


Nzryrngrkxtr Kc Ate Rut x Sam



The New Testament plus Ruth and Psalms is the Natügu
language of the Solomon Islands

**Nzryrngrkxtr Kc Ate Rut x Sam
The New Testament plus Ruth and Psalms is the Natügu language of the Solomon
Islands
Buk Baibel long langguis Natqgu**

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

PDF generated using Haiola and XeLaTeX on 11 Nov 2022 from source files dated 30 Nov 2021
fb2b7f06-e254-5fb7-b59d-ee21d5d7a93f

Contents

Nzryrngrkxtr Kc Ate	1
Rut	2
Sam	8
Matiu	145
Mak	209
Luk	248
Jon	312
Aposol	354
Rom	409
1 Korint	436
2 Korint	464
Galesia	482
Efiszs	493
Filipae	503
Kolosia	509
1 Tesalonika	515
2 Tesalonika	520
1 Timoti	523
2 Timoti	531
Taetus	536
Filimon	540
Hibru	542
Jemes	564
1 Pita	571
2 Pita	579
1 Jon	584
2 Jon	591
3 Jon	593
Jud	595
Nzaelwapxngr	599
Letz Ngr Natqgu	629
Nzalvztr-ngrng	630

**Nzryrngrkxtr Kc Ate
Rut x Sam**
in cooperation with
**The New Testament
Ruth and Psalms**
**in the Natqgu language of Santa Cruz Island
Temotu Province, Solomon Islands**
The Natqgu New Testament with Ruth and Psalms
was produced in cooperation with the
Bible Society of the South Pacific.
Their contribution is greatly appreciated.
Wycliffe Bible Translators © 2008

Buk Ngr Rut

Natq Ngr Nzaplxtnqr Mz Buk Ngr Rut

Trkrlzkuu neke yrle buk lc, a' nzyr mzli kc Devet tqngini-ngrde king kc tqaclvele Israel, mwx mz yiz 1000 BC x Kraes kc mzte tzmc ate. A' da kcng tzyapwxti mz be lc, nzprtzing mzli kc tqngi trgalr king mrkc Israel. Rut nide lxe Obed. Obed nide trte Jesi, x Jesi nide trte King Devet kc tqngi king krali ngr Israel. Opxm kx mz Obed nzmc mz mzlir yiz 1110—1080 BC.

Drtc' ngr Moab yc mz nqlvi r Prla Kxtrlu-ngru Da me prkilzm nepi. Lr Moab nidr leplz kxnzmnc-mrbrng x nzota-zvzng badr lr Israel. A' mz mzli r be lc, nzmnncng mz nrwx murde Moab yclzpebz mz zmatq ngr Israel.

Mzli lcde tao kc dzbi mrkc Israel, murde trpnzngr tewa. Mz nzmu-krde lcde, kzdq kc ncblo ngr Israel, drtqde Elimelek nidr mz olvz rde, drtqde Naomi, x mrlxde nzling, drtqdr Malon x Kilion nzvzng Moab mz nzmnnc-krpwzlr elr. Zbz Malon yrlztile Rut, x Kilion yrlztile Opa, olvz lr Moab. A' mz nibr kzdung mzli, ncblo ngr Naomi x mrlxde kcng nzling sc tzbzpeng Moab.

Mz nibrde Naomi xlrle kx tewa dcpe mrkc Israel, x sc tqaotipe drtwrde kx nayzlu-mop mrnyzde. Rut sc tqyrnipebz bade kx navzng rlildr, murde mrlztile lvxbqde Naomi. Rut lxngitile Yawe mz nzngini-kz-krde Gct rde, x sc tzvzpeng.

Mz drtwr Naomi, nzmnccpe-krdr kc Israel narblx, murde trpengl ncblo ngrdrng, x trnzrlr-ngrpzu mz olvz nzrnginyz-krdr drtc' o da kx na-atatrngrmle. Mwx kzdung lr Israel narpilr na-atrkatilr Rut mz nzngini-krde lr mrkzble kc tqangiole drka' mzli kc. X mz drtwrde kz, narblxz mz Rut nzrmcti-mou-krde ncblo kx nayrlztile nide.

A' kzdq kc ncblo drtqde Boas sc tqyrlzipele Rut, mz nzvz-nqblq-krde nqmq kr lr Jiu mzli lc. Ncblo lc kzdq kxngini Naomi kx takitrde nzxpepx-krbzle drtc' nydz x nzaopx-krbzle nqvi lr ncblo ngrdr mz Rut. * Zbz Rut rmika nedr doa ncblo, drtqde Obed. Obed nide kc nalolvzle drtc' nydz Malon murde nqvi lrde bzkq mztr. *

Be ngr Boas nzokatr-krde Rut ngi kz nzycmne-ebzpxngr mz nzwzkr Kraes, mz nzngini-krde kx-xpepx kxnginideng.

- 1) Kx-xpepx kxnginide navzpxm mz nqvi kcpwz tzvzpx-ngrmqng leplz kcng tqxpepxle. Dekc Mrlx Gct, Mevalu Kxnzmcp, nangini-kzde leplz, da kc tqwaiku. *
- 2) Kx-xpepx kxnginide nakrlzle nzxpe-krde da kx takitrde nzxpepx-krdeleng. Kxnzmcp xpepxle nigu mz nzbz-krde esz'-krde, murde ma tqbz-aloku. *
- 3) Kx-xpepx kxnginide narlrpx-lzbqbz mz nzxpepxngr lc. Mz nzrlrpx-lzbqkr Kxnzmcp, ka-lzbq-nrbalq mz nzxpepx-krde nigu, murde ma tzayrplapx alo nigu mz alwx ngrgung. *
- 4) Kx-xpepx kxnginide trtakitrdeu nide nzngini-krde kxnzawz-nrbalq kc tqmnclzbz mz zmatq ngr kzdq kz ncblo. Kxnzmcp lc trmnclzpwzu mz zmatq ngr alwx murde trpnzngr alwx ngrde. Mz nzmu-krde lcde, krlzle nzxpepx-krde nigu mz alwx ngrgung. *

* : Livae 25:25-34, 47-55 * : Nou 38:8-10; Lou Kcpwz 25:5-10; Matiu 22:23-28 * : Lou Kcpwz 25:5, 7-10; Jon 1:14; Rom 1:3; Filipae 2:5-8; Hibru 2:14-15 * : Rut 2:1; 1 Pita 1:18-19 * : Rut 3:11; Matiu 20:28; Jon 10:15, 18; Hibru 10:7 * : 2 Korint 5:21; Hibru 4:15; 7:26; 1 Pita 2:22; 1 Jon 3:5

Lr Israel, mz nzngini-krdr leplz kcng tqmcpxng Gct, mz drtwrdr trtakitrdeu lr mrkzbeng kcng trnzangiolru Gct angidr nzptr-krdr mz nqvi lrdrng, myapxbz mz nqvi lr Mevalu kc tzaenzlilr. A' be lc aelwapx-kzngrmle bagu kx kxmule-esz' Rut trngiu lr Israel, a' prtr kz mz nqvi lr Jiszs Kxnzmcpx. Mz nzmu-krde lcde, opx angidr kx Kxnzmcpx trarlapxpwzleu lr Israel esz'-krdr, a' vz-kzp mz nzarlapx-krde leplz amrlx mz nrlc kcng tzlxngitilr nide.

Kzdung Lr Israel Nzmncng Mz Drc' Ngr Moab

¹⁻² Mzli kc tqngi trgalr king r Israel, kzdq kc ncblo drtqde Elimelek, nide nqvi lr Efrata, x mnc Betleem mz nrlarnrlc kc Judz, nidr mz olvz rde, drtqde Naomi, x mrlxdr nzling, drtqdr Malon x Kilion. Mzli lcde tao kc dzbi mrkc Israel, murde trpnzngr tewa. Mz nzmu-krde lcde, nzvzng mz kandre kc Moab mz nzmnc-krpwzlr elr.

³ Kx nzmncng kc Moab, Elimelek sc tqbzszpele Naomi x mrlxde kcng nzling. ⁴ Zbz mrlxdeng nzyrlzng rlilrdrng Moab. Kilion yrlztile Opa x Malon yrlztile Rut. Nzmncnctilr Moab yiz nzpnu-esz'. ⁵ Zbz mzle-lzbq lcng, Malon x Kilion nzbz-kzng elr. Mzli lc Naomi trpengr ncblo ngrde x trpe-kzngr mrlxde.

Naomi Rlr-ngrbzle Mz Lvxbqde Rut Nzvz-krdr Ncdr Israel

⁶⁻⁷ Mz nibr kzdung mzli, Naomi xlrle kx Yawe okatr-moule lr Israel mz nznka-kr-mopwzle nzkqlukr dakxnzng. Kx xlr Naomi nrpa lc, sc tzoliqpeng badr lvxbqde kcng nzling, nzvz-krdr badr Israel. X sc tzrkalzpemqng.

⁸ A' mzli lcde, Naomi tekqtr-moule drtwrde, x sc tqrpipebzle mz Opa x Rut kx, "Yzlutx-mouamu mz ma nyzmu badr lxemung. X krka'-ngrne kx Yawe namrlztile nimu da kc tqwaisr-ngrnamu ncblo ngrmung x ninge.

⁹ X naokatrle nimu mz nzmnc-zpwx-krmu badr ncblo kx nangi mou ncblo ngrmung." Zbz sc tqtcngitipeng Naomi x sc tzyrni-katopeng badr. ¹⁰ X nzrpibzlr bade kx, "Trtingr, navzbzku mz lr mrnyzmqng."

¹¹ A' rpibz Naomi kx, "Bzkq vz-nqblqmamu ninge, kx inyxngeng. ?Murde nike naokatr-ngrne nimu? ?Ninge la narmika-moux doa ncblo kx nangi ncblo ngrmung? ¹² Yzlutxpeamu mrnyzmung. Murde nipenge blang mz nzryrlzti-moungr kzdq ncblo. X kxmule-esz' yrlzti-moux dq ncblo kcma mz nrlckxbq x rnginegr doa ncblo, ¹³ a' rblxbz bamu nzaenzli-krmu nidr, vz vz mzli kx nznginidr ncblo x sc tqyrlzti-ateamu nidr. Da amrlx rblxm bange myaszlle nzrblx-krbz da bamu. Murde Yawe atrkatile ninge mz zmatq ngrde. Bzkq vz-nqblqmamu ninge, murde da amrlx ma tqtblx-kzpz bamu." ¹⁴ Mz nzycmne-krbzle lc, sc tzyrnipe-moung. Zbz Opa tcngitxde lvxbqde x sc tqarlrpele. A' Rut lolvz-amqngile Naomi, x tr-rłaszleu nide.

¹⁵ Rpibz Naomi bade kx, "Obqbz, ilem yzlupebz mz kxnginideng x mz gct ngrdrng. Yzluamu rlirmu."

¹⁶ A' rpibz Rut kx, "Bzkq rtulrtr-ngrme nzaki-lzbq-krgi o nzrlasz-krnge nim. Murde drlve ke navzkiq, navzki. X drlve ke namnc-ngrn, namncki. X lr mrnyzm, nangi kz lr mrnyznge. X Gct rm, nangi kz Gct rnge. ¹⁷ Drlve ke nabz-ngrn, nabz-kzx elr x nayrtzmq-kzngelr. Nzmu kx tqrlaszx nim, Yawe na-ayrplapx-zlwzle ninge. Nzbnzgr txpwz kx na-aki-lzbq-ngrgi." ¹⁸ Naomi kx krlztr-zpwxpebzle kc mz Rut nzsuti-zlwzkr drtwrde nzvz-krdr ncdr, sc tqmetxpebz x trycmnepepwzu bade.

Naomi X Rut Nzkrzbzlr Mztea Betelem

¹⁹ Olvz lcng nzling nzvzng nzvzng mzli kx nzkrlz-ngrbzlr mztea Betleem. Kx nzkaputrpzlr kc Betleem, lr mztea kc sc tzabrtzlvzpelr nidr x tzyrlwr-lvzpelr nidr. Olvz lr mrkc sc tzrpipelr kx, “Doa lcng, Naomi yzlupem!” ²⁰ A' rpibz Naomi badr kx, “Bzkq rpimamu ninge Naomi, murde drtwr ngr Naomi ‘mrlzvxi.’ A' kqle-ngrmamu ninge Mara, drtwr ngrde ‘rblx.’ Murde Gct kc Tqaclvele da amrlx batrple nzrblxkr da amrlx bange. ²¹ Murde mz nzvz-krgr kc kqlukr, a' mz nzvzmi-mou-krpqng Yawe lc ninge, vz-nrbalqpec. Delc bzkq rpi-ngrmamu ninge Naomi kxmrlzvxi. Murde Yawe kc Tqaclvele da amrlx aetqpelem drtqnge, mz nqrpi-krde kx vz-rbrx.”

²² Krlc be angidr ngr Naomi mz nzyzlu-krmle Moab nidr mz lvxbqde Rut, kc tqngi olvz lr Moab. Nzkaputrpqng Betleem mz zbo kc kai tzrkqngr nra nabr kc tqngi bali mz nzbrpe-krde. Nra bali nzkqti-txpwzle zbo tq o pwx.

2

Rut Rmikatine Drpwr Nra Bali Kxyrlwrtxo

¹ Mzli lcde, kzdq kc ncblo drtqde Boas mnc Betleem. Nide bcnyr x Naomi krlzle nide murde ngi kxngini ncblo ngrde. ² Mz zbo kzble mz nourla, Rut rpibzle mz Naomi kx, “Rlr-ngrm bange nzvz-krnge mz lclr bali. Mwx kzdq ncblo kxmrlz sa na-abrtzlvzle nzrmikatine-krnge drpwr nra bali kxyrlwrtxo mrnyzde.” Rpibz Naomi bade kx, “Vz inyxnge, sa tqmrlz ye.” *

³ Zbo Rut kc tqvzpe tqrmikatipe drpwr nra bali kx nzrlaszti leplz kxnzawzng. Mz lclr bali lc, kzdung leplz nzrpakilzmqng bali, x kzdu-kzng leplz nzvz-nqblqlr nidr mz nztalvz-krdrleng. X mz nibr nzrtwz-krdr rtalvz kcng, nzkrlz leplz nzrmikatingr nra bali kxyrlwrtxo. Mz zbo lcdepwz, sc tqkrlzti pele kx lclr bali kc nyz Boas.

Rut Rmctile Boas Mz Lclr Bali Nyzde

⁴ Mz nourla lcdepwz, Boas rkalm Betleem x kaputrpz mz lclr bali nyzde. X sc tqrpibezle mz kxnzawz nedeng amrlx kx, “Nimu la.” X nzayzlu-ngrbzlr natqde kx, “Nim la.” X rpi-mopwzle kx, “Rlxtnbo mz Yawe kx naokatrle nimu.” X nqrpi-kzpplr kx, “X nim kz!” ⁵ Boas kc tqveapebz mz ncblo kc tqaclvele kxnzawzng, rpibzle kx, “?Doa olvz lcmor ne neke?” ⁶ Rpibz ncblo kc kx, “Krla doa olvz lr Moab, kx nzvzmqng mz Naomi, mz nzyzlu-krmle kc Moab. ⁷ Rpimle bange kx, ‘?Nzmu rlr-ngrme bange nzrmikatine-krbo nra bali mz nibrdr kxnzawzng?’ X sa tqbrngzti-zpwxle nzrmikatingr nra bali abzo-pnzle kcma mz nourla, x sa tqvzbe. A' amapx-ngrmle matelq mzli kx mrbcne.”

⁸ Zbo sc tqrpibz Boas mz Rut kx, “Lalztqm bange, kx inyxnge. Rpix naokatrpo nim. Bzkq rmikatiq nra bali mz nrlc nyz ncblo kzble x bzkq rrlaszq mrka. A' mncamu badr olvi kxnzawz nengeng. ⁹ Mcpwz mrkc tzrpakingr ncblo lcng bali, x nim kc tqrmikanebzme mz nibr olvi kcng tzrtalvzng. Pipebo badr ncblo lcng kx bzkq nzesotrpzng bam. X drtwrm kx tqbrlxkzle, vz, x rmnqtr mz belue kcng tzangqbatipe ncblo kcng.” ¹⁰ Zbo, Rut yrngzobz bade mz drtc' mz nzamrluengr. X sc tqrpibezle kx, “?Memule tqmrlzti-zlwz-ngrn ninge x tqamrlue-ngrn ninge? Murde ninge olvz lr narnrlc.”

¹¹ Ayzlu-ngrbz Boas natqde kx, “Da amrlx kcng tqalebzme mz lxem Naomi, mz nibr nzbrzkr mrlxd kx tqngi ncblo ngrm, nzyapwx tipem bange bq mz nibr nzkaputrpzlr krmamu. X kxmu nzrlasz-krme trtem x lxem

* ^{2:2} Mz lou sc Mosis, kxrnginyz lclr da, narlr-ngrbzlr mz doa kx trnzrngiscung nzrmikatine-krdr nra da kx yrlwrtxo mz lclr da nyzdr. [Livae 19:9-10; 23:22]

x mrnyzm, x vzme mz nzmncc-krmu badr leplz kx nqmq krdr blepx. ¹² Rlxtibo mz Yawe, Gct rgr, kx na-ayzlubzle bamu nike aletiqng, mz nzamrlz-zlwz-krde nim. Nide ka tqmnclzpebzme bade mz nzvz-krme lc, x nide me rlakitrq, mz nzapu-krm nei kio kx mnclzbz mz nabx lxede.” ¹³ Rpibz Rut kx, “Trtenge, yc zlwz mz drtwrm ninge. X awxopeme nabzng e mz nzycmne-nivzlrpe-krme lc bange, kxmule-esz' trmatqnewxu myaszlzle olvi nem kcng tzwztrpzng bam.”

¹⁴ Mzli kc namupengr bea, rpibz Boas mz Rut kx, “Vzm namupeku. X leo kz bret nam mz waen lc pipz.” Mzli kc Rut tqwxbutr-ngrbzle mz olvi kcng, Boas kabzle bade kcng bali kx nztqngq, mz nzapusr-krde nide kxmncrpz bade. Rut mu x nelzde krlc. X nade kcng ycpwz.

¹⁵ Mzli kc Rut tqvz-ngrde mz nzrmika-mou-krde nra bali, rpibz Boas badr ncblo nedeng kx, “Nzmu kx tqrmika-abeanetrpzle me yrlwr ngr rtalvz ngr bali, bzkq amyabzmu drtqde, murde rlr-ngrbo bade. ¹⁶ A' vecpxbzmu du bali mz rtalvz ngrde kx namikatile x bzkq lclvzbzmu.”

Naomi X Rut Nzycmnetr-ngrdr Boas Nzngini-krde Kx Takitrde Nzokatr-krde Nidr

¹⁷ Rut rmika bali mz lclr bali lc vz-krlzbzle milzpq. Zbz sc tqtalqtipte drpwz bali kcng tqmikatile. Nulvzole mz bxli x yrbulzm. X bxli lc takitr kilo kx nzpnu-esz'-nrade-tq. ¹⁸ Zbz sc tqglqpele bali kc mz mztea, x Naomi mcle bxli r bali kc etu tqglqmle. X ka-kzpz Rut dakxnzng kcng tqmutr-ngrde mzli kc bea. ¹⁹ Naomi rveabz kx, “?Mzbq ka drlve kc tqrmika-ngrn bali? Krka'-ngrne kx Gct na-amrlzle ncblo kc tqokatrle nim.” Zbz sc tqppipebz Rut mz lxede kx, “Drtq ncblo kc tqngi nyzde lclr bali kc tqwz-ngrne kcma, Boas.”

²⁰ Rpibz Naomi bade kx, “Eu, rlxtibo mz Yawe kx na-amrlzle nide. Murde tresakiu nzbatr-krbzle nzrmrlznr-krde leplz kxnzlubeng x kxnzbzpeng. Ncblo la tqngi Boas, ngi kzdq kxnginigu kx takitrde nzxpepx-krde drtc' nyzgu x nzaopx-krde nqvi lr ncblo ngrgu.” ²¹ Zbz rpi-mopwz Rut kx, “Boas rpi-kzple bange kx, ‘Mncamu badr kxnxawz nengeng nakrlz-zpwxbzle nzyrkrpxkr nzrkqng bali x wit.’”

²² Naomi rpibzle kx, “Inyxnge, mrlvxixt nzvzne-krmu badr olvi nedeng, murde ma tzatrakam mz nrlc nyz ncblo kzble, mz nzngini-krm lr narnrlc kx esz'trpz badr.” ²³ Mz zbz kang kqlu, Rut sc tqmnctr-zvzbz badr olvi kxnxawz ne Boas, mz nzrmikati-krde, vz vz mzli kx yrkrpxngr nzrkqng bali x wit. X nzmnccpwzng mz lvxbqde Naomi.

3

Naomi Yrlqle Drtwr Kx Rut Nayrlztile Boas

¹ Mzli lcde, rpibz Naomi mz lvxbqde kx, “Inyxnge, mzli ka namcpo dq ncblo kx nayrlztiq. Kx na-amnkle nim brma x na-aclvele nim. ² Rmikatiq bali vz-nqblqq olvi kcng tzwztrpzng mz Boas. X krlzq nzngini-krde kxnginigu. Koma mz nrlckxbq sa na-akipxle be bali mrkc tzrtaklrpxngr nra bali. ³ Kipotx x aeluti-lzbq tolo kx ngi pzpium. X pxingr lrpzm kxmrlz, x vz mrkc tzrtaklrpxngr nra bali. A' bzkq krlztile nzmncc-krm mrlcde, mzli kc tryrkrpxkangr nzmu-krde x nzrmnq-krde waen. ⁴ Aokztipwz mrkc navzkile mz nzmwii-krde. X mzli kc tqmwipe-ngrde, vz-kzpz x kalvxlbz lrpz kc tqkq-ngrde, x ayrbq-lxlr-ngrbz nanycde x sc tqmnztrpebzme mz nanycde. X mzli kc nabaongr nanycde, sa nadwalzm x napibzle da kx na-aleq.” ⁵ Rpibz Rut kx, “Sa na-alex nikeng pitime.”

Rut Vz-nqblqle Me Pnz Drtwr Naomi

⁶ Zbz Rut kc tqvzope mrkc tzrtaklpxngr nra bali, tqalepele da amrlx kcng tqpibz lxede. ⁷ Mz nibr nzmukr Boas x nzrmnq-krde, drtqde otpxp. Sc tqvzkiopebzle mz nrlarde kc tzaylwrngr nra bali, tqmnzope mz nzmwipengr. Mzli trboiu Rut kc tqprngeipebz mrkc tqmwingr Boas. Kalvxlbzle lrpz mrkc tqobqkio nancde x sc tqmnzlzbzle elr.

⁸ Mzli kcpe mz aurnrlc Boas dwalzm sc tqyzplrp, x tqmcpele kzdq olvz nzmnzlz-krbzle mrkc tqobqkio nancde. ⁹ Boas kc tqveapebz kx, “?Nim neke?” Rpibzle kx, “Ninge kxnxawz nem Rut. Kawxpx lrpz la x akqbubz ninge, nangi rkx kx suti drtwrm nzylzti-krm ninge. Murde nim kx kxnginigr kx takitrde nzxpepxngr drtc' nyzgr x nzaopx-krbzle nqvi lr ncblo rnge.”

Boas Pibzle Mz Rut Kx Sa Nayrlztile

¹⁰ Rpibz Boas kx, “Krka'-ngrne kx Yawe na-amrlzle nim, kx inyxnge. Murde nzaodu-krm lc mz nzsutikr drtwrm nzaopxngr nqvi lr Malon mz nzylzngr lc, myaszlzle nzaodu-krm kc kai, mz nzvz-krmamu mz lvxbqm. X tr-rtangrwq nrpr kztem, nzmu kxrngisc o kxtr-rngiscu, a' mcpxpeq ninge.

¹¹ Mzli ka, kx inyxnge, bzkq drtwrm li. Sa na-alebo da kcng amrlx tqrlxtiq. Leplz amrlx mz mztea ka nzkrlzlr kx nim olvz angidr kxmrlzvxi. ¹² Da zpwxtx, ninge kxnginim kx takitrde nzale-krnge da lc. A' kzdq kc ncblo kx ngi kxnginigu kx esotr-zlwzbz bam myaszpxle ninge. X nide kx na-alele da lc, nzmu kx tqaolvzlele. ¹³ A' mwi txpwz mrka mz nrlckxbq ka. X sa naycmne-krlzpwzkr bade mz nourla. Nzmu kx tqrpile nayrlztile nim, mrlz. A' nzmu kx tqpx-ngrdele, esalz-ngrbo bam mz drtq Yawe kx tqlu, kx nayrlztipex nim. Mnzpwz mrlc nakrlzbzle mzli kc tqprt-z-ngrm paglxnrlc.”

¹⁴ Rut mwilzbz mz nancde krlzbzle mzli lcde, mzli lc trnzrglxkangr leplz. X Boas rpile mz nide esz'-krde kx, “Bzkq kx rkrlzti nzmnckr olvz lc mrka.”

¹⁵ X rpi-kzpble bade kx. “Aolz nzkq scm kc tqrmntr-ngrbz x prlxo mrlc.” Prlxtole x yrngiobz Boas elr bali nzkqlu-krde esolzbz mz kilo kx nzpnu-tq (30). Petxbz Boas x sc tqglqlzbzle mz nabx Rut, x sc tqvzpe mz mztea.

¹⁶ Mzli kc Rut tqkrlz-ngrbzle brma, Naomi sc tqveapebz kx, “?Myx kxmu mz nzvz-krm kc, kx inyxnge?” Zbz sc tqpipebzle da kcng amrlx tqalebz Boas bade. ¹⁷ X rpi-kzpble kx, “Boas ka-kzple bali lc tqtwzmc, x rpimle bange kx, ‘Bzkq vz-nrbalqbzme mz lxem, a' twzbz bali lc bade.’” ¹⁸ Zbz sc tqrpipebz Naomi kx, “Inyxnge, aenzlipwz. Bzkq nabzm talvzo. Murde Boas nzmu trmnc-nrwx-ngru mzbq ka kx tqmnc-nrwxpe-ngrde da tubqpe.”

4

Boas Yrlztile Rut

¹ Mz nourla lcde, Boas vz mz naobz ngr taon lc x sc tqwxbupe elr, murde krlc me nzatubqtingr lrtzlvz ngrdr da. X kxnginide kc tqesotr-zlwzbz, krkc tqpibzle mz Rut, sc tqmcpele nzvz-krde. X sc tqkqlepypel ngrpi-krbzle kx, “Vz-kaip mrka, kx mzlenge, x wxbu kai mrlc.” Ncblo kc vzbz, sc tqwxbupe. ² Zbz Boas kapxmle lrtzlvz nzpnu-esz' kx nzmnccng mrlcde. X rpibzle badr kx, “Nawxbuku ena x okatrpa'mu nigr.” ³ Zbz Boas sc tqrpipebzle mz mzlede lc kx, “Naomi kc tqyzlupem Moab, sc tqamwale drtc' nyz mzlegu Elimelek. ⁴ Vzdzm mz drtwnge nzpi-krbole bam. Kx tqutsi drtwrm nzxpengr drtc' lc, e xpe mzli ka tzmncngr lrtzlvz ngrgu lcng, badr mrlx lcng. Kx tqutsi drtwrm naxpepxqle murde nayzlu-mop mz nqvi lrgu, ale. A' nzmu kx trtingrde, pim bange, murde trpnzng r kx takitrde

nzxpepxngr drtc' lc, a' nim txpwz, x krali ninge." X ayzlubzle natqde kx, "Sa naxpepxbo."

⁵ Rpi-mopwz Boas kx, "Mzli kc naxpepx-ngrbzme drtc' lc mz Naomi, yrlzti kz Rut kc Moab, olvz r mzlegu kc tqbz. Murde mrlxmu ncdr Rut kalr nalolvzle drtc' nyz Malon kc tqbz x nqvi lrde bzkq mztr." *

⁶ Rpibz mzlede lc kx, "Mz nzmu-karde lcde, trpengr nzxpepx-krnge drtc' lc, murde ma tqamnctpxle ninge x trpnzngr da kx na-aprcbo mz mrlxngeng. A' xpepxpe, murde trtakitrpepleu ninge."

⁷⁻⁸ X sc tqkapxpele sadol scde tqkapebzle mz Boas. Murde mzli kc tqprtzngr da lc, nqmq kr lr Israel mz nzxpepxngr x nzaprcngr dztu, kxmule sele. Kzdq ncblo nzmu kapxle sadol scde x kabzle mz mrlx kztede, aelwapx-ngrde kx drtwrdr rlrlrdr esz'ti mz nike nzaolvzlr.

⁹ Boas sc tqycmnepebz mz lrtzlvz x leplz kcng mrkc, mz nrzpi-krbzle kx, "Mzbq ka mcpeamu x xlrpeamu kx sa naxpepxbo mz Naomi drtc' nyz Elimelek kc tqbzszbzle mz mrlxdeng Kilion x Malon, kcng tzbzpe-kzng. ¹⁰ X nayrlzti-kzx Rut kc Moab tqbzsz Malon, nangi olvz rnge. Murde mrlxgr kc kai ncdr Rut kalr nalolvzle drtc' nyz Malon x nqvi lrde bzkq mztr, a' drtqde nadcpwpwz mz mztea nyzgu. Mzbq ka sc tqmc-lxblrpeamu." *

¹¹ Zbz lrtzlvz x leplz amrlx kcng tzmncng mz naobz nrzpibzlr kx, "Eu, sc tqmc-lxblrpekr. X krka'-ngrgr kx Yawe nangi-batrpzle mz olvz kc nayrlztiq nzrngine-karde doa kxkqlu mz nzapu-karde Resel x Lea kcng tzakqlunepxlr lr Israel. X nanginim bcnyr x namatq-esz'-ngrn Betleem. ¹² X krka'-kz-ngrgr kx doa kx nakabz Yawe bam, navzpxmqng mz olvz lc, nakqlu-zlwzng na-apule doa neng melmqgu Peres, mrlx Judz badr Tama, lr mrkzble."

Boas X Rut Nzrningineng Doa Ncblo

¹³ Zbz Boas sc tqyrlztipole Rut. Nzmwi-lxblrng x okatr Yawe nidr mz nzyrkr Rut. X rmika nede doa ncblo. ¹⁴ Nzrpibz olvz kcng tzmncng mrkc mz blrkq mrlx Rut kx, "Naomi, takitrde nzrglqlzngr Yawe, murde rkabz nem doa ncblo mzbq ka. Krka'-ngrgr kx doa lc nakrlzti lr Israel nide. ¹⁵ X rlxtibzkr mz Yawe kx doa ncblo lc na-aelalzmlle drtwrm x naokatrle nim mzli ka nzngini-krm blang. Murde lvxbqm, kc tqmrlzti-zlwzle nim mikale nide. X kxmule-esz' narnginem doa ncblo kxnnzkqlung, a' nzokatr-krdr nim trmyaszpxleu nzokatrkr Rut lc nim."

¹⁶ Naomi brlcle doa kc. Zbz sc tqokatrpele Rut nzabutingr. ¹⁷ Olvz lr Betleem nzrpilr kx, "Naomi nepede kc doa ncblo." X nzyrlqbzlr drtqde Obed. Obed lc nide kc tqngi trte Jesi kc tqngi trte King Devet.

Nqvi Lr Boas

¹⁸ Krlc nqvi lr ncblo kx vzpxm mz Peres. Peres mrlxde Hesron. ¹⁹ Hesron mrlxde Ram, Ram mrlxde Aminadab. ²⁰ Aminadab mrlxde Nason, Nason mrlxde Salmon. ²¹ Salmon mrlxde Boas, Boas mrlxde Obed. ²² Obed mrlxde Jesi x Jesi mrlxde Devet. †

* ^{4:5} Kxmule-esz' naxpepxle drtc' lc, a' trpnzngr nzvztr-kardele o nzaprc-krbzlele mz mrlxdeng mz olvz rde kc kai. * ^{4:10} Lou Kcpwz 25:5-10; Nou 38:8-10; Matiu 22:23-28 † ^{4:22} Mz nzvz-nqblq-krdr nqmq kr lr Israel, doa ncblo kx vzpxm mz nzyrlzngr kxmule lc, trtede li. Nide mrlx ncblo kc tqbzsz lxede, x ni-kzde mrlx ncblo kc tqyrlzti-atele. Murde mz Rut 4:11-12 rpile kx doa ncblo lc nanginide mrlx Boas. A' mz 4:18-22, prtr mz nqvi lr Malon nide mz Elimelek. Mc kz Nou dckrlzde kc 38, 46:12 x Matiu 1:2 kc tzycmnetr-ngrdr doa ncblo ne Tama kcng tzlipxmqng nzngini-krdr mrlx Judz.

Buk Ngr Sam

Natq Ngr Nzaplxtqngr Mz Buk Ngr Sam

Sam lcng tqnginidr nabz kxtr ngrdr lr Jiu x nzkrka'-krdr kx nzngr-zvzngrdr. X mrlz nzvz-nqblq-krgung mz nzangio-krgu Gct x nzkrka'-krbzku bade. Sam nzkrizlr nzokatr-krdr nigu x nzamqtr-krdr drtwrgu. Takitrde kxnzetu rgung nzyapwxtipx-krmlr bagu drtwr ngr Sam lcng.

Leplz nzkqlung kx nzryrung Sam lcng x nzyrtlr yiz siu-esz' (1,000). A' Devet kx ryrbz kxkqlu mz Sam kcng trtqki-esz'-nzpnu-nzlvqn (150). Nzakiolr Sam lcng mz duz rdr nzlvqn nzrpibzlr 'buk.' Kxszalvztrng mz Nzryrngrkxtr nzrpilr kx namrlzu r Sam nzpnu-esz'-nrade-esz'. A' kzdung Sam nzrlxlvzng, x rblx nzrpingr namrlzu r Sam kznike.

Namrlzu R Sam Lcng Nidr Seleng

- 1) Nabz ngr nzyrni-krbz ncblo o leplz kxkqlu mz Gct murde narlxtibzlr bade nzokatr-krde nidr mz nzkxpu-krdrng. Mc Sam 13 x 44.
- 2) Nabz ngr nzrglqpxngr Gct. Mc Sam 8 x 115.
- 3) Nabz ngr nzawi-ngrbz mz Gct. Mc Sam 34 x 67.
- 4) Nabz ngr nzbrtikr drtwr ncblo o leplz kxkqlu kx Gct sa na-arlapxle nidr mz nzayzlu-krbzle nzkrka'-krdr. Mc Sam 11 x 125.
- 5) Nabz ngr Jerusalem mrkc tqtungr Mangr-nzangiongr Yawe mz Newz Saeon, murde Gct mnc mrlcde. Mc Sam 46 x 87.
- 6) Nabz ngr nznginikr Gct King r lr Jiu. Mc Sam 29 x 93.
- 7) Nabz ngr nzabrtzlvzkr lr Jiu king rdr kc tqyrlqbz Yawe badr mz nzaovxio-krde enqmi rdrng. Mc Sam 2 x 72.
- 8) Nabz kx nzngrnelz-ngrdr Jerusalem mz nzangiongr. Mc Sam 84 x 122.
- 9) Nabz ngr nzyrplapxngr kx na-alvztr-ngrdr leplz mz nqmq kxtubq x nqmq kx vz-rbr. Mc Sam 1 x 73.
- 10) Nabz kx rpile doa kx takitrde nzprtr-krde mz Mangr-nzangiongr Yawe, x doa kx takitrde nzayrplapxkr Yawe nide. Mc Sam 15 x 24.
- 11) Nabz kx pipxle be ngr lr Israel badr Yawe. Mc Sam 68 x 105.

Mzli kc tzrwzngr lr Jiu nabz nedrng, ngalrdr li lxbllr. X ngalrdr lcng nzngikzte-lzbqng, murde ngalrde krali yokaetipxle drtwr ngr krkc kai. Rblx nzpipx-krgu kxmu ngalrdr krali amrlx. A' kzdung nzpipxlr drtwr kcpwz mz natq kx blepxngr. Mc Sam 146:2.

Naglqlzx Gct rnge mzli ka tqlube-ngrne,
X na-angrlvzx nide.

Kzdung nzpipxlr drtwr kcpwz mz nzycmne-ebzpxngr. Mc Sam 18:2. Kzdung natq kx apule 'lrvpalvc' nzkriz-txpwlzlr lrtzlvz ngrgung. A' natq lcng nztakitrdr nzpipx-krdr drtwr kcpwz tzpipxlr lr Jiu. X krlzamu nzrmcti-krmu drtwr ngrde mz ngalrde krali o veatibzmu mz kzdq lrtzlvz o rlwxamu natq lc mz Nzalvztr-ngrng Kxmyapxbz kc tqyc mz nibr buk lc. Kzdq kz natq kxmule lc tqngi 'temz ngr lomr kc tqyрputrngr nipna.'

Nim lrvpalvc nyznge peto,
X Mevalu rnge kx arlapxle ninge.

Kzdung nzpipx-krdrle nzayzlulr. Mc Sam 75:10.

Rpile kx, "Sa naodatix zmatq ngr kxdrka'-negrng,
A' zmatq ngr kxntubqng sa na-aetunepxbo."

Sam rtqmz nzvz-nqblqlr letz ngr alfabet scdr lr Jiu. X Sam lcdeng nidr seleng: 9—10, 25, 34, 37, 111, 112, 119, x 145. X nztekqtr-ngrleng mz Natqgu vz-nqblqle letz ngr alfabet scgu. Delc nzxlr-krguleng blepx kxipiz

mz nzxlrngr mz nzycmne-krgu. Mz drtq Sam lcng, kzdq natq kxtopwz rpile kx, 'Kzdq nabz ngr A, B, C.'

Mzli kang kqlu nzycmnebzung mz Gct mz nzhpi-krbzlr kx, 'Yawe.' Murde krlc drtqde kc tqipibzle badr. X drtq lc yr-kzkr mz Natqgu.

Kzdung mzli kxmu nzrwzngr lr Jiu Sam nedr tutr angidr mz nzngrngr mz nabz negung. Delc tztekqtrngr kzdung Sam x kzdung nctr mz nzvz-nqblq-krde nabz negung. Sam lcng nidr seleng: 13:6; 41:13; 47:6; 72:18-19; 75:1; 89:52; 106:48; 107:8-9, 21-22, 31-32; 116:1-9; 118:1-4, 10-12, 15-16, 28-29; 134 amrlx; 136 amrlx; 141:1; 148 amrlx. Sam 23 yc mz Buk Ngr Nzangiongr mz #87, mz nzvz-nqblq-krde nabz negu.

Buk Kc Kai

1

Sam 1—41

Nzmnc-zpxnegr

¹ Nzmnc-zpxnegr trvzpxpuu mz nzvz-nqblqngr nqmq kr kxdrka'-ngrng, X nztu-ngrbz mz lrpzki nyx kxnzaleng alwx.

X trvzpxpuu mz nzprtr-ngrbz mz kxnzxtrnga-ngrdr Yawe.

² A' nzabrtzngr angidr lc vzpxm mz drtwr kx elalzm mz nzvz-nqblqng Loukxtr sc Yawe,

X mz nzaoti-zvzkr drtwr natqde ngrlx x nrlckxbq.

³ Leplz lcng nzapulr nounc kcng dzbrdr tzkrizobzlr lue,
X leu rdr trnzbloung.

X nzdo-zlwzng mz nzvz-krm nrpr angidr.

Da kx nzalelr nradr yc-zvzbz.

⁴ A' kxdrka'-ngrng trnzwailru.

Nzapulr leu kxgllr kcng tztakirpwzlr nzngcngr.

⁵ Delc trnatu-amqngi-ngrdru mzli kc na-ayzlu-ngrbz Gct da mz leplz.
X trnaprtrpwzung mz kxnztubqng.

⁶ Murde lrpzki rdr tutr me nzayrplapxngr.
A' Yawe aclevezle nzi r leplz kxnztubqng.

Sam Krali (2)

Kxnmcpnx Ne Gct

Kxngqngung

¹ Lr mrkzbleng nzngqngung mz nzngyatikr drtwrdr Yawe.

Murde mane nzyrlqtingr drtwr mz nzatrkatingr nide.

² King rdrng x kxnzrmailz rdrng nzyrlwr-lxblrng

Mz nzoliqi-krdr nzota-krdr badr Yawe x Kxnmcpnx nede. [✡]

³ Nzrpilr kx, "Na-axtxbzku nzmncrz-krbzku mz zmatq ngrdr,

Mz nznikitx-krgu nqvi kc tzpe-ngrdr nigu, murde drtqgu naopx."

⁴ A' King Yawe kc tqmncom Heven yrpalelvzle nidr,
X xtrnga-ngrde drtwr kcng tzyrlqlr.

⁵ Ycmne-zngyabz badr,
X nzmwxlr-ngrdr natqde kxpq.

Natq Yawe

⁶ Murde rpile kx, "Yrlqpe King kc tqmcpxpex Jerusalem
Mrkc Saeon, newz kxtr nyznge."

⁷ X King kc tqmcpnx Gct, rpile kx, "Napibo nike pim Yawe bange.

[✡] **Sam Krali (2):2** Aposol 4:25-26

- Rpimle kx, 'Nim Mrlxnge, abzo mzbq ka, sa na-aelwapx-ngrbo mz leplz nzngini-krnge Trtem. [✳]
- ⁸ Rlxtim bange x sa nakabo bam zmatq ngr nzaclvengr neidung amrlx, Murde leplz mz nrlc tulvzo nangi nemqng.
- ⁹ Sa na-aovxioq mrnyzdr mz nxzplr-zlwz-krm, Kc na-apule bz kc tqrniglc botol.' " [✳]
Natq kx pibz Yawe mz Mevalu nede delcng.

Kxnzyrplapxng

- ¹⁰ Delc nimu king x kxnzrmailzng mz nrlc nayrplapxamu, X nalalztq-angidramu, mzli ka tqycbe-ngrbz mzli.
- ¹¹ Narnrctrpzmu mz nzamrlue-krmu Yawe, X mz nzwztr-krbzmu bade.
- ¹² Yrngzobzmu mz Mrlxde, Murde ma tqodatile nimu, Mz zngya ngr drtwrde kc tqwou.
A' nimu amrlx kcng tzrlatrpzng bade, sa namnc-zpxwamu.

Sam Kratq (3)

Nou Nzarlapxngr X Nzaovxiongr

Nabz ne Devet,
kc tqytle mzli kc tqdwasz-ngrde mrlxde Absalom.

- ¹ Yawe, enqmi rngeng nzkqlu-zlwzng, X nztutitr zvz nardr ninge.
- ² Nzrpilr mz nzyapwxti-krdr ninge kx, "Gct trtxpnzng nkokatr-krde nide."
- ³ A' Yawe, nim kx mnc-ngale-zvzle ninge.
 Nim nou nzaovxio-krnge x nim kx apqtrp drtwrnge.
- ⁴ Delc tqrlxti-ngrbo nkokatr-krm ninge, X ayzluome natqng mz newz kxtr nyzm.
- ⁵ Murde namwi-angidrx mz nrlckxbq x melz-mopwc' mz nourla, Mz nzaclve-angidrq ninge.
- ⁶ Kxmule-esz' nztu-ngalelvzlr ninge siu ngr enqmi, A' trtxpnzng nzmwxlr-krnge.
- ⁷ Murde krka'-ngrne kx, "Yawe, Gct rnge, vzm arlapx ninge, X katpxbxz zmatq ngrdrng."
- ⁸ Yawe, nim nou nzarlapxngr, X da kxmrlting amrlx kabzme mz leplz nemqng.

Sam Krapwx (4)

Abrrtrpzmu Drtwwmu Mz Gct

Nabz ne Devet.

Gct Rnge

- ¹ Gct, ayzlam nzkrka'-krnge, Murde dwaki-zvzme bange.
X mzli kc tqkxpu-ngrne, okatrq ninge.
 Delc naycngr mz drtwwrm ninge x naxlr-ngrme natqng.

[✳] **Sam Krali (2):7** Aposol 13:33; Hibru 1:5 [✳] **Sam Krali (2):9** Nzaelwapxngr 2:26-27

Kxnmnc-mrbrng

- ² ?Nimu leplz, myx mzli kx naesakingr nzatrkti-krmu nzmyalz-krnge?
 X myx mzli kx naesakingr nzmrlzkr bamu da kx ngi brmrda x
 nzpokiangr?
- ³ Murde nakrlzamu kx Yawe mcpxle nigr leplz kxnztubqng kx nangine-deng.
 X mzli kc nakrka'-ngrbo bade, sa na-ayzlumle natqnge.
- ⁴ Bzkq nabztq ngr nelzmu mailzle nimu mz alwx.
 A' na-aoti drtwrmu nqmq krmu mz nzyrbq-lrpi-krmu mz nelvq nyzmu
 mz nrlckxbq. [☆]
- ⁵ Zbz na-abrtrpzmu drtwrmu bade,
 X nakabzmu bade blz, mz nzvz-nqblq-krgu natq kc tqkapxmle bagu.

Gct Rnge

- ⁶ Yawe, leplz nemqng nzkqlung kx nzrpimlr bange kx, "?Myx mzli kx
 namnc-zpxw-ngrgu?"
 Delc tqkrka'-ngrbo kx na-amrlzq nigr.
- ⁷ Murde mzli kc tqamrlz-ngrn ninge, abrtz-zlwzx
 Myaszpxle nzabrtzkr leplz kx dakxnxng nadr x waen mqdr kqlu.
- ⁸ Mzli kc tqyrbq-ngrne, mwi-angidrx mz nrlckxbq,
 Murde nim kx aclse-zpxwle ninge.

Sam Kranzlvqn (5)*Nivz Lrm O-nglelvzle Nigr*

Nabz ne Devet kx yrbzle mz kxrmailz ngr dzbe kxnzngrng.

Nzkrka'ngr

- ¹⁻² Yawe, nim King x Gct rnge. Rlxtibo bam kx naxlrme natqnge,
 X na-aoti kz drtwrm, mz nzatutr-krm nzkrka'-krnge.
- ³ Kxetu, mz nourla kang kqlu natqnge sa navzbz bam.
 X nakrka'-zvzbo bam, mz nzaenzli-krbo natqm kxmrlz.

Kxdrka'-ngrng

- ⁴ Yawe, trnginipqu Gct kx abrtzlvzle da kxtrka.
 X trmc-lxblrwamu mz kxdrka'-ngrng.
- ⁵ Leplz kx nzglqpx-lzbqng trtxpnzng nzmnnctr-krbzlr bam,
 Murde rblxbz mz leplz kx mrlz-zvzbz badr nzale-krdr alwx nztutr-krbzlr mz mzpq.
- ⁶ Odatiq kxnpokiang,
 X obqszo-zvzq kxnzrnibqng x kxnzesabrtng.

Kxnztubqng

- ⁷ A' mz nzaodu-zvz-krm, delc navztr-ngrne Mangr-nzangiongr nim,
 X nayrngzobo mz nzamatqng nimb.
- ⁸ Yawe, mailz ninge mz nqmq krm kxtubq, murde enqmi rnge nzkqlu-zlwzng.
 X aelwa-zpxw-ngrm bange me pnz drtwrm.

Kxdrka'-ngrng

- ⁹ Da angidr trvzpxpuu mz nao enqmi rngeng.
 Murde mz nabzdr la nzodatingr txpwz.
 X mz nzycmne-krdr nzmailzlr leplz

[☆] Sam Krapwx (4):4 Efisz 4:26

Mz nzbatr-krbzlr nzbz-krdr esz'-krdr. [✳]
 10 Gct, plzpx alwx ngrdr x ayrplapx nidr,
 Mz nzprt-mou-krdr mz trtxki scdr.
 Mapulrpxngr nidr mz nzkqlukr alwx ngrdrng,
 Murde nzpxtxpx-zvz-ngrdr nim.

Kxnztubqng

- 11 A' leplz amrlx kcng tzabrzpzlr drtwrdr bam na-abrtzng.
 X nangr-along mz nzelalz-krm drtwrdr.
 Aclve-angidr kxnmrlztilr nim
 Murde nabilvzlr nim.
 12 Yawe, amrlz-zvzq kxnztubqng. X nivz lrm o-ngalelvzle nidr
 Mz nzapu-krde temz ngr lomrdr kc tqyrrputrngr nipna.

Sam Kraesz'mz (6)

Drle Mzke'
 Nabz ne Devet kx yrbzle mz kxrmailz ngr dzbe kxnnzngnrg.

Nzkrka'ngr

- 1 Yawe, kxmule-esz' drtfrm ngya,
 A' bzkq pnanatiq x ayrplapxq ninge.
 2 Kxetu, nayc mz drtfrm ninge murde yangrngapex.
 X axplr mou nrkrdrtnge murde yagox-zlwzx.
 3 ?Rnrcti-lzbqtrpo bam mz zmwxlr,
 X aenzli-alopec nzokatr-krm ninge?

Nzarlapxng

- 4 Yawe, tekqtr drtfrm x arlapx ninge,
 Mz nzaodu-krm kc tqyc tqyc.
 5 Murde mz nzbzngr trpengr nzrglqlzngr nim.
 X mz gq nzangiongr nim kc tqyrrpxpebz.

Nzyrningr

- 6 Drtqng mewepe mz nzkrka'-zvz-krbo bam.
 X mz nrlckxbq kang kqlu, nqni x pilo pnrng
 nzlrpr-ngrdr drle mzke'.
 7 Mzke' vaotxtrpebz x tropxpeu,
 Murde nzyrni-krnge lc nzngi-batrpli enqmi rngeng.

Nzaovxiongr

- 8 Nimu leplz kxdrka'-ngrng amrlx, dwaszpeamu ninge!
 Murde Yawe sa tqalalztqpm mz nzyrni-krnge.
 9 Xlrpemle nike rlxtibo,
 X sa na-ayzlmle natqng.
 10 Krka'-ngrne kx drtq enqmi rngeng namya x narnrcti-lzbq-kzng mz
 zwmwtxlr,
 X naplc-aning mz nzaovxio-krnge nidr.

Sam Krarlimz (7)

Yawe Pipxle Nztubqkr Leplz O Nzvz-rbr-krdr
 Nabz ne Devet, kx ngr-ngrbzle mz Yawe,
 mzli kc Kus, ncblo ngr nqvi lr Benjamin, tqatrkti-ngrde nide.

[✳] **Sam Kranzlvqn (5):9** Rom 3:13

Vz-rbrx O Trtingr

- ¹ Yawe, Gct rnge, arlapxbz ninge mz mq ncblo kcng tzayotilr ninge.
Murde nim me rlakitrx.
- ² Murde ma tzkivztibzlr nrkrdrqng e mz nzapu-krdr laion,
X nzkilznedr ninge me trpnzngr kx naokatrle ninge.
- ³ ?Yawe, Gct rnge, nike ale-rbrx?
?Mqnge alele dq da kxtrtubqu?
- ⁴ ?Myx kxmule, alebo dq da kxtrka mz kztengeng?
?O atrkatix dzbede negrung mz nzarlapx-krnge enqmi rgrng?
- ⁵ Nzmu kx tqmule lcde, sa tqmrlz nzrlr-krbzme ninge mz mq enqmi rngeng,
Mz nzmaneuti-krdr ninge mz nzapu-krdr kuli x nzlolvz-krdr ninge.
X natabrti ninge x narnzbriolr ninge mz drtc',
X na-ayrbqtxdr namz rnge elr.

Aryrplapx Kxnzvz-rbrng

- ⁶ Yawe, tumilzm zngya x aesaki leplz kcng tzngyati drtwrdr ninge.
Okatr ninge murde yrlqpeq mzli r nzpipx-krm nztubqkr leplz amrlx o nzvz-rbr-krdr.
- ⁷ Ayrlwr leplz mz nrlc tulvzo murde natu-ngalelvzlr nim,
Mz nzaclve-krm nidr Heven.
- ⁸ Yawe, nim kx rpibz mz leplz kx nztubqng o nzvz-rbrng.
Pipxbz mz leplz kx mnctr-zpwxebo bam murde nabzng opx x tubq.
- ⁹ Aesaki nqmq krdr kxdrka'-ngrng x tu-zvzbz mz nibr kxnztubqng.
Murde nim kxtubq-esz'ngr x obqplxq nabz x nzvzkr nardr.
- ¹⁰ Gct kxmyatxlz, nim temz ngr lomrnge kc tqyrputrngr nipna.
X arlapxq krkcng nabzdr tqlq.
- ¹¹ Tubqq mz nzryrlq-krm drtwr.
X pipxq kx takitrde nzayrplapxngr kxnzvz-rbrng.

Tekqtr Nqmq Nr Drtwrm

- ¹²⁻¹³ Nzmu kx trnztekqtrlu nqmq krdr kxtrka, sa nayrlamzq toki r vea scm,
X nalalvzq popz' scm mz nzpnz-krm nidr mz nipna kxngc.
- ¹⁴ Kxdrka'-ngrng nzpetilr rtq da kxtrka.
X lvclzm nc nzodatingr. X nrade yrlqbzle ngi nzpokiangr.
- ¹⁵ Trtxki kc tzamwiti-ngrdr leplz,
Sa naprtz-mou-ngrdr.
- ¹⁶ Drtwr ngr nzkxpungr kcng tzesabrti-ngrdr leplz, sa nangq-moulr nidr.
X nzodangr kc tzalelr sa naetq-moungr drtqdr.
- ¹⁷ Nangrx mz nzglqlz-krnge Yawe kc tqmyalz-esz'ngr!
X na-awibo bade murde tubq-esz'ngr!

Sam Krartqmz (8)

Drtwr Kx Yrlq Kxrpalz

Nabz ne Devet kx yrbzle mz kxrmailz ngr dzbe kxnzngnrg.

¹ Yawe, nim Kxetu rgr.**Drtqm myalz-esz'ngr mz nrlc tulvzo.**

X nzmyalz-krm myaszlzle bongavz.

- ² Mz nzvz-nqblq-krde me pnz drtwrm, doa kxnztopwzng nzglqlzlr nim.
X natqdr aivilzole nzrpibqqtikr enqmi rmqng x awx-nabule nidr. [✡]

- ³ Kxrpalz, mzli kc tqobqlz-ngrne mz bongavz,

- Mclzx nzlulikr temz x vri kcng tqwz-ngrnqng.
 4 ?A' memule tqmatq-ngrgr mz drtwrm?
 ?X memule tqmrlzti-ngrn nigr leplz txneng?
 5 Murde wz-ngrn leplz vzo kxipiz mz lr Heven,
 X kabzme badr zmrlue x nzamatqngr.
 6 Yrlqq nidr mz nzaclve-kdrda da kcng tqwz-ngrn,
 X da amrlx nzyclzbzng mz zmatq ngrdr. [✳]
 7 Nzaclvelr animol krbzq,
 X animol kzpeto kz.
 8 X nidr kxnzetung r utc x nc,
 X da amrlx kx nwzrneng prla.
 9 **Yawe, nim Kxetu rgr,**
 Drtqm myalz-esz'ngr mz nrlc tulvzo.

Sam Krarpwxmz X Kranzpnu (9 x 10)

Nztaokr Kxdrka'-ngrng

Nabz ne Devet kx yrbzle mz kxrmailz ngr dzbe kxnzngnrg.

Kzdq Nabz Ngr A, B, C

- 1 Awi Yawe! Naglqpx-atwrnr-ngrne nim.
 Ale-zvzq da kcng tzkctipxng, x napipxxng.
 2 Angrlvzx drtqm.
 Bilvzx nim kc tqmyalz-esz'ngr.
 3 Brngzvxix nzyzlukr enqmi rnge mz nzmc-krde nim.
 Bz x tao-ngrde nzulrm.
 4 Clvetio-lzbqz x rpiq kx tubqz.
 Clveq leplz amrlx mz nzwxbuo-krme mz tron, x ayzlu-ngrbzme da
 badr.
 5 Dalr nrlc nzmailzlr kxdrka'-ngrng.
 Delc napnanati-ngrn nidr x
 Drtqdr na-amrbtx-alobzme.
 6 Doa ngr alwx lcng nzyrktrpeng.
 Enqmi rngeng trpengr nzdcpx-krdr mz drtwr leplz x mztea nyzdr
 amznrpe-ngrnq.
 7 Eu, a' Yawe ngini-alom King.
 Elalvzx nzwxbuo-krme mz tron nyzm murde nzayzlu-krbzme da mz
 leplz tubq.
 8 Eu, murde nzaclve-krm nrlc tubq-esz'ngr,
 Esakrlrngr nzpipx-krm ntubqkr leplz o trtingr.
 9 Gct, nim lrpalvc nyz kxzobqszong.
 Glxx kx nim me nzrlakitrkr mzli kx prtzngr da.
 10 Gct, krkcng tzkrlzlr nim nzabrtrpzlr drtwrdr bam.
 Itoto x doa amrlx kcng tzrtangrtlr nim, trmrbrtru mz drtwrm.
 11 Itoto x nigu amrlx napipxbzku mz kxnmnc-mrbrng da kcng tqale Yawe.
 Jerusalem ngi mzteadau nyzde mrkc tqmnc-ngrde. Na-angrlvzku nide.
 12 Jzsle krkcng tzrnibqting leplz mz nzayzlu-kr-mopwzle badr da kcng
 tqtrka tzalelr.
 Kxzobqszong mz drtq kxetq sa na-ayzlu-kzpze badr natq ngr nzyrni-
 krbzlr bade.

[✳] Sam Krartqmz (8):6 Hibru 2:6-8; 1 Korint 15:27

- ¹³ Kxetu, nayc mz drtwrm ninge x mcom kxmu nzaetq-krm enqmi rngeng drtqnge.
 Kxrpalz, bzkq rlrpx-ngrn nzbz-krnge.
- ¹⁴ Kxarlapx, naelalz-ngrm drtwrnge nzarlapx-krm ninge.
 Leplz kxkqlu Jerusalem sa naxlrlr nzglqlz-krnge nim.
- ¹⁵⁻¹⁶ Lalztqmamu! Yawe aelwapx-lzbqngr mz nztubqkr nzayzlu-krbzle da mz leplz.
 Murde lr mrkzbleng nztao-moung mz gq kx nzekqtilr.
 Mz br kx nzatu-kapqlr, nzdwatr-moung elr.
 Mz trtxki kx nzamwilr, nzprtou mou kxdrka'-ngrng elr.
- ¹⁷ Mz nzesablqti-krdr Gct,
 Nabz-ngrdr leplz ngr nrlc.
- ¹⁸ Nzmu nakxpung, trtxpnzngr nzmrbrtitrkr drtwr Gct nidr.
 Nzobqtipxng kxtrnzrngiscung trtxpnzngr nzbotpxx-karde.
- ¹⁹ Natulzme Yawe, mz nzaryplapx-krm lr mrkzbleng amrlx.
 Na-aelwapx-ngrn kx drtwr kxnzetung amrlx ngi brmrda.
- ²⁰ Namwxlrtiir x na-amrluelr nim.
 Nakrlzlr kx nidr leplz txneng, x sa nabzng.

(10)

- ¹ Opxm kx mncme rlru, Yawe.
 Opxm kz kx mnc-kapqq mzli kc tqkxpu-ngrgr.
- ² Obqm! Kxdrka'ngr glqpx-lzbqmile nzayoti-karde leplz kxnxkxpung.
 Pnz drtwrnge kx sa namwati-lzbq mz br scde.
- ³ Pipxle kx nzaotikr drtwrde da kxtrka zlwz ngi da kxmrlz mz nzbilvz-zvz-krdele.
 Pivxile Yawe x ptxpx-ngrde nide, a' amrlzle leplz kx nztrkibrng.
- ⁴ Rblx nzrtangrti-krde Gct murde glqpx-lzbq.
 Rblx nzrmcti-krde Gct murde mz drtwrde trtxpnzngr Gct.
- ⁵ Rlr! Xplrmci-zlwzle nzmnccn gr kxtrka, a' ptxpx-ngrde me pnz drtwrm.
 Suti txpwz drtwrde nzypalelvz-karde enqmi rdeng.
- ⁶ Sc tqrpipele kx, "Trpnzngr da kxtrka kx naprtzm bange,
 X trpnzngr nzodatingr ninge kalr."
- ⁷ Sc tqqlqlz-zvzle alwx x nzpokiangr.
 Natqdeng amrlx ngi dalr nzrpikitingr, nzrpibqtingr, x nzrpilzng. [◊]
- ⁸ Trmrlzu nzmncc-kapq-aepztr-krde mztea mz nzrnibq-krde kx nabzdr lq.
 Tu zvz mz nzaenzli-krde ncblo kxesz'nebz.
- ⁹ Tqtu-kapq apule laion kc
 Tqtcnzpxm mz gq nyzde mz nzkivzti-krde ncblo kx trxplru.
- ¹⁰ Vz zvz nzxplz-zlwz-krde.
 Vz zvz nzatrkti-krde nzmnckr kxnxkxpung.
- ¹¹ Vz-rbr kxdrka'ngr mz nzrpikitingr, "Gct trobqpepuu bange.
 Wzx a' trkrlzleu da kcng trka tqalex."
- ¹² Wztitxpxbz nzwzkr ncblo kxdrka'ngr, kx Yawe, mz nzayrplapx-krm nide.
 Wai-ngrn da lc murde bzkq mrbrtr mz drtwrm kxnxkxpung.
- ¹³ Wai-ngrdele kxdrka'ngr ptxpx-ngrde nide.
 X rpile kx, "Gct trtxpnzngr nzayrplapx-karde ninge."
- ¹⁴ Xlqkqamu nimu kxdrka'-ngrng, murde Gct mcle da kxtrka lcng amrlx tqaleamu.
 X oliquele nzokatr-krde kxnxkxpung kcng tzrtangrtiir nide.
 Xlrlle nidr murde nide kc tqokatr zvz kxnxzobqszong.

[◊] (10):7 Rom 3:14

- ¹⁵ Yawe, katpxbz zmatq ngr kxdrka'-ngrng.
Yrpalelvz nidr x ayrplapxng mz da kxtrka kcng tzalelr, navz x naesaki
žpxw.
- ¹⁶ Yawe, nim King.
Yc zvz nzacuve-krm nrhc.
Yrlqtxpx mz drtc' nyzm krkcng trnzangiolru nim.
- ¹⁷ Zmatq ngrm etu-esz'ngr, murde krlzpe-kaiq nike narlxtibz kxnztubqng.
Zbq kalvz axplrq nidr x kabzme badr nike nzrlxtilr.
- ¹⁸ Zbo ngr leplz kxnzobqsong x kxnzkxpung, sa na-arlapxbzmeng mz
zmatq ngr leplz mz nrhc ka.
Zmwxlr amrlx sa na-aesaki-zvzq.

Sam Kranzpu-esz'-nrade-esz' (11)

- Yawe Nide Me Rlakitr*
Nabz ne Devet kx yrbzle mz kxrmailz ngr dzbe kxnzngrng.
- ¹ Kztengeng, Yawe nide me rlakitr.
A' myx kxmule tqrpi-ngrnamu kx, "Ngrrlz mz newz mz nzrlapx-krm.
- ² Murde leplz kxdrka'-ngrng nzmnc-kapqti-zvzlr leplz kxnztubqng,
Mz nzpnz-krdr nidr mz nipna.
- ³ Trpengr doa x da kx na-abrkitru drtwrgu,
X nigu kxnabzdr lqngi, trpengr da kx na-aleku."
- ⁴ Bzkq kxmu nzycmne-krmamu lc bange, murde Yawe kc tqmncbe mz
Mangr-nzangiongr nide,
X sc tqwxbube mz tron nydze Heven mz nzobqplx-krde nabz leplz
amrlx.
- ⁵ Yawe sc tqobqtr zvz mz nzmncr kxnztubqng x kxdrka'-ngrng.
X pxttxpx-ngrde nzrmcngr kxnzrnibqng.
- ⁶ X mz nzayrplapx-krde nidr, sa nartctio-ngrbzle badr muli rplz kxngc na-
apule nzdckr tewa.
X sa na-abxutile nidr mz nzulr nenq kxpq.
- ⁷ A' krkcng nabzdr tqlgngi sa namncng badr,
Murde Gct tubq-esz'ngr x mrlz bade da kxtubq.

Sam Kranzpu-esz'-nrade-li (12)

- Da Kxtrka Mz Nrhc Tulvzo*
Nabz ne Devet kx yrbzle mz kxrmailz ngr dzbe kxnzngrng.
- ¹ Yawe, okatrp ninge murde trpengr mrlx kxtubq kx mnc mzli ka.
Murde mz nrhc tulvzo leplz kxnzmrlzng nzayrkrtxtrpeng.
- ² Leplz amrlx mz nrhc nzapokiatu-lzbqng.
Nzalqngitilr nzycmnengr mz drtwr kx xlva.
- ³ Rlxtoobam nzaesaki-krm natq leplz kxnzpokiang,
X odati nidr mz nzglqpx-lzbq-krdr.
- ⁴ Murde nzrpilr kx, "Naogr nalctwz txpwz mz nztwz-krgr da kx suti
drtwrgr.
X trpnzng kx naetum bagr."
- ⁵ A' Yawe rpile kx, "Mcpex nzaetq-ngrbz drtq kxnzkxpung,
X nztangqgxkr kxnzmwati drtwrung.
- Delc na-arlapxx nidr mzli ka.
Da kc tqwai nzsutikr drtwrdr le."
- ⁶ Yawe, abrtrpzkr drtwrgr mz natqm lcng, tqtubq tqqlq.
Murde nzopx-krdr apule silvz kc tzayrlni-ebirngr mz nyr.

⁷⁻⁸ Kxmule-esz' leplz lcng trmya-ngru drtqdr nzglqpx-lzbq-krdr,
 X nzrglqlz-krdr da kxtrka mz nrlc tulvzo,
 A' lxngitikr kx sa na-aclve-zpwxq nigr,
 X sa na-arlapx-zvzbzme nigr mz mq leplz lcng tzdrka'ngr.

Sam Kranzpnu-esz'-nrade-tq (13)

- ?Yawe, Na-aenzli-alopex Nim?
- Nabz ne Devet kx yrbzle mz kxrmailz ngr dzbe kxnzngrng.
- 1 ?Yawe, myx kxmule, namrbritr-alope drtwrm ninge?
 ?Namnc-rlru-alopeme bange?
 - 2 ?Nelzngé navzdz-alopem?
 - ?X drtwrnge navz-alope?
 ?X namnclz-alopebo mz zmatq ngr enqmi rngeng?
 - 3 Yawe, obqm bange x ayzlam natqnge.
 Ka-mop bange nzxplr-krnge murde ma tqbzxx.
 - 4 Bzkq rlr-ngrbzme mz enqmi rngeng nzpi-krdr kx nzaovxiopelr ninge.
 X bzkq rlr-ngrbzme nzabrtzlvz-krdr nzrnrci-lzbq-krnge.
 - 5 Murde abrtrpo drtwrnge mz nzaodu-krm kc tqyc tqyc.
 X sa na-abrtz-zlwz-ngrne nzarlapx-krm ninge.
 - 6 Yawe, sa nangrbo bam murde amrlz-zlwzpeq ninge.
 Mz da amrlx kx kame bange, Yawe, sa nangrbo bam.

Sam Kranzpnu-esz'-nrade-pwx (14)

- Nzngqngukr Kxtrnzrlxngitiung*
- Nabz ne Devet kx yrbzle mz kxrmailz ngr dzbe kxnzngrng.
- 1 Leplz kxnzngqngung mz drtwrdr nzrpilr kx, “Trpnzngr Gct.”
 Leplz lcng nzvz-rbrng x nzale-txpwzng da kxtrka zlwz.
 Trpnzngr leplz lcng kxtubq.
 - 2 Yawe mncom Heven, x sc tqmcomle leplz amrlx,
 Mz nzmc-krde neke yrplapx mz nzrtangrti-krde nide.
 - 3 A' nzesablqtilr Gct amrlx ngrdr
 x drtwrdr esz'ti mz nzale-krdr da kxtrka.
 Trpnzngr nidr kxesz' kxtubq. [◊]
 - 4 Delc tqrpingr Yawe kx, “Leplz lcng tztrkang nznibqtitxdr leplz nengeng
 Nzapulr kx nzrnibqng da kx nangqdr.
 X mrbrtr mz drtwrdr nzkrka'-krmlr bange.
 ?Myx kxmule, trnzkrklzru da kxtubq?”
 - 5 A' narngidrtio-lzbqng x namwxrlvzti-lzbqng,
 Murde Gct tedr badr kxnztubqng.
 - 6 Vz zvz nzrpwa'-krbzlr me pnz drtwr kxnzrlxngiting.
 A' Yawe mnc-ngalelvzle leplz nedeng.
 - 7 Sutitx zlwz drtwrnge kx Gct rgu kc Saeon na-arlapxle leplz nedeng.
 Murde mzli kc nayzlu-mou-ngrmle, namnc-zpwxku badr.
 X nigu lr Jekop drtwrgu sa naelalzm.
 X nigu lr Israel sa na-abrtz-ngrgu da lc. [◊]

[◊] Sam Kranzpnu-esz'-nrade-pwx (14):3 Rom 3:10-12 [◊] Sam Kranzpnu-esz'-nrade-pwx (14):7
 Sam 53:1-6

Sam Kranzpnu-esz'-nrade-nzlvqn (15)

Doa Kx Tubq Mz Nzobqkr Gct

Nabz ne Devet.

- 1 ?Yawe, neke navztrpz Mangr-nzangiongr nim?
?X neke takitrde nzangio-krde mz newz kxtr nyzm?
- 2 Doa kxmule lc nabzde nalqngi.
Nqmq krde natubq. X natqde nangi da angidr.
- 3 A' bzkq rpibqti leplz. Bzkq atrkatile kztede.
X bzkq pikitile kxnzesotrpzng bade.
- 4 Napxtpx-ngrde kxdrka'-ngrng.
A' na-amatqle kxnzamrluelr Yawe Gct.
Na-atutr-zvzle nzesalz-krdeng,
Kxmule-esz' rblxbz bade.
- 5 Narlxtile kxnzrbilqngr kx takitrde trau scde kc tqrlrpx-ngrde.
Bzkq pokiatitrle mrlx kxtubq,
Kxmule-esz' leplz nzrpilr naxpelr nide.
Doa kx vz-nqblqle natq lcng sa natu-amqngi zvz.

Sam Kranzpnu-esz'-nrade-esz'mz (16)

Drtwr Ngr Nzmnc-zpxwng

Nabz ne Devet.

Nzkrka'-krnge

- 1 Yawe, arlapx ninge,
Murde nim kx abrkitrx drtwrnge.
- 2 Nim Kxetu rnge
X nou da kxmrlzting amrlx kcng tqngiscngeng.
- 3 Leplz nemqng kcng tztrng mrka mz nrlc,
Nzmyalz-zlwzng x mrlz bange nzmnc-krgr badr.
- 4 Nzxpukr krkcng tzangiols kxtrngiu Gct angidr sa nartxlvzlz zvz.
A' trna-angiowxu gct rdr kxnzmnceng mzlllxlr,
X trnakrka'pou badr.
X trtxpnzngr nzpulio-krnge mepyr ngr blz mz olta nydr.
- 5 Yawe, apume bange drtc' kxmrlz nyng x tzme bange lrpzki kx nao-zlix.
X nzlu-krnge yctrpz bam.
- 6 X mrlzm bange me ngi bz ngr da kx katimeng x da kx trkatipwe'u bange.
Murde mrlzm bange da amrlx kcng tqkatimeng mz nzngini-krme
bange trtenga.

Nzglqlz-krnge Yawe

- 7 Yawe, naglqlz-zvzx nim mz nzmailz-krm ninge.
Murde mz nrlckxbq aopxme nabznge mz nzaongr drtwr kxmrlz.
- 8 Dcpx zvz mz drtwrnge kx mnc-zvzme bange.
X trpnzngr doa x da kx na-aycngrlrle ninge, murde tu-zvzme mz
nibrnge.
- 9 Delc nabznge tqabrtz-zlwz-ngrde x drtwrnge tqelalz-ngrmle.
X tqmnc-zpxwng-ngrne.
- 10 Murde tr-rlrpx-ngrwq zmatq ngr nzbzngr nzaovxio-krde ninge, ncblu
kxtr nem.
X trayrbqtxwq nrkrdrqng mz gq mz nzmibi-krde.
- 11 A' aelwa-zvz-ngrm bange drtwr ngr nzmnc-zpxwng:
Nzabrtz-zlwzng kxmyalz vzpxm mz nzxngi-ngrbz nim.

X da kxmrlzting nzvzpx-zvzmqng mz mqm. [◊]

Sam Kranzpu-esz'-nrade-rlimz (17)

Sa Namcx Mzpq

Nabz ne Devet.

Trvz-rbrwxu

- 1 Yawe, lalztqm mz nzrlxti-krbo nztubqng.
Xlrm natqnge murde nzkrka'-krbo bam trvzpxpuu mz naonge, a' vzdz-zpwxm mz nabznge.
- 2 Mzli kc napipx-ngrn neke vz-rbr, mnc mz nrlarde nyznge,
Mурde nim kx rkrlz nike tubq.
- 3 X krlz-zvzq nzao-krnge drtwrnge
X obqplxq nabznge mz nrlckxbq.
A' trpnzngr da kx vz-rbr kx rmctiq.
X pnzpe drtwrnge kx naonge trna-akawi-ngrwxu alwx.
- 4 Tralewxtu da kx nzrtulrtrnegr, da kc tzwai kzdung leplz.
Mурde vz-nqblq-zvzx natqm.
- 5 Trtaowxtu mz nzatalzngr,
Mурde o-zli-zvzx lrpzki rm.

Nzkrka'ngr

- 6 Gct, krka'bo bam murde lalztq-zvzme bange.
Kxetu, xlrm natqnge.
- 7 Delc na-aelwa-ngrme bange nzaodu-krm kc tqyc tqyc.
Mурde mzli kc tzrlatr-ngrbz leplz bam, arlapxbzme nidr mz mq enqmi rdrng.
- 8 Aclve angidr ninge na-apule dztum kx matq zlwz mz drtwrm.
X amnc-kapqbz ninge da kc tqwai kio mz nwxbulvzo-krde neideng.
- 9 Murde ma kxdrka'-ngrng tzlolvzlr x tznibqlr ninge,
Mz nztu-ngalelvz-krdr ninge.
- 10 Trpnzngr nzrycngr mz drtwr kx ycbz badr.
A' nzglqpx-lzbq-zvzng.
- 11 Trpengr nrlarde kx navzkix, murde nzmnc-nglelvzpelr ninge.
X tzryrlqng drtwr kx nametxbo badr.
- 12 Nzapulr laion kcng tzaenzli-kapqlr
Mzli kx nadwa-ngrmlr mz nzpesaliti-krdr ninge.

Nzayrplapxngr

- 13-14 Yawe, otaamu badr enqmi rngeng x aovxiong.
Kapxm ninge mz mq kxdrka'ngr lcng mz zmatq ngrm.
Arlapx ninge x ayrkrtxtr nidr.
Mурde nzabrtz-krdr yc txpwz mz nrlc ka.
Ayrplapx leplz ngr nrlc mz zvetq kc tqoliqtipeq nakabzme badr,
Navz navz nakrlzbzle doa nedrng x doa ne doa nedrng.
- 15 A' krlzx kx sa namcx mzpq mz nzvz-nqblq-krde nztubq-krnge.
X mzli kc natulz-ngr-mopwc', sa na-abrtz-ngrne nzmnc-krbo bam.

[◊] Sam Kranzpu-esz'-nrade-esz'mz (16):11 Aposol 2:25-28, 31; 13:35

Sam Kranzpu-esz'-nrade-rtqmz (18)

Yawe Nide Temz Ngr Lomr Kc Tqyrputrngr Nipna
 Nabz ne Devet, ncblo ne Yawe, kx yrbzle mz kxrmailz ngr dzbe kxnzngrng,
 mzli kc Yawe tqarlapx-ngrbzle nide mz zmatq ngr enqmi rdeng x King Sol.

Nqmq Kr Yawe

- 1 Yawe, mrlztix nim
 Mурde axplrq ninge.
- 2 Nim Gct rnge, x butqbr kx rlakitrax.
 Nim lrpalvc nyznge peto,
 X Mevalu rnge kx arlapxle ninge.
 Nim nou zmatq rnge apule temz ngr lomrnge kc tqyrputrngr nipna.
- 3 Kqle-zvzx nim kc tqatkitrde nzrglqlzngr,
 X vzme arlapxq ninge mz mq enqmi rngeng.

Nzkrka'-krnge
 4-6 Yawe, mzli ka tqkxpu-ngrne kqlex nim mz nzokatr-krm ninge.
 Mурde ycpe pipz nzbz-krnge.
 Opxm kx zmatq ngr nzbzng sa na-aovxiole ninge,
 Mz nzpe-amqngi-krde ninge.
 A' krlzx kx sa naxlrme ninge mz Mangr-nzangiongr nim,
 Mz nzayzlu-krme natqng.

Zmatq Ngr Yawe

- 7 Mzli kc Yawe nakaputr-ngrmle, zmatq ngrde myalz apule nengq.
 Nrлc ycngrrlr-atwrnrngr x wai-kzle nou newzng.
 Mурde Gct ngyati zlwz drtwrde enqmi rngeng.
- 8 X natqde apu-kzle trmami kc tqyrvpupx.
 X ncte vzpx-ngrm zsikapu. X naode rlxpx-ngrm nyr x rplz kxpq.
- 9 Lvxpgle bongavz,
 X vzom tuom mz dcbz kx botapz'.
- 10 X kzdq enjrl lvcmio-animle nide.
 Mz nzrtwz-krdr nenq.
- 11 Nzlo ngr zbo ngr tewa
 Apule lrpz kx mnc-kapqpx-ngrmle.
- 12 X aelwapx-ngrde zmatq ngrde mz zyzlr kxluli.
 Mz nabz zbo lc bzlrpc tqptcipx x muli-aes tqrlxtiom vzmi rplz kxngc.
- 13 Yawe myatxlz-esz'ngr, ngi-batrpzle nzyrpupxkr bzlrmei.
 X natqde nxzlr mz nrлc tulvzo.
- 14 Rpna-ngrbzle nipna x aodalitile enqmi rngeng.
 Vz-nqblqbz bzlrpc x nzvo-alo-ngrdr.
- 15 Mzli kc Yawe tqpnanati-ngrde enqmi rngeng,
 Natqde apzlzmle me boo-ngrng,
 X atu-lxlr-ngrde nou nrлc.

Nzarlapxkr Yawe Ning
 16 Yawe rtrngztiomle ninge mz nzokatr-krde ninge
 Apule kx veclzmle ninge me boongr prla.
 17 Kxmule-esz' yangrngatrpo mz nxplkr enqmi rngeng,
 A' sc tqvz zvz nzarlapx-krde ninge.
 18 Nzvzmqng mz nzota-krgr badr mzli kc tqprtilz-ngrde ninge nzkxpu-ngrng.
 A' Yawe sc tqutum mz nibrnge.

19 Mailzle ninge me nzmnc-zpxw-ngrne,
X arlapxle ninge, murde abrtzlvle ninge.

Nzvz-nqblq-krnge Yawe

- 20** Yawe rka-zvzm bange da kxmrlzting mz nzvz-nqblq-krde nztubq-krnge.
X ayzlu-ngrmle da bange murde nabznge lqngi.
- 21** Vz-nqblq-zvzx nqmq kr Gct rnge,
X tresablqtiwxu nide.
- 22** Yrlq-angidrx Lou kxtr scdeng,
X aoti zvz drtwrnge natqdeng.
- 23** Trvz-rbrwxu mz nzmnc-krnge,
A' yrlqpx-lzbqnge mz nzalengr alwx.
- 24** Yawe ayzlu-ngrmle da bange mz nztubq-krnge,
Murde nabznge lqngi mz nzobq-krde.

Yawe Badr Leplz

- 25** Yawe, yrlq-zvzbz natqm mz krkcng tzyrlqbzlr natqdr bam.
X amrlzq krkcng nqmq krdr tqmrlz.
- 26** Tubqzbzme mz krkcng nabzdr tqtubq.
A' lolvzq mz br scm krkcng tzesabrng.
- 27** Avzdzq krkcng tzavzo-lzbqng.
X avzoq krkcng tzglqlz-lzbqng.
- 28** Yawe, nim nou nzlu-krnge, mz nzapu-krm kxrtekatr lam pnrnge.
X ayrkrpxq da kxtrka amrlx mz nzmnc-krnge, mz nzapu-krm zyzlr x
nyr kxpq.
- 29** Gct, rka-zvzme bange zmatq ngr nzota-krgr badr enqmi rngeng.
X axplr-zvzq ninge mz nzdwa-nagletr-krbo nabxbz ngr lrpalvc nyzdr.

Nzmyapxkr Yawe

- 30** Nqmq kr Yawe tubq-esz'ngr, x natqde ngi da angidr zvz.
X nginibzle lrpalvc nyzdr krkcng tzrlatrzng bade.
- 31** Yawe nide txpwz Gct angidr,
X butqbr nyzgu.

Kxokatr

- 32** Nide Gct kc tqaxplr-zvzle ninge,
X tzbzle lrpzki rnge kxtubq kx nao-zlix.
- 33** Axplr-zvzbzle nanycnge
Mz nzvzne-krnge mz nartrkla ngr newz.
- 34** Alvztrple bange nzrpnangr,
Murde nakrlzx nzrvecngr nalr popz'.
- 35** Yawe, apume bange temz ngr lomrnge kc tqyrputrngr nipna.
X zmatq ngrm ngi popz' ngr nibrnge. Vzome murde namyalzx.
- 36** Okatr-zvzq ninge, x rblx enqmi rngeng nzolvz-krdr ninge.
X trnzta-pulro-ngrdru ninge mz drtc'.

Kxaovxio

- 37** Maneux enqmi rngeng,
Vz vz x lolvz-zpxwxxng mz nzodati-krnge nidr.
- 38** Tzx nidr, vz vz x ntzaong amrlx mz drtc'.
X trpnzngk x tulzm.
- 39** Axplrq ninge mz nzotangr.
Delc tqaovxio-ngrne enqmi rngeng.
- 40** Nim kx rngi-batrp nzdwaszkr enqmi rngeng ninge,

Murde naodatix krkcng tzpxtxpx-ngrdr ninge.

⁴¹ Nzbztiidr nzyrningr kx naokatrng. Nzqlelr Yawe.

A' trpnzngr kx arlapxle nidr.

⁴² Wibrtix nidr, vz vz nzapulr bq kc tqtwz nenq.

X rnzbzrtix nidr, vz vz nzapulr dxlrb i ngr lrpzki.

King Kxmcpk Yawe

⁴³ Arlapxbzme ninge mz mq leplz kx nzmwati drtwrdr ninge.

X yrlqq ninge mz nzaclve-krnge drtc' nydrng,

Murde lr mrkzbleng namnclzmqng mz zmatq rnge.

⁴⁴ Nzryngzomqng bange

X nzvz-nqlqlqr natqnge.

⁴⁵ Nzrnrcitir-lzbqmqng bange.

Nzprpxmqng mz lrpalvc nydr. X nzmetxmqng bange.

⁴⁶ Yawe, nim Gct kx lu. Glqpxx nim murde nim butqbr nyznge.

Glqlz-zvz-ngrne nim murde arlapx-zvzq ninge.

⁴⁷ Ayrplapx-zvzq enqmi rngeng.

X okatrq ninge nzaovxio-krnge lr mrkzbleng,

⁴⁸ Mz nzarlapx-krm ninge mz mqdr.

Yawe, ngi-batrpe' nzaovxio-krnge enqmi rngeng.

X tu-zvzme mz nibrnge mzli kc ncblo nzrpilr naota-ngrgr badr.

⁴⁹ Gct, sa naglqlzx nim mz mzlr lr drtqbrng amrlx,

Mz nzangrlvz-krnge nim. [☆]

⁵⁰ Yawe, ninge Devet, king nem, x okatr-zvzq ninge mz nzaovxio-krngeng.

Aodu-zvzq ninge kc tqmcpk x leplz ngr nqvi lrnge, tqyc, tqyc.

Sam Kranzpnu-esz'-nrade-rpwxmz (19)

Zyzlr Ngr Bongavz X Zyzlr Ngr Natq Gct

Zyzlr Ngr Nepi, Temz, X Vri

¹ Nzmyalzkr Gct nzmc mz bongavz,

X dalr bongavz amrlx.

² Mz nrlckxngrlx, nepi aelwa-ngrde zmatq rde,

Da kc tzwai temz x vri mz nrlckxbq.

³ Kxmule-esz' bongavz trpnzngr naode x nepi trycmneu,

X trpnzngr natq kxnztwz temz x vri,

⁴ A' nrpa scdr vzpx, krlzbzle leplz amrlx mz nrlc tulvzo. [☆]

Gct yrlqbzle nrlckxbq nangi ma nyd nepi kx mwipx-ngrml.

⁵ Mz nourla, nzvzpx-ani-krm nepi ma nyd apule nzabrtzkr ncblo kx yrlz ate.

X apu-kzle ncblo menrpa kc tqoliq mz nzesangr.

⁶ Nepi lc prtzm mz nzngrrlr-krde mz bongavz.

Ngrlr, krlzbzle nrlarde kc tqtakiole.

X zyzlr ngrde yzlro-ngrm mz da amrlx.

Da kc tqwai Natq Yawe mz nzyzlro-krmle mz leplz amrlx.

Natq Yawe Apule Zyzlr Kx Pnamilxtile Nabz Leplz

⁷ Natq Yawe amrnale nzlukr nabz leplz mz nzmrzvxi-krde.

Akrlztrle kxnzngqngung murde trycngrlru.

⁸ Natq Gct aelalzmle drtwr kxnzrvz-nqblqng mz nztubq-krde.

Aelwapx-ngrde da kx yc-kapq mz nzobqplx-krde nabz.

[☆] **Sam Kranzpnu-esz'-nrade-rtqmz (18):49** Rom 15:9 [☆] **Sam Kranzpnu-esz'-nrade-rpwxmz (19):4** Rom 10:18

- ⁹ Nzamrluengr Yawe tqyc tqyc murde lq-esz'ngr.
Natq Yawe rsakrlrngr murde da angidr zvz.
- ¹⁰ Delc nzsutikr drtwrnge natqde namyaszpxle trau kxkqlu,
Murde vzpx-ngrm nzabrtzngr kx myaszpxle dakxnzng kcng
tqbrngzvxi.
- ¹¹ Mz nzvz-nqblq-krnge natqde, aelwapx-ngrmle bange da kxmrlzting.
X mz nzlalztq-krnge mz natqde, atubqtimle nzmnc-krnge.
- ¹² Kxetu Yawe, ipq ninge mz alwx kznikeng yc-kapqtrp bange,
Murde rblxm bange nzmc-krngeleng.
- ¹³ X lolvz-amqngi ninge,
Murde ma tqvz zvz nzale-krnge alwx
Kcng tqotr ngr drtwrnge nzale-krngeleng.
Murde nabzng e natr x natubqbo mz nzobq-krm.
- ¹⁴ Yawe, nim butqbr kx rlakitr.
- Krka'-ngrne kx natqngeng x nzaotikr drtwrnge navz-nqblq-zvzlr me
pnz drtwrm.

Sam Kranzpnu-li (20)

Nzkrka'ng Mz Nzaovxiokr King
Nabz ne Devet kx yrbzle mz kxrmailz ngr dzbe kxnzngngrng.

- Nzkrka'kr Pris Ne Gct Badr Leplz*
- ¹ Yawe, nim Gct r melrmqgr Jekop.
X krka'-ngrgr kx na-ayzlume natq king rgr.
X mzli kc nakxpu-ngrde okatrz nide.
- ² Mz nzmnc-krm Newz Saeon mz Mangr-nzangiongr,
Acve x axplr nide.
- ³ Abtzlvz da kx rlr-ngrbzle bam.
X suti drtwrgr nzelalz-krm drtwrm mz blz kx angcle mz olta nyzm.
- ⁴ Kabz bade da kcng tqsuti drtwrde,
X angidatibz nepu nr drtwrdeng amrlx.
- ⁵ X sa namalqlvzkr nzaovxio-krde.
X naglqlzkr nim, Gct rgr.
Yawe, ayzlm natqdeng amrlx. Eu, angida.

- Nzkrka'kr King Devet*
- ⁶ Yawe, ninge king kc tqmcpxq.
X mzli ka krlzpx kx okatrq ninge mz nzaovxiongr.
X sa na-ayzluome natqnge mrla tqmnc-ngrn Heven kxtr,
X nakame bange zmatq ngr nzngini-krnge Ngrlrvea.
- ⁷⁻⁸ Kzdung leplz nzabrtzplz drtwrdr mz ami nedrng,
X kzdung mz dalr nzotangr.
Da lcdeng trnaokatrlru nidr x nztaong mz vea.
A' Yawe Gct rgr, tu-amqngi-zvzkr, murde abrtxtrpwzkr drtwrgr bam.

- Leplz Amrlx*
- ⁹ Yawe, kabz zmatq ngr nzaovxiongr mz king nem.
X mz nzkqle-krbzkr nim, ayzlm natqgr.

Sam Kranzpnu-li-nrade-esz' (21)

Nzglqlz-ngrbz Nzaovxiokr Yawe
Nabz ne Devet.

King Devet Glqlzle Gct

- 1 Yawe, ninge king nem x abrtz-zlwzx murde nzrka-krme bange zmatq.
Bilvzx nzaovxio-krbzme enqmi rngeng.
- 2 Da amrlx kcng tqsuti drtwrnge, tqrlxtibo.
X sc tqkatimeng x alebzmeng amrlx.
- 3 Vzpeme bange mz nzrka-krme da kxmrlzting.
X alaome mz narge kraon kx ngi gol.
- 4 Rlxtibo nzlungr bam,
X kapeme bange nzlungr lc tqboi.
- 5 Leplz kxkqlu nxzlr lr nrpa ngr drtqnge, murde okatr-zvzq ninge.
X nzamatqlr ninge, murde armyalzq ninge mz nzngini-krnge King.
- 6 Da kxmrlz kcng tqkatimeng bange, sa nayc-alomqng bange.
X abrtz-zvz-ngrne nzmnc-krme bange.
- 7 Yawe kc tqrnir, ninge king nem x abrtrpo drtwrnge bam,
Murde namnc-zpwxx mz nzaodu-krm kc tqyc tqyc.

Leplz Nzglqlzlr Gct

- 8 Yawe, aovxio-zvzq enqmi rmqng,
X lolvztiq krkcng amrlx tzpxtxpx-ngrdr nim.
- 9 X mz nzolvzti-krm lc nidr, odatiq nidr, apule nyr kc tqangcle nrlc.
Yawe, milxtxo-zvzq nidr x ayrkrtxtrq nidr mz nyr.
- 10 Trpnzngr kx rlapx mz nqvi lrdr,
Murde nibqtiqng amrlx.
- 11 Mz nzyrlq-krdr drtwr ngr nzota-krmu badr mz vea,
Trna-angidalru drtwr lc tzyrlqlr.
- 12 Murde nzdwaszlr nim
Mz nzpnz-krm nidr mz nipna scmqng.

Leplz Amrlx

- 13 Yawe, glqlz-ngrgr nim nxzplr-esz'ngr-krm.
X angrlvzkr nim mz zmatq ngrm.

Sam Kranzpu-li-nrade-li (22)*Nzrlxtingr X Nzrlxngitingr*

Nabz ne Devet kx yrbzle mz kxrmailz ngr dzbe kxnzngngrng.

Nzrlxtingr

- 1 Gct! Gct o! ?Memule tqvzsze-ngrn ninge? [☆]
?X memule tqpxtxpx-ngrn nzokatr-krm ninge x trlalztqpepqu mz nzkrka'-krnge?
- 2 Yrniti-zvzbo bam ngrlx x nrlckxbq,
A' trmnz-zpwxxu murde trayzlumeu natqng.

Nzrlxngitingr

- 3 Nim King rgr kxtr-esz'ngr kc tqaclvele nigr lr Israel.
X angio-zvzkr nim.
- 4 Melrmqgrng nzabrtrpzlr drtwrdr bam.
Nzlxngitilr nim x arlapxq nidr.
- 5 Nzmnc-xglelr nim x tu-zvzbzme mz nibrdr.
Nzrlxtibzlr nzokatr-krm nidr x angidatibzme natqdr.

Nzrlxtingr

[☆] **Sam Kranzpu-li-nrade-li (22):1** Matiu 27:46; Mak 15:34

6 A' nzapusrngr ninge brmrda.

Nzngangr-ngrdr ninge mz nzobqszo-krdr ninge.

7 Nzycnqlrlmlr nardr bange x nzmabqtimlr benaodr bange. [◊]
X nxztrnga-ngrdr ninge. [◊]

8 Nzrpimlr kx, "Abrtrpzme drtwrm mz Yawe, a' namckr ena nzarlapxkr Gct
nim mzli ka.
Mурde trokatrleu nim, kxmule-esz' rpiq kx mrlzti-zlwzle nim."

Nzrlxngitingr

9-10 Yawe, yzuo mz zbo kc tzmcngr mzke', krlzmle mzli ka,
Abrtr-zvzbo drtwrnge bam mz nzngini-krm Gct rnge.

Mурde aclve-angidrq ninge mz nzrmcngr mzke',
X mz nzyq-krnge neyr lxenge.

11 Bzkq rlaszq ninge, murde trpnz-moungr kx naokatrle ninge,
Mz nzesotrpe-krm enqmi rngeng bange.

Nzrlxtingr

12 Yawe, enqmi lcng tztu-ngalelvzlr ninge.
X nzrpilr nanibqlr ninge mz nzapu-krdr poi kz peto.

13 Naodr mznem mz nzvz-krmlr bange,
Mz nzmakx-krdr ninge mz nqngidr kxmalc.

14 Nzxplr-krnge yrkrpxpe apule lue kc tzpulio mz drtc' kx mingr.
Mrkcngr tzaxvctrngr nrvr rngeng nzbxplctipeng, x nqmq nr nabzng
baonepe.

15 Mzli trnaboipeu nzbatr-krme nzbz-krnge.
Mурde mewe-zvzpx x drtwrnge brlxkz apule nabr kxngibr mz nepi.
[◊]

16 Kxdrka'-ngrng nztu-ngalelvzlr ninge, nzapulr kuli kx namaneutilr ninge,
X sc tzmaplxtitrpebzlr mqngeng x nanycngeng. [◊]

17 Mcx kx ninge nrvr-nrbalqtxpe.
X nzobqsneopelr x nzyrpalelvzpelr ninge.

18 Nzakiti-lzbq-ngrdr nctq lrpz scnge,
X nzkq scnge kc boi nzayrleo-ngrdr daes, mz nzkrlz-krdr doa kx
narngisc. [◊]

19 Yawe, bzkq mncme rllu.
A' vz-anim mz nzokatr-krm ninge.

20 X arlapxbz nzlu-krnge mz mq ncblo kxayo lcng,
Tzmaneutilr ninge mz nzapu-krdr kuli kz peto.

21 X mnc-ngalelvz ninge, murde ma tzlupltilr ninge mz toki r vea scdr
Tzapulr nqngi poi kz peto.

Nzrlxngitingr

22 Mz nzyrlwr-lxblkr leplz nemqng,
Sa nabilvzx nim, mz nzrpilr-krbo mz mzlengeng da kx aleme bange. [◊]

23 Murde sa napipxbo badr kx, "Nigu kxnxawz neng Yawe, naglqlzku nide!
Eu. Nigu lr Israel na-amrinueku nide mz nzamatq-zvz-krgu nide!"

24 Kxmule-esz' nigu kxnxobqsong, a' Gct trobqsoleu nzkxpu-krgung,
Mурde trpxtxpx-ngrdeu nzayzlu-krmle natqgung."

[◊] **Sam Kranzpu-li-nrade-li (22):7** Matiu 27:39; Mak 15:29 [◊] **Sam Kranzpu-li-nrade-li (22):7**
Luk 23:35 [◊] **Sam Kranzpu-li-nrade-li (22):15** Jon 19:28 [◊] **Sam Kranzpu-li-nrade-li (22):16**
Matiu 27:35; Jon 20:25 [◊] **Sam Kranzpu-li-nrade-li (22):18** Matiu 27:35; Mak 15:24; Luk 23:34;
Jon 19:24 [◊] **Sam Kranzpu-li-nrade-li (22):22** Hibrus 2:12

- ²⁵ Delc Yawe, narka-ngrbo blz ngr nzawingr kc tqpibo, mz nzyrlwr-lxblrkr leplz nemqng.
 Murde nim nou nzrglqlz-krnge.
- ²⁶ X mz nibrde, sa nakrlcng mz dakxnzng
 kx vzpxm mz blz kc tqkabo bam.
 X sa naglqlzlr nim mz nzbrtikr drtwrdr nim.
 Amrlz-zvzbz nidr mz nzmnc-zpwx-krdr.
- ²⁷ Yawe, lr mrkzbleng amrlx sa na-aoti drtwrdr nim mz nzplzpx-krbzlr alwx ngrdr bam.
 X neidu lcng amrlx sa na-angiolr nim,
- ²⁸ Mz nzngini-krm King kx matq-esz'ngr
 Kc tqaclve-zvzle nidr.
- ²⁹ Delc kxnzetung badr leplz nedrng sa nayrngzobzng bam,
 Mz nzavzo-lzbq-krbzlr bam.
- ³⁰ X doa negrng kz sa nawztrpzng bam,
 Mzli kc naxlitr-ngrmlr bagr nrpa ngrm,
- ³¹ Mz nzhpi-krbzkr badr kx,
 "Yawe arlapx-zvzle leplz nedeng."

Sam Kranzpnu-li-nrade-tq (23)

Kxaclve Sip

Nabz ne Devet.

- ¹ Yawe, aclve-zvzq ninge apux sip nem.
 X trtxpnzngr da kx mnctpx-ngrne.
- ² Mailz-zvzq ninge me ycngr lue x dakxnzng,
 Murde na-amax mrkc tqycngr nrwix.
- ³ Amrnaq nzlu-krnge.
 X aelwa-zvz-ngrme lrpzki kxtubq, murde drtqm tr zlwz.
- ⁴ Nctoko scm tzmlle nzti bange.
 X bz scm abrmle drtwrnge mz da kx prtz.
- Kxmule-esz' vztrx mz nzlo,
 a' trtxpnzngr da
 kx namwxlrtix.
 Murde nim Yawe, kc tqmncme bange.
- ⁵ Alebzme nange dakxnzng,
 Mz mzliq enqmi rngeng.
- Aelubzme narnge tolo,
 X drtwrnge elalzm.
- ⁶ Krlz-angidrx kx sa naka-zvzme bange zmrlz ngrm x nivz lrm,
 X sa namnc-zvzx ma nyzm.

Sam Kranzpnu-li-nrade-pwx (24)

King Kc Tqmatq Vztr Mangr-nzangiongr Mz Mzteadau Nyzde
 Nabz ne Devet.

Neke Takitrde Nzprtr-krde Mangr-nzangiongr

- ¹ Nrlic atwrnrngr nyz Yawe,
 X doa amrlx mz nrlic nedeng x da amrlx mz nrlic scdeng. [☆]
- ² Murde nide Kxrpalz kc tqwz-ngrde nrlic,
 X yrlqbzle prla x drtc' mz zmatq ngrde.

[☆] Sam Kranzpnu-li-nrade-pwx (24):1 1 Korint 10:26

- 3** ?Mz nzaotikr drtwrgu zmatq lc, neke tubqbz bade nzvdzbz mz newz nyz Yawe?
 ?X neke takitrde nzprtr-krde Mangr-nzangiongr nide?
- 4** Leplz kx nabzdr lq x nzmnc-krdr tubq
 Nztakitrdr nzodutr-lxblr-krbzlr mz Yawe.
 Natqdr nzangidati-zvzlr.
 X trnzangiolru mqngr da kx nzlz.
- 5** Leplz kxnzmull lcng nztubqbzng mz nzobqkr Yawe.
 X Gct r Jekop lc sa na-amrlzle x na-arlapxle nidl.
- 6** Leplz lcng nzrtangrtlr me pnz drtwrde,
 X suti drtwrdr nxngi-krbzlr nzulrde mz Mangr-nzangiongr nide.

King Kc Tqmatq

- 7** Lvpxpbzmu bade naonrx ngr Jerusalem,
 X naonrx ngr Mangr-nzangiongr kcng tqblzlongr,
 Murde King kc Tqmatq navztrp.
- 8** ?King kznilc tqmatq?
 Krlc Yawe, kc tqrnir, tqxplr.
 Krkc tqaovxio zvz mz vea.
- 9** Lvpxpbzmu bade naonrx amrlx,
 X naonrx kcng tqblzlongr,
 Murde King kc Tqmatq navztrp.
- 10** ?King kznilc tqmatq?
 Krlc Yawe, Ngrrvea ngr ami nedeng.
 Nide King kc Tqmatq.

Sam Kranzpu-li-nrade-nzlvqn (25)

Doa Kc Tqabutr-zvzbzle Drtwrde Mz Yawe Drtqde Trmyau
 Nabz ne Devet.

Kzdq Nabz Ngr A, B, C

Nzkrka'ngr

- 1-2** Awi Yawe mz nzngini-krm Gct rnge.
 Abrtr-zvzbz drtwnge bam mz nzkrka'-krbo bam.
Bzkq rlr-ngrbzme mz enqmi rngeng nzaovxio-krdr ninge.
Bzkq nzamyatimlr drtqng.
- 3** Clvebz doa kc tqabutr-zvzbzle drtwrde bam, murde drtqde ma tzamyatibz.
 Clveti-lzbq zvz doa lc, a' mrlx kx ani txpwz nzota-krmu ncdr, mrlz nzmyakr drtqde.
- 4** Da kx sutilx-zlwzbz drtwnge bam, nzalvztr-krme bange nqmq krmqng amrlx.
 Delc nakrlz-zpx-ngrne lrpzki rm.
- 5** Elalvzx nzokatr-krme ninge mz nzvz-nqblq-krnge natqm.
 Eu. Murde nim Gct rnge kc tqarlapxle ninge, x tqabrktr-zvzx drtwnge nim.
- 6** Gct, aelwapx-zvzm nzaodu-krm x nivz lrm bange.
 Gct, ale da lc, da kc tqwai-pnzq mzli kc bqnc.
- 7** Ipq ninge mz alwx kcng tqalexng mzli kc tqngini-ngrne obla, murde nim mrlz-esz'ngr.
 Ipqpx nzvz-rbr-krngeng amrlx
 mz nzdcpxkr mz drtwrm nzaodu-zvz-krm.

Nqmq Kr Yawe

- 8** *Jzs-zvzq leplz mz nzmnccngr kxmrlz x kxtubq.*
Jzsiq mz nzalvztr-krm kxnxaleng alwx, murde nao-zlilr nzti rm.
- 9** *Kxrmailz, aelwapx-ngrbzme mz kxnxavzo-lzbqng da kxtubq.*
Kxakrlz, alvztr-zvz-ngrn nidr me pnz drtfrm.
- 10** *Lrpzki rmqng amrlx nzaelwapxbzlr mz leplz nemqng nzaodu-krm x nzangidati-krm natqm.*
Leplz lcng nzyrlq-zvzlr nzalvztr-krm x nzesz'tikr drtfrm badr.
- 11** *Ma-nqblq natqm kc tqesalz-ngrn mz nzipqpx-krm alwx rngeng,*
Murde nzkqlu-zlwzng.
- 12** *Nekeng nzlxngiti-angidrlr natqm,*
Nzo-zlilr lrpzki angidr mz nzalvztr-krm nidr.
- 13** *Olvz x ncblo lcng sa namnc-zpxwng.*
Oliqtibz drtc' kc tqipibzme, murde doa nedrng namnc-kzng elr.
- 14** *Pqtr mz drtfrm leplz kcng tzamrluelr nim.*
Pipx-zvzbzme da kx na-alelr mz nzvz-nqblq-krdr nzesz'tikr drtfrm
badr.

Nzkrka'ngr

- 15** *Rtxtrpwo nibrnge bam mz nzmncc-xgle-krnge nim.*
Rlapx-zvzx mz nzokatr-krm ninge.
- 16** *Suti drtfrnge kx naobqme bange x nayc mz drtfrm ninge.*
Sutitx drtfrnge murde trpengr kztenge x trmnc-zpxwpewu.
- 17** *Trte, katpxbz nztalvzokr nabznge.*
Tekqtr drtfrm x arlapxbz ninge mz nzkxpu-krngeng.
- 18** *Vz zvz nzaotikr drtfrm nzkxpu-krnge x nzetqkr drtqng,*
Vzm x ipqpxbz alwx rngeng.
- 19** *Wx-nzlongr nabznge nzkqlu-zlwzkr enqmi rngeng.*
Wzpx zlwz mz drtfrdr nzatrkti-krdr ninge.
- 20** *Xplrlvzbz ninge mz enqmi rngeng mz nztu-krme mz nibrnge.*
X bzkq rlr-ngrbzme badr nzamyati-krmlr drtqng, murde nim me rlakirx.
- 21** *Yawe, arlapx ninge murde tubqx x nabznge lqngi.*
Yrlqtr-zvzbo nzlu-krnge bam.
- 22** *Zmatq ngrm, navzm mz nzarlapx-krbzle nigr lr Israel mz*
Ztrkang amrlx kcng tqrmctikr mzli ka.

Sam Kranzpnu-li-nrade-esz'mz (26)

O-zli-zvzx Nzti Kxtubq

Nabz ne Devet.

- 1** *Yawe, pipxbz kx ninge ncblo kx nabzde lq.*

Murde o-zli-zvzx nzti kxtubq,

X abrtr-zvzbo drtfrnge bam.

- 2** *Obqtr angidr mz nabznge,*
X mc kxmu nzvzkr nqmq nr drtfrnge.

- 3** *Murde nivz lrm rtwayz-zvzm bange,*
X nzaodu-krm mailz-zpxwle ninge.

- 4** *Traodu-lzbqkru badr leplz kxnxtrkang.*
X trabrtzlvzwu kxnxpokiang.

- 5** *Pxtpx-ngrne nzngi-te-krgr badr kxnxaleng alwx.*
X drtqng sa nzmncc-krgr badr kxdrka'-ngrng.

- 6** *Yawe, ycpqx mqngi mz nzvz-nqblq-krnge Loukxtr scm, murde natubqbo*
mz nzobq-krm,

- X naprtrpo mz leplz nemqng mz nzvz-ngale-krgr olta nyzm.
- ⁷ X ngr-ngrgr nabz ngr nzawingr
Mz nzale-krm da kxmrlzvxiting.
- ⁸ Mrlzm bange Mangr-nzangiongr nim,
Mrkc tzmcngr nzmyalz-krm.
- ⁹⁻¹⁰ Mz nzmilxtxo-krm leplz kcng tztakitrdr nzayrplapxngr,
Bzkq apusr-ngrn ninge kxnzaleng alwx, x kxnzrnibqng,
X kxdrka'-ngrng kcng tzrtwz-zvzng dalr nzamcti-rbrngr,
- ¹¹ **Murde o-zli-zvzx nhti kxtubq.**
Ycngr mz drtwrm x arlapx ninge.
- ¹² X sa naglqlz-ngrne nim mz mzlir leplz nemqng
Murde tu-zvzme mz nibrnge x tubqbo mz nzobq-krm.

Sam Kranzpnu-li-nrade-rlimz (27)

Nim Mevalu Rnge X Trpnzngr Kx Namwxlrtix
Nabz ne Devet kx yrbzle mz kxrmailz ngr dzbe kxnzngngrng.

- Lrpalvc Nyznge*
- ¹ Yawe, nim Mevalu rnge kx arlapx-zvzle ninge. X trpnzngr kx namwxlrtix.
Trnarnrcti-lzbq-ngrne murde nim lrpalvc nyznge.
- ² Mzli kc kxdrka'-ngrng natz-ngrdr ninge mz nznibq-krdr ninge,
Enqmi lcng sa nataong.
- ³ Kxmule-esz' ami kxetu navzm mz nzoti-krmlr ninge, a' trpnzngr nzmwxlr-
krnge.
X kxmule-esz' otakr badr, a' drtwrnge sc tqabrtr-zvzbo bam.

- Ma Nyzm*
- ⁴ Yawe, da kx rlxtitxpwo bam nide sele: Sutix zlwz drtwrnge nzmnc-zvz-
krnge mz ma nyzm.
Murde naxngi-zvzbo nzulr nzmyalz-krm mz nzaoti-zvzkr drtwrnge me
pnz drtwrm.
- ⁵ Murde krlzx kx sa na-aclve-angidrq ninge mz mzli r nzkxpu-krnge.
X na-amnc-kapqq ninge mz Mangr-nzangiongr nim, mz nzngini-krm
butqbr kx rlakitr.
- ⁶ Sa nabatrpe' nzaovxio-krnge enqmi lcng tztu-ngalelvzlr ninge.
X sa namalq-zlwzx nzka-krbo bam blz mz Mangr-nzangiongr nim.
X nangr-ngrbo bam nabz ngr nzawingr.

- Nzkrka'-krnge*
- ⁷ Yawe, xlrm nzkrka'-krnge mz nzkqle-krnge nim.
X nayc mz drtwrm ninge mz nzayzlu-krme natqnge.
- ⁸ Mzli kc tqrpi-ngrme kx, "Vzm mz nzangio-krm ninge."
X ayzlubo natqm kx, "Eu, ninge la navzbo."
- ⁹ Delc, bzkq mnc-rlrume bange. Ninge kxnzawz nem.
X bzkq esablqtiq ninge mz nzngyatikr drtwrm ninge.
Murde okatr-zvzq ninge mzli kc.
Mevalu rnge, bzkq ptxpx-ngrn ninge mz nzaxtx-krm ninge.
- ¹⁰ Kxmule-esz' trtenge x lxenge nzaxtxdr ninge,
A' nim la tqaclve-angidrq ninge.

- Nhti Kx Tubq*
- ¹¹ Alvztrp nqmq krmqng bange.

X mailz ninge mz nzo-zli-zvz-krnge nzt i kx tubq murde enqmi rngeng
sa tzaukztilr ninge.

¹² Bzkq rlr-ngrbzme nzolvz-krdr ninge.

Nzpokiatitrlr ninge x nzamwxlr-ngrdr ninge mz nzycmne-zngya-krdr.

¹³ Yawe, krlzpx kx nzmrzl-zlwz-krm

Sa nakrlzmle ninge mzli ka mz nrhc.

¹⁴ Mzlengeng, na-abrtr-ngrbzku drtwrgu mz Yawe.

X naxplrkmu mz nzlxngiti-krgule.

Bzkq matitr drtwrgu nide,

A' drtwrgu na-abrtr-zvzbzku bade.

Sam Kranzpnli-nrade-rtqmz (28)

Acve Alo Nigr

Nabz ne Devet.

¹ Yawe, kqlex nim murde nim butqbr kx rlakitr.

Bzkq apume bange kxnradrtqde ngq.

Murde ma tqbz x nzmu napx-ngrn nzxlrngr nzyrni-krnge.

² Mzli kc tqobqtr-ngrbo Mrkc Tqtr mz nzmnc-krnge Mangr-nzangiongr nim,
x glalzx mqnge mz nzkrka'-krbo bam,

Xlrm natqnge x okatr ninge.

³ Bzkq apusr-ngrn ninge kxdrka'-ngrng kcng tzrtrngz-zvzbzng da kxtrka.
X nzrpilr kx nidr ncblo ngr nivz, a' trtingr.

⁴ Ayzlu-mopwz mz nzayrplapx-krm nidr mz da kxtrka x nzrtrkalrngr kcng
tzalelr,

Kabz badr da kx takitrde nzvz-rbr-krdrng.

⁵ Murde matitrpe drtwrdr da kcng tqwz-ngrn x da kxetuting tqaleqng.
Dekc namilxtxo-ngrn nidr x bzkq da kx na-ale-moulr.

⁶ Yawe, glqlz-lxblkr nim

Murde ayzlume natqnge mz nzokatr-krm ninge.

⁷ Nim lrpavc nyznge x temz ngr lomrnge kc tqyputrngr nipna.
Abrtrpo drtwrnge bam x okatr-zvzq ninge.

Delc tqelalz-ngrm drtwrnge

X tqawi-zvz-ngrbo bam mz nzngrn.

⁸ Yawe, nim lrpavc nyzgr kx rlakitr.

X nim nzxplk-krnge, ninge king kc tqmcpxbzme.

⁹ Amrlz nigr leplz nemqng mz nzarlapx-krm nigr,

Mz nzngini-krgr sip nemqng kcng tqaclve-zvzq.

Sam Kranzpnli-nrade-rpwxmz (29)

Natq Yawe Mz Trlipu

Nabz ne Devet.

¹ Nimu enjrl ngr Heven nayrngzobzmu mz Yawe,
Mz nzmc-krmu nzmyalz-krde x zmatq ngrde.

² Napipxamu kx takitrde nzamrluengr drtqde,
Mz nzangio-krmu nztr-esz'ngr-krde.

³ Murde natq Yawe aelwapx-lzbqngz mz trlipu.

Nate kxmatq o-zlile dcpwe mz nzapu-krde bzlrmei prla.

⁴ Natq Yawe matq-esz'ngr.

Eu. Natqde xplk zlwz.

⁵ Natq Yawe rpesaliti nc trpili,

- Mz nzapu-krdr nounc kx nzlapitzing.
- ⁶ Natq Yawe aycngrlrle newz nyzugung,
Mz nzapu-krdr ncblo kx nzelang.
- ⁷⁻⁸ Natq Yawe batrpzle bzlrpc.
X bzlrmei ngrde aycngrlrle peto.
- ⁹ Natq Yawe apule nenq kc tqrkqtuti nc yrni x krlxpqtile leu rdr.
X kxnxzangiong amrlx mz Mangr-nzangiongr nzrpilr kx, “Gct, nzmyalz-
esz'ngr-krm glqlz-ngrgr nim!”
- ¹⁰ Nubla ngr tewa kxetu yclzbz mz zmatq ngr Yawe,
Mz nzngini-krde King kc tqaclve alo.
- ¹¹ X mz zmatq lc axplrlle nigu leplz nedeng
Murde namnc-zpxwku.

Sam Kranzpnu-tq (30)

- Yawe Alrti-zvzle Nzyrnibungr Mz Nzelalz-krm Drtwr*
- Nabz ne Devet.
- ¹ Yawe, glqpxx nim mz nzarlapx-krm ninge mz mq enqmi rngeng.
Murde tr-rlr-ngrp wzmeu badr nzaovxio-krdr ninge murde ma tzbilvzlr
ninge.
- ² Yrnibo bam mz nzokatr-krm ninge,
X amrlz-mowq nrkrdrtqnge.
- ³ Mzli kc tqycpe pipz nzbz-krnge,
Arlapxq ninge x nrkrdrtqnge trnavzopeu mz gq.
- ⁴ Yawe, tr-esz'ngrn, x nigr leplz nemqng na-angrlvzkr nim,
Mz nzawi-krbzkr bam da kx aletiqng.
- ⁵ Zngya ngr drtwrm trboiu,
A' nzaodu-krm nigr tqyc tqyc.
- Kxmule-esz' yrnibutikr nrlckxbq,
A' nzyrni-krgr sa nalrtipxle nzabrtz-krgr mz nzmc-krgr zyzlr mz nourla
kxtopwz.
- ⁶ Yawe, mzli kc tqmnc-zpx-ngrne, rpi-zvzx kx,
“Trpengr doa x da kx namwxlritx.”
- ⁷ Murde xngibo nzamrlz-krm ninge, mz nzapu-krm rtabu kx xplr kx tu-
ngalelvzle ninge.
A' mzli kc tqprtz-ngrm da kxtrka bange, opxm kx esablqtime ninge, sc
tqmwxlzr-zlwzpx.
- ⁸ Delc Yawe, tqkqle-ngrne nim.
X rlxtibo nzyzluti-krme ninge.
- ⁹ Rpibo bam kx, “Bzkq rlrpx-ngrn nzvzo-krnge mz gq,
Murde trpnzngr da kx mrlz kx naprpxm mz nzbz-krnge.
X rblxpe nzyapwxtipx-krbo mz leplz mz nzangidati-krm,
Nzmu namibilzpemc mz drtc’.
- ¹⁰ Yawe, xlrm natqnge mz nzyckr drtwrm ninge.
Kxetu rnge, okatrp ninge.”
- ¹¹ Alrtibzme nzyrnibu-krnge mz nzelalz-krm drtwnge,
Mz nztekqtr-krbzme nzvzkr drtwnge mz nzabrtz-krnge.
- ¹² X rblxm bange nzmnc-lrpi-krnge.
A' navz zvz nzangrlvz-krnge nim. Awi kxetu, Yawe!

Sam Kranzpnu-tq-nrade-esz' (31)

Nzbrkr Drtwr X Nztalvzokr Nabz
Nabz ne Devet kx yrbzle mz kxrmailz ngr dzbe kxnzngngrng.

Nzbrkr Drtwr

- ¹ Yawe, nim me rlakitrx.
Bzkq rlrpx-ngrn nzaovxiokr enqmi rngeng ninge.
A' arlapx ninge, murde ale-zvzq da kxtubq.
- ² Ayzlu-anim nzyrni-krnge mz nzarlapx-krm ninge.
Nanginim butqbr kx namnc-kapqpx-ngrmc.

Nztalvzokr Nabz

- ³ Mz nzngini-krm lrpalvc ngr nzrlapxngr,
Aclve x mailz ninge mz nzvz-nqblq-krde natqm.
- ⁴ Bzkq rlr-ngrme nzprt-krnge mz trtxki kc tzamwi-kapq enqmi rngeng,
Murde nim me rlakitrx.

Nzbrkr Drtwr

- ⁵ Yawe, aprcbo mqngrnge mz mqm. ☲
Murde nim Gct kc tqbrti drtwr mz nxzpepx-krm ninge.
- ⁶ Kxetu, abrtxtrpo drtwnge bam,
A' pxtpx-ngrne krkcng tzangiolor mqngr da txneng kx nzlz.
- ⁷ Drtwnge sa naelalzm x na-abrtzlvzx nzaodu-zvz-krm,
Murde okatr-zvzq ninge mz mzliir nzetqkr drtqnge x nzkxpu-krngeng.
- ⁸ X tr-rlr-ngrp wzmeu ninge mz mq enqmi rngeng,
A' amnc-nrwx-ngrbzme nabznge mz nzvzne-krnge.

Nztalvzokr Nabz

- ⁹ Yawe, nayc mz drtfrm ninge murde nabznge talvzo.
Mzke' vaotxpe-ngrde nzyrni-zlwz-krnge x nrkrdrqnge mewetxpengr.
- ¹⁰ Yangrnapex mz nzvzkr drtwnge x drtqnge satxpe murde bztipenge
nzyrningr.
Drtqnge yayrpe-ngrde nzmnc-rbr-krnge x nipenge nrvr-nrbalq.
- ¹¹ Enqmi rngeng nznelvztilr ninge
X kxnzmnc-aepztrpqng bange nzobqsopelr ninge.
Kxkrlzti-lzbqkr badr nzapusr-ngrdr ninge da kxtrka
X krkcng tzmclr ninge mz lrpzki nzdwa-ngrdr ninge.
- ¹² Leplz amrlx mrbritinetrpe drtwrdr ninge, opxm kx bzpex.
Apunepebo badr brmrda.
- ¹³ Mnc-zvzx mz zmwxlr mz nxzlr-krnge nzlc-awakr enqmi rngeng,
Kcng tzyrlqlr drtwr kx nanibq-ngrdr ninge.

Nzbrkr Drtwr

- ¹⁴ A' Yawe, nim Gct rnge,
X abrtrpo drtwnge bam.
- ¹⁵ Arlapx ninge mz enqmi rngeng kcng tzayotilr ninge,
Mz nzaclve-angidr-krm ninge.
- ¹⁶ Amrlz ninge, kxnzawz nem,
Mz nzarlapx-krm ninge murde nzaodu-krm tqyc tqyc.

Nztalvzokr Nabz

- ¹⁷ Yawe, bzkq rlrpx-ngrn nzqgle-krnge nim nzamyati-ngrm drtqnge.
A' amyatibz drtq kxdrka'-ngrng murde napwrkilvc-ngrdr nzbz-krdr.
- ¹⁸ X na-aesakile natq kxnpokiang x kxnglqpx-lzbqng,

✉ Sam Kranzpnu-tq-nrade-esz' (31):5 Luk 23:46

Kcng tzxtrnga-ngrdr kxnztubqng.

Nzbrkr Drtwr

- 19 Myatpx zlwz da kxmrlzti kcng tqyrlqq nangi sc krkcng tzamrluelr nim.
Mурde aelwapxpe-ngrn kx aclve-zpwxq krkcng tzrlatrpzng bam.
- 20 Leplz nemqng nzrlapxng mz drtwr kx nzyrlq enqmi rdrng x nznelvztingr
nidr,
Mурde amnc-aepztrpzme nidr bam.
- 21 Yawe, glqpx-ngrne nim nzaodu-krm ninge.
Mурde mzli kc enqmi rngeng tztu-ngalelvz-ngrdr lrpalvc nyznge, mnc-
zpwxx mz nzetukr nivz lrm.
- 22 Mwxlrz murde opxm kx maszlrpx-ngrn ninge.
A' xlrme nzkqle-krnge nim kx naokatrq ninge.
- 23 Nigu leplz neng Yawe naka-lzbqbzku bade.
Mурde aclele kxzvz-nqblq-zpwxlr nide, a' ayrplatipxle kxzglqpx-
lzbqng.
- 24 Bzkq nabzgu tzprlm, a' natu-amqngiku
Mz nzbrtikr drtwrgu nide.

Sam Kranzpu-tq-nrade-li (32)

Nzawingr Mz Nzipqpxngr

Kzdq nzaongr drtwr kx yr Devet.

Naplzpxbzku Alwx Rgung Mz Yawe

- 1 Doa kx nzipq mz alwx ngrde
Drtwrde elalz-zlwzm.
- 2 Murde mz nzobqkr Yawe trvz-rbrpeu.
A' plzpxle alwx rdeng murde ma tqyc-kapq da kxtrka mz nabzde. ☆
- 3 Yawe, mzli kc tqpxtpx-ngrne nzplzpx-krbo alwx rngeng bam,
Drtqnge satx zlwz mz nzetq-zvz-krde.
- 4 X drtqnge tropx-pnzu mz nzayrplapx-krm ninge ngrlx x mz nrlckxbq.
X yangrngatxpex nzapu-krnge lxbi kcng tqngibr mz nepi.
- 5 Pnzpe drtwrnge kx naplzpxbo alwx rngeng bam.
X mz nzplzpx-krboleng, trpnzngr kx yrlq-kapqbo bam.
- 6 Delc tqipqpe-ngrn ninge,
X katpx-ngrbzme nzmrlepukr alwx rngeng amrlx.
- 7 X nigr leplz nemqng nakrka'bzkr bam mzli ka.
Mурde mzli kc nzkxpung na-apune-ngrmle nrc kc tqoda,
Trtxpnzngr nzkrllz-krmlr nigr.
- 8 Nim me rlakitr x ayrbqpxq ninge mz da kxprtz.
Mzli lc tqxlrz nabz kxyrlvi kx nim nou nzrlapxng.

Navz-nqblqku Natq Yawe

- 8 Rpim Yawe kx, "Sa na-aelwa-ngrbo bam lrpzki kc nao-zliq,
Mz nzmailz-krnge nim.
- 9 A' bzkq apuq hcsi kx narde mqngi,
Kx vz-nqblqle me pnz drtwr ncblo mz nqvi kcng tzpetrpz bade."
- 10 Kxdrka'-ngrng sa na-ayrplapxng mz alwx ngrdrng.
A' nigu kcng tqbri drtwrgu Yawe sa namcku kx aodu-zvzle nigu.
- 11 Nigu kxnztubqng na-angrlvz-ngrgu Yawe.
Na-abrtz-ngrgu nide.

☆ Sam Kranzpu-tq-nrade-li (32):2 Rom 4:7-8

Sam Kranzpu-tq-nrade-tq (33)

Angrlvzku Yawe Mz Nabz Kxyrlvi
Nabz ne Devet.

Nabz Kxmrna

- 1 Naelalvzku Yawe, nigu kx nztabqng.
Mурde mrlvxi nzglqpx-krgu nide.
- 2 Na-angrlvzku nide mz nabz kx yrlvi mz nzawingr,
X mz nzayrni-krgu gita x ukzlele.
- 3 Nangr-ngrbzku bade nabz kxmrna,
Mz nzmalqlvz-krgu nide.
- 4 Murde natqdeng amrlx tubq-esz'ngr,
X da amrlx kcng tqaletileng takitrde nzbrtikr drtwrgu.
- 5 Mrlz bade da kx mrlz x tubq.
X mz nrlc tulvzo nzaodukr Yawe tqvzpe tqvzpe.

Kxrpalz

- 6 Yawe wzngrde bongavz mz natq kx kapxle,
X nepi, temz, x vri amrlx mz nzycmne-krde.
- 7 Ata-lxblrtrle dcpwe me esz',
X yrlqbzle bz ngr prla amrlx.
- 8 Nigu leplz amrlx mz nrlc, ncblo, olvz, x doa kxnztopwzng,
Na-amrlueku x naamatqku Yawe, Kxrpalz.
- 9 Murde wzngrde nrlc mz nzycmne-krde,
X mz nzrkapx-krde natq dekc tqycngr.
- 10 Yawe atrkatile drtwr kx nzyrlq leplz,
X ngi-batrpzle trnzngidati-kru mrkc tqpnz drtwrdr.
- 11 A' drtwr kx yrlqleng ngidati zvz,
X nqmq nr nabzde tqvzpe tqvzpe.
- 12 Sa namrlzbz mz lr drtqbr kcng tzangiols Yawe murde nide Gct rdr.
Mурde leplz kcng tqmcpkle kx nangi nedeng nzabrtz-zvzng.

Lr Nrlc

- 13-14 Yawe obqom mrkc tqwxbuo-ngrmle mz tron nydze Heven,
Mz nzmcokrmle leplz amrlx mz nrlc ka.
- 15 Ngi batrpzle nzao-krdr drtwrdr,
X krlzle da amrlx kcng tzalelrng.
- 16-17 King traovxiou mz nxplkr ami nede.
X ncblo ngr vea tr-rlapx-kzu mz nxplkrde x hcsi nede.

Kxarlapx Kxokatr

- 18 A' Yawe kc tqaclvele krkcng tzamatqlr nide,
X nzbrti drtwrdr nzaodu-zvz-krde nidr.
- 19 Arlapxle nidr mz nzbzngr,
X axplrle nidr mz mzli r dzbi.
- 20 Mnc-xgleku Yawe nzokatr-krde nigu.
Mурde nide temz ngr lomrgu kc tqyputrngr nipna.
- 21 Abrtzlvzku nide,
X drtwrgu abrtrpzku mz drtqde kxtr.
- 22 Krka'ku kx Yawe na-aodu-zvzle nigu
Mz nzbrtikr drtwrgu nide.

Sam Kranzpnu-tq-nrade-pwx (34)

Kxrka X Kkokatr
 Nabz ne Devet,
 mzli kc narpi-ngrbz nalukurnr-ngrde mz mz Abimilek, kc tqmapulr-ngrde
 nide x sc tqvzpe.

- Kzdq Nabz Ngr A, B, C*
- ¹ Awi-zvzbo mz Yawe,
 X tramawxu nzglqpx-krnge nide.
 - ² Bilvz-zvzx Yawe mz nabznge,
 Mурde nimu kx nzaetqbz drtqmu na-abrtzlvzamu da kcng tqaleleng.
 - ³ Clve Yawe doa x da amrlx. Naglqlzku drtqde.
 X napipx-lxblr-ngrgu nzetu-krde.
 - ⁴ Da kcng tqmwxlrtix, arlapxpebz Yawe ninge mz da lcng amrlx.
 Mурde mzli kc tqkrka'-ngrbo bade, ayzlumle natqnge.
 - ⁵ Elr! Na-abrtrpzmu drtwrmu mz Yawe, murde ma drtqmu tqmya,
 X na-abrtzlvzamu nzokatr-krde nimu.
 - ⁶ Gct, mzli kc nzmnc-krnge tqtrka-ngrde, arlapxq ninge,
 Mz nzatutr-krm nzkrka'-krnge.
 - ⁷ Ili! Enjrl ne Yawe arlapxle leplz mzli kc drtqdr tqetq-ngrde,
 Mурde aclvele krkcng tzmyatitrlr Yawe.
 - ⁸ Jzsamu ena nzmrlzkr Yawe x na-abrtr-krbzmu drtwrmu bade.
 Mурde krkcng tqaclveleng nzabrtz-zvzng.
 - ⁹ Kxnvvz-nqblqlr natq Yawe nzrngiscng da amrlx.
 Delc nimu leplz nedeng na-amrlue-ngrnamu nide.
 - ¹⁰ Laion kx nxzplrng nzkrizlr nzbrtalengr,
 Leplz kx nzvz-nqblqlr Yawe, trpnzngr da kx mrbrpxm badr.
 - ¹¹ Mrlxngeng x inyxngeng, lalztqmamu bange,
 Mурde na-alvztrpo bamu kxnamu nzamrluengr Yawe.
 - ¹² ?Nike suti drtfrm?
 ?Nzlungr kxmrlz kxboi?
 - ¹³ Obq zpx, x bzkq pokiaq.
 Bzkq ycmne-atrkatiq leplz,
 - ¹⁴ Prszpx nqmq kxtrka. X ale zvz da kxmrlz.
 X nasuti drtfrm nzmnc-zpx-krmu badr leplz mz nrwx.
 - ¹⁵ Rlxtrbz ncblo kxtubq mz Yawe nzokatr-krde nide.
 X Yawe sa naxlrbzle nzkrka'-krde mz nzaclve-krde nide.
 - ¹⁶ Sa napnanatile krkcng tzale-zvzng da kxtrka.
 Trobqpwu badr x mzli kc nabz-ngrdr, ani txpwz nzmrbrtrkr mz drtfr
 nidr. [☆]
 - ¹⁷ Takitrde nxzlr-krbz Yawe natq leplz kxnztubqng mzli kc tzyrni-ngrbzlr
 bade,
 Mурde ngi nqmq krde nzokatr-krde leplz nedeng.
 - ¹⁸ Vz zvz nzesolvzti-krde krkcng drtfrdr tqvz,
 X nzamnc-lrpi-krde krkcng nabzdr tqyrnibu.
 - ¹⁹ Wzpxtx zlwz nzkxpukr ncblo kxtubq.
 A' Yawe sa na-arlaxle nide mz da lcng amrlx.
 - ²⁰ X mz nzaclve-zpx-krde nide,
 Trpnzngr nrvr ngrdeng kx nztavxi. [☆]
 - ²¹ Yawe sa na-ayrplaxle kxdrka'-ngrng kcng tztrkalr-ngrdr kxnztubqng.

X nqmq krdr lc tqtrka sa nanibq-moule nidr.
 22 Zvz Yawe nztu-krbzle mz nibr kxinzawz nedeng.
 X trpnzngn nzayrplapx-krde krkcng tzabtrpzlr drtwrdr bade.

Sam Kranzpu-tq-nrade-nzlvqn (35)

*Yawe, Amyatibz Drtq Krkcng Nanibqlr Ning
Nabz ne Devet.*

- Enqmi Rngeng*
- 1 Yawe, tu-ngalelvz ninge, murde enqmi rngeng nztu-ngalelvz-kzlr ninge,
 X vecamu badr krkcng tqveckr badr.
 - 2-3 Yrlqbz temz ngr lomrm kc tqyryputrngr nipna,
 X twzm popz' x nipna scmqng,
 Mz nzarlapx-krm ninge mz ncblo kcng tzmaneutilr ninge.
 X apqtrp drtwrnge kx tume mz nibrnge.
 - 4 Aovxióng x amyatibz drtq leplz kcng tzrpilr nanibqlr ninge.
 X krkcng tzrpilr na-atrkatilr ninge, nabzdr nzmu natalvzo x nadwaszlr
 nim.
 - 5 Atwzlr-ngrm enjrl nem mz nzmaneuti-krde nidr.
 Na-apusr-ngrde nidr leu kxgler kxyrkz kcng tqvxu-pulrtine nenq.
 - 6 Navoneng mz lrpzki kx miglq x tu r nzlo,
 Murde nataong mz nzdwasz-krdr enjrl lc.
 - 7 Kxmule-esz' trpnzngn da kxtrka kx alebo badr,
 A' se tzatu-kapqng br scdr x tcekqng gq mz nzolvz-krdr ninge.
 - 8 Mz drtwrnge mrlz nzpwrkilvc-krdr nzodatingr nidr,
 Mz nztao-mou-krdr mz br x trtxki kcng tzyrlqlr.

Nzayzlu-ngrmlr Nivz Lrnge Mz Da Kxtrka

- 9 Gct, mzli lcde sa na-abrtzlvzx nim,
 X drtwrnge elalzm mz nzarlapx-krm ninge.
- 10 X mz nabznge atwrnrngr, sa narpix kx,
 “Trpnzngn kx apule nim.
 Murde arlapxq kxtrnxplrunz mz mq kxnxplrng,
 X kxtrpnzngn scdr zmatq mz kxnzrncisng zmatq.”
- 11 A' kxdrka'-ngrng nzabetitrlr ninge mz da kx tralewxu.
 Nzrpilr kx ninge kc tqrwzngn dalr nzkxpungr.
- 12 Alebo badr da kxmrlz, a' nzayzlu-ngrmlr mz da kxtrka,
 Kx talvzongr nabznge.
- 13-14 Mz nzyagox-krdr, vzti drtwrnge.
 X axtx-zvzx dakxnxng,
 X biox narnge mz nzkrka'-krnge nidr,
 Da kc tqwaisr-ngrne mzlengeng x kztengeng.
 Murde yc-zlwzngn drtwrnge nidr,
 Apule kx vzngr drtwrnge x yrnitix lxenge mzli kc tqbz-ngrde.
- 15 A' mzli kx mnc-ngrne mz nzkxpungr,
 Nzyrlwr-lxblrng mz nzyrpalelvz-krdr ninge.
 Leplz kxtrkrlzwung delcng tzatrkat-zvzlr ninge.
- 16 Nzxrunga-ngrdr ninge mz da kx prtilzleng ninge,
 X nzmadqtimlr nqngidr bange.

Arlapx Ning!

- 17 ?Yawe, nzatrkatingr ninge lc, nakrlzbzle mzli kznike?
 Arlapx ninge mz leplz lcng tzapulr laion kx nangqdr ninge.

- ¹⁸ X sa na-awibo bam mz mz leplz nemqng
Mzli kc nayrlwrngr mz nzangio-krgr nim.
- ¹⁹ Leplz lcng nzpxtpx-krdr ninge trpnzngr noude. [◊]
Bzkq rlr-ngrbzme badr nzabrtzlvz-krdr nzkxpu-krngeng,
X nzyrpalelvz-krdr nzvzkr drtwrnge.
- ²⁰ Trnzkrzlru nzycmnengr mz nrwrx.
A' nzpikiti-zvzlr krkcng tzmnc-lrping mz ma nyzdr.
- ²¹ X nzpibqti-kzlr ninge mz nzsri-krdr kx,
“Eke! A' mcpekr da kxtrka kc tqaleq.”
- Ayrplax Nidr!*
- ²² Yawe, krlzq nikeng nzalemlr bange.
Bzkq mnc-lrpiq x obqlvztx-ngrn nidr.
- ²³ A' vzm, tum mz nibrnge,
X ota-ngrbz ninge.
- ²⁴ Bzkq rlr-ngrbzme badr nzbilvz-krdr ninge.
A' pim bange trnzvz-rbr-krpwu murde tubqq mz nzryrlq-krm drtwr.
- ²⁵ Bzkq rlr-ngrbzme nzsri-krdr kx sc tzaovxiopelr ninge,
X me pnz drtwrdr ngidape.
- ²⁶ Amyatibz drtqdr krkcng tzabrtzlvzlr nzetqkr drtqnge.
Krkcng tzobqszolr ninge drtqdr nzmu namya-zlwzng mz mz leplz x
namanepeng.
- ²⁷ A' kztengeng kcng tzsuti drtwrdr kx natubqbo mz nzobq-krm, batrz
badr nzmalqlvz-krdr nim,
Mz nzsri-zvz-krdr kx, “Yawe, myalz-esz'-negrn! X abrtzlvzq nzmnc-
zpxkr kxanzawz nem.”
- ²⁸ X mz zbz lc sa naglqlz-zvzx nim,
Mz nzangrlvz-krng nztubq-zlwz-krm.

Sam Kranzpnu-tq-nrade-esz'mz (36)

Brti Drtwrnge Kx Sa Na-aovxioq Kxdrka'-ngrng

Nabz ne Devet, kxanzawz ne Yawe.

- ¹ Gct, nzmcnegr kxtrka vzdz-zvzm mz nabz kxdrka'-ngrng,
X sc tqrpipebzle badr kx, “Bzkq amrlueamu Gct.” [◊]
- ² X batrzle nzglqpx-lzbq-krdr.
Murde nzrpilr trmcwq alwx rdrng x trna-ayrplapxwq nidr.
- ³ Natqdr trka-esz'ngr x yctr-ngrpwz nzpokiangr.
Delc trtxpnzngr nzale-krdr da kxmrlz x tubq.
- ⁴ Mz nrlckxbq sc tzaoti drtwrdr nzryrlq-krdr drtwr kxtrka.
Nzpxtppx-ngrdr ntzi kxtubq mz nzmrlzkr badr lrpzki kx vz-rbr.
- ⁵ Yawe, nzmyatxlzkr nzaodu-zvz-krm
X nzangidati-zvz-krm natqm nzkrlzlzlr bongavz. [◊]
- ⁶ Nztubq-krm vzdz krlzbzle newz kxanzmyalzng, x vzo kz la me boongr.
Murde acive-zpxq leplz x animol mz nzrsakrlrngr.
- ⁷ Gct, nzaodu-krm leplz mrlz-zlwzm bagr,
Murde apusr-ngrm nigr nei kio kcng tzwxbulvzong lxedr.
- ⁸ Mz nzsri-zvz-krme nagr dakxnzng, dakxnzng lcng yctpxng zvz.
Murde avzo-zvzme zmrlz ngrm bagr, apule lue kc tqyrltx alo.
- ⁹ X nim narhue r nzlu-krgr,

[◊] Sam Kranzpnu-tq-nrade-nzlvqn (35):19 Jon 15:25 [◊] Sam Kranzpnu-tq-nrade-esz'mz (36):1
Rom 3:18 [◊] Sam Kranzpnu-tq-nrade-esz'mz (36):5 Sam 57:10; 71:19; 103:11; 108:4

- Kc tqapu-zvzmle bagr nzyrlelz-krm aulz.
 10 Yawe, navz zvz nzaodu-krm nigr kcng tzvz-nqblqlr nim,
 Mz nzamrlz-krm kx nabzdr tubq.
 11 Bzkq rlrpx-ngrn mq kxdrka'-ngrng nzlolvz-krdr ninge,
 X kxnzglqpx-lzbqng bzkq nanycdr nzrnzlvzolr ninge.
 12 Murde brti drtwrnge nzaovxio-krm kxdrka'-ngrng.
 X mz nztao-krdr, trpengr nztulz-mou-krmlr.

Sam Kranzpu-tq-nrade-rlimz (37)

*Kxnzabrzpzlr Drtrdr Mz Yawe Sa Natwzlr Drtc' Kc Tqpile Nakabzle
 Badr*
 Nabz ne Devet.

- Kzdq Nabz Ngr A, B, C **
- A, B (1-4)*
- 1-4 Abtzlvz nzwztr-krbzme mz Yawe,
 X sa nakabzle da kcng tqpq mz nabzm.
 Ale da kxmrlz x abrtrpz drtwrm bade,
 Murde namnc-zpwxq mz drtc' kc tqpile kx nakabzle bamu.
 Bzkq witibz nelzm nzmnckr kxdrka'-ngrng,
 Murde mzli trnaboiu x sc tzbpeng.
 Bzkq kcmnz-ngrbzme nzalengr da kcng tzalelr,
 Murde nzlu-krdr sa namrbc nzapulr nabr kxgler mz mzli r nepi.
- C, D (5-7)*
- 5-7 Clveti-lzbq, x aenzli-lrpi mz nzabrztr-krbzme drtwrm mz Yawe.
 Bzkq nabzm talvzo mz nzrmc-krm leplz kxnzrungiscng nzvz-nqblq-krdr
 nqmq krdr kxtrka.
 Da kx na-aleq, mnc-xgle txpwz Yawe,
 X abrtrpz drtwrm bade, murde sa naokatrle nim.
 Delc sa na-aelwapx-ngrbzle nzopxkr nztubq-krm,
 Mz nzapu-krde nilz r nepi kc tqvz-esz'ngr mzli kc bea.
- E, G (8-11)*
- 8-11 Eu, bzkq drtwrm ngya x nabzm talvzo
 Mурde da lcng li ma tzrkatrpzng bam drtwr kxtrka.
 Eu, murde kxnzabrzpzlr drtrdr mz Yawe sa nangi nydzr drtc' kc tqpile
 nakabzle badr,
 A' kxdrka'-ngrng sa namaszlrtpx-ngrng.
 Glqpx Yawe kx mzli trnaboipeu x kxdrka'-ngrng sc tzmrbrpeng.
 Kxmule-esz' rtangrtiq nidr a' trpengr nzmc-krmleng.
 Gct rlr-ngrbzle drtc' nyzde mz kxnzavzo-lzbqng.
 X sa na-abrtzng mz nzmnc-zpwx-krdr elr.
- I, J (12-15)*
- 12-15 Ili! Kxnztubqng x kxtrnzrungiscng na-aclvetio-lzbqng
 Mурde kxdrka'-ngrng nzglalzpelr toki r vea x popz' scdr.
 Ili! A' kxdrka'-ngrng na-aclvetio-lzbq-kzng murde toki r vea scdr sa nanibq-
 moule nidr,
 X Yawe sa naplameitibzle popz' scdr.
 Jzs Yawe krkng tzryrlqng drtwr kx na-atrkat-ngrdr kxnztubqng
 X nzmadqti-zvzbzlr nqngidr badr.
 Jzsle nidr mz nzodati-krde nidr,

* **Sam Kranzpu-tq-nrade-rlimz (37):** Drtc' ngi kz kzdq nzycmne-ebzpxngr, drtwr ngrde da kx
 mrlting amrlx kcng tgesalz Yawe navzpxmqng mz mqde.

X yrpalelvz-zvzle nidr murde trpnzngr nzxplr-krdr.

K, L, M, N (16-22)

16-22 Kxetu Yawe aclve-zvzle kxnzvz-nqblqlr nide,
X nikeng kabzle badr nangisc-alopedr.

Kabzle badr dakxnzng kxkqlu mz mzli r dzbi,
X okatrle nidr mzli kx prtzngr da.

Lalztqmamu! Murde kxdrka'-ngrng sa nabzng, mz nzapu-krdr nrpq da kc tqplclqom

X enqmi r Yawe lcng sa nangiliang na-apulr zsikapu.

Mclr ncblo kxtubq, kxmule-esz' kxipipzne,
Myaszpxle da kxkqlu kxngisc ncblo kxdrka'ngr.

Murde Yawe sa nakatpxbzle zmatq ngrdr kxdrka'-ngrng,
A' sa naokatrle kxnztubqng.

Ncblo kxdrka'-ngrng nzbi-txpwzlr nzrlxngr, x trnzkrzlru nzhka-niwzlrngr.
A' kxnmrlzng yc mz drtwrdr nzhka-niwzlr-krdr vzmi kxnmamnzo-mzleu.

Ncblo kcng tqamrlzng Yawe sa nangi nydzdr drtc' kc tqpile nakabzle badr.
A' leplz kcng tqpilzleng sa nabzng.

O, P (23-26)

23-26 Oblamzngeng, bztipex nzmnncngr, x ninge ka tqnginipenge lrtzlvz.
X mcx kx nqmq kr ncblo kxtubq nide sele.

Okatr-zvzle leplz mz nzrlr-nrbalq-krde dztudeng, x doa nedeng ngi da kxmrz kx kabz Gct bade.

Yawe okatr-zvzle nide x doa nedeng trnzyrnitrpwzung nadr dakxnzng.

Pq mz drtwr Yawe nzaelwa-krbzle mz leplz lrpzki kx nao-zlirl,
X mailz-zvzle krkcng tzabrtz-ngrdr nqmq krde.

Pixple kx kxmule-esz' nancycdr miglqpx, a' trnztaoung,
Murde sc tqolovz-amqngileng.

R, S (27-29)

27-29 Rtxtiamu nibrmu da kxtrka, x aleamu da kxmrz,
Mурde neidu nemung namnc-along mz drtc' kc tqpi Yawe nakabzle bamu.

Rpi Yawe kx mrlz bade da kxtubq,
X okatr-zvzle kxnzabrtrpzlr drtwrdr bade.

Sa naokatr-zvzle nidr,
A' doa ne kxdrka'-ngrng sa nabzng.

Sa nangi nydzdr leplz kxnmrlzng drtc' kc tqpi Yawe nakabzle badr,
X sa namnc-alopeng elr.

T, V (30-33)

30-33 Takitrde kx ncblo kxmrz dekc tqvzkipxm natq ngr nzyrplapxng,
X nikeng pitileng tubq.

Takitr-kzde nzkrz-angidr-krde Lou amrlx sc Gct rde,
X nzlolovz-amqngi-zvz-krdeleng.

Vz zvz kxdrka'-ngrng nzaukzti-krdr leplz kxnmrlzng,
Murde nanibqlrng.

Vz zvz Yawe nzkapx-krmle ncblo kxmrz mz mq enqmi rdeng,
X mzli kc natwz-ngrdr nide mz kot, trnzaovxiolu nide.

W, X (34-36)

34-36 Wz zvz mz nzabrrtr-krbzmu drtwrmu bade,
Mурde sa nangi nydzmu drtc' kc tqpile nakabzle bamu mz nzamatq-krde nimu.

X sa namcamu nzmaneutipx-krde kxdrka'-ngrng.

Xlrmamu natqnge. Mcx kzdq ncblo kxdrka'ngr kxtrka-esz'ngr, x atrkati-zvzle leplz.
Xplr-esz'ngr x obqszo-ngrde leplz amrlx.

X kxmule-esz' rtangrtix nide, a' trmcpewxu, murde mrbrpe.

Y, Z (37-40)

³⁷⁻⁴⁰ Yrlq angidr mz drtfrm ncblo kxmrlz kxtubq, murde mnc mz nrwrx,
X doa kxnzmika mz neidu lrde nzkqlu-zlwzng.

Yrpalelvzx kxdrka'-ngrng murde sa nabzting,
X doa lr neidu lrdr sa nayrkrtxong.

Zvz Yawe na-arlapxle kxnztubqng.
Mурde nide me nzrlakitrlr mz mzli r nzkxpu-krdr.

Zvz Yawe na-arlapxbzle nidr mz mq kxdrka'-ngrng,
Mурde nzbrti drtwrdr nide nzokatr-krde nidr.

Sam Kranzpnu-tq-nrade-rtqmz (38)

*Zmrlepu R Alwx Rngeng X Nzatrkatikr Enqmi Rngeng Ning
Nabz ne Devet.*

Alwx

1 Yawe, kxmule-esz' ngyati drtfrm ninge,
A' bzkq ayrplapxq ning.

2 Murde nipna scmqng tuge bange,
X pnzplrope-ngrn ning.

3 Xngitxtr-zlwzpxex nzngyatikr drtfrm ninge.
X yangrnga-zlwz-ngrne alwx rngeng.

4 Zmrlepu r alwx lcng sc tqayrngzpupele ninge,
X apupex ncblo kx boo mz alwx ngrdeng.

5 Nzngngu-plxsr-krnge aetqpele drtqnge,
Apule kxsqki kx mibi x brtu.

6 Alwx rngeng nzyrlamyro-ngrdr ninge.
Delc drle mzke' tqtao zvz mz zbq kang kqlu.

7 Nzyagox-krnge apule nyr kx ngcpxm mz nrkrdrtnge.
X nxzplr-krnge yrkrtpxpebz.

8 Nzetqkr drtqnge wibrti-zlwzpe-ngrde ninge.
X bztipenge nzyrningr murde drtqnge rkrkx-zlwzpe.

Zyagox

9 Yawe, krlzpeq da amrlx kcng tqpq zlwz mz drtfrnge murde namnc-zpwxx.
X xlrpe-kzpe' nzyrke-zlwz-krnge.

10 Mzli ka drtqnge mewepe x nzycmini-krnge vz-ebirpengr,
X mzke' obqkipele mrkzble.

11 Kztengeng nzngangrpe-ngrdr ninge murde kxsqki rngeng.
X kxnginingeng trnzesotrpepqngqu bange.

12 Krkcng tzrpilr nanibqlr ninge,
Nzamwipelr trtxki rnge.

X krkcng tzaetqmlr drtqnge, sc tzrpilr naodatilr ninge.
X sc tzryrlq-zvzng drtwr mz nzatrkat-krdr ninge.

Enqmi

13 A' opxm kx trxlrwxu nzycmnekr enqmi rngeng.
X trkrlzwxu nzycmnengr.

14 Eu, apubo badr kx nradrtqde ngq,

- X trayzlupwc'u natqdr.
- ¹⁵ Murde nim Yawe kx na-ayzlubzle nike nzalemlr bange,
Mz nzngini-krm Gct rnge kc tqabrrpo drtwrnge bade.
- ¹⁶ Bzkq rlr-ngrbzme nzabrtzlvz-krdr nzetqkr drtqnge.
X bzkq nzglqpx-lzbqng mz nzaovxio-krdr ninge.
- ¹⁷ Murde ycpe pipz nzodati-krdr ninge,
X nzetq-zvzkr drtqnge tryrkrtxppeu.
- ¹⁸ Napltxpxxx nzvz-rbr-krngeng,
Murde nzbatrplr nzkxnekr drtqnge.
- ¹⁹ Enqmi rngeng nxzplrng x nzlu-zpwxng.
X nzkqlung kx nztrkati nivz lrdr ninge.
- ²⁰ Da kxmrlz kcng tqalebo badr, nzayzlumlr mz da kxtrka.
Nzpxtxpx-ngrdr ninge murde vz-nqblqx nzmncngr kxtubq.
- ²¹ Yawe, bzkq amnctxnq ninge esz'-krnge,
X bzkq mnc-zvzme rlru.
- ²² Kxetu, vz-anim mz nzokatr-krm ninge,
Murde nim Mevalu rnge.

Sam Kranzpn-tq-nrade-rpwxmz (39)

Nzlukr Leplz Mrbcnepwz Apule Nzyrplaokr Nrc Kxesz'
Nabz ne Devet.

- Nzlu-krnge Mrbcnepwz*
- ¹ Yawe, pnzpe drtwrnge kx namnc-lrpitxpwo, a' bzkq alex alwx mz nzlctr-krbz drtwrnge bam mz nzkxpu-krngeng.
Murde kxdrka'-ngrng lcng tzmnc-aepztrpqng bange, ma tzxtrnga-ngrdr nzlqngi-krm.
- ² X kxmule-esz' trycmnewxu,
A' nzkxpu-krngeng etunepx zvz, delc tqtalvzongr nabznge.
- ³ X mz nzaotikr drtwrnge nzkxpu-krngeng, nztalvzokr nabznge mrilvzole ninge.
X mzli kc tqrblxm bange nzmnc-lrpi-krnge, sc tqrpipebo bam kx,
- ⁴ "Yawe, nzlu-krnge mrbcnepwz. ?Memule tqpxlavpx-ngrbzme nzkxpu-krnge?
?Myx mzli kx naesakingr trnzmnc-zpwx-krpwc'u lc?"
- ⁵ Murde nim kx amrbctrp nzlu-krnge. X mzli kx lutix ngi da txne mz nzobq-krm.
- Nzlukr leplz mrbcnepwz apule nzyrplaokr nrc kxesz'.**

- Bzkq Ayrplatipx-zvzq Ning*
- ⁶ Nz wz-katongr ngi brmrda kr apule nounc kc trpnzngr nrade.
X mz nzbzkr leplz trpnzngr dztudrng kx natwzlr.
- ⁷ ?Kxetu nike naobqtipxx mz nzmnc-krnge lc tqngi brmrda?
Mwx namrlz nzbrti-zvzkr drtwrnge nim.
- ⁸ Murde na-arlapxq ninge mz alwx rngeng amrlx,
X kxnzlukurnrng ma tzyrpalelvzlr ninge.
- ⁹ Mzli ka, dcpxpe mz drtwrnge kx vz-rbrx nzlctr-krbz drtwrnge bam mz nzkxpu-krngeng.
Murde tubq nzayrplapx-krm ninge mz alwx rngeng.
- ¹⁰ A' bzkq ayrplatipx-zvzq ninge,
Murde ycpe pipz nzbztr-krbo mz mqm.
- ¹¹ Mz nzayrplapx-krm leplz, odatibzme dztudrng kcng tqmrlzbz badr.

Apusr-ngrbzmeleng da kx yrti ninr,
 Murde nakrlzlr kx nzvz-rbrng mz nzobq-krm.
Nzlukr leplz mrbcnepwz apule nzyrplaokr nrc kxesz'.

¹² Yawe, xlrm nzkrka'-krnge x nzyrni-krnge.
 Murde nzmrbcgr nzmncngr mz nrlc apunepwzle nzwoukr betepu.

¹³ Ayrkrtxpx nzetqkr drtqnge x aotpxbxz drtqnge,
 Murde mwx na-abrtztx-kaix mzli kxpipz x ninge kc tqbz ate.

Sam Kranzpu-pwx (40)

Nim Lrpalvc Kx Mncpx-ngrmc
 Nabz ne Devet kx yrbzle mz kxrmailz ngr dzbe kxnzngngrng.

Xlrme Nzkrka'-krnge

- ¹ Yawe, sc tqaenzli-lrpipebo bam nzokatr-krm ninge.
 X mzli kc tqkqle-ngrne nim, xlrme nzkrka'-krnge.
- ² Veclzme ninge mz gq ngr nzbzngr x mz nabz mu kxrluo.
 Atuome ninge mz rplz kxetu, x trpengr doa x da kx namwxlritx.
- ³ Alvztrpe' bange kc nabz kxmrna mz nzrgqlzngr nim.
 X mzli kc naxlrngr leplz nzngr-krngele, sa na-angiolr nim x na-abrtrpzlr drtwrdr bam.

Abrtrpo Drtwrnge Bam

- ⁴ Namrlzbz mz leplz kcng tzabrrpzlr drtwrdr bam,
 Krkcng trnzprtrpwzung mz leplz kcng tzglqpx-lzbq-ngrdr x tzpokiang.
- ⁵ Yawe, nim Gct rgr x trpnzngr kx apule nim.
 Aleme bagr da kxkqlu mz nzatutr-krm drtwr kx yrlqq mz nzamrlz-krm nigr.
 Drtwrnge yrpz'trpz nzrlwxngr da lcng amrlx,
 Murde nzkqlu-zlwzng.

Ka-lzbqbo Bam

- ⁶ Trsutiu drtwrm nzska-ngrbz bam dalr nrlanc ayrrnngr x dalr nzsrankxng alwx.
 X tr-rlx-kzpe'u blz x animol kx na-angcom mz olta nyzm.
- ⁷ A' da kx suti txpwz drtwrm nxzlr-krbo natqm,
 Murde narlrpx-ngrbo nrkrdrtqnge bam.
- ⁸ Delc tqrpi-ngrbo bam kx, "Ninge kape.
 Na-atutrx natq kcng tqyclzm mz Nzryrngrkxtr.
- ⁹ Gct rnge, abrtzvzx nzale-krnge me pnz drtwrm,
 Murde nabzngelolzvz-amqngipele nzalvztr-krmqng." *

Nzyapwxtipx-krnge

- ⁹⁻¹⁰ Yawe, trnayrlq-kapqpou nzaodu-krm x nzangidati-krm mz leplz nemqng.
 A' sa napiqx-zvzbo nrpa ngr nzarlapx-krm nigr
 Mz nzyrlwrpx-lxblr-krgr.
 X krlzq kx vz zvz nzpipx-krngele.

Trmnc-zpwxwxu

- ¹¹ Yawe, krlzx kx yckqti zvz drtwrm ninge.
 X nzaodu-krm x nzangidati-krm nzngini-zvzmlr lrpalvc kx mncpx-ngrmc.

- ¹² A' mzli ka, rblx nzrlwx-krnge nzkxpungr amrlx kx nzprtztimqng bange.
 X alwx rngeng nzmrilvzolr ninge x nzayc-kapqmlr bange da kxtubq.
 Murde nzkqlu-zlwz-krdr nzmyaszpxlr nqnginarnge.
 X nabznge tqtalvzo-zlwz-ngrde.

Krka'-mopwo Bam

- ¹³ Yawe, vz-anim mz nzarlapx-krm ninge.
 Kxetu, rnekim mz nzokatr-krm ninge.
¹⁴ Okatrp ninge nzaovxio-krnge kxnzrpilr naodatilr ninge,
 Murde drtqdr namya x naobqsong mzli kc nadwasz-ngrdr ninge.
¹⁵ X leplz lcng tzxtrnga-ngrdr ninge nelzdr navzdzm
 Mzli kc nametx-ngrmlr bange.
¹⁶ A' amrlz krkcng tzberti drtwrdr nim
 Mz rka-krbzme badr nzabrtz-zlwzngr,
 Murde na-awi-zvz-ngrbzlr bam nzarlapx-krm nidr
 Mz nzrpi-krbzlr kx, "Gct, nim kx myatxlz-esz'ngr."
¹⁷ Kxetu, trxplrxu x trpnzngr scnge zmatq.
 Bzkq mrbrtr mz drtwrm ninge.
 Murde nim txpwz Mevalu rnge.
 Bzkq asaq nzokatr-krm ninge. [◊]

Sam Kranzpu-pwx-nrade-esz' (41)

Yawe, Krka'-negrne Kx Nayc Mz Drtwrm Ninge
 Nabz ne Devet kx yrbzle mz kxrmailz ngr dzbe kxnzngnrg.

Kxnzokatrng

- ¹ Namrlzbz mz doa kcng tzmlztilr leplz kxnzmaneng,
 Murde Yawe sa naokatrle nidr mzli kc nakxpu-ngrdr.
² Sa na-aclvebzle nzlu-krdr.
 X trtxpnzngr nzrlr-krbzle nidr mz mq enqmi rdrng.
 Delc tzrpi-ngrbz kx Yawe amrlzpele lr mrnyzdr Israel.
³ Sa naokatrng Yawe mz nzamrlz-mou-krde nrkrdrtqdr
 Mzli kc nayagox-ngrdr.

Enqmi Rngeng

- ⁴ **Yawe, krka'-negrne kx nayc mz drtwrm ninge**
 X na-amrlz mou ninge.
 Zyagox kc tqycpxm mz nabznge
 Vzpxm mz alwx rngeng kcng tzatrkatilr nim.
⁵ Enqmi rngeng nzpibqtilr ninge,
 Nzrpilr kx, "?Myx mzli kx nabz-ngrde, murde namrbrtxtr mz drtwr
 nide?"
⁶ Kzdung leplz lcng tzoklatimlr ninge, nzpokiatilr kx nzyc mz drtwrdr
 ninge.
 A' nzrpilr nakrlzlr kxmu nzkxpu-krnge, murde nayapwxtinedr mz
 mztea amrlx.
⁷ Nztrkati nivz lrdr ninge nzpikiti-lrpi-zvzlr ninge.
 X nzaoti txpwz drtwrdr da kxtrka kx nadwatimle ninge.
⁸ Nzrpi-awalr kx, "Mrlztxpe! Mzli ka prtilz-zlwzpe zyagox kxtrka,
 X mzli trnaboiu x sc tqbzpe."
⁹ Mzli ka, kztenge kc tqabrtr-zlwzbo drtwrnge bade,

X tqmukr ncdr, nipe-kzde enqmi rnge. [◊]

Nzokatrkr Gct

10 Yawe, krka'-ngrne kx nayc mz drtfrm ninge.

Amrlz-mopwz nrkrdrqnge murde na-ayzlu-mopwc' da kcng tqtrka tzalemlr bange.

**11 X mzli kc trna-aovxio-ngrdru ninge,
Sa nakrlz-angidrpex kx abrtzlvzq ninge.**

**12 Sa naokatrq ninge nzale-krnge da kxtubq,
X namnc-alotrpebo bam.**

Nabz Kx Yrkpxngr Buk Kc Kai

13 Naglqpxku Yawe, Gct r lr Israel.

Mzli ka x tqyc tqyc, naglqpxku Yawe.

Buk Krali

Sam 42—72

Sam Kranzpu-pwx-nrade-li x Kranzpu-pwx-nrade-tq (42 x 43)

Kxmule-esz' Nabznge Talvzo

Nabz ne nqvi lr Kora.

1 Gct, nzmingrti-zlwzkr drtwrnge nim

Apule animol kc drtwrde tqbrlxkz mqde lue.

**2 Nim Gct kc tqlu x nzsutikr drtwrnge nim apule nzbrlxkztikr drtwrnge lue
kxbao.**

?Myx mzli kx naxngi-ngrbo nzmnc-krme bange?

3 Mz zbz kang kqlu yrni-zvzx x mnqtxpwo drlemzke' kx piz.

A' enqmi rngeng nzyrpalelvzlr ninge, nzrpimlr kx, "?Memule Gct rm
trokatrpe-ngrdeu nim? ?Bzpe?"

**4 Gct, mzli ka drtwrnge yrnibutx zlwz. A' dcpx mou mz drtwrnge mzli kc
ena tqmailztr-ngrne leplz Mangr-nzangiongr nim.**

Mzli lcde abrtz-zlwzkr x ngr-katokr mz nzglqlz-krgr nim.

5 Kxmule-esz' nabznge talvzo x nelznge vzdzm,

A' sa na-abrtxtrpwo drtwrnge bam.

Murde naglqlz-mou-ngrne nim kalr,

Mzli kc na-arlapqxq ninge.

6-7 Gct rnge, mzli boipe trnzkrpzpe-krpou Israel.

?Memule tqpulio-zvz-ngrme bange nzkxpungr mz nzapu-krde lue kxvo?

Nzvdz-krm nelznge vz-ebirnrpe-ngrm bange apule nrc kcng tzyrplalv-
zolr ninge.

X nztalzokr nabznge xplr-zlwzpe apule nzyrpukr lue kxtalio mz nabzde.

X ebio ngr srkau amrlx kcng tqatwzlr-ngrme nzalxlvrtine-zvzlr ninge.

A' nadcpx mz drtwrnge da kcng tqmyalz tqaleq Israel,

Mrkc tqyrlengr LueJodzn x tqycngr Newz Hemon x Newz Misa.

8 Murde vz zvz nzpulio-krme nivz lrm mz zbz kang kqlu.

X ngrbo bam mz nrlckxbq vzmi nzkrka'-krnge murde nim Gct kx rkam
nzlungr bange.

9 Gct, nim butqbr nyznge. ?Memule tqmrbritrpengr drtfrm ninge?

?X memule tqkxpu-zvz-ngrne

Mz nzaetqty-krm enqmi rngeng drtqnge?

[◊] **Sam Kranzpu-pwx-nrade-esz' (41):9** Matiu 26:23; Luk 22:21; Jon 13:18

¹⁰ Nzrpi-zvzmlr bange kx, "?Memule Gct rm trokatrpe-ngrdeu nim? ?
Bzpe?"

X sc tqvz zvz nzngzlilvzti-krdr ninge natq kxtrka.

¹¹ **Kxmule-esz' nabznge talvzo x nelznge vzdzm,**
A' sa na-abrtxtrpwo drtwrnge bam.

Murde naglqlz-mou-ngrne nim kalr,
Mzli kc na-arlapxq ninge.

(43)

¹ Gct, pipxbz mz krkcng trnzangiolru nim kx trvz-rbrwxu.
Arlapx ninge mz mq krkcng tztrkating x tzpokiang.

² Nim me rlakitr. ?Memule tqrlasz-ngrn ninge?
?X memule tqkxpu-zvz-ngrne
Mz nzaetqty-krm enqmi rngeng drtqnge?

³ Atwzlr-ngrm bange zyzlr ngrm x nzalvztrngr angidrng,
Mz nzmailz-mou-krdr ninge Saeon, mz newz kxtr nyzm.
Murde nakrlzlzbo Mangr-nzangiongr kc tqmnc-ngrn,

⁴ X na-angiox nim mz olta nyzm,
Mz nzngini-krm nou nzabrtz-krnge.
X na-angrlvzx nim mz nzayrni-krbo gita bam.

⁵ **Kxmule-esz' nabznge talvzo x nelznge vzdzm,**
A' sa na-abrtxtrpwo drtwrnge bam.

Murde naglqlz-mou-ngrne nim kalr,
Mzli kc na-arlapxq ninge.

Sam Kranzpu-pwx-nrade-pwx (44)

Drtwrgr Esz'tipe Kx Sa Nabzpekr
Nabz ne nqvi lr Kora kx nzyrbzlr mz kxrmailz ngr dzbe kxnnzngnrg.

Be Ngr Melrmqgung
¹ Gct, xlrpekr nrpa ngr da kxetuting kcng tqalebzme mz melrmqgrng mzli
kc bqnc,
Mz nzpi-krmlrlle bagr mzli kc.

² Nzayrplapx-krm lr mrkzbzle apule lxbi kc tzbolvzti mz nrlanc nyzm.
X petio-alzuq leplz nemqng mz drtc' nyzdr mz nzamnc-zpx-krm nidr.

³ Melrmqgr lcng trnzaovxiolru enqmi rdrng mz toki r vea scdr x mz zmatq
ngrdr esz'-krdr.
A' leplz nemqng nzaovxiong mz zmatq ngrm, mz nxzplr-krm, x mz
nzmnc-krbzme badr mz nzaodu-krm nidr.

⁴ Gct, nim King rnge.
Nim kx rngi-batrp nzaovxio-krgr, nigr neidu lr Jekop.

⁵ Miltxopekr enqmi rgrng mz nxzplr-krm.
X rnzlvzokr kxnnzatrkatir nigr mz zmatq ngr drtqm.

⁶ Murde trbrtiu drtwrnge popz' x toki r vea scnge
Nzarlapx-krdr ninge mz nzotangr.

⁷ A' ni-txp wzme kx arlapxle nigr mz enqmi rgrng,
Mz nzamyati-krbzme drtqdr.

⁸ Sa naglqlz-zvzkr nim.
X nzawi-krbzkr bam tqvzpe tqvzpe.

Enqmi Rgung

- ⁹ ?A' memule drtqm tqsatrpe-ngrmle bagr, trokatrpe-ngrnqu ncblo ngr vea negrng?
 Mzli ka rlrtx-ngrpwzme mz enqmi rgrng nzamyati-krmlr drtqgr.
- ¹⁰ X ngi-batrpeme nzdwasz-krgr nidr,
 X nztwz-krdr dztugrng amrlx.
- ¹¹ X rlr-ngrbzme badr nznibq-krdr nigr mz nzapu-krgr sip,
 X nzvzmilr nigr mz drtc' nydzdrng mz nwz-nrbalqtr-krbzkr badr.
- ¹² Apule kx amwabzme nigr badr mz narnnbr kx topwzne,
 Mz nzapusr-krm nigr brmrda.
- ¹³ Lr mrkzbeng kcng tzmc-aepztrpqng bagr nznelvzlr nigr mz nzamyati-krmlr drtqgr,
 X nxztrnga-ngrdr nigr.
- ¹⁴ X neidu mz nrlc tulvzo nzobqszo-ngrdr nigr
 Mz nzyrpalelvz-krdr nigr.
- ¹⁵ Aputr-zvzbo da kxtrka mz nzobqkr leplz lcng,
 X drtqnge mya zvz.
- ¹⁶ Murde xlr xnatq kxtrka kcng tzpimlr bange,
 X mcx nzmcn-krm enqmi rngeng.

Vz-nqblq-zvzku Gct

- ¹⁷ Kxmule-esz' nzprtzmqng bagr da lcng
 A' trmrbrtru mz drtwrgr nim x Nzesz'tikr Drtwrgu.
- ¹⁸ Kxmule-esz' traxtxpekru nim,
 X o-zli-zvzkr nhti rm,
- ¹⁹ A' katrpzme nigr mz mq enqmi rgrng mz nzrnzbrti-krdr nigr, mz nzapu-krdr kuli kzpetong.
 X nzaovxiolr nigr x kzdung nigr nzyrtzmqpeng mz gq.

Nzkrka'-krgu

- ²⁰ Gct rgr, nzmu navecpx-lzbqmgr bam,
 Mz nzangio-krgr gct kzble,
- ²¹ Tryc-kapqpwu bam,
 Murde obqplxq nabzgr.
- ²² A' mz nzngini-krgr doa nemqng, vz zvz nznibqti-krdr nigr,
 Mz nzapusr-krdr nigr sip kcng tzmcn-nabung mz nzrnibqng nigr. ☀
- ²³ Kxetu rgr, bzkq esablqme. ?Memule tro-lxlvr-ngrpwe'u bagr?
 Vz-anim, x bzkq pxtpx-ngrn nigr.
- ²⁴ Lxlvrm bagr,
 Mz nzdcpxkr mz drtwrm nzetqkr drtqgr x nzkxpu-krgr.
- ²⁵ Drtwrgr esz'tipe kx sa nabzpekr,
 Mz nztangqgxlz-krmgr mz drtc'.
- ²⁶ Gct, vz-anim x okatrp nigr.
 Arlapx nigr murde aodu-zvzq nigr.

Sam Kranzpu-pwx-nrade-nzlvqn (45)

Nabz Ngr Nzyrlzkr King Kc Tqmyalz-esz'ngr
 Nabz ngr nivz kx nzyr nqvi lr Kora.

Natqngeng

- ¹ King rnge, krhc nabz nenge kx nangr-ngrbo bam.
 Nabzng esz'ngr natq kxmrlzting.

✉ Sam Kranzpu-pwx-nrade-pwx (44):22 Rom 8:36

X nzngqpx-krm natq mz naonge
 Apule nzyrlepx-krm lue mz butqbr.
² Nzobq-krm lqngipx-esz'ngr.
 X natq ngr nzamrlzngr ngqpx-zvzm mz naom.
 Delc tqamrlz-zvz-kzngr Gct nim.

Nim King Kx Xplr

- ³ Nim ncblo kxmyalz-esz'ngr x xplr zlwz mz nzotangr.
 Alvco toki r vea scm mz bxli rde kc mz nrkalom.
⁴ Murde kalr mz nzvo-krm mz vea na-aovxioq enqmi rmqng mz nxzplr-krm.
 X nalolvz-amqngiq da kxtubq x leplz kxzavzo-lzbqng mz zmatq ngrm.
⁵ X nipna scmqng natu x nalvctrng mz lomr enqmi rmqng,
 X lr mrkzbeng amrlx namnclzbzng bam.

X Kxnzmcpnx

- ⁶ Nzyrlqkr Gct lc nzngini-krm King tqyc tqyc,
 Mz nzaclve-krm leplz nemqng mz nzmnncngr kx tubq-esz'ngr.
⁷ Mrlzsz bam da kxtubq, a' px-ngrn da kxtrka.
 Dekc Yawe, Gct rm, tqmcpxpe-ngrde nim mz nzmyaszl-krm kztemqng.
 X tqglqlz-ngrde nim,
 Murde na-aelule nim tolo ngr nzabrtzngr. [◊]
⁸ Lrpzmqng nzaeluti zvz mz tolo kx mnrt mrlzvxi.
 X ncblo sc tzayrnibzng gita bam
 Murde na-aelalzmle drtwrm,
 Mz nabz ma nyzm kx mzte luli-esz'ngr.
⁹ X olvi kc nangi kwin ngrm tutrpz mz nrlarm kxrtc, nzangrlopliti da kx
 nzwzngr mz gol kxpnapr.
 Olvi lc nide kzdq inyx king kcng tzmncng ma nyzm.

Olvz Rm

- ¹⁰⁻¹¹ Nim la nanginim Kwin. Lalztqm bange x aclvetio-lzbq.
 Mzli kznike ncblo ngrm suti-zlwzngr drtwrde nim mz nzlqngivxikr
 mzpq,
 Mnclzbz bade mz nzngini-krde King x Kxetu rm.
 X bzkq matq-zlwzpe mz drtwrm trtem x kxnginimqng.
¹² Kxmule-esz' lr Taea nzrkabzng da kxlqlwx bam,
 A' bzkq nzbatrpzlr nzrnzlvzo-krm me pnz drtwr ncblo ngrm, kc tqngi
 king.
¹³ Mzpq lxngipx-esz'ngr mz nzprtr-krm ma nyz king.
 X lrpzmqng nzkxsilvzitr gol.
¹⁴ Nim kc tqkq lrpz kxluli nzvzmibzlr nim mz king.
 X kztemqng kx nzmnnc-kamelrng nzvz-nqblqlr nim, mz nztutr-krbzmu
 mz mzte.
¹⁵ Mz nzprtr-krmu lc ma nyzde,
 Drtwrmu elalzm x abrtz-zlwzamu.

Mrlxmqng

- ¹⁶ King rnge, doa ncblo kcng mztr namc mz nqvi lrm sa nangini-kzdr king,
 da kc tzwai melrmqdrng mzli kc.
 X nangi-batrpzme nzaclve-atwrnr-krdr drtc' nyzm.
¹⁷ Nabz nenge sa narkatrpz nabztq mz leplz nzamatq-zvz-krdr drtqm,
 X nzglqlz-krdr nim tqvzpe tqvzpe.

[◊] Sam Kranzpn-pwx-nrade-nzlvqn (45):7 Hibru 1:8-9

Sam Kranzpu-pwx-nrade-esz'mz (46)

Yawe Nide Lrpalvc Nyzgu
Nabz ne nqvi lr Kora.

- Me Rlakitrku*
- 1 Gct kc tqmyatxlz, nide me rlakitrku x axplrtle nigu,
X mz nzkqle-krgu nide mz mzli kx nzkxpungr, okatrle nigu.
 - 2-3 Kxmule-esz' nengq aycngirlre nrlc, x newz nzbrkaong prla,
X kxmule-esz' dxvo votrp x nrc oda,
X newz nzycngirlr-ngrdr kz nzyrpukr nrc kxetuting,
A' trmwxrku murde abrtrpzku drtwrgu mz Gct.

- Ngrlrvea Nggru*
- 4 Gct kc tqmyatxlz mnc mz mztea kxtr nyzde, Jerusalem,
Mrkc tqipulio-ngrmle nzabrtzngr bagu,
Mz nzngini-krgu lr mrnyzde.
Nzvzo-krmle bagu apule lue kx yrle-kato.
 - 5 X rblx nzodatingr Jerusalem murde Gct mnmc bagu,
X naokatrle nigu mz zbg kxmrna.
 - 6 A' mz nzxlrkr lr nrlc natqde nzmwxlr-zlwzng.
X ngayati drtwrdr nide murde aovxio-zvzle ami ngr kandre amlrx.
 - 7 **Yawe nide ngrlrvea nggru,**
X nide lrpalvc nyzgu.

- Lrpalvc Nyzgu*
- 8 Obqmamu! Mcamu da kc tqale Yawe.
Mурde aletile da kx nzodating mz nrlc ka.
 - 9 Aesakile vea amrlx mz nrlc tulvzo.
Plameitile popz' x nipna x dalr vea amrlx x rtclz-ngrdeng mz nyr.
 - 10 X rpile kx, "Bzkq ota-zvzamu. A' metxpemamu bange murde ninge txpwz
Gct.
X ninge txpwz kx myatxlzbz mz neidu amrlx mz nrlc tulvzo."
 - 11 **Yawe kc tqrnir mncpem bagu,**
X nide lrpalvc nyzgu.

Sam Kranzpu-pwx-nrade-rlimz (47)

Yawe Kc Tqmyatxlz-esz'ngr
Nabz ne nqvi lr Kora.

- Naglqpxku Yawe*
- 1 Nigu leplz amrlx na-ayrlewzku da
Mz nzngr-abrtz-kato-krbzku mz Yawe, Gct rgu.
 - 2 Murde na-amrlueku nide kc tqmyatxlz-esz'ngr,
Mz nzngini-krde King kxmatq kc tqaclvele nrlc.
 - 3 Batrpzle nzaovxio-krgu lr mrkzbrell,
Mz nzmnclz-krmlr bagu.
 - 4 Nigu leplz ngr nqvi lr Jekop kcng tqmrlzting Yawe,
Bilvzpeku drtc' kc tqmcpxbzle nangi nyzgu.

- King Rgu*
- 5 Mzli kc Yawe tqwxbuo-ngrmle mz tron nyzde Mangr-nzangiongr,
Sc tqrvxupeku trpu x tqmalq-katopeku mz nzabrtzlvz-krgu nide.
 - 6 Nangr-katobzku mz Yawe Gct rgu.

- Murde nide King rgu, nangr-katobzku bade.
- ⁷ Naglqlzku nide mz nabz kxyrlvi,
Murde nide King r nrlc tulvzo.
- ⁸ X wxbu mz tron kxtr nyzde,
Mz nzaclve-krde neidu amrlx.
- ⁹ Kxnzmailzlr lr mrkzbeng nzaxvctr-lzbqmqng bagu, nigu leplz neng Gct
r Ebraam.
Murde Gct kc tqmyatxlz-esz'ngr myaszpxle king amrlx mz nrlc.

Sam Kranzpu-pwx-nrade-rtqmz (48)

Nzmyalzkr Jerusalem, Mzteadau Nyz Gct
Nabz ne nqvi lr Kora.

- Mzteadau Nyz Gct*
- ¹ Yawe myatxlz-esz'ngr. X takitrde nzglqlz-krgu nide
Mz mzteadau nyzde kc tqycom Saeon, newz kxtr nyzde.
- ² Nide king kx rngisc zmatq. X Newz Saeon myatxlz x mzte opx.
X Mzteadau nyzde rkatrpz nzabrtzkr leplz mz nrlc tqlvzo.
- ³ Gct aelwapxpe-ngrde kx trpnzngr da kx nakx mz drtqgu,
Mz nzmnccpx-krmgu badr mz lrpalvc nyzdeng mz mzteadau lc.
- ⁴ Kzdung king nzvzmqng nztung me esz'.
Nzrpilr naotang badr lr mzteadau lc.
- ⁵ A' kx nzmcldr nzmatq-zlwzkr mzteadau Jerusalem,
Nzkctipx-ngrdr x sc tzdwapeng mz zmwxlr,
- ⁶⁻⁷ Kc tqprtilzle nidr
Apule zvetq ngr drtq olvz kx narmika.
X nzrnrci-lzbqng
Apule lcsu kxrtcnengr srkau ngr nounenq.
- ⁸ X mzli lcpwz, tqmnc-ngrgu mzteadau nyz Gct rgu,
Sc tqmcpe-kzku kx Yawe nide Gct kc tqrnir.
X atu-amqngi-zvzle mzteadau lc,
Da kc tzwai nzyapwxtipxkr melrmqgung le mzli kc.

- Mangr-nzangiongr Gct*
- ⁹ Gct, aoti zvz drtwrgr nzaodu-krm
Mz nzvztr-krgr Mangr-nzangiongr nim.
- ¹⁰ Leplz amrlx mz nrlc tulvzo sa naglqlzlr nim mz nxzlr-krdr nzmyalz-krm.
Murde nzaclve-angidr-krm tubq.
- ¹¹ X nigr lr Israel amrlx nzabrtz-ngrgr kz
Nztubqkr da kx pipxq.
- ¹² Nigu leplz neng Gct, naolvxtiku Jerusalem,
X nabrti mzku mrkcng tztu-ngrdr kxnzaukz nedeng.
- ¹³ Naobqlvzti-zpwxku drkq ngredeng x nzmqngikr lrpalvc ngredeng,
Murde nayapwxtipx-zvzbz mz doa ne doa negung.
- ¹⁴ Nzmyalzkr Gct rgu sc tqaelwapx-lzbqng mz mzteadau lc.
X sc tqmailzle nigu tqyc tqyc.

Sam Kranzpu-pwx-nrade-rpwxmz (49)

Leplz Amrlx Sa Nabzng
Nabz ne nqvi lr Kora.

Narnnbr Ngr Nzlu-alongr

- ¹⁻² Lalztqmamu x xlrmamu natqnge, nimu neidung mz nrlc tulvzo,
Kxmule-esz' nimu kxszetung, leplz txneng, bcnyrng, x kxtrnzrngis-cung.
- ³ Murde natqnge otxpx,
X alvztr-ngrne nzyrplapxngr,
- ⁴ Mz nzpipx-krnge natq lrtzlvz ngurgung.
Mурde nayokaetipxx drtwr ngrdr mz nabz nenge.
- ⁵ Kxmule-esz' kxpux mz nztu-ngalelvzkr enqmi rngeng ninge,
A' trmwxlrwxu.
- ⁶ Murde kxdrka'ngr lcng nzabrttzl drtwrdr mz trau,
X nzglqpx-lzbqng mz nzngini-krdr bcnyrng.
- ⁷⁻⁹ A' trpnzngr kxrkrlz nxzpepx-krde nzlu-krde esz'-krde.
Mурde ncblt trtakitrdeu nzkapx-krde narnnbr ngr nzlu-alongr kx yrlq
Gct,
Kxmule-esz' ka-atwrnr-ngrde trau x dztudeng amrlx.
Mурde rblx nxzpe-krde da kx na-arlapxle nide mz gq.

Leplz Amrlx Sa Nabzng

- ¹⁰ Leplz amrlx sa nabzng, kxmule-esz' kxnyrplapxng o kxnnzngqngung.
X dztudrung amrlx sa nabzszbzlr mz kzdung kz leplz.
- ¹¹ X kxmule-esz' mzli ka nzrnginyzng drtc',
A' gq lrdr dela nangipe ma nydzr mz nzmnc-alope-krdr elr.
- ¹² Da amrlx kcng tqmatq mz drtwrdr sa nayrkrpx-kzng.**
Leplz sa nabzng da kc tzwai animol amrlx.
- ¹³ Lrpzki r kxnnzngqngung kcng tzabrttzl drtwrdr mz nidr esz'-krdr x mz
dztudrung,
Yrkrtxpxpwz mz nzbzng.

Kxmule-esz' Bcnyrng

- ¹⁴ Apule kx nzbzng nide kxetu rdr kc tqmailzle nidr mz gq lrdr,
Mz nzapu-krdr sip.
X kxntubqng sa navzneng wq mrkc tzyrtzmqng namz ngrdr.
X mz nzmibi-krdr, nzyc-rlrubzng mz ma nydzr.
- ¹⁵ A' Gct sa naxpetrle ninge mz zmatq ngr nzbzng,
Mz nzarlapx-krde ninge mz gq.
- ¹⁶ Bzkq nabzmu talvzo mz nzmnc-krmu bcnyrng,
X nzkqlunepxkr dztudrung.
- ¹⁷ Murde rblx nzrtwzmingr dztung mz nzbzng.
Dztung la tqyc, a' nrkrdrq la namibi.
- ¹⁸ Kxmule-esz' bcnyrng nzabrtz-zvzng mzli kc tzlube-ngrdr,
X nzamatq leplz nidr murde sc tzakqlunepx-zvzlr dztudrung,
- ¹⁹ A' sa navzo-kzng mz gq, da kc tzwai melrmqdrng,
Mz nzmnc-alope-krdr mz nzlo.
- ²⁰ Da amrlx kcng tqmatq mz drtwrdr mane x nardr tryrplatrpwzu.**
Leplz sa nabzng da kc tzwai animol amrlx.

Sam Kranzpn-nzlvqn (50)

Blz Angidr Nangi Nzawi-ngrbz Mz Gct
Nabz ne Asaf.

- Nzyrlwrkr Leplz Neng Yawe*
- ¹⁻³ Yawe, nide Gct kc tqxplr esz'ngr.
X zluli rde pnamilxtile mzteadau Jerusalem kc tqlqngi.

- A' nrlc ycngrlrlzm mz nzvz-krmle,
 Mурde ныр wounepx kai mz nzangc-krde da amrlx,
 X nounenq o-nglelvzle nide.
 X kglele lr Heven mz nzayrlwr-lxblr-krdr leplz amrlx mz nrlc.
- ⁴ Navzmqng mz nzmc-krdr nztabqkr natqde,
 Mz nzpipx-krde nzvz-rbrkr leplz nedeng.
- ⁵ X rpibzle mz lr Heven kx, "Vzmimamu krkcng tzlxngitilr ninge,
 X drtwrgr badr tgesz'ti mz nzangc-krmlr bange blz krdr, murde
 nayrlwr-nglelvzlr ninge."
- ⁶ X lr Heven nzrpilr kx, "Gct, nzaclve-krm rsakrlrngr.
 Mурde tubqq mz nzryrlq-krm drtwr."

Gct Atubqtile Leplz Nedeng

- ⁷ Rpi Gct kx, "Leplz nengeng, xlrmamu natqnge.
 Mурde нинге Gct rmu x na-aelwa-ngrbo mrkc tqvz-rbriamu.
- ⁸ Animol kc tqngi blz tqkamamu bange, trngiu da kx myapxbz,
 Mz nzangco-zvz-krmamuleng mz olta.
- ⁹ X trngi-kzu da kx myapxbz nzangc-krmamu bange
 Gout x kzu kxncblongr dalr nardzng nyzmu.
- ¹⁰ Murde dalr peto amrlx nyzngeng,
 X wai-kzle kzu amrlx kcng tzmnncng mz siu r newz.
- ¹¹ Utc ngr peto amrlx nengeng,
 Nidr badr animol ngr nardzng.
- ¹² Nzmu nabrtalex x drtwrnge brlxkz tr-rlxpwc'u bamu da.
 Mурде nrlc nyznge x dalrdeng amrlx.
- ¹³ X trmuwxu ncvr kzu.
 X tr-rmnqwtxu mepyr ngr gout.
- ¹⁴ A' **blz angidr nangi nzawi-krmamu bange**,
 X nzangidati-krmu da kx esalz-ngrmamu bange.
- ¹⁵ X mrlz nzkrka'-krmamu bange mzli kc tqkxpu-ngrnamu,
 Mурде naglqlzamu ninge kalr mz nzarlapx-krnge nimu."

Alwx Ngr Kxdrka'-ngrng

- ¹⁶ A' rpibz Gct mz leplz kxdrka'-ngrng kx, "Trtakitrdeu nzyapwxti-zvz-krmu
 Loukxtr scnge,
 Mz nzycmnetr-krmu Nzryrngrkxtrng.
- ¹⁷ Murde ptxpx-ngrnamu nzatubqti-krnge nimu,
 X rtctx-ngrnamu natqnge.
- ¹⁸ Alwx ngrmung nidr seleng:
 Mrlzbz bamu nzngi-kzte-krmu ncblo kx pna da,
 X nzprtr-ngrbz mz leplz kcng tzrmwimi-abeaneng leplz kx trngiu
 krnalzdr.
- ¹⁹ Ycmnetrpwzmu mz da kxtrka,
 X naomu tresakiu nzsri-twzti-krdr da kx nzesabtingr.
- ²⁰ Pikiti-zvzamu kztemung,
 X pibqti-kzamu mzlemung.
- ²¹ Mz nzale-krmu da lcng sc tqmnc-lrpinebo.
 X rpiamu mz drtwrmu, mrlzm bange nzale-krmuleng.
 A' trtingr! Murde da kcng tqvz-rbriamu delcng tqaplxtipx-atebo bamu.

Yawe Sa Na-ayrplapxle Leplz Kalr

- ²² "Mzli ka natekqtramu nqmq krmu,
 Mурде ма tqodatitxne nimu

X sc trpengr kx na-arlapxle nimu.

X bzkq mrbrtr mz drtwrmu nzamatq-krmu ninge.

23 Blz angidr nangi nzawi-krmamu bange.

Murde narmctiamu nzarlapx-krnge nimu, mz nzvz-nqblq-krmu ninge."

Sam Kranzpnu-nzlvqn-nrade-esz' (51)

Nabz Leplz Kx Avzo-lzbq

Nabz ne King Devet,
kx yrle mz nibr nzycmne-plztitr-krbz Profet Neitzn mz nzmwimi-krde
Batsibz.

Wztibz nabznge

- 1 Gct, nayc mz drtwrm ninge,
X atubqtim nzvz-rbr-krngeng, murde aodu-zvzq ninge.
- 2 Wztibz nabznge mz alwx rngeng amrlx
Kcng tzatrkatilr ninge.
- 3 Murde opxpe mz mzke' nzvz-rbr-krngeng.
X plzpxbo nzesablqti-zvz-krnge nim,
- 4 X myapxbz nim kc tqxpqbrr-ngrne
Mz nzrnzlvzo-krnge Loukxtr scm.
Delc, tubqq mz nzhpi-krme bange kx vz-rbrx,
X mz nzyrlq-krm nzayrplapxngr ninge. *

Ipq Ninge

- 5 Mrlzm bange nzale-krnge alwx
Murde mzli kc tqmncbe-ngrne mz nelz lxenge, alwx rnge ycpebz.
- 6 A' suti drtwrm kx nabznge navz-nqblqle nzmncngr angidr.
Delc, na-alvztr-ngrn ninge murde nayrplapxx.
- 7 Wzti-angidrbz nabznge,
Murde nzprki-krnge namyaszpxle nqbya r nrc.
- 8 Ipq ninge murde na-abrtzx,
X drtwrnge kc tqavzbzme naelalz-mop.
- 9 Bzkq obqtrpeq nzmyakr drtqnge mz alwx rngeng,
A' ipqpxbz alwx rngeng amrlx.

Tekqtrpz Nabznge

- 10 Gct, tekqtrpz nabznge murde natubqx,
X amrnale mqngrnge murde navz-nqblqx nim.
- 11 Bzkq maszlrpx-ngrn ninge mz nzmncntr-krbo bam.
X bzkq katpxq nzokatrkr Mqngrm ninge.
- 12 Okatrp ninge murde na-abrtz-mou-ngrne nzarlapx-krm ninge,
X drtqnge navq mz nzvz-nqblqng natqm.
- 13 Zbz sa na-alvztrpo nqmq krmqng mz kxdrka'-ngrng,
Murde nayzlu-mopwzlr bam.

Nawztrpo Bam

- 14 Gct, bzkq ayzlu-mope' bange nzrnibq-krnge ncblo,
Murde na-angrlvzx nim mz nzarlapx-krm lc ninge.
- 15 Kxetu, okatrp ninge
Murde naglqlz-ngrne nim nivz lrm.
- 16-17 Trabrtz-ngrwq nzangco-ngrm blz mz olta nyzm.

* Sam Kranzpnu-nzlvqn-nrade-esz' (51):4 Rom 3:4

A' blz kx mrlzbz bam nabz leplz kx avzo-lzbq x plzpxle alwx ngrdeng.
 Delc trna-angco-ngrpwc'u blz mz olta nyzm,
 A' avzo-lzbq-zvztxpwo bam.

Blz Kxtubq

- ¹⁸ Krka'-ngrbo bam kx naokatrpe' nigr leplz nemqng
 Mz nzamqngi-mou-krgr drkq ngr Jerusalem.
¹⁹ Murde nzangco-krmgr blz mz olta nyzm
 navzpxm mz nzka-lzbq-krbzkr bam.
 X krklc blz kxtubq mz nzobq-krm.

Sam Kranzpnu-nzlvqn-nrade-li (52)

Kxetu Kx Atrkati Leplz Mz Zmatq Ngrde

Nabz ne Devet kx yrbzle mz kxrmailz ngr dzbe kxnnzngnrg, mzli kc Doek
 kc Edom tqvz-ngrbzle mz Sol mz nznpi-krbzle kx, "Devet mncpe ma ny
 Ahimelek."

- ¹ Kxmule-esz' nim ncblo kxetu kxmatq,
 a' bzkq glqpx-lzbqq mz da kxtrka kcng tqaleq,
 Murde Gct vz zvz nzangidati-krde natqde.
² A' ryrlq-zvzq drtwr kx na-atrkat-ngrn leplz.
 X mzli kc tqycmne-ngrn, natqm apule toki kx malc, mz nzbibqti-krm
 nidr.
³ Nzmrzl-zlwz-krbz da kxtrka bam myaszpxle da kxmrzl.
 X mz drtwrm, nzpokia-krm myaszpxle nznpi-krm da angidr.
⁴ Nim Mepokia,
 X abrtz-zvz-ngrn nzaetq-krbzme drtq leplz mz natqmng.
⁵ Delc sa nakilzpx-ngrm Gct nim ma nyzm mz nzodati-alope-krde nim.
 X sa na-ayrkpxbzle nzlu-krm mz nrllc ka.
⁶ X kxntubqng sa na-amrlue-ngrdr Gct nzayrplapx-krde nim.
 X sa nayrpalelvzlr nim mz nznpi-krdr kx,
⁷ "Mcamu ena ncblo kc trmnc-xgleleu Gct.
 A' axplr-lzbq mz nzatrkat-krde leplz x nztwz-krde trau kxkqlu mz
 zmatq ngrde."
⁸ A' ninge sa na-apux nc olivi kc dzbrde tqtu-amqngi mz nzmncpx-krmc
 Mangr-nzangiongr,
 Murde vz zvz nzbrtikr drtwrnge nzaodu-alokr Gct.
⁹ Delc Yawe, sa na-awi-zvz-ngrbo bam da kcng tqaletiqng.
 X sa napipxbo mz leplz nemqng nzmrzl-zlwz-krm.

Sam Kranzpnu-nzlvqn-nrade-tq (53)

Nzngqngukr Kxtrnzrlxngitiung

- Nabz ne Devet kx yrbzle mz kxrmailz ngr dzbe kxnnzngnrg.
¹ Leplz kx nzngqngung mz drtwrdr nzrpilr kx, "Trpnzng Gct."
 Leplz lcng nzvz-rbrng x nzale-tpwzng da kxtrka zlwz.
 Trpnzng leplz lcng kxtubq.
² Gct mncom Heven, x sc tqmcomle leplz amrlx,
 Mz nzmc-krde neke yrplapx mz nzrtangrti-krde nide.
³ A' nzesablqtilr Gct amrlx ngrdr
 x drtwrdr esz'ti mz nzale-krdr da kxtrka.
 Trpnzng nidr kxesz' kxtubq. [☆]

- ⁴ Delc tqrpingr Gct kx, “Leplz lcng tztrkang tznibqtixdr leplz nengeng
Nzapulr kx nzrnibqng da kx nangqdr.
X mrbrrt mz drtwrdr nzkrka'-krmlr bange.
?Myx kxmule, trnzkrklzlu da kxtubq?”
- ⁵ A' mzli ka nzmwxlr-zlwz-krdr myaszpxpele mzli kc.
Mурde Gct sa napxtpx-ngrde enqmi rgung.
X drtqdr sa namya mz nzaovxio-alokrgu nidr.
X namz ngrdr sa narlxbuliane-ngrbz Gct mz nrlc.
- ⁶ Sutitx zlwz drtwnge kx Gct rgu kc Saeon na-arlapxle leplz nedeng.
Mурde mzli kc nayzlu-mou-ngrmle, namnc-zpwxku badr.
X nigu lr Jekop drtwrgu sa naelalzm.
X nigu lr Israel sa na-abrtz-ngrgu da lc. [◊]

Sam Kranzpnu-nzlvqn-nrade-pwx (54)

Nzbrtikr Drtwrgu Gct Nzaovxio-krd Enqmi Rgung

Nabz ne Devet kx yrbzle mz kxrmailz ngr dzbe kxnzngnrg, mzli kc lr Sifz tzvz-ngrbzlr mz Sol mz nzhpi-krbzlr kx, “?Krlzq kx Devet sc tqmnc-kapq mztea nyzgr?”

- ¹ Gct, arlapx ninge mz zmatq ngr drtqm,
X aelwzpx-ngrbz nztubq-krnge mz nztu-krbzme mz nibrnge.
- ² Xlrm natqnge
Mz nzkrka'-krbo bam.
- ³ Kxnzaetqng drtq nzglqpx-lzbqng nzrpilr natzlr ninge,
X krkcng tzxpqbrr-ngrdr nim, nzrpilr nanibqlr ninge.
- ⁴ A' nim Gct kx okatr-zvzle ninge,
Mz nzngini-krm Kxetu rnge kc tqmnc-xgle-zvzx.
- ⁵ Yawe Gct, ayzlu-mopwz badr da kxtrka kcng tzwaisr-ngrdr ninge.
X nibq nidr murde nim kx brti drtwr.
- ⁶ Zbz sa na-abrtzlvzx nzhka-krbo bam blz mz olta nyzm.
X na-awi-ngrbo bam nzmrlz-zlwz-krm.
- ⁷ Murde arlapxq ninge mz nzkxpu-krngeng amrlx,
X okatrq ninge mz nzaovxio-krnge enqmi rngeng.

Sam Kranzpnu-nzlvqn-nrade-nzlvqn (55)

Kxdrka'-ngrng X Kxamwale Kztede

Nabz ne Devet kx yrbzle mz kxrmailz ngr dzbe kxnzngnrg, mz nzayrningr gita.

Nzkrka'ngr

- ¹ Gct, xlrm nzkrka'-krbo bam.
X bzkq drtqm satrp nzycmne-krbo bam.
- ² Lalztqm bange x ayzlum natqnge,
Murde nabzng tropxpeu mz nztalvzo-krde.

Nzetqkr Drtq

- ³ Enqmi rngeng nzrkatrpqng bange nzkxpungr,
Mz nzxngitr-krnge nzycmne-kato-krdr,
Mz nzrnzlvzo-krdr ninge,
X nzobq-krmlr bange mz zngya.
- ⁴ Nelznge vzdz-zlwzm,

[◊] Sam Kranzpnu-nzlvqn-nrade-tq (53):6 Sam 14:1-7

- Murde ycpe pipz nzbz-krnge.
- ⁵ Rnrcti-lzbqpenge mz zmwxlr,
X nrkrdrtqnge esz'pe-ngrde.
- ⁶ X rpx mz drtwrnge kx, "Nzmu nabxnge naycbzle, da kc tqwai bona,
Nalvcx x nartangrx me namnc-zpxw-ngrne.
- ⁷ Nalvctr-rlrux lzke,
X namnc-lrpix esz'-krnge mrlcde.
- ⁸ Na-anitxpwo nzrtangrti-krnge me narlakitrx
Mz tewa x nounenq."

Nzkrka'ngr

- ⁹ Kxetu, akipx kxdrka'-ngrng mz nzarlxlvrti-krbzme natqdr.
Murde nzota-zvzng x nznani-lzbq-zvzng mz mztea.
- ¹⁰ Mz nrlckxngrlx x nrlckxbq
Mztea esz'tx-ngrpwz nzxpqbqlrngr lou x nzkxpungr.
- ¹¹ Nzodangr prtz-zvzm mrlcng kqlu mz mztea.
X me nzamwangr da tresakipxpuu nzpokiangr x nzangqngutingr leplz.

Kxamwa Kztede

- ¹²⁻¹⁴ Kztende, mzli kc ryapwx-angidrki mz nzodu-krgi,
X vztr-lxblrki mz Mangr-nzangiongr Gct.
A' mzli ka trngiu enqmi rnge kc tqxtrnga-ngrde ninge,
A' krlc nim, kc tqmuki me esz' x line-zvzki.
X trngiu kxpptxpx-ngrde ninge kc tqyrapalelvzle ninge,
A' krlc nim, mrlxkzende.
Mz nzatrkatikr enqmi rnge ninge
Nabzng e trtalvzou x krlzx nzmnc-kapqng,
A' nzamwa-krm lc ninge, kx mzlenge,
Delc tqvztx-zlwzng drtwrnge.

Nzkrka'ngr

- ¹⁵ Gct, ayrkrpx-anibz enqmi lcng nabzdr x nzao-krdr drtwrdr tqdrka'ngr,
Murde napwrkilvc-ngrdr nzbz-krdr.
- ¹⁶ Yawe, mzli kc nayrni-ngrbo bam,
Krlzx kx sa na-arlapxq ninge.
- ¹⁷ Murde sa naxlrme natqnge mz nourla, bea, x mz nrlckxbq,
Mz nzkalz-zvz-krbo bam nzlckr drtwrnge x ntalvzokr nabzng.
- ¹⁸ Kxmule-esz' enqmi rngeng nzkqlung, a' mzli kcpe naota-ngrgr badr,
Sa na-amnc-zpxwq ninge mz mzlidr.
- ¹⁹ Murde nim Gct kc nzaclve-krde tqyc tqyc.
X sa na-ayzlume natqnge lcng mz nzaovxio-krm nidr mz nzotangr.
Murde nzpoxpx-ngrdr nztekqtr-krdr nqmq krdr,
X trnzamrlue-kzlu nim.

Kxamwa Kztede

- ²⁰ Mrlxkzende lc, mzli kc nigr badr dzbede kxesz', a' mzli ka yrlqpx-lzbq
mz nzesz'tikr drtwrgr badr.
A' se tqrtwztipte nigr zngya tqotapekr badr.
- ²¹ Nzprlxpx-krde nivz narpi-ngrbz nide ncblo ngrde,
A' mz nabzde la poi kx mu ncblo.
Mz nzycmne-krde nide pakrle,
A' natqdeng malc apule toki r vea.

Nzkrka'ngr

- ²² Yawe, napixbzkr nzkxpu-krgrng bam, murde nalolvz-amqngiq nigr.

X tr-rlrpx-ngrwq leplz kxnztubqng nzaxtx-krbzlr nzlxngiti-krdr nim.
 23 Murde sa nartco-ngrn mz gq lrdr
 Krkcnq tzrnibqng x tzpokiang,
 Mzli lc tznginibe-ngrdr obla.
 A' sa na-abrtr-zvzbo drtwrnge bam.

Sam Kranzpu-nzlvqn-nrade-esz'mz (56)

Mzli Kzniqe Mwxlr-ngrne, Abrtrpo Drtwrnge Bam
 Nabz ne Devet kx yrbzle mz kxrmailz ngr dzbe kxnzngrng,
 mzli kc tzolvzngr lr Filistia nide mrkc mztea Gat.

- Okatrp Ninge*
- 1-2 Yawe, nayc mz drtfrm ninge.
 Mурde enqmi rngeng nzkqlu-zlwzng.
 X vz zvz nzmaneuti-krdr ninge x nzatrkti-krdr ninge,
 Mурde nzrpilr na-aovxiolr ninge mz nzrnzlvzo-krdr ninge.
 3 A' mzli kzniqe mwxlr-ngrne,
 Abrtrpo drtwrnge bam.
- 4 **Trmwxlrtiwxu zmatq ngrdr murde abrtrpo drtwrnge mz natqm,**
Nim Gct kc tqglqlz-zvzx.
- 5 Yawe, enqmi rngeng vz zvz nzrtangr-krdr drtwr kx na-atrkti-ngrdr
 ninge,
 Mz nzrkatr-zvz-krmlr nzkxpungr bange.
- 6 X nzyrlwr-lxblrng me nzmnc-kapq-ngrdr,
 Mz nzaukzti-krdr ninge, murde nanibqlr ninge.
- 7 Bzkq rlr-ngrbzme nzdwa-krdr,
 A' ayrplapxng mz zngya ngr drtfrm.

- Abrtrpo Drtwrnge Bam*
- 8 Krlz-angidrq nzsrrkrkxkr drtqnge.
 Mурde aplxtipxpeq nztaliokr drlemzke' amrlx, mz nzyrtio-krmlr mz
 buk scm.
- 9 X krlz-zpwxx kx mz nzkqle-krnge nim, sa navzme x enqmi rngeng
 nadwaszlr ninge.
 Mурde tu-zvzme mz nibrge.
- 10-11 **Trmwxlrtiwxu zmatq ngrdr murde abrtrpo drtwrnge mz natqm,**
Yawe, nim Gct kc tqglqlz-zvzx, x brti drtwrnge natqm amrlx.
- 12 X sa na-alebo bam da kcng tqpibo,
 Mz nzsrrka-krbo blz ngr nzawingr.
- 13 Awi mz nzarlapx-krme ninge mz mq enqmi rngeng.
 Mурde trpnzngr nznibq-krdr ninge,
 X trmetxpou badr.
 Gct nawztr-zvzbo bam, nzmnc-krnge mz nrlc.

Sam Kranzpu-nzlvqn-nrade-rlimz (57)

Batrpz Mz Lr Nrlc Tuvzo Nzmc-krdr Nzaovxio-krm
 Nabz ne Devet kx yrbzle mz kxrmailz ngr dzbe kxnzngrng,
 mzli kc tqrlatr-ngrde mz butqbr mz nzdwasz-krde King Sol.

- Nayc Mz Drtfrm Ninge*
- 1 Gct, nayc mz drtfrm ninge mz nzaelwa-krme bange nzmrlz-esz'ngr-krm,

Murde mnc-xglex nim mz nzmnc-zpx-krnge mz mzlr nzkxpungr kxtrka.
X na-apux nei bona kc tqmnclzbz mz nabx lxede,
Mz nztu-krme mz nibrnge, navz navz mzli kx ayrkrpx-ngrn nzodangr.
² Gct, myalz-esz'ngrn, x sa nakqlex nim,
Murde angidati-zvzq me pnz drtwrm mz nzmnc-krnge.
³ Sa na-ayzlume natqnge Heven mz nzarlapx-krm ninge.
X na-amyatibzme drtq krkcng tzrnzlvzolr ninge.
Murde aodu-zvzq ninge,
X angidati-zvzq natqm.

Nzrtxtiolar Ninge Br

⁴ Nztu-ngalelvzlr ninge ncblo ngr nzodangr.
Spiz x nipna scdr nzapulr nqngi kx malc,
X natqdr nzaetq-krdr drtq apule nzrluplxtikr toki r vea.
⁵ **Lr Heven namclr nzmyalz-esz'ngr-krm.**
X lr nrlc namclr nzaovxio-krm.
⁶ Kxmule-esz' nabznge talvzo zlwz murde enqmi rngeng nzrtxtiolar ninge
br,
A' awi Gct, kx naprtz-moung mz trtxki kx nzamwiti-ngrdr ninge.

Sa Na-angrlvzx Nim

⁷⁻⁸ Sa na-angrlvzx nim mz nabznge atwrnrngr mz nzayrni-krbo gita bam.
Murde abrtr-zvzbo drtwrnge bam.
Nilz r nepi adwalzmle ninge mz zbz kang kqlu.
A' mz nzdwalz-krmc mz nourla kx topwz,
Na-apule nabz nenge adwalzmle nepi,
Mzli lc naglqlzpx nim.
⁹ Kxetu, sa na-awibo bam mz mzlr lr mrkzbleng,
X na-angrlvzx nim mz mzlr neidung.
¹⁰ Murde nzaodu-zvz-krm myalz krlzlzle bongavz,
X nzangidati-zvz-krm natqm. [◊]
¹¹ **Lr Heven namclr nzmyalz-esz'ngr-krm,**
X lr nrlc namclr nzaovxio-krm. [◊]

Sam Kranzpnu-nzlvqn-nrade-rtqmz (58)

Kxdrka'-ngrng Nzapulr Ningidoe Kcng Tzrmakxng
Nabz ne Devet kx yrbzle mz kxrmailz ngr dzbe kxnzngrng.

Kxnzetung Kxdrka'-ngrng

¹ ?Kxnzetung, myx kxmule, nzaclve-krmu tubq,
X rsakrlrngr angidr?
² Trtingr! Murde yrlqamu drtwr kx atrkatile leplz nemung,
Mz nzaetq-krbzmz drtqdr mz nrlc ka.
³ Nimu kxdrka'-ngrng. X ale-zvzamu da kxtrka,
Yzuo pnz mzli kc tzmcngr mzpu.
⁴ Apuamu ningidoe kcng tzrmakxng
Mz nzatrkat-krmu leplz.
⁵ X apu-kzamu kxnradrtqdr ngq murde ptxpx-zvz-ngrnamu nzxlr-krmu
nzyrni-krdr,
X nzayzlu-krbzmz natqdr.

[◊] **Sam Kranzpnu-nzlvqn-nrade-rlimz (57):10** Sam 36:5; 57:10; 71:19; 103:11 [◊] **Sam Kranzpnu-nzlvqn-nrade-rlimz (57):11** Sam 108:1-5

Nzayrplapxkr Gct Kxdrka'-ngrng

- ⁶ Yawe, ayrplapx leplz lcng tzapulr ningidoe, mz nzyrvilz-krme nipna scdr.
X mz nzapu-krdr poi kz peto, taglctr-kzpz nqngidr.
- ⁷ Mrlzvxitx nzbatr-krbzme nzmyakr nipna scdr,
X nzmrbr-krdr na-apule lue kc tqmrbrlqo mz drtc'.
- ⁸ X mrlzvxi kz nzapu-krdr zwqwq r wagq kc tqlprnebz mq mz nzngrla-
krde x mz nibrde sc tqmrbrrpe mou mz nziokr nepi le.
X na-apu-kzlr itoto kx bz murde nzmika mzli kc tqpoobe-ngrde.
- ⁹ Gct, mzli kc tzlube-ngrdr, apusrngr nidr nabr kc tzikzti,
Mz nzodati-krm nidr mz zngya ngr drtwrm.

Nzabrtzkr Leplz Neng Gct

- ¹⁰ Zbz nigr kxnztubq nemqng sa na-abrtz-zlwz-ngrgr nznibqti-krm kx-
drka'ngr lcng.
X sa naelalvzkr nzyrlekr mepyr ngrdr.
- ¹¹ X sa napibzkr bam kx, "Gct, da zpwxtx! Sa nakabzme da kxmrlzting mz
leplz kxnztubqng,
Murde nzaclve-krm lr nrlc tubq-esz'ngr."

Sam Kranzpu-nzlvqn-nrade-rpwxmz (59)*Kxdrka'-ngrng Nzapulr Kuli Kzpeto*

Nabz ne Devet kx yrbzle mz kxrmailz ngr dzbe kxnzngnrg,
mzli kc King Sol tqatwzlr-ngrde ncblo mz nzaukzti-krdr ma nyz Devet,
murde nanibqlr nide.

Kuli Kzpeto

- ¹ Gct rnge, arlapxbz ninge mz enqmi rngeng,
X tum mz nibrnge mzli kc naoti-ngrmlr ninge.
- ² Arlapx ninge mz kxdrka'ngr lcng,
Tzkrlzlr nzrnibqng leplz.
- ³ Yawe, obqm! Ncblo lcng tzyrlwr-lxblrng nanibqlr ninge.
A' trpnzng da kxtrka kx alebo badr.
- ⁴ Kxmule-esz', a' se tzoliqtilr nztz-krdr ninge.
Tulzm x vzm mz nzokatr-krm ninge.
- ⁵ Yawe, nim Gct kc tqrnir, Gct r lr Israel. Dwalzm mz nzayrplapx-krm lr
mrkzbeng.
X bzkq ycngr drtwrm krkcng tzryrlqng drtwr kxtrka.

Nzyzluti-zvzmlr mztea mzli kc milzpq,**Nzapulr kuli kzpeto kcng tzkclwzng mz nzvzne-krdr mztea.**

- ⁷ Drtwrdr nzamqmqlr x natqdr nzapulr toki r vea kxmalc.
Mz drtwrdr nzrpilr trpnzng kx rkrlztrpz x trpnzng nzayrplapxng
nidr.
- ⁸ A' nim Yawe, yrpalelvzq kxnzmnc-mrbr lcng,
X xtrnga-ngrn nidr.

Temz Ngr Lomrgr

- ⁹ Gct rnge, abrtr-zvzbo drtwrnge mz nxzplk-krm,
Murde nim lrpalvc nyng.
- ¹⁰ X krlzx kx sa na-aovxiox enqmi rngeng,
Murde naokatrq ninge mz nzaodu-zvz-krm.
- ¹¹ Yawe, nim temz ngr lomrgr kc tqyrrputrngr nipna.
Nibqti nidr, murde leplz nengeng nadcpx mz drtwrdr

- Kx nim Gct kc tqayrplapxle kxnzaleng alwx.
 Aodaliti nidr mz zmatq ngrm, murde nataong mz drtc'.
¹² Batrpz mz nzglqpx-lzbq-krdr nzatao-mou-krde nidr.
 Murde mz nzycmne-krdr natqdrng ngi dalr alwx, mz nzrpibqtingr x
 nzpokiangr.
¹³ Odati nidr mz nzmiltxo-krm nidr mz zngya ngr drtwrm.
 Murde leplz nakrlzlr kx nim Gct kc tqaclvele lr Israel x lr nrhc tulvzo.
¹⁴ **Nzyzluti-zvzmlr mztea mzli kc milzpq,**
Nzapulr kuli kzpeto kcng tzkclwzng mz nzvzne-krdr mztea.
¹⁵ Nzrtangrng nadr dakxnzng me yctxpqng,
 X drtwrdr nzamqmqlr mz trnzkrilc-kru nelzdr.

- Lrpalvc Nyznge*
- ¹⁶ A' sa nangr-kato-zvzx mz nourla kang kqlu,
 Mz nzpipx-krnge zmatq ngrm x nzaodu-zvz-krm.
 Murde apu-zvzme bange lrpalvc nyznge
 Kxrlakitrz mz mzli r nzkxpung.
¹⁷ Sa na-angrlvz-zvzx nim, Gct kc tqaodu-zvzle ninge.
Murde nim lrpalvc nyznge kx xplr-esz'ngr.

Sam Kranzpnu-esz'mz (60)

Glalzm Nc Nqngq Bagr

Nabz ne Devet kx yrbzle mz kxrmailz ngr dzbe kxnzngnrg, mzli kc ami nzling nzrpilr narnzlvzo-ngrdr Israel nzprtrpqng mz kzdq nrlar Israel. X ami ngr lr Edom nzprtrpqng mz kzdq nrlarde, Nabzlwa ngr Dcpwe, mrkc Joab kc tqmailzle ami ngr Israel, tzabz-ngrdr ncblo siu-nzpnu-esz'-nrade-li (12,000).

- Ngrlrvea Ngrr*
- ¹⁻³ Gct, mz nzngyatikr drtwrm nigr, drtqm satrpem bagr.
 X batrpeme mz enqmi rgrng nzprtr-krmlr mz nzawxo-krdr bz ngr nrhc
 nyzgr.
 Nzatrkaty-krdr nigr apule nengq mz nzaglwiti-krde drtc'.
 X da amrlx trnzaxvctrpeung.
 Dea-ngrrgr vznepe mz nzvzne-krgr apukr ncblo kxnzrmnqng,
 Mz nzaetqtitx-zlwz-krbzme drtqgr, nigr leplz nemqng.
 A' suti drtvrgr nayzlu-mopwe' bagr
 Mz nzamrlz-mou-krm drtc' nyzgr, murde namnc-zpwx-moukr.
⁴ Nim Ngrlrvea ngrrgr. Glalzm nc nqngq bagr, nigr kcng tzamrluelr nim,
 Murde navzmgr bam mz nztu-mou-krgr me esz'.

- Gct Ayzlu-ngrmle Natqgu*
- ⁵ Mz zmatq ngrm, arlapx nigr kcng tqaodu-zvzq,
 X ayzlu-ngrm natqgr.

- Da Kc Tqpi Gct*
- ⁶ Gct, natqmqng nzvzpxmqng mz Mangr-nzangiongr, mz nzrpi-krdr kx,
 "Mzli kc na-aovxio-ngrne, sa na-akipxbo mz leplz nengeng
 Drtc' kcng mz nrlar LueJodzn rllr.
⁷ Murde neidu lr Gilead nengeng.
 X nqvi lr Manase nenge-kzng.
 X neidu lr Efrem tum mz nibrnge.
 X nqvi lr Judz kx na-aclve-zvzng mz zmatq rnge.

8 A' enqmi rmung trna-aovxiolru nimu.
 Murde lr Moab sa nawztrpqng bange
 X lr Edom sa nametxmqng bange.
 X sa namalqlvzx nzmilxtxo-krnge lr Filistia."

Natq King

9 ?Myx kxmule, sa na-atutrq natqm lc mz nzokatr-krm ninge
 Nzptrr-krnge mz lrpalvc ngr mzteadau nyzdr lr Edom?

10 Murde mzli kc ptxpxpe-ngrn nigr,
 X trokatrwq ami negr mz nzotangr.

11 Gct, okatrp nigr mz nzota-krgr badr enqmi rgrng mzli ka.
 Murde mane nzmnnc-xgle-krgr ncblo nzarlapx-krdr nigr.

12 X krlzkr kx mz nzmnnc-krme bagr,
 Sa narnzlvzokr enqmi rgrng mz nzokatr-krm. [◊]

Sam Kranzpnu-esz'mz-nrade-esz' (61)

Vzmibz Ning Mz Butqbr Kxmqngi

Nabz ne Devet kx yrbzle mz kxrmailz ngr dzbe kxnzngrng.

1 Gct, xlrm nzyrni-krnge,
 X lalztqm mz nzkrka'-krnge.

2 Kqlex nim murde mncx esz'-krnge, x nabznge talvzo zlwz.
 Vzmibz ninge mz butqbr kxmqngi.

3 Murde nim lrpalvc nyznge,
 Me rlakitrx mz mq enqmi rngeng.

4 Rlr-ngrm bange nzmnncpx-alo-krmc mz ma nyzm.
 Murde na-apux nei kio kx mnc-kapqlzbz mz nabx lxeade.

5 **Gct, abrtzlvzq nzesalz-krnge nzangrlvz-zvz-krnge nim.**
 Murde krle takitrde leplz kcng tzamrluelr nim.

6 Kam bange nzlungr kxboi, ninge king nem,
 Murde nzmnnc-krnge navz zvz.

7 Okatrp ninge mz nzaclve-angidr-krnge leplz nengeng mz nzmnclz-krbo
 mz zmatq ngrm.
 Ayrbqpx ninge mz nzaodu-zvz-krm ninge x nzangidati-krm natqm.

8 **Delc na-angrlvz-zvzx nim,**
Mz nzale-krnge da kc tqesalz-ngrbo bam.

Sam Kranzpnu-esz'mz-nrade-li (62)

Mnc-xgle-zvzku Gct Txpwz

Nabz ne Devet kx yrbzle mz kxrmailz ngr dzbe kxnzngrng.

Mnc-xgleamu Gct

1 **Gct txpwz kx mnc-xgle-zvzx mz nabznge,**
Murde nzmnnc-zpx-krnge vzpxm bade.

2 **Nide butqbr nyznge x mevalu rnge.**
Nide lrpalvc nyznge kx tu-amqngio-ngrne.

3 Delc nimu kxdrka'-ngrng bzkq tz-zvzpeamu ninge mzli ka trxplrpewxu.
 X bzkq apusr-ngrnamu ninge nzawxo-krmu ma kx blzlongr.

4 Ryrlqamu drtwr ngr nzapotxo-krmamu ninge me matq kc tqmnco-ngrmc.
 X abrtzlvzamu nzpokiatitr-krmu ninge.
 Murde nivz lr naomu prlxmamu bange,

[◊] Sam Kranzpnu-esz'mz (60):12 Sam 108:6-13

A' mz nabzmu la, ngyati drtwrmu ninge.

Na-abrtxtrpwzmu Drtwrmu Mz Gct

- 5 **Gct txpwz kx mnc-xgle-zvzx mz nabzngē,**
Mурde nzmnс-zpx-krnge vzpxm bade.
- 6 **Nide butqbr nyznge kx abrkitrx drtwrnge.**
Nide lrpalvc nyznge kx tu-amqngio-zvz-ngrne.
- 7 Nzarlapx-krnge x nzmrue-krnge yctr txpwz bade,
Mz nzngini-krde butqbr nyznge kxmqngi kx rlakitr.
- 8 Leplz nengeng, mz nzangidati-krbzle da kx yc mz drtwrmu, na-abrtxtrpwzmu drtwrmu bade.
Mурde nide txpwz me rlakitrku.

Bzkq Brti Drtwrmu Doa O Da Kzbleng

- 9 A' bzkq brti drtwrmu leplz, murde nigu amrlx apu-txpwzku zsikapu,
Kxmule-esz' nigu kxnzetung o leplz txneng.
Mурde nzmu na-arsakrlrku nzmrlekr Gct x nigu,
Nide kx mrle txpwz, a' nginigu da-nrbalq.
- 10 X mz nzrtwz-krmu da kx suti drtwrmu, bzkq brti drtwrmu nzamwxlr-krmu leplz x nzpna-krmu dztudrng.
X kxmule-esz' nimu bcnyrng, bzkq abrtrpzmu drtwrmu mz trau scmu.
- 11 A' na-amqtrku drtwrgu mz nxzlr-krgu natq lcng.
Mурde Gct txpwz kc tqmatq.
- 12 X da kx myapxbz, nzaodu-krde nigu tresakiu.
Rpimle kx, "Mzli lcde, nzayzlu-krbo da mz doa navz-nqblqle da kx aleleng mz nrlc ka."

Sam Kranzpnu-esz'mz-nrade-tq (63)

Sutix Zlwz Drtwrnge Nzxpathr-krm

Nabz ne Devet mzli kc tqmnc-ngrde lzke ngr Judz.

- 1 Gct rnge, rtangrtix nim.
Mурde nim kc tqbatrple nzesatpx-zpxkr drtwrnge.
- 2 Apux ncblo kx drtwrde brlxkz x mzte tclvr mrkc lzke,
Mz nzsutitx-zlwzkr drtwrnge nzmnctr-krbo bam.
- 3 Suti drtwrnge nxngi-krbo nzulrm Mangr-nzangiongr
Mz nzmc-krnge zmatq x zluli rm.
- 4 Nzkrlz-krnge nivz lrm myaszpx-zlwzle nzlu-krnge mz nrlc.
X glqlz-zvzx nim mz nzaodu-zvz-krm ninge.
- 5 X sa na-awi-zvzbo bam
Mz nzglalz-krbo mqnge mz nzkrka'-krbo bam.
- 6 Drtwrnge sa naesatpx zpx nxmnctr-krbo bam.
X sa na-angrlvzx nim mz nabz kxyrlvi.
- 7 Mz nrlckxbq kang kqlu aoti zvz drtwrnge nim,
Vz vz nrlc ngrlxtpx.
- 8 X angrlvzx nim mz nzabrtzng
Mурde okatr-zvzq ninge x tu-zvzme mz nibrnge.
- 9 Mnc-amqngitrpo bam,
X lolvz-amqngiq ninge mz mqm kx xplr.
- 10 A' ayrkrtxong mz drtc'
Krkcnг tzrpilr nanibqlr ninge.
- 11 Nibqting nidr mz vea,
Mурde kuli kzpeto nangqtilr namz ngrdr.

- ¹¹ X ninge, king nem, sa na-abrtzlvzx nim,
Mурde ngi-batrpe' nzaovxio-krnge.
X krkcng tzabrtzpzlr drtwrdr bam, sa nabilvzlr nim.
Murde sa nangi-batrzpzme mz kxnxpokiang nzmnnc-lrpi-krdr.

Sam Kranzpnu-esz'mz-nrade-pwx (64)

Drtwr Kxtrka Trngida-pnzu

Nabz ne Devet kx yrbzle mz kxrmailz ngr dzbe kxnzngnrg.

Enqmi Rngeng

- ¹ Gct, kxputxpex. Xlrm nzkrka'-krnge.
Mwxlrti-zlwzx enqmi rngeng. Arlapx ninge.
² Tum mz nibrnge murde kxdrka'-ngrng nzyrlqng drtwr
Mz nzesabrti-krdr ninge.
³ Nzxngitrkr leplz nzycmne-krdr apule nzrlakikr toki r vea kx malc.
X nzpnz-krdr leplz mz natq kxtrka apule nipna.
⁴ Nzmnnc-kapqng mz nzpnz-krdr kxnztubqng mz natq ngr nzpokiangr.
X trnzmxwlrungr nzaniti-krdr nzatrkat-krdr nidr.
⁵⁻⁶ Nzapqtrlr drtwrdr mz drtwr kxtrka kx nzyrlqlr.
X nzamyatxlzpwzlr nzrkrkzkr leplz,
Mz nzrpi-lxblr-krdr kx, "Na-amwiku trtxki mz nzesabrti-krgu leplz.
X nzbrngzti-krgu lc da kxvz-rbr trpnzngr kx narmc x kx narkrlzti."

Gct Rnge

- ⁷ A' Gct sa na-ayrplapx-anile nidr, na-apule kx pnzle nidr mz nipna scde.
X napwrkilvc-ngrdr nztupekr nipna ngrdr.
⁸ Sa na-atrkatile nidr murde nzrpiting natq kxtrka.
X sa nayrpalelvzng krkcng tzrcmcng nidr.
⁹ X leplz amrlx sa namwxlrlilr Gct.
X sa na-aoti drtwrdr da kxmatq kc tqaleleng x nayapwxtipxlr.
¹⁰ Leplz kxnztubqng sa na-abrtzlvzlr Yawe x sa na-abrtrpzlr drtwrdr bade.
Leplz kx nabzdr lq sa na-awibzng bade.

Sam Kranzpnu-esz'mz-nrade-nzlvqn (65)

Kxaodu, Kxrpalz, Kxrka

Nabz ne Devet kx yrbzle mz kxrmailz ngr dzbe kxnzngnrg.

Kxaodu

- ¹ Gct, nzglqlz-krgr nim Jerusalem tubq-esz'ngr,
X rpikr na-atutr-zpxkr nzesalz-krbzkrng bam.
² Murde xlrme nzkrka'-krgr,
Mz nzmnnc-xgle-krgr nim.
³ X kxmule-esz' nzvz-rbr-krgrng nzmrilvzlr nigr,
A' ipqpx zvz alwx rgrng amrlx.
⁴ Namrlz-ngrmle bagr, nigr kcng tqmcpxqng
X tqvzmitrqng Mangr-nzangiong nim.
Mурde sa namnc-zpxkr
Mz nzrtwzng da kxmrlzting mz ma nyzm.

Kxrpalz

- ⁵ Mevalu rgr, mzli kc tqyrni-ngrbzkr bam, ayzlume natqgr
Mz nzbatr-krme nzaovxio-krgr.

Lr mrkzbleng nzmnncng drtc' x trmctu mz nrlc tulvzo.
X sc tzabutr-kzpplr drtwrdr bam.

6 Murde mz nzxplkr-krm atulzq newz kxetuting,
Mz nzaelwapx-krm nzmyalzkr zmatq ngrm.

7 Aoq nrwrx mz nzyclwzkr srkau x aesakiq nzyrpukr natq nrc. [✡]
X amnc-nabuq leplz kcng tzxpqbrrlr-ngrdr nim.

8 Nzamrluengr nim mz nzetukr zmatq ngrm.
X mz nrlc tulvzo nzmalqlvzlr da kcng tqaleqng.

Kxrka

9 Gct, aclve-angidrq nrlc mz nzadc-krm tewa,
Murde dakxnzng nalvc angidr mz drtc'.

10 Tewa lc tqayayrtile drtc' nyzgr,
Murde da kx petikr mz nrlanc nyzgr nalvc pulzmqng.

11 Ycngr dakxnzng kxkqlu mrkeng amrlx tqvzkiq.
X bxli scgrng yrbuti zvz mz da kxmrlzting.

12 X abrtz-zlwz-ngrgr
Nzmc-krgr nzplckr nra nounc nyzgrng.

13 Angrlvzkr nzyrlvzbqtkr animol negrng,
X malqkr murde nrlanc nyzgrng brtipeng x ycpe pipz nzrkqlzngr.

Sam Kranzpnu-esz'mz-nrade-esz'mz (66)

Nzayzlu-zvz-krbz Gct Natq Kxnztubqng

Nabz kx nzyrbz mz kxmailz ngr dzbe kxnzngnrg.

Lr Nrlc

1 Lr nrlc amrlx
Namalqlvzlr Gct,

2 Mz nzangrlvz-krdr nzmyalzkr drtqde,
X mz nzglqlz-krdr nide mz nabz kxyrlvi.

3 X narpibzku bade kx, "Da amrlx kcng tqaleqng nzkctitpxng.
X enqmi rmqng nzmetxpebzng bam mz nsetu-zlwzkr zmatq ngrm.

4 X lr nrlc amrlx nzangiolar nim,
Mz nzglqlz-krdr nim x nzarmyalz-krdr drtqm."

Lr Israel

5 Nadcpx mz drtwrgu da kx nzkctipxng,
Kcng tqalemqng Gct bagu, nigu leplz nedeng.

6 Akipxle Prla Bla x aesakile nzyrlekr LueJodzn
Mz nzyrlq-krbzle me mingrng kx navzki melrmqgung.
X mzli ka na-awi-ngr-kzpzk bade da lcng.

7 Murde aclve-alole mz zmatq ngrde.
X yrlq zvz mzte lr mrkzbleng murde ma tzglqpx-lzbqng mz nzzxpqbrrl-
krdr nide.

Nigu Amrlx

8 A' nimu lr mrkzbleng naglqlz-kzamu Gct rgr,
Mz nzangrlvz-kato-krmu nide.

9 Murde nide kc tqaclove-zvzbzle nzlu-krgr,
X tr-rlrpx-ngrdeu nzaovxiokr enqmi nigr.

10 Gct, kxmule-esz' atubqtipec nigr, kx nabzgr nalqngi,
Mz nzapu-krgr silvz kc tqyreni, x zblqki rde navztx.

[✡] Sam Kranzpnu-esz'mz-nrade-nzlvqn (65):7 Sam 89:9; 107:29; Matiu 8:26; Mak 4:39; Luk 8:24

- ¹¹ X kxmule-esz' rlrpx-ngrn nzesabtingr nigr,
X batrpzme nzrglq-krgr da kx mrlepu.
- ¹² X kxmule-esz' rlr-ngrbzme mz enqmi rgrng nzrnzbrti-krdr nigr,
X vztrkr mz nabz nzkxpung
Kx apule nyr x nrc kxoda,
A' mzli ka sc tqyzlumipe-mope' nigr me na-arlax-ngrgr.
- ¹³⁻¹⁵ X ayzlu-kzpe' natqnge mz mzlis nzkxpu-krngeng,
X delc naka-ngrbo bam da kcng tqipibo.
Rtwzmc animol kxnclongr kx oliqtix mz olta nyzm,
Mz nzangc-krbzlr bam mz Mangr-nzangiongr.
Murde zsilapu ngrdr navzdzbz,
Nangi dalr nzawi-krbo bam.

Okatrle ninge

- ¹⁶ Nimu amrlx kcng tzangiolr Gct, lalztqmamu bange,
Mz nzpi-krbo bamu da kcng tqalemleng bange.
- ¹⁷ Mz nzbrtikr drtwrnge nide, krka'bo bade,
Mz nzoliqi-krnge nzawi-krbo bade mz nzayzlu-krmle natqnge.
- ¹⁸⁻¹⁹ X ayzlu-zpwxmle natqnge murde plztipxbo alwx rngeng.
A' rblx nzxlr-krde nzkrka'kr doa kx nabzde blqki.
- ²⁰ Awitx-zlwzbo mz Gct murde trpx-ngrdeu nzkrka'-krnge,
X trpx-kz-ngrdeu nzaodu-krde ninge.

Sam Kranzpu-esz'mz-nrade-rlimz (67)

Lr Nrlc Naglqpxlr Gct

- ¹ Gct, nayc mz drtfrm nigr,
Mz nzamrlz-krm x nzokatr-krm nigr.
- ² Murde lr nrlc nakrlz-zpwxlr nqmq krm
Mz nzarlapx-krm nigr.
- ³ **Mrlz neidung amrlx nzglqpx-krdr nim,**
X na-awi-ngrbzlr bam!
- ⁴ Mrlz lr mrkzbleg amrlx nzangrlvz-krdr nim,
Murde nzaclve-krm nidr tubq mz nzmailz-krm.
- ⁵ **Mrlz neidung amrlx nzglqpx-krdr nim,**
X na-awi-ngrbzlr bam!
- ⁶ Gct rgu amrlzle nigu,
Mz nzrkqlzngr dakxnzng.
- ⁷ X sa na-amrlz-zvzle nigu,
Murde leplz amrlx na-amrluelr nide.

Sam Kranzpu-esz'mz-nrade-rtqmz (68)

Zmatq Ngr Gct Mz Nzaclive-krde Lr Israel

Nabz ne Devet kx yrbzle mz kxrmailz ngr dzbe kxnxngnrg.

Nzmyalzkr Gct

- ¹ Mz nzvz-krm Gct, enqmi rdeng nzodalitipeng.
X kxnxpctxpx-ngrdr nide nzdwaszlr nide.
- ² Miltxole nidr mz nzapu-krdr zsilapu kc tqwqplx nenq.
X nibqtile kxdrka'-ngrng mz nzapu-krdr kadol kc tqyrlle mz nzngc-krde.
- ³ A' nigu kxnxzubqng abrtzlvzku nzmnc-aepztr-krbzku bade,
Mz nzbilvz-krgu x nzmalqlvz-krgu nide mz nzelangr.

- 4** Naglqlzku Gct mz nzangrlvz-krgu drtqde.
 Na-amyalzku nide kc tqvoom mz dcbz.
 Drtqde Yawe x na-abrtz-ngrgu nzmnctr-krbzku mz mzte.
- 5** Gct mnc Mangr-nzangiongr.
 Apubzle trte mz doa kxnzbzsng x aclve-kzle olvz kx nzbzsng ncblo
 ngrdr.
- 6** Kxnmncng esz'-krdr amnctr-lxblr-kzleng mz neidung,
 X kx drtqdr tropxu vzmi-kzleng
 Murde namnc-zpxwng.
 A' krkcng tzesablqtilr nide, avzpx-nrbalqleng.

- Mzli Kc Lr Jiu Tzrlasz-ngrdr Ijipt X Tzprtr-ngrdr Lzke** \diamond
- 7** Mz nzrlaszkr leplz ne Gct Ijipt, vzmitrleng lzke.
 X mz nzmailz-krde nidr, mncpxm mz nyr x dcuz.
- 8** Nide Gct r lr Israel kc tqaelwapxle zmatq ngrde mz Newz Saenae.
 Murde mz nzvz-krmle, nengq x tewa kxnnsetung nzvz-kzpqng.

- Mzli Kc Lr Jiu Naprtr-ngrdr Mz Drtc' Kc Tqpibz Yawe Badr** \diamond
- 9** Gct avzo-ngrmle tewa,
 Murde na-alu-moule drtc' nyzde kc tqmingrpe.
- 10** Neidu lrde kxtrnzrncung amncleng mz drtc' lc,
 Mz nznka-krbzle badr da kx nzmnctpx-ngrdr.

- Mzli Nyz Kxnrlyrlqng Drtwr** \diamond
- 11** Kxetu rgu Gct kapxle natq
 Kx olvz kxnxkqlung napipxlr nrpa lcde seng,
- 12** "King x ami nedrng nzdwang.
 X nigr olvz akitikr dztu enqmi kcng tztwz ncblo ngr vea negrng.
- 13** Akitikr da kxlqngi kxlqlwx kx nwzngm mz silvz x gol.
 ?Myx kxmule, kzdung nimu ncblo trnzprtr-ngrdru mz vea?
- 14** Murde Gct kc tqrnir milxtxole king kcng,
 X namz ngrdr nztwzbene-krdr apule lrdz kx lvxz nrc mepz."

- Mzli Kc King Devet Tqyrlq-ngrde Jerusalem Mz Nzngini-krde Mzteadau Nyzde** \diamond
- 15** Mzli kc King Devet tqyrlq-ngrde Mzteadau nyzde mz Newz Saeon,
 Newz Basan apule ncblo kx angya drtwrde nzyckr Mzteadau mrlc.
 A' Devet ayzlubzle natqde mz nznpi-krbzle kx,
 "Newz Basan, kxmule-esz' matq-esz'ngrn x myatxlzq,
 X nra nyzmqng ngi rtrngr,
- 16** A' bzkq obqszoq newz kc tqmcpk Yawe kx namnc-ngrde,
 Murde sa namnc alo elr."

- Yawe Aovxirole Enqmi Rdeng X Vzdz Mangr-nzangiongr Jerusalem**
- 17** Gct vom mz siu ngr sariot scdeng,
 Mz nzprpx-krmle mz Newz Saenae x nzprtr-krde Mangr-nzangiongr.
- 18** Kxetu vzdz-ngrde wq,
 X aovxirole enqmi kxkqlu.
 X nzkabzlr da bade, mz nzmetx-krbzlr bade,
 Kxmule-esz' kxnxpqbrr-ngrdr nide mzli kc. \diamond

\diamond Sam Kranzpnu-esz'mz-nrade-rtqmz (68):6 Nzrlasngr 13:17—19:19 \diamond Sam Kranzpnu-esz'mz-nrade-rtqmz (68):8 Josua 6:1—11:23 \diamond Sam Kranzpnu-esz'mz-nrade-rtqmz (68):10 Kxnrlyrlqng Drtwr 5:16, 24, 30-31 \diamond Sam Kranzpnu-esz'mz-nrade-rtqmz (68):14 2 Samwel 6
 \diamond Sam Kranzpnu-esz'mz-nrade-rtqmz (68):18 Efisz 4:8

¹⁹ Naglqlzku Kxetu kc tqatu-amqngile nigu mz zbo kang kqlu.
Mурde nide Mevalu rgu.

Mzli Kc Gct Tqnibqti-ngrde King Nede Ehab X Nqvi Lrde Mz Nzayrplapx-krde Nidr *

²⁰ Gct rgu nide Gct kc tqarlapxle leplz.
Yawe nide Kxetu kc tqkapxmle nigu mz mq enqmi rgung.

²¹ X sc tqtaputibzle nardr,
Mурde nzvz-rbr-zvzng.

²² Rpimle bagu kx, "Kxmule-esz' enqmi rmung nzdwalzng mz newz
O drlve keng mz nzakitikr nrlc nidr, a' sa nayzlutibong.

²³ Murde navznenamu mz nzrnzlvzo-krmu mepyrngrdrng,
X kuli nemqng drtwrdr naesatxpx zpxw mz nzrmnq-krdrle."

Nzakaputr-ngrm Nzamyangr Mz Mzli Nyz King Hesekaea *

²⁴ Leplz amrlx nzmlcr nzvztr-krmqng leplz neng Gct Mrkc Tqtr,
Mz nzangrlvz-krdr Gct x King rdr.

²⁵ Dzbe kxnzngrng nzrtwayzbzng, vz-nqblqbz olvi kx nzelang x nzayr-lewzng nrasrpwale.
X kxnzayrning gita nzrmnr-ngrmqng.

²⁶ Kxmu nzngr-krdr nide sele,
"Naglqlzku Yawe, nigu leplz nedeng, mz nzyrlwr-lxblr-krgu.
Naglqlzku Yawe, nigu kcng tqngi nqvi lr Jekop."

²⁷ Neidu lcng tzvz-kzpqng, Benjamin, Judz, Sebyulon, x Naftzli.
Neidu ne Benjamin krkc tqtopwz rtwayzbz badr,

X mz nibrdr kxnzetung r Judz x leplz nedrng.
X rmnr-ngrbz neidu kx nzmncmqng mz nort, kxnzetu r Sebyulon x Naftzli.

Lr Jiu Nzkrka'-ngrdr Lr Mrkzbeng

²⁸ Gct, aelwapx-moungr zmatq ngrm,
Kc tqaelwapx-ngrn tqokatr-ngrn nigr mzli kc.

²⁹ Kapxbz natq kx king kcng tqaovxiopeq nartwzmqng da bam,
Mz nzmnc-krm Mangr-nzangiongr.

³⁰ Ayrplapx Ijipt kc tqapule trmwzlogo kc tqmnc-kapqpym mz nabr kc
tqlvcplzlm mz nqlvi lr Lue Nael,
Ayrplapx nidr badr kztedeng murde mrlz-zvzbz badr nzotangr.

Aodali lr mrkzble lcng,
Navz navz nakrlzbzle mzli kc tzyrngzo-ngrbzlr bam.

³¹ Murde kxnzetung ngr Ijipt navzmqng bam,
Nidr badr lr narnrlc amrlx kcng tzaxvctrng badr,
X naxpeng trau, silvz, x da kxlqlwx
Mz nzaovxio-krm nidr mz vea.

Nzmyalzkr Gct

³² Nimu lr nrlc amrlx,
Nangrlvzamu Kxetu Gct.

³³ Murde sc tqvzne mz bongavz, kc tqwz-ngrde mzli kc bqnc.
X nzxplkr natqde apule natq bzlrmei.

³⁴ Napipxku zmatq ngr Gct, kc tqaelwapx-ngrde mz dcbz,
X mz nzaclve-krde nigu lr Israel.

³⁵ Kctitxpx-zlwzku Gct rgu Mrkc Tqtr.

* Sam Kranzpnu-esz'mz-nrade-rtqmz (68):19 1 King 21:19; 2 King 9:24, 36 * Sam Kranzpnu-esz'mz-nrade-rtqmz (68):23 2 Be Ngrdr 30

X nide kc tqrkam bagu nzxplrngr x zmatq. Takitrde nzrglqlz-zvzngr
nide.

Sam Kranzpnu-esz'mz-nrade-rpwxmz (69)

Nzkxpukr Ncblo Kxwztr-zvzbz Mz Yawe

Nabz ne Devet kx yrbzle mz kxrmailz ngr dzbe kxnzngngrng.

Nabzpe

- ¹ Gct, pi-zvzbo bam kx, "Arlapx ninge!"
Mурde nzkxpukr nraetunepxpeng.
X apupex rplz kc namrbropebz mz nrlr.
- ² X apu-kzx kx twznede ninge drlr ngr nrc.
X mz nzboo-krnge, nabzpe, murde trpnzngre me nakcblztr-ngrne.
- ³ Gct, drtqnge satxpe x drtwrnge kaatxpe mz nzkqle-zvz-krnge nim.
Mzke' ngqbqtxtrpebz mz nzaenzli-zvz-krnge nzvz-krme.
- ⁴ Enqmi rngeng nzrpilr nanibqlr ninge murde nzxplr-zlwzng.
X nzpxtxpx-krdr lc ninge trpnzngre noude.
- X nzkqlu-krdr nzmyaszpxlr nqnginarnge.
Nzopokiatitrlr ninge mz nzrpi-krdr kx nakabo trau rde. ?A' myx
kxnamu nzka-krbo trau r da kx tralewxtu?! *

Nzxtrnga-ngrdr Ninge

- ⁵ A' Gct, nim txpwz kx rkrlz alwx rngeng,
Mурde trnzyc-kapqpwzung bam.
- ⁶⁻⁷ Yawe, nim Ngrlrvea r ami nem,
X nim Gct r lr Israel.
Nzatrkatilr ninge murde lxngitix nim,
X nzamyati-zvz-ngrm drtqnge.
- A' bzkq rlr-ngrme bange nzamyati-krbo drtq leplz nemqng,
Kcng tzlxngitilr x tzangiols nim.
- ⁸ Murde apubo lr mrkzble mz lr mrnyznge,
X mzlengeng nzmapulrtr-ngrdr ninge peto.
- ⁹⁻¹⁰ Kxmule-esz' nzxtrnga-ngrdr ninge
Nzaxtx-krnge dakxnnzng mz nzavzo-lzbq-krnge,
A' mz nzpq-zlwzkr nzaotikr drtwrnge Mangr-nzangiongr nim,
Apusr-ngrde ninge da kx nzangc mz nyr x yrkrtxo. *
- X natq kcng tzpikiti-ngrdr nim,
Yrplatr-kzpqng bange. *
- ¹¹ Nzypalelvzlr ninge
Mz nzpxi-krnge lrpz ngr nzvzkr drtwr.
- ¹² Lr mztea nzpikitinedr ninge.
X ncblo kxnxrmnqng nzngr-xtrnga-ngrdr ninge.

Arlapx Ninge

- ¹³ Yawe, arlapx ninge mzli kzniye mrlzbz bam
Mz nzmyalzkr zmrlz ngrm. *
- ¹⁴ A' veclzm ninge mz mu ngr nzkxpukr nraetunepxpeng.
X arlapxbz ninge mz nzngyatikr drtwr enqmi rngeng ninge.
- ¹⁵ Bzkq rlrpx-ngrn nzylremikr drlr ngr nrc ninge,
X bzkq botxo-alox mz nzbzllz-krmc mz gqpr.

16-17 Yawe, ninge kxinzawz nem. Ayzlum natqnge murde aodu-zvzq ninge.
X amrlz ninge murde yc mz drtwrm ninge.

Bzkq mnc-rlrume bange.

A' okatr ninge, murde nabznge talvzo.

18 Vzm bange

X xpepxbz ninge mz mq enqmi rngeng.

Ayrplapx Enqmi Rngeng

19 Murde krlzq enqmi rngeng amrlx,
Kxmu nzpibqti-krdr ninge x nzamyati-krmlr drtqnge.

20 Nzobqszo-krdr ninge yrni'bungr nabznge.

Yrni-ngrne nzvzkr drtwrnge,

A' trpnzngr kxnaokatrle x na-amqtrple drtwrnge.

21 A' nzrkamqng nange dakxnzng kxpix,

X mz nzbrlxkzkr drtwrnge, nzrkamqng mqnge waen kxrkx. [◊]

22 Yawe, kxmu nzmukr leplz lcng badr kztedrng Mangr-nzangiongr trtubqu
mz nzobq-krm.

Delc, tzrtxlvzlz-mou-ngrdr alwx ngrdrng x takitrde nzodati-krm nidr.

23 Akcbz mztr,

X ayangrnga-zvzbz nrkrdrtqdr. [◊]

24 Ayrplapx nidr mz zngya ngr drtwrm,
Kc tqapule nyr kx nangc-ngrdr.

25 X batrpz nzbz-krdr,

Murde ma nyzdr namznrtx-alongr. [◊]

26 Rlxtibo bam da lcng murde ayrplapxpeq ninge,
A' nzrtxlvzlz-moplr nzetqkr drtqnge.

27 Delc alwx ngrdrng nartxlvzlz-kz-ngrdeng,
Murde ma tzprtrng mz nzripqpx-krm alwx.

28 Bzkq yroq drtqdr mz Buk ngr Nzlungr,
Mrkc tqyclz-ngrm drtq kxntubq nemqng. [◊]

Nzrglqlzng Gct

29 Gct, tangigx-zvzx mz nzetqkr drtqnge,
Mzli ka tqaenzlix nzmnc-zpwxngr kc navzm mz nzarlapx-krm ninge.

30 Murde na-angrlvzx nim,

X naglqlzx nim mz nzawingr.

31 Murde sa na-abrtz-ngrm nzangio-krnge nim
Namyaszlezle nzangc-krbo blz bam.

32 X leplz txneng na-abrtzng mz nzokatr-krm nidr,
Murde apqtr-mopwzme nabzdr.

33 Murde lalztqbzme mz kxtrnzrungiscung,
X trmrbrtru mz drtwrm leplz nemqng kcng tzkxpung.

34 Nimu bongavz x drtc' naglqpxamu Kxrpalz.

Nimu prla x dalr prla amrlx naglqlz-kzamu nide.

35 Murde sa na-arlapxle Mzteadau nyzde x sa na-atulz-moule mztea ngr
Judz amrlx.

X kxntuztrpzng bade namncng elr x nangi nyzdr drtc'.

36 X sa na-aprcbzle drtc' mz doa ne leplz nedeng,

[◊] Sam Kranzpnue-sz'mz-nrade-rpwxmz (69):21 Matiu 27:34, 48; Mak 15:23, 36; Luk 23:36;
Jon 19:28-30 [◊] Sam Kranzpnue-sz'mz-nrade-rpwxmz (69):23 Rom 11:9-10 [◊] Sam
Kranzpnue-sz'mz-nrade-rpwxmz (69):25 Matiu 23:38; Luk 13:35; Aposol 1:20 [◊] Sam
Kranzpnue-sz'mz-nrade-rpwxmz (69):28 Luk 10:20

Murde leplz kcng tzmrlztilr nide namnc-zvzng elr.

Sam Kranzpnu-rlimz (70)

Vz-anim Mz Nzarlapx-krm Ning

Nabz ne Devet kx yrbzle mz kxrmalz ngr dzbe kxnzngrng.

- 1 Gct, vz-anim mz nzarlapx-krm ninge.
Kxetu, rnekim mz nzokatr-krm ninge.

- 2 Okatrp ninge mz nzaovxio-krnge kxnxrpilr na-abzlr ninge,
Murde drtqdr namya mzli kc nadwasz-ngrdr ninge.

- 3 X leplz lcng tzxtrnga-ngrdr ninge drtqdr namya
Mzli kc nametx-ngrmlr bange.

- 4 A' amrlz krkcng tzbtti drtwrdr nim
Mz nznka-krbzme badr nzabrtz-zlwzngz,
Murde na-awi-zvz-ngrbzlr bam nzarlapx-krm nidr
Mz nznpi-krbzlr kx, "Gct, nim kx myatxlz-esz'ngr."

- 5 Yawe Gct, trxplr-zvzwxu, x trpnzngr scnge zmatq.
Vz-anim, kx Gct.

Murde nim txpwz Mevalu rnge.

Bzkq asaq nzokatr-krm ninge. [◊]

Sam Kranzpnu-rlimz-nrade-esz' (71)

Nzkrka'kr Kzdq Lrtzlvz

Brti Drtwrnge Nim

- 1 Yawe, mnc-xglex nim nztu-krme mz nibrnge.
X bzkq rlrpx-ngrn nzaovxiokr enqmi rngeng ninge.

- 2 Lalztqm bange mz nzokatr-krm ninge.
X arlapx ninge murde tubq-esz'ngrn.

- 3 Nangini-kzp me rlakitrz mz nzmnc-kapqtr-krbo bam.
Murde nim butqbr x lrpalvc nyznge.

- 4 Gct rnge, arlapx ninge mz mq leplz kxdrka'-ngrng,
Kcng tzrpilr naodatilr ninge.

- 5 Murde nim, Kxetu Yawe, kx brti drtwrnge, yzutr pnz mzli kc tqngi-oblabe-ngrne.
X sc tqvzbe nzabrtr-krbo drtwrnge bam.

- 6 Abzo mzli kc tzmcngr mzke', krlzmle mzli ka, mnc-xgletxpwo nim,
Mz nzaclve-zvz-krm ninge. Delc naglqlz-zvz-ngrne nim.

Okatr-mop Ning

- 7 Nznpi leplz kx ninge rkx ngr da kxtrka,
A' nim lrpalvc kxmqngi kx rlakitrz.

- 8 X glqlz-zvzx nim mz zbk kang kqlu,
Mz nzyapwxtipx-krnge nzmyalz-esz'ngr-krm.

- 9 Delc kxmule-esz' nipenge lrtzlvz, a' bzkq drtqm satrp bange,
X bzkq rlaszq ninge mzli ka tqyangrnage-ngrne.

- 10 Murde enqmi rngeng nzycmnetr-ngrdr ninge
X nzryrlqpeng drtwr,

- 11 Mz nznpi-krdr kx, "Gct sc tqrlaszpele nide.
Vzmamu, nalolvzpeku murde trpengr kx na-arlaxle nide."

Arlapx Ning

[◊] Sam Kranzpnu-rlimz (70):5 Sam 40:13-17

- ¹² Gct rnge, bzkq mnc-rlrume bange,
A' vz-anim mz nzarlapx-krm ninge.
- ¹³ Aovxio x odati krkcng tzrpilr natzlr x na-atrkatilr ninge,
Mz nzamyati-krbzme drtqdr x nzbatr-krbzme nzobqsokr leplz nidr.
- ¹⁴ Sa na-abrtr-zvzbo drtwrnge bam,
X naglqlz-ebir-ngrne nim.
- ¹⁵ Kxmule-esz' da kcng tqaleq nzkqlu-zlwzng,
A' mz zbz kang kqlu sa nayapwxtipxx nztubq-krm, x zmatq ngrm mz
nzarlapx-krm leplz.
- ¹⁶ X sa navzbo bam mz nzglqlz-krnge zmatq ngrm,
Murde nim txpwz kx tubq-esz'ngr.

Vz Zvz Nzpipx-krnge Nzmyalz-krm

- ¹⁷ Gct, alvztrq ninge, abzo mzli kc tqngi-oblabe-ngrne.
X sc tqyapwxtipxbex da kx nzkctitpx kcng tqwz-ngrn.
- ¹⁸ Mzli ka nipenge lrtzlvz x nqnginarne prkipe, bzkq rlaszq ninge.
A' mncm bange mz nzyapwxtipx-krbo zmatq ngrm mz nrpr ngr leplz
amrlx.
- ¹⁹ Gct, nzetukr nztubq-krm krlzlzle bongavz. [✡]
X trpnz-moungr kx apule nim kc tqaleti da kxetuting.
- ²⁰ X kxmule-esz' batrpe' nzetukr nzkxpu-krngeng, a' krlzx kx sa na-amrna-
mowq nzlu-krnge,
Mz nzarlapx-krm ninge mz gq.
- ²¹ Sa na-aetunepxbzme nzamatqkr leplz ninge,
Mz nzaelalz-mou-krme drtwrnge.

Nabz Ngr Nzawingr

- ²² Gct rnge, nim Gct rgr, nigr lr Israel, x sa nangrbo bam mz nzayrni-krbo
gita x ukzle.
Tr-esz'ngrn x sa naglqlzx nim murde ngida angidrme bagr.
- ²³ Sa namalq-katox mz nzabrtz-krnge,
X mz nabznge atwrnrngr sa nangrbo bam murde arlapxpeq ninge.
- ²⁴ Mz zbz kang kqlu sa napixbzme nztubq-krm mz nzokatr-krm ninge.
Murde krlcng tzrpilr na-atrkatilr ninge aovxiopeqng x drtqdr myape.

Sam Kranzpnu-rlimz-nrade-li (72)*Nzaclvekr King Kxnzmcpz*

Nabz ne Solomon. *

Nztubq-krde

- ¹ Gct, batrpz nzaxvctr-krbz king rgr mz zmrlz ngrm,
X okatrpz nide mz nzvz-nqblq-krde nztubq-krm.
- ² Murde nzaclve-krde nigr leplz nemqng namrlz,
X na-atubqtibzle da mz kxnzbqszong.
- ³ X nigr amrlx sa namnc-zpwzkr,
Mz nzmnclz-krbzkr mz nztubqkr nzaclvekr king rgr.
- ⁴ Sa natubz mz nibr kxnzbqszong,
X sa na-arlaxle kx trpnzngz scdr zmatq mz nzaovxio-krde kxnzakx-
putilr nidr.

* **Sam Kranzpnu-rlimz-nrade-esz' (71):19** Sam 36:5; 57:10; 103:11; 108:4 * **Sam Kranzpnu-rlimz-nrade-li (72):** Jiszsa na-angidati-zpwzle drtwr ngr Sam lc mz nzvz-krmle krali.

Nzamrlz-karde Leplz Nedeng

- ⁵ Nzamrluekr leplz nim sa navz zvz,
Da kc tqwai nzyzlr-zvzkr nepi x temz.
⁶ X King nem sa na-amrlzle nigr leplz nedeng,
Mz nzapu-karde tewa kc tqdcom mz nrlanc.
⁷ Mzli kc tqngini-ngrde king nztubqngr naetunepx mz nrlc,
X nzmnc-zpxwkr leplz navz zvz da kc tqwai nzyzlr-zvzkr temz.

Mrkc Tqacve

- ⁸ Nzaclve-karde yzutrle mz Lue Yufretis,
Nakrlzbzle mz nrlc tulvzo.
⁹ Enqmi rdeng sa na-aovxioleng,
X nayrngzobzng bade.
¹⁰ King mz nrlc tulvzo sa nartwzmqng bade dalr nzrle-kangr,
Myapxbz king r trmctung, x Arabia, x Afrika, murde namnc-lxblrng
badr mz nrwxx.
¹¹ King amrlx sa nayrngzobzng bade,
X leplz amrlx sa na-angiolor nide.

Nivz Lrde

- ¹² King lc sa natubz mz nibr kx trpnzngr scdr da, mz nzkqle-krdr nide.
X naokatrle kxnzbqsong kcng tzmnncng esz'-krdr.
¹³ Sa naycngr drtwrde kxtrnxzplrun x kx trpnzngr scdr zmatq.
X na-arlapxle nra-nzlung nigr leplz.
¹⁴ Sa naxpepxle nidr mz mq kxzakxputing x kxzatrkatilr nidr,
Murde matq mz drtwrde nzlu-krdr.

Da Kxmrlzting Kx Navzpxmqng Mz Nzaclve-karde

- ¹⁵ Leplz amrlx sa nakrka'-ngrdr nide
Murde Gct na-amrlz-zvzle nide,
Mz nzrpi-krdr kx, "Gct, king lc nalu angidr zvz.
X lr Arabia narkabzng gol kxpnapr bade."
¹⁶ Krka'-ngrgr kx nrlanc nyzgrng nalvc-angidrngr dakxnzng.
X nounc nyzgrng nadobeting na-apule nounc nigr drtc' kc Lebanon.
X taon nyzgrng nayrbu mz leplz
Na-apule nzyrukr nabr nigr nardzng.
¹⁷ King lc nadcpx zvz mz drtwr.
X drtqde nayc zvz mz nzapu-karde ntzi-zvzkr nepi.
Murde sa nanginide nou nzamrlzkr Gct leplz amrlx mz nrlc,
Mz nzkrlz-krdr kx matq-esz'ngr mz nzobqkr Gct.

Nabz Kx Yrkpxnegr Buk Krali

- ¹⁸ Naglqlzku Yawe, Gct r melrmqgung.
Nide txpwz kxnxkctipx. Naglqlzku Yawe.
¹⁹ Navz navz zvz nzangiongr drtqde.
Nzrglqlzngr nide navz navz zvz.
²⁰ Krlc me yrkpxnegr nabz x nzkrka'-ngrng kx yr King Devet, mrlx Jesi.

Buk Kratq*Sam 73—89***Sam Kranzpu-rlimz-nrade-tq (73)**

Nzmnc-zpxwkrnge Yc-zvzbz Bam
Nabz ne Asaf.

Nzxplkr Krdrka'-ngrng

- 1 Kxmule-esz' rpiku kx, "Gct mrlzti nivz lrde nigu lr Israel,
X amrlzle kx nabzdr lq,"
- 2 A' nabznge ngrgo.
X nzrlxngiti-krnge ycpwz pipz nzaxtx-krbole.
- 3 Murde mcx nzrungisc-zlwzkr kxdrka'-ngrng,
X kcmnzttx-ngrne dztu kxnzglqpx-lzbq lcng.
- 4 Mz nzaotikr drtwrnge, trpnzngr nzetqkr drtq kx nzxngitrlr,
A' nzyrlvz-angidrng x nzxplrng.
- 5 Leplz lcng trpnzngr zyagox kx prtzbz badr,
X trnzrmctilru nzkxpung.
- 6 Delc tzbi-zlwz-ngrdr mz nzglqpx-lzbq-krdr,
X drtqdr trmyau nzrtulrtr-krbzlr me pnz drtwrdr.
- 7 Da kxtrka nzvzpxmqng mz nabzdr x drtwrdr,
Apule lue kc tqyrlepxm mz nzwxplikr kxpqbu.
- 8 Nzryrpalelvzng leplz kxnztubqng x nzycmnetxtrpwzng mz da kxtrka.
X nabzdr nzbilvzlr zmatq ngrdr mz natq ngr nzamwxlr-krdr leplz.
- 9 Nzycmne-atrkatilr Gct kc Heven,
X nzrpilr kx nidr kxnzetu r leplz mz nrlc mz nzska-krbzlr natq badr.

Nzvz-rbrkr Leplz Neng Gct

- 10 Mzli ka kzdung leplz neng Gct nzalztqpe-kzpzung badr,
Mz nzlxngiti-krbzlr natqdr.
- 11 Nzrpibzlr badr kx, "Vz-nqblqmqamu nigr,
Murde Gct kc Heven trtxpnzngr nzmc-krde nimu."
- 12 Krle nqmq kr leplz kxdrka'-ngrng.
X kxmule-esz' nzrungiscpeng da kxkqlu, a' drtwrdr trpnzngr nzesapx-krdr.
- 13 Gct, mz nzmc-krnge nidr, rpix esz'-krnge kx, "Mane nzalqti-lzbq-krnge.
X mane nzyrlqpx-lzbq-krnge mz alwx.
- 14-15 Murde drtqnge etq zvz mz zbz kalvz, mz nzkxpu-zlwz-krnge."
A' trvz-nqblqwxu natq kxdrka'-ngrng,
Mz nzrpi-krdr kx trmcwq alwx ngrgrng,
Murde ma tqmailzx leplz nemqng mz nzvz-rbr-krdr.

Kxdrka'ngrng Sa Naodating

- 16 Rblxm bange nzkrlz-krnge drtwr ngr nzrlr-krbzme mz kxnztubqng
nzkxpu-krdr,
A' trayrplapxwq kxdrka'-ngrng.
- 17 Bbz kx vztrx Mangr-nzangiongr nim mz nzmnc-lrpi-krnge,
Sc tqkrlz-atem kx kxdrka'-ngrng lcng trpnzngr nzmncr-krbzlr bam
Heven.
- 18 Murde rlr-ngrbzme badr nzvz-nqblq-krdr me pnz drtwrdr, kc tqbatrpzle
nzodatingr nidr.
Nzapulr kx nzvzneng mz drtc' kxmiglq kc tqbatrpz ntao-krdr.
- 19 X nzodatingr lc nidr na-ani txpwz,
X nzvzdz-krm nelzdr mz zmwxlr sa naprtrpz badr mzli kc nabz-ngrdr.
- 20 Mz nzbz-ani-krdr lc, nzapulr nzrmwiblengr
Kc tqmrbtrr mou mz nzdwalz-ngrm.

Nabznge Nrgo

- 21 Mzli kc tqxngitr-ngrne mz nabznge nzaetq-krme drtqnge,
X zngya ngr drtwrnge lolvztxne,

- ²² Apux poi kzpeto
Mz nzpqbrtxnekr narnge x nzngqngu-krnge.
- ²³ Kxmule-esz', a' mnc-zvzme bange,
Mz nzolvz-amqngi-krm mqnge.
- ²⁴ X vz zvz nzmailz-krm ninge mz nzalvztr-krm ninge.
Murde naprtrx mz nzarmyalz-krm ninge kalr.

Brti Drtwrnge Gct

- ²⁵ Trpnzngr da kx wz-ngrn Heven x nrlc
Kx suti drtwrnge, a' nim txpwz, Trte.
- ²⁶ Kxmule-esz' nabznge nrgo, a' nim nxzplr-krnge,
X namncme bange, tqvzpe tqvzpe.
- ²⁷ Gct, krkcng tzpx-ngrdr nim, trnamnctrpzu bam mz nibr nzbz-krdr,
Murde sa naodatiq kxtrnzabtrpzlu drtwrdr bam.
- ²⁸ Kxetu Yawe, mrlzvxixm bange nzmnc-aepztr-krbo bam
Mz nzrlatr-krbo bam, murde napipx-zvzbo nqmq krm mz leplz.

Sam Kranzpnu-rlimz-nrade-pwx (74)

Bzkq Mrbrtr Mz Drtwrm Nigr Kxnzakxpu Nemqng
Nabz ne Asaf.

Nzangctix Enqmi Makxtr Nyzmqng Amrlx

- ¹ ?Gct, memule tqrtctx-alope-ngrn nigr,
Mz nzngyatikr drtwrnm nigr sip nemqng?
- ² Nadcpx mz drtwrnm nigr kcng tqmcpxqng mzli kc bqnc, mz nzarlapx-krbzm nigr mz mq kxnzakxputilr nigr,
X mz nzmnc-krme bagr mz Newz Saeon.
- ³ Vztr ena mrlcde mz Mangr-nzangiongr nim Jerusalem,
Murde namcq nzodati-atwrnrkr enqmi rgrng da amrlx mrka.
- ⁴ Enqmi lcng nzmalqlvzlr Mangr-nzangiongr nim,
Nzpetr-krdr nc nqngq ngr nibr kxrmailz ngrdr mz nounc kx nzatulr mrlcde mz nzaelwapx-krdr nzaovxio-krdr nigr.
- ⁵⁻⁶ Nztaglctilr mz xks x hama scdrng da kcng tzlzing amrlx mrlcde,
Mz nzapu-krdr ncblo kx narlaking nounc.
- ⁷ Nzkatrpzlr nyr ngr Mangr-nzangiongr nim,
Mz nzmatinetrkr drtwrdr nztr-esz'ngr-krm.
- ⁸ X nzangctixdr mrkcng amrlx tqangio-ngrgr nim mz drtc' nyzm,
Murde narnzlvzo-atwrnr-ngrdr nigr.
- ⁹ Dalr nzangio-krgr nim lcng amrlx nzmrbrtipeng,
X trpengr profet kx narpim bagr mzli kx naesakingr nzkxpungr lc.
- ¹⁰ ?Gct, myx mzli kx nakrlzbz enqmi rgrng nxztrnga-krdr nim?
?Myx kxmule, narlrx-alope-ngrbzme nzycmne-atrkat-krdr drtqm?
- ¹¹ Bzkq mnc-lrpitxn,
A' odati nidr mz nzokatr-krm nigr.

Nim Kxrpalz Kx Xplr

- ¹² Gct, kxmule-esz' nzmusrnepegr lc, a' nim King rgr yzutr pnz mzli kc bqnc.
X nzwrede kqlu kx arlapx-ngrn nigr.
- ¹³ Sc tqakipxq Prla Bla mz zmatq ngrm.
X tqtamyrnr-ngrn nardr mepwz kc tqngi Ijpt.
- ¹⁴ Murde aovxioq kxnzetu rdrng,

- X kabzme nrkrdrtqdr nangq animol ngr lzke.
- ¹⁵ Sc tqaglwiq mrkc tqrpnakilzm aulz x narlue.
X apz-kzq me nakawicngr LueJodzn.
- ¹⁶ Nim kxrpalz kc tqwz-ngrde ngrlx x nrlckxbq,
X nim kc tqryrlq nepi x temz mrnyzdr.
- ¹⁷ X nim kc tqryrlqbz me nangi bz ngr prla x drtc',
X yrlq-kzpzm mzli r zbao x zpq.

Arlapx Nigr!

- ¹⁸ A' Yawe, nadcpx mz drtwrm kx enqmi rgrng nzxtrnga-ngrdr nim,
X nzatrkatilr drtqm mz nzycmne-krdr mz nzobqszo-krdr nim.
- ¹⁹ Bzkq mrbrtr mz drtwrm kxnxakxpu nemqng,
Mz nzapusr-krm nigr bona kx nalolvzi kuli kzpeto.
- ²⁰ Nadcpx mz drtwrm Nzesz'tikr Drtwrgu mz nzalapx-krm nigr,
Mурde mzli ka ncblo kxayo nzkqlupeng kxnxmnc-kapqneng mz nzlo.
- ²¹ Bzkq rlr-ngrbzme badr nzaovxio-krdr nigr kxnxakxpung,
Mурde nigr leplz txneng kx trpnzng scdr zmatq naglqlzkr nim.
- ²² Gct, vzm mz nzatubqti-krm drtwr kxnxobqszolr nim,
Mz nzdcpxkr mz drtwrm kx nzxtrnga-zvz-ngrdr nim.
- ²³ Bzkq mrbrtr mz drtwrm enqmi rmqng kx nznemi-zvzlr zngya mz
nzatrkti-krdr nim.
A' vzm mz nzawx-nabu-krm nidr mz natqdr.

Sam Kranzpu-nrlimz-nrade-nzlvqn (75)

Waen Kx Xplr Ngr Nzayrplapxng

Nabz ne Asaf.

- ¹ Gct, awitx-ngrbzkr bam mz nzmnc-aepztr-krme bagr.
Aleq da kxmrlzting. Gct, awitx-zlwzbzkr bam.
- ² Gct rpile kx, "Yrlqpe mzli kx napipx-ngrne doa kx tubq x kx vz-rbr.
X nzayzlu-krbo da badr narsakrlrngr.
- ³ Kxmule-esz' nrlc badr leplz ngrdeng nzrnrcng,
A' sa nalolvz-amqngix nou nrlc.
- ⁴⁻⁵ Pibo mz kxnxglqpx-lzbqng kx bzkq nzglqpx-lzbqng
Mz nzbilvz-krdr zmatq ngrdr.
- X pi-kzpo mz kxdrka'-ngrng kx bzkqpe nzarmyalz-lzbqng,
Mz nzailvzo-krdr kztedrng."
- ⁶ Murde trpnzng me vzkipxm nzarmyalzng
Mrka mz nrlc.
- ⁷ A' Gct txpwz kx na-ayzlu-ngrbzle da mz leplz amrlx,
Mz nzayrplapx-krde kxdrka'-ngrng x mz nzarmyalz-krde kxnxzubqng.
- ⁸ Yawe ngyati zlwz drtwrde kxdrka'-ngrng.
X mz nzayrplapx-krde nidr
- Na-apule kx rkabz badr kap ngr waen kx xplr.
X mz nzmnnq-krdrle trpnzng kx pipiz kx nayctxo, a' nayrkrtxlzm.
- ⁹ A' trtxpnzng nzesakikr nzyapwxtine-krnge Gct r Jekop,
X sa na-angrlvz-zvzx nide.
- ¹⁰ Murde rpile kx, "Sa naodatix zmatq ngr kxdrka'-ngrng,
A' zmatq ngr kxnxzubqng sa na-aetunepxbo."

Sam Kranzpnu-rlimz-nrade-esz'mz (76)

Gct Kx Aoyxio Zvz
Nabz ne Asaf.

- Kxaovxio*
- ¹ Lr Israel nzangiolar Gct.
X drtqde nzkrlz-zlwzlr.
 - ² Ma nyzde tuom Jerusalem,
Mz newz Saeon.
 - ³ Mrlc dekc tqtwz-ngrde temz ngr lomr, toki r vea, x nipna scdr enqmi rdeng,
Mz nzodati-krde dalr nzotangr amrlx.

- Ngrlrvea*
- ⁴ Gct, nim Ngrlrvea kxmyatxlz zlwz.
X myaszlzq newz kcng bqnc tzmyatxlzng.
 - ⁵⁻⁶ Gct ngr Jekop, mzli kc tqpnanati-ngrn enqmi rmqng,
Odatipeq zmatq ngr ncblo ngr vea nedrng x rblxbz badr nzotangr.
Ncblo amrlx kcng tzvoneng mz hcsi x hcsi nedrng nztatio-lxblrng x nzbzng.
Nibqtiq nidr amrlx x twzq dztudrung.
 - ⁷ Delc leplz amrlx tzmyatitr-zlwz-ngrdr nim,
Murde nzngyakr drtwrm trpnzngr kx nayatrz.
 - ⁸⁻⁹ Gct, mzli kc tqpio-ngrme Heven nzvz-rbrkr lr nrlc,
Mz nzarlapx-krm kxnxobqszong,
Lr nrlc lcng amrlx nzmwxlr-zlwzng
X nzmnc-lrpitxng.

- Ncblo Ngr Vea Nzmetxbzng Bade*
- ¹⁰ Leplz amrlx sa naglqlz-ngrdr nim
Mz nzaovxio-krm enqmi rmqng kcng tzngyati drtwrdr nim.
Murde ncblo ngr vea kcng trnibqtiwqng tzmetxbzng bam,
Nzpipxbzlr kx nanginipedr ncblo nemqng.
 - ¹¹ Delc na-angidati-ngrgu da kx esalz-ngrbzku mz Yawe, Gct rgu.
X lr mrkzbleng kcng tzesotrpzng nartwzmqng dztudrung kxmrlzvxing
mz Gct kc tzmyatitr zlwz, murde aovxiole nidr.
 - ¹² Murde nide kc tqavzole kxnzetung.
X king amrlx mz nrlc tzmwxlrti-zlwz-ngrdr nide.

Sam Kranzpnu-rlimz-nrade-rlimz (77)

?Nzngya-zlwzkr Drtwr Gct Mrilvzole Nivz Lrde?
Nabz ne Asaf.

- Nzkrka'ngr*
- ¹ Yrnibo mz Gct.
Yrni-katobo bade murde naxlrmle natqnge.
 - ² Mzli ka tqkxpu-ngrne, glalzbo mqnge mz Kxetu.
Kxmule-esz' krka'tix nzwr nrlckxbq, a' trxngipwc'u nzamqtr-ngrm drtwrnge.
 - ³ Gct, kx aoti drtwrnge nim, nabznge nrgo.
X sc tqyrni-katopex mz nzetqkr drtqnge.

- Nzrlxtingr*
- ⁴ Nzlkxpu-krngeng aobqtx-zvzle ninge mz nrlckxbq,
X rblx-kzp bange nzycmnengr mz nztalvzokr nabznge.

- 5 Aoti drtwrnge zbo kcng pnz
X yiz kcng bqnc.
6 X drtwrnge ao-zlwzx mz nrlckxbq.
A' drtwrnge kc tqveabe kx,
7 ?Myx kxmule, Kxetu sa napxtpx-alope-ngrde nigr?
?X trpengr nzmrlzti-mou-krde nigr?
8 ?Nzaodu-krde nigr sa nayrkpx-alope?
?X nzesz'tikr drtwrgr badr naesakipe?
9 ?Myx kxmule, Gct trnaycpeu mz drtwrde nigr?
?X nzngya-zlwzkr drtwrde mrlvzole nivz lrde?
10 Xngitxtr-zlwzx
Gct kc tqmyalz-esz'ngr traelwapxpe-ngrpleu zmatq ngrde bagr.

Nqmq Kr Gct

- 11 Yawe, sa tqdcpx mz drtwrnge nqmq krmqng,
X da kxnzkctipx kcng tqaletiqng mzli kc bqnc.
12 X sa na-aoti zlwz drtwrnge da kxmrlz kxetuting
Kcng tqwz-ngrn mz zmatq ngrm.
13 Gct, nqmq krmqng amrlx tr-esz'ngr,
X trpnz-moungr gct kx myaszpxle nim.
14 Nim txpwz Gct kc tqaleti da kxnzkctipxng,
Mz nzbatr-krbzme mz lr mrkzbleng nzmc-krdr nxzpl-krm.
15 Arlapxpeq nqvi lr Jekop x Josip, murde nindr leplz nemqng,
Mz nzaovxio-krm enqmi rdrng mz zmatq ngrm.

Zmatq Ngr Gct Mzli Kc

- 16 Gct, mzli kc tqvz-ngrme, prla rnrcti-lzbq,
X wai-kzle meboo-ngrng.
17-18 X drtc' ycngrlrlzm mz tripu.
X zbo nzadclr tewa kxetu.
X bzlrpc rpnakile nrlc apule nipna
Mz nzpnamilxti-krm nrlc.
X bzlrmei yrpu-zlide bongavz
Mz nzpro-krm nounenq.
19 Kxmule-esz' trpnzngr kxrmc nabzlvz r nanycm x lrpzki rm,
A' sc tqkawicpeq meboongr ngr Prla Bla.
20 X mailzq leplz nemqng mz nzapu-krdr sip,
Mz mq Mosis x Eron.

Sam Kranzpu-rlimz-nrade-rtqmz (78)

Bzkq Apuku Melrmqgung Kcng Tzvecpx-lzbqmng Mz Gct
Nabz ne Asaf.

Nzalvztrkr Sam Ka

- 1 Leplz nengeng, lalztqmamu mz nzalvztr-krnge,
Mz nzxlr-angidr-krmamu natqngeng.
2 Sa naryapwxbo bamu mz nzycmne-ebzpxngr.
X sa nayokaetipxbo dalr mzli kc bqnc kx trgalr kxrkrlz. [☆]
3 Da lcng tqxlrpeku x tqkrlzpeku
Mурde nzpipem melrmqgung bagu.
4 Bzkq yrlq-kapqbzkung mz doa negung,

[☆] Sam Kranzpu-rlimz-nrade-rtqmz (78):2 Matiu 13:35

- A' nayapwxtibzku badr.
- 5 Yawe yrlqbzle loukxtr scde mz lr Israel,
Mz nzka-krbzle natqde mz nqvi lr Jekop.
- X rngidrlvz-ngrbzle mz melrmqgu lcng
Kx na-alvztr-ngrdr doa nedrng mz lou lcng.
- 6 Murde nayrlqlr lou lcng
X na-alvztr-kzpplr mz doa nedrng.
- 7 Mz nzmu-krde lcde, nrpr ngr doa amrlx na-abrtrpzlr drtwrdr mz Gct,
X na-aoti drtwrdr da kxnzkctipxng kcng tqalele mz nzvz-nqblq-krdr
natqdeng.
- 8 X bzkq na-apulr melrmqdrng kcng nardr tqmqngi x tzxpqbrrlr-ngrdr Gct.
Trtegu lcng nabzdr bao x nzvecpx-lzbqmqng bade.

- Trnzbrtiu Drtwrdr Gct* *
- 9 Mzli kc bqnc kzdung lr Israel, ncblu ngr vea nedrng nzoliq-angidrpeng
mz popz' x nipna scdrng,
A' mz zbo kc navecpengr, sc tzdwapeng.
- 10 Murde trnzatutrlu Nzesz'tikr Drtwrdr badr Gct,
X nzpxtxpx-ngrdr lou scdeng.
- 11-12 **Kxmule-esz' nzmcpeir zmatq ngr Gct,**
A' trmatqu mz drtwrdr da kxnzkctipxng kcng tqaleleng mrkc Ijipt.
- 13 Akipxle Prla Bla x mz nrlarde rlilr atule apule nztukr drkq,
Mz nzmailzo-krde leplz nedeng elr.
- 14 X mz nzvz-krdr ngrlx, mailzle nidr mz dcblz,
X nyr rtwayzbz badr mz nrlckxbq.
- 15-16 Mzli kc tzmnc-ngrdr lzke, amrplxtrpzle rplz
Kx yrlepx-ngrm lue x ningali.
- Murde narmnqng x drtwrdr naesatxpx zpx
Mz lue lc tqkabzle badr, tqxplrm nzyrle-krde.
- 17 Kxmule-esz', a' vz vzz nzatrkti-krdr Gct kc tqmyalz-esz'ngr,
Mz nzale-krdr alwx x nzxpqbrrlr-ngrdr nide.
- 18 Mz nzmqngikr nabzdr nzabzlr nzatalzngr Gct,
Mz nzka-krbzle dakxnnzng kx naesapxngr drtwrdr.
- 19-20 Nzibqtilr Gct, nzrpilr kx,
“Kxmule-esz' luplxtrle rplz x lue yrlepx-katom elr,
A' rblxbz bade nzrka-krmle nagu dakxnnzng,
Mz nzaclve-krde nigu leplz nedeng.”

- Dakxnnzng Kxvzom Heven* *
- 21 Yawe kx xlrle kc nzycmne-krdr, drtwrde trmrllzpuu.
X zngya ngr drtwrde kc tzapqtr-zlwzbzlr.
- 22 Murde trnzlxngitilru nide,
X drtwrdr trnzabrirtrpwzlr bade mz nzaclve-krde nidr.
- 23-24 Kxmule-esz', a' lvpxbzle bongavz,
Mz nzatwzlr-krmle badr dakxnnzng ngr Heven. *
- 25 X mzli lcde, leplz txneng nzumng dakxnnzng nan enjrl,
Mz nzangidati-krbz Gct zbrtale ngr nelzdr.
- 26 X mz zmatq ngrde kz
Sc tqawqpele nenq tonga x trlaki.

* Sam Kranzpnu-rlimz-nrade-rtqmz (78):8 Nzrlaszngr 7—17
rade-rtqmz (78):19-20 Nzrlaszngr 16:13; Nzkqlu-krdr 11:1-34
rade-rtqmz (78):23-24 Jon 6:31

* Sam Kranzpnu-rlimz-n-
* Sam Kranzpnu-rlimz-n-

- 27 X nenq lcng li nzrtwzmqng blzmr kio,
X nzyrlwrne-krdr apule drta' ngr prla.
28 Kio lcng nzatiomqng mz drtc'
O-ngleale ma nydrng.
29 Gct kabzle badr nikeng nzsuti zlwz drtwrdr.
Nzngqdr x nelzdr krlc.
30 Kxmule-esz', a' drtwrdr tresapxu.
X mzli lc tzmube-ngrdr,
31 Gct sc tqnibqtipebzle obla nedr kcng tzxplrng,
Mz nzngyatikr drtwrde nidr.

- Vz Zvz Nzale-krdr Alwx** [☆]
- 32 Kxmule-esz' Gct ayrplapx-katole nidr mz alwx ngrdrng, a' sc tzale-zvzng
alwx.
X kxmule-esz' nzmcpelr nzale-krde da kxnzkctipxng, a' trnzlxngitilru
nide.
33 Zbz sc tqnibq-anipele nidr
Mz nzapusr-krdeleng lue kc tqmilqpx mz leu r nya x tqmrbro mz drtc'.
34 Kx nibgle kcng, opxm kx drtwr kxnzlubeng sc tqyzlu-mopwz bade,
Mz nzplzpx-krbzlr alwx ngrdr x nzkrka'-krbzlr bade.
35 X opxm kz kx dclpx mou drtwrdr kx Gct kc tqrnir nide butqbr nydr,
Kc tqarlapx-zvzle nidr.
36 Kxmule-esz', a' nzpokiatilr nide
Mz nzsri-krbzlr bade kx nzmlztilr nide.
37 Kxmule-esz' nabzdr bao,
X trnzatutrlu Nzesz'tikr Drtwrdr badr,
38 A' trodatileu nidr, murde yckqti mou drtwrde nidr x ipqpxbzle alwx
ngrdrng.
X nzwrd kqlu kx ngyatingr drtwrde nidr, a' lolvztxde zngya ngr
drtwrde.
39 Murde krlzle kx nidr leplz x nzkrlzlr nzbzngr,
Mz nzapu-krdr nenq kc tqwq x sc tqamaneope.

- Mzli Kc Lzke** [☆]
- 40 Nzwrd kqlu lzke nzxpqbrr-ngrdr nide,
Mz nzavzti-krbzlr drtwrde.
41 Zvz nzale-ebir-krdr da kx nzangyati-ngrbzlr drtwrde,
Mz drtwrdr kx lctr-zvzbz mz Gct kc Tqtr-esz'ngr.
42 Mrbrtr mz drtwrdr zmatq ngrde
Mz nzarlapx-krde nidr mz mq enqmi rdrng.
43 **Mzli kc tqale-ngrde da kxnzkctipxng**
Mz nzvzmipx-krde nidr Ijpt.

- Mzli Kc Tzmnc-ngrdr Ijpt** [☆]
- 44 X mzli kc tzmnc-ngrdr Ijpt, ngi-batrpzle lue kxetung nzlrtipx-krdr mepyr,
Milde lr Ijpt ma tzrmnqng lue.
45 Atwzlr-ngrmle frck kxkqlu kx na-atrkatilr mrnyzdr,
X mc kxkqlu kx namakxtilr nidr.
46-48 Nibqtibzle kzu, sip, x gout nedrng
Mz kzdg zyagox kxtrka.
X mz nibrde atwzlr-ngrmle trlipu kxetu,

[☆] Sam Kranzpnu-rlimz-nrade-rtqmz (78):31 Nzkqlu-krdr 14; 16; 17; 21 [☆] Sam Kranzpnu-rlimz-nrade-rtqmz (78):39 Nzrlasngr 15—17; 32—34; Nzkqlu-krdr 11—16; 20—21; 25 [☆] Sam Kranzpnu-rlimz-nrade-rtqmz (78):43 Nzrlasngr 7—15

- Mz nzamzti-krbzle nounc x dalr nrlanc nyzdrng mz nzatatio-krmleleng
muli-aes.
 Zbz sc tqatwzlrpe-ngrmle kionabr
 Mz nzngqti-krdr dakxznzng amrlx kx nzlutinepwzng mz nrlanc.
⁴⁹ X mz nzngyati-zlwzkr drtwrde lr Ijipt kcng tzakxputilr leplz nedeng,
 Atwzlr-ngrmle enjrl kxnzkqlung mz nzpulio-krmlr nyr mz nzayrplapx-
 krdeleng.
⁵⁰ Trolvzleu zngya ngr drtwrde,
 A' xplr-esz'ngr apule nubla ngr lue mz nznibqti-krde nidr.
⁵¹ Nibqtibzle doa ncblo kx ayrnrngr nedrng,
 Nidr kcng tzvzpxmqng mz nqvi lr Ham, doa ne Noa.

Nzrlasz-krdr Ijipt *

- ⁵² Mz nibrde sc tqrtwayzpebz mz leplz nedeng mz nzrlasz-krdr Ijipt.
 X mailztrle nidr lzke mz nzapu-krdr sip nedeng.
⁵³ Aclve-angidrle nidr, x trnzmwxlru.
 A' aboobzle enqmi rdrng amrlx prla.
⁵⁴ X mz nibrde sc tqvzmitr-atele nidr mz drtc' kxtr nyzde, Kenan,
 Mrkc tqtungr Newz Saeon, kx nztwz mz zmatq ngr nzaovxio-krde.
⁵⁵ Maneutipxle leplz kxnzmnc-mrbrng mrlcde, mz nzvztrkr leplz nedeng
 mz drtc' lc.
 X sc tqakipxpebzle drtc' lc mz neidu lr Israel kcng nzpnu-esz'-nrade-li,
 x nzmnccpx-alzupq'ng mz ma nyzdr.

Mzli Kc Tzmnc-ngrdr Kenan *

- ⁵⁶ Kxmule-esz' nzmnccpeng mz drtc' kxtr, a' sc tzycmne-plztitrlr
 x nzxpqbrr-ngrdr Gct kc tqqrnirn mz nzpxtxpx-krdr natqdeng.
⁵⁷ Leplz lcng nzapulr melrmqdr kcng bqnc mz nzesablqti-krdr nide x
 nzvecpx-lzbq-krmlr bade.
 Mz nzmu-krde lcde, trpengr kx brti drtwrde nidr.
⁵⁸ Nzangyatibzlr drtwrde mz nzangio-krdr kx trngiu Yawe Gct angidr,
 X mz nzyrngzo-krbzlr mz mqngr da kxnzlz.
⁵⁹ Kx mcle da lcng tzaletilr, ngyati zlwz drtwrde leplz nedeng,
 X sc tqpxtxpxpe-ngrde nidr.
⁶⁰ Rlasz-pnzle Tentkxtr nyzde kc mztea Saelc, mz drtc' nyz Efrem.
 Mrkc tzmnc-kai-ngrdr badr leplz nedeng.
⁶¹ X rlr-ngrbzle mz enqmi nztwz-krdr Bokis kc tqyclz-ngrm Nzesz'tikr
 Drtwrdr Badr,
 Kc tqngi rkx ngr zmatq x nzmyapx-esz'ngr-krde.
⁶² X mz nzngyati-zlwzkr drtwrde leplz nedeng,
 Rlr-ngrbzle mz enqmi rdrng nznibqti-krdr nidr.
⁶³ X obla nedrng amrlx nzbzting mz vea,
 X olvi nedrng trpengr obla kx naryrlzting.
⁶⁴ Pris nedrng nzbzti-kzng mz vea,
 X olvz ngrdr nzmwxlr-zlwzng x trpnzngr mzli kx nayrnimi-ngrdr namz
 ngrdr.
⁶⁵ Mz nibrde, mz drtwrdr opxm kx Kxetu apule ncblo kx melz-atem
 Mz nzmwingr mz nzrmnq-krde waen.
⁶⁶ X mzli lcpwz aovxirole enqmi rdeng,
 Mz nzamyati-alo-krbzle drtqdr.

Gct Mcpxle Neidu Lr Judz, Newz Saeon, X Devet [◊]

- ⁶⁷ Gct trsutiu drtwrde doa neng Josip,
X sc tqrlaszpele drtc' nyz Efrem, kzdq mrlxde.
- ⁶⁸ A' mcpx-alzule neidu lr Judz,
Mz nzmnc-krde Newz Saeon, kc tqmrlz-zlwzbz bade.
- ⁶⁹ Mrlc dekc tqwztio-ngrde Mrkc Tqtr murde nayc alo elr,
Da kc tqwai nzyc-alokr Heven x nrlc.
- ⁷⁰⁻⁷¹ X mcpx-kzle Devet kx nawztrpz bade.
X kapxmle nide mz nzaclve-krde sip neng trtede,
Murde nanginide king r lr Israel,
Mz nzaclve-krde leplz neng Gct.
- ⁷² X nzaclvekr Devet nidr tubq,
Mz nzmailz-zpwx-krde nidr.

Sam Kranzpu-nrlimz-nrade-rpwxmz (79)*Kxetu, Ayzlu-ebir-ngr-mopwz Badr*

Nabz ne Asaf.

Enqmi Rgrng

- ¹ Gct, leplz kxnzmnc-mrbrng nzvztrpqng x nztztilr nigr,
Murde natwzlr drtc' lc tqkame bagr.
Nzatrkatipelr Mangr-nzangiongr nim,
X nzodati-atwrnrpe-ngrdr Jerusalem.
- ² Namz ngr leplz nemqng nzayrlwrtxnadr
Ngi dakxanzng nanq utc x animol kzpetong.
- ³ Enqmi lcng tzlakitilr leplz amrlx Jerusalem,
X mepyr ngrdr yrlenepe apule lue.
Mz nzmu-krde lcde, trpnzngr nigr kx rlapx,
Kx nayrtzmqlr namz ngr kztedrng.
- ⁴ Lr mrkzbleng kcng tzmnc-aepztrpqng bagr nznelvzlr nigr mz nzamyati-
ngrm drtqgr,
X nxztrnga-ngrdr nigr.
- ⁵ ?Yawe, ngyati-alope drtwrm nigr?
?Myx kxmule, zngya ngr drtwrm lc tqapule nyr, kx na-angc-alopele
nigr?
- ⁶ Bzkq, a' kx nangyati drtwrm kxtrnzrlxngitiung ngr mrkzbleng,
Kcng trnzamatqlru x trnzangiolru nim.
- ⁷ Murde sc tznibqtipelr nigr leplz ngr nqvi lr Jekop,
X tzatrkatipelr drtc' kc tqkame bagr.

Arlapx Nigr!

- ⁸ Gct, bzkq ayrkrpx-ngrn nigr alwx ngr melrmqgrng,
A' nayc mz drtwrm nigr murde nqmq nr nabzgr bao-zlwzpe.
- ⁹ Mevalu rgr, okatrp x arlapx nigr, x ipqpxbz alwx ngrgrng,
Murde leplz ma tzobqszolr nim,
- ¹⁰ Mz nzrpi-krmrlr bagr kx,
"?Myxpe Gct rmu?" [◊]
- A' rlr-ngrm nzmc-krgr nzayrplapx-krm leplz lcng,
Mz nzayzlu-krbzme badr nznibqti-krbzlr leplz nemqng.
- ¹¹⁻¹² Kxetu, ayzlu-ebir-ngr-mopwz badr

[◊] **Sam Kranzpu-nrlimz-nrade-rtqmqz (78):66** 1 Samwel 16:11-12 [◊] **Sam Kranzpu-nrlimz-nrade-rpwxmz (79):10** Sam 22:8; 42:3; 44:16; 115:2

Nikeng nzalelr mz nzobqszo-krdr nim.
 X arlapx kz nigr leplz nemqng kcng tzolvztilr, murde ma tqbzkr,
 Mz nzayzlu-krme nzyrni-krbzkr bam.
¹³ Murde apukr sip nemqng,
 X sa naawi-zvzpebzkr bam mz nzglqlz-alokrgr nim.

Sam Kranzpnu-rtqmz (80)

Ka-mop Bagr Nzxplr-krgr Kc Pnz
 Nabz ne Asaf.

Nigr Sip Nemqng

¹ Gct, myaslzq enjrl kxnzetung.
 X aclve-zvzq nigr doa neng Josip,
 Mz nzapu-krgr sip nemqng.
 Lalztqm bagr, nigr doa neng Israel.
² X aelwa-ngrm zmatq ngrm bagr,
 Nigr nqvi lr Efrem, Benjamin, x Manase.
 Vzm mz nzxplr-krm mzli ka
 X arlapxbz nigr mz mq enqmi rgrng.
³ **Gct, mz nzaodu-zvz-krm nigr, arlapx nigr,**
 X ka-mop bagr nzxplr-krgr kc pnz.

Nabzgr Talvzo

⁴ Yawe Gct kc tqrnir, bzkq drtwrm ngya-zvzm bagr,
 A' ayzlam nzkrka'-krgr.
⁵ Tekqtrpebzme dakxnxng nagr mz nzavz-krbzme drtwrgr.
 X mz lue amnqtr-zvzpeq nigr mz drlemzkr.
⁶ Rlrx-ngrp wzme mz lr mrkzbeng kcng tzmnc-ngalelr nigr nzyrpalelvz-
 krdr nigr
 X nzotalvz-krdr drtc' nyzgr kx neke nartwz.
⁷ **Gct kc tqrnir, mz nzaodu-zvz-krm nigr, arlapx nigr,**
 X ka-mop bagr nzxplr-krgr kc pnz.

Nigr Nqvi Lr Grep Nyzm

⁸⁻⁹ Apusr-ngrn nigr nqvi lr grep ngr nrlanc nyzm.
 Murde mz nzvzmipx-krme nigr Ijipt,
 Apule kx bolvztipeq leplz kxnzmnc-mrbrng mrkc Kenan,
 Murde nqvi lr grep nyzm natu-amqngi mz drtc' lc.
¹⁰⁻¹¹ X bz ngr nrlanc kc tqoliqtime bagr yzutr mz drtc' ngr Lebanon,
 Vz krlzbzle Lue Yufretis.
 X vzki-kzple mz newz kxnzetung,
 Vz x krlzbzle Prla Meditrena.
¹² A' mzli ka opxm kx awxlikiq nabxbz ngr nrlanc nyzgr,
 Mz nzrlr-krbzme mz enqmi rgrng nzrtwz-abeane-krdr dalr nrlanc.
¹³ Lr mrkzbeng nzapulr poi kzpeto kcng tzayabetilr nrlanc,
 Mz nzapusr-krdr nigr dakxnxng nadr.
¹⁴ Gct kc tqrnir, obqom bagr Heven.
 X okatr-mop nigr mz nzapu-krgr nqvi lr grep nyzm,
¹⁵ Kc tqpetiq
 Murde naxplrkr mz nzmnc-krgr mz drtc'.
¹⁶⁻¹⁷ Ngaprbz ncpa'bu ngrgr kx nao-zlilzkr,
 Mz nztu-zvz-krme mz nibrgr, nigr leplz nemqng.

Murde enqmi rgrng nzapusr-ngrdr nigr nounc kc tzlakitxo x nzangc mz nyr.

Delc naodati-ngrbzme nidr mz zngya ngr drtwrm.

¹⁸ Zbz trnaesablqtikru nim,

A' naglqlz-zvzpekr nim mz nzalu-krm nigr.

¹⁹ **Yawe Gct kc tqrnir, mz nzaodu-zvz-krm nigr, arlapx nigr,
X ka-mop bagr nxzplrx-krgr kc pnz.**

Sam Kranzpnu-rtqmz-nrade-esz' (81)

Krkcn Naglqlzlr Ning, Navz-nqblq-kzlr Natqnge
Nabz ne Asaf kx yrbzle mz kxrmailz ngr dzbe kxnzngrng.

Naglqpxku Gct

¹ Namalqlvzku Gct murde nide lrpalc nyzgu.
Nanqr-katobzku mz Gct ngr Jekop.

² Na-ayrnitiku gita x ukzlele x na-ayrllewzku nrasrpwale
Mz nzngr-krbzku bade nabz kxyrlvi.

³ Trpu navxutr mz nzrkqlengr leplz mz zbg kxzetuting,
Mz zbg ngr nzpokr temz x zbg ngr nzyc-atwrnr-krde.

⁴ Murde krilc natq kx kam Gct bagu, nigu lr Israel,
Mz nzka-krbzle loukxtr scde mz nqvi lr Jekop.

⁵ Pipxbzle mz melrmqgung, nidr neidu lr Josip,
Mzli kc tqatrkti-ngrde lr Ijipt.

X ninge Asaf, mzli kc nzryr-krnge tqkrlzpe-ngrbzle me tavau,
Xlrx kc natq kx trglwxu, a' mz nibrde sc tqglx-atem.

⁶ Rpimle kx, "Sc tqrkatxobo da kxmrepu kcng tqqlqamu.
X aopxbo drtqmu mz nwzw-kato-krmu Ijipt.

⁷ Mzli lc tqkxpu-ngrnamu, kgleamu ninge, x sc tqarlapxpex nimu.
X sc tqokatrpele nimu tqvzmc mz bzlrmei.

X ni-kznge kc tqabzle nimu mrkc lzke
Mz aulz ngr Meriba."

Navz-nqblqku Natqde

⁸ "Naxlrmamu da kx narngidrlvz-ngrbo bamu, kx leplz nengeng.
X nalalztqmamu mz natqnge.

⁹ Bzkq angioamu kx trngiu Yawe Gct angidr,
Mz nzyrngzo-krbzmu badr.

¹⁰ Murde ninge Yawe, Gct rmu, *

Kc tqvzmile nimu mz nzrlasz-krmu Ijipt.
X sa na-amrlzx nimu mzli kx abrtrmamu drtwrmu bange.

¹¹ Kxmule-esz', a' tryrlq-angidrwamu natqnge, kx leplz nengeng,
Mz nzpxtxpx-krmu ninge.

¹² Mz nzmu-krde lcde, rlrpx-ngrbo bamu nzvz-nqblq-krmu narmu,
X nzale-krmu nike suti drtwrmu.

¹³ A' sutitx zlwz drtwrnge kx nalalztqmamu bange, kx leplz nengeng.
Mz nzlolvz-amqngi-krmu nqmq krgne.

¹⁴ Murde na-aovxiobo enqmi rmung
Mz nzota-krgr badr.

¹⁵ X Krkcnz tzpxtxpx-ngrdr ninge, sa narnrcng mz nzyrngzo-krmlr bange,
X na-ayrplapx-alox nidr.

* Sam Kranzpnu-rtqmz-nrade-esz' (81):10 Nzrlaszngr 20:2; Lou Kcpwz 5:6

¹⁶ A' na-amrlzx nimu leplz nengeng,
Mурde na-abrtz-zlwzamu mz nzmnс-zpwx-krmu."

Sam Kranzpnu-rtqmz-nrade-li (82)

Gct Pipxle Kx Kxnzetung Nzvz-rbrng

Nabz ne Asaf.

- ¹ Gct wxbuom me matq nydze,
Mурde napipxle kx kxnzetung nzvz-rbrng.
- ² Rpibzle badr kx, "Nzaclve-krmu leplz narsakrlrngr.
A' bzkq okatramu kxdrka'-ngrng nzmyaszpx-krdr kxnztubqng.
- ³ Murde mz nwz-krmu natubzmu mz nibr kx trpnzngr scdr da x doa
kxnzbzsng,
X naokatramu kxnzkxpung x kxtrnxplitung.
- ⁴ Murde na-arlaxbzmu krkcng trpnzngr scdr zmatq
Mz mq kxdrka'-ngrng.
- ⁵ Ngngu-plxsramu x trpnzngr da kx krlzamu, murde nqmq krmung amrlx
trka-zlwzng.
X trpnzngr da kx opxm mzli ka mz nrlc.
- ⁶ Nimu kxnzetung murde kapebo bamu zmatq ngr nzrmailz-krmu.
X nimu amrlx apuamu mrlxng Gct kc tqmyalz-esz'ngr. [¤]
- ⁷ Kxmule-esz', a' mrbrtr mz drtwrmu
Kx zmatq kc tqwz-xgleamu nzkriz nzrkatpx-ngrbz,
Da kc tzwai nzrkatpxpe-ngrbz zmatq mz kzdung kxnzetung.
X nabz-kzamu da kc tzwai leplz amrlx mz nzbz-krdr."
- ⁸ Gct, vzm mz nzaclve-krm leplz mz nrlc tulvzo,
Mурde lr drtc' amrlx nzmnclzbzng mz zmatq ngrm.

Sam Kranzpnu-rtqmz-nrade-tq (83)

Enqmi R Israel Mzli Kc Pnz X Mzli Ka

Nabz ne Asaf.

Enqmi Rmqng

- ¹⁻² Gct, bzkq mnc-lrpitxn,
Mурde enqmi rmqng nzxpqbrr-ngrdr nim.
- ³ Sa tzryrlqng drtwr kxyc-kapq kx na-atrkat-ngrdr nigr.
X nigr leplz nemqng kcng tqmrlzti-zlwzq.
- ⁴ Nzrpilr kx, "Naodatitxbzku mrnyzdr,
Mурde drtq Israel namrbrtxtr alo mz drtwr."
- ⁵⁻⁸ Enqmi kcng tzmnc-ngalelr Israel drtwrdr esz'ti
Mz nzprtr-krbzlr mz lr Amcn x lr Mcab, neidu lcng li nzvzpxmqng mz
nqvi lr Lot.
Kxnztupeng badr me esz' nidr seleng:
Nqvi lr Isc, nqvi lr Ismael, neidu lr Haga, x neidu lr Amalek,
Lr mztea Taea, lr Gebal, x lr Filistia.
X lr Asiria kxnzxplrng nzngi tedr kz badr.

Ayrplapx Nidr

- ⁹⁻¹¹ Gct, aovxio kz enqmi lcng mzli ka, da kc tqwai pnz nzaovxio-zvz-krm
enqmi r melrmqgrng.

[¤] Sam Kranzpnu-rtqmz-nrade-li (82):6 Jon 10:34

- Ayrplapx nidr, da kc tqwai nzayrplapx-krm ami ne Jabin, King r lr
 Kenan x Ngrlrvea nede Sisera,
 Mzli kc tqmilxtxo-ngrn nidr mz Lue Kison kc tqyc-aepztr mztea Endo,
 X namz ngrdr mibio mrlcde mz mzli nyd Profet Debra.
 X rlxti-kzpkr nanibqti-kzq enqmi rgrng, da kc tqwaisr-ngrn mz lr Midizn
 mz nznibq-krm Oreb x Seeb, ngrlrvea ngrdrng.
 X maneuti nidr da kc tqwai nzmaneuti-krm king rdr, Sebz x Salmuna,
 mz nznibq-krm nidr mz mq profet Gidion.
- ¹² Murde leplz lcng pnz nzrpilr kx,
 "Natwzku Israel, drtc' nyd Gct, nangi nydgu." [◊]
- ¹³ Gct, mz nzmu-krde lcde, apusrngr nidr bq r drtc',
 X leu kxgler kx wqplr nenq.
- ¹⁴ Odati-atwrnrngr nidr, apubz badr nyr kxetu
 Kc tqyrkrtxongr dalr peto x nardzng mz mzli r nepi.
- ¹⁵ Maneuting x amwxlrng
 Mz nzapu-krbzme badr nounenq.
- ¹⁶ Yawe, amyatitx-zlwzbz drtqdr,
 Murde nakrlz-ngrdr zmatq ngrm.
- ¹⁷ Aovxio alo x amwxlr alo nidr
 Murde nzmya-zlwzkr drtqdr nanibqle nidr.
- ¹⁸ X mzli lc, sc tzkrlz-atepelr kx nim txpwz Gct kc tqmyatxlz-esz'ngr x drtqm
 Yawe.
 X nim King kc tqaclvele nrlc tulvzo.

Sam Kranzpu-rtqmz-nrade-pwx (84)

Kxnzmncpxmqng Mangr-nzangiongr Yawe Gct kc Tqrnir Nzmnc-zpwxng
 Nabz ne nqvi lr Kora kx nzyrbzlr mz kxrmailz ngr dzbe kxzngrng.

- Yawe Kc Tqrnir*
- ¹⁻² **Yawe kc tqrnir, nim Gct kc tqlu.**
 X mrlz-zlwzm bange Mangr-nzangiongr nim.
 Murde sutitx zlwz drtwrnge nzmncpx-krmc makoa ngrde,
 Mrkc tqngr-abrtz-ngrbo bam mz nabznge atwrnrngr.
- ³ **Yawe kc tqrnir, nim Gct x King rnge.**
 Kxnvzdzng Jerusalem mz nzangio-krdr nim nzrlatrng mz olta
 nyzmqng.
 Murde olta nyzm apule ma nyd doa nemqng.
 Da kc tqwai utc tzewz-ngrdr ma nyd neidr, mz nztapirpx-krdr neimrdr.
- ⁴ X doa lcng tzmncpxmqng Mangr-nzangiongr nim nzmnc-zpwxng
 Mz nzangrlvz-zvz-krdr nim.

- Newz Saeon*
- ⁵ Namrlzbz mz leplz kcng tzvzdzng mz Newz Saeon mz nzangio-krdr nim,
 Murde sa na-axplr-mowq nidr.
- ⁶ Mz nzkawi-krdr nabzlwa kxmingr narmctilr nabzde kx lrting
 Mz nibr nzdckr tewa.
- ⁷ X mz nzesotr-krdr Jerusalem nxzplk-krdr sa naetunepx,
 Murde ycpz pipz nzkrlz-krbzlr Newz Saeon mz nzangio-krdr nim.
 X nim Gct rgr kxmyaszlze krkng tzmncng mzlllxr amrlx
 Tzangiolsr lr mrkzbleng.
- ⁸ **Yawe Gct kc tqrnir, nim Gct r melrmqgr Jekop.**

[◊] Sam Kranzpu-rtqmz-nrade-tq (83):12 Kxnzryrlqng Drtwr 4; 6—8

Xlrm nzkrka'-krnge mz nzvztr-krnge ma nyzm.

Nzmnc-zpxnxngr

Sam Kranzpnu-rtqmz-nrade-nzlvqn (85)

Nzamrlzkr Yawe Mzli Kc Pnz, Mzli Ka, X Mzli Kc Navzm

Nabz ne nqvi lr Kora kx nzyrbzlr mz kxrmailz ngr dzbe kxnzngnrg.

Mzli Kc Pnz

- ¹ Yawe, yc ngr drtwrm lr Israel mzli kc pnz,
Mz nzamnc-zpx-mou-krm nidr mz drtc' nyzm.
² Sc tqipqpeq nidr, leplz nemqng, mz nzvz-rbr-krdr,
X katpxbzme alwx ngrdrng.
³ Mzli lcde, lolvzo-mowq zngya ngr drtwrm,
X nrwx kc tqprlxpebzme badr.

Mzli Ka

- 4 Mevalu rgr, mzli ka, amnc zpxw mou kz nigr,
X nikitx nzngyatikr drtfrm nigr.
 - 5 ?Myx kxmule, nangyati-alope drtfrm nigr,
X trpengr nzyzlukr drtfrm?
 - 6 Trtingr! Axplr-mop nzlu-krgr,
Mурde na-abrtz-ngrgr nim.
 - 7 Yawe, aelwa-ngrm bagr nzaodu-krm kc tqyc tqyc,
Mz nzarlapx-krm nigr.

Mzli Kc Navzm

- ⁸ Nabrti drtwrgu natq Yawe,
Mурde esalz-ngrmle nrwx bagu mz nzyrlqpx-lzbq-krgu mz dalm
nzngqngungr.

⁹ X oliq zvz nzarlapx-karde kxnzamrluelr nide,
Mурde nzulrde naxngi-alope mz drtc' nyzgu.

¹⁰ Yawe aodu-zvzle nigu, murde nangida-zpxbzku bade.
X nzaclve-karde tubq, murde namnc-zpxbxku.

¹¹ Mz nzavzo-krmle nztubqngr lc bagu,
Ayzlubzku mz nzngida-zpxbx-krbzku bade.

¹²⁻¹³ Apule kx nztubqngr lc rtwayzbz bade mz nzatubqti-karde nabz leplz,
Murde naoliqti-ngrdr nzvz-krmle.
Mz nzoliqngr lc, Yawe sa narkatim bagu da kxmrlzting,
X drtc' nyzgu sa nalvcngr dakxnxng kxkqlu.

Sam Kranzpu-rtqmz-nrade-esz'mz (86)

Okatrp Ninge Mz Nzaodu-krm
Nabz ne Devet.

- Abrtrpo Drtwrnge Bam*
- 1 Yawe, xlrm nzkrka'-krnge,
 Mурde trxplrxu x ninge ncblo txne.
 - 2 Nim Gct rnge. Arlapx ninge mz nzbzngr murde tenge nim,
 X ninge kxnzawz nem kc tqmnc-xgle-zvzle nim.
 - 3 Nayc mz drtwrm ninge,
 Mурde vz zvz nzkrka'-krbo bam.
 - 4 Kxetu rnge, aelalzm drtwrnge,
 Mурde abrtrpo drtwrnge bam.
 - 5 Murde mrlz-esz'ngrn nzripq-zvzng.
 X aodu-zvzq krkcng tzkrka'bzng bam.
 - 6 Yawe, lalztqm mz nzyrni-krnge,
 X ayzlam natqng.
 - 7 Mzli ka kqlex nim mz nzkxpu-krnge,
 Mурde angidati-zvzme nzrlx-krbo da bam.
 - 8 Kxetu, trpnz-moungr gct kx apule nim,
 Mурde trpnzng nidr kx rkrlz nzalengr da kxnzkctipxng kcng tqale-zvzq.
 - 9 Kxrpalz, lr drtc' amrlx kcng tqwz-ngrn
 Sa nayrngzobzng bam mz nzarmyalz-krdr nim.
 - 10 Murde nim txpwz Gct,
 Kc tqmatq-esz'ngr mz nzale-krm rlx kxetuting.

- Angio-zvzx Nim*
- 11 Yawe, aelwa-ngrm bange me pnz drtwrm, murde navz-nqblqx natqm.
 X alvztrp bange nzamrlue-zvz-krnge nim.
 - 12 Murde nabzng atwrnrngr na-awibz bam mz nzngini-krm Gct x Kxetu rnge,
 X na-angio-zvzx drtqm.
 - 13 Murde nzaodu-zvz-krm ninge etu-esz'ngr,
 Mz nzarlapx-krm ninge mz nzbzngr.

- Okatrp Ninge Mz Nivz Lrm*
- 14 Gct, kxzglqpx-lzbqng nztutitr nardr ninge.
 Zbo ngr ncblo kxayo lc nzrpilr nanibqlr ninge, murde nzpxtxpx-ngrdr nim.
 - 15 A' yc zvz mz drtwrm leplz, x zmrlz ngrm myalz-esz'ngr.
 X drtwrm trngya-aniu, a' nzaodu-krm x nzangidati-krm tqvzpe tqvzpe.
 - 16 Mz nzmu-krde lcde, yzlum x nayc mz drtwrm ninge.
 Axplr x arlapx ninge, murde wztrpo bam da kc tqwai lxenge mz nzwztr-krbzle bam.
 - 17 Yawe, okatrp ninge mz nivz lrm, murde drtq enqmi rngeng namyatz-zlwzng
 Mzli kc namc-ngrdr nzaxplr-krm ninge x nzapqtr-krme drtwrnge.

Sam Kranzpu-rtqmz-nrade-rlimz (87)

Jerusalem Apule Lxe Neidu Amrlx
Nabz ne nqvi lr Kora.

¹ Yawe wz-ngrde mzteadau Jerusalem

- Mz newz kxtr nydzde.
- ² X mzteadau lc nzmrlzba-krdele
Myaszpxle mztea kc-kzng ngr Israel.
- ³ Delc nimu lr mztea nydzde,
Naxlr-ngrnamu natq kxmrlz kcng tzycmnetr-ngrdr Jerusalem.
- ⁴ Gct rpile kx, "Mzli kc na-aplxtipx-ngrbo leplz nengeng, lr mrkzble kcng
tzmnc-ngalelr Israel sa naprtr-kzng mz dzbede nenge,
Krlcng Ijipt, Bxbilon, Filistia, Taea, x Itiopia.
- ⁵ X sa narpibzlr kx Jerusalem lxe neidu amrlx murde nzrmctitrpzlr nzlungr
bade.
X ninge, Yawe kc tqmyatxlz-esz'ngr, sa na-atu-amqngix nide.
- ⁶ X sa nayrox drtq leplz amrlx kcng tzbrti drtwrdr ninge,
Mz nzprtr-krdr mz neidu lr Israel.
- ⁷ X mzli lcde, leplz nengeng lcng amrlx sa naelang x narpilr mz nzngr-krdr
kx,
'Mztea nydzgu, Jerusalem, ngi narlue ngr me vskipxm da kxmrlzting
amrlx.'

Sam Kranzpu-rtqmz-nrade-rtqmz (88)

Mz Nabz Nzlo
Nabz ne nqvi lr Kora.

- Ycpe Pipz Nzbz-krnge*
- ¹ Yawe, nim Gct kx arlapxle ninge,
X yrni-katobo bam ngrlx x nrlckxbq.
- ² Xlrm natqnge
X lalztqm mz nzkrka'-krnge.
- ³ Murde prtilzpele ninge nzkxpungr kxkqlu,
X ycpe pipz nzbz-krnge.
- ⁴ Mzli ka mewepex,
X trpengr da kx nawaitrpem bange.
- ⁵ Nzapusr-ngrdr ninge namz kx nzyrtzmqng mz gq.
Murde krlcng tzbpeng nzmrbrtitrpe drtwr nidr x trpengr nzrmcti-
krdr nzokatr-krm.
- ⁶ Rtcope-ngrn ninge mz gq kx vzo la,
X tutx-ngrpwz nzlo.
- ⁷ Nzngyatikr drtwrm ninge batrpzle nzetq-zlwzkr drtqnge,
Mz nzmrilvzo-krde nabznge apule nrc kc tqyrplalvzo-ebir-ngrde ninge.

- Rblx Nzglqlz-krnge Nim Mz Gq*
- ⁸ Ngi-batrpe' nzngangrkr ktengeng ninge mz nzmwxlrti-krdr zyagox lc
tqdwatimle ninge.
X trpengr me nayrbqkipxx.
- ⁹ Yawe, mzke' vaotxtrpebz mz nzyrningr mz nzvzkr drtwrnge.
Kxmule-esz', a' mz zbz kang kqlu glalz-zvzbo mqnge mz nzkrka'-krbo
bam.
- ¹⁰ Bzkq rlr-ngrme nzbz-krnge
Murde ma tqrblxipem bange nzyapwxtipx-krbo nim mz leplz.
Murde kxnzlu-txpwzng kcng tqalebzme badr da kxnzkctipxng.
X namz ngr leplz trnztulzpeung mz nzglqlz-krdr nim.
- ¹¹ Trnzycmnetrpe-ngrdru nzaodu-zvz-krm mz nabz gq kc tqngi me nzodat-
ingr nidr.
A' nzangidati-krm nzpipxbz mz krkcng tzlubeng mz nrlc ka.

¹² X rblxpebz mz kxnzyrtzmqng nzrmc-krdr nzmyalz-esz'ngr-krm murde
nzmnncng mz nabz nzlo,
X nivz lrm mrbrtr-alope kz mz drtwr, mz gq lr kxnzbzng.

Nabzne Talvzo Zlwz

¹³ A' krka'-zvzbo bam mz zbo kang kqlu, kx Yawe,
Murde nayc mz drtwrm ninge.

¹⁴ A' opxm kx drtqm satrpem bange,
X sc tquesablqtipeq ninge.

¹⁵ Murde ayrplatpxp-zlwzq ninge, yzutr pnz mzli kc tqngi-oblabe-ngrne.
X mzli ka nzetq-zvzkr drtqnge ycpe pipz nzayrkrpx-krde ninge.

¹⁶ Nzngyati-zlwzkr drtwrm ninge apule nubla kc tqtwzle ninge,
Mz nzbatr-krbzle nzmrbrkr nzlu-krnge.

¹⁷ X nzkxpu-krnge lcng nzngrlelvzlr ninge,
X trpengr me nayrbqkipxx.

¹⁸ Ngi-batrpe' kztengeng kxznmrlzng nzngangr-krdr ninge.
X mzli ka nabzne talvzo zlwz mz nzmnnc-krnge esz'-krnge mz nabz
nzlo.

Sam Kranzpu-rtqmz-nrade-rpwxmz (89)

Angidati-mopwz Nzesz'tikr Drtwr Kx Yrlqbzme Mz Devet

Nabz ne Etan.

Nzaodu-zvzkr Gct

¹⁻² Yawe, sa nangr-zvz-ngrne nzaodu-krm,
Kc tqyc tqyc.

X sa nayapwxipx-alox nzangidati-krm natqm,
Kc tqyctx alo, da kc tqwai bongavz.

³ X sa nayrlq-zvzq natqm kc tqpibzme mz kxanzawz nem, Devet,
Kc tqmcpxq, mz Nzesz'tikr Drtwrmu ncdr.

⁴ Rpibzme bade kx, "Ncblo kcng tzvzpxmqng mz neidu lrm, sa nanginipw-
zlr king,
Murde nqvi lrm na-aclve alo."

Nabz Ngr Nzrglqpxngr

⁵⁻⁷ Yawe, lr Heven nzglqpxlr nzangidati-krm,
Mz nzangrlvz-krdr da kxnxkctipx kcng tqaleq.

Enjrl amrlx nzamrlue-zlwzlr nim,
Murde trpnzngr lr Heven kx apule nim, kc tqmyaszlzle nidr amrlx.

⁸ Yawe Gct kc tqrnir, nim txpwz kx xplr-esz'ngr,
Mz nzangidati-krm me pnz drtwrm.

⁹ Kxmule-esz' srkau xplr, a' sc tqolvzq,
X mz nzprtz-krm nrc kxoda, lclvzbzme murde nrwrx navo. [◊]

¹⁰ X aovxio-zvzq enqmi rmqng mz nxzplrx-esz'ngr-krm,
Da kc tqwai nztabrti-krm Mepwz ngr prla kc bqnc.

¹¹ Kxrpalz, bongavz x drtc' nyzmqng,
Murde nim kx rwzngr nrlc x dalrdeng amrlx.

¹² X doa x da amrlx mz nrlc tulvzo
Nzaxvctr-lxblrng mz nzangrlvz-krdr drtqm,

¹³ Mz nzsri-krdr kx, "Nim kc tqmatq-esz'ngr,
X nxzplrx-krm etu-esz'ngr.

[◊] Sam Kranzpu-rtqmz-nrade-rpwxmz (89):9 Sam 65:7; 107:29; Matiu 8:26; Mak 4:39; Luk 8:24

- ¹⁴ Nou nzaclve-krm nrlc nidr seleng:
Nztubqngr, nzrsakrlrngr, nzaodu-zvzngr, x nzangidatingr.”
- ¹⁵ Yawe, ngi da kxmrlz nzmalq-abrtzlvz-krgr nim,
Murde xngibzkr nzulrm.
- ¹⁶ X ngi da kxmrlz nzbilvz-krgr drtqm,
X nzglqlz-krgr nztubq-esz'ngr-krm mz zbq kang kqlu.
- ¹⁷ Murde axplrq nigr,
X aovxiokr enqmi rgrng mz nzokatr-krm.
- ¹⁸ Yawe, nim Gct kc tqtr-esz'ngr x angio-txpwzkr nim.
Murde mcpxbzme king rgr lc tqaclve-zpxle nigr.

- Nzesz'tikr Drtwr Gct Ncdr Devet*
- ¹⁹ Mzli kc bqnc, mz nzyrlq-krm Devet nzngini-krde king, vzme mz profet nemqng,
X rpibzme mz nzrmwiblengr kx,
“Aprcbo zmatq mz kzdq ngirlvea kx xpli,
Mz nzarmyalz-krnge nide mz leplz txneng, murde nanginide king.
- ²⁰ Ncblo kxnzawz nenge lc tqmcpxx, Devet,
X aelux nide mz tolo kxtr. [☆]
- ²¹ Sa namailzx nide mz mqnge.
X sa na-axplrx nide mz zmatq rnge.
- ²² Kxdrka'-ngrng kcng tzngi enqmi rdeng, trtxpnzngr nzyatr-krbzlr bade
Mz nzamyati-krbzlr drtqde.
- ²³ Murde sa natamyr-ngrbo nidr
Mz nznibqti-krbo kxnxpctpx-ngrdr nide.
- ²⁴ Sa na-aodu-zvzx nide x nanginide kzteng.
X sa nabatrpo bade nzaovxio-krde mz drtqnge.
- ²⁵ Sa nakabo bade zmatq ngr nzaclve-krde Prla Meditrenia,
Navz nakrlzbzle Lue Yufretis.
- ²⁶ Sa namcle kx ninge trtede,
Kc tqngi Gct rde x butqbr nyzde kc tqrlakitrle.
- ²⁷ X sa na-apusr-ngrne nide mrlxnge krdaau,
Mz nzarmyalz-zlwz-krbo nide mz king amrlx mz nrlc.
- ²⁸ Drtwr kxesz'ti kc tqyrlqbo bade, trtxpnzngr nzyzpr-krde,
Mz nzangidati-krnge nzaodu-zvz-krnge nide.
- ²⁹ X nzyrlq-krbo nzaclvekr nqvi lrde tqyc tqyc,
Da kc tqwai nzyc-alokr bongavz.”
- ³⁰ X rpi-mopwz Gct kx, “A' nzmu doa nedeng naesablqtilr loukxtr scnge,
Mz trnzlolvz-amqngi-krdr nzaolvztr-krnge
- ³¹ X nzmu trnavz-nqblqlru me pnz drtwrnge
Mz nzpctpx-krdr natqnge,
- ³² Sa na-ayrplapxxng mz alwx ngrdr,
Mz nzaetq-krbo drtqdr mz nikeng nzvz-rbtilr.
- ³³ A' trpnzngr nzatao-krnge da kc tquesalz-ngrbo mz Devet,
A' sa na-aodu-zvzx nide.
- ³⁴ X trpnzngr nztekqtr-krnge natqnge,
A' sa na-atutr-zvzx nzesz'tikr drtwr kc tqyrlqbo bade.
- ³⁵ Esalzpex mz drtqnge kxtr
X amqngipex kx trtxpnzngr nzesabrti-krnge nide.
- ³⁶⁻³⁷ X nzaclvekr nqvi lrde tqyc tqyc,
Da kc tqwai nzti-alokr nepi x nzprt-z-krm temz x nztao-krde.”

King Kc Tqvzpxm Mz Nqvi Lr Devet, Drtwrde Lctrpz Mz Gct

- ³⁸ Yawe, rpiq da lc, a' mzli ka drtqm satrpem bange x rlaszpeq ninge,
Mz nzngyati-moukr drtwrm ninge, king kc tqmcpxq.
- ³⁹ Nikipeq Nzesz'tikr Drtwr kx yrlqbzme mz melrmqgr Devet, kx natu-
zvzbzme mz nibr nqvi lrde,
Mz nzapusr-krbzme kraon ngr narnge brmrda.
- ⁴⁰ Awxlikitxopebzme drkq ngr mzteadau nyznge.
X odati-atwrnr-ngrbzme lrpalvc nyzgrng amrlx.
- ⁴¹ Enqmi rgrng amrlx nzatrkatzi-zlwzlr nigr.
X lr mrkzbleng kcng tzmnc-aepztrpqng bagr nzyrpalelvzlr ninge, king
nem.
- ⁴² Murde ngi-batrpzme nxzplkr ncblo ngr vea nedrng.
X mzli ka sc tzbilvzpelr.
- ⁴³ Amyatibzme nipna scngeng mz nzrpna-krnge,
X rlr-ngrbzme nzaovxio-krdr nigr.
- ⁴⁴ Odatipeq tron nyznge,
Mz nzkatxpx-krbzme zmatq ngr nzngini-krnge king.
- ⁴⁵ Amyatibzme drtqnge mz mz leplz.
X ngi-batrppe' nzngini-ani-krnge lrtzlvz.

Nzkrka'ngr

- ⁴⁶ Yawe, bzkq mnc-rlrume bagr.
X bzkq apqtipeq nigr mz nzngya-zlwzkr drtwrm.
- ⁴⁷ A' na-aoti drtwrm nzmrbcnekr nzlu-krgr nigr leplz
Mz nzmnc-krgr mz nrlc.
- ⁴⁸ Trpnzngr leplz kx na-arlapx-lzbq,
Murde nigr amrlx mnclzbzkr mz zmatq ngr nzbzngr.
- ⁴⁹ Kxetu, opxm kx trangidatipewq natqm kc tqpibzme mz Devet,
Murde trxngipepwzku nzaodu-zvz-krm kc bqnc.
- ⁵⁰ Bzkq mrbrtr mz drtwrm nzobqszokr leplz ninge, kxnzawz nem,
Murde kxnzmnc-mrbr lcng sc tzbilvztipelr ninge.
- ⁵¹ Yawe, enqmi rmqng nznelvztilr ninge, king kc tqmcpxq,
Mz nxztrnga-krdr ninge.

Nabz Kx Yrkpxngr Buk Kratq

- ⁵² Na-armyalzku Yawe, kc tqngi Kxetu rgu.
Tqvzpe, tqvzpe. Eu. Na-armyalzku Yawe.

Buk Krapwx*Sam 90—106***Sam Kranzpnu-rpwxmz (90)***Nzmrbckr Nzlukr Leplz*

Nabz ne Mosis, ncblo ne Gct.

Kxrpalz Kc Tqmnc-al

- ¹ Kxetu, yzutr pnz mzli kc, krlzmle mzbq ka
Nzngini-krm me rlakitrkr.
- ² Mzli kc trwzka-ngrn nrlc x newz ngrdeng, mncpe-kaiq.
Murde nim Gct, x nzmnc-krm la tqyc tqyc.
- ³ Rpime bagr kx, "Yzlu-mouamu,"
X mz nzbz-krgr yzlu-moukr mz drtc' kc tqwz-ngrn nigr.
- ⁴ Mz drtwrgr, yiz kx siu mz nrlc ngi mzli kxboi, a' mz drtwrm mzli
mrbcnepwz,

Apunede zbo kx esz' kx yrkrpxpe.
 5-6 Mz nzmiltxo-krm nigr rblx nzrlolvzngr,
 Apunede nzrmwiblengr kc tqmrbtrr ani mz drtwr.
 X nzmnc-krgr mrbcne apunekr nabr kx yru mz nourla x nrpqdr mztr luli.
 A' kx krlbzle milzpq sc tzlopeng x tztatiopeng murde nzpqkr nzulr
 nepi.

Nzmrbcnekr Nzlungr Mz Nrlc Ka

7 Da kc tqwai nzodati-krm nigr
 Mz nzpqkr zngya ngr drtwrm.
 8 Murde zyzlr ngrm pnamilxtile alwx rgrng
 Kcng tqyrlq-kapqkrng.
 9 X zngya ngr drtwrm amrbctrple nzlu-krgr.
 X mz nzbz-ani-krgr apukr zycmini kx esz'.
 10 Nzmnc-krgr krlz-txp wzle yiz kxnpnu-rlimz (70),
 A' nzmu nrkrdrtqgr kx tqxplrl krlbzkr yiz kxnpnu-rtqmz (80).
 Yiz lcng tqyctrngr nwz-wkatongr x nzetqkr drtq,
 Nzyrkpx-aning x sc tqbzpekr.
 11 Nzmu namckr nzxplkrk nzngyatikr drtwrm alwx
 Nzamrlue-krgr nim naetunepx kz mz nabzgr.
 12 Okatrp nigr mz nzkrlz-krgr drtwr ngr nzmrbcnekr nzlu-krgr,
 Murde nzmnc-krgr mz nrlc navz-nqblqle nzyrplapx-krm.

Yawe, Aelwa-mou-ngrm Zmrlz Ngm

13 Yawe, bzkq ngyati-alu drtwrm nigr, kxnpawz nemqng,
 A' tekqtr drtwrm x nayc mz drtwrm nigr.
 14 Namc-zvzkr nzaodu-krm nigr mz nourla kang kqlu,
 Murde navz zvz nzangrlvz-krgr nim mz nzabrtzngr.
 15 Kxmule-esz' yiz kqlu avz-ngrbzme drtwrgr mz nzkxpu-krgr mzli kc,
 A' tekqtrpz yiz lcng mz nzaelalz-krme drtwrgr mzli ka.
 16 X aelwa-mou-ngrm bagr rlx kcng tzkctipxng mz zmatq ngrm,
 Murde doa negrng namc-kzlr nzmyalz-krm.
 17 Gct, Kxetu rgr, okatrp nigr mz zmrlz ngrm.
 Murde nra nwz-wkrgr nayc-zvzbz.

Sam Kranzpu-rpwxmz-nrade-esz' (91)

Doa Kx Mnc-xglele Yawe

Lrpalvc Kx Rlakitrx

1 Mz nzmnc-xgle-krm Yawe kc tqmyalz-esz'ngr
 Sa natubz mz nibrm.
 2 X narpibzme mz Gct kc tqrninr kx, "Nim Gct rnge kc tqabrktrx drtwrnge,
 Mz nzapu-krme bange lrpalvc kx rlakitrx."
 3 Murde sa na-arlapxle nim mz nzatrkaner kx yc kapq,
 X mz nzrpibqtingr.
 4 Sa na-aclve-zpwxle nim,
 Na-apule kio kc tqwxbulvzole neideng.
 X sa na-angidatbzle natqdeng
 Mz nzapu-krbzle bam temz ngr lomrm kc tqyrputrngr nipna.

Bzkq Mwxlrq

5-6 Bzkq mwxlrq mz nrlckxbq x nrlckxngrlx,
 Mz nzmwxlrti-krm drka', ncblo kxayo, x zyagox kxnabzngr.

- ⁷⁻⁸ Murde kxmule-esz' siu ngr leplz nzbz-aepztrpzng bam,
 Mzli kc Gct na-ayrplapx-ngrde kxdrka'-ngrng,
 X mcq mz mzpq nzbz-krdn,
 A' trtxpnzngr nzatrkti-krdn nim.
⁹ Murde mz nzsipi-krbzme mz Yawe kx nide me rlakirq,
 X mz nzmnc-xgle-krm nide kc tqmyalz,
¹⁰ Trpnzngr doa x da kx na-atrkale nim,
 X trpnzngr kz zyagox kx navztrpq ma nyzm.

Yawe Aclev-zpwxle Nim

- ¹¹ Murde pipebz Yawe mz enjrl nedeng nztu-krbzlr mz nibrm,
 X nzaclve-zpwx-krdn nim drlvekeng vzkiq.
¹² Naglqlr nim mz mqdr,
 Murde nanycm ma tqtcprtr mz rplz. [◊]
¹³ Mz nzrmcti-krm ningidoe kc bqnc, sa na-aovxioq nide.
 Kxmule-esz' nide drka' kxmatq, a' sa narnzlvzoq nide.

Yawe Ycmnebzle Bam

- ¹⁴ Murde Yawe Gct rpile kx, "Sa na-arlapxx doa kx mrlztile ninge,
 X sa na-aclvex nide mz nzmnc-xgle-krde ninge.
¹⁵ Mz nzkqle-krde ninge, sa na-ayzlubo natqde.
 Kxmule-esz' da kx prtz, a' sa namnc-aepztrpo bade,
 X sa nakatpxxx nide mz nzkxpu-krdeng,
 X sa na-armyalzx nide.
¹⁶ X doa lc sa namcle nzarlapx-krnge nide,
 X nakabo bade nzlungr kxboi kx na-abrtz-ngrde."

Sam Kranzpu-rpwxmz-nrade-li (92)

Da Kx Mrlvxitxm Bange

Nabz ngr Sabat, zbqkxnxzamati.

Mrlvxitxm Bange Nzangio-krnge Nim

- ¹⁻³ Yawe myatxlz-esz'ngrn.
 X mrlvxitxm bange nzawi-krbo bam
 X nzglqlz-krnge nim,
 Mz nzayrningr gita x ukzlele,
 Mzli kzniike angrlvz-ngrne nivz lrm mz nourla,
 X nzyrlq-angidr-krm natqmqng mz milzpq.
⁴ Murde aelalz-ngrme drtwrnge da kxetuting kcng tqwz-ngrn.
 X nanrbo mz nzabrtzngr mz da lcng tqaleq.

Murde matq-esz'ngrn

- ⁵ Yawe, nzwz-krmqng matq-esz'ngr,
 X nqmq nr drtwrm vzo zlwz la.
⁶ Kxnzglqpx-lzbqng nzngqng
 X nardr mqngi mz nztatrkr nzalvztr-krmqng mz nardr. [◊]
⁷ Leplz kxdrka'-ngrng nzetu-krdr
 Nzapulr nabztqkr betepu kc tqwou mzli kx mrbcnepwz.
 X da kxtrka kcng tzalelr nradr trnayc-zvzu,
 A' nzodati-krdr tqvzpe tqvzpe.
⁸ Krle tqmu-ngrde lc,

[◊] **Sam Kranzpu-rpwxmz-nrade-esz' (91):12** Matiu 4:6; Luk 4:10-11 [◊] **Sam Kranzpu-rpwxmz-nrade-li (92):6** 1 Korint 2:14

Murde nim kx rmyalz zvz.

- ⁹ Yawe, obq ena! Murde enqmi rmqng sa nabzng
Mz nzaovxio-krm kxdrka'-ngrng amrlx.

Apux Nounc Kc Tqpa Zvz

- ¹⁰ A' ninge kx xplr zlwz,
Mz nznka-krme bange zmatq ngrm.
¹¹ Mcpex nzaovxio-krm kxnmnc-kapqng mz nznibq-krdr ninge.
X xlpex nzynikr kxdrka'-ngrng lcng mz nzaetq-ngrbz drtqdr.
¹²⁻¹³ Leplz kxntubqng kcng tztung ma nyz Yawe,
X nzyrlwr-lxblrng mz makoa nyzde nzapulr nounc kxetung.
X nzmnc-zpxng x nxzplrng
Murde dzbrdr nzvzong mz drtc' kc tqngi natqde.
¹⁴ X kxmule-esz' nznginipadr lrtzlvz,
A' sa navz zvz nzvz-nqblq-krdr me pnz drtwrde,
X nradr nayc-zvzbz,
Mz nzapu-krdr nounc kc tqpa zvz.
¹⁵ Krle aelwapx-ngrde nzmlzkr Yawe,
X nztubq-krde mz nzngini-krde butqbr kc tqrlakirx.

Sam Kranzpnu-rpwxmz-nrade-tq (93)

King Kc Tqmyatxlz-esz'ngr

- ¹ Yawe, nim King kc tqmyatxlz-esz'ngr, x rngiscm zmatq.
Wz-ngrn nrlc x tu-amqngio me yc-ngrde x trycngrlru.
² Nzmnk-krm tqyc tqyc.
X nzngini-krm King yc pnz kai, x sc tqwz-ate-ngrn dalr nrlc ka.
³ Yawe, srkau ngr prla, nzalxvrsti-ebir-ngrdr da.
X natq nrc ngrde aycngirlle nrlc, mz zmatq kx xplr.
⁴ A' nzmyalz-krm myaszpxle srkau.
X zmatq ngrm myaszpxle nzmatqkr natq nrc, murde nim kc tqmnctxlz tqmatq-esz'ngrn.
⁵ Yawe, Loukxtr scmqng tqvzpe, tqvzpe.
X Mangr-nzangiongr nim nztr-zlwz-krde tqyc, tqyc.

Sam Kranzpnu-rpwxmz-nrade-pwx (94)

Gct Sa Na-ayrplapxle Kxdrka'-ngrng

Yawe, Ayrplapx Kxdrka'-ngrng!

- ¹ Yawe, nim Gct kc tqayzlubz mz leplz kxnvz-rbrng da kxnzalelr.
Aelwapxngr zmatq ngrm.
² Nim kx na-ayzlubz da mz lr nrlc.
Ayrplapx kxzglqlz-lzbqng navz-nqblqle nike nzalelrng.
³ Yawe, bzkq rlr-ngrbzme mz kxdrka'-ngrng
Nzabrtz-krdr mz da kxtrka kcng tzalelr.
⁴ Nzpixtilr da kxtubq,
X nzbilvzlr nzale-krdr alwx.
⁵ Nzatrkatilr nigr, leplz nemqng,
Mz nzaetqti-krbzlr drtqgr.
⁶ Kxntzetung nznibqtilr olvz kxntabzong, x doa kxnbzszng,
X lr mrkzbleng kx mnckrng badr.
⁷ Nzrpilr kx, "Trtxpnzng nzmckr Yawe nigu.

X trycneu mz drtwr Gct rdr da lcng tqaletikung.”

Yawe Obqplxle Nzaokr Drtwr Leplz

- 8 A' nimu kx nardr mqngi, nalalztqmamu bange.
?Myx mzli kx nayrplapx-krlzu-rnamu?
- 9 ?Mz drtwrmu rpiamu kx Gct kc tqwz-ngrde nradrtqgu x mzku,
Nradrtqde ngq x mzte mwi?
- 10 X sc tqayrplapxpele lr mrkzbleng.
?Myx kxmule, trtxpnzngr nzayrplapx-kz-krde nimu?
X alvztrle leplz amrlx.
?Mz drtwrmu trpnzngr da kx krlzle?
- 11 Yawe obqplxle nzaokr drtwr leplz,
X krlzle kx drtwr kx nzyrlqlr mane. [☆]

Mrlz Nzpnamatikr Yawe Leplz Nedeng

- 12 Yawe, namrlzbz mz krkcng tqpnamatikng,
Mz nzalvztr-krm nidr mz loukxtr scm.
- 13 X trnarlrpx-ngrnqu nzkxpu-krdr, a' amnc-zpwxq nidr,
Vz vz mzli kx ayrkro-ngrn kxdrka'-ngrng mz gq.
- 14 Yawe, trpxtxpx-ngrnqu leplz nemqng,
X tr-rlasz-ngrnqu nigr kcng tqmcpxq.
- 15 Mzli kc navzm, nzaclvekr kxnzrmailzng sa natubq,
X krkcng nabzdr tqlqngi sc tzabrtz-ateng.
- 16 Yawe, nim txpwz kx tum mz nibrnge,
X nim kztenge mz nzarlapx-krbzme ninge mz kxdrka'-ngrng.

Yawe Tu-zvzbzle Mz Nibr Kxnztubqng

- 17 Nzmu trnaokatrwq ninge,
Mzli trnaboiu x ninge kc tqbzpex.
- 18 A' mzli kc tqkqle-ngrne nim mz nzkxpu-krnge,
Lolvz-amqngiq ninge mz nivz lrm.
- 19 X mzli kc tqtalvzongr drtwrnge,
Zvz amqtrpe' drtwrnge x abrtz-moux.
- 20 Px-ngrn nzngi-te-krmu badr kxnzetung kxdrka'-ngrng
Mz nzrnlvzo-krdr loukxtr scm.
- 21 Murde nzyrlwrpx-lxblr-ngrdr mz nzrpwa'-krdr kxnztubqng,
X nzaprc-krdr kxnzmrlzng mz nzrnibqngr.
- 22 A' Yawe, Gct rnge, nide lrpalvc nyznge,
X butqbr kc tqrlakitr.
- 23 Yawe, Gct rgr, sa naodatile nidr mz nqmq krdr kc tqtrka,
Mz nzrtxlvzlz-krdr alwx ngrdrng amrlx.

Sam Kranzpnu-rpwxmz-nrade-nzlvqn (95)

Namnclbzku Mz Yawe, King Kc Tqngi Kxrpalz

Nangrbzku Mz Yawe

- 1 Nangrbzku mz Yawe mz nzabrtzngi.
Mурde nide butqbr kc tqrlakitr.
- 2 Na-awibzku bade
Mz nzngr-kato-krbzku bade mz nabz kxyrlvi!
- 3 Murde Yawe nide Gct kc tqmyalz-esz'ngr,
X King kc tqmyaslzle kxnzmncng mzlllxr amrlx.

[☆] Sam Kranzpnu-rpwxmz-nrade-pwx (94):11 1 Korint 3:20

- ⁴ Me boongr yc mz mqde.
X nyz-kzde newz kxmyalzng.
- ⁵ Prla x drtc' nyzdeng
Murde wz-ngrde mz nzngini-krde Kxrpalz.
- ⁶ Na-angioku Yawe kc tqwz-ngrde nigu
Mz nzyrngzlvzo-krgu nide.
- ⁷ Murde nide Gct rgu, x nigu leplz nedeng,
Apuku sip kx aclveleng.

Naxlrku Natqde

- X naxlramu natqde mzbq ka,
Mz nzsri-krbzle bamu kx,
- ⁸⁻⁹ "Bzkq nabzmu mqngipe, da kc tzwailr melrmqmung.
Murde kxmule-esz' nzmc-zvzlr nzrkat-krbo da kxmrlzting badr,
Mz nzmnc-krdr mrkc lzke, a' otalblrkr badr mrkc Meriba,
X nzatalzlr ninge mrkc Masa, mz nzxpqbzlr-krdr ninge.
- ¹⁰ Mz yiz lcng nzpnu-pwx ngyati zvz ngr drtwrnge nidr.
Murde nidr leplz kx nzvz-rbrng mz nabzdr x trnzvz-nqblqlru nqmq
krngeng.
- ¹¹ X mz nzangya-krmlr drtwrnge, sc tqesalzpx kx,
Trtxpnzngr nzprtr-krdr mz nzmnc-zpxnegr kc nakabo badr." *

Sam Kranzpu-rpwxmz-nrade-esz'mz (96)*Naglqlzku Yawe, King Kc Tqtubq**Takitrde Nzrglqlzng*

- ¹ Nigu lr nrhc amrlx
Nangr-ngrbzku mz Yawe nabz kxmrna!
- ² Na-angrlvzku nide
Mz nzyapwxtipx-krgu kx arlapxle nigu.
- ³ Napixbzku mz leplz amrlx
Da kxmatq x da kxmyapxbz kcng tqaletileng.
- ⁴ Takitrde nzrglqlzng Yawe kc tqmyalz-esz'ngr,
Murde nzmrlue-krde namyaslzle kxnzmncng mzlllxlr amrlx.
- ⁵ Lr mrkzbleng nzangio-txpwlzlr mqngr da kxnzlz,
A' Yawe txpwz kx rwzngr bongavz x nrhc atwrnrngr.
- ⁶ Mz nzmncpx-krm Yawe Mangr-nzangiongr,
Xngibzku zmrlue, zyzlr, zmatq x zluli rdeng.

Lr Nrhc Naglqlzlr Yawe

- ⁷⁻⁸ Napibzku mz lr mrkzbleng kx naglqlz-kzlr nide
Mz zmatq, zluli, x zmrlue lcng.
Murde takitrde nzale-krgu da lcng,
Mz nzrtwz-krmgu da bade mz makoa nyzde.
- ⁹ Na-angioku Yawe murde tr-esz'ngr.
Na-amrlueku nide x narnrctrpzku bade.
- ¹⁰ Eu, napixbzku mz neidung amrlx kx Yawe nide King r nrhc, x atu-
amqngile nrhc mz trnzycngrr-krdeu.
X sa na-aclvele lr nrhc amrlx mz nzrsakrlrngr.

Nzacle-krde Tubq

* Sam Kranzpu-rpwxmz-nrade-nzlvqn (95):11 Hibr 3:7-11, 15; 4:3, 5, 7

- ¹¹ Nimu bongavz x drtc' naelalvzamu nide!
X nim prla x dalrmqng amrlx drtwrmu naelalzm!
- ¹² Nimu nardzng x dalrmqng amrlx na-abrtz-kzamu!
Nimu nounc ngr peto amrlx na-angrlvz-kzamu Yawe.
- ¹³ Murde sa tqvzm mz nzacuve-krde lr nrlc.
X nzayzlu-krbzle da mz leplz amrlx sa namrlz x tubq.

Sam Kranzpu-rpwxmz-nrade-rlimz (97)

Na-abrtzlvzku Yawe, King Kc Tqmyatxlz-esz'ngr

Zmatq Ngrde

- ¹ Mrlz lr nrlc amrlx nzabrtz-krdr murde Yawe nide King kc tqmyatxlz-esz'ngr.
X lr trmctu naelalz-ngrm drtwrdr kz nide.
- ² Zbo kxve x nzlo nzngrlelvzlr nide.
X nzacuve-krde leplz mrlz x tubq.
- ³ Nyr rtwayznepx kai mz nzvz-krde,
Nyr kx nangcngr enqmi kcng tzulvz-ngrdr nzi rde.
- ⁴ Bzlrpc ngrde kx pcpkle pnamilxtile nrlc,
X drtc' ycngrlrlzm.
- ⁵ Yawe nide Kxetu r nrlc tulvzo.
X mz nzmc-krdr nide newzng nzwxong nzapulr nzwxokr gq.
- ⁶ Lr Heven amrlx nzpipxlr nztubq-esz'ngr-krde,
X lr nrlc amrlx nzmclr nzmyatxlz-zlwz-krde.

Myaszpxle Kxnzmncng Mzlilxlr

- ⁷ Krkcng amrlx tzangirol kx trngiu Yawe Gct angidr, drtqdr la namya zlwz.
X kxnzmncng mzlilxlr amrlx nzmu na-angirol nide. [☆]
- ⁸ Yawe Gct rgr, nigr lr Jerusalem x lr mztea amrlx ngr nqvi lr Judz abrtz-zlwz-ngrgr nim
Nzayrplapx-krm enqmi rgrng.
- ⁹ Murde lr nrlc amrlx nzmnclzbzng mz zmatq ngrm,
X nzmyalz-zlwz-krm myaszpxle kxnzmncng mzlilxlr amrlx.

Namnclzbzku Bade

- ¹⁰ Nigu kcng tzmrztilr Yawe napxtpx-ngrgu da kxtrka.
Murde tu-zvzbz mz nibr kxnztubqng mz nzarlapx-krbzle nidr mz mq kxdrka'-ngrng.
- ¹¹ Yawe amrlz kxnztubqng, kx nabzdr lqngi.
Murde na-abrtzlvzlr nzngini-krde Gct kxtr.
- ¹² Delc, nigu kcng tzubqng na-abrtzlvzku Yawe,
Mz nzawi-krbzku bade.

Sam Kranzpu-rpwxmz-nrade-rtqmz (98)

Na-angrlvzku Yawe, King Kc Tqmatq-esz'ngr

Na-angrlvzku Yawe

- ¹ Nangr-ngrbzku mz Yawe nabz kxmrna mz nzale-krde da kcng tqmyapxbzng.
Murde aovxiole enqmi rdeng mz nzetukr zmatq ngrde.
- ² X sc tqaewapxpe-ngrbzle nztubq-krde mz lr mrkzbleng amrlx,

[☆] Sam Kranzpu-rpwxmz-nrade-rlimz (97):7 Hibru 1:6

Mz nzarlapx-krbzle leplz nedeng mz mq enqmi rdrng.
3 X aodule nigu lr Israel mz nzatutr-zvz-krde natqde.
Mурде leplz mz nrlc tulvzo nakrlzlr kx arlapxle nigu.

Naglqpxku Nide

4 Nigu leplz amrlx mz nrlc na-angrlvzku Yawe
Mz nabz kx yrlvi.
5 Naglqpxku nide
Mz nzayrni-krbzku bade gita,
6 X mz nzvxu-krbzku trpu.
Na-angrlvzku Yawe, kc tqngi King!

Nangrbzku Bade

7 Nimu prla x drtc' x dalrmung amrlx
Drtwrmu naelalzm!
8 Nimu lue na-amqmq-lzbqamu mz nztalio-krmu mz nabzde.
X nimu newz na-angrlvzamu Yawe!
9 Nigu amrlx nangrbzku bade.
Mурде sa tqvzm mz nzaclve-krde lr nrlc,
X nzayzlu-krbzle da mz leplz sa natubq x narsakrlrngr.

Sam Kranzpnru-rpwxmz-nrade-rpwxmz (99)

Na-angioku Yawe, King Kc Tqtr-esz'ngr

Naglqlzku Drtqde
1 Yawe nide King, kx myaszlzle enjrl kcng tzmatqng tztu-ngalelvzlr tron
nyzde.
X leplz amrlx mz nrlc tulvzo narnrcti-lzbqtr-ngrbzlr bade.
2 Yawe matq-esz'ngr Jerusalem.
X nzmyalz-esz'ngr-krde myaszpxle lr mrkzbleng amrlx.
3 Leplz amrlx naglqlzlr drtqde,
Mурде nide kc tqtr-esz'ngr.

Naglqlzku Gct Rgu

4 King kc tqrnir, mrlz-zvzbz bam da kxmrlz.
Delc nzaclve-zvz-krm nigr tqtubq-zvz-ngrde x rsakrlrngr.
5 Nayrngzobzku mz nany Yawe,
Mrkc tqwxbu-ngrde mz tron nyzde.
Na-angioku x naglqlzku Gct rgu,
Mурде nide kc tqtr-esz'ngr.

Naglqlzku Yawe

6 Mosis x Eron nidr pris neng Yawe, x profet Samwel krka'bz bade.
Nzyrnitrpzng bade x ayzlubzle natqdr.
7 Ycmnepxm badr mz nabz dcbz,
X nzvz-nqblqlr natqde x lou scdeng amrlx.
8 Yawe, nim Gct rgr,
X ayzlume natqgr, nigr leplz nemqng.
Kxmule-esz' ayrplapx-kaiq nigr mz alwx ngrgrng,
A' sc tqaewapxpe-ngrn kx nim Gct kx krlzle nzipq-krde leplz.
9 Naglqlzku Yawe, Gct rgu, mz nzangio-krgu nide mz newz kxtr nyzde,
Mурде nide kc tqtr-esz'ngr.

Sam Kratrtqki-esz' (100)

Na-awi-ngrbzku Mz Yawe Nzaodu-karde Nigu

Na-angioku Nide

- ¹ Nigu leplz amrlx mz nrlc
Na-angrlvzku Yawe!
- ² Na-angioku x naglqpxku nide
Mz nzelalz-krm drtwrgu!
- ³ Nalxngitiku kx Yawe nide Gct, x nigu leplz nedeng murde wz-ngrde nigu.
X apuku sip ngr nardzng nydze.

Na-awibzku Bade

- ⁴ Mz nzvztr-krgu mz naonrx x makoa ngr Mangr-nzangiongr Yawe,
Navz zvz nzawi-krbzku bade x nzangio-kz-krgu nide.
- ⁵ Murde Yawe mrlz-esz'ngr.
X aodule nigu mz nzatutr-zvz-karde natqde.

Sam Kratrtqki-esz'-nrade-esz' (101)

Nztubqkr King R Israel

Nabz ne Devet.

- ¹ Yawe, nangr-ngrbo bam
Nabz ngr da kxtubq x nzangidatingr.
- ² X namnc-nqlqx nztubqkr nqmq krm mz nzokatr-krm ninge.
X nabznge nalqngi zvz mz nzmnc-krgr badr lr ma nydzne.
- ³ Tr-rlr-ngrpwc'u nzptr-krm da kxtrka brma.
X ptxpx-ngrne krkcng tzesablqtilr nim.
- ⁴ Delc, nartctx-ngrne nqmq kr kxdrka'-ngrng,
X nayrlqpx-lzbqnge mz da kxvz-rbr.
- ⁵ Sa narpwa'-ngrbo krkcng tzpikiti-awalr kxnzmnc-aepztrpzng badr.
X kxzglqpx-lzbqnge trmrlzu mz nzobq-krnge.
- ⁶ A' kxnzxngiti-zpwxr nim nanginidr kztengeng,
X kx nabzdr lqngi sa nawztrpqng bange.
- ⁷ A' krkcng tzesabrng x tzpokia-zvzng,
Trtxpnzngr nzmncr-krmlr bange.
- ⁸ Murde mz zbq kang kqlu sa nalolvxit kxdrka'-ngrng
X namaszlrpx-ngrne nidr mz mzteadau nydm.

Sam Kratrtqki-esz'-nrade-li (102)

Apux Zsikapu Kc Tqmrbr Ani

Nzmnc-krnge Esz'-krnge

- ¹ Yawe, lalztqm mz nzkrka'-krbo bam.
X xlrm nzyrni-krnge mz nzokatr-krm.
- ² Mzli ka tqprt-zngrm nzkxpungr bange,
Bzkq mnc-rlrume bange.
- ³ A' ayzlu-anim natqng
Mz nzkqle-krnge nim.
- ⁴ Nrkrdrtnge nzpq-krde apule nyr.
X mzli trnaboiu ninge kc tqbzpx, tqapupex zsikapu kc tqmrbr ani.
- ⁵ Nabzng talvzo apupele nabr kxglt.
X trmupewxu.

- 5 Bztipenge nzyrningr mz nzetqkr drtqnge.
X nginitxpenge nrvr-nrbalq.
- 6 Apux nc kx nzrtclzngr mepz, x sc tqtaligxpe,
Mz nzmnc-krnge esz'-krnge.
- 7 Mnzx, a' trkrlzpewxu nzmwingr.
Apux ncblo kx trpnzngr kxnginide kx naoklatile nide.

Apux Brmrda

- 8 Enqmi rngeng nzatrkat-zvzlr ninge mz nzycmne-krdr.
Nzpitrpzlr drtqnge mz nzrpibqti-krdr leplz.
- 9 Yawe, nzvzkr drtwrnge dekc tqkrlcngr nelznge tqngi dakxnzng nange,
X drle mzke' dekc tqngi lue pqnge.
- 10 Murde ngyati zlwz drtwrm ninge.
X apux brmrda kc tqrtctxpe-ngrn.
- 11 Nzmnc-krnge apule zmyo ngr milzpq
Kc tqmrbr mz nzyrkpxkr ngrlx.

A' Nzngini-krm King Tqyc Tqyc

- 12 Kxmule-esz', a' nzngini-krm King tqyc tqyc.
Nrpr ngr ncblo amrlx sa nadcpx zvz mz drtwrdr nim.
- 13 Murde sa nayc mz drtwrm Jerusalem.
X mzli ka mzli r nzokatrpe-krmle.
- 14 Kxmule-esz' enqmi rm nzodatipelr mztea lc, x trkape,
A' sc tqsutibe drtwrgr x tqvztibe drtwrgr.
- 15 Yawe, lr mrkzbleng amrlx sa na-amrluelr drtqm.
X king amrlx mz nrlc sa na-amatqlr nim.
- 16 Murde mzli kc na-aelwapx-ngrn nzlulikr zmatq ngrm,
Mz nzwz-mou-krm Jerusalem,
- 17 Drtwr ngrde kx ayzlu-ngrme nzkrka'-krgr,
Nigr kcng trpnzngr scgr da.

Krkcng Mztr Trnzmcka

- 18 Nayroku da kcng tqaleting Yawe,
Murde krkcng mztr trnzmcka naglqpx-kzlr nide.
- 19 Kxnamu nzyr-krgule sele: Yawe mnc Heven,
Mz ma nyzde kc tqtr tqmyalz, x sc tqobqom mz nrlc.
- 20 Xlrle nzyrni-krgu mz presin,
X aopxbzle drtqgu, nigu kcng tzpipx kx nanibqng.
- 21-22 X xlrpe-kzle nzngrkr leplz ngr mrkcng amrlx
Mzli kc tzyrlwr-lxblr-ngrdr Jerusalem,
Mz nzangio-krdr nide,
X nzglqpx-krdr drtqde.

Trtxpnzngr Nzrtekqtrngr Nim

- 23 Yawe, ngi-batrpe' nzyangrnga-krnge,
Mz nzamrbctr-krme nzlu-krnge, mzli ka tqngi-oblabe-ngrne.
- 24 A' rpibo bam kx, "Gct rnge, nzlu-krm tqyc tqyc.
Suti drtwrnge nakrlz-zpwxbo nzngi-lrtzlvz-krnge, x ninge kc tqbz-atex.
- 25 Mzli kc mz noude wz-ngrn nrlc,
Bongavz x dalrdeng amrlx.
- 26 Nrlc x bongavz sa nayrkpxng kalr.
A' nim txpwz kx namnctx alo.
Mzli trnaboiu x sc tztrkapeng, tzapupelr lrpz kxblzlongr,

- Kx nzrtctxngr x nztekqtr zvz mz kxmrna. ☀
 27 A' trtxpnzngr nzrtekqtrngr nim.
 X trtxpnzngr nzbz-krm mz kzdq mzli. ☀
 28 Delc doa negrng sa namnc-zpxwng mz nrllc,
 Mурde sa na-aclve-angidrq nidr."

Sam Kratrtqki-esz'-nrade-tq (103)

Nivz Lrde Tqyc Tqyc

Aodu-zvzle Ning

- 1 **Naglqpxx Yawe mz nabznge atwrnrngr!**
 Naglqpox-zvzx drtqde kxtr.
 2 Na-aoti zvz drtwrnge nivz lrde,
 X da kxmrlz kcng tqalemle bange.
 3 Murde katpxbzle alwx rngeng amrlx.
 X amrlzle ninge mz zyagox amrlx.
 4 Arlapxle ninge mz nzbzng.
 Aodu-zvzle ninge.
 5 Okatrle ninge mz da kxmrlz
 Murde nzlu-krnge naboi x nrkrdrtqnge naxplr, mz nzapu-krnge lr.

Ipqpxle Alwx Rgung

- 6 Yawe okatrle kxnzbqszong murde ale-zvzle da kxtubq
 Mzli kc tqayzlu-ngrbzle da mz leplz.
 7 Aelwa-ngrbzle me pnz drtwrde mz Mosis,
 X zmatq ngrde mz lr Israel.
 8 Yawe mrlz-esz'ngr x aodu-zvzle nigu.
 Drtwrde trngya-aniu, a' okatr-zvzle nigu.
 9 Trkrlzleu nzaboitr-krmle zngya ngr drtwrde bagu,
 A' ani txpwz nzipq-mou-krde nigu.
 10 Kxmule-esz' takitrde nzayrplapx-zlwz-krde nigu,
 A' ycngr drtwrde nigu, x trayzruleu bagu mz nzvz-nqblq-krde nzvz-rbr-krgung.
 11 Murde sc tqaodu-zvzpele nigu kcng tzamrluelr nide,
 Murde nzetu-krm nivz lrde bagu myaszpxle bongavz. ☀
 12 X mz nzipqpx-krbzle alwx rgung,
 Apule kx rtctx-ngrbzle rlu, me trpengr nzrmc-moungr.
 13 X Yawe amqtrple drtwrgu,
 Da kc tqwai trte nzamqtr-krbzle drtwr doa nedeng.
 14 Dcpx mz drtwrde kx nigu leplz kxtrnzxplrungr,
 Murde wztx-ngrpwzle nigu mz drtc'.

Aodu-zvzle Nigu

- 15-16 X nzlu-krgu mrbcnepwz,
 Apule nepi kc tqprtzm mz nourla, x tqxplz mzli kc bea.
 A' sc tqtaope mou milzpq.
 Murde mzli kc nabzngr leplz trpengr nzrmc-moungr nidr.
 17-18 A' Yawe aodu-zvzle x amrlz-zvzle nigu,
 Kcng tzamrluelr nide,

☀ Sam Kratrtqki-esz'-nrade-li (102):26 Matiu 24:35; 2 Pita 3:10; Nzaelwapxngr 20:11 ☀ Sam Kratrtqki-esz'-nrade-li (102):27 Hibru 1:10-12; Jemes 1:17 ☀ Sam Kratrtqki-esz'-nrade-tq (103):11 Sam 36:5; 57:10; 71:19; 108:4

Mz nzyrlq-angidr-krgu natqde,
X mz nzolvz-amqngi-krgu Nzesz'tikr Drtwrgu badr.

Naglqpx-zvzku Nide

- ¹⁹ King Yawe wxbu mz tron nydze Heven,
Mrkc tqacive-ngrde nrlc atwrnrngr.
²⁰ Nimu enjrl kxnxmatq kcng tzvz-nqblqlr natqde,
Naglqpxamu nide!
²¹ X nimu ami ngr Heven kcng tzwztrpzng bade mz nzatutr-krbzmu me
pnz drtwrde,
Naglqpx-kzamu nide.
²² X nigu amrlx mz nrlc tulvzo naglqpx-kzku nide.
Naglqpxx Yawe mz nabznge atwrnrngr!

Sam Kratrtqki-esz'-nrade-pwx (104)

Nabz Ngr Nzrglqlzngr Kxrpalz

Kxrpalz

- ¹⁻³ **Yawe Kxrpalz, naglqpxx nim mz nabznge.**
Mурde nim Gct kc tqluli, tqmyalz-esz'ngr.

Bongavz

- Nzmyalz-krm x zmatq ngrm nzngrlelvzlr nim nzapulr lrpz kx kq-ngrn.
X zyzlr ngrm apule lrpzu scm.
Bongavz apule nqni kxetu kc tqprlxpxq.
X atuome elr nctrpou ngr ma nydm.
Dcbz apule lika kx lvc-ngrn,
Mz nztwz-krde nim nenq kxwq.
⁴ Zmatq ngrm batrpzle mz enjrl nemqng nzlvc-ani-krdr mz nzapu-krdr
nenq.
X menrpa lcng tzwztrpzng bam nzapu-kzlr bzlrpc kc tqpc tipx. ☀

Drtc'

- ⁵ Wztioq nrlc mz nou rplz kxmqngi,
Mурde trpnzngr nzycngrlr-krde.
⁶ Mzli kc ayrnrngr, drtc' mrbrobz prla,
X newz amrlx akq-atwrnr-ngrde.
⁷ Zbz mzli kc tqpnanati-ngrn prla sc tqpzneope,
Mz nxzlr-krde natqm kc tqapule bzlrmei.
⁸ Prla pzneom mz nar-newzng, vzo krlzobzle nabzlwang,
Vzo mrkc tqyrlqbzme kx nalrlz-ngrmle.
⁹ X yrlqbzme bz ngr me naesakingr prla,
Mурde ma tqakq-atwrnr-mou-ngrde drtc'.

Lue, Dakxnzng, X Ma

- ¹⁰ Wz-ngrn aulz, nzaulzmqng mz nabzlwa amrlx,
Lue lcng nzvzong x lue kxetung nzyrleng mz mzlir newz amrlx.
¹¹ Animol amrlx nzrmnqng lue lcng,
Mz nzbrlxkzkr drtwrdr.
¹² Utc nzrwzpe-ngrng ma nydze x nzngr-zvzng
Mz nounc mz nqlvi r lue lcng.
¹³ Adcme tewa mz ma nydm bongavz. Dcom mz newz amrlx.
X amrlzle drtc' murde kxnxlung kcng tqwz-ngrn namnc-zpxng.

- ¹⁴ Wz-ngrn nabr x dakxnzng nztuting mz drtc'
 Nangi nan animol x leplz.
- ¹⁵ Rkame waen kx na-aelalz-ngrm drtwrgr,
X tolo kx na-alqngr nrkrdrqgr,
 X dakxnzng kx naxplrngr nigr.
- ¹⁶ Yawe, nounc nyzm kc tqpetiq
 Nzdo-zlwz-krdr vzpxm mz nzadco-krme tewa badr.
- ¹⁷ X utc kang kqlu nzmnccpxng mz nounc lcng.
 X nwzpx-ngrdr ma nyzdr elr.
- ¹⁸ Gout nzmncomqng mz newz,
 X animol kxnztopwzng nzmncc-paqneng me rplzngr.

Mzli Kcng Tqyrlqq

- ¹⁹ Yawe, wz-ngrn temz nangi noabx ngr mzli,
 X nepi noabx ngr zbq.
- ²⁰ Nim kx rwzngr nzlo ngr nrlckxbq,
 Mzli r nzprpx-krm animol kzpeto me nzmncc-ngrdrng.
- ²¹ Laion nzyrni-katong mz nzrtangr-krdr dakxnzng
 Kx nakabzme badr.
- ²² A' mzli kc tqprtz-ngrm nepi,
 Sc tzyzlupeng ma nyzdr, tzmwipeng.
- ²³ X mz nrlc kxngrlx, leplz nzvzng mz nzale-krdr nwz-krdr,
 Nwzng vz vz krlbzle milzpq.

Animol

- ²⁴ Yawe, animol kcng tqwz-ngrn kqlu-esz'ngr.
 Nrlc ka yrbulzm mz da lcng amrlx tqwz-ngrn mz nzyrplapx-krm.
- ²⁵ Dcpwe yrlwrlz-ngrm nc kxkqlu x rblx nzrlwx-krgrleng.
 Kzdu nc lcng nzetuting x kzdu nztopwzneng.
- ²⁶ Lcsu kxnxkqlung nzvoneng prla.
 X nc kxbe kc tqwz-ngrn drtqde besilr ayone kz elr.

Mevalu

- ²⁷ Animol lcng nzmncc-xglelr nim,
 X rka-zvzbzme nadr dakxnzng.
- ²⁸ X mz nzkra-krbzme da kxmrlz badr
 Amrlz-zvzq nidr.
- ²⁹⁻³⁰ Mzli kc tqrka-ngrbzme zycmini sc tzlupeng,
 Mурde nim Kxrpalz.
X ngi-batr-zvzbzme nzlukr animol amrlx mz nrlc.
 A' mzli kc tqpxtxpx-ngrn nidr, nelzdr vzdzm.
- Mурde mz nzrkatpx-krbzme zycmini lc, nzbzng.
 X nzyzlu-moung mz drtc' kc tqwz-ngrn nidr.

Zluli X Zmatq

- ³¹ Nzmyalzkr Yawe navz zvz,
 X nzabrtzlvz-krde nikeng wz-ngrdeng amrlx.
- ³² Mz nzobqo-krmle, drtc' ycngirlzm apule nengq kx vzm,
 X ngi-batrpxle nzsikapukr trmami mz nzmaletr-krde newzng.
- ³³ Na-angrlvz-zvzx Yawe Gct rnge,
 Navz nakrlbzle nzesakikr nzycmini-krnge.
- ³⁴ Mrlzvxitx Yawe nzabrtzlvz-krde natqngeng mz nzngr-krbo bade,
 Mурde nide kc tqrngi-batr-zvzm nzabrtz-krnge.
- ³⁵ Mrlzvxitx nznibqti-krde kxdrka'-ngrng

Murde nzatrkatilr nrlc kc tqwz-ngrde mz nzpxtxpx-krdr nzglqlz-krdr
nide.

Yawe naglqpxx nim mz nabznge.

Eu. Naglqlz-zvzkr nim.

Sam Kratrtqki-esz'-nrade-nzlvqn (105)

*Gct Angidati-zvzle Nzesz'tikr Drtwrdr Badr Leplz Nedeng, Kxmule-esz'
Nzvz-rbrng*

Nqmq Kr Gct

1 Naglqpxku Yawe,

Na-awibzku mz Yawe mz nzmyalz-esz'ngr-krde.
X napipxbzku mz lr mrkzbleng da kcng tqaletileng.

2 Na-angrlvzku mz nzangio-krgu nide.

X napipxku da kxnzkctipxng kcng tqwz-ngrdeng.

3 Nabilvzku drtqde kxtr.

X nigu kcng tzamrluelr nide drtwrgu naelalzm.

4 Namnc-xgleku Yawe x nxzpllr-krde.

X nasuti drtwrgu nxzngi-krbzku nzulrde.

5-6 Vzpxmgu mz nqvi lr Ebraam, kxnzawz ne Yawe,

X nqvi lr Jekop kc tqmcpxle.

Delc nadcpx zvz mz drtwrgu rlx kcng tqmatq tqaleleng,

X nztubqkr nqmq krde.

Nzesz'tikr Drtwrgu Badr Gct

7 Yawe nide Gct rgu.

X kapxbzle natqdeng mz leplz amrlx mz nrlc.

8 Nzesz'tikr Drtwrgu badr tqyc tqyc.

X trmrbrtru mz drtwrde nzesalz-krde.

9 Nzesz'tikr Drtwr lc tzyrlq-kailr mz Ebraam.

X pipx-kzpze nzesalz-krde lc mz Aesak.

10 Amqngi-mopwzle mz Jekop x doa nedeng,

Murde navz alo.

11 Rpibzle badr kx, "Sa nakabo bamu drtc' kc Kenan

Murde nangi drtc' nyzmu."

Leplz Neng Gct

12 A' nqvi lr ncblo lc tqngi nyz Gct nzpipzbeng mzli lcde,

Mz nzngini-krdr lr mrkzbleng kx trpnzng me nzmqngio-ngrdr.

13 X nzayo-txp wzng

Mz nzrlasz-krdr kc mrkzble x nzvzki-mou-krdr mrkzble.

14 A' Yawe tr-rlrpx-ngrdeu nzaovxiongr nidr,

Murde aclvele nidr mz nzlc-amq-krbzle mz king kxnzkqlung,

15 Mz nzhpi-krbzle badr kx, "Bzkq atrkatibzmu leplz nengeng kx mcpxx.

X bzkq aetqbzmu drtq menrpa nenge lcng."

Drtwr Kx Yrlq Gct

16 Mz nibr kzdung mzli, Yawe atwzlr-ngrmle dzbi mz drtc' nyz leplz nedeng,

X katpxx-kzle dakxnzng nadr amrlx.

17 A' atwzlr-kai-ngrde kzdq ncblo Ijipt kx nangibz lrpzki badr.

Krlcde Josip, mrlx Jekop, kc tzamwalr murde nanginide kxnzawz-nrbalq.

18 X mz nibrde sc tqmncpxpem mz presin,

- X nzatolva-ngrdr nide mz nqvi.
- ¹⁹ Vz vz x natqde sc tqyokaetipxpele nzrmwiblekr king r Ijipt,
Mz nzpipx-krde natq angidr kc tqkabz Yawe bade.
- ²⁰ Zbz king r Ijipt kc tqaclvele mrkcng kqlu,
Aopxbzle drtq Josip mz nzkapx-krmlele mz presin.
- ²¹ X sc tqyrlqpele Josip nzngini-krde kxetu elr;
Murde na-aclvele dalr Ijipt amrlx.
- ²² Zbz Josip rngisc zmatq mz nzrkapx-krbzle natq mz kxnzetung amrlx,
X mz nzalvztr-krde ncblo kcng tzyrplapxng.
- ²³ Mz nibrde Jekop badr doa nedeng sc tzvzpeng Ijipt,
Mz nzmnc-krdr elr, murde dzbi lc tqtaope mz drtc' nydzdr.

Nzayrplapxkr Gct Lr Ijipt

- ²⁴ Nqvi lr Jekop nzmncing Ijipt trtqki r yiz, x Yawe batrpzle nzkqlunepx-krdr.
X nxzplkr-krdr myaszpxle lr Ijipt, enqmi rdrng.
- ²⁵ Delc lr Ijipt tzngyattingr drtwrdr leplz nedeng kcng tzangiolr nide.
X sc tzatrkatipelr nidr mz nzawz-nrbalq-krdrlleng x sc tznibqtipe-kpzlr doa ncblo nedrng mzli kc mztr tzmc-ngrdr.
- ²⁶ Delc Yawe tqatwzlr-ngrbzle Mosis kxnzawz nede,
Nidr mz Eron kc tqmcpxle, murde naokatrlr leplz nedeng Ijipt.
- ²⁷ X sc tzale-ngrdr rkh ngr Gct kxmatq kxkqlu elr,
Mz nzngi-batr-krbzle nzrwzngr da kxnzkctipxng mz mqdr x mz natqdr.
- ²⁸ Awx-nzlo-ngrbz Yawe mrnyzdr,
A' natqde trnzvz-nqblqpwzlsru lr Ijipt.
- ²⁹ Ngi-batrpzle nzlrtipxkr lue nydzdrng mepyr
X nzbztingr nc nedrng.
- ³⁰ Drtc' atwrnrngr yrbuti mz frck,
X nznulvzpx-kzplr ma nyd king.
- ³¹ Yawe kapxle natqde
X mc badr mclrla nzyrkrpx-pnz-ngrng nrlarnrlc nydzdr.
- ³² Atwzlr-ngrmle muli-aes apule tewa kxdc,
X bzlrpc tqpcipx zlwz mrnyzdr.
- ³³ Odatile nqvi lr dakxnxng mz nrlanc nydzdr
X plameitio-kzle nounc nydzdr amrlx.
- ³⁴ Yawe kapxle natqde
X blzmr kionabr kx rblx nzrlwxngr nzlvcmqng.
- ³⁵ Nzngqtilr dakxnxng kxnzpeting
Mz nrlanc nydzdr amrlx.
- ³⁶ Zbz Yawe sc tqnibqtipe-kzle doa ncblo kx ayrnrngr
Mz ma nyd lr Ijipt amrlx.

Nzokatrkr Gct Lr Israel

- ³⁷ Mz nibrde sc tqmailzpele lr Israel mz nzrlasz-krdr Ijipt, nzrtwzng silvz x gol.
X trpnzng nidr kxnzyagoxng, a' nxzplrng.
- ³⁸ X lr Ijipt nzabrtzlvzlr nzrlasz-krdr nidr.
Murde nzmwxlrtir da kx naprtzbz badr mz nzolvz-mou-krdrlleng.
- ³⁹ Yawe yrlqbzle dcbl ngrlx murde navz-nqblq leplz nedeng,
X mz nrlckxbq yrlq-kzpzle nyd nayzrbz badr.
- ⁴⁰ Nzrlxbzng bade dakxnxng x atwzlr-ngrmle kio kxkqlu
X dakxnxng kxkqlu kx nakrlcngr nelzdr.

41 Ayrlepxmle lue mz kzdq rplz kxetu,
X lue lc yrle lzke apule lue kxvo.

Me Pnz Drtwr Gct

- 42** Delc Yawe sc tqyc-zvzngr mz drtwrde natqde kxtr
Kc tqpibzle mz kxnzawz nede, Ebraam.
- 43** Zbz sc tqmailzpxpele leplz nedeng kcng tqmcpxle,
X nzngr-zvzng x nzmalq-zvz-kzng mz nzabrtz-krdr.
- 44** Kabzle drtc' ngr lr mrkzbzeng mz leplz nedeng,
X nztwz-kzlr nrlanc nyzdrng x da amrlx kx nzvzpxmqng mz nzwz-krdrng.
- 45** Murde leplz nedeng navz-nqblqlr loukxtr scdeng
X nayrlq-angidrlr natqdeng.
Naglqpxku Yawe.

Sam Kratrtqki-esz'-nrade-esz'mz (106)

Gct Arlapx-zvzle Leplz Nedeng, Kxmule-esz' Nzvz-rbrng

Nzawingr

1 Naglqpxku Yawe!

Murde aodu-zvzle nigu.

Awi-ngrbzku bade nzmrzlz-esz'ngr-krde.

2 Trpnzngr leplz kx rkrlz nzrpipx-angidrngr rkx amrlx kcng tqwz-ngrde,
X nzrglqlzng amrlx trkrlzpxpwzleu nzmyalz-esz'ngr-krde.

3 Yawe, natqm rpile kx sa namrlzbz mz leplz kcng tzaleng da kxtubq,
X trpnzngr da kxtrka mz nzao-krdr drtwrdr.

4 Nadcpnxng mz drtwwm ninge, mzli kc naokatr-ngrn leplz nemqng,
X aprtr-kzpz ninge badr, mzli kc na-arlax-pzpx-ngrn nidr.

5 Murde na-axvctr-kzpo badr mz nzamnc-zpx-krm nidr,
X mz nzabrtz-krdr x nzbilvz-krdr nzngini-krdr leplz nemqng.

Mrkc Ijipt

6 A' axvctr-lzbq-kzpzkr mz melrmqgrng mz alwx ngrdrng.
X vz-nqblq-kzkr nzvz-rbr-krdr mz da kxtrka.

7 Mzli kc tzmncngr melrmqgrng Ijipt,
Trnzkrlz-zpxwlru rkx kcng tqaletiqng,

X trnzaotiu drtwrdr nzwrde kcng kqlu tqaetwa-ngrbzme nivz lrm badr.
X mrkc Prla Bla nzrnzlvzolr nim kc tqmyalz-esz'ngr.

Mrkc Prla Bla

8 Kxmule-esz', a' arlapxq nidr mz nzvz-nqblq-krde nzesalz-krm.
Mурde na-aelwapx-ngrn nzmyapxkr zmatq ngrm.

9 Lclvzq Prla Bla x sc tqakipx-lzbqpe x noude pzlz-kzp.
X sc tqmailzpeq leplz nemqng elr.

10 Arlapxq nidr mz nzaopx-krbzme drtqdr mz mq lr Ijipt,
Enqmi rdr kcng tzpxtxpx-ngrdr nidr.

11 A' prla yrle-etr mou x akq-pnzle enqmi rdrng,
X trpnzngr nidr kx rlapx.

12 Mzli lcpe sc tzlxngiti ate leplz nemqng natqmqng,
X sc tzngrpeng mz nzglqlz-krdr nim.

Mrkc Lzke

13 A' mzli trboiu sc tqmrbtrpe mz drtwrdr nikeng aletiq,
Mz nzvz-nqblq-kai-krdr me pnz drtwrdr x nim kc ate.

¹⁴ Mzli kc tzmnc-ngrdr lzke nzabzlr nim,
Mz nzrlx-krbzlr ncvr animol, murde drtwrdr rblx nzesapx-krdr.

¹⁵ X kabzme badr da kc tzsuti drtwrdr,
Vzmi zyagox kxtrka mz nzayrplapx-krm nidr.

Kxnzrnzlvzolr Mosis

¹⁶ Mzli lcng li kzdung ncblo tzrnzlvzolr Mosis,
Ncdr Eron kc tqngi kxnzawz kxtr nem.

¹⁷ Zbz drtc' glqwi x lvxpx-lzbq mz nzyrtzmq-amrna-krde kxnzrmailz lcng,
Datan ncdr Abiram, nidr badr lr ma nyzdr x kztedrng amrlx.

¹⁸ X atwzlr-kz-ngrpe' nyx mz kzdq ncblo x kxdrka'ngr kc-kzng tzvz-nqblqlr
nide,
X nzngcting amrlx ngrdr.

Mz Nou Newz Saenae

¹⁹ X mz nou Newz Saenae nwz-ngrdr mz gol kc mqngr kzu.
X sc tzangiopelr nide.

²⁰ Nztekqtrlr nzangio-krdr Kxrpalz kc tqmyalz, tqrwzng kzu amrlx,
Mz nzangio-alzu-krdr mqngr kzu kc tzwz-ngrdr esz'-krdr. [☆]

²¹⁻²² Trycneu mz drtwrdr nim kc tqarlapxle nidr.
Tqrtrngzbz rkx kxmatq mrkc Ijipt,

Tqwz-ngrde da kcng tqmrlzvxing elr,
X tqalele da kcng tzkctipxng mrkc Prla Bla.

²³ Delc tqrpipe-ngrn kx naodatipeq leplz nemqng.
A' Mosis kc tqmcpxq, awxobzle zngya ngr drtfrm, x trodatiwq nidr.

Nzpxtxpx-krdr Drtc' Kxmrlz

²⁴ A' mz nibrde nzpxtxpx-ngrdr nzprtrngr mz drtc' kxmrlz kc tqkabzme
badr,
Murde nzmwxlr-zlwzng x trnzlxngitru nzesalz-krm.

²⁵ Nzmnc-txpwzng lzke x drtwrdr lctrpz mz kztedrng mz nzlitr-krbz
drtwrdr bam.
X trnzvz-nqblqlru nim.

²⁶ Zbz sc tqesalzpebzme badr
Kx sa nanibqtiq nidr lzke.

²⁷ X sa nangi-batrpzme mz doa nedrng nzakitikr nrlc nidr,
Mz nzmnc-krdr badr kxtrnzrlxngitiung x nabztneng mrkzbleng.

Nzangio-krdr Baal

²⁸ Zbz mz Newz Peo, leplz nemqng nzprtr-kzpzung mz nzangio-krdr gct kc
drtqde Baal.
X nzmu-kzng blz krde, kxmule-esz' nide gct kxbz kxnzrz.

²⁹ Delc tqngyatingr drtfrm nidr
X sc tqdwatipebz zyagox kx nabz-ngrdr.

³⁰ A' Finizs twzpele zmatq x nibqle doa kcng li tqvzkipxm nzkxpungr,
X zyagox kc sc tqayrkrpxpeq.

³¹ Nzwzkr Finizs lc tubq mz nzobq-krm.
X nzryapwxtpnxngr nide trpnzngr nzmrbz-krde.

Mz Aulz Ngr Meriba

³²⁻³³ Mz aulz ngr Meriba, nzangyati-kzpzlr drtfrm.
X da kcng tzalelrng atalvzbzle drtfr Mosis,

X sc tqvz-rbrpe mz nzycmne-ani-krde.

Delc tr-rlr-ngrpwzmeu nzprtr-krde mz drtc' nyzm,
 X nzkxpu-krde lc vzpxm mz natq kc tqpibzle
 Mz leplz lcng nardr tqmqngi.

Nzprtr-krdr Mz Drtc' Nyz Gct

- ³⁴ Mz nzprtrkr leplz nemqng mz drtc' nyzm
 Pibzme badr kx nanibqtilr lr Kenan kcng tzmncng elr.
 A' nzpxtxpx-ngrdr nzvz-nqblq-krdr natqm,
 Mz nzrlr-krbzlr nzrlapx-krdr.
³⁵ X nzyrlz-etrng badr kxnzmnc-mrbrng,
 X nztwzlr nqmq krdrng.
³⁶ Nzangiolr mqngr drka' rdr.
 X krlc lrpzki r nzodatingr nidr.
³⁷⁻³⁸ Nzrlr-ngrbzlr doa ncblo x doa olvz nedrng
 Nzngini-krdr blz kx nzkabz mz mqngr drka' kxnzlz lr Kenan.
 X mz nzpulio-krdr mepyr ngr doa nedrng kxnzmrlzng,
 Nzatrkti-zlwz-ngrdr drtc' kc tqkabzme badr.
³⁹ X nzatrkti-lzbq-kzng mz da lc tzalelr,
 Mz nzapusr-lzbq-krdr olvz kc tqrlaszle kernalzde.

Nzakitikr Nrlc Nidr

- ⁴⁰ Mz nzmu-krde lcde, sc tqngyatipe drtwrm leplz nemqng,
 X pxtxpx-ngrn nidr.
⁴¹ Rlrpx-ngrn nzaovxiokr kxnzmnc-mrbrng nidr,
 Murde na-aclvepeng enqmi rdrng.
⁴² X enqmi lcng nzayrplatipxlr nidr,
 Mz nzmnclz-krbzlr badr.
⁴³ Nzwrde kqlu kx arlapx-ngrn nidr,
 A' sc tqsuti zvz drtwrdr nzmncngr kx na-atrkatingr nim.

Nzylu-mou-krmlr Mz Drtc' Kc Tqkabz Gct Badr

- ⁴⁴ A' mzli kc tzyrni-ngrbzlr bam, xlrbzme natqdr.
 X vztitx drtwrm nidr murde nzkxpu-krdr.
⁴⁵ Leplz lcng nemqng, dekc tqycngr mz drtwrm Nzesz'tikr Drtwrmu Badr,
 X trayrplapx-zvzwq nidr, murde aodu-zvz-kzq nidr.
⁴⁶ X ngi-batrpzme nzyckr mz drtwr enqmi rdr
 Kcng tzaovxiolr nidr.

Nzkrka'-krgr

- ⁴⁷ Yawe, Gct rgr, arlapx nigr mz mq kxtrnzrlxngitiung,
 Mz nzvzmi-kr-mope' nigr mz drtc' nyzgr.
 Murde na-awibzkr bam
 X naglqlzkr drtqm kxtr.

Nabz Kx Yrkpxngr Buk Krapwx

- ⁴⁸ Naglqlzku Yawe, Gct rgu, nigu lr Israel,
 Tqvzpe, tqvzpe. Naglqlzku Yawe.

Leplz narpilr kx, "Eu, angida!"

Naglqpxku Yawe.

Buk Kranzlvqn

Sam 107—150

Sam Kratrtqki-esz'-nrade-rlimz (107)

Gct Ayzlu-zvz-ngrbzle Natq Leplz Nedeng

Nzawingr

- 1 Na-awi-ngrbzku mz Yawe nzmrlz-esz'ngr-krde.
 Murde aodu-zvzle nigu.
- 2 Naglqlz-zvzku nide,
 Murde arlapxbzle nigu mz mq enqmi rgung,
- 3 Mz nzkapx-krmle nigu mrkzbzeng mz nrlc tulvzo.
 Murde nayrlwr-lxblrku mz drtc' nyzde.

Kxnzayoneng Lzke

- 4 Kzdung nigu nzayoneng lzke,
 Me trpnzngr lrpzki kx narmcti-ngrdr mztea kx namnc-ngrdr.
- 5 Kztegu lcng nzbrtale-zlwzng, nzbrlxkz-zlwzng,
 X mztr tclvrting.
- 6 **Zbz sc tzkqlepelr Yawe,**
Kc tqkatpxpxpebzle nzkxpu-krdr.
- 7 Mailzle nidr mz lrpzki kxtubq,
 Vz, vz nzkrzbzlr mztea kx namnc-zpwx-ngrdr.
- 8-9 Rkabz lue mz kxnzbzrlxkzng,
 X dakxnzng kxmrlzting mz kxnzbzrtaleng.
- “**Awi Yawe, mz nivz lrm kc tqyc tqyc, eu.**
Okatr-zvzq nigr. Awi Yawe, mz nivz lrm.”

Kxnzmncng Mz Presin

- 10 Kzdung nigu nzatolva-ngrng mz presin,
 Mz nzmnccpx-krmrlr me tungr nzlo.
- 11 Murde nzrnzlvzolr lou sc Gct kc tqmyatxlz-esz'ngr,
 X drtqdr sa kz nzrlolvzngr nzalvztr-krdeng.
- 12 Delc tqngi-batr-ngrbzle nzetqkr drtqdr mz nwz-kato-krdr.
 X nzyangrnpeng, a' trpnzngr kx naokatrle nidr.
- 13 **Zbz sc tzkqlepelr Yawe,**
Kc tqkatpxpxpebzle nzkxpu-krdr.
- 14 Aopxbzle drtqdr mz da kc tzatolva-ngrdr,
 X vzmipxmleng mz nabz nzlo mz zyzlr.
- 15-16 Zmatq ngrde myaszpxle naonrx ngr presin,
 Mz nzodati-atwrnr-krdele.
- “**Awi Yawe, mz nivz lrm kc tqyc tqyc, eu.**
Okatr-zvzq nigr. Awi Yawe, mz nivz lrm.”

Kxnzyagoxng

- 17 Kzdung nigu nzpxtxpx-ngrdr Yawe mz nzngqngu-krdr,
 X ayrplapxle nidr mz alwx ngrdrng mz nzbatr-krbzle nzyagox-zlwz-krdr.
- 18 Mzli lc nzpxpe-ngrdr nzmungr,
 X nabzpeng.
- 19 **Zbz sc tzkqlepelr Yawe,**
Kc tqkatpxpxpebzle nzkxpu-krdr.
- 20 Yawe amrlzle nrkrdrqdr mz zyagox lcng mz nzymnetx-krpwzle.
 Delc tzrlapx-ngrdr mz nzbnzng.
- 21 “**Awi Yawe, mz nivz lrm kc tqyc tqyc, eu.**
Okatr-zvzq nigr. Awi Yawe, mz nivz lrm.”
- 22 Abrtz-zlwz-ngrgr nim nzkatpx-krbzme
 Nzkxpu-krgrngq. Abrtz-zlwz-ngrgr nim.
 Naglqpx-zvzkr nim mz nzngr-krgr nabz,

X mz nzale-krgr blz. Naglqpx-zvzkr nim.”

Kxnzalilvcneng Mz Lcsu

- ²³ Kzdung nigu nzalilvcneng mz lcsu prla,
 Murde nzrtrngztibzlr nzmabz-krdr elr.
- ²⁴ Kztegu lcng nzmclr zmatq ngr Yawe,
 Mz da kx aleting dcpwe.
- ²⁵ Mzli kc tqycmneti-ngrdr nenq, x trlipu r nenq kc tqwqppe.
 X batrpzle nzvzdz-krm ebio wq.
- ²⁶ Ebio lc glqtxlzle lcsu scdr wq.
X twzo-moule mrbrobz mz mzlirdr mz kztedeng.
 Trlipu lc avzdzmle nelzdr x alibzle drtwrdr.
- ²⁷ Dea-ngrdr tqvzne x nztaneng nzapulr ncblx kxzrmnqng.
 X trpengr da kx nakrlzlr kx nartrngztibzlr.
- 28 Zbz sc tzkqlepelr Yawe,**
Kc tqkatpxpxpebzle nzkxpu-krdr.
- ²⁹ Ycmnebz mz nenq x sc tqamaope,
 Mz ebio x nrw x kc tqvope. [☆]
- ³⁰ Kztegu lcng nzabrttx-zlwz-ngrdr nzvopekr nrw x,
 X sc tqmailztrpeng Gct mz nabzn kc naokitrlr.
- ³¹ “**Awi Yawe, mz nivz lrm kc tqyc tqyc, eu.**
Okatr-zvzq nigr. Awi Yawe, mz nivz lrm.
- ³² Napipxbzkr nimq mz mz lrtzlvzng,
 X mz leplz amrlx. Napipxbzkr nimq.”

?Nzayrplaxngr O Nzamrlzngr?

- ³³ Yawe apztx-atwrnr-ngrde lue kxnxetuting,
 X aesakile nzyllebz-krm aulzng.
- ³⁴ X apiz-kzle drtc' murde trpnzngkr da kx nalvcpu mrlcde,
 Mz nzayrplax-krde kxdrka'-ngrng kcng tzmnncng elr.
- ³⁵ A' me ngi drta'ngr ngi nabzdeng kx lrngr lue,
 X drtc' kx mingrtng yrlebz-ngrm aulzng.
- ³⁶ Murde navzmimle melrmqgung kxnxbrtaleng namncng mrlcde,
 Mz nwz-wz-krdr mztea nydzr kx namnc-ngrdr.
- ³⁷ Nzrwz-ngrng nrlanc x nzpetilr noun,br/> X nzrninganqng dakxnzng x nranc kxkqlu.
- ³⁸ Amrlz-zvzle nidr x ngi-batrpzle nzrmika-krdr doa kxkqlu,
 X nzkqlunepxkr animol nedrng.

?Kxnzyrplaxng O Kxdrka'-ngrng?

- ³⁹ Mzli kznike leplz nzobqszo-ngrdr nigu
 Mz nzatalvzo-krbzlr drtwrgu x nzaetq-zlwz-krbzlr drtqgu,
- ⁴⁰ Gct kc tqobqszo-ngrde kxnxetung kxnxglqpx-lzbqng,
 X batrpzle nzayone-krdr nzapulr kx trpnzngkr me tutrngr nzvzne-krdr.
- ⁴¹ A' katpxxbzle nzkxpu-krgu, nigu leplz txneng,
 X aclevele nigu mz nzapu-krgu sip nedeng.
- ⁴² Kxntubqng nzmclr nqmq krde x nzabrtz-zlwz-ngrdr.
 A' kxdrka'-ngrng nwz-wz-nabu-txp wzng.
- ⁴³ Krkcng tzyrplaxng nakrlzlr da lcng
 Mz nzaotikr drtwrdr nzetukr nzaodukr Yawe nigu.

[☆] Sam Kratrtqki-esz'-nrade-rlimz (107):29 Sam 65:7; 89:9; Matiu 8:26; Mak 4:39; Luk 8:24

Sam Kratrtqki-esz'-nrade-rtqmz (108)

Mnc-xgle-txpwzkr Nim Mz Na-aovxio-krm Enqmi Rgrng
Nabz ne Devet.

- Sa Na-angrlvzx Nim*
- ¹⁻² Sa na-angrlvzx nim mz nabznge atwrnrngr mz nzayrni-krbo gita bam,
Mурde abrtr-zvzbo drtwrnge bam.
Nilz r nepi adwalzmle ninge mz zbq kang kqlu.
A' mz nzdwalz-krmc mz nourla kx topwz,
Na-apule nabz nenge adwalzmle nepi,
Mzli lc tqglqlzpex nim.
- ³ Yawe, sa na-awibo bam mz mzlir lr mrkzblleng,
X na-angrlvzx nim mz mzlir neidung.
- ⁴ Murde nzaodu-zvz-krm myalz krlzlzle bongavz,
X nzangidati-zvz-krm natqm. [◊]
- ⁵ Lr Heven namclr nzmyalz-esz'ngr-krm,
X lr nrlc namclr nzaovxio-krm. [◊]

- Gct Ayzlu-ngrmle Natqgu*
- ⁶ Mz zmatq ngrm, arlapx nigr kcng tqaodu-zvzq,
X ayzlu-ngrme natqgr.

- Da Kc Tqpi Gct*
- ⁷ Gct, natqmqng nzvzpxmqng mz Mangr-nzangiongr, mz nzsri-krdr kx,
“Mzli kc na-aovxio-ngrne, sa na-akipxbo mz leplz nengeng
Drtc' kcng mz nrlar LueJodzn rllr.
- ⁸ Murde neidu lr Gilead nengeng.
X nqvi lr Manase nenge-kzng.
X neidu lr Efrem tum mz nibrnge.
X nqvi lr Judz kx na-aclve-zvzng mz zmatq rnge.
- ⁹ A' enqmi rmung trna-aovxiolru nimu.
Murde lr Moab sa nawztrpqng bange
X lr Edom sa nametxmqng bange.
X sa namalqlvzx nzmilxtxo-krnge lr Filistia.”

- Natq King*
- ¹⁰ ?Gct, sa na-atutrq natqm lc mz nzokatr-krm ninge,
Nzprtr-krnge mz lrpalvc ngr mzteadau nydr lr Edom?
- ¹¹ Murde mzli kc axtxpeq nigr,
X trokatrwq ami negr mz nzotangr.
- ¹² Gct, okatrp nigr mz nzota-krgr badr enqmi rgrng mzli ka.
Murde mane nzmnc-xgle-krgr ncblo nzarlapx-krdr nigr.
- ¹³ X krlzkr kx mz nzmnc-krme bagr,
Sa narnzlvzokr enqmi rgrng mz nzokatr-krm. [◊]

Sam Kratrtqki-esz'-nrade-rpwxmz (109)

Kxnzplibqtilr Doa Ne Gct
Nabz ne Devet.

Kxnzatrkatilr Ninge

[◊] Sam Kratrtqki-esz'-nrade-rtqmz (108):4 Sam 36:5; 71:19; 103:11 [◊] Sam Kratrtqki-esz'-nrade-rtqmz (108):5 Sam 57:7-11 [◊] Sam Kratrtqki-esz'-nrade-rtqmz (108):13 Sam 60:5-12

- 1** Gct, glqlz-zvzx nim.
Bzkq anabume bange x obqlvz-txpwzme ninge.
- 2** Murde kxdrka'-ngrng kxnzesabrng nzycmnetr-ngrdr ninge
Mz nzpokiatitr-krdr ninge.
- 3** Nzatrkti-krdr ninge trpnzngr noude,
A' nzrpiting natq kx trmrlzu.
- 4** Kxmule-esz' aodux x krka'-ngrneng nidr,
A' nzayzlu-alzuplr mz natq ngr nzpokiangr.
- 5** Kxmule-esz' alebo badr da kxmrlzting mz nzngini-krnge kztedr,
A' nzale-alzupqng bange da kxtrka mz nzapu-krdr enqmi rngeng.

Bzkq Amrlzq Enqmi Rnge

- 6** Yawe, suti drtwrnge kx na-ayrplapxq ncblo kc tqycmne-atrkatile ninge
Mz nzvz-nqblq-krde natqnge kcng napibo bam mz nzngini-krnge
kxnzawz nem.
- Mzli kc navz-ngrde mz kot, kzdq kxdrka'ngr natubz mz nibrde,
X mrlz kzdq enqmi rde nanginide majzstret.
- 7** Bzkq rlr-ngrbzme nzaovxio-krde,
A' nzkrka'-krde na-aelwapx-ngrde nzvz-rbr-krde.
- 8** Bzkq amrlzq nide, a' nabz ani,
X natekqtr ncblo kzble mz nzngini-krde kxrmailz. [◊]
- 9** Nabzzsz-kzle doa nedeng x olvz rde,
Murde trpengr kx na-aclve-angidrle nidr.
- 10** Naodatitxde ma nyd doa nedeng,
Murde navztxneng mz nzrlx-krdr dakxnnzng.
- 11** Mz nznka-niwzlr-krdr trau kx rlxti trtedr, nayrkrttxpxngr dztudrng amrlx.
X lr mrkzblleng napnatibzlr da kx atatprle mz nzwz-krde.
- 12** Bzkq kx nivz lrde mrlzbz bade,
X bzkq kx ycngr drtwrde doa nedeng.
- 13** Nabzng badr lr ma nyzdeng amrlx,
Murde bzkq kx nardctipx mou drtwr nqvi lrde.
- 14** Nadcpx mz drtwrm nqmq kr melrmqdeng kc tqtrka,
X bzkq ipqpxq alwx ngr lxede.
- 15** Mrkc Heven nadcpx zvz mz drtwrm alwx ngrdrng,
A' mz nrlc enqmi lcng namrbtr alo mz drtwr.

Alwx Rdeng

- 16** Rlxtnbo bam da lcng murde mrlx lc trpnzngr kx mrlzti nivz lrde,
A' armzkiti x rnibqti leplz txneng kxtrnzrnciscung x kx drtwrdr talvzo
zlwz.
- 17** Mrlzbz bade nzpilz-zvz-krde leplz.
Delc mrlzvxitx na-ayzlu-mou-ngrbz bade nzpilz-krdeng.
X ptxpx-ngrde nzale-krbzle da kxmrlz mz leplz.
Delc tqpxtxpx-ngrne nznka-ngrbz da kxmrlz bade.
- 18** Tresakiu nzpilz-krde leplz.
Delc nzayzlu-krbzmeleng bade naxngitx-pnzbzle.
Mrlz nzpilz-krm nide na-apule lue kx mingrtr mz nrkrdrdqde,
X tolo kx na-alqtipwzle me xvcngr nrvr ngrde.
- 19** X na-apu-kzle lrpz kc tqkq-ngrde
X amqngitr nrkalo.

Yangrnga-zlwzx

- ²⁰⁻²¹ Yawe, Kxetu rnge, kxmule-esz' rlxtibo bam nzayrplapx-krm enqmi rrgeng
 Kcng tzpibqtilr ninge,
 A' rlxti-kzpo bam nzamrlz-krm ninge x nzokatr-krm ninge mz nzvz-nqblq-krde Natqm.
 X arlapx ninge mz nzvz-nqblq-krde nzmrlzkr nzaodu-krm ninge.
- ²² Murde ninge ncblo txne kx tr-rngiscu,
 X drtwrnge vztx zlwz.
- ²³⁻²⁴ Nrkrdrdqngi ngi nrvr-nrbalqpe mz trnzmupe-krpwc'u,
 Mz nzapu-krnge zmyo ngr milzpq kc namrbr-anipe.
 X apunepe-kzx br kc tqlvcne tqwqplxne nenz,
 Mz nzyangrnga-zlwz-krnge.
- ²⁵ Kx nzmc ninge nzyrpalelvzlr ninge,
 X nzmcpxmlr nctqdr bange.
- ²⁶ Yawe, Gct rnge, okatrp ninge, kxnzawz nem!
 Arlapx ninge mz nzvz-nqblq-krde nzaodu-krm ninge.
- ²⁷ Murde enqmi rngeng nakrlz-zpwxlr kx arlapxq ninge
 Mz zmatq ngrm kx xplr-esz'ngr.
- ²⁸ Yawe, kxmule-esz' enqmi rngeng nzpibqtilr ninge, a' amrlz ninge,
 X aovxio nidr murde nabilvzx nim.
- ²⁹ Batrpz nzavzo-lzbq-krdr,
 Murde nzamyati-krbzme drtqdr naopx mz mz leplz.
- ³⁰ Yawe, sa naawi-zlwzbo bam,
 Mz nzglqlz-krnge nim mz mzli leplz nemqng.
- ³¹ Murde nim kc tqtubz mz nibr ncblo txne,
 Mz nzarlapx-krm nide mz mq kxzabetitrlr nide, murde nabz-ngrde.

Sam Kratrtqki-esz'-nzpnu-esz' (110)

King Kxetu Kc Tqngi Nardr Pris Ne Yawe
 Nabz ne Devet.

- King Kxetu*
- ¹ Yawe rpibzle mz King kc tqngi Kxetu rnge kx, "Wxbu mrlc tqmatq-esz'ngr mz nrlarnge kxrtc,
 Navz nakrlz-zpwxbzle mzli kc nangi-batr-ngrbo mz enqmi rmqng nzmetx-krbzlr bam." *
- ² Murde Yawe sa nangi-batr-kzpze nzetunepxkr zmatq ngrm mz nzvzpx-krme Jerusalem,
 Mz nzaovxio-krm enqmi lcng.
- ³ X mzli lcde, drtq leplz nemqng sa navq zlwz nzprtr-krbzlr mz ami nem,
 Murde namailzq nidr mz zmatq ngrm kc tqluli, tqtr.
 X obla nemqng sa navzmqng naprtr-kzpznng bam mz nzaxplr-mou-krdr ami nem.
 Na-apubzlr badr mi kc tqvzom mz nzkra-krbzle nzlungr kxmrna mz nabr.

- Nardr Pris*
- ⁴ X Yawe esalz-ngrde drtqde x trnatekqtrleu drtwrde.
 Rpile kx, "Nim King nenge, nangini-alo-kzp pris mz nzvz-nqblq-krde nzwzkr Melkesidek." *

* Sam Kratrtqki-esz'-nzpnu-esz' (110):1 Matiu 22:44; 26:64; Mak 12:36; 14:62; Luk 20:42-43; 22:69; Aposol 2:34-35; 1 Korint 15:25; Efisz 1:20, 22; Kolosia 3:1; Hbr 1:3, 13; 8:1; 10:12; 12:2

* Sam Kratrtqki-esz'-nzpnu-esz' (110):4 Hbr 5:6; 7:17, 21

- 5** X Yawe sa natubz mz nibrm,
Mz nzmilxtxo-krde king kxnxkqlung mz zngya ngr drtwrde.
6 X sa na-ayrplapxle lr mrkzblleng mz nznibqti-krde nidr amrlx.
X sa na-aovxio-atwrnr-ngrde king rdrng mz nrlc tulvzo.
7 X nim, King rnge, mz nzvz-krm lc, nxzpl-kato-krm sa namatqnepx kz.
X sa na-aovxio-atwrnr-ngrn nrlc.

Sam Kratrtqki-esz'-nzpnu-esz'-nrade-esz' (111)

Nqmq Kr Gct

Kzdq Nabz Ngr A, B, C

- 1** Awi Yawe! Glqpxku Yawe!
Bilvzx nide mz nabznge atwrnrngr, mz nzyrlwr-lxblr-krgr badr leplz nedeng.
2 Clvele nrlc x da kcng tqwz-ngrde, tqaletileng nzmyalzng.
Delc, leplz amrlx na-aotingr drtwrdr da lcng mz nzabrtzlvz-krdr leng.
3 Eu, da lcng amrlx nzaelwapx-ngrdr zmrlue x zmatq rde.
Glqpxku nztubq-krde kc tqvzpe tqvzpe.
4 Ipqle nigu mz zmrlz ngrde kxmyalz x ycngt drtwrde nigu.
Jzsle nigu x nayc zvz mz drtwrgu rkx ngrdeng.
5 Kabzle dakxnzng mz leplz kcng tzamrluelr nide.
Lolvz-amqngile mz drtwrde da kx esalz-ngrbzle badr.
6 Mz nzaprc-krbzle drtc' ngr lr mrkzblleng mz doa nedeng,
Nide kc tqaewapx-ngrbzle zmatq rde badr.
7 Okatrle nidr mz nzaclve-krdeng kxtubq.
Prlxpx-zvzle da angidr x nzrsakrlrngr.
8 Rkapx zvz natq kx rsakrlrngr.
Sa na-atutrleng murde nqmq krde mrlz x tubq.
9-10 Takitrde nzangio-krgu drtgde kxtr mz nzamrluengr murde
Vz-nqblq-zvzle nzesalz-krde x
Witi nelzde nzarlapx-krde leplz nedeng.
X aelwapx-ngrgu nzyrplapx-krgu mz nzamrlue-krgu nide.
Yawe kabzle nzrkrlz-angidrngr mz krkcng tzyrlq-angidrlr natqde.
Zbq kalvz nzrglqpxngr nide navz zvz x tqvzpe, tqvzpe.

Sam Kratrtqki-esz'-nzpnu-esz'-nrade-li (112)

Nqmq Kr Ncblo Ne Gct

Kzdq Nabz Ngr A, B, C

- 1** Awibzku mz Yawe! Murde amrlzle ncblo kx
Bilvzle natqde x amrluelr nide.
2 Clvele mrnyzde kcng naxplrng mz nzaclve-krdr.
Doa nedeng kxntubqng, sa na-amrlz Gct.
3 Esalz-ngrbz Gct bade da kxmrzlting kxkqlu.
Gct okatrle nide murde natubq.
4 Ipq ncblo lc kztedeng mz nzvz-nqblq-krde zmrlz ngrde, nzryckr drtwrde,
x nztubq-krde.
Jzsle da kx naokatrle leplz kc-kzng, mz nzngini-krbzle lrpzki badr.
5 Kabzle da kxkqlu mz krkcng trnzrnciscung.
Lalztqbzle mz Gct x alele da kx rsakrlrngr mz nwz-wz-krde.

- 6 Murde ncblo kxtubq kxtr-rnrcti-lzbqu
Nadcpx zvz mz drtwr leplz.
- 7 Obqtipx-zvzle Yawe x
Prlxpxle kx nabzde trtaprlzpuu mz nrpa kxtrka.
- 8 ?Rnrcti-lzbq-ngrde? Trtingr, a' tu-amqngile.
Sa namcle nzaovxiokr Yawe enqmi rdeng.
- 9 Tresakiu nznrka-krbzle da mz kxrsuti drtwr.
Vz zvz nzayzlu-krbz Gct bade mz nqmq krde lc tqtubq.
Wxbu me matq mz mzlir leplz.
- 10 X angya drtwr kxdrka'-ngrng mzli kc namc-ngrdr nide.
Ycpwz pipz kxdrka'-ngrng lcng sa namrbr, x mane nzmadqti-krdr nqngidr
mz zngya.
Zbz da amrlx kcng tqmrlzbz badr sa nangitx brmrda x sa na-apulr
zsikapu kx ngilia.

Sam Kratrtqki-esz'-nzpnu-esz'-nrade-tq (113)

Naglqlzku Yawe Mz Nzarmyalz-krgu Drtqde

- 1 **Naglqlzku Yawe!**
Nigu kxnzawz nedeng na-armyalzku drtqde.
- 2 Nayzuo mzli ka nzrglqpxngr drtqde
Tqvzpe, tqvzpe.
- 3 Mz zbz kang kqlu nigu leplz mz nrlc tulvzo
Na-awi-ngrbzku bade nqmq krde.
- 4 Murde aclve-atwrnr-ngrde lr mrkzbleng amrlx.
X nzetukr zmatq ngrde krlzlzbzle bongavz.
- 5 Trpnzngk kx apule Yawe kc tqngi Gct rgu,
Mz nzwxbutxlz-krde mz tron nyzde Heven.
- 6 Sc tqobqlvztile bongavz x drtc',
Mz nzaclve-angidr-krdeleng.
- 7 Murde naokatrle leplz kx trnzrngiscung,
Mz nzkapx-krmle nidr mz nzkxpu-krdr.
- 8 X armyalzle nidr murde nanginidr nradrtq kxnzetung
Kcng tzmailzlr leplz nedeng.
- 9 Ngi-batrpzle mz olvz kxvz-nrbalq nzrngine-krde doa kxnztopwzng,
Mурде na-abrtz-ngrde doa nede lcng.
Naglqlzku Yawe!

Sam Kratrtqki-esz'-nzpnu-esz'-nrade-pwx (114)

Naglqlzku Yawe Mz Zmatq Ngrde

- 1 Mzli kc lr Israel nzrlasz-ngrdr Ijipt,
Mz nzngini-krdr lr mrkzbleng elr,
- 2 Lr Judz lcng tznginipedr leplz kxsztrng ne Yawe,
Mz nzaclve-krde drtc' nyzdr, Israel.
- 3 Prla Bla akipx-lzbq x pzlzm.
X LueJodzn lvxpzbzle lrpzki badr.
- 4 X mzli lc newz x nra nzyameng,
Nzapulr nzblc-abrtznekr nei sip.
- 5 ?Myx kxmule, Prla Bla tqakipx-lzbq-ngrde,
X LueJodzn tqlvpx-ngrde lrpzki?

Sam Sam Kratrtqki-esz'-nzpnu-esz'-nrade-pwx (114):6115 Sam Sam Kratrtqki-esz'-nzpnu-esz'-nrade-nzlvqn (115):17-18

- 6 ?X nike nzyamengr newz x nra amrlx
Mz nzapu-krdcr nzabrtzkr nei sip?
- 7 Da kcng tqwzngr Yawe nzvz-nqblqlr natqde.
Nzelalvzlr nzaelwapx-krde zmatq ngrde, mz nzngini-krde Gct r lr
Israel.
- 8 Murde batrpzle nzyrlepox-krm lue mz rplz,
Lue lc tqngi aulz mz rplz.

Sam Kratrtqki-esz'-nzpnu-esz'-nrade-nzlvqn (115)

Naglqlzku Yawe Mz Nzngini-krde Gct Angidr

Bzkq Angioku Mqngr Drka'

- 1 Yawe, nim txpwz kx takitrde nzarmyalzngr, a' trngiu nigr.
Murde nim txpwz kx aodu zvz x trataowq natqm kcng tqyrlqq.
- 2 Delc trtakitrdeu lr mrkzbleng nzsri-zvz-krmlr bagu kx,
"?Myxpe Gct rmu?"
- 3 Murde Gct rgu mncm Heven,
X rngisc zmatq ngr nzale-krde nikeng suti drtwre.
- 4 A' kxnzmnc-mrbrng nzangiolor mqngr da kxnzlz
Kcng tzwzngr leplz mz mqdr.
- 5-7 A' mqngr da kxnzlz lcng trnzycmneung x trnzobqung.
Trnzxlrun, trnzycminiung,
X trnzrtcngiung da.
Trnzrmaleung x trnzvzneung.
- 8 Leplz kcng tzrwz-ngrng mqngr drka' lcng tzlz
X krkcng tzangiolor nidr nzapu-kzlr nidr mz trnzrungisc-krdr zmatq.
Nznabung, mztr mwi, nradrtqdr ngq, trnzycngrlrun,
Trnzrtcngiung da, trnzxngitrung, x trnzvzneung.

A' Na-angio-txpwzku Yawe Gct Rgu

- 9-11 Nimu kcng tzaxvctr-lzbq-kzpinq bagr mz nzangio-krgr Yawe,
X nimu pris nedeng mz nqvi lr Eron,
X nigu lr Israel amrlx na-abrtrpzku drtwrgu bade.
Murde nide temz ngr lomrgu kc tqyрputrngr nipna.
- 12-13 Yc zvz mz drtwrde nigu x sa na-amrlz-zvzle nigu.
- A' sa na-amrlzle nimu kcng tzaxvctr-lzbqmqng mz nzangiongr nide,
X nimu nqvi lr Eron, x nigu lr Israel amrlx.
Kxmule-esz' nigu leplz txneng o kxnzetung,
- 14-15 Krka'-ngrne kx Yawe kc tqwz-ngrde Heven x nrlc
Na-amrlz-ebir-ngrde nimu badr doa nemung.
- 16 Heven mztea nyz Yawe,
A' kamle bagu, nrlc ka.
- 17-18 X nigu kxnzlung mz nrlc ka na-awibzku bade,
Murde kxnzbzpeng kcng tzyrtzmqpeng mz gq, rblx nzglqlz-krdr nide.
Naglqlzku Yawe na-abzo mzli ka x tqvzpe tqvzpe.
Naglqlzku Yawe!

Sam Kratrtqki-esz'-nzpnu-esz'-nrade-esz'mz (116)

Naglqlzku Yawe Mz Nzxlkrmle Natqgr

Nabz Ngr Nzaovxiongr

- 1-2 Yawe xlrmle natqnge. Mrlzti-zlwzx nide.
Kkle-zvzx nide. Yawe xlrmle natqnge.
3 Ycpwz pipz nzbdz-krnge, x sc tqmwxlr-ngrne.
Nabzng e talvzo-ngrde ycpwz pipz nzbdz-krnge.
4 Sc tqkqlepex nide mz nzrpi-krbo bade kx,
“Yawe, arlapx ninge!” Sc tqkqlepex nide.
5 Zmrlz ngr Yawe myalz-esz'ngr mz nzokatr-krde leplz.
Ycngr drtwrde nigu. Zmrlz ngr Yawe myalz-esz'ngr.
6 Okatrle kxtrnxplrun, murde arlapxbzle ninge
Mz nzkxpu-krngeng. Okatrle kxtrnxplrun.
7-8 Amnc-zpx-moule ninge. Trmetx-ngrpwc'u mz enqmi.
Trbz-ngrneu, tryrni-ngrneu. Amnc-zpx-moule ninge.
9 Navz-nqblq-zvzx nide x me pnz drtwrde.
Mz nzmnc-krnge mz nrlc navz-nqblq-zvzx nide.

Nzawingr

- 10-11 Kxmule-esz' ycpe pipz nzmwxlrti-lzbq-krnge,
A' mzli kc tqkxpu-zlwz-ngrne,
Pipxx murde abrtrpo drtwrnge mz Yawe,
X krlzx kx mane nzbrtikr drtwrnge leplz. ☀
12 Kxmule-esz' rblx nzayzlu-krbo mz Yawe
Da kxmrlzting kcng tqaletimleng bange,
13 A' sa natwzmc bade waen,
Nangi dalr nzawi-krbo bade mz nzarlapx-krde ninge.
14 X sa nakabo bade nike esalz-ngrbo bade,
Mz nzangioxp-lxblrkr leplz nedeng.
15 X napipxbo badr kx, “Drtwr Yawe vztv zlwz
Mz nzmc-krde nzbdzkr kzdq doa nedeng.
Delc tqmrlz-ngrbzle bade nzarlapx-krde nigu,
Tqmyaszpx-ngrde nzrlrpx-krde nzbdz-krgu.”
16 Yawe, ninge kxnzawz nem, da kc tqwai lxenge mzli kc.
Awi mz nzarlapx-krm ninge mz nzbdzng.
17 Kabo bam blz kx na-awi-ngrbo bam,
Mz nzkrka'-krbo bam.
18 Delc tqka-ngrbo bam da kc tqesalz-ngrbo bam,
Mz mzlr leplz nemqng,
19 Mz nzamrlue-lxblr-krgr nim Mangr-nzangiongr Jerusalem.
Naglqlzku Yawe!

Sam Kratrtqki-esz'-nzpnu-esz'-nrade-rlimz (117)

Naglqlzku Yawe Mz Nzaodu-zvz-krde Nigu

- 1 Glqpxamu Yawe nimu lr mrkzbleng amrlx.
X nimu leplz mz nrlc tulvzo naglqlz-kzamu nide. ☀
2 Murde nzaodu-zvz-krde nigu etu-esz'ngr.
X nzngida-angidr-krmle bagu tqyc tqyc.
Naglqlzku Yawe!

☀ Sam Kratrtqki-esz'-nzpnu-esz'-nrade-esz'mz (116):10-11 2 Korint 4:13 ☀ Sam Kratrtqki-esz'-nzpnu-esz'-nrade-rlimz (117):1 Rom 15:11

Sam Kratrtqki-esz'-nzpnu-esz'-nrade-rtqmz (118)

Naglqlzku Yawe Mz Nzaovxio-zvz-krde

Aodu-zvzle Nigu

- ¹ **Aodu-zvzle nigu. Awi-ngrbzku bade**
Nzmrlz-esz'ngr-krde. Aodu-zvzle nigu.
² Aodu-zvzle nigu. Lr Israel amrlx
Napipxku kx, "Aodu-zvzle nigu."
³ Aodu-zvzle nigu. X nimu pris nedeng
Napipxamu kx, "Aodu-zvzle nigu."
⁴ Aodu-zvzle nigu. X nimu kcng tzaxvctrmqng,
Napipx-kzamu kx, "Aodu-zvzle nigu."

Nabrti Drtwrgu Yawe

- ⁵ Mzli kc tqmnc-ngrne mz nzkxpung, kqlex Yawe,
Ayzlumle natqnge x aopxbzle drtqnge.
⁶ Trtxpnzngr nzmwxlr-krnge, murde Yawe tu-zvzm mz nibrnge.
X trtxpnzngr leplz kx krlzle nzatrkti-krde ninge. [◊]
⁷ X sa namcx nzaovxio-krbzle enqmi rngeng,
Murde mnc mz nrlarde nyznge.
⁸ Mrlzvxitx nzmnc-xgle-krgu nzokatrkr Yawe
Murde myaszpxle nzokatrkr leplz nigu.
⁹ X mrlzvxitx nzabrtr-krbzku drtwrgu bade mz nzrlapx-krgu,
Murde myaszpxle nzrmctitr-krbzkle mz kxnzrmailzng.

Aovxiox Mz Zmatq Ngrde

- ¹⁰ Aovxiox mz zmatq ngrde mzli kc enqmi rngeng
Tztu-ngalelvz-ngrdr ninge. Aovxiox mz zmatq ngrde.
¹¹ Aovxiox mz zmatq ngrde mzli kc tzavztio-ngrdr
Ninge mz trtxki. Aovxiox mz zmatq ngrde.
¹² Aovxiox mz zmatq ngrde dzbe meningilo lc.
Nzapulr nabr kx ngc. Aovxiox mz zmatq ngrde.
¹³ Kxnzyrktilzlr ninge mz nzotangr, ycpwz pipz na-aovxio-krdr ninge.
A' Yawe kx okatrle ninge.
¹⁴ Nide oa kx xplr kc tqmailzle ninge mz vea,
X tqarlapxle ninge.

Yawe, Oa Ngr Vea

- ¹⁵⁻¹⁶ Mz nzmnc-krdr matelq ngr vea nyzdr,
Ncblo ngr vea nedeng nzngr-abrtz-ngrdr nzaovxio-krde, nzrpi-krdr kx,
"Yawe, oa ngr vea, kc tqaovxio zvz
Mz zmatq ngrde. Yawe, oa ngr vea."
¹⁷ Delc trbz-ngrneu, a' lubex
Murde napipxbo da kcng tqmatq tqaleting Yawe.
¹⁸ Kxmule-esz' rlrpx-ngrde nzakxpu-zlwz-krdr ninge,
A' trngiu dalr nzbz-krnge.

*King Badr Leplz Nedeng Nzvztrpqng Mangr-nzangiongr Nzawi-krbzlr Mz
Yawe Nzaovxio-krdr*
¹⁹ King malqtrpz yz, rpile kx, "Lvxpym bange naonrx ngr Mangr-
nzangiongr Yawe,

[◊] Sam Kratrtqki-esz'-nzpnu-esz'-nrade-rtqmz (118):6 Hibrus 13:6

- 20 Murde navztrx elr mz nzawi-krbo bade.”
X pris neng Yawe nzayzlubzlr natqde kx, “Krlc naonrx nyd Yawe,
X kxnztubqng txpwz kx navztrng elr.”
- 21 Mz nzvztrkr King elr, rpile kx, “Yawe, awi-zvzbo bam murde ayzlu-ngrme
nzkrka'-krnge,
Mz nzarlapx-krme ninge mz mq enqmi rngeng.”
- Leplz Neng Yawe Amrlx Nzangiopx-lxblrlr Nide*
- 22 Leplz amrlx kcng tzyrlwr-lxblrlng Mangr-nzangiongr nzrpilr kx,
“Rplz kc etu tzpxtxpx-ngrdr ncblo kcng tzrwz-ngrng ma,
Nzaelwapxngr kx nide nou rplz kc tqmyatpx-zlwzbz.” *
- 23 Da lc Yawe kxrwzngr.
X abrtztx-zlwz-ngrgu.
- 24 Krlc zbq kx wzpxngr Yawe.
X na-awi-ngrbzku bade.
- Murde nide kc tqrbatrp zbq lc
Nzrmulvzngr nzaovxio-krgu mz vea.
- 25 Ayzlu-ngrmle natqgu kx, “Yawe, arlapx nigr
Mz nzokatr-krm nzaovxio-krgu.”
- 26 Yawe, glqlzkr nide kc tqvzm mz drtqm.
Glqlzkr nide mrka mz Mangr-nzangiongr. *
- 27 Yawe nide Gct kc tqokatr-zlwzle nigu.
Delc naelami-ngrgu leu ngr nzaovxiongr,
Mz nzvz-ngale-krgu olta nyzde
Kc tqtr-esz'ngr.
- 28 Yawe, nim Gct rnge x na-awi-ngrbo bamq
Nzmyalz-esz'ngr-krmq. Yawe, nim Gct rnge.
- 29 **Aodu-zvzle nigu. Awi-ngrbzku bade**
Nzmrlz-esz'ngr-krde. Aodu-zvzle nigu.

Sam Kratrtqki-esz'-nzpnu-esz'-nrade-rpwxmz (119)

Yawe, Natqm Mrlzvxi

Kzdq Nabz Ngr A, B, C

Alvztr-zvz-ngrn Ninge mz Natqm

- 1 Awi Yawe! Namrlzbz mz leplz kx trnzvz-rbrung,
A' nzvz-nqblqlr Loukxtr scm,
- 2 X namrlz-kzpz mz krkcng tzlxngitilr natqm,
X nzrtangrtiir nim mz nabzdr atwrnrngr,
- 3 X krkcng tzalelr da kxtubq,
X nzo-zlilr lrpzki rm.
- 4 Alvztr-zvzq nigr
Murde nalolvz-amqngikr nqmq krm.
- 5 Navz zvz
Nzrtangrti-krnge me pnz drtwrm.
- 6 Murde ma tqmyangr drtqnge
Mz nzaoti-zvzkr drtwnge Nzryrngrkxtr.
- 7 Alqngitipeq ninge,

* Sam Kratrtqki-esz'-nzpnu-esz'-nrade-rtqmz (118):22 Matiu 21:42; Mak 12:10-11; Luk 20:17;
Aposol 4:11; Efisz 2:20; 1 Pita 2:7 * Sam Kratrtqki-esz'-nzpnu-esz'-nrade-rtqmz (118):26
Matiu 21:9; 23:39; Mak 11:9-10; Luk 13:35; 19:38; Jon 12:13

Glqlz-ngrne nim nztubqkr nabznge.

8 Alex da kx pitimeng bange.

A' bzkq amnctxn ninge esz'-krnge.

Bilvz-zlwzx Nzti Rm

9-10 Bzkq rlr-ngrme nzrlasz-krnge nim,

Murde sa tqabzx nzwztr-krbo bam mz drtwr kxpq.

Nzlolvz-amqngikr obla natqm okatrle nide

Mz nztu-amqngi-krde mz nzmnncngr kxtubq.

11 Abrtz-ngrne Nzryrngrkxtr

Murde natubq-zvzbo mz nzobq-krm.

12 Yawe, glqlzx nim.

X suti drtwrnge nzkrlz-zpxw-krnge nqmq krm.

13 Natqnge etu zvz

Mz nzpipx-krnge Loukxtr scm.

14 Nzabrtzngr kx vzpxm mz nzvz-nqblq-krnge nim

Myaszpxle nzrngisc-krnge trau kxkqlu.

15 Nadcpx mz drtwrnge me pnz drtwrm.

Mz nzaoti-zvzkr drtwrnge nzalvztr-krmqng.

16 Bilvz-zlwzx nzti rm,

X trmrbrtru mz drtwrnge natqm.

Clve Ninge Mz Loukxtr Scm

17 Clve ninge murde ninge kxnxawz nem,

X nayrlq-zvzx natqm mz nzmnnc-krnge.

18 Okatrp ninge mz nzrmcti-krnge

Da kxmrlzting kx nzprpxmqng mz Loukxtr scm.

19 Ninge kxvztimle nrlc.

Bzkq yrlq-kapqme bange me pnz drtwrm.

20 Pq zvz mz drtwrnge

Nzkrlz-krnge nqmq krm.

21 Ayrplapxq kxnxglqpx-lzbqng

Kcng tzrnzlvzolr natqm.

22 Bzkq rlrpx-ngrn nzobqszo-krdr x nzyrpalelvz-krdr ninge,

Murde vz-nqblqx natqm.

23 X kxmule-esz' kxnxetung nzpikitilr ninge,

A' sa tqotr-zvzngr drtwrnge nzalvztr-krmqng.

24 Clve ninge mz Nzryrngrkxtr

Murde abrtz-ngrne nzmailz-krdr ninge.

Da Kx Mailzle Ninge Nangi Lrpzki Rm

25 Drtqnge mewetx-zlwzpe x ycpe pipz nzbbz-krnge.

Ka-mop nzlungr bange, mz nzvz-nqblq-krde natqm.

26 Mzli kc tqplzpx-ngrbo bam alwx rngeng, ayzlu-ngrme natqnge,

X alvztrpe' bange nqmq krm.

27 Okatrp ninge mz nzrkrlz-krnge Loukxtr scm,

Murde na-aoti zvz drtwrnge nzwz-krmqng kcng tqmyalz.

28 Nzrtxlvzlkzkr nzvzkr drtwrnge etutx-zlwzpe.

Amqtrp drtwrnge da kc tqwai nzesalz-krmle.

29 Okatrp ninge mz nzo-zli-zvz-krnge nzti kxtubq,

X alvztrp bange Nzryrngrkxtr mz zmrlz ngrm.

30 Pnzpe drtwrnge kx navz-nqblq-zvzpx nim,

Mz nzale-zvz-krnge me pnz drtwrm.

31 Yawe, bzkq rlrpx-ngrn nzamyati-ngrm drtqnge,

Murde lolvz-amqngix nzalvztr-krmqng.

- 32 Da kx mailzle ninge nangi lrpzki rm
Mz nzokatr-krm ninge.

Esalz-ngrn X Angidatiq Natqm

- 33 Eu Yawe, alvztrp bange me pnz drtwrm,
Murde nayrlq-zvzx.
34 X okatrp ninge mz nzvz-nqblq-krnge Loukxtr scm,
Murde naesz'-ngrde nabznge.
35 Abrtz-ngrne lrpzki rm
Mrkc tqmailz-zvz-ngrn ninge.
36 Okatrp ninge mz nzpqtikr drtwrnge natqm,
Murde myaszpxle nzrngisc-krnge da kxkqlu.
37 X bzkq rlr-ngrme nzsutikr drtwrnge da kxmane,
A' axplr-mop ninge mz nzo-zli-krnge ntzi rm.
38 Angidatim bange nzesalz-krmqng,
Da kc tqwaibzme mz leplz kcng tzamrluelr nim.
39 Okatrp ninge murde mwxlrtix enqmi rngeng nxztrnga-krdr ninge.
A' mrlz-esz'ngrm bange nzpnana-krmqng.
40 Esalz-ngrm bange kx na-alvztrq ninge,
Murde ntubq-krm naka-mople bange nxzplrngr.

Gct, Brti Drtwrnge Drtwr Kcng Tqyrlqqng

- 41 Gct, arlapx ninge mz nivz lrm,
Mz nzangidati-krm nzesalz-krmqng.
42 Murde na-ayzlu-ngrbo natq krkcng tzyrpalelvzlr ninge,
Mz nzbrtilkr drtwrnge natqm.
43 Okatrp ninge mz nzrpi-zvz-krnge da angidr,
Murde brti kz drtwrnge drtwr kcng tqyrlqqng.
44 X nzmqngitr-zlwzkr drtwrnge mz Loukxtr scm
Tqvzpe, tqvzpe.
45 X drtqnge sa naopx mz nzvzne-krngeng
Murde o-zlix lrpzki rm.
46 X trtxpnzngr nzmyamikr naonge
Nzpipx-krbo natqm mz kxnzetung.
47-48 Gct, abrtz-ngrne nzyrlq-angidr-krnge
Nqmq krm x me pnz drtfrm.
Murde nzmrlzmqng bange x nzmatqng mz drtwrnge.
X na-aoti zvz drtwrnge nzalvztr-krmqng.

Ipqpeq Ninge Mz Nzdcpxkr Mz Drtfrm Nzesalz-krm

- 49 Ipqpeq ninge mz nzdcpxkr mz drtfrm nzesalz-krm.
Murde obqtipxx zmrlz ngm.
50 X amqtrple drtwrnge mz mzlii nzkxpung.
Murde rmcti-ngrne nzlungr mz nzrlwx-krnge Loukxtr scm.
51 Kxmule-esz' kxnxglqpx-lzbqng nxztrnga-ngrdr ninge,
A' tresablqtiwxu Nzryrngrkxtr.
52 Yawe, mz nzaotr-zvzkr drtwrnge Lou scm kc bqnc,
Okatrpple ninge.
53 Drtwrnge apulzmle nyr,
Mz nzpxtxpxkr kxdrka'-ngrng nqmq krm.
54 Mzli ka tqlube-ngrne mz nrllc,
Natqm nangi zvz nabz nenge.
55 Yawe, mwible-zvzx nim mz nrlckxbq,

X suti drtwrnge nzyrlq-angidr-krnge me pnz drtwrm.
56 Iklr ninge murde nabznge napq,
X na-ale-zvzx nzalvztr-krmqng.

Jzs Ning, Murde Suti Txpwz Drtwrnge Nim

57 Jzs ninge, murde suti txpwz drtwrnge nim,
X mrlzm bange nzlolvz-amqngi-krnge natqm.
58 Mz nabznge atwrnrngr, rlxtibo bam
Nzmrlzti-krm ninge da kc tqwai nzesalz-krmle.
59 Mzli kc tqdwa-rbrti-ngrne lrpzki rnge mz nzvz-nqblq-krnge nim,
Yzlu-mopwc' nzo-zli-krnge nzt i rm.
60 X trasatiwxu nzyrlq-krnge Loukxtr scm.
A' rnekittxpwo nzale-krnge me pnz drtwrm.
61 X kxmule-esz' prtzx mz trtxki sc kxdrka'-ngrng,
A' trmrbrtru mz drtwrnge Nzryrngrkxtr.
62 Tulzmc mz nzawi-krbo bam mzli kc mz aurnrlc,
Murde drtwr kcng tqyrlqq tubq-esz'ngr.
63 Ninge kzte krkcng tzamrluelr nim,
Tzalelr nzalvztr-krmqng.
64 Yawe, mz nzaodu-krm kc tqyc-ngalelvzle nrlc tulvzo,
Alvztrp bange nqmq krm.

Kxakrlz, Alvztrp Bange Lrpzki Rm

65 Kxetu, aleme bange da kxmrlz,
Mz nzvz-nqblq-krde nzesalz-krm.
66 Kxakrlz, alvztrp bange nzrkrlngr x drtwr kxmrlz,
Mz nzlxngiti-krnge Nzryrngrkxtr.
67 Mzli kc ena vz-rbrpex, x ayrplapxq ninge,
A' mzli ka ale-zvzpex da kxtubq mz nzobq-krm.
68 Mz nzmrlz-esz'ngr-krm x nqmq krm kx mrlzvxi
Alvztrp bange nqmq krm.
69-70 Drtwrnge elalzm mz Loukxtr scm.
A' kxnzglqpx-lzbqng trpnzngr nzrkrlngr-krdr.
Kxmule-esz' nzpokiatitrlr ninge,
A' lolvz-amqngi-zvzx nzalvztr-krm mz drtwr kxbr.
71 Mrlzm bange nzayrplapx-krm ninge,
Murde nakrlz-ngrne nzvz-rbr-krnge.
72 Kxakrlz, natqm nzmrlz-krmle bange
Myaszpxle blzmr trau mz nrlc.

Loukxtr Scm Mrlzm Bange

73 Lalztqm mz nzkrka'-krnge murde nakrlzx me pnz drtwrm,
Murde wz-ngrn ninge x aclve-angidr q ninge.
74 Krkcng tzamrluelr nim na-abrtzlvzlr ninge
Mz nzlxngiti-krnge natqm.
75 Yawe, krlzx kx takitrde nzayrplapx-krm ninge
Murde vz zvz nzokatr-krm leplz nemqng. [☆]
76 Amqtrp drtwrnge mz nzaodu-zvz-krm ninge,
Da kc tqwai nzesalz-krme bange.
77 Mz nzabrtzlvz-krnge Loukxtr,
Nayc mz drtwrm ninge, murde ma tqbz.
78 Amyatxbz drtq kxnzglqpx-lzbqng mz nzpokiatit-tr-krdr ninge,
Murde aoti zvz drtwrnge nzalvztr-krm.

79 Batrpz mz kxnxzamrluelr nim nzaxvctr-lzbq-krmklr bange,
Krkcngr tzkrlz-angidrlr Loukxtr scm.

80 Lod, batrpz mz nabzngne nztubq-krdre mz nzobq-krm,
Murde drtqnge ma tqmya.

Mevalu, Mailz Ninge Murde Navz-nqblqx Me Pnz Drtwrm

81-82 Mevalu, mewepengr drtqnge x mzke' ngqbqtxtrpebz
Mz nzaenzli-krnge nim.

?Myx mzli kx na-arlapx-ngrn ninge,
Mz nzangidati-krm nzesalz-krm kc tqbrti drtwrnge?

83 Kxmule-esz' nzobqszonge apux da kx nzrtctxpengr,
A' dcpx zvz mz drtwrnge me pnz drtwrnm.

84 ?Myx mzli kx nayrkrpxngr nzkxpu-krngeng?
?X myx mzli kx na-ayrplapx-ngrn krkcngr tzatrkatilr ninge?

85 Kxnzglqpx-lzbqng nzekqng gq kx nangi trtxki rnge,
Mz nzpxtxpx-krdr Loukxtr scm.

86 Mailz ninge mz nzbrtikr drtwrnge Nzryrngrkxtrng amrlx.
Murde trpnzngr badr nou nzatrkti-krdr ninge.

87 Kxmule-esz' ycpwz pipz nzayrkrpx-krdr ninge,
A' sc tqlolvz-amqngix nzalvztr-krmqng.

88 Mevalu, arlapx ninge mz nzaodu-krm ninge.
Murde nayrlq-angidrx natqm.

Natqm Tqyc Tqyc

89 Natqm tqyc, tqyc,
X yc amqngi zvz Heven.

90 Wz-ngrn nrhc x yc amqngi zvz.
Delc tqbrti-zvzngr drtwr nim.

91 Da amrlx mz nrhc nzvz-nqblqlr me pnz drtwrnm,
Murde nzwztrpzng bam.

92 Trbz-ngrneu nzkxpu-krngeng,
Murde Loukxtr scm okatrle ninge mz nzaelalz-krmle drtwrnge.

93 X trtxpnzngr nzmrbrtrkr mz drtwrnge Nzryrngrkxtrng,
Murde nzrpwa'-ngrmlr bange mz nzvz-rbrngr.

94 Arlapx ninge, murde ninge doa nem,
X abz-zvzx nzale-krnge nzalvztr-krmqng.

95 Kxmule-esz' kxdrka'-ngrng nzyrlqlr br ngr nznibq-krdr ninge,
A' na-aoti zvz drtwrnge nqmq krm.

96 Natqm tqyc tqyc,
Kxmule-esz' da kxmyapxbz amrlx nzyrkrpxng,

Okatrp Ninge Mz Nzo-zli-krnge Nzti Rm

97 Oliq-zvzx nzaotikr drtwrnge Loukxtr scm,
Murde mrlz-zlwzm bange.

98 Nzrkrlz-krnge myaszpxle enqmi rngeng,
Murde Nzryrngrkxtr yc zvz mz drtwrnge.

99 X nzwzkr narnge myaszpxle kxnxzalvztrlr ninge,
Murde ale-zvzx me pnz drtwrnm.

100 X nzyrplapx-krnge myaszpxle lrtzlvzng,
Murde yrlq-angidrx natq kx kame bange.

101 Yrlqpx-lzbqngne mz nzmncngr kxdrka'ngr,
Mz nzvz-nqblq-krnge da kx tubq mz nzobq-krm.

102 Trpxtxpx-ngrneu drtwr kcng tqyrlqq,
Murde nzalvztrlr ninge.

- 103 Natqm nzlqngi-esz'ngr-krde mz nxzlrngr
Myaszpxle nzmrlzkr dakxinzng amrlx.
104 Okatr-zvzq ninge mz nzalvztr-krm murde nakrlzx nhti kxtubq.
Delc tqmamwe-ngrne nqmq kx vz-rbr amrlx.

Pqtr Zvz Mz Drtwrnge Natqm

- 105 Pqtr zvz mz drtwrnge natqm,
Kc tqngi zyzlr ngr nhti rnge mz nzmailz-krm ninge.
106 Nzesalz-krngeng nayrlq-angidr-zvzxng,
Mz nzo-zli-krnge nztubqkr lrpzki rm.
107 Okatr ninge da kc tqwai nzesalz-krmle,
Murde nzkxpu-krngeng amrlx ma tznibqlr ninge.
108 Yawe, alvztrp bange nzaolvz-krmqng
X abrtzlvz nabz nenge mz nzangrlvz-krnge nim.
109 Kxmule-esz' da kxtrka prtzm bange,
A' trmrbrtru mz drtwrnge Loukxtr scm.
110 X kxmule-esz' kxdrka'-ngrng nzamwitiolr ninge trtxki,
A' vz zvz nzatutr-krnge nzalvztr-krmqng.
111 X lolvz-amqngi-zvzx Nzryrngrkxtrng,
Murde nzaelalzmlr drtwrnge.
112 Pnzpe drtwrnge kx navz-nqblq-zvzx me pnz drtwrm,
Murde nzokatrngr kx vzpxm elr vztix alo.

Rblxm Bange Nzmrlzti-krnge Krkcng Drtwrdr Tqlitrpz Bam

- 113 Rblxm bange nzmrlzti-krnge krkcng drtwrdr tqlitrpz bam,
A' mrlz-zlwzm bange Loukxtr scm.
114 Nim me rlakitr x temz ngr lomrnge kc tqyрputrngr nipna,
X abrtrpo drtwrnge mz natqm.
115 Esablqtix kxdrka'-ngrng
Murde navz-nqblqx nqmq krm.
116 Bzkq mya ngr drtqnge nzbrtikr drtwrnge nim,
A' arlapx ninge da kc tqwai nzesalz-krmle, murde ma tqbzx.
117 Natu-ngrme mz nibrnge mz nzarlapx-krm ninge,
Murde namatq zvz mz drtwrnge drtwr kcng tqyrlqq.
118 Ptxpx-ngrn krkcng tzpxtpx-ngrdr Nzryrngrkxtr.
Murde nzesabrn x nzpokiang.
119 Obqszoq kxdrka'-ngrng mz nzapu-krdr dcvi.
Delc tqmrlz-ngrm bange nzalvztr-krmqng.
120 Rnrcti-lzbqng e mz nzmwxlrti-krnge nim,
Murde ma trtubqwxu mz nzobq-krm.

Suti Drtwrnge Nzryrngrkxtr

- 121 Suti drtwrnge nzarlapx-krme ninge mz mq enqmi rngeng,
Murde nqmq krnge rsakrlrngr x tubq.
122 Bzkq rlr-ngrbzme mz kxzglqpx-lzbqng nzatrkti-krdr ninge.
A' amnc zpxn ninge.
123 Mzke' ngqbqtxtrpebz mz nzaenzli-krnge
Nzvz-nqblq-krm nztubqkr nzesalz-krm.
124 Alvztrp bange nqmq krm
Mz nzaodu-zvz-krm ninge.
125 Okatr nzyrplapx-krnge,
Murde nakrlz-angidrx nzaolvz-krmqng.
126 Yawe, mzli r nzayrplapx-krm leplz dekape.
Murde nzrnzlvzo-zvzlr Loukxtr scm.

- 127 Mz nzmu-krde lcde, natqm nzmrlz-krmle bange
Myaszpxle da kx lqlwx amrlx.
- 128 Sa natubq-zvzm bange nzalvztr-krmqng amrlx.
X mamwe-ngrne nqmq amrlx kx vz-rbr.
- Takitrde Nzolvz-amqngi-krnge Nzalvztr-krmqng*
- 129 Takitrde nzolvz-amqngi-krnge nzalvztr-krmqng
Murde nzmrlz-zlwzng.
- 130 Natqm apule zyzlr,
Murde aelwa-ngrbzle lrpzki kxtubq mz leplz amrlx.
- 131 Nzsutikr drtwrnge nqmq krm apule nzbrlxkztikr drtwrnge lue,
Murde narmcti-ngrne nzlungr angidr.
- 132 Nayc mz drtwrm ninge,
Da kc tqwaibzme mz krkcng tzamrluelr nim.
- 133 Okatrп ninge mz nzvz-nqblq-krnge me pnz drtwrm,
Murde alwx ma tqmailz-rbrle ninge.
- 134 Arlapxbz ninge mz mq leplz kcng tzakxputlr ninge,
Murde nayrlq-zvzx da kx tubq mz nzobq-krm.
- 135 Okatrп ninge mz nxzngi-krnge nim,
X alvztrp bange Nzryrngrkxtr.
- 136 Trtakitrdeu nzrnzlvzongr Loukxtr scm.
X yrnitx-zlwz-ngrne alwx ngrdr lc.

Vz-nqblq-zvzq Nzmnсngr Kxtubq

- 137 Vz-nqblq-zvzq nzmnсngr kxtubq-esz'ngr,
X drtwr kcng tqyrlqq rsakrlrngr.
- 138 Natq kcng tqkapxq nzabrktr drtwr,
Murde nztubq-zvzng.
- 139 Zngya ngr drtwrnge apule nyr kc tqngc,
Murde enqmi rngeng mrbrtr mz drtwrdr Nzryrngrkxtr.
- 140 Nzesalz-krm pq zlwz mz drtwrnge
Murde angidati-zvzme bange.
- 141 Kxmule-esz' leplz nzobqszolr ninge,
A' trmrbrtru mz drtwrnge nzalvztr-krmqng.
- 142 Yawe, nztubq-krm tqyc, tqyc,
X Loukxtr scm ngi da angidr zvz.
- 143 Delc kxmule-esz' nzkxpung x nzvzkr drtwr nzprtzmqng bange,
A' abrtz-ngrne nzo-zli-zvz-krnge nzi rm.
- 144 Vz zvz nzokatr-krm ninge nzmc-krnge
Nztubq-zvzkr natqm, murde ma tqbzx.

Wztx-ngrpwo Nzkrka'-krbo Bam

- 145 Wztx-ngrpwo nzkrka'-krbo bam.
X ayzlm natqnge, murde nao-zlix lrpzki rm.
- 146 Yrnimi-zvzbo bam nzarlapx-krm ninge,
Murde nayrlq-angidrx Loukxtr scm.
- 147 Kgle-zvzx nim mz nourla kxtopwz mz nzokatr-krm ninge,
Murde abrtrpo drtwrnge mz nzesalz-krm.
- 148 Obqtx-zvzx mz nrckxbq,
Mz nzaotikr drtwrnge me pnz drtwrm.
- 149 Mz nzaodu-zvz-krm ninge, xlrm natqnge,
X mailz ninge mz nzalvztr-krmqng.
- 150 Kxmule-esz' kxnzxpqbrr-ngrdr nqmq krm
Nzesolvztilr ninge, a' trmwxlrwxu.

151 Murde eso-aepztrpe' bange,
X drtwr amrlx kcng tqyrlqq da angidr zvz.

152 Wz-ngrn natqm murde nayc-alo,
Da kc tqwai nzkrlz-krngele, abzo mzli kc pnz.

Xlrm Natqnge Da Kc Tqwai Nzesalz-krmle

153 Xlrm natqnge x arlapx ninge mz nzkxpu-krnge,
Murde dcpx zvz mz drtwrnge Loukxtr scm.

154 X pipxbz mz leplz kx nqmq krnge tubq,
Da kc tqwai nzesalz-krmle, murde ma tqbzx.

155 Kxdrka'-ngrng trtxpnzngr nzrlapx-krdr,
Murde trnzrtangrtilru nhti rm.

156 Yawe, axplr mou ninge mz nzetukr nzaodu-krm,
Murde vz-nqblqx me pnz drtfrm.

157 Kxmule-esz' enqmi rngeng nzkqlu-zlwzng,
A' trtxpnzngr nzesablqti-krnge Nzryrngrkxtr.

158 Ptxpx-ngrne kx drtwrdr litrpz bam,
Murde trnzlxngitilru da kxtubq mz nzobq-krm.

159 Yawe, arlapx ninge mz nivz lrm,
Murde mrlzm bange nzalvztr-krmqng.

160 X natqm mqngio mz da kxtubq.
Delc drtwr amrlx kcng tqyrlqq nztubq-kzng.

Yrlq-angidrx Nzalvztr-krmqng

161 Yawe, kxnzetung nzatrkti-krdr ninge trpxpnzngr noude,
A' amatq-zlwzx natqm.

162 Apux bcnyr kc tqrmctile da kxpqtr mz nabzde,
Murde abrtz-ngrne Nzryrngrkxtr

163 Trkam bange natq ngr nzpokiangr,
A' mrlzm bange natqm.

164 Glqpx-zvzx nim mz zbz kang kqlu,
Murde drtwr kcng tqyrlqq tubq-esz'ngr.

165 Krkcng tzmrlz badr Loukxtr scm, nzmnc-zpxnxng.
X trpxpnzngr doa x da kx na-ataole nidr.

166 Yawe, brti drtwrnge nzarlapx-krm ninge,
Mz nzale-zvz-krnge da kx pitimeng.

167 Lolvz-amqngix nqmq krm,
Mz nzmrlz-zlwz-krmle bange.

168 Yrlq-angidrx nzalvztr-krm,
Da kc tqwai nzmc-krmle.

Zyzlr Ngrm Napnamilxtile Nabzng

169 Zyzlr ngrm napnamilxtile nabzng,
Mz nzayzlu-krme natqnge mz nzvz-nqblq-krde nzesalz-krm.

170 Lalztq-ngrm nzkrka'-krnge,
X arlapx ninge mz nzvz-nqblq-krde natqm.

171 Naglqlz-zvz-ngrne nim
Mz nzalvztr-krme bange nqmq krm.

172 Na-angrlvzx nzesalz-krm,
Murde drtwr amrlx kcng tqyrlqq tubq-esz'ngr.

173 Oliqm mz nzokatr-krm ninge,
Murde lolvz-amqngi-zvzx me pnz drtfrm.

174 Yawe, obqtipxx nzarlapx-krm ninge,
Murde mrlzm bange Loukxtr scm.

Sam Sam Kratrtqki-esz'-nzpnu-esz'-nrade-rpwxmz (119):175126 Sam Sam Kratrtqki-esz'-nzpnu-li-nrade-li (122):1-2

- ¹⁷⁵ Okatrп ninge mz Nzryrngrkxtr
Murde naglqpxx nim mzli ka tqlu-ngrne.
¹⁷⁶ Zmrlz ngrm nakqlelvzti-zvzle ninge.
Murde kxmule-esz' vecpx-lzbqbo bam,
A' trmrbrtitru mz drtwrnge lrpzki rm.

Sam Kratrtqki-esz'-nzpnu-li (120)

Ncblo Ngr Nrwx

- Nabz kx nzngrnelzngr Jerusalem mz nzangiongr.
¹ Mzli kc tqmnc-ngrne mz nzkxpung, kqlex Yawe,
X ayzlu-ngrmle natqnge.
² Rpibo bade kx, "Yawe, arlapxbz ninge
Mz leplz kxnxpokiang x nzesabrng."
³ ?Nimu leplz kxnxpokiang,
Krlzpeamu da kx nawaistrngr Yawe nimu?
⁴ Sa na-ayrplapx-zlwzle nimu
Mz nipna sc ncblo ngr vea x mz nyr kxpq zlwz.
⁵ Nzmnc-lxblr-krgu trika-zlwzm bange,
Apule kx mnckr badr leplz kxdrka'-ngrng.
⁶ Mzli boitx zlwz mnctibo bamu,
Nimu leplz kcng tzpxtxpx-ngrdr nrwx.
⁷ Dekc mzli kc tqryapwxtr-ngrne mz nrwx,
Suti alzu drtwrmu nzotangr.

Sam Kratrtqki-esz'-nzpnu-li-nrade-esz' (121)

Gct Acuve-zpwxle Nigu

- Nabz kx nzngrnelzngr Jerusalem mz nzangiongr.
¹ ?Myx me narmcti-ngrne kxnaokatrle ninge?
?Sa navzom mz newz ngr nrlc ka?
² Trtingr. Murde Yawe Kxrpalz kc tqwz-ngrde bongavz x drtc',
Nide txpwz kx naokatrle ninge.
³⁻⁴ Da zpx! Murde Yawe obq zvz,
X acuve-angidrle nigu lr Israel,
Mz nzapu-krgu sip nedeng.
A' tramaу x trmwiu, murde ma tqtaoku.
⁵ Yawe ngi tegu badr,
X tu-zvzm mz nibrgu,
⁶ Murde trtxpnzng doa x da kx na-atrkatile nigu
Mz nrlckxgrlx x mz nrlckxbq.
⁷ Yawe arlapxle nigu mz nzkxpu-krgung amrlx,
Murde namnc-zpxku.
⁸ X acuve-zvzle nzvz-krgu x nzmnc-krgu,
Mzli ka x tqyc, tqyc.

Sam Kratrtqki-esz'-nzpnu-li-nrade-li (122)

Jerusalem Ngi Mzteadau Nyz Yawe

- Nabz ne Devet kx nzngrnelzngr Jerusalem mz nzangiongr.
¹⁻² Drtwrnge elalzm mz nzsri-ngrm bange kx, "Navzdzpeku mz Mangr-nzangiongr Yawe."

Zbz sc tqvztrpekr mz naobz ngr mzteadau nyze.

³ Jerusalem lc nzlrmztio nzrwzng,
X mzte opx nzmwitr-lxblkr ma ngrdeng.

⁴ Nigu neidu lr Israel vzmgu mrlcde mz nzawi-krbzku mz Yawe,
Da kc tqwai nzpi-krdele.

⁵ X Jerusalem ngi mzteadau nyz king rgung, kcng tzvzpxmqng mz nqvi lr
Devet.
X nzaclvelr leplz nedrng elr mz nzwxbuo-krdr mz tron.

⁶⁻⁷ Delc, nakrka'-ngrgu Jerusalem mz nzsri-krgu kx, "Gct rgr, acive zpwx
nigr lr Jerusalem,
Mурde leplz nemqng kcng tzmrlztilr nim
Namnc-zpwxng mz ma nyzdr,
X narmctilr nrwrx mz nzmnccpx-krmlr mz drkq ngr mzteadau nyzm.

⁸⁻⁹ Yawe, rlxtibzkr bam
Kx na-acive-kzpzmme lr mrnyzgr x kztegrng kcng tzmncng elr.
Amrlz zvz leplz amrlx kcng tzmncng elr
Mz nzmrlzti-krdr Mangr-nzangiongr nim. Eu, angida."

Sam Kratrtqki-esz'-nzpnu-li-nrade-tq (123)

Yawe, Nayc Mz Drtwrm Nigr

Nabz kx nzngrnelzng Jerusalem mz nzangiongr.

¹ Yawe, mnc-xglex nim
Mz nzwxbu-krm mz tron nyzm Heven.

² X nzmncc-xgle-zvz-krgr nim navz navz nakrlzbzle mzli kx ycngr mz
drtwrm nigr.
Mурde apukr ncblx x olvz kx nzawzng kx nzmncc-xglelr kxnzetu rdrng.

³ Yawe, nayc mz drtwrm nigr mz nzokatr-krm nigr.
Mурde kxnzakxputing nzapusr-ngrdr nigr brmrda.

⁴ X drtqgr satxtrpebz nxtrngatirkr kxnzrncng nigr,
X kxnzglqlz-lzbqng nzobqszo-zvzlr nigr.

Sam Kratrtqki-esz'-nzpnu-li-nrade-pwx (124)

Yawe Arlapxle Leplz Nedeng

Nabz ne Devet kx nzngrnelzng Jerusalem mz nzangiongr.

¹ Nigu lr Israel nakrlz-angidrk
Kx Yawe ngi-te-zvzku badr mz nzotangr.

² X mz nzngi-te-zvz-krgr badr
Mzli kc enqmi rgung nzrpilr na-atrkati-ngrdr nigu,

³ Rblxbz badr nzmilxtxo-krdr nigu
Mz nzngyati-zlwzkr drtwrdr nigu.

⁴⁻⁵ X trnznibqlru nigu mz nzapu-krdr srkau kx mrlvzole nigu.
X nrc kxetu ngr srkau lc trabooleu nigu.

⁶ Delc na-awi-ngrbzku mz Yawe
Mz trnzrlr-krpwzleu nigu mz mq enqmi rgung.

⁷ Mzli lc sc tqapupeku utc mz nzdwapx-krmgu mz br sc kxnzmwang,
X drtqgu opxpe murde Yawe pingebzle br scdr.

⁸ Yawe nide Kxrpalz kc tqwz-ngrde bongavz x drtc',
X Mevalu kc tqokatrle nigu, mz zmatq drtqde.

Sam Kratrtqki-esz'-nzpnu-li-nrade-nzlvqn (125)

Kxnztubqng X Kxdrka'-ngrng

Nabz kx nzngrelzngr Jerusalem mz nzangiongr.

- ¹ Nigu kcng nzabrtipzlr drtwrdr mz Yawe,
Apuku Newz Saeon kx trycngrlru, a' tutx alo.
- ² X Yawe apule newz kcng tztu-ngalelvzlr Jerusalem,
Mурde vz zvz nztu-krmle mz nibrgu, nigu leplz nedeng.
- ³ X tr-rlr-ngrpwzleu mz kxdrka'-ngrng nzaclve-allo-krdr mrnyzgu, nigu
kxnztubqng.
Mурde ma tqvz-nqblqku nqmq krdr kxtrka.
- ⁴ Delc Yawe, krka'-ngrgr kx na-amrlzq nigr lr Israel kxnztubqng
Mz nzyrlq-angidr-krgr natqm.
- ⁵ A' mzli kc na-ayrplapx-ngrn kxdrka'-ngrng,
Mrlzm bagr nzayrplapx-kz-krm kzdung nigr
Kcng tzpxtxpx-ngrdr nzvz-nqblqng nim.
A' amnc zpxw nigr lang.

Sam Kratrtqki-esz'-nzpnu-li-nrade-esz'mz (126)

Yawe Amnc-zpxw-moule Lr Jerusalem

Nabz kx nzngrelzngr Jerusalem mz nzangiongr.

- ¹ Mzli kc Yawe tqamnc-zpxw-mou-ngrde nigu lr Jerusalem,
Opxm kx trngiu da zpxw, a' rmwibleku.
- ² Mzli lcde, yrpale-twzku x ngr-katoku, mz nzabrtz-zlwz-krgu.
Bbz sc tzrpipe lr mrkzbleng kx, "Yawe rwz-ngrbz da kxetuting kx okatr-ngrde nidr."
- ³ X abrtztx-zlwz-ngrgu
Da lcdeng tqetuting tqwz-ngrmleng bagu.
- ⁴ Delc Yawe, na-amnc-zpxw-mou-ngrde nigu mzli ka,
Da kc tqwai tewa nzdc-krde x lrti-moungr ningali kx pztipeng.
- ⁵ Murde leplz kcng tzyrning mzli kc tzpe-ngrdr dakxnzng mz drtc',
Na-abrtzng mzli kc narkqlz-ngrdr.
- ⁶ X leplz kcng tzyrning mzli kc tzrtwz-ngrdr dakxnzng kx napetilr mz
nrlanc,
Sa nangr-abrtzng mzli kc nartwz-ngrmlr dakxnzng brma mz mzli r
nzkqlzngr.

Sam Kratrtqki-esz'-nzpnu-li-nrade-rlimz (127)

Nqvi Lr Ncblu

Nabz ne Solomon kx nzngrelzngr Jerusalem mz nzangiongr.

- ¹ Nzmu Yawe trnangiu Kxetu r nqvi lrgu le,
Mane nzaetunepx-krgu nqvi lrgu.
Nzmu trna-aukztileu lr mrnyzgu,
Mane nzaclve-krgu nidr.
- ² Nzmu trna-abrtrpwzkuu drtwrgu mz Yawe
Mz nzkqlz-ngrdr dakxnzng bagu,
Mane nzo-rlangr mz nzwz-katongr x nzyzlu-ngrm mz nina,
Murde krlz-kzle nzkqlz-ngrdr da bagu mzli kc tqmwi-ngrgu.

Sam Sam Kratrtqki-esz'-nzpnu-li-nrade-rlimz (127):3-5129 Sam Sam Kratrtqki-esz'-nzpnu-li-nrade-rpwxmz (129):8

- 3-5 X Yawe nide kz kx rkam doa kxnztopwzng mz nqvi lrgu,
Mzli kc tqngi-oblabe-ngrgu.
Murde mzli kc tqngi-lrtzlvzpe-ngrgu, doa lcng na-aclvelr nigu.
Sa namrlzbz mz ncblo kc mrlxde tqkqlu.
Murde mzli kc kzdq ncblo narnqniti-lzbq-ngrdr bade,
Mrlxdeng sa natubzng mz nibrde.
X mz nznka-krbz kxnzrmailzng drtwr kxtubq,
Drtqde trnamyau murde nztu-krbz mrlxdeng lcng mz nibrde.

Sam Kratrtqki-esz'-nzpnu-li-nrade-rtqmz (128)

- Trte Kx Mailze Lr Ma Nyzde*
- Nabz kx nzngrnelzng Jerusalem mz nzangiongr.
- 1 Yawe sa na-amrlzle trte kx amrluele nide,
X o-zli-zvzle ntzi rde.
- 2 Murde da kx naokatrle lr ma nyzde navzpxm mz nwz-wz-krde,
X na-abrtz-ngrde nzmncc-zpwx-krdr.
- 3 Olvz nalzde na-apule nc bia kc nrade tqkqlu,
Murde doa nedrng kalr na-apulr nrtr ngr nc brpi mz nzwxbu-nglelvez-
krdr nyr pnrde.
- 4 Delc Yawe tqamrlz-ngrde
Trte kx amrluele nide.
- 5-6 Yawe, mz nzmnccpx-krme Mangr-nzangiongr,
Amrlz nigr lr Israel, murde namnc-zpwxkr.
- X trtegr lcng namc-zvzlr da kxmrlzting kcng tqaleme bagr, nigr lr
Jerusalem.
X namc-kzlr nzmnckr doa ne doa nedrng, x sc tzbz-ateng.

Sam Kratrtqki-esz'-nzpnu-li-nrade-rpwxmz (129)

- Enqmi r Lr Israel*
- Nabz kx nzngrnelzng Jerusalem mz nzangiongr.
- 1 Nigu lr Israel nadcpx mz drtwrgu kx enqmi rgung nzatrkatilr nigu
Yzuo mzli kc tqipipzbe-ngrgu mrnyzgu.
- 2 A' kxmule-esz' enqmi rgung nzatrkatilr nigu,
Yzuo mzli kc tqipipzbe-ngrgu mrnyzgu, a' trnzaovxio-pnzlru nigu.
- 3 X kxmule-esz' nzikla-zlwzlr nigu,
X bzmrde mnz-aboitxtr-alom mz nibrgu,
- 4 A' Yawe kc tqtubq-esz'ngr,
Aopxpebzle drtqgu mz mqdr.
- 5 Delc Yawe, nigr lr Saeon rlxtibzkr bam, nzmaneutipx-krbzme enqmi
rgrng amrlx,
Murde drtqdr namyatx-zlwzng.
- 6 X ayangrnge nidr
Mzli lc tztopwzbe-ngrdr.
- 7 Murde ma tqtakitrde nidr nzota-moungr,
Nzmu enqmi rgr kc-kzng tzrlxtibzlr badr nzokatr-krdr nidr mz vea.
- 8 X bzqkq rlrpx-ngrn nznka-krbz badr kx,
“Amrlzkr nimu mz drtq Yawe!”

Sam Kratrtqki-esz'-nzpnu-tq (130)

Nzoliq-zvzkr Yawe Mz Nzokatr-krde Leplz Nedeng

Nabz kx nzngrelzngr Jerusalem mz nzangiongr.

¹ Yawe, kqlex nim mz nzokatr-krm ninge

Mz mzlir nzkxpu-krngeng.

² Lalztqm mz nzkrka'-krnge, kx Kxetu,

X ayzlam natqnge.

³ Yawe, nzmu napx-ngrn nzipqpx-krm alwx rgrng,

Trpnzngr kx narlapxbz mz nzayrplapxngr.

⁴ A' olij-zvzq nzipq-krm nigr,

Murde na-amrluekr nim.

⁵⁻⁶ Yawe, obqtipxx nzokatr-krm ninge.

X brti drtwrnge kx sa na-atutrq natqm.

Da kc tzwai kxnzaukzng mz nzaenzli-krdr rrgalx nzpnamiltilz-ani-krmle,

Murde nzkrklzlr kx nepi sa naprkilz-zvzm mz nourla kang kqlu.

A' suti zlwz drtwrnge nzvz-ani-krme,

Myaszpxle nzsutikr drtwrdr nzprt-krm nepi.

⁷ X nigu lr Israel, na-abrtrpzku drtwrgu mz Yawe, murde aodu-zvzle nigu.

X olij zvz nzarlapx-krde nigu.

⁸ X sa naxpepxle nigu

Mz alwx ngrgung amrlx.

Sam Kratrtqki-esz'-nzpnu-tq-nrade-esz' (131)

Apux Doa Kx Yrpz Lxede

Nabz ne Devet kx nzngrelzngr Jerusalem mz nzangiongr.

¹ Yawe, trglqpx-lzbqpc'u bam, mz nzvz-lvi-krnge bz kc tqyrlqme bange.

X tramatq-lzbqwxu murde naprtrpo mz kxnzetung mz nzycmnetr-krdr
mz da kxmyaszpxle nzkrklz-krnge.

² Murde abrtz-ngrne nzapu-krnge doa kxtopwz kx yrpz lxede.

Delc tqmnc-zpwx-ngrne mz nrlc.

³ X nigu lr Israel navz zvz nzabrtr-krbzku drtwrgu mz Yawe,

Murde namnc-zpwx-kzku.

Sam Kratrtqki-esz'-nzpnu-tq-nrade-li (132)

Nzesz'tikr Drtwr Yawe Ncdr Devet

Nabz kx nzngrelzngr Jerusalem mz nzangiongr.

Devet Suti Drtwrde Nzrwzng Mangr-nzangiongr Yawe

¹ Yawe, na-aoti drtwrm nzkxpukr Devet,

Mz nzwztr-krbzle bam.

² Nim Gct kc tqrnrnir tqangio Jekop.

X Devet esalzbz bam.

³⁻⁴ Rpibzle kx, "Yawe, trtxpnzngr nzvz-krnge ma nyznge o mz nelvq nyznge,
X trtxpnzngr nzama-krnge x nzmwi-krnge,

⁵ A' nawzti-kaix dq ma kx namnc-ngrn,

Mz nzngini-krm Gct r Jekop."

Devet Rmctile Bokis Kc Tqyclz-ngrm Nzesz'tikr Drtwrdr Badr Gct

⁶ Mzli kc Devet badr ncblo nedeng tzmnc-ngrdr Efrata,

Nzxllrl nrpa ngr Bokis kc tqyclz-ngrm Nzesz'tikr Drtwrdr Badr Gct.

X sc tzrmctipelr mz mztea Jerim mz nrlarnrlc lcde.

- ⁷ X sc tzrpipelr kx, "Naglpеку Bokis lc mz Tentkxtr nyz Yawe.
Mz nzangio-krgu nide mrkc tqwxbu-ngrde mz tron."
- ⁸ X sc tzrpipebzlr mz Gct kx, "Yawe, vzm mz Tentkxtr nyzm,
Murde namnc-zvzq mrkc tqycngr Bokis ngr zmatq ngrm.
- ⁹ Murde pris nemqng nayapwxtipxbzlr nztubq-esz'ngr-krm mz leplz
nedrng,
Kcng na-angrlvzlr nim."

Nzesz'tikr Drtwr Yawe Ncdr Devet

- ¹⁰ Yawe, mzli ka bzkq ptxpx-ngrn king rgr kc tqmcpxbzme,
A' atutr nzesalz-krbzme mz kxnzawz nem, King Devet.
- ¹¹ Murde esalz-ngrbzme bade da kx trnzkatxu,
Mz nzsri-krbzme bade kx, "Sa nayrlqbo dq mrlxm kx nanginide king
kx na-aclvele lr Israel mz nibrm. [✡]
- ¹² X nzmu mrlxdrng nayrlq-angidrlr nzesz'tikr drtwrgr badr,
X navz-nqblqlr natqnge kc tkapxbo badr,
Sa nangini-zvzdr king,
Badr mrlxdrng, tqyc tqyc."

Mevalu Kc Navzpxm Mz Nqvi Lr Devet

- ¹³ Yawe, rlxtibzkr nzamrlz-krm king nem.
Murde mcpqx Jerusalem nangi mztea nyzm,
- ¹⁴ Mz nzsri-krm kx, "Krlc mztea kx namnc-alu-ngrne,
Mz nzvz-nqblq-krde me pnz drtwnge.
- ¹⁵ Sa nakabo mz lr mztea nyznge lc da kxmrzting kxkqlu.
X sa na-aputrx kxtrnzrngiscung murde nelzdr nakrlc x naesatpx
zpx.
- ¹⁶ Sa nabatrpo mz pris nengeng nzyapwxtipx-krbzlr mz leplz nengeng
nzarlapx-krnge nidr,
Murde leplz kxnztr lcng namalqlvzlr ninge.
- ¹⁷ Sa nayrlqx king kc tqmatq Jerusalem kx navzpxm mz nqvi lr Devet,
X nzaclve-krde trtxpnzngr nzesaki-krde.
- ¹⁸ Sa na-amyalzx nide mz nzalao-krbo kraon mz narde,
A' sa nabatrpo nzmyakr drtq enqmi rdeng."

Sam Kratrtqki-esz'-nzpnu-tq-nrade-tq (133)*Nzesz'tikr Drtwrgu*

- Nabz ne Devet kx nzngrelzngr Jerusalem mz nzangiongr.
- ¹ Lqngipx x mrlzvxi
Mzli kc leplz tzmctr-lxblr-ngrdr mz nzesz'tikr drtwrdr.
- ² Nzesz'tikr drtwr lqngipx apule nzyrleokr tolo mz nar Eron x nrpnz naode,
krlzo-kzpze lrpzde,
Mzli kc tzaelu-ngrde tolo mz nzngini-krde Nardr Pris.
- ³ X nzesz'tikr drtwr mrlzvxi apule nzdco-krm tewa
Mz newz nyzgung mrkc tqmingr zvz.
Murde da kc tqmrlzting amrlx tqkam Yawe bagu nzvzpxmqng Jerusalem,
Myapxbz nzmnz-zpx-zvz-krgr mz drtc' nyzgu.

[✡] Sam Kratrtqki-esz'-nzpnu-tq-nrade-li (132):11 Aposol 2:30

Sam Kratrtqki-esz'-nzpnu-tq-nrade-pwx (134)

Naglqpxku Yawe

Nabz kx nzngrelzngr Jerusalem mz nzangiongr.

¹ Naglqpxku Yawe, nigu kxnawz nedeng.

 Naprtrku mz Mangr-nzangiongr nide.

² Glalzku mqgu Mrkc Tqtr.

 Glqpxku Yawe mz nrlckxbq.

³ X krka'-ngrgr kx Yawe na-amrlzle nimu mz nzmnc-krde Mzteadau nydze.
 Nide kc tqwz-ngrde bongavz x drtc'.

Sam Kratrtqki-esz'-nzpnu-tq-nrade-nzlvqn (135)

Nigu Nqvi Lr Israel Naglqlzku Yawe

Nabz kx nzngrelzngr Jerusalem mz nzangiongr.

Mcpx Gct Nqvi Lr Israel

¹⁻² Naglqlz-zvzku Yawe,

 Murde nide Gct rgu.

X nigu kxnawz nedeng na-amrlueku nide

 Mz nzkrka'-krmu mz Mangr-nzangiongr x makoa ngrde.

³ Naamatqku nide murde mrlz-esz'ngr.

 X na-angrlvz-ngrgu nide nivz lrde.

⁴ Murde mcpxle nqvi lr Jekop, nigu lr Israel,

 Mz nzngini-krgu leplz nedeng.

Kxrpaz

⁵ Krlzku kx Kxetu rgu, Yawe, nide Gct kc tqmyatxlz-esz'ngr,
 Myaszlzle kxnmncng mzllxlr amrlx.

⁶ Vz-nqblq-txp wzle me pnz drtwrde mz da kx alele
 Kxmule-esz' mz bongavz, nrlc, prla, x me boo-ngrng.

⁷ Wz-ngrde zbo nzvzdz-krdr mz lclxlr mz bongavz,
 X bzlrpc nzvzmi-krm trlipu le.
 X batrpzle nzwqkr nenq.

Kxaovxio

⁸ Sc tqnibqtile ncblo kx ayrrnrngr Ijipt,
 Kr neng leplz x kr neng animol.

⁹ Rwngr da kxnxkctipxng kxkqlu mrlcde,
 Mz nzayrplapx-krde king rdr x kxszetu nedeng.

¹⁰ Aovxiole lr mrkzblleng kxkqlu
 Mz nznibqti-krde king kxnxplz-zlwzng.

¹¹ Krlcng King Sihon, King Og, x kzdu-kzng king
 Kcng tzaclveng mz drtc' Kenan.

¹² X drtc' nydzdrng katimleng bagu,
 Nigu lr Israel, da kc tqwai nzpi-krmlele bagu.

Gct Angidr

¹³ Nqmq kr Yawe tqyc tqyc.

 X nzrkrlzngr drtqde tqvzpe tqvzpe.

¹⁴ Yawe sa napixbzle mz leplz nedeng kxnvz-rbrng o trtingr,
 X sa na-aodu-zvzle nidr.

¹⁵ Kxnmnc-mrbrng nzangiolr mqngr da kx nzlz,

- Kcng tzwzngr ncblo mz silvz x gol.
¹⁶ Mqngr da kxnzlz lcng naodr x mztr ycbz,
 A' trnzycmneung x trnzrmcung da.
¹⁷ Nradrtqdr x nctqdr ycbz,
 A' trnzxlrungr da x trnzycmini-kzung.
¹⁸ Leplz kcng tzrwz-ngrng nzapu-kzlr mqngr lcng.
 Murde nnabung, trnzobqung, nradrtqdr ngq, x trpnzngr nzlungr
 badr.

- Lr Israel Naglqlzlr Yawe*
¹⁹ A' Nigu nqvi lr Israel, naglqlzku Yawe.
 X nimu pris, nqvi lr Eron, na-amrlue-kzamu nide.
²⁰ X nimu kxzawz nedeng, nqvi lr Livae, na-amatqamu nide.
 Nigu amrlx kcng tzamrluelr nide, na-angrlvzku nide.
²¹ Na-angioku Yawe Jerusalem, mz Newz Saeon.
Naglqlz-zvzku Yawe.

Sam Kratrtqki-esz'-nzpnu-tq-nrade-esz'mz (136)

Aodu-zvzle Nigu

Kxrpalz

- ¹ Aodu-zvzle nigu. Awu-ngrbzku bade
 Mz nzmrlz-esz'ngr-krde. Aodu-zvzle nigu.
²⁻³ Aodu-zvzle nigu. Kxetu r kxnetzung
 Myaszlzle kxnmncng mzlllxlr. Aodu-zvzle nigu.
⁴⁻⁵ Aodu-zvzle nigu. Wz-ngrde rkx kxmatq,
 Bongavz mz nzyrplapx-krde. Aodu-zvzle nigu.
⁶ Aodu-zvzle nigu. Wznedz-ngrmle drtc'
 Me boongr prla. Aodu-zvzle nigu.
⁷⁻⁸ Aodu-zvzle nigu. X wz-ngrde nepi
 Nayzlr mz nrlckxngrlx. Aodu-zvzle nigu.
⁹ Aodu-zvzle nigu. Wz-ngrde temz badr vri
 Nayzlrng mz nrlckxbq. Aodu-zvzle nigu.

Aovxiole Enqmi Rgung

- ¹⁰ Aodu-zvzle nigu. Nibqtile enqmi rgung,
 Kxmztr nzmc kai ne lr Ijipt. Aodu-zvzle nigu.
¹¹ Aodu-zvzle nigu. Rkamilzmle nigu
 Lr Israel mz mzlir lr Ijipt. Aodu-zvzle nigu.
¹²⁻¹⁴ Aodu-zvzle nigu. Mz zmatq ngrde kx xplr,
 Akixple Prla Bla. Aodu-zvzle nigu.
Aodu-zvzle nigu. X mailzkimle nigu,
 Leplz nedeng mz ntzi rde. Aodu-zvzle nigu.
¹⁵ Aodu-zvzle nigu. A' rtco-ngrde prla
 King x ami r lr Ijipt. Aodu-zvzle nigu.
¹⁶ Aodu-zvzle nigu. X mailztrle nigu
 Leplz nedeng lzke. Aodu-zvzle nigu.
¹⁷⁻¹⁸ Aodu-zvzle nigu. Nibqtile king kxnxplrng.
 Apoopemle king kxnxmatqng. Aodu-zvzle nigu.
¹⁹ Aodu-zvzle nigu. Nibqle King Sihon,
 King r lr Amctq. Aodu-zvzle nigu.

- ²⁰ Aodu-zvzle nigu. X aovxiole King Og,
Kc tqngi king r lr Basan. Aodu-zvzle nigu.
²¹⁻²² Aodu-zvzle nigu. Aprcmle drtc' nydr
Bagu, nigu lr Israel. Aodu-zvzle nigu.

Aclve-zvzle Nigu

- ²³ Aodu-zvzle nigu. Trmrbrtru mz drtwrde
Nzkxpu-zlwz-krgung. Aodu-zvzle nigu.
²⁴ Aodu-zvzle nigu. Arlapxbzle nigu
Mz mq enqmi rgung. Aodu-zvzle nigu.
²⁵ Aodu-zvzle nigu. X rkabz dakxnzng
Mz krkcng tzlung amrlx. Aodu-zvzle nigu.
²⁶ Aodu-zvzle nigu. Glqlzku Gct kc Heven,
X awibzku bade, aodu-zvzle nigu.

Sam Kratrtqki-esz'-nzpnu-tq-nrade-rlimz (137)

Rblx Nzngr-abrtz-krgr Mz Nzmnc-krgr Bxbilon

- ¹ Kx dcpx mz drtwrgr nzodatingr Jerusalem,
Sc tqyrnipekr mz nwxbune-krgr mrkzble mz nqlvi r ningaling
Bxbilon.
² X gita negrng adotxlzpekrng
Mz nounc kx nztung mrlcde.
³ Krkcng tzolvztilr nigr, tzxtrnga-ngrdr nigr, nzrpimlr bagr kx,
“Ngr-ngrmamu du bagr nabz kxtr nemung.”
⁴ A' mz drtwrgr rpikr kx, “Rblx nzngr-abrtz-krbzkr mz Yawe,
Mz nzmnc-krgr mz mztea nyz kxtrnzrlxngitiung.
⁵ Murde nzmu kx tqmrbrtitr drtwrnge Jerusalem,
Namrbrititr kz drtwrnge kxmu nzayrni-krnge gita nenge.
⁶ X nzmu kx tqrblx nzdcpx-kaikr Jerusalem mz nabznge,
Narblx kz nzngr-krnge nabz ngrdeng.”
⁷ Yawe, nadcpwpwz mz drtfrm alwx ngr lr Edom.
Murde mzli kc lr Bxbilon tzodati-ngrdr Jerusalem,
Sc tzrpibzlr badr kx, “Odatiamu!
Odatiamu x natutx-lxlrngr.”
⁸ Yawe, rlxtibzkr bam nzamrlz-krm ncblo kc naodati-atwrnr-ngrde lr
Bxbilon,
Mz nzayzlu-krbzle badr da kcng tzwaissr-ngrdr nigr. [☆]
⁹ Murde na-abrtz-ngrde nzolvzti-krde doa lcng,
Mz nztamyrtitx-krde nidr.

Sam Kratrtqki-esz'-nzpnu-tq-nrade-rtqmz (138)

Drtq Yawe X Natqde

Nabz ne Devet.

- ¹ Yawe, awibo bam mz nabznge atwrnrnegr.
X angrlvzx nim mz mz kxnxmatqng.
² Lxlvrkibo Mangr-nzangiongr nim mz nzglqlz-krnge drtqm.
X awi-ngrbo bam nqmq krm,

[☆] Sam Kratrtqki-esz'-nzpnu-tq-nrade-rlimz (137):8 Nzaelwapxngr 18:6

Nzaodu-krm, x nzangidati-krm.

Murde drtqm x natqm nzmyatxpx-esz'ngr.

3 Mzli kc tqkrka'-ngrbo bam, ayzlume natqnge,
Mz nzaetunepx-krm nzxplrx-krnge.

4 Yawe, king amrlx mz nrlc sa naglqlzlr nim,
Mz nzxlr-krdr nzmrlzkr natqm.

5 X sa na-angrlvzlr kxmu nzale-krmqng da,
Mz nzmc-krdr kx myatxlz-esz'ngrn.

6 Kxmule-esz' myalz-esz'ngrn, a' sc tqaclve-zvzq kxnzavzo-lzbqng.
X avzome kxnzglqpx-lzbqng.

7 X kxmule-esz' nzkxpungr nzprtzmqng bange, a' amnc-zpwxq ninge.
X tu-zvzme mz nibrnge mz nzngyatikr drtwr enqmi rngeng ninge.
X arlapxq ninge mz zmatq ngrm.

8 Yawe, krlzx kx sa na-angidatiq drtwr amrlx kcng tqyrlq-pz'liti-ngrn
ninge.

Murde nzaodu-krm tqyc tqyc.

Bzkq esaki nzaclve-krm krkcng amrlx tqwz-ngrn.

Sam Kratrtqki-esz'-nzpnu-tq-nrade-rpwxmz (139)

Nzrkrlzkr Yawe Myatxlz-esz'ngr X Krlz-kzle Nqmq Nr Nabzm
Nabz ne Devet kx yrbzle mz kxrmailz ngr dzbe kxnzngngrng.

Obqplxq Nabznge

1 Yawe, obqplxq nabznge,
X krlz-atwrnr-ngrn ninge.

2 Krlzq da amrlx kcng tqalex.
Kxmule-esz' mncme rlsru, a' krlz-zvzq nzao-krnge drtwrnge.

3 Kxmule-esz' wzx o amax, a' sa tqmc-zvzq ninge.
X krlz-kaiq da amrlx kcng nartrngztibo mz zbq kxesz'.

4 Abzo pnz mzli kc trycmneka-ngrne
Nzkrlz-kai-krm natq kzniqe napixng.

5 Zmatq ngrm okatrle ninge
Mz nztu-ngalelvz-krde ninge.

6 Nzkrlz-krm ninge etu zlwz.
X trtakitrpwu' nzkrlz-krm.

Esz'-ngrn Nrlc

7 ?Drlve kc navzkix murde trnamcwq ninge?
Trpnzngr kxnamule lc murde esz'-ngrn nrlc.

8 X kxmule-esz' vzdzx Heven, a' sc tqmncq elr.
X kxmule-esz' bzxx x nzyrtzmqng, a' sc tqmnc-kzq elr.

9 Kxmule-esz' alilvc-kzx me prkilzm nepi
O me takiole,

10 A' sc tqmncq elr mz nzokatr-krm ninge
X nzmrlz-krm ninge mz mqm.

11 Kxmule-esz' mnc-kapqx mz nzlo
X mz drtwrnge nrlckxngrlx nangitx nrlckxbq,

12 A' nzlo x nrlckxbq rblx nzamnc-kapq-krdr ninge,
Murde nzlo x zyzlr kxnamu-txpwlzr esz' mz nzobq-krm.

Nzlmzto-krm Ninge

- 13-15 Murde mzli kc tqmclq ninge mz nelz lxenge
Nim txpwz kx rkrlz nzmc-lrpipx-krmc mrlcde.
Wz-ngrn dalr nrkrdrqnge x nrvr rngeng.
X amwitr-lxblr-kzqng amrlx, mz nzvz-nqblq-krd me pnz drtfrm.
X kctipxx x awitx-ngrbo bam
Nzlrmtio-krm ninge.
16 X mzli kc trnzmckangr mzke',
Yrlqpe-kaiq me nakrlbz me nangi bz ngr nzlu-krnge.

- Rblxm Bange Nzao-krm Drtfrm*
17 A' rblxm bange nzkrlz-angidr-krnge nzao-krm drtfrm
Murde nzkqlu-zlwzng.
18 A' nzmu narlwxxleng drtfrnge mrbrtrpz,
Murde nzmyaszpxlr drta' ngr prla amrlx.
X kxmule-esz' nayrkpxp nxrlwx-krgeleng,
A' tryatrkapc' nzkrlz-angidr-krnge nim.

- Kxdrka'-ngrng*
19 Murde rblxbep bange drtfr ngr nqmq krm.
?Memule tqasa-ngrn nzayrplapx-krm kxdrka'-ngrng?
?Myx kxmule trnamilxtxokalq nidr?
20 Murde nzpiti-ngrdr nim natq kxtrka,
X nzrnzlvzolr nqmq krm.
21-22 Yawe, ptxpx-ngrne krkcng tzpxtxpx-ngrdr nim x ni-kzdr enqmi
rngeng.
Murde trnzmncpzung mz zmatq ngrm.

- Aelwa-ngrm Bange Nqmq Krnge Kxtrka*
23 Gct, obqplxti zpx nqmq nr nabzng
Mz nzkrlz-krm nzao-krnge drtfrnge.
24 Murde na-aelwa-ngrme bange nqmq krnge kxtrka,
X namailzq ninge mz ntzi kxtubq.

Sam Kratrtqki-esz'-nzpnu-pwx (140)

Kxna-atrkatilr Ning
Nabz ne Devet kx yrbzle mz kxrmailz ngr dzbe kxnzngnrg.

- Arlapxbz Ning*
1 Yawe, arlapxbz ninge mz kxdrka'-ngrng
Kcng tzsuti drtfrdr nzatrkti-krdr ninge.
2 Nzryrlq-zvzng drtfr kxtrka mz nabzdr,
X nzapqtr-zvzlr drtfr ngr nzotangr.
3 Natqdr nzlvati apule nipna kr ningidoe kc tqrtq,
Mz nzrpikitingr x nzrpibqtingr. *

- Mz Mq Enqmi Rngeng*
4 Yawe, arlapxbz ninge mz zmatq ngrdr.
X aclve-angidrbz ninge mz krkcng tzryrlqng drtfr kx na-atrkti-ngrdr
ninge.
5 Sc tzglqpx-lzbqng nzamwi-kapqlr trtxki kx naprtz-ngrne mz nzatu-krdr
br mz ntzi rnge.
X tzryrlqng drtfr kx nalolvz-ngrdr ninge.

* Sam Kratrtqki-esz'-nzpnu-pwx (140):3 Rom 3:13

Nim Gct Rnge

- ⁶ Yawe, xlrm nzkrka'-krnge,
 Mурde rpi-zvzbo bam kx, "Yawe, nim Gct rnge."
- ⁷ Kxetu rnge, nxzplkr-krm arlapxle ninge.
 X amyaq narnge mz nzvecngr.
- ⁸ Bzkq rlr-ngrbzme nzngidatikr drtwr kcng tzyrlq kxdrka'-ngrng lcng
 Mz nzbilvz-krdr nzlolvz-krdr ninge, kxmule-esz' nzsuti zlwz drtwrdr.

Ayrplapx Nidr

- ⁹ Enqmi lcng tztu-ngalelvzlr ninge.
 Batrpz nzayzlu-krbz badr natq ngr zngya kcng tzpimlr bange, murde
 nangq-moule nidr.
- ¹⁰ X nyd natatiom nangc-ngrdr,
 X nartctiongr nidr mz gq kx trnarlapx-ngrdru.
- ¹¹ Suti drtwrnge kx krkcng tzpokiang nzmnc-krdr mz drtc' natangqneo.
 X da kxtrka nadwatibzle krkcng tzota-zvzng mz nzodati-krde nidr.

Okatr Ninge

- ¹² Yawe, krlzx kx tu-zvzbzme mz nibr kx trpnzngr scde zmatq,
 X okatrq kxnzkxpung mz nzatubqti-krm da kx vz-rbr.
- ¹³ Leplz kxnztubqng sa na-awibzng bam,
 X namnc-zvzamu badr.

Sam Kratrtqki-esz'-nzpnu-pwx-nrade-esz' (141)

Arlapxbz Ninge Mz Zmatq Ngr Alwx X Kxdrka'-ngrng

Nabz ne Devet.

- ¹ Yawe, kqle-zvzx nim. Xlrm natqnge.
 Vz-anim x okatrp ninge. Yawe, kqle-zvzx nim.
- ² Abrtzlvz nzkrka'-krnge nzvdz-krbzle bam na-apule zsikapu ngr bqlr nc
 ninz kc tzangcbz bam.
 X nzglalz-krnge mqnge na-apubzle bam blz ngr milzpq.
- ³ Yawe, mailz ninge murde ma tqrpitix natq kxtrka,
 A' nzycmne-krnge natubqpzw.
- ⁴ Bzkq rlr-ngrme nzsutikr drtwrnge da kxdrka'ngr,
 Mурde ma tqprtrpo badr kxnzaleng alwx
Mz nzale-krdr da kxvz-rbr,
 X ma tqprlvz mzke' da kxtrka.
- ⁵ A' mz nzprtr-krbo badr, mrlzvxitx nzayrplapxngr ninge.
 Mурde nzatubqtingr apule tolo ngr nzamrlzng.
Bzkq narnge mqngi,
 Mурde krka'-zvz-ngrne kx nayrlqpx-lzbqng mz nzvz-rbr-krdr.
- ⁶ X ncblo sa na-abrtz-ngrdr natq ngr nzatubqti-krnge nidr
 Mzli kc namc-ngrdr nzbzkr kxszetu r kxdrka'-ngrng mz nzayrplapxngr
 nidr.
- ⁷ X nrvr ngrdr sa natwzbetxne mz drtc'
 Mz nzapu-krdr lrdz kcng tqalvxz nrc.
- ⁸ Yawe, nim Gct rnge, abrtr-zvzbo drtwrnge bam.
 Nanginim lrpalvc nyznge, murde ma tqmnc-lxlr.
- ⁹ Mailz ninge murde ma tqprttx mz trtxki sc kxdrka'-ngrng,
 X ma tqtaox mz gq kx nzekqtilr.
- ¹⁰ Mrlzvxitx nzdwatr-mou-krdr mz br scdr,

A' drtqnge naopx zvz.

Sam Kratrtqki-esz'-nzpnu-pwx-nrade-li (142)

Aopxbz Drtnge Mz Nzkrkpu-krngeng

Nabz ne Devet mzli kc tqmncpx-ngrmle mz butqbr.

- 1 Yawe, yrni-katobo bam,
Mурde naokatrq ninge.
- 2 X pibo bam da kx lctr-ngrbz drtwrnge,
X nzkxpungr kcng tqprtzmqng bange.
- 3 Kxmule-esz' nabznge baonepe, a' nim kc tqrwayz zvz mz nzvz-krnge.
Mурde enqmi rngeng nzryrlq-kapqpeng trtxki mz lrpzki rnge.
- 4 X kx obq-ngalex kc nrlc, trpnzngr kx mcx kx naokatrle ninge,
X trpnzngr kz kx na-aclve-zpxle ninge.
- 5 Yawe, kqlex nim,
Mурde nim me rlakirx, x nim nou nzmnc-zpxle-krnge.
- 6 Ayzlum natqnge
Mурde nabznge talvzo zlwz.
- 7 Aopxbz drtqnge mz nzkrkpu-krngeng murde na-awibo bam,
X kxnztubqng natu-ngalelvzlr ninge mz nzglqlz-krdr nim mz nzamrlz-zlwz-krm ninge.

Sam Kratrtqki-esz'-nzpnu-pwx-nrade-tq (143)

Nzadwatrlr Ning Mz Nzlo

Nabz ne Devet.

Xlrm Nzkrka'-krnge

- 1 Yawe, xlrm nzkrka'-krnge x ayzlum natqnge,
Mурde tubq-esz'ngrn x angidati-zvzq.
- 2 Bzkq ayrplapxq ninge, kxnzawz nem,
Mурde trpnzngr leplz mz nrlc kxtubq mz nzobq-krm.
- 3 Enqmi rngeng nzmaneutilr ninge x nzrnbzrtiolr ninge mz drtc',
X nzadwatrlr ninge mz nzlo, apux kxbz kx mnclzm mz gq.
- 4 Nabznge baonepe,
X talvzo zlwz.
- 5 A' amqtrx drtwrnge mz nzaotikr drtwrnge zbq kcng tqvztxpeng.
X dcpx mz drtwrnge da kxnzkctipxng kcng tqalemeng bagr.
- 6 Delc tqglalz-ngrbo mqnge bam,
Mурde brlxkzitx zlwz drtwrnge nim.

Ayzlum Natqnge

- 7 Yawe, ayzlu-anim natqnge murde nabznge baonepe.
Bzkq rlaszq ninge, murde ma tqbz.
- 8 A' pi-zvzm bange mz rnalx kang kqlu kx aodu-zvzq ninge,
Mурde abrrpo drtwrnge bam.
- X mailz ninge mz lrpzki kx nao-zlix,
Mурde mnc-xgle-zvzx nim.
- 9 Yawe, bzkq rlr-ngrbzme mz enqmi rngeng nzlolvz-krdr ninge,
Mурde nim me rlakirx.
- 10 Gct rnge, alvztrp bange nzale-krnge me pnz drtwrm.
X rtwayzm bange mz zmrlz ngrm, murde namnc-zpxxx.
- 11 Yawe, arlapx ninge da kc tqwai nzpi-krmle murde ma tqbz.
X tum mz nibrnge mz nzkrkpu-krngeng amrlx, murde tubq-esz'ngrn.

- ¹² Lolvzting enqmi rngeng x milxtxo alo nidr.
Mурde aodu-zvzq nингe, kxinzawz nem.

Sam Kratrtqki-esz'-nzpnu-pwx-nrade-pwx (144)

Sa Namrlzbz Mz Leplz Mrkcng Amrlx Tqamrlz Yawe
Nabz ne Devet.

Mevalu Rnge

- ¹ Yawe, glqpxx nim, murde nim butqbr nyznge.
X alvztrpe' bange nzrpnan gr x axplrq nингe mz nzotangr.
² Brti drtwnge nzngini-krm lrpalvc nyznge.
Nim Mevalu kx xplr x me rlakitrx.
Nim temz ngr lomrnge kc tqyrrputrngr nipna.
X okatr-zvzq nингe mz nzaovxio-krnge lr mrkzbleng.
³ ?A' memule tqmatq-ngrgr mz drtfrm?
?X memule tqmrlzti-ngrn nigr leplz txneng?
⁴ Nzmrbcnekr nzlukr leplz apule nzyrplaokr nrc kxes'.
X apu-kzle zmio kc tqmrbr mz milzpq.
⁵ Yawe, lvpxp bongavz mz nzvzo-krme.
Maletr newz murde nasikapung nzapulr trmami.
⁶ Atwzlro-ngrm bzlrpc mz nzaodaliti-krm enqmi rngeng.
Pnzing nidr mz nipna scmqng murde navotxng.
⁷ Yawe, rtrngztiom nингe mz nzokatr-krm nингe,
Na-apule kx veclzme nингe me boongr prla.
X arlapxbz nингe mz mq lr mrkzbleng.
⁸ Murde nzmrlzti-txpwzlr nigr mz nzycmne-krdr.
A' trnzatutrlu nzesz'tikr drtwrgr badr.

Nzkrka'-krnge

- ⁹ Gct, sa nangr-ngrbo bam nabz kxmrna.
X na-angrlvzx nim mz nzayrni-krnge gita.
¹⁰ Murde okatr-zvzq king nemqng mz nzaovxio-krdrng.
X sc tقارلaxpebzme nингe mz toki r vea kxmalc, murde nингe kxinzawz nem.
¹¹ Mzli ka arlapx-mopwz nингe mz mq lr mrkzbleng murde nzmrlzti-txpwzlr nigr mz nzycmne-krdr.
A' trnzatutrlu nzesz'tikr drtwrgr badr.
¹² Delc mz nzkqlukr enqmi rgrng,
Krka'-ngrgr kx na-amrlzq nigr lr mrnyzm.
Murde obla negrng naxplrelzm mz nzapu-krdr nounc kx xplr.
X olvi negrng naxplr-kzng x mztr nalqngi mz nzapu-krdr nctrpou ngr ma nyz king.
¹³ Dalr nrlanc nyzgrng nalvc-angidrng,
Murde bxli scgrng nayrbu zvz mz dakxnxng.
X animol negrng naeloting
Murde neidrng nayrlwrtxne.
¹⁴ X kxnxzrmailz rgrng na-ale-zpwxlr nwz-krdr,
Murde leplz ma tztanetrplr drkq nigr mztea nyzgr mz nzvzmi-krdr nigr mrnyzdr,
X lr mztea nyzgrng ma tzodalineng mz nzvzdz-krm nelzdr.

- 15 Yawe, leplz kcng tqokatrq mz da lcng, sa na-abrtz-ngrdr nzmnnc-zpwx-krdr.
Mурde leplz amrlx kcng tqnginim Gct rdr sa namnc-zpwx-zvzng.

Sam Kratrtqki-esz'-nzpnu-pwx-nrade-nzlvqn (145)

Zluli X Zmatq Ngr Yawe

Nabz ngr nzrglqpxngr ne Devet.

Kzdq Nabz Ngr A, B, C

- 1 Awi-zvzbo bam mz nzglqpx-krnge nim,
Mурde nim Gct rnge x mnclzbo bam.
- 2 Bilyzx nim mz nzawi-krbo bam.
X sa naglqpx-zvzx nim mz zbz kang kqlu.
- 3 Clveq nrlc mz zmatq ngrm kx trpnzngr kxrkrlz.
Yawe, myatxlz-esz'ngrn x takitrde nzrglqlzngr nim.
- 4 Doa nemqng sa nayapwxti-zvzbzlr mz doa nedrng,
Da kcng tqetuting tqmatq tqaletiqng.
- 5 Eu, x sa na-aoti-zvz-kzx drtwrnge nzwz-krmqng kxmrlzvxing,
X nzetu-esz'ngr-krm mz zmatq.
- 6 Gct, sa nayapwxtipx leplz da kxnzkctipxng kcng tqwz-ngrn.
X sa napiptx nzmyalz-esz'ngr-krm.
- 7-8 Ipq-aniq leplz murde yc mz drtfrm nidr.
Mурde nivz lrm x nzaodu-krm tqyc tqyc.
Jzsiq leplz mz nztubqng x sa na-angrlvzlr nim.
Sa nalepxlr nrpa ngr nzmrlz-esz'ngr-krm.
- 9 Kxetu, mrlziq leplz amrlx,
X yc zlwz mz drtfrm doa amrlx kcng tqwz-ngrn.
- 10 Leplz nemqng amrlx sa na-awibzng bam,
X doa amrlx kcng tqwz-ngrn sa naglqlzlr nim.
- 11 Mz nrlc tulvzo, sa nayapwxtipxlr nzmyalz-esz'ngr-krm,
X nzetukr zmatq ngrm mz nzngini-krm king.
- 12 Nrpa ngr nzwz-krmqng etu, mz da kxmrlzting kcng tqwz-ngrn mz
nzacive-krm,
Sa nakrlz leplz amrlx.
- 13 Obqom mz nrlc mz nzacive-krm kc tqyc tqyc,
X nzngini-krm king tqvzpe tqvzpe.
Pipx-zvzq natq kx na-angidatiq,
X aelwapx-zvzq nivz lrm mz da amrlx kcng tqaleq.
- 14 Rngiscm zmatq kx okatrle leplz kcng tzkxpung,
X axplrlle nabz leplz kcng tqtalvzo.
- 15 Sa narkabzme dakxnxng mz kxnzung amrlx,
Mz nzmnnc-xgle-krdr nim mz da amrlx.
- 16 Tekqtrq nzbrtale-krdr mz nzakrlc-krbzme nelzdr,
X drtwrdr esatpxp zpwx.
- 17 Vz zvz nzale-krm da kx tubq-esz'ngr,
X aelwapx-zvzq nivz lrm mz da amrlx kcng tqaleq.
- 18 Wxbu-aepztrpzme mz krkcng tzkqlelr nim,
Mz nzbrti-zpwxkr drtwrdr nim.
- 19 Xlrq nzyrnikr leplz kcng tzamrluelr nim,
X ayzlubzme natqdr mz nzarlapx-krm nidr.

- 20 Yawe, tu-zvzbzme mz nibr leplz kx nzmrztilr nim,
A' odati-atwrnr-ngrn kxdrka'-ngrng.
21 Zbq kalvz sa naglqlzx nim.
X krkcng tzung tqwz-ngrn, nzangio-krdr nim tqvzpe tqvzpe.

Sam Kratrtqki-esz'-nzpnu-pwx-nrade-esz'mz (146)

Na-abrtxtrpwzku Drtwrgu Mz Yawe

- 1 **Naglqlzku Yawe!**
Na-angiox nide mz nabznge.
2 Naglqlzx Gct rnge mzli ka tqlube-ngrne,
X na-angrlvzx nide.
3 Bzkq abrtrpzku drtwrgu mz kxnzrmailzng,
Mурde leplz trnzkrilzru nzarlapx-krdr nigu.
4 Nabzng x nzyrtzmqng mz drtc',
X mzli lcpwz drtwr kcng tzyrlqlr botpxp-kzp.
5 A' nangi da kxmrlz nzabrrtr-krbzku drtwrgu mz Yawe.
Mурde takitrde mz nzmnc-xgle-krgu Gct r Jekop.
6 X Yawe nide Kxrpalz,
Kc tqwz-ngrde bongavz, nrlc, x prla, x dalrdrng amrlx.
X atutr-zvzle natqdeng amrlx.
7 Nzatubqti-krbz Yawe da mz kxnzkxpung tubq.
X rka-zvzbz dakxnxng mz kxnzbctaleng.
X aopxbzle drtq kxnzmclbzng mz mq enqmi rdrng.
8-9 X nide kz kx aopxbzle mzku.
X atulzmle kxnzbqsong.
Yawe aclvele lr mrkzbleng kx mnckung badr.
X okatrle kxnzbzsng x kxnzabzong.
Mrlztile kxnztubq nedeng,
A' odatile drtwr kcng tzyrlq kxdrka'-ngrng.
10 Yawe ni-alode King!
Nzaclvekr Gct rgu, nigu lr Jerusalem, tqvzpe tqvzpe.
Naglqlzku Yawe!

Sam Kratrtqki-esz'-nzpnu-pwx-nrade-rlimz (147)

Yawe Amrlzle Nigu Leplz Nedeng Mz Zmatq Ngrde

Yawe Rngisc Zmatq Kx Xplr

- 1 **Naglqlzku Yawe!**
Mrlzvitx nzangrlvz-krgu Gct rgu.
Brngzvitx x takitrde nzglqlz-krgu nide.
2 Yawe yrlq-zpwx-moule Jerusalem,
Mz nzvzmi-kr-mople lr Israel kcng tzlolvtting enqmi rdrng.
3 Rka-mopwz nzabrtzngz mz leplz lcng drtwrdr tqtalvzo,
Mz nzawxo-krbzle drtwrdr apule kx pnutibzle kxsqki rdr.
4 Krlzle me krlzbz nzkqlukr vri,
X yrlqtibzle drtqdrng amrlx.
5 Yawe etu-esz'ngr x rngisc zmatq kx xplr.
X trpnzngz kx rkrlzlbz nzyrplapx-krde.

- 6 Atubxlzle kxnzobqszong,
A' rnzbriole kxdrka'-ngrng mz drtc'.

Mnc-xgleku Zmatq Rde

- 7 Nangr-ngrgu nabz kx yrlvi mz nzayrni-krbzku gita mz Yawe,
Mz nzawi-krbzku bade.
8 Murde yrlqtibzle dcblz mz bongavz x adco-ngrmle tewa nalprnegr drtc',
Murde nalutingr nabr kxvo mz nra.
9 Rkabz dakxnnzng mz animol amrlx,
X aputrle nei utc amrlx mz nzyrni-krbzlr bade mz dale ngr nelzdr.
10 Delc trmrlz-ngrpwlzleu mz Yawe nzabtrtr-ngrbzku drtwrgu mz nxplkr
hcsi ngr vea negung,
X nzaovxiokr ncblz ngr vea negung.
11 A' mrlzbz bade krkcng tzamrluelr nide,
X tzmnc-xglelr nzaodu-zvz-krde nidr.

Zmatq Ngr Natqde

- 12 Nigu lr Jerusalem kcng tzangirolr Yawe mz Newz Saeon,
Naglqlzku nide, kc tqngi Gct rgu.
13-14 Murde amqngitibzle naonrx ngr Jerusalem x bz ngr mrnyzgr.
Amrlz-zvzle lr mzteadau nyzde,
X amnc-zpwxle nigu leplz nedeng amrlx
Mz nzrka-krmle bagu da kxmrlzting.
15 Mzli kc tqycmnepx-ngrde
Dalr nrlc nzvz-nqblq-anilr natqde.
16 Mz mzli r zbao, sncu prlxlvztxde drtc' apule lrpz kxprki.
X dcblz vzom mz nrlc apule zsikapu.
17 X muli-aes rlxom mrkcng amrlx.
Milde da amrlx lcng nayclbzng mz zmatq ngr zbao.
18 A' mz nzycmne-mou-krde, nrlc kc tqpcpe,
X nwqkr nenq kxpq ayrle-mouleng lue kcng tqngi aes.
19 X natq lc tqmatq tqpim Yawe bagu, nigu leplz nedeng,
Milde nayrlq-angidrku nzalvztr-krdeng x Loukxtr scde.
20 Trpypxpwzleu lou scdeng mz lr mrkzblleng,
A' nigu txpwz, mz nzngini-krgu leplz nedeng.
Naglqlzku Yawe.

Sam Kratrtqki-esz'-nzpnu-pwx-nrade-rtqmz (148)

Nzrglqlz-zvzngr Yawe

- 1-2 **Glqlz-zvzamu Yawe**, nimu lr Heven amrlx.
Nimu enjrl nedeng, glqlz-zvzamu Yawe.
3 Glqlz-zvzamu Yawe, nepi ncdr temz.
X nimu vri amrlx, glqlz-zvzamu Yawe.
4 Glqlz-zvzamu nide, dalr bongavz amrlx.
X nimu lue kcng wq, glqlz-zvzamu nide.
5 Glqlz-zvzamu drtqde. Kxrpalz wz-ngrde nimu,
Mz natq kx kapxle. Glqlz-zvzamu drtqde.
6 Natqde tqyc tqyc. Yrlqti-lxbllrbzle
Me namnc-alu-ngrnamu. Natqde tqyc tqyc.
7 Glqlz-zvzamu Yawe, nimu nc x mepwz amrlx

- Ngr prla x me boongr. Glqlz-zvzamu Yawe.
8 Vz-nqblqamu natqde, bzlrpc x muli aes.
Dcbz, nenq x tewa, vz-nqblqamu natqde.
9 Glqlz-zvzamu Yawe, newz x nra amrlx.
Nimu nounc ngr peto, glqlz-zvzamu Yawe.
10 Glqlz-zvzamu nide, animol x utc amrlx.
X da kx nzngrlaneng, glqlz-zvzamu nide.
11 Naglqlz-kzku Yawe, nigu lr nrlc amrlx.
Kxnzetung x kxnzrmailzng, naglqlz-kzku Yawe.
12 Naglqlz-kzku nide, nigu obla x olvi.
Itoto x lrtzlvzng, naglqlz-kzku nide.
13 Naglqlzku drtqde, nigu amrlx ngrgu.
Drtqde myatxlz-esz'ngr. Naglqlzku drtqde.
Nzmyalz-esz'ngr-krde myaszlzle drtc',
X bongavz kz. Nzmyalz-esz'ngr-krde!
14 Naglqlz-zvzku Yawe, nigu lr Israel nedeng.
Axplrle x aodule nigu, **naglqlz-zvzku Yawe.**

Sam Kratrtqki-esz'-nzpnu-pwx-nrade-rpwxmz (149)

Nzbilvz-krgu Nzaovxiokr Yawe

- 1 **Naglqlzku Yawe!**
Nangr-ngrbzku bade nabz kxmrna.
Naglqlzku nide mz nzyrlwrpx-krm leplz nedeng mz Mangr-nzangiongr
nide.
2 Nigu lr Israel na-abrtzlvzku Yawe mz nzngini-krde Kxrpalz.
X nigu lr Jerusalem naelalz-ngrm drtwrgu King rgu.
3 Naelabzku bade
Mz nzrta-krgu kcte x nzayrni-krgu gita.
4 Murde Yawe abrtz-zlwz-ngrde nigu leplz nedeng,
X aovxiole enqmi rgung mz nzmnnc-xgle-krgu nide.
5 Delc nigu kxnztrng nabilvzku nzaovxio-krgu.
X nangr-abrtzku mz nrlckxbq krlzbzle mz nrlckxngrlx.
6 Naogu namalqlvzlr Gct.
X narmaleku toki r vea mz mqgu.
7 Murde na-ayzlubzku da mz lr mrkzbengl
Mz nzatutr-krgu nzaryplapxkr Gct leplz lcng.
8 X nape-amqngiku king rdrng,
Badr kxnzrmailz rdrng amrlx mz nzaovxio-krgu nidr.
9 Mz nzamatqkr Gct nigu, rlr-ngrmle bagu, nigu leplz nedeng,
Nzprtr-krgu mz nzatutr-krde natqde mz nzayrplapx-krgu lr
mrkzbengl.
Naglqlzku Yawe!

Sam Kratrtqki-esz'-nzpnu-nzlvqn (150)

Naelabzku Mz Yawe

- 1 **Naglqlzku Yawe** mz nzmnnc-krde Mangr-nzangiongr,
X nzmnnc-krde Heven kc tqmyalz.
2 Na-angrlvzku nide nzmyalz-esz'ngr-krde

Mz nzale-krde da kcng tqmatq.
3-5 Naelamibzku nrasrpwale
X natz-katobzku bade kcte.
Naelabzku bade navzmi nzayrpla-krgu da,
Nrta-krgu da, x nzayrlewz-krgu da mz mqgu.
Navxubzku trpu x ncblei.
X na-ayrniku git a x ukzlele mz nzglqlz-krgu nide.
6 Nigu kxnzlung amrlx, naelalz-ngrm drtwrgu Yawe.
Naglqlzku Yawe!

Nrpakxmrlz Kx Yr Matiu Natq Ngr Nzaplxtqng Mz Nrpakxmrlz Kx Yr Matiu

Aposol Matiu, mrlx Alfizs [◊] yrle buk lc. Kzdq kz drtqde Livae. Mzli kc Jiszs tqkgle-ngrde nide mz nzprtr-krde mz ncblo nedeng, nide ncblo kxatakqti takes mrkc Kzpznizm. Lr Jiu kcng nzokatrllr lr Rom mz nzatakqti-krdr takes nztrkalrngr kztedrng. Murde nzokatrllr lr Rom kcng tzngi enqmi r lr Jiu mz nzaclve-krdr kandre nyzdr. X kxnzatakqting takes kxnzkqlung nzangqngutitrlr leplz nedrng x nzryrlqtrpzng trau namyaszlzle trau kx pi gzpman ngr lr Rom. X nzyrlqtxpxlr krkc tqyctrpz nangi scdr. Matiu mz nzvz-nqblq-krde Jiszs, aelwapx-ngrmle bagu kx Jiszs sa na-abrtzlvzle doa kznike tekqtrle nqmq nr drtwrde mz nzlxngiti-krde nide, kxmule-esz' alwx ngrdeng nzkqlung.

Nzryrngrkxtr Kc Kai rpile kx Mevalu Kxnzmcpk navzpxm mz nqvi lr King Devet. Nzryrkr Matiu melrmqng Jiszs aelwapx-ngrmle kx Jiszs vzpxm mz nqvi lr Devet. A' drtq kcng tqyr Matiu bletipxng mz buk sc Luk. Mc natq kxtopwz mz Matiu 1:1, 17

Mwx Matiu yrle buk lc mz mzlir yiz 45—68 AD mz nibr nzrmcngr mz Jiszs. Yrbzle buk lc mz kztedeng lr Jiu, mz nzaelwapx-krbzle badr kx Jiszs nide Kxnzmcpk x King kc tquesalz-ngrbz Gct kx sa na-atwzlr-ngrbzle badr, mz nzngini-krdr leplz nedeng. Mz nzmu-krde lcde, yr Matiu kzdung natq mz Nzryrngrkxtr Kc Kai, kcng tqangidatipeng Jiszs. Nrpakxmrlz kcng pwx nzbletipx-lxblrng mz kxmu nzaelwapx-krmlr Jiszs bagu. Murde Mak okatrle nigu nzkrlz-krgu kx Jiszs nide Kxnzawz ne Gct. Mz buk sc Luk, Jiszs nide Mrlx Leplz, x mz buk sc Jon nide Mrlx Gct. X mz buk sc Matiu, Jiszs nide Mevalu Kxnzmcpk x King kc tquesalz-ngrbz Gct na-atwzlr-ngrbzle mz leplz nedeng, lr Jiu. X ni-kzde profet kc tqapule Mosis [◊] mz nzmncti-krdr rlilrdr mz kzdq newz zbg kx nzpnu-pwx, x nzrsakrlrng rlilrdr mz nzalvztr-krdr mz Loukxtr sc Gct.

Mrkcng Mz Buk Lc

Jiszs alvztr-ngrde leplz mz nqmq kr doa neng Gct, mzli kc tzmnco-ngrmlr mz nra. [5—7]

Ycmne-ebzpx-ngrde kxmu nzmnclz-ngrbz mz Gct mz nzngini-krde King. [dckrlzde 13]

Alvztr mz Newz ngr Nc Olivi, mz nzycmnetr-krde mzli kc nayzlu-mou-ngrmle, mz nzrpipx-krde krkcng nztubqng x krkcng nzvz-rbrng. [24—25]

Jiszs kabzle nzwzngr kxmyapx mz nzokatrngr leplz x nzalvztrngr nidr mz nzvz-nqblq-krdr nide. [28:18-20]

Melrmqng Jiszs

¹ Krlc nzryapwxtrngr mz be ngr melrmqng Jiszs Kxnzmcpk. Jiszs Kxnzmcpk vzpxm mz nqvi lr King Devet, x King Devet vzpxm mz nqvi lr Ebraam.*

² Ebraam mrlxde Aesak,

* : Mak 2:14 ◊ : Lou Kcpwz 18:15 * 1:1 Gct esalz-ngrbzle mz King Devet kx Kxnzmcpk navzpxm mz nqvi lrde. [2 Samwel 7:11-17; 23:5; Sam 89:3-4, 19-37] X esalz-kz-ngrbzle mz Ebraam kz sa na-amrlzle leplz amrlx mz ncblo lc navzpxm mz nqvi lrde. [Nou 12:2-3]

x Aesak mrlxde Jekop.

Jekop lc mrlxde Judz nidr badr mzledeng kcng nzpnu-esz'-nrade-esz',
(kcng tzvzpx-ngrmqng nqvi lr ncblo kcng nzpnu-esz'-nrade-li (12)
Israel, kc tqngi kzdq drtq Jekop).

³ Judz mrlxde Peres x Seera, lxedr kxtrngiulrJiu, drtqde Tama.

Peres mrlxde Hesron,

x Hesron mrlxde Ram. [☆]

⁴ Ram mrlxde Aminadab,

Aminadab mrlxde Nason,

x Nason mrlxde Salmon. [☆]

⁵ Salmon mrlxde Boas. Boas lc lxede drtqde Reab, kxtrngiulrJiu.

X Boas mrlxde Obed, x lxede drtqde Rut, kxtrngiulrJiu kz, murde vzkimle
mz drtc' ngr Moab.

X Obed mrlxde Jesi. [☆]

⁶ Jesi lc, mrlxde King Devet. [☆]

⁷ Devet x Batsibz mrlxdr King Solomon. Batsibz nide kc tqngi kai olvz
ngr Yuriz mzli kc trnznibqka-ngrde.

Solomon mrlxde Reoboam.

X Reoboam mrlxde Abaeja.

X Abaeja mrlxde Asa. [☆]

⁸ Asa mrlxde Jeosafzt.

X Jeosafzt mrlxde Jehoram.

Yusaea melrmqde Jehoram. [☆]

⁹ Yusaea mrlxde Jotam.

Jotam mrlxde Eas.

Eas mrlxde Hesekaea.

¹⁰ Hesekaea mrlxde Manase.

Manase mrlxde Amon.

X Amon mrlxde Josaea. [☆]

¹¹ Jekonaea nidr badr mzledeng, melrmqdr Josaea. Mz mzli nyz mzle-
lzbq lcng, nide kc tzrtulrtr-ngrbz mz lr Israel nzvz-krdr Bxbilon mz
nzngini-krdr kxnzawz-nrbalqng elr. [☆]

¹² Mz nibr nzrvzmingr lr Israel Bxbilon,

Jekonaea mrlxde Sealtil,

Serubabel melrmqde Sealtil.

¹³ Serubabel mrlxde Abiud.

Abiud mrlxde Eliakim,

x Eliakim mrlxde Aso.

¹⁴ Aso mrlxde Sadok.

Sadok mrlxde Akim.

X Akim mrlxde Eliud.

¹⁵ Eliud mrlxde Eliesa,

Eliesa mrlxde Matan

x Matan mrlxde Jekop.

¹⁶ Jekop mrlxde Josip,

Josip lc yrlztile Mxri, kc tqngi lxede Jiszs, kc tzrpibz Kxnzmcpx.

¹⁷ Nzmu narlwq nrpr ngr leplz lcng, yzuo mz mzli nyz Ebraam, krlzbzle
King Devet, e nrpr ngr leplz nzpnu-esz'-nrade-pwx. X yzuo mou, mz mzli
nyz King Devet krlzbzle mzli kc lr Israel tzapusr-ngrdr kxnzawz-nrbalqng
mrkc Bxbilon, nrpr ngr leplz krlz-mopwzle kx nzpnu-esz'-nrade-pwx. Yzuo

[☆] **1:3** 1 Be Ngrdr 2:4, 9 [☆] **1:4** 1 Be Ngrdr 2:10-11 [☆] **1:5** 1 Be Ngrdr 2:11-12; Rut [☆] **1:6** Rut
4:22; 1 Samwel 16:1 [☆] **1:7** 1 Be Ngrdr 3:5, 10; 2 Samwel 11—12 [☆] **1:8** 1 Be Ngrdr 3:10-11
[☆] **1:10** 1 Be Ngrdr 3:13-14 [☆] **1:11** 1 Be Ngrdr 3:16-17; Estz 2:6; Jeremaea 24:1; 27:20; 28:4; 29:2

mou, mzli lc x sc tqkrlzpebzle mzli kc tzrmcngr mz Jiszs Kxnmcp, nrpr ngr leplz nzpnu-esz'-nrade-pwx mou. †

Nzrmcngr Mz Jiszs

¹⁸ Krlc be ngr nzrmcngr mz Jiszs Kxnmcp. Kzdq kc nzyrlzngz nzatubqtibz mz mzlir Mxri kc tqngi lxede x kzdq ncblo drtqde Josip. Josip xpepxpele Mxri mz nzyrlzngz. Kxmule-esz' Mxri trnzwmwi-lxblrkang mz Josip, a' yrpe kai mz zmatq ngr Mqngrkxtr. ¹⁹ Kx adcpxbz Mxri nzyrpe-krde mz Josip, Josip aotitx pnz drtwrde nzaxtx-krde Mxri, murde nide ncblo kx mnc-nqblq-zvzle Lou sc Mosis. A' rpile na-ale-kapqle murde ma tqamyabzle drtq Mxri mz nzobqkr leplz kxkqlu. ²⁰ Mzli kc tqaotipengr drtwrde da lcng, kzdq enjrl ne Gct adcpx-lzbqbz bade mz nzrmwible-krde, rpibzle bade kx, "Josip, bzkq mwxlrq nztwz-krm Mxri nzngini-krde olvz rm. Murde nim nqvi lr King Devet, x doa la tqyr-ngrde ngi-batrpz Mqngrkxtr, a' trngiu ncblo. ²¹ Sa narmc mz doa x napibzme drtqde Jiszs, kc drtwr ngrde Yawe arlapx, murde sa na-arlapxle leplz mz nzbz-krdr mz alwx ngrdrng." ‡

²² Krlc atutrlie natq kc tqpibz Yawe mz profet Asaea mz nzsri-krde kx, ²³ "Kzdq doa olvz kxmnc-kamel, nargine doa ncblo, x drtqde narpibz Imanuel," kc drtwr ngrde Gct mncm bagu. * ²⁴ Zbz Josip dwalzm x sc tqyrlztipte Mxri, da kc tqwai nzpi-krbz enjrl kc le bade. ²⁵ A' Josip trmwimileu Mxri vz, vz, x krlbzle mzli kx nzrmcngr mz doa nede. X yrlq-kzpz Josip drtqde Jiszs.

2

Gct Aelwa-ngrbzle Nzrmcngr Mz Kxnmcp Mz Kzdung Leplz Kxtrngiul-riju

¹ Jiszs mzte nzmc mz taon kc Betleem mrkc Judiz provins mzli kc Herot Kc Tqmyalz tqngini-ngrde King. Mzli trboiu kzdung ncblo kx nzkrlz-angidrlr drtwr ngr vri sc tzvzpmemqng Jerusalem. Ncblo lcng nzvzmqng rlu me prkilzm nepi. *

† ^{1:17} Mz nzvz-nqblq-krde nqmq kr lr Jiu mz nzryrngr nqvi lr leplz, kzdung drtq leplz trnzyrou, murde trngiu da kx matq zlwz nzrklzngr drtqdr. A' kzdung mzli drtq leplz nzyro murde nzrpilr kx leplz nadcpx mz drtwrdr drtq lcng, da kc tqwale mz duz nqvi lr leplz kcng tq mz ngalrd lcng. Mcku kx Matiu yrlqpxle kcng drtq melrmqng Jiszs murde kzdung drtq lcng mcku mz Nzryrngrkxtr Kc Kai. X mz nzrlwx-kz-krgu Nrpakxmrlz kxyr Luk, namcku kx drtq kcng tqyrleng yzuoz mz nqvi lr King Devet krlzmle mzli nyz Jiszs bletipxngz mz drtq kcng mz buk sc Matiu. Kxmule-esz' a' nzryrngr lcng trnzvz-rbrung. Murde opxm kx nqvi lr leplz kc tqyr Luk ngi nqvi lr ncblo kx vzpx-ngrm Mxri, mz Devet. X drtq kcng tqyrleng Matiu ngi nqvi lr ncblo kx vzpx-ngrm Josip, mz Devet. Kxmule-esz' Jiszs trngi-angidru mrlx Josip mz nrkrdrtq, a' mz lou scdr lr Jiu, Jiszs niped mrlx Josip angidr. Yiz siu-esz' mz mzli nyz King Devet krlzmle mzli nyz Jiszs. X ycbz nqvi lr doa kcng mz Devet kx nzylz-etrng. Lrpzki kqlu kx naryapwx-nqblq-ngrbz mz nqvi lr Jiszs krlbzle King Devet. Profet nzycmnetr-pnz-ngrdr kx Kxnmcp navzpxm mz nqvi lr King Devet. Delc tqmyapx-ngrbzle nzaelwapxngz kx Jiszs vzpx-angidrm mz nqvi lrde. Be kxmule lc takitrd nzesz'-krde mz nzaelwapx-krde kx Jiszs vzpxm mz nqvi lr Devet. A' mrlztx zlwz be ngrde nzli-krdr, krsc Matiu x krsc Luk. † ^{1:21} Drtq lc tzrpibz Jiszs mzli kc nzrpibz Yesus mz natq lr Grik. A' mz natq kx ycmnengr Mxri, Josip x Jiszs kc tzrpibz Erameik, Jiszs nzrpibzlr Yesua. Drtq lc dekc tzrpibz mz Inglis Joshua. * ^{1:23} Asaea 7:14; 8:10 * ^{2:1} Trkrlz-angidrkkuu mzli kx nzvz-ngrmlr. A' nangi mz nibr Mxri x Josip nzkape-krbz blz krdr mz nzalqngi-moungr mz zbz kranzpn-pwx mz nibr nzrmikangr doa. Murde mzli lc nzkabz blz kxtopwz ngr nran kcng li. Mc Luk 2:22-24. A' nzmu ncblo lcng narka-kaipzlr gol badr, mwz blz krdr nangi da kxetu. Kxmule-esz', a' mwz mzli r nzvz-krmlr kapupxpe yiz kxesz' mz nibr nzrmcngr mzte mzli lc Mxri x Josip tzmnbcbe-ngrdr Betleem, murde nzvzkiplr me boi.

² Mzli kc tzkrlzpe-ngrmlr Jerusalem, sc tzveatipebzlr mz leplz kx, “?Myx me nzrmcngr mz doa kc tqtopwz nanginide King r lr Jiu? Mckr vri kc tqplzpxle nzrmcngr mzte mz nzmnnc-krgr mrkc tqprkilzm nepi. X vz-ngrmgrp mz nzangio-krgr nide.”

³ King Herot mz nxzlrpe-krde nrpa lc, nabzde kc tqtalvzope, murde king lc mzte tzmc ate ma tqmyasslzle nide. X nabz lr Jerusalem amrlx talvzo kz, murde nzmxlrltilr nzngyakr drtwr King Herot. ⁴ Herot ayrlwrtr-lxblrlr kxnzetu rdr pris x kxnzalvztrng mz Lou sc Mosis mz nzveati-krbzle badr kx, “?Drlve ke nzpi profet neng Gct namcngr mz Kxnzmcpx?”

⁵ Nzrpibzlr kx, “Kxnzmcpx mzte namc mztea Betleem, mrka mz Judiz provins. Murde profet Maekz yrle natq Yawe kx, ⁶ ‘Nimu lr Betleem, kxmule-esz' taon nyzmu mrkc tzmncngr nqvi lr Judz, ngi taon kxtopwz, a' nangi kz taon kxmyalzbz mz drtc' nyz Judz. Murde sa naprpxm dq bamu kxetu kx na-aclvele lr Israel, kcng tznginidr leplz nengeng.’” *

⁷ Zbz King Herot esz'-krde sc tqkqlepele ncblo kcng tzvzkimlr mrkc tqprkilzm nepi x nzpi-angidrbzlr bade mzli kx nzmc-ayrnr-ngrdr vri kc. ⁸ A' rrgidrtx-ngrbzle mz nrrpi-krbzle badr kx, “Vzamu Betleem x rtangrtiamu doa la topwz. X kx tqmcamu nide, sutitx zlwz drtwrnge nzyzlu-mou-kramu bange, murde navz-kzpo mz nzangio-krnge nide.” King Herot kc tqkxmu nzycmne-krbzle lc badr murde naesabrtile nidr.

⁹⁻¹⁰ X sc tzrkalzpe-mopqng mz nzvz-krdr. A' mzli kc tzvzne-ngrpwlzlr mz lrpzki, sc tzmcpe-moulr vri kcpwz tzmc-pnz-kailr mrkc tqprkilzm nepi. X mzli kc tzmcpe-mou-ngrdr vri kc, sc tzabrtztx-zlwzpe-moung. Vri kc sc tqrtwayzpe-kaipz badr, vzbz krlz-zpwxbzle nztuo-amc-krbzle ma kc tqmncpx-ngrm doa kc tqtopwz mrkc Betleem. ¹¹ Nzdwatrpzng brma, sc tzmcpelr doa kc tqtopwz ncdr lxede Mxri. X sc tzatuopebzng zpr mz nzangio-krdr nide. X sc tzkapebzlr bade da kcng tqmyapxbz badr, krlcng gol, frankinsens x mrr. †

¹² Mz nzyzlupe-mou-krdr mrnyzdr nzo-zli-alzulr kc lrpzki kzble, murde Gct ycmnebz badr mz nzrmwiblengr kx bzkq nzyzlupebzng mz King Herot.

Josip, Mxri X Jisszs Nzrlakitrlr Ijipt

¹³ Mz nibr ncblo kcng nzvzpe-krdr, enjrl ne Yawe kc tqadcpk-lzbqpe-mopwz mz Josip mz nzrmwible-krde. Rpbzle kx, “King Herot sa na-atwzlrpx-ngrde kzdung ncblo mz nzrtangrti-krdr doa ncblo lc topwz mz nznibq-krdrle. Mz nzmu-krde lc, tutxlz-anipwzmu badr doa la x lxede, x plc-aniamu mrkc Ijipt. Mnc-txpwzmu elr. X napi-zpwxbzle mzli r nzrlasz-mou-krmule.” ‡

¹⁴ Josip tumitxlz-animle Jisszs x lxede mz nrlckxbq kc, x sc tzvzki-anipelr mrkc Ijipt. ¹⁵ Nzmcncg Ijipt krlz-zpwxbzle mzli kx Herot bz-ngrde. Dekc Yawe tqatutrle nike pi-pnzbzle mzli kc bqnc mz profet Hosia, mz nrrpi-krde kx, “Ninge Yawe, kqletrx mrlxnge mz nzvzpx-krmle Ijipt.” *

King Herot Nibqtile Doa Ncblo Kxnztopwzibeng Amrlx Ngr Betleem

* ^{2:6} Maekz 5:2, 4; 2 Samwel 5:2; 1 Be Ngrdr 11:2 † ^{2:9-10} Mz mzlr Jerusalem x Betleem takitr kilomita kx rtqmqz. 2:11 Frankinsens nzwnngr mz bqrl be nounc kx nztwzkimle mrkc Arabia. Ngi rkx ngr Jisszs nzngini-krde Gct. Dekc tzangc-ngrbz bqrl nounc mz Gct mz nzkrka'-krdr. Mrr ngi kzdq kz bqrl be nounc kx mnrt sz'pq-esz'ngr x ngi dalr nzaelungr nrkrdrq ncblo kxbz mz nzryrtzmqngr. Ngi rkx ngr nzngini-krde blz mz nzbz-krde leplz. Gol kx lqngi x lqlwx-esz'ngr ngi rkx ngr nzngini-krde king. Da lcng tq takitxtrpwzle nrrka-ngrbz mz king. ‡ ^{2:13} Nzvngr ycpwz pipz nztakitrkr zbq kxnzpn-esz' le. * ^{2:15} Hosia 11:1

¹⁶ Mzli kc Herot tqkrlzpe-ngrde kx ncblo kcng tzvzkiplr mrkc tqprkilzm nepi nzangqngutirpelr nide, drtwrde kc tqngyape. Zbz sc tqpipebzle mz ncblo ngr vea nedeng nanibqtilr doa ncblo amrlx kx yizngrdr libe x kxnztopwztx-zlwzbeng tzmncng Betleem x kzdung kz mztea kxnzesotr-pzng. Murde drtwr lc vz-nqblqle natq ncblo kcng mz nzpi-krbzlr bade mzli kx vri kc aelwapx-lzbq-ayrnr-ngrbzle badr.

¹⁷ Mz nzmu-krde lcde, lr Betleem nzyrnitipelr doa nedr kcng tzbztipeng. X nzyrningr lc sc tqatutrpele nzyr-pnzkr profet Jeremaea mz kzdq mztea kx esotrpz Jerusalem, mz nrzpi-krde kx, ¹⁸ “Kzdq kc natq tzxlrtrpz mztea Rama, x krlc natq ngr nzyrningr mz drtwr kx vz zlwz. Resel tqyrnimile doa nedeng. Rblx nzamnc-lrpingr nide, murde doa nedeng nzbztipeng.” [◊] §

Josip, Mxri, X Jiszsz Nzrlaszlr Ijipt

¹⁹ Zbz Herot kc tqbzpe, x enjrl ne Yawe sc tqadcpx-lzbqpe-mopwz mz nzrmwiblekr Josip, mzli kc tqmncbe-ngrde Ijipt. ²⁰ X rpibz enjrl kc bade kx, “Tulz, otibz doa ncblo la x lxede kz x yzlukipe-mouamu mz mrnyzmu mrkc Israel, murde leplz kcng tzsuti drtwrdr nzrnibqngr doa la topwz nzbzpeng.” ²¹ X Josip ncdr doa ncblo kc x lxede sc tzyzlukipe-moulr Israel.

²² Mzli kc Josip tqxlrpe-ngrde kx mrlx King Herot, drtqde Akelezs kc tqnginipede king r Judiz Provins, sc tqmwxlrepe nzmnc-mou-krdr mrlcde. X Gct ycmne-mopwz bade mz nzrmwiblengr nike na-alele, x sc tqvzkipel Gzlili Provins. ²³ Naszret sc tqngipe mztea nyzde. Mz nzmu-krde lc, natq kx nzpi-pnzngr Kxnzmcpx sc tqututr-angidrpe, mz nrzpi-krde kx, “Kxnzmcpx narpipe-ngrbz nide doa lr Naszret.” *

3

Nzryapwxpxkr Jon Kxawrkxtr

Mak 1:1-8; Luk 3:1-18; Jon 1:19-28

¹ Mzli lcde, Jon Kxawrkxtr vzpxm lzke ngr Judiz Provins, x sc tqryapwx-pebz mz leplz. ² Rpibzle kx, “Tekqtramu nqmq nr drtwrmu mzli ka, murde Gct ycpe pipz nzvectr-krmle leplz mz nzmnclz-krbzlr bade mz nzngini-krde King rdr.” ³ Jon nide kc tqycmnetrngr profet Asaea mz nzryr-krde kx, “Natq kzdq ncblo kx natqde etu mz nzryapwx-krbzle mz leplz lzke. Natq lcde rpile kx, ‘Oliqtiamu nabzmu mz nzvz-krm Kxetu Gct. Atubqtibzmu lrpzki kx nangi nyzde, na-apule nzoliqtikr leplz kzdq lrpzki kx navzkiem king.’” [◊]

⁴ Jon lc nide kzdq ncblo kx rpxingr lrpz kx nzvzngr mz nrpnk kamel x nrkalode ngi bekzu. Dakxnxng nade ngi txpwz kionabr x hane kzpeto. *

⁵ Leplz kxnzkqlung mrkc Jerusalem x me nzyc-aepztimqng mz provins kc Judiz, x mrkcng amrlx tzo-ngalele LueJodzn, nzvzmqng mz nzlalztq-krbzlr mz Jon. ⁶ Nzplxtipxbzlr alwx ngrdrng mz Gct, x sc tqawrkxtrpeng Jon mz LueJodzn.

⁷ Mzli kc tqmcngr Jon kx Farzsi x Sadiusi kxnzkqlung sc tzvzpe-kzpqng bade mrkc tqawrkxtr-ngrde leplz, drtwrde trmrlzu, x sc tqrpipebzle

* **2:18** Jeremaea 31:15 § **2:18** 2:16 Herot mwxlrti-lzbq kx doa lc topwz tqngi Kxnzmcpx ma tqtekqtrle nide mz nzngini-krde King. 2:17-18 Natq profet drtwr ngrde tresz'u. Mz natq lc, kzdq drtwr vzpem mzli nyz profet Jeremaea esz'-krde. Mrlc ycmne-ebzpx-ngrde mztea Rama. A' natq lc atutr-moule mz mzli nyz King Herot. Tqycmnetr-ngrde Betleem mrkc tzyrtzmqng Resel, murde Resel kc tqngi olvz r Jekop tu-ngrde leplz ngr Israel amrlx kcng tzyrning. * **2:23** 2:19 Nzmnc-krdr Ijipt trtakiru yiz kxli. 2:23 Nzycmnenr lc tryclzpwzu mz Nzryrngrkxtr lcng tqycpem bagu mzli ka, x trkrlz-angidrkuu me vzkimle. [◊] **3:3** Asaea 40:3 * **3:4** Krlcng lrpz x dakxnxng nan ncblo kx mnccpxm lzke, da kc tqwai profet Elaeja mzli kc bqnc. [2 King 1:8]

badr kx, "Nimu doa neng kxdrka'-ngrng kxnxzodang! ?Neke rpibz bamu nzwrkxtrngr na-ayrbqpxle nimu mz nzayrplapxkr Gct kc navzm? [◊] ⁸ Nzwrxtrtx-ngrpwz esz'-krde trna-arlapxleu nimu, a' na-aleamu da kx aelwaxp-ngrde kx tekqtrpeamu nqmq nr drtwrmu kxtrka kx ycpxm mz nabzmu. ⁹ X bzkq rpiamu mz nimu esz'-krmu kx, 'Rlapxpekr murde Ebraam ngi melrmqgr. X nigr angidr leplz kx mcpx Gct.' Murde napibo bamu kx nzmu trnavz-nqblqwamuu lrpzki r Gct mz nzarlapx-krde leplz, krlzle nzbatr-krbzle neidu lr Ebraam nzvzpx-krmrlr mz rplz lcng, mz nzatutr-krde da kx esalz-ngrbzle bade. [◊] ¹⁰ Gct apule ncblo kx twzle akes scde x oliqtile nzrlakitiongr nounx x rtctxlz-ngrde mz nyr, murde trnzpapx-ngrdru nradr kxmrlz. Sa tqoliqtile mzli ka nzangc-krde leplz mz nyr ngr nzayrplapxng, murde nqmq krdr trtubqu x nzpxtpx-ngrdr nztekqtr-krdrle. [◊]

¹¹ "Awrkxtrx leplz mz lue txpwz namcngr kx tekqtrpeamu nqmq nr drtwrmu kc tqtrka. A' kzdq la ncblo sa navzm mz nibrnge. X da kx na-alele namyaszlz-moule ninge. Murde kxmule-esz' ninge kzdq profet, a' trtakitrdeu ninge nzwztr-krbo bade, x trtakitr-kzpwc'u nzrmalene-ngrbz sadol scde, murde myaszlz-zlwzle ninge. Sa na-awrkxtrle nimu mz Mqngrkxtr x nyr kx na-alqngile nimu. ¹² Mz nzvz-krmle naoliqtinemle nzrppix-krde nqmq kr leplz. Nakapxmle leplz kx nzmrlzng mz leplz kx nztrkang, mz nzamnc-angidrpe-krdeleng Heven. A' leplz kxnxztrkang sc tqangcpeleng mz nyr kx ngc alo."

Nzwrkxtrkr Jiszs

Mak 1:9-11; Luk 3:21-22

¹³ Mzli lcde Jiszs rkalzm Gzlili Provins x vzm mz Jon mrkc mz LueJodzn mz nzawrkxtrkr Jon nide. ¹⁴ A' Jon abzle nzarlapx-lzbqngr mz nzawrkxtr-krde Jiszs. Rpibz Jon kx, "Nzmu na-awrkxtrbzme ninge! Trtakitrdeu nzawrkxtr-krbo nim!" ¹⁵ A' ayzlu-ngrbz Jiszs natqde kx, "Rlr-ngrbz kx nakxmupele lc mzli ka. Murde mz nzale-krgi da lc, dekc na-atutr-ngrgi me pnz drtwr Gct." Zbz sc tqaolvzpebz Jon natqde.

¹⁶ Mz nibr nzwrkxtrkr Jiszs, mzli kcpwz tqvzdz-ngrmle mz lue kc, Heven lvxpx-lzbqbz bade. X mcle Mqngrkxtr vzom bade apule nran, x wxbuobz bade. ¹⁷ Zbz kzdq natq rpiomle Heven kx, "Mrlx lc nide Mrlxng Kxnzmlzti. X abrtzlvz-zlwzx nide." [◊] †

4

Setzn Tamitile Jiszs

Mak 1:12-13; Luk 4:1-13

¹ Zbz Mqngrkxtr sc tqmailztrpele Jiszs lzke, murde narlr-ngrbzle mz Setzn nzrtamitingr nide. ² Mnctile lzke zbzq nzpnu-pwx mzli kc tqaxtx-ngrbzle dakxnxzng mz nzkrka'-krde. X mz nibrde nelzde kc tqbrtalepe. ³ Mzli lc Setzn sc tqvzpm bade, rpibzle kx, "Kx tqnginim Mrlx Gct, e aelwaxp-ngrm bange x pibz mz rplz lcng nalrtipxlr bret." ⁴ A' ayzlu-ngrbz Jiszs natqde kx, "Trtingr, murde nzyro mz Nzryrngrkxtr kx, 'Doa trlutex-ngrpwzleu nzmu-krde dakxnxzng, a' lu-kz-ngrde natq Gct.' " [◊]

⁵ Zbz Setzn kc tqvzmipele Jiszs Jerusalem, mzteadau kxtr, sc tqam-ncopemle mz kzdq me yctxlz zlwz mz Mangr-nzangiongr Yawe. ⁶ Sc

[◊] 3:7 Matiu 12:34; 23:33 [◊] 3:9 Jon 8:33, 39 [◊] 3:10 Matiu 7:19 [◊] 3:17 Sam 2:7 [†] 3:17 Krlzku kx ngi Get Trte kc tqycmneom Heven murde rpile kx Jiszs nide mrlxde. Delc mz ngalrde lcng 16-17, mcku leplz kcng tq, mz Get kc esz'txu, tzrpibz *Tqtrbz*. Mc kz Matiu 28:18-20; Aposol 1:8; 2:38; x 8:16 x natq kxnxtopwzng elr. [◊] 4:4 Lou Kcpwz 8:3

tqrpipebzle kx, "Kx tqnginim Mrlx Gct, e atao-lzbq mrka. Trpnzngr nztakr-krm murde Nzryrngrkxtr rpile kx, 'Pipebz Yawe mz enjrl nedeng nzaclev-krdr nim. Nzglqlr nim mz mqdr; murde nanycm ma tqtcprtr mz rplz.' " ⁷ A' rpibz Jiszs kx, "Trtingr. Murde Nzryrngrkxtr rpi-kzle kx, 'Bzkq atalzamu Kxetu Yawe, Gct rmu.' " ⁸

⁸ Zbz Setzn vzmilz-kzle Jiszs mz newz kx myatxlz. Sc tqaelwape-ngrbzle mrkcng amrlx tqluli tzaclvelr king r nrlc. ⁹ Zbz rpibz Setzn mz Jiszs kx, "Nzmu narweome bange zpr mz nzangio-krm ninge mzli ka, e da lcng amrlx sc tqkatipebong bam." ¹⁰ Rpibz Jiszs kx, "Rlasz ninge Setzn! Nzmu trangiowxu nim, murde nzyr mz Nzryrngrkxtr kx, 'Angio txpwz Kxetu Yawe, kc tqngi Gct ngrm x wztxtrpwz bade!' " ¹¹ Zbz Setzn kc tqrlaszpele Jiszs, x enjrl neng Gct nzvzmqng sc tzaclvepelr nide x tzrkapebzng nade dakxnzng.

*Nzwzkr Jiszs Mz Nzyapwxtipx-krde Nrpakxmrlz
Mak 1:14-15; Luk 4:14-15*

¹² Zbz kzdq ncblo adcpxbzle mz Jiszs kx Jon Kxawrkxtr nzadwatrpe mz presin. Zbz Jiszs sc tqrkalzpem Judiz Provins tqyzlupe Gzlili Provins. ¹³ Mz nzyzlu-krde mrlcde trmncu mztea Naszret, a' mnc Kzpznizm, kzdq taon kx yco mz nqlvi r Dxbu Gzlili. Kzpznizm yc mz nrlarnrlc kc tzmncngr neidu lr Sebyulon x Naftzli, lr Israel kcng bqnc. ¹⁴ Da lc tqale Jiszs atutrle natq profet Asaea kc bqnc, mz nzrpi-krde kx, ¹⁵ "Nimu lr Jiu namncamu mz mzlir kxtrngiulrJiu mz nrlarnrlc kcng Sebyulon x Naftzli. Drtc' nyzmu yc-aepztrpz mz lrpzki kc tqo-zlile Dxbu Gzlili, krlzbzle nqlvi r LueJodzn me prkilzm nepi. ¹⁶ Alwx ngr leplz kxnmnc-mrbrng akamrbr-ngrde da mz nabzdr. Kxmule-esz' a' sa namclr ncblo kc na-apule zyzlr, kc tqpnamilxtile nabzdr; murde na-aopxbzle badr lrpzki kx navzkilr mz nzrlapx-krdr." ⁹

¹⁷ Mzli lc tqmncpengr Jiszs Kzpznizm, sc tqayzutrpele nzwz-krde. Rpibzle mz leplz kx, "Tekqtramu nqmq nr drtwrmu mzli ka, murde Gct ycpe pipz nzvectr-krmle leplz bade mz nzmnclz-krbzlr bade mz nzngini-krde King rdr."

*Jiszs Kqlele Ncblo Nedeng Kcng Ayrnrngr
Mak 1:16-20; Luk 5:1-11*

¹⁸ Kzdq zbz Jiszs kx o-zlile kc nabz drta' ngr Dxbu Gzlili, rmctile ncblo nzling kx nzmwang. Saemon kc tqngi kz drtqde Pita, x mzlede Adru. Sc tzapoong br Dxbu Gzlili. ¹⁹ Zbz sc tqkqlepypeng Jiszs, rpibzle badr kx, "Vz-nqblqمامن ninge, murde na-alvztrpo bamu nzrtangrngr leplz kx nangi nengeng." ²⁰ X mzli kcpwz nzrlasztx-pnzlr nzwz-krdr x sc tzvz-nqblqpele nide.

²¹ Jiszs o-zli-mopwzle nabz drta', rmcti-moule mzle-lzbq nzling, Jemes x Jon, mrlxng Sebedi. Nzmncomqng badr trtedr mz bot scdr, tzngqtitrlr br scdr. Zbz sc tqkqlepypbz Jiszs nidr. ²² Mzli kcpwz nzyrlqtxdr nzwz-krdr, x nzrlasztrplr trtedr mz bot scdr, x sc tzvz-nqblqpe-kzlr Jiszs.

*Jiszs Alvztrle Leplz X Amrlzle Kxnzyagoxng
Luk 6:17-19*

²³ Zbz Jiszs sc tqvztiptele mztea ngr Gzlili amrlx, tqalvztrpe mz mangr-nzkrka'ngr nyzdr lr Jiu, x tqyapwxtipxle Nrpakxmrlz kx Gct sa tqvec-trpemle leplz bade mz nzngini-krde King rdr. Mzli lc Jiszs amrlz-kzle kxnzyagoxng x kxnzdwatibzng zyagox kxtrka. ²⁴ Zbz nrpa ngr Jiszs sc tqvzpe tqtalvzpxpele provins kc Siriz. X leplz ngr mztea lcng amrlx

⁸ 4:6 Sam 91:11-12 ⁹ 4:7 Lou Kcpwz 6:16 ¹⁰ 4:10 Lou Kcpwz 6:13 ¹¹ 4:16 Asaea 9:1-2

nzrvzmimqng mz Jiszs lr ma nyzdr kxnxzdwatibz zyagox kx bletipx-lxblrng. Kzdung nzyagox-zpxwng, kzdung drtqdr vetq, kzdung nrkrdrtqdr bz, kzdung nzglqng nimz, x kzdung nzdwaszng drka'. Jiszs amrlz-moule leplz lcng amrlx. ²⁵ Mzli lc, zbo ngr leplz kxetu sc tzma-nqblqtipelr Jiszs, kxmule-esz' nznginidr lr Jiu o kxtrngiulrJiu, murde namclr da kx na-alele. Leplz lcng nzprpxmqng mz nrlarnrlc kcng mz taon kcng nzpnu-esz', mz Provins kc Gzlili, Provins kc Judiz, x mzteadau Jerusalem x mz nrlar LueJodzn kc tqprkilzm nepi.

5

Nqmq Kr Doa Neng Gct

Luk 6:20-23

¹ Mzli kc tqmcngr Jiszs zbo ngr leplz kcng tzvzmqng bade, sc tqvzdzpe mz kzdq nra mz nzalvztr-krde nidr. X ncblo nedeng nwxbu-nglelvezlr nide mrkc tqwxbu-ngrde. *

² X sc tqrpipebzle mz nzalvztr-krde nidr kx,

³ "Ngi da kxmrlz nzkrlz-krmu kx mnc-xgleamu nzokatrkr Gct, murde Gct sa nakabzle bamu da kx vzpxm mz nzngini-krde King rmu.

⁴ "Ngi da kxmrlz nzvzkr drtwrmu, murde Gct sa na-amqtrpzle nabzmu.

◊

⁵ "Ngi da kxmrlz nzavzo-lzbq-krmu, murde Gct sa nakabzle bamu zmatq mz nzaclve-krmu mz nrlc. *

⁶ "Ngi da kxmrlz nzpqkr nabzmu mz nzrtangrti-krmu Gct, murde Gct sa naokatrle nimu mz nzvz-nqblq-krmu me pnz drtwrde. *

⁷ "Ngi da kxmrlz nzyckr drtwrmu leplz mz nzokatr-krmu nidr, murde Gct sa nayc kz mz drtwrde nimu.

⁸ "Ngi da kxmrlz nztubqkr nabzmu, murde sa nakrlz-angidramu Gct x nqmq kxtubq. *

⁹ "Ngi da kxmrlz nzaodutr-lxblr-krmu leplz mz nzmnc-krdr mz nrw, murde Gct sa narpile kx nimu doa nedeng.

¹⁰ "Ngi da kxmrlz nzatrkatingr nimu mz nzale-krmu da kxtubq, murde mnclzbzmu mz Gct mz nzngini-krde King rmu. *

¹¹ "Ngi da kxmrlz nzatrkatingr x nzrpibqtingr x nzobqsongr nimu mz nzvz-nqblq-krmu ninge mz nrlc ka. * ¹² Mzli ka na-abrtzlvzamu nzapukrmu profet ne Gct kcng tzatrkti pnz melrmqmung. Murde mz nrlc kc navzm, sa natwz-kzamu da kc tqmyapx-esz'ngr." *

Doa Neng Gct Nzapulr Dcpiz X Zyzlr

Mak 9:50; Luk 14:34-35

¹³ Jiszs rpi-mopwzle mz nzycmne-ebzpxngr kx, "Na-apuamu dcpiz kxmrlz mz nrlc ka. Murde na-amnc-angidr-kzamu leplz da kc tqwai dcpiz nzayc-angidr-krde dakxnzng. A' nzmu nilwz dcpiz kx tqmrbrle la, trpengr nzamrlz-moungr. Trpnzng r da kx takitrde, a' takitxtrpwzle nzrtctxngr mrkc tzvz-ngrdr leplz. Mz nzmu-krde lcpwz, bzkq esaki nzvectr-krmamu leplz bange mz nzarlapx-krnge nidr. ¹⁴ X nzmu na-apu-kzamu zyzlr kc namailzbzle leplz mz Gct. * Murde nztubqkr nqmq krmu naopx-angidrbz badr, da kc tqwai zyzlr ngr taon kx ycom mz newz tryc-kapqu. ¹⁵ X navz

* ^{5:1} Krle nqmq kr lr Jiu mz nzalvztr-krdr leplz. Matiu 5:2–7:27 nzrpibz Nzalvztrngr mz Nra. Mz nzalvztrngr lc, Jiszs ycmneb mz krkeng tzlxngitipelr nide, kxmule-esz' leplz kxnxkqlung nzalztlq-kzpzung bade. * ^{5:4} Asaea 61:2 * ^{5:5} Sam 37:11 * ^{5:6} Asaea 55:1-2 * ^{5:8} Sam 24:3-5 * ^{5:10} 1 Pita 3:14 * ^{5:11} 1 Pita 4:14 * ^{5:12} 2 Be Ngrdr 36:16; Aposol 7:52 * ^{5:14} Jon 8:12; 9:5

zvz nzale-krmu da kxmrlz, murde trpnzngr doa kx rtekatr lam sc tqyrlq-kapqpele. X tralavzo-kzleu topla. A' lam nzadolwpwz wq, murde leplz namclr zyzlr mz nzdwatr-krmklr brma. ¹⁶ Mz nqmq lcpwz, naaelwapxngrbzmu mz leplz nztubqkr nqmq krmu, kc navz-nqblqbzlr mz Trtemu kc Heven, mz nzglqlz-krdr nide.”

Natq Gct

¹⁷ Rpi-mopwz Jiszs kx, “Bzkq rpiamu kx vzmc mz nzayrkrpx-krnge Natq Gct kxnzyro mz Lou sc Mosis x nzalvztrkr profet. Murde trvz-ngrpwc'u mz nzayrkrpx-krngele, a' mz nzatukztr-krngele. †

¹⁸ Dekc tqvz-ngrmc mz nrlc. X trpnzngr natq kxipiz mz Lou sc Gct kx nakatxpx mzli ka bongavz x nrlc tqycbe-ngrdr. A' natqdeng amrlx na-atutr-kaing. ¹⁹ Mz nzmu-krde lcde, doa kx rnzlvzole kzdq natq Gct, x alvztr-rbrle da, sa nanginide ncblo kxmane mz leplz amrlx kcng tzmncbzng mz Gct, kxmule-esz' ncblo lc rpile kx natq lc mane. A' kx vz-nqblq-zvzle natq Gct x alvztr-angidr-ngrde leplz, sa nanginide ncblo kxetu mz drtwr Gct. ²⁰ Napibo bamu, rblk nzmnclz-krbzmu mz Gct mz nzngini-krde King rmu, a' ngi txpwz nzmu nzvz-nqblq-krmu natq Gct namyaszpxle Farzsi x kxnzalvztrng mz Lou sc Mosis kcng tzvz-nqblqlr drtwrdr esz'-krdr.”

Bzkq Drtwrm Ngya

²¹ Jiszs rpi-mopwzle kx, “Krlzamu kx mzli kc bqnc Gct kabzle natq lc mz melrmqgung, mz nzrpi-krde kx, ‘Bzkq rnibqq leplz. Murde sa na-ayrplapxx doa kx rnibq leplz.’ ²² A' rpibo bamu kx Gct sa na-ayrplapx-kzle mrlx kc tqngyati drtwrde kztede, kxmule-esz' tratrkatileu nide. X nide kc tqrpibzle mz kztede kx, ‘Nim dcvi r leplz,’ o ‘Nim brmrda ngr leplz,’ sa navzmi nide mz Kansrl. X nekc mz drtwrde rpile kztede takitrde Hxl, mz nzrpi-krbzle bade kx, ‘Nim bo-ngqngu,’ takitrde Gct nzrtctr-krde nide mz nyg ngr Hxl.

²³⁻²⁴ “Mz nzmu-krde lcde, tubqti-lzbq-kaiamu mz kztem kc tqngyati drtwrde nim. Na-aleq da lc nzmu navzq mz Mangr-nzangiongr Yawe mz nzrka-krm blz mz olta, a' dcpwz mz drtwrk kx kzdq doa ngyati drtwrde nim. Bzkq kaq blz kc, a' yrlq txpwz ena, x tubqti-lzbq-kaiamu mz kztem. Zbz takitrde nzyzlu-kr-mopwe' Mangr-nzangiongr mz nzrka-krm blz kc. ²⁵

²⁵ “Mz nqmq kcpwz, mz nzvz-krmu mz lrpzki, tubqti-lzbq-kaiamu mz ncblo kc natwzle nim mz kot. Murde ma tqaprcbzle nim mz majzstret kc na-aprc-alzupwzle nim mz pulis, x pulis sc tzadwatrpelr nim mz presin,

²⁶ mrkc namnc-ngrn x nakrlz-zpwxbzle nxzpepx-krm trau amrlx kcng nakapxq.”

Bzkq Kcmnzngr Mzpq Doa Kx Trngiu Krnalzm

²⁷ Jiszs rpi-mopwzle kx, “Krlzamu kx mzli kc bqnc Gct kabzle natq lc mz melrmqgung, mz nzrpi-krde kx, ‘Bzkq rmwimiq doa kx trngiu krnalzm.’ ²⁸

²⁸ A' rpibo bamu kx mrlx kx mzte rkcmnzngr doa, x rpile namwimile, mz nabzde rnzlvzopele natq Gct kc tqrpile kx bzkq rmwimiq doa kx trngiu krnalzm.

† ^{5:17} Nzatutr-krde natq Gct drtwr ngrde nidr seleng: 1) Atutre natq Gct kxnzplzpx amrlx kx nzyapwxipxngr Kxnxmcpx. 2) Atutr-kzle da amrlx kcng tqesalz-ngrbz Gct mz leplz nedeng. 3) Vzm mz nzngini-krde ncblo kx tubq-esz'ngr kx trpnzngr alwx ngrde, mz nzvz-nqblq-angidr-krde lou sc Gct amrlx. 4) Vzm mz nzalvztr-krde drtwr angidr ngr natq Gct mz Nzryrngrkxtr kc kai. 5) X vz-kzp mz nzrka-krbzle kzdu-kzng nzalvztrng, murde Nzryrngrkxtr kc kai x natqdeng namwitrx-lxblrng.

◊ ^{5:18} Luk 16:17 ◊ ^{5:21} Nzrlaszngr 20:13; Lou Kcpwz 5:17 ◊ ^{5:23-24} Nou 4:4-7; Nzryplapxngr 15:8; Asaea 1:10-15; Jeremaea 6:20; Emos 5:21-24 ◊ ^{5:27} Nzrlaszngr 20:14; Lou Kcpwz 5:18

29-30 “Mz nzmu-krde lcde, aclveti-lzbq kz. Bzkq rlr-ngrbzme mz alwx nzaclve-krde nim. A' mz mzli r nzatalzngr arlapx-lzbq. X katxpx-lzbqm mz nzatalzngr kx batrpzle nztao-zvz-krm. Murde nzwz-kato-krm mz nzmncngr kxtubq mzli ka, x nzmnc-zvz-krm Heven kalr, myaszpx-zlwzle nzaxtx-krbzme nzrlxngiti-krm mzli ka, x nzmnc-zvz-krm mz Hxl kalr.” *

Bzkq Axtxbzme Krnalzm

Matiu 19:9; Mak 10:11-12; Luk 16:18

³¹ Jiszs rpi-mopwzle kx, “Krlzamu kx mzli kc bqnc Gct kabzle natq lc mz melrmqgung, mz nzsri-krde kx, ‘Ncblo kx na-axtxde krnalzde, naka-kaipzle bade pepz ngr nzaki-lzbq-krdr.’ * ³² A' rpibo bamu kx ncblo kx axtxde olvz rde kx tr-rmwimiu ncblo kzble batrpzle bade nztao-krde mz alwx ngr nzrmwingr ncblo kzble nzmu nayrlz-moule. X ncblo kc tqyrlztile olvz lcde tao kz mz alwx lcdepwz.” ‡

Bzkq Yrlq Nzesalz-krm Mz Kzdq Da

³³ Jiszs rpi-mopwzle kx, “Krlzamu kx mzli kc bqnc Gct kabzle natq lc mz melrmqgung, mz nzsri-krde kx, ‘Bzkq pokiaq mz nzesalz-krm, a' atutr zvz da kx esalz-ngrbzme mz Gct.’ * ³⁴ A' rpibo bamu kx bzkq yrlqq nzesalz-krm mz kzdq da, murde rblxbz bam nzatutr-krm natqm, a' da amrlx yc mz mq Gct. Bzkq yrlqq nzesalz-krm mz Heven murde ngi me mncngr Gct. ³⁵ X bzkq yrlqq nzesalz-krm mz nrlc ka, murde nyz-kzde. X bzkq yrlq-kzq nzesalz-krm mz Jerusalem, murde krlc mzteadau kx nzangiongr Gct, King kxmatq. ³⁶ X bzkq yrlqq nzesalz-krm mz narm, murde rblxbz bam nzaprkigr x nzabongr nqnginarm, murde da lc yc kz mz mq Gct. ³⁷ Setzn kc Tqdrka'ngr tqngi nou da kxtrka amrlx batrpzle mz leplz nzpokia-krdr x nzrpilr nayrlqlr nzesalz-krdr mz kzdq da. Mz nzmu-krde lcde, da kx napi-txpwzme mz nzycmne-krm, ‘Eu’ o ‘Trtingr.’ A' bzkq pokiaq x bzkq yrlqq nzesalz-krm mz kzdq da.” §

Bzkq Ayzluq Da

Luk 6:29-30

³⁸ Jiszs rpi-mopwzle kx, “Krlzamu kx mzli kc bqnc Gct kabzle natq lc mz melrmqgung, mz nzsri-krde kx, ‘Nzayrplaxngr narsakrlr-ngrpwz mz nike nzvz-rbrngr. Doa kx tz-batrpzle mz kztede, natz-batr-kzpze mzte. X doa kx tzlqpxbzle nqngi kztede, natzlpkx-kzpze nqngide.’ * ³⁹ A' rpibo bamu kx bzkq ayzlubzme nike nzwaisr-ngrm, a' ayzlu-alzupwz mz nivz. Nzmu ncblo naobqssole nim mz nztztr-krbzle blzmznaom kxrtc, bzkq ayzluq, a' ao-lxlvr-kzpze nrlarde kxmc mz nztz-kz-krpzle. ⁴⁰ X nzmu ncblo natwzle nim mz kot murde rpile nrz scmqng nangi scdeng, ka-kzpze bade bot scm. *

⁴¹ X nzmu kzdq kxetu kx rtulrtrpzle bam nzglq-krbzme bxli scde mz kilomita kxesz', bzkq kabzme, a' glqtibzle kilomita nali. ⁴² Doa kx rlxbz

* **5:29-30** Matiu 18:8-9; Mak 9:43-47; Luk 17:1-2 * **5:31** Lou Kcpwz 24:1 ‡ **5:32** Mz mzli nyz Jiszs, ncblo txpwz kx krlzle nzaxtx-krde olvz rde. A' mz nztwz-krgu drtwr lc mz nzmnc-krgu, nakrlzku kx drtwr ngrde doa amrlx bzkq nzaxtxdr krnalzdr. * **5:33** Livae 19:12; Nzkqlu-krdr 30:2; Lou Kcpwz 23:21, 23 § **5:37** Mzli kznike ncblo yrlqle nzesalz-krde mz kzdq da, opxm kx nide kxpokia, murde natqdeng esz'-krdr trtakitrdeu nzatutr-krde nzesalz-krde. A' kxmule-esz' ncblo yrlqle nzesalz-krde mz kzdq da, a' kzdzung mzli pokia. Delc na-aelwapx-ngrgu mz nqmq krgu kx pi-zvzku da angidr. X na-atutr-zvzku da kx piku. Mc Jon 8:44 x James 5:12. * **5:38** Nzrlaszngr 21:24; Livae 24:20; Lou Kcpwz 19:21 * **5:40** Nzycmnekr Jiszs angidr dese: Nzmu ncblo natwzle nim mz kot murde rpile nzkq scm kc tqyctxtr kai nangi scde, ka-kzpze lrpz ngr zbao scm.

bam da murde rpile nangi scde, x mcq kx takitrde nzokatrngr, kabz. X kx rlxtibzle da scmqng mzli kxmrbcne, rlr-ngrbz.” [☆]

Bzkq Mwati Drtwrm Enqmi Rmqng

Luk 6:27-28, 32-36

⁴³ Jissz rpi-mopwzle kx, “Krlzamu kx mzli kc bqnc Gct kabzle natq lc mz melrmqgung, mz nrzpi-karde kx, ‘Mrlzti kztemqng, a’ namwati drtwrm enqmi rmqng.’ [☆] ⁴⁴ A’ rpibo bamu kx namrlzti-kzamu enqmi rmung. X nakrka'-ngrnamu leplz kcng tzatrkatilr nimu. ⁴⁵ Murde mz nzale-krmu da lc, sa nanginimu mrlxng Gct Trtemu kc Heven x na-apuamu nide. Murde mrlztile leplz kxmule-esz' kxdrka'-ngrng o kxnzmrlzng, mz nzati-krbzle nepi x nzadc-krbzle tewa mz leplz amrlx. ⁴⁶ Nzmu namrlzti-txpwzmu kxnzmrlztilr nimu, Gct ma trkapwzleu da kxmrlz bamu. Murde tr-rblxu nzalengr, x kxnzatakqting takes nzale-kzlr da lc. ⁴⁷ Nzmu narpi-txpwzmu kx, ‘Nimu la,’ mz kztemung, trmyaszpxleu leplz kc-kzng. Murde tr-rblxu nzalengr, x kxnzmnc-mrbrng nzale-kzlr da lc. ⁴⁸ Mz nzmu-krde lcde, namrlztiamu leplz amrlx, da kc tqwai Trtemu kc Heven nzmrlzti-zlwz-krde leplz amrlx.”

6

Nzalvztrkr Jissz Mz Nzokatrngr Leplz

¹ Jissz rpibzle kx, “Bzkq glqpx-lzbqq mz nzale-krm da kxmrlz me nzyrlwr-lxblrngr, kx muq naglqpxngr leplz nim. Murde nzrglqpxngr lc sa nangipepwz da kx natwzq, a’ trtxpnzngr nztwz-mou-krm da kx nakabz Trtem kc Heven. ² Mz nzmu-krde lc, mzli kznike rka-ngrn da mz nzokatr-krm leplz, bzkq aleq mz mz leplz kxnzkqlung, da kc tzwai leplz kx narpi-rbz kxnzrlxngiting. Nzalelr da lc murde naglqlzng leplz nidr. A’ napi-angidrbo bam kx trpengr da kx natwz-moulr kx nakabz Trtem kc Heven, a’ ngi txpwz nzglqlzkr leplz nidr. ³ A’ mz nzokatr-krm doa, bzkq rlr-ngrbzme mz leplz nzkrlztilr-krbzlr. ⁴ Murde Trtem kc Heven tqrkrlz angidr da amrlx sa nakabzle bam da mz nzabrtzlvz-krde da kc tqale-kapqq.”

Nzalvztrkr Jissz Mz Nzkrka'ngr

Luk 11:2-4

⁵ Jissz rpi-mopwzle kx, “Mz nqmq lcpwz, mzli kznike krka'-ngrn, bzkq apuq leplz kx narpi-rbz kxnzrlxngiting. Murde nzkrka'ng mz mz leplz kxnzkqlung x nzobq-kztilr nidr. A’ napi-angidrbo bam kx trpengr da kx natwz-moulr, a’ ngi txpwz nzglqlzkr leplz nidr. ⁶ A’ nim, mz nzkrka'-krbzme mz Gct kc trnzmcu, krka' me trnamc-ngru leplz nim. Murde Gct kc tqmcle da amrlx, sa narkabz bam da mz nzabrtzlvz-krde da kc tqale-kapqq.

⁷ “X mz nzkrka'-krde, bzkq apuq kxtrnzrlxngitiung kcng tzrpiting natq kxkqlu kx trpnzngr drtwr ngrdeng. Murde mz drtwrdr krkcng tzangiolrng sa nakabzlr badr da navz-nqblkqle nzboikr nzkrka'-krdr. ⁸ Bzkq kxmule lc mz nzkrka'-krde da kc tzwailr, murde Gct Trtem krlzpe-kaile da kcng narlxtibzme trycpwzu bam. X suti drtwrde nzka-krbzle da lcng bam. ⁹ Mz nzmu-krde lcde, mz nzkrka'-krde rpi kx,

‘Gct Trte, batrp bagr, nigr lr nrllc, nzamatq-krgr drtqm kxtr-esz'ngr,

¹⁰ x nzmnclz-krbzkr bam mz nzngini-krm King rgr. Murde navz-nqblkq-krzkr me pnz drtwrm, da kc tzwai lr Heven. ¹¹ Kam bagr dzu r da kx natakitrde mzbq ka. ¹² X ipqpxbz nzvz-rbr-krgr navz-nqblkqle nzipq-krgr krkcng tzaletrpqng da kx vz-rbr bagr. ¹³ X arlapx nigr mz zmatq ngr

[☆] 5:42 Lou Kcpwz 15:9-11; Sam 112:5, 9; Nzyrplapxngr 19:17; Luk 6:35 [☆] 5:43 Livae 19:18

Setzn, mz nzokatr-krm nigr mz nztu-amqngi-krgr mz nzatalzngr. X awi mz nzayzlu-krme natqgr, mz nzngini-allo-krm king rgr, mz zmatq ngm ktc tqyc tqyc. Eu, angida.’”

¹⁴ Jiszs rpi-mopwzle kx, “Mурde nzmu naipqq krkcng tzaletrpzng da kx vz-rbr bam, e Trtem kc Heven sa naipq-kzle nim. ¹⁵ A' nzmu trnaripqwq leplz, e Trtem kc Heven tripq-kzleu nim.”

Nzalvztrkr Jiszs Mz Nzaxtxngr Da

¹⁶ Jiszs rpibzle kx, “Mzli kznike axtx-ngrn da mz nzmnc-aepztr-krbzme mz Gct, ale txpwz mz Gct. X bzkq apuq leplz kx narpi-rbz nidr kxnzrlxngiting. Leplz lcng nzablqkiti-lzbqng mz nzaxtx-krdr da, murde leplz namclr kx nidr kxnztrng. A' napi-angidrbo bam kx trpengr nztwzmou-krdr da, a' ngi txpwz nzglqlzkr leplz nidr. ¹⁷ A' mz nzaxtx-krm da, yangi narm x abrngzti-lzbq. ¹⁸ Murde ma tzkrlztrpz leplz kx axtxq da, a' namc txpwz Gct kc trnzmcu. Murde Gct kc tqrkrlzle da amrlx sa nakabzle bam da mz nzabrtzlvz-krde da kc tqale-kapqq.”

Nzalvztrkr Jiszs Mz Nzrngiscngr Da

Luk 12:33-34

¹⁹ Jiszs rpibzle kx, “Bzkq atamutilzq nzrngisc-krm da mz nrlc ka, murde ma tqyrti ninr x ma tqpnz mepyr rde, x tzpnati ncbl. ²⁰ A' na-atamutilzq nzrngisc-krm da Heven, mrkc trpnzngr da kx atrkati da, x trpnzngr kx pna da elr. ²¹ Murde mrkc tqyrlq-ngrn dztum, dekc tqyc-kzngr nabzm.

²² “Mz nzmu-krde lcde, da kcng tqpqtr mz nabzm nzaelwpx-ngrdr nzngini-krm doa kxmrlz o kxtrka. X doa kxmrlz aelwpx-ngrde kx nabzde yrbulzm mz da angidr x nivz lr Gct mz nznka-nrbalq-krbzle da mz leplz. *

²³ A' doa kxtrka aelwpx-ngrde kx nabzde kamrbrngr. Murde trkibrivzle nzrngisc-krde mz nrlc ka. X rblxbz bade nzobqplxtr-krde natq Gct. Delc tqale-zvz-ngrde alwx.

²⁴ “Rblx doa nzwztr-krbzle mz kxetu kxli mz mzli kxes. Murde sa napqtirpe drtwrde kzdq, x sa namatitrpe drtwrde kzdq kz, mz nzrvznqblq-ngrng. Mz nzmu-krde lcpwz, rblx nzwztr-krbzmu mz Gct x mz nzrngiscngr da. ²⁵

²⁵ “Mz nzmu-krde lcde, rpibo bamu kx bzkq da kx nakxne drtqmu mz nzmnc-krmu, mz da kx nangqamu x namnqamu, x lrpz kx napxingrnamu. Murde nzmnc-zpxngr tryctxtrpwzu mz dakxnxng x lrpz. ²⁶ A' na-aoti drtwrmu utc. Trpnzngr da kx nzpetilr x trnzekqlzung dakxnxng, x trpnzngr nyzdr ma ngr dakxnxng, murde Trtemu Gct aclvele nidr. A' nakrlzamu kx nzmyalz-krmu myaszpxle utc! X mz nqmq lc, Trtemu sa narkatibz bamu da. ²⁷ Mane nzyc-zvzkr drtwrmu da, murde trokatrleu nimu x rblxbz bamu nzaboinepx-krmu nzlu-krmu.

²⁸ “X mane nzyc-zvzkr drtwrmu mz trnzrngisc-ngru lrpz. Na-aoti drtwrmu nzpqpxkr mqmya. Trnzwzung x trnzkxsilzung scdr lrpz.

²⁹ Kxmule-esz' King Solomon kc tqngi nceapu, a' nzlulikr lrpzdeng trmyaszpxleu nrpq mqmya lcng. ³⁰ Murde Gct la tqapqtipx mqmya nangi

* ^{6:14} Mak 11:25-26 ^{6:19} Jemes 5:2-3 * ^{6:22} 6:21 Da kcng nakabz Gct bam mz nzabrtzlvz-krde da kc tqaleq mz nzvz-nqblq-krde natq Jiszs, krlcng nzrngisc-krm Heven. 6:22 Jiszs ycmnetr-angidr-ngrde mz ncbl nznini-krde zyzlr ngr nrkrdrtqde. Mz kxmrlz drtwr ngrde doa kxtrka-nrbalq x mz kxtrka drtwr ngrde doa kxtrkibr. ^{6:24} Luk 16:13

lrvpzdr nc mqmya. Noude lang trnztu-aboiu, murde sa namrbrng mz nzngckrdr mz nyr, nzngikr nanr leng. Mrla tqyc-ngrde, nakrlzamu kx Gct sa napxi-kzle nimu, mz nzmnnc-krmu mz nrlc. Murde myaszlz-zlwzamu nounc. A' nzrlxngiti-krmu bzkq topwz!

³¹ “Mz nzmu-krde lc, bzkq yc zlwz mz drtwrmu da kx nangqamu, lue kx namnqamu, x lrpz kx napxi-ngrnamu. ³² X bzkq apuamu kxtrnzrlxngitiung kx nzaoti txpwz drt wrdr da lcng. Murde trnzkrlzlu kx Gct rkale doa nedeng da kx tryctrpwzu badr. A' nadcpnx mz drtwrmu kx Trtemu kc Heven krlzle da kx trycpwzu bamu. ³³ X narlr-lzbqbzmu mz nzmnclz-ngrbz bade x mz nzvz-nqblqngr natqde, x mz nibrde da lcng sc tqkape-kzpze bamu. ³⁴ Mz nzmu-krde lcde, bzkq yc zlwz mz drtwrmu da kx naprtz kalrla. Murde kalrla sa na-aoti drtwrmu da kx takitrde kalrla. X dalr zbkqa takitxtrpwzle mzbq ka. Bzkq atamutilzamu dalr kalrla mz nzwzkr mzbq ka.” [†]

7

*Atubqti-lzbq Kai
Luk 6:37-38, 41-42*

¹ Jiszs rpibzle kx, “Bzkq rpiamu kx takitrde doa nzayrplapx-katongr mz alwx ngrdeng, murde ma tqrpi kz Gct kx takitrde nzayrplapx-kato-krde nimu mz alwx ngrmung. ² Murde Gct sa na-ayrplapxle nimu mz nqmq krmu mz nqmq kcpwz tqrpi-ngrnamu kx na-ayrplapxle leplz mz nqmq krdr. X sa napi-kzpze bamu kx navz-nqblqamu natq kcngpwz tqpibzmu mz leplz, kx navz-nqblqlrng. *

³ Murde mz ngrpi-krm kx doa takitrde nzayrplapxngr mz alwx ngrde, obqtiq alwx ngrde kc tqtopwzne, a' trmcwq alwx ngrm kc tqwzpx. Opxm kx obqtitrpzme dcvi kc tqtopwzne mz mzlem. A' trmcwq dapunounc kc tqyrbqpym mz mzp. ⁴ Dekc tqrpi-ngrbzme mz mzlem kx, ‘E mzlenge e, nakatxpxbo ena dcvi la tqtopwzne tqycpxm mz mzp.’ ?Memule tqkxmu nzycmne-krm lc? Murde dapunounc kxwzpx la tqycpxm mz mzp! ⁵ Nim leplz kx narpi-rbz kx rlxngitiq! Kapx kai dapunounc la wzpx tqyrbqpym mz mzp, x nzmu mzp kc tqopxpe mz nzrmcngr dcvi kc tqtopwzne tqycpxm mz mzlem. Atubqti-lzbq kai mz alwx ngrmqng x kztemqng kc ate.

⁶ “A' bzkq abzq nzalvztrngr leplz kcng tzpxtxpx-zvz-ngrdr Nzryrngrkxtr. Murde mz nzale-krm da lc opxm kx katxnebzme natq kxtr mz kuli kzpeto, kcng nalxlvtimlrim nim mz nzmakx-krdr nim. X apu-kzle nzrtctx-krbzme dztu Gct mz poi, kcng narnzlvzineolrng mz drtc.”

*Nakrka'-zvzbzku Mz Gct
Luk 11:9-13*

⁷ Jiszs rpi-mopwzle kx, “Rlxbz da mz Gct, x sa nakabzle. Rtangr da x sa narmctiq. Abc x naonrx sa nalvpxbxz. ⁸ Murde doa kx rlx da kx takitrde nide, sa natwzle. X kx rtangrtile nzokatrkr Gct, sa nangida. X kx abctr-zvzbz mz Gct, naonrx nyz Gct sa nalvpxbxz bade. †

* 6:34 Luk 12:22-31 † 6:34 Jiszs tr-rpileu kx bzkq ryrlqku drt wr ngr kalrla. A' rpile kx bzkq yc zlwz mz drt wrgu da kx rblxm bagu nzaclvengr o nztekqtrngr. Murde da lcng nzycng mz mq Gct kc tqaclvele nigu. * 7:2 7:1 Kxmule-esz', a' takitrde nzatubqti-krgu nzvz-rbrkr doa negung x krkeng tqaclvekung. X na-aleku mz nqmq ngr nivz. A' bzkq yapwxtinebzku nidr mz leplz. 7:2 Trngiu drt wr ngrde kx bzkq mcku nzvz-rbrkr leplz. A' mz nzmc-krgule, bzkq yapwxtinebzku mz leplz, a' nakrka'-ngrgu nide mz nzkrlz-krde nzvz-rbr-krde. Mc kz Matiu 18:23-35 x Mak 4:24. † 7:8 Gct sa naka-txpwzle da mz nzvz-nqblq-krde me pnz drt wrde.

⁹ “Murde trpnzngr trte doa kx rkabz mz mrlxde rplz mzli kx rlx-ngrbzle nade dakxnzng. ¹⁰ X trkapwzleu ningidoe mzli kx rlx-ngrbzle nc. ¹¹ Nimu kcng trnztubq-zvzung krlzamu nzale-krmu da kxtubq mz nzhka-ngrbz da kxmrlz mz doa nemung. A' myapx-mopwz, Trtemu kc Heven krlzle nzale-krde da kxtubq mz nzhka-zvz-krbzle da kxmrlzti zlwz mz krkcng tzrlxbzng bade da.

¹² “Ale-zvzbzmu mz leplz da kx suti drtwrmu na-alebz bamu, kxmule-esz' trnzalepwzluu bamu. Murde krlc nzatutrngr nzalvztrngr amrlx mz Nzryrngrkxtr.”

Naonrx Kxtotaki Mz Lrpzki Kc Tqvz Heven

Luk 13:24

¹³⁻¹⁴ Jiszs rpi-mopwzle kx, “Mz nqmq lcpwz, naprtrq mz naonrx kxtotaki mz nzkrlz-krbzme lrpzki kc tqvz Heven. A' nakrlzq kx naonrx lc tqtotaki x lrpzki lc tqtopwzne rblx nzo-zlingr. Leplz trnzkqluung kx nzrmctilr naonrx lc. A' bzkq prtrq mz naonrx kc tqetu, murde ma tqrmctiq lrpzki kc tqvzkile mrkc tzodatingr leplz mz Hxl. Leplz kxnzkqluung nzvz-rbrng mz nzo-zli-krdr lrpzki lc tqyryz murde tr-rblxu nzo-zlingr.” ‡

Nzalvztrkr Jiszs Mz Profet Kxnzalvztr-rbrng

Luk 6:43-44

¹⁵ Zbz rpibz Jiszs kx, “Mz nqmq lcpwz, bzkq vz-nqblqamu lrpzki r profet kxnzalvztr-rbrng. Sa naprtrpzng bamu mz nzapu-krdr kxnzrlxngiting, a' nzrpilr naodatilr nzrlxngiti-krmu, murde nidr angidr kxdrka'-ngrng.

¹⁶ Sa naglxamu nidr, murde nqmq krdr aelwapx-ngrde namrlzu r leplz kc tqnginidr. Apule nouc amrlx kx nzglx-ngrdr nradr kcng tzpapx-ngrdr. Murde tr-rkeopwx'u naq mz nc nole, x dx mz nc lrpz. ¹⁷ A' nouc kxmrlz papx-ngrde nranc kxmrlz. X nouc kxtrka papx-ngrde nranc kxtrka. ¹⁸ Opx angidr kx nouc kxmrlz trpapx-ngrdeu nranc kxtrka. X trpnz-kzngrou nradr kxmrlz nzlakitiong x nzrtclz-ngrng mz nyr. ✰ §

²⁰ Mz nzmu-krde lcde, sa naglx-ngrnamu kxnzalvztr-rbrng mz da kxtrka kx nzvzpxmqng mz nqmq krdr.” ✰

Doa Kx Takitrde Nzprtr-krde Heven

Luk 13:25-27

²¹ Jiszs rpibzle kx, “Leplz kcng amrlx tzrpimlr bange kx ninge Kxetu Lod rdr trnaprtrung amrlx ngrdr Heven, a' nangi txpwz krkcng tzvz-nqblqlr me pnz drtwr Trtengi kc Heven. ²² Murde mz Mzli Kxmatq kc na-ayzlu-ngrbz Gct da mz leplz, leplz kxnzkqluung narpimlr bange kx, ‘Kxetu Lod! Plzpxbzkr mz leplz natq Gct mz drtqm, x rmaszlrpxkr drka', x ale-kzkr da kxmatqng kxkqluung mz drtqm!’ ²³ Kxmule-esz', a' sa narpi-angidrbo badr kx, ‘Nimu kxdrka'-ngrng! Vzkipeamu kc! Trkrlzwu nimu murde trvz-nqblq-angidrwamuu ninge.’” ✰ *

‡ **7:13-14** Naonrx lc tqtotaki drtwr ngrde nzrlxngitingr Jiszs. X lrpzki lc tqtopwzne drtwr ngrde nzvz-nqblqngr natqdeng. ✰ **7:19** Matiu 3:10; Luk 3:9 § **7:19** X mz nqmq lcpwz leplz kxdrka'-ngrng nzangc lc nidr mz Hxl. ✰ **7:20** Matiu 12:33 ✰ **7:23** Sam 6:8 * **7:23**

Leplz kx nzvz-nqblq-angidrlr Jiszs nzalzltq-zvzbzng bade—mz nzkrka'ngr, mz Nzryrngrkxtr, x mz nzatutr-krdr natqde. A' leplz kxnzkqluung nzesabrti-lzbqng. Murde mz drtwrdr nzvz-krdr mz makxtr batrpzle nzngini-krdr kxnzrlxngiting, a' trnzvz-nqblq-angidrlu Jiszs. X kzdu mzli nzvz-nqblq-txpwlzr nqmq krdr esz'-krdr o nqmq kr makxtr nyzdr. Tr-rblxu nzaongr mz trtxki sc Setzn mz nzvz-nqblqngr da kxmrlzbz mz leplz, mz trnzvz-nqblq-angidr-krdr Jiszs esz'-krde. Nzwzkr makxtr ngi nzokatrngr nigu mz nzvz-nqblqngr Jiszs x natqdeng amrlx.

*Ma Li Kx Blepxngr Mz Nzrwzng
Luk 6:47-49*

²⁴ Jiszs rpi-mopwzle kx, “Mz nzmu-krde lcde, doa kx xlrmle natqngeng, x yrlq-angidrleng, apule ncblo kxyrplapx kx wzti-angidrlle ma nydze. Ekqtiole gq lr nctrpou ngrdeng kxmqngi, vzo la mz rplz. ²⁵ Mz nibrde, trlipu r tewa x nenq kc tqvzpm. Nenq wqq x nubla ngr lue yrle-zlwz-kzp, nzrpilr na-awxolr x nayrvilr ma kc. A' trmrtuu murde nctrpou ngrde tu-amqngio mz rplz. †

²⁶ “A' doa kx xlrmle natqngeng x tryrlq-angidrlle, apule ncblo kxngqngu kx awxbutxopwzle ma nydze mz drta'. ²⁷ Mz nibrde, trlipu r tewa x nenq kc tqvzpm. Nenq wqq x nubla ngr lue yrle-kzp nzvztitrlr ma kc. X ma kc mrtuo x ngilialz-pnzm mz trlipu kc.”

²⁸ Mzli kc tqyrkrpxpengl nzalvztrkr Jiszs, zbo ngr leplz kcng nzkctitxpx-zlwzlr nzalvztr-krde. ²⁹ Murde trapuleu Kxnzalvztrng mz Loukxtr, a' ycmnemile zmatq angidr. ☩

8

*Jiszs Amrlzle Ncblo Kx Ycngr Lepz
Mak 1:40-45; Luk 5:12-16*

¹ Mzli kc Jiszs tqvzo-ngrmle mz nra kc mz nibr nzalvztrnegr lc, zbo ngr leplz kxnzetung sc tzma-nqlqpele nide. ² Zbz kzdq ncblo kx ycngr lepz vzm, x rwetxobz zpr mz Jiszs. X rpibzle bade kx, “Kx tqsuti drtwrm le, krlzx kx krlzq nzamrlzngr ning!” ³ Kxmule-esz' mz Lou sc Mosis batrzpzle trnztakitr-krdeu nzprtrnegr mz nzangiongr, a' maletxtrpzle nide. X sc tqrpipebzle kx, “Mrlz mbane. Namrlzq.” X mzli kcpwz kxsqki lepz kc mztxtr pnz kz. ⁴ Zbz rpi-kzpze bade kx, “Bzkq ena ncblo kx napi-nebanle. A' vz-kaipz mz pris, x pibz bade napwxlitibzle nrkrdrqm, murde namcpzle kx mrlzpeq. Zbz sa napipxbzle mz leplz, murde namnc-lxblr-mouamu badr. X kabz blz mz Gct, da kc tqwai nzpikr Lou sc Mosis le, x nakrlzng leplz amrlx kx tubqpeq mz Loukxtr.” ☩

*Jiszs Amrlzle Kzdq Kxnzawz Kxyagox
Luk 7:1-10*

⁵ Jiszs badr ncblo nedeng nzvzng mz taon Kzpznizm, mz nqlvi r Dxbu Gzlili. X kzdq lr Rom kc tqngi kxetu r dzbe ncblo ngr vea kx trtqki-esz' (100), vzm mz nzrmcti-krde Jiszs, murde rpile Jiszs naokatrpzle nide. ⁶ X sc tqrpipebzle bade kx, “Kxetu, kxnzawz-nrbalq nenge sc tqyrbqpe ma nydzne. Nrkrdrdqde bz x sc tqtangigx zlwz.” ⁷ Rpibz Jiszs bade kx, “Mrz. Sa navzmc ma nydzna amrlzbo nide.”

⁸ A' rpibz kxetu kc mz Jiszs kx, “Eke, Kxetu! Bzkq kxpuneme nzvzng ma nydzne. Murde trtakirpwu' nzdwatr-krme ma nydzne. Krlzx kx rngiscm zmatq kxmyalz zlwz. Pi txpwz dq ye natq, x ncblo nenge sc tqmrlzpe. ⁹ Murde mnclz-kzpo mz zmatq ngr kamadz rnge. X ncblo ngr vea nengeng nzmnclzmqng mbane. Kx narpibo mz kzdq kx, ‘Vz!’ x sc tqvzpe. X kx narpibo mz kzdq kz kx, ‘Vzm!’ x sc tqvzpm. X kx narpibo mz kxnzawz nenge kx, ‘Da kx na-aleq se!’ x sc tqalepele.”

¹⁰ Kx xlrbz Jiszs natqdeng, kctitxpx-zlwzle. X sc tqrpipebzle mz leplz kcng tzvz-nqlqlr nide kx, “Napi-zpwxbo bamu, nzrlxngitikr lr Israel

† ^{7:25} Ma kc drtwr ngrde nzmnckr doa mz nrlc. X rplz kc drtwr ngrde Jiszs x da kcng tqalvztr-ngrde. Trlipu lc drtwr ngrde kzdq mzli r nzkxpung x nzbzng mz nrlc ka. Nztu-amqngikr ma kc drtwr ngrde nzvz-zvzkr nzmnckr ncblo. Murde nzlungr kx mqngitr-zvzbz mz Kraes vz vzz, kxmule-esz' bz kalr. ☩ ^{7:29} Mak 1:22; Luk 4:32 ☩ ^{8:4} Livae 14:2-32

trmyaszpxleu nzrlxngitingr lc! ¹¹ X napi-kzpo bamu, mz nrlc tulvzo leplz kxkqlu kxtrngiulrJiu sa naprtrng mz nzmungr kxetu x namu-lxblrng badr melrmqgung Ebraam x Aesak x Jekop, mzli kc Gct na-aclve-ngrde nrlc kxmrna kalr mz nzngini-krde king.*

¹² A' nimu lr Jiu kcng tqrpiamu kx sa naprtramu Heven, sa nartctxtrngr Gct nimu mz nzlo ngr Hxl, murde trvz-nqqlqwamuu nqmq krde. X mz nzmnc-krmu mrlcde, sa nayrni-aloamu mz nzetqkr drtqmu x sa namadqtiamu nqngimu mz zngya, murde mnc-rlrupebzmu bade.”

¹³ Zbz Jiszs sc tqrpipebzle mz kxetu kc kx, “Vzpe ye ma nyzm. Mzli ka da kc tqlxngitiq, sa narmctiq.” X mzli lcpwz, doa kc sc tqmrlzpe.

Jiszs Amrlzle Kxnzyagoxng Nzkqlung

Mak 1:29-34; Luk 4:38-41

¹⁴ Jiszs badr ncblo nedeng nzvzng mz ma nyz Pita. Jiszs kx dwatrpzle kc brma, sc tqmcpele kzdo Pita kc tqngi olvz, sc tqmnz me mnz-ngrde murde drtqde pqpxm. ¹⁵ Zbz Jiszs vzbz malebzle mqde mz nzamrlz-krde nide, x zyagox kc yrkrtpx pnz. X tulzm sc tqoliqtipebzle dakxnzng nadr.

¹⁶ Mzli kc nepi tqtaope-ngrde, x Sabat kc tqyrkrpxpe-kzpz, lr Kzpznizm sc tzrykrmpemqng doa kxkqlu kx nzdwazng drka'. Zbz Jiszs sc tqmaszlrpxpe-ngrde drka' amrlx mz leplz lcng mz zmatq ngr natqde. X amrlzti-kzle leplz kx nzyagoxing amrlx. ¹⁷ X mz nzalekr Jiszs le, atutrl natq kc tqplzpx pnz profet Asaea mz nzycmnetr-krde mz Kxnzmcpx. Rpile kx, “Ncblo lc ayrkrpxpele nzmewe-krgung, x amrlzpele nzyagox-krgung.” *

Drtwr Naesz'ti Mz Nzrvz-nqqlqngr Jiszs

Luk 9:57-62

¹⁸ Mzli kc Jiszs tqmc-ngrde leplz kxkqlu nzyrlwr-ngalelvz-krdr nide, sc tqrpipebzle mz ncblo nedeng nzalilvcio-krdr badr mz nrlar dxbu kc. ¹⁹ A' mzli kc tzoliq-ngrdr nzalilvc-krdr, kzdq kxalvztr mz Lou sc Mosis vzm mz Jiszs, sc tqrpipebzle bade kx, “Kxakrlz, sa navz-nqqlqx nim drlve keng vzkiq.” ²⁰ A' rpibz Jiszs kx, “?Krlz-angidr-kzq da kx ycpxm mz nzrvz-nqqlqngr ninge? Murde fokis nzmnc-zpwxng mz ma nyzdr kx yclzm mz gq. X utc nzmnc-zpwx-kzng mz ma nyzdr kx ngi nrla r nounc. A' ninge Mrlx Leplz, trmnc-zpwxwxtu, murde lr mrnyzngeng nzpxtpx-ngrdr ninge. X sa nappxp-kz-ngrdr nim. ?Myx kxmule, navz-nqqlqpeq ye ninge?”

²¹ Zbz kzdq kz ncblo kx vz-nqqlq-kzle Jiszs, rpibzle bade kx, “Kxetu rnge, na-ale-kaipo nikeng pnz drtwr trtenge mzli ka, a' mz nibr nzbz-krde sc tqvz-nqqlq-atem nim.” ²² A' rpibz Jiszs bade kx, “Trtingr! Rlrpe-ngrbz ye mz krkcng mqngrdr nzbzpeng nzyrtzmq-krdr kxnginidr kx nabzng. A' nim, vz-nqqlq ningel!” †

Jiszs Aole Nrwx Mz Kzdq Nenq Kxetu

Mak 4:35-41; Luk 8:22-25

²³ Mz nibrde, sc tqprtze mz bot scdr kxetu, x ncblo nedeng nzprt-kzpzng x sc tzalilvcopeng. ²⁴ Zbz sc tzpwrkilvcpe-ngrdr kzdq nenq kxetu. X dxka kxetuting sc tqvzopebz mz nabz bot kc. A' mzli lc, Jiszs sc tqmwi.

* ^{8:11} 8:8 Mz Lou scdr lr Jiu nzdwatr-krdr mz ma nyz kx trngiulrJiu, batrpzle badr trnztakitr-krdr nu nzprtrnegr mz nzangiongr. ^{8:11} Mz drtwr lr Jiu, leplz kcng trngiulrJiu trpnzngre nzprtr-krdr Heven badr doa angidr neng Gct. * ^{8:17} Asaea 53:4 † ^{8:22} 8:20 Natq angidr kx pi Jiszs nidr seleng: “Trpnzngre nyznge ma kx na-ama-ngrne.” A' leplz kxnxkqlung nzrplir kx fokis drtwr ngrde King Herot kc trngi-angidru lr Jiu. X utc drtwr ngrde lr Rom kcng trngiulrJiu. X lr ma nyz Jiszs drtwr ngrde lr Jiu. Kxmule-esz' lr Jiu nzabrtzlvzlr kxnxetu kcng trngiulrJiu, a' nzpxtpx-ngrdr Jiszs kc tqngi angidr lr Jiu. ^{8:22} Nzrvz-nqqlqngr Jiszs namyapxpwz mz nzrvz-nqqlqngr nqmq ngr mrnyz.

²⁵ Zbz ncblo nedeng nzvzbzng bade x sc tzameopelr nide. Nzrpibzlr kx, “Kxetu, arlapx nigu! Nabzpeku!”

²⁶ A' rpibz Jiszs badr kx, “?Memule tqmwlxrtx-zlwz-ngrnamu? ?X memule nzlxngiti-krmu ninge tqtopwzbe-ngrde?” Zbz tulzm, sc tqclvzpele nenq x dxka. X mzli kcpwz nrwz otx pnz. ²⁷ X nidr amrlx ngrdr sc tzkctitxpypelr Jiszs, tzrpi-etrpelr kx, “Eke! ?Ncblo kznika? Nenq x dxka nzvz-nqblqlr natqde!”

*Jiszs Maszlrpx-ngrde Drka' Kxnzxplrng Mz Ncblo Nzling
Mak 5:1-20; Luk 8:26-39*

²⁸ Zbz Jiszs badr ncblo nedeng sc tzkrlzopebzlr nrlar dxbu kc, mz nrlarnrlc kc taon Gergesa, me nzmnc-ngrdr kxtrngiulrJiu. ‡ X ncblo nzling kx dwasz drka', nzmncng mz butqbr mrkc tzyrlqngr leplz kxbz. Mrlx lcng nxzplrx-zlwzng x nzatrkti-kzlr leplz. X leplz nzmwxlrng mz nzvzki-krbzlr mrkc tzmnc-ngrdr. Ncblo lcng sc tzvzpxpemqng mz butqbr nydzr mz nzrmcti-krdr Jiszs. ²⁹ X sc tzkabomipebzlr bade kx, “Vrr! Mrlx Gct! ?Nike tqotime? Bzkq ayrplapxq nrkrdrtqgr mzli ka, murde trkrlzkapzle Mzli Kxmatq kc na-ayrplapxngr.”

³⁰ X mnc-aepztrpz mrkc kzdq nrtrq r poi kxetu, sc tzmung. ³¹ Drka' kcng nzyrnitirpzlr bade kx, “Kx tqmaszlrpx-ngrn nigr, atwzlr-ngrbz nigr mz nrtrq r poi kc.” ³² Zbz sc tqrpipebz Jiszs mz drka' kcng kx, “Prpxamu!” X drka' kcng kx nzprpxlr, nzdwasz-pnzlr poi kcng. X nrtrq r poi kc, sc tzvopxpeng mz nqngitrlqli, nztaong mz nabz dxbu kc, x nzbzting amrlx ngrdr mz lue.

³³ Zbz ncblo kcng tzaclveng, nzngrlrng, sc tzpinepelr nrpa ngrde mz mztea, myapxbz kxmu nzmncpekr doa kcng nzling tzprspxpeler drka'.

³⁴ Mz nzmu-krde lcde, leplz kxnxkqlung ngr taon kcma sc tzyrkrepeng mz nzmc-krdr Jiszs. X kx nzkrlzbzlr nide, nzyrnitirpzlr bade kx navzpe.

9

*Jiszs Ipqpxle Alwx Ngr Kzdq Ncblo X Amrlzle Nrkrdrtqde
Mak 2:1-12; Luk 5:17-26*

¹ Zbz Jiszs prtz mz bot, nidr badr ncblo nedeng x sc tzalilvcope-moung mz taon Kzpznizm mrkc tzmnc-ngrdr. ² Kx nzkrlzbzlr kc Kzpznizm, kzdung ncblo nzvzmqng, nzglqmlr kc ncblo kx nrkrdrtqde bz. Nzglqtimlr kzdq nqni. Kx krlztrpz Jiszs nzbrtikr drtwrdr nide mz nzamrlz-krbzle kztedr, sc tqrpipebzle bade kx, “Mrlxnge, bzkq nabzm talvzope, murde alwx ngrmqng ipqpxpebo.”

³ Kx nxzlrbz kzdung lr Jiu kcng tzalvztrng mz Loukxtr nzycmne-krde lc, sc tzrpipele mz drtwrdr kx, “Rlr! Mrlx lc pivxile Gct. ?Mz drtwrde apule Gct?” ⁴ Jiszs krlztitrpebzle da kx ycpxm mz nabzdr. X sc tqrpipebzle badr kx, “Bzkq aoti drtwrmu da kxtrka kxmule lc. ⁵ Nzmu narpibo mz ncblo lc kx, ‘Ipqpxpebo alwx ngrm,’ rblx nzrmcngr. A' nzmu narpibo bade kx, ‘Tulz x vzpe,’ opx angidr nzrmcngr. *

⁶ Mz nzmu-krde lcde, na-amrlzbo nrkrdrtqde mz nzaelwapx-krnge kx ninge, Mrlx Leplz, rngisc-kznge zmatq ngr nzipqpxngr alwx mrka mz nrlc.”

◊ 8:26 Sam 65:7; 89:9; 107:29 ‡ 8:28 Mz kzdung nzryrngr kcng pnz taon lc nzrpibz Gadara o Gerasa. * 9:5 9:2-3 Mz nzrpi-krbzle mz ncblo kc kx ipqpxbzle alwx grdeng, Jiszs arsakrlrmile nide Gct. Murde Get txpwz kx krlzle nzipqpxngr alwx. Mz drtwr kxnxetl lcng Jiszs pivxile Gct x takitrde nzrnibqng nide. 9:5 Lr Jiu lcng nzlxngitl kx nzmrlz-moukr leplz mz zyagox aelwapx-kz-ngrde kx Gct ipqpxpebzle alwx grdeng. Mz nzmu-krde lcde, mz nzamrlz-moukr Jiszs ncblo lc, aelwapx-ngrde kx rngisc kz zmatq ngr nzipqpxngr alwx.

X sc tqrpipebzle mz ncblo kc nrkrdrtqde tqbz kx, "Mrlixnge, tulz, oti nqni pnrm x vzpe mrnyzm!" ⁷ X ncblo kc tulzm x sc tqvzpe mrnyzde. ⁸ Kx nzmc zbo ngr leplz da lc, nzamatqlr Gct. X nzglqpxlr nide x awi-ngrbzlr bade nznka-krbzle zmatq ngrde mz ncblo murde na-amrlzngr leplz x naipqpxngr alwx ngrdr.

Jiszs Kqlele Matiu

Mak 2:13-17; Luk 5:27-32

⁹ Jiszs rlaszle mrlc, x mz nzvz-krde mcle ninge, ncblo kx atakqti takes drtqnge Matiu. Sc tqwxbux mz ofis nyznge kc tzxpekitr takes, x rpim Jiszs bange kx, "Vz-nqblqm ninge." Zbz tutxlzmc, axtxbo da amrlx, x sc tqvz-nqblqpx nide.

¹⁰ Mz nibrde, Jiszs sc tzmupeng badr ncblo nedeng mz ma nyznge. X kztengeng kx nzatakqting takes x kzdu-moung leplz kx nqmq krdr trka mz nzobqkr leplz mu-lxblr-kzkr badr. ¹¹ Mzli kc tzmc-ngrm Farzsi da lc, drtwrdr trmrzlpeu. Murde mz drtwrdr trtakitrdeu ncblo kxmrlz nzngini-krde kzte ncblo kxnztrkang. X sc tzveapebzng mz ncblo nedeng kx, "?Nike kxakrlz ngrmu tzmu-lxblr-ngrdr badr leplz kxnzmull lcng?" †

¹² Xlrbz Jiszs natqdr x sc tqrpipebzle badr kx, "Leplz kx trnzyagoxung trnzsutiu drtwrdr dckta. A' kxnzyagoxng la tzsuti drtwrdr dckta. ¹³ Na-aoti drtwrmu drtwr ngr Nzryrngrkxtr kc tqrpile kx, 'Da kx mrlzm bange, doa nengeng nayc mz drtwrdr leplz mz nzokatr-krdr nidr namyaspxle nznka-krmlr bange blz.' ⋆ Murde trvz-ngrpwu' nznkqlengr leplz kx nznkqlengr nztubqng. A' vz-ngrmc nznkqlengr kxnzaleng alwx, murde naesablqtilr alwx ngrdrng."

Ncblo Neng Jiszs Trnzaxtxpwzlu Dakxnnzng

Mak 2:18-22; Luk 5:33-39

¹⁴ Mz nqmq krgr, nigr lr Jiu, nzaxtx-krgr dakxnnzng zbq li mz wiki kxesz' mz nzkrka'ngr. Zbz oblamzng Jon Kxawrkxtr nzvzmqng mz Jiszs x sc tzveapebzng bade kx, "Nigr badr Farzsi axtxbzkr dakxnnzng. ?A' nigr ncblo nemqng trnzaxtx-ngr-kzpzlu da?" ¹⁵ Jiszs rpibzle kx, "Apux ncblo kxnayrlz. Mz nzmu-krde lcpwz trtakitrdeu drtwr leplz nzvz-krdr mz mzli r nzabrtzngr mz nzyrlzngr, trtakitr-kzdeu ncblo nengeng nzaxtx-krdr dakxnnzng mzli ka. Murde nzabrtz-ngrdr ninge lc tqmncbepo badr. A' mz nibrde, mzli kc nakatpx-ngrmc badr, sc tqtakitr-atede nzaxtx-krdr dakxnnzng mz nzkrka'-krdr."

¹⁶ Jiszs rpi-mopwzle kx, "Nzycmne-ebzpxngr lcng li nzaelwpx-ngrdr nqmq krngi kxmRNA. Murde trpnzngr ncblo kx rkxsilvztr dzlvq lrpz kxmRNA mz nzakqlvztr-krde me bxnge mz lrpz kxblzlongr. Nzmu nawailele, dzlvq lrpz kc sc tqbxplipxpem mz lrpz kcma tqblzlongr. X sc tqbxplipx-zlwzpe myaszpxle mzli kc kai tqbxpli-ngrde. ¹⁷ X trpnz-kzngr ncblo kx narbzltr dakxnnzng kxmRNA mz ncblei kx nzrbzltrpewr dakxnnzng. Murde ncblei kxmule lcde ngcplxtxtr kai mz nzmrnabekr dakxnnzng, x da lcng li sc tzatrkatipeng. A' dakxnnzng kxmRNA nabzltrpewr mz ncblei kxmRNA murde namrlzpwzng rlilrdr." ‡

† **9:11** 9:9 Livae ngi kzdq kz drtq Matiu, x nide kc tqyrlr Nrpakxmrlz lc. 9:11 Mz nzmu-lxblrkr Jiszs badr ncblo lcng tztrkang, drtwrdr tresz'tiu badr mz alwx ngrdr lcng, a' rpile na-aelwapx-ngrbzle nivz lr Gct badr. ⋆ **9:13** Hosia 6:6; Matiu 12:7 † **9:17** Nqmq kcng tqmrna tqprmitrp Jiszs bletpxp-zlwzng mz nqmq kcng pnz. X rblxbz mz kxszetru lr Jiu drtwrdr nzesz'ti-krdr badr, murde rblxbz mz leplz kcng tzabrtzlvzpelr nqmq kcng pnz nztekqtr-krdr nqmq krdr, mz nztwz-krdr nqmq kxmRNA.

Inyx Kzdq Kxetu R Mangr-nzkrka'ngr X Olvz Kc Tqmaletrpzle Lrpz Sc Jiszs

Mak 5:21-43; Luk 8:40-56

¹⁸ Mzli kc Jiszs tqycmnebe-ngrde, kzdq kxetu r mangr-nzkrka'ngr nyzdr vzbz x rweobz zpr bade. Rpibzle kx, "Inyxnge mwx bzpe mzli ka. A' vzm, maletrpz nrkrdrdqde, x sa nalu mou."

¹⁹ Zbz Jiszs tulzm x sc tzvzpeng ncdr x nigr ncblo nedeng kz.

²⁰ Mzli lc kzdq olvz kx tresakuu nzrpwx-karde temz vzm mz nibr Jiszs. Nzrpwx-alu-karde lc temz, twztiptelete yiz nzpnu-esz'-nrade-li (12). Sc tqmaletrpebzle lrpzde. ²¹ Murde rpi drtwrde kx, "Nzmu namaletxtrpwo ye lrpzde, nrkrdrqnge sc tqamrlzpe." ²² Zbz Jiszs lxlvrkimle mq, sc tqmcpele olvz kc. X rpibzle bade kx, "Inyxnge, bzkq nabzm talvzope, murde nzlxngiti-krm ninge sc tqamrlzpele nim." X mzli lcpwz olvz lc sc tqamrlzpe.

²³ Mz nibr nzamrlzkr Jiszs olvz kc, sc tqvzpe mou. X kx krlzbzkr ma nyz kxetu kc, sc tqmcpele kxnzxutrng ncblei x zbo ngr leplz kcng tzyrnikatong mz mzli r nzbngr. ²⁴ Zbz sc tqrpipebzle badr kx, "Yrkpxamu yz! Doa lc trbzu, a' mwine ye!" A' nzyrpalelvzlr nide. ²⁵ Mz nibr nzvzpxkr leplz amrlx kcng yz, sc tqvztrpe brma. Rtrngztiobzle mq doa olvz kc x sc tqtulzjem. ²⁶ X nrpa ngr nzamrlz-karde doa olvz kc vz x talvzpxle nrlarnrlc kc.

Jiszs Amrlzle Ncblo Kxmztr Mwi Nzling X Ncblo Kxnabu

²⁷ Jiszs rkalzm mz ma kc, x mzli kc tqvz-ngrde nzrvz-nqblqbzng kcng ncblo kx mztr mwi nzling. Sc tkqlepelr nide, nzrpibzlr kx, "Mrhx Devet! Nayc mz drtwrm nigr!" ²⁸ Zbz Jiszs kc tqvztrpe mz kzdq ma, ncblo kcng nzling sc tzvztrpe-kzpzng bade. X rveabz badr kx, "?Lxngitiamu kx krlzx nzamrlz-ngrbz nimu?" X nzrpibzlr bade kx, "Eu, Kxetu!" ²⁹ Zbz Jiszs bxtrpzle mztr x rpibzle kx, "Amrlzx nimu murde drtwrmu br kx rngiscnge zmatq ngr nzalengr da lc tqrlxtiamu." ³⁰ X mzli lcpwz mztr kc tqobqpypxpe. A' xplrmibz natq Jiszs mz nzrpi-krbzle badr kx, "Bzkq pinebzmua da lc mz leplz!" ³¹ Kxmule-esz', a' nzvzng x sc tzyapwxtinepelr nrpa mz nrlc amrlx mz nrlarnrlc kc.

³² Mz nibr nzvzpekr ncblo kc nzling, kzdung leplz nzvzmimlr kc mz Jiszs ncblo kx batrpz drka' nznabu-karde. ³³ X mzli kcpwz tqmaszlrpxpe-ngrbz Jiszs drka' kc, ncblo kc sc tqycmnepe. X zbo ngr leplz kcng nzkctitpxlrd da lc x nzrpilr kx, "Rlr! Trgalr da kx mcku kxmule ka mrka Israel!" ³⁴ A' kzdung Farzsi nzrpilr kx, "Setzn ela, kxetu r drka', nide kc tqrkabz zmatq mz Jiszs mz nzmaszlrpx-krdeleng."

Kxnzwztrpzng Mz Gct Nzpipzbeng

³⁵ Zbz Jiszs sc tqvztiptelete mztea amrlx mrlcdeng, tqalvztrpe mz mangr-nzkrka'ngr nyzdrng, x tqyapwxtipxle Nrpakxmrlz kx Gct sa tqvectrpreml leplz mz nzmnclz-krbzlr bade mz nzngini-karde King rdr. Mzli lc Jiszs amrlz-kzle kxnzyagoxng x kxnzdwatibzng zyagox kxtrka. ³⁶ Mzli lc tqmcpengr Jiszs zbo ngr leplz kcng, sc tqyctx-zlwzpengl drtwrde nidr. Murde nabzdr talvzo x rblx nzokatr-lzbq-krdr mz nzrmcti-krdr Gct, a' nzapulr sip kcng trtxpnzngr kxaclvele nidr. ³⁷ Rpimle bagr, nigr ncblo nedeng kx, "Kxmule-esz' leplz kxkqlu nzoliqng mz nzlxngiti-krdr Nrpakxmrlz murde nanginidr doa neng Gct, a' mzli ka kxnzwzng nzpipzbeng kx nzaelwapxngrbzlr lrpzki angidr mz leplz. ³⁸ Mz nzmu-krde lcde, krka'-ngrbzmu mz Trte kc tqoliqtile nabz leplz kcng tzbrti drtwrdr ninge. Rlxtibzmu bade

nzatzwzlr-krmle kzdung mou kxnxawzng kx naokatrng mz nzvzmi-krmlr leplz bange.” [✳]

10

Jiszs Mcpxle Aposol Nzpu-esz'-nrade-li X Atwzlrpx-ngrde Nidr Mz Nzlep-kldr Nrpakxmrlz

Mak 3:13-19; 6:7-13; Luk 6:12-16; 9:1-6

¹ Zbz Jiszs sc tqkglepele nigr aposol kcng nzpu-esz'-nrade-li (12). Mz nzmnclz-krbzkr bade, sc tqrkapem bagr zmatq kx narmaslrpx-ngrgr drka' x na-amrlz-ngrgr kxnzyagoxng x kxnzdwatibzng zyagox kxtrka.

² Drtqgr nigr aposol kcng nzpu-esz'-nrade-li (12) nidr seleng: kx ayrrnrngr

Saemon, kc kzdq drtqde Pita, x mzlede

Adru,

Jemes mrlx Sebedi, nidr mz mzlede

Jon,

³ *Filip, x*

Batolomiu (mrlx Tolmai, kc kzdq drtqde Natzniel),

Tomas x ninge

Matiu kc tqatakqt ena takes, (kzdq kz drtqnge Liva), x

Jemes kc tqngi mrlx Alfisz, x

Tadizs (kc tzrpi-kzpz Judzs), x

⁴ *Saemon kc tqprtr ena mz dzbede kc tzrpilr namaslrtxpx-ngrdr gzpman ngr Rom mz nzmnnc-krdr Israel, x*

Judzs Iskariot, kc tqamwabzle Jiszs mz enqmi rdeng.

⁵ Jiszs atwzlrpx-ngrde nigr aposol mz nzryapwxpx-krgr Nrpakxmrlz. Rpimle bagr kx, “Bzkq vznamu mz mztea nyx kxtrngiulrJiu x mztea nyx lr Szmariz. ⁶ A' vzbzmu mz leplz negung mrka Israel murde trnzvz-nqblqlru nqmq kr Gct mz nzapu-krdr sip kcng tzmrbrneng. ^{✳ 7} Drlve keng vzkiamu, yapwxtpxamu Nrpakxmrlz lc mz nzrpi-krbzmu kx, ‘Gct sa tqvectrpemle leplz bade. X mzli ka mzli r nzmnclz-krbzmu bade mz nzngini-krde King rmu.’ ⁸ X amrlzamu kxnzyagoxng x kxnzyc-ngrng lepz, x maslrxpx-ngrnamu drka', x alu-mouamu kxnbzng. A' mz nzokatr-krmu nidr, bzkq rlxamu da, murde mz nzokatr-krnge nimu, da amrlx ka-nrbalqbo bamu. ⁹ X bzkq rtwzamu trau mz nzvz-krmu. ¹⁰ X bzkq rtwz-kzamu bxli, nzkq krali, sadol krali, x nctoko. Murde leplz kcng naokatramu takitrde nzkarbzlr da lcng bamu.

¹¹ “Mztea kznike nzabrtzlvzlr nzmnnc-krmu badr, ma kznike nzrlr-ngrbz namnc-ngrnamu, mncamu ma lcde esz', nakrlzbzle mzli kx rlasz-ngrnamu mztea lcde. ¹² Mzli kc tqdwartr-ngrnamu mz kzdq ma, rpibzmu mz lr ma lcde kx, ‘Krka'-ngrne kx Gct na-amnc-zpxle nimu!’ ¹³ Nzmu leplz lcng kx tzabrtzlvzlr nimu, Gct sa na-angidatbzle nzkrka'-krmu. A' nzmu leplz lcng kx tzpxtxpx-ngrdr nimu, trpnzngr nzangidatingr natqmu, a' sa nayzlu-mop bamu. ¹⁴ X nzmu kzdung lr ma o lr mztea kznike nzpxtxpx-ngrdr nimu x trnzalztqpzung bamu, mzli kc tqrlaszpe-ngrnamu nidr rtc-ngrbzmu rplz, nakrlz-ngrdrle kx nqmq krdr trka mz nzapu-krdr kxnxzmnc-mrbrng. ¹⁵ A' napi-angidrbo bamu kx mzli kc na-ayzlu-ngrbz Gct da mz leplz kalk, nzayrplapx-krde nidr sa namyaszpxle lr Sodom x lr Gomora, kxdrka'-ngrng kcng bqnc.” [✳]

*Leplz Sa Na-atrkatilr Leplz Neng Jiszs
Mak 13:9-13; Luk 21:12-17*

¹⁶ Rpi-mop Jiszs bagr kx, "X nakrlz-angidramu kx na-atwzlrpx-ngrne nimu mz nzryapwx-krbzmu mz leplz kxdrka'-ngrng, mz nzapu-krmu sip mz mzlir kuli kzpeto. Mz nzmu-krde lcde, aclvetioamu nidr x bzkq vz-rbramu. ¹⁷ Aclvetio-angidramu, murde leplz sa nalolvzlr nimu x navzmilr nimu mz kot. X naiklapxmlr nimu mz nabz mangr-nzkrka'ngr. ¹⁸ X navzmibzlr nimu mz kxnzetu ngr mrkzbrelleng x mz king mz nzayrplapx-krdr nimu, murde vz-nqblqamu ninge. X mzli nyzmu lcpe kz mz nzyapwxtipx-krbzmu Nrpakxmrlz mz kxnzetu lcng x kxtrngiulrJiu kxnzkqlung. ¹⁹ Mzli kc nalolvz-ngrmu, bzkq da kx nakxne drtqmu mz nrpa kx napiamu x kxnamu nzycmne-krmu. Murde mzli lcde Gct sa nakabzle bamu nrpa kc napiamu. ²⁰ X natq lcng trnavzpxpwqung bamu, a' nabatrpz Mqngrkxtr mz nzvz-nqblq-krde me pnz drtwr Gct Trtemu.

²¹ "Mzli lcde, leplz sa nakabzlr mzledrung kcng tzvz-nqblqlr ninge mz enqmi rdrng mz nznibq-krdrlleng. X trte doa kz sa nawaisr-ngrde kz doa nedeng mz nzrnibqng nigrde. X doa na-atrkatik-zzlr trtedr x lxedr x naka-kzpzlr mz enqmi rdrng mz nznibq-krdrlleng. ²² Leplz kxnzkqlung sa napxtpx-ngrdr nimu, murde nimu leplz nengeng. A' nzmu natu-amqngi-zvzamu mz nzrlxngiti-krmu krlbzle nzbz-krmu, sa na-arlapx Gct nimu. ²³ Mzli kc tzatrkti-ngrmu mz kzdq mztea, vzki-alzuamu dq mztea kzble. X nakrlz-angidramu kx trpnzng nayrkrpx-krmu nzyapwxtipx-krbzmu Nrpakxmrlz mz lr mztea amrlx mrka Israel, x ninge Mrlx Leplz sc tqyzlupemc. *

²⁴ "Trpnzng oblamz kx myaszlzle kxakrlz ngrde, x kxnzawz trmyaszlzeu kxetu rde. ²⁵ A' nimu oblamzngeng x kxnzawz nengeng na-abrtzlvzamu nzapu-krmu ninge, kxetu rmu. A' kx tzrpilr ninge kc tqngi Trtemu Beelsebol kc tqngi Kxetu r Drka', sa nakqle-ngrbzlr nimu drtq kx nztrka-zlwzng mz nzngini-krmu lr ma nyngeng."

*Bzkq Mwxlrtiamu Leplz A' Mwxlrti-txpwzmu Gct
Luk 12:2-9*

²⁶ Rpi-mop Jiszs kx, "Kxmule-esz' leplz na-atrkatilr nimu murde vz-nqblqamu ninge, a' bzkq mwxlrtiamu nzryapwx-krbz badr. A' ayrbq-zpx-ngrbz da kx nzyrlq-kapqting. X pipxbz da kx nzxpqbzrlvzlr me naxlrlxblr-ngrdrle. ²⁷ Mz nqmq lcpwz, nke pibo bamu esz'-krmu, aopxbzmu mz leplz me nzyrlwrpx-lxblrngr. ²⁸ Bzkq mwxlrtiamu nzrnibqkr leplz. Murde krla tznibq-txpwzlr nrkrdrqmu. A' namwxlrti-txpwzmu Kxetu kc tqodatile nrkrdrq x mqngr leplz kxnxtrkang mz Hxl. ²⁹⁻³¹ Kxmule-esz' nzamwangr boblz kxli trau rde pipzne, a' trpnzng boblz kx nabz, a' ngi txpwz kx rlrpxngr Gct nzbz-krde. A' nimu myaszlzamu boblz kxkqlu! Murde nqnginarmu amrlx, rlwxti kz Trtemu kc tqacalvele nimu. Mz nzmu-krde lcde, bzkq mwxlrtiamu leplz.

³² "Murde doa kx abrtzlvzle ninge mz mz leplz mz nrlc ka, sa na-abrtzlvz-kzx nide mz mz Trtenge mrkc Heven. ³³ A' doa kx pxtpx-ngrde ninge mz mz leplz mz nrlc ka, sa napxtpx-kz-ngrne nide mz mz Trtenge."

*Leplz Sa Na-aki-lzbqng Mz Nzrlxngitingr Jiszs
Luk 12:51-53; 14:26-27*

* ^{10:23} Mwx Jiszs ycmntr-ngrde nzvz-krmle krali, mzli kc na-aclive-ngrde nrlc kxmrna mz nzngini-krde King. ²⁴ Luk 6:40; Jon 13:16; 15:20

³⁴ Rpi-mop Jiszs bagr kx, “Bzkq rpiamu kx vz-ngrmc nzrtwz-krmc nrwx mz leplz mz nrlc ka. A' vz-ngrmc murde kxnzrlxngiting x kxtrnzrlxngitiung drtwrdr trnaesz'tiu. ³⁵⁻³⁶ Mz nzmu-krde lcde, enqmi r doa sa navzpxm mz ma nyze. Kxmule-esz' trte, o lxe, o mrlx, o inyx, o mzle-lzbq, o ile-lzbq, o kzdo-lzbq, o lvxbq-lzbq, a' doa lcng amrlx sa na-aki-lzbqng mz nzrlxngiting ninge. ³⁷

³⁷ “Doa kx takitrde nzvz-nqblq-krde ninge, namrlzti nivz lrde ninge namyaszpxle kxnginideng, kx apule trtede, lxede, mrlxde o inyxde. X bzkq rlr-ngrbzle nzrpwa'-krbzlr bade nzvz-nqblq-angidr-krde ninge. ³⁸ Murde doa kx takitrde nzvz-nqblq-krde ninge, naglqlzle kros ngrde mz nzrlr-lzbq-krmle bange, navz zvz kxmule-esz' bztrp bange. ³⁹ Murde doa kx otr-zvzngr drtwrde nzlu-krde mz nrlc ka, sa namale-lvile nzlungr kxboi. A' doa kx yrlqtxole nzlu-krde murde vz-nqblqle ninge, sa naprtr mz nzlungr kxboi.” ⁴⁰

Mrlx Kx Abtzlvzle Doa Neng Gct Sa Natwzle Da Kxmrlz

Mak 9:41

⁴⁰ Rpi-mop Jiszs bagr kx, “Mrlx kx abtzlvzle nimu mz nzngini-krmu doa nengeng, lxngiti-kzle ninge. X krkc tqlxngitile ninge, lxngiti-kzle Trtenge kc tqatwzlr-ngrmle ninge. ⁴¹ Mrlx kx abtzlvzle doa kx ngi menrpa ne Trtenge murde plzpxle natq Trte, Trtenge sa nakabzle bade da kxmrlz kcpwz tqtwz menrpa lcde. X mrlx kx abtzlvz-kzle doa kxtubq murde nztabq-krde, Trtenge sa nakabzle bade da kxmrlz kcpwz tqtwz doa lc tqtabq. ⁴² Mrlx kx rkabz lue kxbao kx namnq doa txne kx vz-nqblqle ninge, Trtenge sa naka-angidrbzle bade da kxmrlz mz nzabtzlvz-krde nide.”

11

Jiszs Ycmnetr-ngrde Jon Kxawrkxtr

Luk 7:18-35

¹ Mz nibr Jiszs nzalvztr-krde nigr aposol kcng nzpnu-esz'-nrade-li (12) mz da kx napibzkr mz leplz, nigr kc tqvzpekr. Zbz Jiszs rkalz-kzp mrlcde, x sc tqvzpe mz nzalvztr-krde x nzryapwpx-krde mz kzdung kz mztea ngr Gzlili Provinc.

² Mzli lc Jon Kxawrkxtr sc tqmnc mz presin. Kx xlrle da kcng tqale Kraes, sc tqatwzlrpe-ngrbzle kcng oblamzdeng bade. ³ Sc tzveapebzng bade kx, “?Nim Kxnmcpkx kc tzpi kx navzm, o na-aenzli-moukr dq ncblo kzble?”

⁴ Ayzlu-ngrbz Jiszs natqdr kx, “Yzluamu x pibzmu mz Jon da kcng tqxramu x tqmcamu mrka mz nzatutr-krnge natq Profet Asaea mz nzycmnetr-krde Kxnmcpkx. ⁵ Rpile kx, ‘Kxmztr kcba nzobqpeng, kxnzbxp-long nzvznepeng, kxnzyc-ngrng zkrkqlu nzlqngipe-moung, kxnradrtqdr ngq nzxlpeng da, kxnzbzpeng nztulz-moung, x Nrpakxmrlz nzyapwxtipxbz mz leplz kxnzbqszong.’ ⁶ Sa namrlzbz mz ncblo kx trpxpx-ngrdeu ninge mz trnzale-krngeu nike pnz drtwr leplz kx nangi nzwzkr Kxnmcpkx.”

⁷ Mzli kc tzvzpe-ngrdr menrpa neng Jon, Jiszs kc tqpipebzle mz leplz kcng nzmyalzkr Jon. Rpibzle kx, “Trvz-ngrpwzmuu mz Jon mrkc lzke mz nzmc-krmu ncblo kx tekqtr-zvzle da kx pile, mz nzapu-krde nen i kx yamengr nenq mrkang kqlu. A' kc tqvz-ngrbzmu naxlramu natq angidr. ⁸ X trvz-ngrpwzmuu nzmc-krmu ncblo kxrngisc, kx pxi-ngrde lrpz kx nzxpengr lqlwx. Murde ncblo kxmule lc trnzmcu mrkc lzke, a' nzmcpwz mz ma nyze king. ⁹ Krlc tqvz-ngrbzmu murde namcamu kzdq profet. A' napibo bamu

³⁵⁻³⁶ Maekz 7:6 ³⁷ Matiu 10:39; 16:25; Mak 8:35; Luk 9:24; 17:33; Jon 12:25 ³⁸ 10:40
Mak 9:37; Luk 10:16; Jon 12:44; 13:20 ³⁹ 11:5 Asaea 29:18-19; 35:5-6; 61:1

ncblo lc tqmcamu myaszlzle profet kcng bqnc. Murde nzwz-krde myaszlzle nzwzkr profet amrlx. ¹⁰ Murde Jon nide menrpa kc tqplzpxle nzvz-krm Kxnzmcpx. Da kc tqwai nzpipxkr Gct le mz Nzryrngrkxtr kx, 'Krlc menrpa nenge. Sa na-atwzlr-ngrne nartwayz-kaipz bam, murde naokatrle leplz nengeng mz nzoliqti-krdr nzvz-krbzme.' " [☆]

¹¹ Rpi-mopwz Jiszs kx, "Napibo bamu, trpnzngr ncblo mz nrlc, kx myaszlzle Jon Kxawrkxtr, abzo mzli kc krlzmle mzli ka. A' abzo mzli ka, leplz txne amrlx kx nzrlr-lzbq-ngrmqng bange mz nzmnclz-krbz mz Kxetu namyaszlzlr nide. *

¹² Murde abzo mzli kc Jon tqryapwxpx-ngrde nrpa ngr nzrtekqtrngr drtwr krlzmle mzli ka, Gct sa tqvectrpremle leplz bade mz lrpzki kxmrna, mz zmatq kx xplr-esz'ngr. X leplz kcng drtwrdr tqpqtr mz nzngini-krde King rdr, nztwz-anilr x nzolvz-amqngilr lrpzki rde mz nzarlapx-krde nidr. [☆]

¹³ A' mzli kc pnz nzryrkr profet x Mosis amrlx nzyapwximl bagu kx Gct mrlz x sa na-atwzlr-ngrmle Kxnzmcpx bagu. A' mzli ka Jon Kxawrkxtr pipxle kx vzpem. ¹⁴ X nzmu nalxngitiq natq profet lcng, nalxngiti-kzq kx Jon nide profet kc tqapule Elaeja, tqrpi Nzryrngrkxtr kx navz-kaip x Kxnzmcpx kc ate. X nalxngiti-kzq da kx ycmnetr-ngrde mz Kxnzmcpx. [☆]

¹⁵ Doa kx yrplapx, na-abzle nztwz-krde drtwr ngr natq lc."

¹⁶ Zbz Jiszs rpi-mopwzle kx, "Naryapwxtr-mopwc' mz nimu leplz kcng tzmnncng mzli ka. Apuamu doa kxnztopwz kcng drtwrdr tresapxu. Kzdq dzbede tzrkrkxbzng mz kzdq kz dzbede. Tzrpibzlr kx, ¹⁷ 'Ngr-ngrbzkr nabz ngr nzabrtzngr, a' trelawamu. Ngr-ngrbzkr nabz ngr nzyrningr, a' tryrniwamuu!' ¹⁸ Apuamu nidr murde Jon Kxawrkxtr vzm x trmuneu bret x tr-rmnqne-kzu waen. A' nzrpi leplz kx, 'Drka' mncpxm bade!' ¹⁹ X ninge Mrly Leplz vzmc, x mux dakxnzng x rmnq-kzx waen. A' nzrpilr kx, 'Mcamu ena mrlx ka! Mrly kx mutu x rmnq kato! Kzte ncblo kxnzataktqting takes x leplz kx nztrka-kzng!' A' nadcpx mz drtwrmu kx nztubqkr natq opx zlwz mz nztubqkr doa kx atutr. X sa namcamu kalr nztubq-krgr rlilrgr mz da kc navzpxmqng mz nzmncr leplz kcng tzatutrlr natqgr."

Kxnzpxtxpx-ngrdr Jiszs X Kxnzabrtzlvzlr Nide

Luk 10:13-15, 21-22

²⁰ A' leplz ngr taon kcng tqalengr Jiszs da kxnzmatqng kxkqlu trnztekqtrlu nqmq nr drtwrdr mz alwx ngrdrng. Mz nzmu-krde lcde, ycmne-plztitrle nidr kx Gct sa na-ayrplapxle nidr. ²¹ Rpibz Jiszs kx, "Agrmplz nimu lr Korasin. X agrmplz kz nimu lr Betsaeda! Murde Gct sa na-ayrplapxle nimu. Trtekqtrwamu nqmq nr drtwrmu, kxmule-esz' mcamu da kcng tqmatq tzalepxm mz taon nyzmu. A' lr Taea x lr Saedon kxnzmnc-mrbrng kxdrka'-ngrng nzmyaszpxlr nimu. Murde nzmu rkx lcng na-alepx-pnzmlr mz taon nyzdrng, lr mztea lcdeng nzmu nzpxi-pnzng dzlvq lrpz x nzrlung bq, ngi dalr nztekqtr-krdr nqmq nr drtwrdr. [☆] ²² X napi-angidrbo bamu kx mz Mzli Kxmatq kc navzm, nzayrplapxkr Gct nimu namyaszpxle nzayrplapx-krde lr Taea x Saedon. ²³ X agrmplz nimu lr Kzpznizm murde pxttxpx-ngrnamu ninge. Kxmule-esz' glqlz-lzbqamu wq murde rpiamu nataktrmu Heven, a' Gct sa na-adwatrle nimu mz Hxl! Lr

* ^{11:10} Malakai 3:1 * ^{11:11} Leplz amrlx kcng tzlxngitir Jiszs mz nibr nztulz-krmle mz nzbzng nzunginidr lrmakxtr. X lrmakxtr lcng ngi olvz r Kraes x Mqngrkxtr mncpxm badr. Mz nzmu-krde lcde, krkeng tzprtrng mz dzbede lc tqngi leplz kxnzlxngitir Jiszs, nzmyaszlzl leplz kxnzlxngiti-pnzlr Gct, kx nzapulr Ebraam, Mosis, Devet x Jon Kxawrkxtr. [☆] ^{11:12} Luk 16:16 [☆] ^{11:14} Malakai 4:5; Matiu 17:10-13; Mak 9:11-13 [☆] ^{11:21} Asaea 23:1-18; Esikel 26:1—28:6; Joel 3:4-8; Emos 1:9-10; Sekaraea 9:2-4

Sodom kxdrka'-ngrng nzmyaszpxlr nimu. ☀ Murde nzmu rkx lcng na-alepx-pnzmlr mz taon nyzdr, e lr taon lcde natekqtrlr nqmq nr drtwrdr x taon lc naycbe mzbq ka. ²⁴ X napi-angidrbo bamu kx mz Mzli Kxmatq kc navzm, nzayrplapxkr Gct nimu namyaszpxle lr Sodom.” ☀

²⁵ Mzli lc tqkrka'ngr Jisz, rpile kx, “Trte, Kxetu r lr Heven x lr nrcl! Awibo bam murde aelwapx-ngrbzme mz doa kcng tzavzo-lzbqng da kcng tqyrlq-kapqbzme mz ncblo kcng tzsiklung x tzrpilr kx nzayrplapxng. ²⁶ Trte, da lc vz-nqblqle me pnz drtwrm. Eu.”

Nzkxpu-zlwzkr Lepz

²⁷ Jisz rpi-mopwzle kx, “Nzrkrlzngr x zmatq amrlx kapem Trteng bange. Trpnzngr leplz kx rkrlzti angidr ning, a' ngi txpwz Trteng. X trpnz-kzngr leplz kx rkrlzti angidr Trteng, a' nitxpwo, x leplz kcng tqmcpxx mz nzaelwapx-krbo nide badr. ☀ ²⁸ Mz nzmu-krde lc, nimu amrlx navzma mu bange. Murde nzkxpu-krmung nzmrlepu-zlwzbzng bamu, x rblxbz bamu nzvz-nqblq-krmu natq amrlx kcng tzkapxbz kxnzetu rmung bamu. X sutitx zlwz drtwrnge naokatrpo nimu mz nzmnc-zpx-krmu. ☀ ²⁹ Mnclzm bange x rlr-ngrm nzalvztr-krnge nim, murde nawztr-lxblrki. X avzo-lzbqx murde nabzmu nayc-zpxng. ☀ ³⁰ Mzli lc nzalvztr-krngeng x natqngeng kcng nakabo bamu, trnarblxpwzung bamu murde trnzapulru natq kxnzetu rmung.”

12

Jisz Nide Kxetu R Sabat

Mak 2:23-28; Luk 6:1-5

¹ Mz kzdq zbz ngr nzangiongr, zbz lc nzrpibz Sabat, Jisz x nigr ncblo nedeng o-zlikr lrpzki kx vztr mz kzdung lclr wit. Zbz sc tqcpqpxpekr nra wit x sc tqngqtipex, murde nelzgr brtale. (Lou sc Mosis rlrpx-ngrde nzcpqpxngr wit nyz ncblo kzbleng, a' bzkq nzlakilm noude.) ☀ ² Nzmcpz kzdung Farzsi, sc tzrpipebzlr mz Jisz kx, “Mc ena da kc tzale ncblo nemqng! ?Nike tzxpqbzlr-ngrdr Lou sc Mosis mz nwz-krdr mz Sabat?”

³ A' mz nzaelwapxkr Jisz kx takitrde nzokatrngr ncblo mz Sabat, sc tqayzlupe-ngrbzle natqdr, mz nzsri-krbzle kx, “Krlz-angidr-kzamu da kc tqale melrmqmu King Devet kc tqamatqamu mzli kc tzbrtale-ngrdr badr ncblo nedeng! ☀ ⁴ Nzvztrng mz ma nyz Gct badr kztedeng, x nzngqdr bret kxtr kc tzngqpwzlr pris.” ☀ *

⁵ Rpi-mopwz Jisz kx, “X na-aoti kz drtwrmu pris neng Gct kcng tzxpqbzlr-ngrdr Lou sc Mosis mz Sabat kang kqlu mz nwz-krdr mz zbz lc. A' mz nzobqkr Gct, trnzvz-rbrung mz nzale-krdr nwz-krdr kc tqkabzle badr. Mz nzmu-krde lcde, nzrkriz-krmu mz Lou ngr Sabat vz-rbr. ☀

⁶ A' nakrlz-angidramu kx myaszpxx Mangr-nzangiongr x Lou ngrdeng.

⁷⁻⁸ Murde ninge Mrlx Leplz, kc tqnginige Kxetu r Sabat. X tqrngiscnge zmatq mz nzpnzkr drtwrnge da kx takitrde nzalengr mz Sabat. Otxpx angidr kx trkriz-angidrwamuu drtwr ngr natq Gct mz nzsri-krde kx, ‘Da kx mrlzm bange, doa nengeng nayc mz drtwrdr leplz mz nzokatr-krdr nidr

✉ ^{11:23} Asaea 14:13-15; Nou 19:24-28 ✉ ^{11:24} Matiu 10:15; Luk 10:12 ✉ ^{11:27} Jon 1:18; 3:35; 10:15 ✉ ^{11:28} Sam 95:7-11; Hibru 3:7—4:13 ✉ ^{11:29} Jeremaea 6:16 ✉ ^{12:1} Lou Kcpwz 23:25

✉ ^{12:3} 1 Samwel 21:1-6 ✉ ^{12:4} Livae 24:9 ✉ ^{12:4} Mz nzobqkr Gct, trpnzngr da kx avz-rbr Devet. Murde Lou sc Gct rlr-ngrmle bagu nzokatrngr leplz. ✉ ^{12:5} Nzkqlu-krdr 28:9-10

namyaszpxle nzrka-krmrlr bange blz.’ ☀ Murde nzmu nakrlz-angidramu drtwr ngr Natq Gct lc, e tr-rpiwamuu kx ncblo nengeng nzvz-rbrng.”

Jiszs Amrlzle Kzdq Ncblo Mz Sabat

Mak 3:1-6; Luk 6:6-11

⁹ Jiszs rlaszle mrlcde, x sc tqvztrpe mz mangr-nzkrka'ngr nyzdr Farzsi lcng. ¹⁰ X rmctile kzdq ncblo kx mqde bz. Kzdung nidr nzrtangrtrpzng da kx vz-rbrti Jiszs. Zbz sc tzveapebzng bade, nzrpibzlr kx, “?Mz drtfrm, tubq nzamrlz-moungr doa kxnzyagoxng mz Sabat o trtingr?” ¹¹ Zbz Jiszs ayzlu-ngrbzle natqdr kx, “Nzmu kzdq nimu nede kc sip kx tatxo mz gq kx vzo la mz Sabat, e navectxlz-pnzmle mzli lapwz, kxmule-esz' xpqbrrngrde lou ngr Sabat! ¹² Leplz nzmyaszpxlr sip! Delc Lou scgu rlr-ngrmle bagu nzokatr-krgu leplz mz Sabat!” ¹³ Zbz sc tqrpipebzle mz ncblo kc kx, “Atwztqpx mqm.” X atwztqtxpxle mqde, x mrlztx pnz mzli kcpwz, da kc tqwai mqde kc tqmrlz. ¹⁴ A' Farzsi kcng nzrlasztxdr mangr-nzkrka'ngr, x sc tzycmne-etrpe-ngrdr kxnamu nznibq-krdr Jiszs.

Jiszs Nide Kxnzawz Ne Gct Kxmyapxbz

¹⁵ Jiszs krlzle drtwr kc tzylqlr Farzsi, x sc tqrlaszpele mrkc. Leplz kxnzkqlung nzvz-nqblqlr nide x amrlzle amrlx ngrdr kcng tzyagoxng.

¹⁶ A' tr-rlr-ngrp wzleu badr nzpine-krdr nide. ¹⁷ Alele da lcng murde na-angidatingr natq profet Asaea mz nzhri-krde kx,

¹⁸ “Gct rpile kx, ‘Krlc kxnzawz nenge kx mcpxx. X nzmlzti-krnge nide myapx-esz'ngr x abrtzlvz-zlwzx nide. Sa na-avzobo Mqngrkxtr bade murde narnisc zmatq ngr nzvz-nqblq-krde me pnz drtwnge. X sa nayapwxtipxbzle mz leplz amrlx nztubqkr nzmnc-krdr mz nzobq-krnge.

¹⁹ Trtxpnzng kalr nzrnqniti-lzbq-krdr badr leplz x nzycmne-kato-krbzle badr. X nate trnaetuneu mz lrpzki mz nzbatr-krbzle mz leplz nzvz-nqblq-krdr nide. ²⁰ A' Kxnzmcpx lc sa natubz mz nibr leplz kx nabzdr ngrgo, mz nzatubx-krde nidr. X sa na-apqtrpzle drtwr leplz kx talvzo, mz nzapu-krdr nyr kx rpile namzpe mz nzyaglqtitr-mou-krde nidr. X sa navz zvz, nakrlzbzle mzli kx aovxio-ngrde, mz nzngini-krde lrpzki r nzatubqtkr Gct leplz. ²¹ X kzdung leplz kcng tzycmneng mz natq amrlx mz nrlc sa na-abrtrpzlr drtwrdr bade mz nzarlapx-krde nidr.” ☀

?Zmatq Ngr Jiszs Vzpxm Mz Gct O Mz Setzn?

Mak 3:20-30; Luk 11:14-23

²² Zbz kzdung leplz nzvzmibzlr mz Jiszs ncblo kx mncpx-ngrm drka' kx batrpzle nzmwikr mzte x nznabu-krde. A' mzli kc Jiszs tqamrlzpe-ngrde nide, sc tqobqpe x tqycmnepe. ²³ Zbz leplz nzkctitxpzlr da lc x sc tzrpipelr kx, “Mwx krlc Kxnzmcpx kc navzpxm mz nqvi lr King Devet!”

²⁴ A' kx nzxlrlr natq lc, sc tzrpipelr kx, “Beelsebol ela, kxetu r ma ngr wq, nide kc tqaclvele drka' amrlx x sc nide kc tqrkabz bade zmatq mz nzmaszlrpx-krde drka' mz leplz.” †

²⁵ A' Jiszs krlztitrpebzle drtwrdr. X mz nzaelwapx-krbzle badr kx nzvz-rbrng, sc tqrpipebzle kx, “Kandre kx akipx-lzbq mz dzbede sc tzota-etrpeng, x mzli kxipzne sa naodating. Mz nqmq lcpwz doa lr mztea o ma kxesz' kx nzamnc-dali-lzbqng, sa nayrkrttxpxbzng. ²⁶ X mou, nzmu Setzn namaszlrpx-ngrde drka' nedeng mz leplz, apule kx nzotableng mz nidr esz'-krdr. Nzmu namule lc, e zmatq ngrde mz nzachve-krde leplz sc tqmanepe. ²⁷ Kxmule-esz' rpiamu kx rmaszlrpx-ngrne drka' mz zmatq ngr

✉ **12:7-8** Hosia 6:6; Sam 40:6; 50:14; 51:16-17; Matiu 9:13 ✉ **12:21** Asaea 42:1-4 † **12:24** Beelsebol ngi kzdq kz drtq Setzn.

Setzn, a' tr-rpiwamuu kx oblamzmung nzrmaszlrpx-kzng mz zmatq ngrde. Mz nzmu-krde lc, nzkrlzlr nzrpi-ngrbz bamu kx vz-rbramu! ²⁸ A' me ngi daki-angidrlle se. Mz nzmaszlrpx-krnge drka' mz zmatq ngr Mqngrkxtr, aelwapx-ngrne kx Gct sa tqvectrpemle leplz bade mz nzngini-krde King rdr. ²⁹ A' Setzn apule ncblo kx xplr zlwz. X napebqtx kai, x ncblo kc tqdwatr-atebz mz ma nyzde mz nztwz-krde dztudeng. Da kc tqwai nzarlapx-ngrbz leplz mz mqde.

³⁰ "Na-aoti drtwrmu nrlarde kx namnckiamu. Neke trmnckileu mz nrlarde nyznge nide enqmi rnge. Krkc trokatrleu ninge mz nzrvzmi-ngrm leplz mz Gct, nide kx rmaszlrpxngr leplz mz nzvz-krmlr bade. ³¹ Da angidrtx lc napibo bamu. Gct krlzle nzipqpx-krde alwx x nzrpivxitingr amrlx. A' mz nzrpi-krmu lc, kx zmatq rnge vzpxm mz Setzn, pivxitiamu Mqngrkxtr kc tqngi angidr nou zmatq lc. X rblx nzipqkr Gct doa kx pivxitile Mqngrkxtr. ³² Doa kx pibqtile ninge, krlz Gct nzipqpx-ngrbz alwx ngrde, nzmu natekqtrle nqmq nr drtwrde. A' trpnzngr nzipqkr Gct leplz kx pivxitile Mqngrkxtr, kxmule-esz' mzli ka x mzli kc navzm. †

³³ "Na-aoti drtwrmu ninge x na-aolvzamu nzngini-krnge ncblo kxmrlz o ncblo kxdrka'ngr mz da kcng tqalexng. Murde nzmrlzkr nounc aelwapxngr nrade kxmrlz. A' nztrkakr nounc aelwapxngr nrade kxtrka. ✰ Nounc amrlx nzglx-ngrdr nradr kcng tzpapx-ngrdr. ³⁴ Nimu doa neng kxdrka'-ngrng kxnzodang. X rblxbz bamu nzrpi-krmu da kxmrlz. Murde ncblo krla tqpixle da kx yclzm mz nabzde. ✰ ³⁵ Nabz ncblo kxmrlz yclz-ngrm da kxmrlz. X aelwapx-lzbqngr mz nzmrlzti-krde leplz. A' nabz ncblo kxtrka yclz-ngrm da kxtrka. X aelwapx-lzbqngr mz nzatrkti-krde leplz.

³⁶ "Nakrlz-angidramu kx mz Mzli Kxmatq kc navzm, Gct sa na-ayrplapxle leplz mz natqdrng amrlx kcng trmrlzu mz nzobq-krde. ³⁷ Mz nzmu-krde lcde, na-aclvetio-lzbqamu mz nikeng piti-ngrnamu ninge. Murde Gct sa na-ayzlubzle da bamu mz nzvz-nqblq-krde natqmung. X mzli lcde, nztubqkr doa o nzvz-rbr-krde sa navzpxm mz natqdeng kcng tqpitileng mz nrlc ka. X doa kx natqde trka takitrde nzayrplapxngr nide."

³⁸ Zbz kzdung Farzsi x kxnlzalvztrng mz Lou sc Mosis nzrpibzlr bade kx, "Kxakrlz, ale dq da kxmatq mz nzaelwapx-krm kx vzpx-angidrme mz Gct." ✰ ³⁹ Jiszs ayzlu-ngrbzle natqdr kx, "Nimu leplz kcng tzmncng mzli ka kxdrka'-ngrng kcng tzesablqtilr Gct. Rlxstiamu kx na-alebo dq rkx kxmatq-esz'ngr mz nzaelwapx-krnge kx vzpxmc mz Gct. A' trpnzngr rkx kx na-aelwa-ngrbo bamu, a' nangi txpwz rkx kc tqalebz Gct mz profet Jona kc bqnc. ⁴⁰ "Jona mnctipxme mz nelz besilr zbq tq." ✰ X mz nqmq lcpwz, ninge Mrly Leplz, sa namnctilz-kzpc' mz gq zbq natq. ⁴¹ Mzli kc bqnc leplz ngr taon kxetu Ninive nzlxngitilr nrpa ngr Gct kc tqyapwxtipxbz Jona badr x nztekqtrlr nqmq nr drtwrdr mz alwx ngrdr. Kxmule-esz', a' mzli ka, doa kx myaszpx-zlwzle Jona vzpem mz nzyapwxtipx-krbzle nrpa ngr Gct bamu, a' trtekqtrwamuu nqmq nr drtwrmu. Mz nzmu-krde lcde, mz Mzli Kxmatq kc navzm, lr Ninive sa naycmne-kzng mz kot mz nzpipx-krdr kx vz-rbramu, murde trlxngitiwamuu nrpa ngr Gct da kc tzwailr. ⁴² X mz nqmq lcpwz, mzli kc bqnc kwin kc tqaclvele kandre kc Seba mrkc Arabia,

‡ ^{12:32} Gct krlzle nzipqtx-krpwzle leplz kcng tzplzpxbzlr alwx ngrdrng bade. A' doa kx pivxitile Mqngrkxtr ptxpx-ngrde nide. Mz nzmu-krde lcde, rblx doa lc nzyckr drtwrde alwx ngrdeng, murde Mqngrkxtr dekc tqokatrle leplz mz nzmc-krdr alwx ngrdrng. Doa kx pivxitile Mqngrkxtr trpnzngr nzmc-krde alwx ngrdeng mz nzplzpx-krbzleleng mz Gct. X trpnzngr nzipqkr Gct nide. ✰ ^{12:33} Matiu 7:16-20; Luk 6:43-44 ✰ ^{12:34} Matiu 3:7; 15:18; 23:33; Luk 6:45 ✰ ^{12:38} Matiu 16:1-4; Mak 8:11-12; 16:1; Luk 11:16, 29-32 ✰ ^{12:40} Jona 1:17—2:10

vzm rlu mz nzlalztq-krbzle mz Solomon mz natq ngr nzyrplapxngr. [◊] Kxmule-esz', a' mzli ka doa kx myaszpx-zlwzle Solomon vzpem, a' pxtpx-ngrnamu nzlalztq-krbzmu bade. Mz nzmu-krde lcde, mz Mzli Kxmatq kc navzm, Kwin kc Seba sa naycmne kz mz kot mz nzpipx-krde kx vz-rbramu, murde trlalztqpwzmuu mz Gct mz natq ngr nzyrplapxngr." §

Nzyzlu-krm Drka' Mz Nzprsrxp-krde Ncblo

Luk 11:24-26

⁴³ Rpi-mopwz Jiszs kx, "Mzli kx kzdq drka' nzmaszlrpx-ngrde mz kzdq ncblo, drka' la vzne lzke, rtangrne me na-ama-ngrde mz nabz leplz. A' nzmu trnamcleu kzdq nrcl, ⁴⁴ sc tqrpipelle mz nide esz'-krde kx, 'Nayzlupe-moux mz ma nyznge kc tqrlaszpemc.' Zbz yzlu mou x mcle ncblo kc mrlzpe x nqmq krde mrlzpe x trpnzngr mqngr kzble kx mnpxm bade. ⁴⁵ Zbz vzpx x vzmtrple drka' rlimz kx nztrka-zlwzng mz nide. Nzvzmqng sc tzmnccpxpemqng bade. X nzmnckr ncblo kc sc tqtrkatx-zlwzpe, myaszpxle mzli kc kai.*

X mz nqmq lcpwz, nimu kxdrka'-ngrng kang mzli ka trkatx-zlwzamu myaszpxle mzli kc trvzka-ngrpc'. Murde pxtpx-ngrnamu ninge!"

Kx Ngi Angidr Lxede Jiszs X Mzledeng

Mak 3:31-35; Luk 8:19-21

⁴⁶ Mzli kc Jiszs tqycmnebe-ngrbzle mz zbo ngr leplz kcng, lxede x mzledeng sc tzkaputrpe-kzpqng. Nztutrpqng yz x nzpitrpzlr mz kzdung leplz kx naycmneng badr Jiszs. ⁴⁷ Zbz kzdq nidr rpibzle bade kx, "Lxem x mzlemqng la tztutrpqng yz, nzrpilr naycmneamu badr."

⁴⁸ Kx krlz Jiszs krcl mzli kxmrz nzalvztrngr mz da kxmyapxbz, sc tqrpipebzle kx, "?A' nekeng tqngi angidr lxenge x mzleneng?" ⁴⁹ Zbz sc tqlxpemle nigr ncblo nedeng x tqrpipebzle kx, "Doa kxnzmull lcng nidr lang tqngi lxenge x mzleneng. ⁵⁰ Murde doa kcng tzvz-nqblqlr me pnz drtwr Trtenge kc Heven, nidr lang mzleneng x inwengeng x lxenge angidrng."

13

Drtc' Pwx Kx Bletipx

Mak 4:1-9; Luk 8:4-8

¹ Mz zbo lc, Jiszs kx dwapxmle ma kc, sc tqvzope mz nabz drta' ngr Dxbu Gzlili. X sc tqwxbuope mz nzalvztr-krde leplz. ² Zbz zbo ngr leplz kxnzetunepxlr kc, sc tzyrlwr-ngalelvzpelr nide. X sc tqdwaope mz bot, mz nzalvztr-krde nidr kcng tzyrlwrpxbzng mepz. ³ Yapwxitpxbzle badr kzdung nzycmne-ebzpxngr mz nzalvztr-krde nidr da kxkqlu. X mz zbo lcde, Jiszs yapwxitpxbzle badr nzycmne-ebzpxngr lcde seleng.

Rpibzle kx, "Lalztqmamu bange! Kzdq mzli kzdq kc ncblo olijtile drtc' ngr nranc nyzde. Zbz sc tqarlxpele nra wit nyzdeng. X mz nibrde rpile nayrkqlvzoleng mz drtc'. ⁴ A' mzli kc tqarlx-ngrdeleng, kzdung nzstationg mz lrpzki kx drtc' ngrde mqngi, x nzngqtilzmqng utc. ⁵⁻⁶ X kzdung nztaong mz drtc' kxmelx, murde ycom mz rplz. Nzlvcpulz-animqng, a' nzglrtxng x nzmztx-ani-moung mz nepi, murde dzbrdr trvzou la. ⁷ X kzdung mou nzstationg mz drtc' ngr ncngrbz. Krlcng nzlvcpumilzmqng lxbi x nzyrlvilvzo lxbi nidr. ⁸ X kzdung nztaong mz drtc' kxmrz. Krlcng nzyrlvzlmqng x

* ^{12:42} 1 King 10:1-10; 2 Be Ngrdr 9:1-12 § ^{12:42} Jiszs nide doa kx myaszpxle Jona x Solomon.

* ^{12:45} Leplz kznike nzmaszlrpx-ngrbz drka' bade, narlr-ngrbzle alzu Mqngrkxtr namncpxm mz nabzde, murde drka' kc ma tqyzlu-mop bade, x kzdung kz mou.

nzpang. Kzdung nradr kqlutx zlwz, kzdung nradr kqlu, x kzdung nradr pipz.

⁹ “Doa kx yrplapx, na-abzle nztwz-krde drtwrngr natq lc.”

Nike Jiszs Tqrycmne-ebzpx-ngrde Da

Mak 4:10-12; Luk 8:9-10

¹⁰ Mz nibrde vzbzkr bade rpibzkr kx, “?Nike tqrycmne-ebzpx-ngrbzme da mz leplz?” ¹¹⁻¹² Rpim Jiszs kx, “Ayrbq-angidrbo bamu nqmq kr Gct mz nzngini-krde King r leplz nedeng, kc tqyc-kapq mzli kc. Murde neke lxngitile Gct, Gct sa na-aetunepxbzle nzrkriz-krde da angidr x sa na-axplrbzle nzrlxngiti-krde. A' leplz kcng trnzrlxngitiung, rblxbz badr nzkriz-krdr da angidr, murde drtqdr sa nzlalztq-krmlr bange. Mz nzmu-krde lcde, Gct sa nakatpxbzle nzrkrizngr kzniye ycbz badr. ¹³ Ycmne-ebzpxbo da badr murde kxtrnrlxngitilru ninge nzmcpelr da kx alex, a' trntwzlu drtwrngr de. X kxmule-esz' nzxlrpelr natqngeng, a' drtwrngr nzycmne-ebzpx-krngeng tryrplatirpwzu nardr. ¹⁴ Nindr leplz kcng tqycmnetrngr profet Asaea mz nzrpipxkr Gct kx, ‘Kxmule-esz’ nzlalztqng, a' nardr tryrplatirpwzu. X kxmule-esz’ nzobqng, a' trnzkrizlru da angidr. ¹⁵ Nardr nzamqngipebz, nradrtqdr nzangq, x mztr nzakcpebz, murde nzpxtxpx-ngrdr nzmc-krdr, nzxlr-krdr, x nzlxngiti-krdr da angidr. Mz nzmu-krde lcde, rblxbz badr nzyzlu-krmlr bange mz nzatubqti-krnge nabzdr.’” ¹⁶

¹⁶ Zbz Jiszs rpi-mople bagr kx, “A' mrlzbz bamu mz nzbatr-krbz Gct bamu nztwz-krmu drtwrngr natqngeng x rkx kcng tqalexng. ¹⁷ Murde profet x leplz neng Gct nzkqlung mzli kc nzrpilr namc-kzlr ninge, Kxnmcpnx ne Gct, x da kang tqalepexng, a' trnzmc-pnzlru. X nzrpilr naxlr-kzlr da kang tqxramu, a' trtxpnzngr.”

Drtc' Pwx Kx Bletipx Ngi Nqmq Kr Leplz

Mak 4:13-20; Luk 8:11-15

¹⁸ Rpi-mop Jiszs kx, “Lalztqmamu bange mz nztwz-krmu drtwrngr drtc' lcng pwx. ¹⁹ Nra drtwrngr de nrpa kx Gct sa tqvectrple leplz bade mz nzngini-krde King rdr. Drtc' kc pwx ngi nqmq kr leplz. Murde leplz kcng nardr tryrplatirlru natq Gct nzapulr lrpzki lc drtc' ngrde tqmqngi, murde Setzn kc Tqdrka'ngr vzm x katpxbzle nrpa lc mz nabzdr. ²⁰ Leplz kcng nabzdr tqngrgo nzapulr drtc' kc tqmelx, murde nzxlrlr natq Gct x nzabrtlvzlr nztwz-krdr. ²¹ A' natq Gct trpnzngr dzbrde x trvzou la mz nabzdr. Nzrlxngiti-krdr mrbcnepwz, murde rblx nzlolvz-amqngi-krdrle mzli kc tqprtztingr nzkxpung x nzatalzngr kcng tzvzpxmqng mz nzrlxngitingr. ²² Leplz kcng drtwrdr tresz'tiu nzapulr drtc' ngr nibr ncngrbz. Kxmule-esz' nzxlrlr natq Gct, a' trnzbrtiu drtwrdr. Murde nzaoti-zlwzkr drtwrdr dalr nrlc kxkqlu nzapulr lxbi kcng tzyrlvivzolr nabzdr, x trpnzngr nradr. ²³ Drtc' kxmrlz drtwrngr de leplz kcng nabzdr tzoliqtilr nzlxngiti-krdr natq Gct. Murde nztwzlr mz nzmc-krdr, x nra nzrlxngiti-krdr yc-zvzbz, mz nzvectr-krmlr leplz mz nzmc-nqblq-krdr Gct. Kzdung mzli leplz kcng tzvectrplz nzkqlutx-zlwzng, kzdung mzli nzkqlung, x kzdung mzli nzpipzneng.”

Nabr Kxtrka Kcng Tztung Mz Mzlir Wit

²⁴ Jiszs yapwxti-mopwzle kc nzycmne-ebzpxngr mz zbo ngr leplz kcng. Rpibzle kx, “Nzaclvekr Gct leplz kcng tzmnclbzng bade mz nzngini-krde King rdr apule lrnardzng kx arlx nra wit mz nrlanc nyzde. ²⁵ Zbz mz

^{13:11-12} Matiu 25:29; Mak 4:25; Luk 8:18; 19:26 ^{13:15} Asaea 6:9-10; Luk 19:42; Jon 8:43-44; Aposol 28:26-27

nrlckxbq mzli kc tzmwipengr leplz, ncblo kx mwati drtwrde nide vzm, sc tqarlxpele nra nabr kxtrka mz mzlir wit. Yrkpxbz x sc tqvzpe. ²⁶ Zbz wit x nabr kxtrka sc tzyrblalz pemqng x sc tzetulz pemqng. X nabr lcng rlilrdr kxmu nzobq-krdr esz'. A' mz nibr nzpa-bclzkr wit kcng, sc tqglxtipx-lzbqpe kx kzdung nabr kxtrka nztu-lxblrng badr wit kcng. ²⁷ Kx nzmc ncblo kcng tzwz-nrbalqng nabr kxtrka kcng mz nrlanc nyz kxetu rdr, nzvzbzng bade x sc tzrpipebzlr kx, 'Kxetu, nra wit txpwz kcng tqarlxq mz nrlanc nyzm. ?A' myx me nztwztim nabr kxtrka kcng tztu-lxblrpeng badr wit nyzm?' ²⁸ Rpibz kxetu kc kx, 'Nabr lang arlx ncblo kx mwati drtwrde ninge.' Sc tzrpipebzlr mz kxetu rdr kx, '?Suti drtwrm naotibzkr x nabolvztitxbzkr?' ²⁹ Rpibzle badr kx, 'Bzkq, murde nzmu nabolvztilzamamu nabr kcng tqtrka, sc tqvzmilzpe-kzp kzdung wit. ³⁰ A' natu-txpwzng ena rlilrdr nakrlz-zpwxbzle mzli r nzbrkr wit. X mzli lc sa napibo mz ncblo kx nzwztrng mz wit kx, *Yrviti-kaiamu nabr kcng tqtrkating x rtclz-ngrnamu mz nyx. Zbz sc tqlakilz-atemamu wit, x twzamu me nayc-ngrdr'* "

Nzycmne-ebzpxngr Rtq Nc Seri

Mak 4:30-32; Luk 13:18-19

³¹ Jiszs ycmne-ebzpx-moule da mz nzsri-krde kx, "Nzkqlukr leplz kcng namnclzbzng mz Trtenge mz nzngini-krde King rdr apule rtq nc seri, kx peti ncblo mz nzmq nyzde. ³² Kxmule-esz' topwz zlwz, a' mz nibr kzdung mzli etulzm x sc tqngipe kzdq nounc kxetu. X utc kxkqlung nzmnncng mz nrlardeng." ³³*

Nzycmne-ebzpxngr Yisti

Luk 13:20-21

³³ X Jiszs yapwxtipx-mopwzle kc nzycmne-ebzpxngr. Rpibzle kx, "Nzwzkr leplz kcng tzmnczbzng mz Trtenge apule yisti kxpipz kx oti kzdq olvz. Sc tqayabemipele flawa mz kzdq dis kxetu. X mz nibrde yisti kc sc tqapwzpupele flawa kc." †

³⁴ Jiszs yapwxtibzle nzycmne-ebzpxngr mz nzalvztr-krde zbo ngr leplz lcng. X trpnzngr mou da kx alvztr-ngrde, a' ngi txpwz mz nzycmne-ebzpxngr. ³⁵* ³⁵ Krle atutre natq Gct mz nzsri-krde kx, "Sa naryapwxbo mz leplz mz nzycmne-ebzpxngr. X sa nayokaetipxbo dalr mzli kc bqnc kx trgalr kxrkrllz." ³⁶*

Drtwr Ngr Nabr Kxtrka Kcng Tztung Mz Mzlir Wit

³⁶ Mzli kc Jiszs tqrlasz-ngrde zbo ngr leplz kc x tqvztrpe brma, vzbzkr bade, sc tqrpipebzkr kx, "Yokaetipxm ena bagr drtwr ngr nabr kxtrka kcng tztung mz mzlir wit." ³⁷ Rpim Jiszs bagr kx, "Ncblo kc tqarlx nra kxmrlz drtwr ngrde ninge, Mrlx Leplz. ³⁸ Nrlanc drtwr ngrde nrlc ka. X nra kxmrlz drtwr ngrde doa neng Gct kcng tzmnczbzng bade mz nzngini-krde King rdr. A' nabr kxtrka drtwr ngrde doa neng Setzn kc Tqdrka'ngr. ³⁹ X kxmwati drtwrde ninge drtwr ngrde Setzn. Mzli kc tqbrpengr dalr nrlanc drtwr ngrde Mzli Kxmatq kc na-ayrplapxngr. X kxnxwzng mz nrlanc drtwr ngrde enjrl neng Gct. ⁴⁰ Murde mz Mzli Kxmatq lc, kzdung leplz sa nartctxlz-ngrng mz nyx mz nzapu-krdr nabr kxtrka. ⁴¹ Murde mzli

* ^{13:32} Sam 104:12; Esikel 17:23; 31:6; Daniel 4:12 * ^{13:32} Dzbede ne Gct, mz nzyzutr-krde, leplz ngrde nzpipzneng, mz nzapu-krdr rtq nc seri. A' mz nibrde sc tzkqlunepxpeng, mz nzapu-krdr nounc. X utc kcng drtwr ngrde leplz kx trnzrlxngiting. Murde nzamrlzng mz nzmnnc-lxblr-krdr badr kxnxrlxngiting. † ^{13:33} Nzwzkr kxnxrlxngiting kxnxrlxngiting krlzle nzrungi-batr-ngrbz nrpa ngr Jiszs nzalvzpx-krde nrlc atwrnrngr mz nzapu-krdr yisti. * ^{13:34} Mak 4:33-34 * ^{13:35} Sam 78:2

lcde, ninge Mrlx Leplz sa na-atwzlrpx-ngrne enjrl nengeng mz nzayrlwr-lxblr-krdr leplz kcng amrlx tzalebzng da kxdrka'ngr, badr leplz kcng amrlx tzbatrpzlr mz doa nzale-krdr alwx. ⁴² X leplz lcng amrlx sa nartclz-ngrng mz nyr mz Hxl, mrkc nayrni-allo-ngrdr mz nzetqkr drtqdr x namadqtilr nqngidr mz zngya. ⁴³ A' Trte sa navzmile doa nedeng Heven mrkc tqngini-ngrde King. X sa nayzlrpxng nzapulr nepi murde nztubq-esz'ngrng. Doa kx yrplapx, na-abzle nztwz-krde drtwr ngr natq lc."

Nznginingr Doa Ne Gct Myapx-esz'ngr

⁴⁴ Jissz yapwxti-mople kc nzycmne-ebzpxngr. Rpimle kx, "Nzmyapx-esz'ngrkr nznginingr doa ne Gct apule ncblo kc tqwz mz kzdq drtc'. A' mz nzekq-krde, sc tqrmctipele kzdq da kx yrbulzm mz gol. Gol lc yrlq pnz kzdq ncblo, a' bzszpele x trpnzngr kx rkrlz mrlcde. X trpnzngr ncblo kzble kx rngisc, a' ngi txpwz ncblo kc tqrtwz drtc' kc. Mz nzmurde lcde, kx mc ncblo kc le, abrtzlvzle x ekqlvzo-moule. Zbz vz x amwale dztudeng amrlx mz nzrungisc-krde trau kx takitrde nzxpengr drtc' lc.

⁴⁵ "X mz nqmq lcpwz, nzmyapx-esz'ngrkr nznginingr doa ne Gct apukzle ncblo kc tqrtangr da kx mrlvxi. ⁴⁶ Zbz sc tqrmctipele da kx otr-zlwzngr drt wrde. Zbz vz x amwale dztudeng amrlx mz nzrungisc-krde trau kx natakitrde nzxpengr da lc tqmrlz-esz'ngr." ‡

Nzapoongr Br

⁴⁷ Jissz yapwxti-kzple nzycmne-ebzpxngr lc. Rpimle kx, "Nzaclvekr Gct leplz kcng tzmncbzng bade apule kzdung ncblo kxnzmwang kx nzapoong br. ⁴⁸ Mzli kc br scdr tqyrbupe-ngrde mz nc, sc tzvectrpremlr mepz. X sc tzakipxpelr nc kcng. Nc kxmrlz nzyrlqolr mz topla. A' nc kxtrka nzrtctx-nqngidr. ⁴⁹ X mz Mzli Kxmatq kc navzm, enjrl nengeng sa na-akipxlr leplz kxdrka'-ngrng mz kxnztubqng. ⁵⁰ X kxdrka'-ngrng amrlx sa nartclz-ngrng mz nyr mz Hxl, mrkc nayrni-allo-ngrdr mz nzetqkr drtqdr x namadqtilr nqngidr mz zngya."

⁵¹ Mz nibrde Jissz sc tqrpipemle bagr kx, "?Narmu yrplatr-kzpz mz nzycmne-ebzpxngr lcng?" X rpibzkr kx, "Eu." ⁵² Zbz Jissz sc tqrpipemle kx, "Sa tqmrlz, murde twzpeamu nzalvztrkr Nzryrngrkxtr kc pnz, x mzli ka twzpe-kzamu nzalvztr-krngeng kxmrna. Mz nzmurde lcde, narmu yrbupxem mz nzalvztrngr lcng li. X doa kzni kx apule nimu mz nzmncbz-krbzle mz Gct, apule ncblo kx ngi bcnyr kx rnginyz me nzryrlqngr da kxnzmrlzing scde. Murde narde ngi me yrlq-ngrde nzrkrlz-krdeng amrlx. X krlzle nzalvztr-krde leplz mz nzrkrlzngr lcng, apule bcnyr kx rkapxm da mz nzaelwapx-krbzle mz leplz, kxmule-esz' da kx blzlongr o da kxmrna."

Jissz Nzpxpxngr Lr Mztea Nyzde Naszret

Mak 6:1-6; Luk 4:16-30

⁵³ Mz nibr nzyapwxti-krm Jissz nzycmne-ebzpxngr lcng, sc tqrkalz pemgr badr mrlcde. ⁵⁴ X sc tqvzpekr badr mztea nyzde, Naszret. Zbz sc tqalvztrpele nidr mz mangr-nzkrka'ngr nyzdr. X nzkctipxlr nzalvztr-krdeng. Zbz drt wrdr lctrpz bade murde mz nzobq-krdr nide ncblo txne a' alvztrle nidr apule kxrngisc zmatq. Nzrpilr kx, "?Nzyrplapxkr nar kzni tqycbz bade? ?Myx kxmu nzale-krde rkx kcng tqxlrkung? ⁵⁵ ?Trnipleu mrlx ncblo kc tqrlrmzti da kx wz-ngrdeng, mrlx Mxri? ?X trngiu mzledeng

‡ ^{13:46} Mz nzycmne-ebzpxngr lcng li, Jissz rpile kx nznginingr doa ne Gct kx nalu alo Heven myaszpx-zlwzle dalr nrlc amrlx. Takiitrde nzrlr-krbzku bade da amrlx kcng tzrpwa'-ngrmlr bagu nzmncbz-krbzku bade.

Jemes, Josip, Saemon x Jud? ⁵⁶ ?X trngiu inwedeng lcng amrlx tqmncku badr mrka? ?Myx me twzkinle nzalvztrngr lc? Mrlx lc trngiu ncblo kxmatq.” ⁵⁷ Zbz sc tzpxpxpe-ngrdr nide x nzalvztr-krdeng, x trnzlxngiti-kzlsru nide. Zbz sc tqrpipebz Jiszs badr kx, “Kxmule-esz' lr mztea amrlx nzamatqlr profet, a' lr mztea nydeng x lr ma nydeng trnzamrluelru nide.” ⁵⁸ X mz trnzlxngiti-krdru lc nide, trpnzngr da kxmatq kx alele mz mztea nydeng.

14

Nzrnibqngr Jon Kxawrkxtr

Mak 6:14-29; Luk 9:7-9

¹ Mzli lc King Herot Antipas, kc tqacivele lr Gzlili, xlrle nrpa ngr da kcng tqaleti Jiszs. ² X sc tqrpipebzle mz kxnzawz nedeng kx, “Mwx ncblo lc, Jon Kxawrkxtr elc, tulzpe-mop mz nzbzngr. Dekc tqale-ngrde rkx kcng tqmatq-esz'ngr.”

³⁻⁴ Nzbzkr Jon kxmule sele. Herot twzle olvz r mzlede Filip. X Filip lc sc tqnlube, kx tqyrlzti Herot kc olvz rde. Drtq olvz lc Herodizs. A' Jon pi-zvzbzle mz Herot kx ngibz alwx mz nzobqkr Gct mz nzyrlzti-krde olvz r mzlede. ⁵ Zbz Herot atwzlr-ngrbzle ncblo ngr vea nedeng, nzlolzlr Jon x na-adwatrlr mz presin. ⁶ Herot rpile nanibqle Jon, a' rblx murde mwxlrtile leplz kxkqlu ma tzotablrng. Murde mz drtwrdr, Jon nide profet ne Gct.

⁶ Zbz mz zboq kc tqkaputr-ngrm nzrmcngr mz Herot, alebzle kc nzmungr mz ncblo nedeng. Zbz abrtzlvzle inyx Herodizs, mz nzela-krbzle badr mz nzelangr kx batrpzle ncblo nzrkcmzngr nide. ⁷ Rpibz Herot bade kx, “Nike narlxtime bange, esalz-ngrne kx sa nakabo bam!”

⁸ X mz nzvz-nqblq-krde natq lxede, rpibzle kx, “Suti drtwrnge nalakipxbzme nar Jon Kxawrkxtr x katim dis bange mzli ka, murde nakrlzx kx bz-angidrpe.”

⁹ Herot drtwrde vztx, a' ycakalqpe. Murde esalzpe kai, x nzmu trnakapwzleu nike suti drtwr doa olvz lc, ngi da kx myangr drtqde mz mzlir kxszetu kcng. ¹⁰ X sc tqatwzlrpe-ngrde kc ncblo ngr vea mz presin, kx nalakipxbzle nar Jon. Ncblo ngr vea lc vz mz presin, sc tqlakipxpebzle narde. ¹¹ X sc tqtwztipemle dis, tqkapebzle mz doa olvz kc. X sc tqtwzpebzle mz lxede. ¹² Zbz oblamzng Jon sc tzotipelr namz ngrde, tzyrtzmqpelr. X sc tzvzpmemqng mz Jiszs, tzrlwape-ngrbzlr da kc tqprt.

Jiszs Apuleng Ncblo Siu-nzlvqn (5,000)

Mak 6:30-44; Luk 9:10-17; Jon 6:1-14

¹³ Mzli kc tqxlrngr Jiszs nrpa ngr Jon, sc tqprtpekr badr mz bot, mz nzalilvc-krgr mz kzdq nrlc kx namnc-ngrgr esz'-krgr. A' kx nxzlr leplz ngr taon nzrkalz-krmgr mz bot, sc tzyrkrkipemlr mepz, mz nzrmcti-krdr nigr mrkc na-alilvckitrkr. ¹⁴ Zbz mzli kc Jiszs tqvztrpe-ngrmle mepz, sc tqmcpele zbo ngr leplz kcng tzyrlwrng mrkc tzaenzlilr nide. X sc tqyctx-zlwzpengl drtwrde nidr x amrlzle kxnyagoxng.

¹⁵ A' mzli kcpe mz milzpq, sc tqrpipebzkr bade kx, “Nrlc ycpe pipz nzbq-krde, a' trpnzngr me narmctingr leplz lcng dakxnnzng. Atwzlrpengr nidr mz mztea kcng tzyctineng mrlang, murde naxpeng nadr dakxnnzng.” ¹⁶ A' ayzlu-ngrm Jiszs natqgr kx, “Trmrlzu nzvz-krdr mz nelzdr kxbrtale. A' nimu kx narkabz nadr dakxnnzng.” ¹⁷ Rpibzkr kx, “Yctxpqng bagr bret nzlvqn kx topwztine x nc kxsupe li.” ¹⁸ Rpim Jiszs kx, “Twzmamu bange.”

⁵⁸ 13:57 Jon 4:44 ^{14:3-4} Livae 18:15-16; 20:21

¹⁹ Sc tqpipebzle mz leplz kcng nzwxbuo-kldr mz nabr. Mz nibr nzwxbuo-kldr, Jiszs kalzmle bret kcng nzlvqn x nc kcng li, x obqlz mz bongavz mz nzkrka'ngr x sc tqawipebzle mz Gct. Zbz lopxitile bret kcng, x sc tqkapemle bret x nc kcng bagr, tqakipebzkr mz leplz kcng. ²⁰ Nzmung x nelz leplz amrlx krlctxtrpz. Mz nibr nzmu-kldr, nulvzokr topla nzpnu-esz'-nraedi (12) mz nctq dakxnzng kcng tqyctxo. ²¹ Ycpwz pipz nzkrlz-krbzle siunzlvqn (5,000) mz ncblo, a' trnzrlwxtrpwzu olvz x doa kxnztopwzng.

*Jiszs Vzneom Mz Lue Ngr Dxbu Gzlili
Mak 6:45-52; Jon 6:15-21*

²² Mzli lcde, Jiszs pimle bagr kx naprtzkr mz bot x na-alilvckio-kaikr mz nrlar dxbu kc, mzli kc tqatwzlr-ngrde leplz kcng mrnyzdr. ²³ Mz nibrde, sc tqvzdzpe mz newz esz'-krde mz nzkrka'ngr. X mz nina sc tqmncbe esz'-krde. ²⁴ A' bot scgr sc tqdwaterbep mz zpzu r Dxbu Gzlili, sc tqtzpeng ebio x tqalxngitine ebio ngr nenq.

²⁵ Mzli kc tqkyapengr kio, sc tqvzpem bagr mz lue. ²⁶ A' mzli kc tqmcngrbzkr nzvzne-krmle mz lue, sc tqmwxlpekr. X tqneplapekr x tqrpipekr kx, "Eke! Drka'!" ²⁷ A' mzli kcpwz Jiszs sc tqycmnpem bagr. Rpimle kx, "Ninge lc ye! Bzkq mwxlramu!"

²⁸ Zbz Pita rpibzle bade kx, "Kxetu, kx tqngini-zpwxm la, pim bange napoobo mz lue x navzbo bam." ²⁹ Rpibz Jiszs bade kx, "Vzm!" Zbz Pita poom mz bot x sc tqvzpebz mz Jiszs mz lue. ³⁰ A' kx mcle ebio nzprtz-krmle, sc tqboope mz nzmwxl-krde. X sc tqkqlepele Jiszs, tqrpipebzle kx, "Kxetu! Okatrp ninge!" ³¹ Mzli kcpwz Jiszs vzbz, otibzle mqde, x sc tqveclzpemle. X sc tqrpipebzle mz Pita kx, "?Memule tqrnrc-ngrn x trbti-ngru drtwrm ninge? ?X memule nzlxngiti-krm ninge tqtopwzbe-ngrde?"

³² Mzli kcpwz sc tzprtzbemqng mz bot, x nenq kc tqamaope. ³³ Zbz nigr kcng tzmncng mz bot sc tqangiopekr nide mz nzrpi-krbzkr bade kx, "Ni-zpwxm MrIx Gct!"

*Jiszs Amrlzle Kxnzyagoxng Mrkc Ganeszret
Mak 6:53-56*

³⁴ Zbz sc tqalilvckipe-moukr mz kzdq nrlar dxbu kc. Sc tqkaputrpebzkr mz nrlarnrlc kc tqycngr mztea Ganeszret. ³⁵ X leplz ngr mrlc nzglxl Jiszs, x sc tzpi-anipebzlr nrpa ngrde mz leplz amrlx ngr nrlarnrlc lcde. X nzvzmibzlr kxnzyagoxng bade. ³⁶ X nzyrnititrpzlr bade kx narlr-ngrbzle mz kztedrng nzbxtxtr-krpwzlr nctq lrpz scde. X leplz kcng tzyagoxng tzbxtrpzlr lrpzde nzmrlnzng amrlx.

15

*Nqmq Ngr Gct Myaszpxle Nqmq Kr Melrmqgung
Mak 7:1-13*

¹ Kzdq zbz kzdung Farzsi x kxnzalvztrng mz Lou sc Mosis nzvzkiplr Jerusalem. X nzveatibzlr mz Jiszs kx, ² "?Memule ncblo nemqng tzrnzlvzo-ngrdr nqmq kr melrmqgung? Trnzvz-nqblqlru nqmq krgu mz nzrycpq-kaingr mq x ncblo kc tqmu ate."

³ Jiszs ayzlu-ngrbzle natqdr kx, "?A' memule tqrnzbzle-ngrnamu Lou sc Gct mz nztekqtr-krmule mz nzalvztr-krmu nqmq krmung? ⁴ Murde mz Nzryrngrkxtr Gct rpibzle kx, 'Amrlue zvz trtem x lxem. Murde doa kx tramrlueleu trtede x lxede, a' pibqtile nidr, takitxtrpwzle nzrnibqng.' ⁵⁻⁶ A' rpi-alzu-ngrnamu kx takitrdre doa trokatr-ngrdeu trtede x lxede

⁵⁻⁶ **15:4** Nzrlaszngr 20:12; 21:17; Livae 20:9; Lou Kcpwz 5:16

mz trau scde, nzmu duz r da kx naokatrle nidr yrlqpx-bekapele nangi blz kxtr sc Gct. A' mz nzale-krmu da lc yrlqtxpxamu Lou sc Gct, murde navznqblqamu nzalvztr-krmu nqmq krmung. *

⁷ Nimu leplz kx narpi-ngrbz kx rlxngitiamu, murde narpi-ngrbz kx vz-nqblqamu Lou sc Gct, a' mrlz txpwz bamu nzalvztr-krmu nqmq krmu! Gct ycmnetr-ngrde leplz kxnzapulr nimu mz nzngi-batr-krbzle mz profet Asaea nzryr-karde kx, ⁸ 'Leplz lcng nzamrlue-txpwlzr ninge mz naodr. A' trnzvz-nqblqlru natqnge murde nqmq nr nabzdr yc-rlrup bange. ⁹ Nzangio-krdr ninge mane mz drtwrnge murde nzrpilr da kcng tzalvztr-ngrdr leplz nzvzpxmqng bange. A' trtingr.' " [†]

Leplz Kcng Trnztakitrdrdu Nzprtrngr Mz Nzangiongr Mak 7:14-23

¹⁰ Zbz Jiszs kqle-moule zbo ngr leplz kcng, sc tqrpipebzle kx, "Lalztq-angidrmamu bange x abzamu nzyrlq-krmu da kc napibo bamu. ¹¹ Da kcng tzmale leplz mz mqdr x tzyrlqtrlr mz naodr trnzbatrpwzlsru trnztakitr-krdrdu nidr nzprtrngr mz nzangiongr. Trtingr. A' ngi da kcng tzvzpxmqng mz nao leplz kx nzbatrpzlr trnztakitr-krdrdu nidr."

¹² Zbz vzkr x rpibzkr bade kx, "?Krlz-kzq kx nzycmne-krm nxngitrlr Farzsi?" [†]

¹³ Jiszs ayzlu-ngrmle natqgr kx, "Trtenge kc Heven sa natabotilzmle nzalvztrngr amrlx kcng trnzvz-nqblqlru me pnz drtwrde. ¹⁴ Mz nzmu-krde lcde, bzkq lalztqbzmu mz Farzsi lcng. Murde kxnxetu lcng nzapulr ncblo kx mztr mwi kcng tzmailbzblr leplz kcng mztr tzmwing mz Gct. A' mz nzale-krdr da lc, dzbede lcng li nztaong rlilrdr mz gq mz nzvz-rbr-krdr."

¹⁵ Zbz Pita rpibzle bade kx, "Yokaetipxm bagr nzycmne-ebzpx-krm mz da kcng tzvzpxmqng mz nao leplz." ¹⁶ Jiszs rpimle bagr kx, "Rlr! ?Narmu tryrplatrkapz mz natq lc? ¹⁷ ?Trkrlz-zpwxkalamu kx da kcng tzyrlqtr leplz mz naodr vztr mz lzng krdr, x mz nibrde sc tqvzpxpe-mop mz nrkrdrtq? Da kxnxmulr lcng trnzbatrpwzlsru trnztakitr-krdrdu nidr. ¹⁸ Natq kxtrka amrlx kcng tzvzpxmqng mz nao leplz, nzvdz-kaipqng mz nabzdr. X nzbatrpzlr trnztakitr-krdrdu nidr. ¹⁹ Murde drtwr kxtrka lcng nzvdzmqng mz nabz leplz. X nzmailzlr nidr mz nzale-krdr alwx lcde seleng: nzrpibqtingr leplz, nzrpokiatrngr leplz, nzpnangr da, nzrnibqngr, nzrmwimingr leplz kx trngiu kernalzdr, x kzdung kz da kxtrka. ²⁰ Da kxnxmulr lcng nzbatrpzlr trnztakitr-krdrdu leplz x trnztubq-krdrdu mz nzobqkr Gct. A' mz trnzycpqngru mq x leplz kc tqmupe, trbatrpwzleu trnztakitr-krdrdu leplz."

Olvz KxtrngiulrJiu A' Nzrlxngiti-krde Etu Mak 7:24-30

²¹ Zbz rlaszkr badr Gzlili Provins, x sc tqvzkipler mz nrlarnrlc kc Fonisiz mrkc Siriz Provins, mz taon kcng etu Taea x Saedon. Provins lc nyd leplz kxtrngiulrJiu. ²² Zbz kzdq olvz kxtrngiulrJiu kx mnc mrlcde, vzm mz Jiszs x sc tqycmne-katopebz bade, mz ngrpi-krbzle kx, "Kxetu, Mrlx Devet, nayc

* **15:5-6** 15:2 Mc Matiu 15:12 x natq kxtopwz elr. 15:5-6 Blz kx myapxbz mz nzobqkr Gct ngi nzvz-nqblq-kaingr natqde, x ngrka-ngrbz blz bade kc ate. [Sam 4:5; 34:10-14; 50:15; 51:16-17; 73:24; 81:83; Hosia 6:6; Mak 12:33] [†] 15:9 Asaea 29:13 [†] 15:12 Farzsi kcng nzvz-nqblqlr kzdung nqmq kxnyrlq-pnzng mz nzbatr-krbzle mz leplz nzvz-nqblq-krdr Lou sc Mosis mz nzvz-nqblq-krdr nqmq lcng. Nzalvztr-ngrdr kx ncblo kx trvz-nqblqleu nqmq kr melrmqdr lcng, trtubq-kzu mz nzobqkr Gct. Mz kzdq nqmq kr melrmqdr lcng, leplz naycpq-kailr mqdr x dakxnxng mz lue, x sc tzmu-ateng. X ncblo neng Jiszs nzvz-nqblq-kzlr nqmq lcng mz zbz kang kqlu. A' Jiszs alvztr-ngrde kx nqmq lcng trtubqu, murde nzvzpxmqng mz ncblo, a' trnzvzpxpqngqu mz Gct. Nzalvztrkr Jiszs lc, atrkatikzle nzalvztrkr Farzsi. X batr-kzpzle trnzmnc-zpwx-krdrdu badr.

mz drtwrm ninge! Inyxnge drtqde etqtx zlwz mz drka' kc tqmncpxm bade.” ²³ Kxmule-esz', a' Jiszs traotrpwzleu nrlarde bade x trayzlupwzleu natqde. Zbz sc tqrpipebzkr bade kx, “Ayzlutexpe olvz lc, murde sc tqkq-nqqlq-zvzmle nigu.” ²⁴ Zbz sc tqrpipebz Jiszs bade kx, “Gct atwzlr-ngrmlle ninge mz nzokatr-krnge txpwz lr Israel kcng tzmnc-mrbrng.” ²⁵ Kx xlrbzle natqde lcng, vzm x sc tqrweopebz zpr bade, mz nznpi-krbzle kx, “Kxetu, okatrp ninge!” ²⁶ Jiszs ycmnebz bade mz kzdq nzycmne-ebzpxngr kx, “Trmrlzu nzoti-krbzme dakxnzng nan doa kxnztopwzng x kabzme mz kuli.” ²⁷ Rpibz olvz kc kx, “Kxetu, da zpwxtx la tqpiq, a' nzrlr-kz-ngrbz mz kuli nzngq-krdr dakxnzng kc tqtao mz nabz tebol.” ²⁸ Zbz Jiszs rpibzle bade kx, “Olvz lc, nzbrtikr drtwrm ninge etu-esz'ngr! Sa na-alebo da kc tqutsi drtwrm.” X mzli kcpwz drka' kc sc tqprszpxpele inyxde x sc tqmnc-zpxpe mou. ‡

Jiszs Apuleng Ncblo Siu-pwx (4,000)

Mak 8:1-10

²⁹ Rlaszkr badr nrlarnrlc kc, x sc tqyzlupe-moukr Dxbu Gzlili. Vzdzkr mz nrlar kzdq nra x Jiszs sc tqwxbuope. ³⁰ Zbo ngr leplz nzvzmqng bade. Nzrvzmimqng kxnvz-tengineng, kxnzbxplong, kx mztr mwi, kxnznabung, x kzdung kz kxnzdwatibzng zyagox kx bletipx-lxblrng. X amrlzle nidr. ³¹ X leplz kxkqlu nzkctipx-zlwzlr nzrmc-krdr nzvznekr kxnvz-tengineng, nzmrlz-moukr kxnzbxplong, nzobqkr kx mztr mwi, x nzycmnekr kxnznabung. X nzglqlzlr x nzawibzng mz Gct rdr, nidr lr Israel.

³² Jiszs kc tqkqleolemle nigr x tqrpiemle bagr kx, “Ycpengr drtwrnge leplz lcng. Murde nzmnctipemlr bagu mrka zbq tqpe x dakxnzng nadr yrkrtxpe. Trmrlzu nzatzlrxtngr nidr mz nelzdr kxbrale, ma mztr tqtcldrne mz lrpzki.” ³³ A' rpibzkr bade kx, “Trpnzngr me nxzpe-ngrgr dakxnzng kx natakitrde leplz lcng mrka.” ³⁴ A' Jiszs veam bagr kx, “?Bret tqlvr kx ycbz bamu?” Rpibzkr kx, “Rlimz, x nc kxsupe pipzne.”

³⁵ Rpibz Jiszs mz leplz kcng amrlx nawxbuong. ³⁶ Zbz otitxde dapu bret kcng rlimz x nc kcng, awitx-ngrbzle mz Gct, lopxititxdeng, x sc tqkatipemleng bagr tqakipebzkr mz leplz kcng amrlx. ³⁷ Nzmung amrlx x nelzdr krle. X atakqtikr mulide kcng tqyctxo x nulvzo-ngrgrle topla kxetu rlimz. ³⁸ X mz nzrlwxngr ncblo txpwz krlbzle siu-pwx (4,000) kcng tzitung mz zbq lcma, a' trnzrlwxtrpwzu olvz x doa kxnztopwzng. ³⁹ Zbz sc tqatwzlpengr Jiszs leplz kcng mz mztea nyzdrng. X sc tqprtzpekr mz bot, sc tqalivckiopekr mz nrlarde kc Magadan.

16

Nzrkrlzng Rkx Ngr Nzwzkr Gct

Mak 8:11-21; Luk 12:54-56

¹ Zbz kzdung Farzsi x Sadiusi nzvzmqng mz nzatalz-krdr Jiszs. Nzrlxtibzlr bade nzale-krde kzdq rkx kxmatq mz nzaelwapx-krde kx vzpx-angidrm mz Gct, murde nzrpilr na-amayabzlr drtqde mz trnzale-krdeleu. ² A' Jiszs rpibzle badr kx, “Mz nzrmcngr nzpckr dcbs mzli kc mz nina, nzrpingr kx, ‘Kcma mz nrlckxbq nrlc namrlz.’ ³ A' mz nourla, mz nzrlxlvzkr

‡ **15:28** Mz nzycmne-ebzpxngr lc, doa kxnztopwzng drtwr ngrde lr Jiu, x kuli drtwr ngrde kxtrngiulrJiu. Dakxnzng drtwr ngrde da kxnzmlzti kcng tzvzpxmqng mz Gct. Suti drtwr Gct nzamrlz-krde leplz amrlx mz nzwzkr lr Jiu, leplz nedeng angidr kcng tqmcpxleng. Delc Jiszs tqvz-kai-ngrbzle mz lr Jiu. Be lc drtwr ngrde kx trmrlzu nzamrlz-krde kxtrngiulrJiu x lr Jiu kc ate. A' natq olvz kc aelwapx-ngrde kx lxngiti-angidre Jiszs, x takitrde nzokatr-krde nide.

bongavz, nzrpingr kx, ‘Nrlc trnamrlzpeu.’ Kxmule-esz’ krlzamu drtwr ngr nzrmcngr rkx mz bongavz, a’ rblxbz bamu nzkrlz-krmu drtwr ngr nzrmcngr rkx ngr nzwz-krnge.⁴ Nimu leplz kcng tzmnncng mzli ka kxdrka’-ngrng kcng tzesablqtilr Gct. Rlxiamu kx na-alebo dq rkx kxmatq-esz’ngr mz nzaelwapx-krnge kx vzpxmc mz Gct. A’ trpnzngr rkx kx na-aelwa-ngrbo bamu, a’ nangi txpwz rkx kc tqalebz Gct mz Jona kc bqnc.” Zbz sc tqrlaszpele nidr. *

⁵ Zbz sc tqprtzpekr badr mz bot. X mzli kc tqalilvcope-ngrgr mz dxbu, mrbrtr mz drtwrgr nzrtwz-krgr bret. ⁶ Jiszs rpimle bagr kx, “Rngidrtioamu yisti scdr Farzsi x Sadiusi.” ⁷ Zbz sc tqycmnetrpe-ngrgr, mz nxzlr-krgr kc yisti, sc tqrpi-etrpekr kx, “Jiszs tqkxmu nzycmne-krmle lc murde trpnzngr bret kx twzmgu.”

⁸ Kx xlrm Jiszs da kc tqycmnetr-ngrgr, sc tqrpipemle bagr kx, “?Memule nzlxngiti-krmu ninge tqtopwzbe-ngrde? ?Nike tqyc-zlwzngr mz drtwrmu trnzrtwzne-krmuu bret? ⁹ ?Myx kxmule, trkrlzkalamu? Nadcpx mz drtwrmu mzli kc tqlopxiti-ngrne bret kcng nzlvqn tqapu-ngrne ncblo kcng siu-nzlvqn (5,000). Mzli lcde nulvzoamu toppla nzpnu-esz’-nrade-li (12) mz muli dakxnzng kx yctxo. ¹⁰ X nadcpx kz mz drtwrmu mzli kc tqlopxiti-ngrne bret kcng rlimz tqapu-ngrne ncblo kcng siu-pwx. Mzli lcde nulvzoamu toppla rlimz mz muli dakxnzng kx yctxo. ¹¹ Mzli ka na-aopxbz bamu kx Gct krlzle nzka-krbzle bret. A’ trycmnetrwxu mz bret, murde da kc tqpibo bamu narngidrtioamu yisti scdr Farzsi x Sadiusi.”

¹² Zbz nargr kc tqyrplatr-atebz, kx trpipleu bagr nzrngidrtio-krgr yisti mz bret, a’ rpimle kx narngidrtiokr nzalvztr-rbrkr Farzsi x Sadiusi.

Pita Glxle Kx Jiszs Nide Kxnxmcp

Mak 8:27-30; Luk 9:18-21

¹³ Rlaszkr badr Gzlili Provins x sc tqvzdzpekr, vztrkr mz nrlarnrlc kc tqycngr taon kc Sisaria Filipae. Mzli kc tqkaputrpe-ngrbzkr, Jiszs rveam bagr kx, “?Myx kxmu nzglxkr leplz ninge, Mrlx Leplz?” ¹⁴ Rpibzkr kx, “Kzdung leplz nzrpilr kx nim Jon Kxawrkxtr yzluope-mop mz nzbngr. X kzdung nzrpilr kx nim profet Elaeja o profet Jeremaea yzluope-mop Heven. ¹⁵ X kzdu-kzng nzrpilr kx nim dq profet kxmyalz kc bqnc.” ¹⁶ Zbz rpimle bagr kx, “?A’ nimu, myx kxmu nzglx-krnamu ninge?” ¹⁷ Rpibz Saemon Pita kx, “Nim Mrlx Gct kc tqlu alo, x Mevalu kc tqmcpkle.” ¹⁸ Rpibz Jiszs bade kx, “Saemon, mrlx Jon, sa namrlzbz bam, murde Trtenge kc Heven nide kc tqrkabz drtwr lc bam. A’ trvzpxpuu mz ncblo. X mz nzmu-krde lcde, pibo bam kx nim Pita. Drtqm drtwr ngrde rplz. X natqm lc apule nou rplz murde sa na-axvctr-ngrmc leplz mz lrmakxtr. ¹⁹ X rblxbz mz zmatq ngr nzbngr nzlolvz-amqngi-krde leplz kcng tzlxngitilr natq angidr lc. X sa nakabo bam ki mz nzlvxpx-krm naonrx ngr Heven mz nzprtrkr leplz elr. X mz nzwztr-krme bange, Gct kc Heven sa natubz mz nibrm mz nzesz’tikzkr drtwrde mz da kcng tqrpwa’-ngrn x da kcng tqrlrpx-ngrn mz nrlc ka.” ²⁰ Zbz Jiszs rngidrlvz-ngrmle bagr kx trkrlzkapzle mzli r nzyapwxtine-krbzkr mz leplz nzngini-krde Kxnxmcp ne Gct. †

* 16:4 Jona 1:17—2:10; Matiu 12:40 * 16:4 Nzngqbapxkr besilr Jona ngi nzycmne-ebzpxngr nztulz-kr-mop Jiszs mz nzbnz-krde. X nztulz-mou-krp Jiszs ngi rkx kx vzpxm mz Gct. * 16:14

2 King 2:1-12; Malakai 4:5; Matiu 14:1-2; Mak 6:14-15; Luk 9:7-8; Nzaelwapxngr 11:3-6 * 16:18

Efisz 2:20-22 † 16:20 16:18-19 Zmatq lc kabz Jiszs mz aposol [Matiu 18:18] x leplz amrlx kcng tzaxvctrpzng mz nzlxngiti-krdr nide. [Matiu 28:20] Mc kz Jon 20:23, Asaea 22:22 x Nzaelwapxngr 3:7.

*Jiszs Ycmnetr-ngrde Nzbz-krde X Kxnamu Nzrvz-nqblqngr Nide
Mak 8:31—9:1; Luk 9:22-27*

²¹ Abzo mzli lcde, Jiszs alvztr-ngrde nigr da kx naprtzbz bade. Rpile kx navz Jerusalem mrkc na-aetqti-ngrbz drtqde mz da kxkqluting. X kxnzetung r lr Jiu sa napxtpx-ngrdr nide, krlcng lrtzlvz ngrdr, kxnzetu rdr pris, x kxnzalvztrng mz Lou sc Mosis. X sa nanibqlr nide. A' mz zbzq kratq mz nibr nzbz-krde, sc tqlupe-mop. ²² A' katxpym Pita bagr x sc tqvzmitxpxpele rrlu kxipiz. X rpibzle bade kx, "Bzkq kxmu nzycmne-krm lc. Murde da kxmule lc nzmu trnawaisr-ngrpqngqu!" ²³ A' Jiszs lxlvrbz x sc tqpnanatipele Pita. Rpibzle kx, "Esopx Pita! Bzkq apume bange Setzn, mz nzrpwa'-krme bange nzvz-nqblq-krnge me pnz drtwr Gct. Murde nzrkrlz-krm vz-nqblqle drtwr leplz." ²⁴ Zbz Jiszs rpimle bagr kx, "Doa kx navz-nqblq-angidrl ninge, narlrpx-lzbq mz nzaetq-ngrbz drtqde. X naesablqtile me pnz drtwrde esz'-krde, x bzkq axtxbzle nzo-zli-krde lrpzki rnge. [†]

²⁵ Murde doa kx otr-zvzngr drtwrde nzlu-krde, sa namale-lvile nzlungr kxboi. A' doa kx yrlqtxole nzlu-krde murde vz-nqblqle ninge, sa naprtr mz nzlungr kxboi. ²⁶ Mane nznginingr bcnyr mz nrlc ka x amrbrtxtrle nzlu-krde mz nrlc kc navzm. Murde trpnzngm da mz nrlc ka kx takitrde nzxpepxngr nzlungr kxboi. ²⁷ Murde ninge, Mrlx Leplz, mzli trnabou i x ninge kc tqyzlupemc mz nzvzmi-krmc enjrl kxnztrng mz zluli r Trtenge. X *mzli lcde, nzayzlu-krbo da mz doa navz-nqblqle da kx aleleng mz nrlc ka.* ²⁸ A' da angidrtx lc napibo bamu. Kzdung nimu sa nalubeng mzli kc ninge, Mrlx Leplz na-aelwapx-ngrne zmatq rnge mz nzvectr-krmc leplz bange mz nzngini-krnge King rdr." [§]

17

*Nrkrdrdq Jiszs Tekqtr-lzbq
Mak 9:2-13; Luk 9:28-36*

¹ Mz nibr zbzq kcng esz'mz, Jiszs vzmile Pita, Jemes x mzlede Jon, x sc tzvzdzpeng mz kzdq newz kxetu mz nzmnc-krdr esz'-krdr. ² Mzli lcpwz, ncblo kcng nztqng nzobqbzng nrkrdrdq Jiszs tekqtr-lzbqpe mz zluli. X mzte nzpnapr-krde apule nepi, x lrpz scde prkitxpxpe apule zyzl. ³ Zbz nzmcrl Mosis nidr mz Elaeja, profet kcng bqnc, nzycmne-krdr badr Jiszs. ⁴ Zbz sc tqrpipebz Pita mz Jiszs kx, "Kxetu, mrlztx angidr nzmnc-krgu mrka. Mwx nawztibo du matelq natq, nangi nyzm dq, nangi nyz dq Mosis, x nangi nyz dq Elaeja."

⁵ Mzli kc tqycmnebe-ngrde, kzdq dcbl aelwatxpx-lzbqng x akqlvztxde nidr zmyo ngrde. Natq Gct vzpxm mz dcbl kc, mz nzrpi-krbzle badr kx, "Krlc mrlxnge Kxnmrlzti. Abrtzlvz-angidrx nide. Lalztqbzmu bade!" *

* **16:24** Luk 14:27 † **16:24** 16:23 Na-avzo-lzbqku mz nzalvztr-krgu leplz. Murde ma tqapuku Pita mz nzrpi-krde natq Gct mz kzdq mzli x nzrpi-krde natq Setzn mz kzdq kz mzli. 16:24 Jiszs pi-angidrl kx, "Naglqle kros ngrde." Kros drtwr ngrde nzaetqtingr drtq mz nzbzng. Mc kz Matiu 11:38. * **16:26** Sam 49:7-9 * **16:27** Sam 62:12; Matiu 25:31; Rom 2:6 § **16:28** Kxnzetung mz Nzryrngrkxtr, mz drtwrdr natq lc ngidatipe mz kzdq mzli lcng tq: mz mzli r nztekqtr-lzbqkz nrkrdrdq Jiszs, [Matiu 17:1-13] mz mzli r ntulz-krmle mz nzbzng, [Matiu 28:1-10] o mz mzli r nzvzo-krm Mqngrkxtr mz nibr nzvdzkr Jiszs Heven. [Aposol 1:6-11] Murde mz mzli lcng tq, Jiszs vectrple leplz bade mz nzlxngiti-krdr nide. * **17:5** Natq Gct lc drtwr ngrde kx nzalvztrkr Jiszs myaszpxle Lou sc Mosis x nzryrkr profet amrlx. [Sam 2:7; Asaea 42:1; Matiu 3:17; Mak 1:11; Luk 3:22; Lou Kcpwz 18:15; 2 Pita 1:17-18]

⁶ Kx nzzlrlrle kc, nzmwxlr-zlwzng x sc tzlaopeng mz drtc'. ⁷ Zbz Jisszs vzm, x bxtrpzle nrkrdrqdr, x rpibzle kx, "Tulzamu. Bzkq mwxlramu." ⁸ X nzobq-mopwzng, Jisszs kc tqutxpepwz mrkc esz'-krde.

⁹ Mzli kc tzvzneobe-ngrmlr mz newz kc, rpibz Jisszs badr kx, "Bzkq pinenamu nike mcamu nakrlz-zpxbzle nztulz-krmc ninge Mrlx Leplz, mz nzbz-krnge." ¹⁰ Zbz ncblo kc nztqng sc tzrpipebzlr bade kx, "?Nike kxnxalvztrng mz Lou sc Mosis tzrpi-ngrdr kx profet Elaeja nayzluo-kaip mrka mz nrlc x Kxnxmcpk kc tqvz-atem?" ¹¹ Jisszs ayzlu-ngrbzle natqdr kx, "Kxnxalvztrng nztubq-angidrng mz nzrpi-krdr kx Elaeja navz-kaip mz nzoliqti-krde da amrlx. ¹² A' napibo bamu kx ncblo kc tqngi Elaeja vzpem. A' leplz trnzglxlr nide x nzatrkti-kzlr nide, da kc tzwai nzatrkti-krdr Elaeja kc bqnc. X mz nqmq lcpwz sa na-aetq-kzpplr drtqnge." ¹³ Zbz kztegrng nardr kc tqyrrplatr-atebz kx krlc tqycmnetr-ngrde Jon Kxawrkxtr.
†

Rblxbz Mz Ncblo Neng Jisszs Nzrmaszlrpx-krdr Drka'

Mak 9:14-29; Luk 9:37-43

¹⁴ Mzli kc Jisszs badr Pita, Jemes x Jon tzkrlz-ngrmlr mrkc tqmnc-ngrgr badr zbo ngr leplz kcng, kzdq ncblo vzm mz Jisszs x yrngzobz bade.

¹⁵ Rpibzle kx, "Kxetu, naokatrpzme mrlxnge. Murde dwatibz drka'lz x aetq-zlwzbzle drtqde mz nzglqkr nimz le. X zvz nztalz-krde mz nyr x nztaozvz-krde kz mz lue kxvo. ¹⁶ Vzmimc mz ncblo nemqng mz nzamrlz-krbzlr nide, a' trnzyatrpwzu." ¹⁷ Jisszs rpimle kx, "?Nike nawai-mopwc' bamu? Nzmcn-krbo bamu mzli boipe! A' trkrlzkalamu nzrlxngitingr x narmu kc tqmqngibe. Vzmimamu doa la bange." ¹⁸ Zbz sc tqpnanatipele drka' kc, x sc tqpipebzle nzprszpx-krde doa kc. X mzli kcpwz sc tqprszpxpele doa kc x sc tqmrlzpe mou.

¹⁹ Zbz mzli kc tqmncpe-ngrgr esz'-krgr badr Jisszs, veabzkr bade kx, "?Nike tqtblxti-ngrde nigr nzrmaszlrpxngr drka' lc?" ²⁰ Jisszs ayzlu-ngrmle natqgr kx, "Da angidr lc napibo bamu. Rblxbz bamu murde nzlxngiti-krmu Gct topwz-zlwzbe. A' kxmule-esz' nzlxngiti-krmu Gct topwz apule nztopwzkr rtq nra seri, doa kxesz' mz nimu krlzle nzrpi-ngrbz mz kzdq newz kx, 'Dwasz mrla x vzki mrkc,' x Gct sa nabatrpzle nzvz-krde. Nzmu nzrlxngiti-krmu nakxmule lc trpnzngr da kx narblxbz bamu. ²¹ A' drka' kxmule la nzmaszlrpx-ngrp wz mz nzkrka'ngr vzmi nzaxtxngr dakxnxng."
‡

Nzwrde Krali Kx Ycmnetrngr Jisszs Nzbz-krde

Mak 9:30-32; Luk 9:43-45

²² Zbz yrlwr-lxblr-moukr badr Gzlili Provins. X Jisszs sc tqrpipemle bagr kx, "Ninge Mrlx Leplz sa na-aprcbz mz zmatq ngr kxnxmwati drtwrdr ninge. ²³ Nanibqlr ninge, a' mz zbq kratq mz nibr nzbz-krnge, ninge kc tzatulzpe-mop mz nzlungr." Zbz drtwrgr kc tqvz-zlwzpe.

Jisszs Xpele Takes Ngr Mangr-nzangiongr

^{§ 17:10} Malakai 4:5 ^{† 17:13} Jon Kxawrkxtr ngi ncblo kc tqngi Elaeja, mz nzale-krde nzwzngr kcpwz, mz nzrngisc-krde zmatq kcpwz, x mz nzmcn-krde kz lzke. X da kc tzwai Kwin Jesebel rpile nanibqle Elaeja, Kwin Herodizs kxrngi-batr-kzpz nzrnibqngr Jon. Mz nzmu-krde lc, nzmcnkr Elaeja ngi rkx ngr da kx naprtzbz mz Jon mz nibrde. [1 King 19:1-18; 21:23-24; Malakai 4:5-6; Mak 7:11-13] ^{‡ 17:21} Mz kzduung nzryrngr kcng pnz ngalrde kc 17:21 trnzyrou. Nakrlzku kx kzduung drka' nzxplr-krdr nzmyaszpxlr kzduung kz drka'. Mzli kx drka' trprszpx-ngrdeu ncblo mz drtq Jisszs, nakrka'ku, navzmi nzaxtx-ngrbz dakxnxng mz nzkrka'ngr, nakrlz-zpxbzle mzli kx prszpx-ngrdele.

²⁴ Mzli kc tqkaputr-ngrmgrp badr mz taon Kzpznizm, kzdung ncblo kcng tzatakqting takes ngr Mangr-nzangiongr Yawe Jerusalem nzvzbzng mz Pita. X nzrpibzlr kx, “?Myx kxmule, kxakrlz ngrmu xpe kz takes ngr Mangr-nzangiongr?” ²⁵ Pita ayzlu-ngrbzle natqdr kx, “Eu, xpe kz.” Mzli kc Pita tqvztr-ngrbzle brma, Jiszs sc tqycmnepe-kaipz bade. Rpibzle kx, “?Saemon, myx kxmu nzkrlz-krmle? ?King nzataktibz trau mz mrlxdrng o mz leplz kcng tzmncbzng badr?” ²⁶ Pita ayzlu-ngrbzle natqde kx, “Kxnzmncbzng mz king.” Rpibz Jiszs kx, “Mz nzmu-krde lcde, mrlxng king trnzxpelru takes. §

²⁷ Kxmule-esz', a' naxpeki, murde ma tqbatrpzki nxngitr-krdrle. Vzo mz dxbu x rtcpxngr trmrtao scm mz nzmwangr. Mz nao nc kc naveclz-ayrngrme, sa namcq trau kx natakitrde nxpex-krm takes scgi. Twz x kabz badr.”

18

Bzkq Rpwa'-ngrn Doa Kx Nalxngitile Gct

Mak 9:33-37, 42-50; Luk 9:46-48; 17:1-2; 15:3-7

¹ Kzdq zbz vzmgr mz Jiszs, sc tqveapebzkr bade kx, “?Neke myalz-zlwzbz mz leplz amrlx kx nzrlr-lzbq-ngrbzng mz Gct?” ² Zbz vzmim Jiszs kzdq doa kxtopwz x atumle mz mzligr. ³ X sc tqrpipemle bagr kx, “Nakrlzamu kx trpnzngr nzmnclz-krbzmu mz Gct mz nzngini-krde King rmu nzmu kx trtekqtrwamuu nqmq krmu mz nzapu-krmu doa lc. ⚫ ⁴ Mz nzmu-krde lcde, mrlx kx avzo-lzbq mz nzapu-krde doa lc, nide kx myalz-zlwzbz mz leplz amrlx kx nzrlr-lzbq-ngrbzng mz Gct. ⁵ Mrlx kx vz-nqqlqle ninge mz nzabrtzlvz-krde doa kxtopwz kxmule lc mz drtqng, abrtzlvz-kzle ninge.”

⁶⁻⁷ “A' aclvetio-lzbq murde ma tqatrkatiq nzrlxngitikr doa nengeng. Murde Gct sa na-ayrplapx-zlwzle ncblo kx ataole mz alwx doa kxpobe mz nzrlxngitingr. Mwx mrlz nzbbz-kai-krde mz nrlc ka, mzli ka tratrkatikagrde nzrlxngitikr doa kxmule lcng. Murde nzayrplapxngr nide na-apule mrlx kx nzpetrpz rplz kxetu mz drtwrde x nzrtcongr me boongr prla. Da kcng tzataolr leplz mz alwx sa nakaputrp. Kxmule-esz', a' agrmplz mrlx kx ataole kzdq kz doa mz alwx! Murde kalr Gct sa na-ayrplapx-aleole nide mz alwx lc mz Hxl. ⁸⁻⁹ Mz nzmu-krde lcde, aclvetio-lzbq kz. Bzkq rlr-ngrbzme mz alwx nzaclev-krde nim. Mz mzli r nzatalzngr arlapx-lzbq. X katpx-lzbqm mz nzatalzngr kx batrpzle nztao-zvz-krm. Murde nzwz-kato-krm mz nzmnccngr kxtubq mzli ka, x nzmncc-zvz-krm Heven kalr, myaszpx-zlwzle nzaxtx-krbzme nzrlxngiti-krm mzli ka, x nzmncc-zvz-krm mz Hxl kalr.” ⚫

¹⁰ Rpi-mop Jiszs bagr kx, “Bzkq obqszoamu kzdq doa kxtopwz kxmule lc, murde nzmyapxbzng mz nzobqkr Gct Trtenge. X enjrl kcng tzaclevelr nidr nzkrlzlr nzrlwa-ngrbz bade mrkc tzmnc-ngrbzlr bade Heven. ¹¹ Ning Mrlx Leplz vz-ngrmc mz nrlc mz nzrtangrti-krnge x nzarlapx-krnge doa kxnxmrbrng.” *

¹² Zbz yapwxtibz Jiszs nzycmne-ebzpxngr lc, mz nzaelwapx-krbzle kx Gct yc mz drtwrde doa kcng tzmnc-mrbrng. Rpibzle kx, “?Nzmu kzdq nimu kx nede sip trtqki-esz' x mrbr kc esz', nike na-alele? Nzmu amnctxde krkcng

§ **17:26** Trau ngr takes kc ngi dalr nzaclevngr Mangr-nzangiongr. Mz yiz kang kqlu, ncblo ngr Jiu amrlx nzxpelr trau kx takitrde nzrwztingr mz zbz qxli. A' kx trnaxpelru takes nidr seleng: kxnxrlxng da, pris, x kxnxwztr-zvzbzng mz Gct, da kc tqwai Jiszs. Jiszs trtakitrdeu nzxpe-krde takes mz drtwr lcde seng li: Nide ncblo kxwztrpz mz Gct x nide mrlx Gct kc tqngi nyzde Mangr-nzangiongr.

* **18:3** Mak 10:15; Luk 18:17 ⚫ **18:8-9** Matiu 5:29-30 * **18:11** Mz kzdung nzryrngr kcng pnz trnzyrolru ngalrde 11. A' yc mz Luk 19:10.

nzpnu-rpwxmlz-nrade-rpwxmlz mz nra, me namnc-zpwx-ngrdr. X sc tqvzpe mz nzrtangrti-karde krkc tqvztxne. ¹³ X mz nzmc-krdle, nzabrtzlvz-krdle myaszpxle nzabrtzlvz-karde krkcng nzpnu-rpwxmlz-nrade-rpwxmlz tzmnc-zpwxng. ¹⁴ X mz nqmq lcpwz, Trtemu kc Heven trsutiu drtwrde kzdq doa kxtopwz kxmule lc nzmrbr-karde x nzprtr-karde mz Hxl.”

Nztaokr Kxnzrlxngiting Mz Alwx

¹⁵ Rpi-mop Jiszs bagr kx, “Nzmu kzdq kztem kxrlxngiti nataole mz alwx, vz-kaipz x pibz bade nzvz-rbr-karde. A' bzkq nzkrltibz nzycmneti-krbzme alwx ngrde. Murde nzmu kx tqlxngitibzle nzycmne-krbzme x tekqtrle nqmq nr drtwrde, sa namnclz-mopwz mz Gct. ¹⁶ A' nzmu kx trtekqtrleu nqmq nr drtwrde, vzbzmu du badr leplz naesz' o nali mz nzycmne-kr-mopwzmu bade. Mz nzmu-karde lc, vz-nqblqamu nzalvztrkr Nzryrngrkxtr kc tqrpile kx, ‘Bzkq rpiq kx doa vz-rbrpe, a' mz nzycmne-krbzme natubz du mz nibrm leplz naesz' o nali kx nzmc-kzlr nzvz-rbr-karde.’ ¹⁷ A' nzmu kx tqvz-zvzle trnzlalztq-krpwzleu bamu, pibzmu da amrlx mz lrmakxtr. X rlr-ngrbzmu mz mq kxnzetu ngr lrmakxtr mz nzycmne-krbzlr bade. Nzmu kx tqvz-zvzle trnztekqtr-krdreu nqmq nr drtwrde, nimu lrmakxtr na-aprtxpxpeamu nide murde apule kxmnc-mrbr.”

¹⁸ “Napibo bamu kx Gct kc Heven sa natubz mz nibrmu mz nzesz'ti-kzkr drtwrde mz da kcng tqrpwa'-ngrnamu x da kcng tqrlrpx-ngrnamu mz nzokatr-krmu leplz mz nrlc ka. ¹⁹ X napi-mopwc' bamu kx mzli kznike krka'ngr kzdu nimu kxli o kxtq mz nzesz'tikr drtwrmu kx da kx rlxtibzmu mz Trtenge vz-nqblq-zpwxle me pnz drtwrde, sa nakabzle bamu. ²⁰ Murde mzli lc tzmnctr-lxblr-ngrdr mz drtqnge, ninge la tqmnckr badr mz nzmailz-krnge nidr.”

Nzycmne-ebzpxngr Kxnzawz Kx Px-ngrde Nzipq-krde Kztede

²¹ Zbz Pita vzm mz Jiszs, rpibzle kx, “?Kxetu, nzwrde natqlvr kx naipq-ngrne kztenge kx alem da kxtrka bange? ?Nzwrde kxrlimz mrlz?” ²² Ayzlu-ngrbz Jiszs natqde kx, “Trtingr. Murde nzipq-krm kztem trnaesakiu, kxmule-esz' krlzbzle nzwrde kx nzkqlu-zlwzng, a' sc tqvz ye. ²³ Murde nqmq kr Gct mz nzaclve-karde leplz nedeng apule nzycmne-ebzpxngr lc nayapwxtibo.

“Kzdq mzli kzdq kc king rpile narlwz-lxblrle kaon scdr kxnzawz nedeng. ²⁴ Mzli kc tqabzo-ngrdele, nzvzmim kzdq nidr kc tqkaontibzle bade dola kxnyrmz. ²⁵ A' kxnzawz lc tryatrepwzu nxzpe-krde kaon lc Murde trpnzngr kx rtakitr nrtekqtrngr. Zbz king kc sc tqpipebzle mz kxnzawz nedeng kx ncblo kc na-amwatx x navzmitr olvz rde x doa nedeng mz nzngini-kz-krdr kxnzawz-nrbalqng. X na-amwa kz dztudrung amrlx naxpengr kzdu kz kaon kcng. ²⁶ A' ncblo kc tqrweobz zpr mz king x sc tqyrnititrpebzle bade kx, ‘Krlzu ena, a' kam du bange mzli mz nxzpepx-krbo kaon kcng amrlx!’ ²⁷ Zbz sc tqypengr drtwr king kc nide, tqipqpele nide x katxde kaon kc. X sc tqqlrpe-ngrbzle nzvz-krde.

²⁸ “A' ncblo kc kx vzle, rmctipele kzdq kz kxnzwzng badr kx kaontibzle bade trtqki r dola (100). Lolvzbqbzle drtwrde x sc tqamwxlrpele nide mz nqrpi-krbzle kx, ‘Ka-dwzlr-ngrm trau kc tqkaontime!’ ²⁹ A' ncblo kc rweobz zpr bade x sc tqyrnititrpebzle bade kx, ‘Krlzu ena, a' kam du bange mzli mz nxzpepx-krbo kaon kc atwrnrngr!’ ³⁰ A' trlalztqpwzu bade, x adwatrle

^{18:16} Lou Kcpwz 19:15; 2 Korint 13:1; 1 Timoti 5:19 ^{18:18} Matiu 16:19; Jon 20:23 ^{18:21} Luk 17:3-4

ncblo kc mz presin, namncpxm mrlcde krlzbzle mzli kx nzxpepxngr kaon scde. †

³¹ Kx nzmcpz kxnzwzng badr da lc, drtwrdr vztv zlwz. Nzvzbzng mz king, sc tzrlwape-ngrbzlr da amrlx bade. ³² Zbz sc tqkqlepe king kc kxnzawz kc. X rpibzle bade kx, ‘Ni-zlwzm kxnzawz kxdrka’ngr. Katpxbo kaon scm amrlx murde yrnititrpe’ bange. ³³ X takitrde nzyc-kzkr drtwrm kztem x naipqq nide, da kc tqwaisr-ngrne nim. A’ tryc-ngru drtwrm nide.’ ³⁴ King kc drtwrde ngyatx zlwz, sc tqpipebzle mz kxnzaclveng mz presin kx navzmil ncblo kc x na-aetq-zvzbzlr drtqde murde tryatrpepwzu nzxpe-krde kaon scde.”

³⁵ X rpi-mop Jiszs bagr kx, “Mz nqmq lcpwz, Trtenge kc Heven sa naayrplapx-alole mrlx kx tripq-angidrleu kztede mz nabzde mz da kxtrka kcng tqalebzle bade.”

19

Jiszs Alvztr-ngrde Nzyrlzngr X Nzaxtxngr Krnalz

Mak 10:1-12

¹ Jiszs kx yrkrpxbz kc nzalvztr-krde, sc tqrlaszpekr badr Gzlili Provins x tqvztrpekr Judiz Provins mz nrlar LueJodzn kc tqprkilzm nepi. ² Zbo ngr leplz kxetu nzvz-nqblqmlr nigr mrlcde, x amrlzbzle kztedr kxnzyagoxng.

³ Kzdung Farzsi nzvzmqng mz Jiszs nzabzlr nzatalzngr nide mz kzdung da kxvz-rbr. Nzrpibzlr bade kx, “?Nzpnzkr drtwrm le, Lou sc Gct rlrpxngrde ncblo nzaxtx-krde olvz rde mz nzvz-nqblq-krde drtwrde esz'-krde?”

⁴ Jiszs ayzlu-ngrbzle natqdr kx, “Gct aelwapx-ngrde me pnz drtwrde mzli kc tqwz-ngrde nrlc. Murde rlwxamu mz Nzryrngrkxtr kx mzli kc ayrrnrngr ‘Gct wz-ngrde ncblo esz’ x olvz esz’ kx namnctr-lxblrng. ⁵ Delc mzli kc tzetupe-ngrdr, nayrlzng. X nzamatq-lzbq-krdr namyaszpxle nzamatq-krdr kxngnidrung. X ncblo namnctr-amqngipebz mz olvz rde. Murde doa lcng li nznginipedr nrkrdrdtq x leplz kxesz.’” ⁶ X napibo bamu kx trnzlipeung, a’ nznginipedr leplz kxesz’. Mz nzmu-krde lcde, trpnzng leplz kx takitrde nzakipx-krde krkcng tqaxvctrpeng Gct mz nzyrlzngr.” ⁷ Zbz Farzsi nzveabzng bade kx, “?A’ memule tqrlrpxngr Mosis le mz nzsri-krde kx nzmu ncblo nayrbzle dq letz mz olvz rde napibzle kx pxtxpe-ngrde nide x sc tqatwzlr-ate-ngrde nide?” ⁸ Rpibz Jiszs kx, “Mosis yr-ngrde natq lc murde nar leplz mqngi. A’ trkxmuleu lc mzli kc ayrrnrngr tqwzng Gct leplz. ⁹ Mzli kc ncblo tzaki-lzbq-ngrdr mz olvz rde kx tr-rmwimi ncblo kzble, x yrlzti-moule kc olvz kzble, olvz krali lc trngiu olvz rde angidr. Murde mz nzobqkr Gct, sa tqyrlzibele olvz rde kc ayrrnrngr. Mz nzmwimi-krde olvz krali lc, ayzprttxde nzesalz-krbzle kc mz olvz rde kc ayrrnrngr mz nzyrlzngr mz mz Gct.”

¹⁰ Zbz rpibzkr bade kx, “Kx tqmule lcde, rlrpxngr Gct leplz nzaki-lzbq-krdr mz da lc esz’txu, mwx takitrde bzkq nzyrlzng.” ¹¹ Jiszs ayzlu-ngrmle natqgr kx, “Leplz trnzkqluang kx mrlzbz badr trnzyrlz-krdr, a’ ngi txpwz krkcng tqokatrng Gct mz nzmnnc-nqblq-krdr nqmq lc. ¹² Mz ncblo kcng tqrlxbz badr nzrmwimi-krdr olvz, kzdung nidr nrkrdrqdr trmrlzu mzli kc mztr tzmc-ngrdr. X kzdung nidr nrkrdrqdr nzvzpx, murde narblxbz badr nzrmwimi-krdr olvz. X kzdung leplz nzmcpxlr trnzyrlz-krdr murde

† **18:30** Mzli kc pnz ncblo kx trxpeleu kaon scde, nzadwatr mz presin, namncpxm elr nakrlzbzle mzli kx kztedeng nzxpepx-ngrbzlr kaon scde. Nzmu trnaxpepwzru le, mnctpx-zvzm mz presin, x bzpxm elr. Kxpresin kxmule lc mnc-xgle-txpwlzle kxngnideng mz nzapu-krdr nide. ^{19:5} Nou 1:27; 2:24; 5:2; Mak 10:7-8; Efiszs 5:31; 1 Korint 6:16 ^{19:7} Lou Kcpwz 24:1-4

nawztxtrpwzng mz Gct. X leplz kcng tzkrzlr nzmnnc-nqblq-krdr nqmq lc, nzabrtzlvzlr nqmq lc murde vzpxm mz Gct.”

*Doa Kx Nzlxngitilr Gct Mz Nzngini-krde King Rdr
Mak 10:13-31; Luk 18:15-30*

¹³ Zbz kzdung leplz nzvzmimlr doa kxnztopwzng mz Jiszs mz nzmaletr-krbzle nrkrdrtdqr x nzkrka'-krbzle badr. A' lclvzbzkr. ¹⁴ Zbz Jiszs rpimle bagr kx, “Bzkq rpwa'-ngrbzmu mz doa lang tztopwzng nzvz-krmlr bange. Murde leplz kxnzmull lcng nzlxngitilr Gct mz nzngini-krde King rdr.” ¹⁵ Mz nibr nzyrlqo-krbzle mqde badr mz nzamrlz-krde nidr, sc tqrlaszpele mrkc.

¹⁶ Mzli lc kzdq ncblo vzm mz Jiszs, rpibzle kx, “?Kxakrlz, da kxmrlz kznike na-alex natwz-ngrne nzlungr kxboi?” ¹⁷ Jiszs ayzlu-ngrbzle natqde kx, “?Nike tqveati-ngrme bange da kxmrlz? Murde trpnzngr kxmrlz, a' ngi txpwz Gct esz'-krde. Mz nzprtr-krm mz nzlungr kxboi, navz-nqblqq natq kcng tqkapx Gct.” ¹⁸ Ncblo lc vea-mopwz kx, “?Natq kznikeng?” Rpibz Jiszs kx, “Krlcde seleng: ‘Bzkq kx narnibq. Bzkq kx narmwimi doa kxtrngiu kernalzde. Bzkq kx napna da. Bzkq kx narpokiati leplz. ¹⁹ Amrlue zvz trtem x lxem. X kzdung mou. X mrlzti kztemqng da kc tqwaiq nzmrlzti-lzbq-krm.’”

❖ ²⁰ Ncblo lc rpibzle bade kx, “Vz-nqblq-angidrx natq lcng amrlx. A' mwxttraktirdeu. ?Nike mou na-alex narlapx-ngrne?” ²¹ Rpibz Jiszs bade kx, “Kx tqrpiq natubq-esz'ngrn mz nzobqkr Gct, amwa mclrm amrlx x kabz trau rde mz leplz kx trpnzngr scdr. Nzmu na-aleq da lc, nzrngiba-krm sa namyalz mou mrkc Heven. Zbz vzm x vz-nqblqm ninge.” ²² A' ncblo lc drtqde tqbrpe, kx xlrbzle kc natq Jiszs. Sc tqvzpe, drtwrde vztx zlwz. Murde nzrngiba-krde etu x trsutiu drtwrde nzalvetx-krdele mz nzvz-nqblq-krde Jiszs.

²³ Zbz Jiszs rpimle bagr kx, “Da angidrtx lc napibo bamu. Rblxtx-atwrnr-ngrbz mz kxnzrngiscng nzmnclz-krbzlr mz Gct! ²⁴ Napi-mopwc' bamu kx kamel trkrlzleu nzdwatr-krde mrkc tqmrplxng nidil. X nzrblxkr kxnzrngiscng nzmnclz-krbzlr mz Gct myaszpxle da lc.” ²⁵ Kx xlrbzkr natq lc kctitpxkr. Zbz sc tqrpipebzkr kx, “E kx tqmule lcde, trpengr kx narlapx!”*

²⁶ Jiszs mzte aprtxmle bagr x rpimle bagr kx, “Rblxbz mz ncblo, a' tr-rblxpwzu mz Gct. Murde trpnzngr da kx rblxbz bade.” ²⁷ Zbz rpibz Pita bade kx, “Rlaszpekr dztugr amrlx mz nzvz-nqblq-krgr nim. ?A' nike natwzkr kalr?”

²⁸ Jiszs rpimle bagr kx, “Nakrlzamu kx mz mzli kxmrna kc navzm, sa nangininge King mz nwxbuo-krmc mz tron nyznge kxmatq. X nimu lcng tqvz-nqblq-angidramu ninge, sa na-apu-kzamu king mz nwxbuo-krmamu mz tron mz nzaclve-krmu nqvi lr ncblo kcng Israel nzpnu-esz'-nrade-li (12). ²⁹ Murde mrlx kx rlaszpxle ma nyzde, o mzledeng, o inwedeng, o lxedo, o trtede, o doa kxnztopwz nedeng, o drtc' nyzdeng mz nzvz-nqblq-krde ninge, Gct sa naxpe-moule nide nzwrde nangi trtqki lxblr (100) mz nikeng rlaszpxle. X sa natwz-kzle nzlungr kxboi. ³⁰ Mzli lc, kzdung leplz kxnzetung mz nrlc ka, sa nangi leplz txneng mz nrlc kc navzm. X kzdung leplz txneng mz nrlc ka, sa nanginidr kxnzetung mz nrlc kc navzm.”

20

Nzycmne-ebzpxngr Ncblo Kcng Tzwzng Mz Nrlanc

❖ ^{19:19} Nzrlaszngr 20:12-16; Lou Kcpwz 5:16-20; Livae 19:18; Mak 12:31; Luk 10:27; Galesia 5:14

* ^{19:25} Mz mzli nyz Jiszs, leplz nzpnzkr drtwrdr le nzrngisckr ncblo da vzpxm mz nzamrlzkr Gct nide, nzmu leplz kxnzrngiscng kx trnaprtrlu Heven e trpengr kx naprtr elr. A' drtwr lc vz-rbr.

¹ Rpi-mop Jiszs bagr kx, “Nzprtrkr leplz mz nzlungr kxboi apule nzycmne-ebzpxngr lcde sele. Kzdq kc ncblo nydze kc nrlanc. Kzdq zbz, mzli kc mz nourla kxtopwz, vz mz nzrtangr-karde ncblo kx nawzng mz nrlanc nydze. ² Rmctile kcng ncblo mz nwztr-krbzlr bade mz zbz lc. X rpibzle badr trau kc nakabzle badr trnablepxu, a' narsakrltx-ngrpwz, krkrc trau kxesz'. Murde krkrc narnnbr mz nzxpengr leplz mzli lc. ³ Zbz mz nabz nepi kc tqrpwxmz, sc tqvzpe me nzamwangr da, sc tqrmctipele kzdung ncblo kx nzmnc-txneng. ⁴ Sc tqrpibzle badr kx, ‘Vzamu x wz-kzamu mz nrlanc nyznge. X sa nakabo bamu narnnbr kx takitrde.’ ⁵ Zbz sc tzvzpeng. X sc tqvzpe mou mz nzale-karde da kcpwz mzli kc bea x mz nabz nepi kc tqtzq. ⁶ Zbz mz nabz nepi kc tqnzlvqn, sc tqvzpe, x sc tqrmctipele kzdu-kzng ncblo kx nzmnc-txneng. Rpibzle badr kx, ‘?Memule tqmnctxne-ngrnamu mzbz ka boi?’ ⁷ Nzrpibzlr kx, ‘Trpnzng ncblo kx rpim bagr nwzng.’ Rpibzle badr kx, ‘Vz-kzamu mz nwzng mz nrlanc nyznge.’

⁸ “Zbz mzli kc nataopengr nepi, ncblo kc tqrnginyz nrlanc kc, rpibzle mz kxetu r kxszawzng kx, ‘Kqle ncblo kcng tzawzng. X xpe nidr, yzutr mz leplz kcng tzwz-belqng x nayrkpx mz krkcng tzabzo-kailr nwzng.’ ⁹ Ncblo kcng nzyutrlr nwzng mz nabz nepi kc nzlvqn nzrtwz-lxblrng trau kxesz’. ¹⁰ Mz nzmu-karde lcde, mzli kc naxpepengr krkcng tzwz-kaing, mz drtwrdr nartwzng trau kxkqlu murde nwztilr nabz nepi nzpnu-esz'-nrade-li (12). A' nztwz-kzlr trau kcpwz esz’. ¹¹ Nztwzlr trau scdr x drtwrdr kc tqcltrpebz mz kxetu r nrlanc kc. ¹² Nzrpibzlr kx, ‘Ncblo lcng nwztil-twpwzlr nabz nepi esz’. A' nigr wztikr mzbz ka atwrnrngr mz nepi. A' se tqarsakrlkrk badr mz nznka-krme bagr trau kcpwz tqkabzme badr!’ ¹³ Kx rgninyz nrlanc kc rpibzle mz kzdq nidr kx, ‘Mzlenge, trangqngutirwxu nim. Murde krkrlpeq kx natwzq trau kxesz’ mz nwz-krm mz zbz kxesz’. ¹⁴ Twz trau lc, x vzpe. Murde trpnzng scm drtwr kx yctr elr. A' suti drtwrng nznka-krbo mz leplz kcng tzwz-belqng trau kcpwz tqkabzme badr! ¹⁵ ?Myx kxmule, mz drtwrn rmrlzu nzvz-nqblq-krnge me pnz drtwrng mz nzayrbzkq-krnge trau scnge? ?Nide kc tqdobu-ngrn murde nivz lrng nzmrlz-krbzle badr?”

¹⁶ Zbz rpi-mop Jiszs bagr kx, “X nzprtrkr leplz mz nzlungr kxboi kxnamukzle lc. Murde kzdung leplz txneng mzli ka sa na-avzdzng, x kzdung leplz kxszetung mzli ka sa na-avzong.” ^{*}

Nzwrde Kratq Kx Ycmnetrngr Jiszs Nzbz-karde

Mak 10:32-34; Luk 18:31-34

¹⁷ Mzli kc tqvz-ngrgr mz lrpzki mz nzvzklz-krgr Jerusalem, Jiszs katpxmle nigr ncblo nedeng, vzkixpxkr rlu kxipz x rpimle bagr kx, ¹⁸ “Ninge Mrlx Lepz. X mzli kc nakrlztr-ngrbzku Jerusalem, sa nakaobz ninge mz mqdr kxszetu rdr pris x kxszalvztrng mz Lou sc Mosis. Zbz navzmibzlr ninge mz Kansrl x drtwrdr sa naesz'ti kx nabzx. ¹⁹ Zbz nakao-mopwzlr ninge mz mqdr lr Rom kxtrngiulJiu mz nzrnibqng Ning. X lr Rom lcng sa naxtrnga-ngrdr ninge, naviplalr ninge x natqlvztrlr ninge mz kros. A' mz zbz kratq mz nibr nzbz-krnge, ninge kc tzatulzpe-mop mz nzlungr.”

^{*} **20:8** Livae 19:13; Lou Kcpwz 24:15 [†] **20:16** Matiu 19:30; Mak 10:31; Luk 13:30 ^{*} **20:16** Be lc alvztr-ngrde kx leplz kcng amrlx navzng Heven nzxpengr nidr narsakrlr-twpwzng, krkrc nrlanc nzlungr kxboi. Krkrc da kx rka-nrbalqng Gct. A' trvzpxpuu mz nwztr-ngrbz bade mzli ka mz nrlc. Murde leplz kcng tzrlxngiting yzutr mzli kc tzngi-oblabe-ngrdr nzrtwz-krdr trnayaszpxleu krkcng nzrlxngiti-krdr tqyzutr mzli kc nabzpe-ngrdr. Kxmule-esz', a' leplz trnarsakrlr-ngru mrkc Heven. Murde Gct sa nakale da kxmrz kalr mz nzvz-nqblq-karde da kxmrz kcng tzalelr mzli ka mz nrlc.

*Doa Kx Rpile Namyalz Mz Nzobqkr Gct Nawz-nrbalqtrpz Mz Leplz Amrlx
Mak 10:35-45*

²⁰ Zbz olvz r Sebedi vzm mz Jiszs, nidr badr Jemes x Jon, mrlxde kcng li. Rweobz zpr bade x rlxtibzle da kx na-alebzle bade. ²¹ Jiszs rveabz bade kx, “?Nike suti drtwrm na-alebo bam?” Ayzlu-ngrbzle natqde kx, “Rlr-ngrbz mz mrlxng lcng li nzwxbu-krmu badr, kzdq mz nrlarm kxrtc, x kzdq kz mz nrlarm kxmc, murde nanginidr kxnzetung kxzmyapxbzng.” ²² A' rpibz Jiszs badr kx, “Trkrlz-angidrwamuu nike tqrlxtiamu! ?Nzmu rlrpx-lzbq-ngrnamu mz nzprtrngr mz nzetqkr drtq kc naprtizle ninge?” Nzayzlu-ngrbzlr natqde kx, “Eu, krlzkr nzalengr da lc!” ²³ Zbz rpibz Jiszs badr kx, “Da zpwxtx, drtqmu la naetq kz, da kc nawai nzetqkr drtqnge. A' trpnzngr scnge zmatq mz nzka-krbo me matq lcng. Murde Trtene kx rmcpwpwz krkcng nawxbuong mz tron lcng.”

²⁴ Mzli kc tqxlr-ngrbzkr da lc, drtwrgr kc tqlctrpebz badr rlilrdr. ²⁵ Zbz Jiszs sc tqkqlepemle nigr amrlx ngrgr x rpimle bagr kx, “Krlzamu kx king mz nrlc ka nzrtulrtr-ngrbzlr mz leplz nzalengr da mz nzmnclz-krbzlr badr. ²⁶ A' bzkq mz nimu. Murde mrlx kx rpile namyapxbz mz nimu mz nzaclve-krde leplz nengeng, nawztrpz bamu. ²⁷ X mrlx kx rpile nangi kxetu kxmyalz, na-avzo-lzbq x nawz-nrbalqtrpz bamu. ²⁸ Ninge Mrlx Leplz. X kxmule-esz' ninge kxetu rmu, a' vz-ngrmc mz nrlc mz nzwztr-krbo mz leplz, a' trngiu leplz kx nawztrpqng bange. X vz-ngrmc nzrlrpx-krbo nzlukrige mz nzxpepx-krbo leplz kxzqqlung mz zmatq ngr nzbzngr.”

Jiszs Amrlzle Ncblo Li Kx Mztr Mwi

Mak 10:46-52; Luk 18:35-43

²⁹ Mzli kc tqrlaszpe-mou-ngrgr badr Jeriko, nzyrkr-nqblqmlr nigr zbo ngr leplz kxetu. ³⁰ X mz nrlar lrpzki lc tqo-zlikr, nzwxbung elr ncblo li kx mztr mwi. Mzli kc tzxlrpe-ngrdr kx Jiszs sc tqvzpe mz lrpzki, sc tznepxpeng mz nzrpi-krdr kx, “Mrly Devet, nayc mz drtwrm nigr!” ³¹ A' leplz lcng nzlclvzlr nidr x nzrpbzlr namnc-lrping. A' sc tzaetunelz-zlwzlr natqdr, mz nzrpi-krdr kx, “Kxetu! Mrly Devet, nayc mz drtwrm nigr!” ³² Jiszs kc tqtupe, tqkqlepele ncblo kcng li, rpibzle kx, “?Nike suti drtwrmu na-alebo bamu?” ³³ Nzrpbzlr kx, “Kxetu, naobq-moukr.” ³⁴ Jiszs yc mz drtwrde nidr x maletrpzle mztr. X mzli kcpwz mztr obqtxpx pnz. X sc tzvz-nqblqpe-kzlr nide.

21

*Sade Kx Nzprlxlvzingr Nabx Nc Paam Mz Lrpzki R Jiszs Mz Nzvztr-krde
Jerusalem*

Mak 11:1-11; Luk 19:28-40; Jon 12:12-19

¹ Zbz krlzbzkr badr Jiszs mztea Betpeji mrkc mz Newz ngr Nc Olivi. Mrlc esotrpebz Jerusalem. ² X Jiszs sc tqrpipbzle mz kzdu nigr nzling kx, “Vznamu mz mztea lcmonr tzmcpz. Mzli kc navztr-ngrbzmu, sa namcamu dq dcngki nidr mz neide, nzatolvangr mz nqvi. Yokaepxamu nqvi lrdr x vzmimamu. ³ Nzmu kx tzrpibz kzdu leplz nike tqvzmi-ngrnamu dcngki lang, rpibzmu kx, ‘Suti drtwr Kxetu.’ X mzli lcpwz ncblo la sa narlr-anigrbzle bamu.”

⁴ Da lc atutrele nzrpikr Profet kx, ⁵ “Pibz mz lr Jerusalem kx, ‘King rmu dese tqvzpem mz nrwrx, votrp mz nei dcngki.’” ⁶

⁵ 20:27 Matiu 23:11; Mak 9:35; Luk 22:25-26 ⁶ 21:5 Asaea 61:11; Sekaraea 9:9

6 Kztegrng nzvzng x sc tzalepelr da kc tqipibz Jiszs badr. **7** Nzvzmimlr dcngki kc x neide mz Jiszs, nzprlxobzlr nzkq scdr mz nibrdr, x Jiszs sc tqwxbuopem mz nei dcngki kc. **8** Kzdq zbo ngr leplz kxetu nzprlxtiolr nzkq scdr krali mz lrpzki mrkc navokipx Jiszs. X kzdung nzrplamesitipxmqng nabx nc paam, nzprlxlvzti-kzlr lrpzki. *

9 Leplz kxkqlu kcng tzrtwayzng x krkcng tzvzbzng mz nibr Jiszs, sc tzkabokatomipelr kx, “Hosana! Glqpxkr nim Mrlx Devet! *Glqpxkr Kxnzmcpx kc tqvzm mz drtq Yawe!* Ngrlvzkr Gct kc tqmyalz-esz'ngr!” *

10 Mz nzvotr-krbz Jiszs kc Jerusalem, lr mzteadau amrlx drtwrdr rvea x nzyrkr-lxblrqmng. X leplz kxszkqlung nzrpilr kx, “?Nelc krlc?” **11** Zbo ngr leplz kcng nzayzlu-ngrbzlr natqdr kx, “Krlc Jiszs, profet ngr mztea Naszret mrkc Gzlili.”

Jiszs Anyale Nzatrkatingr Mangr-nzangiongr Yawe
Mak 11:15-19; Luk 19:45-48; Jon 2:13-22

12 Jiszs vztr Mangr-nzangiongr Yawe. X sc tqmaszlrpxpe-ngrde leplz kcng tzxpeting x tzamwating dalr nzrkangr blz. X alzngubzle tebol nydzr lr Jiu kcng tztekqtrpzlr trau r mrkzbleng mz trau r Mangr-nzangiongr. X alzngu-kzpze da kx nzwxbulvzo leplz kcng tzamwang nran kx nangi blz.

13 Rpibzle mz leplz kcng tzmncng elr kx, “Nzyro mz Nzryrngrkxtr rpi Gct kx, ‘*Ma nyznge nangi ma ngr nzkrka'kr leplz.*’” * A' apusr-ngrnamule me nzamwangr da kcng tqangqnguti-lzbq-ngrnamul!” *

14 Zbz leplz kxkqlu kcng mztr tqmwiti x kxnvz-tengineng nzvzbzng bade Mangr-nzangiongr, x sc tqamrlzpebzle nrkrdrtqdr. **15** A' kxszetu rdr pris x kxszalvztrng mz Lou sc Mosis drtwrdr ngyatx zlwz mzli kc tzmc-ngrdr da kcng amrlx tqmrlzting tqalele. X drtwrdr lc, mzli kc tzxlr-ngrdr doa kxsztopwzng mrkc Mangr-nzangiongr mz natqdr nztu-krde mz nqrpi-krdr kx, “Hosana! Glqpxkr nim, kx Mrlx Devet!” **16** Nzveatibzlr mz Jiszs kx, “?Xlr-kzq da kc tqvz-rbr tzpilr?” Ayzlu-ngrbz Jiszs natqdr kx, “Eu. A' trvz-rbru. Murde rlwx-zvzamu mz Nzryrngrkxtr kx, ‘*Gct, mz nzvz-nqblq-krde me pnz drtwrm, doa kxsztopwzng nzglqlzlr nim.*’” *

17 Sc tqrlaszpekr nidr mrkc Jerusalem, nigr badr Jiszs. X sc tqvzpekr mztea Betzni mz nzmwi-krgr.

Nounc Kx Trpnzng Nrade
Mak 11:12-14, 20-24

18 Nrlc kx ngrlxobzle mz nourla, nigr kc tqvzpe-moukr Jerusalem. Jiszs nelzde brtale. **19** Mcle kc nc fiki mz nrlar lrpzki. Vztrpz mz noude, a' mc-txpwzle leu rde. X sc tqrpipebzle bade kx, “Trpnz-moungr nzpa-krm!” X mzli kcpwz nounc kc sc tqglrpe. **20** Kx mckr kc nzglrtx-ani-krde, kctitpxkr x rpibzkr bade kx, “?Myx kxmule nounc lc tqgllr-anitx-ngrpwzle?” **21** Ayzlungr Jiszs natqgr kx, “Da angidr lc napibo bamu. Bzkq drtwrmu li, a' nzmw drtwrmu nabrle, krlzamu nzalengr da kcpwz tqwaisz-ngrne nounc lc. X krlz-kzamu nqrpi-krbzmu mz newz lc kx, ‘Brkalzm x tao prla mz zmatq ngr Gct.’ X Gct sa narlr-ngrbzle bamu nike rlxtiamu. **22** Mz nzmw-krde lcde, Gct sa nakabzle da amrlx kx rlxtiamu vzpxm mz nzrlxngiti-krmu.” †

* **21:8** Krlc kxmu nzarmyalz-krdr king. X mz drtwrdr Jiszs votr Jerusalem murde na-acivele Israel mz nzngini-krde Kxnzmcpx kc tqngi King. * **21:9** Sam 118:26 * **21:13** Asaea 56:7 * **21:13** Jeremaea 7:11 * **21:16** Sam 8:2 † **21:22** 21:21-22 Mz mzli nyd Jiszs, natq lc “nzabrkalz-ngr newz” tqngi nzycmne-ebzpxngr. Mc kz 1 Korint 13:2. Drtwr ngrde nzrkrlnzgr nzalengr da kx rblxbz mz leplz, murde tr-rblxpzu mz Gct. A' rrltx-ngrpwzle da mz nzvz-nqblq-krde me pnz drtwrde.

*Nzrveatingr Zmatq Ngr Jiszs
Mak 11:27-33; Luk 20:1-8*

²³ Jiszs vztrpz mz makoa ngr Mangr-nzangiongr Yawe. X mzli kc tqalvztrngrde leplz, kxnzetu rdr pris x lrtzlvzng nzvzmqng mz nzvea-krbzlr bade kx, “?Neke rkabz bam zmatq mz nzale-krm da lcng tqaleq?” ²⁴ Rpibz Jiszs badr kx, “Sa napibo me twzkimc zmatq kc tqale-ngrne da, a’ ayzlukaipa’mu nzvea-krbo bamu. ²⁵ ?Zmatq ngr nzawrkxtrkr Jon twzmle drlve? ?Kaom Gct o kabz ncblo?” Sc tztalwzpeng mz nidr esz'-krdr, tzrpipelr kx, “Nzmu narpiku kx, ‘Zmatq kx kaom Gct,’ sa narpimle kx, ‘E memule trlxngiti-ngrwamuu natqde?’ ²⁶ A’ nzmu narpiku kx, ‘Zmatq kx kabz ncblo,’ namwxlrtiku leplz kxkqlu ma tznibqlr nigu, murde nzlxngitilr kx Jon nide profet.” ‡

²⁷ Zbz sc tzrpipebzlr mz Jiszs kx, “Trkrlzkru.” Rpibz Jiszs badr kx, “X trpengr nzpi-kz-krbo me twzkimc zmatq kc tqwz-ngrne.”

Nzycmne-ebzpxngr Mrlx Ncblo Kcng Li

²⁸ Rpi-mopwz Jiszs badr kx, “Na-aoti ena drtwrmu be lc. Kzdq kc ncblo mrlxde nzling. Vzbz mz mrlxde kxetu x rpibzle bade kx, ‘Mrlxng, vzt x wz mz nrlanc kc.’ ²⁹ Mz trnzamrlue-krdeu trtede, rpibzle kx, ‘Bzkqtxnge.’ A’ mz nibrde tekqtr-moule drtwrde x sc tqvzpe mz nzwnzng. ³⁰ Mzli lc trtede vz-kzpz mz mrlxde kc tqtopwz x pi-kzpzle da kcpwz. X rpibzle mz trtede kx, ‘Eu. Ning la navzx.’ A’ trvz-pnzu mz nzwnzng. ³¹ Pimamu ena bange. ?Kzniqe tqotibzle nzwnzng kc tqpibz trtedr?” Kxnzetu r lr Jiu kcng nzrpibzlr kx, “Krkc tqetu.” Zbz rpibz Jiszs badr kx, “Da kx napi-angidrbo bamu dese. Mz nqmq lcpwz, srlx x kxnzatakqting takes nztekqtrlr nqmq nr drtwrdr, nzmnclbzng mz Gct x sa naprtr-kaing Heven. A’ nimu kc tqvz-zvzbeamu nzpxtxpx-krmu nide. ³² Murde Jon Kxawrkxtr vzm mz nzaelwapx-krbzle bamu lrpzki r Gct mz nzatubqti-krde leplz mz nzobq-krde, a’ trlxngitiwamuu nide. A’ srlx x kxnzatakqting takes nzlxngitilr nide. Kxmule-esz’ mclamu da lc, a’ trtekqtr-kzwamuu nqmq nr drtwrmu mz nzlxngiti-krmu nide.” *

*Nzycmne-ebzpxngr Kxnzrbilqng Nrlanc
Mak 12:1-12; Luk 20:9-19*

³³ Rpi-mopwz Jiszs kx, “Lalztq-mouamu mz kzdq kz nzycmne-ebzpxngr. Kzdq ncblo petile kc nrlanc ngr grep mz drtc’ nydze. Lvztrle bz ngrde, oliqtile kc da kx narwzng waen, x wz-kz-ngrde kc me na-aukzng mz nrlanc kc. * Zbz sc tqrlrpe-ngrbzle mz kzdung ncblo kx narbilqng x naxpebzlr bade kzdung nra grep mz nrlanc lc. Zbz sc tqrlaszpele mrnyzde, tqvzpe rlru mrkzble. ³⁴ Zbz mzli kc tqbrpengr grep, sc tqatwzlrpe-ngrbzle kcng kxnzawz nedeng kx nayzlumibzlr du nra grep kx nangi mqde. ³⁵ A’ kx nzkrlzbzlr nrlanc kc, nzolvztxdr krkcng tzrbilqng nrlanc kc. Nztilr kc, nznibqlr kc, x nzvaeputilr kc. ³⁶ Zbz atwzlr kcng kxnzawz nedeng badr, nzmyaszpxlr krkc kaing. A’ ncblo kcng tzrbilqng nrlanc kc nzatrkti-kzlr nidr, da kc tzwaisr-ngrdr krkc kaing. ³⁷ Zbz mz nibrde sc tqatwzlrpe-ngrbzle mrlxde. Murde mz drtwrde rpile kx, ‘Ncblo kcng sa na-amrluebzlr mrlxng x sa nakabzlr du bade nra grep kx nangi dalr nzrbilqng.’ ³⁸ A’ mrlxde kc kx nzmc ncblo kcng tzrbilqng nrlanc kc le, sc tzrpi-etrpelr kx, ‘Mrlx kxetu kc tqrnginyz nrlanc ka nide kape. Nanibqpeku, murde da ny

‡ ^{21:26} Jon yapwxipxle kx Jiszs nide Kxnzmcpx, mz nzrpri-krde kx nide ‘Nei Sip ne Gct.’ * ^{21:32}
Luk 7:29-30 * ^{21:33} Asaea 5:1-7; Sam 80:8-17

trtede nangi nyzpegu.' ³⁹ Nzolvzlr nide, nzrtctpx-ngrdr mz nrlanc kc, x nznibqlr nide.

⁴⁰ "X mzli kc navz-ngrm kxetu r nrlanc kc, krlzpeamu da kx na-alebzle mz ncblo kcng tzrbilqng!" ⁴¹ X leplz kcng tzlalztqbzng bade nzrpibzlr kx, "Sa navzm nanibqtile ncblo lang. X nrlanc kc sa nabilq-alzupwz ncblo kzbleng kx narkabzng bade nra grep mz mzli r nzbrpe-krdr, nangi dalr nzrbilqngr."

⁴² X rpibzle badr kx, "Zpwxtx! Krlz-angidramu Nzryrngrkxtr lc tqrpile kx, 'Rplz kc etu tzpxtxpx-ngrdr ncblo kcng tzrwz-ngrng ma, nzaelwapxngr kx nide nou rplz kc tqmyatpxp-zlwzbz. Da lc, Yawe kxrwngr. X abrtztx-zlwz-ngrgu.' ⁴³ Mz nzmu-krde lcde, Gct sa nakatpxle nimu lr Jiu mz nzngini-krmu leplz nedeng. X sa navectrple bade leplz kxtrngiulrJiu kcng namnc-nqblqlr nqmq krde, murde namnclzbzng bade mz nzngini-krdr leplz nedeng. ⁴⁴ Leplz kcng trnzabrtzlvzlu rplz lc tqmcpx Gct, apule kx nztaong elr x nzataki-lzbqng. X leplz kcng tzvz-zvzng nzpxtxpx-krdr rplz lc, sa na-ayrplapxng kalr mz Mzli Kxmatq kc navzm, apule kx rplz kc nataobz badr x natamyr-ngrde nidr." §

⁴⁵ Kx nxzlr kxznetu rdr pris x Farzsi nzycmne-ebzpxkr Jiszs lcng, nzkrlzlr kx Jiszs ycmnetr-ngrde trnzvz-nqblq-krdr nqmq kr Gct. ⁴⁶ Zbz nzrpilr nalolvzlr nide. A' nzmwxlrtiir leplz kxkqlu ma tznibqlr nidr, murde nzlxngitilr kx Jiszs nide profet.

22

Nzycmne-ebzpxngr Nzmungr Kxetu Heven

Luk 14:15-24

¹ Zbz Jiszs yapwxiti-mopwzle kc nzycmne-ebzpxngr mz leplz kcng tzyrlwrng Mangr-nzangiongr. ² Rpibzle badr kx, "Napibo bamu kxmu nzvectr-krm Gct leplz bade mz be lc. Kzdq kc king oliqtile kc nzmungr kxetu mz nzyrlzkr mrlxde. ³ Atwzlr-ngrbzle kxszawz nedeng kx napibzlr mz kxszaveating kx navzpemqng. A' nzpxtxpx-ngrdr nzvz-krmlr. ⁴ Mz nibrde atwzlr-mou-ngrbzle kxszawz nedeng mz kxszaveating mz nzrpibzlr badr kx, 'Mzli ka da amrlx mrlze. Murde kzu nznibqtiye x nzkipeng. Vzpemamu mz nzmungr mzli ka!'

⁵ "Kxmule-esz', a' leplz kcng trnzlxitilru nrpa kc. X matitr drtwrdr zbz lc x nzvz-bekang mz nepu nr drtwrdr. Kzdung nzvzng mz nrlanc nydzdr. X kzdung nzvzng mz nzwzngr. ⁶ X kzdung nzolvzlr kxszawz neng king, nztzlr nidr, vz x nzbzng. ⁷ King kc drtwrde ngyatx zlwz. X atwzlr-ngrde ami nede x nznibqtilr leplz kcng tznibqtilr kxszawz nedeng x nzkatrpzlr nyg ngr mztea nydzdr.

⁸ "Zbz kqlele kxszawz nedeng x rpibzle badr kx, 'Nzmungr oliqtxpe.' A' leplz kcng tqaveatixng trnztakirdrudr nidr nzprtr-krdr mz nzmungr lc. ⁹ Vznamu mz lrpzki amrlx x rvzmimamu leplz amrlx kx rmctiamu, navzmqng mz nzmungr lc. ¹⁰ Kxszawz nedeng nzvzng mz lrpzki x nzayrlwr-lxblrlr leplz amrlx kcng tzrmctilr, kxmule-esz' kxszmrlzng o kxsztrkang. X ma nyg King yrbupxm mz leplz.

¹¹ "A' mzli kc king tqvzpe-ngrmle mz nzmc-krde leplz amrlx, rmctile kc ncblo kx trpxi-ngrdeu lrpz kx kabzle mz leplz lcng amrlx, mz nztakitr-krde nidr nzprtr-krdr mz nzmungr lc. ¹² Rpibz king bade kx, '?Mzlenge, memule

◊ 21:42 Sam 118:22-23 § 21:44 21:41 Mz be lc nrlanc ngr grep drtwr ngrde lr Israel. [Asaea 5:7] Mrlx Kxetu lc drtwr ngrde Jiszs. Jiszs pibzle kx Gct rkabz zmatq bade mz nzngini-krde Mrlxde. Ncblo kzbleng drtwr ngrde kxtrngiulrJiu. 21:42-44 Rplz lc drtwr ngrde Jiszs kc tqngi Kxszmcp. Doa kx ptxpx-ngrde nide, sa na-atwzlrngr Gct mz Hxl.

tqvztr-ngrme mrka, trpxiwq lrpz kxmyapxbz kc tatkabo?" A' ncblo kc anabu txpwz. *

¹³ Rpibz king mz kxnzawz nedeng kx, 'Peamu mrlx lc x rtpcx-ngrnamu yz, mrkc tqtungr nzlo x tzyrningr leplz mz nzetqkr drtqdr x tzmadqti-ngrdr nqngidr mz zngya.' " ¹⁴ Zbz Jiszs ayrkrpxle nzycmne-ebzpxngr lc mz nzhpi-krbzle kx, "Kxmule-esz' Gct aveatile leplz kxnzkqlung mz nzmncrz-krbzlr bade mz nzngini-krde king, a' kxzmcpxng nzpipzng."

Nzrveatingr Nzxpengr Takes Mak 12:13-17; Luk 20:20-26

¹⁵ Zbz Farzsi nzvzng x sc tzyrlwr-lxblrpeng mz nzryrlq-krdr drtwr ngr nzrxtio-krdr Jiszs br mz nzycmne-krde, murde nalolvzlr nide. ¹⁶ Nzatzlrr-ngrbzlr bade kcng oblamzng Farzsi x kzdung leplz ngr dzbede kc mz Herot. Nzvzbzng nzrpibzlr kx, "Kxakrlz, krlzkr kx nike piq x alvztr-ngrn tubq zvz. X krlz-kzkr kx tu-amqngi-zvzq mz nzalvztr-krbzme nqmq kr Gct mz leplz, kxmule-esz' trna-abrtzlvzu kxnetzung. ¹⁷ Mz nzmu-krde lcde, pim ena bagr nike pnz drtwrm. ?Tubq mz Lou sc Mosis nzxpe-krbzku takes mz King r Rom o trtingr?" ¹⁸ A' mcplxtrpebz Jiszs nzatalz-krdr. Murde mz nzhpi-krbzle Eu, lr Jiu lcng nangyati drtrwdr nide mz nzokatr-krde enqmi rdr. X mz nzhpi-krbzle Trtingr; ncblo neng King Herot nalolvzlr nide mz nzxpqbrr-krde lou sc gzpmn ngr Rom. Rpibzle badr kx, "Nimu blzpokiang! ? Memule tqrpi-ngrnamu na-atalz-ngrnamu ninge? ¹⁹ Aelwa-ngrmamu dq ena srlrni kc tqxpe-ngrnamu takes." Nzaelwa-ngrbzlr kc srlrni. ²⁰ X sc tqveapebz kx, "?Mqngr nar nelc tqmnztr mz srlrni lc, x drtq nelc tzyrtr elr?" ²¹ Nzrpibzlr kx, "King r Rom." Zbz rpibzle badr kx, "Mz nzmu-krde lcde, kabzmu mz king da kx takitrde king x kabzmu mz Gct da kx takitrde Gct." ²² Ncblo kcng kx nzxlbzlr da lc nzkctitxpblr natqde, murde trprtz-pnzu mz trtxki scdr. X sc tzdwaszpelr nide.

Nzrveatingr Nztulz-ngrm Mz Nzbzngr Mak 12:18-27; Luk 20:27-40

²³ Mz zbz lcpwz, kzdung Sadiusi nzvzmqng mz Jiszs Mangr-nzangiongr. Nindr dzbe lr Jiu kx trnzlxitru nztulz-mou-ngrm mz nzbzngr. * Nzveatbzlr da kx na-atrkat-ngrbzlr nzalvztr-krde mz nzlu-mou-ngrm mz nzbzngr. ²⁴ Nzrpibzlr kx, "Kxakrlz, rpi Mosis kx, 'Nzmu ncblo kx bzszle olvz rde x trpnzng rnedr doa, mzlede nayrlzti-alzule olvz lc, murde nzrngine-krdr doa na-apule kx ngi doa ne mzlede kc tqbzpe. X doa lc natekqtrle nzmrbrpx-krbz nqvi lr ncblo kc tqbz x natwzle dztudeng.' " ²⁵ Nzmu narpingr kx kzdung mzle-lzbzq nzrlimzng. Mzledr kc tqetu yrlz. Zbz mzli trboiu sc tqbzszpele olvz rde, trpnzng rnedr doa. X olvz rde natwz alzu mzlede krali. ²⁶ Da lc nzwai mzlede krali x kratq. Vz, vz, olvz kc nzyrlzti mzle-lzbzq kcng nzrlimz. ²⁷ A' trpnzng rnedr doa. X mz nibrde olvz kc sc tqbzpe kz. ²⁸ Alvztr-ngrn kx leplz tulz-mop mz nzbzngr. ?Kx tqmule lcde, neke nartwz olvz kc mzli kc natulz-moungr leplz amrlx? Murde mzle-lzbzq kcng rlimz nzyrlztilr nide. ?Myx kxmule, Gct batrpzle mz olvz lc nzxpqbrr-krde natqde mz nzyrlzti-krde ncblo kcng rlimz mz mzli kxesz?"

²⁹ Jiszs ayzlu-ngrbzle natqdr kx, "Nzao-krmu drtwwmu vz-rbrrtx atwrnrngr. Murde tryrplatitru narmu zmatq ngr Gct x drtww ngr Nzryrngrkxtr.

³⁰ Mzli kc na-alu-moungr Gct leplz mz nzbzngr, sa na-apupelr enjrl kcng tzmncng Heven. Trnzyrlzpeung, x trpnzng nzyrlz-mou-krdr kalr. ³¹ X

* ^{22:12} Lrpz kxmyapxbz kc tqkabz King drtww ngrde leplz kxnztubqng mz nzobqkr Gct mz nzlxngiti-krdr Jiszs. ^{22:23} Aposol 23:8 ^{22:24} Lou Kcpwz 25:5-10; Nou 38:8-10; Rut 4:5-10

Gct aelwapx-ngrde kx krkcng tzbzpeng sa na-atulzmqng mz nzlungr. Krlz-angidramu natq Gct kc tqrpbzle bamu kx, ³² ‘Ninge Gct ngr Ebraam, Aesak x Jekop.’ ³³ Kxmule-esz' ncblo lcng tq nzbz-pnzng, a' trpileu kx nide Gct ngrdr mzli kc pnz. Murde nibede Gct ngrdr mz nzlu-krdr Heven mzli ka.’

³³ Kx nxzlrbz zbo ngr leplz natq lc, nzkctitxpxlr nzalvztr-krde.

Lou Kxmyapxbz

Mak 12:28-34; Luk 10:25-28

³⁴ Kx nxzlr dzbe Farzsi nzamyati-krbz Jiszs drtq dzbe Sadiusi x awxnabule nindr, sc tzyrlwr-lxblrpeng mz nzryrlq-krdr drtwr ngr nzatalz-krdr nide. ³⁵ Zbz kzdq nindr kc tqngi kz kxalvztr mz lou sc Mosis, vzbz bade x sc tqveapebz bade kx, ³⁶ ‘?Kxakrlz, lou kznike myaszpxle lou amrlx?’ ³⁷ Ayzlu-ngrbz Jiszs natqde kx, ‘Doa kxesz' mz nimu, namrlztiq Yawe, Gct rmu mz nabzm atwrnrngr, x mz nzwikr nelzm atwrnrngr, x mz drtwrm atwrnrngr.’ ³⁸ Krlc lou sc Gct kx ayrnrngr x kx myapxbz. ³⁹ X lou krali apupwzle nide. Rpile kx, ‘Esz' mz nimu, namrlztiq kztemqng da kc tqwaiq nzmrlzti-lzbq-krm.’ ⁴⁰ Lou lcng li ngi nou da amrlx mz Lou sc Mosis x nzalvztrkr profet.’

Nzrveatingr Kxnzmcpx Ne Gct

Mak 12:35-37; Luk 20:41-44

⁴¹ Mzli kc tzyrlrbengr Farzsi kcng mrkc, Jiszs rveabz badr kx, ⁴² ‘? Mz drtwrmu neke tqngi Kxnzmcpx, x vzpxm mz nqvi lr ncblo kznike?’ Nzrpibzlr bade kx, ‘Vzpxm mz nqvi lr King Devet.’ ⁴³ Zbz Jiszs rveamopwz badr kx, ‘A' memule tqbatr-ngrbz Mqngrkxtr mz Devet nzrpi-krde kx Kxnzmcpx nide kxetu rde. Murde rpi Devet kx, ⁴⁴ ‘Yawe rpibzle mz King kc tqngi kxetu rnge kx, Wxbu mrlc tqmatq-esz'ngr mz nrlarng kxrtc, navz nakrlz-zpwxbzle mzli kc nangi-batr-ngrbo mz enqmi rmqng nzmetx-krbzlr bam.’ ⁴⁵ Mz Sam lc Devet rpile kx, Kxnzmcpx ngi kxetu rde. ?A' myx kxnamu Kxnzmcpx nznginikr doa mz nqvi lrde kc mzte trnzmcka, x mzli kcpwz nqi kz kxetu rde?’ † ⁴⁶ A' nzveakr Jiszs trpnzngr kx ayzlubz. X abzo mz zbq lc, trpnz-moung kx veabz bade da, murde ma drtqdr tqmya zvz.

23

Bzkq Apuamu Kxnzalvztrng Mz Lou Sc Mosis

Mak 12:38-39; Luk 11:43, 46; 20:45-46

¹ Zbz Jiszs sc tqalvztrpele nigr badr zbo ngr leplz kcng. ² Rpimle kx, ‘Kxnzalvztrng mz Lou sc Mosis x Farzsi nzrngisc zmatq mz nzalvztr-krdr x nzyokaetipx-krdr Nzryrngrkxtrng. ³ Mz nzmu-krde lcde, navz-nqblqamu da amrlx kcng tzalvztr-ngrdr nimu. A' bzkq vz-nqblqamu nqmq krdr, murde trnzvz-nqblqlru da kcng tzalvztr-ngrdr leplz. ⁴ Nzaleti-katong nqmq krdr kxkqlu kx nayrlqtr-mopwzlr mz Lou sc Mosis. X rblxbz mz leplz nzma-nqblq-krdrlleng. Murde nqmq lcng nzapupelr da kxmrlepu, kx nzyrlqlbzlr mz nabx leplz kx naglqlr. A' nindr esz'-krdr, trnzvz-nqblqlru nqmq lcng. X trnzokatrlru leplz nzrglqngr da kcng tqmrleputi.

⁵ ‘A' da kx myapxbz badr, leplz na-amrluelr nindr mz nzrpi-krdr kx nindr ncblo kxnztrng. Krlc nou da amrlx kcng tzalelr. Murde bokis kxtopwz kcng tzpetrler mz rtrlrmztr x mqdr tqyctrngr Nzryrngrkxtr, nzaetunepxlr. X nctq

† ^{22:32} Nzrlaszngr 3:6, 15 † ^{22:37} Lou Kcpwz 6:5 † ^{22:39} Livae 19:18 † ^{22:44} Sam 110:1

† ^{22:45} Jiszs na-aelwapx-ngrbzle badr kx Kxnzmcpx trngi-txpwzu ncblo, a' myaszlzle ncblo murde Gct amyazle nide. A' trpnzngr nindr kx yrplatitr narde natqde.

nqvi kcng tzdotitrng mz lrpz scdr nzaboiti-kzlr. Murde nzrpilr narpingr leplz kx nzaoti zvz drtwrdr nzvz-nqblq-krdr natq Gct. A' trtingr. *

⁶ X mrlzbz badr nzwxbu-zvz-krdr me matq mz mangr-nzkrka'ngr x mz mzli r nzmulvngr, murde nzglqpx-lzbqng. ⁷ X mrlz-kzpz badr nzamatqkr leplz nidr mz nqrpi-ngrbz badr kx, 'Nim la, kxetu,' mz nzvzne-krdr me nzamwangr da. ⁸ A' bzkq pibzmu mz kztemung kx na-amrluelr nimu mz nzalvztr-krmu nidr me pnz drtwr Gct. Murde nimu amrlx ngrmu mzle-lzbq x ile-lzbq mz nzmncz-krmamu bange. X ninge kxakrlz kxmyapxbz kx takitrde nzamrluengr. ⁹ X bzkq rpiamu kx rblxbz mz kxnzakrlz ngrmung nzvz-rbrngr. X bzkq armyalzamu nidr x rpbzmu badr *trte*. Murde nimu amrlx ngrmu trtemu esz'txu kc tqmncm Heven. X mz nzalvztr-krde nimu tubq zvz x trvz-rbru. ¹⁰ X bzkq pibzmu mz kztemung kx nalalztq-txpwzng bamu mz nqrpi-krbzmu badr drtwr ngr natq Gct. Murde ninge Kxnmcp, kxaclve kxmyapxbz kc tqtyokaetipxbzle bamu natqdeng. ¹¹ Murde mrlx kx namyapxbz mz nimu mz nzaclve-krde leplz nengeng, nawztrpz bamu. ¹² Murde mrlx kx armyalz-lzbq mzli ka, sa na-avzo Gct nide yu. A' doa kx avzo-lzbq mzli ka, sa na-armyalz Gct nide."

Jiszs Ycmne-plztitrle Kxnzetu Rdr Lr Jiu

Mak 12:40; Luk 11:37-52; 13:34-35; 20:47

¹³ Jiszs rpi-mopwzle kx, "Agrmplz nimu blzpokiang, nimu Farzsi x kxnzalvztrng mz Lou sc Mosis! Murde Gct sa na-ayrplaxle nimu! Murde tr-rlrpx-lzbq-ngrwamuu nzmncz-ngrbz bade. X nzalvztr-rbr-krmu rpwa'-nrbzle mz leplz nzlxngiti-krdr nide.

¹⁴ "Agrmplz nimu blzpokiang, nimu Farzsi x kxnzalvztrng mz Lou sc Mosis! Murde Gct sa na-ayrplaxle nimu! Murde mz zmatq ngr nzngini-krmu kxnzrmailzng, angqngutitramu olvz kxnzbzszng mz nztwz-pnati-krmu dztudrng amrlx. X mzli kcpwz aboitiamu nzkrka'-krmu mz nzyrlq-kapq-krmu alwx ngrmung. Mz nzmu-krde lcde, nzayrplapxngr nimu kalr mz Hxl namyatpxp esz'ngr.

¹⁵ "Agrmplz nimu blzpokiang, nimu Farzsi x kxnzalvztrng mz Lou sc Mosis! Murde Gct sa na-ayrplaxle nimu! Murde vznenamu rlsru x alilvcamu rlsru mz nzrmcti-krmu kzdq doa kx naprtrpz bamu mz nzangiokr lr Jiu. A' mz nzalvztr-krmu nide, nqmq krde myaszpx-zlwzle nztrkakr nqmq krmu.

¹⁶ "Agrmplz nimu kxnzrmailz-rbrng. Murde Gct sa na-ayrplaxle nimu! Rpibzmu mz leplz kx nzmu naesalz-ngrdr Mangr-nzangiongr Yawe, trmatqneu. A' nzmu naesalz-ngrdr gol ngr Mangr-nzangiongr, na-atutrlr nzesalz-krdr. ¹⁷ A' trtingr! ?Neke angqngule nimu? Me pnz drtwrnu vz-rbrtx. Mangr-nzangiongr myaszpxle gol murde nide kc tqatrle gol kc tqycpxm elr. ¹⁸ Rpi-kzpzu mz leplz kx nzmu naesalz-ngrdr olta ngr Mangr-nzangiongr, trmatqneu. A' nzmu naesalz-ngrdr da kc tqycom mz olta, na-atutrlr nzesalz-krdr. ¹⁹ Narmu kc! Olta myaszpxle da kc tqycom elr murde nide kc tqatrle da lcdeng. ²⁰ Mz nzmu-krde lcde, mz nzesalzkr leplz olta, nzesalz-ngrdr nide x da kcng amrlx tqycong elr. ²¹ X mz nzesalz-krdr Mangr-nzangiongr, nzesalz-ngrdr nide x Gct kc tqmnc elr. ²² X mz nzesalz-krdr Heven, nzesalz-ngrdr tron nyz Gct x Gct kc tqwxbuom elr. ²³

* ^{23:5} Bokis x nqvi lcng nzwz-krdr esz'. Krle da kx na-adcpz-zvzng drtwrdr natq Gct x navz-nqblq-zvz-kzlr. Kzdung mzli nzpetr-kzlr bokis kcng mz mqdr. X natq Gct rpile kx na-adotitrlr nqvi lcng mz nctq lrpz kcng pwz. Nctq nqvi lcng nzapulr mrkc tqyalqlitpx mz nqvi nrkalodr mama ngr COM mzbq ka. Mc Nzrlaszngr 13:9, 16, Lou Kcpwz 6:8; 11:18; 22:12, Nzqqlu-krdr 15:38-40 x Matiu 6:1. ^{23:11} Matiu 20:26-27; Mak 9:35; 10:43-44; Luk 22:26 ^{23:22} Matiu 5:34

²³ “Agrmplz nimu blzpokiang, nimu Farzsi x kxnzalvztrng mz Lou sc Mosis! Murde Gct sa na-ayrplapxle nimu! Kxmule-esz' kabzmu da kranzpnu ngr da amrlx bade mz da kxtopwzng kx trmyapxpwzu. A' trktx-pnzu drtqmu da kxmyapxbz. Murde tralewamu da kcng tqtubqbz mz leplz, tryc-ngru drtwrmu nidr, x tratutr-kzwamu natqmu. A' takitrde nzale-kai-krmu da lcng tqmyapxbz, x ale-kzamu da kcng trmyapx-zlwzpwzung. ²⁴ Mz nzale-krmu da lc, rmailz-rbramu! Murde yc zlwz mz drtwrmu da kxtopwzting mz Lou sc Gct, a' yrlqtxoamu da kcng tqmyapxbz. Apule kx rbotilzamu lxbi kxtopwzting mz nrlanc nyzmu, a' trkxu mz drtqmu poi kc etu tqekqtile nrlanc nyzmu atwrnrngr.

²⁵ “Agrmplz nimu blzpokiang, nimu Farzsi x kxnzalvztrng mz Lou sc Mosis! Murde Gct sa na-ayrplapxle nimu! Yc zlwz mz drtwrmu nzale-krmu da kxmrlz mz nzobqkr leplz, murde rpiamu na-amatqlr nimu. A' mzli kcpwz nabzmu drka'-ngrng murde trkibramu x prlvz mzpu da. Apule kx ycpq-txpwzmu nibr kap x plet, a' da kxtrka kcng tqycpxm mz nabzmu tzatrkatilr nimu. ²⁶ Nimu Farzsi vz-rbramu! A' na-atubqti-kaiamu nabzmu, murde Gct na-abrtzlvle nimu x da kcng amrlx tqaleamu natubq-kzng mz nzobq-krde.

²⁷ “Agrmplz nimu blzpokiang, nimu Farzsi x kxnzalvztrng mz Lou sc Mosis! Murde Gct sa na-ayrplapxle nimu! Nabzmu nzapulr gq lr kxbz kcng tzabrngzti, a' mz nabzdr la yrbulz-ngrm nrvr, zmibi, x zbrtu. ²⁸ Mz nqmq lcpwz, mz nzmckr leplz nimu, mz drtwrdr nimu ncblo kxnztubqng, a' nabzmu yrbupxm mz nzpokiangr x da kxdrka'ngr.

²⁹ “Agrmplz nimu blzpokiang, nimu Farzsi x kxnzalvztrng mz Lou sc Mosis! Murde Gct sa na-ayrplapxle nimu! Angrlotiamu gq lr profet x aluliti-kzamu gq lr kxnztubqng. ³⁰ X rpiamu kx, ‘Nzmu namnckr mz mzli nyz melrmqgrng, e trprtrpwzkru badr mz nzrnibqngr profet neng Gct.’ ³¹ A' mz nzycmne-krmu lc, plzpxamu kx vzpxmamu mz nqvi lr kxdrka'-ngrng lcng tznibqlr profet neng Gct murde nzpxtxpx-ngrdr nzlalztq-krbzlr badr. ³² ?Myx kxmule, ptxpx-kz-ngrnamu natqnge? Sa tqmrlz ye. Nibq-kzamu ninge, da kc tzwai melrmqmung nznibqti-krdr profet kcng bqnc. Murde trblepxpwzmuu badr.

³³ “Nimu kxdrka'-ngrng kxnzodang x doa neng kxdrka'-ngrng, x mrnyzmu kalr Hxl. ³⁴ A' vz zvz, murde rpibo bamu kx profet, ncblo kxnzyrplapxng, x kxnzakrlzng nengeng sa navzmqng bamu mz nzpipx-krbzlr bamu natqnge. A' kzdu-kzng sa naiklaamu mz mangr-nzkrka'ngr nyzmung. Zbz sa namaneutipx-zvzamu nidr mz mztea amrlx. ³⁵ Mz nzmu-krde lcde, sa narmcti-ngrnamu nzayrplapx-zlwzng ngrnmu. Murde Gct sa na-atamutilzbzle bamu alwx ngr nzrnibqngr kxnztubqng amrlx, abzo mz Ken nznibq-krde Ebol, krlzmle nzrnibqngr Sekaraea, mrlx Berekaea, kc tznibq mz mzlir Mrkc Tqtr x olta. †

³⁶ Napibo bamu, Gct sa na-atamutilzbzle bamu nzayrplapxng kx nzvzpxmqng mz nzrnibqngr kxnztubqng amrlx, murde nzbz-krdr vzpxm mz da kcng tqaleiamu.

³⁷ “Kosae lr Jerusalem! Nibqtiamu profet neng Gct x vaebqtiamu menrpa kcng tqatwzlr-ngrmle bamu! Kxmule-esz' aodu-zvzx nimu x mzli kqlu kx rpi-ngrne na-apubo bamu kio kx wxbulvzole neideng a' tr-rlr-lzbq-ngrpwa'muu bange. ³⁸ Nakxmupele lape! Murde Gct sa nartxmle nibrde

^{23:23} Livae 27:30 ^{23:34} 2 Be Ngrdr 36:15-16 ^{23:35} Mz Nzryrngrkxtr kc kai, Ebol nide ncblo kx nznibq kai x Sekaraea nide profet kx rmnrpe-ngrbz nzrnibqngr.

bamu mz nzngini-krmu leplz nedeng. X trpnzngr nzokatr-mou-krde nimu. ³⁹ Napibo bamu, trpengr nzmc-mou-krmu ninge nakrlzbzle Mzli Kxmatq kc navzm x sa narpi-ngrnamu kx, ‘Yawe, glqlzkr Kxnzmcpx kc tqvzm mz drtqm.’” ⁴⁰

24

*Rkx Ngr Nzodatingr Mangr-nzangiongr
Mak 13:1-2; Luk 21:5-6*

¹ Mzli kc Jiszs narlaszpe-ngrde Mangr-nzangiongr Yawe, vzmgr bade sc tqlxtypebzkrng kxmu nzlrmztiongr nzrwzngr. ² Rpim Jiszs bagr kx, “Napiangidrbo bamu kx da lcng amrlx tqmcamu, x Mangr-nzangiongr lc trnatualou. Trpnzngr rplz ngrde kx nablio me yc-ngrde. Murde sa naodati enqmi rmung kalr.”

*Rkx Ngr Vea X Nzkxpungr Kxkqlu
Mak 13:3-13; Luk 21:7-19*

³ Kx krlzbzkr kc Newz ngr Nc Olivi, Jiszs sc tqwxbupe elr, mrlcde nzmcpz Mangr-nzangiongr. Zbz kzdung kztegrng sc tzvz-lrpipebzng mrkc tqwxbu-ngrde. Nzrpibzlr kx, “Pim ena bagr mzli kc naodatingr Mangr-nzangiongr, x rkx kznikeng namc nakrlztingr mzli r nzyzlu-krome mzli kc nayrkpx-ngrbz nrcl.” ⁴ Rpim Jiszs bagr kx, “Aclvetio-lzbqamu mz da lcng. Bzkq rlr-ngrbzmu mz leplz nzapokiatr-krdr nimu mz da kznikeng naprtz. ⁵ Ncblo nakqlung sa navzmqng mz drtqnge, narpibzlr mz leplz kx, ‘Ninge Mevalu Kxnzmcpx.’ X leplz nakqlung kalr nalxngitilr nidr mz nzpokia-krdr.

⁶ “X mou, bzkq nelzmu tzprlzr mz nxzlr-krmu natqdr dalr nzotangr mz vea kx esotrpq x nrpa ngr vea kx ycm rlru. Da kxnxmulr lcng naprtzti-kaing, a’ trngiu drtwr ngr nzyrkpxpe-krbz nrcl. ⁷ Murde mrkcng kqlu mz nrcl sa napnz-lzbqng. Dzbi kxetu sa navzmqng, x nengq kxetu sa navz-kzpqng. ⁸ A’ da lcng tqprtzing nzapulr nztangqgx-zlwzkr olvz kxyr, mzli kc tqvz-ebir-ngrm nimz ngr doa kxtopwz, x sc tqrmika ate.

⁹ “Mzli lc sa na-aetqbzlr drtqmu, x sa nalolvzlr nimu, x nanibqlr nimu. Murde leplz mz natq amrlx x drtc’ amrlx mz nrcl kcng tzmwati drtwrdr ninge sa namwati kz drtwrdr nimu mz nzngini-krmu leplz nengeng.

¹⁰ Mzli r nzkxpungr lcng, kzdung leplz kcng tzvz-nqblq-kailr ninge, sa trnalxngitilru ninge. Zbz mz nzmwatikr drtwrdr leplz nengeng, sa na-aprcbzlr nidr mz kxdrka'-ngrng. ¹¹ X profet kxnxpokiang nakqlung. X sa naesabrtiir leplz mz nzmailz-rbr-krdr nidr mz nzalvztrngr angidr.

¹² Mzli lc, nqmq kr leplz kxdrka'-ngrng sa naetunepx mz nzbatr-krbzr nzbaokr nivz mz nrcl. ¹³ A’ nimu kcng tztu-amqngi-zvzng mz nzrlxngitikrmu krlzbzle mz nzbz-krmu, sa na-arlapx Gct nimu.

¹⁴ “X mzli lc, leplz nengeng sa nayapwxtipxbzlr Nrpakxmrlz mz leplz ngr drtc’ x natq amrlx mz nrcl, kx Gct vectrple leplz mz nzngini-krde King rdr murde narlapxng, x nrcl kc tqyrkrpx ate.”

*Rkx Ngr Nzodatingr Jerusalem
Mak 13:14-23; Luk 21:20-24*

¹⁵ Rpi-mop Jiszs bagr kx, “Kxdrka'ngr kxmyapxbz kc tqtrka-esz'ngr sa navzm, mz nzatutr-krde da kx yro Daniel mz buk scde. X nimu kcng tzrlwxlr da lc nakrlz-angidramu drtwr ngrde. Murde Kxdrka'ngr lc sa natuom Mrkc Tqtr Mangr-nzangiongr Yawe, a’ trtakitrdeu nide nztuo-krmle elr. ¹⁶ Mzli lc nimu kcng tzmnncng Judiz nangrlrlzamu mz newz

⁴⁰ 23:39 Sam 118:26 ⁴¹ 24:15 Daniel 9:27; 11:31; 12:11

murde namnc-kapq-ngrnamu nzodangr kc tqycpe pipz nzkaputr-krmle. ¹⁷ Nzmu kx tqmncome mz nibr ma nyzm, bzkq asaq nzvoo-krme x bzkq otrpeq dztum ma nyzm. A' ngirltx pnz. ¹⁸ X nzmu kx tqwzq mz nrlanc, bzkq vzpeq ma nyzm mz nzoti-krm lrpzm, x sc tqngrlr-ateq. ¹⁹ Agrmqng olvz kcng tzyrng x krkcng tzayqng itoto, murde rblxtile nidr nzngrlrlz-anikrdr mz newz mz nzmnc-kapq-krdr. ²⁰ Krka'-ngrbzmu mz Gct murde ma nzrdwasz-krmu tqkaputrp mz Sabat kc tqngi zbo kxnxzamati o mz mzli r zbao, mzli kc nrlc tqbaozlwz-ngrde. ²¹ Murde ztrka ngr nzkxpung lcng sa namyaszpxlr ztrka amrlx abzo mz mzli kc ayrrnrngr tqwzng Gct nrlc krlzmle mzli ka. X trpengr nzwrede kxnamule lc kx naprtz kalr. ²² Gct aotipe drtwrde nzamrbcnetr-krmle mzli lc, murde leplz ma tzyrkrtrxtrng. X amrbcnetrple mzli lc mz nzokatr-krde leplz kcng tqmcpxpeleng.

²³ "Mzli lcde, nzmu kx tzrpibz leplz bamu kx, 'Obqki lcmonr Kxnzmcpx kc tqmnc mrkc!' o 'Obqkim ka nide se tqmnckibzle ka!' bzkq lxngitiamu nidr. ²⁴ Murde mevalu kxnzpokiang x profet kxnzalvztr-rbrng sa navzmqng. X na-aleting rkx x da kx nakctipxng mz nzesabrti-krdr leplz kcng tqmcpxpeng Gct, nzmu nakrlzlr nzyatr-krbzlr. ²⁵ Lalztq-angidramu! Napi-kaipo da lcng bamu x mzli rdr kc tqvz-atem. ²⁶ Mz nzmu-krde lcde, nzmu kx tzrpibz leplz bamu kx, 'Obqki lcmonr Kxnzmcpx kc tqmnc lzke!' o 'Obqkim ka nide se tqmncpxm ma ka!' bzkq lxngitiamu nidr. ²⁷ Murde ninge Mrlx Leplz nzyzlu-krmc sa naotpx mz mzpu. Sa na-apule nzrpnaxkr bzlrpc mz nzayzlrpx-krde bongavz, abzo mz kzdq nrlarde krlzbzle kzdq nrlarde. ²⁸ X mz nzmc-krdr da lc, me mnc-ngrne naopxbz mz leplz amrlx."

Rkx Ngr Nzvz-krm Mrlx Leplz Mak 13:24-27; Luk 21:25-28

²⁹ Rpi-mop Jiszs bagr kx, "Mz nibr mzli r nzkxpung lcng, 'Gct sa na-aycngrltile dalr bongavz kcng tzmatt amrlx. Nepi nawx-nzlongr x temz trnapnzpxu. X vri sa natatio-lxblrmqng mz bongavz.' ³⁰ Ninge Mrlx Leplz. X mzli lc, sa namclz rkx rnge mz bongavz. X kxtrnzrlxngitiung amrlx sa namclr Mrlx Leplz mz nzvz-krmc mz nabz dcbz ngr bongavz mz zluli kxetu x zmatq. X sa nayrning murde nzkrlzlr kx mzli trnaboipeu x sc tzayrplapxpeng. ³¹ X mzli lc, trpu kxetu nayrni x sa na-atwzlrpx-ngrne enjrl nengeng mz nrlc tulvzo. X sa navzmimlr leplz neng Gct kcng tqmcpxleng." ³²

Rkx Ngr Nc Fiki Mak 13:28-31; Luk 21:29-33

³² Bbz rpi-mop Jiszs bagr kx, "Mwx natwzamu drtwr ngr nzplcokr leu r nc fiki. Mrka Israel mzli kc namc-ngrnamu nrlar nc fiki tzpooti-ngrdr x nzyrlqbzlr leu rdr kxmrna, sc tqkrlzpeamu kx mzli r nrpr ngr nranc sa tqesopem. ³³ Mz nqmq lcpwz, mzli kc namc-ngrnamu kx da lcng tqpibo bamu sc tqutrpemqng, sc tqkrlzpe-kzamu kx mzli r nzvz-krmc esotrpem. ³⁴ Nakrlz-angidramu kx da lcng amrlx nangidati-kaing, x leplz kcng tzmncng mz nrlc sc tzyrkrtr-ateng. ³⁵ Kxmule-esz' bongavz x nrlc sa nayrkrpxng kalr, a' natqngeng trtxpnzng nzyrkrpx-krdr, murde sa nangidating amrlx."

³² 24:21 Daniel 12:1 ³³ 24:29 Asaea 13:9-10; 24:21-23; 34:4; Esikel 32:7-8; Joel 2:10-11, 31; 3:15; Emos 8:9; Aposol 2:19-20; Nzaelwapxngr 6:12-13 ³⁴ 24:30 Daniel 7:13; Sekaraea 12:10-14; Matiu 26:64; Nzaelwapxngr 1:7; 19:11-16 ³⁵ 24:31 Nzrlaszng 19:16; Asaea 27:13; Sekaraea 9:14

*Naoliqtı-zvzku Nzyzlu-krm Jiszs
Mak 13:32-37; Luk 17:26-30, 34-36*

³⁶ Rpi-mop Jiszs bagr kx, “Trpnzngr kxrkrlz zbq x nabz nepi kc nayzlu-ngrmc. Trnzkrzlru enjrl ngr Heven amrlx x trkrlz-kzwxu, a' krlz txpwz Trtenge esz'-krde. ³⁷ Nayzlumc mzli kc leplz napxtpx-ngrdr nzlalztqngr mz natq Gct, da kc tqwaile mz mzli nyz Noa. ³⁸ Mzli lcde leplz nzmung, nzyrlzng, x nzpxtpx-ngrdr nzlalztqngr mz natq Gct, vz vz krlzmle mzli kc Noa badr mrlxdeng tzwatr-ngrdr mz lcsu kc etu. X nubla kc tqvo-atem. ³⁹ Murde kxdrka'-ngrng lcng trnzkrzlru kx Gct sa naodatile nidr, a' dcpxpengr drtwrdr nzvo-krm nubla mz nzaboo-krde nidr. X kxnamukzle lc mz zbq kc nayzlu-ngrmc. ⁴⁰ Mzli lc ncblo nzling nawz-lxblrng mz nrlanc kxesz'. Navzmipe Gct krkc tqtubq. X narlaszpe krkc trvz-nqblqleu ninge, mz nzodatingr nide. ⁴¹ X olvz nzling naoliq-lxblrng mz dakxznzng. Navzmipe kc x narlaszpe kc. ⁴² Mz nzmu-krde lcde, oliq-zvzamu murde trkrlzwamuu zbq kxnanginide. ⁴³ Ncblo kx pna da trnzkrzu zbq kx napnagrde da brma. Mz nzmu-krde lcde naoliqtı zvz nzvz-krmle. ⁴⁴ X mz nqmq lcpwz, naoliqtı-zvzamu nzvz-krmc, murde ninge Mrlx Leplz sa navzmc mz mzli kx trnakrlzwamuu.”

*Kxnzawz Kx Brti Drtwr Kxetu Rde
Luk 12:41-48*

⁴⁵ Jiszs rpi-mople bagr kx, “Napibo bamu kxmu kxnzawz nenge kx brti drtwrnge. Sa na-apule kc kxetu kx aprcbzle mz kzdq kxnzawz nede mz nzaclve-krde kztedeng x mz nzapu-krde nidr. Zbz sc tqvzpe mz kzdq nrlc. Kxnzawz kxyrplapx x brti drtwr kxetu rde sa navz-nqblq-zvzle natq kxetu lc. ⁴⁶ Mz nzmu-krde lcde, mzli kc navz-ngrm kxetu rde, kxnzawz lc sa na-abrtzlvzle nzale-krde nzwz-krde. ⁴⁷ Da angidr lc napibo bamu. Kxetu kc sa nayrlqle kxnzawz lc mz nzaclve-krbzle dztudeng amrlx. ⁴⁸ A' nzmu nanginide kxnzawz kxtrka, sa narpile mz drtwrde kx, ‘Kxetu rnge trpnzngr nzvz-ani-krmle.’ ⁴⁹ Zbz sc tqabzope-kzle nzibrti-krde kztedeng. A' nide kc tqmu x tqangqnguti-lzbq-ngrde nzrmnqng. ⁵⁰ A' kxetu kc yzlm mz mzli kx trpnzu drtwr kxnzawz lc. ⁵¹ Zbz kxetu kc sa na-ayrplapx-zlwzle nide x na-atwzlr-ngrde nide mrkc leplz nayrni-alo-ngrdr mz nzetqkr drtq x namadqtilr nqngidr mz zngya, badr leplz kx narpi-ngrbz kxnzrlxngiting.”

25

*Nzycmne-ebzpxngr Olvi Kcng Nzpu
Luk 12:35-40*

¹ Jiszs rpi-mople bagr kx, “Mzli kc nayzlu-ngrmc mz nzngini-krnge King, sa naglx-angidrx leplz kcng tzvz-nqblqlr ninge x navzmix nidr Heven. Mzli lc leplz mz nrlc ka sa na-apulr olvi kcng mz be lc nayapwxtibo.

“Kzdq nrlckxbq kzdu kcng olvi nzpnu-esz' tzaenzling mz ma nyz olvi kc nayrlz. Nzrz-krdr nzyangrle-krdr nyr mz lrpzki kc nao-zli ncblo kc nayrlz mzli kc navz-ngrmle, mz nibr nzatubqtingr narnnbr ngr nzyrlz-krde. ²⁻⁴ Olvi lcng nzlvqn nzyrplapxng, murde nzoliqtir da kqlu kx nayangrlel mzli kxboi. A' nzlvqn nzngqngung, murde nzoliqtı-txpwzlr da kx esz' kx nayangrlel mzli kxmrbc txpwz. ⁵ Ncblo kc nayrlz trvz-anipuu. X mztr kc tqone-mwitipe, x sc tzmwipeng.

⁶ “A' mzli kc mz aurnrlc, sc tzxlrpelr ncblo kx nate etu, rpile kx, ‘Ncblo kc nayrlz sa tqvzpem! Dwalzhamu x rmctiamu nide.’ ⁷ Olvi kcng nzpnu nzdwazlqmng, x sc tztekatrpelr da kcng nayangrlel. ⁸ Olvi kcng tzngqngung nzrpibzlr mz krkcng tzyrplapxng kx, ‘Kamamu du bagr da

scmu kcng tzyangrle, murde kx pnrgngr yrkrtrpe.' ⁹ A' krkcng tzyrplapxng nzayzlu-ngrbzlr natqdr kx, 'Trtingr. Trtakitrpepleu nigu amrlx ngrgu. Murde mz nzyangrlengr nyr, navz nakrlzbzle ma nyz trte ncblo kc nayrlz. Mz nzmu-karde lcde, vznamu x rpxwamu scmu da kx nayangrleam x nayctrpz du.' ¹⁰ A' mzli kc tzvz-ngrdr mz nzxpengr da lcng, ncblo kc nayrlz sc tqkaputrrem. X olvi kcng tzoliq-angidrung, sc tzvzpebzng badr mz ma nyz trtede, mz nzprtr-krdr mz nzmungr kc etu mz nzyrlzngr lc. ¹¹ Mz nibrde olvi kcng tzngqngung sc tzkaputrremqng ma kc. X sc tzrpi-katotrpebzlr kx, 'Kxet! Kxet! Lvxpym naonrx! X nadwatr-kzpzk!' ¹² A' rpipxmle brma kx, 'Trtingr. Trkrlzwxu nimu.'

¹³ Zbz Jiszs ayrkrpxle natqde, nzrpi-karde lcde, "Mz nzmu-karde lcde, naoliqt-zvzamu nzyzlu-krmc. Murde trkrlzwamuu zbo o nabz nepi kx nayzlu-ngrmc." *

*Nzycmne-ebzpxngr Kxnzawz Kcng Tq
Luk 19:11-27*

¹⁴ Rpi-mop Jiszs bagr kx, "Mzli kc nayzlu-ngrmc mz nzngini-krnge King, sa na-ayzlu-ngrbo da mz leplz nengeng mz nzvz-nqblq-krde da kx nzalelr. X sa nakabo da kxmrlz mz krkcng tzaleng da kxmrlz. Mzli lc, leplz mz nrlc ka sa na-apulr kxnzawzng mz be lc.

"Kzdq mzli kzdq kc kxetu oliq mz nzvz-krde mz nrlarnrlc. A' kqlekaile kxnzawz nedeng nztqng kx brti drtwrde mz nzaclve-krbzlr dztudeng.

¹⁵ Aprc-lxblrbzle badr da kx takitrde nidr. Kabzle badr bxli r srlnri kx ngi gol. Kzdq twzle bxli nzlvqn, kzdq bxli li, x kzdq bxli esz'. Zbz sc tqrkalz pem.

¹⁶ Ncblo kc tqrwwz bxli kxnzlvqn, vz x sc tqmwapxpe-ngrde gol kcng. X atatrple bxli nzlvqn mou kx nangi sc kxetu rde. ¹⁷ X mz nqmq lcpwz, ncblo kc tqrwwz bxli kxli, atatr-kzple bxli li mou kx narngisc kz kxetu kc. ¹⁸ A' ncblo kc tqrwwz bxli kxesz', twzle x yrtzmqle mz drtc' murde mz drtwrde nayc angidr.

¹⁹ "X mzli kzblepe, kxetu rdr sc tqyzlupem. X kqleleng rtqlrdr mz nzrlwakrbzlr bade nikeng nzatatrplr mz gol scde. ²⁰ Ncblo kc tqrwwz bxli kx nzlvqn, vzm bade x rpibzle kx, 'Kxet rnge, kame bange bxli nzlvqn, x mwapxpe-ngrne x atatr-mopwc' bxli nzlvqn kx nangi scm.' ²¹ X rpibz kxetu kc kx, 'Mrlzvxitx angidr. Nim kxnzawz kxmrlz kc tqvz-nqblq-zvzle natqng! X nayrlqpe nim mz nzaclvengr da kxkqlu, murde atutr-angidrq nzwz-krm mz da kxipiz. Vzm x prtr mz nzmungr lc etu murde abrtzlvzx nim.' ²² Zbz ncblo kc tqrwwz bxli kxli, vzm bade x rpibzle kx, 'Kxet rnge, aprcme bange bxli li, x mwapxpe-ngrne x atatr-mopwc' bxli li kx nangi scm.' ²³ X kxetu lc rpi-kzpze bade kx, 'Mrlztx angidr. Nim kxnzawz kxmrlz! X nayrlqpe nim mz nzaclvengr da kxkqlu, murde atutr-angidrq nzwz-krm mz da kxipiz. Vzm x prtr mz nzmungr lc etu murde abrtzlvzx nim.'

²⁴ "Zbz ncblo kc tqrwwz bxli kxesz', vzm bade x rpibzle kx, 'Kxet rnge, suti drtwrm kx nike na-ale kxnzawz nemqng nradr naycbz. X atatrpe' gol mz da kx trvzpxpuu mz nzwz-krm. ²⁵ Mwxlrlvzx gol scm murde ma tqamrbrbo. Mz nzmu-karde lcde, yrtzmqtxbo mz drtc' murde nayc angidr. Gol scm kc tqkame bange dese.'

²⁶ "Rpibz kxetu kc bade kx, 'Nim kxnzawz kxtrka x drtqm sa! Krlzq kx suti drtrnre kx nike na-ale kxnzawz nengeng nradr naycbz. X atatrc' gol

* ^{25:13} 25:12 Tr-rlr-ngrpwlzle badr nzprtr-krdr mz nzmungr kc etu kc tqkrlzbzle zbo kxrlim. Murde trnzoliqung mz nzvz-krmle x nzaelwapx-ngrdr kx trnzamrluelru nide. ^{25:13} Leplz kcng tzlxngiti-zvzlr Jiszs x tzvz-nqblq-zvzlr natqde, sa naoliqng mz nzyzlu-krmle.

mz da kx trvzpxpuu mz nzwz-krnge. ²⁷ ?A' memule tryrlqtr-ngrpwzmeu gol scnge mz bxng, murde mz nzyzlu-krmc, gol kxmwatipxle nayctrpebz x na-atatr-mople du trau?" ²⁸ Zbz kxetu kc sc tqrpibzle mz leplz nedeng kx, 'Kapxbzmu bxli scnge bade x kabzmu mz kxnzawz kc tqryrlq bxli kx nzpnu.' "

²⁹ X Jiszs ayrkrpx-ngrde natqde kx, "Mzli kc nayzlu-ngr-mopwc', doa kx aclve-angidrle da kx kabo bade, sa nartxlvzlbzbo nikeng kabo bade, murde dztudeng nakqlu-zlwzng. A' doa kx traclve-angidrleu da kx kabo bade, kxmule-esz' niqe scde pipz, sa nakatpxbo bade. ³⁰ X sa na-apux kxetu kc tqrpibzle mz kxnzawz nedeng kx, 'Kxnzawz kxtrka elc, rtcpx-ngrnamu yz, mrkc tqtungr nzlo x tzyrningr leplz mz nzetqkr drtqdr x tzmadqti-ngrdr nqngidr mz zngya.' " †

Mzli Kxmatq Kc Nawxbuo-ngrm Jiszs Mz Tron Nyzde Kxmyalz-esz'ngr

³¹ Jiszs rpi-mople bagr kx, "Mzli kc ninge Mrlx Leplz nayzlu-ngrmc mz nzngini-krnge King kxluli, sa navzmimc enjrl nengeng amrlx. X sa nawxbuomc mz tron nyznge kxmyalz-esz'ngr mz nzpipx-krbo mz leplz mz nrlc tulvzo ntubq-krdr o nzvz-rbr-krdr. ✶ ³² Leplz amrlx mz drtc' amrlx mz nrlc tulvzo sa nayrkrmqng bange. X sa na-akipxx nidr mz dzbede kxli, da kc tqwai kxaclve sip nzakipx-krde sip mz gout nedeng. ³³ Mzli lc sa na-amncx leplz kcng tzubqng mz nzobqkr Gct mz nrlarnge kxrtc, x leplz kzbleng mz nrlarnge kxmc. ³⁴ Zbz sa narpibo mz leplz kcng tzmnncng me matq mz nrlarnge kxrtc kx, 'Trtenge amrlzle nimu amrlx. Vzmamu x twzamu da kxmrlzting amrlx kcng Gct tqesalz-ngrde nakabzle bamu Heven, mz nzngini-krnge King rmu. Murde olique-pnzle da kxmrlz lcng mzli kc tqwz-ngrde nrlc. ³⁵ Takitrde ntwwz-krmu da kxmrlz lcng murde mzli kc tqbrtale-ngrne rkamamu nange dakxnzng, x mzli kc tqbrlxkzngr drtwrnge rkamamu mqnge lue, x mzli kc tqngini-ngrbo lrnarnrlc bamu adwatramu ninge ma nyzmung, ³⁶ x mzli kc trpnzngr scnge lrpz rkamamu bange lrpz, x mzli kc tqyagox-ngrne aclveamu ninge, x mzli kc tqmncpx-ngrmc mz presin oklatimamu ninge.'

³⁷ "Zbz leplz kxnztubqng sa narpimlr bange kx, '?Kxetu, mzli kzniqe mc-ngrgr nzbrtale-krm x rkabzkr nam dakxnzng? ?X mzli kzniqe mc-ngrgr nzbrlxkzkr drtwrnge rkamamu nange dakxnzng, x mzli kc tqbrlxkzngr drtwrnge rkamamu mqnge lue? ³⁸ ?X mzli kzniqe mc-ngrgr nzngini-krm lrnarnrlc x adwatrkr nim ma nyzgrng? ?X mzli kzniqe mc-ngrgr trpnzngr scm lrpz x rkabzkr scm? ³⁹ ?X mzli kzniqe mc-ngrgr nzyagox-krm o nzmncpx-krme mz presin x oklatibzkr nim?" ⁴⁰ X sa na-ayzlu-ngrbo natqdr kx, 'Da angidr lc napibo bamu. Mzli kzniqe okatr-ngrnamu leplz nengeng, kxmule-esz' nidr leplz txneng, mz drtwrnge okatrpeamu ninge.'

⁴¹ "X mzli lc sa napi-kzpo mz leplz kcng tzmnncng mz nrlarnge kxmc kx, 'Nimu kcng tzmnclzbzng mz zngya ngr drtwr Gct, vzpeamu. X vznamu mz nyr ngr Hxl kc tqngctx alo, tqoliqti Gct mz nzayrplapx-krde Setzn badr drka' nedeng amrlx. ⁴² Nzayrplapxng lc takitrde nimu murde mzli kc tqbrtale-ngrne tr-rkapwa'muu nange dakxnzng, x mzli kc tqbrlxkzngr drtwrnge tr-rkapwa'muu mqnge lue, ⁴³ x mzli kc tqngini-ngrbo lrnarnrlc bamu tradwatrwamu ninge ma nyzmung, x mzli kc trpnzngr scnge lrpz tr-rkapwa'muu bange lrpz, x mzli kc tqyagox-ngrne x tqmncpx-ngrmc mz

† ^{25:30} Dztugu amrlx sc Gct, murde nzvzpxmqng mz mqde. X suti drtwrde kx nigu kcng tzlxngitl Jiszs naokatrku leplz mz da amrlx kx kamle bagu — mz da scgung, mz trau scgung, mz drtc' nyzugung, x mz nzrkrlz-krgung, murde dzbe leplz nedeng naetunepx. ✶ ^{25:31} Matiu 16:27

presin traclvewamuu ninge.’ ⁴⁴ Zbz leplz lcng sa narpimlr bange kx, ‘? Kxetu, mzli kznike mc-ngrgr nzbrtale-krm x nzbrlxkzkr drtwrm, x nzngini-krm lrnarnrlc, x trpnzngr scm lrpz, x nzyagox-krm x nzmnctx-krme mz presin x trokatrkru nim?’ ⁴⁵ X sa na-ayzlu-ngrbo natqdr kx, ‘Da angidr lc napibo bamu. Mzli kznike pxtpx-ngrnamu nzokatr-krmu leplz, kxmule-esz’ nidr leplz txneng, mz drtwrnge pxtpx-ngrnamu nzokatr-krmu ninge.’ ⁴⁶ Zbz leplz lcng sa naprtrng mz Hxl mz nzayrplapxngr kc tqyctx alo. A' kxnztubqng sa naprtrng Heven mz nzlungr kxboi.”

26

Kxnzetu R Lr Jiu Nzrpilr Nanibqlr Jiszs Mak 14:1-2; Luk 22:1-2; Jon 11:45-57

¹ Mzli kc Jiszs tqayrkrpxpe-ngrde nzalvztrngr lcng, rpimle bagr kx,
² “Krlzamu kx ycbep zbzq lang li x zbzq kxtr kc tzrpibz Nzamyangr sc tqkaputrpem. Mzli lc ninge Mrlx Leplz sa nalolvz x natqlvztr ninge mz kros.”

³ Kxnzetu rdr pris x lrtzlvzng r lr Jiu nzyrlwr-lxblrng mz ma kc etu nyz Kaefzs, kc tqngi Nardr Pris. ⁴ Nzyrlqlr drtwr ngr nzlolvz-kapq-krdr Jiszs x nanibqlr. ⁵ A' nzrpilr kx, “Bzkq lolvzku nide mz nabz zbzq kcng tqetung, murde ma tqrkatrpzku mz leplz kxkqlu nzotablrngr.”

Jiszs Aelu Mxri Tolo Betzni Mak 14:3-9; Jon 12:1-8

⁶ Jiszs mnc mztea Betzni mz ma nyz kzdq kc ncblu drtqde Saemon. Ncblu lc amrlz Jiszs mzli kc mz lepz kx dwatibzle nide. ⁷ Mzli kc tqmungr Jiszs ma lcde, dwatrpz kc olvz. Twzbzle kc botol ngr tolo kx narnnbr ngrde lqlwx x mnre mrlz zlwz. X sc tqaelupebzle nar Jiszs mz nzarmyalz-krde nide. ⁸ Kx mckr da lc, drtwrgr ngya, sc tqrpi-etrpekr kx, “?Nike olvz lc tqayrkrtitx-ngrde tolo lc narnnbr ngrde lqlwx? ⁹ Takitrde nzamwatxngr mz narnnbr kc tqlqlwx, x nakabz trau ngrde mz nzokatrngr leplz kxtrnzrngiscung!”

¹⁰ A' rpim Jiszs bagr kx, “Bzkq drtwrmu lctrpz bade. ?Memule tqrpi-ngrnamu narpwa'-ngrbzmu da lc tqalele? Da kxmrlz-esz'ngr lc tqalemle bange. ¹¹ Doa kx trnzrngiscung mnc-zvzamu badr, a' ninge trnamnc-zvzpou bamu. ¹² Aelule ninge tolo, mz nzoliqti-krbzle nrkrdrtrqnge mzli kc nabz-ngrne x nzryrtzmqng ninge kc ate. ¹³ Napi-angidrbo bamu, drlve keng nzyapwxtipxngr Nrpakxmrlz lc mrka mz nrlc, da kxmrlz lc tqalem olvz lc bange sa napipx kz, mz nzrdctipxngr drtwr nide mz nrlc tulvzo.”

Judzs Pyrlq Drtwr Mz Nzamwa-krde Jiszs Mak 14:10-11; Luk 22:3-6

¹⁴ Zbz Judzs Iskariot, kzdq nigr kcng nzpnu-esz'-nrade-li (12), vzbz mz kxnzetu rdr pris. ¹⁵ Rpibzle badr kx, “?Nakamamu bange natqlvr mz nzaprc-krbo Jiszs bamu mz nzlolvz-krmu nide?” X sc tzrlwxpxpebzlr bade trau kx ngi silvz nzpnu-tq (30). ¹⁶ Zbz Judzs sc tqrtangrtipele mzli kxmrlz kx na-aprc-ngrbzle Jiszs badr. *

Jiszs X Ncblu Nedeng Nzmulvzlr Nzamyangr Mak 14:12-21; Luk 22:7-13, 21-23; Jon 13:18-30

¹⁷ Mz zbzq kc kai ngr Nzmulvzng Bret kx Trpnzngr Yisti Ngrde, veatibzkr mz Jiszs kx, “?Myx me naoliqti-ngrbzkr dakxanzng kx nangq

* ^{26:15} Nzrlasngr 21:32; Sekaraea 11:12-13 * ^{26:16} 26:15 Mz Nzryrngrkxtr Kc Kai, trau kx ngi silvz nzpnu-tq takitrde nzxpengr nzrnibqng kxnxawz-nrbalq. X nztwz-krde narnnbr lc aelwapx-ngrde kx Judzs trmatqu mz drtwrde Jiszs.

mz Nzamyangr?” ¹⁸ Jiszs rpile kx navzbzng mz kzdq ncblo mzteadau x narpibzlr bade kx, “Kxakrlz ngrgr rpibzle bam kx, ‘Mzli kc tqmcpx Gct mz nzbz-krnge ycpe pipz nzkaputr-krmle. X sa namulvzkr badr ncblo nengeng Nzamyangr mz ma nyzm.’” ¹⁹ Kzdung kztegrng nzalelr da kc tqipibzle badr mz nzoliqti-krdr Nzamyangr. ²⁰ Kx krlzbzle kc milzpq, Jiszs x nigr kcng nzpnu-esz'-nrade-li (12) sc tqwxbuopekr mz nzmu-krgr. ²¹ X mzli kc tqmupe-ngrgr, rpim Jiszs bagr kx, “Napi-angidrbo bamu kx kzdq nimu esz' sa na-amwabzle ninge mz enqmi rngeng.” ²² Kx xlrbzkr le, drtwrgr vztx pnz. X sc tqycmne-esz'-lxblrpebzkr bade, tqtulzm kc nigr tqrpibzle kx, “?Kxetu, trnipwc'u la tqpiq kx?” ²³ Ayzlu-ngrm Jiszs natqgr kx, “MrIx kc naleole bret nadre mz dis lc, tqwxbutrp bange, sa na-amwale ninge. ²⁴ Ninge MrIx Leplz nabzx navz-nqblqle Nzryrngrkxtr. A' agrmplz ncblo la na-amwale ninge. Murde takitrde bzkq mzte nzmc pnz, murde nzayrplapxngr nide kalr sa namyatpx-esz'ngr.” ²⁵ Zbz Judzs kc na-amwale nide, rpibzle bade kx, “?Kxakrlz, trnipwc'u la tqpiq kx?” Jiszs ayzlu-ngrbzle natqde kx, “Dela tqplzpxpeq.”

Jiszs Ayzuole Nzmungrkxtr

Mak 14:22-26; Luk 22:14-20; 1 Korint 11:23-25

²⁶ Mzli kc tqmube-ngrgr, Jiszs kalzmle bret. Awitx-ngrbzle mz Gct, lopxile, kamle bagr x rpimle kx, “Twzamu x ngqnamu murde krlc ncvr drtqnge.” ²⁷ Zbz glqlzmle kap. Awitx-ngrbzle mz Gct, kamle bagr x rpimle bagr kx, “Mnqamu amrlx ngrmu. ²⁸ Murde krlc mepyr rnge kc tqyrlerek-ngrde leplz kxkqlu, mz Nzesz'tikr Drtwr Gct badr leplz, mz nzipqpx-krde alwx ngrdr. ²⁹ Da zpwxtx, trpengr nzrmnq-krnge waen, navz nakrlzbzle mzli kc narmnq-lxblr-ngrgu waen kxmrna mz nrlc kxmrna kc na-aclve Trtenge kalr.” ³⁰ Mz nibrde ngrtx-ngrgr kc Sam ngr nzrglqpxngr x sc tqrlaszpekr mzteadau, tqvzdzpekr mz Newz ngr Nc Olivi. †

Plzpx-kaipz Jiszs Nzrpikr Pita Trkrlzleu Nide

Mak 14:27-31; Luk 22:31-34; Jon 13:36-38

³¹ Zbz rpim Jiszs bagr kx, “Koma mz nrlckxbq mzli kc nalolvzngr ninge nimu amrlx ngrmu sa nadwaszamu ninge. X krlc sa na-atutrlle Nzryrngrkxtr mz nzrpi-krde kx, ‘Ninge Yawe, sa nanibqx kxaclve sip, x sip nedeng sa na-akiting nrlc.’” ³² A' mz nibr nzatulz-moungr ninge mz nzbzngr, sa nartwayz-kaipo Gzlili x navz-kzpzu mz nzrmcti-lzbq-krgu elr.” ³³ A' Pita rpibzle kx, “Trtxpnzng nzwasz-krnge nim mzli kc nalolvzngr nim, kxmule-esz' kztenge lcng nzdwang amrlx!” ³⁴ Jiszs rpibzle mz Pita kx, “Napi-angidrbo bam, koma mz nrlckxbq, nzwrdre natq nzrpi-krm trkrlzwq ninge x kio kc tqkya' ate.” ³⁵ A' Pita rpi-kzpze bade kx, “Trtxpnzng nzrpi-krnge kx trkrlzwu nim! Kxmule-esz' nzabzminge nim!” X pi-kzpzkri nigr kztede kcng amrlx.

Jiszs Krka' Esz'-krde Getsemzni

Mak 14:32-42; Luk 22:39-46

[†] **26:23** Sam 41:9 [†] **26:30** 26:28 Nzesz'tikr Drtwr lc rpile kx Jiszs tekqtrle nigu mz nzayrplapxngr mz alwx rgung x Gct trpengr nznibq-krde nigu mz alwx lcng. Murde mz nzvz-nqblq-krde Nzesz'tikr Drtwr lc, Gct anulvzlpbzle alwx ngrgung mz Jiszs. X kamle bagu nztubq-krde. Murde mzli kc obq-ngrmle bagu, namc-txpwlzle kx apuku Jiszs mz nztr-krde. 26:30 Mz nzvz-nqblq-krde nqmq kr lr Jiu, mz nzmungr mz Nzamyangr, nzngr-ngrdr Sam 113—118. Kzdung Sam nzngr-kai-ngrdr, x sc tzmu-ateng. X nzngr-ngrdr Sam kzbleng mz nibr nzmungr lc. Mz nzvzdz-krdr mz newz lc, mwx trtakiru nabz nepi kxesz'! [†] **26:31** Sekaraea 13:7

³⁶ Zbz vzokr badr Jiszs krlbzkr kzdq nrlc drtqde Getsemzni. Jiszs rpimle bagr kx, "Wxbupwzmu mrka mzli kc nakrka'-ngrne mrkc." ³⁷ Vzmile Pita, x mrlx Sebedi kcng nzling. Mzli lc nabz Jiszs talvzope x mrlepuge-ngrde nzvzkr drtwrde. ³⁸ Sc tqrpipebzle mz rtqlrdr kx, "Nzvzkr drtwrnge etutx-zlwzpe x rpile nanibqle ninge. Mncpwzmu mrka x aukzpwzmu."

³⁹ Vzspxle nidr kxipiz x sc tqrtco-lzbqpengr mz drtc' mz nzkrka'-krde. Rpile kx, "Trtenge, nzmu kx tqrlrpx-ngrnle, trsutiu drtwrnge nzrlrpx-lzbq-krnge mz nzetqkr drtqnge x nzbzngr. A' bzkq vz-nqblqq me pnz drtwrnge, a' nangi zvz me pnz drtwrm." ⁴⁰ Mz nibr nzkrka'-krde, yzlum mz ncblo kcng nztq, a' sa tzmwing. Sc tqrpiopebzle mz Pita kx, "?Rblx-zlwzbz bam nzobq-krm ninge mz nabz nepi kxesz?" ⁴¹ Aukzpwzmu x krka'namu murde natu-amqngiamu mz nzatalzngr. Murde kxmule-esz' suti drtwrmu nzalengr da kxtubq, a' nzxplr-krmu esz'-krmu trtakitrdeu."

⁴² Zbz Jiszs vz mou mz nzkrka'-krde nzwrde krali, x rpi-moule kx, "Trtenge, nzmu kx tqpnz drtwrm nzrlrpx-lzbq-krnge mz nzetqkr drtqnge x nzbzngr, kxnamupele lape!" ⁴³ Kx yzlu-mople kc badr, mcle kx nzmwiemoung rtqlrdr, murde mztr one mwi.

⁴⁴ Zbz Jiszs yzlu mou mz nzkrka'-krde nzwrde kratq. X pi-moule natqde kcng pwz. ⁴⁵ X kx yzlu-mople badr, mz nzyrkrpx-krbz nzkrka'-krde, mcle sc tzmwibeng. Sc tqrpipebzle kx, "Elr! Nimu ka tqmwibeamu. A' mzli kc tqpi-pnzbo bamu sc tqkaputrpebz. Obqbzmu, ninge Mrlx Leplz se naprcpebz mz zmatq ngr ncblo kx nzaleng alwx. ⁴⁶ Tulzamu, navzbzku narmcti-lzbqku badr. Obqbzmu, ncblo kc tqamwale ninge sa tqvzpebz."

Jiszs Nzlolvz Getsemzni

Mak 14:43-50; Luk 22:47-53; Jon 18:3-12

⁴⁷ Mzli kc Jiszs tqycmnebe-ngrde, Judzs sc tqkaputrpebz. Nide kzdq nigr kcng nzpnu-esz'-nrade-li (12), x vz-nqblqm zbo ngr ncblo kxetu. Nzatwzlrpx-ngrmqng kxnzetu rdr pris x lrtzlvzng. Nzrmaleng dalr nzotangr, bz x toki r vea. ⁴⁸ Judzs rka-kaipz badr rkx mz nzhpi-krbzle kx, "Krkc natcngix kcma, nide kc nalolvzamu."

⁴⁹ Zbz Judzs vzm mz Jiszs. Rpibzle kx, "Nim la, Kxakrlz!" x sc tqtcngipebzle mqde. ⁵⁰ Jiszs ayzlu-ngrbzle natqde kx, "Mzlenge, aniti nika nartrngztibzme." Zbz ncblo kcng sc tzlolvpelr nide. ⁵¹ A' kzdq nigr kx tu mrlcde yrlqbzle toki r vea scde x lakinpxbzle kzdq nradrtq kxnzawznrbalq ne Nardr Pris. ⁵² A' rpibz Jiszs kx, "Toki r vea scm alvco mou mz bxli rde. Murde krkcng tzotang mz toki r vea, sa na-abz-kzng mz toki r vea.

⁵³ ?Trkrlzwamu kx nzmu narlxtibo mz Trtenge nzokatr-krde ninge, mzli lcpwz sa na-atwzlr-ngrmlle ami ngr enjrl kx myaszpxle nzpnu-esz'-nrade-li (12) mz nztu-ngalelvz-krdr ninge? ⁵⁴ A' nzmu na-alex le, Nzryrngrkxtr kcng tzrpilr kx da lc nakaputrpebz sc trna-atutrpeung." ⁵⁵ Rpibz Jiszs mz zbo ngr ncblo kcng kx, "?Memule tqrtwz-ngrmamu bz x toki r vea mz nzlolvz-krmu ninge? ?Opxm kx ninge kxrmailz ncblo mz nzrnzlvzongr zmatq ngr gzpman? Mz zbz kang kqlu alvztr-zvz-ngrne Mangr-nzangiongr. ?Memule trlolvz-ngrwamuu ninge elr? ⁵⁶ A' krlc tqmusr-ngrnamule lc, na-angidale natq profet kcng mz Nzryrngrkxtr." Zbz nigr amrlx sc tqdwaszpekr nide.

Jiszs Nzvzmibz Mz Kansrl Nyz Lr Jiu

Mak 14:53-65; Luk 22:54-55, 63-71; Jon 18:13-14, 19-24

⁵⁷ Kx nzlolvzlr kc Jiszs nzvzmilr mz ma nyz Kaefzs, kc tqngi Nardr Pris, mrkc tzyrlwrpx-lxblr-ngrdr lrtzlvzng x kxnzalvztrng mz Lou sc Mosis.

⁵⁸ Pita kc tqma-nqblqnebzle nidr. X dwatr-kzpz mz makoa ngr ma kc, sc

tzwxbu-lxblrpeng badr pulis ngr Mangr-nzangiongr mz nzmc-krde nike naprtz.⁵⁹ Kxnzetu rdr pris x Kansrl nzrtangrng ncblo kxnzpokiang kx napilr da kx vz-rbri Jiszs, murde nanibqlr nide.⁶⁰ A' trpnzngr kxnzrmctilr, murde kxmule-esz' leplz nzkqlung nzpokiatitrlr Jiszs, a' nzryapwx-krdr tresz'tiu. Zbz ncblo nzling ntulzmqng.⁶¹ Nzrpibzlr mz Kansrl kc kx, "Xlrkr nzrpikr Jiszs kx, 'Sa na-awxtxobo Mangr-nzangiongr Gct, x nayctitxde zbzq nali x zbzq kratq dekc nawzti-mou-ngrnele.'"

⁶² Zbz Nardr Pris tulzm, sc tqveapebz mz Jiszs kx, "?Myx kxmule, trpnzngr natq kx na-ayzlu-ngrbzme natq ncblo lcng?"⁶³ A' Jiszs anabu tpxpz. Zbz Nardr Pris rpi-mopwzle kx, "Mz drtq Gct kc tqlu, napi-angidrme bagr. ?Ngingi-angidrm Kxnzmcpx? ?Nim Mrlx Gct, o trtingr?"⁶⁴ Ayzlu-ngrbz Jiszs natqde kx, "Eu, ninge mrlxde. X napibo bamu kx sa namcamu ninge, Mrlx Leplz, nzwxbu-krnge me matq esz'ngr mz nrlar Gct kxrtc. X ninge la nayzlu-mopwc' kalr mz nabz dcbz ngr bongavz."⁶⁵ Zbz Nardr Pris sc tqpesali-zlwzpele nzkq scde, x sc tqrpipebzle mz Kansrl kx, "Pivxipele Gct! Trpengr nzrtangr-krgu ncblo kx narpim bagu da kx vz-rbri mrlx lc! Murde sa tqxlrpebzmu natq kx pivxiti-ngrde Gct!"⁶⁶ ?Nike aotirpz drtwrmu mz mrlx lc?" Nzrpibz ncblo kcng mz Kansrl kx, "Vz-rbtx-atwrnrngr x takitxtrpwzle nzbz-krde."⁶⁷ Zbz kzdung nidr nzbyatirpzl mzte, x nztzlr mz mqdr. X kzdung nidr nzviplatilr mz mqdr.⁶⁸ Tzrpibzlr kx, "Mz nzngini-krm kc Kxnzmcpx, pim ena bagr krkc tqtzle nim." ‡

Pita Rpile Trkrlzleu Jiszs

Mak 14:53-54, 66-72; Luk 22:54-62; Jon 18:15-18, 25-27

⁶⁹ Mzli kc Pita tqmnclz-ngrmle mz makoa ngr ma kc, kzdq olvz kxnzawz vzm mrkc tqwxbu-ngrde. X sc tqrpipebzle bade kx, "Nim dq kz kx mnctrpz mz Jiszs kc Gzlili."⁷⁰ A' Pita pokiatxbz, rpibzle kx, "Trkrlzwxu da la tqycmnetr-ngrn."⁷¹ Zbz tulzm x sc tqututrpe mz naonrx. Kzdq kz olvz kx mcle Pita, sc tqrpipebzle mz leplz kxnztung mrkc kx, "Mrlx lc nide dq kz ncblo ne Jiszs kc Naszret."⁷² Zbz Pita pokia mou. Rpibzle kx, "Naesalzbo bamu kx da zpxw lc tqpibo bamu. Trkrlzwxu ncblo la tqpimamu bange."⁷³ Zbz mzli trboiu kzdung leplz kx nztung mrkc nzvzmqng mz Pita nzrpikzpzlr kx, "Krlztx-angidrkr kx nim kzdq nidr, murde rblx nzyrlq-kapq-krm nzngini-krm lr Gzlili."⁷⁴ Zbz rpibz Pita kx, "Naesalzbo bamu kx nangi bongavz, da zpxw lc tqpibo bamu. Trkrlzwxu ncblo la. Nzmu kx tqpokiabo na-ayrplapx zvz Gct ninge." X mzli kcpwz kio kc tqkya'pe.⁷⁵ X sc tqdcpxpe mz drtwr Pita nzrpi-krbz Jiszs bade kx, "Napibo bam, nzwrde natq nzrpi-krm trkrlzwq ninge, x kio kc tqkya' ate." Zbz Pita sc tqvzpxpe, x tqbztiptele nzyrningr.

27

Nzado-lzbqkr Judzs *Aposol 1:18-19*

⊕ 26:64 Sam 110:1; Daniel 7:13; Matiu 24:30; Nzaelwapxngr 1:7; 19:11-16 ⊕ 26:65 Livae 24:16

‡ 26:65 Ncblo kcng mz Kansrl trnzlxngitilru Jiszs nzngini-krde Kxnzmcpx o Mrlx Gct. Nardr Pris pesalile lrpzde mz nzvz-nqblk-krde nqmq kr lr Jiu. Kxmule-esz', a' mz Livae 21:10 Gct pipxle kx Nardr Pris bzkq pesalile lrpz scde. 26:68 Mc Mak 14:65 x Luk 22:64. Murde mz nzpe-kilvz-krbzlr mzte, kxnzetu r lr Jiu nzvz-nqblk-krde Asaea 11:3, mz nzrpi-krde kx, "Kxnzmcpx trna-aolvzleu leplz mz nzvz-nqblk-krde da kx mcle mz mzte." A' nzxtrnga-ngrdr nide, murde trnzlxngitilru nide x mz drtwrdr rblxbz bade nzpi-krde neke tzle nide.

¹ Mzli kc mz nourla kc topwz, kxnzetu rdr pris x lrtzlvzng nzycmne-lxblrng x drtwrdr esz'ti kx Jiszs nabz. ² Nzpetxbzlr mqde x sc tzvzmipelr tzaprcpebzlr mz mq Pcntizs Paelzt, lr Rom kc tqachvele Judiz Provins.

³ Judzs kc tqamwabzle Jiszs mz enqmi rdeng, kx mcle kx sa nanibqlr Jiszs, drtwrde vztx zlwz. X twz-mopwzle trau kcng nzpnu-tq (30) tqngi silvz mz kxnzetu rdr pris x lrtzlvzng mz Mangr-nzangiongr. ⁴ X rpibzle badr kx, "Alex alwx kxetu zlwz mz nzamwatx-krbo bamu ncblo kc trvz-rbru. X mzli ka sa nabzpe-ngrde da kc tqalex." Nzayzlu-ngrbzlr natqde kx, "Trpnznggr scgr da kx yctrpz mz da la tqpiq. Krla me pnz drtwrm." ⁵ Zbz Judzs rtctxo-ngrde trau kcng mz Mangr-nzangiongr, x sc tqdwapxpe. Vz x sc tqado-lzbqpe. *

⁶ Kxnzetu rdr pris nzkalzmlr trau kcng, x nzrpilr kx, "Lou scgu tr-rlrpngrdeu nzyrlqtr-krgu trau lcng mz Mangr-nzangiongr. Murde trau lc ngi dalr nzbzkr ncblo." ⁷ Zbz sc tzaotipe drtwrdr nzxpengr drtc' nyz ncblo kc tqrwznggr pct mz drtc', kx nangi me nzyrtzmqnglr mrkzbleng. ⁸ A' mzbq ka nzrpibz drtc' kx yrleongr mepyr, murde nzxpeng mz trau kx ngi dalr nzbzkr ncblo. ⁹ X krlc atutrle natq profet mz Nzryrngrkxtr, mz nzhpi-krde kx, "Nztwzlr trau kcng nzpnu-tq (30) kx ngi silvz, murde krlc narnnbr kx nzyrlq lr Israel nzxpengr nide. ¹⁰ X nzxpelr drtc' nyz ncblo kc tqrwznggr pct mz drtc'. Da lc vz-nqblqle natq kc tqkam Gct bange." *

Jiszs Nzvzmibz Mz Paelzt

Mak 15:1-5; Luk 23:3-5; Jon 18:28-38

¹¹ Mzli lc, Jiszs sc tqaycmnetrpe Paelzt, lr Rom kc tqngi gavzna, mz nzveakrbzle bade kx, "?Myx kxmule, nim king r lr Jiu?" Ayzlu-ngrbz Jiszs natqde kx, "Sa tqplzpxpeq kx ninge." †

¹² A' mzlki kc tzrpi-ngrbz kxnzetu rdr pris x lrtzlvzng kx vz-rbr, trayzlupwzleu natqdr. ¹³ Zbz Paelzt sc tqveape-mopwz bade kx, "?Trxlrwq da kxkqlu kcng tzrpilr kx oti-rbrbzme?" ¹⁴ A' Jiszs sc tqvz zvz trnzyme-krdeu. X trpnznggr natq kxesz' kx ayzlu-ngrbzle natqdr. X Paelzt sc tqkctitpxpele nzanabu-krde. *

Paelzt Rlrpx-ngrde Nzbzkr Jiszs

Mak 15:6-20; Luk 23:13-25; Jon 18:39—19:16

¹⁵ Mz Nzamyangr amrlx, Paelzt aprpxmle kzdq doa lr Jiu kx mnc mz presin kx nzrlxtitrpz lr Jerusalem. ¹⁶ Mzli lc kzdq ncblo kxayo drtqde Barabas mnc mz presin. ¹⁷ Mzli kc tzyrlwrngr leplz kxkqlu, Paelzt rveabz badr kx, "?Neke suti drtwrmu narlr-ngrbo bamu, Barabas o Jiszs kc nzrpibz Kxnzmcpx?" ¹⁸ Krlc tqkxmu nzycmne-krbz Paelzt lc murde krlzle kx Jiszs nzaprcpebz kxnzetu rdr pris bade mz nzdobulvz-krdr nzsuti-zlwzkr drtwr leplz nide.

¹⁹ Mzli kc Paelzt tqwxbuo-ngrbeple mrkc tzrpixngr nztubqkr doa o trtingr, olvz rde atwzlr-ngrbzle nrpa. Rpibzle kx, "Bzkq da kx nawaisrngrn ncblo la. Murde trpnznggr da kx ale-rbrle. X mwibilex kau x atalvzo-zlwzmlle drtvrnge."

²⁰ A' kxnzetu rdr pris nzapqtrpzlr drtwr zbo ngr leplz kcng kx narlxti-alzubzlr mz Paelzt Barabas, x nanibqle Jiszs. ²¹ Paelzt rveabz mz zbo ngr leplz kcng kx, "?Neke mz mrlx lcng li kx suti drtwrmu narlr-ngrbo bamu?"

* ^{27:5} Kxmule-esz' drtwr Judzs vztx, a' trtekqtrleu nqmz nr drtwrde mz nzrlxti-krbzle mz Gct nzipq-krde nide. * ^{27:10} Sekaraea 11:12-13; Jeremaea 32:6-10 † ^{27:11} Mz drtwr lr Jiu, natq lc tqngi "King r lr Jiu" nangi drtq kx pipxle kx nide Kxnzmcpx. Suti drtwrdr kx Paelzt nalxngitile kx Jiszs avzole zmatq ngr king kxetu mrkc Rom, mz nzngini-krde kz king. * ^{27:14} Asaea 53:7

Nzrpibzlr bade kx, "Barabas!" ²² Zbz Paelzt vea-mopwz badr kx, "?Nike nawaisr-ngrne Jiszs kc tzrpibz Kxnzmcpx?" A' nzrpibzlr kx, "Natqlvztr mz kros!" ²³ Rpi-mopwz Paelzt kx, "?A' memule? ?Da kxtrka kznike alele?" A' sc tznemi-katobzlr kx, "Natqlvztr mz kros!" ²⁴ Paelzt krlzpele kx rblxpebz bade nztekqtr-krbzle drtwrdr, x ycpe pipz nzotablrkr leplz kxkqlu mz nzngyatikr drtwrdr nide mz nzycmne-krde. Zbz otile lue, sc tqycpqpele mqde, x rpibzle badr kx, "Krlc rkx kx aelwapx-ngrde kx nzbzkr ncblo lc trtutrpuu bange. A' nzbz-krde tutrpz bamu." ²⁵ X leplz lcng nzayzlu-ngrbzlr natqde kx, "Nzbz-krde natutrp bagr x doa negrng." ²⁶ Zbz sc tqqlrpe-ngrbzle Barabas badr. X rpibzle mz ncblo ngr vea nedeng kx naiklalr Jiszs x natqlvztrlr nide mz kros.

²⁷ Kzdung ncblo ngr vea nzvzmitrlr Jiszs mz nabxbz ngr ma kxetu nyz Paelzt, x sc tzkqlepelr ncblo ngr vea kztedrng amrlx. ²⁸ Nzavotxobzlr nzkq scdeng, x sc tzakqpelr mz nzkq kxpc. ²⁹ X nzngrlelr kc nqvi nzku ngi kraon scde, nzalaobzlr mz narde. Nzyrlqtrpzlr kc mz mqde dapunc sc kxrmailz. Zbz sc tzrweopebzng zpr bade mz nzapusr-krdr nide king. Sc tzxtrngalvztrpelr x tzmrgepe-ngrdr nide kx, "Nim la, King r lr Jiu! Nzmnc-krm naboi." ³⁰ Nzbyatilr nide x nzkatpxbxzlr dapunc kc x nztakrti-ngrbzlr narde nzwrede kqlu. ³¹ Mz nibrde sc tzavopxpebzlr nzkq kc pc x nzavoo-mopwzlr nzkq scde. X sc tzvzmipxpelr mz nzrtqlvztrngr nide mz kros.

Jiszs Nztqlvztr Mz Kros

Mak 15:21-32; Luk 23:26-43; Jon 19:17-27

³² Kx nzpprpxbzlr kc mz nrlarde kx yz ngr mzteadau, sc tzrmctipelr kc ncblo drtqde Saemon. Nide dalr taon kxetu Saerin, mrkc Afrika. X sc tzrtulrtrpe-ngrbz ncblo ngr vea kcng bade nzglq-krbzle kros, murde drtq Jiszs mewetx-zlwzpe. ³³ Ncblo ngr vea kcng nzvzmilr Jiszs mz kzdq newz drtqde *Gclgata*, drtwr ngrde *Bekrlz*, murde nzobq-krde apule bekrlz. ³⁴ Nzkabzlr bade kc waen kx ycmi luekxpiz nzrpibz mrr. Abztrle kxipiz, a' trmnq-pnzleu. ³⁵ [†]

³⁵ Zbz sc tztqlvztrpelr nide mz kros. X nctq lrpz scdeng nzayrleti ncblo ngr vea kcng daes. ³⁶ [†] Zbz ncblo ngr vea kcng sc tzwxbupeng x tzaukztipwzlr nide. ³⁷ Mz nzaelwapxngr da kc tqbzngr Jiszs, nzyrtr kcng natq mz kzdq da x nztqlvztr mrkc tqyc-zbzlz narde. Nzyr kx,

KRLC JISZS, KING R LR JIU.

³⁸ X nztqlvztr kz mz kros kzbleng ncblo nzling kxnxpnang da taplxsr nrlar Jiszs. ³⁹ Mzli kc tqdoo-ngrm Jiszs mz kros, kzdung leplz kx nzvzkmrlr mrlcde nzrpitilbzng natq kxtrkating bade. Nzycngrlrlzbzlr nardr. ⁴⁰ [†] X nzrpilzbzlr kx, "Kx tqrpip kx matq-esz'ngrn mz nzawxo-krm Mangrzangiongr x wzti-mowq mz zbzq kxtqtxu, e vzom mz kros la mz nzarlapx-lzbq-krm! Krlzq nzale-krmle nzmu nangi-zwpxm mrlx Gct!"

⁴¹ Mz nzmu-krde lcdepwz, kxnxetu rdr pris x kxnxalvztrng mz Lou sc Mosis, x lrtzlvzng nxztrnga-kz-ngrdr Jiszs mz mzlirdr. ⁴² Nzrpilr kx, "Krlzle nzarlapx-krde kzdu-kzng leplz, a' trkrlzleu nzarlapx-lzbq-krde. Nzmu kx tqngini-angidrle King r Israel, navzopem mz kros mzli ka x sc tqlxngitipeku

[†] **27:34** Sam 69:21 [‡] **27:34** 27:33 Mz natq lr Rom, *Bekrlz nzrpibz Kalvzri*. 27:34 Mrr, kala ngrde bla. Nzwzngz mz lue lr be nounc kxlala nzrpibz mrr. Nzaleti mz da kxkqlu, x ngi kz tolo x medesin. Mrlc nzyrlqmi waen, ngi dalr nzaesakingr zvetq. Jiszs trmnq-pnzleu murde mz nzvz-nqtblq-krde me pnz drtwr Gct Trte, natwzle zvetq atwrnrngr x naxngitile nzxpepx-krde alwx ngr leplz amrlx.

[†] **27:35** Sam 22:18 [‡] **27:39** Sam 22:7; 109:25

nide. ⁴³ Drtwrde abrtrpzle mz Gct, x rpile kx nide mrlx Gct. Namcku ena na-arlaxkr Gct nide mzli ka, nzmu mrlzti-zlwzle nide.” [☆]

⁴⁴ X mz nqmq lcpwz, ncblo kcng nzling tzpnang da tzdo-kzng mz kros, nzrpiti-kzpzng natq kxtrka bade. §

Nzbzkr Jiszs

Mak 15:33-41; Luk 23:44-49; Jon 19:28-30

⁴⁵ Mzli kc tqavauo-ngrm nepi, nzlo akqlvztx-pnzle nrlc tulvzo, krlzbzle nabznepi kc tqtq. ⁴⁶ X mzli lcpwz, Jiszs sc tqetumipe natqde, nzrpi-krde kx, “Eli! Eli! ?Lama sabaktani?” Drtwr ngrde kx, “Gct! Gct o! ?Memule tqvzszepe-ngrn ninge?” [☆] ⁴⁷ Kzdung leplz mrkc nzxlr-rbrbzlr natq Jiszs, x sc tzrpipeir kx, “?Xlrbzmu? Kqlepele Profet Elaeja kc bqnc mz nzokatr-krde nide!” *

⁴⁸ Kzdq nidr otile kc kzdq da, petrle mz nounc, leole mz waen kxrkx, x sc tqglalzpebzle x katrzple mz nao Jiszs. [☆] ⁴⁹ A' kzdung kz leplz nzrpibzlr kx, “Na-aenzliku ena, namcku nzvz-krm Elaeja mz nzarlapx-krde nide.”

⁵⁰ Zbz Jiszs netxpx-kato mou x sc tqrlrpe-ngrbzle mqngrde mz Gct. [☆] ⁵¹ X mzli lcpwz, lotqbr kc tqdo Mrkc Tqtr Mangr-nzangiongr nzpesalikiomle wq tatxo mz noude, ncte li. X mzli lc nengq kxetu vzm x rplz kxetuting nzbxpitng. ⁵² X butqbr x gq kcng tzyrbqpx-ngrm namz nzlvxpx-lzbqng x nrkrdrtrq leplz neng Gct kxkqlu nztulz-mopqng mz nzbngr. ⁵³ Nzrlaszlr butqbr kcng x mz nibr nztulz-mou-krm Jiszs mz nzbngr, sc tzvztrpeng mzteadau kxtr Jerusalem, x nzmc leplz kxnzkqlung nidr elr.

⁵⁴ Kzdq kxetu kx aclvele dzbe ncblo ngr vea ngr Rom kc trtqki-esz' (100) tulzbz mz nou kros badr kzdung kz ncblo ngr vea mz nzaukzlz-krbzlr mz Jiszs. Kxnzmclr nengq x da lcng tqprtzting, nzmwxlr-zlwz-ngrdr. X sc tzrpipeir kx, “Da zpwxtx, ncblo ka nide Mrlx Gct.”

⁵⁵ Kzdung olvz nzmnk-kzng mrlcde, sc tzumqng rlru, x nzmclr da kcng tzwaisrngr Jiszs. Olvz lcng nzvzklmlr Gzlili x nzvzdzng badr Jiszs Jerusalem mz nzokatr-krdr nide. ⁵⁶ Kzdung olvz lcdeng nidr seleng, Mxri kc Makdala, Mxri lxe Jemes x Josip, x lxe Jemes x Jon.

Jiszs Nzyrtzmq

Mak 15:42-47; Luk 23:50-56; Jon 19:38-42

⁵⁷ Mzli kc tqycpe pipz nztaokr nepi x Sabat kc tqyzutre, kzdq bcnyr vzm. Nide ncblo ngr taon Arimatia, drtqde Josip x lxngitile Jiszs. ⁵⁸ Vzbz mz Paelzt x sc tqrlxtypebzle nrkrdrtrq Jiszs, kx nayrtzmque. X sc tqppipebz Paelzt mz ncblo nedeng kx narlr-ngrbzlr bade. ⁵⁹ Zbz Josip glqle nrkrdrtrq Jiszs x sc tqbxtypele lrpz kxprki. ⁶⁰ X sc tqyrlqtrpele namz ngr Jiszs mz gq lr kxnzbz nyzde, kc tqekqtitr-atele mz butqbr. Alqlitrpzle kc rplz kxetu kx na-apqrtr-ngrbzle naonrx ngrde, x sc tqvzpe. ⁶¹ Mxri kc Makdala x kzdq kz Mxri nzwxbutrpszng yz mz butqbr kc, x nzmclr da amrlx kcng tqaleting Josip.

Ncblo KCng Tzaukzng Mz Gq Lr Jiszs

⁶² Zbq kc navz-mop ngi Sabat. X kxnzetu rdr pris x Farzsi nzvzbzng mz Paelzt. ⁶³ Nzrpibzlr bade kx, “Kxetu, dcpkx mz drtwrgr mzli kc tqqlubengr

* 27:43 Sam 22:8 § 27:44 Jiszs krlzle nzarlapx-lzbq-krde. A' murde rpile na-arlaxkr leplz mz alwx ngrdrng, tekqtrle nidr mz nzayrplaxkr Gct nide. Dekc trarlapx-lzbq-ngru Jiszs. Naglqlz-ngru Gct nzrlrpx-lzbq-krde mz nzbz-krde nigu. * 27:46 Sam 22:1; Asaea 59:2 * 27:47 27:45 Nzetqkr drtq kc tqprtilzle Jiszs mz Matiu 27 nzplzpx kai mz Sam 22 x Sam 69. Alwx ngrgung dekcnq tqbatrpszle nzvzszer Gct Jiszs. 27:46 Natq lr Jiu mzli kc pnz ngi Hibru. X Eli apu-kzpwzle nzrpingr drtq Elaeja. Mc kz 2 King 2:11. * 27:48 Sam 69:21 * 27:50 Sam 31:5

blzpkoria kc, rpile kx, ‘Zbq naotx natq, x ninge kc tqalupe-mopwc.’⁶⁴ Mz nzmu-krde lcde, kapx natqm kx navz du ncblo ngr vea nemqng mz nzaukz-krdr mrkc tzyrtzmqngr nide, nakrlz-zpwxbzle nzyrkrpxkr zbz kcng tq. Murde ncblo nedeng ma tzvzmqng, tzpnatipelr namz ngrde, x sc tzpipebzlr mz leplz kx lupe mou. Nzpokiangr lc sa naetutx zlwz namyaszpxle nzpokiangr kx nide Kxnzmcpx.”⁶⁵ Rpibz Paelzt badr kx, “Vzmiamu du ncblo ngr vea nengeng x namctr mz nzaukz-krdr kx trpzngr kx vznebz mrlcde.”⁶⁶ Zbz sc tzvzpeng x tzamqngitpeler butqbr mz nzamnc-krdr ncblo ngr vea kcng mz nzaukz-krdr elr, x mz nzayrlenitrngr kadol mrkc tqmwitrngr rplz kc mz butqbr kc. Murde nakrlz-ngrdr kx rlvxtrpe kc naonrx mz nzmrglckr dalr kadol kc.

28

*Jiszs Tulz-mop Mz Nzbzng
Mak 16:1-10; Luk 24:1-12; Jon 20:1-10*

¹ Mz nibr Sabat kc, mz nourla kxttopwz mz Sade, Mxri kc Makdala x kzdq kz Mxri nzvzng mz nzoklati-krdr butqbr kc tzyrtzmqngr Jiszs. ² Zbz kzdq enjrl ne Gct vzom Heven, vzmim nengq kxetu. Vztr mz butqbr kc, x sc tqalqlipxpele rplz kc etu tzapqbrtrngr naonrx kc, x sc tqwxbuopem elr. ³ Nzpnapr-krde apule bzlrpc, x lrpz scde prkitxpx apule nqbya ngr nrc. ⁴ Ncblo kcng tzaukzng nzmwxlrng x nzrnrci-lzbqng x nztaong mz drtc' nzapulr ncblo kxnzbzpeng.

⁵ Enjrl kc rpibzle mz olvz kcng kx, “Bzkq mwxlramu. Krlzpebo kx rtangrtiamu Jiszs kc tztqlvztr mz kros. ⁶ Tryrbqpeu mrka, murde lupe mou, da kc tqwai nzpi-krbzlele bamu. Vzmamu x mc-zpwxamu mrkc tzayrbqng namz ngrde. ⁷ A' yzlu-aniamu x pibzmu mz ncblo nedeng kx, ‘Jiszs tulzpe-mop mz nzbzng, x sa nartwayzpe kai Gzlili. Sa narmctiamu nide elr.’ Nrpa kx napibo bamu delape.”⁸ Zbz olvz kcng sc tzngrrlr-anipeng mz nzpi-krmlrlle bagr. Kxmule-esz' nzmwxlrbeng, a' drtwrdr elalz-zlwz-kzp.

⁹ A' mz nzvz-krdr, nzpwrkilvc-ngrdr nzadcpk-lzbq-krbz Jiszs badr. X sc tqrpipebzle badr kx, “Nimu la!” Nzvzmqng x nzyrngzobzng bade, x nzmaletrpzlr nanycde, mz nzangio-krdr nide. ¹⁰ Zbz rpibzle badr kx, “Bzkq mwxlramu. A' vznamu x pibzmu mz mzlengeng kx navzng Gzlili x sa narmctirl ninge elr.”

Nzrlwakr Ncblo Kcng Tzaukzng

¹¹ Mzli kc tzvzngr olvz kcng, ncblo kcng tzaukzng ntulzmqng, x kzduung nidr nzvzng Jerusalem, sc tzrlwape-ngrbzlr mz kxnzetu rdr pris da amrlx kcng tqprtz. ¹² Zbz kxnzetu rdr pris nzyrlwr-lxblrng badr lrtzlvzng x sc tzryrlqpgeng drtwr. Mz drtwr lc, nzrkabzng trau kxkqlu mz ncblo ngr vea kcng. ¹³ X nzrpibzlr badr kx, “Mz da kc tqprtz, napibzmu mz leplz kx, ‘Ncblo nedeng nzvzmqng mz nrlckxbq mzli kc tqmwi-ngrgr x nzpnatilr nrkrdrtrqde.’¹⁴ X nzmu Paelzt, kxetu rmu kc tqngi Gavzna naxlrle da lc, sa naycmnebzkr bade ma tzayrplapxlr nimu.”*

* **28:14** Gavzna nide kxetu r gzpman ngr Rom kx myapxbz mrkc Israel. Ncblo ngr vea lcng trnzyatrpwzung mz da kc tqale enjrl. A' nzmu napibzlr mz leplz kx krlc enjrl, rblx nzlxngiti-krdrle. A' nzmu napibzlr kx nzmwing, rblx kz nzlxngiti-krdrle, murde ncblo ngr vea ne Rom bzkq nzmwing mz mzli r nzwnzng. X nzmu kxnzetu rdrng naxlrlrle, na-adwatrlr nidr mz presin. Kxmule-esz', a' nzmu nzpxtxpx-ngrdr nzpipx-krdr kx nzmwing, kxnzetu r lr Jiu lcng ma na-adwatr-kzlr nidr mz presin, murde trnzalelru nzwz-krdr.

15 Mz nzmu-krde lcde, ncblo ngr vea lcng nztwzlr trau kcng x nzvz-nqblqlr natq pris kcng. X krlc be kx nzyapwxtine zvz mz mzli lr Jiu, vz-krlzmle mzli ka tqyr-ngrne buk lc.

Nzwzngr Kx Myapx Kx Kapx Jiszs

Mak 16:14-18; Luk 24:36-49; Jon 20:19-23; Aposol 1:6-8

16 Nigr kcng nzpnu-esz'-nrade-esz' (11) vzkr Gzlili mz newz kc tqppim Jiszs navzdz-ngrgr. **17** Mzli kc tqmc-ngrgr nide, angiokr nide, kxmule-esz' kzdung nigr drtwrdr litrbepz bade. **18** Jiszs vzm bagr x rpimle kx, "Gct aprcpemle bange zmatq mz doa x da amrlx Heven x mz nrlc ka. **19** Mz nzmu-krde lcde, vznamu mz zmatq rnge. X okatramu leplz ngr mrkcng kqlu x natq amrlx mz nrlc tulvzo mz nzvz-nqblq-krdr ninje. X awrkxtramu nidr mz drtq Gct mz nzngini-krde Trte, MrIx, x Mqngrkxtr. **20** X alvztramu nidr mz nzvz-nqblq-krdr natq amrlx kcng tqkabo bamu. X sa namnc-zvzbo bamu mz nzokatr-krnge nimu, navz nakrlzbzle mzli kc tqmcpk Trte nayzlu-ngrmopc." †

† **28:20** Drtq Gct lc esz', murde Gct esz'txu, a' leplz ngrde tq, kc tzrpibz *Tqtrbz*. Delc nzycmnengr lc trvz-nqblqleu nzycmnengr kc tqxlr-zvzku mz nzrpingr kx, 'Mz drtq Gct Trte, MrIxde, x Mqngrkxtr' O 'mz drtq Gct Trte, Gct MrIxde, x Gct Mqngrkxtr'. Murde nxzlrngr opxm kx drtq tq o tropxu, a' nangi drtq kxesz'. Mz Nzryrngrkxtr, ngalde lc txpwz kx pi-zpxle leplz kcng tq mz Gct kc esz' mz mzli kcpwz. A' mcku Tqtrbz kz mz nzwrkxtrkr Jiszs mz Matiu 3:16-17, Mak 1:10-11, x Luk 3:22. Mc kz natq kxtopwz elr vzmi Aposol 1:8; 2:38, x 8:16. Leplz nzkqlung nzlxngitlrx aposol kcng nzrnceng zmatq kx myapxbz mz nigu kcng tzrlxngiti-belqng. A' Jiszs pibzle badr kx nzalvztr-krdr leplz navz-nqblqlr natq kcng amrlx tqkabzle badr, vzmi nzamrlzngr nrkrdrtrq kx nzyagoxng, nzalu-mou-ngrm kxnzbzng, nzrmaszlrpxngr drka', x kzdung kz da kxnzmulr lcng. Mz nzmu-krde lcde, me pnzm drtvr Jiszs bagu, nigu kxnzrlxngiting amrlx navz-nqblq-kzku natq kcng tqkabzle mz aposol. Murde rngiscgu zmatq kcpwz tqkabzle badr, krlc zmatq ngr Mqngrkxtr.

Nrpakxmrlz Kx Yr Mak Natq Ngr Nzaplxtqng Mz Nrpakxmrlz Kx Yr Mak

Mak kc tqryr Nrpakxmrlz lc nide mrlx Mxri kc Jerusalem. ♀ Kzdq kz drtqde Jon Mak. ♀ Nide kave kr Banabas, ♀ x mz nzvzpxkr Pol mz Banabas kc ayrnrngr, nzvzng badr. ♀ Mz nibrde Pol trbrtiu drtwrde Mak, murde rlaszle nidr. Kxmule-esz', a' nwz mou badr Banabas. ♀ X mz nibr kzdung mzli sc tqmnc-zpwxtrebz mz Pol. ♀ Kzdung leplz, mz drtwrdr nzrpilr kx Mak nide kzte Pita, murde mzli kc pnz buk kc tzrpibz *Nrpakxmrlz kx Yr Pita*. Mwx Pita okatrle Mak nzlxngiti-krde Jiszs ♀ x pibzle da kcng kqlu bade, tqyroleng mz buk lc. Mwx ni-kzde **obla** kc tzmale-lvi mrkc Getsemzni. ♀

Mwx Mak yrle buk lc mz mzli yiz 50—70 AD mz nibr nzrmcngr mz Jiszs. X mz nibrde ncblo ngr vea ne Rom sc tzodatipelr Mangr-nzangiongr Yawe mrkc Jerusalem, mz yiz 70 AD. Kzdung leplz nzrpilr kx Nrpakxmrlz lc nzyr kai. A' kzdung nzrpilr trtingr. Yrle buk lc mzli kc tzmnc-ngrdr Rom badr Pita. Mzli lc Pita sc tqngipe lrtzlvz, x ycpe pipz nzbz-krde. X opx angidr kx yrbzle mz leplz kxtrngiulrJiu, murde yokaetipxle nqmq kr lr Jiu x nzyr-krde natq ngr Nzryrngrkxtr Kc Kai nzpipzng. X yr-kzle kzdung nzalvztrngr mz nzaetq-ngrbz drtq kxnzrlxngiting x nzbzng murde nzrlxngitingr ♀ kc naokatrle lr Rom kxnzrlxngiting mz nztu-amqngi-krdr mz mzli nzkxpu-krdrng.

Nrpakxmrlz kcng pwx nzbletipx-lxblrng mz kxmu nzaelwapx-krmlr Jiszs bagu. Murde Matiu okatrle nigu nzkrpz-krgu kx Jiszs nide Mevalu x King. Mz buk sc Luk, Jiszs nide Mrlx Leplz. X mz buk sc Jon nide Mrlx Gct. Mz buk sc Mak, Jiszs nide Kxnzawz ne Gct kc tqwztrpz mz leplz, mz nzamrlz-krde nrkrdrtrqdr mz zyagox x mz nzbz-krde nidr mz kros mz nzxpe-krde alwx ngldrng. Mak tryrleu nqvi lr Jiszs, murde trtakitrdeu kxnzawz kxavzo-lzbq.

Mrkcng Mz Buk Lc

Kraes wztitrpzle mz Gct x leplz nedeng mz nzrlrpx-lzbq-krde.

Jiszs alvztrle leplz nedeng kx narlrpx-lzbq-kzng mz nzwztr-krbzlr mz leplz. [8:34-37; 10:43-45]

Mak rlwapele da kxnzmatqng kxnzkctipxng nzpnu-esz'-nrade-rpwxmz (19) mz nzaelwapx-krde kx Jiszs ni-kzde Gct.

Nzryapwxpxkr Jon Kxawrkxtr

Matiu 3:1-12; Luk 3:1-18; Jon 1:19-28

¹ Krlc nzyzutrkr Nrpakxmrlz kcng Jiszs Kxnzmcpx, Mrlx Gct. A' mzli kc tryzutngrka nzvz-krde, Jon Kxawrkxtr vz-kaip mz nzyapwx-krbzle mz leplz.

²⁻³ Asaea, profet kc bqnc, yrole da kx pibz Gct mz mrlxde. Ycmnetr-ngrde Jon Kxawrkxtr mz nzrpilr kx,

"Krlc menrpa nenge. Sa na-atwzlr-ngrne nartwayz-kaipz bam, murde naokatrle leplz nengeng mz nzoliqti-krdr nzvz-krbzme. ♀ Natq kzdq ncblo kx natqde etu mz nzryapwx-krbzle mz leplz lzke. Natq lcde rpile kx,

♀ : Aposol 12:12 ♂ : Aposol 12:25 ♂ : Kolosia 4:10 ♂ : Aposol 12:25; 13:5 ♂ : Aposol 13:13; 15:37-39 ♂ : Kolosia 4:10; Filimon 23; 2 Timoti 4:11 ♂ : 1 Pita 5:13 ♂ : Mak 14:51-52 ♂ : 8:34-38; 13:9-13 ♂ **1:2-3** Malakai 3:1

'Oliqtiamu nabzmu mz nzvz-krm Kxetu Gct. Atubqtibzmu lrpzki kx nangi nyzde na-apule nzoliqtikr leplz kzdq lrpzki kx navzkin king.' " [✳]

⁴ Zbz mz nzatutr-krde Nzryrngrkxtr lc, Jon Kxawrkxtr tupxm lzke mrkc Provins kc Judiz. X yapwxtipxbzle nrpa lcde seleng, "Tekqtramu nqmq nr drtwrmu kxtrka. X rlr-lzbq-ngrmamu mz nzawrkxtr-krbo nimu mz nzaelwapx-krmu nzvzkr drtwrmu mz alwx ngrmu, murde Gct naipqle nimu." ⁵ Leplz kxkqlu zlwz mrkc Jerusalem x mz provins kc Judiz, vz zvz nzvzpx-krmlr mz nzlalztq-krbzlr mz Jon. Nzplxitpxbxzlr alwx ngrdrng, x sc tqawrkxtrpeleng mz LueJodzn.

⁶ Jon vz-nqblqnepwzle nqmq kr ncblo kx tr-rngibau, da kc tzwai profet kcng bqnc. Pxine-ngrp wzle lrpz kx nzwngr mz nrpn r kamel. X amqngitrngrde Iрpxi rde nrkalo kx nzwzpx-ngrm mz bekzu. X dakxnzng nade ngi txpwz dalr lzke, krlcng kionabr x hane. ⁷ X Jon sc tqayapwxtipxbzle kx, "Kzdq la ncblo kc sa navzm mz nibrnge, namyaszlze ninge. X trtakirpwu' u nzwztr-ngrbz bade, kxmule-esz' nzryokaepxngr nqvi lr sadol ngr nanycde. ⁸ Awrkxtrtxpwo nimu mz lue, a' sa na-awrkxtrle nimu mz Mqngirkxtr."

Mz Nzwrkxtrngr X Nzatalngr Jiszs

Matiu 3:13—4:11; Luk 3:21-22; 4:1-13

⁹ Mzli lcde, Jiszs vzkimle mztea Naszret mrkc Gzlili Provins. Vzm mz Jon x sc tqawrkxtrpe Jon nide mz LueJodzn. ¹⁰ Mzli kcpwz Jiszs tqvzdz-ngrmle mz lue kc, mcle Heven nzlvxpx x Mqngirkxtr vzom bade, apule nran. ¹¹ X natq Gct vzom Heven, rpile kx, "Nim MrIxng Kxnmrlzti. X abrtzlvz-zlwzx nim." ^{✳ *}

¹² X mzli kcpwz Mqngirkxtr sc tqngi-batrpebzle nzvztr-krde lzke. ¹³ X mnctipxmle mrkc zbg nzpnu-pwx, tqtamiti Setzn nide mz nzatao-krde nide mz alwx, a' trtao-pnzu. Kxmule-esz' animol kxnntrkating nzmnncng badr, a' enjrl neng Gct nzaclve-angidrlr nide.

Jiszs Yapwxtipxle Nrpakxmrlz X Kqlele Ncblo Nedeng Kcng Ayrnrngr

Matiu 4:12-22; Luk 4:14-15; 5:1-11

¹⁴ Mz nibr King Herot Antipas nzadwatr-krde Jon Kxawrkxtr mz presin, Jiszs kc tqvzpe mz Gzlili Provins mz nzyapwxtipx-krde nrpa ngr Gct.

¹⁵ Rpile kx, "Tekqtramu nqmq nr drtwrmu x rlxngitramu mz Nrpakxmrlz lc. Murde mzli ka Gct sc tqvectrple leplz bade, mz nzmnclz-krbzlr bade mz nzngini-krde King rdr."

¹⁶ Kzdq zbg Jiszs kx vznede kc mz nrlar Dxbu Gzlili, sc tqrmctipele kc ncblo kxnnmwang nzling, Saemon nidr ncdr mzlede Adru. Tzmwaneng mz br scdr. ¹⁷ Zbz rpibz Jiszs badr kx, "Vz-nqblqmamu ninge, murde na-alvztrpo bamu nzrtangrngr leplz, kx nangi nengeng." ¹⁸ X mzli kcpwz nzrlasztx-pnzlr nzwz-krdr x sc tzvz-nqblqpelr Jiszs.

¹⁹ Zbz Jiszs vznebz kxipiz mz nrlar dxbu kc x sc tqrmctipe-kzle kzdq mou mzle-lzbq nzling, Jemes x Jon. Trtedr drtgde Sebedi. Tzmnczmqng mz nabz bot scdr, tzngqtitrlr br scdrng. ²⁰ X mzli kcpwz sc tqkqlepe-kzng Jiszs nidr mz nzvz-nqblq-krdr nide. X nzrlasztxdr trtedr Sebedi mz nabz bot kc badr ncblo kcng tzawzlrng, x sc tzvz-nqblqpe-kzlr nide.

Jiszs Maszlrpx-ngrde Kzdq Drka'

Luk 4:31-37

^{✳ 1:2-3} Asaea 40:3 ^{✳ 1:11} Nou 22:2; Sam 2:7; Asaea 42:1 ^{*} **1:11** Krlzku kx ngi Gct Trte kc tqymneom Heven murde rpile kx Jiszs nide mrlxde. Delc mz ngalrde lcng 10-11, mcku leplz kcng tq, mz Gct kc esz'txu, tzrpibz Tqtrbz. Mc kz Matiu 28:18-20; Aposol 1:8; 2:38, x 8:16 x natq kxnnztopwzng elr.

²¹ Zbz Jiszs badr ncblo nedeng nzpxng sc tzvzpeng mz taon Kzpnizm mrkc Dxbu Gzlili. Kx nzkrzbzlr kc Kzpnizm, sc tzvzrpeng mz mangr-nzkrka'ngr nydr lr Jiu mz nzalvztr-krde leplz mz Satde, kc tqngi Sabat nydr. ²² Leplz amrlx nzkctitpx-zlwzlr nzalvztr-krde. Murde trapuleu kxnxakrlz kcng tzalvztrng mz Loukxtr, a' ycmnemile zmatq angidr.

²³ Zbz kzdq kc ncblo kx mncpx-ngrm drka' sc tqdwatrppez mz mangr-nzkrka'ngr. Sc tqnetxppe mz natqde kxwzpx. ²⁴ Rpipele kx, "Vrr! Vzpe Jiszs kc Naszret! Vz, dwasz nigr! Vz-ngrme nzodati-krm nigr! Krlzx ncblo kznike tqnginim! Nim Ncblo Kxtr kc tqatwzlr-ngrm Gct!"

²⁵ Ycmne-plzlttxtr Jiszs drka' kc. Rpibzle kx, "Mnc-lrpi! Dwapxm mz ncblo la!" ²⁶ X drka' kc arnrctitxde ncblo kc, netpx, x sc tqprszpxpele nide. ²⁷ Dzbe leplz kcng nzkctitpx-pnzlr x sc tzveatine-etrpelr mz nzrpi-krdr kx, "Eke! ?Nike tqpile? ?Krlc nzalvztrngr kxmrna? Rngisc zmatq mz nzrka-krbzle natq mz drka' kcng, x nzlxngitbzlr natqde!" ²⁸ Zbz nrpa ngr da lcng tqaleti Jiszs sc tqvztx-anipepwz mz Gzlili Provins tqlvzo.

Jiszs Amrlzle Kxnzyagoxng Nzkqlung

Matiu 8:14-17; Luk 4:38-41

²⁹ Mzli kc tqyrkrtpx-ngrp wz nzkrka'-krdr, Jiszs badr Jemes, Jon, Saemon x Adru, ncblo kcng tzvz-nqblq-kailr nide nzrlasztxdr mangr-nzkrka'ngr kc. X sc tzdwatrpeng mz ma nyd Saemon ncdr Adru.

³⁰ Kzdo Saemon kc tqngi olvz sc tqmnz me mnz-ngrde murde yagox x drtqde pqpxm. Mzli kc Jiszs tqkrlzpe-ngrbzle mrkc, lr nabz ma kc sc tzpipebzlr bade olvz lc tqyagox. ³¹ Jiszs vzbz bade, otibzle mqde x sc tqokatrpele nzatulz-krmlele. Zyagox kc yrkrtpx pnz, zbz sc tqoliqtipebzle dakxanzng nadr.

³² Mzli kc nepi tqtaope-ngrde, x Sabat kc tqyrkrpxpe-kzpz, lr Kzpnizm nzvzmitimlr mz Jiszs kztedrng kxnzyagoxng x kxnzmncpx-ngrmqng drka'.

³³ Lr mztea kxnzkqlung nzyrlwrtrpzng yz mz ma kc tqmncpx-ngrm Jiszs.

³⁴ X amrlztibzleeng leplz kxkqlu mz nzyagox-krdrng amrlx. X maszlrpx-kzpzleeng drka' mz leplz kxkqlu. A' tr-rlr-ngrp wzleu mz drka' lcdeng nzycmne-krdr, murde nzkrzbzlr kx nide Mevalu kc tqmcpx Gct.

Jiszs Ryapwx Nrpakxmrlz Mrkc Gzlili Provins

Luk 4:42-44

³⁵ Mzli kc nrlc tqbqbe-ngrde, mzli boibe x nrlc kc tqbrlawxppe, Jiszs dwalzm x rlasztxde ma kc, vzpx mz nrlarde kx yz mz taon kc me tunabungr, x sc tqkrka'pe. ³⁶ Mzli kc tzdwatz-ngrmlr, Saemon nide nidl badr kztedeng trnzmcpelru Jiszs. X sc tzvzneppeng mz nzrtabrti-krdr nide.

³⁷ Mzli kc tzrmcti-ngrdr nide sc tzrpipebzlr kx, "Leplz kcng tzrtabrti nime!"

³⁸ A' ayzlu-ngrbz Jiszs natqdr kx, "Kxmule-esz', a' navzki-kzx du mztea kzbleng mz nzryapwxpx-kz-krbong badr Nrpakxmrlz. Murde delc tqngi nou nzvzo-krmc mz nrlc ka." ³⁹ Zbz sc tzolvxtipe-kzlrng mztea amrlx mz Gzlili Provins. X sc tqyapwxtipxpebz Jiszs Nrpakxmrlz mz leplz mz mangr-nzkrka'ngr nydrng, x tqrmaszlrpx-kz-ngrbz drka' kxkqlu badr.

Jiszs Amrlzle Kzdq Ncblo Kx Ycngr Lepz

Matiu 8:1-4; Luk 5:12-16

⁴⁰ Kzdq zbz kzdq ncblo kx ycngr lepz vzm x rwetxobz zpr mz Jiszs. X sc tqyrrnitrpebz bade mz nzrpi-krde kx, "Kx tqsuti drtwrm le, krlzx kx nzmu krlzq nzamrlzngr ningi!" ⁴¹ Jiszs yctx pnz mz drtwrde mrlx kc. Kxmule-esz' mz Lou sc Mosis batrpzle trnztakitr-krdeu nide mz nzprtrngr mz nzangiongr, a' maletxtrpzle nide. Sc tqrpipebzle kx, "Mrlzm bange.

Namrlzq.” ⁴² X mzli kcpwz lepz kc dwasctx-pnkle ncblo kc, x nrkrdrdqde mrlztx pnz. ⁴³⁻⁴⁴ Zbz Jiszs rkabz natq, rpibzle bade kx, “Vzpe! X da lc, bzkq ena ncblo kx napi-nebanle. A' vz-kaipz mz pris, x pibz bade napwxlitibzle nim, kx namcpzle kx mrlzpeq. Zbz sa napixbzle mz leplz, murde namnc-lxblr-mouamu badr. X kabz mz Gct blz kx nangi dalr nzamrlzngr nim, da kc tqwai nzpikr Lou sc Mosis le, x nakrlzngr leplz amrlx le kx tubqpeq mz Loukxtr.” ⁴⁵ A' mrlx kc pitxnede da lc mrkcng kqlu tqvzkile. X rblxbz mz Jiszs nzvztr-krde mz mztea lcng murde dzbe leplz kx nzyrlwrng mrkc nzkqlu-aning. Delc tqmncpe-ngrmle rlsru, a' kxmule-esz' lr mztea kang kqlu sc tzvzmqng ye bade.

2

Jiszs Ipqpxle Alwx Ngr Kzdq Ncblo X Amrlzle Nrkrdrdqde Matiu 9:1-8; Luk 5:17-26

¹ Mz nibr kzdung zbo, Jiszs sc tqyzlupe mou Kzpznizm. A' leplz kxnzkqlu nzxlrlr kx sc tqmnc mrkc. *

²⁻³ Zbz sc tzyrkrpebzng mz ma kc tqmnc-ngrde. Nznulvzlr ma kc x nzyrlwrtrpz kcng yz. Mzli kc Jiszs tqyapwxtpx-ngrbzle Nrpakxmrlz badr, ncblo nzpxwxng nzvzmqng, nzglqmlr kc ncblo kx nrkrdrdqde bz. Nzglqtimlr nqni. ⁴ A' rblxtx nzglqtr-krbzlrle mz Jiszs murde leplz kqlu zlwz mrkc. X sc tzglqlz-alzupelr mz nibr ma kc, x nzlvxlzlr mrkc tqmnc-zbzlbz Jiszs. Zbz sc tzavoopebzlr ncblo kc mz nqni mnrd. ⁵ Kx krlztrpz Jiszs nzbrtikr drtwrdr nide mz nzamrlz-krde kztedr, sc tqrpipebzle mz ncblo kc tqyagox kx, “Mrlnge, alwx ngrmqng ipqpxebo.” ⁶ Kzdung lr Jiu kcng tzalvztrng mz Loukxtr kcng tzwxbung mrkc, sc tzrpipele mz drtwrdr kx, ⁷ “Rlr! Mrlx lc tqpixitile Gct. Murde Gct txpwz kx krlzle nzipqpxngr alwx!”

⁸ Mzli lcdepwz mz nzokatrkr Mqngrkxtr, Jiszs krlztitrpebzle mz mqngrde da kx yc mz nabzdr. X sc tqrpipebzle badr kx, “Bzkq nzao-krmu drtwrmu da kxmule lc. ⁹ Nzmu narpibo mz ncblo kxyagox lc kx, ‘Ipqpxbo alwx ngrm,’ rblx nzrmcngr. A' nzmu narpibo bade kx, ‘Tulz, oti nqni pnrm, x vzpe,’ opx angidr nzrmcngr. ¹⁰ Mz nzmu-krde lcde, na-amrlzbo nrkrdrdqde mz nzaelwapx-krnge kx ninge, Mrlx Leplz, rngisc-kzng zmatq ngr nzipqpxngr alwx mrka mz nrlc.” X sc tqrpipebzle mz ncblo kc nrkrdrdqde tqbz kx, ¹¹ “Mrlnge, tulz, oti nqni pnrm x vzpe mrnyzm!” ¹² X ncblo kc sc tqtulzjem mz mztr amrlx ngrdr, otile nqni mnrd x sc tqvzpe. Leplz amrlx nzkctitpx-awrrnr-ngrdr nide, x nzglqpxlr Gct mz nzrpi-krdr kx, “Rlr! Trgalr da kx mcku kxmule ka.”

Jiszs Kqlele Matiu Matiu 9:9-13; Luk 5:27-32

¹³ Jiszs yzlu mou mz nabz drta' Dxbu Gzlili. Zbo ngr leplz nzyrkrmqng bade x sc tqabzopele nzalvztr-krde nidr. ¹⁴ Mzli kc tqvzne-ngrde mz nabz drta' kc, mcle kc ncblo drtqde Livae. X kzdq kz drtqde Matiu. Ncblo lc nide mrlx Alfizs, x sc tqwxbu mz ofis nydzde kc tzxpekitr takes. Rpibz Jiszs bade kx, “Vz-nqblqm ninge.” Livae tutxlzm, axtxbzle da amrlx, x sc tqvz-nqblqpele Jiszs.

¹⁵ Mz nibrde, Jiszs sc tzmupeng badr ncblo nedeng mz ma nyd Livae. Zbz kzdung ncblo kx nzatakqting takes x kzdu-moung leplz kx nqmq krdr trka mz nzobqkr leplz nzmu-lxblr-kzng badr. Murde leplz kxnzmull

* ^{1:43-44} Livae 14:1-32 * ^{2:1} Mz nibr Jiszs nzabzo-krde nzryapwxpx-krde sc tqapusrpe-ngrde Kzpznizm mztea nydzde kxmrna trngipeu Naszret.

lcng nzkqlung nzvz-nqblq-kzlr nide. ¹⁶ Mzli kc tzmc-ngrbzlr Farzsi x krkcng tzalvztrng mz Lou sc Mosis da lc, drtwrdr trmrlzpeu. Murde mz drtwrdr trtakitrdeu ncblo kxmrlz nzngini-krde kzte ncblo kxnxtrkang. X sc tzveapebzng mz ncblo nedeng kx, “?Nike Jiszs tzmu-lxblr-ngrdr badr leplz kxnxmulr lcng?” †

¹⁷ Xlrpebz Jiszs natqdr x sc tqrpipebzle badr kx, “Leplz kx trnzyagoxung trnzsutiu drtwrdr dckta. A' kxnzyagoxng la tzsuti drtwrdr dckta. Trvzngrpwc'u nzrkqlengr leplz kx nzrpilr nztubqng. A' vz-ngrmc nzrkqlengr kxnxaleng alwx, murde naesablqtilr alwx ngrdrng.”

Ncblo Neng Jiszs Trnzaxtx-ngrpwzlsru Dakxnzng

Matiu 9:14-17; Luk 5:33-39

¹⁸ Mz nqmq kr lr Jiu nzaxtx-ngrbz dakxnzng zbo li mz wiki kxesz' mz nzkrka'-krdr. Kzdq zbo oblamzng Jon Kxawrkxtr x kr nedrng Farzsi kcng nzaxtx-ngrbzlr dakxnzng. X kzdung leplz nzvzmqng mz Jiszs, x sc tzveapebzng kx, “?Nike ncblo nemqng trnzaxtx-ngr-kzpzlru dakxnzng?”

¹⁹⁻²⁰ Jiszs rpibzle kx, “Apux ncblo kxnayrlz. Mz nqmq lcpwz trtakitrdeu leplz nzaxtx-krdr dakxnzng mz mzli r nzabrtzngr mz nzyrlzngr, trtakitr-kzdeu ncblo nengeng nzaxtx-krdr dakxnzng mzli ka mz nzmnc-aepztr-krbzlr mz Gct. Murde nzabrtz-ngrdr ninge lc tqmncbepo badr. A' mz nibrde, mzli kc nakatpx-ngrmc badr, sc tqtakitr-atede nzaxtx-krdr dakxnzng mz nzkrka'-krdr. ²¹ Nzycmne-ebzpxngr lcng li nzaelwapx-ngrdr nqmq krnge kxmrna. Murde trpnzng ncblo kx rkxsilvztr dzlvq lrpz kxmrna mz nzakqlvztr-krde me bxnge mz lrpz kxblzlongr. Nzmu nawailele, dzlvq lrpz kc tqmrna sc tqbxplipxpem mz lrpz kcma tqblzlongr, x sc tqbxplipx-zlwzpe myaszpxle mzli kc kai tqbxpli-ngrde. ²² X trpnz-kzng ncblo kx narbzlutr dakxnzng kxmrna mz ncblei kx nzrbzlutrpengr dakxnzng. Murde ncblei kxmule lcde ngcplxtxtr kai mz nzmrnabekr dakxnzng, x da lcng li sc tzatrkatipeng. A' dakxnzng kxmrna nabzlutrpwz mz ncblei kxmrna.” ‡

Jiszs Nide Kxetu R Sabat

Matiu 12:1-8; Luk 6:1-5

²³ Mz kzdq zbo ngr nzangiongr, zbo lc nzrpibz Sabat, Jiszs badr ncblo nedeng nzo-zlirl lrpzki kx vztr mz kzdung lclr wit. Ncblo nedeng, sc tzcpqpxpemqng nra wit mz nc ngrdr. §

²⁴ Zbz kzdung Farzsi sc tqrpipebzlr bade kx, “Mc ena da kc tzalelr! ?Nike tzxpqbrr-ngrdr Lou sc Mosis mz nwz-wz-krdr mz Sabat?”

²⁵ A' mz nzaelwapxkr Jiszs kx takitrde nzokatrngr ncblo mz Sabat, sc tqayzlupe-ngrbzle natqdr, rpibzle kx, “Krlz-angidr-kzamu da kc tqale melrmqmu King Devet kc tqamatqamu, mzli kc tzbrtale-ngrdr badr ncblo nedeng. ✰ ²⁶ Nzvztrng mz ma nyz Gct mzli kc Abiata tqngini-ngrde Nardr Pris. X Nardr Pris lc kabzle mz Devet bret kc tqngi blz, kxmule-esz' rpwa'ngr Loukxtr scgu. Murde bret kxtr nangqpwz pris. A' Devet ngqde bret lcde x ka-kzpze mz dzbede nede. X nakrlzamu kx mz nzobqkr Gct, Devet trpnzng ncblo kx avz-rbrle. Murde Lou sc Gct rlr-ngrmle bagu

† **2:16** Mz nzmu-lxblrkr Jiszs badr ncblo lcng tztrkang, drtwrdr tresz'tiu badr mz alwx ngrdr. A' rpile na-aelwapx-ngrbzle nivz lr Gct badr. † **2:22** Nqmq kcng tqmrna tqprmitrp Jiszs bletpxp-zlwzngz mz nqmq kcng pnz. X rblxbz mz kxnxetu r lr Jiu nzes'tikr drtwrdr badr, murde rblxbz mz leplz kcng tzabrtzvzpelr nqmq kcng pnz nztekqtr-krdr nqmq krdr mz nztwz-krdr nqmq kxmrna. § **2:23** Lou sc Mosis rlrpx-ngrde nzcpqpxngr wit nyz ncblo kzble, a' bzkq nzlakilzm noude. [Lou Kcpwz 23:25] ✰ **2:25** 1 Samwel 21:1-6

nzokatrngr leplz. ²⁷ Murde Gct wz-ngrde Sabat mz nzokatr-krde leplz. A' trwz-ngrdeu leplz mz nzvz-nqblq-krdr lou ngr Sabat. ²⁸ Delc ninge Mrlx Leplz, tqngininge Kxetu r Sabat. X tqrngiscnge zmatq mz nzpnzkr drtwrnge da kx takitrde nzalengr mz Sabat.”

3

Jiszs Amrlzle Kzdq Ncblo Mz Sabat

Matiu 12:9-14; Luk 6:6-11

¹ Mz kzdq mou Sabat, mz nzvztrkr Jiszs mz kzdq mangr-nzkrka'ngr, rmctile kc ncblo kx mqde bz. ² Kzdu kcng Farzsi tzyrlwr-kzng mrkc nzrtangrtrpzng da kx vz-rbri Jiszs. Sc tzaukzti-angidrpelr mz nzmc-krdr nzmu na-amrlzle doa kxyagox mz Sabat. Murde mz drtwrdr nzamrlzng doa kxnzyagoxng ngi nzwnzng. ³ Sc tqrpipebz Jiszs mz mrlx kc mqde tqbz kx, “Vzpxm x tu mrlc.” ⁴ Zbz sc tqrpipebz Jiszs mz leplz kcng kx, “?Nike rlrpxngr Loukxtr scgu nzalengr mz Sabat? ?Nzokatrngr leplz o nzatrkatingr? ?Nzarlapxngr nzlukr ncblo o nzrlr-ngrbz nzbz-krde? Murde krlz-angidramu kx Loukxtr scgu rlrpx-ngrmle bagu nzalengr da kxmrlzti mz Sabat.” A' leplz kcng nzmcn-lrpi-txpwzng murde nzkrlzlr kx mrkc tqvzki nardr vz-rbr. ⁵ Jiszs obq-ngle-ngrde nidr amrlx ngrdr. X drtwrde ngya x talvzo-ngrde nzrsaprlr-krdr natqdeng. X sc tqrpipebzle mz ncblo kc kx, “Atwztqpx mqm.” X atwztqtxle mqde, x mrlztx pnz mou. ⁶ Zbz Farzsi kcng nzrlasztxdr mangr-nzkrka'ngr. X sc tzvz-anipeng mz nzycmne-etr-krdr badr ncblo neng King Herot Antipas, mz ngrpi-krdr kxnamu nznibq-krdr Jiszs.

Zbo Ngr Leplz Kxetuting Nzvz-nqblqlr Jiszs

⁷ Jiszs badr ncblo nedeng nzabrkapx-lzbqmqng mz mztea, x sc tzvzpeng Dxbu Gzlili. A' kzdq zbo ngr leplz kxetuting ngr Gzlili Provins sc tzvz-nqblqpele nidr. ⁸ X leplz kzbleng nzyrkr-kzpinqng mz Jiszs mzli kc txxlrit-ingrdr rkx kcng tqaletileng. Nzvzkimlr taon kxetu Jerusalem, x mz mztea ngr Judiz Provins amrlx, krlzbzle me nzmcnegr lr Edom kcng trngiulrJiu. Nzvz-kzpinqng kcng mz nrlar LueJodzn kc tqyctxo. X nzvz-kzpinqng kcng Taea x Saedon, taon kxetuting nyz lr mrkzbleng, mrkc Prla Meditrenia. ⁹⁻¹⁰ Leplz kxnzyagoxng amrlx sc tzapetr-lzbqbzng mz zbo ngr leplz kcng mz nzbztr-krbzlr nide. Murde ngrpilr na-amrlz-kzpzele nidr da kc tqwai nzamrlzpe-krde leplz kxkqlu. Zbz rpibzle mz ncblo nedeng kx naoliqtibzlr dq bot kx nadwatr-ngrmle dxbu mz nzalvztr-krde nidr. Murde ma tzolikilvztilr nide mz nzalvztr-krde. ¹¹ X mzli kznikeng drka' kxnmncpx mz leplz nzmcpebzlr nide, sc tztaopebzng bade, tqrpipele mz nzepx-krdr kx, “Nim mrlx Gct!” ¹² A' Jiszs rngidrlvztx-ngrbzle badr kx bzkq nzpinebzlr da lc mz leplz.

Jiszs Mcpxle Aposol Nzpn-esz'-nrade-li (12)

Matiu 10:1-4; Luk 6:12-16

¹³ Zbz Jiszs vztlxz-ngrde kc newz x sc tqaveatipele krkcng tqsuti drtwrde, sc tzyrkrpebzng bade. ¹⁴ Mcpxle ncblo nzpn-esz'-nrade-li (12) kx nanginidr ncblo nedeng kxnmymatpxbxzng, kx na-alvztrleng. Murde, mz nibrde na-atwzlrpx-ngrdeng mz nzyapwxtipx-krdr Nrpakxmrlz. ¹⁵ X narngiscng zmatq mz nzrmaszlrpx-krbzlr drka' mz leplz mz drtqde. ¹⁶⁻¹⁹ Krkcng nzpn-esz'-nrade-li (12) tqmcpxleng nidr seleng:

Saemon, kc tqyrlq-kzp Jiszs drtqde Pita,

Jemes nidr mz mzlede

Jon kcng tznginidr mrlx Sebedi, x Jiszs kabzle badr drtqdr *Boanrjis*, drtwr ngrde *mrlxng bzlrmei*, murde nardr mrbc,

Adru (mzle Saemon Pita),

Filip,

Batolomiu (mrlx Tolmai, kc kzdq drtqde Natzniel),

Matiu (kc kzdq drtqde Livae),

Tomas,

Jemes kc tqngi mrlx Alfizs,

Tadizs (kc tzrpi-kzpz Judzs, mrlx Jemes),

Saemon kc tqprtr ena mz dzbede kc tzrpilr namaszltxpx-ngrdr gzpman ngr Rom mz nzmnnc-krdr Israel, x

Judzs Iskariot, kc tqamwabzle Jiszs mz enqmi rdeng.

?Zmatq Ngr Jiszs Vzpxm Mz Gct O Mz Setzn?

Matiu 12:22-32; Luk 11:14-23; 12:10

²⁰ Zbz Jiszs yzlu mou bzq mrkc mztea Kzpznlzm. X kzdq zbo ngr leplz kxetuting nzyrlwr-nglelvez-moulr nidr badr ncblo nedeng. Sc tqtblxtpe nzmu-krdr kxipizp mz nzokatr-krdr leplz lcng. ²¹ Mzli kc lr ma nyz Jiszs tqxlr-ngrdr da lcng, sc tzrkalzpmqng mz nzoti-krdr nide. Murde nzrpilr leplz kx ngqngupe-ngrde nzwz-kato-krde.

²² X mzli lcpwz kzdung kxnzalvstrng mz Lou sc Mosis kx nzvzkimlr Jerusalem sc tzrpipele kx, “Mrlx la mnccpx-ngrm Beelsebol, kxetu r ma ngr wq, nide kc tqacivele drka' amrlx, x sc tqrkabz bade zmatq mz nzmaslrx-krde drka' mz leplz.” *

²³ Zbz Jiszs sc tqrpipebzle kx nayrkrmqng bade. X sc tqryapwxpebz badr mz nzycmne-ebzpxngr lcde sele. Rpibzle kx, “Trtingr! Murde Setzn rblx nzmapulrpx-krde drka' kztedeng mz nabz leplz! ²⁴ Murde kandre kx akipx-lzbq mz dzbede sc tzota-etrpeng, e mzli kxipizne trnatu-amqngiung. ²⁵ Mz nqmq lcpwz doa lr ma kxesz' kx nzamnc-dali-lzbqng, nzatrkti-lzbqng. ²⁶ X mou, nzmu Setzn badr kztedeng naotablrlr mz nidr esz'-krdr x nzaki-lzbqng, e zmatq ngrde mz nzacive-krde leplz sc tqmanepe x tqyrkrpxpebz. ²⁷ Mz nzmu-krde lcde, Setzn apule ncblo kx xplr zlwz. A' napebqtx kai, x ncblo kc tqdwatr-atebz ma nyzde mz nztwz-krde dztudeng. Da kc tqwai nzarlapx-ngrbz leplz mz mqde.

²⁸⁻³⁰ “Rpiamu kx nabzng e mnccpx-ngrm drka'. A' da angidrtx lc napibo bamu. Gct krlzle nzipqpx-krde alwx x nzrpivxitingr amrlx. A' mz nzrpikrmu lc zmatq rnge vzpxm mz drka', pivxitiamu Mqngrkxtr kc tqngi nou angidr zmatq lc. X trpnzngr nzipqkr Gct leplz kx pivxitile Mqngrkxtr, murde atao-lzbq mz alwx kx yctx alo.” †

Kx Ngi Angidr Lxede Jiszs X Mzledeng

Matiu 12:46-50; Luk 9:19-21

³¹ Zbz lxede Jiszs x mzledeng nzkrlzbzlr ma kc tqmnc-ngrde. A' rblx nzprtr-krbzlr brma, murde zbo ngr leplz kcng tzmncong mrkc. Nzatzlrltr-ngrbzng nrpa bade kx navzpx-kaip badr. ³² Kzdu leplz mz zbo ngr leplz

* ^{3:22} Mz natq lr Grik drtq Beelsebol drtwr ngrde kxetu r ma ngr wq, kc tqngi kzdq kz drtq Setzn.

† ^{3:28-30} Gct krlzle nzipqtx-krpwzle leplz kcng tzplzpxbzlr alwx ngrdrng bade. A' doa kx pivxitile Mqngrkxtr ptxpx-ngrde nide. Mz nzmu-krde lcde, rblx doa lc nzyckr drtwrde alwx ngrdeng, murde Mqngrkxtr dekc tqokatrle leplz mz nzmc-krdr alwx ngrdrng. Doa kx pivxitile Mqngrkxtr trpnzngr nzmc-krde alwx ngrdeng mz nzplzpx-krbzleleng mz Gct. X trpnzngr nzipqkr Gct nide.

kcn̄g tzwxbu-nglel̄vzlr Jiszs, nzrpibzlr bade kx, “Lxem x mzlemqng sc tztutrpqng yz, nzrpilr namclr nim.”

³³ X sc tqrpipebzle kx, “?A' nekeng tqngi angidr lxenge x mzlenge?”
³⁴ Obqtxbz mz kxnzrlxngiting kcng tzwxbu-nglel̄vzlr nide, x sc tqrpipebzle badr kx, “Doa kxnzapulr nimu lang tqngi lxenge x mzlenge!” ³⁵ Murde krkc tqvz-nqblqle me pnz drtwr Gct, nide la mzlenge x inwenge x lxenge angidrng.”

4

Drtc' Pwx Kx Bletipx

Matiu 13:1-9; Luk 8:4-8

¹ Mz nibrde, Jiszs dwapx ma kc x sc tqvzope mz nabz drta' ngr Dxbu Gzlili. Zbz zbo ngr leplz kcng kxnzetunepxlr kc, sc tzyrlwr-nglel̄vzpelr nide. X sc tqdwaope mou mz bot, mz nzalvztr-krde nidr kcng tzyrlwrpxbzng mepz. ² Yapwxtibzle badr kzdung nzycmne-ebzpxngr mz nzalvztr-krde nidr da kxkqlu. X mz zbz lcde Jiszs yapwxtibzle badr nzycmne-ebzpxngr lcde seleng.

³ “Lalztqmamu bange! Kzdq mzli kzdq kc ncblo oliqtile drtc' ngr nrlanc nyzde. Zbz sc tقارلخپلے nra wit nyzdeng, murde rpile nayrkqlvzle mz drtc' mz nibrde. ⁴ A' mzli kc tقارلخ-ngrdeleng, kzdung tationg mz lrpzki kx drtc' ngrde mqngi, x nzngqtilzmqng utc. ⁵⁻⁶ X kzdung nztaong mz drtc' kxmelx, murde ycom mz rplz. Nzlvcpulz-animqng, a' nzglrtng x nzmztx-ani-moung mz nepi, murde dzbrdr trvzou la. ⁷ X kzdung mou nztationg mz drtc' ngr ncngrbz. Krlcng nzlvcpumilzm lxbi x nzyrlvilvzo lxbi nidr x trnzpa-pnzung. ⁸ X kzdung nztao mz drtc' kxmrlz. Krlcng nzyrlvzlmqng x nzpang. Kzdung nradr pipz, kzdung nradr kqlu, x kzdung nradr kqlutx zlwz. ⁹ Doa kx yrplapx, na-abzle ntzwz-krde drtwr ngr natq lc.”

Drtc' Pwx Kx Bletipx Ngi Nqmq Kr Leplz

Matiu 13:10-23; Luk 8:9-15

¹⁰ Mz nibrde mzli kc Jiszs tqmnc-ngrde esz'-krde, aposol badr kzdung kz leplz nedeng, sc tqrpipebzlr bade kx nayapwx-dalitipxbzle badr nike tqngi drtwr ngr nzycmne-ebzpxngr lc. ¹¹ Sc tqrpipebz Jiszs kx, “Ayrbq-angidrbo bamu nqmq kr Gct kc tqyc-kapq mzli kc mz nzngini-krde King r leplz nedeng. Murde doa kx lxngitile Gct, Gct sa na-aetunepxbzle nzrkrll-krde da angidr x sa na-axplrbzle nzrlxngiti-krde. A' mz leplz kcng tzpxpx-ngrdr nxzlr-krdr da angidr, napipxbo badr mz nzycmne-ebzpxngr. ¹² Nidr leplz kcng tqycmnetrngr profet Asaea mz nzrpipxkr Gct kx,

‘Kxmule-esz' nzobqng, a' trnzkrllru da angidr. X kxmule-esz' nzlalztqng, a' nardr tryrplatrpwzu. Mz nzmu-krde lcde, rblxbz badr nzyzlu-krmlr bange mz nzatubqti-krnge nabzdr.’” ¹³

¹³ Kctipx Jiszs trnzkrllz-krdru nzycmne-ebzpxngr lc, sc tqrpipebzle badr kx, “?Tryrplatitru narmu nzycmne-ebzpxngr lc? Nzmu kx tqmule lcde, sa narblxbz bamu ntzwz-krmu drtwr ngr nzycmne-ebzpxngr amrlx. ¹⁴ Drtwr ngr nzycmne-ebzpxngr kc nide sele: Nra wit kcng tقارلخ ncblo ngi natq Gct. ¹⁵ Drtc' pwx ngi nqmq kr leplz. Lrpzki lc drtc' ngrde tqmqngi, drtwr ngrde leplz kcng nardr tqmqngi mz nxzlr-krdr natq Gct. Murde mzli kznikeng nxzlr-ngrdr nrpa ngr Gct, Setzn vzm x katpxpxbzle badr.

¹⁶⁻¹⁷ Drtc' kc tqmelx drtwr ngrde leplz kcng nabzdr tqngrgo. Kxmule-esz' nxzllrlr natq Gct x nzabrtzlvzlr ntzwz-krdrle, a' natq Gct trpnzngr dzbrde x trvzou la mz nabzdr. Nzrlxngiti-krdr mrbcnepwz, murde rblx

¹³ 4:12 Asaea 6:9-10

nzolvz-amqngi-krdrle mzli kc tqprtzingr nzkxpungr x nzatalzngr kcng tzvzpxmqng mz nzrlxngitingr. ¹⁸⁻¹⁹ Drtc' ngr nibr ncngrbz drtwr ngrde leplz kcng drtwrdr tresz'tiu. Kxmule-esz' nxlrlr natq Gct, a' trbriu drtwrdr. Murde nzaoti-zlwzkr drtwrdr dalr nrlc kxkqlu nzapulr lxbi kcng tgyrlvilvzolr nabzdr, x trpnzngr nardr. ²⁰ Drtc' kxmrlz drtwr ngrde leplz kcng nabzdr tzoliqtilr nzlxngiti-krdr natq Gct. Murde nztwzlr x nzlxngitilr natqde, x nra nzrlxngiti-krdr yc-zvzbz, mz nzvectr-krmlr leplz mz nzmnc-nqblq-krdr Gct. Kzdung mzli leplz kcng nzvectrplr nzpipzneng, kzdung mzli nzkqlung, x kzdung mzli nzkqlutx-zlwzng."

Gct Suti Drtwrde Nrpakxmrlz Natalvpxle Leplz Amrlx

Luk 8:16-18

²¹ Mz nzaelwapxkr Jiszsz kx Nrpakxmrlz na-apule zyzlr; rpibzle kx, "Lam trnztekatru sc tzalalvzope topla. X trnzawxbulzpwzu mz nabz da. A' lam nzadolzpz wq, murde leplz namctr zyzlr mz nzdwatr-krmlr brma.

²² Mz nqmq lcpwz, kxmule-esz' Nrpakxmrlz trkrlzkapzle leplz amrlx, a' sa naopxbz badr kalr. Murde mzli lc, sa nayrplatitr nardr x na-aelwapx-ngrbzle da kx yc-kapqbepz badr. ²³ Doa kx yrplapx, na-abzle nztwz-krde drtwr ngr natq lc."

²⁴ Rpi-mopwz Jiszsz badr kx, "Na-aoti angidr drtwrmu natq Gct kc tqxlramu murde natwz-kzamu mz nzmnc-krmu. Mz nqmq kcpwz tqrkanrnamu, sa na-ayzlubz Gct bamu. A' nznka-krde myaszlzle kxmu nznka-krmu. ²⁵ Murde doa kx twzle natq Gct mz nzmnc-krde, sa natwz-moule nzyrplaxngr mz kzdung kz natq Gct. A' doa kx trtwzleu natq Gct mz nzmnc-krde, trnatwz-moule nzyrplaxngr. Kxmule-esz' nznkrlzngr kx topwzne ycbz bade, a' sa nakatpx-kpz Gct bade."

Nzycmne-ebzpxngr Nznginikr Gct King

²⁶ Jiszsz pi-mopwzle kzdq nzycmne-ebzpxngr. Rpibzle kx, "Nzwzkr Gct mz nzvectr-krmlr leplz bade mz nzngini-krde King rdr apule ncblo kx pe rtq wit mz nrlanc nyzde. ²⁷ Mz nibrde sc tqaletipele kzdung kz nzwzng. Mwi angidr mz nrlckxbq x traotipeu drtwrde rtq wit kcng tqpetile. Nzlvcpulzmqng x nzetulzmqng, a' ncblo kc tqpe, trkrlzleu kxmu nzylvzlk-krmlr. ²⁸ Murde drtc' esz'-krde kc tqwztr mz nzylvzlk-krmlr x nzpa-krdr. Da ayrnrngr kx yrlqbzle nzpa-bclz-krdr, x mz nibrde nztcngzlkzkr nrpq nradr. Zbz nradr kcng tztutrpebzng. ²⁹ X mzli kc tzbrpengl nradr, kx ngi nyz nrlanc lc otile toki scde, sc tqlakitilzpmengl, murde mzli r nzrkqng nradr kaputrpem."

Nzycmne-ebzpxngr Rtq Nc Seri

Matiu 13:31-35; Luk 13:18-19

³⁰ Zbz sc tqrpipebz Jiszsz kx, "?Nzkqlukr leplz kcng namnclzbzng mz Gct kalr mz nzngini-krde King rdr apule niki? ?Nzycmne-ebzpxngr kzniike takitrde nayokaetipx-ngrbole? ³¹ Apule rtq nc seri kx peti ncblo mz drtc'. Kxmule-esz' topwz zlwz, ³² a' mz nibr kzdung mzli etulzm x sc tqngipe kzdq nounc kxetu. X utc kxkqlung nzmncng mz zmyo ngrde." ³³⁻³⁴ Jiszsz yapwxibzle nzycmne-ebzpxngr kxkqlu kxmule lcng mz nzalvztr-krde leplz mz nrpa ngr Gct. Alvztrle zbo ngr leplz mz nzycmne-ebzpxngr txpewz, murde da kx takitrde nayrplatitr-krbz nardr kxipz nzalvztr-krde delc. A' mz nibrde, mzli kc namnape-ngrdr esz'-krdr badr ncblo nedeng, sc tqyapwxipbzeng drtwr ngr nzycmne-ebzpxngr lcng badr.

³⁵ 4:32 Sam 104:12; Esikel 17:23; 31:6; Daniel 4:12

*Jiszs Aole Nrwx Mz Kzdq Nenq Kxetu
Matiu 8:23-27; Luk 8:22-25*

³⁵ Mz zbo lcpwz mzli kc tqvzopengr nepi, Jiszs rpibzle mz ncblo nedeng kx, “Na-alilvckiopeku mz nrlar dxbu kc.” ³⁶ Zbz sc tzrlaszpelr zbo ngr leplz kcng x sc tzprtzpe-kzpzung mz bot kxetu kc tqwxbuope-ngrm Jiszs, x sc tzalilvcopeng. X kzdung kz leplz nzvo-nqblqopebzlr nidr mz bot kcng tzedwa-kzng mrkc. ³⁷ Zbz sc tzpwrkilvcpe-ngrdr kzdq nenq kxetu. Ebio kxnzetuting prtzm x nzvztiobzng mz nabz bot kc. X sc tzmulr naboopeng. ³⁸ A' mzli lc Jiszs sc tqmwi mz mrtwz' kxrm, glz mz pilo. Nzvzbzng bade sc tzameopelr. Nzrpibzlr kx, “Kxakrlz, okatr nigu! Nabzpeku!” ³⁹ Jiszs tulzm x lclvztxde nenq x ebio, rpibzle kx, “Esakiamu! Mnc-lrpiamu!” X mzli kcpwz nrwx kc tqvope. ⁴⁰ Zbz sc tqrpipebzle mz ncblo nedeng kx, “? Memule tqmwxlr-zlwz-ngrnamu? ?Trlxngitikalamu ninge?” ⁴¹ A' nzmwxlr-zlwzbeng, sc tzrpi-etrpelr kx, “Eke! ?Ncblo kznika? Nenq x ebio nzvz-nqblqlr natqde.”

5

*Jiszs Maszlrpx-ngrde Drka' Kx Xplr Mz Kzdq Ncblo
Matiu 8:28-34; Luk 8:26-39*

¹ Jiszs badr ncblo nedeng nzkaputrpzng mz nrlar Dxbu Gzlili mz nrlarnrlc kc tqycngr taon kcng nzpnu-esz', mrkc tzmncngr leplz kcng trngiulrJiu. X kzdq taon lcdeng dekc tqngi Gergesa. *

² Mzli kcpwz Jiszs tqpoo-ngrmle mz bot, vzm bade kc ncblo kx mncpx-ngrm drka'. ³⁻⁴ Dekc tqmncpx-ngrmle mz butqbr kx nzryrtzmqpx-ngrm namz ngr leplz. Apule ncblo kxayo, xplr-esz'ngrtx x rblk nzamnc-moungr nide x nzatolvangr. Nzwrde kqlupe kx nzpe-ngrbz mqde x nanycde mz nqvi x sen, a' zvz tqnikitileng x sa tqvz. ⁵ Zvz, ngrlx x nrlckxbq, nzvzne-krde mz butqbr x mz nra, tatkabo x tqtakrti-lzbq mz rplz.

⁶ Kx mcpxmlle kc Jiszs rlru, sc tqngrlrpebz, rweobz zpr bade mz nzangio-krdele. ⁷⁻⁸ Rpibz Jiszs mz drka' kc kx, “Drka', prszpx mrlx la!” Sc tqnepe, tqrpipele kx, “Vrr! Jiszs, Mrlx Gct kc tqmyalz-esz'ngr! ?Nike tqotime? Esalzngr mz drtq Gct kx bzkq ayrplapxq nrkrdrtqnge!” ⁹ Jiszs veabz kx, “?Drtqm neke?” Rpibzle kx, “Drtqnge Siu Kqlu, murde kqlu-zlwzkr.” ¹⁰ X sc tqyrrnititr-zvzbzle mz Jiszs kx bzkq atwzlr-ngrde nidr mz nrlarnrlc kzble.

¹¹ X mnc-aepztrpz mrkc kzdq nrtrq r poi kxetu sc tzmung mz nra. ¹² X drka' kcng nzyrnititr-mopwzlr mz Jiszs kx, “Atwzlr-ngrbz nigr mz nrtrq r poi kc, murde namncpx-alzupgr badr.” ¹³ Zbz sc tqrlrpe-ngrbz Jiszs nzvz-krdr. Drka' kcng nzprsrxpplr mrlx kc x nzdwatr-alzung mz poi kcng. X nrtrq r poi kc, poi ngrde siu-li (2,000), tzngrlropeng mz nqngitrlqli, nztaong mz nabz dxbu kc, x nzboong amrlx.

¹⁴ Zbz ncblo kcng tzaclveng, nzngrlrng sc tzpinepelr nrpa ngrde mz mztea x nabz nrlanc kcng. X leplz kxnxkqlung sc tzyrkrepebzng mz nzmc-krdr da kc tqprt. ¹⁵ Nzvzmqng mz Jiszs x nzmcpelr ncblo kc tzprszpx drka' siu kqlu, wxbu-lrpipe, drtwrde opxpe, x pxipe. Kx nzmc leplz kxnxkqlule, sc tzmwxlrpe-ngrdr zmatq ngr Jiszs. ¹⁶ Leplz kcng nzrmc-kaing da amrlx kcng tqprt znpinebzlr mz kzdung kz leplz be ngr Jiszs ncdr ncblo kc, x drka' x poi kcng. ¹⁷ Zbz leplz kcng nzyrnitrzpplr mz Jiszs kx navzpe.

¹⁸ Mzli kc Jiszs naprtzpe-ngrde mz bot, ncblo kc tqamrlzle vzm bade sc tqyrrnititrpebzle mz Jiszs kx navzng badr.

* 4:39 Sam 65:7; 89:9; 107:29 * 5:1 Mz kzdung nzryrngr kcng pnz, taon lc nzrpibz Gadara o Gerasa.

¹⁹ A' tr-rlrtx-ngrpwzu Jiszs. Rpi-alzupwzle bade kx, "Yzlubz mz lr mrnyzm x pibz badr da kxmrlz kc tqalebz Gct bam mz nzokatr-karde nim." ²⁰ Zbz mrlx kc rkalzm x sc tqayotipele nrlarnrlc kc mz taon kcng nzpnu-esz'. Tqyapwxinepele da kxmrlz kcng tqalebz Jiszs bade. X leplz amrlx kcng txxlrbzlr nzyapwx-karde nzkctitpxlr zmatq ngr Jiszs.

Inyx Kzdq Kxetu R Mangr-nzkrka'ngr X Olvz Kc Tqmaletrpzle Lrpz Sc Jiszs

Matiu 9:18-26; Luk 8:40-56

²¹ Jiszs badr ncblo nedeng nzalilvckio-moulr nrlar dxbu kc x zbo ngr leplz sc tzyrlwr-nglelvezpe-moulr nide mz nabz drta'. ²²⁻²³ Zbz kzdq ncblo drtqde Jaerzs sc tqkaputrpem. Nide kzdq kxetu r mangr-nzkrka'ngr. Rtctxo-lzbq-ngrbz mz nanyc Jiszs x sc tqyrnititrpebzle kx, "Inyxnge yagox x sc nabzpe. Vzm bagr x maletrpz nrkrdrtqde x sa namnc zpwx mou." ²⁴ Zbz Jiszs sc tzvzpeng ncdr. Nzmnccpxmqng mz mzlir leplz kxkqlu, kxnzrdrdrvzti-lzbqng mz nzvz-krdr.

²⁵ Zbz kzdq olvz kx tresakiu nzrpwx-karde temz prtr-kzpz mz zbo ngr leplz kcng. Nzrpwx-alo-karde lc temz, twzti-pele yiz nzpnu-esz'-nrade-li (12). ²⁶ Nzabzpebz dckta kxnzkqlung nzamrlz-krbzlr nzetqkr drtqde, x trau scdeng yrkrtpem mz nzxpeti-karde nidr x lue kxpiz kxkqlu. Tzrpilr nzamrlzngr drtqde, a' trpnzngr. X sc tqetunepx zlwz. ²⁷⁻²⁸ Olvz lc xlrle nrpa ngr nzamrlzkr Jiszs kxnzyagoxng. Sc tqrpipe drtwrde kx, "Nzmu namaletxtrpo ye lrpzde, drtqne kc tqmrlzpe." Sc tqrbinginetrpebz mz zbo ngr leplz kcng mz nibr Jiszs, x sc tqmaletrpebzle lrpzde. ²⁹ X mzli kcpwz mepyr ngr drtqde sc tqmingrtrpe x tqxngipebzle kx drtqde mrlzpe. ³⁰ X sc tqxngipe-kzpz Jiszs kx zmatq vzpxpem kcng mz drtqde x amrlzpele kzdq leplz. Lxlvrkimle mq x mzte kc tqvecpe mz nabz zbo ngr leplz kcng x sc tqveapebz kx, "?Neke tqmaletrple lrpzng?" ³¹ Ncblo nedeng nzayzlu-ngrbzlr natqde kx, "Rlr! ?Trmcwq zbo ngr leplz kang tqmncpx-ngrme? ?Memule tqveati-ngrn kx maletrpzle nim?" ³² A' Jiszs mzte sc tqvec zvz, murde namc-zpwxle leplz kc tqbxtrpzle lrpzde. ³³ Olvz kc kx krlztrpele mz drtqde nzmrlzpe-karde, sc tqrnrcnepxpebz mz zmwxlr. Kxmule-esz' mwplr a' atuobz zpr mz Jiszs mz nzangio-karde, x sc tqpipebzle da angidr kc tqveatile. ³⁴ Rpibz Jiszs kx, "Inyxnge. Nzlxngiti-krm ninge amrlzpele nim. Vzpe x bzkq da kx pnzpe drtfrm, nzmrlz-alo-krm lape." †

³⁵ Mzli kc tqycmne-ngrbe Jiszs, kzdung ncblo kxnzatzl-ngrmqng mz ma nyx Jaerzs sc tzkaputrpemqng. Nzrpibzlr mz Jaerzs kx, "Kxetu, inyxm bzpe. Bzkq akxputipeq kxakrlz la." ³⁶ A' rpibz Jiszs bade kx, "Kxmule-esz', bzkq drtfrm talvzo, a' lxngiti ninge." ³⁷ X trpnzngr mou leplz kx rlr-ngrbzle nzvz-krdr badr, a' ngi txpwz Pita, Jemes, x mzlede Jon. ³⁸ Kx nzkrzbzlr kc ma nyx Jaerzs, sc txxlrbpelr nzyni-katokr leplz kcng amrlx mrkc. ³⁹ Nzdwatrpzng x sc tqrpipebzle kx, "Bzkq yrni-katopeamu. Doa lc trbzu, a' mwine ye!" ⁴⁰ A' nzyrpalelvzlr nide. Mz nzmu-karde lcde, avztxpxleng yz amrlx ngrdr. X sc tzvztrpeng badr trte x lxe doa kc mrkc tqyrbqng nide. ⁴¹ Zbz malebzle mqde, sc tqrpipebzle kx, "Tzlitz, koum!" drtfrm ngrde "Doa olvz lc, tulzm!"

* 5:25 Livae 15:19-30 † 5:34 Mwxlrti-lzbq zlwz mz nike na-alebz Jiszs badr zbo ngr leplz kcng bade. Murde nzyagox-karde batrpe-kzpzle trnzakitr-karde nide mz nzprtrngr mz nzangiong, x batr-kzpzle doa kcng nabxtrpzlr nide, trnzakitr-kz-krdru mz nzprtrngr mz nzangiong mz nzvz-nqblq-karde Lou sc Mosis. Mc Livae 15:19-30.

⁴² X mzli kcpwz doa olvz kc tulzm x sc tqvznepe. Kx nzmc lxede x trtede da lc nzkctitpxlrl. (Yiz ngr doa olvz lc nzpnu-esz'-nrade-li.) ⁴³ A' rrgidrtxtrngrbz Jiszs badr kx bzkq nzlenedr nrpa ngr da kc. X rpi-kzpze kx, "Kabzmu du dakxnzng namu doa la."

6

Jiszs Nzpxpxngr Lr Mztea Nyzde Naszret Matiu 13:53-58; Luk 4:16-30

¹ Jiszs rkalzm mrkc, sc tzvzpeng badr ncblo nedeng mz mztea nyzde Naszret. ² Kx krlzbzle kc Sabat, Jiszs sc tqvztrpe mz mangr-nzkrka'ngr nyzdr, mz nzalvztr-krde leplz nzkqlung kx nzlalztqng. X nzkctipxlr nzalvztr-krdeng. Zbz drtwrdr lctrpz bade murde mz nzobq-krdr nide ncblo txne a' alvztrle nindr apule kxrngisc zmatq. Sc tzveatipe-moulr nide mz nzsri-etr-krdr kx, "?Myx me twzklme nzalvztrnegr lc? ?Nzyrplapxkr nar kznika tqycbz bade? ?Myx kxmu nzale-krde rkkx kcng tqxlrkung? ³ ? Trnipleu mrlx ncblo kc tqrlrmzti da kx wz-ngrdeng, mrlx Mxri? ?X trngiu mzledeng Jemes, Joses, Jud, x Saemon? ?X trngiu inwedeng lcng tqmncku badr mrka? Mrlx lc trngiu ncblo kxmatq." Zbz sc tzpxpxpe-ngrdr nide x nzalvztr-krdeng, x trnzlxnigiti-kzlr nide. ⁴ Zbz sc tqrpipebz Jiszs badr kx, "Kxmule-esz' lr mztea amrlx nzamatqlr profet, a' lr mztea nyzde, x kxnginideng, x lr ma nyzdeng trnzamrluelru nide." ⁵ X mz trnzlxnigiti-krdr lc nide, rblxbz bade nzale-krde da kxmatq mrlcde, a' ngi txpwz nzbxtrkr mqde kxnzyagoxng kxnpipzneng x nzmrlzng. ⁶ Jiszs kctitpxx-zlwzle trnzlxnigiti-krdr nide.

Jiszs Atwzlrpx-ngrde Aposol Nedeng Mz Nzlepx-krdr Nrpakxmrlz Matiu 10:5-15; Luk 9:1-6

Mz nibrde Jiszs sc tqvzpe mz kzdung kz mztea mrlcde mz nzalvztr-krde. ⁷ Zbz sc tqkqlepele ncblo nedeng kcng nzpnu-esz'-nrade-li (12). Mz nzmnclz-krbzlr bade, sc tqrkapebz badr zmatq ngr nzrmaszlrpx-krdr drka'. Mrlz, sc tqatwzlrpxpe-ngrdeng nzli-lxblrng mz mztea kxesz'. ⁸ Rpibzle badr bzkq da kx natwzlr, da kx apule dakxnzng, bxli, x trau. A' nangi txpwz nctoko scdr, ⁹ x sadol ngr nanycdr. A' bzkq nzrtwzng lrpz krali. ¹⁰ X rpi-kzpze badr kx, "Mztea kznike nzabrtzlvzlr nzmnc-krmu badr, ma kznike nzrlr-ngrbz namnc-ngrnamu, mncamu ma lcde esz', navz mzli kx rlasz-ngrnamu mztea lcde." *

¹¹ Nzmu lr mztea kx trnzamnc-zpwxlru nimu x trnzlalztq-kzpwzung bamu, rlaszamu mztea la. X rtc-ngrbzmu rplz nakrlz-ngrdrle kx nqmq krdr trka mz nzapu-krdr kxnmnc-mrbrng, x sa na-ayrplapx Gct nindr.

¹² Zbz ncblo neng Jiszs sc tzvzpeng mz mztea kxkqlu, mz npine-krbzlr mz leplz nztekqtr-krdr nqmq nr drtwrdr mz alwx ngrdrng. ¹³ X nzrmaszlrpxng drka' kxnpipzneng mz leplz, x nzamrlz-kzng kxnzyagoxng mz nzaelu-krdr nindr mz tolo.

Nzrnibqngr Jon Kxawrkxtr Matiu 14:1-12; Luk 9:7-9

¹⁴ Mz mzli lcng, nrpa ngr Jiszs x da kx aletileng xlrti kz King Herot Antipas, kc tqacuvele Provins kc Gzlili, murde leplz ngr mrkang kqlu sc tzycmnetr-ngrdr Jiszs. Kzdung nindr nzrpilr kx, "Mwx ncblo lc, Jon

* ^{6:4} Jon 4:44 * ^{6:10} Mz ngalrde 10, rpibz Jiszs badr kx bzkq nzayrkrpxlr ma ngr mztea mz nzmi-krdr, da kc tzwai ncblo kxnpipzneng da. A' namwi-ngrdr ma naesz'txu, murde namatq x namrlue angidr mz drtwr lr mztea nindr. X sa narkabzng badr dakxnzng, lrpz, x trau kx navzpxm mz nzwztr-krbzlr badr.

Kxawrkxtr elc, tulzpe-mop mz nzbzngr. Dekc tqale-ngrde rlx kcng tqmatq-esz'ngr." ¹⁵ Mz drtwr kzdung leplz Jiszs nide Profet Elaeja kc tqaleti rlx kxkqlu mzli kc bqnc. X kzdung leplz nzrpilr kx nide profet kxmrna kx apule profet kcng bqnc tzrngiscng zmatq. ¹⁶ Kx xlr kz Herot nrpa ngr Jiszs, sc tqrpipele kx, "Jon Kxawrkxtr kc tqpibo mz ncblo ngr vea nengeng nalakipx-krbzlr narde, lupe mou."

¹⁷⁻²⁰ Nzbzkr Jon kxmule sele. Herot twzle olvz r mzlede Filip. X Filip lc sc tqlube kx tqyrlzti Herot kc olvz rde. Drtq olvz lc Herodizs. A' Jon pi-zvzbzle mz Herot kx ngi-alwxbz mz Gct nzyrlzti-krde olvz r mzlede. Natq lc ngyangr drtwr Herodizs x rpile nanibq-ngrde Jon. Zbz Herot atwzlr-ngrde ncblo ngr vea nedeng, nzolvzlr Jon x na-adwatrlr mz presin. A' rblx nznibqkr Herodizs le, murde Herot mrlue mz drtwrde Jon x krlzle kx nide ncblo kxmrlz x tr, dekc tqamnc-zpwx-ngrdele. Suti drtwrde nzvz-krbz Jon bade mz nzlalztq-krbzle mz nzryapwx-krde, kxmule-esz' narde tryrplatrpwzu mz natqdeng amrlx.

²¹ A' kzdq zbo mrkc tqpnz drtwr Herodizs mz nznibq-krde Jon sc natutrpe. Mz zbo kc tqkaputn-ngrm nzrmcngr mz Herot, alebzle kc nzmungr badr ncblo kxnzmatq nedeng x kxnzetung mz provins nydze.

²²⁻²³ Mzli lc tzyrlwr-ngrdr, nzabrtzlvzlr inyx Herodizs mz nzela-krbzle badr mz nzelangr kx batrpzle ncblo nzrkcmnzng nide. Sc tqrpipebz King Herot mz doa olvz kc kx, "Nike suti drtwrm, rlxtim bange mzli ka, x sa nakabo bam. Nike narlxtime bange esalz-ngrne kx sa nakabo bam, kxmule-esz' kzdq nctq drtc' ka tqaclvex o dztungeng kxkqlu!" ²⁴ Zbz doa olvz kc sc tqvzpebz mz lxede, rpibzle kx, "?Nike narlxtibo mz King?" Rpibz lxede kx, "Rlxtibz nar Jon Kxawrkxtr." ²⁵ Doa olvz kc ngrlrbz mz King, rpibzle kx, "Suti drtwrnge nalakipxbzme nar Jon Kxawrkxtr x katim dis bange mzli ka, mz nzkrlz-krnge kx bz-angidrpe."

²⁶ King Herot trsutiu drtwrde nznibq-krde Jon. Drtwrde vztix, a' ycakalqpe. Murde esalz lukurnrngr nzmu trnakapwzleu nike suti drtwr doa olvz kc, ngi da kx myangr drtqde mz mzlir kxnzetu kcng. ²⁷ X sc tqatwzlrpe-ngrde kc ncblo ngr vea mz presin kx nalakipxbzle nar Jon. Ncblo ngr vea lc vz mz presin, sc tqlakipxpebzle narde. ²⁸ Zbz sc tqtwztipemle dis, tqkapebzle mz doa olvz kc. X tqtwzpebzle mz lxede. ²⁹ Kx nzxlr oblamzng Jon nzribqngr nide, sc tzotipelr namz ngrde tzyrtzmqpelr mz gq kx nzwztrngr mz butqbr mz nra.

Jiszs Apuleng Ncblo Siu-nzlvqn (5,000)

Matiu 14:13-21; Luk 9:10-17; Jon 6:1-14

³⁰ Ncblo neng Jiszs nzylumqng bade mz nibr nzwz-krdr mz nzalvz-krdr x nzamrlzti-krdr kxnzyagoxng, x sc tzpipebzle bade da amrlx kcng tzalelrng x tzalvztr-ngrdrng. ³¹ Zbz sc tqrpipebz Jiszs badr kx, "Narlasztx-kaiku ena zbo ngr leplz kang, navzku me yc-nrwxngr x na-amatxku." Pibzle da lc murde trtxpengr scdr mzli kx namu-ngrdr x na-amatilr. A' leplz kxnzkqlung sc nzyrkrmqng mz Jiszs, tzvzmqng kcng x tzyzlung kcng.

³² Zbz sc tzprtzpeng mz bot x tzalilvcopeng mz kzdq nrlc kx trngiu mztea murde namncng elr.

³³ A' leplz nzkqlung nzmlcr nzrkalz-krmlr x nzglxlr nidr. Zbz leplz lcng, nidr badr leplz ngr mztea kxkqlu ngr nrlarnrlc lcde, sc tzvzkipebzle mepz, x nzmnc-kaing mrkc na-alilvckitrlr. ³⁴ Zbz mzli kc Jiszs tqvztrpe-ngrbzle mepz, sc tqmcpele zbo ngr leplz kcng tzyrlwrng tzaenzlilr nide. X sc tqyctx-zlwzpengr drtwrde nidr. Murde rblx nzokatr-lzbq-krdr mz nzkrlz-krbzlr Gct, a' nzapulr sip kcng trpnzng ngr kxaclvele nidr. Mz nzmu-krde lcde,

kxmule-esz' Jiszs badr ncblo nedeng nzrpilr na-amang, a' alvztr-ngrde leplz lcng da kqlu. ³⁵

³⁵ A' mzli kcpe mz milzpq ncblo nedeng sc tzrpipebzlr bade kx, "Nrlc ycpe pipz nzbq-krde, a' trpnzngr me narmctingr leplz lcng dakxznzng. ³⁶ Atwzlpengr nidr mz mztea x mz nrlanc kcng tzyctineng mrlang, murde naxpeng nadr dakxznzng." ³⁷ A' ayzlu-ngrbz Jiszs natqdr kx, "Nimu kx narkabz nadr dakxznzng." Nzrpibzlr bade kx, "Rblx nzvz-krgr nxzpe-krgr dakxznzng kx natakitrde leplz lcng murde trau kqlu ela naxpengr." ³⁸ Rpibz Jiszs badr kx, "Vzamu x mcamu kx yrlqamu dakxznzng tqlvr." Nzmctxdr x sc tzpipebzlr bade kx, "Yctxpqng bagr bret nzlvqn x nc kxsupe li."

³⁹⁻⁴⁰ Zbz Jiszs sc tqrpipebzle badr kx na-awxbuong leplz mz nabr mz dzbedeng kx krlzbzle trtqki-esz' (100) x nzpnu-nzlvqn (50). ⁴¹ Mz nibr nzwxbuo-krdr, Jiszs kalzmle bret kcng nzlvqn x nc kcng li, x obqlz mz bongavz mz nzkrka'ngr, x sc tqawipebz mz Gct. Zbz lopxitile bret, x sc tqkapebzle mz ncblo nedeng, tzakipebzlr mz leplz kcng. Zbz aki-kzpze nc kcng li mz leplz amrlx. ⁴² X nzmung x nelzdr krlctxtrpz. ⁴³ Mz nibr nzmukrdr, ncblo nedeng nnzulvzolr topla nzpnu-esz'-nrade-li mz nctq bret x nc kcng tqyctxo. ⁴⁴ X mz nzrlwxngr ncblo txpwz krlzbzle siu-nzlvqn (5,000), a' trnzrlwxtrpwzu olvz x doa kxnztopwzng.

Jiszs Vzneom Mz Lue Ngr Dxbu Gzlili

Matiu 14:22-33; Jon 6:15-21

⁴⁵ Mzli lcde, Jiszs pibzle mz ncblo nedeng kx naprtzng mz bot x nalilvckio-kailr mz nrlar dxbu kc tqycngr mztea Betsaeda, mzli kc tqatwzlrde leplz kcng mrnyzdr. ⁴⁶ Mz nibrde, sc tqvzdzpe mz newz mz nzkrka'ngr. ⁴⁷ Mz nina, ncblo nedeng sc tzmnctrpqng mz bot mz zpzu r Dxbu Gzlili, x Jiszs sc tqmncbe esz'-krde mepz. ⁴⁸ Zbz kzdq nenq kxetu sc tqwqpe x sc tzavzopelr nqni ngr bot scdr, x tzyapeng. Mz nibr nzkrka'kr Jiszs, mzli kc tqkyapengr kio, sc tqmcpxbzle nzyalvzkr ncblo nedeng nenq lc, x sc tqvzpebz badr mz lue. X mz nzvz-krbzle lc rpile namyape-ngrde nidr. ⁴⁹⁻⁵⁰ A' mzli kc tzmc-ngrbzlr nzvzne-krmle mz lue, sc tzmwxrpeng x tznelapeng murde nzrpilr kx nzrmcpeng drka'. A' mzli kcpwz Jiszs sc tqycmnepebz badr. Rpibzle kx, "Ninge lc ye! Bzkq mwxlramu!" ⁵¹ Zbz sc tqprtzpebz mz bot, x nenq kc tqamaope. X nzkctitpx-pnzlr nide. ⁵² Murde trnzkrizti-angidrkalr nzrngisc-krde zmatq amrlx, kxmule-esz' nzmctipelr rkx kc tqalele mz nzapu-krde zbo ngr leplz. Nabzdr mqngibe nztwz-krdr drtwr ngr rkx lcng tqaletileng.

Jiszs Amrlzle Kxnzyagoxng Mrkc Ganeszret

Matiu 14:34-36

⁵³ Zbz sc tzalilvckio-moulr mz nrlar dxbu kc, sc tzkaputrppezng mz nrlarnrlc kc tqycngr mztea Ganeszret, x sc tzadwatrppezblr bot scdr mz nctq drta'. ⁵⁴ Mzli kc tzpoope-ngrmlr mz bot kc, leplz ngr mrkc nzglxtx-pnzlr Jiszs. ⁵⁵ X nzpine-anibzlr nrpa ngrde mz lr mztea amrlx ngr nrlarnrlc lcde. X drlvekeng vzkile, kxnzyagoxng nzglqtibzlr nqni bade. ⁵⁶ X drlvekeng vzkile, mz mztea, mz taon, o nrlanc, leplz nzrglqtimqng kztedrng kxnzyagoxng me nzyrlwrpx-lxblrngr. X nzyrnitirpzlr bade kx narlngrbzle mz kztedrng nzbxtrtx-krpwzlr nctq lrpz scde. X leplz kxnzyagoxng kcng tzbxtrpzlr lrpzde nzmrlzng amrlx.

³⁵ **6:34** Matiu 9:36; Jon 4:34-38

7

*Nqmq Ngr Gct Myaszpxle Nqmq Kr Melrmqgung
Matiu 15:1-9*

¹⁻⁴ Nakrlzamu kx nigr lr Jiu rngiscgr kzdung nqmq kxyc pnz mzli kc bqnc. Kxnzalvztrng kxnzetung mz Lou sc Mosis nzyrlqlr nqmq lcng mz nzbatr-krbzlr mz leplz nzvz-nqblq-krdr Lou sc Mosis mz nzvz-nqblq-krdr nzalvztr-krdr. A' trpiu Lou sc Mosis kx leplz na-alelr da lcng. Murde nqmq lcng nzyrlqnetrpzlr leplz. A' Farzsi nzalvztr-ngrdr kx ncblo kx trvz-nqblqleu nqmq kr melrmqgrng, trvz-nqblq-kzleu Lou sc Gct. Kzdq nqmq kr melrmqgrng lcng rpile kx leplz naycpq-kailr mqdr mz lue, x sc tzmu-ateng. Mz nqmq lcpwz, mzli kc tzyzlu-ngrmlr me nzyrlwrpx-lxblrngr leplz kxkqlu, naycpq-kailr mqdr o nakipong, x sc tzmu-ateng. Nzalvztr-ngrdr kx navz-nqblqkr nqmq kr melrmqgrng lcng murde natubqbzkr mz nzobqkr Gct. X nzkqlung mz nigr nzvz-nqblqlr nqmq kqluti-moung mz nzrycpq-krdr da kx nzmutationg: kap, belue, baol, x tebol.

Kzdq zbz kzdung Farzsi x kxnzalvztrng mz Lou sc Mosis nzvzkimlr mrkc Jerusalem mz nzrmcti-lzbq-krdr badr Jiszs. Ncblo lcng nzkrlzlr kx ncblo neng Jiszs trnzvz-nqblqlru nqmq kr lr Jiu mz nzrycpq-kaingr mq x ncblo kc tqmu ate. ⁵ Zbz nzveabzng bade kx, “?Memule ncblo nemqng tzrnzlvzongrdr nqmq krgung?” ⁶ Jiszs rpibzle badr kx, “Gct ycmnetr-ngrde leplz kx nzapulr nimu mz nzngi-batr-krbzle mz profet Asaea nzryr-krde kx, ‘*Lepz lcng nzamrlue-txpwzlr ninge mz naodr. A' trnzvz-nqblqlru natqnge murde nqmq nr nabzdr yc-rlrup bange. 7 Nzangio-krdr ninge mane mz drtwrnge, murde nzrpilr da kcng tzalvztr-ngrdr leplz nzvzpxmqng bange. A' trtingr.*’”

* ⁵

⁸ Rpi-mopwz Jiszs kx, “Trvz-nqblqwamu Lou sc Gct, a' krlang tqvz-nqblqamu nqmq kx nzyrlq leplz. ⁹ Krlztx-angidramu nzrkatpxngr lou angidr sc Gct, murde navz-nqblqpwzmu nqmq krmu. ¹⁰ Kzdq me aleki-kzamule nide sele: Gct rpile mz Lou kc tqkabzle mz Mosis kx, ‘*Amrlue zvz trtem x lxem.*’ ¹¹ ¹² A' rpi-alzu-ngrnamu kx takitrde doa trnzamrlue-krdeu trtede x lxede mz nzrlr-krbzle trau scde badr mz nzokatr-krde nidr, nzmu duz r da kx naokatrle nidr yrlqpx-bekapele kx nangi blz kxtr sc Gct. ¹³ A' mz nzale-krmu da lc yrlqtxpxamu Lou sc Gct, murde navz-nqblqamu nzalvztr-krmu nqmq krmu. X vz vzz nzale-krmu da kxkqluting kx nzbatrpzlr mz leplz nzvz-nqblq-krdr nqmq kr melrmqmung x nzrpwa'-ngrbzlr badr nzvz-nqblq-krdr natq Gct.” *

*Lepz Kcng Trnztakitrdrdu Nzprtrngr Mz Nzangiongr
Matiu 15:10-20*

¹⁴ Zbz Jiszs kqle-moule zbo ngr leplz kcng, sc tqrpipedbzle kx, “Lalztq-angidrmamu bange x yrlqamu da kc napibo bamu. ¹⁵ Da kcng tzyrlqtr mz nrkrdrtrq leplz trnzbatrpwzlr trnztakitr-krdrudr nidr mz nzprtrngr mz nzangiongr. Trtingr. A' ngi da kcng tzvzpxmqng mz leplz kx nzbatrpzlr trnztakitr-krdrudr nidr. ¹⁶ Doa kx yrplapx, na-abzle nztwz-krde drtwr ngr natq lc.”

¹⁷ Zbz Jiszs badr ncblo nedeng sc tzrlaszpelr zbo ngr leplz kcng x tzdwatrpe-ngrdr kc ma. X sc tzveatipebzlr bade nike drtwr ngr nzalvztr-krde lc. ¹⁸ Sc tqrpipedbz Jiszs kx, “Rlr! ?Narmu tryrplatrkapz mz natq

* ^{7:7} Asaea 29:13 * ^{7:10} Nzrlasngr 20:12; Lou Kcpwz 5:16 * ^{7:10} Nzrlasngr 21:17; Livae 20:9 * ^{7:13} 7:11-12 Blz kx myapxbz mz nzobqkr Gct ngi nzvz-nqblq-kaingr natqde, x nzrka-ngrbz blz bade kc ate. [Sam 4:5; 34:10-14; 50:15; 51:16-17; 73:24; 81:83; Hosia 6:6; Mak 12:33]

lc? Trngiu dakxnzng x mq kx trnzycpqu kx nzbatrpzlr trnztakitr-krdru leplz mz nzprtrngr mz nzangiongr.¹⁹ Murde vztr mz lzng kr leplz, x mz nibrde sc tqvzpxpe-mop mz nrkrdrdtq.” Natq Jiszs lc drtwr ngrde kx takitrde nzmungr dakxnzng amrlx.²⁰ X sc tqrpipe-mopwzle kx, “A' da kx nzvzdzmqng mz nabz leplz, nidr lang tzbatrpzlr trnztakitr-krdru nidr mz nzprtrngr mz nzangiongr.²¹⁻²² Murde drtwr kxtrka lcng nzvzdzmqng mz nabz leplz. X nzmailzlr nidr mz nzale-krdr alwx lcde seleng: nzrkcmnzngr, nzdobungr, nzglqpx-lzbqngr, nzngqngungr, nzesabrttingr, nzrpibqtingr leplz, nzpnangr da, nzrnibqngr, drtwr kxmwa, nzrmwimingr leplz kx trngiu kernalzdr, nzamqmiti-rbrngr mz nrkrdrdtq, x kzdung kz da kxtrka.²³ Da kxdrka'ngr lcng amrlx nzvzdzmqng mz nabz leplz x alwx lcng nzbatrpzlr trnztakitr-krdru leplz x trnztubq-krdru mz nzobqkr Gct.”

Olvz KxtrngiulrJiu A' Nzrlxngiti-krde Etu

Matiu 15:21-28

²⁴ Zbz Jiszs badr ncblo nedeng nzrlaszlr Gzlili Provins, x sc tzvzkipelr mz nrlarnrlc kc Fonisiz mrkc Siriz Provins, mz taon kc etu Taea. Provins lc nyx leplz kxtrngiulrJiu. Mz drtwr Jiszs namnc-nrwxngr mrlc murde trpnzngr kx naglxle nide. A' nrpa ngr nzkaputr-krbzle ani txpwz ntalvzpx-krde mrkc.²⁵⁻²⁶ Kzdq olvz lr Taea, kx xlrle kc nrpa, sc tqvzpem bade, murde inyxde kxtopwz mnccpx-ngrm drka' kxtrka. Olvz lc trngiulrJiu, sc tqyrgzopebz bade mz nzyrnitr-krbzle nzmaslrxpx-krbzle drka' kc mz inyxde.²⁷ Jiszs ycmnebz bade mz kzdq nzymcmne-ebzpxngr kx, “Doa kxnztopwzng namu-kaing. Murde trmrlzu nzoti-krbzme dakxnzng nandr x kabzme mz kuli.”²⁸ Rpibz olvz kc kx, “Kxetu, kxmule-esz', a' nzrlr-ngrbz mz kuli nzngq-krdr dakxnzng kc tqtao mz nabz tebol.”²⁹ Jiszs rpibzle bade kx, “Nzayzlu-krme natqnge mrlzvxitx! Vzpe ma nyx murde drka' kc rlaszpele inyxm.”³⁰ X mzli kc tqkrlz-ngrbzle ma nyxde, sc tqmcpele inyxde nzaonepxpe-krde drtqde mz bet nyxde. Drka' kc rlaszpele nide. †

Jiszs Amrlzle Kc Ncblo Kx Nradrtqde Ngq X Nzymcmne-krde Tropxu

³¹ Zbz Jiszs badr ncblo nedeng sc tzrlaszpe-moulr taon Taea. Sc tzongalekipemlr nrlarnrlc nyxdr leplz kcng trngiulrJiu x nzkrzbzlr taon Saedon, x nrlarnrlc kc mztea nzpnu, mz nzyzlu-krdr Dxbu Gzlili.³² Kzdung leplz nzvzmi-moplr kc bade kzdq ncblo kx nradrtqde ngq x nzymcmne-krde tropxu. Nzrlxtibzlr bade nzyrlqo-krbzle mqde mz ncblo kc murde namrlz mou.³³ Jiszs vzmitpxle ncblo kc rrlu mrkc tzyrlwr-ngrdr zbo ngr leplz kcng. X yrlqtrpzle nratoki r mqde mz nradrtq ncblo kc, byatx x bxtr-kzpzle nalzpqde.³⁴ X mz nzyckr drtwrde nide, krka'lz mz bongavz, x rpibzle kx, “Lvpx!” Natq lc nzrpibz lr Jiu kx, “Efata!”³⁵ Mzli kcpwz nradrtqde kc tqxlrpe x nzymcmne-krde otxpx pnz kz.³⁶ Pibz Jiszs mz leplz kcng bzkq nzpititxnedr da lc. Kxmule-esz' rpwa'-zlwx-ngrbz Jiszs nzpine-krdrle, a' sc nzyapwxtitx-zlwzlr.³⁷ X mzli kc tzxlrpe-ngrdr leplz nrpa, nzkctipxlr x sc tzrpipelr kx, “Jiszs da amrlx kx aleleng mrlzvxi esz'ngr! Amrlzpeleng leplz kcng nradrtqdr tqngq x krkcng tqrblx nzymcmne-krdr.”

† **7:30** Mz nzymcmne-ebzpxngr lc, doa kxnztopwzng drtwr ngrde lr Jiu, x kuli drtwr ngrde kxtrngiulrJiu. Dakxnzng drtwr ngrde da kxnzmlzti kcng tzvzpxmqng mz Gct. Suti drtwr Gct nzamrlz-krde leplz amrlx mz nzwzkr lr Jiu, leplz nedeng kc tqmcpxleng. Delc Jiszs tqvz-kai-ngrbzle mz lr Jiu. Be lc drtwr ngrde kx trmrlzu nzamrlz-krde kxtrngiulrJiu x lr Jiu kc ate. A' natq olvz kc aelwapx-ngrbzle kx lxngiti-angidrle Jiszs, x takitrde nzokatr-krde nide.

8

Jiszs Apuleng Ncblo Siu-pwx (4,000)

Matiu 15:32-39

¹ Mzli trboiu mz nibr nzyzlu-krmlr Dxbu Gzlili, kzdq zbo ngr leplz kxetu nzvz-mopqng mrkc tqmncngr Jiszs. X mz nibr kzdung zbq dakxnzng nadr kc tqykrpe. Jiszs kc tqkqlepele ncblo nedeng x tqrpipebzle badr kx, ² “Yctxpe mz drtwrnge leplz lcng. Murde nzmnctipemlr bagu mrka zbq tqpe x dakxnzng nadr yrkrtxpe. ³ Trmrlzu nzatwzlrtngr nidr mz nelzdr kxbrtale, ma mztr tqtcvrne mz lrpzki, murde kzdung nidr nzvzkimlr rlsru.” ⁴ Ncblo nedeng nzrpibzlr bade kx, “Trpnzngr me nxzpe-ngrgr dakxnzng kx natakitrde leplz lcng mrka.” ⁵ A’ Jiszs veabz badr kx, “?Bret tqlvr kx ycbz bamu?” Nzrpibzlr kx, “Rlimz.” ⁶ Zbz Jiszs rpibzle mz leplz kcng amrlx nawxbuong. Zbz otitxde dapu bret kcng rlimz, awitx-ngrbzle mz Gct, lopxititxdeng, x sc tqkatipebzle mz ncblo nedeng tzakipebzlr mz leplz kcng amrlx. ⁷ X yc-kzpz badr kcng nc kxtopwzting. Zbz awi-kz-ngrbzle nc kcng x rpibzle badr kx na-aki-kzpzlr mz zbo ngr leplz kcng. ⁸ Leplz kcng amrlx nzmung x nelzdr krlc. X nzataktir mulide kcng tqyctxo x nznulvzongrdrle topla kxetu rlimz. ⁹ Zbz sc tqatwzlrpengr Jiszs leplz kcng mz mztea nyzdrng mz nibr nzmupe-krdr amrlx ngrdr. Ycpwz pipz nzkrlz-krbzle siu-pwx (4,000) mz ncblo txpwz kcng tzmung mz zbq lcma. ¹⁰ Mzli lcde, sc tzprtzpeng mz bot badr ncblo nedeng x sc tzalilvckiopelr mz nrlarde kc Dalmanuta.*

Nzrkrlzng Rkx Ngr Nzwzkr Gct

Matiu 16:1-12; Luk 12:54-56

¹¹ Zbz kzdung Farzsi nzvzmqng x sc tzalilvckiopelr mztea Betsaeda. ¹⁴⁻¹⁶ Mz nzalilvcobe-krdr dxbu, Jiszs rpibzle badr kx, “Rngidrtioamu yisti sc Farzsi x King Herot.” Zbz sc tzycmnetrpe-ngrdr, x mz nxzlr-krdr kc yisti, mz drtwrdr Jiszs kc tqycmne-ngrbzle lc murde trnzrtwzne-krdr bret, x bret esz’txu kx ycnebz badr mz bot. ¹⁷ Kx xlrbz Jiszs nike tzycmnetr-ngrdr, sc tqrpipebzle badr kx, “?Nike tqyc-zlwzng mz drtwrmu trnzrtwzne-krmuu bret? ?Myx kxmule, trkrlzkalamu? ?Drtqmu sa nzrtwzng nikeng aelwapx-ngrbz Gct bamu?” ¹⁸ Opxm kx trpnzngr mzpu x trpnzngr nradrtqmu. Murde mrbrtr mz drtwrmu rkx kcng tqmctipeamu. * ¹⁹ ?Mzli kc tqlopoxiti-ngrne bret kcng nzlvqn, tqapu-ngrne ncblo kcng siu-nzlvqn (5,000), topla tqlvr kx nulvzoamu muli dakxnzng kcng tqyctxo?” Nzrpibzlr kx, “Nzpnuesz'-nrade-li (12).” ²⁰ Rpi-mopwz Jiszs kx, “Dela. ?X mzli kc tqlopoxiti-ngrne bret kcng rlimz tqapu-ngrne ncblo kcng siu-pwx (4,000), topla tqlvr kx nulvzoamu muli dakxnzng kcng tqyctxo?” Nzrpibzlr kx, “Topla rlimz.” ²¹ Jiszs rveabz badr kx, “?Myx kxmule, mz drtwrmu alvztr-ngrne nimu bret o nzalvztr-rbrkr Farzsi?” †

* ^{8:10} Trpnzngr kx rkrlz me ycngr mrkc tzrpibz Dalmanuta, murde Mak esz'-krde kx yre drtq mrlc. A’ mc kz Matiu 15:39. * ^{8:18} Jeremaea 5:21; Esikel 12:2 † ^{8:21} Jiszs rpile na-alvztr-ngrne nidr kx yisti kxipizkrlzle nzaetunepxngr dapu bret nzkqlu-krdr, mz nqmq lcpwz nzalvztr-rbrnrgr kxipizkrlzlr nzatrka-atwrnr-krdr nzmnccngr. A’ Jiszs nzmu tr-rlxpwu bret badr, murde krlzle nzrka-krbzle bret mz leplz kxnxkqlung.

Jiszs Amrlzle Ncblo Kx Mzte Kcba

²² Mzli kc tzkrlzpe-ngrbzlr mztea Betsaeda, kzdung leplz nzvzmimlr kc ncblo kx mzte kcba mz Jiszs x nzyrnitirpzlr bade nzmaletr-krbzle drtqde. ²³ Jiszs malebzle mqde, vzmitpxle rlu mz mztea kc. Zbz byatrpz mz mzte x yrlqtr-kzpze mqde mz mzte. Jiszs rveabz bade kx, “?Myx kxmule, rmcpeq da?” ²⁴ Mrlx kc obqlvxtxde nrlc x sc tqrpipele kx, “Eu, mcpex leplz, a' tropx-angidrkna nzmc-krnge nidr. Nzapunebelr nounc kxnzvzneng.” ²⁵ Zbz Jiszs yrlqtr-mopwzle mqde mz mzte. X mzli lc mzte kc tqopx ate x tqrmc-angidrpe. ²⁶ Jiszs rpibzle bade kx, “Vzpe, a' mz nzvz-krm bzkq tavaunetrq mz mztea mz nzvz-krm ma nyzm.” ‡

Pita Glxle Kx Jiszs Nide Kxnzmcpx

Matiu 16:13-20; Luk 9:18-21

²⁷ Jiszs badr ncblo nedeng nzrlaszlr Gzlili Provins x sc tzvzdzpeng x nzvztrng mz nrlarnrlc kc tqycngr mztea Sisaria Filipae. Mzli kc tzvne-ngrbzlr mz lrpzki, Jiszs rveabz badr kx, “?Myx kxmu nzglxkr leplz ninge?” §

²⁸ Nzrpibzlr kx, “Kzdung leplz nzrpilr kx nim Jon Kxawrkxtr yzluope-mop mz nzbz-krde. X kzdung nzrpilr kx nim profet Elaeja yzluope-mop Heven. X kzdu-kzng leplz nzrpilr kx nim dq profet kxmyalz kc bqnc.” ☀ ²⁹ Zbz rpibzle badr kx, “?A' nimu, myx kxmu nzglx-krnamu ninge?” Rpibz Pita kx, “Nim Kxnzmcpx!” ³⁰ A' Jiszs rngidrlvz-ngrbzle badr kx trkrlzkapzle mzli r nzyapwxtine-krbzlr mz leplz nzngini-krde Kxnzmcpx ne Gct.

Jiszs Ycmnetr-ngrde Nzbz-krde X Kxnamu Nzrvz-nqblqngr Nide

Matiu 16:21-28; Luk 9:22-27

³¹ Zbz Jiszs alvztr-ngrde nidr da kx naprtzbz bade mz nzngini-krde Mrlx Leplz. Rpile kx drtqde sa na-aetqbz mz da kxkqluting. X kxnzetung r lr Jiu sa napxtpx-ngrdr nide, krlcng lrtzlvz ngrdr, kxnzetu rdr pris, x kxnzalvztrng mz Lou sc Mosis. X sa nanibqlr nide. A' mz zbzq kratq mz nibr nzbz-krde, sc tqalupe mou. ³² Nzpi-krbzle badr da lc opx angidr. A' katpxm Pita mz kztedeng x vzmitpxle rlu kxpipz. X rpibzle bade kx, “Bzkq kxmu nzycmne-krm lc.” ³³ A' Jiszs lxlvrbz x obqtxbz mz ncblo nedeng, sc tqpnanatipele Pita. Rpibzle kx, “Esopx Pita! Bzkq apume bange Setzn. Murde nzrkrlz-krm vz-nqblqle drtwr leplz, a' trngiu me pnz drtwr Gct.”

³⁴ Zbz Jiszs kqlele ncblo nedeng badr leplz kcng amrlx, x rpibzle bade kx, “Doa kx navz-nqblq-angidrle ninge, narlrpx-lzbz mz nzaetq-ngrbz drtqde. X naesablqtile me pnz drtwrde esz'-krde, x bzkq axtxbzle nzo-zli-krde lrpzki rnge. ☀ *

³⁵ Murde doa kx otr-zvzngr drtwrde nzlu-krde, sa namale-lvile nzlungr kxboi. A' doa kx yrlqtxole nzlu-krde murde lxngitile ninge x Nrpakxmrlz, sa naprtr mz nzlungr kxboi. ³⁶ Mane nznginingr bcnyr mz nrlc ka x

‡ **8:26** Lr Jiu nzpnzkr drtwrdr le nqbya ngr nao ngi kzdq luekxpiz mz nqmq krdr. Krle ngi kzdq mzli kx nzyrtxopwz mz Nzryrngrkxtr mzli kx Jiszs trangida-ngrdeu nzamrlz-krde leplz mzli kc ayrrnrng tqale-ngrdele. A' mwz kx prtz-kzpze kzdung kz mzli. X mzli kx krka'-ngrgu leplz mz nzmrzlz-krdr, bzkq aoti txpwz drtwrgru nzmrzlz-krdr mzli lapwz. A' navz vzz nzkrka'-krgu nidr nakrlz-zpwxbzle mzli kx namrlz-ngrdr. § **8:27** Mz nzmnckr Jiszs mz nrlc nzkrlz-krde nikeng tzaoti drtwrdr leplz, vzpxm mz Mqngrkxtr. A' trkrlzleu da amrlx. ☀ **8:28** 2 King 2:1-12; Malakai 4:5; Matiu 14:1-2; Luk 9:7-8; Nzaelwapxngr 11:3-6 ☀ **8:34** Luk 14:27 * **8:34** 8:33 Kxmule-esz' Pita pipx-kaile kx Jiszs nide Kxnzmcpx, a' trkrlz-atwrnr-ngrdeu nike drtwr ngrde. Mz nzmu-krde lc, na-aclvetio-kzku kxmu nzyokaetipx-krgu natq Gct x da kx aelwapx-ngrmle bagu. 8:34 Jiszs pi-angidrle kx, “Naglgle kros ngrde.” Kros drtwr ngrde nzaetqtingr drtq mz nzbzng.

amrbrtxtrle nzlu-krde mz nrlc kc navzm. ³⁷ Murde trpnzngr da mz nrlc ka kx takitrde nxpxepx-krde nzlungr kxbui. ³⁸ Leplz ngr nrlc ka nidr kxdrka'-ngrng kcng trnzangiolru Gct. Krkcng tzpxtxpx-ngrdr ninge x natqngeng mz nzngini-krnge Mrlx Leplz, sa napxtxpx-kz-ngrne nidr mzli kc nayzlu-ngr-mopwc' mz nzvzmi-krmc enjrl kxnxtrng mz zmatq ngr Trteng."

9

¹ Zbz rpibz Jiszs badr kx, "A' da angidrtx lc napibo bamu. Kzdung nimu sa nalubeng mzli kc Gct na-aelwapx-ngrde zmatq ngrde mz nzvectr-krmle leplz mz nzmnclz-krbzlr bade mz nzngini-krde King rdr." *

Nrkrdrtq Jiszs Tekqtr-lzbq

Matiu 17:1-13; Luk 9:28-36

²⁻³ Mz nibr zbzq kcng esz'mz, Jiszs vzmile Pita, Jemes x Jon, x sc tzvzdzpeng mz kzdq newz kxetu mz nzmnclz-krdr esz'-krdr. Mzli lcpwz, ncblo lcng nztqng nzobqbzng nrkrdrtq Jiszs tekqtr-lzbqpe mzzluli x lrpz scde prkitxpxpe x aglqpz'pe, myaszpxle lrpz kxprki mz nrlc tulvzo. ⁴ Zbz nzmcrl Mosis nidr mz Elaeja, profet kcng bqnc, nzycmne-krdr badr Jiszs.

⁵⁻⁶ Mz nibrde sc tqrpipebz Pita mz Jiszs kx, "Kxakrlz, mrlztx angidr nzmcrl Mosis x nangi nyz dq, nangi nyz dq Mosis x nangi nyz dq Elaeja." A' krklc tqycmne-ngrbz Pita lc, murde nidr badr kztedeng nzmwxlr-zlwzng x trkrlzleu da kx napile. ⁷ Zbz kzdq dcblz akqlvztxde nidr mz zmyo ngrde. X natq Gct vzpxm mz dcblz kc, rpibzle badr kx, "Krlc mrlxng Kxnzmrlzti. Lalztqbzmu bade." ⁸ Mz nibr natq lc, nzobq-mopwzng, Jiszs kc tqutxpepwz mrkc esz'-krde. †

⁹ Mzli kc tzvzneobe-ngrmlr mz newz kc, rpibz Jiszs badr kx bzkq nzpiniedr nike nzmcrlz-zpwxbzle nztulz-kr-mop Mrlx Leplz mz nzbnz-krde. ¹⁰ Yc-lrpi mz nabzdr esz'-krdr, a' vz vzz nzveati-etr-krdrle kx nikeng tqpnz drtwr Jiszs mz nztulz-kr-mople mz nzbnzng. ‡

¹¹ Zbz sc tqrpipebzlr mz Jiszs kx, "?Nike kxnxalvztrng mz Lou sc Mosis tqrpi-ngrdr kx profet Elaeja nayzlu-kaip mrka mz nrlc x Kxnzmcpkx kc tqvz-atem?" * ¹² Jiszs ayzlu-ngrbzle natqdr kx, "Kxnxalvztrng nztubq-angidrung mz nzrpi-krdr kx Elaeja navz-kaip mz nzoliqti-krde da amrlx. A' trnzaopxpzu badr kx Nzryrngrkxtr rpi-kzle kx Mrlx Leplz na-aetqbz drtqde x naobqszo nide x na-atrkat nide. ¹³ A' napibo bamu kx ncblo kc tqngi Elaeja vzpem. A' leplz nzatrkat-kzlr nide, da kc tzwai nzatrkat-krdr Elaeja kc bqnc, mz nzvz-nqblqng Nzryrngrkxtr." §

* **8:37** Sam 49:7-9 * **9:1** Kxnzetung mz Nzryrngrkxtr, nzrpilr kx natq lc ngidatipe mz kzdq mzli lcng tq: mz mzli r nztekqtr-lzbqkr nrkrdrtq Jiszs, mz mzli r nztulz-krde mz nzbnzng, o mz mzli r nzvzo-krde Mqngkrkxtr mz nibr nzvzdzkr Jiszs Heven. Murde mz mzli lcng tq, Jiszs vectrple leplz bade mz nzlxngiti-krdr nide. † **9:8** Natq Gct lc aelwapx-ngrde kx Jiszs x nzalvztr-krde myaszpxle ncblo kxnxetu lcng li, kxmule-esz' Elaeja nide profet kxmyapxbz x Mosis yrle Lou Kxtr. X aelwapx-kz-ngrde kx Jiszs nide Gct, x trngiu ncblo kxmatq txpwz. ‡ **9:10** Rblxbz badr nzvz-krdr drtwr kx Kxnzmcpkx ne Gct nabz. * **9:11** Malakai 4:5 § **9:13** Trnzaopxpzu mz lr Jiu kx Nzryrngrkxtr rpile kx Kxnzmcpkx na-aetqbz drtqde x naobqszo nide, na-atrkat nide, x nanibq nide. [Sam 22:1-18; 69:8, 11, 20-21; 118:22a; Asaea 53:1-12.] Murde nzlxngitilr natq Gct kx rpile kx Kxnzmcpkx nangi king kc etu na-aovxiol enqmi rdrng amrlx x na-aclev-aleole leplz amrlx. A' trnzaopxpzu natq kzbleng. Jon Kxawrkxtr ngl ncblo kc tqngi Elaeja, mz nzale-krde nzvzng kcpwz, mz nzrncisc-krde zmatq kcpwz, x mz nzmcrlz-krde kz lzke. X da kc tzwai Kwin Jesebel rpile nanibqle Elaeja, Kwin Herodizs kxrngi-batr-kzpz nzrnbqng Jon. Mz nzmu-krde lc, nzmnckr Elaeja ngl rkx ngr da kx naprtzbz mz Jon. [1 King 19:1-18; 21:23-24; Malakai 4:5-6; Matiu 17:11-13]

*Rblxbz Mz Ncblo Neng Jiszs Nzrmaszlrpx-krdr Drka'
Matiu 17:14-21; Luk 9:37-43*

¹⁴ Mzli kc Jiszs badr Pita, Jemes x Jon tzkrlzope-ngrmlr nou newz kc, sc tzrmctipelr zbo ngr leplz kxetu tzyrlwr-ngalelvzlr ncblo nedeng kcng tzmncnclzbzng mrkc. X sc tzatalwzti-lzbqng badr kxnzalvztrng mz Lou sc Mosis. ¹⁵ Mzli kc leplz kcng tzmcpe-ngrdr Jiszs, nzkctipxlr x sc tzngrlrpebzng bade x tzelalvzpelr nide. ¹⁶ Jiszs rveabz badr kx, “?Nike tqtalwzti-lzbq-ngrnamu?” ¹⁷ Kzdq ncblo rpibzle kx, “Kxakrlz, vzmimc mrlxng e mrka mz nzamrlz-krbzme nide, murde drka' kc tqmncp xm bade tr-rlr-ngrp wzleu bade nzycmne-krde. ¹⁸ X mzli kznikeng drka' lc dwass-ngrde nide, sc tqprtilzpe nimz x tqrctxope-ngrde mz drtc', vz vz nqbya ngr naode tqwxbutxtrpebz, madqlvztxde nqngide, x sc tqlulwxkz'pe. Rlxtibo mz ncblo nemqng nzmaszlrpx-krbzlrle, a' rblxtile nidr.” ¹⁹ Jiszs rpibzle kx, “?Nike nawai-mopwc' bamu? Nzmnc-krbo bamu mzli boipe! A' trkrlzkalamu nzrlxngitingr x narmu kc tqmqngibe. Vzmimamu doa la bange.” ²⁰ Zbz sc tzvzmipebzlr bade. A' mzli kc drka' kc tqmcpe-ngrbzle Jiszs, sc tqprtilzpe nimz tqrnrcpe x sc tqrtope-ngrde mz drtc'. Sc tqtaligxp x nqbya ngr naode kc tqwxbutrpebz.

²¹ Jiszs veabz mz trte doa kc kx, “?Myx mzli kx dwa-ngrbz zyagox lc bade?” Rpibzle kx, “Abzo pnz mzli kc tqtopwzbe-ngrde. ²² Vz vzz nzngi-batr-krbz drka' lc nztalz-krde mz nyr x nztao-krde mz nabzde kxlr, murde rpile nanibqle nide. Nayc mz drtwrm nigr x okatrp nigr, nzmu kx tqkrlzq nzale-ngrbz da bade.” ²³ Rpibz Jiszs bade kx, “?Nike tqrpi-ngrme kx nzmu krlzx? Trpnzng da kx rblxbz mz doa kxnzlxngitilr Gct.” ²⁴ A' trte doa kc ani txpwz nzrpi-krbzle kx, “Eu, lxngiti-angidrx. A' okatr-kzp ninge mz nzngrogokr nzrlxngiti-krnge.” ²⁵ Mzli kc Jiszs tqmc-ngrde leplz kxnzkqlung tzngrlr-ngrmlr bade mz nzmc-krdr nike tqalele, sc tqpnanatipele drka' kc mz nzrpi-krbzle kx, “Drka' ngr nzangqngr nrdrq x nzanabukr leplz, rningrlvz-ngrbo bam prszpx doa la x bzq dwattr-mopwzme bade!” ²⁶ Zbz drka' kc sc tqnepe, x sc tqrtope-ngrde doa kc mz drtc'. Zbz sc tqprszpxpele nide. Doa kc sc tqyrbqtxpe mrkc mz drtc' trycngrlrpeu x apupele kxbzpe. Kxnzmc leplz kxnzkqlung le, sc tzrpipelr kx, “Doa la bzpe.” ²⁷ A' mz nzkrlzkr Jiszs kx doa kc mrlztx-angidrpe, rtrngztiobzle mqde x sc tqokatrpele nztulz-mou-krmle.

²⁸ Zbz mzli kc Jiszs badr ncblo nedeng tzmncp xpe-ngrmlr mz kzdq ma, nzveabzng bade kx, “?Nike tqrblxti-ngrde nigr nzrmaszlrpxngr drka' kc?”

²⁹ Rpibz Jiszs kx, “A' drka' kxmule la nzmaszlrpxpwz mz nzkrka'ngr vzmi nzaxtxngr dakxnxng.” *

*Nzwrde Krali Kx Ycmnetrngr Jiszs Nzbz-krde
Matiu 17:22-23; Luk 9:43-45*

³⁰ Jiszs badr ncblo nedeng nzrlaszlr nrlarnrlc kc tqycngr mztea Sisaria Filipae x sc tzvzkitrpelr Gzlili Provins. Jiszs trsutiu drtwrde nzkrlztkr leplz me mnc-ngrde. ³¹ Murde rpile namnc-txpwzng esz'-krdr badr ncblo nedeng mz nzalvztr-krde nidr. Pibzle badr kx, “Ninge Mrlx Leplz sa na-aprcbz mz zmatq ngr kxnzmwati drtwrdr ninge. Nanibqlr ninge, a' mz zbq kratq mz nibr nzbz-krnge, ninge kc tqtulzpe-mopwc'.” ³² A' ncblo nedeng trnzkrlzlu

* ^{9:29} Mz kzdung nzryrngr kcng pnz trnzyrou natq lcng ‘vzmi nzaxtxngr dakxnxng.’ Nakrlzku kx kzdung drka' nzxplr-krdr nzmyaszpxlr kzdung kz drka'. Mzli kc drka' trprszpx-ngrdeu ncblo mz drtq Jiszs, nakrka'ku nakrlz-zpwxbzle mzli kx prszpx-ngrdele. X kzdung mzli nakrka'ku navzmi nzaxtx-ngrbz dakxnxng.

drtwr ngr nzrpi-krde kx Kxnzmcpx sa nabz. A' naodr mya nzveati-krbzlr drtwr ngrde. [☆]

Doa Kx Myalz-zlwzbz Mz Nzobqkr Gct

Matiu 18:1-5; Luk 9:46-48

³³ Mz nibr nzyzlu-kr-mop Jiszs badr ncblo nedeng mztea Kzpznizm, sc tzvztrpeng mz ma kc tzmnc-ngrdr. Zbz Jiszs rveabz badr kx, “?Nikeng tqycmnetr-ngrnamu mzli kc tqvz-ngrmu mz lrpzki?” ³⁴ A' naodr mya nzayzlu-krbzlr natqde, murde tztalwzti-lzbq-ngrdr neke kx myatpxbz mz nzobq-krde. ³⁵ X sc tqawxbupele aposol kcng, tqrpipebzle badr kx, “Mrlx kx nangi doa kxmyalz, na-avzo-lzbq x nawztrpz mz kztedeng amrlx.” ³⁶ Zbz vzmibz Jiszs kc doa kxtopwz, atubzle mz mzlirdr. X lolvztrple doa kc bade x rpibzle badr kx, ³⁷ “Mrlx kx vz-nqblqle ninge mz nzabrtzlvz-krde doa kxtopwz mz drtqnge, abrtzlvz-kzle ninge. X krkc tqabrtzlvzle ninge, trabrtzlvzleu ninge esz'-krnge, a' abrtzlvz-kzle Trte kc tqatwzlr-ngrmle ninge.” [☆]

Mrlx Kx Prtr Mz Nrlarde Nyz Jiszs

Luk 9:49-50

³⁸ Zbz Jon rpibzle bade kx, “Kxakrlz, mckr kc ncblo kx rmaszlrpxngr drka' mz drtqm. A' pibzkr bade kx naesakipe, murde trprtrpuu bagu.” ³⁹ A' rpibz Jiszs kx, “Bzkq rpwa'-nrbzmu bade! Mrlx kx alele da kxmatq mz drtqnge, rblxbz bade nzpibqti-krde ninge. ⁴⁰ Murde mrlx kx tr-rpwa'-ngrmleu bagu nzale-krgu nwz-wz-krgu, tukile mz nrlarde nyzgu. ⁴¹ Da angidrtx lc napibo bamu. Mrlx kx rkabz mqmu lue mz nzngini-krmu doa nengeng, sa nakabz Gct bade da kxmrlz mz nzabrtzlvz-krde nide.

Bzkq Attratiq Nzrlxngitikr Kzdu-kzng Leplz

Matiu 5:29-30; 18:6-9; Luk 17:1-2

⁴² “Aclvetio-lzbq murde ma tqatratiq nzrlxngitikr doa neng Gct. Murde Gct sa na-ayrplapx-zlwzle ncblo kx ataole mz alwx doa kxpobe mz nzrlxngitingr. Nzayrplapxngr nide namyaszlzle mrlx kx nzpetrpz rplz kxetu mz drtwerde x nzrtcongr prla me boongr. Mwx mrlz nzrnibqng nide mz nrlc ka mzli kc tratrkatika-ngrde nzrlxngitikr doa ne Gct, myaszpxle nzayrplapx-alokr Gct nide mz alwx lc kalr. ⁴³⁻⁴⁸ Mz nzmu-krde lcde, aclvetio-lzbq kz murde ma tqatratiq-lzbqq. Mz mzli r nzatalzng dwatx ani. Mz nzatalzng kx batrpzle nztao-zvz-krm mz alwx, katpx-lzbqm bade. Nzvztr-krm Heven kalr myaszpxle nzmnnc-nrwkx-krm mz nrlc ka. X nzaetq-krm drtqm mz nzmnncngr kxtubq mz nrlc ka, myaszpx-zlwzle nzprtr-krm mz Hxl kalr, mrkc nzayrplapxkr Gct kxnxzaleng alwx tresakiu apule be kc trbzu, x nzetqkr drtqdr tryrkrpxpwzu apule nyk kx ngctx alo. [☆] ⁴⁹ Kxmule-esz', a' mz nrlc ka nzkxpu-krmung nzapulr nyk mz nzalqngi-krdr nzrlxngiti-krmu. ⁵⁰ Nzxpungr lcng mrlz. A' rblx nzlolzv-amqngi-krmu nzrlxngiti-krmu nzmu napxtpx-ngrnamu nzatubqtingr kc navzpxm mz nzkxpungr lcng. Rlr-ngrbzmu nzkxpungr lcng nzatubqti-krdr nimu murde namnc-zpxm-mouamu badr kztemung.” †

10

Jiszs Alvztr-ngrde Nzyrlzngr X Nzaxtxngr Kralz

Matiu 19:1-12; Luk 16:18

[☆] 9:32 Mak 8:31-33; 9:11-12 [☆] 9:37 Matiu 10:40; Luk 10:16; Jon 12:44 [☆] 9:43-48 Asaea 66:24

† 9:50 9:49-50 Rblx nzpi-angidrngr drtwr ngr ngalrde lcng. Murde trnzkrlzu nke drtwr Jiszs mz nzycmne-ebzpxngr lc. Vz-nqblqkr drtwr kxesz' mz nztekqtr-ngrdeng.

¹ Zbz Jiszs badr ncblo nedeng nzrlaszlr mztea Kzpnizm mrkc Gzlili Provins x nzvztrng Judiz Provins mz nrlar LueJodzn kc tqprkilzm nepi. X kzdq zbo ngr leplz nzvz-mopqng bade mrlcde, x Jiszs sc tqalvztrpele nidr, da kc tqwai-zvzle. ² Kzdung Farzsi nzvzmqng mz Jiszs mz nzatalz-krdr nide mz nzale-krde kzdung da kxvz-rbr. Nzveatibzlr bade kx, “?Nzpnzkr drtwrm le, Lou sc Gct rlrpx-ngrde ncblo nzaxtx-krde olvz rde?” ³ Jiszs rveamopwz badr kx, “?Myx kxmule nike pi Mosis mz nzaxtxngr?” ⁴ Nzrpibzlr kx, “Mosis rlrpx-ngrde. Murde rpile kx nzmu ncblo nayrbzle dq letz mz olvz rde, napibzle kx nzaxtx-lzbqpeng ncdr x sc tqatwzlr-ate-ngrde nide.” ⁵ ⁵ Rpibz Jiszs kx, “Mosis yr-ngrde natq lc murde leplz nzdrka'-ngrng x nardr mqngi. ⁶ A' Gct aelwapx-ngrde me pnz drtwrde mzli kc tqwz-ngrde nrlc. Murde Nzryrngrkxtr rpimle bagu kx mzli lc ayrnrngr, ‘Gct wz-ngrde ncblo esz' x olvz esz' mz nzmnctr-lxbblr-krdr.’ ⁷ ⁷ ‘Delc mzli kc tzetupe-ngrdr; nayrlzng. X nzamatq-lzbq-krdr namyaszpxle nzamatq-krdr kxnginidrng. X ncblo namnctr-amqngipebz mz olvz rde. ⁸ Murde doa lcng li nznginipedr nrkrdrq x leplz kxesz.’ ⁸ X napibo bamu kx trnzlipeung, a' nznginipedr leplz kxesz'. ⁹ Mz nzmu-krde lcde, trpnzngr leplz kx takitrde nzakipx-krde krkcng tqaxvctrpeng Gct mz nzyrlzngi.”

¹⁰ Mz nibrde, mzli kc tzmnenepe-ngrdr esz'-krdr brma badr ncblo nedeng, nzveati-mopwzlr bade nike drtwr ngrde. ¹¹ Rpibzle badr kx, “Mzli kc ncblo nzaki-lzbq-ngrdr mz olvz rde x yrlzti-moule kc olvz kzble, olvz krali lc trngiu olvz rde angidr, murde mz nzobqkr Gct sa tqyrlztibele olvz rde kc ayrnrngr. Mz nzmwimi-krde olvz krali lc, ayzprtxde nzesalz-krbzle kc mz olvz rde kc ayrnrngr mz nzyrlzngi mz mz Gct. ¹² X kxmu-kzle lc mz olvz kx axtxde ncblo ngrde x yrlzti-moule kc ncblo kzble.”

*Doa Kx Nzlxngitilr Gct Mz Nzngini-krde King Rdr
Matiu 19:13-30; Luk 18:15-30*

¹³ Kzdq zbz kzdung leplz nzvzmiml doa kxnztopwzng mz Jiszs mz nzmaletr-krbzle nrkrdrqdr x nzamrlz-krde nidr. A' ncblo nedeng nzlclvzlr leplz lcng. ¹⁴ A' mzli kc tqmc-ngrbz Jiszs, drtwrde ngyatx. Sc tqrpipebzle badr kx, “Bzkq rpwa'-ngrbzmu mz doa lang tztopwzng nzvz-krmlr bange. Murde leplz kxnxmulr lcng nzlxngitilr Gct mz nzngini-krde King rdr. * ¹⁵ X trpnzngr nzmnclz-krbzmu mz Gct mz nzngini-krde King rmu nzmu kx trapuwamuu doa lcng.” ¹⁶ Zbz sc tqbrlcipele doa kxnztopwz kcng mz mqde, yrlqo-ngrbzle mqde badr, x sc tqamrlzipele nidr.

¹⁷ Zbz mzli kc Jiszs badr ncblo nedeng narkalzpe-ngrmlr, kzdq ncblo ngrlrm mz Jiszs, atuobz zpr bade, x rveabz bade, rpibzle kx, “Kxakrlz, krlzx kx nim ncblo kxmrzl. ?Nike na-alex mz nztwz-krnge nzlungr kxboi?” ¹⁸ Rpibz Jiszs bade kx, “?Memule tqrpi-ngrme bange mrlzx? Murde trpnzngr kxmrzl, a' ngi txpwz Gct esz'-krde. ¹⁹ Krlzq natq kcng tqkapx Gct. Krlcde seleng: ‘Amrlue zvz trtem x lxem. X bzkq kx narnibq. Bzkq kx narmwimi doa kxtrngiu kernalzde. Bzkq kx napna da. Bzkq kx narpokiat leplz. Bzkq kx naryrlqpx da kx nakabz mz leplz.’ X kzdung kz da mou kxnxmulr lcng.” ²⁰ A' rpibz ncblo kc kx, “Kxakrlz, abzo pnz mzli kc tqngini-ngrne obla vz-nqblq-angidrx natq lcng amrlx.” ²¹ Jiszs obqtxbz mz ncblo kc mz nzmrzti-krde nide. Zbz rpibzle bade kx, “Mrbrpxbep da esz' kx na-aleq. Amwa mclrm amrlx x kabz trau rde mz leplz kx trpnzngr

* ^{10:4} Lou Kcpwz 24:1-4 * ^{10:6} Nou 1:27; 5:2 * ^{10:8} Nou 2:24; 1 Korint 6:16; Efisz 5:31 * ^{10:14} Kzdung mzli takitrde nzngyatikr drtwrgu leplz kcng tzvz-rbrng mz nqmq kr Gct, x nzlclvz-krbzkuleng badr. * ^{10:19} Nzrlaszngi 20:12-16; Lou Kcpwz 5:16-20

scdr. Nzmu na-aleq da lc, nzrngiba-krm namyalz mou mrkc Heven. Vzm x vz-nqblqm ninge.” †

²² Mzli kc ncblo kc tqxlr-ngrbzle natq Jiszs, drtqde blotx pnz x sc tqvztxpe, drtwrde vzttx zlwz. Murde nzrngiba-krde etu x trsutiu drtwrde nzalvetx-krdeleng mz nzvz-nqblq-krde Jiszs.

²³ Jiszs obqlvztxde nrlc, zbz rpibzle mz ncblo nedeng kx, “Rblxtx-atwrnr-ngrbz mz leplz kx nzrungiscng nzmncrz-krbzlr mz Gct, murde trnzkrizlru kx nzmnc-xglelr nide mz da amrlx!” ²⁴ Nzpwrkilvc-ngrdr natqdeng. A' Jiszs rpi-mopwzle kx, “Doa nengeng, rblxtx-atwrnr-ngrbz mz leplz nzmncrz-krbzlr mz Gct. ²⁵ Kamel trkrlzleu nzdwatr-krde mrkc tqmrplxng nidl. X nzrblxkr kxnzrungiscng nzmncrz-krbzlr mz Gct myaszpxle da lc.” ²⁶ Ncblo nedeng nzwprkilvc-zlwz-ngrdr natqde x nzrpibzlr bade kx, “E kx tqmule lcde, trpengr kx narlapx!” ²⁷ Jiszs mzte aprtxbzle badr x rpibzle kx, “Rblxbz mz ncblo, a' tr-rblxpwzu mz Gct. Murde trpnzngr da kx rblxbz bade.”

²⁸ Zbz rpibz Pita bade kx, “Rlaszpekr dztugrng amrlx mz nzvz-nqblq-kgr nim.” ²⁹ Rpibz Jiszs kx, “Napi-angidrbo bamu. Mrlx kx rlaszpxle ma nydze, o mzledeng, o inwedeng, o lxede, o trtede, o doa kxnztopwz nedeng, o drtc' nyzdeng mz nzvz-nqblq-krde ninge x nzlepx-krde Nrpakxmrlz, ³⁰ Gct sa naxpe-moule nide nzwrde nangi trtqki lxbler (100) mz nikeng rlaszpxle. Mz nrlc ka sa natwz-moule du ma nydze, mzledeng, inwedeng, lxedeng, doa kxnztopwz nedeng x drtc' nyzdeng, vzmi nzatrkat-zlwzkr leplz nide murde vz-nqblqle ninge. X mz nrlc kc navzm, sa natwz-kzle nzlungr kxboi.

³¹ A' nadcpx mz drtwrmu kx kzdung leplz kxnzetung mz nrlc ka, sa nangi leplz txneng mz nrlc kc navzm. X kzdung leplz txneng mz nrlc ka, sa nanginidr kxnzetung mz nrlc kc navzm.”

Nzwrde Kratq Kx Ycmnetrngr Jiszs Nzdz-krde

Matiu 20:17-19; Luk 18:31-34

³² Mzli kc tzvz-ngrdr mz lrpzki mz nzvzkilz-krdr Jerusalem, Jiszs rtwayzbz mz leplz amrlx kcng tzvz-nqblqlr nide. X ncblo nedeng nzmwxlr-zlwzng murde nzkrlzlr kx kxnzetu r lr Jiu nzrpilr nanibqlr nide. Zbz katpxxmle nidr, vzmitpxleng rrlu kxppiz x sc tqpipe-mopwzle badr nikeng naprtzbz bade. ³³ Rpibzle badr kx, “Ninge Mrlx Leplz. X mzli kc nakrlztr-ngrbzku Jerusalem, sa nakaobz ninge mz mq kxnzetu r pris x kxnzalvztrng mz Lou sc Mosis. Zbz navzmibzlr ninge mz Kansrl x drtwrd sa naes'ti kx nabzx. Zbz nakao-mopwzlr ninge mz doa lr gzpman ngr Rom kxtrngiulrJiu mz nzribqngr ninge. ³⁴ X lr Rom lcng naxtrnga-ngrdr ninge, nabyatilr ninge, naviplalr ninge x nanibqlr ninge. A' mz zbz kratq ninge kc tqlupe-moux.”

Doa Kx Namyalz Mz Nzobqkr Gct Nawz-nrbalqtrpz Mz Leplz Amrlx

Matiu 20:20-28

³⁵ Zbz Jemes x Jon, mrlx Sebedi kcng nzling, nzvzbzng mz Jiszs x nzycmneng badr. Nzrpibzlr kx, “Kxakrlz, nayc mz drtwrm nigr x kam bagr nike suti drtwrgr.” ³⁶ Jiszs rveabz badr kx, “?Nike suti drtwrmu na-alebo bamu?” ³⁷ Nzrpibzlr kx, “Mzli kc na-amrluengr nim mz nzngini-krm king, rlr-ngrm bagr nzwxbukr kzdq nigr mz nrlarm kxrtc, x kzdq nigr mz nrlarm kxmc, mz nzngini-krgr kxnzetung kxnzmyapxbzng.” ³⁸ A' rpibz Jiszs badr kx, “Trkrlz-angidrwamuu nike tqrlxtiamu! ?Krlzamu nzprtrngr mz nzetqkr drtq kc naprtizle ninge? ?X narlrpx-lzbq-ngrnamu mz da kzike

† ^{10:21} Jiszs krlzle kx nzrngibakr mrlx lc rpwa'-ngrbzle bade nzvz-nqblq-angidr-krde nide, murde dztudeng nzapubzlr bade mqngr da kx nzl kx angioleng.

naprtzbz bamu, da kc nawaix mzli lc navztrp?" ³⁹ Nzayzlu-ngrbzlr natqde mz nzrpi-krbzlr kx, "Eu, krlzkr nzalengr da lc!" Zbz rpibz Jiszs badr kx, "Da zpwxtx, drtqmu la naetq kz, da kc nawai nzetqkr drtqnge. ⁴⁰ A' trpnzngr scnge zmatq mz nzka-krbo me matq lcng. Murde Trtenge kx rmcpwpwz krkcng nawxbuong mz tron lcng." ‡

⁴¹ Mzli kc txxlr-ngrbz kztedrng da kc tzrlxtilr, drtwrdr kc tqqlctrpebz mz Jemes x Jon. ⁴² Zbz Jiszs sc tqkqlepele nidr amrlx ngrdr, x rpibzle badr kx, "Krlzamu kx king mz nrlc ka nzrtulrtr-ngrbzlr mz leplz nzalengr da mz nzmnclz-krbzlr badr. ⁴³ A' bzkq mz nimu. Murde doa kx rpile namyapxbz mz nimu mz nzaclve-krde leplz nengeng, nawztrpz bamu. ⁴⁴ X doa kx nangi kxetu kxmyalz, na-avzo-lzbq x nawz-nrbalqtrpz mz leplz amrlx. ⁴⁵ Ninge Mrlx Leplz. X kxmule-esz' ninge kxetu rmu, a' vz-ngrmc mz nrlc mz nzwztr-krbo mz leplz, a' trngiu leplz kx nawztrpqng bange. X vz-ngrmc nzrlrpx-krbo nzlu-krnge mz nzxpepx-krbo leplz kxnzkqlung mz zmatq ngr nzbngr."

*Jiszs Amrlzle Kzdq Ncblo Kx Mzte Kcba
Matiu 20:29-34; Luk 18:35-43*

⁴⁶ Mz nzvz-krdr kc Jerusalem, nzvztrng mz mztea Jeriko. X mzli kc tzrlaszpe-mou-ngrdr Jeriko, nzyrkr-nqblq zbo ngr leplz kxetu. X mz nrlar lrpzki lc tzo-zlilr, wxbu zvz elr kc ncblo kx mzte kcba, drtqde Batimezs, mrlx Timezs, mz nzrlx-krbzle trau mz leplz. ⁴⁷ Mzli kc tqxlrpe-ngrde kx Jiszs kc Naszret sc tqvz mz lrpzki, sc tqnepxpz mz nzrpi-krde kx, "Jiszs, Mrlx Devet, nayc mz drtwrm ninge!" ⁴⁸ Leplz kcng nzlclvzlr nide x nzrpibzlr namnc-lrpi. A' sc natqde tqaetunelz zlwz, mz nzrpi-krde kx, "Mrlx Devet, nayc mz drtwrm ninge!" ⁴⁹ Jiszs kc tqutupe, tqrpipebzle mz leplz kx, "Kqlebzmu, navzm mrka." Sc tzkqlepelr ncblo kc mzte tqkcba x tqrpipebzlr bade kx, "Tulzm x drtwrm naelalzm, murde nide la tqkqlemle nim!" ⁵⁰ Zbz Batimezs aotxole lrpz ngr zbao, tutxlz-anim x sc tqvzpebz mz Jiszs. ⁵¹ Jiszs rpibzle bade kx, "?Nike suti drtwrm na-alebo bam?" Rpibzle kx, "Kxetu, naobq-moux." ⁵² Zbz rpibz Jiszs bade kx, "Vzpe. Murde nzlxngiti-krm ninge dela tqamrlz-angidrpele nim." X mzli kcpwz mzte obqtxpx pnz. X sc tqvz-nqblqpe-kzle Jiszs mz lrpzki.

11

*Sade Kx Nzprlxlvzingr Nabx Nc Paam Mz Lrpzki R Jiszs Mz Nzvztr-krde
Jerusalem*

Matiu 21:1-11; Luk 19:28-40; Jon 12:12-19

¹ Jiszs badr ncblo nedeng nzkrlzbzlr mztea kcng li Betpei x Betzni mrkc mz Newz ngr Nc Olivi. Mrlc esotrpebz Jerusalem. Sc tqrpipebzle mz kzdung ncblo nede nzling kx, ² "Vznamu mz mztea lcmonr tzmcpz. Mzli kc navztr-ngrbzmu, sa namcamu kzdq nei dcngki kx nzatolvangr kx trnzvonekangr. Yokaepxamu x vzmimamu. ³ Nzmu kx tzrpibz kzdu leplz, nike tqvzmi-ngrnamu dcngki la, rpibzmu kx, 'Suti drtwr Kxetu.' X mzli lcpwz sa na-atwzlr-ngr-mople mrka." *

⁴ Ncblo kcng nzli nzvzng. Sc tzmcpelr dcngki kc nztu-krde mz lrpzki, nzpetr mz kzdq nrlar naonrx ngr ma. ⁵ Mzli kc tzyokaepx-ngrmlr nqvi lrde,

‡ **10:40** Jemes kc tznibqpe mz nzvz-nqblq-krde Jiszs. X Jon nzaetqti-kzpz drtqde mz nzvz-nqblq-krdele. * **11:3** Kzdung leplz mz drtwrdr nzycmnekr ncblo lcng yrkrpx mrkc tqyrkrpxngn ngalrde lc, mz nzrpi-krdr kx, 'Suti drtwr kxetu. X mzli lcpwz sa na-atwzlr-ngr-mople mrka.'

kzdu leplz kx nztung mrlcde sc tzrveapebzng kx, “?Memule tqyokaepx-ngrnamule la?” ⁶ Sc tzpipebzlr natq Jiszs kcng tqpibzle badr, x sc tzrlrpe-ngrbzlr nzvzmi-krdrlle.

⁷ Nzvzmimlrc dengki kc mz Jiszs, nzprlxobzlr nzkq scdr mz nibr dengki kc x Jiszs sc tqwxbuopem elr. ⁸ Leplz nzkqlu nzprlxioi nzkq ngr zbaos cdr mz lrpzki mrkc navokipx Jiszs. X kzdung nzrplameitipxmqng nabx nc paam, nzprlxlvzti-kzlr lrpzki. †

⁹ Leplz kxkqlu kcng tzrtwayzng x krkcng tzvzbzng mz nibr Jiszs, sc tzkabokatomipelr kx, “Hosana! *Glpxkr King Kxszmcpx kc tqvzm mz drtq Yawe.*

✳ ¹⁰ Nim King kc tqmcpx Gct, tqvzpxm mz nqvi lr melrmqgr Devet! Gct, ngrlvzkr nim kc tqmyalz-esz'ngr!”

¹¹ Jiszs votr Jerusalem, zbz sc tqyztrpe Mangr-nzangiongr Yawe. Kx obqlvztile da amrlx elr, sc tzyzlupe-moung mztea Betzni murde nrlc milzpqpengr.

Nounc Kx Trpnzngr Nrade

Matiu 21:12-27; Luk 19:45-48; 20:1-8

¹² Nrlc kx ngrlxobzle mz nourla x sc tzrlaszpelr Betzni. Jiszs nelzde brtale. ¹³ Kx nzvzbzlr kc mz lrpzki, mcle kc nc fiki kxyrlvi. Mz drtwrde sc tqdo kz, a' kx vztrpzle trpnzngr nrade kx mclzbzle, murde trngiu mzli r nzpakr nc fiki. ¹⁴ Sc tqrpipebz Jiszs mz nc fiki kc kx, “Trpnzngr doa kx namu mou nram.” X ncblo nedeng nxzrlbzlr nzpi-krdele. ‡

¹⁵ Kx nzkaputr-mopwzlr kc Jerusalem, Jiszs vztr mou Mangr-nzangiongr Yawe. X sc tqmaszlrpxpe-ngrde leplz kcng tzxpeting x tzamwating dalr nzrkangr blz. X alzngubzle tebol nyzdr lr Jiu kcng tzekqtrpzlr trau r mrkzbleng mz trau r Mangr-nzangiongr. X alzngu-kzpze da kx nzwxbulvzo leplz kcng tzamwang nran kx nangi blz. ¹⁶ X rpwa'-ngrbzle mz leplz kxnzkqlung mz nzrprwi-krmrlr mz makoa ngr Mangr-nzangiongr mz nzvz-krdr mz kzdq nrlarde ngr mzteadau. ¹⁷ Sc tqalvztrpeleng, rpibzle kx, “Nzyro mz Nzryrngrkxtr rpi Gct kx, ‘*Ma nyng nangi ma ngr nzkrka'kr leplz ngr mrkcng kqlu mz nrlc.*’ ✳ A' apusr-ngrnamule *me nzamwangr da kc tqangqnguti-lzbq-ngrnamu!*” ✳ §

¹⁸ Kx nxzlr kxszetu rdr pris x kxszalvztrng mz Lou sc Mosis da kc tqale Jiszs, sc tzyrlqpele drtwr ngr nzrnibqngr nide. Murde nzdobutilr nide mz nzkctipxkr leplz amrlx nzalvztr-krde x nzabrtzlvzlr nide.

¹⁹ X mz milzpq lcng, Jiszs badr ncblo nedeng sc tzrlaszpe-moulr Jerusalem.

²⁰ Nrlc ngrlxobz mz nourla, Jiszs badr ncblo nedeng nzkrlz-moplr nc fiki kc tqlcbqle. X nzmcpelr kx nzglrnedz-krmle kc mz dzbrde, krlztxlzle wq.

²¹ Pita dcpx mz drtwrde nike pitrpz Jiszs mz nounc kc mz zbq kc kai, sc tqrpipebzle kx, “Kxarklz, mc ena, nc fiki kc tqlcbqq, leu rde glrtipe!”

²² Rpibz Jiszs badr kx, “Nabrti drtwrmu Gct. ²³ Da angidr lc napibo bamu. Mzli kzniike rlx-ngrbzmu da mz Gct, bzkq drtwrmu li. A' drtwrmu nabr kx sa na-ayzlu-ngrbzle natqmu, x delc natwz-ngrnamu nike rlxtiamu.

† **11:8** Krle kxmu nzarmyalz-krdr king. X mz drtwrdr Jiszs votr Jerusalem murde na-aclvele Israel mz nzngini-krde Kxszmcpx kc tqngi King. ✳ **11:9** Sam 118:26 ‡ **11:14** Mz Nzryrngrkxtr nc fiki ngi nzycmne-ebzpxngr lr Israel. Mz nqmq lcpwz kx nc fiki lc yrlvi a' trpnzngr nrade, lr Israel nzarmyalzlr Gct mz nzycmne-krdr, a' trngiu mz nabzdr. Trpnzngr nradr kxmrzl mz nzmnc-krdr. X mz nqmq lcpwz tqlcbq Jiszs nounc lc, Gct sa nalcbq-kzle lr Israel kalr. ✳ **11:17** Asaea 56:7 ✳ **11:17** Jeremaea 7:11 § **11:17** Da kc tqale Jiszs Mangr-nzangiongr aelwapx-ngrde kx Gct sa na-alqtile Mangr-nzangiongr murde rpile leplz na-armyalz-angidrlr nide o naodatitxde mz nzapu-krdr nc fiki kx trpnzngr nrade.

Apule mrlx kc tqipibzle mz newz kc kx, ‘Brkalzm x tao prla mz zmatq ngr Gct.’ X Gct sa narlr-ngrbzle bade nike rlxtile. ²⁴ Mz nzmu-krde lcde, da kznike kx rlxtibzmu mz Gct, sa nakabzle bamu, nzmu nalxngitiamu kx sa natwzamu da lcde. ²⁵ A' mzli kc tqkrka'-ngrnamu, naipq-kaiamu leplz kx ngyati drtwrmu, x Trtemu kc Heven sa naipq-kzle nimu x nakabzle nike rlxtiamu. ²⁶ A' nzmu trnaipqwamuu leplz, Trtemu kc Heven tripq-kzleu nimu mz alwx ngrmung.” *

²⁷ Jissz badr ncblo nedeng nzvz-moung Jerusalem. Kx nzvznedr kc Mangr-nzangiongr Yawe, kxnzetu rdr pris, kxnzalvztrng mz Lou sc Mosis x lrtzlvzng, nzvzmqng mz nzvea-krbzlr bade. ²⁸ Nzrpibzlr kx, “?Neke rkabz bam zmatq mz nzale-krm da lcng tqaleq?”

²⁹ Rpibz Jissz badr kx, “Sa napibo me twzkimc zmatq kc tqale-ngrne da, nzmu na-ayzlu-kaipamu nzvea-krbo bamu. ³⁰ ?Pimamu bange, zmatq ngr nzawrkxtrkr Jon kaom Gct o kabz ncblo?”

³¹ Sc tztalwpeng mz nidr esz'-krdr, tzrpipelr kx, “Nzmu narpiku kx, ‘Zmatq kx kaom Gct’ sa narpimle kx, ‘?E memule trlxngiti-ngrwamuu natqde?’ ³² A' nzmu narpiku kx, ‘Zmatq kx kabz ncblo,’ namwxlrtiku leplz kxnzkqlung ma tznibqlr nigu, murde nzlxngitilr kx Jon nide profet.” ³³ Zbz sc tzrpipebzlr mz Jissz kx, “Trkrlzkru.” Rpibz Jissz badr kx, “X ninge kz trpengr nzpi-krbo me twzkimc zmatq kc tqwz-ngrne.” †

12

Nzycmne-ebzpxngr Kxnzbilqng Nrlanc

Matiu 21:33-46; Luk 20:9-19

¹ Zbz sc tqypwxtypebz Jissz nzycmne-ebzpxngr lc. Rpibzle mz leplz kcng tzmncng Mangr-nzangiongr kx, “Kzdq ncblo petile kc nrlanc ngr grep. Lvztrle bz ngrde, oliqtile kc da kx narwzngr waen, x wz-ngrde kz kc me na-aukzngr mz nrlanc kc. ² Zbz sc tqrlrpe-ngrbzle mz ncblo kx narbilqng, kx naxpebzlr bade kzdung nra grep mz nrlanc lc. Zbz sc tqrlaszpele mrnyzde, vzpe rlsru mrkzble. ³ Zbz mzli kc tqbrpengr grep, sc tqatwzlrpe-ngrbzle kc kxnzawz nede kx nayzlumibzle du nra grep kx nangi mqde. ⁴ Ncblo kc tqatwzlr-ngrbzle, kx krlzbzle kc ncblo kcng tzrbilqng nrlanc, sc tzlolvpelr nzttxdr x sc tzayzlu-nrbalqpelr. ⁵ Zbz Kxetu kc atwzlr-ngr-mopwzle kc kxnzawz nede badr. A' nzdwatibz ncblo kcng tzrbilqng, nztakrtibzlr narde x nzamyatibzlr drtqde. ⁶ Zbz atwzlr-mou-ngrbzle kc kxnzawz, krle nzotibzlr nznibqlr. Mz nqmq lcpwz, kxnzawz kxkqlu kx atwzlr-ngrbzle badr, nztztilr kcng x nznibqtilr kcng.

⁶ “Ncblo kc mncbepz bade doa esz'txu kx na-atwzlr-mou-ngrbzle badr. Krle mrlxde kx mrlzti-zlwzle. Sc tqatwzlrpe-ngrbzle, murde mz drtwrde rpile kx, ‘Ncblo kcng na-amrluebzlr mrlxnge x sa nakabzlr du bade nra grep kx nangi dalr nzrbilqng.’ ⁷ A' kx nzmc ncblo kcng nide, sc tzrpipetrpelr kx, ‘Mrlx kxetu kc tqrnginyl nrlanc ka nide ka. Nanibqpeku nide, x da nyd trtede sa nangi nyzpegu.’ ⁸ Nzlolvzlr nide, nznibqlr x nrkrdrqde nzrtctxpx-ngrdr mz nibr bz ngr nrlanc kc.

* ^{11:26} 11:12-22 Kxnzxngit-angidrlr Gct nzapulr nounc kxmrlz kx do zvz x nrade kqlu. 11:23 Mc kz natq kxtopwz mz Matiu 21:21-22. ^{11:24} Nakrlzku kx Nzryrngrkxtr pi-kzle kx narlbzku da mz Gct navz-nqblqle me pnz drtwrde. 11:26 Ngalrde lc trycu mz nzryrngr kxkqlu mz nzryrngr kcng pnz, a' drtwr ngrde yc kz mz Matiu 6:15 x 18:35. † ^{11:33} Jon yapwxtpile kx Jissz nide Kxnzmcpx, mz nzrpi-krde kx nide Nei Sip ne Gct. Lr Jiu lcng nzaelwapx-ngrdr mou kx nidr nounc kx trpnzng nradr mz nzpxtxpx-krdr profet ne Gct. ^{12:1} Asaea 5:1-7; Sam 80:8-17

9 “X krlzpeamu da kx na-alebz ncblo kc tqrnginyz nrlanc! Sa navzm nanibqtile ncblo lang. X nrlanc kc sa nakabzle mz ncblo kzbleng.” *

10-11 Jiszs rpi-mopwzle kx, “Zpwxtx! Krlz-angidramu Nzryrngrkxtr lc tqrpile kx, ‘Rplz kc etu tzpxtxpx-ngrdr ncblo kcng tzrwz-ngrng ma, nzaelwapxngr kx nide nou rplz kc tqmyatpx-zlwzbz. Da lc Yawe kxrwzng: X abrtztx-zlwz-ngrgu.’” ☀ **12** Zbz kxnzrmailzng ngr lr Jiu nzkrlztrpebzlr kx nzyapwxkr Jiszs lc tutrpz badr, x nzrpilr nalolvzpe-ngrdr nide. A' nzmwxltilr zbo ngr leplz ma drtwrdr tzngya. Zbz sc tzrlaszpelr nide.

Nzrveatingr Nzxpengr Takes

Matiu 22:15-22; Luk 20:20-26

13 Mzli kc Jiszs tqmncbe-ngrde Mangr-nzangiongr, kxnzrmailz ngr lr Jiu nzatwzlr-ngrbzlr bade kzdung Farzsi x kzdung leplz ngr dzbede kc mz Herot. Nzrpilr naesabtilr Jiszs mz nzycmnengr murde nalolvzlr nide.

14 Nzvzbzng nzrpibzlr kx, “Kxakrlz, krlzkr kx nike piq x alvztr-ngrn tubq zvz. X krlz-kzkr kx tu-amqngi-zvzq mz nzalvztr-krbzme nqmq kr Gct mz leplz, kxmule-esz' trna-abrtzlvzu kxnzetung. Mz nzmu-krde lcde, pim ena bagr. ?Tubq mz Lou sc Mosis nxzpe-krbzku takes mz King r Rom o trtingr?

15 ?Naxpeku o bzkq?” A' mcplxtrpebz Jiszs drtwrdr mz nzatalz-krdr nide. Murde mz nzrpri-krbzle ‘Eu,’ lr Jiu lcng nangyati drtwrdr nide mz nzokatr-krde enqmi rdr. X mz nzrpri-krbzle ‘Trtingr,’ ncblo ne Herot nalolvzlr nide mz nzxpqbrrlr-krde lou sc gzpmann ngr Rom. Delc tqrpi-ngrbzle kx, “?Memule tqrpi-ngrnamu na-atalz-ngrnamu ning? Kamamu dq ena srlrni namcx.” **16** Nzkabzlr kc x sc tqveapebz kx, “?Mqngr nar nelc tqmnztr mz srlrni lc, x drtq nelc tzyrtr elr?” Nzrpibzlr kx, “King r Rom.” **17** Zbz Jiszs rpibzle kx, “Mz nzmu-krde lc, kabzmu mz king da kx takitrde king x kabzmu mz Gct da kx takitrde Gct.” X ncblo kcng nzkctitpxl natqde, murde trprtz-pnzu mz trtxki scdr.

Nzrveatingr Nztulz-ngrm Mz Nzbzng

Matiu 22:23-33; Luk 20:27-40

18 Kzdung Sadiusi nzvzmqng mz Jiszs Mangr-nzangiongr. Nidr kzdq dzbe lr Jiu kx trnzlxitru nztulz-ngr-mop mz nzbzng. Nzveatibzlr da kx na-atrkti-ngrbzlr nzalvztr-krde mz nztulz-ngr-mop mz nzbzng. **19** Nzrpibzlr kx, “Kxakrlz, Mosis yrpxle kzdq lou kx nangi scgu. Rpile nzmu ncblo kx bzszle olvz rde x trpnzng nedr doa, mzlede nayrlzti-alzule olvz kc. Murde nzrngine-krdr doa na-apule kx ngi doa ne mzlede kc tqbzpe. X doa lc natekqtrle nzmrbrpx-krbz nqvi lr ncblo kc x natwzle dztudeng. ☀ **20** Nzmu narpingr kx kzdung mzle-lzbq nzrlimzng. Mzledr kc etu yrlz. Zbz mzli trboiu sc tqbzpe, trpnzng nede doa. **21** Zbz mzledr krali yrlzti-alzule olvz kc, x bz kz trpnzng nede doa. X wai-kzle mzledr kratq. **22** Vz, vz, olvz kc nzyrlzti mzle-lzbq kcng nzrlimz, x trpnzng nedr doa. X mz nibrde olvz kc sc tqbzpe kz. **23** Alvztr-ngrn kx leplz tulz-mop mz nzbzng. ?Kx tqmule lcde, neke nartwz olvz kc mzli kc natulzng mou leplz amrlx? Murde mzle-lzbq kcng rlimz nzyrlztilr nide. ?Myx kxmule, Gct batrpzle mz olvz lc nzxpqbrrlr-krde natqde mz nzyrlzti-krde ncblo kcng rlimz mz mzli kxesz’?”

24 Jiszs ayzlu-ngrbzle natqdr kx, “Nzao-krmu drtwrmu vz-rbrrtx atwrnrngr. Murde tryrplatitru narmu zmatq ngr Gct x drtwr ngr Nzryrngrkxtr.

25 Mzli kc Gct na-alu-ngr-mople leplz mz nzbzng, sa na-apupelr enjrl kcng

* **12:9** Mz be lc nrlanc ngr grep drtwr ngrde lr Israel. [Asaea 5:7] Mrlx Kxetu drtwr ngrde Jiszs, kc tqrkabz Gct zmatq mz nzngini-krde Mrlxde. Ncblo kzbleng drtwr ngrde kxtrngiulrjiu. ☀ **12:10-11** Sam 118:22-23 ☀ **12:19** Nou 38:8; Lou Kcpwz 25:5-10; Rut 4:5-10

tzmncng Heven. Trnzyrlzpeung, x trpnzngr nzyrlz-mou-krdr kalr. ²⁶ X Mosis aelwapx-ngrde kx krkcng tzbzpeng sa na-atulzmqng mz nzlungr. Murde krlz-angidramu natq Mosis mz be ngr nounc kc tqmrbz tqwou. Mzli lc Gct tqrpi-ngrbzle mz Mosis kx, ‘Ninge Gct ngr Ebraam, Aesak x Jekop.’ ²⁷ Kxmule-esz’ ncblo lcng tq nzbdz-pnzng, a’ trpileu kx nide Gct ngrdr mzli kc pnz. Murde nibede Gct ngrdr mz nzlu-krdr Heven mzli ka. Delc mrkc tqpnzki drtwrmu le vz-rbrtx atwrnrngr.”

Lou Kxmyapxbz

Matiu 22:34-40; Luk 10:25-28

²⁸ Mzli kc dzbe Sadiusi tztalwzti-lzbq-ngrdr badr Jisz, kzdq kxalvztr mz Loukxtr rpibzle mz Jisz kx, “Lou kznike myaszpxle lou amrlx?” ²⁹ Ayzlu-ngrbz Jisz natqde kx, “Lou kx myapxbz nide sele, ‘*Lxngitiamu, nimu lr Israel.* Murde *Yawe nide Gct rgu.* X *Yawe nide Gct kc esz’txu.* ³⁰ *Doa kx esz’ mz nimu namrlztiq Yawe, Gct rmu mz nabzm atwrnrngr, x mz nzwikr nelzm atwrnrngr, x mz drtwrm atwrnrngr, x mz zmatq ngm atwrnrngr.*” ³¹ “Lou krali nide sele. ‘*Mrlzti kztemqng da kc tqwaiq nzmrlzti-lzbq-krm.*’” Trpnz-moungr lou kx nzmyaszpxlr lou lcng li.”

³² Kxalvztr mz lou kc rpibzle mz Jisz kx, “Eu, da zpwxtx la tqpiq. *Yawe nide Gct kc esz’txu x trpnzngr mou gct kzble.*” ³³ X *namrlztiq nide mz nabzm atwrnrngr, x mz drtwrm atwrnrngr, x mz nxzplk-krm atwrnrngr.* X *namrlzti kztemqng da kc tqwai nzmrlzti-lzbq-krm.*” Da lcng li nzmyaszpxlr nzrka-ngrbz da mz Gct x mz nzangc-ngrbz blz bade.”

³⁴ Kx xlrbz Jisz nzycmne-angidr-krde, sc tqrpipebzle bade kx, “Opxm kx ycpe pipz nzmnclz-krbzme mz Gct mz nzngini-krde King rm.” Mz nibrde leplz amrlx nzmwlxltxng nzvea-mou-ngrbz natq, murde ma tqamyatx-mopwzle drtqdr.

Nzrveatingr Kxnzmcp Ne Gct

Matiu 22:41-46; Luk 20:41-44

³⁵ Mzli kc tqalvztrpengr Jisz Mangr-nzangiongr, rpibzle mz leplz kcng kx, “Kxnzalvztrng mz Lou sc Mosis nzpilr kx Mevalu kc Tqmcpk Gct navzpxm mz nqvi lr melrmqde Devet. ³⁶ Murde Mqngrkxtr batrpzle mz Devet nzycmnetr-krde Kxnzmcpk mz nzrpi-krde kx, ‘*Yawe rpibzle mz King kc tqngi kxetu rnge kx, Wxbu mrlc tqmatq-esz’ngr mz nrlarng kxrtc, navz nakrlz-zpwxbzle mzli kc nangi-batr-ngrbo mz enqmi rmqng nzmetx-krbzlr bam.*’” ³⁷ Mz Sam lc Devet rpile kx Kxnzmcpk ngi kxetu rde. ?A’ myx kx namu Kxnzmcpk nznginikr doa mz nqvi lrde kc mzte trnzmcka, x mzli kcpwz ngi kz kxetu rde?” Zbo ngr leplz kcng nzabrtz-ngrdr nzlalztq-krbzlr bade. †

Bzkq Apuamu Kxnzalvztrng Mz Lou Sc Mosis

Matiu 23:1-36; Luk 20:45-47

³⁸ Mzli kc tqalvztrngr Jisz leplz, rpibzle badr kx, “Bzkq apuamu kxnzalvztrng mz Lou sc Mosis. Murde mrlzbz badr nzkq-krdr nzkq kxboi mz nzvzne-krdr, x nzamatqkr leplz nidr mz nzrpi-ngrbz badr kx, ‘Nim la trte,’ mz nzvzne-krdr me nzamwangr da. ³⁹ X mrlz-kzpz badr nzwxbu-zvz-krdr me matq mz mangr-nzkrka’ngr x mz mzli r nzmulvzng,

* **12:26** Nzrlasngr 3:1-6, 15 * **12:30** Lou Kcpwz 6:4-5 * **12:31** Livae 19:18; Luk 10:27; Rom 13:9; Galesia 5:14; Jemes 2:8 * **12:32** Lou Kcpwz 4:35; 6:4; Asaea 45:21 * **12:33** Lou Kcpwz 6:5; Livae 19:18 * **12:36** Sam 110:1 † **12:37** Jisz na-aelwpx-ngrbzle badr kx Kxnzmcpk trngi-txpwu ncblo, a’ myaszlxle ncblo murde Gct armyalzle nide. A’ trpnzngr nidr kx yrplatir narde natqde.

murde nzglqpx-lzbqng. ⁴⁰ X mz zmatq ngr nzngini-krdr kxnzrmailzng, nzangqngutitrlr olvz kxnbzszng mz nztwz-pnati-krdr dztudrng amrlx. A' mzli kcpwz nzaboitilr nzkrka'-krdr mz nzyrlq-kapq-krdr alwx ngrdr. Mz nzmu-krde lcde, leplz kxnmulr lcng nzayrplapxngr nidr kalr mz Hxl namyatpx-esz'ngr."

Nzrkangr Angidr

Luk 21:1-4

⁴¹ Mzli lcng tqalvztrngr Jisz, wxbu aepztr mrkc Mangr-nzangiongr tzryrlqongr trau. Tqobqlvz-ngrde leplz amrlx nzrkatr-krdr trau. Leplz kxkqlu kxnmrncng nzryrlqong blzmr trau. ⁴² Zbz kzdq olvz kxtr-rngiscu x bzszpe ncblo ngrde vztrpz yrlqole srlrni kxtopwzne li.

⁴³ Jiszs kqlele ncblo nedeng, rpibzle badr kx, "Napibo bamu, mz nzobqkr Gct olvz lc tqabzope, srlrni kc topwz tqkapxle myaszpxle blzmr trau kcng tzkapxlr kxnmrncng. ⁴⁴ Murde kxmule-esz' kxnmrncng nzkapxlr kqlu a' kxipizne la ye mz nzrngisc-krdr. A' olvz lc tr-rngiscu katpxpcele da kcng amrlx namnc-xglele."

13

Rka Ngr Nzodatingr Mangr-nzangiongr

Matiu 24:1-2; Luk 21:5-6

¹ Mzli kc narkalzpe-ngrm Jisz Mangr-nzangiongr Yawe, kzdq ncblo nede rpibzle bade kx, "Kxakrlz, mc ena kxmu nzlrmziongr nzrwzng Mangr-nzangiongr ka mz rplz lcng etuti, x mzte nzluli-krde lxngipx-esz'ngr."

² Rpibz Jisz bade kx, "Mangr-nzangiongr lc tqpime mzte tqluli trnatulou. X trpnzng rplz ngrde kx nablio me yc-ngrde. Murde sa naodati enqmi rmung kalr."

Rkx Ngr Vea X Nzkxpungr Kxkqlu

Matiu 24:3-14; Luk 21:7-19

³ Kx nzkrzbzlr kc Newz ngr Nc Olivi, Jisz sc tqwxbupe elr, mrlcde nzmcpz Mangr-nzangiongr Yawe. Zbz Pita, Jemes, Jon x Adru sc tzvz-lrpipebzng mrkc tqwxbu-ngrde. ⁴ Nzrpibzlr kx, "Pim ena bagr mzli kc naodatingr Mangr-nzangiongr, x rkx kznikeng namc nakrlztingr mzli lcde."

⁵ Rpibz Jisz bade kx, "Aclvetio-lzbqamu mz da lcng. Bzkq rlr-ngrbzmu mz leplz nzpokiatr-krdr nimu mz da kznikeng naprtz. ⁶ Ncblo nakqlung sa navzmqng mz drtqng, narpibzlr mz leplz kx, 'Ninge Kxnmcpnx.' X leplz nakqlung kalr nalxngitilr nidr mz nzpokia-krdr. ⁷

⁷ "X mou, bzkq nelzmu tzprlzm mz nxlkr-krmu nrpa ngr nzotangr mz vea kx esotrpq x nrpa ngr vea kx ycm rlru. Da kxnmulr lcng naprtzti-kaing, a' trngiu drtwr ngr nzyrkrpxpe-krbz mz nrlc. ⁸ Murde mrkcng kqlu mz nrlc sa napnz-lzbqng. Nengq kxetuting sa navzmqng, x dzbi kxetuting sa navz-kzpqng. A' da lcng naprtzting nzapulr nztangqgx-zlwzkr olvz kxyr, mzli kc tqvz-ebir-ngrm nimz ngr doa kxtopwz, x sc tqrmika ate.

⁹ "Aclvetio-angidramu, murde nimu lang tzlxngitilr ninge sa nalolvz kai kxnetung nimu. Sa navzmilr nimu mz kot x naiklapxmlr nimu mz nabz mangr-nzkrka'ngr. X navzmibzlr nimu mz kxnetu mrkzbleng x mz king kxtrngiulrJiu mz nzayrplapx-krdr nimu. X mzli nyzmu lcpe kz mz nzyapwxtipx-krbzmu Nrpapxmrz lc nale-kaipz mz neidu amrlx mz nrlc, x Mzli Kxmatq kc na-ayzlu-ngrbz Gct da mz leplz kc ate. ¹⁰ Mzli lc nalolvz-ngrmu mz nzvzmi-krdr nimu mz kot, bzkq da kx

⁸ 13:6 Matiu 13:21

nakxne drtqmu mz da kx napiamu. Murde natq kcng napiamu trngiu nrpa kx aoti drtwrmu, a' ngi nrpa kx nakatrpz Mqngrkxtr mz nabzmu.

¹² "Mzli lcde, leplz sa nakabzlr mzledrng kcng tzvz-nqblqlr ninge mz enqmi rdr mz nznibq-krdrleng. X trte doa kz sa nawaisr-ngrde kz doa nedeng mz nznibq-qnegr nidr. X doa na-atrkati-kzlr trtedr x lxedr x naka-kzpplr mz enqmi rdrng mz nznibq-krdrleng. ¹³ Leplz kxnzkqlung sa napxtpx-ngrdr nimu, murde nimu leplz nengeng. A' nimu kcng tztu-amqngi-zvzng mz nzrlxngiti-krmu krlzbzle mz nzbz-krmu, sa na-arlapx Gct nimu.

Rkx Ngr Nzodatingr Jerusalem

Matiu 24:15-21; Luk 21:20-24

¹⁴ Rpi-mopwz Jisszs kx, "Kxdrka'ngr kxmyapxbz kc tqtrka-esz'ngr sa navzm, mz nzatutr-krde da kx yro Daniel mz buk scde. ¹⁵ X nimu kcng tzrlwxlr da lc nakrlz-angidramu drtwr ngrde. Murde Kxdrka'ngr lc sa natuom Mrkc Tqtr Mangr-nzangiongr, x trtakitrdeu nide nztuo-krmle elr. Mzli lc nimu kcng tzmncng Judiz nangrlrlzamu mz newz, mz nzmnc-kapq-krnamu nzodangr kc tqycpe pipz nzkaputr-krmle. ¹⁶ Nzmu kx tqmncome mz nibr ma nyzm, bzkq asaq nzvzo-krme x bzkq otrpeq dztum ma nyzm. A' ngrlrx pnz. ¹⁷ X nzmu kx tqwzq mz nrlanc, bzkq vzpeq ma nyzm mz nzoti-krm lrpzm, x sc tqngrrl-ateq.

¹⁷ "Agrmqng olvz kcng tzyrnx x krkcng tzayqng itoto, murde rblxtile nidr nzngrlrz-ani-krdr mz newz mz nzmnc-kapq-krd. ¹⁸ Krka'-ngrbzmu mz Gct murde da lcng ma tzkaputrpqng mz mzli r zbao, mzli kc nrlc tqba-zlwz-ngrde. ¹⁹ Murde ztrka ngr nzkxpungr lcng sa namyaszpxlr ztrka amrlx abzo mz mzli kc ayrnrngr tqwzng Gct nrlc krlzmle mzli ka. X trpnz-moungr nzwnde kxnakxmule lc kx naprtz kalr. ²⁰ Gct aotipe drtwrde nzamrcnetr-krmle mzli lc, murde leplz ma tzyrkrtxtrng. X amrcnetrple mzli lc mz nzokatr-krde leplz kcng tqmcpxpeleng. ²¹ Mzli lcde, nzmu kx tzrpibz leplz bamu kx, 'Obqki lcmonr, Kxnzmcpx kc tqmnc mrkc!' o 'Obqkim ka, nide se tqmnckibzle ka!' bzkq lxngitiamu nidr. ²² Murde Mevalu kxnzpokiang x profet kxnzalvztr-rbrng sa navzmqng. X na-aleting rks x da kx nakctipxng mz nzesabrti-krdr leplz kcng tqmcpxpeng Gct, nzmu nakrlzlr nzyatr-krbzlr. ²³ Aclvetio-angidramu, murde napi-kaipo da lcng bamu x mzli rdr kc tqvz-atem."

Rkx Ngr Nzvz-krm Mrlx Leplz

Matiu 24:29-31; Luk 21:25-28

²⁴⁻²⁵ Rpi-mopwz Jisszs kx, "Mz nibr mzli r nzkxpungr lcng, Gct sa na-acyngrltile dalr bongavz kcng tzmatqng amrlx. Nepi nawx-nzlongr x temz trnapnapxu. X vri sa natatio-lxblrmqng mz bongavz. ²⁶ Ninge Mrlx Leplz. X mzli lc leplz amrlx mz nrlc tulvzo sa namclr ninge mz nzvz-krmc mz nabz dcbz mz zmatq kxetu x zluli. ²⁷ X sa na-atwzlrpx-ngrne enjrl nengeng mz nrlc tulvzo, mz nzvzmi-krmlr leplz neng Gct kcng tqmcpxpeleng."

Rkx Ngr Nc Fiki

Matiu 24:32-35; Luk 21:29-33

²⁸ Zbz rpi-mopwz Jisszs kx, "Mwx natwzamu drtwr ngr nzplcokr leu r nc fiki. Mrka Israel mzli kc namc-ngrnamu nrla nc fiki tzpooti-ngrdr x nzyrlqbzlr leu rdr kxmrna, sc tqkrlzpeamu kx mzli r nrpr ngr nranc sa

^{13:14} Daniel 8:13; 9:27; 11:31; 12:11; 2 Tesalonika 2:3-4; Nzaelwapxngr 13:14-15 ^{13:24-25} Asaea 13:9-10; 24:21-23; 34:4; Esikel 32:7-8; Joel 2:10-11, 31; 3:15; Emos 8:9; Aposol 2:19-21; Nzaelwapxngr 6:12-13 ^{13:26} Daniel 7:13; Nzaelwapxngr 1:7; 19:11-16

tqesopem. ²⁹ Mz nqmq lcpwz, mzli kc namc-ngrnamu kx da lcng tqpibo bamu sc tqkaputrpemqng, sc tqkrlzpeamu kx mzli esotrpem mz nzvz-krmc. ³⁰ Nakrlz-angidramu kx da lcng amrlx nangidati-kaing, x leplz kcng tzmncng mz nrlc sc tzykrkrtr-ateng. ³¹ Kxmule-esz' bongavz x nrlc sa nayrkrpxng kalr, a' natqngeng trtxpnzngr nzyrkrpx-krdr murde sa nangidating amrlx.”

Naoliqti-zvzku Nzyzlu-krm Jiszs

Matiu 24:23-28, 36-41; Luk 17:26-30, 34-36

³² Rpi-mopwz Jiszs kx, “Trpnzngr kxrkrlz zbo q x nabz nepi kc nayzlu-ngrmc. Trnzkrzlru enjrl ngr Heven amrlx x trkrlz-kzwxu, a' krlz txpwz Trtenge esz'-krde. ³³ Mz nzmu-krde lcde, olij-zvzamu murde trkrlzwamuu mzli rde. ³⁴ Kxnamu narkalz-ngrmc x ninge kc tqvzpemc, na-apule ncblo kc tqrkalzm ma nyzde tqvz mz narnrlc. X rkabz nwzvngr mz kxnzawz nedeng amrlx. X rpibzle mz ncblo kc tqacivele naonrx, na-aukz zvz mzli kx yzlu-ngrmle.

³⁵ “Mz nzmu-krde lcde, olij-zvzamu, murde trkrlzwamuu mzli kc nakaputr-ngrmc, ma tqngi milzpq o aurnrlc o mz natq kio kc kai o mz nourla. ³⁶ Trmrlzu trnzoliqti-krmuu nzyzlu-krmc, x tqrmtipex nzpwrkilvc-krmu nzyzlu-krmc. ³⁷ Mz nzmu-krde lcde, natqnge lcng tqpibo bamu, pi-kzpo mz leplz amrlx, kx naoliqti-zvzamu nzyzlu-krmc!”

14

Kxnzetu R Lr Jiu Nzrpilr Nanibqlr Jiszs

Matiu 26:1-5; Luk 22:1-2; Jon 11:45-57

¹ Ycbep lang zbo li x zbo kxtr kc tzrpibz Nzamyangr sc tqkaputrpem. Zbo lc tqyzutrngr nzmulvzngr kxtr, mzli kc tzmux-ngrpwlzlr bret kc trpnzngr yisti ngrde. Zbo ngrde rlimz. Kxnzetu rdr pris x kxnzalvztrng mz Lou sc Mosis nzrpilr nalolvz-kapqlr Jiszs x nanibqlr, bzkq nzkrlzti leplz kxkqlu.

² A' nzrpilr kx, “Bzkq lolvzku nide mz nabz zbo kcng tqetung, murde ma tqrkatrpzku mz leplz kxkqlu nzotablrngr.”

Nar Jiszs Nzaelu Tolo Betzni

Matiu 26:6-13; Jon 12:1-8

³ Jiszs mnc mztea Betzni mz ma nyz kzdq ncblo drtqde Saemon. Mrlx lc amrlz Jiszs mzli kc mz lepz kx dwatibzle nide. Mzli kc tqmungr Jiszs ma lcde, dwatrpz kc olvz. Twzbzle kc botol ngr tolo kx narnnbr ngrde lqlwx x mnrt mrlz zlwz. Lvxlzle botol kc x sc tqaelupebzle nar Jiszs mz nzarmyalz-krde nide.

⁴ Kzdung leplz kcng tzmncng mrkc drtwrdr ngya, sc tzrpi-etrpelr kx, “? Nike olvz lc tqayrkrtitx-ngrde tolo lc narnnbr ngrde tqlqlwx? ⁵ Takitrde nzamwatxngr tolo la mz narnnbr kx tqlqlwx. Narnnbr kx rsakrlrmingr nzxpengr ncblo mz yiz kxesz'. X nakabz trau rde mz kxtrnznrgiscung.” Sc tzpibqtipelr olvz kc.

⁶ A' rpibz Jiszs badr kx, “Bzkq ycmnebzmu bade. ?Memule tqrpi-ngrnamu narpwa'-ngrbzmua da lc tqale? Da kxmrlz-esz'ngc lc tqalemle bange. ⁷ Doa kx trnznrgiscung mnc-zvzamu badr, x krlzamu nzokatrngr nidr mzli kznike pnz ngr drtwrmu le. A' ninge trnamnc-zvzpc'u bamu.

⁸ Da lc tqale olvz lc, takitrde nide nzale-krmlele bange. Aelule ninge tolo mzli ka mz nzoliqti-krbzle nrkrdrtrqng mzli kc nabz-ngrne x nzyrtzmqng namz ngrnge kc ate. ⁹ Napi-angidrbo bamu, drlve keng nzyapwxtipxng

Nrpakxmrlz lc mrka mz nrlc, da kxmrlz lc tqalem olvz lc bange sa napipx kz, mz nzrdctipxngr drtwr nide mz nrlc tulvzo.”

Judzs Ryrlq Drtwr Mz Nzamwa-krde Jiszs

Matiu 26:14-16; Luk 22:3-6

¹⁰ Judzs Iskariot nide kzdq ncblo neng Jiszs kcng nzpnu-esz'-nrade-li (12). Vzbz mz kxnzetu rdr pris mz nzamwa-krbzle Jiszs badr. ¹¹ Kxnzxllrlr da lc, nzabrttxng x nzrpibzlr naxpebzlr Jiszs bade. Zbz Judzs sc tqrtangrtipele mzli kxmrlz kx na-aprc-ngrbzle Jiszs badr.

Jiszs X Ncblo Nedeng Nzmulvzlr Nzamyangr

Matiu 26:17-25; Luk 22:7-14, 21-23; Jon 13:18-30

¹² Mz zbo kc kai ngr Nzmulvzngr Bret kx Trpnzngr Yisti Ngrde, nei sip kx nangq mz Nzamyangr sc tznibqpe. X mzli kc tqtaopengr nepi sc tzmulvz-atelr Nzamyangr. Ncblo nedeng nzveabzng bade kx, “?Myx me naoliqti-ngrbzkr dakxnxng ngr Nzamyangr?”

¹³ Jiszs atwzlr-ngrde kzdu nidr nzling, rpibzle badr kx, “Vztramu mzteadau Jerusalem, x sa narmctiamu kzdq ncblo kx rglqe da kx lrti lue. Vz-nqblqamu nide. ¹⁴ X kx tqkrlzbzmu la, ma kc nadwakitrle, rpibzmu mz ncblo kc tqrnginyz ma kc kx, ‘?Kxakrlz rpile nakrlzle myx me namnc-ngrdr badr ncblo nedeng mz nzmulvz-krdr Nzamyangr?’ ¹⁵ Sa navzmilzle nimu wq mz nelvq rde kxetu mrlcde nzamrlzpqppe-ngrde nigu. Mrlcde dekc naoliqti-ngrnamu dakxnxng nagu.”

¹⁶ Ncblo nede kcng tzvztrng Jerusalem, x da amrlx kcng tqpibz Jiszs badr sc tqngi-datipeng. Zbz sc tzoliqtipelr Nzamyangr.

¹⁷ Kx krlzbzle kc milzpq, Jiszs badr aposol kcng nzpnu-esz'-nrade-li (12) sc tzvzpem ma kcma. ¹⁸ X mzli kc tzmulzpe-ngrdr mz tebol, rpibz Jiszs kx, “Napi-angidrbo bamu kx kzdq nimu esz' sa na-amwabzle ninge mz enqmi rongeng. Kzdq nimu kang tqmu-lxblrku mzli ka.” ¹⁹

¹⁹ Drtwrdr vztv pnz, x sc tzycmne-esz'-lxblrpebzng bade, tqtulzm kc nidr tqrpibzle kx, “?Trnipwc'u la tqpiq kx?” ²⁰ Ayzlu-ngrbz Jiszs natqdr kx, “Kzdq nimu kang ncblo nengeng, kzdq nimu kc naleole bret nade mz dis lc tqwxbutrp bange. ²¹ Ninge Mrlx Leplz nabzx navz-nqblqle Nzryrngrkxtr. A' agrmplz ncblo la na-amwale ninge. Murde takitrde bzkq mzte nzmc pnz, murde nzayrplapxngr lc nide kalr namyatpx-esz'ngr.”

Jiszs Ayzuole Nzmungrkxtr

Matiu 26:26-30; Luk 22:14-20; 1 Korint 11:23-25

²² Mzli kc tzmube-ngrdr, Jiszs kalzmle bret. Awitx-ngrbzle mz Gct, lopxile, kabzle badr x rpibzle kx, “Twzamu murde krlc ncvr drtqnge.”

²³ Zbz glqlzmle kap. Awitx-ngrbzle mz Gct, kabzle badr x nzrmnqong amrlx ngrdr elr.

²⁴ Rpibzle badr kx, “Krlc mepyr rnge kc tqyrlpx-ngrde leplz kxkqlu, mz Nzesz'tikr Drtwr Gct badr leplz. ²⁵ Nakrlz-angidramu kx trpengr nzrmnq-mou-krnge waen, navz nakrlzbzle mzli kc narmnq-ngrne waen kxmrna mz nrlc kc na-aclve Gct kalr.”

¹⁹ 14:18 Sam 41:9

²⁶ Mz nibrde nzngrtx-ngrdr kc Sam ngr nzrglqpxngr, x sc tzrlaszpelr mzteadau, tzvzdzpeng mz Newz ngr Nc Olivi. *

*Plzpx-kaipz Jiszs Nzrpikr Pita Trkrlzleu Nide
Matiu 26:31-35; Luk 22:31-34; Jon 13:36-38*

²⁷ Zbz rpibz Jiszs badr kx, “Koma mz nrlckxbq nimu amrlx ngrmu sa nadwaszamu ninge, mz nzatutrngr Nzryrngrkxtr mz nzrpikrde kx, ‘Ninge Yawe, x sa nanibqx kxaclve sip, x sip nedeng sa na-akiting nrlc.’ ⚫ ²⁸ A' mz nibr nzatulz-moungr ninge mz nzbzngr, sa nartwayz-kaipo Gzlili x navzzkpzmu mz nzrmcti-lzbq-krgu elr.”

²⁹ A' Pita rpibzle kx, “Trtxpnzngmz nzwasz-krnge nim, kxmule-esz' kztenge lcng nzwang amrlx!”

³⁰ Jiszs rpibzle mz Pita kx, “Napi-angidrbo bam, koma mz nrlckxbq, nzwrdne natq nzrpikrm trkrlzwq ninge x kio nzky'a-krde nzwrdne krali kc ate.”

³¹ A' Pita natqde xplr-zlwzbz mz Jiszs nzrpikrbzle bade kx, “Trtxpnzngmz nzrpikrde kx trkrlzwxu nim! Kxmule-esz' nzabzminge nim!” X nzpikzpzlr kztede kcng amrlx.

*Jiszs Krka' Esz'-krde Getsemzni
Matiu 26:36-46; Luk 22:39-46*

³² Mz nzvzo-kr-moplr nzkrzbzlr kzdq nrlc drtqde Getsemzni. Jiszs rpibzle badr kx, “Wxbupwzmu mrka mzli kc nakrka'-ngrne.” ³³ Vzmile Pita, Jemes x Jon. Mzli lc nabz Jiszs talvzope x mrlepupe-ngrde nzvzkr drtwrde. ³⁴ Sc tqrpopebzle badr rtqlrdr kx, “Nzvzkr drtwrnge etutx-zlwzpe x rpile nanibqle ninge. Mncpwzmu mrka x aukzpwzmu.”

³⁵ Vzspxle nidr kxppipz x sc tqrtco-lzbqpengr mz nzkrka'-krde. Krka'-ngrde kx nzmu kx tqrlpxngr Gct le e bzkq drtqde nzaetq x nzabz.

³⁶ Rpile kx, “Abba! Trte! Rngiscm zmatq ngr nzalengr da amrlx. Trsutiu drtwrnge nzrlrpx-lzbq-krnge mz nzetqkr drtqnge x nzbzngr. A' bzkq vznqblqq me pnz drtwrnge, a' nangi zvz me pnz drtwrm.”

³⁷ Mz nibr nzkrka'-krde, yzluum mz ncblo kcng nztqng, a' sa tzmwing. Sc tqrpopebzle mz Pita kx, “Saemon! ?Nike tqmwilvzq? ?Rblx-zlwzbz bam nzobq-krm mz nabz nepi kxesz”? ³⁸ Aukzpwz x krka' murde natu-amqngiq mz nzatalzngmz. Murde kxmule-esz' suti drtwrm nzalengr da kxtubq, a' nzxplkrm esz'-krm trtakitrdeu.”

³⁹ Zbz Jiszs vz mou mz nzkrka'-krde, x pi-moule natqde kcng pwz. ⁴⁰ Kx yzlu-mople kc badr, mcle kx nzmwipe-moung rtqlrdr, murde mztr one mwi zlwz. X trnzkrzbzlr da kx napibzlr bade.

⁴¹ X kx yzlu-mople kc mz nzwrdne kratq mz nzyrkpx-krbz nzkrka'-krde, sc tzmwibeng. Sc tqrpopebzle kx, “Elr! Nimu ka tqmwibeamu. Mrlzpe ena. Mzli kc tqpi-pnzbo bamu sc tqkaputrpem. Obqbzmu, ninge Mrlx Leplz se na-aprcpebz mz zmatq ngr ncblo kx nzaleng alwx. ⁴² Tulzamu, navzbzku narmcti-lzbqku badr. Obqbzmu, ncblo kc tqamwale ninge sa tqvzpm.”

* ^{14:26} 14:24-25 Nzesz'tikr Drtwr lc rpile kx Jiszs tekqtrle nigu mz nzayrplapxngr mz alwx ngrgung x Gct trpengr nznibq-krde nigu mz alwx lcng. Murde mz nzvz-nqblq-krde Nzesz'tikr Drtwr lc, Gct anulvzlppebzle alwx ngrgung mz Jiszs, x kamle bagu nztabq-krde. Murde mzli kx obq-ngrml bagu, namc-txpwlze kx apuku Jiszs mz nztr-krde. ^{14:26} Mz nzvz-nqblq-krde nqmq kr lr Jiu, mz nzmungr mz Nzamyangr, nzngr-ngrdr Sam 113—118. Kzdung Sam nzngr-kai-ngrde, x sc tzmu-ateng. X nzngr-ngrdr Sam kzbleng mz nibr nzmungr lc. Mz nzvzdz-krdr mz newz lc, mwtx trtakitru nabz nepi kxesz'. ⚫ ^{14:27} Sekaraea 13:7

Jiszs Nzlolvz Getsemzni

Matiu 26:47-56; Luk 22:47-53; Jon 18:3-12

⁴³ Mzli kc Jiszs tqycmnebe-ngrde, Judzs sc tqkaputrpebz. Judzs lc nide kzdq ncblo nedeng kcng nzpnu-esz'-nrade-li (12), x vz-nqblqm zbo ngr ncblo. Nzatwzlrpx-ngrmqng kxnzetu rdr pris x kxszalvztrng mz Lou sc Mosis x lrtzlvzng. Nzrmaleng dalr nzotangr, bz x toki r vea.

⁴⁴ Judzs rka-kaipz badr rkx mz nzhripi-krbzle kx, “Krkc natcngix kcma, nide kc nalolvzamu x vzmiamu.” ⁴⁵ Zbz Judzs vzm mz Jiszs. Rpibzle kx, “Kxakrlz!” x sc tqtcngipebzle mqde. ⁴⁶ Zbz sc tzlolvzpelr Jiszs. ⁴⁷ A' kzdq ncblo nede kx tu mrlcde yrlqbzle toki r vea scde x lakitpxbzle kzdq nradrtq kxnzawz-nrbalq ne Nardr Pris.

⁴⁸ Rpibz Jiszs badr kx, “?Memule tqrwwz-ngrmamu bz x toki r vea mz nzlolvwz-krmu ninge? ?Opxm kx ninge kx rmailz ncblo mz nzrnzlvzongr zmatq ngr gzpman? ⁴⁹ Mz zbo kang kqlu alvztr-zvz-ngrne Mangr-nzangiongr. ?Memule trlolvwz-ngrwamuu ninge elr? A' kxmusr-ngrnamule lc mz nzangida-krde Nzryrngrkxtr.” ⁵⁰ Zbz ncblo nedeng amrlx sc tzwaszpelr nide.

⁵¹ Mzli lcde kzdq obla vz-nqblqne-kzle Jiszs mz nrlckxbq kcpwz, pxi tpxwz lrpz. X nzrpilr nalolvz-kzlr nide. ⁵² A' nzmale-lvitxdr nide x dwaszle lrpz scde, x sc tqvope ycblq. †

Jiszs Nzvzmibz Mz Kansrl Nyz Lr Jiu

Matiu 26:57-68; Luk 22:54-55, 63-71; Jon 18:13-14, 19-24

⁵³ Jiszs nzvzmilr mz ma nyz kx ngi Nardr Pris, mrkc tzyrlwrpx-lxblr-ngrdr kxnzetu rdr pris, lrtzlvzng, x kxszalvztrng mz Lou sc Mosis.

⁵⁴ Pita kc tqma-nqblqnebzle nidr. X dwatr-kzpz mz makoa ngr ma kc, sc tzwxbu-lxblrpeng badr pulis ngr Mangr-nzangiongr mz nzmulq-krde nyr. ⁵⁵ Kxnzetu rdr pris x Kansrl nzrtangrng kzdq da kx vz-rbri Jiszs, murde nzrpilr nanibqlr nide, a' trpnzngr da kxnzrmctilr. ⁵⁶ Murde leplz nzkqlung nzpokiatitr Jiszs, a' nzryapwx-krdr tresz'tiu. ⁵⁷ Zbz kzdu leplz nztulzmqng, sc tzpokiape-kzng. ⁵⁸ Nzrpilr kx, “Xlrkr nzrpikr Jiszs kx, ‘Sa na-awxtxobo Mangr-nzangiongr lc tzwzti ncblo, x nayctitxde zbo nali, x zbo kratq sa nawzti-mopwc' dq kxmrna kx trnzkrzu ncblo nzrwzng.’” ⁵⁹ A' natq kcng tzpiti-lxblrlr tresz'ti-kzu.

⁶⁰ Zbz Nardr Pris tutxlzm mz mzlindr, sc tqveapebz mz Jiszs, rpibzle kx, “?Myx kxmu, trpnzngr natq kx na-ayzlu-ngrbzme natq ncblo lcng?” ⁶¹ A' Jiszs anabu tpxwz. ⁶² Zbz Nardr Pris vea-mopwz bade, rpibzle kx, “?Ngini-angidrm Kxnzmcpx? ?Nim Mrlx Gct kc tqglqlzkr?” ⁶³ Ayzlu-ngrbz Jiszs natqde kx, “Eu, ninge mrlxde. X sa namcamu ninge, Mrlx Leplz, nzwxbu-krnge me matq esz'ngr mz nrlar Gct kxrtc. X ninge la nayzlu-mopwc' kalr mz nabz dcbz ngr bongavz.” ⁶⁴

⁶³ Zbz Nardr Pris sc tqpesali-zlwzpele nzkq scde, tqrpipebzle mz Kansrl kx, “Trpengr nzrtangr-krgu ncblo kx narpm bagu da kx vz-rbri mrlx lc! ⁶⁴ Murde sa tqxlrpebzmu natq kx pivxi-ngrde Gct. ?Nike aotitpz drtwrmu mz mrlx lc?” Rpibz Kansrl kx vz-rbri x takitxtrpwzle nzbz-krde. ⁶⁵ Zbz kzdu ncblo kcng mz Kansrl sc tzbyatipelr Jiszs. X nzpe-kilvzbzlr mzte lrpz x sc tztpelr mz mqdr, tzrpipebzlr kx, “Mz nzngini-krm

⁵³ ^{14:49} Asaea 53:7-12 ^{† 14:52} Mwx obla kc nide Jon Mak kc tgyrle buk lc. ⁵⁴ ^{14:61} Asaea 53:7 ⁵⁵ ^{14:62} Sam 110:1; Daniel 7:13 ⁵⁶ ^{14:64} Livae 24:16

kc profet, pim ena bagr krkc tqtzle nim.” X Jiszs nzvzmi-kzlr pulis ngr Mangr-nzangiongr x nztz-kzlr. †

Pita Rpile Trkrlzleu Jiszs

Matiu 26:69-75; Luk 22:56-62; Jon 18:15-18, 25-27

⁶⁶ Mzli kc Pita tqmnclz-ngrmle mz nabxbz ngr ma kc, kzdq olvz kxwz mz ma nyz Nardr Pris vzm mrkc tqwxbu-ngrde. ⁶⁷ Kx mcle kc Pita nzmulq-krde nyr, sc tqobqlvzpele, x tqrpipebzle bade kx, “Nim dq kz kx mnctrpz mz Jiszs kc Naszret.”

⁶⁸ A' Pita pokiatxbz, rpibzle kx, “Trkrlzwu da la tqycmnetr-ngrn.” Zbz tulzm x sc tqututrpe mz naonrx, x kio kc tqky'a'pe.

⁶⁹ Kx mc mou olvz kc Pita, sc tqrpipebzle badr leplz kxnztung mrkc kx, “MrIx lc nide dq kz ncblu ne Jiszs.” ⁷⁰ Zbz Pita pokia mou, rpile kx trngiu da zpxwz kc tqpi olvz kc. Zbz mzli trboiu kzdung leplz kx nztung mrkc nzrpi-kzpplr mz Pita kx, “Krlztx-angidrkr kx nim kzdq nidr, murde mz nzycmne-krm ottxpx kx nim lr Gzlili.”

⁷¹ Zbz rpibz Pita kx, “Naesalzbo bamu kx nangi bongavz, da zpxwz lc tqpibo bamu. Trkrlzwu ncblu la tqpimamu bange. Nzmu kx tqpokiabo na-ayrplapx zvz Gct ninge.” ⁷² X mzli kcpwz kio kc tqky'a'pe mz nzwrde krali. X sc tqdcpxpe mz drtwr Pita nzrpi-krbz Jiszs bade kx, “Napibo bam, nzrpi-krm trkrlzwq ninge nzwrde natq, x natq kio krali kc ate.” Zbz Pita sc tqyrrnitxpe, bztitxde nzyrningr.

15

Jiszs Nzvzmibz Mz Paelzt

Matiu 27:1-2, 11-14; Luk 23:1-5; Jon 18:28-38

¹ Mzli kc mz nourla kc topwz, kxnzetu rdr pris, lrtzlvzng, kxnzalvztrng mz Lou sc Mosis, x leplz amrlx mz Kansrl nydr lr Jiu nzycmne-lxblrnx x sc tzryrlqpeng drtwr. Nzpetxbzlr mq Jiszs x sc tzvzmipelr tzaprcpebzlr mz mq Pcntzs Paelzt, lr Rom kc tqaclvele Judiz Provins.

² Paelzt veabz mz Jiszs kx, “?Myx kxmule, nim king r lr Jiu?” Ayzlu-ngrbz Jiszs natqde kx, “Sa tqplzpxpeq kx ninge.” *

³ Kxnzetu rdr pris nzrpbzlr kx Jiszs alele da kqlu kxtrkating. ⁴ Zbz Paelzt sc tqveape-mopwz bade, rpibzle kx, “?Memule trayzlu-ngrpwe'u natqnge? ?Trxlrwq da kcng kqlu tzrpilr kx oti-rbrbzme?”

⁵ A' Jiszs sc tqvz zvz trnzycmne-krdeu. Sc tqkctitxpxpe Paelzt nznabu-krde. *

Paelzt Rlrpx-ngrde Nzbzkr Jiszs

Matiu 27:15-26; Luk 23:13-25; Jon 18:39—19:16

† **14:65** 14:63-64 Ncblo kcng mz Kansrl trnzlxitlru Jiszs nzngini-krde Kxnzmcpx o MrIx Gct. Nardr Pris pesalile lrpzde mz nzvz-nqblq-krde nqmq kr lr Jiu. Kxmule-esz', a' mz Livae 21:10 Gct pipxle kx bzkq pesali Nardr Pris lrpz scde. 14:65 Mz nzpe-kilvz-krbzlr mzte, kxnzetu r lr Jiu nzvz-nqblqlr Asaea 11:3, mz nzrpi-krde kx, “Kxnzmcpx trna-aolvzleu leplz mz nzvz-nqblq-krde da kx mcle mz mzte.” A' nzxtrnga-ngrdr nide, murde trnzlxitlru nide x mz drtwrdr rblxbz bade nzpipx-krde neke tzle nide. * **15:2** 15:1 Lr Jiu, trpnzngr scdr zmatq mz nznibq-krdr leplz, a' doa lr gzpman ngr Rom txpwz kcng tzaclvelr nrlarnrlc nydr kxrngisc zmatq lc. [Jon 18:31] Kxnzrmailz ngr lr Jiu suti drtwrdr Jiszs nabz, a' da kx alele trtakirdeu nznibqng nide mz lou sc lr Rom. Paelzt mnc zvz mz taon Sisaria. A' kzdung mzli vz Jerusalem, myapxbz mzli kcng tqkaputr-ngrm zbz qkxetu scdr lr Jiu, mz nzrpwa'-krbzle badr nzotangr. 15:2 Mz drtwr lr Jiu, natq “King r lr Jiu” nangi drtq kx nalvr-ngrbz mz Kxnzmcpx. Nzrpilr kx Paelzt lxngitile kx Jiszs avzole zmatq ngr King kxetu mrkc Rom mz nzngini-krde kz king. * **15:5** Asaea 53:7

⁶ Mz Nzamyangr amrlx, Paelzt aprpxmle kzdq doa lr Jiu kx mnc mz presin kx nzrlxtitrpz lr Jerusalem. ⁷ Mzli lc kzdq ncblo kxayo drtqde Barabas mnc mz presin. Murde nidr badr kztedeng nznibqlr kcng ncblo ngr vea ne Rom mz nzota-krdr badr mz nzmaszlrpx-krdr nzaclvekr lr Rom nidr. ⁸ Zbz mz Nzamyangr kc, lr Jerusalem nzrlxtitrpzlr mz Paelzt kzdq ncblo mz nzvz-nqblq-krde nqmq krde.

⁹ X rpibzle kx, “?Narlr-ngrbo bamu King rmu, King r lr Jiu?” ¹⁰ Krlc tqkxmu nzycmne-krbz Paelzt lc murde krlzle kx Jiszs nzaprcbz kxnzetu rdr pris bade mz nzdobulvz-krdr nzsuti-zlwzkr drtwr leplz nide. ¹¹ A' kxnzetu rdr pris nzapqtrpzlr drtwr zbo ngr leplz kcng kx narlxti-alzubzlr mz Paelzt Barabas.

¹² Zbz Paelzt vea-mopwz badr kx, “?Nike nawaisr-ngrne ncblo lc tqrpiamu King r lr Jiu?”

¹³ A' sc tznemipebzlr, tzrpibzlr kx, “Natqlvztr mz kros!”

¹⁴ Rpi-mopwz Paelzt kx, “?A' memule? ?Da kxtrka kzniike alele?” A' sc tznemi-katobzlr kx, “Natqlvztr mz kros!”

¹⁵ Paelzt suti drtwrde nzaelalz-krmle drtwr zbo ngr leplz kcng, x sc tqaprxpebzle Barabas badr. A' rpibzle mz ncblo ngr vea nedeng naiklalr Jiszs x natqlvztrlr nide mz kros.

Jiszs Nztqlvztr Mz Kros

Matiu 27:27-44; Luk 23:26-43; Jon 19:2-3, 17-27

¹⁶ Kzdung ncblo ngr vea nzvzmitrpelr Jiszs mz makoa ngr ma kxetu nyz Paelzt, x sc tzkqlepelr ncblo ngr vea kztedrng amrlx. ¹⁷ Nzotilr kc nzkq kxprpol sc king, sc tzakqpe-ngrdr Jiszs. X nzngrlelr kc nqvi nzku ngi kraon scde, nzalaobzlr mz narde. ¹⁸ Sc tzxtrngalvztitrpelr x tzmrgepe-ngrdr nide kx, “Nim la, King r lr Jiu! Nzmnc-krm naboi.” ¹⁹ Nztakrtibzlr narde mz dapunc x nzbyatilr nide. Zbz sc tzrweopebzng zpr bade mz nzapusr-krdr nide king. ²⁰ Mz nibrde sc tzavopxpebzlr nzkq kc prpol x nzavoo-mopwzlr nzkq scde. X sc tzvzmipxpelr mz nzrtqlvztrngr nide mz kros.

²¹ Nzvzng, x sc tzrmctipelr kc ncblo drtqde Saemon. Nide dalr taon kxetu Saerin, mrkc Afrika. X mrlxdeng drtqdr Aleksada x Rufzs. Tqvz-atem x navztrpe Jerusalem. A' ncblo ngr vea kcng sc tzrtulrtrpe-ngrbzlr bade nzglq-krbzle kros ngr Jiszs, murde drtqde mewetx-zlwzpe. ²² Ncblo ngr vea kcng nzvzmilr Jiszs mz kzdq newz drtqde *Gclgata*, drtwr ngrde *Bekrlz*, murde nzobq-krde apule bekrlz. ²³ Nzkabzlr bade kc waen kx ycmi luekxpiz nzrpibz mrr, a' trmnq-pnzleu. [☆] [†]

²⁴ Zbz sc tztqlvztrpelr nide mz kros. X nctq lrpz scdeng nzayrleti ncblo ngr vea kcng daes, mz nzkrlz-krde doa kx narngisc. [☆]

²⁵ Nztqlvztrlr Jiszs mz kros mz nabznepi kc tqrpxwmz mz nourla. ²⁶ X mz nzaelwapxngr da kc tqbzngr Jiszs, nzyr kcng natq x nzatu mrkc tztqlvztr-ngrdr nide mz kros. Rpile kx, “KING R LR JIU.” ²⁷ X nztqlvztr kz mz kros kzbleng ncblo nzling kxnxpnang da taplxsr nrlar Jiszs. ²⁸ Mz nzmu-krde lcde, natq profet Asaea sc tqngidatipe, mz nzrpri-krde kx, “Mz nzaotikr drtwr leplz, ni-kzde ncblo kx xpqbrlr-zvz-ngrde lou.” [☆] ²⁹ Mzli kc tqdoo-ngrm Jiszs mz kros, kzdung leplz kx nzvziml mrlcde nzrpitilzbzng natq

^{☆ 15:23} Sam 69:21 ^{† 15:23} 15:22 Mz natq lr Rom, *Bekrlz nzrpibz Kalvzri*. 15:23 Mrr kala ngrde bla. Nzwnzgr mz lue lr benounc kxlala nzrpibz mrr. Nzaleti mz da kxkqlu x ngi kz tolo x medesin. Mrlc nzylqmi waen, ngi dalr nzaesakingr zvetq. Jiszs trmnq-pnzleu murde mz nzvz-nqblq-krde me pnz drtwr Gct Trte, natwzle zvetq atwrnrngr x naxngitle mz nzxpepx-krde alwx ngr leplz amrlx.

^{☆ 15:24} Sam 22:18 ^{☆ 15:28} Asaea 53:12

kxtrka bade. Nzaycngrlrlzbzlr nardr, nzrpilbzlr kx, "Kx tqrpiq kx matq-
esz'ngrn mz nzawxo-krm Mangr-nzangiongr x wzti-mowq mz zboq kxtqtxu,
³⁰ e vzom mz kros la mz nzarlapx-lzbq-krm!" *

³¹ Mz nzmu-krde lcdepwz, kxnzetu rdr pris x kxnzalvztrng mz Lou sc
Mosis nxztrnga-kz-ngrdr Jiszs mz mzlindr, nzrpilr kx, "Krlzle nzarlapx-
krde kzdu-kzng leplz, a' trkrlzleu nzarlapx-lzbq-krde. ³² Nzmu kxtqngini-
angidrde King Kxnmcpx ngr Israel, navzopem mz kros mzli ka x sc
tqlxngitipeku nide." X ncblo kcng nzling tzdo-kzng mz kros, nzrpiti-kzpzn
natq kxtrka mz Jiszs. ‡

Nzbzkr Jiszs

Matiu 27:45-56; Luk 23:44-49; Jon 19:28-30

³³ Mzli kc tqtavauo-ngrm nepi, nzlo akqlvztx-pnzle nrlc atwrnrngr,
krlzbzle nabznepi kc tqtz. ³⁴ X mzli lcpwz, Jiszs sc tqetumipe natqde, nzrp-
krde kx, "Eloi! Eloi! ?Lama sabaktani?" Drtwr ngrde kx, "Gct! Gct o! ?
Memule tqvzsze-ngrn ninge?" *

³⁵ Kzdung leplz mrkc nzxlr-rbrbzlr natq Jiszs, x sc tzrpipelr kx, "?
Xlrbzmu? Kglepele Profet Elaeja kc bqnc mz nzokatr-krde nide!"

³⁶ Kzdq nidr otile kc kzdq da, petrle mz nounc, leole mz waen kxrkx, x sc
tqglalzpebzle mz nao Jiszs. * Sc tqrpipebzle kx, "Na-aenzliku ena, namcku
nzvz-krm Elaeja mz nzglqo-krmle nide mz kros."

³⁷ Zbz Jiszs netxpx-kato mou x sc tqbzpe. §

³⁸ X mzli lcpwz lotqbr kc tqdo Mrkc Tqtr Mangr-nzangiongr nzpesa-
likiomle wq tatxo mz noude, ncte li. ³⁹ Kzdq kxetu r dzbe ncblo ngr vea ne
Rom kx trtqki-esz' (100) tulzbz mz nou kros. Kx mcle kxmu nzbzkr Jiszs,
sc tqrpipele kx, "Da zpwxtx, ncblo ka nide Mrlx Gct."

⁴⁰ Kzdung olvz nzmnc-kzng mrlcde, sc tztumqng rllu, x nzmclr da kcng
tzwaisrngr Jiszs. Olvz lcdeng seng, Mxri kc Makdala, Salome, x Mxri lxede
Jemes kc tqtopwz x Joses. ⁴¹ Olvz lcng nzvz-nqblqne-zvzlr Jiszs x nzokatrlr
nide mzli kc tqmnc-ngrde Gzlili Provins. Olvz nzkqlu kx nzmncng mrlcde
kx nzvzimlr Gzlili x nzvzdzng badr Jiszs Jerusalem. *

Jiszs Nzyrtzmq

Matiu 27:57-61; Luk 23:50-56; Jon 19:38-42

* **15:30** Sam 22:7; 109:25 † **15:32** 15:28 Ngalrde lc tryclpuu mz kzdung nzryrngr kcng pnz
ngr buk lc. Kxmule-esz' Jiszs trpnzngr alwx ngrde, a' mz nzayrplapxkr Gct lc nide mz nzapu-krde
kx alwx ngrde ycbz, tektrle nigu mz nxzpepx-krde nigu mz alwx ngurgung, mz nzipq-krde nigu.
[2 Korint 5:21] 15:32 Jiszs krlzle nzarlapx-lzbq-krde. A' suti drtwrde nzarlapx-krde leplz mz
alwx ngrdrng, mz nzekqtr-krde nidr mz nzayrplapxkr Gct nide. Dekc trarlapx-lzbq-ngru Jiszs.
Naglqlz-ngru Gct nzrlrpx-lzbq-krde mz nzbz-krde nigu. * **15:34** Sam 22:1; Asaea 59:2 * **15:36**

Sam 69:21 § **15:37** 15:34 Nzetqkr drtq kc tqptilzpele Jiszs mz Mak 15 nzplzpx kai mz Sam
22 x Sam 69. Alwx ngurgung dekng tzrbatrzng nzvzsksr Gct Jiszs. 15:35 Mz natq Erameik *Eloi*
apu-kzpwzle nzrpingr drtq *Elaeja*. Mc kz 2 King 2:11. 15:37 Mz nzbz-ani-krde, Jiszs aelwapx-ngrde
kx trnginideu ncblo txne, a' nide ncblo kxmatq. Murde leplz kx nztqlvztr mz kros lutu-zvzle zboq
kqlu, yangrngatx, drtwrde mrbr x sc tqbzpe. A' Jiszs trwaleu. * **15:41** Kxmule-esz' ncblo neng
Jiszs nzdwaszlr nide, a' ngi txpwz Jon, x olvz lcng tzbrti drtwrdr nide vz-krlztx-zpwxbzle mz kros.
Salome trnzkrz-zpwzu, a' mxw nide olvz r Sebedi, lxe Jemes x Jon. [Matiu 27:56] Kxmule-esz'
mzleng Jiszs drtqdr Jemes, Joses, Jud, x Saemon, [Mak 6:3] a' Mxri kc tqngi lxede Jemes kc tqtopwz
x Joses, opxm kx trngiu lxede Jiszs. Mwx Mxri lc ngi olvz r Alfizs Klopzs. [Luk 6:15; Jon 19:25]
Jemes lc nzrpibz Jemes kc topwz mz nzablepx-ngrbz nide mz Jemes mzle Jon kc tqvz-nqblq-kzle
Jiszs. Mz Luk 8:2 mcku Mxri kc Makdala. Kzdq kz Mxri ngi Mxri, lxede Jiszs, x kzdq Mxri ile Mata,
mzlwedr Lasarus. Mz Aposol 12:12 mcku Mxri, lxe Jon Mak. X mz Rom 16:16 mcku kzdq mou Mxri
kx lxngitile Jiszs mrkc Rom.

42-43 Zbqkranzlvqn ngi zbq ngr nzoliqtikr lr Jiu mz Sabat. Sabat yzutr mzli kc tqtaopengr nepi. Josip kc Arimatio trmwxlru, vzbz mz Paelzt x sc tqrlxtipebzle nrkrdrdq Jiszs mz nzyrtzmq-krdele. Josip lc nide kzdq kxetu mz Kansrl nyzdr lr Jiu. X tqobqtipxle mzli kc Kxnzmcpx ne Gct nanginingrde King r lr Jiu. †

⁴⁴ Paelzt kctipxle nxzlr-krde kx Jiszs bz-anipe. Kqlele kxetu r ncblo ngr vea kc tqaclvele Jiszs, sc tqveatipebzle kx Jiszs bz-zpxwpe. ⁴⁵ Mz nibr nzrlwa-krbz ncblo nede, Paelzt sc tqqlrpe-ngrbzle namz ngr Jiszs mz Josip. ⁴⁶ Zbz Josip xpele kc lrpz kxprki. Kaomle namz ngr Jiszs mz kros, x sc tqbxstipele lrpz kc, mz nzvz-nqbtlq-krde nqmq kr lr Jiu x sc tqqlqtr-anipele mz gq lr kxbz kx nzekqtitr mz butqbr. Mrlz, sc tqalqlitrpebzle kc rplz kxetu kx nzapqbrtr-ngrbzle naonrx ngr butqbr kc. ⁴⁷ Mxri kc Makdala x Mxri lxede Joses nzmclr butqbr kc tqayrbqpx-ngrm Josip namz ngr Jiszs.

16

Jiszs Tulz-mop Mz Nzbzngr

Matiu 28:1-10; Luk 24:1-12; Jon 20:1-10

¹ Mz nibr Sabat mzli kc mz nina, Mxri kc Makdala, Mxri lxede Jemes, x Salome nzvzng sc tzxpepeng da kx na-aelu-ngrdr namz ngr Jisz. *

² Zbz mz nourla kc topwz mz Sade, olvz kcng nztqng sc tzvpeng mz butqbr kc. ³ Mzli kc tzvz-ngrdr mz lrpzki, sc tzpi-etrpelr kx, “?Neke naokatrle nigu mz nzalqlipxngr rplz kc? Murde etu zlwz x mrlepu.”

⁴ A' kx nzkrlzbzlr butqbr kc, nzmcpelr rplz kc nzalqlipxpe.
⁵ Nzdwatrpzng mz butqbr kc nzpwurklyc ngrdr kzdg apirl kx apule

⁵ Nzdwatrpzng mz butqbr kc, nzpwrklvc-ngrdr kzdq enjrl kx apulle obla, x kq lrpz kxprki wxbu mz nrlarde kxrtc ngr gq kc.

⁶ A tpbzle kx, “Bzkq mwixlamu. Ktizpebo kx rtangrlamu Jiszs kc Naszret tztqlvztr mz kros. Mc-zpxwexamu mrkc tzayrbq-ngrdr namz ngrde. Tryrbqpeu mrka, murde tulzpe mou. ⁷ A’ yzluamu x pibzmu mz ncblo nedeng badr Pita kx, ‘Jiszs sa tqrtwayzpe kai Gzlili, x navz-kzpzmu mz nzrmcti-lzbq-krmu badr elr, da kc tqwai nzpi-pnz-krbzlele bamu.’” ⁸

⁸ Olvz kcng nzvzpxmqng mz butqbr kc, nzrnrcti-lzbqng mz zmwxlr x sc tzngrlrpeng. Mzli lcde trpnzngr doa kx nzpine badr le, nike nzmctr mz butqbr kc. †

Kzdq Me Yrkrkipx Nrpakxmrlz Lc ‡

† **15:42-43** Zbq ngr nzoliqngr Zbqkranzlvqn amrlx x Sabat ngi Satqde amrlx. Mz nqmq kr lr Jiu zbzq yzutr mzli kc tqtaongr nepi mz nabznepi kc tqesz'mz. X nzyrlqlr kzdung kz zbzq kxtr nzrpi-kzp Sabat. Mc kz Lou Kcpwz 21:22-23 x Jon 19:31, 38. * **15:46** Asaea 59:9, 12; Jon 19:39-42 * **16:1** Mz nzvz-nqbqlq-karde Lou scdr lr Jiu trpnzngr doa kx naxpe da x narglqe da mz Sabat. Sade yzutr mz milzpq ngr Sabat mz nabznepi kc tqesz'mz. Olvz kcng nztqng nzxpeng da lc mzli lcde. Mz nzbzkr Jiszs kc, trpnzngr nidr kx aoti drtwrde kx sa nalu mou, da kc tqwai nzpi-pnz-krbzle. Mc Mak 8:31, 9:31, 10:34 x 14:28. * **16:7** Mak 14:28 † **16:8** 16:7 Mwx Enjrl lc tqpibzle drtq Pita lc, murde nabzde talvzo-ngrde nzpokia-karde kx trklrzleu Jiszs. X mz nxzlr-karde drtqde apqtrpzle drtwrde, x krlrzle kx Jiszs sc tqmrlztibe drtwrde nide. 16:8 Nrpakxmrlz kx yr Mak yrkrpx mz ngalrde kc rtqmz mz nzryrngr li kx nzyr pnz kai. A' kzdung kz nzryrngr kx nzyrlqtrpzlr ngalrde 8b mz nzrpi-karde kx, 8b "Zbz olvz kcng nzyapwxtibzlr kxipznepwz mz Pita badr kztedeng da kcng tqpibz obla kc. X mz nibrde Jiszs sc tqatwzlrpxpe-ngrde ncbllo nedeng mz nzle-krbzlr Nrpa lc tqtr x tqyctx alo mz leplz. Krle nrpa ngr nzarlapxkr Gct leplz mz nzayrplapx-alongr mz alwx ngrdrng. Delape." ‡ **16:8** Nzryrngr kxkqlu nzycng mz ngalrdr 9-20. X mz drtwr kxnnzetung mz makxtr takitrde nzaolvzngr ngalrdr lcng mz nzngini-krdr natq Gct, kxmule-esz' mz drtwr kzdung leplz tryru Mak.

*Jiszs Adcpx-lzbqbz Mz Mxri Kc Makdala
Matiu 28:9-10; Jon 20:11-18*

⁹ Mz nibr nzulz-krm Jiszs mz nourla mz Sade, adcpx-lzbqbz mz Mxri kc Makdala, kc tqmaszlrpx-ngrbz Jiszs bade drka' rlimz. ¹⁰ Vz x sc tqpipebzle mz ncblo nedeng kcng drtwrdr tzvzbeng x tzyrning. ¹¹ Kx nxlrbzlr nzrpi-krbzle kx Jiszs lupe mou x mcle nide, trnzlxnge tipwzlu natqde. §

*Jiszs Adcpx-lzbqbz Mz Leplz Nedeng Nzling
Luk 24:13-35*

¹² Mz nibrde, mz zbo kcpwz, Jiszs adcpx-lzbq-kzpz mz leplz nedeng nzling kx nzrkalzmqng Jerusalem. Mzli kc tqadcpx-lzbq-ngrbz Jiszs badr, nzobq-krde blepxngr x trnzglxlu nide mzli kc kai. ¹³ A' kx nzglxlr kc nide, sc tzylupe-moung Jerusalem, x tzrlwape-ngrbzlr mz kztedrng amrlx, a' trnzlxnge kzlru natqdr.

*Jiszs Adcpx-lzbqbz Mz Ncblo Nedeng
Matiu 28:16-20; Luk 24:36-49; Jon 20:19-23; Aposol 1:2-3, 6-8*

¹⁴ Mz nibrde Jiszs adcpx-lzbq-kzpz mz ncblo kcng nzpnu-esz'-nrade-esz' (11) mz nzmu-krdr. X ycmnetxbz badr, murde trnzbr-kru drtwrdr, x nzmqngikr nardr, x trnzlxnge krdru leplz kcng tzmclr nide mz nibr nzulz-krmle mz nzbz-krde.

¹⁵ Zbz sc tqpipebz Jiszs badr kx, "Vzpxamu mz nrlc tulvzo x lebzu Nrpakxmrlz mz leplz amrlx. ¹⁶ X krkcng nzrlxngiting x nzwrkxtrng sa na-arlapx Gct nidr. A' krkcng trnzrlxngiting trtxpnzngz nzrlapx-krdr.

¹⁷ Kxnzlxnge tilr ninge sa nartwzng zmatq mz nzale-krdr rkx lcde seng: mz drtqnge sa narmaszlrpx-ngrng drka', x naycmneng mz natq lr mrkzbleng mz zmatq ngr Mqngkrkxtr. ¹⁸ X kxmule-esz' nzrmaleng ningidoe kxrmakk x nzrmnqng lue kxrlq, a' trtxpnzngz nznibq-krdr nidr. X mzli kc tzmaletr-ngrbzlr drtq kxnzyagoxng, zyagox ngrdr nayrkpxbz x namrlz-moung." *

*Jiszs Yzluz Mou Heven
Luk 24:50-53; Aposol 1:9-11*

¹⁹ Mz nibr nzycmne-krbz Kxetu Jiszs badr, sc tqavvdzpe Gct Heven. X wxbutxom me matq mz nrlar Gct kxrtc. ²⁰ Zbz ncblo nedeng sc tzvzpxpeng mz nrlc tulvzo mz nzrlxngiting Nrpakxmrlz. X Jiszs okatr-zvzle nidr mz nzale-krdr da kxnzkctipxng mz nzaelwapxngz kx nzalvztr-krdr da zpxw. Eu. Delape.

* **16:9** Luk 8:2 § **16:11** Rblx nzrlxngitingr nide murde lr Jiu mz nzaotikr drtwrdr nzycmne olvz ngi da kxmane. X mz drtwrdr leplz nzlu-moungz mz nzbzngz nzwrde naesz', mz Mzli Kxmatq kc na-ayzlu-ngrbz Gct da mz leplz. * **16:18** Jiszs tr-rkapwzu natq ngr nzrmaleng-krdr ningidoe kxrmakk x nzrmnqng lue kxrlq. A' ycmnetr-ngrde nzatrkatingr kxnzlxnge mz nzrtulrtr-ngrbz badr da kxtrka kx na-alelr, nangqdr o namnqlr. X ycmnetr kz mzli kx trnzkrzlrda kx nzalelr. Mc Aposol 28:3-6. Mwx ningidoe drtwr ngrde Setzn. Mc kz Sam 91:13. * **16:19** Sam 110:1; Mak 12:36

Nrpakxmrlz Kx Yr Luk Natq Ngr Nzaplxtqng Mz Nrpakxmrlz Kx Yr Luk

Luk kc tqyrle Nrpakxmrlz lc, yr-kzle Da Kcng Tzaletilr Aposol. Nide kzte Pol kc tqycmnetr-ngrde nide mz nzrpi-krde kx, ‘Dckta Luk kc tqmrlzti-zlwzkr.’ ¹ Mz kzdung nzvzpxkr Pol nzvzng badr. ² X mz nzwrdde kc kai Pol tqmncpx-ngrmle mz presin nzmnccng badr, ³ x mz nzwrdde krali kz. ⁴ Luk nzsiklu-krde mrlz x trngiulrJiu. ⁵ Leplz nzrpilr kx mwx nide ncblo ngr Adiok mrkc Siriz, kx tryrlzu, x kx bz mzli kc tqngipe-ngrde lrtzlvz.

Mwx Luk yrle buk lc mrkc Rom, mz mzli yiz 59—63 AD mz nibr nzrmcngr mz Jiszs, x Da Kcng Tzaletilr Aposol kc ate. Opx-angidr kx yrbzle mz kxtrngiulrJiu, murde yokaetipxle nqmq kr lr Jiu kxkqlu x yrlqle drtq ncblo mz natq lr Grik a' trngiu natq lr Jiu. Yrbzle mz kzdq ncblo, drtqde Teofilzs, kc tqngi bcnyr, x mwx okatrle Luk mz trau, murde nayrle buk lc.

Luk yrle buk lc mz nzaopx-krde da kcng amrlx tqprtz mz nzwzkr Jiszs krlzbzle mzli kc tqvzdzpe-mou-ngrde Heven. Murde leplz kxtrngiulrJiu nakrlzlr kx suti drtwr Gct nzvz-nqblq-kz-krdr Jiszs. Buk lc myapxbz murde kzdq ncte be ngrdeng trnzycpxpqngqu mz Nrpakxmrlz kcng tq. Drtwr kx myapxbz mz buk lc ngi nzvz-krm Jiszs mz nrlc mz nzrtangrti-krde x nzarlapx-krde doa kxnzmrbnrg. ⁶ Luk aelwapx-ngrmle bagu nzamatqkr Jiszs olvz x nzmlzti-krde doa amrlx, kxmule-esz' kx trpnzngr scdr da, kxtrngiulrJiu, krkeng nzobqszong, krkeng nzaleng alwx, x krkeng nzdwatibz lepz kcng trnzmncung badr leplz kxnzmrlzng.

Nrpakxmrlz kcng pwx nzbletipx-lxblrng mz kxmu nzaelwapx-krmlr Jiszs bagu. Murde Matiu okatrle nigu nzkrlz-krgu kx Jiszs nide Mevalu x King. Mz buk sc Mak, Jiszs nide Kxnzawz ne Gct kc tqwztrpz mz leplz. X mz buk sc Jon nide Mrlx Gct. Mz buk sc Luk, ycmnetr-ngrde Jiszs nzngini-krde Mrlx Leplz, mz da kx xngitrle mz nabzde, kxmu nzkrka'-krde, x nzmncc-xgle-krde Gct Trtede. Nzryrkr Matiu melrmqng Jiszs, aelwapx-ngrde kx Jiszs vzpxm mz nqvi lr king r Israel. A' nqvi lr leplz kc tqyr Luk ngi nqvi lr ncblo kx vzkipxm Mxri mz Devet, vz-krlzbzle Adzm. Krkeng aelwapx-ngrmle bagu nznginikr Jiszs leplz angidr, kxmule-esz' ni-kzde Gct.

¹⁻² Ninge Luk, ryrbo bam kx Kxetu Teofilzs. Krkeng aelwapx-krmlr Jiszs bagu. Murde Matiu okatrle nigu nzkrlz-krgu kx Jiszs nide Mevalu x King. Mz buk sc Mak, Jiszs nide Kxnzawz ne Gct kc tqwztrpz mz leplz. X mz buk sc Jon nide Mrlx Gct. Mz buk sc Luk, ycmnetr-ngrde Jiszs nzngini-krde Mrlx Leplz, mz da kx xngitrle mz nabzde, kxmu nzkrka'-krde, x nzmncc-xgle-krde Gct Trtede. Nzryrkr Matiu melrmqng Jiszs, aelwapx-ngrde kx Jiszs vzpxm mz nqvi lr king r Israel. A' nqvi lr leplz kc tqyr Luk ngi nqvi lr ncblo kx vzkipxm Mxri mz Devet, vz-krlzbzle Adzm. Krkeng aelwapx-ngrmle bagu nznginikr Jiszs leplz angidr, kxmule-esz' ni-kzde Gct.

³ Mz nqmq kcpwz, aoti drtwrnge kx mrlz nzryr-krbo, mz nzaopx-krbo bam da lcng amrlx. Murde veati-angidrpex da amrlx, abzo mz nzayuzuokr nzryapwxngr, vz-krlzbzle me yrkrkipxle. X krlzx nzryr-angidrngr. ⁴ Yrbo bam da lcng murde nakrlzq da amrlx kx ngida, mz da kcng tzalvztrpz bam.

Nzrmcngr Mz Jon Kxawrkxtr Nzpipx Kai

¹ : Kolosia 4:14 ² : Aposol 16; 20—21; 27—28 ³ : Kolosia 4:14 ⁴ : 2 Timoti 4:11 ⁵ : Kolosia 4:10-14 ⁶ : dckrlzde 15; 19:10

⁵ Mzli kc ena Herot Kc Tqmyalz tqngini-ngrde king r Provins kc Judiz, mnc kz kc pris drtqde Sxkaraezs, prtr mz dzbe pris kc tzrpibz Abaeja. Olvz rde drtqde Elszbet. Elszbet ni-kzde neidu lr Eron. *

⁶ Nqmq krdr tubq-esz'ngrbz mz nzobqkr Yawe, murde nzvz-nqblq-angidrlr Loukxtr scde. X nzvz-nqblq-angidr-kzlr natqde. ⁷ A' Sxkaraezs nidr mz Elszbet trpnzngr nedr doa, murde Elszbet tr-rngineu, vz-nrbalq. X nide blangpe x Sxkaraezs ngipe kz olman.

⁸⁻⁹ Zbz sc tqkrlzbzle mzli kx dzbede ne Sxkaraezs nawz-ngrdr mz Mangr-nzangiongr Yawe mrkc Jerusalem. Kzdq zbg, mz nzvz-nqblq-krde nqmq krdr pris, Sxkaraezs kc tzmcpxpe kx nanginide pris kc na-angcom bqlr nc ninz mz olta mzbq lcde. Sc tqdwatrpe Mrkc Tqtr mz Mangr-nzangiongr mz nzale-krde da lc. Mzli kcpwz tqale-ngrde nzwz-krde, ¹⁰ zbo ngr lr Jiu kcng sc tzyrlwrtrpzng yz tzkrka'ng, mz nabznepi kc tzangc-ngrp wz bqlr nc ninz.

¹¹ Kzdq enjrl ne Yawe adcpx-lzbqbz mz Sxkaraezs. Enjrl kc tukibzle me nzamatqngr mz nrlar olta kxrtc, mrkc tqngcngr bqlr nc ninz. ¹² Kx mctx Sxkaraezs enjrl lc, drtwrde alititx-pnkle, x sc tqmwxlrtxpe. ¹³ A' rpibz enjrl kc kx, “Bzkq mwxlrq, kx Sxkaraezs! Nzkrka'-krm xlrpe Gct. †

X olvz rm la namikabzle dq doa ncblo. Yrlqbz drtqde nangi Jon. ¹⁴ Mzli kc mzte namc-ngrde, na-abrtzlvztxn x leplz kxkqlu na-abrtzlvztx-kzlr nide!

¹⁵ Nanginide ncblo kx myatxlzpebz mz nzobqkr Yawe. Bzkq rmnq pnz waen x lue kx xplr, mz nzwztr-krbzle bade. ¹⁶ Mzli kc naetuengrde, nzryapwx-krde na-ayzlu-mople doa lr Israel kxkqlu, mz Yawe, Gct ngrdr. ¹⁷ Jon nartwayz-kaipz mz Kxetu. Natwzle zmatq kcpwz tqtwz profet Elaeja, mz nzale-krde nzwzng kcpwz. Murde *na-amnctr-lxblr-moule trte badr doa nedrng*. ¹⁸ Na-ayzlu-moplen grkcng trnzlxngitilru Gct mz drtwr kxtubq. Naokatrle leplz neng Gct mz nzoliqtingr nabzdr mz nzvz-krm Kxnzmcpx.” *

¹⁸ Rpibz Sxkaraezs mz enjrl kc kx, “Trlxngitiwxu natqm murde nipenge olman, x olvz rnge ngipe kz blang.” ¹⁹ Rpibz enjrl kc kx, “Ninge Gebrel. Mnctrpo mz Gct. X atwzlr-ngrmle ninge mz nzycmne-krbo bam. Rpimle napibo nrpa kxmrlz lc bam. ²⁰ A' trlxngitiwq natqnge, mz nznrginengr doa ncblo. Mz nzmu-krde lc, trpengr nzycmne-krm, x nznabu-krm navz nakrlzbzle mzli kc tqyrlq Gct na-angidati-ngrde da lc.”

²¹ Leplz kcng tzkrka'ng sc tzaenzlitrpzlr Sxkaraezs. Sc tzveatipe drtwrdr, nike mzli tqboipengr Sxkaraezs nzmcpx-krmle mz Mangr-nzangiongr. ²² Kx vzpxpemle, nabutxpengr. Sc tzkrlzpeler kx obq-rmwiblepe mz Mangr-nzangiongr. Sxkaraezs trpengr natq kx adcpixe. A' ycmnetxpepwz mz mqde. ²³ X mzli nyzde mz nzvz-krde Mangr-nzangiongr kx yrkrpxpebzle, sc tqrkalzpe Jerusalem x vzkipele mrnyzde, mz kzdq taon ngr Judiz Provins.

²⁴ Mz nibrde, olvz r Sxkaraezs, Elszbet, sc tqyrpe. A' temz nzlvqn trdwaxpx-pnzu yz. ²⁵ Zbz sc tqrpipele kx, “Esae ninge! Yawe okatrpele

* ^{1:5} Dzbe pris lc nzyrlqbz drtqde Abaeja, murde Abaeja nide ncblo kx rmailz kai dzbede lc. Dzbe pris nzpnu-li-nrade-pwx (24). Mzli nyzdr ycbz nzvz-krdr mz Mangr-nzangiongr Yawe. Dzbede kxes' scdr wiki esz'. Mc 1 Be Ngrdr 24:7-19. Mc kz Eron x Livae mz Nzalvztr-ngrng Kxmyapxbz.

† ^{1:13} 1:10 Pris kxes' nzangc-krde bqlr nc ninz nzwre esz'txu mz nzlu-krde. Mz drtwr lr Jiu, Gct mcpx-angidrl pris mz nzale-krde da lc. X kabzle bade nzamatqngr kxmyalz. ^{1:13} Sxkaraezs krka'-ngrde kx Kxnzmcpx navzm. ^{1:15} Nzqqlu-krdr 6:1-4 ^{1:17} Malakai 4:5-6 ^{1:17} Luk 1:76

ninge mzli ka, murde ngi-batrudemle nzyr-krnge. Katxpxpebzle zmya ngr drtqngel!” ‡

Nzrmcngr Mz Jiszs Nzpipx Kai

²⁶ Mzli kc temz ngr Elszbet tqesz'mzpe-ngrde mz nzyr-krde, Gct kc tqatwzlrpe-ngrbzle enjrl Gebrel mz mztea Naszret mrkc Gzlili Provins. ²⁷ Twzbzle kc natq mz kzdq olvi kxmnc-kamelr drtqde Mxri. Olvi lc, nayrlzng mz kzdq kc ncblo drtqde Josip. Josip lc vzpxm mz neidu lr King Devet. ²⁸ Enjrl kc vzm bade, sc tqrpipebzle bade kx, “Nim la, Mxri! Yawe mncbz bam x mcpxpele nim mz nzamrlz-krde nim!”

²⁹ Mxri trmncc-nrwx-pnz-ngru mz nabzde mz natq enjrl kc, murde tryrplatitru narde da kcng tqipibzleng. X dekci drtwrde tqvea-zvz-ngrde kx nike drtwr ngrde. ³⁰ Rpibz enjrl kc bade kx, “Mxri, bzkq mwxlrq. Murde Gct abrtzlvzle nim. ³¹ X nim la nayrq. X mrlxm la mzte namc, yrlqbz lc drtqde nangi Jiszs. ³² Nide namyalz, murde nide Mrlx Gct kc tqmyalzesz'ngr. Gct Yawe nayrlqle nide nzngini-krde king mz nqvi lr melrmqde King Devet. ³³ Nangini-alode king r lr Israel. X zmatq ngrde trpnzngr nzyrkrpx-krbzle!” *

³⁴ Rpibz Mxri mz enjrl kc, kx, “Tryrlzwu x ninge olvi kxmnc-kamelr. ?Nzmu-krde ke, myx kxnamule?” ³⁵ Rpibz enjrl kc kx, “Mqngrkxtr sa navzom bam. X zmatq ngr Gct kc tqmyalz-esz'ngr naprtrpz bam x naayrle nim. Mz drtwr lc itoto nanginide Mrlx Gct, doa kxtr. ³⁶ Napibo bam kx kxngnim Elszbet yrpe mzli ka. Kxmule-esz' blangpengr x nzrpibz vz-nrbalq murde trpnzngr nede doa, a' mzli ka temz ngrde esz'mzpe. ³⁷ Da lcng tqpibo nangida murde trpnzngr da kx rblxbz mz Gct.” ³⁸ Sc tqrpipe Mxri kx, “Nipenge kxanzawz ne Gct. Mrla tqpikimele, nangidapem ye bange.” X sc tqrlaszpe enjrl kc.

Mxri Oklatile Elszbet

³⁹ Mz nibrde Mxri oliqtx, sc tqngrlrx-anipe mz mztea nyz Elszbet, mrlcde kc newz ngrde tqkqlu, mrkc Judiz Provins. ⁴⁰ Mzli kc tqkrlz-ngrbzle mrkc, dwaterpz mz ma nyzde. Sc tqycmnepebz mz Elszbet, olvz r Sxkaraezs. ⁴¹ Kx xlrbz Elszbet nzycmnekr Mxri, itoto kc tqmncpxm mz nelzde, sc tqblcpe. X mzli kcpwz Mqngrkxtr prsrle Elszbet kcma. ⁴² Sc tqngi-batrpebzle, nzetumipe-krbz natqde, nzrpi-krbzle mz Mxri kx, “Gct amrlzle nim myaszpxle olvz kang kqlu. X amrlz-kzle doa kc namikaq! ⁴³ Kxmule-esz' ninge olvz kxnxobqszo, a' nim, lxe Kxetu Lod rnge, oklatime ninge. A' nzpnzkr drtwrnge le trnakxmuleu ka! ⁴⁴ Murde mzli kc tqxlrxtngrpw' natqm, itoto kc tqmncpxm mz nelzng, blcmix-pnzle nzabrtzng. ⁴⁵ Amrltxpe Yawe nim, murde nzlxngiti-krm da kx pi-ngrde nim.”

Nabz Ne Mxri §

⁴⁶ Rpi Mxri kx,

“Bilz-zvzx Yawe mz nabzng. ⁴⁷ X drtwrnge elalzm mz Gct, mz nzarlapx-krde ninge. ⁴⁸ Murde yc mz drtwrde ninge kxnxobqszo. X abzo mzli ka leplz narpimler kx ninge olvz kxnxamrlz, tqvzpe tqvzpe.

‡ ^{1:24} Trsutiu drtwrde leplz nzypalelvz-krdr nide mz nzrpi-krde kx nide la tgyr, murde ngipede blang. A' mz nibr temz kx nzlvqn, nzmu sc tqopx-angidre. ^{1:25} Zmya ngr drtqde ycbz murde olvz kx vz-nrbalq, nzrpilr rngisc alwx x kx Gct ayrplaxle nide mz trnzrngine-ngru. ^{1:27}

Matiu 1:1-25 ^{1:31} Matiu 1:21 ^{1:33} 2 Samwel 7:12-13, 16; Asaea 9:7 ^{§ 1:45} Mc kz Nabz Ne Hana, 1 Samwel 2:1-10. ^{1:46} Sam 34:2 ^{1:47} Sam 35:9

⁴⁹ Murde Gct kc tqrninr, alepemle bange da kx myapxbzng. Drtqde tr-esz'ngr. ⁵⁰ Aodu-zvzle krkcng tzamrluelr nide. ⁵¹ Murde aovxiole enqmi rdeng mz nzetukr zmatq ngrde. ⁵² Apoopemle king kxnzmatqng. X avzdzbzle kx nzavzo-lzbqng. ⁵³ Rkabz dakxnzng kxmrlzting mz kxnzbrtaleng. A' krkcng tzesablqltilr nide, avzpx-nrbalqleng. ⁵⁴⁻⁵⁵ Gct angidapele da kx esalz-ngrbzle mz melrmqgung, Ebraam, x nigu neidu lrdeng. Murde yc zvz mz drtwrde nigu lr Israel, x atwzlr-ngrmle bagu Mevalu Kxnzmcpx." ⁵⁶

⁵⁶ Zbz Mxri nzmnctilr badr Elszbet temz tq, krlzbzle mzli kx Elszbet rmika-ngrde. X mz nibrde sc tqyzlupe mou mrnyzde Naszret.

Nzrmcngr Mz Jon Kxawrkxtr

⁵⁷ Zbz kx krlzpebzle kc mzli nyz Elszbet nzrmc-krde mz doa, mz mrlxde kc tzmcpe. ⁵⁸ Lr mrnyzdeng x kxnginideng, nxzlxpeler kx Yawe amrlzpele nide mz nzrmika-krde, sc tzabrtz-lxblrpeng badr. ⁵⁹ Mzli kc itoto kc zbz rde tqrtqmzpe-ngrde, sc tzvzpemqng mz nzrpakrngr nide, mz nzaelwapx-krde kx nide doa ne Gct. Krlc nzvz-nqblq-krde Lou sc Mosis. ⁶⁰ Nzrpilr nayrlqpebzlr drtqde nangi Sxkaraezs, drtq trtede. ⁶¹ A' rpibz lxede kx, "Trtingr. Drtqde nangi Jon."

⁶¹ Nzrpibzlr bade kx, "A' trpnzngr kxnginimu kx ngi drtqde Jon!" ⁶² Zbz sc tzycmnepebzng mz Sxkaraezs mz mqdr. Tzveatibzlr drtq kx nangi drtq doa nede. ⁶³ Sxkaraezs kc tqycmnepebz mz mqde, tqrlxpebz da kx naryrongr. X yrole kx, "Drtqde Jon." X leplz amrlx nzkctitpxlr. ⁶⁴ Mzli lcpwz, Sxkaraezs kc tqycmnepe mou, tqglqpxpele Gct. ⁶⁵ Lr mrnyzdeng amrlx prsrpeng nzmwxlrngr. Zbz nrpa ngr da lcng sc tqvzpe, talvzpxpele lr nrlar Judiz kc newz ngrde tqkqlu. ⁶⁶ Leplz kcng tzxlrng, sc tzaotipe drtwrdr x tzveapeng kx, "?Doa ka topwz nanginide lc elx nike?" Otxpx kx zmatq ngr Yawe ycbz bade.

Natq Gct Kxyc-kapq Kxplzpx Sxkaraezs

⁶⁷ Zbz Mqngrkxtr prsrle trtede, sc tqplzpxpele natq Gct kxyc-kapq, kx ycmnetr-ngrde Kxnzmcpx. ⁶⁸ Rpibzle kx,

"Naglqpxku Yawe, Gct rgu, nigu lr Israel! Murde vzpem mz nzxpepx-krbzle nigu mz enqmi rgu. ⁶⁹ X atwzlrpe-ngrmle bagu Mevalu kxmatq kx vzpxm mz nqvi lr King Devet, ncblo nede. ⁷⁰ Gct esalz-ngrde mz natq profet nedeng kcng bqnc, ⁷¹ kx na-arlapxbzle nigu mz mq leplz kcng tztrkalr-ngrdr nigu. ⁷² X aelwapx-ngrmle nzyckr drtwrde melrmqgung, mz nzatutr-krde Nzesz'tikr Drtwrdr badr, ⁷³ kc tqesalz-kai-ngrbzle mz melrmqgu Ebraam. ⁷⁴⁻⁷⁵ Rpibzle kx sa na-arlapxbzle nigu mz mq enqmi rgung, murde ma tqmwxlrtiku nidr. A' nawztrpzku bade mz nzmnccngr kxtubq x kxtr, mz zbz kang kqlu."

⁷⁶ Zbz Sxkaraezs kc tqycmnetrpe-ngrde mrlxde Jon. Rpile kx,

"Nim, kx mrlxnge, nanginim profet ne Gct kc tqmyalz-esz'ngr. Murde sa naokatrq leplz nedeng mz nzoliqtingr nabzdr mz nzvz-krmle. ⁷⁷

Napibzme badr kx naplpxbzlr alwx ngrdrng mz Gct, murde naipqle x na-arlapxle nidr. ⁷⁸ X mou, mz nzvz-nqblq-krde nzryc-zlwzkr drtwr Gct, sa na-atwzlr-ngrmle Kxnzmcpx bagu. X na-apule zyzlr. ⁷⁹ Murde alwx ngr leplz kxnzmnc-mrbrng akamrbr-ngrde da mz nabzdr. Kxmule-esz',

⁴⁹ 1:50 Sam 103:17 ⁵¹ 1:51 Sam 98:1 ⁵² 1:51 Sam 68:1 ⁵³ 1:52 Sam 136:18; Job 5:11; 12:19

⁵⁰ 1:53 Sam 107:9; 68:6 ⁵⁴⁻⁵⁵ 1:54-55 Nou 17:7; Sam 89:19-29; 132:10-12, 17-18 ⁵⁹ 1:59 Livae 12:3

⁵⁶ 1:69 Sam 89:17; 132:17 ⁷¹ 1:71 Sam 106:10 ⁷² 1:72 Sam 105:8-10 ⁷³ Nou 22:16-17

⁷⁶ 1:76 Asaea 40:3; Malakai 3:1; Luk 1:17

a' sa namclr ncblo kc na-apule zyzlr, kc tqpnamilxtile nabzdr, murde na-aopxbzle badr lrpzki kx navzkilr mz nzrlapx-krdr." [✳]

⁸⁰ Zbz doa kc yrlvzlzm x vz-nqblqle Gct mz nabzde atwrnrngr. X mzli kc tqetupe-ngrde, sc tqmncnepe lzke, vz-krlzbzle mzli kc tqaewapxpe-ngrbz Gct le mz lr Israel mz nzngini-krde profet.

2

Nzrmcngr Mz Jiszs Matiu 1:18-25

¹ Mzli kc Herot Kc Tqmyalz tqngini-ngrde king r Judiz Provins, King kxetu ngr lr Rom kc tqmnc kz, drtqde Agzstzs. X Herot mnclbz bade. King Agzstzs atwzlrpx-ngrde natqde kx leplz amrlx kcng tqaclvele, drtqdr nayro mz nxzpe-lxblr-krdr takes. ² Krlc nzryrongr drtq kx ayrnrngr kx krlzbzle lr Jiu mz natq kx kapx King r Rom. Mzli lcde kzdq ncblo drtqde Kwaerinizs aclvele Provins kc etu Siriz. X Herot kc tqaclvele lr Jiu mnclz-kzpz bade.

³ Zbz lr Jiu amrlx sc tzyrkrpe-kzng. Ncblo esz' kc vzkipele mz taon nyz melrmqde, mz nzryrongr drtqde.

⁴ Zbz Josip mz Mxri kc tzrkalz pemqng mztea Naszret mrkc Gzlili Provins, x sc tzvzpeng mztea Betleem mrkc Judiz Provins. Krlc mztea nyz King Devet mzli kc bqnc. Josip vzkile Betleem murde vzpxm mz neidu lr Devet.

⁵ Josip nzvzng ncdr Mxri kc tqyr, murde nzpipe kx nayrlzng ncdr x drtqdr nayc lxblr mz nzryrongr. ⁶ Mzli kc tzmnc-ngrdr Betleem, sc tqkrlzpebzle mzli kx Mxri narmc-ngrde mz doa kxtopwz. ⁷ Nzmwipxmqng mz ma nyz kzu, murde trpnzngr ma kx namnc-ngrdr. Mikatxde mrlxde kx ayrnrngr, x otibzle bulvztile lrpz. Sc tqayrbqlz pemle mz da kx nzmutio kzu.

Kzdung Enjrl Nzadcpx-lzbqbzng Mz Kxnzaclveng Sip Nedrng

⁸ Mz nrlckxbq lcde kzdung ncblo nzaclvelr sip nedrng mz nardzng, me esotrpz Betleem. ⁹ Kzdq enjrl ne Yawe adcpx-lzbqbz badr, zbz zyzlr kxetu kxluli rpnaobz badr, o-ngaletxde nidr. Ncblo kcng nzmwxlrssbzqtx-pnzng.

¹⁰ A' rpibz enjrl kc badr kx, "Bzkq mwxlramu. Murde rtwzmc bamu nrpa kxmrlz. Nrpa lc narkabz nzabrtzngr kxetu mz leplz amrlx. ¹¹ Mz nrlckxbq ka, mrkc mz taon nyz Devet, Mevalu nzmika, Kxnzmcpx kc tqngi Kxetu Lod! ¹² Kxnamu nzglx-krmu doa lc nide sele. Namcamu dq itoto nzbulvzti lrpz, x yrbqlzm mz da kx nzmutio kzu."

¹³ Nzpwrkilvc-ngrdr dzbe enjrl kxetu kx ngi ami kx vzom Heven, nzadcpx-lzbqpe-kzpzng. X enjrl lcng amrlx nzangrlvzlr Gct. ¹⁴ Nzrpilr kx, "Takitrde nzamatqngr Gct kc tqmnc Heven kc tqyctxlz. X mz nrlc, nzmnc-zpxnegr sa naycbz mz leplz kcng tqabrtzlvzleng!" ¹⁵ Zbz Enjrl kcng sc tzrlaszpelr nidr, tzyzlulzpe-moung Heven. Zbz ncblo kcng sc tzrpi-etrpelr kx, "Navzpeku ena Betleem mz nzmc-krgu da kc tqprtz, tqpipem Yawe bagu, mz natqde kc tqtwzm enjrl bagu."

¹⁶ Zbz sc tzngrlrpeng Betleem, tzmcpelr Mxri, Josip, x itoto kc nzayrbqlz-krmle mz da kx mutio kzu, da kc tqwai nzpi-krbz enjrl le. ¹⁷ Kx nzmcpelr itoto kc, sc tzpipebzlr mz Josip x Mxri nike enjrl kc pi-ngrde itoto kc.

¹⁸ X leplz kcng amrlx tzxlrlr nrpa lc tzkctitpxl da lcng. ¹⁹ X Mxri yrlq-amqngile da lcng mz nabzde, sc tqaoti-zvzpe drtwrde. ²⁰ Zbz ncblo kcng sc tzyzlupe-mopwzng mz sip nedrng, tzangrlvzlr Gct mz da kc tzxlrlr x tzmcpelr, da kc tqwai nzpi-krbz enjrl kc le badr.

Nzyrlqbzlr Drtq Jiszs

²¹ Mzli kc itoto kc zbz rde tqrtqmzpe-ngrde, sc tqkrlzpebzle mzli kx napakrpe-ngrde mz nzvz-nqblq-krde Lou sc Mosis. Murde nzrpakrngr ngi rrx kx nide doa ne Gct. X sc tzyrlqpebzlr drtqde Jiszs. Drtq lc pi-pnzbz enjrl kc mz Mxri mzli kc itoto trabzoka-ngrde mz nelzde. *

Simion X Ana Mz Mangr-nzangiongr

²² Zbz nzpnu-pwx (40) otx mz nibr nzrmcngr mz Jiszs, sc tqkrlzpebzle mzli kx Mxri navz-ngrde mz Mangr-nzangiongr Yawe mrkc Jerusalem, mz nzalqngi-moungr mz nzvz-nqblq-krde Lou kxtr. * X sc tzvzmipe-kzlr doa kc topwz mz nzrlrpx-krbzlrle mz mq Yawe, x nakrka'lvz kx natr x nawztrpz mz Gct kalr. ²³ Murde navz-nqblqlr Loukxtr mz nzrpi-krde kx, “Doa kx ngi doa ncblo kx ayrrngr amrlx, narlrpx-ngrbz mz mq Yawe.” * ²⁴ Mxri x Josip nzvz-kz-ngrdr mz nzka-krdr blz ngr nzalqngingr mz nzvz-nqblq-krde Loukxtr, mz nzrpi-krde kx, “Nakabz mz pris nran nali, a' kx trpnzngr le e bona nali, nanibqbz mz Yawe.” *

²⁵ Mzli lcde kzdz qc ncblo mncne mrkc Jerusalem, drtqde Simion, kc tqutubq-esz'ngr mz nzobqkr Gct. Amatqle Gct mz da amrlx. X sc tqaenzlile nzvz-krm Kxnzmcpx mz nzarlapx-krde lr Israel. X Mqngrkxtr kc tqmncpxm bade, ²⁶ pibzle bade kx namc-kaile Kxnzmcpx ne Yawe, x sc tqbz ate. ²⁷ Kzdz qbz Simion mailz Mqngrkxtr Mangr-nzangiongr. Mz zbz lcde Mxri ncdr Josip nzprmitrzlrl itoto Jiszs elr, mz nzvz-nqblq-krdr Lou sc Mosis. * ²⁸ X kx mc Simion itoto kc, sc tqotipebzle, tqbrlcpele. X sc tqglqpxpele Gct x tqawipebz bade.

²⁹ X sc tqrpibezle kx, “Yawe, ninge kxinzawz nem. X mzli ka takitrpede nzbdz-krnge. Murde atutrpeq natqm ³⁰ mz nzmctx-angidrpe-krnge mz mzke' Mevalu nem kc tqatzlrl-ngrme mz nzarlapx-krde leplz. ³¹ X aelwapx-ngrbzme nide mz mz leplz amrlx. ³² Murde na-apule zyzlr kc tqaewapxbzle nqmq krm mz kxtrngiulrJiu. X nabatrzple mz leplz nzamatq-krdr nigr lr Israel, mz nzngini-krgr doa nemqng.” *

³³ Trte Jiszs x lxede nzkctitxpplr natq kcng tqpingr Simion Jiszs. ³⁴ Zbz krka'lvztxbzng Simion nidr. X sc tqrpibezle mz Mxri kx, “Doa lc mcpx Gct mz nzngini-krde rkx. X nigu lr Israel kxkqlu kxnxpxtxpx-ngrdr nide nataong. A' nigu kcng tzabrtzlvzlr nide nazarpxng. ³⁵ Da kx aoti drtwr leplz sa na-aelwapx-lzbqngr mz nzabrtzlvz-krdr nide o nzpxtxpx-krdr nide. X mz nibrde nzaetq-ngrbz drtqde sa na-apule toki kx luplxtrpzle nabzm.”

³⁶ X kzdz qc blang, mncne kz mzli lcde. Drtqde Ana kc tqngi profet. Nide inyx Fanwel, vzpxm mz nqvi lr Asz. *

Ana yrlz pnz mzli kc tqnginibe-ngrde olvi, x nzmnctlr mz ncblo ngrde yiz rlimz x ncblo kc sc tqbzpe. ³⁷ Yiz ngrde nzpnu-rtqmz-nrade-pwx (84). X olvz lc vz zvz mz Mangr-nzangiongr. X mzli kang kqlu, nzangio-krde Gct vzmi nzaxtx-krbzle dakxnxng mz nzkrka'-krde. ³⁸ X mz nabznepi lcdepwz tqmncngr Simion badr Josip x Mxri, Ana kc tqkaputrpe-kzpz mrkc tzmnc-ngrdr. Kx xlrele natq Simion, sc tqawipebz mz Gct mz nzatwzlr-krmle Kxnzmcpx nede. X sc tqycmnetrpe-ngrde doa kc topwz, murde naxlrbz leplz kcng tzobqtipxlr Gct nzarlapx-krde lr Jerusalem, x lr Israel amrlx. X tresakiu nzpi-krbzlele mz leplz kxkqlu.

* ^{2:21} Livae 12:3; Luk 1:31 * ^{2:22} Livae 12:1-8 * ^{2:23} Nzrlaszngr 13:2, 12, 15 * ^{2:24} Livae 12:8 * ^{2:27} Livae 12:3; Nzkqlu-krdr 18:15-16 * ^{2:32} Asaea 42:6; 49:6; 52:10; Aposol 13:47
* ^{2:36} Asz ngi kzdz mrlx Jekop kcng nzpnu-esz'-nrade-li (12).

³⁹ Mz nibr nzyrkrpx-krbz nzalengr da lcng amrlx tzyr mz Loukxtr, sc tzyzlupe-moung Naszret, mrkc Gzlili Provins. ⁴⁰ X doa kc yrlvzlzm x xplr. X nzyrplapx-krde etu-esz'ngr murde Gct okatr-zvzle nide.

Jiszs Mncpxm Mz Mangr-nzangiongr

⁴¹ Mz yiz kang kqlu trte Jiszs badr lxede nzvz-zvzng Jerusalem, mz nzprtrngr mz nzmungr kc tqetu tzrpibz Nzamyangr. ⁴² Mzli kc Jiszs tqkrlzpe-ngrbzle yiz kx nzpnu-esz'-nrade-li (12), sc tzvzmipe-kzlr mz nzmungr kc mrkc Jerusalem, mz nzvz-nqblq-krde nqmq krdr. †

⁴³ Zbq ngr nzmungr kcng kx yrkrpxpebzle, sc tzrkalz pemqng mz nzyzlungr mrnyzdr Naszret. A' trtede x lxede trnzkrlzlu kx Jiszs mnctxpe Jerusalem.

⁴⁴ Murde nzpnzkr drtwrdr kx prtrpebz mz leplz kcng tzrtwayzpe-kaing mrnyzdr. X nzvztilr zbq kxesz'. Zbz sc tzrtangritrpebzlr mz mzlis kxnginidrng x leplz kx nzkrlzti-lzbqng badr. ⁴⁵ A' mz trnzmc-krdr nide, sc tzyzlupe-moung Jerusalem, tzrtangrtipe-moulr.

⁴⁶ Mz zbq kratq, sc tzmcpelr mz nabz Mangr-nzangiongr Yawe. Tqwxbu mz mzlis kx nzalvztrng mz Lou sc Mosis. Tqlalztqbz badr x tqveabz badr natq. ⁴⁷ Leplz kcng tlalztqbzng bade nzkctitpxlr nzyrplatitrkr narde da x nzayzlu-krde natq kx nrveati. ⁴⁸ Nzpwrkilcpengr trtede x lxede. Sc tqrpipbz lxede kx, “?Mrlxnge, nike tqale-ngrme da lc bagr? Nigr mz trtem, vztipre drtwrgr nim. Bztitxpegr nzrtangrttingr nim.”

⁴⁹ Rpibzle kx, “?Memule trkrlz-ngrwamu me namnc-ngrne? ?Trkrlzwa-muu kx namncx mz ma nyz Trtenge?” ⁵⁰ A' tryrplatitru nardr da kc tqpibzle badr. ⁵¹ Zbz sc tzvzpe-moung badr Naszret. Nzmnc-krdr kc Naszret lxngiti-txpwzle trtede x lxede. X lxede yrlqle mz nabzde da lcng amrlx. ⁵² X Jiszs yrlvzlzm mz nrkrdrq. X nzyrplapx-krde etunelz, x nzabrtzlvzkr Gct nide etunepx zlwz, da kc tqwai nzabrtzlvzkr leplz nide. *

3

Nzryapwxkr Jon Kxawrkxtr

Matiu 3:1-12; Mak 1:1-8; Jon 1:19-28

¹ Mzli kc Taebirizs tqngini-ngrde king kxetu r Rom, kzdung kz gavzna x king nzmnlzbzng bade. Kzdq nidl Pcntizs Paelzt nide gavzna ngr Judiz. Kzdq mou Herot Antipas nide king kx aclevele Gzlili. X mzle Herot, Filip, nide king kx aclevele Provins kcng Itiria x Trakonaetis. X kzdq mou Laesalias nide king kc tqaclevele Abilin Provins. ² Mzli lcde Anas nidl mz Kaefzs nidl Nardr Pris. *

Mz yiz kranzpu-esz'-nrade-nzlvqn (15) kx King Taebirizs acleve-ngrde nrlc, natq Gct vzm mz Jon, mrlx Sxkaraezs, mrkc lzke. ³ Mz nzlxngiti-krbz Jon natq Gct, sc tqvz-ngalepe-ngrde nrlar LueJodzn mz nzryapwx-krbzle mz leplz. Rpibzle kx, “Kx tqrpiamu kx Gct naipqpxbzle alwx ngrmu, natekqtramu nqmq nr drtwrmu x nawrkxtramu.” ⁴ Krlic atutrlle natq Profet

* ^{2:41} Nzrlasngr 12:1-17; Lou Kcpwz 16:1-8 † ^{2:42} Mz nqmq kr lr Jiu, obla naprmitr mz nzangiongr Gct mz Mangr-nzangiongr mzli kc tqkrlzbzle yiz nzpnu-esz'-nrade-li o tq (12 o 13).

* ^{2:52} 1 Samwel 2:26; Nzryapwxngr 3:4 * ^{3:2} 3:1 Taebirizs nide king r Rom mz nibr Agzstzs. Herot Antipas nide mrlx Herot Kc Tqmyalz. Mc Luk 1:5 x 2:1. 3:2 Mzli kc Jiszs tqngini ngrde doa ncblo, Anas sc tqngi Nardr Pris. A' mz yiz kc 15 AD gzpmann ngr Roman sc rtulrtr-ngrbzle mz Anas nzaprx-lzbq-krde. X nzmcpx-alzulr kzdode Kaefzs, kc tqyrlztibzle inyx Anas, mz nztekqtr-krde nide. Mzli kcng tqalvztrng Jiszs x tztqlvztr-ngrde mz kros, Kaefzs nide Nardr Pris. A' mz nzvz-nqblq-krde Lou sc Mosis, Anas nzmu nangi nide Nardr Pris nakrlzbzle nzbz-krde. Mz drtwr lr Jiu, Anas sc tqngibe Nardr Pris x Kaefzs mnclzbz mz zmatq ngrde. Mc kz ‘Nardr Pris x Kaefzs’ mz Nzalvztr-ngrng Kxmyapxbz.

Asaea mz nzrpi-krde kx, “*Natq kzdq ncblo kx natqde etu mz nzryapwx-krbzle mz leplz lzke. Natq lcde rpibzle kx, ‘Oliqtiamu nabzmu mz nzvz-krm Kxetu Gct. Atubqtibzmu lrpzki kx nangi nyzde na-apule nzoliqtikr leplz lrpzki kx navzkin king.* ⁵ *Nabzlwa nayrngilvztio, newz x me yrulrtingr namnzpz’. Me ngaluti ngr lrpzki na-atubqti, x me vzo mz lrpzki nayrngilvztio.* ⁶ *Murde leplz amrlx namclr Mevalu kc tqatwzlr-ngrm Gct!*” *

⁷ Zbo ngr leplz nzyrkrpxmqng mz Jon mz nzawrkxtr-krdeng nidr. Mz drtwrde kx trmrlzu, sc tqrpipebzle mz kzdung nidr kx, “Nimu kxdrka'-ngrng! Tqpokiamu! ?Neke rpibz bamu nzwrkxtrngr na-ayrbqpxle nimu mz nzayrplapxkr Gct kc navzm? * ⁸ Nzwrkxtrtx-ngrp wz esz'-krde trna-arlapxleu nimu, a' na-aleamu da kx na-aelwapx-ngrde kx tekqtrpeamu nqmq nr drtwrmu kxtrka. X bzkq rpiamu mz drtwrmu kx, ‘Rlapxpekr murde Ebraam ngi melrmqgr. X nigr angidr leplz kx mcp x Gct.’ Murde napi-pnzbo bamu kx nzmu trnavz-nqblqwamu lrpzki r Gct mz nzarlapx-krde leplz, krlzle nzbatr-krbzle doa neng Ebraam nzvzpx-krmleng mz rlpz lcng, mz nzatutr-krde da kx esalz-ngrbzle bade. * ⁹ Gct apule ncblo kx twzle akes scde x oliqtile nzrlakitiongr noun c x rtctxlz-ngrde mz nyr, murde trnzpapx-ngrdru nradr kxmrlz. Sa tqoliqtile mzli ka nzangc-krde leplz mz nyr ngr nzayrplapxngr, nidr kcng nqmq krdr trtubqu x nzpxtxpx-ngrdr nztekqtr-krdrle.” *

¹⁰ Zbz leplz kcng nzveabzng mz Jon, nzrpibzlr kx, “?Nike nawaipekr?” ¹¹ Rpibzle kx, “Kxrngisc nzkq kxli nakabzle kzdq mz kx trpnzngr scde nzkq. X kxrnginan dakxnxng narka-ngrde.” ¹² Kzdung mrlx kcng tzatakqting takes nzvz-kzp qng mz nzawrkxtrngr nidr. Zbz sc tqrpipebzlr kx, “Kxakrlz! ?E nike nawaikr?” ¹³ Rpibz Jon kx, “Takes kx otibzmu mz leplz, bzkq myaszlle narncbr kc tqyrlq gzpm man ngr Rom naxpe ncblo kxesz.” ¹⁴ Kzdung ncblo ngr vea nzvea-kzp zng, nzrpibzle kx, “?X nigr x? ?Nike nawaikr?” Rpibzle kx, “Bzkq amwxlramu leplz mz nznka-krbzlr bamu trau. X bzkq pokiatitramung. A' naesapxngr drtwrmu trau kx nxzpe-ngrmu.”

¹⁵ Leplz amrlx tzobqtipxlr nzvz-krm Kxnzmcpx, x kx nzmcpelr kc Jon drtwrdr kc tzaotrpebzlr kx, “Mwx Kxnzmcpx nide kape.” ¹⁶ Krlztitrpebz Jon nzaotikr drtwrdr kc, sc tqrpipebzle badr kx, “Awrkxtrx nimu mz lue. A' kzdq la ncblo navzm mz nibrnge, kc tqmyaszlle ninge. X trtakitrpwu nzewztr-ngrbz bade, kxmule-esz' nzryokaepxngr nqvi lr sadol ngr nancde. Na-awrkxtrle nimu mz Mqngirkxtr x nyr ngr nzalqningr. ¹⁷ Mz nzvz-krmlle sa napixle kx leplz nztrubqng o trtingr. X nakapxmle leplz kxnzmrlzng mz leplz kxnztrkang, x sc tqamnc-angidrpeleng Heven. A' leplz kxnztrkang sa na-angcpeleng mz nyr kx ngc alo.” ¹⁸ Mz natq kxkqlu mou, rngidrlvz-ngrbzle da mz leplz lcng, mz nzryapwxpx-krbzle badr kxmu Gct nzarlapx-krde leplz.

Jon Kxawrkxtr Nzadwatr Mz Presin

¹⁹ X Jon lclvz-kzp zle King Herod Antipas mz da kxkqlu kxtrka kx aletile. X tqrpipebzle kx natekqtrle nqmq nr drtwrde. Murde krnalz mzlede, drtqde Herodizs, tqyrlztibzle. A' mzlede lc sc tqqlube. ²⁰ Zbz king Herod ale-moule kc da kx trkatpxbz mz nzngyatikr drtwrde Jon, murde tqqlcvzbz Jon nqmq krde kcng tqtrka. Atwzlr-ngrbzle kcng ncblo ngr vea, sc tzadwatrpelr Jon mz presin.

Nzwrkxtrkr Jiszs

Matiu 3:13-17; Mak 1:9-11

* ^{3:6} Asaea 40:3-5 * ^{3:7} Matiu 12:34; 23:33 * ^{3:8} Jon 8:33, 39 * ^{3:9} Matiu 7:19

²¹ X kzdq zboq mzli kc Jon trvztrka-ngrde mz presin, mz nibr leplz amrlx nzwrkxtr-krdr, Jiszs kc tqwrkxtrpe kz. X mzli kc tqkrka'-ngrpwzle, Heven nzlvpx, ²² x Mqngkrkxtr vzom bade mz nrkrdrq kx apule nran. X kzdq natq rpiomle Heven, rpile kx, "Nim Mrlxnge Kxnzmrlzti. X abrtzlvz-zlwzx nim." [†]

Melrmqng Jiszs

Matiu 1:1-17

²³ Mwx yiz ngr Jiszs nzpnu-tqpe (30) mzli kc tqabzo-ngrde nzwz-krde. Nzpnzkr drtwr leplz le ngi mrlx Josip. Josip ngi mrlx Heli.

²⁴ Heli ngi mrlx Matat.

Matat ngi mrlx Livae.

Livae ngi mrlx Malakai.

Malakai ngi mrlx Janai.

Janai ngi mrlx Josip.

²⁵ Josip ngi mrlx Matataeas.

Matataeas ngi mrlx Emos.

Emos ngi mrlx Naham.

Naham ngi mrlx Esli.

Esli ngi mrlx Nagae.

²⁶ Nagae ngi mrlx Maat.

Maat ngi mrlx Matataeas.

Matataeas ngi mrlx Semen.

Semen ngi mrlx Josxk.

Josxk ngi mrlx Joda.

²⁷ Joda ngi mrlx Joazn.

Joazn ngi mrlx Resz.

Resz ngi mrlx Serubabel.

Serubabel ngi mrlx Seltiel.

Seltiel ngi mrlx Nerae.

²⁸ Nerae ngi mrlx Mxlki.

Mxlki ngi mrlx Adae.

Adae ngi mrlx Kosam.

Kosam ngi mrlx Elmadam.

Elmadam ngi mrlx Er.

²⁹ Er ngi mrlx Josua.

Josua ngi mrlx Eliesa.

Eliesa ngi mrlx Jorim.

Jorim ngi mrlx Matat.

Matat ngi mrlx Livae.

³⁰ Livae ngi mrlx Simion.

Simion ngi mrlx Judz.

Judz ngi mrlx Josip.

Josip ngi mrlx Jonam.

Jonam ngi mrlx Eliakim.

³¹ Eliakim ngi mrlx Melea.

Melea ngi mrlx Mena.

Mena ngi mrlx Matata.

Matata ngi mrlx Neitzn.

[†] 3:22 Nou 22:2; Sam 2:7; Asaea 42:1 [†] 3:22 Krlzku kx ngi Gct Trte kc tqycmneom Heven murde rpile kx Jiszs nide mrlxde. Delc mz ngalrde lc, mcku leplz kcng tq, mz Gct kc esz'txu, tzrpibz Tqtrbz. Mc kz Matiu 28:18-20, Aposol 1:8; 2:38, x 8:16 x natq kxnztopwzng elr.

Neitzn ngi mrlx King Devet.
³² King Devet ngi mrlx Jesi.
 Jesi ngi mrlx Obed.
 Obed ngi mrlx Boas.
 Boas ngi mrlx Salmon.
 Salmon ngi mrlx Nason.
³³ Nason ngi mrlx Aminadab.
 Aminadab ngi mrlx Admin.
 Admin ngi mrlx Arnae.
 Arnae ngi mrlx Hesron.
 Hesron ngi mrlx Peres.
 Peres ngi mrlx Judz.
³⁴ Judz ngi mrlx Jekop.
 Jekop ngi mrlx Aesak.
 Aesak ngi mrlx Ebraam.
 Ebraam ngi mrlx Tera.
 Tera ngi mrlx Neor.
³⁵ Neor ngi mrlx Seruk.
 Seruk ngi mrlx Reu.
 Reu ngi mrlx Pelek.
 Pelek ngi mrlx Ebr.
 Ebr ngi mrlx Sela.
³⁶ Sela ngi mrlx Kainzn.
 Kainzn ngi mrlx Arpaksat.
 Arpaksat ngi mrlx Sem.
 Sem ngi mrlx Noa.
 Noa ngi mrlx Lamxk.
³⁷ Lamxk ngi mrlx Mxtusvla.
 Mxtusvla ngi mrlx Inck.
 Inck ngi mrlx Jarxt.
 Jarxt ngi mrlx Maalalil.
 Maalalil ngi mrlx Kenzn.
³⁸ Kenzn ngi mrlx Enos.
 Enos ngi mrlx Set.
 Set ngi mrlx Adzm.
 Adzm wzngr Gct.

4

*Setzn Tamitile Jiszs**Matiu 4:1-11; Mak 1:12-13*

¹ Mz nzprt-krm Jiszs mz LueJodzn mz nibr nzwrkxtr-krde, mnccpx-ngrm Mqngrkxtr vz-krlzbzle nzvzdz-krde Heven. Zbz Mqngrkxtr sc tqmailztrpele nide lzke. ² Zbq nzpnu-pwx (40) mnctile lzke, tqtamiti Setzn, murde rpile na-ataole mz alwx, a' trtao-pnzu. Mzli kcng tqmnctile mrkc tqaxtx-ngrbzle dakxnzng mz nzkrka'-krde. X kx ycpe pipz nzyrkrpx-krdeng, nelzde kc tqbrtalepe. ³ Zbz sc tqrpipebz Setzn bade kx, "Kx tqnginim Mrlx Gct, e aelwapx-ngrm bange x pibz mz rplz lc nalrtipxle bret." ⁴ Rpibz Jiszs kx, "Trtingr. Murde nzyro mz Nzryrngrkxtr kx, 'Doa trlutx-ngrpwzleu nzmu-krde dakxnzng.' " [☆]

⁵ Zbz Setzn kc tqmailzlzpele Jiszs mz newz kx ycpx wq, sc tqaewapengrbzle mrkcng amrlx tzaclve king r nrlc, mzli kxipzpwz. ⁶ Rpibz Setzn bade kx, “Sa nakabo bam drtc' lcng tzmailz king x zmatq ngrdr. X naka-kzpo nzmyalz-krdrng. Nzkatipem bange amrlx x mrlc tqycpe-ngrde, krlzxz nznrka-ngrbz mz doa kc suti drtwrnge naka-nebangeleng. ⁷ Nzmuraynrgzome bange mz nzangio-krm ninge, da amrlx sc tqngiscpem naaclveq.” ⁸ Rpibz Jiszs kx, “Trtingr. Trna-angiowxu nim murde Nzryrngrkxtr rpile kx, ‘Angio txpwz Kxetu Yawe kc tqngi Gct ngrm x wztxtrpwz bade!’” ⁹

⁹ Zbz Setzn kc tqmailzlzpele Jiszs Jerusalem, sc tqamncopemle mz kzdq nctq bute' kx yctxlz zlwz mz Mangr-nzangiongr. Sc tqrpipebzle kx, “Kx tqnginim Mrlx Gct, e atao-lzbq mrka. ¹⁰ Trpnzngr nztakr-krm murde Nzryrngrkxtr rpile kx, ‘Pipebz Yawe mz enjrl nedeng nztu-krbzlr mz nibrm, x nzaclove-angidr-krdn nim dvlvekeng vzkiq. ¹¹ Naglqlr nim mz mqdr, murde nanycm ma tqtcprtr mz rplz.’” ¹² A' rpibz Jiszs kx, “Trtingr. Murde Nzryrngrkxtr rpi-kzle kx, ‘Bzkq atalzamu Yawe, Gct rmu.’” ¹³

¹³ Mz nibr Setzn nztamiti-krde Jiszs mz nzrtamitingr lcng amrlx, sc tqvzpe mz nzaenzlingr nzwre kzbble.

Nzwzkr Jiszs Mz Nzyapwxtipx-krde Nrpakxmrlz

Matiu 4:12-17; Mak 1:14-15

¹⁴ Zbz Jiszs kc tqyzlupe mou mz provins kc Gzlili, x zmatq ngr Mqngkrkxtr ycbz bade. Nrpakxmrlz nztakr-krm murde Gzlili.

¹⁵ Alvztrpe mz mangr-nzkrka'ngr nyzdrng x nzglqtxpx leplz amrlx.

Jiszs Nzpxpxngr Lr Mztea Nyzde Naszret

Matiu 13:53-58; Mak 6:1-6

¹⁶ Zbz Jiszs kc tqvzpe Naszret, kc tzabuti-ngrde. X mzli kcpe mz kzdq Sabat, sc tqvztrpe mz mangr-nzkrka'ngr, da kc tqwai-zvzle. Sc tqtulzpe mz nzrlwxngr Nzryrngrkxtr. ¹⁷ Sc tzkapebz bade buk sc Profet Asaea kc bqnc. Kawxtpxle buk kc, sc tqmcpele mrkc tqrpile kx,

¹⁸ “Mqngkr Kxetu Yawe sa tqprsle ninge, x mcpkle ninge mz nzyapwxtipx-krbo Nrpakxmrlz mz leplz kcng tzobqszongr. Atwzlr-ngrmle ninge mz nzodati-krnge zmatq ngr alwx, murde leplz amrlx narlapxng. X vz-ngrmc nzamrlz-krbo mz krkcng mztr tqkcba, murde naobq-moung. Gct atwzlr-ngrmle ninge mz nzarlapx-krnge krkcng tzatrkating. ¹⁹ X vz-ngrmc mz nzrpipxngr kx krlz pemle mzli r nzaodukr Yawe leplz nedeng mz nzarlapx-krdeleng.” ²⁰

²⁰ Zbz Jiszs apqbtxtrle buk kc, sc tqkape-mopwzle mz kxaclve ma kc, x sc tqwxbuope mz nzalvztr-krde nidr. Mztr leplz kcng amrlx tzyrlwrpxmqng mangr-nzkrka'ngr kc tutxpepwz bade, murde nzrpilr naxlrbzlr da kx naalvztr-ngrde nidr. ²¹ X sc tqycmnepebz badr, tqrpipebzle kx, “Natq Gct lc sa tqututrpe mzli kapwz tqxlr-ngrnamule mzbq ka!” ²² Leplz lcng nzkctitpxpxl natq kcng tqabrngrztile nzrpipng. A' mz drtwrdr trmrlzu badr, x sc tzrpipele kx, “Krlc mrlx Josip xke!”

²³ Jiszs krlz titrpebzle drtwrdr, sc tqrpipebzle kx, “Krlzx kx sa narpimamu bange kx, ‘Abrngz-lzbq, kx dckta.’ Murde rpiamu kx namc-kzamu mrka mz mztea nyzmu rkx kcpwz tqalex Kzpznizm! ²⁴ A' da zpwxtx lc napibo bamu. Kxmule-esz' lr mztea amrlx nzamatqlr profet, a' lr mztea nyzde trnzamrluelru nide. ²⁵ Kxmule-esz', a' lalztqmamu bange, murde naycmne-ebzpxbo da nali. Da kx ayrnrngr, mz mzli nyz profet Elaeja, tewa

⁵ 4:8 Lou Kcpwz 6:13 ⁸ 4:11 Sam 91:11-12 ⁸ 4:12 Lou Kcpwz 6:16 ⁸ 4:19 Asaea 61:1-2

⁸ 4:24 Jon 4:44

trdctileu yiz tq x ncte kc. X tao kc dzbi kxetu mz nrlc tulvzo. [◊] Kxmule-esz' olvz kxnzbzsz ncblo ngrdr nzkqlung mrkc Israel, ²⁶ a' Gct tratwzlr-pnz-ngrpwzleu Elaeja mz kzdq nidr mz nzokatr-krdele. A' atwzlr-alzu-ngrpwzle mz kzdq kz olvz kxtrngiulrJiu. Ni-kzde kxbzsz ncblo ngrde, a' ngi olvz lr mztea Sarefzt, mz nrlarnrlc kc mz taon kc etu Saedon. [◊] ²⁷ X da krali, mz mzli nyz profet Elaesha, kxmule-esz' leplz kx zti lepz nzkqlung kx nzmncng Israel, a' trpnzngr nidr kx amrlz mou profet kx atwzlr-ngrm Gct. A' ngi txpwz Naaman kxtrngiulrJiu, doa lr Siriz Provins." [◊] *

²⁸ Zbz leplz kcng tzyrlwrpxmqng mz mangr-nzkrka'ngr kc, drtwrdr sc tzngyape kx nxzrlbzlr natqde lcng. ²⁹ Nztulzmqng sc tzapepxpelr Jiszs mz mztea kc. Nzvzmilbzlr mz nar newz kc tqyco-ngrm mztea kc. Murde nzrpilr na-apeolr mz nqngitrlqli kc. ³⁰ A' Jiszs prtxtrpz mz mzlindr, sc tqvzpe.

Jiszs Maszlrpx-ngrde Kzdq Drka'

Mak 1:21-28

³¹ Zbz Jiszs kc tqvzpe mz mztea Kzpznizm mrkc Gzlili. Sc tqalvztrpele leplz kcng mz Sabat kc. ³² Nzktitpx-zlwzlr nzalvztr-krde, murde ycmnemile zmatq angidr. ³³ X kzdq kc ncblo kx mnccpx-ngrm drka' mnccpxm mz mangr-nzkrka'ngr kc. Sc tqnetpxpze mz natqde kxwzpx. ³⁴ Rpipele kx, "Vrr! Vzpe Jiszs kc Naszret! Vz, dwasz nigr! Vz-ngrme nzodati-krm nigr! Krlzx ncblo kznike tqnginim! Nim Ncblo Kxtr kc tqatwzlr-ngrm Gct!" ³⁵ A' ycmne-plzttixtr Jiszs drka' kc. Rpibzle kx, "Mnc-lrpi! Dwapxm mz ncblo la!" Drka' kc rtctxo-ngrbzle ncblo kc mz mztr. X sc tqprszpxpe mz ncblo kc. A' drka' kc trataki-pnzleu nide. ³⁶ Leplz lcng nzktitpxlrx, x sc tzrpi-etrpelr kx, "?Nike tqpiq? Murde mz natq kx kabzle mz drka' kcng, vzmi pnz zmatq x nxzplrngr. X drka' kcng nzprpx-pnzmqng mz ncblo kc!" ³⁷ Zbz nrpa ngr Jiszs sc tqtalvzpxpele Gzlili Provins.

Jiszs Amrlzle Kxnzyagoxng Nzqqlung

Matiu 8:14-17; Mak 1:29-34

³⁸ Jiszs rkalzm mz mangr-nzkrka'ngr kc, x sc tqvzpe ma nyz Saemon. A' kzdo Saemon kc tqngi olvz, sc tqyagox, drtqde tqpqpxm. Sc tzrpipebzlr mz Jiszs kx na-alebzle du da bade kx nabrngz-ngrde. ³⁹ Jiszs vzbz, yrngzobz bade x ycmne-plzttitrle zyagox kc. X zyagox kc yrkrtpx pnz. X mzli kcpwz tutxlzm, sc tqoliqtipebzle dakxnxng nadr.

⁴⁰ Mzli kc nepi tqtaope-ngrde, mz nibr Sabat, leplz kcng nzvzmimlrmz Jiszs kztedrng kcng tzyagoxing, mz nzyagoxngr kx bletipx lxbler. Mqde yrlqobzle mz leplz amrlx, x amrlzleng nidr mz nzyagox-krdr. ⁴¹ X maszlrpx-kz-ngrbzleng drka' mz leplz kxkqlu. Drka' kcng tzneng, tzrpilr kx, "Nim Mrlx Gct!" A' ycmne-plzttixtr Jiszs drka' lcdeng. X tr-rlr-ngrpwzleu nzycmne-krdr, murde nzkrlzlr kx nide Kxnzmcpx.

Jiszs Ryapwx Nrpakxmrlz Mrkc Gzlili Provins

Mak 1:35-39

⁴² Mzli kc nrlc tqngrlxnepxpe-ngrde, Jiszs rkalzm mz mztea kc, x sc tqvzpxpe mz kzdq me nakrka'-ngrde. Zbz leplz kcng sc tzrtangrtipelr nide. X kx nzmcpelrle, nzrpilr narpwa'pe-ngrdr kx bzkq vzpe. ⁴³ A' rpibzle badr kx, "Nayapwxtipx-kzpo Nrpakxmrlz mz leplz mz kzdung kz mztea,

* ^{4:25} 1 King 17:1 * ^{4:26} 1 King 17:8-16 * ^{4:27} Livae 13; 2 King 5:1-14 * ^{4:27} 4:23 Natq lc, 'Abrngz-lzbq, kx dckta,' drtwr ngrde kx trnzlxngitlu nzrpilr kx nide Kxnzmcpx. X nzrpibzlr na-alele du rrx kx nalxngiti-ngrdr nide. 4:27 Natq Jiszs lcng drtwr ngrdr kx mzli kznikeng lr Jiu nzpxtipx-ngrdr Gct, sa naokatr-alzule kxtrngiulrJiu.

kx Gct sa tqvectrpemle leplz mz nzmnclz-krbzlr bade mz nzngini-krde King rdr. Murde delc tqngi nou nzvzo-krmc mz nrlc ka.” ⁴⁴ Zbz Jiszs kc tqryapwxpxpem mz mangr-nzkrka'ngr kxkqlung mrkcng tzmnc-ngrdr lr Jiu.

5

*Jiszs Kqlele Ncblo Nedeng Kcng Ayrnrngr
Matiu 4:18-22; Mak 1:16-20*

¹ Kzdq mzli Jiszs tu mz nabz drta' ngr Dxbu Gzlili. Leplz nzdlrvztxtr-lzbqpwzng mz nzyrlwr-ngalelvz-krdr nide, mz nzlalztq-ngrbz bade mz natq Gct. ² Mcle bot li kx nzaminilz mz nabz drta', prszopeng mrlx kcng tzrmwa-ngrng. Nzpoopemqng, sc tzwztipelr br scdrng. ³ Jiszs prtxlz mz kzdq bot Icdeng, kx ngi sc Saemon. Murde naycmnebz badr amrlx ngrdr, x ma tzbolikilvztilr nide. Sc tqrlxtipebz Jiszs mz Saemon kx na-alvcpxbzle mz dxbu kxipiz. Jiszs wxbutxlzm mz nabz bot kc, sc tqalvztrpele zbo ngr leplz kcng.

⁴ Mzli kc tqyrkrpxpe-ngrbz nzryapwx-krde, sc tqrpipebzle mz Saemon kx, “Alvcpxbz bot scm me boongr lue. X nimu badr kztem lang, sc tqapoopeamu br scmu. Sa na-aprtzamu kzdung nc.” ⁵ Rpibz Saemon kx, “Kxetu, kxputxkr kau mzli boitx, a' trtxpnzngr nc kx prtz mz br. A' rpiq kx na-apookr br lc, na-apoopekr ye.” ⁶ Nzapotxolr br kc, x nzaprtz-pnzlr nc kqlutx pnz. Br kcng nzmulr nabxpli zpx, murde nzyrbu-krdr mz nc. ⁷ Sc tzayaglpbebzlr mqdr mz kztedrng kcng tzmncmcomqng mz bot kzble, kx nayamqng x naokatrpzlr nidr. Nzyamqng x nznulvzlr bot kcng mz nc. X nzmulr nabootxng. ⁸ Kx mctxpe Saemon Pita da lc, rweobz zpr mz Jiszs, sc tqrpipebzle kx, “Rlasz txpwz ninge, kx Kxetu rnge! Murde trtakitrpwcu nzesotr-krbo bam. Ninge ncblo kx alwx ngrde ycbz!”

⁹ Pita badr leplz lcng nzkctitpxlr blzmr nc kcng tzaprtzlr. ¹⁰ Kzte Saemon nzling, Jemes nidr mz Jon, mrlxng Sebedi, nzkctitpx-atwrnr-kz-ngrdr. Rpibz Jiszs mz Saemon kx, “Bzkq mwxrq. Abzo mzli ka sa na-alvztrpo bam nzrtangrngr leplz, kx nangi nengeng.” ¹¹ Nztetxlzlr bot scdr mz nabz drta', nzdwasztxdr da amrlx, x sc tzvz-nqblqpele Jiszs.

*Jiszs Amrlzle Kzdq Ncblo Kx Ycngr Lepz
Matiu 8:1-4; Mak 1:40-45*

¹² Kzdq mzli, Jiszs mnccpxm mz kzdq taon mrkc tqmncngr kzdq ncblo kx ycngr lepz. Ncblo lcde ngabq kxsqki. Kx mcle Jiszs, rweobz zpr bade, mzte obqo, x sc tqyrrnitrpebz bade, mz nzrpi-krde kx, “Kxetu, kx tqsuti drtwrm le, krlzx kx krlzq nzamrlzngr ninge!” ¹³ Kxmule-esz' mz Lou sc Mosis batrpzle trnztakitr-krdeu nide mz nzprtrngr mz nzangiongr, a' maletxtrpzle nide. X sc tqrpipebzle kx, “Mrlzm bange. Namrlzq.” X mzli kcpwz lepz kc dwasztx-pnzle ncblo kc. ¹⁴ Zbz Jiszs rkabz natq, rpibzle bade kx, “Bzkq ena ncblo kx napi-nebanle. A' vz-kaipz mz pris, x pibz bade napwxlitibzle nim, kx namcpzle kx mrlzpeq. Zbz sa napipxbzle mz leplz, murde namnc-lxblr-mouamu badr. X kabz mz Gct blz kx nangi dalr nzamrlzngr nim mz nzyagox-krm, da kc tqwai nzpikr Lou sc Mosis le, x nakrlzngr leplz amrlx le kx tubqpeq mz Loukxtr.” ¹⁵ A' nrpa ngr Jiszs sc tqvzlvzpx-ngrde nrlarnrlc kcng. X zbo ngr leplz nzyrkrmqng mz nxzlr-krdr nide x nzamrlz-krde nidr mz zyagox ngrdr. ¹⁶ A' Jiszs sc tqvzpx zvz mz kzdung nrlc kx namncne-ngrde esz'-krde mz nzkrka'-krde.

*Jiszs Ipqpxle Alwx Ngr Kzdq Ncblo X Amrlzle Nrkrdrtrqde
Matiu 9:1-8; Mak 2:1-12*

¹⁷ Kzdq zbzq, mzli kx Jiszs alvztr-ngrde, kzdung Farzsi x kxnzalvztrng mz Lou sc Mosis sc tzwxbu-kzng mrkc. Ncblo lcng nzyrkpxmqng mz taon kcng amrlx tzycpxmqng Gzlili, x mz mzteadau Jerusalem x mz kzdu-kzng taon kcng tzycpxmqng Judiz. Mzli lcde, zmatq ngr Yawe sc tqycpxm mz Jiszs mz nzamrlz-krde kxnzyagoxng.

¹⁸ Kzdung ncblo nzvzmqng, nzglqmlr kc ncblo kx nrkrdrtrqde bz. Nzglqtimlr kzdq nqni. Nzrpilr naglqtrpzlr brma mz ma kc, murde na-ayrbqtrpzlr mz Jiszs x na-amrlzbzle nide. ¹⁹ A' rblxtx nzvzmitr-krbzrlre mz Jiszs murde ncblo nzkqlu-zlwzng mrkc. Sc tzo-zlilzpelr ladz ngr ma kc, mz nzglqlz-kdrle mz nibr ma kxmnzpz'. Nzaobqtxlzlr kc nrlc mrkc mz nibr ma. X sc tzavoopebzlr ncblo kcma mz nqni pnrde. Nzavotxobzlr mz mzlir dzbe leplz kcng, mrkc tqlxlvrkipxbz Jiszs. ²⁰ Kx krlztrpz Jiszs nzbrtikr drtrwrdr nide mz nzamrlz-krde kztedr, sc tqrpipebzle mz ncblo kc tqyagox kx, "Mzlenge, alwx ngrmqng ipqpxebo." ²¹ Lr Jiu kcng tzalvztrng mz Lou sc Mosis x Farzsi kcng sc tzrpi-etrpelr kx, "Rlr! Mrlx lc pivxile Gct. Murde Gct txpwz kx krlzle nzipqpxngr alwx!"

²² A' Jiszs krlzittrpebzle nike pnz drtrwrdr, sc tqrpipebzle badr kx, "Bzkq nzao-krmu drtrwrmu kxmule lc. ²³ Nzmu narpibo mz ncblo lc kx, 'Ipqpxebo alwx ngrm,' rblx nzrmcngr. A' nzmu narpibo bade kx, 'Tulzm, x vzpe,' opx angidr nzrmcngr. ²⁴ Mz nzmu-krde lcde, sa na-amrlzbo nrkrdrtrqde mz nzaelwapx-krnge kx ninge, Mrlx Leplz, rngisc-kznge zmatq ngr nzipqpxngr alwx mrka mz nrlc." X sc tqrpipebzle mz ncblo kc nrkrdrtrqde tqbz kx, "Mrlnge, tulzm, oti nqni pnrm x vzpe mrnyzm!" ²⁵ Mzli kcpwz ncblo kc tutxlz-pnzm mz mztr amrlx ngrdr. Otibzle nqni kcma tqmnzo-ngrmle, sa tqvzpe mrnyzde. Kx tqvzle kc, sc tqqlqpxle Gct. ²⁶ Leplz amrlx nzkctitpx-awtrnr-ngrdr x nzglqpx-kzlr Gct. Nzamatq-zlwzlr Gct, sc tzrpipler kx, "Mzbq ka rmcku da kx blepx awtrnrngr."

*Jiszs Kqlele Matiu
Matiu 9:9-13; Mak 2:13-17*

²⁷ Mz nibr da lc, Jiszs vzpx x mcle kzdq ncblo kx atakqti takes. Drtgde Livae, x kzdq kz drtgde Matiu. Sc tqwxbu mz ofis nyzde kc tzxpekitr takes. Rpibz Jiszs bade kx, "Vz-nqblqm ninge." ²⁸ Livae tutxlzm, axtxtxbzle da amrlx, x sc tqvz-nqblqpele Jiszs. ²⁹ Zbz Livae wz-ngrbzle mz Jiszs kc nzmungr kxetu mz ma nyzde. Mz nzmu-lxblrngr kc ycbz ncblo kxnzataktinq takes kx nzyrkrmqng, x kzdung kz mou ncblo kx nqmq krdr trka mz nzobqkr leplz. ³⁰ Kzdung Farzsi x ncblo kcng tzalvztrng mz Lou sc Mosis, kx nzngini-kzdr Farzsi, drtrwrdr lctrpz mz ncblo neng Jiszs. Nzrpibzlr kx, "?Memule tqmu-lxblrngr namu badr kxnzataktinq takes x kzdung kz leplz kxnztrkang?" *

³¹ Rpibz Jiszs kx, "Leplz kx trnzyagoxung trnzsuti drtrwrdr dckta. A' kxnzyagoxng la tzsuti drtrwrdr dckta. ³² Trvz-ngrpwc'u nzrkqlengr leplz kx nzrpilr nztrubqng. A' vz-ngrmc nzrkqlengr kxnzaleng alwx, murde naesablqtilr alwx ngrdrng."

*Ncblo Neng Jiszs Trnzaxtx-ngrpwlru Dakxnnzng
Matiu 9:14-17; Mak 2:18-22*

* ^{5:30} Mz nzmu-lxblrngr Jiszs badr ncblo lcng tztrkang, drtrwrdr tresz'tiu badr mz alwx ngrdr. A' rpile na-aelwapx-ngrbzle nivz lr Gct badr.

³³ Kzdung leplz nzrpibzlr mz Jiszs kx, “Oblamzng Jon Kxawrkxtr nzaxtx-vzv-ngrbzlr dakxnxng mz nzkrka'-krdr. X wai kz oblamzng Farzsi kcng. A' ncblo nemqng trnzaxtxdru dakxnxng, a' nzmutx-zvzng.” ³⁴⁻³⁵ Sc tqrpipebz Jiszs kx, “Apux ncblo kxnayrlz. Mz nqmq lcpwz trtakitrdeu leplz nzaxtx-krdr dakxnxng mz mzli r nzabrtzngr mz nzyrlzngr, trtakitr-kzdeu ncblo nengeng nzaxtx-krdr dakxnxng mzli ka. Murde nzabrtz-ngrdr ninge lc tqmncbepo badr. A' mz nibrde, mzli kc nakatxpx-ngrmc badr, sc tqtakitr-atede nzaxtx-krdr dakxnxng mz nzkrka'-krdr.

³⁶ “Nzycmne-ebzpxngr lcng li nzaelwxpx-ngrdr nqmq krmge kxmrna. Murde trpnzngr ncblo kx narpesalipxm muli nzkq kxmrna, sc tqkxsl-vztrpele mz nzkq kxblzlongr. Nzmu nawailele, sc tqatrkatipele nzkq kc tqmRNA, x muli lrpz kc tqmRNA, nzobq-krdr trkxmulru esz' mz lrpz kc tqblzlongr. ³⁷ X trpnz-kzngr ncblo kx narbzlutr dakxnxng kxmrna mz ncblei kx nzrbzlutrpengr dakxnxng. Murde ncblei kxmule lcde ngcplxtxtr kai mz nzmrnabekr dakxnxng, x da lcng li sc tzatrkatipeng. ³⁸ A' dakxnxng kxmrna nabzlutrpwz mz ncblei kxmrna. ³⁹ Murde rblxbz mz leplz kcng tzabrtzlvzpelr nqmq kcng pnz nztekqtr-krdr nqmq krdr mz nztwz-krdr nqmq kxmrna. Apule ncblo kx ptxpx-ngrde nzrmnq-krde waen kx nzwz-atengr, murde mz drtwrde rpile kx, ‘Kx yc pnz mrlz.’ ”

6

Jiszs Nide Kxetu R Sabat

Matiu 12:1-8; Mak 2:23-28

¹ Mz kzdq zbz ngr nzangiongr, kc tqrpibz Sabat, Jiszs badr ncblo nedeng nzo-zlirl lrpzki kx vztr mz kzdung lclr wit. Ncblo nedeng sc tzcpqpxpemqng nra wit. Nzwitilr mz mqdr mz nzdwasz-krdr bedr, sc tzngqtipelr. *

² Zbz kzdung Farzsi sc tqrpipebzlr kx, “?Nike tqxpqbrlr-ngrnamu Lou sc Mosis mz nzwz-krmu mz Sabat?” ³ A' mz nzaelwapxkr Jiszs kx takitrde nzokatrngr ncblo mz Sabat, sc tqayzlupebzle natqdr rpibzle kx, “Krlz-angidr-kzamu da kc tqale melrmqmu King Devet kc tqamatqamu, mzli kc tzbrtale-ngrdr badr ncblo nedeng! ⚫ ⁴ Devet vztr mz ma nyg Gct. Otile bret kc tzkabz mz Gct tqngi blz, kabz Nardr Pris, x ngqde, x ka-kzpze mz ncblo nedeng. A' da lc tqrpwa'ngr Lou scgu. Murde Lou scgu rpile bret kxtr nangqpwz pris. ⚫ ⁵ Ninge Mrlx Leplz kc tqngininge Kxetu r Sabat. X rngiscnge zmatq mz nzpnzkr drtwrnge da kx takitrde nzalengr mz Sabat.” †

Jiszs Amrlzle Kzdq Ncblo Mz Sabat

Matiu 12:9-14; Mak 3:1-6

⁶ Mz kzdq mou Sabat, Jiszs vztr mz kzdq mangr-nzkrka'ngr, sc tqalvztrpe. Kzdq kc ncblo tqmnc kz mrkc. Mqde kxrtc bz. ⁷ Kzdung Farzsi x kxnxalvtrng mz Lou sc Mosis nzrtangrtrpzng da kx navz-rbri Jiszs. X namclr nzmu kx tqamrlzle kxnzyagoxng mz Sabat. Murde mz drtwrdr nzamrlzngr doa kxnzyagoxng ngi nzwzng. ⁸ A' Jiszs krlztitrpebzle drtwrdr, sc tqrpipebzle mz mrlx kc mqde tqbz kx, “Tulz x vzpxm. X tu mrlc.” Mrlx kc tutxlz x sc tqtupe mrkc. ⁹ Zbz sc tqveatipebz Jiszs mz leplz kcng kx, “?Nike rlrpxngr Lou scgu nzalengr mz Sabat? ?Nzokatrngr

* ^{6:1} Lou sc Mosis rlrpx-ngrde nzcpqpxngr wit nyg ncblo kzble, a' bzkq nzlakilzm noude. [Lou Kcpwz 23:25] ⚫ ^{6:3} 1 Samwel 21:1-6 ⚫ ^{6:4} Livae 24:9 † ^{6:5} Mz drtwr Gct x mz drtwrmu, Devet trpnzngr da kx vz-rbrite. Murde kzdung mzli nzokatrngr leplz myaszpxle nzvz-nqblqngr Lou sc Mosis.

leplz o trtingr? ?Nzarlapxngr nzlukr ncblo o nzrlr-ngrbz nzbz-krde? Krlz-angidramu kx Lou scgu rlrpx-ngrmle bagu nzalengr da kxmrlzti mz Sabat!" ¹⁰ Jiszs obq-ngale-ngrde nidr amrlx ngrdr, sc tqrpipebzle mz ncblo kc kx, "Atwztqpx mqm." Atwztqtxpxle mqde, x brngztx pnz mou. ¹¹ A' Farzsi kcng badr krkcng tzalvztrng, drtwrdr ngyatx atwrnrngr. Sc tzrpi-etrpeng da kx nawaisr-ngrdr Jiszs.

Jiszs Mcpxle Aposol Nzpu-esz'-nrade-li (12)

Matiu 10:1-4; Mak 3:13-19

¹² Kzdq zbzq mzli lcdeng, Jiszs vzdz mz kzdq newz murde nakrka'. Mz nrlckxbq kc boi sc tqmnc ye mrkc, tqkrka'bz mz Gct. ¹³ Zbz nrlc kx ngrlxopebzle, sc tqkglepele ncblo nedeng. X mcpixe ncblo nzpu-esz'-nrade-li (12). Krlcng rpibzle aposol. ¹⁴⁻¹⁶ Ncblo lcdeng nidr seleng:

Saemon (yrlq-kzpze drtqde Pita) x mzlede

Adru,

Jemes nidr mz mzlede

Jon,

Filip,

Batolomiu, (kc kzdq kz drtqde Natzniel),

Matiu, (kc kzdq kz drtqde Livae),

Tomas,

Jemes mrlx Alfizs,

Saemon kc tqprtr ena mz dzbede kc tzrpilr namaszrttxpx-ngrdr gzpman ngr Rom mz nzacive-krdr Israel,

Judzs mrlx Jemes, (kc tqngi kz drtqde Tadizs), x

Judzs Iskariot, kc tqamwabzle Jiszs mz enqmi rdeng.

Jiszs Alvztrle Leplz X Amrlzle Kxnzyagoxng

Matiu 4:23-25

¹⁷ Nzvzomqng badr aposol nedeng mz newz kc, sc tqtupe me mnzpz', tqtumipele kzdq dzbe leplz nedeng kxetu. X kzdq zbo ngr leplz kxetu sc tzmnc-kzng mrkc. Nzyrkrkimlr rlsru mz kzdung mztea ngr Judiz, x kzdung nzyrkrkimlr Jerusalem. X nzyrkrmqng kcng mz taon kcng etu Taea x Saedon, mz nrlarde kcng rlsru tqyccpx prla. ¹⁸ Nzyrkr-ngrmlr mz nxzlr-krdr nzalvztrkr Jiszs x mz nzamrlzngr nidr mz zyagox ngrdrng. Leplz kcng tzatrkating drka' amrlz-kzng Jiszs. ¹⁹ Leplz kcng amrlx tzabzlr nzrbxtr-ngrbz nide, murde zmatq sc tqvzpxm bade, x tqamrlztile nidr amrlx mz zyagox ngrdr.

Nzamrlzkr Gct X Nzayrplapx-krde

Matiu 5:1-12

²⁰⁻²⁶ Jiszs obqbz mz leplz nedeng, x sc tqrpipebzle kx,

"Ngi da kxmrlz nzkrz-krmu kx mnc-xgleamu nzokatrkr Gct mz nrlc ka, murde Gct sa nakabzle bamu da kx nzvzpxmqng mz nzngini-krde King rmu mz nrlc kc navzm.

A' ngi da kxtrka nzrngisc-krmu da mz nrlc ka, murde trpnz-moungr da kx natwzamu mz nrlc kc navzm.

Ngi da kxmrlz nzrtangrti-zvz-krmu Gct mz nrlc ka, murde sa na-aesapxbzle drtwrmu mz nrlc kc navzm.

A' ngi da kxtrka nzamrbtrtr-krmu Gct mz drtwrmu mz nzesapxkr drtwrmu mz nrlc ka, murde trpnzng da kxmrlz kx nangi scmu mz nrlc kc navzm.

Ngi da kxmrlz nzyrnibu-krmu mz alwx ngrmung mz nrlc ka, murde Gct sa na-aelalzmle nabzmu mz nrlc kc navzm.

A'ngi da kxtrka nzmrge-zvz-krmu x nzabrtz-zvz-krmu mz nrlc ka, murde sa nayrni-aloomu mz nrlc kc navzm.

Ngi da kxmrlz nzatrkatingr x nzpxtxpxngr, x nzrpibqtingr x nzobqszongr nimu murde vz-nqblqmu ninge mz nrlc ka. Mzli la naelalvzamu nzapu-krmu profet neng Gct kcng tzatrkti pnz melrmqmung. ☀ Murde mz nrlc kc navzm, sa natwzamu da kcpwz tqmyapx-esz'ngt tztwzlr profet lcng.

A'ngi da kxtrka leplz amrlx nzabrtzlvz-krdr nimu mz nrlc ka. Murde mz nrlc kc navzm, sa natwzamu nzayrplapxngr kcpwz tqkrlzbzle melrmqmung kcng tzabrtzlvzlr profet kcng tzalvztr-rbrng mzli kc bqnc."

Bzkq Apuamu Kxdrka'-ngrng

Matiu 5:38-48; 7:12

²⁷ Rpi-mopwz Jiszs badr kx, "A' pibo bamu nimu lcng tzlalztqmqng bange. Kxmule-esz' nidr enqmi rmung, a' na-aodu-zvzamu nidr. X kxmule-esz' nztrkalr-ngrdr nimu, a' na-alebzmu da kxmrlz badr. ²⁸ Kxmule-esz' npilzlr nimu, a' narlxibzmu mz Gct nzamrlz-krde nidr. X kxmule-esz' nzalebzng bamu da kxtrka, a' nakrka'-ngrnamu nidr. ²⁹ Nzmu kzdq ncblo natzlvzbzle nrlar blzmznaom mz nzngyatikr drtwrde nim, bzkq ayzlubzme, a' ao-lxlvr-kzpz nrlarde krali, murde natzlvz-kzpze. Nzmu ncblo kx tqpnatibzle bot scm, e mz nivz, ka-kzpz nrz scm bade. ³⁰ Doa kx rlxbz bamu da, x mcamu kx takitrde nzokatrngr, kabzmu. X doa kx rpnatibz dztumu, bzkq rlxtipe-mopwzmu. ³¹ Ale-zvzbzmu mz leplz da kx suti drtwrmu na-alebzlr bamu, kxmule-esz' trnzalepwzlsru bamu. ‡

³² "Nzmu namrlzti-txpwzmu kxnzmrlztilr nimu, Gct trabrtzlvzleu nimu. Murde tr-rblxu nzalengr, a' kxdrka'-ngrng nzale-kzlr da lc. ³³ X tr-rblxpzu badr nzale-kz-krbzlr da kxmrlz mz leplz kcng tzalebzng badr da kxmrlz. ³⁴ X tr-rblx-kzpzu mz kxdrka'-ngrng nzrlr-krbzlr da mz leplz kx nzkrzlr kx krlzle nzayzlu-mou-ngrbz badr. ³⁵ Bzkq apuamu nidr! A' na-aodu-kzamu kxnztrkalr-ngrdr nimu. X na-alebzmu da kxmrlz badr. X narkabzmu da badr, kxmule-esz' trna-ayzlupwzlsru bamu. Murde mz nzale-krmu da lcng natwzku kzdq da kxmrlz kxetu. X nanginimu doa neng Gct kc tqmyalz, murde aodu-kzle leplz kx trnzawipwzung bade x kxdrka'-ngrng. ³⁶ Nayc mz drtwrmu leplz, da kc tqwai Trtemu Gct nzyc-zvzkr drtwrde nidr."

Atubqti-lzbq Kai

Matiu 7:1-5

³⁷ Rpibz Jiszs kx, "Bzkq rpiamu kx takitrde doa nzayrplapx-katongr mz alwx ngrdeng, murde ma tqrpi kz Gct kx takitrde nzayrplapx-kato-krde nimu mz alwx ngrmung. X bzkq rpiamu kx doa vz-rbr, murde ma tqrpi kz Gct kx vz-rbramu. A' ipqamu leplz murde Gct naipq-kzle nimu. ³⁸ Rkaamu da mz nzokatrngr leplz, x Gct sa nakabzle bamu da. Murde Gct sa na-ayzlu-kzpze da bamu da kc tqwai nznrka-krmu da. Nzmu narka-angidramu mz nabzmu, sa natwz-kzamu da kxetu. A' nzmu narkaamu da kxipiz, natwz-kzamu da kxipiz. Nznrkakr Gct myaszlzle nznrka-krmu. Murde apule ncblo kx rnulvzbz topla x yrbulzm, lolvzbzle x ayclwzle x nganqlvzle x yrlqo-mopwzle kcng."

✡ **6:20-26** 1 Pita 4:14; 2 Be Ngrdr 36:16; Aposol 7:52 ‡ **6:31** 6:29 Nzycmnekr Jiszs angidr dese: Nzmu kzdq ncblo pnatibzle lrpz ngr zbao scm, e ka-kzpz nzkq kc tqyctxtr kai.

³⁹ Zbz pibz Jiszs nzycmne-ebzpxngr lc murde ma tqikitiku leplz. Rpibzle kx, “Ncblo kx mzte kcba nzmu trmailzleu kzdq kz kx mzte kcba. Nzmu nawailele, nztaong rlilrdr mz gq. ⁴⁰ Trpnzngr oblamz kx myaszlzle kxakrlz ngrde. A' oblamz kx tqkrlz-angidrpele la da kc tzalvztrpz bade, sc tqapupe-kzle kxakrlztrle nide. Mz nzmu-krde lcde, kx tqrpi-ngrnamu kx na-apuamu ninge, e vz-nqblqamu nqmq krnge. *

⁴¹ “Mурде mz нзрpi-krmu kx leplz nzaleng alwx, obqtiq alwx ngrdr kc tqtopwzne, a' trmcwq alwx ngrm kc tqwzpx. Opxm kx tqobqtitrpzme dcvi kc tqtotakine mz mz mzlem. A' trmcwq dapunounc kc tqyrbqpxm mz mzpq. ⁴² Dekc tqrpi-ngrbzme mz mzlem kx, ‘E mzlenge, nakatpxbo ena dcvi la tqtopwzne tqycpxm mz mzpq.’ ?Memule tqycmne-ngrn lc? Murde dapunounc kxwzpx la tqycpxm mz mzpq! Nim leplz kx narpi-ngrbz kx rlxngitiq! Kapx kai dapunounc la wzpx tqyrbqpxm mz mzpq, x mzpq kc tqopxpe mz nzrmcngr dcvi kc tqtopwzne, tqycpxm mz mz mzlem. Atubqtilzbq kai mz alwx ngrmqng x kztemqng kc ate.”

Nzrglxngr Leplz Kxnzmrlzng X Leplz Kxnztrkang Matiu 7:16-20; 12:33-35

⁴³⁻⁴⁴ Rpibz Jiszs kx, “Nounc amrlx nzglx-ngrdr nradr kcng tzpapx-ngrdr. Nounc kxmrlz trpapx-ngrdeu nranc kxtrka. Trpnz-kzngr nounc kxtrka kx papx-ngrde nranc kxmrlz. Murde tr-rkeopwx'u naq mz nc nole x dx mz nc lrpz. ⁴⁵ Mz nqmq lcpwz, ncblo krla tqpipxle da kx yclzm mz nabzde. Murde nabz ncblo kxmrlz yclz-ngrm da kxmrlz. X aelwapx-lzbqng mz nzmrlzti-krde leplz. A' nabz ncblo kxtrka yclz-ngrm da kxtrka. X aelwapx-lzbqng mz nzrtrkalr-krde leplz.” *

Ma Li Kx Blepxngr Mz Nzrwzng Matiu 7:24-27

⁴⁶ Rpibz Jiszs kx, “?Memule tqrpi-ngrmamu bange kx ninge kxetu rmu, a' tryrlq-angidrwamu natqnge? ⁴⁷ Ncblo kx vzm bange, x xlrmle natqngeng, x yrlq-angidrleng, ⁴⁸ apule ncblo kx wzti-angidrl ma nydze. Ekqtirole gq lr nctrpou ngrdeng, vzo la. Kxmule-esz' nenq kxetu wq x yrplatr ma kc, a' trwxlikiou, murde wzti-angidr-pnzle. ⁴⁹ A' ncblo kc tqxlrle natqngeng x trvz-nqblqleung apule ncblo kx wztie ma nydze mz drta' x nctrpou ngrdeng trmqngioug. Nenq kxetu wq, yrplatr ma kc, x mzli kcpwz wxlikitxo pnz!” §

7

Jiszs Amrlzle Kzdq Kxnzawz Kxyagox Matiu 8:5-13

¹ Kx yrkrpxbz nzpi-krbz Jiszs da lcng, sc tqvzpe mz taon Kzpnizm. ² Kzdq kc kxetu tqmnc elr, kc tqacivele dzbe ncblo ngr vea ne Rom kx trtqki-esz' (100). A' kxnzawz-nrbalq nede yagoctx, ycpe pipz nzbdz-krde. ³ Nrpa ngr Jiszs nzamrlz-krde leplz kxnzyagoxng, kx xlrpe kxetu kc le, sc tqatwzlrpe-ngrbzle kzdung lrtzlvz ngr lr Jiu kx naveatibzlr mz Jiszs na-amrlzbzle kxnzawz nede. ⁴ Nzvzmqng mz Jiszs, sc tzyrnititrpebzlr bade mz nzrpi-krbzlr kx, “Kxetu lc, takitrde nzokatr-krmle. ⁵ Murde mrlztile nigu lr Jiu x rkapx trau kx nawztingr mangr-nzkrka'ngr nangi nydze.”

⁶ Zbz Jiszs kc tzvzpeng badr. Nzesonetrpebzng mz ma nydze kxetu kc, zbz sc tqatwzlrpxpe-ngrbzle kzdung kztedeng mz Jiszs. Nzrpibzlr bade

* 6:40 Matiu 10:24; Jon 13:16; 15:20 * 6:45 Mak 7:20 § 6:49 Mc natq kxtopwz mz Matiu 7:25.

kx, "Kztegr rpimle bagr kx, 'Kxetu, bzkq da kx nakxne ye drtqm, murde trtakitrpwu' nim nzdwatr-krme ma nyznge." *

⁷⁻⁸ Dekc trvz-ngrpwc'u bam mz ninge esz'-krnge. Mnclzbo mz zmatq ngr kamadz rnge. X ncblo ngr vea nengeng nzmnclzmqng bange. Kx narpibo mz kzdq kx, "Vz!" x sc tqvzpe. X kx narpibo mz kzdq kz kx, "Vzm!" x sc tqvzpe. X kx narpibo mz kxnzawz nenge kx, "Da kx na-aleq se!" x sc tqalepele. Krlzx kx rmgiscm zmatq kxmyalz zlwz. Pi txpwz dq ye natq, x ncblo nenge sc tqmrlzpe.' "

⁹ Kx xlrbz Jiszsz natqdeng kctitpxz-zlwzle. Ayzlutx-lzbq, sc tqrpipebzle mz zbo ngr leplz kc tzvz-nqblqlr nide kx, "Napibo bamu, nzrlxngitikr lr Israel trmyaszpxleu nzrlxngitingr lc!" ¹⁰ Mrlx kcng tzatzlrl-ngrbz mz Jiszsz nzyzlutx-mopwzng mz ma nyz kxetu kc. Kx nzkaputrpzlr, nzmcpelr kx mrlx kc tqyagox mrlztxpe.

Jiszsz Atulz-mople Mrlx Kzdq Olvz

¹¹ Mzli trboiu mz nibrde, Jiszsz kc tqvzpe mz kzdq taon, drtqde Nein. Ncblo nedeng x kzdq zbo ngr leplz nzvzng badr. ¹² Mzli kc tzkaputrngrbzlr mz naonrx ngr taon kc, nzobqbnzng a' ncblo kx bz la tzglqpxm mz nzryrtzmqng nide. Ncblo kc tqbz ngi mrlx kzdq olvz kx bzsz ncblo ngrde. Mrlxde nide kc txpwz esz'txu. X zbo ngr leplz kx nzvzpxmqng mz taon kc, sc tzyrkpxmqng badr olvz lcde. ¹³ Kx mctxpebz Kxetu olvz kc, sc tqycpe mz drtwrde. Sc tqrpipebzle bade kx, "Bzkq yrniq." ¹⁴ Zbz vzbz, sc tqmaletrpebzle da kc tqyrbqo-ngrm namz ngr ncblo kc. X ncblo kcng tzrglqng nztutx-pnzng. X sc tqrpipebz Jiszsz mz ncblo kc tqbz kx, "Obla, dwalzm!" ¹⁵ Ncblo kc tqbz lutx pnz, sc tqwxbupe x tqycmnepe. Sc tqavzpe-mopwz Jiszsz mz lxedede.

¹⁶ X leplz amrlx nzkctitpxlrl, x sc tzglqpxpelr Gct. Tzrpipelr kx, "Kzdq profet kxmyalz vzpem mz mzligu! Gct atwzlr-ngrmle profet nede mz nzarlapx-krde leplz nedeng!" ¹⁷ Nrpa ngr Jiszsz lc talvzpx-pnzle mztea kcng tqyc-ngalele Nein, x mrkcng amrlx tzmnc-ngrdr lr Jiu.

Menrpa Kcng Tqatwzlr-ngrm Jon Kxawrkxtr

Matiu 11:2-19

¹⁸ Oblamzng Jon Kxawrkxtr nzpitibzlr nrpa ngr Jiszsz mz Jon, mrkc tqmncngrde mz presin. Aveatile oblamzde nzling. ¹⁹ X sc tqatwzlrpe-ngrbzle mz Kxetu, murde naveatibzlr kx nide Kxnmcpnx o trtingr. ²⁰ Kx nzvzpemlr kc mz Jiszsz, sc tzrpipebzlr kx, "Atwzlr-ngrmle nigr Jon Kxawrkxtr bam. Rpimle naveatibzkr bam kx, ?Nim Kxnmcpnx kc tzpi navzm, o na-aenzlimoukr dq ncblo kzble?"

²¹ Mzli lcdepwz amrlzle leplz kxkqlu kx nzyagoxng, x kxnmncng mz drtq kxetq, x maszlrpx-ngrde drka' kx mnctipxm mz leplz. X leplz kxkqlu kx mztr kcba, mztr aobqpe-mopwz Jiszsz. ²² Rpbzle mz menrpa kcng tqatwzlr-ngrm Jon kx, "Yzluamu x pibzmu mz Jon da kcng tqmcamu x tqxlramu mrka mz nzwz-krnge. Murde kxnmztr kcba nzobqpeng, kxnbzxp-long nzvznepeng, kxnzyc-ngrng zkrkqlu nzlqngipe-moung, kxnradrtqdr ngq nzxlrpeng da, kxnbzbpeng nztulz-moung, x Nrpakxmrlz nzyapwxtpxbz mz leplz kxnbzbpeng. ²³ Sa namrlzbz mz ncblo kx trpxpx-ngrdeu ninge mz trnzale-krngeu nike pnz drtwr leplz kx nangi nzwzkr Kxnmcpnx." †

* ^{7:6} Pile da lc murde mz Lou scdr lr Jiu nzdwatr-krdr ma nyz kxtrngiulrJiu, batrpzle trntakitr-krdr mu nzprtrngr mz nzangiongr. ^{7:22} Asaea 35:5-6; 61:1 ^{† 7:23} 7:22 Natq angidr mz kxnyzcng zkrkqlu ngi kxnyzcng lepz. A' mz natq lr Grik trni-txpwzu lepz, a' ngi kz nyagox ngr be nrkrdrq amrlx kxtrka kx krlzle nzprc-krbzle mz leplz.

²⁴ Mz nibr menrpa ne Jon nzvzpx-krdr, Jiszs kc tqpipxbzle nzmyalzkr Jon mz leplz kcng. Rpibzle kx, “Trvz-ngrpwzmuu mz Jon mrkc lzke nzmc-krmu ncblo kx tekqtr-zvzle da kx pile, mz nzapu-krde nen i kx yamengr nenq mrkang kqlu. A' kc tqvz-ngrbzmu naxlramu natq angidr. ²⁵ X trvz-ngrpwzmuu kx namcamu ncblo kx rngisc, kx pxi-ngrde lrpz kx nzxpengr lqlwx. Murde ncblo kxmule lc tqmnc zpxw trnzmcu mrkc lzke, a' nzmcpwz mz ma nyd king. ²⁶ Krlc tqvz-ngrbzmu nzmc-krmu profet. A' napibo bamu ncblo lc tqmcamu myaszlzle profet kcng bqnc. Murde nwz-wz-krde myaszlzle nwz-wz-krde profet amrlx. ²⁷ Murde Jon nide menrpa kc tqplzpxle nzvz-krm Kxnzmcpx. Da kc tqwai nzpipxkr Gct le mz Nzryrngrkxtr kx, ‘Krlc menrpa nenge. Sa na-atwzlr-ngrne nartwayz-kaipz bam, murde naokatrle leplz nengeng mz nzoliqti-krdr nzvz-krbzme.’” ²⁸ Rpi-mopwz Jiszs kx, “Napibo bamu, trpnzngr ncblo mz nrhc kx myaszlzle Jon, abzo mzli kc krlzmle mzli ka. A' abzo mzli ka, leplz txne amrlx kx nzrlr-lzbq-ngrmqng bange mz nzmnclz-krbz mz Gct namyaslzlr nide.” ‡

²⁹ Zbz Jiszs rpi-mopwzle kx, “Mzli lcde leplz amrlx x ncblo kcng tzatakqting takes tzobqszo nzlxngitilr nqmq kr Gct kc txxrbzlr mz Jon x sc tqawrkxtrpeng Jon. ³⁰ A' kzdung Farzsi x krkcng tzalvztrng mz Lou sc Mosis nzpxtxpx-ngrdr me pnz drtwr Gct mz nzpxtxpx-krdr nzawrkxtrkr Jon nidr.

³¹ “Naryapwxtr-mopwc' mz nimu leplz kcng tzmncng mzli ka. ³² Apuamu doa kxnztopwz kcng drtwrdr tresapxu. Kzdq dzbede tzkrlkxbzng mz kzdq kz dzbede. Tzrpibzlr kx, ‘Ngr-ngrbzkr nabz ngr nzabrtzngr, a' trelawamu. Ngr-ngrbzkr nabz ngr nzyrningr, a' tryrniwamu!’

³³ “Apuamu nidr murde Jon Kxawrkxtr vzm x trmuneu bret x tr-rmnqnekzu waen. A' rpi-ngrnamu kx, ‘Drka' mncpxm bade!’ ³⁴ X ninje Mrlx Leplz vzmc, x mux dakxnnzng x rmnq-kzx waen. A' sc tqrpipelineam kx, ‘Mcamu ena mrlx ka! Mrlx kx mutu x rmnq kato! Kzte ncblo kxnzatakqting takes x leplz kxnztrka-kzng!’ ³⁵ A' nadcpx mz drtwrmu kx nztubqkr natq opx zlwz mz nztubqkr doa kx atutr. X sa namcamu kalr nztubq-krgr rlilrgr mz da kc navzpxmqng mz nzmnckr leplz kcng tzatutrlr natqgr.”

Kzdq Farzsi X Kzdq Olvz Kx Mnc Mz Alwx

³⁶ Kzdq Farzsi drtqde Saemon, aveatile Jiszs mz nzmupx-lxblr-krdr badr. Jiszs vztrpz ma nydze x sc tqprtrpe mz nzmungr. ³⁷ Kzdq olvz mnc mz mztea lc, kc tqale-zvzle alwx mzli kc. Kx xlrpele nzmukr Jiszs mz ma nyd Farzsi kc, sc tqvzpebz, twzbzle botol kx yrbulzm mz tolo kx mnre mrlz zlwz x lqlwx nzxpengr. ³⁸ X esotrpz mz nanyc Jiszs, tqyrni x tqalprtibzle nanycde mz drlemzte. Zbz amingrtxbzle nanycde mz nqnginarde, x sc tqtcngitx-zvzpwzle nanycdeng. Zbz sc tqpulitxopebzle tolo kc mz nanycde kcng li mz nzawi-krbzle bade nivz lrde. ³⁹ Farzsi kc tqaveatile Jiszs mcpzle da lc. X sc tqrpipelinele mz drtwrde kx, “Ncblo ka nzmu nangini-angidrde profet, e nzmu krlzpele kx olvz ka ngi olvz kxale zvz alwx x nzmu rpwa'-nrbzle nzbztr-krbzle nide.”

⁴⁰ A' Jiszs krlzipele da kx yclzm mz nabz Saemon, sc tqrpipelinebzle kx, “Saemon, kzdq kc da napibo bam.” Rpibz Saemon kx, “Pim ye, kx kxakrlz.”

⁴¹ Rpibz Jiszs kx, “Kzdu kcng ncblo nzling. Ncblo kcng nzling nzkaonbzng srlrni mz kzdq ncblo kxrngisc. Kzdq kaontibzle srlrni trtqki-nzlvqn (500),

◊ 7:27 Malakai 3:1 ‡ 7:28 Leplz amrlx kcng tzlxngitilr Jiszs mz nibr nztulz-krmlle mz nzbzng nznqinidr lrmakxtr. X lrmakxtr lcng ngi olvz r Kraes x Mqngrkxtr mncpxm badr. Mz nzmu-krde lcde, krkcng tzprtrng mz dzbede lc tqngi leplz kxnzlxngitilr Jiszs, nzmyaslzlr kxnzlxngiti-pnzlr Gct, kx nzapulr Ebraam, Mosis, x Devet.

x kzdq kaontibzle srlrni nzpnu-nzlvqn (50). Srlrni kxesz' ngi narncbr ngr nzwzngr mz zbzq kxesz'. ⁴² Trpnzngr nidr kx takitrde nzhka-dwzlr-moung
kaon scde. Zbz kxetu kc sc tqpipebzle kx bzkq nzxpenepelr ye. ?Nzmu-
krde ke, mrlx kcmang nzling neke namrlzti-zlwzpele ncblo kc tqrngisc?"
⁴³ Rpibz Saemon kx, "Mwx ncblo kc kaon scde tqet." Rpibz Jiszs kx, "Da
angidr la tqpiq."

⁴⁴ Zbz o-lxlrbz mz olvz kc, sc tqrpipebzle mz Saemon kx, "?Mcq
olvz lc? Dwatrpc' ma nyzm, a' trpnzngr lue kx kame kx nawzti-ngrne
nanycnge, mz nzvz-nqblq-krde nqmq krgu. A' wztipebzle nanycnge mz
drlemzte x amingrpebzle mz nqnginarde. ⁴⁵ Trabrtzlvzwq ninge mz
nzrtcngingr mqnge, mz nzvz-nqblq-krde nqmq krgu, a' tresakika nztcngi-
krde nanycnge kx vztrpc' kcma. ⁴⁶ X kxmule-esz' traeluqw narnge mz tolo,
mz nzvz-nqblq-krde nqmq krgu, a' aelupebzle nanycnge mz tolo kxmrlz-
esz'ngr.

⁴⁷ "Napibo bam kx olvz lc tqaelwapx-ngrde nzetukr nivz lrde mz
nzipqpx-krbz Gct alwx ngrde kxkqlu. A' mrlx kx plzpxbzle alwx ngrdeng
kxipiz mz Gct, Gct ipqpxbzle alwx ngrde kxipiz kz, x rblxbz bade nzxngi-
krbzle nivz lr Gct. Mz nzmu-krde lcde nzmrlzti-krde Gct topwz." ⁴⁸ Zbz sc
tqrpipebz Jiszs mz olvz kc kx, "Alwx ngrmqng nzipq-angidrpe." ⁴⁹ Leplz
kcng tzmung badr, sc tzrpi-etrpelr kx, "?Nelc krlc tqkrlz-kzle nzipqpxngr
alwx?" ⁵⁰ A' rpibz Jiszs mz olvz kc kx, "Nzrlxngiti-krm arlapxpele nim.
Krka'-ngrne kx namnc-zpwxq. Bzkq da kx nakxnepe drtqm."

8

Olvz Kcng Tzvz-nqblqlr Jiszs

¹ Mz nibrde, Jiszs aesz'tipeleng taon x mztea kcng, mz nzvztr-krde elr. X
yapwxtipxle Nrpakxmrlz kx Gct sa tqvectrpemle leplz mz nzmnclz-krbzlr
bade mz nzngini-krde King rdr. Nzvzng badr aposol kcng nzpnu-esz'-
nrade-li (12). ² Nzprtr-kzpznng kzdung olvz kx amrlzleng mz zyagox, x kx
maszlrpx-ngrbzle drka' badr. Kzdq olvz lcdeng drtqde Mxri kc Makdala.
Drka' rlimz nzmaszlrpx-ngrbz bade mzli kc. ³ X prtr-kzpznng Joana kernalz
Kusa kc tqngi ncblo kxetu wztrpz mz King Herot Antipas. X prtr-kzpznng
Susana, x kzdung kz olvz kxkqlu kx nzokatrlr Jiszs x ncblo nedeng, mz
trau scdr.

Drtc' Pwx Kx Bletipx

Matiu 13:1-9; Mak 4:1-9

⁴ Leplz kc tzavzpmqng mz Jiszs, nzyrkrkimlr mz taon kcng amrlx. X zbo
ngr leplz kx nzmnccpeler mrkc, Jiszs kc tqayapwxtipxbzle nzycmne-ebzpxngr
lc. ⁵ Rpibzle kx, "Kzdq mzli kzdq kc ncblo oliqtile drtc' ngr nrlanc nyzde.
Zbz sc tqarlxpele nra wit nyzdeng, murde rpile nayrkqlvzle mz drtc' mz
nibrde. A' mzli kc tqarlx-ngrde nra wit lcdeng, kzdung nztationg mz
lrvzki kx drtc' ngrde mqngi, x nztulvzto leplz x nzngqtilz-kzpqng utc. ⁶ X
kzdung nra wit kcng taong me drtc' ngrde melx, ycom mz rplz. Nzlvcpulz-
animqng, a' nzglrtng x nzmxtx-ani-moung, murde mrkc tewa trdc-zvzu
x drtc' trlrpru. ⁷ X kzdung mou nztationg mz drtc' ngr ncngrbz. Krlcng
nzlvcpumilzm lxbi x nzyrlvilvzo lxbi nidr. ⁸ X kzdung mou nztationg mz
drtc' kxmrlz. Krlcng nzyrlvzlmqng x nzpang. X nzyrlqbzlr nradr kqlutx
zlwz." Zbz xplrmitxbz natq Jiszs nzyrpi-krbzle kx, "Doa kx yrplapx, na-abzle
nztwz-krde drtwr ngr natq lc."

*Drtc' Pwx Kx Bletipx Ngi Nqmq Kr Leplz
Matiu 13:10-23; Mak 4:10-20*

⁹ Mz nibrde mzli kc tzmncpe-ngrdr esz'-krdr, ncblo nedeng nzveatibzlr mz Jiszs drtwr ngr nzycmne-ebzpxngr kc. ¹⁰ Rpibzle kx, “Ayrbq-zpwx-ngrbo bamu nqmq kr Gct mz nzngini-krde King r leplz nedeng, kc tqyc-kapq mzli kc. A' mz leplz kcng tzpxtxpx-ngrdr nxzlr-krdr da angidr, napipxbo badr mz nzycmne-ebzpxngr. Nidr leplz kcng tqycmnetrngr profet Asaea mz nzrpipxkr Gct kx, ‘Kxmule-esz' nzobqng, a' trnzkrlzlu da angidr. X kxmule-esz' nzlalztqng, a' nardr tryrplatrpwzu.’” ¹¹

¹¹ Rpibz Jiszs kx, “Drtwr ngr nzycmne-ebzpxngr kc nide sele: Nra wit kcng tqrarlx ncblo kc ngi natq Gct. Drtc' kc pwx ngi nqmq kr leplz.

¹² Lrpzki lc drtc' ngrde tqmqngi, drtwr ngrde leplz kcng nardr tqmqngi mz nxzlr-krdr natq Gct. Murde mzli kznikeng nxzlr-ngrdr nrpa ngr Gct, Nar Drka' vzm x katpxbxzle badr, murde rpile narblxbz badr nzrlxngitingr x nzrlapxngr. ¹³ Drtc' kc tqmelx drtwr ngrde leplz kcng nabzdr tqnrgo. Nzxlrlr natq Gct x nzabrtzlvzlr nztwz-krdrle, a' natq Gct trpnzngr dzbrde. Nzrlxngiti-krdr mrbcnepwz, murde rblx nzolvz-amqngi-krdrle mzli kc tqprtztingr nzatalzngi. ¹⁴ Drtc' ngr nibr ncngrbz drtwr ngrde leplz kcng drtwrdr tresz'tiu. Murde nzxlrlr natq Gct, a' trbrtiu drtwrdr. Nzaoti-zlwzkr drtwrdr dalr nrlc kxkqlu nzapulr lxbi kcng tzyrlvilvzolr nabzdr, x trpnzngr nzbrpe-krdr. ¹⁵ Drtc' kxmrlz drtwr ngrde leplz kcng nabzdr tqmrlz x tzoliqtilr nzlxngiti-krdr natq Gct. Murde nztwzlr x nzolvzlr mqngi, x nra nzrlxngiti-krdr yc-zvzbz, mz nzvectr-krmlr leplz mz Gct.”

*Gct Suti Drtwrde Nrpakxmrlz Natalvzpxle Leplz Amrlx
Mak 4:21-25*

¹⁶ Mz nzaelwapxkr Jiszs kx Nrpakxmrlz na-apule zyzlr, rpibzle kx, “Lam trnztekatu sc tzalalvzope topa. X trnzawxbulzpwzu mz nabz da. Lam nzadolzpwz wq, murde leplz namclr zyzlr mz ndzwatr-krmlr brma. ¹⁷ Mz nzmu-krde lcde, kxmule-esz' Nrpakxmrlz trkrlzkapzle leplz amrlx, a' sa naopxbz badr kalr. X mzli lc sa nayrplatitr nardr x na-aelwapx-ngrbzle da kx yc-kapqbepz badr.

¹⁸ “X na-aclive-angidramu murde natq Gct kc tqxlamu natwz-kzamu mz nzmnc-krmu. Murde doa kx twzle natq Gct mz nzmnc-krde, natwz-moule nzyrplapxngr mz kzdung kz natq Gct. A' doa kx trtwzleu natq Gct mz nzmnc-krde, trnatwzleu kzdq mou nzyrplapxngr. X kxmule-esz' nzrkrlzngi kxtopwzne kx ycbz bade, a' sa nakatpx-kzpz Gct bade.”

*Kx Ngi Angidr Lxede Jiszs X Mzledeng
Matiu 12:46-50; Mak 3:31-35*

¹⁹ Kzdq mzli lxe Jiszs x mzledeng nzvzmqng bade mz ma kc tqmnc-ngrde. A' trnzdwatr-pnzpwzung brma, murde zbo ngr leplz kcng tzmncong mrkc.

²⁰ Kzdq ncblo rpibzle mz Jiszs kx, “Lxem x mzlemqng la tztutrpqng yz, nzrpilr namclr nim.” ²¹ X sc tqrpipebzle kx, “Lxenge x mzlengeng dekcng txxlrng natq Gct x nztwzlr mz nzmnc-krdr.”

*Jiszs Aole Nrwx Mz Kzdq Nenq Kxetu
Matiu 8:23-27; Mak 4:35-41*

²² Kzdq zbo Jiszs badr ncblo nedeng nzprtng mz kzdq bot kxetu, x sc tqrpipebzle badr kx, “Na-alilvckiopeku mz nrlar dxbu kc.” X sc tzalilcpeng. ²³ Nzvo-krbzlr kc, Jiszs kc tqmwipe. Kzdq nenq kxetu vzobz mz nabz dxbu kc. Zbz bot kc sc tqdwatiope lue. Mz drtwrdr sc tzrpilr

naboopeng. ²⁴ Nzvzbzng mz Jiszs sc tzameopelr. Nzrpipebzlr kx, “Kxetu, Kxetu! Nabzpeku!” Jiszs dwalzm, x lclvztxde nenq x ebio kx yclwz. X nzamatxo-pnzung x nrwrx votx pnz. ²⁵ Zbz rpibzle mz ncblo nedeng kx, “?Nike tr-rlxngiti-ngrwamu?” Nzkcti-lzbqng x nzmwxr-kzng, x sc tzrpietrpelr kx, “Eke! ?Ncblo kznika? Rkabz natq mz nenq x nrc, x nzvz-nqblqlr natqde!”

*Jiszs Maszlrpx-ngrde Drka' Kx Xplr Mz Kzdq Ncblo
Matiu 8:28-34; Mak 5:1-20*

²⁶ Nzkaputrpzng mz nrlarnrlc kc tqycngr taon kcng nzpnu-esz', mrkc tzmncngr leplz kcng trngiulrJiu. Kzdq taon lcde drtqde Gergesa, yckiomle mz kzdq nrlar Dxbu Gzlili, x Provins kc Gzlili yckiomle mz kzdq nrlarde. *

²⁷ Jiszs kx poobzle mepz, sc tqrmctipe kzdq ncblo ngr taon kc, kx mnccpx-ngrm drka'. Mzli boipe, kx tqvznede la, x trpnzngr scde lrpz. X trmncpeu mrnyzde, a' mnctxpepwz mz butqbr kx nzryrtzmqng kxnzbzng. ²⁸⁻²⁹ Mzli kqlupe tqlolvzng drka' kc le. X leplz nzapusr-ngrdr nide ncblo kxzpresin. Kxmule-esz' mqdeng x nanycdeng nzpetibzng mz sen, a' sen lang tqnikileng x tqavztr drka' kc mrkc lzke. Kx mctxbzle Jiszs, katpxbzle kc natq ngr nzneplangr x nzky'a-nimzng. X rtctxo-lzbqbz bade. Rpibz Jiszs mz drka' kc kx, “Prpxm bade!” Sc tqnemipele kx, “Vrr! Jiszs, Mrlx Gct kc tqmyalzesz'ngr! ?Nike tqotime? Yrnitrpo bam, bzkq ayrplapxq nrkrdrqnge!”

³⁰ Jiszs veabz rpibzle kx, “?Drtqm neke?” Rpibzle kx, “Drtqnge Siu Kqlu.” Murde drka' kxkqlu nzyrkrtrpebzng bade. ³¹ Drka' kcng nzyrnitirpzlr mz Jiszs nzrpibzlr kx bzkq atwzlr-ngrbzle nidr mz gq kc trpnzngr noude mz Hxl. ³² X mncc-aepztrpz mrkc kzdq nrtrq r poi kxetu sc tzmung mz nra. Drka' kcng nzyrnitirpzlr mz Jiszs kx narlr-ngrbzle badr nzvztr-krdr mz poi kcng. X sc tqrlrpe-ngrbzle. ³³ Zbz drka' kcng nzdwapxmqng mz ncblo kc x nzdwartr-alzung mz poi kcng. X nrtrq r poi kc nzvoong mz nrlar nqngitrlqli, nztaong mz nabz dxbu kc, sc tzboopeng amrlx.

³⁴ Kx nzmc ncblo kcng tzaclveng, nzngrlrng sc tzpinepelr nrpa ngrde mz mztea x mz nabz nrlanc kcng. ³⁵ Zbz leplz kxnzkqlung sc tzyrkrpebzng mz nzmc-krdr da kc tqprtz. Nzvzmqng mz Jiszs x nzmcpelr ncblo kc tzprszpx drka' kcng, pxixpe, x drtwrde opxpe. X sc tqwxbulzbz mz nanyc Jiszs, tqqlalztqpebz mz nzalvztr-krde. Zbz sc tzmwxltxpeng amrlx ngrdr, nzmwxltilr zmatq ngr Jiszs kc tqmyalz. ³⁶ Krkcng tzrmcng sc tzpipebzlr mz leplz kcng tzvz-atemqng kxmu ncblo kc nzmrlz-krde. ³⁷ Zbz leplz kcng amrlx ngr nrlarnrlc kc Gergesa nzrlxti-nrwrx-ngrbzlr mz Jiszs kx navzpe, murde nzmwxltx-atwrnrpe-ngrng. Zbz mzli kc Jiszs tqprtzpe-ngrde mz bot, ³⁸ ncblo kc tzprszpx drka' kcng, sc tqvzpem tqyrrnitrpebzle mz Jiszs kx navzng badr. A' atwzlrpxngr Jiszs, rpibzle kx, ³⁹ “Yzlupe mrnyzm, x pipx da kc tqwzpe-ngrbz Gct bam.” Zbz Jiszs kc tqrlaszpele mrkc x ncblo lc sc tqvz-zlipele taon kc atwrnrngr, tqpinede da kc tqwz-ngrbz Jiszs bade.

*Inyx Jaerzs X Olvz Kc Tqmaletrpzle Lrpz Sc Jiszs
Matiu 9:18-26; Mak 5:21-43*

⁴⁰ Mzli kc Jiszs tqyzlupe-mou-ngrbzle mz nrlar dxbu kc, zbo ngr leplz kc sc tzabrtzlvzpelr nide. Murde nidr amrlx ngrdr tzaenzlirl nide. ⁴¹ Zbz kzdq ncblo drtqde Jaerzs, sc tqkaputrpem. Nide kzdq kxetu r mangr-nzkrka'ngr. Rtctxo-lzbq-ngrbz mz nanyc Jiszs x sc tqyrrnitrpebz kx navzng

* ^{8:24} Sam 65:7; 89:9; 107:29 * ^{8:26} Mz kzdung nzryrngr kcng pnz taon lc nzrpibz Gadara o Gerasa.

badr mrnyzde. ⁴² Murde inyxde esz'txu, yiz ngrde mwx nzpnu-esz'-nrade-li (12), sc nabzpe. Jiszs kx vzbzle, leplz kcng nzrdrlvzti-lzbq-txpwzng mz nzvz-krbzlr bade.

⁴³ A' kzdq olvz kx tresakiu nzrpwx-krde temz sc tqmnc kz mrkc. Nzrpwx-alokrde lc temz, twzti pele yiz nzpnu-esz'-nrade-li (12) x tqamewetxbzle drtqde. A' trpnzngr kx krlzle nzamrlz-krbzle nide. ⁴⁴ Olvz lc vzdzm mz mzlir zbo ngr leplz kc mz nibr Jiszs x sc tqmaletrpebzle lrpzde. X mzli kcpwz mepyr kc sc tqesakipe. ⁴⁵ Jiszs kc tqrpipele kx, “Neke tqmaletrple ninge?” Leplz amrlx nzrpibzlr kx trpnzngr. Zbz Pita kc tqrpipebzle kx, “Kxetu rnge, leplz amrlx la tzbolikilvzlr nim. Nzkrlzlr kx nzbxtrpzlr nim.”

⁴⁶ A' rpibz Jiszs kx, “Kzdq kc doa maletrple ninge murde krlztix zmatq vzpxpem bange x amrlzpele kc kzdq doa.” ⁴⁷ Olvz kc mcpele kx nzkrlzti, sc tqvzpem, rnrcnepem, x rtctxo-lzbqbz mz nanyc Jiszs mz nzaelwapx-krde nzavzo-lzbqngr x nzamatqngr. Mrkc, mz mz leplz amrlx, sc tqpipxpebzle da kc tqmaletr-ngrbzle lrpz sc Jiszs x kxmu nzmrlztx-ani-krpwzle. ⁴⁸ Rpibz Jiszs kx, “Inyxnge, vzpe x bzkq da kx napnz drtwrm. Murde nzrlxngiti-krm ninge amrlzpele nim.” †

⁴⁹ Jiszs kc tqycmnebe ye, a' kzdq ncblo vzpem mz ma nyz Jaerzs. Rpinemle kx, “Inyxm bzpe, kx Jaerzs. Bzkq akxputipeq kxakrlz la.” ⁵⁰ A' xlrpebz Jiszs, sc tqrpipebzle mz Jaerzs kx, “Bzkq drtwrm talvzo, a' lxngiti ninge, x sa nalu mou.”

⁵¹ Kx nzkrlzbzlr ma kc trpnzngr leplz kx rlr-ngrbzle nzmnccpx-krmlr badr brma, a' ngi txpwz Pita, Jon, James, trtede x lxede. ⁵² Leplz kcng amrlx mrkc tznemipelr nzyrni-krdr. A' mz nzkrlzkr Jiszs kx nzbzkr doa olvz kc trnabzalou, sc tqrpipebzle kx, “Bzkq yrniamu. Doa lc trbzu, a' mwine ye!” ⁵³ A' nzyrpalelvzlr nide murde nzkrlzlr kx doa olvz kc bzpe. ⁵⁴ A' Jiszs dwatrpz x otibzle doa olvz kc, malebzle mqde, sc tqrpibzle kx, “Dwalzm!” ⁵⁵ Nzlu-krde yzlutx-mop x mzli kcpwz tutxlzm. Zbz sc tqrpipebz Jiszs kx, “Kabzmu du dakxnzng namu doa olvz lc.” ⁵⁶ Lxede x trtede kx nzkctipxlrle, naodr mz txpwz. A' Jiszs lclvztxbzle kx bzkq nzpinedr da lc tqngi-dape.

9

Jiszs Atwzlrpx-ngrde Aposol Nedeng Mz Nzlepx-krdr Nrpakxmrlz Matiu 10:5-15; Mak 6:7-13

¹ Jiszs kqleleng aposol kcng nzpnu-esz'-nrade-li (12) x sc tqayrlwr-amqmupele. X mz nzmnclz-krbzlr bade, kabzle badr nzxplrngr x zmatq ngr nzmaszlrpx-krdr drka' amrlx x nzamrlz-krdr kxnyagoxng.

² Zbz atwzlrpxpe-ngrdeng mz mztea kcng trkrlzkapzlrng. Rpibzle kx nayapwxtipxlr Nrpakxmrlz kx Gct sa tqvectrpremle leplz mz nzmnclz-krbzlr bade mz nzngini-krde King rdr. X na-amrlzlr nrkrdrtrq leplz kx nzyagoxng. ³ Rpi-mopwzle badr kx, “Bzkq da kx natwzamu mz nzvzpx-krmu, kx apule nctoko, bxli, dakxnzng, x srlrni. X bzkq nimu kx nartwz kz nzkq krali. Murde na-abrtrpzmu drtwrmu mz Gct nzrka-krde. ⁴ Drlve ke nzaodu-ngrmu, mncpepwzmu mz ma lapwz esz' navz, nakrlzbzle mzli kx narlasz-ngrnamu mztea la. ⁵ Drlve ke leplz trnzaodu-ngrdru nimu, rlaszamu mztea la x rtc-ngrbzmu rplz nakrlz-ngrdrle kx nqmq krdr trka mz nzapu-krdr kxnyagoxng.” ⁶ Aposol kcng nzrkalzmqng, sc tzvz-zlipelr

† ^{8:48} Mwxlerti-lzbq mz nike na-alebz Jiszs badr zbo ngr leplz kcng bade. Murde nzyagox-krde batrpe-kzpze trnztakitr-krdeu nide mz nzprtrngr mz nzangiongr, x nabatr-kzpze doa kcng nabxtrpzlr nide trnztakitr-kz-krdr mz nzprtrngr mz nzangiongr mz nzvz-nqblq-krde Lou sc Mosis. [Livae 15:19-30]

mztea kcng amrlx. Tzyapwxipxlr Nrpakxmrlz kc x tzamrlzting leplz kx nzyagoxng mrkc atwrnrngr.

*King Herot Antipas Xlrle Nrpa Ngr Jiszs
Matiu 14:1-12; Mak 6:14-29*

⁷ Zbz King Herot Antipas, kc tqaclvele lr Gzlili, xlrle nrpa ngr da kcng tqaleting Jiszs x ncbllo nedeng. Drtwrde mrbrtxtrpz, murde mzli kc kai pibzle mz kzdung ncbllo ngr vea nedeng nanibqlr Jon. A' kzdung leplz tzrpilr kx, "Jon Kxawrkxtr tulzpe-mop mz nzbzngr." ⁸ Kzdung nzrpilr kx profet Elaeja kc bqnc, tqmatq tqadcpx-lzbqpe. X kzdung nzrpilr kx kzdq kz profet ngr mzli kc lupe mou. ⁹ Rpi Herot kx, "Nar Jon lakipxpe kzdung ncbllo ngr vea. ?A' nelc krlc tqxlrk tqaleti da lcng?" X sc tqrpile namcle Jiszs.

*Jiszs Apuleng Ncblo Siu-nzlvqn (5,000)
Matiu 14:13-21; Mak 6:30-44; Jon 6:1-14*

¹⁰ Aposol kcng sc tzyzlupemqng mz nzryapwxpx-krdr Nrpakxmrlz x nzamrlz-krdr leplz kxnzyagoxng, sc tzpipebzlr mz Jiszs da kcng amrlx tzalelr. Zbz sc tzvzpxxpeng me esotrpz mz kzdq taon drtqde Betsaeda murde namnc-ngrdr esz'-krdr. ¹¹ A' kx nzxlrbz zbo ngr leplz kcng le, sc tzvz-nqblqpele nide. Kx nzkrlzbzlr nide, sc tqaodupele nidr. X sc tqycmnetr-ngrbzle badr kx Gct sa tqvectrpemle leplz mz nzmnclz-krbzlr bade mz nzngini-krde King rdr. X amrlzle krkcng tzyagoxng. ¹² A' mzli kcpe mz milzpq, aposol kcng nzvzmqng bade sc tzpipebzlr kx, "Kxetu, atwzlrpxngr leplz lcng mz mztea x nrlanc kcng tzyctineng mrlc, murde namwing x narmctineng nadr dakxnzng. Murde trpnzngr me narmctingr leplz lcng dakxnzng."

¹³ A' Jiszs rpibzle badr kx, "Nimu kx narkabz nadr dakxnzng." Nzrpibzlr kx, "Yctxpqng bagr bret nzlvqn kxtopwzting x nc kxsupe li. Takitxtrpwzle nzvz-krgr nzxpe-krgr dakxnzng nang zbo ngr leplz lc." ¹⁴ (Murde ncbllo nzkqlu-krdr nzesolzbzng mz siu kx nzlvqn (5,000). A' trnzrlwxtrpwzu olvz x doa kx nztopwzng.) Rpibz Jiszs mz ncbllo nedeng kx, "Awxbuamu leplz mz dzbedeng. Mz dzbede kxesz' leplz nakrlzbzle nzpnu kxnzlvqn (50)."

¹⁵ X sc tzawxbutiopelrng. ¹⁶ Jiszs kalzmle bret kcng nzlvqn x nc kcng li, x obqlz mz bongavz mz nzkrka'ngr x sc tqawipebz mz Gct. Zbz lopxitxdeng, x sc tqkapebzleng mz ncbllo nedeng, tzakipxbzlr mz leplz kcng nzkqlung.

¹⁷ Leplz amrlx nzmung x nelzdr krlctxtrpz, x ncbllo nedeng nznulvzo-moulr topla nzpnu-esz'-nrade-li (12) mz nctq dakxnzng kx yctxo.

*Pita Glxle Kx Jiszs Nide Kxnxmcpx
Matiu 16:13-19; Mak 8:27-29*

¹⁸ Kzdq zbq, mzli kx Jiszs krka'-ngrde esz'-krde, ncbllo nedeng nzvzmqng bade, sc tqveapebz badr, rpibzle kx, "?Myx kxmu nzglxkr leplz ninge?"

¹⁹ Nzrpibzlr kx, "Nzkqlung nzrpilr kx nim Jon Kxawrkxtr tulzpe-mop mz nzbzngr. Kzdung nzrpilr kx nim Elaeja. X kzdu-kzng nzrpilr kx nim dq profet kc bqnc tqlupe mou." ²⁰ Rpibzle kx, "?A' nimu, myx kxmu nzglx-krnamu ninge?" Rpibz Pita kx, "Kxnxmcpx ne Gct." ²¹ Zbz Jiszs rngidrlvz-ngrbzle badr kx trkrlzkapzle mzli r nzyapwxtinge-krbzlr mz leplz nzngini-krde Kxnxmcpx.

*Jiszs Ycmnetr-ngrde Nzbz-krde X Kxnamu Nzrvz-nqblqng Nide
Matiu 16:21-28; Mak 8:30—9:1*

^{9:8} 2 King 2:1-12; Malakai 4:5; Matiu 16:14; Nzaelwapxngr 11:3-6

²² Sc tqrpipebz Jiszs kx, “Ninge, Mrlx Leplz, drtqnge naetqtx zlwz, x natrkalrpx-ngrdr ninge lrtzlvz ngrgung, nidr badr kxnzetu rdr pris, x kxnzalvztrng mz Lou sc Mosis. Sa nanibqlr ninge, a' sa na-atulz-mople ninge Gct Trte mz zbzkratq mz nibr nzbbz-krnge.” ²³ Zbz sc tqrpipebzle badr amrlx ngrdr kx, “Doa kx navz-nqblq-angidrle ninge, narlrpx-lzbq mz nzaetq-ngrbz drtqde mz zbzkr kang kqlu. X naesablqtile me pnz drtwrde esz'-krde, x bzkq axtxbzle nzo-zli-krde lrpzki rnge. ²⁴ Murde doa kx otr-zvzngr drtwrde nzlu-krde, sa namale-lvile nzlungr kxboi. A' krkc tqyrlqtxole nzlu-krde murde lxngitile ninge, sa naprtr mz nzlungr kxboi. ²⁵ Mane nznginingr bcnryr mz nrlc ka x amrbrtxtrle nzlu-krde mz nrlc kc navzm. ²⁶ Doa kx pxtxpx-ngrde ninge x natqngeng mz nzngini-krnge Mrlx Leplz, sa napxtxpx-kz-ngrne nide mzli kc nayzlu-ngr-mopwc' mz zluli rnge x zluli r Trtenge x enjrl kxnztrng. ²⁷ A' napi-angidrbo bamu kx kzdung nimu sa nalubeng mzli kc Gct na-aelwapx-ngrde zmatq ngrde mz nzvectr-krmle leplz mz nzmnclez-krbzlr bade mz nzngini-krde King rdr.” *

Nrkrdrdq Jiszs Tekqtr-lzbq

Matiu 17:1-8; Mak 9:2-8

²⁸ Mwx zbzkr tqrpipebzle da lcng, vzmileng Pita, Jon, x Jemes x sc tzvzdzpeng mz kzdq newz murde Jiszs nakrka'. ²⁹ Mzli kcpwz tqkrka'-ngrde, Jiszs mzte kc tqblepxpengr x lrpz scde kc tqpnaptxppe. ³⁰ Nzpwrkilvc-ngrdr ncblo nzling, Mosis x Elaeja, kcng tzupeng badr Jiszs mrkc, tzycmepeng. ³¹ Ncblo lcng nzadcpk-lzbqng mz zluli kxetu, sc tzycmnetrpe-ngrdr kxnamu nzatutrkr Jiszs me pnz drtwr Gct mz nzbbz-krde Jerusalem. ³² Mzli lcde Pita nidr badr kztedeng nzmwipeng. A' kx nzdwazmlr, sc tzmcpelr zluli r Jiszs, x nzmcpe-kzlr ncblo kcng nzling tztung badr. ³³ Mzli kc ncblo kcng nzling tzrpilr nzrlaszpe-ngrdr Jiszs, sc tqrpipebz Pita mz Jiszs kx, “Kxakrlz, mrlztx angidr nzmnk-krgu mrka. Mwx nawztibzkr du matelq natq, nangi nyzm dq, nyz dq Mosis x nyz dq Elaeja.” (Trkrlz-angidrleu da kc tqpile.)

³⁴ Mzli kc tqycmnebe-ngrde, kzdq dc当地 aelwapx-lzbqng x akqlvztxde nidr mz zmyo ngrde. X nzmwxlrtx-pnzng. ³⁵ Natq Gct vzpxm mz dc当地 kc. Rpibzle badr kx, “Krlc mrlxnge Kxnzmcpx. Lalztqbzmu bade!” †
³⁶ Natq kc kx esakitxde, Jiszs kc tqututxpe mrkc esz'-krde. Da lcng yclrpitxtrpwz badr Pita, Jon x Jemes. A' trpnzng kx nzpi-nebadrle mzli lcde.

Rblxbz Mz Ncblo Neng Jiszs Nzrmaszlrpx-krdr Drka'

Matiu 17:14-18; Mak 9:14-27

³⁷ Nrlc ngrlxobz sc tzvzopemqng mz newz kc. Zbz zbo ngr leplz kxetu sc tzrmctipeng Jiszs badr Pita, Jon x Jemes. ³⁸ Kzdq ncblo sc tqkabopxpm mz nabz zbo ngr leplz kcng. Rpipxmle kx, “Kxakrlz! Mctxbz ena mrlxnge, murde mrlxnge delcpwz esz'txu! ³⁹ Kzdq drka' mnccpxm bade, x mzli kx dwatitr-ngrde mrlxnge, sc tqanepele nide. X batrpzle nzglqkr nimzle, vz vz mzli kx nqbya ngr naode wxbutr-ngrbzle. Tqataktibzle drtqde, x waisrzvz-ngrde nide! ⁴⁰ Yrnititrpo mz ncblo nemqng kx namaszlrpx-ngrbzlr bade. A' trnzyatrpwzung.”

* 9:23 Luk 14:26-27 * 9:27 9:23 Jiszs pi-angidrle kx, “Naglqlzle kros ngrde.” Kros drtwr ngrde nzaetqtingr drtq. 9:27 Kxnzetzet mz Nzryrngrkxtr, mz drtwrdr natq lc ngidatipe mz kzdq mzli lcng tq: mz mzli r nztekqtr-lzbqkr nrkrdrtq Jiszs, mz mzli r nztulz-krmle mz nzbbzng, o mz mzli r nzvzo-krm Mqngkrkxtr mz nibr nzvzdzkr Jiszs Heven. Murde mz mzli lcng tq, Jiszs vectrple leplz bade mz nzlxngiti-krdr nide. † 9:35 Natq Gct lc drtwr ngrde kx nzalvztrkr Jiszs myaszpxle Lou sc Mosis x nzryrkr profet amrlx. [Sam 2:7; Asaea 42:1; Matiu 3:17; Mak 1:11; Luk 3:22; Lou Kcpwz 18:15; 2 Pita 1:17-18]

⁴¹ Rpibz Jiszs kx, “?Nike nawai-mopwc' bamu? Nzmnc-krbo bamu mzli boipe! A' trkrlzkalamu nzrlxngitingr x narmu kc tqmqngibe.” Zbz sc tqrpipebzle mz ncblo kc kx, “Vzmim mrlxm mrka.” ⁴² Doa ncblo kc kx vzmle, drka' kc sc tqrtcope-ngrde nide mz drtc' x sc tqngi-batrpebzle nzglqkr nimzle. Jiszs pnanatile drka' kc. Amrlzle doa ncblo kc, x sc tqavzpebzle mz trtede. ^{43a} Leplz amrlx nzkctitpxl zmatq ngr Gct kc tqmyalz.

*Nzwrde Krali Kx Ycmnetrngr Jiszs Nzbxz-karde
Matiu 17:22-23; Mak 9:30-32*

^{43b} Mzli kc leplz mztr tqprtxbe-ngrde x naodr tqmztxbe-ngrde mz nzrkctipx-krdr, Jiszs kc tqrpipebzle mz ncblo nedeng kx, ⁴⁴ “Da lc napibo bamu bzq mrbrtr mz drtwrmu! Ning Mr lx Leplz sa na-aprcbz mz zmatq ngr kxnzmwati drtwrdr ning.” ⁴⁵ A' trnzkrizlru nike drtwr ngrde. Nzylq-kapqbz badr x tryrplatitru nardr. A' nzmwxlrtlr nzveati-krbzlr nzycmnengr lc.

*Doa Kx Myalz-zlwzbz Mz Nzobqkr Gct
Matiu 18:1-5; Mak 9:33-37*

⁴⁶ Kzdq mzli, ncblo neng Jiszs tztalwzti-lzbq-ngrdr neke mz nidr kx myapxbz. ⁴⁷ Krlztrpebz Jiszs da kx tqpnz drtwrdr, zbz otile kc kzdq doa kxtopwz sc tqatupele mz nrlarde. ⁴⁸ X sc tqrpipebzle badr kx, “Mr lx kx vznqblqle ninge mz nzabrtzlvz-krde doa kxtopwz mz drtqnge, abrtzlvz-kzle ninge. X mrlx tqabrtzlvzle ninge, abrtzlvz-kzle Trte kc tqatwzlr-ngrmle ninge. Murde mrlx kx avzo-lzbq, nide kx myalz-zlwzbz mz mz Gct.”

*Mrlx Kx Prtr Mz Nrlarde Nyz Jiszs
Mak 9:38-40*

⁴⁹ Jon rpibzle mz Jiszs kx, “Kxetu rnge, mckr kc ncblo kx rmaszlrpxngr drka' mz drtqm. A' pibzkr bade kx naesakipe, murde trprtrpuu bagu.” ⁵⁰ Rpibz Jiszs bade kx, “Bzkq! Murde mrlx kx tr-rpwa'-ngrbzleu bamu nzale-krmu nzwz-krmu, tukile mz nrlarde nyzmu.”

Kzdung Lr Szmariz Nzpxtxpx-ngrdr Jiszs

⁵¹ Zbq trkqlupeu kx ycbep mz nzbzkr Jiszs x sc tzvzmilzpe Heven, sc tqaoti-angidrpe drtwrde nzvz-krde Jerusalem. ⁵² Atwzlr-ngrde kcng menrpa nedeng kx nartwayz-kaipzng bade. X sc tzvztrpeng mz kzdq mztea ngr Szmariz mz nzoliqt-krbzlr dakxnzng x ma kx namwi-ngrdr. ⁵³ A' leplz kcng mrkc nzpxtxpx-ngrdr nzadwatr-krdr nide, murde opx angidr kx nzvz-krde la navzkile Jerusalem. Tzwai-ngrdr da lc murde lr Szmariz nztrkabzng badr lr Jiu x mzteadau Jerusalem. ⁵⁴ Kx nzxlrpe Jemes nidr mz Jon da lc, sc tzrpipebzlr mz Jiszs kx, “?Kxetu rgr, trnakqlelzkakr nyr Heven navzom x na-atrkatile nidr?” ⁵⁵ A' Jiszs o-lxlvrz sc tqclvzpebzle. {X rpibzle badr kx, “Drka' la tqbatrpzle nzycmne-krmu lc. Murde ninge Mr lx Leplz trvz-ngrpwc'u nzodati-krnge nzlukr leplz, a' vz-ngrmc nzarlapxngr nidr.”} ⁵⁶ X sc tzvzkipelr mztea kzble. ‡

*Drtwr Naesz'ti Mz Nzrvz-nqblqng Jiszs
Matiu 8:19-22*

⁵⁷ Mzli kc tzvzpe-ngrdr, kzdq ncblo rpibzle mz Jiszs kx, “Sa navz-nqblqx nim drlve keng vzkiq.” ⁵⁸ A' rpibz Jiszs kx, “?Krlz-angidr-kzq da kx ycpxm mz nzrvz-nqblqng ninge? Murde fokis nzmnc-zpxwxng mz ma nyzdr kx yclzm mz gq. X utc nzmnc-zpxwx-kzng mz ma nyzdr kx ngi nrla nounc.

‡ 9:56 9:55 Mz kzdung nzryrngr kcng pnz natq lcng tqycpxm mz { } trnzyroung elr.

A' ninge Mrlx Leplz, trmnc-zpxwxu, murde lr mrnyzngeng nzpxtxpx-ngrdr ninge. X sa napxtpx-kz-ngrdr nim. ?Myx kxmule, navz-nqblqpeq ye ninge?"⁵⁹ Rpibz Jiszs mz kzdq kz ncblo kx, "Vz-nqblqm ninge." A' rpibz ncblo kc kx, "Kxetu, na-ale-kaipo me pnz drtwr trtenge mzli ka, a' mz nibr nzbz-krde sc tqvz-nqblq-atex nim."⁶⁰ Rpibz Jiszs kx, "Trtingr! Rlrpe-ngrbz ye mz krkcng mqngrdr nzbzpeng nzyrtzmq-krdr kxnginidr kx nabzng." §

⁶¹ Kzdq kz ncblo rpibzle kx, "Navz-nqblqbo nim, kx Kxetu. A' navztx-kaipo mz trtenge narlxibo bade kx rlr-ngrmle o trtingr."⁶² Rpibz Jiszs kx, "Ncblo kx ryabo nrlanc a' matinetr drtwrde, trnatwzleu dalr nrlanc. X mz nqmq lcpwz, mane nzpnzkr drtwr doa nzmnclz-krbzle mz Gct mz drtwrde nzlitr-krbzle. Murde rblx nzvectr-krbzle leplz mz Gct mz nzngini-krde King rdr."

10

Jiszs Atwzlrpx-ngrde Lepz Nzpu-rlimz-nrade-li (72)

¹ Mz nibrde Jiszs mcpkx-moule leplz nzpnu-rlimz-nrade-li. * X atwzlrpx-ngrde nidr nzli-lxblrng mz nzrtwayz-kai-krbzlr mz mztea kcng amrlx x mrkcng navzkibzle. ² Rpibzle badr kx, "Kxmule-esz' leplz kxkqlu nzoliqng mz nzlxngiti-krdr Nrpakxmrlz murde nanginidr doa neng Gct, a' mzli ka kxnzawzng nzpipzbeng kx nzaelwapx-ngrbzlr lrpzki angidr badr. Mz nzmu-krde lcde, krka'-nrbzmu mz Trte, kc tqoliqtile krkcng nabrti drtwrdr ninge. Rlxibzmu bade nzatzl-krmle kzdung mou kxnzawzng kx naokatrlr nimu mz nzvzmi-krmlr leplz bange. ³ Oliqamu mz nzvzngr. Murde atwzlrpx-ngrbo nimu mz mzlis leplz kxdrka'-ngrng. Nzapulr kuli kzpeto kx nzrmaneutng leplz. A' Gct sa na-aclvele nimu. ⁴ Bzkq rtwzamu trau x bxli, a' twz-txpwzmu sadol kc tqyctr mz nanycmu. Bzkq nzaotr nimu leplz nzycmne-krbzmu badr mz lrpzki, a' rnekitiamu mz nzvzngr. ⁵ Mz nzdwatr-krmu mz ma kx nzabrtzlvzlr nimu, rpi-kaipzmu kx, 'Krka'-ngrne kx Gct na-amnc-zpxwle nimu.' ⁶ Nzmu ncblo kc tqmnc mrla kx tqabrtzlvzle natqmu, nzmnclz-zpxwng la nakrlzbzle nide. Nzmu kx trpnz-ngrde, trpnzng nzkrlz-krbzle nide. ⁷ Mz nzmnclz-krmu, mncpepwzmu mz ma la esz'. Dakxnzng kznike nzkabzlr bamu, ngqamu, murde takitrde ncblo kxwz natwzle dalr nzwz-krde. Bzkq vzkiamu mz kzdq ma x vzki-mouamu mz kzdq kz ma. ⁸ Mzli kx vztr-ngrnamu mz kzdq mztea x nzabrtzlvzlr nimu, ngqamu dakxnzng kx nzkabzlr bamu, kxmule-esz' kxmu nzasungr trvz-nqblqle Loukxtr. ⁹ Amrlzamu nrkrdrtrq kxnzyagoxng mrla, x rpibzmu mz leplz amrlx kx, 'Gct sa tqaesonetrpemle nimu mz nzmnclz-krbzmu bade mz nzngini-krde King rmu.' ¹⁰ A' nzmu kx tqvztramu mz kzdq mztea x trnzabrtzlvzlu nimu, e vzne-alzuamu mz mzlis ma lang. ¹¹ X pibzmu badr kx, 'Rtc-ngrbzkr rplz nakrlz-ngrnamu kx nqmq krmu trka mz nzapu-krmu kxnmnc-mrbrng. A' nadctipx drtwrmu kx Gct rpile navectrpemle nimu mz nzmnclz-krbzmu bade mz nzngini-krde King rmu. A' pxttxpx-ngrnamu nrpa lc, x mz nzmu-krde lc tqpxtxpx-kz-ngrnamu nide!' " ¹² Rpi-mopwz Jiszs kx, "X napi-angidrbo bamu kx mz Mzli Kxmatq

§ ^{9:58} Natq angidr kx pi Jiszs nidr seleng: "Trpnzng nyznge ma kx na-ama-ngrne." A' leplz kxnxkqlung nzrpilr kx fokis drtwr ngrde King Herot kc trngi-angidru lr Jiu. X utc drtwr ngrde lr Rom kcng trngiulrJiu. X lr ma nyx Jiszs drtwr ngrde lr Jiu. Kxmule-esz' lr Jiu nzabrtzlvzlr kxnxzeti kcng trngiulrJiu, a' nzpxtxpx-ngrdr Jiszs, kc tqngi angidr lr Jiu. 9:60 Nzrvz-nqblqng Jiszs namyaszpxle nzrvz-nqblqng nqmq ngr lr mrnyzm. * ^{10:1} Kzdung nzryrngr nzyro nzpnu-rlimz txpwz.

* ^{10:2} Matiu 9:37-38 * ^{10:7} 1 Korint 9:14; 1 Timoti 5:18 * ^{10:11} Aposol 13:51

kc navzm, nzayrplapxkr Gct nidr namyaszpxle lr Sodom kxdrka'-ngrng kcng bqnc.” [✳]

Lr Taon Kcng Tzpxtxpx-ngrdr Jiszs

Matiu 11:20-24

¹³ Rpi-mopwz Jiszs kx, “Agrmplz nimu lr Korasin. X agrmplz kz nimu lr Betsaeda! Murde Gct sa na-ayrplapxle nimu. Trtekqtrwamu nqmq nr drtwrmu kxmule-esz' mcamu da kcng tqmatq tzalepxm mz taon nyzmu. A' lr Taea x lr Saedon kxnzmnc-mrbrng kxdrka'-ngrng nzmyaszpxlr nimu. Murde nzmu rkx lcng na-alepx-pnzmle mz taon nyzdrng, e lr mztea lcdeng nzmu nzpxing dzlvq lrpz x nzrlung bq, ngi dalr nztekqtr-kldr nqmq nr drtwrdr. [✳] ¹⁴ Mz nzmu krde lc, mz Mzli Kxmatq kc navzm, nzayrplapxkr Gct nimu namyaszpxle nzayrplapx-krde lr Taea x Saedon. ¹⁵ X agrmplz nimu lr Kzpznizm murde pxtpx-ngrnamu ninge. Kxmule-esz' glqlz-lzbqamu wq murde rpiamu natakitramu Heven, a' Gct sa na-adwatrl nimu mz Hxl!” [✳]

¹⁶ Zbz rpibz Jiszs mz leplz nedeng kcng nzpnu-rlimz-nrade-li (72) kx, “Doa kx lxngitile natqmu, lxngiti-kzle natqngeng. X doa kx pxtpx-ngrde nimu, pxtpx-kz-ngrde ninge. X krkc tqpxtxpx-ngrde ninge, pxtpx-kz-ngrde Gct, kc tqatwzlr-ngrmle ninge.” [✳] Mz nibr natq lcng, sc tzvzpeng.

Nzyzlu-krm Krkng Nzpnu-rlimz-nrade-li (72)

¹⁷ Mzli kc tzyzlu-ngrm ncblo kcng nzpnu-rlimz-nrade-li nzabrtz-zlwzng. X sc tzrpipebzlr mz Jiszs kx, “Kxetu rgr, kxmule-esz' drka' kcng nzlxngitiml nigr mz nzrkapx-krbzkr natq mz drtqm.” ¹⁸ Rpibz Jiszs kx, “Krlztipex da lc murde Setzn taom mrkc tqycngr zmatq ngrde. Nzo-anikr nztao-krmle apule bzlrpc kc nilz rde tgo ani txpwz nzvzo-krmle mz bongavz. Nzwwz-krmu aovxiole zmatq ngrde. ¹⁹ Kapebo bamu zmatq ngr nzrnzlvzo-krmu zmatq ngr drka', murde namaszlrpx-ngrnamu drka' mz leplz. X kxmule-esz' otaamu badr enqmi rmu Setzn, a' sa na-aovxioamu nide x trpnzngr doa x da kx na-atrkale nimu. [✳] ²⁰ A' bzkq abrtz-ngramu drka' kcng nzlxngiti-kldr nimu. Na-abrtz-kz-ngrnamu ye kx Gct yropele drtqmu mz buk ngr nzlungr mrkc Heven.” [✳]

Jiszs Abrtz

Matiu 11:25-27; 13:16-17

²¹ Mzli lcde Mqngrkxtr prsrle Jiszs, x mz nzabrtz-krde sc tqrpipele kx, “Trte, Kxetu r lr Heven x lr nrlc! Awibo bam murde aelwapx-ngrbzme mz doa kcng tzavzo-lzbqng da kcng tqyrlq-kapqbzme mz ncblo kcng tzsiklung x tzrpir kx nzayrplapxng. Trte, da lc vz-nqblqle me pnz drtfrm. Eu.”

²² Rpibz Jiszs mz leplz kcng tzmncng mrkc kx, “Nzrkrlzng x zmatq amrlx kapem Trtenge bange. Trpnzngr leplz kx rkrlzti angidr ninge, a' ngi txpwz Trtenge. X trpnz-kzng x leplz kx rkrlzti angidr Trtenge, a' nitxpwo, x leplz kcng tqmcpxx mz nzaelwapx-krbo nide badr.”

²³ Zbz Jiszs o-lxlvrtxbz mz ncblo nedeng x sc tqrpi-lrpipebzle badr kx, “Ngi da kx mrlz nzmc-krmu da kcng tqalepex! ²⁴ Murde profet x king nzkqlung mzli kc nzrpilr namc-kzlr ninge, Kxnzmcpk ne Gct x da lcng tqalepexng, a' trnzmc-pnzlru. X nzrpilr naxlr-kzlr da lcng tqxlramu, a' trtxpnzngr.”

Doa Lr Szmariz Kc Tqmrlz

^{✳ 10:12} Nou 19:24-28 ^{✳ 10:13} Asaea 23:1-18; Esikel 26:1—28:26; Joel 3:4-8; Emos 1:9-10; Sekaraea 9:2-4 ^{✳ 10:15} Asaea 14:13-15 ^{✳ 10:16} Matiu 10:40; Mak 9:37; Jon 12:44; 13:20 ^{✳ 10:19} Sam 91:5-13; Mak 16:18 ^{✳ 10:20} Sam 69:28

²⁵ Kzdq kxalvztr mz Lou sc Mosis tulzm sc tqkapxbzle natq ngr nzatalzngr lcde se. Rpibzle kx, “?Kxakrlz, nike na-alex mz nzptr-krnge mz nzlungr kxboi?” ²⁶ Rpibz Jiszs kx, “?Nike pi Lou sc Mosis? ?Myx kxmu nzyrplatitrkr narm le?” ²⁷ Rpibz ncblo kc kx, “Mrlzti Yawe, Gct ngrm mz nabzm atwrnrngr, x mz nzwikr nelzm atwrnrngr, x mz zmatq ngrm atwrnrngr, x mz drtwrm atwrnrngr. X mrlzti kztemqng da kc tqwaiq nzmrlzti-lzbq-krm.” ²⁸

²⁸ Rpibz Jiszs kx, “Nzayzlu-krm natq tubqtx angidr. Nzmu na-ale-angidrq da lc x trpnzngr nzwrdde kx atatxo-ngrnle, sa naprtrq mz nzlungr kxboi.” ²⁹ A' mz nide esz'-krde rpile tubq, sc tqrpipebzle mz Jiszs kx, “?Nekeng kztengeng kx namrlztixng?”

³⁰ Zbz Jiszs kc tqaypwxtipebzle kzdq kc be mz nzaelwapx-krde kx namrlztku leplz amrlx. Rpibzle kx, “Kzdq lr Jiu, vzkiomle Jerusalem, navzkiole mz taon kc Jeriko. Ncblo lc tatxtr mz mqdr ncblo kxdrka'-ngrng. Nzaotpxbzlr lrpzdeng, nzoti-kzpplr trau scdeng, x nztztitxdr nide mule nabztx. X sc tzvopeng. ³¹ Zbz kzdq pris kc tqvokiopemle Jerusalem mz lrpzki kcpwz. Navokiopele Jeriko, vone mz dcngki. Kx mcpele ncblo kc, sc tqkawipele, tgo-ngalukipele mz kzdq nrlar lrpzki, murde ma tqbatrzle trnztakitr-krdeu nide mz nzptrrngr mz nzangiongr mz nzvz-nqblq-krde Lou sc Mosis. ³² Mz nqmq kcpwz, kzdq ncblo kx vzpxm mz nqvi lr Livae vz-kzp mrkc. Obqtxobz mz ncblo kc, x kawitxde. O-ngalukitxde mz kzdq nrlar lrpzki kc, murde rpile kx nzrlr-krbzlr nzptr-krde mz nzangiongr myaszpxle nzokatr-krde ncblo lc. ³³ A' kzdq doa lr Szmariz kx vzkio-kzple mz lrpzki lcde, mcpele ncblo kc, sc tqyctxpe mz drtwre. ³⁴ Vztxbz bade x wztibzle kxsqki ngrdeng mz waen x pnutibzle mz tolo, x pilvzbzleng dzlq lrpz. Zbz glqlzle ncblo kc mz dcngki nede, sc tqvzmipebzle mz kzdq ma kx nzamatrngr mz lrpzki, tqaclvepele elr. ³⁵ Nrlc ngrlxobz, kalzmle kcng trau kx takitrde kzdung zbzq nzmnc-krde mz ma kc, sc tqkapebzle mz ncblo kc tqaclve ma kc. Rpibzle kx, ‘Aclvepwz x nzyzlu-krmc sc tqayzlupe-mopwc’ nikeng ayrbzqtrpzmen bade.’”

³⁶ Rpi-mopwz Jiszs mz kxalvztr mz Lou sc Mosis kc kx, “?Nzpnzkr drtwrm le, neke tqapubzle kztede mz ncblo lc tqtabq ncblo kxayo?” ³⁷ Rpibz ncblo kc kx, “Ncblo lcde kc tqmrlztile nide.” Rpibz Jiszs kx, “Vz x vz-nqblq kz nqmq kr ncblo lc.”

Jiszs Oklatile Mata Nidr Mz Mxri

³⁸ Jiszs badr ncblo nedeng, kx nzvzpelr kc, sc tzvzpxpeng mz mztea Betzni, me mncngr kzdq kc olvz drtqde Mata. Sc tqaodupele Jiszs. ³⁹ Mzli kc tzmncpe-ngrdr brma, ilede Mxri, wxbu-aepztrpz mz Kxetu x tqlalztqbz mz nzalvztr-krdeng. ⁴⁰ A' Mata drtwre otxtrpwz mz nwzngr kcng tqaleleng. Zbz sc tqvzpm mz Jiszs tqrpipebzle kx, “Kxetu rnge, ilenge rlasztxpemle bange nzalengr da kcng amrlx. ?Krlzq nrp-i-ngrbz bade naokatrle ninge?” ⁴¹ Rpibz Kxetu kx, “Mata e, bzkq otr kato mz drtwrm da lang kqlu. ⁴² A' da esz'txupwz kx myapxbz. Mxri krlzle da lcde, x tr-rpwa'-ngrpw'u bade nzlalztq-krde mz nzalvztr-krngeng.”

11

Nzalvztrkr Jiszs Mz Nzkrka'ngr Matiu 6:9-13; 7:7-12

²⁵ **10:25** Matiu 19:16-19 ²⁶ **10:27** Livae 19:18; Lou Kcpwz 6:5; Matiu 22:34-40; Mak 12:28-33; Rom 13:9; Galesia 5:14; Jemes 2:8 ²⁸ **10:28** Livae 18:5

¹ Kzdq mzli Jiszs krka' mz kzdq nrlc. Kx yrkrpxpebzle kc, kzdq ncblo nede rpibzle bade kx, "Kxetu rnge, alvztrp bagr nzkrka'ngr, da kc tqwai Jon Kxawrkxtr nzalvztr-karde oblamzdeng." ² Rpibz Jiszs badr kx, "Mz nzkrka'-krmu rpiamu kx,

'Gct Trte, batrp bagr nigr lr nrlc, nzamatq-krgr drtqm kxtr-esz'ngr, x nzmnclz-krbzkr bam nzngini-krm King rgr. ³ Kam bagruzu r da kx natakitrde mzbq ka. ⁴ X ipqpxbz alwx ngrgrng navz-nqlqle nzipq-krgr krkcng tzaletrpqng da kx trmrlzu bagr. X arlapx nigr mz nzokatr-krm nigr mz nztu-amqngi-krgr mz nzatalzngr. Eu, angida.'

⁵⁻⁶ "Napi-mopwc' dq nzycmne-ebzpxngr. Kzdq mzli kzdq kc ncblo adwatile kc kzlede kx kaputrp mz ma nydze mz aurnrlc. Ncblo lc vzm, x navzkile mz kzdq nrlc. A' trpnzngr nadr dakxnzng kx nakabzlr bade. X ncblo kc tqrnginyz ma, vz mz ma kzble mz nzrlx-karde da. Zbz sc tqrpipebzle kx, '?Mzlenge, nakame bange du dakxnzng?' ⁷⁻⁸ Kxmule-esz' ncblo kc naonrx nydze pqbrpe x tzmncpeng badr doa nedeng me nzmwu-ngrdr, a' sa natulzpebz mz nzokatr-karde kztede, murde drtqde ma tqamyabz lr mztea nydeng. X sa nakabzle da kcng amrlx tqsutibz drtwrde, murde tubq nzale-krdle.

⁹ "Mz nqmq lcpwz, rlxtibz da mz Gct, x sa nakabzle. Rtangr da x sa narmctiq. Abc x naonrx sa nalvpxbz. ¹⁰ Murde doa kx rlx da kx takitrde nide, sa natwzle. X kx rtangrtile nzokatrkr Gct, sa nangida. X kx abctr-zvzbz mz Gct, naonrx nydze Gct sa nalvpxbz bade. ¹¹ Murde trpnzngr trte doa kx rkabz mz mrlxde ningidoe mzli kx rlx-ngrbzle nc. ¹² X trkapwzleu nalx mzli kx rlx-ngrbzle neimr kio. ¹³ Nimu kcng trnztubq-zvzung krlzamu nzale-krmu da kxtubq mz nzrka-ngrbz da kxmrlz mz doa nemung. A' da kx myapxbz, Trtemu kc Heven, krlzle nzale-karde da kxtubq mz nzka-krbzle Mqngrkxtr mz krkcng nzrlxtibzlr bade."

?Zmatq Ngr Jiszs Vzpxm Mz Gct O Mz Setzn?

Matiu 12:22-30; Mak 3:20-27

¹⁴ Kzdq mzli, Jiszs rmaszlrpxngr drka' kx batrpzle nznabukr kzdq ncblo. Ncblo kx prszpx drka' kc le, sc tqycmnepe. Zbz nzkctitpx zbo ngr leplz kcng. ¹⁵ A' kzdung leplz nzrpilr kx, "Beelsebol ela, kxetu r ma ngr wq, nide kc tqaclvele drka' amrlx, x sc tqrkabz bade zmatq ngr nzrmaszlrpx-karde drka' mz leplz." *

¹⁶ Kzdung kz nzabzpxlr nide mz nzrlxti-krbzlr bade kx na-alebzle dq da kxmatq mz nzaelwapx-karde kx zmatq ngrde vzpxm mz Gct, a' trvzpxpuu mz Setzn. ¹⁷ A' Jiszs krlztitrpebzle drtwrdr x mz nzaelwapx-krbzle badr kx nzvz-rbrng, sc tqrpipebzle kx, "Kandre kx akipx-lzbq mz dzbede sc tzotatrpeng, mzli kxpiqzne sa naodating. Mz nqmq lcpwz doa lr ma kxesz' kx nzamnc-dali-lzbqng, sa na-apulr ma kx wxtxo. ¹⁸ X mou, nzmu Setzn badr drka' kztedeng naotablrlr mz nidr esz'-krdr, e zmatq ngrde mz nzaclve-karde leplz sc tqmanepe. ¹⁹ Kxmule-esz' rpiamu kx rmaszlrpx-ngrne drka' mz zmatq ngr Setzn, a' tr-rpiwamuu kx oblamzmung nzrmaszlrpx-kz-ngrdr mz zmatq ngrde. Mz nzmu-krde lc, nzkrlzlr nzrpi-ngrbz bamu kx vz-rbramu! ²⁰ A' me ngi daki-angidrle se. Mz nzmaszlrpx-krnge drka' mz zmatq ngr Gct, aelwapx-ngrne kx Gct sa tqvectrpemle leplz bade mz nzngini-karde King rdr.

²¹ "Murde Setzn apule ncblo kx xplr, kx tumile mclrde atwrnrngr mz nzotangr, x acuvele ma nydze, murde leplz kcng tqolvzleng ma tzrlapxng.

²² A' ninge ncblo kx xplrpxbz x aovxiopex nide. X twzpxez zmatq ngrde

* ^{11:15} Beelsebol ngi kzdq kz drtq Setzn.

atwrnrngr, kc tqabutr-ngrde drtwrde. X kapebo zmatq rnge mz leplz kcng tqarlapxpex mz nzmaslrxpe-krbo drka' kcng badr, murde natu-pz'liti-ngrdr nide.

²³ “Na-aoti drtwrmu nrlarde kx namckiamu. Doa kx trmnckileu mz nrlarde nyznge, nide enqmi rnge. Doa kx trokatrleu ninge mz nzrvzmi-ngrm leplz mz Gct, nide kx rmaslrxpxngr leplz mz nzvz-krmlr bade.”

Nzyzlu-krm Drka' Mz Nzprsrpe-krde Ncblo

Matiu 12:43-45

²⁴ Rpi-mopwz Jiszs mz leplz kcng kx, “Mzli kx kzdq drka' nzmaslrxpxngrde mz kzdq ncblo, drka' la vzne lzke, rtangrne me na-ama-ngrde mz nabz leplz. A' nzmu trnamcleu kzdq nrlc, sc tqrpipele mz nide esz'-krde kx, ‘Nayzlupe-moux mz ma nyznge kc tqrlaszpemc.’ ²⁵ Zbz yzlu mou, x mcle ncblo kc mrlzpe x nqmq krde mrlzpe x trpnzngr kxnmncng mzilxlr kzble kx mnccpxm bade. ²⁶ Zbz vzpx x vzmitrple drka' rlimz kx nztrka-krdr myaszpxle nztrka-krde. Nzvzmqng sc tzmnccpxpemqng bade. X nzmnckr ncblo kc sc tqtrkatx-zlwzpe, myaszpxle mzli kc kai.” †

Jiszs Pxtxpx-ngrde Nzalengr Dq Rkx Kx Matq-esz'ngr

Matiu 12:38-42

²⁷ Mzli kc Jiszs tqycmne-ngrde, kzdq olvz ycmnelzm mz mzlir zbo ngr leplz lcng x rpibzle kx, “Namrlzbz mz lxem murde mikale nim x ayqle nim!” ²⁸ A' rpibz Jiszs kx, “Eu, a' sa namrlz-kzpz mz leplz kcng tzxlrng natq Gct x nzvz-nqblqlr!”

²⁹ Zbz zbo ngr leplz kc, kx etunepxpele, sc tqrpipe-moule kx, “A' nimu leplz kcng tzmnccng mzli ka kxdrka'-ngrng. Rlxiamu kx na-alebo dq rkh kxmatq-esz'ngr mz nzaelwax-krnge kx vzpxmc mz Gct. A' trpnzngr rkh kx na-aelwa-ngrbo bamu, a' nangi txpwz rkh kc tqalebz Gct mz profet Jona kc bqnc. ³⁰ Murde nqmq kcpwz Jona tqngini-ngrbzle rkh mz lr taon kc etu Ninive, e ninge, Mrlx Leplz, nangini-kzpo rkh mz lr nrlc ka. ³¹ Mzli kc bqnc kwin kc Seba mrkc Arabia, vzm rlru mz nzlalztq-krbzle mz Solomon mz natq ngr nzyrplaxngr. ³² Kxmule-esz', a' mzli ka doa kx myaszpx-zlwzle Solomon vzpem, a' pxtxpx-ngrnamu nzlalztq-krbzmu bade. Mz nzmu-krde lcde, mz Mzli Kxmatq kc navzm, Kwin kc Seba sa naycmne kz mz kot mz nzpipx-krde kx vz-rbramu, murde trlalztqpwzmuu mz Gct mz natq ngr nzyrplaxngr. ³³ Mz nqmq lcpwz, mzli kc bqnc leplz ngr taon kxetu Ninive nzlxngitilr nrpa ngr Gct kc tqyapwxtipxbz Jona badr, x nztekqtrlr nqmq nr drtvrdr mz alwx ngrdr. Kxmule-esz', a' mzli ka doa kx myaszpx-zlwzle Jona vzpem mz nzyapwxtipx-krbzle nrpa ngr Gct bamu, a' trtekqtrwamuu nqmq nr drtvrmu. Mz nzmu-krde lcde, mz Mzli Kxmatq kc navzm, lr Ninive sa naycmne-kzng mz kot mz nzpipx-krdr kx vz-rbramu, murde trlxngitiwamuu nrpa ngr Gct da kc tzwailr.” ‡

³³ Rpi-mopwzle kx, “Trpnzngr leplz kx rtekao lam sc tqyrlq-kapqpele. X tralavzo-kzleu topla. A' lam nzadolwpwz wq, murde leplz namclr zyzlr mz nzdwatr-krmlr brma. ³⁴ X nzmu mzpu mrlz, krlzamu nzrmc-angidrngr da. A' nzmu mzpu trmrlzu, trkrlzwamuu nzrmcngr da. ³⁵ Mz nqmq lcpwz, na-ayayramu nabzmu murde nakrlzamu nzalvztrnegr angidrngr. A' bzkq amqngiamu nabzmu murde ma tqvz-rbr-zvzamu. ³⁶ Murde mzli kx

† **11:26** Leplz kznike nzmaslrxpx-ngrbz drka' bade, narlr-alzu-ngrbzle Mqngrkxtr namncpxm mz nabzde, murde drka' kc ma tqyzlu-mop bade, vzmitrple kzdung kz mou. [‡] **11:31** 1 King 10:1-13;

2 Be Ngrdr 9:1-12 [‡] **11:32** 11:30 Jona mnctilzm mz nelz besilr zbq tq. X Jiszs ycmnetr-ngrde nztulz-kr-mople mz nzbzngr mz nibr zbq kxtq. 11:31-32 Jiszs nide doa kx myaszpxle Solomon x Jona.

nabzmu yayr-ngrde, krlzamu nzrkrlzngr da angidr kx vzpxm mz Gct. X da angidr lcde sa na-apule zyzlr kx na-aopx-angidrbzle da mz nabzmu.” §

*Jiszs Ycmne-plztitrle Kxnzetu R Lr Jiu
Matiu 23:1-36; Mak 12:38-40*

³⁷ Mzli kc Jiszs tqyrkrpxpe-ngrbzle nzycmne-krde, kzdq kc Farzsi sc tqaveatipebzle nide kx namung badr. Kx krlzbzle kc ma nydze, sc tqvztrpebz tqwxbuope mz nzmungr, a' trwzti-kaileu mqdeng. ³⁸ Farzsi kc pwrkilvc-ngrde nzmc-krde kx Jiszs trvz-nqblqleu nqmq kxtr krdr, x sc tqmu ate.*

³⁹ Jiszs krlzle da kc tqaoti drtwr Farzsi kc, sc tqrpipebzle bade kx, “Nimu Farzsi aoti txpwz drtwrmu da kx trmyapxpzu. Krlzamu nzrwztingr kxipiz nibr kap x nibr plet mz nzvz-nqblqngr nqmq krmu, murde natubqamu mz Lou sc Mosis. A' nabzmu yrbupxm mz nzpnangr da x nqmq ngr alwx. ⁴⁰ Narmu trka x lukurnr-ngrnamu! Murde Gct kc tqrwzngnrkrdrqmu yz, nide kc tqrwz-kzngr nabzmu. X mz nzobq-krde, nzbrngzkr nabzmu myaszpx-zlwzle nzrwztingr nibr da. ⁴¹ Nzmu nasuti drtwrmu nztubq-ngrbz mz nzobqkr Gct, bzkq aoti drtwrmu da kx trmyapxpzu. A' naokatr-alzuamu kxtrnzrngiscung da mz nznka-ngrbz badr da kxmrzl kx trpnzngn scdr. Murde nzmu na-aleamu da lcng mz nabzmu angidr, nimu badr dztumu amrlx sa natubqpebzmu mz nzobqkr Gct.

⁴² “A' agrmplz nimu, kx Farzsi. Gct sa na-ayrplapxle nimu. Murde kxmule-esz' kabzmu da kranzpu ngr da scmung amrlx bade mz nza-otikr drtwrmu da kxtopwzng kx trmyapxpzu, a' trkxu mz drtqmu da kxmyapxbz. X tralewamu da kcng tqtubqbz mz leplz, x trmrlztiwamuu nidr mz nivz lr Gct. A' takitrde nzale-kai-krmu da lcng tqmyapxbz, x ale-kzamu da kcng trmyapx-zlwzpwzung.

⁴³ “Agrmplz nimu, kx Farzsi. Gct sa na-ayrplapxle nimu mz nzglqpx-lzbq-krmu! Murde rpiamu nawxbupwzmu mrkc tqmrlztxpxbz mz mangr-nzkrka'ngr, x leplz napi-txpwz bamu natq ngr nzamatqngr me nzyrlwr-lxblrngr.

⁴⁴ “Agrmplz nimu, kx Farzsi! Gct sa na-ayrplapxle nimu! Murde apuamu gq lr kxbz kx trnzyrqlzu, x mzli kx leplz nzvzneo-ngrmlr elr, batrpzle trnztakitr-krdru nidr nzprtrnegr mz nzangiongr. Mz nqmq lc kz, rblxbz mz leplz nzkrlz-krdru kx nqmq krmu trka. X mzli kx nzvz-nqblq-ngrdr nimu, batrpzle trnztakitr-krdru nidr.”

⁴⁵ Zbz kzdq ncblo kxalvztr mz Lou sc Mosis rpibzle bade kx, “Kxakrlz, mz nzycmne-krm lc pibqtx-kzq nigr!” ⁴⁶ Rpibz Jiszs kx, “Agrmplz nimu, kx kxnlzalvztrng mz Lou sc Mosis. Gct sa na-ayrplapx-kzle nimu! Aleti-katoamu nqmq krmu kxkqlu kx yrlqtr-mopwz mz Lou sc Mosis. X rblxbz mz leplz nzma-nqblq-krdrleng. Murde nqmq lcng nzapulr da kxmrlepu, kx yrlqlzbzmu mz nabxdr kx naglqlr. A' nimu esz'-krmu, trvz-nqblqwanuu nqmq lcng x trokatrwamuu leplz mz nzrlqngn.

⁴⁷ “Agrmplz nimu! Murde kxmule-esz' rwzo-ngrnamu da kx ycobz mz gq lr profet kcng bqnc, a' profet lcng tznibqti melrmqmung. ⁴⁸ Wztx-ngrbzmu gq lr profet kcng tznibqti melrmqmung. A' trblepx-pnzpwzmuu badr. Murde ptxpx-kz-ngrnamu nzvz-nqblq-krmu nzalvztrkr profet neng

§ ^{11:36} Nzalvztrkr Jiszs nzapulr zyzlr. X naopx-angidrbz mz leplz kx nzalvztrkdeng mz vzpxmqng mz Gct murde ycmnebzle badr me nzyrlwrngr leplz. Kxmule-esz' a' kxnlzaklung kxnlzptxpx-ngrdr nzvz-nqblq-krdrleng. * ^{11:38} Nzrwztingr lc mq tryctrus mz Lou sc Mosis, a' ngi nqmq kx nzyrlqtr-mopwzlr lrtzlvzng r lr Jiu. A' Jiszs trvz-nqblqleu nqmq lc, murde rpile na-atubqtile Farzsi kcng tzamyalzlr nqmq krdrleng myaszlxle Lou sc Mosis kc tqkabz Gct.

Gct. ⁴⁹ A' vz zvz, murde Gct ycmnetr-ngrde nimu mz nzyrplapx-krde mz nzrpi-krde kx, 'Profet x menrpa nengeng sa navzbzng mz leplz nengeng mz nzpipx-krbzlr badr natqng. A' kzdung nidr sa nanibqlr x kzdu-kzng sa na-atrkatilr.' ⁵⁰ Mz nzmu-krde lcde, sa narmctiamu nzayrplapx-zlwzngr nimu. Murde Gct sa na-atamutilzbzle bamu alwx ngr nzrnibqng profet amrlx, ⁵¹ abzo mz Ken nznibq-krde Ebol, krlzmle nzrnibqng Sekaraea, kc tznibq me tavau mz mzlir olta x Mrkc Tqtr. Napibo bamu, Gct sa na-atamutilzbzle bamu alwx ngr nzrnibqng profet amrlx, murde nzbz-krdr vzpxm mz da kcng tqaletiamu. †

⁵² "Agrmplz nimu, kxnzalvztrng mz Lou sc Mosis. Gct sa na-ayrplapxle nimu! Murde tr-rlrpx-lzbqwamuu mz nzmncz-ngrbz bade. X nzalvztr-rbr-krmu rpwa'-ngrbzle mz leplz nzlxngiti-krdr nide. Apule kx yrlq-kapqbzmu badr ki kc nzmu nalvxpxbzle naonrx ngr Heven."

⁵³ Jiszs kx rlaszpele kc mrkc, kxnzalvztrng mz Lou sc Mosis, badr Farzsi sc tztrkalrpe-ngrdr nide, x nzrpilr na-aesakibzlr nwz-krde. Zbz sc tzve-ebirthxpe-kzpwzng natq kxkqluti. ⁵⁴ Murde nzrpilr na-aprtzlr nide mz trtxki scdr, mz nzrpi-rbr-krde da, x sc tzolvzpelr nide.

12

Da Tq Kx Bzkq Aleamu

Matiu 10:19-20, 26-33; 12:32

¹ Mzli kcpwz siu ngr leplz tzyrlwr-lxblrng x tzrnekrti-lzbq-ngrdr nzoliki-krdr, Jiszs rpi-kaipzle mz ncblo nedeng kx, "Bzkq apuamu Farzsi. Nzrpilr kx ntubqng, a' nzpokiang. Nqmq krdr apule yisti kx talvzpxle bret atwrnrngr, murde nqmq krdr atrkatipele leplz amrlx kcng tzvz-nqblqlr nidr. ² A' da kx nzyrlq-kapqting, sa nayrbq-zpxxngr. X mz nqmq lcpwz, da kx nzxpqbrlvzlr, sa napihx me naxlr-lxblr-ngrdeng. ³ Nike pi-lrpiamu mz nabz nzlo, sa napihx mz nrlckxngrlx. X da kcng tqpi-awabzmu mz leplz, sa napi-kato mz mzlir mztea. Murde alwx ngrmung amrlx kx yc-kapqti, sa nakrlzti leplz kalr.

⁴ "A' napibo bamu, kx mzlengeng, bzkq mwxlrtiamu krkcng nzrnibq-txpwzng nrkrdrtrq, a' mz nibrde nzmu trnznibqlru mqngr. ⁵ A' namwxl-rtiamu Gct, murde mz nibr nzrnibq-krde, rngisc zmatq mz nzadwatrngr leplz mz Hxl. Nide kx namwxlrti txpwz!

⁶ "Kxmule-esz' nzamwangr boblz kxnzlvqn trau rde pipzne, a' trpnzngr boblz kx mrbrtr mz drtwr Gct. ⁷ A' nimu myaslzamu boblz kxkqlu! Murde nqnginarmu amrlx, rlwxti kz Gct kc tqaclvele nimu. Mz nzmu-krde lcde, bzkq mwxlrtiamu leplz.

⁸ "Milde doa kx abrtzlvzle ninge Mrlx Leplz mz mz leplz mz nrlc ka, sa na-abrtzlvz-kzx nide mz mz enjrl neng Gct mz Mzli Kxmatq kc na-ayzlu-ngrbz Gct da mz leplz. ⁹ A' doa kx ptxpx-ngrde ninge mz mz leplz mz nrlc ka, sa napxtxpx-kz-ngrne nide mz mz enjrl neng Gct. ¹⁰ Doa kx pibqtile ninge, krlz Gct nzipqpx-ngrbz alwx ngrde, nzmu natekqtrle nqmq nr drtwrde. A' rblx nzipqkr Gct doa kx pivxitile Mqngrokxtr. *

* **11:49** 2 Be Ngrdr 36:15-16 † **11:51** 11:48 Nzpxtxpx-ngrdr nzvz-nqblq-krdr Jon Kxawrkxtr x Jiszs, mz nzngini-krdr profet neng Gct. **11:51** Mz Nzryrngrkxtr kc kai, Ebol nide ncblo kx nznibq kai x Sekaraea nide profet kx rmnrpe-ngrbz nzrnibqng. * **12:10** Gct krlzle nzipqtx-krpwzle leplz kcng tzplzpxbzlr alwx ngrdrng bade. A' doa kx pivxitile Mqngrokxtr ptxpx-ngrde nide. Mz nzmu-krde lcde, rblxbz mz doa lc nzyckr drtwrde alwx ngrdeng, murde Mqngrokxtr dek cokatle leplz mz nzkrlz-krdr alwx ngrdrng. X doa kx pivxitile Mqngrokxtr trpnzngr nzkrlz-krde alwx ngrdeng mz nzplzpx-krbzleleng mz Gct. X mou, trpnzngr nzipqkr Gct nide.

¹¹ “Kzdung mzli sa navzmitrlr nimu mz kot mz mangr-nzkrka'ngr murde lxngitiamu ninge. X na-atubzlr nimu mz kxnxetu r lr Jiu. X kzdung mzli sa navzmilr nimu mz kzdung kz kot. Mz mzli lcdeng, bzkq da nakxne drtqmu kxnamu nzayzlu-krmu natq, x nrpa kc napiamu kx narblxbz badr nzayzlu-krbzlr. ¹² Murde Mqngrkxtr la naokatrle nimu mz nrpa kc napipxamu.”

Be Ngr Bcnyr Kxngqngu

¹³ Kzdq ncblo kx mnccpxm mz zbo ngr leplz kc rpibzle bade kx, “Kxakrlz, pibz mz mzlenga kx na-akikr bade drtc' kc tqbzszm trtegr bagr.” ¹⁴ Rpibz Jiszs kx, “Trvz-ngrpwc'u nzakingr dztu leplz.” ¹⁵ Zbz rpibzle mz leplz kcng kx, “Bzkq trkibramu, a' aclvetio-lzbqamu mz da amrlx kx naprlvz mzpu. Murde nzmnc-zpwxngr x nzlungr kxboi trnzvzpxpwung mz nzrngiscngr da.”

¹⁶ Zbz rpibz Jiszs kx, “Napibo bamu dq nzycmne-ebzpxngr. Kzdq kc bcnyr rningydz drtc' kx dakxnzng ngrde kqlu x mrlzti. ¹⁷ Kzdq mzli drtwrde aole mz nide esz'-krde kx, ‘Trpengr me nayrlq-ngrne dakxnzng nangeng kx nayctile mzli naboi. ?Nike na-alepex? ¹⁸ Sa na-awxlikiope ma ngr da nyngeng x nawztix ma kxnxetupxbzng, murde nayrlq-ngrne dakxnzng kcng kqlu tqmrlzti x dztungeng amrlx. ¹⁹ X mz nibrde sa na-amax x namux x narmnqx x na-abrtzx mz nzmnc-zpwx-krnge! Murde dztungeng takitxtrpedeng nzyc-krdr nzkrlz-krbzle yiz kxkqlu mou.’ ²⁰ A' rpibz Gct bade kx, ‘Kxngqngu e! Mz nrlckxbq ka nabzpeq. X dztumqng amrlx nabzszbzme mz leplz kzbleng.’” ²¹ X rpi-mopwz Jiszs kx, “X Gct sa na-ayrplapxle leplz amrlx kcng tzatamutilzng da kx nangi scdrng, a' nzpxtxpzngrdr nzokatrngr leplz.”

Nzrngiscngr Da

Matiu 6:25-33

²² Zbz sc tqripebz Jiszs mz ncblo nedeng kx, “Da kx tqrpi-ngrbo lc bamu kx bzkq da kx nakxne drtqmu mz nzmnc-krmu, mz da kx nangqnamu x lrpz kx napxi-ngrnamu. ²³ Murde nzmnc-zpwxngr tryctxtrpwzu mz dakxnzng x lrpz. ²⁴ A' na-aoti drtwrmu utc. Trpnzng da kx nzpetilr x trnzekqlzung dakxnzng. Trpnzng nyzdr ma ngr dakxnzng, murde apu Gct nidr. A' nzmyalz-krmu myaszpxle utc! X mz nzmu-krde lc, Trtemu sa narkatibz bamu da. ²⁵ Rblxbz bamu nzaboinepx-krmu nzlu-krmu mz nzyc-zvzkr mz drtwrmu da.

²⁶ “Mz nzmu-krde lc, mane nzkxkr drtqmu da, murde trokatrleu nimu. ²⁷ A' na-aoti kz drtwrmu nzpqpxkr mqmya. Trnzwzung x trnzrkxsilvzung scdr lrpz. Kxmule-esz' King Solomon kc tqngi nceapu, a' nzlulikr lrpzdeng trmyaszpxleu mqmya lcng. ²⁸ Murde Gct la tqapqtipx mqmya nangi lrpzdr nc mqmya. Noude lang trnztu-abou murde sa namrbrng mz nzngc-krdr mz nyr, nzngikr nanr leng. Mrla tqyc-ngrde, nakrlzamu kx Gct sa na-apxikzle nimu, mz nzmnc-krmu mz nrlc. Murde myaszpx-zlwzamu nounc. A' nzrlxngiti-krmu bzkq topwz! ²⁹ Mz nzmu-krde lc, bzkq aoti txpwz drtwrmu da kx nangqamu. ³⁰ X bzkq apuamu kxtrnzrlxngitiung kx nzaoti txpwz drtwrdr dakxnzng. Murde trnzkrlzlr kx Gct rkale doa nedeng dakxnzng. A' nadcpx mz drtwrmu kx Trtemu krlzle da kx trycpwzu bamu. ³¹ Mz nzmu-krde lcde, narlr-lzbq-ngrbzmu mz nzmnclz-ngrbz mz Gct x mz nibrde da lcng sc tqkape-kzpze bamu.

³² “Apuamu sip nengeng x rblx nzokatr-lzbq-krmu. A' bzkq mwxlaramu, murde Trtemu kc Heven abrtz-ngrde nzrka-krbzle bamu da kcng tzvzpxmqng mz nzngini-krde King rmu. ³³ A' amwa-alzuamu da kcng

* 12:20 Sam 49:10

tqngisctimu x kabzmu trau rdeng mz krkcng trpnzngr scdr. Murde mz nzale-krmu da lc, sa na-atamutilzamu nzrngisc-krmu mrkc Heven, me trnayrkrpx-ngrp wzle. X mrlc trpnzngr kx napna da x trpnzngr ninr kx nayrti da. ³⁴ Na-atamutilzamu nzrngisc-krmu mrkc Heven, murde mrkc tqyrlq-ngrnamu dztumung, delc tqyc-kzngr nabzmu.

Naoliq-zvzamu Nzyzlu-krm Jiszs

Matiu 25:1-13

³⁵⁻³⁶ “Mzli kx nzyrlzngr, ncblo kxyrlz prtr kai mz nzmungr mz nzyrlzngr. Zbz sc tqvzpe mz nzvzmi-krmle olvz rde brma. X kxnzawz-nrbalq nedeng naoliqng x lam pnrdr nangc mz nzaenzli-kldr nzyzlu-krmle. Murde mzli kc navz-ngrmle na-abctrpz, x nalvxpxbzlr naonrx mzli lcdepwz. ³⁷⁻³⁸ X mzli kc kxetu rdr navz-ngrmle, kxnzawz kcng na-abrtzng murde nzobq-pz'lir x nzoliqpeng, kxmule-esz' na-aenzlirl nide krlzbzle aurnrlc o mzli kx boipx-mopwz! X kxetu rdr sa na-abrtzlvztx-kzle nidr. X sa narpibzle kx nawxbuo-kaing mz nznka-krbzle nadr dakxznzng. ³⁹⁻⁴⁰ X nimu na-apuamu kxnzawz lcng. X na-apu-kzamu ncblo kx oliq mz nzrpwa'-krbzle mz kxpnada nztangetr-krbzle ma nyzde, murde trkrlzle nabznepi lcde. Mz nqmq lcpwz, naoliq-zvz-kzamu. Murde Ning, Mrlx Leplz, sa nayzlumc mzli kx trpnzu drtwrmu nayzlu-ngrmc.”

Kxnzawz Kx Brti Drtwr Kxetu Rde

Matiu 24:45-51

⁴¹ Rpibz Pita kx, “?Kxetu rnge, nzycmne-ebzpxngr lc pime bagr o pibzme mz leplz amrlx?” ⁴² Rpibz Jiszs kx, “?Neke kxnzawz nenge kx brti drtwrnge? Tqycmnetibo nimu x kzdung kz kxnzrmailzng. Murde kzdq kxetu aprcbzle mz kzdq kxnzawz nede mz nzaclve-krde kztedeng x mz nzapu-krde nidr. Zbz sc tqvzpe mz kzdq nrlc. Kxnzawz kx yrplapx x brti drtwr kxetu rde, sa navz-nqblq-zvzle natq kxetu lc. ⁴³ Mz nzmu-krde lcde, mzli kc navz-ngrm kxetu rde, kxnzawz lc sa na-abrtzlvzle nzale-krde nwz-krde. ⁴⁴ Da angidrtx lc napibo bamu, kxetu kc sa nayrlqle kxnzawz lc na-aclvebzle dztudeng amrlx.

⁴⁵ “A' trmlzu kxnzawz lc nznpi-krde mz drtwrde kx, ‘Kxetu rnge trpnzngr nzvz-ani-krmle.’ Zbz sc tqibrtipe-kzle kztedeng, waile ncblo x olvz. A' nide kc tqmu x tqangqnguti-lzbq-ngrde nzrmnqng. ⁴⁶ A' kxetu kc yzlm mz kzdq mzli kx trpnzu drtwr kxnzawz lc. Zbz kxetu kc na-ayrplapx-zlwzle nide x na-apusr-ngrde nide kxtrnzrlxngitiung.

⁴⁷ “Kxnzawz kc tqkrlzle me pnz drtwr kxetu rde a' troliu nzvz-nqblq-krdele nzrviplangr nide nwzrde nakqlu. ⁴⁸ A' kxnzawz kc trkrlzle me pnz drtwr kxetu rde, x alele da kx takitrde nzrviplangr nide, nzrviplangr nide nwzrde napipz. Murde leplz kx nzkrlzlr me pnz drtwr Gct, navz-nqblq-zvzlr. X leplz kx ka-nebang Gct zmatq kxetu, narlr-lzbq-zvz-ngrbzng mz nwz-krde.”

Jiszs Batrpzle Nzakipx-lzbqng

Matiu 10:34-36

⁴⁹ Rpi-mopwz Jiszs kx, “Vz-ngrmc nztekatr-krnge nrlc mz nyr pnr Gct. X sutipe drtwrnge nwou-krde mzli ka! A' sc trwouka. ⁵⁰ Murde nzetqkr drtq kxtrka x nzkxpung kx nakrlzmle ninge sa tqvzbep. X nabzng tqtalvzo vzz mz nzaotikr drtwrnge le. X nzvz-krde la nakrlzbzle mzli kx nakapupxngarde! ⁵¹ Mz drtwrmu rpiamu kx vz-ngrmc nzrtwz-krmc nrwx mz leplz mz nrlc ka. A' trtingr, murde vz-ngrmc nzakipxng kxnzlxngitiung ninge x kxtrnzrlxngitiung. ⁵² Mzli kape doa lr ma kxesz' na-akipx-lzbqng, kzdung mz nrlarde nyzng x kzdung mz nrlarde kzble. ⁵³ Kxmule-esz' trte, o lxe, o

mrlx, o inyx, o mzle-lzbq, o ile-lzbq, o kzdo-lzbq, o lvxbq-lzbq, a' doa lcng amrlx sa na-aki-lzbqng mz nzrlxngitingr ninge.” [✳]

Nzrkrlzngr Rkx Ngr Nzwlzkr Gct

Matiu 16:1-12; Mak 8:11-21

⁵⁴ Rpi-kzpz Jiszs mz leplz kcng kx, “Kx namcpeamu kx zbo kc tqtupe, pitx-pnzamu kx, ‘Mwx tewa nadcpe,’ x dctx. ⁵⁵ X kx naxngibzmu nenq ngr ulu kx nabaopele mrka Israel, sc tqrpipelineamu kx, ‘Nrlc la napqpe,’ x nrlc kc tqpqpe. ⁵⁶ Krlzamu nzrmcngr da kx navzpxm mz nibr zbo x nenq. X rpi-kzamu krlzamu da kx nzvztimqng mz Gct, a' pokiaamu. Murde rblxbz bamu nzrkrlzngr nzwlzkr Gct mzli ka.

⁵⁷ “A' nakrlzamu nike tubq x aleamu. ⁵⁸ Nzmu kzdq ncblo natwzle nim mz kot, tubqti-lzbq-kaiamu mz lrpzki. Murde ma tqaprcbzle nim mz majzstret kc na-aprc-alzupwzle nim mz pulis, x pulis sc tqadwatrpele nim mz presin. ⁵⁹ Murde nzmu kx tqkrlzpebzme la presin trpengr nzdwapx-krme. Murde rblx nzatatr-krme trau kx na-avzpxmle nim. Mz nqmq lcpwz, tekqtr nqmq nr drtwrmu mzli ka, murde ma tqpibz Gct kx navzq mz Hxl, x trpengr nzdwapx-krme.”

13

Esablqtiamu Alwx Ngrmung

¹ Mzli lcde kzdung leplz kcng tzmnncng mrkc, nzpibzlr mz Jiszs kx nznibqti ncblo ngr vea neng Paelzt kzdung lr Gzlili, mzli kc tzkalz-ngrbzr blz krdr mz Gct mrkc Jerusalem. ² Rpibz Jiszs badr kx, “?Nzpnzkr drtwrmu le rpiamu lr Gzlili lcng, alwx ngrdr trka-zlwzng myaszpxle lr Gzlili kc-kzng? ³ Mwx trtingr! A' napibo bamu, nzmu kx trtekqtrwamu la nqmq nr drtwrmu mz alwx ngrmu, Gct sa naodati-aleole nimu amrlx ngrmu mz Mzli Kxmatq kc na-ayzlu-ngrbzle da mz leplz. ⁴ Nadctipx drtwrmu ncblo kcng nzpnu-esz'-nrade-rtqmz (18) tqtabqlvzo ma kc tqtupx wq, esotrpz mz nabzde Siloam, mrkc Jerusalem. ?Nzpnzkr drtwrmu le nidr kx nztrkatx-zlwzng mz nzobqkr Gct nzmyaszpxlr leplz kc-kzng tzmnncng Jerusalem? ⁵ Trtingr! A' napibo bamu kx nzmu kx tresablqtiamuu la alwx ngrmung, Gct sa na-ayrplapxle nimu mz nzavztr-krde nimu amrlx ngrmu mz Hxl.

⁶ “Murde nimu lr Israel apuamu nc fiki kc tqpeti Gct. Petile nc fiki mz drtc' kxmrlz mz nrlanc nyzde. Nounc kc kx etupele, sc tqvz-zvzpebz mz nzrtangrtr-krde elr nrade, a' trpnzng da kx tqmcle. ⁷ Zbz sc tqrpipelinebzle mz ncblo kc tqacelvebzle nrlanc nyzde kx, ‘Yiz tq vztipemc, tqrtangrtrx nra fiki mz nou fiki lc, a' trgalr kx mcx. Lakitxope nounc la, murde trmrlzu nztu-nrbalq-krde mz drtc' nyznge.’ ⁸ A' rpibz ncblo kc tqacelve nrlanc kc kx, ‘Natutitx-moule yiz naesz’, kx Kxetu. Murde mz nibrde sa nayabo-ngalebo x sc tqyrlqtiopebo da kx na-ayrlvile nide. ⁹ Zbz nzmu nounc nyzm kx tqpale mz yiz lc navzom, e sa tqmrlz. A' nzmu kx trpnz-ngrde, e sc tqqlakiopeq x tqangcpeq.’”

Jiszs Amrlzle Olvz Kxbxplo Mz Sabat

¹⁰ Mz kzdq Satde, Sabat nyzdr lr Jiu, Jiszs alvztr mz kzdq mangr-nzkrka'ngr. ¹¹ Kzdq olvz mnc mrkc kx mncpx-ngrm drka' kc tqayangrngale nide. Yrngzpu txpwz mz nzvzne-krde, twztiptelete yiz nzpnu-esz'-nrade-rtqmz (18). ¹² Kx mcpbxz Jiszs nide, rpibzle kx, “Olvz e, vzm. Drtqm opxpe mz zvetq la!” ¹³ X maletxtrpzle nide, x mzli kcpwz atwztqtxlz-lzbq pnz x sc tqqlqpxele Gct.

¹⁴ A' kxaclve mangr-nzkrka'ngr kc drtwrde ngyatx kx Jiszs kc tqamrlz doa mz Sabat. X sc tqrpipebzle mz leplz kcng kx, "Zbq esz'mz kx nawzti mz wiki kxesz'. Vzmamu mz nzamrlzngr nimu mz kzdq zbo lcdeng. A' bzkq ngi mz Sabat!"

¹⁵ A' Kxetu rpibzle badr kx, "Nimu leplz kx narpi-ngrbz kx rlxngitiamu! Nimu amrlx ngrmu wzamu mz Sabat mz nzyokaepx-krmu kzu nemung o dcngki nemung me tu-ngrdr x sc tqvzmipxpeamu me na-amnq-ngrnamule lue! Murde mz drtwrmu rpiamu mrlz nzalengr nzwzng r lc, nzaclvengr animol mz Sabat. ¹⁶ A' olvz lc nide neidu lr Ebraam x lolvzti Setzn le yiz nzpnu-esz'-nrade-rtqmz (18). ?Memule nzmu trnzarlapxu nide mz nabz Sabat? Murde myapxbz nzarlapxng olvz lc mz Sabat, myaszpxle animol."

¹⁷ Kx pitxbzle natq lc, krkcng tzpxtxpx-ngrdr nide drtgdr myatxlz-pnzm. A' zbo ngr leplz lcng tzabrtzlvzlr da kcng tqmrlzvxi tqaleleng.

Nzycmne-ebzpxngr Rtq Nc Seri

Matiu 13:31-32; Mak 4:30-32

¹⁸ Jiszs sc tqrpipebzle kx, "?Nzkqlukr leplz kcng namnclzbzng mz Gct mz nzngini-krde King rdr apule nike? ?Nzycmne-ebzpxngr kznike takitrde nayokaetipx-ngrbole? ¹⁹ Apule rtq nc seri, kx peti ncblo mz nrlanc nyzde. Yrlvzlzm x sc tqngipe kzdq nounc, x utc kxkqlung nzmncng mz nrladeng mz nzama-krdr elr." *

Nzycmne-ebzpxngr Yisti

Matiu 13:33

²⁰ Jiszs rpi-mopwzle kx, "?Nzetunepxkr Nrpakxmrlz kx Gct sa tqvectr-pemple leplz bade mz nzngini-krde King rdr apule nike? ²¹ Apule yisti kxipiz kx oti kzdq olvz, sc tqayabemipele flawa mz kzdq dis kxetu. Mz nibrde yisti kc sc tqapwzpupele flawa kc."

Nzmnclz-ngrbz Mz Gct Rblx

Matiu 7:13-14, 21-23

²² Mz nibrde Jiszs kc tqvznepebz Jerusalem. X mz nzvzki-krbzle mz kzdung taon x mztea kcng, sc tqalvztrpele lr mrlcdeng. ²³ Kzdq ncblo veabz bade, rpibzle kx, "?Kxetu, doa kxipiz keng narlatpxpxpzng x navzng Heven?" Mz nzayzlu-krbz Jiszs le, rpi-alzupwzle mz leplz kcng kx,

²⁴ "Naonrx esz'txu kx topwzne kx naprtrngr Heven. Mz nzmu-krde lcde, namnclzbzmu mz Gct mzli kape. A' napibo bamu, leplz nakqlung na-abzlr nzprtrngr Heven kalr, a' trpnzng r lc nzprtr-krdr elr. ²⁵ Murde mzli kc navzm kalr, Gct sa na-apqbrbzle naonrx ngr Heven badr. X natutrpzng mz naonrx x na-abctrpzng mz naonrx mz nzhpi-krbzlr kx, 'Lvxpzm bagr naonrx, kx Kxetu!' A' sa narpixbo badr kx, 'Trkrlzwxu nimu! Trpnzng nzlvpx-krbo naonrx.' ²⁶ X sa narpitrpzlr kx, 'A' krlzq nigr murde muku x alvztr-kzq mz mztea nyzgr!' ²⁷ A' narpimopwo kx, 'Nimu leplz kxdrka'-ngrng amrlx, dwaszpeamu ningel!' * ²⁸ X mzli kc namc-ngrdr Ebraam, Aesak, Jekop x profet kcng amrlx nzmncpx-krmlr Heven, nayrning. X nqngidr namadqlr mz drtwr kxngya murde sa namapulrpxngr Gct nidr! ²⁹ Kxmule-esz', a' leplz kxkqlu nayrkrkimlr mrkang kqlu mz nrhc. Lr Jiu badr leplz kxtrngiulrJiu navz-lxblrmqng mz nzmungr kc etu mzli kc nayzlu-ngrmc mz nzngini-krnge King. ³⁰ A' kzdung kxnzmyapxbzng mz nrhc ka, sa nanginidr leplz txneng mz nrhc kc navzm. X kzdung kxnznginidr leplz txneng mz nrhc ka, sa nanginidr leplz kxnzmyapxbzng mz nrhc kc navzm."

* **13:19** Sam 104:12; Esikel 17:23; 31:6; Daniel 4:12 * **13:27** Sam 6:8

*Nzyckr Mz Drtwr Jiszs Lr Jerusalem
Matiu 23:37-39*

³¹ Mzli lcpwz kzdung Farzsi nzvzmqng mz Jiszs, sc tzrpipebzlr bade kx, “Rlasze mrka x vzkipe mz kzdq kz nrlc. Murde rpi King Herot nanibqle nim.” ³² A' sc tqrpipebz Jiszs badr kx, “Vzbzmu mz Herot la tqngi ncblo kxayo, x pibzmu kx, ‘Mzbq ka tqrmaszlrpx-ngrne drka' x tqamrlz-moux leplz. X nawai-kzle mz kzdung mou zbz. X mzli trnaboiu sc tqayrkpxpex nzwz-krnge.’ ³³ Kxmule-esz', a' navznebo ye Jerusalem mzbq ka x kalrla x mzbq kcng mou. Murde trtakitrdeu nznribqngr profet mrkzble, a' nanibqp wz Jerusalem.

³⁴ “Kosae lr Jerusalem! Nibqtiamu profet neng Gct x vaebqtiamu menrpa kcng tqatwzlr-ngrmle bamu! Kxmule-esz' aodu-zvzx nimu x mzli kqlu kx rpi-ngrne na-apubo bamu kio kx wxbulvzole neideng, a' tr-rlr-lzbq-ngrpwa'muu bange. ³⁵ Nakxmupele lape! Murde Gct sa nartxmle nibrde bamu mz nzngini-krmu leplz nedeng. Napibo bamu, trpengr nzmc-krmu ninge nakrlzbzle Mzli Kxmatq kc navzm x narpi-ngrnamu kx, ‘Yawe, glqlzkr Kxnzmcpx kc tqvzm mz drtqm.’” [☆]

14

Jiszs Amrlzle Kzdq Ncblo Mz Sabat

¹ Kzdq Sabat, Jiszs nzaveatim mz nzmungr mz ma nyz kzdq kxetu rdr Farzsi. X mzli lc Farzsi lcng nzaukti-angidrpepwzlr Jiszs, murde nzrpilr namctrpzlr du da kx alele kx napipxlr nzvz-rbr-krde. ² Mzli kc tqmnc-ngrpwzle brma, kzdq ncblo kx nanycdeng x mqdeng vaoti vzm mz Jiszs. ³ Rpibz Jiszs mz kxnlalvztrng mz Lou sc Mosis x Farzsi kcng kx, “?Rlrpxngr Lou sc Mosis nzamrlzngr kxnyagoxng mz Sabat o trtingr?”

⁴ A' nzmnc-lrpitxng. Zbz maletrpz Jiszs ncblo kc, amrlzle x sc tqatwzlrpengrde. ⁵ Sc tqrpipebzle kx, “Nzmu kzdq nimu nede kc doa ncblo o kzu kx tatxo mz kzdq lrpao mz Sabat, e navectxlz-pnzmle mzli lapwz kxmule-esz' mz drtwrmu xpqbrr-ngrde lou ngr Sabat!” ⁶ A' trnzayzlupwzlr natqde. Nzkrizlr kx ycmne angidr, a' drtwrdr ngyatx, murde nzycmne-krde tqamatile nqmq krdr. *

Da Kxmrlz Sc Ncblo Kxmrlz

⁷ Mz nzmungr lc, Jiszs krlztrpebzle kx kzdung ncblo nzmcpxlr mrkcng tqmrlzpxbzng tzwxbungr. Zbz sc tqyapwxtypebzle nzycmne-ebzpxngr lc. ⁸⁻⁹ Sc tqrpipebzle kx, “Nzmu kzdq ncblo aveatile nim mz nzmungr mz nzyrlzngr, bzkq wxbuoq me nzwxbungr kx nzmrlzpxbzng. Murde kzdq mzli doa kx myaszpxle nim nzaveati kz. X ncblo kc tqaveatile nimu rlirmu narplibzle bam kx, ‘Kztem, nawxbubz mrla.’ Zbz drtqm kc tqmyape x sc tqwxbunetr-rlrupebzme me siga. ¹⁰ A' mzli kx nzaveati-ngrm, vz x wxbu mrkc tqyctr-rlrupwz me siga, murde mrlx kc tqaveatile nim navzm bam x narplibzle kx, ‘Mzlenge, esolzm, me brngz kxpipz.’ X sc tqamatqpebzle nim mz mz leplz kcng tqaveati-kzleng. ¹¹ Murde doa kx amyazl-lzbq mzli ka, sa na-avzo Gct nide yu. A' kx avzo-lzbq mzli ka, sa na-amyazl Gct nide.”

¹² Zbz Jiszs kc tqrpipebzle mz ncblo kc tqrwzng nzmungr kc kx, “Nzmu kx tqrwz-ngrn nzmungr, bzkq aveati-txpwzme leplz kx na-ayzlu-mopwzlr bam. Murde mz nzale-krm da lc, twzpeq mz nrlc ka da kxmrlz mz nzale-krm lc da kxmrlz. ¹³ A' mzli kznike rwz-ngrn nzmungr, aveati kz leplz kx

* ^{13:35} Sam 118:26 * ^{14:6} 14:4-6 Lou sc Mosis rlr-ngrbzle nzokatrngr mrlx kx ycp pipz nzbz-krde. A' nqmq kr kxnetu r lr Jiu rpwa'-ngrde nzwzng amrlx, kxmule-esz' nzarlapxngr leplz.

trpnzngr scdr zmatq, kx trpnzngr scdr da, kx mqde bz, kx nancyde bxplo, x kx mzte kc. ¹⁴ Kxmule-esz' leplz lcng trnzkrzlr nzayzlu-mou-krbzlr bam, a' Gct sa na-amrlzle nim mz nzayzlu-krmle da kxmrlz lc kalr, mzli kc leplz kxnztubqng natulz-ngr-moplr mz nzbzng."

Nzycmne-ebzpxngr Nzmungr Kxetu Heven

Matiu 22:1-10

¹⁵ Zbz kzdq ncblo mz nzmungr lc sc tqrpipebzle mz Jiszsz kx, "Sa namrlzsz mz leplz kx naprtrpzng mz nzmungr mzli kc Kxnmcpk nayzlu-ngrmle mz nzngini-krde King." ¹⁶ Zbz Jiszsz kc tqyapwxtipebzle be lc mz nzaelwapx-krbzle badr kx leplz kxtrngiulrJiu naprtr-kzng Heven. Sc tqrpipebzle badr kx, "Kzdq kxetu wz-ngrde kc nzmungr kxetu. Aveatile ncblo nzkqlung.

¹⁷ X mzli kc namupengr, atwzlr-ngrbzle kxnzawz nede kx napibzle badr kx navzpemqng murde da amrlx mrlzpe. ¹⁸ A' nidr amrlx ngrdr sc tzrpipebzng da kx aotrleng nidr trnzvz-krpwzlr. Ncblo kc kai rpibzle kx, 'Xpex kc drtc' kx trmckalx, x navzpx x naoklatipex. Pibz kx trpengr nzvz-krbo.' ¹⁹ Kzdq kz rpibzle kx, 'Xpex kzu nqvi nzlvqn kx trmckalx, naokatrlr ninge mz nwzng. A' navzpx na-abzpxpexng. Pibz kx trpengr nzvz-krbo.' ²⁰ Kzdq kz mou rpibzle kx, 'Sa tqyrlz-atex. X mrlc tqycngr da trpengr nzvz-krbo.'

²¹ "Kxnzawz lc sc tqyzlupe x pipebzle da lcng mz kxetu rde. Zbz kxetu kc drtwrde kc tqngyape x sc tqrpipebzle mz kxnzawz nede kx, 'Ngrrtxpx-anipwz mz lrpzki kcng tqetu x krkcng tqtopwz. Vzmim krkcng trpnzngr scdrng da, krkcng mqdr tqbz, krkcng tzbxplong, x krkcng mztr tqkcb.' ²² Vztx x yzlum, sc tqrpipebzle kx, 'Natqm twzpx, kx kxetu. A' me namncngr la tqkqlube.' ²³ Zbz kxetu kc sc tqrpipebzle bade kx, 'Vzpx mz lrpzki kcng tqyctrp mz nibr nrlc x rvzmitim leplz x lr mrkzbleng nayrkrtrpqng, murde ma nyznge kc tqetu nayrbupxm. ²⁴ A' napibo bamu, kx ncblo kcng tzaveati kai tzpxtxpxng, trpnzngr nidr kx nabxtr naodr dakxanzng kcng tqoliqtix!' " †

Bzkq Axtxbzme Nzo-zli-krm Lrpzki R Jiszsz

Matiu 10:37-38; 5:13; Mak 9:50

²⁵ Mz nibrde, sc tqvznepe-mopwz mz nzvz-krde kc Jerusalem. Mzli lc zbo ngr leplz kxetu sc tzyrkrng badr. O-lxlvrxbz, sc tqrpipebzle kx,

²⁶ "Doa kx vzm bange namrlzti nivz lrde ninge namsyazpxle kxngnideng, kx apule trtede, lxede, olvz rde o ncblo ngrde, mzledeng, illedeng, x doa nedeng. X bzkq rlr-ngrbzle nzrpwa'-krbzlr bade nzvz-nqblq-angidr-krde ninge. X nzmrlzti-krde ninge namsyazpx-kzle nide esz'-krde. ²⁷ Murde doa kx trglqleu kros ngrde mz nzo-zli-krde lrpzki rnge, trvz-nqblq-angidrleu ninge." *

²⁸ Zbz Jiszsz pipx-moule nzycmne-ebzpxngr tq, mz nzaelwapx-krde kx doa na-aoti kai drtwrde nike na-alele mz nzvz-nqblq-krde nide. Zbz napnzpe drtwrde kx na-alele o trtingr. Zbz sc tqrpipebzle kx, "Nzmu kzdq nimu aoti drtwrde nzrwztingr ma, e na-aoti kai drtwrde nikeng navztr mz nzrwztingr ma kc, kx takitrpede o trgalr. ²⁹ Murde nzmu kx trtakitrdeu, e rblx nzyrkrpx-krde ma kc. X leplz sa naxtrnga-ngrdr nide. ³⁰ Narpir kx, 'Ncblo ka nwz-krde ngi nctengr!' "

³¹ Mz nzycmne-ebzpxngr krali, rpi-mopwz Jiszsz kx, "Nzmu kzdq king prmpipxle ncblo siu-nzpnpu-esz' (10,000) mz nzota-krdr mz kzdq kz king kx vzm-alzuple nede ncblo siu-nzpnpu-li (20,000), na-aoti kai drtwrde

† ^{14:24} Leplz kx nzpxtxpx-ngrdr nzaveatikr Gct trnaprtrung mz nzmungr kc etu Heven. * ^{14:27} Mak 8:34; Luk 9:23

nzmu nzxplr-krde takitrde nzaovxio-krde king kc o trtingr. ³² X nzmu kx trtakitrdeu, e na-atwzlr-kai-ngrbzle kzdung kxnzetung mz nzrmcti-krdr king kc mzli kc tqmncbe-ngrmle rlsru, kx narlxtime du da kx na-alebzle murde nrwrx nayc. ³³ Mz nqmq lcpwz, mrlx kx navz-nqblq-angidrpele ninge, narlaszle doa x da amrlx kx nzolvzolr nide.”

³⁴ Zbz pibzle nzycmne-ebzpxngr kratq mz nzsri-krbzle kx, “Dcpiz ngi da kxmrlz. A' nzmu nilwzde kx tqmrbrle, trpengr nzamrlz-moungr da.

³⁵ X trpnzngr da kx takitrde, kxmule-esz' nzayabemi drtc' o nzyrlqmi dcvi kxmibi kx na-amrlzle drtc'. A' takitxtrpwzle nzrtctxngr. Doa kx yrplapx, na-abzle nztwz-krde drtwr ngr natq lc.” ‡

15

Nzycmne-ebzpxngr Sip Kx Mrbr

Matiu 18:12-14

¹ Ncblo kcng tzatakqting takes x leplz kc-kzng tzmncng mz alwx nzkqlung, tzlalztq-zvzbzng mz Jiszs. ² A' Farzsi x kxnzalvztrng mz Lou sc Mosis kcng drtwrdr tqctrpebz mz Jiszs. Nzrpipelr kx, “Mz Lou sc Mosis, mrlx lc batrpzle trnztakitr-krdeu nide nzprtrngr mz nzangiongr murde aodu-zvzle leplz kcng tzaleng alwx mz nzmu-krdr badr!” ³ Zbz yapwxtibz Jiszs nzycmne-ebzpxngr lc mz nzaelwapx-krbzle kx Gct yc mz drtwrde leplz kcng tzmnc-mrbrng.

⁴ Rpibzle kx, “?Nzmu kzdq nimu kx nede sip trtqki-esz' (100) x mrbr esz', nike na-alele? Nzmu amnkle krkcng nzpnu-rpwxmz-nrade-rpwxmz (99) me namnc-zpxe-ngrdr. X sc tqvzpe mz nzrtangrti-krde krkc tqmrbr mz nzmc-zpxe-krdele. ⁵ Kx mclele kc, abrtz zlwz x glqlzle mz nabxde. X sc tqqlqpe-mople mrkc tqamnc-ngrde sip nedeng. ⁶ Mzli kc tqvzpe-ngrde brma, sc tqkqle-lxblrpeleng kxnginideng, kxnzesonetrpzng bade, x mzledeng kxnzmrlzti-lzbqng badr, x sc tqrpipebzle badr kx, ‘Abrtz-zlwzpe murde mctxpex sip nenge kc tqmrbr. Namulvzpeku!’ ⁷ Mz nqmq kcpwz, napibo bamu, Gct nzabrtz-krde etu mrkc Heven mzli kx kzdq doa kxale alwx tekqtr-ngrde nqmq nr drtwrde. Nzabrtzngr lc myaszpxle nzabrtzlvz-krde leplz kx nzpnu-rpwxmz-nrade-rpwxmz (99) kx trtakirpedeu nztekqtr-krdr nqmq nr drtwrdr murde nztubq-angidrpeng.”

Nzycmne-ebzpxngr Trau Kc Tqmrbr

⁸ Jiszs yapwxti-mopwzle kc nzycmne-ebzpxngr. Rpibzle kx, “?E nzmu narpingr kx kzdq olvz kx rngisc dola kx nzpnu-esz', amrbrle esz', nike na-alele? Nzmu yakatrle kzdq lam x amilxpqtile ma nyzde x obqlvxti-angidrle nrlc amrlx namc-zpxe.” *

⁹ Mzli kx mc-ngrdele, kqleleng kxnginideng, kxnzesonetrpzng bade, x iledeng kxnzmrlzti-lzbqng badr, x sc tqrpipebzle badr kx, ‘Abrtztxpex murde mcpex trau kc tqamrbx. Namulvzpeku!’ ¹⁰ Mz nqmq kcpwz, napibo bamu, Gct nidr badr enjrl nedeng nzabrtzlvzlr kzdq doa kxale alwx kx tekqtrle nqmq nr drtwrde.”

Mrlx Kcng Nzling Tzmnc-mrbrng X Trtedr

¹¹ Jiszs yapwxtibzle kc be ngr mrlx kcng nzling tzmnc-mrbrng x trtedr. Sc tqrpipebzle kx, “Kzdq kc ncblo kx mrlxde li. ¹² Krkc tqtopwzbz pibqtxde trtede mz nzsri-krbzle bade kx, ‘Trte, rblxtxpem bange nzaenzli-krnge nzbz-krm. A' aprcpem bange mzli ka da kx nangi scnge kalr.’ Kxmule-esz',

‡ ^{14:35} Doa kx vecpx-lzbq mz nzvz-nqblq-krde Jiszs, trpnzngr da kx bxtrle. * ^{15:8} Mzli lcde dola kxesz' dekc tzxpengr ncblo mz nwz-krde mz zbz kxesz'.

a' ncblo kc sc tqaotipe drtwrde nzaki-krbzle dztudeng mz mzlir mrlxde kcng nzling. X sc tqkapebzle krsc mrlxde kc tqtopwzbz.

¹³ "A' mzli trboiu, mrlx kc tqtopwzbz amwatxde dztudeng. Twzpele trau scdeng, sc tqrlaszpele brma, vzkipele kc kzdq mrkzble kx ycm rlsru. A' trau scde ayrkrtx-nrbalqle mrlcde mz nzrtrngz-krbzle alwx. ¹⁴ Amrbrtxde da scdeng amrlx. Zbz kzdq dzbi kxtrka tao, talvzpxle mrlcde. X nide kx tqmncle kc, trtxpengr da kx namnc-xglele. ¹⁵ Zbz sc tqyrrnitrpebz nzwzngr mz kzdq doa lr mrkzble kc. Zbz alele nzwzngr kx batrzple trnztakitr-krdeu nide, murde aclvele poi mz nabxbz. ¹⁶ Nelzde brtaletx-atwrnrpengr, a' trpnzngr kxrkale nide dakxznng. X mzli kc tqapu-ngrde poi, tqrpile nangqtx-kzle dakxznng nadr. ¹⁷ Zbz mz nzngqngu-krde kc, drtwrde kc tqopxpe. X sc tqdctipxpe drtwrde ncblo kcng amrlx tqamcti trtede. Tzrningating dakxznng kxkqlu, a' nide nabzpe-ngrde nade. ¹⁸ X sc tqrpipele kx, navztx-anipebo mz trtenge x narpibo bade kx, 'Trte, atrkatix nim x atrkati-kzx Gct. ¹⁹ Bzkq apusrnepe-ngrn ninge mrlxm, a' nanginipenge kxanzawz nem.'

²⁰ Zbz sc tqvzpebz mz trtede. "Mzli lcde trtede tqaenzli-zvzle nide, x sc tqmcpebzle nide mzli kc tqvzbe-ngrmle rlsru mz ma nydr. X sc tqvopebz mz nzabrtzlvz-krdele. Sc tqkaplzpelle x tcngipele nide, murde ycpengr drtwrde nide. ²¹ Rpibz mrlxde kc kx, 'Trte, atrkatix nim x atrkati-kzx Gct. Bzkq apusrnepe-ngrm ninge mrlxm.' ²² A' trte kc kqlebzle kxanzawz-nrbalq nedeng, rpibzle kx, 'Ngrrt-txpwzmu! Twzmmamu nzkq kc tqmrlztxpxbz x akq-ngrnamu nide. Aotrpzmu dq ring scnge mz nratoki r mqde, x yrlqtrpzmu sadol mz nanycdeng. ²³ Otiamu nei kzu kc tzapulvzti mz mzli r nzrbilvzngr. Vzmimamu x nibqamu murde namulvzku nide mz nzabrtz-krgu. ²⁴ Murde mrlxnge lc apule kx bzszpele ninge, a' sa tqlupe mou. Mrbrpe, a' mzli ka dcpxpe-mop.' Zbz sc tzmulvzpelr.

²⁵ "Mzli lc mrlxde kc tqetubz sc tqwztrp mz lclr da nydr. A' mz nzyzlu-krmle, mzli kc tqesotrpe-ngrbzle ma kc, xlrpebzle nzayrpungr da x nzelangr. ²⁶ Kqlebzle kzdq kxanzawz kc x sc tqveatipebzle bade kx, '? Nike tzale?' ²⁷ Rpibzle kx, 'Mzlem yzlupem brma. X trtem pimle bagr kx nanibqbzkr nei kzu kc tzapulvzti, murde mzlem lube x yzlupem-mop.'

²⁸ "Mrlxde kc tqetubz drtwrde kx ngyale ptxpx-ngrde nzdwatr-ngrbz brma. Zbz trtede kc tqdwapxpebz yz, sc tqtamitipele mrlxde kx nadwatrzp brma x naipqle mzlede. ²⁹ A' rpibzle mz trtede kx, 'Obq ena, mz yiz lcng kqlu nzwtzr-krbo bam aputxtrpo kxanzawz-nrbalq. X trpnzngr mzli kx atao-ngrbo natqmqng. A' trpnzngr da kx kame bange, kxmule-esz' gout kx esz'txu nangqkr badr kztengeng. ³⁰ A' mrlxm lc angi-brmrda-ngrbzle dztum mz srhx kxkqlu. X kx yzlumle brma nibqbzme nei kzu kc tqyrlvztxpxbz! Da lc tqaleq trarsakrlrleu nigr rlilrgr!' ³¹ A' rpibz trtede kx, 'Mrlxnge, mnc-zvzki x da amrlx kx ngiscngeng scmqng, murde mzlem twzpele krscdeng. Yctxtrpepwz bam nzale-krm da kx suti drtwrm. ³² A' nialeku kzdq nzmungr x na-abrtzku, murde mzlem apule kx bzszpele nigi, a' mzli ka lupe mou. Mrbrpe, a' mzli ka dcpxpe-mop.' " †

† ^{15:32} 15:15 Lou sc Mosis rpwa'-ngrbzle mz lr Israel nzmu-krdr poi x nzbxtr-krdrle. Mz nzale-krdr da lc batrzple badr trnztakitr-krdr nu prtrngz mz nzangiongr. Mz nzmu-krde lcde, lr Israel mz nzaotikr drtwrdr poi ngi animol kxtrka. 15:22 Ring sc trte ngi rkx ngr zmatq ngr mrkc tqmnc-pnz-ngrde mzli kc. X sadol aelwapx-ngrde kx nide mrlxde, trniginideu kxanzawz. 15:30 Mrlx kc tqetubz apule kxanzalvztrng mz Lou sc Mosis. Murde rpile kx nztubq-krde vzpxm mz nzvz-nqblq-krde lou sc trtede, a' ptxpx-ngrde nzipq-krde mzlede.

16

Be Ngr Kxnzawz Kc Tqaclive, Tqobqpx Kai

¹ Zbz rpibz Jiszs mz ncblo nedeng kx, “Kzdq kc ncblo kxrngisc, nede kc kxnzawz kx aclvebzle dztudeng x trau scdeng amrlx. A' kzdung leplz nzpipxlr kx tqangi-brmrda-ngrbzle dztu kxetu rde. ² Zbz sc tqaveatipe kxetu kc kxnzawz nede. Sc tqrpipebzle kx, ‘?Natq lc tzpingr nim, da zpxw? Yrpzbz pepz kx yro-ngrn trau r nzaclve-krm dztungeng, x sc tqkapeme. Murde trpengr nzaclve-krm dztungeng.’ ³ Rpipe kc tzawz mz nide esz'-krde kx, ‘Kxetu rnge sa na-ayrkrpxpebzle ninge mz nzwz-krnge. ?Nike nawaipe? Trxplrnewxu mz nzwzngk kxmrlepu. X drtqnge myane kz nzrlx-zvzngr trau. ⁴ O! Krlzpe da kx na-alex. Sa na-avzobo kaon scdr leplz kcng tzrlxbzng da mz kxetu rnge. X sa na-abrtzlvzlr ninge mz nibr kxetu lc nzayrkrpx-krbzle ninge mz nzwz-krnge.’

⁵ “Zbz sc tqaveatipele leplz kcng amrlx tzkaonbzng mz kxetu rde. Rpibzle mz krkc kai kx, ‘Ngi da kxmrlz nzaolvzti-krgi da mz nike kaontibzme mz kxetu rnge. ?Tqlvr kx nzyro mz pepz scm?’ ⁶ Rpibzle kx, ‘Galon ngr tolo trtqki-rtqmqz (800).’ Rpibz kxnzawz kc tqaclve kx, ‘Na-avzopeki kaon scm. A' pepz scm kzbble se. Wxbuo ani x yrxtopwz elr trtqki-napwx (400), murde naxpe-txp wzme krlc.’ ⁷ Rpibzle mz kzdq mou kx, ‘?X nim, tqlvr kx kaonqtig?’ Rpibzle kx, ‘Bxli r wit siu-esz’ (1000).’ Rpibz kc tqaclve kx, ‘Pepz scm se. Tekqtxtrpwz trtqki-nartqmqz (800).’

⁸ “Kxetu r kc tzawz tqangqngutitr glqtxpxle nide mz nzobqpx-kai-krde. X yapwxti-ngrbo be lc murde mzli kang kqlu kxtrnzrlxngitiung nzmyaszpxlr kxnzrlxngiting. Murde nzavzlr trau scdr mz nzrvectr-krmlr leplz badr, murde na-abrtzlvzlr nidr. A' mzli kang kqlu kxnzrlxngiting trnzavzlr trau scdr mz nzrvectr-krmlr leplz mz Gct.”

⁹ “A' napi-mopwo bamu kx na-avzamu dztumu mz nzokatrngr leplz mz nrlc ka, murde Gct na-abrtzlvzle nimu x mzli kc trnarmalepe-ngrwamuu trau mz nzbzpe-krmu, naprtramu mz nzlungr kxboi. ¹⁰ Murde doa kx atutrle nzwz-krde mz da kxtopwz, sa na-atutr-kzle nzwz-krde mz da kxetu. A' doa kx angqngutitr mz nzwzngk kxtopwz, sa na-angqngutitr kz mz nzwzngk kxetu. ¹¹ Mz nqmq lcpwz, nzmu kx trawzq la dztumqng mz nzokatr-krm leplz mz nrlc ka, trpnzngk nzkra-krbz Gct nzrkrlzngk murde naokatrq kztemqng mz nzvz-nqblq-krdr nide. ¹² X nzmu kx traclve-angidrwq dztu Gct mz nrlc ka, trpnzngk nzabrtzlvz-krde nqmq krm x trnatwzwq da kxmrlz angidr mrkc Heven. ¹³ “Rblx doa nzwztr-krbzle mz kxetu kxli mz mzli kxesz’. Murde sa napqtitrpe drtwrde kzdq, x namatitrpe drtwrde kzdq kz, mz nzrvz-nqblq-ngrng. Mz nqmq lcpwz, rblx nzwztr-krbzmu mz Gct x mz nzrnciscngr da.” ¹⁴

¹⁴ Farzsi kcng nxzrlbzlr da lcng amrlx, sc tzxtrngalvztrpe-ngrdr Jiszs. Murde nzmrlz zlwz badr trau x nzrpilr kx Gct amrlzle kxnztubqng. X mz nzrncisc-krdr da aelwapx-ngrde kx amrlz Gct nidr. ¹⁵ A' rpibz Jiszs badr kx, “Kxmule-esz’ mz nzobqkr leplz nimu leplz kxnztubqng, a' Gct krlzle da kx tqyctipxm mz nabzmu. X kxmule-esz’ nzpnzkr drtwr leplz le kx myapxbzmu, a' Gct obqssole nimu x angyabzmu drtwrde.

¹⁶ “Murde natq ngr Lou sc Mosis x nzryrkr profet kcng bqnc nzryapwxng krlzmle mzli kc Jon kc tqawrkxtr tqbzpe-ngrde. Abzo mzli lcde, rpi Nrpakxmrlz kx Gct sa tqvectr premle leplz bade mz nzngini-krde King rdr. X leplz kang kqlu drtwrdr pqtr mz nzngini-krde King rdr, nztwz-anilr x nzolvz-amqngilr lrpzki rde mz nzarlapx-krde nidr. ¹⁷ Kxmule-esz’,

¹⁴ 16:13 Matiu 6:24 ¹⁵ 16:16 Matiu 11:12

a' Lou sc Mosis x nzryrkr profet kcng bqnc sa tqngibeng natq Gct. X trpnzngr kx nayrlqtxpx, a' natq Gct amrlx sa na-atutr. ¹⁸ "Mz nzmu-krde lcde, ncblo kx axtxde olvz rde x yrlzti-moule kc olvz kzble, taope mz alwx ngr nzrmwimingr doa kx trngiu kernalzde. Murde olvz krali lc trngiu olvz rde angidr mz nzobqkr Gct. X ncblo kx ryrlzti olvz lcde, tao kz mz alwx lcdepwz." ¹⁹

Be Ngr Ncblo Kc Tqrngisc X Lasarus Kx Tr-rngiscu

¹⁹ Zbz Jiszs yapwxtibzle kzdq be, rpibzle kx, "Kzdq kc ncblo kx rngisc, pxi txpwz lrpz kxmrlzvxi. X mz zbz kang kqlu mu txpwz dakxanzng kx mrlztxpxbz kx trau rde etu nzxpengr. ²⁰ Mzli lc mnc kz kc ncblo kx trpnzngr scde da, drtqde Lasarus. Ncblo lc ngabq kxsqki, tqyrbqne zvz mz naonrx ngr nabxbz ngr ma nyz ncblo kc tqrngisc. ²¹ Murde nzpnzkr drtwrde le rpile kx namune muli dakxanzng kx taneom mz tebol nyz ncblo kc tqrngisc. X kuli nzvzmqng tzmanidutibzlr kxsqki rdeng. A' ncblo kc tqrngisc trokatrleu nide.

²² "Zbz ncblo kc tr-rngiscu sc tqkrlzpebzle mzli r nzbz-krde. X mqngrde sc tqglqpebz enjrl mrkc tqmncngr Ebraam mz nzmungr kc etu mrkc Heven. Zbz mrlx kc tqrngisc sc tqbzpe kz x sc tzyrtzmqpe. ²³ A' vztr mz Hxl x drtqde etqtx atwrnrngr. Zbz obqlzbz x mclzbzle Ebraam mrkc Heven x Lasarus sc tqmnctrpz mz nrlarde. ²⁴ Zbz sc tqkqlzpebz, rpibzle kx, 'Trte Ebraam! Nayc mz drtwrm ninge! X atwzlr-ngrm Lasarus naleole nratoki r mqde mz lue x na-abaobzle nalzpqnge. Murde nyd ka apqtx-zvz pemle drtqnge.'

²⁵ "A' rpibz Ebraam kx, 'Nadctipx drtwrm, kx mrlxnge, mzli kc tqlungrn da kcng amrlx tqmrlzti nzkabz bam. X Lasarus twztibzle da kcng tqtrkati. A' mzli ka, sa tqabrtzlvzpele nzmnc-krde mrka. X drtqm la tqetq-alzupe. ²⁶ X kzdq la gq kx vzo la tqvivx mz mzligu, murde krkcng tzrpilr narkawicbzng bamu mz nzokatr-krdr nimu ma tzwailr, x krkcng tzmnncng mrla ma tzvzo-kzpqnq bagr!' ²⁷ Zbz mrlx kc tqrngisc rpibzle kx, 'Kx tqmule la, kx trte, atwzlr-ngrbz Lasarus mz ma nyz trtenge. ²⁸ Murde mzlenge nzlvqn sa tzmnncng elr. Atwzlr-ngrbz nide badr mz nzpi-krbzle badr bzkq nzvz-pnzmqng mrka tqetq ngr drtq. A' natekqtr-pnzlr nqmq nr drtwrdr mzli ka tzlube-ngrdr mz nrlc.'

²⁹ "A' rpibz Ebraam kx, 'Mzlemqng lang, nzryrkr Mosis x profet kcng tqyc mz Nzryrngrkxtr sa tqycbz badr, narkabzng badr natq. Mzlemqng nalalztqbzng mz kxzrlwxng x nalxngitilr da kx napibzlr badr.' ³⁰ Rpibz ncblo kc tqrngisc bade kx, 'Krla trtakitrdeu, kx trte Ebraam! A' nzmu mqngr leplz kx bzpe navzbzle badr, e nzmu nqmq nr drtwrdr sa tztekqtrlr.' ³¹ A' rpibz Ebraam kx, 'Nzmu kx trnzlxngitilru Nzryrngrkxtr, e trnzlxngitilru kxyzlubz mz nzbzngr.'"

17

Bzkq Attratiq Nzrlxngitikr Kzdung Kz Leplz Matiu 18:6-7, 21-22; Mak 9:42-50

¹ Zbz Jiszs rpibzle mz ncblo nedeng kx, "Kxmule-esz' da kcng tzataolr leplz mz alwx sa nakaputrp, a' agrmplz mrlx kx ataole kzdq kz doa mz alwx! ² Murde kalr Gct sa na-ayrplapx-aleole nide mz alwx lc mz Hxl. X nzayrplapxngr nide na-apule mrlx kx nzpetrpz rplz kxetu mz drtwrde x nzrtcongr prla me boongr. Mwx mrlz nzbz-krde kai mz nrlc ka, mzli ka

^{16:18} Malakai 2:16; Matiu 5:31-32; 19:8-9; Mak 10:11-12

tratrkatika-ngrde nzrlxngitikr doa ne Gct. ³ “Mz nzmu-krde lcde, aclvetio-lzbqamu murde ma tqatrkatiamu nzrlxngitikr doa neng Gct. X nzmu kxrlxngiti kx tqalebzle bam da kxtrka, ycmne-plzttitr nide. X nzmu nqmq nr drtwrde kx tqtekqtrlele, e ipqq nide. ⁴ Kxmule-esz' alebzle bam da kxtrka kqluti mz zbz kxesz', x mz nzwrdde amrlx vzm bam x rpibzle bam kx, ‘Drtwrnge yzlupe,’ a' naipq-zvzq nide.”

⁵ Aposol kcng nzkrlzlr kx trnzkrlzlpwzlr nzipqngr leplz mz nzvz-nqblq-krdr natqde lc, sc tzrpipebzlr mz Kxetu kx, “Aetubz nzrlxngiti-krgr.” ⁶ Rpibz Kxetu kx, “Kxmule-esz' nzlxngiti-krmu Gct topwz apule nztopwzkr rtq nc seri, doa kx esz' mz nimu krlzle nzrpi-ngrbz mz kzdq nounc kx mqngio mz drtc' kx, ‘Naveclz-lzbqng x napetio-lzbq prla!’ X nzmu Gct nabatrzple nzvz-nqblq-krbzle natqm.”

Nzwztr-ngrbz Mz Gct

⁷ Rpibz Jiszs kx, “Nzmu kzdq nimu nangi nede kzdq kxnzawz-nrbalq kx tqryabo mz nrlanc nyzm, e mwx tqaclvele sip nemqng. Mzli kx vztr-ngrmlle me wz-ngrde, trtakitrdeu nzrpi-krbzme kx, ‘Vz-anim x ngq drta'm.’ ⁸ Murde kxnzawz-nrbalq nawztr-kaipz bam mz nzngini-krm kxetu rde. Narpi-kaipzme bade kx, ‘Oliqtibz drta'nge kx nangqx mz milzpq. X mz nibr nzmu-krnge, sc tqmu-ateq.’ ⁹ X mzli kx ayrkrpx-ngrbzle nzwz-krde trtakitrdeu nzawi-krbzme bade. Murde ale-txpwzle nzwzngr kc tzamnqlzbz bade. ¹⁰ Nakxmu-kzpwzle la mz nimu. Mzli kx wztr-ngrbzmu mz Gct, rpi-txpwzmu kx, ‘Trtakitrdeu Gct nzawi-krmle bagu. Murde krle tqale-txpwzku ye nzwzngr kc tzamnqlzm bagu.’”

Jiszs Amrlzle Ncblo Kx Ycngr Lepz Nzpnue-sz'

¹¹ Mzli kc Jiszs badr ncblo nedeng tzvzne-ngrbzlr Jerusalem, nzrlaszlr Gzlili Provins x nzprtrng mz Szmariz Provins. ¹² Nzvztibzlr kzdq mztea, sc tqrmctipeng ncblo nzpnue-sz' kx ycngr lepz. Nztubzng rlru, murde trnzrlrpx-ngru nzesotr-krbzlr mz doa kx tryc-ngru lepz. ¹³ X nzkq-katopxpemqng nzrpibzlr kx, “Kxetu Jiszs! Nayc mz drtwrm nigr x amrlz nigr!”

¹⁴ X rpibzle badr kx, “Vzamu x rtangrtiamu kzdung pris, kx napwxlitibzlr nimu, da kc tqwai nzpikr Lou sc Mosis le. Murde nakrlzlr kx mrlzpeamu x napiplxlr.” Kx nzvznepebzlr kc lepz kc sc tqmrbrpe. ¹⁵ A' kzdq nidr, kx mcpele kx mrlzpe, yzlm, x sc tqglqpxpele Gct mz natqde kxbe. ¹⁶ Yrngzobz mz drtc' mz nanyc Jiszs, mz nzawi-krbzle bade. Ncblo kc ngi lr Szmariz, kx nzobqszo lr Jiu. ¹⁷ Rpibz Jiszs mz leplz kcng tzmnncng mrkc kx, “Ncblo nzpnue-sz' kcng tzamrlzng. ?A' myx krkcng rpwxmz? ¹⁸ ?Memule doa lc trngiulrJiu kc tqyzlum mz nzawi-ngrbz mz Gct?” ¹⁹ X rpibz Jiszs bade kx, “Tulzpe x vz. Murde nzrlxngiti-krm amrlz-angidrpele nim.” *

Naoliqt-zvzku Nzyzlu-krm Jiszs

Matiu 24:23-28, 36-41; Mak 13:32-37

²⁰ Kzdung Farzsi nzveatibzlr mz Jiszs mzli kx Gct na-aclve-angidr-ngrde nrlc. X rpibzle kx, “Gct trnavzmipleu rkx kx nzmc mz nzngini-krde King.

²¹ X trpnzngr ncblo kx narpile kx nzaclve-krde sc tqyc mrka o sc tqyc mz kzdq nrlc. Murde mzli ka sc tqaclve-angidrpele nabz kzdung leplz mz nrlc.”

²² Zbz sc tzrpipebzle mz ncblo nedeng kx, “Ninge Mrlx Leplz. X mzli kc navzm, narpiamu kx namcamu nzyzlu-krmc mz nzngini-krnge king. A' trgalr nzmc-krmule murde mzli lcde trkaputrkap. ²³ Mzli lc tqaenzliamu,

* ^{17:14} Matiu 8:4; Mak 1:44; Luk 5:14 * ^{17:19} 17:19 Nzrpilr kx ngalrde lc tqycmnetr-ngrde nzamrlzngz mz zyagox x nzarlapxngz mz alwx.

kzdu lang leplz narpibzlr kx, ‘Obqbzmu, Kxnzmcpx lcmonr tqmnc mrkc!’ O narpibzlr kx, ‘Obqmamu se tqmnc mrka!’ A’ bzkq rtangrtiamu ninge.

²⁴ Murde ninge Mrlx Leplz nzyzlu-krmc sa naotpx angidr mz mzpu. Na-apule nzrpnapxkr bzlrpc mz nzayzlrpx-karde bongavz, abzo mz kzdq nrlarde krlzbzle kzdq nrlarde. ²⁵ A’ drtqnge naetq zlwz kai x doa kcng tzmncng mzli ka natrkalrpx-ngrdr ninge. ²⁶ Nayzlumc mzli kc leplz napxtxpx-ngrdr nzlalztqngr mz natq Gct, da kc tqwaile mz mzli nyd Noa. ²⁷ Mzli lcde leplz tzmung, tzyrlzng, x tzpxtxpx-ngrdr nzlalztqngr mz natq Gct, vz vz krlzmle mzli kc Noa badr mrlxdeng tzdwatr-ngrdr mz lcsu kc etu. X nubla kc tqvo-atem x nibqtileng leplz kcng amrlx trnzrdwatrung elr.

*

²⁸ X sa nayzlu-mopwc’ mzli kc leplz na-apu-ngrdr leplz kcng mz mzli nyd Ebraam x mrlx mzlede, Lot. Mzli lcde leplz kc tzmung ye, tzxpeng da x tzamwang da, tzrpetiong da, x tzrwz-ngrng da. A’ trnztekqtrlu nqmq nr drtwrdr kxtrka. ²⁹ Zbz mz zbq kcpwz Gct tqatwzlr-ngrbzle enjrl nedeng mz nzmailzpx-krdr Lot x lr ma nyzdeng, ayrplapx-kzle taon kc etu Sodom mz nqmq krdr kxtrka. Avzomle mz bongavz nyd x rplz kxpc kx nzbzlu tatiobz mz taon lcde, x nibqtileng leplz kcng amrlx trnzrlaszpxlru taon kc.

³⁰ X kxnamu-kzle lc mzli kc na-adcpx-lzbq-mou-ngrne. *

³¹ “Mz zbq lcde, ncblo kx mnctrpz yz mz ma nydze, bzkq votr mou mz ma nydze mz nzotitr-krde dztudeng, murde trpnzngr mzli rde. X mz nqmq lcpwz, ncblo kc tqmnctrp mz lclr dakxanzng nydze, bzkq yzlupe mou mz ma nydze mz nzoti-krde dztudeng. ³² A’ nadcpx mz drtwrmu olvz r Lot, kx bzt x pnz murde obq-teblqtx. * †

³³ Murde doa kx otr-zvzngr drtwrde nzlu-krde, sa namale-lvile nzlungr kxbui. A’ kx yrlqtxole nzlu-krde murde lxngitile ninge, sa naprtr mz nzlungr kxbui. * ³⁴ Napibo bamu, mz nrlckxbq lc nayzlu-ngrmc, leplz nzling namwing mz nqni kxes’. Navzmipe Gct Heven krkc tqvz-nqblq-angidrl ninge. A’ narlaszpele krkc trvz-nqblqleu ninge mz nzodatingr nide. ³⁵ Olvz nzling naoliq-lxblrng dakxanzng. Navzmipe kc, a’ narlaszpe kc. ³⁶ Ncblo nzling nawz-lxblrng mz nrlanc kxes’. Navzmipe kc a’ narlaszpe kc.”

³⁷ Zbz nzrpibzlr ncblo nedeng kx, “?Drlve ke, kx Kxetu?” Rpibz Jiszs kx, “Mzli lcde sa naopxbz bamu mz nzmc-krmu rkx ngrde.”

18

Be Ngr Majstret Kc Tqdrka'ngr X Olvz Kc Tqbzz Ncblo Ngrde

¹ Zbz Jiszs kc tqpipebzle badr nzycmne-ebzpxngr lc, mz nzalvztr-krde nidr kx nakrka'-zvzngr, x bzkq nabzdr tzprlzm, nakrlzbzle mzli kx ayzlu-ngrbz Gct nzkrka'-krdr. ² Rpibzle kx, “Kzdq kc majstret mnc mz kzdq taon. Tramatqleu Gct x Lou scde, x trkxu mz drtqde nzale-angidr-krde nzwz-krde. ³ A’ kzdq olvz kx bzs Ncblo ngrde mnc kz mz taon kc. Vz-zvzm bade tqrpibzle kx, ‘Ycmnepe-ngrbz ninge. Ycmneamu badr leplz kcng tzangqngutitrlr ninge mz drtc’ nydzne, murde nakxmu-lxblrle naesz’ bagr.’ ⁴ Pxtxpx-zvz-ngrbz majstret lc. A’ kzdq mzli sc tqrpipele mz nide esz’-krde kx, ‘Kxmule-esz’ tramatqwxt Gct x trkxu mz drtqnge leplz, ⁵ a’ naycmnepe-ngrbo nide. Murde tramatxpewxu mz nzvz-zvz-krm olvz lc bange!”

* ^{17:27} Nou 6—7 * ^{17:30} Nou 19 * ^{17:32} Nou 19:26 † ^{17:32} Olvz r Lot bzpe murde trlxngitileu natq Gct kx bzkq obq-teblq. A’ mzli kc tqama-ngrde nzvongr, rpile naobq mou mz taon nydzne Sodom. Bzkq obq-teblqq mz nzvz-nqblq-krm Jiszs. * ^{17:33} Matiu 10:39; 16:25; Mak 8:35; Luk 9:24; Jon 12:25

⁶ X rpi-mopwz Jiszs kx, “Naxlramu da kc tqipi majzstret lc tqdrka'ngr. Kape-ngrbzle da kc tqrlxtile, murde olvz kc nzrlxtx-zvz-krbzle da bade. ⁷ A' Gct trapuleu majzstret kxmule la. Murde nide tubq x mrlztile leplz nedeng. X trpnzngr nzaenzli-krde mzli kxboi mz nzokatr-krde kxmcpxleng, mz nzkrka'-zvz-krbzlr bade mz zbz kang kqlu. ⁸ Napibo bamu, Gct sa na-atubqti-anibzle da badr. A' mzli kc nayzlu-mou-ngrmc mz nrlc, mwx sa namcx leplz kxnzpipzng kxnzxngiti-angidrbelr ninge.”

Nzycmne-ebzpxngr Kzdq Farzsi X Kxatakqt Takes

⁹ Jiszs pi-kzpze nzycmne-ebzpxngr lc murde kzdung leplz nzabrtxtrpwzlr drtwrdr mz nzatubqti-lzbq-krdr, a' nzobqszo-ngrdr kzdung kz leplz.

¹⁰ Rpibzle kx, “Ncblo nzling nzvzdzng Mangr-nzangiongr mz nzkrka'ngr. Kzdq ngi Farzsi kx glqpx-lzbq. X kzdq kz kxatakqt takes, ncblo kx ale zvz alwx, x nzobqszo.

¹¹ “Farzsi kc tutxpx kai esz'-krde, sc tqkrka'pe-ngrde nide esz'-krde. Rpipele kx, ‘Gct, awibo bam murde trapuwxu ncblo kxnzkqlung. Murde trprlvzu mzke' da, x trangqngutirwxu, x trmwimiwxu olvz r ncblo kzble. X awi mz trnzapu-krngeu kxatakqt takes lcmonr, nqmq krde tqtrka. ¹² Alex da kqlupxbz myaszpxle da kc tqpiq mz Lou scm. Murde mz wiki amrlx nzaxtx-krbo dakxanzng zbz li mz nzkrka'-krbo bam. X kabu bam kranzpnugr da kcng amrlx tqatatrpc', x kranzpnugr dalr nrlanc nyzngeng x animol nengeng.’”

¹³ Rpi-mopwz Jiszs kx, “A' kxatakqt takes kc tqtutrp rllu kxipiz x rbltxpe nzobqlz-krde Heven mz nzkrka'-krde, murde drtqde myatxpe. X tztrle lomrde mz nzkrka'-krde, sc tqrpipele kx, ‘Gct, nayc mz drtwrm ninge, murde ninge ncblo ngr alwx! Ipqpxbz alwx ngrnge x atubqtim ninge. Eu, angida.’ ¹⁴ X napibo bamu, mz nibrde, ncblo lc tubqbz mz nzobqkr Gct. A' ncblo kc kz, trtingr. Murde doa kx amyazl-lzbq mzli ka, sa na-avzo Gct nide yu. A' kx avzo-lzbq mzli ka, sa na-amyazl Gct nide.”

Doa Kx Nzlxngitilr Gct Mz Nzngini-krde King Rdr Matiu 19:13-30; Mak 10:13-31

¹⁵ Kzdung leplz nzvzmimlr doa kxnztopwzng x itoto nedrng mz Jiszs mz nzmaletr-krbzle nrkrdrtrqdr x nzamrlz-krde nidr. A' kx nzmcpebzlr ncblo nedeng le, sc tzlclvztrpebzlr nzvz-krm leplz kcng. ¹⁶ A' Jiszs kqlebzle doa kxnztopwz kcng, sc tqrpipebzle mz ncblo nedeng kx, “Bzkq rpwa'-ngrbzmu badr doa lang tztopwzng nzvz-krmlr bange. Murde leplz kxnzmullr lcng nzlxngitilr Gct mz nzngini-krde King rdr. ¹⁷ Nadcpx da lc! Murde trpnzngr nzmnclz-krbzmu mz Gct mz nzngini-krde King rmu nzmu kx trapuwamuu doa lcng.” ¹⁸ Zbz kzdq kxrmailz r lr Jiu veabz mz Jiszs, rpibzle kx, “Kxakrlz, krlzx kx nim ncblo kxmrlz. ?Nike na-alex murde natwz-ngrne nzlungr kxboi?”

¹⁹ Rpibz Jiszs bade kx, “?Memule tqrpi-ngrme bange kx mrlzx? Murde trpnzngr kxmrlz, a' ngi txpwz Gct esz'-krde. ²⁰ Krlzq natq kcng tqkapx Gct. Krlcde seleng: ‘Bzkq kx narmwimi doa kxtrngiu kernalzde. Bzkq kx narnibq. Bzkq kx napna da. Bzkq kx narpokiati leplz. Amrlue zvz trtem x lxem,’ x kzdung mou.” ²¹

²¹ A' rpibz ncblo kc kx, “Abzo pnz mzli kc tqngini-ngrne obla, vz-nqblq-angidrx natq lcng amrlx.” ²² Kx xlrbz Jiszs da lc, sc tqrpipebzle bade kx, “Mrbrpxbep da esz' kx naleq. Amwa mclrm amrlx x kabz trau rde mz leplz kx trpnzngr scdr da. Nzmu na-aleq da lc, nzrngiba-krm namyalz

²¹ 18:20 Nzrlasngr 20:12-16; Lou Kcpwz 5:16-20

mou mrkc Heven. Vzm x vz-nqblq ninge.” ²³ A' kx xlrbz ncblo lc le drtwrde vzttx, murde nide ncblo kxrngisc x trsutiu drtwrde nzrlrtx-ngrbz da kcng. ²⁴ Mctrpebz Jiszs drtwrde nzvz-karde sc tqrpipebzle kx, “Rblxtx-atwrnr-ngrbz mz leplz kx nzrngiscng nzmnclz-krbzlr mz Gct! Murde trnzkrlzru kx nzmnc-xglelr nide mz da amrlx. ²⁵ Kamel trkrlzleu nzdwatr-krde mrkc tqmrplxngr nidil. A' nzrblxkr kxnzrngiscng nzmnclz-krbzlr mz Gct myaszpxle da lc.” ²⁶ Zbz sc tzrpipebzle kx, “E kx tqmule lcde, trpengr kx narlapx!” *

²⁷ A' rpibz Jiszs kx, “Nike rblxbz mz ncblo tr-rblxpwu mz Gct.” ²⁸ Zbz rpibz Pita kx, “Obq ena! Rlaszpekr mr nyzgr mz nzvz-nqblq-krgr nim.” ²⁹ Rpibz Jiszs badr kx, “Napi-angidrbo bamu. Ncblo kx rlaszle ma nyzde, o olvz rde, o mzledeng, o trtede x lxede, o doa nedeng mz nzvectr-krmle leplz mz Gct mz nzngini-krde King rdr, ³⁰ Gct sa nakabzle bade da kxkqlu namyaszlzle mzli ka mz nrlc ka, da kx natekqtrle da kcng tqamrbrle. X mz nrlc kc navzm, sa natwz-kzle nzlungr kxboi.”

Nzwrde Kratq Kx Ycmnetrngr Jiszs Nzsz-krde

Matiu 20:17-19; Mak 10:32-34

³¹ Zbz Jiszs vzmileng krkcng nzpnu-esz'-nrade-li (12) mz kzdq nrlc mz nidr esz'-krdr, sc tqrpipebzle badr kx, “Lalztqmamu! Navzpeku Jerusalem x mzli kc nakrlzlz-ngrbzku mrkc, da kcng amrlx tzyro profet kcng mzli kc, tzpi-ngrdr ninge mz nzngini-krnge Mrlx Leplz, sc tzngidatipeng. ³² Murde sa nakaobzlr ninge mz mqdr kxtrngiulrJiu. Sa naxtrnga-ngrdr ninge. Na-akrlo-ngrdr ninge. X nabyatilr ninge. ³³ Naviplatilr ninge x nanibqlr ninge. A' mz zbo kratq sc tqlupe-moux.” ³⁴ Da lcng trpnzngr kx yrplatitl nar ncblo nedeng. Drtwr ngr natq kcng yc-kapqbz badr. Trnzkrlzru da lc tqycmnetrngr Jiszs. †

Jiszs Amrlzle Kzdq Ncblo Kx Mzte Mwi

Matiu 20:29-34; Mak 10:46-52

³⁵ Jiszs badr zbo ngr leplz kcng, sc tzesonetrpebzng Jeriko. A' kzdq kc ncblo kx mzte mwi wxbune mz nrlar lrpzki, tqrlxne scde trau. ³⁶ Kx xlrle zbo ngr leplz kcng tqvzng mrkc tqmnc-ngrde, sc tqveape, “?Nilc krlc tqkxmule lc?” ³⁷ Nzrpibzlr bade kx, “Jiszs kc Naszret la tqvz mz lrpzki.” ³⁸ Zbz sc tqnepxppe tqrpipele kx, “Jiszs, Mrlx Devet! Nayc mz drtwrm ninge!” ³⁹ Leplz kcng tzrtwayzbzng nzlclvzlr nide x nzrpibzlr namnc-lrpi. A' sc tqaetunelz-zlwzle nate, mz nzrpi-krde kx, “Mrlx Devet! Nayc mz drtwrm ninge!” ⁴⁰ Kx xlrbz Jiszs natqde, sc tqtupe, x tqrkapebz natq kx ncblo kc mzte tqmwi navzmim bade. X mzli kc tqesotrpe-ngrbzle, Jiszs sc tqveapebz bade, ⁴¹ rpibzle kx, “?Nike suti drtwrm kx na-alebo bam?” Rpibzle kx, “Kxetu, naobq-moux.” ⁴² Zbz rpibz Jiszs bade kx, “Obq! Nzlxngiti-krm ninge amrlzpele nim.” ⁴³ X mzli lcpwz mzte obqtxpx pnz, x sc tqvz-nqblqpele Jiszs, tqawibz mz Gct. Kx nzmcpe zbo ngr leplz kc le, sc tzglqlzpelr Gct. ‡

* **18:26** Leplz mz mzli nyz Jiszs, mz drtwrdr nzrpilr kx nzrngiscr ncblo da vzpxm mz nzamrlzkr Gct nide. Nzmu leplz kxnzrngiscng kx trnaprtrru Heven e trpengr kx naprtr elr. † **18:34** Trnzaopxpwu mz lr Jiu kx Nzryrngrkxtr rpile kx Kxnzmcpx na-aetqbz drtqde x naobqszo nide, na-atrkati nide, x nanibq nide. [Sam 22:1-18; 69:8, 11, 20-21; 118:22a; Asaea 53:1-12] Murde nzlxngitilr natq Gct kc tqrpile kx Kxnzmcpx nangi king kc etu na-aovxiole enqmi drrng amrlx x na-aclive-alole leplz amrlx, da kc nawailo mz nzyzlu-mou-krmle. A' trnzxngitilru natq kzble lcng.

‡ **18:43** 18:42 Natq lc tqngi amrlzpele mz Natqgu, nzyr pnz arlapxpele mz natq lr Griek. X natq lc drtvr ngrde amrlz mz nzyagoxngr x arlapx.

19

Jiszs X Sakizs

¹ Jiszs krlzbzle taon kc etu Jeriko badr ncblo nedeng x sc tzkawipelr.
² Mzli lc kzdq kc ncblo kx mnc mz taon lcde, drtqde Sakizs. Nide nardr krkcng tzatakqting takes mz taon lcde, x rngisc. ³ X Sakizs lc, tqabzle nzrmcngr Jiszs, a' trpnzngr murde zbo ngr leplz kc, x nide ncblo kx mrbcnelzbz. ⁴ Zbz sc tqvope kai, tqrlaszpxpele zbo ngr leplz kc. Sc tqolzpe mz kzdq nc sikomo murde rpile namcomle Jiszs nzvzki-krmle mz lrpzki kc. ⁵ Jiszs vzkimle mrkc, obqlzbz x mcle Sakizs. Sc tqrpipebzle bade kx, "Sakizs, voo-anim murde namncx mz ma nyzm mzbq ka." ⁶ Sakizs votxo-anim. X kx nzkrnlzbzlr ma nyzde, abrtz-ngrde nzadwatr-krdele. ⁷ Leplz kcng tzrmcng da lc drtwrdr lctx, murde mz drtwrdr nzvztr-krbz Jiszs ma nyzde drtwr ngrde kx abrtzlvzle alwx ngr Sakizs. Sc tqrpipelr kx, "Mrlx lc vztrpebz mz ma nyz ncblo lc tqale zvz alwx!" *

⁸ Mzli kc Jiszs tzmnncbe-ngrdr badr, Sakizs kc tqtekqtrpele nqmq nr drtwrde. Tutxlzm, sc tqrpipebzle bade kx, "Kxetu rnge, kzdq se da napibo bam! Dztungeng lcng kqlu nakabo mz krkcng trpnzngr scdr da. X krkcng tqangqngutirxng, naxpe-mopwc' nzwrde napwx, navz-nqblqle Lou sc Mosis." ⁹ Rpibz Jiszs mz krkcng tzlalztqng kx, "Otxpxpe kx Gct arlapxpele ncblo lc, murde nzrlxngiti-krde apule melrmqde Ebraam. ¹⁰ Ninge Mrlx Leplz vz-ngrmc mz nrlc mz nzrtangr-krnge x nzarlapx-krnge doa kxnzmrbrng."

Kxnzawz-nrbalqng Kx Nzatutr-angidrlr Nz wz-krdr

Matiu 25:14-30

¹¹ Mzli kcpwz leplz tzlalztq-ngrpwzlr mz da lc, Jiszs sc tqryapwxpe-mopwz badr kzdq nzycmne-ebzpxngr. Pi-ngrbzle da lc murde sc tzesonetrpebzng Jerusalem, x nzpnzkr drtwrdr le, kx mz nzkrnlz-krbzle la Jerusalem, sa nayrlqpe Gct nide mz nzngini-krde king rdr, x lr nrlc amrlx namnclzbzng mz Gct. ¹² Zbz rpibz Jiszs kx, "Kzdq ncblo kxetu navz mrkzble rlsru, murde king kxetu ngr mrlcde nakabzle bade zmatq ngr nzngini-krde king r mrnyzde. Zbz sa nayzlu-mop mz nzaclve-krdele. ¹³ Mzli kc ycpe pipz nzrlasz-krde mrkc, sc tqaveatipele kxnzawz-nrbalq nedeng nzpnu-esz'. X mz ncblo kxesz' kabzle trau nzkqlu-krde kxmule-esz'. X rpibzle badr kx, 'Mwapx-ngrbzmu trau scnge lc mzli kc navz-ngrne.' Zbz sc tqvzpe. ¹⁴ A' kzdung lr mrnyzde nzpxpx-ngrdr nide nzngini-krde king. X sc tzatwzlrpe-ngrbzlr kzdung ncblo mz nibrde, mz nzrpi-krbzlr mz king kc etu kx, 'Trsuti drtwrgr ncblo lc nzngini-krde king rgr.'

¹⁵ "Kxmule-esz', a' ncblo kc etu sc tqnginipede king rdr. X mzli lc tqyzlupe-ngr-mople badr, sc tqaveatipele kxnzawz kcng tqka-nebade trau kcng. Murde nakrlzle kx tqlvr kx nzatatrpremlr mz trau scdeng. ¹⁶ Krkc ayrrnrngr vztrp x rpibzle kx, 'Kxetu rnge, trau scm kc tqkame bange nzatatr-krmlle nzwrde nzpnu-esz'pe.' ¹⁷ Rpibz king kc kx, 'Mrlztx angidr. Nim kxnzawz kxmrlz! X nayrlqpe nim mz nzaclvengr taon nyznge nzpnu naesz' murde atutr-angidrq nz wz-krmlle mz da kxtopwz.' ¹⁸ Kxnzawz krali vztrp x rpibzle kx, 'Kxetu rnge, trau scm kc tqkame bange nzatatr-krmlle nzwrde nzlvqnpe.' ¹⁹ Mz krlc rpibzle kx, 'Na-aclveq taon nyznge nanzlvqn.'

* ^{19:7} 19:2 Lr Jiu kc-kzng tzrkalrtinqr lr Jiu kcng tzatakqting takes, murde nzangqngutirlr leplz nedrng x nz wztrpzlr mz gzpmanc ngr Rom. X krkcng tzatakqting takes nakapxlr trau kx nangi takes namyaszlze kx pi gzpmanc. X nzyrlqtxpxlr krkc tqyctrpz nangi scdr. ^{19:7} Mz nzmncc-lxblrkr Jiszs mz ncblo lc tqtrka, drtwr Jiszs tresz'tiu badr mz alwx ngrdeng, a' rpile na-aelwaxp-ngrbzle nivz lr Gct bade. ^{19:8} Nzrlaszngr 22:1

²⁰ "Kzdq mou kxnxawz vztr-mop x rpibzle kx, 'Kxetu rnge, trau scm kc tqkame bange dese. Nux mz lrpz sc tqyrlq-kapqpex. ²¹ Mwxlrtix nim, murde suti drtwrm kx nike na-ale kxnxawz nemqng nradr naycbz. X atatrpe' trau mz da kx trvzpxpuu mz nwz-krm. Mwxlrvzx trau scm murde ma tqamrbrbo.' ²² Rpibzle bade kx, 'Nim kxnxawz kxtrka! Trvz-nqblq-pnzwq natq kx kabko. Na-ayrplapxpex nim navz-nqblqle natqm kc tqpiq. Murde krlzq kx ninge ncblo kc tqayrplapx-zlwzle kxnxawz nengeng kcng tzvz-rbrng x suti drtwnge kx nike na-alelr nradr naycbz. X atatrpc' trau mz da kx trvzpxpuu mz nwz-krnge. ²³ ?A' memule tryrlqtr-ngrpwzmeu trau scnge mz bxng, murde mz nzyzlu-krmc trau kxmwatipxle nayctrpebz?'

²⁴ "Zbz kxetu kc sc tqrpipebzle mz leplz nedeng kcng tzyrlwrng mrkc kx, 'Kapxbzmu trau scnge bade x kabzmu mz kxnxawz kc nzatatr-krmle nwzrde nzpnu tqesz'. ²⁵ A' nzrpibzlr bade kx, 'Kxetu rgr, nzatatr-krmle trau nwzrde nzpnu-esz'pe!' ²⁶ A' rpibzle kx, 'Napibo bamu, doa kx acuve-angidre da kx amnqlzbo bade, sa nartxlvzlzbo nikeng kabko bade. A' krkc traclve-angidreleu da kx kabko bade, kxmule-esz' nike scde pipz, sa nakatxpxbo bade. ²⁷ X mzli kape, enqmi rngeng kcng trsutiu drtwrdr nzngini-krnge king rdr, vzmimamu mrka x nibqtrpa'mu mz mzke'!" †

Sade Kx Nzprlxlvzingr Nabx Nc Paam Mz Lrpzki R Jiszs Mz Nzvztr-krde Jerusalem

Matiu 21:1-11; Mak 11:1-11; Jon 12:12-19

²⁸⁻²⁹ Jiszs sc tqrtrwayzbz mz ncblo nedeng. X pibzle da lc mzli kc tzkrpzengrbzlr mztea kcng li Betpeji x Betzni, mrkc mz Newz ngr Nc Olivi. Zbz sc tqatwzlrpe-ngrde ncblo nedeng nzling. ³⁰ Rpibzle kx, "Vznamu mz mztea lcmonr tzmcpz. Mzli la navztr-ngrbzmu, sa namcamu dq nei dcngki nzatolvangr kx trnzvonekangr. Yokaepxamu x vzmimamu mrka. ³¹ Nzmu kx tqrveabz dq kx, '?Memule tqyokaepx-ngrnamule?' rpibzmu bade kx, 'Suti drtwr Kxetu.'"

³² Zbz krkcng tzaveang nzvzng, x da amrlx kcng tqpibz Jiszs badr sc tqngidatipeng ³³ Murde mzli kc tzyokaepx-ngrpwzlr dcngki kc, kxnxrningeng kc tzrpipebzlr kx, "?Nike tqyokaepx-ngrnamu dcngki la?" ³⁴ Nzrpibzlr kx, "Suti drtwr Kxetu." X nzrlr-ngrbzlr nzvzmi-krdrle. ³⁵ X sc tzvzmipebzlr mz Jiszs. X nzprlxobzlr nzkq scdrng mz nibr dcngki kc, x nzawxbuomlr nide elr. ³⁶ Mzli kc tqvobe-ngrbzle Jerusalem, zbo ngr leplz kcng nzprlxtoilr nzkq scdrng krali mz lrpzki. ‡

³⁷ Kx nzesotrpebzlr Jerusalem, mrkc tqvzkiope lrpzki kc mz Newz ngr Nc Olivi, zbo ngr leplz nedeng sc tzglvzpelr nide. X nzglqpxlr Gct mz natqdr kxetu, murde da kcng tqmatq tzmcpelr. ³⁸ Nzrpilr kx, "Glqpxkr King Kxnxmcpkx kc tqvzm mz drtq Yawe! Twzme nrwz mz mzli leplz x Gct. Ngrlvzkr nim kc tqmyalz-esz'ngr." * ³⁹ Kzdung Farzsi kcng tzmnccpxmqng mz zbo kc, drtwrdr ngyape murde leplz lcng tzrpilr kx Jiszs nide Kxnxmcpkx, a' Farzsi kcng trnzlxnigilru. Sc tzrpipebzlr mz Jiszs kx, "Kxakrlz, pibz mz leplz nemqng kx namnc-lrping." ⁴⁰ Rpibz Jiszs kx, "Napibo bamu, nzmu namnc-lrpilr, e rplz lcng sc tkabomipelr natq kcpwz. Murde krlzpebzle mzli rde."

† **19:27** Be lc aelwapx-ngrde kx Jiszs navztx kai, x mz nibrde nayzlu-mop mz nzngini-krde king r nrhc, mz nzayzlu-krbzle da mz leplz mz nzvz-nqblq-krde nqmq krdr. † **19:36** Krlc kxmu nzarmyalz-krdr king. X mz drtwrdr Jiszs votr Jerusalem murde na-acuvele Israel mz nzngini-krde Kxnxmcpkx kc tqngi King. * **19:38** Sam 118:26

Jiszs Yrnimile Lr Jerusalem

⁴¹ Zbz sc tzesonetrppezng mz mzteadau Jerusalem. X kx mcpelele, sc tqyrrnimipele lr Jiu. ⁴² Sc tqrpipele kx, “Agrm lr mrnyznge, trnzrlxngiti-krpwa'muu amwitrpebzle mzpu. X trmcwamuu nike na-aleamu kx narlapx-ngrnamu mz nzayrplapxkr Gct nimu. Mzli ka sa tqbrngzbe, a' trka-ngrde tr-rlxngitiwamu. ⁴³ Mzli la nakaputrp bamu kx enqmi rmung natu-ngalelvz-ngrdr mzteadau nyzmu. X nayrkqlvzlzlr drkq nyzmu mz drtc', murde naesolvztirpzlr nimu mz nrarmu amrlx. X trpnzngr me narlakipxamu. ⁴⁴ X sa naodatilr nimu lr Jerusalem. Na-awxlikiolr drkq nyzmu x ma nyzmu amrlx. Murde trglxwamuu Gct mzli kc tqoklati-ngrmle nimu mz nzarlapx-krde nimu, a' pxttxpx-ngrnamu nide!” §

Jiszs Angyale Nzatrkatingr Mangr-nzangiongr Yawe

Matiu 21:12-17; Mak 11:15-19; Jon 2:13-22

⁴⁵ Mz nibrde, Jiszs vztr Mangr-nzangiongr Yawe Jerusalem x sc tqmaszlpoxpe-ngrde leplz kcng tzamwating animol kx nangi blz.

⁴⁶ Tqrpibzle badr kx, “Nzyro mz Nzryrngrkxtr kx rpi Gct kx, ‘*Ma nyznge nangi ma ngr nzkrka'kr leplz.*’ [◊] A' apusr-ngrnamule *me nzamwangr da kcng tqangqnguti-lzbq-ngrnamu!*” [◊]

⁴⁷ Zbz Jiszs alvztr Mangr-nzangiongr mz zbo kcng trkqluu tqmnctibe. Kxnzetu rdr pris x krkcng tzalvztrng mz Lou sc Mosis, x kxnzrmailzng sc tzyrlqpele drtwr ngr nzribqng nide. ⁴⁸ A' rblxbz badr, murde leplz amrlx nalalztq-angidrbzng mz natqdeng amrlx. X narpwa'-ngrbzlr mz kxnzrmailz lcng nzatrkaty-krdr nide.

20

Nzrveatingr Zmatq Ngr Jiszs

Matiu 21:23-27; Mak 11:27-33

¹ Kzdq zbo lcdeng Jiszs sc tqalvztrleng leplz mz Mangr-nzangiongr, x tqryapwxbz Nrpakxmrlz kx Gct sa tqvectrpemle leplz bade. Kxnzetu rdr pris x krkcng tzalvztrng mz Lou sc Mosis, nidr badr kzdung lrtzlvz nzvzmqng. ² X sc tqrpipebzlr bade kx, “?Pim bagr, neke rkabz bam zmatq mz nzale-krm da lcng tqaleq?” ³ A' rpibzle kx, “Mzli ka naveati-kaipo du bamu kzdq natq. ⁴ ?Zmatq ngr nzawrkxtrkr Jon kaom Gct o kabz ncblo?” ⁵ Zbz sc tzrpi-etrpelr kx, “Nzmu narpiku kx, ‘Zmatq kx kaom Gct,’ sa narpimle kx, ‘?E memule trlxngiti-ngrwamuu natqde?’ ⁶ A' nzmu narpiku kx, ‘Zmatq kx kabz ncblo,’ zbo ngr leplz lc nzmu nzvaebrtilr nigu. Murde nzkrlz-angidrlr kx Jon nide profet.” ⁷ Zbz sc tzrpipebzlr kx, “Trkrlzkru kx rkabz.” ⁸ Rpibz Jiszs badr kx, “X ninge kz trpnzngr nzpi-krbo me twzkimc zmatq kc tqwz-ngrne.” *

Nzycmne-ebzpxngr Kxnzrbilqng Nrlanc

Matiu 21:33-46; Mak 12:1-12

⁹ Zbz sc tqyapwxtypebz Jiszs nzycmne-ebzpxngr lc. Rpibzle mz leplz kcng tzmncng Mangr-nzangiongr kx, “Kzdq ncblo petile kc nrlanc ngr grep. Zbz sc tqqlrpe-ngrbzle mz ncblo kx narbilqng, murde naxpebzlr bade kzdung

§ **19:44** Gct oklatipemle lr Jiu mz nzvz-krm Jiszs Kxnzmcpx. Nzodatingr Jerusalem lc ngida mz yiz 70 AD mzli kc ami ngr Rom sc tqodatipele Jerusalem x Mangr-nzangiongr Yawe, x nibqtileng leplz ngrdeng amrlx. [◊] **19:46** Asaea 56:7 [◊] **19:46** Jeremaea 7:11 ^{*} **20:8** 20:5 Jon Kxawrkxtr yapwxtypele kx Jiszs nide Kxnzmcpx, mz nzrpi-krde kx nide Nei Sip ne Gct. 20:8 Jiszs krlztypele kx nzrpilr na-atalzlr nide, murde leplz napxttxpx-ngrdr nide mz nzrpi-krde kx zmatq ngrde vzpxm mz nzngini-krde Kxnzmcpx ne Gct.

nra grep mz nrlanc lc. Zbz sc tqrlaszpele mrnyzde, vzpe rlu mrkzble, mnctile mzli boitx. ¹⁰ Zbz mzli kc tqbrpengr grep, sc tqatwzlrpe-ngrbzle kc kxnzawz nede mz nzyzumi-krbzle du nra grep kx nangi mqde. Ncblo kc tqatwzlr-ngrbzle, kx krlzbzle ncblo kcng tzrbilqng nrlanc kc, sc tzolvzpelr, nzttxdr x sc tzayzlu-nrbalqpelr. ¹¹ Zbz atwzlr-ngrbzle kzdq mou kxnzawz. A' nztz-mopwzlr nide x nzamyabzlr drtqde. Zbz nzayzlu-nrbalq-mopwzlr. X vzm x pi-mopwzle mz kxetu rde. ¹² Zbz sc tqatwzlrpe-ngr-mopwzle kxnzawz kratq. Krlc nztzti-kzlr, bixrti, x nzrtctxpx-ngrdr yz mz nibr nrlanc kc. ¹³ “Zbz ncblo kc tqrnginyz nrlanc kc, sc tqrpipele kx, ‘?Nike na-alepex? Na-atwzlrpe-ngrbo mrlxnge kc esz’txu. Mwx nzmu nzamrluebzlr nide x sa nakabzlr du nra grep bade kx nangi dalr nzrbilqng.’ ¹⁴ A' kx nzmc ncblo kcng tzrbilqng nrlanc mrlxde, sc tzrpi-etrpelr kx, ‘Mrlx kxetu kc tqrnginyz nrlanc ka nide kape. Nanibqpeku murde da nyz trtede nangi nyzpegu.’ ¹⁵ Zbz nzrtctxpx-ngrdr mz nrlanc kc x nznibqtxdr.

“X krlzpeamu da kx na-alebz ncblo kc tqrnginyz nrlanc kc badr! ¹⁶ Sa navzm nanibqle ncblo lang. X nrlanc la sa nakabzle mz ncblo kzbleng.” Nzkrpzpelr kx nzycmne-krde kc tutrpz mz kxetu r lr Jiu, sc tzrpipele kx, “Bzkq ngida nzrtekqtr Gct nigr mz kxtrngiulrJiu mz nzngini-krdr leplz nedeng!” †

¹⁷ Jissz obqbz badr x rpibzle kx, “Kx tqrpi-ngrnamu nakxmule lc, na-aoti kz drtwrmu nike drtwr ngr Nzryrngrkxtr lc tqrpile kx, ‘Rplz kc etu tzpxtxpx-ngrdr ncblo kcng tzrwz-ngrng ma, nzaelwaxngr kx nide nou rplz kc tqmyatpxp-zlwzbz.’” ¹⁸ Leplz kcng trnzabtzlvzlr rplz lc tqmcpx Gct, apule kx nztaong elr x nzataki-lzbqng. X leplz kcng tzvz-zvzng nzpxtxpx-krdr rplz lc, sa na-ayrplapxng kalr mz Mzli Kxmatq kc navzm. Sa na-apule rplz kc nataobz badr x natamyr-ngrde nidr.” ¹⁹ Zbz ncblo kcng tzalvztrng mz Lou sc Mosis x Kxnzetu rdr pris kcng, nzkrpztrpebzlr kx nzryapwxkr Jissz lc tutrpz badr. X nzrpilr nalolvzlr nide mzli lcpwz. A' nzmwxltilr leplz kcng murde drtwrde ma tzngya. Zbz trnzlolvz-pnzlru.

Nzrveatingr Nzxpengr Takes Matiu 22:15-22; Mak 12:13-17

²⁰ Sc tqauktipe kxnzetu r lr Jiu. Nzamctilr kzdung ncblo kxdrka'-ngrng mz nzaukzti-krpwzlr nide. Nzatzl-ngrbzlr mz Jissz mz nzatalz-krdrle mz kzdq nzveangr. Murde nzrpilr nabatrpzlr nzrpi-krde da kx nalolvz-ngrdr nide. X nakaobzlr mz Pcntzs Paelzt, lr Rom kc tqaclvele Provins kc Judiz. ²¹ Kxmule-esz' trnzlxngitilru nide, a' nzrpibzlr bade kx, “Kxakrlz, krlzkr kx nike piq x alvztrq ngi da kxtubq. X krlz-kzkr kx tu-amqngi-zvzq mz nzalvztr-krbzme nqmq kr Gct mz leplz, kxmule-esz' trna-abrtzlvzu kxnzetung. ²² ?Pim bagr, tubq mz Lou sc Mosis nzxpe-krbzku takes mz King r Rom, o trting?”

²³ A' mcplxtrpebz Jissz nzatalz-krdr. Murde mz nzrpi-krbzle kx, ‘Eu,’ lr Jiu lcng nangyati drtwrdr nide mz nzokatr-krde enqmi rdr. X mz nzrpi-krbzle kx, ‘Trtingr,’ ncblo ngr vea neng Paelzt nalolvzlr nide mz nzxpqbrrlr-krde lou sc gzpman ngr Rom. ²⁴ Sc tqrpipebzle badr kx, “Aelwa-ngrnamu dq srlrni kc tqxpe-ngrnamu takes.” Nzaelwa-ngrbzlr kc srlrni. X rpibzle kx, “?Mqngr nar nelc tqmnztr mz srlrni lc x drtq nelc tzyrtr elr?” Nzrpibzlr kx, “King r Rom.” ²⁵ Zbz rpibz Jissz kx, “Mz nzmu-krde lcde, kabzmu mz king

† ^{20:16} Mz be lc nrlanc ngr grep drtwr ngrde lr Israel. [Asaea 5:7] Mrlx Kxetu lc drtwr ngrde Jissz. X Jissz pibzle kx Gct rkabz zmatq bade mz nzngini-krde Mrlxde. Ncblo kzbleng drtwr ngrde kxtrngiulrJiu. ^{20:17} Sam 118:22

da kx takitrde king x kabzmu mz Gct da kx takitrde Gct.” ²⁶ Rblxtx nzatalz-krdrle mz da kx pile. Sc tzmnc-lrpitxpepwzng, nzkctitpxlrx kx trnzatalz-pnzlru, a' ayzlutx-angidrbzle natq kc tzveatilr.

*Nzrveatingr Nztulz-ngrm Mz Nzbzng
Matiu 22:23-33; Mak 12:18-27*

²⁷ Kzdung Sadiusi nzvzmqng mz Jiszs Mangr-nzangiongr. Nidr kzdq dzbe lr Jiu kx trnzlxitlru nztulz-mou-ngrm mz nzbzng. Nzveatibzlr da kx na-atrkat-ngrbzlr nzalvztr-krde mz nzlu-mou-ngrm mz nzbzng. ²⁸ Nzrpibzlr kx, “Kxakrlz, Mosis yrpxle kzdq lou kx nangi scgu. Rpile nzmu ncblo bzsle olvz rde x trpnzngr nedr doa, mzlede nayrlzti-alzule olvz kc. Murde nzrngine-krdr doa na-apule kx ngi doa ne mzlede kc tqbzpe. X doa lc natekqtrle nzmrbrpx-krbz nqvi lr ncblo kc x natwzle dztudeng. ²⁹ Nzmu narpingr kx kzdung mzle-lzbq rlimz. Mzledr kc tqetu yrlz. Zbz mzli trboiu sc tqbzpe, trpnzngr nede doa. ³⁰ Zbz krkc tqvz-kzpz twz-kzle olvz kc, x mz nibrde bzt kx, x trpnz-kzngr nede doa. ³¹ X zbz kratq. Da kcpwz waile mz mzle-lzbq kcng rlimz. Nzbztx-lxblrng, x trtxpnzngr nedr doa. ³² Mz nibrde olvz kc sc tqbzpe. ³³ Alvztr-ngrn kx leplz tulz-mop mz nzbzng. ?Kx tqmule lcde, neke nartwz olvz kc mzli kc natulz-moungr leplz amrlx? Murde mzle-lzbq kcng rlimz nzyrlztilr nide. ?Myx kxmule, Gct batrpzle mz olvz lc nzxpqbrrlr-krde natqde mz nzyrlzti-krde ncblo kcng rlimz mz mzli kxesz?”

³⁴ Rpibz Jiszs kx, “Mzli ka leplz kcng tzylwrng mz nrlc ka nzyrlzng. ³⁵ A' mzli kc navzm, leplz kx takitrdr nztulz-mou-krmlr mz nzbzng x nzprtr-krdr Heven, trnzyrlzung x trpnzngr nzyrlz-mou-krdr kalr. ³⁶ Murde trnzbzung, a' nzapulr enjrl. X nztulz-mopqng mz nzbzng mz nzngini-krdr doa neng Gct.

³⁷ “X Mosis aelwapx-ngrde kx krkcng tzbpeng sa na-atulzmqng mz nzlungr. Krlz-angidramu natq Mosis mz be ngr nounc kc tqmrbz tqwou. Mzli lc Yawe tqrpi-ngrbzle mz Mosis kx, ‘Ninge Gct ngr Ebraam, Aesak x Jekop.’ ³⁸ Kxmule-esz' ncblo lcng tq nzbz-pnzng, a' trpileu kx nide Gct ngrdr mzli kc pnz. Murde nibede Gct ngrdr mz nzlu-krdr Heven mzli ka. Mz nzmu-krde lc, krlzku kx mqngr leplz amrlx sa nalung mz nibr nzbzkr nrkrdrtqdr.” ³⁹ Kzdung krkcng tzalvztrng mz Lou sc Mosis nzycmnelzmqng. Nzrpibzlr kx, “Da zpxw la tqpiq, kx kxakrlz!” ⁴⁰ X nidr amrlx ngrdr nzmwxlrng nzvea-mou-ngrbz natq, murde ma tqamya-mopwzle drtqdr.

*Nzrveatingr Kxnzmcp Ne Gct
Matiu 22:41-46; Mak 12:35-37*

⁴¹ Rpibz Jiszs badr kx, “Kxnzalvztrng mz Lou sc Mosis nzpilr kx Mevalu kc tqmcpk Gct navzpxm mz nqvi lr melrmqde Devet. ⁴² Murde Devet ycmnetr-ngrde Kxnzmcpk kc mz kzdq Sam kx, ‘Yawe rpibzle mz King kc tqngi Kxetu rnge kx, Wxbu mrlc tqmatq-esz'ngr mz nrlarng kxrtc, ⁴³ navz nakrlz-zpwxzble mzli kc nangi-batr-ngrbo mz enqmi rmqng nzmetx-krbzlr bam.’” ⁴⁴

⁴⁴ “Mz Sam lc Devet rpile kx Kxnzmcpk nqi kxetu rde. ?A' myx kx namu Kxnzmcpk nznginikr doa mz nqvi lrde kc mzte trnzmcka x mzli kcpwz nqi kz kxetu rde?” ‡

^{20:28} Lou Kcpwz 25:5-10; Nou 38:8; Rut 4:5-10 ^{20:37} Nzrlasngr 3:1-6, 15 ^{20:43} Sam 110:1 ^{20:44} Jiszs na-aelwapx-ngrbzle badr kx Kxnzmcpk trngi-twpwzu ncblo, a' myaszlzle ncblo murde Gct amyazlze nide. A' trpnzngr nidr kx yrplatir narde natqde.

*Bzkq Apuamu Kxnzalvztrng Mz Lou Sc Mosis
Matiu 23:1-36; Mak 12:38-40*

⁴⁵ Mzli kcpwz leplz amrlx tzlalztq-ngrpwlzlr mz Jiszs, rpibzle mz ncblo nedeng kx, ⁴⁶ “Bzkq apuamu kxnzalvztrng mz Lou sc Mosis. Murde mrlzbz badr nzkq-kldr nzkq kxboi mz nzvzne-kldr, x nzamatqkr leplz nidr mz nzrpi-ngrbz badr kx, ‘Nim la, trte,’ mz nzvzne-kldr me nzamwangr da. X mrlzbz badr nzwxbu-zvz-kldr me matq mz mangr-nzkrka'ngr x mz mzli r nzmulvzngr murde nzglqpx-lzbqng. ⁴⁷ X mz zmatq ngr nzngini-kldr kxnzrmailzng, nzangqngutitrlr olvz kxnzbzsng mz nztwz-pnati-kldr dztudrng amrlx. A' mzli kcpwz nzaboitilr nzkrka'-kldr mz nzyrlq-kapq-kldr alwx ngrdr. Mz nzmu-krde lcde, leplz kxnzmulr lcng nzayrplapxngr nidr kalr mz Hxl namyatpxx esz'ngr.”

21

Nzrkangr Angidr

Mak 12:41-44

¹ Jiszs obqlvxle nrlc x mcpele ncblo kxnzrngiscng tzryrlqong trau mrkc mz nzrkatr-kldr trau Mangr-nzangiongr. ² X mc-kzle kzdq olvz kx trngiscu x bzsz ncblo ngrde, tqryrlqo srlrni kxtopwzne li. ³ Rpibzle mz ncblo nedeng kx, “Napibo bamu, mz nzobqkr Gct olvz lc tqabzope, srlrni kc topwz tqkapxle myaszpxle blzmr trau kcng tzkapxlr kxnzrngiscng. ⁴ Murde kxmule-esz' kxnzrngiscng nzkapxlr kqlu, a' kxipizne la ye mz nzrngisc-kldr. A' olvz lc tr-rngiscu katxpixepe da kcng amrlx namnc-xglele.”

Rkx Ngr Nzodatingr Mangr-nzangiongr

Matiu 24:1-2; Mak 13:1-2

⁵ Kzdung ncblo nedeng tzycmnetr-ngrdr nzobqkr Mangr-nzangiongr Yawe x nzluli-krde mz rplz ngrdeng kxlqngiti. X mz da kx nzka kxluliti nzangrlopliti-ngrde. ⁶ Rpibz Jiszs kx, “Kzdq mzli sa navzm kx trpnzngr rplz ngr da lcng amrlx tqmcamu kx nablio me yc-ngrde. Murde sa naodati enqmi rmung Mangr-nzangiongr lc kalr.”

Rkx Ngr Vea X Nzkxpungr Kxkqlu

Matiu 24:3-14; Mak 13:3-13

⁷ Nzveabzng nzrpibzlr kx, “Kxakrlz, pim ena bagr mzli kc naodatingr Mangr-nzangiongr Yawe, x rkx kznikeng namc nakrlztingr mzli lcde.”

⁸ Rpibz Jiszs kx, “Aclvetio-lzbqamu mz da lcng. Bzkq nzapokiatitrlr nimu mz da kznikeng naprtz. Murde ncblo nakqlung sa navzmqng mz drtqnge, narpibzlr mz leplz kx, ‘Ninge Kxnzmcpx!’ X narpilr kx, ‘Mzli r Gct nzngini-kdre king mz nrlc ka, se tqkaputrpem!’ A' bzkq ma-nqblqamu nidr.

⁹ “X mou, bzkq mwxlramu mz nxzlr-krmu nrpa ngr vea, x nrpa ngr nzrtekqrnegr gzpman mz nzrtwztingr vea. Da kxnzmulr lcng navz-kaip, a' trngiu drtwr ngr nzyrkpx-krbz da amrlx mz nrlc esotrpem.”

¹⁰ Rpi-mopwzle kx, “Mrkzbleng kxkqlu mz nrlc naotablr-etrng. ¹¹ Nengq kxetu sa navzmqng. Dzbi kxetu sa natao-kzng. Zyagox kxkqlu kx rnibqti leplz kxkqlu natalvzpxle nrlc. X rkx kxmatq kx nzmwxlrtng navzpxm bongavz. ¹² Da lcng navzmqng kalr, a' nimu lang tzlxngitilr ninge, sa nalolvz kai kxnzetung nimu. Sa na-aetqbzlr drtqmu x navzmilr nimu mz kansrl nyzdr x mz mangr-nzkrka'ngr, x na-adwatrlr nimu mz presin. X navzmibzlr nimu mz king kxtrngiulrJiu, x mz kxnzetung r mrkzbleng mz nzayrplapx-krbz nimu. ¹³ X mzli nyzmu lape kz mz nzyapwxtipx-krbzmu Nrpa rnge badr. ¹⁴ Mzli lcde natu-amqngiamu x bzkq aoti kai drtwrmu

kxnamu na-ayzlu-ngrbzmu natqdr. ¹⁵ Murde sa nakabo bamu natqngeng x nzyrplapx-krnge kx rblxbz badr nzayzlu-krbzlrle. ¹⁶ A' trngi-txpwzu leplz kc-kzng kx narlwa-ngrdr nimu mz nzvz-nqqlq-krmu ninge. Murde trtemung x lxemung, mzlemung x kxnginimung, x kxmrlzti-lzbqamung badr sa na-amwatilr nimu x sa nanibqtilr kzdung nimu. ¹⁷ Leplz kxkqlu sa napxtpx-ngrdr nimu, murde nimu leplz nengeng. ¹⁸ A' trpnzngr dalr nzayrplapxngr mz Hxl kx nabxtrpzle nimu. ¹⁹ Tu-amqngiamu, murde natwzamu nzlungr kxboi."

Rkx Ngr Nzodatingr Jerusalem

Matiu 24:15-21; Mak 13:14-19

²⁰ X rpi-mopwz Jiszs kx, "Mzli kc namc-ngrnamu Jerusalem nao-ngaletvngr ami le, sc nakrlzpeamu kx mzli trnaboiu sc tzodatipelr. ²¹ Mzli lc nimu kcng tzmncng Judiz navolzamu mz newz mz nzmnc-kapq-krnamu mz nzodangr kc tqycpe pipz nzkaputr-krmle. X krkcng tzmncng mz mzteadau Jerusalem, narkalz-animqng mz nzvongr. X krkcng tzmncnetrpqng mz nibr taon, bzkq nzvztrpemqng mz taon, murde ma tzodating. ²² Murde mzli lc Gct sa na-ayzlubzle da mz lr Jerusalem kcng tzpxtpx-ngrdr Kxnmcpx. X nzodatingr lc Jerusalem na-angidatile da kcng amrlx tqpi Nzryrngrkxtr. ²³ Agrmqng olvz kcng tzyrng o tzayqng itoto, murde rblxtile nidr nzngirlrz-ani-krdr mz newz mz nzmnc-kapq-krdr. Nzxpungr kxetu sa navztrp mz lr Judiz, x nzayrplapxkr Gct navzom mz lr Israel. ²⁴ Kzdung nanibq mz toki r vea. Kzdung nalolvzlr x navzming mz nzngini-krdr kxzawz-nrbalqng, mz drtc' amrlx nyz lr mrkzbleng. X Jerusalem nayctxlzbz mz zmatq ngr kxtrngiulrJiu. Navz, navz, nakrlzbzle mzli kx Gct na-ayrkrpx-ngrbzle zmatq ngr kxtrngiulrJiu mrka Jerusalem."

Rkx Ngr Nzvz-krm Mrlx Leplz

Matiu 24:29-31; Mak 13:24-27

²⁵ Rpi-mopwz Jiszs kx, "Zbz kzdung rkx sa na-aelwapx-lzbqngm mz nepi x temz x vri lang mz bongavz. X mz drtc' amrlx leplz trnzyrplatitru nardr da lc, x sa namwxlr-ngrdr prla nzyclwz-zlwz-krde mz nrlc kxtrka. ²⁶ X mzli lc na-aenzli-ngrdr da kcng navztrp na-atrkale nrlc ka, mz leplz natclvrtrpz mz zmwxlr. Murde dalr bongavz kcng tzmatqng amrlx sa naycngrlrti-atwrnrngr. ²⁷ Ninge Mrlx Leplz. X mzli lc leplz amrlx mz nrlc tulvzo sa namclr ninge mz nzvz-krmc mz nabz dcbz, mz zluli kxetu x zmatq. ²⁸ Mzli lc tqmcamu nzprtakr da lcng, binenamu ye x obqtipxamu nzmnc-krmu Heven, murde ycpe pipz nzkaputr-krmle."

Rkx Ngr Nc Fiki

Matiu 24:32-35; Mak 13:28-31

²⁹ Zbz Jiszs yapwxtibzle kzdq kz nzycmne-ebzpxngr mz nzhpi-krde kx, "Na-aoti drtwrmu nzpqkr nc fiki x nounc amrlx. ³⁰ Mrka Israel mzli kc namc-ngrnamu nzyrlqbzlr leu rdr kxmrna, sc tqkrlzpeamu kx mzli r nrpr ngr nranc sa tqesotrpem. ³¹ Mz nqmq lcpwz, mzli kc namc-ngrnamu kx da lcng tqpibo bamu sc tzkaputrpemqng, sc tqkrlzpeamu kx mzli esopem mz nzaclvekr Gct nrlc mz nzngini-krde king. ³² "Nakrlz-angidramu kx da lcng amrlx nangidati-kaing, x leplz kcng tzmncng mz nrlc sc tzyrkrtr-ateng. ³³ Kxmule-esz' bongavz x nrlc sa nayrkrpxng kalr, a' natqngeng trtxpnzngr nzyrkrpx-krdr murde sa nangidating amrlx."

^{21:26} Asaea 13:9-10; 24:21-23; 34:4; Esikel 32:7-8; Joel 2:10-11, 31; 3:15; Emos 8:9; Aposol 2:19-21; Nzaelwapxngr 6:12-13 ^{21:27} Daniel 7:13; Nzaelwapxngr 1:7; 19:11-16

Naoliq-zvzku Nzyzlu-krm Jiszs

³⁴ X rpi-mopwz Jiszs kx, “Aclvetio-lzbqamu! Bzkq rmnq-zlwzamu x bzkq witi nelzmu dalr nrlc ka. X bzkq kxne drtqmu da kx namnc-xgleamu, murde ma tqpwkilkvcamu mz Mzli Kxmatq kc na-ayzlu-ngrbz Gct da mz leplz. A' naoliqamu. ³⁵ Murde mzli lc nzvz-krmle sa nao ani txpwz mz leplz amrlx kx nzmnncng mz nrlc, na-apunemle trtxki kx yrplztx-anipwz. ³⁶ A' navz vyz nzaclvetio-lzbq-krmu murde ma tqtaoamu mz alwx. X nakrka'-zvzbzmu mz Gct kx natu-amqngiamu mz nzrlxngiti-krmu, kxmule-esz' da kx prtz. Murde ninge, Mrlx Leplz, na-abrtzlvzx nimu mzli kc natutngrmamu mz mzke' mz mzli lcde.”

³⁷ Mz zbz kang kqlu mz wiki lcde Jiszs tqmncpxm Mangr-nzangiongr kc Jerusalem tqalvztr. X mz milzpq ngr zbz lcng, mwipwz mz kzdq mztea mz Newz ngr Nc Olivi. ³⁸ X mzli kc mz nourla kxtopwz ngr zbz kcng, leplz kc tzyrkrpebzng mz Mangr-nzangiongr mz nzlalztq-krbzlr mz nzalvztr-krdeng.

22

Kxnzetu R Lr Jiu Nzrpilr Nanibqlr Jiszs

Matiu 26:1-5; Mak 14:1-2; Jon 11:45-53

¹ Mzli r nzmulvngr kc tzrpibz Nzamyangr sc tqesotrpem. Mz zbz kxtr lcng rtqmqz tzmutzx-ngrpwlzlr bret kc trpnzngr yisti ngrde. ² ² Kxnzetu rdr pris x kxnzalvztrng mz Lou sc Mosis tzabzlr nzolvz-krdr Jiszs mz nznibq-krdrle. Da lc nzale-kapqlr murde nzmwxlrtir nike na-alebz leplz kxkqlu.

Judzs Pyrlq Drtwr Mz Nzamwa-karde Jiszs

Matiu 26:14-16; Mak 14:10-11

³ Zbz Setzn dwatitrle nabz Judzs Iskariot, kzdq aposol kcng nzpnu-esz'-nrade-li (12). ^{*}

⁴ Zbz Judzs vzpx x nzycmneng badr kxnzetu rdr pris x pulis r Mangr-nzangiongr. Nzrpilr kxnamu nzaprc-krbzle Jiszs badr mz nzolvz-krdr nide.

⁵ Nzabrtztxng x nzrpibzlr naxpebzlr Jiszs bade. ⁶ Aolvztxbz Judzs x sc tqrtangrtipele mzli kxmrlz nzaprc-ngrbzle Jiszs badr, mzli lc trpnzngr zbo ngr leplz kx nzmnncneng mrkc.

Jiszs X Ncblo Nedeng Nzmulvzlr Nzamyangr

Matiu 26:17-25; Mak 14:12-21; Jon 13:18-30

⁷ Zbz zbz kc kai ngr Nzmulvzngn Bret kx Trpnzngr Yisti Ngrde sc tqkaputrpem. Mz zbz lc nzrnibqngn nei sip kx nangq mz zbz ngr Nzamyangr. X nzmungn lc abzopwz mzli kc nepi tqtaope-ngrde. ⁸ Jiszs atwzlr-ngrde Pita x Jon, rpibzle kx, “Vzamu oliqtiamu dakxnnzng kx nangqku mz Nzamyangr.” ⁹ Nzrpibzlr kx, “?Naoliqtibzkr drlve?” ¹⁰ Rpibzle kx, “Mzli kc navztr-ngrbzmu mz mzteadau Jerusalem, sa narmctiamu kzdq ncblo kx rglqne da kx lrti lue. Vz-nqblqamu nide mz ma kc navzkitrle. ¹¹ X rpibzmu mz ncblo kc tqrnginyz ma kc kx, ‘Kxakrlz nakrlzle myx me namnc-ngrdr badr ncblo nedeng mz nzmulvz-krdr Nzamyangr.’ ¹² Sa navzmilzle nimu wq mz nelvq rde kxetu, mrlcde nzamilxpqpe-ngrde nigu. Mrlc dekc naoliqt-ngrnamu dakxnnzng nagu.” ¹³ Nzvzpxng x nzmclr da amrlx da kc tqwai nzpi-krbz Jiszs le badr, x sc tzoliqtipele Nzamyangr.

* ^{22:1} Nzrlaszngr 12:1-27 * ^{22:3} Jon 13:2, 27 * ^{22:3} Setzn krlzle nzalengr da lc murde Judzs tqalepele alwx mz nzaotikr drtwrde nzamwa-karde Jiszs. Setzn tr-rtulrtr-ngrpwlzleu Judzs nzale-karde da, a' katrzple drtwr kxkqlu mz drtwrde.

Jiszs Ayzuole Nzmungrkxtr

Matiu 26:26-30; Mak 14:22-26; 1 Korint 11:23-25

¹⁴ Mzli kc nepi tqtaope-ngrde, Jiszs kc tzwxbuopeng badr aposol nedeng mz nzmu-krdr Nzamyangr. ¹⁵ Rpibzle badr kx, “Sutitx zlwz drtwrnge nzmu-lxblr-krgu mz Nzamyangr lc, murde drtqnge kc tqetq ate x sc tqbz-ate-kzx! ¹⁶ Murde drtwr ngr Nzamyangr lc na-atutr kai, mzli kc na-aclvengr Gct nrlc kxmrna mz nzngini-krde King, x nzprtr-krnge mz nzmungr lc kc ate.”

¹⁷ Zbz glqlzmle kap. Awitx-ngrbzle mz Gct, kabzle badr x rpibzle badr kx, “Mnqamu amrlx ngrmu. ¹⁸ Murde trpengr nzrmnq-krnge waen, navz nakrlzbzle mzli kc na-aclve Gct nrlc kxmrna kalr.”

¹⁹ Zbz Jiszs kalzmle bret. Awitx-ngrbzle mz Gct, lopxile, kabzle badr x rpibzle kx, “Krlc ncvr drtqnge nzkabz bamu. Rtrngzti-zvzbzmu da lc mz nzdctipxkr drtwrnu ninge.” ²⁰ Mz nqmq lcpwz, mz nibr nzmungr, glqlzmle kap x kabzle badr, rpibzle kx, “Krlc mepyr rnge kc tqyrlpx-ngrde nimu mz Nzesz'tikr Drtwr Gct Kc Ate badr leplz.

²¹ “A' da kx nakrlzamu se! Krkc tqamwale ninge, sa tqwxbuku badr tqmuku badr! ²² Murde ninge, Mrlx Leplz, nabzx navz-nqblqle me pnz drtwr Gct. A' kosae! Ncblo la tqamwale ninge sa navz mz Hxl!” ²³ Sc tzabzopelr nzveangr mzlirdr neke mz nidr kx na-alele da lc. †

Doa Kx Myalz-zlwzbz Mz Nzobqkr Gct

Matiu 18:1-5; Mak 9:33-37

²⁴ X mzli lcde ncblo neng Jiszs tztalwzti-lzbq-ngrdr neke mz nidr kx myatpxbxz. ²⁵ A' rpibz Jiszs badr kx, “King mz nrlc ka nzrtulrtr-ngrbzlr mz leplz nzalengr da mz nzmnclz-krbzlr badr. X nzrtulrtr-ngrbzlr mz leplz kx narpibzlr badr kx, ‘Nidr kzte leplz!’ ²⁶ A' bzkq apuamu nidr. Murde doa kx nangi kxetu kxmyalz na-avzo-lzbq x nawztrpz mz leplz mz nzokatr-krde nidr. ²⁷ Krkc tqwxbuo mz nzmungr myalzbz mz krkc tzawz. X kxmule-esz' ninge kxetu rmu, a' vz-ngrmc mz nrlc mz nzwztr-krbo mz leplz. Navz-nqblqamu ninge.

²⁸ “Kxmule-esz' nzkxpu-krngeng, a' tu-amqngi-zvzmmamu mz nibrnge. A' kzdu-kzng trtingr. ²⁹ Mz nzmu-krde lcde, sa nakao-kzpo bamu zmatq mz nzngini-krmu king, da kc tqwai trtenge nzka-krmle bange zmatq mz nzngini-krnge King. ³⁰ X sa na-aclveamu nqvi lr ncblo kcng Israel nzpnu-esz'-nrade-li (12). X sa naprtramu mz nzabrtzngr mz nzmungr kxetu mzli kc nayzlu-ngrmc mz nzngini-krnge King.”

Plzpx-kaipz Jiszs Nrzpikr Pita Trkrlzleu Nide

Matiu 26:31-35; Mak 14:27-31; Jon 13:36-38

³¹ Rpibz Jiszs mz Pita kx, “Saemon! Saemon! Nakrlzq kx Setzn pibzle mz Gct nakabzle bade zmatq mz nzatalz-krde nimu mz nzabao-krbzle nzrlxngiti-krmu nimu amrlx ngrmu. X rlr-ngrbzle. ³² A' krka'pe-ngrne nim, kx Saemon, kx nzrlxngiti-krm bzkq yrkrpxbz. X mzli kc nao-lxlvrtimou-ngrme ninge, axplrti-mopwz nzrlxngitikr mzlemqng.” ³³ Rpibz Pita kx, “Kxetu rnge, oliqtipex nzvz-krgi mz presin x mz nzbzmi-krnge nim!” ³⁴ Rpibz Jiszs kx, “Napibo bam, kx Pita, mzli kc kio trnakya'ka-ngrde koma mz nrlckxbq, sa narpiq kx trkrlzwq ninge nzwrdde natq.”

* ^{22:21} Sam 41:9 † ^{22:23} 22:20 Nzesz'tikr Drtwr lc rpile kx Jiszs tekqtrle nigu mz nzayrplapxngr mz alwx rgung x Gct trpengr nznibq-krde nigu mz alwx lcng. Mz nzvz-nqblq-krde Nzesz'tikr Drtwr lc, Gct anulvzlpbzle alwx ngrgung mz Jiszs, x kamle bagu nztubq-krde. Murde mzli kx obq-ngrmle bagu, mc-txpwzle kx apuku Jiszs mz nztr-krde.

Mzli R Nzxpung Kc Navztrp

³⁵ Rpibz Jiszs badr kx, “Mzli kc tqatwzlrpx-kai-ngrne nimu, twztxpwzamu sadol kc tqyctr mz nanycmu, x trpnzngr scmu trau x bxli. ? Myx kxmule, tapxamu mz da kx namnc-xgleamu o trtingr?” Nzrpibzlr kx, “Trtingr.” ³⁶ Jiszs sc tqrpipebzle badr kx, “A’ mzli ka naoliqamu murde krlzpebzle mzli r nzxpung. X doa kx rngisc trau o bxli natwzle. X doa kx trpnzngr scde toki r vea, na-amwale kzdung da scde mz nxzpe-krde dq. ³⁷ Murde Nzryrngrkxtr lc natutrp bange, krkc tqpile kx, ‘Mz drtwr leplz, nide kzdq kz ncblo kx xpqbrlr-zvz-ngrde lou.’ [†] X nzryrngr lc, ycpe pipz nzatutrngr.” ³⁸ Zbz sc tzrpibzlr kx, “Obqm! Toki r vea li seng, kx Kxetu!” A’ rpibzle kx, “Mrlzpe! Navzpeku!” [‡]

Jiszs Krka' Esz'-krde Getsemzni

Matiu 26:36-46; Mak 14:32-42

³⁹ Jiszs vzpxm Jerusalem x vvdz mou mz Newz ngr Nc Olivi, da kc tqwai-vzle. X nzvzng badr ncblo nedeng. ⁴⁰ Mzli kc tqvzpe-ngrbzle mrkc, sc tqrpipebzle badr kx, “Krka’amu murde natu-amqngiamu mz nzatalzngr.” ⁴¹ Zbz mz nzvzo-mou-krmlr nzkrlzbzlr kzdq nrlc. Vztxpxbz badr rlru kxipiz, x rwetxo zpr sc tqkrka’pe. ⁴² Rpile kx, “Trte, nzmu kx tqrlrpx-ngrnle, trsutiu drtwrnge nzrlr-lzbq-krbo mz nzetqkr drtqnge x nzbngr. A’ bzkq vz-nqblqq me pnz drtwrnge, a’ nangi me pnz drtwrm.” ⁴³ Zbz kzdq enjrl kx vzom Heven adcpx-lzbqbz bade x axplrle nide. ⁴⁴ X nabzde talvzo mz da kc nawaibz bade, x nzkrka'-krde sc tqpqnelz. Wrlerpe-ngrde ztqlq kxpc apupele nzatalikr mepyr, tqtalio mz drtc’. §

⁴⁵ Kx tulzmle mz nzkrka'-krde, sc tqvzpebz mz ncblo nedeng x mcle kx nzwing. Murde amwitxpeng drtwrdr kx vz. ⁴⁶ X mz nibr nzameo-krdeleng, sc tqrpipebzle kx, “?Nike tqmwilvzamu? Tulzamu, x krka’amu murde natu-amqngiamu mz nzatalzngr.”

Nzrlolvzng Jiszs

Matiu 26:47-56; Mak 14:43-50; Jon 18:3-11

⁴⁷ Mzli kc Jiszs tqycmnebe-ngrde kzdq zbo ngr ncblo kc tqkaputrjem, x Judzs kc tqmailzmle nidr. Ncblo kc tqrlasz-pnz-kaile kztedeng mzli kc mz milzpq kc. Vzm mz Jiszs x tcngibzle mqde. ⁴⁸ A’ rpibz Jiszs bade kx, “?Nztcngi-krm ke ninge apux kztem murde na-aprcbzme ninge mz enqmi rongeng?”

⁴⁹ Mzli lc ncblo neng Jiszs kcng tzmcng badr tzmc-ngrdr da kc naprtzpe, sc tqrpipebzle kx, “?Kxetu, naotape-ngrgr toki r vea scgr?” ⁵⁰ X kzdq nidr yrlqbzle toki r vea kc mz kxnzawz-nrbalq ne Nardr Pris, x lakipxbzle nradrtqde kxrtc. ⁵¹ A’ rpibz Jiszs kx, “Mrlzpe!” Maletxtrpzle nradrtq ncblo kc x amrlztxbzle.

⁵² Zbz Jiszs kc tqrpipebzle mz kxnzetu rdr pris, x kxnzetu ngr pulis ngr Mangr-nzangiongr, x lrtzlvz kcng tzvzmqng mrkc mz nzoti-krmlr nide kx, “?Memule tqrzwz-ngrmamu bz x toki r vea? ?Opxm kx ninge kx rmailz ncblo mz nzrnzlvzonr zmatq ngr gzpman? ⁵³ Murde mz zbz kang kqlu mnc-zvzku mz Mangr-nzangiongr. ?Memule trlolvz-ngrwamu ninge elr? Kxmule-esz’, a’ Gct rlrpx-ngrde nzaovxio-krmu ninge mzli ka mz zmatq ngr Setzn.”

[§] 22:37 Asaea 53:12 [†] 22:38 Pnzpe drtwrdr kx ycpe pipz nzrlolvzng nide. A’ tryrplatirpwzu nardr kx toki r vea lc ngi dalr Mqngrkxtr mz nzota-krdr badr Setzn. [Efisz 6:17] [§] 22:44 22:41 Mz Nrpakxmrlz kx yr Mak x Matiu, krlzku kx mrlc drtqde Getsemzni. 22:44 Mz kzdung nzryrngr kcng pnz ngalrde 43 x 44 trnzyru.

*Pita Rpile Kx Trkrlzleu Jiszs**Matiu 26:57-58, 69-75; Mak 14:53-54, 66-72; Jon 18:15-18, 25-27*

⁵⁴ Zbz nzolvzlr Jiszs x sc tzvzmipelr x nzdwamitrlr mz ma nyz Nardr Pris kc. Pita kc tqvznebz-rlru mz nibrdr. ⁵⁵ Pulis ngr Mangr-nzangiongr nztelvzlr kc nyr mz makoa ngr ma kc. X Pita prtrpz mz krkcng tzwxbungalelvzlr nyr kc. ⁵⁶ Kx mcpebz kzdq olvz kcng tzawzlr nzwxbutr-krde mz nyr kc, sc tqpwxbztipele, x rpibzle mz pulis kcng kx, “Mrlx lc nide dq kz kz mnctrpz bade!” ⁵⁷ A' Pita pokiatxbz. Rpibzle kx, “Olvz lc e, trkrlzwxu ncblo la!”

⁵⁸ Mzli trboiu kzdq ncblo glxpele nide, x sc tqrpipebzle kx, “Nim dq kz, kzdq nidr!” A' rpibz Pita kx, “Mrlx lc e, trnipwc'u!” ⁵⁹ X mwx kzdq nabznepi otx, x kzdq kz mou ncblo xplrmixbz natqde, mz nzrpi-krbzle kx, “Krlztx-angidrx, mrlx lc nzmnncng badr, murde mz nzycmne-krde otpx kx nide lr Gzlili.” ⁶⁰ A' rpibz Pita kx, “Mrlx lc e, trkrlzwxu da la tqycmnetrngrn!” X mzli kc tqycmnebe-ngrde kio kc tqkyap kx. ⁶¹ Kxetu o-lxlvrtxbz x pwxbztitxde Pita. X Pita dctitpx pnz mz drtwrde natq Kxetu mz nzrpi-krbzle kx, “Mzli kc kio trnakya'ka-ngrde koma mz nrlckxbq, narpiq kx trkrlzwq ninge nzwrdde natq.” ⁶² Zbz Pita vzpxm mrkc tzlalvztr sc tqyrnitxpe, bztitxde nzyrningr, murde drtwrde vzttx atwrnrngr.

*Jiszs Nzvzmibz Mz Kansrl Nyzdr Lr Jiu**Matiu 26:59-68; Mak 14:55-65; Jon 18:13-14, 19-24*

⁶³ Pulis kcng tzaclvelr Jiszs nxztrngalvztitrlr nide x nztzlr nide. ⁶⁴ Nzpe-kilvzbzlr mzte lrpz x sc tzrpipebzlr kx, “Mz nzngini-krm kc profet, pim ena bagr krkc tqtzle nim.” ⁶⁵ X nzrpi-mopwzng bade natq kxkqlu kx nzatrkat-ingrdr nide.*

⁶⁶ Nrlc kx ngrlxpele, krkcng tzmncpxmqng mz Kansrl, lrtzlvz ngrdr lr Jiu x kxnzetu rdr pris, x kxnzalvztrng mz Lou sc Mosis, nzyrlwrtr-lxblrng x Jiszs kc tzvzmipemlr badr. ⁶⁷ Nzrpibzlr kx, “?Pim bagr, nim Kxnmcpk kc tzrpi kx sa navzm?” Rpibzle kx, “Kxmule-esz' pibo da lc, a' rblx nzlxngitikrmule. ⁶⁸ X nzmu naveatibo kzdung natq mz nzngini-krnge Kxnmcpk, nzmu pxtppx-ngrnamu nzayzlu-krmamu natqnge. ⁶⁹ Kxmule-esz', a' na-abzo mzli ka, ninge Mrlx Leplz, nawxbuomc mrkc tqmatq-esz'ngr mz nrlar Gct kxrtc.” ⁷⁰

⁷⁰ Nzrpibzlr amrlx ngrdr kx, “?E nim mrlx Gct?” Rpibzle kx, “Sa tqpi-angidrpeamu.” ⁷¹ X sc tzrpipele kx, “Trpengr mou ncblo kx nartabrtiku! Murde xlrtrpebzku mz naode kx pivxitile Gct mz nzrpi-krde kx nide Kxnmcpk!”

23*Jiszs Nzvzmibz Mz Paelzt**Matiu 27:1-2, 11-14; Mak 15:1-5; Jon 18:28-38*

¹ Dzbe ncblo kcng atwrnrngr tzyrlwr-lxblrng mz Kansrl nyzdr lr Jiu, nztulzmqng, sc tzvzmipebzlr Jiszs mz Paelzt, lr Rom kc tqaclvele Judiz. ² X sc tzycmnetrpe-ngrdr nide, tzrpilr kx, “Mckr ncblo lc tqmailz-rbrle leplz negrung. Tqrpibzle badr kx bzkq nzxpebzng takes mz King r Rom. X tqrpi-kzle kx nide King Kxnmcpk x namailzle leplz mz nzmapulrpx-krdr gzpman ngr Rom. Mz nzmu-krde lcde, nide enqmi r gzpman.” ³ Paelzt

* ^{22:65} Mz nzpe-kilvz-krbzlr mzte, kxnzetu r lr Jiu nzvz-nqblqlr Asaea 11:3, mz nzrpi-krde kx, “Kxnmcpk trna-aolvzleu leplz mz nzvz-nqblq-krde da kx mcle mz mzte.” A' nxztrnga-ngrdr nide, murde trnzlxngitilru nide x mz drtwrdr rblxbz bade nzpix-krde neke tzle nide. ^{22:69} Sam 110:1

veabz mz Jiszs, rpibzle kx, “?Myx kxmule, nim king r lr Jiu?” Rpibzle kx, “Sa tqplzpxpeq kx ninge.” ⁴ Zbz Paelzt kc tqrpipebzle mz kxnzetu rdr pris, x zbo ngr leplz kcng kx, “Mz nzvz-nqblqngr lou sc gzpman ngr Rom, trpnzngr da kx vz-rbrtrpz bade kx nabz-ngrde.” ⁵ A' xplrmi-mopwz natqdr, nzrpibzlr kx, “Tqayclwztibzle nabz leplz mz nzmapulrpx-krdr gzpman ngr Rom, mrka atwrnrngr Judiz. Abzole mz provins kc Gzlili x sa tqvz pem mrka.”

Jiszs Nzvzmibz Mz King Herot

⁶ Kx xlrpebz Paelzt da lc, sc tqveapebz, rpibzle kx, “?Ncblo lc, nide dalr Gzlili?” ⁷ Kx krlzpele kc kx Jiszs vzkimle mz Gzlili Provins, mrkc tqaclve king Herot, sc tqrpipebzle mz ncblo ngr vea kx navzmibzlr bade. Murde sc tqmnc kz Jerusalem mzli lcde. ⁸ King Herot abrtztx mzli kc tqmcpe-ngrde Jiszs, murde xlrpe-ngrde da kqlupe, x mzli boipe rpile namcle Jiszs nzale-krde da kxmatq. ⁹ Zbz king Herot veatibzle mz Jiszs natq kqlu, a' trpnzngr natq kxes' kx ayzlubzle. ¹⁰ Kxnzetu rdr pris x kxnzalvztrng mz Lou sc Mosis nzblctrpzng mz nzycmne-krdr, sc tzpibqtipelr Jiszs kx alele da kxkqlu kxtrkating. ¹¹ X King Herot nidr badr ncblo ngr vea nedeng nzxtrngalvztrlr Jiszs, x nzrwaitibzng da kxtrka kx plzpxle kx trnzamatqlru nide. Nzakq-ngrdr nide lrpz sc king, ngi dalr nzxtrngalvztr-krdr Jiszs, murde nzrpi-krde kx nide King r lr Jiu. Zbz sc tqatwzlrpe-mou-ngrbz king Herot mz Paelzt. ¹² Abzo mzbq lcde king Herot ncdr Paelzt nzmrzlzti-lzbq-pnznq. A' mzli kc ena trpnzngr.

Paelzt Rlrpx-ngrde Nzbzkr Jiszs

Matiu 27:15-26; Mak 15:6-15; Jon 18:39—19:16

¹³ Paelzt aveatileng kxnzetu rdr pris kcng x kxnzrmailzng x leplz amrlx. ¹⁴ X sc tqrpipebzle badr kx, “Vzmimamu ncblo lc bange, x rpiamu kx tqmailz-rbrle leplz. Mzli ka, veapebo bade x lalztqtr-angidrpebo mrka mz mzpu. A' trpnzngr da kx vz-rbr-ngrde mz da kcng tqpipxamu. ¹⁵ Trpnz-kzngr da kx mctrpz king Herot kx vz-rbr-ngrde, murde atwzlrpe-mou-ngrmle bagu. X nzmu namctrpzle du da mz Jiszs kx vz-rbr-ngrde, e tratwzlrpe-ngrpleu. Trpnzngr da kx ale ncblo lc, kx nananide. ¹⁶ A' napibo mz ncblo nengeng naviplalr nide x sc tzrlrpe-ngrbzlr nzvz-krde.” *

¹⁷ Zvv mz Nzamyangr amrlx, Paelzt na-aprpxbzle kzdq doa lr Jiu kx mnc mz presin. Mzli lc rpile na-aprpxbzle Jiszs mz zbo ngr leplz kc.

¹⁸ A' leplz kcng nzrpi-lxblrbzlr kx, “Nanibq mrlx la! X aprpxm bagr Barabas!” ¹⁹ Barabas lc tqnginide ncblo kxtrka, dekc tqmnc-ngrde mz presin murde kzdq mzli dzbede nede nzotang badr ncblo ngr vea ne Rom mrkc Jerusalem, x rnibq ncblo. ²⁰ Paelzt rpile na-arlapxle Jiszs, bzkq nznibq. Zbz sc tqycmnepxpe-mopwz badr, murde na-aopx-ngrbz mztr. ²¹ A' sc tzkabong ye. Tzrpibzlr kx, “Natqlvztr mz kros! Natqlvztr mz kros!”

²² Nzwrde kratq Paelzt rpi-mopwzle kx, “?A' memule? ?Da kxtrka kznike ale? Rblxtxm bange nzrmc-krnge da kx takitrde nzbz-krde! A' napibo mz ncblo nengeng naviplalr nide, x sc tzrlrpe-ngrbzlr nzvz-krde.” ²³ A' sc tzkabolzng ye mz natqdr kxetu kx Jiszs natqlvztr mz kros. X sc tqtutipele nzkabo-krdr. ²⁴ Zbz Paelzt kc tqpipxpebzle kx Jiszs nabz, mz nzatutr-krde natqdr kxpq. ²⁵ Zbz aprpxbzle Barabas, krkc tzadwatr-ngrde mz presin mz nzota-krdr badr lr Rom x nzrnibq-krde ncblo. X kaobzle Jiszs mz ncblo nedeng mz nzvz-nqblq-krdr me pnz drtwr lr Jiu.

* **23:16** Ngalarde 17 tryclzpuu mz kzdung nzryrngr kcng pnz ngr mz buk lc. Mwx nzaxvtrpz mz nibrde mz nzaopxngr be kc.

Jiszs Nztqlvztr Mz Kros

Matiu 27:31-44; Mak 15:20-32; Jon 19:16-24

²⁶ Nzvzmipxpelr Jiszs mz nzrtqlvztrngr nide mz kros. Nzvzng, nzvzng, x sc tzrmctipelr kc ncblo drtqde Saemon. Nide dalr taon kxetu Saerin, mrkc Afrika. Tqvz-atem x navztrpe Jerusalem. A' nzlolvzlr, x nzyrlqlzbzlr kros kc bade mz nzglq-krbzlele mz nibr Jiszs, murde drtqde mewetx-zlwzpe.

²⁷ Kzdq zbo ngr leplz kxetu nzvz-nqblqbzlr nide. Mz zbo ngr leplz kc, kzdung olvz sc tzneminebzlr nzyrnimi-krdr Jiszs. ²⁸ A' Jiszs o-lxlvrtxbz badr, x rpibzle kx, "Olvz lr Jerusalem! Bzkq yrnimiamu ninge, a' nayrnimi-lzbqamu x doa nemung. ²⁹ Murde kzdq la mzli navzm kx Gct na-ayrplapx-ngrde lr Jerusalem mz nzpxtxpx-krdr Kxnzmcpx nede. X mzli lcde narpingr leplz kx, 'Namrlzbz mz olvz kcng tzvz-nrbalqng, murde olvz kcng tzrningeng doa namclr nzetqkr drtq doa nedrng.' ³⁰ X leplz narpi-kz-ngrdr kx nengq na-abrkao-txpwzle elx newz kc badr. Murde nanibqtile nidr x nayrnivilvtiole nidr, mz nzayrkrpx-krbzle nzetqkr drtqdr. ³¹ Murde nzmu Gct narlrxp-ngrde nzetqkr drtqnge, ninge kc trpnzngr da kx vz-rbr-ngrne, sa na-ayrplapx-zlwzle krkcng tzvz-rbrng, x na-aetq-kzpze drtqdr."

³² Zbz ncblo ngr vea kcng nzoti-kzlr ncblo nzling kxnzxpqbrrlr-zvz-ngrdr lou. X nznibq-kzng badr Jiszs. ³³ X sc tzvzmipxpemlr mz nibr drkq r Jerusalem, mz newz kc tzrpibz *Bekrlz* murde nzobq-krde apule bekrlz. † X nztqlvztrlr Jiszs mz kzdq kros elr. X nztqlvztr-kzlr mz kros kzbleng ncblo kcng nzling taplxsr nrlar Jiszs. ³⁴ X sc tqrpipe Jiszs kx, "Trte, ipqpxbz alwx ngrdr! Murde trnzkrllru da lc tzalelr." X nctq lrpz scdeng nzayrleti ncblo ngr vea kcng daes. ³⁵ Leplz kcng tzyrlwrng mrkc sc tzmcpelr mzli kc kxnzrmailzng lr Jiu tzxtrngalvztr-ngrdr Jiszs. Tzrpilr kx, "Krlzle nzarlapx-krde kzdu-kzng leplz. Nzmu kx tqnginide Mevalu kc tqmcpx Gct, na-arlapx-lzbq." ³⁶⁻³⁷ Ncblo ngr vea kcng nxztrngalvztr-kz-ngrdr nide, nzrpi-krbzlr kx, "Kx tqnginim king r lr Jiu, e arlapx-lzbq! Vzom murde namnqku du waen lc tqrkx!" ³⁸ Mz nzaelwapxngr da kc tqbzngr Jiszs, nzyr kcng natq x nzatu mrkc tqyc-zbzlz narde. Nzyr kx,

KRLC KING R LR JIU.

³⁹ Kzdq ncblo kxnzxpqbrrlr-ngrdr lou kcng tzhong mrkc ycmne-atrkati-kzle Jiszs, rpibzle kx, "?Nim Kxnzmcpx? Kx tqngi-angidrple, arlapx nigi mz nzbzng!" ⁴⁰ A' lclvztrpz kztede, rpibzle kx, "Mzli trnaboiu sa nabzq na-apule ncblo la. ?Memule tqatamutilz-ngrn alwx ngrm mz nzatrakingr nide? ?Trmwxlrtiwq Gct nzayrplapx-krde nim?" ⁴¹ X mz nigi, sa tqtubq, murde twz-mouki da kx takitrde da kx aletiking. A' nide, trpnzngr da kx vz-rbr-ngrde." ⁴² X rpibzle mz Jiszs kx, "Jiszs, nadctipx drtwrm ninge mzli kc nayzlu-mou-ngrme nzngini-krm king!" ⁴³ Rpibz Jiszs bade kx, "Napibo bam, koma namncki Me Mncngr Gct!" ⁴⁴

Nzbzkr Jiszs

Matiu 27:45-56; Mak 15:33-41; Jon 19:28-30

⁴⁴⁻⁴⁵ Mzli kc tqtavauo-ngrm nepi, nzlo akqlvztx-pnzle nrlc atwrnrngr krlzbzle nabznepi kc tqtz. X lotqbr kc tqdopxm Mangr-nzangiongr Yawe nzpesali ncte li. ⁴⁶ Jiszs kqtxpxbz mz Gct mz natqde kxetu, rpibzle kx, "Trteng! Aprcbo mqngrnge mz mqm! X sc tqbzpe. ⁴⁷ Kzdq kxetu r dzbe ncblo ngr vea ne Rom kxtrtqki-esz' (100) mcle da kcng tqprtiz, sc tqglqpxele Gct, tqrpipele kx, "Da zpwxtx, nide kzdq ncblo kxtubq."

◊ ^{23:30} Asaea 2:19-20; Hosia 10:8; Nzaelwapxngr 6:16 † ^{23:33} Mz natq lr Rom, *Bekrlz* nzrpibz Kalvzri. ◊ ^{23:34} Sam 22:18 ◊ ^{23:36-37} Sam 69:21 ◊ ^{23:43} 2 Korint 12:2-4; Nzaelwapxngr 2:7 ◊ ^{23:46} Sam 31:5

⁴⁸ Leplz kcng tzyrlwrng mrkc, mz nzmc-krdr da kc tqprtz, nzyrkr-lxblrng amrlx ngrdr mz ma nyzdr, x mz nzaelwapx-krdr drtwr kxvz nztztrlr lomrdr. ⁴⁹ Leplz kcng amrlx tqkrlzting Jiszs, nidr badr olvz kcng tzvz-nqblq-pnzmlr nide Gzlili, nztutrpqng rlu kxipz mz nzmc-krdr da lcng.

Nzryrtzmqngr Jiszs

Matiu 27:57-61; Mak 15:42-47; Jon 19:38-42

⁵⁰⁻⁵¹ Kzdq lr Jiu drtqde Josip, dalr taon Arimatia, nide ncblo kxbrngz x tubq. X tqobqtipxle mzli kc Kxnzmcpx ne Gct nangini-ngrde King r lr Jiu. Kxmule-esz' prtr mz Kansrl nyzdr lr Jiu, a' drtwrdr tresz'tiu badr mz nzrnibqngr Jiszs. ⁵² Ncblo lc vzbz mz Paelzt. X sc tqrlxtipebzle nrkrdrtrq Jiszs, murde nakaomle mz kros x nayrtzmgle. ⁵³ Rlr-ngrbzle, zbz sc tqkaopem Josip nrkrdrtrq kc. X bxtile kzdq lrpz kxprki kxboi mz nzvz-nqblq-krde nqmq krdr. X sc tgyrlqtr-anipele mz kzdq gq lr kxbz kx nzekqtitr mz butqbr. Butqbr lc trgalr kx nzayrbqpxm elr. ⁵⁴ Yrtzmq-ani-ngrdele, murde zbz kc ngi zbz ngr nzoliqngr mz Sabat, x sc tqycpe pipz Sabat.

⁵⁵ Olvz kcng tzvz-nqblq-pnzmlr Jiszs Gzlili, nzvz-nqblqlr Josip x nzmclr butqbr kc mrkc tzayrbqpx-ngrm nrkrdrtrq Jiszs. ⁵⁶ Zbz sc tzyzlupe-moung me nzmnc-ngrdr, x nzoliqtilr dalr nzaelungr nrkrdrtrqde. A' na-aenzlilr nzamangr mz Sabat kc nzyrkpx-kai-krde, mz nzvz-nqblq-krdr Lou sc Mosis.

24

Jiszs Tulz-mop Mz Nzbzngr

Matiu 28:1-10; Mak 16:1-8; Jon 20:1-10

¹ Mz nourla kxtopwz mz Sade, olvz kcng nzvzng mz butqbr, sc tzrtwzneng dalr nzaelungr nrkrdrtrq Jiszs. ² Nzvzbzng, nzmcpelr rplz kc tzapqbrtrngr mrkc tzdwakitrpz, nzalqlipxpe. ³ Zbz nzdwatrpzng, a' trnzmclru nrkrdrtrq Kxetu Jiszs. ⁴ Mzli kc tztu-ngrpwlzr mrkc, drtwrdr otrblamrtx-pnzngr mz da lc, nzpwrkilvc-ngrdr enjrl nzling, sc tztupebzng badr. Lrpzdr pnapr x nzobq-krdr nzapulr nzobqkr ncblo. ⁵ Olvz kcng nzmwxrtr-ngrdr enjrl kcng, x nzobqtxong mz drtc'. A' enjrl kcng nzrpibzlr kx, "?Memule tqrtangrti-ngrnamu kxlu mz mzlir kxnbzpeng? ⁶ Trmncu mrka. Tulzpe-mop. Nadctipx drtwrmu da kc tqpi-pnzbzle bamu mzli kc tqmnc-ngrde Gzlili. ⁷ Murde rpile kx na-aprcbz nide mz mq kxdrka'-ngrng. X natqlvztr mz kros, x mz zbz kratq, sc tqtluzpe-mop."

⁸ Zbz olvz kcng sc tzdctipx ate drtwrdr natqdeng. ⁹ Nzyzlmqng Jerusalem, x sc tzpipebzlr da lcng amrlx mz aposol nedeng kcng nzpnu-esz'-nrade-esz', badr leplz neng Jiszs amrlx. ¹⁰ Drtq olvz kcng deseleng: Mxri kc Makdala, x Joana, x Mxri lxede Jemes. Nidr badr olvz kc-kzng tzvzng badr mz butqbr kc, nzpibzlr da lcng mz aposol neng Jiszs. ¹¹ A' aposol kcng nzrpilr kx da kc tzpibzlr olvz kcng tropxpuu da, x trnzlxitpwzlr natqdr. ¹² A' Pita dwatpx x sc tqvopebz mz butqbr kc. Yrngzobz, obqtrpz, x mcpele lrpz kcng tzbxti nrkrdrtrq kc. A' trpnz-moungr da. Zbz yzlutx mou mrkc tqmnc-ngrde, drtwrde otrblamrtx-pnzngr mz da kc tqmcle. *

Jiszs Adcpx-lzbqbz Mz Leplz Nede Nzling

Mak 16:12-13

¹³ Mz zbz lcde, leplz neng Jiszs nzling nzvzng mz mztea Zmezs. Mz mzlir Zmezs x Jerusalem, kilomita nzpnu-esz'-nrade-esz' (11). ¹⁴ Tzycmnetr-ngrdr

* ^{24:12} Mz kzdung nzryrngr kcng pnz ngalrde 12 trnzyru elr. A' mc kz Jon 20:3-10.

da kcng amrlx tzwaisrngr Jiszs. ¹⁵ X mzli kc tzryapwx-etr-ngrdr, Jiszs adcpx-lzbqbz badr, sc tzvzpeng badr. ¹⁶ Nzmclr nide, a' mztr traopxpwzu Gct nzglx-krdr nide. ¹⁷ Rpibz Jiszs badr kx, “?Nila tqpiamu nzvz-krmu la?” Nztu-lrpitxng, nzobqmitxdr drtwr kxvz. ¹⁸ Kzdq nidr, drtqde Kleopas, veapebz bade, rpibzle kx, “?Ni-txpwzme ncblo kx mnc Jerusalem kx trkrlzleu da kc tqprtz elr mz zbz lcng trkqluu tqykrpxpe?”

¹⁹ Rpibzle kx, “?Nike lcdeng?” Nzrpibzlr kx, “Da kcng tzwaisrngr Jiszs kc Naszret. Ncblo lc nide profet kx ycmnemile zmatq x aleti da kxmatq, aelwapx-ngrde kx zmatq lc vzpxm mz Gct. X leplz amrlx nzamatqlr nide mz nabzdr. ²⁰ A' kxnzetu rdr pris ngurgung x kxnzrmailzng, nzkaobzlr nide mz doa ngr gzpman ngr Rom kcng tzaclveng, murde nzrpilr nanibqlr nide mz nztqlvztr-krdrle mz kros. ²¹ Obqtipxkr kx nide Kxnzmcpx kc tqatwzlr-ngrm Gct mz nzarlapx-krde Israel. A' drtwrgr matxpe murde krlc zbz qkratq mz nibr da kcng tqprt. ²² Kxmule-esz', a' kzdung olvz mz dzbede kc tqprtr-ngrgr, nzakctixpxlr nigr. Murde nzvzbzng mz butqbr kc mzli kcma mz nourla kxtopwz, ²³ x trnzmcpelru nrkrdrtdqe. Nzyzlumqng nzrpilr kx nzrmcng kzdq enjrl ne Gct kx pibzle badr kx Jiszs sa tqlu. ²⁴ Kzdung kzegr nzvzng mz butqbr kc. X nzmclr naode obq x mznrngr, da kc tqwai nzpikrbz olvz kcng le. A' trnzmcclru Jiszs.”

²⁵ Zbz rpibz Jiszs badr kx, “Asa-zlwzamu nzyrplatitrkr narmu da, x asazlwz-kzamu nzlxngiti-krmu da kcng amrlx tzyrolr profet kcng bqnc mz nzycmnetr-krdr mz Kxnzmcpx. ²⁶ ?Memule tropxu nzpipx-pnz-kaikr profet kcng le, kx drtqde naetq mz da lcng, x mz nibrde sc tqatulzpe Gct x tqamyalzpele nide Heven?” ²⁷ X Jiszs kc tqyapwx-dalitipebzle badr ngalrde lcng amrlx tzycmnetr-ngrdr Kxnzmcpx mz Nzryrngrkxtr, abzole mz buk scng Mosis krlbzle mz nzryrkr profet kcng amrlx.

²⁸ Kx nzesotrpzlr mz mztea kc tzvzkilr, mrlx kc opxm kx navz-rlrupe. ²⁹ A' nzrpibzlr kx, “Namncpeku, murde nrlc milzpqpe x ycpe pipz nrlc nzbq-krde.” Zbz sc tqvztrpebz tzmncpeng badr. ³⁰ Zbz kx nwxbulzlr badr mz tebol, otibzle bret, x sc tqkrka'lvzpele. Zbz lopxile bret x kabzle badr. ³¹ X mztr kc tqaopxpebz Gct nzglx-krdr nide, a' mzli lcpwz mrbqlqtxbz mz mztr. ³² X nzsri-etrpelr kx, “Mzli kc tqycmne-ngrmle bagi mz lrpzki, drtwrgi elatxlzm nzyapwx-daliti-krmle Nzryrngrkxtr kcng. Aputxmle bagi zyzlr kx nakrlz-ngrgi da, a' trglx-pnzkiu nide.”

³³ Nztulzmqng mzli kcpwz x nzyzlutx-moung Jerusalem, mz nzmc-krdr aposol kcng nzpnu-esz'-nrade-esz', tzyrlwr-lxblrng badr leplz neng Jiszs kc-kzng. ³⁴ Nzrpibzlr mz ncblo kcng nzling kx, “Kxetu rgu tutxlz-angidrpem mz nzbzngr. Aelwa-lzbqpe-ngrbz mz Saemon!” ³⁵ Zbz ncblo kcng nzling nzpibzlr da kcng tqprt mz lrpzki kc tqvzkile mztea Zmezs, x kxmu nzglx-krdr nide mzli kc tqlopixe-ngrbzle bret nadr.

Jiszs Adcpx-lzbqbz Mz Leplz Nedeng

Matiu 28:16-20; Mak 16:14-18; Jon 20:19-23; Aposol 1:6-8

³⁶ Mzli kcpwz ncblo kcng nzling tzpi-ngrpwzlr da lc, nzpwrkilvc-ngrdr Jiszs tutxpebz mz mzlirdr. Rpibzle badr kx, “Krka'-ngrne kx Gct na-amnc-zpxle nimu.” ³⁷ Leplz kcng amrlx nzmwxlrtx-pnzng, murde nzrpilr nzrmcpeng mqngr ncblo kxbz. ³⁸ A' rpibz Jiszs kx, “?Memule tqmwxr-ngrnamu? ?Memule tqlititrngr drtwrmu ninge? ³⁹ Mcamu ena bzmr nilz kcng mz mqnge x nanycnge. Ninge lc! Maletrpa'mu ninge. Mqngr ncblo

kxbz trpnzngr nrkrdrtqde, a' nrkrdrtqnge ycbz." ⁴⁰ Mz nibr nzpi-krbz Jiszs da lc, sc tqaelwape-ngrbzle mqdeng x nanycdeng. †

⁴¹ Nzabrtz-krdr etu x mzlvztx naodr mz nzrkctipxngr da kc tzmclr. A' sc trnzlxngitikalr kx Jiszs kc angidr, tulzpem mz nzbzngr. Rpibz Jiszs badr kx, "?Rnginamu dakxnzng mrka?" ⁴² Nzkabzlr kc dapu nc kx nztqngq.

⁴³ Otibzle x ngqbzle mz mztr, mz nzaelwapx-krbzle kx trnginideu mqngr.

⁴⁴ Bzb rpibzle badr kx, "Da kcng ena lc tqpitibo mzli kc tqmncbe-ngrgu. Rpibo kx da kcng amrlx tzyrngr ninge mz Lou sc Mosis, mz nzryr-krdr profet, x mz Sam kcng, na-atutrng." ⁴⁵ Zbz aopxbzle mztr mz nzyrplatitrkr nardr Nzryrngrkxtr kcng tzyrngr Kxnxmcpx. ⁴⁶ X sc tqrpipebzle badr kx, "Nzyr pnz kx drtq Kxnxmcpx naetq x nabz, x mz zbz kratq sc tqlupe mou. ⁴⁷ X nrpa ngr nzrtekqtrngr drtwr x nzipqpxngr alwx, nayapwxtipxbz mz zmatq ngrde, na-abzo Jerusalem, sc tqkrlzpebzle mrkzbleng amrlx. ⁴⁸ Mcamu nzale-krnge da lcng amrlx tqpingr Nzryrngrkxtr Kxnxmcpx. X mzli kape napipebzmu mz kzdu-kzng leplz da kcng tqmcamu, murde nalxngiti-kzlr ninge. ⁴⁹ X sa na-atwzlr-ngrmc Mqngrkxtr kc tquesalzng Trtenge. A' aenzlipwzmu Jerusalem, navz nakrlzbzle mzli kc navzo-ngrmle Heven mz nzmncpx-krmle bamu, murde narkabz bamu zmatq."

Nzvdzkr Jiszs Heven

Mak 16:19-20; Aposol 1:9-10

⁵⁰ Zbz sc tqmailzpxpeleng Jerusalem, nzvzng nzesotrpzng mztea kc Betzni. Mrlc mqdeng glalzbzleng badr sc tqamrlzpeleng. ⁵¹ X mzli lcpwz, sc tqavzdzpe Gct nide Heven. ⁵² Nzangiolr nide x sc tzylutrpe-moung Jerusalem. Nzabrtztx-atwrnr-ngrng. ⁵³ X mzbz kang kqlu nzrmcti-lzbq-zvzng mz Mangr-nzangiongr tzawibzng mz Gct.

† **24:40** 24:36 Krlc kxmu nzrpi-krdr kx, "Nimu la." 24:40 Ngalarde 40 trnzyru mz kzdung nzryrngr kcng pnz.

Nrpakxmrlz Kx Yr Jon

Natq Ngr Nzaplxtqng Mz Nrpakxmrlz Kx Yr Jon

Aposol Jon yrle buk lc. X nzrpilr kx yrle mrkc Efisz, mz mzlir yiz 85—90 AD mz nibr nzrmcngr mz Jissz. Nide **ncblo ne Jissz kc tqmrlzti-zlwzle**, [◊] x mzlede Jemes kc tqngi kz aposol. Nidr mrlxng Sebedi x Salome. X mz nzvz-nqblq-karde Jon 19:25, kzdung leplz nzrpilr kx lxedr nide kz ile Mxri, kc tqngi lxe Jissz. Drtwr ngrde kx Jon nide kave kr Jissz, (da kc tqwai-kzle Jon Kxawrkxtr). Mz nibr nzvzdzkr Jissz Heven, Jon aclvele lrmakxtr mrkc Jerusalem [◊] nidr badr Pita x Jemes mzle Jissz. X aclve-kzle Mxri, lxe Jissz mz nibr nzbzkr Jissz. [◊] Nzrpilr kx Jon sc tqyzpe taon kc Efisz mz nzmnc-karde elr, mz yiz 67 AD. Mz nibr kzdung mzli, doa lr gzpman ngr Rom nzayrplapxlr nide mz nzadwatr-krdr nide mz presin mz trmctu Patmos, mz nzmnc-karde esz'-karde elr. [◊] Yr kz Jon letz scde kcng tq x buk ngr Nzaelwapxngr, mz nibr Nrpakxmrlz lc. Mzli kc tqngipe-ngrde lrtzlvz, sc tqbzpe.

Nrpakxmrlz kcng pwx nzbletipx-lxblrng mz kxmu nzaelwapx-krmlr Jissz bagu. Murde Matiu okatrle nigu nzkrlz-krgu kx Jissz nide Mevalu x King. Mz buk sc Mak, Jissz nide Kxanzawz ne Gct. Mz buk sc Luk, Jissz nide Mrlx Leplz. X mz buk sc Jon nide Mrlx Gct. Jon tryrleu nqvi lr Jissz, murde nide Mrlx Gct. Lr Jiu nzkrlz-angidrlr kx ncblo kx ngi mrlx Gct nzrsakrlrng ncdr. Buk sc Jon bletpx-zlwzbz mz Nrpakxmrlz kcng tq, murde pile da kxmyapxbzng mz nzlukr Jissz mz nzaelwapx-lzbq-krbzle mz leplz. Mz Jon 20:30-31 rpile kx, “Da kxmatq kxkqlu kx ale-kzp Jissz bagr. A' da lcdeng tryrowxu mz buk lc. A' yro-ngrne krlcng, murde nalxngiti-kzamu kx Jissz nide Kxanzmcpx, Mrlx Gct. X mz nzxngiti-krmu nide, narmcti-kzamu nzlungr angidr kxmrna.” Buk lc tuo-ngrde rkx rtqmz x nzycmne-ebzpxngr rlimz x natq Jissz nzlqvn kc tzaelwapx-ngrdr nzngini-angidr-karde Mrlx Gct.

Rkx Rtqmqz

Jissz alrtipxle lue mz waen. [2:1-12]

Jissz angyale nzatrkatingr Mangr-nzangiongr Yawe. [2:13-22]

Jissz amrlzle nrkrdrq ncblo kx mnem rlru. [4:43-54]

Jissz amrlzle ncblo kx nrkrdrqde bz mz zbo ngr Sabat. [5:2-16]

Jissz apule ncblo siu-nzlqvn dakxnxng. [6:1-15]

Jissz vzneom mz lue ngr Dxbu Gzlili. [6:16-21]

Jissz amrlzle ncblo kc mzte tqmwi pnz mzli kc tzmcngr mzte. [9:1-41]

Jissz atulz-ngrmle Lasarus mz nzbz-karde. [11:1-44]

Nzycmne-ebzpxngr Rlimz Mz Nzrpikr Jissz Kx, “Ninge.”

Ninge dakxnxng ngr nzlungr. [6:35, 48]

Ninge zyzl ngr lr nrlc. [8:12; 9:5]

Ninge naonrx kc tzvzkitr leplz mz nzkrlz-krbzlr Gct. [10:7, 9]

Ninge kxaclve angidr sip nengeng. [10:11, 14]

Ninge kc tqatulz-mopwc' leplz mz nzbz-krdr x ninge kc tqka-kzpo badr nzlungr kxmrna. [11:25]

Ninge lrpzki, da angidr x nzlungr. [14:6]

Ninge angidr nounc. [15:1-5]

Natq Esz'mz Kx Nzaelwapx-kz-ngrdr Kx Jiszs Nide Gct

Ninge kape (Kxnzmcpx). [4:25-26; 13:19]

Ninge Ningep. [8:24, 28]

Ninge (Yawe). [8:58]

Da zpwxtx, nigr ncdr Trtenge da kxesz'. [10:30; 14:9; 17:21]

Mrnyznge Heven. [17:5, 11, 24]

Aposol Jon rpile kx Jiszs nide Gct. [1:1, 34; 20:28]

Jiszs Nide Kxrpalz

¹ Jiszs nide Natq Gct. X Natq lc mncpe mzli kc nrlc trnzwzka-ngrde. X Natq lc nzmncc-pnzng ncdr Gct, x ni-kzde Gct. ² Nzmnc-pnzng ncdr Gct mzli kc tqyzutrngr nrlc. ³ Natq lc wz-ngrde da amrlx mz nzvz-nqblq-krde me pnz drtwr Gct. X trpnzng ralr nrlc kx mnctxpx-ngrde mz nzrwzng. ⁴ Natq lc ngi nou nzlungr kxboi, x apule zyzlr kc tzaelwapx-ngrbzle nzalvztrngr angidr mz kxmu nzarlapxkr Gct leplz. ⁵ X zyzlr ngr nzalvztrngr angidr lc pnamilxile nabz leplz kcng tzmnclzbzng mz zmatq ngr alwx x nzbzngr. A' rblxbz mz zmatq kxtrka lcng nzamz-krdr zyzlr lc.

⁶ Atwzlr-ngrm Gct kzdq profet mz leplz nedeng lr Jiu. X krlcde Jon Kxawrkxtr. ⁷ Vzm mz nzyapwxtipx-krde Zyzlr kc tqngi Jiszs, murde leplz amrlx nalxngitilr nide. ⁸ Jon Kxawrkxtr trnginipleu Zyzlr lc tqatwzlr-ngrm Gct. A' vztx-ngrple nayapwxtipxbzle Zyzlr lcde mz leplz.

⁹ Jiszs ni-angidrde Zyzlr kc navzm mz nrlc. X mz nzvz-krmle, sc tqayzlrpe-ngrbzle nabz leplz amrlx. ¹⁰ Mrlx lc tqngi Natq vzm x mnc mz nrlc ngr alwx. X kxmule-esz' wz-ngrde nrlc, a' lr nrlc trnzunglxlru nide. ¹¹ X vzm bagr, nigr lr Jiu kcng tzngi lr mrnyzde, a' lr mrnyzdeng kxnzkqlung nzpwtppx-ngrdr nide.*

¹² A' kzdung nigr nzabrtzlvzlr nide x nzlxngitilr nide. X atubqtibzle mz leplz lcdeng lrpzki r nzngini-krdr doa ne Gct, murde nalxngitilr nzarlapx-krde nidr. ¹³ Doa ne Gct lcng nzmika mz nzrmikangr kxmrna mz drtwr Gct esz'-krde. Nzrmikangr lc trvzpxpuu mz nzrmcti-lzbqkr trte ncdr lxe, o mz nelz lxe, o mz nqvi lr melrmqdr.

¹⁴ Natq Gct lc ngi doa ne leplz, x mnckr badr. X aelwapx-ngrmle bagr nzalvztrngr angidr x zmrlz ngr Gct kxmyalz. X nigr aposol mcpekr nzmyalz-krde, mz nzngini-krde Mrlx Gct kc esz'txu. ¹⁵ Mzli kc Natq lc tqmncpe-ngrde, Jon Kxawrkxtr sc tqyapwxtipxpele nide. Rpibzle mz leplz, mz nate kxetu kx, "Milde mzli kc ena tqrpi-ngrbo kx, 'Vz-kaipc' a' ncblo kc navzm mz nibrnge, myaslzle ninge, murde mnc pnz kai mz ninge." X mrlx lc sc tqvzpm." ¹⁶ X sc tqamrlz-ebir-ngrde nigu mz zmrlz ngrde kxmyalz, mz nzhka-krmle da kxmrzting kxkqlu bagu. ¹⁷ Murde Gct kamle bagr Loukxtr scde mz Mosis. A' da kx myapx-esz'ngr, nzhka-krmle bagu zmrlz ngrde kxmyalz x nzangidati-krde da mz Jiszs Kxnzmcpx. ¹⁸ Trgalr kx rmc Gct mz mzte, a' ngi txpwz Mrlxde kc esz'txu, kc tqpq zlwz mz nabz Trtede, x aelwapx-ngrmle Trtede bagu.

Nzycmnekr Jon Kxawrkxtr

Matiu 3:1-12; Mak 1:1-8; Luk 3:1-18

* **1:1** Nou 1:1; 15:1, 4; 1 Samwel 3:7, 21; 15:10; 1 King 12:22; 1 Be Ngrdr 17:3; 22:8; 2 Be Ngrdr 11:2; Sam 33:6; Asaea 38:4; Jeremaea 1:4; 1 Jon 1:1 * **1:6** Matiu 3:1; Mak 1:4; Luk 3:1-2 * **1:11** Aposol Jon kc tqyrlr Nrpakxmrz lc, nide kzdq lr Jiu, x sc tqvz-nqblq-kaile Jon Kxawrkxtr, x Jiszs kc ate. A' tsutiu drtwrde nzglqpx-lzbq-krde mz nzpipx-zvz-krde drtqde. A' mz nztekqtrngr natqdeng mz Natqgu, takitrde nzryrngr *ninge* x *nigr*; murde nakrlzku kx tqnginide kc tqycmne mz buk lc.

¹⁹ Mzli lcde, Jon Kxawrkxtr mnc mz nrlar LueJodzn kc tqprkilzm nepi mz nzawrkxtr-krde leplz. Kzdq zbz kxnzetu r lr Jiu kcng mzteadau Jerusalem nzaveamlr kcng pris x ncblo ngr nqvi lr Livae mz Jon. Nzrpibzlr kx, “?Nim ncblo kzni?” †

²⁰ X Jon Kxawrkxtr trpokiapwzu, a' pi-angidrbzle badr kx, “Trnginipwc'u Kxnmcpk, Mevalu kc navzm.” ²¹ Nzvea-mopwzng, nzrpibzlr kx, “?E nim neke? ?Nim Profet Elaeja?” Rpi-mopwzle kx, “Trtingr, trnginipwc'u nide.” Nzrpibzlr kx, “?E nim Profet kc tqapule Mosis?” Rpi-kzpze kx, “Trtingr.” ²² Nzrpibzlr kx, “Pim bagr ncblo kxnginim, murde napi-mopwzkr mz ncblo kcng tzaveamlr nigr bam. ?Nike nzwz-krm?” ²³ Zbz sc tqayzlu-mopwz Jon badr mz nzycmnekr profet Asaea. Rpibzle kx, “Ncblo kc tqngininge nide sele. Natq kzdq ncblo kx natqde etu mz nzryapwx-krbzle mz leplz lzke. Natq lcde rpile kx, ‘Oliqtiamu nabzmu mz nzvz-krm Kxetu Gct. Atubqtibzmu lrpzki kx nangi nyzde na-apule nzoliqtikr leplz kzdq lrpzki kx navzkim king.’” ²⁴ Kzdung ncblo kcng nzatzl-ngrmqng kxnzetu r lr Jiu nznginidr dzbe Farzsi. ²⁵ Farzsi lcng nzrpibzlr mz Jon kx, “Rpiq kx trnginipqu Kxnmcpk, x Elaeja, x profet kc tqapule Mosis. ?Kx tqmule lcde, myx me twzkime zmatq ngrm mz nzawrkxtr-krm leplz?” ²⁶ Rpibz Jon kx, “Awrkxtrxpwo leplz mz lue, mz nzoliqtingr nabzdr mz nzvz-krm Kxnmcpk. X nide la tqmncpebz bamu, a' trglxkalamu nide. ²⁷ Sa navzm mz nibrnge, x nide ncblo kxmatq-esz'ngr x ninge ncblo txne. Mz nzmu-krde lcde, trtakitr-kzpwc'u nzyokaepx-krbo nqvi lr sadol scde.”

²⁸ Da lcng nzalelr mz nrlar LueJodzn kc tqprkilzm nepi, yc-aepztrpz mz mztea Betzni kzble mrkc tqawrkxtrngr Jon. ‡

Jiszs Nide Nei Sip Ne Gct Kc Tqrkatx Alwx

²⁹ X mz zbz kzble, Jon Kxawrkxtr mcle nzvz-krm Jiszs bade. Sc tqrpipemle kx, “Nei Sip kc nangi blz kx naka-nrbalqm Gct, dela tqvzm. Sa nakatxde alwx ngr leplz ngr nrlc! ³⁰ X krlc tqycmnetr-ngrne mz nzrpibzlr kx, ‘Vz-kaipc’, a' ncblo kc navzm mz nibrnge, myaszlze ninge, murde mnc pnz kai mz ninge.’ ³¹ Mzli kc kai trglx-angidrw Xu mrlx lc. A' kc tqvz-ngrmc tqawrkxtr-ngrne mz lue, murde na-aelwapx-ngrbz nide mz lr Israel. ³²⁻³³ Gct kc tqatzl-ngrmle ninge kx na-awrkxtr leplz mz lue, rpimle bange kx, ‘Sa namcq nzvzo-krm Mqngkrxtr mz nwxbuo-krmle mz kzdq ncblo. Krlc ncblo kx na-awrkxtr mz Mqngkrxtr.’ A' trglxw Xu kx Jiszs Kxnmcpk nide ncblo lcde, vz-krlzbzle mzli kx mc-angidr-ngrne nzvzo-krm Mqngkrxtr bade, mz nrkrdrtrq kx apule nran, x wxbuom bade. ³⁴ X mcpe da lcdeng, x napibo bamu kx ncblo lc tqwxbuo-ngrmle, ni-angidrde Mrlx Gct.”

Ncblo Neng Jiszs Kcng Kai

³⁵ X nrlcngrlxobz Jon Kxawrkxtr badr kzdu nigr nzling kx ngi oblamzdeng, nzmn-coung mrlcde. ³⁶ Mzli lcde kx mc Jon Kxawrkxtr nzvz-krm Jiszs, sc tqrpipemle bagr kx, “Nei Sip ne Gct, dela tqvzm.” §

³⁷ Kx xlrbzkr nzycmne-krde, sc tqma-nqblqpekr Jiszs. ³⁸ Zbz Jiszs lxlvkimle mq, sc tqmcpele nzvz-nqblq-krgr nide. X sc tqrpipemle kx, “? Nike tqrtangrtiamu?” Rpibzkr kx, “?Kxakrlz, myx me mnc-ngrn?” ³⁹ Rpim Jiszs bagr kx, “Vzmamu x mc-kzamu mz mzpu.” Vzkr badr x sc tqmcpekr

† ^{1:19} Mc nqvi lr Livae mz Nzialvztr-ngrng Kxmyapxbz. ^{21:21} Malakai 4:5-6; Lou Kcpwz 18:15-19 ^{23:1} Asaea 40:3 ‡ ^{1:28} Trngi Betzni kc tqyc-aepztrpz mz Jerusalem. § ^{1:36} Aposol Jon nangi kzdq nidr ncblo nzling, murde namncpeng badr mz nzycmne-daliti-krde nzkqlekr Jiszs ncblo nedeng mz ngalre kcng 36-51 x mz nzyrlzng mztea Kena mz dckrlzde kc li.

mrkc tqmnc-ngrde. Nzmnc-krgr badr abzo mz nabz nepi kc tqpwx krlzbzle mz nina. ⁴⁰⁻⁴¹ Kzdq nigr drtqde Adru, tulzm x vztv-pnzbz mz mzlede, Saemon Pita. Sc tqrpipebzle bade kx, “Rmctipekr Kxnzmcpx kc tqaenzliku!” ⁴² X mzli kcpwz Adru sc tqvzmipemle mzlede Saemon mz Jiszs. Kx mc Jiszs Saemon, sc tqrpipebzle kx, “Nim Saemon mrlx Jon. Sa nangi drtqm Sifzs.” (Drtq lc dekcpwz tqngi Pita kc drtwr ngrde rplz.)

Jiszs Badr Filip X Natzniel

⁴³ Nrlc kx ngrlxo-mopwzle, Jiszs sc tqaotipe drtwrde nzvz-karde Gzlili Provins, x sc tqvzpekr badr. Kx vzbzkr kc, sc tqrmctipele Filip, x sc tqrpipebzle bade kx, “Vz-nqblqm ninge!” ⁴⁴ Filip lc nide ncblo ngr Betsaeda, taon nyz Adru ncdr Pita. ⁴⁵ X Filip vz x rmctile Natzniel, sc tqrpipebzle bade kx, “Rmctipekr Kxnzmcpx kc tqyro Mosis mz Buk ngr Loukxtr x tzyr-kzlr profet. Ncblo lcde drtqde Jiszs, mrlx Josip ngr mztea Naszret.” ⁴⁶ A' rpibz Natzniel kx, “?Elr, nzmu Naszret mztea lc tqtopwzne naprpx-ngrm da kxmrlz?” Rpibz Filip kx, “Eu, a' vzm x mc kz mz mzpq.” ⁴⁷ Kx mc Jiszs Natzniel mzli kc tqvz-ngrmle, sc tqycmnetrpe-ngrde mz nzhpi-karde kx, “Ncblo lc nide kx takitrde nzhpi-ngrbz lr Jiu ngr Israel, murde rblxbz bade nzpokia-karde.” ⁴⁸ Natzniel kc tqveapebz, rpibzle kx, “?Myx kxmu nzkrlz-krm ninge?” Rpibz Jiszs kx, “Mzli kc trkqleka-ngrpz Filip nim, sc tqmcbo nim mrkc tqwxbulz-ngrn mz nou nc fiki kc.” ⁴⁹ Rpibz Natzniel kx, “Kxakrlz, mz nzmc-kai-krm la ninge, krlzx kx nim Mrlx Gct, King r Israel.” ⁵⁰ Rpibz Jiszs kx, “?Myx kxmule, lxngiti-ngrn ninge nzpi-krbo bam nzmc-krnge nim mzli kc tqwxbulz-ngrn mz nou nc fiki kc? Krlc da kxtopwz. A' sa namcq kalr da kxetuting kx namyaszpxlr da lc. ⁵¹ Da angidrtx lc napibo bamu. Sa namc-kzamu nzlvxtpxkr Heven, x enjrl neng Gct sa nao-zliomlr x nao-zlilzlr ninge, mz nzngini-krnge Mrlx Leplz Kxnzmcpx, da kc tqwai nzmc-pnzkr Jekop mz nzrmwible-karde.” *

2

Nzyrlzngr Mztea Kena

¹ Zbq otx li mz nzycmne-krbz Jiszs mz Natzniel, x kzdq nzyrlzngr sc tzrtrngztierez Kena, kzdq mztea mrkc Gzlili Provins. Lxe Jiszs mncpe kai mz mztea lcde tzyrlzngr. ² Zbz Jiszs x nigr ncblo nedeng kcng tqmcpxpeleng, nzaveati kz nigr mz nzyrlzngr lc, x sc tqvzpekr. ³ X mz nibrde, sc tqmulvzpekr nzyrlzngr lc. Zbz waen kc tqmnqkr kx yrkrle kc, sc tqrpipebz lxe Jiszs bade kx, “Waen kcng tzmnq yrkrpe. ?Nzmu mrlz nzrtangr-krgu mou waen kzble?” ⁴ Rpibz Jiszs bade kx, “Lxe, mzli ka trtakirpleu nzpi-krme bange mrla tqaoti drtwrm, murde trkrlzkapzle mzli r nzaelwapx-lzbq-krnge.” ⁵ Mz nzmu-karde lcde, sc tqrpipebz lxede mz kztedr kcng tzokatrng kx, “Mrlzpe. Da kznike pibzle bamu, rtrngztibzmu.”

⁶ X wxbu elr belue esz'mz kx nzwzngr mz rplz. Belue lcng nangi dalr nzycpq-krgr mqgr x kzdung kz da mz nzvz-nqblq-krgr Loukxtr scgr. Belue lcdeng mz nzyrbu-krdr takitr lxblr lita kx trtqki-esz' (100). ⁷ Sc tqrpipebz Jiszs mz leplz kcng tzokatrng kx, “Ngilatramu belue lcng.” Nzngilatrlr x nzyrbu-lxblrng amrlx. ⁸ Sc tqrpipebzle badr kx, “Angqpxamu du lue mz belue lcng x twzbzmu mz mrlx kc tqaclvle nzyrlzngr lc.” X nztwzbzlr bade. ⁹ X sc tqabztrpele lue kc tqrltipxle waen. Waen lc nzkrlz leplz kcng tzokatrng, a' trkrlzu mrlx lc, me nztwzkimle. X mz nzkctipx-kardele x nzabrtzlvz-kardele, sc tqkqlepele ncblo kc tqyrlz. ¹⁰ X sc tqrpipebzle

* 1:51 Nou 28:12

bade kx, "Mz nqmq ngr nzyrlzngr, waen kxmrlz kc namnq kai. X mzli kc naesapxpengr drtwr ncblo, waen kx trmrlzne-zpxu kc tztwz-mop. A' nim ayzlu-alzuq, x waen kx mrlz-esz'ngr yrlqtxpxq krlzmle mzli ka, x sc tqkapx-ateq."

¹¹ Jiszs alele rkx lc ayrnrngr mztea Kena mz Gzlili Provins. Rkx lc aelwapx-ngrde nzmyalz-krde. Nigr ncblo nedeng mckr x lxngitikr nide.*

¹² Mz nibrde, Jiszs, lxede, mzledeng x nigr ncblo nedeng, vzo-lxblrkr amrlx ngrgr mz taon Kzpznizm, x mnctikr kcng zbzq mrlcde. *

*Jiszs Angyale Nzatrkatingr Mangr-nzangiongr Yawe
Matiu 21:12-17; Mak 11:15-17; Luk 19:45-46*

¹³ Mzli lc zbzq kxetu scgr nigr lr Jiu, kc tzrpibz Nzamyangr, ycpe pipz nzkaputr-krmle, x nigr badr Jiszs sc tqvzdzpekr mzteadau Jerusalem mz nzakaputr-krmgrle. * ¹⁴ Kx vztr Jiszs kc makoa ngr Mangr-nzangiongr Yawe, sc tqmcpele leplz nzamwati-krdr kzu, sip, x kio kx nangi blz. X mc-kzle ncblo kxnzrtekqtrng trau r mrkzble mz trau r Mangr-nzangiongr, sc tzwxbulzng mz tebol. ¹⁵ Zbz sc tqalepele kc nqvi kx nangi bz, tqmaneupxpeleng ncblo lcng amrlx badr sip x kzu nedrung, mrkc tzylwrtr-ngrbzlr Mangr-nzangiongr. X alzngubzle tebol nyz mrlx kcng tzrtekqtrng trau. X trau scdr rlxtxbzleng. ¹⁶ X rpi-kzpzele mz ncblo kcng tzamwang kio kx, "Twzamu kio lcng x vnamu. Bzkq ma nyz Trtene apusr-ngrnamule me nzamwangr da." ¹⁷ Da lc tqalele sc tqadcpxpemle drtwrgr nzrpikr Nzryrngrkxtr kx, "Mz nzpq-zlwzkr nzaotikr drtwrge Mangr-nzangiongr nim, apusr-ngrde ninge da kx nzangc mz nyr x yrkrtxo." *

¹⁸ Zbz kxnzetu r lr Jiu nzyzlu-mopqng bade, nzrpibzlr kx, "?Myx rkx kx na-aleme bagr kx na-aelwapx-ngrde nzrngisc-krm zmatq ngr Gct mz nzale-krm da lc?" ¹⁹ Rpibz Jiszs kx, "Awxtxoamu Mangr-nzangiongr lc, x kxmrna kc natekqtr-ngrbole, na-atulz-mou-ngrnele zbzq natqtxu." * ²⁰ Nzrpibzlr kx, "Elr! ?Nzmu atulz-mowq mz zbzq kxtqtxu? Mangr-nzangiongr lc nwzti-ngrde yiz nzpnu-pwx-nrade-esz'mz (46)!" ²¹ A' trnzkrzlru kx ycmnetr-ngrde Mangr-nzangiongr kc tqngi nrkrdrdtqde.

²² Mz nibr kzdung yiz, mzli kc tqtzlpe-ngr-mople mz nzbz-krde mz zbzq kratq, sc tqdcpx ate mz drtwrgr kx pi-pnz-kaile da lc. X sc tqlxngiti-atekr Nzryrngrkxtr kc tqycmnetr-pnz-ngrde na-atulz-mou-ngrm Jiszs. X lxngiti-kzkr nzycmnetrkr Jiszs lc, mz nide esz'-krde. †

Jiszs Krlzle Nabz Leplz Amrlx

²³ Mzli lc tqmncngr Jiszs Jerusalem mz Nzamyangr, leplz nzkqlung nzrlxngitix-ngrpwlzlr nzrmc-krdr rkx kcng tqaleleng. ²⁴ A' Jiszs esz'-krde, trabru drtwrde nzrlxngiti-krdr, murde krlzpele nqmq kr leplz amrlx. ²⁵ X trpnzngr kx narpi-mopwz bade nqmq kr leplz, murde nide esz'-krde kc tqobqplxle nabzdr mz nzekqtr-lzbzq-krdr zvz.

* ^{2:11} Mz nzycmnekr Jon, da kcng tqmatq tqale Jiszs nzrpibz "rkx." Murde rpile nakrlzku niike drtwr ngrdr, a' trngi-txpwu nzwzng r esz'-krdr. X rkx lcng nzaelwapx-ngrdr nqmq kr Jiszs x nzokatrlr nzrlxngitikr leplz nedeng. * ^{2:12} Matiu 4:13 * ^{2:13} Nzrlaszngr 12:1-27 * ^{2:17} Sam 69:9 * ^{2:19} Matiu 26:61; 27:40; Mak 14:58; 15:29 † ^{2:22} Mz Nrpakxmrlz kcng tzyrng Matiu, Mak, x Luk, be ngr Jiszs Angyale Nzatrkatingr Mangr-nzangiongr Yawe kaputrp mzli kc nayrkrpxpe-ngrbz nzlukr Jiszs. A' mz Nrpakxmrlz kc tqyr Jon, be lc kaputrp mzli kc tqabzo-ngrde nwz-krde. Leplz trnzkrzlru nzale-krde da lc nwzrde esz' o li.

3

Nikodimzs Nzryapwxng Ncdr Jiszs

¹ Kzdq Farzsi kx prtr mz Kansrl kx aclvele Loukxtr scgr, nigr lr Jiu, drtqde Nikodimzs. ² Kzdq nrlckxbq vzm mz Jiszs mz nzycmnetr-krdr mz nzmnclz-ngrbz mz Gct mz nzngini-krde King. X sc tqrpipebzle bade kx, "Kxakrlz, krlzkr kx nim kxalvztr kx atwzlr-ngrm Gct. Murde trpnzngr leplz kx rkrlz nzalengr rkx lcng tqaleq, a' ngi txpwz ncblo kx mncbz Gct bade mz nzokatr-krdele." ³ Ayzlu-ngrbz Jiszs natqde kx, "Da angidrtx lc napibo bam. Trpnzngr leplz kx namnclzbz mz Gct mz nzngini-krde King rde, a' ngi txpwz doa kx namika kai mz nzrmikangr kxmrna." ⁴ Rpibz Nikodimzs kx, "?Mzte namc mou, rpiq? ?Nzmu ncblo kxetupe mzte nzmc mou? ?Nzmu krlzle nzprtr-krde mou mz nelz lxede, x sc tzmikape mz nzwrde krali?" ⁵ Rpi-mopwz Jiszs bade kx, "Da angidrtx lc napibo bam. Trpnzngr kx namnclzbz mz Gct mz nzngini-krde King rde, nzmu trnamika-kaileu mz lue x Mqngrkxtr. ⁶ Murde nrkrdrdq leplz mikapxle nrkrdrdq, a' Mqngrkxtr mikapxle mqngr. ⁷ Bzkq kctipxq nzpi-krbo bam ncblo namika kai mz nzrmikangr kxmrna. ⁸ Na-aoti drtwrm nzwqkr nenq. Se tqxlrq nzwq-krde, a' trkrlzwq mrkc tqwqkipxmle x mrkc nawqkitrle. Kxmu-kzle lc mz nzwzkr Mqngrkxtr. Se tqmcq nzwz-krde mz leplz kcng tzprtrng mz nzrmikangr kxmrna. A' trkrlzwq da kx alele x mzli r nzale-krdele." *

⁹ Rpi-mopwz Nikodimzs kx, "?Nzmu trmu-pnzleu la tqpiq?" ¹⁰ Rpibz Jiszs bade kx, "?Myx kxmule, alvztrq lr Jiu ngr Israel, a' se trkrlzwq da lcng? ¹¹ Da angidrtx lc napibo bam. Pibo bam da kx krlz-angidrx x mcx mz mzke', a' trpnzngr nimu lr Jiu kx suti drtwrde nzlxngiti-krde natqnge. ¹² Mzli kc tqyapwxntri-ngrbo bamu dalr nrlc, trlxngitiwamu ninge. ?Mz nzmu-krde lcde, myx kxnamu nalxngiti-ngrnamu ninge kalr, mz nzyapwxtr-krbo dalr Heven? ¹³ Trgalr leplz kx vzdz x krlzlzle Heven x krlz-angidrle dalr Heven, a' ninge txpwz, Mrlx Leplz kc tqrlaszomle Heven x vzom mz nrlc. ¹⁴⁻¹⁵ X krlzku kx Mosis, mzli kc tzmcn-ngrdr lzke, tqglqlz-ngrde ningidoe kc tqngi bras mz nounc, murde leplz nalung. ¹⁶ X mz nqmq lcpwz, Mrlx Leplz sa naglqlz kz nide mz kros, murde krkcng tzlxngitilr nide narmctilr nzungr kxboi." †

¹⁶ Da zpx. Gct atwzlr-ngrmle Mrlxde kc esz'txu murde nzmrlnzti-zlwzle lr nrlc. Murde krkcng tzlxngitilr mrlxde trtxpnzngr nzbz-alo-krdr, a' sa narmctilr nzungr kxboi. ¹⁷ Tratzwzlr-ngrpuu Gct Mrlxde mz nrlc mz nzayrplapx-krde lr nrlc, a' mz nzaelwapx-krde nidr mz nzayrplapxngr mz alwx. ¹⁸ Delc, krkcng tzlxngitilr nide trpnzngr nzayrplapxngr nidr. A' krkcng trnzlxngitilru nide, nzmnccpeng mz nzayrplapxngr lc, murde trnzlxngitilru Mrlx Gct kc esz'txu. ¹⁹ Nzayrplapxngr lc vzpxm mz nzatzwzlr-krm Gct mrlxde mz lr nrlc mz nzaelwapx-krde da angidr badr. A' nzpxtxpx-ngrdr nzalvztr-krdeng, mz nzmrlnzba-krdr alwx, murde nzale-zvzlr da kxtrka. ²⁰ Krkcng amrlx tzaleng da kxtrka, nztrka badr da angidr. X trnzlxngitilru da angidr, murde trsutiu drtwrdr nzaxtx-krdr da kxtrka kcng tzrtrngztibzlr. ²¹ A' krkc tqqrtrngzbz da kxtubq, vz-nqblqle da angidr, murde naaelwapx-ngrde kx da lcng tqaletile nzvzpxmqng mz Gct.

Jiszs Ycmnetr-moungr Jon Kxawrkxtr

* ^{3:1} Jon 7:50-51; 19:39 * ^{3:8} 3:3 Mz natq lr Grik, nzrmikangr kxmrna drtwr ngrde nzrmc-moungr mz x nzrmikangr wq. 3:8 Mz natq lr Grik, nenq drtwr ngrde nenq x mqngr.

† ^{3:14-15} Nzkqlu-krdr 21:4-9 † ^{3:14-15} Kzdu kxszetung, mz drtwrdr nzycmnekr Jiszs lc krlzbzle ngalrde kc 21. X kzdung kz kxszetung, nzrpilr kx yrkrpx mz ngalrde kc 15.

²² Mz nibrde, nigr badr Jiszs, sc tqvzpekr mz Judiz Provins. Mnctikr badr kzdung mzli mrlcde mz nzawrkxtrngr leplz. ²³⁻²⁴ Mzli lc Jon sc tqaotr ncte nzawrkxtrngr, murde tradwatrka Herot Antipas mz presin. [☆] Awrkxtr mrkc vaulz Aenon, yc-aepztrpz mztea Salim, murde mrlcde ycng r vaulz kxkqlu. X leplz nzvzbzng mrlcde mz nzawrkxtrkr Jon nidr. ²⁵ Kzdq zbz oblamzng Jon nztalwz-ngrdr badr kzdq lr Jiu mz namrlzu r nzrycpqng da mz Lou sc Mosis. ²⁶ Mz nibrde nzvzng, sc tzrpipebzlr mz Jon kx, "Kxakrlz, ncblo kc tqmncamu ncdr mz nqlvi r LueJodzn kc tqyctxo, x tqycmnetrngrn, mzli ka sc tqawrkxtrpe kz. X leplz kxkqlu sc tzyrkrtxpepwzng bade." ²⁷ Rpibz Jon kx, "Trpnzng ncblo kx nartrngzbz da lcdeng mz nide esz'-krde, a' nzkaomqng Gct Heven. X kxmu-kzle la mz nide. ²⁸ Xlrpeamu nzhpi-krbo kx trnipwc'u Kxnzmcpx. A' ninge ncblo kx atwzlr-kai-ngrm Gct kx naoliqtipxbo leplz mz nzvz-krmle. [☆]

²⁹ "Na-aoti drtwrmu nzyrlzng. Murde mz nzyrlzng olvz vz txpwz mz ncblo kc nayrlztile nide. X mrlx kzte ncblo lc, prtr mz nzelalz-krm drtwrdr. Delc, tqabrtzlvz-ngrne nide. [☆] Murde nide Ncblo kc Tqyrlz x ninge mrlx kztede. Mrlz leplz kxkqlu nzyrkr-krmlr bade mz nzapu-krdr olvz rde.

³⁰ Nzmrlnue-krde naetunelz zvz, x ninge navzneo alzu." ‡

³¹ Nigu kcng tzmika mz nrlc, nigu dalr nrlc x ycmnepx-ngrp wzku dalr nrlc. A' Jiszs kc tqvzom wq Heven, nide kc tqmyaszlzle leplz amrlx. ³² X pipxbzle mz leplz da kx mcleng x da kx xlrleng, a' trpnzng kx rlxngitibz natqde. ³³ A' krkcng tzlxngitilr nide, nzkrzlr kx natq Gct ngi da angidr. ³⁴ X mrlx kc tqatwzlr-ngrm Gct, pipxle natq Gct murde Gct ka-zvzbzle Mqngkrkxtr bade. ³⁵ Trte mrlztille Mrlxde, x aprcbzle bade zmatq ngr nzaclve-krde doa x da amrlx. [☆] ³⁶ Krkcng tzlxngitilr Mrlx Gct, narmctilr nzlungr kxboi. A' krkcng tzpxtxpx-ngrdr nide, trtxpnzng nzmcti-krdr nzlungr lc. A' zngya ngr drtwr Gct yctr-zvzbz badr.

4

Jiszs X Kzdq Olvz Lr Szmariz

¹ Dzbe Farzsi nzxrlrlr kx leplz kx awrkxtrpeng Jiszs x nzvz-nqblqlr nide, nzkqlu-krdr nzmyaszpxpelr oblamzng Jon. ² Jiszs esz'-krde trawrkxtru leplz, a' ngingr txpwz kx nzaleng. ³ Zbz nigr badr Jiszs rkalzmgr Judiz Provins, x sc tqvzdzpe-moukr Gzlili Provins. Murde krlzpe Jiszs nzxrlkr Farzsi nzawrkxtr-krgr. ⁴ Mz nzvz-nqblqkr Jiszs me pnz drtwr Gct, o-zlikr lrpzki kc tqtavautr Szmariz Provins mz nzvzdz-krgr Gzlili. ⁵ Vzdzkr x krlzbzkr kzdq mztea ngr Szmariz drtqde Sika. Mztea lc esotrpz mz nardzng kc tqka-pnzbz Jekop mz mrlxde Josip mzli kc bqnc. [☆] ⁶ Mrlc dekc tqycngr lrpao nyx Jekop. X drtq Jiszs kx tapele kc mz nzvz-krmle mzli kc bea, sc tqwxbuope mz nrlar lrpao lc mz nzama-krde.

⁷⁻⁸ X nigr ncblo nedeng, sc tqvzpekr mz mztea, mz nzxpe-krgr dakxnzng. Mzli kc tqvzpe-ngrgr, vzm kc olvz lr Szmariz kx na-avoo lue. Sc tqrpipebz Jiszs bade kx, "Kam du mqnge lue la." ⁹ A' rpibz olvz kc kx, "?Elr, nim lr Jiu x ninge lr Szmariz, memule tqrlx-ngrme bange lue?" Krlc tqycmne-ngrbzle lc, murde lr Jiu nzngangr-ngrdr lr Szmariz. [☆] ¹⁰ Rpibz Jiszs kx, "Trkrlzwq da kx nakaom Gct, x trglxwq ninge lc tqrlxbz bam lue kxpipz. Nzmu naglxq ninge, narlxme bange lue, murde nakabo bam lue ngr nzlungr." [☆] ¹¹ Mz

[☆] 3:23-24 Matiu 14:3; Mak 6:17; Luk 3:19-20 [☆] 3:28 Jon 1:20 [☆] 3:29 Jon 15:11; 17:13 ‡ 3:30 Kzdu leplz mz drtwrdr nzycmnekr Jon Kxawrkxtr lc krlzbzkr ngalrde 36. [☆] 3:35 Matiu 11:27; Luk 10:22 [☆] 4:5 Nou 33:19; Josua 24:32 [☆] 4:9 Esra 4:1-5 [☆] 4:10 Jeremaea 2:13; 17:13

drtwr olvz lc, ycmnetrngr Jiszs lue kxvo, x sc tqrpipebzle kx, "Kxetu, lrpao lc vzola x trpnzngr scm bepao kx naveclz-ngrme lue. ?Lue kc tqpiq narkabz nzlungr mz leplz, natwzme drlve? ¹² Lrpao lc, trtegu Jekop kc tqrkam bagu, x nzmnqlr badr doa nedeng x sip nedeng. ?Myx kxmule, nim kx myapxbz mz nide? ?X lue kc nakabzme mz leplz myaszpxle lue lc?" ¹³ Rpibz Jiszs bade kx, "Lue lc, kxmule-esz' nzrmnqngr nzwrd kqlu, a' drtwr leplz kc tqbrlxkz mou. ¹⁴ A' doa kx narmnq lue kc nakabo, trtxpengr nzbrlxkzkr drtwrde. Murde lue kc nakabo bade na-apulzmle mz nabzde lue kxvaulz kx etunepx x nakabzle bade nzlungr kxboi." ¹⁵ Rpibz olvz kc kx, "Kxetu, kam bange lue la tqpiq. Murde namnqx x drtwrnge bzkq brlxkz mou, x bzkq vo-zvzmc lue mrka."

¹⁶ Zbz Jiszs sc tqaelwa-lzbqpe-ngrbz bade murde naokatrpzle nide. X sc tqrpipebzle bade kx, "Vz, oti menalzm x vzmim mrka." ¹⁷ Rpibz olvz kc kx, "Trpnzngr menalnge mzli ka." Rpibz Jiszs bade kx, "Eu, da zpxw la tqpiq, kx trpnzngr menalzm. ¹⁸ Murde yrlztipeq ncblo nzlvqn, a' krkc tqmwimiq mzli ka trngiu menalzm. X da angidr la tqpime." ¹⁹ Rpibz olvz kc kx, "Kxetu, krlztrpebo kx nim profet ne Gct, murde Gct txpwz kx rkrlz nzaelwa-ngrbz bam kxmu nzmnc-krnge. ²⁰ Mzli kc bqnc kxnzetu rgrng, nigr lr Szmariz, nzabzlr nzangioo-krmlr Gct mz Mangr-nzangiongr nyzgr, mrka mz Newz Gerisim. A' nimu lr Jiu rpiamu kx takitxtrpwzde nzangiongr mz Mangr-nzangiongr nyzmu mrkc Jerusalem. ?Mz nzmu-krde lcde, neke mz nigu kx ngi da angidr?" ²¹⁻²² Rpi-mopwz Jiszs bade kx, "Olvz lc e, napi-zpxwbo bam, x lxngiti ninge. Nimu lr Szmariz angioamu Gct kx trkrlzwamuu. A' nigr lr Jiu angiokr Gct kx krlz-angidrkr. Murde mcpox Gct nigr mz nzaelwapx-krde kx sa na-arlapxle leplz. Mzli lc navztrp trpengr nzangioo-krmamu Trte mz newz lc, x wai-kzle Jerusalem. A' leplz ne Gct sa na-angiopelr nide drlve keng nzmnc-ngrdr. ²³ A' kxmule-esz', mzli kc tzpi navzm, deka tqkaputrpem. Murde mzli ka leplz na-angiopelr Gct mz nabzdr. X na-angiolor mz zmatq ngr Mqngkrkxtr mz nzvz-nqblq-krdr da kxtubq. X leplz kxnzmull lcng, dekc tqrtangrtng Gct mz nzangio-krdr nide. ²⁴ Murde trnipleu leplz kx namcku, a' nide Mqngr. Mz nzmu-krde lcde, nzangiongr nide navzdzm mz nabz kxtubq mz nzokatrkr Mqngkrkxtr." ²⁵ Rpibz olvz kc kx, "Krlzx kx Kxnzmcpox, kc tzrpibz Kraes, sa navzm. X mzli kc navz-ngrmle, sa nayokaetipxmle bagr da amrlx." ²⁶ Rpibz Jiszs bade kx, "Ninge kape."

Nzrvzmi-ngrm Leplz Mz Gct Apule Nzrkqlzngr Nrlanc

²⁷ Mzli lcpwz nigr ncblo nedeng sc tqyzlupemgr mz mztea Sika. X kctitpxkr nzmc-krgr Kxetu rgr nzycmne-krdr ncdr olvz lr Szmariz. Murde kxakrlz kx apule Jiszs nzrpwa'-ngrbz bade nzycmnemi-krde olvz. A' trpnzngr nigr kx rpibzle mz olvz kc kx, "?Nike suti drtwrm?" X trpnz-kzngr kx rpibzle mz Kxetu rgr kx, "?Memule tqycmnemi-ngrn olvz lc?"

²⁸⁻²⁹ Zbz olvz kc rlaszle belue mqde, sc tqyzlupe mztea. Kx krlzbzle kc mztea, sc tqrpipebzle mz lr mztea kx, "Doa lcng, vzmamu ena. Rmctix kc lr narnrlc kx yapwxtime da amrlx kcng tqrtrngzibo. ?Trnipleu Kxnzmcpox kc tzpi navzm?" ³⁰ Zbz sc tzrkalzpmqng mztea, mz nzrmcti-lzbq-krdr badr Jiszs.

³¹ Mz nibr nzvzkr olvz kc, sc tqrpipebzkr bade kx, "Ei Kxakrlz, mutx ena dakxnnng lcng tqtwzmgm." ³² Rpim Jiszs bagr kx, "Dakxnnng nange sa tqyc, a' trmcwamuu." ³³ X sc tqrpi-etrpekr kx, "?Myx kxmule? ?Rtwzpm dñ nade dakxnnng?" ³⁴ Rpim Jiszs kx, "Dakxnnng nange ngi nzale-krnge me pnz drtwr Gct kc tqatzlrc-ngrmle ninge, x nzayrkrpx-krnge nzwzng lc.

³⁵ Na-aoti ena drtwrmu nrlanc. Murde kzdq nzycmne-krmu rpile kx, 'Ycbep la temz pwx x leplz kc tqrkqlzpe.' A' mz nzrkqtilz-krgu leplz, traenzlikuu mzli kxboi. Murde mzbq ka pex rtq mz nabz leplz kcng tzxlrlr natqnge, x nzapulr nzbrpekr dalr nrlanc, kx narkqtilzpxez mz nzvzmi-krbo nidr mz Trtenge. ³⁶ Nzrvzmi-ngrbz leplz bade apule nzrkqlzngr dalr nrlanc. Mrlx kc tqrkqlz, nzxpepe mz nzrtwz-krde dalr nrlanc. Murde nrade yc zvz mz nzokatr-krde leplz mz nzprtr-krdr mz nzlungr kxboi. X mz nzmu-krde lcde, mrlx kc tqpe x mrlx kc tqrkqlz nzabrtzlvzlr doa kx rmctile nzlungr kxboi. ³⁷ X nzycmnengr kc tqrpile kx, 'Kzdung ncblo nzli: kxpe x kxrkqlz,' sc tqtutrpe. Murde mrlx kc tqpe apule mrlx kc tqrpipx-kaipz mz leplz nrpa ngr Gct. X mrlx kc tqrkqlz apule mrlx kc tqrvmibz leplz bade. ³⁸ Mz nzmu-krde lcde, atwzlrpe-ngrbo nimu mz nrlanc kc tqngi nrlc ka. Trkxputrwamu elr mz nzpengr. A' nzpeti doa kzbleng, mz nzrpipx-krbzlr mz leplz nrpa ngr Gct. X prtxtrpwzmu mz nzrkqtilzngr da kx prpxm mz nwz-wz-krdr, murde narvzmimamu leplz mz Gct."

Lr Szmariz Kxnzkqlung Nzlxngitilr Jiszs

³⁹⁻⁴⁰ Leplz ngr mztea lcde nzlxngitilr Jiszs mz nzxlr-krdr natq olvz kc. X sc tzlc-amnqpelr nigr mz nzmcn-krgr badr mou kxipiz. X mnctikr badr zbz li. ⁴¹ Jiszs kx ryapwxbzle kc badr, leplz nzkqlu-moung kx nzlxngiti-kzlr kx nide Kxnzmcpx. ⁴² Delc tzrpi-ngrbzlr mz olvz kc kx, "Mzli ka lxngitipekr kx nide Mevalu ngr lr nrlc murde mc-angidrpekr x xlr-angidrpe-kzkr. A' trngi-txpwzu nzycmne-krme bagr."

Jiszs Amrlzle Mrlx Kzdq Kxrmailz

⁴³ Mz nibr zbz kcng li tqmnctikr Szmariz Provins, nigr badr Jiszs rkalzmgr, sc tqvzpekr Gzlili, mz provins nydze. ⁴⁴ Kxmule-esz' Jiszs traleleu rrx kxmatq, a' lr Szmariz nzlxngitilr nide. X mzli kcpwz Jiszs krlz-kzle kx narblxbz mz lr mrnyzdeng nzlxngiti-krdr nide, murde rpile kx, "Profet amrlx trnzamrlueu lr mrnyzdr." ⁴⁵ Mzli kc tqkaputr-ngrmgr Gzlili, lr mrlcde nzabrtzlvzlr nide. Murde nzvz-kzng mz Nzamyangr Jerusalem, x nzmcrl da amrlx kcng tqalepele, myapxbz mz nzngyatikr drtwrde nzatrkatingr Mangr-nzangiongr Yawe. ⁴⁶

⁴⁶ Mzli lcde, nigr badr Jiszs krlz-mopwzkr Kena, mztea ngr nzyrtzng mrkc tqale-pnz-ngrde lue kc tqlrtipxle waen. X kzdq ncblo kxrmailz mz gzpman mnc mz taon Kzpznizm. X mrlxde kxtopwz yagoctx zlwz mz ma nydze. ⁴⁷ Kx xlrle nzrkalz-krm Jiszs Judiz Provins mz nzvzdz-krde Kena, sc tqvzpem tqpipebzle mz Jiszs kx navzong ncdr Kzpznizm. Murde na-amrlzbzle mrlxde kc tqycpe pipz nzbz-krde. ⁴⁸ Rpibz Jiszs bade kx, "Trpnzng nrimu kx lxngitile ninge, a' krlc tqrlxngiti-ngrnamu nzmc-krmu rrx kcng tqalex." ⁴⁹ A' rpibz trte doa kc kx, "Kxetu, vz-anim, murde doa nenege ma tqbz." ⁵⁰ Zbz sc tqrpipebz Jiszs kx, "Vzpe ye ma nydze, mrlxm mrlzpe." Trte doa kc lxngitibzle natq Jiszs, x sc tqvzpe mz ma nydze.

⁵¹ Mz nourla, mzli kc tqvzobe-ngrbzle mz lrpzki, sc tqrmctipele kxnzawz-nrbalq nedeng. X nzrpibzlr kx, "Mrlxm tryagoxpeu, sc tqmnc-nrwxpengr." ⁵² X sc tqveatipebzle mzli kx mrlz ngr drtq mrlxde. Nzrpibzlr kx, "Nzyagox-krde dwaszle nide bz, mzli kc mz nabz nepi kc tqesz." ⁵³ X sc tqdcpxpe mz drtwr trte kx krlc nabz nepi tqrpi-ngrbz Jiszs bade kx, "Mrlxm mrlzpe." X sc tqlxngitipele kx Jiszs nide Kxnzmcpx. Mz nzmu-krde lcde, kx nzkrlztilrle, nidr badr lr ma nydze amrlx nzlxngitilr Jiszs.

⁴⁴ Jon 1:11; Matiu 13:57; Mak 6:4; Luk 4:24 ⁴⁵ Jon 2:23 ⁴⁶ Jon 2:1-11

⁵⁴ Krlc rkx krali mou kx ale Jiszs Gzlili. Da lc waile mzli kc tqyzlu-ngrmgr Judiz Provins.

5

Jiszs Amrlzle Kc Ncblo Mz Nqlvi R Kzdq Nabzde

¹ Mz nibr kzdung mzli, nigr badr Jiszs sc tqvzdzpe-moukr Jerusalem, murde ycpe pipz nzakaputr-ngrm kzdq Nzmulvngr kxetu, mz nzyrlwr-lxblr-krgr, nigr lr Jiu. ² Mz Jerusalem yc kc elr kzdq nabzde kx lrlz-ngrm lue, drtqde *Betesta* mz natq lr Jiu, x yc-aepztr mz kzdq naonrx kxetu ngr bz ngr mzteadau, drtqde *Naonrx Ngr Sip*. Mz nqlvi r nabzde lcde, tuo elr matelq pwx, x matelq kranzlvqn akipxle nabzde lc. ³ Matelq lcng nzyrbqpx-ngrm leplz kxnzyagoxng kxnzkqlung. Kzdung kx mztr kcba, kxnzvz-tengineng, x kx nrkrdrqdr bz. [Leplz lcng tzaenzlilr nzyclwzkr lue. ⁴ Murde kzdung mzli enjrl ne Gct nalvcom, x sc tqkapulzjem mz lue. Mzli kc tqyclwzng lue, kxyagox kznike krlzo-kaile lue, drtqde kc tqmrlzpe.] *

⁵ Kzdq ncblo yrbq mrlcde, kx yagoxtipele yiz nzpnu-tq-nrade-rtqmz (38) mz zyagox kx rblk nzvz-ani-krde. ⁶ Jiszs kx krlzmle nabzde lcde, sc tqmcpele ncblo kc. Kx krlztrpebzle kc nzboinepe-krm nzyagox-krde, sc tqrpipebz Jiszs bade kx, “?Suti drtwrm nzmrlz-mou-krm?” ⁷ Rpibzle kx, “Eu Kxetu, a' trpnzngr leplz kx naglqobzle ninge mzli kc tzyclwzng lue. Murde mzli kc nangrlaneo-ngrbo, ncblo kzble kc tqdwa-kirpxpe-ngrde ninge, tqvzope kai mz lue.” ⁸ Rpibz Jiszs bade kx, “Tulzm, glqlzm nqni mnrm x nim kc tqvzpeq.” ⁹ X mzli kcpwz drtq ncblo kc sc tqmrlzpe. Glqlzmle nqni mnrd x sc tqvzpe.

A' ncblo lc amrlz Jiszs mz Sabat. ¹⁰ X kxnzetu r lr Jiu, kx nzmclr ncblo lc, sc tqrpipebzle bade kx, “?Ei, nila tqaleq? ?Trkrlzwq nzngikr Sabat koma? Nzwnzng lue nqni mnrm apxngr Lou sc Mosis.” ¹¹ Rpibz ncblo kc badr kx, “Mrlx kc tqamrlzle ninge, pimle bange naglqlzmc nqni mnrnge, x navzx.” ¹² Nzrpi-mopwzlr kx, “?Neke rpibz bam nzglqlz-krm nqni mnrm x nim kc tqvzpeq?” ¹³ A' trkrlz-pnzleu drtqde. X trmcpeleu krkc tqamrlzle nide, murde Jiszs amrbrtr-lzbqpe mz zbo ngr leplz.

¹⁴ Mz nibrde, sc tqrmtipe mou Jiszs Mangr-nzangiongr, x tqrpipebzle bade kx, “Mzli ka mrlzpeq, a' bzkq rtrngzpebzme alwx, murde zyagox kxtrka zlwz ma tqdwati-mopwzle nim.” ¹⁵ Kx krlzle kc drtq Jiszs, sc tqvzpe, tqrpipebzle mz kxnzetu r lr Jiu kx, “Jiszs nide kc tqamrlzle ninge.” ¹⁶ X sc tzngyatipe drtwdr Jiszs, murde nzamrlz-krde ncblo kc mz Sabat. ¹⁷ Kx krlztipebz Jiszs nzngyatikr drtwdr nide, sc tqrpipebzle badr kx, “Trtenge tramau mz nzwz-krde, a' wz mz zbz kang kqlu. X vztr-kzpz mzbz ka kxmule-esz' ngi Sabat. X navz-nqblqpwo nide.” ¹⁸ Nzycmnekr Jiszs lc trka mz drtwr kxnzetu r lr Jiu. X nzrpilr nanibqlr nide, murde xpqbrr-ngrde lou ngr Sabat. X mou, rpile kx nide Mrlx Gct. X mz drtwdr, rtulrtr-lzbqpe nide, murde nzrsakrlr-krdr ncdr Gct. X delc tqatkitr-ngrde nznibqng nide.

Zmatq Kx Kabz Gct Mz Mrlxde Jiszs

¹⁹ X sc tqayzlupebz Jiszs mrkc tqpnz drtwdr, mz nzrpi-krbzle badr kx, “Da angidr lc napibo bamu. Ninge mrlx Gct. X trpnzngr da kx nartrngzti esz'-krnge. A' rtrngzbo da kx pwxlvtzpo mz Trtenge. Murde aletx-kzpo da kcpwz tqaleting Trtenge. ²⁰ Krlzx nzalengr da lcng murde Trtenge mrlztil nide. X aelwa-kz-ngrmle bange da amrlx kcng tqaletileng. X mz da

* ^{5:4} Kzdung nzryrkr Jon kcng pnz trnzyrlqtrpwzu mz ngalrde 3b-4. ^{11:10} Nzrlaszngr 20:8-10; 31:14-15; 35:2-3; Livae 16:29-31; 23:3; Lou Kcpwz 5:12-14

kx na-alex, sa na-aelwapx-mou-ngrbzle rkx kxkqlu kxmyapxbzng, murde nakctipxamu kalr. ²¹ Ninge Mrlx Gct rkabo nzlungr mz doa kznike suti drtwrnge, da kc tqwai Trtenga nzatulz-kr-mople leplz kxnzbzng, x rkabz nzlungr badr. ²² Murde trngiu Trtenga kc napile doa kx tubq o kx vz-rbr, da kc tqwai nzaotikr drtwrmu le. A' aprcpemle bange zmatq amrlx mz nzale-krnge da lc. ²³ Murde leplz amrlx na-amatqlr ninde da kc tqwai nzamatq-krdr Trtenga. A' krkcng tzpxtxpx-ngrdr nzamatq-krdr ninde kc tqatwzlr-ngrmle, trnzamatq-kzlu Trtenga.

²⁴ "Da angidrtx lc napibo bamu. Doa kx xlrle natqnge, x lxngitile Trtenga Gct, prtrpe mz nzlungr kxboi. X trpnzngr nzayrplapxngr nide. Murde sc tqprpxpem mz nzbzng x tqprtrpe mz nzlungr kxmrna. ²⁵ Mzli ka sc tqkrlzpebzle mzli kxmrna. Murde krkcng tzlxngitilr natqnge nzprtrpeng mz nzlungr kxmrna. ²⁶ Ninge nou nzlungr, da kc tqwai Trtenga nzngini-krde nou nzlungr. ²⁷ X ni-kznge Mrlx Leplz. Delc, tqaprc-kz-ngrmle bange zmatq ngr nzayrplapxngr leplz mz alwx ngrdr. ²⁸⁻²⁹ Bzkq kctipxamu da lcng tqpibo bamu. Murde mzli lc navztrp, leplz amrlx kcng tzbzng sa naxlrlr natqnge, x sa na-atulz-mopqng mz gq ldrng. Mzli lcde, krkcng tzale-pnzng da kxmrlz, sa na-atulz-mopqng mz nzlungr kxboi. A' krkcng tzaleng da kxtrka, sa na-atulz-kzpqng mz nzayrplapx-alokr Gct nide. *

³⁰ "Trna-ayrplapwxu leplz mz alwx ngrdr mz zmatq rnge, a' aletxpo da kcng tqpim Trtenga bange. X nzayzlu-krbo da mz leplz tubq x rsakrlrngr. Murde na-atutxtrpwo me pnz drtwr Gct, a' trngiu me pnz drtwrnge."

Jiszs Aelwapx-ngrde Kx Nide Mrlx Gct

³¹ Rpi-mopwz Jiszs kx, "Da kcng pwx nzaelwapx-ngrdr kx zmatq rnge vzpxm mz Gct. Nzmu nayapwxitxpwo ninde mz leplz, trnzlxngitilru natqnge.

³² "A' Jon Kxawrkxtr tqycmnetr-kai-ngrde ninde. X takitrde nzlxngitikrmu natqde, murde da kcng tqycmnetr-ngrde ninde da zpx. ³³ Murde mzli kc tqatwzlr-ngrbzmu ncblu nemu kcng bade, pi-kzpwzle da angidr lc badr. * ³⁴⁻³⁵ X Jon lc apule nzyzlrkr lam kc tqwou, mz nzaelwapx-krde nzalvztrngr angidr. X abrtzlvzamu nzalvztr-krdeng mzli kx mrcbcnepwz. X pipx-ngrbo nzycmne-krde bamu, murde nalxngitiamu x narmctiamu nzlungr kxmrna.

³⁶ "X nwzr-krngeng ngi da krali kx aelwapx-kz-ngrde kx zmatq rnge vzpxm mz Gct. Murde da kcng tqaletixng myaszpxle natq Jon. X delc trsuti drtwrnge leplz nztu-krmlr mz nibrnge mz nzymcne-krbzlr ninde. Murde nwzngi lcng tqkam Trtenga bange nzaelwapx-ngrdr kx atwzlr-ngrmle ninde.

³⁷ "X natq Trtenga ngi da kratq kc tqycmnetr-kz-ngrde ninde. A' trpnzngr nzxlr-krmu natqde x nzglx-krmu nide. * ³⁸ X trdcpxu mz drtwrmu natqde, murde trlxngitiwamu ninde kc tqatwzlr-ngrmle.

³⁹ "X Nzryrngrkxtr ngi da krapwx kc tqycmnetr-kz-ngrde ninde. Rlwz-zvzamu murde mz drtwrmu narmctiamu nzlungr kxboi mz nzvz-nqblk-krmule. Eu, a' Nzryrngrkxtr lcpwz dekc tqycmnetr-ngrde ninde. ⁴⁰ A' se tqpxtxpx-ngrnamu nzvz-krmamu bange, mz nzhka-krbo bamu nzlungr kxboi.

⁴¹ "Trkxneu mz drtqnge kx naglqpxamu ninde o trtingr. ⁴² Murde krlzpx nabzmu, kx trmrlztiwamu Gct. ⁴³ Kxmule-esz' vzmc mz zmatq ngr Trtenga, a' ptxpx-ngrnamu nzlxngiti-krmu ninde. A' lxngiti-aniamu

* 5:28-29 Daniel 12:2 * 5:33 Matiu 3:11-12; Mak 1:7-8; Luk 3:16-17; Jon 1:26-27, 29-34, 36 * 5:37 Matiu 3:17; Mak 1:11; Luk 3:22

leplz kcng tzvzmqng mz zmatq ngrdr esz'-krdr. ⁴⁴ Rblxbz bamu nzlxngiti-krmu ninge murde tr-rtangrtiwamuu nzglqpxkr Gct nimu. A' glqpx-lzbq-txpwzmu mz nimu esz'-krmu.

⁴⁵ "X trnningeuc kc narlwa-ngrbzle nimu mz da lcng mz mz Trteng. A' Mosis kc tqrpi drtwrmu kx navdz-ngrnamu Heven mz nzyrlq-krmu Lou scde, nide kc narlwa-ngrde nimu. ⁴⁶ Rlwangr Mosis nimu, murde nzmu nalxngitiamu natqde, nalxngiti-kzamu ninge. Murde ninge kc tqycmnetr-ngrde. ⁴⁷ A' mz trnzlxngiti-krmuu nzryrkr Mosis, rblx-kzpz bamu nzrxngitingr natqngeng."

6

Jiszs Apuleng Ncblo Siu-nzlvqn (5,000)

Matiu 14:13-21; Mak 6:30-44; Luk 9:10-17

¹ Mz nibr kzdung mzli, nigr badr Jiszs prtzkr mz bot scgr, x sc tqalilvcopekr mz nrlarde kc Dxbu Gzlili. (Kzdq kz drtq dxbu lc Taebirizs.) ²⁻⁴ Vzdzpekr badr mz kzdq nra x sc tqwxbuo-lxblrpekr me mnzpz' mz nzalvztr-krde nigr. Mzli lc ycpe pipz nzkaputr-krm nzyrlwr-lxblrkr lr Jiu, kc tzrpibz Nzamyangr. X leplz kxnzkqlung sc tzyrkr-nqblqpelr Jiszs, murde nzmcpe-krdr rkx ngr nzamrlz-krde leplz kxnzyagoxng.

⁵ Kx mc Jiszs leplz kcng nzvz-krmlr bade, sc tqrpipebzle mz Filip kx, "?Myx me naxpe-ngrgu dakxanzng kx natakitrde zbo ngr leplz lc?" ⁶ (Krlc tqkxmu nzycmne-krbz Jiszs lc, murde na-abzle Filip mz nzkrlzpe-krde nige nartrngztibzle.) ⁷ Rpibz Filip kx, "Nzmu naxpeku dakxanzng, trau kxkqlu ela natwz, kx takitrde na-atatr-ngrm mz zbo kxtrtqki-li (200). Kxmule-esz' da pipzne lxblr kz badr, a' nzmu trnzyrkrpx-kz-ngrdru." ⁸ Zbz kzdq nigr, drtqde Adru, mzle Saemon Pita, rpibzle mz Jiszs kx, ⁹ "Kzdq se doa ncblo kxtopwz mrlc twznede nade bret nzlvqn x nc kxtopwzne li. ?A' myx kxnamu nztakitr-krdr zbo ngr leplz lc?" ¹⁰ Mrkc tqmnco-ngrmgr lvcngr nabr, sc tqrpipem Jiszs bagr kx, "Pibzmu mz leplz nawxbuong." Zbz leplz kcng sc tzwxbuopeng. X me ycngr nzrlwxngr ncblo krlzbzle siu-nzlvqn (5,000), a' trnzrlwxtrpwzu olvz x doa kxnztopwzng. ¹¹ Jiszs kalzmle bret kcng, awitx-ngrbzle mz Gct, x sc tzakipebz mz leplz kcng tzwxbung. X waisr-kz-ngrde nc kcng. Nzmung amrlx ngrdr x nelzdr krlc, murde batrpz Gct nzkqlunepxkr dakxanzng kcng. ¹² Leplz amrlx nelzdr kx krlc-lxblrpele kc, sc tqrpipem Jiszs bagr kx, "Mikatiamu dakxanzng kcng tzmutrngr leplz lcng. Trmrlzu nwztx-krdr brmrda." ¹³ Ata-lxblrtikr x nulvzokr topla nzpnu-esz'-nrade-li (12) mz nctq bret kx yctxong mz nzmukr leplz lcng. ¹⁴ Kx nzmcldr rkx lc, leplz lcng sc tzrpipele kx, "Zpwxtx, krlc Profet kc tqpi Gct navzm mz nrlc." ¹⁵ X kx krlzti Jiszs kx leplz sa nartulrtrpzlr nzngini-krde king, sc tqvzdzpe mou mz nra esz'-krde.

Jiszs Vzneom Mz Lue Ngr Dxbu Gzlili

Matiu 14:22-33; Mak 6:45-52

¹⁶ Nrlc kx milzpqtrpzle kc, sc tqvzopekr esz'-krgr mz Dxbu Gzlili. ¹⁷ Prtzkr mz bot scgr, sc tqalilvcipekr mz nrlar dxbu kc, murde nakrlzbzkr taon Kzpznizm. Alilvckr, alilvckr x nrlc kc tqbqtxtrpe. A' Jiszs trkrlzkaple nigr. ¹⁸ Zbz nenq kc tqwqpe, x dcpwe kxtrka kc tqprtzpem. X sc tqavzopekr nqni scgr, murde nayapekr. ¹⁹ Sc tqyapekr, tqyapekr, x kx krlzpebzkr kc me tavau, sc tqmcpekr nzvz-krm kzdq ncblo mz lue. X kx esonetrple kc, sc tqmwxlr-zlwzpe-ngrgr nide. ²⁰ A' krlc Jiszs. X rpimle bagr kx, "Ninge lc!"

¹⁴ 6:14 Jon 1:21

Bzkq mwxlramu!” ²¹ X sc tqabrtzlvzpekr, sc tqaprtzpekr nide mz bot. Zbz pwrkilvc-ngrgr, murde sc tqkrlz pemgr mepz mz taon kc na-alilvckitrkr.

Jiszs Nide Dakxnzng Ngr Nzlungr

²²⁻²³ Nrlc kxngrlxobzle, zbo ngr leplz kcng tzyrlwrpe-moung mz nrlar dxbu. Kzdung bot ngr taon kxetu Taebirizs, sc tzwda-aepztrpqng mrkc tzmu-ngrdr. X sc tzaenzli-moulr Jiszs, murde nzkrlzlr kx alilvco-lxblrmgr badr bq. X amnctxkr Jiszs x sc tqyzluopekr mz bot Kzpznizm. ²⁴ X mzli kc tzkrlzpe-ngrdr trnzmcpe-kru Jiszs, x wai-kzle nigr ncblo nedeng, sc tzprtzpeng mz bot kcng, x sc tzalilvcopeng Kzpznizm, tzrtangrtipelr nide. ²⁵ Kx nzkrlzobzlr kc Kzpznizm mz nrlar dxbu kc, sc tzrmctipelr Jiszs, x nzrpibzlr bade kx, “?Ei, Kxakrlz, myx kxmu nzvz-krme mrka?”

²⁶ X sc tqalvztrpeng Jiszs mz mangr-nzkrka'ngr. Rpibzle badr kx, “Da angidrtx lc napibo bamu. Kc tqrtangrti-ngrnamu ninge ye, murde nzmu-krmu x drtwrmu esatpx. A' trvz-ngrpwa'muu murde krlzamu drtwr ngr rrx kc tqaelwapx-ngrbo bamu. ²⁷ Bzkq aotxtrpwz drtwrmu nzwz-kato-krmu mz nrlc ka mz nzrtwz-krmamu dakxnzng kx namibi. A' na-aoti drtwrmu nzwz-kato-krmu, mz nzrmcti-krmu dakxnzng kc narkabz bamu nzlungr kxboi. Dakxnzng lc nide kc nakabo bamu. Murde Gct aelwapx-angidr-ngrde kx aprcpemle zmatq ngrde bange.” ²⁸ Zbz, sc tzveapebzng bade, nzrpibzlr kx, “?Nike nartrngztibzkr mz nzale-krgr nzwzkr Gct?” ²⁹ Rpibz Jiszs badr kx, “Nzwzng kx suti drtwr Gct nartrngztibzmu nide sele. Lxngitiamu ninge kc tqatwzlr-ngrmle.” ³⁰ A' nzrpibzlr kx, “?Rkx kzniike na-aelwapx-ngrme bagr murde nalxngitikr kx vzpxme mz Gct? ³¹ ?Myx kxmule? ?Krlzq nzalengr rrx kcng tqale Mosis mzli kc melrmqgung tzmcn-ngrdr lzke, x nzmung dakxnzng kc tzrpibz *mand?* Murde Nzryrngrkxtr rpile kx, ‘Gct rkaom dakxnzng Heven kx nangqdr.’” ³² Rpibz Jiszs kx, “Da angidrtx lc napibo bamu. Dakxnzng kc tqkabz Trtene ngi dakxnzng angidr kx vzom Heven. A' trngiu dakxnzng lc tqkabz Mosis. ³³ Murde dakxnzng angidr kc tqkapx Gct, tqvzom Heven mz nzrka-krbz nzlungr mz lr nrlc.” ³⁴ Nzrpibzlr kx, “Kxetu, ka-zvzm bagr dakxnzng lc.”

³⁵ Rpibz Jiszs badr kx, “Ninge dakxnzng ngr nzlungr. Doa kx vzm x lxngitile ninge trtxpengr nzbrtale-krde x nzbrlxkzkr drtwrde. Murde rkabo nzlungr kxmrna mz nabz leplz. ³⁶ Kxmule-esz' mcpeamu mzke' a' trtxpnzngr nzlxngiti-krmu kx vzpxmc mz Gct. ³⁷ Leplz amrlx kcng tqamnqtrp Trtene bange, sa navzmqng bange. X krkcng tzvzmqng bange trtxpnzngr nzmaszlrpx-krngeleng. A' sa na-abrtzlvzx nidr. ³⁸ Murde vzo-ngrmc Heven mz nzale-krnge me pnz drtwr Trtene, a' trngiu da kx vzpxm mz drtwrnge esz'-krnge. ³⁹ X me pnz drtwr Trtene nide sele. Leplz kcng tqamnqtrple bange, trtxpnzngr nidr kx namrbrpxm. A' na-aclve-zpwxx nidr x na-atulz-mopwc'ng mz Mzli Kxmatq kc navzm. ⁴⁰ Dazpwxtx, Trtene suti drtwrde kx krkcng amrlx tzlxngitilr ninge narmctilr nzlungr kxboi, x na-atulz-mopwc'ng mz Mzli lc Tqmatq.”

Kxnzetu R Lr Jiu Nzrpwa'-ngrdr Jiszs

⁴¹ Kx nxzrlbz kxnzetu r lr Jiu nzycmne-krde lc, drtwrdr sc tqlcpe. Murde rpi Jiszs kx, “Ninge dakxnzng kc tqvzom Heven.” ⁴² X sc tzrpipelr kx, “Jiszs xke, Mrlx Josip. X krlz-angidrku trtede x lxede. ?A' nike tqrpi-ngrde kx, ‘Vzomc Heven?’” ⁴³ Rpibz Jiszs badr kx, “Bzkq drtwrmu lctrp mz natqngc lcng. ⁴⁴ Trpnzngr kx navztxnem bange, a' ngi txpwz kx vectrp Trtene. X leplz kxnzmullr lcng, sa na-atulz-mopwc'ng mz Mzli Kxmatq lc. ⁴⁵ Mzli

[☆] **6:31** Nzrlaszngr 16:4, 15; Sam 78:24

kc bqnc, leplz kcng tzvzmqng mz Gct, kxmu nzyrkr profet le nide sele. Nzrpilr kx, ‘Gct sa na-alvztrle leplz amrlx.’ ⁴⁵ X mzli ka, krkcng naxlrlr nzalvztrkr Trtenge x nzlxngitilr nide, sa navzmqng bange. ⁴⁶ Mz nzalvztrkr Gct leplz, trngiu drtwr ngrde kx leplz nzmcpelr Gct mz mztr. Trtingr, a' nginitxpo kx vzpxm bade x mc-txpwzle nide. ⁴⁷ Da angidrtx lc napibo bamu. Doa kx lxngitile ninge, rmctile nzlungr kxboi. ⁴⁸ Ninge dakxnzng ngr nzlungr. ⁴⁹ Mzli kc bqnc, melrmqgung tzmnc-ngrdr lzke, nzmung mana. X kxmule-esz' nzmung mana kc tqvzom wq, a' nzbzngr sa tqvz zvz. ⁵⁰ A' mzli ka, dakxnzng angidr kc tqvzom Heven blepxngr. Murde doa kx namu dakxnzng lcde, trtxpnzngr nzbz-krde. ⁵¹ X ninge dakxnzng kxlu, kc tqvzom Heven. Doa kx ngqde dakxnzng lc, sa nalu-zvzpe. Murde dakxnzng lc ngi ncvrnge, x rlrpx-lzbq-ngrne mz nzalu-krnge lr nrlc.”

⁵² X lr Jiu kcng drtwrdr kc tqtrkape. X sc tzrpipelr kx, “?Myx kxnamu, nzka-krm mrlx lc ncvr drtqde mz nzngq-krgule?” ⁵³ Zbz sc tqrpipebz Jiszs badr kx, “Da angidrtx lc napibo bamu. Ninge MrIx Leplz. Nzmu trnangqwamuu ncvrnge x trnamnqwamuu mepyr rnge, trtxpnzngr nzlungr kxboi x sa na-atulz-mopwc' mz Mzli Kxmatq kc navzm. ⁵⁵ X sa nalu-mou, murde ncvr drtqnge ngi dakxnzng angidr, x mepyr rnge ngi da kx nzmng angidr. ⁵⁶ X doa kx ngqde ncvrnge x mnqle mepyr rnge, mncpxm bange x mncppebo bade. ⁵⁷ Trtenge kc tqatwzlr-ngrmle ninge, nide nou nzlungr. X ni-kzng nzlungr, murde vzpxmc bade. Mz nzmu-krde lcde, doa kx ngqde ncvr drtqnge, sa nalu murde ninge nzlungr.

⁵⁸ “Napi-mopwc' bamu kx ncvrnge ngi dakxnzng kx vzom Heven. Dakxnzng lc trapuleu mana kc tzngq melrmqgung lzke, x nzbzngr sa tqvz zvz. A' doa kx namu dakxnzng angidr lc, rmctile nzlungr kxboi.” ⁵⁹ Nzalvztrkr Jiszs lc, ycmne mz mangr-nzkrka'ngr mrkc Kzpznizm.

Leplz Nzkqlung Nzvecpx-lzbqmqng Mz Jiszs

⁶⁰ Kx nxzlr leplz kxnvvz-nqblqlr nide nzycmne-krde lc, sc tzrpipelr kx, “Nzalvztrngr lc rblxm bagu. ?Myx kxnamu nzkrlz-krgu natq lcng?” ⁶¹ Krlzpe Jiszs kx drtwrdr lctrpz mz nzalvztrngr lc. X sc tqrpipebz kx, “? Myx kxmule, natqnge lcng nzataolr nimu mz nzlxngiti-krmu ninge? ⁶² ? X nzmu namcamu ninge, nzyzlulz-krnge Heven mrkc tqrkakilzmc, mzli kc tqvzo-ngrmc? ?Nike napnz drtwrmu mzli lcde? ⁶³ Murde natq kcng tqpibo bamu, nidr keng tqrkabz nzlungr kc tqvzpxm mz Mqngrkxtr mz nabzmu. A' zmatq ngr leplz trtakitrde nzokatrngr nimu. ⁶⁴⁻⁶⁵ A' kzdung nimu trnzlxngiti-angidrlru natqnge. Delc tqrpi-pnz-ngrbo bamu kx, ‘Trpnzngr doa kx navztxnem bange, a' ngi txpwz kx rlr-ngrm x kam Trtenge.’” Jiszs kc tqkxmu nzycmne-krde lc, murde krlz-pnz-kaile mz nzabzokr nwz-wz-krde, doa kx na-amwale nide x krkcng trnalxngitilru nide. ⁶⁶ Mzli lcde, leplz nzkqlung kx nzvecpx-lzbqpeng mz nzvz-nqblq-krdr nide.

Ncblo Neng Jiszs Tzvz-nqblq-zvzpelr Nide

⁶⁷ Sc tqrpipe-kzp Jiszs bagr, nigr ncblo kcng nzpnu-esz'-nrade-li (12) kx, “?Myx kxmule mz nimu, suti kz drtwrmu nzrlasz-krmu ninge?” ⁶⁸ A' rpibz Saemon Pita bade kx, “?Kxetu Lod, ncblo kznike navz-nqblq-moukr? Murde nim me vzkipxm natq ngr nzlungr. ⁶⁹ X mzli ka lxngiti-angidrpekr kx nim Ncblo Kxtr kc esz'txu, tqatwzlr-ngrm Gct.” ⁷⁰ Rpim Jiszs bagr kx, “Kxmule-esz' mcpxx nimu mz nzmnctr-krmamu bange, a' kzdq nimu ngi

kxnzawz ne Setzn.” ⁷¹ Krlc tqycmnetr-ngrde Judzs, mrlx Saemon Iskariot, kc na-amwale nide.

7

Mzle Jiszs Trnzlxngitilru Nide

¹ Mz nibr kzdung mzli, nigr badr Jiszs sc tqoklatipekr mztea ngr Gzlili Provins. Trsutiu drtwrde nzvz-krde Judiz Provins, murde kxnzetu r lr Jiu nzrpilr nanibqlr nide. ² Mzli lc nzyrlwr-lxblrngr kc tzrpibz Matelq ycpe pipz nzkaputr-krmle. ^{*}

³ Zbz mzle Jiszs sc tzrpipebzlr bade kx, “Rlasz mrka x vvdz Judiz, murde leplz nemqng namc-kzpplr rrx kcng tqaewapx-ngrn. ⁴ Nzmu kx tqsuti drtwrm nzamatqngr nim, bzkq ale-kapqq rrx kcng tqaleq, a' aelwapxngr mzlilxlr, murde nakrlzti lr nrlc amrlx.” ⁵ Krlc tqkxmu nzycmne-krdr lc, murde trnzlxngitikalr nide.

⁶ Sc tqrpipebz Jiszs badr kx, “Mzli r nzvz-krnge mrla trkrlzkapzle. A' nimu mzli kx yctxp, sa tqatkitrde nimu. ⁷ Lr nrlc trnzsutiu drtwrdr nzatrkti-krdr nimu, a' suti drtwrdr nzatrkti-krdr ninge, murde nzpi-zvz-krbo badr kx nqmq krdrng trka. ⁸ Vvdzamu esz'-krmu mz nzyrlwrngr lc, a' namnctxpwo murde mzli r nzvzdz-krnge mrla trkrlzkapzle.” ⁹ Natq lcng pibz Jiszs badr, x sc tqmnctxpepwz Gzlili.

Jiszs Alvztr-ngrde Lou Ngr Sabat

¹⁰ Mz nibr nzvzdzkr mzledeng Jerusalem, nigr badr Jiszs sc tqvzdz-kapqpebzkr. X traewapx-lzbq-ngrpzu me nzyrlwrpx-lxblrngr, murde trsutika drtwrde nzrkratzingr nzvzdz-kz-krmle. ¹¹ Zbz kxnzetu r lr Jiu sc tzrtangrtipelr nide. X tzrpilr kx, “?Myxpe Jiszs?” ¹² Leplz nzqqlung kx nzycmne-awang mz zbo ngr leplz kc. Kzdung nzrpilr kx, “Nide ncblo kxmrlz.” A' kzdu-kzng nzrpilr kx, “E trtingr! Murde mrlx la rmailz-rbr leplz kxnzqqlung.” ¹³ Nzpi-awa-krdr lc Jiszs trnzplzpxlru, murde nzmwxltilr kxnzetu rgr.

¹⁴ Kx krlzbzle kc vau r wiki lc, Jiszs vztr Mangr-nzangiongr sc tqalvztrpe elr. ¹⁵ Kx nxzlrbz kxnzetu r lr Jiu nzalvztr-krde nzkctitpxl, sc tzrpipelr kx, “Mrlx lc trsikluneu mz Lou scgu. ?A' myx me twzklme da lcng tqipixleng?”

¹⁶ Rpibz Jiszs badr kx, “Da lcng tqalvztr-ngrne trnzvzdzpqngqu mz drtwrnge. A' da lcng aelwa-ngrm Gct, kc tqatwzlr-ngrmle ninge. ¹⁷ Doa kx nartrngzbz me pnz drtwrde, sa nakrlzle kx nzalvztr-krnge vz-nqblq-zvzle me pnz drtwr Gct. ¹⁸ Murde doa kx ycmnetr-ngrde zmatq ngrde esz'-krde, suti drtwrde nzangiongr nide. A' doa kx yc mz drtwrde nzangiokr leplz Kxetu rde, ncblo kxmule lcde tubq x trpokiau. ¹⁹ Mosis rkabz bamu Loukxtr. A' trpnzng nimi kx rvz-nqblq zvz natqdeng. X mz drtwrmu rpiamu kx xpqbrllr-ngrne Lou ngr Sabat. ?E delc tqrpri-ngrnamu nanibq-ngrnamu ninge?”

²⁰ Nzrpibzlr leplz kx, “Eke, drka' la tqmncpxm bam. ?Neke rpile nanibqle nim?” ²¹⁻²³ Rpibz Jiszs mz kxnzetu r lr Jiu kx, “Kzdq mzli wzx mz Sabat mz nzamrlz-krnge ncblo. A' yrkelvzamu ninge. A' nimu wz-kzamu mz Sabat mzli kznikeng vz-nqblq-ngrnamu Lou sc Mosis, mz nzrpakrngr doa ncblo. (A' lou lc vz-pnz-kaip x lou sc Mosis kc ate.) Murde nzmu zbq ngr

* ^{7:2} Livae 23:34; Lou Kcpwz 16:13 * ^{7:2} Mz nzyrlwr-lxblrngr lc mz Septembz o Oktobz, lr Jiu adcpz mz drtwrdr mzli kc melrmqdrng tzmncngr mz matelq x tent mrkc lzke badr Mosis. Kxmule-esz' nzrningydr ma, a' nzmncpxmqng mz matelq mz zbq rlimz. X mz zbq lcdeng nzrtwztrng lue x nzawoung kadol Mangr-nzangiongr Yawe. Murde yc mz drtwrdr nzrka-krbz Gct mqdr lue, x nzmailz-krde nidr mz nyr mrkc lzke.

nzrpakrngr kx tqtaole mz Sabat, sc tqrtrngztipecbzmu nzrpakrngr. X da lc tubq mz drtwrgu. ?A' memule tqngyatingr drtwrmu ninge, mz nzamrlz-atwrnr-krnge ncblo mz Sabat? ²⁴ Bzkq obqti-txpwzmu da kx yctrpz yz, a' nzaolvz-krmu da natutr mz da kxtubq.”

Me Vzkin Kxnzmcpk

²⁵ Kzdung lr Jerusalem nzrpilr kx, “Mwx ncblo lc tzpi kxnzetung kx nanibqlr. ²⁶ Rlr! A' se tqycmnetxppebz mz mz leplz kxnzkqlung x trpnzngr nidr kx ayzlubzle natqde. ?Myx kxmule, nzkriztrpebz kxnzeti rgung kx ni-angidrpede Kxnzmcpk? ²⁷ A' trtingr. Murde krlzku kx mzli kc navz-ngrm Kxnzmcpk trpnzngr kx narkrlz me navzkip. A' mrlx lc krlzku mztea nyzde, dekc trnangini-ngrdeu Kxnzmcpk.” Krlc tqkxmu nzycmne-krdr lc, murde mz drtwrdr nzrpilr kx Jiszs mzte nzmc mztea Naszret. ²⁸ A' trnzkrizlru kx mzte nzmc Betleem, mztea nyz Kxnzmcpk, mz nzatutr-krde natq profet kcng bqnc. ²⁹ Mz nzmu-krde lcde, mz nzalvztrkr Jiszs kc Mangr-nzangiongr, nate plxtpxle mz nzsri-krde kx, “Rpiamu kx krlzamu ninge x me vzkimc. A' trkrlzwamu me vzkimc. Murde trvz-lzbqpwc'u, a' atwzlr-ngrmle ninge Gct angidr. X trkrlz-kzwamu nide. ³⁰ A' ninge kx rkrlz angidr nide, murde vzpxmc bade x atwzlr-ngrmle ninge.”

³⁰ Kzdung leplz kx nzxrbzlr nzycmne-krde lc, sc tzrpipelr nalolvzpelr murde rpile kx vzpxm mz Gct. A' trpnzngr kx kabzle mqde, murde trkrlzkapzle mzli r nzrnbqng nide. ³¹ A' leplz kcng tzlxngitilr nide, sc tzrpipelr kx, “Mwx, nide Kxnzmcpk kc tzpi navzm. Murde ale rrx kxkqlu.”

³² Kx nzxlr kzdung Farzsi nzpi-awa-krdrle, sc tzaveatipelr kzdung pulis ngr Mangr-nzangiongr nzlolvz-krdr nide. ³³ A' mzli kc tzkaputr-ngrbz pulis lcdeng, nzlalztqbzng bade. X sc tqrpipebz Jiszs mz leplz lcn amrlx kx, “Mzli r nzmc-krbo bamu trboipeu x ninge kc tqyzlupe-mopwc' mz Gct kc tqatwzlr-ngrmle ninge. ³⁴ Mzli lcde, sa nartangrtiamu ninge, a' trnamcwamu ninge. X trtxpnzngr nzvz-krbzmu mrkc namnc-ngrne.”

³⁵ Sc tzrpipe kxnzeti r lr Jiu kx, “?Mrlx lc navzkile drlve kc tqrpi-ngrde trpnzngr nzmc-krgu nide? ?Myx kxmule, navz mz kzdung kz nrlarnrlc kcng tqacuve kz King r Rom? ?X na-alvztrle lr Jiu kcng tzmcnng mrlcdeng x lr mrlcde kcng tzmcn-mrbrng? ³⁶ Rpile kx sa nartangrtiku, a' trpnzngr nzmc-krgu nide. X trpnzngr nzkriz-krbzku mrkc namnc-ngrde. ?Nike tqkxmu nzycmne-krde ke?”

Jiszs Rka Lue Ngr Nzlungr

³⁷ Mz milzpq ngr zbq krartqmz ngr Matelq, Jiszs tulzm Mangr-nzangiongr Yawe, sc tqetumipe natqde nzrpi-krde kx, “Doa kx drtwrde brlxkz navzm bange, murde narmnq lue ngr nzlungr kxmrna.” †

³⁸ “Murde kxnzxngitilr ninge sa na-atutrlr Nzryrngrkxtr kc tqrpile kx, ‘Lue ngr nzlungr sa nangqtr-zvzbz mz nabz leplz.’” ³⁹ Lue ngr nzlungr lc, tqycmnetrngr Jiszs ngi Mqngrkxtr, kc nakabz mz leplz kcng nalxngitilr nide. A' mzli lc tqycmne-ngrde, Mqngrkxtr trvztrkapz mz nabz leplz. Murde Jiszs trnzglqlzka.

⁴⁰ Kzdung leplz kx nzxrbzlr nzycmnekr Jiszs, sc tzrpipelr kx, “Mrlx lc ni-angidrde profet kc tqaenzliku, tqapule Mosis.” ⁴¹⁻⁴² X kzdung nzrpilr

* 7:21-23 Jon 5:1-9; Nou 17:10-13; Livae 12:3 * 7:28 Maekz 5:2 † 7:37 Mz zbq krartqmz lc, lr Jiu nzyzlpeng ma nyzdr, mz nzyckr drtwrdr nzprtr-krdr drtc' kc tqesalz-ngrbz Gct badr, tzrpi-ngrbz Kenzn. A' trnzrtwztrung lue x trnzawou-kzung kadol Mangr-nzangiongr. Krlc zbq kx myapxbz x nzyrlwrngr kx ngi Matelq kc tqyrkrpxpe mz milzpq ngr zbq lc. [Livae 23:36] * 7:38 Asaea 44:3; 55:1; Esikel 47:1-9; Sekaraea 14:8

kx, "Eu, mrlx lc nide angidr Kxnzmcpx ne Gct." A' kzdu-kzng nzrpilr kx, "Trtingr, Kxnzmcpx nzmu trvzpxpuu Gzlili. Murde Nzryrngrkxtr rpile Kxnzmcpx navzpxm mz nqvi lr Devet x mzte namc Betleem, taon nyzde." ⁴³ Kc tqmu nzycmne-krdr lc, murde trnzkrlzlr kx Jiszs mzte nzmc Betleem, a' nzrpilr kx mzte nzmc Gzlili Provins. ⁴³ Zbz drtwrdr kc tresz'tipeu. ⁴⁴ Kzdung nzrpilr nalolvzlr nide, a' trpnzngr kx kabzle mqde.

Kxnzetu R Lr Jiu Nzpxtpx-ngrdr Jiszs

⁴⁵ Zbz pulis ngr Mangr-nzangiongr sc tzyzlupebzng esz'-krdr. X kxnzetu rdr kcng tzatzwzlr-ngrdr nidr mz nzolvz-krdr Jiszs, sc tzrpipebzlr badr kx, "?Memule tqvz-ngrmamu esz'-krmu?" ⁴⁶ A' mz nzmrlzkr badr natq Jiszs, nzrpibzlr kx, "Trgalr ncblo kx myaszpxle nzycmne-krde." ⁴⁷ Nzrpip-mopwz Farzsi kx, "?Memule, angqngupe-kzle nimu x sc tqlxngitipe-kzamu nide? ⁴⁸ ?Xlrpe-kzamu dq ena nigr kx lxngitile mrlx lc? ⁴⁹ Trtingr. A' leplz lcng trnzkrlzlr Lou scgu. X sa na-ayrplapx Gct leplz lcng."

⁵⁰⁻⁵¹ Zbz Nikodimzs, kc tqvzbz mz Jiszs mzli kc ena, rpibzle mz Farzsi kztedeng kx, "Mz nzvz-nqblq-angidr-krde Lou scgu, trtakitrpleu nzpi-krgu kx ncblo vz-rbr, a' nalalztq-kaipzku mz nzycmne-krde." ⁵² Zbz kxnzetu kcng sc tzngyatipe drtwrdr nide. Nzrpibzlr bade kx, "?Memule, ni-kzp lr Gzlili? Na-aoti drtwrm Nzryrngrkxtr, murde rpile kx trpnzngr profet kx naprpxm Gzlili." ‡

Olvz Kx Rmwimi Ncblo Kzble

⁵³ Kx yrkrpxbz nzycmnekr Farzsi lc, sc tzaki-lzbqpeng, tzyzlupeng mz ma nyzdr.

8

¹ A' Jiszs rkalzm Mangr-nzangiongr, x sc tqvzdzpekr badr mz Newz ngr Nc Olivi mz nzmwingr. ² Zbz mzli kc mz nourla mz zbg krartqmz ngr Matelq, Jiszs yzlu mou Mangr-nzangiongr. Kx nzmc leplz nide, sc tzyrkrpe-mopwzng bade. X Jiszs wxbutxo x sc tqalvztrpele nidr.

³ Mzli lc krkcng tzalvztrng mz Lou sc Mosis x kzdung Farzsi nzvzmibzlr mz Jiszs kc kzdq olvz. Olvz lc yrlz a' rmwimi ncblo kzble. ⁴ Zbz sc tzrpipebzlr mz Jiszs kx, "Kxakrlz, olvz lc yrlz, a' nzmc nzmwimi-krde kzdq ncblo kzble. ⁵ Mz Lou scgu, Mosis kapxle natq kx olvz kxmule lc navaebq mz rplz. ?A' myx kxmu nzaotikr drtwrm le?" ⁶ Krlc tzycmne-ngrbzlr lc bade nzrpilr na-atalzlr nide. Murde nzmu narpibz Jiszs kx navaebqlr olvz kc, xpqbrr-ngrde lou sc gzpmn ngr Rom. X nzmu narpibzle kx bzkq nzvaebqlr olvz kc, xpqbrr-ngrde Lou sc Mosis. Mz nzmu-krde lcde, myx me ayzlukibz Jiszs le, nzkrlzlr nzrlwangr nide mz lou kx xpqbrr-ngrde.

A' Jiszs sc tqyrngzope mz drtc' tqyryrpe mz nratoki r mqde. ⁷ A' mzli kc tzvea-zvz-ngrbzlr bade, Jiszs yrngzlm, sc tqrpipebzle badr kx, "Mrlz, a' doa kx trpnzngr alwx ngrde kxesz', nide kc navaebq-kaile olvz lc mz rplz."

⁸ Zbz, yrngzo mou x ryr mou mz drtc'.

⁹ X kx nxzrbz kxnzalvztrng mz Lou sc Mosis x Farzsi kcng nzycmne-krde, drtwrdr trmrlzu. X sc tzwapxpeng amrlx ngrdr yz, yzuo mz lrtzlvz nzdwapx-krdr, vz vz nzyrkrtpxng. Murde nzkrlzlr kx nidr amrlx ngrdr nzaleng alwx. Zbz Jiszs ncdr olvz kc tzvzmiml, nzmc-txpwzng mz mzlr zbo ngr leplz lcng. ¹⁰ Jiszs yrngzlm, sc tqrpipebzle bade kx, "?Myxpe

⁴¹⁻⁴² 2 Samwel 7:12; Sam 89:4; Maekz 5:2 ⁴³⁻⁵¹ Jon 3:1-2 ⁵² Kzdung nzryrkr Jon kcng pnz trnzyrlqtrpwzu mz ngalrdeng 7:53—8:11. ^{8:5} Livae 20:10; Lou Kcpwz 22:22-24

leplz kcng tzvzmimlr nim? ?Mncbe dq kx na-ayrplapxle nim?” ¹¹ Ayzlungrbz olvz kc natqde kx, “Kxetu, trpengr kx mnc.” X rpi-mopwz Jiszs kx, “X ninge, trna-ayrplapx-kzwxu nim. A' vzpe x bzkq alepeq alwx.”

Jiszs Nide Zyzlr Ngr Lr Nrlc

¹² Jiszs rpi-mopwzle mz leplz kcng tzmnncng Mangr-nzangiongr lc kx, “Ninge zyzlr ngr lr nrlc. Doa kx vz-nqblqmle ninge tralepeu alwx, a' sa nalxngitile da angidr mz nzrmcti-krde nzlungr kxmrna.” ¹³ A' nzrpibz Farzsi bade kx, “Rblxbz mz leplz nzlxngiti-krdr natqm. Murde da amrlx kcng tqipixq ycmnetrnx-ngrpwzme nim esz'-krm, x trnzkrlzlu kx da zpxw lc tqpiq o trtingr.” ^{*}

¹⁴ Rpi-mopwz Jiszs kx, “Kxmule-esz' ycmnetr-ngrne ninge esz'-krnge, a' da lcng tqpixng da angidr. Murde, krlzx mrkc tqvzkimc x mrkc navzkix. A' trkrlzwamu mrkc tqvzkimc x mrkc navzkix. ¹⁵ Aolvzamu leplz mz nzvz-nqblq-krde drtwr ncblo. A' traolvzwxu leplz mz nzvz-nqblq-krde drtwr lc.

¹⁶ A' nzayzlu-krbo da mz leplz tubq-esz'ngr. Murde trpipxwxu esz'-krnge, a' nigr ncdr Trtenge kc tqatwzlr-ngrmle ninge. ¹⁷ Lou scmu rpile kx, ‘Nzmu ncblo kxzling kx drtwrdr esz'ti, nalxngitiku natqdr.’ ¹⁸ Rpix kx natqnge da angidrung. X Trtenge kc tqtu-kzp mz nibrnge, rpi-kzle kx natqnge ngi da angidr kz. Mz nzmu-krde lcde, takitrde nzrlxngitingr natqgrng.”

¹⁹ Nzrpibzlr kx, “?Myx Trtem kc tqpiq?” Rpibzle kx, “Trkrlzwamu Trtenge murde trkrlz-kzwamu ninge. Nzmu nakrlzamu ninge, krlz-kzamu Trtenge.” ²⁰ Jiszs pile natq lcng mz nzalvztr-krde mz Mangr-nzangiongr, mrkc mz bokis kc tzyrlqongr trau. A' trpnzngr kx rlolvz nide, murde trkrlzkapzle mzli r nzrnibqng nide.

Trpnzngr Farzsi Kxnavz Mrkc Navzki Jiszs

²¹ Rpi-mopwz Jiszs mz Farzsi kcng kx, “Ninge lc navzpx. X sa nartangrtiamu ninge, a' trtxpnzngr nzvz-krmamu mrkc navzkix. Murde mzli kc nabz-ngrnamu, alwx ngrmu trnaipqpwpwu Trtenge.” ²² Sc tzrpipe kxnzetu r lr Jiu kx, “Rpile kx trpnzngr nzvz-krbzku mrkc navzkile. ?Myx kxmule, na-abz-lzbq?” ²³ Rpibz Jiszs kx, “Nimu lr nrlc, a' ninge lr Heven. ²⁴ Delc tqrpi-ngrbo bamu kx sa nabz-ngrnamu alwx ngrmung. Murde nzmu Trtenge naipqle nimu, nalxngitiamu kx Ninge Ningep, kc tqatwzlr-ngrmle.” *

²⁵ X sc tzrpipebzlr bade kx, “?Nim angidr ncblo kznike?” Rpibz Jiszs kx, “Nzwrde kqlupe nzpi-krbole bamu. ²⁶ X kxmule-esz' krlzx nzpi-krbo bamu da kxkqlu, x krlz-kzx nzpi-krbo nzvz-rbr-krmung kxkqlu, a' pitxpo nike pim Trtenge kc tqatwzlr-ngrmle ninge. X nide da angidr.” ²⁷ Jiszs ycmnetr-ngrde Trtede Gct, a' tryrplatirpwzu nardr. ²⁸ Sc tqrpipebzle badr kx, “Mz nibr nzadolz-krmu ninge, Mrlx Leplz, sc tqkrlz-ateamu kx Ninge Ningep. Murde trvz-nqblqwxu me pnz drtwrnx esz'-krnge, a' pitxpwo nike alvztrp Trtenge bange. ²⁹ Trtenge kc tqatwzlr-ngrmle ninge, sc tqmncm bange. Trrlaszleu ninge murde rtrngz-zvzbo da kx aelalzmle drtwrde.” ³⁰ Mzli lc leplz nzkqlung kx nzlxngitilr Jiszs, mz nxzlr-krbzlr natqdeng.

Jiszs X Ebraam

* ^{8:12} Asaea 9:2; Matiu 5:14; Jon 9:5 * ^{8:13} Jon 5:31 * ^{8:17} Lou Kcpwz 17:6; 19:15; Matiu 18:16

* ^{8:24} Ninge Ningep drtwr ngrde kx Jiszs nide Gct. Murde Gct ycmnetr-ngrde nide esz'-krde mz natq lcng mzli kc tzryapwx-ngrdr ncdr Mosis. Mc Nzrlaszng 3:14.

³¹⁻³² Sc tqrpipebz Jiszs mz lr Jiu kxnzlxngitilr nide kx, “Mz nzyrlq-angidr-krmu natqnge, aelwapx-ngrde kx nimu leplz nengeng. Delc nakrlz-zpxwz-ngrnamu da angidr, x da angidr lcde sa na-aopxbzle drtqmu.” ³³ Kx nzxlrblzlr nzycmne-krde, sc tzrpipelr kx, “Ei, nigr nqvi lr Ebraam, x trgalr leplz kx awz-nrbalqle nigr, x drtqgr opxpe. ?A' nike tqrpi-ngrn kx drtqgr sa na-aopx?” ³⁴

³⁴ Rpi-mopwz Jiszs badr kx, “Da angidrtx lc napibo bamu. Pe-amqngi alwx leplz amrlx kcng nzaleng alwx. X trpnzngr scdr zmatq kx na-aopx-ngrdr drtqdr. ³⁵ X doa kxmule lc traxvctru mz nqvi lr neidu. A' doa ncblo ne trte, nide txpwz kc tqatkitrde nzmnctr-zvz-krde mz nqvi lr neidu. ³⁶ Mz nzmu-krde lcde, mzli kx Mr lx Trte aopx-ngrbzle drtqmu, axvctrpele nimu mz nqvi lr trtede, x drtqmu opx angidr. ³⁷ Da zpwxtx nzrpi-krmu kx nimu nqvi lr Ebraam. A' kzdung nimu suti drtwrdr nzribq-krdr ninge, murde nzpxtxpx-ngrdr natqngeng. ³⁸ Pibo bamu da kx pwxlvtztrpo mz Trtenge. X ale-kzamu da kx pibz trtemu.”

³⁹ A' nzrpbzlr bade kx, “Ebraam nide kc tqngi trtegr.” Rpibz Jiszs kx, “Nzmu nangini-angidrmu doa ne Ebraam, navz-nqblk-kzpzmu nqmq krdeng kxmrlz. ⁴⁰ Pi-zvzbo bamu da angidrng kx xlrtrpo mz nao Gct. A' rpiamu nanibq-ngrnamu ninge. Trngiu nqmq kr Ebraam lc tqwaiamu. ⁴¹ Mz nzrtrngzti-krbzmu da lcng, vz-nqblk-angidramu nqmq kr trtemu, kc trngiu Gct x trngi-kzu Ebraam.” Nzribzlr kx, “Trnipgru doa ngr peto, a' Gct kx ngi Trtegr angidr.”

⁴² Rpi-mopwz Jiszs badr kx, “Nzmu Gct nangi Trtemu le, namrlztiamu ninge. Murde vzpxmc bade, x vzmc mz nrlc. Trvzpwu' mz zmatq rnge esz'-krnge, a' nide kc tqatwzlr-ngrmle ninge. ⁴³ A' narmu trnzyrplatitrlru natqnge. ⁴⁴ Murde nimu doa ne trtemu, Setzn. Dekc tqmrlz-ngrbz bamu nzvz-nqblkqng me pnz drtwrde. Abzo mzli kc tzwnzgr nrlc, Setzn tqngi Kxrnbq. X ni-kzde Kxapokia, murde da angidr trycpwzu bade. X mz nzpokia-krde vz-nqblk-txpwlze nqmq krde esz'-krde. Murde nide Mepokia x Nou Nzpokiagr amrlx. ⁴⁵ X trlxngiti-ngrwamuu ninge mz nzpi-krbo bamu da angidr, murde nimu doa nedeng. ⁴⁶ ?Neke mz nimu krlzle nzaelwa-ngrm da kx vz-rbrtix? ?Nzmu kx tqrpibo da angidr, memule trlxngiti-ngrwamuu ninge? ⁴⁷ Doa neng Gct nzlxngiti-angidrlr natqde. A' trlxngitiwamuu natqde murde trnginipwa'muu doa nedeng.”

Jiszs Mnc Kai X Ebraam Kc Ate

⁴⁸ Kx nzxlr lr natq Jiszs mz trnzngini-krplru doa neng Gct, nzribzlr bade kx, “Eke! A' nim trngiulrJiu. Nim lr Szmariz kxngangr! X drka' la tqmncpxm bam.” ⁴⁹ Rpibz Jiszs kx, “Trpnzngr drka' kx mncpxm bange. Murde amatqx Trtenge, a' tramatzwamuu ninge. ⁵⁰ X mz trnzamatq-krpwa'muu lc ninge, Trtenge sa na-ayrplaxle nimu. Murde suti drtwrde kx leplz amrlx na-amatqlr ninge, Mr lx de. X navz-nqblk-zvzx me pnz drtwrde.

⁵¹ “Da angidrtx lc napibo bamu. Doa kx lxngitile natqnge, trtxpnzngr nzbz-krde.” ⁵² A' nzribzlr bade kx, “Mzli ka krlz-angidrpekr kx drka' la tqmncpxm bam. Murde Ebraam bzpe x profet nzbpeng, a' se tqrpiq kx doa kx lxngitile natqm trtxpnzngr nzbz-krde. ⁵³ ?Myx kxmule, myapxbzme mz melrmqgr Ebraam? ?Mz drtwrm nim neke?”

⁵⁴ Rpi-mopwz Jiszs badr kx, “Nzmu na-amatq-lzbqngre trpnzngr drtwr ngrde. A' Trtenge kc tqamatqle ninge, rpiamu kx nide Gct rmu. ⁵⁵ X kxmule-esz' rpiamu kx nide Gct rmu, a' trkrlz-angidrwamuu nide. Murde

ninge kx rkrlz angidr nide. Nzmu narpix kx trkrlzwu nide, sc tqapupe-kzx nimu kxnxpokiang. A' krlzx nide x vz-nqblqx natqde. X trpokiawxu.

⁵⁶ "X melrmqmu Ebraam kz abrtz-zvz-ngrde nxzlr-krde ninge mzli kc tqmnc-ngrde mz nrlc. Murde lxngitile natq Gct kx sa na-atwzlr-ngrmle ninge mz nrlc." ⁵⁷ Nzrpibz kxnxzetu r lr Jiu kx, "Pokiatxpeq! Murde Ebraam bz pnz mzli kc bqnc, x trkrlzkapzme yiz kx nzpnu-nzlvqn (50). ?A' se tqrpipeq mc-kzq Ebraam?" ⁵⁸ Rpi-mopwz Jiszs badr kx, "Da angidrtx lc napibo bamu. Ebraam mzte trnzmcka, a' Ninge la tqmncpex." ⁵⁹ Kx nxzlrbzr natqde lcng, sc tzrtangrpeng rplz kx nzvaebq-ngrdr nide. A' Jiszs amrbrtr-lzbqbz mz zbo ngr leplz, x sc tqvzpxpe yz Mangr-nzangiongr.

9

Jiszs Amrlzle Ncblo Kx Mzte Mwi

¹ X mz nzvz-krgrr badr Jiszs mz lrpzki, rmctikr kzdq ncblo kx mzte mwi. Nzwmwirr mzte lc nzmcmi pnz mzte. ² X rpibzkr kx, "?Kxakrlz, myx kxmule mz nzwmwirr mzte lc? ?Ngi dalr alwx ngrde esz'-krde o alwx ngr trtede x lxede?" Krlc tqycmne-ngrbzkr lc murde mz drtwrgr zyagox amrlx vzpxm mz alwx. ³ A' ayzlu-ngrm Jiszs natqgr kx, "Nzwmwirr mzte trngiu dalr alwx ngrde x trngi-kzu alwx ngr trtede x lxede. A' mzte mwi murde zmatq ngr Gct na-aelwapxngr mz nzamrlz-krnge nrkrdrdqde. ⁴ Murde nawztrpzku mz Trtene kc tqatwzlr-ngrmle ninge, mzli ka tqrnginyzbe-ngrgu mzli. Murde mz nibr nzbz-krde ncblo trkrlzpeleu nwzvngr. ⁵ A' mzli ka tqmncbe-ngrne mz nrlc, apux zyzlr kc tqrln-ngrbzle mz lr nrlc nzmc-krdr da angidr." *

⁶ Mz nibr natq lcng, Jiszs sc tqbyaope mz drtc'. X zbya ngrde sc tqayabemipele drtc' mz nzayayr-krdele. X sc tqabli-kztrpebzle mz mz ncblo kc mzte tqmwi. ⁷ X rpibzle bade kx, "Vz x ycpqo mzpq mz nabzde Siloam." Siloam drtwr ngrde Nzatzlerngr. Ncblo kc vz mrkc tzatzlirkile, ycpqpxle drtc' kcng mz mzte. X mzli lcpwz, sc tqrmcpe da, x sc tqyzlupe mrnyzde. ⁸ Ncblo lc mzli kc ena wxbu zvz mz nrlar lrpzki mz nzrlx-krde scde da. Kx nzmc leplz nide, sc tzrpipelr kx, "?Ei, trngiu mrlx kc tqwxbu zvz mz nrlar lrpzki tqrlnx bagu scde da?" ⁹ Kzdung leplz nzrpilr kx, "Ncblo lc nide lape." A' kzdu-kzng nzrpibzlr kx, "E trkr, ncblo kzble la, a' nzobq-krde apule nide." A' kx xlrbzle nzycmnetr-krdr nide, sc tqrpipebzle kx, "Ninge kape." ¹⁰ Zbz sc tzrveapebzng bade, nzrpibzlr kx, "?Myx kxmu mzpq tqobqpe-ngrde?" ¹¹ Sc tqrpipebzle badr kx, "Ncblo kc tqngi drtqde Jiszs ayayrtile kc drtc' mz zbya ngr naode, sc tqabli-kztrpebzle mz mzke', x rpimle bange navzne mz nabzde Siloam x naycpqpxx mzke' elr. Kx ycpqpxx kc mzke', ninge kc tqrmcpe da." ¹² Nzrpibzlr kx, "?Myxpe ncblo lcde?" Rpibzle kx, "Trkrlzwu."

Farzsi Nzycmnetrng Mz Ncblo Kc Mzte Tqmwi Pnz

¹³ Zbz ncblo lc, sc tzvzmipebzlr badr Farzsi. ¹⁴ Zbz kc tqamrlz-ngrbz Jiszs mz ncblo lc ngi Sabat. ¹⁵ Mz nzmu-krde lcde, nzveati-mopwz Farzsi mz ncblo kc kxmu nzobqpxkr mzte. Sc tqrpipebzle kx, "Alatrpzle kc drtc' kx yayr mz mzke', ycpqpxx, x ninge kc tqrmcpe da." ¹⁶ Zbz drtwr Farzsi tres'tipeu. Kzdung nidr nzrpilr kx, "Ncblo kxmule lc tratwzlr-ngrpqqu Gct, murde nwz-krde mz zbz lc rnzlvzole Lou ngr Sabat." A' kzdu-kzng nzrpilr kx, "Trtingr, mrlx lc atwzlr-ngrm Gct, murde ncblo kxale alwx, traieu rkx kxmule lc." ¹⁷ X nzrpibzlr kx, "?Rpiq kx ncblo kc aobqpxbzle mzpq? ?X mz nzaobqpx-krbzle lc mzpq, mz

* 9:5 Matiu 5:14; Jon 1:9; 8:12

drtwrm nide neke?” Rpibzle kx, “Mwx nide profet.” ¹⁸ A' kxnzetu r lr Jiu trnzlxitru ncblo lc. Zbz sc tzaveatipelr trtede ncdr lxede. ¹⁹ Kx nzvzmlr kc, Farzsi kcng sc tzrpipebzlr kx, “?Mrlxmu lc? ?Da zpx kx nzmwikr mzte nzmcmi pnz mzte? ?A' nike tqobqpengr mzte mzli ka?” ²⁰ Nzrpibzlr kx, “Krlz-angidrkr kx mrlxgr lc mzte mwi mzli kc tzmika-ngrde. ²¹ A' trkrlzkrkru nide tqobq-ngrde x neke tqaobqpxbz. A' veabzmu bade, nipedo doa kxetu x krlzle nzycmne-krde esz'-krde.” ²² Krlc tzycmne-ngrbzlr lc, nzmwxltilr kxnzetu r lr Jiu, murde nzpixlr kx, “Doa kx rpile Jiszs nide Kxnzmcpx, sa na-amnctrpzlr yz mz mangr-nzkrka'ngr x namapulrpx-ngrdr mztea.” ²³ Delc tzrpi-ngrbz trtede ncdr lxede kx, “Nipede doa kxetu, veabzmu bade.”

²⁴ Zbz sc tkqlepe-moulr ncblo kc mz nzwrd krali, tzrpipebzlr kx, “Esalzbz mz Gct kx da angidr kc napiq. Murde krlzkr kx mrlx lc tqaobqpxbzle mzpq rtrngzbz alwx.” ²⁵ Rpibzle badr kx, “Trkrlzwu kx nide ncblo kxrtrngzbz alwx o trtingr. A' da kx krltxpo mzli kc ena mzke' mwi, a' mzli ka obqpe.” ²⁶ Nzrpibzlr kx, “?Nike waisr-ngrde nim mz nzamrlz-krbzle mzpq?” ²⁷ Rpi-mopwzle badr kx, “Rlr, pipebo bamu a' trxlrwamu. ?Nike tqrpi-ngrnamu napi-ngr-mopwc'le? Mwx suti kz drtwrmu nzngini-krmu ncblo nedeng.” ²⁸ Kx nzxlrbzlr nzycmne-krde, drtwrdr trmrlztlpqngqu, sc tzpibqtipelr, x nzrpibzlr kx, “Nim kxvz-nqblqle nide, a' nigr vz-nqblqkr Mosis. ²⁹ Murde krlzkr kx ycmnekix Gct Mosis, a' mrlx la trkrlz-pnz-kru me vzkimle.” ³⁰ Rpi-mopwz ncblo kc badr kx, “Rlr, kctipxpex nimu. ?Ncblo lc aobqpxbzle mzke', a' se trkrlzwamu me vzkimle? ³¹ Krlz-angidrku kx Gct trayzlupwzleu nzkrka'kr ncblo kx rtrngz-zvzbz alwx x trtekqtrleu nqmq nr drtwrde. A' lalztqp wz mz doa kx angiole nide x alele nide suti drtwrde. ³² Abzo mzli kc pnz trgalr ncblo kx aobqpxbzle mz mrlx kx mzte mwinepxm mz nzrmcngr mzte, da kc tqwaix. ³³ A' mrlx lc mc-angidrpeku nzvzpx-krmle mz Gct. Nzmu trnavzpxpleu mz Gct, trpnzngr da kx na-alele.” ³⁴ A' nzrpibzlr kx, “Ei, trtakitrdeu nzalvztr-krm nigr, murde mzpq nzmc mz alwx ngr trtem x lxem, x tao zvz mz alwx.” Zbz sc tzamnctrpebzlr nide yz mz Mangr-nzangiongr, x tzmapulrpxpe-ngrdr mztea.

Kxnvz-rbrng Mz Nzobqkr Gct

³⁵ Kxrmcti Jiszs ncblo kc tzmapulrpxngr, sc tqrpipebzle kx, “?Myx kxmule? ?Lxngitipeq Mrlx Leplz?” ³⁶ Rpibz ncblo kc kx, “?Kxetu, neke tqngi ncblo lcde? Pim bange murde nakrlzx x nalxngitix nide.” ³⁷ Rpibz Jiszs bade kx, “Ninge lc tqycmnebz bam, ninge nide.” ³⁸ Zbz sc tqrpipebzle kx, “Kxetu Lod, lxngitix kx nim Kxnzmcpx.” X rweobz zpr mz Jiszs mz nzangio-krde nide.

³⁹ Rpibz Jiszs kx, “Vz-ngrmc mz nrlc mz nzpxliti-krnge leplz mz alwx ngrdr x mz nzalvztr-krnge nidr kcng trnzkrzkalr Gct, murde narmctilr nzlungr kxmrna. A' vz-kz-ngrpc' mz nzaelwapx-krbo da kxvz-rbr mz leplz kcng tzrpilr kx nzalvztr-krdr tubq.” ⁴⁰ Kzdung Farzsi kx nzmcncng badr sc tzrpipebzlr kx, “?Mz nzycmne-krm lc nigr du kz kxnxalvztr-rbrng?” ⁴¹ Rpibz Jiszs badr kx, “Eu. Murde leplz kcng trnzkrzlu Gct, trnzvz-rbrung mz nzvz-nqblq-krdr nide. A' mz nzrpibzlr kx nzalvztr-krmu tubq, aelwapx-ngrde kx vz-rbramu mz nzobqkr Gct.”

¹⁻² Rpi-mopwz Jiszs badr kx, “Naycmne-ebzpxbo dq ncblo kxaclve sip. Kxaclve Angidr sip dwatrpz mz naonrx. A' mrlx kx trdwatrpwzu mz naonrx, a' okilbzle mz nibr bz, nide mrlx kxpna da. ³ Ncblo kc tqaclve naonrx, lvpxbzle naonrx mz kxaclve sip. X sip nedeng nzkrlzlr natqde mz nzkqle-krbzle drtqdr, x sc tqvzmiipxpeleng. ⁴ X nzvz-nqblqlr me vzkile, murde nzkrlzlr natqde. ⁵ Trnzvz-nqblqlru ncblo kzble, murde trnzkrlzlr natqde. A' nzdwaszlr nide.”

⁶ Yapwxtibz Jiszs badr nzycmne-ebzpxngr lc mz nzaelwapx-krde nzblepx-krde mz leplz kcng tzesabrtlr leplz. A' tryrplatirpwzu nardr natqde. ⁷ Zbz sc tqrpipe-mopwz Jiszs kx, “Da angidrtx lc napibo bamu. Ninga naonrx kc tzdwakitr sip mz nzprtr-krbzlr badr kztedrng. ⁸ Leplz kcng tzvz-kaipqng mz ninga, nzalvztr-ngrdr da kx vz-rbr. X nzapulr kxnxpnang da x nzangqnguting. Delc sip trnzlalztq-ngrpwlru badr. ⁹ X ninga naonrx kc tzvzkitr leplz mz nzkrlz-krbzlr Gct. Doa kx vztrp bange nide kx narlapx. X na-apule sip nenge mz nzdwatr-krmle x nzdwapx-krde mz nzrmcti-krde dakxnzng ngr nzlungr. ¹⁰ Vz-ngrmc murde sip nengeng namnc-zpxwng. A' ncblo kxpna da vztx-ngrple nzpnangr, nzrnibqng x nzodangr.

¹¹ “Da angidrtx lc napibo bamu. Ninga kz Kxaclve-angidrle sip. Murde Kxaclve-angidrle sip rlrpx-lzbqngm mz nzbz-krde mz nzarlapx-krde sip nedeng.*

¹² Ncblo kxnxawz, trnipleu ncblo kxaclve x rngine sip. Ncblo kxnxawz dwaszle sip mz nzmc-krde nzvz-krm kuli kzpeto. Zbz kuli kc sc tqolvzpele kcng x aodalitipele kcng. ¹³ Ncblo kxnxawz dwa murde yc txpwz mz drtwrde nzataatr-ngrm trau, a' tryc-ngru drtwrde sip. ¹⁴⁻¹⁵ Ninga Kxaclve Angidr sip. Krlzx sip nengeng x nzkrlzlr ninga, da kc tqwai nzkrlzkr Trtenge ninga x nzkrlz-krnge Trtenge. X rlrpx-lzbq-ngrne mz nzbz-krnge nidr. ¹⁶ Kzdung sip kx nangi nengeng trnzprtrkang mz nabxbz nyznge. Krlcdeng navzmi-kzpc'ng mz nabxbz nyznge x sa naxlr-kzplr natqng. Murde sip nengeng amrlx nanginidr dzbede kx esz', x nanginige txpwz kxaclvele nidr.

¹⁷ “X rlrpx-ngrne nznibq-krdr ninga murde krlzx kx sa nalu-mopwc'. Delc Trtenge tqmrlzti-zlwz-ngrde ninga. ¹⁸ Trpnzngm kx nanibqle ninga, a' ninga kx narlr-lzbq-ngrbz mz nznibq-krdr ninga. Murde rngiscnge zmatq ngr nzka-krbo nzlungr x nzrkatx-krngele. Krlc natq kx kam Trtenge bange kx na-angidax.”

¹⁹ Zbz lr Jiu sc tzaki-lzbqpe-moung mz natq kcng tqpit Jiszs. ²⁰ Leplz nzkqlung nzrpilr kx, “Eke! Mrlx lc dwasz drka', delc tqlukurnr-ngrde. ?Memule tqalztq-ngrbzmu bade?” ²¹ A' kzdu-kzng nzrpilr kx, “Ncblo kx dwasz drka' nzycmne-krde trkxmuleu lc. ?Myx kxmule, drka' krlzle nzaobqpx-krde mz kxmwi?”

Kxnzetu R Lr Jiu Nzpxtxpx-mou-ngrdr Jiszs

²²⁻²³ Mzli lcpwz, mzli r zbao mz Disembz, ycp pipz nzkaputr-krm Nzyrlwr-lxblrngr mz Nzatr-moungr Mangr-nzangiongr Yawe Jerusalem. X nigr badr Jiszs sc tqvztrpekr Mangr-nzangiongr, x sc tqvznepe mz Makoa nyz Solomon. †

* ^{10:11} Jiszs nide Kxaclve Angidr Sip, x ni-kzde Kxaclve sip kxmyapxbz [Hibru 13:20-21] x Kxetu r kxnxacvelr sip nedeng. [1 Pita 5:4] ^{10:14-15} Matiu 11:27; Luk 10:22 ^{10:22-23} Mz nzyrlwr-lxblrngr mz Nzatr-moungr Mangr-nzangiongr nadcpxngr mz drtwrdr nzalqng x nzrlvxpxngr mou Mangr-nzangiongr mz nibr nzatrkatikr kzdq kxetu r ncblo ngr vea kxtrngiulrJiu. Mc Daniel 11:31. Zbq lcng nzrpi-kzpplr Nzyrlwr-lxblrngr Kxyzlr.

²⁴ Kxnzetu r lr Jiu nzvzmqng nzmnc-ngalelvzlr nide, murde nzrpilr namctrpzlr dq da kx vz-rbrtile. X sc tzrpipebzlr kx, “Mzli boipe, a' drtwrgr kc tqveabe. Kx nim Kxszmcpx o trtingr, pi-zpwxm bagr murde nakrlzkr.” ²⁵ Rpibz Jiszs badr kx, “Pipebo bamu, a' trlxngitiwamuu ninge. Rkx kcng tqalexng mz zmatq ngr Trtenge, da lcng nzaelwapx-ngrbzlr bamu ncblo kc tqngininge. ²⁶ A' trlxngitiwamuu murde trnipwamuu sip nengeng. ²⁷ X krlzx sip nengeng, nzxlrmlr natqnge, x nzvz-nqblqmlr ninge. ²⁸ Kabo badr nzlungr kxboi x trtxpnzngr nzbz-krdr. X trtxpnzngr kx narvecpxm mz mqnge. ²⁹ Trtenge kc tqrkam bange myapxbz mz leplz amrlx. Mz nzmu-krde lcde, trtxpnzngr kx navecpxmlle nidr mz mq Trtenge. ³⁰ Da zpwxtx, nigr ncdr Trtenge da kxesz’.”

³¹ Kx nzxlrbzlr natqde lcng, drtwrdr kc tqngyape mou. Murde rtulrtr-lzbqbz mz nzrsakrlr-krdr ncdr Gct. X sc tzrtrngzope mou rplz kx nzvaebq-ngrdele. ³² A' rpibz Jiszs badr kx, “Da kxkqlu kx alepex mz zmatq ngr Trtenge mz nzokatr-krnge leplz. ?A' myx mz da lcng kx takitrde nzvaebq-krmu ninge?” ³³ Nzrpibzlr bade kx, “Trnavaeby-ngrgru nim nzale-krm da kxmrzl, a' mz nzamatine-krm Gct. Murde nim ncblo txne, a' rtulrtr-lzbqm mz nzrpi-krm kx nim Gct.” ³⁴ Rpibz Jiszs badr kx, “Nzyro mz Nzryrngrkxtr kx rpibz Gct badr kzdung leplz kx nzapulr nide. ³⁵ Krlzku kx nike pi Nzryrngrkxtr ngi zvz da zpx. Delc Gct tramatine-lzbqu mz nzrpi-krde kx leplz lcng nzapu-kzlr nide. ³⁶ ?Mz nzmu-krde lcde, myx kxmu nzamatine-krnge Gct mz nzrpi-krnge ninge mrlxde? ³⁷⁻³⁸ Murde mcpk Trtenge ninge, x atwzlr-ngrmle ninge mz nrlc. Rtrngzti-zpxbo me pnz drtwrde. Nzmu trna-alewxu da lcng, sa tqmrlz trnzlhxngiti-krpwamuu ninge. Kxmule-esz' trlxngitiwamuu nzrpi-krbo ninge Mrlx Gct, a' narlxngitiamu murde vz-nqblqx natqdeng. X mz nzvz-nqblq-krnge natqdeng, nakrlz-angidramu kx Trtenge sc tqmncm bange x sc tqmncbo bade.” ³⁹ Kx nzxlrbzlr nzycmnekr Jiszs drtwrdr kc tqngyatxpe mou. X sc tzrpilr nalolvzpe-ngrdr nide. A' ani txpwz nzrlasz-krde Mangr-nzangiongr.

⁴⁰ Nigr badr Jiszs rkalzmgr Judiz Provins x kawickr LueJodzn. Vzkr mrkc tqawrkxtr-pnzngr Jon, x sc tqmncpekr elr. ⁴¹ Leplz nzkqlung nzvzmqng elr mz nzxlr-krbzlr nzycmne-krde. Zbz sc tzrpipelr kx, “Ncblo lc opxm nide Kxszmcpx, murde aelwapxngr rkx kxkqlu. Kxmule-esz' Jon Kxawrkxtr trpnzngr rkx kx aelwapx-ngrde, a' Jiszs angidatipele da amrlx kcng tqyapwxtingr Jon nide.” ⁴² X leplz nzkqlung nzlxngitilr kx nide Kxszmcpx.

11

Nzbzkr Lasarus

¹⁻² Kzdq kc ncblo drtqde Lasarus. X inwedeng drtqdr Mata x Mxri. Mxri nide kc kalr na-aelubzle nany Jiszs mz tolo x na-amingrbzle mz nqnginarde. Doa lcng nztqng mztea nydzr Betzni mrkc Judiz Provins. Zbz kzdq mzli mzlwedr Lasarus kx yagoxle. ³ Ile-lzbq lcng nzling sc tzatzlrepe-ngrbzlr natqdr mz Jiszs. Nzrpibzlr kx, “Kxetu, mzlem kc tqmrlzti-zlwzq sc tqyagox.”

⁴ Kx xlr Jiszs natqdr, sc tqrpipemle bagr kx, “Zyagox lc trngiu dalr nzbzkr Lasarus. A' ngi dalr nzaelwapx-krnge nzmyalzkr Gct mz nzale-krnge rkx kxmatq mz nzngini-krnge Mrlxde.” ⁵⁻⁶ Kxmule-esz' Jiszs mrlzti-zlwzle Mata,

^{☆ 10:33} Livae 24:16 ^{☆ 10:34} Sam 82:6 ^{☆ 10:36} Nzrlaszngr 22:28 ^{☆ 10:40} Jon 1:28 ^{☆ 11:1-2} Luk 10:38-39; Jon 12:3

Mxri, x Lasarus, x xlrle nrpa ngr nzyagoxkr Lasarus, a' mncti-moule zbz li mrkc tqmnc-ngrgr badr.

⁷ Mz nibr zbz kcng li, sc tqrpipemle bagr kx, "Navz-mouku ena Judiz." ⁸ A' rpibzkr bade kx, "?Kakrlz, navz-mowq mrlcde? A' mzli lc belq dekc tzmu lr Jiu nzvaebq-ngrdr nim, x nzmu navzbzme sa na-ale-mopwzlr bam." ⁹⁻¹⁰ A' ayzlu-ngrmle natqgr mz kzdq nzycmne-ebzpxngr. Rpimle kx, "Na-aoti drtwrmu nrlckxngrlx x nrlckxbq. Mz nzvz-nqblq-krnge me pnz Trtenge, apux ncblo kx vzne mz nrlckxngrlx. Trtaou mz nzmnc-krde, murde vz-nqblqle da angidr. A' doa kx trvz-nqblqleu natq Gct apule ncblo kx vzne mz nrlckxbq. X tao mz alwx murde da angidr lc trycpxpuu mz nabzde."

¹¹ Zbz rpi-mople kx, "Mzlegu Lasarus mwipe, a' navzpebzku mzli ka mz nzameo-krbo nide." ¹² A' rpibzkr kx, "Kxetu, nzmu namwile, drtqde sa namrlz." ¹³ Krlc tqpi Jiszs nzbzkr Lasarus, a' mz drtwrgr nzmwingr mz mz kx otim nemwi. ¹⁴ Zbz sc tqrpi-angidrpemle bagr kx, "Lasarus bzpe. ¹⁵ A' abrtzlvzx trnzmnc-krpwc'u Betzni mz nzamrlz-krnge nide mz nzyagox-krde. Murde da kc na-alebo bade mzli ka, sa nabatrzple mz nabzmu nzlxngiti-angidr-krmu ninge. Vzmamu, navzpebzku bade." ¹⁶ Zbz Tomas, kc kzdq drtqde Lipxm, sc tqrpipemle bagr kx, "Navzku amrlx nguru badr, murde nabz-lxblrku badr." *

Jiszs Atulz-mople Leplz X Rkabz Badr Nzlungr

¹⁷ Kx vz-aepzmgr kc badr Betzni, sc tqxlrpele kx Lasarus yrbqtipel mz gq zbz pwxpe. ¹⁸⁻¹⁹ X lr Jiu kxnxkqlung nzyrkrkiml Jerusalem, murde Jerusalem ncdr Betzni takitr kilomita kxtq. Nzvz-ngrmlr mz nzamnc-lrpi-krdr Mata ncdr Mxri mz nzvztikr drtwrdr mzlwedr kc tqbz. ²⁰ Mata kx xlrle kx Jiszs kc navzm, sc tqvzpxpe mz nzrmcti-krde nide. A' Mxri mncpwz brma. ²¹ Kx krlzmle kc Jiszs, Mata aelwapx-ngrde nzrlxngiti-krde mz nzrpi-krde kx, "Kxetu, nzmu namncq mrka, mzlwenge trbzu, murde nzmu amrlzbzme nide. ²² Kxmule-esz', a' krlzx kx mzli ka nike rlxtibzme mz Gct, sa nakabzle bam." ²³ Rpibz Jiszs bade kx, "Mzlwem sa natulz-mop mz nzbzngr." ²⁴ Rpibz Mata kx, "Eu, krlzx kx sa natulz-mop mz Mzli lc Tqmatq na-ayzlu-ngrbz Gct da mz leplz." ²⁵ Rpi-mopwz Jiszs bade kx, "Ninge kc tqatulz-mopwc' leplz mz nzbzngr x ninge kc tqrka-kzpo badr nzlungr kxboi. Doa kx lxngitile ninge, kxmule-esz' bzpe, a' sa natulz-mop mz nzbzngr. ²⁶ X krkc tqatulz-mop murde lxngitile ninge, mqngrde trpengr nzbz-krde. ?Lxngitiq da lc?" ²⁷ Rpibz Mata kx, "Eu, lxngitix kx nim Kxnxmcpx, Mrlx Gct kc navzm mz nrlc, da kc tqwai nzpikr profet leng amrlx."

Jiszs Yrni

²⁸ Mz nibr nzycmnekr Mata lc, sc tqyzlupe brma tqycmne-awapebz mz ilede Mxri. Rpibzle bade kx, "Kakrlz vzpem, x rpile namcle nim." ²⁹ Kx xlr Mxri le, tutxlzm x sc tqvz-anipe mz nzrmcti-krde Jiszs, ³⁰ mrkc tqaenzlibep, tqrmttingr Mata nide. ³¹ A' mzli kc tqdwaxngr Mxri yz, leplz kcng tzmneng badr nzdwaxpx-kzng, murde mz drtwrdr Mxri nayrni mz gq lr Lasarus. ³² Mxri kx krlzmle Jiszs, rtco-lzbq-ngrbz mz nzamatq-krde nide. Sc tqrpipebzle bade kx, "Kxetu, nzmu namncq mrka, mzlwenge trbzu murde nzmu amrlzbzme nide." ³³ Kx mcpz Jiszs nzyrnikr Mxri x leplz kcng, sc tqngyati-zlwzpe drtwrde zmatq ngr Setzn mz nzatrkat-krde leplz

* ^{11:16} Mz drtwr kzdung leplz, Tomas nzlipxmqng ncdr Matiu, murde ncblo lcng nzling nzryro-rlilr-zvzng mz Matiu 10:3, Mak 3:18, x Luk 6:15. A' trkrlz-angidrkkuu kx ngi da zpx o trtingr.

mz nzbzngr. ³⁴ Zbz sc tqrpipebzle mz ile-lzbq lcng kx, “?Myx gq lrde?” Nzrpibzlr kx, “Kxetu, vzm murde na-aelwa-ngrbzkr bam.” ³⁵ X Jiszs sc tqyrnipe kz. ³⁶ Zbz leplz kcng sc tzrpipelr kx, “Ycbz nzmrlzti-zlwz-krdele!” ³⁷ A' kzdu nidr nzrpilr kx, “Mrlx lc aobqpxbzle mz ncblo kx mzte mwi. Nzmu navz-animle mwz krlz-kzle nzarlapx-krde Lasarus mz nzbzngr.”

Jiszs Atulz-mople Lasarus Mz Nzbzngr

³⁸ Zbz Jiszs ngyati mou drtwrde zmatq ngr nzbzngr. X mzli lc krlzpebzkr badr butqbr kc tqyrbqpx-ngrm Lasarus. Naonrx ngrde nzapqbrtr rplz kxetu, murde ma tzwatitr animol. ³⁹ Rpibz Jiszs badr kx, “Alqlipxamu rplz lc.” A' rpibz Mata bade kx, “Kxetu, yrbqtipxpemle mrla zbz pwxpe x brtupe.” ⁴⁰ Rpibz Jiszs bade kx, “Rlr! Se tqpi-atebo bam kx sa namcq zmatq ngr Gct mz nzlxngiti-krm ninge.” ⁴¹ Zbz sc tzalqlipxpelr rplz kc x Jiszs sc tqkrka'lzpe Heven, nzrpi-krde kx, “Trte, awi-ngrbo bam nzlalztq-krme bange x nzayzlu-krme natqnge. ⁴² Kxmule-esz' lalztq-zvzme bange, a' tqkxmu nzycmne-krbo lc bam, murde leplz lcng nalxngitilr ninge kc tqatwzlr-ngrme.” ⁴³ Zbz sc tqetumipe natqde nzrpi-krde kx, “Lasarus, vzpxm.” ⁴⁴ X mzli kcpwz, Lasarus sc tqvzpxpem, mqde rlilr nzpilvz lrpz x nanycdeng, x narde kz. Rpibz Jiszs kx, “Yokaepxbzmu lrpz lang murde navzne.” X sc tzyokaepxpebzlr.

Kxnzetu R Lr Jiu Nzrpilr Nanibqlr Jiszs

Matiu 26:1-5; Mak 14:1-2; Luk 22:1-2

⁴⁵ Zbz leplz kx kqlung kx nzrmcng rkx lc nzlxngitilr nide. ⁴⁶ A' kzdung nidr sc tzyzlupeng Jerusalem mz nzrpi-krbzlr mz Farzsi da kx ale Jiszs. ⁴⁷ Zbz Farzsi kcng sc tzyrlwr-lxblrpeng badr kxnzetu rdr pris mz Kansrl kc tqaclvele Lou scdr lr Jiu. X sc tzrpipelr kx, “?Nike na-alepeku? Jiszs sc tqaelwapx-zvznggr rkx kxmatq. X mzli ka nzrpilr kx atulzpe-mop ncblo mz nzbzngr. ⁴⁸ Nzmu trnaripa'-ngrbzkuu nwzr-krde, leplz amrlx sa nalxngitilr nide x nayrlqlr nzngini-krde King r Israel. X doa lr gzpmn ngr Rom sa na-ayrplapxlr nigu mz nzrpwa'-krmlle nzyrlwr-lxblr-krgu Mangr-nzangiongr nyzgu, x sa nanibqtilr nigu lr Israel.” ⁴⁹ Zbz Kaefzs kc tqngi Nardr Pris mz yiz lcde, rpibzle kx, “Mrlzpe nzngqngu-krmu. ⁵⁰ Takitrde ncblo dq naesz' nabz-ngrbzle leplz amrlx, murde na-arlaxngr lr Israel.”

⁵¹ A' natqde lcng trpileu mz drtwrde esz'-krde, a' mz nzvz-nqblq-krde me pnz drtwr Gct. Batrpz Gct bade nwzkr profet lc, murde nide Nardr Pris nede. X Jiszs na-atutrle natqdeng mz nzbz-krde, murde na-arlaxple lr Jiu amrlx kcng tzlxngitilr nide. ⁵² X trnabz-ngrdeu nzarlapx-krde lr Jiu esz'-krdr, a' nabz-kz-ngrde lr nrlc kcng tqmcpx Gct mz nzngini-krdr doa nedeng. Murde doa neng Gct amrlx nanginidr neidu kxesz'. ⁵³ Zbz abzo mzli lcde, kxnzetu r lr Jiu sc tzyrlqpelr drtwr ngr nznibq-krdr Jiszs. ⁵⁴ Mz nzmu-krde lcde, nigr badr Jiszs sc tqrlaszpekr Jerusalem, tqvzpekr rlru mz taon Efrem.

⁵⁵ Ycpe pipz nzakaputr-krmlr zbz kxtr, kc tqngi Nzamyangr scdr lr Jiu. X lr Israel amrlx nzyrkrmqng Jerusalem mz nzoliqti-lzbq-krdr. Murde natakitrdr nzprtrngr mz Mangr-nzangiongr, mz nzvz-nqblq-krdr Lou sc Mosis. ⁵⁶ X mz nzyrlwr-krdr kc Mangr-nzangiongr, sc tzatxti mztr Jiszs. X tzrpibzlr mz kztedrng kx, “?Rkrlz dq nimu kx Jiszs sa navzm?” ⁵⁷ X kxnzetu r lr Jiu trnzkrlz-kzrlu kx navzm o trtingr. A' nzrpilr nalolvzlr nide, delc tzkapx-ngrdr natqdr kx doa kx rkrlz me mncngr Jiszs napibzle badr.

12

*Jiszs Aelu Mxri Tolo Betzni
Matiu 26:6-13; Mak 14:3-9*

¹ Nigr badr Jiszs sc tqyzlupekr Betzni, mztea nyz Lasarus kc tqatulzmople mz nzbz-karde. Mzli lc ycbe zbzq esz'mz, x Nzamyangr kc tzakaputrpemlr. ² Nzrtrngztibzlr nzmu-ngrbz mz Jiszs. Lasarus nigr badr x leplz kcng tzwxbulz-kzng badr Jiszs mz tebol. A' Mata okatr mz nzakingr dakxanzng. ³ Zbz Mxri twzmle kc botol ngr tolo kx narnnbr ngrde lqlwx x mnrt mrlz zlwz. X mz nzamatq-karde Jiszs, sc tqaelupebzle nanyc Jiszs x amingrtibzle mz nqnginarde. X mnrt lvabqpe mz nabz ma kc. ⁴⁻⁵ Judzs, kzdq nigr ncblo neng Jiszs, kc na-amwale nide kalr, rpibzle kx, "Tolo lc narnnbr ngrde takitrde nzatr-krm ncblo mz yiz kxes'. ?Memule tramwangerne x trau rde nakabz mz leplz kcng trnzrngiscung da?" ⁶ Krlc tqkxmu nzycmne-karde lc murde nide ncblo kxpna da x aclvele bxli r trau kx nzkabz badr mz nzwz-krd. X trau kx nzyrlqo elr krlzle nzrkalz-ngrm. A' nzycmne-karde lc, trvzpxpuu mz nzyckr drtwrde leplz. ⁷ Rpibz Jiszs kx, "Bzkq ycmnebzme bade. Da lc tqrtrngzti-ngrbzle ngi dalr nzoliqtikrbzle nrkrdrtqnge mz nzaelu-krbzlele tolo mzli kc nabz-ngrne. ⁸ Mnc-zvzamu badr leplz kcng trpnzngr scdr da, x krlzamu nzokatrngr nidr mzli kznikeng suti drtwrmu. A' ninge trnamnc-zvzpou bamu. Mz nzmu-karde lcde, takitrde nzaelwapx-krmamu nzmrlzti-zlwz-krmu ninge mzli ka." ⁹

⁹ Kx nxzlr leplz nzmnckr Jiszs Betzni, sc tzvzpmqng. Trnzvz-ngrmlru Jiszs txpwz, a' nzrpilr namc-kzlr Lasarus kc tqatulz-mople. ¹⁰ Zbz kxnzetu rdr pris sc tzryrlqpeng drtwr kx nanibqpe-kz-ngrdr Lasarus. ¹¹ Murde lr Jiu kxnzqqlung trnzvz-nqblqpelru kxnzetu rdrng, a' nzlxngitipelr Jiszs mz nzmc-krd nzaulz-mou-krmle Lasarus.

*Sade Kx Nzprlxlvtingr Nabx Nc Paam Mz Lrpzki R Jiszs Mz Nzvztr-karde
Jerusalem*

Matiu 21:1-11; Mak 11:1-11; Luk 19:28-40

¹² Nrlc kxngrlxobzle, nxzlr leplz kcng tzvzmqng mz Nzamyangr, kx Jiszs sc tqvzpe mz lrpzki mz nzvztr-karde Jerusalem. X sc tqvzpekr badr. ¹³ Zbz sc tzrlakipxpeng nabx nc paam, x sc tzrmcti-lzbqpeng badr mz nrlarde kx yz Jerusalem. X natqdr kc tqetupe tzrpipler kx, "Hosana! Glqpxkr King Kxnzmcpx kc tqvzm mz drtq Yawe! Nim kc nangi King rgr lr Israel."

¹⁴⁻¹⁵ Otim Jiszs kc nei dcngki, wxbuom elr x sc tqvope-ngrde. Da lc atutrl nzaulz Profet kx, "Bzkq mwxrpeamu lr Jerusalem!" ¹⁶ King rmu dese tqvzpm mz nrw, votrp mz nei dcngki." ¹⁷ Zbz mz nibr nzvzdzkr Jiszs Heven, sc tqdcpx ate mz drtwrgr kx da lcng tqprtzbz mz Jiszs nzaultr natq kcng tqyclz-pnz-kaip mz Nzryrngrkxtr, tzycmnetr-ngrdr Kxnzmcpx x nike naprtzbz bade. ¹⁸ A' mrkc Jerusalem leplz kx nzmclr Jiszs nzaulzpe-mou-karde Lasarus mz nzbzng, sc tzlenepelr nrpa lc. ¹⁹ X kx nxzlr leplz kx nzqqlung rkx lcde, sc tzyrkr-ngrmlr mz Jiszs. ²⁰ Zbz sc tzrpi-etrpe Farzsi kx, "Mzlengeng, tryatrepewzkuu bade. Murde lr Jiu mz mztea amrlx nzvz-nqblqpelr nide."

Jiszs Ycmnetr-ngrde Nzbz-karde

²⁰ Kzdung lr Grik nzprtrpzng mz leplz kcng tzvzdzng Jerusalem mz nzakaputr-krmlr Nzamyangr. ²¹ Lr Grik lcng nzrpibzlr mz Filip kx, "Kxetu, rpikr naycmnekr badr Jiszs." ²² Filip sc tqpipebzle mz kzdq lr mrnyzde,

Adru. X sc tzvzmipebzlr lr Grik kcng mz Jiszs. Tzrpipebzlr kx, "Kxetu, leplz lcng trngiulrJiu nzrpilr naycmneamu badr." ²³ Mz nzayzlu-krbzle natqdr, Jiszs yapwx tipxbzle nzbz-krde kx na-arlapxle leplz kxnzkqlung. Rpibzle kx, "Ninge MrIx Leplz. X mzli ka sc tqkrlzpebzle mzli r nzbz-krnge x nzvzdz-krnge Heven. ²⁴ Naycmne-ebzpxbo nra wit. Murde nra wit nataole mz drtc' x namibiole mz nzryrlq-krbzle nrade kxkqlung. Nzmu trtaoleu mz drtc', esz'tx alo. Mz nzmu-krde lcde, na-apux nra wit mz nzbz-krnge murde na-arlapxx leplz kxnzkqlung. ²⁵ Murde doa kx otr-zvzngr drtwrde nzlu-krde mz nrIc ka, sa namale-lvile nzlungr kxboi. A' doa kx yrlqtxole nzlu-krde mz nzvz-nqblq-krde ninge, sa naprtr mz nzlungr kxboi. ²⁶ X mrlx kznike nawztrp bange navz-nqblqmle ninge, murde kxnzawz nengeng sa namnc-zvz-kzng mrkc namnc-ngrne. X Trtenge sa na-amatq leplz amrlx kcng tzwztrpqng bange."

²⁷ X mz nzaotikr drtwrde nzbz-krde lc, rpi-mople kx, "Mzli ka nabzng talvzo. ?Mrlz nzrlxti-krbo mz Trtenge kx bzkq rlrpx-ngrde nzbz-krnge? A' trtingr! Murde vz-nqblqle me pnz drtwrde. X vz-ngrmc mz nrIc murde na-angidatix da amrlx kcng naprtzmqng bange mz nzbz-krnge. ²⁸ Trte, krka'-ngrne kx nzmyalz-krm na-aelwapxngm mz nzmcn-krnge. Eu, angida." X mzli kcpwz Gct ycmneom Heven, rpile kx, "Nzmyalz-krnge aelwapxpe-ngrbo x sa na-ale-moux." ²⁹ Kx nxzlr leplz kcng natq Gct, kzdung nidr nzrpilr bzlrmei. A' kzdung nidr nzrpibzlr kx, "E trtingr, enjrl ne Gct ela tqycmnebz bade." ³⁰ A' rpibz Jiszs badr kx, "Natq lc trngiu dalr nzokatr-krde ninge, a' ngi dalr nzokatr-krde nimu. Murde nakrlzamu kx Gct atwzlr-ngrmle ninge. ³¹ Mzli ka krlzmle mzli r nzpixkr Gct kx lr nrIc nzvz-rbrng. X krlz-kzple mzli r nzaovxiokr Gct zmatq ngr Setzn, Kxetu r nrIc ka. ³² A' ninge MrIx Leplz. X mzli kc naglqlz-ngrdr ninge, sa navecrpc' leplz amrlx bange." ³³ Mz natq lcng aelwapx-ngrde kx nabzom mz kros. ³⁴ Rpibz leplz kcng bade kx, "?Nabzq? A' Lou scgu alvztr-ngrde nigu kx trpnzngr nzbzkr Kxnzmcpx. ?Nike tqipi-ngrn mzli kc naglqlzngr MrIx Leplz mz kros? ? Mrlx Leplz kznike?" *

³⁵ Rpibz Jiszs badr kx, "Apux zyzlr. A' sa namncbepo bamu mzli kxipiz. Mz nzmu-krde lcde, navz-nqblqamu nzalvztr-krngeng mzli ka tqmncbe-ngrbo bamu, murde ma tqtaoamu mz alwx kc tqakamrbr-ngrbzle da mz nabzmu. Murde doa kx vz-nqblqle da kx tropxu vz-rbr zvz. ^{36a} Delc, mzli lc tqmncbe-ngrbo bamu, na-abrtrpa'mu drtwwmu bange, murde nanginimu doa nengeng mz nzale-krmu da kxtubq."

Lr Jiu Vz Zvz Trnzlxngiti-krdr Jiszs

^{36b} Yrkpxbz nzycmne-krbz Jiszs, sc tqvzpekr badr mz nzmcn-kapq-krgr. ³⁷ Murde trnzlxngitilru nzngini-krde Kxnzmcpx, kxmule-esz' rkx kcng kqlung tqalele, tzaelwapx-ngrdr zmatq ngr Gct. ³⁸ Mz nzmu-krde lcde, sc tqatutrpele natq Profet Asaea mz nzrpi-krde kx, "Yawe, trpnzngr kx lxngitile natqnge, x trpnzngr kx rkrlz zmatq kc tzaelwapx-ngrgr." ³⁹⁻⁴⁰ X mz trnzrlxngiti-krdr lc, angidatipe-kzle natq Gct kc tqipix Asaea, mz nzrpi-krde kx, "Mztr nzakcpebz x nardr nzamqngipebz, murde nzpxtxpx-ngrdr nzmc-krdr x nzlxngiti-krdr da angidr. Mz nzmu-krde lcde, rblxbz badr nzyzlu-krmlr bange murde na-arlapxx nidr." ⁴¹ Krlc tqkxmu nzryapwxkr

* **12:25** Matiu 10:39; 16:25; Mak 8:35; Luk 9:24; 17:33 * **12:34** Traopxpzu mz lr Jiu kx Nzryrngrkxtr rpile kx Kxnzmcpx na-aetqbz drtqde x naobqszo nide, na-atrkatnide, x nanibq nide. [Sam 22:1-18; 69:8, 11, 20-21; 118:22a; Asaea 53:1-12] Murde nzlxngitilru natq Gct kx rpile kx nangi king kc etu, na-aovxiole enqmi rdrng amrlx, x na-aclev-alele leplz amrlx. A' trnzlxngitilru natq kzbleng. * **12:38** Asaea 53:1; Rom 10:16 * **12:39-40** Asaea 6:10

Asaea lc, murde mcpe-kaile nzmyalzkr Kxnxmcpx mzli kc navz-ngrmle mz nrlc. ⁴²⁻⁴³ Yzuo mzli lc, kxnzetu r lr Jiu nzkqlung kx nzlxngitilr Jiszs. A' trnspinedru murde nzmwxlrtilr Farzsi, ma tzyrlqtrpzlr nidr yz mz mangr-nzkrka'ngr x tzmapulrpx-ngrdr nidr mztea. Murde nzmrlzkr badr nzglqpxkr leplz nidr myaszpxle nzglqpxkr Gct nidr.

Nzayrplapxngr Vzpxm Mz Natq Jiszs

⁴⁴ Jiszs natqde etutx mz nzrpri-krbzle mz zbo ngr leplz kcng kx, "Doa kx lxngitile ninge, trlxngitileu ninge esz'-krnge, a' lxngiti-kzle Gct kc tqatwzlr-ngrmle ninge. ⁴⁵ X doa kx mcle ninge mcpe-kzle Gct. ⁴⁶ Vzmc apux zyzlr kc tqaelwapx-ngrbzle mz lr nrlc kxnamu nzrlapx-krdr, murde doa kx lxngitile ninge trnataopeu mz alwx. ⁴⁷ A' doa kx xlrle nzycmne-krnge x trlxngitileu, trna-ayrplapwxu nide. Murde trvz-ngrpwc'u nzayrplapx-krnge lr nrlc, a' vzo-ngrmc Heven nzarlapx-krnge nidr. ⁴⁸ A' nzayrplapxngr nidr vzpxm mz kxmu nzyrlq-krdr natqnge. Doa kx mapulrpx-ngrde ninge x ptxpx-ngrde natqnge, vz-rbrpe x sa na-ayrplapx mz Mzli Kxmatq kc navzm. ⁴⁹ Murde natq lcng tqpibo trnzvzpxpwqung bange, a' krlcng tqpibo natq kx nzvzpxmqng mz Trtenge. Natq lcng kamle bange kx napibo bamu. ⁵⁰ X krlzx kx nzlungr kxboi vzpxm mz natq kx kamle. Mz nzmu-krde lcde, pix da kx pim Trtenge napibo bamu."

13

Jiszs Ycpqtibzle Nanyc Ncblo Nedeng

¹ Mzli kc nepi trtaoka-ngrde x trkrlzkapzle Nzamyangr, Jiszs krlzpe-kaile kx mzli r nzrlasz-krde nigr ycp pipz, mz nzyzlu-kr-mopwzle mz Trtede. X mz nzmrlzti-zvz-krde leplz nedeng mz nrlc, aelwapx-ngrmle nzetukr nivz lrde bagr. ² Mzli kc mz milzpq, nigr badr Jiszs sc tqmulvzpekr Nzamyangr. X kzdq nigr, Judzs Iskariot, yrlqtrpebz Setzn mz nabzde nzamwa-krde Jiszs. ³ A' Jiszs krlzle kx aprcpebz Gct zmatq ngr da amrlx kcng naprtzbzng bade. X krlz-kzle kx prpxm mz Gct x nayzlu-mopwz bade. ⁴ Delc, mzli kc tqmube-ngrgr, tulzm, sc tqwztrpem bagr. Aotxole nzkq scde kc tqrmnrtr-ngrbz, x rtrngztibzle taol pewi-lzbq-ngrde. ⁵ Zbz sc tqpuliopele kcng lue mz dis, x ycpqti-ngrbzle nanycgr. X amingrtibzle mz taol kc. ⁶ Kx krlzbzle kc Saemon Pita, rpibz Pita bade kx, "?Kxetu, da zpxwpe kx na-avzo-lzbqpeme mz nzypcq-krbzme nanycnge?" ⁷ Rpibz Jiszs kx, "Mzli ka trkrlzkalq da lc tqrtrngztibo. A' sa nakrlzq mzli lc navzm." ⁸ Rpibz Pita kx, "Trtxpnzngr nzypcq-krbzme nanycnge." Rpibz Jiszs kx, "Nzmu kx trycpqpwc'u nim, trvz-nqblq-angidrpewq ninge." ⁹ A' Saemon Pita narde tryrplatrpwzu mz natq Jiszs, x sc tqrpi-mopwzle kx, "Kxetu Lod, bzkq ngi txpwz nanycnge, a' mqnge x narnge kz." ¹⁰ Rpibz Jiszs kx, "Pita, doa kx kipope, drtqde prkipe. X trpengr nzkipo-krde a' ngi txpwz nanycde, murde nzblkqking mz nzayo-krde mz lrpzki. X nabzmu lqngi, a' kzdq nimu esz', trtingr." *

¹¹ X krlc tqrpi-ngrmle kx, "A' kzdq nimu esz', trtingr," murde krlzpele kzdq nigr na-amwale nide.

¹² Mz nibr nzypqti-krbzle nanycgr, kq-mou-ngrde nzkq scde x sc tqyzaule mou mrkc tqwxbulz-ngrde mz tebol. Sc tqrpipemle bagr kx, "?Krlzpeamu da lc tqwaisz-ngrne nimu? ¹³* Rpmamumu bange ninge Kxakrlz x Kxetu rmu, x da zpxwtx nzpi-krmamule. ¹⁴ X kxmule-esz' ninge Kxakrlz x Kxetu rmu, a' avzo-lzbqx mz nzypqti-krbo nanycmu. X kxnamu-kzamu

* ^{12:44} Matiu 10:40; Mak 9:37; Luk 10:16 * ^{13:10} Krlc drtwr ngrde kx Jiszs alqitele nidr, a' alwx kznikeng nzale-moulr naycpqtipx-moung mz nzplzpx-krdrleng. ^{13:12}* Luk 22:27

lc, na-avzo-lzbqamu mz nzycpqty-etr-krmu nanycmu. ¹⁵ Nakrlzamu kx aelwapx-ngrbo lrpzki bamu, murde navz-nqblqamu nike alebo bamu, mz nzavzo-lzbq-krmu x nzokatr-etr-krmu. ¹⁶ Da angidrtx lc napibo bamu. Trpnzngr kxzawz kx myaszlze kxetu rde, x menrpa trmyaszlze doa kx atwzlr-ngrde nide. Mz nzmu-krde lcde, takitrde nimu menrpa nengeng naokatr-etramu. ¹⁷ Nzmu nakrlz-angidramu da lcng, Gct sa na-aelalzmle drtwrmu mz nzvz-nqblq-krmuleng.”

*Jiszs X Ncblo Nedeng Nzmulvzlr Nzamyangr
Matiu 26:17-25; Mak 14:12-21; Luk 22:7-13, 21-23*

¹⁸ Jiszs rpi-mople bagr kx, “Trycmnetrxu nimu amrlx ngrmu mz nzrpi-krbo kx nabzmu lppe. Krlzx kx mcpxx nimu amrlx ngrmu. A' nzycmnekr Nzryrngrkxtr na-atutr, mz nzrpi-krde kx, ‘Mzli ka kztenge kc tqmukr ncdr, nipe-kzde enqmi rnge.’ ¹⁹ Napi-pnzbo da lc, murde mzli kc nakaputr-ngrmle, sc tqlxngitipeamu kx ninge Kxnzmcpx ne Gct. ²⁰ Da angidrtx lc napibo bamu. Doa kx abrtzlvzle ncblo kx atwzlrpx-ngrne, lxngiti-kzle ninge. X mz nzlxngiti-krde ninge, lxngiti-kzle Gct kc tqatwzlr-ngrmle ninge.” ²¹

²¹ Zbz mz nibr nzycmne-krde lc nabz Jiszs sc tqtalvzope. X sc tqrpipe-mople bagr kx, “Da angidrtx lc napibo bamu. Kzdq nimu sa na-amwale ninge mz enqmi rngeng.” ²² A' kx xrbzkr nzycmne-krde, sc tqobq-etrpekr kx neke mz nigr kc tqpile, murde trkrlzkru. ²³ X wxbutrpo bade, mz nrlarde kxrtc. ²⁴ Zbz Saemon Pita kc nrlar mzte tqaopemle bange, kx naveatibo kx nelc tqpile. ²⁵ Drtrpo nrlarde x sc tqveapebo bade, rpibo kx, “?Kxetu, neke tqkxmu nzpi-krmle ke?” ²⁶ Ayzlu-ngrmle natqnge kx, “Mrlx kc naleobo bret nade mz lue lr supsup.” Zbz kx leole kc nctq bret kc, sc tqkapebzle mz Judzs Iskariot, mrlx Saemon. ²⁷ Mz nibr nzngqkr Judzs bret kc, Setzn kc tqprtrpebz bade, a' tropxu mz mzkr. X sc tqrpipebz Jiszs bade kx, “Aniti nike nartrngztibzme.” ²⁸ A' trpnzngr nigr kx rkrlz drtwr ngr nzycmne-krbz Jiszs lc bade. ²⁹ Murde mz nzaclve-krbzle kc trau scgr, mz drtwrgr kzdung nigr naxpe kzdung kz dalr Nzamyangr o narkabz trau mz kxtrnznrgiscung. ³⁰ Mz nibr nzngqkr Judzs nctq bret kc, tulzm x sc tqdwapxpe yz. X mzli lc nzlo kc tqyzutrpe. †

Natq KxmRNA

³¹ Mz nibr nzvzpekr Judzs, rpim Jiszs bagr kx, “Mzli ka ninge Mrlx Leplz, ycppe pipz nzaelwapxngr nzmyalz-krnge. X nike na-alex sa na-aelwapx-kz-ngrde nzmyalzkr Gct. ³² X nzmu na-aelwapx-ngrne nzmyalz-krde, Gct esz'-krde sa na-aelwapx-kz-ngrde nzmyalz-krnge. X nzale-krdele trnamnetiu. ³³ Doa nengeng, namnctibo bamu mzli kx mrbcne. Mz nzmu-krde lcde, sa nartangrtiamu ninge kalr. A' napi-kzpo bamu natq kcpwz tqpibo mz kzdung kxszetu r lr Jiu, mz nzrpi-krbo kx, ‘Mrkc navzkix, trgalr ena nzvz-krmamu elr.’ ³⁴ Natqnge kxmyapxbz kxmRNA nide sele: ‘Namrlzti-lzbqamu, da kc tqwai nzmrlzti-krnge nimu.’ ³⁵ Mz nzmrlzti-lzbq-krmu lc, sa na-aelwapx-ngrbzmu mz leplz amrlx nzngini-angidr-krmu leplz nengeng.”

^{13:16} Matiu 10:24; Luk 6:40; Jon 15:20 ^{13:18} Sam 41:9 ^{13:20} Matiu 10:40; Mak 9:37; Luk 9:48; 10:16 ^{13:30} Natq lc tqngi nzlo, ngi kzdq nzycmne-ebzpxngr. Murde nzlo drtwr ngrde nzyzutrkr da kxtrka kcng amrlx tzwaisrngr Jiszs, mz nzamwakr Judzs kc nide, mz nzolvzkr kxszetung nide, mz nzvzmi-krdr nide mz kot, mz nztqlvztr-krdr nide mz kros, x mz nzbz-krde. Judzs apule ncblo kx vzne mz nrlckxbq x tao mz alwx, murde da angidr trycpxpuu mz nabzde. Mc Jon 11:9-10. ^{13:33} Jon 7:34; 8:21 ^{13:34} Jon 15:12, 17; 1 Jon 3:23; 2 Jon 5

*Plzpx-kaipz Jiszs Nzrpikr Pita Trkrlzleu Nide
Matiu 26:31-35; Mak 14:27-31; Luk 22:31-34*

³⁶ Rpibz Saemon Pita bade kx, “?Kxetu, drlve kc navzkiq?” Rpibz Jiszs bade kx, “Trnavz-nqqlqpwe'u ninge mzli ka, a' vz-nqqlq-krlzpwq ninge kalr.” ³⁷ Rpibz Pita kx, “?Nike trnavz-nqqlq-ngrpwu nim mzli ka? Murde nabz-ngrbo nim.” ³⁸ Rpibz Jiszs kx, “?Nabz-ngrn ninge? Da angidrtx lc napibo bam. Koma mz nrlckxbq nzrpi-krm kx trkrlzwq ninge nzwrde natq, x natq kio kx ayrnrngr kc ate.”

14

Jiszs Ngi Lrpzki, Da Angidr; X Nzlungr

¹ Jiszs rpi-mople bagr kx, “Bzkq nelzmu taprlzm. Abrtrpzmu drtwrmu mz Gct x abrtr-kzpa'mu drtwrmu bange. ²⁻³ Murde mrkc Heven ma nyz Trtene kqlu-esz'ngr, x navz-kaipo mrlcde mz nzoliqtipx-krbo nzvz-krmamu. Dekc, nayzlu-ngr-mopwc' mz nzvzmi-krnge nimu, murde namnc-aloamu mrkc tqmnc-ngrne. X takitrde nzlxngiti-krmu natqngeng murde trkrlzwu nzpokiangr.

⁴ “X krlzamu mrkc navzkix x lrpzki rde.” ⁵ Rpibz Tomas kx, “Kxetu, trkrlzamu mrkc navzkiq. ?Mz nzmu-krde lcde, myx kxnamu nakrlz-ngrgr lrpzki lc?” ⁶ Rpibz Jiszs bade kx, “Ninge lrpzki, da angidr x nzlungr. Ninge lrpzki kc nao-zli mz nznkrlz-ngrbz Heven. X ninge kx na-aelwapx-ngrbz da angidr kx vzpxm mz Gct. X ninge kz nou nzlungr kxboi. Mz nzmu-krde lcde, trpnzngr kx navztxnebz mz Trtene, a' navzki-kaiple bange.

⁷ “Murde mz nzkrlz-angidr-krmu ninge, nakrlz-kzamu Trtene, murde apux nide. X abzo mzli ka mcpeamu nide x krlzpe-kzamu nide.” ⁸ Rpibz Filip kx, “Kxetu, da kx rlxti-txpwzkr bam, aelwa-ngrm bagr Trtem.” ⁹ Ayzlu-ngrbz Jiszs natqde kx, “?Filip, myx kxmule? ?Mnctipebo bamu mzli boipe, a' sc trkrlzkalq ninge? Murde doa kx mcpele ninge, mcpe-kzle Trtene. ?Memule tqrpi-ngrme kx na-aelwa-ngrbo Trtene bamu? ¹⁰ ? Myx kxmule trlxngitiwq kx sc tqmncbo mz Trtene x Trtene sc tqmncm bange? Murde natq kcng tqpitibo bamu, nzvzpxmqng mz Trtene, a' trnzvzpxpwqung bange. X wz-nqqlqx me pnz drtwr Trtene, kc tqmncpwm bange. ¹¹ Takitrde nzlxngiti-krm kx sc tqmncbo mz Trtene x sc tqmncm Trtene bange. Kxmule-esz' a' nalxngitiamu mz nzmc-krmu rkx kcng tqalexng. ¹² Da angidrtx lc napibo bamu. Doa kx lxngitile ninge sa na-ale-kzle rkx lcng tqalexng. X sa na-ale-kzle du rkx kx namyapxbzng, murde nzvzpxe mz Trtene. ¹³ X da kx rlxtiamu mz zmatq r drtqnge sa na-angidabo, murde na-aelwapx-ngrne nzmyalzkr Trtene. ¹⁴ X mzli kznike narlx-ngrmamu dq da mz zmatq r drtqnge, sa na-angidabo.”

Jiszs Esalz-ngrde Mqngrkxtr

¹⁵ Rpi-mop Jiszs bagr kx, “Nzmu mrlztiamu ninge, yrlq-angidramu natqng. ¹⁶ X sa narlxtibo mz Trtene, nzatwzlr-mou-krmle dq Kxokatr kx namnc-alobz bamu. ¹⁷ Krlcde Mqngrkxtr kc tqaelwapx-zvz-ngrde da angidr. Rblxbz mz lr nrlc nzlxngiti-krdr Mqngrkxtr, murde trnzglxlu nide x trnzkrlz-angidrlu nzwz-krde. A' nimu, krlzpeamu nide, murde sc tqmncbz bamu x sa navztrp mz nabzmu. ¹⁸ Mzli kc nadwasz-ngrne nimu, trpnzngr nzaxtx-krbo nimu nzapu-krmu doa kxnzbzszng. Murde na-apule kx ninge la nayzlu-mopwc' mz Mqngrkxtr. ¹⁹ Ycpe pipz trnzmcpeu lr nrlc ninge. A' sa namc-mouamu ninge. Murde nzlu-krmu kxmrna vzpxm mz

nzlu-mou-krnge. ²⁰ X mzli lc Mqngkrkxtr navzpx-ngrmle bamu, sc nakrlz-ateamu kx mncbo mz Trtenge, x mncmamu bange, x mncbo bamu. ²¹ Doa kx yrlq-angidrle natqnge, mrlztile ninge. X mz nzmrlnzti-krde lc ninge, sa namrlzti kz Trtenge nide. X sa namrlzti-kzx nide x na-aelwa-lzbq-ngrbo bade.” ²² Zbz sc tqrpipebz Judzs kzble kx, “Kxetu, ni-txp wzgr, a' lr nrlc trtingr?” ²³ Rpibz Jiszs bade kx, “Doa kx mrlztile ninge yrlq-angidrle natqnge. X mrlzti zlwz Trtenge, x sa navzmgr x namncpx-kzpgm bade. ²⁴ A' trnavzpgru mz mrlx kx trkati nivz lrde ninge, x tryrlq-angidrle natqnge. Murde natqnge lc trvzpxpuu bange a' vzpxm mz Trtenge kc tqatwzlr-ngrmle ninge.

²⁵ “Napipx-pnzbo bamu da lcng mzli ka tqmncbe-ngrbo bamu. ²⁶ Murde sa na-atwzlr-ngrm Trtenge Kxokatr kc tqngi Mqngkrkxtr, mz zmatq rnge. X sa na-alvztrle nimu mz da amrlx kx takitrde nzrkrlz-krmuleng, x na-adcpx-mopwzle drtwrmu mz natq amrlx kcng tqpitibong.

²⁷ “Amnqlvz-ngrne nimu nzmnc-zpwxngr kc tqycm bange. Murde nzmnc-zpwxngr kc tqkabo bamu, trapuleu nzmnc-zpwxngr mz nrlc, a' yc-amqngi zvz. Bzkq nelzmu taprlzm x ayo, x bzkq mwxlramu. ²⁸ Xlrpemamu nzpi-krbo kx narkalzpmec x sa nayzlu-mopwc' bamu. Nzmu namrlzti-angidramu ninge, naelalz-ngrm drtwrmu nzvz-krbo mz Trtenge, murde myapxbz mz ninge. ²⁹ Mzli ka, napi-pnzbo bamu da lcng x mzli r nzkaputr-krmlr kc ate. Murde nzrlxngiti-krmu naxplr, mzli kc nakaputr-ngrmlr. ³⁰ Nzycmne-krbo bamu naesakitxpe mzli ka, murde Setzn kc tqngi kxetu r nrlc ka, se tqvz pem. Kxmule-esz', a' trpnzngmz nzmclz-krbo bade murde trpnzngmz da kx vz-rbrix. ³¹ A' rtrngzti-ngrbo da amrlx kcng tqpitim Trtenge bange, murde nakrlz lr nrlc kx mrlztx nide. Delape. Tulzamu, navzpeku.”

15

Jiszs Nide Nounc Angidr

¹ Mzli kc tqvz-ngrgr mz lrpzki, Jiszs rpi-mople bagr mz nzycmne-ebzpxngr kx, “Ninge nounc angidr, x Trtenge nide kx ngi nydze nrlanc.

² Lakitpx-awrnr-ngrdeng nrlangeng amrlx kcng trpnzngmz nradr. X nrlangeng kcng nradr tqycbz lvxoleng murde nado zlwz. ³ X mz nqmq kcpwz, natqnge alqtile x okatrle nimu mz nzale-krmu da kxmrlz.

⁴ Trpnzngmz nrla nounc kx nado mz nide esz'-krde, a' natutrpwz mz noude. Kxmu-kzle lc mz nimu. Na-axvctr-lzbqnmamu bange murde namncbo bamu. A' nzmu trna-axvctr-lzbqpwamuu bange, trpnzngmz nramu, murde ninge nou nzlu-krmu.

⁵ “Ninge nounc x nimu nrlangeng. Doa kx axvctr-lzbqbz bange x mncbo bade, sa nado zlwz. Trpnzngmz da kxmrlz kx nartrngzibzmu nzmu trna-axvctr-lzbqpwamuu bange. ⁶ X doa kx lakipx-lzbqm bange, trpnzngmz nrade. A' nrlade kxmule lcng takitxtrpwzle nzangcngr mz nyr. ⁷ A' nzmu na-axvctr-lzbqnmamu bange x yrlq-angidramu natqnge, krlzamu nzrlxti-krbzmu mz Gct da kx suti drtwrmu, x sa na-angidabzle. ⁸ Mz nzaxvctr-lzbq-krmamu bange, dekc nado-zlwz-ngrnamu x na-aelwapx-ngrnamu kx nimu leplz nengeng. X nramung na-aelwapx-kz-ngrdr nzmyalz-esz'ngrkr Trtenge. *

⁹ “Mrlztix nimu da kc tqwai nzmrlnzti Trtenge ninge. Mz nzmu-krde lcde, namnclz-zvzmmamu mz nivz lrng. ¹⁰ X sa namnclz-zvzmmamu mz nivz

* ^{15:8} Mz nzycmnekr Jiszs, rpile ‘Ninge nqvi lr grep angidr.’ Mz Nzryrngrkxtr nqvi lr grep drtwr ngrde lr Jiu ngr Israel. Mz nqrpi-krde kx nide angidr nqvi lr grep, mwxt drtwr ngrde kx lr Israel trnznginipedru nqvi lr grep angidr.

lrnge nzmu nayrlq-angidramu natqnge. Da kc tqwaix nzyrlq-angidr-krbo natq Trtenge, x mnclz-zvzbo mz nivz lrde. ¹¹ Pipxbo bamu natq lcng murde na-abrtzlvzx nimu x nabzmu na-abrtz zvz. *

¹² “Natqnge kx nayrlq-angidramu nide sele, ‘Mrlzti-lzbqamu da kc tqwai nzmrlzti-krnge nimu.’ * ¹³ Nivz kx myapxbz rlrpx-ngrde nzlu-krde mz nzokatr-krde mzledeng. ¹⁴ X sa nanginimu mzlengeng, mz nzyrlq-angidr-krmu natqnge. ¹⁵ Mzli ka trpengr nrpi-krbo nimu kxnzawzng, murde kxnzawz trkrlzleu da kcng tqrtrngzibz kxetu rde. A' nipemu mzlengeng, murde da amrlx kcng tqxrtrpo mz nao Trtenge, tqpitipebo bamu x krlzpeamu. ¹⁶ Trmcpxwamuu ninge, a' mcpxx nimu murde nramu nakqlu zvz. X da kzniike rlxtibzmu mz Trtenge mz zmatq r drtqnge, sa na-angidabzle. ¹⁷ Yrlq-angidramu natqnge lc, ‘Mrlzti-lzbqamu.’ ” †

Lepz Neng Jiszs X Lr Nrlc

¹⁸ Jiszs rpi-mople bagr kx, “Bzkq kctipxamu mzli kc napxtpxngr lr nrlc nimu, murde nzpxtxpx-kai-ngrdr ninge. ¹⁹ Kqlex nimu murde nablepxbzmu mz lr nrlc. Delc tzpxtxpx-ngrdr nimu. A' nzmu nanginimu lr nrlc, sa namrlztilr nimu murde nzmrlzti-zvzlr lr mrnyzdr. ²⁰ Nadcpx mz drtwrmu da lc tqpibo bamu, ‘Trpnzngr kxnzawz kx myaszlzle kxetu rde.’ Nzmu kx tzatrkatilr ninge kc tqngi kxetu rmu, sa na-atrkatilr nimu mz nzngini-krmu kxnzawz nengeng. A' nzmu nayrlqlr natqnge, sa nayrlq-kzlr natqmu. * ²¹ Lr nrlc sa na-atrkatilr nimu mz nzngini-krmu leplz nengeng, murde trnzkrlzlu Gct kc tqatwzlr-ngrmle ninge. ²² Nzmu trnaxlrlu natqnge, trpnzngr alwx ngrdr. A' alwx ngrdr tutr mz nzpxtxpx-krdr natqnge. ²³ Murde doa kx ptxpx-ngrde ninge ptxpx-kz-ngrde Trtenge. ²⁴ Kxmule-esz' nzmcpelr nzale-krnge da kcng tqmatq-esz'ngr, kx trpnz-moungr kx rkrlz nzalengr, a' alwx ngrdr tutr mz nzpxtxpx-zvz-krdr nigr ncdr Trtenge. ²⁵ Da lcng nzatutrlr natq kcng mz Nzryrngrkxtr, tqrpile kx, ‘Nzpxtxpx-krdr ninge trpnzngr noude.’ ” *

Kxokatr Kc Tqngi Mqngrkxtr

²⁶ Jiszs rpi-mople bagr kx, “Sa na-atwzlr-ngrmc Kxokatr bamu. Krk Mqngrkxtr, kc tqngi nou da angidr amrlx, tqvzpxm mz Trtenge. Mzli kc navzo-ngrmle, sa na-aewapx-ngrbzle ninge bamu. ²⁷ X mzli lcde, nayapwxtipxamu ninge, murde mnctrpa'mu bange abzo mz mzli kc ayrmrngr tqwz-ngrne mz nrlc.

16

¹ “Pi-pnzbo da lcng bamu, murde nzrlxngiti-krmu ma tqbaio mzli kc lr nrlc nzatrkatilr nigr nimu. ² Sa nayrlqtrpzlr nimu yz mz mangr-nzkrka'ngr x namapulrpx-ngrdr nimu mztea. X mzli kc navzm, sa nanibqlr nimu, mz nrpi-krdr kx nzwztrpzng mz Gct. ³ A' sa nartrngzibzlr da lcng, murde trnzkrlzlu nigr ncdr Trtenge. ⁴ Mz nzmu-krde lcde, nzrlxngiti-krmu namqngi mz nzdctipxkr drtwrmu kx pi-pnz-kaipo da lcng bamu. A' trpi-pnzpwu' bamu mzli kc kai, murde nigu la tqmncbeku.

Nzwzkr Mqngrkxtr

⁵ “A' mzli ka nayzlupe-ngrbo mz Gct kc tqatwzlr-ngrmle ninge. X trpengr nrpi-krmu kx, ‘?Navzn drlve?’ * ⁶ Murde drtwrmu vzttx-zlwzpe mz nzpi-krbo bamu nzvzpe-krnge. ⁷ A' da angidrtx lc napibo bamu. Mrlzvxitx

* ^{15:11} Jon 3:29; 17:13 * ^{15:12} Jon 13:34; 15:17; 1 Jon 3:23; 2 Jon 5 † ^{15:17} Gct sa naka-txpzwle da mz nzvz-nqblq-krde me pnz drtwre. * ^{15:20} Matiu 10:24; Luk 6:40; Jon 13:16 * ^{15:25} Sam 35:19; 69:4 * ^{16:5} Jon 13:36; 14:5

nzprspx-krbo nimu. Murde mz nzvz-krnge, sa na-atwzlr-ngrmc bamu Kxokatr, kc tqngi Mqngrkxtr. A' nzmu trnavwxu, Mqngrkxtr trnavzopuu bamu. ⁸ X mzli kc navzo-ngrmle, sa na-aelwapx-ngrbzle mz lr nrlc kxnxaleng alwx, x nztubq-krdrng trtakitrdeu, x nzaolvz-krdrng da vz-rbr. ⁹ Sa na-aelwapx-ngrbzle badr kx alwx ngrdr kxmyapxbz tutr mz trnzrlxngiti-krdrnu ninge. ¹⁰ Mz nzyzlu-krbo mz Trtenge trpe-moungr nzmc-krmu ninge. A' Mqngrkxtr sa natekqtrle ninge mz nzpi-krbzle mz lr nrlc kx nztubq-krdr trtakitrdeu. Murde sa na-aelwapx-ngrbzle badr nztubqkr nzmnk-krmu. ¹¹ X sa na-aelwapx-kz-ngrbzle badr kx nzaolvz-krdrng vz-rbr mz nzpxtxpx-krdr ninge. Murde kxetu rdr Setzn, aclve mz nrlc ka. A' pnzpe kai drtwr Gct kx sa na-ayrplapxle nide kalr. ¹² Da kqlu kx napi-mopc' bamu, a' trpengr nzpi-krboleng mzli ka, murde ma tqrblx-zlwzbz bamu. ¹³ A' mzli kc navzo-ngrm Mqngrkxtr kc tqngi nou da angidr, sa na-alvztrpzle bamu nzalvztr-ngrng angidr amrlx. Murde trnaycmnetru mz nide esz'-krde, a' napi-txpzwzle da kx xlrtrpzleng mz nao Gct. X naplzxpbzle bamu da kx navzm. ¹⁴ X sa na-aelwapx-ngrde nzmyalz-krnge mz nzpipx-krbzle bamu nzalvztr-krngeng. ¹⁵ X da amrlx kcng tqngisc Trtenge, scngeng. Delc tqrpi-ngrbo kx, 'Mqngrkxtr napixbzle bamu nzalvztr-krngeng,' murde nzalvztrngr lcng nzvzpx-kzpqng mz Trtenge."

Nzvzkr Drtwr Kxmrbcne X Nzabrtz-zvzng

¹⁶ Jiszs rpi-mople bagr kx, "Mzli kx mrbcne x trnamcwamu ninge, zbz sa namc-mouamu ninge." ¹⁷ Zbz sc tzveati-etrpe kzdung nigr, tqrpipekr kx, "?Nike drtwr ngr natq lcng tqpimle bagu? Murde rpi-kaile kx nayzlu-mopwz mz Trtede. ¹⁸ ?X nike drtwr ngr natqdeng 'mzli kx mrbcne?' Trkrlzkuu da lc tqpile." ¹⁹ Krlz Jiszs kx suti drtwrgr nzveati-krbzkrle bade, sc tqrpipemle kx, "Rpibo kx 'mzli kx mrbcne x trnamcwamu ninge, zbz sa namc-mouamu ninge.' ?Da kc tqveati-etramu nide lc? ²⁰ Da angidrtx lc napibo bamu. Lr nrlc sa na-abrtzlvzlr da kc nawaisr-ngrdr ninge. A' drtwrmu sa navztx zlwz x nayrniamu. A' nzyrni-krmu sa nalrtipxle nzabrtz-zvz-krmu. ²¹

²¹ "Na-apule mzli kc olvz narmc-ngrde mz doa. Mzli lc drtwrde vz murde sc tqkrlzpebzle mzli r nzetqkr drtqde. A' mz nibr nzrmika-krde, mrbrititrpe drtwrde nzetqkr drtqde, murde drtwrde elalz-ngrm doa kc mzte tzmc. ²² Mz nzmu-krde lcde, mzli ka drtwrmu vzpe. A' sa namc-moux nimu mzli kc natulz-mou-ngrne mz nzbzngr, x nabzmu sa na-abrtz zlwz. X trpnzngr kx narkatpxbz nzabrtzngr lc bamu. ²³ Da angidrtx lc napibo bamu. Mzli lcpwz trpengr nzrlx-krmamu da bange. A' krlzamu nzrlx-ngrbz da mz Trtenge, murde da kznike rlxtibzmu bade mz zmatq r drtqnge, sa na-angidatilie. ²⁴ A' trgalr da kx rlxtiamu mz zmatq r drtqnge. Mz nzmu-krde lcde, rlxamu da x sa na-angidati Gct, murde nabzmu na-abrtz zvz." ²⁵

Nzodatingr Zmatq Ngr Nrlc

²⁵ Jiszs rpi-mople bagr kx, "Krlzmle mzli ka, ryapwpxbo mz nzycmne-ebzpxngr. A' mzli lc navztrp trpengr nzycmne-ebzpx-krbo da, murde sa naycmnetr-zpwxpe-ngrbo Trtenge bamu. ²⁶ X mzli lcde, trnarlx tipou da kx suti drtwrmu mz Trtenge, a' narlxpebzmu da bade mz zmatq r drtqnge. ²⁷ Murde Trtenge mrlzti-zlwzle nimu mz nzmrzti-krmu ninge x nzlxngiti-krmu kx vzpxmc bade. Delc, tqsutigr drtwrde nzrlx-angidrpe-krbzmu da bade. ²⁸ Eu, vzpxmc mz Trtenge x vzomc mz nrlc. X mzli ka narkalzpe-mopwc' x nayzlupebo bade."

²⁵ **16:17** Jon 16:5, 10 ²⁶ **16:20** Sam 30:11 ²⁷ **16:24** Matiu 7:7-8, 11; 21:22; Luk 11:9-10; Jon 14:13; 15:19

²⁹ Rpibzkr bade kx, “Mzli ka tr-rycmne-ebzpxpewq da, a' sc tqryokaetipx-angidrpeq drtwr ngrde. ³⁰ X sc tqkrlzpekr kx krlzq da amrlx, murde krlzq nzayzlu-ningr nike yc mz drtwrgr, a' tr-rlxtikapzkr. Mz nzmu-karde lcde, sc tqlxngitipekr kx vzpx-angidrme mz Gct.” ³¹ Rpim Jiszs bagr kx, “A' nzrlxngiti-krmu nrgobe mzli ka. ³² Murde koma mz nrlckxbq nimu kc tqmwxlpeamu x tqngrlr-lxblrpeamu mrnyzmung. Mzli lcde, sa namncpex esz'-krnge mz nzodaline-krmu. A' trnamnc-angidrwxu esz'-krnge, murde Trtenge sc tqmnc-zvzm bange. ³³ Krlc tqpipx-pnz-ngrbo da lcng bamu, murde nabzmu naycngr nrwx, mz nzaxvctr-lzbq-krmamu bange. Kxmule-esz' lr nrlc sa na-atrkatilr nimu, a' bzkq mwxlramu, murde odatipex zmatq ngr Setzn mz nrlc.”

17

Nzkrka'kr Jiszs Mz Nzngini-krde Nardr Pris Ngugu [◊]

¹ Mz nibr nzalvztrngr lcng, Jiszs obqtxlz Heven mz nzkrka'ngr. X sc tqrpipebzle mz Trtede kx,

“Trte, mzli r nzbz-krnge x nzylu-mou-krbo bam, delc tqkrlzpebzle. Aelwapxngr nzmyalz-krnge mz nzbz-krnge, murde nzbz-krnge naaelwapx-ngrde nzmyalz-krm. ² Aprcm bange zmatq, murde leplz amrlx namnclzmqng bange, x nakabo nzlungr kxboi mz leplz nengeng kcng tqamnqtrpe'ng bange. ³ Drtwr ngr nzlungr lc tqboi ngi nzrkrlngr nim, Gct angidr kc esz'txu, x ninge Jiszs Kxnzmcpx kc tqatwzlr-ngrme mz nrlc. ⁴ Aelwapxpe-ngrbo mz lr nrlc nzmyalz-krm, mz nzayrkrpxpe-krnge nzwzngar amrlx kcng tqkame bange. ⁵ Trte, mzli ka vzmi mou ninge Heven, murde natwz-moux me matq-esz'ngr kc tqngi nyg-pnznge mzli kc nrlc trnzwzka-ngrde.

⁶ “Alvztrpe-ngrbo nim mz leplz kcng tqamnqtrpe'ng bange mz nrlc, krkcng tzyrlq-angidrpelr natqm. ⁷ X mzli ka nzkrlngr kx da amrlx kcng tqkatimeng bange nzvzpxmqng bam. ⁸ Murde alvztrpe-ngrbo badr natqm kcng tqkame bange, x nzlxngitipelr natqm lcng. X nzkrln-angidrpelr kx vzpxmc bam x nim kc tqatwzlr-ngrmle ninge.

⁹ “Krka'-ngrtxpo leplz nengeng kcng tqamnqtrpe'ng bange, murde nidr leplz nemqng. A' trkrka'-ngrneu lr nrlc. ¹⁰ X leplz kcng tqngi nengeng nemqng. X leplz nemqng nengeng. X leplz lcng nzaelwapx-ngrdr nzmyalz-krnge mz da amrlx kcng tzalepelr mz nzwztr-krmlr bange. ¹¹ Mzli ka trnamncpewxu mz nrlc, a' na-amnctxpwc'ng nidr mz nrlc mz nzvzpe-krbo bam. Trte, nim tr-esz'ngr. Delc acuve-angidrbz leplz lcng mz zmatq ngr drtqm kc tqkame bange, murde naesz'ting da kc tqwaiki nzesz'ti-krgi. ¹² Murde mz nzmnnc-krbo badr mz nrlc ka, sc tqacuvepex nidr mz zmatq ngr drtqm, x trpnzngar nidr kx mrbr, a' ngi txpwz doa kx vz-nqblqle nqmq ngr nzodangr, mz nzatutr-krde Nzryrngrkxtr. [◊]

¹³ “Mzli ka navzpebo bam. X mzli kc tqmnc-ngrbo badr mz nrlc, ryapwxbo badr da kxkqlu, murde nzabrtzngr angidr nayc zvz mz nabzdr. ¹⁴ Alvztrpe-ngrbo badr natqm, x nzlxngitipelr. Mz nzmu-karde lcde, nzpxtxpxngr lr nrlc nidr, murde drtwrdr badr lr nrlc tresz'tipeu. Da kc tqwai-kzx trnzngini-krpwc'u lr nrlc. ¹⁵ A' tr-rlxtipwc'u nzkatxpx-krm nidr mz nrlc, a' okatr nidr murde ma tzvecpx-lzbqng mz nzlxngiti-krdr ninge, mzli kc Setzn kc Tqdrka'ngr tqatrkti-ngrde nidr. ¹⁶ Eu, da

kc tqwaix, drtwrgr badr lr nrlc tresz'tiu, drtwrdr badr lr nrlc tresz'ti-kzu. ¹⁷ Alqngi nidr x atrbz nabzdr mz da angidr kx vzpxm mz natqm.

^{☆ 18} Murde atwzlrpx-ngrne nidr mz nrlc, da kc tqwai nzatzlrl-krme ninge mz nrlc. ¹⁹ X rlr-lzbq-ngrbo bam murde navqty kz drtqdr nzrl-lzbq-krbzlr.

²⁰ “Trngi-txpwzu leplz nenge kcng mzli ka tqkrka'-ngrne. A' krka'-kz-ngrne doa amrlx kx nalxngitilr ninge kalr, mz nzxlr-krdr Nrpakxmrlz.

²¹ Trte, krka'-ngrne kx naesz'ting mz nzmnc-krdr, da kc tqwai nzaxvctr-lzbq-krme bange x na-axvctr-lzbq-krmc bam. X na-axvctr-lzbq-kzpinqn bagi, murde lr nrlc nalxngitilr kx atwzlr-ngrme ninge. ²² X me matq Heven kx kame bange, kape-kzpo badr, murde naesz'ting, da kc tqwai nzesz'ti-krgi. ²³ X mncpxmc badr x mncpxme bange, murde naesz'ti-kzng amrlx ngrdr. X mz nzesz'ti-krdr lc nakrlzngr lr nrlc kx atwzlr-ngrme ninge, x mrlztiq leplz nengeng da kc tqwai nzmrlzti-krm ninge. ²⁴ Trte, suti drtwrge kx leplz nenge lcng namnc-kzkr badr mrkc namnc-ngrne Heven. Murde namclr me matq-esz'ngr kc tqngi nyznge tqka-pnzme murde mrlztiq ninge mzli kc nrlc trnzwzka-ngrde.

²⁵ “Trte, nqmq krm tubq-esz'ngr. X kxmule-esz' trnzkrlzu lr nrlc nim a' krlzx nim, x leplz nengeng amrlx nzkrlzlr kx atwzlr-ngrme ninge.

²⁶ Aelwapxpe-ngrbo nim badr mzli ka, x sa na-aelwapx-kzpo nim mz krkcng nalxngiti-kzlr ninge kalr. Murde nidr amrlx ngrdr na-aelwapx-ngrbzlr mz leplz nivz kcpwz tqmrlzti-ngrn ninge. X namncpx-kzpc' badr mz Mqngrkxtr kc namncpxm mz nabzdr. Eu, angida.”

18

Nzrlolvzngr Jiszs

Matiu 26:47-56; Mak 14:43-50; Luk 22:47-53

¹ Mz nibr nzkrka'kr Jiszs, nigr kc tqvzpe-moukr, x tqkawipekr Nabzlwa Kidron mz nrlarde kc. X sc tqprtrpekr mz nrlanc olivi. ² Mrlcde krlz kz Judzs kc tqamwale Jiszs, murde vz-zvzkr badr Jiszs mrlcde. ³ Zbz, sc tqvzmipebz Judzs kcng dzbe ncbl nzung. Kzdq dzbede lc ngi ncbl ngr vea ne Rom x kzdq kz ngi pulis ngr Mangr-nzangiongr. Ncbl lcng nzatzlrxngr kxnzetu rdr pris x Farzsi. Nzngxlunebzng mz dxpu x lam, x nzrtwzbzng toki r vea x dalr nzotangr. ⁴⁻⁵ X Jiszs krlzpele da amrlx kcng nawaisr-ngrde. Zbz sc tqvzpebz badr, tqrpipebzle badr kx, “?Neke tqrtangrtiamu?” Nzrpibzlr kx, “Jiszs kc Naszret.” Rpibz Jiszs kx, “Ninge kape.” ⁶ X mzli kcpwz, sc tzvz-teblqpeng x nidr amrlx ngrdr nzpwekaong mz drtc' mz zmatq ngr Jiszs. ⁷ Jiszs sc tqvea-mopwz badr, rpibzle kx, “?Neke tqrtangrtiamu?” Nzrpimopwzlr kx, “Jiszs kc Naszret.” ⁸ Rpibzle kx, “Pipebo bamu kx ninge ncbl lcde. Nzmu kx tqotimamu ninge, leplz nenge lcng navztxng.” ⁹ Krle tqycmne-ngrde lc murde nzkrka'-krde na-atukztr-zpxle. Krle mz nzrpimopwzlr kx, “Trte, trpnzngr leplz nengeng kx mrbr.” ^{☆ 10} Zbz kzdq nigr, Saemon Pita, ycbz bade kc toki r vea, yrlqbzle mz kxnzawz ne Nardr Pris, lakitpxbzle nrdrqde kxrtc. Kxnzawz Ic drtqde Malkzs. ¹¹ A' rpibz Jiszs mz Pita kx, “Toki r vea scm alvco mou mz bxli rde. Murde rlrpxpe-ngrne nrkrdrqng nzaetq-ngrbz mz nzvz-nqblq-krde me pnz drtvr Trtenge.” [☆]

^{☆ 17:17} Sam 119:142; Jon 1:14; 14:6 ^{☆ 18:9} Jon 17:12 ^{☆ 18:11} Matiu 26:39; Mak 14:36; Luk 22:42

¹² Zbz ncblo kcng tqvzmibz Judzs nzlolvzlr Jiszs x nzpebzlr mqde. ¹³ X sc tzvzmipe-kaipzlr mz Kxetu Anas, murde nide kzdo Kaefzs kc tqngi Nardr Pris mz yiz lcde. *

¹⁴ Kaefzs nide kc tqrpi-pnzbzle mz kxnzetu r lr Jiu kx takitrde ncblo dq naesz' nabz-ngrde leplz amrlx. *

Pita Rpile Kx Trkrlzleu Jiszs

Matiu 26:57-58, 69-70; Mak 14:53-54, 66-68; Luk 22:54-57

¹⁵ Zbz nigr mz Saemon Pita vz-nqblqbzkr Jiszs. Kx krlbzkr kc ma nyz Nardr Pris, olvz kxaclve naonrx kc sc tqglxpele ninge. X sc tqlvxpxpemle naonrx bange mz nzvztr-kz-krpo mz makoa mrkc tzyrlwrtr-ngrbz. ¹⁶ X rlxti-kzpo bade nzvztr-krm Pita. X rlr-ngrmle murde krlzti-lzbqkr ncdr Nardr Pris. ¹⁷ X rpibz olvz kc tqacalve naonrx mz Pita kx, “?Ni-kzp dq ncblo nede?” Rpibz Pita kx, “Trtingr.” ¹⁸ Mz nrlckxbq lc nrlc bao. X kxnzawzng x pulis ngr Mangr-nzangiongr nztelvzlr kc nyr, x sc tzmulqpe-ngrdr. Zbz Pita kc tqvzpe-kzpz, tzmulqpeng badr nyr.

Jiszs Aveatr Anas

Matiu 26:59-66; Mak 14:55-64; Luk 22:66-71

¹⁹ Mzli lcde Anas kc tqngi kai Nardr Pris, aveatr-ngrde Jiszs mz nzalvztr-krdeng x ncblo nedeng. ²⁰ Rpibz Jiszs bade kx, “Ycmne-zvzbo mz leplz me nzyrlwrpx-lxblrngr, x nzalvztr-krngeng amrlx twztypo mangr-nzkrka'ngr x Mangr-nzangiongr mrkcng tzyrlwrpx-lxblrngr lr Jiu. Trpnzngr mzli kx alvztr-kapq-ngrne. ²¹ ?Memule tqvea-ngrme bange? Veatibz mz leplz kcng tzlalztqmqng bange nike pibo badr. Sa napibzlr nike pixng.” ²² Kx pibz Jiszs natq lcng, kzdq pulis ngr Mangr-nzangiongr sc tqetakrpebzle nar Jiszs, tqrpipebzle kx, “?Kxmu nzycmne-ngrbz mz Narde Pris lc tqycmne-ngrn?” ²³ Rpibz Jiszs kx, “Nzmu kx tqpix dq da kx vz-rbr, plztxpxbz mz leplz amrlx da lcde. ?A' nzmu kx tqngi da angidr kc tqpix, nike tqetakr-ngrbzme narnge?” ²⁴ Zbz Jiszs sc tqatwzlrpe-ngrbz Anas mz Kaefzs kx ngi Nardr Pris, mz nzvea-krbzle bade. Mzli lc, mq Jiszs sc tzpebepz.

Pita Pokia-mou-ngrde Kx Trkrlzleu Jiszs

Matiu 26:71-75; Mak 14:69-72; Luk 22:58-62

²⁵ Mzli kc Pita tquturbe-ngrde mz nyr, nzrpibz kzdung leplz bade kx, “?Da zpxw kx trnginipuu ncblo nede?” A' Pita pokia mou, rpibzle kx, “Trtingr trnipwc'u.” ²⁶ Kzdq kxnzawz-nrbalq ne Nardr Pris, mzlede krkc tqlakipxbz Pita nrardrtqde, rpibzle mz Pita kx, “Da zpxwtx nim dq kz, murde nim kc tqmcx mz nrlanc.” ²⁷ A' Pita pokia-mopwz, rpibzle kx, “Trtxpnzngr! Trnipwc'u la tqpiq.” X mzli kcpwz kio kc tqkya'pe kz, da kc tqwai nzpnpnzkr Jiszs le.

Jiszs Nzvzmibz Mz Paelzt

Matiu 27:1-2, 11-14; Mak 15:1-5; Luk 23:1-5

²⁸ Mz nibr nzycmne-krdr badr Jiszs, kxnzetu r lr Jiu drtwrdr sc tqesz'tipe mz nznibq-krdr nide. X sc tzrkalzpmemqng badr ma nyz Kaefzs, mzli kc tqprtz-ngrm paglxnrlc. X sc tzvzmipelr mz ma kxetu nyz Paelzt, kxetu

* ^{18:13} Mzli kc Jiszs tqngini ngrde doa ncblo, Anas sc tqngi Nardr Pris. A' mz yiz kc 15 AD gzpman ngr Roman sc rtulrtr-ngrbzle mz Anas nzaprpx-lzbq-krde. X nzmcpx-alzulr kzdode Kaefzs, kc tqyrlzibzle inyx Anas, mz nztekqtr-krde nide. Mzli kcng tqalvzrngr Jiszs x tztqlvztr-ngrde mz kros, Kaefzs nide Nardr Pris. A' mz nzvz-nqblq-krde Lou sc Mosis, Anas nzmu nangi nide Nardr Pris nakrlzbzle nzbz-krde. Mz drtwr lr Jiu, Anas sc tqngibe Nardr Pris x Kaefzs mnclzbz mz zmatq ngrde. Mc kz ‘Nardr Pris x Kaefzs’ mz Nzalvztr-ngrng Kxmyapxbz. * ^{18:14} Jon 11:50

r lr Rom. Lr Jiu trnzdwatrpwzung ma nyzde murde ma tqbatrpzle badr trnztakitr-krdru mz nzprtrngr mz nzangiongr mz Nzamyangr. ²⁹ Mz nzmu-krde lcde, Paelzt kc tqngi Gavzna ngr Judiz, sc tqvzpxpebz badr, tqrpipebzle badr kx, “?Nike atrka mrlx lc?” ³⁰ A' nzrpi-txpwzlr kx, “Nzmu nanginide ncblo kxmrlz, trpnzngr nzaprc-krbzkrle mz mqm.” ³¹ Rpibz Paelzt badr kx, “Vzmiamu x ayrplapxamu nide mz nzvz-nqblq-krde Loukxtr scmu.” A' nzrpibz kxnzetu r lr Jiu kx, “Eu, a' trpnzngr scgr zmatq ngr nzrnibqngr leplz.” ³² Da lc prtzm, murde na-atutrle nzrpipxkr Jiszs kxnamu nzbz-krde.

†

³³ Paelzt vztr mou ma nyzde, kglele Jiszs x sc tqveapebz, rpibzle kx, “?Myx kxmule, nim king r lr Jiu?” ³⁴ Rpibz Jiszs kx, “?Nzvea-krme lc vzdzm mz drtwrm o nzpibz kzdung leplz bam?” ³⁵ Rpibz Paelzt kx, “?Mz drtwrm ninge lr Jiu? Lr mrnyzmqng x kxnzetu rdr pris ngrmqng, nzaprcmlr nim bange. ?Pim bange, nike rtrngzti-rbrbzme?” ³⁶ Rpibz Jiszs kx, “Trnipc'u king r nrlc ka. Nzmu nanginige king r nrlc, ncblo nengeng nzkrlzlr nzotangr mz nzarlapx-krdr ninge mz mq lr Jiu. A' trtingr, trnipc'u king r mrka.” ³⁷ X rpi-mopwz Paelzt kx, “?Mz nzmu-krde lcde, ni-zpwxm king?” Rpibz Jiszs kx, “Eu, sa tqmrlz nzrpi-krm ninge king. Dekc tqvzngrmc x mzke' tzmc-ngrde mz nrlc, murde naycmnetr-ngrne da angidr. X doa amrlx kcng tzmrlzbz badr da angidr sa navz-nqblq-angidrlr ninge.” ³⁸ Rpibz Paelzt kx, “?Nike tqngi da angidr?”

Paelzt Rlrpx-ngrde Nzbzkr Jiszs

Matiu 27:15-26; Mak 15:15; Luk 23:13-25

Bbz Paelzt vzpx-mopwz mz lr Jiu, sc tqrpipebzle badr kx, “Trpnzngr da kx rmctitrpo nanibqngr mrlx lc. ³⁹ A' mz nzvz-nqblq-krde nqmq krmu, mz Nzamyangr kang kqlu rlrpx-ngrbo kc ncblo kxpresin. ?Myx kxmule, suti drtwrmu nzrlrpx-krbo bamu King rmu lc?” ⁴⁰ Kx nzxlrbzlrle, sc tznemipelr nzrpi-krdr kx, “Trsutiu drtwrgr mrlx la. A' kx suti drtwrgr Barabas.” Barabas lc tqmnc mz presin murde nide ncblo kx pna zvz da x prtr mz dzbede kc tzrpilr namaszlrpx-ngrdr gzpmanc ngr Rom mz nzmnc-krdr Israel.

19

¹ Mz nzmu-krde lcde, sc tqrpipebz Paelzt mz ncblo ngr vea nedeng nzvzmi-krdr Jiszs mz nzriklangr. ² X nzngrlelr kc nqvi nzku nangi kraon x nzalaobzlr mz nar Jiszs. X nzakq-kzlr nzkq kxprpol, murde kala lcde takitrde king. ³ X sc tzxtrngalvztitrpelr nide, nzyrngzobzng bade x nzrpibzlr kx, “Nim la, King r lr Jiu! Rlxtrikr kx nzmnc-krm naboi!” X sc tztppebzlr narde.

⁴ Paelzt vzpx-mopwz mz dzbe lr Jiu kcng, sc tqrpipebzle kx, “Vzmipxmc mrlx lc bamu murde nakrlzamu kx mz drtwnge trpnzngr da kx vz-rbrtrpz bade kx nanibq-ngrde.” ⁵ Bbz Jiszs kc tqvzpxpebz, kraon r nzku kc sc tqycobep mz narde, x sc tqkqbe-ngrde nzkq kc tqprpol. Sc tqrpipebz Paelzt badr kx, “Krlc ncblo,” murde rpile nayckqti drtwrdr Jiszs. ⁶ A' kxnzetu rdr pris x pulis ngr Mangr-nzangiongr, kx nzmclr kc nide, sc tzrpipebzlr kx, “Tqlvztr mz kros! Tqlvztr mz kros!” Murde nzkrlzlr kx trpnzngr scdr zmatq ngr nzrtqlvztr-krdr nide. Rpibz Paelzt badr kx, “Vzmiamu esz'-krmu x tqlvztramu mz kros, murde mz drtwnge trpnzngr da vz-rbrtrpz bade.”

† ^{18:32} Natq Jiszs mz Jon 3:14, 8:28, x 12:32-34 drtwr ngrdr kx nabz mz nzrtqlvztrnegr nide mz kros. Krlc kxmu nzrnibqkr lr Rom leplz kx nzvz-rbrng.

⁷ Nzrpibz lr Jiu kx, “Mz Loukxtr scgr takitrde nzbz-krde, murde rtulrtr-lzbq mz nzngini-krde Mrlx Gct.” ⁸ Kx xlr Paelzt natq lcng, sc tqmwxlr-zlwzpe. ⁹ Vzmitr-moule Jiszs ma nyzde. X sc tqrveape-mopwz bade, rpibzle kx, “?Myx me vzkipx-zpwxme?” A’ Jiszs anabu txpwz, trayzlupwzleu natqd. ¹⁰ Rpi-mopwz Paelzt bade kx, “?Trsutiu drtwrm nzycmne-krme bange? ?Trkrlzwq kx rngiscnge zmatq mz nzrpipx-krnge nzarlapxngr nim o nzrtqlvztrngr nim mz kros?” ¹¹ Rpibz Jiszs kx, “Trpnzngr scm zmatq ngr nzaclve-krm ninge, a’ ngi txpwz kx kabz Gct bam. Mz nzmu-krde lcde, leplz kcng tzaprcbzlr ninge bam nzetukr alwx ngrdr myaszpxle alwx ngrm.”

¹² Kx xlrbz Paelzt natq Jiszs lcng, sc tqrtangrpe lrpzki kx na-arlapx-ngrde nide. A’ nzrpibz lr Jiu kx, “Nzmu na-arlapxq mrlx lc, trwztrpwzmeu mz King r Rom. X sa narlwa-ngrbzkr nim bade, murde doa kx rtulrtr-lzbq nzngini-krde king rnzlvzole King kc Rom.” ¹³ Kx xlrbz Paelzt natq lcng, sc tqvzmipx-mopwzle Jiszs yz x tqwxbuo mou mrkc tzrpi kx doa vz-rbr o trtingr, tzrpibz *Rplz Kxmnpz'* x mz natq lr Jiu nzrpibz *Gabata*. ¹⁴ Krlc nourla ngr zbz kc tzoliqtingr Sabat. X Paelzt sc tqxtrngapebz mz lr Jiu mz nzrpipx-krbzle kx, “Krlc king rmu.” ¹⁵ A’ sc tznemipebzlr, nzrpipx-krbzle kx, “Vzmipx x tqlvztr mz kros!” A’ rpibz Paelzt kx, “?Suti drtwrmu nzrtqlvztr-krnge king rmu mz kros?” A’ nzrpibz kxszetu rdr pris kx, “Trpnzngr king rgr, a’ ngi txpwz King kc etu mrkc Rom!” ¹⁶ Zbz, Paelzt sc tqmetxpebz badr, x sc tqrpipebzle mz ncblo ngr vea nedeng kx natqlvztrlr Jiszs mz kros.

Jiszs Nztqlvztr Mz Kros

Matiu 27:45-56; Mak 15:33-41; Luk 23:44-49

¹⁷ Mz nzmu-krde lcde, ncblo ngr vea kcng nzrkamilzmlr Jiszs Jerusalem. X sc tzrtulrtrpe-ngrbzlr nzrglq-krde kros ngrde mrkc natqlvztr-ngrdr nide. X glqbzle mz newz kc tzrpibz *Bekrlz*, murde nzobq-krde apule bekrlz. Drtqde mz natq lr Jiu *Gclgata*. *

¹⁸ X mrlcde, sc tzaopxpebzlr lrpz scde x tztqlvztrpelr nide mz kros. X nztqlvztr-kzlr ncblo kxszetrang nzling taplxsr nrlar Jiszs. ¹⁹ Mz nzaelwapxngr da kc tqbzng Jiszs, Paelzt yrle kcng natq x nzatu mrkc tztqlvztr-ngrdr nide mz kros. Nzyr kx,

JISZS KC NASZRET, KING R LR JIU.

²⁰ Nzryrngr lc nzrlwx lr Jiu kxszetrang, murde mrkc tqdoo-ngrm Jiszs mz kros, trycpwzu rlru Jerusalem. Nzryrngr lcde nzyr mz natq lr Jiu, mz natq lr Rom kcng tzaclveng, x mz natq lr Grik kc tzrklzlr leplz kxszetrang.

²¹ A’ kxszetu rdr pris drtwrdr trkabz mz Paelzt murde trnzlxitilru Jiszs nzngini-krde king rdr. Zbz sc tzrpipebzlr mz Paelzt kx, “Trmrlzu nzyr-krm ‘King r lr Jiu,’ a’ kxnamu nzyr-krmle se, ‘Mrlx lc rpile kx nide King r lr Jiu.’”

²² A’ rpibz Paelzt kx, “Nike yrpex, kxnamu nzyc-krde lape.”

²³ Mz nibr nztqlvztr-krdr Jiszs mz kros, ncblo ngr vea kcng nztwlzlr lrpz sc Jiszs, x sc tzpesalitipelr ncte pwx, murde nataplxs-ngrdr ncte kcng. A’ nzkq scde kxboi yc txpwz murde esz’ti. ²⁴ X sc tzrpipelr kx, “Bzkq pesalitiku nzkq lc, a’ na-ayrletiku daes mz nzkrlz-krgu neke mz nigu kx narngisc.” Mz nzmu-krde lc, atutrlle Nzryrngrkxtr kc tqrpile kx, “Nztwlzlr lrpz scnge x nzakiti-lzbq-ngrdr; x nztwlz-kzlr nzkq kxboi scnge nzayreltilr daes mz nzkrlz-krdr doa kx narngisc.” ^{25a} Da lcng nzale ncblo ngr vea kcng.

Jiszs X Lxede

^{25b} Mzli lcde, olvz kx nztu-aepztrpzng mz kros ngr Jiszs nidr seleng, lxe Jiszs, x ilede angidr, x kzdq kz iledr Mxri kc tqngi olvz r Alfizs Klopzs, x Mxri

* ^{19:17} Mz natq lr Rom, *Bekrlz nzrpibz Kalvzri*. ^{19:24} Sam 22:18

kc Makdala. ²⁶ Jiszs mcomle nztulz-krbzkr ncdr lxede. ²⁷ X sc tqrpioemle mz lxede kx, “Lxe, mrlxm lape.” ²⁸ X rpio-kzple bange kx, “Lxem lape.” X abzo mzli lcde, sc tqvzmipex nide mz ma nyznge.

Nzbzkr Jiszs

Matiu 27:45-56; Mak 15:33-41; Luk 23:44-49

²⁸ Jiszs krlzpele kx nzwz-krdeng amrlx kcng tqkabz Trtede yrkrpxpe. X mz nzatutr-karde Nzryrngrkxtr, sc tqrpipele kx, “Drtwrnge brlxkz.” ²⁹ Kx nzxlrbz ncblo ngr vea kcng nzycmnekr Jiszs, sc tzotipelr kc lrpz, nzpetrlr mz neni, nzleolr mz waen kxrkx, x sc tzkalzpebzlr mz nao Jiszs. ³⁰ Kx abztrpz Jiszs waen kc, sc tqrpipele kx, “Nzwz-krnge yrkrpxpe.” X biolle narde x sc tqrlrpe-ngrbzle mqngrde mz Gct mz nzbz-karde. ³¹

Blrir Jiszs Nzlu

³¹ Zbq lc zbq ngr nzoliqtingr Sabat. Zbz kxnzetu r lr Jiu sc tzrlxtipebzlr mz Paelzt nzrlr-krbzle nzrtavxi-ngrbz nanclo kcng tztqlvztr mz kros, murde nabz-aning, x nayokaeomlr mz kros mz nzyrtzmq-krdr nidr. Murde Loukxtr scgr tr-rlrpx-ngrdeu namz nzdoo-krmle mz kros nzkrlz-krbzle milzpq, myapxbz mz Sabat. ³² Kx rlrpe-ngrbz Paelzt le, sc tzotipe ncblo ngr vea nzrtavxi-ngrbz nancdr. Nzoti-kailr kzdq ncblo kcng tztqlvztrng badr Jiszs x nzoti-moulr krali. ³³ A' kx nzkrlzbzlr Jiszs, nzmclr nzbz-karde. Dekc trnztavxipe-ngrpwzlr nancde. ³⁴ Kxmule-esz', a' kzdq ncblo ngr vea kcng luplxtipelr blrir Jiszs, x mzli kcpwz yrlepym mrlcde mepyr x lue.

³⁵ Da lcng tqyapwxibo ngi da angidr, murde mctx-angidrx. Delc tqpi-ngrbole bamu murde nalxngiti-kzamu Jiszs Kxnzmcpx. ³⁶ Trnztavxi-ngrdru nancde murde na-atutr Nzryrngrkxtr kc tqrpile kx, “Trpnzngnr nrvr ngrdeng kx nzavxi.” ³⁷ X kzdq kz Nzryrngrkxtr rpile kx, “Leplz sa naobqlvzlzlr ncblo kc blrirde tzluplxtr.” ³⁸

Nzyrtzmqngr Jiszs

Matiu 27:57-61; Mak 15:42-47; Luk 23:50-56

³⁸ Kzdq ncblo kx lxngitile Jiszs drtqde Josip kc Arimatia. A' traewapx-ngrdeu nzlxngiti-karde Jiszs, murde mwxlrtile kxnzetu r lr Jiu. A' ncblo lc vzbz mz Paelzt, sc tqrlxtipebzle nzkao-krmle nrkrdrtr Jiszs mz kros mz nzyrtzmq-krdele. Zbz sc tqrlrpe-ngrbz Paelzt nzkao-krmle. ³⁹ X Nikodimzs kc mzli kc kai tqvzbz mz Jiszs mz nrlckxbq, nzvzng ncdr Josip. ⁴⁰ Nikodimzs lc twzbzle dalr nzaelungr namz ngr Jiszs, nzmrlepu-krdr takitr kilo kxnzpn-tq (30). ⁴¹ Zbz sc tzkaopemlr namz ngr Jiszs, nzaelulr da lcng, x sc tzbxtipelr lrpz, mz nzvz-nqblq-krde nqmq krgr mz nzyrtzmq-krgr namz. ⁴² Mrkc tztqlvztrngr Jiszs mz kros, yc kc elr nabznpx. X yc kc elr gq kxmrna kx nayrbqpx-ngrm namz ngr leplz, a' trgalr kx yrbqpxm elr. X sc tzyrlqtrpelr namz ngr Jiszs mz gq lcde, x nzalqlitrpzlr kc rplz kxetu nzpqrtr-ngrdr naonrx. Murde mzli kc milzpq Nzamyangr kc tqabzope. X mz zbq lc Lou sc Mosis tr-rlrpx-ngrdeu nzwzng, murde Sabat ngi zbq kxnzamati.

20

Jiszs Tulz-mop Mz Nzbzng

Matiu 28:1-10; Mak 16:1-8; Luk 24:1-12

³⁸ **19:26** Jon 13:23 ³⁹ **19:28** Sam 69:21; 22:15 ⁴⁰ **19:30** Sam 31:5 ⁴¹ **19:31** Lou Kcpwz 21:23
³⁹ **19:36** Nzrlasngr 12:46; Nzqqlu-krdr 9:12; Sam 34:20 ⁴² **19:37** Sekaraea 12:10; Nzaelwapxng
1:7 ⁴³ **19:39** Jon 3:1-2

¹ Mz Sade mz nourla kxtopwz, Mxri kc Makdala sc tzolapeng badr kzdu-kzng olvz mz gq kc tqyrbqngr namz ngr Jiszs, mz nzaelu-krdele. Kx nzkrlzbzlr mrlcde, sc tzmcpelr rplz kc etu nzalqlipxpe. ² Zbz sc tqngrlrpem bagr, ncdr Saemon Pita, sc tqrpipemle bagr kx, “Namz ngr Kxetu rgu nzglqtxpxpem mz butqbr kc, a' trkrlzpekru me nzyrlq-ngrde.” ³ Kx xlrbzkrle sc tqngrlrpekr ncdr Pita mz gq kc. ⁴ Nzrkalz-krmgr kxesz', zbz sc tqngrlrszpx Pita x krlzpe-kaipo mz butqbr kc. ⁵ Yrngzobo mz naonrx x tcngztrpo, a' trdwatrwxu elr. A' mcx lrpz kcng tzbxtile. ⁶ Mz nibrnge Pita kc tqngrlr-atebz x ngrrltr rlsru mz nabz gq kc, x mc-kzle lrpz kcng tzbxti Jiszs yrbqtxnepe. ⁷ X mc-kzle lrpz kc tzbxti narde nzbu-esz'ngrtrpe-ngrbz mz lrpz kc-kzng. ⁸ Zbz dwatr-kzpo. Mc-kzx lrpz kcng, a' namz ngr Jiszs tryrbqpeu. X sc tqlxngitipex kx Jiszs lupe mou mz nzbz-krde. ⁹ Kxmule-esz' a' krlzmle mzli lc trkrlz-angidrkakr natq kcng tzyro mz Nzryrngrkxtr, kx Jiszs sa nabz, a' na-atulz-mop mz nzbz-krde. ¹⁰ Mz nibrde, nigr amrlx sc tqyzlupekr mrkcng tqmnc-ngrgr.

Jiszs Adcpx-lzbqbz Mz Mxri Kc Makdala

¹¹ Mxri kc Makdala yzlu mou mz gq lr Jiszs, sc tqyrnitrpebz yz, tqtcngztrpe elr. ¹² Kx tcngztrpzle kc, mcle kcng enjrl li nzkqng nzkq kxprki. Wxbuom kc mrkc tqobqki nar Jiszs x wxbu kc mrkc tqobqki nanycde. ¹³ Nzrpibzlr bade kx, “?Mxri, nike tqyrni-ngrn?” A' rpibzle kx, “Yrni-ngrne namz ngr Kxetu rnge nzglqtxpe, a' trkrlzwxu me nzayrbq-ngrde.” ¹⁴ Zbz Mxri lxlvpxm, x sc tqmcpele Jiszs nztu-krbzle bade. A' trglxleu nide. ¹⁵ X sc tqveapebz Jiszs bade, rpi-kzpze kx, “?Nike tqyrni-ngrn? ? Neke tqrtangrtiq?” Rpibz Mxri bade kx, “Nzmu kx tqqlqbzme namz ngr Jiszs mz kzdq nrlc, pim bange murde naotix.” Krlc tqycmne-ngrbzle lc murde rpile kx nide ncblo kx wz mz nabznpx kc. ¹⁶ Rpi-mopwz Jiszs bade kx, “Mxri!” Mxri kx lxlv-mopwzle kc, sc tqglx-atele Jiszs. X rpile nakaplzle nide. X mz nzbilvz-krde nide, rpibzle kx, “Raboni!” Mz natq lr Jiu Raboni drtwr ngrde Kxakrlz rnge. ¹⁷ A' rpibz Jiszs bade kx, “Bzkq maletrpe' ninge, murde trvzdzkapc' mz Trtenge. A' navz-kaipo bade murde naesotr-kzpa'mu bange. A' vzbz mz mzlengeng mzli ka, x pibz badr kx, ‘Navzdz-kaipo mz Trtenge kc tqngi kz Trtemu, nide kc tqngi Gct rnge x Gct rmu.’” ¹⁸ Zbz Mxri kc Makdala sc tqvzpem bagr, x sc tqpipemle nzmc-krde Jiszs kc tqlupe kx, pi-kzple bagr natqdeng.

Jiszs Adcpx-lzbqbz Mz Kzdung Ncblo Nedeng, A' Tomas Trprtrpwzu Matiu 28:16-20; Mak 16:14-18; Luk 24:36-49

¹⁹ Mz Sade lcpwz mzli kcpe milzpq, yrlwr-lxblr-ngrgr kc ma, x amqngikr naonrx ngrde, murde mwxlrtikr kxnzeti r lr Jiu. Mzli lcde pwrkilvc-ngrgr nztupe-krm Jiszs bagr, x rpimle bagr kx, “Krka'-ngrne kx Gct na-amnc-zpxle nimu.” ²⁰ Mz nibr nzycmne-krmle bagr, sc tqaewape-ngrmle nabzlvz r mqde x blrirde. Kx mc-krleng drtwrgr elatxlzm. ²¹ X rpi-mople bagr kx, “Rlxtix kx namnc-zpxle amu. X atwzlr-ngrne nimu mz nzryapwxtpx-krmu nrpa rnge, da kc tqwai nzatzl-kai-krm Trtenge ninge.” ²² Zbz sc tqvxupemle bagr, x rpimle kx, “Twzamu Mqngkrkxtr. ²³ X mzli ka, krkcng tqipqamu mz alwx ngrdr, ipq kz Gct nidr, a' krkcng tripqwamuu, tripq-kzu Gct nidr.” ²⁴

Jiszs Adcpx-lzbq-mopwz Mz Nzprtrpe-krbz Tomas

^{20:2} Jon 13:23 ^{20:23} Matiu 16:19; 18:18

²⁴ Kzdq nigr kcng nzpnu-esz'-nrade-li (12), Tomas kc kzdq drtqde Lipxm, trprtrpuu bagr mzli kc tqadcpx-lzbq-ngrm Jiszs bagr. ²⁵ Sc tqpipebzkr bade kx, "Mcpekr Kxetu Lod rgu." A' rpim Tomas bagr kx, "Trlxngitiwxu nimu. Nzmu kx tqlxngitipexle, namcx bzmr nilz kcng mz mqde, x nratoki r mqnge narlutr-ngrbo mz bzmr nilz kcng, x mqnge namaletrle blrirde."

²⁶ Mz nibr wiki lc, yrlwr-lxblr-moukr mz ma kx naonrx ngrde nzamqngi. A' mzli lc Tomas sc tqprtrpem bagr. X pwrkilvc-ngrgr Jiszs nztupe-mou-krmle mz mzlirgr. X rpimle bagr kx, "Krka'-ngrne kx Gct na-amnc-zpxle nimu." ²⁷ Zbz rpibzle mz Tomas kx, "Vzm Tomas, nratoki r mqm yrlqo mrlc, x mc nabzlvz r mqnge x maletr kz blrirnge, x bzkq drtwrm abrlzpem, a' lxngitipe nzlu-kr-mopwc'." ²⁸ Ayzlu-ngrbz Tomas natqde kx, "Da zpwxtx! Lxngitipex kx nim Kxetu Lod x Gct rnge." ²⁹ Rpibz Jiszs bade kx, "Rlxngiti-ngrn nzmc-krm ninge. A' sa nangi da kxmrlz zlwz mzli kc leplz kc-kzng nzlxngiti-kzlr ninge, kxmule-esz' trnzmcrlu ninge. Murde sa na-amrlz Gct Trte nindr mz nzabrtzlvz-krde nzetukr nzrlxngiti-krdr."

Nzwzkr Buk Lc

³⁰ Da kxmatq kxkqlu kx ale-kzp Jiszs bagr. A' da lcdeng tryrowxu mz buk lc. ³¹ A' yro-ngrne krlcng, murde nalxngiti-kzamu kx Jiszs nide Kxnzmcpx x Mrlx Gct. X mz nzlxngiti-krmu nide, narmcti-kzamu nzlungr kxboi.

21

Jiszs Adcpx-lzbqbz Mz Ncblo Nzrlimzng

¹ Mz nibrde, Jiszs adcpx-lzbq-mop bagr mz nqlvi r Dxbu Gzlili kc tzrpikzpz Taebirizs. Kxmu nzadcpx-lzbq-krmle bagr nide sele. ² Kzdq zbzq Saemon Pita badr Tomas kc tzrpibz Lipxm, x Natzniel kc mztea Kena ngr Gzlili Provins, x ninge x mzlenge Jemes, x kzdu mou nigr nzling, nigr lcng rlimz mnc-lxblrkr me esz'.

³ Zbz sc tqrpipeb Saemon Pita bagr kx, "Navzplex mz nzmwangr." X rpibzkr bade kx, "Nanginigu." X sc tqvzopekr badr mz bot scgr. Mwakr mz nrckxbq lcde, a' trpnzngr nc kxes' kx mwatikr. ⁴ Zbz mzli kc naprtzpe-ngrm nepi, Jiszs sc tqtpxpebz mz nabz drta', a' trglxkru nide. ⁵ X sc tqrpipebemle bagr kx, "?Doa lcng, trpnzngr nc kx mwatiamu?" A' rpitrpzkr kx, "Trpnzngr kxes'!" ⁶ Rpipx-mop Jiszs bagr kx, "Apooamu br scmu mz nrlar bot kxrtc, murde namwatiamu du nc." Kx apookr kc br scgr, kx vztitrzp blzmr nc le, yangrnagatikr nzveclz-krmgrle. ⁷

⁷ X sc tqrpipebo mz Pita kx, "Krlc Kxetu rgu." ⁸ X Saemon Pita sc tqkalzpemle lrpz scde x sc tqpe-zpxle, murde kalo txpwz mz nzws-krdr. Zbz dwao mz lue, sc tqwrtrpebz mz Jiszs. ⁹ X sc tqvectrpemgr br scgr yrbupxm mz nc, x yatrpgm mepz, murde mrkc tqdwatr-ngrmgr esotrp mepz, takitr mita kx trtqki-esz' (100). ¹⁰ Kx poomgr kc mepz, mckr kc nyr ngr dzpnzng, x ycom elr kcng nc x yctr-kzpz kcng bret. ¹¹ Sc tqrpipebemle Jiszs bagr kx, "Twzmmamu du nc kcng tqmwati-ateamu." ¹² Zbz Saemon Pita sc tqytlupxpe mou mz bot, tqvectrpemgr badr br kc mepz. Nc lcdeng krlzbzle trtqki-esz'-nzpnu-nzlvqn-nrade-tq (153). X kxmule-esz' nc kqlu mz nzpookr br kc esz', a' br scgr trbxngeu. ¹³ Zbz sc tqrpipebemle Jiszs bagr kx, "Vzmamu, mutxnamu." Jiszs vztrpz, kalzmle bret, sc tqakipemle bagr, x wai-kzle nc kc tqbzlu. Mz nzapu-krde kc nigr, trpnzngr mz nigr kx abrl nelzde mz nzrpi-krbzle kx, "?Nim neke?" A' drtwrgr esz'ti mz nzglx-krgr

kx krlc Kxetu rgr. ¹⁴ X krlc nzwrde kratq nzadcpx-lzbq-krm Jiszs bagr, mz nibr nztulz-mou-krmle mz nzbz-krde.

Nzycmnekr Jiszs Ncdr Pita Kxrmnr-ngrbz

¹⁵ Mz nibr nzmu-krgr, Jiszs sc tzvznepeng mz Pita. X sc tqrpipebz Jiszs bade kx, “?Saemon mrlx Jon, nzaodu-krm ninge myaszpxle mrlx lcng?” Rpibz Pita bade kx, “Eu Kxetu, krlzpeq kx mrlztix nim.” Rpibzle bade kx, “Kx tqmule lcde, aclvebz leplz nengeng kcng tzapulr nei sip.” ¹⁶ Zbz rpi-mopwz Jiszs mz nzwrde krali kx, “?Saemon mrlx Jon, da angidr nzaodu-krm ninge?” Rpibz Pita kx, “Eu Kxetu, krlzpeq kx mrlztix nim.” Rpibz Jiszs kx, “Kx tqmule lcde, mailzbz sip nengeng.” ¹⁷ X rpi-mopwz Jiszs mz nzwrde kratq kx, “?Saemon mrlx Jon, da angidr kx mrlztiq ninge?” Pita drtwre yrnibutx, murde Jiszs nzvea-krbzle nzwrde kratq kcpe. X sc tqrpipebzle kx, “Kxetu Lod, nim kx rkrlz da amrlx, x krlz-angidr-kzq kx mrlztix nim.” Rpi-mopwz Jiszs bade kx, “Aclvebz sip nengeng.”

¹⁸⁻¹⁹ Zbz aelwapx-ngrbz Jiszs mz Pita kxnamu na-amatqle Gct mz nzbz-krde. Sc tqrpipebzle kx, “Da angidrtx lc napibo bam. Mzli kc tqngini-ngrm obla, xplrq x krlzq nzamqngitrngr nrkalom x vzq drlve ke suti drtwrm. A' mzli kc nangini-ngrm lrtzlvz, sa napebzlr leplz mqm, x navzmilr nim me trsutiu drtwrm, x sa naglapx-kzpz mqm. Kxmule-esz', a' vz-nqblqm ninge!” *

²⁰ Pita lxlvrkimle mq sc tqmcpele ninge, kc tqvz-nqblqbo nidr. Ninge kc tqdrtr-pnzbo nrlar Jiszs mzli kc tqmu-ngrgr, tqrpi-ngrbo bade “?Kxetu, neke tqamwale nim?” ²¹ Kx mcm Pita ninge, sc tqrpipebzle mz Jiszs kx, “?Kxetu, nike nzwaisrngr ncblo lc mz nzbz-krde?” ²² Rpibz Jiszs bade kx, “Trngiu nzwz-krm nzmu nasuti drtwnge kx Jon nalu nakrlzmle nzyzlu-krmc. A' vz-nqblqm ninge!” ²³ Mz nibrde, sc tzyapwxinepe leplz nedeng amrlx mz mzlindr kx trpnzngr nzbz-krnge. A' trpipwzu Jiszs trnzbz-krpwc'u, a' pibzle mz Pita kx trngiu nzwz-krde nzmu nasuti drtwrde kx nalux nakrlzmle nzyzlu-krmle.

Natq Kxrmnrngr

²⁴ Delape. Ninge Jon, ncblo ne Jiszs kc tqrycmnetrngr da kcng x yro-kzx. X nzkrlz leplz kx nike pix ngi da angidr. ²⁵ X da kqlu kz kx rtrngztibz Jiszs. A' nzmu nayro da lcdeng amrlx, buk ngrdr naesz'-ngrdr nrlc ka.

* ^{21:18-19} Kzdung leplz nzrpilr kx, Naglapxbz mqm drtwr ngrde kx mzli kc nabzngr Pita, mqde naglapxbz mz nztqlvztrngr nide mz kros. ^{21:20} ^{21:20} Jon 13:23, 25

Da Kcng Tzaletilr Aposol Natq Ngr Nzaplxtqngr Mz Da Kcng Tzaletilr Aposol

Krlc buk krali kxyr Luk, axvctrpzle mz Nrpakxmrlz kc tqyr-kaile. Ycmnetr-ngrde Jiszs x leplz nedeng. Da lcng kqlu tzyrtio mz Aposol krlz Luk, murde sc tzvotine-ngrdr badr Pol. Mwx Luk ayrkrpxle nzryrngr lc mz yiz 62 AD mz nibr nzrmcngr mz Jiszs. Murde trpnzngr da kx prtz mz nibr yiz 62 AD kc tzryrngr buk lc. Tryrleu nzatrkatikr King Niro Irmakxtr mz yiz 64 AD. X tryr-kzleu nzbzkr Pol mz yiz 68 AD, x nzodatingr Jerusalem mz yiz 70 AD.

Mz buk lc Luk yrle da kcng tqprtzbz mz lrmakxtr mz nibr Jiszs nzvzdz-krde Heven, mz nzatutr-krdr natq Jiszs mz Aposol 1:8. Murde nzyapwxtipxbzlr Nrpakxmrlz mz lr Jiu x kxtrngiulrJiu. Luk ycmnetr-ngrde kxmu leplz nzkrka'-krdr x nzmailzkr Mqngrkxtr leplz neng Gct, myapxbz mz nzprs-krde nidr.

Kzdung Da Kx Myapxbz Kx Nzyro Mz Buk Lc Nidr Seleng

Jiszs rpibzle mz leplz nedeng kx nayapwxtipxlr Nrpakxmrlz mrkc **Jerusalem, Judiz, Szmariz x mz nrlc tulvzo**, x sc tqvzdz ate Heven. [dckrlzde 1]

Lrmakxtr Nzaelwapx-ngrbzlr Jiszs Mz Leplz Mrkc Jerusalem

Mqngrkxtr vz-om mz leplz neng Jiszs. [dckrlzde 2]

Nzayrplapxngr Ananaeas x Safira. [dckrlzde 5]

Nzrmcpxng ncblo kxszaclveng dalr makxtr. [6:1-8]

Stivin sc tqbzpe. [6:9—7:60]

Lrmakxtr Nzaelwapx-ngrbzlr Jiszs Mz Leplz Mrkc Judiz X Szmariz

Sol atrkatile lrmakxtr. [dckrlzde 8]

Sol lxngitile Jiszs. [dckrlzde 9]

Pita ryapwxbzle mz kxtrngiulrJiu. [dckrlzde 10]

*Mqngrkxtr alvztrle Pita kx Nrpakxmrlz napi-kzpz mz kxtrngiulrJiu.
[dckrlzde 11]*

Jemes, mzle Jon, sc tqbzpe. [dckrlzde 12]

Lrmakxtr Nzaelwapx-ngrbzlr Jiszs Mz Leplz Mz Nrlc Tulvzo

Pol ryapwx mz nzvzpx-krde kx ayrnrngr. [13—14]

Kxszaclvler dzbe lrmakxtr kcng Jerusalem nzyrlwr-lxblrng. [dckrlzde 15]

Pol ryapwx mz nzvzpx-krde krali. [15:36—18:22]

Pol ryapwx mz nzvzpx-krde kratq. [18:23—21:16]

Nzrlolvzngr Pol mrkc Judiz Provins. [21—26]

Da kx prtz mz nzalilvckr Pol Rom. [27—28]

Jiszs Plzpx-kaile Nzvzo-krm Mqngrkxtr

¹ Kxetu Teofilzs, ninge Luk x mz buk kc kai, yrx da kcng amrlx tqale Jiszs x tqalvztr-ngrde, abzo mzli kc tqayzuo-ngrde nzwz-krde, ² krlzbzle mzli kc tqycpe pipz nzavzdzkr Gct le Heven. A' mzli kc navzdzpe-ngrde, rkabz natq mz nzvz-nqblq-krde me pnz drtwr Mqngrkxtr, mz ncblo kcng tqmcpxleng nangi aposol nedeng. Mz buk krali lc, sa napix nike ale-moule. ³ Mz

¹:2 Luk 24:33-53

nabz zbz kcng nzpnu-pwx, mz nibr nzetqkr drtqde x nzbz-krde, aelwapx-lzbq-ngrbz mz aposol nedeng. X alele da kxmatq kxkglu mz nzokatr-krde nidr mz nzxngiti-krdr kx lupe mou. Mz nzaelwapx-lzbq-krbzle badr, pibzle badr da kqlu mz nzaesotr-krm Gct leplz mz nzmncz-krbzlr bade mz nzngini-krde King rdr. ⁴ X kzdq mzli kc tzmu-ngrdr badr, rpibzle kx, “Bzkq ena rlaszamu mzteadau Jerusalem, a' aenzlipwzmu nzvzo-krm Mqngrkxtr bamu, da kc tqwai nzesalz-krbz Trtenge le. Ycmnetr-ngrbo bamu da lc mzli kc. ⁵ Jon awrkxtrle leplz mz lue x mzli trnaboiu sa na-awrkxtr Gct nimu mz Mqngrkxtr.”

Gct Avzdzle Jiszs Heven

⁶ Kzdq kz mzli aposol kcng kx nzrmcti-lzbq-moulr badr Jiszs mz Newz ngr Nc Olivi, nzveabzng bade kx, “?Kxetu rgr, nangipe mzli ka kx na-ayrkrpx-ngrn nzaclvekr lr Rom nigu lr Israel x na-aclve-lzbqku mz nzngini-krm King rgr?” *

⁷ Rpibz Jiszs badr kx, “Trtenge tr-rlrpx-ngrdeu kx nakrlzti mzli rde. Murde da lcng navz-nqblqpzwzle me pnz drtwrde. ⁸ A' da kx nakrlzamu nide sele. Sa natwzamu zmatq mzli kc navzo-ngrm Mqngrkxtr bamu. X na-aelwan-grbzmu ninge mz lr Jerusalem, lr Judiz Provins, lr Szmariz Provins, x nakrlzbzle leplz mz nrlc tulvzo.” ⁹ Mz nibr nzpi-krde da lc, sc tqavzdzpe Gct Heven mz dc bz. Mzli kc aukztingr aposol nedeng le, dc bz kc sc tqvzmilzpele nide, vzdz vzdz x mrbtilzbz mztr. ¹⁰ X mzli lcpwz tqabztx-zlwzbe-ngrdr nzrmclzngr Jiszs mz bongavz, enjrl nzling sc tztung badr nzkqng lrpz kxprki. ¹¹ Nzrpibzlr kx, “Ei! Lr Gzlili, bzkq ye obqnelzpeamu mz bongavz nztu-krmu la mrka! Jiszs lc tzavzdz ate Heven, sa nayzluo-mop karl mz nqmq lcpwz tqmc-ngrnamu nzvzdz-krde.” †

Mateas Tekqtrle Judzs

¹² Zbz mz nibr nzvzpekr enjrl kcng, aposol kcng nzrlaszmlr Newz ngr Nc Olivi, nzyzlu-moung mzteadau Jerusalem. Nzboikr mz lirdr mz Jerusalem mwx takitrde kilomita kxesz'. ¹³ Kx nzprtrpzlr kc Jerusalem, sc tzvzdzpeng mz nabz ma kc tqycpx wq, mrkc tzmnc-ngrdr. Nidr kcng tzmncng mrlcde deseleng:

Saemon Pita,

Jon,

Jemes mzle Jon,

Adru mzle Pita, x

Filip,

Tomas,

Batolomiu, x

Matiu kc tqngi kz drtqde Livae, nidr badr kz dq mou

Jemes mrlx Alfizs,

* **1:4** Jon 14:15-17, 26; 16:7-8, 13-15 * **1:6** Lr Jiu nzxngitilr kx Gct sa na-atwzlr-ngrbzle Mevalu Kxnzmcpx nede badr. A' nztwz-rbrrl nzrplzpxkr nrpa kc tqycmnetr-ngrde nide. Murde nzpnzkr drtwrdr le, na-aovxiobzle enqmi rdrng mz nzaclve-krde nrlc, da kc tqwai pnz King Devet. [Sam 89:26-29; Asaea 9:6-7] Mz nzmu-krde lcde, mz drtwr leplz nedeng, Jiszs na-aovxiolr lr Rom kcng tzaclvelr Israel mzli lcde, mz nzrtwz-krde zmatq ngr nzngini-krde Mevalu x king kc tqmcpx Gct.

† **1:11** 1:9 Kzdung mzli dc bz drtwr ngrde zluli r Gct. Mc Nzvzpxngr 40:34, 1 King 8:10-11, Mak 13:26, 62, x Luk 9:34-36. **1:10** Enjrl nzling nzmnc-kzng mrkc mz butqbr kc tqmznrngr. [Luk 24:4] Mz Lou scdr lr Jiu doa kx nzling napilr da kcpwz mz nzngikr da angidr le. [Lou Kcpwz 19:15] **1:11** Jiszs vzdz Heven zbz nzpnu-pwx (40) mz nibr nztulz-mou-krde. Zbz mz nibr zbz nzpnu-esz' mou, Mqngrkxtr nzavzom, mz zbz kranzpu-nzlvqn (50) mz nibr nztulz-moukr Jiszs mz nzbzng. Natq kc tqngi ‘Pentikos’ drtwr ngrde ‘kranzpu-nzlvqn’.

Saemon kc tqprtr ena mz dzbede kc tzrpilr namaszlrpx-ngrdr gzpman ngr Rom mrkc Israel, x

Judzs kc tqngi kz drtqde Tadizs, mrlx kzdq ncblo drtqde kz Jemes. ☀‡

¹⁴ Nzamnctr-lzbq-zvzng mz nzkrka'ngr mz nzesz'tikr drtwr, nidr badr Mxri, lxede Jiszs, mzledeng, x kzdung olvz kxnxzung.

¹⁵ Zbz kzdq zbo Pita tulzm mz mzliр kxnxrlxngiting lcng, mz nzycmne-krbzle badr. Nidr kcmang trtqki-esz'-nzpnu-li (120). ¹⁶ Rpibz Pita badr kx, "Mzlengeng, Judzs atutre Nzryrngrkxtr murde Mqngrkxtr batr-kaipzle mz King Devet nzycmnetr-krde nide kc tqmailbzle zbo ngr leplz kcng tzlolvzlr Jiszs. ¹⁷ X mz nzngini-krde Jiszs mcpxle Judzs kzdq nigr aposol kx nawztrpzkr badr mz Gct." Krlcng da kx pibz Pita.

¹⁸ X da kc tqwai nzkrlz-krmule, Judzs lc xpele kzdq drtc' mz trau r da kc tqtrka tqalele. Kxmu nznibqtx-lzbq-krde batrpzle narde nzobqneo-krmle x nzwxtwetx-krde zpzu x dalr nelzde amrlx rlpxxm yz. ¹⁹ Nrpa ngr da kc tqwzngr Judzs talvpxle Jerusalem, sc tzrpipebzlr drtc' kc *Akeldama* mz natqdr Erameik kx nzkrlz-kailr. Drtwr ngrde 'drtc' kx yrleongr mepyr.' §

²⁰ Rpi-mopwz Pita kx, "Da la ngida murde Devet yrle mz buk ngr Sam kx, 'X batrpz nzbz-krde murde ma nyzde namznrtx-alongr.' ☀ Nzyr kz kx, 'Natekqtr ncblo kzble mz nzngini-krde kxrmailz.' ☀ ²¹⁻²² Mz nzmu-krde lcde kzdq ncblo natekqtrle Judzs mz nztu-krmle mz nibrgu mz nztulz-kr-mop Jiszs mz nzbzng. Nangi kzdq ncblo kx mnc-pnzku badr abzole mz Jon nzawrkxtr-krde Jiszs, krlzbzle mzbq kc tqkapx-ngrm Gct le bagu, x sc tqvzdzpe Heven." ²³ Zbz kxnxrlxngiting sc tzpipxpelr ncblo nzling. Kzdq ngi Josip kc tzrpibz Basabas, nzsri-kzpz Jastzs x krkc kz Mateas. ²⁴ Zbz sc tzkrka'peng, tzrpipelr kx, "Kxetu rgr, krlzq da kx yc mz nabz leplz amrlx. Aelwapxng ncblo kznike kx mcpxppeq, ²⁵ kx nartwz nzwzkr aposol lc tqrlaszpe Judzs kc tqbz x sc tqmncpe mz Hxl, mrkc tqtakitrde nzmnc-krde elr." ²⁶ Zbz sc tzaopeng rplz nzyrlqtrpzlr maki ngrdrng mz nzmcpx-krdr ncblo kx nangi aposol. Mateas kc tzmcpxpe. X sc tqprtrpebz mz aposol kcng nzpnu-nrade-esz'. *

2

Nzvzo-krm Mqngrkxtr

¹ Mzli kc tzmulvzng nzhakilz-ngrm wit tqkaputrpe-ngrmle, krkcng tzrlxngiting amrlx nzyrlwr-amqmupeng mz ma kxesz' mrkc Jerusalem. ² X nzpwrkilvc-ngrdr da kx natqde apule nenq kxetu. X natq lc vzom Heven talvpxle ma kc tzwxbu-ngrdr. ³ Zbz nilvc nyr aelwapx-lzbq-ngrbz badr, x sc tqakipx-lzbqpebz badr. ⁴ Zbz Mqngrkxtr prsrle nidr amrlx ngrdr, x sc tzycmnepeq mz natq lr mrkzbleng, tqbatrpebz Mqngrkxtr nzycmne-krdr.

✩ **1:13** Matiu 10:2-4; Luk 6:13-16; Mak 3:16-19 † **1:13** Trkrlzkuu kx nzmu Alfizs kc lcpwz tzpi mz Mak 2:14 kx ngi trte Livae, krkc tqatakqti takes. Ncblo nzesz'mzng kx blepx lxblr drtqdr Judzs mz Nzryrngrkxtr Kxmrna. Krlc opxm Judzs kcpwz tzpi mz Jon 14:22 x Luk 6:16, a' trngiu Judzs Iskariot. § **1:19 1:16** Atutre Sam 41:9 mz nzsri-krde kx, 'X kztene kc tqabutr-zlwzbo drtwnge bade, x tqmukr ncdr, mzli ka nipe-kzde enqmi rnge.' **1:18** Judzs bzpe mzli kc tzxpengr kxnxetu rdr pris kcng drtc' kc mz muli silvz kcng nzpnu-tq. Kxmul-esz', a' Judzs kc tzpnzbe drtwr kx nide kx rmgisc trau kc x xpele drtc' kc. Matiu 27:5 pile kx Judzs ado-lzbq. Mwx nqvi kc tqdo-ngrde yzpr x nrkrdrqde yrplao mz rplz kx yclzbz, o nrkrdrqde mwx elx yrplatr mz kzdq da kx malc mzli kc tqtao-ngrde. ☀ **1:20** Sam 69:25 ☀ **1:20** Sam 109:8 * **1:26** Nzlxngitir kx mz nzyckr da, Gct la tqatubqti (Nzryrlapxng 16:33). A' mz nibr da lc mz Aposol 1:26, trnzpipxpeu mz Nzryrngrkxtr kc ate. Mwx mz nibr nzvzo-krm Mqngrkxtr, sc tqaelwape-ngrbzle badr me pnz drtwr Gct. Mc Aposol 11:12, 27-28, 13:1-2, 15:28, 32, x 21:10-11.

⁵ Mzli lcde lr Jiu kx nzangio-zvzlr Yawe Gct rdr, a' kxtrnzlxitlru Jisszs, sc tzmncng Jerusalem. Leplz lcng tzvzklmlr mz nrlarnrlc amrlx mz nrhc.

⁶ Mzli kc txxlr-ngrdr nzmqmqr natq lc etu, zbo ngr leplz kxetu kcng tzatamuti-lzbqpmqng badr kxnzlxngiting. X nzpwrkilvc-ngrdr nzxlrrkrdr kxnzlxngitlra Kraes nzycmne-krdr mz natq lr mrkzbeng. Murde mz zbo ngr leplz kcng, ncblo kxes' mz nidr xlrle kzdg kxrlxngiti nzycmne-krde mz natqde. ⁷ Nzkctitpx-zlwzlr sc tzrpipelr kx, "Eke! Ncblo kang tzkxmu nzycmne-krdr kang lr Gzlili xkeng! ⁸ ?Myx kxmule tqxlr-ngrbzku nzycmne-krdr mz natqgung?" *

⁹⁻¹⁰ Krlc tqkxmu nzycmne-krdr lc murde kzdung nidr kcng mrkc, lr Jiu kcng tzvzkbzlr nrlarnrlc kcng Partia, Medea, x Mesopotemia rlsru mz tonga. X kzdung nipeng dalr mrka Judiz Provins. X kzdung nzvzkbzlr mz nrlarde kc tqesotrpz mz provins kcng Kapadosia, Pontzs, Pamfilia, Esia x nrlarnrlc ngrde Frijz. X kzdung nidr nzvzkbzlr drtc' ngr Elam, Ijipt x Libia mz nrlarde kc tqesotrpz mz taon kxetu Saerin. X kzdung nzvzkbzlr taon kxetu Rom, kxmule-esz' lr Jiu, o kxnzaxvctr-lzbqbzng mz nzangiongr Yawe.

¹¹ X kzdung nzvzkbzlr nrlarnrlc kc Arabia x trmctu Krit. Nzrpi-etrler kx, "Kxmule-esz' vzkimgu me blepx lxbler, a' sa tqxlrbzku ye leplz lcng nzpi-krdr mz natqgung da kxmatqng kx ale Gct!" ¹² Sc tzkctitpxlrx nardr pqbrtxtrpz mz nztu-krdr mrkc. X kzdung nidr nzvea-etrpeng, "?Da lc drtvr ngrde nike?" ¹³ A' kzdu-kzng nzxtrnga-ngrdr krkcng tzrlxngiting, nzrpilr kx, "Ncblo lcng nzrmnqpeng!" †

Pita Ryapwxbz Mz Zbo Ngr Leplz

¹⁴ Zbz Pita tumilzme aposol kc-kzng nzpnu-esz'-nrade-esz', x mz natqde kxetu sc tqycmnepebz mz zbo ngr leplz kc. Rpibzle kx, "Nimu lr Jiu kang mrka mz Judiz Provins x nimu kang tzmncng Jerusalem mzli ka, da lc nakrlzamu x nalalztq-angidrmamu mz natqngeng. ¹⁵ Ncblo lcng trnzrmnqung, da kc tqwai nzpnzkr drtwrmu le. Mzli ka ngibe nabznepi kc tqrpwxmz mz nourla. ¹⁶ Trtingr! A' atutre nropa kc tqplzpx pnz profet Joel.

¹⁷ "Mурde Gct ycmnetr-ngrde mzli kc nakaputr, x Jisszs sc tqyzlu-ate-mop, mz nzrpi-krde kx, 'Napuliobo Mqngrnge mz leplz nengeng amrlx mz nrhc, murde mrlxmung x inyxmung sa naplzxpxlr natq kc na-aelwapx-ngrbo. Obla nemung naobq-rmwibleng x lrtzlvz ngrmung sa narmwibleng da kx nakabo badr. ¹⁸ Mz mzli lc navzm, sa napuliobo Mqngrnge mz kxnzawz nengeng, kxmule-esz' ncblo o olvz murde naplzxpx-kzlr nropa kc nakabo badr.

¹⁹ Sa na-alex da kxnzkctipxng mz bongavz x na-aelwapx-ngrne rkx mz nrhc. Namcti leplz mepyr x nyx x kzdq zsikapu kx awx-nzlongr. ²⁰ Nepi nawx-nzlongr x temz napc na-apule mepyr x Mzli Kxmatq Kxmrlz nyx Kxetu sc tqkaputr-atem. ²¹ Zbz doa kx abrtrpzle drtvrde mz Kxetu sa narlapx mz nzayrplapxngr nide mz alwx ngrdeng." *

²² "Nimu lang mz nqvi lr Israel, lalztqmamu bange! Jisszs kc tqnginide lr Naszret avzom Gct x atwzlr-ngrmle mrka. Krlzamu kx abrtzlvle nide

* ^{2:8} 2:3 Nyr tu-ngrde me mncngr Gct mz nzryrngr lc, da kc tqwaile mz Nzryrngrktr Kc Kai. 2:7 Mz drtvr lr Jiu kxnzmncng Jerusalem, lr Gzlili drtvrdr mrbrbe x trnzkrzlrda. † ^{2:13} Mesopotemia ngi drtq drtc' kc tqyc mzli Lue Taegris x Lue Yufretis x mrkc tqyc-ngale-ngrde mrlcng. Mz nibr lr Bxilon keng nzlolzvz-krdr lr Jiu mz vea mz yiz 605—538 BC kzdung lr Jiu kcng trnzyzlupepqngu Israel. Nzqqlung nzmnctxng mz kzdung mrkcng tzpi mrlc, x mwx mz nibrde kzdung kz kx nzaclveng nzatwzlrki-ngrdrle mz kzdung kz nrhc. Nzalvztr-lzbqng mz natqdr leplz kcng tzmncng badr. Nrlar Frijz yc mz Esia Provins, nrlarde kcpeng tqyc mz Galesia Provins. * ^{2:21} Joel 2:28-32; Asaea 13:9-10; 24:21-23; 34:4; Esikel 32:7-8; Joel 2:10-11; 3:15; Emos 8:9

murde alele da kxnxkctipxng, da kxmatq x rkx kxkqlu mz mzlirmu mz zmatq ngr Gct. ²³ Ncblo lc tqaprcbz Gct bamu mz nzvz-nqblq-krde me pnz drtwrde x pnzpe kai drtwrde da kx na-alebzmu bade. Nide kc tqtqlvztramu mz kros mz nzaprc-krbzmu mz mq ncblo kxdrka'-ngrng. ²⁴ A' atulz-mop Gct mz nzbzngr, mz nzaopx-krbzle drtqde mz zvetq ngr nzbzngr, murde rblxbz mz nzbzngr nzaovxio-karde Jiszs. ²⁵ Mzli kc bqnc King Devet plzpx-pnzle nrpa ngr nztulz-kr-mop Jiszs, mz natq kc tqpibz Kxnxmcpz mz Gct kx, 'Dcpz zvz mz drtwrnge kx mnc-zvzme bange. X trpnzng doa x da kx na-aycngirlle ninge, murde tu-zvzme mz nibrnge. ²⁶ Delc nabzng tqaabrtz-zlwz-ngrde x drtwrnge tqelalz-ngrmle. X tqmnc-zpwxpe-ngrne. ²⁷ Murde tr-rlrpx-ngrnqu zmatq ngr nzbzngr nzaovxio-karde ninge, ncblo kxtr nem. X trayrbqtxwq nrkrdrqde mz gq mz nzmibi-karde. ²⁸ A' aelwa-zvz-ngrm bange drtwr ngr nzmnc-zpwxng: Nzabrtz-zlwzng kxmyalz vzpxm mz nzxngi-ngrbz nim.' " ^{*}

²⁹ Rpi-mopwz Pita kx, "Mzlengeng, na-aopx-angidrbo bamu melrmqgu Devet. Bz x nzyrtzmq x gq lrde se tqycm bagu mzli ka. ³⁰ X nide profet x krlzle kx Gct esalz-ngrbzle bade da kx trnzkatxu, kx nayrlqle dq neidu lrde kx nanginide king mz nibrde. ³¹ Devet mcpe-kaile da kx na-ale Gct mzli kx navztrp. X sc tqycmnetrpe-ngrde nztulz-mou-krm Kxnxmcpz mz nzbzngr. Rpile kx, 'Trayrbqtxdeu nrkrdrqde mz gq mz nzmibi-karde.' ³² Jiszs lc ngi Kxnxmcpz kc tqatulz Gct mz nzbzngr x nigr amrlx ngrgr mckr kx lupe mou. ³³ Gct Trte avzdzpele nide Heven x amnle nide me matq-esz'ngr mz nrlarde kxrtc. X Gct Trte kabzle bade zmatq murde na-atwzlr-ngrmle Mqngrkxtr bagr, da kc tqwai nzesalz-krbzle mz leplz nedeng. X da kcng tqmcamu x tqxlramu mzli ka nzvzpxmqng mz Mqngrkxtr kc tqatwzlr-ngrmle. ³⁴ Murde Devet trvzdzu Heven da kc tqwai Jiszs, a' pile da kx pibz Gct mz Jiszs. Rpibz Devet kx,

'Yawe rpibzle mz King kc tqngi kxetu rnge kx, **Wxbu mrlc tqmatq-esz'ngr mz nrlarnde kxrtc, ³⁵ navz nakrlz-zpwxbzle mzli kc nangi-batr-ngrbo mz enqmi rmqng nzmetx-krbzlr bam.**' " ^{*}

³⁶ Pita ayrkrpxbzle nzycmne-karde mz nzsri-krde kx, "Nimu amrlx ngrmu nakrlz-angidramu kx Jiszs kc tqtqlvztramu mz kros, tqngi Kxetu Lod x Kxnxmcpz ne Gct!"

³⁷ Kx nzxlrbz leplz kcng natq Pita, mztr otxpx angidr pnz x sc tzveapebzng mz Pita x aposol kcng kx, "?Nike na-alepekr, kx mzlegrng?"

³⁸ Zbz rpibz Pita kx, "Natekqtramu nqmq nr drtwrmu. X na-awrkxtrpzkr nimu mz drtq Jiszs Kxnxmcpz, murde Gct naipqpxbzle alwx ngrmung. X sa naka-nrbalqbzle bamu Mqngrkxtr. ³⁹ Murde Gct esalz-ngrbzle Mqngrkxtr bamu, nimu badr doa nemung, x leplz kznikeng kx nzmncrpqng rlru, nimu kcng tqkqleleng mz nzxngiti-krmu Jiszs."

⁴⁰ Mzli boi ryapwx-ngrbz Pita badr. X pibzle kzdung mou natq mz nzsridrlvz-krbzle badr, x xplrmibz natqde mz nzsri-krbzle kx, "Arlapx-lzbqamu mz nzayrplapxng kx vz-ngrmle nrpr ngr ncblo kxnxtrkang kxnxpctxpx-ngrdr Jiszs!" ⁴¹ Leplz kxnxkqlung nzxngitilr nrpa kc tqyapwx Pita x nzwrxtrng. X nzkqlukr leplz lcng tzprtrpzng mz dzbede kxnxrlxn-giting mzbq lcde esolzbz mz siu-kxtq (3,000).

Nzodutr-lxblrkr Lrmakxtr

⁴² Nzavzti-zvzlr nzyrlwr-lxblrngr mz nzlalztq-ngrbz mz nzalvztrkr aposol, mz nzaodutr-lxblrngr, mz Nzmungrkxtr, x mz nzkrka'ngr. ⁴³ Gct

^{*} 2:28 Sam 16:8-11 [†] 2:30 2 Samwel 7:12-13; Sam 132:11-12 [‡] 2:31 Sam 16:10 [§] 2:35 Sam 110:1

aletile da kxnzkctipx kxkqlu x rkx kxmatq, prpxm mz aposol kcng kx batrpzle kxnzrlxngiting amrlx mrkc nzamrlue-krdr Gct. ⁴⁴ X nzodutrlxblr-zvzng x nzakibzlr dztudrng mz kztedrng. ⁴⁵ Kzdung mzli nzamwalr dztudrng x nzakibzlr trau rdrng mz kztedrng amrlx, vz-nqblqle ncblo kxesz' mz nike takitrde nide. ⁴⁶ Mz zbz kang kqlu drtwrdr esz'ti mz nzyrlwr-lxblr-krdr mz makoa ngr Mangr-nzangiongr. X nzyrlwr-lxblr-kzng mz ma nyz kztedr mz nzabrtzngr x mz nzavzo-lzbq-krdr. Nzmukxtr-kaing x mz nibrde sc tzmu-lxblrpeng. ⁴⁷ Nzglqlzlr Gct, x leplz kcng Jerusalem nzabrtzlvzlr nqmq krdr. X mz zbz kang kqlu, Kxetu rgu arlapxle leplz x kxnzrlxngiti-ateng nzprtr-kzpzung mz dzbede lc.

3

Pita Amrlzle Kzdq Ncblo Kxbxplo

¹ Kzdq zbz Pita x Jon nzvdzng mz Mangr-nzangiongr Yawe mz nzkrka'ngr mz nabznepi kc tqtzq. ² X kzdq kc ncblo nanycde bxplo pnz mzli kc mzte tzmc-ngrde. Mzbz kang kqlu nzglqbz x nzamnctrpz yz mz drkq ngr Mangr-nzangiongr, mrkc tqycngr 'Naonrx Kxluli,' murde narlxbz trau mz lr Jiu kcng tzvztrng brma. ³ Kx mc-kzle Pita x Jon nzvztr-krdr, sc tqrlxpe-kzpzung traubadr. ⁴ Zbz Pita x Jon nzobqtxtrpzng mz mzte x rpibz Pita kx, "Obqm bagr!" ⁵ Zbz ncblo kc obqtxbz badr, nzpnzkr drtwrde le, sc nakabzlr kzdq traub. ⁶ A' rpibz Pita kx, "Trpnzngr scnge traub, a' nakabo da kx ngiscnge. Mz zmatq ngr Jiszsz Kxnmcpk, kc Naszret, tulzm x vzne!" ⁷ Zbz otibzle mqde kxrtc, sc tqatulzpele. Mzli kcpwz nanycdeng x rtudx ngr nanycdeng nxzplrtx-pnzng. ⁸ Blctxlz pnz x sc tqabzopele nzvzne-krde. Zbz sc tzvztrpeng badr mz Naonrx Kxluli kc mz Mangr-nzangiongr, tqvzne, tqblc, x tqglqpxle Gct. ⁹ Nzmc leplz amrlx nzvzne-krde x nxzlrbzlr nzglqlz-krde Gct. ¹⁰ Kx nzkrizlr kx nide ncblo kc tqwxbune, tqrlx vzda mz Naonrx Kxluli, nzkctitxpx-atwrnr-pnz-ngrdr.

Pita Ryapwxbz Mz Leplz

¹¹ Mzli kc ncblo kc tqblitrbe-ngrbzle mz Pita x Jon mz nzabrtz-krde, leplz amrlx sc tkctitxpxpelr. X sc tzvoebzng mz nzyrkr-krbzlr badr mz makoa nyz Solomon. ¹² Kx mctxbz Pita leplz kcng, sc tqrpipebzle badr kx, "?Lr Israel, nike tqkctipx-ngrnamu da lc x nike tqpwxbzti-ngrnamu nigr? Murde travznekru ncblo lc mz zmatq ngrgr x mz nztubq-krgr. Trting! ¹³ Murde Gct rgu kc tqangio Ebraam, Aesak, Jekop, x melrmqgung, sc tqamrluepele kxszawz nede Jiszsz mz nzatulz-krmlele mz nzbzngz x avzdzpele nide Heven. Aprcbzmu nide mz nznribqngz x pxtpx-ngrnamu nide mz mz Paelzt, kxmule-esz' rpile narlrpx-ngrde nzvz-krde. ¹⁴ Pxtpx-ngrnamu krkc tqtr tqtubq-esz'ngr, a' rlxtiamu kx Barabas kc tqrnibq narlrpx-ngrm x navz. ¹⁵ Kxmule-esz' nibqtxnamu Mevalu, a' atulz-mop Gct mz nzbzngz x mckr nide mz nibr nztulz-krmle. ¹⁶ X ncblo lc tqbxplo nzaxplrngr nide x nzamrlzngz nrkrdrqtde tuo mz nzrlxngitingz Jiszsz. X krlzamu ncblo lc amrlx ngrmu mzli kc, x mcpeamu mz mzpu da kc tqwaile mzli kcma.

¹⁷ "Mzli ka, kx mzlengeng, krlzx kx nimu badr kxnzrmailz ngrmung nibqamu Jiszsz, murde trkrlzwamu kx nide Kxnmcpk ne Gct. ¹⁸ A' mz nzale-krmu da lc, Gct atutrle natqdeng kcng tzplzpx profet nedeng amrlx mzli kc bqnc, mz nznri-krdr kx drtqde naetq. ¹⁹ Mz nzmu-krde lcde, natekqtramu nqmq nr drtwwmu x nayzlutiamu Gct, murde naipqpxbzle

^{☆ 3:13} Asaea 42:1; 49:6; 52:13; 53:11 ^{☆ 3:14} Luk 23:18-25

alwx ngrmung. ²⁰ X Gct namnc-zvzbz bamu x na-amrna-mopwzle nabzmu. X na-atwzlr-mou-ngrmle Jiszs bamu. Murde Gct mcpxle nide mz nzngini-krde Mevalu rmu. ²¹ Jiszs esz'-krde namnc Heven nakrlzbzle mzli kc Gct na-atubqti-mou-ngrde da amrlx, mz nzvz-nqblq-krde natq profet nedeng kcng bqnc. ²² Murde Mosis, profet ngrgu kc kai, ycmnetr-ngrde Jiszs mz nzrpi-krde kx, ‘Yawe Gct rgu sa na-atulzle kzdq profet kxetu mz mzlirgu kx na-apule ninge. Lalztqbzmu mz nike pibzle bamu. ²³ Doa kx trlalztqpwzu bade nakapxm Gct mz leplz nedeng x naodati-atwrnr-ngrde.’” ²⁴

²⁴ Rpi-mopwz Pita kx, “X abzo mz Samwel x profet kcng amrlx tzvzmqng mz nibrde, nzpipxlr da kcng tqangidatipe Jiszs mzbq kang x mzbq lcng navztrpqng. ²⁵ Da kcng tqesalz-ngrbz Gct mz profet nedeng x mz Nzesz'tikr Drtwrdr badr melrmqgung, twzku mzli ka. Gct rpibzle mz Ebraam kx, ‘Mz nqvi lrm sa na-amrlzx leplz amrlx mz nrlc.’” ²⁶ Dekc Gct tqatzwzlr-kaingrmle Jiszs, kxnzawz nede bagu, nigu lr Jiu. Murde na-amrlzle nigu mz nzbatr-krbzle mz doa kxesz', nzesablqti-krde nqmq krde kxtrka x nzlxlvrti-krde Gct.”

4

Pita X Jon Nzvzmim Mz Kansrl Nyz Lr Jiu

¹ Mzli kc Pita x Jon tzycmnebe-ngrbzlr mz leplz kcng, kzdung pris, x kxetu ngr pulis ngr Mangr-nzangiongr, x kzdung ncblo kxnxprtrng mz dzbede nyz lr Jiu nzrpibz Sadiusi sc tzyrkpemqng badr. ² Drtwrdr nzngyaxt zlwz murde aposol kcng nzling tzalvztr-ngrdr leplz mz nzrpi-krbzlr badr kx Gct sa nabatrzle mz leplz nztulz-krmlr mz nzbzngr, da kc tqwaibzle mz Jiszs. ³ Zbz nzlolvzlr Pita x Jon, x nzadwatrlr mz presin. X nzmncng elr krlzbzle nrlc kxngrlxobz, murde nrlc milzpqpe. ⁴ A' leplz nzkqlung nzlxngitilr nrpa kc tzyapwxtipxlr. X nzkqlukr ncblo kcng tzrlxngiti-kaing badr kxnzrlxngi-ateng, krlzbzle siu-nzlvqn (5,000), a' olvz badr doa kxnztopwzng trnzrlwxtrpwzung.

⁵ Nrlc ngrlxobz kxnzrmailz x lrtzlvng ngr lr Jiu, x kxnzalvztrng mz Lou sc Mosis nzyrlwr-lxblrng mz Kansrl nyzdr mz mzteadau Jerusalem. ⁶ Kxnzmnc-kzng mrkc Anas kc ena tqngi Nardr Pris x kzdode Kaefzs kc tqngi Nardr Pris mzli lc, nidr badr Jon x Aleksada x kzdung kz ncblo kxnzetung mz lr ma nyz Nardr Pris kcng. ⁷ X Kansrl kc rkabz natq ngr nzrvzmi-ngrm Pita x Jon. Zbz mzli kc tztupe-ngrbzlr mz zpzu rdr, sc tzveapebzng badr. Nzrpibzlr kx, “?Myx kxmusr-ngrnamu nzamrlzng ncblo lc tqbxplo? ?Aleamu mz zmatq ngr neke?”

⁸ Zbz Mqngrkxtr prsrle Pita, x sc tqrpipebzle badr kx, “Nimu kxnzr-mailzng x lrtzlvz ngr Israel! ⁹ Vzmimamu nigr mrka murde nzamrlz-krgr ncblo lc. A' mz nzayzlu-krgr natqmu mz zmatq kc tqarlapxpele nide, ¹⁰ napibzkr kx ncblo lc tqtubz mz mzpu mrlztx-atwrnrpengr mzbq ka mz zmatq ngr Jiszs Kxnzmcpk kc Naszret, tqtqlvztramu mz kros. A' atulz-mop Gct mz nzbzngr, x da angidr lc nakrlzamu amrlx ngrmu x lr Israel amrlx. ¹¹ Murde krlc ‘rplz kc etu tzpxtxpx-ngrdr ncblo kcng tzrwz-ngrng ma, nzaelwapxngr kx nide nou rplz kc tqmyatpx-zlwzbz.’” ¹² Jiszs esz'-krde tqngi nou rplz lc tqmyatpx-zlwzbz. ¹³ X trpnz-moungr lrpzki r nzrlapxngr, a' ngi txpwz mz nzrlxngtingr Jiszs. Murde trpnz-moungr doa mz nrlc ka kx krlzle nzarlapxngr leplz.”

²¹ Matiu 19:28 ²³ Livae 23:29; Lou Kcpwz 18:15-19 ²⁵ Nou 12:3; 18:18; 22:18; 26:4 ^{4:11} Sam 118:22

¹³ Pita x Jon nelzdr br mz nzycmnengr, kxmule-esz' trnzsiklu-angidrung x trnzalvztr-pnzu nidr mz lou sc Mosis. Zbz kxnxrmailz ngrdr lr Jiu nzkctitpxlr, x sc tzkrpz-atelr kx nzmnncng ena badr Jiszs. ¹⁴ Nzrpilr na-angi-brmrdatitx-ngrdr aposol kcng, a' trtxpnzngr da kx napilr, murde nzmcpelr ncblo kc brngzpe. ¹⁵ Sc tzrpipebzlr kx navzpxng mz Kansrl kc murde naryapwx-lxblrng. ¹⁶ Sc tzrpi-etrpelr kx, "?Nike nawaisrpe-ngrgu ncblo kang? Rblx nzayrplapx-krgu nidr murde ottxpxbz mz leplz amrlx mrka kx Gct batrpzle nzale-krdr da kxmatq-esz'ngr. X rblx kz ngrpi-krgu kx trtingr. ¹⁷ Mz nzmu-krde lcde, mz nzaesaki-ngrbz da lc nztalvzpx-krde mz mzlir leplz kcng, na-amwxlrku ncblo lcng kx bzkq nzycmne-mopwzng badr mz drtq Jiszs."

¹⁸ Zbz nzrpibzlr mz Pita x Jon kx nayzlu-mopqng brma. X mz natqdr kx xplr nzrpibzlr kx bzkq nzyapwxtipelr Jiszs x bzkq nzalvztrpe-ngrdr nide. ¹⁹ A' rpibz Pita nidr mz Jon kx, "?Mz drtwrmu nike tubq mz nzobqkr Gct, nzvz-nqblqng natqmu o natqde? ²⁰ Murde mz nzvz-nqblq-krgr natqde, rblxm bagr nzesakikr nzpipx-krgr da kcng tqmcpekr tqale Jiszs x da kcng tqxlrkr mz nzalvztr-krdeng." ²¹ Mz nibr kzdung mou natq ngr nzamwxlrngr kx nzkabzlr, sc tzrlrpxpe-ngrbzlr nzvz-krdr. Rblx nzayrplapx-krdr nidr, murde mzli lc leplz amrlx nzglqlzlr Gct mz da kcng tqprtz. ²² Murde ncblo kc tqbxplo pnz mz nzrmcngr mzte, mrlzpe mz zmatq ngr Jiszs. X yiz ngrde myaszlzle kx nzpnu-pwx (40).

Aposol Kcng Tzkrka'-ngrdr Nzrlxngitingr Kx Xplr

²³ Mzli kc tzrlrpxpe-ngrbzlr nzvzpx-krdr, Pita x Jon sc tzyzlupe-mopwzng mz kxnxrlxngiting x nzpibzlr badr da kcng tzpibz kxnxetu ngr Kansrl kc. ²⁴ Kx nxzrlbzrl, sc tzamnctr-lzbqpeng mz nzkrka'-krbzlr mz Gct mz drtwr kxesz'. Nzrpibzlr kx, "Kxetu rgr, nim *Kxrpalz kc tqwz-ngrde bongavz, nrlc x prla, x dalldrng amrlx.*" ²⁵ Mqngrkxtr batrpzle mz melrmqgr King Devet nzycmnengr ngrpi-krde kx, '*Lr mrkzbeng nzngqngung mz nzngyatikr drtwrdr Yawe. Murde mane nzyrlqtingr nide drtwr kxtrka.*' ²⁶ King rdrng x kxnxrmailz rdrng nzyrlwr-lxblrng mz nzoliqi-krdr nzota-krdr badr Yawe x *Kxnxmcpk nede.*' ²⁷ Natq Devet lc atukztrpe Jiszs! Murde King Herot Antipas x Pcntizs Paelzt nzyrlwr-lxblrbzng mrka Jerusalem badr kxtrngiulrJiu x lr Jiu. Nzryrlqting drtwr mz nzatrkatr-krdr Jiszs, kxnxawz nem kxtr, kc tqmcpxq. ²⁸ Mz nzvz-nqblq-krde me pnz drtwrm x zmatq ngr, nzatutrlr da kcng amrlx tqyrlq pnz drtwrm kx nangida. ²⁹ X mzli ka, kx Kxetu, na-aoti drtwrm nzamwxlr-krdr nigr. X rlr-ngrm bagr, nigr kxnxawz nemqng, nzpipx-krgr natqm mz nelz kxbr. ³⁰ X aelwapxngr zmatq ngrm mz nzamrlzng zyagox x nzalengr da kxmatq kxnxkctipxng zmatq ngr Jiszs, kxnxawz nem kxtr. Eu, angida." ³¹ Mzli kc tqyrkrpxpe-ngrbz nzkrka'-krdr, mrkc tzkrka'-ngrdr aycngrlrlzm Gct. Zbz Mqngrkxtr prsrle nidr, murde narpipxng Nrpa ngr Jiszs mz nelz kxbr. *

Kxnxrlxngiting Nzakilr Dztudrng

³² Krkcng tzrlxngiting nzesz'ting mz nabzdr x mz drtwrdr. Trpnzng ngrdr kx rpile kx dztudeng scde esz'-krde. A' nidr amrlx ngrdr nzakibzlr dztudrng mz kztedrng kxtrnzrulgiscung. ³³ Mz zmatq ngr Mqngrkxtr nzyapwx tipx aposol kcng nzulz-krm Jiszs mz nzbzng. X natqdr pnamilxtile nabz leplz kx kqlu. Murde Gct okatr-zvzle nidr amrlx ngrdr mz zmrlz ngrde kxmyalz. ³⁴ Trpnzng ngrdr kx tr-rulgiscu da. Murde kxnxrlxngiting nzamwalr lclr da

* 4:13 Luk 12:11-12; 21:12-15; Jon 7:49 * 4:24 Sam 146:6 * 4:26 Sam 2:1-2 * 4:31 Kzdung mzli Gct aelwapx-ngrde me mnc-ngrde mz nengq. [Nzrlaszngr 19:18; Asaea 6:4]

o ma nyzdr,³⁵ x nzaprcbzlr trau ngrdeng mz aposol kcng mz nzaki-krbzrlre mz doa kxesz' mz nzvz-nqqlq-krde nike takitrde nide.

³⁶ Kzdq ncblo drtqde Josip ale-kzle da lc. Aposol kcng tzhpi-kzpplr drtqde Banabas mz nzvz-nqblq-krde nqmq krde. ³⁷ Murde drtq lc drtwr ngrde mrlx kx axqlr leplz. Nide nqvi lr Livae x mzte nzmc mz Trmctu Saepiras.

5

Ananaeas X Safira Nzpokiabzng Mz Mqngrkxtr

¹ A' kzdq kz ncblo drtqde Ananaeas nidr mz olvz rde Safira, nzamwa-kzlr kzdq drtc' nyzdr. ² Kxmule-esz' nzesalz-ngrdr nzaprc-ngrbz trau rde amrlx mz, a' nzaolvzlr rlilrdr nzryrlqpxngr kzdung trau rde, x kx yctxo sc tzaprcpebzlr mz aposol kcng. ³ Mz nibrde rpibz Pita mz Ananaeas kx, “?Memule tqrlr-ngrbzme mz Setzn nzprtrpe-krde mz nabzm? Murde pokiatiq Mqngrkxtr mz trau kx esalz-kai-ngrn nzka-krmle, mz nzyrlqpx-krm kzdquzu r trau kc. ⁴ Mzli kc trnzamwaka-ngrde, ngi dztum. X mz nibr nzamwa-krmule, trau rde scmu. Trpnzngr kx batrzple nzaprc-krmu trau rde amrlx. ?Memule tqqrpipe-ngrn mz nabzm napokiaq? Trpokiapwzmeu mz leplz txpwz. A' apokiatipe-kzq Gct, mz nqrpi-krm kx aprcbzme trau amrlx!” ⁵ Mzli kcpwz Ananaeas tqxlr-ngrde da lc, tatxo x bztx pnz. X leplz kcng amrlx tzxlrng nrpa ngrde nzmwxlrtx-pnz-ngrdr nzayrplapxkr Gct. ⁶ Zbz kzdung obla mrkc nztulzmqng, nznutxdr Ananaeas, nzglqtxpxlr x sc tzyrtzmqpelr.

⁷ Nabznepi tq vztx, olvz rde Safira sc tqdwaterpe-kzp. Trkrlzleu kx Ananaeas bzpe. ⁸ Sc tqaelwa-ngrbz Pita bade trau kc tqtwzm Ananaeas. X sc tqrpipebzle kx, “?Trau kcng amrlx tqtwzamu mz ncblo ngrm mz drtc' nyzmu kc delcpe?” Rpibzle kx, “Eu, trau ngrde delape.” ⁹ Rpibz Pita bade kx, “?Memule tqaolvz-ngrnamu mz ncblo ngrm nzabzpx-krmu Mqngr Gct mz nzpokia-krbzmu bade? ?Rpri-ngrnamu kx trna-ayrplapxleu nimu? Murde obla kcng tzryrtzmqng ncblo ngrm sa tztutrpqng mz naonrx mzli ka, x sa naglqpx-kzlr nim mz nzyrtzmq-krdr nim!” ¹⁰ X mzli kcpwz Safira tatxo-pnzbz mz nanyt Pita, x bztx pnz kz. Obla kcng nzdwaterpqng nzmcpelr kx bzpe, sc tzglqpxpe-kzlr x nzyrtzmqlr mz nrlar ncblo ngrde. ¹¹ Lrmakxtr kc atwrnrngr x leplz amrlx kcng tzxlr-kzng da lc, nzmxlxrtx-zlwzng.

Aposol Nzalelr Da Kxmatq Kxkqlu

¹² Aposol kcng nzaleting rkx x da kxnzkctipxng kxkqlu mz mzlr leplz. X mz drtwr kxesz' nzyrlwr-lxblrng mz makoa nyz Solomon mz Mang-nzangiongr mz zbo kang kqlu. ¹³⁻¹⁴ X leplz kxkqlu kxnzrlxngiti-ateng nzprtr-kzpzung mz Kxetu rgu, x nzkqlu-krdr etunepx zvz. A' trpnzngr kx trnzrlxngitikang kx nzyrlwr-lxblrng badr murde nzmwxrng. A' leplz amrlx nzamrlue-zlwzlr krkcng tzrlxngiting. ¹⁵ X leplz kxkqlu nzrvzmimqng kxnzyagoxng, nzamnzo-lxblrlr mz nqni mz nrlar lrpzki, murde Pita nayrlqobzle mqde badr, o mqngrde navzobz badr mz nzamrlz-krde nidr. ¹⁶ X zbo ngr leplz nzyrkrkimlrg mz taon kcng nzyc-ngalelr Jerusalem, nzvzmimlr mz aposol leplz nedrng kxnzyagoxng x kxnzmncpx-ngrmqng drka' kcng tzatrkatilr nidr, x nzbrngzng amrlx ngrdr.

Aposol Kcng Nzatrkating

¹⁷ Nardr Pris x krkcng tzwz-lxblrng badr, Krkcng tzprtrng mz dzbede ne Sadiusi, nzdobutilr aposol kcng. ¹⁸ X nzolvzlr nidr x sc tzadwatrpelr mz

✡ 4:36 Aposol 9:27; 11:26; 13:2

presin. ¹⁹ A' mz nrlckxbq, atwzlr-ngrm Gct kzdq enjrl nede mz nzlvpxpkde naonrx ngr presin x mailztxpxle nidr. ²⁰ X enjrl kc rpibzle badr kx, "Vzamu x tuamu mz makoa ngr Mangr-nzangiongr, x pibzmu mz leplz da amrlx mz nzlungr kxmrna kc narmctilr mz Kraes." ²¹ Nzvz-nqblqlr natq enjrl kc. X mzli kc nrlc tqngrlxnepxpe-ngrde, nzprtxtrng Mangr-nzangiongr, sc tzalvztrpelr leplz kcng tzmncng mrkc.

A' mzli lcpwz Nardr Pris lc x krkcng tzwz-lxblrng badr, nzmncng mz kzdq nrlc. Nzayrlwr-lxblrlr krkcng tzprtrng mz Kansrl, nidr badr kxnzetung amrlx ngr lr Jiu. Zbz sc tzatzwzlrpe-ngrbzng natq mrkc mz presin kx navzmim aposol kcng badr. ²² A' pulis ngr Mangr-nzangiongr, trnzmcpelru nidr mz presin. Zbz sc tzyzlupe-mopqng mz krkcng tzatzwzlr-ngrng, sc tzrpipebzlr kx, ²³ "Mzli kc tqkaputr-ngrbzkr mz presin kc, mckr kx naonrx nzamqngi angidr x kxnzaukzng amrlx nzaclve-angidrlr naonrx. A' kx lvxpypkcr kc naonrx, trpnzngr kx mckr kx mnccpxm elr!" ²⁴ Mzli kc kxetu ngr pulis ngr Mangr-nzangiongr x kxnzetu rdr pris tzxlr-ngrdr da lc, naodr kc tqmztxpe, murde trnzkrlzru da kx naprtz mou. ²⁵ Zbz kzdq ncblo vzm, sc tqrpipebzle badr kx, "Ei! Ncblo kcng tqamncpxmamung mz presin sa tztupxmqng mz Mangr-nzangiongr tzalvztrlr leplz nemung."

²⁶ Kxetu r pulis kc nzvzng mz Mangr-nzangiongr badr pulis nedeng x nzyzlumi-lrpi-moplr aposol kcng, murde nzmwxlrng ma tzvaebrti leplz kcng nidr mz rplz. ²⁷ Nzvzmipemlr aposol kcng x nzatutxbzlr mz zpzu r Kansrl kc, x sc tzaveatrpeng Nardr Pris kc. ²⁸ Rpibzle kx, "Rkabzkr bamu natq kx xplr kx bzkq alvztrpe-ngrnamu dcvi lr ncblo lc, a' mcamu ena da kx aleamu. Esaprlrpe-ngrnamu natqgr! Nzalvztr-krmu talvzpxpele Jerusalem, x rpiamu nzbzkr ncblo lc natetitrpe-ngrnamu nigr."

²⁹ Pita x aposol kc-kzng, nzayzlu-ngrbzlr natqdr mz nrzpi-krbz Pita kx, "Nzmu ncblo narpimlr bagr da kx blepxbz mz me pnz drtwr Gct, trnavz-nqblqkru, murde navz-nqblqpwzkr Gct, a' trngiu ncblo. ³⁰ Kxmule-esz' amyabzmu drtq Jiszs mz nztqlvztr-krnamule mz kros, a' Gct kcpwz tqangio kz trtegung atulz-mople nide. ³¹ Zbz Gct avzdzpele nide me matq-esz'ngr mz nrlarde kxrtc, murde nanginide king x Mevalu rgu. X na-ayzlu-ngrbzle nigu lr Israel mz Gct mz nrztekqtrngr nqmq nr drtwrgu, murde alwx ngrgung naipqpxbzleng. ³² X nigr kang tztung mrka, pipx-zvzbzkr da lcng tqmckr, da kc tqwai kz nzpipxkr Mqngrkxtr, kc tqkapem Gct bagr, nigr kcng tzvz-nqblqlr natqde."

³³ Kx nzxlrbzlr kc natqdeng zngya ngr drtwrdr kc tqmatqtx-zlwzpe, x sc tzrpipelr kx nanibqpe-kzlr aposol kcng. ³⁴ A' kzdq nidr kc tqngi Farzsi, drtqde Gamaliel, kxalvz kxmyapxbz mz lou sc Mosis sc tqmnc mrkc. X mrlx lc nzamatq leplz amrlx. Sc tqutxlz mrkc mz Kansrl, x rkabz natq ngr nzrvzmipxngr aposol kcng mzli kxipiz. ³⁵ Mz nibr nzrvzmipxngr yz, rpibzle mz Kansrl kc kx, "Nimu lr Israel, acvetio-lzbqamu mz da lc tqrpiamu na-alebzku mz ncblo lcng. ³⁶ Mzli kc ena kzdq ncblo drtqde Teudas rpile nide ncblo kxetu. X kzdung leplz nzamatqlr nide. X leplz nzesolzbzng mz trtqki-pwx (400) nzprtrpzng bade. A' nznibqtx, x dzbede kc nzakiting nrlc x nzwz-krde trngida-pnzu. ³⁷ Mz nibrde, Judzs lr Gzlili sc tqprtzm, mzli kc gzpmam ngr Rom tqrlwx-ngrde leplz. Mailz-kzle kc zbo ngr leplz. A' nznibq kz x kxnvz-nqblqlr nide nzaki-kzng nrlc. ³⁸ Mrlc tqyc-ngrde mzli ka, napibo bamu kx rlrtx-ngrbzmu ncblo lcng kx navztxng. Murde nzmu nzalvztr-krdr lc tqvzpxmle mz drtwr ncblo sa

^{☆ 5:30} Lou Kcpwz 21:22-23; Galesia 3:13 ^{☆ 5:34} Aposol 22:3

nayrkrnepxbz. ³⁹ A' nzmu nzalvztr-krdr lc tqvzpxmle mz drtwr Gct x rpingrnamu narpwa'-ngrbzku, rblx nzaesakitr-krgu nidr. Na-aclvetioku nikey aleku, ma tqota-alzuku badr Gct." ^{* 40} X Kansrl kc vz-nqqlqzbzle natqde. Sc tzkqlepe-mopwzlr aposol kcng navztrpzng badr, nzvibrtibzng x nzpibzlr kx bzkq nzycmnetrpe-mou-ngrdr Jisszs. Zbz sc tzrlrpixe-ngrbzlr nzvz-krdr.

⁴¹ Aposol kcng nzdwaszlr Kansrl kc. Tzabrtzlvzlr nzrlr-krbz Gct badr nzetqkr drtqdr mz nzvz-nqqlq-krdr Jisszs. ⁴² Mz zbqkalvz mz Mangrzangiongr mz ma nyzdr leplz, trnzesakiu nzalvztr-krdr x nzryapwxpx-krdr nrpa kx Jisszs nide Kxnzmcpk ne Gct.

6

Ncblo Nzrlimzng Kx Na-aclveng Dalr Makxtr

¹ Mz zbq lcng, leplz neng Jisszs nzkqlunepxpeng. X sc tzavzti-zvzbeltzakngr dztudrung badr kztedrung kcng trnzrungiscung. Mzli lc lr Jiu kxnxrlxngiting kcng tzycmneng mz natq lr Grik, drtwrdr lctrpz mz lr Jiu kxnxrlxngiting kcng tzycmneng mz natq lr Erameik. Nzrpibzlr kx, "Mzli kang kqlu, da kx suti drtwrdr olvz negrung kxnzbzsz ncblo ngrdrng trnzkapwzu badr mz nzakngr dakxznzng!" ^{* 2} Zbz aposol kcng nzkqlebzlr kxnxrlxngiting amrlx, x sc tzrpipebzlr badr kx, "Trbrngzpwzu bagr nzesakikr nzryapwxpx-krbzkr Nrpa ngr Jisszs, murde na-akingr dakxznzng. ³ Mzlegrng, mz drtwr lc, mcpxamu ncblo narlimzng mz nimu kx nqmq krdr mrlz mz nzobqkr leplz x Mqngirkxtr prsrle nidr x nzyrplaxng, kx nayrlq-kzng mz nzwzngr mz nzakngr dakxznzng. ⁴ Zbz na-amnctr-lzbqpwzkr mz nzkrka'ngr x mz nzryapwx-ngrbz Nrpa ngr Jisszs." ⁵ X drtwr lc nzabrtzlvztx leplz lcng amrlx. X sc tzmcpxpelr Stivin, ncblo kx nzrlxngiti-krde xpltrpz mz Gct x mailz Mqngirkxtr. Nzmcpx-kzlr Filip, x Prokorzs x Nikano x Timon x Pamenas x Nikolas kc Adiok. Mzli kc trnginideu lr Jiu. Zbz axvctr-lzbq-kaipz mz nzangiokr lr Jiu Yawe, x sc tqlxngiti-atele Jisszs. *

⁶ Nzvzmibzlr mz aposol kcng. X sc tzkrka'pe-ngrdr nidr x nzyrlqobzlr mqdr badr, mz nzmcpx-krdr nidr mz nzwzngr lc. ⁷ X natq Gct sc tqvzpx zvz, x leplz neng Jisszs mrkc Jerusalem sc tqkqlunepx zvz kz. X pris r lr Jiu nzkqlukzng kxnxrlxngiting.

Lr Jiu Kxnzrmailzng Nzlolvzlr Stivin

⁸ Stivin ale-zvzle rkk x da kxnxkctipxng, murde zmrlz x zmatq ngr Gct axplrle nide. ⁹ X kzdung lr Jiu kx nzvzkiplr mz taon kxetung Saerin x Aleksadria mrkc Afrika, kcng tzprtrng mz mangr-nzkrka'ngr kx nzrpibz, 'kr nyx ncblo kxnzarlapxng' nzmcx-kzng elr. X kzdut-kzng lr Jiu nzvzkiplr mz Provins kcng Silisia x Esia. Leplz lcng amrlx sc tztalwzpeng badr Stivin mzli kc tqryapwx-ngrde. †

¹⁰ A' Mqngirkxtr rkabz zmatq mz nzyrplaxng. X mzli kx ycmne-ngrde rblx nzayzlu-ngrbz natqde. ¹¹ Zbz nzxpe-kapqtxdr kzdung ncblo mz nzpokiatitr-krdr Stivin. X ncblo lcng tzrpibzlr mz leplz kx, "Xlrkr Stivin nzpibqti-krde Mosis x Gct!" ^{* 12} Dekc tzangyati-ngrbzlr drtwrdr leplz, badr lrtzlvzng x kxnzalvztrng mz Lou sc Mosis. Nzyrkrmqng amrlx ngrdr mz Stivin, nzdwatibzlr x nzvzmibzlr mz Kansrl. ¹³ Zbz nzvzmilzmlr kxnxpokia

^{* 5:39} 2 Be Ngrdr 13:12 ^{* 6:1} 1 Timoti 5:3-16 ^{*} 6:5 Ncblo kcng amrlx nzrlimzng tzmcpxng nztwzlr drtq ngr Grik. Nidr ncblo kcng ayrrnrngr tzaclvelr dalr makxtr. Kzdung nidr mwz nznginidr kxnxacvelr dzbe lrmakxtr mz nibrde. Filip lc blepxbz mz Filip kc tqngi aposol. ^{† 6:9} Leplz kcng tzprtrng mz 'Ncblo kx nzarlapxng' nidr lr Jiu kcng tzyzlu-moung Israel murde nzarlapxng mz nibr nzngini-krdr kxnzawz-nrbalqng. ^{* 6:11} Livae 24:16; Lou Kcpwz 19:16-21

lcng x nzrpilr kx, “Ncblo lc tresakiu nzrpingr natq ngr nzatrkatingr Mangr-nzangiongr nyzgu x Lou sc Gct kc tqkabzle mz Mosis. ¹⁴ Murde xlrbzkr nzrpi-krbzle mz leplz kx Jiszs kc Naszret na-awxlikiole Mangr-nzangiongr nyzgu x natekqtrle nqmq kcng amrlx tqaprcm Mosis bagu.” ¹⁵ Leplz kcng amrlx tzprtrng mz Kansrl kc, mztr tu txpwz mz Stivin x nzmcbzlr kx mzte pnaprtx apule nzobqkr enjrl. †

7

Stivin Rpile Kx Amrlue-zvzle Gct

¹ Nardr pris veabz mz Stivin, rpibzle kx, “?Da zpxw, tramrluewq Mosis x Mangr-nzangiongr Yawe?” ² Ayzlu-ngrbz Stivin natqde kx, “Trtingr, kx trtengeng x mzlengeng! A' lalztqmamu bange, murde trpxtxpx-ngrneu nqmq krgu! Krlz-angidrpeku Gct kc tqmyalz-esz'ngr aelwapx-lzbq-ngrbz mz melrmqgu Ebraam mzli kc tqmncbe-ngrde mz drtc' ngr Mesopotemia, x sc tqmnc ate mz taon kxetu Haran. ³ X pibzle bade kx, ‘Rlasz drtc' nyzm x kxnginimqng, x vz mz drtc' kx na-aelwa-ngrbo bam.’ ⁴ Zbz sc tqrlaszpele nrlarnrlc kc Mesopotemia, drtc' nyz lr Kaldea x sc tqvzpe tqmncpe mz taon Haran. X mz nibr nzrbzkr trtede, Tera, Gct vzmimle Ebraam mz drtc' kc tqmnc-ngrgu mzbq ka. ⁵ X trpnzngr drtc' lc kx kabzle bade kx nangi nyzde, kxmule-esz' me takitxopwz nabzlvz r nanyc. A' mzli kc Ebraam trgalr nede doa, Gct esalz-ngrbzle drtc' lc bade kx kalr doa kxnzvzpxmqng mz nqvi lrde namncng elr x drtc' lc nangi nyzdr. ⁶ A' rpi-kzpze bade kx, ‘Doa kxnzvzpxmqng mz nqvi lrm namncng mrkzble, me na-awz-nrbalqng leplz nidr x na-atrkatilr nidr, nakrlzbzle yiz kx trtqki-pwx (400). ⁷ A' sa na-ayrplapxx leplz kcng tzyrlqlr nidr mz nzngini-krdr kxnzawz-nrbalqng. Zbz sa narlaszlr drtc' lc kalr, x navzmqng x na-angiolr ninge mrka.’ ⁸ Zbz Gct rpibzle mz Ebraam kx ncblo nedeng napakrng murde nangi rkh ngr Nzesz'tikr Drtwrdr badr, mz nzngini-krdr leplz nedeng. Zbz Ebraam nede Aesak x pakrle mz zbz krartqmqz mz nibr nzrmcngr mzte. X mz nqmq kcpwz, Aesak kx etupele, pakrle mrlxde Jekop. X Jekop pakrleng mrlxdeng kcng nzpnu-esz'-nrade-li (12), krkcng tznginipedr melrmqgung kcng tzmailzlr nqvi lrgung.”

⁹ X rpi-mopwz Stivin kx, “Melrmqgung lcng nzdobubzng mz mzledr Josip. X sc tzamwapebzlr mz ncblo kx nzrvzming mz drtc' ngr Ijipt, nangi kxnzawz-nrbalq. A' Gct mncbz bade. ¹⁰ X arlapxle nide mz nzetqkr drtqde amrlx. X batrpzle mz King r Ijipt nzamatq-krde Josip mz nzyrplapxngr kc tqkapebz Gct bade. Zbz sc tqmcpxpe King nide mz nzaclve-krde Ijipt x dztudeng amrlx. ¹¹ Zbz kzdq dzbi kc tqtaope Ijipt x Kenzn kz kx batrpzle nzetqkr drtq kxtrka-esz'ngr. X melrmqgung, mzle Josip kcng, trpengr me narmc-ngrdr dakxnzng. ¹² A' kx xlrpe trtedr Jekop kx dakxnzng kc tqyc Ijipt, sc tqatwzlrpe-ngrde mrlxdeng mz nxzpe-krdr dakxnzng. Krlc nzwrd kx ayrngr nzvz-krdr Ijipt. ¹³ Mz nzvz-krdr krali mz nxzpe-krdr dakxnzng, Josip kc tqpipebzle badr kx nide mzledr, murde trnzglxlu nide. X mzledeng sc tqkrlzipe King. ¹⁴ Zbz Josip atwzlr-ngrbz natq mz trtede x kxnginideng amrlx kx navzomqng Ijipt. X nzkqlu-krdr krlzbzle nzpnu-rlimz-nrade-nzlvqn (75). ¹⁵ Zbz Jekop badr mrlxdeng kcng tqngi melrmqgung, sc tzvzpeng Ijipt. Nzmcnng x sc tzbzpe-kzng elr.

¹⁴ 6:14 Jon 2:19 [†] 6:15 Mztq Mosis pnaprtx kz. [Nzrlaszngr 34:29; 2 Korint 3:7] ¹⁵ 7:3 Nou 12:1 ^{7:5} Nou 12:7; 17:8; 48:4 ^{7:7} Nou 15:13-14; Nzrlaszngr 3:12 ^{7:9} Nou 38:1—50:26

16 Mz nibrde, mzli kc lr Israel tzrlaszpe-ngrdr Ijipt, nrkrdrqdr tzyzlumipe-moung mztea Sekem mrkc Kenzn. X sc tzayrbqpypemqng mz butqbr kc tqxpe-pnzbz Ebraam mz mrlxng Hamor.” ¹⁷

¹⁷ Rpi-mopwz Stivin kx, “Mzli kc tqesope-ngrm mzli r nzarlapxkr Gct melrmqgung Ijipt, mz nzvz-nqblq-krde da kx esalz-ngrbzle mz Ebraam, nzkqlunepxppe-krdr myaszpxle nyrmz. ¹⁸ **X mzli lc kzdq kz king sc tqacivepele Ijipt, kx trklztileu nike ale Josip mzli kc kai mz nzokatr-krde lr Ijipt.** ¹⁹ Mz nzmwxlrvz-krde nzkqlukr lr Israel, sc tqangqngutipele nidr x aetqtibzle drtqdr, mz nzrtulrtr-krbzle badr nzrtco-krdr itoto kxnchlongr nedr mz Lue Nael, murde nabzng. ²⁰ Mzli lcde Mosis mzte nzmc x nzobq-krde alulibz Gct. X nzabuti-kapq trtede x lxede le brma temz tq. ²¹ Mzli lc, kx rblxpele kc nzamnc-kapq-krdrle, sc tzyrlqopelr mz kzdq topla, x sc tzalvabelzpemlr mz lue. Zbz sc tqmcpe inyx King, x abutipele apupele mrlxde. ²² X nzkabz mz Mosis nzalvztrngr kx brngztxpx-zlwzbz mrkc Ijipt atwrnrngr, x xplr mz nzycmnengr x mz nzalengr da.”

²³ X rpi-mopwz Stivin kx, “Mzli kc Mosis yiz ngrde nzpnu-tqpwxpe-ngrde (40), sc tqvzpem mz drtwrde nzoklati-krde lr mrnyzde lr Israel, kcng tzwz-nrbalqtrpzng mz lr Ijipt. ²⁴ Mzli kc tqoklati-ngrdeleng, mcle kzdq lr Ijipt tqatrkti-rbrle kzdq lr Israel. Zbz sc tqvzpebz mz nzokatr-krdele, ayzlubzle mz lr Ijipt kc x nibqtxde. ²⁵ Nzpnzkr drtwrde le kx lr mrnyzdeng nayrplatitr drtwrdr kx Gct sc tqwz-zlimle nide mz nzarlapx-krde nidr mz lr Ijipt, a' tryrplatitru nardr. ²⁶ Mzbq kc mou Mosis adcpx-lzbqbz mz lr Israel nzling kx nzotang. Sc tqabzpebzle nzao-ngrbz nrwz mz mzlirdr. Rpibzle kx, ‘Ncblo lcng, nimu mzle-lzbq! ?Nike tqota-rbrtr-ngrnamu?’ ²⁷ A' ncblo kc tqabzobz nzotangr apepxle Mosis x rpibzle kx, ‘Naom apqbrtr! ?Neke mcpxle nim mz nzaclvengr nigr x nzryrlqngr drtwr mz nike naprtz? ²⁸ ?Rpiq nanibqq ninge da kc tqwai nnibq-krm lr Ijipt kc bq?’ ²⁹ Mz natq lcng Mosis sc tqplcpe rlu, x tqnginipede kxvznebz mrkzble, nyz lr Midizn. X mz nzmnc-krde kc mrkc yrlz x nede ncblo li. *

³⁰ “Yiz nzpnu-pwx, Mosis sc tqmnc-ngrde lzke esotrpz mz Newz Saenae, kc tzrpi-kzpz Newz Horeb. ³¹ Mzli lcde, kzdq enjrl ne Gct adcpx-lzbqbz bade mz nilvc nyr mz nounc kxmrbzne kx wou. ³² Kx mclele kctitpxle. Zbz kx esonetrpzle kc mz nzmc-angidr-krdele, Yawe sc tqycmnepebz bade. ³³ Rpibzle kx, ‘Ninge Gct kc tqangio melrmqmng, Ebraam, Aesak x Jekop.’ Kx xlrbz Mosis le, rnrcpe mz zmwzlr mz nzobqtrngr mrkc tqyru. ³⁴ Zbz rpibz Yawe bade kx, ‘Kapx sadol scmqng. Murde mrla tqtu-ngrn ngi drtc’ kxtr. *

³⁵ Mcpex nzatrkatikr lr Ijipt leplz nengeng, x xlrpex nzyrni-krdr. Mrlc tqycngrde, vzopemc mz nzarlapxngr nidr. Vzm, murde na-atwzlrpe-mou-ngrne nim Ijipt.’” *

³⁶ Stivin rpi-mopwzle kx, “Mosis lc nide ncblo kcpwz tzpxtxpxngr lr Israel kcng mz nzbpi-krdr kx, ‘?Neke mcpxle nim mz nzaclvengr nigr x nzryrlqngr drtwr mz nike naprtz?’ ³⁷ A' Gct atwzlr-ngrbzle Mosis badr mz nzaclve-krde nidr x nzarlapx-krde nidr, mz nzokatrkr enjrl lc tqadcpx-lzbqbz bade mz nounc kxmrbzne kx wou. †

* **7:16** Nou 23:15-18; 33:19; 50:13; Josua 24:32 * **7:17** Aposol 7:6 * **7:18** Nzrlaszngr 1:8 * **7:19** Nzrlaszngr 1:10-22 * **7:28** Nzrlaszngr 2:14; Aposol 7:35 * **7:29** Nzrlaszngr 2:15, 22 * **7:30** Nzrlaszngr 3:1-2 * **7:30** Nzrlaszngr 3:1 * **7:33** Nzrlaszngr 3:5-6 * **7:33** Sadol nzkapx mz nzavzo-lzbq-ngrbz mz Gct. * **7:34** Nzrlaszngr 3:7, 10 * **7:35** Nzrlaszngr 2:14; Aposol 7:27

† **7:35** Lr Jiu nzpxtxpx-ngrdr Jiszs kc tqatwzlr-ngrbz Gct mz nzarlapx-krde nidr, da kc tqwai pnz melrmdrng nzpxtxpx-krdr Mosis kc tqatwzlr-ngrbz Gct mz nzarlapx-krde nidr.

³⁶ Mosis sc tqmailzpxmle nidr Ijipt, mz nzale-krde da kxnxkctipxng x rkx kxmatqng mrkc Ijipt, mz nzkawi-krdr Prla Bla, x mz nzvzne-krdr lzke yiz nzpnu-pwx (40). ³⁷ Mosis kcpwz dekc kz tqrpibz mz lr Israel kx, ‘*Yawe Gct rgu sa na-atulzle kzdq profet kxetu mz mzlirgu kx na-apule ninge.*’ ³⁸ Krlc Mosis kcpwz tzmncng badr melrmqgung mrkc lzke. Mz Newz Saenae enjrl ne Gct ycmnebz bade, murde na-aprcmle bagu natq ngr kxnamu nzprtrngr mz nzlungr kxboi.

³⁹ ‘A’ trsutiu drtwr melrmqgung nzvz-nqblq-krbzlr natqde. Nzpxtxpxngrdr nide murde mz drtwrdr nayzlu-moung Ijipt. ⁴⁰ X mzli kc Mosis tqmncobe-ngrmle mz newz, *nzrpibzlr mz mzlede Eron kx, ‘Wz-ngrbz du mqngr da kxnzlx kx na-angiokr x kx namailzlr nigr. Murde trkrlzpekru da kx waipe Mosis lc tqmailzpxmle nigu Ijipt.’* ⁴¹ X mzli lcde nzesablqtilr Gct mz nzwz-krdr kc brbzda mz nzobqkr nei kzu. X nzrkabzng blz bade, mz nzsri-krdr kx nide gct kx na-arlapxle nidr. Zbz nzmulvzlr nide mz nzarmyalz-krdr da kx nzwz-ngrdr mz mqdr. ⁴² Mz nzmu-krde lc, Gct esablqti-kzle nidr x kaobzle nidr mz nzangio-krdr nepi, temz, x vri. Krla Natq Gct kx yr profet Emos mzli kc pnz mz nzsri-krde kx, ‘*Mzli kc nimu lr Israel tqmnc-ngrnamu lzke yiz nzpnu-pwx, trnginipwc’u kc tqmulvzamu x tqangioamu mz blz kcng tznibqti.* ⁴³ A’ glqneamu mqngr Molek, gct kx apubzle nepi mz lr Kenzn, x mqngr Refan, gct kx apubzle vri mz lr Ijipt, murde na-angioamu nidr. Mrlc tqyc-ngrde, na-aesopxbo nimu rllu, namyaszpxle taon kxetu Bxbilon!’” ⁴⁴ [‡]

⁴⁴ X rpi-mopwz Stivin kx, “Mzli kc melrmqgung tzmnc-ngrdr lzke, nzangiolor Gct mz Tentkxtr kc tqaelwapx-ngrde kx Gct mnccbz badr. Nzrwz-zbztingr vz-nqblqpwzle da kx aelwa-ngrbz Gct mz Mosis mz newz Saenae.

⁴⁵ §

⁴⁵ Mz nibrde, melrmqgung kcng tzrtwzng Tentkxtr kc, kaobz trtedrng, nzglqmlr mrka Kenzn, nidr badr Josua mzli kc. Josua mailzbzle nidr mz nzota-krdr badr lr Kenzn. X mz nzokatrkr Gct nidr, nzmaneutitpxlridr mz drtc’ lc. Tentkxtr kc tqycbz badr mrka, x yc kz mzli kc melrmqgu Devet tqngi-ngrde king. ⁴⁶ X Gct abrtzlvzle Devet. X rlxtibz Devet bade nzrlr-krbzle bade nzrwzng Mangr-nzangiongr kx namnc-zvzngr Gct kc tqangio melrmqde Jekop. ⁴⁷ A’ rlr-ngrbz Gct mz mrlxde Solomon nzwti-alzu-krdele. ⁴⁸ A’ Gct kc tqmyalz-esz’ngr trmncu mz ma kx wzngr leplz, da kc tqwai nzryrkr profet Asaea le mzli kc bqnc. ⁴⁹ Rpi Yawe kx, ‘*Heven apule me wxbu-ngrne murde ninge King. X nrlc apule me tuongr nanycnge. ?Mrлу r ma kzniqe nawzngr nangi nyznge, me na-ama-ngrne?*’ ⁵⁰ Murde ninge kc tqrwzng da lcng amrlx.’” ⁵¹

⁵¹ Mz nzycmne-plzitrkr Stivin nidr, rpi-mopwzle kx, “Narmu mqngi! X apuamu kxnxzmc-mrbrng murde rblx nzkatr-lzbq-krmu mz me pnz drtwr Gct. X apu-kzamu melrmqmung murde tqrpwa'-zvz-ngrbzmu mz Mqngkrkxtr nzycmne-krbzle bamu. ⁵² Melrmqmu lcng nzatrkatilr profet neng Gct amrlx! X nznibq-kzlr profet kcng tzrpi-kaing nzvz-krm Krkc Tqtubq tqmcpx Gct. X mzli lc ate aprcbzmu nide mz enqmi rdeng murde nanibqlr nide. ⁵³ Kxmule-esz’ Gct aprcbzle bamu Loukxtr mz mq enjrl, a’ ptxpx-ngrnamu nzvz-nqblq-krmule.” ⁵⁴

⁵⁴ **7:37** Lou Kcpwz 18:15; Aposol 3:22 ⁵⁵ **7:40** Nzrlaszngr 32:1, 23 ⁵⁶ **7:43** Emos 5:25-27 ⁵⁷ **7:43** Mz nzangiongr Molek, nzribqngr doa kxnxztopwzng murde nanginidr blz. ⁵⁸ **7:44** Nzrlaszngr 25:40; Hibru 8:5 ⁵⁹ **7:44** Gct yrle natqdeng kcng nzpnu-esz’ mz rplz li, x kabzle mz Mosis. Zbz nzryrlqzmqng mz nabz Bokis ngr Nzesz’tikr Drtwrdr Badr Gct mz nabz Tentkxtr. [Nzrlaszngr 25:16, 21] ⁶⁰ **7:50** Asaea 66:1-2 ⁶¹ **7:52** Asaea 53:11-12; Jeremaea 23:5; 33:15 ⁶² **7:53** Galesia 3:19; Hibru 2:2

Stivin Nzvaebq Mz Rplz

⁵⁴ Kx nzxlrbpebz krkcng tzprtrng mz Kansrl nyz lr Jiu natq Stivin lc, drtwrdr kc tqngyaxt-zlwzpe x nzmadqlvzpebzlr nqngidr bade. ⁵⁵ A' Mqngrkxtr prsrle Stivin, x mzte obqtxlzp wz Heven x mcle zluli r Gct, x Jiszs tu me matq-esz'ngr mz nrlar Gct kxrtc. *

⁵⁶ X rpibzle badr kx, "Obqbzmu, mcx naonrx ngr Heven nzlvpx x Jiszs Mrlx Leplz kc tqtubz mz nrlar Gct kc tqrte!" ⁵⁷ Nzkabopxng mz natqdr kxetu x nzapqbrtrlr nradrtqdr mz mqdr, murde ma tzxlrlr nzpivxi-krde Gct. Zbz mz zngya kxetu nzyrkrtx-lxblrbzng amrlx ngrdr bade.

⁵⁸ Kxnzeti lcng sc tkilzpxpelr nide yz mz nibr Jerusalem, x sc tzvaebrtipelr nide mz rplz. X ncblo kcng tzpokiatirl nide sc tzrvaeberti-kzng nide. X nzayrlwrtrpzlr lrpzdr mz kzdq obla drtqde Sol, mz nzaclve-krdeleng. ⁵⁹

⁵⁹ Mzli kcpwz tzvaebq-ngrdr Stivin, sc tqkrka'pe tqrpipele kx, "Jiszs, Kxetu rnge, rlr-ngrbo mqngnrgbam!" ⁶⁰ Zbz rwetxo zpr x sc tqetumipxpe natqde ngrpi-krde kx, "Kxetu rnge, ipqpxbz alwx ngrdr lc!" X sc tqbzpe. *

8

¹⁻³ Mz nibr nznibqng Stivin, kzdung lr Jiu kx nzangio-zvzlr Yawe, Gct rdr, nzyrtzmqlr nrkrdrtqde. X trmyamiu drtqdr nzryrnimigr. X natqdr betx mz nzyrni-krdr.

X Sol lc abrtzlvzle nznibqng Stivin. X sc tqabzopele nzodati-krde lrmakxtr. Dwatrngr kc ma, dwapxm, x dwatr-mou-ngrde kc ma, mz nzkilzpx-krmle leplz neng Jiszs, vz-ngrde ncblo x olvz tqadwatrleng mz presin.

X abzo mz zbo lc, nzatrkti-zlwzlr lrmakxtr kcng tzmnncng Jerusalem. Zbz kxnzrlxngiting amrlx nzangiliating x nzplckilr me blepx-lxblrbzng mz provins kcng Judiz x Szmariz. A' aposol kcng, nidr kc txpwz kx trnzplcpx-pnzung Jerusalem.

Filip Ryapwxbz Nrpakxmrlz Mz Lr Szmariz

⁴ Mz nzmu-krde lcde, krkcng tzlxngitilr Jiszs nzaodalitipeng, x nzvzkilr me yctxp tzyapwxtpixlr Nrpakxmrlz Mz Lr Szmariz Provins. X pibzle mz lr Szmariz kx Jiszs nide Kxnzmcpx ne Gct. ⁵ ⁶ Zbo ngr leplz kcng nzlalztq-angidrbzng mz natqdeng. X nzlxngitilr Jiszs murde nzxlrbzlr da kx pile x nzmclr rkx kcng tqalele. ⁷ Murde leplz kxkqlu kxnzmcpx-ngrmqng drka' nzkabopxng mz nzprszpxkr drka' nidr. X nzkqlung kx drtqdr bzti x kxnzbxplong nzmlrlz-kzpqng. ⁸ Mz nzmu-krde lc, nzabrtzng kxetu yctx mz nabz lr mztea lcng.

⁹ A' kzdq kc ncblo mz taon lcde drtqde Saemon. Mzli boipe lr Szmariz tzkctitpxpxlr da kx alele mz nznrgineti-krde dabo. Rpile nide kzdq ncblo kxetu.*

¹⁰ X leplz amrlx, abzo mz kxnztopwzng krlzbzle kxnzetung nzlalztqtr-angidrbzng bade. X nzrpilr kx, "Ncblo lc nide kc tzrpibz 'Nzxplr-esz'ngrkr Gct.'" ¹¹ Nzlalztq-angidrbzng bade murde nzkctipx-krdr nide mzli boipe mz nzalrti-krde da mz dabo. ¹² A' ncblo x olvz lcng sc tzwrxtrpeng mz nzabrtzlvz-krdr natq Filip. Alvztr-ngrde nidr Nrpakxmrlz kx Gct sa tqaesotrpemle leplz bade murde nanginide King rdr, mz nzlxngiti-krdr

* ^{7:55} Ngalrde 55 pile leplz kcng tq tzmnncng mz Tqtrbz: (Gct) Mqngrkxtr, Gct (Trte), x Jiszs (mrlx Gct). Mc kz Matiu 28:19, x Nzwrkxtrkr Jiszs, mz Matiu 3:13-17, Mak 1:9-11, x Luk 3:21-22. ^{7:56}

Daniel 7:13-14 ^{7:58} Livae 24:14; Lou Kcpwz 17:7; Aposol 5:26; 9:39 ^{7:60} Luk 23:34, 46

^{8:5} Aposol 6:5 ^{8:9} Nzryrngrkxtr rpile kx bzkq kx na-alrti da mz dabo x bzkq kx narlr-ngrbz. [Livae 19:26; Lou Kcpwz 18:10-12; 2 Be Ngrdr 33:6; Esikel 13:18-23; Maekz 5:12]

mrlxde Jiszs. ¹³ Saemon nide esz'-krde rlxngiti kz, x mz nibr nzwrkxtr-krde, mzli kqlutx nzmnctilr badr Filip. Kx mcpele rkx x da kxmatq kcng tqale Filip, sc tqkctipxpeleng.

¹⁴ Kx nzxlrppe aposol kcng Jerusalem kx lr Szmariz kqlupe nzlxngitipelr Nrpa ngr Jiszs, nzatzlrl-ngrbzlr Pita x Jon badr. ¹⁵ Kx nzkaputrpzlr mrkc, sc tzkrka'pe-ngrdr lr Szmariz kcng murde natwz-kzlr Mqngrkxtr. ¹⁶ X trgalr nidr kx vzo-ngrbz Mqngrkxtr. A' nzwrkxtr-txp wzng mz drtq Kxetu Jiszs. ¹⁷ Zbz Pita x Jon nzyrlqobzlr mqdr badr x nzatzlrl Mqngrkxtr.

¹⁸ Kx mcpebz Saemon kx nzkapebz Mqngrkxtr mz nzyrlqo-ngrbz kc mq, suti drtwrde nznka-krbzle trau mz Pita x Jon mz nxzpe-krde zmatq lc. ¹⁹ X rpibzle kx, “Ka-kzp bange zmatq lc, murde mzli kx yrlqo-ngrbo mqnge mz leplz natwz-kzlr Mqngrkxtr.” ²⁰ A' rpibz Pita bade kx, “Takitrde nimu badr trau scmqng nzodating, murde rpi-ngrn kx naxpeq Mqngrkxtr kx ka-nrbalqbz Gct badr kxnzrlxngiting! ²¹ Trpnzngr scm da kx yctrp bagr, murde nzao-krm drtwrm vz-rbr mz nzobqkr Gct! ²² Mz nzmu-krde lc, nqmq nr drtwrm la tqtrka natekqtrq x krka'bz mz Kxetu. Mwx elx sa naipqle nim. ²³ Murde mctrpebo kx nzdobu-krme bagr trka-atwrnrngr x mnclzbzme mz zmatq ngr alwx.” ²⁴ Zbz rpibz Saemon kx, “Krka'-ngrbzmu ninge mz Gct, murde da kcng tqpiamu ma tzptilzlr ninge!” ²⁵ Mz nibr nzyapwxtipx-angidr-krbz Pita ncdr Jon Nrpa ngr Kxetu Jiszs mz lr mztea lcng, sc tzyzlupe-mopwzng Jerusalem. X mz nzyzlu-krdr lcde, nzyapwxtipx-kzlr Nrpakxmrlz mz mztea kxkqlu ngr Szmariz Provins.

Filip Awrkxtrle Kzdq Kxetu Ngr Nubia

²⁶ Kzdung mzli mz nibrde, kzdq enjrl ne Gct rpibzle mz Filip kx, “Vz mz lrpzki kc tzvzkipxm Jerusalem, tqvzkitrle lzke x sc tqvzkitrpeq mz taon kxetu Gasa.” ²⁷ Zbz sc tqvzpe. Mz nzvz-krde kc, mcle dq ncblo kx vzpxm mz drtc' ngr Nubia mrkc Afrika. Nide kxetu kxmyapxbz, wztrpz mz Kandes, kwin kc Nubia. Nide ncblo kx nzvzpx x aclvele trau sc Kwin. Vz Jerusalem mz nzangio-krde Gct, x mzli lc nayzlupe mrnyzde. †

²⁸ X mz nzyzlu-krde mrnyzde, wxbuom mz sariot scde kx kilzne hcsi nede. X sc tqrlwxle buk sc profet Asaea, natqde etu. ²⁹ Mzli lc rpibz Mqngrkxtr mz Filip kx, “Vzbz mz sariot la.” ³⁰ Zbz Filip votxbz mz sariot kc x xlrbzle ncblo kc nzrlwx-krde buk kc, x sc tqveapebz bade. Rpibzle kx, “?Yrplatitr kz narm drtwr ngr natq la tqrlwxq?” ³¹ A' rpibz ncblo kc kx, “?Myx kxnamu nzyrplatitrkr narnge le, kx trpnzngr lc kx naryapwx-dalitim bange?” Zbz sc tqyrrnititrpebzle mz Filip naprtzbz mz sariot kc, nawxbung ncdr. ³² Natq Gct kc tqrlwx ncblo lc deseile, “Ncblo lc nzmailzpx mz nznribqng, da kc tqwai nzmailzpxngr sip kx napz. X mnc-lrpine mzli kc tznibq-ngrde, da kc tqwai nei sip nzmnc-lrpi-krde mz nzyrlxo-krbz ncblo nrpnrd e mz nzlube-krde. ³³ Ncblo lc nzamyatibzlr drtqde x nzyzlu-krbzlr da bade trtubqu. A' trpengr neidu lrdeng murde nzlu-krde nzayrkpxpebz mz nrlc ka.” ³⁴ Lr Nubia kc rpibzle mz Filip kx, “?Kzle, nelc tqycmnetrngr profet lc? ?Tqycmnetr-ngrde nide esz'-krde o kzdq kz ncblo?” ³⁵ Zbz Filip sc tqyokaetipxbzle bade kx dckrlzde lc tutrpz mz Jiszs. X sc tqyokebzle bade nrpa ngrde amrlx. ³⁶ Zbz mz nzvoo-krbzlr kc mz lrpzki, nzvzong mz kzdq lue. X ncblo kc rpibzle mz Filip

* ^{8:15} Luk 9:51-54 † ^{8:27} Mzli lc Nubia kzdq kz drtqde Kus x kzdq kz Itiopia. A' Itiopia lc blepxbz mz Itiopia kc mzli ka. Mzli lc, ncblo kc tqwz vzv mz ma kxetu nyz King, navzpxpwz murde ma tqmwimile olvz rde o inyxdeng. Lou scdr lr Jiu trnzrlpx-ngrdr kx ncblo kxmulc lc naprtr-angidrbz mz lr Jiu. [Lou Kcpwz 23:1] Kxmulc-esz', a' nzrlr-ngrbz nzangio-krde Gct murde mwz Gct na-arlaxp-kzle nide. [Asaea 56:3-8] * ^{8:33} Asaea 53:7-8

kx, "Obqbz, kzdq lue kc mrkc! ?Nike nalolvz-moule ninge mz nzwrkxtr-krnge?" ³⁷ Filip rpibzle kx, "Kx tqlxngitiq Jiszs mz nabzm atwrnrngr, krlzq nzwrkxtrngr." Rpibz ncblo kc kx, "Lxngitix kx Jiszs nide mrlx Gct." ³⁸ Zbz sc tqrkapebz natq mz nzawxbungr sariot kc, x sc tzpoopeng rlilrdr mz lue kc. X sc tqawrkxtrpe Filip. ‡

³⁹ Kx nzvzdzpemlr mz lue kc, Filip katxpxm Mqngr Gct bade, x trmcpeu ncblo kc. A' sc tqvope mz nzabrtz-zlwzngr. ⁴⁰ Mzli kcpwz Filip mcpele nzmnnc-krde mz taon Asotzs mz nrlarde kzprla, Prla ngr Meditrenia. Zbz sc tqvz-zlipele lrpzki kxvzkile nrlarde kzprla, mz nzvz-krde Sisaria. X oklatile mztea kcng amrlx mz lrpzki lc mz nzyapwxtipx-kz-krbzle Nrpakxmrlz badr.

9

Nqmq Kr Sol Tekqtrpz Jiszs

¹ Mzli lcde Sol kc tqvz zvz nzpipx-krde natq ngr nzamwxlrngr x nzribqngr leplz neng Kxetu rgu Jiszs, murde lr mrnyzdeng ma tzvz-nqblqlr Jiszs. Dekc tqvz-ngrbzle mz Nardr Pris. ² X rlxtibzle nayrbzle kcng letz mz kxnzrmailz ngr mangr-nzkrka'ngr nyz lr Jiu mz taon kxetu Damaskzs. Murde nalolvzle lr Jiu kxnvz-nqblqlr 'Lrpzki r Kxetu,' x navzmile nidr Jerusalem mz nzadwatr-krde nidr mz presin. *

³ Mz nibr nztwz-krde letz kcng, sc tqvzpe Damaskzs, nidr badr kzdung ncblo. Zbz mzli lcpwz tqesotrpebzle mz taon lc, zyzlr kxetu vzom mz bongavz, pnamilxle nide. ⁴ X tatxo pnz. Xlrle kc natq rpibzle bade kx, "?Sol, Sol o, nike tqatrkat-ngrn ninge?" ⁵ Rpibz Sol kx, "?Nim neke, kx Kxetu?" Rpibz natq kc kx, "Ninge Jiszs, kc tqatrkatiq. ⁶ A' mzli ka tulz x vztr mz taon la x da kx na-aleq sa napibz bam." ⁷ Ncblo kx yrkrminedeng nztu-nabupeng mz zmwxlr, murde nxzlrnatq kc, a' trpnzngr kx nzmclr. ⁸ Mz nibr natq Jiszs lc, Sol tutxlzm. A' kx aobqpxle mzte, trpnzngr da kx mcle. Zbz ncblo lcng nzmalebzlr mqde, sc tzvzmitrpelr Damaskzs. ⁹ Zbq tq kx rblx nzrmc-krde da x mzli lcde trpnzngr da kx ngqde x mnqle.

¹⁰ Mzli lcde, kzdq ncblo ne Jiszs mnc Damaskzs, drtqde Ananaeas. Kxetu Jiszs ycmnebz bade mz nzobq-rmwiblengr, rpibzle kx, "Ananaeas!" Rpibzle kx, "Kxetu rnge, ninge se." ¹¹ Zbz rpibz Jiszs bade kx, "Tulz x o-zli lrpzki kc tzrpibz 'Tubq,' krlzbzme ma nyz Judzs. X veati dq ncblo mrlcde drtqde Sol dalr taon Taszs, murde mzli ka sa tqkrka'. ¹² X mcle nim mz nzobq-rmwible-krde, kx vztrpz kc bade ncblo drtqde Ananaeas, x yrlqobzle mqde bade murde naobq mou." ¹³ Rpibz Ananaeas kx, "A' Kxetu rnge! Xlrpex nrpa ngrde. Ncblo la atrkati-zlwzpele leplz kxnxkqlu nemqng kcng Jerusalem. ¹⁴ X mzli ka twzpebzle zmatq kx nzkapxbz kxnxzeti rdr pris, mz nzlolz-krde leplz amrlx kcng tzlxngitilr nim." ¹⁵ Rpibz Kxetu kx, "Kxmule-esz', a' vzbz, murde mcpxpex nide mz nzwztr-krmle bange. Sa nalepxbzle nrpa rnge mz leplz kxtrngiulrJiu x king rdrng x lr Jiu kz. ¹⁶ X ninge la sa napipxbo bade kx nzwrde nakqlu kalr mz nzetqtikr drtqde mz nzwztr-krmle bange." *

¹⁷ Zbz Ananaeas rkalzm x vz dwatr mz ma kc. X yrlqobzle mqdeng mz Sol, sc tqrpipebzle kx, "Mzlenge Sol, atwzlr-ngrmle ninge Kxetu Jiszs kc tqadcpx-lzbqzbz bam mz lrpzki, murde mzpq naobq mou x Mqngrkxtr naprsrl nim." ¹⁸ X mzli lcpwz kzdung da nzbrkapxmqng mz mzte, x sc

‡ ^{8:38} Kxmule-esz' ncblo nzvzpx o trtingr, a' nzprtr-ngrbz mz Jiszs vzpxm mz nzrlxngitingr.

* ^{9:2} Mzli lc kxnvz-nqblqlr Jiszs kxnxkqlu-zlwzng nidr lr Jiu kx nzangioeng mz mangr-nzkrka'ngr tzycng mz mztea nyzdr. * ^{9:16} 2 Korint 11:23-29

tqrmcpes mou da. Tutxlzm, x sc tqwrkxtrpe. ^{19a} Zbz mutx, x nzxplrx-karde kc tqyzlupe-mop.

Sol Mrkc Taon Damaskzs

^{19b} Sol nzmncti-moulr kcng zbz mz taon Damaskzs badr leplz neng Jiszs. ²⁰ Mzli lcde vztr mz mangr-nzkrka'ngr nyz lr Jiu x sc tqyapwxtipxpele Jiszs kx nide mrlx Gct. ²¹ Krkcng amrlx tzlalztqbzng nzkctitpxlr Jiszs nztekqtr-atwrnrpe-karde Sol. X sc tzvea-etrpeng, tzrpipelr kx, "?Trngiu ncblo kc tqrpile naodatile krkcng tzmncng Jerusalem tzangirolr Jiszs? ?Trvzngnkleple mrka mz drtwr lcde lapwz nzolvz-krdeleng x nzvzmi-krbzleleng mz kxnzeti rdr pris?" ²² Nzryapwxpxkr Sol tqxplrnepx x angqbqtxdeng lr Jiu kcng tzmncng Damaskzs, mz nzayrbq-zpwx-krbzle badr kx Jiszs nide Mevalu kc tqmcpx Gct.

²³ Zbz kqlu mz nibrde, lr Jiu kcng tzrmailzng sc tzryrlqpeng drtwr kx nanibq-ngrdr Sol. ²⁴ X ngrlx x nrlckxbq, kxnzrmailzng sc tzaukzti-angidrpelr nide mz naonrx ngr drkq kx o-ngleale taon kc. Murde nzrpilr nanibqlr nide mzli kx dwapx-ngrde. A' da kc tqpnz drtwrdr nzpitxbz mz Sol. ²⁵ X kzdq nrlckxbq kzdung kxnzvz-nqblqlr nide, nzotibzr nzadwapxmlr mz kzdq memrplx mz drkq kc, x nzavoomlr mnclzm mz topla kxetu.

Sol Prtrpz Mz Leplz Neng Jiszs Mrkc Jerusalem

²⁶ Mz nibr kzdung mzli, Sol rpile nayzlu mou Jerusalem. Zbz kx krlzbzle mzteadau, rpile naprtrpz mz krkcng tzvz-nqblqlr Jiszs mrkc. A' nzmwxr-ngrdr nide murde trnzlxitru kx vz-nqblq-angidrpelr Jiszs. ²⁷ A' otibz Banabas nide x vzmimle mz aposol kcng. X aopxbzle badr kx Sol mcle Kxetu rgu Jiszs mz lrpzki kc tqvzkile Damaskzs, x ycmnepebz bade. X mz nibrde sc tqyapwxtipxpele Nrpa ngr Jiszs Damaskzs, mz nelz kxbr. ²⁸

²⁸ Zbz Sol sc tzmncng badr x vzlvzpxle Jerusalem atwrnrngr. X ryapwxbz mz leplz mz nelz kxbr. ²⁹ Ryapwx-kzpbadr x nztalwzng badr lr Jiu kcng tzycmneng mz natq lr Grik, a' nzryrlqng drtwr kx nanibq-ngrdr nide. ³⁰ Kx nzkrlztipelr kxnzrlxngiting le, sc tzvzmiopelr mz taon kxetu Sisaria. Zbz sc tzatzlrx-pe-ngrdr mz taon nyzde Taszs mrkc Silisia Provins.

Pita Amrlzle Nrkrdrtr Enias

³¹ Zbz Irmakxtr talvzpxle Provins kcng Judiz, Gzlili, x Szmariz nzmnncng mz nrwx. X mzli lcde, Irmakxtr nzaxglrtr mz nzrlxngitingr x nzkqlunepxng, murde nzamrluelr Kxetu, x Mqngrkxtr apqtrle drtwrdr.

³² Mzli lc, Pita kx vz-nglepe-ngrde kc Judiz Provins, vzo-kzp mz nzoklati-krde leplz ne Gct kcng tzmncng mz taon Lida. ³³ Mrlc rmctile kzdq ncblo drtqde Enias kx nrkrdrtrde bz x yrbqtipelr mz nelvq yiz rtqmzpe. ³⁴ Rpibz Pita bade kx, "Enias, Jiszs Kxnzmcpx amrlzle nim. Tulzm x butr nqni pnrm." X mzli kcpwz tutxlz-pnzm. ³⁵ Kx nzmc leplz amrlx ngr Lida kx Enias nzamrlzpe, sc tzlxngiting le, sc tzvzmiopelr Kxetu rgu, nidr badr leplz ngr nrlarnrlc kc tqesotr-kzp, tzrpibz Saron.

Pita Atulz-mople Dokas Mz Nzbzngr

³⁶ Mzli lc kzdq olvz ne Jiszs, mnc mz taon kc Jopa. Drtqde Tabita mz natqdr, x drtqde Dokas mz natq lr Grik. Olvz lc ale zvz da kxbrngz x okatrle kxtrpnzngz scdr da. ³⁷ Mzli lcde, Pita tqmnc-ngrde mz taon kc Lida, Dokas yagox x sc tqbzpe. Nrkrdrtrde nzakipo x sc tzayrbqxpemlrbma. ³⁸ Taon kc Lida tryc-rlrupwzu mz taon kc Jopa. Zbz leplz neng

^{☆ 9:20} Sam 2:6-7; Matiu 26:63 ^{☆ 9:27} Aposol 4:36-37; 11:26; 13:2 ^{☆ 9:34} Luk 5:24-25; Jon 5:8-9

Jiszs kcng tzmncng Jopa, kx nxzrlrlr kx Pita sc tqmnc Lida, nzatzlrlr-ngrbzlr ncblo nzling nztwzbzlr natq kx navztx-anibz badr.³⁹ Kx nzpibzlrle bade, Pita tulzm x sc tzvzpeng badr. Kx kaputrpzle ma nyd Dokas, nzvzmitrpzlr brma mrkc tqyrbq-ngrde. X kxnzbzsz ncblo ngrdrng kcng amrlx nzyrlwr-nglelvzpelr Pita. Tzyrning x tzaelwa-ngrbzlr bade lrpz kcng tqkabz Dokas badr mzli kc tqlube-ngrde.⁴⁰ Zbz atwzlrpxngr Pita leplz lcng yz. X rweo zpr, sc tqkrka'pe. Zbz o-lxlvrxtbz mz nrkrdrtrq kc, sc tqrpipebzle kx, "Tabita, tulzm!" Mzli kcpwz aobqtxpx-pnzle mzte x kx mcle Pita tutxlz pnz x wxbutx.⁴¹ Zbz otibzle mqde, sc tqatulzpele. Kqlebzng Pita krkcng tzrlxngiting x kxnzbzsz ncblo ngrdrng x aelwa-ngrbzle kx Dokas lupe mou.⁴² Nrpa ngr Jiszs nznka-krbzle zmatq mz Pita mz nzatulz-mou-krmle Dokas mz nzbzngr, vz talvzpxle mz taon kc Jopa, x leplz kqlutx nzlxngitilr Jiszs.⁴³ X zbz kqlu mou mncti Pita Jopa mz kzdq ncblo kx wztr mz be animol, drtqde Saemon. †

10

Kzdq Enjrl Adcpx-lzbqbz Mz Koniliias

¹ Mz taon kxetu Sisaria, mnc elr kc ncblo kx ngi lr Rom, drtqde Koniliias. Nide kxetu r dzbe ncblo ngr vea kxtrtqki-esz' (100). Dzbede lc tqprtrngrde mz ami ngr Itali provins.² Nide badr lr ma nydze nznginidr leplz kx nzamrluelr Yawe Gct angidr. X okatr-zlwzle lr Jiu kxtrnznrgiscung x krka'-zvzbz mz Gct.³ Kzdq zbzq mz nabznepi kc tqtzq mz mzli r nzkrka'ngr, kzdq enjrl ne Gct adcpx-lzbqbz mz Koniliias mz nzobq-rwmible-krde. X rpibzle bade kx, "Koniliias!"⁴ X Koniliias mwxrxtx kc tqpwxbztile kc enjrl kc. Sc tqveapebz kx, "?Kxetu rnge, niqe suti drtwrm?" Rpibz enjrl kc kx, "Gct abrtzlvzle nzkrka'-krmqng x nzokatr-krm kxtrnznrgiscung mz nzapukrbzlr bade blz kx nzangcbz bade.⁵ Atwzlrngr kzdung ncblo nemqng mz taon Jopa, naotilr dq ncblo drtqde Saemon Pita.⁶ Sa tzmncng badr kzdq kz ncblo kx drtq-kzde Saemon, kc tqwztr mz be animol. Ma nydze tupx prla."⁷ Mz nibr enjrl kc nzpi-krbzle da lc, sc tqvzpe. Zbz Koniliias kc tqkqlepele kxnzawz nedeng brma nzling x kzdq ncblo ngr vea kx mnctrpz bade x amrlue-kzle Yawe Gct angidr.⁸ Pibz Koniliias da amrlx x sc tqatwzlrpengrdeng Jopa mz nzoti-krdr Pita.

Pita Obq-rmwible

⁹ Nrlc ngrlxobz x mzli kc bea, sc tzesonetrppebzng Jopa mz nzvzne-krbzlr. Mzli lcpwz Pita sc tqvzdzpe mz nibr ma mz nzkrka'-krde.¹⁰ Mzli kc tqkrka'ngr, nelzde brtaletx-zlwzpe x rpile namutxpe. Mzli kc tzoliqtingr dakxnnng nade, sc tqobq-rmwiblepe.¹¹ Mcle bongavz nzlvpx x kzdq lrpz kxetu sc tzavzopem mz nrlc, nzmale mz nctq bute' ngrde kcng pwx.¹² Lrpz kcma yrbi mz animol kang kqlu, animol krbzq x kzpeto x animol kcng tzngrlatineng x utc kang kqlu. X kzdung animol lcng nzprtrpzng mz animol kcng tqrpw'a'-ngrbz Gct mz leplz nedeng nzngq-krdrreng. ✰¹³ Zbz rpibz kzdq natq bade kx, "Pita, tulzm. Nibq du animol lcng, sc tqngqtipeqng."¹⁴ A' rpibz Pita kx, "Trna-alewxu, kx Kxetu! Murde trngqtx-pnzwxu da kx pi

† 9:43 9:38 Doa nzyrtzmqpwz mz zbzq lcde la tqbz-ngrde. Mz nzmu-krde lcde, Pita nao ani txpwz, murde abzo mz taon kc Lida krlbzle mz taon kc Jopa takitr nabz nepi kxpx. 9:43 Lr Jiu nzobqszolr ncblo kxnzwztrng mz be animol. Murde nzbxtr-krdr be animol kxbz batrpzle badr trntakitr-krdeu nzprtrngr mz nzangiongr. [Livae 11:39-40] X wai-kzle nzmnc-krdr badr kxtrngiulrJiu kxmule lc. Pita nzmncng ncdr ncblo lc, kxmule-esz' atrkatile nide mz nqmq kr lr Jiu, murde suti drtwrde nzokatr-krde kxtrngiulrJiu mz nzwtztr-krbzle mz Jiszs. ✰ 10:12 Livae 11:1-47

Lou scgr trtakitrdeu nzmu-krgr!” ¹⁵ Natq kc ycmnebz mz Pita nzwrdde krali, rpibzle kx, “Nike alqngipe Gct, bzkq napi kx trtakitrpleu nzmung!” ¹⁶ Da lc nzwai-krdele nzwrdde tq. Zbz lrpz kc, sc tzavzdzpe mou mz bongavz.

¹⁷ Mzli kc Pita tqaoti-zlwzngr drtwrde nike drtwr ngrde, ncblo kcng tqatwzlr-ngrm Koniliias sc tzkaputrpemqng. Nzpipebz badr me tungr ma nyx Saemon x sc tztutrppebzng mz naonrx ngr nabxbz. ¹⁸ Zbz sc tzkqpeng x tzveatipebzlr kx, “?Mnc dq ncblo mrka kx drtqde Saemon Pita?” ¹⁹ Mzli lcdepwz rpibz Mqngrkxtr bade kx, “Lalztq, ncblo nztqng la tzrtangrtirln nim. ²⁰ Tulz, vzobz, x vzamu badr. Bzkq drtwrm li kxmule-esz' kxtrngiulrJiu, murde atwzlr-ngrmc nidr bam.” ²¹ Zbz Pita vzobz badr, sc tqrpipebzle kx, “Ninge kape. ?Nike tqrtangrti-ngrnamu ninge?”

²² Nzrpibzlr kx, “Kzdzq lr Rom kc tqngi kxetu r dzbe ncblo ngr vea kxtrtqki-esz' (100) atwzlr-ngrmle nigr bam. Drtqde Koniliias. Nide ncblo kxtubq x lxngitile Yawe Gct, x lr Jiu amrlx nzamatq-zlwzlr nide. Pibz kzdzq enjrl ne Gct bade kx na-aveatimle nim ma nyxde, murde naxlrbzle bam kzdzq nrpa kxmyapxbz.” ²³ Zbz rpibz Pita nadwatrpzng brma mz nzmwi-krdr. X nrlc ngrlxobz mz nourla, Pita tulzm sc tzvzpeng badr ncblo kcng nztqng. X kzdung lr Jopa kcng tzvz-nqblqlr Jiszs nzvz-kzng badr. *

Pita Ryapwxbz Nrpakxmrlz Mz Koniliias

²⁴ Nrlc ngrlxobz, Pita badr kztedeng sc tzkaputrppebzng mz taon kxetu Sisaria. Koniliias ayrlwr-lxblrpele kxnginideng x kx krlzti-zlwzleng. X mzli lc Koniliias sc tqaenzlile Pita, murde nzrpilr naxlr-kzlr nrpa kx yapwxtile.

²⁵ Mzli kc naprtr-ngrbzlr ma nyx Koniliias, rmctipe Koniliias x rweobz zpr bade mz nzangio-krde nide. ²⁶ A' atulz Pita x rpibzle kx, “Ni-kzng e dq ncblo, da kc tqwaiq.” ²⁷ Zbz Koniliias tulzm. X mzli kc Pita tqycmnebe-ngrde mz nzvztr-krdr kc brma, mcle leplz kqlu nzyrlwrng mrkc. ²⁸ Rpibzle kx, “Krlzamu kx Lou sc Mosis rpwa'-ngrde lr Jiu nzprtr-krbzlr mz leplz kxtrngiulrJiu x nzoklati-krdr nidr. A' aelwa-ngrm Gct bange kx vz-rbr nzrpi-krnge kzdzq doa trtubqu x trtakitrdeu mz nzobq-krde. ²⁹ Dekc mzli kc tqaveati-ngrmamu ninge trpxtxpx-ngrpou. ?A' memule tqaveati-ngrmamu ninge?” ³⁰ Rpibz Koniliias kx, “Zbq tq yrkrpxpe, mncx mz ma nyxngi mzli lcde kapwz mz nabz nepi kc tqtzq, mzli r nzkrka'ngr. Mzli kc tqkrka'-ngrne, kzdzq enjrl adcpx-lzbqm bange x lrpzde pnapr. ³¹ X rpimle kx, ‘Koniliias, Gct xlrpele nzkrka'-krm x mcpele nzrka-krm kxtrnzrngiscung. ³² Atwzlrngr kzdung ncblo nemqng mz taon kc Jopa, naotile dq ncblo drtqde Saemon Pita. Sa tzmncng badr kzdzq kz ncblo drtq-kzde Saemon, kc tqwztr mz be animol. Ma nyxde tupx prla.’ ³³ Zbz atwzlr-ngrbo kzdung ncblo naotibzlr nim x brngz angidr nzvz-krme. Mzli ka nigr amrlx yrlwrtr-ngrbzkr mz mz Gct mz nzlalztq-ngrbz mz da amrlx kx pibz Gct bam nzpi-krmele bagr.”

³⁴ Zbz Pita sc tqalvztrpele nidr mz nzrpi-krbzle kx, “Mzli ka krlztipex kx mz nzobqkr Gct leplz amrlx nzesz'tipeng. ³⁵ Murde abrtzlvzle doa kznike mz drtc' kznike, kx amrluele nide x alele da kxtubq. ³⁶ Krlzpeamu nrpa kc tqatwzlr-ngrbzle mz lr Israel, kx leplz namnc-zwpnxng badr Gct murde da kx alepe Jiszs Kxnzmcpx, kc tqngi Kxetu kx nzmncikilz ncblo amrlx. ³⁷ X krlzpe-kzamu da kcng tqprtq tqtalvzpxle Judiz Provins, abzole Gzlili Provins, mz nibr Jon nzyapwxtpx-krde kx leplz natekqtrlr nqmq nr drtwrdr x nawrkxtrng. ³⁸ Krlzpeamu da kcng tqprtzbzng mz Jiszs kc

* ^{10:15} Mak 7:14-23 * ^{10:23} Lr Jiu trnzmnc-lxblrung badr kxtrngiulrJiu. Mz nzadwatrngr kc ncblo lcng, Pita aelwapx-ngrde kx mzli ka abrtzlvzpele kxtrngiulrJiu.

Naszret, mz nzavzo-krbz Gct Mqngrkxtr x zmatq bade. Jiszs vz-ngalengrde nrlc tqalelibz da kxbrngzng mz leplz x nzamrlzngr leplz amrlx kcng tzmncbzng mz zmatq ngr Setzn, murde Gct sc tqmncbz bade.

³⁹ “Nigr aposol, mckr x krlzkr nrppixngr da kcng amrlx tqale Jiszs Jerusalem x Israel. Nznibqlr nide mz nztqlvztr-krdrle mz kros. ⁴⁰ A' atulzm Gct mz nzbzngr mzbq kratq. X batr-kzpze nzadcpx-lzbq-krmle bagr. ⁴¹ Adcpx-lzbqm bagr, nigr aposol kcng tqmcpx pnz Gct. Trngiu leplz amrlx kx nzmcpe-moulr nide, a' nigr txpwz krkcng tzmung badr mz nibr nztulz-krmle mz nzbzngr. ⁴² X rkam bagr natq mz nzryapwxpxngrbz Nrpakxmrlz. Murde Gct mcpxle Jiszs mz nzayzlu-krbzle da mz leplz, kxmule-esz' kxnzlubeng o kxnzbzpeng. ⁴³ Profet kcng amrlx nzycmnetrngrdr nide mz nzryr-krdrng. Nzrpilr kx doa kx lxngitile nide, alwx ngrdeng naipqpxbz, murde mz nzbzkr Jiszs, Gct ipqpxle alwx ngr leplz amrlx kcng tzlxngitir nide.” ⁴⁴

Mqngrkxtr Vzo-kzpze Mz Leplz KxtrngiulrJiu

⁴⁴ Mzli lcpwz Pita tqpi-ngrde da lcdeng, Mqngrkxtr vzobz mz leplz amrlx kcng tzlalztqbzng mz nrpa kc. ⁴⁵ Lr Jiu kcng tzvz-nqblqlr Jiszs kcng tzvzmqng badr Pita Jopa nzpnzkr drtwrdr le kx lr Jiu txpwzng kx nangi leplz neng Gct. Mz drtwr lc, nzkctitpxlr nzmc-krdr kx Gct ka-nrbalq-kzpze Mqngrkxtr mz kxtrngiulrJiu lcng. ⁴⁶ Murde nxzrlbzlr Konilias badr kxnginideng x kztedeng naglqlz-krdr Gct x nzycmne-krdr mz natq lr mrkzbleng tqbatrpebz Mqngrkxtr. ⁴⁷ Zbz rpibz Pita kx, “Mzlengeng, leplz lcng nztwzpe-kzlr Mqngrkxtr da kc tqwaiku. Bzkq kx narlclvztr-mopwz nzwrkxtr-krdr mz lue.” ⁴⁸ Zbz rkabz natq mz Konilias badr kxnginideng x kx krlztileng kx nawrkxtrng mz drtq Jiszs Kxzmcpx. Mz nibr nzawrkxtrngr nidr, sc tzrpipebzlr mz Pita kx namnctilr badr kzdung mou zbz.

11

Takitrde KxtrngiulrJiu Nzprtrngr Mz Lrmakxtr

¹ Mzli trboiu nrpa krlzpebzle aposol kc-kzng badr leplz neng Jiszs kcng tzmncng Judiz Provins kx leplz kxtrngiulrJiu nzlxngiti-kzlr nrpa ngr Gct. ² A' mzli kc Pita tqvzdzpe-ngrde Jerusalem, kzdung lr Jiu kcng tzrlxngiting nzpibqtilr nide. Murde suti drtwrdr kx kxtrngiulrJiu napakrng x navz-nqblqlr Loukxtr, mz nzaxvctr-lzbq-krbzlr mz Jiszs. ³ X nzrpibzlr kx, “Dwatrq ma nyx kxtrngiulrJiu x mutx-kzamu badr! Da la trtubqu mz Lou scgu.”

⁴ Zbz Pita kc tqryapwxpxpebz badr da amrlx, abzo mz nzmnc-krde mz taon Jopa. ⁵ Rpibzle kx, “Mz nzmnc-krnge kc mz taon kc Jopa, kzdq zbz, mz nzkrka'-krnge obq-rmwiblex. Mcx kzdq lrpz kxetu vzom mz bongavz, nzmale mz nctq bute' ngrde kcng pwx. X vzom nzprlxo x esotrp bange. ⁶ Obqtr-aepzbo murde namc-zpwxx nikc tqycpxm elr. X mcx animol krbzq x kzpeto, x animol kcng tzngrlatineng, x utc kang kqlu. ⁷ Zbz xlrq dq natq rpimle bange kx, ‘Pita, tulzm. Nibq du animol lcng, sc tqngqtipeqng.’ ⁸ A' rpibo kx, ‘Trna-alewxu, kx Kxetu! Murde trngqtx-pnzwxu da kx pi Lou scgr trtakitrdeu nzmu-krgr!’ ⁹ A' natq kc ycmne-mop nzwrde krali, rpimle kx, ‘Nike alqngipe Gct, bzkq napi kx trtakitrdeu nzmungr!’ ¹⁰ Da lc nzwai-krdele nzwrde tq. Zbz da amrlx sc tzavzdzpe mou mz bongavz.

⁴⁴ **10:43** Asaea 33:24; 53:4-12; Jeremaea 31:34; 33:8; 50:20; Maekz 7:18-19

¹¹ “Mzli lcdepwz ncblo nztqng sc tzkaputrpe-kzpinqg mz ma kc tqmncngrgr. Nzatzlrl-ngrmqng bange, nzvzklmlr mz taon kxetu Sisaria. ¹² Pim Mqngkrkxtr kx navzkr badr, a' bzkq drtwrnge li. X mzlegu lcng nzesz'mzng vz-kzkrng badr mrkc Sisaria x dwatrkr amrlx ngrgr ma nyz Koniliias. ¹³ Pimle bagr kx mcle kzdq enjrl tune ma nyzde x rpibzle bade kx, ‘Atwzlrngr kzdung ncblo nemqng Jopa, kx napibzlr nzvz-krm dq ncblo drtqde Saemon Pita. ¹⁴ Murde sa napibzle bam x lr ma nyzm kxnamu nzrlapx-krmu.’

¹⁵ “Mzli kc tqycmne-ngrbo badr, Mqngkrkxtr vzo-kzpzbzlr badr, da kc tqwaile mz nigu mzli kc kai. ¹⁶ Zbz dcltpx drtwrnge natq Kxetu rgu Jiszsz kc tqpimle bagr. Rpimle kx, ‘Jon awrkxtr leplz mz lue, a' na-awrkxtr Gct nimu mz Mqngkrkxtr.’ ¹⁷ Mz nzmu-krde lcde, Gct kabzle mz kxtrngiulrJiu Mqngkrkxtr kcpwz tdkamle bagu mzli kx lxngiti-ngrgu Kxetu rgu Jiszsz Kxnzmcpx. Trtakirpc'u nzaesakitrngr nzwzkr Gct.” ¹⁸ Kx nxzlrpelr natqdeng, trntalwzpeng badr. A' sc tzglqlzpelr Gct mz nzrpi-krdr kx, “Mzli ka Gct rlr-ngrbzle mz kxtrngiulrJiu nztekqtr-krdr nqmq nr drtwrdr, murde namnc-kzng badr Gct mz nzlungr kxboi.”

Lrmakxtr Mz Taon Kxetu Adiok

¹⁹ Mz nibr nzbzkr Stivin, leplz neng Jiszsz sc tzakitipeng nrlc, murde nzkxpungr kc tqycpe. Kzdung nidr nzkrlzbzlr nrlarnrlc kc Fonisiz x mz taon kxetu Adiok mrkc Siriz Provins. X kzdu-kzng nzkrlzbzlr trmctu Saepras. A' nzpi-txpwzlr Nrpa ngr Jiszsz mz lr Jiu kxnzmcng mrkcng. ²⁰ A' kzdung ncblo kcng mz trmctu Saepras x mz taon kxetu Saerin mrkc Afrika, nzvz-kzpzngr mz taon kxetu Adiok. X sc tzryapwxpe-kzpzngr mz kxtrngiulrJiu mz nzpi-krbzlr badr Nrpa ngr Kxetu Jiszsz. ²¹ X Kxetu Gct okatr-zvzle nzwz-krdr. X leplz kqlu nzlxngitilr Jiszsz x nzvz-nqblqlr natqde. ²² X kx nrpa ngrde sc tqxlrpe lrmakxtr kcng Jerusalem, sc tzatzlrlpe-ngrbzlr Banabas, kc tqngi dalr Saepras, mrkc Adiok. ²³ Kx kaputrebebze mrkc, mcpele kx Gct okatrle leplz lcng mz zmrlz ngrde kxmyalz. X sc tqabrtzpe, x axglrle nidr amrlx mz nzmnctr-zvz-krbzlr mz Kxetu Jiszsz mz nabzdr atwrnrngr. ²⁴ Leplz nzkqlung nzlalztqbzng bade x sc tzlxngitipelr Jiszsz. Murde Banabas nide ncblo kxbrngz, nzrlxngiti-krde mqngi, x Mqngkrkxtr prsrle nide.

²⁵ Zbz rkalzm Adiok x vz mz taon kxetu Taszs mz nzrtangrti-krde Sol. ²⁶ Kx mcpele kc Sol, sc tzvzpmemqng ncdr mz taon kc Adiok, murde nawztr-lxblrlng mz Nrpakxmrlz. Zbz mz kzdq yiz atwrnrngr nzrmcti-lzbq-zvzng badr lrmakxtr kc Adiok mz nzalvztr-krdr leplz kxkqlu. X leplz neng Jiszsz nzpi-ayrnr-ngrbz badr Kristin mrlc Adiok. *

²⁷ Mzli lcpwz kzdung profet neng Kraes nzrkalzmqng Jerusalem, nzvzki-olr mz taon kxetu Adiok. ²⁸ Kzdq mzli kx nzyrlwr-lxblr-ngrdr, esz' mz nidr drtqde Agabas tulzm. X Mqngkrkxtr okatrle nzayrbq-zpwx-krde kx kzdq dzbi kxetu natao mrkcng amrlx tzmnlzbzng mz lr Rom. X natqde lc tutr mz dzbi kc tqkaputrp mzli kc Klaodizs tqngini-ngrde king r Rom (mz yiz 46 AD mz nibr nzrmcngr mz Jiszsz). ²⁹ Mz nzmu-krde lcde, lrmakxtr kcng tzmncng Adiok sc tzaotipe drtwrdr nzokatr-krdr kxnzrlxngiting kcng Judiz Provins. Nzatakqtingr da vz-nqblqle ncblo kxesz' nike takitrde nide.

* **11:15** Aposol 2:4 * **11:16** Aposol 1:5; Luk 3:16 * **11:19** Aposol 8:1; 21:2 * **11:20** Luk 23:26 * **11:22** Aposol 4:36; 9:27 * **11:26** 11:25 Yiz nzpnu-esz' (10) kapupxpe mz nibr Sol nzylu-krde mz taon Taszs. [Aposol 9:30] 11:26 Drtq Kristin nzpi-kaing enqmi r Kraes mz nzxtrngati-krdrle. [Aposol 26:28] Drtwr ngrde tropxu, a' mwx drtwr ngrde kxnzawz-nrbalqng ne Kraes o Kraes kxnztopwzng o kxnzrpi-zvzng “Kraes.”

³⁰ Nzataktiilr da kc naokatrngr, x sc tzatzlrlpe-ngrbzlr, nzmalenepe-krbz Banabas x Sol, murde nakabzlr mz kxzaclvelr dzbe lrmakxtr kcng Jerusalem. *

12

King Herot Agripz Kc Kai Atrkatile Lrmakxtr

¹ Mzli lcdeng, King Herot Agripz Kc Kai rkabz natq mz ncblo ngr vea nedeng kx nalolvztilrng kzdung lrmakxtr, murde na-atrkatilr nidr. ² X pibzle badr kx nalakipxbzlr mz toki r vea nar aposol Jemes, mzle Jon. ³ Herot mcle kx kxnzrmailz ngrdr lr Jiu nzabrtzlvz-krdr nznibq-krde Jemes. X sc tqadwatrpe-kzle Pita mz presin, mz zbz kcng lr Jiu tzmungr bret kx trpnzngr yisti ngrde. ⁴ Mz nzadwatr-krdr Pita mz presin, nzamnclr dzbe ncblo ngr vea pwx mz nzaclvengr nide. Mz dzbede kx esz' ncblo pwx. Murde Herot rpile navzmibzle Pita x na-atubzle mz mz leplz kxkqlu, murde na-aveatrle mz nibr Nzmungr mz Nzamyangr. ⁵ Zbz Pita mnçpxm mz presin, a' lrmakxtr sc tzkrka'-zvz-ngrdr kx Gct naokatrle nide.

Enjrl Arlapxle Pita Mz Presin

⁶ Mz nrlckxbq ngr zbz kc kai, x nrlc kxngrlxobz Herot na-aveatr-atele Pita, Pita sc tqmnc mz presin, tqmwi mz mzli ncblo ngr vea nzling. Nzatolvatr-ngrbz mqdeng mz mq ncblo ngr vea kcng nzling mz sen li. X kzdung kz ncblo ngr vea, sc tzaukzng mz naonrx ngr presin kc. ⁷ Zbz kzdq enjrl ne Gct adcpx-lzbq. X zyzlr ngrde pnamilxle mrkc tqmncngr Pita. X sc tqtapztrpzle nrlar Pita mz nzadwalz-krmlele, x rpibzle bade kx, "Tulz-anim!" Zbz sen kcng nztatitpx-pnzng mz mqde. ⁸ X rpibz enjrl kc bade kx, "Amqngitr nrkalom x petr sadol scmqng." Sc tqalepele, x rpi-mopwz enjrl kc kx, "Aprtz lrpz ngr zbao scm x ma-nqblqm ning." ⁹ X mz nibr Pita nzaprtz-krde lrpz scde, sc tqrlaszpxpele ncblo ngr vea kcng mz nzvz-nqblq-krde enjrl kc. A' trkrlzleu kx da kc tqalebz enjrl kc bade ngi da angidr. A' nzpnzkr drtwrdr le obq-rmwibile. ¹⁰ Nzvzbzng, x nzkawilr ncblo ngr vea kcng tzmncr-kzpqng, x kzdu-kzng mou. X sc tzkrlzpebzlr naonrx kc tqngi aian, kc tqobqkitrpzle mz mzteadau Jerusalem. Naonrx kc lvpx-lzbqzbadr, sc tzrlaszpelr presin kc, x nzvzkiobzlr mz lrpzki. X mzli kcpwz enjrl kc sc tqrlaszpele nide. ¹¹ Zbz mzte kc tqopxpe, x mz drtwrde sc tqrpipele kx, "Mzli ka krlz-angidrx kx Gct atwzlr-ngrmle enjrl nede kc tqarlapxpebzle ninge mz mq Herot x mz da amrlx kcng tqpnz drtwrdr kxnxetu r lr Jiu na-alemlr bange."

¹² Mz nibr mzte nzopx-krde, sc tqvzpe mz ma nyz Mxri kc tqngi lxede Jon Mak. Leplz kxkqlu kc tzyrlwr-lxblrng mrkc tzkrka'-ngrdr nide. ¹³ Zbz Pita abctrpz mz naonrx ngr nabxbz kc tqboilz wq. X kzdq olvz kxnaonrx, drtqde Roda, vzm mz nzlvxpx-krbzle naonrx. ¹⁴ A' kx abrtzle kx nzglx-krde natq Pita, mrbrtxtr nzlvxpx-krbzle naonrx, a' votxtrpz mz nzpi-krbzle kx Pita kc tqututrpz mz nabxbz. ¹⁵ Nzrpibzlr bade kx, "Narm trwz-angidrpeu!" A' sc tqrpibzle ye kx Pita kc tqmnc angidr mrkc. Zbz sc tzrpipele kx, "Ma tqngi enjrl kx okatrle nide." *

¹⁶ Mzli kc tzycmne-ngrdr, Pita kc tqabctrpz ye. Kx nzvzpxmlr x nzlvxpxbzlr naonrx kc, nzmcpelr nide x nzkctitpxpxlr. ¹⁷ Zbz Pita ayaglqbzle mqde badr kx namnc-lrping, x sc tqyapwxstipebzle badr nzavzpx-krm Kxetu le mz

* **11:30** Galesia 2:1-10 * **12:15** Lr Jiu nzlxngitilr kzdq enjrl kxactve, krlzle nzadcpk-lzbqngz mz nzobqkr leplz la tqacuvele. Mc Sam 91:11, Matiu 18:10 x Hibru 1:14. Kzteng Pita mwz nzpnzkr drtwrdr le kx enjrl kx okatrle Pita vz-ngrmle nzycmne-krbzle badr.

presin. Rpibzle badr kx, "Pibzmu da lcng mz Jemes, mzle Jiszs, x mzlegu kc-kzng." Zbz rkalzm, sc tqvzkipele mz kzdq kz nrhc.

¹⁸ Nrlc ngrlxobz mz nourla, ncblo ngr vea kcng trnzwxbulvzopeung, murde Pita trmncpeu mrkc. ¹⁹ Kx krlzti King Herot Agripz kx Pita dwape, sc tqrpipebzle mz ncblo ngr vea nedeng kx nartangrtiir, a' trnzmc-pnzlru. Zbz sc tqaveatrpele dzbe ncblo ngr vea kcng pwx x sc tzribqtipeng. Zbz Herot rkalzm Judiz Provins, sc tqmncpe mz kzdung mzli mz taon kxetu Sisaria mrkc tqycpx prla.

Gct Nibqle King Herot Agripz

²⁰ King Herot drtwrde ngyatx-zlwzbz mz leplz mz taon kxetung Taea x Saedon murde kzdq da kx ntalwz-ngrdr. Zbz lr Taea x lr Saedon nzmcpxlr kzdung ncblo mz nzprtr-krdr mz dzbede kxesz'. X sc tzatzwzlrpe-ngrbzlr mz King Herot. Nzaodu-lzbqpe-kaing badr Blastzs, ncblo kc tqaclvebzle ma nyz king. X sc tzvzpebzng mz Herot nzrlxtibzlr nzmnc-krdr mz nrwrx, murde dakxnzng nadr vzkimle mz nrlarnrlc kc tqaclvele. ²¹ Mz zbz kc tqmcpx Herot nzmc-krdeleng, aprtzle mrlwzdeng x sc tqwxbuopem mz tron. Zbz sc tqyapwxtipebzle kzdq nzycmnengr kxboi mz dzbede lc, nidr badr zbo ngr leplz kcng tzlalztqbzng bade. ²² Kx nxzrlbzlr nzycmne-krde, sc tzglqlzpelr nide. Nzbilvzlr nide mz nzrpi-zvz-krbzlr kx, "Natqm trngiu natq leplz, a' ngi natq gct!" ²³ Mzli kcpwz kzdq enjrl ne Gct ayagoxtx-pnzle nide, murde nzglqpx-lzbq-krde, x tr-rpwa'-ngrpwzleu mz leplz kcng nzangio-krdr nide. Mz zyagox lc Herot ngqtx be x mz nibr kzdung zbz sc tqbzpe.

²⁴ Mzli lcdeng, Nrpa ngr Jiszs sc tqvznepx ye x kxnzrlxngiting tzkqlunepxng.

²⁵ Mz nibr Banabas x Sol ntawz-krbzlr trau mz kxnzrlxngiting mrkc Jerusalem, sc tzyzlupeng Adiok. Nzvzmilr Jon Mak, kave kr Banabas.

13

Banabas X Sol Nzatwzlrpxngr Lr Adiok

¹ Kzdung profet x kxnzalvztr-ngrde natq Gct nzprtrpzng mz lrmakxtr mrkc mz taon kxetu Adiok. Drtqdr seleng: Banabas, Simion kc tzrpibz 'Naejz' mz nzngini-krde ncblo kxbo, Lusias dalr taon kxetu Saerin, Sol, x Manaen kc tzabutimi King Herot Antipas. ² Kzdq zbz nzyrlwr-ngrdr, tzangiols Kxetu x tzaxtx-ngrbzlr dakxnzng mz nzkrka'-krdr. Mzli lcde, Mqngrokxtr rpibzle badr kx, "Mcpxamu x atwzlrpx-ngrnamu Banabas x Sol, murde na-alelr nwzngnrc kc tqkqle-ngrne nidr." ³ Zbz mz nibr nzaxtxngr dakxnzng mz nzkrka'ngr, nzyrlqobzlr mqdr badr mz nzmcpx-krdrlleng mz nzwztr-krbzlr mz Gct. Zbz sc tzatzwzlrpxpe-ngrdr.

Banabas X Sol Nzryapwxbzng Mz Lr Trmctu Saepras

⁴ Mz nibr nzatwzlrpxpekr Mqngrokxtr Banabas x Sol, sc tzvzkipxpelr me dwangr lcsu mz taon Seleusia. Nzabzolr Seleusia, nzalilvckilr mz trmctu Saepras. ⁵ Nzkaputrpzng mz taon kxetu Salamis, x nzryapwpxng Nrpa ngr Jiszs mz mangr-nzkrka'ngr nyz lr Jiu. Mzli lcde Jon Mak sc tqmncbz badr mz nzokatr-krde nidr. ⁶ Nzpr-wiclr trmctu kc nzkrzbzlr taon kxetu Pafos, mrkc nzrmctilr kzdq lr Jiu drtqde Ba-Jiszs Elimas, profet kxpokia kx rningeti dabo. ⁷ Ba-Jiszs kc ngi kzte Gavzna Serjizs Polzs, kc tqngi ncblo kx rkrlz da. X Serjizs Polzs aveatile Banabas x Sol naoklatimlr nide, murde suti drtwrde nxzlr-krde Nrpa ngr Jiszs. ⁸ A' Elimas kc tqrngineti dabo, pibqtile

² 13:1 Matiu 27:32; Rom 16:21

nrpa ngrdr x rpile na-aesakibzle gavzna kc mz nzlxngiti-karde Jiszs. ⁹ Zbz Mqngrkxtr prsrle Sol, kc tzrpi-kzpz Pol. X sc tqpwxbztitxpele nide. *

¹⁰ Rpibzle kx, "Nim doa ne Setzn x enqmi r da kxbrngz. Apokiatiq leplz x esabrtiq nidr! X tresaku nzangaluti-krm nztubqkr Gct mz nzpokia-krm.

¹¹ Mz nzmu-karde lcde, Gct na-ayrplapxle nim x mzpq la nakcba mz kzdu mzli. X narblxbz bam nzrmc-krm zyzlr ngr nepi." Mzli kcpwz kzdq da kx botapz' apule zsikapu vztrpz mz mzte. Zbz sc tqatxnepele mqde murde naxngibzle dq doa kx namailznebzle nide mz nzmale-krbzle mqde. ¹² Kx mctxbz gavzna kc, lxngitile Jiszs. X kctitpx-pnzle nzalvztrkr Pol x Banabas mz Kxetu.

Pol Ryapwxpxbz Mz Lr Taon Pisidia Adiok

¹³ Zbz Pol nidr badr kztedeng nzrlaszlr taon Pafos, nzprtzng mz kzdq kx lcsu x sc tzvokipelr taon kxetu Prga mz provins kc Pamfilia. Zbz Jon Mak rlaszle nidr mrlc, sc tqyzlupe mou Jerusalem. ¹⁴ Nzrkalz-mopqng Prga x sc tzvzkipelr taon kc Adiok mrkc Pisidia Provins, kc tzrpibz Pisidia Adiok. Mz Satde, Sabat ngrdr, nzvztrng mangr-nzkrka'ngr nyz lr Jiu, x sc tzwxbuopeng. ¹⁵ Mz nibr kzdung nzrlwxngr mz Nzryrngrkxtr, nzvzpxmqng mz buk ngr Lou sc Mosis x profet, leplz kcng tzrmailzng mz mangr-nzkrka'ngr nzaprcbzng natq mz Pol x Banabas, nzrpibzlr kx, "Mzlegr, nzmu kx tqngiscmu du natq ngr nzaxglrngr leplz lcng, ycmneamu."

¹⁶ Zbz Pol tutxlz, ayaglqtxbzle mqde kx leplz namnc-lrping, sc tqrpibebzle badr kx, "Lr Israel x kxtrngiulrJiu kx nzangio-kzlr Yawe Gct, lalztqmamu bange. ¹⁷ Gct rgu, nigu lr Israel, mcpkle melrmqgung mzli kc bqnc x aetunepxle zmatq ngrdr x nzkqlq-krdr mzli kc tzmnc-ngrdr Ijipt. X vzmipxmleng elr mz nzale-karde da kxnxmatqng kxnxkctipxng. ⋆

¹⁸ Nzmntilr badr mrkc lzke yiz nzpnu-pwx (40). X tr-rlaszleu nidr, kxmule-esz' trnzvz-nqblqlru natqde. ¹⁹ Zbz odatile neidu rlimz kxnxmnc-mrbrng kx nzmnncng mz drtc' ngr Kenzn. X kabzle drtc' lc bagu, nigu lr Israel, murde nangi nyzgu, mz nzngini-krgu leplz nedeng. ²⁰ Nzmnnc-krdr Ijipt krlzmle mzli lc tzmnc-zpwxpe-ngrdr Kenzn takitr yiz kx trtqki-pwx-nzpnu-nzlvqn (450). Mz nibrde kabz Gct mz melrmqgung kzdung ncblo Kxnxryrlqng Drtwr, kcng tzmailzlr nidr krlzbzle mzli nyz profet Samwel, mz nzngini-krde Kxryrlq Drtwr kxrmnrpe-ngrbz. ²¹ Mzli lc Samwel tqngi-ngrde profet ne Gct, melrmqgung nzrlxtilr kzdq king. Zbz kabz Gct badr Sol, mrlx Kis, vzpxm mz nqvi lr Benjamin, nangi king rdr, twzle yiz nzpnu-pwx (40). ²² Zbz sc tqapoopemle Sol x avzdzbzle Devet nangi king rdr. ⋆ Gct ycmnetr-ngrde Devet, mz nzrpi-krde kx, 'Abrtzlvzx Devet, mrlx Jesi, murde krlzx kx nabzde mrlz x sa na-alele da amrlx mz nzvz-nqblq-krde me pnz drtwrnge.' ⋆ ²³ Da kc tqwai nzesalz-krbz Gct le mz Devet, yrlqle Mevalu mz nzvzpx-krmle mz nqvi lrde, drtqde Jiszs, kx na-arlapxle lr Israel. ⋆ ²⁴ Mzli kc Jiszs trabzokale nzwz-krde, Jon Kxawrkxtr ryapwxpebz mz lr Israel kxkqlu kx natekqtrlr nqmq nr drtwrdr x nawrkxtrng mz nzo-lxlvkrbzlr mz Gct. ²⁵ Mzli kc Jon tqycpe pipz nzayrkrpx-krde nzwz-krde, rpibzle mz leplz kx, ?Rpiamu ninge Kxnxmcp? Trtingr! A' sa navzm mz nibrnge. X trtakirpwc'u nzyokaepx-ngrbz nqvi lr sadol ngr nanycede.'

* ^{13:9} 13:6 Ba-Jiszs drtwr ngrde 'mrlx Kxarlapx.' Elimas drtwr ngrde 'kxrngineti dabo.' 13:9 Kxmule-esz' Sol nide lr Jiu x drtqde lc mz natqdr, a' mz nzalvztr-krde kxtrngiulrJiu nzkqlebz drtqde Pol kc tqngi drtq kcpwz mz natq lr Grik. ⋆ ^{13:17} Nzrlasngr 6:1, 6; Sam 136:11-12 ⋆ ^{13:22} 1 Samwel 13:14 ⋆ ^{13:22} Sam 89:20 ⋆ ^{13:23} 2 Samwel 7:11-16; Sam 89:2-37; 132:10-12

26 “Mzlengeng, nimu neidu lr Ebraam x nimu kxtrngiulrJiu kcng tzamrluelr Yawe Gct angidr, Gct aelwapx-ngrmle bagu nrpa ngr kxmu na-arlapxle nigu. **27** A' lr Jiu mrkc Jerusalem x kxnzrmailz ngrdrng trnzlxngitilru kx Jiszs nide Kxnzmcpx. X mz nznibq-krbzlr, nzatutrlr natqng profet neng Gct kcng tzrlwx zvz mz Sabat amrlx. **28** X kxmule-esz' trpnzngr drtwr kx nzmclr kx nanibq-ngrdrng, a' nzrlxtibzlr mz Paelzt kx nanibqtx. **29** Zbz kx yrkrpxpebz nzale-krbzlr bade da amrlx kcng tzyrngr nide mz Nzryrngrkxtr mzli kc, sc tzglqopemlr nrkrdrdqde mz kros x nzglqtrlr mz butqbr. **30** A' Gct atulz-mople nide mz nzbzng. **31** X zbz kqlu kx adcpx-lzbq-ngrbzle mz leplz kcng tzvzmqng badr Gzlili provins nzvzdz-krdr Jerusalem. Mzli ka nznginipedr krkcng tzyapwxtipxbzlr Jiszs mz leplz. **32** X pibzkr bamu Nrpakxmrlz kx da kc tqesalz-ngrbz Gct mz melrmqgung mzli kc, **33** atutrlp bagu, nigu doa nedrng mzli ka, mz nzatulz-krmle Jiszs mz nzbzng. Murde rpile mz Sam krali kx, ‘*Nim Mrlxnge, abzo mzbq ka sa na-aelwapx-ngrbo mz leplz nzngini-krnge Trtem.*’ **34** X Nzryrngrkxtr pi-kzle kx Gct na-atulz-moule nide mz nzbzng, x trpnz-moungr nzyrtzmqng mz gq mrkc tzmibing, murde Profet Asaea rpile kx, ‘*Sa nakabo bam da kcng tqmrlz tqtr tqesalz-ngrbo mz Devet.*’ **35** Dekc Mevalu tzrpi-kz-ngrde mz kzdq kz Sam kx, ‘*X trayrbqtxwq nrkrdrdqde ncblo kxtr nem mz gq mz nzmibi-krde.*’ **36** Trycmnetr-ngrdeu Devet, murde mzli kc tqqlube-ngrde, wztrpz mz leplz nedeng, mz nzvz-nqblq-krde me pnz drtwr Gct. Zbz sc tqbzpe, nzyrtzmq mz nrlar melrmqdeng, x nrkrdrdqde mibi. **37** A' Jiszs kc tqatulz-mop Gct trmibi-pnzu. **38** Mz nzmu-krde lcde, nakrlzamu, kx mzlengeng, kx nzipqpxngr mz alwx vzpxm mz nzwzkr Jiszs. **39** X ntzubqkr leplz amrlx mz nzobqkr Gct, vzpxm mz nzlxngiti-krdr Jiszs. A' rblx ntzubqti-lzbq-krmu mz nzvz-nqblq-krmu Lou sc Mosis, murde tao-vzku mz nzale-krgule. **40** Mz nzmu-krde lcde, na-aclvetoamu, murde ma da kc tzyr profet mzli kc bqnc, tqutur-kzpzbam, mz nzrpikr Gct kx, **41** ‘*Obq-zpwxamu, nimu kx nxztrnga-ngrdr ninge. Murde sa na-alex da kx myapx-esz'ngr mz mzli nyzmu kx nakctipxamu. A' nabzamu murde rblxbz bamu nzlxngiti-krmu kx sa na-alex da lc, kxmule-esz' nzyapwxtibz bamu.*’”

42 Zbz mzli kc Pol x Banabas tzvzpxpe-ngrmlr mz mangr-nzkrka'ngr kc, leplz kcng sc tzrlxtipebzlr kx nayzlu-mopqng mz Sabat kc navzm, mz nzryapwpx-mou-krbzlr da lcng. **43** Mz nibr leplz nzrlasz-krdr mangr-nzkrka'ngr, lr Jiu kxkqlu x leplz kcng tzaxvctr-lzbqbzng mz nzamrluengr Yawe Gct angidr, nzvzng badr Pol x Banabas. X ncblo lcng nzling sc tzaxglrpebzlr nidr mz nzavzti-vzvzng nzbritikr drtwrdr Gct kc tqokatrle nidr mz zmrlz ngrde kxmyalz.

44 Zbz Sabat kx kaputrple, ycpwz pipz lr taon Pisidia Adiok amrlx nzvz-krmlr mz nzxlr-krdr Nrpakxmrlz ngr Jiszs. **45** A' kx nzmcpe lr Jiu kxnzrmailzng zbo ngr ncblo kcng mrkc, sc tzbobutipe-ngrdr Pol, x sc tzpibqtipelr nide. **46** Kxmule-esz', a' Pol ncdr Banabas nelzdr br mz nzrpi-krbzlr kx, “*Opx-angidrm bagr kx Nrpakxmrlz ngr Jiszs napipx-kaipzkr bamu, nimu lr Jiu. A' pxtwpk-ngrnamu nzrlxngitingr x aelwapx-ngrde kx trtakitrdeu nzrtwz-krmu nzlungr kxboi. Delc mzli ka tqvz-alzupe-ngrbzkr mz kxtrngiulrJiu kcng tzmncng mrka, mz nzyapwxtipx-krbzkr Nrpakxmrlz badr.*” **47** Murde natq kx pim Gct bagr dela, mzli kc tqrpi-ngrde kx, ‘*Atwzlr-ngrbo nim, murde na-apuq zyzlr kc tqaewapxbzme nqmq krnge mz kxtrngiulrJiu. X leplz*

13:33 Sam 2:7 **13:34** Asaea 55:3 **13:35** Sam 16:10 **13:39** Rom 3:9-12, 23, 28; 5:12; 2 Korint 5:21; Galesia 2:16 **13:41** Habakuk 1:5

amrlx mz nrlc nakrlzlr lrpzki kx navzking mz nzrlapxngr.' " ⁴⁸ Kx nzxlrbz kxtrngiulrJiu natq lc, sc tzabrtz-zlwzpeng x tzglqpxpe-ngrdr Kxetu nrpa lc. X krkng amrlx tqmcpx Gct mz nztwz-krdr nzlungr kxboi, nzlxngitilr Jisszs.

⁴⁹ Zbz Nrpa ngr Kxetu Jisszs talvpxle nrlarnrlc kc atwrnrngr. ⁵⁰ A' lr Jiu kcng tzrmailzng nzpibqtibzlr Pol x Banabas mz kzdung ncblo mz taon kc x kzdung olvz kxnzetung kcng tzaxvctr-lzbqbzng mz nzamrlue-krdr Yawe Gct angidr. Zbz lr taon kcng tzngyati drtwrdr Pol x Banabas. X sc tzatrkatipelr nidr, x nzmaszlrpx-ngrdr mz nrlarnrlc nyd. ⁵¹ Delc aposol lcng tzrlaszpe-ngrdr Pisidia Adiok x nzrtc-ngrbzlr rplz murde nakrlzngir taon kc kx nqmq krdr trka. X sc tzvzpeng mz taon kxetu Ikonizm. ⁵² A' kxnxrlxngiting kcng tzmncng mz taon Pisidia Adiok sc tzabrtz-zvzng x Mqngrkxtr prsrle nidr.

14

Pol Ncdr Banabas Nzryapwxng Mz Taon Ikonizm

¹ X da kcpwz tqprtz-mopwz mzli kc tzkrpz-ngrbzlr taon kxetu Ikonizm. Murde Pol x Banabas nzvztrng mz mangr-nzkrka'ngr nyd lr Jiu, da kc tzwai-zvzlr. X nzryapwx-krdr batrpzle lr Jiu x lr Grik kxnxkqlung nztekqtr-krdr nqmq nr drtwrdr x nzlxngitilr Jisszs. ² A' lr Jiu kcng tzpxtxpx-ngrdr nzrlxngitingr nzycmnebzng mz kxtrngiulrJiu kcng x nzbatrpzlr nzngyatikr drtwrdr lrmakxtr kcng. ³ Kxmule-esz', a' aposol lcng nzling nzmncng mrkc mzli boitx, x nelzdr br mz nzycmne-zpwx-krdr. Murde Kxetu aelwapx-ngrbzle kx nrpa ngr zmrlz ngrde kxmyalz ngi da angidr, x kabzle badr zmatq ngr nzale-krdr rkx kxmatq kxnxkctipxng.

⁴ Lr taon kc sc tzlvalio-lzbqpeng. Kzdung nepe lr Jiu kcng trnzrlxngitiung x kzdu-kzng nepe aposol kcng nzling. ⁵ Zbz leplz amrlx kxtrnzrlxngitiung, kxmule-esz' lr Jiu o kxtrngiulrJiu, nidr badr kxnxrmailz ngrdrng, nzrpilr na-atrkatilr x navaebqlr Pol x Banabas mz rplz. *

⁶ Kx nzxlrppe aposol kcng le, sc tzplckipelr mz taon kcng Listra x Drbi, mz nrlarnrlc kc Laekaonia Provins. X nzmnc-kzng mz kzdung kz taon ngr nrlarnrlc lcde. ⁷ Mrlcde nzyapwxtipx-kzlr Nrpakxmrlz.

Pol Ncdr Banabas Nzryapwxng Mz Taon Kcng Listra X Drbi

⁸ Kzdq kc ncblo mnc mz taon Listra nanycdeng bz. Wai-pnzle mzli kc tzrmcngr mzte x trvzne-pnzu mzli kcng tqmnctinepemleng. ⁹ Kzdq zbz lalztqbz mz Pol nzycmne-krde. Zbz Pol sc tqpwxbztibzle nide, x krlztrpzle kx oliqtipelr nzrlxngiti-krde kx Gct na-amrlzle nrkrdrdqde. ¹⁰ X sc tqetumipebz natqde nzrpi-krbzle kx, "Mzlenge e, tulz!" X ncblo kc blctxlz pnz x sc tqvznepe. ¹¹ Kx nzmcpelr zbo ngr leplz kcng, sc tzkabomipelr nzycmne-krdr mz natqdr, natq lr Laekaonia Provins. Tzrpilr kx, "Gct kcng tqangio-zvzku nzvzopemqng bagu!" A' Pol x Banabas trnzkrlzlu natqdr, x tryrplatitru nardr nikc tzpilr. ¹² Banabas nzyrlqbzlr drtqde Sus, kxetu r gct nedrng. X Pol nzyrlqbzlr drtqde Hermes, murde nide kc tqngi menrpa. ¹³ Zbz pris ne gct Sus, kx madrka' nyd tunetrpz yz mz taon kc, vzmimle kcng kzu mz naonrx ngr taon kc, x twzmle nqvi ngr flawa. Murde da lcng nangipe blz kx na-angiope-ngrbzlr mz aposol kcng.

¹⁴ A' kx nzkrpz Banabas x Pol da kc na-alelr, nzpesalitxdr lrpzdr mz nzaelwapxngr kx drtwr lc vz-rbr zlwz. X sc tzvotrpebzng mz zpzu r zbo

* ^{13:47} Asaea 49:6; Luk 2:32 * ^{13:51} Luk 9:5 * ^{14:5} Lou sc lr Jiu pile kx leplz kx pivxile Gct navaebq mz rplz. [Livae 24:16] Kxmule-esz', a' mz nzmnclz-krbzlr mz gpman ngr Rom, lr Jiu trpnzngir scdr zmatq ngr nzribqngir leplz.

ngr ncblo kcng. X sc tzkabong, ¹⁵ mz nzhpi-krbzlr kx, “?Memule tqale-ngrnamu bagr da lc, kx ncblo lcng? Ninegr ye ncblo, leplz kx apule nimu! Mnc-ngrgr mrka napixbzkr bamu Nrpakxmrlz, murde naesablqtiamu nzangio-krmu da lcng tqwz-ngrnamu, x na-angioamu Gct kc tqlu tqmnc zvz, krkc tqwz-ngrde bongavz, nrlc, prla x da amrlx kcng tzyrlwrpxmqng elr. ¹⁶ Mzli kcng bqnc, rlr-ngrbzle mz neidu amrlx nzvz-nqblq-krdr nqmq krdr, mz nzlxngiti-rbr-krdr kx trngiu Gct angidr. ¹⁷ Kxmule-esz', a' Yawe Gct angidr kc esz'txu aelwapx-ngrbzle nzmnc-krde x nqmq krde mz da kxmrlzting kx kabzle mz leplz amrlx. Krlcng tewa kx dcom mz bongavz, dalr nrlanc, dakxnzng kqlu x nzabrtzngr.” ¹⁸ Kxmule-esz' nzrpwa'-nrbzlr x nzyapwxtibzlr da lcng, a' ycpwz pipz trnzyatr-krpwzlsru mz nzrpwa'-krbzlr nzka-krbzlr blz badr mz da kcng tztwzmlr.

¹⁹ A' mz nibr kzdung zbq, kzdung lr Jiu nzvzkiplr taon kcng Pisidia Adiok x Ikonizm nzlcbutixobzlr drtwrdr leplz kcng amrlx mz nzvz-nqblq-krdr nidr. Kxnzxngitipebzlr kc natqdr, sc tzvaebqpele Pol mz rplz x nzkilzpxlr nrkrdrdrqde yz mz nibr taon kc, nzpnzkr drtwrdr le kx bzpe. ²⁰ A' kx nzyrlwr-nglelvz krkcng tzrlxngiting le, sc tqtulzpe-mop, x sc tqyzlutrpe mz taon kc Listra.

Nrlc ngrlxobz, Pol x Banabas nzrkalzmqng, sc tzvzpeng mz taon kc Drbi. ^{21a} Pol x Banabas nzryapwxpxng Nrpakxmrlz Drbi, x leplz nzkqlung nzlxngitilr Jisz.

Pol X Banabas Nzoklati-moung Kzdung Dzbede Lrmakxtr Mz Nzyzlu-mou-krdr Mz Lr Adiok

^{21b} Zbz nzoklati-moung taon kcng Listra, Ikonizm, x Pisidia Adiok. ²² Nzaxglrlr leplz neng Jisz keng, mz nzhpi-krbzlr kx natu-amqngi-zvzng mz nzabrtr-krbzlr drtwrdr bade, kxmule-esz' drtqdr nzaetq. Murde mz nrlc ka, nzetqkr drtq kxkqlu naprtzm bagu, x sc tqprtr-ateku Heven. ²³ Mz dzbe lrmakxtr kxesz', Pol x Banabas nzaxtxng dakxnzng mz nzkrka'-krdr murde namcpxlr kx na-aclvele dzbe lrmakxtr lcng. X nzkrka'-ngrdr kxnxacve lcng, kx Kxetu Jisz na-aclvele x naokatrle nidr kcng tzbrti drtwrdr nide.

²⁴ Mz nibr nzvzlvzpx-krdr Pisidia Provins, sc tzvztrpe-moung Pamfilia Provins, ²⁵ mrkc tzyapwxtipxpebzlr Nrpa ngr Jisz mz leplz kcng tzmncng mz taon kc etu Prga. Zbz nzvzong taon mz Atalia, mrkc tqdwangr lcsu. ²⁶ Mrlc nzprtng mz lcsu, sc tzalilvckipe-moulr Siriz Provins mz taon kxetu Adiok, mrlc sc tzyrlqopebzlr mqdr badr, mz nzmcpx-krdrreng mz nzwztr-krbzlr mz Gct. X nzkrka'-ngrdr kx Gct na-aclvele nidr mz nzale-krdr nzwzngr kc tzangidapelr: †

²⁷ Kx nzkaputrpebzlr Adiok, nzayrlwr-lxblrng lrmakxtr kcng tzatzlrxngnogrdr nidr. X nzpitxbzlr badr da amrlx kcng tzalelr badr Gct, mz nzbatr-krbzle kxtrngiulrJiu nzlxngiti-krdr Jisz mrkcng kqlu tzryapwx-ngrdr. ²⁸ Nzmnc-krdr mrkc mzli boitx badr krkcng tzrlxngiting.

15

Nzryapwxtrngr Mz Lrmakxtr KxtrngiulrJiu Jerusalem

¹ Mzli kc Pol x Banabas tzmnc-ngrdr taon kxetu Adiok mz Siriz Provins, kzdung lr Jiu kxnzxngitilr Jisz nzvzkiplr Judiz Provins. X sc tzalvztrpelr krkcng trngiulrJiu kxnzxngitilr Jisz. Nzrpibzlr kx, “Nzmu

^{14:15} Nzrlaszngr 20:11; Sam 146:6 ^{14:17} Emos 9:11-12 ^{14:26} Nzvzpxkr Pol lc ayrrnrngr mz Aposol dckrlzdeng 13—14, twzle yiz esz' x ncte kc.

trnapakrwamuu mz nzvz-nqblq-krde Lou sc Mosis, e trpengr nzarlapx-krde nimu Gct mz alwx ngrmung.” ² Trngiu nzycmnengr kxtopwz mz mzlir Pol x Banabas badr lr Judiz lcdeng mz da lc. Zbz kxnzrlxngiting mrlcde, sc tzrpipelr kx Pol, Banabas x kzdung krkcng Adiok navdzng Jerusalem, murde naycmnetr-ngrbzlr da lc badr aposol x kxznetung ngr lrmakxtr. ³ X mz nzvz-krdr, kx nzvztrpzlr Provins kcng Fonisiz x Szmariz, nzpibzlr mz kxnzrlxngiting nrpa kx kxtrngiulrJiu nzlxngitipe-kzlr Jiszs. X nzabrtz-zlwz-ngrdr nxzlr-krdr nrpa lc.

⁴ Kx nzkaputrpzlr Jerusalem, nzabrtzlvz lrmakxtr badr aposol x kxznetu rdrng. Zbz Pol x Banabas nzpibzlr da amrlx kcng tzalelr mz nzokatrkr Gct. ⁵ A' kzdung Farzsi kx nzlxngitipelr Jiszs nztulzmqng, sc tzrpipebzlr kx, “KxtrngiulrJiu napakrng x navz-nqblqlr Lou sc Mosis.” ⁶ Zbz aposol x kxznetu kcng nzyrlwr-lxblrng mz nzobqtr-krdr mz da lc. ⁷ Mz nibr nzycmnetr-krdr kxboi, Pita tulzm, x sc tqrpipebzle kx, “Mzlengeng, krlz-angidramu kx Gct mcpx-pnzle ninge mz mzlirmu, murde nayapwxtipxbo Nrpakxmrlz mz kxtrngiulrJiu x narlxngitipeng. ⁸ X Gct, kx rkrlz da kx yc mz nabz leplz amrlx, aelwapx-ngrde kx abrtzlvzle nidr mz nzka-krbzle Mqngrkxtr badr, da kc tqwaimle bagu. ⁹ Nike waisr-ngrde nidr trblepxu mz da kc tqwaisr-ngrde nigu. Murde alqngi-kzpze nabzdr mz nzlxngiti-krdr Jiszs. ¹⁰ Mz nzmu-krde lcde, bzkq angyatiamu drtwr Gct mz nzrtulrtr-ngrbz badr nzvz-nqblq-krdr lou scgung amrlx kx rblk-atwrnr-ngrm bagu nigu lr Jiu, nzvz-nqblq-zpwx-krguleng. ¹¹ Murde krlzku kx nzrlapx-krgu vzpxm mz zmrlzkxmyalz kc tqkam Kxetu rgu Jiszs Kxnmcpx bagu mz nzbrtikr drtwrgu nide, dekc tzwai-kzlr mz kxtrngiulrJiu.” ¹²

¹² Zbz leplz amrlx mz nzyrlwrngr lc, nzmnc-lrping mz nzlalztq-krbzlr mz Banabas x Pol nzpi-krbzlr rkh x da kxnxkctipxng amrlx kx ale Gct mz nzwz-krdr mz mzlir kxtrngiulrJiu. ¹³ Mzli kc tqykrxpengr nzycmne-krdr, Jemes mzle Jiszs, kzdq kxetu ngr lrmakxtr kc Jerusalem, sc tqrpipebzle kx, “Mzlengeng, lalztqmamu bange. ¹⁴ Saemon Pita pipemle bagu kxmu Gct nzaelwapx-krmle nzaodu-krde kxtrngiulrJiu, mz nzkapx-krmle kzdq dzbe leplz badr kx nangi nede. ¹⁵ X profet negung nzycmnetr-kz-ngrdr da lc, mz nzryr-krdr natq Yawe kc tqrpile kx, ¹⁶ ‘Mz nibrde, sa nayzlu-mopwc’. X sa nayrlq-moux ncblo kx navzpxm mz nqvi lr Devet, mz nzngini-krde king mz nrlc. X sa na-axplr-moux x na-amrna-moux leplz nengeng mz nzmncsz-krbzlr bade. ¹⁷ Murde leplz amrlx kcng tqkqlex mz nzngini-krdr leplz nengeng, nartangrtiir ninge x narmctiir ninge mz nzaxvctr-lzbq-krbzlr bade, kxmule-esz' kxtrngiulrJiu. ¹⁸ Ninge Yawe. Krlc natqnge, kc tqipix-pnzs kx na-alex da lc.’” ¹⁹

¹⁹ Rpi-mopwz Jemes kx, “Mz nzmu-krde lcde, krlz-atex kx trmrlzu nzrtulrtr-krbzku mz kxtrngiulrJiu nzvz-nqblq-krdr nqmq krgung amrlx, mz nzvz-krbzlr mz Gct. ²⁰ A' naryr-alzupwzku letz badr, mz nzpi-krbzku badr kx navz-nqblqlr kzdung nqmq krgu kxipiz, murde naodutr-lxblrku badr. Nqmq lcde seng: Bzkq nzrmung dakxanzng kx ngi blz kr drka'. X bzkq nzrmqng mepyr o nzmu-kzng ncvr animol kx nznibq x mepyr ngrde trnzayrlepxu. X mou bzkq nzrmwimng doa kx trngiu krmalzdr. ²¹ Mrlz nzvz-nqblq-krdr lou lcng, murde ma tzatrkatibzlr drtwr lr Jiu kcng tzmncng mz nrlc tulvzo. Murde lou sc Mosis nzyapwxtipxpeng mz taon amrlx mz nzrlwxngr natqdeng mz mangr-nzkrka'ngr mz Sabat kang kqlu.”

^{15:7} Aposol 10:1—11:18 ^{15:11} Galesia 2:16; Efiszs 2:8 ^{15:18} Emos 9:11-12 ^{15:20} Nou 9:4-6; Livae 17:10—18:30; Aposol 21:25

Letz Kx Nzatzlrlmibzlr letz. X mz letz kc nzrpilr kx.

²² Zbz aposol x kxnzetu kcng, badr lrmakxtr kc atwrnrngr, nzlxngitilr da kc tqpi Jemes. Sc tzmcpxpelr ncblo nzling mz krkcng tzaclvelr dzbe lrmakxtr kcng Jerusalem, murde na-atwzlrpe-ngrdr mz taon kxetu Adiok badr Pol x Banabas. Kzdq nidr Saelas x kzdq Judzs, krkc tzrpi-kzpz Basabas. ²³ Nzatzlrlmibzlr letz. X mz letz kc nzrpilr kx,

“Mzlegrng, nigr aposol x kxnzetu kcng Jerusalem rpibzkr kx, ‘Nimu la.’ Atwzlr-ngrbzkr letz lc bamu, nimu leplz kcng trngiulrJiu tzlxngitilr Jiszs. Nimu kx nzmnncng mz taon kc Adiok x provins kcng Siriz x Silisia.

²⁴ Xlrkr kx kzdung kztegr nzvzmqng bamu, kx tratwzlr-ngrpwzkru x nzatalvzbzlr nabzmu mz nzrpilr kx napakrmu x navz-nqblqamu Lou sc Mosis, murde narlapxamu. ²⁵ Mz nzmu-krde lcde, mz nibr nzycmnetr-krgr da lc, yrlqkr drtwr kx brngz nzatzlrlmibzlr kzdung ncblo bamu mz nzrka-krbzlr nrpa lc. Navzbzng badr mzlegung Banabas x Pol, ²⁶ kcng tznanidr mz nzatzlrlmibzlr mz Kxetu rgu Jiszs Kxnmcp. ²⁷ Mz nzmu-krde lcde, tqatzlrlmibzlr Judzs x Saelas, murde napiangidrbzlr da kcng tqyrbzkrng mz letz.

²⁸ Drtrgr esz'ti mz Mqngrkxtr kx bzkq kabzkr bamu lou scgr kxkqlu, nigr lr Jiu, murde ma tqmrlepubz bamu. A' nangi txpwz da lcde seleng murde naodutr-lxblrku: ²⁹ Bzkq muamu dakxnzng kx ngi blz kr drka'. X bzkq rmnqamu mepyr o mu-kzamu ncvr animol kx nznibq x mepyr ngrde trnzayrlepxu. X mou bzkq rmwimiamu doa kx trngiukrnalzmu. Mrlz nzyrlqpx-lzbq-krmu mz da lcng.

Eu, delape. Nimu lape.”

³⁰ Zbz mzli kc tzkrpz-ngrbzlr Adiok, sc tzayrlwrpelr lrmakxtr kcng. Sc tzkapebzlr letz kc. ³¹ X kx nzrlwxpe leplz kcng le, axglrle nidr natq kcng x drtrdr elalzm. ³² Zbz Judzs x Saelas, kx nzngini-kzdr profet ne Kraes, nzaxglrbzlr mzledr kcng, mz natq kxkqlu kx nzyapwxtibzlr mz nzaxplrkrbzlr nidr. ³³ Mz nibr kzdung mzli, kxnxrlxngiting mrkc Adiok, atwzlr-mopwzlr Judzs x Saelas mz kztedrng kcng Jerusalem. Murde napibzlr badr da kx prtz, vzmi nzkrkz'-krdr kx Gct na-amnc-zpwxle nidr. ³⁴ A' Saelas rpile namnc txpwz mrlcde, x Judzs kc tqyzzlupe. *

³⁵ Pol x Banabas nzmnnc-kzng Adiok. Nidr badr kzdung mou leplz, tzalvztrng x tzryapwpxng Nrpa ngr Kxetu rgu, Jiszs.

Pol X Banabas Sc Tzaki-lzbqpeng

³⁶ Kzdung mzli mz nibrde, rpibz Pol mz Banabas kx, “Nayzlupe-mouki x naoklatipeki taon kcng amrlx tqyapwxtipx-ngrgi Natq Kxetu, murde nakrlzki kx nzvz-zvzng mz nzrlxngiti-krdr o trtingr.” ³⁷ Banabas rpile navzmile Jon Mak. ³⁸ A' Pol ptxpx-zvz-ngrde nzrvzmingr Jon Mak, murde trnzayrkrpxlru badr nzwz-krdr, a' rlasz-pnzle nidr mzli kc tzmnnc-ngrdr Pamfilia Provins. ³⁹ Nzrveclvzti-lzbq-krdr etu, x sc tzaki-lzbqpeng. Banabas vzmipele Mak x sc tzvokipelr mz trmctu Saepras. †

⁴⁰ A' Pol mcpkx-alzule Saelas, kc tqmncbe Adiok. X nzrkalzmqng Adiok mz nibr nzkrkz'lvezkr lrmakxtr nidr mz nzaclvekr Gct nidr. ⁴¹ Zbz sc tzvzlvzpxpelr provins kcng li, Siriz x Silisia, tzaxglrtrlr lrmakxtr kcng mrlcdeng.

* ^{15:22} Galesia 2:11-12; 3:10-12; 5:2-3; 6:12 * ^{15:34} Mz kzdung nzryrngr kcng pnz, ngalrde 34 trnzyrou. * ^{15:38} Aposol 13:13 † ^{15:39} Luk trycmnetr-mou-ngrdeu Banabas x Mak mz buk lc, mwx murde vzbz mz Pol mz nzvzpx-krdr. A' mz nibrde Mak sc tqmnc-zpwxtrpebz mz Pol. [Kolosia 4:10; Filemon 23; 2 Timoti 4:11]

16

Timoti Prtrpz Mz Nzwz-krdr Pol X Saelas

¹ Pol mz Saelas nzvzmqng mz taon kc Drbi. Zbz sc tzvzpe-kzng mz taon kc Listra. Kzdq kc ncblo ne Jiszs mnc elr, drtqde Timoti. Lxede ngi kzdq lr Jiu kx lxngitile Jiszs. A' trtede trngiulrJiu. ² Leplz kcng tzrlxngiting, kcng Listra x Ikonizm nzrpilr kx Timoti nide ncblo kxbrngz. ³ Pol suti drtwrde nzvz-krdr badr. Zbz sc tqpakrpele Timoti. Murde lr Jiu kcng tzmnncng mz taon lcng, ma tzpxtxpx-ngrdr Timoti, mz nzkrlz-krdr kx lxede nide lr Jiu, a' trtede trngiulrJiu. ⁴ Mz nibr Timoti nzrpakrngr, sc tzvzpeng mz taon kcng amrlx. X sc tzpibzlr natq kx nzkabzlr aposol badr kxnzetu kcng Jerusalem, kx navz-nqqlq kxtrngiulrJiu kxnxrlxngiting. ⁵ Zbz dzbede lrmakxtr lcng, sc tzxplrnepxpeng mz nzlxngiti-krdr Jiszs, x vzm kc zbz, sc tzkqlunepxng.

Pol Obq-rmwible Mrkc Troas

⁶ Pol, Saelas x Timoti sc tzvztrpeng mz nrlarnrlc kc Frijz mz Provins
kc Galesia, murde Mqngrkxtr tr-rlr-ngrpwlzleu badr nzpipx-krdr Nrpa ngr
Jiszs mrkc Esia Provins. ⁷ Kx nzvzpemlr mz ncngrbz ngr nrlarnrlc kc
Maesia x Bitinia Provins, nzrpilr navztr-ngrbz Bitinia, a' Mqngrkxtr tr-rlr-
ngrpwlzleu badr. *

⁸ Zbz sc tzvztrpeng mz nrlarnrlc kc Maesia. Nzvzng x nzkrlzbzlr Troas, taon kxetu kx dwangr lcsu. X ninge Luk, krlzmc nidr mrlc. ⁹ Mz nrlckxbq kcpe, Pol obq-rmwible. Mcle kc ncblu ngr Masedonia Provins sc tqtu tqaveatibzle nido mz nzrni krbzle kx. “Yokicm baqr Masedonia Provins x okatrp nigr”

¹⁰ X mz nibr nzobq-rmwiblekr Pol, yapwximle bagr. X olijtx-rlru-pnzkr nzrkalz-krmgr mz nzvzngr Masedonia Provins. Murde drtwrgr esz'ti kx Gct kqlemle nigr amrlx mz nzyapwx tipx-krbzkr Nrpakxmrlz mz lr Masedonia.

Lidia Lxngitile Jiszs

¹¹ Zbz sc tqalilvcki-rlrupekr mz trmctu kc Samotres, x nrlc ngrlxobz sc tqalilvckipekr mz taon kc Neapolis. ¹² Rkalzmgr mrkc, x sc tqvzpekr mz nzkrlz-krbzkr mz taon kxetu Filipae, mrkc Masedonia Provins. Taon lc nyzdr kzdung lr Rom kcng tzmnncng elr. X mnctikr mz taon nyzdr kzdung zbg. ¹³ X mz Sabat kc, dwapxkr mz naonrx ngr taon, sc tqvzopekr mz nrlar lue, me nzrpibz nzkrka'-ngrdr lr Jiu. Kx krlzpebzkr mrlcde, sc tqwxbuopekr, x sc tqycmnepebzkr mz olvz kcng tzyrlwrng mrkc tzkrka'ngr. ¹⁴ Kzdq nidr kc tqlalztqm bagr ngi olvz kxrngisc, drtqde Lidia. TrngiulrJiu, a' amrluele Yawe Gct angidr. Nide lr Taeatira, x nwz-wz-krde nzamwangr lrpz kx narncbr ngrde lqlwx x kala ngrde prpol. Mz nzlalztq-krde, drtwrde aotpxp-pnzbz Gct mz da kcng tqpi Pol, x sc tqlxngitipele Jiszs. ¹⁵ Zbz sc tqwrkxtrpe x lr ma nyzde nzwrkxtr-kzng. Zbz sc tqaveatipemle nigr, tqrpipemle kx, "Vztxpwa'mu ye x mncamu mz ma nyznge mzli ka tqmnc-ngrnamu Filipae, murde krlzamu kx lxngitix Kxetu Jiszs." X tamititxde nigr nzmnc-krgr ma nyzde.

Pol X Saelas Nzadwatrng Mz Presin

¹⁶ Kzdq zbz mzli kc tqvz-ngrgr mrkc tzkrka'ngr, kzdq doa olvz kxnxawz rmctipele nigr. Olvz lc mncpx-ngrm drka' kx batrpzle nzpipx-krde da kx naprtzbz mz leplz kalr. Atatrple trau kxkqlu sc kxetu rdeng mz nzpi-krbzle mz leplz da kx naprtzbz badr. ¹⁷ Doa olvz kc tqvz-nqqlqle nigr badr

[◊] **16:1** 2 Timoti 1:5; 3:15 [◊] **16:3** Aposol 15:20; 1 Korint 9:19-23; Galesia 2:3-4 [◊] **16:6** Aposol 19:1-10 * **16:7** Trkrlzkuu kxmu trnzrlr-krpwzu Mqngrkxtr nzprtr-krdr Esia Provins (ngalrde 6) x Bitinia Provins (ngalrde 7).

Pol, tqkabobz mz leplz tqrpile kx, “Ncblo lcng nidr kxnzawz neng Gct kc tqmyalz-esz'ngr, x tzpipxbzlr bamu lrpzki r nzarlapxngr.” ¹⁸ Zbz kqlupe kx vz-nqblqnede nigr me vzkikr, tqkabomile da kcpwz. A' Pol drtqde satxtrpebz mz nzycmne-krde, murde ayakukule nzwz-krgr. X o-lxlvrtxbz bade x rpibzle mz drka' kc kx, “Pibo bam, mz drtq Jiszs Kxnmcpx, dwapxm mz doa olvz lc!” Mzli kcpwz drka' kc dwasztx-pnzle nide.

¹⁹ A' mz nibrde, kxnzetu rdr doa olvz kc nzmcplr kx drka' kc rlaszpele nide, x lrpzki r nzatatr-krmlr trau kc vztxpe. Zbz sc tzolvzpelr Pol x Saelas, tzkilztrpelr me nzamwangr da, murde narmctirl majzstret kcng tzaclveng nrlc. ²⁰ Nzvzmibzlr mz majzstret kcng, sc tzrpipebzlr kx, “Ncblo lcng nidr lr Jiu x tzbatrpzlr nzmncngr kxtrmrlzu mz nabz taon nyzgu. ²¹ Murde sc tzalvztr-ngrdr da kx rnzlvzole lou scgu lr Rom!” ²² Leplz kcng tzyrlwrng mrlcde nzprtrpzng mz nzpibqti-krdr Pol x Saelas. Zbz majzstret kcng nzkapxbzlr natq mz ncblo ngr vea nedrng kx napesalipxbzlr lrpzdr x natabrlr mz bz. ²³ Zbz sc tzadwatrpelr mz presin. X nzpibzlr mz kxetu r presin kx na-aclve-zpxleng. ²⁴ Mz nzvz-nqblq-krde natq kcng tzkapxbz, adwatr-zpxleng me tavau mz presin kc. X sc tqamqngipebzle nanycdrng mz dapunounc kx mrlepu murde ma tzdwang.

Kxetu R Presin X Lr Mrnyzdeng Nzarlapxng

²⁵ Mzli kc mz aurnrlc, Pol ncdr Saelas tzkrka'ng x tzglqlzlr Gct mz nzngr-krdr nabz kxtrng. X krkc-kzng tzamncng mz presin sc tzlalztqbzng badr. ²⁶ Zbz nzpwrkilvc-ngrdr kzdq nengq kxetu. Aycnqlrlle me tukio presin kc. X mzli kcpwz naonrx mz nabz presin nzobqtitxng amrlx. X da kcng tzatolvangr leplz kcng tzpresinqng tattixpx-kzng mz mqdr x nanycdr. ²⁷ Kxetu kc tqaclevle presin kc kx dwalzidle, mcpele naonrx ngr presin kc nzobq-krde. Zbz nzpnzkr drtwrde le kx leplz lcng nzdwapeng. X sc tqveclzpeple toki r vea scde, nanibq-lzbqpe. ²⁸ A' Pol kqpxbz bade mz natqde kxetu, rpibzle kx, “Bzkq atrka-lzbqm! Nigr ka tqmnckr amrlx ngrgr mrka.” ²⁹ Kxetu r presin kc kqpe kx nartwzbz dq nyr. Zbz sc tqvotrpebz mz presin, x rnrcnepebz mz zmwxlr, sc tqrweopebz zpr mz Pol x Saelas. ³⁰ Tulzm sc tqvzmipxpemleng yz, tqrpipebzle badr kx, “?Nike na-alex murde Gct na-arlapxle ninge?” ³¹ Nzrpibzlr kx, “Lxngiti Kxetu Jiszs x sa narlapxq, da kc nawai-kzpplr mz lr manyzmqng.” ³² Zbz sc tzpipebzlr nidr badr leplz amrlx mz ma nyzde Nrpa ngr Kxetu Jiszs. ³³ X mz nabznepi lcde mz nrlckxbq, kxetu r presin kc vzmile nidr x wztibzle me nzataking mz nrkrdrtrqdr. X sc tqwrkxtrpe x lr ma nyzde sc tzwrkxtrpe-kzng. ³⁴ Zbz vzmimleng brma x kabzle badr dakxnzng. Nzabrtzng nidr badr doa lr ma nyzde, murde sc tzlxngitipelr Yawe Gct angidr.

³⁵ Mzli kc nrlc tqngrlxpe-ngrde, majzstret kcng nzatzlrbzlrng ncblo ngr vea nedrng mz kxetu r presin kc, nzrpibzlr kx, “Avzpxpeamu ncblo kcng.” ³⁶ Zbz kxetu r presin kc sc tqrpipebzle mz Pol kx, “Majzstret kcng nzatzlrbzlr-ngrmlr natq kx na-adwapxpx nimu ncdr Saelas mz presin mzli ka. Krlzamu nzvzpxngr. X krka'-ngrne kx namnc-zpxxamu.” ³⁷ A' rpibz Pol mz ncblo kcng kx, “Da kc tzwz-ngrmlr majzstret kcng bagr trtubqu! Murde gzpman ngr Rom rlr-ngrmlr bagr nzprtr-krgr mz dzbede kc tqmyapxbz. A' nzbatrpzlr nzrtabringr nigr mz mz ncblo kxkqlu, x nzadwatrlr nigr mz presin. A' trtingr! Majzstret kcng nidr esz'-krdr navzmqng mrka, x na-avzpx-moulr nigr mz presin!” ³⁸ Ncblo kcng nzyzlbzng x nzrlwa-ngrbzlr natqdr mz majzstret lcng. Kx nxzllrlr kx gzpman ngr Rom rlr-ngrbzle badr nzprtr-kz-krdr mz dzbede lc tqmyapxbz, nzmwxltxng. ³⁹ Zbz sc tzvzpebzng, x

sc tzvzmipxpemlr yz mz nzamatq-krdr nidr, murde na-amnc-nrwx-ngrdr nidr. X nzyrnititr-zvzbzlr badr kx narlaszlr taon kc. ⁴⁰ Mz nibr nzvzpx-krmlr mz presin, nzvzpeng ma nyz Lidia mz nzrmcti-lzbq-krdr badr krkcng tzrlxngiting. Nzryapwxbzng badr natq ngr nzaxglrngr, x sc tzrkalzpepqng badr kzdung kztedrng. [A' ninge, Luk, mnctxpo Filipae.] †

17

Pol Ryapwx Mz Taon Tesalonika

¹ Pol x Silas badr kztedrng nzkawilr taon kcng Amfipolis x Apolonia x sc tzkrlzpemlr taon kxetu Tesalonika, mzteadau ngr Masedonia Provins. X mz taon lc, tu elr kc mangr-nzkrka'ngr nyz lr Jiu. ² Mz nqmq kr Pol, vztrpz mz mangr-nzkrka'ngr nyz lr Jiu. X yapwxtipx-ngrbzle badr Nzryrngrkxtr Sabat tq. ³ Aopxbzle Nzryrngrkxtr badr mz nzaelwa-krbzle kx Kxnzmcpx drtqde naetq, nabz x natulz-mop mz nzbzngr. Rpibz Pol badr kx, "Jiszs lc tqyapwxtipxbo bamu nide kc tqngi Kxnzmcpx." *

⁴ X mz nzmnc-krdr Tesalonika, kzdung lr Jiu sc tzlxngitipelr natq Pol, x nzprtrpzng mz Pol x Saelas. Wai-kzle kxtrngiulrJiu kxnzkqlung kxnzamrluelr Yawe Gct angidr x olvz kxnzetung kxnzkqlung. ⁵ Mz nzmukrde lcde, kxnzrmailz r lr Jiu nzdobung. Zbz nzotirlr kcng ncblo me nzamwangr da, kx nqmq krdr trka. X nzabzolr mz zbo ngr ncblo kx drtwrdr ngya, sc tzgzmipelr drtwr kxngya mz nabz taon kc. Sc tzvzpeng mz ma nyz Jeszn, murde rpilr mz drtwrdr kx Pol x Saelas sc tzmncng badr. Nztavetrlr naonrx nyzde, tzrtangrtirr nidr, murde navzmimlr mz zbo ngr ncblo kcng. ⁶⁻⁷ A' kx trnzmc-pnzlru Pol x Saelas mrkc, nzotibzlr Jeszn x kzdung kz lrmakxtr, sc tkilzpebzlr mz kxnzetu r taon kc. X sc tzkabomipxpelr nzsri-krdr kx, "Jeszn lc adwatrle ma nyzde kzdung ncblo kxnztrkang. Murde ncblo lcng tzbatrpzlr nztalwzngr mz nrlc tulvzo! X mzli ka nzvzpe-kzpqng mz taon nyzgu. Tzrnzlvzolr lou sc Klaodizs king kc etu rgu kc Rom, mz nzsri-krdr kx kzdq kz king kc tqmnc, drtqde Jiszs!" ⁸ Kx xlreve zbo ngr leplz x kxnzetu r taon kc le, drtwrdr kc tqngya-zlwzpe. ⁹ Zbz lr taon kcng sc tzrlxpebzng trau kx ngi 'faen' mz Jeszn badr lrmakxtr lcng, kx naxpepx-ngrdr nzvz-krdr. Mrlz, sc tzxpepebzlr, x sc tzvzpeng.

Lr Berea Kxnzkqlung Nzlxngitilr Nrpakxmrlz

¹⁰ Nrlc bqtxtrpz kc, lrmakxtr kcng Tesalonika nzotibzlr Pol x Saelas nzatwzlrtr-ngrdr mz taon Berea, murde nzmwxlr-ngrdr kx kcma tzatrkang. Kx nzkrzbzlr kc Berea, sc tzvztrpeng mz mangr-nzkrka'ngr nyz lr Jiu. ¹¹ X nzvqtikr drtq lr Berea nzlalztq-krbzlr mz Pol myaszpxle lr Tesalonika. Murde nzabrtzlvzlr nztwz-krdr natqdeng. Mzbq kcng kqlu nzobqtitrlr Nzryrngrkxtr mz nzmc-krdr kx da lcng tqpi Pol ngi da zpxw o trtingr.

† **16:40** 16:37 Trtubqtru mz lou sc lr Rom kx nzayrplaxngr x nzadwatrngr mz presin ncblo kx gzpman ngr Rom rlr-ngrbzle bade nzprtr-krde mz dzbede lc tqmyapxbz. A' navz-kai mz kot murde nakrlz-zpwxx vz-rbr o trtingr. Gzpman kc Rom xplr angidr mz nzaclve-krde doa kxnzmulr lcng. Nzmu Pol napibzle mz gzpman ngr Rom da kc tzwabz bade x Saelas, e na-ayrkpxbzlr majzstret kcng mz nzwz-krdr x na-ayrplaxng nidr mz nzayrplaxngr kx xplr. 16:40 Krlzku kx Luk mnc txpwz Filipae murde mz 17:1-2 trpileu 'nigr,' a' rpile 'nidr.' Pol prtr-mopwz mz Luk mz Aposol 20:5, mz nzyzlu-mou-krde Filipae. * **17:2** 1 Tesalonika 1:9; 2:9; 2 Tesalonika 3:7-10; Filipae 4:16

* **17:3** 17:1 Leplz ngr Tesalonika nzkqlu-krdr myaszlzle 200,000. Taon lc ngi kzdq me dwangr lcsu x me nzamwangr x nzxpengr da. 17:3 Trnzaopxpzu mz lr Jiu kx Nzryrngrkxtr rpile kx Kxnzmcpx na-aetqbz drtqde x naobqszo nide, na-atrkatn nide, x nanibq nide. [Sam 22:1-18; 69:8, 11, 20-21; 118:22a; Asaea 53:1-12] Murde nzlxngitilr Natq Gct kx rpile kx Kxnzmcpx nangi king kc etu, na-aovxiole enqmi rdrng amrlx, x na-aclve-alole leplz amrlx. A' trnzlxngitilru natq kzbleng.

¹² Lr Jiu nzkqlung kxnzxngitilr Jiszs, nidr badr kzdung olvz kxnxetung kxtrngiulrJiu x ncblo nzkqlu-kzng kxtrngiulrJiu.

¹³ A' kxnzkrlztipe lr Jiu kcng tzmnncng Tesalonika kx Pol yapwx tipxpele Nrpa ngr Jiszs Berea, sc tzvzpe-kzng elr, murde na-angyati-kzpplr drtwr zbo ngr leplz kcng. ¹⁴ X mzli lcde, lrmakxtr mrlc nzatzlrl-ngrdr Pol, nidr badr kzdung ncblo, nzvzkiolr prla. A' Saelas x Timoti nzmnctxng Berea.

¹⁵ Krkcng tzvzng badr Pol, nzvzmilr nzkrlbzlr taon kxetu Atens, mrkc Akaia Provins. Zbz nzyzlu-moung Berea nztwzbzlr natq Pol kx Saelas x Timoti navz-anibzng bade Atens. †

Pol Ryapwx Mz Taon Kxetu Atens

¹⁶ Mzli lcde Pol tqaenzli-ngrde Saelas x Timoti mrkc Atens, drtwrde vztx zlwz. Murde mcle elr mqngr da kx nzlz kxkqlu kx nzangio leplz lcng.

¹⁷ X sc tqvztrpe mz mangr-nzkrka'ngr nyz lr Jiu, mz nzyapwx tipx-krbzle Jiszs mz lr Jiu kcng x kxtrngiulrJiu kx nzamrluelr Yawe Gct angidr. X mzbq lcng kqlu, vz kz me nzamwangr da mz nzyapwx tipx-krbzle Jiszs mz kxtrngiulrJiu kxnmncng elr. ¹⁸ Zbz kzdung kxnxakrlzng ngr dzbede nzling nzrpibz 'Epikiurian' x 'Stoik' sc tzatzlitzt-lzbq-kzng badr Pol. Kzdung nidr nzrpilr kx, "?Nike tqpi ncblo lc tqycmne-nqngu?" X kzdu-kzng nzrpilr kx, "Opym kx tqypwx tipxle kzdung gct ngr lr mrkzbleng." Nzplir da lc murde Pol tqypwx tipxle Jiszs x nztulz-krmle mz nzbzngr. ¹⁹ Zbz sc tzvzmipebzlr Pol mz kxnxetu rdrng kcng tzprtrng mz Areopagzs. X kxnxetu lcng sc tzrpipebzlr kx, "Nakrlz-kzkr nzalvztrngr lc tqmrna tqypwx tibzme mz leplz. ‡

²⁰ Murde kzdung da kcng tqypwx tibzme mz leplz trxlr-pnzkru. X nakrlz-kzkr ena nike tqycmnetr-ngrn." ²¹ Krlc tqkxmu nzycmne-krdr lc murde lr Atens x lr mrkzbleng kx nzprtrpqng kx nzmnncng Atens, mrlzbz badr nzycmnetr-zvzngr x nzlalztq-zvzngr mz da x drtwr kx vztr-atem.

²² Zbz Pol tulzm mz zpzu r Areopagzs kc x rpibzle badr kx, "Ncblo ngr Atens! Krlzx kx nzangio-krmu gct ngrmung pqtr zlwz. ²³ Murde mz nzvzne-krnge mz nabz taon nyzmu, tqmctix da kxkqlu kcng tqangioamung. Mc-kzx kzdq olta kx nzyrtr elr kx, 'Mz GCT KX TRNZKRLZU.' Gct kc tqangioamu trkrlzwamuu, nide ka tqypwx tibo bamu. ²⁴ Gct kc tqwz-ngrde nrlc x bongavz x da amrlx kcng tzyrlwrpxmqng elr, ni-kzde King kx aclvele doa x da amrlx. Trmncu mz makxtr kx wzngr ncblo. ²⁵ X trmnc-xgleleu da kx nakabzku bade, murde nide kx batrzple nzlung, x kabzle da amrlx mz leplz. ²⁶ Wz-ngrde nqvi lr ncblo amrlx mz nrlc, nzyrblapxmqng mz ncblo esz'txu, drtqde Adzm. X mcpxbzleng me namnc-ngrdr x yrlq-kzpze nzboikr mzli r nzlu-krdr. ²⁷ Wz-ngrde leplz murde nartangrtir nide x narmctir nide. Kxmule-esz', a' Gct trmnc-rlrupleu bagu. ²⁸ Murde kzdq ncblo rpile kx, 'Nide nou nzlu-krgu, nzvzne-krgu, x nzmnnc-krgu.' Da kc tqwai nzpi-kzkr kzdu ncblo nemung mz nzyr-krdr kx, 'Nigu amrlx doa nedeng.' §

²⁹ "X pibo bamu kx mz nzngini-krgu doa neng Gct, ni-kzde Trtegu kc tqwz-ngrde nigu leplz. Mz nzmu-krde lcde, bzkq rpiku kx Gct apule mqngr da kx nzvzngr mz gol, o silvz, o rplz. ³⁰ Mzli kcng pnz Gct trayrplapxleu leplz kx trnzkrlzlu nide. A' mzli ka kapxle natqde kx leplz amrlx mrkang

† ^{17:15} Akaia Provins nzrpilz 'Gris.' ‡ ^{17:19} Areopagzs ngi drtq kzdq dzbe ncblo. X ngi kz drtq ma nyzdr x newz kc tqtwo-ngrmle. § ^{17:28} Kzdq lr Grik rpile natq lcng. A' mc kz Job 12:10 x Daniel 5:23. Mz drtwr lr Grik nzycmnenegr lcng nzling nzycmnetr-ngrdr Sus, gct rdr kxetu. Pol ayzuobzle mz nzycmnenegr kx nzkrlz-zpwzlr, murde nayapwx tibzle Yawe Gct angidr.

kqlu mz nrlc natekqtrlr nqmq nr drtwrdr mz nzkriz-krdn nide x navznqblqlr natqde. ³¹ Murde pipx-pnzle kx mz Mzli Kxmatq kc navzm nzayzlu-krbzle da mz leplz natubq. X mcpxpele Jiszs mz nzale-krdele. Murde aelwaxp-ngrbzle mz leplz amrlx kx sa tqalele da lc mz nzatulzmou-krmle Jiszs mz nzbngr.

³² Zbz kx nxxlpelr kx Gct atulzpemle Jiszs mz nzbngr, kzdung nidr sc tzyrpalepeng, murde trnzlxngitilru kx nrkrdrtrq kx bzpe natulz-mop. A' kzdung nzrpibzlr kx, "Mrlz nzpi-mou-krme bagr da lc mz kzdung mzli."

³³ Zbz Pol kc tqrkalzjem Areopagzs. ³⁴ A' Dionisizs, kzdq ncblo kxprtr mz Areopagzs, x kzdq olvz drtgde Damaris, x kzdu-kzng leplz kxpipz mrkc nzprtrpzng bade mz nzlxngiti-krde Jiszs.

18

Pol Vzkile Mzteadau Korint, Taon Ngr Drka' X Alwx Kxkqlu

¹ Mz nibrde Pol rkalzm Atens, sc tqvzpe Korint, mzteadau ngr Akaia Provins. ² X rmctile elr kzdq lr Jiu, drtgde Akwila, mzte nzmc Pontzs Provins. Sc tzvz-atemqng Itali Provins badr olvz rde Prisila, murde King kxet Klaodizs kapxle natq kx lr Jiu amrlx narlaszlr mzteadau Rom, murde tzbatr-zvzbzlr nzotabllvzngr kxmu nzrlxngitingr Gct. Pol vzbz mz nzmc-krde nidr. ³ X nzaveatilr mz nzmc-krdr badr, murde nzrwz-ngrng tent, da kc tqwaile. X sc tzwpeng badr. *

⁴ Mz Sabat kang kqlu Pol sc tqyapwxtipxbzle mz lr Jiu x kxtrngiulrJiu mz mangr-nzkrka'ngr nyz lr Jiu, murde nalxngitilr Jiszs.

⁵ Mzli lc Saelas x Timoti nzkaputr-kzpqng Korint mz nzvz-krmlr Masedonia Provins. Nzwtzmlr trau kx nzkabz lrmakxtr kcng Masedonia mz nzokatr-krdr nzwzkr Pol. Zbz Pol kc tquesakipe nzrwz-krde tent, sc tqyapwxtipx-zvzbzle mz lr Jiu Nrpa ngr Jiszs nzngini-krde Kxnzmcpx kc tzaenzliber. ⁶ A' kx nzpctxpxngr lr Jiu kcng Pol x nzpokiatitrlr nide, tapqtipxle zpqlr lrpz scdeng murde nakrlz-ngrdr kx nqmq krdr trka mz nzobqkr Gct. X rpibzle badr kx, "Nzayrplapxngr nimu kalr mz nzpctxpx-krmu Jiszs, vzpxpem bamu. A' trvzpxpuu bange. Mz nzmu-krde lcde, abzo mzli ka, mz nzmc-krnge ka Korint sa napipx-alzubo Nrpa ngr Jiszs mz kxtrngiulrJiu." ⁷ Zbz rlaszle mangr-nzkrka'ngr, sc tqvzpe mz nzmc-krde ma nyz Tisizs Jastzs, kxtrngiulrJiu kc tqamrluele Ÿawe Gct angidr. Ma nyzde esotrpz mz mangr-nzkrka'ngr nyz lr Jiu kcng. ⁸ X Krispzs, kc tqngi kxet r mangr-nzkrka'ngr nyz lr Jiu, x doa lr ma nyzde amrlx, tzlxngitingrdr kx Jiszs nide Kxnzmcpx. X lr Korint kxnzkqlu-kzng nzrlxngiting x sc tzwrkxtrpeng.

⁹ Kzdq nrlckxbq Kxet Jiszs adcpx-lzbqbz mz Pol mz nzobq-rmwiblengr x rpibzle bade kx, "Bzkq mwxrq nzrpi-krbzme ninge mz leplz mrka. X bzkq mnc-lrpimiq. ¹⁰ Murde sa tqmncbo bam x rblx nzatrkti-krdr nim. Murde leplz nzkqlu mz taon ka sa nalxngitilr ninge." ¹¹ Zbz Pol mnctile mrkc yiz esz' x ncte kc, tqalvztr-ngrde leplz mz Nzryrngrkxtr x Nrpa ngr Jiszs.

* **17:30** Matiu 10:5-6; 15:24; Aposol 14:16; Rom 1:18-20; 3:25 * **18:2** Rom 16:3; 1 Korint 16:9;

2 Timoti 4:19 * **18:3** Mz drtwr lr Jiu, vz-rbr mz kzdq ncblo nzxpengr mz nzalvztr-krde leplz mz natq Gct. Mz nzmu-krde lcde, kxnzakrlzng nzkqlung nzrnginyzng da kx nzatatr-ngrm trau mz nzokatr-krde nidr mz lrpz, dakxnzng, x mz ma. Mwx Pol nzalvztr-pnzbz bade nzwzng lc mzli kc tqoblaben-krde, murde ngi kz nqmq kr lr Jiu mz trteng nzalvztr-krdr mrlxdrng mz nzwz-krdr.

* **18:5** Aposol 16:12; 17:1, 14-15; 2 Korint 11:9; Filipae 4:14-15

¹² A' mzli kc Galio tqnginipe-ngrde gavzna ngr Akaia Provins, lr Jiu kxnxkqlung nzyrlwr-lxblrng, x nzolvzlr Pol x sc tzvzmipebzlr mz Galio. ¹³ Nzrpibzlr mz Galio kx, “Ncblo lc kxmu alvztr-ngrde leplz mz nzangio-krdr Gct trtubqtru mz Loukxtr scgr.” ¹⁴ Mzli kcpwz Pol tqrpile napi-ngrde kzdq da, Galio rpitxbzle mz lr Jiu kcng kx, “Nzmu krlc tqngi nzvz-rbrngr kxetu o da kxtrka kx rtrngztibzle, mrlz nzlalztq-ngrbz bamu. ¹⁵ A' wztramu elr esz'-krmu, murde tqycmnelvz-zvzamu nzalvztrngr x drtq x loukxtr scmu esz'-krmu, nimu lr Jiu. Pxtpx-ngrne nzrpipxngr da kxtubq mz da kxmule la!” ¹⁶ X sc tqtzlvipxpevng ncblo ngr vea ne Galio yz mz ma kc tzkotqngr. ¹⁷ Zbz kzdung leplz sc tzolvzpeler Sostenes kc tqtekqtrle Krispzs, mz nzngini-krde kxetu ngr mangr-nzkrka'ngr nyz lr Jiu. X sc tztpeler mz naonrx ngr ma kc tzkotqngr. A' drtq Galio trkxne-pnzu kxipz mz da kc.

Pol Yzlu-mop Mz Lr Adiok

¹⁸ Pol mncti-moule Korint zbq kqlutx badr krkcng tzrlxngiting, mz nzayrkrpx-krde nzalvztr-krde elr. Zbz sc tqvzope mz taon Kenkrae mz nzprtz-krde mz lcsu. Mzli kc tqmnc-ngrde mrlc, rpile kx nqngi narde nayrlxtxo, murde ngi rkx ngr nzangidati-krde kzdq da kx esalz-ngrbzle mz Gct. ¹⁹ Zbz sc tzprtzpeng mz lcsu x tzalilvckipelr Siriz Provins, nidr badr Prisila x Akwila. ²⁰ Nzalilvcbzng, x lcsu kc sc tqvotrpe x tzdwatrpeng mz taon kxetu Efiszs mrkc Esia Provins, murde Prisila x Akwila na-amncleng elr. Nzpoong amrlx, x Pol sc tqvztrpe mz mangr-nzkrka'ngr nyz lr Jiu, x sc tqyapwxtipxpebzle Jiszs badr. ²¹ Nzrpibzlr bade kx, “Namnctime bagr mzli naboipxbz.” A' rpibzle kx, “Trtingr. ²² {Murde navzpe Jerusalem mz nzmulvz-krnge Nzamyangr.} A' esalz-ngrbo bamu kx sa nayzlu-mopwc', nzmu kx tqngi me pnz drtwr Gct le.” Zbz prtxlz mz lcsu, x sc tqrlaszpele taon kxetu Efiszs.

²³ Lcsu kc dwatr mou mrkc taon kxetu Sisaria, x sc tqvzpe Jerusalem mz nzoklati-krde dzbede lrmakxtr lc x mz nzmulvz-krde Nzamyangr. Zbz sc tqvzkiopele taon kxetu Adiok mrkc Siriz Provins, mz nzoklati-krde lrmakxtr kcng tzatzlrx-ngrdr nide mz nwz-krde. ²⁴ Mz nibr nzmncti-krde kzdung mzli Adiok, rkalzm sc tqvzpe, tqvzikbzle kc nrlc, x vzki-mopwzle kc nrlc, vzlvpzx-ngrde Galesia x nrlar Galesia Provins kc tzrpibz Frijz. X sc tqaxglrleng leplz neng Jiszs kcng amrlx. †

Prisila X Akwila Badr Apolos

²⁵ Mzli lc kzdq lr Jiu, drtqde Apolos, mzte nzmc mz taon kxetu zlwz kc Aleksadria mrkc Ijipt, vzm mz taon kxetu Efiszs, mrkc Pol tqrlasz-ngrde Prisila x Akwila. Apolos lcde ngi ncblo kx siklu zlwz x krlz-zpxle Nzryrngrkxtr. ²⁶ Nzalvztrpe mz ‘Lrpzki r Kxetu’ x da kcng tqkrlzle alvztr-zpxle-ngrde mz natq kx xpl. A' krlz-txpwzle nike tqalvztrngr Jon Kxawrkxtr. ²⁷ Nelzde br mz nzryapwx-krde mz mangr-nzkrka'ngr nyz lr Jiu. X kx xlrpe Prisila x Akwila le, sc tzaveatipelr, tzyapwx-zi-zpxle-ngrde kxmu Gct nzarlapx-krde leplz mz nzlxngiti-krdr Jiszs.

²⁸ Apolos aotipe drtwrde nzvzkic-krde Akaia Provins mz nzyapwx-zi-zpx-krde Nrpakxmrlz lc elr. Zbz sc tzokatrpe kxnxrlxngiting kcng Efiszs, mz nzryr-ngrbz letz mz leplz neng Jiszs kcng tzmnncng Akaia Provins, kx natu-pz'limlr nide. Kx tqkaputrpzle, sc tqokatr-zlwzpele krkcng tzrlxngiting Jiszs mz nzvz-nqblq-krde zmrlz ngr Gct kc tqmyalz. ²⁹ Murde okatrle nidr

²⁸ **18:18** Nzkqlu-krdr 6:1-21; Aposol 21:24 ²⁹ **18:23** 18:21 Mz kzdung nzryr-ngrng kcng pnz, mrkc tqycnrg maki kxmule lc { }, trnzycpxpuu elr. 18:23 Krlc nzabzokr nzvzpxkr Pol kratq. Mwx Pol oklati-moule taon kcng tqmnc-pnzs-ngrde mzli kc, krlcde seleng: Drbi, Listra, Ikonizm, x Pisidia Adiok.

mz nzaovxiongr lr Jiu, mz nzycmne-krde mz mzlir leplz kxkqlu. X sc tqaelwapx-ngrbzle badr mz natq ngr Nzryrngrkxtr kx Jiszs nide Kxnzmcpx ne Gct.

19

Pol Yzlu Mou Taon Efiszs

¹ Mzli kc Apolos tqmnc-ngrde mz taon kxetu Korint, Pol kc tqayo-zlile nrlarnrlc kx yckiomle peto, vz vz krlzobzle taon kxetu Efiszs. X rmctile kzdung leplz kxnzlxngitilr Jiszs. ² X sc tqveapebz badr kx, “?Twzpe-kzamu Mqngrkxtr mzli kc kai tqrlxngiti-ngrnamu?” Nzrpibzlr kx, “Trtingr, murde trkrlz-pnz-kzkru nzmncr Mqngrkxtr.” ³ Zbz veabz badr, rpibzle kx, “?E nzawrkxtrngr kzniqe tqwrkxtr-ngrnamu?” Nzrpibzlr kx, “Nzawrkxtrngr kc tqale Jon Kxawrkxtr.” ⁴ Rpibz Pol kx, “Jon awrkxtrle leplz mz nzwrukxtrngr kx nztekqtrngr nqmq nr drtwr x nzesablqtingr nqmq kxtrka. A' rpi-kzpze mz leplz kx nalxngitilr Jiszs kc navzm mz nibrde.” ⁵ Kx nzxlrbzlr da kc tqpi Pol, sc tzlxngitipelr natqdeng x tzwrukxtrpeng mz drtq Kxetu Jiszs. ⁶ Zbz yrlqobz Pol mqdeng badr, x Mqngrkxtr vzom badr. X mz zmatq ngrde, sc tzycmnepeng mz natq lr mrkzbzle, x tzrplzpxng nrpa kx kabz Gct. ⁷ Ncblo lcng nzkqlu-krdr nzpnu-esz'-nrade-li (12).

⁸ Temz tq vztrngr Pol mz mangr-nzkrka'ngr nyz lr Jiu, x nelzde br mz nzyapwxti-krbzle badr lrpzki r nzrlxngitingr Jiszs x kxnamu nzmncrz-krbzlr mz zmatq ngr Gct. ⁹ A' kzdung nidr nardr mqngi x nzipxtxpx-ngrdr nzrlxngitingr. X mz mz leplz, sc tzpibqtipelr nzo-zlingr ‘Lrpzki r Kxetu.’ Mz nzmucrde lcde, Pol rlaszle nidr, sc tqvzmipeleng krkcng tzrlxngiting. X mz zbz kang kqlu nzryapwxng badr ma ngr nzalvztrngr nyg Tiranzs. ¹⁰ Alvztr-ngrde leplz yiz li, krlzbzle mzli kx leplz amrlx kx nzmncng Esia Provins nzxlr-ngrdr Nrpa ngr Kxetu Jiszs, kxmule-esz' lr Jiu o kxtrngiulrJiu.

Mrlxng Skeva Trnzkrzlr Nzrmaszlrpxngr Drka'

¹¹ Gct batrpzle mz Pol nzale-krde da kxmatq kxmyapxbzng. ¹² Mz nzmucrde lc, kzdung leplz nzrtwzbzng nctq lrpz kxnztopwzng scdrng mz nzbxtr-krbzlr mz Pol, murde natwzbzlr mz leplz kxnzyagoxng. X leplz kx nabxtrpzlr lrpz kcmang topwz, zyagox ngrdrng tqesakititxng x drka'ng sc tzrlaszpeler leplz kx nzolvzlrng.

¹³ Kzdung lr Jiu kxnzayoneng x tzrmaszlrpx-ngrng drka'ng mz leplz, tzabz-kzlr nzrpingr drtq Kxetu Jiszs mz nzale-krdr da lc. Nzrpilr kx, “Mz drtq Jiszs kc tqyapwxti Pol, pibo bamu vzpxmamu!” ¹⁴ Kzdq kxnzetu rdr pris ngr lr Jiu, drtqde Skeva, mrlxde nzrlimzng kx nzale-kzlr da lc. ¹⁵ A' kzdq zbz drka' kc rpibzle badr kx, “Krlzx Jiszs x krlz-kzx Pol. ?A' nimu nekeng?” ¹⁶ Ncblo kc tqmncpx-ngrm drka' kc blctibzle mrlxng Skeva, vibrtileng amrlx. Mz nzota-krdr kc, lrpzdr pesalitipxbzle, x nzycblqng. Zbz sc tzvopxpeng x nzwrlrpe-kz-ngrdr mepyr. ¹⁷ Da lc nzxlrpe lr Jiu x kxtrngiulrJiu kcng amrlx tzmncng Efiszs. X zmwxlr kc tqycpebz badr amrlx ngrdr. X drtq Kxetu Jiszs kc tzamrlue-zlwzpelr.

¹⁸ Mzli lcde nzkqlung mz krkcng tzlxngiti-atelr Jiszs, sc tzplzpxpebzlr da kxtrka kx nzaleti-pnzng. ¹⁹ Kzdung nidr kcng tzaleti-zvzng dabo x leu r drka'ng x da kxnzmullr lcng, nzlve-lxblrmlr buk scdrng kx nzpilr kxmu nzalengr, nztelvzlr nyr kxetu x nzangclr mz mz leplz amrlx. ²⁰ X mz nzrlwx-krdr narncbr ngr buk kcng krlzlbzle trau kx ngi silvz siu-nzpnuz-nzlvqn (50,000), takitrde nzxpengr ncblo mz yiz kx trtqki-esz' x nzpnu-esz'mz (160).

²⁰ Mz da kxmatq lcng amrlx, Gct aelwapx-ngrde nzxplr-krde. X Nrpa ngr Kxetu Jiszs sc tqetunepx zvz x talvzo-pnzle mztea amrlx.

²¹ Mz nibr da kcng tqprtizl, Pol kc tqpnzpe drtwrde nzvzngr Jerusalem, mz nzvzki-krbzle mz provins kcng li Masedonia x Akaia. Rpibzle mz lrmakxtr kcng kx, “Mz nibr nzvz-krnge Jerusalem, navz-kzx mzteadau Rom mz nzryapwpx-krnge elr.” ²² Zbz atwzlr-ngrde ncblo nede nzling, Timoti x Erastzs, kx navz-kaing Masedonia Provins, mzli kc tqmnc-ngrde kxpipz Efiszs mrkc Esia Provins.

Lr Efiszs Kcng Tzrwz-ngrng Mqngr Da Ngyati Drtwrdr Pol

²³ Mzli lcdeng mrkc Efiszs kzdung ncblo nzbatrpzlr kzdq nztalwzng kxetu mz krkeng tzvz-nqblqlr ‘Lrpzki r Kxetu.’ ²⁴ Mrlcde kzdq ncblo kx rwtzingr da mz silvz, drtqde Demitrizs. Ncblo lc tqrwztingr madrka' kxtopwz mz silvz kx nzobq-krde apule madrka' mrkc tzangio-ngrdr Atemis, drka' nedr kxmyapxbz. X nzvzngr lc atatples tra u kxetu mz ncblo kcng tzwztrpzng bade. ²⁵ Ayrlwr-lxblrlle ncblo nedeng x krkc-kzng nzwz-krdr tqkxmule-esz', sc tqrpipebzle badr kx, “Mzlengeng, nzrngisc-krgu vzpxm mz nzvzngr lc! ²⁶ Krlz-angidramu da kc tqale Pol mrka. Rpile kx gct kx wzngr ncblo mz mqde trngitx-pnzung gct angidrung. Lr Efiszs kxnzkqlung x kzdu-kzng leplz talvzpxle Esia Provins nzlxngitilr nide x batrpzle nzvz-rbr-krdr. ²⁷ Leplz amrlx mz Esia Provins x mz nrhc tulvzo nzangiolr gct kxetu Atemis mzli ka. X trmrlzu leplz nzlxngiti-krdr Pol, murde ma tzpibqtilr nzwz-krgu, x tqesaki nzamrlue-krdr madrka' x tzmrbrtitr drtwrdr nide.” *

²⁸ Kx nzxlrpelr da kc tqpi Demitrizs, drtwrdr kc tqngyatx-zlwzpe, x sc tzkabopeng, tzrpilr kx, “Drka' negr Atemis, nide kxmyalz!” ²⁹ Mzli trboiu leplz amrlx mz taon kc drtwrdr ngya x tzkabong. Zbz zbo ngr ncblo kc sc tzvotr-anipebzng me nzyrlwr-lxblrngr. X nzdwatibzlr ncblo nzling dalr Masedonia Provins. Kzdq drtqde Gaizs x kzdq drtqde Aristakzs, kzteng Pol, nzkilztr-anibzlr mrkc tzyrlwr-lxblrngr. ³⁰ Pol su ti drtwrde nzvztr-krbzle mz zbo ngr leplz kc, a' trnzrlr-ngrpwzu kztedeng kcng tzlxngitilr Jiszs. ³¹ X kzdung kz kzteng Pol kxnzrmailzng mz gzpman ngr Esia Provins, nzatzwzlr-kz-ngrbzlr natq, nzrpibzlr kx, “Bzkq aelwa-lzbq-ngrbzme mrkc tzyrlwr-lxblrngr.” X Pol Ixngitibzle natqdr.

³² Zbo ngr leplz lcng nardr mrbc zlwz. Mzli kcpwz kzdung leplz tzkabomilr kzdq da x krkc-kzng tzkabomi-kzlr da kzble, murde nzkqlupxbzng trnzkrlzlu da kx tzvz-lxblr-ngrmlr. ³³ X kzdung ncblo mz zbo ngr leplz kcng nzrpilr kx Aleksada nide kc tqabzole nztalwzng lc, murde lr Jiu kcng tzapepxbzlr nide mz zbo ngr leplz. X kzdung ncblo lcng nzkabomibzlr natqdr bade. A' Aleksada ayaglqbzle mqde kx namnc-lrping, murde napibzle badr kx lr Jiu kcng trnzbatrpwzlu da kc tqprtz. ³⁴ A' lr Efiszs nzkrlzlr kx Aleksada trangioleu Artemis mz nzngini-krde lr Jiu. X nzkabomitpxlr amrlx ngrdr da esz', vz vz krlzbzle nabznepi kx li, tzrpi-vzlr kx, “Drka' negr Atemis, nide kxmyalz!”

³⁵ Zbz kzdq kxetu kc tqngi klak ngr taon kc, sc tzamnc-nrwxp-ngrde zbo ngr leplz kc. Rpibzle badr kx, “Lr Efiszs! Leplz amrlx nzkrlzlr kx taon

* ^{19:27} ^{19:24} Mz Efiszs, tu elr kc madrka' kxwzpx, nzyrlqpx dalr nzangiongr drka' kx ngl olvz Atemis. Pris ngrdeng trtqki kqlu nzwzpxmqng mz madrka' kc. Leplz ngr mrkang kqlu nzvzbzng Efiszs mz nzangio-krdr Atemis, murde mz drtwrdr acleve animol kzpetong, nzmwang, x nzrmikangr. ^{19:27} Natq Demitrizs lc sc tqatutrebebzle mz nzvzkr Pol. Murde lr Efiszs kxnzkqlung nzlxngitilr Jiszs, x atrkatile zmatq ngr drka' Atemis. Mz nibr kzdung yiz, mzli kc Aposol Jon tqmncpe-ngrde Efiszs, maszlrpx-ngrde Atemis lc mz madrka' kc wzpx, x madrka' kc nzawxtx. X yiz nzpnu-nzlvqn (50) mz nibrde, leplz kxpipznepwz kx nzangobelr Atemis lc.

nyzgu amrluele Atemis kc tqmyalz x aclvele madrka' kc. X nzkrlz-kzlr kx brbzde kxtr kc tqtaom mz bongavz sc tqyc kz mrka. ³⁶ Trpnzngr ncblo kx narpile kx da lcng trngida-angidru. Mrlc tqyc-ngrde, nrwrx nayc x bzkq vz ani nzale-krmu da. ³⁷ Vzmimamu ncblo lcng mrka, a' kx tqmule ke, trpnzngr da kx nzpnatilr mz madrka' kc x trpnzngr da kxtrka kx nzpi-ngrdr Atemis, drka' negu. ³⁸ Nzmu Demitrizs x krkcng tzwztrpzng bade kx tqycbz du badr drtwr kx napilr, e rnginyzgu kot kx na-atubqtibzle nzvz-rbrngr kcng tzpixl. ³⁹ A' nzmu kx tqsuti drtwrmu nzrpingr kzdu-moung da, na-atubqtiamu mz kot. ⁴⁰ Murde mz nztutilz-lzbqng lc tqetu mzbq ka, tr-rblxpwzu mz kzdq kxetu ngr Rom nzrpi-krde kx rnzlvzoku lou scdrng. X trpnzngr drtwr kxmrlz mz nzyrlwrngr kxmule lc. ?X nzmu naveamlr bagu nike waiku, e nike napibzku?" ⁴¹ Mz nibr nzpi-krbzle da lc, sc tqayrkrpxpebzle nzyrlwrngr kc. †

20

Pol Yzlu Mou Mz Provins Kcng, Masedonia X Akaia

¹ Mz nibr lr Efiszsz nzmnc-lrpi-krdr, Pol kqle-lxblrbzleng leplz neng Jiszsz kcng, x axglrtxdeng. Zbz rpibzle badr kx, "Nimu lape." X sc tqrkalzpem Efiszsz mz nzvzki-krde Masedonia Provins. ² Mz nzvzti-krde provins lc, axglrlle lrmakxtr kcng tzmncng elr mz natq kxkqlu. Zbz sc tqkaputrpem Akaia Provins, (ngi kzdq kz drtq Gris). ³ X mnctile elr temz tq. Sc tqoliqtiipele nzalilvcngr Siriz Provins mz kzdq lcsu. A' kx krlztiipele kx lr Jiu nzyrlqlr drtwr ngr nzrnibqng nide, sc tqaotipe drtwrde nzvzki-ngrbz Masedonia Provins, murde namcle kzdq kz lcsu kx na-alilvc-ngrde Siriz.

⁴ Leplz kx nzyrkrneng badr nidr seleng:

Sospata, mrlix Paerzs, doa lr taon Berea,
Aristakzs x Sekodzs nidr rllrdr doa lr taon Tesalonika,
Gaizs, doa lr taon Drbi,
Tikikzs x Trofimzs nidr doa lr Esia Provins,
x Timoti.

⁵ Kx nzkrlzmlr ninge Luk mz taon kxetu Filipae, nzrtwayz-kaipzng bagr, sc tzaenzlipelr nigr mz Pol mz taon Troas. *

⁶ A' nigr rlilrgr mnc-txpwzkr Filipae mz nzmulvtx-krgr Wiki ngr Bret kx trpnzngr yisti ngrde. Zbz prtzkr mz lcsu, sc tqrkalzpemgr mrkc Masedonia Provins. Zbq nzlvqn mz nibrde, lcsu kc sc tqkaputrpebz mz taon kxetu Troas, me tqprtrpe-ngrbzkr mz kztegrng kcng tzrtwayz-kaipzng bagr, x mnctikr elr zbq rlimz.

Pol Atulzmle Kzdq Obla Mz Nzbzngr

⁷ Mz milzpq ngr Satqde yrlwr-lxblrkr badr kxnzrlxngiting mz Nzmungrkxtr. X Pol sc tqryapwxpebz badr. A' aboipxbzle nzycmne-krde krlzbzle mz aurnrlc, murde narkalz-mop mz nrlc kxngrlxobz. ⁸ Lam kqlu ngcpxm mz nelvq kc tqycom wq, mrkc tqyrlwrpx-ngrmgr. ⁹ Kzdq obla, drtqde Yutikzs, wxbupx mz wido, sc tqqlalztqbz mz Pol. A' Pol nzycmne-krde kx boipele kc, Yutikzs sc tqatwekipe nemwi, vz sc tqmwitxpe. X sc tqtatpxpe mrkc wq mz wido ngr nelvq ngrde kratq, tatxom yu mrkc yz.

† **19:41** 19:35 Klak ngr taon ngi kzdq ncblo kxetu mz taon kc Efiszsz. Mz nzwz-krde vz mz mzlis Kansrl ngr taon x gzpman ngr Rom. 19:40 Nzmu kzdq kxetu ngr Rom namcle nzvz-rbr-krdr mz nztutilz-lzbq-krdr, e ma sc tqayrplapxpele leplz kcng x kapxbzle kzdung zmatq mz nzaclve-lzbq-krdr.

^{20:1} 2 Korint 2:12-13 * **20:5** Luk nipe-moudr badr Pol. [Aposol 16:17]

Kzdung leplz nzvoobzng x nzatulzmlr, a' bzpe. ¹⁰ A' Pol vzobz x rtctxo-lzbq-ngrbz bade x kapltxde. Zbz rpibzle mz leplz kcng kx, "Bzkq drtwrmu vz. Sa tqlupe mou." ¹¹⁻¹² X leplz lcng tzabrtz-zlwz-ngrdr obla kc, tqtulz-mop mz nzbzngr. Zbz Pol yzlutxlzbz badr mz nelvq kc tzyrlwro-ngrmlr, rlopxititxbz bret mz Nzmungrkxtr, x sc tzmu-lxblrpeng. Zbz Pol ycmnebz badr mzli boi, vz vz nrlc ngrlxo. Zbz sc tqvzpe. X leplz lcng sc tzvzmipelr obla lcde ma nyzde.

Pol Nzrmcti-lzbqng Badr Kxnzaclvelr Dzbe Lrmakxtr Kc Efiszs

¹³ Rtwayzpe-kaikr mz lcsu, x sc tqalilvcpxpekr, tqalilvcckipekr mz taon Asos, me na-aprtz-ngrgr Pol. Pimle bagr kxnamule lc, murde narprwikibzle mepz. ¹⁴ Zbz mrkc Asos, sc tqprtzpe-mop bagr mz lcsu, x sc tqalilvcpe-mopwzkr mz taon kxetu Mitilin, mz trmctu Lesbos. ¹⁵ Nrlc ngrlxobz, alilvcbzkr dwatrkr mepz mz trmctu Kios. Zbz nrlc ngrlxo-mopwz, alilvc-mopwzkr mz trmctu Samos. X mzbq kc mou, sc tqkaputrpebzkr mz taon Miletzs. ¹⁶ Pol rneki mz nzkriz-krbzle mzteadau Jerusalem, mz nzprtr-krbzle mz nzrmulvzngr nzrlakilz-ngrm wit, nzmu kx tqtakitrdele, murde ngi zbz ngr nzvzo-krm Mqngrkxtr. Mz nzmu-krde lcde, aoti pnz kai drtwrde trnzkriz-krbzleu taon kxetu Efiszs mz nzvz-krgr. Murde nzmnncng elr kztedeng kxnnkqlung, x rblx nzmnnc-krdr badr mzli kxmrbc txpwz.

¹⁷ A' atwzlr-alzu-ngrbzle nrpa mz lr Efiszs, aveatibzle kxnzaclvelr dzbe lrmakxtr kc narmctir nide mrkc Miletzs. ¹⁸ Kx nzkaputrpremlr kc, rpibzle badr kx, "Krlzamu kxmu nzmnnc-krbo bamu mzli kcng tqmnc-ngrgu, abzo mzbq kc ayrnrngr tqkaputr-ngrmc Esia Provins, krlzbzle mzli kc tqrkalz-ngrmc. ¹⁹ Mzli lc wztrpo mz Kxetu rgu, x mz nzavzo-lzbq-krnge drlemzke' kxkqlu tao, murde lr Jiu nzaetqmlr drtqnge x nzyrlqlr drtwr ngr nznibq-krdr ning. ²⁰ Krlzamu kx trmnc-lrpiwxu, a' yapwxtipx-zvzx da kx naokatrle nimu mz nzrlxngiti-krmu. X trvz-kapqwrxu mz nzalvztr-krnge mz ma kxkqlu. ²¹ A' ka-lxblrbo natq kx xplr mz lr Jiu x kxtrngiulrJiu, kx naesablqtilr alwx ngrdr, x nao-lxlvrbzng mz Gct, x nalxngitilr Kxetu rgu Jiszs Kxnnkqlung, murde narlapxng.

²² "X mzli ka, mz nzmailzkr Mqngrkxtr, navzpex Jerusalem. A' trkrlzwrxu da amrlx kx naprtzm bange mrlcde. ²³ Murde krlztxpwo kx mz mztea amrlx kx oklatix, Mqngrkxtr pimle bange kx nzkxpungr x nzmnncngr mz presin naprtzmqng bange kalr. ²⁴ Kxmule-esz' nzlu-krnge nayrkrpx ani, a' da kx myapxbz ngi nzayrkrpx-krnge nzwzngr kc tqkam Kxetu Jiszs bange. Nzwngr lc ngi nzpipx-krnge Nrpakxmrlz, kx Gct aodule leplz mz mrlxde Jiszs." *

²⁵ Rpi-mopwzle kx, "X mzli ka krlz-angidrx kx nimu kcng tqvz-nebaneng mz nzryapwx-krbo kx leplz namnclzbzng mz Gct mz nzngini-krde King rdr, trpnzng nrimu kx namc-moule lc ning. ²⁶ Mz nzmu-krde lcde, pitxbo bamu mzbq ka, kx nzmu kzdq nimu bz x trlxngitileu Jiszs, trngiu nzvz-rbr-krnge. ²⁷ Murde trmnc-lrpiwxu, a' pi-zpwxbo bamu me pnz drtwr Gct.

²⁸ "Aclvetio-lzbqamu x aclve-kzamu leplz neng Gct mz nzapu-krdr sip. Murde Mqngrkxtr aprcbzle nzwzngr lc bamu. Aclve-angidramu lrmakxtr neng Gct kc tqxpepeleng mz mepyr ngr Mrlxde. * ²⁹ Krlzx kx mz nibr nzrlasz-krnge nimu, ncblo kx nzapulr kuli kzpeto sa navzmqng mz mzlirmu, x narpilr naodatingr dzbe sip ne Gct. ³⁰ X kzdung ncblo mz dzbede nemu sa napokiating, murde leplz neng Jiszs navz-nqblq-alzulr nidr. ³¹ Mz nzmu-krde lcde, aclvetio-lzbqamu mz leplz kxnnkqlung!

X nadctipx drtwrmu kx yiz tq, nrlckxbq x nrlckxngrlx, tresaki-pnzwxu nzrngidrlvz-krnge nimu, vzmi drlemzke' kx tao."

³² Rpi-mopwz Pol badr kx, "Mzli ka amnqtrpo nimu mz nzaclvekr Gct. X veatr-ngrbo bamu kx nadctipx drtwrmu nrpa ngr nzarlapx-krde nimu, murde naokatrle nimu mz nztu-amqngingr mz nzrlxngiti-krmu, x mz nzrtwz-krmu dalr nzrlapx-krmu karl.

³³ "X mzli kc tqmnc-ngrgu, trkcmnz-ngrneu trau o lrpz scmung. ³⁴ A' krlz-angidramu kx wz-katox mz mqnge mz nzrwz-krnge tent, mz nztwz-krnge mclrngeng x mclrdr kztenge kcng tqnginigrng badr. ³⁵ Mz da amrlx, aelwa-ngrbo mz nzwz-katongr kxmule lc, kx naokatrku krkcng tzsuti drtwrdr da x bzkq mrbrtr natq Kxetu Jiszs kc tqrpile kx, 'Nzmnc-zpxkr doa kx okatrle kztedeng myaszpxle nzmnc-zpxkr doa kx nzokatr.' Delape. Awi."

³⁶ Yrkpxbz nzryapwx-krbz Pol, nzrweong badr zpr, sc tzkrka'peng.

³⁷ Mz nibr nzkrka'-krdr, sc tzyrnitxpeng amrlx ngrdr, x tzkaplztir Pol x nztcngitxdr nide. ³⁸ Vztx zlwz ngr drtwrdr, myapxbz mz nzhpi-krbzle badr kx trpengr nzmc-krdr mzte. X sc tzvepelr mz lcsu. †

21

Pol Vz Jerusalem

¹ Zbz alilvc-rlrukz mz trmctu Kos. Nrlc ngrlxobz alilvckibzkr mz trmctu Rodes. X abzo mrlc, alilvcki-mopwzkr mz taon Patara. ² X sc tqpotxokr mz lcsu, sc tqmcpe-moukr kc lcsu kx na-alilvckile nrlarnrlc kc Fonisiz. Zbz sc tqprtzpekr elr, sc tqalilvcpekr. ³ Alilvckr krlzbzle mzli kx mc-ngrgr trmctu Saepras. Zbz sc tqyrlqkipekrle mz nrlargr kxmc x alilvc-mopwzkr mz Siriz Provins. Kaputrzkr mz taon kxetu Taea x potxokr, murde nzrpilr na-apoolr kzdung da mrlcde. ⁴ Mckr kzdung leplz neng Jiszs mrlcde x mnctikr badr wiki esz'. Nzrpibzlr mz Pol kx bzkq vztr Jerusalem, murde Mqngrkxtr pibzle badr kx sa na-atrkat elr. *

⁵ A' mzli nyzgr badr kx yrkrpxpele kc, rkalzmgr, sc tqvzopekr badr mz drta'. Nidr amrlx, badr olvz ngrdrng x doa nedrng, vzpxkr badr mz nibr taon kc. Rweokr zpr mz nabz drta' x krka'-lxblrkr. ⁶ Zbz sc tqarlr-lzbqpekr, x prtzkr mz lcsu. X sc tzylupeng mrnyzdrng.

⁷ Alilvc-moukr mz nzayo-krgr kc prla. Abzokr nzalilvcngr mrkc taon Taea, alilvcbzkr mz taon Tolemais. X pitxbzkr, "Nimu la," mz mzlegrng mrkc x mnctikr badr zbq esz'. ⁸ Nrlc ngrlxobz rkalzmgr x kaputrzkr taon kxetu Sisaria. X vzbzkr ma nyz Filip kc tqlemle Nrpakxmrlz x mnckr badr. Nide kzdq ncblo kcng nzrlimzng tzmcpxng mrkc Jerusalem mz nzokatr-krdr aposol kcng. ⁹ Inyxde nzpxng trnzyrlzung kx nzrplzpxng nrpa kx kabz Gct, mz nzngini-krdr profet neng Kraes. ¹⁰ Zbq trkqluu mz nibr nzmnc-krgr mrkc, kzdq kz profet ne Kraes, drtqde Agabas, vzom mrlc Judiz Provins. ¹¹ Vzm bagr, otile nrkalo Pol, pe-ngrde mqdeng x nanycdeng nide esz'-krde, x sc tqrpipeline kx, "Mqngrkxtr rpile kx lr Jiu kcng Jerusalem sa napelr ncblo kx rngisc nrkalo lc, da kc tqwaix, x nakaobzlr mz kxtrngiulrJiu."

¹² Kx xlrbzkr natqde, nigr badr leplz kcng mrkc rnqnbzkr mz Pol kx bzkq vzdz Jerusalem. ¹³ A' rpimle kx, "?Nike tqaleamu mz nzyrni-krnamu

* **20:34** Aposol 18:3 † **20:38** 21:35 Natq Jiszs lcng trnzyro-pnzu mz Nrpakxmrlz kcng, murde natq Jiszs kx kqlu trnzyrtio-pnung. Mc Jon 20:30-31 x 21:25. * **21:4** Mz Aposol 20:22-24, Mqngrkxtr pipebzle mz Pol nzvzngr Jerusalem, kxmule-esz' drtqde na-aetqbz elr. * **21:8** Aposol 8:40 * **21:10** Aposol 11:27-29

lc x tqayrnibu-ngrmamu drtwrnge? Oliqpepx nzvzdzpe-krnge Jerusalem, kxmule-esz' nznibqlr ninge elr mz nzyapwxtipx-krbo Kxetu Jiszs." ¹⁴ Kx mcpekr kx trnatekqtrpwzkru drtwrde, sc tqesakipekr x tqrpipekr kx, "Me pnz drtwr Gct nangida ye." ¹⁵ Mz nibrde, oliqtxkr, x sc tqvzdzpekr Jerusalem. ¹⁶ Kzdung leplz neng Jiszs kcng Sisaria, nzvz-kzkrng badr. X nzvzmibzlr nigr mz ma nyz kzdq ncblo, drtgde Mnason, namnckr badr Jerusalem. Mnason dalr trmctu Saepras, x mzli boipem nzvz-nqblq-krde Jiszs.

Pol Rmctile Kxnzaclvelr Dzbe Lrmakxtr Kcng Jerusalem

¹⁷ Kx kaputrpzkr kc Jerusalem, mzlegr kcng nzamnctx-angidrlr nigr. ¹⁸ Nrlc ngrlxobz Pol x nigr kz vzkr badr nzrmctingr Jemes, x kxnzaclvelr dzbe lrmakxtr kcng tzmncc-kzng Jerusalem. ¹⁹ Pol pibzle, "Nimu la," badr, x sc tqaplxtipebzleng da amrlx kx aletipe Gct mz mzlir kxtrngiulrJiu mz nzwz-krde. ²⁰ Kx nzxlrbzlr natqdeng, nzglqlzlr Gct. Zbz nzrpibzlr mz Pol kx, "Mzlegr Pol, mz nigr, blzmr siu ngr lr Jiu nzlxngitipelr Jiszs, x mrlz-zlwzbz badr nzmnclz-ngrbz mz Lou sc Gct. ²¹ A' kzdung leplz nzpi-rbrbzlr badr kx tqalvztrq lr Jiu kcng amrlx tzmnccng mrkzbleng kx narlr-ngrbzr Lou sc Mosis. X nzxlrlr kx tqpibzme badr kx bzkq nzpakrlr doa nedrng, x bzkq nzvz-nqblqlr nqmq krgu, nigu lr Jiu. ²² Leplz lcng sa nakrlzlr kx kaputrpeme. Trmrlzu kzdq zbo ngr leplz nzvzmqng mz nzatrka-krdr nim. ²³ Mz nzmu-krde lcde, mrlzm bagr kx na-aleq nike pibzkr bam. Ncblo nzpxwng tqmnckr badr mrka kx nzesalzbzng mz Gct. ²⁴ Vz-lxblramu badr, alqngi-lzbqamu badr, x xpebz nike naxpelr, murde nqnginardr nayrlxolr mz nzayrkpx-krdr nzesalzkr Nasiraet. X leplz amrlx sa nakrlzlr kx vz-rbr mz da kcng amrlx tzpingr nim. A' mnc-nqblqq Lou kc tqkabz Gct mz Mosis. †

²⁵ A' krlz-kzq kx atwzlrpe-ngrbzkr kc letz mz kxtrngiulrJiu kcng tzrlxngiting. X pipebzkr badr kx navz-nqblqlr kzdung nqmq krgu kxpipz, murde naodutr-lxblrku badr. Nqmq lcde seng: Bzkq nzumung dakxnnzng kx ngi blz kr drka'. X bzkq nzrmqng mepyr o nzmu-kzng ncvr animol kx nznibq x mepyr ngrde trnzayrlepxu. X mou bzkq nzrmwimng doa kx trngiukrnalzdr." ²⁶

²⁶ Nrlc ngrlxobz, Pol otileng ncblo lcng, sc tzalepelr dalr nzalqngiti-lzbqngr, murde naprtr-moung mz nzangiongr. Zbz vztrpz mz Mangr-nzangiongr, x sc tqadcpxpebzle mz pris kc mrkc, kx zbz rlimz ycbe mz nzayrkpxkr mzli r nzalqngingr, x blz ngr nzayrkpx-krdr nzesalz-krdr Nasiraet kc sc tqka-atebzle, dalr nidr amrlx ngrdr.

Pol Nzlolz

²⁷ Mzli kc zbz kcng rlimz mz nzayrkpx-krdr nzesalz-krdr tqycpe pipz nzayrkpx-krde, kzdung lr Jiu kcng trnzlxngitilru Jiszs, nzvzmqng Esia Provins. Kx nzmlcr Pol mz makoa ngr Mangr-nzangiongr, sc tzangyatrpebzlr drtwr ncblo kxnxkqlung kxnxmnccng mrkc. Nzngyati drtwrdr Pol, x nzdwatibzlr nide. ²⁸ Tzkabong, tzrpi-rbrllr kx, "Lr Israel, okatramu nigr! Ncblo lc tqvz mrkang kqlu, tqalvztr-ngrde leplz amrlx kx nqmq krgu trka, x Lou scgung x Mangr-nzangiongr Yawe trka kz! Kzdq mou da kx trkatpx-mopwz nzvzmi-krmleng ncblo kxtrngiulrJiu mz nabz Mangr-nzangiongr nyzgu, mz nzatrkti-krde mrkc tqtr!" ²⁹ Nzplir da lc

* ^{21:21} Galesia 5:2-6; 1 Korint 9:20 † ^{21:24} Pol mz nzvzki-krmle mrnyz kxtrngiulrJiu, batrpzle trnztakitr-krdeu nide nzprtrngr mz nzangiongr. Mz nzmu-krde lcde, takitrde nzalqngi-lzbq-krde, murde suti kz drtwrde nzayrkpx-krde dalr nzesalzkr Nasiraet. Mc Aposol 18:18 x Nzkqlu-krdr 6:1-21. ^{21:25} Aposol 15:20

murde nzmclr Trofimzs lr Efiszszs badr Pol mz nabz Jerusalem. X nzpnzkr drtwrdr le vzmitrpe Pol mz nabz Mangr-nzangiongr, myasztrle mrkc tzrlr-ngrbz mz kxtrngiulrJiu.

³⁰ Mzli trboiu lr mzteadau kc atwrnrngr nzkabo-abeapeng x kzdq zbo ngr ncblo kxetu sc tqabzope. Nzdwatibzlr Pol x nzkilpxmlr mz makoa ngr Mangr-nzangiongr. Mzli kcpwz naonrx ngr makoa kc tqyctrpz mz Mangr-nzangiongr nzapqbrtr, murde ma tzatrkatilr Mangr-nzangiongr. ³¹ Mzli kc tzabzbe-ngrdr nzrnibqngr nide, nrpa kc tqkrlzpebzle kamadz ngr ami ngr Rom, kx lr Jerusalem amrlx sc tztutilz-lzbqng. ³² X sc tqotipe kamadz kc kzdung kxetu ngr ami nedeng x ncblo ngr vea kxnzkqlung, x nzvoobzng mz zbo ngr ncblo kc. Kx nzmcpebz leplz kcng nide badr ncblo ngr vea kcng, nzesaking nzvibrti-krdr Pol. ‡

³³ Kamadz ngr ami kc, kx krlzbzle mrkc, sc tqotipebzle Pol x rkabz natq mz ncblo nedeng kx napelr Pol mz sen nali. Zbz veabz mz zbo ngr ncblo kc rpibzle kx, “?Ncblo kznilc krlc x nike vz-rbr-ngrde?” ³⁴ Kzdung nidr nzkabomipxlr da esz' x kzdu-kzng nzkabomipxlr da kzble. Kamadz kc trmc-pnzleu da angidr murde nzkabo-abeangr kc. X sc tqrkapebz natq kx Pol navzmilz mz lrpalvc nyzdr. ³⁵ Zbz mzli kc tzkrlz-ngrbzlr mz ladz kc, sc tzglqpelr nide murde zngya ngr drtwr leplz kcng etu-zlwzpe. ³⁶ Leplz kcng amrlx tzyrkr-nqblqbzlr nidr, tzkabong tzrpibzlr kx, “Nanibq!”

Pol Ycmnebz Mz Zbo Ngr Ncblo Kc

³⁷ Mzli kcpwz tzvzmitr-ngrdr Pol mz lrpalvc nyz ncblo ngr vea, sc tqycmnepebz mz kamadz ngr ami kc mz natq lr Grik, rpibzle kx, “Kxetu lc e, napibo du ena bam da.” Zbz kctitpxk kamadz ngr ami kc, sc tqrpipebzle kx, “E krlzq natq lr Grik! ³⁸ ?E nim lr Ijipt kc mzli lcmonrng ena, tzotang badr gzpman x mailzpxle ncblo nedeng siu-pwx (4,000) lzke o trtingr? Dzbede lc nzrpibz ‘Kxnzrnibqng mz toki.’” ³⁹ Rpibz Pol kx, “Ninge lr Jiu. Mzke' nzmc mz taon kxmyapxbz Taszs, mz Silisia Provins. Suti drtwrnge nzycmne-krbo mz zbo ngr leplz mrka.” ⁴⁰ Rlr-ngrbz kamadz kc. Zbz Pol kc tqtuopem mz ladz kc, x ayaglqbzle mqde mz leplz, murde namnc-lrping. Mzli kc tzmnc-lrpi-ngrdr, Pol kc tqycmnepebz badr mz natqdr.

22

¹ Rpibz Pol mz zbo ngr leplz kcng kx, “Trtengeng x mzlengeng, lalztq-kaipa'mu bange mz nzatubqti-lzbq-krbo bamu!” ² Kx nzxrlbzlr nzycmne-krbzle badr mz natqdr, sc tzmnc-lrpitxpeng. ³ Rpibzle kx, “Ninge kzdq lr Jiu, x mzke' nzmc Taszs, taon kxetu ngr provins kc Silisia. Nzabutinge mrka Jerusalem. Siklutrpo mz Gamaliel x nzalvztrp bange nzsma-nqblq-angidrngr Lou sc melrmqgung. Mz nzmu-krde lc, drtwrnge pqtr-zlwzsz mz Gct, da kc tqwai nimu amrlx mzbq ka. *

⁴ Atrkatixng kxnzrvz-nqblqng ‘Lrpzki ngr Kxetu’ x batrpo nzbz-krdr. Olvz x ncblo lolvzxng x adwatrxng mz presin. ⁵ Nardr Pris x kxnzetu ngr Kansrl kcng amrlx nzkrlzlr nzrpipxngr kx da zpwx lc tqpix. Kzdq mzli

‡ ^{21:32} 21:29 Mz lou sc lr Jiu, kxtrngiulrJiu nzbatrzlr doa trnztakitr-krdeu mz nzprtrngr mz nzangiongr. X trtubqu mz Lou scdr, mz kxtrngiulrJiu nzprtr-krde mz nabz Mangr-nzangiongr, nzrlasztr-krdr makoa nyz kxtrngiulrJiu kx yctrpz yz. Lr Jiu txpwz kx takitrde nzprtrngr mz makoa kcng tqyctxtrng, krlang makoa nyz olvz x makoa nyz lr Israel. Doa kx trvz-nqblqleu nqmq lc nznibq. 21:32 Mzli kang kqlu lr Jiu kcng Jerusalem nzotang, myapxbz mz mzli r nzrmulvzng kxnzetung. X mz nzrmulvzng kang kqlu, gzpman ngr Rom amncpx-zvz-ngrmle ncblo ngr vea mrlc murde na-amnc-nrwx-ngrdr lr Jerusalem. * ^{22:3} Gamaliel ngi kxakrlz kx nzamatq zlwz mzli kc tqmncngr Pol. Ni-kzde Farzsi kxprtr mz Kansrl nyz lr Jiu. [Aposol 5:34]

nzkatimlr bange letz kx nzyrbz mz mzledr, lr Jiu kcng tzmncng Damaskzs. Zbz vzx mrkc mz nzrlolvzngr leplz lcdeng x yzlumimcng Jerusalem murde na-ayrplaxng.

⁶ “X mz nzvo-krnge kc, tqvztinepemc Damaskzs, x esotinepebzle mzli kc bea. Zbz pwrkilvc-ngrne kzdq zyzlr kx xplr. Vzom bongavz x mnctpx-pnzmc elr. ⁷ Tatxox mz drtc', x xlrk kzdq natq rpimle bange kx, ‘Sol, Sol o, nike tqatrkti-ngrn ninge?’ ⁸ Rpibo kx, ‘Nim neke, kx kxetu?’ Rpimle kx, ‘Ninge Jiszs kc Naszret tqatrktiq.’ ⁹ Ncblo kcng tqnginigr badr nzmclr zyzlr kc, a' tryrplatitru nardr natq kc tzpim bange. ¹⁰ Rpibo kx, ‘Kxetu, nike na-alepex?’ X rpimle bange kx, ‘Tulz x vztr Damaskzs. X mrla sa napibz bam da kc tzmcpk-ngrm na-aleq.’ ¹¹ Mzke' kctx pnz, murde nzpnaprkr zyzlr kc le. X kztengeng nzmalebzlr mqnge, sc tzvzmitrpebzlr ninge mz taon lcde.

¹² “Kzdq nigu lr Jiu, drtqde Ananaeas, mnc Damaskzs. Nide ncblo kx angio-zvzle Yawe, Gct rgu, x vz-nqqlq-zvzle lou scgung. X lr Jiu kc-kzng amrlx tzmncng Damaskzs nzamatq-zlwzlr nide. ¹³ Vzm, tutxtrp bange, x rpimle kx, ‘Mzlenge Sol, obq mou!’ X mzli kcpwz obqlzbo, sc tqmcpxe nide. ¹⁴ Zbz sc tqrpipemle bange kx, ‘Gct ngr melrmqgung mcpxpel nim mz nzkrllz-krm me pnz drtwrde, x nzmc-krm Krkc Tqtubq-esz'ngr x nxzlr-ngrbz natqde. ¹⁵ Murde napipxbzme mz leplz amrlx, mz nike mcbzme x xlrbzme bade. ¹⁶ ?X mzli ka nike na-aenzli mou? Tulz x wrkxtr mz nzrlxti-krbzme mz Gct nzipq-krde nim.’ †

¹⁷ “Mz nibz nzvz-nqqlq-krnge natqdeng, yzlu-moux Jerusalem. X kzdq zbz mzli kc tqkrka'-ngrne mz Mangr-nzangiongr, obq-rmwiblex. ¹⁸ X mcx Kxetu, rpimle kx, ‘Ngrrl! Rlasztx-anipwz Jerusalem. Murde sa napxtpx-ngrdr nzpipx-krm ninge mrka.’ ¹⁹ Rpibo kx, ‘Kxetu, nzkrllz-angidrlr kx vzx mz mangr-nzkrka'ngr nyzgrng, lolvzx x vibrtixng krkcng tzlxngitilr nim. ²⁰ X mzli kc Stivin tqppipx-ngrde nim, x tznibq-ngrde, tu-kzx mrkc, x abrtzlvz-kzx nzrnibqngr mz nzaclve-krnge lrpz scdr krkcng tzrnibqng nide.’ ²¹ Rpim Kxetu bange kx, ‘Vz, murde sa na-atwzlr-rlru-ngrbo nim mz kxtrngiulrJiu!’”

²² Sc tzlalztqbzng mz Pol krlzbzle mzli kx pi-ngrbzle da lc. A' sc tzabzopelr nzkabo-krdr mz natqdr kxetu, tpilr kx, “Nanibq! Trtakirpedeu nzlu-krde!” ²³ Mzli kc tzne-ngrdr, tzayaglqlr lrpzdrng mz zngya ngr drtwrdr, x tzrlxlzng bq r nrlc wq. ²⁴ Kamadz kc rkabz natq mz ncblo ngr vea nedeng kx navzmitr Pol mz lrpalvc nyzdr, x naviplalr, x na-aveatrlr kx nike lr Jiu kcng tznelvz-ngrdr nide. ‡

²⁵ A' mzli kc tzpeo-ngrdr Pol mz nzrviplangr, rpibzle mz kxetu r dzbe ncblo ngr vea kx trtqki-esz' (100) kc tqtu mrkc kx, “?Nzmu-krde ke, tubq mz lou sc lr Rom nzrviplangr ncblo kx gzpmangr Rom rlr-ngrbzle nzprtr-krde mz dzbede kc tqmyapxbz, a' trnztwz-kaiu mz kot?” ²⁶ Kx xlrbz kxetu kc natqde, vzbz mz kamadz, x rpibzle kx, “?Krlz-kzq kx ncblo lc prtr mz dzbede kc tqmyapxbz?” ²⁷ Zbz kamadz kc vzbz mz Pol x rpibzle kx, “Pim! ?Prtr-kzq mz dzbede kc tqmyapxbz?” Rpibz Pol kx, “Eu.” ²⁸ Rpibz kamadz kc kx, “Trau kx kax kqlu dalr nzrlr-ngrm bange nzprtr-krnge elr.” A' Pol rpibzle bade kx, “A' prtrx elr murde trtenge prtr kai elr.” ²⁹ Mzli lcde ncblo kcng na-aveatrlr Pol, nzteblqtxpxmqng bade. X kamadz kc sc tqmwxlrpe, murde yrplatitrpe narde kx Pol prtr mz dzbede lc tqmyapxbz, a' atolvatxpe-ngrde mz sen. §

† ^{22:16} 22:14 Krkc Tqtubq-esz'ngr ngi kzdq drtq Kxnmcpk. [Asaea 53:11; Jeremaea 23:5; 33:15; Aposol 7:52] ‡ ^{22:24} Kzdung mzli kxnmncng mz presin nabzng mz nzrviplangr kxmule lc.
§ ^{22:29} Aposol 16:22-25, 35-40

Pol Tubz Mz Kansrl Nyz Lr Jiu

³⁰ Kamadz kc nartangrti-zpxle nike lr Jiu kcng tzpipx-ngrdr kx Pol vz-rbr. Zbz nrlc ngrlxobz, sc tzkapxpebz sen ngrde, x sc tqrkape natq kx kxnzetu rdr pris x krkcng tzprtrng mz Kansrl, nayrlwr-lxblrng. Zbz vzmiomle Pol, sc tqatupebzle badr.

23

¹ Pol mzte tutxpwz mz ncblo kcng tzprtrng mz Kansrl, sc tqrpipebzle badr kx, “Mzlengeng! Narnge opx angidr mz da amrlx kx alepex mz nzwztr-ngrbz mz Gct.” ² Mzli lcpwz kzdq kz ncblo drtqde Ananaeas nide Nardr Pris. X pibzle mz ncblo kcng tztu-aepztrpzng mz Pol kx natlvztrpzlr naode. ³ Rpibz Pol bade kx, “Gct la natzle nim. Murde lgngiq mz nrlarde kxyz, a' nabzm trka zlwz! ?Myx kxnamu nzwxbu-krm mrla mz nzpipx-krm kz trvz-nqblqwxu lou sc Mosis, a' trvz-nqblqwxu lou mz nrpi-krbzme mz ncblo nemqng nztz-krdr ninge?” ⁴ Ncblo kcng tztutrpzng mz Pol nzrpibzlr kx, “Tqangqbqtitxoq Nardr Pris ne Gct!” ⁵ Rpibz Pol kx, “Mzlengeng, trkrlzwxu kx nide Nardr Pris, x ma trpitx-pnzwxu da lc. Murde nzyr mz Nzryrngrkxtr kx, ‘Bzkq pi-ngrn natq kx drka'ngr mz nzycmnetrngr kx aclvele lr mrnyzmu.’” *

⁶ Kx mcpe Pol kx kzdung ncblo kcng mz Kansrl nidr Sadiusi x kzdung kz Farzsi, sc tqetumipxpebz natqde mz ncblo ngr kansrl kcng. Rpibzle kx, “Mzlengeng, ninge Farzsi, x mrlx Farzsi. Nzvzmim ninge mrka murde obqtipxx nztulz-krm leplz mz nzlungr!” ⁷ Kx pitxbzle natq lc Farzsi x Sadiusi sc tzycmnetitr-lzbqpeng, x kansrl kc sc tqakio-lzbqp. ⁸ Murde dzbe Sadiusi nzrpilr kx leplz kz nzbzpeng trpnzngr lc nztulz-krmlr mz nzbzngr, x trpnzngr enjrl x drka' kxnxmnccng. A' dzbe Farzsi nzlxngitir da lcng tq.

⁹ Nzkabongr kc sc tqetunelz, x kzdung kxnxalvztrng mz Lou sc Mosis kx nznginidr Farzsi nztulzng, sc tzrpipelr kx, “Trpnzngr da kxtrka kx mctrpzkr mz ncblo lc! Mwx kzdq mqngr o enjrl ycmnebz bade!” ¹⁰ Nztalwzng lc tqetu-zlwzpe. Zbz kamadz kc mwxlrvzpele kx Pol ma tzpesalitxdr. Zbz sc tqrkapebz natq mz ncblo ngr vea nedeng kx navzobzng mz kansrl kc, navecpxmlr Pol, x navzmitrlr mz lrpalvc nyzdr. ¹¹ Mz nrlckxbqtrpz, Pol mcle Kxetu Jisz. X sc tqrpipebzle bade kx, “Nelzm nabr! Murde sa napipx-kzq ninge mrkc Rom, da kc tqwaipeq mrka Jerusalem.”

Lr Jiu Nzryrlqng Drtwr Mz Nzrnibqng Pol

¹² Mz nourla, kzdung lr Jiu nzyrlwrpx-lxblrng x nzryrlqng kzdq drtwr. Mz nzaxtx-krdr dakxnxng x lue, nzesalz-lxblrbzng mz Gct kx nanibq-zpxlr Pol, x sc tzmu-ateng x tzrmnq-ateng. ¹³ X nzkqlu-krdr myaszlzle nzpnu-pwx (40). ¹⁴ Zbz nzrpibzlr mz kxnxzetu rdr pris x lrtzlvz kcng kx, “Mz nzaxtx-krgr dakxnxng x lue, esalz-lxblrbzkr mz Gct kx nanibq-zpxlr Pol, x sc tqmu-atekr x tqrmnq-atekr. ¹⁵ Mzli ka nimu badr Kansrl atwzlr-ngrbzmu dq natq mz kamadz ngr ami kc, kx navzmiomlr Pol bamu, murde naxlr-mouamu du da kx napibzle bamu. A' sa naoliqtikr nzrnibqng nide mzli kc trkrlzoka-ngrmle mrka.”

* 23:5 Nzrlaszngr 22:11 * 23:5 Ananaeas lc tqngi Nardr Pris mz yiz kcng 47—59 AD, blepxbz mz Ananaeas kc Damaskzs tqokatrle Pol. [Aposol 9:10; 22:12] X blepx-kzpz mz Ananaeas kc tqngi ncblo ngr Safira, nidr kcng tzbpeng. [Aposol 5:1-11] X blepx-kzpz mz Anas kc tqngi kz Nardr Pris mz yiz kcng 6—15 AD mz nibr nzrmcngr mz Jisz. [Jon 18:13; Aposol 4:6] Opxm kx Ananaeas nzpnzr drtwre le Pol tqopokia. A' trtubqu nztz-krdr nide murde mz nzvz-nqblq-krde lou scdr, ncblo nakot kai x sc tzmcpx ate kx tubq o trtingr. A' trtakirdeu nzrpingr kx ncblo kx trkotq-kaileu vz-rbr x nzayrplapxng nide.

¹⁶ A' mrlx inwe Pol xlrpele drtwr lc. Zbz sc tqvzpe x dwatrpe mz lrpalvc nyzdr, x sc tqpipebzle mz Pol. ¹⁷ X Pol sc tdkqlele kxetu r dzbe ncblo ngr vea kcng x rpibzle kx, "Vzmibz obla lc mz kamadz kc. Napibzle bade dq da." ¹⁸ Otibz kxetu r ncblo kcng, sc tqmailzpebzle mz kamadz, x rpibzle kx, "Pol, mrlx kc tqpresin kqlebzle ninge, x rpimle navzmimc obla lc bam, murde rngisc natq kx napibzle bam." ¹⁹ Kamadz kc otibzle mqde, sc tqvzmipxpele, x tqveapebz bade, rpibzle kx, "?Nikc napime bange?" ²⁰ Rpibzle kx, "Lr Jiu kcng drtwrdr esz'ti kx narlxtibzlr bam nzvzmio-krbzme Pol mz Kansrl kc kalrla, murde suti drtwrdr nzxlr-moungr du da kx napibz Pol badr. ²¹ A' bzkq lxngitiq nidr, murde ncblo nzpnu-pwxng (40) sa namnc-kapqng x na-aenzlirl nide. Nzesalzpebzng mz Gct kx nanibqtx-zpwxlr Pol x sc tzmu-ateng x tzrmnq-ateng. Mzli ka sa tzoliqng nzale-krdrle, x tzaenzlirl nike pnz drtwrm." ²² Rpibz kamadz kc kx, "Bzkq pinen kx rlwape-ngrme da lc." X sc tqavzpxpele obla kc.

Pol Nzaprccb Mz Gavzna Filiks

²³ Zbz kamadz ngr ami ngr Rom kc, sc tdkqlepebzle kxetu nede nzling, x rpibzle badr kx, "Oliqt ncblo ngr vea nemung trtqki-nali (200), kxnnzvong mz hcsi nzpnu-narlimz (70), x kxnnzrmaleng spiz trtqki-nali (200). X olikamu nzrkalz-ngrm mz nabznepi kc rpxwmz koma mz nrlckxbq, mz nzvz-krmu taon kxetu Sisaria, mrkc tqtungr lrpalvc nyzgu kc tqmyapxbz. ²⁴ Vzmimamu kzdung hcsi navongr Pol, murde ma tzatrka mz nzaprccngrbz mz Gavzna Filiks." ²⁵ Zbz kamadz kc yrle kzdq letz kx rpile kx,

²⁶ "Ninge Klaodizs Lisizs. Letz lc yrbo bam, kx kxetu gavzna Filiks. Nim la.

²⁷ Lr Jiu nzblctibzlr ncblo lc, x nzrpilr nanibqpeir. A' mzli kc tqxlrngrne kx nide ncblo kx gzpman ngr Rom rlr-ngrbzle nzprtr-krde mz dzbede kx tqmyapxbz, sc tqvzpebzkr badr ncblo ngr vea nengeng, x sc tcarlapxpekr nide. ²⁸ Rpix nakrlzxk nike vz-rbrtileng, zbz sc tqvzmiopebo mz Kansrl nyzdr. ²⁹ Mcpex kx trpnzngr da kxtrka kx alele kx nananide mz nzbz-krde o nzadwatrngr nide mz presin, murde nzotablr-ngrdr dalr lou scdr. ³⁰ Zbz sc tzpipem bange kx kzdung lr Jiu tzryrlqng drtwr mz nznibq-krdr nide. Mz drtwr lc, dekc tqrpi-ngrne kx na-atwzlr-ngrmcle bam. Pibo mz krkcng tzotablrng badr kx na-atubqtilr da lc mz kot me mnc-ngrn.

Nim lape. Ninge kamadz mrka Jerusalem, *Klaodizs Lisizs.*"

³¹ Ncblo ngr vea kcng nzatutrlr natq kamadz kc. Nzotilr Pol mz nrlckxbq kc, nzvelr krlbzblr taon Antipatris. ³² Nrlc ngrlxobz ncblo ngr vea kcng tzvzng mz nanycdr, sc tzyzlupemqng mz lrpalvc nyzdr mrkc Jerusalem. X krkcng tzvong mz hcsi sc tzvopeng badr Pol. ³³ Kx nzkaputrpzlr kc Sisaria, nzkabzlr letz kcma mz gavzna kc, x sc tzaprcpebzlr Pol bade. ³⁴ Gavzna kc rlwxle letz kc, x sc tqveatipebzle mz Pol provins kznike vzkimle. Kx krlzpele kx vzkimle Silisia Provins, ³⁵ rpibzle kx, "Naxlr-krlzux nim mzli kc nakaputr-ngrm krkcng tzpipxlr kx vz-rbrq." Zbz sc tqrkape natq kx Pol namnclvzngr mz jelz mrkc ma kxetu nyzde. Jelz lc tqwz-pnzngr King Herot kc tqmyalz.

24

Nzkotq-krbz Pol Mz Gavzna Filiks

¹ Zbq nzlvqn mz nibrde, Ananaeas lc tqngi Nardr Pris badr kzdung lrtzlvzng, x kzdq loyz drtgde Tertzlzs, nzvzong mz taon kxetu Sisaria. Nzvz-ngrdr nzpipx-krdr nzvz-rbrkr Pol mz kot mrkc Gavzna Filiks tqngini-ngrde

majzstret. ² Pol nzqgle, x Tertzlzs sc tqpipxpele nzvz-rbr-krdeng. Rpibzle kx, "Kxetu Filiks, abrtzlvzpekr mzli kxboi kx nzmnncngr mz nrwrx, murde nzmnclz-ngrbz bam. X mrlzm bagr da kx tekqtrq mz nzokatr-krm nrlarnrlc nyzgr ka. ³ Zvz mz taon nyzgrng amrlx nzmc-krgrle brngz x awi-zlwzbzkr bam, kx kxetu Filiks. ⁴ A' trsutiu drtwrnge nzrtwz-ngrbz mzli nyzm kxkqlu. A' rlxtibo bam mz zmrlz ngrm, kx lalztqm ena mzli kxipiz.

⁵ "Mcpekr kx ncblo lc nide ncblo kx atrka da. Tqabzo-zvzle nzotablrrngr mz mzlir lr Jiu mz nrlc talvzpx. X mailzle ncblo kcng tzvz-nqblqlr Jiszs kc Naszret. ⁶ Tqabz-kzle nzatrkatingr nztrkr Mangr-nzangiongr Yawe, x sc tqlolvzpekr nide. {Murde napipxkr nztubq-krde o trtingr mz nzvz-nqblq-krde lou scgr. ⁷ A' kamadz kc Lisizs vzm x katpxxmle bagr mz nzrtwz-krmle vea. ⁸ Zbz Lisizs rka natq kx krkcng tzpipxlr kx vz-rbrtile navzmqng bam.} Nzmu na-aveatrq ncblo lc, sc tqkrlzpeq mz nim esz'-krm nzvz-rbr-krdeng amrlx kcng tqipixkr." ⁹ Lr Jiu kcng nzprtrpzng mz nzpipx-krdr da kx vz-rbrtile x nzrpi-kzlr kx da lcng ngi da zpxw. *

¹⁰ Gavzna kc aycngrlrbzle narde mz Pol kx naycmne ye. X sc tqrpipebz Pol kx, "Krlzx kx ngini-pnzm majzstret mrka twztiqe yiz kqlupe. X abrtzx mz nzycmne-krnge mz nzacve-lzbq-krnge. ¹¹ Tr-rblxu nzrtangrti-krm da angidr, murde vz-ngrne Jerusalem mz nzangiongr x zbo kx nzpnu-esz'-nrade-li (12) kc ate. ¹² Lr Jiu kcng trnzmcrlu nztalwz-krgr badr kzdq ncblo mz Mangr-nzangiongr Yawe. Trnzmc-kzrlu nzrtrngztio-krnge nelz leplz, mz mangr-nzkrka'ngr nyzgrng o mz kzdq nrlc mz nabz mzteadau. ¹³ Rblx-kzpz badr nzpipx-krbzlr da kx ngi da angidr mz nzvz-rbr-krngeng. ¹⁴ A' naplpxbo da lc. Angiox Gct ngr melrmqgrng mz nzvz-nqblq-krnge 'Lrpzki r Kxetu.' A' tzrpilr kx dzbede lc nzvz-rbrng. A' lxngiti-kzx da kcng amrlx tzyro mz buk ngr Lou x Profet. ¹⁵ X obqtipxx da kcpwz tzaenzlilr ncblo lcng, krlc kx leplz amrlx sa natulzmqng mz nzbzngr, kxmule-esz' kxnzmrlzng x kxnztrkang. ¹⁶ Mz nzmu-krde lcde, nabztq-ngrde etum bange kx narnge naopx-zvzbz mz Gct x leplz.

¹⁷ "Mz nibr nzpprx-krnge Jerusalem mz kzdung yiz, yzlu-moux mz nzrtwz-krbo trau kx nakabo mz Gct x kzdung trau kcng tzatakti mz nznrka-ngrbz mz lr Jiu kcng trpnzngr scdr da. ¹⁸ Mzli kc tqale-ngrne da lc, dekcpwz tzmc-ngrdr ninge mz Mangr-nzangiongr, mz nibr nzayrkpx-krnge nzalqngi-lzbqngr mz nzangiongr. Trpnzngr zbo ngr ncblo kx nigr badr x trprtrwxu mz nztutilz-lzbqngr lc. ¹⁹ A' kzdung lr Jiu kx nzvzkimlr Esia Provins nzmnncng mrkc. Nzmu kzdq da kx tqavz-rbrbole, navzmqng bam mz nzpipx-krdrle. ²⁰ O kx tqmule leplz lcng mrlc napilr da kzniqe nzmcrl vz-rbr-ngrne, mzli kc tqtu-ngrne mz Kansrl kc. ²¹ A' da esz'txupwz nemipxx mzli kc tqtu-ngrbo badr. Murde rpibo badr kx, 'Rpiamu kx vz-rbrx mzbq ka murde lxngitix kx leplz kxnzbzpeng nalu-moung.' "

²² Zbz Filiks kc tqkrlz-angidrpele 'Lrpzki r Kxetu,' sc tqayrkpxpebzle nzycmnengr kc. X sc tqrpipebzle badr kx, "Mzli kc kamadz Lisizs nakaputr-

* ^{24:9} 24:5 Lou sc lr Rom yrlq-kaile nzrlxngitingr amrlx kx takitrde leplz kcng tzmnlzbzngbadr nzvz-nqblq-krdr. Kx trnzrvz-nqblqung lou nznibq. Lr Jiu lcng nzrpilr kx dzbede mz ncblo kcng Naszret ngi nzrlxngitingr kx trtakitrdeu mz gzpman ngr Rom. A' mz ngalrdeng 14-16, Pol aopxbzle kx leplz kcng tzvz-nqblqlr Kxnzmcpkx nzprtr-kzng mz nzrlxngitikr lr Jiu, kc tqtakitrde mz gzpman ngr Rom. 24:8 Mz kzdung nzryr-ngrng kcng pnz, mrkc tqycngr maki kxmule lc { }, trnzycpxpqng elr. ^{24:17} Aposol 11:27-30; Rom 15:25-28; 1 Korint 16:1-4; 2 Korint 8—9

ngrmle, sc tqobqtrpebo elr." †

²³ Pibzle mz kxetu r dzbe ncblo ngr vea kc kx Pol namncpwz, a' narlr-kz-ngrbzle nzoprtane-krde x bzkq rpwa'-ngrbzle kztedeng nztwz-krmlr nikeng suti drtwre.

Pol Alvztr-ngrde Filiks Mz Jiszs

²⁴ Mz nibr kzdung zbz Gavzna Filiks nzvzmqng mz olvz rde Drusila, nide lr Jiu. Aveatipele Pol mz presin, x lalztqbz mz nzryapwx-daliti-krbzle Jiszs Kxnzmcpx. ²⁵ Zbz Pol sc tqryapwxtrpe-ngrde da kxtubz mz nzobqkr Gct, nzaclve-lzbqngr, x nzayrplapxkr Gct kc navzm. Filiks kc tqmwxlre x sc tqrpipebzle kx, "Mrlzpe! Krlzpeq ye nzvzngr mzli ka. Na-aveati-krlz-mopwc' nim kx tqrngiscnge mzli." ²⁶ Mzli lc tqobqtipxle kx kzdq mzli Pol narkabz trau, murde na-avzpx-ngrmle nide mz presin. X mz drtwr lc, sc tqaveati-zvzle mz nzryapwx-krdr badr.

²⁷ Yiz li kaputpx. X mz nibrde Posizs Festzs sc tqtekqtrpele Filiks nzngini-krde gavzna. Filiks rpile namrlzi lr Jiu kcng, murde ma tzota-zvzng. X sc tqrlaszpebzle Pol mz presin. ‡

25

Nzkotq-krbz Pol Mz Gavzna Festzs

¹ Zbz tq otx mz nibr Festzs nzkaputr-krmle mz provins kc mz nzngini-krde gavzna, rkalzm Sisaria, sc tqvzdzpe Jerusalem. ² X kxnzetu rdr pris x lrtzlvz ngr lr Jiu nzpipxlr nzvz-rbrkr Pol. X nzrlxti-kzpplr mz Festzs kx ³ na-aelwa-ngrbzle badr nzrmrlztingr, mz nzatzlrl-krmle Pol mz nzkotq-krde Jerusalem. A' nzrpilr da lc murde nzryrlq-kapqng drtwr kx nanibqlr Pol mz lrpzki. ⁴ Rpibz Festzs kx, "Pol nzamnc mz presin kc mz taon Sisaria. X mzli trnabou sa nayzlu-moux elr. ⁵ Kxnzrmailz rmung navzokr badr. X napipxlr nzvz-rbr-krdeng elr."

⁶ Festzs mnctilr badr wiki esz', x sc tqvzope Sisaria. Nrlc ngrlxobz sc tqvztrpe mz nabz mangr-nzkotqng, x sc tqrkape natq kx ncblo ngr vea nedeng navzmitrpl Pol. ⁷ Mzli kc Pol tqkaputr-ngrbzle, lr Jiu kcng nztungalelvzlr nide, x sc tzrping brmrda ngr natq kx vz-rbrti Pol kx trpnzng me nztukitrlr. ⁸ A' Pol aclve-lzbq mz nzsri-krbzle kx, "Trpnzng da kx alex kx vz-rbrtr mz lou sc lr Jiu, o mz Mangr-nzangiong, o mz king kc etu kc Rom."

⁹ Kxmule-esz', a' Gavzna Festzs rpile namrlzba lr Jiu kcng, murde ma tzota-zvzng. X sc tqveapebz mz Pol tqrpipebzle kx, "?Mrlz nzvzdz-krm Jerusalem, x na-abzpxm mz da lcng elr?"

¹⁰ Rpibz Pol kx, "Tqtutrho mz kot nyz king kxetu x takitrde nzpipx-krbzme kx vz-rbrx o trtingr mz kot ka. Trpnzng da kx vz-rbr kx alebo mz lr Jiu, da kc tqwai nzkrlz-zpwx-krmle. ¹¹ A' nzmu kx tqvz-rbrpex mz lou sc lr Rom, x alepex dq da kx nanibq-ngrnge, e tr-rlxtiwxu nzplcsz-krngele. A' nzmu kx trpnzng da kx ngi da angidr mz natq lcng tzpiti-ngrdr ninge, e

† **24:22** Opx-angidrbz mz leplz amrlx kx Pol trvz-rbru mz lou scdr lr Rom x vz-nqblq-angidrl lou scdr lr Jiu. Mz nzmu-krde lcde, mz nzprtr-krde mz dzbede kc tqmyapxbz, takitrde nzrlrpxpengr nide. Kxmule-esz', a' Filiks na-ale-kzle da kx mrlbz mz lr Jiu. ‡ **24:27** Mz nzvz-nqblq-krde lou sc lr Rom, kzdq leplz na-avzpxm mz presin nzmu kx trkotqleu mz nabz yiz kxli. Kxmule-esz', mzli kc Pol na-avzpx-ngrmle, lr Jiu kcng drtwrdr ngyabz mz Filiks mz da kxkqlu. Filiks krlzle kx mzli trnabou, narmcti-lzbqng badr mz kot mz nzatubqtingr da lcdeng. Mz nzmu-krde lcde, rlaszpele Pol mz presin mz nzayc-nrwx-krbzle drtwrdr kx ngya. Gzpmam ngr Rom aprpxle Filiks mz nzwz-krde murde leplz trnzmnc-lrpi-ngrdru mz nzrmailz-krde.

mz nzvz-nqblq-krde lou ngr Rom, trpnzngr kx nakaobzle ninge badr. Mzli ka rlxtibo atwzlr-ngrbz ninge mz king kc Rom mz nzkotq-krnge elr.” *

¹² Festzs nzryapwxxtxng badr ncblo kx nzatubqtilr nide. Zbz sc tqrpipebzle kx, “Rlxtiq nzkotqtr-krbzme mz mz king kc Rom, e sa na-atwzlrpe-ngrbzkr nim bade.”

Festzs Pibzle Pol Mz King Herot Agripz

¹³ Kzdung mzli mz nibrde, King Herot Agripz Krali kc tqaclvele Provins kc Gzlili x inwede Bernis nzvzmqng mz taon Sisaria, mz nzoklati-krmlr Festzs murde sc tqngini-atede gavzna. ¹⁴ Mz nibr nzmncti-krdr mrkc kzdung zbz, Festzs kc tqaopxpebzle mz king nrpa ngr Pol. Rpibzle kx, “Kzdq kc ncblo mrka kx amnctx Gavzna Filiks mz presin sc tqrlaszpele. ¹⁵ X kx vzdzx kc Jerusalem, lrtzlvzng x kxnzetu rdr pris r lr Jiu sc tzrlxtipemlr bange kx napix kx mrlx lc vz-rbr.

¹⁶ “A' rpibo badr kx lou sc lr Rom tr-rlrpx-ngrdeu nzaprcngr ncblo mz nzbz-krde, a' narmcti-lzbz-kaing badr leplz kcng tzrpilr kx vz-rbr mz kot. Murde napipxle mz kot trnzvz-rbr-krdeu. ¹⁷ Kx nzvzmlr mrka, sc trpnzmounger da kx na-aenzlix, a' mz nrlc kxngrlxobz sc tqwxbuope-ngrne mrkc tzrpipxngr ntubqkr doa o trtingr, x sc tqrpipebo kx ncblo kc navzmitrp. ¹⁸ A' nzvz-rbr-krdeng kcng tzpipxlr, trngi-pnzu da kc tqpnz drtwrnge kx napipxlr. ¹⁹ Murde nzpipxlr kx nzvz-rbrkr Pol tutr mz kzdung da mz nzrlxngiti-krdr, x mz kzdq ncblo drtqde Jiszs, bzpe, a' Pol rpile sa tqlu. ²⁰ Trkrlzwxu kxnamusr-ngrne trnzesz'ti-kru lc drtwr. Mz drtwr lc, veatibo mz Pol nzmu kx tqmrlzbz bade nzvzdz-krde Jerusalem mz nzabzpx-krngele mz da lcng elr. ²¹ A' ptxpx-ngrde. Rlxtile kx na-aclvepwz nide, navz nakrlzbzle mzli kc na-atwzlr-ngrbo nide mz king kc etu kc Rom, mz nzkotq-krde elr.”

²² Rpibz Agripz mz Festzs kx, “Suti drtwrnge nzxlrngr nzycmnekr ncblo lc mz ninge esz'-krnge.” Rpibz Festzs kx, “Xlr-krlzq kalrla.”

King Agripz Lalztqbz Mz Nzycmnekr Pol

²³ Nrlc ngrlxobz leplz kcng tzglqlzlr Agripz ncdr Bernis mz nzngini-krdr kxnzetung mzli kc tzvz-ngrmlr mrkc tzyrlwr-lxblrngr. Nzdwatrpxng mz nabz kzdq ma nyg gzpman, mrkc kxnzetung tzlalztq-ngrbzlr mz leplz nedrung. X kxnzetu r ami kcng x kxnzrmailzng lr taon kc nzdwatr-kzpzngr. Festzs rkatxbz natq, x Pol kc tzvzmitrpem. ²⁴ Zbz Festzs kc tqrpipebzle kx, “King Agripz, x nimu lcng amrlx tqmnckr badr mrka, pwxbztiamu ncblo lc! Lr Jiu amrlx mrkc Jerusalem x mrka Sisaria, nzrtwzmqng natq bange, x nznemilr kx nanibq. ²⁵ A' trmcwxu kzdq da kx alele kx nanibq-ngrde. X pnzpe drtwrnge nzatwzlr-krngele Rom, murde rlxtile nzkotqtr-krbzle mz mz king kc etu. ²⁶ Trkrlzkax da kx nayrx mz letz kx nayrbo mz king, mz nzpi-krbo Pol. Mz nzmu-krde lcde, vzmipemc nide bamu mrka, x myapxbz nim, kx King Agripz! Murde mz nibr nzvea-krbzmu da bade, mwx elx sc tqngiscpenge dq da kx nayrx. ²⁷ Murde trtakitrdeu nzatwzlr-krbo ncblo mz King, mz trnzayrbq-zpxw-ngru mz nzryrngr da kznikeng nzrpilr kx vz-rbr-ngrde.” †

* ^{25:11} King Niro nide king r Rom mz yiz lcng. Doa kx gzpman ngr Rom rlr-ngrbzle nzprtr-krde mz dzbede kc tqmyapxbz nzrncscng zmatq ngr nzrlxtingr nzkotq-ngrbz mz king kxet Rom. Trpnzngr kx krlzle nzrpwa'-ngrbz da lc. ^{25:23} Luk 21:12 † ^{25:27} King Agripz krlz-zpxwle lou sc lr Jiu, kxmule-esz' trprtru mz nzvz-nqblq-krde nqmq krdr. King Niro nangyati drtwrde Festzs nzmu na-atwzlr-ngrbzle Pol bade, a' trpnzngr nou rde kxtubq. Murde nzwzkr kxnzetung mz provins nzatubqti-krdr dalr provins nydr esz'-krdr x bzkq nzayakukulr King Niro.

26

¹ Zbz rpibz Agripz mz Pol kx, “Ycmne ye. Nzrlrpe-ngrbz nzycmne-krm.” Pol atwztqpxle mqde, sc tqabzopele nzycmne-krde mz nzpnzti-krde natq kcng tzpiti-ngrde. ² Rpibzle kx, “King Agripz, mrlzm bange kx tqtupebo mz mzpq mzbq ka, mz nzayzlu-krbo natq lcng tzpipx lr Jiu tqvz-rbr-ngrne. ³ Myapxbz murde krlzq nqmq krgu, nigu lr Jiu, x da kcng tresz'ti-ngru drtwrgu. Mz nzmu-krde lcde, rlxtibo bam, lalztq-kaip ena bange.

⁴ “Lr Jiu amrlx nzkrlzlr nqmq krnge, vzne-pnzm mzli kc tqoblabe-ngrne. Mnckr badr mrnyznge, x mnc-kzkr badr Jerusalem. ⁵ Mz nzmu-krde lcde, nzkrlztipelr ninge mzli boipe. X nzkrlz-kzlr nzrpingr kx tzsuti drtwrdr le, kx prtrx mzli boipe mz Farzsi, dzbede kc tqolvz-amqngile nzrlxngiti-krgr, nigr lr Jiu. ⁶ A' mzli ka tux mrka murde nzrpilr kx vz-rbrx mz nzlxngiti-krnge Mevalu Kxnzmcpx kc tqesalz-ngrbz Gct mz melrmqgung. ⁷ Krlc nzesalzngangidr kc tqobqtipxkr, nigr neidu lr melrmqgrng kcng nzpnu-esz'-nrade-li (12). X mz nzaenzli-krgrle, angio-zvzkr Gct mz nrlc kxngrlx x nrlckxbq, mz drtwrgr kxpqtr zlwz. X mz nzlxngiti-krnge nzesalzkr Gct lc, dekc tqlctr-ngrm drtwr lr Jiu bange! ⁸ Kzdung nimu lr Jiu, rpi-zvzamu kx lxngitiamu kx Gct krlzle nzatulz-mou-krmle leplz mz nzbzng. ?A' memule tqrblx-ngrbzle bamu nzrlxngitingr kx Gct atulzpeple Jiszs mz nzbzng?

⁹ “Mzli kc ena, aoti drtwnge kx na-alex da kx na-atrkat-ngrne leplz kcng tzvz-nqblqlr Jiszs kc Naszret. ¹⁰ X alex da lc Jerusalem. Kxnzetu rdr pris nzkamlr bange zmatq, mz nzadwatr-krnge leplz mz presin nedeng kxnzqlung. X mzli kx nzrpi-ngrdr narnibq-ngrdr, drtwnge esz'ti badr. ¹¹ Nzwrdde kqlu kx lolvzpx-ngrmc nidr mz nabz mangr-nzkrka'ngr nyzgr. X ayrplapxx nidr murde nangi-batrzle badr nzpixiti-krdr Jiszs. Ngyati zlwz drtwnge nidr x vz-kzx mrkzbleng mz nzatrkatingr nidr.” *

Pol Pipxle Nzrmcti-krde Jiszs

¹² Rpi-mopwz Pol kx, “Mz kzdq nzvz-krnge lcng, vzx mz taon kxetu Damaskzs, murde kxnzetu rdr pris nzrkamqng zmatq x natq mz nzwzng. ¹³ Waile mzli kc tqavau r nrlc bea, kx king, kx mcx kzdq yzlrpx-zlwz-ngrbz, myaszpxle nzpnaprkr nepi, yzlro-ngrm mz bongavz, o-ngle-ngrde ninge x kztengeng. ¹⁴ Tatxokr amrlx ngrgr mz drtc' x xlrk kzdq natq mz Erameik kc tqycmne-ngrgu mz mzli nyzgu. Rpimle bange kx, ‘?Sol, Sol o, nike tqatrkti-ngrn ninge?’ Bzkq biluszpxq ninge, ma tqatrka-lzbqm, murde tryatrpwe'u bange.’ ¹⁵ Rpibo bade kx, ‘?Nim neke, kx Kxetu?’ X rpim Kxetu kx, ‘Ninge Jiszs, kc tqatrktiq. ¹⁶ A' tulzm, murde mz drtwr lc adcpkx-lzbqpebo bam, mz nzmcpx-krnge nim mz nzngini-krm kxnzawz nenge. Napibzme mz kzdu-kzng leplz kx mcpeq ninge mzbq ka. X sa naaelwa-ngrbo bam kzdung da mou mzli lc navztrp mz nzpi-kz-krbzmeleng badr. ¹⁷ X sa na-arlapxbo nim mz mq kxtrngiulrJiu, kcng tqatwzlr-ngrbo nim badr. X sa na-arlpxkzpo nim mz mq lrmrnyzm kcng tzngi lr Jiu. ¹⁸* Murde na-aopxbzme da angidr badr, naesablqtilr alwx x nalxlvrtilr da angidr mz nzrvz-nqblqngr ninge. X naesablqtilr nzxplkr Setzn, x nao-lxlvrttilr Gct, mz nzmnclz-krbzlr bade. Zbz vzpxm mz nzlxngiti-krdr ninge, sa naipqpxbz Gct alwx ngrdrng, murde naprtrpzng mz leplz nede kcng tqatrpeleng.’ *

* ^{26:11} Lr Jiu sc tzaenzlir Gct nzatutr-krde da kx esalz-ngrbzle mz nzatzl-krmle Kxnzmcpx mz nzaenzl-krde nidr. Pol lxngitile kx Jiszs atutrpel nzesalzng lcde. Kxmule-esz' lr Jiu nzkqlung nzrpilr kx nzlxngitilr kx Gct na-atulzme leplz mz nzbzng, a' trnzlxngiti-zpxlru, murde trnzrlxngitilru kx Gct atulzpeple Jiszs. ^{26:17} Matiu 28:18-20 ^{26:18} Asaea 42:7, 16

¹⁹ “X mz nzmu-krde lcde, kx King Agripz, ma-nqblqx nzobq-rmwiblengr kc tqvzom Heven. ²⁰ Ryapwxpx-kaipo mz krkcng Damaskzs, x mz nibrde mz krkcng Jerusalem, mz lr Judiz amrlx, x mz kxtrngiulrJiu. Ryapwxbo kx natekqtrlr nqmq nr drtwrdr mz alwx ngrdr x nalxlvrtilr Gct, x naaelwapx-ngrdr kx nztekqtrpelr nqmq nr drtwrdr mz da kx nzalelr. ²¹ Dekc tzolvzngr lr Jiu ninge Mangr-nzangiongr mrkc Jerusalem, x tzrpilr nanibqlr ninge. ²² A' Gct okatrle ninge krlzmle mzbq ka. Mz nzmu-krde lcde, tux mrka, tqpipxbo da lcng mz leplz amrlx, kxmule-esz' kxnztopwzng o kxnzetung. Da kcng tqyapwxtipxx trblepxu mz nikeng nzpilr profet x Mosis kx nangida. ²³ Murde nzpilr kx Kxnzmcpx sa nabz. X sa nanginide doa kx ayrnrngr kx natulz-mou-ngrmle mz nzbzngr x trpengr nzbz-krde. X nayapwxipxle kx Gct sa na-arlapxle nigr lr Jiu badr kxtrngiulrJiu.” ²⁴

²⁴ Pol kx krlzmle mrlc mz nzycmne-krde, sc tqkabolvzpe gavzna Festzs, mz nzrpi-krbzle kx, “Lukurnr-ngrn, kx Pol! Nzkrlz-krm la da kxkqlu alukurnr-ngrde nim!” ²⁵ Rpibz Pol kx, “Trlukurnr-ngrne'u, kx kxetu gavzna! Natq kcng tqpix da angidr x me tukitrle ycbz. ²⁶ King Agripz! Nzycmne-krbo bam trotru, murde krlztipeq da lcng. Krlz-angidrx kx xlrpeq Nrpa ngr Jiszs amrlx, murde da lcng tryc-kapqpeu. ²⁷ ?King Agripz, lxngitiq kx da kcng tzyr pnz profet neng Gct da angidr, o trtingr? Krlzx kx lxngitiq!” ²⁸ Rpibz Agripz mz Pol kx, “?Mzli ka mrbcne, rpiq na-aprtrpeq ninge mz nzlxngiti-krnge Jiszs?” ²⁹ Rpibz Pol kx, “Mzli kxmrbc o kxboi, a' krka'-ngrbo mz Gct kx nim x nimu lcng amrlx tzlalztqmqng bange mzbq ka navz-nqblq-kzamu Jiszs Kxnzmcpx, da kc tqwaix. A' da kx trtingr e sen lcng!”

³⁰ Zbz king kc x gavzna kc x Bernis, x krkc-kzng amrlx nzrkalzmqng. ³¹ X mz nzvzpx-krdr, sc tzrpi-etrpelr kx, “Ncblo lc trpnzngr da kx alele kx nabz-ngrde o na-adwatr-ngrde mz presin.” ³² X Agripz rpibzle mz Festzs kx, “Takitrde ncblo lc na-avzpxpem mz presin nzmu trnarpipeleu nzkotq-krbzle mz king kc etu kc Rom.”

27

Pol Rkalzm Mz Nzialilvcngr Rom

¹ Mzli kc tzaolvztipengr kx kxnzmncng mz presin na-alilvcpelr mzteadau Rom mrkc Itali provins, sc tzaprcpebzlr nidr badr Pol mz kzdq lr Rom drtqde Julizs, kc tqngi kxetu r dzbe ncblo ngr vea kxrtqki-esz' (100). Dzbede lc tqprtr-ngrde mz ami nzrpbiz ‘Ami ne King Kxetu.’ ² Ning Luk x Aristakzs, lr Tesalonika mrkc Masedonia Provins prtzkr badr mz lcsu kx alilvckimle taon Adramitium. Murde na-alilvckile mz taon kznikeng dwaterngr lcsu mrkc Esia Provins. ³

³ Nrlc kxngrlxbz kaputrpzkr mz taon kxetu Saedon. Kxetu Julizs mrlztxde Pol, x rlr-ngrbzle nzvz-krde murde namcle kztedeng mz nzrkan-grbz nikeng suti drtwrde. ⁴ Alilvc-mopwzkr mz nzrlasz-krgr mrlc. X sc tqalilvcikekr mz nrlar trmctu Saepras kc tqwq-epe, murde nrlarde kc alilvckibzkr wqngr nenq. ⁵ Alilvc-wickr prla ngr provins kcng Silisia x Pamfilia, x krlzmgr mz taon Maera, mrkc Laesia provins. ⁶ X mc kxetu Julizs kc lcsu alilvckimle taon kxetu Aleksadria mrkc Ijipt, na-alilvckile Itali provins. Zbz sc tqaprtzpele nigr elr mz nzalilvc-krgr Prla Meditrenia. ⁷ Alilvc-lrpitinekr zbz kqlupe murde nrlc trka prla. Zbz sc tqesotrpebzkr

^{26:20} Rom 15:16; Galesia 2:8 ^{26:23} Rom 8:29; 1 Korint 15:20; Kolosia 1:18; Hibru 1:6 ^{27:1} Aposol 10:1 ^{27:2} Aposol 21:18; Kolosia 4:10; Filimon 24

mz taon Nidzs. Nenq kc tr-rlrpe-ngrpleu nzalilvcpx-moungr rlu kxipiz, sc tqalilvckiopekr mz nrlarde kc tqwq-epe mz trmctu Krit, tqrlaszpekr ncte kc Salmone. ⁸ Mz nzkawi-krgr ncte lc, rblxtx zlwz, a' esolvztitrkr mepz mz nzalilvcngr. X alilvctrpgr mz kzdq nrlc nzrpibz 'Nabzn Kxmrlz,' trycpwzu rlu mz taon Lasea.

⁹ Mzli boitx nzaenzli-krgr nrlc kxmrlz, a' krlzbzle Oktobz, temz kx nrlc trka-zlwz-ngrde mz nzalilvc-moungr. Zbz Pol kc tqrkapebz natq. ¹⁰ Rpibzle kx, "Ncblo lcng, mwz nrlc natrka-zlwzpe. Nzmu na-alilvcku mzli ka, lcsu x kago ngr lcsu amrlx sa naodati, x nabzti kzdung nigu." ¹¹ A' kxetu Julizs kc lxngiti-txpwzle da kx nzpilr kapten x kzdu-kzng leplz, x trngiu da kc tqpibz Pol. ¹² Me dwangr lcsu mrkc trngiu nabzn kxbrngz mz nzaenzlingr mzli kx nrlc trka-ngrde. Mz nzmu-krde lc, ncblo kxnzkqlu-zlwzng nzlxngitipelr na-alilvcpxpengl prla, murde nakrlz-ngrbz taon Finiks mrkc trmctu Krit, murde ngi nabzn kxbrngz kx nadwa-zpxnxngr mzli kx nrlc trka-ngrde.

Lcsu Alilvctile Wiki Li Mz Nabz Nenq Kxetu

¹³ Kzdq nenq kxtopwz vzkimle mz trlaki, x nzpnzkr drtwr ncblo kcng le, nzatutrpelr da kx suti drtwrdr. Mz drtwr lc, nzveclzlr agz, x sc tzalilvc-zlipelr trmctu Krit, x nzesotr-zlwzng mepz. ¹⁴ A' mzli trboiu kzdq nounenq kx xplr wqtxom mz trmctu kc. ¹⁵ Tztitrle lcsu kc, x drtwrgr kc tqmatxpe nzabzpxngr nzalilvcngr. Zbz sc tzavzopelr nqni ngr lcsu kc x tzrlrpe-ngrbz nztwzkr neng le, murde rblxpe nzrveti-krde nenq kc. ¹⁶ Kx krlzbzkr nrlar Trmctu Klauda kxwq-epe kxipiz, sc tqpe-amqngipekr bot ngrde, a' rblxtitxde nigr. *

¹⁷ Nzveclzmlr mz lcsu. Zbz nzpe-ngale-ngrdr lcsu kc kzdung nqvi mz nzamqngi-krdrle. Nzmxlrl-ngrdr ma tzwxlzng mz lvxlzng drta' mz nabzn Sirtis, mrkc Libia, Afrika. Zbz nzavzolr dalr nzulvzng lcsu lc mz nrlc kxtrka, murde nalolvzle lcsu mz nztwzkr neng le. ¹⁸ Rtctinepe-ngrde nigr ebio ngr neng kc. Zbz mz nrlc kxngrlxobz sc tzrtctiope-ngrdr kago ngr lcsu kc prla. ¹⁹ Mz zbzq kratq sc tzrtcope-ngrdr kzdung dalr lcsu kc mz mqdr. ²⁰ Trlipu kc twztile nigr zbzq kqlu kx trmetikru nepi x vri ngr bongavz. X neng kc nxzplrtx-zlwz-krde sc tqyctx mrkc tqyc-ngrde. X drtwrgr matxpe nzobqtipxngr nzrlapxng.

²¹ Mz nibr trnzmutipe-krgru zbzq kqlupe, Pol tulzm mz mzirgr. Sc tqrpipemle kx, "Ncblo lcng, nalalztq-pnzmamu bange x bzkq alilvcpx-pnzmgu trmctu Krit, ma da kang trna-atrkatiu x trmrbrtiu. ²² A' mzli ka, axglrbo nimu. Bzkq nabzmu taprlzm! Trpnzng r nigu kx nabz, a' nangi txpwz lcsu kx naodati. ²³ Murde kau Gct kc tqngi nede ninge x tqangiox, enjrl nede vzm bange. ²⁴ X rpimle kx, 'Bzkq mwzlrq, kx Pol! Sa natutrpzme mz king kc etu kc Rom. X mz nzmrzti-zlwzkr Gct nim, dekc na-arlapx-ngrde nimu badr krlang tqalilvcnenamu badr!' ²⁵ Mz nzmu-krde lcde, kx ncblo lcng, bzkq nelzmu taprlzm! Murde lxngitix kx nakxmu-txpwzle da kc tqwai nzpi-krmlele bange. ²⁶ Lcsu ka sa nawxlz mz kzdq mapz ngr trmctu."

²⁷ Ngipe nrckxbq kranzpn-esz'-nrade-pwx (14), x sc tqapetinede nigr neng mz nabz prla lc, mz kzdq nrlar prla nzrpibz Prla Adrixtik. Mz aurnrlc, nzpnzkr drtwr ncblo kx nzwzng mz lcsu kc kx esotinepebzkr mepz. ²⁸ Zbz sc tzavoopelr kc nqvi prla nzpetr elr da kx mrlepu x nzmclr kx nzbookr mrkc nabx nzpnu-li (20). Mzli trboiu nzale-moulr x nzmclr kx nzbookrde nabx nzpnu-esz'-nrade-nzlvqn (15). ²⁹ Nzmxlrlng murde lcsu scgr

* ^{27:16} Bot r lcsu o-zlinepwz lcsu rde, a' mz nrlc kxtrka nzveclz mz lcsu.

ma tqprtz mz rplz kcng. Zbz nzrtco-ngrdr agz pwx mz mrtwz' kxrm ngr lcsu kc, x sc tzkrka'tipelr nrckxngrlx. ³⁰ Krkcng tzwzng mz lcsu nzabzlr nzrlaszpxngr lcsu kc. Nzavzolr bot kc prla, x narpi-rbz kx nartco-moulr du kzdung agz mz mrtwz' kx rtwayz ngr lcsu kc. ³¹ A' rpibz Pol mz kxetu Julizs x ncblo ngr vea nedeng kx, "Nzmu ncblo lcng nadwaszlr lcsu, trpnzngr nzrlapx-krmu." ³² Zbz ncblo ngr vea kcng nzlakitpxlxr nqvi kcng tqdotrngr bot kc, x sc tqtaope prla.

³³ Nrlc kc tqmule nangrlxppe, x Pol sc tqrngidrlvzpele nidr amrlx ngrdr nzngq-krdr du dakxnzng. Rpibzle kx, "Aenzlipe-ngrnamu da kx naprtz krlzmle mzbq nzpnu-esz'-nrade-pwxpe (14) ka, x mzli lcng trgalar da kx ngqnamu. ³⁴ A' mzli ka rpibo bamu ngqamu du dakxnzng, nangi dalr nzrlapx-krmu. Trpnzngr nimu kx nabz x kx nrkrdrtqdr na-ataki." ³⁵ X sc tqrtrngztypebzle kcng bret, awitxbz mz Gct mz mztr, lopxitxde, x sc tqmupe. ³⁶ Dekc tqaxglrle drtwrdr x nidr amrlx ngrdr nzmutx-kzng dakxnzng. ³⁷ Nzkqlu-krgr krlbzle trtqki-li-nzpnu-rlimz-nrade-esz'mz (276) kx mncomgr mz lcsu kc. ³⁸ Mz nibr nelzdr nzkrlc-krde, sc tzamingrnrengnegrdr lcsu kc mz nzrlxo-krdr bxli r wit kcng prla.

³⁹ Nrlc kxngrlxobzle, kc trnzkrltxtrpwzlsru nibr nrlc kc. A' nzmclr kzdq nabzn kx drta'ngr. X sc tzrpipelr kx na-aminilzpelr lcsu kc elr, nzmu kx tqtaglitrdele. ⁴⁰ Zbz nzlakitpxlxr tolva kcng x nzrlrtx-ngrbzlr nzboo-krdrng. X nzyokaepx-kzlr nqvi kc tqlolvzle stia kcng. X sc tzveclzpelr nqni kc mz mrtwz' kx rtwayz, murde nenq natwztrle mepz. ⁴¹ A' lcsu kc sc tqwxlzpe mz kzdq mapz kx wxbu prla. Mrtwz' kx rtwayz wxbutxom elr mqngitx pnz, a' mrtwz' kxmq, sc tqtaglctrpe nrc, wzpe mulide.

⁴² Ncblo ngr vea kcng nzryrlqpeng drtwr mz nzrnbqtingr krkcng tzpresinqng, murde ma tzwtrng mepz x sc tzdwapeng. ⁴³ A' kxetu Julizs rpile na-arlapxle Pol, sc tqrpwa'pe-ngrbzle badr. Rpi-alzupwzle mz ncblo kcng tzkrlzlr nzwrngr, kx nadwao-kaing prla x nawrtrng mepz. ⁴⁴ X krkc-kzng nzblco-kzpzung nzwr-ngrdr trprpa x kzdung muli lcsu kc, x delc tqrlatr-ngrgr amrlx ngrgr mepz.

28

Ningidoe Makxle Pol

¹ Mzli kc tqkrlztrpe-ngrbzkr mepz, sc tzpipem bagr kx krlc trmctu Malta.
*

² Lr mrlcde nzmrzti-zlwzlr nigr. Nztelvzbzlr kc nyr namulq-ngrgr, murde tewa dc x nrlc bao. ³ Pol kc tqrmikanepa nanr, x sc tqyrlqlzpele mz nyr. Zbz kzdq ningidoe kxtrka kc tqngrlapxpe, murde nzulr nyr kc. X sc tqmakxpebzle mqde, x tqdotrpebz. ⁴ Lr trmctr kcng nzmclr nzdotrkr ningidoe kc, sc tzrpi-etrpelr kx, "Nanginide ncblo kxrniqb, murde kxmule-esz' rlapxpe prla, a' gct rgr kc tqayzlubz da mz leplz tr-rlr-ngrpawzle bade nzlu-krde." ⁵ A' Pol bikrltxzle ningidoe kc mz nyr, x trpnzngr da kx atrkatrzple bade. ⁶ Sc tzaenzlibzlr nzvaolzkr mqde o nzbz-amrnatx-krde. Nzaenzlilr mzli boitx, a' trtxpnzngr. X sc tztekqtrpelr drtwrdr, tzrpipelr kx nide kzdq gct.

⁷ Mrkc tqprtza-ngrmgr mepz esotrpz elr kc drtc' kxetu nyz Pzblizs, kxetu r trmctu kc. Abrtzlvzle nigr x prltxmle bagr nivz. X zbz tq mnctikr ma nyzde. ⁸ Trte Pzblizs sc tqyrbq mz nelvq yagoxtx, drtqde pq, x nelzde vo. Pol vztrpz bade, krka'tx, maleobzle nide, x sc tqamrlzpebzle nide

* ^{28:1} Nenq kc twztile lcsu scdr prla kilomita trtqki-rpwxmz (900). Nzboi-krde takitr mrka Santz Krus krlbzle Isabel. ^{28:5} Mak 16:18

mz zyagox kc. ⁹ Kx nzmc lr trmctu kc nzmrlzkr trte Pzblizs, leplz amrlx kxnzyagoxng sc tzvzpqemqng x Pol amrlzbzle nide. ¹⁰⁻¹¹ Mnctikr Malta temz tq, mz nzaenzli-krgr nrlc kxmrlz. X lr Malta lcng nzkamlr bagr da kxkqlu mz nzamrlue-krdr nigr. Kzdq lcsu dalr taon kxetu Aleksadria nzrpibz ‘Gct kc Tqlipxm’ yc-kapq-kz-ngrde nenq mz trmctu kc. X mzli kc na-alilvcpe-ngrgr mz lcsu lc, lr Malta nzyrlqlbzlr elr nikeng amrlx nasuti drtwrgr prla, mz nzokatr-krdr nigr. Zbz sc tqalilvcpekr.

Nzalilvcngr Mrkc Rom

¹² Mz nzalilvc-krgr lc, alilvctrkr mz taon kxetu Sirakus, taon kxmyapxbz mz trmctu Sisili, murde me nzalilvctrngr lcsu nide lcde. X mnctikr elr zbz tq. ¹³⁻¹⁴ Rkalzmgr mrkc x sc tqalilvc-mopwzkr, x alilvctrkr mz taon Rejizm. Nrlc ngrlxobz nenq abzole nzwq-ngrm mz ulu. X mz zbz krali sc tqkrlzpebzkr taon kxetu Puteoli, me dwatrngr lcsu, mrkc Itali Provins, murde navzkr Rom. X mckr kzdung mzlegung mz Kraes mrkc Puteoli kx nzrpiml namnctikr badr wiki naesz'. ¹⁵ Lrmakxtr kx nzmnncng mzteadau Rom nzxlrlr nzvz-krbzkr. Zbz sc tzrtangrtinepebzlr nigr, murde navebzlr nigr Rom. Nzvzbzng x kzdung nzrmctilr nigr mz mztea Apisz mrkc nzamwangr da, x kzdung nzrmctilr nigr mz kzdq mztea drtqde ‘Ma Nyz Lrnarnrlc Kcng Tq.’ Kx mc Pol nide, apqtrpzle drtwrde, x awitxbz mz Gct.

Nzmnckr Pol Rom

¹⁶ Kx krlz-angidrbzkr kc mzteadau Rom, Pol kc tzrlrpe-ngrbz nzmncc-krde esz'-krde mz kzdq ma. X kzdq ncblo ngr vea tqaclevewzle nide. ¹⁷ Mz nibr zbz kratq, Pol sc tqaveatipeleng kxnrmailz r lr Jiu mrkc Rom, kx nayrlwr-lxblrbzng bade. Kx nzyrlwr-lxblrpelr, sc tqrpipebzle badr kx, “Mzlengeng! Kxmule-esz' trvecpx-lzbqpwu mz lr mrnyzgung x trpibqtiwxu nqmq kcng tqkaom melrmqgung, a' nzadwatrlr ninge mz presin Jerusalem x nzkaobzlr ninge mz lr Rom. ¹⁸ Nzaveatrlr ninge kxnenetu kcng Rom. X nzmclr kx trpnzngr da kx vz-rbrix kx takitrde nzrnbqng ninge, x nzrpilr narlr-ngrmlr nzvzpe-krnge. ¹⁹ A' kx trnzutiu drtwr lr Jiu nzrlr-ngrm nzvzpe-krnge, delc tqrlxti-ngrne nzkotq-krnge mrka Rom mz mz king kxetu, kxmule-esz' trpnzngr da kx pipxbo kx nzvz-rbtilr. ²⁰ Dekc tqsutingr drtwrnge nzmc-krnge nimu. Murde naycmnebo bamu, x nakrlzamu kx nzpenge mz sen lc, murde wztrpo mz Kxnmcpk kc tqobqtipxku, kx na-arlapxle nigu lr Israel.”

²¹ Nzrpibzlr bade kx, “Trpnzngr letz ngr Judiz provins kx krlzmle nigr kx ycmnetr-ngrde nim. X trpnz-kzngr mzlegu kcng Judiz kx vzm mrka mz nzyapwxti-krmle nim mz da kxtrka. ²² A' rpikr naxlrbzkr natqm, murde mrkang kqlu xlrkr leplz nzpibqti-zvz-krdr dzbede lc tqprtr-ngrn.”

²³ Zbz sc tzyrlqpelr kzdq zbz kx navz-mou-ngrmlr. Mz zbz lcde, ncblo kcng tzvzmqng ma kc tqmncngr Pol nzkqlu-zlwzng. Abzo mz nourla, krlzbzle nrlckxbz, yapwx-dalitipxbzle nrpa ngr nzmnclz-krbzlr mz Gct mz nzngini-krde King. X suti zlwz drtwrde kx nalxngitilr Jiszs nzngini-krde Kxnmcpk, mz nzpipx-krbzle natq amrlx kcng tqyclzm mz Lou sc Mosis x nzryrkr profet mz Nzryrngrkxtr kc kai, kcng tzycmnetr-ngrdr nide. ²⁴ Kzdung nide nzlxngitilr natqde, a' kzdung trtingr. ²⁵ Murde drtwrdr tresz'tiu mz natqdeng. Zbz mz nzrlasz-krdr mrlc, Pol pi-kzpze kzdq mou da. Rpile kx, “Mqngkrkxtr pi-angidrbzle mz melrmqmung. Murde rpibzle mz profet Asaea kx, ²⁶ ‘Vzbz mz lr Israel, rpibz badr kx, **Kxmule-esz' obqamu, a' trkrlzwamu da angidr. X kxmule-esz' lalztqamu, a' narmu tryrplatrpwzu.** ²⁷ **Narmu nzamqngipebz, nradrtqmu nzangqpe, x mzpu nzakcpebz, murde ptxpx-ngrnamu**

nzmc-krmu, nzxlr-krmu, x nzlxngiti-krmu da angidr. Mz nzmu-krde lcde, rblxbz bamu nzyzlu-krmamu bange, mz nzatubqti-krnge nabzmu.’” ²⁸ X Pol ayrkrpxle nzycmne-krde, nrzpi-krde kx, “Mz nzmu-krde lc, kx mzlengeng, nakrlzamu kx nrpa ngr nzarlapxkr Gct leplz, nzatwzlrpe-ngrbz mz kxtrngiulrJiu, murde sa nalxngitilr nide!” ²⁹ Mz nibr nzpikr Pol da lc, lr Jiu kcng sc tzrlaszpelr ma nyzde. X nztalwzngr kxetu prtxlz mz mzlirdr.

³⁰ Pol mnctile mrlcde yiz li mz kzdq ma kx bilqle namnc-ngrde. X abrtzlvzle krkcng amrlx tzvzmqng nzmc-krdr nide. ³¹ X trmwxlru nzryapwxpx-zvz-krde nrpa ngr nzmnclz-ngrbz mz Gct mz nzngini-krde King, x nzalvztr-krde kx Kxetu Jiszs nide Kxnzmcpx. X nzrlr-ngrbzlr bade nzryapwx-ngrbz mz leplz amrlx. †

^{28:27} Asaea 6:9-10; Matiu 13:14-15 ^{28:31} 28:29 Mz kzdung nzryrngr kcng pnz ngalrde 29 trnzyrou. 28:31 Mzli kc tqmncngr Pol Rom, yrbzle letz mz dzbe lrmakxtr kcng Efisz, Kolosia x Filipae, x mz Filimon.

Nzryr-krbz Pol Mz Lr Rom Natq Ngr Nzaplxtqng Mz Nzryr-krbz Pol Mz Lr Rom

Aposol Pol yrbzle letz lc mz lrmakxtr mrkc mzteadau Rom, mzli kc tqmnc-ngrde mz taon kxetu Korint. [◊] Mz drtwr kxzakrlzng mz Nzryrngrkxtr, yrle mz mzlir yiz 57—58 AD mz nibr nzrmcngr mz Jiszs. Mzli lc ycpwz pipz nzayrkrpx-krde nzvzpx-krde kratq.

Lr Jiu x kxtrngiulrJiu kxnzrlxngiting nzmnncng Rom. Pol troklatipeleu nidr, a' xlrle nqmq krdr. Ayrkrpxpele nzryapwx tipx-krde Nrpakxmrlz mrkc Provins kcng Masedonia x Esia, x suti kz drtwrde nzvz-krde Spen mz nzryapwx-krde elr. Mz drtwrde, Rom nangi nou nzwz-mou-krde x lr Rom kxnzrlxngiting naokatrler nide mz nzvzpx-krde. Mz nzmu-krde lcde, mrlzbz bade nzyokaetipx-zpwx-krbzle badr Nrpakxmrlz kc tqyapwx tipxle, murde nakrlz-angidrlr da kcng tqalvztr-ngrde, murde tralvztrleu lr Rom mzli kc.

Mz letz lc, Pol pipx-zpwxle kxnamu leplz nztubq-krdr mz nzobqkr Gct. X kxmu nzarlapx-krde nidr. Mc Rom 1:16-17 x 3:21-25.

Mrkcng Mz Letz Lc

Pol pibzle badr nike yrle mz letz lc. [1:1-17]

Mz nzobqkr Gct leplz amrlx takitrde nzprtr-krdr mz Hxl. [1:18—3:20]

Jiszs nide lrpzki r Gct mz nzarlapx-krde leplz. [3:21-31]

Be ngr Ebraam aelwapx-ngrde kx Gct atubqtile leplz kcng tzbrti drtwrdr nide. [dckrlzde 4]

Nztubq-krgu mz nzobqkr Gct okatrle nigu. [5:1-11]

Leplz amrlx nzaleng alwx, a' Jiszs aovxirole alwx x nzbngr. [5:12-21]

Zmrlz ngr Gct kxmyalz trmailzleu leplz mz nzale-krdr alwx. [dckrlzde 6]
Loukxtr tr-rngiscu zmatq ngr nzaprtr-krde kxnzrlxngiting mz Hxl,
murde nzbpeng badr Kraes mz nzaxvctr-krbzle bade. [7:1-13]

Zmatq ngr alwx nzotablrng badr drtwr kxmrlz mz nabz kxnzrlxngiting.
[7:14-25]

Mqngrkxtr wz zvz mz nabz kxnzrlxngiting x nivz lr Gct etu. [dckrlzde 8]
Kxmule-esz' Gct okatrle kxnzlxngitilr Jiszs mz zmrlz ngrde kxmyalz, a'

vz zvz nzatutr-kz-krde da kcng tqesalz-ngrbzle mz lr Israel. [9—11]

Leplz neng Gct navz-nqblq-zvzlr natqde lcng. [12—15]

Pol rpibzle kx, "Nimu la," mz kzdung lr Rom. [dckrlzde 16]

¹ Ning Pol, wztrpo mz Mevalu Jiszs, x ryrbo bamu, nimu kxnzrlxngiting mz mzteadau Rom. Gct kqlele ninge mz nzngini-krnge aposol, x mcpixe ninge mz nzryapwx tipx-krbo Nrpakxmrlz. ² Mzli kc bqnc Nrpakxmrlz lc pipx-pnzbz Gct mz profet nedeng mz nzesalz-krbzle kx sa na-atutre kalr. X nzyrolr mz Nzryrngrkxtr. ³⁻⁴ Nrpakxmrlz lc ycmnetr-ngrde Mrlxde, Kxetu rgu Jiszs Kxnmcp. Mz nzngini-krde leplz, nzmikapx mz nqvi lr King Devet. Kxmule-esz' nide leplz, a' Gct aelwapx-zpwx-ngrde mz zmatq ngrde kx xplrx kx Jiszs ni-kzde Mrlxde kc tqtr-esz'ngr. X alele da lc mz nzatulz-krmlle nide mz nzbngr. ⁵ Gct ka-ngrmle bange nzwzkr aposol, mz nzvz-nqblq-krde da kc tqalem Kraes bange mz zmrlz ngrde kxmyalz, murde namailzx leplz amrlx kxtrngiulrJiu mz nzbrtikr drtwrdr nide x mz nzvz-nqblq-krdr natqde. Murde sa nabatrzle mz leplz kxkqlu nzamatq-krdr Kraes.

[◊] : Rom 15:26; 16:1-2

⁶ X prtrpe-kzpzmz mz leplz kcng tqkqle Gct mz nzngini-krdr leplz neng Jiszs Kxnxmcp. ⁷ Mz nzmu-krde lcde, tqryr-ngrbo bamu, nimu amrlx kcng tzmnncng Rom, tqmrlzti Gct nimu x tqkqlele nimu mz nzngini-krmu leplz kxnxtr nedeng. X krka'-ngrne kx Gct Trtegu badr Kxetu rgu Jiszs Kxnxmcp naokatrler nimu x na-amnc-zpwxlr nimu.

Pol Suti Drtwrde Nzyapwxtipx-krbzle Nrpakxmrlz Mz Lr Rom

⁸ Mz nzyzutrkr letz lc, napi-kaipo bamu kx awi-ngrbo mz Gct nimu amrlx, murde nrpa ngr nzbrtikr drtwrmu Jiszs Kxnxmcp krlzpele mrkang kqlu mz nrlc tulvzo. ⁹ Wztrpo mz Gct mz mqngrnge atwrnrngr, mz nzpipx-krnge Nrpa ngr Mrlxde. X Gct krlzle kx trmrbrtru mz drtwrnge nimu mz nzkrka'-krnge. ¹⁰ Rlxti-zvzbo bade narlr-ngrmle bange nzoklati-krbo nimu. ¹¹ Murde sutilx zlwz drtwrnge nzvz-krbo bamu, murde na-amrlzx nimu mz nzokatrkr Mqngrkxtr x nzrlxngiti-krmu naxplrnepx. ¹² Drtwr ngr nzycmne-krbo lc kx sa naokatr-lzbqku, murde nzrlxngiti-krmu sa na-apqtrple drtwrnge x nzrlxngiti-krnge sa na-apqtrpzle drtwrmu. ¹³ Mzlengeng x inwengeng, suti drtwrnge kx nakrlzamu kx nzwrde kqlupe aotingr drtwrnge nzvz-krbo bamu. A' vzm krlzmle mzli ka sc tqrblxtxbe. Suti drtwrnge nzvz-krbo murde naokatrpo nimu lr Rom mz nzrlxngitingr, da kc tqwaisrpe-ngrne mztea nyz kzdung kz leplz. ¹⁴ Murde Gct kapxle natq kx nayapwxtipxbo Nrpakxmrlz mz leplz amrlx mz nrlc tulvzo, myapxbz kxtrngiulrJiu, kxmule-esz' nqmq krdr blepxbz o trtingr, x kxmule-esz' kxnsiklung o kxtrnzsikluung. ¹⁵ Delc tqsutilx-zlwzngr drtwrnge nzpipx-krbo Nrpakxmrlz bamu, nimu lr Rom.

Zmatq Ngr Nrpakxmrlz

¹⁶ Glqpx-lzbq-ngrne Nrpakxmrlz, murde angidatile me pnz drtwrnge. Nrpakxmrlz lc tqngi nou zmatq ngr Gct mz nzarlapx-krde leplz amrlx kcng tzbrti zvz drtwrdr Jiszs mz nzlxngiti-krdr Nrpa lc. Lrpzki r nzarlapxng lc navzki leplz amrlx, abzo mz lr Jiu x kxtrngiulrJiu kc ate. ¹⁷ Murde Nrpakxmrlz lc aelwapx-ngrde lrpzki kc tqyrlqbz Gct mz leplz mz nzatubqti-krbzle nidr mz nzobq-krde. Nztabqngr lc yzutr mz nzbrkr drtwr x yrkrpx mz nzbrkr drtwr. Da kc tqwai nzrpikr Nzryrngrkxtr kx, "Nzlukr kxntubqng tutr mz nzbrtikr drtwrdr Gct." *

Takitrde Gct Nzayrplapx-krde Leplz Kxnzaleng Alwx

¹⁸ Gct kc tqmncm Heven, ngyati drtwrde leplz x ayrplapxle nidr amrlx mz alwx ngrdrng. Murde nzpxtxpx-ngrdr nzalvztrngr angidrng, a' vz zvz nzvz-nqblq-krdr nqmq ngr alwx. ¹⁹ Nzalelr da lc, kxmule-esz' adcpx-lzbqbz badr mz nabzdr x da angidr opx-zpwxbz badr. ²⁰ Yzuo mzli kc Gct tqwz-ngrde nrlc, da lcng amrlx tqwz-ngrde nzaelwapx-ngrbzlr nide mz leplz, kxmule-esz' trnzmcrlu nide. Nakrlzlr kx nide Gct angidr kc tqwz-ngrde nrlc x rngisc zmatq kx yctx alo. Mz nzmu-krde lcde, trpnzngr me ngi noude mz nzrpikrdr kx trnzkrlzlr nide. ²¹ Kxmule-esz' nzkrlzlr kx nide Gct, a' nzpxtxpx-ngrdr nzangio-krdr nide x nzawi-krbzlr bade. Trnzlxngitilru da angidr, a' vz-rbr mz nzyrlq-krdr drtwrdr esz'-krdr mz nqmq kr Gct. Mz nzmu-krde lcde, drtwrdr mrbrtrpz x nzrlxngiti-rbrng. ²² Kxmule-esz'

* ^{1:17} Habakuk 2:4 * ^{1:17} Drtwr ngrde li, murde ycmnetr-ngrde nzlungr mz nrlc ka x nzlungr kxboi Heven. Leplz neng Gct sa namnc-zpwxng mz nrlc ka mzli kznike nzlu-krdr vz-nqblq-ngrde nzbrtikr drtwrdr nide. X nzlungr kxboi Heven vzpxm mz nzabrr-krbzlr drtwrdr mz Jiszs. Mc kz Galesia 3:11 x Hibru 10:38.

nzrpilr nzyrplapxng, a' nzngqngutx-zlwzng. ²³ Murde nztekqtrlr nzangio-kldr Gct angidr kc tqlu alo, tqtr, x tqmyalz, mz nzangio-alzu-kldr mqngr da kxnzlz kxnxzapulr ncblo, utc, animol x da kx nznglaneng. [☆]

²⁴ Mz nzmu-krde lcde, Gct ayrplapxle nidr mz nzrlr-krbzle badr nzmnclz-krbzlr mz zmatq ngr drtwr kxtrka kcng tqyclzm mz nabzdr. Delc tzale-etrngrdr da kx mya-zlwzng drtq. ²⁵ Nztekqtrlr nzlxngiti-kldr nzalvztrngr angidr, mz nzlxngiti-alzu-kldr natq ngr nzpokiangr. Nzangiolr da kcng tqwzng Kxrpalz, a' trnzangiolru nide kc tqtakitrde nzglqpx-zvz-krgule tqyc tqyc. Eu, angida.

²⁶ Mz nzmu-krde lcde, Gct sc tqaprcpebzle badr nzmnclz-krbzlr mz zmatq ngr drtwr kxtrka kx mya-zlwzng drtq. Dekc olvz tztekqtrlr nzrmwimi-kldr ncblo, mz da kx vz-rbr-zlwzbz mz nzobqkr Gct, krcl nzrmwimi-alzu-kldr olvz kztedrng. ²⁷ Mz nqmq lcpwz, ncblo drtwrdr bao mz nzrmwimi-kldr olvz x pqtr alzu mz drtwrdr nzrmwimi-kldr ncblo kztedrng. Ncblo lcng nzrtrngzbzng badr ncblo mou da kx mya-zlwzng drtq. X da kx prpxm elr nztwz-kldr nzayrplapxng mz nrkrdrtqdr kx takitrde nzvz-rbr-zlwz-kldr lc.

²⁸ Zbz Gct sc tqaprcpebzle badr mz zmatq ngr drtwr kxtrka mz nzrtrngzti-zvz-krbzlr da kx trtakitrpleu nzalekr leplz le. Murde aoti drtwrdr kx trtakitrpedeu nzlxngiti-kldr nide. ²⁹ Nabzdr yrbulzm mz da kxtrka, da kxdrka'ngr, x da kx nzvz-rbr-zlwzng kang kqlu, mz nzngini-kldr kxnxztrkibrng, kxnxrkcmnz-ngrng, x kxnxzdobu-zlwzng, x kx drtwrdr trkabz mz leplz, kxnxrnibqng, kxnxzota-zvzng, kxnxzesabrng, kxnxzabrtzlvzlr nzaetq-kldr drtq leplz, x kxnxzrpikiting leplz. ³⁰ X nzpibqti-kzlr nidr. Nzpxtpx-zlwz-ngrdr Gct. Nzxpqbrr-ngrdr leplz. X nzglqpx-lzbqng. Suti drtwrdr nzale-kldr namrlzu r alwx kang kqlu. X trnzamatqlru trtedrng badr lxedrng. ³¹ Nzngqngung murde trnzkxngitlru kx nzvz-rbrng. X trnzyrlqlru natqdr. Trpnzngr nivz mz nabzdr murde tryc-ngru drtwrdr leplz, a' vz zvz nzaetq-kldr drtqdr. ³² Vz zvz nzale-kldr da lcng, kxmule-esz' nzkrlzpeler mz nabzdr kx Gct rpile kx leplz kxnxzmull lcng takitrde nzbztx-krpwzlr. A' da kx trka zlwz, nzabrtzlvz-kzlr kzdu-kzng leplz kcng tzrtrngz-kzpzng da lcng tqtrka.

2

Gct Sa Na-ayzlu-ngrbzle Da Mz Leplz Amrlx Mz Nzvz-nqblq-krde Da Kx Nzalelr

¹ Doa kx rpile kx takitrde leplz nzayrplapx-katongr mz alwx ngrdrng vzrbr! Trmrlzu nzpibqti-krm nidr mz drtwrm. Murde vz-rbrq mz nzobqkr Gct, mz nzale-kz-krm alwx lcng. [☆] ² Napiix Gct kx leplz nzvz-rbrng o trtingr. X krlzku kx da kxnpixle tubq zvz. ³ Bzkq rpiq kx narlapxq kalr mz nzayrplapxkr Gct nim, murde vz-rbr-kzq da kc tzwai leplz kcng tqatubqtiq. ⁴ X bzkq obqszoq nzmyalzkr zmrlz ngr Gct, x nzaenzli-zpxwz-krde. Mwx trkrlzwq kx zmrlz ngrde kxmyalz drtwr ngrde kx trayrplapxleu nim mzli ka, murde narnginyzm mzli r nzyzlu-krm drtwrm x nztekqtr-krm nqmq nr drtwrm.

⁵ A' narm mqngi zlwz murde pxtpx-ngrn nztekqtr-krm nqmq nr drtwrm. Mz nzmu-krde lcde, aetunepx-zlwzq nzayrplapxkr Gct nim. Mz Mzli Kxmatq kc navzm, Gct sa napipxle kxnxvz-rbrng o trtingr, mz nzvz-nqblq-krde nztubq-esz'ngr-krde. X sa na-ayrplapx-zlwzle kxnxzaleng alwx

[☆] 1:23 Lou Kcpwz 4:16-18; Sam 106:20 [☆] 2:1 Matiu 7:1-2

mz zngya ngr drtwrde. ⁶ Murde sa na-ayzlubz Gct mz doa kxes' mz nzvz-nqblq-krde da kx alele mz nrhc ka. ⁷ Sa nakabzle nzlungr kxboi mz leplz kcng tzvz zvz nzale-krdr da kxtubq, mz nzaenzli-krdr nzamatqkr Gct nidr x nzptr-krdr mz nzlungr kc tqyc zvz. ⁸ A' sa na-ayrplapx-zlwzle mz zngya ngr drtwrde leplz kxdrka'-ngrng kcng tzpxtxpx-ngrdr natqde mz nzrpi-krbzle badr da kxtubq x da kx vz-rbr. Murde nzvz-nqblq-zvzlr me pnz drtwrdr esz'-krdr. ⁹ Gct sa nabatrpzle nzkxpungr x nzetqkr drtq mz leplz amrlx kcng tzalelr da kxtrka. Sa na-ale-kaipzle mz lr Jiu mz nzngini-krdr leplz kcng tqmcpx-kaileng, x kxtrngiulrJiu kcng ate. ¹⁰ A' sa nabatrpzle nzmrluengr kxetu x nzmnc-zpxnxngr mz leplz amrlx kcng tzalelr da kxmrlz. Sa na-ale-kaipzle mz lr Jiu, x kxtrngiulrJiu kcng ate. ¹¹ Murde mz nzobqkr Gct leplz amrlx nzes'ting, x kxmu nzayzlu-krbzle da badr tubq zvz.

¹² Sa na-adwatr Gct mz Hxl kxtrngiulrJiu kcng tzaleng alwx, kxmule-esz' trnzkrzlr Loukxtr scde. X sa na-ayrplapxle lr Jiu kcng tzxpqbrr-ngrdr Loukxtr, mz nzkrlz-zpxnx-krdrle. ¹³ Murde nztubqkr leplz mz nzobqkr Gct, trtutxtrpwzu mz nxzlr-krdr o nzkrlz-krdr Loukxtr, a' vzpxm mz nzvz-nqblq-zpxnx-krdrle.

Gct Sa Na-ayzlu-ngrbzle Da Mz KxtrngiulrJiu Mz Nzvz-nqblq-krde Da Kx Nzalelr

¹⁴ Krlzamu kx kzdung kxtrngiulrJiu nzvz-nqblqlr natq kc tqkabz Loukxtr, murde nzkrlzlr kx da lcng mrlz, kxmule-esz' trnzxlrIru Lou lc. ¹⁵ Krlc aelwapx-ngrde kx kzdung natq mz Loukxtr ycpxpe-kaip mz nabzdr. X mz nabzdr nzkrlzlr mzli kznike nzale-ngrdr da kxmrlz o da kx vz-rbr. ¹⁶ Da lcng amrlx sa naprtzng mzli kc Gct naobqtr-ngrde mz nqmq kr leplz amrlx x mz drtwrdr kcng tqyc-kapq. X sa nayrlqle Mevalu Jiszs mz nzpipx-krde kx nqmq kr leplz mrlz o trtingr. Krlc Nrpa kc tqyapwxtipxx.

Gct Sa Na-ayzlu-ngrbzle Da Mz Lr Jiu Mz Kxmu Nzvz-nqblq-krdr Loukxtr

¹⁷ Nimu lr Jiu, lalztqmamu bange. Kzdung nimu nzrpilr kx nimu doa neng Gct murde krlzamu Loukxtr. X glqpx-lzbqamu kx tubqamu mz nzobq-krde. ¹⁸ Krlzamu me pnz drtwr Gct x krlz-kzamu da kxmrlz x da kxtrka, murde nzalvztrpz bamu Loukxtr. ¹⁹ Mz drtwrmu rpiamu kx namailzbzmu leplz kcng tzmnc-mrbrng mz Gct, mz nzalvztr-krbzmu da angidr. ²⁰ Rpi-kzamu kx krlzamu nzalvztrngr leplz kcng tzapulr doa kxnxtopwzng, x krkeng trpnzngr da kx pnz drtwrdr. Murde krlzamu Loukxtr mrkc tqyclz-ngrm da amrlx kx takitrde nzalvztrngr angidr x da kx suti drtwr Gct nakrlzku.

²¹ Alvztramu leplz, a' trvz-nqblqwamu nzalvztr-krmu lcng. Yapwx-tipxbzmu badr leplz kx bzkq nzpnang da, a' nimu ke ye tqpnama da. ²² Rpibzmu badr kx nayrlq-angidrlr nzesalz-krdr mz nzyrlzngr, a' trvz-nqblqwamu natqmu esz'-krmu. Pxtpx-ngrnamu nzangio-krmu mqngr drka'ng kxnzlz, a' nimu ke ye tqatrkti-lzbqamu mz nzmale-krmu da kx pnatipxmamu mz ma ngr nzangiongr nidr. ²³ Glqpx-lzbq-ngrnamu nzmnclz-krbzmu mz Loukxtr, a' rnzlvzoamu Gct mz nzobqkr kxtrngiulrJiu kcng trnzrlxngitiung mz nzxpqbrr-krmu natqde. ²⁴ X atutramu natq Gct mz Nzryrngrkxtr kc tqrpile kx, "Leplz kcng trngiulrJiu nzpibqtilr Gct murde da kx nzale lr Jiu, mz nzngini-krdr leplz nedeng." ²⁵

²⁵ 2:6 Sam 62:12; Nzyrplapxng 24:12 ²⁴ 2:24 Asaea 52:5; Esikel 36:20-21

²⁵ Nzrpakrngr ngi rkx mz nrkrdrqmu, nimu lr Jiu, kx nimu doa neng Gct. X drtwrngrde ycbz mz nzvz-nqblq-krmu Lou scde. A' nzmu naxpqbrlrrnegrnamu Loukxtr apuamu leplz kxnmnc-mrbrng kcng trnzpakru. ²⁶ X leplz kcng trngiulrJiu kx trpnzngr scdr rkx ngr nzrpakrngr mz nrkrdrqdr, nzngini-krdr doa neng Gct tuo mz nzvz-nqblq-krdr Loukxtr, da kc tqwaile mz lr Jiu. ²⁷ Nimu lr Jiu twzamu rkx ngr Gct lc. Krlzamu x rlwxamu Loukxtr. A' kzdung nimu trnzvz-nqblqlru. A' kzdung kxtrngiulrJiu nzvz-nqblq-angidrlr Loukxtr, kxmule-esz' trnztwzlrkx ngr Gct mz nrkrdrqdr. Mz nzmu-krde lcde, mz nzobqkr Gct nqmq lcng li, sa napibzle kx nqmq krmu vz-rbr, a' nqmq krdr tubq.

²⁸ Nznginingr doa ne Gct trtuou mz lxede x trtede nzngini-krdr lr Jiu o mz nzrpakrngr nrkrdrqde. Murde tr-rblxu nzatrkatingr rkx lcng mz trnzrvz-nqblq-ngru Loukxtr. ²⁹ A' doa kx ngi lr Jiu angidr mrlztile x vz-nqblqle Gct mz nabzde. X rkx angidr alepxm Mqngrkxtr mz nabzde. Nzrpakrngr angidr ngi da kx trnzmcu mz nabz leplz, a' trngi-txpwzu rkx mz nrkrdrq ncblo. Kxmule-esz' leplz trnzglqlzlrdoa lc tqtwzle rkx lc mz nabzde, a' Gct sa naglqlz-zpwxle nide.

3

¹?Nzmu doa trtubqu mz nzobqkr Gct mz nzngini-krde lr Jiu, myx kxmule, lr Jiu nzmyaszpxlr kxtrngiulrJiu o trtingr? ?X mrlz nzrpakrngr nidr o trtingr? ² Lr Jiu nzmyaszpxlr kxtrngiulrJiu mz da kxkqlu. X krlc kc tqmyapxbz, Gct yrlqle nidr mz nzaclve-krdr natqde kcng mz Nzryrngrkxtr, mrkc tzyrongr da kcng tqesalz-ngrbzle badr. ³ Da zpwxtx kx kzdung nidr trnzyrlq-angidrlr natqdr mz nzvz-nqblq-krdr Gct. ?A' myx kxmule, drtwr ngrde kx Gct trnayrlq-angidr-kzleu natqde x trna-atutrleu da kx esalz-ngrbzle badr mz Nzryrngrkxtr? ⁴ Bzkqtx pnz! Murde Gct sa nayrlq-angidrlr natqde, kxmule-esz' leplz amrlx nztaong mz da kx nzpilr. Murde King Devet yrle kx, “*Tubqq mz nzsri-krme bange kx vz-rbrx, x mz nzyrlq-krm nzayrplapxng ninge.*” ⁵ Mwx kzdung leplz narpilr kx, “?Nzmu alwx rgrng nzaopx-angidrlr nztubqkr Gct x nztr-krde, e nike, vz-rbr mz nzayrplapx-krde nigr Gct mz zngya ngr drtwrde?” ⁶ Bzkqtx pnz! Murde Gct natubqpzwz mz nzpipx-angidr-krde nztubqkr lr nrlc o nzvz-rbr-krdr. ⁷ A' mwx, kzdq kxdrka'ngr lc narpi-moule kx, “A' nzmu nzpokia-krnge aopx-angidrlr kx Gct atutr-zvzle natqde, x batrpzle leplz nzglqpx-krdr nide, drtwr ngrde kx okatr x nide. ?A' nike tqayrplapx-ngrbele ninge?” ⁸ A' drtwr lc vz-rbr, murde batrple bagu nzsri-krgru kx mrlz nzale-krgru alwx, murde batrpzle mz leplz nzglqpx-krdr Gct. X kzdung leplz nzpibqtilr ninge mz nzsri-krdr kx sc tqayrplapxtipxx da lc! A' takitrde Gct nzayrplapx-krde nidr mz natq lc.

Trpnzngr Leplz Kxtubq Mz Nzobqkr Gct

⁹Pipeku kx lr Jiu nzmyaszpxlr kxtrngiulrJiu o trtingr. A' mz nzobqkr Gct, lr Jiu trnzmyaszpxlr kxtrngiulrJiu, murde leplz amrlx nzmnclzbzng mz zmatq ngr alwx. ¹⁰ Da kc tqwai nzpikr Nzryrngrkxtr le kx,

“*Trpnzngr leplz kxesz' kxtubq. 11 Trpnzngr kx yrplapx. Trpnzngr kx rtangrtile Gct.* ¹² A' nzesablqtilr Gct amrlx ngrdr, x drtwrdr esz'ti mz nzale-krdr da kxtrka. *Trpnzngr leplz kxesz' kx ale da kxmrlz.* ¹³ X mz nzycmne-krdr nzmailzlr leplz mz nzbatr-krbzlr nzbz-krdr esz'-krdr. Natqdr nzlvati apule nipna kr ningidoe kc tqrtq. ¹⁴ Natqdrng amrlx ngi dalr nzrpikitingr, nzrpibqtingr, x nzrpilzng. ¹⁵ Nzoliq-zvzng mz nzrnibqng. ¹⁶ X nzodang

x nzaetqbzlr drtq leplz mz nzvzne-krdr. ¹⁷ X trnzkrizlru nzmnc-krdr badr leplz mz nrwrx. ¹⁸ X trnzamrluelru Gct.” [◊]

¹⁹ Krlzpeku kx nike pipx Loukxtr pibzle mz lr Jiu kcng tzmnclzbzng mz zmatq ngrde. Loukxtr pile natqdeng murde naopx kx mz nzobqkr Gct leplz amrlx nzvz-rbrng, kxmule-esz' lr Jiu o kxtrngiulrJiu, x takitrde Gct nzayrplapx-krde nidr. Dekc trpnzngr leplz kx narpile kx tubq mz nzobqkr Gct. ²⁰ Mz nzmu-krde lcde, trpnzngr leplz kx natubq mz nzobqkr Gct mz nzvz-nqblq-krde natqdeng amrlx, murde rblxbz mz leplz amrlx nzale-zvz-krdrle. Loukxtr trngiu dalar nzatubqtingr leplz mz nzobq-krde, a' ngi dalar nzaelwapxngr kx leplz kcng trnzyatrpwzung mz nzvz-nqblq-krdrle takitrde nzayrplapxngr nidr murde nzaleng alwx. [◊]

Lrpzki R Gct Mz Nzatubqti-krde Leplz Mz Nzobq-krde

²¹ X mzli ka mz nzvz-krm Kraes, Gct aopx-zpwxbzle lrpzki rde kx natubq-ngrbz leplz mz nzobq-krde. Lrpzki lc trngiu Lou sc Mosis, a' ngi lrpzki kx Gct esalz-ngrbzle mz Lou sc Mosis x mz natq profet kcng bqnc. ²² X lrpzki lc nide sele: Gct aotipe drtwrde kx leplz natubqzbzng mz nzobq-krde mz nzbrtikr drtwrdr Jiszs Kxnzmcpx mz nzkatz-krde alwx ngrdrng. Murde Jiszs atutr-zpwxpele me pnz drtwr Gct x Lou scdeng amrlx. Kxmule-esz' doa kznike, a' krlc lrpzki r leplz nztubq-krbzlr mz nzobqkr Gct. [◊] ²³ Murde leplz amrlx nztaong mz alwx x trnzyatrpwzu nzvz-nqblq-krdr nqmq kxmrlz kxtr kc tqyrlqbz Gct badr. ²⁴ A' Gct nakanrbalqbzle nzrlapxngr lc mz leplz amrlx, vzpxm mz zmrlz ngrde kxmyalz. Murde Mevalu Jiszs xpepxele alwx ngr leplz amrlx mz nztekqtr-krde nidr mzli kc tqbz-ngrde nidr mz kros. ²⁵⁻²⁶ Gct tubq-esz'ngr mzli kc x mzli ka. X nztubq-krde drtwr ngrde kx na-ayrplapxle kxzaleng alwx, murde trpnzngr da kxtrka kx namcle. Gct aenzli-zpwxle nzvz-krm Mevalu Kraes mz nzayrplapx-krde leplz kcng pnz mz alwx ngrdrng. Murde yrlqle Mevalu mz nzngini-krde blz kx naxpepxle alwx amrlx ngr leplz amrlx kcng pnz, krkcng mzli ka x mzli kc navzm. X mz nzngini-krde blz kc, Jiszs katxde alwx ngr leplz kcng tzbrti drtwrdr mepyr ngrde mz nzbz-krde nidr, murde nakatx-kzle nzngyatikr drtwr Gct nidr. Dekc tqatubqti-ngrde nidr mz nzobqkr Gct. Gct tubq-esz'ngr murde ayrrlapx-zpwxle alwx amrlx. X atubqtibzle mz nzobq-krde leplz kcng tzlxngitilr Jiszs. Delc Gct tqngi nou nztubqngr amrlx. [◊]

²⁷⁻²⁸ Mz nzmu-krde lcde, trpnzngr doa kx takitrde nzglqpx-lzbq-krde. Murde trpnzngr kx vz-nqblq-zvzle Loukxtr. X nztubqkr doa tuo mz nzrlxngitingr. Mz nzmu-krde lcde, nztubq-krde vzttxpxpq mz nzlxngiti-krde Jiszs, a' trngiu mz nzvz-nqblq-krde Loukxtr. ²⁹⁻³⁰ Nimu lr Jiu, bzkq rpiamu kx Gct lc nide Gct rmu txpwz, x trngiu Gct r krkcng trngiulrJiu. Murde Gct esz'txu kc tqaclevle leplz amrlx. X atubqtibzle lr Jiu mz nzlxngiti-krdr Jiszs x atubqti-kzpze kxtrngiulrJiu mz nzrlxngitingr kcpwz. [◊] ³¹ A' mwz kzdung leplz napilr kx nzatubqtkr Gct leplz mz nzrlxngiti-krdr ayrrkpixe Loukxtr. A' bzkqtx pnz! Murde pipxle da kcpwz tqipix Mosis mz Lou lc.

4

Nztubqkr Ebraam Mz Nzobqkr Gct Tuo Mz Nzbrtikr Drtwrde Gct

[◊] **3:18** Sam 14:1-3; 53:1-3; Kxalvztr 7:20; Sam 5:9; 140:3; 10:7; Asaea 59:7-8; Nzayrplapxngr 1:16; Sam 36:1 [◊] **3:20** Sam 143:2 [◊] **3:22** Galesia 2:16 [◊] **3:25-26** Nou 22:8; 1 Timoti 2:6; 4:10; Livae 17:11 [◊] **3:29-30** Galesia 3:20

¹ Mrlz. Na-aoti drtwrgu Ebraam, kc tqngi melrmqgr, nigr lr Jiu. ?Nike rmctile mz nztubqkr doa mz nzobqkr Gct? ² Nzmu Gct na-atubqtile nide mz da kx aleleng, tr-rblxu nzglqpx-lzbq-krde. A' mz nzobqkr Gct trpnzngr da kx takitrde nzglqpx-lzbq-krde. ³ Murde Nzryrngrkxtr rpile kx, “Ebraam tubq mz nzobqkr Gct, murde brti drtwrde nide.” *

⁴ Trau kc tztwz leplz mz nzwz-krdr trngiu da kx nznka-nrbalqngr, murde nzmabztilr trau lc. ⁵ A' rblxbz mz leplz nzrwztingr nztubqngr lc. Murde ka-nrbalqbz Gct nztubqngr lc mz doa kx brti drtwrde nide kc tqatubqtile kxdrka'-ngrng. ⁶ Devet pi-kzle da lc mzli kc tqycmnepx-ngrde nzabrtz-zlwzkr ncblo kc tqtubq mz nzobqkr Gct kxmule-esz' trwztileu. ⁷ Murde rpile kx, “Doa kx nzipq mz alwx ngrde, drtwrde elalz-zlwzm. ⁸ Murde mz nzobqkr Yawe trvz-rbrpeu.” *

Ebraam Tubq Mz Nzobqkr Gct Mzli Kc Trtwzka-ngrde Rkx Ngr Gct

⁹ Mrlz. ?Myx kxmule, zmrlz ngr Gct lc vzbz mz lr Jiu txpwz, mz nzrpakr-krdr mz rkx ngr Gct? Trtingr! A' vz-kzpz mz kxtrngiulrJiu kcng trnzrtwzu rkx lc. Krlzpeku mrkc tqrpile mz Nzryrngrkxtr kx, “Ebraam tubq mz nzobqkr Gct, murde brti drtwrde nide.” * ¹⁰ ?Myx kxmule, Ebraam tubq mz nzobqkr Gct mzli kc trnzpakrka-ngrde mz rkx ngr Gct o mz nibrdepe? Mzli kc trnzpakrka-ngrde! ¹¹ Murde mz nibrde Gct kabzle natq mz Ebraam kx napakr * mz nzngini-krde rkx ngr nzlxngiti-krde nzesalzkr Gct x nztubq-krde mz nzobq-krde. Mzli lc trnzpakrka-ngrde, Ebraam trngiulrJiu, a' tubq mz nzobqkr Gct. Mz nzmu-krde lcde, Ebraam apule trte leplz amrlx kcng tzbrti drtwrdr Gct, kxmule-esz' trnzpakrung, murde navz-nqblqlr nide mz nzbrti drtwrdr Gct. Delc nztubq-krdr mz nzobqkr Gct vzpxm mz nzbrtikr drtwrdr nide. ¹² X Ebraam ni-kzde trte lr Jiu kcng tzpakrung, mzli kznike nzvz-nqblqlq-ngrdr nide mz nzbrkr drtwr kcpwz tqvz-nqblqlle mzli kc trnzpakrka-ngrde.

*Nzrtwzngr Da Kcng Tqesalz-ngrbz Gct Vzpxm Mz Nzrlxngitingr Natqde **

¹³⁻¹⁵ Esalz-ngrbz Gct mz Ebraam kx sa nakabzle nrlc atwrnrngr bade x doa nedeng mz nzrnginyyz-krdrle. Nzmu Gct na-atutr-txpwzle nzesalz-krdeng mz leplz kx nzvz-nqblqlq-zvzlr Lou scdeng, drtwr ngrde kx mane nzbrtikr drtwrgu nide. X mane kz da kx esalz-ngrbzle murde rblx nzvz-nqblqlq-zvzng Lou scdeng. A' Gct tresalz-ngrp wzleu da lc murde Ebraam vz-nqblqlq-zvzle Lou scdeng, a' murde nztubq-krde mz nzobq-krde vzpxm mz nzbrtikr drtwrde nide. Gct esalz-kai-ngrbzle da lc mz Ebraam, x sc tqka-atebzle Loukxtr mz Mosis. Delc rblx nztubqkr Ebraam nzvzpx-krmle mz nzvz-nqblqlq-krde Lou sc Mosis. *

¹⁶ Mz nzmu-krde lcde, Gct atutr-txpwzle nzesalz-krdeng mz leplz kx nzbrti drtwrdr kx sa nakabzleleng badr. Murde naka-nrbalqbzle mz kxnzrlxngiting nztubqngr lc. X mz nzrlxngiti-krgu, nakrlzku kx natwzku da kc tqesalz-ngrmle bagu, kxmule-esz' vz-nqblqlku Lou sc Mosis o trtingr. Murde Ebraam apu-zpxwle trte leplz amrlx kcng tzlxngitilr Gct, da kc

* ^{4:3} Nou 15:6; Galesia 3:6; Hibru 11:8-12; Jemes 2:23 * ^{4:8} Sam 32:1-2 * ^{4:9} Nou 15:6; Rom 4:3 * ^{4:11} Nou 17:9-14 * ^{4:12} Gct esalz-ngrbzle mz Ebraam da tq mz Buk Ngr Nou. 1) Ebraam nanginede dq doa ncblo x nqvi lrde sa navz zvz. Da lc ngida mzli kc tzmcngr mz Aesak, x nqvi lrde dekc tqngi neidu lrdr lr Israel, x mz nibrde lr Jiu. 2) Doa kx nzvzpxmqng bade nakqlu-zlwzng x narblkx nzrlwxngr. X nanginide trte leplz kxkqlu mz nrlc tulvzo. Da lc ngida murde kxnzrlxngiting amrlx nidr doa nedeng. 3) Sa nakabz Gct nrlc atwrnrngr bade x doa nedeng. Sa na-atutre da lc mzli kc nayzlu-ngrm Jiszs mz nzaclve-krde kxnzrlxngiting amrlx mz nrlc kxmrna. Mzli lc kxtrnzrlxngiting amrlx sa namncng mz Hxl. * ^{4:13-15} Nou 12:3; 13:14-17; 15:4-5; 17:2-8, 16, 19; 22:15-18; Galesia 3:17, 29

tqwaile. ¹⁷ Krlc drtwr ngr Nzryrngrkxtr mz nzrpri-krde kx, “*Mcpxpex nim nzngini-krm trte leplz ngr nou x nqvi kxkqlu.*” ¹⁸ Da lc ngida murde mz drtwr Gct Ebraam nide melrmqgu nigu amrlx. X Gct lc rngisc zmatq ngr nzatulz-krde kxnzbzng x mz nzrwzngr da mz nzycmne-krde txpwz.

¹⁸ Kxmule-esz' rblx, a' Ebraam obqtipxle mz nzrlxngitingr x nipedre trte leplz ngr nou x nqvi kxkqlu, da kc tqwai nzpi-krbz Gct bade kx, “*Nzkqlukr doa nemqng sa na-apule vri ngr bongavz.*” ¹⁹ Nzbrkr drtwrde trycngrlru, kxmule-esz' krlz-zpxle kx trtakitrpeleu nide nzngini-krde trte doa, murde yiz ngrde krlzpebzle nzpnu-rpwxmxz-nrade-rpwxmxz (99), x Sera nipedre blang x vz-nrbalq. ²⁰ X drtwrde trlitrpwzu mz nzatutrkr Gct natqde kalr. A' nzrlxngiti-krde xplrnepx, x glqlz-zvzle Gct mz da kx esalz-ngrbzle bade. ²¹ Murde brti zvz drtwrde kx sa na-alele da lc. ²² Mz nzmu-krde lcde, “*Ebraam tubq mz nzobqkr Gct, murde brti drtwrde nide,*” trnzyrou mz nzokatr-krde Ebraam esz'-krde. ²⁴ A' nzyro kz mz nzokatr-krde nigu, murde nakrlzku kx tubqku mz nzobq-krde mz nzabtrtr-krbzku drtwrgu mz Gct kc tqatulz-mople Kxetu rgu Jiszs mz nzbz-krde. ²⁵ Gct rlrpx-ngrde Jiszs nzayrplapxngr nide mz alwx ngrgung mz nzbz-krde. X atulz-mople nide mz nzbzng murde natubqku mz nzobqkr Gct mz nzxpepxkr Jiszs alwx lcng.

5

Kxnzrlxngiting Nzmnc-lxblr-moung Badr Gct Mz Nrwx

¹ Mz nzmu-krde lcde, tqtubq-ngrgu mz nzobqkr Gct, murde lxngitiku Kxetu rgu Jiszs Kxnzmcpk x brti drtwrgu nzbz-krde mz nzarlapx-krde nigu. Mz nzmu-krde lcde, navz zvz nzmnc-lxblr-krgu badr Gct mz nrwx.

² Mz nzlxngiti-krgu Kraes, dekc tqmnc-aepztr-ngrbzku mz Gct. X okatr-zvzle nigu murde nzaxvctrpebzku mz Kraes. X abrtzlvzku nzobqtipx-krgu nzyzlu-krm Kraes, murde mzli lc sa naprtr-kzku mz nzmyalz-krde. ³ X abrtzlvz-kzku nzkxpungr mz nrhc ka, murde alvztrple bagu kx natu-amqngilzbzku bade mz nzrlxngitingr. ⁴ X nztu-amqngilz-krbzku mz nzkxpungr alvztrple bagu kx drtwrgu natubq. X nztubqkr drtwrgu alvztrple bagu kx naobqtipxku Gct mz nzangidati-krde natqde. ⁵ X krlzku nzbztrikr drtwrgu Gct nzangidati-krde nzobqtipx-krgu, murde xngibzku nivz lrde mz nabzgu mz nzwzkr Mqngrkxtr kc tqkamle bagu.

⁶ Na-aoti drtwrmu da lc. Rblxm bagu, nigu leplz, nzarlapx-lzbq-krgu. Kxmule-esz', a' mzli kc tqkrlzpe-ngrbzle mzli kc tqyrlq Gct, Kraes bz mz nzarlapx-krde nigu kxnxaleng alwx. ⁷ Leplz kxipiz kx nzrlrpx-lzbq-ngrdr mz nzbz-krdr nzarlapxngr doa kzble, kxmule-esz' doa lc tqmrlz. A' mwk kzdq leplz narlrpx-lzbqngz mz nzbz-krde mz nzarlapx-krde doa kx mrlzesz'ngr. ⁸ A' mzli kc tqalebe-ngrgu alwx, Gct aelwapx-ngrde nzmrlzti-zlwzkr nivz lrde nigu, mz nzbzkr Kraes nigu. ⁹ Naopx angidr kx Kraes sa na-arlapxbzle nigu mz zngya ngr drtwr Gct. Murde tubqpeku mz nzobqkr Gct mz nzbzkr Kraes nigu. ¹⁰ X naopx angidr kz kx mz nztulz-mou-krmlle mz nzbzng, Kraes sa na-arlapxbzle nigu mz nzayrplapxkr Gct nigu kalr. Murde Gct amnc-lxblrtrpele nigu badr mz nrwx mz nzbzkr Mrlxde mzli kc tqnginibe-ngrgu enqmi rdeng. ¹¹ X mou, mzli ka abrtzlvz-zvzku Gct mz nzmnc-lxblr-krgu badr mz nrwx, mz nzwzkr Kxetu rgu Jiszs Kxnzmcpk.

Adzm Twzmle Nzbzng, A' Kraes Twzmle Nzlungr

¹² Mzli kc Adzm tqtao-ngrde mz alwx, alwx lc nzaxvctr-kzpz mz nqvi lrde. X alwx lc twz-kzple nzbzngr. X nzbzngr lc prtzbz mz leplz amrlx murde nztao-kzng mz alwx mz nzngini-krdr nqvi lr Adzm. ¹³ Nzvz-rbr-krdr lcng ngi alwx, kxmule-esz' Gct tr-rkakapz Loukxtr. A' rblx nzrpingsr kx leplz nzaleng alwx mzli kc trgalr lou kx na-alvztr-ngrde nidr mz alwx. ¹⁴ Kxmule-esz', a' opx angidr kx nzaleng alwx murde nzbzngr. Abzo mz mzli nyx Adzm krlzmle mzli nyx Mosis, leplz amrlx nztaong mz alwx x nzbzngr, kxmule-esz' trnzxpqbrrlr-ngrdru natq angidr lc tqkabz Gct, da kc tqwai Adzm.

Mrlz nzkrlz-krgu kx Adzm ngi rkx kc tqplzpx-kaile Kraes kc navzm, mz nzbatr-krbzlr da mz leplz kxkqlu. ¹⁵ A' alwx ngr Adzm blepx-zlwzbz mz nzipqkr Gct leplz. Murde Adzm batrzple nzbzkr leplz kxkqlu mz alwx ngrde. A' Jiszs Kxnzmcpx batrzple nzipqngr leplz kxkqlu mz zmrlz ngr Gct kc tqka-nrbalqzbzle badr. ¹⁶ Mz nqmq lcpwz, alwx ngr Adzm batrzple nzayrplapxngr leplz kxkqlu mz nzbzngr. A' da kc tqka-nrbalqzbz Gct batrzple nzrkapxngr alwx ngr leplz kxkqlu x atubqtile nidr mz nzobq-krde. ¹⁷ Da zpx kx alwx ngr Adzm amnclzbzle leplz mz zmatq ngr nzbzngr. A' nzwzkr Jiszs Kxnzmcpx myaszpx-zlwzle da lc. Murde leplz amrlx sa na-aovxio-zpxlr zmatq ngr alwx x nzbzngr mz nzprtr-krdr mz nztubqngr kc tqka-nrbalqzbz Gct badr.

¹⁸ Mz nzmu-krde lcde, alwx kc esz' tqale Adzm drtwr ngrde kx takitrde Gct nzayrplapx-krde leplz amrlx. Mz nqmq lcpwz, da kc esz' tqale Kraes mz nzvz-nqblq-krde me pnz drtwr Gct mz nzbzngr, drtwr ngrde kx leplz amrlx kcng tzrlxngiting nzkrlzlr nzprtr-krdr mz nztubq-krde x mz nzlungr kxboi.

¹⁹ Leplz kxnzkqlu nzaleng alwx, murde Adzm trvz-nqblqleu natq Gct. X mz nqmq lcpwz, leplz kxnzkqlung sa natubqng mz nzobqkr Gct murde Jiszs vz-nqblq-zvzle natqde. ²⁰ Gct kao-ngrmle Loukxtr murde leplz nakrlz-zpxlr kx nzvz-rbr-zvzng. A' mz nzetunepxkr nzmc-krgu kx alwx ngrgung trka zlwz, zmrlz ngr Gct kc tqmyalz sc tqetunepx kz, mz nzipq-krde nigu leplz.

²¹ Mz nzmu-krde lcde, mzli kc leplz amrlx nzmnclz-nqblqpeku mz zmatq ngr alwx x nzbzngr. A' mzli ka mz nzvz-krm Kraes, mnclzpebzku mz zmatq ngr nzokatrkr Gct nigu, x tubqku mz nzobq-krde. Delc sa naprtrku mz nzlungr kxboi, murde nzwzkr Kxetu rgu Jiszs Kxnzmcpx.

6

Kxnzrlxngiting Trnzmnclzpebwzung Mz Zmatq Ngr Alwx, A' Nzmn-clzbzng Mz Gct

¹ Mwx kzdq doa napile kx mrlz nzale-zvz-krgu alwx, murde nabatrzple nzetunepx-zvzkr zmrlz ngr Gct kc tqmyalz. ² Bzkqtx pnz! Murde mz nzobqkr Gct bzpeku badr Kraes x trmnclzpekuu mz zmatq ngr alwx. Doa kx bzpe rblxbz bade nztao-krde mz nzatalzng. X mz nqmq lcpwz, mz nzmnclzpeku mzli ka, na-apusr-lzbqku kx nrkrdrqgu bzpe, murde bzqk vz-nqblqpeku alwx x trpengr nzmetx-krbzku bade. ³ Nadcpx mz drtwrmu kx nzaxvctrpebzku mz Mevalu Jiszs mz nzwrkxtr-krgu, x mz nzobqkr Gct bzpeku badr mz kros. ⁴ Bzpeku badr x nzyrtzmpe-kzku badr mz nzwrkxtr-krgu, murde natwz-kzku nzlungr kxmrna kxtr, da kc tqwai Kraes mzli kc tqatulz-ngr-mop Gct Trtegu nide mz nzbzngr, mz zmatq ngrde kx myalz-esz'ngr.

⁵ X mz nzaxvctr-krbzku bade mz nzbzngr mzli ka, sa na-axvctr-zpx-kzpzku bade Heven, mzli kc na-atulz-kzng Gct nigu mz nzbzngr, da kc

tqwaisrpe-ngrde Kraes. ⁶ Murde krlzpeku kx nqmq ngr alwx kx vzo la mz nabzgu nztqlvzmitrpe Kraes mz nzodatitpxx-krbz Gct zmatq ngr alwx nzaclve-krde nigu. Delc mzli ka trmnclzpepwzkuu mz zmatq ngr alwx. ⁷ Murde leplz kznike bzpe, drtqde opxpe mz nzvz-nqblq-krde kc ena zmatq ngr alwx. ⁸ X mz nzbzpe-krgu lc badr Kraes, lxngitiku kx sa nalu-kzku badr. ⁹ Krlzku kx mz nztulz-krm Kraes mz nzbzngr, trpengr nzbz-mou-krde, murde trmnclzpepwzu mz zmatq ngr nzbzngr. ¹⁰ Mzli kc tqbz-ngrde, nzbz-krde nzwrdre esz'txu, a' nzaovxio-krde zmatq ngr alwx lc tqyc tqyc. X mzli ka mz nzluge-krde lc, mnclz-zvzpebz mz Gct. ¹¹ Mz nzmu-krde lcde, nalxngitiamu kx nimu leplz kxnzbzpeng, kcng rblxbz badr nzmetxmou-krbzlr mz alwx. X nalxngiti-kzamu kx Mevalu Jiszs mncpxpem bamu mz nzokatr-krde nimu mz nzvz-nqblq-zpwx-krmu nqmq krde mz nzwztr-krbzmu mz Gct.

¹² A' bzkq rlr-lzbqpe-ngrbzmu mz nzmnclz-krbzmu mz zmatq ngr alwx, murde ma tqvz-nqblqamu. *

¹³ Bzkq pnz rlr-ngrbzmu kzdq nrlc mz nrkrdrqmu mz alwx, nangi dalr nzalengr da kxtrka. A' rlr-lzbq-ngrbzmu mz Gct, murde kapebzle bamu nzlungr kxmrna. X rlr-lzbq-ngrbzmu bade mz nrkrdrqmu atwrnrngr, nangi dalr nzalengr da kxtubq. ¹⁴ Murde kxmule-esz' trmnclzpepwzmuu mz zmatq ngr Lou mz nzpipx-krde kx vz-rbramu, a' suti drtwr Gct kx bzkq taoamu mz alwx. A' namnc-nqblqamu nide murde twzpeamu zmrlz ngrde kxmyalz mz nzokatr-krde nimu mz nzvz-nqblq-krmu me pnz drtwrde.

Nawztrpzku Mz Gct

¹⁵ Mrlz. A' mwz kzdq doa napi-moule kx mrlz nzale-krgu alwx murde trmnclzpepwzkuu mz zmatq ngr Lou mz nzayrplapx-krde nigu, a' mnclzbzku mz zmatq ngr Gct mz nzokatr-krde nigu. A' bzkqtx pnz!

¹⁶ Murde nakrlzamu kx mzli kc tqrlr-lzbq-ngrbzmu mz kzdq ncblo mz nzwztr-krbzmu bade, drtwr ngrde kx nide kxetu rmu x mnclzbzmu mz zmatq ngrde. Namcpx-zpwxamu da kx nangi kxetu rmu. Nangi alwx o me pnz drtwr Gct. Nzmu namcpxamu alwx, me natutr-ngrde nzbz-alongr. A' nzmu namcpxamu me pnz drtwr Gct, me natutr-ngrde nztubq-krmu mz nzobq-krde. ¹⁷ Mzli kc ena wztrpzmu mz alwx mz nzmnclz-krbzmu mz zmatq ngrde. A' awi-ngrbo mz Gct kx mzli ka mcpxpreamu mz nabzmu atwrnrngr mz nzmnclz-krbzmu me pnz drtwrde x da kcng tzalvztr-ngrmu mzli kc kai tqlxngiti-ngrnamu Jiszs. ¹⁸ Mz nzlungr kxmrna lc, Gct aopxpebzle drtqmu mz zmatq ngr alwx, x mzli ka mcpxpreamu nzmnclz-krbzmu mz zmatq ngrde mz nzale-krmu da kxtubq. ¹⁹ Krkc tqkxmu nzycmne-dalitpx-krbo da lc bamu, murde narmu nayrplatrz mz nzrlxngiti-krmu kc tqpobe. Mzli kc ena rlr-ngrbzmu nrkrdrqmu atwrnrngr mz zmatq ngr da kx trtakitrdeu x da kxdrka'ngr, mz nzale-zvz-krmu da kxtrka zlwz. A' mzli ka na-aotipe drtwrmu mz nzrlr-krbzmu nrkrdrqmu mz Gct mz nzmnccngr kxtubq, murde nztrkr nzmnccngr naetunepx zvz.

²⁰ Mzli kc ena tqmnclz-ngrbepzmu mz zmatq ngr alwx, traotiu drtwrmu nzale-krmu da kxtubq. ²¹?X nike mabztiamu mz nzmnccngr lc tqmyapengr drtqmu? Murde trpnzngr da kxmrlz kx vzpxm elr. A' natutr-ngrde mz nzbz-alongr. ²² A' mzli ka drtqmu opxpe mz zmatq ngr alwx, x mnclzpebzmu mz zmatq ngr Gct. X natutr-ngrde mz nzmnccngr kxtr x nzlungr kxboi. ²³ Nzrmabztitrngr alwx, natutr-ngrde mz nzbzngr. A' Gct

* ^{6:12} Drtwr ngrde kx nigu kxnrlxngiting, rngiscgu zmatq ngr nzvz-nqblq-krgr Gct x nzesablqti-krgr nqmq ngr alwx.

ka-nrbalqbzle nzlungr kxboi mz leplz kcng tzaxvctrpzng mz Kxetu rgu Mevalu Jiszs.

7

Kxnzrlxngiting Trnzmncpzepwzung Mz Zmatq Ngr Lou Sc Mosis

¹ Mzlengeng x inwengeng, ryrbo bamu mz nzngini-krmu leplz kcng tzkrlz-angidrlr Lou sc Gct. A' nadcpx mz drtwrmu kx doa mnclzbz mz zmatq ngr Lou mzli kc tqlu-ngrde. ² Na-aoti drtwrmu nzyrlzngr. Murde olvz kxyrlz namncbz mz ncblo ngrde mzli kc tqqlungr ncblo ngrde. A' nzmu ncblo ngrde nabzle, olvz lc trmnclzpepwzu mz lou ngr nzyrlzngr. ³ X trxpqbrlr-ngrde lou ngr nzyrlzngr mz nzyrlzti-mou-krde ncblo kzble. A' nzmu nayrlzti-moule dq ncblo kzble mzli kc tqqlubengr ncblo ngrde kc kai, olvz lc xpqbrlr-ngrde lou ngr nzyrlzngr. ⁴ Mz nqmq lcpwz, kx mzlengeng x inwengeng, bzpeamu badr Kraes mz nzaxvctr-krbzmu bade, x trmnclzpepwzmuu mz zmatq ngr Loukxtr. Mzli ka nepede nimu Kraes kc tqatulz-mop Gct mz nzbzngr, murde nrade naycz mz nzwztr-krbzmu mz Gct. *

⁵ Mzli kc tqvz-nqblqbe-ngrgu drtwrgu esz'-krgu mz nzale-krgu alwx, nzkrlz-krgu Loukxtr aetunepx zvz nzatalzngr. X nzwz-krgung amrlx tutr mz da kxdrka'ngr x yrkrpx mz nzbzngr. ⁶ Mzli lcde, mnclzbzku mz lou kx nzyrong. A' mzli ka drtqgu opxpe mz nzmnclz-krbzku mz zmatq ngr Loukxtr, murde bzpeku badr Kraes. X krlzku nzwztr-krbzku mz Gct mz nzvz-nqblq-krgu Mqngrkxtr, kc tqmncpxm mz nabzgu x okatrle nigu mz nzlungr kxmrna.

Loukxtr Aelwapx-zpwx-ngrde Alwx

⁷ Bzkq rpiamu kx natqnge lc drtwr ngrde kx Loukxtr ngi da kxdrka'ngr. Bzkqtx pnz! Murde rblxm bagi nzmc-krgi kx aleki alwx, nzmu Loukxtr trna-aelwapx-ngrpleu bagi kx vz-rbrki. Nzmu lou trnarpileu kx, "Bzkq kcmnz-ngrbzme dztu leplz kc-kzng," nzmu trkrlzkiu kx nzrkcmzngr ngi alwx. * ⁸ A' mz nxzlr-krgi natq lc tqkapx Gct, zmatq ngr alwx atalz-ngrde nigi nzrkcmznkri-krgi da kxkqlu. A' rblx nzrpingle kx leplz nzaleng alwx mzli kc trpnzngrou lou mz nzpi-krbzle badr da kx nigi alwx. * ⁹ Mzli kc ena trkrlzkiu da kx alvztrngrou Loukxtr mz alwx. A' mzli kc tqmcpe-ngrgi natq lc tqkapx Gct mz nzrkcmzngr, sc tqkrlz-ateki kx aleki alwx x mnc-rrlrbzki mz Gct. ¹⁰⁻¹¹ Mzli lcde, mz nztwz-kai-krgi natq kcng tqkapx Gct, zmatq ngr alwx mz nabzgi esabrtile nigi. X rpimle bagi kx sa nalu-aloki mz nzvz-nqblq-zvz-krgi natq lcng. A' zmatq ngrde xplrx x atalzle nigi, x sc tqtaopeki mz alwx. A' mz nibrde, sc tqkrlz-ateki kx natq kcng tqkapx Gct trngiu lrpzki r nzlungr kxboi, murde nzaelwapx-ngrmlr bagi kx takitrde nzayrplapxngrou nigi mz nzamnc-rlru-ngrbz nigi mz Gct, mz nzbz-alongr.

¹²⁻¹³ ?Nike, drtwr ngrde kx natq Gct batrple nzmnc-rlru-krbzki bade? Bzkqtx pnz! Na-aoti drtwrgi dxlrb. Kzdung mzli mz nzobq-krgi otixpx. A' mzli kc tqayabeti-ngrgile mz dapunc, aelwapx-ngrde kx lue lc ngangrtx zlwz. Trngiu dapunc kc tqtblqki, a' lue esz'-krde. Natq kc tqkapx Gct apule dapunc lc mz nzaelwapx-krde alwx kc tqyc-kapq mz nabzgi mzli kc zmatq

* ^{7:4} Nigu kxnzrlxngiting trmnclzpepwzkuu mz zmatq ngr Loukxtr mz da lcde seng tq: 1) Rblxbz mz Loukxtr nzatalz-krde nigu, murde trmnclzpepwzkuu mz zmatq ngr alwx. 2) Rblxbz mz Loukxtr nzbtr-krmlx nzxngi-krbzku nzmnclz-rlru-krm Gct, murde krlzku kx Gct ipqpele nigu mz nzplzpx-krgu alwx ngrgung. 3) Rblxbz mz Loukxtr nzyrlq-krmlx nzayrplapx-krdeng bagu, murde Gct yrlqlzpebzle nzayrplapxngrou amrlx mz Kraes. * ^{7:7} Nzrlasngr 20:17; Lou Kcpwz 5:21 * ^{7:8} Rom 5:13, 20

ngr alwx lc tqatao-ngrde nigi mz alwx. Trngiu natq Gct kc tqtrka, a' alwx kcng tqtrka zlwz mz nzobq-krde. Delc Lou sc Gct tr x natq amrlx kcng tqkapx Gct nztrng, nztrng, x nzmrlzvxing.

Nike Kxnzrlxngiting Tztao-ngrdr Mou Mz Alwx

¹⁴ Kxmule-esz' krlzki kx Lou sc Gct mrlz murde vzpxm mz Mqngrde, a' mzli ka mnckiki mz nrkrdrtqgi, mnclzbepzki mz lrpzki kc pnz tqikztki mz nzale-zvz-krgi alwx. Murde nrkrdrtqgi x nargi tr-rblxpzu badr nztwz-ani-mou-krdr alwx lcng tqale-zvzki mzli kc. ¹⁵ X mzli kang kqlu aleki da, a' trkrlzkiu nike tqaletiking. Mz drtwrgi mrlzm bagi nzalengr da kxmrlz, a' ale-alzuki alwx kc tqpxtxpx-ngrgi. ¹⁶ Glxki kx aleki alwx. X drtwrgi kc tqxpepxe Jiszs esz'ti mz nike pi Lou sc Gct kx krk alwx. Da lc aelwapx-ngrde kx lxngitiki nzmrlzkr Loukxtr.

¹⁷ Mz nzmu-krde lcde, nzale-krgi alwx trvzpxpuu mz nike pnz drtwrgi mz nigi esz'-krgi, a' vzpxm mz nzvz-nqblqbe-krgi lrpzki kc pnz tqikztki mz nzale-zvz-krgi alwx mzli kc. ¹⁸ X drtwrgi esz'timi drtwr Gct kx alwx lcng nzvzpxmqng mz lrpzki lc tqikzti-pnzki nigi da kxdrka'ngr. Murde suti zlwz drtwrgi nzale-krgi da kxtubq, a' rblxm bagi nzale-krgileng mz nzxplrkrgi esz'-krgi. ¹⁹ Mzli kc nasutingr drtwrgi nzalengr da kxmrlz, traiezvzkiung. Murde kxmule-esz' suti drtwrgi nztu-amqngi-krgi, a' kzdung mzli sc tqtaobeki mz nzatalzngr. ²⁰ Mz nzmu-krde lcde, nou alwx ngrgi lcng tqpxtxpx-ngrgi trngiu drtwrgi kc tqxpepxe Jiszs, a' nzvzpxbepqng mz lrpzki lc tqikzti-pnzki.

²¹ Mzli ka krlzpeki nqmq lc. Mzli lcpwz tqasutingr drtwrgi nzalengr da kxmrlz, lrpzki kc pnz tqikztki mz nzale-zvz-krgi alwx apumle bagi zmyo rgi kx vz-nqblq-zvzle nigi drlve ke vzkiki. X rpile na-ataole nigi mz alwx. ²² Kxmule-esz', a' yclzm mz nabzgi, abrtzlvzki Loukxtr. ²³ X mzli lcpwz krlz-kzki kx nqmq kxdrka'ngr wzep mz nrkrdrtqgi x nargi mz nzatrkti-krde da kxmrlz kx suti drtwrgi na-aleki. X krlz-kzki kx mnclzbepzki mz nqmq ngr alwx mz lrpzki lc tqikzti-pnzki. ²⁴ Delc tqtrka-zlwzpe-ngrgi! ?Rkrlz dq kx na-arlapxle nigi mz zmatq lc tqtrka tqvzmile nigi mz nzbzng? ²⁵ Eu! X awi-ngrbzki mz Gct kx Kxetu rgi Jiszs Kxnzmcpk sc tqarlapxpele nigi murde nakrlzki nzesablqti-krgi nqmq ngr alwx lc tqycbep mz nrkrdrtqgi x nargi!

Mz nzmu-krde lcde, mzli kcpwz tqmnclz-ngrbzki mz Gct mz nabzgi x drtwrgi, mnclz-kzpkki mz lrpzki r alwx kc tqikzti-pnzki.

8

Doa Neng Gct Nzvz-nqblqlr Mqngrkxtr

¹ Mz da kcng amrlx tqppipebo, nakrlzamu kx mzli ka trpengr nztwz-krgu nzayrplapxkr Gct nigu mz nzvz-rbr-krgung, murde sc tzaxvctrpebzku mz Mevalu Jiszs. ² X mz nzaxvctrpe-krbzku bade, zmatq ngr Mqngrkxtr alule mqngrgu x arlapxle nigu murde trmnclzpepwzkuu mz zmatq ngr alwx x nzbzng. ³ Murde trpnzng scgu zmatq ngr nzarlapx-lzbq-krgu mz nzvz-nqblq-zvz-krgu Loukxtr, murde mzli kc mnclzbzku mz zmatq ngr alwx. Mz nzmu-krde lcde, Gct esz'-krde sc tqarlapxpele nigu, mz nzatwzlr-krmle Mrlxde angidr mz nzngini-krde leplz da kc tqwaiku. Murde nangi blz kx takitrde nzxpepxngr alwx ngrgu, nigu leplz. Dekc Gct tqarlapx-ngrde nigu leplz murde trmnclzpepwzkuu mz zmatq ngr alwx. ⁴ Arlapxpele nigu murde ma tqvz-nqblqbeku nqmq ngr alwx lc, a' navz-nqblq-alzuku Mqngrkxtr kc tqokatrle nigu mz nzvz-nqblq-krgu natq Gct mz nzmncngr kxtubq.

⁵ Kxtrnzrlxngitiung kcng tzvz-nqblqlr nqmq ngr alwx kc tqycpxm mz nabzdr, nzaoti zvz drtwrdr nzalengr alwx lcng. A' kxnxrlxngiting kcng tzvz-nqblqlr Mqngrkxtr, nzvqt drtqdr da kx na-abrtzlvz-ngrde nidr. ⁶ Nzmu nzaokr drtwr leplz nayclzbzlr mz nqmq ngr alwx, sa navz-nqblqlr lrpzki kc tqutur mz nzbz-alongr. A' nzmu nzaokr drtwr leplz navz-nqblq-zvzlr me pnz drtwr Mqngrkxtr, sa narmctilr nzlungr kxboi x namncng badr Gct mz nrwrx. ⁷ X leplz kcng nzao-krdr drtwrdr tqyctrpz mz nqmq ngr alwx, nidr enqmi r Gct, murde nzpxtxpx-ngrdr nzvz-nqblq-krdr Loukxtr, x mou rblx-zlwzbz badr nzale-krdrle. ⁸ X leplz lcng tzmncbzng mz zmatq ngr alwx, rblx-kzpz badr nzabrtzlvzkr Gct nidr.

⁹ A' nzao-krmu drtwrmu tryctrpepwzu mz zmatq ngr alwx, murde Mqngrkxtr mncpxm mz nabzmu, x mnclzbzmu bade. A' krkcng nabzdr trmncpx-ngrpqu Mqngrkxtr kc tqkabz Kraes, trnginidru leplz nedeng. ¹⁰ A' nimu, leplz nedeng. Murde kxmule-esz' nrkrdrqmu nabzng kalr murde alwx ngrmung, a' mqngrmu nzlupeng x nztubqpeng mz nzobqkr Gct murde Kraes mncpxm bamu mz Mqngrkxtr. ¹¹ A' Gct kc tqatulzmle Jiszsz mz nzbzngr, mz nqmq lcpwz sa na-alu-mople nrkrdrqmu mz zmatq ngr Mqngrkxtr kc tqkabzle mz nzmncpx-krmle bamu.

¹² Mzlengeng x inwengeng, da kxmrlzting kcng tzvzpxmqng mz Mqngrkxtr drtwr ngrde kx navz zvz nzvz-nqblq-krgru da kx pimle bagu. X trpnzngr da kx batrple bagu nzvz-nqblq-krgru lrpzki kc pnz tqikztiku mz nzale-zvz-krgru alwx. ¹³ Murde krkc tqvz-nqblq-zvzle lrpzki lc, sa nabz alo. A' mz nzrlr-krbzmu zmatq ngr Mqngrkxtr nzokatr-krde nimu, krlzamu nzesablqti-krmu lrpzki lc tqmrlz-zlwzbz mz nrkrdrqmu x narmu. X mz nzale-krmu da lc, sa naprtramu mz nzlungr kxboi. ¹⁴ Murde leplz amrlx kcng tzvz-nqblqlr Mqngrkxtr kc tqkabz Gct, nidr doa nedeng. ¹⁵ X Mqngrkxtr kc tqkamle bagu, trapusr-ngrdeu nigu kxnzawz-nrbalqng kcng tzmwxlr-ngrdr nide mz nzayrplapx-krde nidr. A' mz nzka-krmle bagu Mqngrkxtr, nginipecu doa nedeng, x Mqngrkxtr pi-zvzmle bagu kx Gct suti zlwz drtwrde nzrpi-krbzku bade kx, "Trte."

¹⁶ X Mqngrkxtr aopx-angidrmle bagu mz mqngrgung x nabzung kx nigu doa neng Gct. ¹⁷ Delc, mz nznginipe-krgru lc doa nedeng, sa naprtrku mz dztudeng amrlx. X sa naprtr-kzku mz da amrlx kcng tqkabz Gct mz Mrlxde Kraes. Murde nzmu na-axvctrpzku bade mz nzetqkr drtqde, sa naprtr-kzpzku bade mz nzmyalz-krde.

Nzprtr-krgru Mz Nzmyalzkr Gct X Nzamatqngr Nide Heven

¹⁸ Mz drtwrnge, nzetukr da amrlx kcng tqmrlz tqkqlu nakam Gct bagu Heven kalr nzmyaszpx-zlwzlr nztopwzkr nzetqkr drtqgu kxipz mzli kxmrbcne tqmncku mz nrlc ka. ¹⁹ Da amrlx kcng tqwzngr Gct nzobqtipxlr mzli kc Gct na-aelwapx-ngrde nzmrluekr leplz nedeng. ²⁰ Murde Gct yrlqlzbzle dalr nrlc atwrnrngr mz zmatq ngr zmibi x nzbzngr vzpxm mz alwx kc tqale Adzm. ²¹ A' pnzpe kai drtwrde kx mz Mzli Kxmatq kc nayzlungrm Jiszsz, sa na-arlapxle doa nedeng x nakabzle badr nzmnc-zpxwxngr. X mzli lcpwz, sa na-arlapx-kzle dalr nrlc atwrnrngr kcng tzyclzbzng mz zmatq ngr zmibi x nzbzngr, murde nayc-zpxwx-kzng.

²² Mz nzmu-krde lcde, krlzpeku kx abzo mzli kc tqalengr Adzm alwx krlzmle mzli ka, dalr nrlc amrlx sc tqvzbe nzmibi-krdr x nzbz-krdr. X nzetqkr drtqdr apule zvetq ngr drtq olvz kx narmika. ²³ A' nigu kz, apuku olvz lc, kxmule-esz' Mqngrkxtr mncpxm mz nabzgu mz nzngini-krde da ayrrnrngr mz da kcng amrlx nakam Gct bagu. Murde nabzgu yrnibu kz mz nzaenzli-krgru Gct nzarlapx-krde nigu mz nzetqkr drtqgu x nzota-krgru badr

zmatq ngr alwx mz nrlc ka. Aenzliku Gct nzka-krmle bagu nrkrdrqgu kxmrna x nzvzmi-krde nigu Heven mz nzngini-zpx-krgu doa nedeng. ²⁴ Abzo mzli kc Gct tqarlapx-ngrde nigu, obqtipx-zvzku nztwz-krgu da lcng. Murde nzmu natwzpeku da lcng, e trna-aenzlipeku. Trpnzngr kx obqtipxle da kx twzpele. ²⁵ A' obqtipxku da kcng trtwzkaku. X aenzliku mz drtwrgu kx br kx sa natwzkung kalr.

Mqngrkxtr Okatrle Nigu Mz Nzkrka'-krgu

²⁶ X Mqngrkxtr okatr-kzle nigu mz nzaenzli-krgu mzli ka mz nzngrgokr nabzgu. X krka'-zvz-ngrde nigu. Murde trkrlzkuu da kx takitrde nzkrka'tikrgule, x rblx nzrmcti-krgu natq mz nzpipx-krbzku da kx yclzm mz nabzgu. ²⁷ A' Gct Trte kc tqobqplxle nabzgu x drtwrgu, krlz-kzle drtwr ngr nzkrka'kr Mqngrkxtr nigu, murde Mqngrkxtr vz-nqblq-txpzwle me pnz drtwr Trte mz nzkrka'-krde leplz nedeng.

Da Kx Suti Drtwr Gct Nartrngztime Bagu

²⁸ Gct kqlele nigu mz nzngini-krgu leplz nedeng, mz nzvz-nqblq-krde drtwr kx yrlq-pnzle. Delc kxmule-esz' da kx prtzm bagu, nakrlzku kx Gct yrlqle drtwr lc mz nzamrlz-krde nigu kcng tzmrlztilr nide. ²⁹ X mcpx pnz kz Gct nigu, x sc tqwz-ate-ngrde nrlc. Murde krlz-pnz-kaile kx sa nalxngitiku Mrlxde. X yrlqle drtwr kx na-apupwzku Mrlxde mz nqmq krgung, murde Mrlxde nangi doa kc kai x nanginigu doa kxnztopwzbzng bade. ^{*} ³⁰ X nigu lcng na-apuku Mrlxde, kqle-kzle nigu mz nzngini-krgu doa nedeng. X nigu lcng tqkqleleng, atubqti-kzle nigu mz nzobq-krde. X nigu lcng tqatubqtipeleng, sa tqbatrple nzavctr-krbzku mz nzmyalzkr Mrlxde.

Gct Tu Mz Nibrgu X Nivz Lrde Tu-nglelvzle Nigu

³¹ Mz nzmc-krgu da amrlx lcng tqalem Gct bagu, nakrlz-kzku kx trpnzngr kx na-aovxiole nigu murde tu-zvzle mz nibrgu. ³² X krlz-angidrku kx sa naka-kzple bagu da amrlx kcng tqpimle, murde trolvzleu Mrlxde kc esz'txu, a' atwzlr-ngrmle nide mz nztekqtr-krde nigu amrlx mz nzbzng.

³³ X trpnzngr kx narpibzle mz Gct kx kzdq nigu leplz kcng tqmcpxle vz-rbrpe, murde nide esz'-krde kc tqatubqtipeleng nigu mz nzobq-krde. *

³⁴ Mz nzmu-krde lcde, trpnzngr kx narpile kx takitrde nzayrplapxng nigu mz alwx rgung. Murde Jiszs Kxnzmcpk bzpe-ngrde nzxpepx-krde nigu mz alwx lcng. X da kx myapxbz, Gct Trtede atulz-mople nide mz nzbzng x awxbule nide me matq-esz'ngr Heven, mrkc tqpi-ngrbzle mz Trtede kx nede nigu. ³⁵⁻³⁶ A' kzdung mzli da prtzm bagu, da kc tqwai nzrlwx-krgule mz Nzryrngrkxtr, mz nzsrikr kzdq Sam kx, "Gct, mz nzngini-krgu doa nemqng, vz zvz nznibqti-krdr nigr, mz nzapusr-krdr nigr sip kcng tzmnc-nabung mz nzrnibqng nldr." ^{*} A' nakrlzku kx trtxpnzngr da kx narpwa'-ngrde nivz lr Kraes mz nzkrlz-krmle nigu. Trngiu nzkxpungr, x zmwxlr, x nzetqkr drtq, x dzbi, x trnzrncgisc-ngru da, x nzatrkatingr, x nzotangr, x kxmu-kzle-esz' nzbzng. Trtxpnzngr kz. ³⁷ Kxmule-esz' da lcng amrlx nzprtzmqng bagu, a' sa na-aovxio-zvzkung mz nzokatrkr Kraes kc tqmrlztile nigu. ³⁸⁻³⁹ Murde lxngiti-angidrx kx trpnzngr doa x da kx

* ^{8:29} Aposol 26:23; 1 Korint 15:20; Kolosia 1:18; Hibru 1:6 * ^{8:33} Kzdung mzli mz nzaotikr drtwrgu alwx rgung, nabzgu talvzo murde mwz mz drtwrgu rblxbz mz Gct nzmrlzti-krde nigu. A' drtwr lc ngi nzwzkr Setzn mz nzatrkti-krde nzrlxngit-krgu. Mz nzplzpxpe-krbzku alwx rgung mz Gct x mz nztekqtrpe-krgu nqmq nr drtwrgu murde navz-nqblq-mouku nide, nakrlz-zpxwku kx ipqpe Gct nigu x tubqpe-mouku mz nzobq-krde. 1 Jon 1:9 Mzli kznike nabzgu talvzo-ngrde, naglqlzku Gct x naawi-ngrbzku bade nivz lrde mz nzyckr drtwrde nigu. Murde nzrglqlzng Gct krlzle nzaovxio-krde nzwzkr Setzn. Sam 8:2 * ^{8:35-36} Sam 44:22

na-aovxiole nivz lrde. Kxmule-esz' nzlungr o nzbngr, a' xngi-zvzpebzku nivz lrde. Kxmule-esz' kxnzmncng mzilxlr kxnzxplrng x kxzmatqng, a' trnzkrzlr nzdati-krdr nivz lc. Kxmule-esz' da kx prtz mzli ka o mzli lc navzm, a' nivz lrde tqyc tqyc. Kxmule-esz' lr Heven, o lr Hxl, o doa x da kznikeng kz wzngr Gct, a' nivz lrde talvzpxle da amrlx. Trtxpnzngr doa o da kx na-aovxiole nivz lr Gct kc tqrmctiku mz Kxetu rgu, Mevalu Jisz.

9

Lr Jiu Kx Nzpxtxpx-ngrdr Jisz

¹⁻² Mzli kang kqlu drtqnge etq zlwz x drtwrnge vztx-ngrde kxnginingeng, lr Jiu, mz nzpxtxpx-krdr Kraes. Pibo da lc bamu x krlzamu kx ngi da angidr murde nede ninge Kraes. X Mqngrkxtr ncdr nzao-krnge drtwrnge, nzpiml mz nabznge kx trpokiaawxu. ³ Lr Jiu kxkqlu trnzkxngitilru Jisz nzngini-krde Mevalu Kxnzmcp. A' uti zlwz drtwrnge nzokatr-krnge nidr mz nztekqr-krdr nqmq nr drtwrdr, murde nidr kxnginingeng x nqvi kr bangeng. Kxmule-esz' rblx, a' da kx aoti txpwz drtwrnge nide sele—nzayrplapxkr Gct ninge x nalakitpxmle ninge mz Kraes, nzmu da lc kx tqkrlzle nzokatr-krde lr Jiu lcng mz nzesotr-krbzlr mou mz Gct. A' trtingr. ⁴ Sc tqmcpx-pnzng Gct lr Israel mz nzngini-krdr doa nedeng. Mrkc Izke nzmlcr rkk ngr nzmyalz-krde x yrlqbzle Nzesztikr Drtwrdr badr, x kabzle Loukxtr badr mz Newz Saenae. Alvztr-ngrde nidr kxnamu nzangio-angidr-krdr nide x esalz-ngrbzle badr da kcng tqmyapxbz mz nzvz-krm Kxnzmcp. ⁵ Melrmqdrng nidr ncblo kxszet neng Gct kcng bqnc, x Kraes nzmika kz apule leplz mz nqvi lr ncblo lcdeng. A' nide kc tqmyaszpxle doa x da amrlx. Naglqlz-zvz-ngrgu Gct! Angida!

⁶ Bzkq rpiamu kx Gct tratutrlie nzesalz-krbzle badr. Murde trngiu leplz amrlx kcng nzmika mz nqvi lr Israel kcng tqmcpx Gct. ⁷ X trngiu leplz amrlz mz nqvi lr Ebraam kx nznginidr leplz neng Gct. Murde rpibz Gct mz Ebraam kx, “*Nqvi lr ncblo nem angidr nayzuo mz mrlxm Aesak.*” ⁸ Drtwr ngrde nznginikr leplz doa neng Gct trvzpxpuu mz nzngini-krdr nqvi lr Ebraam. Murde leplz amrlx kcng tzlxngitilr Gct, da kc tqwai Ebraam, nidr angidr doa ngr nqvi lrde. ⁹ Natq lcng tqesalz-ngrbz Gct mz Ebraam kx, “*Mzli kapwz, mz yiz lc navzm, sa nabatrpo mz Sera nzkrz-krde nzmika-krde mrlxde.*” ¹⁰ Kxmu-kzle lc mz Rebeka kc mrlxde tzlipxmqng, trtedr esz', krlc melrmqgu Aesak. ¹¹⁻¹² Kxmule-esz' mztr trnzmcka x trnzalekalr da kxmrlz o da kxtrka, a' rpibz Gct mz Rebeka kx, “*Mrlxm kxetu sa nawztrpz mz mzlede kxtopwz.*” ¹³ Gct pile da lc mz nzaelwapx-krde kx nzmcpx-krde leplz trtuou mz da kx nzalelr, a' tuo mz drtwr kx yrlq-pnzle. ¹⁴ Da kc tqwai nzpikr Gct le mz Nzryrngrkxtr kx, “*Mrlztix Jekop, a' pxtxpx-ngrne Isc.*” ¹⁵

¹⁴ ?Nike, napiku kx Gct vz-rbr mz nzale-krde da lc? Bzkqtx pnz! Murde Gct tubq zvz. ¹⁵ X rpibzle mz Mosis kx, “*Sa naycngr drtwrnge doa kx pnz drtwrnge. X sa naokatrdoa kx pnz drtwrnge.*” ¹⁶ Mz nzmu-krde lcde, Gct sa namcpkle krkcng natwzlr da kx esalz-ngrde. X nzmcpx-krde leplz tryctru mz nzrsutikr drtwrdr o mz nzale-krdr da, a' mz nzryckr drtwrde nidr. ¹⁷ Na-aoti kz drtwrgu King r Ijipt. Murde Nzryrngrkxtr alvztr-ngrde kx Gct rpibzle bade kx, “*Yrlqx nim mz nzngini-krm king, murde na-aovxiox nim mz zmatq rnge x nrpa rnge natalvzole nrlc.*” ¹⁸ Mz nzmu-krde lcde, opx angidr kx Gct ycngi drtwrde kzdung leplz, mz nzvz-nqblq-krde me pnz

⁸ 9:4 Nou 9:8-9; 17:2; Nzrlaszngr 24:8; Josua 8:33; 2 Samwel 23:5 ^{9:7} Nou 21:12 ^{9:9} Nou 18:10, 14 ^{9:11-12} Nou 25:23 ^{9:13} Malakai 1:2-3 ^{9:15} Nzrlaszngr 33:19 ^{9:17} Nzrlaszngr 9:16

drtwrde. X batr-kzpze nzmqngikr nar kzdu-kzng leplz, vz-nqblq-kzle me pnz drtwrde. *

¹⁹ Mwx kzdung leplz sa narpimlr bange kx, “Leplz lcng nzale-txpwlzlr da kc tqbatrpz Gct badr nzale-krdr le. X rblxbz badr nzvecpx-lzbq-krmlr mz zmatq ngr me pnz drtwrde. ?A' nike Gct tqayrplapx-ngrde leplz kcng trnzlalztqpwzung bade?” ²⁰ A' sa na-ayzlu-ngrbo natqdr kx, “Bzkq kxmu nzvea-krmu lc.” Murde nimu leplz, x trtakitrdeu leplz nzycmnetitr-krdr Kxrpalz kc tqwz-ngrde nidr. Murde ma nyd ncblo tr-rpipwzleu mz ncblo kc tqwz-ngrde nide kx, “?Nike tqmu nwz-krm ninge lc?” ²¹ Murde ncblo kx rwzngr ma, takitrde nzvz-nqblq-krde me pnz drtwrde esz'-krde. Krlzle nwzngi ma kx li, kzdq kxnzmwingr, x kzdq kxnzasungr dakxnzng.

²²⁻²³ Kxmu-kzle lc mz Gct. Murde kxmule-esz' takitrde nzayrplapx-krde kxnzaleng alwx mz zngya ngr drtwrde, a' rlr-ngrbzle badr nzmnchbengr mz nrlc mzli ka x trayrkrpx-anileu nrlc. Murde na-aelwapx-kai-ngrbzle nzyckr drtwrde x rkx ngr nzmyalz-krde mz leplz kcng mztr trnzmcka, tqmcpx-pnzleng, x sc tqayrplapx-atele kxnzaleng alwx. ²⁴ Alemle da lc bagu, nigu kcng tqkqleleng, kxmule-esz' nigu lr Jiu o kxtrngiulrJiu. ²⁵ Da kc tqwai nzpikr profet Hosia le mz Nzryrngrkxtr kx, “Leplz kcng trngiu leplz nengeng mzli kc, sa narpibo badr mzli ka leplz nengeng. X leplz kcng trnzprtr-pnzung mz nivz lrnge mzli kc, sa narpibo badr mzli ka kx mrlzti-zlwzpepxng nidr.” ²⁶ “X mrkc tqrpi-ngrbo badr kx, ‘Trnginipwxmuu leplz nengeng,’ mrlcdepwz dekc narpi-ngr-mopwc' badr kx, ‘Nimu doa neng Mevalu Gct.’” ²⁷ A' profet Asaea ycmnetr-ngrde Israel, rpile kx, “Kxmule-esz' leplz ngr Israel nzkqlu-krdr apule drta' ngr prla, a' kxipiz txpwz delang narlapxng. ²⁸ Murde ycpwz pipz Yawe sa na-atutre nzayrplapx-krde leplz amrlx mrka mz nrlc.” ²⁹ X Asaea ycmnetr-mou-ngrde da lc, rpile kx, “Nzmu Yawe trnarlrpx-ngrdeu bagu kzdung doa negung kxnzpipzng, e nigu lr Israel miltxopeleng, da kc tqwaisr-ngrde lr Sodom x lr Gomora.” ^{*}

Lr Jiu Trnzrlxngitiung

³⁰ Drtwr ngr da lcng tqipibo bamu kxmule se. Leplz kcng trngiulrJiu nztubqng mz nzobqkr Gct murde nzbrti drtwrdr Kraes, kxmule-esz' mzli kc trnzabzlu nzvz-nqblq-krdr Loukxtr. ³¹ A' lr Israel kcng tzabz-zlwzlr nzrvz-nqblqng Loukxtr murde natubqbzng mz nzobqkr Gct, trnzyatrwpwzung mz nzkrlz-krbzlr bz lc. ³² ?Nike trnzyatr-ngrpwzlu? Trnzyatr-ngrpwzlu murde trnzabzlu nzkrlz-krbzlr bz mz nzbrtikr drtwrdr da kc tqesalz-ngrbz Gct badr. A' nzabz-alzulr nzkrlz-krbzlr bz mz nzvz-nqblq-krdr natq amrlx kcng tzyrong mz Loukxtr mz nzxplr-krdr esz'-krdr. X mz nzpxtxpx-krdr lrpzki r nzarlapxngr kc tqyrlq Gct, nztaong mz nou rplz kc tzyrputrngr leplz. †

³³ Da kc tqwai nzpikr Gct le mz Nzryrngrkxtr kx, “Obqmamu! Murde yrlqex kc doa mrkc Jerusalem kx apule rplz kx nayrputrngr leplz, mz nzobqszo-krdr nide. X nide nou rplz kc tzpxtxpx-ngrdr. Kxmule-esz', a' doa kx lxngitile nide drtqde trnanyau mz nzbrtikr drtwrde nide.” [†]

* ^{9:18} 9:7 Kzdung doa neng Ebraam nzvzpx-kzpqng mz mrlxde Ismael, mrlx Haga. A' doa lcng trnzatutrlu da kc tqesalz-ngrbz Gct mz Ebraam, x trnginidru leplz kcng tqmcpxle. [Nou dckrlzdeng 15—18, 21] ^{9:13} Isc x Jekop nzlipxmqng, x Isc nide kc nzmika kai. ^{9:17} Mzli kang kqlu King r Ijpt, narde mqngi. [Nzrlaszngr 7:22; 8:15, 32] Zbz sc tqbatrpesz Gct nzmqngi-zvzkr narde. [Nzrlaszngr 9:12, 35; 10:27; 11:10] ^{9:25} Hosia 2:23; 1 Pita 2:10 ^{9:26} Hosia 1:10 ^{9:28} Asaea 10:22-23 ^{9:29} Asaea 1:9; Nou 19 [†] ^{9:32} Mz drtwr lr Jiu, rblx nzbzkr Mevalu Kxnzmcp. Mzli kc tzxlr-ngrdr kx Kraes bz-ngrde nidr, nzpxtxpx-ngrdr drtwr lc. X mz nzmu-krde lcde, nztaong mz nou rplz, kc tqngi Kraes esz'-krde. ^{9:33} Asaea 8:14; 28:16; 1 Pita 2:7-8

10

¹ Mzlengeng x inwengeng, krka'-ngrbo mz Gct kx lr Jiu amrlx narlapxng, murde ngi da kx pqtx zlwz mz drtwrnge. ² Krlz-angidrx kx nzabz-zlwzlr nzvz-nqblq-krdr Gct, a' trnzkrlzlr u kxnamu nzvz-nqblq-krdr le. ³ Trnzkrlzlr u kxmu nzatubqtikr Gct leplz mz nzobq-krde. A' mz drtwrdr, nztabq-krde navzpxm mz da kx nzyrlqlr esz'-krdr, mz nzvz-nqblq-krdr Loukxtr. X nzpctxpx-ngrdr nzmnclz-krbzlr mz lrpzki r Gct mz nzatubqtikrde leplz kcng tzlxngitilr Kraes. ⁴ Kc tqatutrpele bz ngr Loukxtr. X mz nztabq-krde mz nzvz-nqblq-angidr-krdele, leplz amrlx kcng tzlxngitilr nide nzkrlzlr nzprtr-kz-krdr mz nztabq-krde mz nzobqkr Gct.

⁵ Mosis yrole kxmu leplz natubq-ngrdr mz nzobqkr Gct mz nzvz-nqblq-krdr Loukxtr. Rpile kx, “*Doa kx vz-nqblq-zvzle Loukxtr amrlx, sa nalu zvz.*” ⁶ X mou, Nzryrngrkxtr alvztr-kzple mz nzatubqtkr Gct leplz mz nzlxngiti-krdr Kraes, mz nzrpi-krde kx, “*Bzkq rpi drtwrm kx navzdzq Heven,*” (mz nzvzmio-krme Kraes mz nztwz-krmle nrpa ngr nzrlapxngr). ⁷ “*X bzkq rpi kz drtwrm kx navzoq la,*” (mz nzatulz-krme Kraes mz nzbzngr, mz nztwz-krmle Nrpakxmrlz). ⁸ “*Murde nrpa lc krlzpebzle nim. X ycpxpem mz nabzm x pipxpeq mz naom.*” ⁹ Krlc nrpa kc tqyapwx tipxkr, kx leplz narlapxng mz nzlxngiti-krdr Kraes. X tr-rblxu nzrlapx-krdr murde Gct esz'-krde kx atwzlro-ngrmlle Jiszs bagu x atulz-mople nide mz nzbzngr. ¹⁰ Murde doa kx naplpxle mz naode kx, “*Jiszs nide Kxetu Kxmyalz-esz'ngr,*” x lxngiti-angidr-kzle mz nabzde kx Gct atulz-mople Jiszs mz nzbzngr, doa la sa na-arlapx. ¹¹ Murde mz nzplzpx-krgu nzlxngiti-angidr-krgu Kraes, tubqku mz nzobqkr Gct x sa na-arlapxle nigu. ¹² Murde Nzryrngrkxtr ycmnetr-ngrde Mevalu mz nzrpi-krde kx, “*Doa kx lxngitile nide drtqde trnayau mz nzbrtikr drtwrde nide.*” ¹³ Kxmule-esz' lr Jiu o kxtrngiulRjiu, a' kxnzrlxngiting amrlx nzmnclzbzng mz Kxetu kcpwz, tqamrlz-zlwzle leplz amrlx kcng tzrlxtibzlr nzokatr-krde nidr. ¹⁴ Da kc tqwai nzpikr profet Joel le kx, “*Krkcng nzrlxtibzlr mz Kxetu nzokatr-krde nidr, sa narlapxng.*” ¹⁵

¹⁴ ?A' myx kxnamu nzrlx-krbzlr bade nzokatrngr, nzmu kx trnzlxngitikalr nide? ?X myx kxnamu nzlxngiti-krdr nide, nzmu kx trnzxlkalr nrpa ngrde? ?X myx kxnamu nzxlr-krdr Nrpakxmrlz lc, nzmu kx trpnzngr leplz kx narpipxbz badr? ¹⁵ ?X myx kxnamu nzrpipxkr leplz nrpa, nzmu kx trpnzngr doa kx na-atwzlrpx-ngrng? Da kc tqwai nzpikr Nzryrngrkxtr le kx, "Mrlz-esz'ngr nzvz-krm leplz kcng tzrtwzmqng nrpa kxmrlz." ¹⁵

¹⁶ A' lr Jiu amrlx trtwzlsru Nrpakxmrlz lc. Murde profet Asaea rpile kx, "Yawe, trpnzngr kx lxngitile natqnge." ¹⁷ Mz nzmu-krde lcde, leplz nzrlxngiting mz nzyrplatitrkr nardr Nrpakxmrlz, x nardr nzyrplatitrkr Nrpakxmrlz mz nzryapwxtipx-ngrbz badr Nrpa ngr Kraes.

¹⁸ ?A' lr Jiu nzxlrpelr, da kc tqwai nzpikr Nzryrngrkxtr le kx, "A' nrpa scdr vzpx x krlzbzle leplz amrlx mz nrlc tulvzo." ¹⁹ ?A' lr Jiu nzyrplatitr nardr nrpa lc? Eu, murde Mosis alvztrpzle da kc tqpi-kaipz Gct mz lr Israel, mz nzsipi-krde kx, "Sa na-adobu-ngrbo nimu leplz kxnnzmaneng kcng trngiu lr Israel. X sa na-angyati-ngrbo drtwrmu nzamrlz-krnge leplz kcng trnzkrlzlu ninge." ²⁰ X mz nelzde kxbr Asaea alvztrpzle natq Gct mz nzsipi-krde kx, "Leplz kcng trnzrtangrtilru ninge, sc tzrmctipelr ninge. Xaelwapx-lzbqpe-ngrbo mz krkcng trnzrlxtilru nzvz-krbo badr. ²¹ A'

☆ 10:5 Livae 18:5 **☆ 10:8** Lou Kcpwz 30:11-14 **☆ 10:11** Asaea 28:16 **☆ 10:13** Joel 2:32
☆ 10:15 Asaea 52:7 **☆ 10:16** Asaea 53:1; Jon 12:38 **☆ 10:18** Sam 19:4 **☆ 10:19** Lou Kcpwz 32:21

mz zbg kalvz kqle-ngrne leplz nengeng kx nayzlu-mopqng bange. A' vz zvz nzxpqbrrlr-krdr ninge murde nardr mqngi.” *

11

Gct Trlakitpxx-atwrnrleu Lr Israel

¹ ?Myx kxmule, Gct pxttxpx-ngrde leplz nedeng kcng tqngi lr Jiu? Bzkqtx pnz! Murde ninge dq kz lr Jiu. X mzke' nzmc mz nqvi lr ncblo kc mz Benjamin, tqvzpxm mz Ebraam. A' Gct trpxtxpx-ngrdeu ninge. ² X trpxtxpx-kz-ngrdeu leplz nedeng kcng tqmcpx-pnz-kaile, x nrlc kc tqwz-ate-ngrde. X krlzpeamu nike ycmnetrngr Nzryrngrkxtr mz da lc. Murde profet Elaeja drtwre lctrpz mz lr Israel mz nzrpi-krde kx, ³ “Yawe, nznibqtipelr profet nemqng amrlx, x nzawxtxopebzr olta nyzmqng. Ninge kc tqmnctpxpepwz, x sa tzrpilr nanibq-kzlr ninge.” * ⁴ A' ayzlu-ngrbz Gct nzkrka'-krde kx, “Amnc-bekapxpex leplz ngr Israel siu-rlimz (7,000) kx trnzangiolru gct Baal, murde leplz lcng nangi nengeng.” * ⁵ Kxmu-kzle lc mzli ka. Murde kzdu lang kz leplz kxpixz kxnzamnc-bekapxpeng kcng tqmcpxpeng Gct mz nzarlapx-krde nidr mz zmrlz ngrde kxmyalz. ⁶ Nzmcpx-krde nidr tuo mz zmrlz ngrde kxmyalz x trtuou mz nike nzalelr. Murde nzmu namcpxle nidr mz nike nzalelr, zmrlz ngrde lc trngiu da kx ka-nrbalqle.

⁷ Krlc drtwr ngrde kx lr Israel nzabz-zlwzlr ntubq-krbzlr mz nzobqkr Gct, a' nzkqlung kx trnzyatrpwzung. A' ngi txpwz krkcng tqmcpxle kx nayatrpzng. A' batrpzle nzmqngikr nar leplz kxkqlu. ⁸ Da kc tqwai nzrpikr Nzryrngrkxtr le kx, “Gct aprczble badr kxmcn mzllxlr kx akamrbr-ngrbzle nzrkrlz-krdr, vzm vzm krlzme mzli ka, rblxbz badr nzrmcngr x nzxlrngr nzalvztrngr angidr.” * ⁹⁻¹⁰ X rpi kz Devet kx, “Yawe, kxmu nzmu leplz lcng badr kztedrng Mangr-nzangiongr trtubqu mz nzobq-krm. Delc, nzrtxlvzlz-mou-ngrdr alwx ngrdrng x takitrde nzodati-krm nidr. Akcbz mztr, x ayangrnga-zvzbz nrkrdrtdqdr.” *

¹¹ ?Myx kxmule, mzli kc tztaongr lr Jiu mz nzpxtxpx-krdr Kraes, drtwr ngrde kx nzlakitpxkr Gct nidr tqyc tqyc? Bzkqtx pnz! A' arlapxle leplz kcng trngiulrJiu, mz nzlxngiti-krdr Jisz, murde nabatrpzle nzdobutizlwzkr lr Israel nidr. ¹² Lr Jiu nzpxtxpx-krdr Kraes, batrpzle mz Gct nzka-alzu-krbzle da kxmrlzting mz kxtrngiulrJiu. Mz nzmu-krde lcde, mz nibr lr Jiu amrlx kcng tqmcpx Gct ntarpxng, sa na-amrlz mou Gct leplz amrlx mz nrlc namyaszpxle mzli ka. Murde da kxmrlzting amrlx kcng tqkaom Gct bagu, nzvzpxmqng mz nzkao-kai-krbzleng mz lr Jiu.

¹³ Pibo da lcng amrlx bamu, myapxbz nimu kcng trngiulrJiu. Gct mcpxle ninge mz nzngini-krnge aposol mz nzalvztr-krnge kxtrngiulrJiu. X nzwz-krnge lc matq zlwz mz drtwrnge. ¹⁴ Murde mw, sa nadobutingr lr mrnyzngeng nzarlapxkr Gct nimu, x nzwz-krnge lc sa nabatrpzle mz kzdung nidr nzrlapx-krdr kz. ¹⁵ Mzli kc lr Jiu tzpxtxpx-ngrdr Jisz nzngini-krde Mevalu rdr, Gct rlrpx-ngrde nzrlapxkr lr mrkzbzeng amrlx mz nrlc. ? A' nike naprtz mzli kc na-abtzlvz-ngrde nidr mzli kc nalxngitilr Jisz kalr? Kxnzbzng sa nalu-moung. *

Lr Jiu Nznginibedr Kxnzmcpxng Ne Gct

* **10:21** Asaea 65:1-2 * **11:3** 1 King 19:10, 14 * **11:4** 1 King 19:18 * **11:8** Lou Kcpwz 29:4; Asaea 6:9-10; 29:10 * **11:9-10** Sam 69:22-23 * **11:15** Mz drtwr kzdung kxntzung, natq lc kxnzbzng sa nalu-moung,’ drtwr ngrde kx lr Jiu kxnxkqlung sa nalxngitilr Jisz, x sc tqyzlu-atem.

¹⁶ Na-aoti drtwrmu dalr nrlanc x dzbr nc. Murde dalr nrlanc kc tzamrlz tzka-kaipz mz Gct batrpzle nztrkr dalr nrlanc amrlx. X nzmu dzbr nc natrlr, e nrladeng amrlx nztr-kzng. Mz nqmq lcpwz, lr Jiu sa nangineng Gct murde melrmqdrng nidr leplz nedeng.

¹⁷ Naycmne-ebzpxbo nc olivi. Lr Jiu nzapulr nc olivi kc tqpeti Gct mz nrlanc nyzde. X lr Jiu kcng trnzrlxngitiung nzapulr nrla nounc kcng tqlakitxpx Gct. X nimu kxtrngiulrJiu apuamu nrla nc olivi kx tutrp mz nrlarde kx yz mz nrlanc nyz Gct. A' mzli ka mz nzrlxngiti-krmu, Gct twzpele nrlade kcng tqnginimu x sc tqaxvctrpebzle nimu mz nc olivi nyzde, murde nanginimu kz leplz nedeng. X mzli ka prtrpe-kzamu mz da amrlx kcng tqesalz-ngrbzle mz leplz nedeng. ¹⁸ Mz nzmu-krde lcde, bzkq obqszongrnamu leplz kcng tzapulr nrla nounc kx lakitxpxle. Murde dzbr nc nide kc tqalule nrla nounc, a' trngiu nrladeng kcng tzalulr dzbrdr. ¹⁹ Mwx kzdung nimu naglqpx-lzbqamu mz nzsri-krmu kx, "A' Gct lakitxpxle nrla nc olivi angidr, murde na-axvctrpzle nigr mrkcng tzyzprpx-ngrmlr." ²⁰ Da zpwxtx. A' nrlade kcng tzlakitxpxng murde trnzrlxngitiung, x nimu kx ngipe nrla nc olivi lc murde rlxngitiamu. Mrlyvxix, a' bzkq glqpx-lzbqamu, a' acvetio-lzbqamu mz zmwxlr, murde ma tzlakitxpx kz nimu. ²¹ Murde nzmu Gct kx tqlakitxpxle lr Jiu kcng tqngi angidr nrla nc olivi mz trnzrlxngiti-krdru, e sa nalakipx-kzle nimu, nzmu trnavz-zvzu nzrlxngiti-krmu.

²² Nakrlz-angidramu kx Gct okatrle leplz o ayrplapxle nidr. Murde sc tqayrplapxpele krkcng trnzrlxngitiung. X okatrle nimu mz zmrlz ngrde, nzmu navz zvz nzbritkr drtwrmu zmrlz lc. A' nzmu navecpx-lzbqamu mz nzrlxngitingr, sa nalakitxpx-kzle nimu mz nc olivi. ²³ X mz nqmq lcpwz, nzmu lr Jiu natekqtrlr nqmq nr drtwrdr mz nzlxngiti-krdr Mrly Gct, sa na-axvctr-moule nidr mrkc tzyzprkipxmlr. Murde Gct rngisc zmatq ngr nzaxvctr-moungr nidr. ²⁴ Murde axvctrpzle nimu mz nc olivi kc tqpetile, kxmule-esz' nginimu nrla nc olivi kzble. Mz nzmu-krde lcde, trnarblxpwzu bade kalr nzaxvctr-mou-krde lr Jiu kcng tznginidr nrla nc olivi angidr.

Lr Jiu Sa Nayzlubzng Mz Gct Mz Nzlxngiti-krdr Kraes Kalr

²⁵ Mzlengeng x inwengeng, suti drtwnge nzkrlz-krmu da angidr kc tqyc-kapq mzli kc, murde ma tqglqpx-lzbqamu. Nzmqngikr nar lr Jiu sa navz nakrlzmle mzli kc narlapxngr kxtrngiulrJiu kxnzkqlung kcng tqmcpxng Gct. †

²⁶ Bzb lr Jiu kxnzkqlung kcng mzli lc sa narlxngiting x narlapxng. Da kc tqwai nzsripikr Nzryrngrkxtr le kx, "Mevalu sa naprpxm Jerusalem, x sa nakatxde nqmq kxtrka amrlx mz leplz kcng tzvzpxmqng mz nqvi lr Jekop.

²⁷ X sa nayrlqkr Nzesz'tikr Drtwrdr badr; mzli kc naipqpx-ngrbo alwx ngrdr."

✳ ²⁸ Lr Jiu kxnzkqlung nzpxtxpx-ngrdr Nrpakxmrlz. X krlc okatrle nimu, murde Gct sc tqka-zvzbzle bamu da kxmrlzting. Kxmule-esz', a' lr Jiu sc tznginibedr leplz nedeng kc tqmcpxleng. X mrlzti-zlwzle nidr murde da kcng tqesalz-ngrbzle mz melrmqdrng. ²⁹ X trtekqtrleu drtwrde mz leplz kcng tqkqleleng tqamrlzleng. ³⁰ Mzli kc, nimu kcng trngiulrJiu xpqbrrngrnamu Gct. A' mzli kc lr Jiu trnzrlr-ngrpwlru mz Gct nzokatr-krde nidr x nzyckr drtwrde nidr, okatr-alzule nimu x yc mz drtwrde nimu. ³¹ X mzli ka lr Jiu nzxpqbrrlr-ngrdr Gct. X krlc Gct naokatr-kzle nidr x naycng

† ^{11:25} Mwx 'kxtrngiulrJiu kxnzkqlung' drtwr ngrde leplz kcng na-atutr-ngrdr natq kc tqplzpx Jon mz Nzaelwapxngr 5:9-10 x 7:9. Kzdung leplz kcng tzprpxmqng mz nou, natq, leplz, drtqbr, x neidu amrlx mz nrlc sa nalxngiti-kailr Kraes, x lr Jiu kxnzkqlung kc ate. Mz nibrde kzdung leplz mou sa nalxngiti-kzlr Kraes. ✳ ^{11:27} Asaea 59:20-21; 27:9; Jeremaea 31:33-34

drtwrde nidr, da kc tqwaisr-ngrde nimu. ³² Murde amnclzbzle leplz amrlx mz zmatq ngr nzxpqbzlrngr mz nzapu-kldr kxnmncng mz presin. Mz nzmu-krde lcde, krlzle nzokatr-krde nidr x nzyckr mz drtwrde nidr amrlx.

Nabz Ngr Nzrglqlzngr Gct

³³ Kctitpx-zlwzx nzetukr Nzyrplaxkr Gct x nzrkriz-krde.
Trpnzngk x narde nayrplatrpz
Mz da kc tqaolvzle x nqmq krdeng.

³⁴ Natq Gct rpile kx, “*Trpnzngk*
Kx rkrlz me pnz drtwr Yawe,
O kx rkrlz nzokatr-krde Gct
Mz da kzniwe kx pibzle bade.” *

35-36 “*Trpnzngk* kx rkabz da mz Gct
Murde na-ayzlu-mopwz Gct bade.” *

Murde wz-ngrde nrlc atwrnrngr,
Mz nzvz-nqblq-krde me pnz drtwrde.

X da amrlx lolvz lxblr zvz
Zmatq ngrde kx xplr-esz'ngr. *
Naglqlzku x na-amrlue-zvzku
Gct tqyc tqyc. Eu, angida.

12

Rlr-lzbq-ngrbzmu Mz Gct

¹ Mzlengeng x inwengeng, mz nzkrlz-krmu kx Gct ycngk drtwrde leplz amrlx, lc-apqbzx nimu nzrlr-lzbq-krbzmu mz nzwztr-krbzmu bade, mz nzapu-krmu blz kxtr kxlu. Murde krlc nzangiongr angidr x aelalzmle drtwrde. * ² Bzkq rlr-lzbq-ngrbzmu mz nzvz-nqblq-krmu nqmq kr lr nrlc, x bzkq drtwrmu esz'ti badr. A' rlr-ngrbzmu mz Gct nztekqtr-krbzle nqmq nr drtwrmu, murde navz-nqblq-alzuamu me pnz drtwrde. X mz nzale-krmu da lc, nakrlz-zvzamu me pnz drtwrde. Krlc da kx mrlbz bade, aelalz-ngrmle drtwrde, x tubq mz nzobq-krde. *

³ Mz nzngini-krnge aposol, rmgidrlvz-ngrbo mz doa kxes' mz nimu, kx bzkq glqpx-lzbqm. A' na-avzo-lzbqm mz nzkrlz-angidr-krm zmatq kx myapxbz kc tqkabz Gct bam mz nzwztr-krbzme bade. Murde zmatq lc vzpxm mz nzlxngiti-krm Kraes. ⁴ Murde nrkrdrtqm esz', a' dalr nrkrdrtq kqlu. X mrlcdeng nzwz-krdr bletipx-lxblrng. ⁵ Mz nqmq lcpwz, kxmule-esz' kqluku, a' mz nzaxvctr-krbzku mz Kraes nigu nrkrdrtq kxes'. Doa kxes' mz nigu apule dalr nrkrdrtqde, kx nzmwitr-lxblrbz bade. ⁶ Gct kamle bagu zmatq kxmyapxbz kx bletipx-lxblrng mz nzwztr-krbzku bade. X zmatq lcng nzvzpxmqng mz Mqngrkxtr. Doa kxes' mz nigu nawz zvz mz zmatq kc tqkabz Gct bade. Nzmu kx tqkabzle bam zmatq ngr nzrplzpxngr nrpa kc tqkabzle bam, plzpx nrpa lc navz-nqblqle nzetukr nzlxngiti-krm, mzli kc tqpi-ngrbz Mqngrkxtr nzplzpx-krmle. ⁷ Nzmu kx tqkabzle bam zmatq ngr nzwztr-ngrbz mz leplz, wztrpz badr. Nzmu kx tqngi nzalvztrnegr natq Gct le, alvztr leplz. ⁸ Nzmu kx tqngi dalr nzapqtr-ngrbz drtwr leplz le,

* 11:34 Asaea 40:13-14 * 11:35-36 Job 35:7; 41:11 * 11:35-36 Kolosia 1:17 * 12:1 Jon 4:23-24 * 12:2 Gct krlzle nztekqtr-krde nqmq nr drtwrgru mz nzrlwx-krgu Nzryrngrkxtr x mz nzvz-nqblq-krgu le mz nzmnc-krgu.

apqtrpz drtwrdr. Nzmu kx tqngi zmatq ngr nzrka-ngrbz da mz leplz le, rka-nrbalqbz badr, a' bzkq pnz drtwrm nzayzlu-krbzlr le. Nzmu kx tqngi zmatq ngr nzrmailzngr le, mailz angidr leplz. X nzmu kx tqngi zmatq ngr nzrycngr drtwr leplz le, okatr nidr.

⁹ Nivz lrm, nangi nivz angidr. Lolvz-amqngi da kxmrlzbz mz Gct, x pxtpxngr da kxtrka. ¹⁰ Mrlzti leplz da kc tqwaisr-ngrn doa lr ma nyzm. X amrlue kztemqng namyaszpxle nim esz'-krm. ¹¹ Nzpq-zlwzkr drtwrm mz nzwztr-krbzme mz Kxetu, naglq-zvzle nabzm. ¹² Naelalz-zvz-ngrm drtwrm nzobqtipx-krm da amrlx kcng tquesalz-ngrbz Gct bam. Tu-amqngi mz nzrlxngiti-krm mz mzli r nzkxpung. Bzkq nzkrka'-krm esaki. ¹³ Akiamu dztumu badr leplz ne Gct kcng takitrde nzokatrngr. X abrtlvz nzadwatr-krbz leplz ma nyzm mz nzvz-krdr mrkzbleng.

¹⁴ Rlxtibz mz Gct nzamrlz-krde krkcng tzatrkatilr nim. Amrlz nidr, x bzkq pibqtiq nidr. ¹⁵ Prtr mz nzabrtzkr kxnzabrtzng, x mz nzvzkr drtwrdr kxnzyrnning. ¹⁶ Mnc-zpwx-lxblramu. Bzkq aetu-lzbqm, a' mnc-lxblramu badr leplz x wz-lxblramu badr. X bzkq rpiq nim kxrkrklz da.

¹⁷ Bzkq ayzlubzme da kxtrka kx nzalebz leplz bam. A' ale txpwz da kxtubq mz drtwr leplz amrlx. ¹⁸ Kxmule-esz' nike nzale leplz, a' ale zvz da kx namnc-ngrnamu badr mz nrwx. ¹⁹ Nimu kztengeng, x doa kxesz' mz nimu bzkq ayzlubzme da kxtrka kx nzalebz leplz bam. A' rlr-ngrbz mz Gct nzayrplapx-krde nidr mz zngya ngr drtwrde. Murde mz Nzryrngrkxtr rpi Yawe kx, "Ninge kx na-ayrplapxle leplz. X ninge kx na-ayzlu-mopwz badr da kx nzalelr." ²⁰ A' nim vz-nqblq alzu nike pi Nzryrngrkxtr kx, "Nzmu doa kx mwati drtwrde nim kx tqbrtalele, rkabz nade dakxnzng. X nzmu drtwrde kc tqbrlxzle, rkabz mqde lue. Mz nzale-krbzme da lc, sa namyangr drtqde da kc tqalebzle bam." ²¹ Bzkq rlr-ngrbzme mz da kxtrka kx nzalebz bam nzaovxio-krde nim, murde ma tqbatrpzle bam nzayzlu-krbzmele badr. A' aovxio nzao-krm drtwrm kxtrka mz nzale-krbzme da kxmrlz badr.

13

Vz-nqblqamu Gzpman

¹ Doa kxesz' mz nigu kxnzrlxngiting namnclzbz mz zmatq ngr gzpman. Murde zmatq ngr gzpman amrlx vzom mz Gct, x yrlqle kxnzetung ngr gzpman mr nydzdrng. ² Mz nzmu-krde lcde, krkcng tzxpqbrr-ngrdr gzpman nzxpqbrr-ngrdr Gct kc tqyrlqle gzpman lc, x sa na-ayrplapxng. ³ Krkcng tzaleng da kxtubq trnzmxlrltilru gzpman. A' nzmwxlrti krkcng tzaleng da kxtrka. Nzmu kx trsutiu drtwrmu nzmwxlrltingr gzpman, e ale-txpwzmu da kxtubq, murde naglqlz-ngrdr nimu. ⁴ Murde kxnzetung mz gzpman, nidr kxnzawz neng Gct kcng tqyrlqleng mz nzokatr-krdr nimu. A' nzmu kx tqaleamu da kxtrka, e mxwlrtiamu gzpman lc, murde Gct kabzle badr zmatq ngr nzayrplapxng kxnzaleng da kxtrka, kxmule-esz' nznibqlr nidr. ⁵ Mz nzmu-krde lcde, namnclbzmu mz zmatq ngr gzpman murde ma tzayrplapx nimu, x mou murde tubq nzmnlz-krbzmu bade.

⁶ Delc tqxpe-ngrnamu kz takes, murde kxnzetu lcng nidr kxnzawz neng Gct mz nzale-krdr nzwzng kx tqkabzle badr. ⁷ Mz nzmu-krde lcde, xpebzmu mz leplz nike takitrde nzzxe-krmu. X xpeamu takes kcng tqpi lou ngr gzpman kx naxpe. Mz nqmq lcpwz amatqamu krkcng tqtakitrde nzamatq-krmu nidr x amrlueamu krkcng tqtakitrde nzamrlue-krmu nidr.

Nzmnncngr Kxtubq Mzli Ka, X Jiszs Sc Tqyzlu-atem

⁸ Eu. Mrlz nzxpe-krbzmu mz leplz da amrlx kcng tqrlxtibzmu badr. A' nakrlz-zpxwamu kx rblx nzxpe-krbzmu da mz Gct mz nzayzlu-krbzmu nivz lrde. Delc navz zvz nzmrlzti-lzbq-krmu. Murde nzale-krmu da lc atutrlle natq amrlx kcng tqkapx Loukxtr. ⁹ Natq lcng nzrpilr kx, "Bzkq rmwimiq doa kx trngiu kernalzm. Bzkq rnibqq leplz. Bzkq pnaq da. Bzkq rkcmnz-ngrn," x kzdung kz da mou. ¹⁰ A' natq lcng amrlx nzaxvctr-lxblrbzng mz natq kc esz' tqrpile kx, "Namrlzti kztemqng da kc tqwaiq nzmrlzti-lzbq-krm." ¹¹ Nzmrlzti-krmu leplz drtwr ngrde kx bzkq aleamu da kx na-atrkatile nidr. Mz nzmu-krde lcde, nivz ngi lrpzki nzvz-nqblqng Loukxtr amrlx.

¹¹⁻¹² Nzmnc-krmu natubq, mz nzkrlz-krmu kx ycpe pipz nzyzlu-krm Jiszs mz nzvzmi-krde nigu Heven. Mz nzmu-krde lcde, bzkq amaamu, a' nawz-katopeamu mz nzwzngr kc tqkabz Kxetu bamu mzli ka tqycngrbepz mzli. X bzkq vz-nqblq-zvzamu da kxtrka, a' vz-nqblq-alzuamu nzalvztrngr angidr. ¹³ Mz nqmq lcpwz kx tr-rblxu nzmc-krgu da ngrlx, tr-rblx-kzpwzu mz leplz nzmc-krdr kx nqmq krmu tubq. Bzkq prtrpzmu mz kxnzrmnq-zvzng, kxnzyrlwr-lxblrng mz nzale-krdr alwx, kxnzrmwimi-abeaneng, kxnzaleng da kx myangr drtq, kxnzota-zvzng, x kxnzdobung, a' kapx-lzbqماما badr. ¹⁴ A' mz nzaxvctr-krbzmu mz Kxetu rgu Jiszs Kxnzmcpx, navz-nqblq-kzamu nqmq krde, murde leplz namclr nide mz nzmc-krdr nqmq krmu. X bzkq aoti drtwrmu nzvz-nqblq-krmu zmatq ngr alwx kc tqycpxbep mz nrkrdrtqmu. ^{*}

14

Bzkq Pikitiq Leplz Kcng Nzrlxngiti-krdr Tqngrgo

¹ Mnc-zpxwamu badr leplz kcng drtwdr tqlitrpz mz da, murde trnzkrizlru kx da kx nzalelr tubqbz mz nzobqkr Gct o trtingr. X bzkq otablramu badr mz drtwr kx blepxngr mz nzao-krmu drtwrmu. ² Murde kzdung leplz nzlxngitilr kx takitrde nzmu-krdr dakxnxng amrlx. A' kzdu-kzng leplz trnzmuu ncvr animol, murde mz drtwdr rpwa'ng Gct x nzrlxngiti-krdr nrgo mz nzmu-krdrle. *

³ Mrlx kx krlzle nzmungr dakxnxng amrlx bzkq obqszo-ngrde ncblo kc trmuu ncvr. X doa kx trkrlzleu nzmungr ncvr, bzkq pikitile ncblo kc tqmu dakxnxng amrlx, murde tr-rpwa'-ngru Gct. ⁴ ?Nim neke kc tqkxmu nzycmne-krde lc? Murde trtakitrdeu nzpikiti-krm kxnzawz neng Gct! Trnzwztrpwzu bam! A' Kxetu sa napibzle mz kxnzawz nedeng kx nzale-krdr da kxtubq o trtingr. Kxnzrlxngiting amrlx nidr leplz nedeng, murde okatrle nidr amrlx, kxmule-esz' nzrlxngiti-krdr mqngi o nrgo. ⁵ Mz nqmq lcpwz, kzdq ncblo mz drtwrde kzdq zbq kxesz' myapxbz mz zbq amrlx. X kzdq kz ncblo mz drtwrde zbq amrlx kxmu-txpwzle esz'. Doa kxesz' mz nimu nakrlz-angidrle nike lxngitile, x navz-nqblqle mz nzmnc-krde. ⁶ Murde mrlx kx rpi drtwrde kzdq zbq kxesz' myapxbz mz zbq amrlx, alebzle mz Kxetu. X krkcng tzmung dakxnxng amrlx, nzalebzlr mz Kxetu, murde nzawi-ngrbzlr bade. X leplz kx trnzmuung ncvr, nzale-kzpzlr mz Kxetu mz nzawi-krbzlr bade. Nzabrtzlvzkr Gct nidr vzpxm mz nzale-krbzlr

* **13:8** Matiu 22:40 * **13:9** Nzrlaszngr 20:13-17; Lou Kcpwz 5:17-21 * **13:9** Livae 19:18; Matiu 19:19; 22:39; Mak 12:31; Luk 10:27; Galesia 5:14 * **13:14** Rom 7:23 * **14:2** 14:1 Bzkq otablruk mz da kx tryctru mz Nzryrngrkxtr. X mou, bzkq otablruk mz dalr Nzryrngrkxtr kx tropxu, x drtwr lrmakxtr tresz'titru elr, da kc tqwai mz nzwrkxtrngr. A' takitrde nzatubqt-krgu leplz kcng tzaleng alwx x tzxpqbrr-ngrdr natq Gct. 14:2 Lou sc Mosis rpwa'-ngrde nzmungr kzdung dakxnxng. A' mzli kc lr Jiu tzlxngitipe-ngrdr Jiszs, nardr tryrplatrpwzu kx mzli ka takirpede nzmu-krdr dakxnxng angidr amrlx.

da bade. ⁷ Mz nzao-krgu drtwrgu nigu kxnxrlxngiting, da kxmyapxbz trngiu nzamatqkr leplz nigu mzli ka mz nzlu-krgu o mzli kc nabz-ngrgu. ⁸ A' da kxmyapxbz nzamatqkr leplz Gct mz nzmc-krdr nqmq krgu mzli ka x mzli kc nabz-ngrgu. Mz nzmu-krde lcde, kxmule-esz' luku o bzku nede nigu Kxetu rgu. ⁹ X nakrlzamu kx Kraes bz x lu-mop murde nanginide Kxetu r kxnzlubeng x kxnzbzpeng. ¹⁰ Mz nzmu-krde lcde, bzkq pikitiq x obqszoq kztemqng. Murde mzli kc nayzlu-ngrm Jisszs, sa natutrpzku amrlx ngrgu mz mz Gct, mz nzpi-krmle bagu kx vz-rbrku o trtingr. ¹¹ Murde mz Nzryrngrkxtr Kxetu rgu rpile kx, “*Da kc tqipibo bamu sa natur angidr, murde ninge Yawe Gct kc tqlu alo. Leplz amrlx sa na-atuobzng zpr bange. x naplpxlr natq ngr nzrglqpxngr ninge.*” ¹² Mz nzmu-krde lcde, nigu leplz amrlx sa napipxbzku mz Gct nqmq krgung x da kx alekung amrlx mz nrlc ka.

¹³ Mz nzmu-krde lcde, bzkq vz zvz nzpikiti-lzbq-krmu. A' na-aoti drtwrmu kx bzkq aleamu da kx na-atrkatile nzrlxngitikr kztemung o na-ataole nidr mz alwx. ¹⁴ Mz nzaxvctr-krbo lc mz Kxetu rgu Jisszs, lxngiti-angidrx kx trpnzngr dakxnzng kx trtakitrdeu nzmungr mz nzobq-krde. A' nzmu mzlenge rpi drtwrde kx kzdung dakxnzng trtakitrdeu mz nzobqkr Gct, trtakitrdeu nzngq-krdeleng. X bzkq atrkatil-ngrbo nzrlxngiti-krde. ¹⁵ Nzmu nzmu-krm ncvr atrkatile nzrlxngitikr kztem x ataole nide mz alwx, e bzkq ngqnle. Murde Kraes bz-ngrde nzarlapx-krde nide. X da kx atrkatile nzrlxngitikr kztem, trvzpxpuu mz nivz. ¹⁶ Mz nzmu-krde lcde, bzkq ale-zvzq da kx mrlzbz bam esz'-krm, murde ma tqataole kztem mz alwx x sc tzpibqtipengr leplz nim. ¹⁷ Murde mz nznginiikr Gct king rmu, da kx myapxbz trngiu nzmungr x nzrmnqngr. A' da kcng tqmyapxbz da lcde seleng tq: ntzubqkr nzmnnc-krmu mz nzobqkr Gct, nzmnnc-zpxw-krmu badr kztemung kxnxrlxngiting, x nzprtr-krmu mz nzabrtzngr kx vzpxm mz Mqngrokxtr. ¹⁸ Murde krkcng nawztrpzng mz Kraes mz nzvz-nqblq-krdr da lcdeng, sa na-abrtzlvz Gct nidr x na-amatq kz leplz nidr.

¹⁹ Dekc na-ale-ngrgu da kx na-amnc-zpxwle nigu x na-amqngile nzrlxngiti-krgu. ²⁰ Nzmu nzngq-krmu dakxnzng na-atrkatile da kx na-alebz Gct mz kztemung, bzkq ngqamu dakxnzng lcng. Murde dakxnzng amrlx takitrde nzmungr mz nzobq-krde. A' trtakitrdeu nzngq-krmu dakxnzng kx nabatrpzle mz kztemung ntzao-krdr mz alwx. ²¹ Bzkq aleamu da kx krlzle nzbatr-krbzle mz kztemung ntzao-krdr mz alwx, kxmule-esz' da kx ngqnamu o da kx mnqamu. ²² Doa kxeszz' mz nimu, bzkq alvztrpzme nike lxngitiq mz da lcng mz kztemqng, murde navz-nqblq-kzlr me pnz drtwrm. A' pi txpwz nzrlxngiti-krm mz Gct. X mz nzvz-nqblq-krmle, Gct trnapipwzleu bam kx vz-rbrq, a' sa na-abrtzlvzle nim. ²³ A' doa kx drtwrde litrpz mz dakxnzng kx ngqde, alepele da kx vz-rbr. Murde trvz-nqblqleu da kxtubq mz nzobqkr Gct mz nzrlxngiti-krde. Mzli kznike doa ale-ngrde da kx atrkatile nzrlxngiti-krde sc tqalepele alwx mz nzobqkr Gct.

15

¹ Nigu kcng nzrlxngiti-krgu tqmqngi, na-aoti drtwrgu kztegung kcng nzrlxngiti-krdr tqnrgo, mz dakxnzng x zbz kxtr lcng. X bzkq ale-txpwzku da kx na-abrtz-ngrgu esz'-krgu. ² A' mzli kc tqmnc-ngrgu badr, na-aleku da kxmrlzbz badr mz nzokatr-krgu nidr mz nzamqngingr nzrlxngiti-krdr. ³ Murde Kraes traleleu da kx na-abrtz-ngrde esz'-krde, a' da kx abrtzngr Gct, da kc tqwai nzpikr Nzryrngrkxtr le kx, “*Natq kcng tzpikiti-ngrdr nim,*

yrplatr-kzpqng bange." ⁴ Da amrlx kcng tqyclzm mz Nzryrngrkxtr, nzyrongrdr na-alvztrlr nigu, murde nabzgu napqtr zvv x natu-amqngi-zvzku mz nzobqtipx-krgu da kcng tquesalz-ngrm Gct bagu. ⁵ Krka'-ngrbo mz Gct kc tqapqtrple nabzgu x okatrle nigu mz nztu-amqngi-krgu mz nzrlxngiti-krgu, kx sa naokatrle nimu mz nzesz'tikr drtwrmu, mz nzvz-nqblq-krmu nabzlvz r nany Mevalu Jiszs. ⁶ Murde naodutr-lxblramu mz nabz kxesz' mz nzangio-krmu Gct, kc tqngi Trte Kxetu rgu Jiszs Kxnzmcpx. Eu, angida.

⁷ Mz nzmu-krde lcde, na-aodu-lzbqamu, da kc tqwai Kraes nzaodu-krde nimu, murde nzesz'tikr drtwrmu lc nabatrpzle mz leplz nzglqlz-krdr Gct. ⁸ Nadcpx mz drtwrmu kx Kraes vzm mz nzokatr-krde nigr lr Jiu. Suti drtwrde kx na-aelwapx-ngrde kx Gct takitrde nzbrtikr drtwr leplz le. Murde angidatile da kcng tquesalz-ngrbzle mz melrmqgrng, mz da kc tqalepele Mevalu kc Tzmcpx. ⁹ X Kxnzmcpx vz-kzp murde kxtrngiulrJiu naglqlz-kzlr Gct mz nzyckr drtwrde nidr x nzokatr-krde nidr. Da lc atutre da kc tqpi Devet mz Nzryrngrkxtr kx, "Gct, sa naglqlzx nim mz mzlir lr drtbqbrng amrlx, mz nzangrlvz-krnge nim." ¹⁰ Rpi mou Nzryrngrkxtr kx, "Nimu kcng trngiulrJiu, abrtz-lxblramu badr leplz neng Gct." ¹¹ X rpi-moule kx, "Glqpxamu Yawe nimu lr drtbqbrng amrlx. X leplz mz nrlc tulvzo naglqlz-kzlr nide." ¹² X rpi kz profet Asaea kx, "King kxmrna sa naprpxm mz nqvi lr Jesi. X na-aclvele kxtrngiulrJiu. X sa na-abrtrpzlr drtwrdr bade."

^{*}

¹³ Gct nide nou nzobqtipx-krgu da kcng sa na-alele kalr. X krka'-ngrne kx sa nakabzle bamu nzabrtzngr x nzmnc-zpxng kcng tzvzpxmqng mz nzbrtikr drtwrmu nide, murde nzrlxngiti-krmu naetunepx zvv mz zmatq ngr Mqngkrkxtr.

¹⁴ Mzlengeng x inwengeng, krlz-angidrx kx amrlz-zvzamu leplz, x krlzpeamu da amrlx kx suti drtwr Gct nakrlzamu, x krlz-kzamu nzalvztr-lzbq-krmu. ¹⁵ A' mz nzryr-krbo lc letz, rrgidrlvz-ngrbo kzdung da bamu, kx nadcpnxnrg drtwrmu da kxmyapxbz. X alex da lc murde mz nzvz-nqblq-krde zmrlz ngrde kxmyalz, Gct atwzlr-ngrmle ninge ¹⁶ mz nzokatr-krnge nimu kxtrngiulrJiu mz nwztr-krbo mz Mevalu Jiszs. Apux pris kc tqvectrple leplz mz Gct, mz nzyapwxtipx-krbo Nrpakxmrlz mz kxtrngiulrJiu, murde nalxngiti-kzlr Kraes x natubqng mz nzobqkr Gct, mz nzapu-krdr blz kc tqatr Mqngkrkxtr.

¹⁷ X mz nzaxvctr-krbo mz Mevalu Jiszs, glqpx-lzbq-ngrne nwztr-krbo mz Gct. ¹⁸⁻¹⁹ A' sa naycmnetxtrpo mz nike ale Kraes mz nzaxvctr-krbo bade, mz nzmailz-krde leplz kcng trngiulrJiu mz nzvz-nqblq-krdr natq Gct. Murde batrz Gct nzrlxngiti-krdr mz zmatq ngr Mqngkrkxtr kc tqaelwapxpele mz nzryapwxtipx-krnge x mz nzale-krnge rkx x da kxnxkctipxng. Dekc tqyapwxtipx-zpxbo Nrpakxmrlz mz lr mztea kcng trnzkrzkalr Kraes. A' trsutiu drtwrge nzalvztr-krnge lr mztea kcng tzxlrpelr Nrpakxmrlz mz lr mztea kcng trnzkrzkalr Kraes. ²¹ A' nwztr-krnge natutre Nzryrngrkxtr kc tqycmnetr-ngrde Kraes mz nzsri-krde kx, "Lepz kcng trnzpi-kaipwzu badr nide, sa nakrlzlr nzalvztrngr angidr. X leplz kcng trnzxlr-kailru nrpa ngrde, nardr sa nayrplatrpz mz nrpa lc." ²² X nwztrde kqlupe kx rpi-ngrne kx naoklati-ngrbo nimu. A' nzale-krnge nwztr-krbo ngrne kx naoklati-ngrbo nimu. A' nzale-krnge nwztr-krbo ngrne kx naoklati-ngrbo nimu.

^{*} **15:3** Sam 69:9 ⁵ **15:9** Sam 18:49; 2 Samwel 22:50 ⁸ **15:10** Lou Kcpwz 32:43 ⁸ **15:11** Sam 117:1 ⁸ **15:12** Asaea 11:10 ^{*} **15:12** Jesi nide trte King Devet, x Jiszs Kxnzmcpx nide King kx prpxm mz nqvi lrdr. ⁸ **15:21** Asaea 52:15

Pol Aoti Drtwrde Nzoklati-krde Lr Rom Kxnzrlxngiting

²³ A' mzli ka nzwz-krnge yrkrpxpe mz mztea lcdeng, murde trpengr mrka me nayapwxtingr mou Nrpakxmrlz. Delc, tqaotipengr drtwnge nzoklati-krbo nimu, murde yiz kqlupe kx sutingr drtwnge nzvz-krbo bamu. ²⁴ Sa naoklatibo nimu mzli kc navz-ngrne Spen. X sa naodutr-lxblrku mz kzdung mzli. X mz nibrde, suti drtwnge naokatramu ninge mz nzvz-krnge Spen. ²⁵ A' mzli ka navz-kaix Jerusalem mz nzrtwz-krbo kzdung trau kx naokatrle lrmakxtr kx nzmnncng elr. ²⁶ Murde dzbe lrmakxtr ngr provins kcng Masedonia x Akaia nzabrtz-ngrdr nzrkapx-krdr trau kx naokatrngr nra-nzlungr lrmakxtr kcng Jerusalem, mz nzodutr-lxblr-krdr badr. ²⁷ Eu. Nzabrtz-ngrdr nzrkapx-krdr, murde rblxbz mz kxtrngiulrJiu nzayzlu-krbzlr mz lr Jiu da kxnzmrlzting amrlx kcng tqkabz Gct badr mz nzaxvctr-krbzlr mz Mevalu kc tqesalz-ngrbzle mz lr Jiu. Delc takitrde kxtrngiulrJiu nzrka-krbzlr kzdung dztudrng mz nrlc ka mz nzokatr-krdr lr Jiu. ²⁸ Mz nibr nzrtwz-krnge trau kcng tzataqtilr Jerusalem, ninge kc tqvz-atax Spen. X mz nzvz-krnge lc Spen, dekc naoklati-ngrbo nimu. ²⁹ Krlzx kx mzli kc navz-ngrmc bamu, Kraes sa na-amrlz-zlwzle nigu mz da kxkqlu.

³⁰⁻³¹ Mzlengeng x inwengeng, nigu dzbede kxes' mz nzaxvctr-krbzku mz Kxetu rgu Jiszs Kxnzmcp, x mz nzaodukr Mqngrkxtr nigu. Mz nzmu-krde lcde, drtwnru naesz'ti kz mz nzkrka'-zvz-krgu ninge mz nzvz-krnge Jerusalem. Murde Gct na-arlapxle ninge mz provins kc Judiz, murde ma tzatrkatilr ninge lr Jiu kcng trnzlxngitilru Jiszs. X nakrka'-kz-ngrnamu kx leplz kxnztrng ne Gct kcng Jerusalem, na-abrtzlvzlr trau kc natwzbo badr. ³² Nzmu kx tqsuti drtwnr Gct le, sa naelalz-ngrm drtwnge nzvz-krbo bamu, x sa na-apqtrpamu drtwnge x na-amqngiamu nzrlxngiti-krnge mzli kc namnc-ngrgu. ³³ Krka'-ngrne kx Gct kc tqngi nou nzmnc-zpwxngr, namncbz bamu amrlx ngrmu. Eu, angida.

16

Rpibz Pol "Nimu la," Mz Kzdung Lr Rom

¹ Fibi kc tqrtwzbz letz lc bamu, nide inwegu kc tqwztrpz mz lrmakxtr kc mz taon Kenkrae, mz nzngini-krde kzdq kxaclvele dalr makxtr. Abrtzlvzx nide murde nide olvz kxmrlz-esz'ngr. ² Rlxtibo bamu nzaodu-krmu nide naesz' mz nzngini-krmu leplz neng Gct, murde wztrpz mz Kxetu. Okatramu nide mz nikeng suti drtwnre, murde okatr-zlwzle ninge x leplz kxnzkqlu.

³⁻⁴ Rpibzmu kx, "Nimu la," mz kztengeng amrlx mrla, myapxbz Prisila x Akwila, nidr kx wztrpzkr badr mz Jiszs Kxnzmcp, badr lrmakxtr kcng tzangio-lxblrng ma nydzr. Ycpwz pipz nzbz-krdr mz nzarlapx-krdr ninge. X nigr badr lrmakxtr amrlx kcng trngiulrJiu awitx-zlwz-ngrbzkr mz Gct nidr.

⁵ X kztengeng Epenetz. Nide kx lxngiti-kaile Kraes mz provins kc Esia.

⁶ Mxri kc tqwz zlwz mz nzokatr-krde nimu.

⁷ Adronikzs x Junia, ni-kzdr lr Jiu. Mrlix lcng nzling mnccpxmgnr badr mz presin, x nidr aposol kxnzamatqng. Nidr rlilrdr kx nzlxngiti-kailr Kraes x ninge kc ate. *

⁸ X Ampliatzs, nide mzlenge kx mrlzvxi mz Kxetu.

⁹ Urbanzs, nide ncblu kx wzku badr mz nrlarde nyz Kraes. X mrlx kztengen Stakis.

* ^{16:7} Nzpilr kx Junia ngi drtq olvz, kc tqngi kx aposol.

- ¹⁰ Apelis kc tqaelwapx-ngrde nzpqkr nzlxngiti-krde Kraes, mz nztu-amqngi-krde mz mzlir nzkxpungr.
 X lr ma nyz Aristobulzs.
- ¹¹ X Herodion, ni-kzde lr Jiu.
 X kxnzrlxngiting kcng tzmncng ma nyz Narsiszs.
- ¹² Trifaena ncdr Trifosa, olvz kx nzwz-zlwzng mz nrlarde nyz Kxetu.
 X inwegu Persis kxnzmrlzti. Nide kzdq kz olvz kx wz kato mz nrlarde nyz Kxetu.
- ¹³ X Rufzs, ncblo kxmyapxbz, x lxede kz kc tqapusr-ngrde ninge mrlxde.
- ¹⁴ Asinkritzs, Flegon, Hermes, Patrobas, Hermas x lrmakxtr amrlx kcng tzangio-lxblrung badr.
- ¹⁵ X Filologzs, Julia, Olimpas x Nerezs ncdr inwede, x leplz neng Gct amrlx kcng tzangio-lxblrung badr.
- ¹⁶ Eu, x rpi-etramu, “Nim la,” x male-lxblramu mqmu mz nivz. Lrmakxtr amrlx kcng tzmncng mrka nzrpibzlr bamu kx, “Nimu la.”

Natq Ngr Nzarlrlzbqng

¹⁷ Mzlengeng x inwengeng, xplrmibz natqnge bamu, kx acvetioamu leplz kcng tzakipxlr kxnzrlxngiting. Murde nzatrkatilr nzrlxngiti-krmu mz nzrpi-krbzlr da kx blepxngr mz nzalvztrngr kc tqkrlz-kaiamu. Kapx-lzbqmamu badr. ¹⁸ Murde leplz kxnzmull lcng trnzwztrpwzung mz Kraes, Kxetu rgu. A' nzvz-nqblq-txpwlzr alwx kznikeng nzaoti drtwrdr kx namrlzbz badr. Nztamiti-krdr leplz mz natq x nzalvztr-krbzlr badr da kxmrlz mz nxzlr-ngrbz, a' nzkrlzlr nzesabrttingr leplz kx trnzaclvetio-lzbqung mz nzalvztr-rbr-krdr lc. ¹⁹ Leplz kxkqlu nxzlrpelr kx vz-nqblqpeamu Nrpakxmrlz. X mz nzmu-krde lcde, abrtztx-zlwz-ngrne nimu. A' suti drtvrnge nakrlz-angidramu da kxmrlz, x bzkq aoti drtwrmu da kxtrka. ²⁰ Murde ycpe pipz Gct kc tqngi nou nzmnc-zpxwngr, nzodati-krde zmatq ngr Setzn, mz nzokatr-krde nzaovxio-krmu leplz kcng tzrpilr na-akipxlr nimu. Krka'-ngrne kx Kxetu rgu Jiszs Kxnzmcpk naokatr-zvzle nimu mz zmrlz ngrde kxmyalz. Eu, angida.

²¹ Kzdung lrmakxtr kcng mrka nzrpi-kzpplr bamu, “Nimu la.” Kzdung nidr seleng, Timoti kc tqwzkr ncdr. X Lusias, Jeszn x Sospata, mrlx lcng nigr badr lr Jiu. ²² X Tertizs kc tqyrbzle natqnge lcng. ²³ Gaizs kc tqmnckr ncdr ma nyzde, x kc tqrlr-ngrbzle mz lrmakxtr nzangio-krdr mrka. X wai-kzle Erastzs kc tqaclvele trau ngr taon ka, x mzlegu Kwartzs. †

Nzrglqlzkr Pol Gct

²⁵⁻²⁶ Naglqlzku Gct kc tqkrlzle
 Nzatu-amqngingr nimu amrlx
 Mz nzlxngiti-krmu nrpa ngr
 Jiszs Kxnzmcpk kc tqyapwxtipxx.

Nrpakxmrlz lcde yc-kapq pnz
 Mzli kc nrlc trnzwzka-ngrde.
 A' mzli ka sc tqaelwapxpengr Gct
 Kx suti drtvrde leplz amrlx.

Na-arlapxle kxnzlxngitilr Kraes,

† **16:23** Ngalrde kc 24 yclzm mz kzdung nzryrngr kcng pnz. X mule narsakrlrmi ngalrde kc 20, mz nzrpi-krde kx, “Eu, krka'-zvz-ngrne kx Kxetu rgu Jiszs Kxnzmcpk naokatrle nimu amrlx ngrmu mz zmrlz ngrde kxmyalz. Eu, angida.”

Kxmule-esz' nidr lr Jiu o trtingr.
Gct kc tqlu zvz kapxle natq
Kx natqde kcng pnz na-atutrpeng.

Da kcng tzyro-pnzlr profet mz
Nzryrngrkxtr na-atutrng mzli ka.
Murde leplz mz nrlc tulvzo
Nalxngitilr Kraes mz nzmnnc-krdr.

²⁷ Gct nide txpwz Gct kxyrplapx.
X nigu kcng tzaxvctrpzng mz Kraes
Jiszs Kxnzmcpk naglqlzku
Gct tqyc, tqyc. Eu, angida.

Delape. Ninge *Pol.*

Nzryr-krbz Pol Kx Ayrnrngr Mz Lr Korint Natq Ngr Nzaplxtqngr Mz Nzryr-krbz Pol Kx Ayrnrngr Mz Lr Korint

Aposol Pol nide ncblo kx ryapwxtipx-kai Nrpakxmrlz Korint, mz nzvzpx-krde krali, x dzbe lrmakxtr lc vzpxm mz nzwz-krde. [◊] Mz taon lc, tu elr madrka' nzkqlung. Lr Korint nzrmnq-zlwzng x nzrmwimi-abeaneng leplz kx trngiu kernalzdrng. Mzli kc tzrlxngiti-ate-ngrdr, nqmq nr drtwrdr apubele kxnzmnc-mrbrng. Lr Korint kxzrlxngiting nzkqlung kxtrngiulrjiu, kx trpnzngr scdr da, x kxzawz-nrbalqng. A' kx nznginidr bcnyr nzpipzng. Nzaki-lzbqng murde kxznginidr bcnyrng nzobqszolr kztedrng kx trpnzngr scdr da. Kzdung kxzrlxngiting lcng nzrmwimng kxtrngiulrjiu kernalzdr. X nzglqpx-lzbqng mz zmatq ngr nzwzngk kc tqkabz Mqngrkxtr badr, myapxbz zmatq ngr nzycmne-ngrbz mz Gct mz natq lr mrkzbleng. Mz drtwrdr nidr leplz kxnyrplapxng x kxzbrpeng mz nzvz-nqblq-krdr Jiszs. A' trtingr.

Pol yr-kaipzle kc letz mz lrmakxtr mrkc Korint mzli kc, x letz lc kc ate. Mz letz kc kai, pnanatile nidr mz nqmq krdr kxtrka. Zbz mzli kc tqmnc-ngrde mz taon Efisz, ncblo nztqng nztwzbzlr bade kc letz kx nzatzl-krdr lr Korint. X mz letz lc nzayzlu-nrbzlr natqdeng. Trkrlzkuu nike tqyrlle mz letz kc kai. A' opx angidr kx lr Korint nzpaxpx-ngrdr natq Pol x nzbatrpzlr mz leplz nzyrlqpx-lzbq-krdr mz zmatq ngr nzngini-krde aposol. Zbz Pol sc tqayzlu-mopwzle natqdr mz letz lc, tqyrlle mz mzlir yiz 54—55 AD mz nibr nzrmcngk mz Jiszs, mz nzvzpx-krde kratq.

Kxmule-esz' yrbzle letz kc kai, a' lr Korint kxzrlxngiting kxzqqlung nzvz-nqblqbelr nqmq nr drtwr lr Griek kxnzmnc-mrbrng. Mz drtwrdr, dalr nrlc trmyapxpzu, a' dalr nqmq kxtr kx myapx-zlwzbz. Mz nzmu-krde lcde, mrlzbz badr nzrmwimi-krdr kx trngiu kernalzdrng, murde nrkrdrtrq ncblo ngi dalr nrlc ka. X drtwr lc batrpzle badr nzvz-rbr-krdr mz nzyrlzngk x mz ntulzkr nrkrdrtrq mz nzbzngk. X mou, mz drtwrdr Pol trnginideu aposol, murde trycmne-aboipwzu badr mz natq kx rblx, a' natqdeng opx angidr. X Pol wz mz nzrtwz-krde trau, x takitrde kxetu nzbatr-krbzle mz leplz nzyrlzngk da bade. Mz drtwrdr nzyrapwx-krbz Pol badr takitrde kxzrlxngiti-ateng, x trtakirpedeu nidr murde nzrlxngiti-krdr brpe. A' Apolos, kc tqalvztrle nidr mz nibr Pol, mz drtwrdr vz-nqblqle nqmq kr kxetu mz da lcdeng, x nzvecpx-lzbqmqng mz Pol, mz nzvz-nqblq-krdr Apolos. Mz letz lc, Pol atubqtibzle drtwrdr lcng tqvz-rbr, mz natqdeng kxpq zlwz.

Mrkcng Mz Letz Lc

Lr Makxtr nzaki-lzbqng. [1:10-17; dckrlzde 3]

Mz drtwr kzdung leplz nzyrplapxkr Gct ngi dalr nzngqngung. [1:18—2:16]

Kxnamu nzmnckr Aposol badr lrmakxtr. [dckrlzde 4]

Lr Korint na-ayrplapxlr kxzrlxngiting kcng tzapulr kxtrnzrlxngitiung. [dckrlzde 5]

Bzkq kxrlxngiti twzle kztede kxrlxngiti mz kot. [6:1-11]

Nrkrdrtrq kxzrlxngiting sc Gct. [6:12-20]

Kxnamu nzyrlzngk kxtubq. [dckrlzde 7]

Kxzrlxngiting bzkq nzmung dakxnzng kx nzkabz mz drka'. [dckrlzde 8]

[◊] : Aposol 18:1-8

Aposol Pol nzaotikr drtwrde le kztedeng nzmyaszpxlr nide. [dckrlzde 9]
 Kxnzmung mz madrka' nzangiolr kxtrngiu Gct angidr. [10:1—11:1]
 Nqmq kx takitrde olvz ngr lrmakxtr. [11:2-16]
 Kzdung da nzakipxlr kxnzrlxngiting mz Nzmungrkxtr. [11:17-34]
 Mqngrkxtr kabzle zmatq kxmyapxbzng mz kxnzrlxngiting. [12—14]
 Jiszs tulz-mop mz nzbzngr mz nrkrdrdqde angidr. [dckrlzde 15]
 Nzataktirl trau mz nwzkr lrmakxtr x kzdung kz natq mou. [dckrlzde 16]

1-2 Ning Pol kc tqkqle Jiszs Kxnzmcpx mz nzngini-krnge aposol nede, mz nzvz-nqblq-krde me pnz drtwr Gct. Nigr ncdr mzlegu Sostenes rpibzkr bamu kx, "Nimu la!" Ryrbo bamu, nimu dzbe lr makxtr ne Gct mrkc mz taon kxetu Korint. Gct kqlele nimu amrlx mz nzngini-krmu leplz kxtr nedeng kx nawztrpzng bade mz nzaxvctr-krbzmu mz Mevalu Jiszs, da kc tqwai-kzle mz kxnzrlxngiting amrlx mrkcng kqlu tzangiolr Kxetu rgu Jiszs.
3 Krka'-ngrne kx Trtegu Gct x Kxetu rgu Jiszs nakabzlr bamu zmrlz ngrdr kxmyalz x nzmnc-zpwvxngr.

4 Awi-zvzbo mz Gct, murde kabzle bamu zmrlz ngrde kxmyalz mz nzaxvctr-krbzmu mz Mevalu Jiszs. **5** X mz nzaxvctr-krbzmu lc mz Kraes, dekc tqrngisc-ngrnamu zmatq kxmyapxbzng mz nzwztr-krbzmu mz Gct mz nzrkrzlz-krmu nzalvztrngr angidr, x mz nzpipx-krmu natq Gct. **6** X nzrngisc-krmu zmatq lcng atutre natqnge mz nzpipx-krbo bamu da kx na-alebz Kraes bamu. **7** Dekc mz nzodutr-lxblr-krmu, tqkao-ngrbz Gct zmatq amrlx kcng tqakitrde nzale-krmu nzwz-krde, mzli ka tqobqtipx-ngrnamu nzyzlu-krm Kxetu rgu Jiszs Kxnzmcpx. **8** X Kraes sa naokatrle nimu mz nztu-amqngi-krmu mz nzrlxngiti-krmu nakrlzbzle nzbz-krmu o nzyzlu-krmle, murde natubqamu mz nzobq-krde mz Mzli kx tqmatq naayzlu-ngrbz Gct da mz leplz. **9** Gct sa na-angidatibzle da lcng bamu, murde yrlq-zvzle natq ngr nzesalz-krdeng. X sc tqkqlele nimu mz nzprtr-krmu mz nzodutr-krbzmu mz Mrlxde, Kxetu rgu, Jiszs Kxnzmcpx.

Lr Makxtr Nzaki-lzbqng

10 Mzlengeng x inwengeng, mz zmatq ngr Kxetu rgu Jiszs Kxnzmcpx, rngidrlvz-ngrbo bamu mz natqnge kx xplr kx naesakitxpe nzotablr-krmu. A' drtwrmu naesz'ti murde ma tqakipx-lzbqamu. **11** Mzlengeng x inwengeng, xlrk kx otablramu, murde kzdung leplz ngr ma nyk Klowi nzvzmqng x nzpimlr bange nrpa lc. **12** Xlrk kx kzdung nimu nzrpilr kx, "Ninge vz-nqblqx Pol." X kzdung nzrpilr kx, "Vz-nqblqx Apolos," x kzdu-kzng "Vz-nqblqx Pita." X kzdu-moung nzrpilr kx, "Vz-nqblqx Kraes." **13** A' vz-rbramu. Murde nigu amrlx nzaxvctrpzku mz Jiszs, x trpnzngr kx na-akipxle Kraes mz dzbede kxkqlu. Kzdung nimu nzrpilr kx nzvz-nqblqlr ning. ?A' myx kxmule, ninge kc tqbzom mz kros mz nzarlapx-krnge nimu? ?X nzawrkxtrmu mz drtqnge? **14** Trtingr! A' awitx-zlwzbo mz Gct kx trawrkxtrwxu nimu. A' awrkxtrtxpo Krispzs x Gaizs. **15** Dekc, trpnzngr kx narpile kx wrkxtr mz drtqnge mz nzngini-krde oblamznge. **16** (Eu, a' sc tqdcpxpe mz drtwrnge kx awrkxtr-kzx Stifanas badr lr ma nydzde. A' trpnzngr kx dcpx kz mz drtwrnge kx awrkxtr.) **17** Trawrkxtrwxu leplz kxkqlu murde Kraes atwzlr-ngrmlle ninge mz nzpipx-krnge Nrpakxmrlz. X mz nzpipx-krngele, trapuwxu ncblu kx rkrlz-angidr x aetu-lzbq mz nzycmne-krde. A' yrlqkixle me mrlzkibzle nzxlrkr leplz le, murde nayrplatitr angidr nardr. Murde ma tqrpwa'-ngrne zmatq ngr Nrpakxmrlz nzbzo-krmle mz kros mz nzarlapx-krde leplz.

Mz Drtwr Kzdung Leplz Nzyrplapxkr Gct Ngi Dalr Nzngqngungr

¹⁸ Mz drtwr leplz kcng tzo-zlirl rlpzki r Hxl, nrpa ngr nzbzo-krm Jiszs nidr mz kros ngi dalr nzngqngungr. A' mz drtwrgu, nigu kcng tzo-zlirl rlpzki r Heven, nrpa lc aelwapx-ngrmle bagu kxnamu nzarlapxngr nigu mz zmatq ngr Gct. ¹⁹ Murde natq Gct rpile kx, "Sa naodatix nzyrplapxkr kxnzyrplapxng, x sa nakatpxbo nzrkrlzkr kxzalvztrng." ²⁰ Gct aovxiole nzrkrlzkr lr nrlc. Murde trpnzngr kxrlapx mz nzrkrlz-krde, o mz nzalvztr-krde mz Lou sc Mosis, o mz nzycmne-angidr-krde. A' leplz amrlx nzrlapxng mz nzbzo-krm Jiszs mz kros.

²¹ Murde Gct yrplapx-esz'ngr x yrlqle drtwr kx trpnzngr kx nakrlzle nide mz nzyrplapx-krde esz'-krde. A' abrtzlvzle nzarlapx-krde leplz kcng tzlxngitilr nrpa kc tqyapwxtipxkr nigr aposol, kxmule-esz' mz nzobqkr leplz kxkqlu nrpa lc ngi dalr nzngqngungr. ²² Murde lr Jiu nzrlxngiting mz nzrmc-krdr rkkx kxmatq. X kxtrngiulrJiu nzrlxngiting mz nzxlr-krdr da kx vz-nqblqle nzyrplapx-krdr. ²³ A' trvz-nqblqkru drtwr lr Jiu o kxtrngiulrJiu lcng. Murde yapwxtipxkr nzbzo-krm Kraes mz kros mz nzarlapx-krde leplz. A' mz drtwr lr Jiu nrpa lc trngiu da kxmatq-esz'ngr x mz drtwr kxtrngiulrJiu ngi dalr nzngqngungr, x nzpxtxpx-ngrdr rlrlrdr. ²⁴ A' nigu kcng tqkqleng Gct, kxmule-esz' lr Jiu o kxtrngiulrJiu, glxku kx Kraes nide zmatq ngr Gct mz nzarlapx-krde nigu x ni-kzde nou drtwr kxyrplapx kx yrlq Gct mz nzarlapx-krde leplz. ²⁵ Kxmule-esz' nrpa ngr nzatzwlro-krm Gct MrIxde mz nzbzo-krmle mz kros ngi dalr nzngqngungr mz nzobqkr kzdung leplz, a' nzyrplapxkr drtwr lc tqyrlq Gct myaszpx-zlwzle nzyrplapxngr amrlx sc leplz. X kxmule-esz' mz drtwr kzdung leplz Gct trpnzngr scde zmatq murde tr-rpwa'-ngrpwzleu nzrnibqngr MrIxde, a' zmatq ngr Kraes mz nzbzo-krmle mz kros myaszpx-zlwzle zmatq amrlx sc leplz.

²⁶ Mzlengeng x inwengeng, na-aoti ena drtwrmu nimu esz'-krmu. Murde mzli kc tqkqle-ngrbz Gct nimu, trkqluwamuu kxyrplapx mz nzobqkr leplz x trkqlu-kzwamuu kxnzetung o kxnzvzpxmqng mz nqvi lr ncblo kxnzmyapxbzng. ²⁷ A' Gct mcpkle leplz kxnzkqlung kcng trnzsikluung, kxnzngqngung mz nzobqkr leplz, murde na-aelwapx-ngrbzle mz krkcng tzyrplapxng kx nzrkrlz-krdr trokatrleu nidr mz nzmncc-zpwx-krdr badr Gct. X mcpkle leplz txneng kxnzkqlung kcng trpnzngr scdr zmatq, murde na-aelwapx-ngrbzle mz leplz kxnzmatqng kx nzngini-krdr kxnzetung x nzrngisc-krdr zmatq trokatrleu nidr mz nzmncc-zpwx-krdr badr Gct. ²⁸ X mcpkle-kzle leplz kx nzmaneng x kxnzobqsong mz nzobqkr leplz mz nrlc ka, murde na-aelwapx-ngrbzle mz lr nrlc kx da kcng tqmyapxbz mz drtwrdr ngi brmrda mz nzobqkr Gct. ²⁹ Mz nzmu-krde lcde, trpnzngr kx naglqpx-lzbqbz mz nzobqkr Gct, mz nzrpri-krbzle bade kx myaszpxle kztedeng. ³⁰ Murde nzaxvctr-krbzku mz Mevalu Jiszs trvzpxpuu mz da kcng tqaleku x mz nqmq krgu, a' vzpxm mz nzwzkr Gct. Murde Gct yrlqle drtwr kxyrplapx, kx nangi Jiszs kx na-atubqtile nigu mz nzobq-krde. X Jiszs kc naokatrle nigu, murde nanginigu leplz kxtr neng Gct. X ni-kzde kc naxpepxle nigu mz zmatq ngr alwx, murde namncku badr Heven. ³¹ Dekc tqrpingr Nzryrngrkxtr kx, "Doa kx rpile naglqpx-lzbq, naglqpx-lzbq-ngrde nile alebz Kxetu rde bade." ²

2

¹ Mzlengeng x inwengeng, nadcpk mz drtwrmu kx vz-nqblq-kzx da lc tqpipebo bamu. Murde mzli kc tqvz-ngrmc bamu mz nzyapwxtipx-

² 1:19 Asaea 29:14 ³ 1:31 Jeremaea 9:24

krbo nrpa ngr Gct, trglqpx-lzbqpou bamu mz nzrpi-krnge kx ninge ncblx kxyrplapx x kxsiklu. X tryapwxtipxpou bamu mz nzapu-krnge ncblx kx rkrlz-angidr x aetu-lzbq mz nzycmne-krde. ² Murde aotipe drtwrnge kx mzli kc tqmnc-ngrgu, naycmnetxtr-ngrpwo Jiszs Kxnzmcpx x nzbzo-krmle mz kros mz nzarlapx-krde nimu. ³ Mzli kc tqvz-ngrmc bamu, yangrngax x rnrcti-lzbqnge mz zmwxlr. ⁴ Nrpa kc tqyapwxtipxbo opx angidr x nzycmne-krnge trapuleu natq ncblx kxrklz x kxyrplapx. A' nzyapwxtipx-krbole bamu vzmi da kx nzaelwapx-ngrdr zmatq ngr Mqngrkxtr. ⁵ Murde nzrlxngiti-krmu ma tqtwo mz nzyrplapx-krnge, a' natuopwz mz zmatq ngr Gct kc tqaewapx-ngrde kx natqngeng amrlx da angidr.

Nzyrplapxngr Kx Vzpxm Mz Gct

⁶ Kxmule-esz' a' alvztr-ngrne nzyrplapxngr kx batrpz Gct mz leplz kx nzbrpeng mz nzrlxngiti-krdr. A' nzyrplapxngr lc trvzpxpuu mz leplz o mz kxnzetung mz nrlc ka, mzli ka Kraes tryzluka-ngrmle. Murde zmatq ngr leplz amrlx sa na-ayrkpxng mz nzyzlu-krmle. ⁷ A' nzyrplapxngr lc tqpixbo vzpxm mz Gct. Krlc drtwr kc tqyrlq-pnzle mzli kc nrlc trnzwzka-ngrde. Drtwr lc tqayc-kapqle nakrlzbzle nzvz-krm Kxnzmcpx. Murde mz drtwr lc tqyrlqle, na-axvctrpzle nigu mz Mrlxde, murde naprtr-kzku mz nzmyalz-esz'ngr-krde. ⁸ Trpnzngr kxnzetung mz nrlc ka kx rkrlz nzyrplapxngr lc. Murde nzmu nakrlzlrle, e trnztqlvztrlru Kxetu kc tqmyalz-esz'ngr mz kros. ⁹ Trnzkrlz-krdru lc tqrpi-kai Nzryrngrkxtr kx, "Trpnzngr kx rmc x xlr da amrlx kcng tqoliqt Gct mz nzhka-krbzle mz leplz kcng tzmlztilr nide. X trpnzngr kx aoti drtwrde da lcng." ¹⁰ A' Gct atwzlr-ngrmle Mqngrkxtr mz nzaelwapx-krmle bagu drtwr lc tqyrlq-pnzle. Murde Mqngrkxtr krlzle da amrlx, kxmule-esz' drtwr Gct kc tqyc-kapq. ¹¹ Mqngr Gct esz'-krde kx krlztrpzle drtwr Gct, da kc tqwai doa, trpnzngr kx rkrlztrpz drtwrde, a' ngi txpwz nide esz'-krde. ¹² A' krlz-angidrku da kxmrlzting kcng tqkam Gct bagu, murde twzku Mqngrkxtr kc tqatwzlr-ngrmle, tqaewapx-ngrmle da lcng bagu. Delc nzkrlz-krgu drtwr ngr da lcng tqblepx-ngrbzle mz drtwr kxtrnzrlxngitiung. ¹³ X mz nzpixx-krbzku da lcng tqmrlzting, natq kcng tqpixbxzku kam Mqngrkxtr bagu. A' trnvzpxpwpung mz nzyrplapxkr leplz. Murde yokaetipxbzku da mz nzvz-nqblq-krde kxmu nzyokaetipx-krm Mqngrkxtr le bagu. ¹⁴ A' kxtrnzrlxngitiung nzpxtxpx-ngrdr da angidr kcng tzvzpxmqng mz Mqngrkxtr, murde mz drtwrdr ngr dalr nzngqngungr. Trnzkrlzlr nztwz-krdr drtwr ngr nzalvztrngr angidr lcng, murde nzmnccpx-krm Mqngrkxtr mz nabz doa kxrlxngiti, dekc tqtwz-ngrde drtwr ngr nzalvztrngr angidr lcng x tqkrlz-ngrde nzmrlz-krdr. ¹⁵ Kxnlxngitiung nzkrlzlr nzmrlzkr da angidr lcng, murde Mqngrkxtr mnccpxm badr. A' rblxbz mz kxtrnzrlxngitiung nzkrlz-zpwx-krdr nqmq nr drtwr kxnlxngitiung. ¹⁶ Da kc tqwai nzpikr Nzryrngrkxtr le kx, "Trpnzngr kx rkrlz drtwr Yawe. X trpnzngr kx takitrde nzyrlq-krbzle drtwr kx navz-nqblqle." ¹⁷ Kxmule-esz' a' Mqngrkxtr kc tqmncpxm bagu okatrle nigu mz nzvz-nqblq-krgu me pnz drtwr Kraes.

3

Nzaki-lzbqkr Lrmakxtr Aelwapx-ngrde Kx Nzrlxngiti-krdr Pobe

¹ Mzlengeng x inwengeng, mzli kc tqmnc-ngrgu, trtakitrdeu nzycmne-krbo bamu da kc tqwaibo mz leplz kcng tzvz-nqblqlr nzrmailzkr Mqngrkxtr. A' ycmnebo bamu mz nzapu-krmu kxtrnzrlxngitiung o

^{2:3} Aposol 18:9-11 ^{2:7} Efisz 1:9-14 ^{2:9} Asaea 64:4 ^{2:14} Sam 92:6 ^{2:16} Asaea 40:13

kxnzrlxngiti-ateng. ² Murde apubeamu itoto kx nzyqbeng x trnzmukang dakxnxng kxmqngi. Delc tqalvztr-ngrne nimu nzalvztrngr kcng kai, murde nzalvztrngr lcng tqrblx, trnztakitrkaplr nimu. ³ Murde vz-nqblqbeamu lrpzki kc pnz tqikztiamu mz nzale-zvz-krmu alwx. A' trmnclzpwmuu mz nzrmailzkr Mqngrkxtr. Opx angidr kx nqmq krmu apubele nqmq kr kxtrnzrlxngitiung, murde dobuti-lzbqamu x otalr-zvzamu. ⁴ X apu-kzamu nidr mz nzsripi-krmu kx, "Vz-nqblqx Pol," o "Vz-nqblqx Apolos."

⁵ Bzkq akipx-lzbqamu mz nzvz-nqblq-krmu ninge o Apolos. Murde ngini-kzgr leplz x wztrpzkr mz Gct mz nzokatr-krgr nimu mz nzrlxngiti-krmu, mz nzvz-nqblq-krde nzwzngr kc tqkamle bagr. ⁶ Mz nzvz-krgr lc, apux ncblo kc tqpe rtq kc tqngi natq Gct mz nabzmu. X Apolos apule ncblo kc tqpulivzle rtq lc mz lue, mz nzalvztr-krde nimu. A' Gct kx rbatrz mz rtq lc nzlvcpu-krde mz nzbrtikr drtwrmu Jisz. ⁷ Mz nzmu-krde lcde, ncblo kc tqyapwxtipx-kaile Nrpakxmrlz x ncblo kc tqalvztr-ngrde nimu nzalvztrngr angidr lcng mz nibrde, trnzmyapxpwzung. A' Gct kxmyapxbz, murde nide kc tqbatrzle nzlu-krmu kxmrna x tqaetunepxle nzrlxngiti-krmu. ⁸ Ncblo lcng li nzvz-krdr blepxngr mz nzvectr-krmlr leplz mz Jisz. X Gct sa naxpele nidr navz-nqblqle kxmu nzwzkr ncblo kxes' mz nidr. ⁹ Da kc tqwai-kzle mz nigr ncdr Apolos. Wztrpzkr mz Gct mz nzale-krgr nzwzngr kc tqkamle bagr. Nimu doa neng Gct, a' trnginimuu doa negrng. Apuamu nrlanc nyz Gct x suti drtwrde nzlvcxz-krm da kxmrlzting elr.

X mz kzdq mou nzycmne-ebzpxngr, apu-kzamu kzdq ma kx atulz Gct nangi nyzde. ¹⁰ Mz nzngini-krnge aposol ne Gct, abzox nzatulzng makxtr nyzde Korint, krlcde nimu leplz nedeng. Vz-nqblqx zmatq ngr nzlrmztrngr mz nzwzngr ma, mz nzyrlq-kai-krnge nou rplz ngr ma lc. Mz nibrde, leplz sc tzvz-mopqng mz nzwzngr mz ma lc mz nzalvztr-krdr nimu. A' na-acvetio-lzbqng mz nzwo-angidr-krdr mz nou rplz kc tqyrlq-kaix. ¹¹ Murde da amrlx natuo mz nou rplz lc tqngi Jisz Kxszmcpx. Murde nide esz'-krde lrpzki r nzarlapxkr Gct leplz. Bzkq doa kx rtwzm nzalvztrngr kzble mz nztekqtr-krde Jisz nzngini-krde nou rplz angidr. ¹² Nzvzkr kxszrlxngiting kx nzatuong mz nou rplz sa namrlz. Murde na-apule nzrwz-ngrng mz gol, silvz, x rplz kxlqlwx kxlqngipx, kx trpnzng nzangcngr. A' nzvzkr kzdu-kzng kxszrlxngiting sa natrka. Murde na-apule nzrwz-ngrng mz nounc, nabr, x lo. ¹³ Mzli kc Kxszmcpx nayzlu-ngr-mople mz Mzli Kxmatq, nzvzkr leplz kxes' sa naopx angidr. Murde nzpwxliti-krde nzvzkr leplz nedeng sa na-apule nyr, x nzvzkr leplz kx nayc alo sa naprpxmqng mz nyr lc. ¹⁴ Doa kx wz angidr mz nike wztiole mz nou rplz, sa namcle kx nzvz-krdeng trnzngcu mz nyr. X Gct sa naxpele nide mz da kxmrlzting Heven. ¹⁵ A' doa kx nzvz-krdeng nge x yrkrto mz nyr, trpnz-moungr kx naxpengr Gct nide. Sa na-apule ncblo kx rlapx mz nzngckr ma nyzde, a' dztudeng amrlx yrkrtxong. Murde sa narlapx Heven, kxmule-esz' trpnzngr da kx naxpengr Gct nide mz nzvz-krde mz nrlc.

¹⁶ Nakrlz-angidramu kx Mqngr Gct sc tqmnc mz mzlirmu, mz nzapu-krmu Mrkc Tqtr nyz Gct. ¹⁷ X Gct sa naodatile doa kx alvztr-rbrle nimu x akipxle nimu, murde atrkatile lrmakxtr nyzde. X nzodatingr lc Hxl tqyc tqyc. Murde apuamu Mrkc Tqtr nyzde, kcng tqamnc-bekapxleng mz nzngini-krmu leplz kxszrlxngiting nedeng.

¹⁸ Bzkq esabrti-lzbqamu mz nzsripi-krmu kx yrplapxamu! A' doa kx rpile yrplapx mz nzobqkr leplz, natekqtrle drtwrde x narlapx-ngrbzle mz leplz nzsripi-krdr kx nide doa kxngqngu murde vz-nqblqle nqmq kr Gct. Dekc nangini-ngrde doa kx yrlapx mz nzobqkr Gct. ¹⁹ Murde nzyrplapxkr

leplz kcng trnzkrizlru Gct mane mz nzobq-krde. Da kc tqwai nzrpikr Nzryrngrkxtr kx, "Gct yrlqe nzrkrizkr kxnyrplapxng mz nzapu-krde trtxki kc tqbartzle nzprtr-krdr elr." ²⁰ X kzdq kz Nzryrngrkxtr rpile kx, "Yawe krlzle kx drtwr kx nzyrlq kxnyrplapxng mane." ²¹ Mz nzmu-krde lcde, bzkq glqpx-lzbqq mz nzvz-nqblq-krm kzdq ncblo. Murde Gct kabzle bamu da kxmrlzting amrlx mz nzaxvctr-krbzle nimu mz Kxnmcpnx. ²² Murde atwzlr-ngrmle ninge, Apolos, x Pita mz nzalvztr-krgr nimu. X wz-ngrde da amrlx mz nrlc ka mz nzokatr-krdr nimu. Kxmule-esz' luamu o bzamu, a' sa namrlzbz bamu. X kxmule-esz' da kx prtzbz bamu mzli ka o mzli kc navzm, a' sa nabatrz Gct mz nzokatr-krde nimu. Da lcng amrlx scmung. ²³ Na-aoti drtwrmu kx nimu doa neng Kraes. X nide txpwz kx takitrde nzmailz-krde nimu murde nide Kxnmcpnx ne Gct.

4

Aposol Badr Lrmakxtr

¹ Mz nzmu-krde lcde, nimu lrmakxtr na-apusr-ngrnamu nigr aposol badr kxnzacvlelr nimu kxnzawz neng Kxnmcpnx. Nzwz-krgr kx nzaprcm bagr nzpipx-krbzkr drtwr kc tqyrlq pnz Gct mz kxnamu nzarlapx-krde leplz. Drtwr lc tqyrlq-kapqle mzli kc, a' mzli ka Kxnmcpnx aelwapxpe-ngrmle bagu. ² X krlzku kx doa kxnzawz kxmrlz na-angidati-zvzbzle natq Kxetu rde. ³ Kzdung nimu nzpibqtilr nzwz-krnge. A' tryc-zlwzu mz drtwnge nzrpibqtilr leplz. Murde trtakirdeu nzpwxliti-kz-krnge nzwz-krnge esz'-krnge. ⁴ Kxmule-esz' rpix kx trvz-rbrwxu mz nzwztr-krbo mz Kxetu rnge, a' trngiu drtwr kxtubq. Murde Kxetu rgu txpwz kx napwxlitile ninge. ⁵ Mz nzmu-krde lcde, bzkq pibqtiamu kxnzawz neng Kxetu, murde trkrlzkapzle mzli rde. A' na-aenzliamu nzyzlu-krm Kxetu, murde krlc mzli r nzpwxliti-krde leplz amrlx. Mzli lcde, sa na-aelwapx-ngrde nqmq nr nabzgu kcng tzyc-kapqng. X sa napiqxle kxnvzvz-rbrng x kxntubqng mz nzobqkr Gct.

⁶ Mzlengeng x inwengeng, ycmne-ebzpx-ngrbo kxpipz nigr ncdr Apolos, mz nzatubqti-krnge nimu. Navz-nqblqamu natq kc tqrpile kx, "Kxnamu nzaolvz-krmu leplz navz-nqblq-txpwzle da kx pi Nzryrngrkxtr," murde ma tqqlqpx-lzbqamu mz nzrpi-krmu kx kzdq ncblo myaszpxle kztede mz nzobq-krmu. ⁷ ?Nimu kxnzetung kxnmymapxbzng? ?Nzrkrlz-krmu myaszpxle kztemung? Trtingr! Murde nzrkrlz-krmung amrlx ka-nrbalqbz Gct bamu. Bzkq glqpx-lzbqamu. Murde nzrkrlz-krmung trnzvzpxpwung mz nimu esz'-krmu.

⁸ ?Myx kxmule, rngiscpemu da kxmrlzting amrlx kcng tqutsi drtwrmu kx vzpxmqng mz Gct? Trtingr! Kxmule-esz' mz drtwrmu nzrlxngiti-krmu brpe x nimu kxnzetung kcng trtakirpedeu nigr aposol nzokatr-krgr nimu, a' esabrti-lzbqamu. Murde nzrlxngiti-krmu pobe. Trapukru nimu mz nzngini-krmu kxnzetung. ⁹ Murde Gct rlr-ngrbzle mz leplz nzatrkatikrdr nigr aposol, mz nzapusr-krdr nigr ncblo kxnmncpxmqng mz presin kcng nanibqng. Doa amrlx nzmlcr nzmyakr drtqgr, kxmule-esz' enjrl o ncblo. ¹⁰ Mz drtwr leplz mz nrlc ka, ngqngukr murde yapwxtipxkr Kxnmcpnx kc tqbzom mz kros. X opxm kx trpnzng scgr zmatq. A' mz drtwrmu nimu kxnyrplapxng kxnrngiscng zmatq nigr Gct. Rlr-ngrbzmu mz leplz nzamatq-krdr nimu, mzli kc tzobqszo-kzlr nigr. ¹¹ Abzo mzli kc x sc tqvzbe, tqrmctitxbzkr dale, tqbz-ngrgr lue, x tqpxinekr lrpz kxbxpli. Nzifikatedr nigr, x trpnzng me mnclvzo-ngrgr. ¹² Mnc-xgle-txpwzkr mqgr esz'-krgr. Amrlzkr krkcng tzpilzlr nigr. X trayzlupwzku da kxtrka mz

krkcng tzatrkatilr nigr. ¹³ X ycmnebzkr mz nrwrx mz krkcng tzipbqtilr nigr. Krlzmle mzli ka leplz kxnzkqlung nzapusr-ngrdr nigr dcvi x brmrda.

¹⁴ Tryr-ngrpou natq lcng murde na-amyati-ngrbo drtqmu. Trtingr. A' murde mrlztix nimu mz nzapu-krmu doa nengeng. X suti drtwrnge nzatubqti-krbo nqmq nr drtwrmu. ¹⁵ Kxmule-esz' rningemu kxnlzalvztrng kxnzkqlung, a' ninge txpwz dela nangi trtemu. Murde yapwxtipx-kaipo Nrpakxmrlz bamu, mz nzvzmi-krnge nimu mz nzlxngiti-krmu Kraes. ¹⁶ Mz nzmu-krde lcde, rmgidrlvz-ngrbo bamu kx navz-nqblqamu Jiszs, da kc tqwaix. ¹⁷ Dekc tqatwzlr-ngrbo Timoti bamu. Murde nide mrlxnge mz Kraes, kc tqmrlzti-zlwzx. X krlzx kx sa na-angidatibzle me pnz drtwr Kxetu. X sa na-adcpx-mopwzle bamu nzalvztr-krngeng amrlx x kxnamu nzmnckrmu mz nzavctr-krbzmz Kraes. Murde alvztr-ngrne da lcng mz dzbe lrmakxtr kcng kqlu mrkcng tqalvztr-ngrne.

¹⁸ Kzdung nimu nzglqpx-lzbqpeng, murde mz drtwrmu kx trpengr nzyzlu-krbo bamu. ¹⁹ A' nzmu kx tqrlrpxngr Kxetu ninge, sa navz-anibo bamu. Mzli lcde sa namcx namrlzu r zmatq kc tqycbz mz leplz lcng tzglqpx-lzbqng, kx ngi zmatq ngr Gct o trtingr. ²⁰ Murde zmatq ngr Gct trtuo mz nzycmnengr, a' ycbz mz leplz kcng tzmnclzbzng bade mz nzngini-krde King rdr. X zmatq lc tqaelwapx-lzbq-ngrde mz nzale-krdr nzwzkr Gct. ²¹ ?Mz nzmu-krde lcde, nike suti drtwrmu mzli kc navz-ngrbo? O naplpxamu nzglqpx-lzbq-krmu, murde na-aodux nimu mz nivz. O navz zvz nzglqpx-lzbq-krmu lc, murde na-ayrplapx-zlwzx nimu.

5

Ayrplapxamu Kxnzrlxngiting Kcng Tzapulr Kxtrnzrlxngitiung

¹ Drtwrnge talvzotx zlwz mz nxzlr-krnge kx rlr-ngrbzmu mz kzdq ncblo kx mwimile kernalz trtede nzmncc-lxblr-krmu badr. Da kxtrka lc, kxmule-esz' kxnzmnc-mrbrng murde trnzrlrpx-ngrdru da lc. ² Rlr! ?Myx kxmule tqglqpx-lzbq-ngrnamu nzbrpekr nzrlxngiti-krmu? Nzmu navz-zlwzng drtwrmu alwx lc, x namaszlrpx-ngrnamu ncblo lc, murde natekqtrle nqmq nr drtwrde mz nzplzpx-krde alwx ngrde. ³ Kxmule-esz' trmncpou bamu mzli ka, a' ninge la tqmncbo bamu mz mqngrnge, mz nzavctr-krbzu mz Mqngrkxtr. Delc mz zmatq ngr nzngini-krnge aposol, tqpq-zlwzngz nzpi-krbole bamu kx na-ayrplapxamu ncblo lc, na-apule kx ninge kc tqmncbo bamu mrla. ⁴ ⁵ Mz nzmu-krde lcde, mzli kc tqyrlwr-lxblr-ngrnamu, namaszlrpx-ngrnamu ncblo lc mz nzmncc-lxblr-krmu badr, mz zmatq ngr Kxetu rgu Jiszs. Nakatpxamu nide mz nzaclvekr Gct nide, x na-aprcbzmu nide mz mq Setzn, mz nzatrkti-krde nide. X murde mwex elx, natekqtrle nqmq nr drtwrde x narlapx mz nzbz-alongr mz Mzli Kc Tqmatq na-ayzlu-ngrbz Gct da mz leplz.

⁶ Namyangr drtqmu nzglqpx-lzbq-krmu mz nzbrpekr nzrlxngiti-krmu, mz nzrlr-krbzmz mz ncblo kxmule lc nzmncc-krde mz mzlimu. Nakrlzamu kx alwx ngr ncblo lc, sa na-aprctile kzdu-kzng leplz, nzmu narlr-ngrbzmu nzmncc-krmu badr, da kc tqwai yisti kxipipzne nzayrlvz-krde flawa atwrnrngr kx nangi bret. ⁷ Mz drtwrgr, nigr lr Jiu, yisti ycmne-ebzpx-ngrde alwx. X mz nzvz-nqblq-krde nqmq krgr, katpxkr yisti amrlx mz ma nyzgr, x sc tqakaputr-atemgr Nzamyangr mz nzngq-krgr bret kx trpnzng yisti ngrde. X mzli ka nalqngi-kzamu, mz nzkatpx-krmu kxnlzaleng alwx mz nzylwr-krbzmz badr. Takitrde nzale-krmu da lc, murde Kraes alqngile nimu, mz nzngini-krde nei sip kx ngi blz kc tznibq mz nzarlapx-krde nigu mz zbq ngr Nzamyangr. ⁸ Delc mzli ka tqmrlzngz nzakaputr-krmgu Kraes

nzngini-krde nei sip ne Gct, mz nzmncngr kxtubq kx apule bret kx trpnzngr yisti ngrde. X nakatpxku nqmq krgu kcng mzli kc tqtrka, tqdrka'ngr, mz nzapu-krdr yisti. *

⁹ Mz letz kc tqyrbo bamu mzli kc, pipebo bamu kx bzkq prtrpzmu badr leplz kcng tzrmwiming doa kxtrngiu kernalzdr. ¹⁰ A' trycmnetr-ngrpou kxtrnzrlxngitiung kcng tzrmwiming kxtrngiu kernalzdr, x tzrkcmnz-ngrng, tzesabrng, x tzangiolar da kcng trnzngnidru Gct angidr. Murde krlzx kx rblx nzyrlqpx-lzbq-krbzmu mz leplz kxnzmull lcng amrlx, murde nzmncng mz nrlc tulvzo. ¹¹ A' ycmnetr-ngrbo leplz kcng tzrpilr nzvznqqlqpeir Jiszs, a' nqmq krdr trka. Bzkq prtrpzmu mz leplz kxnzmull lcng tzrmwiming kxtrngiu kernalzdr, tzrkcmnz-ngrng, tzangiolar kxtrngiu Gct angidr, tzrpibqting leplz, tzrmnq-zlwzng, tzesabrng, x kzdung kz da kxnzmull lcng. X bzkq mu-lxbllr-kzamu badr, murde ma tzrpilr kx drtwrmu esz'ti badr mz nqmq krdr lcng tqtrka. A' kapx-lzbq-zvzhamu badr. ¹² Trtakitrdeu nigu kxtrnzrlxngitiung nzayrplapx-krgu kxtrnzrlxngitiung mz nqmq krdr lcng tqtrka. A' suti drtwr Gct nzayrplapx-krmu leplz kcng tzrpilr nidr lrmakxtr, a' sc tzvz-nqqlqlr nqmq lcng tqtrka. ¹³ Murde Gct esz'-krde kx na-ayrplapxle kxtrnzprtrpwzung mz lrmakxtr. X rpile mz Nzryrngrkxtr kx, "Maszlrpx-ngrnamu leplz kxdrka'-ngrng murde ma tzprtrpzlr bamu." *

6

Bzkq Twzq Kztem Kxrlxngiti Mz Kot

¹ Mz nzotablrkr kxtrnzrlxngitiung, bzkq vzmibzmu nidr mz kxtrnzrlxngitiung mz nzokatrngr. A' otiamu dq kztemu kxrlxngiti mz nzokatr-krde nimu nzatubqti-krmu nzotablr-krdr. ² ?Myx kxmule, trkrlzwamuu kx mzli kc nayzlu-ngrm Kraes, nigu kxtrnzrlxngitiung sa na-aclveku leplz amrlx mz nrlc? Mz nzmu-krde lcde, takitrde kxtrnzrlxngitiung nzatubqti-krdr nzotablrkr kztedr kxtrnzrlxngitiung. ³ ?X trkrlzwamuu kx sa na-aclve-kzku enjrl? * Kx tqmule lcde, tr-rblxu nzatubqti-krmu da amrlx mzli ka mz nrlc ka. ⁴ Mz nzotablrngr kxmule lcng, takitrde kzdq doa mz lrmakxtr kxtrnzamatqng nzatubqti-krdele. ⁵ Rlr! Namyangr drtqmu! ? Myx kxmule, trpnzngr doa kxesz' mz nimu kx narde mrlztipx, kx krlzle nzatubqti-krbzle da lcng bamu? ⁶ Murde xlrk kx mzli ka kxrlxngiti delc tqtwzle kztede kxrlxngiti mz kot. X ngi da kx trka-esz'ngr, nzpibqti-lzbq-krdr mz mz kxtrnzrlxngitiung. ⁷ Nqmq ngr nztwz-lzbq-krmu lc mz kot, aelwapx-angidr-ngrde kx vz-rbramu. A' mzli kznike kztem kxrlxngiti atrkati-ngrde nim o pnatibzle dztum, mrlzvxix trnztwz-krmleu mz kot. Murde mrlz nzrlrpxngr nzatrkati-krde nim myaszpxle nzovxiokr Setzn nimu rlilrmu mz nztwz-krmle mz kot. * ⁸ A' apubeamu kxtrnzrlxngitiung, mz nzangqnguti-krmu x nzatrkati-krmu leplz, kxmule-esz' kztemung kxtrnzrlxngitiung.

⁹ Nakrlz-angidramu kx leplz kxdrka'-ngrng trnaprtrung Heven. Bzkq esabrti-lzbqamu mz nzrpi-krmu kx nimu leplz neng Gct, mzli lcpwz tqmncbeamu mz nqmq lcng tqtrka. Murde Gct sa napxtpx-ngrde

* ^{5:8} 5:7-8 Mz Nzryrngrkxtr kc kai, mzli kc lr Israel tzmnc-ngrdr Ijipt, Gct rpibzle badr kx narnibqng nei sip x mepyr ngrdr nakiivztrlr mz naonrx ngr ma nyzdrng. Murde enjrl kc nanibqle kzdung lr Ijipt namya-ngrde ma nyzdrng. Krle Nzamyangr kc kai. [Nzrlaszng 12:1-36] X ngi kz rkx ngr Kraes nzbzo-krmle nigu mz kros. Mz Nzryrngrkxtr kc ate, nzrpibz 'Nei Sip ne Gct,' murde Gct ipqpxle alwx rgung mz nzylleo-krm mepyr ngrde. [Mak 14:12; 1 Pita 1:19] * ^{5:13} Lou Kcpwz 17:7 * ^{6:3} Sam 149:9; Nzaelwapxngr 20:6 * ^{6:7} Rom 12:17; 1 Tesalonika 5:19; 1 Pita 2:19-21

leplz amrlx kcng tzalelr da lcde seng: nzrmwimingr kxtrngiu kernalzdr, nzrmwimikr ncblo ncblo kztede o olvz olvz kztede, nzangiongr kxtrngiu Gct angidr, ¹⁰ nzpnangr da, nztrkibrngr, nzrmnq-zlwzngr, nzrpibqtingr leplz, nzesabrttingr leplz, x kzdu-kzng da kxnzmulr lcng. Leplz kxnzmulr lcng, trtxpnzngr nzmnc-krdr badr Gct Heven. ¹¹ Mzli kc ena kzdung nimu kxnzmulr lcng. A' mzli ka trtakirpedeu nzale-krmu da lcng. Murde Gct ipqpele nimu mz nzkatx-krde alwx ngrmung. X kqlepele nimu mz nzngini-krmu leplz nedeng kxnztrng. X atubqtipele nimu mz nzobq-krde mz nzaxvctr-krbzmu mz Kxetu rgu Jiszsz Kxnzmcpkx mz zmatq ngr Mqngrkxtr.

Nrkrdrtqmu Sc Gct

¹² Mwx kzdq nimu narpile kx, "Nzrlr-ngrm bange nzale-krnge da kx suti drtwrnge, murde trmnclzpepou mz zmatq ngr Lou sc Mosis." A' rpibo bamu kx, "Eu, a' kzdung da trnzokatrulu ninge nzmnc-aepztr-krbo mz Gct. Murde kxmule-esz' trmnclzpepxu mz lou mz nzaxvctr-krbo mz Jiszsz, a' yrlqpx-lzbqngne mz doa x da amrlx kx nzkrizlrlz nzamnclz-krbzrlz ninge badr." ¹³ Mwx kzdq nimu narpile kx, "Mzli kc nelzng tqbartale-ngrde, mrlz nzaputrngr nide dakxnxng." Murde mz drtwrmu mrlz nzvznqqlq-zvz-krmu nike suti drtwr nrkrdrtqmu. Kxmule-esz' da zpwxtx kx sa nabzku nzmu trnamukuu, a' Gct sa natekqtrle nigu x nrkrdrtqgu kalr Heven. X mzli lc trpengr nzsutikr drtwrgu dakxnxng. A' vz-rbramu mz nzrpi-krmu kx mrlz nzale-krmu da amrlx kx suti drtwr nrkrdrtqmu. Murde Gct wz-ngrde nrkrdrtqgu mz nwztr-krbzku mz Kxetu rgu Jiszsz. A' nrkrdrtqgu trngiu dalr nzalengr alwx mz nzrmwimi-krgu kxtrngiu kernalzgu. Nrkrdrtqgu sc Kxetu, murde bz-ngrde nzarlapx-krde nigu. ¹⁴ X Gct, mz zmatq kcpwz tqatulz-ngrmle nrkrdrtq Kxetu rgu mz nzbz-krde, sa na-atulz-kzple nigu mz nzbz-krgu kalr. ¹⁵ Nadcpkx mz drtwrmu kx nrkrdrtqmu nzaxvctrpzng mz nrkrdrtq Kraes. ?Myx kxmule, mz nzngini-krgu nrkrdrtq Kraes, tqrpi-ngrnamu kx takitrde nzbatr-krbzmu mz kzdq nimu nzaxvctr-kzpz mz nrkrdrtq srlx? Bzkqtx pnz! ¹⁶ Murde mzli kc ncblo tqmwimi-ngrde srlx nznginipedr leplz kxesz'. Murde Nzryrngrkxtr alvztr-ngrde kx mzli kx leplz kxnzling nzrmwimi-lzbq-ngrdr, "Doa lcng li nznginipedr nrkrdrtq x leplz kxesz'." ¹⁷ A' mz nzaxvctr-lzbqpe-krbzme mz Kxetu Jiszsz Kraes, prtrpeq mz Mqngr Kraes.

¹⁸ Mz nzmu-krde lcde, yrlqpx-lzbq mz nzrmwimingr kxtrngiu kernalzm. Murde alwx lc nzatrkti-krde nrkrdrtq myaszpx-zlwzle alwx amrlx. Mzli kc tqrmwimi-ngrn kxtrngiu kernalzm, atrktiq nrkrdrtqm esz'-krm. X mou atrkti-kzq nzesz'ti-krmu mz Jiszsz. ¹⁹ ?Myx kxmule, trkrizwamuu kx nrkrdrtqmu ngi Mrkc Tqtr nyz Mqngrkxtr mz nzmncpkx-krmle elr? Mqngrkxtr lc tqkabz Gct bamu. X nrkrdrtqmu scdeng. ²⁰ Murde Gct xpepxpele nimu mz narnnbr kxlqlwx mz nzbzo-krm Mrlxde mz kros, murde nanginimu leplz angidr nedeng. Mz nzmu-krde lcde, rlr-ngrbzmu nrkrdrtqmu nangi dalr nzamatqng Gct.

Nzalvztrngr Mz Nzyrlzng

^{6:10} Nzrlaszngr 20:3-4, 14-17; Livae 18:6-23; 19:4, 11, 13, 16; 20:10-21; Lou Kcpwz 4:15-31; 5:7-8, 18-21; Nzryrlapxng 10:1; Asaea 57:17; Jeremaea 6:13-15; Matiu 15:19; Mak 7:20-22; Luk 12:15; Rom 1:26-32; 13:13; 2 Korint 12:20-21; Galesia 5:19-21; Efisz 4:3; 5:18; Kolosia 3:8; 1 Timoti 5:14; Taetus 3:2; Jemes 4:11; 1 Pita 2:1; 4:3 ^{6:16} Nou 2:24; Matiu 19:5; Mak 10:8; Efisz 5:31

¹ Mzli ka sutipe drtwrnge nzayzlu-krbo natq kcng tqveatimamu mz letz scmu. Mz letz lc, rpiamu kx mz drtwrnu Gct abrtzlvle ncblo kx trmwimileu olvz rde. Mz drtwrnge mrlz trnzyrlz-kru ncblo x tr-rmwimiui olvz. A' Gct trabrtzlvzleu da lcng nzmyaszpx-krde kzdung kz da. ² Mz drtwrnge, kxmule-esz' kzdung da kxmrlz nzvzpxmqng mz trnzyrlz-ngru, a' doa kcng tzsuti zlwz drtwrdr nzrmwimingr leplz, mrlz nzyrlz-krdr. Murde leplz kxnzkqlung nztaong mz alwx ngr nzrmwimingr kxtrngiu krnalzdr. ³ X mz nzyrlzngr, ncblo narlr-lzbq-ngrbz mz olvz rde. X wai-kzle olvz narlr-lzbq-kz-ngrbz mz ncblo ngrde, mz nzmwimi-krde krnalzde mz nzyrlzngr. X bzkq nzpx-ngrdr nzrmwimingr, murde ma kzdq nidr tqtao mz alwx. ⁴ Murde nrkrdrdq olvz trscpleu esz'-krde, a' sc kz ncblo ngrde. X wai-kzle nrkrdrdq ncblo trscpleu esz'-krde, a' sc kz olvz rde, mz nzngini-krdr nrkrdrdq x leplz kxesz'. ⁵ Mz nzmu-krde lcde, bzkq px-ngrn nzrlr-krbzme nrkrdrqm mz kztem, a' ngi txpwz mz mzli kxipiz mz nzkrka'-krmu mz kzdq da, mz nzesztikr drtwrnu. X mz nibrde namwi-lxblr-mouamu, murde ma Setzn tqatalzle kzdq nimu mz nzmwimi-krde doa kx trngiu krnalzde, murde rblxbz bade nzxplrvz-krde nrkrdrdqde. ⁶ Naopx angidr kx nzrlr-ngrbz bamu trnzmwi-lxblr-krmuu mzli kxipiz. A' bzkq rpiamu kx ngi natq kx kapxbo kx navz-nqblq zvz leplz.

⁷ Mz drtwrnge, mrlz leplz amrlx trnzyrlz-krdr x trnzrmwimiung leplz kz, da kc tqwaix. A' Gct kabzle zmatq ngr nzmnc-kamelrngr mz kzdung leplz, x ka-kzpze nzyrlzngr mz kzdu-kzng leplz.

⁸ Rlxti-kzpa'mu bange nike na-ale leplz kcng tzabzopeng. X mz drtwrnge, mrlz trnzyrlz-krdr, da kc tqwaix mz trnzyrlz-krngeu. ⁹ A' leplz kcng tqrlxbz badr nzxplrvz-krdr nrkrdrdq, mrlz nzyrlz-mou-krdr. Murde ma nzpqkr nzrkcmnz-krdr mz nzrmwimingr leplz tqataole nidr mz alwx.

¹⁰ Kxetu Jiszs kapxle natq kx, "Bzkq axtx-lzbqamu!" X aprcbo natq lc bamu, nimu kxnzrlxngiting kcng tzyrlzpeng. ¹¹ A' leplz kcng tzaxtxdr krnalzdr, bzkqpe nzyrlzng, a' nzmu kx tzyrlz-moulr, nangi txpwz krnalzdr kcng kai. ¹²⁻¹³ X natq kx kapxbo bamu, nimu kxnzrlxngiting kcng tzyrlztilr doa kxtr-rlxngitiu, nide sele. Nzmu krnalzm kx tqsuti zvz drtwrde nzyrlz-krmu ncdr, bzkq axtxbzme nide. Kxetu rgu trpileu da lc, a' pibo bamu. ¹⁴ Nzyrlzngr kxmule lc, trngiu da kxtrka mz nzobqkr Gct. A' Gct amrlzle nzyrlzngr lc murde kzdq nidr rlxngiti. X amrlz-kzle doa nedrng. A' doa ngr nzyrlzkr kxtrnzrlxngitiung, trnzprtrpwzung mz nzamrlzkr Gct. ¹⁵ A' nzmu krnalzm kxtr-rlxngitiu na-axtxde nim, rlr-ngrbz nzvz-krde. Nzmu navzle, trngiu alwx ngr kxrlxngiti mz nzobqkr Gct. Murde suti drtwr Gct kx nrwrx naycpxm mz nabz kxnzrlxngiting. ¹⁶ A' nzmu krnalzm kxtr-rlxngitiu trnavzleu, mrlz nzmnc-lxblr-krmu. Murde mwx elx krnalzm lc sa nalxngiti-kzle Jiszs mz nzmnc-lxblr-krmu.

¹⁷ Alvztr-zvz-ngrne kzdq nqmq mz dzbe lrmakxtr mrkcng tqvzkixng. Na-abrtzlvzq nzmnc-krm mz nzmncngr kcpwz tqmnc-ngrn mzli kc tqrlxngiti-ate-ngrn. Murde krlc nzmncngr kx yrlqbz Gct bam. ¹⁸ Nzmu kx tzpakrpem mzli kc tqrlxngiti-ate-ngrn, bzkq katxq rkx ngr nzrpakrngr. X nzmu kx trnzpkrapk mzli kc tqrlxngiti-ate-ngrn, bzkq twzq rkx lc. ¹⁹ Murde trngiu nzrpakrngr x trnzrpakr-ngru kx myapxbz mz drtwr Gct, a' da kx myapxbz nzvz-nqblq-krm natqde. ²⁰ Nimu amrlx namncamu mz nzmncngr kcpwz tqmnc-ngrnamu mzli kc tqrlxngiti-ate-ngrnamu. ²¹ X mou, nzmu kx tqnginim kxnzawz-nrbalq mzli kc tqrlxngiti-ate-ngrn, bzkq kxne drtqm. Murde krlzq nwztr-krbzme mz Kraes kxmule-esz'

¹²⁻¹³ Lou Kcpwz 24:1-4; Jeremaea 3:1; Malakai 2:16; Matiu 5:31-32; 19:8-9; Mak 10:2-12; Luk 16:18

nim kxnzawz-nrbalq. A' nzmu kxetu rm kx tqaopxbzle drtqm, murde trmnclzpepwzmeu bade, e mrlz nzvzpe-krm. ²² Murde krlzq nzwztr-krbzme mz Kxetu rgu kxmule-esz' drtqm opx o trtingr. Murde kxnzawz-nrbalq kxrlxngiti trmnclzpepwzu mz zmatq ngr alwx. X kxtrnzawz-nrbalqu kxrlxngiti amnclz-lzbqbz mz zmatq ngr Kraes. ²³ Murde Gct xpepxle nimu mz narnnbr kxlqlwx mz nzbzo-krm Mrlxde mz kros. X mzli ka nipemu leplz nedeng. Bzkq rlr-ngrbzmu mz leplz nzpi-krbzlr bamu kx namnclz-mopwzmu mz zmatq ngrdr mz nzngini-krmu kxnzawz-nrbalq nedrung. ²⁴ Mzlengeng x inwengeng, namncamu mz nzmncngr kcpwz tqmnc-ngrnamu mzli kc tqrlxngiti-ate-ngrnamu, mz nzmnc-xgle-krmu nzokatrkr Gct.

²⁵ Veati-kzpa'mu bange nzycmnetr-krnge mz doa kcng trnzyrlzkang. Trpnzngr natq kx kam Kxetu rgu kx naycmnetrnrngr mz da lc. A' sa napipxbo nzao-krnge drtwrnge, murde mz nzryckr drtwr Kxetu, batrple bange nzngini-krnge ncblo kx takitrde nzbrtikr drtwr leplz le. ²⁶ Mz drtwrnge, mrlz trnzyrlz-kru leplz lcng, murde mzli ka mzli r nzatrkatizlwzng kxnzrlxngiting. ²⁷ Nzmu kx tqyrlzpeq, bzkq axtxbzme kernalzm. A' nzmu kx tryrlzwq, trmrlzu nzrtangrti-krm kx nayrlztiq. ²⁸ A' nzmu nayrlzq, trngiu alwx. X nzmu olvi kxmnc-kamelr nayrlzle, trngi-kzu alwx. A' mz mzli r nzatrkatingr lc kxnzrlxngiting, leplz kcng tzyrlzng nzkxpu-krdr sa naetunepx mz nzaotikr drtwrdr nzatrkatingr kernalzdrng. X suti drtwrnge kx da lcng bzkq nzprtzbzng bamu.

²⁹ Mzlengeng x inwengeng, nadcpx mz drtwrmu kx mzli nyzgu mz nrlc ka mz nzwztr-krbzku mz Kxetu rgu mrbcnepwz. Nimu kcng tzyrlzng nzwztr-krbzmu mz Kxetu namyaszpxle nzwztr-krbzmu mz kernalzmung.
*

³⁰ Bzkq nqmq ngr nzmnc-krmu batrpzle trnzwztr-krpwzmuu mz Kxetu. Kxmule-esz' drtwrmu vz zlwz o abrtz-zlwzamu o xpeamu da kxmrlz, a' navz vzz nzwztr-krbzmu bade. ³¹ Kxmule-esz' mncamu mz nrlc ka, a' bzkq kxne drtqmu dalr nrlc ka. Murde nzu-krmu x dztumung sa namrbr-aning.

³² Trsutiu drtwrnge nzkxkr mz drtqmu dalr nrlc ka, myapxbz nimu kxnzyrlzng. Murde ncblo kxtryrlzu krlzle nzwztr-krbzle mz Kxetu mz nabzde atwrnrngr x nzaotikr drtwrde kxnamu nzabrtzlvzkr Gct nide. ³³ A' ncblo kxyrlz yc zlwz mz drtwrde dalr nrlc ka. X suti kz drtwrde olvz rde nzabrtzlvz-krde nide. ³⁴ Delc, na-aotingr drtwrde Kxetu rde x olvz rde nzabrtzlvz-krdr nide. Da kc tqwai-kzle mz olvz. Murde olvi kxtryrlzu krlzle nzwztr-krbzle mz Kxetu mz nzrlrpx-lzbq-krbzle bade mz nrkrdrdtqde x mz nabzde atwrnrngr. A' olvz kxyrlz yc mz drtwrde dalr nrlc ka. X suti kz drtwrde ncblo ngrde nzabrtzlvz-krde nide. ³⁵ Krlc tqpi-ngrbole, mwix naokatrpo nimu, murde nakrlz-angidramu nike na-aleamu. Trkapxpou natq kx xplr kx bzkq yrlzamu. A' rngidrlvz-ngrbo bamu nzrmcti-krmu da kx namrlzbz bamu mz nzmnc-krmu, murde bzkq da kx atrkatile nzwztr-krbzmu mz Kxetu.

³⁶ Rlxti-kzpa'mu bange nzycmnetr-krnge mz trte kx tr-rlr-ngrp wzleu mz inyxde kxmnc-kamelr nzyrlz-krde. Nzmu ncblo lc narpile mzli ka kx vzzrbr mz nzrpwa'-krbzle mz inyxde nzyrlz-krde mzli kc, e mrlz nzrlr-krbzle bade. Myapxbz mzli lc tqyc-ngrbepz mzli r nzrngine-krde. Krlc trngiu alwx. ³⁷ A' nzmu drtwr ncblo lc natu-amqngile kx mrlz inyxde trnzyrlz-krdeu, x trpnz-moungr da kx aelwapx-ngrde kx olvi lc nayrlz, e ncblo lc trvz-rbru mz nzvz-nqblq-krde me pnz drtwrde. ³⁸ Mrlz nzyrlz-krde o

* ^{7:29} A' bzkq yrlqpx-lzbqamu mz nzmrlnzi-krmu x nzalve-krmu kernalzmung x doa nemung.

trnzyrlz-krdeu. A' mz drtwnrge, mrlz olvi lc trnzyrlz-krdeu, murde mzli ka mzli r nzatrktati-zlwzngr kxnzrlxngiting. †

³⁹ Mz nzyrlz-moungr, napi-mopwo bamu kx doa kxyrlz mnctr-alobz mz kernalzde, nakrlzbzle nzbzkr kzdq nidr. A' nzbzkr kzdq nidr ayrkrpxle nzyrlz-krdr. X nzrlr-ngrbz mz krkc tqlu nzyrlz-mou-krde, a' ngi txpwz mz doa kxrlnxngiti. ⁴⁰ A' mz drtwnrge, sa na-abrtz-zlwz-ngrde trnzyrlz-krdeu, mz mzli r nzatrktati-zlwzngr lc kxnzrlxngiting. X lxngitix kx drtwr lc vzpxm mz Mqngrkxtr.

8

Nzmukr Kxnzrlxngiting Dakxnzng Kx Nzkabz Mz Mqngr Drka' Kxnzlx

¹ Rlxti-kzpa'mu bange kx nzmu takitrde kxnzrlxngiting nzmu-krdr dakxnzng kx ngi blz nzkabz mz mqngr drka' kxnzlx. Rpiamu kx Mqngrkxtr kamle bagu nzrkrlzng amrlx kx takitrde nzngq-krgule. A' nzrkrlz-krmu lc krlzle nzbzle nzglqpx-lzbq-krmu, nzmu trnamrlzti-kzwamuu kztemung kxnzrlxngiting. Murde nivz lc dekc tqaxplre nzrlxngitikr lrmakxtr x nzesz'tikr drtwrdr. ² Leplz kcng tzrpilr kx nzkrlz-angidrlr da amrlx, trnzkrlzlu da kx myapxbz mz nzrkrlzng. ³ A' mz krkcng tzmrlztilr Gct, sc tqrpile kx nidr doa nedeng. X leplz lcng tzmrlzti-kzlr kztedrng x nzrkrlz-krdr tubq.

⁴ X mrlz nzaotikr drtwrmu nzalvztrngr lc mz nzmungr dakxnzng kxnzkabz mz mqngr drka' kxnzlx. Murde krlzku kx trpnz-moungr gct, a' ngi txpwz Gct angidr kc esz'txu. ⁵ Leplz nzangiolor mqngr x drka' kxnzkqlung kxmule-esz' kxnzmncng mzlllxr o mrka mz nrhc, mz nzrpikrdr kx nidr gct rdrng x kxnzeti rdrng. ⁶ A' krlzku kx Gct esz'txu, Trtegu kc tqwztrpzku bade x nou leplz x da amrlx. X Kxetu esz'txu, Jiszs Kxnzmcp, kc tqwz-ngrde leplz x da amrlx x tqkamle bagu nzlungr mz nzaxvctr-krbzku bade.

⁷ A' kxnzrlxngiting amrlx trnzkrlzlu nzalvztrngr angidr lcng. Murde mzli kc kzdung nidr nzangiolor mqngr drka' lcng tzlx. X mz drtwrdr nzaleng alwx mzli ka mz nzmu-krdr dakxnzng kx ngi blz kx nzkabz mz mqngr drka' kxnzlx. X myapengr drtqdr nzvz-rbr-krdr lc. ⁸ Nakrlzku kx nzmungr o trnzmu-ngru trtekqtrleu nzmnc-zpx-krgu badr Gct.

⁹ A' mz nivz, aclvetio-lzbqamu, murde nzale-krmu da kxtubqbz mz drtwrmu ma tqataole mz alwx kztemung kx nzrlxngitikr nrgobe. ¹⁰ Bzkq kztem lc mcpzle nzmu-krm da mz madrka', murde ma tqngibatrpzle bade nzale-krde da kx rpi drtwrde ngi alwx. ¹¹ Zbz sc tqatrkatipeq nzrlxngitikr mzlem lc tqrlapx mz nzbzkr Kraes, murde aleq da kxtubqbz mz drtwr. ¹² Alwx nrgm, mz nzatrktati-krm nzrlxngitikr kztem kc tqale da kx rpi drtwrde ngi alwx, ngi kz alwx ngr nzatrktati-krm Kraes. ¹³ Mz nzmu-krde lcde, trpengr nzmu-krnge dakxnzng kznike na-ataole kztengen mz alwx, murde ma tqatrkatix nzrlxngitikr.

† ^{7:38} Mz natq lr Grik ngalrde lcng 36-38 mwx drtwr ngrde li. Kzdq drtwr ngrde nzyrope. X kzdz qkz drtwr ngrde nide sele: ³⁶ Rlxti-kzpa'mu bange nzymnnetr-krnge mz ncblo kx nzpipelr mz kzdz qolvi nzyrlz-krdr, a' tekqtr-moule drtwrde murde mz drtwrde abrtzlvz zlwz Gct trnzyrlz-ngru. A' mzli ka tekqtr-moule drtwrde, murde mz drtwrde trtubqpu mz olvi lc x mou rblxbz bade nzxplrvz-krde nrkrdrdrqde. Mrlz nzvz-nqblq-krde me pnz drtwrde. Nzyrlz-krdr trngiu alwx. ³⁷ A' nzmu drtwr ncblo lc natu-amqngile kx mrlz trnzyrlz-krde, x trpnz-moungr da kx aelwapx-ngrde kx takitrde nzyrlz-krde, e ncblo lc trvz-rbru mz nzvz-nqblq-krde me pnz drtwrde. ³⁸ Mrlz nzyrlz-krde o trnzyrlz-krdeu. A' mz drtwnrge, mrlz trnzyrlz-krdr, murde mzli ka mzli r nzatrktati-zlwzngr kxnzrlxngiting.

9

*Aposol Pol Nzaotikr Drtwrde Le Kztedeng Nzmyaszpxlr Nide **

¹ Takitrde nztwz-krnge x nzale-krnge da kxkqlu, a' mzli kang kqlu axtx-ngrboleng mz nzokatr-krnge kztengeng. Kxmule-esz' kzdung nimu nzpx-ngrdr nzmnclz-krmlr mz zmatq rnge, a' ni-kznge aposol, mz nzmc-krnge Kxetu rgu Jiszs, kc tqadcpx-lzbqm bange. X nzngini-krmu kxnzrlxngiting vzpxm mz nzvz-nqblq-krnge nzwzngr kc tqaprcmle bange. ² Kxmule esz' kzdu-kzng leplz nzpxtxpx-ngrdr nzngini-krnge aposol, a' nimu kx nzrkrlzng kx ninge aposol kc tqmnclzbzmu mz zmatq ngrde, murde abrtrpzmu drtwrmu mz Jiszs mzli kc tqtyapwxtipxbo Nrpakxmrlz bamu.

³ Mzli lc tqmnc-ngrbo bamu, tr-rlr-ngrpou bamu nzaclve-krmu ninge mz nzhka-krmamu da bange. Dekc kzdung nimu tzrpi-ngrdr kx trnginingeu aposol angidr. ⁴ Dazpwxtx kx takitrde leplz kcng tzlalztqbzng mz aposol nzhka-krbzlr bade dakxnzng. ⁵ Pita badr kzdu-kzng aposol, x mzleng Kxetu Jiszs nzvzminedr olvz rdrng mz nzayo-krdr mz nzwz-krdr x leplz nzaclvelr nidr amrlx. X takitrde kz nzaclve-krmu nigr badr olvz ngrdr kztengeng kcng tqvzminekr mz nzwz-krgr. ⁶ Bzkq rpi drtwrmu kx mrlz nigr ncdr Banabas nzwz-krgr mz nzrtwz-krgr trau, mzli lcpwz tqaclve-ngrnamu kxnzeti kc-kzng. ⁷ Murde opx angidr kx takitrde nzxpeng ncblo mz nzwz-krde. Ncblo ngr vea nzxpeng mz nzwz-krdr mz ami. X ncblo kx wz mz nrlanc ngq-kzle kzdung dalr nrlanc. X ncblo kxaclve sip, mnq-kzle lue lr neyr sip nedeng.

⁸ X mz natqnge lcng trvz-nqblqtxpou drtwr ncblo mz nrlc ka, a' Loukxtr pi-kzle da lc, ⁹ mz nzrpi-krde kx, "Bzkq pebzmu nao kzu, a' rlr-ngrbz bade nzmu-krde mzli kc tqrnzlqtipx-ngrde nra wit." [◊] ?Myx kxmule, rpiamu kx Gct ycmnetr-ngrpwlz kzu? Trtingr! ¹⁰ Murde krlc tqycmnetr-kz-ngrde nigu. Doa kc tqpe rtq x doa kc tqrkq nrade mz nzbrpe-krde, mz drtwrdr natwz-kzlr kzdung dakxnzng ngrde. Da kc tqwai-kzle mz nigr, mz leplz kcng tqaclvekr. ¹¹ Takitrde nzhka-krmamu bagr kzdung da kxipiz kx naokatrle nrkrdrqgr mz nrlc ka, murde rlrpx-lzbq-ngrgr kx naprtr-kzamu mz da kxmrlzting kx nayc-alo mz nrlc kc navzm. ¹² Mrlz nzokatr-krmu leplz kc-kzng tzalvztrlr nimu. A' mz nzngini-krnge aposol ngrmu, zmatq rnge namyaszpxle zmatq ngrdr. X takitrde nigr badr kztengeng mz nzwzkr Kxetu nzhka-krmamu da bagr.

A' aoti drtwrgr kx bzkq wzkr mz zmatq lc mz nzrlx-krbzkr da bamu, kxmule-esz' da amrlx rblxm bagr, murde ma tqrpwa'-ngrne Nrpak ngr Kraes, mz nzrpikr leplz kx alvztr-ngrne nimu nztwz-nrbalq-krnge dakxnzng. ¹³ X takitrde nzokatr-krmu nigr mz dakxnzng mz nzvz-nqblq-krmu pris kxnzwzpxmqng mz Mangr-nzangiongr Yawe. Murde nzrtwzng dakxnzng kx nzrlr-ngrbz mz Mangr-nzangiongr x ncblo kxnzkabzlr animol kx ngi blz mz olta, nzrtwz-kzng kzdung drte mz blz lc. ¹⁴ X Kxetu Jiszs esz'-krde kapx-kzle natq kx leplz kcng tzxrlr Nrpakxmrlz takitrde nzhka-krbzlr dakxnzng mz leplz kcng tzyapwxtipxbzlr nrpa lc badr. [◊]

* ^{9:} Pol naycmnetr-mou-ngrde nzmungr dakxnzng kx nzkabz mz mqngr drka' kxnzlz kc tqpi-kaile mz dckrlzde kc 8. A' mz dckrlzde kc 9, rpile kx navz-nqblqlr lrpzki rde mz nzaotikr drtwrde kx kztedeng nzmyaszpxlr nide. X kxmule-esz' kzdung nidr nzrpilr kx trnginideu aposol angidr, a' aelwapx-kz-ngrbzle badr kx nide aposol angidr. Zbz mz dckrlzde kc 10 ycmnetr-mou-ngrde mz dakxnzng kx nzkabz mz mqngr drka' kxnzlz. ^{◊ 9:9} Lou Kcpwz 25:4 ^{◊ 9:14} Matiu 10:10; Luk 10:7; Galesia 6:6; 1 Timoti 5:18

¹⁵ Mz nzmu-krde lcde, kxmule-esz' takitrde nzrka-krmamu dakxnxng bange mz nzngini-krnge aposol, a' trtwzwxu dakxnxng lcng. A' tryngrpou da lcng murde natwzx du da kx nangi scnge mz nzaclvle-krmu ninge. Glqpx-lzbq-ngrne trnzrtwz-krngeu da scdr leplz mz nzyapwxtipx-krbo Nrpakxmrlz badr. X mrlzvxix nzbztr-krnge mz kzdq da, ma tzrpi leplz kx pokia-ngrne nzglqpx-lzbq-krnge lc. ¹⁶ Murde nzglqpx-lzbq-krnge lc trvzpxpuu mz nzyapwxtipx-krnge Nrpakxmrlz, a' murde Gct kapxle natq mz nzyapwxtipx-krngele. X trmrlzpuu bange nzmu trnavz-nqblqwxu le. ¹⁷ Nzmu natwzx nzwzngr lc esz'-krnge, takitrde nzxpengr ninge. A' apux kxnzawz-nrbalq ne Gct kc tqaprcmle nzwzngr lc bange. X kxnzawz-nrbalq trnzxpeu mz nzale-krde nzwz-krde. ¹⁸ Ninge kxnzawz-nrbalq ne Gct x trrtwzwxu da mz nzale-krnge nzwzngr kc tqaprcm Gct bange. X mz mzli lcpwz ni-kzng e aposol ngrmu x takitrde nzrtwz-krnge da murde okatr x nimu. Kxmule-esz', a' rpwa'-ngrbo bamu nzrka-krmamu da bange, murde suti drtwrnge kx Gct na-abrtzlvzle ninge.

¹⁹ Mz nzmu-krde lcde, trpnzng doa kx mnclzbo mz zmatq ngrde. A' avzo-lzbqx mz nzwztr-krbo mz leplz amrlx, murde navecrpw' leplz mz Kraes. ²⁰ Mz nzwz-krgr badr lr Jiu, kxmule-esz' trmnclzpepou mz Lou sc Mosis, a' vz-nqblqx nqmq kgrng, murde navecrpw' mzlengeng lcng mz Kraes. ²¹ X mz nzwz-krgr badr nimu kcng trngiulrJiu kxtrnzkrzlu Lou sc Mosis, vz-nqblqx nqmq krmung. X trvz-nqblqwxu nqmq kgrng mz dakxnxng x mz nzrwztingr da. A' vz-nqblq-zvzx da kxtubq mz drtwr Gct, murde mnclzbo mz Kraes. ²² Mz nzmnc-krgr badr leplz kcng nzrlxngiti-krdr nrgo, apu-kzx doa kx nzrlxngiti-krde nrgo, murde ma tqatrkatix nzrlxngiti-krdr, a' na-axplrx nidr. Mz nzmu-krde lcde, mnc-nqblqx nqmq krdr leplz kang kqlu, murde navecrpw' kzdung nidr mz Kraes. ²³ Sa na-ale-zvzx da amrlx mz nzlepx-krnge Nrpakxmrlz mz leplz kxszkqlung. Murde suti drtwrnge nzprtr-kz-krpo badr mz da kxmrlzting kcng tqkabz Gct mz krkcng tzrlxngiting.

²⁴ Mz nzmnc-krgu mz nrlc ka apuku leplz kcng tzvong mz nzesangr. A' leplz kcng tzaovxiong txpwz kx nztwzlr dakxmrz mz nzayrkrpx-krdr nzesangr lc. Mz nzmu-krde lcde, da amrlx kx aleamu mz nzmnc-krmu naokatrle nimu mz nzayrkrpx-krmu nzesangr lc, murde natwz-kzamu nzlungr kxboi. ²⁵ Leplz kznikeng nasuti drtwrdr nzvz-krdr mz sport mz Olimpik, navz zvz nzaycngrlrti-krdr nrkrdrdtqdr mz nzaxplr-krdr lengl. Murde natwzlr kraon ngr leu kx ani txpwz nzblo-krde, x mzli r nzrlqpxnegr nidr trboiu. A' mz nzvo-krgu mz nzesangr lc, abz-zlwzku nztwz-krgr da kxmrlz kx nayc-alu mz nzprtr-krgr me matq ngr Gct Heven. ²⁶ Krlc nqmq krng e mz nzmnc-krnge. Murde natwz-kzx da kxmrlz kx nakabz Gct mz leplz kcng tzaovxiong. Apux ncblo kx vo mz nzesangr, mz nzvo-ani-krnge x nzaotikr drtwrnge mrkc tqesakingr nzesangr lc. X apu-kzx ncblo kx eta mz sport. A' tr-eta-abeanevwu. ²⁷ Apusr-ngrne nrkrdrtnge kxszawz-nrbalq nenge, mz nzolvzo-krngele x mz nzrtultr-krbo nzvz-nqblq-krde me pnz drtwrnge. Murde ma tqrngidrlvz-ngrbo mz leplz nzolvzo-krdr nidr esz'-krdr, a' ptxpx-ngrde ninge Gct kalr mz trnzvz-nqblq-krngeu natqngeng.

10

Kxnmung Mz Madrka' Nzangiolr Kxtrngiu Gct Angidr

¹ Nadcpx zvz mz drtwrmu nzpxtpxkr Gct leplz nedeng mzli kc bqnc. Murde mzli kc lr Israel tzrlasz-ngrdr Ijipt nzmncbzng mz nzaclvekr Gct nidr. X yrlqle dcblz kx apule nctrpou kxwzpx nangi rkx ngr nzmnc-krbzle

badr. X arlapxle nidr mz ami ngr lr Ijipt, mz nzakipx-krde Prla Bla, mz nzkawi-krdrle mz nancycdr. ² Mz nqmq lcpwz tqarlapxngr Jiszs nigu x axvctrpzku bade mz nzwrkxtrngr, lr Israel nzaxvctr-kzpzung mz Mosis kc tqmailzle nidr mz nzrlapxngr. Nzkawi-krdr Prla Bla x nzmnclz-krbzlr mz dcbz ngi kzdq namrlzu r nzwrkxtrngr. ³⁻⁴ X mz nqmq lcpwz tqmu-ngrgu x tqrmnq-ngrgu da kx vzpxm mz zmatq ngr Gct mz Nzmungrkxtr mzli ka, leplz lcng mzli kc nzitung dakxnxng x nzrmnqng lue kc tqkabz Gct badr mz zmatq ngrde. Rplz kxetu kc tqyrlapx-ngrm lue ngi rkx ngr nzmnc-krbz Kraes badr mz nzokatr-krde nidr, da kc tqwai-kzple bagu mzli ka. ⁵ A' nadcpx mz drtwrmu kx kxmule-esz' Gct arlapxpele nidr x amrlzle nidr x okatr-zvzle nidr, a' ngyati zlwz drtwrmu krkcng tzangi olr kxtrngiu Gct angidr. X odatile nidr mrkc lzke. ^{*}

⁶ Da lcng nzyrong mz nzrngidrlvz-krmleleng bagu, murde bzkq prtrpzku badr mz nzayrplapxngr kcpwz. Bzkq sutilx zlwz drtwrgu da kxdrka'ngr da kc tzwailr, murde ma tzayrplapx-alongr nigu. ⁷ Nzryrngrkxtr rpile kx, "Leplz lcng tzangi olr mqngr nei kzu kxnlz mz nzmu-krbzlr bade x nzelalvzlr nide." ^{*} Bzkq mutrpzku mz mqngr drka' kxnlz da kc tzwai kzdung nidr, murde ma tqangio-kzku kxtrngiu Gct angidr. ⁸ X bzkq rmwimiku kxtrngiu kernalzgu, da kc tzwai kzdung nidr. Murde mzli lc leplz siu-nzpnul-li-nrade-tq (23,000) nzbz-krdr kxesz'. ^{*} ⁹ X bzkq matitr drtwrgu zmrlz ngr Kxetu rgu mz nzrmcti-krgu kx na-ayrplapxle nigu o trtingr, da kc tzwai kzdung nidr. Murde ma tqodati-kzle nigu da kc tqwaile mz lr Israel kcng tzbtting mz nzmakxkr ningidoe nidr. ^{*} ¹⁰ X bzkq apuamu kzdung nidr kcng drtwrdz tqilctrpz mz Mosis, mz nzlctr-krm drtwrmu bange. Murde enjrl kc tqatwzlr-ngrbz Gct nibqtile nidr. ^{*}

¹¹ Da lcng tqprtzbzng badr nzrngidrlvz-ngrm bagu kx bzkq xpqbrr-ngrgu Gct. X nzyro-kzng mz nzokatr-krdr nigu kcng tqmncpeku mz mzli r nzangidatipekr Gct drtwr kc tqyrlq-pnzle mz nzrlxngiti-krde x rblxbz bade nztao-krde mz da lcng, na-aclvetio-lzbq. Trmrlzu nztao-krde mz nzangio-krde kxtrngiu Gct angidr x dekc trnaprtrpe-ngrdeu mz nzlungr kxboi. ¹² Nzatalzngr amrlx kcng tzprtzbzng bam, nzprt-kzpzung mz leplz amrlx. A' mrlz nzabrtr-krbzme drtwrm mz Gct, kc tqokatr-zvzle nim. Murde sa na-aelwapx-ngrbzle bam lrpzki r nzyrbqpx-krm. X mz nzo-zli-krmle, sa natu-amqngiq, x nzatalzngr trpnzngr nzaovxio-krde nim.

¹³ Mz nzmu-krde lcde, kx mzleneng x inwengeng, yrlqpx-lzbq-zvzamu mz nzangio-krmu mqngr drka' kxnlz murde trngiu Gct angidr. ¹⁴ X mz nzngini-krmu leplz kxnyrplapxng, nakrlz-angidramu kx natq kc napibo bamu tubq. ¹⁵ Mz Nzmungrkxtr, mzli kc tqrmnqo-ngrgu mz kap ngr waen kc tqawi-ngrbzku mz Gct, x tqmu-ngrgu bret kc tzlopwx, prtrku mz da kxmrzting kcng tzvzpxmqng mz nzyrleo-krm mepyr ngr Kraes x nzbzo-krmle mz kros. ¹⁶ Bret esz'txu, x nigu amrlx nrkrdrtrq esz', murde prtr-ngrgu bret kc esz'. X bret lc esz' ngi rkx ngr nrkrdrtrq Jiszs, kc tqodutr-lxblr-ngrbzku bade mz Nzmungrkxtr.

¹⁷ Na-aoti kz drtwrmu lr Israel. Murde mzli kc tzngq-ngrdr dq animol kc tqngi blz, opx angidr kx nzodutr-lxblrbzng mz Gct kcpwz tzkabzlr bade blz kc. ¹⁸⁻²⁰ A' kxtrnzrlxngitiung nzkabzlr blz krdr mz mqngr drka' kxnlz

^{*} **10:1** Nzrlaszngr 13:17—14:31 ^{*} **10:3-4** Nzrlaszngr 16:4-30; 17:1-7; Nzkqlu-krdr 20:2-13; Lou Kcpwz 8:15-16; 32:4, 15, 18, 30-31; Nemaea 9:15, 20; Sam 78:15-31; 105:40-41 ^{*} **10:5** Nzrlaszngr 32; Nzkqlu-krdr 14 ^{*} **10:7** Nzrlaszngr 32:6 ^{*} **10:8** Nzkqlu-krdr 25:1-9 ^{*} **10:9** Nzkqlu-krdr 21:4-7 ^{*} **10:10** Nzkqlu-krdr 16:41-50

nedrng, a' trngiu mz Gct angidr. Kxmule-esz' mqngr drka' kxnzlz nedr trnzuung x blz krdr maneng, a' trsutiu drtwrnge nzodutr-lxblr-krbzmu mz drka' lcng. ²¹ Murde Gct tr-rlr-ngrpwlzleu nzrmnqo-krmu mz kap sc Kraes, x mz nibrde krsc kz drka'. X tr-rlr-kz-ngrpwlzleu nzmu-krmu bret kxtr, x mz nibrde dakxzng kx nzkabz mz drka'. ²² Bzkq aleamu da kxmule lcng, murde ma Gct tqngyati drtwrde nimu mz nzangio-krmu gct kx trngiu Yawe esz'-krde, x sc tqayrplapx-zlwzpele nimu.

²³ Kzdung nimu nzrpilr kx, "Nzrlr-ngrm bange nzale-krnge da kx suti drtwrnge, murde trmnclzpepou mz zmatq ngr Lou sc Mosis." A' napibo bamu kx, "Kzdung da kx aleamu trnzokatrlru kztemung mz nzesz'tikr drtwrmu x mz nzaetunepxngr nzrlxngiti-krdr." ²⁴ Bzkq aoti txpwz drtwrmu nimu esz'-krmu, a' na-aoti kz drtwrmu da kx naokatrle kztemung. ²⁵

²⁵ Takitrde nzmu-krmu animol kznike rmctiamu me nzamwangr da. A' bzkq yc mz drtwrmu nzveati-krbzmule kx nzkabz mz mqngr drka' kxnzlz o trtingr. ²⁶ Da kc tqwai nzpikr Nzryrngrkxtr le kx, "Nrlc atwrnrngr nyg Yawe, x doa amrlx mz nrlc nedeng x da amrlx mz nrlc scdeng." ²⁷ Mz nzmu-krde lcde, Gct rlr-ngrbzle bamu nzmu-krmu dakxzng amrlx, mz nzawi-krbzmu bade mz da lcng.

²⁷ Nzmu kzdq ncblo kxtr-rlxngitiu na-aveatimle nim mz nzmu-krmu badr ma nydze, vzbz ye x ngq da kznikeng katibzle bam. X bzkq yc mz drtwrn nzveati-krbzme dakxzng kx kabzleng kx nzkabz mz drka' o trtingr. ²⁸⁻²⁹ A' nzmu kzdq kcng doa rpibzle bam kx, "Dakxzng lc nzkabz mz drka'", bzkq ngqn dakxzng lcde, murde ma tqatrktiq nabz doa kc tqkxmu nzycmne-krbzle lc bam. ³⁰ Murde kxmule-esz' tratrkatileu nabzng e mz nzmu-krnge dakxzng lc tqawi-ngrbo mz Gct, a' na-aoti kz drtwrnge leplz kcng tzrpilr mz nabzdr kx vz-rbrx mz nzngq-krngele. ³¹ X na-amrlueku Gct mz da amrlx kx aleku, kxmule-esz' muku o rmnqku. ³² Bzkq atrkatiamu drtwr lr Jiu o kxtrnzrlxngitiung, murde ma tzpxtxpx-ngrdr Nrpakxmrlz. X bzkq atrkti-kzamu drtwr kztemung lrmakxtr kxnxrlxngiting. ³³ Da kc tqwai-zvzx mz nzabz-zlwz-krnge kx leplz amrlx na-abrtzlvzlr ninge mz da kcng amrlx tqalexng. Tralew Xu da kx mrlzm bange, a' ale-zvzx da kx naokatrle leplz kxnxkqlung murde narlapxng mz nzlxngiti-krdr Jiszs.

11

¹ Mz nzmu-krde lcde, vz-nqblqamu nqmq krnge mz da lc, da kc tqwaix mz nzvz-nqblq-krnge nqmq kr Kraes.

Nqmq Krgu Kx Takitrde Olvz Ngr Lrmakxtr

² Rpiamu mz letz scmu kx dcpkx mz drtwrmu nqmq krnge x da amrlx kcng tqalvztr-ngrne nimu. X rpi-kzamu kx vz-nqblq-zvzamu nqmq ngr nzangiongr mz makxtr kcng tqaprcbo bamu. X abrtzlvzx nimu mz da lcng. ³ A' navz-nqblq-kzamu da kc tqpibo bamu kx bzkq atrkatiamu drtwr kztemung kxnxrlxngiting. Mzli kc tqyrlwr-lxblr-ngrnamu mz nzangiongr, nar olvz na-akqlvzlr mz nzvz-nqblq-krde nqmq krgu mzli ka, mz nzkrka'-kato-krdr x mz nzrplzpx-krdr nrpa kx kabz Mqngkrkxtr badr. Nakrlz-angidramu kx ncblo amrlx kxnxrlxngiting nzmnclzbzng mz Kraes. X olvz nzmnclzbzng mz ncblo, murde olvz kc ayrrngr nzwzngr mz nrvr ngr blrir Adzm. X Kraes mnclzbz mz Gct. Mz nzmu-krde lcde, mz nzvz-nqblq-krde nqmq krgu mz nzangiongr, ncblo x olvz bletipxng. ⁴⁻¹⁰ X mz

nzangiongr lc, trtakitrdeu ncblo nzakqlvz-krde narde, murde Gct wz-kaingrde ncblo mz mqngrde, murde na-amatqlr nide. Dekc ncblo kx akqlvzle narde mz nzangiongr, amanede Kraes kc tqngi nou nzlu-krde. Mz nzrwzkr Gct leplz, ncblo x olvz bletipxng. Murde Adzm trvzpxpuu mz Iv, a' Iv vzpxm mz Adzm. X Gct trwz-ngrdeu Adzm mz nzokatr-krde Iv, a' wz-ngrde Iv mz nzokatr-krde Adzm, murde olvz na-amatqlr ncblo. Dekc olvz kx trakqlvzleu narde mz nzangiongr, amatinede ncblo kxzrlxngiting, mz nzrtulrtr-krde nzrsakrlr-krdr badr ncblo. X nzmyakr drtq olvz kxmule lc, esz' ncdr olvz kx nqngi narde nzyrlxo x olvz kx nqngi narde nzrpakingr apule ncblo. Delc, mrlz olvz nzakqlvz-krdr nardr mz nzangiongr, nangi rkkx ngr nzmnclz-krbzlr mz zmatq kxtubq, murde enjrl na-abrtzlvz-kzlr nidr.

¹¹ Kxmule-esz', a' mz nzaxvctrpe-krbzku lc mz Kxetu, olvz nzmnnc-xglelr ncblo, x ncblo nzmnnc-xgle-kzlr olvz. ¹² Kxmule-esz' Iv vzpx-kaip mz Adzm, a' abzo mzli lc ncblo nzvzpxmqng mz olvz. Drtwr ngrde kx leplz amrlx nzrsakrlrng mz nzmnclz-krbzlr mz Gct kc tqwz-ngrde nigu.

¹³ Mwx elx mzli ka drtwrmu esz'ti mz nzsri-krnge kx nar olvz na-akqlvzlr mz nzkrka'-kato-krdr x mz nzsrlpzpx-krdr nrpa kx kabz Mqngkrkxtr badr. ¹⁴ X mz drtwrgu, trtakitrdeu ncblo nqngi nardr nzboi-krdr, murde mz nqmq krgu ngi da kx myangr drtqdr. ¹⁵ A' rpike kx mrlz nzboikr nqngi nar olvz, murde lqngipx mz nzobq-krgu. X opxm kx Gct kabzle nqngi nardr nangi dalr nzakqlvz-krde nardr. Delc takitrde nzakqlvz-krdr nardr da kc tqwai nzpipx-krbole bamu. ¹⁶ Bzkq kxvecpx-lzbqm mz da lc, murde alvztr-ngrne nqmq lc mzli kc tqmnc-ngrbo bamu, x dzbe lrmakxtr amrlx neng Gct nzvz-nqblq-kzlr. *

Da Kx Akipxle Kxzrlxngiting Mz Nzmungrkxtr

¹⁷ Trabrtzlwzwxu nimu kxmu nzvz-nqblq-krmu kzdung nqmq ngr makxtr kcng tqaprcbo bamu, myapxbz mz nqmq krmu mz Nzmungrkxtr kx atrkatile kzdung kztemung. ¹⁸ Xlrx kx nimu lrmakxtr akipx-lzbqmu mz dzbedeng mzli kc tqyrlwr-lxblr-ngrnamu mz nzangiongr. X lxngitix kxipiz kx nrpa lc ngi da angidr. ¹⁹ A' krlz-kzx kx kzdung nzakipxng lcng nzvzpxmqng mz nztu-amqngikr kzdung nimu mz da kxtubq, murde ma tqprtrpzmu mz kxzrlvz-rbrng, a' nakrlzngr neke tubq mz nzobqkr Gct. ²⁰ Kxmule-esz', a' mzli kc tqyrlwr-lxblr-ngrnamu mz nzmulvzngr Kxetu rgu, nqmq krmu atrkatile nide, mz nzakipx-lzbq-krmu. X apusr-ngrnamule trngiu Nzmungrkxtr. †

²¹ Murde kxmule-esz' yrlwr-lxblramu, a' leplz amrlx trnzakilru dakxanzng nadr badr kztedrng. A' kc doa ngq-txpwzle dakxanzng nade. X mzli lc nimu kxzrlngi bcnyrng nzmu-zpxwng x nzrmnq-zlwzng waen, a'

* ^{11:16} 11:2 Pol ycmnetr-ngrde nqmq krdr mzli lc, a' trngiu natq kx rmgidrlvz-ngrmle kx navz-nqblqku mzli ka. ^{11:3} Mz drtwr Gct x mrkc Heven leplz amrlx nzrsakrlrng, murde wz-ngrde nidr amrlx mz mqngrde. ^{11:4-10} Mzli lc mz nqmq krdr ngi da kx myangr drtq olvz kx nqngi narde kxzrlus-ngrdr lcng. Trkrlzkuu drtwr angidr ngr natq Pol mz nzsri-krde kx, 'murde enjrl.' A' nzsriktr-krgr vz-nqblqle kzdq drtwr kxzrlkrlzng. ^{11:16} Drtc' amrlx kcng tzmncbzng mz zmatq ngr King r Rom, lrmakxtr kcng mrlcde tzvz-nqblqrlr nqmq lc. A' trngiu drtwr ngrde kx navz-nqblqku mzli ka mrka mz trmctu nyzgu. † ^{11:20} Mzli lc pnz, leplz amrlx mrlc nzakipx-lzbqng mz dzbede nzling, dzbede kx nznginidr bcnyr x dzbede kx trpnzng scdr da. Mz nqmq krdr, mzli lc leplz tzvz-ngrmlr mz ma nyz kzdq bcnyr, bcnyr lc badr kztedeng nzmung me esz' mz dakxanzng kx mrlzvxi kxkqlu. A' leplz kx trpnzng scdr da, nzmung me kzble mz ma nyzde, x dakxanzng nadr pipz. X mrkc tzwxbu-ngrdr nzkrlzlr nzrmcngr leplz kx nzmu-zpxwng. Mz letz lc, Pol ngyangr drtwrde murde kxzrlxngiting kx nqngi bcnyrng nzvz-nqblqrlr nqmq lcpwz mz nzyrlwr-lxblrkr kxzrlxngiting ma nyzdr mz nzangiongr x mz nzprtr-krdr mz Nzmungrkxtr.

leplz kx trpnzngr scdr da nzbrtaleng. ²² Bzkq aleamu da lc. A' mu-kaiamu mz ma nyzmung, x mz nibrde sc tqyrlwr-lxblr-ateamu badr kztemung kxnzrlxngiting. Murde amyatibzmu drtq leplz kcng tzbrtaleng mz nzobqszo-krmu lrmakxtr neng Gct. ?Nike napibo bamu? ?Mrlz nzglqlzkrnge nimu mz da lc? Trtingr!

²³ A' nqmq kc tqkam Kxetu bange x aprcpebo bamu nide sele. Jiszs, mz nrlckxbq ngr zbz kc tqamwangr Judzs nide, kalzmle bret. ²⁴ Awi-ngrbzle mz Gct, lopxile, x rpibzle mz ncblo nedeng kx, "Krlc ncvr nrkrdrqnge, nzkabz bamu. Rtrngzti-zvzbzmu da lc mz nzdcpxkr drtwrmu ninge." *

²⁵ Mz nqmq lcpwz, mz nibr nzmulvz-krdr Nzamyangr, glqlzmle kap ngr waen, x rpibzle badr kx, "Waen lc ngi rkx ngr Nzesz'tikr Drtwr Gct Kc Ate tqyrlqbzle badr leplz mz nzyrleokr mepyr rnge. Rtrngztibzmu da lc mzli kznikeng mnq-ngrnamule, mz nzdcpx-zvzkr drtwrmu ninge." ‡

²⁶ Drtwr ngrde kx, mz nzngq-krmu bret lc, x nzrmnq-krmu waen lc, navz vzv nzaelwapx-krmu nzbszkr Kraes nigu amrlx, vz vz krlzmle mzli kx yzlu-mou-ngrmle.

²⁷ Mz nzmu-krde lcde, doa kx vz vzv nzamane-krde Kxetu mz Nzmungrkxtr, da kc tzwai kzdung nimu, atrkatilr Nzesz'tikr Drtwrdr badr Gct kc tqyrlqle mz nrkrdrq Mrlxde mz nzyrleo-krm mepyr ngrde.

²⁸ Dekc, na-aoti-angidr-kaingr drtwrmu nqmq krmu mz Nzmungrkxtr. X sc tqmupeamu bret x tqrmnqpeamu waen ngrdeng kc ate, murde ma tqatrkatiamu kztemung mz nqmq krmu. ²⁹ Murde Gct sa na-ayrplapxle doa kznike prtr mz Nzmungrkxtr, a' vz-rbr murde trkrlzleu drtwr ngr nrkrdrq Kxnzmcpx. * ³⁰ Dekc kxnzkqlung mz nimu tzyangrngape-ngrdr x tzyagoxpe-ngrdr. X kzdung nimu tzbzpe-ngrdr. §

³¹ A' naobqtr-kaiku mz nabzgu, mz nzmncz-krbzku mz me pnz drtwr Kxnzmcpx, murde ma tqprtrku mz nzayrplapx-alokr Gct nigu. ³² A' mzli kc tqmc-ngrde kx vz-rbrku mz nqmq krgu, ayraplapxle nigu, murde natekqtrku nqmq nr drtwrgu x trpnzngr nzayrplapx-alo-krde nigu mz Hxl.

³³ Mz nzmu-krde lcde, kx mzleneng x inwengeng, mzli kc tqyrlwr-lxblr-ngrnamu mz Nzmungrkxtr lc, aodu-lzbqamu mz nivz. ³⁴ Doa kx suti drtwrde nelzde nakrlc angidr, namu pnz kai ma nyzde, murde ma tqbatrpzle nzayrplapxkr Gct nimu mz nzvz-rbr-krmu mz Nzmungrkxtr.

Mzli kc navz-ngrmc, sa napi-zpwx-mopwo du da, mz nzayzlu-krbo nike piamu mz letz scmu.

12

Zmatq Kxmyapxbzng Kcng Tqkam Mqngkrkxtr

¹ Mzleneng x inwengeng, mzli ka suti drtwrnge nzalvztr-krnge nimu mz zmatq kcng tzvzpxmqng mz Mqngkrkxtr, murde nzao-krmu drtwrmu naopx. ² Krlzamu kx mzli kc tqmnc-mrbrbe-ngrnamu, drka' nzvectrplr nimu mz nzangio-krmu da kxnzlx, kcng trnzluung. ³ A' mzli ka suti drtwrnge kx nakrlzamu kxmu nzglx-krmu kxnzmncng mzlllxlr kznike kx aycmnele ncblo, kx ngi Mqngkrkxtr o drka'. Murde doa kx aycmne

* ^{11:24} Asaea 53:12; Matiu 26:29; Mak 14:22-25; Luk 22:14-20 ‡ ^{11:25} Nzmungrkxtr ngi rrx ngr nzprtrngr mz da kxmrlzting kcng tzvzpxmqng mz Nzesz'tikr Drtwr lc Tqmrna. Krlcde seleng—nzipqpxngr alwx, nzamrlzng nkrdrq mz zyagox, nzrlxngitingr kx xplr, nzesz'tikr drtwr kxnzrlxngiting, nzatubqtikr Jiszs nidr mz nzobqkr Gct, x kzdu-kzng da kxnzmull lcng. [Jeremaea 31:31-34; Nzrlaszngr 24:8] * ^{11:29} 1 Korint 10:17 § ^{11:30} 11:29 Murde kxnzrlxngiting amrlx kxnzmull esz' mz nzobq-krde, mz nzngini-krdr nkrdrqde. 11:30 Trngiu drtwr ngrde kx zyagox x nzbnzng amrlx nzvzpxmqng mz nzayrplapxkr Gct leplz.

Mqngrkxtr trtxpnzngr nzhpi-krde kx, "Pibqtix Jiszs," a' ngi txpwz kx aycmne drka'. X doa kx mnccpx-ngrm Mqngrkxtr, nide txpwz kx krlzle nzhpi-krde kx, "Jiszs nide Kxetu kxmyapx-esz'ngr."

⁴ A' bzkq aoti txpwz drtwrmu zmatq ngr nzycmne-ngrbz mz Gct mz natq lr mrkzbeng. Murde zmatq nzkqlung kx bletipx-lxblrng kcng tzvzpxmqng mz Mqngrkxtr kcpwz esz'. ⁵ Da kc tqwai nzwzng kxkqlu kx bletipx-lxblrng mz nzwztr-ngrbz mz Kxetu kcpwz esz'. ⁶ X nzhkrlzngr kxkqlung kx bletipx-lxblrng kx nzvzpxmqng mz Gct kcpwz esz', mz nzalekr leplz nzwzng kc tqaprcbzle badr. ⁷ A' Mqngrkxtr kamle bagu zmatq ngr nzwzng lcng tqbletipx-lxblrng, murde naokatrku kztegung kxnzrlxngiting. ⁸ X zmatq lcng tzbletipx-lxblrng tqka Mqngrkxtr nidr seleng: nzrpipxng nrpa ngr nzyrplapxng, nzrpipxng nrpa ngr nzhkrlzngr, ⁹ nzrlxngitingr kx xplrs'ez'ngr, kzdung zmatqng ngr nzamrlzngr kxnyagoxng, ¹⁰ zmatq ngr nzalengr da kxmatq, nzrplzpxng nrpa kx kabz Gct, nzrglxng namrlzur kxnxzmcng mzlilxlr kc tqwz, nzycmne-ngrbz mz Gct mz natq lr mrkzbeng, x nzrpipxng drtwr ngr natq lr mrkzbeng lcng. ¹¹ A' Mqngrkxtr kcpwz esz' kc tqrka zmatq ngr nzwzng lcng tzbletipx-lxblrng. X sc tqkatipebzle mz leplz mz nzvz-nqblq-krde me pnz drtwrde.

Naez'stiku Mz Nrkrdrtrq Kraes, Kxmule-esz' Nzwz-krgung Kqlu

¹² Nrkrdrtrqm esz', a' dalr nrkrdrtrq kqluti. Mz nqmq lcpwz, kxmule-esz' kqluku x zmatq ngrgu bletipx-lxblrng, a' nigu nrkrdrtrq kxesz', mz nzprtr-krgu mz nrkrdrtrq Kraes. ¹³ Murde nigu amrlx nzaxvctrpzku mz nrkrdrtrq lc esz', mz nzawrkxtrkr Mqngrkxtr nigu. Kxmule-esz' nigu lr Jiu o trtingr, x kxmule-esz' nigu kxnzawz-nrbalgong o trtingr, a' Gct avzomle bagu amrlx Mqngrkxtr kcpwz esz'.

¹⁴ Nrkrdrtrq trngiu da kxesz'ti, a' dalr nrkrdrtrq kqluting x nzwz-krdrng bletipx-lxblrng. ¹⁵ Mz nzmu-krde lcde, bzkq nanyc nrkrdrtrq rpile kx, "Trprtrwxu mz nrkrdrtrq, murde trnipc'u mqde." ¹⁶ X bzkq nradrtq rpile kx, "Trprtrwxu mz nrkrdrtrq, murde trnipc'u mzte." Murde nidr amrlx nzprtrng mz nrkrdrtrq. ¹⁷ Nrkrdrtrq atwrnrngr kx ngi txpwz mz, trxlu da mz nzmrbrpx-krm nradrtq. X nrkrdrtrq atwrnrngr kx ngi txpwz nradrtq, trtcngiu da mz nzmrbrpx-krm nctq. ¹⁸ Nzwzng amrlx nzokatrlr nrkrdrtrq. X Gct yrlqle kxnzrlxngiting amrlx badr zmatq ngr nzwz-krdr me namnc-ngrdr mz nrkrdrtrq Kraes, mz nzvz-nqblq-krde me pnz drtwrde. ¹⁹ Mz nzrngisckr kxnzrlxngiting amrlx zmatq kcpwz mz nzwzng, drtwr ngrde kx nzwzng kxnxkqlung nzmrbrpxmqng mz nrkrdrtrq Kraes. X nrkrdrtrq kxmule lc, trkrlzleu nzale-krde nzwzkr nrkrdrtrq amrlx. ²⁰ Takitrde zmatq ngr nzwzng kxnxkqlung kxbletipx-lxblrng nzwz-lxblr-krdr mz nrkrdrtrq kxesz'.

²¹ Mz nzmu-krde lcde, trtakitrdeu nar nzrpi-krbzle mz nanyc kx, "Nzwz-krdrng mane." X trtakitr-kzdeu mq nzrpi-krbzle mz mz kx, "Nzwz-krdrng mane."

²² Kxmule-esz' kzdung kxnzprtrng mz nrkrdrtrq trnzxplitung, a' nzwz-krdr nzmyatpx-kzng. ²³ X dalr nrkrdrtrqgu kx nzobqszong x kx myangr drtqgu, acive-angidrku x amatqku nidr mz nzakqlvz-krgu nidr mz lrpz, murde nrkrdrtrqgu atwrnrngr natakitrde leplz nzmc-krdrle. ²⁴ A' dalr nrkrdrtrqgu kx takitrde nzrmcngr, trnakxmusr-ngrguu nidr lc. X kxmu-kzpwzle lc mz nrkrdrtrq Kraes. Murde suti drtwr Gct kx nzamatq-krgu x nzaclve-krgu krkeng tzmatineng namyaszpxle nzamatq-krgu kxnzamatqpeng.*

* ^{12:24} Mrlz nzamatq-krgu kxtrpnzng scdr da, doa kxnztopwzng x olvz namyaszpxle kx ngybcnyrung x kxnzetung kcng tzamatqpeng.

²⁵ Murde trsutiu drtwr Gct kx leplz nzakipx-lzbqng, a' nzacuve-kdrdr kztedrng kxnzrlxngiting narsakrlrngr. ²⁶ X mz drtwr lc, nzmu drtq kzdq doa mz nrkrdrtrq Kraes naetqle, nxzngitr lxblr kztedeng amrlx. X nzmu kzdq doa nzamatqle, kztedeng amrlx naprtr-kzng mz nzabrtz-krde.

²⁷ Nimu amrlx ngrmu nrkrdrtrq Kraes. X doa kxesz' mz nimu prtr mz nrkrdrtrq lc x nwzkr-krde myatpxx kz. ²⁸ Mz nwzkr nzachvengr lrmakxtr, Gct

yrlq-ayrnr-ngrde nwzkr aposol,
krali nwzkr profet, x
kratq nwzkr kxzalvztrng mz natq Gct x mz nqmq krde.
X yrlq-kzle zmatq kxbletipx-lxblrng lcde seleng:
nzalengr da kxmatq,
kzdung zmatqng ngr nzamrlzngr kxnzyagoxng,
nzokatr-zlwzngr leplz,
nzrmcngr lrpzki kx navzki lrmakxtr, x
nzycmne-ngrbz mz Gct mz natq lr mrkzblleng.
²⁹ Trngiu leplz amrlx kx nznginidr aposol, profet, kxzalvztrng mz natq Gct, o kxzaleng da kxmatq. ³⁰ X trngiu leplz amrlx kz kxzamrlzngr kxnzyagoxng, kxnzycmnebzng mz Gct mz natq lr mrkzblleng, o kxnzr-pipxng drtwr ngr natq lr mrkzblleng lcng.

*Nivz Namyapx-esz'ngr
Mz Nwztr-ngrbz Mz Gct
Mz Zmatq Kxmyapxbzng*

³¹ Mrlz nzsuti-zlwzkr drtwrmu zmatq kxmyapxbzng mz nzokatr-krmu lrmakxtr. A' mzli ka napibo bamu nqmq kx myapx-esz'ngr mz zmatq lcng.

13

¹ Doa kx traewapx-ngrpzwleu nivz mz leplz, mane zmatq ngr nzycmne-krde mz natq lr mrkzblleng x natq enjrl kz. Murde apule nzrliplakr natq dram kxmzrngr mz nzrtztrngr. ² X doa kx trmlztileu leplz, mane kz zmatq ngr nzplzpx-krde nrpa kxkabz Gct, x nzrpipx-krde nrpa ngr nzrkrlzngr, x nzkrlz-krde da angidr kx yc-kapq. X mane kz nzxplkr nzrlxngiti-krde kx krlzle nzabrkalz-ngrm newz. ³ X doa kx traewapx-ngrpzwleu nivz mz leplz, mane kz nzglqpx-lzbq-krde nzamwa-krde drtc' nydzeng x dztudeng amrlx mz nzokatr-krde kx trpnzng scdr da.

⁴ Murde doa kx aelwapx-ngrbzle nivz angidr vz-nqblqle nqmq lcde seleng: nzvz-nrwx-ngrbz mz leplz, nzrycngr drtwr leplz, nzokatrng leplz, x nzavzo-lzbq-ngrbz mz leplz. A' mrlx lc bzkq glqpx-lzbqzb mz leplz, bzkq kcmnz-ngrbzle dztudrung, ⁵ bzkq amatinede leplz, bzkq trkibrbz mz leplz, bzkq drtwrde ngya-anibz mz leplz, x bzkq aboi drtwrde da kxvz-rbribz leplz bade. ⁶ Doa ngr nivz, drtwrde vz zlwz mzli kc tzalengr leplz da kxdrka'ngr, a' abrtzlvzle mzli kc tzalengr da kxtubq. ⁷ X nivz angidr drtwr ngrde kx doa tu-zvzbz mz nibr leplz mz nzokatr-krde nidr kxmule-esz' nqmq krdr trka. Traylzu-mopwzu da kxtrka mz da kxtrka, a' drtwrde abrzvzle, x obqtipxle nzrtekqtrngr nqmq nr drtwr.

⁸ Nivz trpnzng nzyrkrpx-krde. A' zmatq amrlx ngr nzwztr-ngrbz mz Gct sa nayrkrpxng mzli kc nayzlu-ngrm Jiszs, kxmule-esz' nzplzpxngr nrpa kx kabz Gct, nzycmne-ngrbz mz Gct mz natq lr mrkzblleng, x nzrpipxng nrpa ngr nzrkrlzngr. ⁹ Murde mzli ka mz nrlc ka, rblxbz mz doa nzkrlz-atwrnr-krde x nzplzpx-atwrnr-krde drtwr ngr nrpa kc tqkabz Gct bade.

¹⁰ A' mzli kc nayzlu-ngrm Jiszs, sa na-atutrle da amrlx, x zmatq lcng amrlx sa namrbrng.

¹¹ Mz kzdq nzycmne-ebzpxngr, mzli kc tqtopwzbe-ngrne, nzycmne-krnge, nzrkriz-krnge, x nzao-krnge drtwrnge nztakitrdr doa kxtopwz. A' mzli ka nipenge ncblo, x yrlqtxopex nqmq krdr doa kxnztopwzng, murde nqmq krnge natakitrde ncblo. ¹² Mzli ka nzrmc-krgu nzalvztrngr angidr apule nzobqtr-krgu mz dzpq kx kamrbrngr. Murde trkrlz-atwrnr-ngrguu da lcng. A' Gct krlz-atwrnr-ngrde nigu. X mzli lc navzm, sa nakrlz-angidrpeku da mz nzmnc-zvz-krbzku mz Jiszs.

¹³ Nqmq nr nabzgu tq kx nayc-along nidr seleng: nzbrtikr drtwrgu Gct, nzobqtipx-krgu nzatutr-krde nzesalz-krdeng, x nzaelwapx-krbzku nivz lrde mz leplz. A' nivz dela tqmyapx-esz'ngr zvz.

14

Gct Kabzle Zmatq Kxmyapxbzng Mz Leplz Nedeng Mz Nzaxplr-lzbq-krdr

¹ Mz nzmnu-krde lcde, drtqmu navq zvz mz nzmrlzti-krmu leplz. X mzli lcpwz nasuti kz drtwrmu nztwz-krmu zmatq ngr nzwztr-krbzmu mz Gct, myapxbz zmatq ngr nzrplzpxngr nrpa kx kabz Gct. ² Mzli ka suti drtwrmu kx leplz amrlx naycmnebzng mz Gct mz natq lr mrkzbleng. A' doa kxmule lc trycmnepwzu mz lrmakxtr. Murde mqngr doa lc ycmnetr-ngrde da kx yc-kapq x leplz trnzkrizlru drtwr ngrde. ³ A' mzli kc leplz nzalzqtq-ngrbzlr mz doa kx plzpxle nrpa kx kabz Gct, nrpa lc axplrlle nzrlxngiti-krdr, apqtrle drtwrdr, x amqtr-kzpze drtwrdr. ⁴ Mrlx kc tqycmnebz mz Gct mz natq lr mrkzbleng, okatrle nide esz'-krde. A' mrlx kc tqplzpxle nrpa kx kabz Gct, okatrle lrmakxtr atwrnrngr. ⁵ Suti drtwrnge kx nimu amrlx nakrlzamu nzycmne-krbzmu mz Gct mz natq lr mrkzbleng. A' sutitx zlwz drtwrnge kx naplzxam kx kabz Gct. Murde mrlx kx plzpxle nrpa kx kabz Gct, nzokatr-krde lrmakxtr myaszpxle mrlx kx ycmne txpwz mz Gct mz natq lr mrkzbleng, a' trpipx-kzleu drtwr ngrde. A' nzmnu napipx-kzle drtwr ngrde, mrlx lcng li nzrsakrlrung mz nzokatr-krdr lrmakxtr. ⁶ Mzlengeng x inwengeng, nzmnu naycmnebo mz Gct mz natq lr mrkzbleng, mz nzyrlwr-lxblr-krgu, trkrlzleu nzokatr-krde nimu. Murde mz nzokatr-krnge nimu naycmnebo bamu mz natq kx krlzamu, mz nzyapwxtipx-krbo bamu da kxyc-kapq kx aelwapx-ngrm Gct bange, o mz nzpipx-krbo nrpa ngr nzrkriznegr, o mz nzplzpx-krbo nrpa kx kam Gct bange, o mz nzalvztr-krnge natq Gct.

⁷ Na-aoti drtwrmu nzyrnikr gita. Nzmnu trnzamqngi-zpxwu nqvi lrdeng, rblx nzkriz-krmu nabz kc tzayrningr gita kc, x trokatrleu nimu nzngr-krmu nabz lc. ⁸ X na-aoti kz drtwrmu ngirlvea nzvxutr-krde trpu. Nzmnu natqde trnaopxleu, rblxbz mz ncblo ngr vea nedeng nzoliqi-krdr nzotangr.

⁹ Kxmu-kzle lc mzli kc tqangio-ngrnamu. Nzmnu natq ncblo kx trpnzng kx rkrlz, rblx nzokatr-krde leplz. Nzycmnekr ncblo kxmule lcde mane, murde vz lxlrtngr. ¹⁰ Da zpxwtx kx natq kqlu mrka mz nrlc, x natq lcdeng amrlx kzdung leplz nzyrplatitr nardr. ¹¹ A' mz nzycmnekr ncblo mz natq kx trkrlzwxu, apumle bange lr mrkzble, x apu-kzpo bade lr mrkzble, murde trkrlzkr nzycmne-etr-krgr. ¹² Kxmu-kzle lc mz nimu. Mz nzvqtikr drtqmu zmatq ngr nzwzng lcng, mrlz nzsuti-kzkr drtwrmu zmatq ngr nzaxplrng lrmakxtr.

¹³ Mz nzmnu-krde lcde, ncblo kx twzpele zmatq ngr nzycmne-ngrbz mz Gct mz natq lr mrkzbleng, nakrka'-ngrbzle bade zmatq ngr nzrpipxng drtwr ngr natq lr mrkzble lcng. ¹⁴ Murde mzli kc tqycmne-ngrbo mz Gct mz

natq lr mrkzbleng, mqngrnge krka', a' drtwrnge trprtrpwzu mz nzkrka'ngr lc. ¹⁵ Delc, pnzpe drtwrnge kx mqngrnge sa nakrka'bz x nangrbz mz Gct mz natq lr mrkzbleng mz nzangio-krnge nide mz nzmnc-krnge esz'-krnge. A' drtwrnge sa nakrka' x nangrbz mz Gct mz natq leplz kcng tqangio-lxblkr badr. X navz-nqblqamu natqnge lcng. ¹⁶ Murde mz nzglqpx-krm Gct x nzawi-krbzme bade mz natq lr mrkzbleng, rblxbz mz kztemqng nzesz'tikr drtwrmu badr mz nzkrka'-krm lc. ¹⁷ X nzkrka'ngr kxmule lc, takitrde nzawi-ngrbz mz Gct, a' trokatrleu leplz. ¹⁸ X awi-ngrbo mz Gct kx nzycmne-krbo bade mz natq lr mrkzbleng myaszpx-zlwzle nimu. A' alex da lc mz nzmnc-krnge esz'-krnge. ¹⁹ Murde mz nzyrlwr-lxblkr lrmakxtr, mz drtwrnge nzpipx-krbo mz leplz nrpa kxmrbc kx yrplatitr nardr myaszpx-zlwzle nzycmne-aboi-krbo mz Gct mz natq lr mrkzbleng, kx tryrplatitru nardr.

²⁰ Mzlengeng x inwengeng, mz zmatq ngr nzwzngr lcng, bzkq apuamu doa kxnztopwzng mz nzkctitpx-krmu zmatq ngrdr. A' na-apuamu ncblo kxbrpe mz nzwz-krmu mz zmatq lcng mz nzokatr-krmu kztemung. A' mrlz kz nzapu-krmu doa kxnztopwzng murde trpnzu drtwrdr nzptrr-zvzngr mz da kxdrka'ngr. ²¹ Mz Nzryrngrkxtr, rpi Yawe kx, "Sa naycmnebo mz leplz nengeng mz natq lr mrkzbleng. Sa nangi rkx ngr nzayrplapx-krnge nidr murde trnzlxngitilru natqngeng. Kxmule-esz', a' sa napxtxpx-zvz-ngrdr nzvz-nqblq-krdr ninge." *

²² Mz nzmu-krde lcde, nzycmnekr kzdq kxrlxngiti mz natq lr mrkzbleng x trpnzngr doa kx r pipx drtwr ngrde, trngiu rkx ngr nzabrtzlvzkr Gct nide. A' sa nangi kz rkx ngr nzayrplapxkr Gct kxtrnzrlxngitiung. Murde mz nzpxtxpx-krdr nzycmnengr kxnxmulr lcng, sa napxtxpx-kzngnegr Nrpakxmlz, x nzptrrbeng mz nzayrplapxngr. A' nzplzpxkr kzdq kxrlxngiti nra kx kabz Gct bade, ngi rkx ngr nzabrtzlvzkr Gct nide, murde okatrle kxnxrlxngitiung x tratrakileu kxtrnzrlxngitiung. ²³ Mz nzyrlwr-lxblkr dzbe lrmakxtr nyzmu, trmrlzu nimu amrlx nzycmne-krbzmu mz Gct mz natq lr mrkzbleng. Murde nzmu kxtrnzrlxngitiung o kxtrnzkrklzlr zmatq lc, kx nzptrrpzng bamu, sa narpilr kx lukurnr-ngrnamu o aycmnele nimu drka'. ²⁴⁻²⁵ A' mrlz nimu amrlx nzplzpx-krmu nrpa kx kabz Gct bamu. Murde nrpa lcng amrlx nzkrklzlr nzptrr-krdr mz nabz leplz lcng mz nzaelwapx-krbzlr badr kx nzaleng alwx x takitrde nzayrplapxkr Gct nidr. X naokatrlr nidr mz nztekqtr-krdr nqmq nr drtwrdr mz nzlxngiti-krdr Jisz. X sa nayrngzobzng mz Gct mz nzangio-krdr nide. X narpilr kx, "Gct sc tqmnc-zpxwzbz bamu mrka."

Nqm Ngr Nzyrlwr-lxblrngr Kxmrlz

²⁶ Mzlengeng x inwengeng, da kx navzpxmqng mz nzalvztr-krnge lc nide sele. Mz nzyrlwr-lxblr-krmu takitrde doa kxesz' mz nimu nzptrr-krde mz nzangiongr lc, mz nzrlwx-krbzle kzdq nabz kxtr, o mz nzalvztr-krbzle kzdq da, o mz nzaelwapx-krbzle kzdq da kxyc-kapq, o mz nzycmne-krbzle mz Gct mz natq lr mrkzbleng, o mz nzpipx-krbzle drtwr ngr natq lr mrkzble lcng. Murde da kxmyapxbz nzokatr-krmu lrmakxtr atwrnrngr. ²⁷ A' mz nzaki-krmu nzycmnengr, rlrtx-ngrpwo leplz nali o natq kx naycmnebz mz natq lr mrkzbleng. X trtakitrdeu nzycmne-krdr mz nzwrde kxesz'. X nangi dq doa kx napipx-zvzbzle drtwr ngr natqdrng. ²⁸ A' nzmu kx trpnzngr leplz

* 14:21 Asaea 28:11-12 * 14:21 Suti drtwr Gct kx leplz nedeng nakrlzlr kx ycmne-kaipz badr mz natqdr, a' nzpxtxpx-ngrdr nzvz-nqblq-krdr nide. Mz nzmu-krde lcde, ayrplapxle nidr mz nzrlr-krbzle mz lr Asiria nzaovxio-krdr nidr. X lrmrkzble lcng nzycmneng mz natq kx rblxbz mz lr Israel nzxlrngr. Natq lr mrkzbleng ngi rkx ngr nzayrplapxkr Gct kxtrnzrlxngitiung.

kx rkrlz nzrpipxngr drtwr ngr natq lr mrkzble lcng, e leplz kcng tzycmneng mz natq lr mrkzbleng namnc-lrping x naycmne-nabu-txpwzng esz'-krdr badr Gct. ²⁹ X mou, rlrtx-ngrpwo leplz nali o natq kx narplpxng nrpa kx kabz Gct badr. X kztedrng naobqtrpzng mz nrpa lcng mz nzrkrlzng kx ntubqng amrlx o mwx kzdung natqdrng vz-rbr, murde drtwr ngrdr tr-rsakrlr-ngru mz Nzryrngrkxtr. Mz nibr nzycmnekz kzdq doa, vz-nqblq-mouamu nqmq lc x rlr-ngrbzmu mz kzdung kz leplz kxli o tq nzplzpx-kz-krdr nrpa kx kabz Gct badr. ³⁰ Nzmu kzdq doa tulz mz nzplzpx-krde nrpa kx kabz Gct bade, x mzli lc tqycmne-ngrde, Gct ka-kzpze kzdq kz nrpa mz kzdq kz doa, doa krali lc natulz. X krkc kai nawxbuo x namnc-lrpi mzli kxipiz mz nzrlr-ngrbz mz doa krali nzplzpx-kz-krde nrpa scde. X krkc kai sc tqplzpxpe-moule nrpa scde mz nzayrkrpx-krdele. ³¹ Mrlz leplz amrlx nzplzpx-krdr nrpa kx kabz Gct badr, murde leplz amrlx naxlrlr nrpa lcng x na-apqtrpzlr drtwrdr. ³² X mz zmatq ngr nzrplzpxngr nrpa kx kabz Gct badr, zmatq lc ycpebz badr mz nzaclve-krdrle. Murde Mqngrokxtr trpnzng nztulrtr-krbzle mz leplz nzaelwapx-krbzlr zmatq lcng tqkabzle badr. ³³ Murde mz dzbe lrmakxtr amrlx nyg Gct, trsutiu drtwrde lrmakxtr nzale-krdr da kx tropxu mz nzrkrlzkr leplz. A' suti drtwrde kx da amrlx namwitr-lxblrning mz nrwx.

³⁴ Kzdung nimu nzvz-rbrng mz nzrpi-krmu kx, "Olvz bzkq nzycmneng mzli kc tqyrlwr-lxblr-ngru. A' namnclzbzng mz zmatq ngr ncblo ngrdrng, da kc tqwai nzpikr Lou sc Mosis le. ³⁵ Nzmu kx tzsuti drtwr olvz nzrkrlz-krdr kzdung da, naveati-krlzpwzlr mz ncblo ngrdrng mz ma nyzdrng. Murde myangr drtq olvz nzycmne-krde mz nzyrlwr-lxblrkr lrmakxtr." †

³⁶ Vz-rbramu murde natq Gct trvzpxpuu bamu. Bzkq glqpx-lzbqamu mz nzrpi-krmu kx nimu txpwz kx rkrlz nzyokaetipxngr drtwr ngr natqde.

³⁷ X nimu leplz kcng tzrpilr kx rngiscmu zmatq ngr nzrplzpxngr nrpa kx kabz Gct o zmatq kc-kzng tqkabz Mqngrokxtr mz leplz, nakrlzamu kx da lcng amrlx tqipixbo bamu ngi natq kx katimqng Kxetu rgu Jisz. ³⁸ A' bzkq vz-nqblqamu doa kznike trglxleu ntubqkr natqng lcng.

³⁹ Mz nzmu-krde lcde, kx mzlengeng x inwengeng, navqti drtqmu nztwz-krmu zmatq ngr nzrplzpxngr nrpa kx kabz Gct. A' bzkq rpwa'-ngrbzmu mz leplz nzycmne-krbzlr mz Gct mz natq lr mrkzbleng. ⁴⁰ Mz nzyrlwr-lxblr-krmu, aleamu da amrlx mz nqmq kxmrlz kx takitrde nzmnc-zpx-krmu.

15

Jisz Tulz-mop Mz Nzbzng Mz Nrkrdrdrqde Angidr

¹ Mzli ka, kx mzlengeng x inwengeng, napi-mopwo bamu Nrpakxmrlz kc tqyapwxtipebo bamu. Lxngitiamu Nrpakxmrlz lc x rpiamu kx sc tqvz-zvzbe ntzu-amqngi-krmu elr. ² X mz ntzu-amqngi-krmu mz da lcng tqalvztr-ngrne nimu, sa naprtr-kzamu mz nzrlapxngr x da kxmrlzting amrlx kx nzvzpxmqng mz Nrpakxmrlz lc. A' nzmu nzrlxngiti-krmu kx tqpi txpwz naomu le, trnaprtrwamuu elr. ³ Aprcpebo bamu nzalvztrngr kx nzka-kaipqng aposol kc-kzng bange. Da lcng tqlxngitiku kx myapx-esz'ngr nidr seleng. Nzbzkr Kraes xpele alwx ngurgung, murde Gct naipqle nigu, da kc tqwai nzpikr Nzryrngrkxtr le. ⁴ X nzyrtzmq x Gct atulz-mople nide

† ^{14:35} Kxnzeti r Nzryrngrkxtr drtwrdr tresz'tiu mz drtwr ngr ngalrde lcng li, 34-35. Mz nzrtekqtr-krgr mz Natgu, vz-nqblqkr ncblo kcng tzrpilr kx ngalrde lcng trngi drtwr Pol, a' ngi drtwr kzdung lr Korint. Murde natq lcng trnzesz'tiu mz kzdung kz natqdeng mz kzdung kz ngalrdeng. X mou Lou sc Mosis trpileu kx olvz bzkq nzycmneng mzli kc leplz neng Gct tzyrlwr-lxblr-ngrdr. ^{15:3} Asaea 53

mz zbzq kratq ngr nzbdz-krde, da kc tqwai nzpikr Nzryrngrkxtr le. ⁵ Zbz adcpx-lzbqbz mz Pita, x mz nibrde badr ncblo nedeng kcng nzpnu-esz'-nrade-li. *

⁶ X mz nibrde, adcpx-lzbq-mopwz badr kxnzrlxngiting nzmyaszpxlr trtqki-kxnzlvqn (500) mz nzwrde kc esz'. Kxmule-esz' kzdung nidr nzbpeng, a' nzkqlung kx nlubeng mzli ka tqryr-ngrbo bamu. X nzkriz-angidr-kzlr kx tulz-mop mz nzbdngr mz nrkrdrqde. ⁷ Zbz adcpx-lzbq-kzpz mz mzlede Jemes, x mz nibrde adcpx-lzbq-kzpz badr aposol nedeng amrlx. ⁸ X kzdung yiz mz nibr nzvzdz-krde Heven, adcpx-lzbq-kzpq bange. ⁹ X mz nzlxngi-ate-krnge nide, apux doa kx nzmiaka-rbr, a' twzpele nzlungr. ¹⁰ Murde kxmule-esz' mzli kc tqatrkti-zlwzx lrmakxtr ne Gct, x trtakitrdeu nzngini-krnge aposol nede, a' mzli ka prtrpebo badr, kxmule-esz' tr-rsakrlr-ngrgru badr mz nzmyalz-krdr. ¹¹ Nzlxnigiti-krnge Jiszs x nzngini-krnge aposol nede nzvzpxmqng mz zmrlz ngr Gct kxmyalz. X zmrlz ngrde lc trmaneu, murde nzyapwxtipx-krnge Nrpakxmrlz mrkang kqlu myaszpx-zlwzle nzwzkr aposol lcng amrlx. A' trtakitrdeu nzglqpx-krdr ninge mz da lc, murde nzwz-krnge vzttxpxpwq mz zmrlz lc tqmyalz. ¹² Kxmule-esz' krkc tqyapwxtipxbzle Nrpakxmrlz bamu, nidr o ninge, a' sc tqlxngitipeamu mz nzxlr-krmule.

Nrkrdrtq Kxnzrlxngiting Sa Natulz-kzp Mz Nzbdngr Mz Nzvz-nqblq-krde Nztulz-krm Nrkrdrq Jiszs

¹² Mz nzlxngiti-krmu Nrpa ngr Kraes, bzkq rpiamu kx trpnznggr nzatulz-krm Gct kxnzrlxngiting mz nzbdngr. Murde da amrlx kcng tqlxngitiku nt-tuong mz nzatulz-krm Gct nrkrdrq Jiszs mz nzbdngr. ¹³ Nzmu natrpnznggr nztulz-krm nrkrdrq mz nzbdngr, drtwr ngrde kx trnzatulz-kzpuu Kraes mz nzbdngr. ¹⁴ X nzmu Kraes nabz-ale, drtwr ngrde kx nzryapwxtipx-krgr nigr aposol mane x nzrlxngiti-krmu ngi brmrda. ¹⁵ Murde nzmu Gct trna-atulzpe-mopleu Kraes, aelwapx-ngrde kx pokiatitrkr Gct, mz nzsri-krgr kx atulz-mople nide mz nzbdngr. Drtwr lc navzpxm mz nzsri-krmu kx trpnznggr nztulz-krm nrkrdrq mz nzbdngr. ¹⁶ Murde nzmu natrpnznggr nztulz-krm nrkrdrq mz nzbdngr, drtwr ngrde kx nrkrdrq Kraes mnclz-alom mz gq. ¹⁷ X nzbrtikr drtwrmu nide nzarlapx-krde nimu ngi brmrda. Murde trpnznggr nzipqpxngr alwx ngrmung x sa naprtramu mz Hxl, ¹⁸ da kc tzwai kxnzrlxngiting amrlx kcng tzbzspelr nigu. †

¹⁹ X nzmu natrpnznggr nzprtr-krgu mz nzlungr kxboi kalr, mane mzli ka mz nrlc ka nzobqtipx-zvz-krgu da kx nakam Kraes bagu kalr mz nrlc kc navzm. X takitrde leplz nzyckr mz drtwrdr nigu, mz nzrlxngiti-nrbalq-krgu lc.

²⁰ Kxmule-esz', a' dazpwxtx kx Gct atulz-mople Kraes, mz nzngini-krde doa kx ayrnrngr kx natulz-mou-ngrmle mz nzbdngr x trpengr nzbdz-krde. Murde kxnzrlxngiting kxnzbzpeng amrlx natulz-kzpqng mz nzbdngr kalr. ²¹ Murde nzbdngr prtzbz mz leplz amrlx vzpx-ngrmle alwx ngr ncblo esz', kc tqngi Adzm. X kxmu-kzle lc, nztulz-krm nrkrdrq mz nzbdngr naprtzbz mz kxnzrlxngiting amrlx vzpx-kz-ngrmle nztulz-krm ncblo esz' kc tqngi Jiszs. ²² Leplz amrlx nzbdzng murde nzprtrpzng mz Adzm. X leplz amrlx kxnzrlxngiting sa nalu-mopqng murde nzprtrpzng mz Kraes. ²³ A' nzlu-mou-krm leplz sa navz-nqblq-angidrle mzli rde kc tqyrlq Gct. Murde Kraes

* ^{15:4} Sam 110:1; Hosia 6:2; Jona 1:17; Luk 24:46; Aposol 2:25-36 * ^{15:5} Kxmule-esz' Judzs bzpe, a' nzrlwxtr-kzpz mz ncblo neng Jiszs kcng nzpnu-esz'-nrade-li. ^{15:6} ^{15:7} Galesia 1:19 ^{15:8}

Aposol 9:1-19 ^{15:9} Aposol 8:1-3; 9:1-2 † ^{15:18} Gct mz nzatulz-mou-krmle Jiszs mz nzbdngr, aelwapx-ngrde kx nzbdz-krde lc ngi blz kx takitrde nzrkatx-krde alwx ngrgung amrlx. ^{15:20} Aposol 26:23; Rom 8:29; Kolosia 1:18; Hibru 1:6

nanginide doa kx ayrnrngr kc tqtblz-mou-ngrmle mz nzbzngr a' trpengr nzbz-karde. X mzli kc nayzlu-mou-ngrmle, leplz nedeng sc natulz-ate-kzng. ²⁴ X mz nibr da lc, sc tqkrlzpebzle nzyrkpxkr nrlc ka. Mzli lc, Kraes sa naodati-kaile enqmi rdeng amrlx, kxmule-esz' ncblo o drka' x kxmule-esz' kxnzetung, kxnzmatqng, o kxnzaclveng. X sc na-aprc-atebzle doa x da amrlx mz Gct Trtede. ²⁵ Murde Kraes nangini-kaide King, navz navz mzli kx nzamnclz-ngrbz enqmi amrlx mz zmatq ngrde. ²⁶ X nzbzngr apu-kzle enqmi murde atrkatile leplz. A' Kraes sa naodati-kzle zmatq ngr nzbzngr lc. ²⁷ Murde rpi Nzryrngrkxtr kx, "Gct yrlqlzbzle doa x da amrlx mz zmatq ngr Kraes," ²⁸ (kxmule-esz' leplz, enjrl, drka', animol, o da kxtrnzuung), "mz nzmetx-krbzlr bade." ²⁹ A' opx angidr kx Gct Trte trprtrpwzu mz "doa x da amrlx lcng," murde tramnclzpzwleu nide esz'-krde mz zmatq ngr Mrlxde Kraes. ³⁰ X mz nibr Gct Trte nzyrlqlz-krbzle doa x da amrlx lcng mz zmatq ngr Mrlxde Kraes, Mrlxde sa na-amnclz-kzpze zmatq ngrde lc tqmyalz-esz'ngr mz zmatq ngr Trtede. X mzli lc, doa x da amrlx lcng sa navz-nqblq-moulr me pnz drtwr Trtede.

²⁹ Kzdung nimu mrla, nzlukurnr-ngrdr mz nzsripi-krdr kx trpnzng nztulz-krm nrkrdrtrq mz nzbzngr, x mzli lcpwz nzwrxtrng mz nztekqtr-krdr leplz kxnzbzpeng, murde mz drtwrdr sa naokatrle nidr. ‡

³⁰ ?X nzmu natrpnzng nztulz-krm leplz mz nzbzngr, memule nigr aposol tqrlrpx-lzbq-zvz-ngrgr mz nzaetq-ngrbz drtqgr mz nzyapwxtipx-krgr Nrp lc? ³¹ Mzlengeng x inwengeng, mz zbz kang kqlu leplz nzsripilr nanibqlr ninge, murde yapwxtipxx Nrp lc. A' vqti drtqng nzae-krnge nzwzng lc, murde abrtzlvz-zlwzx Kxetu rgu, Jiszs Kxnmcpkx mz nztekqtr-krde nqmq krmu kc tqvzpxm mz da angidr kcng tqalvztr-ngrne nimu. ³² Kzdung ncblo mrka mz taon Efisz, drka' mnccpxm badr, x nzatrkatilr ninge. A' kxmule-esz' nzsripwa'-ngrmlr nzwz-krnge, a' tu-amqngi-zvzx mz nzyapwxtipx-krnge nrpa kx Gct atulz-mopele Jiszs mz nzbzngr. A' nzmu natrpnzng nztulzkr leplz mz nzbzngr, nzwz-krnge mane, x trpnzng nrade kx nayrlq-zvzbzle. X opxm kx mrlz nzvz-nqblqng drtwr kx rpile kx, "Na-ale-txpwzku da kxmrlzm bagu mz nzmutx-krpwzku x nzrmnqtx-krpwzku, murde ycppe pipz nzbz-krgru." ³³

³³ A' bzkq nzesabrttingr nimu mz nzvz-nqblq-krmu natq lc. Murde nakrlzamu kx mz nzprtr-krbzmu mz leplz kx nzvz-rbrng mz nzsripi-krdr kx trpnzng nztulz-krm leplz mz nzbzngr, nzae-krdr drtwrdr lc tqtrka sa na-atrkatile nzae-krmu drtwrmu kxmrlz. ³⁴ Aclvetio-lzbqamu! Nzae-zvz-krmu alwx naesakipe! X namyangr drtqmu. Murde leplz kcng tzalvztr-ngrdr nimu da kxvz-rbr lcng, trnzkrlz-pnzlru Gct.

Nrkrdrtrqgu Kxmrna Kc Natulz-mopqng Kalr Ngi Nrkrdrtrq Kxblepxng

³⁵ Mwx kzdq nimu narpile kx, "?Myx kxnamu na-alu-moungr namz ngr leplz? ?Sa nangi mou nrkrdrtrq kxmi?" ³⁶ Ngqngu-plxsrq! Murde da kx nzpetio mz drtc' namibio kai mz nzlrtipx-krde da kxmrna kc nalvclzm.

³⁷ Rtq da kc tzpetio nzobq-krde blepxbz mz da kc nalvclzm. ³⁸ A' Gct yrlqle drtwr kx da kc nalvclzm mz rtq, navz-nqblqle rtq kc tzpetiong.

³⁹ Nrkrdrtrq amrlx tr-rsakrlr-ngru. A' nrkrdrtrq leplz, animol, utc, x nc nzbletipx-lxblrng. ⁴⁰ X nrkrdrtrq kxnmncng mz nrlc ka nzbletipx-lxblrng

* 15:27 Sam 8:6 * 15:27 Sam 110:1 ‡ 15:29 15:28 Da kc tzwai-pnzlru mzli kc Adzm trtaoka-ngrde mz alwx. 15:29 Trpnzng kxrkrlz namrlzu r nzawrxtrng lc. A' opxm kx drtwr Pol tresz'tiu badr mz nzawrxtrng lc, murde abzo mzli kc krlzmle mzli ka, namrlzu r nzawrxtrng lc trnzaleu lrmakxtr. * 15:32 Asaea 22:13

mz nzobqkr dalr bongavz. X nzlqngipxkr dalr bongavz nzbletipx-lxblr-kzng mz nzlqngipxkr nrkrdrtq mz nrlc ka. ⁴¹ X mou, nzlqngipxkr nepi, temz, x vring nzbletipx-lxblrng, da kc tqwai-kz nzobqkr vri amrlx.

⁴² Kxnamu-kzle lc mzli kc na-atulz-mou-ngrmqng Gct leplz kxnzbzpeng. Murde nrkrdrtq kc tzyrtzmq mz drtc' krlzle nzbzngr. A' nrkrdrtq kc tqlumop blepxbz bade, murde trkrlzleu nzbzngr. ⁴³ Nrkrdrtq kc tzyrtzmq yangrnga x nzobq-krde trka, a' mzli kc na-alupe-mou-ngrmle nrkrdrtq lc naxplr x nzobq-krde nalqngipx. ⁴⁴ Nrkrdrtq kc tzyrtzmq ngi dalr nrlc ka, a' nrkrdrtq kc tzalu-mop mz zmatq ngr Mqngrkxtr takitrde nzmnc-alo-krde Heven. Nakrlzamu kx nzmncr nrkrdrtq mz nrlc ka ngi rlx ngr nzmnc-kzkr nrkrdrtq kxmrna Heven. ⁴⁵ Murde Nzryrngrkxtr rpile kx, "Adam, kc tqngi ncblo kc kai nginide leplz kxlu." ⁴⁶ X leplz amrlx nzbzng mz nzprtr-krbzlr bade. A' Kxszmcpx vzm, mz nzngini-krde ncblo kc kai tqlu-alo, x kabzle nzlungr kxboi mz leplz nedeng amrlx. ⁴⁶ A' mzli ka, trtwzkaku nrkrdrtqgu kxmrna kx natwzku kalr Heven. A' mncbeku mz nrkrdrtqgu mz nrlc ka. ⁴⁷ Adzm, kc tqngi ncblo kc kai vzpxm mz nrlc ka. A' Kxszmcpx, kc tqngi ncblo kxmrna, vzpxm Heven. ⁴⁸⁻⁴⁹ Leplz kcng tzvzpxmqng mz nqvi lr ncblo kc kai, nrkrdrtqdr bz x mibi, mz nzapu-krdr nide. A' nigu kcng tzvzpxmqng mz nqvi lr ncblo kxmrna, nrkrdrtqgu sa nalu-along Heven, mz nzapu-krgu nide.

⁵⁰ Mzlengeng x inwengeng, nayokaetipxbo dq da bamu. Mzli ka nrkrdrtqgu bz x mibi, x nrkrdrtq kxmule lc trpnzng noprtr-krde Heven mz nzu-alo-krde elr.

⁵¹ Gct aelwapx-ngrmle bagu kx mzli kc nayzlu-ngrm Kxszmcpx, kzdung kxzrlxngiting nalubeng. A' mzli lc kxzrlxngiting amrlx sa nalrtipx-aning, kxmule-esz' nzlubeng o nzbzpeng. ⁵² Murde kzdq kc enjrl sa navxutre trpu kxrmnr-ngrbz, x mzli lcpwz leplz kxnzbzpeng sa natulzpqemqng mz nzlungr kxboi, x nrkrdrtq kxzrlxngiting amrlx sa nalrtipxng mz nrkrdrtq kxmrna. ⁵³ Nrkrdrtq kcng tr-rblxu nzbz-krdr nalrtipxng mz nrkrdrtq kxmrna kx trnzkrzlr nzbzngr. ⁵⁴ X mzli lc tzlrtipxng, sa na-atutre Nzryrngrkxtr kc tqrpile kx, "Zmatq ngr nzbzngr nzaovxio-along!" ⁵⁵ Murde kxnzbzpeng sa nalu-mopqng x trpengr kx nabz. ⁵⁵ X narpi-kzku kx, "Nzbzngr nzodatitx alo mz nzvecngr! X trpengr zmatq ngrde mz nzaetq-krde drtqgu." ⁵⁶ Murde zmatq ngr nzbzngr mz nzaetq-krde drtqgu, vzpxm mz alwx rgung, mz nzrpikr Loukxtr kx krkcng amrlx tzaleng alwx nabzng. ⁵⁷ A' awi-ngrbzku mz Gct nzprtr-krbzku mz Kxetu rgu Jiszs Kxszmcpx mz nzaovxio-krde alwx x nzbzngr, x trmnclzpepwzkuu mz zmatq ngrdr.

⁵⁸ Mz nzmu-krde lcde, kx mzlengeng x inwengeng, bzkq vecpx-lzbqamu mz nzbritikr drtwrmu Kxetu rgu, a' tu-amqngi-zvzamu. X rlrpx-lzbqamu mz nzwzng kqaprcbz Jiszs bamu, murde nzwz-krmu trnamaneu, a' rpile kx nrade nayc-zvzbz.

16

Nzatakqtingr Trau Mz Nzwzkr Lrmakxtr

¹ Mz letz scmu, rlxti-kzpa'mu bange nike na-aleamu mz nzatakqti-krmu trau kx na-atwzlr-ngrbzmu mz lr Jerusalem kxzrlxngiting kx trpnzng scdr da. X suti drtwrnge kx navz-nqblqamu da kx pipebo mz dzbe lrmakxtr kcng mz provins kc Galesia. ² Mz Sade kang kqlu, mz nzmnc-krmu ma nyzmung, doa kx esz' mz nimu, nakapxle du trau mz nzwzng lc, mz

⁵⁸ **15:45** Nou 2:7 ⁵⁹ **15:52** 1 Tesalonika 4:15-17; Nzaelwapxng 10:7; 11:15 ⁶⁰ **15:54** Asaea 25:8
⁵⁵ **15:55** Hosia 13:14

nzvz-nqblq-krde nike atatrple. X rtxlvzlx zvz trau lc mz Sade kang kqlu, murde bzkq atakqtipamu trau mzli kc navz-ngrmc. ³ Mzli kc nakaputrngrbo bamu, sa nayrbo du letz badr kztegung kxnxrlxngiting, murde letz lcng naokatrlr ncblo kcng tqmcpxamu mz nztwz-krbzlr trau scmung mz lr Jerusalem. ⁴ X nzmu kx tqmrlz kz nzvz-krgr badr, mwx sa navzkr badr ncblo lcdeng.

Natq Ngr Nzvzpxkr Pol X Natq Kx Na-abrtzlvzngr Timoti

⁵ Sa naoklatimc nimu mz nibr nzoklati-kai-krnge kztegung mz provins kc Masedonia. ⁶⁻⁷ Murde nzmu naoklati-kaipc' nimu, nzmnc-krgu mzli mrbcnepwz. A' suti drtwrnge nzmnc-krgu mzli naboitx, kxmule-esz' temz kxli o tq nzmu kx tqrlr-ngrm Kxetu le. X mz nibrde, mrlz nzokatr-krmu ninge mz nzvzpx-krnge mou drlveke navzkix. ⁸ A' nzmnc-krnge mrka Efiszsz nakrlzbzle mzli kc tzmulvzngr nzrlakilz-ngrm wit, zbg kc tqvzo-ngrm Mqngrkxtr. ⁹ Murde mzli ka ngi mzli kx mrlzpe mrka, mz nzyapwxtipx-krnge Nrpakxmrlz. Leplz nzkqlung kx nzabrrpebzlr drtwrdr mz Jiszs. A' mzli lcpwz, leplz nzkqlu-kzng kx nzrpwa'-ngrmlr nzwz-krnge lc.

¹⁰ Mzli kc Timoti nakrlz-ngrbzle nimu, abrtzlvzamu nzvz-krmle x aclve-angidramu nide. Murde wzkr badr mz nzwzkr Gct, x takitrde nzamatq-krmu nide mz nzngini-kz-krde kxetu mz lrmakxtr. *

¹¹ Bzkq obqszoamu nznginibe-krde obla. A' okatramu nidr badr kztedeng mz nzyzlu-mou-krmlr bange. Murde obqtipxx nzmc-mou-krnge nidr.

¹² Mz letz scmu, rlxti-kzpa'mu bange nzatzlkrbo Apolos bamu mz nzalvztr-krde nimu. X apqtrpo drtwrde mz nzyzlu-krbzle bamu badr kztegung kcng tzatzmlr letz scmu bange. A' rpile kx trsutiu drtwrde nzvz-krbzle bamu mzli ka, a' sa navzbz mzli kx takitrde.

Kzdung Kz Natq Mou

¹³ Aclvetio-lzbqamu! X tu-amqngi-zvzamu mz nzrlxngiti-krmu. Kxmule-esz' da kx prtz, a' nelzmu nbr. ¹⁴ Da amrlx kcng na-aleamu navz-nqblqle nqmq ngr nivz.

¹⁵⁻¹⁸ Mzlengeng x inwengeng, abrtztx-ngrnge nzvz-krm Stifanas, Fortunatzs, x Akaekzs, mz nzkrlz-krmlr ninge. Murde nzapqtrplr drtwrnge, da kc tzwai-zvzlr mz nzapqtr-krbzlr drtwrmu. X mrlzm bange nxzlr-krnge nrpa scmung.

A' mzli ka, mz nztwz-krbzlr letz scnge bamu, rmgidrlvz-ngrbo bamu kx na-amatqamu ncblo kxnxmulr lcng. Nadcpx mz drtwrmu kx Stifanas badr lr ma nyzde, nidr kx nzrlxngiti-ayrnrrng mz provins kc Akaia. X nzrlrpx-lzbqng mz nzokatr-krdr leplz neng Gct. Namnclzbzmu mz zmatq ngrdr badr kztedrng kcng tzaclveng badr.

Natq Ngr Nzarlr-lzbqng

¹⁹ Lrmakxtr kcng mrka mz provins kc Esia nzrpibzlr bamu kx, "Nimu la." X Akwila badr olvz rde Prisila, x kxnxrlxngiting kcng tzyrlwr-lxblrng ma nyzdr mz nzangiongr, nzrpi-kzlr kx nzmrzti-zlwzlr nimu. ²⁰ X kztengeng amrlx kcng tqwzkr badr nzrpi-kzpplr bamu kx, "Nimu la." X mzli kc tqrmcti-lzbqamu, male-lxblramu mqmu mz nivz.

²¹ Abzo mz ngalrde lc yr-angidrx mz mqnge. Ninge Pol rpibo bamu kx, "Nimu la."

* **16:10** Pol trsutiu drtwrde nztrkakr nzmnc-krbz Timoti badr lr Korint. Murde krlz Pol kx kzdung lr Korint nzpxtxpx-ngrdr Pol nzngini-krde aposol x nzngyatikr drtwrdr nide. [1 Korint 4:17; Aposol 19:22]

²² Nadcpx mz drtwrmu kx doa kx trmrlztileu Kxetu mz nzvz-nqblq-krde natqde, namnclzbz mz nzrpilzngr kc na-amnkle nide mz Hxl kalr. X nakrka'-zvz-ngrgu kx, "Kxetu Jiszs, vz-anim!"

²³ X krka'-ngrne kx Kxetu rgu Jiszs naokatrle nimu mz zmrlz ngrde kxmyalz.

²⁴ Mrlztix nimu amrlx mz nzaxvctr-krbzku mz Jiszs Kxnzmcpx.

Delape. Ninge Pol. †

† **16:24 16:19** Mzli lcde Akwila x Prisila nzmnncng Korint x nzkrlz-angidrlr kxnzrlxngiting mrlcde. [Aposol 18:1-3] 16:22 Pol suiti drtwrde kx natekqtrlr nqmq nr drtwrdr, murde ma tzayrplapxng mz nzyzlu-ani-krm Jiszs.

Nzryr-krbz Pol Krali Mz Lr Korint Natq Ngr Nzaplxtqngr Mz Nzryr-krbz Pol Krali Mz Lr Korint

Mzli kc tqmncngr Aposol Pol mz taon Efisz, yrbzle ‘Nzryr-krbz Pol Kx Ayrnrngr Mz Lr Korint.’ Mz letz lc, rpile kx Timoti sa naoklatile nidr x mz nibrde nayzlu-mop bade. [◊] Opx angidr kx Timoti pibzle mz Pol kx kzdung aposol kxnxalvztr-rbrng kcng tzprtrng mz lr Korint nzbatrpzlr badr nzrlxngiti-krdr kx Pol trngiu aposol angidr. Zbz Pol oklatile nidr mzli kxipiz kx trmrlz-etr-ngru drtwrdr, x nzycmne-krbzle badr pqtx zlwz. [◊] Zbz sc tqyzlupe mou Efisz x pnzpe drtwrde nzatwzlr-krbzle Taetus badr, mz nzokatr-krde nztekqtr-krdr nqmq nr drtwrdr. X kzdung mzli mz nibrde, rlaszle taon kc Efisz, x rmctile Taetus mz Masedonia Provins, mz nzylu-krbzle bade, mwx mz taon kc Filypae. [◊] Mzli lcde, yiz esz' mz nibr ‘Nzryr-krbz Pol Kx Ayrnrngr Mz Lr Korint,’ yrbzle letz lc, mwx mz mzli yiz 55—56 AD mz nibr nzrmcngr mz Jiszs. X Taetus twzbzle letz lc mz lr Korint. [◊] Zbz sc tqoklatipe Pol nidr mz nzwrdre kratq. X mz nzmnc-krde kc mz Korint, yrbzle ‘Nzryr-krbz Pol Mz Lr Rom.’

Mz letz lc, awi-ngrbz Pol mz Gct lr Korint kcng tztekqtrlr nqmq nr drtwrdr, x rlxtibzle mz krkcng tzxpqbzlr-ngrdr nide kx natekqtr-kzlr nqmq nr drtwrdr. Pibzle badr da kqlu mz nzaelwapx-krde kx nide aposol angidr.

Mrkcng Mz Letz Lc

Gct amqtr-zvzle drtwr kxnxrlxngiting. [1:3-11]

Pol ayzlbzle natq leplz kcng tzrpilr kx da kcng tqpile pokia-ngrde. [1:12 —2:4]

Lr Korint naipqlr kztedrng kcng tztekqtrlr nqmq nr drtwrdr mz alwx ngrdrng. [2:5-13]

Kxnzrlxngiting nzaovxio-zvzlr Setzn mz nzaxvctr-krbzlr mz Kxnzmcp. [2:14-17]

Pol nide angidr aposol murde nqmq kr lr Korint mrlz. [3:1-6]

Nzesz'tikr Drtwr Gct Kxmrna badr leplz nedeng myaszpx-zlwzle krkc kai mz Lou Sc Mosis. [3:7-18]

Kxmu nqmq kr Pol mz nzwz-krde. [4:1—6:13]

Nimu kxnxrlxngiting bzkq axvctr-lzbqbzmu mz kxtrnxrlxngitiung. [6:14 —7:4]

Taetus rlwa-ngrbzle mz Pol nrpa ngr lr Korint kxnxrlxngiting. [7:5-16]

Nzatakqtilr trau mz nzwzkr lrmakxtr. [8—9]

Pol ayzlbzle natq leplz kcng tzpibqtilr nide. [10—12]

Pol lc-apq-mopwzle mz leplz kcng tzrpwa'-ngrbzlr nzwz-krde. [13:1-10]

Pol pibzle natq ngr nzarlr-lzbqgngr. [13:11-14]

¹ Ning Pol kc tqkqle Jiszs Kxnzmcp. mz nzngini-krnge aposol nede mz nzvz-nqblq-krde me pnz drtwr Gct. Nigr ncdr mzlegu Timoti rpibzkr bamu kx, “Nimu la!” Ryrbo bamu, nimu lr makxtr ne Gct kx nzmncng mz taon kxetu Korint, x kxnxrlxngiting kc-kzng mz provins kc Akaia. *

² Krka'-ngrne kx Trtegu Gct x Kxetu rgu Jiszs Kxnzmcp. nakabzlr bamu zmrlz ngrdr kxmyalz x nzmnc-zpwxng.

* : 1 Korint 16:10-11 * : 2 Korint 2:1; 12:14; 13:1-2 * : 2 Korint 2:12-13; 7:5-16 * : 2 Korint 8:16-24 * 1:1 Korint nide taon kxmyapxbz mz Akaia Provins, mz nzngini-krde mzteadau ngrde. Mzli ka provins lc yc mz kandre kc Gris.

Gct Amqtr-zvzmle Drtwrgu

³ Naglqlzku Gct x na-awi-ngrbzku bade, mz nzngini-krde Trte Jiszs Kxnzmcpx, Kxetu rgu. Murde yc zvz mz drtwrde nigu x amqtr-zvzmle drtwrgu. ⁴ Mz nzapqtr-zvz-krmle lc drtwrgu mz nzkxpu-krgu, krlz-kzku nzapqtr-ngrbz drtwr kztegung mz nzkxpu-kdrngr, mz nzvz-nqblq-krde nqmq kr Gct mz nzapqtr-krmle drtwrgu. ⁵ Leplz nzaetq-zvzbzlr drtqgu mz nzaxvctr-krbzku mz Jiszs Kxnzmcpx, da kc tqwai nzaetq-zvz-krbzlr drtqde. A' mzli lcpwz, apqtr-zvzm Gct drtwrgu, da kc tqwai nzapqtr-zvz-krbzle drtwr Jiszs. ⁶ Mz nzmu-krde lcde, kxmule-esz' drtqgr nzaetq, nigr aposol, o drtwrgr nzapqtrpqng, a' da lcng li ngi dalr nzokatrngr nimu. Murde nzetqkr drtqgr okatrle nigr mz nzapqtr-krbzkr drtwrmu mz nzetqkr drtqmu. X mz nzapqtr-krm Gct drtwrgr mzli lc tqtrka, okatrle nimu mz nztu-amqngi-zvz-krmu mz nzbrtikr drtwrmu nide, kxmule-esz' drtqmu etq, da kc tqwaikr mz nzetqkr drtqgr. ⁷ X lxngiti-angidrkr kx natu-amqngi-kzamu, murde mz nzprtr-krmu mz nzetqkr drtqgu, nigu kxnzrlxngiting, sa naprtr-kzamu mz nzapqtr-krm Gct drtwrgr.

⁸⁻⁹ Mzlengeng x inwengeng, nakrlz-angidramu kx mzli kc tqmnc-ngrgr mz provins kc Esia, leplz nzaetq-zlwzbzlr drtqgr. X nxzplr-krgr trtakitrdeu nztu-amqngi-krgr mz nzkxpu-krgr lcng. X mz drtwrgr, ycpe pipz nzbbz-krgr. A' Gct rlr-ngrmle da lcng, murde bzkq brti drtwrgr nxzplr-krgr esz'-krgr, a' nabrti drtwrgr nide kc tqatulzmle leplz mz nzbngr mz zmatq ngrde. ¹⁰ Zbz mzli lc, Gct sc tqarlapxpele nigr mz nzbngr. X abrtxtrpwzkr drtwrgr bade mz nzarlapx-zvz-krde nigr mz da kznikeng naprtzmqng bagr kalr. ¹¹ Murde mnc-xgle-kzkr nzprtr-krbzmu mz kztegung mrkang kqlu mz nzkrka'-krbzmu mz Gct nzokatr-krde nigr. X mz nzayzlu-krbzle nzkrka'-krmu, nimu kxnzkqlung sa na-awi-ngrbzmu bade zmrlz ngrde kx avzomle bagr. *

Pol Ayzlubzle Natq Leplz Kcng Tzrpilr Kx Da Kcng Tqpile Pokia-ngrde

¹² Krlz-angidrx mz nabzng e kx nqmq krnge mz nzmnc-krgr badr leplz mrlz x tubq, myapxbz mz nzmnc-krgu. X abrtzlvzx da lc. Murde trvzpxpuu mz nzyrplapxkr leplz, a' vzpxm mz zmrlz ngr Gct kc tqokatrle ninge. ¹³ Pibo da lc murde suti drtwrnge kx nakrlzamu kx da amrlx kcng tqyrbamamz letz scngeng nzopx-angidrnx x tryrlq-kapqwxu drtwr ngrdr. ¹⁴ Krlzmle mzli ka, kzdung nimu trnzkriz-zpwxkalr kx nzmnc-krgu badr mrlz x tubq zvz, a' ycpe pipz nimu amrlx nzbrtikr drtwrmu ninge. X mzli kc nayzlu-ngrm Kxetu rgu Jiszs, sa naglqpx-lzbq-ngrnamu ninge, da kc tqwai nzglqpx-lzbq-krnge nimu mzli ka. †

¹⁵⁻¹⁶ Mzli lc tqyrb-ngrbo bamam, lxngitix kx amatqamu ninge, x pibo bamu kx nzoklati-krbo nimu nzwrde nali, mzli kc mz nzvz-krnge mz Masedonia Provins, x mzli kc nayzlu-ngrmc. Murde suti drtwrnge kx naokatramu ninge mz nzvzne-krnge Judiz Provins. X nzmu na-alepex da lc, natwzpeamu da kxmrlz mz nzwrde lcng li, murde mz nzamrlz-krmu ninge, Gct sa na-amrlz-kzle nimu. ¹⁷ Kxmule-esz', a' mz nibrde tekqtrx drtwrnge. A' trngiu drtwr ngrde kx nzycmne-krnge ycmne-abeanene. Murde mz nztekqtr-krnge drtwrnge, trvz-nqblqwxu da kx mrlzm bange, da kc tzwai

* **1:11** 2 Korint 4:15 † **1:14** Mzli kc Gct naqbtr-ngrde mz nqmq krgu kalr, takitxtrpwzle nzglqpx-lzbq-krgu mz leplz kcng tqokatrku mz nzvz-nqblq-krdr Jiszs. Nzmu lr Korint nzokatr Pol mz nzkrka'-krdr nide, takitrde nzglqpx-lzbq-krdr mz nzngini-krde kxrmailz kxmrlz. X Gct sa na-amrlzle nidr mz nzokatr-krdr nide. A' nzmu napxtpx-ngrdr nide, trnatwzlu nzamrlzkr Gct lc nidr.

kxtrnzrlxngitiung, a' vz-nqblqx me pnz drtwr Gct. Trpnzngr nzpokia-krnge mz nzhpi-krnge da kx na-alex. ¹⁸ Da kc tqwaiamu mz nzbrtipekr drtwrmu Gct nzatutr-krde natqdeng, takitrde nzbrti-kzkr drtwrmu ninge, murde trpnzngr nzhpi-krbo bamu kx, "Eu" x "Trtingr" mz mzli kcpwz. ¹⁹ Murde vz-nqblq-zvzx Jiszs Kxnzmcpx, Mrlx Gct, x nigr badr Saelas x Timoti yapwx tipxbzkr nide bamu. X Jiszs trpnzngr nzhpi-krmle bagu kx, "Eu" x "Trtingr" mz mzli lcpwz, a' atutr-zvzle natq Gct mz nzmnc-krde. ²⁰ Mz nzwzkr Jiszs, Gct sa tqatutr-zvzle da amrlx kx esalz-ngrbzle mz leplz nedeng. X mz nzkrlz-krgu da lc, glqlzku Gct mz nzhpi-krbzku bade kx, "Eu, da zpwxtx kx atutr-zvzq nzesalz-krmqng." ²¹ Sc tqamqngi Gct nzrlxngiti-krgu mz nzaxvctr-krbzle nigu mz Kxnzmcpx. X mcpx-kzle nigu. ²² X avzomle Mqngrkxtr mz nzmncpx-krmle mz nabzgu, murde nanginide rkkx kx nigu leplz neng Gct kcng natwzlr da amrlx kcng tquesalz-ngrmle bagu.

²³ X ni-kzde Gct kx krlzle kx trpokiarwu. A' tekqtrx drtwrnge mz nzoklati-krbo nimu nzwre krali, murde ma tqpnanati-moux nimu mz alwx ngrmung. ²⁴ Bzkq rpiamu kx suti drtwrnge nzmnclz-krmamu bange mz da amrlx. A' da kx suti txpwz drtwrnge nzwz-lxblr-krgu murde na-abrtzamu mz Kraes. X krlzx kx tu-amqngiamu mz nzrlxngiti-krmu. †

2

¹ Aoti zvz drtwrnge nzoklati-krbo nimu. A' pnz drtwrnge kx mrlz trnzoklati-krpou nimu mzli lc, murde ma tqbatrpo nzvzkr drtwrmu. ² Murde mz nzbatr-krbo nzvzkr drtwrmu mz nzpnanati-krnge nimu, drtwrnge vz kz. X trpnzngr kx na-aelalzmle drtwrnge. ³ Mz nzmu-krde lcde, yrbo letz lc bamu mz nzpnanati-krnge nimu, murde natekqtramu nqmq nr drtwrmu x sc tqoklati-atebo nimu. Krlzpe kx mz nzvz-nqblq-krmu natqnge lcng, dekc na-abrtzlvz-ngrne nqmq krmu x na-abrtzlvz-kz-ngrnamu ninge. ⁴ Drtwrnge talvzo x yrni-kzx mzli lc tqyr-ngrbo letz lc bamu, murde alwx ngrmung x nqmq nr drtwrmu abaomle nabzng. Ryrbo bamu murde nakrlzamu kx mrlzti-zlwzx nimu, a' trngiu mz nzbatr-krbo nzvzkr drtwrmu.

Kztemung Kcng Tztekqtrlr Nqmq Ngr Drtwrdr Mz Alwx Ngrdrng

⁵ Mz letz kc pnz, pibo bamu kx na-ayrplapxamu ncblo kc tqbatrpzle nzkxpungr lcng. Trmrlzu nzhpi-krnge kx alwx rde etu zlwz, a' nzatrkatikrde nimu myaszpxle nzatrkat-krde ninge. ⁶ Murde mzli ka tekqtrpele nqmq nr drtwrde. X nzayrplapx-krmu nide nayrkpx. *

⁷ Bzkq yc zvz mz drtwrmu alwx rde, a' na-amrlztrpzmu drtwrde, murde nabzde ma tqtalvzo zvz x sc tqyrlqpx-lzbqpe-ngrde mz nzrlxngitingr.

⁸ Mz nzmu-krde lcde, rngidrlvz-ngrbo bamu kx mrlx lc nakrlz-angidrlie kx mrlzti-mouamu nide x suti drtwrmu nzprtr-mou-krde mz nzodutrlxblr-krmu badr. ⁹ Pnanati-ngrne nimu kz mz letz lc, mz nzobqtr-krnge kxmu nzvz-nqblq-krmu natq kx kapxbo bamu kx namnc-zpwxt-ngrbzmu mz Gct. ¹⁰ Vz-nqblqpeamu natqngeng mz nzayrplapx-krmu nide. X sc tqkrlzpe kx sa navz-nqblq-kzamu natqngeng mz nzipq-krmu nide. X

† ^{1:24} 1:19 Ncblo kc tqngi menrpa na-ale-zvzle da kx na-abrtzlvzng kxetu rde nide, murde ma tzobqszo leplz badr kxetu rde. ^{1:22} Nzrlxngiti-krgu x nzwz-krgu kc tqaprcm Gct bagu nztuong mz nzxplkr Gct, a' trngiu mz nzxplkr esz'-krgu. ^{1:23} Pol pnanati-kaile nidr mz letz, murde namnc-zpwxtng badr mzli kc tqoklati-ngrde nidr. * ^{2:6} Mwx ncblo lcpwz dekc tqyapwx tipx Pol mz 1 Korint 5:1-5. Mz nzayrplapxkr lrmakxtr nide, nzmaslrx-ngrdr nide mz makxtr x ma nyzdr x trnzrlr-ngrpwlru nzprtr-krde mz Nzmungrktr. X nzkatpxlr nide mz nzaclvekr Gct nide, mz nzaprc-krbzlr nide mz mq Setzn, murde natekqtrle nqmq nr drtwrde mz nzplzpx-krde alwx ngrde.

mz nzipq-krmu nide, ipq-kzx nide. Kxnzmcpx krlzle kx ipqpex nide mz nzatrkti-krde ninge, murde ma tqrpwa'-ngrne nzaodu-mou-krmu nide. ¹¹ Mrlz nzale-krgu da lc, murde ma tqkabzku mz Setzn zmatq ngr nzatrkti-krde nigu murde ptxpx-ngrgu nzipq-krgu mzlegu lc. Krlz-zpxwku kx Setzn vz zvz nzyrlq-krde drtwr ngr nzatrkti-krde nigu kxzrlxngiting. †

¹² Atwzlr-ngrbo Taetus mz nzka-krbzle letz scnge bamu. X kzdung mzli mz nibrde, rlaszx taon kc Efiszs mz nzvz-krnge mztea Troas mz nzyapwxtipx-krbo Nrpakxmrlz badr, murde narmctix Taetus mrlcde mz nzyzlu-krmle bange. ¹³ Mzli kc tqkrlz-ngrbo mrlc, kxmule-esz' leplz lcng nasuti drtwrdr nzxlr-krdr Nrpap ngr Jisz, ¹³ a' sc tqkx zlwz mz drtqnge nimu, murde Taetus trkrlzkaple Troas. X mzli kxpipzne mnckr badr kxzrlxngiti-ateng kcng mrlc, x sc tqrlaszpex nidr. X sc tqvzpx Masedonia provins mz nzrmcti-krnge Taetus.

Kxzrlxngiting Nzaovxio-zvzlr Setzn Mz Nzaxvctr-krbzlr Mz Kxnzmcpx ‡

¹⁴ Sa naycmnetr-mou-ngrne da lc mz nibrde. A' mzli ka awi-ngrbo mz Gct kx kxmule-esz' da kx prtzm bange, a' aovxiox Setzn mz nzaxvctr-krbo mz Kxnzmcpx kc tqaovxiopel nide. X Gct okatrle ninge mz nzyapwxtipx-krnge Nrpap ngr Kxnzmcpx drlve keng vzkix. X Nrpakxmrlz lc apule zsikapu ngr bqlr nc ninz kx mnrt mrlz zlwz kc tqlvabqtile mrkang kqlu.

¹⁵⁻¹⁶ Mz drtwr Gct mnrt mrlz zlwz, murde abrtzlvzle nzyapwxtipx-krnge nrpa lc. X mz drtwr leplz kcng sa narlapxng, mnrtq nrpa lc mrlz zlwz kz mz nzxlr-krdrle, murde mailzle nidr mz nzlungr kxboi. A' leplz kcng sa naprtrng mz Hxl, nzpxtpx-ngrdr nzxlr-krdr Nrpap ngr Jisz, murde mz drtwrdr nrpa lc brtu apule namz kxmibi. X mz nzpxtpx-krdr nrpa ngr nzlungr, nzprtrng mz nzbz-alongr. Trpnzng kx takitrde nzyapwxtipx-krde nrpa lc mz nzxplr-krde esz'-krde. ¹⁷ Kzdung ncblo nzyapwxtipxlr nrpa ngr Gct, murde nartwz-ngrdr da kx nakabz leplz kcng tzabrtz-ngrdr nzalvztr-krdrng. A' nigr badr kztengeng trapukru nidr, murde nzryapwx-krgr trnartwz-ngrgru da kx nakamamu. A' mz nwztr-krbzkr mz Jisz Kxnzmcpx, krlzkr kx Gct obqom bagr, x yapwxtipx-zpxwkr nrpa kc tqaprcmle bagr.

3

Pol Nide Angidr Aposol Murde Nqmq Kr Lr Korint Mrlz

¹ Bzkq rpiamu kx glqpx-lzbq-ngrne nzycmnengr lc. Trapukru kxzrlxngiting kcng tzrtwz-zvzm letz murde suti drtwrdr kx leplz nakrlzlr kx nzalvztr-krdrng tubq. Murde krlzpeamu nigr x nwztr-krgr. X tr-rlxti-kzpwzkrbamu nzryr-krmu letz mz nzokatr-krmu nigr. ²⁻³ Murde nimu esz'-krmu apuamu letz kx yr Kxnzmcpx mz nzaelwapx-krbzle mz leplz kx wztrpzkr mz Gct. Murde trmrbrtru mz drtwrdr kx mzli kc tqyapwxtipx-ngrbzkr Nrpakxmrlz bamu, Jisz tekqtrle nabzmu. X alele da lc mz nwztr-krgr Mqngkrxtr kc tqatwzlr-ngrm Gct kxlu zvz. X opx-angidrbz mz leplz amrlx kcng tzkrlzlr nimu, kx atwzlr-kz-ngrm Gct nigr x nzalvztr-krgr tubq. Murde trapuwamu letz kc tzlztr mz rplz, a' apuamu letz kxlu, murde nqmq nr

† ^{2:11} Kzdung mzli zyagox prtzbzle mz doa kx ptxpx-ngrde nzipq-krde leplz. ^{‡ 2:12} Aposol 16:8 ^{‡ 2:13} Mz 2 Korint 7:5 Pol ycmnetr-mou-ngrde nzvz-krde Masedonia Provins x nzrmcti-krde Taetus. A' mz ngalde lcng dcpk mz drtwrdr kx kxmule-esz' kxne drtqd Taetus, a' Setzn trpnzng nzyatrkti-krde nide. X Pol abrtzlvzle nzaovxio-krde Setzn. Murde kxmule-esz' trxplrkku, a' zmatq ngr Gct mz zmrlz ngrde kxmyalz okatrle nigu mz nzaovxio-krgu Setzn x alwx.

nabzmu x nzmnc-krmu tubq. [◊] ⁴ Nzycmne-krbo kxmule lc murde brti drtwrgr kx Gct wz mz nabzmu mz nzaxvctr-krbzmu mz Kxnzmcpx.

⁵ Krlz-angidrkr kx trpnzngr scgr zmatq esz'-krgr mz nztekqtr-krgr nabz leplz. A' zmatq ngr Gct txpwz kx tekqtrle nabzdr mz nzvzpx-krmle mz nzwz-krgr. ⁶ Murde nide kc tqokatrle nigr mz nzyapwxtipx-krbzkr nrpa ngr Nzesz'tikr Drtwr Gct Kc ate badr leplz kcng tqraxpele, mz nzabrtt-krbzlr drtwrdr mz Jiszs Kxnzmcpx. Mz Nzesz'tikr Drtwr Kc Kai tqyrlqle mz Lou sc Mosis, leplz nanibqng mz nzxpqbrrl-krdr lou lcng. A' mz Nzesz'tikr Drtwr lc Tqate, leplz nalung mz zmatq ngr Mqngrkxtr.

Nzesz'tikr Drtwr Gct Kc ate Myaszpx-zlwzle Krkc Kai Mz Lou Sc Mosis

⁷ Krlzku kx lou lc mrlz tqrpile kx leplz kxnzaleng alwx nabzng. Murde mzli kc Gct tqka-ngrbzle Loukxtr mz Mosis nzlstrng mz rplz kx nzmelxng, zluli r Gct sc tqayzlrpxpe-ngrde mz Mosis. A' lr Israel nzmwxltilr zmatq lc x nzpxtxpx-ngrdr nzobq-krbzlr mz mzte. Delc tqakqlvztrngr Mosis mzte mz lrpz. A' zyzlr ngr mzte lc krlzle nzvzneo-krde. ⁸ Delc, opx angidr kx nzmrlzkr Nzesz'tikr Drtwr Kc ate tqyrlq Gct mz nzka-krbzle Mqngrkxtr mz leplz, myapx-zlwzbz mz Nzesz'tikr Drtwr Kc Kai. Murde mz Krkc Kai ayzlr-ngrbzle mz Mosis, a' mz Krlc Tqate prtrku mz zluli r Gct. ⁹ X krlz-kzku kx Lou sc Mosis lc mrlz tqaewapx-ngrbzle mz leplz kx takitrde Gct nzayrplapx-krde nidr. X opx angidr kz kx nzmrlzkr Nzesz'tikr Drtwr Kc ate myapx-esz'ngr murde Jiszs atubqtile leplz kxnzlxngitilr nide mz nzobqkr Gct. ¹⁰ X mzli ka, nzmu na-arsakrlr-ngrgu nzmrlzkr Nzesz'tikr Drtwr Kc ate mz Lou sc Mosis, opxm kx Lou lc trpengr nzmrlz-krde, murde Krkc Tqate mrlz-esz'ngr. ¹¹ X mou, krlz-kzku kx Lou lc mrlz, kxmule-esz' nayrkrpxpe. X opx angidr kz kx nzmrlzkr Nzesz'tikr Drtwr Kc ate, myatpx-zlwzbz mz Krkc Kai, murde yc alo.

¹² Mz nzmu-krde lcde, nelzgr br mz nzryapwpxngr, murde krlzkr kx nrpa scgr lc tqyc zvz, a' nrpa sc Mosis nayrkrpxpe. ¹³ A' trapukru Mosis kc tqakqlvzle nzyzlrpxkr mzte, murde lr Israel ma tzmlcr nzvzneo-krde. ¹⁴⁻¹⁶ Mzli lcde, batrpz Gct nzmqngikr nardr, x nardr trpnzngr nzyrplatir-krdr drtwr ngr natqdeng, krlzmle mzli ka. Murde mzli kc lr Jiu tzrlwx-ngrdr Nzesz'tikr Drtwr Kc Kai mz Nzryrngrkxtr Kc Kai, trtwzlu drtwr ngrde, murde kzdq kc da akamrbr-ngrbzle nzao-krdr drtwrdr, da kc tqwaibzle mz kxtrngiulJiu. A' mzli kc leplz tzabrtt-ngrbzlr drtwrdr mz Kxetu Jiszs, Mqngrkxtr okatrle nidr mz nzrkatx-krde da kx akamrbr-ngrbzle nzao-krdr drtwrdr. ¹⁷ Murde tqngi Mqngr Kxetu rgu kc tqwz mz nzbzgu. X Mqngrkxtr lc aopxbzle drtqgu murde trnamnclzpepwzkuu mz zmatq ngr Lou sc Mosis x alwx. ¹⁸ X mzli ka, nigu amrlx kcng tzrlxngiting krlzku nzmrlzkr nqmq kr Kxetu Jiszs, murde trpengr da kx akamrbr-ngrbzle nqmq nr drtwrgu. X mz nzaotikr drtwrgu Kxnzmcpx, Nzryrngrkxtr apule dzpq, kc tqaewapx-ngrmle mqngrde bagu. X Mqngrkxtr tekqtr-ebir-ngrde nigu, mz nzapu-krgu Jiszs. X nzaelwapx-krgru nzmrlzkr nqmq krde sc tqetunepx zvz.

4

Nqmq Krgu Nzaelwapx-ngrdr Kx Gct Mncpxm Bagu

¹ Trpnzngr nztalvzokr nabzgr mz nzyapwxtipx-krgr Nrpakxmrlz, murde Gct yc zvz mz drtwrde nigr x okatrle nigr. ² X nqmq krgr tubq mz da amrlz murde yrlqpx-lzbqgr mz da kx myangr drtq. X da amrlx kx alekr

takitrde leplz nzmc-krdrleng. Tresabrtikru leplz murde nalalztqmqng bagr o naokatrlr nigr. X trpnzngr nztekqtr-krgr nrpa ngr Gct. A' yapwx tipx-zpxkr nrpa angidr, murde krlzkr kx Gct sa tqobqom bagr. X krlz-kzkr kx leplz kxnztubqng sa namclr kx nzalvztr-krgrng tubq. ³⁻⁴ A' mzli lcpwz, Setzn, kc tqaclove nrlc, ayrrputrzle drtwr kzdung leplz, murde ma tztwzlr drtwr ngr Nrpakxmrlz. Leplz lcng sa naprtrng mz Hxl, murde trnzkrlzlr kx Jiszs Kxnxmcpk myapx-esz'ngr mz nzaotr-angidr-krde Gct. ⁵ X Jiszs Kxnxmcpk lc tqaypwxtipxkr mz nzngini-krde Kxetu kc tqaclove-zvzle leplz amrlx. A' trycmnetr-ngrgru nigr esz'-krgr, a' ngi txpwz mz nzsri-krgr kx kqle Jiszs nigr mz nzwtztr-krbzkr bamu. ⁶ Mzli kc tqwzng Gct nrlc, rpile kx, "Zyzlr nayzlrpx-ngrm mz nzlo." ⁷ Mz nqmq lcpwz, Gct katxde da kx akamrbr-ngrbzle nqmq nr drtwrgu, mz nzayzlrpx-krmle nzalvztrngr angidr mz drtwrgu, murde nargu nayrplatitrlr drtwr ngr nrpa ngrde. X mzli ka mz nzkrlzpe-krgu Jiszs Kxnxmcpk x nqmq krdeng, nakrlz-kzku kx nqmq kr Gct mrlz-esz'ngr.

⁷ Krlzkr nzmrzkr nqmq kr Kxetu Jiszs x nzyapwxtipx-krgr da lc ngi da kxbrngz-esz'ngr. X kxmule-esz' nigr leplz txneng x nrkrdrqgr yangrnga, mz nzapu-krdr dis kx mrglc ani, a' Gct aprcmle nzwtzng lc bagr. Alele da lc mz nzaelwaxp-krde kx zmatq ngr Nrpas ngr Jiszs mz nztekqtr-krde leplz, trvzpxpuu mz zmatq ngrgr esz'-krgr mz nzyapwxtipx-krgrle, a' vzpxm mz Gct. ⁸ Dekc nzkxpung kxkqlu tqprtz-ngrmlr bagr, a' trnzaovxiolru nigr. X nzwrde kqlu kx nabzgr talvzo-ngrdeng, a' drtwrgr trmau. ⁹ Nzaetq zvz drtqgr, a' Gct mnc-zvzm bagr. Nzwrde kqlu kx nztz-ngrgr, a' trbzkr. ¹⁰ Drlve keng vzkikr, prtrkr mz nzatrakingr kcng pwz tqprtzbz mz Jiszs. X rlrxp-lzbqgr mz nzbz-krgr, da kc tqwaile, murde leplz nakrlzlr kx zmatq kcpwz tqalu-moule Jiszs, dekc tqwz mz nabzgr x nrkrdrqgr. ¹¹ Mz nzwtztr-krbzkr mz Jiszs mz nzlu-krgr, Gct sc tqrlr-ngrmlr bagr nzprtr-krdr mz da kxkqlu kx nabatrzle nzbz-krgr. Murde suti drtwrde kx leplz nakrlzlr kx Jiszs lupe mou x zmatq ngrde dekc tqwz mz nrkrdrqgr kxyangrnga mz nzokatr-krde nigr mz nztu-amqngi-krgr kxmule-esz' da kx prtz. ¹² Delc tqrlrpx-lzbq-ngrgr mz nzbzng murde naprtramu mz nzlungr kxboi.

¹³ Apukr ncblo kc tqrpile kx, "Pipxx murde abrtrpo drtwrnge mz Yawe." ¹⁴ Murde pipx-zvz-kzkr nrpa ngrde mz nzabrtr-krbzkr drtwrgr bade. X krlzkr kx nide kc tqatulz-mople Kxetu Jiszs mz nzbzng. X kxmule-esz' nznibqgr, a' mz nzavctr-krbzkr mz Jiszs, sa na-atulz-kz-mople nigu mz nzlungr kxboi, x sa navzmile nigu mz nzmnctr-krbzkr bade Heven. ¹⁵ Da lcng amrlx tzprtzmqng bagr ngi dalr nzokatrnr nimu x leplz kc-kzng tqalvztrkr. Murde mz nzqqlunepxkr leplz kcng tzlxngitlr nzmrzkr Nrpas ngr Jiszs, nzawi-krbzkr mz Gct x nzangio-krdr nide naetunepx kz.

¹⁶ Delc nabzgr trtalvzou mz nzwtztr-krbzkr mz Gct. Murde kxmule-esz' nrkrdrqgu vztrpem, a' Gct sc tqaxplr-zvzle nabzgu mz zbg kang kqlu. ¹⁷ Mz nzobqtipx-krgu nzetukr da kxmrzting amrlx kx natwz-aloku Heven, nzaetq-krmlr drtqgu mz nrlc ka topwz, x mzli rde mrbcnepwz. ¹⁸ Mz nzmu-krde lcde, traotiu drtwrgr da kx prtzm mz nrlc ka, murde sa nayrkrpxng. A' aoti txpwz drtwrgr da kx naprtzm Heven murde sa nayc-along.

5

¹ Nrkrdrqgu mz nrlc ka nzapulr matelq, murde sa nabzng. A' krlzku kx Gct sa naka-mople bagu nrkrdrqgu Heven kx na-apulr ma kx tu-

⁷ **4:6** Nou 1:3 ⁷ **4:10** Matiu 16:24-25; Mak 8:34-35; Luk 9:23-24; Rom 8:17; 2 Korint 1:5; Filipae 3:10; 1 Pita 4:13 ⁷ **4:13** Sam 116:10

amngi murde trnzbzung. ² X mz nzmnc-krgu mz mzlir nzkxpungr mz nrlc ka, batrple bagu nzsuti-zlwzkr drtwrgu nztwz-mou-krgu nrkrdrtq lcng kx trpnzngr nzkxpu-krdr. ³ Murde mz nzbzkr nrkrdrtqgu mz nrlc ka, mqngrru sa narmctilr me namnc-ngrdr mzli kc natwzpe-mou-ngrgu nrkrdrtq lcng. ⁴ A' mz nzmncbe-krgu mz nrkrdrtq lcng tr-rblxu nzbz-krdr, yrni-zvz-ngrgu zvetq. X mzli lcpwz, trsutiu drtwrgu nzbz-krgu, a' suti drtwrgu kx nrkrdrtqgu lcng nalrtipxng mz nrkrdrtq kx tretqu, murde sa nalu-along. ⁵ Gct yrlq-pnzle drtwr kx sa naka-mople bagu nrkrdrtq lcng kalr. X batrple bagu nzsutikr drtwrgu nrkrdrtq lcng. X amncpxmle Mqngrkxtr mz nabzgu nangi rkx kx sa na-atutrle nzesalz-krdeng.

⁶⁻⁷ Delc krlzku kx sa natwzku nrkrdrtq kzbleng lcng kalr. X brti drtwrgu kx Gct sa na-atutrle nzesalz-krdeng amrlx, kxmule-esz' trmckaku. X trpnzngr nzprmitr-krgu nrkrdrtqgu lcng tr-rblxu nzbz-krdr Heven. Mz nzmucrde lcde, obqtipxku nzyrlqtxo-krgu nrkrdrtq mz nrlc ka, mz nzvz-krbzu mz Kxetu Heven, kc tqngi mrnyzgu angidr.

⁸ X trmwxlrtikru nzbzng, murde mz drtwrgr nzmncr-krbzu mz Kxetu Heven myaszpxle nzmnc-krgr mrka. ⁹ Kxmule-esz' mnckr mz nrkrdrtq mz nrlc ka o yrlqtxokrng mz nzvztr-krgr Heven, a' da kx myapxbz mz drtwrgr nzaelalz-krmgr drtwr Kxetu mz da amrlx. ¹⁰ Murde mzli kc nigu amrlx kxnzrlxngiting natutr-ngrbzu mz mz Kxnmcpk kalr, sa na-ayzumle da bagu mz nzvz-nqblq-krde da kx alekung mz nrlc ka, kxmule-esz' mrlz o trka.*

¹¹ Mz nzmyatitr-krgr Gct, dekc tqabz-ngrgr nzngi-batr-krbzu bamu nzkrlz-krmu kx nqmq krgr mrlz x takitrde nzmncr-krmamu bange mz nzngini-krnge aposol x mz nzxngiti-krmu nrpa angidr. Gct krlzle kx nqmq krgr mrlz x kglele nigr mz nzvzng lc. X lxngitix kx krlz-kzamu da lc mz nabzmu. ¹² Mz nzycmnengr lc trglqpx-lzbq-ngrgru. A' ngi dalr nzayzlu-krbzu natq leplz kcng tzatratilr nqmq krgr, mz nqrpi-krbzu badr kx abrtzlvzamu nigr. Murde leplz lcng nzglqpx-lzbqng mz da kx nzmc leplz, a' traotiu drtwrdr nqmq nr nabzdr. ¹³ Kxmule-esz' nzrpilr ngqngukr, a' nzngqngu-krgr ngi dalr nzaelalz-krmgr drtwr Gct, murde wztrpzkr bade. X mz nqrpi-angidr-krbzu da bamu ngi dalr nzokatr-krgr nimu. ¹⁴ Murde nivz lr Kxnmcpk mailzle nigr mz da amrlx kx alekr. Murde mz nivz lrde, bz-ngrde leplz amrlx. Delc nigu leplz nedeng prtrku mz nzbz-krde. ¹⁵ X mz nzbz-krde leplz amrlx, atulz-mop Gct nide mz nzbzng. Murde suti drtwr Gct kx leplz kcng tzprtrng mz nzlungr kxboi mz nzxngiti-krdr Jiszsbzkq nzvz-nqblqpelr me pnz drtwrdr esz'-krdr, a' navz-nqblq-alzulr me pnz drtwrde.

¹⁶ Mz nzmucrde lcde, mzli ka nzaolvz-krgr leplz trpengr nzvz-nqblq-krde drtwr kxtrnzrlxngitiung, a' nzaolvz-krgr nidr navz-nqblqle drtwr Kxnmcpk. Mzli kc tr-rlxngitiaka-ngrgr, aolvzkr Kraes mz nzvz-nqblq-krde drtwr kxtrnzrlxngitiung. A' mzli ka krlz-angidrpekr nide. ¹⁷ Leplz amrlx kcng tzabrtzrdr mz Kxnmcpk nztekqtr-atwrnrpe-ngrng. Murde Gct tekqtrle nqmq krdrng kxblzlongr kxtrka mz nqmq kzbleng kxmrz. ¹⁸⁻¹⁹ Sc tqale Gct da lc, murde Jiszbs Kxnmcpk bz-ngrde nigu badr leplz amrlx mz nrlc. X dekc tqyzlumi-mop Gct nigu mz nzmnc-zpwx-krgr badr. X aprcmle bagr nzvzng mz nzyapwxtpx-krbzu da lc. Rpibzkr badr kx Gct sa tqipqpx-zvzle alwx ngr krkeng tzplzpxbzlr alwx ngrdr bade mz

* ^{5:10} Kxnzrlxngiting kcng tzaleng da kxmrz sa natwzlr da kxmrzting, a' krkeng trnzaleung da kxmrz trpnzngr da kx natwzlr, a' nangi txpwz nzlungr kxboi. [Sam 62:12] ^{18 5:14} Galesia 2:20; 1 Timoti 2:6; 4:10; Rom 6:3-11

nzabutr-krbzlr drtwrdr mz Kxszmcpx kc tqbz-ngrde nidr. Murde Gct suti drtwrde namnc-zpxw-moung badr.

²⁰ X nigr menrpa neng Kxszmcpx murde pipxbzkr natqdeng mz leplz. Apule Gct yrnitirpzle bamu, mz nrpki-krbzkr bamu kx, "Natekqtramu nqmq nr drtwrmu, murde namnc-zpxw-mouamu badr mz nrwrx." ²¹ Kraes tubq murde trpnzngr alwx ngrde. [☆] A' Gct rlr-ngrbzle bade nzayrplapxngr nide mz nxzpe-krde alwx rgung amrlx, murde natubq-kzku mz nzobqkr Gct mz nzaxvctr-lzbq-krbzku mz Kraes. [☆]

6

¹ Prtrpeamu mz zmrlz ngr Gct kxmyalz mz nzarlapx-krde lc nimu. X mz nzwz-lxblr-krgr badr Gct, rnqidrlvz-ngrbzkr bamu kx bzkq ma mz drtwrmu zmrlz lc, a' rlr-ngrbzmu bade nzokatr-krde nimu nzrvz-nqblqng nide. ² Rpi pnz Gct mz Nzryrngrkxtr kx, "Mz mzli kx mrlzm bange, sa na-ayzlu-ngrbo da kx rlxtimamu bange, murde naokatr x nimu mz mzli r nzrlapxngr." [☆] Nakrlzamu kx mzli ka, mzli kx mrlzpebz mz Gct mz nzarlapx-krde leplz, murde sc tqatwzlrpe-ngrmle Mevalu Kxszmcpx mz nrlc, x suti drtwrde kx na-abrtrpzmu drtwrmu bade mzli ka.

Nqm Kr Leplz Kcng Tzwztrpzng Mz Gct

³ Nigr badr kztengeng trpnzngr nzale-krgr da kx nabatrpzle mz leplz nzpxtxpx-krdr nzxlr-krdr Nrpakxmrlz. ⁴ X aelwapx-ngrgr kx wztr-angidrbzkr mz Gct, murde tu-amqngikr mzli kc tqprtr-ngrgr mz nzaetqng drtqgr, nzkxpu-krgr, nzvztx-zlwzkr drtwrgr, ⁵ nziklatingr nigr, nzadwa-trngr nigr mz presin, x nztutilz-lzbqkr zbo ngr leplz kcng tzrmaneutng nigr murde nanibqlr nigr. X vz zvv nzbrtikr drtwrgr Gct mzli kc tqwz-kato-zvz-ngrgr, trmwikru, x nelzgr brtale zvv. ⁶ Suti drtwrgr kx Gct na-abrtzlvzle nigr mz da amrlx. Mz nzmu-krde lcde, nzmnc-krgr tubq, krlzkr nzmrlzkr nqmq krdeng, x drtwrgr trngya-anipwzu mz leplz, a' okatrkr nidr mz nivz angidr mz zmatq ngr Mqngirkxtr. ⁷ Alvztr-ngrgr Nrpakxmrlz mz zmatq ngr Gct x mz natq angidr. X nztubq-krgr apule toki r vea mz mqgrng. Murde rblxbz mz leplz nzatrkat-krdr Nrpakxmrlz mz nzpipx-krdr kx nqmq krgr trka. X krlzkr nzaovxiongr leplz amrlx kcng tzrpilr narpwa'-ngrdr nzvzpxkr Nrpakxmrlz lc. ⁸ Wztr-angidrbzkr mz Gct kxmule-esz' nzglqpx leplz nigr o nzpxtxpx-ngrdr nigr, kxmule-esz' nzabrtzlvzr nigr o nzpibqtilr nigr, x kxmule-esz' nzrpilr nigr kxnpokiang, a' yapwxti-zvzkr da angidr. ⁹ Kzdung leplz nzkrlzlr kx wztrpzkr mz Gct, a' kzdu-kzng leplz nzpxtxpx-ngrdr nigr. Nzayrplatipxlr nigr x nzrpilr nanibqtilr nigr, a' trbzkr. ¹⁰ Nzavztibzlr drtwrgr, a' drtwrgr elalz-ngrmle Kxetu rgr. Kxmule-esz' trpnzngr scgr da, a' prtr-kzkr mz da kxmrlzting amrlx kx kam Gct bagr mz nzaxvctr-krbzkr mz Kxszmcpx. X okatrkr leplz mz nzprtr-kz-krbzkr bade.

¹¹ Mzlengeng x inwengeng lr Korint, aelwapx-ngrbzkr bamu kx mrlzti-zlwzkr nimu x trpnzngr da kx yrlq-kapqbzkr bamu mz nzpipx-krbzkr bamu nivz kx yc mz nabzgr. ¹² X trpnzngr me lolvz-moukr mz nivz lc. A' trka-atwrnr-ngrpwa'muu nabzmu bagr, mz nzmrlzti-kz-krmu nigr. ¹³ Apuamu doa nengeng. X pibo da lc mz nzapu-krbo bamu trtemu. Takitxtrde nzayzlu-kz-krpwzmu nivz lc bange.

Bzkq Axvctr-lzbqzmu Mz Kxtrnzrlxngitiung

[☆] 5:21 Hibru 4:15; 7:26; 1 Pita 2:22; 1 Jon 3:5 [☆] 5:21 Asaea 53:6; Rom 3:21-26 [☆] 6:2 Asaea 49:8

¹⁴ Bzkq axvctr-lzbqbzmu mz kxtrnzrlxngitiung, mz nzmnclz-krbzmz badr mz nzwzngr o mz nzyrlz-krbzmz badr, murde ma tqprtr-kzamu mz alwx ngrdrng. Murde leplz kxnztubqng kcng tzvz-nqblqlr nqmq kr Gct trtakitrdeu nzaxvctr-lzbq-krbzlr mz kxdrka'-ngrng kcng tzvz-nqblqlr nqmq kr Setzn. Da kc tqwai zyzlrx nzlo trnzkrlzru nzyctr-lxbblr-krdr me esz'.
¹⁵ Trpnzngz nzesztikr drtwr mz Kxnxmcpx x Setzn. Mz nzmu-krde lcde, trpnz-kzngr nzesztikr drtwr kxnxrlxngiting badr kxtrnzrlxngitiung mz da kxtubq. ¹⁶ ?Myx kxmule, takitrde mqngr drka' kxnzlz nztupx-krmleng Mangr-nzangiongr Yawe? Bzkqtx pnz! Mz nqmq lcpwz, trtakitrdeu nigu kxnxrlxngiting nzaxvctr-lzbq-krbzku mz kxtrnzrlxngitiung. Murde nigu Mrkc Tqtr nyz Gct mz nzmnccpx-krmle elr. Rpile mz Nzryrngrkxtr kx, "Sa namncpxmc mz leplz nengeng x mz mzlindr. Sa nanginibo Gct rdr, x nanginidr leplz nengeng." ¹⁷ Dekc tqrpi-kzle kx, "Prsrpxamu kxdrka'ngr lcng, x akipx-lzbqmu badr, murde ma tqbatrzle trnztakitr-krdeu nimu mz nzprtr-krmu mz nzangiongr. ¹⁸ Aleamu da lc x sa na-abtzlvzx nimu." ¹⁹ X rpi kz Yawe kc tqrnir kx, "Sa nanginibo Trtemu, x nanginimu mrlxngeng x inyxngeng." ²⁰

7

¹ Mzlengeng x inwengeng, mz nzaotikr drtwrgu da lcng tquesalz-ngrmle bagu, naesakipe nzale-krgu alwx amrlx, kxmule-esz' mz nrkrdrtrqgu o mz nzao-krgu drtwrgu. X mz nzmyatitr-krgu Gct, nztubqkr nzmncc-krgu naetunepx zvz.

² X yrnititroo bamu nzayzlu-kz-krmamu bagr mz nivz lrmu. Murde trpnzngz nimu kx atrkatikr, trpnzngz nimu kx alvztr-rbrkr, x trpnzngz nimu kx esabrtikr mz nztwz-krgr dztudrng. ³ Trycmne-ngrpou lc murde na-amyatibo drtqmu. A' da kc tqwai nzpi-krbole bamu mzli kc, kx nzmrzti-krgr nimu sa navz zvz, kxmule-esz' bzku o luku. ⁴ Pipxpebo da kx yc mz nabzng, murde brti drtwrnge nimu. X glqpx-lzbq-ngrne nimu mz nzvz-nqblq-krmu Kxetu. X apqtrple drtwrnge mz nzpi-krm Taetus bange kx vz-nqblq-angidramu natqngeng mz letz kc kai. Abtzlvzx nimu, kxmule-esz' ptilzle nigr nzkxpung kxkqlu.

Nzrlwakr Taetus Lr Korint Kxnxrlxngiting

⁵ Mz nibr nzkrlz-krbzkr provins kc Masedonia, trmncc-zpwxkru murde trrmctikru Taetus mz nzyzlu-krmle bange. Mzli lcde nabzgr talvzotx zlwz, murde rmctikr nzkxpung mrkang kqlu, x mrlcdeng amrlx leplz otablrkr badr mz nzycmnengr. X mwzlr-ngrgr drtwrrgr nzlitr-krbzle mz Taetus mz nzatrkaner nide, x kx kz mz drtqgr kxnamu nzayzlu-krmamu letz scnge.

⁶ A' mz nibrde, Gct kc tqapqtrpzle drtwr leplz kx nabzdr talvzo, apqtr-kzple drtwrrgr mz nzvz-krm Taetus. ⁷ X Taetus aelalz-zlwzmle drtwrrgr mz nzrpi-krmle bagr kxmu nzapqtr-krbzmu drtwrde. Murde rpimle bagr kx sutix zlwz drtwrmu nzoklati-krbo nimu, x drtwrmu vzttx-ngrde kxmusrnamu ninge mzli kc, x mzli ka vqti drtqmu nzmnclz-krmamu bange mz nzngini-krnge aposol ngrmu.

⁸⁻¹² X mzli ka abtz-ngrne nzyr-krbo letz lc, murde atutrle me pnz drtwrnge mz nzbatr-krbzle bamu nzkrlz-krmu kx mrlzti-angidramu ninge x amatq-angidramu ninge. X okatrle nimu murde narmu nalvxpzbzle mz nzale-krmu da kxtubq. X atwzlr-kz-ngrpo letz lc mz nzatubqti-krnge ncblu

²¹ 6:16 Livae 26:12; Jeremaea 32:38; Esikel 37:27 ²² 6:17 Asaea 52:11 ²³ 6:17 Esikel 20:34

²⁴ 6:18 2 Samwel 7:14; 1 Be Ngrdr 17:13; Hosia 1:10; Jon 1:12

kc tqvz-rbr x mz nzokatrngr leplz kcng tqatrkatile. Kxmule-esz' pnanati-zlwzx nimu mz letz lc, a' mz nzyr-krbole, drtwrnge vz murde krlzx kx sa na-avz-kzpze drtwrmu. X nzvzkr drtwrmu lc, krlzle nzyrkpx-knde mz da kxtrka o da kxmrlz. Murde mzli kc drtwr leplz tqvz-ngrde x aoti txpwz drtwrdr da kxtrka lcng x nzpxtxpx-ngrdr nztekqtr-krdr nqmq nr drtwrdr, krlc da kx na-akipx-lzbq-ngrdr badr Gct x batrpze nzvz-krdr mz nzbz-alongr mz Hxl. A' mzli kc nzvzkr drtwr leplz tqbatr-ngrbzle nzavzo-lzbq-krdr x nzyzlu-krbzlr mz Gct, krlc da kx na-ayrkrpxle nzvzkr drtwrdr mz nztekqtr-krdr nqmq nr drtwrdr. X awi-ngrbo mz Gct kx mz nzvzkr drtwrmu, yzlutiamu nide x sc tqtekqtrpeamu nqmq nr drtwrmu. Murde da kxmrlz kxkqlu kx nzvzpxmqng elr. Aesakipeamu nzale-krmu da kxtrka. X drtqmu myape-ngrde nqmq lcng tqtrka. X amatqpeamu ninge mz nzngini-krnge aposol. X mzli ka sutitx zlwz drtwrmu nzmncl-lxblr-krgu. X sc tqrpwa'pe-ngrbzmu mz leplz nzpibqti-krdr ninge. X sc tqayrplapxpeamu ncblo lc tqvz-rbr. Da lcng amrlx nzaelwapx-ngrdr kx drtqmu vq mz nzatubqti-lzbq-krmu mz nzvz-rbr-krmung. Mz nzmu-krde lcde, drtwrnge trvzpeu mz nzyr-krnge letz lc, a' drtwrnge elalz-zlwzpm. Murde vztxngrp wz drtwrmu mzli mrcne x letz lc batrpze nzyzlu-krbzmu mz Gct, a' trbatrpwzleu nzesablqti-krmu nide. ¹³ Da lcng amrlx nzapqtrplr drtwrgr. X abrtz-zlwz-ngrgr nzabrtzkr Taetus mz nzoklati-krbzle nimu, murde nimu amrlx apqtrpzmu drtwrde mz nqmq krmu. ¹⁴ Mzli kc narkalzpe-ngrmle, pibo mz Taetus kx glqpx-lzbq-ngrne nimu, murde lxngiti-angidramu x vqti drtqmu nzwztr-krbzmu mz Gct. X mzli kc tqkrlzpe-ngrbzle nimu, tramyatipwamu drtqnge, a' mcle kx nike pibo bade da angidrtx, da kc tqwai mz da kcng amrlx tqpitibong bamu. ¹⁵ Nzmrlztikr Taetus nimu etunepx mz nzaotikr drtwrde kx drtqmu vq mz nzmnclz-krbzmu mz zmatq ngrde x amatq-zlwzamu nide mz nzngi-krde menrpa nenge. ¹⁶ X mzli ka, abrtz-zlwzpx murde drtwrnge brpe kx sa na-ale-zvzpeamu da kxtubq.

8

Nzatakqtingr Trau Mz Nzvzkr Lrmakxtr

¹⁻² Mzlengeng x inwengeng, suti drtwrgr nakrlzamu nqmq kr dzbe lrmakxtr kcng mz Masedonia Provins. Murde mz nzvz-nqblq-krde zmrlz ngr Gct kxmyalz, drtwrdr elalz-zlwzpm mz nzyr-krbzle da kxkqlu mz nzokatr-krdr kztegung lr Jiu kcng Jerusalem kx trpnzngr scdr da. X nzalelr da lc kxmule-esz' nidlz esz'-krdr trpnzngr scdr da x kxtrnzrlxngitiung nzaetq-zlwzbzle drtqdr. ³ Napi-zpwxbam kx nzkapxlr da kxkqlung. X mzli ka nzmncl-xglenepwzlr da kxkipzne. Trpnzngr kx rpibz badr nzale-krdr da lc, a' pnzpe drtwrdr esz'-krdr. ⁴ X nzrlxtitx-zlwzmlr bagr nzrlr-krbzkr nzprtr-krdr mz nzatakqtingr lc, murde naokatr-kzlr dzbe lrmakxtr kcng Jerusalem. ⁵ Mz drtwrgr nakatxpwpwzlr trau kxkipzne. A' sc tzmyaszpxpelr mrkc tqpnz drtwrgr. Murde mzli kc kai nzrlrpx-lzbqbnzng mz Gct mz nzale-krdr me pnz drtwrde. X mz nibrde nzrlxtimlr bagr nzpi-krbzkr badr nike na-alebzlr bade. X sc tzrkapx-ateng trau kxkqlu.

⁶ X nzyr-krbzle da adcpxle drtwrnge mz nimu x nqmq krmu. Delc tqrtulrtr-ngrbole mz Taetus mz nzvzkrp-krbzle bamu mz nzokatr-krde nimu nzayrkrpx-krmu nzatakqtingr lc. Murde nide kc tqyzutrpzle nzvzkngr lc bamu mz yiz kc tqvztxpe. ⁷ Sc tqwz-angidrpeamu mz zmatq kxkqlu mz nzvztr-krbzmu mz Gct. Murde wz-angidrpeamu mz zmatq ngr nzrlxngitiung, nzrplzpxngr nrpa kx kabz Gct, nzrpipxngr nrpa ngr nzrkrlngr, x drtqmu vq mz nzokatrngr. X mrlztiamu nigr mz nivz kc

tqaelwapx-kai-ngrbzkr bamu. X mzli ka takitrde nzwz-angidr-kz-krmu mz zmatq ngr nzrka-nrbalq-ngrbz da mz leplz kx trpnzngr scdr da.

⁸ Krlc trngiu natq kx rmgidrlvz-ngrbo bamu. A' suti drtwrnge kx drtqmu navq kz nzrka-nrbalq-krbzmu da mz leplz mz nzaelwapx-krmu kx mrlzti-angidramu nidr, da kc tzwaipe lr Masedonia kxnzrlxngiting. ⁹ Murde Kxetu rgu Jisz Kxnzmcpk aelwapx-ngrbzle zmrlz ngrde kxmyalz bamu. Rlaszmle Heven mz nzngini-krde bcnyr elr, mz nzngini-alzu-krde kxtr-rngiscu mz nrlc, murde naprtr-kzamu mz da kxmrlzting sc Gct kcng tzvzpxmqng mz nzwz-krde kx etq-nrbalqngr drtq mrka.

¹⁰⁻¹¹ Mz yiz lc tqvztxpe nimu lr Korint yzutr-kaiamu nzatakqtingr trau lcng. X drtqmu vq zlwz nzale-krmule. A' na-ayrkrpxamu nzatakqtingr lc mz nzrka-mou-krbzmu trau kznike ycpebz bamu mzli ka. Murde nzvqtikr drtqmu lc mz nzale-krmule navz zvv nakrlzbzle nzayrkrpx-krmule. Pibo da lc mz nzokatr-krnge nimu. ¹² Gct suti drtwrde kx navqti drtqmu nzrkapxngr da. X mz nzvqkr drtqmu lc, abrtzlvzle nzrkapx-krmu da, mz nzvz-nqblq-krde da kx ngisamu, kxmule-esz' doa kx esz' kapxle da kqlu o pipz.

¹³ A' trsutiu drtwrnge nzkapx-krmu da kxkqlu x trpnz-alzungr kx nangi scmu. A' nimu amrlx narngisc-kzpu da kx natakitrde nzmnc-xgle-krmuleng. ¹⁴ X mzli ka mz nzrngisc-krmu da kxkqlu takitrde nzokatr-krmu kx trpnzngr scdr da. X mz kzdu mzli kx natakitrde, sa na-ayzlu-kzpplr bamu. ¹⁵ Murde Nzryrngrkxtr mz nzycmnetr-krde mz dakxanzng kx atwzlr-ngrm Gct lzke, rpile kx, "Doa kx rtwz dakxanzng kxkqlu, bzkq ngi natxpwzle esz'-krde. Murde doa kx rtwz dakxanzng kxipz, narngina kz dakxanzng kx namnc-xglele." *

¹⁶⁻¹⁷ Rtulrtr-ngrbzkr mz Taetus nzyzlu-mou-krbzle bamu. X angqlzlvzle drtwr lc, murde aotipe kz drtwrde nzale-krdele. X awi-ngrbo mz Gct nzbatr-krbzle nzvqtikr drtqde nzokatr-krde nimu mz nzatakqtingr lc, da kc tqwai nzsuti-kzkr drtwrnge le. ¹⁸ Atwzlr-ngrbzkr Taetus x kzdq mzlegu kx nzamatq lr makxtr amrlx mz nzyapwxtipx-krde Nrpakxmrlz. ¹⁹ X nzmcpxlr nide murde navznekr badr mzli kc natwz-ngrbzkr trau lcng mz lr Jerusalem. Alekr nzwzngr lc mz nzamatq-krgr Kxetu rgu x mz nzaelwapx-krbzkr mz lr Jerusalem kx suti drtwrgu nzokatr-krgu nidr.

²⁰ Alekr da amrlx mz nzatakqtingr lc, murde leplz ma tzpibqtilr nigr mz kxmu nzolvz-krgr trau kxetu lc. ²¹ Murde suti drtwrgr nzale-krgr da kxtubq mz nzobqkr Gct x mz nzobqkr leplz.

²² X atwzlrmi-ngrbzkr ncblo lcng nzling kzdq kz mzlegu. Murde krlzkr kx nide ncblo kx brti drtwr nzwztr-angidr-krbzle mz Gct. X drtqde vq zlwz nzokatr-krde nimu mz nzatakqtingr lc, murde Taetus pibzle bade nzmrlzkr nqmq krmu. ²³ Ncblo lcng brti drtwr mz nzolvz-krdr trau scmu. Murde Taetus nide kztenge kx wz-lxblrkr ncdr mz nzokatr-krgr nimu. X kxzaclveng dzbe lrmakxtr nzatzlrl-ngrbzlr mzlegu lcng nzling x leplz nzglqlzlr Kxnzmcpk mz nzmrlzkr nqmq krdr. ²⁴ Mz nzmu-krde lcde, aoduamu nidr murde dzbe lrmakxtr kcng tzatzlrl-ngrmlr nidr bamu nakrlz-angidrlr kx trpokiarwu mz nzglqpx-krnge nqmq krmu.

9

¹⁻² Krlzx kx abzo mz yiz kc tqvztxpe, vqti drtqmu nzprtr-krmu mz nzatakqtingr trau lc mz nzokatrnrgr lr Jerusalem kxnzrlxngiting. X trpengr

* ^{8:15} Nzrlaszngr 16:18

nzpi-krbo bamu kx da lc ngi da kx myapxbz. A' nakrlzamu kx glqpx-zlwzbo nimu mz lr Masedonia Provins. X mz nxzlxr-krdr nzvqkr drtqmu mz nzatakqtingr trau lc, batrpzle badr nzvq-kzkr drtqdr nzprtr-kz-krdr elr. ³⁻⁵ Mz nzmu-krde lcde, na-atwzlr-ngrbo mzlegu lcng tq bamu, mz nzatakqti-krbzlr bamu trau kc tqpiamu kx nakapxamu. Murde suti drtwrnge kx trau lcng nayc pnz kai mzli kc nakaputr-ngrbo bamu. Mrlz nzoliqti-angidr-krmule, murde ma tqmyangr drtqmu x drtqnge kz mz nzglqpx-krnge nimu, nzmu kzdung lr Masedonia navzbzkr badr. A' mrlz nzoliqti-kai-krmule, murde ma tzrpi drtwrdr kx rtulrtr-ngrbo bamu nzkapx-krmule.

⁶ Murde nzrka-ngrbz da mz kx trpnzngr scdr da apule npengr da mz nrlanc nyz Gct. X esalz-ngrmle bagu kx sa na-amrlzle doa kx alele da lc. X Nzryrngrkxtr alvztr-ngrde nigu kx, "Doa kx pe dakxnzng kxipzne, sa narkqtile da kxipzne kz. A' krkcng tqpe dakxnzng kxkqlu, sa narkqti-kzle da kxkqlu." ⁷ Mz nzmu-krde lcde, doa kxesz' mz nimu, nakrka'-kai-ngrbzle mz Gct x nakapxle nike pnz drtwrde nakapxle. A' bzkq rkapxq murde mz drtfrm nzrtulrtr-ngrbz bam, murde ma tqavzbzle drtfrm. Murde Gct abrtzlvz-zlwzle doa kx rka-nrbalq da kx vzdz-angidrm mz nabzde. ⁸ X mz nzale-krmu da lc, Gct krlz-zvzle nzrka-nrbalq-krbzle da kxkqluting bamu, mz nzvz-nqblq-krde zmrlz ngrde kxmyalz-esz'ngr. Murde sutitx drtwrde kx namnc-zpwx-zvzamu mz nzrtwz-krmu da amrlx kx takitrde nzmnc-xgle-krmuleng. X suti kz drtwrde kx nartwzamu da kx nzmyaszpxlr da lcng, murde naokatr-kzamu kx trpnzngr scdr da mz nzkqlukr dztumung. ⁹ Murde Nzryrngrkxtr ycmnetr-ngrde ncblx kx rka-nrbalq da mz nzrpi-krde kx, "Tresakiu nzrka-krbzle da mz kxrsuti drtwr. Vz zvz nzayzlu-krbz Gct bade mz nqmq krde lc tqtubq." ¹⁰

¹⁰⁻¹¹ X rpi kz Nzryrngrkxtr kx, Gct rkam "rtq da kx napeti. X rka-kzp dakxnzng kx nangq." ¹¹ Mz nzmu-krde lcde, nzrka-krbzle bamu da x nzrkrlngr kxkqluting sa naetunepx zvz, murde nzokatr-nrbalq-krmu leplz naetunepx zvz kz. X trau kcng natwzbzkr mz lr Jerusalem, sa nabatrpzle badr nzawi-krbzlr mz Gct mz nzokatr-nrbalq-krmu nidr. ¹² Delc, da lcng li nzvzpxmqng mz nzokatr-krmu leplz kcng trpnzngr scdr da. Leplz lcng nzrtwzng da kx takitrde nzmnc-xgle-krdrleng x nzawi-krbzlr mz Gct etunepx zvz. ¹³ X lr Jerusalem lcng, mz nzngini-krdr lr Jiu, sa naglqlzlr Gct murde nzokatr-nrbalq-krmu lc nidr, kxmule-esz' trnginipuu lr Jiu. X da lc aelwapx-zpwxbzle badr kx lxngiti-angidramu Nrpakxmrlz x drtqmu vq mz nzvz-nqblq-krmu natq Jisz. ¹⁴ X sa nakrka'-ngrdr nimu mz nivz kxetu, murde Gct aelwapx-ngrbzle badr zmrlz ngrde kxmyalz mz nzokatr-krmu nidr. ¹⁵ X na-awi-kzpzu mz Gct mz nzka-nrbalq-krmle Mrlxde bagu, kxmule-esz' rblxm bagu nzrpi-krgu nzetukr zmrlz ngrde lc tqmyalz.

10

Pol Ayzlubzle Natq Leplz Kcng Tzhibqtilr Nide

¹ Mzli ka, ninge Pol, sa na-ayzlubo natq leplz kcng tzhibqtilr ninge, mz nzrpikr kzdung nimu kx trngini-angidrngeu aposol. Nzycmne-krdr kxmule lc murde pnanatix nimu mz letz scngeng, a' vz-nrwx-ngrbo bamu mzli kc tqmnc-ngrgu badr. A' mz nzvz-nqblq-krnge Kxnmcp, avzo-lzbqx x vz-nrwx-ngrbo bamu, mz nzrlxti-krbo bamu kx bzkq pibqtipeamu ninge. ²

² Mzli kc navz-ngrmc bamu, trsutiu drtwrnge nzpnanati-mou-krnge

^{9:6} Nzyrplaxngr 11:18; 19:17; Hosia 10:12; Matiu 10:42; 25:34; Luk 6:38; Galesia 6:7 ^{9:8} Livae 25:35; Lou Kcpwz 15:7-11; Efissz 4:28; Filipae 4:19; 1 Timoti 6:6-10 ^{9:9} Sam 112:9
^{9:10-11} Asaea 55:10 ^{10:1} Sekaraea 9:9; Matiu 5:5; 11:29

nimu mz nzayrplapx-krnge nimu. A' mwx sa na-alebo da lc mz leplz kcng tzrpilr kx vz-nqblqkr drtwr leplz mz nrlc ka. ³ Kxmule-esz' mnckr mz nrlc, a' trotablr-nqblqkru nqmq kr lr nrlc mz nzotablr-krgr badr leplz kcng tzrpwa'-ngrmlr nwz-w-krgr. ⁴ Murde zmatq ngr nzota-krgr trvzpxpuu mz natq leplz kxtrnzrlxngitiung mz nzesabrttingr leplz. A' plzpxkr natq angidr kx kam Gct bagr. X natqdeng nzrngiscng zmatq ngr nzodatingr nqmq nr drtwr kznikeng trngiu da angidr. Natq lcng xplr x nzkrlzlr nzbatr-krbzlr mz leplz nztekqtr-krdr nqmq nr drtwrdr. Murde nqmq nr drtwrdr lcng tzvz-rbrng nzapulr lrpalvc kx xplr kx nzawxonr mz zmatq ngr Gct. ⁵ Murde milxtxokr drtwr x nzycmnengr amrlx kcng tzrpwa'-ngrbzlr mz leplz nzkrlz-angidr-krdr Gct. X aovxiokr nqmq nr drtwr lcng amrlx tzvz-rbrng, murde nzaotikr drtwr leplz da navz-nqblq-txpwzle me pnz drtwr Kxnzmcpx. ⁶ X mzli kc navz-ngrmigr bamu x namc-ngrbzkr krkcng nzmnclzpebzng mz Kxnzmcpx, sa na-ayrplapx-atekr nimu kcng tzxpqbrr-ngrdr nide mz nzpxtxpx-krmu nzmnclz-krmamu bagr.

⁷ Leplz kcng tzpibqtilr nigr nzrpilr kx nidr leplz neng Kxnzmcpx. A' nakrlz-angidramu x leplz lcng nakrlz-kzlr kx nigr kz leplz nedeng. ⁸ Drtnge trmyau mz nzglqpx-lzbq-krgr mz zmatq kc tqkaom Kxetu rgu bagr. Murde zmatq lc ngi dalr nzokatr-krgr nimu mz ntzu-amqngi-krmu mz nzrlxngiti-krmu, a' trngiu dalr nzatrkatingr nimu. ⁹ Dekc trsutiu drtwrige nzmwxlrti-krmu ninge mz natq kcng tqyrbam u mz letz scngeng. ¹⁰ Krlzx kx kzdung nimu nzrpilr kx, "Nzycmnekr Pol mz letz scdeng matq-esz'ngr. A' mzli kcng tqmnc-ngrgu badr apunede ncblo kxmane x nzycmne-krde trxplru." ¹¹ A' rngidrlvz-ngrbo mz leplz lcng, kx mzli kc namnc-ngrgu badr, sa na-atutr-angidrkr natq amrlx kcng tqyrbzkr mz letz scgrng, mz nzaelwapx-krbzkr bamu kx rngiscgr zmatq.

¹² Trmrlzu nzrpi-krgr kx apukr leplz lcng. Murde nzrpilr kx nidr leplz kxntubqng x nzmyapxbzng mz kzdung kz kxntzung. A' mz nzaotikr drtwrdr nike tubq x myapxbz, nzobqtixtrpwzlr nidr esz'-krdr. Krlc aelwapx-ngrde kx nzngqngu-angidrung. ¹³ A' trapukru nidr. Murde glqpx-lzbqtx-ngrpwzkr zmatq kc tqkaom Gct bagr. X nimu amrlx ngrmu mnclzmamu bagr mz zmatq lc. ¹⁴ Nzmu trnayapwxtpxpwzkr Nrpakxmrlz bamu, vz-rbrkr mz nzrpi-krgr kx namnclzmamu mz zmatq ngrgr. A' ryapwpxp-ayrnr-ngrbzkr Nrpakxmrlz bamu. X rngiscgr zmatq ngr nzngini-krgr aposol kcng tqmnlzbzmu badr. X krkcng tzvzmqng mz nibrgr trnznrgiscung zmatq lc. ¹⁵ Trglqpx-lzbq-ngrgru nwzwngr kx nzale kzdung kz leplz, da kc tzwailr. A' obqtipxkr mzli kc nabrpengr nzrlxngiti-krmu, murde mzli lc nakrlzamu nzokatr-krmu nigr mz nzvzpx-krgr mrkang kqlu mz nzyapwxtipx-mou-krgr Nrpakxmrlz. ¹⁶ Murde suti drtwrgr nzyapwxtipx-krbzkrle mz leplz kcng trnzzlralr Nrpa lc. X dekc krlzkr nzglqpx-lzbqtx-krpwzkr nwz-w-krgr esz'-krgr, a' trngiu nwzkr kzdu-kzng leplz.

¹⁷ X nzglqpx-lzbq-krgr mz nwz-w-krgr lc, vz-nqblqle Nzryrngrkxtr kx rpile kx, "Trtakitrdeu doa nzglqpx-lzbq-krde mz nike ale, a' naglqpx-txpwzle Yawe mz nike ale." ¹⁸ Murde kxntglqpx-lzbqng esz'-krdr trabrtzlvz Gct nidr, a' nide esz'-krde kx takitrde nzglqpx-krde leplz kcng tqabrtzlvzleng nidr.

11

¹ Mzlengeng x inwengeng, kxmule-esz' krlzamu kx takitrpwzle Gct nzglqpx-krde doa, a' suti drtwrige kx narlr-ngrmamu bange nzglqpx-lzbq-

krnge mz nzycmne-ngqngu-krnge, da kc tqwaipeamu. Murde ncblo lcng tqabrtzlvzamu mzli ka, trnginidru aposol angidr. ² X tubq nzdobulvz-krnge nimu, mz nzapu-krbo bamu trtemu kc tqyapwxtipx-ayrnr-ngrbo Nrpakxmrlz bamu. X suti drtwrnge kx nivz lrmu natubq mz nzmlztitx-krpwzmu Jiszs Kxnzmcp, da kc tqwai trte olvi kx nayrlz suti drtwrde kx nqmq kr olvi lc natubq, mzli kc narlr-ngrbzle mz ncblo ngrde. Murde esalz-ngrbo mz Jiszs kx nanginimu leplz kxnztubqng. ³ A' mwxlrtix kx Setzn sa na-avz-rbrbzle drtwrmu x nabatrzle bamu nzvecpx-lzbq-krmamu mz nzmlztitx-krpwzmu Kxnzmcp, da kc tqwai pnz Setzn mz nzesabtri-krde Iv. ⁴ Murde lxngitiamu nrpa kx nzyapwxtipx ncblo lcng, kxmule-esz' blepxbz mz Nrpakxmrlz kc tqyapwxtipx-ayrnr-ngrbzkr bamu. X suti drtwrmu nztwz-krmu kxmnc mzllilxr kx trngiu Mqngrkxtr.

⁵ Kxmule-esz' ncblo lcng nzrpilr kx nidr aposol kxnzmyapxbzng, a' mz drtwrnge trnzmyaszpxlru ninge. ⁶ X kxmule-esz' trkrlz-zpwxwxu kxmu nzycmnengr, da kc tzwailr, a' krlzx nzalvztrnegr angidrng. X aelwapx-ngrbzkr bamu zmatq ngr nzrkrlzngc lc mz da kx pibzkrng bamu x aletikrng mz mzlimu.

⁷ ?Nike tqrpiamu mz drtwrmu kx trmrlzu trnzrtwz-krngeu dztumung mz nzyapwxtipx-krbo bamu Nrpakxmrlz? Murde apux Kraes mz nzavzo-lzbq-krnge murde naokatr x nimu, a' rpiamu kx trtakitrdeu ninge. A' tratrktiwxu nimu mz da lcng. ⁸ Murde mzli kc tqryapwpxp-ngrbo bamu, rlr-ngrbo mz kzdung kz dzbe lrmakxtr nzokatr-krdr ninge mz trau. Murde nzkrlzlr kx ninge trtedr mz Kxnzmcp. ?Myx kxmule, ncblo lcng tzpibqtilr ninge narpi-kzlr kx pnatibo dztu dzbe lrmakxtr lcng? ⁹ Kxmule-esz' kzdung mzli trpnzngr nange dakxanzng, a' tr-rlxpou da bamu. Murde mzli lcde, kzdung mzlegung kcng Masedonia Provins nzvzmqng x nzrkamqng bange trau kx namnc-xglex. X trpnzngr nztekqtr-krnge nqmq krnge lc. *

¹⁰ X pi-zvzbo da angidr bamu, da kc tqwai Kxnzmcp. Murde tr-rlxpou da bamu, nimu lr Akaia Provins, murde ma tzrpi leplz kx pokia-ngrne nzglqpx-lzbq-krnge nz wztr-nrbalq-krbo bamu. ¹¹ Kzdung leplz nzrpibzlr bamu kx trnzrtwz-krngeu dztumung drtwr ngrde kx trmrlztiwxu nimu. A' nzpokiang, murde krlz Gct kx mrlzti-zlwzx nimu. ¹² Ncblo lcng tzpibqtilr ninge nzrpilr kx rsakrlrkr badr mz nzprtr-krdr mz nz wztr-nrbalq-krbo mz leplz, murde na-awx-nabux nzglqpx-lzbq-krdr lc. ¹³ Murde ncblo kxdrka'ngr lcng tzesabtilr nimu mz nzrpilr kx nidr aposol neng Kraes, a' trnznginidru aposol angidr. ¹⁴⁻¹⁵ Bzkq kctipxamu nidr. Murde kxmule-esz' ncblo lcng tzapusr-lzbq-ngrdr kxnzawzng ne Gct, a' nzvz-nqblqlr nqmq kr kxetu rdr Setzn, kc tqapusr-lzbq-kai-ngrde enjri kxluli ne Gct. A' mzli kc nayzlu-ngrm Jiszs, sa na-ayzlubz Gct badr nikeng nzalelr mz nrlc ka.

¹⁶ Nzmu narpiamu kx ngqngux, mrlz nzlalztq-krmamu bange nzglqpx-lzbq-krnge mz nzycmne-ngqngu-krnge, da kc tqwaipeamu mz nzlalztq-krbzmu mz ncblo lcng tzglqpx-lzbqng. ¹⁷ A' nzycmne-krnge trapuleu nzycmne-nqblq-krnge Kxnzmcp. A' nzglqpx-lzbq-krnge apule kxnzngqngung kcng tzbrti drtwrdr nzglqpx-lzbq-krdr. ¹⁸ A' mz nzlalztq-krbzmu mz nzglqpx-lzbq-krdr, nalalztq-kzpa'mu mz nzglqpx-lzbq-krnge. ¹⁹ Mz drtwrmu yrplapx-zlwzamu. ?A' myx kxmule tqabrtzlvz-ngrnamu ncblo

² 11:2 Matiu 22:1-2; Jon 3:29; Efisz 5:22-32; Nzaelwapxng 19:7-8; 21:2, 9 ³ 11:3 Nou 3:1-6, 13

⁴ 11:7 1 Korint 4:12; 9:3, 12, 15-19 * 11:9 11:6 Mwx Pol ycmnetr-ngrde nzamrlz-krde nrkrdrtq leplz x nzale-krde da kxnzktipxng mz zmatq ngr Mqngrkxtr. 11:9 Nqmq kr Pol bletipxbz mz nqmq kr aposol kxnzpokiang. Murde nzrlx-zvzbzng trau kxkqlu mz lr Korint mz nzaetunepx-krdr trau scdr x zmatq ngrdr.

kxnzngqngu lcng? ²⁰ Murde abrtzlvzamu nidr, kxmule-esz' nzapusr-ngrdr nimu kxnzawz nedrng, x nzrlx-zvzbzng bamu trau kxkqlu, x nzesabrtiir nimu, x nzobqszolr nimu, x nzamyatibzlr drtqmu mz nzviplatr-krbzlr blzmr naomu. ²¹ Drtwrnge vzttx zlwz murde nigr ncblo kxnzmaneng x rblx nzvz-nqblq-krgr nqmq krdr.

A' abrtzlvz-kzamu nzlalztq-krbzmu mz ncblo lcng nelzdr tqbr mz nzglqpx-lzbq-krdr. X mzli ka nalalztq-kzpa'mu mz nzycmne-ngqngu-krnge, murde nelzng br kx sa namyaszpxx nidr mz nzglqpx-lzbq-krngeng.

²² Nzglqpx-lzbqng mz nzngini-krdr lr Hibru, a' ninge kz. Nzrpilr kx nidr leplz neng Gct mz nzngini-krdr lr Israel, a' ninge kz. Nzrpilr kx nzvzpxmqng mz nqvi lr melrmqgr Ebraam, a' ninge kz. ²³ Nzrpilr kx nzwztrpzng mz Kxnzmcpx. X kxmule-esz' lukurnr-ngrne mz nzpi-krngele, a' nzwztr-krbo bade myaszpx-zlwzle nidr, mz da lcde seleng. Vz zvz nzyapwxtipx-krnge Nrpakxmrlz. Nzadwatrngr ninge mz presin nzwrd kqlu. Nztabwxti-krdr ninge nzwrd kqlu kx ycpwz pipz nzbz-krnge. ²⁴ Nzwrd nzhvqn kxnzetu r lr Jiu nzikla-krdr ninge. X mz nzwrd lcng nzlvqn, nzwrbz nzpnu-tq-nrade-rpwxmz (39) lxblr. †

²⁵ Nzwrd tq nztzngr lr Rom ninge mz dapunc. Nzwrd esz' nzvaebrtingr ninge mz rplz. Nzwrd tq mnco-ngrmc mz lcsu kx nzwxlzng. X mz kzdq mzli lcdeng, lvabetilzx mz dapunc prla zbz kx yc atwrnrngr esz'.

²⁶ Nzwrd kqlu kx vzpx-ngrne mz nzwztr-krbo mz Kxet. X mz nzvzpx-krngeng amrlx ptilzle ninge da kxtrka kxkqlu. Murde rmctix ncblo kxayo, x lr Jiu x kxtrngiulrJiu kcng tzaetqbzlr drtqng. X leplz kcng tzpokiang mz nzrpi-krdr kx nidr leplz neng Jisz, nzatrkat-kzlr ninge. X rmcti-kzx nubla ngr lue x trlipu kxet. Kxmule-esz' mnch mz mztea o peto, a' da kxtrka nzptilz-zvzlr ninge. ²⁷ Yctxbz nzwz-kato-krnge x kzdung mzli trmwipnzwxu. X mzli kqlu kx trpnzngr nange da x mqnge lue, x mzli kqlu kz kx trmu-ngrne. X mzli kqlu kx baongr drtqng murde trpnzngr me namnc-ngrne x trpnzngr scnge lrpz. ²⁸ X mou, mz zbz kang kqlu yc txpwz mz drtwrnge lrmakxtr amrlx kcng tzmnczmqng bange. ²⁹ Murde nabzng talvzo zvz mz nzxlr-krnge kx nabzdr nrgo. X ngyatx-zlwzng drtwrnge leplz kcng tzataolr nidr mz alwx.

³⁰ A' mz nzglqpx-lzbq-krnge mzli ka, naglqpx-lzbq-ngrpwo mz da kx aelwaxpx-ngrde kx ninge ncblo kxmane. ³¹⁻³³ Murde kzdq mzli kx mnc-ngrne mz taon kxet Damaskzs, gavzna kc tqmnclzbz mz King Aretas, suti drtwrde nzolvz-krde ninge. Zbz sc tqpipebzle mz ncblo ngr vea nedeng, nzaclve-krdr naobz amrlx ngr taon lc. A' kzdung lrmakxtr nzokatrlr ninge. X nzadwaolr ninge mz topla kxet mz nzapu-krnge dakxnnzng. X nzpetrpzlr nqvi elr, x sc tzavzopelr ninge nrlarde kx yz ngr bz ngr Damaskzs, murde nayrbqpx, mz nzapu-krnge ncblo kc trpnzngr scde zmatq. X Gct krlzle kx trpokiaxwu. Nide kc tqngi Trte Kxet rgu Jisz, x nzrglqlz-zvzng nide tqyc tqyc. Eu. *

12

¹ Kxmule-esz' trbatrpwzleu bamu ngrpi-krmu kx ninge aposol ngrmu, a' naglqpx-lzbq-mopwo. Murde mzli ka naycmnetrpex mz nzobq-rmwiblengr x da kx yc-kapq-pnzng kx aelwa-ngrm Kxet bange. ²⁻⁴ Yiz

† ^{11:24} Lou sc Mosis rlr-ngrbzle mz lr Jiu nzikla-krdr ncblo nzwrbz nakrlz-txpwzle nzpnu-kpxpx (40), murde ma tzabzlr nide. A' lr Jiu pnzpe drtwrdr kx nakrlz-txpwzle nzwrbz nzpnu-tq-nrade-rpwxmz (39), murde ma tzxpqbzlr-ngrdr lou lc mz nzrlwx-rbr-krdrle, x sc tzkrlzpebzlr nzwrd kx nzpnu-pwx-nrade-esz' (41). [Lou Kcpwz 25:1-3] * ^{11:31-33} Aposol 9:23-25

nzpnu-esz'-nrade-pwx (14) kx vztxpe, avzdz Gct ninge Heven kc tqmyalz-esz'ngr. Trkrlzwxu kx vzdzx mz nrkrdrqng kzo mz mqngrnge txpwz mz nzobq-rmwiblengr lc, a' Gct kx rkrlz. A' krlz-angidrx kx mncx Me Mncngr Gct. X mz nzmnc-krnge elr, xlrx da kx rblxm bange nzyapwxtrngr mz natq ncblo, x nzrpwa'-kz-ngrm bange nzyapwxtipx-krngeleng. *

⁵ Glqpx-lzbq-ngrne nzobq-rmwiblengr lc, a' Gct kx aelwapx-ngrm bange. Mz nzmnc-krde lcde, glqpx-lzbq-ngrne da kx aelwapx-ngrde kx ninge ncblo kxmane. ⁶ Kxmule-esz' glqpx-lzbq-ngrne da kx obq-rmwible, a' trycmne-nqnguwxu. Murde napitxpwo da kx ngi da angidr. A' trnaycmnetrpewxu mz da lc, murde ma tqamatq-zlwzamu ninge mz nzobq-rmwible-krngeng. Murde suti txpwz drtwnge kx leplz naglqpxlr ninge mz nike nzmclr alex, x nxzlrlr pix.

⁷ X ninge kz, trmrlzu nzglqpx-lzbq-krnge mz nzobq-rmwible-krngeng. Mz nzmnc-krde lcde, rlr-ngrm Gct nzprtr-zvz-krnge mz kzdq nzkxpung. Murde nakrlz-angidrx kx trpnzngr scnge zmatq, a' namnc-xglex nide. Nzxpung lc ngi menrpa kc tqatwzlr-ngrm Setzn mz nzapu-krde dxpa' kx luplxti-zvzle nrkrdrqng. ⁸ Nzwrd tñ kx rlxti-ngrbo mz Kxetu nzkatpx-krbzle nzxpung lc bange. ⁹ A' rpimle kx, "Zmrlz rnge kxmyalz takitr-zvzde nzokatr-krde nim, kxmule-esz' da kx nzprtzing. Murde zmatq rnge wz angidr mz nzmnc-xgle-krm ninge mz mzlir nzxpunr-krmqng." X mz nzlxngiti-krnge da lc, abrtzlvzx nzngini-krnge ncblo kxmane. Delc tqgqlpx-lzbq-ngrne mz da lc, murde zmatq ngr Kxnzmcpk na-aelwapx-ngrne mz nzlu-krnge. ¹⁰ Mz nzmnc-krde lcde, kxmule-esz' ninge ncblo kxmane, x leplz nzpibqtilr ninge, x da kxtrka nzptilzlr ninge, x leplz nzaetqbzlr drtqnge, x prtrx mz nzxpung, a' abrtzlvzx da lcng mz nzvz-nqblq-krnge Kxnzmcpk. Murde zmatq ngrde wz-angidrm bange mzli kc tqmnc-xgle-ngrne nide.

¹¹ Nimu kx rbatrp bange nzycmne-nqngungr mz nzglqpx-lzbq-krnge lcng. Murde nimu kx takitrde nzglqpx-krmu ninge mz nzmrlzkr nqmq krnge. Murde kxmule-esz' ninge ncblo kxmane, a' krlzamu kx myaszpx ncblo lcng tzrpilr kx nidr aposol kxnxmyalzng. ¹² Murde mzli kc tqmnc-ngrgu, aelwapx-ngrbo bamu kx ninge angidr aposol, mz nzale-zvz-krnge rkx, x da kxnxkctipxng, x da kxmatq kxkqlu mz zmatq ngr Gct. ¹³ Apusrngrne nimu da kc tqwaisr-ngrne lrmakxtr kc-kzng tzmnclzmqng bange. A' da esz'txu kx tr-rlr-ngrpou bamu, nzokatr-krmu ninge mz tra. Nzmli kx tqatrkatix nimu mz da lc, rlxti-zlwzbo bamu kx mwx elx naipqamu ninge mz nabzmu.

¹⁴ Mzli ka ycpe pipz nzvzkr-mopwo bamu mz nzwrd krtq. X sa navz zvz trnzrlr-krpou bamu nzokatr-krmu ninge mz tra. Trsutiu drtwnge nzka-krmamu dztumung bange, a' suti drtwnge nzka-krmamu bange nabzmu, mz nzamatq-krmu ninge. Murde nimu doa nengeng mz Kxnzmcpk. X trtakitrdeu doa nzaclve-krdr trtedr. A' takitrde trtedr ncdr lxedr nzaclve-krdr doa nedrng, da kc tqwaix mz nzaclve-krnge nimu. ¹⁵ Delc abrtz-zlwz-ngrne kx trpnzngr da kx lolvz-moux mz nzokatr-krnge nimu, murde mrlztix nimu mz nabzng atwrnrngr. X mrlz kz nzmrlzti-krmu ninge kxipiz.

¹⁶ Mz trnzrk-a-krpwa'muu lc bange tra, kzdung leplz nzrpilr kx esabrtix nimu x sa napnatix trau kcng tqatakqtiamu mz nzokatr-krmu kx trpnzngr

* ^{12:2-4} Mz drtwr lr Jiu, Heven kc tqmyalz-esz'ngr nide 'Me Mncngr Gct.' Nzrpi-kzpz 'Paradaes' mz natq lr Inglis. Krlc me navzki leplz kxnxrlxngiting mz nibr nzbz-krdr. Mc kz Luk 23:43 x Nzaelwapxng 2:7, x natq lc mrkc Nzalvstr-ngrng Kxmyapxbz.

scdr da. ¹⁷ A' nzpokiang, murde ncblo kcng tqatwzlr-ngrbo bamu trnzatrkatilru nimu x trnzpnatipwzlr dztumung. ¹⁸ Murde mz nzatzwzlr-krbo Taetus, atwzlr-kz-ngrbo kzdq mzlegu badr. X krlz-angidramu kx Taetus tresabrtileu nimu mz nztwz-krde trau scmung. X nqmq krgr esz' mz nzmnclz-krbzkr mz Mqngrkxtr. †

¹⁹ Mwx mz drtwrmu rpiamu kx yro-ngrgr da lcng mz letz lc mz nzaelwapx-krgr nztubq-krgr. A' trtingr! Murde yrtxopwzkr da kx suti drtwr Kxnzmcpx nzpipx-krbzkrle bamu. X mz nzkrlz-krgr kx Gct obqom bagr, da amrlx kcng tqalekr x tqpikr ngi dalr nzaxplr-krbzkr nzrlxngiti-krmu, murde mrlzti-zlwzkr nimu. ²⁰ Mwxlrtix kx mzli kc nakrlz-ngrbo nimu, trna-abrtzlvzwxu nimu kcng tzpxtxpx-ngrdr da kcng tqpiro bamu mz letz kc pnz. Murde vz-rbrbeamu mz nzotablr-lzbq-krmu, nzdobu-krmu, nzngyakr drtwrmu, nzota-krmu, nzrpibqti-krmu, nzpokia-krmu, nzglqpx-lzbq-krmu x nzayctx-krbzmu nzwzkr leplz. Nzmu kx tqmule lcde, sa trna-abrtzlvz-kzwamuu ninge mz nzayrlplapx-krnge nimu. ²¹ X mwxlrti-kzx kx Gct sa na-amyati-mople drtqnge, murde glqpx-lzbq-ngrne nimu mz nzngini-krnge trtemu mz Kxnzmcpx. Trmrlzu nzayrni-krmu ninge, murde kzdung nimu nzpxtxpx-ngrdr nztekqtr-krdr nqmq nr drtwrdr mz alwx ngrdrng. A' vz zvz nzamyati-krdr drtqdr, nzrmwimi-krdr leplz kx trngiu kernalzdr, x nzamqmiti-rbr-krdr mz nrkrdrdrtqdr. ☀

13

Nzlc-apqbzkr Pol Kxrmnr-ngrbz Mz Krkcng Tzrpwa'-nrbzlr Nzwz-krde

¹ Mzli ka nzwrede kratq deka naoklati-ngrbo nimu. X mzli lcde, sa na-ayrplapxx leplz kcng tzrpilr na-atrkatilr nzwz-krnge. Murde sa navz-nqblqx Nzryrngrkxtr mz nzsri-krde kx, "Bzkq rpiq kx doa vz-rbrpe, a' mz nzycmne-krbzme natubz du mz nibrm leplz naesz' o nali kx nzmc-kzlr nzvz-rbr-krde." ☀ ² Mzli kc mz nzwrede krali mz nzoklati-krbo nimu, rngidrlvz-ngrbo mz leplz kcng tzmncng mz alwx kx natekqtrlr nqmq nr drtwrdr. X mzli ka mz nzmc-krbo lc rlru, narngidrlvz-kz-ngrpo mz leplz lcng badr leplz kc-kzng tzmncng mz alwx mzli ka. Murde mzli kc navz-ngr-mopwo, trpengr doa kx nayc mz drtwrnge nide, a' sa na-ayrplapxx leplz amrlx kcng tzvz-rbrng. ³ Sa na-alex da lc murde kzdung nimu leplz nzsri-krde kx nzmu na-aelwapx-ngrbo nzrngisc-krnge zmatq mz nzngini-krnge aposol ne Kxnzmcpx. X sa namclr zmatq lc mz nzayrlplapx-zlwz-krnge nidr. Murde trnavz-nrwz-ngrpou badr. ⁴ Mzli kc tztqlvztrngr Kxnzmcpx mz kros, opxm kx trpnzngr scde zmatq. A' mzli ka lupe mz zmatq ngr Gct. Mz nqmq lcpwz, mz nzaxvctr-krbzkr bade, rpiamu kx trpnzngr scgr zmatq mzli kc tqmnc-ngrgu. A' sa namcamu kx prtr-kzpzkr mz zmatq kc tqatulzmle nide mz nzbzngr, mzli lc na-ayrplapxngr nimu.

⁵⁻⁶ Naobqtitramu nabzmu. Doa kx esz' mz nimu, nakrlzle kx Jiszs mncpxm mz nabzm o trtingr. Murde nzmu kx tqlxngiti-angidrpeq Jiszs Kxnzmcpx kc tqbz-ngrde nim, nakrlz-kzq kx abrtrpzme drtwrm bade mz nzyapwxtipx-krbzkr nide bam. A' doa kx Jiszs trmnccpxpuu mz nabzde, trnginideu kxrlxngiti angidr. ⁷ X krka'bzkr mz Gct kx trpnzngr nimu kx navz-rbr mzli kc nakrlz-nrbzkr nimu. Nzkrka'-krgr lc trvzpxpuu mz nzsutikr drtwrgr leplz nzsutikr drtwrgr nzale-krmu da kxtubq, kxmule-esz' leplz trnzmclru zmatq ngrgr. X mz drtwrgr, trngiu da kx

† ^{12:18} Lr Korint nzamrlue-zlwzlr Taetus. ☀ ^{12:21} 2 Korint 2:1-4 ☀ ^{13:1} Lou Kcpwz 17:6; 19:15; Matiu 18:16; 1 Timoti 5:19

myapxbz nzaelwapx-krgr zmatq ngrgr. ⁸ Murde zmatq lc trngiu dalr nzayrplapx-krgr leplz kcng tzvz-nqblqpelr Nrpa Angidr. A' zmatq lc ngi dalr nzvectr-krmgr leplz mz nzlxngiti-krdrl. ⁹ X mzli kc tqolvz-amqngi-ngrnamu nzrlxngitingr angidr, abrtzkr kxmule-esz' zmatq ngrgr yc-kapq. Murde krka'-zvz-ngrgr kx nzrlxngiti-krmu nabr. ¹⁰ Dekc tqyr-ngrbo letz lc bamu mz natq kx xplr mz nzmnc-rlru-krbo bamu. Murde mzli kc nakrlz-ngrbo nimu, trsutiu drtwrnge nzayrplapx-zlwz-krnge nimu mz zmatq kc tqkam Kxetu bange. Murde zmatq lc ngi dalr nzokatr-krnge nimu mz nztu-amqngi-krmu mz nzrlxngiti-krmu, a' trngiu dalr nzamyati-krbo drtqmu o nzatrkti-krnge nimu.

Natq Ngr Nzarl-lzbqngr

¹¹ Mzli ka, kx mzlengeng x inwengeng, naelalz-ngrm drtwrmu Kxetu. X nzrlxngiti-krmu nabr mz nzvz-nqblq-krmu natqngeng, mz nzesz'tikr drtwrmu, x mz nzmnc-zpwx-lxblr-krmu. Murde mz nzale-krmu da lcng, Gct kc tqrkam nivz x nzmnc-zpwxngr, sa namnc mz mzlirmu. ¹² Mz nzrmcti-lzbq-krmu, male-lxblramu mqmu mz nivz.

¹³ Leplz ne Gct amrlx kcng tzmnncng mrka Masedonia Provins, nzrpibzlr bamu kx, "Nimu la."

¹⁴ Krka'-ngrne kx nivz lr Gct, x zmrlzkxmyalz ngr Kxetu rgu Jiszs Kxnzmcp, x nzodutr-lxblr-krmu badr Mqngrkxtr, nayc-zvzbz bamu.

Delape, Ning Pol.

Nzryr-krbz Pol Mz Lr Galesia Provins Natq Ngr Nzaplxtqng Mz Nzryr-krbz Pol Mz Lr Galesia

Aposol Pol yrbzle letz lc mz kxnzrlxngiting kcng tzmnncng mz provins kc Galesia, kc tqngi kandre kc Trki mzli ka. Yrle mz mzlir yiz 48—58 AD mz nibr nzrmcngr mz Jiszs.

Pol xlrle kx kzdung lr Jiu kxnzrlxngiting nzalvztr-rbr-ngrdr da mz kxtrngiulrJiu kxnzrlxngiting mrkc. Nzrpilr kx kxtrngiulrJiu napakrng x navz-nqblqlr Lou sc Mosis, murde na-arlapxng. Nzrpi-kzlr kx Pol trngini-angidrleu aposol, x kx tekqtrle Nrpakxmrlz mz nznkatx-krde kzdung lou kx navz-nqblqlr.

Pol yrle letz lc mz nzaelwapx-krde kx nide aposol angidr, x aposol kztedeng drtwrdr esz'ti badr mz nzalvztr-krdeng mz lrpzki r nzrlapxngr. Pi-kzpze badr kx nzvz-nqblq-krdr Lou sc Mosis trkrlzleu nznatlapx-krde nidr, a' nabrti drtwrdr Kraes. Murde mz nzrlr-lzbq-krbzku mz nzvz-nqblq-krgu Mqngrokxtr, trmnclzpepwzkuu mz Lou, a' vz-nqblqpeku da kx pim Mqngrokxtr mz nabzgu.

Ngalrdeng kxmyapxbz 2:20-21 x dckrlzde kc 5.
Mrkcng Mz Letz Lc

Nike tqyrngr Pol letz lc. [1:1-10]

Nrpakxmrlz kc tqyapwx tipx Pol ngi da angidr murde vzpxm mz Kraes. [1:11-24]

Aposol kc-kzng drtwrdr esz'ti badr Pol mz nzalvztr-krdeng. [2:1-10]

Bzkq atrkatiamu Nrpakxmrlz mz nzrpi-krmu kx namnclzbzku mz lou murde narlapxku. [2:11-21]

Twzku nzlungr angidr mz nzabrtr-krbzku drtwrgu mz Kraes, trngiu mz Lou Sc Mosis. [3:1-14]

Lou sc Mosis trayrkpxleu da kc tqesalz-kaingr Gct. [3:15-22]

Kxnzrlxngiting nzapulr doa kxtopwz neng Gct, mz nzaxvctr-krbzlr mz Mrlxde, a' nzmnclz-ngrbz mz lou apule nznginingr kxnzawz-nrbalqng. [3:23—4:31]

Bzkq mnclzbzmu mz leplz kcng tzsuti drtwrdr nzmnclz-krbzmu mz lou mz nzrlapxngr. [5:1-12]

Navz-nqblqku nzycmne-krm Mqngrokxtr mz nabzgu. [5:13-26]

Mz nzvz-nqblq-krgu Mqngrokxtr nawztrpzku mz leplz. [6:1-18]

¹⁻² Ning Pol, ryrbo bamu, nimu kcng tznginidr leplz neng Gct, tzmnncng Galesia Provins. Nigr badr mzlegung kcng tzmnncng mrka, rpibzkr bamu kx, “Nimu la.” Ning aposol murde Jiszs Kxnzmcpkx nidr mz Gct Trte kc tqatulzmle nide mz nzbzngr, nzmcpxlr ninge. Delc zmatq rnge mz nzaclve-krnge lrmakxtr trvzpxpuu mz leplz.

³ Krka'-ngrne kx Gct Trtegu x Kxetu rgu Jiszs Kxnzmcpkx naokatrlr nimu mz zmrlz ngrdr kxmyalz, murde namnc-zpwxamu badr. ⁴ Nzmncc-zpwxng lc vzpxm mz Kraes, murde sc tqvz-nqblqpele me pnz drtwr Gct Trte, mz nzrlrpx-lzbq-krde mz nzbzngr. Alele da lc murde rpile nakapxle alwx rgung, x na-arlapxle nigu mz nzrvz-nqblqng nqmq kr kxdrka'-ngrng kcng tzvz-rbrng mz da kx nzaoti drtwrdr x mz da kx nzaleting. ⁵ Delc takitrde nzglqpx-krgu x nzamatq-krgu Gct Trte, tqvzpe tqvzpe. Eu. Angida!

Gct Arlapxle Leplz Mz Hxl Mz Lrpzki Esz'txu

⁶ Kctitxpxx kx esablqti-anipeamu Gct kc tqaveatile nimu mz nzmnclz-vzv-krbzmu mz zmrlz ngr Kraes kc tqmyalz. A' sc tqvz-nqblqamu nzalvztrngr kzble mz lrpzki r nzrlapxngr. ⁷ Kxmule-esz' trpnz-moung'r lrpzki r nzrlapxngr, a' kzdung leplz sa tzesabrtlir nimu, mz nztekqtr-krd'r Nrpakxmrlz angidr kx Kraes esz'-krde arlapxle nigu. ⁸⁻⁹ Pibzkr bamu da lc mzli kc tqmnc-ngrgu. [◊] X mzli ka sa tqpipe-mopwc' bamu. Takitrde Gct nzadwatr-krde doa mz Hxl, kxmule-esz' kzdq nigr aposol o kzdq enjrl kxvzom Heven nzmu kx tqalvztr-ngrde lrpzki r nzrlapxngr kx blepxbz mz da kc tqyapwxtipebzkr bamu, tqlxngitipeamu mzli kc.

¹⁰ Tryrpou bamu da lc murde suti drtwrnge nzabrtzlvz-krmu ninge, da kc tqwai nzpi-krdr ninge. Murde nzmu leplz nzabrtzlvz-zvzlr ninge mz nike pibo badr, trtakitrdeu nzngini-krnge kxnxawz ne Kraes. A' da kx myapxbz kx Gct na-abrtzlvzle ninge.

Nrpakxmrlz Kc Tqyapwxtipx Pol Ngi Da Angidr Murde Vzpxm Mz Kraes

¹¹ Mzlengeng x inwengeng, Nrpakxmrlz kc tqyapwxtipxbo trvzpxpuu mz leplz. ¹² X trxltrtr-kzpwc'u mz leplz. A' Jiszs Kxszmcpx nide esz'-krde kx rpim bange, mz nzadcpx-lzbq-krmle bange.

¹³ Krlzpeamu nqmq krnge mzli kc. Murde vz-nqblq-angidrx lou x nqmq krgr amrlx. X lolvz-kzx leplz neng Kraes, mz nzadwatr-krngeleng mz presin, murde ma tzlxngitilr nide. ¹⁴ X myaszpxx nrpr kztengeng mz nzpqlz-krmle mz nabznge nzalvztrkr melrmqgrng.

¹⁵⁻¹⁶ A' trkrlzwxu kx mcpk pnz Gct ninge mzli kc mzke' trnzmcka-ngrde, mz nzngini-krnge aposol nede murde napipxbo Nrpa ngr Jiszs mz krkcng trngiulrJiu. A' mcpkxle ninge mz nzvz-nqblq-krde zmrlz ngrde kxmyalz, kxmule-esz' trtakitrpwu' nzwzngr lc. Zbz kx krlzpebzle mzli kc tqmcpx pnz Gct, sc tqvz-ngrbo Damaskzs. X sc tqaewapxpe-ngrmle bange kx Jiszs Kxszmcpx ngi mrlxde. A' trpnzngr ncblo kx vz-nebax kx na-alvztrle ninge mz nzrkrlzng'r Kraes. [◊] ¹⁷ X trvz-kzwxu Jerusalem murde krkcng tzngini-kaiplr aposol bange na-alvztrlr ninge. A' mz nibr nzrkqlengr ninge, vzx mz Arabia provins. X mz nibr kzdung mzli, sc tqyzlupe-moux mz taon kc Damaskzs. ¹⁸ Zbz yiz tq kaputpx, mz nibr nzrlxngiti-krnge, sc tqvzpx Jerusalem, mz nzryapwx-krgr mz Pita. Mnctikr bade zbzq nzpnu-nrade-nzlvqn. ¹⁹ Mzli lcde, oklati-kzx aposol Jemes, mzle Kxetu rgu, kc tqaclvele dzbe lrmakxtr kc mrkc. A' tr-rmctiwu kzdq kz aposol. ²⁰ Esalzx mz mz Gct, kx da amrlx kx yrbo bamu da angidr. ²¹ Mz nibrde, sc tqyapwxtipxx Nrpakxmrlz mz provins kcng Siriz x Silisia, mrlcdeng trnzkqlu-ngru lr Jiu. ²² A' leplz neng Kraes kx nzmnccng Judiz Provins, trnzkrlzkalr ninge, murde tr-rmcti-lzbqkakr badr. ²³ A' nzxlr-ngrdr nrpa, kx ncblo kc tqatrkatile kxnxrlxngiting mzli kc, mzli ka sa tqryapwxpxpe kz Nrpa ngr Jiszs. ²⁴ X nzglqpxlr Gct kc tqtekqtrle ninge.

2

Kxnxaclvelr Dzbe Lrmakxtr Kcng Jerusalem Drtwrdr Esz'ti Kx Nzalvztrkr Pol Tubq

¹ Yiz nzpnu-esz'-nrade-pwx (14) vztv, mz nibr nzoklatingr ayrnrngr lc, vz-moux Jerusalem. X mzli lc vzkr badr Banabas x Taetus. ² Vz-ngrgr Jerusalem murde opx angidr nzrpi-krm Gct bange navzx. X kx kaputpxebo kc, yrlwr-lxblkrng badr aposol kc-kzng, x kxnxaclvelr dzbe lrmakxtr kc-kzng Jerusalem. X yokaeipx-angidrbo badr Nrpakxmrlz kc tqyapwxtipxbo

[◊] **1:8-9** Aposol 13:2; 13:13—14:20 [◊] **1:15-16** Aposol 9:1-31

mz kxtrngiulrJiu. Murde sutix drtwrnge kx drtwrgr naesz'ti badr mz nzalvztr-krngeng. X murde ma tzatkatilr leplz nzwz-krnge kalr, mz nzpi-krdr kx drtwr kxnzaclve kcng Jerusalem tresz'tiu mz nzalvztr-krngeng. ³⁻⁶ Murde kzdung ncblo kcng tzrpilr kx nzlxngitilr Jiszs, a' nzpokia-ngrdr da lc, nzalvztr-rbr-ngrdr kx ncblo napakrng mz nzvz-nqblq-krde Lou sc Mosis, murde narlapxng. Ncblo lcng nzkrlzlr kx drtqgr opx mz Mevalu Jiszs. A' suti drtwrdr kx namnclz-mopwzku mz Lou sc Mosis. X nzaprr-lzbqbzng mz kxnxrlxngiting, murde natekqtrlr nzalvztrngr angidr. A' plzpxkr Nrpa angidr ngr Kraes, murde ma tzatkatilrle. Tu-amqngikr mz nzalvztr-krgr lcng, murde nakrlzamu lrpzki angidr ngr nzrlapxngr, x narmu ma tqngqngutrpz mz nzalvztr-rbrngr. Aelwa-ngrbzkr mz ncblo kcng amrlx tzaclvelr leplz neng Kraes, kx nzalvztr-krgr ngi da angidr. X kxmule-esz' mz drtwr leplz kxnxkqlung, kxnzaclve lcng nzmyaszpxlr ninge, a' trkxu mz drtqnge nike aotingr drtwr leplz nidr. Murde Gct trkx-kzu mz drtqde nike aotingr drtwr leplz nidr. A' da kx myapx-zlwzbz kx nzalvztr-krdr ngi da angidr o trtingr. Aelwa-ngrbzkr badr kx nzalvztr-krgrng ngi da angidr, x nzaolvzlr nzalvztrngr lcng amrlx, x trpnzngr da kx natekqtrr elr. Murde kxmule-esz' Taetus tqngi lr Grik x trngiulrJiu, a' kxnzaclve kcng Jerusalem, trnzrtulrtr-ngrdru nzrpakrngr nide mz nzaxvctr-krbzle mz Kraes, murde narlapx. ⁷⁻⁹ Krlzamu kx leplz ne Kraes kcng Jerusalem, nzrpilr kx James, Pita x Jon nzaclvelr nidr. X mzli kc ncblo lcng nztqng txxlr-ngrdr nzwz-krnge, nzmclr kx Gct aelwapx-ngrde zmrlz ngrde x nxzplrx-krde mz nzryapwxpx-krbo mz leplz kxtrngiulrJiu. X nzkrlzlr kx krle nqmq kcpwz tqaewapx-ngrde mz nzryapwxpx-krbz Pita mz lr Jiu. Mz nzmu-krde lcde, opx-angidrbz badr kx Gct mcpkle ninge mz nzyapwxtpx-krbo Nrpakxmrlz mz leplz kcng trngiulrJiu, da kc tqwai mz nzmcpx-krbzle Pita nzryapwxpx-krbzle Nrpakxmrlz mz lr Jiu. Zbz aposol lcng nztqng malekr mqgr badr x Banabas, nangi rkx kx nigr kzte-lzbqgr mz nzwzkr Kraes. X drtwrgr esz'ti kx nigr ncdr Banabas nawzkr mz mzli krkcng trngiulrJiu, x nawztrpzng mz lr Jiu. ¹⁰ Da kx nzrlxtitxplr bagr kx nialekr, nzkangr trau murde naxpengr dakxanzng nanginan leplz ne Kraes kx trnzrncgiscung, da kc tqwai nzpnzkr drtwrnge le mzli kc.

Pol Rpwa'-ngrbzle Mz Pita Nqmq Krde Kx Trtubqu

¹¹⁻¹³ Nzalvztrngr lc, kx navz-nqblqku Lou sc Mosis mz nzrlapxngr, vzdz-kaip mzli kx Pita oklati-ngrde leplz neng Kraes mz taon Adiok. Murde mzli kx vz-ayrnr-ngrde mrkc, prtrpz mz leplz neng Kraes kxtrngiulrJiu, x nzmung badr, kxmule-esz' mz nzvz-nqblq-krde Lou sc Mosis batrzple trnztakitr-krdeu nide mz nzprtrngr mz nzangiongr. A' mz nibrde, kzdung lr Jiu nzrlaszmlr James mrkc Jerusalem, x kzdung nidr nzprtrnrg mz dzbede kc tzrtulrtr-ngrdr nzrpakrngr. Zbz Pita vecpx-lzbqbz mz krkcng trngiulrJiu, murde mwxlrtile nzrpikitikr dzbede lc. Zbz lr Jiu kxnxrlxngiting kcng amrlx tzmcng Adiok nzvz-nqblq-kzlr nqmq kr Pita, x tzvecpx-lzbqpe-kzng mz krkcng trngiulrJiu. Mz nzmu-krde lc, Banabas nzaprtipe-kzlr nzvz-nqblqng nide mz nzngini-krdr leplz kx trnzvz-nqblq-angidrlru da kxtubq. *

¹⁴ Zbz nzycmne-krnge xplrtxbz mz Pita, mz mz lr Jiu kc-kzng. Murde opx angidr kx nqmq krde vz-rbr, x trvz-nqblqpeleu Nrpa angidr ngr nzrlapxngr. Rpibo bade kx, "Kxmule-esz' nim kzdq lr Jiu, a' trvz-nqblqpewq da amrlx kc tqyclzm mz Lou sc Mosis. ?E memule tqrtulrtr-ngrbzme

* ^{2:11-13} Dzbede kc tzpkarng nzlxngitilr Jiszs nide Kxnxmcpx. A' mz drtwrdr, lrmakxtr amrlx napakr-kzng, x navz-nqblq-kzlr Lou sc Mosis, murde narlapxng.

lrmakxtr lcng trngiulrJiu nzvz-nqblq-krdr Lou kcng? ¹⁵ Blepxbzku mz ncblo ngr alwx kcng trnzkrzlu Loukxtr. Murde mzku nzmc nzngini-krgu lr Jiu, x krlztipecu Lou sc Gct mzli boipe. ¹⁶ Kxmule-esz', a' krlz-kzku kx leplz trnztubqung mz nzobqkr Gct mz nzvz-nqblqngr Loukxtr lc, a' mz nzrlxngitingr Mevalu Jisz. Dekc, nigu lr Jiu tqlxngitipe-kzku Mevalu Jisz, x drtwrgu br kx atubqtipele nigu mz nzobqkr Gct. A' trvz-nqblqpeku Lou sc Mosis mz ntubq-ngrbz mz nzobq-krde. Trpengr kx narlapx mz nzrvz-nqblqngr Lou lc, murde tratubqleu leplz mz nzobqkr Gct. A' aelwatz-ngrp wzle kx vz-rbrku. ¹⁷ A' kzdung lr Jiu kx suti drtwrdr navz-nqblqku Loukxtr, nzrpilr na-atrkatilr nigu. Mwx narpilr kx nigu kcng tzabtrpwzlr drtwrdr mz Kraes mz nzatubq-krbzle nigu mz nzobqkr Gct, sa tqalebeku alwx. X opxm kx Kraes mailzle nigu mz da kx vz-rbr. A' trtingr! ¹⁸ Murde lxngitipex Kraes mz ntubq-krnge. X nzmu narpix na-atubq-lzbqbo mz nzobqkr Gct mz nzrvz-nqblqngr Lou sc Mosis, vz-nqblq-moux lrpzki kc pnz tqpxtxpxpe-ngrne. X mz nzale-krnge da lc vz-rbr-angidrx. ¹⁹⁻²⁰ Murde mz nzaxvctr-lzbq-krbo mz Kraes, axvctr-lzbq-kzx mz nzbz-krde mz kros. X trmnclzpepwu' mz Lou, murde trpnzngr da kx na-aletrpz Lou kc mz krkcng tzbzpeng. Trvz-nqblqpewxu Lou sc Gct mz nzrlapxngr. X trvz-nqblqpewxu nqmq ngr alwx. A' vz-nqblqx Kraes kc tqlupxm bange, tqkamle bange nzlungr kxmrna. X mz nzlungr kxmrna lc, sc tqvz zvz nzabrrtr-krbo drtwnge mz Mrlx Gct, kc tqaodule ninge x tqbz-ngrde nzarlapx-krde ninge. ²¹ Lolvz-amqngix mz nivz lr Gct x zmrlz ngrde kxmyalz mz nike alepem Kraes bange. Murde nzmu nayzlu-mopwc mz nzalvztr-krnge kx navz-nqblqku Lou sc Mosis mz nzrlapxngr, drtwr ngrde kx nzbzkr Kraes ngi brmrda.”

3

*Twzku Nzlungr Angidr Mz Nzabrrtr-krbzku Drtwrgu Mz Kraes,
Trngi Mz Lou Sc Mosis*

¹ Nimu lr Galesia, lukurnr-ngrnamu! X opxm kx kzdq ncblo rwitipele nimu leu. ?Nike tqlxngiti-ngrnamu nzpokiangr lc? Murde alvztr-zpwxkr nimu mz nzrtqlvztrngr Jisz Kxnxmcpx mz kros x nzbz-krde mz nzarlapx-krde nigu. ² Nadctipx drtwrmu kx Gct kabzle Mqngrokxtr bamu mz nzlxngiti-krmu Nrpa ngr Kraes kc tqyapwxtipxkr. A' trtwztx-pnzwamuu mz nzvz-nqblq-krmu Lou sc Mosis! ³ ?A' nike tqngqngutx-zlwz-ngrnamu mz nzrlxngitingr lc tqpokiangr? Murde abzoamu nzlu-krmu kxmrna mzli kc tqtwz-ngrnamu Mqngrokxtr tqokatrle nimu. ?A' mzli ka, rpiamu navz-nqblqamu Gct mz nxzplk-krmu esz'-krmu? Nakrlzamu kx nzmu trngida-pnzu! ⁴ Tu-amqngiamu mz nzrlxngiti-krmu mzli kc, kxmule-esz'-nzaetqbz drtqmu. A' mzli ka, opxm kx da kxmrlzting kx navzpxmqng mz ntua-amqngi-krmu lc sa nayrkrpxbz mz nzlxngiti-rbr-krmu lc. ⁵ Mzli kc tqmnc-ngrgu, Gct kabzle Mqngrokxtr bamu, x alele da kxmatqng mz mzlirmu. ?Memule, alele da lcng murde vz-nqblqamu Lou sc Mosis o murde lxngitiamu Nrpakxmrlz?

⁶ Na-adcpkx-mopwc' bamu Nzryrngrkxtr kc tqrpile kx, “Ebraam tubqz mz nzobqkr Gct murde brti drtwrde nide.” ⁷ Nayrplatitr narmu kx krkcng tzrlxngiting da kx esalz-ngrbz Gct, da kc tqwai Ebraam, nidr txpwz leplz neng Gct. ⁸ Mz Nzryrngrkxtr, Gct aopx-pnkle kx sa na-atubqtile kxtrngiulrJiu amrlx mz nrlc mz doa kx vzpxm mz nqvi lr Ebraam, krlc Kraes. Murde rpibz Gct mz Ebraam kx, “Mz nqvi lrm, sa na-amrlzx neidu

amrlx mz nrlc ka." ☀ 9 Mz nzmu-krde lc, leplz amrlx kcng tzrlxngiting da kx esalz-ngrbz Gct, da kc tqwai Ebraam, sa nartwzng da kcng tqmrlzting tquesalz-ngrbz Gct bade.

10 X Nzryrngrkxtr alvztr-kz-ngrde kx leplz amrlx kcng tztuong mz nzvz-nqblqngr Lou sc Mosis, nzmnclzbzng mz nzayrplapxkr Gct, x sa navzng mz Hxl. Murde rpile kx, "Gct sa na-ayrplapxle doa kx trangidaleu da amrlx kx yc mz Lou scde." ☀ 11 Trpnzngr kx rkrlz nzatubqti-lzbqngr mz nzobqkr Gct mz nzrvz-nqblqngr Loukxtr. Murde Nzryrngrkxtr rpi-kzle kx, "Nzlukr kxnztubqng tutr mz nzbrtikr drtwrdr Gct." ☀ *

12 Doa kx vz-nqblqle Lou sc Gct, ptxpx-ngrde nzesalz-krde. Murde Nzryrngrkxtr alvztr-kz-ngrde kx, "Doa kx twzle Lou kcng, navz-nqblq-angidrle natqdeng amrlx, x bzkq tao pnz mz alwx." ☀ 13 A' nigu amrlx taoku mz alwx x mnclzbzku mz nzayrplapxngr kc tqvzpxm mz Lou sc Gct. Mz nzmu-krde lc, Kraes arlapxle nigu mz nzayrplapxngr lc. Murde mzli kc tqbzo-ngrmle mz kros, tekqtrle nigu mz nzayrplapxngr. Krlzku kx Gct ayrplapx-zpwxle nide, murde Nzryrngrkxtr rpile kx, "Mrlx kx nzado mz nounc, bz-ngrde nzayrplapxkr Gct." ☀ 14 Mevalu Jiszs arlapxle nigu, murde nzlungr kxboi Heven kc tqkabz Gct mz Ebraam, naka-kzpze mz leplz amrlx kcng tzlxngitilr Jiszs, kxmule-esz' nidr lr Jiu o trngiulrjiu. Bz-ngrde nigu, murde natwzku Mqngrkxtr kc tquesalz-ngrbz Gct mz krkcng tzlxngitilr da kx esalz-ngrdeng.

Lou Sc Mosis Traykrpxleu Da Kc Tquesalz-kaingr Gct

15 Mzlengeng x inwengeng, napibo dq nzycmne-ebzpxngr. Mzli kx kzdq ncblo yro-ngrde drtq doa kx natwzle drtc' nyzde x dztudeng mz nibr nzbdz-krde, trpnzngr kx krlzle nztekqtr-krde nike yrole. Mz nqmq lcpwz, trpnzngr kx krlzle nztekqtrnegr da kx esalz-ngrbz Gct mz Ebraam. 16 Gct esalz-ngrbzle da lc mz Ebraam x mz doa nede. Tresalz-ngrpzwzleu mz doa nedeng, kcng tzngi lr Israel. A' mz Nzryrngrkxtr rpibz Gct mz Ebraam kx, "Mz doa nem." Ycmnetile doa esz'txu, kc tqngi Jiszs Kxnzmcp. ☀ 17 Gct esalz-kai-ngrbzle da mz Ebraam, x mz nibr yiz trtqki-pwx-nzpnu-tq (430) sc tqka-atebzle Lou kc mz Mosis, nangi scdr lr Israel. Mz nzmu-krde lcde, rblx nzkapx-krde Nzesz'tikr Drtwr Gct ncdr Ebraam x Kraes, doa nede. Nzesalz-krde krali tratrkatileu krkc kai. 18 Ka-nrbalq Gct da kxmrlzting amrlx kcng tquesalz-ngrbzle mz Ebraam x Kraes. X natwz-kzku da lcng, mz nzaxvctr-krbzku mz Kraes. A' nzmu navz-nqblqku Lou sc Gct mz nzrtwzng da lcng, e trngipeu da kx nzka-nrbalq. A' Gct ka-nrbalq-zpwxbzle da lcng mz Ebraam, da kc tqwai nzesalz-krdele. 19 ?E mz nibrde, nike Gct tqka-ngrbzle Loukxtr mz Mosis, nangi sc lr Israel? Gct pibzle mz enjrl nedeng, nakabzlr Lou badr. Suti drtwrde nzaelwapx-krde kxnamu nzmnc-zpwx-krdr badr kxmule-esz' nzaleng alwx, nakrlzbzle mzli kc navz-ngrm Kraes. †

20 Loukxtr ngi Nzesz'tikr Drtwr Gct badr leplz nedeng. Mosis nide kc tqtu mz mzlir Gct x leplz nedeng. X leplz mz nrlarde lcng li natutrlr natqdr, murde kzdung da kc tquesalz-ngrbz Gct badr mz Nzesz'tikr

❀ 3:8 Nou 12:3; 18:18; 22:18 ☀ 3:10 Lou Kcpwz 27:26 ☀ 3:11 Habakuk 2:4; Rom 1:17; Hibru 10:38 * 3:11 3:9 Krlcde seleng—nztubqng mz nzobqkr Gct, x nzlu-alongr mrkc Heven. 3:10 Kxmule-esz' aleq alwx esz'txu, xpqbrlr-ngrn Loukxtr, x amnclzbzle nim mz nzayrplapxkr Gct. 3:11 Natq Gct lc drtwr ngrde li. Leplz neng Gct sa namnc-zpwxng mz nrlc ka mzli kx nzlu-krdr vz-nqblq-ngrde nzbrtikr drtwrdr nide. X nzlungr kxboi Heven vzpxm mz nzabtr-krbzlr drtwrdr mz Jiszs. ☀ 3:12 Livae 18:5 ☀ 3:13 Lou Kcpwz 21:23 ☀ 3:16 Nou 12:7; 13:15; 24:7 † 3:19 Mz nzvz-krmle, Kraes sc tqtwzpele da kc tquesalz-ngrbz Gct bade nidr mz Ebraam. X leplz amrlx kcng tzaxvctrpzng mz Kraes nztwz-nrbalq-kzlr da lcng.

Drtwrdr lc, ntuong mz nzvz-nqblq-krdr natqde. Dekc, da kxmrlzting kcng tzvzpxmqng mz Lou, tzyctrng mz kxnamu nzalelr me pnz drtwrde. A' da kc tquesalz-ngrbz Gct mz Ebraam, yctxtrpwz mz Gct esz'-krde nzale-krde da kc tquesalz-ngrbzle bade. A' tryctrpwzu mz nike na-ale Ebraam.

²¹ ?Lou kcng tqka Gct, nzrpwa'-nrbzlr bade nzatutr-krde da kx esalz-ngrbzle? Trtingr! Murde rblxbz mz lou nzatubqtingr kxnzaleng alwx. X trpnzngr lou kx kabzle nzlungr kxboi. ²² Murde Nzryrngrkxtr amnclzbzle leplz amrlx mz zmatq ngrde vzpxm mz ntzao-krdr mz alwx. X trpnzngr leplz kx krlzle nzarlapx-lzbq-krde. takitrde nzrtwzngr nzlungr kxboi mz da kx alele. A' esalz-ngrbz Gct nzlungr kxboi mz doa amrlx kx nzabrrpzlr drtwrdr mz Jiszs Kxnmcpz nzarlapx-krde nidr.

²³ X mzli kc trlxngitikakr Kraes, nigr lr Jiu mnclzbzkr mz mz nzapu-krgr kxnzmncng mz presin. Murde mzli kc navzm Kraes naoliqtikr nzlxngiti-krgr nide. ²⁴ X Loukxtr apule kxakrlz. Murde kam Gct Loukxtr bagr, mz nzmailz-krbzle nigr mz Kraes, murde natubqkr mz nzobqkr God mz nzbrtikr drtwrgr nide. ‡

²⁵ A' mzli ka, mz nzlxngiti-krgr Kraes, trmnclzpepwzkru mz zmatq ngr Lou sc Mosis.

Kxnrlxngiting Nzapulr Doa Kxnztopwzng Ne Gct, Mz Nzaxvctr-krbzlr Mz Mrlxde

²⁶ Mzli ka kxmule-esz' trnginipuu lr Jiu, a' nimu kz doa kxnztopwzng ne Gct, murde lxngitiamu Mevalu Jiszs nzarlapx-krde nimu.

²⁷ Nzaxvctrpebzmu mz Kraes, mzli kc tqrlxngiti-ngrnamu x tqwrkxtr-ngrnamu. X mzli ka mz nzaxvctr-krbzmu lc bade, sa tqapupeamu nide mz nqmq krdeng amrlx. ²⁸ Trpnzngr doa kx myaszlzle kztedeng mz drtwr Gct kxmule-esz' nide lr Jiu o kxtrngiulrJiu, nide kxnzawz-nrbalq o ncblo kxetu, x kx ngi ncblo o olvz, murde nigu amrlx ngrgu nzptrku mz dzbede kxesz' mz nzlxngiti-krgu Kraes. ²⁹ X mz nzesz'ti-krgu mz Kraes, twzku da kcng tqmrlzting, tquesalz-ngrbz Gct mz Ebraam, x mz Kraes, doa lc tqvzpxm mz nqvi lrde.

4

Nzmnclz-ngrbz Mz Lou Apule Nznginingr Kxnzawz-nrbalq

¹⁻² Mzli kc nigr lr Jiu tqmnclz-ngrbzkr mz Lou sc Mosis, apukr doa kxnztopwzng. Kxmule-esz' dztu trte sa nangi dztu doa kxtopwz nede kalr, a' mzli la tqnginibe-ngrde doa kxtopwz, apule kxnzawz-nrbalq. Trpnzngr scde zmatq kx na-aclve-lzbq-ngrde. A' navz-nqblqle natq trtede badr kxnzaclvelr nide, nakrlzbzle mzli kc tqpnz drtwr trtede nzka-krbzle kzdung da bade, kx nzetupe-krde. ³ Kxmu-kzpwzle la mz nigr lr Jiu. Mzli lc tqapu-ngrgr doa kxnztopwzlbzng mz nzmailzkr Loukxtr. X apu-kzkr kxnzawz-nrbalqng murde yrplatxitpwz nargr kx navz-nqblqkr lou lcng amrlx. ⁴ A' kx krlzbzle mzli kc tqyrlq Gct, atwzlr-ngrmle mrlxde, mzte nzmc nzngini-krde ncblo txne, kx ngi lr Jiu, kc tqmnclzbz mz Loukxtr. ⁵ Vzm mz nzarlapx-krde nigr lr Jiu, murde nanginigr doa neng Gct, kcng natwzkr da amrlx kx rngisc Kraes, mz nzaxvctr-krbzkr bade. ⁶ X mzli ka nipe-kzmu doa neng Gct. X Mqngr Mrlxde kc tqmncpxm mz nabzgu, okatrle nigu nzkrlz-krgu kx takitrde doa kxesz' mz nigu nqrpi-krde kx, 'Gct ngi Trtengel!' ⁷ Dekc trniipeggu kxnzawz-nrbalqng, a' niipegdoa neng Gct kcng natwzlr da kxmrlzting amrlx tquesalz-ngrbzle bagu.

‡ ^{3:24} Loukxtr aelwapx-ngrmle bagu alwx ngrgung. X sa na-ayrplapx Gct kxnzaleng alwx mz Hxl. Dekc tqsuti drtwrgu Mevalu kx na-arlaxle nigu.

Doa Kx Brti Drtwrde Nzrvz-nqblqng Nqmq Kr Leplz Mz Nzrlapxngr, Sa Navz Mz Hxl

⁸ Mzli kc nimu kxtrngiulrJiu trkrlzwamu Gct angidr kc esz'txu, murde trxlrkalamu Nrpakxmrlz. Mzli lcde mnclzbzmu mz zmatq ngr drka' mz nzangio-krmu nidr x nz wztr-krbzmu badr. ⁹ A' mzli ka, krlzpeamu Gct, x rpile kx nimu doa nedeng. ?Memule tqyzlu-mou-ngrnamu mz nz wztr-krbzmu mz drka' lcdeng tzatrkating, kx trpnzngr scdr zmatq mz nz arlapx-krdr nimu? ¹⁰ Prtrpzmu mz nqmq kr lr Jiu, x mz nzakaputr-krmamu zbg, temz, yiz, x nrpr kxtr nyzdrng. ¹¹ A' mw x lrlvzx nimu mz nz pxtxpx-krmu Kx nzmcpx, murde nz wz-krngeng amrlx trpengl da kx nabxtrlr. ^{12a} Yrnititrpo bamu. Vz-nqblqamu nqmq nr drt wrnge mzli ka mz nz alvztr-krnge lc, murde mz nivz kx etu, sc tqvz-nqblqpx nqmq krmu mzli kc tqmnc-ngrgu. A' trvz-nqblqwxu nqmq krgrng.

Pol Ycmnetr-ngrde Nivz Lrde X Nzotrkr Drtwrde Lr Galesia

^{12b} Mzlengeng x inwengeng, trpnzngr da kxtrka kx alemamu bange mzli kc. ¹³ A' krlzamu kx mzli kc ayrnrngr tqryapwxpx-ngrbo Nrpakxmrlz bamu, yangrnatipex nz vzngr. ¹⁴ Kxmule-esz' wz-zlwzamu mz nz aclev-krmu ninge, a' trbqszou drt wrmu ninge. A' suti drt wrmu namnku, mz nz apusr-krnamu ninge enjrl kx avzom Gct, o Mevalu Jisz s esz'-krde. ¹⁵ Abrtzlvzamu ninge mzli lc tqryapwxpx-ngrbo Nrpakxmrlz. ?Memule tqblepxpe-ngrnamu mzli ka? Murde vqti drt qmu nz okatr-krmu ninge mzli lc. ¹⁶ ?A' mzli ka, nike tqapusr-ngrnamu ninge enqmi rmu? ?Murde pi-mopo bamu lrpzki angidr ngr nzrlapxngr?

¹⁷ Leplz kcng tzsuti drt wrdr nzvz-nqblq-krmu Lou sc Mosis, nz tamiti-zlwzlr nimu mz nz prtr-krbzmu mz nqmq krdr. A' trngi dalr nz okatr ngr nimu. A' nakapxmlr nimu bagr, murde namnclzbzmu badr. ¹⁸ Nangi da kx brngz nsutikr drt wrdr nzngini-krmu kx nzvz-nqblqlr nidr, nz mu nz alvztr-ngrbzlr bamu da angidr. Murde mrlz nzvz-nqblq-krmu da angidr, a' bzkq ngi txpwz mzli kx mnc-ngrbo bamu. ¹⁹ Doa nengeng, apux lxemu, murde drt wrnge yckq krlzbzle mzli kx mz pu nz mc-ngrdr, x opx angidr kx nz mnc-krmu lc mrlz, x navz-nqblq-zpwxamu Kraes mz nz apu-krmu nide. ²⁰ Rblxm bange nz rkrlzngr nike nayrx mz nz lxngiti-krmule. X sutitx drt wrnge kx namnc-txp wzku elx mrla mzli ka, murde naycmne-nrw xbo bamu.

Gct Sa Napxtxpx-ngrde Leplz Kcng Tzm nclzbzng Mz Lou Sc Mosis

²¹ Nimu lr Galesia kcng tzsuti drt wrdr nzrlapxngr mz nz mnclz-krbzmu mz Lou sc Mosis, trkrlzwamu ni ke tqalvztr Lou lang. ²² Murde nz yr elr kx Ebraam mrlx de nz ling. Kc ayrnrngr drt qde Ismael, yrlop xbz Haga, olvz kx nzawz-nrbalq ne olvz rde, Sera. Krali drt qde Aesak, yrlop xbz Sera, olvz ngr Ebraam, kx trngi kx nzawz-nrbalq, a' drt qde opx. ²³ Gct esalz-ngrbzle mz Ebraam kx nede dq doa nc blo. Zbz mrlx Haga mz te nz mc, murde Ebraam rpile na-angidale natq lc mz nide esz'-krde. A' mrlx Sera mz te nz mc, murde Gct esz'-krde atutrl natqde mz nz rmcn gr mz Aesak.

²⁴⁻²⁵ X olvz lcng nz ling ngi kz kzdq nz ycmne-ebzpxngr, murde nz tu-ngrdr Nzesz'tikr Drt wr kcng li kx blepx-lx blrngr mz mz lir Gct x leplz nedeng. Haga tu-ngrde Nzesz'tikr Drt wr Kc Kai, tq kabz Gct mz Mosis, mz Newz Saenae mrkc Arabia. X tu-kz-ngrde Jerusalem mz nrlc ka, murde leplz ngr deng nz ngingi pedr kx nzawz-nrbalqng kcng tzm nclzbzng mz zmatq ngr Lou. ²⁶ A' Sera tu-ngrde Nzesz'tikr Drt wr Gct Kc Ate badr leplz kcng

²⁴⁻²⁵ 4:24-25 Sam 110; Asaea 9:6

tzlxngitilr Kraes. Nzesz'tikr Drtwr lc ngi dalr zmrlz ngrde kxmyalz x da kx esalz-ngrde mz nzavzo-krmle Kraes. Sera tu-kz-ngrde Jerusalem kc navzm, mrkc namncngr leplz neng Kraes amrlx kalr. X ni-kzgu doa neng Sera kcng drtqdr tqopx, x prtrpzku mz nqvi lr Gct, murde brtipe drtwrgu da kx esalz-ngrde. ²⁷ X profet Asaea ycmnetr-ngrde Sera mz nzrpi-krde kx, “Olvz kx vz-nrbalq, nim kc trpnzngr nede doa, drtwrm naelalzm! Kabopx mz nzabrtz-krm, nim kc drtqde tretqu mz nzrmcngr mz doa! Murde nim kc tr-rngine-pnzu doa mzli kc, sa narnginetim doa kxkqlu namyaszpxle olvz kc tzmnncng mz ncblo ngrde.” ^{*}

²⁸ Mzlengeng x inwengeng, apuku Aesak, mrlx Sera, murde prtrku mz nztubqngc kc tqvzpxm mz da kx esalzngc Gct. ²⁹ Mzli lc pnz Ismael atrkatile Aesak, kc tqbatrpz Mqngrkxtr mzte nzrmcngr. X mzli ka krkcng tzmnclbzng mz Lou sc Mosis, nzatrkti-kzlr nigu kcng tzlxngitilr Kraes mz nzokatrkr Mqngrkxtr. ³⁰ A' mcku mz Nzryrngrkxtr, kx Sera pibzle mz Ebraam kx, “Maszlrpxngr Haga ncdr mrlxde. Murde trpnzngr nzprtrkr mrlx olvz kxnzawz-nrbalq lc mz da lcng nakaobz mz mrlx” olvz kx drtqde opx. † ³¹ Mz drtwr lc, nadcpx mz drtwrmu kx trnginigu doa neng Haga, olvz lc tzawz-nrbalq. A' nigu doa neng Sera, olvz lc drtqde opx, murde Kraes arlapxpele nigu.

5

Bzkq Lxngitiamu Leplz Kcng Tzsuti Drtwrdr Kx Namnclbzmu Mz Lou Mz Nzrlapxngr

¹ Kraes arlapxle nigu murde drtqgu naopx. X trsutiu drtwrde nzmnclzmou-krbzmu mz Lou sc Mosis. A' natu-amqngiamu mz nzarlapxkr Kraes nimu.

² Murde ninge, Pol, pibo bamu kx nzmu nimu kxtrngiulrJiu rlr-lzbq-ngrbzmu mz nzrpakrngr nzrlapxngr nimu, e nzbzkr Kraes mz kros trpnzngr nzarlapx-krde nimu. ³ Acvetio-angidramu! Murde ncblo kx natubqzb mz nzobqkr Gct mz nzrlr-lzbq-ngrbz mz nzrpakrngr, navz-nqblq-kzle Lou sc Mosis amrlx x bzkq tao mz alwx. ⁴ Kxnzvz-nqblqlr Lou mz nzatubqtingr nidr nzpxtxpxpe-ngrdr zmrlz ngr Gct kxmyalz. X sc tzlakitxpypbzng mz nqvi lr Kraes. ⁵ A' mz nzokatrkr Mqngrkxtr, sc tqobqtipxku da amrlx kx esalz-ngrbz Gct bagu mz nzatubqtkr Kraes nigu kcng tzbrtipe drtwrgu nide. ⁶ Murde mz nzaxvctr-krbzmu mz Mevalu Jisszs, trpnzngr da kx ablepxle nzmu napakrgu o trtingr. A' da kx myapxbz ngi nzrlxngitingr nide, x nzrvz-nqblqngr nide mz nzmlzti-krgr leplz.

⁷ lr Galesia vz-nqblq-angidramu Kraes mzli kc. ?Neke aesakibzle nzvz-nqblq-krmu lrpzki angidr ngr nzarlapxngr? ⁸ Nzrtamitingr la, trvzpxpuu mz Gct kc tqaveatile nimu mz nzngini-krmu doa nedeng. ⁹ Nzalvztrngr kxtrka kxipizne krlzle nzatrkti-krde nzrlxngitikr leplz ne Gct amrlx, da kc tqwai yisti kxipizne nztalvzpx-krde flawa kx nangi bret, mz nzawzpx-krdele. ¹⁰ A' lxngitix kx Kxetu rgu sa naokatrle nimu murde navz-nqblqamu Nrpakxmrlz kc tqalvztrpo bamu mzli kc. A' Gct sa na-ayrplapxle

^{*} **4:27** Asaea 54:1 ^{*} **4:27** 4:23 Mzli lc pnz, Sera vz-nrbalq. X Ebraam trngztibzle Haga, kc tqmikapele Ismael. Mz nibrde Gct batrpzle Sera nzmika-krde Aesak. 4:27 Pol mcle kx nzkqlukr leplz kxtrngiulrJiu kx nalxngitilr Jisszs kalr, sa namyaszpxlr lr Jiu kcng tzvz-nqblqlr Loukxtr. † **4:30** [Nou 21:10] X Gct pibzle mz Ebraam kx navz-nqblqle natq Sera. Mz nzmu-krde lcde, leplz kcng tzmnclbzng mz Lou trpnzngr nidr nzrlapx-krdr, da kc tzwaibz mz Ismael, murde trpnzngr da sc Ebraam kc tqtwzle.

mrlx kc tqakamrbr-ngrbzle drtwrmu, mz nzalvztrngr lc tqtrka, kxmule-esz' nide neke.

¹¹ ?Mzlengeng x inwengeng, nzmu sa tqalvztrpex kx ncblu napakr, nike drtwrdr tqngya-ngrmle bange? Nzpxtxpx-ngrdr nzalvztr-krnge kx nzbzkr Kraes mz kros txpwz kx arlapxle nigu, murde rblx nzglqpx-lzbq-krdr mz da lc. ¹² A' sutitx zlwz drtwrnge kx krkcng tzatrkatilr nimu mz rtulrtr-ngrbzlr bamu nzrpakrngr, navzpx-lzbq-kzng.

Navz-nqblqku Nzycmne-krm Mqngrkxtr Mz Nabzgu

¹³ Mzlengeng x inwengeng, Gct aopxle drtqmu murde naokatramu kztemung mz nivz. A' mz nzprtr-krmu mz nzaopxkr drtqmu lc, bzkq vz-nqblqamu nepunr drtwrmu kx ataole nimu mz alwx kc tq atrkatile leplz.

¹⁴ Murde sa tqangidapeamu Lou kc atwrnrngr mz nzvz-nqblq-krmu natq kc tqrpile kx, "Mrlzti kztemqng da kc tqwaiq nzmrlzti-lzbq-krm." ¹⁵ A' bzkq atrkatiamu nzmctr-lxblrkr leplz ne Gct, mz nzngya-etrkr drtwrmu x nzotablr-etr-krnamu.

¹⁶ A' vz-nqblqamu nzycmnek Mqngrkxtr mz nabzmu, murde mz nzale-krmu da lc, trnavz-nqblqwamu nepunr drtwr lcng tqtrka. ¹⁷ Nepunr drtwrmu x Mqngrkxtr nzota-etrng x nzota-ebirtr-zvzpxmqng bamu, mz nzaprcti-krdr nimu. ¹⁸ A' vz-nqblqamu Mqngrkxtr, murde mz nzale-krmu da lc, trmnclzpepwzmuu mz Lou sc Mosis.

¹⁹ Nepunr drtwrdr kxdrka'ngr mailzle leplz mz nzale-krdr da kxnzmullcde seng.

Nzrmwimingr leplz kx trngiu kernalzdr,
trnqlqngi-kru drtwrdr,
nzamqmiti-rbr-krdr mz nrkrdrtdqdr,
²⁰ nzangio-krdr da kx trngiu Gct angidr,
nzryzplengz-krdr leplz,
drtwrdr kxmwa,
trnzmnnc-nivzlr-krdr,
nzdobukr drtwrdr,
nzyrpupxkr nzngya,
nztalwz-krdr,
nzrpwa'-zvz-krdr da,
nzaki-lzbq-krdr,
²¹ nzrkcmnz-krdr,
nzrmnq-zvz-krdr, x
trnzclu-krdr mz da kx myangr drtq.
x da kxnzmullcng.

Kabo bamu natq kx xplr mzli ka, da kc tqwaile mzli kc, kx leplz kx nzale-zvzng da lcng trnatwzlu da kcng nzvzpxmqng mz Gct, murde nzpxtxpx-ngrdr nzngini-krde King rdr.

²²⁻²³ A' nra Mqngrkxtr mz nabz leplz kcng tzvz-nqblqlr nide, nidr seleng: nivz,
nzelalz-krm drtwr,
nzmnczpxnxngr,
nzaenzli-zpxnxngr,
nzokatrngr,
nzrmrlzngr,
nzatukztrngr natq,
nzvz-nrwxngr, x
nzacuve-lzbqng.

^{✳ 5:14} Livae 19:18; Matiu 19:19; 22:39; Mak 12:31; Luk 10:27; Rom 13:9; Jemes 2:8

X Lou sc Mosis tr-rpwa'-ngrdeu nzale-krmu da lcng. ²⁴ A' doa neng Mevalu Jiszs nzrtxo-amqngilr nepunr nabzdr kxdrka'ngr. X opxm kx nztqlvztrlrng mz kros. ²⁵ X namnc-nqblq-zvzku natq Mqngkrkxtr mz nabzgu, murde nide kc tqalu-mople nigu. ²⁶ A' bzkq glqpx-lzbqku, murde batr-ngrbzku nzngyatikr drtwr leplz nigu x nzdobuti-krdr nigu.

6

Naokatrku Kztegung

¹ Mzlengeng x inwengeng, mzli kx kzdq nimu tao-ngrde mz alwx, nimu kcng tzbrng mz nzmnc-nqblq-krmu Mqngkrkxtr, naokatramu nide mz nzyzlu-krmle mz Gct. A' mz nzalengl da lc, na-avzo-lzbqamu x navz-nrwxngr, murde ma tqtaoamu mz alwx kcpwz. ² X naokatr-kzamu leplz kx prtilz da kxtrka. Murde sa tqangidapeamu natq Kraes kc tqrpile kx namrlzti-lzbqku. ³ A' doa kc tqrpile kx nide ncblo kxmyalz, a' trngiu da angidr, ncblo la angqnguti-lzbq, x tao mz alwx ngr nzglqpx-lzbqngr. ⁴ Mz drtwr lc, pwxlitipxpwz kx da kc tqaleq brngz o trka, murde na-abrtzlvzq nzale-krm da kxtubq. A' bzkq arsaklr-lzbq-ngrnamu ncdr kztem. ⁵ Murde doa kxesz' na-alele nzwzngr kx amnqlzbz Gct bade.

⁶ X takitrde kx nimu kcng tzalvztr mz natq Gct naokatramu ncblo kc tqalvztrle nimu, mz nzhka-krbzmu da x trau bade.

Sa Namcku Nra Nzmnc-krgu Kalr

⁷ Bzkq apokiati-lzbqamu. Murde Gct tr-rlrpx-ngrdeu leplz nzxtrnga-krdr nide. A' ayzlu-mopwzle da mz leplz amrlx mz nzvz-nqblq-krde da kx nzpetilr mz nzmnc-krdr mz nrlc ka. Da kc tqwai nzrtwz-krmu mz nrlanc nyzmu da kx petiamu elr. ⁸ Doa kc tqvz-nqblq-zvzle nepunr drtwrde kxdrka'ngr, sa natwzle nzodati-alongr mz Hxl. A' doa kc tqvz-nqblq-zvzle Mqngkrkxtr, sa natwzle nzlungr kxboi Heven. ⁹ Bzkq drtqmu sa mz nzalengl da kxmrlz, kxmule-esz' trmckalamu da kx vzpxm elr. Murde sa namcku nra nzwz-krgung kalr. ¹⁰ Mz nzmucrde lcde, naokatrku leplz amrlx mzli kx takitrde, myapxbz kztegung kcng tzrlxngiting.

Natq Ngr Nzarlr-lzbqngr

¹¹ Mcamu ena nzryr-krnge lcng tqwzpx! Ryrbo bamu mz mqnge, murde naglxamu kx ninge angidr lc tqryrbo bamu. *

¹² Leplz kcng tzrpilr kx napakrmu, nzmwxlrng nzplzpx-krdr Nrpakxmrlz kx nzbzkr Kraes mz kros arlapxle nigu. Murde nzaoti drtwrdr lr Jiu lcng, murde ma tzatrkatilr nidr. ¹³ A' krkcng tzrpakrng trnzlolvz-pnzlru Lou scng Gct amrlx. A' nzsuti drtwrdr nzglqpx-lzbq-ngrbz mz lr Jiu kcng, mz nzvecpx-krdr nimu mz nzhpaqrngr. ¹⁴ Trtakitrdeu nzglqpx-lzbq-krnge, a' ngi txpwz mz nzbzkr Kxetu rgu Jiszs Kxnxmcpx mz kros mz nzarlapx-krde ninge. Murde prtrx mz nzbz-krde lc. X mzli ka dalr nrlc ka trpengr nztamiti-krdr ninge, x nar leplz mz nrlc ka tryrplatitrlru nqmq ngr drtwrge. ¹⁵ Nzrpakrngr o trnzrpakr-ngru trmyapxpwzu. A' da kx myatpxpwz ye, nzhka-krbz Gct nzlu-krde bamu mz nzyrlqtr-krbzle Mqngkrkxtr mz nabzmu. ¹⁶ Gct sa nayc mz drtwrde leplz amrlx kcng tzvz-nqblqlr nzalvztr-krnge lcng, mz nzhka-krbzle nzmnc-zpx-krdr badr. Murde mz nzngini-krdr leplz neng Gct, nidr lr Israel angidr.

¹⁷ Abzo mzli ka, bzkq rpiamu kx nzalvztr-krnge vz-rbr. Murde opx angidr kx wztr-zpxwbo mz Kxetu Jiszs, murde nrkrdrtnge tulvzpe bzmr

* **6:11** Letz lc mzli kc tzyr-ngrde, yr kzdq ncblo x Pol kc tqycmepwz. Mzli kc tqkrlz-ngrmlle ngalrde 11, sc tqypr Pol.

nzrvaehrkr leplz ninge x nzrikla-krdr ninge. ¹⁸ Mzlengeng x inwengeng,
krka'-ngrne kx Kxetu rgu Jiszs Kxnzmcp, nakabzle bamu zmrlz ngrde
kxmyalz mz nabzmu. Eu, angida.

Delape. Ninge *Pol.*

Nzryr-krbz Pol Mz Lr Efisz Natq Ngr Nzaplxtqngr Mz Nzryr-krbz Pol Mz Lr Efisz

Aposol Pol yrle letz lc mzli kc tqmnc-ngrde mz presin mrkc Rom. [◊] Yrle mz mzlir yiz 60—62 AD mz nibr nzrmcngr mz Jisz. Mzli lc yr-kzpze letz mz Filimon, lr Kolosia, x lr Filipae. Letz lcng amrlx dzbede esz' kx nzyrng mz presin. Yrbzle letz lc mz kxnzrlxngiting kxtrngiulrJiu kcng tzmcnng Provins kc Esia, mz taon kc Efisz, yc-aepztrpz mz taon kcng Kolosia x Laodisea. Mzli ka mrlcde nzrpipebz kandre kc Trki.

Pol tryrleu letz lc mz nzatubqti-krde drtwr kx vz-rbr, a' mz nzpipx-krbzle da kxmrlzting amrlx kcng tqkam Gct bagu mz nzaxvctr-krbzku mz Mrlxde. Mz nzvz-nqblq-krgu lrpzki rde x nzmnclz-krbzku mz zmatq ngrde, zmatq lc ycpxm bagu, murde na-aovxioku alwx x Setzn badr drka' nedeng.

Mrkcng Mz Letz Lc

Da kxmrlzting kcng tzvzpxmqng mz nzaxvctr-krbzku mz Kraes. [1:1—2:10]

Kxnzrlxngiting amrlx dzbede kxesz' mz nzaxvctr-krbzlr mz Kraes, kxmule-ess' lr Jiu o kxtrngiulrJiu. [2:11—3:21]

Nqmq krdr x nzmcn-krdr natakitrde nzngini-krdr doa neng Gct. [4:1—6:9]

Nayrlqbzku dalr vea amrlx kcng tqkam Gct bagu, murde natu-amqngi-nrgu, mzli kc tqvecku badr Setzn. [6:10-20]

Pol ayrkrpxle letz lc mz natq ngr nzarlr-lzbqngr. [6:21-24]

Mz letz lc Pol pipx-kzpze nzycmne-ebzpxngr tq mz nzmcn-krdu badr Kraes:

Nigu lrmakxtr nrkrdrtrq Kraes x nide nargu. [1:22-23; 4:15-16]

Apuku ma nyg Gct kc tqtr, tqmncpx-ngrm Mqngrkxtr, x Jisz nide nou rplz kx myatpxz-zlwzbz mz ma lc. [2:21-22]

Jisz apule ncblo kxyrlz x nigu lrmakxtr apuku olvz rde kc tqmrlzti-zlwzle. [5:23-32]

¹ Ninge Pol kc tqmcpk Gct mz nzngini-krnge aposol ne Mevalu Jisz. Ryrbo bamu leplz kxnztr neng Gct kcng tzmcnng Efisz, x tzvz-nqblq-angidrlr Mevalu Jisz. ² Krka'-nrgbo mz Gct, Trtegu badr Kxetru rgu Jisz Kxnzmcpx, kx nakabzlr bamu zmrlz ngrdr kxmyalz x nzmcn-zpxnegr.

Da Kxmrlzting Kcng Tzvzpxmqng Mz Nzaxvctr-krbzku Mz Kraes

³ Na-awibzku mz Gct, kc tqngi Trte Kxetru rgu Jisz Kxnzmcpx. Murde mz nzaxvctr-krbzku mz Kraes, Gct kc Heven kapemle bagu da kxmrlzting amrlx elr, mz nzokatr-krde nabzgu mz nzmcnng kxtr. ⁴ Murde mzli kc nrlc trnzwska-ngrde, mcpxppele nigu mz nzngini-krdu leplz nedeng x mz nzaxvctr-krbzku mz Kraes, murde nanginigu leplz kxnztrng kxnztubqng mz nzobq-krde. ⁵ Mz nivz lrde, pñzpe kai drtwr Gct kx naotile nigu mz nzngini-krdu doa angidr nedeng mz Jisz, murde mrlzbz bade. ⁶ X naglqlz-nrgu nide zmrlz ngrde kxmyalz-esz'ngr, kc tqka-nrbalqmle bagu mz nzaxvctr-krbzle nigu mz Mrlxde Kxnzmrzti. [◊] ⁷ Jisz xpele nigu mz mepyr ngrde mz nzarlapx-krde nigu mz zmatq ngr alwx. X dekc tqipqng Gct nigu mz alwx rgung, mz nzvz-nqblq-krde zmrlz ngrde myalz-esz'ngr.

8 X pulio-ebir-ngrmle zmrlz ngrde lc bagu, mz nzvz-nqblq-krde nzetukr nzyrplapx-krde x nzrkrlz-krde.

9-10 X mzli ka abrtzlvz Gct nzaelwapx-krmle bagu drtwr kxmyapxbz kc tqyrlq-kaile mzli kc bqnc, tqyc-kapqbz mz kxnzlung amrlx krlzmle mzli ka. Kraes nide nou drtwr lc x atutrl. Murde mz nzkrlz-krbzle mzli kx mcpnx Gct, Gct sa na-ayrlwr-lxblrlle mz dzbede kxesz' kxnzlung amrlx mrkc Heven x mz nrlc ka, murde namnclzbzng mz Kraes kc nangi nardr. **11** X mcpnx Gct nigu x yrlq-pnzle drtwr kx nanginigu doa nedeng mz nzaxvctr-krbzku mz Kraes. X Gct batrpzle da amrlx kx prtzm mz nzvz-nqblq-krde nzyrplapx-krde mz drtwr kc tqyrlqle. **12** Murde nigr lr Jiu, mz nzbrtikaikr drtwrgr Kraes, nabatrpzkr mz leplz nzglqpx-krdr Gct. **13** X nimu kxtrngiulrJiu nzaxvctrpe-kzpzu mz Kraes, murde mzli kc tqxlr-ngrnamu natq angidr, sc tqlxngitipe-kzamu Nrpakxmrlz lc. X mz nzbrtikr drtwrmu Kraes nzarlapx-krde nimu, Gct sc tqyrlqtrpebzle bamu rrx ngr nzngini-krmu leplz nedeng. Krlc Mqngrkxtr kc tqpiix-pnzle kx nakabzle mz leplz nedeng. **14** Mqngrkxtr apule trau kx nzka kai mz nzaelwapxngr kx sa naka-kzle da amrlx kcng tquesalz-ngrde. Murde Gct ka-kaipzle Mqngrkxtr mz nzaelwapx-krde kx sa naka-kzpze da kxmrlzting amrlx kx nzvzpxmqng mz nzngini-krgu leplz nedeng. Murde naglqpxku nide mz nzmrlzkr nqmq krde.

Pol Krka'-ngrde Lr Efiszs Kxzrlxngiting

15-16 Mz nztwz-krgu da kxmrlzting lcng, sc tqkrka'-pe-ngrne nimu, abzo mzli kx xlrx kx brtipe drtwrmu Kxetu rgu, Jiszs Kxnmcp, x mrlztiamu leplz kxnxtrng ne Gct amrlx. X awi-zvz-ngrbo mz Gct nimu. **17** Gct nide Trte Kxetu rgu, Jiszs Kxnmcp, x nqmq krdeng amrlx myapx zlwz. X rlxti-zvzbo mz Gct kx nzyrplapxngr x nzrkrlzng kx kabz Mqngrkxtr naetunepx-zvzng mz nabzmu, murde nzkrlz-krmu Gct naetunepx kz. **18** X nakrlz-kzamu da kxmrlzting kx nakabzle bamu. Murde sa nakabzle da lcng, tqobqtipxamu, mz nzkqle-krde nimu mz nzngini-krmu leplz nedeng. X krka'-ngrne kx nakrlz-angidramu kx nzngini-krmu leplz nedeng ngi da kxmrlz kxmyapxbz mz nabzde.

19-20 X krka'-ngrne kx naxngi-angidramu zmatq ngrde kxetu-esz'ngr kc tqwz zvz mz nabzgu, mz nzngini-krgu kxnxrlxngiting. Murde mz zmatq kcpwz tqatulz-mou-ngrm Gct Jiszs mz nzbz-krde, x dekcpwz tqawxbuo-ngrmle nide me matq-esz'ngr mz nrlar Gct kxrtc kc Heven. *** 21** X mz nzaclve-krde kc Heven, Jiszs myaszlz-zlwzle kxnxzung amrlx kxmule-esz' mz nrlc ka o mzilxlr. Myaszlzle nidr mz nzxplr-krde, zmatq ngrde, zmrlue ngrde, x drtqde, kxmule-esz' mzli ka o mzli kc navzm. *

22 X Gct yrlqlzbzle doa x da amrlx mz zmatq ngr Kraes, ***** (kxmule-esz' leplz, enjrl, drka', animol, o da kxtrnlzluung), mz nzmetx-krbzlr bade. ***** Murde nanginide nar leplz amrlx kcng tzprtrng mz lrmakxtr. **23** X lrmakxtr lcng nzaesz'tilr nide, murde nide nardr x nidr nrkrdrtrqde. X nide kc tques-ngrde da amrlx.

*** 1:19-20** Sam 110:1 *** 1:21 1:18** Kzdung leplz mz drtwrdr natq lc tqrmnr-ngrbz natekqtr-kzlr mz nztwz-krde kx, 'Krka'-ngrne kx nakrlz-angidramu nzetukr da kxmrlzting kx nakabzle bamu.' 1:21 Mz mzli nyz Pol, leplz nzrpipr kx enjrl x drka' nzaclveng badr kxnxetu ngr kandre x mztea amrlx. X nzota-etrng mz nztwz-krdr leplz mz nrlarde nyz Gct o Setzn. krkcnz tzaovxiolr mrnyzdr batrpzle da mz nrlc ka. Kzdung Kristin nzlxngiti-kzlr drtwr lc, mz nzrlwx-krdr Daniel 4:25 x 10:13. Mc kz Hibrus 2:5. *** 1:22** Sam 8:6 *** 1:22** Sam 110:1

2

Nzlungr Vzpxm Mz Nzaxvctr-krbzku Mz Kraes

¹ A' mzli lc trlxngitikalamu Kraes, mqngrmu bz, murde vz-rbr-zvzamu mz nzale-krmu alwx. ² X mzli lcde, apuamu kxnzmnc-mrbrng mz nrlc, mz nzvz-nqblq-krmu Setzn, kc tqngi kxetu r drka' amrlx kcng tzmnncng mrnyzdr mzlilxlr. X nide kc tqvz zvz nzbatr-krbzle mz leplz nzxpqbrr-krdr Gct. ³ Mzli lc tqmnc-nqblq-kzkr nqmq nr drtwr kxtrka kcng tqyclzm mz nabzgr, mz nzrtrngzti-zvz-krbzkr da kznikeng mrlzm bagr. Nigr leplz kxdrka'-ngrng mz nzapu-krgr leplz amrlx, x takitrde Gct nzayrplapx-krde nigr mz zngya ngr drtwrde.

⁴ Kxmule-esz', a' Gct yc zlwz mz drtwrde nigu leplz amrlx, murde aodulzwle nigu. ⁵ Mzli lcde mqngrgu bz mz nzale-zvz-krgu alwx, a' Gct sc tqalupemle mqngrgu mz nzaxvctr-krbzle nigu mz Kraes. Arlapxle nigu mz nzvz-nqblq-krde zmrlz ngrde kxmyalz. ⁶ X mz nzaxvctr-krbzku mz Mevalu Jisz, Gct atulz-kzple nigu mz nzbzngr, x wxbuo-kzku badr me matq Heven.
*

⁷ Alele da lc murde mzli kc navzm na-aelwapx-angidr-ngrbzle nzetukr zmrlz ngrde kxmyalz-esz'ngr, mz da kx mrlzing amrlx kcng nzvzpxmqng mz nzaxvctr-krbzle nigu mz Kraes. ⁸⁻⁹ Murde nzrlapx-krmu vzpxm mz zmrlz ngr Gct kxmyalz, mz nzokatr-krde nimu mz nzabrrtr-krbz drtwrmu mz Kraes. A' nzrlapxng lc trvzpxpuu mz nimu esz'-krmu. A' Gct kx rkanrbalqbz bamu, murde ma tqglqpx-lzbq-ngrnamu kx wz-ngrnamu da lc mz zmatq ngrmu esz'-krmu. ¹⁰ Gct wz-ngrde nigu mz nzmnc-krgu mz nrlc ka mzli ka. X alule mqngrgu mz nzaxvctr-krbzle nigu mz Mevalu Jisz. X mzli kc pnz, yrlqle drtwr mz da kxmrlzing kx suti drtwrde nzale-krguleng.

Lr Jiu X KxtrngiulrJiu Nzngini-krdr Dzbede Kx Esz' Mz Kraes

¹¹ Nimu kxtrngiulrJiu nadcpx mz drtwrmu kx mzli kc pnz, nzrpi lr Jiu nimu kxtrnzpakrung, a' nidr kxnpakrng mz nzvz-nqblq-krdr Loukxtr. Nzrpakrngr lc dalr nrkrdrtq, a' tr-rngiscu zmatq ngr nztekqtr-krde nabz leplz. ¹² Mzli lcde, nzmnc-krmu trka, murde mnc-rlrubzmu mz Kraes. X ni-kzpu' lr mrkzblleng murde trpnzngz nzprtr-krmu mz nqvi lr Israel, leplz kcng tqmcpx Gct. X trprtr-kzpwmamu mz Nzesz'tikr Drtwrdr badr. X trpnz-kzngr nzkrlz-krmu Gct angidr x drtwrmu kc tqmatxpe nzobqtipxngz da. ¹³ A' nimu kcng ena nzmnc-rlrubzng mz Gct, mzli ka vec-aepztrpemle nimu bade, mz mepyr ngr Kraes kc tqyrlleo mz nzbz-krde nimu. ¹⁴⁻¹⁵ X Kraes batrpzle nzmnc-lxblr-krgu mz nrw, nimu kxtrngiulrJiu x nigr lr Jiu. Kzdung natq x nqmq x nzryr-ngrng mz Lou sc Mosis nzapulr drkq kx akipxle nigu x batrpzle nzngyati-lzbqkr drtwrgu. A' Kraes awxole drkq lc, x sc tqmape lou lcng mz nzrlrpx-krbzle nrkrdrtqde nzbz-krde nigu, murde nanginigu dzbede kxesz' kxmrna mz nzaxvctr-krmle nigu bade. Delc nide nou nrw x ngrgu. ¹⁶ Murde yzlumi-kzpze nigu mz Gct mz dzbede kc esz' mz nzbz-krde nigu mz kros. X mz nzrnibqng Kraes, awxobzle zngya kx yc

* ^{2:6} Drtwr lc angidatile mqngr kxnzrlxngiting mzli ka x nrkrdrtqdr kx mrna Heven kalr.

mz mzlir nigr lr Jiu x nimu kxtrngiulrJiu, murde namnc-zpxw-ngrgu badr Gct. †

¹⁷ Kraes vzm mz nzryapwx tipx-krde lrpzki r nzmnc-zpxwngbadr Gct. Pibzle bamu, nimu kxnmn-rlrubzng mz Gct, x pi-kzple bagr, nigr kxnmn-aepztrpzng bade. ¹⁸ Murde mzli ka, mz nzwzkr Kraes, nigu amrlx ngrgu nzaxvctrpzng mz Mqngrkxtr kcpwz, kxmule-esz' lr Jiu o kxtrngiulrJiu, x takitrpegu ntutr-krbzku mz Gct Trte. ¹⁹ Mz nzmu-krde lcde, nimu kxtrngiulrJiu trpengr nzngini-krmu lrnarnrlc x doa lr mrkzble. Murde mzli ka nipemu lr mztea nyg Gct badr leplz kxsztr nedeng amrlx. X nimu neidu lrde x prtrpe-kzpzmu mz lr ma nyzde. ²⁰⁻²² X wz-ngrde ma nyzde lc tqtr mz nou rplz kx ngi nzalvztrkr aposol x profet. X Mevalu Jiszs nide rplz lc tqetu tqmyatpx-zlwzbz, murde nide rplz kc tzatuo kai, tqngi nou bute', x atu-amqngile ma kc. X rplz amrlx ngr ma kc nzaxvctrpzng bade. X apuku rplz lcng tqmwitr lxblr, tqngi drkq ngr ma lc tqtr. X Mqngrkxtr mncpxm elr. ^{*}

3

Nzwzkr Pol Mz Nzyapwx tipx-krbzle Nrpakxmrlz Mz Leplz KxtrngiulrJiu

¹ Mevalu Jiszs yrlqle ninge nzyapwx tipx-krbo Nrpakxmrlz bamu, nimu kxtrngiulrJiu. X dekc tqmnc-ngrne mrka mz presin, murde alex da lc mz nzokatr-krnge nimu. ² Mwx xlrpeamu kx Gct aprcmle nzwzng lc bange, murde napipxbo bamu zmrlz ngrde kxmyalz. ³ Krlc da kx yc-kapq pnz kc tqaelwapx-ngrmle bange, da kc tqwai nzypre-krbo mz letz ka. ⁴ Mz nzrlwx-krmu letz lc, nakrlzamu nzaotikr drtwrng drtwr kc tqyrlq kai Gct mz nzarlapxng leplz mz nzbzkr Kraes. ⁵ Murde traewapx-ngrpwlzleu drtwr lcde badr leplz kcng pnz. A' mzli ka, atwzlr-ngrmle Mqngrkxtr mz aposol x profet kxsztr nedeng mz nzaelwapxpe-krbzlele badr.

⁶ Drtwr lcde tqyc-kapq pnz nide sele. Lr Jiu x kxtrngiulrJiu nipedr dzbede kx esz' mz nzlxngiti-krdr Mevalu Jiszs. X nzprtrng rlilrdr mz da kxmrlzting kcng tgesalz-ngrbz Gct kx navzpxmqng mz nzngini-krdr nrkrdrtq Kraes. ⁷ Mz nzvz-nqblq-krde zmrlz ngr Gct kxmyalz, kamle bange zmatq ngrde, murde nawztrpo bade mz nzyapwx tipx-krnge Nrpakxmrlz. ⁸ Kxmule esz' leplz nedeng amrlx nzmyaszpxlr ninge, a' mz zmrlz ngrde kxmyalz rlr-ngrmle bange nzyapwx tipx-krbo mz kxtrngiulrJiu da kxmrlzting kx twzku mz Kraes, kx trnzkrzu me yrkrkipxle. *

⁹ X Gct kc tqwz-ngrde doa x da amrlx, yrlq-kaile drtwr mzli kc bqnc x yrlq-kapqle krlzmle mzli ka. X suti drtwrde kx nayokaetipxpebo mz leplz, kx mzli ka sc tqvzpe nzatutr-krde drtwr lc. ¹⁰ X suti kz drtwr Gct kx nigu lrmakxtr na-aelwapx-ngrbz kx nzetukr nzyplapx-krde mz enjrl x drka' kxnnsetung kxnrngiscng zmatq mrnyzdr mzllxlr. ¹¹ Da lcng tqale Gct mz nzvz-nqblq-krde me pnz drtwrde kx yrlq-pnzle mzli kc trwzka-ngrde nrlc. X mzli ka angidatipeleng mz nzwzkr Mevalu Jiszs, Kxetru rgu. ¹² X mzli ka trmwxrpekuu nzvz-krbzku mz Gct mz nzkrka'ngr. Murde krlzku

† ^{2:14-15} Mwx Pol rpile 'drkq' mz nzaotikr drtwrde drkq ngr Mangr-nzangiongr Yawe kx akipxle kxtrngiulrJiu mz nzprtr-krdr mrnyz lr Jiu. KxtrngiulrJiu nzkrzlr nzprtr-krdr mrnyz lr Jiu mz nztekqtr-krdr nzrlxngitingr x mz nzngini-krdr lr Jiu mz nzrpakrngr. Lou kxsztr lcng nzakipxng leplz. Kzdq rpile kx nzmu lr Jiu nzmnncng badr kxtrngiulrJiu, sa nabatrzle mz lr Jiu trntakitrdeu nzprtrnegr mz nzangiongr. Mzli lc pnz, pris neng lr Jiu na-ale-zvzng blz, murde Gct naipqpxle alwx ngr leplz nedrung. A' mzli ka, sc tqangidatipe Jiszs lou lcng, mz nzngini-krde Nei sip ne Gct, kc tqngi blz kxrmnr-ngrbz. ^{*} ^{2:17} Asaea 57:19 ^{*} ^{2:20-22} Sam 118:22 ^{*} ^{3:8} Pol rpile kx leplz neng Gct amrlx nzmyaszpxlr nide, murde xngitr-zlwzle nzatrkat-kai-krde kxnlxngitilr Jiszs.

kx abrtzlvzle nigu mz nzabrtr-krbzku drtwrgu mz Jiszs x nzaxvctr-krbzku bade. ¹³ Mz nzmu-krde lcde, bzkq nabzmu talvzo mz nzetqkr drtgngé mz nzyapwx tipx-krbo Nrpakxmrlz bamu, nimu kxtrngiulrjiu. Murde da kx prtzm bange ngi dalr nzokatrngr nimu.

Pol Krka'-ngrde Lr Efiszs

¹⁴ Mz nzaotikr drtwnge da lcng tqmrlzting, tzvzpxmqng mz nzaxvctr-krbzmu mz Kraes, atuobo zpr mz nzkrka'-krbo mz mz Gct Trtegu. ¹⁵ Murde nide Trte neidu amrlx kx nzmnncng Heven x kx nzmnncng mrka mz nrlc ka. ¹⁶ Mz da lcng tqmrlzting, rlxtibo bade nzka-krbzle bamu zmatq ngr Mqngrokxtr mz nzaxplr-krde nimu navzo la mz nabzmu. ¹⁷ Murde namnc zvz mz nabzmu, mz nzbrkr drtwrmu. X krka'-ngrne kx nivz lr Gct nangi dzbr x nou nzmnnc-krmu. ¹⁸ Murde mz zmatq ngrde nakrlz-angidramu nzetukr nivz lr Kraes. Murde nzyryz-krde, nzboi-krde, nzvzo-krde, x nzmyalz-krde tqvzpe tqvzpe. ¹⁹ X krka'-ngrne kx sa naxngibzmu nzetukr nivz lrde mz nabzmu, kxmule-esz' trpnzng r kxrkrlz angidr. Murde naelwaxp-zpx-ngrnamu nivz lrde mz nqmq krmung amrlx.

²⁰⁻²¹ Mzli ka takitrde nzglqlz-krgu Gct. Murde krlzle nzalengr da kx myaszpx-zlwzle da amrlx kx rlxtibzku bade x myaszpx-kzle da amrlx kx aoti drtwrgu. X alele da lcng mz zmatq ngr Mqngrokxtr kc tqalu-zvzle nabzgu. Murde nigu lrmakxtr, mz nzaxvctr-krbzku mz Mevalu Jiszs, naamrlue-zvzku nide, tqvzpe tqvzpe. Eu, angida.

4

Drtwr Kxnzxngitilr Kraes Naesz'ti

¹ Lalztqmamu bange. Mnçpxmc mz presin murde wztrpo mz Kxetu. Naxplrmibz natqnge mz nzpi-angidr-krbo bamu kx nqmq krmu x nzmnnc-krmu natakitrde nzkqlekr Gct nimu mz nzngini-krmu doa nedeng. ² Lrpzki kx navz-nqblqamu nide sele. Avzo-lzbqamu. Nanginimu leplz ngr nrwx. X bzkq drtwrmu ngya-anibz mz leplz kx nzatrkatilr nimu. A' mz nivz, rlr-ngrbzmu badr mzli r nztekqtr-krdr nqmq nr drtwrdr. ³ Mnç-zvzamu mz nrwx x mz nzesz'tikr drtwrmu mz nzmnclz-krbzmu mz Mqngrokxtr.

⁴ Murde nanginigu dzbede kxesz' mz da amrlx. Prtrku mz nrkrdrtq kcpwz. Twzku Mqngrokxtr kcpwz. X obqtipxku da kxmrlzting kcpwz mz nzkqlekr Gct nzngini-krgu leplz nedeng. ⁵ X vz-nqblqku Kxetu kcpwz, mz nzrlxngitingr kcpwz. X mz drtq Gct kc tqngi Trte, Mrlxde, x Mqngrokxtr, prtrku mz nzwrkxtrngr kcpwz. *

⁶ Angioku Gct kcpwz, tqngi Trte leplz amrlx, tqmyaszle nigu amrlx, tqmncpxm bagu amrlx, x tqmcpkle nigu amrlx mz nzale-krgu nzwz-krde.

⁷ Kxmule-esz', a' Kraes kamle bagu zmatq ngr nzwzng r kx bletipx-lxblrng mz nzwztr-krbzku bade, mz nzvz-nqblq-krde me pnz drtwrde. ⁸ Da kc tqpingr Nzryrngrkxtr le, kx mz nzvdzkr Kxetu wq aovxiol enqmi kang kqlu. X kabzle da kxmrlzting mz ncblo. ⁹ Mz nxzlr-krgu natq lc, 'vzdz wq,' nakrlz-kzku kx vzo-kaip yu mz nrlc. ¹⁰ Mr lx kc tqvzom, nide kcpwz tqvzdz wq me matq esz'ngr, murde naesz'-ngrde da amrlx mz nrlc atwrnrngr. ¹¹ Nide kcpwz tqyrlqle leplz mz nzwz-krdr murde na-aclvelr lrmakxtr, mz nztwz-krdr nzwzkr aposol, o profet, o kxnzrlep xng Nrpakxmrlz, o kxnzaclvelr leplz nedeng, o kxnzalvztr-ngrdr natqde, ¹² mz nzoliqti-krdr

* ^{4:5} Mzli kc Pol tqyr-ngrde letz lc, lrmakxtr trpnzng r nzakipx-lzbq-krdr mz nzwrkxtrngr. ^{9:8} Sam 68:18

leplz neng Gct murde nawztrpzng bade. X mz nzwz-krdr lcng, sa na-aplrlr leplz kcng tqngi nrkrdrtq Kraes, ¹³ vz vz mzli kx drtwrgu esz'ti mz nzlxngiti-krgu Mrlx Gct x nzkrlz-krgu nide. Murde nzmnc-krgu badr nabr x na-apupwzku Kraes mz nqmq krgu amrlx. ¹⁴ Mzli lcpe nzmnc-krgu trapupeleu doa kxnztopwzng kx nztekqtr-ebir-ngrdr drtwrdr apule drtwrdr lcng tqtwzne nrc. Doa lcng tztwzlr nzalvztrngr kzbleng mzli kznikeng nzxlr-ngrdrle, apule da kx tqtwzne nenq. A' trapupekuu nidr, murde mzli ka rblxbz mz kxnzalvztr-rbrng nzesabrti-krdr nigu murde mc-zpxwku nzpokia-krdrng. ¹⁵ X mz nzvz-nqblk-krgu nivz angidr, napipx-etrku nzalvztr-ngrng angidr, murde naetunepx-zvzku mz da amrlx mz nzapu-krgu Kraes kc tqngi nargu. ¹⁶ X mz nzngini-krde nargu, amwitrlxblrle leplz nedeng mz nrkrdrtqde, apule neli kxetu kc tqaxvctrle mrkcng kqlu mz nrkrdrtq ncbl. Murde mzli kc doa kxesz' tqale-zpxw-ngrde nzwz-krde mz nzvz-nqblk-krgu nivz lr Gct, doa lc aetunepxle nxzplr-krgu, nigu amrlx mz nrkrdrtq Kraes.

Nqmq Kr Leplz Neng Gct

¹⁷ Mz nzmu-krde lcde, pibo bamu mz drtq Kxetu rgu x mz nzngini-krnge aposol nede, kx bzkq apuapeamu kxtrnzrlxngitiung, murde nzaoti zvz drtwrdr da kxmane x trpnzngr nrade. †

¹⁸ Rblxbz badr nzkrlz-zpxw-krdr nzalvztrngr angidr, murde nqmq nr drtwrdr lc tqvz-rbr akamrbr-ngrde da mz nabzdr. X nzpxtxpx-ngrdr nzlukr Gct kxmrna murde nardr mqngi x trnzkrlzlr nqmq krde.

¹⁹ Trnzclupeung mz da kx myangr drtq, mz nzrlrpz-lzbq-krdr nzvz-nqblk-zvz-krdr da kx mrlzbz mz nrkrdrtqdr. X nzamqmiti-rbrllr nrkrdrtqdr mz nzrmwimi-abeane-krdr leplz kx trngiu kernalzdr. X drtwrdr tresapxu mz nzale-rbr-krdr da lcng.

²⁰ A' nimu, trngiu da kx nzalvztr-ngrmu lc, mzli kc kai tqxlr-ngrnamu Nrpa ngr Kraes. ²¹ Murde mzli lc tqxlrpe-ngrnamu kx nzmnc-krmu navz-nqblk-zvzle natq angidr kc tqalvztrngr Jissz. ²² Rpile kx na-axtxpeamu nqmq kcng pnz tqvz-nqblkqamu mzli kc trkrlzka-ngrnamu Gct. Murde nqmq kxdrka'ngr lcdeng nzatrkatilr drtwrmu x nabzmu. ²³ A' narlr-ngrbzmu mz Gct nztekqtr-krde nimu, murde nanginimu leplz kxmrna kcng nzao-krmu drtwrmu tqmrna kz. ²⁴ X mz zbq kang kqlu narlrpx-lzbq-ngrnamu mz nzngini-krmu leplz kxmrna, murde navz-nqblk-angidramu Gct x nzmnc-krmu natubq zpxw x nalqngi mz nzobq-krde.

²⁵ Mz nzmu-krde lcde, bzkq pokiapebzmu mz kztemung, a' rpi-etramu da angidr. ²⁶ Murde nigu amrlx ngrgu leplz ngr nrkrdrtq kcpwz. ²⁶ Kzdung zngya ngr drtwr leplz trngiu alwx. A' aclvetio-lzbqm mzli kc tqngyangr drtwrm, ma tqvz-rbrq. ²⁷ Murde tr-rblxu nzvz-rbrngr mzli kc tqngyangr drtwrm. X bzkq zngya ngr drtwrm boi nzkrlz-krbzle nzmwi-krm mz nrlckxbq. ²⁸ ²⁷ A' ipq ani kztem murde ma tqrlr-ngrbzme mz Setzn nzatrkat-krde nabzmu.

²⁸ Mrlx kx pna da, bzkq pnape da. A' nawz-kato mz nzatatr-krmle da kx takitrde nide badr lr ma nyzde, vzmi nzokatr-krde nra-nzlu ngr leplz. ²⁹ Bzkq ycmne-atrkatiamu leplz mz nzrpibqti-krmu x nzrlcbqti-krmu nidr. A' rpi-txpwzmu natq kx takitrde nzaxplr-krde nabz leplz neng Kraes, murde na-amrlz-zvzamu krkcng tzlalztqng. ³⁰ Bzkq avzbzmu

²⁸ 4:14 Jud 12-13 [†] 4:17 Kzdung da kxmane nidr seleng: nzangio-krm drka', nzmnc-xgle-krm zmatq ngrm esz'-krm, nzvz-nqblk-krm nqmq kr leplz kx nzrpwa'-ngrdr nzwzkr Gct, nzpxtxpx-krm natq Gct, x kzdung kz da kxnzmull lcng. ²⁹ 4:25 Sekaraea 8:16 ³⁰ 4:26 Sam 4:4 ³¹ 4:26 Hosia 7:6

drtwr Mqngrkxtr, murde ma tqrblxbz bade nzokatr-krde nimu. Murde Mqngrkxtr lc tqmncpxm mz nabzmu ngi rrx ngr nzngini-krmu leplz neng Gct. X nzwz-krde nzokatr-krde nimu nakrlzbzle mzli kc Gct na-arlapx-atwrnr-ngrde nimu mz zmatq ngr alwx, mz nzyzlu-krm Jiszs o mz nzbbz-krmu.

³¹ Naesakiamu nzrtrngz-ngrbz drtwr kxtrka lcde seleng: nzlolvz-amqngi-krmu zngya ngr drtwrmu kx vz nabu, zngya kxetu, nztalwz-krmu, nzpibqti-krmu leplz, x nzmwatikr drtwrmu leplz. ³² A' nivz lrmu namrlz x naycngr drtwrmu leplz kxnzkxpung x naokatramu nidr. X ipq-lzbqamu, da kc tqwai Gct mz nzipq-krde nimu mz nzaxvctr-krbzmu mz Kraes.

5

¹ Abzamu nzvz-nqblq-zvz-krmu lrpzki r Gct, murde nimu doa nedeng kcng tqmrlzti-zlwzleng. ² Namrlzti-zvzamu leplz, da kc tqwai Kraes nzmrlzti-krde nigu. Murde rlrpx-lzbq-ngrde nzbbz-krde nigu, mz nzngini-krde blz kx myapx-esz'ngr kx abrtzlvz Gct.

³ X mz nznginipe-krmu lc leplz kxnztrng ne Gct, nzmnc-krmu natubq-zvzpwz, murde ma tzpikingr leplz nimu nqmq krmu. Bzkq rwmimiamu doa kx trngiu kernalzmu, x bzkq aleamu da kx myangr drtq, x bzkq trkibramu. Murde nqmq kxnzmulr lcng trtakitrpleu leplz nedeng. ⁴ Murde trtakitr-kzdeu nzryapwx-krmu kxtrka. Bzkq yapwxtipxamu be kx amyale drtq. Bzkq ycmne-lukurnr-ngrnamu x rwxtiamu leplz. A' awi-ngrbzmu mz Gct nivz lrde, mz nzycmne-krmu amrlx. ⁵ Leplz kcng tzprtrng mz nzrmwingr leplz kx trngiu kernalzdrng, x mz nzalenegr da kx myangr drtq, x mz nzngini-krdr trkibr, leplz kxnzmulr lcng trnamncung Heven badr Kraes x Gct Trte, x trnatwzlrda kcng tzvzpxmqng mz Gct nzngini-krde King rdr. Murde mz nzale-krdr da lcng trnzangiolru Gct angidr, a' nzangiolr nidr esz'-krdr. ⁶ Bzkq rlr-ngrbzmu mz leplz nzesabrti-krdr nimu, mz nzrpikrbzlr kx Gct rlrpx-ngrde da lcng tqtrka. Murde natq kxnzmulr lcng nzvz-rbrng. X zngya ngr drtwr Gct kalr sa natutitrle leplz amrlx kcng tzxpqbrrngrdr natqde. ⁷ Mz nzmu-krde lcde, bzkq prtrpzmu badr, a' kapx-lzbq-zvznamu badr.

⁸ Murde mzli kc ena, apuamu leplz kcng tzmnncng mz nzlo, murde alwx ngrmung nzakamrbr-ngrdr da mz nabzmu. A' mzli ka apupeamu leplz kcng tzmnncng mz zyzlr, murde da angidr kx vzpxm mz Kxetu pnamilxtipele nabzmu. Mz nzmu-krde lcde, mnc-nqblqamu da angidr lc. ⁹ Murde leplz kcng tzmnnc-nqblqlr da angidr lc, nqmq krdr sa namrlz, nalqngi, x natubq. ¹⁰ X abzamu nzkrlz-krmu da kx abrtzlvz Kxetu, x vz-nqblqamu me pnz drtwrde. *

¹¹ Kapx-lzbqmamu mz da kxmane kcng tqtrka. X pibzmu mz leplz kx da lcng ngi alwx. ¹² Murde myangr drtq leplz nzryapwxtinengr da kx nzrtrngzti-kapqbz leplz kxdrka'-ngrng. ¹³ A' mzli kc alwx kcng tqyc-kapq tzaelwapx-ngrdr, leplz nakrlzlr da kx ngi drka'-ngrng. ¹⁴ Murde da angidr kx vzpxm mz Gct apule zyzlr kc tzaelwapx-ngrde da kxtubq x da kxvz-rbr. Delc, leplz nzngr-ngrdr kx,

“Ei! Melzmq! Bzkq mwibqpeq!

A' tulzm mz nzbngr mzli ka.

X rlr-ngrbz zyzlr ngr Kraes

Nzpnamilxti-zvz-krde nabzm.” †

* ^{5:8} Asaea 9:1-2 * ^{5:10} Naglxku niike abrtzlvz Gct mz nzrlwx-krgu Nzryrngrkxtr, murde pipxle da kx mrlbz bade x da kx trkabz bade. † ^{5:14} Nabz lc nangr-ngrgu mz #110 ‘Lod, Glqlzkr’ mz Buk R Nzangiongr.

¹⁵ Mz nzmu-krde lcde, obq-angidramu mz nzmnc-krmu. Bzkq apuamu ncblo kxngqngu, a' na-apuamu ncblo kxyrplapx. ¹⁶ Oliqti-zvzamu nzamrlz-krmu leplz, murde mzli ka leplz kxnzkqlung nzale-txpwzng da kxtrka. ¹⁷ Dekc tqrpi-ngrbo bamu kx bzkq apuamu ncblo kxngqngu, a' abzamu nzkrlz-krmu me pnz drtwr Kxetu.

¹⁸ Bzkq rlr-ngrbzmu mz nzrmnqngr nzatrkatı-krde nimu. Murde nzrmnq-katongr rkatrpz mz leplz nzrtrngz-abeane-krdr da kxdrka'ngr kx myangr drtq. A' rlr-ngrbzmu mz Mqngrkxtr nzokatr-krde nimu, murde narkatrpz bamu nzale-krmu da kxtubq. ¹⁹ X mz nzokatrkr Mqngrkxtr, ycmne-etramu badr kztemung mz natq ngr Sam, him, x nabz kxtrng. ²⁰ X angrlvzamu Kxetu mz nabzmu atwrnrngr. ²¹ X awi-zvz-ngrbzmu da amrlx mz Trtegu Gct, mz nzngini-krmu leplz neng Kxetu rgu Jiszs Kxnzmcpx.

Olvz Kxnzyrlzng X Ncblo Ngrdrng

²¹ Doa ne Kraes namnclbz mz zmatq ngr kztedeng kxnzrlxngiting mz nzamrlue-krde Kraes. ²² Mz nzmu-krde lcde, nimu olvz kxnzyrlzng namnclbzmu mz zmatq ngr ncblo ngrmung, mz nzmncz-krbzmu mz Kxetu rgu. ²³ Kraes nide nargu kx aclve-angidrle nigu lrmakxtr mz nzngini-krgu nrkrdrdqde. X nide kc tqarlapxle nigu. Mz nqmq lcpwz, ncblo kxyrlz nangi nar olvz rde mz nzaclve-angidr-krdele. ²⁴ Mz nzmu-krde lcde, nimu olvz narlr-lzbq-ngrbzmu mz nzmncz-krbzmu mz ncblo ngrmung, da kc tqwai lrmakxtr nzmncz-krbzlr mz Kraes.

²⁵ X nimu ncblo kxnzyrlzng namrlztiamu olvz ngrmung, da kc tqwai Kraes nzmrlzti-krde lrmakxtr mz nzbz-krdeleng. ²⁶ Bz-ngrde nidr murde na-alqngile nidr mz lue ngr nzwrukxtrnegr x mz nzlxngiti-krdr natqde. ²⁷ Murde lrmakxtr sa na-apule olvi kx nayrlzti Kraes kalr. X mzli ka sc tqatubqtile nide, murde natakitrde nide nztutr-krbzle mz mzte, mz nzngini-krde olvi kxluli, kxlqngipx, kxtr, x kxtubq-esz'ngr mz nzobq-krde, kx trtxpnzngar alwx ngrde x trpnzngar da kxvz-rbrtrpz bade. ²⁸ X nimu ncblo namrlztiamu olvz ngrmu da kc tqwai nzmrlzti-krmu nrkrdrdqmu. Murde mz nzmnc-lxblrngr, ncblo kc tqmrlztile olvz rde mrlzti-lzbq kz. ²⁹⁻³⁰ X trpnzngar kx trkalr-ngrde nrkrdrdqde. A' aclve-angidrle x aputre dakxanzng, da kc tqwai Kraes nzaclve-krde nigu lrmakxtr, mz nzngini-krgu nrkrdrdqde. ³¹ Da kc tqwai nzpikr Nzryrngrkxtr le kx, "Mzli kc ncblo x olvz tzetupe-ngrdr, nayrlzng. X nzamatq-lzbq-krdr namyaszpxle nzamatq-krdr kxnginidrng. X ncblo namnctr-amqngipebz mz olvz rde. Murde doa lcng li nznginipedr nrkrdrdq x leplz kxesz'." ³²

³² X mz nqmq lcpwz Kraes ncdr lrmakxtr nidr nrkrdrdq x leplz kxesz'. Krlic da kx myapxbz kx trkrlz-angidrkaku. ³³ Kxmule-esz', a' ncblo kxyrlz kxesz' namrlztile olvz rde, da kc tqwai nzmrlzti-lzbq-krde. X olvz kxyrlz na-amatqle ncblo ngrde. ‡

6

Doa Kxnztopwzng Badr Trtedr X Lxedr

¹ Nimu doa kxnztopwzng, lxngitibzmu natq trtemu badr lxemu, murde axvctr-lzbqpebzmu mz Kxetu x krlic me pnz drtwrde. ²⁻³ Da kc tqwai nzpikr Nzryrngrkxtr le kx, "Amrlue zvz trtem x lxem, murde na-amrlz Gct nim

³¹ 5:19 Kolosia 3:16 ³² 5:24; Matiu 19:5; Mak 10:7-8; 1 Korint 6:16 ³³ 5:25 Nivz lc ngi dalr nzska-zvzngr da, a' trngi dalr nzrtwz-zvzngr da. 5:33 Gct yrlqle nzyrlzng murde ncblo x olvz naokatr-lzbqng mz nzyrlz-krdr.

x namnc-zpxwq mz nrlc ka mzli kxboi.” ☀ Krlc lou sc Gct ayrnrngr kx amnqlzle kc tqvzmi nzesalz-krde.

⁴ A' nimu trte x lxe doa kxnztopwzng, bzkq angyatibzmu drtwr doa nemung. A' acive-angidramu x alvztr-angidramu nidr, murde navz-nqblqlr me pnz drtwr Kxetu mz nzyrlvzlx-krmlr.

Kxnzawzng X Kxnzetu Rdrng

⁵ Nimu kxnzawzng, navz-nqblqamu natq kxnzetu rmung mrka mz nrlc. X navzdzm mz nabzmu atwrnrngr nzamrlue-krmu nidr mz nzamatqng, na-apule kx wztrpzmu mz Kraes. ⁶ Bzkq wz-angidrtx-ngrpwzmu mzli kx nztulvz-ngrdr nimu kxnzetu rmung, murde naglqlz-ngrdr nimu. A' napq mz nabzmu nzvz-nqblq-angidr-krmu natqdr, mz nzapu-krmu kxnzwztr-pzng mz Kraes, murde krlc me pnz drtwr Gct. ⁷ Abtzlvzamu nwz-wz-krmu, na-apule kx wztrpzmu mz Kxetu, a' trngiu ncblo. ⁸ Nadcpx mz drtwrmu kx Kxetu sa na-ayzlumle nwz-wz-krgu kxmrlz mz da kxmrlz, kxmule-esz' nigu kxnzawzng o trtingr. ⁹ X nimu kxnzetung, kx namusr-kz-ngrnamu kxnzawz nemung lcpwz. Bzkq rpibzmu natq kx naxngitrlr x natq ngr nzviplangr nidr. Nadcpx mz drtwrmu kx nimu badr Kxetu rmu esz' kc Heven, x mz nzobq-krde leplz amrlx kxnzmu-txpwlzlr esz'.

Dalr Vea Kx Kam Gct Bagu Mz Nzaovxio-krgu Setzn Badr Drka' Kztedeng

¹⁰ Natqnge kx nzrmnr-ngrbzng nidr seleng. Mnctr-amqngibzmu mz Kxetu rgu, murde nargiscmu zmatq mz nzaxplr-krde nimu. ¹¹ Vecku badr Setzn kc tqsuti drtwrde nzaovxio-krde nigu. Mz nzmu-krde lcde, yrlqbzmu dalr vea amrlx kcng tqkabz Gct bamu, murde natu-amqngi-ngrnamu mzli kc Setzn na-atalz-ngrde x naesabtri-ngrde nimu. ¹² Mz vea lc trveckuu badr leplz. A' vecku badr drka' kxnzetung, kxnzrmailzng, x kxnzmatqng kcng tzmnccng mrnyzdr. Murde sc tzrbatrpzng alwx x da kxtrka mz nrlc ka, mz nzrngisc-krdr zmatq kxdrka'ngr. ¹³ Mz nzmu-krde lcde, mzli ka nayrlqbzmu dalr vea amrlx kcng tqkabz Gct bamu, murde mzli kc navec-ngrgu badr, natu-pz'li-ngrnamu nidr. X natu-amqngiamu nakrlzbzle mzli kc nayrkrpxngr nzvecngr lc.

¹⁴ Oliqti-lzbqamu mz nzngini-krmu ncblo ngr vea neng Gct. Murde ncblo ngr vea nzamqngitrlr nrkalodr, murde naoliqng mz nzvecngr. X mz nqmq lcpwz, nzkrlz-krmu da angidrng amrlx kx nzvzpxmqng mz Gct na-apule nrkalomu, murde naoliqamu mz nzaovxio-krmu nzpokiangr amrlx. X ncblo ngr vea nzyrlqbzlr temz ngr lomrdr kc tqyryputrngr nipna, murde enqmi rdrng ma tzuapltxtrpzlr lomrdr. Mz nqmq lcpwz, nzkrlz-krmu kx tubqpebzmu mz nzobqkr Gct na-apule temz ngr lomrmu, murde Setzn ma tqbatrpzle nztalvzokr nabzmu, mzli kc tqrpi-ngrbzle bamu kx vz-rbramu. ☀ ¹⁵ X ncblo ngr vea nzyrlq-kzpzlr but ngr nanycdr, murde natu-amqngi-ngrdr mz mzli r vea. X mz nqmq lcpwz, nzkrlz-krmu kx mncamu mz nrwrx badr Gct mz nzvz-nqblq-krde Nrpakxmrlz, na-apule but ngr nanycmu, murde natu-amqngiamu mz nzrlxngiti-krmu x mz nzpipx-krbzmu Nrpakxmrlz badr leplz. ¹⁶ X ncblo ngr vea nzaotr-kzng mz mqdr kxmc da kxmngi scdr kc tqyryputrngr nipna. Mz nqmq lcpwz nzbrtikr drtwrmu Jisz, na-apule da kxmngi scmu kc tqyryputrngr nipna kxngc kc tqpnzng Setzn nimu mz nzatrkat-krde nimu. Murde nzbrtikr drtwrmu Jisz sa na-amz-zvzbzle nipna kxngc sc Krkc Tqdrka'ngr amrlx. ¹⁷ X ncblo ngr vea nzyrlq-kzpzlr abx ngr vea kc tqayrbqpxle nardr. X nzmale-kzlr toki r vea mz mqdr kxrtc mz nzvec-krdr badr enqmi rdrng. ☀ X mz

nqmq lcpwz, nzkrlz-krmu kx Gct arlapxpele nimu na-apule da kxmqngi kx nalalvzle narmu, murde nzao-krmu drtwrmu natubq x naopx, murde ma tqesabrti Setzn nimu. X nzkrlz-krmu natq Gct x nzpipx-krbzmule na-apule toki r vea kc tqkabz Mqngrkxtr, nangi dalr nzaovxio-krmu Setzn. ¹⁸ X mz nzvec-krmu, krka'-zvz-ngrbzmu mz Gct nzokatr-krde nimu. X mz da amrlx krka'-zvzamu navz-nqblqle kxmu nzpi-krbz Mqngrkxtr le mz nabzmu. Mz nzkrka'-krmu aclvetio-angidramu, murde drtwrmu bzkq ma mz nzkrka'-krmu leplz neng Gct amrlx mrkang kqlu. X bzkq esaki nzkrka'-krmu, navz nakrlzbzle mzli kx ayzlu-ngrbz Gct natqmu.

¹⁹ X krka'-kz-ngrnamu ninge, murde nakam Gct bange natqdeng mzli kzniqe naycmne-ngrne, x nelznge nbr, mz nzyokaetipx-angidr-krbo Nrpakxmrlz kc tqyc-kapqbz mz leplz. ²⁰ Kraes aprcmle bange nwzkr menrpa nede mz nzyapwx tipx-krbo natqdeng. Dekc tzadwatrpe-ngrne mz presin. A' krka'-negrnamu ninge, murde napipx-angidrbo mz nelznge kxbr.

Natq Ngr Nzarlrlzbqngi

²¹ Atwzlr-ngrbo bamu Tikikzs, mzlegu kxnzmrlzti, kx wztr-angidrbz mz Kxetu rgu, murde nayapwxti-krlzpwlze ninge bamu x da kx rtrngztibong.

²² X na-apqtrpzle drtwrmu mz nzkrlz-krmu nrpa ngrgrng amrlx.

²³ Krka'-negrne kx Trtegu Gct x Kxetu rgu Jiszs Kxnmcpnx na-amnc-zpwxlz nimu badr mz nrwrx. X nabatrpbzlr nzmrlzti-lzbq-krmu x nzbtti-zvzkr drtwrmu Kraes. ²⁴ X rlxti-kzpo mz Gct kx nakabzle zmrlz ngrde kxmyalz mz leplz amrlx kcng tzmrlztilr Kxetu rgu Jiszs Kxnmcpnx mz nivz kc tqvztx alo.

Delape. Ninge Pol.

Nzryr-krbz Pol Mz Lr Filipae Natq Ngr Nzaplxtqng Mz Nzryr-krbz Pol Mz Lr Filipae

Letz lc yrbz aposol Pol mz lrmakxtr kcng tzmncng taon kxetu Filipae mz provins kc Masedonia. Mzbq ka Masedonia nzrpibz kandre kc Gris. Trgalr lr Filipae kxnzrlxngiting mzli kx Pol nidr badr Saelas, Timoti, x Luk nzkrlbzlr mrlcde mz nzvzpx-krde krali mz yiz 51 AD mz nibr nzrmcngr mz Jiszs. [◊] A' sc tzlxngiting mz nzryapwx-krbzlr Nrpakxmrlz badr. Oklati-moule nidr mz nibrde. Mz nwzng Mz leplz nzkqlung kxtrngiulrJiu nzrlxngitilr Jiszs.

Yrle letz lc mz nzwrdkc kai tqmnc-ngrde mz presin mrkc Rom. [◊] Yrle mz mzli yiz 60—62 AD. Mzli lc tqyr-kzpze letz mz Filimon, lr Efisz, x lr Kolosia. Letz lcng amrlx dzbede esz' kx nzryng mz presin. Mz letz lc awibz mz lr Filipae murde nzatzlrbzlr traus x Epafroditz bade mz nzokatr-krdr nide.

Nzalvztrngr kxmyapxbz mz letz lc rpile kx na-aelalz-ngrm drtwrgu nzaetqng drtqgu mz nzvz-nqblq-krgu Jiszs Kxnzmcpx. Murde mz nzaxvctr-krbzku bade mz nzetqkr drtqde, sa na-amrlzle nigu. Pol rpi-kzle kx leplz neng Gct drtwrdr naesz'ti x na-aclvetio-lzbqng mz kxnzalvztr-rbrng.

Mrkcngr Mz Letz Lc

Pol awibz mz lr Filipae x krka'-ngrde nidr. [1:1-11]

Kxmule-esz' Pol mnccpxm mz presin, drtwrde elalzm, murde suti drtwrde kx leplz naglqlzlr Kraes. [1:12-26]

Pibzle badr kx natu-amqngi-zvzng mz nzrlxngiti-krdr, x nzmnc-krdr natakitrde leplz neng Gct. [1:27—3:1]

Pibzle badr kx na-avzo-lzbqng da kc tqwai Kraes ma nzavzo-lzbq-krde. [2:1-11]

Pi-kzpze badr kx navz-nqblqlr nzmnc-krde x natq Kxetu nakrlbzle nzbz-krdr. [dckrlzde 3]

X pi-mopwzle badr kx naesz'ting mz drtwrdr, na-abrtzlvz-zvzlr nzkrlz-krdr Kxetu, x drtwrdr naesapx mz nzmnc-zpxngr kx kabz Gct badr. [dckrlzde 4]

¹ Ning Pol, nigr ncdr Timoti, kxnzawz-nrbalqng ne Mevalu Jiszs.

Ryrbzkr bamu, nimu leplz kxnztrng ne Gct amrlx kx nzaxvctrpzng mz Mevalu Jiszs. Nimu kcng tzmncng mz taon Filipae, badr kxnzaclvelr nimu x kxnzaclveng dalr makxtr. ² Krka'-ngrne kx Gct Trtegu x Kxetu rgu Jiszs Kxnzmcpx, naokatrlr nimu mz zmrlz ngrdr kxmyalz murde namnc-zpxxamu.

Pol Krka'-ngrde Lr Filipae

³ Awi-zvz-ngrbo mz Gct rnge mz nzdcpxkr mz drtwrnge nimu. ⁴ X mzli kznikeng krka'-ngrne nimu amrlx, krka'-abrtz-zvzx. ⁵ Murde okatr-zvzamu ninge mz nwz-lxblr-krgu mz Nrpakxmrlz, yzuo mzli kc kai tqrlxngiti-ngrnamu, krlzmle mzli ka. ⁶ X krlzti-angidrx kx Gct dekc tqayzutrpzle nztekqtr-krde nimu, x sa navz zvz nztekqtr-krde nimu nakrlbzle mzli kx na-ayrkpx-ngrdele, mzli kc nayzlu-mou-ngrm Mevalu Jiszs. ⁷ Nimu la tqyc zvz mz drtwrnge. X takitrde nzaoti-zvzkr drtwrnge lc nimu amrlx ngrmu.

[◊] : Aposol 16:6-40 [◊] : Aposol 28:30-31

Murde nargu tutr-lxblrpe mz nzwzngr kxmrlz mzli ka tqmncpx-ngrmc mz presin, x mzli kc tqaxplrtr-ngrne Nrpakxmrlz mz nzalvztr-krnge. ⁸ Krlz Gct kx trpokiawxu mz nzhpi-krbo kx nzmlzti-zlwz-krnge nimu vzpxm mz nivz lr Mevalu Jiszs.

⁹ X krka'-negrne nimu, kx nivz lrmu naetunepx zvz, mz nzkrlz-angidr-krmu Gct x nzabrtzlvz-krmu da kxtubq. ¹⁰ X nakrlzamu nzrmcpxngr da kx brngz-esz'ngr, x nzmnc-krmu natubq x natr nakrlzbzle mzli kc Kraes nayzlu-mou-ngrmle. ¹¹ X krka'-negrne kx nztubq-krmu lc naetunepx zvz mz nzaxvctr-krbzmu mz Jiszs Kxnmcpnx, murde leplz naglqpxlr Gct.

Nzmnctr-ngrbz Mz Kraes

¹² Mzlengeng x inwengeng, abrtztx-ngrne nzpi-krbo bamu kx kxmule-esz' nzatrkatilr ninge, a' krlc okatrle x axplrlle nzwz-krnge mz Nrpakxmrlz. ¹³ Murde kxnaclveng mz ma nyz King kc etu mrka Rom x kzdung kz leplz nzkrlzlr kx mncpxmc mz presin murde wztrpo mz Kraes. ¹⁴ Nzmnctr-ngrmc lc mz presin, apqtr-mopwzle nabz mzlegung kxnnzkqlung. X mzli ka nelzdr br mz nzpipx-krdr Nrpakxmrlz, x trnzmwxlpeung. ¹⁵ Kxmule-esz' kzdung nidr nzdobulvzlr x sc tzyapwxtipx-ngrdr Nrpakxmrlz mz drtwr kxmwa, a' kzdung nzryapwxpxng murde suti drtwrdr nzokatr-zpwxlr ninge, vzpxm mz nivz lrdr. ¹⁶ X nzkrlzlr kx Gct mcpkle ninge mz nzaxplrkrnge nzwzkr Nrpakxmrlz. ¹⁷ A' ncblo lc-kzng tzyapwxtipxlr Kraes, murde suti drtwrdr namyalzng mz nzamatqkr leplz nidr. X nzrpilr na-aetunepx-zlwzlr nztalvzokr nabzng mzli ka tqmncpx-ngrmc mz presin. ¹⁸ A' sa tqmrlz ye! Murde da kx myapxbz ngi nzvz-zvzkr nzryapwxtipxngr Kraes. Kxmule-esz' nzyapwxtipx mz nabz kxnpokiangr o mz nabz angidr, a' nzryapwxtipxngr Kraes, dela tqabrtz-ngrne. X abrtz-zvz-ngrne. ¹⁹ Murde krlzx kx sa na-aovxiox mz nzkrka'-krmu ninge, x mz nzokatrkr Mqngr Jiszs Kxnmcpnx. ²⁰ Da kx pqtx zlwz mz drtwrnge, x da kx obqtipxx, kx bzkq taox mz nzwztr-krbo mz Kraes. A' suti zvz drtwrnge kx nelzng bzkq twz-prlzm, myapxbz mzli ka. Murde na-alex da kx naglqpxngr Kraes, kxmule-esz' mz nzlu-krnge o mz nzbz-krnge. ²¹ Murde mz nzmnc-krnge mz nrlc ka, mncbo mz Kraes. A' nzmu nabzx, sa namnc-zvzpebo bade Heven. ²²⁻²³ Trkrlzwxu myx kxmrlz, nzlungr o nzbngr. Mncx mz drtwr kxli. Nzmu namnc-zvzbo mz nrkrdrtq, krlzx nzwztr-zvz-krbo mz Kraes. A' suti drtwrnge nzrlaszpx-krnge nzlu-krnge mz nrkrdrtqng lc, murde namnctrpebo mz Kraes. Murde nzmnctr-ngrbz bade ngi da kx myapx-esz'ngr. ²⁴⁻²⁵ A' krlzx kx sutibe drtwrmu ninge. Mz nzmu-krde lcde, krlz-kzx kx sa nalubex. X sa namnc-zvzbo bamu mz nzokatr-krnge nimu. Murde nzlxngiti-krmu Jiszs x nzabrtzlvz-krmu nide naetunepx. ²⁶ X nayzlu-mopwz' mzli kc Mevalu Jiszs na-avzpx-ngrmle ninge mz presin, murde na-abrtzlvz-kzamu nzkrlz-krbo nimu.

Tu-amqngiamu Mz Nzotangr

²⁷ Kxmule-esz' da kx prtz, a' da amrlx kx aleamu natakitrde Nrpa ngr Kraes. Murde kxmule-esz' vzmc mz nzmc-krnge nimu mz mzke', o mncmc rrlru, a' naxlrtxpwo nrpa kx tu-amqngiamu mz drtwr kxesz', mz vea ngr Nrpakxmrlz. ²⁸ Bzkq mwxlrtiamu ncblo kcng tgotaamu badr, murde Nrpakxmrlz aelwapx-ngrde kx Gct sa naodatile nidr, a' na-arlapxle nimu. ²⁹ Gct rlr-ngrbzle bamu nzwztr-krbzmu mz Kraes murde lxngitiamu nide. X rlr-kz-ngrbzle nzetqtr-krbz drtqmu bade. ³⁰ Murde mzli ka nzkxpungr kcpwz tqrmctiamu, dekc tqrmcti-zvzx.

2

Nzavzo-lzbqkr Kraes Kc Tqmyalz-esz'ngr

¹⁻² Batrpzmu nzelalz-krm drtwrnge, mz nzale-krmu da lcde seng. Drtwr naesz'ti murde Kraes sc tqapqtrpzle drtwrmu. X nivz lrmu na-apule nivz lr Kraes kc tqmrlztile nimu. X nzmncc-lxblr-krmu natr murde odutr-lxblramu badr Mqngkrkxtr. X da kx napnz drtwrmu naesz', murde mrlzti-lzbqamu x tqyc mz drtwrmu kztemu. ³ Bzkq trkibramu mz nzrtrngz-krbzmu da kx na-aetu-lzbq-ngrnamu, a' na-avzo-lzbqamu, x na-aoti drtwrmu kx leplz namyaszpxpwzlr nimu. ⁴ Bzkq aoti txpwz drtwrmu nimu esz'-krmu, a' na-aoti kz drtwrmu da kx suti drtwr kztemung.

⁵ Nqmq nr nzao-krmu drtwrmu na-apule Mevalu Jiszs.

⁶ Kxmule-esz' Kraes esz'-krde nide Gct,
X apule Gct mz da amrlx x nzrsakrlrulg ncdr,
A' trolvz-amqngileu mz nzrsakrlr-krdr ncdr.

⁷ A' yrlqtxole kzdung da mz nzrsakrlr-krdr ncdr,
Mурde navzom mz nzngini-krde kxnzawz-nrbalq,
X namika mz nzngini-krde ncblo.

⁸ X mz nzaelwaxp-lzbq-krde apule ncblo, avzo-lzbq.
X vz-nqblq-zvzle me pnz drtwr Gct,
Kxmule-esz' nabz,
Mz nzrtqlvztrngr nide mz kros.

⁹ Mz nzmu-krde lcde,
Gct kabzle bade me matq esz'ngr Heven,
X aprcbzle bade drtq kx myaszlzle drtq amrlx.

¹⁰ Murde kxnzmncng Heven amrlx,
X kxnzmncng mz nrlc amrlx,
X kxnzbzpeng amrlx,
Na-atuong zpr mz nzangio-krdr Jiszs. [◊]

¹¹ X leplz amrlx naglqpxlr Gct Trtegu
Mz nzpipx-krdr kx, "Jiszs Kxnzmcpk nide Kxetu Lod."

Na-aelwaxp-ngrbzmu Lrpzki Angidr Mz Leplz Mz Nzkriz-krbzlr Gct

¹² Mzlengeng x inwengeng, mzli kc tqmnc-ngrbo bamu, vz-nqblq-zvzamu natqng. A' mzli ka trmncpe-ngrpwc'u, namyapx-mopwz nzvz-nqblq-krmule. Doa kx esz' mz nimu na-ayrkpxle nzwnzgr kc tqyzuo Gct, mzli kc tqarlapx-ngrde nide mz nzamatq-krde Gct mz zmwxlr. ¹³ Murde Gct kc tqmncbz bamu, okatrl nimu murde nasuti drtwrmu nzvz-nqblqng me pnz drtwrde x nakrlzamu nzrvz-nqblqng.

¹⁴ Mz da amrlx kx rtrngztibzmu, bzkq drtwrmu lc x talwzamu.

¹⁵ Kxmule-esz' mncamu mz mzlir kxtrnzrlxngitiung x kxdrka'-ngrng, a' nabzmu natr x natubq mz nzngini-krmu doa neng Gct. Murde nqmq krmu na-aelwaxp-ngrbzle badr lrpzki angidr mz nzkriz-krbzlr Gct. ¹⁶ X nayapwxtibzmu nrpa ngr nzlungr badr. X dekc, sa na-abrtzlvz-ngrne nimu mzli kc nayzlu-mou-ngrm Kraes kalr. Murde nzwz-krmu lc sa na-aelwaxp-ngrde kx drtqng tretqne-nrbalqu mz nzwz-krnge.

¹⁷ Nzrlxngiti-krmu apule blz kc tqkabzmu mz Gct. X opxm kx ycpe pipz nzrnibqngr ning. Kxmule-esz' nzpuliokr mepyr rnge na-ayrkpxle blz krmu, a' drtwrnge sc tqelalz-ngrm nzprtr-krnge mz nzaetqkr drtq Kxnzmcpk x mz nzprtr-kz-krmu mz nzaetqkr drtqde. ¹⁸ X nimu kz

drtwrmu naelalzm x naprtrpa'mu mz nzabrtz-krnge, kxmule-esz' nike prtzm bange. *

Nzatwzlrngr Timoti X Epafroditzs

¹⁹ Drtwrnge abrtrpo mz Kxetu Jiszs kx sa na-atwzlr-ngrbo Timoti bamu. Murde mz nzyzlu-krmle, drtwrnge na-apqtrple mz nzyapwxxti-krmle nrpa ngrmu. ²⁰ Trpnzngr ncblo mrka kx apule Timoti, kx yc zlwz mz drtwrde nimu. ²¹ A' opxm kx ncblo kc-kzng tqwzkrng badr nzaoti txpwz drtwrdr me pnz drtwrdr esz'-krdr, a' trnzaotiu drtwrdr nwzkr Mevalu Jiszs. ²² Krlz-angidramu nzmrlzkr nqmq krde. Okatrle ninge mz nzryapwxxtipxngr Nrpakxmrlz apule doa kxtopwz kx nwzng ncdr trtede. ²³ Pnzpe drtwrnge kx sa na-atwzlr-ngrbo nide bamu, mz nibr nxzlr-krnge nike naprtzm bange mrka. ²⁴ Abrtrpo drtwrnge mz Kxetu rgu kx mzli trnaboiu x ninge kc tqvzpe-kzpc' mz nzoklati-krbo nimu.

²⁵ Kxmule-esz', a' aotipe drtwrnge nzayzlu-kai-krbo Epafroditzs bamu. Nide mzlegu kx likr ncdr mz nwzngkr kxesz'. X xplrlvzkr rlilgr nzyapwxxtipxngr Nrpakxmrlz. Atwzlr-ngrmamu nide mzli kc mz nzokatr-krde ninge. ²⁶ Sutitx zlwz drtwrde nzmc-krde nimu amrlx, x nabzde talvzo murde nxzlr-krmu nzayagox-krde. ²⁷ Yagoxtx zlwz x ycpwz pipz nzbz-krde. A' ycpengr drtwr Gct, x trbzu. Tryc-ngru drtwr Gct nide esz'-krde, a' ninge kz. Katpxbzle nzvzkr drtwrnge kx nzmu navz-ebirngrm bange, nzmu Epafroditzs nabzle. ²⁸ Sutitx zlwz drtwrnge nzayzlu-krbole bamu, murde drtwrnu naelalzm mz nzmc-mou-krm nide, x nzvzkr drtwrnge sc tqykrpxpebz. ²⁹ Abtzlvzamu nide mz nzprtr-krbzle bamu, na-apule mzlemu mz nzabrtz-zlwzng. X amatqamu ncblo amrlx kcng tzapulr nide. ³⁰ Ycpwz pipz nzbz-krde mz nwzkr Kraes. Trmwxlru nzkra-krbzle nzlu-krde mz nzayrkrpxngr nzokatrngr kx rblxbz bamu, murde mnc-rlrupwamu bange.

3

Nzmncngr Kx Tubq-esz'ngr

¹ Mzlengeng x inwengeng, natq kx napi-rmnrs-ngrbo bamu nide sele. Na-abrtzlvzamu nzaxvctr-lzbq-krbzmu mz Kxetu.

Suti drtwrnge nzpi-kr-mopwo nikeng yrpe-kaipo bamu mzli kc, murde ma tqvz-rbramu. ² Acvetio-angidramu leplz kcng tzapulr kuli kzpeto, tzaleng da kxtrka. Nzalvztr-ngrdr nimu kx suti drtwr Gct ncblo napakrng mz nzvz-nqqlq-krde Nzesztikr Drtwr Kc Kai. ³ A' nzrpakrngr angidr mz Nzesztikr Gct Kc Ate delc tqtwwku mz nabzgu, nigu amrlx, a' trnztwzlu. Twzku nzrpakrngr angidr murde da kcng tq. Nzangio-krgu Gct vzpxm mz Mqngrde. Abtz-ngru nzaxvctr-lzbq-krbzku mz Mevalu Jiszs. X trabrtrpwzkuu drtwrgu mz nzrpakrngr nrkrdrtq. ⁴ Kxmule-esz', a' krlz-kzx nzabrttr-krbo drtwrnge mz da kxnzmull lcng. Nzmu namnc dq ncblo kx krlzle nzabrttr-krde drtwrde mz dalr nrkrdrtqde, myapxpwo! ⁵ Murde nzpakr nrkrdrtqne mzli kc zbz rnge tqrtqmz-ngrde, mzli kc tzrmcngr mzke'. Ningi lr Israel, vzpxmc mz nqvi lr Benjamin. Ningi angidr mepyr ngr lr Jiu. X vz-nqqlq-angidrx Loukxtr, da kc tzwailr Farzsi. ⁶ X mz drtwrnge nzmwatikr, sc tqatrkatipex leplz neng Kraes, murde mz drtwrnge nzesablqtilr Loukxtr. X mz nzvz-nqqlq-krnge Lou sc Mosis tubq-esz'ngrx.

* ^{2:18} 2:17 Nzkqlu-krdr 15:1-12 ycmnetr-ngrde blz kx nzka-nrbalqngr, x mz nzka-krbzrlr, nzka-zvz-kzpz waen kc tzpulio-ngrdr mz drtc'. Nzrlxngitikr lr Filipae apule blz lc, x nzmu Pol nabz, mepyr ngrde na-apule waen lc.

⁷ A' mzli ka, da kznikeng pix mzli kc mz nzaetu-lzbq-krnge, rtctxpengrneleng murde namncpebo mz Kraes. ⁸ A' tr-rtctx-ngrwxu da lcng txpwz, a' rtctx-ngrne da amrlx kcng tqpqtitr drtwrnge mzli kc, murde natwzx da kznike pqtr zlwz mz drtwrnge mzli ka, krlcde nzkrlz-krnge Kxetu rnge, Mevalu Jiszs. Da amrlx kcng tqrtctx-ngrne nzapupemlr bange dcvi. X abrtzlvezx nzrtctx-krnge engeleng murde namnctr-lxblkr mz Kraes, ⁹ x nanginipegr ncdr da kxesz'. Mz nzmu-krde lcde, nztubq-krnge trvzpxpuu mz nzvz-nqblq-krnge Loukxtr. A' vzpxm mz nzlxngiti-krnge Kraes. Gct kamle bange nztubqng lc, mz nzbritkr drtwrnge Kraes. ¹⁰ Suti drtwrnge kx nakrlzx nide x natwz-kzx zmatq kc tqtulz-mople nide mz nzbz-krde murde navz-nqblq-zvzx nide. Kxmule-esz' drtqnge etq x bzx, a' suti drtwrnge kx na-apu-zpwxx nide mz nzvz-nqblq-krnge me pnz drtwr Gct. ¹¹ Murde krlzx kx sa na-atulz-kz-mople ninge mz nzbz-krnge.

Pol Yrnitr Mz Nzkrlz-krbzle Bz Ngr Nzesangr

¹² Tr-rpipwc'u kx mncpex mrkc tqpnzm drtwr Gct bange. Trkrklzkapc' bz ngrde. A' sc tqabz-zvzx nzkrlz-krbole, murde dekc Mevalu Jiszs tqtwz-ngrde ninge. ¹³ Mzlengeng x inwengeng, krlzx kx trkrklzapo bz kc mz nzapu-krnge Jiszs. A' da kx rtrngzti-zvzbo nide sele. Mrbrtr mz drtwrnge dalr mzli kc, x yrnitrx mz bz lc tqobqtipxx nakrlzbz. ¹⁴ Nzmnc-krnge mz nrlc apule nzesangr. X sa tqvo-zvzx mz nzayrkrpx-krnge nzesangr lc, murde natwzx da kxmrlz kx Gct nakabzle mz krkng tqkqleleng, kx namncng badr Heven kalr murde nzaxvctr-lzbqbzng mz Mevalu Jiszs.

¹⁵ Nigu amrlx ngrgu kcng tzbrpeng mz nzmncngr kxtr, nalxngiti-kzku natqngc lcng. A' nzmu drtwr kzdu nimu kx tqblepxle, sa na-aelwapx-ngrbz Gct badr drtwr kxtubq. ¹⁶ Navz zvz nzvz-nqblq-krgu da angidr kc tqtwzpeku.

¹⁷ Mzli ka kx mzlengeng x inwengeng, navz-nqblqamu nqmq krngeng x nqmq kr leplz kcng tzmcn-nqblqlr nqmq krgr, nigr aposol. ¹⁸ Murde leplz kxnzkqlung, trnzlxngitilru nzbzo-krm Kraes mz kros. Ycmnetr-ngrbo nidr nzwrde kqlupe, x mzli ka pi-mopo bamu nqmq krdr mz nzyrningr.

¹⁹ Murde lrpzki lc tzvz-nqblqlr mailzle nidr mz Hxl, mz nzodati-alongr nidr. Trnzwztrpwzung mz Gct, a' nzvz-nqblqlr da kx suti drtwr nrkrdrtdqdr. Nzrtrngzbzng da kx myangr drtq x nzglqpx-lzbq-ngrdr. Nzaoti txpwz drtwrdr dalr nrlc. ²⁰ A' nigu, mrnyzgu ycp Heven, x aenzliku Mevalu x Kxetu rgu Jiszs Kxnzmcpx, naprpxm mrlcde. ²¹ X mz nzyzlu-krmle lc, sa natekqtrpzle nrkrdrdqgu mz nrkrdrdq kxluli mz nzapu-krdr nrkrdrdqde, mz zmatq kcpwz tqaclve-ngrde doa x da amrlx mz nrlc.

4

Nzlc-apqbzkr Pol

¹ Mz nzmu-krde lcde, tu-amqngitrpzmu mz Kxetu rgu, da kc tqwai nzpi-krbole bamu. Nimu kztengeng kx mrlzti-zlwzx. Mzli ka sutitx zlwz drtwrnge nzrmcngr nimu. Murde aelalz-zvzmmamu drtwrnge x apuamu da kxmrlz kx sa natwzx mz nzokatr-krnge nimu mz nzrlxngiti-krmu.

² X mzli ka napitxbo bamu, nimu Yuodia x Sidike, kx bzkq talwzamu. A' drtwrmu naesz'ti, mz nzapu-krmu ile-lzbq, mz nzaodukr Kxetu rgu.

³ Susugos, nim mrlx kztengje angidr. Rlxtrbo bam, okatrpz olvz lcng nzling mz nzwztr-zvz-krbzlr mz Kraes. Murde olvz lcng wz-lxblkr badr, mz nzlepx-krgr Nrpakxmrlz, x Klemen badr kzdung kz leplz. X krlzx kx drtqd

yyclzm mz Buk r Nzlungr, mrkc tqyrtongr Gct drtq leplz kcng namncng mz nzlungr kxboi.

⁴ Naelalz-zvz-ngrm drtwrmu Kxetu rgu. X napi-mopwc' kx, naelalz-ngrm drtwrmu.

⁵ Na-aenzli-zpxwamu leplz amrlx. Murde Kxetu rgu ycpe pipz nzvz-krmle. ⁶ Bzkq drtwrmu yclwz mz da, a' rlxtibzmu mz Gct mz nzkrka'ngr x awibzmu bade mz da amrlx. ⁷ Zbz nrwrx x nzmnnc-zpxwngr kc tryrplatirpwzu nargu, sa navzom mz drtwrmu x nabzmu mz nzaxvctr-lzbq-krbzmu mz Mevalu Jisz.

⁸ Mzlengeng x inwengeng, napitx-mopwc' kx na-aoti zvz drtwrmu da angidr, da kxmrlz, da kxtubq, da kxlqngi, da kxtr, da kxmyapx-esz'ngr, x da amrlx kx takitrde nzamrluengr x nzrglqpxngr. ⁹ Na-ale-zvzamu da kx alvztr-ngrne nimu mz natqngeng x mz nzmnnc-krnge. X Gct kc tqrkam bagu nzmnnc-zpxwngr, sa namncbz bamu.

Pol Awibz Mz Lr Filipae

¹⁰ Awi-zlwz-ngrbo mz Kxetu rgu, nzyc-moukr mz drtwrmu ninge mzli ka. Murde mzli boitxpe trpengr da kx aleamu mz nzokatr-krmu ninge. Trngiu murde traotiu drtwrmu ninge, a' trpnzngr mzli rde. ¹¹ Trpi-ngrpwc'u da lc murde mnctxpxx mz da. Murde alvztr-lzbqpenge mz nzmnnc-zpxwngr kxmule-esz' trpnzngr da, mz nzmnnc-xgle-krnge Jisz. ¹² Kzdung mzli mncx mz mzli kx rblx ngr da, x kzdung mzli mnc-kzx mz mzli kx kqlu ngr da. A' alvztr-lzbqpenge mz nzmnnc-zpxwngr mz da amrlx, kxmule-esz' mz nzmungr kx krlcngr nelz mz nzrngisc-krnge da, o nzmungr kx trnzkrll-ngru mz nzngini-krnge nra-nzlu ngr leplz. ¹³ Krlzx nzalengr da amrlx mz nzvz-nqblq-krde me pnz drtwr Gct, mz nzokatrkr Jisz Kxnzmcpx.

¹⁴ A' mrlzm bange nzokatr-krmu ninge mz mzli r nzkxpu-krngeng mzli ka. ¹⁵ Murde nimu lr Filipae krlz-angidramu kx okatr-zvzamu ninge. Mzli lc tqrkalz-ngrmc mz Provins nyzmu Masedonia mz nzyapwxtipx-krnge Nrpakxmrlz, dzbe lrmakxtr nyzmu txpwz kc tqokatrple ninge. ¹⁶ X mzli kc tqmncpe-ngrne mztea Tesalonika mz nzsutikr drtwrnge trau, tqatwzlr-zvz-ngrmamu trau, mz nzokatrngr ninge. ¹⁷ A' trsutiu drtwrnge nzrka-krmamu scnge da mzli ka. A' da kx sutibz drtwrnge bamu, kx Gct na-abrtzlvzle nimu mz nzrka-nrbalq-krmu. ¹⁸ Twzpx da amrlx kcng tqatwzlr-ngrmamu bange. X nzrngisc-krnge da myaszpxele da kx takitrde nzmnnc-krnge. Trpnzngr mou da kx suti drtwrnge, murde Epafroditzs kapemle bange da kcng tqokatr-ngrnamu ninge. Da lc tqapule blz kx mnrt mrlz zlwz, kx abrtzlvz Gct x elalz-ngrm drtwrde. ¹⁹ X Gct rnge sa nakabzle bamu da amrlx kx takitrde nzmnnc-krmu, mz nzaxvctr-krbzmu mz Mevalu Jisz, murde nide bcnyr kx myapx-esz'ngr. ²⁰ Naglqpxku Trtegu Gct, tqvzpe tqvzpe. Eu, angida.

Natq Ngr Nzarlz-lzbqng

²¹ Rpibo "Nimu la," mz leplz kxnztrng ne Mevalu Jisz amrlx mrla. X mzlegung kcng mrka nzrpi-kzpplr bamu kx, "Nimu la." ²² Leplz ne Gct amrlx kcng mrka nzrpi-kzpplr kx, "Nimu la," myapxbz leplz ngr ma nyz King kxetu kx mrka Rom.

²³ Krka'-ngrne kx Kxetu rgu Jisz Kxnzmcpx naokatrle nimu mz zmrlz ngrde kxmyalz.

Delape. Ninge Pol.

Nzryr-krbz Pol Mz Lr Kolosia

Natq Ngr Nzaplxtqng Mz Nzryr-krbz Pol Mz Lr Kolosia

Kxmule-esz' trkrlzkapzle Kolosia, a' Pol yrbzle letz lc mz dzbe lrmakxtr mz taon lcde, badr dzbe lrmakxtr mz taon kc Laodisea, mz provins kc Esia. Taon kc etu Efiszs yc kz mz provins lcde. Mzli ka mrlcde nzrpipebz kandre kc Trki. Yrle letz lc mz nzwrdkc kai tqmnc-ngrde mz presin mrkc Rom. [◊] Yrle mz mzliyiz 60—62 AD mz nibr nzrmcngr mz Jiszs. Mzli lc yr-kzpzeletz mz Filimon, lr Efiszs, x lr Filipae. Letz lcng amrlx dzbede esz' kx nzyrung mz presin.

Pol yrbzle letz lc mz nzatubqti-krde kzdung nzalvztr-rbr-ngrng, kx nzrpilr kx na-ale-zvzlr da kxkqlu mz nzmnctr-zpxr-krbzlr mz Gct. X nzakaputr-zvzmlr zbzq kxtrng, nzangio-zvzlr enjrl, x nzvz-nqblq-zvzlr Lou sc Mosis mz dakxnnzng kx trtakitrdeu nzmungr. X mou nzrlrpx-lzbq-ngrbzlr mz nzpakrngr x mz nzaetqng drtqdr murde mz drtwrdr ngi nzayrplapxngr kxtr. X suti drtwrdr nzrkrlzngr nzyrplapxngr kx yc-kapq. A' nzao-krdr drtwrdr lcng amrlx nzvz-rbrng.

Mrkcng Mz Letz Lc

Kraes myaszpx-zlwzle da amrlx kcng tqmatq mz drtwr lr Kolosia. ^[dckrlzde 1]

Kraes myalz-esz'ngr. ^[1:15-20]

Pol rpibzle badr kx bzkq nzesabrtng mz nzalvztr-rbr-ngrng. ^[dckrlzde 2]

Da kcng tzmyapxbzng mz nzvz-nqblq-krdr Kraes. ^[3:1—4:6]

Pol ayrkrpxle letz lc mz natq ngr nzarlr-lzbqng. ^[4:7-18]

¹ Ning Pol kc tqmcpx Gct mz nzngini-krnge aposol ne Jiszs Kxnzmcp, nigr ncdr mzlegu Timoti.

² Ryrbzkr bamu nimu leplz kxnxtrng ne Kraes, kx nzmnncng mztea Kolosia. Nimu mzlegrng murde vz vzz mz nzlxngiti-krmu nide.

X krka'-ngrgr kx Gct Trtegu naokatrle nimu mz zmrlz ngrde kxmyalz murde namnc-zpxrnamu.

Nzkrka'ngr Mz Nzawingr

³ Awi-zvz-ngrbzkr nimu mz Gct Trte, mzli kznikeng krka'-ngrgr nimu. Murde Kxetu rgu Jiszs Kxnzmcp nide mrlxde. ⁴ Awi-ngrbzkr nimu mz Gct murde nzxlr-krgr nzabrtr-krbzmu drtwrmu mz Mevalu Jiszs, x nzmrzti-krmu leplz ne Gct amrlx. ⁵ Nzrlxngiti-krmu x nivz lrmu lcng nzvzpxmqng mz nzobqtipx-krmu da kcng tqaenzliamu, tzyrlq-bekang Heven. Da lcng tqxlr-zvzamu mzli kc tzpi-ayrnr-ngrbz bamu da angidr kc tqngi Nrpakxmrlz. ⁶ Nrpakxmrlz lc sc tqvz vzz nzrka-krbzle da kxmrzting mz leplz x tresakiu nzetunepx-krde mz nrlc. Da kc tqwaibzle bamu, abzo mzli kc tqxlr-ayrnr-ngrnamule x tqkrlz-angidrpe-ngrnamu zmrlz kxmyalz kc tqka-nrbalq Gct. ⁷ Epafras kc tqalvztr-ngrde nimu mz zmrlz ngr Gct kxmyalz, nide kxnzawz-nrbalq ne Kraes mz nigr, kcng tqwz-lxblrbzkr badr, x mrlzti-zlwzkr nide. ⁸ X pimle bagr nivz kc tqkatrz Mqngkrktr mz nabzmu.

⁹ Mz nzmu-krde lcde, abzo mzli kc tqxlr-ngrgr nrpa ngrmu, sa tqdctipx vzz drtwrgr nimu mz nzkrka'-krgr kc Gct nakabzle bamu nzrkrlzngr kx

vzpxm mz Mqngrkxtr, murde nakrlzamu nike tqsuti drtwr Gct. ¹⁰ Murde nzmn-c-krmu natakitrde Kxetu rgu, mz da lcde seleng. Nartrngzbzmu da kx abrtz-ngrde mz da amrlx, x na-aelwapx-ngrnamu nzwzngr kxmrlz kxkqlu, x nzkriz-krmu Gct naetunepx zvz. ¹¹ X krka'-kz-ngrgr kx nzetukr zmatq ngr Gct na-axplr-zlwzle nzrlxngiti-krmu, kxmule-esz' da kx prtz, a' natu-amqngi-zvzamu mz nzabrtzng. ¹²⁻¹⁴ X na-awibzmu mz Gct Trtegu murde vzmipxpele nigu mz nzmnclz-krbzku mz zmatq ngr alwx kc tqakamrbr-ngrde da mz nabzgu, x vzmtrpele nigu mz nzmnclz-krbzku mz zmatq ngr MrIxde Kxnzmrlzti mz nzngini-krde King rgu. X mz nzbzpe-krde nigu, Jiszs xpepxpele alwx rgung murde Gct naipqle nigu. X sc tqrz-kzp lrpzki r nztakitr-krgu nztwz-krgu da lcng tqmrlzting tzvzpxmqng mz nzaxvctr-krbzku bade. Murde alu-moule nigu mz nzapu-krgu lam kc tqtekatrle mz nyr pnrde.

Nzmyapx-esz'ngrkr Kraes

¹⁵ Jiszs Kxnzmcpk aelwapx-ngrbzle mz leplz nqmq kr Gct Trtede kc trnzmcung. X mz nzngini-krde MrIx Gct, nide kx myapxbz mz doa x da amrlx kcng tzwngr. ¹⁶ Mz nide, dekc Gct tqwz-ngrde doa x da amrlx Heven x mz nrlc ka, da kcng tqmcku mz mzku x da kcng trmckuu mz mzku, kx nzmnncng mzllxl kxmule-esz' enjrl o drka'ng, kxnzetung, kxnzaclveng, x kxnzmatqng. Doa x da amrlx nzwzngr murde namwitr-lxblrpwz bade. ¹⁷ Doa x da amrlx nzwz-atengr, a' Jiszs mnc pnz kai, x da amrlx lolvz lxblr zmatq ngrde. ¹⁸ Lrmakxtr apule nrkrdrtq Kraes, x nide narde, murde nide nou nzlungr. X nzatulz-kaip nide mz nzbngr, a' trpengr nzbz-krde. Murde Kraes namyapxbz mz doa x da amrlx. ¹⁹ Murde mz nzvz-nqblq-krde me pnz drtwr Gct, trpnzng da kx namrbrpxm mz MrIxde mz nzaotr-angidr-krde Trtede. ²⁰ Vzdz-kzp mz drtwr Gct esz'-krde kx nayzlumimle doa x da amrlx mz nrlc atwrnrngr bade mz nzwzkr MrIxde. Gct ao nrwz mz nzyrleo-krm mepyr ngr MrIxde mz kros. X yzlumi-mople mz nide esz'-krde doa x da amrlx mrka mz nrlc ka x mrkc Heven. *

²¹ Mzli kc, mnc-rlrupwzmu mz Gct. X aelwapx-ngrnamu kx ptxpx-ngrnamu nide mz nzale-krmu da kxtrka x nzaongr drtwr kxtrka. ²² A' mzli ka mz nzbzo-krm nrkrdrtq Kraes lc mz kros, Gct yzlumipemle nimu bade, murde nanginimu leplz kxnztrng, kxnztubqng, kx nabzdr lq mz nzobq-krde. ²³ Da lcng nangidati nzmu navz zvz nzabrttr-krbzmu drtwrmu mz Nrpakxmrlz, x tu-amqngiamu, bzkq nelzmu bao mz nzobqtipx-krmu da kc tqpi Gct mz Nrpakxmrlz. X wztrpo mz nzyapwxtipx-krnge Nrpakxmrlz lc mz mztea amrlx.

Nzwz-nrbalqtr-krbz Pol Mz Leplz Neng Kraes

²⁴ Kxmule-esz' mncx mz presin, a' abrtztx-ngrne nzetqtr-krbz drtqnge. Murde drtqnge naetq kz mz nzkxpu-krngeng da kc tqwai Kraes, mz nzokatr-krnge nrkrdrtqde kc tqngi leplz nedeng. ²⁵ Gct mcpkxle ninge mz nzwz-nrbalqtr-krbo mz leplz ne Kraes, murde naokatr x nimu mz nzyapwxtipx-zpx-krnge Nrpa ngr Kraes. ²⁶ Nrpa lc ngi dakxyc-kapq pnz. Trpipwzleu mz nrpr ngr leplz lcng kqlu mz yiz kang kqlu, a' mzli ka aelwapxpe-ngrbzleu mz leplz kxnztr nedeng. ²⁷ Dakxyc-kapq pnz lc tqaelwapx-kz-ngrpz Gct mz leplz nedeng kxtrngiulrJiu. Da zpx lc tqmyapx nide sele. Kraes tqmncpk-ngrnamle bamu murde naobqtipx-ngrnamu nzprtr-kz-krmu mz nzmyalz-krde. ²⁸ Mz nzmu-krde lcde, pipxbzkr Kraes mz leplz amrlx. X mz nzyrplapx-zpx-krnge Nrpakxmrlz lc mz mztea amrlx.

* **1:18** Aposol 26:23; Rom 8:29; 1 Korint 15:20; Hibru 1:6 * **1:20** A' sa na-ayrplapxle drka' x kxtrnzrlxngitiung amrlx.

leplz amrlx x alvztr-ngrgr nide, murde leplz amrlx kcng tqvzmimgr mz Gct nabrpeng mz nzmnc-krdr mz Kraes. ²⁹ Delc nabztq tqtu-ngrmle bange mz nzale-krnge nzwzngr lc, mz nzmnc-xgle-krnge mz zmatq kx xplr kx katrp Kraes mz nabznge, a' trngiu nxzplr-krnge esz'-krnge.

2

¹ Suti drtwrnge nakrlzamu kx wz-katox mz nzokatr-zvz-krnge nimu lr Kolosia, lr Laodisea, x kzdu-kzng leplz kxkqlu kcng tr-rmcti-lzbqkru badr. ² Suti zlwz drtwrnge kx mz nzaxvctr-lxblr-krmu mz nivz, nabzmu napq x nakrlz-angidramu da amrlx kx vzpxm mz dakxyc-kapq pnz kx aelwapxpengr Gct, krlcde Kxnzmcpx. ³ Yrlqbz Gct mz Kraes esz'-krde nzyrplapx-zlwz-krde x nzrkriz-zlwz-krde.

⁴ Da lc napibo bamu murde ma tzesabtilr nimu mz da kx nzaoti drtwrdr kx vz-rbr, kxmule-esz' mz nxzlr-krbzmuleng opxm kx ngi da angidr. ⁵ Murde kxmule-esz' trmnccpwc'u bamu mz nrkrdrq, a' ninge kc tqmncbo bamu mz drtwrnge. X drtwrnge elalzm mz nxzlr-krnge kx tu-amqngi-lxblramu mz nzlxngiti-krmu Kraes.

Nzlungr Angidr Mz Nzaxvctr-lzbq-ngrbz Mz Kraes

⁶ Mz nzmu-krde lcde, navz zvz nzmnctr-krbzmuz mz Mevalu Jisz, murde abrtrpebzmu drtwrmu bade nzngini-krde Kxetu rmu. ⁷ Nabzmu namqngitpz bade, na-apule nounc kc dzbrde tqvzo mz drtc'. X nzmnc-krmu naxplramu na-apule ma kc tzwti, tqngi noude Jisz. Tu-amqngi-zvzamu mz nzrlxngiti-krmu nrpa kc tzalvztr-ngrmu. X bzkq esaki nzawi-zvz-krbzmuz mz Gct.

⁸ Aclvetio-angidramu, murde leplz ma tqpe-amqngilr nimu mz nzalvztrngr kx trokatrleu leplz x avz-rbrle nidr. Nzalvztrngr kxnxmulr lcng nzaprcbz mz leplz, x vzpxm mz drka' kcng tzacvelr nrlc ka, a' trnzvzpxpuung mz Kraes. ⁹ Murde trpnzngi da kx mrbrpxm mz nrkrdrq Kraes mz nzaotr-angidr-krde Gct. ¹⁰ X mz nzaxvctr-lzbq-krbzmuz mz Kraes, trpnzngi da kx mrbrpxm mz nzlu-krmu angidr. Murde sc tqaclvele zmatqng x kxnxsetung amrlx.

¹¹ Mz nzaxvctr-lzbq-krbzmuz mz Kraes, zmatq ngr alwx trolvzpeleu nimu. Murde sc tqrkatx Kraes zmatq lc mz nzrpakr-krde nabzmu. A' trngiu nzrpakrngr ncblo kc tzale lr Jiu, a' ngi dalr nabz kc tqwzngi Kraes mz zmatq ngrde. ¹² Mzli kc tqwrkxtr-ngrnamu, nzyrtzmqmimiu Kraes, x nzatumilz-kzpamu Kraes, murde brti drtwrmu zmatq ngr Gct kc tqatulzle Kraes mz nzbz-krde. ¹³ Mzli lcde mnclzbzmuz mz zmatq ngr alwx x mqngrmu bz. A' mzli ka Gct kapebzle nzlungr kxmrna bamu mz Kraes, x ipqpele nimu mz alwx ngrmung amrlx, da kc tqwaibzle mz kxnxrlxngiting amrlx. ¹⁴ Murde taoku mz lou scdeng mzli kc, x yrole nike alekung. Lou scdr lr Jiu, nzrpilr kx alwx lcng naxpe-mopwzku bade. A' mzli ka mz nzbzkr Jisz, Gct katpxple lou amrlx kcng tzpelr nigu, apule kx tqlvztrle alwx ngrgung mz kros. ¹⁵ X mz kros lcde Kraes aovxiol kxnxmncng mzlllxlr kxnxtrkang, x katpxbzle zmatq ngr drka' lcng amrlx. X amyatibzle drtqdr mz mz leplz amrlx.

¹⁶ Mz nzmu-krde lcde, bzkq rlr-ngrbzmu mz ncblo nzpi-krbzlr bamu da kx nangqnamu x namnqamu x kxnamu nzakaputr-krmamu zbz kxtr, zbz ngr temz kxpo x Sabat kx ngi zbz kxnxzamati. ¹⁷ Nqmq kxnxmulr lcng ngi txpwz zmyo ngr Kxnzmcpx x da kxmxrlzting kcng natwzmle. Murde nzaelwapx-ngrdr kxipiz da kx na-aelwapx-zpxwz-ngrde mzli kc navz-ngrmle. A' mzli ka sc tqvzpelem, x mz nzaxvctr-krbzmuz bade trpengr

nzvz-nqblq-krmu nqmq lcng mzli kc. ¹⁸ Bzkq lalztqbzmu mz leplz kx nzrpilr nzmyalzng murde nzrmwible-krdr. Nzrpilr nartulrtr-ngrbzlr bamu nz-avzo-lzbq-krmu x nzangio-kz-krmu enjrl, da kc tzwailr. A' nzamatq-lzbqng, x nzvz-rbrng murde nzvz-nqblq-txp wzlr nzao-krdr drt wrdr kxtrka. ¹⁹ Leplz kxnzm ulr lcng trnzm nclzpwzung mz zmatq ngr Kraes, mz nzngini-krde nar nrkrdrtq, kc tqngi leplz nedeng. X nrkrdrtq sc tqmnc-xglele nide murde naokatr-lzbqku x nrkrdrtqde naxplr. X Gct dekc tqaetunepxle nrkrdrtq lc.

Nzbzngr X Nzlungr Mz Kraes

²⁰⁻²² Axvctr-lzbqamu mz nzbzkr Kraes murde ma tqmnc-nqblqamu nqmq ngr drt wr lr nrlc ka. ?A' nike tqvz-nqblqbe-ngrnamu natqdrng x nzalvztr-krdrng? Murde nzrpilr kx, "Bzkq maleamu." "Bzkq ngqamu." "Bzkq bxtramu." A' lou lcng amrlx nzycmnetr-ngrdr da kcng nayrkpxng. ²³ Mz drt wr leplz lou lcng nzrkabzlr badr nzyrplapxngr. X nzolvzo-lzbqng mz nzvz-nqblq-krdr lou lcng kx nzrtulrtr-ngrbzng badr nzaetqtingr nrkrdrtqdr. Kxmule-esz' mrlz mz nzobq-krdr, a' trnzokatrlru nidr mz nzyrlqpx-lzbq-krdr mz alwx kcng tqmrlzbz badr.

3

¹ Na-aoti drt wrmu dalr Heven, mrkc tqmatq-esz'ngr tqwxbungr Kraes mz nrlar Gct kxrtc, ² murde nzaxvctrpebzmu mz Kraes mz nzatulz-mou-krm Gct nide mz nzbzngr. ³ Na-aoti-zvzpwz drt wrmu dalr Heven, a' bzkq aoti drt wrmu dalr nrlc ka. ⁴ Murde apuamu kxnzbzpeng mz nzaxvctr-krbzmu mz nzbzkr Kraes. X sc tqaovxiopel zmatq ngr alwx. Mz nzmu-krde lcde, nzlu-krmu angidr trnzaelwapxkangr. A' sc tqyc-kapqtrbepz mz Kraes kc tzmnncng ncdr Gct. ⁵ Kraes nide nou nzlu-krmu lc angidr. X mzli kc nayzlu-ngrmle, da kx yc-kapq naopx. X sa na-aelwapx-ngrde zmatq ngrde mz nrlc tulvzo. X na-aelwapx-kz-ngrde kx nimu leplz nedeng.

Nzlungr Mzli Kc X Nzlungr Mzli Ka

⁵ Mz nzmu-krde lcde, bzkq aoti drt wrmu nqmq ngr alwx kcng tzvz-nqblqlr mrka mz nrlc. A' yrlqpx-lzbqamu mz nzrmwimigr leplz kx trngiu kernalzmu, nzalengr da kx myangr drt qmu, x nzaongr drt wrmu x nzsutikr drt wrmu kxtrka. X bzkq prlvz mzpu da, murde mz nzprlvzkr mzpu da, angioamu da myaszpxle Gct, kc tq takitxtrpwzle nzangiongr nide. ⁶ X sa na-ayrplapxle leplz amrlx kcng tzalelr da kxnzm ulr lcng. ⁷ Mzli lcng tqvztxpe, mnc-nqblqamu alwx lcng, x alwx lcng tqtrka tzmailzlr nimu.

⁸ A' mzli ka da kx bzkq rtrngzti pebzmu nidr seleng: zngya, nzotangr, x nzaetqngr drt q. Bzkq rpibqtiamu x bzkq natq kxtrka vzpxm mz naomu. ⁹ Bzkq pokiapebzmu mz leplz, murde sc tqyrlqtxopeamu alwx lcng, ¹⁰ x tekqtr-alzupeamu mz nzlungr kxmrna. X mz nzlungr lc tqmrna ablepxngr Gct nimu murde nqmq nr nabzmu na-apule nide x nakrlz-angidramu nide. ¹¹ Mz nzlungr lc tqmrna, tqwzng Gct, trakipxleu leplz kxtrngiulrJiu x lr Jiu, x ncblo kcng trnzbakru x krkcng tzpakrng, lr mrkzblleng, leplz ngr nqvi kzbleng, kxnzawz-nrbalqng x kxtrnzwz-nrbalqng. Leplz lcng trnzblepung amrlx ngrdr, murde Kraes esz'-krde myaszlze nidr amrlx x mncpxm mz krkcng amrlx tzbrti drt wrdr nide. Mz nzmu-krde lcde, leplz amrlx nzrsakrlng mz nzobq-krde.

¹² Nimu leplz kxnztrng ne Gct kx mcpxpeleng x mrlzti-zlwzle nimu. Nayc mz drt wrmu leplz. X namncamu mz nzokatrngr, nzavzo-lzbqng, nzmnnc-nrwxng x nzaenzli-zpxng. ¹³ Drt wrmu bzkq ngya ani, a' ipq-lzbqamu.

² **3:1** Sam 110:1

Nzmu kzdq nimu kx aetqtibzle drtq kztede, naipq-lzbqng da kc tqwai Kxetu rgu nzipq-karde nigu. ¹⁴ X da kx myapxbz mz da lcng, namncamu mz nivz lrde kc tqolvztr-lxblrlle da lcng amrlx mz nzesz'tingr. ¹⁵ Nzmnc-zpxnegr kc tqkabz Kraes bamu, na-aclvele nabzmu. Murde Gct mcpxppele nimu mz nzmnctr-lxblrl-krnamu mz nrwrx mz nzngini-krmu dzbede kxesz'. X naawi-zlwz-ngrbzmu bade. ¹⁶ Natq Kraes nangi da kx ayrnrngr zvz mz nabzmu, mz nzalvztr-lzbq-krmu x nzlc-apqbz-lzbq-krmu, mz nzyrplaxnegr kc kabz Gct, x mz nzawi-krbzmu bade mz nzngr-krmung him, Sam x nabz kxnztrng. ¹⁷ Da amrlx kcng tqaleamu x tqpiamu, nartrngztibzmu mz nzngini-krmu leplz neng Kxetu rgu Jiszs. X naawi-ngrbzmu mz Trtegu Gct da kxmrlzting amrlx kcng tzvzpxmqng mz nzaxvctr-krbzmu bade.

Nzyokaetipxngr Nzlungr Kxmrna

¹⁸ Nimu olvz kx nzyrlzng, namnclzbzmu mz ncblo ngrmung mz nzngini-krmu olvz kx nzlxngitilr Jiszs. ¹⁹ Nimu ncblo kx nzyrlzng namrlzti-zvzamu olvz nalzmung. Namnc-nrwrx-zvzamu x bzkq ngyati drtwrmu x tabramu nidr. ²⁰ Nimu doa, vz-nqqlq-zvzbzmu natq trtemu x lxemu, murde da kx abrtz-zlwzng Gct delc. ²¹ Nimu trteng x lxeng doa, bzkq xplrbqtiamu doa nemung, murde nabzdr ma tqbaa mz nzmnc-krnamu badr. ²² Nimu kxnzawz-nrbalqng navz-nqqlq-zvzamu natq kxnzetu rmung mz da amrlx. A' bzkq ale-txpwzmu mzli kc tzmnc-ngrbzlr, murde narpibzlr kx wz-angidramu. A' nawztr-zvzbzmu badr da kc tqwaibzmu mz Kxetu rgu Jiszs. ²³ Nzww-nrbalqng kcng nartrngzibzmu navzdz-angidrm mz nabzmu, x nzww-krmu na-apule kx wztrpzmu mz Kxetu rgu, a' trngiu mz ncblo. ²⁴ Murde krlzpeamu kx Jiszs sa nakabzle bamu da kcng tqyrlq-bekale mz nzka-krbzle mz leplz nedeng. Kraes nide angidr Kxetu kc tqwztrpzmu bade. ²⁵ X Gct sa na-ayrplapxle leplz amrlx kcng tzalelr da kxtrka. Murde trkxneu mz drtqde kx leplz nzngini-krdr kxnzetung o ncblo txneng, a' nzayzlu-krbzle da badr vz-nqqlq-zvzle da kx nzrtrngztibzlrng.

4

¹ Nimu kxnzetung, mz nzmailz-krmu leplz, kabzmu nike mrlz x tubq mz kxnzawz-nrbalq nemung. Murde mnclz-kzpzmz mu mz kzdq Kxetu. Nide kc tqmnc Heven x tqobq-nglelvzle nimu.

Nzalvztrngr

² Nakrka'-zvzbzmu mz Gct, x mzpu nabr-zvzpwz mz nzkrka'-krmu x na-awibzmu bade. ³ X krka'-kz-ngrbzmu nigr mz Gct, murde nakamle bagr mzli r nzpipx-krgr nrpa kx Kraes na-arlax-kzle kxtrngiulrJiu, murde tqmncpx-ngrmc mz presin, mz nzyapwxtpx-krnge nrpa lc tqyc-kapq pnz. ⁴ Krka'-ngrnamu ninge, murde natq ngr nzyokaetipx-krnge nrpa lc naopxng, mz nzvz-nqqlq-krde me pnz drtvr Gct.

⁵ Narmu nayrplapx mz nzmnc-krmu badr leplz kxtrnzlxngitikalr Kraes, murde nakrlzamu mzli kxmrlz nzpipx-krbzmu Nrpakxmrlz badr. ⁶ X mz nzryapwx-krbzmu lc badr, narpi-zvzamu natq kxmrlz mz nzxlrngr x otrngr drtvr. X na-ayzlu-ngrbzmu natqdr mz natq kxtubq.

Natq Ngr Nzarlr-lzbqng

⁷ Nrpa rnge sa napi-krlzpwz mzlegu Tikikzs kc tqmrlzti-zlwzx. Wz angidr mz nzwwtr-lxblrl-krgr ncdr mz nzwwtr-krbzkr mz Jiszs. ⁸ Atwzlr-ngrbole bamu, murde nayapwxzibzle bamu kxmu nzmnc-krgr x na-apqtrpzle nabzmu. ⁹ X atwzlr-kz-ngrbo lr mrnyzmu Onesimzs navz-kzpznng ncdr.

Nide mzlegu kx mrlzti-zlwz-kzkr x wz angidr. Mrlx lcng nzling, sa napi-krlzpwlzlr da amrlx kcng tqprtztng mrka.

¹⁰ Aristakzs kc tqmnckr ncdr mz presin x Mak kc tqngi kave kr Banabas, nzrpibzlr bamu kx, "Nimu la." Mak lc tqyrpe-kaipo bamu kx nzmu kx tqkrlzbzle nimu elalvzamu nide. ¹¹ X Josua kc tqngi kz drtqde Jastzs, rpi-kzpze bamu kx, "Nimu la." Mz ncblo kcng tqwzkr badr mrka mz nzaesotr-krbzlr leplz mz Gct mz nzngini-krde King rdr, Aristakzs, Mak, x Josua, kx nzngini-txpwzdr lr Jiu, x nzapqtr-zlwzmlr drtwrnge.

¹² Epafras rpi-kzpze bamu kx, "Nimu la." Ni-kzde doa lr Kolosia kx wztrpz mz Jissz Kxnzmcpx. X nabzde pq mz nzkrka'-zvz-krde, nimu kx natu-amqngiamu mz nzvz-nqqlq-krmu me pnz drtwr Gct, murde nzmnc-krmu mz Kraes nabr x na-abrtr-zvzbzmu drtwrmu bade. ¹³ Mc-angidrx mz mzke' nwz-kato-krde mz nzkrka'ngr mz nzokatr-krde nimu lr Kolosia, lr Laodisea, x lr Haerapolis. ¹⁴ Dckta Luk kc tqmrlzti-zlwzkr, nidr ncdr Demas nzrpi-kzpplr kx, "Nimu la."

¹⁵ Pibzmu mz mzlegung kcng tzmnncng Laodisea x olvz kc tqngi drtqde Nimfz ncdr leplz ne Kraes kcng tzyrlwr-lxbblr-zvzng ma nyzde, kx rpibzkr badr kx, "Nimu la." ¹⁶ Mz nibr nzrlwx-krmu letz lc, atwzlr-kz-ngrbzmu mz mzlegung kcng Laodisea mz nzrlwx-kz-krdrle. X krkc tqyrbo badr na-atwzlr-alzu-ngrpwlzlr bamu murde narlwx-kzamu. *

¹⁷ X napibzmu mz Akipzs kx pibo bade kx, "Atutr zpxwz nzwzngr kc tzkabz bam mz nzwztr-krbzme mz Kxetu."

¹⁸ Yr-angidrx mz mqnge, "*Ninge Pol rpibo bamu kx, 'Nimu la.'*" Bzkq mrbrtr mz drtwrmu nzkrka'-krmu ninge mz nzmnc-krnge mz presin mrka Rom. Krka'-ngrne kx zmrlz ngr Gct kxmyalz nayczbz bamu.

Delape. *Ninge Pol.*

* ^{4:16} Mwx nangi nzryr-krbz Pol mr lr Efiszs.

Nzryr-krbz Pol Kx Ayrnrngr Mz Lr Tesalonika

Natq Ngr Nzaplxtqnggr Mz Nzryr-krbz Pol Kx Ayrnrngr Mz Lr Tesalonika

Letz lc yrbz aposol Pol mz dzbe lrmakxtr kcng taon kxetu Tesalonika mz provins kc Masedonia. Mzbq ka Masedonia nzrpipebz kandre kc Gris. Oklatile nidr mz nzvzpx-krde krali x yapwxtipxbzle Nrpakxmrlz badr. KxtrngiulrJiu kxnzkqlung x kzdung lr Jiu nzlxngitilr Jiszs mzli lc. * A' kzdung lr Jiu kxtrnzrlxngitiung nzngyati drtwrdr nide x nzbatrpbzlr kzdq nzotablrngr kxetu. Delc kxnzrlxngiting tzatzlrlpx-ngrdr Pol badr Timoti x Saelas mz taon kc Berea. Zbz Pol atwzlr-mopwzle Timoti x Saelas mz nzalvztr-krdr lr Tesalonika. Mz nibr kzdung mzli, Pol yrle letz lc mz nzayzlu-krbzle kzdung da kx rlwa-ngrbz Timoti bade.

Yrle letz lc mz mzli yiz 50—51 AD mz nibr nzrmcngr mz Jiszs, mzli kc tqmnc-ngrde Korint. Mwx krle buk ayrnrngr kx nzyr mz Nzryrngrkxtr Kc Ate.

Mrkcng Mz Letz Lc

Pol abrtzlvzle nqmq kr lr Tesalonika. [dckrlzde 1]

Pol ayzlbzle natq kxnzpibqti-ngrdr nqmq krde. [2:1-16]

Nike troklati-mou-ngrdeu nidr x nike tqatwzlr-ngrbzle Timoti badr. [2:17 —3:13]

Kxnamu nzmnc-zpwx-krdr badr Gct x kztedrng. [4:1-12]

Pol ayzlbzle natqdr mz kxnzrlxngiting kcng tzbpeng x mzli kc nayzlu-mou-ngrm Jiszs. [4:13—5:11]

Alvztr-kzle nidr kxnamu nzmnc-zpwx-lxblr-krdr. [5:12-28]

¹ Ninge Pol, nigr ncdr Saelas x Timoti. Ryrbzkr bamu, nimu leplz neng Gct Trte x Kxetu rgu Jiszs Kxnzmcp, kcng tzmncng taon Tesalonika.

Krka'-ngrgr kx Gct naokatrle nimu mz zmrlz ngrde kxmyalz x namnc-zpwxamu.

Nqmq Kr Lr Tesalonika

²⁻³ Mzli kx krka'-ngrbzkr mz Trtegu Gct, awi-zvz-ngrbzkr bade nimu amrlx. Murde aelwapx-ngrnamu nzrlxngiti-krmu mz nzwztr-krbzmu bade. X aelwapx-ngrnamu nivz lrmu mz nzokatr-krmu leplz. X aelwapx-kz-ngrnamu nzobqtipx-krmu nzyzlu-krm Kxetu rgu Jiszs Kxnzmcp. Mz ntzu-amqngi-zvz-krmu mz mzli r nzatrkattingr.

⁴ Gct mrlztile nimu. X krlzkr kx mcpkle nimu mz nzngini-krmu leplz nedeng. ⁵ Murde mzli kc lemgr bamu Nrpa ngr Jiszs Kxnzmcp, trpi-txpwzkru mz natq. A' aelwapx-kz-ngrgr mz zmatq, mz nzokatrkr Mqngrkxtr, x mz nzrlxngiti-angidrngr. X krlz-kzamu kx aelwapx-ngrgr Nrpakxmrlz lc mz nzmnc-krgr, mzli kc tqmnc-ngrbzkr bamu. Da kcng amrlx tqalebzkr bamu, ngi dalr nzokatrngr nimu. ⁶ X nigr badr Kxetu kx ngibz lrpzki bamu kx navz-nqblqamu. Kxmule-esz' sc tzatrkatimu, a' sc tqlxngitiamu Nrpakxmrlz mz nzabrtzngr kx vzpxm mz Mqngrkxtr.

⁷ Mz nzmu-krde lcde, nanginibzmu lrpzki mz leplz neng Kraes mz provins kcng Masedonia x Akaia. ⁸ Murde nzaetunepx-krmu Nrpa ngr Kxetu Jiszs Kxnzmcp trngi-txpwzu Masedonia x Akaia, a' nrpa ngr nzrlxngiti-krmu

* : Aposol 17:1-15

nzkrlzpe mrlcng kqlu. Dekc, trpnzngr da kx napitr-mopwzkr mz nzrlxngitikrnu. ⁹ Lr mztea lcng tzyapwx tipelr nzmrlzkr nqmq krmu mz nzabrtzlvz krmu nigr. Se tzyapwx tine nzesakikr nzangio-krmu mqngr drka' kxnzlz, kx trpnzngr nzlu-krdr. X tekqtrpeamu nqmq krmu mz nzwztr-nrbalq-krbzmu mz Yawe Gct angidr kc tqalu alo. ¹⁰ X aenzliamu nzvzo-krm Mrlxde Heven, kc tqatulzmle mz nzbz-krde. Krlc Jiszs kc tqarlapxbzle nigu mz zngya ngr drtwr Gct kc navzm mzli kc napipxngr neke tubq x neke vz-rbr.

2

Nzwzkr Pol Tesalonika

¹ Mzlegrng x inwegrng, krlzpeamu kx nzvz-krbzkr bamu ngi da kx nrade ycbz. ² Mzli kc trvzka-ngrgpr bamu, drtqgr etqtx x nzamyatibz mztea Filipae. Nzmusr-krdr lc nigr krlzamu. Kxmule-esz' nzxplrmiml bagr nzrpwa'-krdr nzwz-krgr, a' Gct rgr abrmle nelzgr mz nzpipx-krbzkr Nrpakxmrlz bamu. ³ Dekc, tqkrlz-ngrnamu kx nzrpipx-krgr Nrpakxmrlz trvzpxpuu mz drtwr ngr nzpokiangr, drtwr kxtrka, x mz drtwr ngr nzesabrttingr. ⁴ A' pipxkr murde Gct kc tqabzpx-kaile nigr x aprc-atemle nzwzngr lc bagr. Trsutiu drtwrgr leplz nzabrtzlvz-krdr nigr, a' sutix drtwrgr Gct kc tqobqplxle nabzgr nzabrtzlvz-krde nigr. ⁵ X krlz-zpwxamu kx trtamatikru nimu mz nzycmne-krgr x tresabrtikru nimu mz nztwz-krgr trau scmu. Krlz Gct kx da lc da zpx. ⁶ X trsutiu drtwrgr kx naglqlzamu nigr o naglqlz kzdung kz leplz nigr. Kxmule-esz' nigr aposol neng Kraes, x takitrde nzokatr-krmu nigr x nzamatq-krmu nigr, a' trwaipwzkru lc bamu. ⁷ A' mzli kc tqmnc-ngrgu, mnc-nrwxbzkr apubzkr bamu lxe doa, kc tqaclvele itoto nede. ⁸ Abrtzlvz-ngrgr nzrpipx-ngrbz bamu Nrpa ngr Gct murde aodukr nimu. X abrtz-kzkr nzka-lzbq-krbzkr bamu murde pqrzlwz mz drtwrgr nimu. ⁹ Mzlegrng x inwegrng, krlzx kx sc tqdcpxbe mz drtwrmu kxmu nzwz-kato-krgr. Mzli lc tqyapwx tipx-ngrbzkr Nrpakxmrlz bamu, wzkr mz nrlckxbq x ngrlx mz nzatatr-krmgr trau, murde ma tqaetunepxkr nzwz-krmu.

¹⁰ Mzli kc tqmnc-ngrgu, krlz-zpwxamu kx nzmnc-krgr tr x tubq, x trpnzngr da kx trkatr elr. X krlz Gct kx krlc da angidr. ¹¹ Krlz-kzamu kx apusr-ngrgr nimu doa negrng. ¹² Axplrkr nimu, apqtrpzkr drtwrmu, x pibzkr bamu kx nzmnc-krmu natubq, murde natakitrde Gct kc tqkqlele nimu mz nzmnclz-krbzmu bade x mz nzptr-krmu mz nzmyalz-krde.

¹³ X awi-zvzbzkr mz Gct. Murde mzli kc lemgr bamu Nrpa ngr Kraes, xlramu x lxngitiamu. X lxngiti-kzamu kx nrpa lc tqngi natq Gct angidr, trngiu natq ncblo. X me tutr-ngrde lape! X natq Gct lc tqatutrl nzwz-krde mz nabzmu, nimu kcng tzbrtipe drtwrmu Jiszs. ¹⁴ Mzlegrng x inwegrng, prtramu mz nzatrkatingr kcpwz tzprtrng lr Jiu kcng tzlxngitilr Mevalu Jiszs, tzmnncng mz Judiz Provincs. Murde lr mrnyzdr nzatrkatilr nidr, da kc tzwaisr-ngrdr lr mrnyzmu nzatrkatr-krdr nimu. ¹⁵ Lr Jiu lcng, melrmqdrlng nznibq-kailr profet. X mz nibrdr, trtedrng nznibq-kzlr Kxetu rgu Jiszs Kxnxmcpx. X mzli ka, sc tzmaszlrpe-kz-ngrdr nigr. Gct trabrtzlvzleu lr Jiu lcng, murde nzpxtxpx-ngrdr leplz amrlx, ¹⁶ mz nzrpwa'-krmlr bagr nzle-krbzkr nrpa ngr nzarlapxngr mz kxtrngiulrJiu. Mz nzmu-krde lcde, tzrtxlvzlvz-zvzpelr alwx ngrdr. A' mzli ka zngya ngr drtwr Gct ycpipz nzkrlz-krbzle nidr.

Suti Drtwr Pol Naoklati-moulen

¹⁷ Mzlegrng x inwegrng, mzli kc tqmncitxtrpemgr mzli mrbcnepwz mz nrkrdrtrq, sutix zlwz drtwrgr nzoklati-kr-mopwzkr nimu, a' sc tqrblxm

bagr. Kxmule-esz', a' krlzku kx mz drtwrgr nigu kc tqmncku. ¹⁸ Sutix zlwz drtwrgr nzyzlu-krbzkr bamu. X ninge, Pol, abz-ngrnele nzwrde kqlupe, a' Setzn tqrpwa'-ngrde nzvz-krbzkr. ¹⁹ Suti drtwrgr nzoklati-mou-krmgr nimu murde obqtipxkr nzmc-krgr nztu-amqngi-krmu mz nzrlxngitingr. Mz nzmu-krde lcde, sa nanginimu kx nabatrpzle nzaelalz-krm drtwrgr! X sa na-apuamu da kxmrlz kx natwzkr mz nwz-wz-krgr. X sa naglqpx-lzbq-ngrgr nimu mzli kc natu-lxblr-ngrbzku mz mz Jiszs Kxnzmcpkx mzli kc nayzlu-mou-ngrmle!

²⁰ Da zpwxtx! Nimu kx nabatrpzle nzaelalz-krm drtwrgr x nimu kx nzglqlzng nigr.

3

¹ Mzli kc tqrbltxpe nzaenzli-krgr x tqxngitr-zlwzkr nzmncc-rlru-krmamu bagr, sc tqaotipe drtwrgr kx nigr badr Saelas namnc-txpwzkr taon kc etu Atens, ²⁻³ x na-atwzlr-ngrbzkr Timoti bamu. Nide mzlegr kx wzkr badr mz nwztr-krbzkr Gct. Okatrle nigr mz nzyapwxtpx-krbzle Nrpa ngr Kraes. X atwzlr-ngrbzkr nide murde na-axplrlle nimu x na-apqtrpzle nabzmu. Murde ma nzrlxngiti-krmu tqrnrc mz nzkxpungr kcng tqprtzmqng bamu mzli ka. Murde krlzpeamu kx da kxmule lcng naprtzmqng bagu. ⁴ Murde pi-pnzbzkr ena bamu mzli kc tqmnc-ngrgu, kx leplz sa na-atrkatilr nimu kalr. X mzli ka da kc tqpi-ngrbzkrle sc tqututre. ⁵ Mz nzmu-krde lcde, mzli ka rbltxpe nzaenzli-krgr, delc tqatwzlrpe-kai-ngrbo Timoti bamu, murde nakrlzx kxmupe nzrlxngiti-krmu. X mwxlrvzx nimu murde ma tqataole nimu Setzn, x nwz-wz-krgr sc tqngipe brmrda.

⁶ A' mzli ka Timoti yzlupe-mop bagr x lemle bagr nrpa ngr nzrlxngiti-krmu x nivz lrmu. Pimle bagr kx dcpkx zvz mz drtwwmu nigr x sutix zlwz drtwwmu nzmc-krmu nigr, da kc tqwai-kzkr nzsutikr drtwrgr nzmc-krgr nimu. ⁷ Mz nzmu-krde lcde, kxmule-esz' nzatrkatilr nigr mz da kxkqlu, a' apqtrle drtwrgr nxzlr-krgr nrpa ngr nzrlxngiti-krmu. ⁸ X mnc-zpwxpekr mz nxzlr-krgr nzlolvz-amqngi-krmu Kxetu rgu. ⁹ X rblxm bagr nzpipx-krgr natq ngr nzawi-krbzkr mz Gct mz nzetukr nzabrtzlvz-krgr nimu. ¹⁰ X nzkrka'-krgr pq zvz, ngrlx x nrlckxbq. Krka'-negrgr kx namc-moukr nimu x na-alvztr-ngrbzkr bamu da amrlx kcng tqmrbpoxm mz nzrkrllz-krmu nzrlxngiti-krgu.

¹¹ Krka'ngr mz nzrpi-krgr kx,

"Gct Trtegr x Kxetu rgr Jiszs, rlxtibzkr bamu naoliqtipxbzmu lrpzki kc nakrlz-ngrbzkr lr Tesalonika. ¹² X krka'-kz-ngrgr kx na-aetunepxbzmu nivz lrdr mz nzmrzti-lzbq-krdr x nzmrzti-krdr leplz amrlx, x namrlztilr leplz da kc tqwai nzmrzti-krgr nidr. ¹³ Trte, axplr nabzdr, murde natrng x natubqng mz nzobq-krm, myapxbz mzli kc Kxetu rgr Jiszs nayzlu-ngrmlr badr leplz kxnxtr nedeng. Eu. Angida!"

4

Nzmnccngr Kx Abrtzlvz Gct

¹ Mzlegrng x inwegrung, alvztrpekr nimu mz nzmnccngr kxtubq, murde na-aelalz-ngrm drtwr Gct, x sc tqvz-nqblqpeamu. X mzli ka rmgidrtx-zlwz-ngrbzkr bamu mz zmatq ngr Kxetu rgu Jiszs, kx nzmc-krmu lc tqtubq navz zvz x naetunepx. ² Krlzpeamu nke pibzkr bamu, mz zmatq ngr Kxetu rgu Jiszs. ³ Me pnz drtwr Gct nide sele: Nzmc-krmu natramu, x nayrlqpx-lzbqamu mz alwx ngr nzrmwimi-krmu doa kxtrngiu kernalzmu. ⁴ Suti drtwrde kx doa kxesz' mz nimu nakrlzle nzaclve-krde nrkrdrdqde

mz nzmnccngr kxtr x kxtubq. ⁵ Leplz kcng trnzkrizlru Gct nzrlrpx-ngrdr nrkrdrtdr nzmmailz-krdr nidr mz alwx ngr nzrmwimigr doa kxtrngiu kernalzdr. A' bzkq apuamu nidr. ⁶ X bzkq angqngutiamu kztemu mz da lc. Murde Gct sa na-ayrplapx-zlwzle leplz kx nzrtrngztibzlr da lceng. Dekc tqpi-ngrbzkrle ena bamu mz natq kxlqlwx. ⁷ Gct kqlele nigu murde nzmnccngru natr. X trsutiu drtwrde nzrtrngzti-krbzku alwx ngr nzrmwimigr kxtrngiu kernalzgu. ⁸ Mz nzmu-krde lcde, mrlx kx ptxpx-ngrde nzalvztrngr lc, ptxpx-kz-ngrde Gct, kc tqrkam bagu Mqngkrkxtr.

⁹ Tryrpwzkr kxnamu nzmrlzti-krmu kztemung mz Kraes, murde opx angidr kx Gct alvztrpe-ngrde nimu da lc. ¹⁰ Murde mrlztiamu leplz neng Kraes mz mztea amrlx mrkc Masedonia Provins. A' mzli ka, rrgidrtrnngrbzkr bamu kx nzmrlzti-krmu nidr naetunepx zvz. ¹¹ Rtrngztibzmu da kc tqbatrzle nzmnccngru mz nrwxx. Bzkq pnz drtwrmu dztu leplz, a' dztumu. X aleamu nwz-krmu esz'-krmu. Pi-pnzbzkr bamu ena nzale-krmu da lcng. ¹² Murde mz nzmnccngru lc tqmrlz, leplz kcng trnzlxngitilru Kraes na-amatqlr nimu x ma tqmnc-xgleamu doa kc-kzng.

Nzyzlu-krm Kxetu Rgu

¹³ Suti drtwrgr nakrlzamu nike naprtzbz mz leplz neng Kraes kcng tzbzpeng. Murde trsutiu drtwrgr nzmnccngru mz drtwr kxvz mz nzapukrmu leplz kx trpnzngr da kx nzobqtipxlr. ¹⁴ Lxngitiku kx Jiszs bz x tulzmou. Mz nzmu-krde lcde, Gct sa na-atulz-kzple krkcng tzbzpeng tzlxngitilr Jiszs, murde navzmimle nidr, mzli kc nayzlu-ngrmle.

¹⁵ Nzalvztrkr Kxetu nide sele. Nigu kcng tzlubeng mzli kc nayzlu-ngrm Kxetu rgu, trnartwayzpwzkuu mz krkcng tzbzpeng, mz nzvzdz-ngrbz mz nzrmctingr nide. ¹⁶ Murde mzli kc Kxetu rgu navzom Heven, lr nrlc sa naxlrlr dq nzkabongr, natq narenjrl, x trpu r nzkqkr Gct. X leplz neng Kraes kx nzbpeng natulz-kaipqng. ¹⁷ X mz nibrde, nigu kcng tzlubeng x kxnzlu-moung sa navzdz-lxblrku mz nabz dcblz, mz nzyrlrpx-lxblr-krgu badr Kxetu mrlc mzlixl. X sa namnc-lxblr-aloku badr Kxetu! ¹⁸ Mz nzmu-krde lcde, apqtr-etramu nabzmu mz nzpipx-krmu natq lcng.

5

Naoliqt-zvzku Nzyzlu-krm Kxetu

¹ Mzlegrng, mzli ka trnayrpwzkr kxnamu mzli kc na-adcpk-lzbq-ngrm Kxetu rgu o zbz qk nayzlu-ngrmle. ² Murde krlzpeamu kx mzli lc nakctipx, na-apule ncblo kc tqpna da mz nrlckxbq. ³ Leplz kx trnzrlxngitiung narpilr kx, "Nigr ka tqmnc-zpwpxekr ye mz nrwxx." A' mzli lcde, nzayrplapxngr nidr sa na-ani txpwz, na-apule nimz ngr zvetqkr nibr olvz kx narmika. X sa narblxbz mz leplz lcng nzrlapx-krdr mz nzlva-krdr. ⁴ A' trnakctipxwamuu nzvz-krm Mzli lc Tqmatq, mz nzapu-krde nzvz-krm ncblo kc tqpna da. Murde trvz-nqblqewamuu nqmq ngr alwx. ⁵ A' nimu doa neng Kraes kcng tqvz-nqblqamu nzalvztrnegr angidr ngr da kx ptilzmqng mzli ka mz nrlc. Mz nzmu-krde lcde, na-aclvetio-lzbqku x nalolvzo-lzbqku. ⁷ Murde nrlckxbq mzli r alwx, mzli r nzmwings, x mzli r nzrmnqng. ⁸ Mz nzvz-nqblq-krgu nzalvztrnegr angidr, na-aclvetio-lzbqku. Na-apuku ncblo ngr vea mz nzvec-krgu badr Setzn. Nzrlxngiti-krgu x nivz lrgu na-ayrbqpxle nabzgu na-apule temz ngr lomrgu kc tqyryputrnegr nipna. X nzarlapxkr Kraes nigu

na-ayrbqpxle drtwrgu na-apule da kxmqngi kx nalalvzle nar ncblo ngr vea, murde mz drtwrgu kxbr, obqtipxku da amrlx kx vzpxm mz nzarlapx-krde nigu. ⁹ X nadcpx mz drtwrgu kx Gct mcpxle nigu x arlapxpele nigu mz nzbzkr Kxetu rgu Jiszs Kxnzmcpx. A' trmcpxleu nigu mz nzayrplapx-alokrde nigu. ¹⁰ Kxmule-esz' bzpeku o lubeku mzli kc nayzlu-ngrm Jiszs, a' bz-ngrde murde nalu-zvzku badr. ¹¹ Mz nzmu-krde lcde, apqtramu drtwrmu x axplr-lzbqamu da kc tqwaiamu mzli ka.

Natq Ngr Nzarlrl-zlbqngr

¹² Mzli ka, mzlegrng x inwegrng, na-amatqamu krkcng tzwz-katong mz mzlirmu, mz nzaclve-krdr nimu mz zmatq ngr Kxetu x mz nzalvztr-krdr nimu. ¹³ Mz nivz angidr, aelwa-ngrbzmu badr kx amatqamu nidr mz nzwzngr kcng tzalebzlr bamu. X mnc-zpxwx-lxblramu.

¹⁴ Mzlegrng x inwegrng, lalztqmamu bagr. Axplrbzmu natqmu mz krkcng drtqdr tqlsa. Apqtrpzmu drtwr krkcng tzmwxlrng. Okatramu krkcng nabzdr tqbao mz nzxngiti-krdr. X mnc-zpxwxamu badr leplz amrlx.

¹⁵ Aclvetio-lzbqamu x bzkq ayzlubzmu da kxtrka mz da kxtrka. A' na-alebzmu da kxmrlz mz kztemung x leplz amrlx.

¹⁶ Naelalz-zvz-ngrm drtwrmu! ¹⁷ Nakrka'-zvzamu! ¹⁸ Kxmule-esz' nike prtz, a' na-awi-zvz-ngrbzmu mz Gct da lc. Murde suti drtwrde kx doa amrlx kcng tzlxngitilr Jiszs na-awi-zvzbzng bade.

¹⁹ Bzkq rpwa'-ngrnamu nzwzkr Mqngkrkxtr. ²⁰ Bzkq apusr-ngrnamu natq x nrpa kc tqaewapx-ngrbz Mqngkrkxtr mz leplz brmrda. ²¹ A' mzli kc tqrpingr kzdq ncblo kx natqde aelwa-ngrbz Mqngkrkxtr, naobqtitr-kaiamu da amrlx. X yrlq-zvzamu natq kxmrlz. ²² A' yrlqpx-lzbqamu mz natq kxtrka amrlx.

²³ Nzkrka'-krgr nimu nide sele:

“Gct, nim kc tqrkam bagr nzmnc-zpxwxngr. Krka'-ngrgr kx na-atrq nidr mz da amrlx. Murde nztubq-krdr mz mqngldr, nabzdr, x nrkrdrtdr navz nakrlzbzle nzyzlu-krm Kxetu rgr Jiszs Kxnzmcpx. ²⁴ Nim kc tqkqlepele nidr. X lxngitikr kx sa na-atutrq natqmqng amrlx. Eu. Angida!”

²⁵ Mzlegrng x inwegrng, nakrka'-kz-ngrnamu nigr. ²⁶ Pibz “Nimu la,” mz inwegung x mzlegung amrlx mrla, mz nzmale-lxblr-krmu mqmu mz nivz.

²⁷ Rngidrtx-zlwz-ngrbo bamu mz zmatq ngr Kxetu, kx natqgr lcng narlwxbz mz leplz neng Kraes amrlx.

²⁸ Krka'-ngrgr kx Kxetu rgu Jiszs Kxnzmcpx naokatrle nimu mz zmrlz ngrde kxmyalz.

Delape. Ning Pol,
nigr ncdr Saelas x Timoti.

Nzryr-krbz Pol Krali Mz Lr Tesalonika Natq Ngr Nzaplxtqngr Mz Nzryr-krbz Pol Krali Mz Lr Tesalonika

Letz lc yrbz aposol Pol mz dzbe lrmakxtr kcng taon kxetu Tesalonika. Mc kz 'Natq ngr Nzaplxtqngr Mz Nzryr-krbz Pol Kx Ayrnrngr Mz Lr Tesalonika.' Letz krali lc tqyrlle mz nibr kzdung temz mz letz kc kai. Murde mrlx kc tqrtwz letz kc kai, mz nzyzlu-krmle rlwa-ngrbzle mz Pol kzdung nrpa ngr lr Tesalonika. Rpibzle bade kx lr Tesalonika nztu-amqnging mz nzrlxngiti-krdr kxmule-esz' nzaetqbz drtqdr mz nzatrkattingr nidr. X rpi-kzpze kx kzdung leplz nzalvztr-rbr-ngrdr kx Kraes sc tqyzlupe-mop, a' lr Tesalonika trnzprtrpeung mz nzvzmi-krde leplz nedeng Heven. Kzdung kz leplz trnzwzu, x Pol lc-apqbzle nidr.

Mz nzmu-krde lcde, Pol yrle letz krali lc mz nzapqtr-krbzle drtwr lr Tesalonika x mz nzalvztr-krde nidr mz nzyzlu-kr-mop Kraes kalr.

Mrkcngr Mz Letz Lc

Apqtr-ngrbzle drtwrdr mz nzkxpu-krdrng mz nzvz-nqblq-krdr Kraes.
[dckrlzde 1]

Alvztr-ngrde nidr mz nzyzlu-krm Kraes kalr. [dckrlzde 2]

Pibzle badr kx navz zvz mz nzwz-krdr x na-ayrplapxlr kx nzpxtxpx-
ngldr nzwzngr. [dckrlzde 3]

¹ Ning Pol, nigr badr Saelas x Timoti. Ryrbzkr bamu, nimu leplz neng Gct Trtegu, x Kxetu rgu Jiszs Kxnzmcpx, kc tzmncng mz taon Tesalonika.

² Krka'-ngrne kx Gct Trte x Kxetu rgu Jiszs Kxnzmcpx naokatrlr nimu mz zmrlz ngrdr kxmyalz x namnc-zpwxamu.

Gct Sa Na-ayrplapxle Leplz Kxnztrkang Kalr

³ Mzlegrng x inwegrung, takitrde nzawi-zvvz-krbzkr mz Gct nimu. Murde nzrlxngiti-krmu sc tqetunepx zvz, x nzmrlzti-lzbq-krmu sc tqatunedz.

⁴ Mz nzmu-krde lcde, glqpx-lzbq-ngrbzkr nimu mz mzlegung mz Kraes. Yapwxtibzkr kx nztu-amqngi-krmu x nzrlxngiti-krmu sc tqvz zvz, kxmule-esz' nzatrkatimu x trnzamnc-zpwxu nimu.

⁵ Tu-amqngiamu mz nzatrkattingr mzli kc tqvectr-ngrbzmu leplz mz Gct mz nzngini-krde King rdr. Krlc aelwapx-ngrde kx nzpipxkr Gct kx nimu leplz kxnztubqng da angidrtx x takitrde nzprtr-krmu Heven. Murde atubqtipale nimu mz nzobq-krde. ⁶ Mz nzmu-krde lcde, takitrde Gct nzayrplapx-krde krkcng tzatrkatilr nimu. ⁷ X sa nakatx-kzle nzatrkattingr lc nimu, x nawai-kzle nigr, mzli kc Kxetu Jiszs na-adcpx-lzbq-ngrde mz nzvzo-krmle Heven, nidr badr enjrl nedeng kxnzmatqng. ⁸ Sa navzomqng mz nabz nyr kxwou, x mzli lc sa na-ayrplapxle leplz kcng tzpxtxpx-
ngldr nzlxngiti-krdr Gct x nzmnnc-nqblq-krdr Nrpa ngr Kxetu rgu Jiszs.

⁹ Nzayrplapxkr Kxetu kx namule sele. Sa narpwa'-alo-ngrbzle badr nzmnnc-krdr me mnc-ngrde, x trnamclru nzetukr zmatq ngrde. A' mz nzmnnc-alo-krdr esz'-krdr, trpnzngr da kxmrlz kx narmctilr. ¹⁰ X leplz neng Gct sa naglqlz-ngrdr nide x kxnzrlxngiting lcng amrlx na-amatq-ngrdr nide mz da lcng na-allele mzli kc nayzlu-ngrm Jiszs. X naprtr-kzamu mz dzbede lc, murde lxngitiamu natqgr.

¹¹ Delc, nzkrka'-zvz-krgr nimu tqkxmu-ngrde sele. "Gct rgr, krka'-ngrgr kx natakitrde nidr nzlungr kc tqoliqti-ngrn nidr. X kx naokatrpzme nidr

mz zmatq ngrm, murde na-alelr da kcng amrlx tqmrlz tzsuti drtwrdr mz nzlxngiti-krdr Mrlxm. ¹² Gct Trte x Kxetu rgr Jiszs Kxnzmcp, krka'-ngrgr kx naokatramu nidr mz zmrlz ngrmu kxmyalz, murde leplz na-amatqlr drtq Kxetu rgr Jiszs mz nike nzalelr x na-amatq-kzlr nidr mz nzngini-krdr leplz nedeng. Eu. Angida!"

2

Kxtrvz-nqblqleu Lou Sc Gct Sa Navz-kaip, X Kraes Sc Tqvz-atem

¹ Mzlegrng x inwegrng, rpikr napi-mopwzkr du dalr mzli kc nayzlu-ngrm Kxetu rgu Jiszs Kxnzmcp, x mzli kc nayrlwr-lxblr-ngrgu badr. ² Bzkq rlr-ngrbzmu mz leplz nzatalvzo-krdr x nzataprlz-krmlr nabzmu, mz nzrpikrbzlr bamu kx, "Mzli kc navz-ngrm Kxetu kaputr-pnzm." Murde mzli lc trvzkap. Kxmule-esz' nzrpilr kx da lc aelwa-ngrbz Mqngrkxtr, o nzpibzlr da lc mz nzalvztrngr, o mz nrpa kx nzrpilr kx atwzlr-ngrbzkr, ³ a' bzkq lxngitiamu nidr. Murde da li lang nakaputr-kaipqng x Kxetu kc tqyzlu-atem. Leplz nakqlung kalr kx naxpqbrllr-ngrdr Gct. X Kxtrvz-nqblqleu Lou sc Gct sa navzm, nide kc naprtr kalr mz nzayrplapx-alongr mz Hxl. ⁴ Ncblo lc sa narpwa'-ngrbzle mz leplz nzangio-krdr Yawe Gct angidr x kxtrngiu gct angidr kz. Murde sa na-amyalz-lzbqbz badr. X sa nawxbupx-kzp Mangrzangiongr Yawe Jerusalem x narpile kx nide Gct.

⁵ Nadcpx mz drtwrmu da kcng tqpi-pnzbo bamu mzli kc tqmnc-ngrgu. ⁶ X sc tqkrlzpeamu zmatq kc tqolvzbele nide mzli ka. A' mzli kc nakrlz-ngrbzle mzli rde, Gct sc tqrlrpx-ate-ngrde nzvz-krm Kxtrvz-nqblqleu Lou scde. ⁷ Zmatq ngr Setzn sc tqwz-kapqpe mz nrlc mzli ka. A' Kxtrvz-nqblqleu Lou sc Gct trvzkap murde trkatxkangr Gct Kxrolvz zmatq ngrde. ⁸ Mzli kc nakatxpengr Gct zmatq Kxrolvz, Kxtrvz-nqblqleu Lou sc Gct sc tqvz pem, x Kxetu Jiszs sc tqyzlu-atem. X sa naodati-atwrnr-ngrbzle zmatq ngr Kxtrvz-nqblqleu Lou sc Gct lcde mz zmatq ngr nzvz-krmle, x nanibqle nide mz natq ngr naode. ⁹ Kxtrvz-nqblqleu Lou sc Gct lc sa navzm mz zmatq ngr Setzn. X sa na-aelwapx-ngrde rrx kxkqlu kx bletipx-lxblrng kx narpibz leplz nzvzpxmqng mz Gct. ¹⁰ X sa na-aleti-kzle da kxtrka kang kqlu, murde rpile naesabrti-ngrde leplz kcng naodati-along. Sa naesabrtile nidr murde napxtppx-ngrdr nzlxngiti-krdr Nrpa ngr Jiszs, kc na-arlapxpele nidr. ¹¹ X sa na-aprcbz Gct nidr mz nzlxngiti-zvz-krdr nzpokiakr Kxtrvz-nqblqleu Lou scde. ¹² Murde krkcng amrlx kznikeng trnzlxngitilru Nrpakxmrlz, a' nzsuti txpwz drtwrdr nzalengr da kxdrka'ngr, na-ayrplapxng.

Nzmcpxmu Murde Narlapxamu

¹³ Mzlegrng x inwegrng, Gct mrlztile nimu. X abzo mzli kc tzwzngr nrlc, mcpxle nimu murde na-arlapxle nimu kalr. X arlapxle nimu murde lxngitiamu nzalvztrngr angidr x Mqngrkxtr atrle nimu. Mz nzmu-krde lcde, takitrde naawi-zvz-ngrbzkr bade nimu. ¹⁴ Gct kqlele nimu mz Nrpakxmrlz kc tqlemgr bamu, murde leplz na-amatqlr nimu da kc tqwai nzamatq-krdr Kxetu rgu Jiszs Kxnzmcp. ¹⁵ Mz nzmu-krde lcde, natu-amqngi-zvzamu mz nzlxngiti-krmu natq angidr kc tqalvztrpzkr bamu mz nzryapwx-krgr x mz nzryr-krbzkr bamu.

¹⁶⁻¹⁷ Gct mrlztile nigu. X mz zmrlz ngrde kxmyalz, apqtr-zvzmle drtwrgu x okatrle nigu mz nzobqtipx-krgu da kcng nakam Kraes bagu. Krka'-ngrgr kx Kxetu rgu Jiszs Kxnzmcp x Gct Trteg na-apqtrpzlr drtwrmu. X na-aplrlr nimu mz nzale-krmu x nzrpikrmu da kxmrlzting amrlx.

3*Krka'-ngrnamu Nigr*

¹ Mzlegrng x inwegrng, krka'-ngrnamu nigr murde Nrpa ngr Kxetu naletx-anipwz x nalxngiti leplz kxkqlu, da kc tqwaipeamu. ² Krka'-kz-ngrnamu kx na-arlapxbz Gct nigr mz mq leplz kxnztrkang, kxnzvz-rbrng, x kxtrnzlxngitilru Kxetu rgu.

³ A' Kxetu kc tqbrti drtwr, dekc na-axplrlle nimu x na-arlapxbzle nimu mz zmatq ngr Setzn kc Tqdrka'ngr, murde ma tqodatile nzrlxngiti-krmu.

⁴ Abrtrpzkr drtwrgr mz Gct, delc drtwrgr tqbr-ngrde kx sa namnc-nqblq-zvzamu natqgr kcng tqpibzkr. ⁵ Krka'-ngrgr kx nabatrpzle nzkrlz-krmu kx Gct aodule nimu, kx na-atu-amqngi-zvzle nimu, da kc tqwaipe Kraes.

Bzkq Drtqmu Sa

⁶ Pibzkr bamu mz drtq Kxetu rgu Jiszs Kxnzmcp, kx navecpx-lzbqmamu mz kxnzrlxngiting kcng drtqdr tqsx x trnzvz-nqblqlru nzalvztrngr kc tqpibzkr bamu. ⁷ Murde krlzpeamu kx nqmq krgr ngipe lrpzki kx navz-nqblqamu. Drtqgr trtau mzli kc tqmnc-ngrbzkr bamu. ⁸ X mz nzmnc-krgr, xpe-zvzbzkr dakxanzng mz leplz. X wz-zvzkr mz zbo kang kqlu mz nzatatr-krmgr trau, murde drtqmu naopx x ma tqrkabzkr bamu nzwzngr kx naetunepxng nzwz-krmu. ⁹ Kxmule-esz' takitrde nzpi-krbzkr bamu nzokatr-krmu nigr mz nzngini-krgr aposol, a' aclveti-lzbqgr mz nzngini-krbzkr lrpzki kc navz-nqblqamu. ¹⁰ X lou kc tqpibzkr bamu mzli kc tqmncbe-ngrbzkr bamu, nide sele, "Mrlx kx ptxpx-ngrde nzwzngr, trtakitrdeu nzmu-krde."

¹¹ Pi-ngrbole murde xlrkr kx kzdung nimu nzpxtpx-ngrdr nzwzngr. X trpnzu drtwrdr dztudr, a' pnz txpwz drtwrdr dztu leplz kc-kzng. ¹² Mz nzvz-nqblq-krde zmatq rgr mz nzngini-krgr aposol ne Kxetu rgu Jiszs Kxnzmcp, pibzkr bamu kx leplz kxnzmulr lcng na-apqbtxtrpwzlr naodr x na-aleng nzwzngr kx na-atatr-ngrmlr. ¹³ A' mz nimu amrlx, bzkq yrlqpx-lzbqamu mz nzale-krmu da kxmrlz.

¹⁴ Mrlx kx trmnc-nqblqleu natq kcng tqyrbo bamu mz letz lc, namcp-wzmu nide. X navecpx-lzbqmamu bade, murde drtqde la namya mz nzvz-rbr-krde. ¹⁵ A' bzkq apusr-ngrnamule enqmi rmu, a' apusr-ngrnamule mzlemu o inwemu kx nalc-apqbzamu.

Natq Ngr Nzarlr-lzbqng

¹⁶ Krka'-ngrgr kx Kxetu r Nrwx namncbz bamu x naka-zvzbzle bamu nrwx, murde namnc-zpxwzamu.

¹⁷ Mz nzvz-nqblq-krnge nqmq krnge, yr-angidrx natq lcng mz mqnge, "Nimu la!" Murde na-aelwapx-ngrne kx atwzlr-ngrbo letz lc.

¹⁸ Krka'-ngrgr kx Kxetu rgu Jiszs Kxnzmcp naokatrle nimu amrlx ngrmu mz zmrlz ngrde kxmyalz.

Delape. Ning Pol,
nigr badr Saelas x Timoti.

Nzryr-krbz Pol Kx Ayrnrngr Mz Timoti Natq Ngr Nzaplxtqng Mz Nzryr-krbz Pol Kx Ayrnrngr Mz Timoti

Aposol Pol yrbzle letz lc mz Timoti, x apusr-ngrde nide mrlxde. Mz kzdung nzvzpxkr Pol nzvzng badr. [◊] Mz nzwz-krde, Timoti tu mz mzlindr Pol badr dzbe lrmakxtr mrkc Efisz x mz provins kc Esia, mz nzmnclz-krbzle mz zmatq ngr Pol. Kxmule-esz' trnzyrlqu nide nzngini-krde 'kxaclve' o 'aposol,' a' nzaclve-krde myaszlle ncblo kxaclvele dzbe makxtr kc esz', murde mcpkle leplz kxnzaclvelr lrmakxtr.

Mz Aposol 28, Pol sc tqmncpxm mz presin mrkc Rom. A' mz drtwr kzdung kxnzalvztr-ngrdr mz Nzryrngrkxtr, mwz nzaopx mou drtq Pol mz presin, x sc tqvzpx mou mz nzyapwxtipx-krde Nrpakxmrlz. Murde kzdq letz kx trnzyrou mz Nzryrngrkxtr rpile kx Pol krlzbzle Spen. Yrle letz 1 Timoti mz mzlir yiz 62—63 AD mz nibr nzrmcngr mz Jisz. Mz nibrde, mz yiz 64 AD kzdq nyr kxetu odatile kzdq nctq Rom. King Kc Etu Niro abetitr-ngrde lrmakxtr kc Rom x kapxle natq kx bzkq nzlxngiti Jisz. Krkcng tzrlxngiting nalolvzng x nanibqng. Mz yiz 67 AD Pol nzamncpx-mop mz presin nzwrde krali. Letz ayrnrngr lc tqyrbzle mz Timoti, yrle mz mzlir nzwrde kcng li tqmncpx-ngrmle mz presin.

Mz letz kcng tqyrbz Pol mz Timoti x Taetus alvztr-ngrde kxmu nqmq kr leplz kxnzaclvelr dzbe lrmakxtr.

Mrkcng Mz Letz Lc

Timoti na-atubqtibzle kzdung nzalvztr-rbr-ngrng. [1:1-20]

Kxnamu kxnzrlxngiting nzangio-lxblr-krdr Gct. [dckrlzde 2]

Leplz kcng tztakitrdr nzaclve-krdr dzbe lrmakxtr. [dckrlzde 3]

Pol pibzle mz Timoti kxnamu nzale-krde nzwz-krde. [dckrlzde 4]

Pol alvztr-ngrde da kx nartrngtibzng mz nzvz-rbrkr lrmakxtr. [dckrlzde 5]

Pol alvztr-ngrde Timoti x lrmakxtr mz da kxkqlu. [dckrlzde 6]

¹⁻² Nim la Timoti, ninge Pol, aposol kc tqmcpk Mevalu Jisz, mz nzvz-nqblq-krde natq Gct kc tqarlapxle nigu, ncdr Mevalu Jisz kc tqbrti drtwrgu. Nzatzl-ngrdr ninge mz nzwztr-krbo badr.

Apubo bam trtem angidr mz nzrlxngiti-krgi. X krka'-ngrne kx Gct Trtegu x Kxetu rgu Mevalu Jisz nayc mz drtwrdr nim x naokatrdr nim mz zmrlz ngrdr kxmyalz x namnc-zpwxq.

Nzalvztrngr Kx Nzvz-rbrng

³ Mzli kc tqmncbe-ngrgi mz taon Efisz, pibo bam kx namncme elr, x ninge kc tqvzpxe mz provins kc Masedonia. X mzli ka suti drtwnge kx namncbeq elr, murde na-atubqtibzme nzalvztrkr leplz kcng tzalvztr-rbrng. ⁴ Pibz badr kx bzkq nzamatqlr be kc bqnc tzpokiangr x pepz kc tqyrlwrlz-ngrm drtq melrmqdrng. Da lcng tqrkatrpz nzakipx-lzbqkr leplz, a' trnzokatrlru nzwzkr Gct kc tqvzpxm mz nzrlxngitingr.

⁵ Timoti, suti drtwnge kx nivz navzpxm mz nzalvztr-krgi, murde nabz leplz neging natubq, nqmq nr drtwrdr trnavz-rbru, x nzrlxngiti-krdr natu-amqngi mz nzmrlzti-lzbq-krdr. ⁶ Murde kzdung leplz nzesablqtipelr da

[◊] : Aposol 16:1-3; 17:14-15; 18:5; 19:22; 20:4-5; Rom 16:21; 1 Korint 4:17; 16:10; 2 Korint 1:1, 19; Filipae 1:1; 2:19-23; Kolosia 1:1; 1 Tesalonika 1:1; 3:1, 6; 2 Tesalonika 1:1; Filimon 1:1; Hibru 13:23

lcng tqmrlz, murde naprtrng mz nzycmnengr kx trokatrleu leplz. ⁷ Nzrpilr nanginidr kxnzalvztr mz Lou sc Mosis, a' trtakitrdeu. Murde kxmule-esz' natqdr tubq mz drtwrdr esz'-krdr, a' trnzkrlzlu da kcng tzycmnetr-ngrdr x drtwr ngrde.

⁸⁻¹¹ Krlzku kx Loukxtr okatrle leplz mzli kc tzvz-nqblq-ngrdr drtwr ngrde angidr. X drtwr ngr Loukxtr naesz'ting mz drtwr ngr Nrpakxmrlz kc tqaprcm Gct kc tqmyalz bange. Murde yrlq-ngrbzle Loukxtr trngiu dalr nzatubqtingr leplz kxnztubqng, a' mz nzatubqti-krde leplz kxnzvz-rbrng murde nzrpwa'-ngrdr Loukxtr x nzpxtxpx-ngrdr nzvz-nqblq-krdrle. Nidr leplz kxnzatrkatilr Gct, kxnzaleng alwx, kxnzpxtxpx-ngrdr Gct x kxnzpxtxpx-ngrdr da kxtrng amrlx. X nidr leplz kxnznibqlr trtedr x lxedr, x leplz kc-kzng, x kxnzrmwiming badr doa kx trngiu kernalzdr, x ncblo badr ncblo, x olvz badr olvz. Nidr kxzpnang doa kx na-amwalrng, kxnzpokiang, x kxnzpokiang mz mz kxnzetung mz kot, x kxnzaleng da kx rpwa'-ngrde Nrpakxmrlz.

Nzawikr Pol Mz Nzyckqkr Drtwr Gct

¹² Awibo mz Kxetu rgu Mevalu Jiszs, murde abr drtwrde ninge mz nz wztr-krbo bade, x axplrle ninge mz nzale-krnge nz wzngr lc. ¹³ A' mzli kc pnz pibqtix Kraes, x alex da kxkqlu kx aetq-ngrbo drtqde, x atrkatilzlwz-kzx doa nedeng. Kxmule-esz', a' Gct yckqti drtwrde ninge. Murde trkrlzwxu kx alex da kx vz-rbr, x rtrngzti-ngrbole mz nzvz-nqblq-krde trnzrlxngiti-krngeu. ¹⁴ A' zmrlz ngr Kxetu rgu sc tqmyatxlz-esz'ngr mz nzipq-krde ninge. X nzkra-krmle bange nzbrkr drtwr x nivz mz nzaxvctr-lzbq-krbo mz Mevalu Jiszs. ¹⁵ Da zpwxtx, x takitrde nzrlxngitingr mz nabz atwrnrngr kx Mevalu Jiszs vzm mz nrlc mz nzarlapx-krde kxnzaleng alwx. X ninge kx myapxbz mz alwx kcng tqale-zvzx mzli kc. ¹⁶ X Jiszs Kxnzmcpx trngyati-aniu drtwrde ninge mzli lc, kxmule-esz' myapxbz mz alwx rngeng. A' mcpkle ninge mz nzaelwapx-krde nzelukr zmrlz ngrde, mz nzarlapx-krde ninge mz alwx lcng. X nzarlapx-krde ninge lc tqaelwapx-kz-ngrde nzvqtikr drtqde nzarlapx-kz-krde leplz amrlx. Murde nalxngiti-kzlr nide x narmcti-kzlr nzlungr kxboi.

¹⁷ Mz nzngini-krde King,
Kx lu zvz, trnzmcu,
Nide txpwz Gct,
Naglqlz-zvzku,
X na-angio-zvzku nide. Eu!
Naglqlzku nide,
Na-angioku nide. Eu! *

¹⁸ Mrlxng Timoti, natqnge lcng nakabo bam nzvz-nqblqlr natq kcng tzpipx-pnzlr profet ngr lrmakxtr mz nz wzngr lc tqrtrngztierezme. X na-aoti angidr drtwrm natq lcng, murde naxplrq mz nzota-krm mz nrlarde nyx Kxetu. ¹⁹ X nalolvz-amqngi-zvzq nzrlxngiti-krm, x nabzm nalqngi. Murde krkcng tzpxtxpx-ngrdrng nzrlxngiti-krdr yrkrpxpebz. ²⁰ Kzdung nidr nzling drtqdr Haemznezs ncdr Aleksada. Aprcpebo nidr mz mq Setzn, murde drtwrdr naopx x nayrtqpx-lzbqng mz nzycmne-atrkatilz Gct.

2

Nzmncngr Kx Takitrde Nzyrlwr-lxblkr Lrmakxtr

* ^{1:17} Krlc nabz #9 mz Buk Ngr Nzangiongr.

1-2 Na-alvztrpzme mz lrmakxtr nem kx nakrka'-ngrgu leplz kcng tzacl-veng drtc' amrlx x kxnzrmailz rgung amrlx. Murde na-aclve-angidrlr nigu x namnc-zpwxku mz nzamatq-krgu Gct, x mz nzvz-nqblq-krgu natqde. X nakrka'-ngrgu leplz amrlx, mz nzrlxti-krbzku mz Gct nzokatr-krde nidr. X na-awibzku bade mz nzayzlu-krde nzkrka'ngr lcng. **3** Gct kc tqarlapxle nigu abrtzlvzle nzkrka'-krgu leplz amrlx. **4** Murde suti drtwrde kx leplz amrlx narlapxng mz alwx ngrdrng x nakrlzlr nzalvztrngr angidr. **5-6** Murde nzalvztrngr angidr nide sele.

Gct esz'txu. X Mevalu Jiszs ngi ncblo esz'txu Kc tqtu mz mzlir Gct x leplz. Murde rlrpx-lzbq mz nzbzo-krmle mz kros, mz nxzpe-krde alwx ngr leplz amrlx, mz nzvz-nqblq-krde mzli kc tqyrlq Gct.

7 Delc tqmcpxngr Gct ninge, mz nzyapwxtipx-krnge Nrpakxmrlz. Zpwxtx! Trpokiawxu! Mcpxle ninge mz nzngini-krnge aposol. X atwzlr-ngrde ninge mz nzalvztr-krnge krkcng trngiulrjiu, murde nalxngiti-kzlr nzalvztrngr angidr.

8 X suti zlwz drtwrnge kx ncblo neng Kraes ngr mrlcng amrlx nakrka'ng. Murde nzkrka'ngr atubxlzle nzwzkr Nrpakxmrlz. Bzkq ncblo nzbubzlr mqdr mz enqmi rdr, a' naglalbzblr mqdr mz Gct mz nzkrka'ngr kxtr. **9** Suti kz drtwrnge kx olvz nakrka'-kzng mz nzavzo-lzbq-krbzlr mz Gct. X nakqng lrpz kx takitrde nzkrka'ngr. A' bzkq nzalulilr nrlardr kxyz mz nzkcmnzkr leplz nidr. X bzkq nzalqtilr da kxlqlwx mz nqnginardr, x nzrlung gol, x nzkqng lrpz kx trau rde kqlu zlwz, murde da kxnzmull lcng nzatrkatilr leplz mz nzmctr-krbzlr mz Kraes. **10** Murde takitrde olvz neng Kraes kx na-aelwapx-ngrdr nzamatq-krdr Gct nzalqngiti-krdr nabzdr mz nzsrrngz-krbzlr da kxmrlz.

11-14 Olvz kxnzlxngiting namnc-lrping mzli kc tzryapwxngr mz nzyrlwr-lxblrkr lr makxtr. X navz-nqblqlr nzalvztrngr lcng. Murde mzli kc Gct tqwz-ngrde nrlc, wz-ayrnr-ngrde Adzm, x Iv kc ate. Delc mz nzaclvengr lrmakxtr, tr-rlr-ngrpwc'u mz olvz nzalvztr-krdr ncblo mz dalr nzmncngr mz Kraes x bzkq zmatq ngrdr nzmyaszpx-krdr ncblo, a' ncblo namyapxpwz. X tr-rlr-ngrpwc'u mz olvz nzaclve-krdr ncblo mz nzka-krbzlr natq badr. Murde trngiu Adzm kc tqmailzle Iv mz alwx, a' Iv kc tqtao kai mz alwx, mz nzesabrtikr Setzn nide. **15** Kxmule-esz', a' tqngi olvz kc tqrmikapx Mevalu Kxnzmcp, kc tqaovxiole Setzn. X mz nzrmikangr lc, olvz amrlx narlapx-kzng, mz nzlxngiti-zvz-krdr nide. Nzmnc-krdr natr x namrlzti-zvzlr leplz, x na-alelr da kxtubq. *

3

Ncblo Kx Takitrde Nzwzngr Mz Nzaclve-krde Dzbe Lrmakxtr Taetus 1:6-9

1 Da angidr lc tqpibo. Mrlx kc tqpq zlwz mz drtwrde nzwzngr mz nzaclve-krde dzbe lrmakxtr, suti drtwrde nzwzngr kxmrlz-esz'ngr.

2 Kxacvle lc nangi ncblo kxtubq, kx trnzpibqtiu leplz. Nayrlzti-txpzwzle olvz naesz', mz mzli kxesz' bzkq aoti drtwrde nzvz-krbzle mz olvz kzbleng.

* **2:15 2:11-14** Kzdung leplz nzrpilr kx natq Pol lcng takitrde olvz amrlx kxnzrlxngiting. A' kzdung nzrpilr kx trtingr, a' ngi txpwz natq kc tqkapxbzle mz lr Efisz murde olvz lcng trnzkrlz-zwpwkralr nzalvztrngr angidr. 2:15 Kzdung leplz drtwrdr tresz'tiu mz da kc tztekqr mz ngalrde 15. A' nzrpilr kx drtwr ngrde nide sele. 'Kxmule-esz' alwx vz-ngrmle mz nrlc olvz, a' olvz narlapxng mz nzatutr-krdr nzwzkr olvz mz nzrmikangr doa x nzasu-krdr dakxnxng x kzdung kz da kxnzmull lcng, nzmu navz vzz nzlxngiti-krdr Mevalu Kxnzmcpz mz nztrkr nzmnc-krdr, x nzmrlzti-krdr leplz, x nzale-krdr da kxtubq. A' bzkq nzvecpz-lzbqng mrkc tqamncngr Gct nidr, da kc tqwai Iv.'

Na-aclve-lzbq, nayrplapx, x na-amrlue leplz. X naokatrle lr narnrlc mz nzadwatr-krde nidr mz ma nyzde. X nzalvztr-krde natq Gct natubq. ³ Bzkq rmnq zlwz. Bzkq drtwrde ngya, a' nalolvzo-lzbq. X bzkq otablr, a' nangi ncblo ngr nrwrx. X bzkq mrlz zlwz bade trau. ⁴ Namailz-angidrlr lr manyzdeng, x naokatrle doa nedeng mz nzvz-nqblq-krdr natqdeng mz nzamatqngr. ⁵ Murde ncblo kx trmailz-angidrlre u lr manyzdeng, trtakitrdeu nide nzaclve-krde dzbe lrmakxtr neng Gct. ⁶ Kxaclve lc nangi kz ncblo kx nzrlxngiti-krde brpe. A' bzkq mcpqx ncblo kx nzrlxngiti-krde pobe, murde ma tqani txpwz nzglqpx-lzbq-krde, da kc tqwai Setzn. X mz nzglqpx-lzbq-krde lc, tqaxvctr-lzbq-kzpz mz nzayrplapxkr Gct Setzn. ⁷ X kxaclve lc nangi ncblo kx nzamatq kz leplz kcng trngiu lrmakxtr, murde ma tzpibqtilr nide x tqatrkti Setzn nwz-krde mz Nrpakxmrlz. *

Ncblo Kx Takitrde Nzwnzngr Mz Nzaclve-krde Dalr Makxtr

⁸ Mz nqmq lcpwz, ncblo kx nzyrlq mz nzaclve-krde dalr makxtr nangi kz ncblo kx nzamrlue leplz. Bzkq kx natqde tresz'tiu. Bzkq rmnq zlwz. X bzkq mrlz zlwz bade nzrncsngt tra u kxkqlu. ⁹ A' nalolvz-angidrlr nzrlxngitingr kc tqaelwapx-ngrm Gct bagu. ¹⁰ Timoti, obqtr kai mz leplz lcng na-aclvelr dalr makxtr. Nzmu kx trpnzngr da kx vz-rbrtrpz badr, sc tzngi ate kxnxaclveng dalr makxtr. ¹¹ Mz nqmq lcpwz, olvz kx aclvele dalr makxtr o olvz r ncblo kxaclvele dalr makxtr nangi olvz kx nzamatqng leplz amrlx. Bzkq nznginidr olvz kx narpikiting. A' na-aclve-lzbqng x nangini nidr olvz kx nzabrktr drtwr mz da amrlx. ¹² Ncblo kxaclvele dalr makxtr nalzde olvz naesz'txu x bzkq aoti drtwrde nzvz-krbzle mz olvz kzbleng. A' namailz-angidrlre doa nedeng x lrmanyzdeng amrlx murde navz-nqblq-kzlr nzrlxngitingr angidrl. ¹³ X kxacvlele dalr makxtr kc tqwz angidrl sa narmctile kx leplz nzamatqlr nide. Mz nzmu-krde lcde, nelzde nabr mz nzyapwxtipx-krbzle nzlxngiti-krde Mevalu Jisz. †

Nzalvztrngr Angidr

¹⁴⁻¹⁵ Mwx mzli trnabou niinge kc tqvzpebo bam. A' mzli ka nayr-kaipo da lcng bam, murde ma trvz-anipwc'u. Da lcng tzalvztr-ngrdr nimu da kx takitrde leplz neng Gct kc tqulu, mz nzprtr-krdr mz dzbe leplz kcng tzrlxngiting amrlx. Murde nqmq kr kxnxrlxngiting na-aelwapx-zvz-ngrde kx Nrpa ngr Kraes da angidrtx, mz nzvz-nqblq-zpx-krdrle. X namc-zpxl kx leplz nzyapwxtipxlr nzalvztrngr angidrl, murde Nrpa ngr Gct na-angidati-zpxle me pnz drtwrde. ¹⁶ X Gct aelwapxpe-ngrde nzalvztrngr angidrl ngr Mevalu Kxnzmcp. X drtwrgu esz'ti mz nzplzpx-lxblr-krgule. Delc tqrpi-zvz-ngrgu kx, "Lxngitiku

Jisz Kxnzmcp kx tqaelwapx-lzbqpe mz nrkrdrtrq leplz, x tqael-wapxngt Mqngkrktr nzngini-angidrl-krde Mrlx Gct, mz nzatulz-mou-krdele mz nzbdz-krde. X lxngitiku nzmcckr enjrl neng Gct nide mz nibr nztulz-krmle, nzvzmilzkr Gct nide me matq-esz'ngr Heven, nzyapwxtipx-ngrbz Nrpa ngrde mz lr nrlc, x nzlxngitikr leplz nide mz nrlc tulvzo."

* ^{3:7} Mz nzrtekqtrngr 'kxnxaclvler dzbe lr makxtr' leplz nzyro natq lcde seleng: kxaclve, pasto, bisop, presbitz, x lrtzlvz. A' nzalelr nwz-krde kcpwz. Mrkc mz trmctu nyzgu, nzkqle-ngrbzng nidr pris (o mama) x pasto. X dikon ngr COM nzprtr-kzng mz kxnxaclveng. A' nakrlz-kzku kx pris mz makxtr nyz Kristin mzli ka nzblepxbzng mz pris r lr Jiu mz Nzryrngrktr. Mc 'kxnxaclvler dzbe lrmakxtr' mrkc mz Nzalvztr-ngrng Kxmyapxbz. † ^{3:13} Mz nzrtekqtrngr 'nbclo kxnxaclveng dalr makxtr' leplz nzyro natq lcde 'dikon.' A' dikon lc, blepxbz mz dikon ngr COM. Murde krlc mz Nzryrngrktr nwz-krde nzaclv-krde dalr makxtr. Mz makxtr nyzgu nidr 'srs kipa,' 'srs kcmiti,' 'kxaclvele trau,' kxnzmokatng mz nzmailz-krdr dzbedeng mz makxtr, x leplz kx nzaleng nwz-krde kxnzmulr lcng. Mc 'kxnxaclveng dalr makxtr' mz Nzalvztr-ngrng Kxmyapxbz.

4

Lou Ngr Nzyrlzngr X Dakxnzng

¹ Mqngrkxtr pipx-angidrle kx mzli lcng navztrp, kzdu leplz sa na-axtxbzlr nzrlxngitingr angidr. X sa navz-nqblqlr nzalvztrkr drka' kxnzpokiang. ² Kxnxalvztr lcng nzpokiang x narpi-ngrbz kx nidr leplz kxnxmrlzng. A' trnzkrzlru nike mrlz x nike trka, murde nzpxtxpx-zvz-ngrdr da kxtubq. X mz nzalengr da lc nzamqngilr nabzdr, x rblxbz mz nabzdr nxngitr-kdrda lcng tqvz-rbrng. ³⁻⁵ Trnzrlrpix-ngrdr nuzyrlzngr x nzmungr kzdung dakxnzng, mz nqrpi-kdrda lc Gct trabrtzlvzleu da lcng. A' nqmq nr drtwrdr lc trvz-nqblqleu me pnz drtwrde. Murde mzli kc tqwz-ngrde nrlc, rpile kx doa x da amrlx kcng tqwz-ngrdeng mrlz. Delc trpnzngr da kxtrka mz da kcng tqwz-ngrde. Kamle dakxnzng bagu, nigu kcng tzlxngitilr nzalvztrngr angidr, mz nzamrlz-krde nigu. X naawi-ngrbzku bade da lcng x sc tqngq-ateku. Mz nzmurde lcde, mz nzvz-nqblq-krde natqde, dakxnzng amrlx mrlz x takitrde nzngq-krguleng, mz nzawi-kai-ngrbz bade.

Nim Kxnxawz Kxmrlz Ne Kraes

⁶ Timoti, xplrpeq murde vz-nqblqq natq ngr nzrlxngitingr x nzalvztrngr angidr. Pibz da lcng mz lrmakxtr mz nzaelwapx-krm kx nim kxnxawz kxmrlz ne Mevalu Jiszs. ⁷ Bzkq lalztqbzme mz be kx angqngu leplz, x nzalvztr-kdrda blepxngr mz Nrpakxmrlz. A' alvztr-lzbq mz nzmncngr kxtubq. ⁸ Murde nzvz-nqblqng nzmncngr lc tqtubq mz nzobqkr Gct, okatrle leplz mz nrlc ka x mz nrlc kc navzm. A' nzvz-nqblqng nzmncngr nzmncngr lzbqkr nrkrdrtq, okatr-txpwzle leplz kxipiz mz nrlc ka. ⁹ Da lc tqpibo da zpwxtx x takitrde nzrlxngiti-zpwxtx. ¹⁰ Delc tqwz-kato-ngrgi mz nzvz-nqblq-krgi nzmncngr kxtubq. Murde abrtrpzku drtwrgu mz Gct kc tqlu, tqngi Kxarlapx ngr leplz amrlx, myapxbz kxnxrlxngiting. *

¹¹ Rkabz badr natq x alvztrng mz da lcng. ¹² Bzkq leplz nzobqszolr nim mz nzngini-krm obla. A' nanginibzme lrpzki r kxnxrlxngiting, mz nzvz-nqblq-krdr nzycmne-krm, nqmq krm, nivz lrm, nzrlxngiti-krm, x nztubq-krm. ¹³ Mzli ka tqaenzli-ngrn nzvz-krmc, navz zvz nzrlwx-krbzme Nzryrngrkxtr mz leplz, x nzryapwx-krbzme badr, x nzalvztr-krm nidr. ¹⁴ Nadcpkx mz drtwrm mzli kc kxnxaclveng tzyrlqo-ngrbzlr mqdr bam. Mzli lcde aycmneng Mqngrkxtr nidr, nzycmnepx-ngrdr nim. X Mqngrkxtr vzom bam ngi dalr nzwztr-krbzme mz Kraes. Delc navz zvz nzwz-nqblq-krm nike kabz Mqngrkxtr bam. ¹⁵ Navz zvz nzale-krm da lcng amrlx. Rlrpxngr nzlu-krm mz nzale-krmleng, murde namc leplz amrlx nzetunepxkr nzlxngiti-krm Kraes. ¹⁶ Aclve angidr nzmnc-krm x nzalvztr-krm, murde ma tqvz-rbrq. X tu-amqngi zvz mz nzale-krm da lcng, murde krlzq kx Gct sa na-arlaxle nim badr leplz kcng tzlalztqbzng bam mz nzlxngiti-zvz-krmu nide.

5

Nzmncngr Kx Takitrde Kxaclve Badr Lrmakxtr Nedeng

¹ Mzli kc tqatubqti-ngrn lrtzlvzng, bzkq ycmnebzme badr mz zngya. A' nzatubqti-krm nidr, na-apule kx ycmnebzme mz trtem, mz nzokatr-krm nidr. X nzaodu-krmqng obla na-apusr-ngrn nidr mzlemqng. ² Aodu blang, apusr-ngrdr lxemqng, x olving apusr-ngrdr inwemqng mz nzmncngr kxlqngi.

* ^{4:10} Murde mz nzbzkr Jiszs, Gct rkabz lrpzki r nzarlapx-krde leplz amrlx. A' kx arlapx-txpwzleeng krkng tzlxngitilr Jiszs.

Dzbe Olvz Kxnzabzong Kx Nzwztrpzng Mz Kraes

³ Lrmakxtr naokatrlr olvz kxnzabzong kcng trpnzngr kxnginidr kx naokatrlr nidr. X narlr-ngrbzlr badr nzprtr-krdr mz dzbe olvz kxnzwztr-pzng mz Kraes. ⁴ A' nzmu olvz kxabzo kx rngine doa o doa ne doa nedeng, o kzdq kz kxnginide, doa lcng naokatrlr lxedr, murde na-ayzlu-mopwzlr nzaclvekr lxedr x trtedr nidr, mzli kc tztopwz-ngrdr. X mz nzvz-nqblq-krdr nzmnncnrg kxmrlz mz nzobqkr Gct, naokatr-ayrnr-ngrdr lr mrnyzdr, mz nzwztr-krbzlr badr. ⁵ Olvz kxnzabzong kcng trpnzngr kxnginidr nzabrtr-txpwzlr drtwrdr mz Gct. X vz zvz nzrlxti-krbzlr nzokatr-krde nidr, x mz nzkrka'-krdr leplz. ⁶ A' olvz kxabzo kx vz zvz nzmrlzkr bade me pnz drtwrde esz'-krde, mqngrde bzpe kxmule-esz' nrkrdrtqde lube.

⁷ Pibz mz kxnzrlxngiting amrlx kx navz-nqblqlr natq lcng tqkabo bamu, murde natubqbzng mz nzobqkr leplz. ⁸ Murde leplz amrlx naokatr-angidrlr nqvi lrdr, myapxbz lr manyzdr. A' nzmu kx trpnzngr le, pokiangrde nzlxngiti-krde Jiszs. X mrlx kxmule lcde, nqmq krde trka zlwz, myaszpxle kxnzmnc-mrbrng. ⁹ Olvz kxnzabzong kcng naokatrng lrmakxtr nakrlzbzlr yiz kx nzpnu-esz'mz (60). X mz nzyrlzngr, mzli kc ncblo ngrdr tzlube-ngrdr, bzkq nzaoti drtwrdr nzvz-krbzlr mz ncblo kzbleng. A' nzmncc-krdr badr natubq zvz. ¹⁰ X nakrlzq kx nqmq krdr kcng mzli kc nzmrlz-zvzng, mz nzaodu-krdr leplz, nzaclve-angidr-krdr doa nedrng, nzadwattr-krdr lr narnrlc mz ma nydzr, nzavzo-lzbq-krdr mz nzwztr-krbzlr mz leplz neng Gct, nzokatr-krdr leplz kcng trnzmnc-zpwxu, x mz nzvqtikr drtqdr nzaleng da kxmrlz.

¹¹ Olvz lcng naesalz-ngrbzlr mz Kraes kx trpengr nzyrlz-mou-krdr mz nzwztr-krbzlr bade. Mz nzmu-krde lcde, bzkq rlr-ngrbzme mz olvz kcng nrkrdrtqdr trbrka nzprtr-krdr mz dzbede lc. Murde mzli kc drtwr ngr nzyrlzngr mou navzdz-ngrmle mz nabzdr, trna-aotipeu drtwrdr Kraes, a' sa na-aotitxpepwz drtwrdr nidr esz'-krdr. ¹² X Gct sa na-ayrplapxle nidr, murde trnzyrlq-angidrlru da kx tqesalz-ngrbzlr mz Kraes. ¹³ X kzdq mou da, bzkq lrmakxtr nzrkabzng trau kxkqlu mz olvz kxnzabzong kxtrnznginidru blang. Murde ma tqkatpxbzle nzsutikr drtwrdr nzwzng. Delc, sa nasapengr drtqdr x navznepe-ngrdr mz ma amrlx. X mz nzvzne-krdr kz, sa napikitipelr kztedr, x napnzttxpepwz drtwrdr nqmq kr leplz kxtrka. A' trnakrlzpelru kx nqmq krdr trka. X sa napipxlr da kx trtakitrdeu nzrpingr. ¹⁴ Mz nzmu-krde lcde, suti drtwrnge olvz kx nzabzong kcng trnznnginidru blang nayrlz-moung, narmikang doa, x na-aclvelr ma nydzr. Nzmu nartrngztibzlr da lcng, trpnzngr da kx narmctitpz Setzn, enqmi rdr, kx nzvz-rbr-ngrdr. ¹⁵ Murde kzdung olvz kxnzabzong kxnzmulr lcng trnzyrlzpeung, tzesablqtipelr Kraes, mz nzvz-nqblq-krdr Setzn. ¹⁶ Kxnzrlxngiting amrlx naokatrlr nqvi lrdrng, myapxbz olvz kxrlxngiti, Mz nzokatr-krde olvz kxnzabzopeng mz neidu lrdr mz ncblo ngrde. A' dzbe lrmakxtr naokatr-txpwzlr krkcng trpnzngr kxnginidr kx nzmncc-esotrpzng badr mz nzokatr-krdr nidr.

Kzdu-kzng Da Mz Kxnzaclvelr Dzbe Lrmakxtr

¹⁷ Kxnzaclveng kcng tzmailz-angidrlr lrmakxtr, takitrde nzhka-ngrbz badr da lcde seng li, nzamatqngr nidr x nzxpengr nidr mz trau, myapxbz krkcng tzwz-katong mz nzryapwxngr x nzalvztrngr. ¹⁸ Murde Nzryrn-grkxtr alvztr-ngrde da lcng li. Kzdq rpile kx, "Mzli kc tqawz-ngrnamu kzu

mz nzrnzglupx-krde be nra wit, bzkq pebzmu naode, a' rlr-ngrbzmu nzngq-krde kzdung nra wit lcng.” ¹⁸ X kzdq rpile kx, “*Takitrde nzxpengr ncblo kx wz.*” ¹⁹

¹⁹ Nzmu ncblo kxesz' kx rpile kxaclve vz-rbrpe, bzkq lalztqbzme bade. A' navz-nqblqq Nzryrngrkxtr kc tqrpile kx, “Bzkq rpiq kx doa vz-rbrpe, a' mz nzycmne-krbzme natubz du mz nibrm leplz naesz' o nali kx nzmc-kzlr nzvz-rbr-krde.” A' nzmu leplz nzling o nztqng kx nzrpilr kx vz-rbrpe, natqm naxplrbz mz kxaclve lc mz alwx ngrde, murde natekqtrle nqmq nr drtwrde. ²⁰ A' nzmu kxaclve lc sc tqvz zvz nzale-krde alwx, natqm naxplrbz bade mz nzyrlwrngr lrmakxtr amrlx, murde leplz amrlx namwxltilr nzale-krdr alwx. ²¹ Pibo bam nayrlq-angidrq natqnge lcng, mz nzkrlz-krm kx Gct ncdr Mevalu Jiszs x enjrl nedrng sa tzmclr nim. X bzkq mrltqi kzdq kxzaclve lcng nzmyaszpx-krde kztedeng, a' nike waisz-ngrn nidr narsakrlrngr mz da amrlx.

²² Timoti, drtwrm ao angidr, bzkq rnekitiq nzyrlqo-krbzme mqm mz kxacvle mz nwzkr Kxetu. Murde nzmu kx tqyrlqobzme mqm mz kxacvle kx ale zvz alwx, opxm kx drtwrmu esz'ti kz badr mz alwx ngrde. A' natubq-zvzq. ²³ X mz nztubqng lc, bzkq rpiq kx narmnq-txpwzme lue. Murde mrlz nzrmnq-kz-krm waen kxipiz, mz nzokatr-krde zyagox ngr nelzm. *

²⁴ X mz nzmcpx-krm kxaclve, tr-rblxu nzkrlzngr kx kzdung ncblo trntakirdrdu kxzaclve, murde alwx ngrdrng trnzyc-kapqung. A' kzdung ncblo alwx ngrdr nzyc-kapqng, x naobq-angidr-kaiq murde ma tqrmcpxq ncblo kxmule lc. ²⁵ Mz nqmq kcpwz, kzdu mzli da kxmrlz nzkrlztr-anibz x kzdu mzli yc-kapq. A' da kxmrlz amrlx sa na-aelwapxngr kz kalr.

6

Kxnzawzng Badr Kxetu Rdrng

¹ *Kxnzawzng amrlx kcng tzrlxngiting na-amatq-zvzlr kxetu rdrng, murde ma tzpibqti drtq Gct rgu x nzalvztr-krdr. ^{2a} X nzmu kxetu rdrng nzrlxngiti-kzng, nzamatq-krdr nidr namyatxlz. X nawztr-angidrbzng badr, murde leplz kcng tzokatrlr ni-kzdr mzledrng mz Kraes kcng tzmrlztilr.*

Natq Kx Rngidrlvz-ngrbz Pol Mz Timoti

^{2b} Timoti, alvztrngr x yapwxtipxbz da lcng amrlx mz lrmakxtr. ³ Murde kzdung ncblo nzalvztr-krdr blepxngr mz nzalvztr-angidrkr Kxetu rgu Jiszs Kxnzmcpx. X trnzlxngitilru Nrpakxmrlz kx leplz nalxngitilr Gct x navz-nqblqlr natqde. ⁴⁻⁵ Ncblo kxnmulr lcng, nzglqpx-lzbqng x trtakirdeu nidr nzalvztr-krdr. Murde nzaokr drtwrdr trkape. X nzryapwxtr-zvzng mz nzalvztrngr kcng tqbatrpzle nzaki-lzbqng x nzotablr-zvz-krdr mz kzdung natq. X nzapqtrlr nzdobungr, nzotablrngr, nzrpikitingr, x nztrkakr drtwr. Ncblo lcng trnzesz'ti-zvz-kru drtwrdr, murde nardr lukurnrngr x rblx da angidr nzvztr-krde mz nabzdr. X mz drtwrdr nzvz-nqblq-krdr Gct ngi dalr nzrngisc-krdr da kxkqlu, murde na-abrtzng mz nzngini-krdr bcnyrung.

⁶ A' mzli kc na-abrtzlvzku nzvz-nqblq-krgu Gct, rngisc-kzgu da kxkqlu, mz nzrtwz-krgu nivz, nrwz, nzkrlzngr, nzmc-pwxngr, x kzdung kz da kxnmulr lcng. ⁷ Mzli kc tzmika-ngrgu mz nrlc, trpnzngr da kx nzmcmi mzku. X mzli kc nabz-ngrgu trpnzngr da kx natwzku. ⁸ Mz nzmu-krde lcde, nzmu kx tqrnginagu dakxnnng x tqrngiscgu lrpz, x tqrnginyzgu

* 5:18 Lou Kcpwz 25:4 * 5:18 Livae 19:13; Lou Kcpwz 24:15; Matiu 10:10; Luk 10:7 * 5:19 Lou Kcpwz 19:15; Matiu 18:15-17; 2 Korint 13:1 * 5:23 Nzryrngrkxtr rpile kx bzkq nzrmnq-zlwzng. A' tr-rpwa'-ngrdeu nzrmnqng kxipiz.

ma, drtwrgu naesapx mz da lcng. ⁹ A' krkcng nasuti drtwrdr nzngini-krdr bcnyr, ani txpwz nztao-krdr mz da kx vz-rbr, mz nzatatr-krmlr trau. X nqmq nr nabzdr lc, alukurnr-ngrde nidr mz nzesabrti-lzbq-krdr. X nzmu navz zvz mz nzalengr da lcdeng, sa naodati-alopengr nidr mz nzayrplapxngr. ¹⁰ Murde nzmrlz-krbz trau mz leplz ngi nou da kxtrka x alwx kxkqlu. X kzdung leplz, mz nzsutikr drtwrdr trau, nzesablqtipelr nzrlxngitingr angidr, x batrpzle nztalvzokr nabzdr x nzyrpz'kr drtwrdr.

¹¹ Timoti, nim ncblo ne Gct. Kapx-lzbqm mz da kxtrka lcng amrlx. X lolvz-amqngipwz da kxmrlz lcde seng, nztubqngr, nqmq kr Gct, nzrlxngitingr, nivz, nztu-amqngingr, x nzaodungr. ¹² Mnc-aepztrpz mz Gct x tu amqngi mz nzrlxngiti-krgu. Murde kqlepele nim mz nzmnc-alo-krmu ncdr x rlrpx-lzbqpebzme bade mz mz lrmakxtr.

¹³ X mzli ka, kabo bam natq mz mz Gct kc tqngi nou nzlungr, x Mevalu Jiszs kc tqrpipxbz da angidr mzli kc tqtutr-ngrbzle mz mz Pcntzs Paelzt.

¹⁴ Yrlq angidr natq Gct mz nzmncngr kxlqngi x tubq, nakrlzbzle mzli kc nayzlu-ngrm Kxetu rgu Jiszs Kxnxmcpx. ¹⁵⁻¹⁶ Murde mz mzli kc tqyrlq, Gct sa na-aelwapx-ngrmle da lcng.

Leplz amrlx nzmnclzbzng mz Gct,
Mz nzngini-krde King r king amrlx,
X Kxetu r kxnzetung amrlx.
X nide txpwz nou nzlungr kxboi.

Nilz r nzpnaprkr zyzlr ngrde
Xplr-esz'ngr mz zmatq ngrde.
X rblx nzesotr-ngrbz bade.
Trnzmcu x trnamcu leplz nide.

X nide kx naglqlz-zvzku,
X na-angio-zvz-kzku.
Mурde amnclz-zvzbzle nigu *
Amrlx mz zmatq ngrde. Eu. *

Kxnzrlxngiting Kcng Tzngi Bcnyr Ngrdr

¹⁷ Rkabz natq mz kxnzrlxngiting kcng tzngi bcnyr ngrdr dalr nrlc ka. Pibz badr bzkq nzglqpx-lzbqng mz nzrngisc-krdr. X bzkq nzabrtrpzlr drtwrdr mz trau, murde trau ngi da kx namrbr. A' na-abrtrpzlr drtwrdr mz Gct, kc tqrkam bagu da amrlx kcng tqabrtz-ngrgu. ¹⁸ X na-avz-angidrlr trau scdr, murde nzkqlukr nzale-krdr da kxmrlz na-apule nzrngisc-krdr trau kxkqlu. X navqty drtqdr nznka-nrbalq-krbzlr da mz leplz kx trnzrulgiscung. ¹⁹ Murde mz nzale-krdr da lcng, nzaprclr da scdrng mz nrlc ka mz nzyc-alo-krdr Heven. X mzli lcpwz, nzprtrng mz da kxmrlzting kcng tzvzpxmqng mz nzlungr kxboi, kxmule-esz' nzmncbeng mz nrlc.

Natq Ngr Nzarlz-lzbqng

²⁰ Timoti, acve angidr da kcng tzaprcbz bam. Yrlqpx-lzbq mz krkcng nzycmne-krdr trokatrleu leplz, murde sc tqapqtrle nzalvztrngr kx vz-rbr. Kzdung leplz nzyapwxtipxlr da lc, apule kx ngi da angidr. A' nzrpwa'-ngrdr nzalvztrngr angidr. ²¹ X mz nzlxngiti-krdr da lc, sc tzvzspxpelr nzalvztrngr angidr.

Krka'-ngrne kx zmrlzkxmyalz nayc-zvzbz bamu.

Delape. Ninge Pol.

* **6:15-16** Krlc nabz #99 mz Buk Ngr Nzangiongr.

Nzryr-krbz Pol Krali Mz Timoti Natq Ngr Nzaplxtqngr Mz Nzryr-krbz Pol Krali Mz Timoti

Mc natq ngr nzaplxtqngr mz nzryr-krbz Pol ayrnrngr mz Timoti.

Pol yrle letz krali lc mz mzlis yiz 65—67 AD, mzli kc tqmncpx-ngr-mople mz presin mz nzwrde krali, tqaenzli-ngrde nznibq-krdn nide. Kztedeng amrlx nzrlaszpxlr nide, a' ngi txpwz Luk kc tzmnncng badr. Yrle letz lc x sc tzbz ate.

Mz letz lc, Pol pibzle mz Timoti da kcng naokatrler nide mz nzwztr-krbzle mz Gct. X rmgidrlvz-ngrbzle bade mz nztu-amqngi-krde mz nzrlxngiti-krde x nzwz-krde kxmule-esz' da kx prtz. Rpi-kzpze bade kx, "Sutitx-zlwzbz drtwrnge kx navz-kaipe' x mzli r neng kzprla kc ate." Murde krlzle kx ycpe pipz nzbz-krde.

¹ Nim la Timoti. Ning Pol, aposol ne Mevalu Jisz. X mcpk Gct ninge mz nzyapwxtipx-krnge nzlungr kxboi kc tquesalz-ngrbzle mz leplz kcng tzlxngitilr Mevalu Jisz.

² Timoti, apubo bam trtem angidr. X krka'-ngrne kx Gct Trtegu x Kxetu rgu Mevalu Jisz, nakabzlr bam zmrlz ngrdr kxmyalz, nzmnc-zpxnegr, x nayc mz drtwrdr nim. ³ Wztrpo mz Gct mz nabz kxtubq, da kc tzwai melrmqngeng. X mzli kang kqlu krka'-ngrne nim, x awi-zvz-ngrbo bade. ⁴ Mz nzdc tipxkr drtwrnge mzli kc tqprszpx-ngrne nim, tqyrni-ngrme bange, sutitx zlwzbz drtwrnge nzmc-krnge nim, murde na-abrtz-mouki.

Natu-amqngi Mz Nzwztr-krbzme Mz Kxetu, Kxmule-esz' Drtqm Nzaetqbz

⁵ Krlz-angidrx kx lxngiti-zpxnegr Kxetu rgu. Murde blrkqm Lois x lxem Yunis, nzalvztr-ngrdr nim, mz nzlxngiti-krm Jisz Kxnzmcpx. X krlz-kzx kx nzrlxngiti-krm sc tqxplrp krlzmlle mzli ka. ⁶ A' mzli ka nadcpk mz drtwrmlle mzli kc tqyrlqo-ngrbo mqnge bam, x Gct avzomle bam zmatq ngr Mqngkrxtr mz nzwztr-krbzme bade. X drtwrmlle napqtr zvz mz nzwz-nqblq-krm zmatq lc. ⁷ Murde Mqngkrxtr ngi nou zmatq, nivz, x nzaclve-lzbqng. A' trbatrpwzleu zmwxr. ⁸ Delc, bzkq mwxrq nzpipx-krbzme Kxetu rgu mz leplz, x bzkq myangr drtqm nzmnccpx-krmc mz presin mz nzwztr-krbo bade. A' narlrpx-lzbq-ngrn mz nzyapwxtipx-krm Nrpakxmrlz mz zmatq ngr Mqngkrxtr, kxmule-esz' drtqm nzaetqbz da kc tqwaix.

⁹⁻¹⁰ X Nrpakxmrlz lc nide sele.

Gct arlapxle x kqlele nigu nzngini-krgu doa kxnxtr nedeng, mz nzvz-nqblq-krde me pnz drtwrde x zmrlz ngrde kxmyalz. A' trvzpxpuu mz da kx aleku. Murde mzli kc nrle trnzwxka-ngrde, Gct pnzpe drtwrde kx Mevalu Jisz Kxnzmcpx na-arlapxle nigu. X mz nzvzo-krmle mz nrle, aovxiol zmatq ngr nzbzng. X Nrpakxmrlz aelwapx-ngrde kxnamu nzprtrngr mz nzlungr kxboi.

¹¹ X nzmcpx ninge mz nzngini-krnge aposol mz nzalvztrnegr x nzrlepxngr Nrpakxmrlz. ¹² X mzli ka, mz nzwztr-krnge lc mz Nrpakxmrlz, dekc tqaetqmle drtqnge x tqmncpx-ngrmc mz presin. A' trmya-ngru drtqnge. Murde krlzx Gct kc tqabrktrx drtwrnge. X lxngitix kx sa nabatrple

Nrpakxmrlz kc tqaprcmle bange nzryapwx tipx-zvzngr nakrlzbzle nzyzlu-krm Jiszs. *

¹³ Timoti, nadcpx mz drtwrm nzalvztrngr kxtubq kcng tqpibo bam. X alvztr-zpwxbz mz leplz. X mz nzaxvctr-krbzme mz Mevalu Jiszs, navz zvz nzabrrtr-krbzme drtwrm bade x nzmlzti-krm nide. ¹⁴ X mz nzokatrkr Mqngrkxtr kc tqmncpxm bagu, aclev angidr Nrpakxmrlz kc tzaprcbz bam. Murde nzalvztr-ngrng amrlx mz Nrpakxmrlz lc natubqpwz mz nzyapwx tipx-krmleng.

¹⁵ Krlzpeq kx kxnzrlxngiting nzkqlung dalr Provins kc Esia, trntu-amqngiung mz nzokatr-krdr ninge, a' mzli ka nzrlaszpeler ninge. X wai-kzle Fijelzs x Hzmcjinis.

¹⁶⁻¹⁸ A' abrtz-zlwz-ngrne Onesiforzs. Krlzpeq kxmu nzokatr-krde ninge mztea Efiszs. X mzli kc tqkaputr-ngrmle Rom, rtangrtile ninge, vz vz mzli kx rmcti-ngrde ninge. X trmya-ngru drtqde nzmncpx-krmc mz presin. A' okatr-zvzle ninge. X delc, mz nzkrka'-krnge, tqrlxti-ngrbo mz Kxetu rgu kx na-amrlzle lr ma nyzde mzli ka. X krka'-ngrne kx Kxetu rgu nayc mz drtwrde nide mzli kc nayzlu-ngrm Jiszs.

2

¹ Mrlxnge Timoti, nzrlxngiti-krm naxplr mz nzokatrkr Mevalu Jiszs nim.

² Xlr-zvzme nzalvztr-krnge mz Nrpakxmrlz. Mzli ka, aprcbz nzalvztrngr lcng mz leplz kcng tqabrrtrpzu drtwrgu badr mz nzalvztr-krdr kzdung kz leplz, murde leplz lcng na-alvztr-moulr kzdung kz leplz. ³ Rlrpx-lzbqng, da kc tqwaix, mz nzwztr-krbzki mz Mevalu Jiszs, kxmule-esz' drtqgi nzaetqbz.

⁴ Na-apuki ncblo ngr vea, kc tqvz-nqblqpwzle kxetu rde. X tr-rlr-ngrp wzleu nzaotrkr ncte dalr nrlc. X dekc tqabrtzlvzngr kxetu rde nide. ⁵ X na-apu-kzki doa kx prtr mz nzesangr. Murde vz-nqblqpwzle nqmq ngr nzesangr, murde natwzle da kxmrlz. ⁶ X na-apu-kzki doa kxwz kato mz nrlanc. Murde sa nangq-kaile dalr nrlanc kc tqetqti drtqde. ⁷ Na-aoti zvz drtwrn nzycmne-ebzpxngr lcng tq, murde Kxetu rgu na-aopxbzle bam kxnamu nzwztr-krbzme bade.

⁸ Delc, nayc-zvz-ngrde mz drtwrn Nrpakxmrlz lc tqyapwx tipxx mz nzwztr-krbo bade, kxmule-esz' nzaetqbz drtqm. Murde Jiszs Kxnzmcpkx kc tqvzpxm mz nqvi lr King Devet, drtqde nzaetq-kaipz mz nzrnibqng nide, a' tulz-mop mz nzbzng. ⁹ X drtqnge nzaetq-kzpz mz nzamyati-ngrm drtqnge x nzamncpx-krmlr ninge mz presin. X nzapusr-ngrdr ninge ncblo kx xpqbrlrngr lou murde lepxx Nrpakxmrlz. A' natq Gct rblx nzapqbrlvzngr mz presin. ¹⁰ Delc, tqvz-zvzngr nzlepx-krnge Nrpakxmrlz, x rlrpx-lzbqng ngrne mz nzprtilz-krdr ninge da lcng amrlx, murde leplz kcng tqmcpkx Gct narlapx-kzng, mz nzlxngiti-krdr Mevalu Jiszs, x naprtr-kzng mz nzlungr kxboi Heven. ¹¹⁻¹³ Murde natq angidr deseleng.

Mz nzbzmi-krgu Kraes, sa nalu-aloku badr.

Mz ntzu-amqngi-krgu mz nzrlxngitingr, sa na-aclevku badr mz nrlc kc navzm.

A' nekeng nzpxtxpx-ngrdr nide, sa napxttxpx-kz-ngrde nidr.

Kxmule-esz' taoku mz nzatutr-krgu da kx esalz-ngrbzku bade, a' trtxpnzng nztao-krde mz nzatutr-krde da kx esalz-ngrmle bagu.

Murde nqmq kr Kraes trpnzng nztetqtr-krde, a' vz-nqblq-zvzle nqmq krde lc tqmrlz.

* ^{1:12} Kzdung leplz nztekqtr-krdr ngalrde lc blepxbz, mz nzrpi-krdr kx, "X lxngitix kx sa na-aclev-angidrle nzlu-krnge, nakrlzbzle mzli kc nabz-ngrne o nzyzlu-krm Jiszs." Kzdung natq mz Grik tropxu.

Kxnzawz Angidr Ne Gct

¹⁴ Timoti, adcpx-mopwz mz leplz nemqng natq kcmang tqpi-kaipo. X mz drtq Gct, rpwa'-ngrbz badr nzotabrlvz-krdr natq kx akipxle leplz. Murde trokatrleu leplz, a' atrkatile kxnzalztqng. ¹⁵ Navz zvz nzalvztr-zpx-krm Nrp a ngr Jisz, murde nakrlzq kx Gct abrtzlvzle nzalvztr-krmq lcng x drtqm trmyau mz nzmc-krdeleng. ¹⁶ A' kapx-lzbqm mz leplz kcng tzycmnetr-ngrdr dalr nrlc. Murde drtwr kxmule lc tramatqleu Gct x trokatrleu leplz. A' mailtxpxle nidr mz nzrtxlvzlvz-krdr alwx ngrdr. ¹⁷ X nzalvztr-krdr lcng tqtrka sa naetunepx mz mzlimu. X na-apule kxsqki kc tqngi kansz. Kzdq kxnzalvztr-rbr lcng drtqde Haemznezs x kzdq kz drtqde Filetzs. ¹⁸ Nzvz-rlrubzng mz nzalvztrngr angidr. Murde nzrpilr kx nigu kxnzrlxngiting sc tzatulzpeng mz nzbnzng x trpe-moung nztulzkr nrkrdrtqgu kalr. Nzalvztrngr lc tqatrkatipebzle nzrlxngitikr kzdung leplz. ¹⁹ A' krlzku kx nzalvztrngr angidrng kc tqkabz Gct sa natu-amqngi-alo. Murde Nzryrngrkxtr rpile kx, "Yawe krlz-angidrle nekeng leplz nedeng." ²⁰ X rpi-kzle kx, "Leplz amrlx kcng tzplzpxlr kx nzlxngitilr Kxetu naesablqtilr nqmq krdr kxtrka." ²¹

²⁰ Mz nzvz-nqblq-krde nqmq krgu, mzli kx vz-ngrm kzdq kxetu mz ma nyzgu, rkabzku bade dakxnzng kxmrlzti, mz nzamatq-krgu nide. A' mzli kx mnc-ngrgu esz'-krgu, trmu-zvzkkuu dakxnzng kxnamulr krkcng tzkabz bade. ²¹ X krlc nzycmne-ebzpxngr kx navz-nqblqku. Nzmu alqngi-lzbqku mz da kcng tqtrka, apuku dakxnzng kcng tqmrlz. X takitrde nzmcpx nigu mz nzokatr-krgu Kxetu rgu, murde tqoliqpe-ngrgu mz nzale-zvz-krgu da kxmrlzti. ²² Mz nzmu-krde lcde, kx Timoti, esablqti da kxtrka amrlx kcng tzmrlzbz mz obla. A' mz nzokatrkr leplz kcng tzlxngitilr Kxetu rgu x tzsuti drtwrdr nzabrtzlvz-krde nidr, navz zvz nzale-krm da kxtubq, nztu-amqngi-krm mz nzrlxngiti-krgu, nzmrlzti-krm Gct x leplz, x nzmcpx-zpx-kz-krmu badr. ²³ Eu, navz zvz mz nzpxtxpx-krm nzaongr drtwr kcng tqangqngu-ngrde leplz, murde nzbatrpzlr nzotablrngr. ²⁴ Murde kxnzawz ne Kxetu, bzkq nzotablrng x drtwrde ngya ani mz nzatrkatikr leplz nide. A' nanginide mrlx kx okatrle leplz amrlx x alvztr angidr. ²⁵ X mz nivz lr Kxetu, na-atubqtile leplz kcng tzpxtxpx-ngrdr nide, murde mwex elx Gct naokatrle nidr mz nztekqtr-krdr nqmq nr drtwrdr x nalxngitilr natq angidr. ²⁶ X drtwrdr naopx, murde narlapxbzng mz nzesabrtikr Setzn, kc tqrtulrtr-ngrbzle badr nzale-krdr me pnz drtwrde.

3

Leplz Kxnztrkang Mzli Ka Tqaenzli-ngrgu Nzyzlu-krm Jisz

¹ Nakrlzq kx mzli ka tqaenzli-ngrgu nzyzlu-krm Jisz sa naprtr-kzku mz nzkxpung kang kqlu. ² Murde kxmule-esz' nzrpilr kx nzlxngitilr Jisz, a' leplz nzkqlung sa navz-rbrng. Sa na-aoti txpwz drtwrdr nidr esz'-krdr, x namrlzbz badr trau. Sa naglqpx-lzbqng x nalcpung. Sa narpibqting leplz x narnzlvzolr natq trtedr x lqedr. Trna-abrtzlvzlrda kxmrlz x trna-amatq-kzlr Gct. ³ Trpnzngr scdr nivz x trnakrlzlrda nzipqng leplz. Trna-aclvetio-lzbqung x sa narpikiti-katong leplz. Trpnzngr nzrycngr mz drtwr badr, x sa natrka badr da kxmrlz amrlx. ⁴ Trpnzngr nardr x sa na-amwalr kztedrng. Sa namrlzbz badr alwx ngr nrkrdrtqdr namyaszpxle nzvz-nqblq-krdr Gct. ⁵ Leplz lcng sa naprtrpqng bagu mz nzsri-krdr kx nidr lrmakxtr. A' trtingr,

¹ 2:18 1 Korint 15 ² 2:19 Nzkqlu-krdr 16:5; Jon 10:14 ³ 2:19 Joel 2:32; Sam 34:12-14; Nzyrplaxngr 3:7

murde trnzrlrpx-lzbq-ngrpwzung mz zmatq ngr Mqngrkxtr, nztekqtr-krde nabzdr. Delc nayrlqpx-lzbq-nrbzku badr.

⁶⁻⁷ Kzdung leplz kxnzmusr lcng nzprtrpzng mz ma nyz olvz kcng nzrlxngiti-krdr trxplru, mz nzesabrti-krdrleeng mz nzalvztr-rbr-krdr. X olvz lcng nzvz-nqblq-txpwlzr drtwrdr esz'-krdr. X o ani txpwz nzrtwz-krdr nrpa kzniqe vzne, murde nzrpilr narmcti-ngrdr nrwrx. A' rblk nzkrlz-krdr da angidr murde suti drtwrdr alwx ngrdr namyaszpxle nzvz-nqblq-krdr Gct, kc tqngi nou nrwrx. ⁸⁻⁹ Ncblo kcng tzvznebzng mz ma lcng, nzpibqtilr Nrpakxmrlz. Murde nzao-krdr drtwrdr kxdrka'-ngrng, x nzvz-rbrng mz nzrlxngiti-krdr. Ncblo lcng nzapulr Janzs x Jabrzs kcng bqnc, tzpibqtilr nzalvztrkr Mosis. A' nzpokia-krdr aelwapx-lzbqpengr. X mz nqmq lcpwz, ncblo kcng tzvzneng mzli ka, nzvz-rbr-krdr sa naopx kalr. *

Vz-nqblqpwz Nzalvztrngr Angidr

¹⁰ Timoti, vz-nqblqpeq nzalvztr-krnge, nqmq krnge, me pnz drtwrnge, nzrlxngiti-krnge, trnzngya-ani-kru drtwrnge, nivz lrnge, x nztu-amqngi-krnge. ¹¹ X krlzpeq kxmu nzatrkti-krdr ninje, x nzaetq-krdr drtqnge mzli kc tqmnc-ngrne mztea Adiok, Ikonizm, x Listra. ¹² Kxmule-esz' sc tzatrkatilr ninje, a' Kketu rgu sc tqokatrpele ninje x arlapxle ninje murde ma tqbz. ¹³ Murde da zpwxtx kx leplz amrlx kcng tzsuti drtwrdr nzvz-nqblq-krdr me pnz drtwr Gct mz nzlxngiti-krdr Mevalu Jiszs, sa na-atrkti kz leplz nidr. ¹⁴ A' leplz kxdrka'-ngrng badr kxnzpokia-ngrdr kxnzxngitilr Jiszs, nztrka-krdr sa naetunepx zvz. X sa naesabrti leplz murde nzesabrti-kaing.

¹⁵ Timoti, krlzq kx nzalvztr-krgr ngi da angidr, murde krlz-zpwxtq nigr kcng tzalvztrlr nim. Delc, navz zvz mz nzlxngiti-krmle. ¹⁶ Abzo mzli kc tqtopwzbe-ngrn, krlz-zpwxtq Nzryrngrkxtr. X zmatq ngrde alvztrpele nim kx nabrti drtfrm Mevalu Jiszs mz nzarlapx-krde nim. ¹⁷ Gct kaomle natq amrlx mz Nzryrngrkxtr mz zmatq ngr Mqngrkxtr, murde natq lcng naokatrlr leplz mz nzalvztr-krdr nidr, mz nzlc-apqbz-krdr nidr, mz nzatubqti-krdr nidr, x mz nzaelwapx-krbzlr badr nzmncngr kxtubqbz mz nzobqkr Gct. ¹⁸ Murde doa nedeng, naoliqting mz nzale-krbzlr da kxmrlz mz leplz.

4

Nzwz-krm Navz Zvz

¹⁻² Timoti, mz nzwz-krm, naoliq-zvzq mz nzyapwxtipx-krm Nrpakxmrlz, kxmule-esz' mrlzbz bam o mrlzbz mz leplz o trtingr. Nzalvztr-krm naokatrl leplz mz nzaopx-krde da kx vz-rbr, x mz nzatubqti-krde nidr x mz nzapqtr-krbzle drtwrdr. X aenzli-zpwxbz badr mz nzvz-nqblq-krdr natqm. Murde Mevalu Jiszs x Gct Trte sa tzobqlvz-ngrdr nzwz-krm. X mzli kc Mevalu Jiszs navz-ngrmlle mz nzngini-krde King r nrlc, sa napipxbzle mz leplz amrlx nztubq-krdr o trtingr, kxmule-esz' kxnzlubeng o kxnzbzpeng.

³ Murde kalr, leplz trnavz-nqblqlru nzalvztrngr angidr. A' sa navz-nqblq-txpwlzr me pnz drtwrdr x nalalztq-lzbzng mz kxnzalvztrng kcng drtwrdr tqesz'ti badr. ⁴ X sa naesablqtilr da angidr mz nzo-lxlvrti-krdr be ngr nqmq krdr kcng trngiu da angidr x da kx trpnzngr drtwr ngrde. ⁵ A' nim, kx Timoti, namnc-nrwrx-ngrn mz da amrlx. Kxmule-esz' nzaetqbz drtqm, a' navz zvz mz nzale-krm nzwzngc kcng tqaprcbo bam.

* ^{3:8-9} Mzle-lzbq lcng, Janzs x Jabrzs, drtqdr trnzyroung mz Nzryrngrkxtr. A' mz nqmq kr lr Jiu, nzrpilr kx ncblo lcng nidr ncblo neng King r Ijipt kxnzrning dabo ngr nzaelwapx-krdr rks kx vzpxm mz drka'. [Nzrlaszngr 7:11-22; 8:7-19] ⁴ 3:11 Aposol 13:50; 14:4-6, 19-20

Ryapwxpxbz Nrpakxmrlz mz leplz kcng trnzlxngitikalr Jiszs, mz nzrlrpx-lzbq-krbzme mz Kxetu rgu, da kc tqwaix.

⁶⁻⁷ Murde rlrpx-lzbqpe-ngrbo mz Gct, kxmule-esz' ycpe pipz nznibq-krdr ninge. X angidatipex nwzvngr kc tqaprcmle bange mz nzngini-krnge ncblo ngr vea kxmrlz ne Kraes. Murde ota-zpwxpex mz nztu-amqngi-krnge mz nzrlxngitingr. X vo-angidr-kzx mz nzesangr kc tqyrlqmle bange x sc tqayrkRpex. ⁸ X krlzx kx sa natwzx da kxmrlzting Heven kx nzvzpxmqng mz nzabrtzlvzkr Gct nzmnc-krnge mz nrlc ka. Murde Kxetu rgu tubq zvz mz nzayzlu-krbzle da mz leplz. X mzli kc nayzlu-ngrmle, sa nakamle bange da lcng tqmrlzting. X leplz amrlx kcng tzaenzli-kzlr nzyzlu-krmle x tqabrtzlvz-kzle nidr, sa natwz-kzlr da lcng tqmrlzting.

Natq Ngr Nzarlz-lzbqng

⁹ Sutitx zlwz drtwrnge nzvz-ani-krme Rom mz nzmnc-lxblr-krgi. ¹⁰ Murde Demas mrlz zlwz bade dalr nrlc. X rlaszpele ninge x vzpe taon kc Tesalonika. Kresen vzpe mz nwzvz-krde mz Galesia Provins, x Taetus vzpe kz mz Dalamasia Provins. ¹¹⁻¹² Atwzlrpe-ngrbo Tikikzs bam mz nztekqtr-alzu-krde nim mz taon kc Efisz. A' Luk kx mnc-txpwzkr ncdr mzli ka. Oti Jon Mak x vzmamu ncdr, murde krlzle nzokatr-krde ninge mz nwzvngr mrka. ¹³ Mzli kc navz-ngrme, twzm du dztungeng. Twzm kot scnge, ycbz mz mzlegi Kapzs mrkc mztea Troas. X twz-kzp buk scnge, myapxbz krkcng tzvzngz mz be kzu.

¹⁴⁻¹⁵ Nzmu kx tqrmctiq Aleksada kc tqrwzng aian, aclvetio nide. Murde rpwa'-ngrde nzalvztr-krgu, x yctxbz nzatrkatr-krde ninge. A' krlz-angidrx kx Gct sa na-ayrplapxle nide.

¹⁶ Mzli kc tqkot-ayrn-ngrne mrka Rom, trpnzngz kztegung kx okatrle ninge. Murde nzrlasz-ngrdr ninge mz nzmwzlr-krdr. A' krka'-ngrne kx Kxetu rgu naipqle nidr. ¹⁷ Murde Kxetu txpwz kx tum mz nibrnge x abrmle nelzng. Delc tqyapwxtpx-zpwx-ngrbo Nrpakxmrlz mz leplz amrlx kcng trngiulrJiu tzmncng mz kot. X Gct arlapxle ninge murde trnznibqkalr ninge. ¹⁸ X krlzx kx Kxetu sa na-arlaxbzle ninge mz da kxtrka amrlx. X sa na-aprtrle ninge mrnyzde Heven.

X naglqpx zvz nide. Eu, angida.

¹⁹⁻²¹ Eu, sutitx-zlwzbz drtwrnge kx navz-kaipe' x mzli r nenq kzprla kc ate. Murde Erastzs sc tqmnc taon kc Korint x Trofimzs sc tqamnctxne mrkc mztea Miletzs, murde yagox.

Timoti, rpibz "Nimu la," mz Prisila ncdr Akwila, x lr ma nyz Onesiforzs. Doa lrmakxtr amrlx mrka, myapxbz Yubulzs, Prudens, Linzs, x Klaodia, nzrpibzlr bam kx, "Nim la."

²² Krka'-ngrne kx Kxetu rgu namnc zvz mz nabzm. X naokatrle nimu amrlx mz zmrlz ngrde kxmyalz. Eu, angida.

Delape. Ninge Pol.

Nzryr-krbz Pol Mz Taetus

Natq Ngr Nzaplxtqng Mz Nzryr-krbz Pol Mz Taetus

Aposol Pol yrbzle letz lc mz Taetus, mz nzngini-karde kxnzawz ne Pol mz Trmctu Krit. Nzycmnetrngr mz Taetus mz 2 Korint 2:13; 7:6-7, 13-15; 8:6, 16-19, 23; 12:18; Galesia 2:1-3 x 2 Timoti 4:9. Nidr mz Luk trngiulrJiu.

Mz Aposol 28, Pol sc tqmncpxm mz presin mrkc Rom. A' mz drtwr kzdung kxzalvztr-ngrdr mz Nzryrngrkxtr, mwx nzaopx mou drtq Pol mz presin, x sc tqvzpx mou mz nzyapwxtipx-karde Nrpakxmrlz, murde kzdq letz kx trnzyrou mz Nzryrngrkxtr rpile kx Pol krlzbzle Spen. Mz nzvzpx-karde lc rlaszle Taetus mrkc Krit mz nzalvztr-karde leplz, murde kzdung nidr nzpokiang, nzrmnq-zlwzng, x nzrmwiming leplz kx trngiulrJiu.

Mz mzliy yiz 63—65 AD mz nibr nzrmcngr mz Jiszs, yrbzle letz lc mz Taetus, mz nibr letz ayrnrngr kc tqyrbzle mz Timoti, x letz krali mz Timoti kc ate. Mz yiz 64 AD kzdq nyr kxetu odatile kzdq nctq Rom. King Kxetu Niro abetitr-ngrde lrmakxtr kc Rom x kapxle natqde kx bzkq nzlxngiti Jiszs. Krkcnq tzrlxngiting nzlolvzng x nznibqng.

Mrkcng Mz Letz Lc

Ncblo kcng tztakitldr nzwzng Mz Nzaclve-krde dzbe lrmakxtr. [1:5-9]

Taetus na-apqtile kxzalvztr-rbrng. [1:10-16]

Kxnamu nzalvztrkr Taetus x Nzaclve-krde dzbe lrmakxtr. [2—3]

¹ Nim la Taetus. Ning Pol. Wztrpo mz Gct x ninge aposol ne Jiszs Kxzmcpx, murde nzwz-krnge na-aetunepxle nzlxngitikr leplz ne Gct kcng tqmcpxleng. X nayokaetipxbo nzalvztrngr angidrung, mz nzokatr-krnge nidr mz nzvz-nqblq-krdr me pnz drtwr Gct. ² Leplz neng Gct na-abrtrpzlr drtwrdr bade mz nznka-krbzle nzlungr kxboi. Murde pipx pnz Gct mzli kc bqnc, x trpokiatx-pnzu. ³ Zbz kx krlzbzle kc mzli kc tqyrlqle, sc tqaelwapx-ngrde nzlungr lc tqboi mz Nrpakxmrlz. Delc, Gct rgu tqmcpnx-ngrde ninge mz nzyapwxti-krbo Nrpakxmrlz lc.

⁴ Taetus, apubo bam Trtem angidr mz nzlxngiti-krge. X krka'-ngrne kx Gct Trtegu x Mevalu rgu Jiszs Kxzmcpx, naokatrlr nim mz zmrlz ngrdr kxmyalz x namnc-zpwqxq.

Ncblo Kx Takitrde Nzwzng Mz Nzaclve-krde Dzbe Lrmakxtr

1 Timoti 3:1-7

⁵ Taetus, amnctx-ngrne nim mrla mz Trmctu Krit, murde na-atubqtiq da kcng tqyctxtrbe. Kx ayrnrngr, narmcpqx kxzalveng mz mztea amrlx kx nanginidr nar dzbe lrmakxtr. ⁶ Kxaclve nangi ncblo kxtubq kx trnzpibqtiu leplz. Nayrlzti-txpwzle olvz naesz', mz mzli kxesz', x bzkq aoti drtwrde nzvz-krbzle mz olvz kzbleng. X doa nedeng nalxngiti-kzlr Jiszs, x bzkq nzxpqbrr-ngrdr nide mz lxedr. ⁷ Ncblo kx na-aclvele dzbe lrmakxtr nangi ncblo kxtubq mz nzobqkr leplz. X bzkq kx mz drtwrde natqde nangidati zvz, trlalztqpwu mz kztedeng, drtwrde trka ani, rmnq zlwz, ota zvz, x prlvz mzte trau. ⁸ A' naokatrlr lr narnrlc mz nzadwatr-krde nidr mz ma nyzde x mrlzbz bade da kxmrlz. X nanginide ncblo kxyrplapx, x tubq x tr, kx aclve-lzbq. ⁹ X natu-amqngi mz nzlxngiti-krde nzalvztrngr angidrung, murde na-alvztr-ngrde da angidr x na-atubqtile nzrkrlzkr leplz kcng nardr tryatrkapz mz da angidr.

¹⁰ Taetus, ncblo lcng na-aclveng nakrlz-zpxwlr nzalvztrngr angidrng, murde leplz nzkqlu kx nznginipedr enqmi r Nrpakxmrlz, kxmule-esz' nzrpilr kx nzlxngitilr Jiszs. Mrlx lcng nzxpqbrr-ngrdr kxnzrmailzng, x nzycmne-lukurnr-ngrng, x nzesabrtng leplz, myapxbz lr Jiu kcng tzalvztr-ngrdr kx, "Ncblo napakrng amrlx mz nzaxvctr-kbzlr mz lrmakxtr." ¹¹ Bzkq rlr-ngrbzme mz leplz kxnzmull lcng nzalvztr-krdr mz makxtr. Murde nzapqtrpzlr drtwr leplz kxkqlu mz nzvz-nqblq-krdr nzpokiangr lc. X nzalvztr-krdr lc trngiu dalr nzokatr-krdr leplz, a' ngi dalr nzmabz-krdr trau.*

¹² X kzdq lr Krit kx ngi profet, pi-zpxwle mz nzsipi-krde kx, "Lr Krit nzpokia-katong. Nzapulr poi kx mu ncblo. Namu-txpwzng, a' drtqdr sa zlwz." ¹³ X natq profet lc ngi da zpxw. Delc, naxplrmibz natqm badr, kx nzalvztr-krdr lcng naesakitxpeng, murde natu-amqnging mz nzrlxngiti-krdr Nrpakxmrlz. ¹⁴ X mou, kxnzaclvelr dzbe lrmakxtr lcng bzkq nzlxngiti-zvzlr be ngr nqmq kr lr Jiu kcng trngiu da angidr. X bzkq nzvz-nqblqlr natq kcng tzkapx leplz kcng tzpxtxpx-ngrdr da angidr.

¹⁵ Ncblo lcng tzalvztr-rbrng nzaoti txpwz drtwrdr nztubqngr kx vzpxm mz nzvz-nqblq-krdr Loukxtr. A' doa kxnzrlxngiting nztubqpebzng mz nzobqkr Gct, x trpengr da kx batrzple badr trnztakitr-krdr Loukxtr. A' mz drtwr kxtrnzrlxngitiung kcng tzpxtxpx-ngrdr Nrpakxmrlz, trpnzng da kxtubq. X nqmq nr nabzdr x nzao-krdr drtwrdr nztrkapeng rlilrdr.

¹⁶ Ncblo kxnzmull lcng, mz drtwrdr nzrpilr kx nzkrlzlr Gct. A' trmckuu mz nzmnc-krdr. Murde nzalelr da kx myangr drtq x nzxpqbllr-zvz-ngrdr Gct. X rblxbz badr nzalengr da kxmrlz. *

2

Da Kx Na-alvztrngr Taetus Leplz Nedeng

¹ A' nim, kx Taetus, na-alvztr-ngrn leplz nemqng nqmq kx takitrde leplz kcng tzsuti drtwrdr nzvz-nqblq-krdr nzalvztrngr angidrng. ² Pibz badr lrtzlvzng amrlx na-aclve-lzbqng, x nayrplapxng, x nqmq krdr natakitrde leplz nzamatq-krdr nidr. X mou natu-amqnging mz nzalvztrngr angidrng, mz nzmrlzti-krdr leplz x mz ale-krdr da kxtubq, kxmule-esz' da kx prtz. ³⁻⁴ X pi-kzpz badr blang kx nzu na-amrluelr Gct mz nzmncngr kxtr. A' bzkq nzrpikiting x nzrmnq-zlwzng. A' na-alvztr-ngrdr iledrng kx namrlzti-zvzlr ncblo ngrdrng x doa nedrng mz nqmq kxtubq. ⁵ X mou, na-alvztr-ngrdr olvz lcng kx nayrplapxng x nzmnc-krdr natr, x nawz-angidrng mrnyzdr. X naokatrler leplz x namnclzbzng mz ncblo ngrdr, murde leplz kxtrnzrlxngitiung ma tzpibqtilr natq Gct.

⁶ X rrgidrlvz-ngrbz mz ncblo x obla nemqng kx nayrplapxng mz nzaclve-lzbq-krdr, murde ma tzvz-rbrng mz nzmncngr kx trtakitrde kxnzrlxngiting. ⁷ Taetus, nanginibzme lrpzki mz leplz nemqng mz da amrlx, mz nzale-krm da kxmrlz x mz nzalvztr-angidr-krmqng, murde naamatqlr nim. ⁸ Tubqpwz mz nzycmne-krmqng amrlx, murde enqmi rgung ma tzmctrplr da kxtrka bagu. A' drtqdr namya murde sa narblxbz badr nzpibqti-krdr nigu.

⁹ X pi-kzpz mz kxnzawz-nrbalqng kxnzrlxngiting kx navz-nqblq-zvzlr natq kxnzetu rdrng, murde na-abrtzlvzlr nidr mz da amrlx kcng nartrngztibzlr. A' bzkq nzxpqbrr-ngrdr kxnzetu rdrng. ¹⁰ X bzkq nzpnatibzlr dztudrng x trau scdrng. A' nabrti drtwr kxetu rdr nidr, murde

* ^{1:11} Mzli lc, ncblo kcng tzvzneng mz nzalvztr-krdr leplz, nzrtwzbzng trau mz leplz kcng tzalvztrleng. * ^{1:16} Sam 14:1-3

nzmrlzkr nqmq krdr na-aelwapx-ngrde kx nzalvztr-krgu ngi da angidr x navectrple leplz mz Mevalu rgu.

¹¹ Da zpwxtx. Nqmq kr nigu kxnzrlxngiting natubq, murde leplz nalxngitilr Gct kc tqaelwapxpe-ngrde zmrlz ngrde kxmyalz mz nzatwzlr-krmle Jiszs, mz nzarlapx-krde leplz amrlx kcng nalxngitilr nide. ¹² Dekc tqalvztrngr Jiszs kx nayrplapxku x natubqku mz nzmnc-krgu mz nrlc. X na-axtxbzku nqmq krgung kxtrka x nzmrlz-krm bagu alwx x dalr nrlc. ¹³ X mzli ka tqobqtipx-ngrgu nzyzlu-krm Mevalu Jiszs mz nzmyalzkr zluli rde nzngini-krde Gct x Mevalu rgu, namnc-nqblqku nzmncngr lcng. ¹⁴ Murde rlrpx-lzbqngr Jiszs nzbz-krde nigu, murde na-arlapxle nigu x trnamnclzpepwzkuu mz zmatq ngr alwx, a' nzmnc-krgu natubq x nanginigu leplz nedeng kcng drtqdr tqvq mz nzale-krgu da kxmrlz mz nzobq-krde.

¹⁵ Taetus, alvztrngr leplz nemqng kx navz-nqblqlr nqmq lcng tqmrlz. Apqtrpz drtwrdr x lc-apqbz leplz kcng tzpxtxpx-ngrdr natqmqng. Murde bzkq kx naxpqbrlr-ngrde zmatq ngrm. Murde natq kc tqkabzme badr vzpxm mz nzalvztr-krgr nigr aposol.

3

¹ Taetus, suti kz drtwrnge kx na-alvztrngr leplz neng Gct mz nzmnlcz-krbzlr mz zmatq r kxnzetung mz gzpmaz x krkcng amrlx tzrngiscng zmatq mz nzaclvengr. X drtqdr navqtr mz nzwzngr kxmrlz amrlx. ² Bzkq nzbqtilr leplz x bzkq drtwrdr ngya ani, a' na-avzo-lzbqng, murde namnc-zpxwng badr leplz amrlx mz nrwrx x nivz.

³ Mwx elx nzmrlzkr nqmq krdr navectrple mz Jiszs leplz kxtrnzrlxngitung. Murde mzli kc trlxngitika-ngrgu Jiszs, alwx kc tqyclzm mz nabzgu avz-rbrle nigu, x angqngule nigu, x batrple nzxpqbrlr-krgu Gct x kxnzetu rgung. X mz nzvz-nqblq-krgu nqmq ngr alwx lc, batrple bagu nzmnc-nqblqtx-krpwzku da kx mrlzm bagu. Ycmnetr-zvzbzku mz mz leplz x rkcmnz-zvz-ngrgu. Nztrkati drtwr leplz nigu x trkati kz drtwrgu nidr. ⁴ A' mzli ka trpengr. Murde Gct rgu aelwapx-ngrbzle nivz lrde mz lr nrlc mz mrlxde, Jiszs Kxszmcpx. ⁵ X mz Mevalu, sc tqarlapxpele nigu murde yc mz drtwrde nigu, x krlzle kx rblx nzale-krgu da kxtubqzbz mz nzobq-krde. X nzarlapx-krde lc nigu vzpxm mz Mqngrokxtr kc tqawrle nigu murde mzku namc mou mz nzlungr kxmrlz. *

⁶ Avzom Gct Mqngrokxtr bagu mz nzaxvctr-krbzku mz Mevalu rgu Jiszs Kxszmcpx. ⁷ X Gct atubqtile nigu mz nzobq-krde mz zmrlz ngrde kxmyalz. Murde nanginigu doa nedeng kcng tzobqtipxlr nzlungr kxbol. ⁸ Nzalvztrngr lc da angidr. Delc nayapwxtipx-zpwx-ngrbzmele mz kxszlxngitilr Gct. Murde mz nzvz-nqblq-krdrl, na-alelr da kxmrlz. Nzalvztrngr lcng nzmyalzng x takitrde nzokatr-krdr leplz amrlx.

⁹ Kapx-lzbq mz nzlcpliti-lzbqngr, x nzycmne-lukurnrngr, x nzrnqnitilzbqngr mz nqvi lr ncblo x nzalvztrkr Mosis. Murde trpnzngr da kxmrlz kx naprpwm mz da lcng. ¹⁰ Lcapq-kaipz leplz kcng tzbatrplzlr nzakipx-lzbqkr lrmakxtr, murde nqmq krdr lc naesaki. X nzmu kx na-alepwzlr da lcpwz, ycmne-apqti nidr mz nzwrd krali. A' nzmu kx navz zvz nzale-krdrle, katpx-lzbqmamu badr. ¹¹ Murde krlzq kx leplz kxszmulr lcng nzvz-rbrng mz nzmnc-krdr. X nidr esz'-krdr nzkrlz-angidrlr kx nzaleng alwx.

Natq Ngr Nzarlr-lzbqngr

* ^{3:5} Mz drtwr kzdung dzbe Makxtr, ngalrde 5 ycmnetr-ngrde nzawrkxtrngr.

¹² Sa na-atwzlr-ngrbo kzdq mrlx lcng nzling, Atemas o Tikikzs. Mz nzkaputr-krbz kzdq nidr kc navzbz, sutitx zlwz drtwrnge nzvz-krme bange mztea Nikopolis. Murde sa namncx mrlcde mz mzli r nenq kzprla.

¹³ X kzdq mou da, mz Senas kc tqngi loyz x Apolos. Mzli kc narkalz-ngrmlr trmctu Krit mz nzayo-krdr, okatramu nidr mz nzkra-krbzmu trau, dakxnzng, o lrpz, mz nzlepx-krdr Nrpakxmrlz ngr Kraes. ¹⁴ Murde mrlz kx leplz neging naokatr-zvzlr leplz kx suti drtvrdr da. Murde mz nzale-krdr da lcng nradr naycbz mz nzwztr-krbzlr mz Gct.

¹⁵ Lrmakxtr kcng tqmnckr badr mrka, nzrpibzlr bam kx, “Nim la!” X rpi-kzpzkx kx, “Nimu la,” mz lrmakxtr kcng tqmncamu badr. Krka'-ngrne kx Gct naokatrle nimu amrlx mz zmrlz ngrde kxmyalz.

Delape. Ning Pol.

Nzryr-krbz Pol Mz Filimon Natq Ngr Nzaplxtqng Mz Nzryr-krbz Pol Mz Filimon

Letz lc yrbz Pol mz kzdq ncblo drtqde Filimon, kc tqmnc mz taon Kolosia, badr dzbe lrmakxtr kcng tzangiong mz ma nyzde. Yrle letz lc mz nzwrde kc kai tqmnc-ngrde mz presin mrkc Rom. ⁸ Yrle mz mzlis yiz 60—62 AD mz nibr nzrmcngr mz Jiszs. Mzli lc yr-kzpze letz mz lr Efisz, lr Kolosia, x lr Filipae. Letz lcng amrlx dzbede esz' kx nzyrng mz presin. Kolosia yc mz provins kc Esia, yc-aepztrpz mz taon kcng Efisz x Laodisea. Mzli ka mrlcde nzrpipebz kandre kc Trki.

Filimon nede kc kxnzawz-nrbalq drtqde Onesimzs. Onesimzs lc pnatib-zle kcng dztu kxetu rde, x sc tqdwaneppe-ngrde. Nzmu nalolvzlr kxnzawz-nrbalq kxmule lc nzayrplaxngr nide, nzrnibqngr nide. A' mz nibrde, Onesimzs kc tqlxngitipele Jiszs. Mwx Pol rmctile nide mrkc Rom x sc tqokatrpele nide mz nzrlxngitingr. X mzli ka, Pol atwzlr-mou-ngrbzle nide mz kxetu rde Filimon. Pol yrle letz lc mz nzyrnititr-krbzle mz Filimon nzipq-krde Onesimzs murde natwz-moule nide mz nzngini-krde kxnzawz-nrbalq nede kc tqngi kz mzlede mz Kraes.

Krlc kzdq nzycmne-ebzpxngr kz. Murde nzrlapxkr Onesimzs x nzyzlu-mou-krbzle mz Filimon badr lrmakxtr mrkc Kolosia apule nzarlapxkr Gct nigu mz nzayzlu-krmle nigu mz nzmnc-zpwx-mou-krgu badr. Pol rlxtibzle mz Filimon nzipq-krde Onesimzs da kc tqwai Jiszs nzrlxti-krbzle mz Trtede nzipq-krde nigu. X Filimon apule Gct Trte. Mz nzvz-nqblq-krde lou takitrde nzrnibqngr Onesimzs x nigu kz mz alwx ngurgung. Kxmule-esz', a' Gct arlapxle leplz mz zmrlz ngrde kxmyalz.

¹ Nim la Filimon. Ninge Pol. Ninge ka tqmncx mz presin mz mzteadau Rom murde yapwxtipxbo nrpa ngr Mevalu Jiszs. Nigr mz mzlegi Timoti. Nigu mzle-lzbq mz nz wztr-krbzku mz Gct. ² Rpibz “Nim la,” mz Apfia kc tqngi inwegu mz Kraes, x Akipzs kc tqnginigu badr ncblo ngr vea ne Kraes. X rpi-kzp “Nimu la,” mz kxnzrlxngiting mrkc mztea Kolosia kcng tqyrlwr-lxblramu badr mz ma nyzm. ³ Krka'-ngrne kx Gct Trtegu x Kxetu rgu Jiszs Kxnzmcpx naka-zvzbzlr bamu nzmnc-zpwxngr x zmrlz ngrdr kxmyalz.

Pol Krka'-ngrde Filimon

⁴ Filimon, awi-zvzbo mz Gct, ⁵ Mz nzxlk-krnge kx lxngitiq Kxetu Jiszs x mrlzti-zvz-kzq kxnzrlxngiting. ⁶ X krka'-ngrne kx nzrlxngiti-krgi naokatrle nim mz nzale-krm da kx narkatrpz mz leplz nzglqlz-krdr Kraes, mz nzmc-krm kxmu nzamrlz-zlwz-krde nim. ⁷ X abrtzlvzx nim mz nzxlk-krnge kx nivz lrm apqtr-zvzle nabz leplz neng Gct.

Filimon Naipqle Kxnzawz Nede Kc Drtqde Onesimzs

⁸⁻¹⁰ Mzlenge, mz nzngini-krnge aposol ne Mevalu Jiszs, rngiscnge zmatq mz nzrtulrtr-krbo bam nzale-krm da kxtubq. Kxmule-esz', a' rlxtibo bam nzipq-krm Onesimzs murde mrlztiq ninge. Ninge lrtzlvz Pol kc tqmnc mz presin murde vz-nqblqx Mevalu. Mz nzmncpx-krmc lc mz presin, okatrax Onesimzs mz nzlxngiti-krde Jiszs, x mzli ka apupele mrlxnge. ¹¹ Mzli kc ena nzmc-krm nide ngi brmrda. A' mzli ka sa namcpeq kx na-atutrpele

⁸ : Aposol 28:30-31

drtwr ngr drtqde. Murde Onesimzs drtwr ngrde 'kxabrngrz' x sa naokatrle nigi.

¹²⁻¹³ Pg zlwz mz nabznge x mrlzm bange nzyzlu-krmle mrka mz nzwztr-krmle bange. Murde naokatrle ninge da kc nawai nzokatr-krm ninge nzmu namncq mrka. Kxmule-esz', a' na-ayzlu-kaipo nide bam. ¹⁴ Murde trmrlzu nzmnnc-krde mrka, nzmu trnavzpxpleu bam. Trmrlzu nzrtultr-krbo bam nzale-krm da kx mrlzm bange.

¹⁵ Mwx rlr-ngrbz Gct nzdwasz-krde nim mzli kxmrbc, murde mz nzyzlu-krbzle bam namnctr-alopebz bam. ¹⁶ X mz nzyzlu-mou-krpwzle, trnangitxpwu kxnzawz nem, a' nangipe kz mzlem mz Kxetu rgu. Mrlzti-zlwzx nide. X krlz-kzx kx nzmrlzti-krm nide namyapx-zlwzbz mz nzngini-krde kxnzawz nem x mzlem. ¹⁷ Mz nzmu-krde lcde, nide kz kztegu. X suti drtwrnge kx na-apusr-ngrn nide da kc tqwaisr-ngrn ninge.

Filimon Bzkq Rlx Trau Mz Nikeng Oti-rbrbz Onesimzs Bade

¹⁸⁻¹⁹ Ning Pol, yrx natq lcng mz mqnge esz'-krnge kx, "Suti drtwrnge nzxpe-ngrbz bam mz nzvz-nqblq-krde nikeng oti-rbrbz Onesimzs mz nzkaniwzlr-krbo bam trau kznike takitrde." Kxmule-esz', a' mrlzm bange kx bzkq rlxq trau mz nikeng oti-rbrbzle bam. Murde da kx rtrngztibo bam mz nzokatr-krnge nim mz nzlxngiti-krm Jiszs, myaszpx-zlwzle trau kcng narlxtibzme mz Onesimzs. A' navz-nqblqle drtfrm. ²⁰ Delc, mzlenge, okatr ninge mz nzale-krm da kx rlxtibo bam x mz nzayzlu-krme Onesimzs bange, murde na-apqrpe' nabznge mz Kraes.

²¹ Krlz-angidrx kx sa navz-nqblqq natqnge x nzaodu-krm nide sa namyaszpxle da kcng tqrlxtibo. ²² X kzdq mou da. Lxngitix kx Gct sa na-atutre nzkrka'-krmu mz nzvzpx-krmc mz presin. Delc, mzli ka oliqtibz dq me namnc-ngrne mzli kc nayzlu-ngrbzkr.

Natq Ngr Nzarlr-lzbqngr

²³ Kxnxrlxngiting mrka nzrpibzlr bam kx, "Nim la." Krlcng Epafras kc tqmnckr ncdr mz presin mz nzrlepx-krgr Nrpa ngr Mevalu Jiszs, ²⁴ nidr badr Mak, Aristakzs, Demas, x Dckta Luk, mrlx kcng tqwzkr badr.

²⁵ Krka'-ngrne kx zmrlzkxmyalz ngr Kxetu rgu, Jiszs Kxnmcpk, nayc zvz mz nabzmu.

Delape. Ning Pol.

Nzryr-ngrbz Mz Lr Hibru Kxnxrlxngiting Natq Ngr Nzaplxtqngr Mz Letz Kx Nzryrbz Mz Lr Hibru Kxnxrlxngiting

Trpnzngr kx rkrlz ncblo kx ryr letz lc. Kzdung nzrpilr Aposol Pol, kzdung Banabas, x kzdung Apolos. A' mwx trngiu Pol.

Mwx nzryrbz mz mzlis yiz 68—69 AD mz nibr nzrmcngr mz Jisszs. X mz nibrde lr Rom sc tzodatipelr Mangr-nzangiongr Yawe mrkc Jerusalem mz yiz 70 AD.

Drtq lc 'lr Hibru' drtwr ngrde kz lr Jiu. X opx angidr kx ncblo kc tqryr letz lc, nide kzdq lr Jiu, x yrbzle mz lr Jiu kx nzlxngitilr kx Jisszs nide Mevalu Kxnxmcpk ne Gct. Mz nzmu-krde lcde, kxryr lc, krlzle kx lr Jiu lcng nzkrlz-zpwxlr nzalvztrkr Nzryrngrkxtr Kc Kai, myapxbz mz Lou sc Mosis, x kxmu lr Jiu nzale-krdr blz mz nznibq-krdr animol x nziklr-krdr mepyr ngrde mrkc Mangr-nzangiongr Yawe. X trtakitrdeu nzyokaetipx-krbzle da lcng mz lr Jiu. A' mz nzokatr-krde nigu kcng trngiulrJiu, natq kxnxztopwzng mz nibr kzdung ngalrdeng yokaetipxle drtwr ngrdr. X narlwz-kzku 'Nzalvztrngrng Kxmyapxbz' kx ayrkrpxle buk kxetu lc.

Kzdung lr Jiu kx nzlxngitilr kx Jisszs nide Kxnxmcpk kc tzaenzlilr, trnzsutiu drtwrdr nzesaki-krdr nzalengr blz mz nzvz-nqblq-krde Lou sc Mosis. Murde nzmwxlrtiltr kx Gct tripqpxleu alwx ngrdrng, a' ngi txpwz mz nzale-krdr blz kcng. X mou, nzmwxlr-kz-ngrdr lr Jiu kxtrnzrlxngitiung murde ma tzatrkatilr nidr mz nzxpqbrrlr-krdr Lou sc Mosis mz kxmu nzalengr blz.

Mz nzmu-krde lcde, kxryr letz lc rpibzle badr kx Gct yrlgpebzle Nzesz'tikr Drtwr Kc Ate badr leplz nedeng, kx tekqtr-ngrde Krkc Kai tqyrlqbzle badr mz Lou sc Mosis. X trpengr blz kx nzalelr mzli ka, murde Jisszs rlrpx-lzbqpengr mz nzngini-krde blz angidr kxrmnr-ngrbz kx tekqtrle blz kcng pnz. Rpi-kzle kx Tentkxtr, Mrkc Tqtr, x lou amrlx mz nzalengr blz nzaelwapx-ngrdr kxpipz da lcng Heven x nwzkr Jisszs. Delc Jisszs nide Nardr Pris ngrgu kc tqmyaszlz-zlwzle pris kcng pnz tzvz-nqblqlr Lou sc Mosis. Letz lc pibzle badr kx krkcng tzlxngiti-kailr Kxnxmcpk, zbz nzyzlutebql-moung mz nzalengr blz kcng pnz, sa naprtrng mz Hxl.

Mrkcng Mz Letz Lc

Mevalu myaszlzle enjrl amrlx x Mosis. [1:1—4:13]

Mevalu Jisszs nide Nardr Pris ngrgu kxmyalz-esz'ngr. [4:14—5:10]

Bzkq nzrlxngiti-krmu ngrgo. [5:11—6:20]

Mevalu Jisszs nide Nardr Pris mz nzvz-nqblq-krde nwzkr Melkesidek.
[dckrlzde 7]

Mevalu Jisszs aclvele Nzesz'tikr Drtwr Gct Kxmrna badr leplz nedeng. [8:1—9:10]

Nike nwzkr mepyr mz Nzesz'tikr Drtwr lcng li, mz Krkc Kai x mz Krkc Tqmrna. [9:11-22]

Nzrkabzng animol kx ngi blz mz nzvz-nqblq-krde Nzesz'tikr Drtwr Kc Kai trtakitr-pnzdeu nzrkatx-atwrnr-krde alwx. [10:1-18]

Natu-amqngiku mz nzrlxngiti-krgu nakrlzbzle nzbz-krgu. [10:19—13:25]
Kxnamu nzvz-nqblq-krgu Mevalu. [10:19-39]

Leplz kcng navz-nqblqku mz nzbritikr drtwrdr Gct. [dckrlzde 11]

Natu-amqngiku mz nzvz-nqblq-krgu Mevalu. [12—13]

Mevalu Kxnzmcpx Myaszlle Profet Amrlx X Nzryrngrkxtr Mz Nzngini-krde Mrlx Gct

¹ Mzli kc bqnc, Gct ycmnebz badr melrmqgung, nigu lr Jiu. Nzycmne-krbzle badr nzwrde kqlu x bletipx-lxblrng, mz da kx nzyro profet nedeng x da kx nzrtrngztibzlrng. ² A' mzli ka, mz nzaenzli-krgu nzatubqtikr Gct da amrlx, ycmne-angidrpe-kzp bagu mz nzatwzlr-krmle Mrlxde, Jiszs Kxnzmcpx. Mz nide, dekc tqwz-ngrde nrlc x doa x da amrlx elr. X yrlqle da amrlx mz nzngisckr Jiszs x doa amrlx mz nzmnclz-krbzlr mz zmatq ngrde. ³ Kraes aotr-angidrle Gct Trte. X nqmq krdeng amrlx nzaelwapx-zpwxlz nqmq kr Gct x zmatq ngrde. X da amrlx lolvz lxblr zmatq ngr natqdeng. Mz nibr nzrkatx-krde alwx ngr leplz, wxbu me matq-esz'ngr Heven mz nrlar Gct Trte kxrtc. *

*Mevalu Kxnzmcpx Myaszlle
Enjrl Amrlx*

⁴ Mz nzmu-krde lcde, Jiszs myaslz-zlwzle enjrl amrlx mz nzngini-krde Mrlx Gct. X zmatq kc tqaprcbz Gct bade myaslz-kzle zmatq ngr enjrl amrlx. ⁵ Murde trpnzngr enjrl kx rpi-neba Gct natq kc tqpibzle mz Mrlxde kx, “*Nim Mrlxnge, abzo mzbq ka sa na-aelwapx-ngrbo mz leplz nzngini-krnge Trtem.*” * X trpnzngr enjrl kx rpibz Gct bade kx, “*Sa nangininge trtede, x nanginide mrlxnge.*” *

⁶ Mz nzatwzlr-krm Gct Mrlxde kc esz'txu mz nrlc, ycmnetr-ngrde enjrl nedeng mz nzsri-krde kx, “*Kxnzmcng mzllilxlr amrlx nzmu na-angiolr nide.*” * ⁷ Kzdq Sam ycmnetr-ngrde enjrl neng Gct mz nzsri-krde kx, “*Zmatq ngm batrpzle mz enjrl nemqng nzlvc-ani-krdr mz nzapu-krdr nenq. X menrpa lcng tzwztrpzng bam nzapu-kzlr bzlrpc kc tqpcipx.*” * ⁸ A' mz nzobqkr Gct, Mrlxde myapxbz, murde kzdq kz Sam rpile kx, “*Nzyrlqkr Gct lc nzngini-krm King tqyc tqyc, mz nzaclve-krm leplz nemqng mz nzmcnegr kx tubq-esz'ngr.*” ⁹ *Mrlzbz bam da kxtubq, a' px-ngrn da kxtrka. Dekc ninge, Gct rm, tqmcpx-ngrne nim mz nzmyaszlz-krm kztemqng.* X tqglqlz-ngrne nim, murde na-aelux nim tolo ngr nzabrtzngr.” * ¹⁰ Rpi-mopwz Gct mz Mrlxde kx, “Mzli kc mz noude wz-ngrn nrlc, bongavz, x dalrdeng amrlx. ¹¹ Da lcng amrlx sa namrbting. A' nim txpwz kx namnctx alo. Mzli trnaboiu x sc tztrkapeng tzapupelr lrpz kxblzlongr, ¹² kx nzrtctxngr x nztekqtr zvz mz kxmrna. A' trtxpnzngr nzrtekqtrngr nim. X trtxpnzngr nzbz-krm mz kzdq mzli.” * ¹³ X trpnzngr enjrl kx rpibz Gct bade kx, “*Wxbu mrlc tqmatq-esz'ngr mz nrlarne kxrtc, navz nakrlz-zpwxbzle mzli kc nangi-batr-ngrbo mz enqmi rmqng nzmetx-krbzlr bam.*” *

¹⁴ Murde enjrl lcng nidr kxnxzmcng mzllilxlr kxnxzmlrzng kcng tzwztrpzng mz Gct, kc tqatwzlr-ngrmqng mz nzokatr-krdr leplz kx na-arlaxleng.

2

Bzkq Myangr Lrpzki R Nzrlxngitingr Mz Nzvz-krmu Mz Nrlc

¹ Mz nzbritikr drtwrgu Kraes nzarlapx-krde nigu, nalolvz-amqngiku nzalvztrngr angidrng kcng tqxlrpeku, murde ma tqmyangr lrpzki angidr

* ^{1:3} Sam 110:1 * ^{1:5} Sam 2:7 * ^{1:5} 2 Samwel 7:14 * ^{1:5} 1:4 Mzli lc tzyrngr letz lc, kzdung lr Jiu kxnxrlxngiting nzalvztr-rbr-ngrdr kx Kraes nzrsakrlrng badr enjrl x Gct myaszlle nide. ^{1:5} Mz 2 Samwel 7:14, Gct pibzle natq lc mz King Devet mz nzycmnetr-krde mrlx kx navzpxm mz nqvi lrde. X atutr-kaile natq lc mz King Solomon, x mz Jiszs kc ate, mz nzngini-alo-krde king. * ^{1:6} Lou Kcpwz 32:43; Sam 97:7; Aposol 26:23; Rom 8:29; 1 Korint 15:20; Kolosia 1:18 * ^{1:7} Sam 104:4 * ^{1:9} Sam 45:6-7 * ^{1:12} Sam 102:25-27; Jemes 1:17 * ^{1:13} Sam 110:1

mz nzvz-krgu mz nrlc, x nzrlapx-krgu sc tqmrbrpe. ² Krlzku kx batrpz Gct mz melrmqgung nzmnclz-krbzlr mz natq kc tztwzm enjrl nedeng badr. X takitrde nzayrplapxkr Gct melrmqngung mzli kx nzxpqbrr-ngrdr Nzesz'tikr Drtwrdr badr kx navz-nqblq-zvzlr natqde. *

³ Mz nzmu-krde lcde, takitr-kzde nzayrplapx-zlwz-krde leplz kznikeng nzpxtxpx-ngrdr natq ngr nzarlapxngr kc tztwzm Mrlxde, murde natqde myaszlz-zlwzle natq enjrl. Kxetu Jiszs aprcbzle natq lc mz leplz kcng tzlalztqbzng bade, x nzyapwxtpxmlr bagu mz nzsri-krmlr bagu kx ngi lrpzki angidr ngr nzrlapxngr. ⁴ X aelwapx-kzng Gct Trte kx Jiszs ngi lrpzki angidr ngr nzarlapx-krde leplz, mz nzkao-krbzle Mqngrkxtr mz leplz kcng tzbtti drtwrdr Jiszs. Murde Mqngrkxtr okatrle nzale-krdr da kxmatq kxkqlu kxnxkctipxng, x natwzlr zmatq ngr nzwzngr kxmyapxbz x kxbletipx-lxblrng mz nzwztr-krbzlr bade, mz nzvz-nqblq-krde me pnz drtwrde.

Nrlc Kc Navzm Sa Nayclzbz Mz Zmatq Ngr Jiszs †

⁵ Mzli kc nayzlu-ngrm Kraes, nrlc kxmrna trnayclzpzu mz zmatq ngr enjrl. ⁶ Murde mz kzdq Sam rpibz Devet mz Gct kx, “?A' memule tqmatq-ngrgr mz drtwrm? ?X memule tqmrlzti-ngrn nigr leplz txneng? ⁷ Murde wz-ngrn leplz vzo kxipiz mz lr Heven, x kabzme badr zmrlue x nzamatqngr:

⁸ X da amrlx nzyclzbzng mz zmatq ngrdr.” ⁸ Kxmule-esz' Sam lc mz nzsri-krde kx, “Da amrlx nzyclzbzng mz zmatq ngrdr,” drtwr ngrde kx trpnzng da kx tryclzpzu mz zmatq ngrdr. A' trngidatika mz nigu leplz mz nrlc. ⁹ A' krlzku kx Jiszs nzavzo kxipiz mz lr Heven mzli kxipiz. X mzli ka twzpele zmrlue x nzamatqngr mz nzrlapx-lzbq-krde mz nzbzng, murde leplz amrlx naprtrng mz zmrlz ngr Gct kxmyalz mz nzbz-krde lc nidr. ¹⁰ X takitrde nzaetqngr drtqde mz nzbz-krde leplz. Murde mz nzetqkr drtqde, dekc Jiszs tqngini-ngrde kxrmailz kxmyapxbz x leplz namnc-nqblqlr nide mz lrpzki r nzrlapx-krdr. Da amrlx navz-nqblqlr drtwr kc tqyrlq Gct mz nzngini-krde Kxrpalz. Mz nzmu-krde lcde, takitr-kzde Gct nzatutr-krde drtwr lc tqyrlqle mz nzaprtr-krde leplz kxnxkqlung mrkc tqmatq-esz'ngr.

¹¹ Jiszs badr leplz kcng tqatrleng x tqatubqtileng, Trtedr esz'txu. Dekc Jiszs tqabrtz-ngrde mz nzsri-krbzle mzledeng. ¹² Murde rpibzle mz Gct kx, “Mz nzyrlwr-lxblrkr leplz nemqng, sa nabilvzx nim, mz nzsri-krbo mz mzleneng da kx aleme bange.” ¹³ Jiszs apule nigu mzledeng mz nzbritikr drtwrde Gct. Murde ycmnetr-ngrde Gct mz nzsri-krde kx, “Sa na-abrtrpo drtwrnge bade. Mnch mrka badr doa kx aprcm Gct bange.” ¹⁴ ‡

¹⁴ Doa lcng nzmnncng mz nrkrdrd. X Jiszs esz'-krde kz nzmiaka apule nidr, x prtr kz mz nzmnckr nrkrdrd. Murde mz nzngini-krde leplz naprtr kz mz nzbzng. X mz nzbz-krde mz nzngini-krde leplz, na-aovxiol Setzn, x na-arlapxle leplz kcng tzmnclzbzng mz zmatq ngr Setzn x nzmxwlrtir nzbz-krdr. ¹⁵ X mz nzbz-krde lc, katpxbzle zmwxlr ngr nzbzng kc tqolovz-zvzle leplz amrlx.

* ^{2:2} Natq lc tztwzm enjrl, drtwr ngrde da amrlx nzyrong mz Nzryrngrkxtr Kc Kai, myapxbz mz Lou Sc Mosis. Mz nqmq krdr Lr Jiu, nzrpilr kx enjrl nztwzmlr Louktr mz Mosis mz Newz Saenae, kxmule-esz' drtwr lc trnzyrou mz Nzrlasngr mz dckrlzdeng kcng 19—34. † ^{2:4} Mz drtwr lr Jiu, enjrl x drka' nzaclveng badr kxnxetu ngr kandre x mztea amrlx. X rzota-etrng mz nztwz-krdr leplz mz nrlarde nyz Gct o Setzn. Krkcng tzaovxiolr mrnyzdr batrpzle da mz nrlc ka. Kzdung Kristin nzlxtingiti-kzlr drtwr lc, mz nzrlwx-krdr Daniel 4:25 x 10:13. Mc kz Efisz 1:21. ^{2:8} Sam 8:4-6

◊ ^{2:12} Sam 22:22 ^{2:13} Asaea 8:17-18 ‡ ^{2:13} Mz drtwr Jiszs nigu mzledeng x inwedeng murde mnclz-kzpzku mz Trtede.

¹⁶ Opx angidr kx trvz-ngrpleu nzokatr-krde enjrl, a' vz-ngrmle nzokatr-krde nigu leplz kcng tzprtrng mz nqvi lr Ebraam, mz nzlxngiti-krgu kz Gct da kc tqwaile. ¹⁷ Mz nzmu-krde lcde, Jiszs nzmu na-apule nigu mzledeng mz da amrlx, murde nanginide Nardr Pris ngrgu mz nwztr-krbzle mz Gct. X mz nzngini-krde leplz, krlz-angidrle drtwr ngr nzngini-krgu leplz, murde naycngr drtwrde nigu x naokatrle nigu, mz nxzpe-krde alwx ngrgung. X vz zvz ntutr-krbzle mz mz Gct mz nrpi-krbzle bade kx atrpele x atubqtipel nigu. ¹⁸ X mz nzatalzngr x mz nzaetq-ngrbz drtqde, krlz-angidrle drtwr ngr nzatalzngr. X krlz-kzle nzokatr-krde nigu ntzu-amqngi-krgu mz nzatalzngr, murde trtaou mz alwx mzli kc tzatalzngr nide.

3

Mevalu Kxnzmcpx Myaszlzle Mosis

¹ Mz nzmu-krde lcde, kx mzlengeng x inwengeng, kcng tqkqle kz Gct, mz nzngini-krmu leplz kxnxtr nedeng, na-aoti drtwrmu Jiszs. Murde rpiku kx nide menrpa ne Gct kxmyapxbz x Nardr Pris kc tqtu mzligu badr Gct. ² Mevalu atutre da amrlx kcng tqyrlqbz Gct bade mz nzmcpx-krde nide, da kc tqwai Mosis ntatutr-krde nwzr-krde mz nwztr-krbzle mz lr ma nyz Gct. ³ Nzamrluengr Jiszs myaszlzle nzamrluengr Mosis. Murde takitrde nzamrluengr ncblo kc tqatulzle ma nyz Gct, namyaszlze nzamrluengr krkc tqwzpxm mz ma lcde. ⁴ Murde leplz kxnxkqlung nwzr-krde mz ma nyz Gct, a' Gct kc tqwz-ngrde da amrlx. ⁵ Mosis atutre nwzr-krde mz nwztr-krbzle mz lr ma nyz Gct. X trngiu kxetu, a' nide txpwz kxnxawz. X nwzr-krde lc ngi rrx ngr nwzrkr Jiszs kalr, kc tqplzpx-kaile da kc napibz Gct mz leplz nedeng mz nibrde, mz nzycmnetr-krde Jiszs. ⁶ A' Mevalu atutre da amrlx kcng tqyrlqbz Gct bade mz nzngini-krde Mrlxde kc tqacuve-angidrle lr ma nyz Gct. X nipecu lr ma nyzde nzmu natu-amqngiku mz nzbrtikr drtwrku Kraes x mz nzlxngiti-krgu kx sa naprtrku mz nzlungr kxboi, navz nakrlzbzle mzli kc nabz-ngrgu.

*Bzkq Apuamu Kxtrnzabrztrpwzlr Drtrwrdr Mz Gct **

⁷ Mz nzkriz-krmu kx Mevalu myaszlzle Mosis, na-aoti drtwrmu natqde. Da kc tqwai nzpikr Mqngkrkxtr le kx, "Naxlramu natqde mzbq ka, mz nrpi-krbzle bamu kx, ⁸⁻⁹ 'Bzkq nabzmu mqngipe, da kc tzwailr melrmqmung. Murde kxmule-esz' nzmc-zvzlr nzkati-krbo da kxmrzting badr, mz nzmc-krdr mrkc lzke mz yiz kcng nzpnu-pwx, a' otalrkr badr x nzatalzlr ninge mz nzxpqbzr-krdr ninge.' ¹⁰ Dekc tqngiyati ngr drtwrnge nidr, murde nidr leplz kx nzvz-rbrng mz nabzdr x trnzvz-nqblqlru nqmq krngeng. ¹¹ X mz nzangya-krmlr drtwrnge, sc tqesalzpx kx, 'Trtxpnzngz nzprtr-krdr mz nzmc-zpxnegr kc nakabo badr.' " ¹² Mz nzmu-krde lcde, kx mzlengeng x inwengeng, acvetioamu, murde nabzmu ma tqdrka'-ngrng x tqapuamu kxtrnzrlxngitiung, mz nzpxtxpx-krmu Gct kc tqrkabz nzlungr. ¹³ Apqtr-etramu drtwrmu mzbq ka tqglube-ngrnamu, murde ma narmu tqmqngi x alwx tqesabrtile nimu. ¹⁴ Murde ntzwz-krgu da kxmrzting amrlx kcng tqesalzngz Kraes mz nzavctr-krbzku bade, nzvzpxmqng mz nzlolvz-amqngi-krgu nzlxngiti-krgu nide, da kc tqwai mzli kc tqrlxngiti-ayrnrr-ngrgu, nakrlzbzle nzbz-krgu. ¹⁵ Bzkq mrbrtr mz drtwrmu nzalvztrkr Nzryrngrkxtr kx mzbq ka narlrpx-lzbq-ngrbzmu mz Gct. Murde rpile kx, "Naxlramu natqde mzbq ka, mz nrpi-krbzle bamu kx, 'Bzkq narmu mqngipe, da kc tzwai melrmqmung, murde otalrkr badr.' " ¹⁶ X mc-

* ^{3:6} Rlwz nqmq kr lr Jiu mz 'Natq Ngr Nzaplxtqngz' mz buk lc. ^{3:11} Sam 95:7-11 ^{3:15} Sam 95:7-8

kzku kx leplz kcng pwz tqmailzpxm Mosis Ijipt x tzxlrlr natq Gct, nidr lcng tzotablrng badr. ¹⁷ X mc-kzku kx leplz lcng pwz tzangyatibzlr drtwr Gct mz yiz kcng nzpnu-pwx x tzbzpxmqng lzke, murde nzale-zvzng alwx. ¹⁸ X krlzku kx leplz lcng pwz tquesalz-ngrbzle badr kx, “Trtxpnzngr nzprtr-krdr mz nzmnc-zpxnegr,” nidr lcng tzxpqbrrlr-ngrdr nide. ¹⁹ Mz nzmukrde lcde, trnzprtrpeung mz nzmnc-zpxnegr kc nakabz Gct badr, murde trnzabrtzlpzlu drtwrdr bade. *

4

Nzprtrnegr Mz Nzmnc-zpxnegr Kc Nakabz Gct Mz Kxnzrlxngiting

¹ Nzmnc-zpxnegr lc tquesalz-ngrbz Gct mz kxnzrlxngiting sc tqvzbe mzli ka. A' na-aclvetioku, murde kzdung nigu ma tqrblxbz badr nzprtrnegr mz nzmnc-zpxnegr lc. ² Murde da kcng tquesalz-ngrbz Gct badr krkcng tzrlxngiting, delc tzyapwxti-kzpqng bagu, da kc tqwaibzle mz lr Israel kcng tqmailzpxm Mosis Ijipt. A' mz nxzlr-krdrle trokatrleu nidr, murde trnzabrtzlpzlu drtwrdr bade. *

³ Kxmule-esz' kzdung melrmqgung trnzprtrpwzung mz nzmnc-zpxnegr lc, mz nzrpikr Gct kx, “X kx nzangya-zlwzmlr drtwrnge, sc tquesalzpxe kx, ‘Trtxpnzngr nzprtr-krdr mz nzmnc-zpxnegr kc nakabo badr.’” * A' nigu amrlx kcng tzrlxngiting prtrpeku elr. Murde sc tqoliqtiye Gct lrpzki r nzprtrnegr mz nzmnc-zpxnegr lc, mzli kc tqayrkpxpe-ngrde nzwz-krde nrlc ka. ⁴ Da kc tqwai nzrlwx-krgule mz Nzryrngrkxtr, mz nzsri-krde kx, “Gct aykrpxle nzwz-krde nrlc, x sc tqmnc-zpxpex mz zbq krarlimz.”

* ⁵ Natq lc rpi-moule mrlc kx, “Trtxpnzngr nzprtr-krdr mz nzmnc-zpxnegr kc nakabo badr.” * Nzmnc-zpxnegr lc mz mzli nyz Mosis ngi nzmnc-zpxnegr kcpwz tqoliqtiye Gct abzo mzli kc tqayrkpxpe-ngrde nzwz-krde nrlc. ⁶ Kxmule-esz' kzdung leplz kcng tzxlrlr da kc tquesalz-ngrbz Gct badr trnzrlapxung x trnzprtrpwzung mz nzmnc-zpxnegr lc murde nzxpqbrrlr-ngrdr nide, a' nakrlz-kzku kx kzdu-kzng leplz sa naprtrng mz nzmnc-zpxnegr lc. ⁷ Murde mz yiz kang kqlu mz nibr leplz neng Mosis trnzprtrpwzung mz nzmnc-zpxnegr lc, Gct batrzple mz Devet nzyro-krde ngalrde lc tqrpile kx, “Naxlramu natqde mzbq ka, mz nzsri-krbzle bamu kx, ‘Bzkq nabzmu mqngipe.’” * Opx-angidr kx Gct yrlqzbzle kzdq zbq, murde leplz naprtrng mz nzmnc-zpxnegr lc. Krlc ‘mzbq ka,’ murde mzbq ka mzli kx myapxbz mz nzrlxngiti-krm. Bzkq narm mqngi, murde mzli r nzrlxngiti-krm ma tqmrbrtx. ⁸ Zbz mz nibr yiz kcng nzpnu-pwx lzke, Josua mailzle leplz nedeng mz nzprtr-krdr mz drtc' kc Kenzn tquesalz-ngrbz Gct badr. Krlc atutn-ngrde kxipiz natq lc tqngi ‘nzmnc-zpxnegr.’ A' trngiu drtwr ngrde kx myapxbz. Murde Devet ycmnetr-mou-ngrde nzprtrnegr mz nzmnc-zpxnegr lc mz Sam kc tqyrlle mz nibrde. * ⁹ Mz nzmukrde lcde, mzli ka leplz neng Gct sc tqvzbe nzprtr-krdr mz nzmnc-zpxnegr lc. X nzmnc-zpxnegr lc apule nzmnc-zpxxkr Gct mz zbq krarlimz, mzli kc tqabrtzlvz-ngrde da kcng tqmyapxbzng tqwz-ngrdeng. ¹⁰ X mrlx kx prtrpe

* ^{3:19} Matiu 11:28 * ^{4:2} Gct esalz-ngrbzle mz lr Israel kx nakabzle badr drtc' kc Kenzn mz nznginyz-krdrle. A' mz nzmuc-krdr ncblx kxnzwzpxng kxnzxplrng kcng tzmncng elr, nzmwxitlir x trnzabrtzlpzlu drtwrdr mz Gct nzokatr-krde nidr mz nzaovxio-krdr enqmi lcng. Mz nzmukrde lcde, sc tzvzine-moulr lzke yiz nzpnu-pwx, krlz-zpxxbzle ncblx kx trnzrlxngiting nzbzti-krdr, murde ma tzprtrng mz drtc' lc. Mc buk kc Nzkqlu-krdr dckrlzdeng 13—14. Be ngrdr nangi kz nzycmne-ebzpxngr mz leplz kxnzrlapxng x kxtrnzrlapxung. Murde esalz-ngrm Gct bagu kx nzmnc-zpxx-krgu vzpxm mz nzkrlz-krgu kx mnc-zpxpexbadr Gct murde arlapxpele nigu x ipqpxele alwx ngrgung. * ^{4:3} Sam 95:11 * ^{4:4} Nou 2:2 * ^{4:5} Sam 95:11 * ^{4:7} Sam 95:7-8 * ^{4:8} Josua 3:1-4

mz nzmn-c-zpxngr kcpwz, prtrpe kz mz nzabrtzlvz-krde da kcng tqalebz Gct bade. X trabzpeleu nwz-kato-krde mz nzvz-nqblq-krde Gct mz zmatq ngrde esz'-krde, murde nztubqkr mrlx lc vzpxm mz da kx alebz Gct bade. ¹¹ Mz nzmu-krde lcde, na-abrtr-anibzku drtwrgu mz Gct, murde naprtrku mz nzmn-c-zpxngr lc, murde kzdq nigu ma tqtao mz nzvz-nqblq-krde melrmqgung mz nzxpqbrlr-krdr Gct, x trprtrpeu mz nzmn-c-zpxngr kc nakabz Gct bade. ¹² X natq Gct lu x wz-zvzm bagu mz Mqngrkxtr mz nzokatr-krde nigu, murde nakrlzku nzalvztrngr angidr x narlr-ngrbzku bade nztekqtr-krde nigu. X natq Gct malc-esz'ngr. Nzmalc-krde myaszpxle toki r vea kx malc nrlarde rlilr. Murde mz nxzlr-krgule luplxtrle nabzgu vz-krlzbzle mqngrgu, x aelwapx-angidr-ngrmle bagu me vz-zpxngr x me vz-rbr-ngrgu. ¹³ Mz nzmu-krde lcde, naplpxku nzvz-rbr-krgung amrlx mzli ka, murde naipqpele nigu x naprtrku mz nzmn-c-zpxngr lc. Murde trpnzngr dalr nrlc kx yc-kapqbz mz Gct, a' da amrlx kcng tqaleku x tqaoti drtwrgu sa tqyrlq-angidr mzeng. X sa naplpxbzku da lcng bade mz Mzli Kxmatq kc na-ayzlu-ngrbzle da mz leplz.

Mevalu Jiszsz Nide Nardr Pris Nguru Kxmyalz-esz'ngr

¹⁴ Bzkq nabzmu talvzo, a' lolvz-amqngiamu natq ngr nzrlxngiti-krgu. Murde Gct mcpkle Nardr Pris nguru kxmyapxbz, kc tqvzdzpe Heven x tutrpz mz mzte, mrkc tqtu-ngrde mz mzligu badr Gct. Nardr Pris lc nide Jiszsz, Mrlx Gct. ¹⁵ X Nardr Pris nguru lc, krlzle nzryckr drtwrde nigu, murde krlz-angidrle mrkcng tqtao-zvz-ngrgu mz nzatalzngr. Murde nzatalzngr kz nide mrkcng amrlx tzatalz-ngrgung, a' trtaou mz alwx. ¹⁶ Dekc, nelzgu nabr mz nzmn-aepztr-krbzku mz Gct kc tqmrlz-esz'ngr. Murde krlzku kx sa nayc ngr drtwrde nigu x naokatrle nigu mzli kc tqkxpu-ngrgu, mz nzvz-nqblq-krde zmrlz ngrde kxmyalz.

5

¹ Mzli kc bqnc, ncblo kx ngi Nardr Pris mrkc Israel mcpwpwz Gct mz nztu-krde mz mzlindr badr leplz nedeng, murde narlrpx-ngrbzle mz Gct da kx nzkabz leplz x animol kx ngi blz ngr nzipqpxkr Gct alwx ngrdrng. Leplz lcng tr-rlr-ngrpwzu Gct nzvz-krbzlr esz'-krdr bade, a' nangi txpwz Nardr Pris. ² X Nardr Pris lc krlzle nzyckr drtwrde leplz nedeng, kxmule-esz' trnzkrlzlu nqmq kr Gct x nzvz-rbr-zvzng, murde nide ncblo kx tao kz mz nzatalzngr. ³ Dekc, tqrlrpx-ngrde blz, mz nxzpe-krde alwx ngrdeng, vzmi alwx ngr leplz nedeng.

⁴ Trpnzngr ncblo kx narlrpx-lzbq esz'-krde mz nzngini-krde Nardr Pris. A' mcpwpwz Gct, mz nzqkle-krde nide mz nzwzngr lc tqmatq, da kc tqwai nzmcpx-krde Eron mzli kc, mz nzngini-krde Nardr Pris kc kai. ⁵ Mz nqmq lcpwz, Kraes tr-rlrpx-lzbqu mz nzwzngr lc tqmatq mz nzngini-krde Nardr Pris, a' Gct mcpkle nide mz nzsri-krbzle bade kx, "Nim Mrlxng, abzo mzbq ka sa na-aelwapx-ngrbo mz leplz nzngini-krnge Trtem." ⁶ X trpnzngr Nardr Pris kzble kxmu nzycmne-krbz Gct lc bade. ⁶ X mz kzdq kz Sam rpile kx, "Nangini-aloz-krpz pris mz nzvz-nqblq-krde nzwzkr Melkesidek." ⁷ Mzli kc Jiszsz tqmncbe-ngrde mz nrlc, krka'bz mz Gct kc tqrkrlz nzarlapxngr nide mz nzbzngr x rlxbz da bade mz nzyrni-krde vzmi drlemzte. X ayzlubz Gct natqde murde Jiszsz avzo-lzbq mz nzmnclz-krbzle bade. ⁸ Kxmule-esz' Jiszsz

nide mrlx Gct, a' ngi me pnz drtwr Gct kx na-alvztr-lzbq mz nzvz-nqblq-krde natqde, kxmule-esz' nzaetqbz drtqde. *

⁹ X mz nzaetqngr drtqde mz nzvz-nqblq-krde natq Trtede, Gct batrpzle bade nzngini-krde Nardr Pris kxmyapx-esz'ngr kx takitrde nzokatr-krde nigu. X yrlq-kzle Jiszs nzngini-alo-krde nou nzrlapxkr leplz amrlx kcng tzmnclz-zvzbzng bade. ¹⁰ X yrlq kz Gct nzngini-krde Nardr Pris ngrgu, "mz nzvz-nqblq-krde nzwzkr Melkesidek." *

Kxzrlxngiting Naetulzmqng Mz Nqmq Kr Gct

¹¹ Da kqlube kx na-alvztr-ngrne nimu mz nzapukr Kraes Melkesidek. A' rblx nzalvztrngr nimu, murde teblk-mouamu mz nzkrlz-krmu kxasa zlwz, x da angidr tryatitru narmu. ¹² Kxmule-esz' nzrlxngiti-krmu mzli boipe, x mzli ka nzmu takitrpe mu nzalvztr-krmu, a' apubeamu itoto kx nzyqbeng, x trtakitrkaple nimu nzmungr dakxnzng kxmqngi. Murde opxm kx navzmop dq ncblo kx na-alvztr-moule nimu mz nzalvztrngr angidr kcng kai, a' nzalvztrngr kcng tqrblx, trntakitrkaplr nimu. ¹³ X mrlx kx nzrlxngiti-krde pobe, apule doa kxtopwz kx rmnq txpwz nei. Murde trkrlzkale nzalvztrkr Nzryrngrkxtr mz da kxtubq x da kxvz-rbr. ¹⁴ A' mrlx kx nzrlxngiti-krde brpe, apule mrlx kx mupe dakxnzng kxmqngi. Murde mrlx kxmule lcde krlzpele da kxmrlz x da kxtrka mz nzobqkr Gct, x vz-nqblq-zvzle nqmq kr Gct.

6

¹ Mz nzmu-krde lcde, na-aoti drtwrgu nzrwzng ma ngr nzrlxngitingr. Na-atulzku drkq ngr ma mz nou rplz ngr ma kc, tqngi nzalvztrngr angidr kcng kai. Murde nabrku mz nqmq kr Gct amrlx. Krlzpeku da angidr kcng kai x da kx nzalvztr-ngrdr. Mz nzmu-krde lcde, bzkq yapwxti-zvzpeku nzabrtr-ngrbz drtwr mz Gct, nzrtekqtrngr drtwr mz alwx murde yrkrpx mz Hxl, ² nzwrkxtrngr kxbletipxng, kxnamu nzyrlqo-ngrbz mq mz doa, nztulz-moungr mz nzbngr, x nzpipxkr Gct doa kx tubq x kx vz-rbr mz Mzli Kxmatq kc nayzlu-ngrm Jiszs, x kzdung kz nzalvztrngr kxnmulr lcng. ³ X krlzku nzprtr-krgu mz nzrlxngitingr kxbrpe lc, nzmu kx tqrlr-ngrm Gct le bagu. A' rblxbz mz leplz kcng tzpxtxpx-ngrdr nzlxngiti-krdr Kraes. ⁴ Murde kzdung leplz nzlxngiti-kailr Kraes x nzpxtxpx-mou-ngrdr nide. X rblxpebz badr nztekqtr-mou-krdr drtwrdr mz nzlxngiti-mou-krdr nide. Sc tzkrlzpelr da angidr x nzmnc-zpwxpeng badr Gct mz nrw. X mou nzxngipebzlr Mqngrkxtr nzmncpx-krmle mz nabzdr. ⁵ X nzmcpelr kx Gct atutr-zvzle da kcng tqesalz-ngrde mz Nzryrngrkxtr. X nzmcpe-kzlr kxipiz zmatq kx nayc zvz mz nrlc kc navzm. ⁶ A' rblxpebz badr nzyzlu-krbzlr mz Gct. Murde mz nzpxtxpx-krdr Jiszs apule kx nztqlvztr-moulr nide mz kros x nzamyabzlr drtqde mz mz leplz. Murde mz nzale-krdr da lc, nzaelwapx-ngrdr kx mz drtwrdr nzbz-krde trtakitrdeu blz ngr nzrkatxng alwx ngrdr. Bzkq apuamu nidr!

⁷ Leplz mz nrlc ka nzapulr drtc' ngr nrlanc nyg Gct. Murde kabzle badr da amrlx kx takitrde nzmnc-krdr kxtubq, apule tewa x nepi. X abrtzlvzle leplz kcng tzrlxngiting mz nzale-krdr da kxmrlz. ⁸ A' drtc' kc tqlvclz-ngrm nzku x lxbi ngi drtc' kxtrka, kx takitrde nzangcngr mz nyr. X mz nqmq

* ^{5:8} 5:6 Mc Nou 14:17-20, x natq kxtopwz mz Hibru 7:1-3. ^{5:7} Ngalrde lc ycmnetr-ngrde nzkrka'kr Jiszs Getsemzni. Murde krka'-ngrde kx, "Bzkq vz-nqblqq me pnz drtwrge, a' nangi me pnz drtwrm." X Gct kabzle bade nzxplrngr kx takitrde nzvz-nqblq-krde me pnz drtwrde kx nabz. ^{5:8} Drtqgu sa naetq mz nzvz-nqblq-krgru natq Gct mz nrlc ka. A' Jiszs nide lrpzki rgu kx naokatrle nigu mz nzmnclz-krbzku mz Gct. * ^{5:10} Sam 110:4

lcpwz, leplz kx trnzrlxngitiung kcng nqmq krdr tqtrka, sa naodating Gct x na-angcleng mz nyr ngr Hxl.

⁹ Kztengeng kx mrlzti-zlwzx, kxmule-esz' natqnge xplrbz bamu mz da lcng, a' krlz-angidrx kx vz-nqblqpeamu lrpzki angidr mz nzale-krmu da kxmrlzting kcng tqvzmi nzrlapx-krmu. ¹⁰ Murde Gct tubq zvz. X sa naayzlubzle bamu da kxmrlzting mz nzwzngr kc tqaleamu x nivz kc tqaelwangrbzmu bade mz nzokatr-zvz-krmu lrmakxtr. ¹¹ Sutitx zlwz drtwrnge nztu-amqngi-zvz-krmu mz nzlxngiti-krmu Kxetu x nzale-krmu nzwz-krde, navz navz nakrlzbzle mzli kc natwz-ngrnamu da amrlx kcng tgesalzngrmle bagu. ¹² Bzkq drtqmu sa nzaenzlingr nztwz-krmu nzalvztrngr angidr kcng tqrblx. A' suti drtwrnge kx navz-nqblqamu leplz kcng tzkrlzpeler da angidr lcng. Murde drtwrdr br mz nzobqtipx-zvzpelr da kcng tgesalz-ngrbz Gct badr, krlzbzle mzli kx nztwz-ngrdrleng.

Gct Atutr-zvzle Nzesalz-krdeng

¹³ Na-aoti drtwrmu Ebraam. Mzli kc tqyrlq-ngrbz Gct natqde mz Ebraam mz nzska-krbzle bade da, esalz-ngrbzle drtqde txpwz. Murde trpnzngr kx myaszlzle nide kx naesalz-ngrde. ¹⁴ Rpibzle bade kx, “*Esalz-ngrne drtqngé kx sa na-amrlzx nim x na-aetunepxbó neidu lrm.*” ^{*} ¹⁵ Ebraam obqtipx-zvzpele mz drtwrde kxbr, krlzbzle mzli kx twz-ngrde da kx esalz-ngrbz Gct bade. *

¹⁶ Mzli kx ncblo yrlq-ngrde nzesalz-krde, nayrlqle mz da kx myaszlzle nide, murde leplz nakrlzlr kx sa na-atutr-zpxle nzesalz-krde, x trpnzngr natq kx narprwi-mop mz nibrde. ¹⁷ Gct trtekqtr-lzbqu, trtekqtrleu drtwrde, x trkrlzleu nzpokiangr. X suti drtwrde kx nigu kcng natwzku da kx esalz-ngrde, nakrlz-angidrku nqmq krde lcng. Mz nzmu-krde lcde, esalzngarde drtqde, mz nzaelwapx-krmle bagu kx sa na-atutrle. ¹⁸ Nzesalz-krde x drtqde, da lcng li trtxpnzng nzskekqtrnegr x trtxpnzng nzskekia-krde. Mz nzmu-krde lcde, nigu kcng tzrlatrpzng mz Jiszs, drtwrgu nabr murde obqtipxku nzatutr-atwrnr-krde nzesalz-krdeng kalr Heven. ¹⁹ Nzobqtipx-krgu da lcng apumle bagu da kx atolvale nabzgu. X okatrle nztu-amqngi-krgu x nzmn-c-zpx-krgu mz nrhc ka, murde krlzku kx Jiszs lolvzmle nqvi lr nztolva-krgu, mz nzmn-c-krde Mrkc Tqtr-esz'ngr Heven. ²⁰ Jiszs vzpe kai mrlcde, murde naokatrle nigu kz mz nzvz-krbzku mz Trtede. X vz-nqblqle nzwzkr Melkesidek mzli ka, murde tutr-alobz mz mz Gct mz nzpi-krbzle bade kx sc tqatlapxpele x tqatubqtipede nigu.

7

Melkesidek Myaszlzle Melrmqgu Ebraam

¹ Melkesidek lc tqngi king r taon kc Salem. X ni-kzde pris ne Gct kx myalz-esz'ngr. Murde Melkesidek sc tqrmctipele Ebraam mz lrpzki mzli kc Ebraam tqyzlu-ngrmle mz nzaovxio-krde kzdung king nzpxng. Ebraam rmctile Melkesidek kc tqamrlzle nide. ² Mzli lc Ebraam kabzle mz Melkesidek da kranzpu ngr da amrlx kcng tqtwztimleng mrkcng tqaovxioleng. Drtq lc Melkesidek drtwr ngrde ‘King Kx Tubq-esz'ngr.’ X mz nzngini-krde King r Salem, drtwr ngrde kx ni-kzde ‘King r Nrwx.’ Murde Salem drtwr ngrde ‘nrwx.’ ³ Melkesidek, trpnzngr kx rkrlz trtede x lxede.

* ^{6:14} Nou 22:16-17 * ^{6:15} Ebraam aenzi-ngrde yiz nzpnu-li-nrade-nzlvqn (25) x Aesak kc mzte tzmc ate, mz nzatutr-krde kzdq da kx esalz-ngrbz Gct bade. Esalz-kz-ngrbzle bade kx nzkqlukr doa kx nzvzpxmqng mz nqvi lrde namyaszpxle nzkqlukr vri ngr bongavz. Kxmule-esz' Ebraam trmcieu nzatutrkr Gct da lc mz nzlu-krde, a' drtwrde trmau kx sa na-atutr Gct natqde kalr.

X trpnzngr kx rkrlz me vzkimle, mzli kx nzmcngr mzte x mzli kx bz-ngrde.
Mz nzmu-krde lcde, apule Mrlx Gct, murde ni-alode pris. *

⁴ Nakrlzku kx Melkesidek myaszlzle Ebraam, kc tqngi trtegu kxmyapxbz. Murde Ebraam kabzle bade da kranzpu ngr da kxmrlz kx yablketipxle mz da amrlx kcng tqtwzmleng mz nzaovxio-krde mz nzvecngr. ⁵ Mzli lc Ebraam trgalar nede doa, x trgalar leplz kx nzvzpxmqng mz nqvi lr Israel, Mosis, x Livae, murde mztr trnzmckang. A' mz nibrde, mz nzvz-nqblq-krde Lou sc Mosis, leplz amrlx mz nqvi lr Israel nzmu nakabzlr da kranzpu ngr dztudrung amrlx mz pris ngrdrng kcng tzvzpxmqng mz nqvi lr Livae. Nztwzbz pris badr lr mrnyzdrng, kxmule-esz' nindr amrlx leplz kx nzvzpxmqng mz nqvi lr Ebraam. ⁶ Kxmule-esz' rblx Melkesidek nzvzpx-krmle mz nqvi lr Livae x Lou sc Mosis trnzkaokapz, a' Ebraam kc tqesalz-ngrbz Gct da bade, kabzle mz Melkesidek da kranzpu ngr da kx ngi scdeng amrlx. X Melkesidek sc tqamrlzpele nide. ⁷ X opx angidr kx mrlx kc tqrngisc zmatq ngr nzamrlzng myaszlzle mrlx kc tqamrlzle. †

⁸ Melkesidek myaslz-kzle pris kcng tzvzpxmqng mz nqvi lr Livae, mz nzrtwz-krdr badr da kranzpu ngr da scdr leplz. Murde nindr ncblo kx nzmnncng x nzbzng. A' Melkesidek, rpi Nzryrngrkxtr kx lutx alo. ⁹⁻¹⁰ Mz nzhka-krbz Ebraam da kcng mz Melkesidek, apule kx ncblo amrlx kcng tzvzpxmqng mz nqvi lrde, nzhkape-kzpzung. Drtwr ngrde kx lr Livae kcng tzrtwzng da kranzpu ngr da amrlx scdr lr Israel, nzxpe-kzpzung da kranzpu ngr da amrlx scdrng mz Melkesidek. X mc-mouku kx Melkesidek myaszlzle lr Livae.

Nzesz'tikr Drtwr Kc Ate Vzpxm Mz Mevalu Jiszs Nzngini-krde Pris Mz Nzvz-nqblq-krde Melkesidek

¹¹ Gct kapxle natq mz Lou sc Mosis kx pris nedeng navzpxmqng mz nqvi lr Livae. X kxmule-esz' rblxbz mz lr Livae nzrkatx-atwrnr-krdr alwx ngr leplz, a' nindr rkx kc pnz ngr Kraes mz nzngini-krde pris kzble kc navzm. Opx angidr kx pris lc navzm, murde Gct ycmnetr-kz-ngrde kzdq kz pris, kc na-apule Melkesidek, x trvzpxpuu mz nqvi lr Eron, kc tqvzpxm mz nqvi lr Livae. ¹²⁻¹⁴ X opx angidr kz kx Gct tekqtrpele kzdq lou scdeng, murde yrlqmle bagu Mevalu rgu Jiszs mz nzngini-krde pris kx trvzpxpuu mz nqvi lr Livae. Murde vzpxm mz nqvi lr Judz. X mz nzvz-nqblq-krde Lou sc Mosis trgalar doa lr nqvi lr Judz kx ngnide pris mzli kc. ‡

¹⁵ Mz nzmu-krde lcde, opx-angidrpe kx Gct atwzlr-ngrmle bagu pris kzble kc tqapule Melkesidek. ¹⁶ Murde Kraes nzngini-krde pris trvzpxpuu mz nqvi lr Eron, kc tqvzpxm mz nqvi lr Livae, a' ngi pris kx vzpxm mz zmatq ngr nzlungr kc tqyc tqyc. ¹⁷ Murde Nzryrngrkxtr ycmnetr-ngrde nide mz nzhpi-krde kx, "Nangini-alo-kzp pris mz nzvz-nqblq-krde nzwzkr Melkesidek." ¹⁸ Lou kcng bqnc mz nzwzkr pris x blz ngrdrng

* ^{7:3} 7:1 Mc Nou 14:18-20, mz nzrlwxngr mz vea lc x nzrmctikr Ebraam Melkesidek. Drtq lc Salem, nztekqtr mz nibrde, nzyrlqbz drtq kc tzrpibz 'Jerusalem.' 7:3 Kraes ni-alode pris mz nzvz-nqblq-krde nzwzkr Melkesidek. X nzwzng lc myaszpxle nzwzkr pris mz nqvi lr Eron. Murde Melkesidek nide pris x king mzli kcpwz, da kc tqwai kz Kraes mz nibrde. Melkesidek drtwr ngrde 'King Kx Tubq-esz'ngr' x nide King r Salem, kc drtwr ngrde 'nrwx.' X Jiszs mzte nzmc mz nqvi lr Judz, nqvi lr king r Israel x nide Kxetu r Nrwx [Asaea 9:6] kc tqatubqtile nigu mz nzobqkr Gct Trte. Mz trnzrkriz-ngru lc be ngr nzlukr Melkesidek, kzdung leplz nzrpilr kx krlc Kraes tqadcpk-lzbqzbz mz Ebraam mz nzngini-krde ncblo. † ^{7:7} 7:5 Pris kcng mz nqvi lr Livae nzwztrpzng mz Gct x trpnzngr nydzdr drtc'. Mz nzmu-krde lcde, nzrtwzng da kranzpu ngr da amrlx scdr nqvi kc-kzng mrkc Israel. [Nzkqlu-krdr 18:25-32] ^{7:8} Sam 110:4 ^{7:12-14} Mz nibr mzli r King Sol, king r Israel amrlx nzvzpxmqng mz nqvi lr Judz. ^{7:17} Sam 110:4

nzyrlqtxpxpeng, murde trpnzngr scdr zmatq ngr nztekqtr-krdr leplz x trtakitrdrus mzli ka tqvzpe-ngrm Kraes. ¹⁹ Murde Lou sc Mosis rblx nzbattr-krbzle mz leplz nzale-krdr da kxtubq. A' mzli ka, mz nznginipekr Kraes Nardr Pris ngrgu, Gct kapemle bagu lrpzki kxmyapxbz mz nzvec-aepztr-krmle nigu bade.

²⁰⁻²¹ X Jiszs myapx-kzpz murde mz Nzryrngrkxtr rpile kx, “*Yawe esalz-ngrde drtqde x trnatekqtrleu drtwrde. Rpile kx, ‘Nangini-allo-kzp pris.’*” ²¹ X trwaipwzleu mz pris kcng tzvzpxmqng mz nqvi lr Livae. ²² Mz nzesalz-krde drtqde kx Jiszs sa nangini-alode pris, nakrlz-zpwx-kzku kx Jiszs sa na-aclev-zvzle Nzesz'tikr Drtwr Gct Kc Ate mz nzamrlz-krde leplz nedeng. X Krlc Tqate myaszpxle Krkc Kai, murde tqyc tqyc, da kc tqwai Jiszs nzmyzspx-krde pris kcng pnz mz nzngini-allo-krde pris ngr Krlc Tqate.

²³ X kzdq mou da kx blepxbz mz pris kcng mzli kc x Jiszs nzngini-krde pris kc nzvzm. Pris kcng pnz nzkqlung murde mz nzbz-krdr trnzkrpzpelru nzale-krdr nwzr-krdr. ²⁴ A' Jiszs lu zvz x trpengr mou pris, murde nwzr-krde mz nzngini-krde pris tqvzpe tqvzpe. ²⁵ X mz nzlu-allo-krde lc, dekc tqrnigsc-ngrde zmatq ngr nzarlapx-krde leplz kcng tzvzmqng mz Gct mz nzaxvctr-krbzr bade. X sa tqtu zvz mz mzlindr badr Gct mz nzrlxti-krbzle bade nzipq-krde x nzokatr-krde nidr.

²⁶ Mz nzmu-krde lcde, Jiszs mz nzngini-krde Nardr Pris kxmulc, tqtakitrde nigu. Murde nide txpwz kxtr, kxtubq-esz'ngr, x trpnzngr alwx ngrde. X Gct katpxmle nide mz nzmnc-krdr badr leplz ngr alwx, x amnctxlzle nide me matq-esz'ngr Heven. ²⁷ Jiszs trapuleu Nardr Pris kcng mzli kc tzaleng blz mz zbz kang kqlu murde Gct naipqpxle alwx ngrdrng, nidr badr leplz nedrng. Trpnzngr blz kx alele mz nzipqkr Gct nide, murde trpnzngr alwx ngrde. X trpnzngr blz kx ale-moule mz nzipqkr Gct leplz, murde rlrpx-lzbz-ngrbzle nwzrde esz'txu mz nzngini-krde blz angidr kc esz'txu, tqtakitrde nxzpe-atwrnrngr alwx amrlx. ²⁸ Ncblo kx nzmcpxng mz nzngini-krdr Nardr Pris mz nzvz-nqblq-krde Lou sc Mosis, nidr ncblo kx nztaong mz nzatalzngr. A' mz nibrde esalzng Gct mz drtqde, kx mcpxle Mrlxde mz nzngini-allo-krde Nardr Pris kc tqtubq-esz'ngr, tqatutr-atwrnrngrde me pnz drtwrde.

8

Mevalu Kxnzmcpx Myaszlle Nardr Pris Amrlx

¹ Da kxmyapxbz mz da kcng amrlx tqpibo bamu nide sele. Jiszs nide Nardr Pris ngrgu kc tqwxbu me matq-esz'ngr mz nrlar Gct kxrtc Heven. ² X sc tqrtrngzti-ngrbzle nwzrkr Nardr Pris Mrkc Tqtr-esz'ngr Heven mz nabz Tentkxtr kx trwzti leplz, a' wzti Gct esz'-krde elr. ³ Nardr Pris amrlx, nwzr-krdr nzrlr-ngrbz da kx nzkang x blz mz Gct. Mz nzmu-krde lcde, takitrde Nardr Pris ngrgu nzrlr-kz-krbzle da mz Gct. ⁴ A' nzmu Kxnzmcpx namnkle mz nrcl trnanginideu Nardr Pris. Murde mz nrcl, pris kqlu kx nzmcpxeng, kx nzrlr-ngrbzng da mz Gct mz nzvz-nqblq-krde Lou sc Mosis. ⁵ Nzrzng Mrkc Tqtr mz nrcl, kc tqaelwapx-ngrde kxipiz dalr Heven. Murde mzli kc Mosis tqoliqt-ngrde nzrwzng Tentkxtr, rpibz Gct bade kx, “*Aclev angidr, nwzr-krmlle navz-nqblqpwzle nzrwzng kc tqaelwa-ngrbo bam mz newz.*” ⁶ *

¹ **7:20-21** Sam 110:4 ² **8:1** Sam 110:1 ³ **8:5** Nzrlasngr 25:40 ⁴ **8:5** Mz mzli nyz Solomon nzrwzng Mangr-nzangiong Yawe mz nzvz-nqblq-krde kxmu nzrwzng Tentkxtr.

6 A' Jiszs, Nardr Pris ngrgu, nzwz-krde Heven myaslz-zlwzle nzwzkr pris kcng tzvz-nqblqlr Lou sc Mosis. Murde nide kc tqtu mz mzlr Gct badr leplz mz Nzesz'tikr Drtwr Kc ate tqmyaszlz-kzle Krkc Kai. Murde da kxnxmrlzti-zlwzng kcng tquesalz-ngrbz Gct mz Krkc Tqate nzmyaszlz-zlwzlr da kxmrlzng kcng tquesalz-ngrbzle mz Krkc Kai.

Nzesz'tikr Drtwr Kc ate Myaszlzle Krkc Kai Mz Lou Sc Mosis

7 Nzesz'tikr Drtwr Kc ate myaszlzle Krkc Kai murde Krkc Kai trpnzngr scde zmatq ngr nzbatr-krbzle mz leplz nzvz-nqblq-krdrle. **8** X Gct krlzle kx leplz nedeng nzvz-rbr-zvzng. Delc kzdg profet rpile kx, "Rpi Yawe kx, 'Mzli kc navzm, sa nayrlqbo Nzesz'tikr Drtwr Kc ate badr lr Israel x lr Judz. **9** Murde melrmqdrng kcng tqvzmipxmc nidr Ijipt, trnzvz-nqblqlru lou ngr Nzesz'tikr Drtwr Kc Kai. Delc tquesablqtippe-ngrne nidr krlzmlle mzli kx nayzlungrmlr bange. Krkc Tqate sa nablepxbz mz Krkc Kai. **10** Mz Nzesz'tikr Drtwr Lc Tqate badr lr Israel, sa nayrlqtrpo natqngeng mz nardr, murde nakrlz-zpwxlr me pnz drtwnrge. X natqngeng sa naycpk-kzpqng mz nabzdr, murde nasuti drtwrdr nzvz-nqblq-krdrleng. Sa nanginibo Gct rdr, x nanginidr leplz nengeng. **11** Mzli lc navzm trpengr kx na-alvztrle kztedeng x mzledeng mz nzkrlz-krdr ninge. Murde leplz amrlx sa nakrlzlr ninge, abzo mz leplz txneng vz-krlzbzle kxnzetung. **12** Murde sa naipqpxbo alwx ngrdrng, x trpengr nzdcpxkr mz drtwnrge nzvz-rbr-krdrng." **13** Mz nzrpikr Gct 'Nzesz'tikr Drtwr Kc ate,' drtwr ngrde kx Krkc Kai blzlopengr, x takitrpede nzyrkpx-krde. †

9

Blz Kx Rlr-ngrbz Mevalu Kxnxmcpk Myaszlzle Blz Amrlx

1 Mz Nzesz'tikr Drtwr Gct Kc Kai badr lr Israel, nzyrlqlr kcng lou kx nzpibzlr kxnamu nzangiongr Gct Mrkc Tqtr mrka mz nrlc. **2** Nzwztilr Tentkxtr na-apule kzdg ma, x tupx-kzpq kc ma kxtopwz mz nabzde. Ma lc tqetu nzrpibz Mrkc Tqtr. X nzycpxmqng elr da kc tqwxbutiom lam, x tebol kc tqyco-ngrm bret kxtr. **3** X ma kc tqtopwz mz nabzde, nzrpibz Mrkc Tqtr-esz'ngr x nzpqrtr mz lotqbr kxve. **4** Mrkc tqutur-ngrbz olta kc tqngi gol tzangcngr bqlr nc ninz. X mz nabz ma kc tqtopwz nide kc tqycpx-ngrm Bokis kc tqyclz-ngrm Nzesz'tikr Drtwr Gct Badr. X Bokis lc nzakqlvz-atwrnrngr gol, yz x mz nabzde. X nzyclzmqng elr baol x lopqde kc tqycpx-ngrm dakxnxng kxtr kc tqkabz Gct mz Mosis, tzrpibz 'mana.' X nzyclz-kzpqng elr nctoko sc Eron kc tqlvputi, x rplz kcng li tqyrtrngr Gct lou scdeng. *

5 X nzwzngm mz gol enjrl-serub nzling mz lopq Bokis kc, mz nzngini-krdr rkx ngr nzmnckr Gct mrlcde. X nabxdr nzglapxlr mz nzakqlvz-krdr lopq Bokis, kc tzrpibz Mrkc Tzrmctingr Nivz Lr Gct. Murde Gct ipqpxle alwx ngr leplz mz nziklrkr Pris mepyr ngr animol kx ngi blz elr. A' trpnzngr nzyapwxtipx-krbo da lcng amrlx mzli ka.

* **8:12** Jeremaea 31:31-34 † **8:13** Letz lc nzyr x mz nibrde lr Rom sc tzodatipelr Mangr-nzangiongr Yawe Jerusalem, mrlc txpwz dekc tzalengr lr Jiu blz. Mwx ngalrde lc tqplzpx-pnkle kx nzale-krdr blz ycp pipz nzyrkpx-krde. * **9:2** Nzrlaszngr 25—40 * **9:4** Bokis kc ngi rkx kx Gct mncbz badr lr Israel. Mc Nzrlaszngr 40:34-35, 1 King 8:10-11, 2 Be Ngrgu 5:13-14; 7:13. Nzrlaszngr 25:10-22 ycmnetr-ngrde kxmu nzrwzng Bokis kc, x dckrlzde kc 16 ycmnetr-ngrde dakxnxng kxtr x baol ngrde. Nzkqlu-krdr dckrlzde kc 17 ycmnetr-ngrde nctoko sc Eron.

⁶ Mzli kc tqyrkrpxpengr nzoliqti-krdr da lcng amrlx mz Tentkxtr, pris sc tzvztr-zvzpeng mz nabz ma kc kai, tqngi Mrkc Tqtr, mz nzale-krdr nzwz-krdr. Pris txpwzng kx nzrlr-ngrbz nzvztr-krdr elr. ⁷ A' mz ma kc tqtopwz, Nardr Pris esz'-krde txpwz kx krlzle nzprtrngr elr. X nzprtr-krde mrlcde zbz kxesz'txu mz yiz kxesz', mz Zbz ngr Nzrkatxngr Alwx. Mz nzvztr-krde mrlcde, rtwztr mepyr ngr animol kx ngi blz. X rlr-ngrbzle mz Gct, murde narkatx-ngrde alwx ngrdeng badr alwx ngr leplz nedeng, kcng tzalelr mz yiz kc tqvztxpe, a' nzyc-kapqtrpzng badr. Murde nzalepelr blz mz nzipqpx-krde alwx ngrdr amrlx kcng tzkrlzpelr. ⁸ Mzli kc Mqngrkxtr tqpi-ngrbzle kxnamu nzrwzngr Tentkxtr x Lou ngrdeng amrlx, aelwapx-angidrle kx Gct tr-rlrpx-ngrdeu leplz nzvztr-krdr Mrkc Tqtr-esz'ngr tqmncpx-ngrmle, murde nzaleng alwx. X leplz nzmncbzng mz lou lcng vz-krlzbzle mzli kx tekqtrngr Gct Nzesz'tikr Drtwr Kc Kai. ⁹ X krlc aelwapx-ngrmle bagu mzli ka, kx da kx nzkang x blz kcng tzrlr-ngrbz mz Gct trnzyatrwpzung mz nztekqtr-krdr nqmq nr nabz leplz. ¹⁰ Murde da kx nzkang x blz lcng nzvz-nqblqpwzlr lou ngr dakxanzng x da kxnxmnq x nqmq ngr nzwztingr kxkqlu dalr nrlarde kx yz mz ncblo. X lou lcng kaom Gct kx navz-nqblq leplz navz navz mzli kx krlz-ngrbzle nzyrlq-krde Nzesz'tikr Drtwr Kc Ate.

¹¹ X Gct yrlqpele Nzesz'tikr Drtwr Lc Tqate mz Kraes kc tqngipe Nardr Pris tqaclvele da kxmrlzting amrlx kcng tqesalz-ngrm Gct bagu. X Kraes vztrpe Mrkc Tqtr-esz'ngr, tqmyalz-esz'ngr Heven, me trnzwz-ngru leplz ngr mz nrlc ka. ¹² X mz nzvztr-krde Mrkc Tqtr-esz'ngr Heven, tr-rtwztru mepyr ngr gout x kzu kxncblongr. A' vztr-ngrde mrlcde nzwrede esz'txu mz nzrlrpx-krde mepyr ngrde mz nzbz-krde, mz nzngini-krde blz angidr kc esz'txu. X batrpzle nzrlapx-alokr.

¹³ Mz nzvz-nqblq-krde Lou sc Mosis, mepyr ngr gout x kzu kxncblongr x bq ngr nei kzu kx nzangc nziklrti-ngrbzlr mz leplz kcng trtakitrdeu nzprtr-krdr mz nzangiongr, murde na-atrlr nidr mz nzobqkr Gct x naprtr-moung elr. ¹⁴ A' mepyr ngr Kraes matq-esz'ngr myaszlzle mepyr ngr animol lcng. X Mqngrkxtr batrpzle nzrlrpx-lzbz-krbzle mz Gct mz nzngini-krde blz kxkql kx katx-atwrnr-ngrde alwx rgung amrlx, vzmi nzatubqti-krde nabzgu, murde trsutipeu drtwrgu nzale-krgu da lcng tqtrka tzyrkrpxng mz nzbzng. A' mzli ka, sutipe drtwrgu nzwztr-krbzku mz Gct, kc tqrkam bagu nzlungr angidr. †

¹⁵ Dekc Kraes tqtu-ngrde mz mzligu badr Gct mz Nzesz'tikr Drtwr Gct Kc Ate. Mz nzbzkr Kraes, xpele alwx ngr leplz kx nzalelr mzli kc tzmncbz-ngrbzlr mz lou ngr Nzesz'tikr Drtwr Kc Kai. Murde leplz kcng tqkqle Gct mz nzngini-krdr leplz nedeng natwzlr da kcng tqesalz-ngrbzle badr x namnc-along badr Heven.

¹⁶ Nzmu kzdq ncblo nayrpxle dq nzesz'tikr drtwr kx pipxle nekeng amnqlzbzle dztudeng badr mzli kc nabz-ngrde, e nzmu nakrlz-angidrli mzli kznike bz-ngrde. ¹⁷ Murde mzli kc tqglubengr ncblo, nzesz'tikr drtwr kc tqyrrpxle trpnzng zmatq ngrde. A' mzli kc tqbzpe-ngrde, sc tzvz-nqblqpe

* 9:7 Livae 16 † 9:14 9:12 Yrlq-kaip Gct Tentkxtr x Lou scdeng, murde mz nibrde nakrlz-angidrku drtwr ngr mepyr ngr Jiszs kc tqxpe-ngrde alwx rgung. 9:14 Nadcpx mz drtwrgu kx mepyr drtwr ngrde nzbzkr animol kxbz. [Livae 17:11] Mepyr ngr animol kx trbzu trmatqu, murde mz nzbzkr animol nzayrplax nide mz alwx ngr leplz, da kc tqwai mepyr ngr Kraes. Trngiu mepyr ngrde esz'-krde kc tqrngisc zmatq, a' nzbz-krde, dekc tqrkatx-atwrnr-ngrde alwx rgung. Murde tekqtrle nigu mz nzbzng. X mz nzbrtikr drtwrgu nide, prtr-kzku mz da kxmrlzting amrlx kcng tqesalzng Gct mz Nzesz'tikr Drtwr Kc Ate. Gct ipqle nigu. X Mqngrkxtr mnccpxm mz nabzgu x okatrle nigu mz nzapu-krgu Kraes.

leplz nzesz'tikr drtwr kc tqyrrpxle. ¹⁸ Dekc Nzesz'tikr Drtwr Gct Kc Kai, ngidati-ngrpzwle nzyrlekr mepyr ngr animol kxbz mz nzngini-krde blz.

¹⁹ Mzli kc Mosis tqrwapx-ngrbzle mz leplz Lou sc Gct amrlx, twzle mepyr ngr gout x nei kzu kxncblongr kx ayabemile lue. X twz-kzle kc nrla nounc x petrle elr nrpnri sip. Zbz leole mz mepyr ngr blz kcng, x sc tqiklrtipe-ngrde Buk Ngr Lou badr leplz amrlx. ²⁰ Mzli lc sc tqrpipebzle badr kx, "Mepyr lcng angidatile Nzesz'tikr Drtwr Gct x nimu. Mzli ka navz-nqblqpeamu da lc." ²¹ X mz nqmq lcpwz, iklr-kz-ngrde Tentkxtr x dalr nzangiongr amrlx elr mz mepyr lcng. ²² Murde mz nzvz-nqblq-krde Lou sc Mosis, doa x da amrlx nzatrpwz mz mepyr. X Gct ipqpwpwz alwx mz nzyrlekr mepyr mz nzbzngr. ²³ Dalr Tentkxtr mz nrlc ka nzatrpwz mz blz. X krlc tqaewapx-ngrde kxipiz dalr Heven. Murde blz kc tqatrle dalr Heven namyaszlzle mepyr ngr animol. ‡

²⁴ Mz nzvztrkr Kraes Mrkc Tqtr, trvztru mz dalr nrlc ka kx nzwzngr leplz, a' vztrpe Mrkc Tqtr Heven. X tutrpz elr mz mz Gct mz nzsri-krbzle bade kx atubqtipel nigu. ²⁵ Nardr Pris ngrdr lr Jiu nzvztr-krde Mrkc Tqtr-esz'ngr nzwrde esz'pwz mz yiz kang kqlu mz nzrlrpx-krde mepyr ngr animol kx ngi blz. A' Jiszsz vztr-ngrde Mrkc Tqtr-esz'ngr Heven nzwrde esz'txu mz nzrlrpx-krde mepyr ngrde esz'-krde. ²⁶ Nzmu Jiszsz nzvztr-krde Mrkc Tqtr nzwrde nakqlule, drtwr ngrde kx nzbz-krde nzwrde kqlu kz, abzo mzli kc Gct tqwz-ngrde nrlc krlzmle mzli ka. A' trtingr. Murde Kraes vz-ngrmle nzwrde esz'txu mzli kx yrlq pnz Gct, mz nzkatz-atwrnr-krde alwx amrlx mz nzrlrpx-lzbq-krde mz nzbzngr. ²⁷ Leplz amrlx nzbz-krdr nzwrde esz'txu. X mz nibrde, sc tqrpipebz Gct badr, krkcng tzvz-rbrng x krkcng tztubqng, murde krlc vz-nqblqle me pnz drtwrde. ²⁸ Mz nqmq lcpwz, Kraes rlrpx-lzbq-ngrde mz nzbzngr nzwrde esz'txu, mz nzngini-krde blz kx katx-atwrnrpe-ngrde alwx ngr leplz. Mz nzmu-krde lcde, trtakitrdeu nzale-mou-krdele. A' mz nzyzlu-mou-krmle mz nzwrde krali, sa nakabzle nzlungr angidr badr leplz kx nzobqtipx-zvzlr nzvz-krmle.

10

Blz Esz'txu Kx Kabz Kxnzmcpx Takitrde Nzxpelo-krde Alwx Ngr Leplz Amrlx

¹ Nzesz'tikr Drtwr Gct Kc Kai mz Lou sc Mosis apule nzycmne-ebzpxngr kc tqaewapx-ngrde kxipiz da kxmrlzting kcng navzpxmqng mz Krkc Tqate. Dekc tqrblxngr blz kxnmulr lcng nzsri-ebir-ngrbz mz yiz kang kqlu nztekqtr-angidr-krdr nabz leplz. A' takitrpwzle nzrlr-krbzle badr nzprtr-krdr mz nzangiongr Gct mzli kxipiz. ² Nzmu blz lcng narngiscdr zmatq ngr nztekqtr-angidr-krdr nztubqkr nabz leplz mz nzwrde kxesz', e trnzrka-zvzbzlu blz lcng. X trpengr nzxlr-krdr nzsri-krbz Gct badr kx nzvz-rbrng, murde trpnzngar alwx ngrdr. ³ A' trkxmuleu lc. Murde blz lcng nzadcpx-zvzbzlu drtwrdr mz alwx ngrdr mz yiz kang kqlu. ⁴ X mepyr ngr kzu x gout kxncblongr trnzyatrpwzung mz nzokatz-atwrnr-krdr alwx. ⁵⁻⁶ Dekc, mzli kc Kraes navzpe-ngrmle mz nrlc, rpi-ngrbzle mz Gct kx,

◊ 9:20 Nzrlaszngr 24:8 ◊ 9:22 Livae 17:11 ‡ 9:23 Nzbzkr Kraes angidatile Nzesz'tikr Drtwr Kc Ate vzmi da kxmrlzting amrlx elr. X mzli lcpwz ayrkrpxle Krkc Kai mz nzatutr-krde lou ngrdeng amrlx. Murde nzbzkr animol kx ngi blz mz Krkc Kai, mc-mouku mz nzbzkr Kraes yiz siu-esz'-trtqki-nzlvqn (1,500) mz nibrde. Murde mzli kc mepyr ngr animol kc tzikl-ngrdr mz leplz atubqtile nidr mz nzobqkr Gct mzli kxipiz mz nztekqtrkr animol lc nidr mz nzbzngr. X mzli ka Jiszsz tekqtrle nigu mz nzbzngr, murde natubq-zvzku mz nzobqkr Gct. Kxmule-esz', a' nzalek kxnzmnc-mrbrng blz krdr blepxbz x trnzyatrpwzung mz nzokatz-atwrnr-krdr leplz, murde tryctrus mz natq kx kabz Gct x mz nzbzkr Kraes.

"Trsutiu drtwrm nzrka-ngrbz bam dalr nrlanc ayrnrngr x dalr nzrkatxngr alwx.

X tr-rlx-kzpe'u blz x animol kx na-angcom mz olta nyzm.

A' da kx suti txpwz drtwrm nxzlr-krbo natqm,

Murde narlrpx-ngrbo nrkrdrqngbam.

7 Delc tqrpi-ngrbo bam kx, 'Ninge kape.

Na-atutrx natq kcng tqyclzm mz Nzryrngrkxtr.

Abrtzlvzx nzale-krnge me pnz drtwrm.' " [§]

⁸ Kxmule-esz' Devet yrle Sam lc, a' ngi Kraes kc tqycmnepx, mz nzrpi-krde kx, "Trsutiu drtwrm nzrka-ngrbz bam dalr nrlanc ayrnrngr x dalr nzrkatxngr alwx. X tr-rlx-kzpe'u blz x animol kx na-angcom mz olta nyzm."

[§] Pile da lc, kxmule-esz' Lou kx kabz Gct mz Mosis rpile kx lr Israel narkazvzbzng blz. ⁹ Zbz rpi-mopwzle kx, "Ninge kape. Abrtzlvzx nzale-krnge me pnz drtwrm." Mz nzpikr Kraes da lc, ayrkrpxle blz mz nzvz-nqblq-krde Nzesz'tikr Drtwr Kc Kai, murde nayrlqle Krkc Tqate mz nzvz-nqblq-krde me pnz drtwr Gct. ¹⁰ X mz nzvz-nqblq-krde lc me pnz drtwrde, Jiszs Kxnzmcpx sc tqatubqtipole nigu mz nzrlrpx-krde nrkrdrqde nzwrde esz'txu mz nzngini-krde blz kx takitrde nzkatx-atwrnr-krde alwx rgung amrlx. ¹¹ Mz zbz kang kqlu, mz nzvz-nqblq-krdr Nzesz'tikr Drtwr Kc Kai, pris amrlx nzrka-zvzbzng namrlzu r blz kcng pwz. A' trnzyatrwpwzung mz nzrkatx-krdr alwx. ¹² A' Kraes nzrlrpx-lzbq-krde nzwrde esz'txu, mz nzngini-krde blz kc tqatkitrde nzkatx-atwrnr-krde alwx amrlx. X mz nibrde sc tqwxbupe me matq-esz'ngr mz nrlar Gct kxrtc. ¹³ X mzli ka Kraes sc tqaenzli mrlcde, navz nakrlz-zpwxbzle mzli kc nangi-batr-ngrbz Gct enqmi rdeng nzmetx-krbzlr bade. [§] ¹⁴ Murde atubqti-alopele x atralopele leplz nedeng mz blz lc esz'txu. ¹⁵ Mqngrkxtr ycmnetr-kz-ngrde da lc mz nzrpi-kai-krde kx, ¹⁶ "Rpi Yawe kx, 'Mz Nzesz'tikr Drtwr Kc ate bader lr Israel, sa nayrlqtrpo natqngeng mz nardr; murde nakrlz-angidrlr me pnz drtwrnge. X natqngeng sa naycpx-kzpinqg mz nabzdr; murde nasuti drtwrdr nzvz-nqblq-krdrleng.' " [§] ¹⁷ X rpi-moule kx, "Sa naipqpxbo alwx ngrdrng, x trpengr nzdcpxkr mz drtwrnge nzvz-rbr-krdrng." [§] ¹⁸ Mz nzmu-krde lcde, opx angidr kx mzli ka ipqpxpe Gct alwx ngrgung, x trtakirpedeu nzrka-mou-krbzgu blz mz nzxpe-krde alwx.

Nzmnncngr Kxmrna Mz Nzesz'tikr Drtwr Kc ate

¹⁹ Mz nzmu-krde lcde, kx mzlengeng x inwengeng, mzli ka nelzgu nabr mz nzvztr-krgu mrkc Tqtr-esz'ngr Heven tqmncngr Gct, mz nzangio-krgu nide x nzkrka'-krbzku bade. Murde mepyr ngr Jiszs kc tqyrlpx-ngrmle nigu, ²⁰ aelwapx-ngrmle bagu lrpzki kxmrna kc tqlxpxpemle bagu lotqbr kc tqapqbrle Mrkc Tqtr-esz'ngr. X alele da lc mz nrkrdrqde kc tqbzom mz kros x tqtulz-mop. *

²¹⁻²² Navz-aepztrpzku mz Gct mz nzabrtr-krbzku drtwrgu bade mz nabzgu atwrnrngr. Murde Jiszs nide Nardr Pris ngrgu kc tqaclvle leplz amrlx neng Gct. X iklrpele mepyr ngrde mz nabzgu mz nzatubqti-krde nigu mz nzobqkr Gct, murde ma tqmwxlrtipeku nzayrplapxkr Gct nigu. X ipqpxpele alwx rgung mz nzwrkxtr-krgu. ²³ Delc natu-amqngiku mz nzbrtikr drtwrgu da kcng tqlxngitiku. Murde takitrde nzbrtikr drtwrgu

^{§ 10:7} Sam 40:6-8 ^{§ 10:8} Sam 40:6-8 ^{§ 10:13} Sam 110:1 ^{§ 10:16} Jeremaea 31:33 ^{§ 10:17} Jeremaea 31:34 * ^{10:20} Mzli kc Jiszs tqbzo-ngrmle mz kros, lotqbr kc tqdo Mrkc Tqtr-esz'ngr Mangr-nzangiongr tqpesaliom Gct le wq, tatxo mz noude, ncte li, mz nzaelwapx-krde kx abzo mzli lcde rlr-ngrbzle mz leplz nedeng nzvztr-krdr Mrkc Tqtr-esz'ngr tqmncpx-ngrmle. [Matiu 27:51; Mak 15:38; Luk 23:45]

Gct nzatutr-krde nzesalz-krdeng. ²⁴ X na-aoti zvz drtwrgu kxnamu naokatrku kztegung mz nzaelwapx-ngrbz nivz x nzale-ngrbz da kxmrlz. ²⁵ Bzkq vecpx-lzbqmamu mz nzyrlwr-lxblr-krgu badr lrmakxtr, kxmule-esz' kzdung leplz nzvecpx-lzbqpeng. A' navz zvz nzapqtr-etr-krgu drtwrgu, murde Mzli Kxmatq ycpe pipz nzvz-krmle, x mzli lc mzli r nzkxpungr kx nakqlu.

Bzkq Vecpx-lzbqmamu Mz Nzlxnngiti-krmu Mevalu Kxnzmcp

²⁶ Aclvetio-lzbqamu! Murde doa kx brtipe drtwrde Mevalu, zbz vecpx-lzbq-mop bade mz nzale-zvz-krde alwx, trpengr mou blz kx nakatxde alwx ngrdeng, murde ptxpxpe-ngrde blz kc tqkabz Mevalu. ²⁷ X trpengr da kx naobqtipxle, a' ngi txpwz nzayrplapxkr Gct nide mz Hxl, mrkc nyr kx nzulrde rbq naodati-ngrde enqmi r Gct amrlx. ²⁸ Murde krlzku kx mz nzvz-nqblq-krde Nzesz'tikr Drtwr Kc Kai, doa kx rnzlvzole Lou sc Mosis, x nzrlwangr leplz kxli o tq, trycpe-ngru drtwr, a' nanibq txpwz mz nzayrplapxngr nide. ²⁹ Nzmu kx tqmule lcde, mrlx kx rnzlvzole Mrlx Gct, takitrde nzayrplapx-zlwzngr nide. Murde mz nzpxtxpx-krde mepyr kc tqatubqtile nide mz Nzesz'tikr Drtwr Kc Ate, apusr-ngrde mepyr ngr Kraes da kxmane. X obqszo-kz-ngrde Mqngrkxtr kc tqokatr-kaile nide mz nzrlxnngiti-krde. ³⁰ Krlzku kx rpi Gct kx, "Ninge kx sa na-ayrplapxle leplz. X ninge kx sa na-ayzlu-mopwz badr da kx nzalelr." ³¹ Natq Gct rpi-moule kx, "Yawe sa napixle kx leplz nedeng nzvz-rbrng o trtingr." ³² ³¹ Gct kxlu, nzayrplapx-zlwz-krde leplz ngi da kx nzmwxlrti-esz'ngr.

Bzkq Rtctx-ngrnamu Da Kx Twzamu Mz Nzaxvctr-krbzmu Mz Mevalu

³² Na-aoti mou ena drtwrmu da kcng tqprtzing mzli kc tqlxnngiti-ate-ngrnamu Nrpakxmrlz. Mzli lcde, kxmule-esz' drtqmu etqtr mz da kxkqlu, a' nimu kc ye tqtu-amqngi-zvzamu. ³³ Kzdung mzli nzxtrnga-ngrdr nimu x nzaetqbzlr drtqmu mz mz leplz kxkqlu. X mz kzdung mzli kz, okatramu kztemung kx nzatrkti kz nidr. ³⁴ Mzli lc drtqmu etq lxblr badr kztemung kx nzamncpxmqng mz presin. X mzli kc tztxwzngr leplz dztumung mrka mz nrlc, drtwrmu trvzu. Murde krlzamu kx dztumu kx nzyctx-along Heven nzmyaszpx-zlwzlr dalr nrlc ka. ³⁵ Mz nzmu-krde lcde, bzkq rtctx-ngrnamu da kcng tqtwzamu mz nzaxvctr-krbzmu mz Kraes, murde na-aenzliamu Gct nzka-krbzle bamu da kxmrlzting kalr. ³⁶ Tu-amqngi-zvzamu mz nzale-krmu me pnz drtwr Gct, murde natwz-kzamu da kcng tqesalz-ngrbzle bamu. ³⁷ Murde Nzryrngrkxtr rpile kx, "Mrlx kc tqoliq mz nzvz-krmle, ycpe pipz nzvz-krmle. X nzvz-krmle trna-asau. ³⁸ Nzlukr kxntubqng tutr mz nzbrtikr drtwrdr Gct. A' doa kx yzluki-moule mz nibrde, sa nangyati drtwr Gct nide." ³⁹ A' trprtrpwzkuu mz leplz kcng nzyzluki-moulr mz nibrdr, x nzodating. A' prtrpzku mz leplz kcng tzbrti drtwrdr Gct, x nzrlapxng.

11

Leplz Kcng Navz-nqblqku Mz Nzbrtikr Drtwrdr Gct

¹ Nzbrtikr drtwrgu Gct, drtwr ngrde kx obqtipx-zpxku da kcng tqesalz-ngrde, x krlz-angidr-kzku kx da kcng amrlx tqipipxleng da angidr, kxmule-esz' trmckaku mz mzku. ² Abtzlvz Gct melrmqgung kcng bqnc mz tzbrti

² **10:27** Asaea 26:11 ³ **10:30** Lou Kcpwz 32:35; Sam 94:1; Rom 12:19 ⁴ **10:30** Lou Kcpwz 32:36; Sam 135:14 ⁵ **10:38** Habakuk 2:3-4; Rom 1:17; Galesia 3:11

drtwrdr nide. ³ X mz nzbrtikr drtwrgu Gct, dekc tqkrlzpe-ngrgu kx wzngrde mz natqde nrlc atwrnrngr, vzmi nepi, temz x vring. Drtwr ngrde kx Gct wz-ngrde da lcng amrlx tqmcku mz natqde kx trnzmcu. *

⁴ Ebol, mz nzbrtikr drtwrde Gct, dekc blz kc tqkabzle mz Gct tqmyaszpx-ngrde blz kc tqkabz Ken, kc trbrtiu drtwrde nide. X nzbrkr drtwrde atubqtile nide mz nzobqkr Gct, dekc tqabrtzlvz-ngrde animol kc tqkabz Ebol bade. Ebol alvztr-ngrde leplz kxmu nzbrtikr drtwrdr Gct krlzmle mzli ka, kxmule-esz' bzpe. *

⁵ Inck, mz nzbrtikr drtwrde Gct, dekc trbz-ngrdeu, a' vzmilzle nrkrdrtdqe Heven. X trpnzngr kx rmc nide, murde vzmilz Gct. Mz yiz kcng trtqki-tq-nzpnus' mz-nrade-nzlvqn (365) tqlu-ngrde mz nrlc, rpi Nzryrngrkxtr kx aelalmle drtwr Gct mz nqmq krde. *

⁶ Trpnzngr kx rkrlz nzaelalz-krm drtwr Gct, a' ngi txpwz doa kx brti drtwrde nide. X krkng tzvzmqng mz Gct nalxngitilr kx Gct sa tqmnc x okatr-zvzle krkng tzrtangtilr nide murde nakrlzlr nide.

⁷ Noa, mz nzbrtikr drtwrde Gct, dekc tqlxngiti-ngrbzle natqde mz nubla kc navzm, kxmule-esz' da lc trnzmc-pnzu mzli kc. A' mz nzvz-nqblq-krde natqde, wz-ngrde lcsu kc etu, murde narlapx-ngrdr badr lr ma nyzdeng. X mz nzbrtikr drtwrde Gct, dekc tqtubq-ngrbzle mz nzobqkr Gct, a' leplz kcng pnz trnzlxngitilru Gct nzbpeng. X mz nqmq lcpwz, leplz amrlx kcng trnzrlxngitiung sa nabzng x na-ayrkpxng mz Hxl. *

⁸ Ebraam, mz nzbrtikr drtwrde Gct, dekc tqvz-nqblq-ngrde natq Gct mz nzrlasz-krde mrnyzde mz nzvz-krde mrkzbzle kx nangi nyzde. Kxmule-esz' trkrlzleu mrlcde, a' sc tqvz ye. ⁹ Mz nzbrkr drtwrde, dekc tqmnc-ngrde mz drtc' kc tqpibz Gct bade, mz nzngini-krde lrnarnrlc mz drtc' kzble x ma nyzde ngi kzdq tent, da kc tzwai mrlxde Aesak ncdr mrlxde Jekop, kcng tzbrti kz drtwrdr Gct nzatutr-krde nzesalz-krde. ¹⁰ X mz nzaenzli-krde nzatutr-krdele, Ebraam sc tqobqtipx-kzle nzmnc-krde mz mzteadau kxtr kc tqyc tqyc, tqwzngr Gct Heven mz nzvz-nqblq-krde me pnz drtwrde. Murde lxngiti-zpwxle da amrlx kcng tqpibz Gct bade.

¹¹ Sera, mz nzbrtikr drtwrde Gct nzka-krbzle doa ncblo bade, dekc tqkangrbz Gct doa ncblo bade, kxmule-esz' Ebraam yiz ngrde trtqki-esz' (100) x Sera blangpe x vz-nrbalq. Murde abrtrpzle drtwrde mz Gct mz nzangidati-zvz-krde natqde. †

¹² Ebraam nipsee lrtzlvz x ycpe pipz nzbz-krde, a' nzkqlukr doa kx nzvzpxmqng bade apule vri ngr bongavz x nzkqlukr nqngi drta' kcng tqrblx nzrlwxngr, mz nzvz-nqblq-krde nzesalz-krbz Gct bade. *

¹³ Ncblo kxnzetu lcng nzbzmitxolr nzbrtikr drtwrdr Gct, kxmule-esz' trnztwzlrda amrlx kcng tquesalz-ngrbzle badr mzli kc tzmnc-ngrdr mz nrlc. A' se tzkrlzlr kx namclr kalr, x nzabrtzlvzlr. X trmyamiu naodr nzrplzpx-krdr kx nzapunepwzlr lr narnrlc x lr mrkzbzeng kx nzoklamqng mz nrlc ka. ¹⁴ Opx angidr kx leplz lcng tzplzpxlr da lc nzrtangtilr mrnyzdr kzble kxmyapxbz, krlcde Heven. ¹⁵ Nzmu nayc mz drtwrdr drtc' kc tzrlaszlr, e nzkrlzlr nzyzlu-mou-krdr. ¹⁶ A' nike nzsutitx-zlwzpe drtwrdr, nzmnc-krdr mrnyzdr kxmyapxbz, mrkc Heven. Dekc Gct tqoliqti-ngrbzle mzteadau nyzdr Heven mz nzabrtzlvz-krde nzrpi-krbzlr nide Gct rdr.

* ^{11:3} Mz Nou dckrlzde 1, rpile kx Gct wz-ngrde doa x da amrlx mz nzcmne-krde. X mz Jon 1:1-3 rpile kx Jiszs nide Natq Get kc tqwz-ngrde da amrlx. * ^{11:4} Nou 4:1-15 * ^{11:5} Nou 5:21-24 * ^{11:7} Nou 6:1—9:17 † ^{11:11} Mzli kc nubla trvzka-ngrmle nzlukr ncblo boi. A' mz mzli nyz Ebraam, mz nibr nubla lc, ncblo kc yiz ngrde trtqki-esz' (100) sc tqngipe lrtzlvz-zlwzpe, da kc tqwaipela mzli ka. * ^{11:12} Nou 22:17

17-18 Ebraam, mz nzbritikr drtwrde Gct, dekc tqrlrpx-ngrde mrlxde Aesak nzngini-krde blz, mzli kc tqabzpxngr Gct nide. Kxmule-esz' nzatutrkr Gct nzesalz-krde navzpxm mz Aesak, mrlx Ebraam kc esz'txu, a' abrtzlvzle nzka-krbzlele mz Gct. Murde rpibz Gct bade kx, "Mz Aesak nide kc navzkipxm nqvi lr ncblo nem kc tqipibo bam." [☆] **19** Opx angidr kx Ebraam abrtrpzle drtwrde mz Gct kc tqkrlzle nzatulz-mou-krmle Aesak mz nzbz-krde. X mzli kc Gct tr-rlrpx-ngrdeu nzbzkr Aesak, mz nzobqkr Ebraam apule kx tulz-mop mz nzbzngr kc tqycpwz pipz nzngida-krde. [Nou 22:1-18] ‡

20 Aesak, mz nzbritikr drtwrde Gct, dekc tqrlxti-ngrbzle bade nzamrlz-krde mrlxdeng Jekop x Isc mz da kx naprtzbzng badr x doa nedrng kalr. [☆]

21 Jekop, mz nzbritikr drtwrde Gct, dekc mzli kc nabzpe-ngrde, tqamrlz-ngrde mrlx mrlxde Josip kcng nzling, Manase x Efrem. X mzli lc sc tqglqpxpele Gct mz nztablzo-krmle mz nctoko scde. [☆]

22 Josip, mz nzbritikr drtwrde Gct, dekc mzli kc nabzpe-ngrde, tqycmnetr-ngrde mzli kx lr Israel narlasz-ngrdr Ijipt kalr. X pibzle badr nztwz-krdr nrvr ngrdeng mzli kc navz-ngrdr. [☆]

23 Trte x lxe Mosis, mz nzbritikr drtwrdr Gct, dekc tzamnc-kapq-ngrdr Mosis temz tqtz-ngrde mz nibr nzrmikangr. Murde nzglxlr kx doa lc mzte lqngivxi, dekc trnzmwxlr-ngrdru nzrnzlvzo-krdr natq king kx doa ncblo amrlx nanibqng. [☆]

24 Mosis, mz nzbritikr drtwrde Gct, dekc mzli kc tqetupe-ngrde tqpxtxpx-ngrde nzsri-krbz leplz nide mrlx inyx king. §

25 A' rlrpx-lzbq mz nzetqmikr drtqde leplz neng Gct, murde trsuti drtwrde nzabrtzlvz-krde nqmq ngr alwx mz ma nyz king, kx ngi dalr mzli kx mrbcnepwz mz nrlc ka. **26** Murde mz nzobq-krde nzaetqbz drtqde, namyaszlx-zlwzle nztwz-krde dztu lr Ijipt amrlx kcng tqmrlzvxi. Murde brtipe drtwrde nzesalzkr Gct nzatzlrx-krmle Mevalu Kxszmcpx, x obqtipxle da kxmrlzti kcng nakabz Gct bade Heven.

27 Mosis, mz nzbritikr drtwrde Gct, dekc tqrlasz-ngrde Ijipt. X trmwxlru mz nzngyatikr drtwr king nide. A' tu-amqngi zvz, murde opxm kx mcle Gct kc trpnzngkr kxrmc. [☆] **28** X mz nzbritikr drtwrde natq Gct, dekc tqabzpx-ngrde Nzamyangr, x kapxle natq kx mepyr ngr nei sip naiklr-ngrdr mz naonrx ngr ma nyz lr Israel amrlx, murde enjrl kc tqabz ma tqnibqtile doa ncblo nedrng, a' namya-ngrde nidr. [☆]

29 Lr Israel, mz nzbritikr drtwrdr Gct mz nzlolvz-krde prla mz nrlarde rlilr, dekc tzkawic-ngrdr Prla Bla, apule kx nzvzneng mepz. A' mzli kc tzabzngkr kz ami ngr Ijipt nzkawic-krdrle, prla lc tqyrpla-etrpe, x nzboong amrlx. [☆]

30 Lr Israel, mz nzbritikr drtwrdr Gct, dekc tqabrkaoole drkq rplz kxetu kc tqtu-ngalelvzle taon kc Jeriko, mz nibr zbq kcng rlimz tzvz-ngale-ngrdrle. [☆]

[☆] **11:17-18** Nou 21:12 ‡ **11:19** 11:17-19 Ismael, ni-kzde mrlx Ebraam. A' trngiu kx na-atutre nzesalzkr Gct. Ebraam nzrlrpx-krbzle mrlxde kc esz'txu mz Gct, ngi kzdq nzycmne-ebzpxngr mz nzrlrpx-kzkr Gct Mrlxde kc esz'txu, x mz nztulz-krm Kraes mz nzbz-krde. [☆] **11:20** Nou 27:28-29; Nou 25:19—36:43 [☆] **11:21** Nou 47:31—49:21 [☆] **11:22** Nou 50:22-26 [☆] **11:23** Nzrlaszngr 2:1-10 § **11:24** Murde krlz-zpxle kx nide lr Israel x trtakirdeu nide nzangio-krde gct ngrdr lr Ijipt. [Nzrlaszngr 2:10-12] [☆] **11:27** Nzrlaszngr 2:11-15; 12:51 [☆] **11:28** Nzrlaszngr 11:1—12:30 [☆] **11:29** Nzrlaszngr 13:17—14:31 [☆] **11:30** Josua 5:13—6:21

³¹ Srlx Reab, mz nzbrtikr drtwrde Gct ngrdr lr Israel, dekc tqrlapx-ngrde mz nznibqtingr lr Jeriko mz nzxpqbrrlr-krdr Gct. Murde abrtzlvle nzvz-krbz ncblo ngr Israel nzling mz nzaukzti-krdr taon kc Jeriko. *

³² Krlzx nzryapwx-ngrbepz, a' trpengr scnge mzli r nzyapwxti-krbo Barak, Gidion, Jeftz, Samson, King Devet, Samwel x ncblo kcng tznginidr profet. A' krlz-angidramu be ngrdrng. *

³³ Mz nzbrtikr drtwrdr Gct, dekc tzale-ngrdr da kxetuting. Nzaovxiolr lr mrkzbleng mz vea. Nzaolvz-krdr x nzaclve-krdr leplz tubq. X nztwzlr nike pipx Gct nakabzle badr. Nzrlapxng mz nao laion. ³⁴ Trpnzngr nidr kx ngc mz mzli r ngrdrng. * Nzamyalr toki r vea. Nzmwxlr-krdr batrpz Gct nzlrlipx-krde nzbr-zlwzkr nelzdr. Nztwzlr zmatq mz nzvecngr mz nzaovxio-krdr ami ngr mrkzbleng. ³⁵ Kzdung olvz, mz nzbrtikr drtwrdr Gct, dekc doa nedrng kx nzbzpeng tzatulz-mopqng mz nzbzng. * A' kzdu-kzng leplz nzluplxting mz toki r vea, murde mz drtwrdr nzbz-krdr x nzkrlz-krbzlr Gct namyaszlze nzesablqti-krdr nide x nzaopxkr drtqdr.

³⁶ Kzdu-kzng kx nzbrti drtwrdr Gct nzyrpalelvzting x nziklating. X kzdung nzatolva-ngrng mz sen mz presin. ³⁷ X kzdung nidr nzvaebqting mz rplz, nzlawilr kcng mz vau rdr, x nznibq kcng mz toki r vea. Nidr kxtrnzrngiscung kx nzpxinepwzng be sip x gout. Trpnzngr nadr dakxnxng. X nzaetqtibzng drtqdr x nzatrkating.

³⁸ Kxmule-esz' leplz lcng tzbrti drtwrdr Gct nidr kxtrnzrngiscung x nzvzneng lzke x mz newz, x nzmncpxmqng mz butqbr x nzmnczmqng mz gq, a' nidr leplz kxszmyapxbzng mz nzobqkr Gct, x trtakitrdeu leplz ngr nrhc nzmnc-krdr badr. ³⁹ Leplz lcng amrlx nztubqng mz nzobqkr Gct, murde nzbrti zvz drtwrdr nide. A' trnztwzluu nike pibz Gct nakabzle badr. ⁴⁰ Murde yrlqpe drtwr kx na-amrlzle nigu amrlx mz mzli lcpwz. X leplz lcng na-aenzlipwzlr nigu mz Nzesz'tikr Drtwr Kc ate mz nzaxvctr-krbzku mz Kraes. Murde natwz-lxblrku badr nztubqng kxmyapxbz mz nzprtr-kz-krgu badr mz nzlungr kxboi.

12

Navz Zvz Nztu-amqngi-krmu Mz Nzvz-nqblqngr Mevalu

¹⁻² Nakrlzku kx leplz kcng mzli kc tzbrti drtwrdr Gct, nidr zbo ngr leplz kxetut Heven, kx nzobqlvz-ngrdr nigu mz nrhc ka. Murde nagzlvz-ngrdr nzabrtzlvz-krdr nzbrti-kzkr drtvrgru Gct. Murde apuku leplz kcng tzvong mz nzesangr. Mz nzmu-krde lcde, nartctx-ngrgu doa x da amrlx kcng tzaotrlr nigu, x mz alwx kcng tzlolz-amqngilr nigu, mz nzbattr-krmlr nzaotikr drtvrgru da kzbleng nzmyaszpx-krdr Gct. A' na-aoti txpwz drtvrgru Jisz, kc tqaenzlile nigu mrhc tqesakingr nzesangr lc. Murde natwzku nzlungr kxboi kc tqkabzle mz leplz amrlx kcng tzayrkrpxlr nzesangr lc. Nide kc tqokatrle nigu mz nzbritikr drtvrgru nide, x sc tqvz zvz nzokatr-krde nigu mz nzvz-nqblq-krgu lrpzki rde. Jisz tu-amqngi zvz mz nzale-krde me pnz drtwr Trtede. X drtwrde trmeiu mz nzamyatilz-ngrbz drtqde mz nzrtqlvztrnegr nide mz kros, murde obqtipxle nzabrtzng kx navzm. X mzli ka, abrtzlvzpele nwxbu-krde me matq-esz'ngr mz nrlar Gct kxrtc * mz nzaclve-krdr ncdr. ³ Nzaoti drtwrmu nide kc tqtu-amqngi mzli kc tzatrkti ngr leplz ngr alwx nide x na-apu-kzamu nide, murde nabzmu

* **11:31** Josua 2:1-24; 6:22-23; James 2:25 * **11:32** Kxnzryrlqng Drtwr dckrlzdeng 4 (Barak), 6-8 (Gidion), 11-12 (Jeftz), x 13-16 (Samson). 1 Samwel dckrlzdeng 16-30, buk kc 2 Samwel x 1 King dckrlzdeng 1-2 (Devet). Mz mzli nyd Devet Samwel nide Kxryrlq Drtwr x Profet. * **11:34** Daniel 3 * **11:35** 1 King 17:8-24; 2 King 4:8-37 * **12:1-2** Sam 110:1

ma tqtalvzo. ⁴ Murde krlzmle mzli ka, Gct tr-rlxtipwzleu bamu nzrlrpx-krmu nzlu-krmu mz nzaetq-ngrbz drtqmu nzkapx-lzbq-krmamu mz alwx, da kc tqwai Jiszs. ⁵ Bzkq mrbrtr mz drtwrmu kzdq ngalr Nzryrngrkxtr kc tqabrl nelzmu x drtwrmu. Murde rpile kx leplz neng Gct nidr doa nedeng, mz nzsri-krde kx, “*Doa nenge, mzli kc tqatubqtingr Gct nim, acvetio-lzbq. X bzkq nabzm talvzo mzli kc tqapnani-ngrde nim.*” ⁶ *Murde Gct atubqtipwzle leplz kcng amrlx tqmrlztileng. X ayrplaxle leplz kcng amrlx tqapusr-ngrde nidr doa nedeng.*” ⁷ Nzkxpungr amrlx ngi dalr nzatubqtingr nimu. Murde dekc Gct tqapusr-ngrde nimu doa nedeng. Murde trte doa amrlx nzatubqtilr doa nedrung. ⁸ Gct ayrplaxle doa nedeng amrlx kcng tzvz-rbrng. Nzmu trna-ayrplaxleu nim, trnipqu doa nede angidr. ⁹ Mz nrlarde nydz trtegung mz nrlc, amrluekung nidr, mz nzatubqti-krdr nigu. Dekc namnclz-angidr-ngrbzku kz mz zmatq ngr Trtegu kc Heven, murde naluzpxku. ¹⁰ Trtegung mz nrlc nzayrplaxlr nigu mzli kx mrbcnepwz, mz nzvz-nqblq-krde me tubqkile mz drtwrdr. A' Gct ayrplaxle nigu, murde naokatrle nigu x naprtrku mz nztubq-krde. ¹¹ Mzli kc tqayrplaxngr Gct nigu, drtwrgu vz x drtqgu etq. A' mz nzrlr-krbzku nzayrplaxngr lc nzalvztr-krde nigu, nrade sa nayc-zvzbz. Murde sa namncpeku badr mz nrwz x natubqku mz nzobq-krde. ¹²⁻¹³ Mz nzapu-krmu kxnxvong mz nzesangr lc, bzkq mqmu yangrnga x nanycmu rnrc. A' navo-zvzamu mz lrpzki angidr x naokatramu ncblo kxbxplo, murde ma tqtao. A' nanycde namrlz mou, murde na-ayrkrpx-kzle nzesangr lc. *

Bzkq Esablqtiamu Zmrlz Ngr Gct Kxmyalz

¹⁴ Abzamu nzmnc-krmu badr leplz amrlx mz nrwz, myapxbz kxnxrlxngiting. X yrlqpx-lzbqamu mz alwx, murde krkcng nqmq krdr drka'ngr, trtxpnzngz nzmnc-krdr ncdr Kxetu Heven. ¹⁵ Acvetio-lzbqamu, murde ma tqesablqtiamu zmrlz ngr Gct kxmyalz. Trmrlzu kzdq nimu nzapu-krde lxbi kxtrka kx lvcpulzm x aprctile leplz kxkqlu, mz nzatrkti-krde leplz neng Gct mz nzapu-krdr nrlanc nydz. ¹⁶⁻¹⁷ Acvetio-lzbqamu, murde ma tqvz-rbr-zvzamu x tqmasz drtwrmu Gct mz nzapu-krmu Isc. Murde kzdq zbq kx brtale-zlwz-ngrde, aprcbzle zmatq ngr nzngini-krde doa kx mzte nzmc kai mz mzlede kxtopwz, Jekop, murde nakabzle bade plet ngr dakxnzng kx esz'txu. A' mz nibrde, Isc suti drtwrde trtede nzamrlz-krde nide mz nzngini-krde doa ncblo kc kai, a' rblxpe. Kxmule-esz' yrnitirpzle nzamrlzkr trtede nide, a' trpnzngz da kx natekqtrngr Isc nzvz-rbr-krde. [†]

¹⁸ Nzesz'tikr Drtwr Kc Ate blepxbz mz Krkc Kai. Murde lr Israel mz mzli nydz Mosis nzvzbzng mz Newz Saenae kc tzbxtrlr x nzmlcr nzngco-krm nyr kxetu elr. X mrlcde wx-nzlongr x tulvz trlipu, x nzmwxlrti. ¹⁹ X nzxlrlr nzynikr trpu vzmi natq Gct kx ycmnebz badr. Natq lcde nzmwxlrti, x sc tzynitrbpebzng mz Mosis kx narlxtrbzle mz Gct kx bzkq ycmnepebz badr. ²⁰ Murde nzmwxlrti natqde kx xplrc kx tqkabzle badr, mz nzsri-krde kx, “*Bzkq doa x animol kx bxtrle newz kxtr lc, murde mz nzbxtr-krdrle,*

* ^{12:6} Nzryrplaxngr 3:11-12 * ^{12:10} Sam 119:75 * ^{12:12-13} Drtwr ngrde kx na-apqtramu drtwrmu kc tqmatxpe x na-apxlr-mouamu nabzmu kc tqtalvzo, murde natu-amqngi-zvzamu mz nzbrtikr drtwrmu Gct. X na-alvztr-zvzamu da kxtubq mz nzokatr-krmu leplz kx nabzdr ngrgo, murde naplrx-moung x naprtr-kzng mz nzlungr kxboi. * ^{12:16-17} Nou 25:27-34; 27:32-40

† ^{12:16-17} Bzkq apuamu Isc mz nztekqtr-krmu nzmnc-alo-krmu Heven kalr mz nzale-krmu alwx mzli kxpliz mz nrlc ka. * ^{12:19} Nzrlaszngr 20:18-19

navaebqti mz rplz x nabz." ²¹ Mzli lc, nzrmctingr Gct nzmxwlrti. Murde mz nibrde rpi kz Mosis kx, "Rnrcti-lzbqnge mz zmwxlr." ^{*}

²² A' mzli ka, rmctiamu Gct mz Nzesz'tikr Drtwr Kc Ate tzyrlq mz Newz Saeon, mrkc tqbzo-ngrm Mevalu. X vzmamu mz Gct kx tqlu mz mzteadau kxtr Heven, krlcde Jerusalem Kxmrna, mrkc trtqki r siu ngr enjrl tzglqlzlr x tzangrlvzlr Gct. ²³ Vzmamu mz nzyrlwr-lxblr-krmu mz nzabrtzngr badr doa neng Gct amrlx kcng drtqdr tzyropeng Heven, murde narmctiamu Gct kc napibzle mz leplz amrlx nzvz-rbr-krdr o trtingr. A' nimu leplz kxnxmyapxbzng murde apuamu mrlx kc mzte tzmc kai, x natwzamu nzlungr kxboi badr leplz amrlx kcng mqngrdr tqtubq murde atubqti Trtemu. ²⁴ X vzmamu mz nzrmcti-krmu Jiszs, kc tqtu mz mzlirmu badr Gct mz Nzesz'tikr Drtwr Kc Ate. Murde drtqmu naiklrg mz mepyr ngrde, kc tqyrnitirpzle mz Gct nzipq-krde nimu. Mz nzmu-krde lcde, mepyr ngrde myaszlzle mepyr ngr Ebol, kc tqyrnitirpzle mz Gct nzayzlu-krbzlele mz Ken. ^{*}

²⁵ X mz drtwr lc, aclvetio-lzbqamu. Bzkq apqbrtramu nradrtqmu mzli kc tqycmne-ngrbz Gct bamu. Murde kzdung melrmqmung nzbz-along mz nzayrplapxkr Gct krkcng tzpxtxpx-ngrdr nzlalztq-krbzlr mz natq Mosis mrka mz nrlc, mz nzngini-krde menrpa ne Gct. Nzmu kx tqmule lcde, opx angidr kx sa nabz-alo-kzku mz nzayrplapx-zlwz-krde krkcng tzpxtxpx-ngrdr nzlalztq-krbzlr mz Mevalu kc tqmnc Heven. ²⁶ Mzli kc nrlc aycngrlr natq Gct. A' mzli ka, rpipxpele kx, "*Mou dq nzwrde naesz' sa na-aycngrlrrlilr-ngrne nrlc x bongavz.*" ^{*} ²⁷ Mz natq kcng tqrpile kx, "*Mou dq nzwrde naesz'*," drtwr ngrde kx Gct sa nakatx-atwrnr-ngrde da amrlx kcng mzli kc tqwz-ngrde tzycngrlrng, murde natekqtrle mz da kxmrna kx trnaycngrlrun x nayctx-along. ²⁸ Mz Nzesz'tikr Drtwr Lc Tqate, nzaclve-krgu badr nrlc vztv alo x trycngrlru. Delc, na-awi-ngrbzku bade da lc. X na-angioku nide mz nzamrlue-krgu x nzmyatitr-krgu nide. ²⁹ Murde Gct rgu apule nyr kx odatile da kxtrka amrlx. ^{*}

13

Kxnamu Nzaelalz-krmgu Drtwr Gct

¹ Navz zvz nzmlzti-krmu kztemung mz Kraes. ² Adwatramu lr narnrlc mz ma nyzmung. Murde kzdu leplz kx nzalelr da lc mzli kc, nzadwatrnge enjrl mz ma nyzdr, kxmule-esz' trnzglxlru nidr, murde mz drtwrdr kx leplz txneng. ^{*} ³ Okatramu x krka'-ngrnamu kxnxmncng mz presin x kx drtqdr etq, na-apule kx mncamu badr x drtqmu etq lxblr badr, myapxbz kxnxrlxngiting.

⁴ Ncblo x olvz kxnyrlzng nayrlq-angidr-zvzlr nzesalz-krdr mz nzyrlz-krdr. X bzkq rmwimiamu doa kx trngiu kernalzmu. Murde Gct sa na-ayrplapx-zlwzle leplz kxnxmulr lcng. ⁵ Bzkq mrlz zlwzbz bamu trau. A' abrtzlvz-txpwzmu nikeng ycbz bamu, murde Gct rpile kx, "*Trtxpnzngr nzrlasz-krnge nimu, x trtxpnzngr nzyrlqpx-lzbq-krnge mz nzokatr-krnge nimu.*" ^{*} ⁶ Mz nzmu-krde lcde, nelzgu nabr mz nzsri-krgu kx, "*Trtxpnzngr nzmxwlr-krnge, murde Yawe tu-zvzm mz nibrnge. X trtxpnzngr leplz kx krlzle nzatrkatr-krde ninge.*" ^{*}

⁷ Na-aoti mou drtwrmu kxnxmailzlr nimu kcng tzalvztrlr nimu mz natq Gct. Mc-zpwxamu da kxmrlzting kx nzvzpxmqng mz nqmq krdr, x vznqblqamu lrpzki rdr mz nzbrtrkdr drtwrmu Kraes. ⁸ Jiszs Kxnxmcpk nqmq

^{*} **12:20** Nzrlasngr 19:12-13 ^{*} **12:21** Lou Kcpwz 9:19 ^{*} **12:24** Nou 4:10 ^{*} **12:26** Hagai 2:6
^{*} **12:29** Lou Kcpwz 4:24 ^{*} **13:2** Nou 18 ^{*} **13:5** Lou Kcpwz 31:6, 8 ^{*} **13:6** Sam 118:6

krde kc pnz, sc tqvzbe mzli ka, x tqvzpe tqvzpe. Murde trpengr nztekqtr-krde nqmq krde.

⁹ Bzkq rlr-ngrbzmu mz leplz kxnzalvztr-ngrdr da kzbleng nzmailz-krdr nimu mz nzvz-rbr-krmu. Nzxpathr-krmu mz nzvz-nqblq-krmu nqmq kr Gct vzpxm mz zmrlz ngrde kxmyalz, a' trvzpxpuu mz nzvz-nqblq-krmu lou kcng mzli kc tqpixle dakxznng kx takitrde nzmung. Murde nzvz-nqblqngr lou kxnzmulr lcng trokatrleu leplz mz nzmnc-nqblq-krdr Gct. *

¹⁰ Mz Nzesz'tikr Drtwr Kc Ate, Mevalu rlrpx-lzbq mz olta nyz Gct Heven mz nzngini-krde blz kx katx-alopele alwx ngrgung, nigu kxnzrlxngiting amrlx. A' leplz kx nzmnclzbzng mz Krkc Kai mz nzrlrpx-krdr animol mz olta ngr Mrkc Tqtr mrka mz nrlc, trnatwzlu da kxmrlzting kcng tzvzpxmqng mz blz kr Kraes. Murde nzpxtxpx-ngrdr nide. ¹¹ Mz Krkc Kai, nrkrdrtq animol kx ngi blz, nzangctrpz mz nrlarde kc yz ngr mztea. Zbz Nardr Pris twztrle mepyr ngrde Mrkc Tqtr-esz'ngr mz nzrlrpx-krbzlele mz nzxpe-krde alwx ngr leplz. ¹² Mz nqmq lcdepwz, Jiszs nzaetq-kzpz drtqde mz nrlarde kc yz mzteadau Jerusalem. X rlrpx-ngrde mepyr ngr nzbz-krde Mrkc Tqtr-esz'ngr Heven, mz nzxpe-krde alwx rgung x mz nzatubqti-krbzle nigu mz nzobqkr Gct. ¹³ Rblk nzprtrnegr mz Nzesz'tikr Drtwr lcng li, mz mzli kxesz'. X krlzku kx leplz kx nzrpilr namnclz-zvzbzng mz Krkc Kai nzamyatibzlr drtq Jiszs x nzpxtxpx-ngrdr nide, mz nztqvlztr-krdr nide mz kros mz nrlarde kc yz mzteadau. Delc, mz nzprtr-krgu badr mz Krkc Tqate, narlr-ngr-kzpzu mz leplz kxnzmulr lcng nzamyati-krbzlr drtqgu x nzpxtxpx-krdr nigu. ¹⁴ Murde trpnzngr me namnc-alo-ngrgu mrka mz nrlc. A' obqtipxku nzmnc-alo-krgu mrnyzgu Heven kc navzm.

¹⁵ Mz nzmu-krde lcde, mz nzaxvctr-krbzku mz Jiszs, narlrpx-zvz-ngrbzku blz ngr nzglqlz-krgu Gct, mz nzawing. Murde takitrde leplz kx nzpixlr kx nide Kxetu Lod rdr nzale-krdr da lc. ¹⁶ Okatr-lzbqamu mz nzaki-krmu dztumung, murde krklc blz kx elalz-ngrm drtwr Gct.

¹⁷ Vz-nqblqamu kxnzetu rmung kcng tzaclvelr nimu lrmakxtr, mz nzale-krmu nike nzpibzlr. Murde nzaclvelr nimu x suti drtwrdr kx nzbrtikr drtwrmu Gct naetunepx zvz. X sa narlwa-ngrbzlr bade kalr. Vz-nqblqamu nidr murde na-abrtzlvzlr nzale-krdr nzwzng lc, murde ma drtwrdr tqvz, mz nzrblxkr nzwz-krdr mz nzokatr-krdr nimu.

¹⁸ Krlz-angidrkr kx vz-nqblq-zvzkr nqmq kr Gct x trvz-rbrkru, murde suti txpwz drtwrgr nzalengr da kxtubq x mrlz. Krka'-zvz-ngrnamu nigr, murde navz zvz nzale-krgr da lc. ¹⁹ Rlxti-zlwzbo bamu nzkrka'-krmu ninge, murde navz-ani-mopwc' bamu.

Nzkrka'ngr Mz Nzamrlzng

²⁰⁻²¹ Krka'-ngrne kx Gct kc tqngi nou nzmnc-zpxnxng nakabzle bamu da amrlx kcng trpnzngr bamu mz nzale-krmu me pnz drtwrde. X nabatrzple bamu nzaelalz-krmamu drtwrde, mz nzokatrkr Jiszs Kxnmcp. Murde Gct yrlqpele Nzesz'tikr Drtwr Kc Ate tqyc tqyc, mz nzyrlekr mepyr ngr Kxetu rgu Jiszs. X atulz-mople nide mz nzbzng, murde nanginide Kxaclve Sip Kxmyapxbz. X nzglqlzng Mevalu Jiszs navz zvz. Eu, angida.

Natq Ngr Nzarlr-lzbqng

²² Mzlengeng x inwengeng, rlxti-zlwzbo bamu nzlalztq-angidr-krmu mz natqng lcng tqyrbo bamu mz nzrngidrlvz-krbo nimu x nzapqtr-krbo

* ^{13:9} Rom 14:1-23; 1 Korint 8:1-13 * ^{13:9} Kzdung lr Jiu kxnzlxngitilr Jiszs suti drtwrdr nzvz-nqblqngr Lou sc Mosis, murde ma tqpxtxpxng Gct nidr. Lr makxtr kcng mzli kc drtwrdr tresz'tiu mz da lc.

drtwrmu. Murde nzryrngr lc trboi-zlwzu. ²³ Nakrlzamu kx mzlegu Timoti nzrlrppe-ngrm mz presin. Nzmu kx tqkrlz-animle mrka, sa navzbzkr rlilrgr mz nzoklati-ngrbz nimu. ²⁴ Pibzmu mz kxnzaclvelr nimu, x leplz ne Gct amrlx mrla kx rpibo badr kx, “Nimu la.” X lrmakxtr ngr Provins kc Itali nzrpi-kzpplr bamu kx, “Nimu la.” ²⁵ Krka'-ngrne kx Gct naokatr-zvzle nimu amrlx mz zmrlz ngrde kxmyalz.

Nzryrkr Jemes

Natq Ngr Nzaplxtqngr Mz Nzryrkr Jemes

Mwx Jemes yrle letz lc mz mzlis yiz 46—49 AD mz nibr nzrmcngr mz Jiszs. Yrbzle mz lr Jiu kcng tzmnc-rlrubzng mrkc Israel. Jemes lc nide mzle Jiszs, [◊] a' trnginideu aposol Jemes, mzle Jon, aposol kc tznibq kai murde vz-nqblqle Jiszs. [◊] Jemes lc trlxngiti-kaileu Jiszs, a' mz nibr nztulz-krmle mz nzbzngr, sc tqlxngiti-atele. [◊] Jemes badr mzledeng nzaenzlilr nzvzo-krm Mqngrkxtr mrkc Jerusalem. [◊] Mzli trboiu Jemes sc tqnginipede kzdq kxetu kxmyapxbz mz lrmakxtr kc Jerusalem. [◊] Jemes ncdr mzlede Jud kc tqyrlle letz nzrpibz ‘Nzryrkr Jud,’ trnznginidru aposol. A' nidr kxnzetung kx nzamrlue zlwz kxnzrlxngiting. Mz nibrde nzkabzlr bade drtqde, ‘Jemes Kc Tqtubq.’ Mz yiz 62 o 66 AD nznibq nide murde lxngitile Jiszs.

Jemes ycmnetr-ngrde nzrlxngiti-angidrngr kx krlzle nzarlapx-krde nigu. Rpile kx, ‘Mane nzrpikr doa kx lxngitile Gct, a' trpnzngr da kxmrlz kx vzpxm mz nzrlxngiti-krde.’ Murde nzrlxngiti-angidrngr batrpzle mz leplz nzmnclz-krbzlr mz Gct x nzvz-nqblq-krdr natqdeng. X okatrle nigu murde na-aclve-lzbqku mz nzycmne-krgu. X okatr-kzle nigu nztu-amqngi-krgu mz mzli r nzatalzngr, murde ma tqaleku alwx. X nzrlxngiti-angidrngr okatr-kzle nigu mz nzaenzli-lrpi-krgu nzyzlu-krm Jiszs. X kxmule-esz' mncku mz nzkxpungr, a' okatr-kzle nigu nztu-amqngi-krgu mz nzabrtzng.

Kzdung ngalrdeng kx nzmyapxbzng mz letz lc nidr seleng. [◊]

Natq Kcng Kai

¹ Ning Jemes, wztrpo mz Gct x Kxetu rgu Jiszs Kxnzmcpx. Ryrbo bamu nimu lr Jiu kcng tzlxngitilr Jiszs, tzakiting mztea amrlx mz nrlc ka. Rpibo kx, “Nimu la.”

Nzrlxngitingr Kx Tu-amqngi Mz Nzxpungr

² Mzlengeng x inwengeng, mzli kznikeng nzprtz-ngrbz nzkxpungr bamu, na-abrtzlvzamung. ³ Murde nakrlzamu kx nzkxpungr lcng nzkrlzlr nzaxplr-krdr nzrlxngiti-krmu. Nzmu natu-amqngiamu mz nzrlxngiti-krmu, sa naokatrle nimu mz nztu-amqngi-krmu mzli kx nzkxpungr vztr-mou-ngrmle. ⁴ Mz nzmu-krde lcde, navz zvz nztu-amqngi-krmu mz nzkxpungr lcng, nakrlzbzle mzli kx nayrkpx-ngrbzle. Murde mzli lc nzrlxngiti-krmu sa nabrpe, x nakrlzamu nztu-amqngingr kxmule-esz' da kx prtz.

⁵ A' doa kx trkrlz-zpwxleu da kx na-alele narlxtibzle nzyrplapxngr mz Gct. Murde Gct abrtzlvzle nznka-nrbalq-krbzle nzyrplapxngr mz krkcng amrlx tzrlxbzng bade. ⁶ A' narlrpx-lzbq-ngrnamu mz nzvz-nqblq-krmu me pnz drtwrde, mz nzrlx-krbzmu bade nzyrplapxngr. X bzkq drtwrmu li, mz nzapu-krmu da kx twztine trmilo ngr prla. ⁷⁻⁸ Murde Gct trpnzngr nzayzlu-krbzle natq leplz kcng drtwrdr tqli, mz nztekqtr-zvz-krdr drtwrdr.

⁹ Kxrlxngiti kx ngi doa txne na-abrtz murde nide doa kxmyalz mz nzobqkr Gct. ¹⁰ X kxrlxngiti kx ngi doa kxetu mz nzngini-krde bcnyr, na-abrtz mz nzavzo-lzbq-krde, murde krlzle kx Gct tramatqleu nzngini-krde bcnyr. Murde doa kx ngi bcnyr apule nnpq mqmya kc tqkawpx mz nourla

[◊] : Matiu 13:55; Mak 6:3; Galesia 1:19 [◊] : Aposol 12:1-2 [◊] : 1 Korint 15:7 [◊] : Aposol 1:14
[◊] : Aposol 12:17; 15:13-21; 21:18; Galesia 2:9, 12 [◊] : 1:2, 17, 22; 2:17; 3:2, 17; 4:17; 5:16

x sc tqblotrpe mzli kc mz milzpq. ¹¹ Mz nzprt-z-krm nepi nzulrde aglrtle nrpq mqmya kc x sc tqtaope, x nzluli-krde lc tqykrpxpebz. X nakxmu-kzpze lc mz bcnyr kc, murde sa nabz mz mzlis nzale-krde da.

¹² Sa namrlzbz mz doa kx tu-amqngi mz nzkxpungr x drtwrde trlcu. Murde mzli kc nzkxpungr lcng nayrkrpx-ngrbzle, sa nakabz Gct bade da kc tqmrlz tqngi nzlungr kxboi. Murde esalz-ngrde kx nakabzle mz leplz kcng tzmrlztilr nide. ¹³ Mz mzlis nzkxpungr, bzkq rpiamu kx, "Gct rpile nzabzle ninge." Nzaongr nqmq nr drtwr lc vz-rbr, murde Gct trpnzngr nzatalz-krde leplz x trpnzngr doa kx krlzle nzatalz-krde nide. ¹⁴ Nzabzngr vzpxm mz nim esz'-krm x da kxtrka kcng tqsuti zlwz drtwrm. Da kxnmulr lcng dek tqabzle nzvecpx-krde nim. ¹⁵ Murde nzaoti-zvzkr drtwrm da kxtrka kxtopwz, sa natwzle nim mz nzale-krm alwx lcde. X mz nzale-zvz-krm alwx lcde, sa natwzle nim mz Hxl.

¹⁶ Mzlengeng x inwengeng, bzkq rlr-ngrbzmu mz Setzn nzesabrti-krde nimu, mz nzrpi-krmu kx Gct abzle nimu. ¹⁷ Murde Trte kc Heven, nide nou da amrlx kcng tqmrlz, tqtubq-esz'ngr. Nide Kxrpalz kc tqwz-ngrde da amrlx kcng tqyzlrngr mz bongavz. X kxmule-esz' da lcng nzkrlzlr nztekqtrngr me nztu-ngrdr, a' Gct trpnzngr nztekqtr-krde nqmq krde. *

¹⁸ Mz nzvz-nqblq-krde nzmrlzkr me pnz drtwrde, Gct batrple bagu nzngini-krgu doa nedeng murde lxngitiku kx Nrpa ngr Jiszs ngi da angidr. Murde nanginigu doa nedeng kcng ayrnrngr mz leplz amrlx kcng naprtrpzng bade kalr.*

Nqm Kr Doa Angidrng Ne Gct

¹⁹ Mzlengeng x inwengeng, bzkq mrbrtr mz drtwrmu da lcng. Lalztq-angidr-kaiamu. Bzkq anitiamu nzycmnengr. X bzkq drtwrmu ngya ani.

²⁰ Murde zngya trngiu nou da kxtubq mz nzobqkr Gct. †

²¹ Mz nzmu-krde lcde, esablqtiamu da kx nzatrkatilr nabzmu x rtctx-ngrnamu nzngyatikr drtwrmu leplz mz nzmailz-krde nimu mz alwx. Avzolzbqamu mz nzlxngiti-krmu natq Gct kc tqayzuole mz nabzmu, murde natq lcng nzkrlzlr nzarlapxngr nimu.

²² A' bzkq esabrti-lzbqamu mz nxzlr-krmu natq Gct. Murde krkcng tzlalztqng mz natqde, navz-nqblqlr da kx pile. ²³ Doa kx esabrti-lzbq, apule mrlx kx mctrle mqngrde mz dzpq. X mcle kc dq da kx trtubqu. ²⁴ A' mzli kc tqvz-ngrde, mrbrtr mz drtwrde da kc tqmcle tqvz-rbr. X trpnzngr da kx tekqtrle. ²⁵ Mz nqmq lcpwz, natq Gct apule dzpq mz nabzgu. Murde doa kx aoti zvz drtwrde nzmcnegr kxtubq kx krlzle nzarlapxngr nide mz zmatq ngr alwx, da kx alele nrade nayc-zvzbz. Murde trmrbrtru mz drtwrde nqmq kr Gct, a' vz-nqblq-zvzle.

²⁶ Doa kx rpile kx Gct na-abrtzlvzle nide, a' traclvetio-zpxleu nzycmne-krde, ncblo kxmule lc pokiaty-lzbq. Murde kxmule-esz' aleti-kzle kzdzung da kxmrlz, a' Gct trabrtzlvzleu nide. ²⁷ Murde da kx abrtzlvz Gct Trtegu nidr seleng. Aclve-angidramu doa kxnmulr kx olvz kx nzbzs-kzng kx trpnzngr kx na-aclveng nidr. X bzkq aleamu alwx, da kc tzwai lr nrlc, murde sa na-atrkatile nimu mz nzobqkr Gct.

* ^{1:17} Sam 102:25-27; Hibru 1:10-12 * ^{1:18} 1:17 Mz mzli ny Jemes, leplz kxnmulr nzmwslng murde nzlxngitilr kx nepi, temz x vring mz bongavz nzbaprzlr da kxbrngz x kxtrka kcng tzprtzbgz mz leplz. A' nzao-krdr drtwrdr vz-rbr, murde trpnzngr da kxtrka kx vzpxm mz Get kc tqmrlz-esz'ngr.

† ^{1:20} Nzngyakr drtwr kxtubq vzpxm mz Gct mzli kx nzatrkatigr nide, da kc tzwai Jiszs mz nzngyakr drtwrde nzatrkatigr Mangr-nzangiong Yawe.

2

Bzkq Nzamrluengr Kxnzetung Myaszpxle Leplz Txneng

¹ Mzlengeng x inwengeng, bzkq amrlueamu kzdung leplz nzmyaszpx-krde kzdung kz leplz. Murde mz nzlxngiti-krmu Kxetu rgu Jiszs Kxnzmcpk, nakrlz-kzamu kx nide txpwz kxmyapxbz mz leplz. ² Mwx kzdq mzli kzdq bcnyr kx pxi lrpz kxmrlzvxi navzm mz makxtr nyzmu, x mzli lcpwz navz-kzpq kzdq doa kxtr-rngiscu kx pxine lrpz txne. ³ Bzkq amrlueamu ncblo kc tqpxi lrpz kxmrlz, mz nzhpi-krbzmu bade kx, "Wxbu mrlcde se tqbrngz." X bzkq obqszoamu doa kxtr-rngiscu, mz nzhpi-krbzmu bade kx, "Wxbunepwz mz nibr leplz kxkqlu." ⁴ Murde mz nzale-krmu da lc, vz-rbramu mz nzobqkr Gct. X akipxamu leplz mz nzamyalz-krmu kxnzetung kx ngi bcnyr murde narkabz bamu da. A' da kx myapxbz nzrvz-nqblqngr nqmq kr Kraes.

⁵ Lalztq-angidrmamu, kx mzlengeng x inwengeng. Gct mcpkle kx-trnzrngiscung mz nrlc ka murde nabrti zlwz drtwrdr nide x natwzlr da kcng tqvzpxm bade mz nzngini-krde King rdr x narmctilr nzlungr kxboi Heven. Murde da lcng tqpixle nakabzle mz leplz kcng tzmrlztilr nide.

⁶ Mz nzmu-krde lcde, bzkq obqszoamu kxtrnzrngiscung. Murde bcnyrnx kx kxnzetung nzatrkatilr nimu x nztwzlr nimu mz kot. ⁷ X nzhpiivxiti-kzng drtq Jiszs, kc tqngi nede nimu.

⁸ Nakrlzamu nzalengr da kxtubq mz nzvz-nqblqngr natq kxmyapxbz mz Nzryrngrkxtr, kc tqrpi-ngrde kx, "Namrlztiq kztemqng da kc tqwaiq nzmrlzti-lzbq-krm." ⁹ A' nzmu kx tqmrlzti-txpwzmu kzdung leplz, ngipe alwx. X vz-rbramu mz Lou sc Gct. ¹⁰ Kxmule esz' doa kx rtrngztibzle da amrlx kcng tqyc mz Loukxtr, a' vz-rbrti-alzule kzdq da kxtopwzne, e apu-kzpwzle doa kc tqtao mz lou kcng amrlx, x takitrde nzayrplaxngr nide. ¹¹ Murde Gct kc tqrpile kx, "Bzkq rmwimiq doa kx trngiu krnalzm," rpi-kzle kx, "Bzkq rnibqq leplz." Mz nzmu-krde lcde, ncblo kx tr-rmwimiu doa kx trngiu krnalzde, a' rnibq doa, rnzlvzole nivz kc tqngi nou Loukxtr atwrnrngr. ¹² Gct sa na-ayzlu-ngrbzle bamu mz nzvz-nqblq-krde da amrlx kcng tqpiamu x tqaleamu, mz nzmc-krde kx vz-nqblqamu natqde mz nzmrlzti-krmu leplz o trtingr. ¹³ Trpnzngr nzyckr drtwrde doa kx tryckz-ngru drtwrde leplz. A' doa kx yc mz drtwrde leplz, namcle nzyckr drtwr Gct nide mzli kc napiix-ngrde neke tubq x neke vz-rbr.

Mane Nzrlxngititx-ngrp wz Gct, A' Trpnzngr Kx Vz-nqblqle Natqde

¹⁴ Mzlengeng x inwengeng, mane nzhpiikr doa kx lxngitile Gct, a' trpnzngr da kxmrlz kx vzpxm mz nzrlxngiti-krde. Murde nzrlxngitingr kxmule lc trkrlzleu nzarlapx-krde nide. ¹⁵ Nzmu kzdung kztemqng kx trpnzngr scdr lrpz x trpnzngr nadr dakxnxng, ¹⁶ mane nzhpi-krbzme badr kx, "Krka'-ngrne kx namnc-zpxwamu, nrkrdrqmu namrlz, x nelzmu nakrlc," a' mzli lcpwz trpnzngr da kx okatr-ngrn nidr? ?Memule, nzymnetx-ngrp wz kxmule lc krlzle nzokatr-krde nidr? ¹⁷ Mz nqmq lcpwz, mane nzlxngiti-krm Gct, a' mzli kcpwz trvz-nqblqwq natqde mz nzale-krm da kxmrlz kxnaokatrngr. ¹⁸ Murde doa kx lxngiti-angidrle Jiszs, ale-kzle da kxmrlz kx naokatrngr. A' doa kx rpile kx lxngitile Jiszs, a' trpnzngr da kxmrlz kxalele, rblx nzrmcngr nzrlxngiti-krde. ¹⁹ Nzrlxngiti-angidrngr navzmi nzrvz-nqblqngr natq Gct. Mane nzhpiikr doa kx lxngitile kx Gct esz'txu, murde drka' nzlxngiti-kzlr da lc. Dekc tzrnrcti-lzbq-ngrdr mz zmwxlr,

⁸ 2:8 Nzrlasngr 20:12-16; Livae 19:18; Lou Kcpwz 5:17-21; Matiu 19:19; Mak 12:31; Luk 10:27; Rom 13:9; Galesia 5:14 ⁹ 2:11 Nzrlasngr 20:13-14; Lou Kcpwz 5:17-18

murde nzkrlzlr kx Gct sa na-ayrplapxle nidr mz nzrnzlvzo-krdr natqde. Opx angidr kx trngi-txpwzu nzrlxngitingr kxmule lc kx na-arlapxle leplz.

²⁰ Bzkq angqngutitr-lzbqamu mz nzpxtxpx-krmu nztekqtr-krmu drtwrmu. Murde mane nzrlxngititx-ngrpwz, a' trpnzngr kxvz-nqblqle natq Gct. ²¹ Gct rpile kx melrmqgu Ebraam tubq mz nzobq-krde, murde rlrpx-lzbq mz nzvz-nqblq-krde natq Gct, dekc tqrlr-ngrbzle mrlxde Aesak mz olta. ²² Mz nzmu-krde lcde, opx angidr kx nzlxngiti-krde Gct vzmi nzvz-nqblq-krde natqde. Atutrle nzrlxngiti-krde mz da kx alele mz nzvz-nqblq-krde natq Gct. ²³ Krlc drtwr ngr Nzryrngrkxtr kc tqrpile kx, "Ebraam tubq mz nzobqkr Gct, murde brti drtwrde nide." ^{*} Dekc tzrpi-ngrdr kx nide kzte Gct. *

²⁴ Mz nzmu-krde lcde, opx angidr kx nztubqkr doa mz nzobqkr Gct vzpxm mz da kx alele mz nzvz-nqblq-krde natqde. A' nztubqngr trvzpxpuu mz nzrlxngititx-ngrpwz. ²⁵ Kxmu-kzle lc mz olvz kc tqngi srlx, drtqde Reab. Murde adwattrle lr Israel kcng nzling ma nyzde. X mz nibrde, sc tqaprpxpeleng mz nzo-zli-krdr lrpzki kzble, murde narlapxng. Dekc tqrpingr Gct kx Reab tubq mz nzobq-krde, mz nzvz-nqblq-krde da kx alele.

^{*}

²⁶ Nzrlxngitingr kx trvz-nqblqleu natq Gct apule nrkrdrdq kx trycminiu, murde nzbzng rlilrdr.

3

Zmatq Ngr Natq Leplz

¹ Mzlengeng x inwengeng, bzkq kqluamu mz nzalvztr-krmu natq Gct. Murde suti drtwrde kx nigu kxnlzalvztrng mz natqde natubqku mz nzalvztr-krgu. A' kxtrnzalvztr-angidrung, nzayrplapxkr Gct nidr namyaszpxle nzayrplapx-krde leplz kcng tzalvztrlr. ² Vz-rbr-zvzku amrlx ngrgu. A' na-abzku nzpi-zvz-krgu da kxmrlz kxtubq. Murde doa kx trvz-rbru mz nzycmne-krde, nide mrlx kx tubq-esz'ngr, x krlzle nzaclve-lzbq-krde mz da amrlx. ³⁻⁴ Na-aoti drtwrgu lcsu kxet. Kxmule-esz' twz nenq kx xplr, a' nzkrlz nzyalvzngr mz nrz kxtopwzne, murde navo mrkc tqsuti drtwr kapten navokile. X na-aoti kz drtwrgu hcsi. Murde nrkrdrdqde kc tqwzpx vz-nqblq-ngrde leplz nqvi kcng tqtopwz tzpetrpzng mz narde. ⁵ Mz nqmq lcpwz, nao leplz topwzne, a' nzycmne-krde krlzle nzbatr-krbzle da kxet. Da kc tqwai kz nqngi nyr kxtopwz. Murde krlzle nzbatr-krbzle nyr kxet. ⁶ Delc, naogu apule nyr. Murde natq kxipzne nzkrlzlr nzodatingr da amrlx mz nzmnc-krgu. X kxnamu nzycmne-krgu, dekc tqyalvzle nigu mz lrpzki kx o-zliku mz nrlc ka. Kx Setzn kc tqacivele naogu, nzycmne-krgu sa na-atrkatile leplz amrlx kcng tqmncku badr, mz nzapu-krde nyr kxet. kc tqrblix nzamzngr.

⁷ Leplz nzkrlzlr nzayamqmimi-krdr animol amrlx mz nrlc, kxmule-esz' utc ngr peto, o nc ngr prla. ⁸ A' trpnzngr doa kx rkrlz nzayamqmitingr naode. Murde naode pxttxpx-ngrde nzmnc-lrpi-krde, a' rpi zvz kz da kxtrka-esz'ngr. X natq kx vzpxm mz naode apule da kxrlq kxrnibq. ⁹ Naogu dekc tqglqlz-ngrgu Kxet kx tqngi Trtegu, x dekc kz tqrpibqti-ngrgu leplz kc tqwzng Gct mz nzaotr-krdr nide. ¹⁰ Delc, natq ngr nzrglqlzngr x natq ngr nzrpibqtingr

^{*} 2:23 Nou 15:6 * 2:23 2:21-23 Gct abrtzlvle nzrlxngitikr Ebraam. A' nzmu Ebraam trnavz-nqblqleu natqde, drtwr ngrde kx trlxngiti-angidrleu nide. Nzvz-nqblq-krgu natqde vzpxm mz nzrlxngiti-krgu. X nzrlxngiti-angidr-krgu navzmi zvz nzvz-nqblq-krgu natqde. Pol pi-zvzle kx nztubq-krgu vzpxm mz nzlxngiti-krgu Gct. X Jemes aopxml bagu kx nzrlxngiti-angidr-krgu navzmi kz nzvz-nqblq-krgu natq Gct. Jemes x Pol drtwrdr esz'ti. [†] 2:25 Josua 2:1-24; Hibru 11:31

nzvzpxmqng mz nao kxesz'. X trtakitrdeu nzale-krgu da kxmule lc. [◊]
¹¹ Trpnzngr aulz kx ngqlz-ngrm lue x dcpiz mz mzli lapwz. ¹² Nc bia trpangrdeu nzlu. X nc brpi trpa-ngrdeu bia. X dcpwe rblx nzngikr lue le. Mzli kx natq kxtrka x natq kxmrlz nzvzpx-ngrmlr mz nao doa kxesz', drtwr ngrde kx nabz doa lc trtubq-angidru, x narlr-ngrbzle mz Gct nzalqngi-krde nide.

Nzyrplapxngr Angidr Vzom Mz Gct

¹³ Neke mz nimu rpile kx nide doa kxyrplapx kx krlz-angidrle da kxtubq, na-alvztrpzle da lcng mz leplz mz nzale-krde da kxmrlz x mz nzavzo-lzbq-krde. Murde nqmq lcng nzvzpxmqng mz nzyrplapxngr kx kabz Gct. ¹⁴ A' neke mz nimu nabzde yrbulz-ngrm nzdobungr mz drtwr kxmwa x nzaetu-lzbqngr, bzkq glqpx-lzbqq kx nim doa kxyrplapx. Murde nzrglqpx-lzbqngr pokia-ngrde nzrpngr da kxtubq mz nzobqkr Gct. ¹⁵ X da lcng trnzvzpxpwung mz nzyrplapxkr Gct. A' da lcng tqtrka nzvzpxmqng mz nzao-krdr drtwr lr nrhc ka, x mz nztrkibrngr, x mz nqmq nr drtwr kx nzbatrpz drka'ng. ¹⁶ Murde nzdobungr x nzaetu-lzbqngr vzmi lxblr zvv kz nzaki-lzbqngr x da kxdrka'ngr amrlx. ¹⁷ A' nzyrplapxngr kx kam Gct bagu batr-kaiple bagu nzrlr-krbzku mz Gct nzalqngi-krde nigu mz alwx ngrgung. Murde namncku badr leplz mz nrwrx, naokatrku nidr, nalalztq-kzpzu badr, nayc mz drtwrgu nidr, x namrlzti-kzku leplz. X navz zvv, nzale-krgu da lcng mz drtq kxvq. ¹⁸ Murde doa kx aodutr-lxblrle leplz mz nrwrx, sa nabatrpzle mz leplz nzmnc-lxblr-krdr mz nrwrx. X leplz amrlx sa na-aleng da kxtubqng.

4

Naesablqtiku Da Kxtrka

¹ ?Krlzamu nike nou nztalwzngr x nzotangr mz mzlirmu? Nzvzpxmqng mz nztrkibr-krmu, murde traotiu drtwrmu da kx suti drtwr kztemung x da kxtubq mz nzobqkr Gct. ² A' sutitx zlwz drtwrmu da kx trpnzngr scmung, x sc tqrnibqpeamu doa mz nztwz-krmu dztudeng. Rkcmnz-ngrnamu da kx rblx nztwz-krnamuleng, sc tqtalwzpeamu x tqotablrpeamu, mz nzrtwz-krmung. Vz-rbramu! Trtwzwamuu da lcng tqsuti drtwrmu, murde trrlxtipwzmuu mz Gct. ³ O trtwzwamuu da kcng murde rlxamu da mz drtwr kxtrka. X suti txpwz drtwrmu da kx na-abrtzlvz nrkrdrtqmung, a' traotiu drtwrmu da kx xngibz kztemung. ⁴ Apuamu olvz kx vz zvv nzmwimi-krdr ncblo kzbleng. Murde nzmrlzti-krmu dalr nrhc ka myaszpxle nzmrlzti-krmu Gct. X krkeng kzte leplz kx nzpxtxpx-ngrdr Gct, nidr enqmi rdeng. ⁵ X krlzamu kx ncblo dobulvzle olvz rde mz nzsutikr drtwrde ncblo kzble. Mz nqmq lcpwz Nzryrngrkxtr alvztr-ngrde nigu kx Mqngrkxtr kc tqamncpxm Gct mz nabzgu dobulvz-kzle nigu mz doa x da kznikeng suti drtwrgu nzmyaszpx-krde Gct.

Gct Okatrle Kxnzavzo-lzbqng

⁶ Mz nzmu-krde lcde, Gct okatrle nigu mz nzaovxio-krgu nqmq nr drtwr kxtrka lcng amrlx, mzli kx rlxti-ngrbzkle bade. Murde Nzryrngrkxtr rpile kx, "Gct esablqtile kxnzglqpx-lzbqng, a' tubz mz nibr kxnzavzo-lzbqng." [◊] ⁷ Mz nzmu-krde lcde, avzo-lzbqamu mz nzmnclz-krbzmu mz Gct. X otaamu badr Setzn, kc tqaxglrbzle drtwrmu lcng tqtrka, murde nadwaszle nimu. ⁸ Esablqtiamu alwx ngrmung x rlr-ngrbzmu mz Gct nzalqngi-krde

nabzmu, murde trvz-nqblqwamuu nide mz nabzmu atwrnrngr. Mnc-aepztrpzmu bade, murde namnc-aepztr-kzpz bamu. ⁹ Nabzmu natalvzo zlwz murde nzpxtxpx-krmu Gct. Drtwrmu navz x nayrnimiamu alwx ngrmung. Natekqtramu nzyrpale-krmu mz nzalz-krmu. X natekqtr-kzamu nzabrtzlvz-krmu da kxtrka mz nzyrni-kato-krmu. ¹⁰ Murde nzmu na-avzo-lzbqbzmu mz mz Gct, sa na-amyalzle nimu. [◊]

Bzkq Aycmne-atrkatiamu Kztemung

¹¹ Mzlengeng x inwengeng, bzkq rpibqtiamu x aycmne-atrkatiamu kztemung kxnzrlxngiting. Murde mz nzale-krmu da lc, trvz-nqblqwamuu natq Loukxtr mz nzsri-krde kx namrlzti-lzbqku. X apu-kzle kx rpiamu Loukxtr vz-rbr. A' trngiu nzwz-krmu mz nzrpingr kx Loukxtr lc vz-rbr o trtingr, a' navz-nqblq-txpwzmu. ¹² Gct rkam Loukxtr, x nide esz'-krde kx takitrde nzpipx-krde neke tubq x trtubqu, murde na-arlapxle kxnztubqng x naodatile kxtrnztubqung mz Mzli Kxmatq kc navzm. A' trtakitrdeu nimu nzrpibqti-krmu x nzaycmne-atrkat-i-krmu kztemung.

Bzkq Glqpx-lzbqamu Mz Drtwr Kx Yrlqamu

¹³ Lalztqmamu mz da lc. Bzkq glqpx-lzbqamu mz nzsri-krde kx, "Koma o kalrla ninge kc tqvzpxez mz mzaea kc. X namnctix elr yiz naesz', murde na-abzox kzdq nzwzngr mrlcde mz nzatatr-krmc trau." ¹⁴ Murde trpnzng nimu kx rkrlz da kx naprtzbz bade kalrla. Mzli nyzgu mrbcnepwz, apule zsikapu kc tqvzdz. Mc-ngrgule mzli pipzne x sc tqmrbpem mou. ¹⁵ A' nzaycmne-krmu nakxmule sele, "Sa namncbex x na-alex drtwr lc tqyrlqx, nzmu kx Gct tqrlr-ngrmlele." ¹⁶ A' mzli ka nzglqpx-lzbq-krde sa tqvzbeng. A' nzglqpx-lzbqng amrlx vz-rbrtx, murde drtwr ngrde kx trabtrpwzmuu drtwrmu mz Gct. ¹⁷ Mz nzmu-krde lcde, nzmu kx tqkrlz-angidrq me pnz drtwr Gct mz da kx na-aleq, a' tralewq, taoq mz alwx.

5

Bcnyr Kxnvz-rbrng

¹ Nimu kcng tznginidr bcnyrng, lalztqmamu bange. Yrnimi-lzbqamu mzli ka, murde nzayrplaxngr nimu x nzkxpu-krmung ycpe pipz nzkaputrrkrmlrng, x namatq-esz'ngr. ² Mzli lc dztumung x trau scmwng sa na-apulr brmrda. X lrpzmung sa na-apulr da kx yrti ninr. ³ Trau scmwng sa na-atrkatile nimu, murde atatrpamu x ayrbzkqamu mz da kxtrka mz nzngini-krmu kxnztrkibrng. Gct mcle da lc x sa na-ayrplaxle nimu mz nyr mz Hxl. Murde aoti txpwxz drtwrmu nzatamutingr da, a' trkrlzwamuu kx mzli nyzmu mrbcnepwz, x ycpe pipz Kraes nzvz-krmle mz nzaryplax-krde nimu! ⁴ Angqngutitramu mz trau scdrng, krkcng tzawzamu mz nrlanc nyzmung. Lalztq-angidrmamu. Murde kxmule-esz' pxtpx-ngrnamu nzxlr-krbzmu nzyrnimi-krbzlr kx vz-rbramu, a' Gct kc tqrninr xlrpele nzyrni-krdr. ⁵ Mzli ka tqmnc-ngrnamu mz nrlc apuamu poi kcng tzyrlvzng murde tzmu-txpwzng, a' trnzkrklzlr kx ycpe pipz nzrnibqng nidr. X xpeamu da kxqlqwx kxkqlu murde na-abrtzlvz nrkrdrqtmung. A' trkrlz-kzwamuu kx ycpe pipz Gct nzayrplax-krde nimu. ⁶ Twzamu leplz kxnztubqng mz kot x batrpzmu nzbz-krdr mz zmatq ngrmu kx myapxbz. A' trpnzng scdr zmatq mz nzarlapx-krbzlr mz mqmu.

Bzkq Drtwrmu Ma Nzaenzli-krmu Nzyzlu-krm Kraes

⁷ Mzlengeng x inwengeng, bzkq rkrkxamu x drtwrmu ma nzaenzli-krmu nzyzlu-krm Kxet. A' na-apuamu kxnznginyzdr nrlanc. Nzaenzli-kailr

[◊] 4:10 Matiu 23:12

tewa nzayayrti-krde drtc', murde napetilr da nyzdrng. X nzaenzli-moulr tewa mz nzokatr-krde nzlvcplz-krm da nyzdr. ⁸ X nimu kz, bzkq drtwrmu ma mz nzaenzlingr, a' natu-amqngiamu. Murde Kxetu rgu ycpe pipz nzyzlu-krmle. ⁹ Bzkq drtwrmu lctitr-lzbq, murde ma tqayrplapx Gct nimu mz nzvz-rbr-krmu lc. Murde ycpe pipz nzadcpx-lzbq-krmle mz nzpipx-krde neke tubq x neke vz-rbr. ¹⁰ Na-apu-kzamu profet kcng bqnc kcng tzpipxlr natq Gct. Drtqdr etq mz nzale-krdr da kxbrngz. X trnzkkrkxung, a' nzaenzli-lrpilr nzayrplapxkr Gct krkcng tzatrkatilr nidr. ¹¹ Amrlueku leplz kcng tztu-amqngitrpzng mz Gct mzli kx da rblx-ngrde, da kc tqwai Job. Krlz-angidramu kx Yawe ayrkrpxbzle nzetqkr drtqde, murde Yawe aodu-zvzle leplz x yc kz mz drtwrde nidr. [◊]

Bzkq Da Kx Naesalz-ngrnamu

¹² Mzlengeng x inwengeng, bzkq esalz-ngrnamu bongavz, nrlc, x kzdung kz da. Bzkq pokiamu, a' da kx napi-txpwzmu mz nzycmne-krmu, 'Eu' o 'Trtingr,' murde ma tqayrplapx Gct nimu mz natq kx piamu. [◊]

Nzkrka'ngr Kxmatq

¹³ Nimu kcng tzaxvtrpzng mz Kraes na-aleamu da lcng. Doa kx drtqde etq, nakrka'bz mz Gct. Mrlx kx abrtz, na-angrlvzle Gct. ¹⁴ Doa kx yagox, nakqlele kxnzetu r lrmakxtr, murde na-aelulr nide tolo mz drtq Kxetu, x nakrka'-ngrdr kx Gct na-amrlzbzle nide. ¹⁵ X Gct sa na-ayzlu-ngrbzle nzkrka'-krdr, mz nzvz-nqblq-krde nzbrtikr drtwrdr nide. X na-amrlz-moule nrkrdrtrq krkc tqyagox. X nzmu zyagox kc kx tqvzpxmle mz alwx ngrdeng, sa naipq kz Gct nide. ¹⁶ Mz nzmu-krde lcde, plzpxbzmu alwx ngrmung mz kztemung, x krka'-lzbq-ngrnamu, murde namrlz-mouamu. Murde nzkrka'kr doa kxtubqbz mz nzobqkr Gct matq-esz'ngr x ngidati kz. ¹⁷ Murde profet Elaeja kc bqnc, tqngi kz leplz apule nigu. A' mz nzlxngiti-krde Gct, krka'bz bade kx tewa bzkq dc. X tewa trdctileu yiz tq x temz esz'mz. ¹⁸ X mz nibrde, krka'-mopwz mz nzrlxti-krbzle mz Gct nzadc-krde tewa, x tewa kc tqdc ate mou mz nzalvcutilz-krmle dalr nrlanc. [◊]

Okatramu Krkcng Tzrlaszpelr Nzrlxngiti-angidrngr

¹⁹ Mzlengeng x inwengeng, naokatramu doa kcng tzrlaszlr nzrlxngiti-angidrngr, murde navz-nqblq-moulr Gct. ²⁰ Murde nzarlapxkr Gct nidr x nzipqpx-krbzle alwx ngrdrng sa navzpxm mz nzokatr-krmu nidr.

Delape. Ninge Jemes.

Nzryrkr Pita Kx Ayrnrngr Natq Ngr Nzaplxtqng Mz Nzryrkr Pita Kx Ayrnrngr

Aposol Pita yrle letz lc mz mzli yiz 62—64 AD mz nibr nzrmcngr mz Jiszs, mzli kc tqmnc-ngrde Rom. Zbz mz yiz 67 AD sc tzqlvztrpe nide mz kros. Mzli lc Niro nide king kxetu kc Rom, x leplz kxtrnzrlxngitiung nzpibqtilr x nzaetqbzlr drtq kxnzvz-nqblqlr Jiszs.

Pita ryrbz mz lrJiu x kxtrngiulrJiu kcng tzrlxngiting mz provins kcng Pontzs, Galesia, Kapadosia, Esia x Bitinia, mz kandre kc Trki mzli ka. Pita krlzle kx leplz nzatrkatilr nidr x nzaetqbzlr drtqdr. X ryrbz badr mz nzapqtr-krbzle drtwrdr x mz nznpi-krbzle badr kx namnclzbzng mz zmatq ngr kxetu rdrng x navz-nqblq-zvzlr me pnz drtwr Gct, kxmule-esz' da kx prtz. X rpi-kzpze badr kx Gct rlr-ngrbzle da kxtrka nzprtilz-krdr nigu, mz nzaxplr-krde nzbrtikr drtwrgu nide.

¹ Ning Pita, aposol ne Jiszs Kxnzmcp. Ryrbo bamu nimu leplz kcng tqmcp Gct mz nzngini-krmu lr mrkzbleng mz nrlc ka, murde mrnyzmu angidr Heven. Nimu kcng tzakiting nrlc mz provins kcng Pontzs, Galesia, Kapadosia, Esia x Bitinia. ² Yrlq pnz Gct Trte drtwr kx namcpkle nimu mz nzngini-krmu doa kxnztr nedeng. X Mqngkrkxtr atrle nimu x okatrle nimu mz nzvz-nqblq-krmu Jiszs Kxnzmcp. Murde suti drtwr Gct kx naipqpxbzle alwx ngrmung mz mepyr ngr nzbrzkr Jiszs. Krka'-ngrne kx Gct sa navz zvz nzkao-krbzle bamu zmrlz ngrde kxmyalz x nzmnc-zpxngr.

Drtwrgu Elalzm Mz Nzobqtipx-krgu Nzlungr Kxboi

³⁻⁴ Na-awibzku mz Gct kc tqngi Trte Kxetu rgu Jiszs Kxnzmcp. Murde mz zmrlz ngrde kxmyalz batrple bagu nzprtr-krgu mz nzlungr kxmrna. Lxngitiku Jiszs Kxnzmcp kc tqatulz-mop Gct mz nzbrzng x prtr-kzku mz nzlungr kxboi. X obqtipxku da kxmrlzting amrlx kx nzylq-bekapxlr mz nzka-krmlrleng bagu Heven. Murde da lcng trnayrkrpxu x trnatekqtru, a' sa nayc-along. ⁵ A' mzli ka mz nrlc ka, zmatq ngr Gct o-nglelvezpele nimu murde abrtrpzmu drtwrmu bade mz nzarlapx-krde nimu. X sa na-aclve-angidrle nimu navz nakrlzbzle nzyzlu-krm Jiszs. X mzli lcde, sa na-aelwapx-ate-ngrbzle bamu da kxmrlzting amrlx lcng tzvzpxmqng mz nzarlapxpe-krde nimu.

⁶ Delc kxmule-esz' prtramu mz da kxtrka kxnzkqlung mzli kxmrbcne, a' sc tqabrtzpe-ngrnamu da lcng. ⁷ X da kxtrka lcng nzokatr-kzlr nimu, mz nzapu-krdr nyr kc tqayrleni-ebirngr gol, mz nzrkatx-krde zblqki rde. Murde nztu-amqngi-krmu axplrle nzrlxngiti-krmu x Gct rlr-ngrbzle nzprtzkr da lcng mz nzaxplrngr nzrlxngiti-krmu. Murde mz drtwrde nzrlxngiti-angidr-krmu myaszpx-zlwzle gol kxlqngi kx trnayc-alou. X mzli kc nayzlu-ngrm Jiszs Kxnzmcp mz nrlc, nzrlxngiti-angidr-krmu lc nabatrzple mz Gct nzabrtzlvz-krde nimu, nzglqpx-krde nimu, x nzamatq-krde nimu. ⁸ Murde kxmule-esz' trmcwamuu Kxnzmcp, a' mrlztiamu nide x brti drtwrmu nide, mz nzelalz-zlwz-krm drtwrmu. X rblx nzrpings nzetukr nzabrtz-krmu lc. ⁹ Murde kalr mrkc Heven, sa naprtramu mz bz ngr nzlxngiti-krmu Jiszs, mzli kc tqarlapx-alo-ngrde nimu.

¹⁰ Profet kcng bqnc, nzpipx-pnzlr kx Gct naokatrle nimu mz zmrlz ngrde kxmyalz. Kxmule-esz' nzsuti zlwz drtwrdr nzkrlz-krdr drtwr ngr

nzarlapxngr lc, a' trnzkrzlrn drtwr ngr da amrlx kcng tzpipxlr. ¹¹ Mqngr Kraes kc tqmncpxm badr pipx-zvzle nzetqkr drtq Kxnxmcpx x da kxmrlz-esz'ngr kcng naprtzting mz nibrde. X profet lcng nasuti drtwrdr nzkrz-krdr ncblo kznike kx nanginide Kxnxmcpx lc x myx mzli kx naprtzng da lcdeng x nike naprtzm mz nrlc ka mzli lcde. ¹² X aelwapx-ngrbz Gct badr kx natq kcng tzpipxlr trngiu dalr nzokatr-krde nidr esz'-krdr, a' ngi dalr nzokatr-krde nimu lcng tzvzmqng mz nibr nzngidatikr natqdr. Murde Mqngkrkxtr kc tqatwzlro-ngrm Gct Heven rpibzle bamu kx natq profet lcng nzngidatipeng mz Jiszs Kxnxmcpx, kc tzyapwxtipxbzlr bamu mz Nrpakxmrlz. X mzli boipe enjrl nzsuti-kzngn drtwrdr nztwz-krdr drtwr ngr da lcdeng.

Gct Kqlele Nigu Mz Nzmncngr Kxtr

¹³ Mz nzmu-krde lcde, olijtiamu drtwrmu mz nzvz-nqblqngr me pnz drtwrde x acive-lzbqamu. X na-aoti txpwz drtwrmu da kxmrlzting kcng tqobqtipxamu nznka-ngrbz bamu mzli kc nayzlu-ngrm Jiszs Kxnxmcpx. ¹⁴ X mz nzngini-krmu doa neng Gct kx nzvz-nqblqlr natqdeng, bzkq vz-nqblqamu nqmq nr nabzmu kxtrka kcng tqaleamu ena, mzli kc trkrzkalamu nzalvztrngr angidr. ¹⁵ A' mzli ka, nzmnc-krmu natr, da kc tqwai nztrkr Gct kc tqkqlele nimu. ¹⁶ Murde rpile mz Nzryrngrkxtr kx, "Nzmnc-krmu natr, murde nzmnc-krnge tr." *

¹⁷ Na-aoti drtwrmu kx Gct Trtemu kc tqkrka'bzmu bade, nzmnc-krde leplz rsakrlrngr. Murde sa na-ayzlubzle bamu nike aleq mz nrlc ka. Mz nzmu-krde lcde, namyatitramu nide mz da amrlx kcng tqaleamu mz nzngini-krmu lr mrkzble mz nzmnc-krmu mz nrlc ka. *

¹⁸ Na-aoti kz drtwrmu kx trngiu trau o silvz o gol kc tqxpengr Gct nimu mz nzkapx-krmle nimu mz nqmq kx trmatqu kc tzaprcbz melrmqmung bamu. Murde trau x silvz x gol nzkrlzlr nztrkangr. ¹⁹ A' xpetrle nimu mz da kx myapx-esz'ngr, krlcde mepyr ngr Kxnxmcpx. Murde bz-ngrde nimu mz nzngini-krde blz kxmyapx-esz'ngr x nei sip kx lqngipx-esz'ngr.

²⁰ Kxnxmcpx lc tqngi nei sip kx nangi blz kc tqmcpx pnz Gct mzli kc nrlc trnzwzka-ngrde. X mzli ka, sc tqaelwapxpe-ngrbz Gct bamu kx Jiszs nide lrpzki r nzarlapxngr nimu. ²¹ X mz nzaxvctr-krbzmu mz Jiszs, brtipe drtwrmu Gct kc tqatulz-mople nide mz nzbzng x kabzle bade me matq-esz'ngr Heven. Mz nzmu-krde lcde, Gct txpwz kc tqabrrpzmu drtwrmu bade x tqobqtipxamu mz nzatutr-krde da amrlx kcng tquesalz-ngrbzle bamu.

²² Mz nzxngiti-krmu Nrpa Angidr, katpxbzle da amrlx kcng tzrpwa'-ngrdr nzmrlzti-lzbq-krmu mz nzapupe-krmu mzle-lzbqng x ile-lzbqng. X mzli ka, na-aelwapx-zvz-ngrbzmu nivz angidr lc mz kztemung mz nabzmu atwrnrngr. ²³ Murde prtrpeamu mz nzlungr kxmrna, kx trpnzngr nzryrkpx-krde. Murde vzpxm mz Jiszs Kxnxmcpx kc tqngi Natq Gct kc tqlu-al. * ²⁴ Da kc tqwai, nzpikr Nzryrngrkxtr le kx, "Leplz amrlx sa nayrkpxng mz nzapu-krdr nabr kxgler. X zluli rdr apule nrpq nounc kcng tzplclqtiong. ²⁵ A' natq Kxetu yctx alo." * X natq lcde ngi Nrpa ngr Kxnxmcpx kc tzyapwxtipxpebz bamu.

* ^{1:16} Livae 11:44-45; 19:2; 20:7 * ^{1:17} Nzamatq-krgu Gct namyaszpxle nzamatq-krgu da x leplz, kxmule-esz' mrnyzgu o lr mrnyzgu. Murde mz nzngini-krgu doa nedeng, apuku lr mrkzble mz nrlc ka. X na-aoti zvz drtwrgu kx mrnyzgu angidr Heven. * ^{1:23} Jon 1:1-14 * ^{1:25} Asaea 40:6-8

2

¹ Mz nzmu-krde lcde, yrlqpx-lzbqamu mz drtwr kx mwa, nzpokiangr, nzrkcmnnzngr x nzrpibqtingr. ² A' nasutitx zlwz drtwrmu nztwz-krmu drtwr ngr natq Gct, mz nzapu-krmu itoto kx suti txpwz drtwrde nei pqde. Murde dekc nzbrtikr drtwrmu kx rlapx-angidrpeamu naetunepx zvz. ³ X krlzpeamu kx Kxetu rgu mrlz-esz'ngr.

Kxnzmcpx Badr Leplz Nedeng Nidr Mrkc Tqtr Nyz Gct

⁴⁻⁵ Namnc-aepztr-zvzbzmu mz Kxnzmcpx kc tqngi Nou Rplz kc tqlu-alo. Murde apu-kzamu rplz kcng tqbatrpzle nzmwitr-lxblr-krdr mz drkq ngr ma nydze kc tqtr, mrkc tqmncpx-ngrm Gct. A' nimu rplz kcng tzlung. X nimu kz pris kxzstr nede kcng tzwztrpzng bade, mz nzrlrpx-krbzmu bade blz ngr nzrglqlzngr nide, nzawi-ngrbz bade, nzangiongr nide x nzmnclz-ngrbz bade. X blz lcng nzmrlzng mz nzobqkr Gct murde nzaxvctrpzmu mz Jiszs Kxnzmcpx. ⁶ X kxmule-esz' Jiszs nide rplz kx myatpx-zlwzbz kc tqmcpx Gct, a' kzdung leplz nzpxtxpx-ngrdr nide. ⁷ ⁶ Gct ycmnetr-ngrde Mrlxde mz Nzryrngrkxtr mz nzrpi-krde kx, "Obqmamu! Murde yrlqpx kc doa mrkc Jerusalem kx apule rplz kx myatpx-zlwzbz, murde nide kc tqngi rplz kc tzatuo kai, tqngi nou bute' kc tqmcpx. Doa kx lxngitile nide drtqde trnayau mz nzbrtikr drtwrde nide." ⁸ ⁷ Delc, nimu kcng tzrlxngiting tqkrlzamu kx nide kxmyapxbz. A' Nzryrngrkxtr rpibzle mz leplz kcng trnzrlxngitiung kx, "Rplz kc etu tzpxtxpx-ngrdr ncblo kcng tzrwz-ngrng ma, nzaelwapxngr kx nide nou rplz kc tqmyatpx-zlwzbz." ^{*}

⁸ X rpi-kzle kx, "Nide rplz kx nayrputrngr leplz mz nzobqszo-krdr nide." ⁹ X nztaong murde nzpxtxpx-ngrdr nrpa kc tqycmnetr-ngrde nide mz Nzryrngrkxtr. Krlc vz-nqblqle drtwr kc tqyrlq pnz Gct mz leplz lcng mzli kc bqnc.

⁹ A' nimu "nqvi kc tqmcpx Gct," x "pris kcng tzwztrpzng mz King rgu" Jiszs. X ni-kzpu' "dzbede kxtr kc tzamnc-bekapx Gct," murde nanginimu "angidr leplz ne Gct esz'-krde." X kqlele nimu mz nzyapwxtpx-krbzmu mz leplz zmrlz ngrde kxmyalz. X kapxmele nimu mz zmatq ngr alwx, murde naprtramu mz nzkrlz-angidr-krmu nide. ¹⁰ ¹⁰ Murde Nzryrngrkxtr alvztr-ngrde nigu kx "mzli kc trnginipwa'muu leplz nedeng," a' mzli ka "nipemu leplz neng Gct." X mzli kc "trprtrwamuu mz nivz lrde," a' mzli ka "mrlzti-zlwzpele nimu." ^{*}

Navz-nqblqku Nqmq Kr Gct Mz Nzmnc-krgu Mz Mzlir Kxtrnzrlxngitiung

¹¹ Mzlengeng x inwengeng, na-apuamu lr narnrlc x lr mrkzbleng mz nzmnc-krmu mz nrlc ka, murde mrnyzmu angidr Heven. Mz nzmu-krde lcde, bzkq rlr-lzbq-ngrbzmu mz da kxtrka kx suti drtwr nrkrdrtqmu, murde ma tzaovxiolr nimu. ¹² A' nqmq krmu natubq zvz mz nzmnc-krmu mz mzlir leplz kxtrnzrlxngitiung. Murde kxmule-esz' nzycmne-atrkatilr nimu, a' sa namclr ntubqkr nqmq krmu. X kzdung nidr mwz sa nalxngiti-kzlr Jiszs x naglqpxlr Gct mzli kc nayzlu-ngrm Jiszs. ^{*}

Namnclzbzmu Mz Zmatq Ngr Kxnzetung

¹³ X mz nzamatq-krmu Kxetu rgu Jiszs, namnclzbzmu mz zmatq amrlx kcng tzyrlqbz bamu. Abzo mz king o gzpman kc tqaclvele nimu,

^{*} **2:4-5** Asaea 61:6; Rom 12:1; Filipae 4:18; Hibru 13:15-16 ^{*} **2:4-5** Matiu 21:42; Mak 12:10; Luk 20:17; Aposol 4:11; 2 Korint 6:16; Efissz 2:20-22 ^{*} **2:6** Asaea 28:16 ^{*} **2:7** Sam 118:22 ^{*} **2:7** Rplz lc drtwr ngrde Jiszs Kxnzmcpx. X kxnxpxtxpx-ngrdr nide drtwr ngrde ncblo kx nzmailzlr lr Israel. [Asaea 28:14] ^{*} **2:8** Asaea 8:14; Rom 9:33 ^{*} **2:9** Nzrlaszngr 19:5-6; Asaea 43:21; Jeremaea 13:11; Malakai 3:17 ^{*} **2:10** Hosia 1:10; 2:23 ^{*} **2:12** Matiu 5:16

¹⁴ nakrlzbzle leplz kznike nzatwzlr-ngrdr mz nzayrplapx-krdr kxnzvz-rbrng x mz nzamatq-krdr kxnzaleng da kxmrlz. ¹⁵ Murde nzale-krmu da kxmrlz awx-nabule leplz kxdrka'ngr kcng tzpibqtilr nimu. X krlc me pnz drtwr Gct. ¹⁶ Kxnzmcpk arlapxle nimu mz nzmncz-krbzmu mz zmatq kxtrka amrlx. Mz nzmucrde lcde, bzkq ale-mouamu da kxdrka'ngr, a' rlrpx-lzbqamu mz nwztr-krbzmu mz Gct. ¹⁷ Amrlueamu leplz amrlx. Mrlztiamu kztemung kxnzrlxngiting. Myatitramu Gct. X amatqamu king.

¹⁸ Nimu kcng tzawz-nrbalqng, namnclzbzmu mz zmatq ngr kxetu rmung mz nzamatq-krmu nidr, kxmule-esz' nzacuve-zpxwlr nimu o nzatrkatilr nimu. ¹⁹⁻²⁰ Trabrtzlvzu Gct nimu mz nzetqkr drtqmu mzli kc kxetu rmung nzayrplapx-ngrdr nimu mz nzvz-rbr-krmung. Murde takitrde nzale-krdr da lc. A' Gct sa na-abrtzlvle nimu mz nzamatq-zvz-krmu kxetu rmung murde mrlztiamu Gct. Myapxbz mz nzetqkr drtqmu kxmule-esz' nzatrkatikrdr nimu trpnzngr noude.

²¹ Murde suti drtwr Gct kx navz-nqblqamu Kxnzmcpk kc drtqde tqetq mz nzarlapx-krde nimu. ²² Murde Profet Asaea ycmnetr-ngrde nide mz nzsri-krde kx, "Trpnzngr alwx ngrde. X trpnzngr nzpokia-krde." ²³ A' mzli kc tzpibqti-ngrde, trpnzngr natq kx ayzlubzle badr. ²⁴ X mzli kc tzaetq-ngrbz drtqde, trpnzngr natq ngr nzamwxlrngr kx pi-mopwzle badr, a' abrtr-zvzbzle drtwrde mz Gct kc tqutubq mz nzayzlu-krbzle da mz leplz. ²⁵ X tekqtrle nigu mz nzxpe-krde alwx rgung mz nzrtqlvztrngr nrkrdrtqde mz kros. X arlapxle nigu mz zmatq ngr alwx, murde nzmnc-krgu natubq-esz'ngr. Delc nzatakingr nide tqamrlzpe-ngrde nigu. ²⁶ Mzli kc apuamu sip kx nzmrbrng kcng tzmcn-rlrubzng mz kxetu rdr. A' mzli ka yzlupebzmu mz Kxetu kc tqacuve-angidrle nimu mz nznginipe-krmu sip nedeng. ²⁷

Olvz Kxnzyrlzng X Ncblo Ngrdrng

3

¹⁻² Mz nqmq lcpwz, nimu olvz kxnzyrlzng namnclzbzmu mz ncblo ngrmung. Murde kzdung nimu kcng ncblo ngrdrng trnzlxngitikalr natq Gct, kxmule-esz' tryapwxtpxpwzmuu Nrpakxmrlz badr, a' mwz nzmc-krdr nzmrlzkr nqmq krmung x nzutubq-krdr, sa navectrple nidr mz Gct. ³ Bzkq angrlo-txpwzmu nrkrdrtqmu kx nalxngipx-esz'ngr, mz nzbz-krmu nqngi narmu, nzrluti-krmu da kx ngi gol x nzpxi-krmu lrpz kx mzte luli. Murde da lcng trnzmyapxpwzung. ⁴ A' nzlxngipx-krmu navzpxm mz nabzmu. Murde nzlxngipxkr nabz rblx nzyrkpx-krde mzli kc nanginipe-ngrmu blang. A' nzlxngipxng kx vzpxm mz nabz kx vz-nabu x avzo-lzbq ngi da kx myapx-esz'ngr mz nzobqkr Gct. ⁵ Krlc nqmq krdr olvz kxnztrng kcng bqnc tzabtrtzl drtwrdr mz Gct. Murde nzlxngipx-krdr vzpxm mz nzmncz-krbzlr mz ncblo ngrdrng. ⁶ Da kc tqwai Sera mz nzvz-nqblq-angidr-krde natq Ebraam, x mz nzamatq-krde nide mz nzsri-krbzle bade nide kxetu rde. X sa na-apuamu Sera, nzmucrde Gct na-ayzlubzle nzkrka'-krmung.

⁷ X mz nqmq lcpwz, nimu ncblo kxnzyrlzng namnclzbzmu badr olvz ngrmung, mz nzkrllz-krmu kx nzxplkr ncblo myaszpxle nzxplkr olvz. A' na-amatq-kzamu nidr mz nzngini-krdr kztemung kcng tzprtr-kzng mz nzlungr kxboi. Nzmnc-krmu nakxmule lc, murde Gct na-ayzlubzle nzkrka'-krmung.

²² Asaea 53:9 ²³ Asaea 53:7 ²⁴ Asaea 53:4-5 ²⁵ Asaea 53:6

Kzdung Mzli Drtqgu Nzaetq Mz Nzale-krgu Da Kxmrlz

⁸ X mou, nimu amrlx ngrmu namnc-zpwx-lxblramu, naycngr drtwrmu kztemung, namrlztiamu kztemung na-apulr kx mzlemung angidr, na-avzo-lzbqbzmu badr, x naokatramu nidr. ⁹ Bzkq ayzlubzmu da kxtrka mz da kxtrka. X bzkq pibqtiamu krkcng tzpibqtilr nimu. A' rlxtibzmu mz Gct nzamrlz-krde nidr. Murde krlc me pnz drtwrde x sa na-amrlz-kzle nimu mz nzale-krmule. ¹⁰ Murde Nzryrngrkxtr rpile kx, “?Nike suti drtwrm? ?Nzlungr kxmrlz kxboi? Obq-angidr x bzkq ycmne-atrkatiq leplz. X bzkq pokiaq. ¹¹ Prszpx nqmq kxtrka. X ale zvz da kxmrlz. X nasuti drtwrm nzmnc-zpwx-krmu badr leplz mz nrwx. ¹² Rlxtibz ncblo kxtubq mz Yawe nzokatr-krde nide. X Yawe sa naxlrbzle nzkrka'-krde mz nzaclve-krde nide. Sa napnanatile leplz kxnzale-zvzng da kxtrka.” *

¹³ Nzmu kx tqvqty drtqmu nzalengr da kxmrlz, mwx trpnzngr kx na-aetqbzle drtqmu. ¹⁴ A' nzmu kx tzaetqngr drtqmu mz nzale-krmu da kxmrlz, sa namrlzbz bamu kalr. * Murde Nzryrngrkxtr rpile kx, “Bzkq kxne drtqmu natq ngr nzamwxlrkr leplz nimu.” * ¹⁵ A' abrtrpzmu drtwrmu mz Jisszs Kxnzmcpkx mz nzngini-krde Kxetu rmu. X oliq-zvzamu nzayzlu-krbzmu natq krkcng tzveatibzlr kx memule tqlxngiti-ngrnamu Jisszs x nike tqobqtipx-ngrnamu nzlungr kxboi. A' amatqamu nidr x ayzlu-ngrbzmu natqdr mz nivz. ¹⁶ Na-ale-zvzamu da kxtubq, murde narmu naopx angidr mz da amrlx. Mz nzmu-krde lcde, nzmu leplz kx tzpibqtilr nimu mz nqmq krmu kxmrlz mz nzvz-nqblk-krmu Kxnzmcpkx, bzkq da kx nakxne drtqmu, murde sa na-amyatibz Gct drtqdr kalr. ¹⁷ Nzaetqngr drtqmu mz nzale-krmu da kxmrlz kx pnz drtwr Gct myaszpxle nzaetqngr drtqmu mz nzale-krmu da kxtrka. ¹⁸ Murde Kxnzmcpkx kc tqtubq nzaetq-ngrbz drtqde nzwrde esz'txu mz nxzpe-krde alwx rgu, nigu leplz kxtrnztrubqung, murde navzmibzle nigu mz Gct. Nrkrdrdtqde nznibq, a' lu-mop mz zmatq ngr Mqngrkxtr.

¹⁹⁻²⁰ X mz zmatq ngr Mqngrkxtr lc, Kxnzmcpkx sc tqycmnekipxpele Noa mz nzyapwxtipx-krbzle mz leplz kx suti drtwr Gct nzplzpx-krdr alwx ngrdr. A' nzpxtxpx-ngrdr nzvz-nqblk-krdr Gct. Krlc mzli kc bqnc tqwzngr Noa lcsu kc etu. Mzli lcde Gct kabzle badr mzli r nztekqtr-krdr nqmq nr drtwrdr. A' trtingr, x mzli ka mqngr leplz lcng nzatolvape-ngrng mrnyz mqngr kxnzbzpeng. X leplz nzrtqmzng kx nzrlatpxpxpwzng mz nubla ngr lue. *

²¹ Leplz lcng nzrlapxng mz nubla ngr lue, da kc tqwai-kzku mz nzrlapx-krgru mz lue ngr nzwrkxtrngr, murde mzli lc brti drtwrgu nztulz-kr-mop Kxnzmcpkx mz nzbzngr. Nzwrkxtrngr trngiu dalr nzrwztipxngr zblkki mz nrkrdrtrqgu. A' ngi dalr nzkrka'-krbzku mz Gct nzatubqti-krde nigu x nzaopx-krbzle nargu, mz nike alem Jisszs bagu. ²² Mzli ka sc tqwxbupe me matq-esz'ngr Heven mz nrlar Gct kxrtc. X krkcng amrlx Heven, tzmnczbzng bade, kxmule-esz' enjrl, o kxszmatqng.

Vz-nqblkamu Lrpzki R Kxnzmcpkx

* ^{3:12} Sam 34:12-16 * ^{3:14} Matiu 5:10; Luk 6:22 * ^{3:14} Asaea 8:12-13 * ^{3:19-20} Ngalrde lcng 19-20 nzalvztr-ngrdr nigu kx nayapwxtipxbzku Nrpakxmrlz mz leplz, kxmule-esz' nzpxtxpx-ngrdr nigu, da kc tzwai-kzpzlr mz Noa. X kxmule-esz' nigu kcng tzvz-nqblkqlr Gct pipzku, a' krlzle nzarlapx-krde nigu, da kc tqwaibzle mz Noa badr lr ma nyzdeng. X mou, Kxnzmcpkx sa na-aovxirole enqmi rdeng amrlx x sa na-ayrplapxle krkcng tzpxtxpx-ngrdr nide, da kc tqwaibzle mz leplz kcng tzbzng mz nubla.

4

¹ Mz nzmu-krde lcde, navz-nqblqamu lrpzki r Kxnzmcpx mz nzmnckrnu. X drtwrmu badr naesz'ti mz nzrlrpx-lzbq-krbzmu mz nzaetqngr drtqmu, da kc tqwaile. Murde krkc tzaetq-zlwzpebz drtqde mz nzvz-nqblq-krde Kraes, aovxiopele nzatalzngr nide mz alwx. ² X mrlx lc, krlzle nzma-nqblq-krde me pnz drtwr Gct vz-krlzbzle nzbz-krde. X trpengr nzvz-nqblq-krde drtwr kxdrka'ngr. ³ Mzli kc ena trlxngitika-ngrnamu Jiszs, mzli kang kqlu prtramu mz drtwr kxdrka'ngr sc kxtrnzrlxngitiung. Murde rmwimiamu doa kx trngiu kernalzmu, vz-nqblqamu drtwr kxtrka, rmnq-zlwzamu, trcluwamu mz da kx myangr drtqmu, x angioamu mqngr drka' kxnzlz kxkqlu. ⁴ A' kztemu kcng tqprtrpzmu badr mzli kc, nzpikitelr nimu murde trnzkrlzluu nike trprtrpe-ngrpwzmuu badr mz nqmq kxdrka'ngr lcng mzli ka. ⁵ Kxmule-esz' a' mz Mzli Kxmatq kc navzm, sa natutrpzng mz mz Kxnzmcpx. X sa napibzle mz leplz amrlx kxnztubqng o trtingr, kxmule-esz' kxnzlubeng o kxnzbzpeng. X sa napipxbzlr bade drtwr ngr da amrlx kcng tzalelr mz nzlu-krdr. ⁶ A' kztemung kcng tzbzpeng, mzli kc tzlube-ngrdr nzlxngitilr Nrpakxmrlz kc tzyapwxtipxbz badr. Krlc drtwr ngrde kx kxmule-esz' nzprtrng mz nzayrplapxngr mz nzbzkr nrkrdrdqdr, da kc tzwai leplz amrlx, a' mqngrdr nzlu-alobzng mz Gct, mz nzvz-nqblq-krde me pnz drtwrde. *

Nqmq Krmu Natubq Mzli Ka Tqaenzli-ngrnamu Nzyzlu-krm Jiszs

⁷ Ycpe pipz nzyrkrpx-krbz nrlc ka. Mz nzmu-krde lcde, acvetio-lzbqamu murde nzkrka'-krmu nawz-angidrng. ⁸ X da kx myapxbz mz da amrlx, namrlzti-lzbqamu. Murde Nzryrngrkxtr rpile kx, "Nivz batrple mz nabzgu nzipq-krgru leplz mz nzkqlukr alwx ngrdr." ⁹ Abrtzlvzamu nzadwatr-krm kztemung ma nyzmung. ¹⁰ Doa kxesz' mz nimu, nawztrpz mz kztedeng mz zmatq kxmyapxbz kc tqkabz Gct bade. Murde zmatq kxmyapxbz kx bletipx lxblr lcng nawz-lxblrng mz nzaelwapx-krdr zmrlz ngrde kxmyalz. ¹¹ Nzmu kx tqkabzle bam zmatq ngr nzryapwxtipxngr natqde, ryapwpxbxz mz leplz mz nzkrlz-krm kx Gct kc tqrkabz natq kcng tqpiq. X nzmu kx tqngi nzwztr-ngrbz mz leplz le, wztrpz badr mz nzkrlz-krm kx Gct kc tqrkabz nzxplrngr bam. Aleamu da lcng murde leplz naglqlz-zvz-ngrdr Gct mz da kx wzngr Jiszs mz nimu. Murde mz nzngini-krde king kc tqmatq takitrde nzrglqlzngr nide tqyc. Eu, angida.

Na-abrtzlvzamu Nzaetq-ngrbz Drtqmu Da Kc Tqwai Nzaetq-ngrbz Drtq Kxnzmcpx

¹² Mzlengeng x inwengeng, bzkq kctipxamu nzprtr-krmu mz nzkxpu-zlwzngm mzli ka, murde da kxtrka nzprt-zvzng. X Gct rlr-ngrbzle da lcng mz nzaxplrngr nzrlxngiti-krmu. ¹³ A' na-abrtzlvzamu nzaetq-ngrbz drtqmu murde vzpxm mz nzvz-nqblq-krmu me pnz drtwrde, da kc tqwai nzaetq-ngrbz drtq Jiszs Kxnzmcpx. Murde mzli kc nayzlu-ngrm Jiszs mz nzmyalz-krde, na-abrtzlvz-kzamu nzprtr-krmu mz nzmyalz-krde lc. ¹⁴ Nzmu kx tzpikiti leplz nimu murde vz-nqblqamu Kxnzmcpx, mrlz nzabrtzlvz-krmu da lc. Murde aelwapx-ngrde kx Mqngr kxmatq kc tqvzpxm mz Gct sc tqmncbz bamu. ¹⁵ A' trmrlzu nzmu nzaetq-ngrbz drtqmu mz nzngini-krmu ncblo kxayo, kxpna da, kxale da kxdrka'ngr, x kxrpikiti leplz. ¹⁶ A' nzmu nzaetqbz drtqmu mz nzngini-krmu Kristin, naglqpx-ngrnamu Gct nzngini-krmu nabolr Kraes, mz nztwz-krmu drtqde. X bzkq myangr drtqmu.

* ^{4:6} Mz nibr nzbz-krdr, kxnzrlxngiting trnzprtrpeung mz nzaryplapxkr Gct nidr. ⁸ 4:8
Nzyrplapxngr 10:12

¹⁷ Murde mz nzayrplapxkr Gct lr nrlc, yzutrpele mz nzayrplapx-krde nigu leplz nedeng. Murde suti drtwrde nzatubqti-krde nigu mz da kxtrka kcng tzprtzmqng bagu. X opx angidr kx nzmu na-ayrplapxle leplz nedeng, sa na-ayrplapx-zlwzle krkcng trnzlxngitilru Nrpa ngrde. ¹⁸ Murde Nzryrngrkxtr rpile kx, “?Nzmu kx rbltx-zlwzbz mz leplz kxnztubqng nzrlapx-krdr, a' myx kxnamu-alzule mz leplz kxnztrkang kxnzale-zvzng alwx?” [◊] †

¹⁹ Mz nzmu-krde lcde, nimu kcng tzaetqbz drtqdr mz nzvz-nqblq-krde me pnz drtwr Gct, navz zvz nzale-krmu da kxtubq, mz nzabrtr-zvz-krbzmu drtwrmu mz Kxrpalz kc tqwz-ngrde nrlc x na-angidatile natqdeng amrlx.

Da Kx Na-ale Kxnzaclvelr Dzbe Leplz Neng Gct

5

¹ Napibo du da bamu, nimu kxnzaclvelr dzbe leplz neng Gct, mz nzngini-kz-krnge kxaclve. Murde krlc tqyapwxtipxx nzmc-krnge nzetqkr drtq Kxnzmcpx mz kros. X sa naprtr-kzx mz nzmyalz-krde mzli kc nayzlu-ngrmle. ² Na-aclve-angidramu leplz neng Gct kcng tqkatrpzle mz mqmu, mz nzvz-nqblq-krde me pnz drtwrde. Drtwr ngrde kx naaclve-krmu nidr navzpxm mz nabzmu, a' trngiu da kx nzrtulrtr-ngrbz bamu. X navtqi drtqmu nzwztr-krbzmu mz Gct, a' trngiu dalr nzngini-krmu bcnyr o mz nzamatqngr nimu. ³ X bzkq glqpx-lzbqbzmu badr, a' nangini-zvzbzmu lrpzki mz leplz nemung. [◊] ⁴ Murde Jiszs nide kxetu r kxnzaclvelr sip nedeng. X mzli kc nayzlu-ngrmle, sa nakabzle bamu da kxmrlz kx nayc alo mz nzprtr-krmu mz nzmyalz-krde.

Da Kx Na-ale Kxnzrlxngiting

⁵ Mz nqmq lcpwz, nimu obla x olvi namnclzbzmu mz kxnzaclvelr nimu mz makxtr. X nimu amrlx ngrmu na-avzo-lzbqbzmu mz kztemung kxnzrlxngiting. Murde Nzryrngrkxtr rpile kx, “Gct esablqtile kxnzglqpx-lzbqng, a' tubz mz nibr kxnzavzo-lzbqng.” [◊]

⁶ Mz nzmu-krde lcde, avzo-lzbqbzmu mz Gct kc tqmyalz-esz'ngr, murde na-avzdzle nimu nzkrlz-krbzle mzli kc tqyrlqle. ⁷ X twzbzmu mz Gct nikeng nzatalvzobzlr nabzmu, murde sa tqaclve-angidrle nimu.

⁸ Aclvetio-lzbqamu x oliq-zvzamu, murde enqmi rmu Setzn kc tqotaamu badr apule laion kc tqamwxlr-ngrde leplz mz nztukr natqde. X sc tqvz zvz nzrtangrti-krde doa mz nzatrkti-krde nide. ⁹ A' esablqtiamu nide x tu-amqngiamu mz nzbrtikr drtwrmu Jiszs. Murde nakrlz-kzamu kx kztemung kxnzrlxngiting amrlx mz nrlc nzprtr-kzng mz nzetqkr drtq mz nzvz-nqblq-krdr Jiszs, da kc tqwaiamu.

¹⁰ A' mz nibr mzli kxmrbc kcng tqetqti drtqmu, Gct esz'-krde sa na-amrlz-moule nimu, sa na-amqngile nzbrtikr drtwrmu nide, x sa na-axplrlle nabzmu, murde navz zvz nzyatr-krbzmu. Murde zmrlz x nzokatrngr amrlx nzvzpxmqng bade. X kqlele nimu mz nzaxvctr-krbzle nimu mz Kxnzmcpx, murde rpile naprtr-alo-kzamu mz nzmyalz-krde. ¹¹ Murde nide king kc tqmatq tqvzpe tqvzpe. Eu, angida.

Natq Ngr Nzarlr-lzbqngr

[◊] **4:18** Nzayrplapxng 11:31 [†] **4:18** Gct atubqti-kaile leplz nedeng mz nzrlr-krbzle nzprtr-krdr mz nzetqkr drtqdr, x sc tzprtr-ateng Heven. A' kxnzpxtpx-ngrdr nide, trnzubqng mz nzobq-krde. X dekc trnaprtr-ngrdru Heven. [◊] **5:3** Matiu 20:25-27; 23:8-12; Mak 9:35; 10:42-44; Luk 22:25-26
[◊] **5:5** Nzayrplapxng 3:34; Jemes 4:6

¹² Saelas okatrple ninge mz nzryr-krbo bamu letz lc mrbcne. Krlz-angidrx nzngini-krde mzlegu kx nzbri drtwr leplz. Yrbo letz lc mz nzapqtr-krbo drtwrmu x mz nzrpri-krbo bamu kx kxmule-esz' nike prtzbz bamu, a' suti zvz drtwr Gct nzokatr-krde nimu mz zmrlz ngrde kxmyalz. Lolvz-amqngiamu nzbritikr drtwrmu nide.

¹³ Lr makxtr kztemung kcng tzmnncng Rom, tqmcpx-kzng Gct, nzrpibzlr bamu kx, "Nimu la." X Mak kz kc tqapubo bade trtede, rpibzle bamu kx, "Nimu la." ¹⁴ Male-lxblramu mqmu mz nivz mzli kc tqrmcti-lzbq-ngrnamu. Krka'-ngrne kx nimu leplz neng Jiszs Kxnzmcpx amrlx namnc-zpxwng mz nrwx.

Delape. Ninge *Pita*.

Nzryrkr Pita Krali

Natq Ngr Nzaplxtqng Mz Nzryrkr Pita Krali

Aposol Pita yrle letz lc mz mzliy yiz 65—67 AD mz nibr nzrmcngr mz Jiszs, mzli kc tqmnc-ngrde Rom. Mwx ryrbz mz leplz kcng pwz tqyrbzle letz kc kai badr. Pita krlzle kx ycpe pipz nzbz-karde, x suti drtwrde kx nakrlzlr kx kxnxalvztr-rbrng nzprtrpebzng mz lrmakxtr x nzatrkatipelr nzrlxngitikr leplz. Pibzle badr kxnamu nzglx-krdr leplz lcng x mz natqde kxpq rmgidrlvz-ngrbzle badr kx leplz kxnxmulr lcng sa naprtrng mz Hxl. Kxmule-esz' leplz lcng nzpibqtilr nzalvztrkr aposol, a' nzalvztrkr aposol amrlx da angidrtx. X nzmnckr leplz neng Gct natubq x natr mz nzaenzli-krdr nzatutr-krde nzesalz-krde mz nzyzlu-krm Jiszs.

¹ Ning Saemon Pita, wztrpo mz Jiszs Kxnzmcpx x ni-kzpc' aposol nede. Ryrbo bamu, nimu kcng tztwzlr nzrlxngitingr kcpwz tqka-kzp Gct bagr, mz nzngini-krgr aposol. Murde nzrlxngitingr lc tutr mz nztubqkr Jiszs Kxnzmcpx kc tqngi Gct x Mevalu rgu. ² Krka'-ngrne kx naokatr zvz Gct nimu mz zmrlz ngrde kxmyalz x namnc-zpwxamu mz nzkrlz-angidr-krmu nidr ncdr Kxetu rgu Jiszs.

Nzmnc-krmu Natubq

³ Gct kapemle bagu da amrlx kcng tqsuti drtwrgu mz nzmncngr kxtubq. Murde krlzku nzprtr-krgu mz zmatq ngr Kraes mz nzkrlz-angidr-krgu nide murde nzaxvctrpebzku bade. X nzkglekr Kraes nigu mz nzngini-krgr leplz nedeng vzpxm mz nzmyalz-esz'ngr-krde x nzmrlz-esz'ngr-krde. ⁴ X da kx prpxm mz nqmq krde lcng tqmrlz-esz'ngr, nzesalz-krmle bagu da kxmrzting kxmyapxbz mz Nzryrngrkxtr. X mz nzbrtikr drtwrmu natqde lcng, sa narlapxamu mz nzbngr kc tqvzpxm mz zmatq ngr drtwr kxtrka kcng tqrmcti-zvzamu mz nzmnc-krmu mz nrcl ka. X nzmnc-krmu sa natubq x natr, da kc tqwai Gct, mz nzprtr-krmu mz nzmrlzkr nqmq krde. ⁵ Mz nzmu-krde lcde, nzapu-krmu Gct naetunepx zvz. X mz nzbrtikr drtwrmu lc nide, nqmq krmu namrlz. X mz nzmrlzkr nqmq krmu lc, nakrlz-angidramu nide. ⁶ X mz nzkrlz-krmu lc nide, na-aclvetio-lzbqamu, murde ma tqaleamu alwx. X mz nzaclvetio-lzbq-krmu lc, natu-amqngi-zvzamu kxmule-esz' da kx prtz. X mz nztu-amqngi-krmu lc, navz-nqblq-zvzamu me pnz drtwr Gct. ⁷ X mz nzvz-nqblq-zvz-krmu lc nide, namrlziamu kztemung kcng tzrlxngiting. X mz nzmrlzti-krmu lc nidr, na-aodu-zvz-kzamu leplz amrlx. ⁸ Murde nzmnc-nqblq-krmu nqmq lcng sa naokatrle nimu mz nzkrlz-angidr-krmu Kxetu rgu Jiszs Kxnzmcpx x nzlukrmu trnamaneu, a' nrade sa nayc-zvzbz. ⁹ A' doa kx trmnc-nqblqleu nqmq lcng, apule ncblx kx mzte mwi o kx mzte kamrbrngr. Murde mrbrtrpe mz drtwrde kx Gct ycpqpxpebzle alwx ngardeng. X trkrlzleu drtwr ngr nzngini-krde doa ne Gct.

¹⁰ Mz nzmu-krde lcde, kx mzleneng x inwengeng, navqti drtqmu mz nzmnc-nqblq-zvz-krmu nqmq lcng mz nzaelwapx-krmu kx prtr-angidrbzmu mz leplz kcng tqkqleng Gct x tqmcpxleng. Murde mz nzale-krmu da lcng, trtxpnzng nzyrlqpx-lzbq-krmu mz nzrlxngitingr. ¹¹ X Gct sa na-abrtzlvz-zlwzle nimu, mz nzprtr-krmu mz nzlungr kxboi Heven, mrkc tqacve Kxetu Mevalu rgu Jiszs Kxnzmcpx mz nzngini-krde King. *

* ¹¹ A' leplz kcng trnzvz-nqblqru nqmq lcng, trnznginidru leplz angidr neng Gct. X trnaprtrung kalr Heven.

¹² Kxmule-esz' krlzpeamu x lolvz-amqngipe-kzamu da amrlx lcng tzalvztr-ngrmu, a' sa navz zvz mz nzadcpx-krboleng mz drtwrmu, murde nayc zvz. ¹³⁻¹⁴ Murde Kxetu rgu Jiszs Kxnzmcpx aopx-angidrmle bange kx nzmnc-krnge mz nrlc ycpe pipz nzyrkpx-krde. Delc, mrlzvxitz nzpi-mou-krboleng bamu, mzli ka tqqlube-ngrne mz nrkrdrqnge, kc tqapule matelq nyznge mz nzmnc-krnge mz nrlc. ¹⁵ Mz nzmu-krde lcde, sa nayapwx-dalitipxbo da lcng bamu, murde ma tqmrbtr mz drtwrmu mz nibr nzbz-krnge.

Nzryrngrkxtr X Nzalvztrkr Aposol Takitrde Nzbrtikr Drtwr Leplz Leng

¹⁶ Mzli kc nigr aposol tqpi-ngrbzkr bamu zmatq ngr Kxetu rgu Jiszs Kxnzmcpx mz nzmnc-krde mz nrlc ka x nzyzlu-mou-krmle kalr, trvz-nqblqkru nzryapwtxnengr. A' pi-txpwzkr da kx mc-angidrkr mz mzkr x da kx xlrkr, myapxbz mzli kc nigr mz Jemes x Jon tqmc-ngrgr nzmyalzesz'ngrkr Kxnzmcpx. ¹⁷⁻¹⁸ Murde mzli lcde mncomgr badr mz newz kxtr, obqbzkr nrkrdrqnge tekqtr-lzbqpe mzzluli. X xlrkr rtqlrgr natq Gct kx matq-esz'ngr vzom Heven. X Gct Trte amatqle x armyalzle nide mz nzsri-krde kx, "Mrlx lc nide mrlxnge Kxnzmrlzti. X abrtlvz-zlwzx nide." ¹⁹ X krklc aelwapx-ngrmle bagu kx nrpa ngr profet mz Nzryrngrkxtr da angidrtx. Mz nzmu-krde lcde, mrlzvxitz nzaotikr drtwrmu natqdrng. Murde natqdr nzapulr zyzlr kx napnamilxtile lrpzki mz nrlckxbq mz nzaelwapx-krmle bagu nzi rgu. X nalxngitiamu Nzryrngrkxtr lcng vz-krlzbzle mzli kc nayzlu-ngrm Kraes mz nzbatr-krbzle bamu nzkrlz-atwrnr-krmu Gct. Mz nqmq lcpwz kc paglxnrlc tqngi rkx ngr nzabzokr zbz kxmrna, nzvz-krm Jiszs sa nangi kz rkx kx Gct sa tqamrnale x tqatubqtile nrlc. ²⁰ Nakrlz-angidramu kx trpnzngr nzrplzpxkr profet kcng tqyclzm mz Nzryrngrkxtr kx vzdzm mz drtwr profet esz'-krde. ²¹ Murde trpnzngr nzrplzpxngr angidr kx vzpxm mz ncblo esz'-krde. A' Mqngrokxtr batrpzle badr nzplzpx-angidr-krdr natq Gct.

Kxnzalvztr Kxnzpokiang

2

¹ Mzli kc bqnc, profet kxnzpokiang kxkqlu nzmnccpxmqng mz mzli lr Israel. X mz nqmq lcdepwz, kxnzalvztr-rbrng sa naprtz-kzpqng mz mzlirmu. X sa na-alvztr-rbr-ngrdr nimu da kx na-atrka-atwrnr-ngrde nzrlxngiti-krmu. X sa naesablqti-kzlr Kxetu Jiszs kc tqxpepxle nidr. X mz da kxtrka lcng tzaletir, sa naodati ani Gct nidr. ² X kxnzrlxngiting kxnzkqlung sa navz-nqblqlr nidr mz nzale-krdr da kx myangr drtq. X leplz sa napibqtilr nqmq kr Kraes mz nzmc-krdr nqmq lc tqtrka tzvz-nqblq leplz nedeng. ³ Kxnzalvztr-rbr lcng nzrkcmnz-ngrng x sa naesabrtir nimu mz natqdr mz nzrtwz-krdr trau scmung x dztumung. A' Gct yrlq-pnzle drtwr mzli kc bqnc kx sa na-ayrplapxle leplz kxnzmull lcng. ⁴ X aelwapx-ngrmle da lc bagu mz nzayrplapx-krde kxnzvz-rbrng mzli kc. Murde tryrlqtxpxleu mz nzayrplapx-krde enjrl kcng tztaong mz alwx. A' rtco-ngrde nidr mz Hxl mz gq kx vzo la x tungr nzlo. X namncng elr nakrlzbzle mzli kc nayzlu-ngrm Jiszs.

⁵ X tryrlqtxpx-kzleu mz nzayrplapx-krde leplz kxdrka'-ngrng amrlx mz mzli nyz Noa. A' atwzlr-ngrbzle nubla mz nrlc atwrnrnegr kc tqodatile leplz amrlx, a' arlapxpwzle Noa nidr badr doa lr ma nyzde nzrlimzng. Murde Noa yapwxitpx-zvzbzle badr kx nqmq krdr natubq. ⁶ X Gct ayrplapx-kzle

^{1:17-18} Nou 22:2; Sam 2:7; Asaea 42:1; Matiu 17:1-9; Mak 9:2-9; Luk 9:28-36

leplz ngr taon kcng li, Sodom x Gomora, mz nzangc-atwrnr-krde nidr x taon nyzdrng, x trpnzngr mou kxlu, a' bq ngrdr kx yc txpwz. Krlc me nakrlztingr kxnamu nzayrplapx-krde leplz kcng tzale-zvzng alwx kalr. [☆] 7 A' Gct arlapxle Lot mzli lcde, murde nide ncblo kxtubq kc tqxngitr-zlwzle nzale-zvzkr leplz lcng drka'-ngrng da kx myangr drtq. [☆] 8 X nabzde talvzo zlwz mz zbz kang kqlu tqmnc-ngrbzle mz mzlindr. Murde mcle x xlrle nzxpqbrrl-zvz-krdr lou scng Gct. ⁹ Krlcng nzaelwapx-ngrdr kx Gct krlzle nzarlapx-krde leplz nedeng kxnztubqng mz nzetqkr drtqdr. X krlz-kzle nzolvz-amqngi-krde leplz kxdrka'-ngrng mz nzamnclz-krbzle nidr mz zmatq ngr nzayrplapx-krde nidr, vz-krlzbzle mzli kc nayzlu-ngrm Jiszs mz nzayrplapx-zpx-wx-krdeleng. ¹⁰ X sa na-ayrplapx-zlwzle leplz kcng tzaleng da kx myangr drtq x kxnzobqsolr zmatq ngrde. Da kc tqwai-kzpze mz kxnzalvztr-rbrng. Murde trnzavzo-lzbqung, a' nzglqpx-lzbqng x trnzmwxlsru nzpibqti-krdr enjrl neng Gct. ¹¹ X kxmule-esz' enjrl lcng tzmatqng nzmyaszpxlr leplz lcng mz zmatq x nzxplrngr, a' trnzpibqtilru leplz lcng mz nzipi-krbzlr mz Gct kx nzvz-rbrng. ¹² A' kxnzalvztr-rbr lcng nzpibqtilr da kznikeng tryrplatitru nardr. Murde nzapulr animol kzpetong kx trpnzngr nardr x nzvz-nqblq-txpwzlr nike nxngibz nrkrdrtqdr. X sa naodating mz nzapu-krdr poi kzpetong, kx takitxtrpwzle nzrlolvzngr x nanibqng. ¹³ Nzodatingr lc nidr ngi dalr nzayzlu-ngrbz badr nzatrkatikrdr nzrlxngitikr leplz. Nzabrtzlvz-zlwzlr nzvz-nqblq-krdr drtwr kxtrka kx mrlzbz mz nrkrdrtqdr, kxmule-esz' nzmclr leplz. X mz nzmulvz-krmu badr da kx myangr drtq kcng tzalelr, amyabzle drtqmu, a' trmyangru drtqdr. ¹⁴ Mzli kang kqlu nzsuti zvz drtwrdr nzrtrngz-krbzlr olvz, x drtwrdr trkrlzleu nzesapx-krdr. Nzmailztilr krkcng nzrlxngiti-krdr tqngrgo mz lrpzki r alwx. X nzkrlz-angidrlr nztrkibrngr. Alwx lcng amrlx nzamnclzbzlr nidr mz nzipilzkr Gct. ¹⁵ Mrlx lcng tzmnc-mrbrng nzrlaszpelr lrpzki angidr x nzvz-lukurnrpe-ngrng, mz nzo-zli-krdr lrpzki kc tzo-zli Balam, mrlx Beo mzli kc bqnc. Mrlz-zlwzrz mz Balam nzatatr-krmle trau mz nzalenegr da kxtrka. ¹⁶ A' mzli kc dcngki nede tqpnanatingrde nide mz nzycmnekr ncblo, batrpzle bade nzesakikr nzngqngu-krde.

[☆] 17 Kxnzalvztr-rbr lcng nzapulr lrpao kxplz, x nzapu-kzlr dcbz kxmingr kx twzne nenq, murde da kx nzalvztr-ngrdr trokatrleu leplz. Gct oliqtipole mr nyzdr me tungr nzlo, mz nzayrplapx-krde nidr mz Hxl. ¹⁸ Leplz lcng nzglqpx-lzbq-zvzng mz nzycmne-krdr kx trpnzngr noude. X nztamitilr leplz kxnzrlxngiti-ateng mz nzamqmiti-rbr-krdr mz nrkrdrtqdr. Murde leplz lcng tzrlxngiti-ateng, tr-rblxu nzataongr nidr mz alwx. ¹⁹ Kxmule-esz' nzpipxbzlr mz leplz kx drtqdr na-aopxng mz nzale-krdr da kx suti drtwrdr, x trpnzngr kx na-ayrplapxle nidr, a' kxnzalvztr-rbr lcng esz'-krdr drtqdr tropxu, murde nzmnclzbzng mz zmatq ngr alwx. Murde leplz amrlx kxrlr-lzbq-zvzbzng mz da, nzmnclzbzng mz zmatq ngr da lcde.

²⁰ Mzli kc leplz tzabtr-ngrbzlr drtwrdr mz Jiszs Kxnzmcpx mz nzngini-krde Kxetu x Mevalu rdr, arlapxle nidr mz nqmq ngr alwx kc tqatrkatile leplz. A' leplz kcng tzlxngiti-kailr Jiszs x mz nibrde nzesablqtilr nide mz nzprtr-mou-krdr mz alwx x mz nzmnclz-krbzlr mz zmatq ngr alwx, nzmnckrdr lc tqtrka sa namyaszpxle krkc kai mzli kc trnrlxngitika-ngrdr Jiszs. ²¹ Murde leplz kcng tzlxngiti-kailr kxmu ntubqng nzbqkr Gct x mz nibrde nzpxtxpx-ngrdr natqde kc tzaprcbz badr, nzayrplapxkr Gct nidr sa namyaszpx-zlwzle nzayrplapx-krde kxtrnzrlxngitiung. [☆] ²² Natq ngr

nzyrplapxngr nzling nzycmnetr-ngrdr nqmq krdr mz nzrpi-krdr kx, “*Kuli yzlutile zngqba ngrde x ngq-moule.*” [✳] X mou, “Poi mz nibr nzkipo-krde rtxo-lzbq-moungr mz dxlrb.”

Naoliqt-zvzamu Mzli Kc Nayzlu-ngrm Kxetu

3

¹ Mzlengeng x inwengeng, mz letz lcng li tqyrbo bamu, tqadcpk-mopwo kzdung da kx krlz-angidrpeamu, murde nzaotikr drtwrmu leng natubq.

² Murde suti drtwrnge nzdcpx-krpwz mz drtwrmu natq kcng tzplzpxlr profet kcng bqnc. X nadcpk kz mz drtwrmu natq Kxetu x Mevalu rgu, kcng tqaprcbzkr bamu, nigr aposol.

³ Nakrlz-angidramu kx mzli ka tqaenzli-ngrgu nzyzlu-krm Kxetu, leplz kxnxtrnga-ngrdr da nzmnkpeng mz mzligu mz nzyrpalelvzti-krdr nzyzlu-krmle. Leplz lcng sa navz-nqblqlr drtwr kcng tqmrlzbz badr. ⁴ X sa narpibzlr bamu kx, “?Jiszs rpile nayzlu-mop? ?A' myxpe nide? Trtegung nzbpeng, a' trvzkap. Abzo mzli kc tzwzngr nrlc krlzmle mzli ka, trgalr da kx blepxngr.” ⁵ A' leplz lcng mrbrtr mz drtwrdr da kc tqprtz mzli kc bqnc. Murde mzli lcde Gct tqycmnetx-ngrp wzle x bongavz ncdr nrlc sc tzypeng. X mz natqde wznedz-ngrmle drtc' me boongr prla, murde prla nayc-ngle-ngrde drtc'. [✳] ⁶ X mz nibrde mz mzli nyd Noa, Gct odati-moule nrlc mz nzyrlekr nubla kxetu. ⁷ X natq Gct kcpwz delc tqngi zmatq kc tqolvz-zvzle nrlc x bongavz mzli ka. X sc tqvz zvz nzolvz-amqngi-krdeng nakrlzbzle mzli kc nangc-atwrnr-ngrdr mz nyr, nindr badr leplz kcng tztrkang, mz nzyrplapxkr Gct nindr.

⁸ Mzlengeng x inwengeng, bzkq mrbrtr mz drtwrmu Nzryrngrkxtr kc tqrpile kx, “*Kxetu, mz drtwrgr, yiz kx siu (1,000) mz nrlc ngi mzli kxboi, a' mz drtwrm mzli mrbcnepwz, apunedebzq kx esz' kx yrkrpxpe.*” [✳] ⁹ Krlc drtwr ngrde kx kxmule-esz' kzdung leplz nzrpilr kx asa zlwz, a' Kxetu Jiszs trasau mz nzangidat-krde natqde kx sa nayzlu-mop. Murde aenzli-zpwxle nztekqtrkr leplz nqmq ngr drtwrdr mz nzarlapx-krde nindr. X suti drtwrde nzarlapx-krde leplz amrlx, x trpnzngr doa kxes' kx namncpx. *

¹⁰ A' sa naodati-atwrnr-ngrde nrlc mz nzyzlu-krmle mz Mzli Kxmatq lc. X leplz sa napwrkilvc-ngrdrle mz nzapu-krde nzvz-krm kx pna da. [✳] Mz mzli lcde, bongavz x dalr bongavz amrlx sa naodati-kzng mz nyr kx nzulrde rbq x nzmqmqrnatqde naetu-esz'ngr. ¹¹⁻¹² Mz nzaotikr drtwrmu nzodatingr lc, na-aoti kz drtwrmu nzmnkrm. Murde mzli ka tqaenzli-ngramu nzkaputr-krm mzli lc, suti drtwr Gct kx nzmnkrm natr mz nzvz-nqblq-krm me pnz drtwrde. Murde mz nzyrkrpx-krmu nzwz-krde mz nrlc, sa nabatrplezle nzkaputr-ani-krm mzli lc, mzli kc bongavz nangc-atwrnr-ngrde x dalrdeng sa nayrleniting mz nzrbqkr nzulr nyr. ¹³ A' trnayc-zlwzu mz drtwrgu da lc. Murde obqtipxku nzatutrkr Gct nzesalz-krde mz nzwz-krde bongavz x nrlc kxnxmrnang, kx nangi mrnyz kxntubqng. [✳]

* ^{2:22} Nzyrplapxngr 26:11 ^{✳ 3:5} Sam 24:2; 136:6 ^{✳ 3:8} Sam 90:4 * ^{3:9} Kzdung leplz nzrpilr kx mzli kc nayzlu-ngrm Jiszs sa navz-nqblqle zbq kcng rlimz mzli kc Gct tqwz-ngrde nrlc. Mz drtwrdr, yiz siu esz' apule zbq kxetu kxes'. X abzo mzli kc tqwzngr Gct nrlc krlzbzle nzyzlu-krm Jiszs sa nangi zbq kxetu kcng esz'mz, krlcde yiz siu esz'mz. X zbq kxetu kralimz drtwr ngrde nzaclvekr Jiszs nrlc ka mz yiz siu esz', kc tzpi kz mz Nzaelwapxngr dckrlzde kc 20. Zbq kxetu lc apule zbq kralimz kc tqamangr Gct mz nibr nzrwz-krde nrlc. Nzmu drtwr lc natubqle, yiz lcng siu esz'mz ycp pipz nzyrkrpx-krdr x Jiszs sa nayzlpem. A' trpnzngr kx rkrz mzli lcde. ^{✳ 3:10} Matiu 24:43; Luk 12:39; 1 Tesalonika 5:2; Nzaelwapxngr 3:3; 16:15 ^{✳ 3:13} Asaea 65:17; 66:22

¹⁴ Mz nzmu-krde lcde, kx mzlengeng x inwengeng, mzli ka tqaenzligrnamu Mzli Kxmatq lc, navz zvz nzmnc-zpx-krbzmu mz Gct mz nzmncngr kx tr x tubq mz nzobq-krde. ¹⁵ Nadcpx mz drtwrmu kx nzyzlu-krmle asa murde leplz nakqlu kx narlapxng, da kc tqwai nzpi-krbz mzlegu Pol le bamu, vzpxm mz nzyrplapxngr kc tqkabz Gct bade. ¹⁶ Pol ycmnetr-ngrde da lcng mz letz scdeng amrlx. X krlzx kx kzdung nzalvztr-krdeng rblx nzyrplatitrkr nar leplz le. X leplz kcng trnzrkrlz-zpxung x kxzngong mz nzrlxngiti-krdr, leplz lcng nzalvztr-rbrng mz nzalvztrnegr kxrblx lcng. X nzalvztr-rbr-kzng mz Nzryrngrkxtr amrlx. A' da lc sa naodatingr nidr.

¹⁷ Mzlengeng x inwengeng, krlzpeamu da lcng. Mz nzmu-krde lcde, aclvetio-angidramu, murde leplz kxdrka'-ngrng ma tzmailz-rbrlr nimu x sc trtu-amqngipewamu mz nzrlxngiti-krmu. ¹⁸ A' navz zvz nzmnc-aepztr-krbzmu mz Kxetu Mevalu rgu Jiszs Kxnzmcp. X narlr-zvz-ngrbzmu nzokatr-krde nimu mz zmrlz ngrde kxmyalz. Naglqlzku nide mzli ka tqvzpe tqvzpe. Eu, angida.

Delape. Ninge *Pita*.

Nzryrkr Jon Kx Ayrnrngr Natq Ngr Nzaplxtqngr Mz Nzryrkr Jon Kx Ayrnrngr

Mc 'Natq Ngr Nzaplxtqngr Mz Nrpakxmrlz Kx Yr Jon.' Mwx yrle letz lc mz mzlir yiz 90—95 AD mz nibr nzrmcngr mz Jiszs. Jon yrbzle mz lrmakxtr mz provins kc Esia, kcng tzmncbzng bade. Suti drtwrde nzapqtr-krbzle nabzdr mz nzaxvctr-zvz-krbzlr mz Gct badr Mrlxde Jiszs Kxnzmcpx. X rpibzle badr kx bzkq nzvz-nqblq-krdn nzalvztrkr kxnzalvztr-rbrng, murde ma tzvecpx-lzbqmqng mz Gct x Mrlxde.

Kzdung da kx vz-rbr nidr seleng. Nzrpilr kx da amrlx mz nrlc ka kx nzmc x nzbztr ngi da kxdrka'ngr, myapxbz nrkrdrtq leplz. Mz nzpokia-krdn nzrpi-kzlr kx Jiszs nide txpwz ncblo, x Kraes nide mqngr kx prtrpz bade mzli kc tqwrkxtr-ngrde, x rlasz-moule nide x sc tztqlvztr ate mz kros. Mz drtwrdr, Kraes kc tqngi Mrlx Gct trngi-angidru ncblo. Nzrpi-kzlr kx nidr leplz kxnzmyapxbzng murde nzkrlzlr nzyrplapxngr kx yc-kapq. X trtakitrdeu nzvz-nqblq-krdn natq Gct, da kc tzwai kzdung kz leplz. A' mrlz nzvz-zvz nzrmwimi-krdn leplz kxtrngiu kernalzdr. X nzalvztr-rbr-ngrdr kx mzli kc ncblo tqrlapxpe-ngrde mz nzxngiti-krde Kraes, aopxpebzle drtqde mz nzaoti-zvzkr drtwrde kxmu nzmnc-zpxngr mz nrlc ka. X nzrpi-kzlr kx trtakitrdeu nzmrlzti-krgu Gct, nzvz-nqblq-krgu natqde, x nzmrlzti-lzbq-krgu.

Jon yr-kzle letz lc murde nakrlzku leplz angidr neng Gct.

Mrkcng Mz Letz Lc

Jiszs ngi angidr Mrlx Gct. [1:1-4]

Gct tubq-esz'ngr x trpnzngr doa x da kxtrka kx natutrpz mz mzte. [1:5
—2:2]

Kxnamu nzkrlz-krgu doa angidr neng Gct. [2:3—3:10]

Nzvz-nqblq-zvzlr natqde. [2:3-6]

Nzaelwapx-ngrdr nivz, a' trngiu nzrtrkalrngr. [2:7-11]

Trnztao-zvzung mz da kcng tzatalzngr nigu mz nrlc ka. [2:12-17]

Krkcng tzrpilr kx Jiszs trngiu Kxnzmcpx trnznginidru doa neng Gct.
[2:18-27]

Nzmnckr doa neng Gct natubq. [2:28—3:10]

Kxnamu nqmq kr doa neng Gct. [3:11—5:13]

Namrlzti-lzbqng x navz-nqblq-zvzlr natqde. [3:11-24]

Nzrpilr kx Jiszs nide Mrlx Gct x nzvz-nqblq-zvzlr nzalvztrkr aposol.
[4:1-6]

Nzaelwapx-ngrdr nivz lrde, murde nide nou nivz. [4:7-21]

Nzxngitilr kx Jiszs nide Kxnzmcpx, nzmrlztilr nide, nzvz-nqblqlr
natqde, x nzaovxiolr nzatalz-ngrng. [5:1-5]

Brti drtwrdr natq Gct mz nzycmnetr-krdn Mrlxde Jiszs. [5:6-13]

Nakabz Gct da mz kxzrlxngiting mz nzmnc-xgle-krdrleng x kzdq natq
kx xplr mou. [5:14-21]

Jiszs Ngi Nou Nzlungr Kxboi

¹ Krlc tqyrbo bamu Mevalu Kxnzmcpx kc tzrpibz 'Natq Ngr Nzlungr.' Murde nide nrpa kc tqatwzlr-ngrm Gct mz leplz, x nide nou nzlungr amrlx. Kxmule-esz' mnc pnz kai mzli kc tzwz-ngrdr nrlc, a' nigr aposol mc-angidrkr nide mz mzkr, lalztqbzkr mz nzalvztr-krdeng, kctipxkr nzale-krdn

da kxmatq kxkqlu, x maletr-kzpkr nrkrdrdqde mz mqgr. ² Nzmnc-along ncdr Trtede Gct mrkc Heven. Zbz vzm nzngini-krde leplz x aelwapx-lzbq-ngrm bagr. Mckr nide, x mzli ka ryrbo bamu mz nzpipx-zpx-krbo bamu kx. Natwzku nzlungr kxboi mz nzaxvctr-krbzku bade. ³ Pibo bamu da kx mckr x xlrkr, murde narmcti-kzamu nzlungr kxboi. X naprtr-kzpa'mu bagr mz nzodutr-lxblr-ngrbz mz Gct Trtegu x Mrlxde Jisz Kxnzmcp. ⁴ Yrbo letz lc murde drtwwmu naelalzm mz nzvz-nqblk-krmu natqnge.

Gct Tubq-esz'ngr

⁵ Nrpa kc tqxlrbzkr mz Mrlxde x tqpibo bamu nide sele. Gct tubq-esz'ngr, x trtxpnzngr alwx ngrde kx akamrbrnegr da mz nabzde. Trpnzngr doa x da kxtrka kx natutrpz mz mz Gct. ⁶ Nzmu narpiku kx nzaxvctrpzku mz Gct, a' ale-zvzku alwx, pokiaku murde ptxpx-ngrgu nzalvztrnegr angidr. ⁷ A' mz nzvz-nqblk-krgu nqmq kr Gct, odutr-lxblrku badr. X nzbzkr Mrlxde Jisz atubqtile nqmq krgu, mz nzvz-nqblk-krgu nide.

Naplpxku Alwx Rgung

⁸ Nzmu narpiku kx trpnzngr alwx rgung, esabrti-lzbqku x ptxpx-ngrgu da angidr. ⁹ A' nzmu naplpxbzku alwx rgung mz Gct, sa naipqle nigu x naycpqpxbzle da kxtrka amrlx mz nabzgu, murde natubqbzku mz nzobq-krde. Murde angidati-zvzle natqde x ale-zvzle da kxtubq. ¹⁰ Rpi Gct kx leplz amrlx nzaleng alwx. X mz nzrpi-krgu kx trpnzngr alwx rgung, rpi-kzku Gct pokia. X aelwapx-ngrde kx ptxpx-ngrgu natqde.

2

Jisz Okatrle Nigu Mzli Kc Tqtao-ngrgu Mz Alwx

¹ Doa nengeng mz Kraes, yrbo natq lcng bamu murde nayrlqpx-lzbqamu mz alwx. A' nzmu kzdq nigu kc tqalele alwx, Jisz Kxnzmcp. kc tqtubq-esz'ngr, tu mz mzli Trtede badr leplz nedeng x okatrle nigu mz nzrlxti-krbzle bade nzipq-krde nigu. ² Murde rlrpx-lzbq mz nzbzng, mz nxpe-krde alwx kcng tqalekung. X nzbz-krde takitr-kzde nxpe-alongr alwx ngr leplz amrlx mz nrlc tulvzo.

Kxnvvz-nqblk Natq Gct Nidr Doa Angidr Nedeng

³ Nzmu nayrlq-angidrku da kcng tqalvztrnegr Kraes, krlzku kx nepede nigu. ⁴ A' doa kx trvz-nqblk Natq lc trngiu natq kxmrna, murde krlztypeamule mzli boipe. ⁸ Kxmule-esz', a' mz mzli lcpwz nqi kz natq kxmrna. Murde Kraes aelwapx-ngrde drtww ngr nivz mz nzbz-krde nigu. X mzli ka okatrle nigu mz nzmlzti-lzbq-krgu. X nqmq krde tqtekqtrle nqmq ngr alwx mz nabzgu, apule nepi nztekqtr-krde nrlckxbq mz nrlckxngrlx mz nzprtz-krmle. X nivz lc amrlz-kzle leplz.

⁹ Mz nzmu-krde lcde, doa kx rpile mz naode kx vz-nqblk Natq lc trngiu natq kxmrna, murde krlztypeamule mzli boipe. ¹⁰ A' krkc tqmrlztilr kztedeng, myapxbz kxnzrlxngiting, vz-nqblk Natq lc trngiu natq kxmrna. Murde Kraes, x nqmq kr Gct yc mz nabzde. X trpnzngr da kxtrka kc tqyc mz

nabzde mz nzbatr-krbzle nzatrkatı-krde kztedeng. ¹¹ Doa kx trmrlztileu kztedeng mnc-mrbr, x nqmq krde trka. Alwx ngrdeng nzakamrbr-ngrdr da mz nabzde x lrpzki rde tutr mz Hxl. Apule mrlx kx vzne mz nrlckxbq x trmcleu me navzkile.

¹²⁻¹⁴ Natq kc tqyrbo bamu takitrde nzvz-nqqlq-krmu. Nimu kcng tzrlxngiti-ateng, krlzamu kx Gct ipqpxle alwx ngrmung murde Jiszs bz-ngrde nimu. X krlz-zpwxamu kx Gct nide Trtemu. Navz-nqqlqamu natqnge.

X nimu kcng tzxplrng mz nzbrtikr drtwrmu Gct, sc tqaovxiopeamu Setzn kc Tqdrka'ngr. X natq Gct yc mz nabzmu. Navz-nqqlq-kzamu natqnge.

X nimu kcng nzrlxngiti-krdr tqbrpe mz nzlolvz-amqngi-krmu Gct ncdr Mrlxde, kcng tzmnc-along, navz-nqqlqamu natqnge kz.

¹⁵ Bzkq mrlzm bagu nzvz-nqqlq-krgu nqmq kr kxtrnzrlxngitiung mz nrlc ka. Murde nzmu namrlzm bagu dalr nrlc, rblx nzmrlnzi-krgu Gct. ¹⁶ Bzkq rlr-ngrbzme mz alwx nzaclve-krde nim, kxmule-esz' mz da kx suti drtwr nrkrdrtqm, x mz da kx kcmnzngr mzp, x mz da kx batrpzle nzglqpx-lzbq-krm. Murde drtwr kxnzmull lcng trnzvzpxpuung mz Gct, a' nzvzpxmqng mz Setzn. ¹⁷ X mzli trnaboiu x nrlc ka sa nayrkrpx. X da kxtrka scdeng amrlx sa namrbrmi-kzleng. A' doa kx vz-nqqlq-zvzle me pnz drtwr Gct, sa nalu alo.

Kxnzalvztr-ngrdr Da Angidr Nidr Doa Angidr Neng Gct

¹⁸ Doa nengeng mz Kraes, xlrpeamu kx mzli kc nayrkrpxngr nrlc, Enqmi Kxetu ngr Kraes sa navzm, kc narpwa'-ngrde nzwzkr Kraes amrlx. X mzli ka krlzku kx ycke pipz nzyrkrpxkr nrlc, murde leplz kxnzkqlung kx nznginidr kz enqmi r Kraes, nzmnccemqng bagu. ¹⁹ X mzli kc, enqmi r Kraes lcng nzaxvctr-lzbqmqng bagu, nigu lrmakxtr ne Kraes. A' mzli ka sc tzrlaszpelr nigu murde trnzlxngiti-angidrlru Jiszs. X krlzku kx trnznginidru doa neng Gct.

²⁰ A' trnipwamuu leplz kxnzmull lcng, murde Kraes avzopemle Mqn-grkxtr bamu, mz nzalvztr-krde nimu nzalvztrnegr angidr. ²¹ Trpi-ngrpou da lcng bamu murde trkrlzwamuu da angidr. Trtingr! A' yr-ngrboleng bamu murde na-amqngile da angidr kc tqkrlzpeamu. Murde mz nzkrlz-krmu da angidr lc trpnzngr nzpokiangr kx krlzle nzesabrti-krde nimu.

²² Kzdung leplz nzpokia-zlwzng mz nzsri-krdr kx Jiszs trngiu Mevalu Kxnzmcpx. Leplz kxnzmull lcng nzpxtxpx-ngrdr Gct Trte ncdr Mrlxde, x nidr enqmi r Kraes. ²³ Murde krkc tqpxtxpx-ngrde Kraes kc tqngi Mrlx Gct, sc tqpxtxpx-kz-ngrde Gct Trtede. A' krkc tqlxngitile Kraes, tzaxvctr-kzpz mz Trtede.

²⁴ Delc, nalxngiti-zvz-ngrnamu nige nzalvztr-ngrmu mz Kraes mzli kc tqrlxngiti-ate-ngrnamu. Murde na-axvctr-angidr-zvzbzmu mz Mrlx ncdr Trtede. ²⁵ X mz nzaxvctr-zvz-krbzku lc badr, sc tqrmctipeku nzlungr kxboi tqesalz-ngrm Gct bagu.

Mz Nzvz-nqqlq-krgu Nzalvztrkr Mqngrkxtr Rblxbz Mz Setzn Nzesabrti-krde Nimu

²⁶ Ryrbo bamu murde na-aclvetio-lzbqamu. Murde enqmi r Kraes lcng tzrlaszlr lrmakxtr, nzabzlr nzesabrti-krdr nimu mz nzalvztr-krdr kxnamu leplz nzrlapxngr. A' nzalvztr-krdr vz-rbr. ²⁷ Kraes avzomle Mqngrkxtr mz nzmnccpx-krmle mz nabzmu, murde na-alvztrle nimu mz da kx ngi da angidr amrlx, x nakrlzamu da kxtubq x da kx vz-rbr. Bzkq rtangrtiamu kxakrlz kc-kzng mz nzyokaetipx-krdr da kc tqaopxpebzle Gct bamu. A' nabrti drtwrmu Mqngrkxtr kc tqpi-zvzle da angidr. Mz nzmu-krde lcde,

navz zvz nzaxvctr-krbzmu mz Kraes x nzvz-nqblq-krmu nide, da kc tqwai nzpi-krbz Mqngrkxtr le bamu.

Doa Neng Gct Nzvz-nqblqlr Natqdeng

²⁸ Na-axvctr-lzbq-zvzbzmu mz Kraes, murde ma tqmwxlramu x drtqmu tqmya mzli kc nayzlu-ngrmle. ²⁹ Krlzpeamu kx Kraes tubq-esz'ngr mz nzobqkr Gct, x opx kz kx doa angidr neng Gct navz-nqblq-kzlr nzmncngr lc tqtubq.

3

¹ Gct mrlztile nigu. Nzmlzti-krde nigu etu-esz'ngr, delc tqrpi-ngrgu nigu doa nedeng. Zpwxtx, nigu doa neng Gct! A' leplz kxnzkqlung mz nrlc ka kx trnzkrzlru nide. Mz nzmu-krde lcde, trnzkrzlz-kzlr nigu doa nedeng. ² Mzlengeng x inwengeng, mzli ka nginiipegu doa neng Gct. X mzli kc nayzlu-ngrm Kraes, sa natekqtr Gct nigu. Kxmule-esz' tropxka mz drtwrgu myx kxnamuku, a' krlzku kx mzli lcde sa naopx-angidrpe nzmc-krgu nide mz nzkrlz-angidr-krgule. X sa natekqtr Gct nigu mz nzapu-angidr-krgu nide. ³ X krkcng amrlx tzobqtipxlr nzyzlu-krmle, navecpx-lzbqng mz nzalengr alwx, a' namnc-nqblqlr nqmq kr Kraes, kx trpnzngr alwx ngrde.

⁴ A' krkcng tzale-zvzng alwx nzpxtxpx-ngrdr Gct x nzxpqbrr-ngrdr lou scdeng, murde krlc drtwr ngr nzalengr alwx. ⁵ Jiszs trpnzngr alwx ngrde. X krlzku kx vzm mz nrlc murde leplz trna-alepelru alwx. ⁶ Mz nzmu-krde lcde, krkcng amrlx tzaxvctr-lzbqpebzng bade, trnzalepelru alwx. A' opx angidr kx krkcng tzale-zvzng alwx, trnzkrzlru nide x trnznginidru doa nedeng.

⁷ Doa nengeng mz Kraes, bzkq rlr-ngrbzmu mz leplz nzesabrti-krdr nimu. Murde krkcng tzale-zvzng da kxtubq, nztubq-kzng mz nzobqkr Gct, da kc tqwai Kraes nztubq-krde mz nzobq-krde. ⁸ A' krkcng tzale-zvzng alwx nzaelwapx-ngrdr kx nidr doa neng Setzn, kc tqngi Nar Drka', mz nzapu-krdr nide kc tqale kai alwx. A' MrIx Gct vzm mz nzodati-krde nzwzkr Setzn amrlx, murde trka-zlwzng.

⁹ Doa angidr neng Gct trnzale-zvzung alwx, murde nqmq kr Gct ycpxm badr. X rblxbz badr nzale-zvz-krdr alwx murde sutitx drtwrdr nzapu-krdr Trtedr. ¹⁰ Delc, opx angidr kxmu nzglx-krgu neke doa ne Gct o neke doa ne Setzn. Murde krkcng trnzalelru da kxtubq x trnzmlztilru kztedrng trnznginidru doa neng Gct.

Doa Angidr Neng Gct Nzmlzti-lzbqng

¹¹ Natq kcpwz tqxlr-ngrnamu mzli kc tqrlxngiti-ate-ngrnamu, nide sele. "Nigu leplz neng Kraes namrlzti-lzbqku!" ¹² Bzkq apuku Ken kc tqvz-nqblqle Setzn kc Tqdrka'ngr x nibqle mzlede Ebol. Murde nztubqkr nqmq kr mzlede aelwapx-ngrbzle bade kx nqmq krde drka'ngr. *

¹³ Mz nqmq lcdepwz, bzkq kctipxku leplz kcng trnzvz-nqblqlru Gct nztrkatikr drtwrdr nigu. ¹⁴ A' nzmlzti-krgu kztegung kxnzrlxngiting, aelwapx-ngrde kx rlapxpeku mz nzbz-alongr x prtrpeku mz nzlungr kxboi. A' krkcng trnzmlztilru leplz neng Kraes, nzmnclzbzng mz zmatq ngr nzbz-alongr. ¹⁵ Krkcng tztrkati drtwrdr leplz, nzapulr kxnzrnibqng mz nzobqkr Gct. X leplz kxnxmulr lcng trnzprtrpzung mz nzlungr kxboi. ¹⁶ Jiszs aelwa-ngrmle bagu drtwr ngr nivz angidr mz nzrlrpx-krde nzbz-krde mz nzokatr-krde nigu. X sufi drtwrde kx narlrpx-lzbq-ngrgu mz nzokatr-krgu

mzlegung x inwegung mz Kraes, kxmule-esz' drtqgu etq x bzku. ¹⁷ Doa kx rngisc da x px-ngrde nzokatr-karde mzlede kx tr-rngiscu da, trpnzngr nivz lr Gct kx ycpxm mz nabzde. ¹⁸ Doa nengeng mz Kraes, nivz angidr aelwaxp-lzbq-ngrde mz nzokatr-karde leplz. Mane nzycmnetrkr ncblu nivz x mzli lcpwz trokatrleu leplz.

Gct Mrlztile Nigu Doa Nedeng, Kxmule-esz' Kzdung Mzli Taoku Mz Alwx

¹⁹ Mz nzmrlzti-lzbq-krgu lc, nakrlz-angidrku kx nigu doa nedeng. X mzli kc tqkrka'-ngrgu nakrlz-kzku mz nabzgu kx mrlztile nigu. ²⁰ Kzdung mzli, mz nztao-krgu mz alwx, drtqgu mya, x trxngipebzkuu nivz lrde mz nabzgu. Kxmule-esz', a' Gct krlz-zpxle da kx ycpxm mz nabzgu x nivz lrde myaszpx-zlwzle da lcng amrlx. ²¹ Doa nengeng, mz nzkrlz-krgu mz nabzgu kx trvz-rbrkuu, nelzgu nbr mz nzkrka'-krbzku bade. ^{*} ²² X mz nzkrka'-krgu lc, sa nakamle bagu da kznikeng rlxtibzku bade, murde sc tqvz-nqblq-zvzpeku natqdeng x abrtz-ngrde nqmq krgu. ²³ X natqde kx myapx-esz'ngr nide sele. "Nalxngitiku Jiszs Kxnzmcpx nzngini-karde Mrlx Gct x namrlzti-lzbqku, da kc tqwai nzpi-krm Jiszs le bagu." ²⁴ X krkc tqmnc-nqblq-angidrle natq Gct, sc tqaxvctr-lzbqpe-kzpz mz Gct x Gct axvctr-lzbqpebz bade. X Mqngrkxtr kc tqavzomle bagu pi-zvzmle da lc mz nabzgu.

4

Kxnamu Nzglx-krgu Kxakrlz Ne Gct O Kxakrlz Ne Setzn

¹ Mzlengeng x inwengeng, aclvetio-lzbqamu kxnxzakrlz kx mnckilzamu. Murde kxnxzalvztr-rbrng nzkqlung, x natqdrng nzvzpxmqng mz drka'. Mz nzmu-karde lcde, abz-kaiamu natq amrlx mz nzrmc-krmu me nzvzkipxmlr. ² Murde mzli kc natq kxakrlz vzpxm mz Mqngrkxtr, ncblu lc sa na-alvztr-ngrde kx Jiszs Kxnzmcpx nide Mrlx Gct, kc tqvzm mz nrlc nzngini-karde leplz. Krkcng tzalvztr-ngrdr da lc nidr angidr kxnxzakrlzng neng Gct. ³ A' ncblu kx alvztr-ngrde kx Jiszs trngiu Mrlx Gct, kc tqvzm mz nrlc nzngini-karde leplz, tqnginide enqmi r Kraes. Xlrpeamu kx Enqmi r Kraes Kc Etu sa navzm kalr. Kxmule-esz', a' mzli ka enqmi r Kraes kxnxzakrlzng nzmncpeng mz nrlc.

⁴ A' nipemu doa neng Gct x aovxiopeamu kx nzalvztr-rbr lcng, x trnzesabrtipelu nimu. Murde Mqngrkxtr kc tqmncpxm bamu myaszpxle Setzn badr drka' nedeng kcng mncpxmqng mz krkcng trnzrlxngitiung. ⁵ Natqdr nzvz-nqblqlr nzaokr drtwr leplz mz nrlc kcng trnzkrzlr Gct, murde kxnxzakrlz lcng trnzkrzlr-kzlr nide. X kxnxvz-nqblq-ngrdr natqdr ngi txpwz kxtrnzkrzlr-kzlr Gct. ⁶ A' kxnxzkrzlr Gct nzvz-nqblq-kzlr nzalvztr-krgrng mz nzngini-krgr aposol neng Jiszs kcng tqatwzlr-ngrm Gct. Leplz kx trnginedeu nzpxtxpx-ngrdr nzalvztr-krgr. Mz nzmc-krmu da lcng tqpi-atebo, naglxamu kxmnc mzlilxlr kx vz-nqblqle natq angidr x krkc tqvz-nqblqle natq kx vz-rbr. *

Gct Ngi Nou Nivz Lrgu

⁷ Doa nengeng, navz zvz nzmrlzti-lzbq-krmu. Murde Gct ngi nou nivz lrgu mz nzmrlzti-krgu leplz. X mz nzmrlzti-krmu lc leplz, opx angidr kx Gct mncpxm bamu x nimu doa nedeng murde apuamu Trtemu. ⁸ X opx angidr kz kx doa kx trmrlztileu kztedeng trkrzleu Gct. Murde nivz lr leplz kcng tzaxvctr-lzbqbz bade, na-apule nivz lrde. ⁹ Gct aelwaxp-ngrde kx mrlztile nigu leplz mz nzatwzlr-krmle mrlxde kc esz'txu mz nrlc, murde narmctiku

^{*} 3:21 1 Jon 1:9 * 4:6 Nzalvztrkr aposol nzycpxmqng mz Nzryrngrkxtr Kc Ate.

nzlungr kxboi. ¹⁰ X mz nivz lc tqetu-esz'ngr aelwapx-kz-ngrde drtwr ngr nivz angidr. Murde nivz lc trvzpxpuu mz nzmlzti-krgu Gct, a' mz nzmlzti-krde nigu. Murde mz nivz lc, atwzlr-ngrmle mrlxde mz nzngini-krde blz kx naxpe-ngrde alwx rgung. ¹¹ Mz nzmu-krde lcde, namrlzti-lzbqku kz, murde takitrde nzmlzti-krgu leplz kcng tqbzng Gct nidr.

¹² Kxmule-esz' trmcckuu Gct, a' mnccpxm mz nabzgu nzmu namrlzti-lzbq-zvzku. X tekqtr-zvzle nabzgu murde nivz lrgu na-apupwzle nivz lrde. ¹³ X krlzku kx Gct sc tqmncpxm mz nabzgu x axvctr-lzbqpebzku bade, murde kapemle Mqngrkxtr bagu. †

¹⁴ Nigr aposol pipx-zvzbzkr mz leplz kx Gct Trte atwzlr-ngrmle Mrlxde mz nzarlapx-krde lr nrlc. Murde mc-angidrkr mz mzkr da lcng tqprtztng mzli kc. ¹⁵ Krkc tqrlxngitile x rpile kx Jiszs nide Mrlx Gct, Gct sc tqmnc mz nabzde x nzaxvctr-zvzbz bade. ¹⁶ Krlzpeku nzetu-krm nivz lr Gct bagu, murde aelwapx-ngrmle nivz lc bagu. X brtipe drtwrgu kx sa namrlzti-zvzle nigu, murde krkc nqmq krde. X krkcng tzmlzti-zvzlr leplz, sc tzaxvctrpebzng mz Gct kc tqmncpxm mz nabzdr.

¹⁷ Mz nzaxvctr-krbzku mz Kraes, tekqtrle nigu murde nivz lrgu na-apupwzle nivz lrde. X na-apuku nide mz nzmncc-krgu mz nrlc ka. Mz nzmu-krde lcde, nelzgu nabrpe mz nztutr-krbzku mz mz Kraes mzli kc nayzlu-ngrmle. ¹⁸ Doa kx mwxlrtile nzayrplapxkr Gct nide mzli lcde, trkrlzkale kx Gct mrlztile nide. Murde mz nzkrllz-angidr-krde nivz lr Gct mz nabzde, trpnzngr zmwxlr kx naycpk-kzp elr. ¹⁹ Nzmlzti-krgu Gct x leplz vzpxm mz nzmlzti-kaikr Gct nigu. ²⁰ Doa kx rpile kx mrlztile Gct, a' trkati drtwrde kztedeng, nide kxdrka'ngr kxpokia. Murde doa kx trkati drtwrde leplz kcng tqmctrpzle mztr, rblx nzmlzti-krde Gct kc trmcctrpwzleu mzte. ²¹ Natq kx kam Kraes bagu nide sele. Doa kx mrlztile Gct, namrlzti-kzle kztedeng! *

5

*Doa Neng Gct Nzmlztilr Nide,
Nzvz-nqblqlr Natqdeng, X Nzbrti Drtwrdr Kx Jiszs
Nide Mrlxde*

¹ Krkcng amrlx tzlxngitilr kx Jiszs nide Kxnzmcpx ne Gct, nidr doa angidr nedeng x nzmlztilr Gct Trtedr. X mrlzti-kzlr doa amrlx nedeng. ² X nzmlzti-krgu lc doa nedeng vzpxm mz nzmlzti-krgu Gct x nzvz-nqblq-krgu natqde. ³⁻⁵ Aelwapx-ngrgu nzmlzti-krgu Gct mz nzvz-nqblq-krgu natqde. X natqde tr-rblxpuu bagu murde doa nedeng nzkrllzlr nzvz-nqblq-krdr me pnz drtwr Trtedr. Doa nedeng amrlx kcng tzlxngitilr kx Jiszs nide Mrlxde, nidr txpwz kx nzrngiscng zmatq ngr nzaovxio-krdr nzatalzng x alwx amrlx. Zmatq lc vzpxm mz nzabrrtr-krbzku drtwrgu mz Jiszs nzokatr-krde nigu.

Gct Aelwapx-ngrbzle Kx Jiszs Nide Angidr Mrlxde

⁶⁻⁸ Rkx kcng tq nzaelwapx-ngrdr kx Jiszs nide angidr mrlx Gct. Rkx kx ayrrnrngr lue. Murde mzli kc tqwrkxtrngr Jiszs, rpi Gct kx, "Krkc Mrlxde." Rkx krali mepyr. Murde yrleo-ngrm Jiszs mepyr ngrde mz kros mz nzbz-krde nigu. X rkh kratq Mqngrkxtr kc tqmncpxm mz nabzgu. Murde

† ^{4:13} Mzli kc Mqngrkxtr tqmncpx-ngrmle mz nabz leplz, opx-angidrbz badr. Murde ycmne-lrpibz badr x okatrle nidr mz nzbrtrikr drtwrdr Jiszs, nzmlzti-krdr nide x nzvz-nqblq-krdr natqde. Mqngrkxtr aelwapx-ngrbzle alwx rdrng badr, murde naplpxbzlr alwx lcng mz Gct x naipqle nidr. X mou, kabzle badr zmatqng kxmyapxbz mz nwztr-krbzlr mz Gct. * ^{4:21} Matiu 22:37-40; Mak 12:29-31; Luk 10:27-28; Jon 13:34; 14:15; 15:12

drtwrde esz'ti badr Gct kx Jiszs nide Mrlxde. Delc rrx lcng tq, lue, mepyr, x Mqngrkxtr drtwrdr esz'ti mz nzaelwapx-krmlr bagu kx Jiszs nide Mrlx Gct. ⁹ Mz nrlc ka, lxngitiku nike nzpipx leplz mz nzycmnetr-krdar mz da kx nzkrlzlr. Delc takitrde nzlxngiti-kz-krgu natq Gct mz nzycmnepx-krde kx Jiszs nide Mrlxde. Murde Gct myaszlle leplz x trkrlzleu nzpokiangr. ¹⁰ Nigu amrlx kcng tzlxngitilr Mrlx Gct, krlzpeku mz nabzgu kx natq Gct ngi da angidr. A' doa kx trlxngitileu da kx pipxngr Gct Mrlxde, rpile kx Gct pokia, murde ptxpx-ngrde natqde.

Krkng Tzxngitilr Da Kx Pipxngr Gct Mrlxde Narmctilr Nzlungr Kxboi

¹¹ Natq Gct nide sele. Gct sc tqkamle bagu nzlungr kxboi kc tqvzpxm mz Mrlxde. ¹² Krkc tqlxngitile Mrlx Gct rmctile nzlungr kxboi, a' krkc tqpxtxpx-ngrde Mrlxde trprtrpepu mz nzlungr lc.

¹³ X yrbo da lcng amrlx bamu, murde sc tqlxngitipeamu kx Jiszs nide Mrlx Gct. X suti drtwnge kx nakrlz-kzamu kx sc tqrmctipeamu nzlungr kxboi.

Gct Ayzlubzle Nzkrka'kr Doa Nedeng

¹⁴ Nigu doa neng Gct. Mz nzmu-krde lcde, krlzku kx mzli kc tqkrka'-nrgu tqrlx-ngrbzku da mz Gct mz nzvz-nqblq-krde me pnz drtwrde, lalztqm bagu. ¹⁵ X sa nakamle bagu da kcng tqrlxtibzku bade, mz nzvz-nqblq-krde me pnz drtwrde.

¹⁶ Mz nzmu-krde lcde, mzli kc tqmc-nrgu mzlegu mz Kraes kc tqale alwx kx tryrkrpxu mz nzbz-alongr, nakrka'-nrgu x narlxtibzku mz Gct nzipq-krde nide. X Gct sa na-alq-mopwzle nabzde x na-amnctr-lxblr-moule nidr rlirdr. A' kzdung alwx nzyrkrpxng mz nzbz-alongr, da kc tqwai mz nzpxtxpxngr Jiszs nzngini-krde Mrlx Gct. Bzkq rlxtibzku mz Gct nzipqpx-krde alwx kxnzmull lcng. ¹⁷ Nzvz-rbr-ngrng amrlx delang tqngi alwx mz nzobqkr Gct. A' alwx kxnzkqlung kx trnzbatrpwzlu mz leplz nzpxtxpx-alo-krdr Gct. Krlcng krlzle nzipqpx-krdeleng. *

Da Kcng Tqkrlzku

¹⁸ Da kcng tqkrlzku nidr seleng. Krlzku kx doa angidr neng Gct trnzale-zvzlu alwx, a' nzvz-nqblqlr nqmq kr Gct. X Mrlx Gct aclevle nidr, murde Setzn ma tqatrkatile nzrlxngiti-krdr. ¹⁹ X krlz-kzku kx nigu doa neng Gct, a' leplz amrlx kcng trnginedeu nzmncbzng mz zmatq ngr Setzn kc Tqdrka'ngr. ²⁰ X krlz-kzku kx Mrlx Gct vzm mz nzokatr-krde nigu murde nakrlz-zpwxku Gct angidr. X na-axvctrpzku bade mz nzaxvctr-lzbqpe-krbzku mz Mrlxde Jiszs Kxnmcp, kc tqngi kz Gct angidr x nou nzlungr kxboi.

²¹ Doa nengeng, acvetio-lzbqamu. X bzkq rlrpx-lzbq-ngrbzku mz doa x da kx natekqtrlr Gct mz nabzgu. A' na-angio-txpwzku nide.

Delape. Mrlztix nimu. Ninge Jon.

* ^{5:17} Alwx esz'txu kx tripqpxu Gct. Krlc nzpxtxpxngr Mqngrkxtr kc tqokatrl leplz nzlxngiti-krdr Jiszs. Murde Gct krlzle nzipqtx-krpwzle krkcng tzplzpxbzlr alwx ngrdrng bade. A' rblxbz mz doa kc tqpxtxpx-ngrde Mqngrkxtr nzyckr drtwrde alwx ngrdeng, murde Mqngrkxtr dekc tqokatrl leplz mz nzkrz-krdr alwx ngrdeng. X trpnzng nzipqkr Gct doa kc trpnzng nzipqpx-krbzle alwx ngrdeng bade. Bzkq krka'-nrgu doa kc tqpxtxpx-ngrde Mqngrkxtr. Mc kz Matiu 12:32.

Nzryrkr Jon Krali

Natq Ngr Nzaplxtqngr Mz Nzryrkr Jon Krali

Mc 'Natq Ngr Nzaplxtqngr Mz Nrpakxmrlz Kx Yr Jon.' Mwx yrle letz lc mz yiz 90 o 91 AD mz nibr nzrmcngr mz Jiszs. Letz lc trkrlzkuu kx ryr-neba Jon, murde apule nzycmne-ebzpxngr. Ycmnetr-ngrde kzdq olvz x doa nedeng kx drtwr ngrde kzdq dzbe lrmakxtr. Ilede drtwr ngrde kzdq kz dzbe lrmakxtr kx aclve Jon. Mz yiz kcng trtqki-li (200) mz nibr nzvzdzkr Jiszs Heven, leplz kxnzqqlung nzvzpxng mz nzalvztr-krdr leplz. Nzmncng badr kxnzlxngitilr nzalvztr-krdr x kxzokatrlr nidr mz nzvzpx-krdr. Mz letz lc, Jon rpibzle mz kxzokatrlr na-aclvetio-lzbqng, murde ma tzokatrlr krkcng tzalvztr-rbrng.

X Jon yr-kzle kzdung da kx apupwzle da kx yrle mz letz kc kai, a' letz lc mrbcnepwz. Pibzle badr kx nalolvz-amqngilr nzalvztrngr angidr, namrlzti-lzbqng, x bzkq nzrlr-ngrbzlr mz kxzokatrlr nzalvztr-krdr x nzalvztr-krdr mz makxtr nyzdr.

¹ Ninge Jon, kxaclvele lrmakxtr. Nimu dzbe lrmakxtr lang mrla kx mcpx Gct, apuamu ile-lzbq badr dzbe lrmakxtr kang mrka. X rpibo "Nimu la!" mz doa nemqng mz Kraes amrlx mrla, murde mrlzti-angidrxng. X trnipwc'u esz'-krnge, a' leplz kcng amrlx mrka tzkrlzlr nrpa angidr ngr Kraes, nzmrlzti-kzlr nimu. ² Mrlztkr nimu murde nzalvztrngr angidr kc tqyc alo mz nabzgu. ³ X krka'-ngrne kx Gct Trtegu, x Mrlxde Jiszs Kxzmcpx, nakamlr bagu zmrlz ngrdr kxmyalz, nzyckr drtwr, x nzmnc-zpxngr mz nzlxngiti-krgu NRPA NGR KRAES, x mz nzaelwapx-krgu nivz lrde.

Da Angidr X Nivz

⁴ Rmctix kzdung doa nemung, x abrtztx-ngrne nzmc-krnge nzvz-nqblqbe-krdr nzmncngr angidr, da kc tqwai Gct Trte nzkapx-krde natqde kx nayrlq-angidrku. ⁵ X mzli ka, tr-ryrpwc'u bamu natq kxmrna. A' nadcpx mz drtwrmu natq kc tqka-pnzm Gct bagu, mzli kc kai tqlxngiti-ngrgu Nrpakxmrlz. Natq lc nide sele, "Namrlzti-lzbqku!" ⁶ Aelwapx-ngrgu nzmrlzti-krgu Gct mz nzvz-nqblq-krgu natqde. X natq kx kapxle mzli kc kai nide sele. "Namrlzti-lzbqku!"

Kxzakrlz Kxzpkiang

⁷⁻⁸ Acivetio-lzbqamu, murde kxzakrlzng kxzpkiang nzkqlung nzmncpemqng bagu, x nzrpilr naesabrtiir nimu. Leplz lcng trnzlxngitilru nzvz-krm Jiszs Kxzmcpx mz nrlc nzngini-krde leplz. Krkz nzalvztrkr Enqmi Kxetu ngr Kraes, kc tqngi kz Kxpokia. Bzkq vz-nqblqamu lrpzki rdr kx vz-rbr. Murde mz nzvz-nqblq-krmule, trnatwzpebamuu da amrlx kx navzpxmqng mz nzwztr-krbzku mz Kraes. ⁹ Doa kx trvz-nqblqleu nzalvztrkr Kraes, traxvctr-lzbqpu mz Gct. A' krkc tqmncmire nzalvztrngr angidr, nide kx axvctr-lzbqpu mz Gct ncdr Mrlxde. ¹⁰ Mrlx kx vzm bamu kx trtwzpleu nzalvztr-angidrkr Kraes, bzkq rlr-ngrbzmu nzalvztr-krde mz makxtr x bzkq adwatramu mz ma nyzmu. ¹¹ Murde krkc tqabrtzlvz kxakrlz kxpokia axvctr-lzbqpebz mz alwx ngrde.

Natq Ngr Nzarlz-lzbqng

¹² Da kqlu kx suti drtwrnge napibo bamu, trpengr nzyrtio-krboleng mz letz lc. Murde suti drtwrnge nzoklati-krbo nimu mz nzpi-zpxngr mz

bamu x naelalz-ngrm drtwrgu. ¹³ Dzbe lrmakxtr kang mrka kx mcpx kz Gct, nzrpibzlr bamu kx, “Nimu la!” Lrmakxtr kang mrka tqapuamu badr ile-lzbq mz Kraes.

Delape. Mrlztix nimu. Ninge *Jon*.

Nzryrkr Jon Kratq

Natq Ngr Nzaplxtqng Mz Nzryrkr Jon Kratq

Mc 'Natq Ngr Nzaplxtqng Mz Nrpakxmrlz Kx Yr Jon.' Mwx yrle letz lc mz yiz 90 o 91 AD mz nibr nzrmcngr mz Jiszs. Jon yrbzle letz kratq lc mz kzdq ncblo drtqde Gaizs. Ycmnetr-ngrde kxnamu lrmakxtr nzokatr-krdr krkcnq tzvzpxng mz nzyapwxtipx-krdr Nrpakxmrlz. Rpile kx nqmq kr Gaizs mrlz murde okatrle nidr, a' nqmq kr Diotrifes trka, murde atrkatile nidr. X rpi-kzpze mz Gaizs kx narlr-ngrbzle mz Demitrizs nzalvztr-krde mz makxtr nyzdr. Mwx Jon kabzle letz lc mz Demitrizs mz nztwz-krbzlele mz Gaizs.

¹ Nim la, Gaizs. Ninge Jon, kxaclvele lrmakxtr. Mrlzti-angidr-zlwzx nim. ² Mrlxnge mz Kraes, krka'-ngrne kx da amrlx namrlzbz bam, x naxplrq mz nrkrdrtrq, da kc tqwai nxzplrx-krm mz nzrlxngiti-krm. ³ Eu, abrtztx-zlwz-ngrne nxzlxr-krnge nrpa kx nzrlwa-ngrmqng kzdung kztegung kx nzvzmqng mrka. Nzrpilr kx vz-nqblq-zvzpeq nzmncngr angidr mz nzlolvz-amqngi-krm Nrpakxmrlz. ⁴ Nzabrtz-krnge myapx-esz'ngr nzxlr-krnge nzvz-zvzkr doa nengeng mz nzvz-nqblq-krdr nzmncngr angidr.

Nzmrlzkr Nqmq Kr Gaizs

⁵⁻⁶ Mrlxnge, mzlegung kcng tzvzpxng mz nzalvztr-krdr Nrpakxmrlz, nzyapwxtipxpebzlr mz lrmakxtr mrka nzmrlz-krbz nivz lrm badr. X nzrpi-kzlr kx nzokatr-krm nidr vz zvz, kxmule-esz' trkrzlwq nidr. X abrtztx-ngrne nzokatr-krm nidr mz nzmncngr kx takitrde nzaxvctr-krbzme mz Gct. X da kx mrlzm bange nxzlxr-krngele, mzli kc narkalz-ngrmlr mztea nyzm, kabzme da kcng amrlx naokatrle nidr, mz nzlepx-krdr Nrpakxmrlz. ⁷ Murde nzvzneng mz nzwztr-krbzlr mz Kraes, a' trnzrtwzpwzung dalr nzwz-krdr mz leplz kxnmnc-mrbrng kcng tzryapwxne badr. ⁸ Mz nzmu-krde lcde, takitrde nigu lrmakxtr nzokatr-krgu nidr, mz nzngi-kzte-krgu badr mz nzwzkr Kraes.

Bzkq Vz-nqblqq Nqmq Kr Diotrifes

⁹ Yrbo da lc mz lrmakxtr mz mztea nyzmu. X pipxpebo nzmncngr angidr mz nzokatr-krmu leplz kcng tzvzneng mz nzalvztr-krdr Nrpakxmrlz. A' Diotrifes kc tqrtulrtr-lzbq mz nzngini-krde kxrmailz, trlxngitieu nike pibo bamu. ¹⁰ X mzli kc navz-ngrbo, sa nayapwxtipxbo nqmq krde mz lrmakxtr nyzmung, mz nzpiti-krde ninge mz natq kxtrka x nzpokia-krde. X da kx trka zlwz, ptxpx-ngrde nzadwatr-krde leplz lcng mz ma nyzde. X da kxtrkatx-esz'ngr kz, rpwa'-ngrbzle mz leplz kcng tzrpilr na-adwatrng mz ma nyzdr, x aprtxpxle nidr mz makxtr. ¹¹ Mrlxnge, bzkq vz-nqblqq nqmq krde lcng tqtrka. A' vz-nqblqpwz nzmncngr kxtubq, murde krkc tqalele da kxtubq, nide doa ne Gct. A' krkc tqalele da kxtrka, trtxpnzng nzkrlz-krde Gct.

Nzokatrngr Demitrizs

¹² Mzli kc navz-ngrm Demitrizs mz nzalvztr-krde mz makxtr nyzmu, naokatramu nide. X nim, kx Gaizs, na-adwatrq nide ma nyzm. Murde trtxpnzng da kx trkatrpz bade, x leplz amrlx nzrpilr kx nide ncblo kxmrlz. Krlzq kx trkrzlwq nzhokatr, x napi-zpxbo bamu kx nzalvztr-krde tubq.

Natq Ngr Nzarlr-lzbqng

¹³ Da kqlu kx suti drtwrnge napibo bam, a' trpengr nzyro-krboleng mz
letz lc. ¹⁴ Murde rpx kx navzbo bam mz nzycmnetr-krgi mz da kxkqlu.
¹⁵ Kztem kcng mrka nzrpibzlr bam kx, "Nim la." X pibz mz kztenge kcng
mrla amrlx kx rpibo badr kx, "Nimu la." Eu, nim lape. Krka'-ngrne kx
nakabz Gct nzmnc-zpwxngr bam.

Delape. Mrlztix nim. Ninge *Jon*.

Nzryrkr Jud

Natq Ngr Nzaplxtqngr Mz Nzryrkr Jud

Mwx Jud yrle letz lc mz mzlis yiz 65—80 AD mz nibr nzrmcngr mz Jiszs. Nide kzdq mzle Jiszs kxtopwzbz. [◊] Jud trlxngiti-kaileu Jiszs, a' mz nibr nztulz-krmle mz nzbzngr, sc tqlxngiti-atele. [◊] Mzle Jud kc tgetubz, drtqde Jemes, aclvele lrmakxtr kc Jerusalem. [◊] Mz 1 Korint 9:5 mcku kx mzle Jiszs lcdeng nzkrzti-angidrung x nzlepxlr Nrpakxmrlz da kc tqwai Pol. Jemes ncdr Jud trnznginidru aposol, a' nidr kxznetung ngr lrmakxtr kx nzamrlue zlwz kxnxrlxngiting.

Jud ycmnetr-ngrde kxnxakrlzng kxnxpokiang kcng tzataleo-lzbqpebzng mz nzyrlwr-lxblkr lrmakxtr. Nztwz-rbrpelr Nrpakxmrlz mz nrpi-krdr kx ncblo trvz-rbru mz nzrmwimigr doa kx trngiu kernalzde, murde mz zmrlz ngr Gct kxmyalz, sa naipq-zvzle leplz, kxmule-esz' vz zvz nzale-krdr alwx lc. Nzaongr drtwr lc sa tzalvztr-kzngr mzli ka. Murde leplz kcng tzrpilr kx nzlxngitilr Jiszs, trnzlxngiti-angidrlru kx Gct krlzle nzavzngr leplz mz Hxl, murde nivz lrde etu zlwz. Nzalvztr-kzlr kx leplz narlpox-ngrdr nzalengr da kx myangr drtq, kxmule-esz' Natq Gct rpwa'-ngrde da lcng. Krlc nzalvengr da kxmrlz mz da kxtrka-esz'ngr. Mz mzli nyd Jud, leplz lcng nzpxpx-ngrdr zmatq ngr Loukxtr mz Nzryrngrkxtr Kc Kai. X mzli ka kzdung leplz nzxtrnga-ngrdr zmatq ngr Nzryrngrkxtr Kc Ate, kc tqrpibzle badr kx nzvz-rbrng.

¹ Nimu la! Ning Jud, mzle Jemes kxtopwz. X wztr-nrbalqbo mz Jiszs Kxnxmcpx. Ryrbo bamu, nimu kcng tqkqle Gct Trte mz nzrlxngitingr, tzmnccpxmqng mz nivz lrde. Aclvele nzrlxngiti-krmu nakrlzbzle mzli kc Jiszs Kxnxmcpx nayzlu-mou-ngrmle. *

² Krka'-ngrne kx natwz-zvzamu nzrmrlzngr, nivz, x nzmnc-zpwxngr. Eu, angida.

Kxnzakrlz Kxnxpokiang

³ Mzlengeng x inwengeng, mzli kc kai suti drtwnge nzryr-krbo bamu mz nzlu-krgu kxmrna mz Jiszs. A' tekqtrpex drtwnge, murde kzdung da kx nzprtzbzng bamu. X mzli ka suti zlwz drtwnge nzrngidrlvz-ngrbo bamu mz nzvec-krmu murde natu-amqngiamu mz da kcng tqlxngitiku. Murde da angidr lcng tzaprcemlr bagu, nalolvz-amqngiku, nigu doa kxnxtrng.

⁴ Mzli ka kzdung kxdrka'-ngrng nzataleo-lzbqpebzng mz mzlirmu. A' trkrlzwamu kx nzpxtxpx-ngrdr nzmnclz-ngrbz mz Jiszs Kxnxmcpx, kc tqngi txpwz Kxetu rgu mz da amrlx. Nztwz-rbrpelr Nrpakxmrlz mz nrpi-krdr trvz-rbru mz nigu kxnxrlxngiting mz nzrmwimigr doa kx trngiu kernalzgu, murde sa naipq-zvz Gct nigu mz zmrlz ngrde kxmyalz. A' mzli kc pnz, profet nzyrolr mz Nzryrngrkxtr kx leplz kxnxmulr lcng sa nayrplaxng mz Hxl. †

Kxnxaleng Alwx Mzli Kc Bqnc Nzayrplaxng

⁵ Krlzpeamu be kcng amrlx napi-ngrbo bamu, mz leplz kcng tzmnccng mz alwx mzli kc bqnc tzayrplaxng. A' brngz nzadcpk-mou-ngrm bagu.

[◊] : Matiu 13:55; Mak 6:3 [◊] : Jon 7:5; Aposol 1:14 [◊] : Aposol 15:13; Galesia 1:18-19 * 1:1

Jud lc ni-kzde mzle Jiszs. Mc mrkc wq mz 'Natq Ngr Nzaplxtqngr Mz Nzryrkr Jud.' † 1:4 Jiszs kamle bagu zmrlz ngrde kxmyalz, murde nargiscgu zmatq mz nzaovxio-krgu alwx. A' trngiu da kx rlr-ngrmle bagu nzale-zvz-krgu alwx.

Murde arlapxpe Yawe lr Israel, leplz nedeng kcng tqmcpixe, mz nzngini-krdr kxnxawz-nrbalqng mrkc Ijipt. A' mz nibrde ayrplapx-kzle kzdung nidr mz nzodati-krde krkeng trnzlxngitilru nide. ⁶ X nayc kz mz drtwrmu enjrl kcng tzvecpx-lzbqng mz naclve-krdr mz zmatq ngrdr. Nzesablqtitxdr mrnyzdr. Mz nzmu-krde lcde, ayrplapxpe Gct nidr mz nzpe-allo-krde nidr x nzamnc-krdeleng mz presin kx wx-nzlongr. X namncng elr nakrlzbzle mzli kc nayzlu-ngrm Jiszs mz nzayrplapx-mou-krdeleng. ‡

⁷ X nadctipx kz drtwrmu lr Sodom x lr Gomora, x lr mztea kcng tzesonetr-pzng. Mz nqmq lcpwz, nzrmwiming badr doa kx trngiu kernalzdrng mz nzalvengr da kxmrlz mz da kx trka-esz'ngr. Mz nzmu-krde lc, Gct angcle leplz lcdeng x mztea nyzdrng mz nyr kx vzom mz bongavz, murde nakrlz-ngrgu kx sa na-ayrplapx-kzle leplz kxdrka'-ngrng amrlx mz nyr kx nge alo.

◊

Lepz Kcng Mzli Ka Tzalvztr-rbrng Sa Na-ayrplapx-kzng

⁸ Mz nqmq lcpwz, kxdrka'ngr lcng tzprtrpzng bamu nzale-kzlr da lcng. Murde nzrpilr kx Kxetu kx rkabz nzobq-rmwibilegr kcng tzvz-nqblqlr; tqrlr-ngrbzle badr nzrtrngz-abeane-ngrbz da kx myangr drtq. A' mz nzale-krdr alwx lcde, nzatrkatilr nrkrdrtqdr mz nzobqkr Kxetu. X nzobqszolr zmatq ngr natqde. X nzpibqtilr enjrl nedeng kxnluling. ⁹ A' trtakitrdeu nzamyalz-lzbq-krdr nzmyaszlz-krdr Loukxtr. Murde Setzn rpwa'-ngrbzle mz Maekol, Nardr Enjrl, nztwz-krde namz ngr Mosis mz nzngini-krde kxrniqb. A' Maekol tramyalz-lzbq-pnzu mz Loukxtr, mz nzpnanati-krde Setzn. A' rpi-alzubzle kx, "Napnanatile nim Kxetu!" §

¹⁰ A' kxnxalvztr-rbr lcng nzpibqtilr da kznikeng tryrplatitru nardr. X mou, nqmq krdr vz-nqblq-txpwzle nqmq kr animol kzpetong, kx trpnzngr nardr. X trnzxplrlvzlu nrkrdrtqdr, a' nzvz-nqblq-alzulr nike xngibz nrkrdrtqdr, kcng tzbatrpzlr nzprtrnegr mz zngya ngr drtwr Kxetu x nzayrplapx-krde nidr. ¹¹ Agrmplzng! Murde sa na-ayrplapxng mz nzo-zli-krdr lrpzki nyz ncblo kxdrka'-ngrng kcng bqnc. Nzapulr Ken kc tqdrka'ngr. X nzvqti drtqdr nzalengr alwx, da kc tqwai profet Balam kc bqnc, mz nzmailz-krde lr Israel mz nzrtrngz-abeane-ngrbz alwx, murde nartwz-ngrde trau. X leplz lcng nzpxtxpx-ngrdr nzmnclz-ngrbz mz Kxetu, da kc

‡ **1:6** 5 Mc Nzkqlu-krdr dckrlzde kc 14. lr Israel trnzbrtiu drtwrdr nzokatrkr Gct nidr mz nzaovxio-krdr ncblo kxnxwzpxng kxnxplrng mz drtc' kc tqesalz-ngrbzle badr. Mz nzmu-krde lcde, krkeng trnzrlxngitiung trnzprtr-pnzung elr, a' nzrve-txpwzng lzke yiz nzpnu-pwx, vz vz nzbzng amrlx ngrdr. 6 Mc Nou 6:1-4. Be lc yc mz kzdq buk, drtqde 1 Inck. A' tryclpuu mz Nzryrngrkxtr, x trkrlz-angidruk kx nge da angidr o trtingr. Kxmule-esz', a' leplz mz mzli nyx Jud nzkrltilr be lc. Mz 1 Inck, kzdung enjrl nzvzomqng Heven x nzmwiming kzdung olvz x nzyrng. A' krle trvz-nqblqleu me pnz drtwr Gct, a' nge nzalvengr da kxmrlz mz da kxtrka-esz'ngr. ◊ **1:7** Nou 19:1-29 § **1:9** 8 Mzli kc Gct tqka-ngrbzle Loukxtr mz Mosis, ycmnekixle enjrl. [Aposol 7:38, 53; Hibru 2:2] Mz drtwr lr Jiu, enjrl nzaclevr Loukxtr x leplz nzmnclzbzng mz Lou. X nzlxngiti-kzlr kx Gct amnkle enjrl esz' kc na-acleve kzdq neidu, mz neidu amrlx mz nrlc. A' nzpnzkr drtwr leplz lcng le, nzmyaszlzlr enjrl lcng murde mz nzobq-rmwibile-krdr. Mz nzmu-krde lcde, trnzmnclzpwzung mz Loukxtr kc tqkabz enjrl lcng mz Mosis. X nzalvztr-kzlr kx enjrl lcng nzkabzlr mz leplz lou, mz nzatrkat-krdr nidr, a' trvzpuu mz Gct. Mz nqmq lc, nzvecpx-lzbqng mz nzmnclz-krbzlr mz Loukxtr, x trnzamrluelur enjrl kcng tzalvelr lou lc. Mc kz Rom 6:15-23 x 1 Korint 6:3. 9 Nzmu Maekol trnarngiscdeu zmatq mz nzryrlqng drtwrde mz nzvz-nqblqng Loukxtr, e trpnzngr kx rngisc kz zmatq lcde. Murde Gct txpwz esz'-krde kxmyaszlzle Loukxtr.

tqwai Kora kc bqnc. X sa naodati-kzng mz alwx lc, da kc tqwai Kora. *

¹² Leplz lcng trnzamrluelru kztedrng mzli kc tqmu-lxblr-ngrnamu x mzli kc tqodu-lxblr-ngrnamu mz Nzmungrkxtr. Murde mzli lcdeng nzalelr da kx myangr drtq mz nzmutu-krdr x nzrmnq-zlwz-krdr. Nzapulr mapz kx wxlzngr lcsu, murde nzbatrpzlr nzodatingr leplz. X nzapulr kxzaclveng sip, a' nzaoti txpwz drtwrdr nidr esz'-krdr. X nzapu-kzlr dcbl kxmingr kx twzne nenq mz mzli r nepi boi, murde da kx nzalvztr-ngrdr trokatrleu nzrlxngitikr leplz. * X nzapu-kzlr nounc kx trpengr nradr murde nzmzpeng, x nzmz-moung mzli kc tzamrtu-ngrdrng. * ¹³ X kxnxalvztr-rbr lcng nzapu-kzlr nrc kxetuting mz nabz trlipu kxetu kx yrplao mz nabz drta' x nzrlaszlr dcvi kxnlvemlr. Murde nqmq krdr lc trmrlzu atrkatile leplz. * X mou nzapulr vri kx nzvz-lvilr nti rdr, murde nzamnc-mrbrllr krkcng tzrma-nqblqng. Delc sa na-amnc-along me yc-zlwzngz nzlo mz Hxl.

¹⁴ Inck vzpxm mz nrpr ngr ncblu krarlimz mz nibr Adzm. Plzpx-kaile leplz lcng tzdrka'-ngrng, mz nzrpi-krde kx, "Kxetu sa tqvzmipemle siu ngr enjrl nedeng, ¹⁵ murde napixbzle mz leplz amrlx kx nztubqng o trtingr. X mzli lc sa napipx-kzpzle mz kxdrka'-ngrng amrlx kx nzvz-rbrng mz da kxdrka'-ngrng amrlx kcng tzalelr. Murde nzvz-nqblqlr nqmq kxdrka'-ngrng, x nzpivxi-ngrdr Kxetu mz natq kxdrka'-ngrng." * †

¹⁶ Leplz lcng drtwrdr lc-zvz-ngrdr da kx prtzbz badr, murde drtwrdr tresapxu. * X vz zvz nzvz-nqblq-krdr da kxdrka'ngr kx mrlzbz badr. Nzglqpx-lzbqng mz nzycmne-krdr x nztamitilr leplz murde namrlzbadr nidr.

Jud Lc-apqbzle Kztedeng

¹⁷ A' nimu, kx mzleneng x inwengeng, nadctipx drtwrmu kx aposol neng Kxetu rgu Jiszs Kxnzmcpx nzpi-kaipzlr bamu leplz lcng tzdrka'-ngrng, tzmncng mz mzlirmu. ¹⁸ Nzibzlr bamu kx, "Mzli ka tqaenzli-ngrgu nzyzlu-krm Jiszs, leplz sa naxtrnga-ngrdr nigu kcng tzvz-nqblqlr nqmq krde. Sa navz-nqblqlr drtwr kxtrka kcng tqmrlzbz badr." * ¹⁹ X nidr leplz kcng tzbatrpzlr nzaki-lzbq-krmu mz nzalvztr-rbr-krdr. Nzvz-nqblqlr nqmq nr drtwrdr lcng tqdrka'ngr x Mqngrokxtr trmncpxuu badr.

²⁰⁻²¹ Mzleneng x inwengeng, mzli ka tqaenzli-ngrnamu nzprtr-krmu mz nzlungr kxboi Heven, kc tqvzpxm mz nzryckr drtwr Kxetu rgu Jiszs Kxnzmcpx x zmrlz ngrde, namnc-aepztrpzmu mz Gct mz nzolvz-zvz-krmu nivz lrde. Natu-amqngiamu mz nzalvztrkr aposol, murde nzrlxngiti-krmu naetunepx zvz. X narlr-lzbq-ngrbzmu mz zmatq ngr Mqngrokxtr nzmailz-krde nimu mzli kznikeng krka'-ngrnamu. ²² Nayc mz drtwrmu leplz kx nabzdr nrgo x na-aplrbzmu nzrlxngiti-krdr. ²³ Narngidrvz-ngrbzmu x na-apqtrpzmu drtwr leplz kcng tzesotrpzng mz nzprtr-krdr mz nyg ngr Hxl, murde narlapxng. * X nayc mz drtwrmu krkcng tzale-zvzng alwx. A'

* **1:11** Nou 4 ycmnetr-ngrde Ken nznibq-krde mzlede. A' mz kzduing be nedr lr Jiu, Ken nqmq krde drka'ngr zlwz, murde alvztr-rbrle leplz mz nzangio-krdr drka' x mz nzrmwimigr doa kx trngiu kralzdr. X be ngr Balam yc mz Nzkqlu-krdr dckrlzdrng 22-25, 31:16, Lou Kcpwz 23:4-5, Nemaea 13:2, x Nzaelwapxng 2:14. Lr Jiu nzpilr kx Balam esabtile lr Israel mz nzangio-krdr drka'ng x nzrmwimigr kxtrngiu kralzdr, murde King Balak, kc tqngi enqmi rdr, xpe-kapqle nide mz nzale-krde da lc. Mc kz nzkqlu-krdr 16 kc tqycmnetr-ngrde nzpxtxpxkr Kora nzmnclz-krbzle mz Gct. * **1:12** Nzyrplapxng 25:14 * **1:12** Matiu 7:16-20; Efisz 4:14; Nzaelwapxng 21:8

* **1:13** Asaea 57:20; Efisz 4:14 * **1:15** Matiu 12:36-37; 16:27; 25:31-32, 41, 46 † **1:15** Nou 4:21-24 ycmnetr-ngrde Inck. Mc kz natq kxtopwz mz Jud 6. * **1:16** Nzrlaszngr 16:1-12; 17:1-7; Nzkqlu-krdr 11:1; 14:26-29; 16:41—17:10; 1 Korint 10:10 * **1:18** Aposol 20:29 * **1:23** Matiu 18:15-17; Luk 17:3; Galesia 6:1-2; 2 Tesalonika 3:15; 1 Timoti 5:20; Taetus 3:10; Jemes 5:19-20; 1 Jon 5:16

bzkq odutr-lxblramu badr, murde alwx ngrdr ma tqaprctile nimu. Murde alwx ngrdr lcng nzapulr lrpz kxngangr kx angangrle kxrbxtrpz.

Jud Glqlzle Gct

²⁴⁻²⁵ Naglqpxku Yawe, Gct kc esz'txu, kc tqarlapxle nigu mz Kxetu rgu Jiszs Kxnzmcpx. Nide kc tqolovz-amqngile nigu, murde ma tqtaoku mz alwx. X alqngile nabzgu, murde na-abrtz-ngrgu nztubq-krgu mzli kc tqvzmi-ngrde nigu mz nztutr-krbzku mz mzte, mz zluli rde Heven. Murde sc tqtakitrde nzangiongr, tqmyalz-esz'ngr, tqxplr-esz'ngr, x tqmatq-esz'ngr, da kc tqwai-pnzle mz noude, krlzmle mzli ka, x kxnamu-zvzpele lc, tqyc tqyc. Eu, angida.

Delape. Ninge *Jud.*

Nzaelwapx-krbz Jiszs Mz Jon Da Kcng Tqyc-kapq-pnzng

Natq Ngr Nzaplxtqngr Mz Nzaelwapx-krbz Jiszs Mz Jon Da Kcng Tqyc-kapq-pnzng

Mc ‘Natq Ngr Nzaplxtqngr Mz Nrpakxmrlz Kx Yr Jon.’ Yrle buk lc mz mzlir yiz 90—97 AD mz nibr Nrpakxmrlz. Aposol Jon yrbzle letz lc mz dzbe lrmakxtr kcng rlimz mz provins kc Esia, tzmnclzbzng mz nzaclve-krde, murde pibz Jiszs bade mz nzobq-rmwiblengr. Suti drtwrde nzapqtr-krbzle nabz leplz mz nztu-amqngi-krdr mz mzli r nzakxpung. Murde nxzplkr Gct myaszpxle nxzplkr Setzn, x sa na-aovxio-atwrnr-ngrde Setzn badr enqmi r Gct amrlx, mzli kc nakrlz-zpwx-ngrbzle mzli kc tqyrlq Gct.

Mz nzobq-rmwible-krde lcng, Jiszs aelwapx-ngrbzle mz Jon kzdung da kx naprtzng, mz nzycmne-ebzpxngr kxkqlu. Kxnzrlxngiting drtwrdr tresz’tiu mz drtwr ngr kzdung da mz buk lc, murde rblx nzrkrlzngr. A’ kzdung da nzopx-angidrng. Mz nzmu-krde lcde, kzdung mzli yokaetipxkr drtwr ngrdr, x kzdung mzli trtingr. Dckrlzdeng 17-18, nzycmnetr-ngrdr gzpmann kxdrka’ngr kc navzm na-aclvele nrlc atwrnrnegr. Gzpmann lc apule srlx, murde batrpzle mz leplz nzrlasz-krdr Gct x nzvz-nqblq-krdr nqmq krde kxtrka. X nzyrlq drtqde “Bxbilon” nqmq krde lc tqtrka. Murde mzli kc bqnc, lr Bxbilon nzaovxiolr lr Jiu x nzbatrpzlr badr nzngini-krdr kxnzawz-nrbalqng. X nzbatr-kzpplr nzangio-krdr gct ngrdrng, da kc tqwai nzmc-krgule mz Buk sc Daniel. A’ mz buk lc, Bxbilon drtwr ngrde gzpmann ngr Rom mz mzli nyg Jon. X drtwr ngrde kz kx gzpmann kx na-apule Rom sa navzm. X mz gzpmann lc, Enqmi Kxetu ngr Kraes sa na-aclve-atwrnr-ngrde nrlc. Nzrpi-ngrbz “Mrlx Kc Tqdrka’ngr Kc Kai.”

Jon yr-kzle kzdung nabz kx nzngr-ngrdr Heven. Nabz lcng amrlx nangr-ngrgu mz #123 mz Buk Ngr Nzangiongr.

Jiszs Kxnzmcpx Myapxbz Mz Buk Lc

Aelwapx-ngrde zluli rde. [dckrlzde 1]

Aclvele dzbe lrmakxtr nedeng mz nrlc. [2—3]

Nide Nei Sip kc tznibq x lu-mop, x nzangio kxnzrlxngiting amrlx. [4—5]

Nzayrplaxngr amrlx mz yiz kcng rlimz tzrpibz Mzli r Nzxpung
Kxtrka-zlwz. [6—19]

Jiszs yzlu-mou-ngrmle mz Jerusalem kxmrna, murde na-aclvele nrlc mz nzngini-krde King r king amrlx. [19—22]

¹ Ning Jon, kxnzawz ne Jiszs. Krlcng da kx naprtilzng kx aelwa-ngrm Jiszs bange. Rlr-ngrbz Gct mz Jiszs da lcng tqycpe pipz nzprt-zkrmlr, mz nzvz-nqblq-krde me pnz drtwrde, murde na-aelwa-ngrbzle mz kxnzawz nedeng. X Jiszs atwzlr-ngrmle dq enjrl nede bange, murde nayokaetipxme bange drtwr ngr da lcdeng. ² Mz nzmu-krde lcde, sc tqyropex da amrlx kcng tqmcxng x tqxrlxng. Krlcng natq Gct x nrpa angidr ngr Jiszs Kxnzmcpx. ³ Namrlzbz mz doa kx rlwxpxle natq lcng tqyrox mz buk lc. X namrlz-kzpplr mz leplz kcng tzxlrlr x tzyrlq-angidrlr natq lcng. Murde sa nakrlz-angidrlr da lcng amrlx mzli kc tqycpe pipz nzprt-zkrmlr.

Jon Ryrbz Mz Dzbe Lrmakxtr Mz Taon Rlimz Mz Esia Provins

⁴⁻⁵ Ning Jon, ryrbo bamu nimu dzbe lrmakxtr kcng mz taon rlimz mz Esia Provins.

Krka'-ngrne kx zmrlzkxmyalz x nzmn-c-zpxngr na-avzom Gct, Mqngrkxtr x Jisz Kxnzmcpk bamu. Gct kc tqmnc mzli ka, x tqmnc zvz, x sa navzm. X Mqngrkxtr kc tqmnc mz tron kc tqwxungr Gct x nzwz-krdeng kcng rlimz. X Jisz Kxnzmcpk kc tqrpipx angidr natq Gct, x doa kx nzatulz-kaip mz nzbzngr, a' trpengr nzbz-karde. X nide kc tqaclvele king amrlx mz nrlc tulvzo. ⁵

Jisz Kxnzmcpk lc mrlzti-zvzle nigu, x aopxpebzle drtqgu mz zmatq ngr alwx rgung mz nzbzo-krmle mz kros. ⁶ X ata-lxblrtrle nigu mz dzbede kc esz', murde nawztrpzku mz Gct Trtede, kc tqngi King rgu, mz nzngini-krgu pris nedeng. Takitrde nzglqlz-zvzngr nide mz nzetukr zmatq ngrde, kc tqvzpe tqvzpe. Eu, angida. ⁷

⁷ Jisz sa navzom natuom mz dc bz. X sa namc leplz amrlx ngr nrlc tulvzo, nidr badr leplz kcng tzrbatrpzng nzrluplxtingr nrkrdrtrq Jisz mzli kc. X leplz amrlx mz nrlc sa namwxlrng x nayrni-zlwzng. Me tutr-ngrde lape! Eu, angida. ⁸

⁸ Rpi Yawe kx, "Ninge Gct kc tqrninr, kc tqmnc mzli ka, x tqmnc zvz, x sa navzm. Ninge nou da amrlx x kx ayrkrpx da amrlx." ⁹

Jisz Kxnzmcpk Opx Mz Mz Jon Apule Mrlx Leplz

⁹ Ninge Jon, x prtrku mz dzbede kc esz' mz nztu-amqngi-krgu kxmule-esz' nzaetqbz drtqgu murde mnclzbzku mz Jisz mz nzngini-krde King rgu. Nzadwatrlr ninge presin mz trmctu Patmos, murde yapwxtpx-zvzx natq Gct x Nrpa ngr Jisz. ¹⁰ Mz kzdq Sade mrlc, zmatq ngr Mqngrkxtr prsrlle ning, x obq-rmwiblex. Mzli lcdepwz xlrkixle mz nibrnge kzdq natq Kraes kxetu apule nzyrnikr trpu. ¹¹ Rpile kx, "Yro mz buk da amrlx mcqng, x atwzlr-ngrbz buk lcde mz Esia Provins mz dzbe lrmakxtr mz taon rlimz seleng: Efisz, Simrnz, Prgamzm, Taeatira, Sadis, Filadelfia x Laodisea."

¹² Kx lxlvrkimc kc mq mz nzmc-krnge kc tqycmnem bange, mcx da rlimz kx ngi gol kxwxbuo-ngrm lam. ¹³ X mz mzliard, kzdq ncblo, kx apule Mrlx Leplz, kq nzkq kxboi, x lunyao-ngrde kc da kx apule gol. ¹⁴ Nqngi narde prkitpx apule nqbya ngr nrc. X mzte nzapulr nalzpq nyr. ¹⁵ X nanycde kz nzapulr nzpnaprkr bras kc tzayrlni mz nyr x sc tzalqtipe. X nzokr natqde apule nzypukr nrc. ¹⁶ X malele mz mqde kxrtc vri rlimz, x lvcpxm mz naode kc toki r vea kxmalc nrlarde rlilr, x nzyzlrkr rtrlrmzte apule nzlulikr nepi mzli kc bea. ¹⁷

¹⁷ Kx mcx kc nide, rtco-lzbq-ngrbo mz nanycde apux ncblo kx bz, mz nzangio-krnge nide. A' mqde kxrtc bxtrple ninge x rpimle bange kx, "Bzkq mwvxlrq. Ninge kx rtwayz x ninge kx rmnr-ngrbz. ¹⁸ Ninge nou nzlungr. Bzx mzli kc ena, a' nzluge-mou-krmc lc mzli ka tqvzpe tqvzpe. Lolvzx zmatq ngr nzrlvxngr x nzrbqtrngr naonrx ngr mrnyz mqngr leplz kxnzbzpeng. ¹⁹ Yro da kcng tqmcqng, tqprtilzng mzli ka, x da kcng naprtizng mz nibrde. ²⁰ Drtwr ngr vri lcng rlimz tqmalex mz mqnge kxrtc x da rlimz kx ngi gol kxwxbuo-ngrm lam nidr sele. Vri kcng rlimz drtwr

⁵ **1:4-5** Sam 89:27; Nzyrplaxngr 14:5, 25; Jeremaea 42:5; Rom 8:29; 1 Korint 15:20-22; Filipae 2:9-11; Kolosia 1:18; Hibru 12:23; Nzaelwapxngr 17:14; 19:16 ⁶ **1:6** Nzrlaszngr 19:6; Asaea 61:6; 1 Pita 2:5, 9; Rom 12:1; Hibru 13:15 ⁷ **1:7** Daniel 7:13; Sekaraea 12:10-11; Matiu 24:30; Jon 19:37; 1 Tesalonika 4:17 ⁸ **1:8** Nzrlaszngr 3:14; Asaea 44:6; 48:12; Nzaelwapxngr 1:8, 17; 2:8; 21:6; 22:13 ⁹ **1:12** Sekaraea 4:2-6 ¹⁰ **1:13** Daniel 7:13; 10:5 ¹¹ **1:14** Daniel 7:9 ¹² **1:15** Esikel 1:7, 24; 43:2; Daniel 10:6 ¹³ **1:16** Asaea 11:4; 49:2; 60:1; Daniel 10:6; Malakai 4:2; Matiu 13:43; 17:2; Efisz 6:17; Hibru 4:12 ¹⁴ **1:17** Asaea 44:6; 48:12; Nzrlaszngr 33:20; Asaea 6:5; Esikel 1:28; 3:23; 43:3; 44:4; Daniel 8:17-18; 10:7-10; Matiu 17:7; Aposol 9:3-4; Nzaelwapxngr 1:8; 2:8; 21:6; 22:13 ¹⁵ **1:18** Matiu 16:16; Jon 1:1-3; 6:57; 14:6; Hibru 2:14; 3:12; 9:14; 10:31; 12:22

ngrdr kxnzaclvelr dzbe lrmakxtr mz taon kcng rlimz, x da rlimz kx ngi gol kwxwbuo-ngrm lam, drtwr ngrdr dzbe lrmakxtr mz taon lcng rlimz.”

2

Letz Nangi Sc Dzbe Lrmakxtr Kc Efisz

¹ Jiszs sc tqycmnem bange, mz nzngini-karde ncblo kc tqapule Mrlx Leplz. Rpi-mople kx nayrbz dq natq mz kxaclvele dzbe lrmakxtr kc mz taon kxetu Efisz. Rpibzle kx,

“Krlcng natqnge, ninge kc tqrmale vri kcng rlimz mz mqnge kxrtc x ninge kc tqayox mz mzli da rlimz kx ngi gol kwxwbuo-ngrm lam.

² Krlzpex nqmq krmu, nimu lr Efisz. Wz-katoamu x tu-amqngi-zvzamu mz nzvz-nqblq-krmamu ninge. Krlz-kzx kx pxtxpx-ngrnamu leplz kcng nqmq krdr tqtrka. X obqplxtrpeamu ncblo kcng tzrpilr nidr kxnzakrlzng ne Kraes, a' trtingr. X rmctitrpzmu kx nzpokiang, x nqmq krdr rngidrlvz-ngrbzmu mz leplz kx bzkq nzvz-nqblqlr. ³ Krlzx nztu-amqngi-zvz-krmu mz nrlarde nyznge. X kxmule-esz' nzatrkatilr nimu, a' nzrlxngiti-krmu trbaou mz nzvz-nqblq-krmu ninge. ⁴⁻⁶ Eu, x mrlz kz nzpxtxpx-krmu nqmq kr leplz kcng tzvz-nqblqlr nzalvztrkr Nikolas, da kc tqwai-kzx mz nzpxtxpx-krngele.

“A' da kx trmrlztr-ngrpwu drtwrnge bamu nide sele. Trmrlzti-lzbqpewamuu da kc tqwaisr-lzbq-ngrnamu mzli kc tqlxngiti-atengrnamu ninge. Nadcpx zvz mz drtwrmu mrkc tqesakingr nzvz-rbr-krmu. Drtwrmu nayzlum mz alwx ngrmung, x nqmq krmu na-apule mzli kc tqlxngiti-ate-ngrnamu ninge. Nzmu drtwrmu kx tryztupleu, ninge la navzmc bamu x nakatxx dzbe lrmakxtr nyzmu mz nzmnc-krmamu bange, mz nzkatx-krnge da kx wxbuo-ngrm lam kc tqngi gol mrkc tqtlz-ngrmle mz mzli. Murde trvz-nqblq-angidrpewamuu ninge. *

⁷ “Abzamu nzyrlq-angidr-krmu natq lcng tqpibz Mqngrkxtr mz dzbe lrmakxtr lcng. Murde mrlx kx aovxiole mz nzvec-krdr badr zmatqng kxtrka, sa narlr-ngrbo bade nzngq-krde Nranc ngr Nzlungr Kxmrna kc tqtu Me Mnncngr Gct.” *

Delape. Ninge Jisz.

Letz Nangi Sc Dzbe Lrmakxtr Kc Simrnz

⁸ X Jiszs nzngini-karde ncblo kc tqapule Mrlx Leplz, rpi-mople bange kx nayr-kzpo dq natq mz kxaclvele dzbe lrmakxtr kc mz taon Simrnz. Rpibzle kx,

“Krlcng natqnge, ninge kxrtwayz x kxrmnr-ngrbz, ninge kc tqbz mzli kc ena, a' mzli ka lupe-mopwc’. *

⁹ Krlzpex nzetqkr drtqmu, nimu lr Simrnz. X kxmule-esz' tr-rngiscmuu trau, a' mz nrlarde nyz Gct nginimu kz bcnyr angidr mz nzrlxngiti-krmu. Krlzpe-kzx nzrpikikitkr leplz kcng tztulrtr-lzbq-ngrdr nzngini-krdr lr Jiu. A' trnzngini-angidru leplz kcng tqmcpxng Gct, murde nidr dzbede kc tzangi olr Setzn. * ¹⁰ Bzkq mwxlramu mz da trka naptilzbzng bamu. Kzdq la mzli, enqmi rmung sa nalolvzlr nimu x na-adwatrlr nimu mz presin mz nzabzpxngr nzrlxngiti-krmu, murde nzvz-nqblqlr drtwr Setzn. X naetqti drtqmu zbkq nzpnu naesz'. A' abrtrpa'mu drtwrmu bange, kxmule-esz' nznibqlr nimu. Murde mz nibrde, sa nakabo bamu nzlungr kxmrna, nangi da kxmrlz kx vzpxm mz nzrlxngiti-krmu.

* ^{2:4-6} Matiu 24:12 * ^{2:7} Nou 2:9; Nzaelwapxngr 22:2 * ^{2:8} Asaea 44:6; 48:12; Nzaelwapxngr 1:8, 17; 21:6 * ^{2:9} Jon 8:44-47; Rom 2:28-29; Filipae 3:3

¹¹ “Abzamu nzyrlq-angidr-krmu natq lcng tqipibz Mqngrkxtr mz mz dzbe lrmakxtr lcng. Murde krkcng tzaovxiong mz nzvec-krdr badr zmatqng kxtrka, trnabzpeung mz nzbngr kxrmnr-ngrm mzli kc Gct naayrplapx-ngrde lr nrlc kcng tzvz-rbrng.” [☆]

Delape. Ninge Jiszs.

Letz Nangi Sc Dzbe Lrmakxtr Kc Prgamzm

¹² X Jiszs nzngini-krde ncblc kc tqapule Mrlx Leplz rpi-mople bange kx nayr-kzpo dq natq mz kxaclvele dzbe lrmakxtr kc mz taon Prgamzm. Rpibzle kx,

“Krlcng natqnge, ninge kc tqrngisc toki r vea kxmalc nrlarde rlilr.

¹³ Krlzx mrla tqmnc-ngrnamu mrkc tqaclve Setzn. A' nimu lr Prgamzm vz-nqblq-angidramu ninge, x abrtr-angidrmamu drtwrmu bange. Trmwxlrwamuuz nzipix-krmu nzabrtr-krmamu drtwrmu bange, kxmule-esz' Antipas nznibq mz taon nyzmu kc tqaclve Setzn. Antipas lc aelwa-ngrbzle vz-nqblqle ninge mz nzycmne-krde x nzale-krde da.

¹⁴ “A' da kxipipz kx trmrlztr-ngrpzu drtwrnge bamu nidr seleng. Kzdung nimu sc tzvz-nqblqlr nzalvztrkr Profet Balam. Mzli kc bqnc alvztrle King Balak kc Moab nzesabtri-krde lr Israel murde nataong mz alwx. X pibzle badr nzmu-krdr dakxnzng kx ngi blz nzkabz mz mqngr drka' kxnzlz, x aprtrle nidr mz nzrmwimigr doa kx trngiu kernalzdr. X mzli ka kzdung nimu nzvz-nqblqlr nqmq krde. [☆] ¹⁵ X kzdung nimu sc tzvz-nqblq-kzlr nzalvztrngr kxtrka sc dzbede ne Nikolas.

¹⁶ Tekqtramu nqmq krmu lcng tqtrka! Nzmu kx trtekqtrwamuuz nqmq lcng, sa napwrkilvc-ngrnamu ninge mz nzota-krgr badr leplz lcng, mz toki r vea kc tqmalc nrlarde rlilr tqlvcpxm mz naonge. ¹⁷ “Abzamu nzyrlq-angidr-krmu natq lcng tqipibz Mqngrkxtr mz mz dzbe lrmakxtr lcng. Murde mrlx kx aovxio mz nzvec-krdr badr zmatqng kxtrka, sa nakabo bade dakxnzng nange kxmrna kc tzrpibz ‘mana kc tqyc-kapq.’ X mz nzabrtzlvz-krnge nide sa naka-kzpo bade rplz kxprki kx yctrngr drtqde kxmrna. X drtq kxmrna lc, trgalr kxrkrlz, a' krlz txpwz ncblc kc tqrngisc rplz lcde.” [☆]

Delape. Ninge Jiszs.

Letz Nangi Sc Dzbe Lrmakxtr Kc Taeatira

¹⁸ X Jiszs nzngini-krde ncblc kc tqapule Mrlx Leplz rpi-mople kx nayr-kzpo dq natq mz kxaclvele dzbe lrmakxtr kc mz taon Taeatira. Rpibzle kx,

“Krlcng natqnge, ninge Mrlx Gct kc mzke' tqapule nalzpq nyr, x nanyonge apule bras kc tzalqtipe.

¹⁹ Krlzpex nqmq krmu, nimu lr Taeatira kx lxngiti-txpwzmu ninge. Murde sc tqvz vzz nzmrzti-lzbq-krmu x nzokatr-etr-krmu. X krlz-kzx kx kxmule-esz' nzaetqbz drtqmu, a' tu-amqngi-lxblr-zvzamu. X aleamu da kx myaszpxele mzli kc tqlxngiti-ate-ngrnamu ninge. ²⁰ “A' da esz' kx trmrlztr-ngrpzu drtwrnge bamu. Murde rlr-ngrbzmu mz olvz kc tqapule Jesebel kc bqnc, nzmncbe-krbzle bamu mz nzapokiati-krde nimu kx nide profet ne Gct. Leplz nzkqlupeng kx ycpixe nzalvztr-krde mz nzrpi-krbzle badr nzrmwimi-abeane-krdr doa kx trngiu kernalzdr x nzmu-krdr dakxnzng kx ngi blz nzkabz mz mqngr drka' kxnzlz. [☆]

[☆] **2:11** Nzaelwapxngr 20:14; 21:8 [☆] **2:14** Nzkqlu-krdr 22:5, 7; 25:1-3; 31:16; Lou Kcpwz 23:4

[☆] **2:17** Asaea 62:2; 65:15; Jon 6:48-50 [☆] **2:20** 1 King 16:31; 21:25-26; 2 King 9:22, 30

²¹ Kapebo mz olvz lc mzli r nztekqtr-krde nqmq ngr drtwrde, a' pxtpxngrde x sc tqvz zvz nzrmwimi-abeane-krde doa kx trngiu kernalzde. ²² Mz da lcng tqtrka, sa na-amnc-zvzbo nide mz nelvq mz zyagox kxtrka, nindr badr krkcnf tzprtrpeng mz alwx ngrde, nzmu kx trnztekqtrlu nqmq nr drtwrdr. ²³ X sa namilxtxobo doa kcng tzvz-nqblq-zvzlr nide. Murde kxnzrlxngiting mz taon amrlx nakrlzlr kx obqplxtix nabz leplz x nzvzkr nardr. X sa na-ayzlu-ngrbo bamu mz nzvz-nqblq-krde da kx aleamu. *

²⁴⁻²⁵ "A' kzdu nimu lr Taeatira trnzvz-nqblqlru nzalvztrkr Jesebel lc. X trprtrpwzmuu mz da kc tzrpibz 'da kx yc-kapq sc Setzn.' X napibo bamu kx trtxpnzngr natq mou kx nayrlqamu, a' lolvz-amqngiamu nzlxngiti-krmu ninge, da kc tqwai nzolvz-zvz-krmule, navz navz mzli kx nayzlu-ngrmc. ²⁶⁻²⁷ Murde zmatq kcpwz tqkam Trtenge bange, sa nakabo mz mrlx kx aovxirole mz nzvec-krdr badr zmatqng kxtrka, x nzyrlq-angidr-krde natqnge navz navz nakrlzbzle nzyrkpxkr nrcl. X sa nakabo bade zmatq ngr nzaclvengr neidu amrlx mz nrlc tulvzo. Sa na-aovxirole mrnyzdr mz nxzplkrde, kc na-apule bz kc tqrniglc botol. * ²⁸ X mz nzaelwapxngr nzaovxio-krde, sa naka-kzpo bade paglxnrlc, kc tqngi rkk ngr zbz kxmrna nyg Gct. *

²⁹ "Abzamu nzyrlq-angidr-krmu natq lcng tqpibz Mqngrkxtr mz mz dzbe lrmakxtr lcng."

Delape. Ninge Jiszs.

3

Letz Nangi Sc Dzbe Lrmakxtr Kc Sadis

¹⁻² X Jiszs nzngini-krde ncblo kc tqapule MrIx Leplz rpi-mople bange kx nayr-kzpo dq natq mz kxaclvele dzbe lrmakxtr kc mz taon Sadis. Rpibzle kx,

"Krlcng natqnge, ninge kc tqrngine Mqngr ne Gct kc nwz-krdeng rlimz x rngine kz vri kcng rlimz.

Krlpex nqmq krmu, nimu lr Sadis kx trtakitrkaple mz nzobqkr Gct rnge. Nzrpilr kx lubeamu, a' trtingr, murde bz-angidrpeamu. Dwalzmamu! Axplrtiamu nzlu-mqglq-krmu, murde ycpe pipz nzyrkrtxpkrbzle. * ³ Mzpu naobqpx zvz x natekqtramu nqmq ngr drtwrmu. Murde ma tqprkilvc-ngrnamu ninge nzapu-krnge ncblo kxpnada. Trnakrlzwamuu mzli kc navz-ngrmc. Bzkq mrbrtr mz drtwrmu da kcng tqmrlz tzpibz bamu x tqxramu. X yrlq-angidramu natq lcng. *

⁴ "A' nimu kxipiz mrkc Sadis kx lrpz scdr trblkqiu, sa nakqamu lrpz kxprki mzli kc navz-lxblr-nrgu murde takitrde nimu.

⁵ "MrIx kx aovxirole nzvec-krdr badr zmatqng kxtrka, sa nakq lrpz kxprki na-apule lr Sadis lcdeng, x trnakapxpwc'u drtgde mz Buk ngr Nzlungr. A' napipxbo mz Trtenge x enjrl nedeng kx ni-angidrde doa nenge. *

⁶ "Abzamu nzyrlq-angidr-krmu natq lcng tqpibz Mqngrkxtr mz mz dzbe lrmakxtr lcng."

Delape. Ninge Jiszs.

* ^{2:23} Job 34:33; Sam 7:9-10; 26:2; 62:12; 139:1; Nzyrplapxngr 24:12; Asaea 40:10; 59:18; 62:11; Jeremaea 17:10; Matiu 16:27; 25:31-46; Rom 2:6; 2 Korint 5:10; Galesia 6:7-8; 2 Timoti 4:14; Nzaelwapxngr 2:23; 20:13 * ^{2:26-27} Sam 2:8-9; Asaea 30:14; Jeremaea 19:11; Nzaelwapxngr 12:5; 19:15 * ^{2:28} Luk 1:78; 2 Pita 1:19; 1 Jon 3:2; Nzaelwapxngr 22:16 * ^{3:1-2} Nzaelwapxngr 1:4-5; 16:16 * ^{3:3} Matiu 24:42-44; Mak 13:33-37; Luk 12:39-40; 1 Tesalonika 5:2-4; 2 Pita 3:10; Nzaelwapxngr 16:15 * ^{3:5} Nzrlaszngr 32:32-33; Sam 69:28; Matiu 10:32; Luk 12:8; Nzaelwapxngr 20:12

Letz Nangi Sc Dzbe Lrmakxtr Kc Filadelfia

⁷ X ncblo kc tqapule Mrlx Leplz rpi-mople bange kx nayr-kzpo dq natq mz kxaclvele dzbe lrmakxtr kc mz taon Filadelfia. Rpibzle kx,

“Krlcng natqnge, ninge kc tqtr-esz'ngr x tqngi da angidr. Lolvzx ki sc King Devet, kc drtwr ngrde kx rngiscnge zmatq ngr nzrlvxngr naonrx kx trpnzngr kx rkrlz nzrbqngr, x zmatq ngr nzrbqngr naonrx kx trpnzngr kx rkrlz nzrlvxngr. ⁸

⁸ Krlzpex nqmq krmu, nimu lr Filadelfia. Kxmule-esz' trnipwamuu kxnzetung, a' yrlq-angidramu natqnge x trtxpnzngr nzrpri-krmu kx trkrlzwamuu ninge. Delc, naonrx se tqlvpxbo bamu, naonrx kx trpnzngr kx rkrlz nzrbqtrngr. ⁹ “Lalztqmamu bange. Dzbe leplz kcng tzangirol Setzn tzrpilr nidr lr Jiu, a' nzpokia-ngrdr. Sa navzmimc nidr mz nzavzo-lzbq-krbzlr bamu, murde nakrlzlr kx mrlzti-zlwzx nimu. ¹⁰

¹⁰ X sa na-arlapxbo nimu mz da kcng tqtrka naprtzbz mz leplz amrlx mz nrlc mz nzayrplapxngr nidr, murde mz nzyrlq-angidr-krmu natqnge, tu-amqngi-zvzamu kxmule-ess' nzaetqbz drtqmu. ¹¹ Mzli trnzboi-krdeu x sa nayzlupe-mopwc'. ¹² Lolvz-amqngiamu nzlxngiti-krmu ninge murde ma tzangqngutilr, x sc tr-rtwzpewamuu da kxmrlz mz nzaovxio-krmu mz nzvecngr.

¹² “Murde mrlx kx aovxio mz nzvec-krdr badr zmatqng kxtrka, nide kx navzmibo mz Gct rnge na-apule nctrpou ngr Mangr-nzangiongr kxmrna, x trtxpengr nzdwassz-krdele. X nayrtrpo bade drtq kxmrna lcde seng tq. Drtq kx ayrnrngr drtq mzteadau nyg Gct, Jerusalem kxmrna kc tqvzom Heven. Murde Jerusalem kxmrna nangi mrnyzde. X drtq krali drtq Gct rnge, murde nide doa ne Gct. X drtq kratq drtqng kxmrna, murde nikzde doa nenge. ¹³

¹³ “Abzamu nzyrlq-angidr-krmu natq lcng tqipibz Mqngrkxtr mz mz dzbe lrmakxtr lcng.”

Delape. Ninge Jiszs.

Letz Nangi Sc Dzbe Lrmakxtr Kc Laodisea

¹⁴ X Jiszs nzngini-krde ncblo kc tqapule Mrlx Leplz rpi-mople bange kx nayr-kzpo dq natq mz kxaclvele dzbe lrmakxtr kc mz taon Laodisea. Natq lc nide sele.

“Krlcng natqnge, ninge kc tqapux natq lc tqngi ‘angida’ murde ninge kc tqrngi-batrpz da amrlx mz nzvz-nqblq-krde me pnz drtwr Gct. X nikzngi ncblo angidr kc tqrpipx-angidrpe natqdeng. X ninge nou da amrlx kcng tqwzngr Gct. ¹⁵

Krlzpex nqmq krmu. Krlzx kx trvz-nqblqwamuu ninge mz drtwr kxpq o drtwr kxbao. A' na-aoti drtwrmu me navz-nqblqkiamule, murde drtwrmu napqtrpz o nabao trpz. Bzkq drtwrmu li. ¹⁶ A' mz nzngini-krmu ncte lxblr mz da amrlx x pq-lrpiamu, sa nabyapx-ngrne nimu na-apule lue kxtrka. ¹⁷ “Rpiamu kx nimu bcnyrng, x rngiscpemu da amrlx kcng tqsuti drtwrmu. A' trkrlzwamuu kx mz nrlarde nyg mqngrmu x nabzmu tatpxamu mz da amrlx mzli ka. Mz nzobqkr Gct, nimu leplz kxdrka'ngr, kxnxyc mz drtwr, kxtrnzrngiscung, kx mzpu mwi x ycblkamu. ¹⁸ Rlr-ngrmamu bange nzka-krbo bamu da kx na-atubqtile nimu mz nzobqkr Gct. Rlr-ngrmamu bange nxzpe-krbo alwx ngrmu mz nzbz-krnge, na-apule kx xpeamu gol. Delc nanginimu bcnyr angidr

⁸ 3:7 Job 12:14; Asaea 22:22; 40:25; Habakuk 3:3; Mak 1:24; Jon 6:69 ⁹ 3:9 Asaea 45:14; 60:14

¹⁰ 3:10 Matiu 10:22; 24:13; Mak 13:13; Rom 2:7; 1 Timoti 4:16; 2 Timoti 2:10-12; Hibru 10:36; Jemes 1:12 ¹¹ Nzaelwapxngr 22:7 ¹² Asaea 62:2; 65:15 ¹³ 3:14 Nzyrplapxngr 8:22

mz nzrmcti-krmu nzlungr kxboi. X apxitr-lzbq-ngrnamu lrpznge kxprki ngr nztubq-esz'ngr-krnge, murde drtqmu ma tqmya mzli kc navz-ngrmc. Murde mzli lc naoliqti-angidramu ninge. X rlr-ngrmamu bange nzaelwa-lzbq-krbo bamu, murde nakrlz-angidramu ninge na-apule luekxpiz kxngi tolo kx nakitramu mz mzpu mz nzobq-angidr-krmu. ¹⁹ Krkcng tqmrlzti-zlwzxng krlzx nzlclvz-krbo badr da, x nzayrplapxngr nidr. Mz nzmu-krde lcde, drtwrmu nayzlu, x napqtitr drtwrmu ninge. ²⁰ Murde ninge la tquturp yz mz naonrx nyzmu, tqabctrpo mz nzaenzli-krnge nzvzmitr-krmu ninge. Doa kx xrlle natqnge x lvpxxmle naonrx bange, sa nadwatrpo ma nyzde mz nzmu-lxblr-krgr ncdr. ²¹ "Mrlx kx aovxio mz nzvec-krdr badr zmatqng kxtrka, sa na-awxbuox nide mz tron mz nwxbu-krgr badr mz nzaclvengr. Da kc tqwaix mz nzaovxio-krnge mz nzvec-krgr badr zmatqng kxtrka, x wxbupekr ncdr Trtenege mz nzaclvengr.

²² "Abzamu nzyrlq-angidr-krmu natq lcng tqpibz Mqngrkxtr mz mz dzbe lrmakxtr lcng."

Delape. Ninge Jiszs.

4

Jon Mcle Nzangiongr Gct Heven

¹ Mz nibr nxzlr-krnge letz lcng, obq-rmwible-moux x opx mz mzke' kc naonrx kx obq Heven. X sc tqxlr-moux natq Kraes kc etu tqapule nzyrnikr trpu, tqycmne-kaip ena bange. X rpi-mople kx, "Vzdzm mrka, murde naaelwa-ngrbo bam da kx naprtizmqng mzli lc navzm." ² X mzli lcpwz, Mqngrkxtr sc tqprsre-moule ninge. X mcx kc tron Heven, x wxbuom kc Kxetu elr. ³ X Kxetu kc tqwxbuom mz tron lcde, mzte apule nzyaglqkr rplz kx opx, x nzpnaprkr rplz kxpc. X o-ngalelvze tron nrpc' kx nilz rde apule rplz kx mqbz. ⁴ X mc-kzx tron nzpnu-li-nrade-pwx (24) nztungalelvzlr tron nyzde, x kxnzaclveng nzpnu-li-nrade-pwx nwxbuomqng elr, nzkq-lxblrng lrpz kxprki, x nzabx-lxblrng mz kraon kx ngi gol. ⁵ X mclz-kzx nzaglqpz'tikr bzlrpc x xrlzx nzyrputipxkr bzlrmei mz tron. X mrkc tqlxlvrkipx tron woutrpz elr lam rlimz, rlx ngr Mqngrkxtr ne Gct kc nzwz-krdeng rlimz. ⁶ X ycstr-kzpzc kc elr da kx apule prla kx ngi dzpq kx otpx. ⁷ X nztu-ngalelvzlr nrlar tron kcng pwx krkcng tzlung kcng pwx. X mztr kqlu kxnzobqpx-kaing x kxnzobqpxng mq. ⁸ X krkcng tzlung, kx ayrrnrngr apule laion, krali apule nei kzu kxncblongr, kratq mzte apule mz ncblo, x krapwx apule lr kc tqlvcpe. ⁹ Xnzung lcng pwx nabxdr esz'mz lxblr, x nrkrdrtdqr yrlwr-ngalelvz mztr x wai-kzle nabz nabxdrng. Nzglqlzlr x nzangiolar x nzawibzng mz Kxetu kc tqwxbuom mz tron, tqluzvzpe. X mz nrlckxngrlx x mz nrlckxbq tresakiu nzngr-krdr kx,

"Yawe, Gct kc tqrninn;

Drtqmq tr-esz'ngr;

Nimq kc tqmnc mzli ka,

X tqmnc zvz, x sa navzm." ¹⁰

X mzli lcdepwz, kxnzaclveng kcng nzpnu-li-nrade-pwx nzsweobzng zpr mz Kxetu kc tqwxbuom mz tron, tqlu-zvzpe. Nzkaobzlr kraon ngr nardr mrkc tqlxlvrkipx tron, x sc tznggrpeng. ¹¹ Nzrpibzlr kx,

"Yawe, nipem Gct rgr.

^{19:16} Nzyrplapxngr 3:12; Hibru 12:6 ^{4:2} Asaea 6:1; Esikel 1:26-28; 10:1 ^{4:5} Nzrlaszngr 19:16; Esikel 1:13; Sekaraea 4:2 ^{4:6} Esikel 1:5-10, 22; 10:14 ^{4:8-10} Esikel 1:18; 10:12; Asaea 6:2-3

X takitrde nim
 Nzrglqlzngr, nzangiongr,
 X nzrpipxngr zmatq ngrm.
 Murde wz-ngrn doa amrlx,
 X da amrlx mz nrcl.
 X mz nzwz-krmqleng
 Nzmnc-krdr x nzyc-krdr,
 Nzvz-nqblqlr me pnz drtwrm.”

5

Nei Sip Kc Heven

¹ Zbz mcx kc skrol kx apule lrpzu kxboi kxnzbz. X male Kxetu kc tqwxbuom mz tron mz mqde kxrtc. X skrol lc nzyr nrlarde rlilr. A' nzbupe x nzabli-kzo-ngrde nrcl rlimz mz kadol kx apule bq lr nounc. ²
² X mcx kc enjrl kx matq-esz'ngr, x sc tqetumipe nate nzrpi-krde kx, “? Neke takitrde nzrniglcngr kadol lcng rlimz murde nakawxpgle skrol lc?”
³ A' trpnzngr kx nzrmcti Heven, mz nrcl, x mrnyz mqngr kxnzbzpeng kx takitrde. ⁴ Sc tqyrnitx-zlwzpx. ⁵ A' kzdq kxnzaclve lcng rpimle bange kx, “Bzkq yrniq! Mcpwz! Laion ngr Neidu lr Judz. Ncblo kxmatq kc tqngi melrmqde King Devet, x aovxiopele nzvecngr. Sa nanigcle kadol lcng rlimz murde narkawxpgle skrol lc.” ⁶

⁶ Zbz mcx kc Nei Sip tutrpz mrkc tqlxlvripkx tron, x kxnzlung kcng pwx x kxnzaclveng kcng nzpnu-li-nrade-pwx (24) nztu-ngalelvzlr nide. Nei Sip kc opxm kx nznibqpe. X tutrpz bade dxpa' rlimz kx ngi rkx ngr zmatq ngrde. X mzte rlimz kz, rkx ngr Mqngrkxtr ne Gct kc nzwz-krdeng rlimz, kx atwzlrpx-ngrde mz nrcl tulvzo. ⁷ Nei Sip sc tqvzpebz mz Kxetu kc tqwxbuom mz tron x otibzle skrol kc tqmalele mz mqde kxrtc. ⁸ X mzli lcpwz, kxnzlung kcng pwx x kxnzaclveng kcng nzpnu-li-nrade-pwx nzrtco-lzbq-ngrbzng mz Nei Sip nzglqpx-krdrle. X nzrtaplxsrng gita x dis kx ngi gol yrbu lxblr mz bqlr nc ninz, krlcng nzkrka'kr leplz neng Gct. ⁹⁻¹⁰ Zbz sc tzngr-ngrdr kc nabz kxmrna, mz nzrpi-krdr kx,

“Nipem ncblo kx rtwz skrol la,
 X takitrde nim,
 Nzrniglcngr kadol ngrdeng
 X nzrkawxpz-kzngr.
 Nim blz kx nznibqng.
 Mepyr ngrm yrleo.
 Xpetrle leplz neng Gct.
 Leplz lcng nzprpxmqng mz nou, natq, drtc', x
 Neidu amrlx mz nrcl. ¹¹

“Nim kx rvzmimqng leplz lcng amrlx,
 Nindr kxzprpxmqng
 Mz nou, natq, x neidu, x drtc' amrlx
 Mrka mz nrcl tulvzo,
 Murde nangini-ngrdr
 Pris neng Gct rgu,
 Mz nzwztr-krbzlr bade.
 X nindr kx na-aclveng ncdr mz nrcl,
 Mz nrcl tulvzo, eu.” ¹²

¹ 5:1 Esikel 2:9-10; Asaea 29:11 ² 5:5 Nou 49:9; Asaea 11:1, 10 ³ 5:6 Asaea 53:7; Sekaraea 3:9; 4:10 ⁴ 5:8 Sam 141:2 ⁵ 5:9-10 Sam 33:3; 98:1; Asaea 42:10 ⁶ 5:9-10 Nzrlaszngr 19:6

¹¹ Zbz obq-mopwc' x xlr x nzngrkr siu ngr zbo ngr enjrl kx rblx nzrlwxngr. X enjrl lcng nzyrlwr-ngalelvzlr tron, mrkc nzmnc-kzng kxnzlung kcng pwx x kxnzaclveng kcng. ¹² X natr kc tqetupe mz nzngrngr kx,

“Nimq Nei Sip kc tznibq,

X takitrde nim

Nzrpipxngr zmatq ngrmq,

Nzkrlz-angidr-krm,

Kx nim angidr bcnyr, x xplr-esz'ngrn.

X takitrde nim kz

Nzrglqlzngr, nzangiongr,

X nzrglqpxngr zvz.”

¹³ Zbz xlr-moux krkcng lu amrlx, kxmule-esz' Heven, mz nrlc, mrnyz mqngr kxnzbzpeng, prla, x nrlc atwrnrngr, a' nzngrpx-lxblr-ngrdr mz nzrpi-krdr kx,

“Kxetu rgr, kc tqngi Nei Sipq,

X Gct kc tqwxbuom mz tron,

Naglqpxkr nimu, na-amatqkr nimu,

Naawi-ngrbzkr bamu.

X napipxkr zmatq ngmu

Kx myalz-esz'ngr.

Me tutr-ngrde lape!

Na-angiokr nimu, naglqlzkr nimu,

Tqvzpe tqvzpe! Eu!”

¹⁴ X kxnzlung kcng pwx nzrpibzlr kx, “Eu, angida!” X kxnzacvleng kcng nzrtco-lzbqng mz nzangiongr.

6

Hcsi Kxprki Drtwr Ngrde Nzaovxiongr

¹ Zbz mcx Nei Sip nzrniglc-krde kadol ngr skrol kc kai. X xlr x nznetpxxzlwzkr kxnzlung kc kai, x nate etu apule bzlrmei, rpile kx, “Vzm!” ² Obq-mopwc', x mcx kc hcsi kxprki, x mrlx kc tqwxbuom elr rmale popz' x nipna, x nzalaobz kc kraon mz narde. ³ Nzwxbuo-krmle kc mz hcsi apule ncblo kx aovxiope mz nzvecngr x naprpx mou mz nzaovxiongr mz kzdq kz nzvecngr.

Hcsi Kxpc Drtwr Ngrde Nzvecngr

³ Zbz mc-moux Nei Sip kc nzrniglc-krde kadol krali, x xlr-kzx kxlu krali nzrpi-krde kx, “Vzm!” ⁴ Zbz vzpxm-mop kc hcsi kxpc. Mrlx kc tqwxbuom elr nzkabz kc bade toki r vea kxetu x zmatq ngr nzrkatx-krde nrw x mz nrlc, murde na-apqtrpzle drtwr leplz mz nzota-krdr x nznibq-lzbq-krdr.

Hcsi Kxbotapz' Drtwr Ngrde Nztaokr Dzbi

⁵ Zbz Nei Sip kc niglc-kzle kadol kratq. X kxlu kratq rpi-kzle kx, “Vzm!” Obqbo x mcx vzpxm kc hcsi kxbotapz'. ⁶ X ncblo kc tqvone elr adole mz mqde kc skel mz nzpipx-krde narnnbr ngr dakxnzng. ⁶ Zbz xlr x kc natq vzpxm mz mzli kxnzlung kcng pwx, rpibzle mz ncblo lc kx, “Rlr-ngrbo bam nzyrlq-krm narnnbr kxlqlwxz zlwz mz bxli r flawa wit kxesz' o bxli r raes kxtq, murde vea kcng mz nrlc nzayctxdr nzpengr dakxnzng. A' bzkq odatiq nounc olivi x nqvi lr grep!”

Hcsi Kxkupya Drtwr Ngrde Nzbnzng

¹ 5:11 Daniel 7:10 ² 6:2 Sekaraea 1:8; 6:2-6 ³ 6:5 Sekaraea 1:8; 6:2-6

⁷ Zbz Nei Sip sc tqniglcpe-kzle kadol krapwx, x xlrbo kxlu krapwx rpi-kzle kx, “Vzm!” ⁸ Obqbo, x mcx vzpxm kzdq hcsi kxkupya. ⁹ X mrlx kc tqwxbuom elr, drtqde ‘Nzbzngr.’ X mrlx kx drtqde ‘Mrnyz Mqng Kxnzbzpeng’ vzbz mz nibrde. Gct rlr-ngrbzle badr zmatq ngr nznibqti-krdr leplz kxxqlu ngr nrlc mz vea, mz dzbi, mz zyagox, x mz animol kzpetong.

Nznibqkr Kxnzrlxngiting

⁹ Zbz niglc kz Nei Sip kc kadol kranzlvqn. Obqbo x mcx kc olta. X mz nabz olta lcde, mcx mqngr leplz kcng tznibq-ngrdr nzrpipx-krdr Nrpa ngr Jiszs. ¹⁰ X etumi natqdr nzrpri-krdr kx, “Yawe kc tqrnir, tr-esz’ngrn, x yrlq-angidrq natqm. ?Memule tqasa-ngrn nzayrplapx-krm lr nrlc kcng tznibqtir nigr?” ¹¹ Mz nibrde sc tzataplxsrpeng lrpz kxprki, x nzrpibz badr kx, “Mzlemung kcng tzwarztr-kzpzng mz Kxetu, sc tznibqtibeng nidr, da kc tzwaissr-ngrdr nimu mzli kc. A’ aenzlipwzmu ena, murde trkrlzkapzle me nangi bz ngr leplz kcng nanibqng.”

Zngya Ngr Drtwr Gct Krlbzle Nrlc Tuvzo

¹² Zbz mc-moux Nei Sip kc nzrniglc-krde kadol kraesz’mz. X vzm kc nengq kxetu, x nepi botapz’ x temz pctx atwrnrngr apule mepyr. ¹³ X vri ngr bongavz nztatio-lxblrng mz drtc’, nzapulr nra nc kxpo kc tqrlxom mz nzayclwztkr nenq kxetu nrladrng. ¹⁴ X bongavz kz nzmrbr-krde apule nqni kc tzbutr x sc tzkatxpe. X newz badr trmctu amrlx nzaprszpxng nidr me nzwxbu-ngrdrng. ¹⁵ X leplz kxtrnzrlxngitiung amrlx mz nrlc, kxmule-esz’ king amrlx, kxnzetung, kxnzaclveng ncblo ngr vea, bcnyrng, kxnzrngiscng zmatq badr leplz txneng, kxnzawz-nrbalqng, x kxdrtqdr opxng, leplz lcng amrlx sa namnc-kapqpxmqng mz butqbr x mz nabz newz. ¹⁶ X sa nanemi-lzbzlr mz newzng x butqbrng, mz nzrpri-krdr kx, “Talvzom nigr, x amnc-kapqbz nigr mz mz Kxetu kc tqwxbuom mz tron x mz zngya ngr drtwr Nei Sip. ¹⁷ Murde mzli ka sc tqkrlzpebzle Mzli Kxmatq nyz Gct ncdr Nei Sip, x trpnzngr kx narlapx mz nzayrplapx-krdr nigr.” ¹⁸

7

Leplz Ne Gct Kcng Siu-trtqki-esz'-nzpnu-pwx-nrade-pwx (144,000) Narlapxng

¹ Zbz obq-rmwible-moux, x mcx enjrl nzpxwng taplxsr bute’ ngr nrlc, nzrpwa’-ngrdr nenq kcng pwx mz nrlc, murde nenq ma tqwq mz drtc’, nounc, x prla. ² Zbz mc-kzx kzdq kz enjrl vzdzm Heven vzkimle me prkilzm nepi. X malele kc da kx nayrlq-ngrbz rkx mz leplz, nzaelwapxngr kx nzngineng Gct kc tqngi nou nzlung. X etumibz nate nzkqle-krbzle mz enjrl kcng pwx tqrka-neba Gct zmatq ngr nzodatingr drtc’ x prla. ³ Rpibz enjrl kc kx, “Bzkq odatiamu ena drtc’, prla, x nounc, nakrlz-zpxwzbzle nzryrkrpxkr nzryrlq-krbzkr rkx ngr Gct rgu mz rtrllrmz kxnzawz-nrbalq nedeng.” ⁴ X nzpim bange me nakrlzbz nzkqlukr leplz ne Gct kcng nartwzng rkx ngrde. Kxnzlxngiting kcng tzprpxmqng mz neidu lr Israel nakrlzbzle siu-trtqki-esz'-nzpnu-pwx-nrade-pwx (144,000). ⁵⁻⁸ Leplz lcng siu-trtqki-esz'-nzpnu-pwx-nrade-pwx (144,000) taplxsr neidu lr leplz kcng Israel nzpnu-esz'-nrade-li (12). Murde neidu lcng amrlx nzrngine-lxblrng siu-nzpnu-esz'-nrade-li (12,000) kx nzrtwzng rkx ngr Gct. Drtq neidu lcng nidr seleng,

⁸ **6:8** Sekaraea 1:8; 6:2-6; Esikel 14:21 ⁹ **6:12** Nzaelwapxngr 11:13; 16:18; Asaea 13:10; Joel 2:10, 31; 3:15; Matiu 24:29 ¹⁰ **6:13** Asaea 34:4 ¹¹ **6:15** Asaea 2:19-21 ¹² **6:16** Hosia 10:8; Luk 23:30
¹³ **6:17** Joel 2:11; Malakai 3:2 ¹⁴ **7:1** Jeremaea 49:36; Daniel 7:2; Sekaraea 6:5

Judz	Simion
Ruben	Livae
Gad	Isaka
Asz	Sebyulon
Naftzli	Josip
Manase	Benjamin

Zbo Ngr Leplz Kxetu Neng Gct

⁹ Mz nibrde, obq-rmwible-moux, x mcx kc zbo ngr leplz kxetu-esz'ngr. Nzqqlu-zlwzng x trpnzngr kx yatrpz nzrlwxngr. Nzprpxmqng mz nou, natq, neidu, x drtc' amrlx mz nrlc. Nztutrpeng mrkc tqlxlvrkipx Nei Sip mz tron. Nzq-lxblrng lrpz kxprki x nzrmale-lxblrng nabx nc paam mz nzabrtz-krdr. ¹⁰ Zbz sc tzetumipe natqdr nzrpi-krdr kx, "Nzarlapxngr vzpxm mz Gct rgr kc tqwxbuom mz tron, nimu ncdr Nei Sip." ¹¹ Zbz enjrl kcng amrlx tztu-ngalelvzlr tron mrkc tzmncng kxnaclveng kcng x kxnaclveng kcng pwx, sc tzrtco-lzbqng mrkc tqlxlvrkipx tron mz nzangio-krdr Gct. ¹² Nzrpilr kx, "Eu, angida! Angiokr nim, awibzkr bam, glqlzkr nim, x amatqkr nim. Pipxkr nzyrplapx-krm, nzxplar-krm, x zmatq ngrm, tqyc tqyc. Eu, angida!"

¹³ Zbz kzdq kxnaclveng kcng rpimle bange kx, "?Neke lcng tzkqng lrpz kxprki, x nzvzkiplr drlve?" ¹⁴ A' ayzlu-ngrbo natqde kx, "Kxetu, nim kx rkrlz." X rpi-mople bange kx, "Krlcng leplz kx nzvzpxmqng mz Mzli r Nzxpungr Kxtrka-zlwz. X mzli ka nztzapopelr lrpzdr mz mepyr ngr Nei Sip, murde naprkitxpxpeng. ¹⁵ Delc tztutr-ngrbzlr mrlc tqlxlvrkipx tron nyg Gct mz nzangio-krdr nide mz Mangr-nzangiongr nyg Heven, ngrlx x mz nrlckxbq. X Gct kc tqwxbuom mz tron, sa namnc-zvzng badr mz naaclve-krde nidr. ¹⁶ X trtxpengr nzbrtale-krdr x nzbrlkzkr drtwrdr, x trtxpengr nrkrdrtdqdr nzyrlxkr nzulr nepi, nyr x kzdung kz da." ¹⁷ Murde Nei Sip kc tqtavau mrkc tqlxlvrkipx tron, sa na-aclvele nidr na-apule ncblo kxaclvele sip nedeng x namailzle nidr mz aulz ngr lue ngr nzlungr. X Gct sa naycpqpxbzle drlemztr amrlx, murde naesakingr nzvzkr drtwrdr. ¹⁸

8

Nzrniglckr Nei Sip Kadol Krarlimz

¹ Mzli kc tqniglcngr Nei Sip kc kadol krarlimz, lr Heven amrlx nzmncc-nabutxng mzli kxipiz trkrlzpwzleu nabz-nepi kxes'. ² Zbz mcx nar enjrl kcng rlimz tztutrpzng mrkc tqlxlvrkipx Gct, x nzkabz badr trpu rlimz.

³ X kzdq mou enjrl vzm tutr mz olta kc tzwzngm mz gol, tqututrpz mrkc tqlxlvrkipx tron. X malele kc baol kx ngl gol, kx nayclz-ngrm bqlr nc ninz kxngc. X nzka-mopwz bade kcng bqlr nc ninz, kx nakamibzle nzkrka'kr leplz ne Gct amrlx mz olta. ⁴ X mz nzglalzkr enjrl kc baol ngr bqlr nc ninz kc, zsikapu ngr bqlr nc ninz kxmnrt mrlz sc tqvzmlz lxblr nzkrka'kr leplz neng Gct, vzdz x krlzlzbzle Gct. ⁵ Mz nibrde enjrl kc glaole kc baol ngr bqlr nc ninz kc, tekatrle mz nyr ngr olta x rtco-ngrde mz nrlc. X mzli lcdepwz bzlrpc tqpcipx, bzlrmei tqyryputipx x nrlc tqycngrlr atwrnrngr mz nengq. ⁵

Trpu Kc Kai Drtwr Ngrde Nzatrkattingr Drtc'

⁶ Zbz enjrl kcng rlimz tzrtaplxsrng trpu, sc tzoliqpeng nzvxu-krdr leng.

⁵ 7:14 Daniel 12:1; Matiu 24:21 ⁶ 7:16 Asaea 49:10 ⁷ 7:17 Sam 23:1-2; Esikel 34:23; Asaea 25:8 ⁸ 8:3 Emos 9:1; Nzrlaszngr 30:1, 3 ⁹ 8:5 Livae 16:2; Esikel 10:2; Nzrlaszngr 19:16

⁷ Mzli kc enjrl kc kai tqvxutrle kc trpu nede, muli-aes x nyr rlxlvzmi mepyr nzrtco-ngrm mz drtc' apule tewa kxdc. Mz nzmu-krde lcde, nctq drtc' kxetu, vzmi nounc x nabr yrkrtxo mz nyr amrlx. [☆]

Trpu Krali Drtwr Ngrde Nzatrkatingr Prla

⁸ Zbz enjrl krali vxutrle trpu nede, x kzdq da kx apule newz kxetu kxngc nzrtcongr prla. X nctq prla kxetu nzlrtipxlr mepyr. ⁹ X dalr nctq prla lc amrlx nzbzting x lcsu amrlx mz prla lc nzodating. [☆]

Trpu Kratq Drtwr Ngrde Nzatrkatingr Lue

¹⁰ Zbz enjrl kratq vxutr-kzle trpu nede. X vri kxetu taom mz bongavz apuneomle kx ngxlu, x tao mz nctq lue kxkqlu, x aulz kxkqlu. [☆] ¹¹ X drtq vri lcde 'Kxpiz,' murde apule lue lr nc rtc kxpiz. X lue kxkqlu lcng nilwzdr piz, x leplz nzkqlung kx nzbz-ngrdr nzrmnq-krdr lue lcng tqipiz. [☆]

Trpu Krapwx Drtwr Ngrde Nzatrkatingr Dalr Bongavz

¹² Zbz enjrl krapwx vxutr-kzle trpu nede. X nctq nepi, temz x vri nzatrkating amrlx, murde ncte lcng nabzting. Mz nzmu-krde lcde, kzdq nctq ngrlx tryzlr-ngru, x kxmule lcpwz mz nrlckxbq. [☆]

¹³ Mz nibrde obq-mopwc' x mcx nzlvctxlzkr kzdq lr mrkc wq, x sc tqnemipele nzrpi-krde kx, "Nimu lr nrlc na-aclvetioamu. Murde mzli kc enjrl kcng tq navxutr-mou-ngrdr trpu nedr, nzayrplapxngr kxtrka-esz'ngr lang tq sa navz-kzpzngr bamu."

9

Trpu Kranzlvqn Drtwr Ngrde Nzatrkatingr Leplz

¹ Zbz enjrl kranzlvqn kc tqvxutrppele trpu nede. X mcx kzdq vri kx taopem Heven mz nrlc. Nzkabz mz vri lc tqtaom kc ki kx nalvxlzngarde naonrx ngr gq kc trpnzngr noude. ² Kx lvxlzle kc gq kc, zsikapu kxbotatz' mapunelmle apule zsikapu ngr trmami, x amrbrtxde zyzl ngr nepi, x awx-nzlo-atwrnr-ngrde bongavz. [☆] ³ X vzpxm mz zsikapu kc kionabr nzyrkromqng mz nrlc. X nzkabz badr zmatq ngr nzrtq-krdr leplz apupwzle nalx. [☆] ⁴ Nzibz badr kx bzkq nzatrkatilr nabr, nounc, x lxbi. A' nzrlrtx-ngrp wzbadr nzatrkat-krdr leplz kcng rkx ngr Gct tryctr mz rtrlrmztr. [☆] ⁵ Trnzrlr-ngrp wzbadr kionabr lcng nznibq-krdr leplz, a' nzaetq-zlwz-ngrbzlr drtqdr mz temz kxnzlvqn. X zvetq kxetu lc na-apule zvetq ngr nzrtqkr nalx. ⁶ Mz nabz temz lcng nzlvqn, leplz kcng drtqdr tqetq sa nartangrtir kzdq da kx nabz-ngrdr, a' trtxpzngr nzrmcti-krdrle. X nzsutitx zlwz drtwrdr nzbzng, a' trtxpzngr nzbz-krdr. [☆]

⁷ Mc-kzx kionabr lcng nzapulr hcsi kx nzoliqng mz nzvo-krdr mz vea. X nardr lao-lxblr-ngrm da kx apule kraon kx ngl gol, x nardr apule nar ncblo. [☆] ⁸ Nqnginardr boi apule nqnginar olvz, x nqngidr malc apule nqngi laion.

⁹ X nzkq-ngrdr temz ngr lomrdr da kx nzwzngr mz aian kc tqyputrngr nipna. X natq nzyrklzkr nabxdr apule natq sariot kcng tzvomi-ani-txpwlzr hcsi mz nzvecngr. ¹⁰ X dxpa' krdr kcng tqtutr mz nqglqdr nzapulr dxpa' kr nalx. X mz dxpa' krdr dekc tqyctrngr zmatq ngr nzrtq-krdr leplz mz temz kxnzlvqn. ¹¹ Nzrngineng king kx acuvele nidr, krlcde enjrl kc tqngi kxetu r gq kc trpnzngr noude. X drtqde mz lr Jiu Abadon, x drtqde mz lr Grik Apolian, drtwr ngrde Kxoda.

[☆] **8:7** Nzrlaszngr 9:23-25; Asaea 28:2; Esikel 38:22 [☆] **8:9** Sekaraea 13:8-9 [☆] **8:10** Asaea 14:12

[☆] **8:11** Jeremaea 9:15 [☆] **8:12** Asaea 13:10; Esikel 32:7; Joel 2:10, 31; 3:15 [☆] **9:2** Nou 19:28

[☆] **9:3** Nzrlaszngr 10:12-15 [☆] **9:4** Esikel 9:4 [☆] **9:6** Job 3:21; Jeremaea 8:3 [☆] **9:7** Joel 1:6; 2:4-5

¹² Nzayrplapxngr kxtrka-esz'ngr kc kai, dela tqyrkrpxpe. A' nzayrplapxngr kxtrka-esz'ngr li lang tzvzbepqng.

Trpu Kraesz'mz Drtwr Ngrde Nznibqngr Leplz

¹³ Enjrl kraesz'mz vxutrle trpu nede. X xlrk kc natq vzpxm mz nctq bute' kcng pwx mz olta kc tqngi gol tqtu mrkc tqlxlvrkipx Gct. ¹⁴ Rpibzle mz enjrl kraesz'mz kx, "Aopxpebz drtq Enjrl kcng pwx tzatolvangr mz lue kc etu drtqde Yufretis, mzli ka." ¹⁵ Zbz sc tqaopxpebzle drtq enjrl kcng pwx, murde nanibqtilr nctq leplz kxetu mz nrlc. Enjrl lcng nzaenzli-ngrdr nabz nepi, zbzq, temz, x yiz lcdepwz murde na-atutr-ngrdr nzwz-krdr lc. ¹⁶ X nzpim bange leplz ngr ami kxnzvo mz hcsi krlzbzle obu-trtqki-li (200 milion). ¹⁷ X mz nzobq-krnge opx mz mzke' hcsi kcng, x kxnzwxbuomqng badr. Nzqkq-ngrdr temz ngr lomrdr da kx nzwzngm mz aian, pc apule nyr, blu apule zsi kapu, x plc apule rplz salfz. Nar hcsi kcng nzapulr nar laion x naodrng tqrpnaphx-ngrm nyr, zsi kapu x salfz kxngc. *

¹⁸ Mz nzayrplapxngr lcng tq, nyr, zsi kapu x salfz kxngc kcng tqrpnaphxm mz naodr, nznibqtilr leplz kxnzkqlung mz nrlc. ¹⁹ Hcsi lcng mrkc tqmalcnepx mz nqglqdr apule nar ningidoe, x nzrmakx-ngrdr leplz. Mz nzmu-krde lcde, zmatq ngr nzaetq-krdr drtq leplz yctr mz naodr x nqglqdr kz.

²⁰ A' leplz amrlx kcng trnzbzung mz nzayrplapxngr lcng, tresakuu nzangio-krdr drka' x mqngr drka' kxnzlz kx nzwzngm mz gol, silvz, bras, rplz x dapunc. X da lcng amrlx trpnzngr da kx nzmclr x nxzlr, x trnzvzne-kzung. A' trnzaxtxlru da lcng tzwz-ngrdr mz mqdr. ²¹ X trnzaxtx-kzlsru nzribq-krdr, nzycmne-krbzlr mz drka', nzrmwimi-krdr doa kx trngiu kernalzdr, x nzpnangr da.

10

Skrol Kxtopwz

¹ Zbz obq-rmwible-moux, x mcx kc enjrl kxmatq vzom Heven. Ngrlelvz dc当地 apule lrpz kx kq-ngrde, x narde ngrlelvz nRPC'. Mzte luli apule nepi, x nancde nzapulr nctrpou kx ngc-zli nyr. ² Enjrl lc malele kc skrol kxnzyr kx nzkawpxpe. Nancde kxrtc atuole prla x kxmc atuole mz drtc'. ³ X yrlqbzle kc natqde kxetu, kx apule nzkclwzkr laion kxetu. Zbz xrlzx kc natq Heven, apule bzlrmei kxetu x ayzlu-ngrbzle natq enjrl nzwrde rlimz. ⁴ Mzli kc tqayzlu-ngrbzle natqde, sc tqoliqtipex nzryrongr natqde kcng rlimz. A' mzli lcdepwz, kzdq natq Heven rpimle kx, "Yrlq-kapq natq kcng rlimz, bzkq yroq."

⁵ Zbz enjrl kc nancde tqtu kc prla x tuo kc mz drtc', glalzle mqde kxrtc Heven. ⁶ X esalz-ngrde drtq Gct kc nzlu-krde tqyc tqyc, x tzwz-ngrde bongavz, drtc', prla, x da kznikeng amrlx ycpxmqng elr. ⁷ Murde mzli kc enjrl krarlimz navxutr-ngrde trpu nede, drtwr Gct kx yc-kapq kc tqipx-pnzbzle mz profet nedeng kcng tzwztrpzng bade, sa natutrpe."

⁸ X nide kc tqycmneom Heven, xlr-moux nate, rpimle bange kx, "Vz x rtrngztibz skrol kc tkawpxp mz mq enjrl kc nancde tqtu kc prla x kzdq tqtu mz drtc'." ⁹ X vzbo mz enjrl kc, sc tqrlxtipebo skrol kc topwz. Rpimle bange kx, "Twz x ngq. Sa naxngibzme mz naom nilwzde nzmrlz-krde

* 9:13 Nzrlaszngr 30:1-3 * 9:17 Mz Nzryrngrkxtr mzli kang kqlu rplz salfz drtq ngrde nzodatingr mz nzayrplapxkr Gct leplz. Mc Sam 11:6; Asaea 30:33; 34:9; Esikel 38:2 x Nzaelwapxngr 9:17; 14:10; 19:20; 20:10 x 21:8. * 9:20 Sam 115:4-7; 135:15-17; Daniel 5:23 * 10:5 Nzrlaszngr 20:11; Lou Kcpwz 32:40; Daniel 12:7; Emos 3:7 * 10:6 Nzrlaszngr 20:11 * 10:8 Esikel 2:8—3:3

apule hane. A' mzli kc navzope-ngrde mz nelzm, nelzm kc tqrlvqkrkxpe." ¹⁰ Rtrngztibo skrol kc topwz mz mqde. Sc tqngqpex, x da zpx, nzmrzlzkr nilwzde mz naonge apule hane. A' mz nibr nzlwzo-krngele, nelznge kc tqrlvqkrkxpe. ¹¹ Zbz sc tzrpipe-mop bange kx, "Napipx-mouq natq Gct lcng tqycmnetr-ngrde drtc', leplz, natq x king kang kqlu."

11

Profet Ne Gct Kcng Li

¹ Zbz, mz nibrde nzkam kc bange nenikxboi apule dapunc ngr nzanengr, x nzrpim bange kx, "Tulzm, x vz mz nzanengr Mangr-nzangiongr Yawe x olta ngrde, x rlwx leplz kcng tzangiopxmqng elr. ² A' yrlqtxpx nrlarde makoa kcng yz, bzkq aneqng, murde nzkapebz mz leplz kxtrnzrlxngitiung kcng narnzlvzolr Jerusalem, navz nakrlzbzle yiz tq x ncte kc. ³ Sa natawzlr-ngrbo profet nenge kcng li tzpxing lrpz ngr nzvzkr drtwr. X sa nayapwxtipxlr natq Gct mz nabz yiz tq x ncte kc." *

⁴ Profet lcng li nzapulr nounc olivi kcng li, x da li kcng nzwxbuo-ngrm lam, tqutur mrkc tqlxlvrkipx Gct, Kxetu kc tqaclvele nrlc. ⁵ Nzmu kzdq doa rpile na-atrkatile nidr, nyr sa navzpxm mz naodr mz nzodati-krde nide. X kxnamu-kzle lc nzbzkr doa kznike rpile na-atrkatile nidr. ⁶ X nzrngiscng zmatq ngr nzrpwa'-krbzlr mz bongavz nzdckr tewa, murde tewa ma tqdc mzli lc tzryapwpx-ngrdr natq Gct, mz yiz lcng tq x ncte kc. X nzrngisc-kzng zmatq ngr nzale-krdr lue nzlrtipx-krdr mepyr, x zmatq ngr nzatrkatikrdr lr nrlc mz zyagox kznikeng nasuti drtwrdrle. ⁷

⁷ Mzli kc tqyrkrpxpengr profet lcng nzyapwxti-krdr natq Gct, MrIx Kc Tqdrka'ngr tqdwalzm mz gq kc trpnzngr noude, sa naotang badr. Sa na-aovxiole nidr x nanibqleng. ⁸ X namz ngrdr sa nayrbqtxng mz lrpzki kx nzvzkitr leplz kxkqlu mzteadau Jerusalem, mrkc tztlqvztrnrg Kxetu rdr mz kros. Mzteadau lc nzycmne-ebzpxngr drtq 'Sodom' o 'Ijipt,' murde lr Jerusalem trnzlxngiti-kzlu profet ne Gct da kc tzwai lr Sodom x lr Ijipt trnzrlxngiti-krdr. ⁹ Zbz leplz ngr nou, natq, neidu, x drtc' amrlx naobqlvzolr namz ngrdr, zbzq natq x ncte kc. X trnarlrpx-ngrdr nzryrtzmqngr namz ngrdr. ¹⁰ X lr nrlc sa na-abrtz-zlwz-ngrdr nxzlr-krdr nzbzkr profet lcng nzling. X sa nartrngzbzng nzmungr x narka-etrng da, murde profet lcng nzling kc tzaetqbzlr drtq lr nrlc.

¹¹ Mz nibr nzyrbqtkr namz ngrdr zbzq tq x ncte kc, Gct sa na-atulz-mople nidr mz nzbngr mz nzvxutr-krbzle nzlu-krde badr. X kx namc leplz kxnxkqlung nztulz-mou-krmlr mz nzbz-krdr, namwxlr-zlwz-ngrdr. ¹² X mz nibrde, sa naxrlz profet kcng nzling Heven kzdq natq kxetu, narpiomle kx, "Vzdzmamu mrka!" X mzli lcde, sa naobqlvzlngr leplz kcng tzmwati drtwrdr nidr, nzvzdz-krdr Heven mz nabz dcbs. ¹³ X mzli lcpwz, nengq kxetu sa navz-kzp mz nzodati-krde kzdq nctq Jerusalem x nabzng mz nengq lcde leplz siu-rlimz (7,000). X leplz kcng tzlu-txpwzng namwxlr-zlwzng x naglqlzlr Gct kc Heven.

* **11:1** Esikel 40:3; 42:20; Sekaraea 2:1-2 * **11:2** Luk 21:24 * **11:3** 11:2 Mz nzplzpxkr Jon zbzq lcng, kzdu mzli pipxle yiz tq x ncte kc, kzdu mzli pipxle temz nzpnu-pwx-nrade-li (42), x kzdu mzli pipxle zbzq kcng siu-esz'-trtqki-li-nzpnus-esz'mz (1,260). A' yro-txpwzkr 'yiz tq x ncte kc,' murde drtwr ngr mzli lcng tq kx namu-txpwzlr esz'. Mc kz Nzaelwapxngr 11:6, 12:6, 14, 13:5. * **11:4** Sekaraea 4:1-14 * **11:6** 1 King 17:1; Nzrlaszngr 7:14-21; 1 Samwel 4:8; Luk 4:25; Jemes 5:17 * **11:7** Daniel 7:7, 21; Nzaelwapxngr 13:5-7; 17:8 * **11:8** Asaea 1:9-10 * **11:11** Esikel 37:5-14 * **11:12** 2 King 2:11

¹⁴ Nzayrplapxngr kxtrka-esz'ngr krali delc tqkapupxpe, a' se tqvz-nqblqpe-kzp nzayrplapxngr kxtrka-esz'ngr kratq.

Trpu Krarlimz Drtwr Ngrde Nzaclve-angidrkr Gct Nrlc

¹⁵ Zbz enjrl krarlimz kx vxutre kc trpu nede, kzdung natq kxetung Heven nzrpilr kx, "Zmatq ngr nznginingr King mz nrlc ycbz mz Kxetu Gct rgu ncdr Kxnzmcpx nede. X Gct sa tqaclv mzli ka x nzaclve-krde tqyc!" ¹⁵

¹⁶ Zbz kxzaclveng kcng nzpnu-li-nrade-pwx (24) tzwxbuong mz tron mrkc tqlxlvrkipx Gct, nzrtco-lzbqng mz drtc', x nzangiolor Gct. ¹⁷⁻¹⁸ Nzrpilr kx, "Kxetu rgr, Gct kc tqqrinr,

Kc tqmnc mzli ka,
X tqmnc pnz. Awi-ngrbzkr bam,
Nztwzpe-krm zmatq ngm,
X nipem King r nrlc ka.
A' lr mrkzbleng ngyati
Drtwrdr nimq murde
Nzkaputr-krm mzli r nzayzlu-krbzme
Da mz leplz kxnbzpeng.

"X mzli r nznka-krbzme
Da kxmrlz mz profet
Kcng tzwztrpzng bam, badr leplz nemqng
Amrlx kcng tzamrluelr nim,
Kxmule-esz' kxnzetung o leplz txneng.
X krlzpe-kzpze mzli
Nzrmilxtxo-krm
Krkcng tznibqtilr
Leplz nemqng mz nrlc ka." ¹⁶

¹⁹ Zbz Mrkc Tqtr Mangr-nzangiongr Gct Heven nzlvpx, x Bokis kc Tqyclzngm Nzesz'tikr Drtwrdr Badr Leplz Nedeng, sc tzmcpe elr. Mzli lcde bzlrpc tqpcipx, bzlrmei tqyrputipx, nrlc ycngirlr atwrnrngr mz nengq, x muli-aes kxetuting tqvziom apule tewa kxdc. ¹⁷

12

Olvz Kc Tqngi Israel X Doa Nede Kc Tqngi Mevalu

¹ Zbz kzdq rkx kxmatq prpxm mz bongavz. X mcx kc olvz kq lrpz kx apule nepi, x tuo-ngrmle temz x ngrlelvzle narde vri nzpnu-esz'-nrade-li (12) apule kraon ngr narde. ² Olvz lc yr x tangqgx mz nzetqtikr drtqde nzrmika-krde.

³ Zbz kzdq rkx kxmatq prpx-mop mz bongavz. Krlcde mepwz kxpc kxetu, narde rlimz, taplxsr kraon kxtopwzting, x scde dxpa' kxetu nzpnu-esz'. ⁴

Mepwz lcde nqglqde iplro-ngrmle vri ngr bongavz kxnxkqlung mrka mz drtc'. X vzbz mz olvz kc, sc tqtu-pz'litrpebzle doa kc namikale, murde nangqde. ⁵ Olvz kc rmika x nede doa ncblo. A' doa ne olvz kc trngqu Mepwz kc murde nzglqlz-rlrubz mz Gct mrkc tqwxbu-ngrde mz tron. Nide kc na-aclevle leplzng amrlx mz zmatq kx xplr-esz'ngr, *na-apule bz kc tqrniglc botol*. ⁶ X olvz kc sc tqdwarpe lzke, me oliqtibz Gct mz nzmnccpx-krmle elr mz yiz kcng tq x ncte kc. ¹⁸

Enjrl Nzaovxiolr Drka' Neng Setzn

¹⁵ **11:15** Nzrlasngr 15:18; Daniel 2:44; 7:14, 27; Asaea 9:7 ¹⁶ **11:17-18** Sam 2:1-2; 110:5; 115:13

¹⁷ **11:19** Nzaelwapxngr 8:5; 16:18, 21 ¹⁸ **12:3** Daniel 7:7 ¹⁹ **12:4** Daniel 8:10 ²⁰ **12:5** Sam 2:9; Asaea 66:7 ²¹ **12:6** Nzaelwapxngr 11:2

⁷ X vea kxetu kc tqprtzpe Heven, Narenjrl Maekol badr enjrl nedeng nzvecng badr Mepwz. X Mepwz badr enjrl nedeng nzotang badr. ⁸⁻⁹ Mepwz kxetu kc tqngi kz ningidoe ngr nrlanc kc bqnc, tzrpi-kzpz ‘Nar Drka’ x ‘Setzn.’ Nide enqmi r leplz murde tqpibqle leplz x tquesabrtile leplz ngr nrlc atwrnrngr. Nzvecng x Mepwz badr enjrl nedeng sc tzaovxiopeng Maekol badr enjrl nedeng. X trnzrlrpe-ngrpwzu nzmnc-krdr mou Heven. Nzrtcmipxngr enjrl nedeng Heven x nztaomqng mz nrlc, mz nzngini-krdr drka’. ¹⁰⁻¹²

Mz nibrde, xlrx kc natq kxetu Heven, rpile kx, ¹³

“Gct rgu sa na-arlapxle

Leplz nedeng mzli ka.

Sa natwzpele zmatq ngrde,

X nangipe King mz nrlc.

Kxnzmcpx nede twzpele zmatq ngrde,

X Setzn kc tqpibqtitr-

Zvzbzle kztegung

Mz mz Gct rgu,

Nzrtcpxpengr Heven.

“A’ kztegung nzaovxiopelr

Nide mz zmatq ngr mepyr

Ngr Nei Sip. X nimu lr Heven

Na-abrtz-zlwzamu.

A’ nimu lr nrlc ka

Na-aclvetioamu.

Nar Drka’ vzopebz bamu.

Drtwrde ngya zlwz murde nzmnc-krde

Mrla mzli trnabouiu.”

Mepwz Nzotang Badr Olvz Kc X Doa Nedeng Amrlx

¹³ Kx glxpe Mepwz kc nzrco-ngrm nide mz nrlc, sc tqmaneutinepele lxede doa kc. ¹⁴ A’ olvz kc lvctr-ngrde mrnyzde mrkc lzke nabx lr kxetu li kx nzkabz bade. X namncpx-ngrmle mrkc nakrlzbzle yiz kxtq x ncte kcng, murde namnc-rlrubz mz Mepwz kc. ¹⁵ Zbz Mepwz kc sc tqbyape-ngrbzle lue kxkqlu mz nibr olvz kc, murde natwz nubla ngrde x trpnzngr nzrlapx-krde. ¹⁶ A’ drtc’ okatrle olvz kc. Amzpxle naode x mnqle nubla ngr lue kc tqbyapxngr Mepwz kc yrkrtxo. ¹⁷ Zbz Mepwz kc sc tqngyatipe drtwrde olvz kc, x sc tqvzpe mz nzvec-krdr badr kzdung kz doa nedeng, kcng tzvz-nqblqlr Loukxtr sc Gct, x tzlxngitlr natq angidr kcng tqpipx Jiszs.

13

Mrlx Kc Tqdrka’ngr Kc Kai Tqngi Enqmi Kc Etu Ngr Kraes

¹ Zbz obq-rmwible-moux, x Mepwz sc tqtupe mepz prla tqaenzlipxpe. X mcx Mrlx Kc Tqdrka’ngr kx vzdzm prla. X nzyrtr-lxblrng mz narde rlimz drtq kx bletipx-lxblrng kx nxztrnga-ngrdr Gct. X scde dxpa’ nzpnu-esz’, taplxsraon kxtopwz. ² Mrlx Kc Tqdrka’ngr tqmcx apule trputi kzpeto kxetu. Drkrvi ngr nanycde boi x malc apule drkrvi ngr nanyc kzdq kz animol kzpeto. X nxzplkrnaode apule nao laion x nqngide malc. X rngisc zxplkrnaon x zmatq kx aprcbz Mepwz bade. ³ Opxm kx kzdq nar Mrlx Kc Tqdrka’ngr lcde nzataki pnz x ycpwz pipz nzbz-krde. A’ mztrpe x bzmrde

⁷ **12:7** Daniel 10:13, 21; 12:1; Jud 9 ⁸ **12:8-9** Nou 3:1; Luk 10:18 ⁹ **12:10-12** Job 1:9-11; Sekaraea 3:1 ¹⁰ **12:14** Daniel 7:25; 12:7 ¹¹ **13:1** Daniel 7:3-25; 11:6

sc tqyctxtr alo. Kx nzmclr Mrlx Kc Tqdrka'ngr, lr nrlc amrlx nzkctitpxlr x sc tzvz-nqblqpelr natqde. ⁴ X nzangio-kzlr Mrlx Kc Tqdrka'ngr, mz nzrpikrdr kx, "Trpnzngr kx rtakitr nzxplkr Mrlx Kc Tqdrka'ngr. X trpnzngr kx yatrpz mz nzota-krdr ncdr murde na-aovxirole nide." X nzangio-kzlr Mepwz murde nzaprc-krbzle zmatq mz Mrlx Kc Tqdrka'ngr. ⁵ Mrlx Kc Tqdrka'ngr napivxitole Gct mz nzglqpx-lzbq-krde mz nzycmne-krde. A' zmatq lc nzrlrtx-ngrpwlrlle bade yiz tq x ncte kc. ⁶ Sc tqpibqtipole x tqqlcbqtipole Gct, drtqde, me mnc-ngrde x lr Heven amrlx. ⁷ Nzrlr-ngrbz bade nzota-krdr badr leplz neng Gct x na-aovxioleng. X kxnzvzpxmqng mz nou, natq, neidu, x drtc' amrlx nzmnclbzng mz zmatq ngrde. ⁸ Leplz mz nrlc tulvzo sa na-angiolar Mrlx Lc Tqdrka'ngr, krkcng drtqdr trnzyrou mz Buk ngr Nzlungr sc Nei Sip kc tznibq. A' kxnzrlxngiting kcng drtqdr tzyro elr abzo mzli kc tqwzngr Gct nrlc, trtxpnzngr Mrlx Lc Tqdrka'ngr. *

⁹ Abzamu nzylq-angidr-krmu natq lcng navzm. ¹⁰ doa kx pnzpe drtwr Gct napresin, sa napresin. X kx pnzpe drtwr Gct nanibq mz toki r vea, sa nanibq mz toki r vea. Mz nzmu-krde lcde, mzli kc naprtz-ngrbz da lcng bamu, tu-amqngiamu mz nzrlxngiti-krmu x abrtrpzmu drtwrmu mz Gct.

*

Mrlx Kc Tqdrka'ngr Krali Tqngi Profet Kxpokia

¹¹ Zbz mc-moux kzdq kz Mrlx Kxdrka'ngr kx vzdzm mz drtc'. Dxpa' krde li kxtopwz apule dxpa' kr Nei Sip, a' nzycmne-krde xplr apule nzycmnekr mewpz. ¹² Mrlx Kc Tqdrka'ngr lc tutrpz mz krkc kai x zmatq ngrde apupwzle zmatq ngr krkc kai. X rtulrtr-ngrbzle mz lr nrlc amrlx nzangio-krdr Mrlx Kc Tqdrka'ngr kc kai tqyctrngr bzmr kxsqki. ¹³ Mrlx Lc Tqdrka'ngr krali, na-aletile rkx kxkqlu. Krlzle nzavzo-ngrm nyr bongavz mzli kc tzobqngr leplz kxkqlu. ¹⁴ Nzrlr-ngrbz mz Mrlx Kc Tqdrka'ngr krali nzaletr-krbzle rkx mz Mrlx Kc Tqdrka'ngr kc kai. X mz nzale-krde rkx lcng, esabrti-ngrde leplz kxkqlu mz nrlc. Krkc Krali pibzle badr nzrlz-krdr mqngr Krkc Kai tzataki mz toki r vea a' sc tqlupe mou, murde leplz na-angiolar nide mz mqngr kxnzll lc. ¹⁵ X nzrlr-ngrbz mz Mrlx Kc Tqdrka'ngr krali nzvxutr-krbzle mz nao mqngr Mrlx Kc Tqdrka'ngr kc kai tzlzl, murde naycmne, x nanibqtile leplz kcng trnzangiolru nide. ¹⁶ Mrlx Kc Tqdrka'ngr krali rtulrtr-ngrbzle mz leplz txneng, bcnyrng, nra-nzlung, kxnzawz-nrbalqng x kx drtqdr opx nzycctrkr rkx mz mqdr kxrtc o mz rtrlrmztr. ¹⁷ Trpnzngr kx naxpe x na-amwa da, kx tr-rtwzkale rkx lc tqngi drtq Mrlx Kc Tqdrka'ngr kc kai o nabz kx ngi rkx ngr drtqde. ¹⁸ X nabz lcde trtqki-esz'mz-nzpnru-esz'mz-nrade-esz'mz (666). Doa kx drtwrde aotr-angidrbzle mz nabz lc, nide kx narmc drtwr ngr nabz sc Mrlx Lc Tqdrka'ngr, murde ngi nabz sc kzdq ncblo. Drtwrmu na-aotr-angidrbzmu mz da lcng murde naglx-angidramu nide mzli kc navzm.

14

Kxnzrlapxpeng Sc Tzngrpe-ngrdr Kc Nabz KxmRNA.

¹ Mz nibrde, obq-rmwible-moux, x mcx Nei Sip kc nztuo-krmle mz Newz Saeon kxmqngi, nidr badr kxnzrlapxpeng kcng siu-trtqki-esz'-nzpnru-pwx-nrade-pwx (144,000). X drtq Nei Sip x drtq Trtede nzyrtr-pnzbz mz rtrlrmztr. * ² X xlrk kc nzngrngr Heven, nate etu-esz'ngr apule nzypukr nrc x bzlrmei. X nzngrngr lcde tqxlrk nzylvi-krde apu-kzle nzynikr nqvi

* ^{13:8} Sam 69:28 * ^{13:8} Setzn mnccpx-ngrmle Mrlx Kc Tqdrka'ngr Kc Kai. * ^{13:10} Jeremaea 15:1; 43:11 * ^{14:1} Esikel 9:4

r git a kxkqlu. ³ Leplz kcng siu-trtqki-esz'-nzpnu-pwx-nrade-pwx (144,000) nzngr-ngrdr kc nabz kxmrna mrkc tqlxlvrip Gct, badr kxnzlung kcng pwx, x kxnzaclveng kcng nzpnu-li-nrade-pwx (24). Nabz lc tzngr-ngrdr trpnz-moungr kx ryatitr nzrngrngr, a' ngi txpwz krkcng tzxpetrpeng mz lr nrlc. ⁴ Trnzvz-nqblqlru nqmq kr lr nrlc, a' nidr leplz kx nzalqti-lzbqng mz nzapu-krdr ncblo o olvz kxnmnc-kamelr. X nzvz-nqblq-zvzlr Nei Sip drlve ke vzkile. Leplz lcng xpetrpeng Gct mz lr nrlc, murde nayrlqpx-bekang mz nzwztr-krbzlr mz Gct x Nei Sip, da kc tqwai nzyrlqpx-beka-ngrbz mz Gct x Nei Sip nra nounc kcng ayrrnrngr. ⁵ Trnzpokiaung x nqmq krdr tubqbz mz nzobqkr Gct. ⁶

Nrpa Kxmrlz Tqycpe Tqycpe

⁶ Zbz mcx kc enjrl kx lvc mrkc wq mzlllxlr, x rlem nrpa kxmrlz kc tqycpe, tqycpe mz lr nrlc, x mz nou, natq, neidu, x drtc' amrlx. Nrpa lc nrpa ngr nzaclve-angidrkr Gct. ⁷ X rpibzle mz nate kxetu mz leplz amrlx kx, "Amrlueamu Gct x glqpxamu nide, murde mzli r nzayzlu-krbzle da mz leplz dekape. Mzli lc sa nakabzle da kxmrlzting mz leplz kcng tztabq-esz'ngrng x sa na-ayrplaxle leplz kcng tzpxtxpx-ngrdr nzyrlq-angidr-krdr natqde. Mz nzmu-krde lcde, na-angioamu Gct kc tqwz-ngrde bongavz, drtc', prla, x aulzng."

⁸ Zbz mc-moux kc enjrl krali lvc-nqblqmle enjrl kc kai, x rpile kx, "Taon kc etu, apule Bxbilon kc bqnc, kc tqrngisc zmatq kx xplrx, tzmilxtxo. Nzmnckr lr Bxbilon trka. X nzangio-krdr drka' apule nzabeati-krdr nzrmwimingr, murde trnzngida-zpwxung mz nzangio-krdr Gct angidr. Leplz mz nrlc tulvzo nzaxvctr-lzbqbzng mz alwx ngrdr x opxm kx alukurnr-ngrng waen. Mz nzmu-krde lcde, Gct sa na-ayrplaxle leplz lcng amrlx." ⁹

⁹⁻¹⁰ X mc-moux kc enjrl kratq lvcm mz nibr krkcng nzling. X etumi nate nzsri-krde kx, "Doa kx angiole Mrlx Kc Tqdrka'ngr kc kai x mqngrde kc tzlz x nzyrtr-kzpz mz rtrlrmzte o mz mqde kxrtc rkx ngrde, sa na-ayrplax Gct mz nztutr-krbzlr mz Nei Sip badr enjrl kxnxmatqng. Zngya ngr drtwrde sa naxplr-esz'ngr mz nzayrplax-krde leplz lcng. Sa na-aetqti-zlwzbzle drtqdr x sa naodati-atwrnr-ngrng mz nyr kxpq-esz'ngr ngr rplz salfz kxngc. ¹⁰ Trpnzngr nzyrkpxkr nzetqkr drtqdr, krkcng tzangiolor Mrly Kc Tqdrka'ngr x mqngrde kc tzlz, x tzwtzlr rkx ngr drtqde. Nzetzqkr drtqdr vztx alo, ngrlx x mz nrlckxbq, murde zsikapu ngr nzngckr nrkrdrdrqdr tqvzpe tqvzpe." ¹¹ ¹² Drtwr ngrde kx nimu leplz neng Gct, kcng tzyrlq-angidrlr natqde x tzvz-nqblq-zvzlr Jisz, na-abrtrpzmz drtwrmu bade mz nzaenzli-krmu, murde sa na-ale Gct nke pipxle.

¹³ Mz nibrde, xlr-moux kc natq Heven, rpimle bange kx, "Yro natq lcng. Abzope mzli ka, sa namrlzbz mz leplz kcng tznibqting murde nzlxngitilr Kxetu rgu." Rpi Mqngirkxtr kx, "Eu, da angidrtx! Murde nzetqkr drtqdr kx vzpxm mz nzwztr-krbzlr mz Kraes sa nayrkpxpe, x Gct sa narkabz badr nzmncc-zpwxngr x da kxmrlzting mz nzwztr-krbzlr bade, kxmule-esz' nke prtzbz badr."

Nzayrlwr-lxblrngr Lr Nrlc Apule Nzrkqtrnegr Nra Nouc

¹⁴ Mz nibrde, obq-rmwible-moux, x mcx kc dcblx kxprki. X mz dcblx lcde, wxbuom kc ncblo elr apule Jisz, Mrly Leplz. Laom mz narde kc kraon kx ngi gol x malele kc toki kxka x malc. ¹⁵ Zbz, mcx kc enjrl vzpxm

³ 14:5 Szfznaea 3:13 ⁴ 14:8 Asaea 21:9; Jeremaea 51:8 ⁵ 14:9-10 Nou 19:24; Matiu 5:22; 8:12; 10:28; 13:42, 50; 18:9; 22:13; 24:51; 25:30; Mak 9:47-48; Luk 13:28; 16:24; Jud 7; Nzaelwapxngr 9:17; 19:20; 20:10; 21:8 ⁶ 14:11 Asaea 34:8-10 ⁷ 14:14 Daniel 7:13

Mangr-nzangiongr, x mz nate kxetu rpibzle mz ncblo kc tqwxbuom mz dcbz kx, “Mzli ka mzli r nzayrlwr-lxblrpengr leplz kxnzmrlzng ngr nrhc, da kc tqwai nzrkqtrngr nra nounc kxnzmrlz mz toki mzli kc nabrpe-ngrdr. Mz nzmu-krde lcde, ayrlwr lxblr leplz kxnztubqng ngr nrhc.” ¹⁶ Zbz mrlx kc tqwxbuom mz dcblz yrlqbzle toki kxka scde mz nrhc, x leplz kxnztubqng amrlx nzyrlwrtr-lxblr-pnzng.

¹⁷ Zbz, mc-moux kzdzq kz enjrl kc tqvzpxm Mangr-nzangiongr Heven. Enjrl lc male-kzle kc toki kxka kxmalc. ¹⁸ X enjrl kc tqacalvele nyr ngr olta vzxpxm mz olta. Rpibzle mz enjrl kc tqrmale toki kxka kxmalc kx, “Mzli ka mzli r nzayrlwr-lxblrpengr leplz ngr nrhc tulvzo kcng tzaleng alwx, da kc tqwai nzrkqtrngr nra grep mz toki mz mzli r nzrnzbrtiongr.” ¹⁹ Murde leplz kcng tzaleng alwx nzapulr nra grep. X enjrl kc tqayrlwr-lxblrl leplz lcng, apule ncblo kc tqrlakipx nra grep mz toki scde. X leplz lcng sc tzayrplapx-zlwzpeng mz zngya ngr drtwr Gct kc tqtubq-esz'ngr, apule nzrtcongr nra grep mz da kxetu kx narnzbrtio-ngrdr mz nzwz-krdrlleng murde nangi lue. ²⁰ Mzli kc tzrnzbrtiongr nra grep, lue lr nra grep kxpc yrlepz zlwz. X mz nqmq lcpwz, Gct sa na-ayrplapxle leplz ngr nrhc kcng tzaleng alwx. Sa na-apule kx rnzbrtiole nidr, x mepyr ngrdr kxpc nayrlepz kz na-apule nzyrlepzkr lue lr nra grep. X me nakrlzbz nubla ngr mepyr ngrdr takitr kilomita kx trtqki-tq (300) x nzboo-krde krlzmle nabx ncblo, murde nzayrplapxkr Gct kxanzaleng alwx sa naetu-esz'ngr. ^{*}

15

Nzayrplapxngr Kxnrnmr-ngrbzng Kcng Rlimz Tzoliqting Heven

¹ Mz nibrde, mc-moux rkx kxmatq mz bongavz x kctipx-zlwzx. Enjrl nzrlimzng nzkabz badr nzayrplapxngr rlimz. kxnzmnr-ngrbzng. Murde mzli kc nayrkrpx-ngrbz nzayrplapxngr lcng, zngya ngr drtwr Gct kc tqykrpxpe-kzpz. ² X mc-kzx prla kx apule dzpq kx rlxlvzmi nyr. X leplz kcng tzaovxiolr Mrlx Kc Tqdrka'ngr, murde trnzangiolru mqngrde kxnzlx x nzpx-ngrdr nzrtwz-krdr rkx ngr drtqde. Nztu-aepztrng mz prla lc x nzrmale-lxblrlng gita kx kabz Gct badr. ³⁻⁴ X nzngr-ngrdr nabz ngr nzmyalz-esz'ngrkr Gct mz nzarlapx-kai-krde leplz nedeng mz kxanzawz nede Mosis, x mz Nei Sip kc ate. ^{*} Nzrpilr kx,

“Yawe, Gct kc tqrninr,
King abzo mzli kc bqnc
Krlzmle mzli ka, nzwz-krmqng myapx-
Esz'ngr x kctipxkrng.
Nqmq krmqng da angidr,
X tubq-esz'ngr.
Leplz nzamrluelr nim.
X trpnzngr kx napxtpx-ngrde
Nzglqlz-krde nqmq krm.

“Nim txpwz kxtr-esz'ngr,
X nzamrluelr nim.
Trpnzngr leplz kx napxtpx-ngrde
Nzglqlz-krde nqmq krm.
Murde nqmq krmqng kxtubq,

^{*} **14:15** Joel 3:13; Matiu 13:30, 39-43 ^{*} **14:20** Asaea 63:3; Nzyrningr 1:15 ^{*} **14:20** Nzboikr nubla ngr mepyr lc apule mrka Santz Krus krlzbzle Santz Ana o Santa Krus krlzbzle Tikopia.
^{*} **15:3-4** Nzrlaszngr 15:1

Lr nrlc amrlx sa navzmqng
 Mz nzangio-krdr nim.
 Murde aelwapxpe-ngrn nqmq krmqng kxtubq,
 Tubq-esz'ngr, eu." [◊]

⁵ Mz nibr nzngr-krdr, obqlzbo x mcx Mrkc Tqtr-esz'ngr mz nabz Tentkxtr nzlvxppe Heven. [◊] ⁶ X nzvzpxmqng elr enjrl kcng rlimz tzrka-nebang nzayrplapxngr kcng rlimz. Enjrl lcng nzkqng amrlx ngrdr nzkq kxprkitpx, x nzlunyao-ngrdr kc da kx apule gol. ⁷ Zbz kzdq kxnzung kcng pwx twzbzle baol rlimz kx ngi gol ataplxs-ngrde enjrl kcng rlimz. X Gct kc tqlu zvz, sa nalva-puliole mz nrlc zngya ngr drtwrde na-apule baol lcng nayrbu-lxblrng mz nzayrplapx-krdeng. ⁸ Mrkc Tqtr lvabqtx atwrnrngr zsikapu kx vzpxm mz zluli x zmatq ngr Gct. X trtxpnzngr kx navztr Mrkc Tqtr, navz navz nakrlz-zpwxbzle nzyrkrpx-krbz nzayrplapxkr Gct lcng rlimz tztwzm enjrl lcng rlimz. [◊]

16

Nzayrplapxngr Kcng Rlimz Narmnr-ngrbzng

¹ Zbz xlrk kc natq Gct kx xpli Mrkc Tqtr, rpibzle mz enjrl kcng rlimz kx, "Vzamu, x odati-atwrnr-ngrnamu dalr nrlc mz zngya ngr drtwrnge, na-apule baol ngr lue kxpq kc tzpulilvziongr da, x blo atwrnrngr."

Baol Kc Kai Drtwr Ngrde Kxsqki Kxtrka

² Enjrl kc kai vz x puliole baol scde mz nrlc. X kxsqki kxtrka apule naasake x nranrpqdo dwatibzle leplz kcng tztwzlr rkx ngr Mrlx Kc Tqdrka'ngr, nzangiolor mqngrde. [◊]

Baol Krali Drtwr Ngrde Nzatrkatingr Prla

³ Zbz enjrl krali puliole baol scde prla. X prla yrnlcvz apule mepyr ngr ncblo kxbz. X dalr prla amrlx nzbzting. [◊]

Baol Kratq Drtwr Ngrde Nzatrkatingr Lue

⁴ Zbz enjrl kratq puliole baol scde mz lue x aulzng, x lue amrlx nzlrtipxlr mepyr. [◊] ⁵ X xlrk enjrl kc tqacivele lue amrlx, rpibzle mz Gct kx, "Gct, nim txpwz kxtr-esz'ngr, mncq mzli ka x mnc-zvzq mzli kc. X nzayrplapx-krm lcng tqtubq-esz'ngr. ⁶ Murde leplz lcng tznibqtilr profet x leplz kxnztr nemqng mz nzayrle-krdr mepyr ngrdr. Mz nzmu-krde lcde, ayzlu-mou-ngrbzme badr mz nzlrtipx-krme lue pqdr mepyr x rka txpwzme mqdr mepyr. X me tubqki nzxpengr nidr delape." ⁷ Zbz xlr-moux natq leplz kcng tznibqti vzpxm mz olta, nzrpilr kx, "Kxetu rgr, nim Gct kc tqrnir. Awitxpe mz nzayrplapx-krm krkcng tznibqtilr nigr! Murde drtwr kcng tqyrlqpeq rsakrlrngr x tubq zvz." [◊]

Baol Krapwx Drtwr Ngrde Nzpqkr Nzulr Nepi

⁸ Zbz, enjrl krapwx twzle baol scde x pulilvzle nepi murde nzulr lr nepi na-apqle ncblo, x nrkrdrqdr nabxuting. ⁹ X mzli kc tzbxuti-ngrdr mz nzulr nepi, nzpibqtilr Gct kc tqatwzlr-ngrm nzayrplapxngr lcng. A' nzpxtpx-ngrdr nztekqtr-krdr nqmq nr drtwrdr murde naglqpxlr nide.

Baol Kranzlvqn Drtwr Ngrde Mrnyz Mrlx Kc Tqdrka'ngr Kc Kai Wx-nzlotx Atwrnrngr

[◊] **15:3-4** Jeremaea 10:7; Sam 86:9 [◊] **15:5** Nzrlaszngr 38:21; 40:1-33; Aposol 7:44; Hibr 8:5

[◊] **15:8** Nzrlaszngr 40:34; 1 King 8:10-11; 2 Be Ngrdr 5:13-14; Asaea 6:4 [◊] **16:2** Nzrlaszngr 9:9-11

[◊] **16:3** Nzrlaszngr 7:17-21 [◊] **16:4** Sam 78:44 [◊] **16:7** Sam 19:9; Nzaelwapxngr 6:9-10; 19:2

¹⁰ Zbz enjrl kranzlvqn twzle baol scde x puliobzle mz tron nyz Mr lx Kc Tqdrka'ngr kc kai. X mztea amrlx kcng tqacuve Mr lx Kc Tqdrka'ngr wx-nzlotx atwrnrngr. X leplz ngr mztea lcdeng tzmakitilr nalpqdr murde nzetq-zlwzkr drtqdr etunepxpe mou. [◊] ¹¹ X sc tzpibqti-zlwzpelr Gct kc Heven mz nzetqkr drtqdr x kxsqki rdr, a' nzpxtxpx-ngrdr nzesakingr nzalengr alwx.

Baol Kraesz'mz Drtwr Ngrde Nzpzkr Lue Yufretis

¹² Zbz enjrl kraesz'mz puliole baol scde mz Lue Yufretis, x lue lc etu pzl-pnzm, murde narlr-ngrbz mz king r me prkilzm nepi nzkawimio-krmleng ami nedrng. [◊] ¹³ X mcx drka' kxnxtrkang nztqng, nzapulr teblika. Dwapxm kc mz nao Mepwz, dwapxm kc mz nao Mr lx Kc Tqdrka'ngr kc kai, x dwapxm kc mz nao Profet Kc Tqpokia, (kc tqngi kz Mr lx Kc Tqdrka'ngr krali). ¹⁴⁻¹⁶ Drka' lcng nztqng nztrka-zlwzng, x nzrngiscng zmatq ngr nzalrttingr da. Sc tzayrlwr-lxblr-ngrdr king amrlx ngr nrlc me esz', drtqde 'Newz Magedon,' mz nzngini-krdr ami kxesz' kxetu. Mz Mzli Kxmatq lc, Gct kc tqqrnir sa naotang badr Mepwz, Mr lx Kc Tqdrka'ngr, x Profet Kc Tqpokia badr ami nedr. [◊]

X mz nzycmnekr Jiszs mz nzyzlu-krmle, rpile kx,

"Ninge la nayzlu-mopwc' mz nrlc. X nzvz-krmc na-apule nzvz-krm ncblo kx pna da kx trnzoliqtiu. A' sa namrlzbz mz doa kx olique nzvz-krmc, na-apule ncblo kx obq zvz x yrlqbzle lrpzde mz nzaenzli-krde nzvz-krm kztede. Nzmu naoliqtiq mzli kc navz-ngrmc, drtqm trnamyatrpwzu mz mz leplz, mz nzapu-krm ncblo kxycblk mz nzvzne-krde."

Baol Krarlimz Drtwr Ngrde Nzodatingr Da Kxkqlu

¹⁷ Zbz enjrl krarlimz puliole baol scde mzlllxlr. X natq Gct vzpxm mz tron kc Mangr-nzangiongr, etumi nate nzrpi-krde kx, "Kapupxpe!" ¹⁸ X mzli lc bzlrpc tqpcipx x bzlrmei tqyrputipx x nengq kxetu-esz'ngr aycngrrle nrlc atwrnrngr. Krlc nengq kx myatxppebz. Trgalr nengq kxetu kxmule lc abzo mzli kc tzwzng ncblo, krlzmle mzli ka.

¹⁹ A' Gct trmrbrtru mz drtwrde alwx ngr leplz ngr taon kc etu tqapule Bxbilon kc bqnc. X ayrplapx-zlwzle nidr mz nxzplkr zngya ngr drtwrde. Mz nzmu-krde lcde, taon kc etu glqwitpx ncte tq, x taon mz nrlc tulvzo nzodating amrlx. [◊] ²⁰ X mzli lcpwz trmctung x newzng amrlx nzmrbrlmqng mz nengq kc etu. ²¹ X muli-aes kx etuting kz rlxom mz bongavz nztabqlr leplz. Nzmrlepu-lxblrkr ncte kxesz' takitr kilo kx nzpnu-nzlvqn (50). A' leplz sc tzpibqti-zlwzlr Gct mz nzrlxo-krm muli-aes, murde nzayrplapx-krde trka-zlwzlbz badr. [◊]

17

Nzycmne-ebzpxngr Srlx Kc Drtwr Ngrde Taon Kc Etu Rom

¹ Mz nibrde, kzdq enjrl kcng rlimz tzrngiscng baol kcng rlimz, vzm bange x rpimle kx, "Navzki, murde na-aelwa-ngrbo bam nzayrplapxkr Gct taon kc etu tqapule Bxbilon kc bqnc. Taon lc tqyc mz mzli lue kxkqlu. X lr taon lcng nzprszpxlr Yawe Gct angidr mz nzangio-krdr kx trngiu Gct angidr. Nzapulr olvz kxyrlz kc tqprszpxle ncblo ngrde angidr mz nzrmwimi-abeane-krde ncblo kzbleng. [◊] ² X king amrlx mz nrlc nzaxvctr-lzbqbzng

^{◊ 16:10} Nzrlasngr 10:21-22 ^{◊ 16:12} Asaea 11:15-16; Josua 3:13-17 ^{◊ 16:14-16} 2 King 23:29; Sekaraea 12:11; Matiu 24:43-44 ^{◊ 16:19} Asaea 51:17 ^{◊ 16:21} Nzrlasngr 9:23 ^{◊ 17:1} Jeremaea 51:13

mz alwx ngr nzrprszpxngr Gct angidr. X leplz amrlx ngr nrlc nzpxtxpx-kzngrdr Gct. Opxm kx nzalukurnrngr nzrmnqng, mz nzaxvctr-lzbq-krbzlr kz badr king rdr.” ⁵

³ Zbz mz zmatq ngr Mqngrkxtr, enjrl lc sc tqvzmitrpele ninge lzke. Mcx mrlcde olvz kc tqngi srlx, krklc taon kc etu tqapule Bxbilon. Olvz lc wxbuom mz Mrlx Kc Tqdrka'ngr kc kai, tqpctx, x narde rlimz, x dxpa' krde nzpnu-esz'. X nrkrdrdqde nzyr-ngaleti drtq kx nzrnzlvzongr Gct. ⁴ X olvz lcde kq nzkq kxlqlwx x kala ngrde prpol x pc. X rlu kz da kx nwzngm mz gol, prl x rplz kxlqlwxng. X malele kc kap kx nwzngm mz gol, kx yrbulzm mz waen kxngangr x kxblqki kx vzpxm mz nzrtrngz-abeane-krde da kx myangr drtq mz nzangio-krde drka'. ⁵ ⁶ X mz rtrllrmzte kz nzyrtr elr drtq kx drtwr ngrde yc kapq, rpile kx,

XBILON KC ETU,
LXEDE SRLX AMRLX,
X NOU DA KXDRKA'NGR
X DA KXMYANGR DRTQ AMRLX MZ NRLC.

⁶ X mcx kx olvz lcde abrtz-zlwz-ngrde nzribqti-krde leplz kxnxtr neng Gct, kcng tznibqti-ngrdr murde nzrpipx-krdr Nrpa ngr Jiszs. Opxm kx olvz lc alukurnrngr nzrmnq-krde mepyr ngrdr. Kx mcx olvz lc pwrkilvctx-ngrne.

Drtwr Ngr Srlx Kc Tqngi Rom X Mrlx Kc Tqdrka'ngr Kc Kai

⁷ Zbz sc tqrpiem enjrl kc bange kx, “?Nike tqpwkilkvc-ngrn olvz lc? Olvz lc x Mrlx Kc Tqdrka'ngr tqvone-ngrde nzapulr nzycmne-ebzpxngr. X sa nayokaetipxbo bam drtwr ngrde. ⁸ Mrlx Kc Tqdrka'ngr tqmcq, lu mzli kc kai, a' trlupeu mzli ka, x mzli trnaboiu sa navzdzm mz gq kc trpnzng noude. X sa nao-zlide lrpzki kx vztr mz nzodatingr nide. Lr nrlc kcng drtqdr tryclzpuu mz Buk ngr Nzlung, yzuo pnz mzli kc Gct tqwz-ngrde nrlc, sa nakctipxlr Mrlx Kc Tqdrka'ngr tqlu mzli kc kai a' trlupeu mzli ka mz nzyzlu-kr-mople. Murde mz drtwrdr krklc ngi rkx kxmatq.” ⁹

⁹ X rpi-mop enjrl kc bange kx, “Drtwr na-aotr-angidrbzme mz da kcng napibo bam mz nzkriz-krmleng mzli kc naprtz-ngrdr. Mrlx Kc Tqdrka'ngr narde rlimz. Narde lcng drtwr ngrdr newz nzrlimzng, newz ngr taon kc etu mrkc tqmncngr srlx kc. ¹⁰ X nar kcng rlimz drtwr ngrdr kz king rlimz kx na-aclvelr taon nyzde lc etu. King lcng nzlvqn nzaclvepeng, x king kraesz'mz kc tqaclvele mzli ka. Zbz krarlimz sa na-aclve-kzle taon kc etu kalr. X mzli kc navz-ngrmle, namncti-txpwlzle mzli namrcbcnepwz. ¹¹ Kzdq king mz king lcng rlimz na-aclve mou. Sa nanginide king krartqmz. Krklc Mrlx Kc Tqdrka'ngr tqlu mzli kc kai, a' mzli ka trlupeu. X nao-zlide lrpzki kx vztr mz nzodatingr nide.

¹² “Dxpa' lcng nzpnu-esz', drtwr ngrdr king r mrkzbleng nzpnu-esz' kx trnzprtrkang mz nzaclvengr. A' king lcng sa narngiscng zmatq ngr nzaclve-krdr badr Mrlx Kc Tqdrka'ngr mzli kc navzm. X nzaclveti-txpwlzlr mzli trnaboiu na-apupwlzle nabz nepi kxesz'. ¹³ ¹⁴ X king lcng nzpnu-esz' drtwrdr sa naesz'ti x nakaobzlr nzxplr-krdr x zmatq ngrdr mz Mrly Kc Tqdrka'ngr. ¹⁴ X sa nartwzng vea badr Nei Sip x leplz nedeng. Leplz nede lcng tqkqleleng x tqmcpxleng x nzvz-nqblq-zvzlr nide. X Nei Sip lc sa na-aovxiol Mrly Kc Tqdrka'ngr x king kcng, murde nide Kxetu r kxnxzung amrlx, x King r king amrlx.”

⁵ **17:2** Asaea 23:17; Jeremaea 51:7 ⁶ **17:4** Jeremaea 51:7 ⁷ **17:8** Daniel 7:7; Sam 69:8; 2 Tesalonika 2:3 ⁸ **17:12** Daniel 7:24

¹⁵ Zbz rpi-mop enjrl kc bange kx, “Mcpeq lue kcng tzesotrpzng mrkc tqmncngr srlx kc. Lue lang drtwr ngrde leplz ngr natq x drtc' amrlx mz nrlc x zbo ngr leplz kxetu. ¹⁶ X king kcng nzpnu-esz' badr Mrlx Kc Tqdrka'ngr, sa natrkatni nivz lrdr taon kc etu tqapule srlx kc. Sa nakatpxxmlr mz taon lc da kxmrlzting kcng tqlqlwx amrlx, mz nzapu-karde kx na-aycblqtxdr srlx kc. X sa na-atrkatitx-zlwzlr nide mz nzapu-karde kx nzngqdr ncyr drtqde, x na-ayrkrpxlr nide mz nzangc-kdrle mz nyr. ¹⁷ Na-alelr da lc murde Gct kx ryrlqtrpz drtwr mz nabzdr. Murde navz-nqblqlr me pnz drtwrde, mz nzesztikr drtwr king kcng nzpnu-esz', mz nzkao-krbzlr zmatq ngr nzaclvengr scdr mz Mrlx Kc Tqdrka'ngr. Murde na-aclveng navz navz mzli kx tutrngr natq Gct amrlx nzatutrngr. ¹⁸ “X olvz kc drtwr ngrde taon kc etu tqapule Bxbilon kc bqnc, kc tqaclve-zpwxle king amrlx mz nrlc.”

18

Gct Odatile 'Bxbilon' Kc Tqngi Taon Kc Etu Rom

¹ Mz nibr da lcng, mc-moux kc enjrl kx vzom Heven. Enjrl lc rngisc zmatq kxetu x nrlc yzlr-atwrnrnegr mzzluli rde. ² X sc tqnemipele nzrpi-krde kx, “Bxbilon kc tqngi srlx kc etu, tzodati, eu nzodati. Taon kc etu mzli ka ngipe me nzmcn-ngrdr drka', drka' kzpetong, x da kxtrka amrlx mz nlvcneng mz bongavz kx nzapulr palc x kqba. ³ ³ X lr taon kc nzprszpxpelr Gct angidr x nzangiolar kx trngi Gct angidr. Nzapulr olvz kxyrlz kc tqprszpxle ncblo ngrde mz nzrmwimi-abeanne-krde ncblo kzbleng. Lepz amrlx badr king rdr nzavctr-lzbqbzng mz alwx ngrde, mz nzapu-kdr ncblo kcng tzrmnq-zlwzng. X ncblo kxnzataatrpgng trau mz nzamwa-krdr da mz nrlc, nidr bcnyr kxnzrngisc-zlwzng. Murde nzamwang da kx naesatpxngr drtwr leplz ngr taon lc, mz nzngini-krdr kxnzrkcmnz-zlwzng x kxnztrkibr-zlwzng.” ⁴

⁴ Zbz, xlr-moux natq Gct Heven, rpile kx, “Leplz nengeng, dwaszpeamu lr taon lcng, ma tqaxvctr-lzbq-kzpzmz mz alwx ngrdrng, x ma tqprtr-kzamu mz nzayrplapxngr nidr. ⁵ ⁵ Murde alwx ngrdrng kqlu-esz'ngr, x nqmq krdr trtxpnzngz nzmrbrtr-krde mz drtwrnge. ⁶ ⁶ Ayzlu-mopwzmu badr nikeng nzale-kaipzlr bamu. A' mz nzayzlu-krbzmuleng badr, nangi nqvi lxblr mz nikeng nzalepebzlr bamu. Nzaetqngz drtq kc tkabzlr bamu nangi nqvi kz nzxplkrde x kabzmu nzetqkr drtqdr. ⁷ ⁷ Leplz ngr taon kc, mz drtwrdr nzmyapx-esz'ngrng x trpnz-moungr kx apule nidr, x trpnzngz da kxtrka kx naprtzbz badr. Nzapulr srlx kc tqglqpx-lzbq mz nzrpi-krde kx, ‘Ninge Kwin mzli ka.’ A' nimu leplz nengeng, rtulrtr-ngrbzmu bade nzavzo-lzbq-krde. X srlx kc mz drtwrde abrtz zvz kz, mz nzrpi-krde kx, ‘Trnipc'u kxabzo kx yrni x drtwrde vz.’ A' kabzmu bade nzyrningr x nzvzkr drtwr.

⁸ Taon lc sa naodati mz nyr murde ninge Kxetu Gct kc tqrninr-esz'ngr sa na-ayrplapxx nide mz nzatrkatn-krnge nide mz zyagox, nzyrningr, x dzbi mz zbz kx esz'txu. ⁹

⁹ “King mz nrlc kcng tzprtrng badr mz alwx ngr nzprszpx-krdr Gct x alwx ngr nzrkcmnzngz x nztrkibrnegr, sa namclr zsikapu ngr nzngckr taon lc. X nayrni-ngrdr nzbz-krde, murde da kxmrlzting kcng tzkcmnz-zlwz-ngrdr sc tzodatieng. ¹⁰ Sa natubzng rrlu mz nzmwxlrti-krdr nzavctr-lxblr-krbzlr mz nzodatingr taon kc. X narpilr kx, ‘Rlr, rlr, nim taon kc etu tqapule

^{18:2} Asaea 13:21; 21:9; 34:11-15; Jeremaea 50:39; 51:8, 37 ^{18:3} Asaea 23:17; Jeremaea 51:7

^{18:4} Asaea 48:20; Jeremaea 50:8; 51:6, 9, 45 ^{18:5} Nou 18:20-21; Jeremaea 51:9 ^{18:6} Sam 137:8; Jeremaea 50:15, 29 ^{18:8} Asaea 47:7-9

Bxbilon kc bqnc, kc tqngi-bcnyrlr x matq. Nzodati-ningr nim apule bzlrpc kc tqpcpx.' ” [✳]

¹¹ Zbz rpi mou Gct kx, "X kxnxzamwang da sa nayrning x navzti drtwrdr nide, murde trpengr kx naxpebz da lcng tzamwatinr. [✳] ¹² Murde nzamwati-pnzng da kxkqlu lcde seleng: da kxnzlu nzwzngr mz gol, silvz, prl, x rplz kxlqlwxng, lrpz kxnzkqngr kxprki, kxprpol, kxpc x kx ngi silk. X nzamwati-kzng trprpa ngr nounc kx nzapulr nc bq, x da kx nzlz mz nounc kxlqlwx, bras, aian, rplz kxlq nzrpibz 'mabol' x mz nqngi elefant nzrpibz 'aevri.' ¹³ X nzamwati-kzng bqlr nounc kx bletipxng, x tolo kx mnrt mrlz zlwz, x da kx na-amrlzle dakxnzng kx nzapulr ba x riya. X nzamwati-kzng dakxnzng kx nzapulr wit x flawa ngrde, waen, tolo ngr nra nounc olivi, x kzu, sip, hcsi, x sariot ngr vea. X nzamwati-kzng leplz kxnzawz-nrbalqng.

¹⁴ "Eke Bxbilon! Da kxmrlz kcng tqsuti drtwrml yrkrpxpebz, x da kcng tqngi-bcnyrlr-ngrn x nzobq-ngrbz tqmrlzvxiting mrbritipeng. X trpengr nzngisc-krmleng. ¹⁵ Ncblo kcng tzaleng da tqangi-bcnyr-ngrdeng, sa natubzng rlsru mz zmwxlr, murde ma tzodati-kzng. Ncblo lcng sa nayrning x drtwrdr navz. ¹⁶ X narpilr kx, 'Rlr, rlr, nim taon kc etu, mzli kc kqq lrpz kxlqlwx x kxprpol x kxpctpx scmqng. X rluq kz da kx nzwzngr mz gol, prl, x rplz kxlqlwx. ¹⁷ A' da lcng tqmrlz scmqng amrlx nzodati-ningr apule bzlrpc kc tqpcpx.'

"Mzli lc, kapten, kxnzwzng mz lcsu, kxnzalivcmqng lcsu, x leplz kx nzmabzng prla amrlx, sa natutr-kzpinqng rlsru. ¹⁸⁻¹⁹ X mzli kc namc-ngrdr nzvzdzkr zsiakupu ngr nyr kc tqangcle taon kc, sa nanemilr mz nzyrni-krdr nzrpi-krdr kx, 'Esae! Trpnz-moungr taon mz nrlc ka kx narsakrlrng ncdr taon kc etu. Rlr, rlr, taon kc etu! Leplz amrlx kcng tzrngiscng lcsu angi-bcnyrlr-ngrng mz dztumqng. A' nim la tzodati-anipe mzli ka tqapule bzlrpc kc tqpcpx.' X sa nakilvztilr nardr drtc' mz nzvzkr drtwrdr. ²⁰ Mz nzmu-krde lcde, abrtzamu nimu lr Heven, nimu badr aposol, x profet, x leplz nengeng amrlx, murde odati-ngrne nide mz nikeng alebzleng bamu." [✳]

²¹ Mz nibr nzycmnekr Gct lc, kzdq enjrl kx xplr kalzmle kc rplz kxmrlepu, rtco-ngrde prla, x rpile kx, "Kxnamu nzodatingr taon lc etu delc, murde mzte nambrtx alo. ²² Trpengr natq gita, ncblei, x trpu, x trpengr nzngrngr kx naxlrtr-kz-mopwz elr. Trpengr ncblo kx namabzng elr. X trpengr kx narbing kai elr. ²³ Bxbilon trpengr lam kx nayzlrpx-ngrm bam, x trpengr ncblo x olvi kx nayrlpx-mop bam. Nzodatingr nim vzpxm mz ncblo nemqng, kxnzetung kcng tznginidr bcnyrning mz nrlc. Murde nzesabrti leplz ngr mrkcng kqlu mz nzmrzba-krdr dztumqng myaszpxle nzmrzti-krdr Gct, apule kx rwitiq nidr dabo nem. [✳] ²⁴ Eu Bxbilon, x nzodati-kzp murde ayrleq mepyr ngr profet x leplz kxnztrng ne Gct, badr mepyr ngr leplz neng Gct mrka mz nrlc kx nznibqting." X krle nzyrkrpxpekr nzayrplapx-rmnkr Gct kcng rlimz.

19

Lepz Ngr Heven Nzglqpxlr Gct

¹ Mz nibr nzodatingr Bxbilon, xlr x nzmalqkr zbo ngr leplz kxet Heven. Nzrpilr kx, "Awi Yawe! Naglqpxku Gct rgu kc tqngi nou nzrlapxngr, tqrngiscde zluli x zmatq. ² Murde drtwr kcng tqyrlqpeq rsakrlrng x tubq zvz. [✳] X ayrplapx-ngrde srlx kc nzrbatr-krbzle mz lr nrlc nzprszpx-krdr

^{✳ 18:10} Esikel 26:16-17 ^{✳ 18:11} Esikel 27:12-36; Asaea 23:14 ^{✳ 18:20} Lou Kcpwz 32:43; Jeremaea 51:48-64 ^{✳ 18:23} Asaea 24:8; Jeremaea 7:34; 16:10; 25:10 ^{✳ 19:2} Sam 19:9

Gct angidr, x sc *tqayzlubzle bade mz nzvz-nqblq-krde nibqti-krde kxnzawz nedeng.* ⋆ 3 Awi Yawe! Naglqpxku Gct! Mzli ka taon kc tqvz-nqblqle nqmq kr srlx lc sc tqngcpe, x *zsikapu rde nzvzdz-krde la, tqvzpe tqvzpe.*” ⋆ 4 Zbz kxnzaclveng kcng nzpnu-li-nrade-pwx (24) x kxnzung kcng pwx nzyrngzong, x nzangirol Gct kc tqwxbuom mz tron, nzrpilr kx, “Delape! Awi Yawe! Naglqpxku Gct!”

5 Zbz kzdq natq vzpxm mz tron, rpile kx, “Glqpxamu Gct rgu, nimu amrlx kcng tzwztrpzng bade x tzamrluelr nide, kxmule-esz’ nimu ncblo kxnzetung o ncblo txneng.” ⋆ 6 Zbz xlr-moux kc natq kx apule nzycmnekatokr zbo ngr leplz, x apu-kzle nzylrekr me talipx ngr lue, x apu-kzle nzypupxkr bzlrmei. Nzrpilr kx, “Awi Yawe! Naglqpxku Gct! Murde Kxetu Gct kc tqrninr, nide txpwz King r leplz amrlx. ⋆ 7 Drtwrgu naelalzm x nabrtz-zlwzku, x naglqlzku Gct. Murde krlzpebzle mzli r nzyrlzkr Nei Sip. X olvz kxmnc-kamelr kc nayrlztile oliqt-lzbqpe. ⋆ 8 Nzkapebz bade nzkq-ngrde kc lrpz kxlqlwx kxprki x aglqpz.” Olvz lc drtwr ngrde leplz kxnztrng ne Gct, x lrpz kxprki lc drtwr ngrde da kxtubq-esz’ngr kcng tzaleting.

9 Mrlz, rpi-mop enjrl kc bange kx, “Yro natq lcng. Sa namrlzbz mz leplz kcng tzaveating mz nzprtr-krdr mz nzyrlzkr Nei Sip. Zpwxtx! Krlcng natq Gct.” ⋆ 10 Zbz ninge kc tqrweopebo zpr mz enjrl lc, a’ rpimle bange kx, “Bzkq! Angio txpwz Gct! Murde wztr-kzpo bade Gct, apu-kzx nim x kztemqng kcng tzabrrtr-zvzbzlr drtwrdr mz Nrpa ngr Jiszs Kxnmcp. X nrpa lc tqngi nou da amrlx kcng tzpipxlr profet.”

Nzvz-krm Kraes

11 Zbz obq-rmwible-moux, x mcx nzobqkr naonrx ngr Heven, x mcx kzdq hcsi kxprki. X Kraes kc tqwxbuom elr nzrpibz ‘Kx brti drtwr’ x ‘Kx atutr zvz natqde.’ Drtwr kcng tqyrlqpeq x nzrtwz-krde vea rsakrlrngr x tubq zvz. ⋆ 12 Mzte apule nqngi nyr, x narde lao-ngrm kraon kxkqlu. X nzyrtrpz kc bade drtq, a’ nide txpwz kx rkrlz drtwr ngr drtq lc, x trpnz-moungr leplz kxrkrlz kz. ⋆ 13 Mz nzmu-krde lcde, drtqde nzrpibz Natq Gct. X nzkq kc tqkq-ngrde bxlvz zlwz mz mepyr. ⋆ 14 X ami ngr leplz ne Gct nzvo-nqblqlr mz hcsi kxprking, x nzkq-lxblrng nzkq kxlqlwx kxprki x pnapr. ⋆ 15 X ncblo kc tqrmailz lvcpxm mz naode kc toki r vea kxmalc kx naotangrde mz nzaovxio-krde lr drtqbrng amrlx. X *na-acuvele nidr mz zmatq kx xplr-esz’ngr na-apule bz kc tqrniglc botol.* ⋆ X na-apusr-ngrde nidr nra grep kcng tqrnzbrtile, mz zngya ngr drtwr Gct kc tqrninr. ⋆ 16 X nzyrtr mz nzkq scde mrkc tqyc-zbztr dcdrade, drtq lcde sele:

KING R KING AMRLX
X KXETU R KXNZETUNG AMRLX.

Vea Kxetu

17 Mz nibrde mc-moux kc enjrl, tu mrkc tqrpnakim nepi. X mz nate kxetu, sc tqkqlepele utc ngr wq amrlx, rpibzle kx, “Vzhamu x yrlwr-lxblramu mz nzmungr kxetu kc tqrtrngztibz Gct. ⋆ 18 Vzhamu x ngqnamu namz ngr leplz amrlx, kxmule-esz’ king, kxnzetung rdr ncblo ngr vea, ncblo ngr vea, kxnzawz-nrbalqng, kx drtqdr opx, kxnzetung, leplz txneng, x kxnzvoneng mz hcsi badr hcsi nedrng.”

19 Zbz mc-moux Mrlx Kc Tqdrka’ngr kc kai badr king kxkqlu ngr nrlc ka x ami nedrng, nzata-lxblrtipx-lzbq-ngrdr nzota-krdr badr Kraes kc

⋆ 19:2 Lou Kcpwz 32:43; 2 King 9:7; Sam 19:9; Asaea 34:10 ⋆ 19:3 Asaea 34:10 ⋆ 19:5 Sam 115:13 ⋆ 19:6 Esikel 1:24; Sam 93:1; 97:1; 99:1 ⋆ 19:9 Matiu 22:2-3; Luk 14:15-24 ⋆ 19:11 Esikel 1:1; Sam 2:9; 96:13; Asaea 11:4 ⋆ 19:12 Daniel 10:6 ⋆ 19:15 Sam 2:9 ⋆ 19:15 Asaea 63:3; Joel 3:13 ⋆ 19:17 Esikel 39:17-20

tqwxbuom mz hcsi lc, x ami nedeng. ²⁰ Zbz sc tzolvzpelr MrIx Kc Tqdrka'ngr tzadwatrng mz presin ncdr Profet Kxpokia, kc tqaletrpz rrx mz mz MrIx Kc Tqdrka'ngr. X mz rrx lcng, dekc tquesabrti-ngrde leplz kcng tztwzlr rrx ngr MrIx Kc Tqdrka'ngr, x nzangiolr mqngrde. MrIx Kc Tqdrka'ngr ncdr Profet kc Tqpokia, nzrtco-amrnangr mz Dxbu Nyr kx nzulrde rbq, x nge mz rplz salfz. ²¹ X ami nedrung nzniqbting mz toki r vea kc tqlvcpxm mz nao ncblo kc tqvone mz hcsi. X utc amrlx nzmuti-krdn nelzdr krlc angidr mz ncvrdr.

20

Yiz Siu-esz' (1,000)

¹ Mz nibr Kxnzmcpx nzaovxio-krde MrIx Kc Tqdrka'ngr, obq-rmwible-moux, x mcx kc enjrl kx vzom Heven, malele ki ngr gq kc trpnzngr noude x sen kxetu kxmrlepu. ² Enjrl lc aovxiole Mepwz kc etu, tzrpi-kzpz 'Nar Drka' x 'Setzn' kc tqngi kz ningidoe ngr nrlanc kc bqnc. X otibzle Mepwz lc, x bxtile sen kc, murde nayrbqtile yiz siu naesz' (1,000). ³ X rtco-ngrde mz gq kc trpnzngr noude. Apqbrobzle naonrx ngrde x amqngitxde, murde navz navz nakrlz-zpwxbzle yiz kcng siu-esz' x tquesabrti-moupele lr drtqbrng kc ate. X mz nzvz-nqblq-krde me pnz drtwr Gct, mzli lc drtqde sa na-aopxbz mzli kxipz.

⁴ Zbz obq-rmwible-moux, x mcx kcng tron kxkqlu Heven, x nzwxbuopemqng elr kxnzrlxngiting amrlx murde nzaprcbz badr zmatq ngr nzaclve-krdr badr Kxnzmcpx yiz siu-esz' (1,000). X mc-kzx mrlcde mqngr krkcng tzlakitipxbz nardr, x krkcng amrlx tznibqng mz nzrpipx-krdr Nrpa ngr Jiszs x natq Gct, x krkcng trnzangiolru MrIx Kc Tqdrka'ngr kc kai x mqngrde kxnzlx, x trnzyrtrpwzu rrx ngr MrIx Kc Tqdrka'ngr mz rtrlrmztr o mz mqdr. Krkcng tzrlxngiting amrlx nzlupe-moung mz nzaclve-krdr badr Mevalu Kxnzmcpx. ⁵ Leplz lcng tzlxngitilr Jiszs, nidr dalr ntulz-mou-ngrm kc kai. A' kxnzbzng amrlx kcng trnziqxngitilr Jiszs, sa na-atulz-kz-mop Gct nidr mz nzbz-krdr mz nibr yiz kcng siu-esz'. ⁶ Sa namrlzbz mz leplz kcng tqatulz-mopqng Gct mz nzbzng kc kai, murde nidr leplz neng Gct. X trnartco-ngru nidr mz Dxbu Nyr kc tqngi nzbzng kxrmnr-ngrm. X nidr kx nangi pris ne Gct ncdr Mevalu Kxnzmcpx, x na-aclvetilr badr Mevalu yiz siu-esz'.

Nzaovxiongr Setzn

⁷ Mz nibr yiz lcng siu-esz' (1,000), mzli kc tqatulz-mou-ngrm Gct kxnzbzng amrlx kcng trnziqxngitilr Jiszs, Setzn sc tzavzpxpem mz presin. ⁸ X sa naprpx mz nzesabrti-mou-krde leplz mrkcng amrlx mz nrlc tulvzo. X sa navzmi-lxblrmqng Setzn mz nzvecngr, x nzkqlu-krdr na-apule drta' ngr prla. Sa na-apulr ngirlvea kc drtqde Gog, badr lr Magog kcng tzrnzlvzo-zvzlr Gct. ⁹ Sa namnc-ngalelr mzteadau kc tqmrlzti Gct mrkc tzmnncngr leplz nedeng. A' nyr sa navzom Heven naodatile nidr. ¹⁰ Zbz Setzn kc tquesabrtile lr nrlc, sa nartcongr mz Dxbu Nyr kx nzulrde rbq x nge mz rplz salfz. ¹¹ Dxbu kc tzrtcope-kaingr MrIx Kc Tqdrka'ngr ncdr Profet kc Tqpokia. X sa na-aetq-zlwzbz drtqdr mz nrlckxngrlx x nrlckxbq, tqyc tqyc.

Nzrpipxngr Kxrmnr-ngrm Mz Krkcng Tztubqng X Krkcng Tzvz-rbrng

^{19:20} Nzaelwapxngr 9:17 ^{20:2} Nou 3:1 ^{20:4} Daniel 7:9, 22; 1 Korint 6:2-3 ^{20:8} Esikel 38:2, 18 ^{20:10} Nzaelwapxngr 9:17

¹¹ Zbz obq-rmwible-moux, x mcx Gct nzwxbuo-krm mz tron kxetu kxprki. X opxm kx drtc' ncdr bongavz nzdwaszlr nide, x trnzmc-pnzung. ¹²⁻¹³ X mc-kzx leplz amrlx kcng tzbzpeng, kxnzbzng prla x kxnzmncng mrnyz mqngr kxnzbzpeng, leplz kxnzetung x leplz txneng. Leplz amrlx lcng nztutrpzng mrkc tqlxlvrkipx tron. Zbz Buk ngr Nzlungr, mrkc tzyrongr drtq leplz kcng naprtrng mz nzlungr kxbui, nzkawpx. X kzdung kz buk nzkawpx kz, kx nzpipxlr da amrlx kcng tqrtrngzibz doa kxesz' mz nzmnc-krde. X Gct kc tqwxbuom mz tron sc tqayzlupe-ngrbzle da mz leplz mz nzvz-nqblq-krde buk lcng. ¹⁴ Trpengr kx rngisc zmatq ngr nznribqng x nzatwzlrngr leplz mz mrnyz kxnzbzpeng. Murde krkcng tzrngisng zmatq lcng, nzrtctiope-ngrng mz Dxbu Nyr krlc tqngi nzbzngr kxrmnr-ngrm. ¹⁵ X krkcng drtqdr trnzyrou mz Buk ngr Nzlungr, nzrtco-ngrng mz Dxbu Nyr. X leplz lcng mrlc nzlakipx-lzbqpeng badr Gct, tqyc tqyc.

21

Bongavz Kxmrna X Drtc' Kxmrna

¹ Zbz obq-rmiwble-moux, x mcx kc bongavz kxmrna x drtc' kxmrna, kx trpnzng rla ngrde. Bongavz kc kai ncdr drtc' nzmrbrpeng. ² X mcx mzteadau kxtr, Jerusalem kxmrna, prpxpem Heven mrkc tqmncngr Gct, x sc tqvzom. Mzteadau lc tqtr nzoliqti x mzte lqngi, apule olvz kx nayrlz kc tzaoliq mz nzyrlz-krdr ncdr ncblo ngrde. ³⁻⁴ X xlrk kc natq kxetu aepztr mz tron, rpile kx,

“Ma nyz Gct ycpebz mz krkcng
Nanginidr leplz nedeng.

Sa namncpeng badr.

X Gct esz'-krde sa nanginide Gct rdr.
Drlemztr amrlx sa naycpqpxbzle.

Trpengr kx drtwrde navz,

Kx nayrni, kx nabz,

Kx drtqde navetq.

Dalr mzli kc mrbrpe.” ⁵

⁵ Zbz sc tqrpipem Gct kc tqwxbuom mz tron bange kx, “Yro natq lcng, murde da angidr lcng x sa natutrng. Mzli ka atubqti x sa amrlx!

⁶ Eu, kapupxpe! Murde ninge nou da amrlx x kx ayrkrpx da amrlx, x ninge kz kx ryzutr da amrlx x kx nzamrbrrtx mou. Sa naka-nrbalqbo mz leplz kcng drtwrdr tzbrlxkzng, lue kx yrelzm mz vaulz ngr nzlungr kxmrna, murde nalu-moung. ⁷ Sa nakabo da lcng mz leplz kcng tzaovxiong mz nzvec-krdr badr zmatqng kxtrka. X sa nanginibo Gct rdr, x sa nanginidr doa nengeng. ⁸ A' krkcng tzmwxlrlir nzbz-krdr mz nzvz-nqblq-krdr

Jiszs, nzesablqtilr nide, x nzprszpxlr nide mz nzangio-krdr gct kx trngiu Gct angidr, nznribqng, nzrmwimng doa kx trngiu kernalzdr, nzrningeting dabo, nzangiong mqngr drka' kxnzlx, x nzpokiang. Leplz lcng sa nartco-ngrng mz Dxbu Nyr kc tqngc mz rplz salfz. ⁹ Krlc nzbzngr kxrmnrnegr, x leplz lcng nzlakipx-lzbqmqng bange, tqyc tqyc.”

Jerusalem Kxmrna

⁹ Enjrl kcng rlimz mzli kc nzkabz badr nzayrplapxngr kx nzrmnr-ngrmqng rlimz. Zbz kzdq nidr vzm bange rpimle kx, “Vzm, murde na-aelwa-ngrbo

⁵ 20:11 Daniel 7:9-10 ⁶ 21:1 Asaea 65:17; 66:22; 2 Pita 3:13 ⁷ 21:2 Asaea 52:1; 61:10 ⁸ 21:3-4 Esikel 37:27; Liva 26:11-12; Asaea 25:8; 35:10; 65:19 ⁹ 21:6 Asaea 55:1; Jon 4:10 ¹⁰ 21:7 2 Samwel 7:14; Sam 89:26-27 ¹¹ 21:8 Nzaelwapxngr 9:17

bam Olvz r Nei Sip kc tqyrlz ate.” ¹⁰ X enjrl kc sc tqvzmilzpele ninge, mz zmatq ngr Mqngrkxtr, mz kzdq newz kxetu x vzdz wq. Sc tzaelwapxngrmle bange Jerusalem, mzteadau kxtr kc tqvzpxm mz Gct Heven. ^{*} ¹¹ X zluli r Gct aglqpz'ngr Mzteadau lc apule rplz daemon kc tqlqlwx-esz'ngr x nzopx-krde apule dzpq. ¹² X ngrlelvz drkq kx xplr x vzdz wq. X naonrx ngrde nzpnu-esz'-nrade-li (12), naonrx kcng taplxsr enjrl kxnzaclveng x nzataplxsr nzryrtrngr drtq neidu lr leplz ne Israel kcng nzpnu-esz'-nrade-li (12). ¹³ Naonrx tq lxbler mz nrlar Mzteadau kxesz'. ^{*} ¹⁴ X nwzngn drkq lcdeng mz nou rplz nzpnu-esz'-nrade-li (12), x nzataplxsrnegr nzryrtrngr drtq aposol neng Nei Sip.

¹⁵ Enjrl kc tqycmnem bange malele kcneni kx ngi gol kx nzanengr Mzteadau, naonrx ngrdeng, x drkq ngrde. ^{*} ¹⁶ Mzteadau trpnzngr nrlarde kxboi, a' kx namu-txpwlzr esz'. Enjrl kc anele mzteadau mzneni kc tqmalele, x krlzbzle stadia siu-nzpnu-esz'-nrade-li (12,000), (kc tqngi kilomita siu-li-trtqki-pwx (2,400)). Nzboi-krde, nzetupx-krde x me krlzlbz drkq ngrde, kxnamu-txpwlzr esz'. ¹⁷ Enjrl kc ane-kzle nzvekr drkq ngr Mzteadau, x krlzbzle kubit trtqki-esz'-nzpnu-pwx-nrade-pwx (144), (kc tqngi mita nzpnu-esz'mz-nrade-esz'mz (66)), vzpxm mz noabx kc tqanengrde, kc tqngi noabx sc leplz. *

¹⁸ Drkq ngrde nwzw esz'ngr mz rplz kxprki, x Mzteadau esz'-krde nwzw esz'ngr mz gol kxlq, x nzpnapr-krde apule dzpq. ^{*}

¹⁹ Nou rplz kcng mz drkq ngr Mzteadau nzmrlngr murde nwzngn mz rplz kxlqlwx. Nou drkq kc kai rplz kxprki, krali rplz kxblutpx apule nzopxkr bongavz mz nrlc kxngrlx, kratq rplz kxbx, krapwx rplz kxmqbq. ²⁰ X kranzlvqn rplz kxbotapz', kraesz'mz rplz kxpc, kralimz rplz kxplctpx, krartqmz rplz kxblu apule nzblukr bongavz, krarpwmxmz rplz kxyzlo, kranzpnru rplz kxplc, kranzpnru-esz'-nrade-esz' rplz kxbla, x kranzpnru-esz'-nrade-li rplz kxprpol. ²¹ X naonrx kcng nzpnu-esz'-nrade-li nwzngn mz prl kxlqlwx amrlx. Naonrx esz' kc tzwngr mz prl kxetu kx aglqpz' apule nelc, x lrpzki kxetu kc tqvz vau r Mzteadau nwzngn mz gol, x nzlq-krde apule nzopxkr dzpq.

²² A' trpnzngr Mangr-nzangiongr kx mcx Mzteadau mrkc tqmnc-ngrbz Gct badr leplz nedeng. Murde Kxetu Gct kc tqrnir ncdr Nei Sip nztekqtrlr Mangr-nzangiongr mz nzangiongr nidr mz nrlc amrlx Mzteadau. ²³ X Mzteadau lc tryzlr-ngru mz zyzlr ngr nepi o temz, murde zluli r Gct ncdr Nei Sip, dela na-angrlxpele nide. ^{*} ²⁴ X leplz kxntubqng mrkcng amrlx mz nrlc, sa navzneng mz zyzlr ngrde, mz nzvz-nqblq-krde me pnz drtwr Gct. X king amrlx mz nrlc kcng tztubqng kz sa naprtrpzng mz Mzteadau, mz nzrlqlqz-krdr Gct ncdr Nei Sip.

²⁵ Mzli kc bqnc, naonrx ngr taon nzbq mz nrlckxbq. A' mz Mzteadau kxmrna, naonrx ngrdeng trtxpengr nzrbqpx-ngrng, murde trpnzngr nrlckxbq mrlcde. ²⁶ X leplz lcng tztubqng sa naprtrpzng mz Mzteadau. X sa natwzlr dztudrng kxmrlnvxing kxlqlwxng. ²⁷ A' trtxpnzngr da kx trtakitrdeu mz nzobqkr Gct kx naprtrpzng mz Mzteadau, x trpnzngr leplz kx nzrtrngz-abeaneng da kx myangr drtq, x kxnpokiang. A' nangi txpwz krkcng drtqdr tzyrope mz Buk ngr Nzlungr sc Nei Sip, nidr lang kx naprtrng elr. ^{*}

* ^{21:10} Esikel 40:2 * ^{21:13} Esikel 48:3-35 * ^{21:15} Esikel 40:3 * ^{21:17} Mz ngalrde lcng, opxm kx nabz 12,000 x 144 nzycmne-ebzpx-ngrdr nabz 12. Murde nabz 12 vzm mz mzlr rlilrdr. 12 X 1,000 = 12,000. 12 X 12 = 144. Mz Nzryrngrkxtr, nabz 12 nzrpibz nabz ngr nzayrkpxngr da.
* ^{21:18} Asaea 54:11-12 * ^{21:23} Asaea 60:3, 11, 19-20 * ^{21:27} Asaea 52:1; Esikel 44:9

22

Da Kxmrlzting Ngr Jerusalem Kxmrna

¹ Mz nibr nzmc-krnge Jerusalem kxmrna, aelwapx-kz-ngrm enjrl kc bange Lue ngr Nzlungr yrlelzm mz tron nyz Gct ncdr Nei Sip, x nzopx-krde apule dzpq. ² Yrlekiole vau r lrpzki kc tqavau Mzteadau, x nrlarde rlilrdr tungr Nounc ngr Nzlungr. X nzpa-krdr nzwrde nzpnu-esz'-nrade-li (12) mz yiz kxesz', nzwrde esz' mz temz kxesz'. X leu rdrng ngi dalr nzrkatxngr zyagox ngr nrkrdrdtq leplz kxnztubqng ngr mztea amrlx. ³ A' trpengr nzayrplapxngr kc tqyrlq pnz Gct, tqakipxle nide x leplz. A' Gct ncdr Nei Sip nawxbuomqng mz tron nyzdr Mzteadau. X kxnzawz nedrng amrlx na-angiolr nidl elr. ⁴ Mzli kc trpnzngr doa kx mcle Gct. A' mzli lcpe krkcngr tzyrtrpz drtq Gct mz rtrlrmztr, sc tzmcctr-atepebzlr mzte, x sc tzkriz-angidrpe-kzlr nide. ⁵ Trpnzngr nrlckxbq mrlcde, x trnzsuti drtwrdr zyzlr ngr nepi o lam, murde Kxetu Gct sa nayzlrpx-ngrbz badr. X leplz lcng sa nanginipe-kzdr king x nzaclve-krdr tqvzpe tqvzpe. X da kx mc-rmnrr-ngrbo nide lape. ⁶

Natq Enjrl X Natq Jiszs

⁶ Zbz rpi-mop enjrl kc bange kx, "Natq lcng da angidr x takitrde nzabrkitr drtwr. X Kxetu rgu, Gct kc tqakabzle Mqngrde mz profet kcng bqnc, atwzlr-ngrmle ninge nzaelwapx-krbo mz kxnzawz nedeng amrlx da lcng tqycpe pipz nzprtz-krdr."

⁷ Rpim Jiszs bagu kx,

"Lalztq-angidramu, murde mzli trnaboiu x ninge kc tqyzlupe-mopwc'. X sa namrlzbz mz doa kcng tzyrlq-angidrlr natq kcng tqkapx Gct mz Buk lc, murde sa nakrlz-angidrlr da lcng amrlx mzli kc tqycpe pipz nzprtz-krdr."

⁸ Ninge Jon. Xlrx x mcx da lcng amrlx tqaelwa-ngrm enjrl kc bange. X kx yrkrpxbz kc nxzlr-krnge x nzrmc-krnge da lcng, ninge kc tqrweopebo zpr bade mz nzangio-krngele. ⁹ A' rpi-mople bange kx, "Bzkq! Angio txpwz Gct! Murde wztr-kzpo mz Gct, da kc tqwaiamu badr profet x leplz amrlx kcng tzyrlq-angidrlr natq kcng tqyclzm mz Buk lc. ¹⁰ Bzkq yrlq-kapqq natq kcng tqpipx Gct mz Buk lc, murde ycpe pipz nzkaputr-krmqng. ¹¹ Mz nzmu-krde lcde, mzli r leplz nztekqtr-krdr nqmq krdrng sc tqykrpxpe. X mzli ka, kxnzvz-rbrng sa navz zvz mz nzvz-rbr-krdr, x kxdrka'-ngrng sa navz zvz nzale-krdr da kxdrka'ngr. A' kxnztrng sa navz zvz mz nztr-krdr, x kxnztubqng sa navz zvz nzale-krdr da kxtubq." ¹²

¹² Rpi-mop Jiszs kx,

"Ninge Jiszs. Lalztq-angidrmamu, murde mzli trnzbói-krdeu x ninge kc tqyzlupe-mopwc'. X sa natwzmc da kx nayrlq-ngrbo mq leplz amrlx, navz-nqblqlle nzwz-krdrng, kxmule-esz' kxmrlz o kxtrka." ¹³ Ninge nou da amrlx x kx ayrkrpx da amrlx. X ninge kxrtwayz x kxrmnr-ngrbz. X ninge kz kx ryzutr da amrlx x kx amrbrtx mou." ¹⁴

¹⁴ Ninge Jon. Namrlzbz mz doa kcng lrpzdr tqprki mz nztapzo-krdrlleng mz mepyr ngr Jiszs, murde takitrde nidl nzprtr-krdr mz naonrx ngr Mzteadau x nzmu-krdr nra Nounc ngr Nzlungr. ¹⁵ A' kzdung kz leplz kcng tzvz-nqblqlr nzmnccnegr kxtrka, trtxpnzngr nzvztr-krdr Mzteadau. Leplz kxnzmull seng: kxnzryzplengz-ngrng, kxnzrmwiming doa kx trngiu

^{*} **22:1** Esikel 47:1; Sekaraea 14:8 ^{22:2} Esikel 47:12; Nou 2:9 ^{22:3} Sekaraea 14:11 ^{22:4} Nzrlaszngr 33:20; 1 Timoti 6:16; Matiu 5:8; 1 Jon 3:2 ^{22:5} Asaea 60:19; Daniel 7:18 ^{22:11} Daniel 12:10 ^{22:12} Asaea 40:10; 62:11; Sam 28:4; Jeremaea 17:10 ^{22:13} Asaea 44:6; 48:12 ^{22:14} Nou 2:9; 3:22

krnalzdr, kxnzrnibqng, kxnzangiolr mqngr drka' kxnzlz, x kxnzmrlzbz badr nzpokia-zvzngr.

¹⁶ “Ninge Jiszs. Ninge lc tqatzlrl-ngrbo enjrl nenge bamu mz nzpipx-krbzle da lcng bamu, nimu kxnzrlxngiting mz makxtr kcng rlimz. Vzpx-angidrmc mz nqvi lr melrmqng King Devet. X apux Paglxnrlc, mz nzaelwapx-krnge Zbq Kxmrna ngr Gct.” ☀

¹⁷ Mqngrkxtr ncdr Olvz R Nei Sip nzrpibzlr bade kx, “Vzm!” X nekeng amrlx nxzrlrl natqde narpi-kzlr kx, “Vzm, kx Kxetu Jiszs!” Neke drtwrde brlxkz navzm, murde narmnq Lue ngr Nzlungr kx nzrka-nrbalq. ☀

Aclvetioamu!

¹⁸ Ninge Jon. Aclvetioamu nimu kcng txxlrlr natq Gct kcng tqkapxle tqyclzm mz buk lc, murde namwxrltiamu. Murde doa kx ryrlqtr-mopwz kzdung natq kxnzpokiangr mz natq kcng tqyclzjem mz buk lc, sa na-ayrplapx Gct mz nzayrplapxngr kxtrka kcng tqppixpele mz buk lc. ☀ ¹⁹ X doa kx katpxle kzdung natq mz natq lcng tqkapx Gct tqyclzm mz buk lc, trpnzngr nzmnccpx-krmle Mzteadau kxtr, x trpnzngr nzmu-krde nra Nounc ngr Nzlungr, mz nzkatpxkr Gct da kxmrlzting kcng tqycmnetrngr buk lc.

Vzm Kxetu Jiszs

²⁰ Jiszs kc tqycmnetr-ngrde da lcng amrlx rpile kx, “Da zpwxtx! Mzli trnzboi-krdeu x ninge kc tqyzlupe-mopwc.” X kxnzrlxngiting amrlx nzrpibzlr bade kx, “Eu, angida! Vz-anim, kx Kxetu Jiszs!”

²¹ X ninge Jon krka'-ngrne kx Kxetu Jiszs naokatrle leplz kxnztrng nedeng amrlx mz zmrlz ngrde kxmyalz. Eu, angida!

✡ **22:16** Asaea 11:1, 10; Luk 1:78; 2 Pita 1:19; 1 Jon 3:2 ✡ **22:17** Asaea 55:1 ✡ **22:18** Lou Kcpwz 4:2; 12:32

Letz Ngr Natqgu

Natqgu Alfabet — 26 Letz (da kc tqwaibz mz Inglis)

a b c d e f g h i j k l m n (ng) o p q r s t u v w x y z

18 Kansznznt:

b d f g h j k l m n (ng) p (r) s t v w y

2 Letz kcng tzyrong mz natq lr mr kzbleng (Inglis, Kwara'ae, x kzdu kz natq moung):

f	Frank, Jeosafzt (Jehoshaphat)
h	hama (hammer), hane (honey)

1 kansznznt kc tzyro mz letz li: ng

Letz r:

“r” tqngi vaol mz Natqgu —rpi— Jiszs rpibzle kx nayzlu-mop.

“r” tqngi kansznznt mz natq lr mrkzbleng —Jerusalem— Sc tzvzpeng Jerusalem.

10 Vaol:

a e i o u (kxmu-kzpwzle mz Pijin)
c q r x z

Natq mz nzadcpxngr mz drtwr vaol lcng:

a	kalva (betelnut)	c	ncdc (carrying stick)
e	neke (who)	q	nqmq (way, custom)
i	nigi (iumi tufala)	r	mrbr (lost)
o	itoto (baby)	x	kxrkx (that which is spicy)
u	tumu (kind of fish)	z	zvz (always)

Vaol ngr nctq: Yrobz maki kxmule lc ' mz nibr kzdq vaol, nzmu trpnzngr letz m, n, o ng mz ncte natq lc tqycngr vaol lc. Krlc aelwapx-ngrde kx natq zycmne lc vzpxm mz nctq, da kc tqwai mz esz'.

Nzalvztr-ngrng Kxmyapxbz

1 aleluya— (*allelujah*)

Natq lc tqngi ‘aleluya’ drtwr ngrde ‘Naglqlzku Yawe.’ Murde mz natq Hibru, ‘hallel’ drtwr ngrde ‘glqpx,’ x ‘ya’ amrbc-ngrde mz nzrpingr ‘Yawe.’ Mz Inglis ‘allelujah’ x ‘alleluia’ nznginidr natq kcpwz. Kzdung mzli rpi-kzku kx, ‘Awi Yawe’ mz nzrtekqtrngr natq lc, myapxbz mz kzdung nabz kxtr.

2 angida— (*amen*)

Natq lc ‘angida’ vzm mz ‘amen’, mz natq lr Hibru kx nzycmne-ngrdr lr Israel. Mzli kang kqlu rpiku kx, ‘eu’ mrkc tqyrkrkipx nzkrka’ngr. A’ mz nzrtekqtrngr mz Natqgu, nzryrngr kx ‘angida.’ Murde natq lc drtwr ngrde kx, ‘Eu, drtwrnge esz’ti mz nzkrka’ngr lc, x lxngitix kx Gct sa naayzlumle, murde esalzpe-ngrmle kx sa na-angidale natqde x lxngitix nike rlxtipekr vz-nqblq-angidrlle me pnz drtwrde.’ Ngi natq ngr nzaolvzngr, nzrlxngitingr x nzrlxngitingr

3 aovxio— (*conquer, overcome, defeat, win over*)

Natq lc tqngi ‘aovxio’ drtwr ngrde kx vecku badr enqmi rgung x nzmetxmqng bagu. Mz nibrde enqmi lcng nzmnclzmqng bagu. Lr Rom nzotang badr lr Jiu x lr Rom nzaovxiong. Zbz gzpman ngr Rom atwzlr-ngrde ncblo ngr gzpman ngrdr x ncblo ngr vea nedrng mz nzwzkrdr Israel. X nzrtulrtr-ngrdr lr Jiu mz nzvz-nqblq-krdr Lou scdrng x nxzpebzng takes badr.

Jiszs aovxirole Setzn badr drka’ nedeng, x zmatq ngr nzbzngr x zmatq ngr alwx, mz nzbzo-krmle mz kros x nztulz-mou-krmle mz nzbzngr. Drka’ x zmatq lcng sa tzmnccbeng, a’ nzmnclzbzng mz Jiszs. Mz mzli kc navzm, Jiszs sa naodati-atwrnr-ngrde zmatq ngr nzbzngr x alwx. Mzli lcde, trpengr alwx x nzbzngr mz nrlc. X Setzn badr drka’ nedeng sa namncng mz Hxl.

Krlzku nzaovxiongr nepunr drtwrgu kxtrka mz nzokatrkr Mqngrkxtr. Mzli kx aovxio-ngrgu mz zmatq ngrde, nepunr drtwrgu lcng tqtrka sa tzycng, a’ nzmnclzbzng mz zmatq ngrgu x mz zmatq ngr Mqngrkxtr. Nepunr drtwrgu lcng trnzrtulrtr-ngrdru nigu nzalengr alwx. A’ mz zmatq ngr Mqngrkxtr krlzku nzvz-nqblq-alzu-krgu me pnz drtwr Gct.

4 bqblr nc ninz— (*incense*)

Lr Israel nzangclr bqblr nc ninz mz Tentkxtr x mz Mangr-nzangiongr. Trvzpx-angidrpqu ye mz nc ninz, a’ nzalepxm mz bqblr nounc kzbleng. Mzli kc tzangc-ngrde, mnrtre mrlzvxi. Frankinsens, ngi kz bqblr nounc. Ncblo kx nzkrlz-angidrlr drtwr ngr vri nzkabzlr frankinsens mz itoto Jiszs. Mc natq kxtopwz mz Matiu 2:11. Nzycmnetr-kz-ngrdr bqblr nc ninz mz Nzrlaszngr 30:1-9, 34-37, 37:25-29, Livae 2:1-2, 14-16, 6:14-16, 16:11-14, 24:1-9, Sam 141:2, Nzyrplapxngr 25:9, Asaea 1:13, Malakai 1:11, x Luk 1:8-10. Gct ngyati drtwrde leplz nedeng mzli kx nzangc-ngrbzlr bqblr nc ninz kx ngi blz mz gct kxpokia. Nzaelwapxngr 5:8 x 8:3-4 alvztr-ngrde kx nzvzdzkr zsi kapu ngr bqblr nc ninz drtwr ngrde nzkrka’kr leplz neng Gct mz nzvzdz-krdr Heven.

5 da angidr ngr nzrpetingr x nzrkqngr— (*principle of sowing and reaping*)

Mz Nzryrngrkxtr nzrpetingr ngi kzdq nzycmne-ebzpxngr mz nike aleku mz nzlu-krgu. Nzale-krgu da kxmrlz apule nzrpeti-krgu rtq da kxmrlz. X nzrtwz-krgu da kxmrlz kx kam Gct bagu apule nzrkq-krgu

dakxnxnng kxmrlz mz da lcng tqpetipeku. Nzmu napetiku koni, e nakqku koni, trngiu raes. Krlc opx angidr. Mz nqmq lcpwz, nzmu kx tqaleku da kxmrlz, e sa natwz-kzku da kxmrlz kx vzpxm mz Gct. A' nzmu kx tqaleku da kxtrka, e sa natwzku nzayrplapxngr kx vz-kzp bade. Doa kxkqlu mz drtwrdr nzrpilr kx nzkrzlzr nzesabrti-krdr Gct x rblx nzmcgr Gct da kxtrkating kx nzalelr. A' Nzryrngrkxtr pile kx rblx nzesabrti-krgu Gct. Sa nakamle da kxmrlz o nzayrplapxngr navz-nqblqle nike aleku. [2 Samwel 22:21; Sam 18:20; Nzryrplapxngr 13:21; 22:4; Jeremaea 31:16; Hosia 10:12; Matiu 10:40-42; 16:27; Mak 9:41; Rom 2:5-10, 16; 1 Korint 3:8-15; 2 Korint 5:10; Galesia 6:7-8; Efiszs 6:8; Kolosia 3:23-25; Hibru 4:12; 11:6; Nzaelwapxngr 2:23; 20:12; 22:12]

Da angidr ngr nzrpetingr x nzrkqngr lc pi-kzle kx nzmu napetiku da kxipznepwz, e nakqku da kxipz kz. A' nzmu kx tqpetiku da kxkqlu, e nakq-kzku da kxkqlu kz. Mz nqmq lcpwz, nzmu na-aleku da kxmrlz kxkqlu, e sa natwzku da kxmrlz kxkqlu kz mrkc Heven. A' nzmu kx tqaleku da kxmrlz kxipz, e da kxmrlz scgu napipz kz mrkc Heven. Nzmu namrlztiku leplz o nzplanatiku nidr, x nzmu naka-nrbalqku da o napxtpx-ngrgu nzokatrngr leplz, Gct sa na-ayzlumle da bagu mz nzvz-nqblq-krde nqmq krgu. [Matiu 7:2; Mak 4:24; Luk 6:37-38; 2 Korint 9:6-8]

6 da kxnxprtrng mz nznginingr doa kxesz'—(parts of a person)

6.1 ?Da li o da tq kxnxprtrng mz nznginingr doa kxesz'?—(Are people body and soul or body soul and spirit?)

6.2 nrkrdrdq—(body)

6.3 nznginikr doa nide esz'-krde—(soul)

6.3.1 nabz—(heart)

6.3.2 drtwr—(mind)

6.3.3 me pnz drtwr—(will)

6.3.4 nzwikr nelz—(emotions)

6.4 mqngr—(spirit)

6.1 ?Da li o da tq kxnxprtrng mz nznginingr doa kxesz'?—(Are people body and soul or body soul and spirit?)

Kristin nzkrzlz-krdr li blepxngr mz kx ngi da li o da tq kxnxprtrng mz nznginingr doa kxesz'. Kzdung leplz nzlxngitilr kx da li nzprtrng mz nznginingr doa kxesz': nrkrdrdqde x nabzde. A' leplz kxnxkqlung nzrpilr kx da lcng tq nzprtrng mz nznginingr doa kxesz': nrkrdrdqde, nabzde, x mqngrde. Krlc nzalvztrngr kc tqvz-nqblqku mz buk kc. A' nadcpx mz drtwrgu kx Nzryrngrkxtr trnzaopx-angidrlru mz nzalvztrngr lc. Murde mz natq kxesz' drtwr ngrde yctr zvz mz drtwr ngr natq kztedeng kcng tzyc-aepztrpzng bade.

Kzdung ngalr nzycmnetr-ngrdr mqngr doa kx blepx-ngrbz mz nabzde. A' kzdung leplz nzpnzkr drtwrdle kx 'mqngr' lc drtwr ngrde apu-txpwzle 'drtrw' o 'nabz.' [Job 32:8, 18; Sam 31:5; 32:2; Esikel 11:19; Matiu 26:41; Mak 2:8; 14:38; Rom 8:16; 1 Korint 5:5; 6:17; 7:34; 14:2; 14-15; Hibru 4:12] Kxmule-esz' a' 1 Tesalonika 5:23 ycmnetr-ngrde krlcng tq amrlx: nrkrdrdq, nabz, x mqngr. X Hibru 4:12 pile kx mz nzxlr-krgu natq Gct luplxtrle nabzgu, vz-krlzbzle mqngrgu.

6.2 nrkrdrdq—(body)

Opx nike tqngi nrkrdrdqgu. Nrkrdrdqgu nzyangrngang, zyagox krlzlr nzrkrzlz-ngrbz nidr, x nzbzng. Mzli kc nrkrdrdqgu tzlu-ngrdr, nzbatrpzlr bagu nzale-krgu da mz nrlc ka x nzycmne-krbzku mz leplz. A' mz nzbzkr nrkrdrdqgu, rblxm bagu nzale-krgu da x nzycmne-krbzku mz leplz.

Dalr nrkrdrtqgu nzatalz-ngrdr nigu mz alwx. Nrkrdrtqung suti drtwrdr da kx mrlzbz bade, a' kzdung da lcng trnzokatrlu nigu. Nzryrngrkxtr alvztr-ngrde nigu kx bzkq vz-nqblqku nzrtamitikr nrkrdrtqgu. [Matiu 5:29-30; Rom 6:6-7, 12-14, 19; 7:23] Nrkrdrtqgu sc Gct, trngiscgu, murde bz mz nxzpepx-krde nigu mz zmatq ngr alwx. Na-amrlue-zvzku Gct mz nrkrdrtqgu. [1 Korint 6:15; 19-20]

Mzli kc Jiszs nayzlu-ngrmle, sa natwzku nrkrdrtq kxmrna na-apule nrkrdrtqde. Nrkrdrtq lc tqmrna trpnzngr nzsakr drtqde, trpnzngr nzyagox-krde, x trpnzngr nzbz-krde. X sa nakrlzlr nzalengr da kxkqlu kx trkrlzkuu nzalengr mz nrkrdrtqgu mz nrlc ka. [1 Korint 15:35-54; Filipae 3:20-21] Mz nztwz-krgu nrkrdrtq kxmrna, doa amrlx naglxlr neke tqnginigu, da kc tqwaipwz Pita, Jemes x Jon nzglx-krdr Mosis x Elaeja, kxmule-esz' trnzmc-pnzlru nidr mzli kc. [Matiu 17:3-4; Mak 6:4-5; Luk 9:30-33]

6.3 **nznginikr doa nide esz'-krde**— (soul)

Natq lr Inglis ‘soul’ ngi dalr doa kx trngiu nrkrdrtqde. Drtwr ngrde da kxtrnzmcung amrlx kx nzprtrpzng mz doa nzngini-krde nide esz'-krde. Krlcde seng: nabzde, drtwrde, me pnz drtwrde, nzryrlq-krde drtwr, nzwikr nelzde, nqmq krde, nzdcpxkr drtwrde da, x da kxnzmullr lcng. ‘Soul’ lc sc tqlu zvz mzli kc nrkrdrtqde nabz-ngrde. Mz nztekqtrngr ‘soul’ mz Natqgu rpiku ‘nabz’ o mz ngalr mrkc ‘nabz’ tqycpe, mz nztekqtrngr ‘soul,’ nzrpingr ‘nzwikr nelz,’ o kzdq kz natq mou. [Matiu 22:37]

6.3.1 **nabz**— (heart)

Natq lr Inglis ‘heart’ drtwr ngrde li mz Nzryrngrkxtr. Mz Nzryrngrkxtr Kc Kai, lr Israel nzrpilr kx nzaokr drtwr doa yc mz nabzde. Mz Nzryrngrkxtr Kc Ate x mz Inglis ‘heart’ ngi mrkc tzycngr nzwikr nelz doa, nzabrtlvz-krde da, nzvzkr drtwrde, x nzngyakr drtwrde. ‘Nabz’ prtr zvz mz nznginikr doa nide esz'-krde. Mz nztekqtrngr ‘heart’ mz Natqgu, rpi-zvzku ‘nabz.’

6.3.2 **drtwr**— (mind)

Natq lr Inglis ‘mind’ nztekqtrngr mz ‘drtwr.’ X drtwr ngrde dalr doa mrkc tqaongr drtwrde, a' blepx mz tomna ngr narde. Tomna ngi dalr nrkrdrtqde, x krlzle nzbzngr. A' ‘drtwr’ prtr zvz mz nznginikr doa nide esz'-krde, kxmule-esz' nrkrdrtqde lc nabz.

Nzaokr drtwr kxnzrlxngiting tubq. [Rom 7:25; 1 Korint 2:16] Murde mzli kx aoti ngr drtwrgu da kx vz-rbr, nzaongr drtwr lcng trnzvzpxpqung mz drtwrgu. A' nzvzpxmqng mz drka' kcng tzrpilr nzaongr drtwr mz drtwrgu, o mz nzrvz-nqblq-krgu nqmq ngr alwx kcng mzli kc. Nzaokr drtwr kcng nzatalz-ngrdr nigu nzale-krgu da kx rpwa'-ngrm Gct bagu, trnzvzpxpqung mz Gct. Mz mzli r nzaongr drtwr lcng tqtrka, narlxtibzku mz Jiszs nzokatr-krde nigu murde nzao-krgu drtwrgu natubq. Mqngrkxtr krlz-kzle nzrpi-ngrbz nzaongr drtwr kxtubq mz drtwrgu. Nalalztq-angidrku mz nzkrlz-krgu nzaongr drtwr lang kx nzvzpxmqng bade. Rngisc-kzgu nzaongr drtwr esz'-krgu.

6.3.3 **me pnz drtwr**— (will)

Mzli kc tr-rlxngitika-ngrgu, rblxm bagu nzale-krgu da kxtubq mz nzobqkr Gct. A' mzli kc tqarlapx-ngrde nigu, kamle bagu nzrkrlzng murde namcpxku nzvz-nqblq-krgu me pnz drtwrde, a' trngiu me pnz drtwrgu. X nzmcpx-krgu me pnz drtwrde drtwr ngrde kx okatrle nigu mz nzale-krgu da kxtubq mz nzobq-krde. A' mz nzvz-nqblq-krgu me pnz drtwrgu, ale-zvzku da kx vz-rbr. Murde lrpzki kc pnz tqikztiku mz nzale-zvz-krgu alwx atalz-ngrde nigu mz nzwikr nelzgu, nqmq krgung,

x nzaokr drtwrgu kxtrka kcng mzli kc. A' mrlz nzrlxti-krbzku mz Jiszs nzokatr-krde nzale-krgu da kxtubq mz nzobq-krde x mz nzvz-nqblq-krgu me pnz drtwr Mqngrkxtr kc tqmailz-zvzle nigu mz nzale-krgu da kxmrlz. [Rom 8:5-15]

6.3.4 **nzwikr nelz**—(emotions)

Mz nzwikr nelzgu, kzdung mzli abrtzku, kzdung mzli drtwrgu vz, kzdung mzli nelzgu prtzm, kzdung mzli drtwrgu ngya. Rblx nzabrtz-zvz-krgu. A' Gct suti drtwrde kx narlxti-ngrbzku nzokatr-krde mz nzale-krgu da kxtubq, kxmule-esz' da kx xngibzku mz drtwrgu, x nabzgu, x nelzgu nzatalz-ngrdr nigu mz nzalengl da kx trtubqu. Gct trsutiu drtwrde leplz nedeng nzvz-nqblq-krdr nzrveckr da kx nxngibzlr mz nabzdr. A' suti drtwrde nzvz-nqblq-krgu da kxtubq x mrlz mz nzobq-krde.

6.4 **mqngr**—(spirit)

Mqngr doa ngi nrlarde kx glxle dalr lclxlr mqngr, kxmule-esz' enjrl, drka', o Gct esz'-krde. Mzli kc leplz mztr tzmc-ngrdr, mqngrdr nzbdzng, murde Adzm rtrngzbz alwx. X mzli kx mqngrgu nzbdz-ngrdr, nzkrlzlr nzycmne-ngrbz badr drka'ng, a' rblx nzycmne-krbzlr mz Gct x nxzlr-ngrbz bade. A' mzli kx mqngrgu nzlu-ngrdr, krlzku nzycmne-krbzku mz Gct x nxzlr-ngrbz bade. [1 Korint 14:2, 14-15] Murde mzli kc tqlxngitiku Jiszs, Gct sc tqarlapx-ngrde nigu, amrnale x alule mqngrgu, [Sam 51:10-11; Esikel 11:19; 18:31; 36:26; Rom 1:9; 8:10, 15-16; Efiszs 2:10; 1 Pita 3:18], x nzaxvctrpzku mz Jiszs mz mqngrgu. [1 Korint 6:19; 12:12-13] X mou, kam Gct Mqngrkxtr bagu mz nzmnccpx-krmle mz mqngrgu, (kxmule-esz' mz nzycmne-krgu rpi-zvzku kx mnccpxm mz nabzgu). [Jon 20:22; Rom 8:9, 11; 1 Korint 3:16; 6:19; 2 Korint 1:22; 5:5; Galesia 3:2; 4:6; 1 Jon 3:24; 4:13]

Ngalrdeng kc-kzng nzycmnetr-ngrdr mqngr doa nidr seleng: [Job 10:12; 15:13; 17:1; 20:3; Sam 34:18; 51:12, 17; 77:3, 6; 78:8; 104:29; 142:3; 143:4, 7; 146:4; Nzyrplapxng 15:13; 18:14; 20:27; Kxalvztr 12:7; Asaea 26:9; 42:5; Nzyrningr 1:20; 2:11; Esikel 3:14; 13:3; 36:26; Daniel 2:1, 3; 5:20; 7:15; Hagai 1:14; Sekaraea 12:1. Malakai 2:15-16; Matiu 26:41; 27:50; Mak 2:8; 8:12; 14:38; Luk 1:46-47, 80; 8:55; 23:46; Jon 4:23-24; 11:33; 13:21; 19:30; Aposol 7:59; 17:16; 18:25; Rom 12:11; 1 Korint 2:11; 5:3; 5:5; 7:34; 15:45; 16:18; 2 Korint 2:13; 7:1, 13; Galesia 6:18; Efiszs 4:23; Filipae 4:23; Kolosia 2:5; 1 Tesalonika 2:17; 5:23; 2 Timoti 4:22; Filimon 25; Hibru 4:12; Jemes 2:26]

Kzdung ngalr mz Nzryrngrkxtr nzycmnetr-ngrdr nabz x mqngr, o nabz x drtwr, mz ngalrde kxesz'. X mz ngalrde lcng, rblx nzrpingr kx drtwr ngrdr esz' o li mz drtwr ncblo kc tqryr-ngrdeng. [Job 7:11; Sam 19:7-8; 42:5; 51:10; 16-17; Luk 1:46-47]

7 **dzbede Epikiurian**—(Epicurean philosophers)

Dzbede Epikiurian nidr kzdung ncblo lr Grik mz mzli nyz Pol. [Aposol 17:18] Nzalvztr-ngrdr drtwr kx vz-rbr. Ncblo lcng nzvz-nqblqlr nzalvztrkr kzdq ncblo drtqde Epikiurizs, kc tqlu mz mzli yiz 342-270 BC. Alvztr-ngrde kx nzabrtzngr nigu da kxmyapxbz mz nzlu-krgu mz nrlc ka, x mrlz nzalengl da kxklu mz nzrmctingr nzabrtzngr mz nzlungr. Mz nzmu-krde lcde, vqty drtq leplz da kzniqe batrpzle nxngiti-krdr da kxmrlz mz drtwrdr x nrkrdrtqdr. A' nzpxtxpx-ngrdr da kx rbatrpz zvetq x zmwxlr. Nzlxngitilr kx gct ngrdrng trpqtitru drtwrdr leplz. A' nzalvztrkr Pol blepxbz mz dzbede Epikiurian. Murde alvztr-ngrde kx Gct aodu-angidrle leplz x da kxmyapxbz mz nzlu-krgu mz nrlc ka nigi nzrvz-nqblqngr me pnz drtwr Gct.

8 **dzbede Stoik**—(Stoic philosophers)

Dzbede Stoik nidr kzdung ncblo lr Grik mz mzli nyz Pol. [Aposol 17:18] Nzalvztr-rbr-ngrdr mz nzvz-nqblq-krde nzalvztrkr kzdq ncblo drtqde Seno kc tqlu mz mzlir yiz 332-260 BC. Alvztr-ngrde da kcng pwx. 1) Leplz namncng mz nrwrx badr dalr nrhc ka, badr temz, nepi, nounc, nenq x kzdung kz da kxnxmulr lcng. 2) Doa nalolvzo-lzbq. 3) Nzkrlz-krde naetunepx zvz. 4) X namnc-xglele nide esz'-krde. Murde mz drtwrdr nzabrtzngr vzpxm mz nzrlr-ngrbz dalr nrhc nzvz-nqblq-krdr nqmq krdrng. Stoik nzglqpx-lzbqng. A' Pol alvztr-ngrde kx doa ne Gct na-avzo-lzbq mz nzvz-nqblq-krde me pnz drtvr Gct.

9 hosana—(hosanna)

Hosana ngi kzdq natq mz natq Hibru x mz natq Erameik kx drtvr ngrde ‘okatr nigr’ o ‘arlapx nigr.’ A’ mz mzli nyz Jiszs, drtvr ngr natq lc nztekqtrpe x ngipe nzrkabomingr nzrglqpxngr. A’ Sam 118:25 rpile kx, ‘Yawe arlapx nigr mz nzokatr-krm nzaovxio-krgu.’ Mz ngalrde lc ‘arlapx nigr’ tekqtrle natq ‘hosana.’ Leplz nzpilr natq lc mz nzrglqpxngr Jiszs mz Nrpakxmrlz kcng tq: [Matiu 21:9, 15; Mak 11:9-10; Jon 12:13]

10 Israel—(Israel)

10.1 ncblo kc drtqde Israel—(the man named Israel)

10.2 nqvi lr Israel kcng nzpnu-esz'-nrade-li (12)—(the 12 tribes of Israel)

10.3 kandre kc Israel nzaxvctr-lxblr-krdr—(united Israel)

10.4 kandre kc Israel nzaki-lzbq-krdr—(divided Israel)

10.5 lr Jiu—(the Jews)

10.6 lr Hibru—(the Hebrews)

10.1 ncblo kc drtqde Israel—(the man named Israel)

Isc x Jekop nzlipxmqng, x Isc nide kc tzmika kai. Trtedr Aesak. Jekop tekqtrpz Gct drtqde mz Israel, [Nou 32:28] kc drtvr ngrde ‘nzbilusz-lzbqng mz Gct.’ Mz Nzryrngrkxtr, kzdung mzli yrlqbzle drtq ncblo lc Jekop, x kzdu-kzng mzli yrlqbzle drtqde Israel.

10.2 nqvi lr Israel kcng nzpnu-esz'-nrade-li (12)—(the 12 tribes of Israel)

Israel mrlxde nzpnu-esz'-nrade-li. Mrlxde kcng esz'mz, Ruben, Simion, Livae, Judz, Isaka, x Sebiulzn, mztr nzmcbz mz olvz rde ayrnrngr kc tqngi Lea. X mrlxde kcng li, Josip x Benjamin, mztr nzmcbz mz olvz rde krali, drtqde Resel. Mrlxde kcng li, Dan x Naftzli, mztr nzmcbz mz kxnxawz ne Resel, drtqde Bilha. X mrlxde kcng li, Gad x Asz, mztr nzmcbz mz kxnxawz ne Lea, kc drtqde Silpa. Mrlx Israel lcng nzpnu-esz'-nrade-li nidr nou nqvi lr Israel kcng nzpnu-esz'-nrade-li (12). Leplz kcng tzvzpxmqng mz ncblo lcng nzkqlebzng ‘Lr Israel.’

Mzli kc lr Israel tzmnc-ngrdr Ijipt x Jekop sc tqlube, amrlzleng mrlx lcng nzpnu-esz'-nrade-li (12). X mrlxde Josip, mrlxde li drtqdr Efrem x Manase. [Nou 48:1-6] Nqvi lcng tzvzpxmqng mz ncblo lcng nzling nzkqlebzng ‘nctq nqvi,’ murde mz nibrde nctq nqvi lcng nzling nztekqtrlr nqvi lr trtedr, x trpengr nqvi kx nzkqlebz ‘Josip.’ A’ ngi-alzu nqvi lcng nzpnu-esz'-nrade-esz' (11) x nctq nqvi lcng nzling. Drtq nqvi lcng nzpnu-esz'-nrade-tq (13) nidr seleng: Ruben, Simion, Livae, Judz, Isaka, Sebiulzn, Efrem, Manase, Benjamin, Dan, Naftzli, Gad x Asz. A’ lr Livae nzyrlqpxng mz nqvi lcng murde nzwztrpzng mz Gct. X mzli kc tzakipx-ngrdr drtc' ngr Kenan, lr Livae trnzrlr-ngrpwzu nzrnginyz-krdr drtc'. A’ leplz mz nqvi lr Israel kc-kzng nakabzlr kranzpn u ngr da scdrng mz nqvi lr Livae.

10.3 Kandre kc Israel nzaxvctr-lxblr-krdr —(United Israel)

Mzli kc lr Israel tzkqlupx-ngrdr krlzlzbzle milion kxesz' (1,000,000), nzrlaszlr Ijipt x Gct okatrle nidr mz nzaovxio-krdr krkcng tzmncng mz drtc' kc tzkqlebz 'Kenan.' Mz nibr nzaovxio-krdr leng, sc tqnginipede kandre ngr Israel. X nqvi lr Israel lcng amrlx nzmncng elr. Mzli lc kandre kc Israel xvctr-lxblr.

10.4 **kandre kc Israel nzaki-lzbq-krdr**— (*divided Israel*)

A' mz nibr nzbzkr King Solomon, kandre ngr Israel nzakipxng mz kandre kxli. Nzakipxngr lc ngida mz yiz 920 BC. Kzdq kandre sa tzkqlebepz Israel x kzdq kz nzkqlebz Judz. Nqvi nzpnu-esz' (10) lcde seng nzprptrpzng mz Israel: Ruben, Simion, Isaka, Sebiulzn, Efrem, Manase, Dan, Naftzli, Gad x Asz. X nqvi lr Judz x Benjamin nzprptrpzng mz kandre kc Judz. Lr Livae nzlvaliong, kzdung nzmncng Israel x kzdung nzmncng Judz. King kxkqlu nztrkang mrkc Israel krali lc, x nzangiolr gct kzbleng. Mz nzmu-krde lcde mz yiz 723 BC, Gct batrpzle mz kandre ngr Asiria nzaovxiongr Israel x nzvzmingr nidr Asiria. Zbz lr Israel nzyrlz-etrng badr lr Asiria x nzangiolr badr gct nedrng x nzmrbrtr mz drtwrdr kx nidr doa lr Israel. Kzdung mzli nqvi lr Israel lcng nzkqlebz 'nqvi lr Israel kcng nzpnu-esz' tzmrbrng.' A' trmrbr-angidrung, murde krlzku mrkc tzvzkilr. Nzaovxiong x nzaxvctrpzng mz leplz kcng tzaovxiolr nidr. Trnzvztrpqung mrka mz Trmctu ngr Solomon o Papua Niugini, da kc tqwai nzpikr kzdung leplz leng.

10.5 **Ir Jiu**— (*the Jews*)

Mzli lcde, kandre ngr Judz vz zvz mz nibr Asiria nzaovxio-krde Israel. Kzdung king kxnzmrlzng nzaclvelr Judz, a' king rdr kxnzkqlung nztrkang. Mz nzmu-krde lc, batrpz Gct mz kandre ngr Bxbilon nzaovxiongr Judz mz 586 BC. X lr Judz nzkqlung nzvzming Bxbilon. A' kzdung nidr sa tzvz-nqblqbelr Lou sc Yawe elr. X mz nibr yiz nzpnu-rlimz (70) kzdung lr Judz lcng nzyzlu-mopqng mz kandre ngr Judz. Mzli lc nzmncbeng Bxbilon, lr Bxbilon sc tzkqle-ngrbzlr leplz ngr Judz lcng, lr Jiu. Mz nzyzlupe-mou-krdr kc mz kandre nyzdr, nzkqle-mopwzlr 'Israel,' x doa kcng nzkqlebzng 'lr Jiu.' Mz nibr mzli lcde, lr Jiu x lr Israel drtwr ngrde esz'.

Mz mzli r Nzryrngrkxtr kc Ate, lr Rom nzodatilr Jerusalem x Mangrzangiongr Yawe mz 70 AD murde mz nzxpqbrrkr lr Jiu. X mz nibrde, lr Jiu nzodaliting mrkang kqlu mz nrlc tulvzo x trpnzngr nyzdr kandre mz yiz lcng siu-esz'-trtqki-rpwxmz (1,900). Leplz nzkqlung nzlxngitilr kx Nzryrngrkxtr plzpxle kx Gct sa nakqlele lr Jiu mz nzyzlu-mou-krmlr Israel x nznginyz-krdr kandre lc, x Jiszsc sc tqyzlu-atem. Zbz mz yiz 1948 AD, kzdung lr Jiu nzabzo-moulr kandre ngr Israel mzli kc tqyrkrpxpe-ngrbz Vea Kxetu Krali (Second World War) kc tqtalvzpxle nrlc atwrnrngr. Kxmule-esz' nzkqlukr lr Jiu kcng tzmncng mrkzbleng mz nrlc nzmyaszpxlr krkcng tzmncng Israel, a' mz nzyckr kandre ngr Israel leplz kxnzkqlung delc tzlxngiti-ngrdr kx nzyzlu-krm Jiszsc esotrpem.

10.6 **Ir Hibru**— (*the Hebrews*)

Lr Israel amrlx nzvzpxmqng mz Ebraam. Ebraam vzpxm mz nqvi lr Ebr, kc tzkqlebz 'lr Hibru.' [Luk 3:35] Lr Israel x lr Hibru nznginidr kz lr Hibru. A' kzdu-kzng leplz mz nqvi lr Ebr kcng trnzvzpxpqung mz Ebraam. A' leplz lcng mzli ka trnzkqlepwlru nidr esz'-krdr lr Hibru. Kzdung mzli nzkqle-kzpplr 'lr Sem,' mz nzvzpx-krmlr mz nqvi lr Sem, kzdq mrlx Noa. Lr Jiu nzngini-kzdr lr Sem. Mz Inglis nzkqlebz nidr 'Semites.' Leplz kcng tzmncng mz 'Middle East,' mz kandre kcng Israel,

Arabia, Jodzn, Lebanon, Irak, Iran, x kzdu-kzng kandre kxyc-aepztrpzng badr, nidr lr Sem.

11 Jiszs aotr-angidrle Gct Trte—(exact likeness)

[2 Korint 4:3-4; Kolosia 1:15, 19; 2:9; Hibru 1:3] Mz nzrpingr kx Jiszs aotr-angidrle Gct Trte, trycmnetr-ngrdeu kxmu nzobqkr Jiszs, murde Gct nide mqngr x trpnzng rnkrdrtqde. A' Jiszs apu-txpwzle Gct Trte mz nztr-krde, nzryckr drtwrde, nztubq-krde, zmatq ngrde, nqmq krdeng, x kzdu-kzng da kxnmulr lcng. Me pnz drtwr Gct nzrsakrlrng mz me pnz drtwr Jiszs. Da amrlx kx pile x aleleng, ngi nike suti drtwr Trte nzpi-krdeleng x nzale-krdeleng. Trte ncdr Jiszs nzrsakrlrng mz da amrlx, a' ngi txpwz da lcde seng li kx blepxpwz: 1) Jiszs ni-kzde kzdq ncblo mz nrkrdrtq. 2) X Jiszs alele nike suti drtwr Trte. Mz nkrlz-krgu Jiszs x nqmq krdeng, krlz-kzku Gct Trte x nqmq krdeng.

Gct wz-ngrde Adam ncdr Iv mz nzapu-krdr nide. A' kzdung la da kxblepxbzng. 1) Trnznginidru gct. 2) Nzrngiscng nrkrdrtq x nzmnctxpwzng mrkc esz', a' Gct tr-rngiscu nrkrdrtq x mnc mrkang kqlu. 3) Gct krlzle da amrlx x rngiscde zmatq amrlx, a' leplz trnzkrlzlu da amrlx nzrngiscnepwzng zmatq kxipiz. A' kzdung la da kx nzkxmu-txpwzlr esz': 1) Nzkrlzlr nzao-krdr drtwrdr, nzdictpxkr drtwrdr da, nzale-krdr nike pnz drtwrdr, x nzrmrlzting. 2) Gct yrlqle nidr mz nzaclve-krdr nrlc ka. 3) Mzli kc trnzrtrngzika-ngrbzlr alwx, trpnzng scdr alwx, a' nztubqng x nztrng. Gct yrlq-kzle drtwr kx na-axvctr-ngrbzle nidr bade mz mqngrdrng, a' trngida-pnzu murde nzrtrngzbzng alwx. Kxmule-esz' a' mzli ka kxnzrlxngiting nzaxvctrpzng mz Jiszs mz mqngrdrng, x nzaxvctrpebzng mz Gct. Mzli kc navz-ngrgu Heven, sa na-apuku Gct, a' da kx bletipxpwz nzmu trmnckuu mrkang kqlu x trpnzng nzkrlz-krgu da amrlx. A' sa nakrlzku da amrlx kcng tqsuti drtwr Gct nakrlzku x nangiscgu zmatq ngrde. X da amrlx nayclzmqng bagu x doa amrlx namnclzmqng bagu, mz nzmnclz-krbzku mz Gct Trte, Jiszs x Mqngrkxtr. Jiszs aotr-angidrle Gct Trte. X sa na-apuku Jiszs, a' ngi txpwz mz nzmnctxgle-krgu nide. Jiszs batrple bagu nzmnnc-krgu mz zmatq ngrde. X trpnzng nzmnnc-krgu a' ngi txpwz mz zmatq ngrde nzbatr-krmle nzmnnc-krgu. [Kolosia 1:17; Hibru 1:3]

12 Judz—(Judah)

12.1 mrlx Israel—(son of Israel)

12.2 nqvi lr Israel—(line of Israel)

12.2.1 nqvi lr king—(line of kings)

12.2.2 nqvi lr Kxnmcpk—(line of Christ)

12.3 drtc' ngr Judz—(land of Judah)

12.4 kandre Judz—(country of Judah)

12.1 mrlx Israel—(son of Israel)

Judz ngi kzdq mrlx Jekop (Israel) kcng nzpnu-esz'-nrade-li (12), x mrlx Lea. [Nou 29:31-35; 35:22-26]

12.2 nqvi lr Israel—(line of Israel)

Mrlxng Judz nznginidr kzdq nqvi lr Israel. [Nzrlasngr 1:1-7; Nzkqlukrdr 1:26]

12.2.1 nqvi lr king—(line of kings)

Jekop (Israel) plzpx-pnkle natq Gct kx king kc tqaclvele lr Israel navzpxm mz nqvi lr Judz. [Nou 49:1;8-10]

12.2.2 nqvi lr kc Kxnmcpk—(line of Christ)

King Devet vzpxm mz nqvi lr Judz, x Gct esalz-ngrbzle bade kx kzdq ncblo esz' mz ncblo kcng tzvzpxmqng mz nqvi lrde sa nangini-zvzde

king kx na-aclvele Israel. [2 Samwel 7:8-16; 1 King 9:4-5; 1 Be Ngrdr 17:11-14; Luk 1:30-33] Mz nibrde lr Israel sc tzlxngititipelr nzesalzngr lc tqycmnetr-ngrde Kxnzmcpx (Jiszs).

12.3 drtc' ngr Judz— (*land of Judah*)

Mzli kc lr Israel tzaovxio-ngrdr drtc' kc tzkqlebzlr Kenzn, nzakipxbzng mz nqvi lr Israel kcng nzpnu-esz'-nrade-li (12). X nqvi lr Judz nzkabzlr drtc' kxetu. X mz nibrde nzkqlebz drtc' nydzr nqvi lr Judz, drtc' ngr Judz, o ngi txpwz 'Judz.' [Josua 15:20-63]

12.4 kandre kc Judz— (*country of Judah*)

Nqvi lr Judz sc tzaovxiopelr drtc' ngr Judz abzo mz yiz 1400 BC. Zbz mz nibr nzbzkr King Solomon mz yiz 920 BC, kandre kc Israel nzakipxng mz kandre kxli, Israel mrkc nort x Judz mrkc ulu (south). [2 Be Ngrdr 10:1-11:13] Kandre kc Judz vzmitr drtc' ngr Judz, Benjamin x Simion. Zbz lr Bxbilon nzaovxiolr kandre kc Judz mz yiz 586 BC. [2 King 24:1-25:21; 2 Be Ngrdr 36:5-21] Mzli kc tzmnncng Bxbilon, nzkqlebz nidr 'lr Jiu,' murde nzvzpxmqng mz Judz. [Estz 2:5-8]. Mz mzli nyd Jiszs, kandre kx ngi Judz mzli kc, tzrpibz 'Judiz,' a' ncngrbz ngrde blepxbz kxipiz mz Judz.

13 kranzpu ngr da— (*tithe, tenth*)

'Kranzpu ngr da' drtwr ngrde kx nzmu kx tqrginam topla ngr dakxnzng kx nzpnu-esz', nakaq topla naesz'. Nzmu kx tqkqq nra nounc trtqki-esz' (100), nakaq nra nzpnu-naesz'. Nzmu kx tqnginem animol nzpnu-esz' kx mzte nzmc x kx nzabuti, nakaq animol naesz'. Lou sc Mosis rpile kx leplz mz nqvi lr Israel kc-kzng nakabzlr kranzpu ngr dakxnzng nadr x animol nedrng amrlx mz ncblo kcng tzvzpxmqng mz nqvi lr Livae, murde lr Livae nzwztrpzng mz Gct x trnzrlr-ngrpzu nzrnginyz-krdr drtc'. Zbz nqvi lr Livae lcng nzkabzlr kranzpu ngr da lcng amrlx mz nqvi lr Eron kc tqvzpxm mz nqvi lr Livae, murde nidr pris neng Yawe. Kranzpu ngr da nzka-ngrdrle, nangi zvz krkcng tqmrlz-esz'ngrng mz dakxnzng x animol amrlx. Mc kz nzycmnetrngr Israel.

Nzrkangr kranzpu ngr da myapxbz mz nzobqkr Gct. Murde nzale-pnzlr nqmq lc mz mzli nyd Ebraam x Jekop, x Lou sc Mosis kc ate. [Nou 14:20; 28:20-22] Mz Malakai 3:8-12 Gct ycmnetr-ngrde lr Israel mzli kc tzrka-ngrdr kranzpu ngr dztudrung. Lrmakxtr nyd Kraes kxkqlu nzalvztr-ngrdr kx mrlz kxnzrlxngiting amrlx nzrkang kranzpu ngr dakxnzng x trau mz makxtr mz nzokatr-krdr mama x pasto x mz nzalenglz nzwzkr Gct. Mz Matiu 23:23 x Luk 11:42 rpi Jiszs kx leplz narkangr kranzpu ngr da.

Ngalrde kc-kzng nzycmnetr-kz-ngrdr nzrkangr kranzpu ngr da: [Livae 27:30-33; Nzkqlu-krdr 18:21-32; Lou Kcpwz 12:4-17; 14:22-28; 26:1-15; 2 Be Ngrdr 31:2-8; Nemaea 10:37-39; 12:44-46; 13:4-13; Emos 4:4; Malakai 3:8-12; Luk 18:12; Hibr 7:1-10.]

14 Kxetu— (*Lord*)

14.1 Yawe— (*Yahweh*)

14.2 nume— (*sir*)

14.3 Jiszs nide Kxetu x Lod— (*Jesus is Lord*)

14.1 Yawe— (*Yahweh*)

Mz Nzryrngrkxtr Kc Kai kc tzyr mz natq Hibr, drtq Gct ngi 'Yawe.' A' mz nibrde lr Jiu trnzsutiu drtwrdr nzrpingr drtq Gct, mz nzamrlue-krdr nide. Zbz nzkqlebzlr nide 'adonai' kc drtwr ngrde 'kxetu.' Zbz lr Jiu nztekqtr-kzlr natq Hibr mz Nzryrngrkxtr Kc Kai mz natq lr Grik. X mz nzale-krdrle, nztekqtrlr 'Yawe' mz natq lr Grik kc tqngi 'kurios,' drtwr ngrde 'kxetu.' Vz vz mzli kc leplz tztekqtr-ngrdr Nzryrngrkxtr mz Inglis,

nzvz-nqblqlr nqmq lc x tekqtrlr 'Yawe' mz Inglis 'the LORD.' X tekqtrle 'adonai' mz 'the Lord.' Mz nzmu-krde lcde, leplz kxnzkqlung trnzkrlz-angidrlru kx drtq Gct ngi 'Yawe.'

14.2 **nume**— (*sir*)

Mz mzli nyx Jiszs, natq kx ngi 'kurios' mz natq lr Grik drtwr ngrde tq. 1) Leplz nzkqlebzlr ncblo amrlx 'kurios,' mz nzamrlue-krdr nidr. Natq lc drtwr ngrde 'ume,' o 'sir' mz natq lr Inglis. 2) Mzli kx ncblo neng Jiszs nzkqle-ngrbzlr nide 'kxetu' tzrpibzlr kx nzmnclzbzng bade. 3) Kzdung mzli mz Nzryrngrkxtr Kc Ate, nzrping 'Lord' mz natq lr Inglis x drtwr ngrde kx nzrkrlzngr kx nide 'Gct.' Mz nzrtekqtrngr mz Natqgu, tqabzkr nzaopxngr mzli kx doa kx na-amrluele Jiszs, mzli kx mnclzbz bade, x mzli kx krlzle kx Jiszs nide Mrlx Gct.

14.3 **Jiszs nide Kxetu x Lod**— (*Jesus is Lord*)

Mz nibr Jiszs nztulz-krmle mz nzbnzng, mzli kc leplz tzlxngiti-ngrdr nide x nzrpibzlr kx, 'Jiszs nide kxetu,' drtwr ngrde kx 'Jiszs nide Gct.' Mz nzrtekqtrngr mz Natqgu, yrkr 'Kxetu', o 'Kxetu Lod,' o 'Lod.'

15 **Kxrpalz**— (*creator*)

Gct nide kxrpalz kc tqwz-ngrde da amrlx 'mz natqde.' Wz-ngrde nrhc, x nounc, x da kx nzpeting, x animol, x utc, x nc, x bingar amrlx, x da kc-kzng mz nrhc ka. Wz-ngrde nepi, temz x vri. [Nou dckrlzdeng 1-2; Asaea 42:5; 45:18] Wz-ngrde leplz kcng ayrnrngr Adzm x Iv. [Nou 1:27; 2:19-22; 5:1-2; Asaea 43:7; 44:12] Gct lc tqwz-ngrde da amrlx, pile drtqde Yawe. Nzryrngrkxtr Kc Ate pimle bagu kx ngi doa krali ngr Tqtrbz kc tqwz-ngrde da amrlx x lolvz lxblr zmatq ngrde. Murde Mrlx Gct, kc tqvzm mz nrhc nzngini-krde Mevalu Kxnmcpx, nide Natq Gct kcpwz tqwz-ngrde nrhc. [Jon 1:1-3; Kolosia 1:16-17; Hibru 1:3]

16 **Kxdrka'ngr kxmyapxbz**— (*abomination that causes desolation*)

Mz Daniel 9:27, 11:31 x 12:11, Daniel plzpx-kaile kzdq kxdrka'ngr kxmyapxbz kx sa na-atrkatile Mangr-nzangiongr Yawe mrhc Jerusalem, mz nzbatr-krbzle nzangiongr kx trngiu Yawe elr. X natq Daniel lc atutrepelie mz yiz 168 BC mzli kc Antiakzs Epifanes tqbatrpzle nzatrkatingr Mangr-nzangiongr mz nzwztipx-krmle elr kzdq olta ngr nzamatqngr gct Jupita Olimpzs x rlrpx-ngrbzle kzdq poi kx nangi blz ngr nzangio-krde nide. Lr Rom nzangiolr Jupita Olimpzs mz nzngini-krde kxetu r gct rdr. A' poi ngi animol kx tr-rlr-ngrpwzu Gct mz lr Israel.

Mz Matiu 24:15; x Mak 13:14 rpi Jiszs kx nzatrkatingr Mangr-nzangiongr kxmule lc sa nangida x sc tqyzlu-atem. Kzdung leplz nzrpilr kx natq Jiszs lc tqngidape mz yiz 70 AD. Murde mzli lc ami ngr Rom tzaovxio-ngrdr Jerusalem. X nzatulzlr rkx ngr ami nedrng mz kzdq naobz ngr Mangr-nzangiongr. X ncblo ngr vea ngrdrng nzangiolr rkx lcng mz nzapu-krdr gct rdrng. Kxmule-ess' a' kzdu-kzng leplz nzrpilr kx lr Jiu nawztype-moulr Mangr-nzangiongr Yawe mrhc Jerusalem, x Jiszs sc tqyzlu-atem. Zbz kx nzrwzpe-ngrdr Mangr-nzangiongr, Mrlx Kxdrka'ngr krali kc, sa na-atulzle elr mqngr Mrlx Kxdrka'ngr kc kai tzlz. Nide Enqmi Kxetu ngr Kraes. X krkc krali sa nartulrtr-ngrbzle mz leplz nzangio-krdr mqngr drka' lc tzlz. X leplz kx nzpxtxpx-ngrdr nzangio-krdrle, sa nanibqng. [Nzaelwapxngr 13:11-15]

17 **kxnzmncng mzlilxlr**— (*spirit beings*)

17.1 **kxnzmncng mzlilxlr**— (*spirit beings*)

17.2 **enjrl**— (*angels*)

17.2.1 **kxnzetung rdr enjrl**— (*angelic hierarchy*)

17.2.2 **narenjrl**— (*archangels*)

17.2.3 **enjrl-seraf**—(*seraphim*)

17.2.4 **enjrl-serub**—(*cherubim*)

17.2.5 **enjrl kxnzaclve-ngrdr leplz neng Gct**—(*guardian angels*)

17.3 **drka'**—(*demons*)

17.3.1 **kxzetung rdr drka'**—(*demonic hierarchy*)

17.3.2 **Setzn**—(*Satan*)

17.4 **mqngr leplz kxnbzpeng**—(*spirits of dead people*)

17.1 **kxnzmncng mzllxl**r—(*spirit beings*)

Kxnmncng mzllxl trnzrncung nrkrdrtrq da kc tqwaiku. A' kzdung mzli nzadcpx-lzbqng mz nrkrdrtrq mzli kxipiz. Mqngr kxnmncng mzllxl mznmnc-zvzng, murde rblx nzbz-krdr. Kxmule-esz' nzesotrpqng, a' namule trmckuu nidr. Gct ni-kzde kxmnc mzllxl, a' blepxbz badr. Murde mnc mrkang kqlu mzli kxesz', x wz-ngrde kxnmncng mzllxl amrlx. X kxmule-esz' nzmncng me esz' mz kzdq mzli, a' nzkrlz-kzlr nzvz-aningr mz kzdu-kzng nrhc, murde trpnzngr nrkrdrtrqdr. Nzxrpl-krdr myaszlle leplz, a' Gct myaszlle nidr kcng tqwz-ngrde. Kzdung kxnmncng mzllxl enjrlng x kzdu-kzng drka'ng.

17.2 **enjrl**—(*angels*)

Gct wz-ngrde enjrlng mz nzwztr-krbzlr bade. Nzwz-krdr kqlu x blepx-ngrng. Kxmule-esz' nzrkrz-krgu nidr topwz, a' krlzku kx nzxrplng x nzkrlzlr nzadcpx-lzbqng mz nzapu-krdr leplz. X mz nzadcpx-lzbq-krdr nzmwzlr-ngrdr leplz murde nzpnapr-krdr apule nepi. X kzdu-kzng mzli, mz nzadcpx-lzbq-krdr nzapulr doa txne, x rblx nzglx-krgu kx nidr enjrlng.

17.2.1 **kxzetung rdr enjrl**—(*angelic hierarchy*)

Kzdung enjrl nzaclveng mz nzngini-krdr kxzetung, da kc tzwai kzdung doa nzaclve-krdr nigu leplz. Trkrlz-zpwxkuu namrlzur enjrlng kxzetung amrlx. A' krlzku kx Maekol kc tqngi narenjrl aclvele kandre kc Israel. Mz nzmu-krde lcde, opxm kx Gct yrlqle kzdung enjrl mz nzaclve-krdr kandre. Natq Gct rpile kx Jiszs aclvele zmatqng x kxzetung kxnmncng mzllxl amrlx. [Kolosia 2:10, 15] Kzdu-moung enjrl kxzetung nidr seleng: narenjrl, enjrl-seraf x enjrl-serub.

17.2.2 **narenjrl**—(*archangels*)

Enjrl Maekol nzrpibz narenjrl mz Nzryrngrkxtr. Trpnz-moung enjrl kx nzrpibz narenjrl, a' kzdung leplz mz drtwrdr nzrpilr kx Gebrel ni-kzde narenjrl. X mou nzrpi-kzlr kx Setzn tqngi narenjrl mzli kc pnz. A' trkrlz-zpwxkuu. 1 Tesalonika 4:16 ycmnetr-ngrde kzdq narenjrl, a' trpileu drtqde. Jud 9 pile Maekol nzngini-krde narenjrl. Mz Daniel 18:13, Maekol nzqlebz 'kzdq mrlx king kxmyapxbz' mz dzbe enjrl amrlx. Mz Daniel 10:21 Maekol nzqlebz 'mrlx king rmu' x 'mrlx king kxmyalz kx aclvele leplz ngrmu.' Mz nzmu-krde lcde, drtwr leplz esz'ti kx nide enjrl kc tqaclvele Israel. Maekol nzycmnetr-kz-ngrdr mz Nzaelwapxngr 12:7.

17.2.3 **enjrl-seraf**—(*seraphim*)

Nzycmnetr-ngrdr enjrl-seraf mz Asaea 6:2 x 6. Nidr enjrl kx nabxdr esz'mz x nzmnc-aepztrpzng mz Gct mz nzangio-zvz-krdr nide.

17.2.4 **enjrl-serub**—(*cherubim*)

Nzycmnetr-ngrdr enjrl-serub mzli kqlu. Nzaclvelr Nrlanc ngr Iden mz nibr Gct nzmaszlrpx-krde Adzm x Iv. [Nou 3:44] Mqngr enjrl-serub nzling nzwzng nzmncm mz lopq Bokis kc tqyclz-ngrm Nzesz'tikr Drtwr Gct Badr lr Israel. [Nzrlaszng 25:18-22; 37:7-9; Nzkqlu-krdr 7:89; 1 Samwel 4:4; 2 Samwel 6:2; 2 King 19:15; 1 Be Ngrgr 13:6; 28:18; Sam 80:1; 99:1; Asaea 37:16; Hibru 9:5] Tokale ngrdr nzkxsilvztr mz lotqbr ngrng

Tentkxtr. [Nzrlaszngr 26:1, 31; 37:8, 35] Mz Mangr-nzangiongr Yawe kc tqwzngr Solomon, nzwngr enjrl-serub kxnzlz murde natung Mrkc Tqteresz'ngr. [1 King 6:23-35; 8:6-7; 2 Be Ngrgr 3:10-13; 5:7-8] X nzlti-kzng mz kzdung nrlc mz Mangr-nzangiongr. Nzycmnetr-kz-ngrdr mz 2 Samwel 22:11, Sam 18:10, Esikel 9:3, 10:1-22, 11:22, 28:14, 16, 41:17-25. Mz da kc tqycmnetrngr Esikel 10:1-22 mz enjrl-serub opxm kx krkcng tzlung kcng pwx mz Nzaelwapxngr 4:6-11; nzngini-kzdr enjrl-serub. Trkrlz-zpxkkuu kxnamung enjrl-serub, a' krlzku kx nzpxwng kcng tzmnc-ngalelr tron nyz Gct Heven, x kzdung nzaclvelr mrkc tzvzkitrz mz Nrlanc ngr Iden.

17.2.5 **enjrl kxnxacive-ngrdr leplz neng Gct**—(guardian angels)

Hibru 1:14 rpile: ‘Mурde enjrl lcng nidr kxnxmncng mzlilxlr kxnxmr-lzng kcng tzwlztrpzng mz Gct. Atwzlr-ngrmqng Gct mz nzokatr-krdr leplz kx na-arlapxleng.’ Mz nzmu-krde lcde, mz drtwr leplz kxnxkqlung doa kxrlxngiti kxesz' rngine enjrl kxesz' kx nzmn-c-zvzng badr mz nzaclve-krde nide x mz nzaokatr-krde nide. A' bzkq krka'bzku badr, murde nangi tpxwz Gct kx nakrka'bzku bade. Mc kz Sam 34:7 x 91:11.

17.3 **drka'**—(demons)

Nzryrngrkxtr pimle bagu kx kzdung enjrl nzrnzlvzolr Gct. X vea kxetu kaputrp Heven x enjrl kcng tzdrka'ngr nzmaszlor-ngrm Heven. [Nzaelwapxngr 12:7-12] Kzdung nzadwatrng mz presin mrkc Hxl x kzdu-kzng nzrlr-ngrbz badr nzvzne-krdr mz nrlc. Mz Nzryrngrkxtr Kc Ate mz Inglis, enjrl lcng nzrpibzng ‘mqngr kxdrka'-ngrng’ o ‘mqngr kxtrnzlqngiung.’ A' mz Natq Gct mz Natqgu rpi-zvzku kx ‘drka’. Drka' lcng nzrlr-ngrbz badr nzatrkti-krdr leplz. A' Gct pi-kzle da kx tr-rlr-ngrpwzleu badr nzalengr. Setzn kz narlx-kai-ngrbzle mz Gct x sc tqatrkti-atele leplz kx acive Gct. [Job 1:6-12; 2:1-7; Luk 22:31; 2 Pita 2:4; Jud 1:9; Daniel 8:9-12; Nzaelwapxngr 12:3-4]

Kzdung leplz nzrpilr kx mz nzrtrngz-krbzku alwx, aelwax-ngrgu kx trxplrkkuu mz kzdung nzatalzngr. X tr-rblxpzu mz drka' nzatalz-mou-krdr nigu x nzbatr-krbzlr bagu nztao-mou-krgu mz alwx kcpwz. Gct rpwa'-nrbzle mz nigu leplz nedeng mz nzrlxti-krbzku mz drka'ng nzokatr-krdr nigu, murde rlr-lzbqbzku mz zmatq ngrdr. [Livae 19:31; 20:6, 27; Lou Kcpwz 18:10-12; 2 King 21:6; 1 Be Ngrdr 10:13; Asaea 8:19]

Ngi da kxtrka kx vz-rbr mz nzngr-ngrbz nabz mz drka' murde nidr enqmi r Gct. Jiszs trpnzngr nzalapx-krde nim nzmu angioq drka' x rlxtibzme nzokatr-krdr nim. Namcpxq kx navz-nqblqq drka' x nqmq krdrng o Gct. Murde Gct trpnzngr nzrlr-krbzle bam nzngini-krm doa nede nzmu nangnim kzte enqmi rdeng. Doa neng Gct nzartxbzlr drka' x nqmq krdr amrlx: nzngr-ngrbz nabz badr, nzela-ngrbz badr, nzatungr mqngr drka', luekxpiz scdr, nzrlxti-ngrbz nzokatr-krdr, x da kxnxmulr lcng. [1 Korint 10:20-22]

Mz Nzryrngrkxtr, kzdung mzli nzrpibz nzwzkr drka' mz nzbatr-krbzle kzdq namrlzu r zyagox o da kxtrka. Trkrlzkuu kx nzmu namrlzur drka' lc bletipxngr o nzmu kzdq drka' krlzle nzbatr-ngrbz nzmn-cng amrlx kx trmrlzu. Trtakitrdeu murde nigu doa neng Gct rngiscgu zmatq ngr nzrmaszlpnxngr drka' amrlx mz drtq Jiszs. Nzrwzkr drka' lcng nidr seleng:

drka' kx batrpzle nrdrtrq nzngq-krde x doa trnzycmne-krdr [Mak 9:17-25],

drka' kx ayangrnga x abxplcti nrkrdrtq [Luk 13:11],

drka' kx batrpzle doa nzrkrll-kaingr nike navztrp kalr [Aposol 16:16],

drka' kx batrpzle zmwxlr [Rom 8:15; 2 Timoti 1:7],

drka' kx akamrbr-ngrbzle nzrkrllzkr doa murde narblxbz bade nzrmcngr
 x nzxlrngr nzalvztrngr angidr [Rom 11:8],
 drka' kc tqngi enqmi r Kxnnzmcpx [1 Jon 4:3],
 drka' kx vz-nqblqle da kx vz-rbr [1 Jon 4:6],
 drka' kx batrpzle nzdobungr [Nzkqlu-kldr 5:14, 30],
 drka' kx batrplzle nzmwi-katongr [Asaea 29:10],
 drka' kx batrpzle nzawma-lzbqngr [Hosia 4:12; 5:4], x
 drka' kx batrpzle nzglqkr nimz [Matiu 17:15-18; Mak 9:38-42].
 X kzdung leplz nzpnzkr drtwrdrle mwx ngi drka' kx batrpzle nzyagoxngr
 mz Luk 4:38-39 murde Jiszs maszlrpx-ngrde nide.

17.3.1 **kxnnzetung rdr drka'**— (*demonic hierarchy*)

Kzdung drka' nzaclveng mz nzngini-krdr kxnnzetung, da kc tqwai
 kzdung enjrl nzaclvrelr enjrl kztedrung. Nar drka' ngi Setzn, a' trpnz-
 moungr drka' kx nzpi drtqdr mz Nzryrngrkxtr. Efisz 3:10, 6:12 x Kolosia
 1:16, nzycmnetr-ngrdr drka' kxnnzetung, kxnzaclveng, x kxnnzmatqng. Mz
 Daniel 10:13, kzdung doa nzpnzkr drtwrdrle kx mrlx king kc tqaclvele
 kandre kc Prsiz ngi kzdq drka'. Mz nzmu-krde lc kzdung doa nzrpilr kx
 kzdu lang drka' kx rngisc zmatq mz mztea, trmctu, x nrlarnrlc amrlx.
 Mc kz Efisz 1:21 x natq kxtopwz elr. Krlzku kx kzdung drka' nzrngiscng
 zmatq kxkqlu myaszlzle kzdu-kzng drka' x rblx nzrmaszlrpxnegr drka'
 kxnnzmulr lcng mz leplz, murde drka' kxmule la nzmaszlrpx-ngrpwz mz
 nzkrka'ngr vzmi nzaxtxngr dakxnxng. [Mak 9:29]

17.3.2 **Setzn**— (*Satan*)

Setzn ngi drtq nar drka' kc tqngi kxetu r drka'ng amrlx. X drtqde
 kqlu mz Nzryrngrkxtr. Drtq lc 'Setzn' vzpxm mz natq lr Hibrus x drtwr
 ngrde 'enqmi.' Mz natq Inglis 'devil' (devol) vzpxm mz natq lr Grik x
 drtwr ngrde 'kx rpibqti leplz' murde Setzn pibqti-zvzle leplz neng Gct mz
 mzte. [Nzaelwapxngr 12:10] Mz nzmu-krde lc, mzli kx ycmne-atrkati-
 ngrgu kzdq doa ne Gct, wztrpzku mz Setzn. Dekc Gct tqrpwa'-ngrmle
 bagu nzycmne-atrkati-ngrgu kztegung.

Mz Nzaelwapxngr 12:3-4, 7-12 Setzn nzrpibz 'Mepwz' x krlic ycmnetr-
 ngrde nzxpqbrr-krdr Gct badr kzdu-kzng enjrl. Leplz nzrpilr kx da
 lc kaputr-pnzm mzli kc Gct tqwz-ngrde nrlc. X nzrpi-kzlr kx Asaea
 14:12-15 x Esikel 28:11-17 nzycmnetr-ngrdr nar enjrl nzglqpx-lzbq-krde
 x nzrnzlvzo-krde Gct. Nzkqlebz nide 'paglxnrlc' x 'mrlx rnalx' mz Asaea
 14:12. Mz Asaea 14:12 x 14 nztekqtrnegr drtqde mz Inglis, mz 'Lucifer,'
 (Lusifz) kc drtwr ngrde 'kc tqytlupx'. Nzrpi-kzlr kx Nzaelwapxngr 12:3-4
 drtwr ngrde kx enjrl kratq ngr enjrl amrlx kcng Heven (1/3) nzxpqbrrng
 badr Setzn x sc tznginipedr drka'.

Kzdu-kzng drtq Setzn x nwz-wz-krdeng nidr seleng:
 Mepokia x nou nzpokiangr amrlx [Jon 8:44],
 Beelsebol, kc drtwr ngrde kxetu r ma ngr wq [Matiu 10:25; 12:24-27; Mak
 3:22; Luk 11:15-19],
 kxetu r drka' [Matiu 9:34; 12:24; Mak 3:22; Luk 11:15],
 kxetu r nrlc ka [Jon 12:31; 14:30; 16:11],
 kxetu r drka' kcng tzmnncng mzlllxlr [Efisz 2:2],
 enqmi r leplz kxmwati drtwrde nidr [Matiu 13:39; Luk 10:19; 1 Timoti
 5:14; 1 Pita 5:8],
 krkc Tqdrka'ngr [Matiu 5:37; 6:13; 13:19, 38; Jon 17:15; Efisz 6:16; 2
 Tesalonika 3:3; 1 Jon 2:13-14; 3:12; 5:18-19] x
 laion kc tqamwxlr-ngrde leplz mz nzetukr natqde, [1 Pita 5:8].

Kxmule-esz' Setzn matq-esz'ngr, a' aovxitxo Jiszs kc tqkamle bagu zmatq mz nzaovxio-kz-krgu murde ma tqatrkatile nigu. Setzn krlz-txpwlzle nzmnncngr me esz' mz mzli kxesz', x atwzlr-ngrbzle drka' nedeng mz nzale-krdr nzewz-krde. Nrlc kqlu mz Nzryrngrkxtr, kx nzycmnetr-ngrdr Setzn badr drka' nedeng. [Matiu 7:22; 10:5-7; 12:28; 17:18; 28:18; Mak 1:34, 39; 3:14-15; 6:7-13; 9:38; 16:9, 17; Luk 9:1, 49; 10:1-20; 11:20; Jon 16:33; 17:15; Rom 16:20; 1 Korint 15:27; Efisz 6:16; 2 Tesalonika 3:3; 1 Jon 2:13-14; 4:4; 5:4-5, 18]

17.4 mqngr leplz kxnxbzpeng—(*spirits of dead people*)

Mqngrdr leplz kxnxbzpeng nzvz-rlrung Heven o Hxl. Trnzmncung mz nrlc ka x trpnzngr nzokatr-krdr o nzatrkti-krdr leplz o nzycmne-krbzlr badr. Kzdung mzli mz nibr nzbzkr doa, nzkriz leplz nzrmcngr da kx nzobq-krde apule doa kc tqbz. A' krla nginepwz kzdq drka' kc tqabzle nzesabtingr nidr. Gct tqrlr-ngrpwzleu mqngr doa kx nzbzpeng nzyzlu-mou-krmlr x nzycmne-krbzlr badr leplz mz nrlc ka. A' nzwrdi li kc tqrlr-ngrbz Gct mz mqngr doa kxnxbzpeng nzycmne-krbzlr badr leplz kxnxlubeng. Nzwrdi kc kai kaputrp mzli kx King Sol ycmnetr-ngrbzle mz mqngr kxbz. [1 Samwel 28:8-19] A' profet Samwel ycmne-plztitrle Sol mz nzale-krde da lc tqtrka. Nzwrdi krali kaputrp mzli kc Mosis x Elaeja tzadcpx-lzbq-ngrbzlr mz Jiszs mz newz. [Matiu 17:3; Mak 9:4; Luk 9:30] A' Jiszs pi-kzple bagu da kx kaputrpz mz leplz mzli kx nzbz-ngrdr mz be ngr Lasarus x ncblo kxrngisc mz Luk 16:19-31. Mc kz Hibru 9:27.

18 Kxnxmcpx—(*Christ*)

'Kxnxmcpx' tekqtr natq lr Grik kc tqngi 'Kraes' x natq lr Hibru kc tqngi 'Mesaea.' Kraes x Mesaea drtwr ngrdr kxmu-txpwlzle esz', mz nzngini-krde, 'kxnzaelu tolo.' X mz nzvz-nqblq-krde nqmq kr lr Israel, nzrpuliongrbz tolo mz kzdq doa, mz nzmcpx-krdrle mz nzngini-krde profet, o pris, o king. Kxnxmcpx nide kxarlapx kc tquesalz-ngrbz Gct kx na-atwzlr-ngrbzle mz leplz nedeng. [Nou 3:15; 49:10; 2 Samwel 7:11-16; Sam 22; Sam 40; Sam 110; Asaea 9:14; 11:1-7; 40:3-11; 42:1-4; dckrlzdeng 49 x 53; Jeremaea 23:5-6; Daniel 9:25-27; Sekaraea 12:10-14; Hagai 2:6-9; Malakai 3:1] Mz Nzryrngrkxtr nzkqle-kzpz nide:

'nei Ebraam,' [Nou 22:18]

'laion,' [Nou 49:9]

'laion kc tqvzpxm mz nqvi lr Judz' [Nzaelwapxngr 5:5],

'profet,' [Lou Kcpwz 18:18]

'kxnzaelu tolo,' [Sam 2:2]

'king rnge,' [Sam 2:6]

'mrlxnge,' [Sam 2:7, 12]

'ncblo kxtr nem,' [Sam 16:10]

'kxetu rnge,' [Sam 110:1]

'pris,' [Sam 100:4]

'Immanuel,' kc drtwr ngrde Gct mnmc bagu, [Asaea 7:14]

'kxokatr kxmyapxbz, Gct kc tqrninr, Trte kc tqmnc zvz, kxetu r nrwx,' [Asaea 9:6]

'king kc tqvzpxm mz nqvi lr Devet,' [Asaea 9:7; Jeremaea 23:5-6]

'Zluli r Yawe,' [Asaea 40:5]

'kxnxawz nenge,' [Asaea 42:1]

'natq Gct rgu,' [Asaea 40:8]

'mrlx leplz' [Daniel 7:13-14; 10:16-18].

19 kxnxrmailzng r lr Jiu—(*Jewish leaders*)

**19.1 kxnzrmailzng kx nzmyapxbzng mz Nzryrngrkxtr Kc Kai—
(important Old Testament leaders)**

19.1.1 **Ebraam**—(Abraham)

19.1.2 **Mosis**—(Moses)

19.1.3 **Samwel**—(Samuel)

19.1.4 **King Devet**—(King David)

19.1.5 **King Solomon**

19.1.6 **Elaeja**—(Elijah)

19.1.7 **Melkesidek**—(Melchizedek)

19.1.8 **kxnzryrlqng drtwr**—(judges)

19.2 lr Jiu kxnzrmailzng mz mzli nyz Jiszs—(religious leaders in Jesus' time)

19.2.1 **kansrl kx aclevele nqmq kr lr Jiu**—(Sanhedrin)

19.2.2 **Nardr Pris x Kaefzs**—(High Priest & Caiaphas)

19.2.3 **kxnzetu rdr pris**—(chief priests)

19.2.4 **pris kcng nzvzpxmqng mz nqvi lr Livae**—(Levitical priests)

19.2.5 **dzbe Sadiusi**—(Sadducees)

19.2.6 **lrtzlvzng**—(elders)

19.2.7 **kxnzalvztrng mz Lou sc Mosis**—(Scribes, teachers of the Law)

19.2.8 **dzbe Farzsi**—(Pharisees)

19.3 **king kcng mz Nzryrngrkxtr**—(kings in the Scriptures)

19.3.1 **king kcng drtqdr Herot**—(kings named Herod)

19.4 **pulis ngr Mangr-nzangiongr Yawe**—(temple guards)

**19.1 kxnzrmailzng kx nzmyapxbzng mz Nzryrngrkxtr Kc Kai—
(important Old Testament leaders)**

19.1.1 **Ebraam**—(Abraham)

Be ngr nzlukr Ebraam sa tqycpxm mz Buk Ngr Nou 11:26–25:11. Mncpe kai, zbz esotrpz mz yiz kx siu-li (2000) yrkrpx x Jiszs kc mzte tzmc-ate. Yawe mcpxle nide mz nzngini-krde trte leplz nedeng amrlx, murde brti drtwrde Gct nzrka-krbzle bade da kc tqesalz-ngrbzle bade. Delc tqnginide melrmqdr lr Israel kcng amrlx. Nzrlxngitikr Ebraam aelwapx-ngrmle bagu drtwr ngr nzrlxngitingr angidr.

Drtq Ebraam ngi kai Ebrzm. Gct ycmnebz mz Ebrzm mzli kc yiz ngrde tqngingr 75 le [Nou 12:4] x pibzle bade narlaszle kandre nyzde x navz mz kzdq kz nrlc kx nakabzle bade. Gct esalz-ngrde kx Ebraam na-amrlzle leplz amrlx mz nrlc. [Nou 12:2-3]. A' mz nzmnc-krde mz nrlc, mncpxm mz kzdq tent x trnginyzdeu drtc' lc tqmnc-ngrde. Ni-alode lrnarnrlc mz drtc' kzble. X Gct atutrlle da kc tqesalz-ngrbzle bade mzli kx kabzle drtc' lc mz lr Israel kcng tzvzpxmqng mz nqvi lrde. X Ebrzm lxngitile Gct nzatutr-krde da kx esalz-ngrde, kxmule-esz' trmcieu nzngida-krde. [Nou 12:7]. Mz nibrde Gct esalz-ngrbzle bade nzrngine-krde neidung kxkqlu, rblx nzrlwxngr. [Nou 13:14-16; Nou 15:5-6]. X Ebrzm lxngitile Gct nzatutr-krde nzesalz-krde, kxmule-esz' mz nzobq-krde rblx, murde olvz rde, Sarai vz-nrbalq tr-rngineu, x Ebrzm ngipe olman. X nzbrkr drtwrde lc atubqtile nide mz nzobqkr Gct, kxmule-esz' tryrplatitru narde kxnamu nzngida-krde. Nzrbtingr drtwr lc ngi nou Nrpakxmrlz. Murde nztabqkr kxnzrlxngiting amrlx vzpxm mz nzabtrpzlr drtwrdr mz Gct nzatutr-krde nzesalz-krde mz nzarlapx-krde nidr mz nzbzkr Jiszs. Delc Ebraam nzrpibz 'trte kxnzrlxngitng amrlx.'

Mzli kc Ebrzm yiz ngrde tqngingr 99 le, Yawe aelwapx-lzbqbz bade x yrlqle kzdq Nzesz'tikr Drtwrdr badr. [Nou 17:1-22] Mzli lcde, Gct tekqtrpzle drtqde Ebrzm, kc drtwr ngrde 'trte kx nzamyalz,' nangi Ebraam, kc drtwr ngrde 'trte doa kxnzkqlung.' Gct esalz-mou-ngrbzle

bade nzka-krbzle neidu kxnzkqlung. X rkabz natq mz Ebraam x neidu lrdeng amrlx mz nzrpakrngr ngi dalr rkx ngr Nzesz'tikr Drtwr Gct badr Ebraam x neidu lrdeng. Gct tekqtr-kzpze drtq olvz r Ebraam, Sarai nangi Sera, x esalz-ngrbzle mz Ebraam kx Sera sa nanginede dq doa ncblo, mz nibr kzdq yiz abzo mzli lcde, kxmule-esz' yiz ngrde ngipe 90. Ebraam lxngitile natq Gct x sc tqpakr-lzbq x pakr-kzle ncblo kx awzleng amrlx mz ma nyzde. X abrtrpzle drtwrde mz Gct mz nzatutr-karde da kx esalz-ngrde. (Sarai x Sera drtwr ngrdr esz', ngi 'inyx king.' Gct nztekqtr-krbzle drtqde yctr mz nzrpingr kx sa na-alele da kx blepxbz mz nzlu-karde.)

Zbz Ebraam sc tqaenzlitipele yiz nzpnu-li-nrade-nzlvqn (25) mz Gct nzatutr-karde nzesalzngr lc. X nzbritkr drtwrdr Gct trnrgopeu, a' nxzplrkde etunepx zvz. Dekc tqngini-ngrde lrpzki kx myalz kc navz-nqblqku mz nzrbtingr drtwrgu Gct. Sera mikale mrlxde lc, x yrlqbzlr drtqde ngi Aesak. Mz nibr Aesak nzetupe-karde mz nzngipekr doa ncblo, Gct abzpxle nzrlxngitikr Ebraam. Murde pibzle mz Ebraam nznibq-karde mrlxde nanginide blz. [Nou 21:1-19] Ebraam rlr-ngrbzle mrlxde x brti drtwrde kx Gct sa na-atulz-mople nide mz nzbzngr, mz nzatutr-karde nzesalz-karde kx nangi nede neidung kxkqlu kx navzpxmqng mz Aesak. Ebraam mz nzrlr-krbzle nzbzkr mrlxde mz Gct aelwaxp-ngrmle bagu kxmu Gct nzrlr-krbzle mrlxde, Jissz mz nzarlapx-karde nigu. Gct amrlz-zlwzle Ebraam murde brti drtwrde Gct x vqt drtqde nzvz-nqblq-karde natqdeng. X aelwaxp-ngrmle bagu kxnamu kxnzxngitilr Jissz amrlx nzmu na-abrtrpzlr drtwrdr mz Gct x da kx esalz-ngrdeng. Da kqlu mou nzyr kx ycmnetr-ngrde nzrlxngitikr Ebraam mz Hibru 11:8-19.

19.1.2 Mosis—(Moses)

Mosis nide kzdq lr Israel, x abzo mz nibr Ebraam krlzbzle mzli kc tzmcngr mz Mosis yiz 600. X abzo mz Mosis krlzbzle nzrmcngr mz Jissz yiz 1400. Mosis mzte nzmc mzli kc lr Israel tzngini-ngrdr kxnzawznrbalqng mrkc Ijipt. Be ngrde yzutr mz Buk ngr Nzrlaszngr dckrlzde kc esz'. X da kcng tqprtizng mz nzlu-karde nzyrtiong mz buk kcng tqyrl, krlcng Nzrlaszngr, Livae, Nzkqlu-krdr, x Lou Kcpwz. Mosis yr-kzle Buk Ngr Nou. Dekc buk lcng nzlvqn tzrpi-ngrbz 'Buk scng Mosis.' X Buk lcdeng nzrpi-kzp 'Lou sc Mosis,' x 'Buk ngr Lou,' x 'Loukxtr', murde mz buk lcng nzycpxmqng elr natq kcng amrlx tqkabz Gct mz leplz nedeng kx navz-nqblqlr. Kzdu mzli sa naxlr-kzku buk lcng nzlvqn nzrpi-kzpzn 'Pentatuk' o 'Tora'. Murde mz natq lr Grik 'penta' drtwr ngrde 'nzlvqn', x mz natq lr Israel 'Tora' kc drtwr ngrde 'nzalvztr-ngrng'.

Mzli kc Mosis yiz ngrde tqkrlz-ngrbzle nzpnu-rtqmz (80), nginide ncblo kx avzo-lqbq, myaszlzle leplz amrlx mz nrlc. [Nzkqlu-krdr 12:3] Gct ycmnebz bade mz nounc kc tqmrbz tqwou, [Nzrlaszngr 3:2-4:17] x pibzle bade namailpxmle lr Israel Ijipt mz nzngini-krdr leplz nedeng, murde narlapxng x ma tzwz-nrbalq-zvzng. Gct nzobq-etrng mz Mosis mzli kc tqycmne-ngrbzle bade. [Nzkqlu-krdr 12:6-8] X mz nzmckr Mosis Gct, mz drtwr lr Israel Mosis nide profet kc tqmyalz-esz'ngr x myaszpxle profet kcng amrlx. X Mosis ni-kzde profet kc ayrrnrngr tqatwzlr-ngrbz Gct mz leplz nedeng. Wz-ngrde rkx x da kxnzmatqng kxkqlu. Vzmipxmle lr Israel Ijipt x mailztrleng lzke kc tzrpibz Saenae. Gct ycmnebz mz lr Israel elr x pibzle Lou scdeng mz Mosis. Gct yrlqle Nzesz'tikr Drtwrdr badr lr Israel. X sc tqesalzpebz badr kx sa nzamrlzle nidr, x namyalz nzmu navz-nqblqlr natqdeng kcng tqpibzle mz Mosis. A' esalz-kz-ngrbzle kx napibqtile nidr nzmu naxpqbrrlr-ngrdr natqde lcng. [Lou Kcpwz dckrlzde 28.]

Mosis mailztile lr Israel myaszpxle yiz kx nzpnu-pwx (40), murde naprtrng mz kandre kc tzrpibz Kenzn, tquesalz-ngrbz Gct mz lr Israel. Krlc kandre lcpwz tquesalz-ngrbz Gct mz doa kx nzvzpxmqng mz nqvi lr Ebraam. Mz nibr nzesalz-krde, yiz esotibzle kx trtqki-esz'mz (600) x da kc tquesalz-ngrbz Gct sc tqatutrpele. Mosis esz'-krde trprtr-pnzu mz drtc' kc tquesalzng Gct murde kzdg mzli xpqbrr-ngrde natq Gct. [Nzkqlu-krdr 20:1-12; Lou Kcpwz 34:1-7] Krlc aelwapx-ngrde kx kxmule-esz' ncblo ne Gct kx nzmyalzng, a' nzkrlzlr ntzaongr mz alwx. A' Gct ipqpxbzle alwx ngrde x Mosis tresakiu mz nzngini-krde kxrmailz kxmyalz.

Mz mzli nyz Jisz, Ebraam nldr mz Mosis nldr ncblo kcng nzling tzamrlue zlwz lr Jiu.

19.1.3 Samwel—(Samuel)

Mz nibr lr Israel nzaovxio-krdr drtc' kc Kenzn, x tqngipe kandre nyzdr, Gct mcpixe kzdung leplz mz nzngini-krdr kxnzrmailzng kx naokatrli nldr. Leplz lcng nzrpibzng 'kxnzryrlqng drtwr.' Mzli lcde lr Israel trgall king ngrdr, murde Gct nide txpwz king ngr lr Israel, x aclveleng mz nzachvekr kxnzryrlqng drtwr x profet nedeng. Samwel nide kxryrlq drtwr kx rmnrpe-ngrbz, x ni-kzde profet. Buk lc tqngi 1 Samwel ycmnetr-ngrde nzlu-krde. X ngalrdeng kang kqlu mz Nzryrngrkxtr nzycmnetr-kz-ngrdr nide. Yiz trtqki li o tq vztx mz nzrmcngr mz Mosis, x Samwel kc mzte tzmc-ate. X esotibzle yiz kx 1100 mou x Jisz kc mzte tzmcpe kz. Gct kqlele Samwel mz nzngini-krde profet mzli kc tqnginibe-ngrde doa ncblo.

Mz mzli nyz Samwel, lr Israel nzpxtxpx-ngrdr Gct nzngini-krde king rdr x suti drtwrdr kzdg ncblo kxngi king murde na-apu-kzlr kandre kcng tzmnc-mrbrng. Kxmule-esz' Gct trabrtz-ngrdeu da lc, a' pibzle mz Samwel kx nakabzle dq king badr, mz nzpulio-krbzle tolo mz narde. Zbz sc tzpuliopebzlr mz nar kzdg obla drtgde Sol, ncblo kxboi x nzobq-krde brngz, mz nzngini-krde king ayrnrngr mrkc Israel. Tolo ngi rkx ngr Mqngrkxtr, x nzrpulio-ngrbz tolo mz nar ncblo ngi rkx kx Gct mcpixe nide nzngini-krde king ngr Israel x yrlqobzle Mqngrde bade. Lr Israel lcng nzabrtz-ngrdr Sol. A' Samwel rpi-kaipzle badr kx king rngisc zmatq ngr nzbatr-krbzle badr nzxpe-krdr takes, x mz ncblo ngrdrng nzprtr-krdr mz ami nede. X mz nzmu-krde lcde, trna-abrtz-zvz-ngrdru king ngrdrng kalr.

Zbz Sol trvz-nqblqleu nqmq kr Gct mzli kxboi. X mz nzxpqbrr-krde Gct, sc tqpxtxpxpengr Gct nide x Mqngrkxtr rlaszle nide. X mzli kc Sol tqnginibe-ngrde king, pibz Gct mz Samwel narpuliozb tolo mz nar kzdg kz king. Rpibzle kx namcpixe kzdg obla, drtgde David, mrlx Jesi, mz nzngini-krde king krali.

19.1.4 King Devet—(King David)

Devet vzpxm mz nqvi lr Judz. X be ngrde yzutr mz 1 Samwel 16 x sc tqvzpe krlzbzle me yrkrkipx buk lc. Buk 2 Samwel x Lou Kcpwz nzycmnetr-kz-ngrdr nzlu-krde. 1 King 1:1-2:12 ycmnetr-ngrde nzbzkr King Devet. Abzo mz mzli nyz Devet krlzbzle nzrmcngr mz Jisz, yiz 1000. Gct mcpixe Devet mz nzngini-krde king ngr Israel krali, murde nqmq krdeng nzapulr nqmq kr Gct. Devet avzo-lzbq, a' brti zvz drtwrde kx na-alele da kx matqting mz nzokatrkr Gct nide. Drtgde trmyau mz nzmrzti-krde Gct. Ni-kzde profet x yrlle Sam kx kqlu. X ni-kzde kxrmailz kxmyalz. Mz nzngini-krde king, vz-nqblq-zvzle Lou sc Gct x nzachve-krde tubq.

Mzli kc Samwel tqipulio-ngrbzle tolo bade mz nzmcpx-krde nide, sc tqnginibede obla. Mzli lcde Sol sc tqnginibede king. X kxmule-esz' mcpx Gct Devet mz nzngini-krde king kzble mou, a' mcpxpe-kai-kzle Sol. X Devet abrtz-ngrde nzaenzlingr krlzbzle mzli kx nayrlqngr Gct nide mz nzacve-krde. X rblxbz bade nzotangr o nzrnibqngr Sol mzli lc tqaenzli-ngrde. Nzwrde li kx nanibq-ngrde Sol, a' trale-pnzleu, murde Gct kx yrlq-kaile Sol nzngini-krde king. X mzli lcde, Devet nide ncblo ngr vea kx xplr, x lr Israel kxnzkqlung nzmrlztilr nide. Mz nzmu-krde lcde, dobungr King Sol x sc tqrpile nanibqpele nide. Devet plctx, x yiz kqlutx kx ayctingr Sol nide x tqabzle nzrnibqngr.

Mz nibr nzbzkr Sol, Devet sc tqnginipede king x Israel nginide kzdq kandre kx xplr. Rpile nawztile kzdq Mangr-nzangiongr Gct, a' tr-rlr-ngrpwzu Gct bade, murde nide ncblo ngr vea. Gct pibzle bade kx mrlxde Solomon sa nawztile Mangr-nzangiongr lcde. A' Gct abrtzlvzle Devet x yrlqbzle Nzesz'tikr Drtwrdr badr. Mz Nzesz'tikr Drtwr lc, Gct esalz-ngrde kx king kcng na-aclvelr Israel nangi zvz doa kx vzpxm mz nqvi lr Devet. [2 Samwel 7:1-16] Abzo mz mzli nyd Devet, king ngr Israel amrlx nzvzpxmqng mz nqvi nyd. Mz nibrde profet nzrpilr kx Kxnzmcpx navzpx-kzp mz nqvi lr Devet. X Jissz sc tqatutrpele natq lc murde vzpxm mz nqvi lr Devet x ni-alode king ngr leplz ne Gct amrlx.

Devet vz-nqblq-zvzle nqmq kr Gct. A' kzdq mzli tao mz alwx x pnatile olvz r kzdq ncblo ngr vea nede. Zbz rkabz natq mz kamadz kx, ncblo kc na-atupx kai mz nzotangr murde nanibq. [2 Samwel 11] Neitzn kc tqngi profet mzli lcde, sc tqycmne-plztrpele Devet mz alwx ngrde lc, x sc tqtekqtrpele drtwrde mz nzplzpx-krde alwx lc. Kxmule-esz' a' ayrplapx Gct nide mz nzkatpx-krbzle nzlukr itoto nede kx mzte nzmc ate. [2 Samwel 12] Kzdq mzli mrlxde, Absalom, abzle nzngini-krde king x Devet plctx murde ma tqnibq Absalom. [2 Samwel 15-18] Devet trnzotaung ncdrl, murde lxngitile kx nangini-zvzde king nzmu kx tqrler-ngrbz Gct le. Devet nide king ngr Israel kx myatxlz-esz'ngr, x aclvele Israel yiz nzpnu-pwx (40). Mz nibr nzbz-krde, mrlxde Solomon tekqtrle nide.

19.1.5 King Solomon—(King Solomon)

Be ngr Solomon sc tqyc mz 1 King dckrlzdeng 2-11; x 2 Lou Kcpwz dckrlzdeng 1-9. Solomon nide obla mzli kc tqngini-ngrde king, x krlzle kx rblx nzngingr king kxbrngz. Gct adcpx-lzbqbz mz Solomon mz nzrmwible-krde x rpibzle nakabzle da kx rlxtibzle. [1 King 3:5-15] Solomon avzo-lzbq x rlxtibzle nzyrplapxng, murde nanginide king kxmrlz. Gct abrtztx-ngrde trnzrlxti-krpwzleu nzrngiscngr o nzlungr kxboi o nzrnibqngr enqmi rdeng. Zbz kabzle bade nzyrplapxng kc tqmyaszlzle leplz amrlx. Batr-kzpz Gct nzrngisc-krde da x zmatq. Leplz nzvzmqng mz nrlc tulvzo murde naxlrlr natqde mz nzngini-krde ncblo kx yrplapx. Israel ngitx kandre kx xplr, kx rngisc. King Solomon mrlztilde Gct x wztile Mangr-nzangiongr Yawe kc tqrpingr trtede Devet kx nawztile.

Mzli lcde, ngi nqmq krdr kx nzrlrpx-ngrbz mz ncblo nzyrlzti-krde olvz kx myaszle olvz kxesz'. X kxnznginidr king olvz rdr kqlu. Solomon olvz rde kx yrlztilde trtqki-rlimz (700) x olvz trtqki-tq (300) kx mwimiti-kzleng. [1 King 11:3] A' nzkqlukr olvz lcng nzmc-mrbrng. Yrlzti-ngrdeleng nangi dalr nzmc-nrwx-krdr badr kzdung kz kandre. A' olvz rdeng nzangiolor gct kxtrnznginidru Gct angidr. Solomon wz-ngrde kzdung nrlc kx na-angio-ngrdr gct rdrng. Zbz sc tqprtrpe-kzpz mz nzangio-krdeleng. [1 King 11] X Gct kc drtwrde tqngyape mz nzale-krdele, x rpile kx

nakapxle kzdung nqvi lr Israel mz nzaclve-krde. A' aenzlipwz mz nzbzkr Solomon mz nzale-krdele murde trtede Devet nide ncblo kxmrlz. Zbz mz nibr nzbz-krde, mrlxde, Reoboam tqnginipede king. Tryrplapxu x nqvi lr Israel kcng nzpnu nzesaprler-ngrdr nide, mz nzvz-nqblq-krdr ncblo kc drtqde Jeroboam. X Jeroboam lc tqngipe king ngr kandre kc Israel. A' nqvi lr Judz nidr mz nqvi lr Benjamin, sc tzvz-nqblqbelr Reoboam, mz nzngini-krde king r kandre kc Judz, murde Reoboam vzpxm mz nqvi lr Judz. Mc kz 'Israel,' 'nqvi lr Israel kcng nzpnu-esz'-nrade-li,' x 'kandre kc Judz.'

Kxmule-esz' kzdung mzli King Solomon tao mz alwx, a' mz kzdu-kzng mzli sc tqngini-kzde ncblo kx yrplapx. Yrle kzdq nrlar buk ngr Nzyrplapxngr, x yr-kzle Nabz ne Solomon x Kxalvztr. Solomon aclvetile mz nzngini-krde king yiz nzpnu-pwx (40). Trkrlzkkuu kx tekqtrle nqmq nr drtwrde x sc tqbz-ate, o trtingr.

19.1.6 **Elaeja**—(Elijah)

Elaeja ngi kzdq profet ne Gct kx myalz x alele rkx x da kxmatq. Yiz 75 otxpe mz nibr King Solomon nzbz-krde x Elaeja kc tqmncpe. Atwzlrngr Gct nide mz kandre kc Israel mzli kc Ehab tqnginipe-ngrde king elr. Ycmne-plztritle Ehab x lr Israel mz nzangio-krdr gct kxbleng. X be ngrde yclzm mz 1 King 16:19 vz-krlzbzle 2 King 2:12. X mou, mz 2 Be Ngrdr 21:12-15 pibzle mz King Jehoram ngr Judz kzdq nrpa kx vzpxm mz Gct. Elaeja trbz-pnzu, a' Gct vzmilzle nide Heven mz kzdq sariot ngr nyr. [2 king 2:11] Kxnxawz nede Elaesha mcle da lc, x sc tqnginipede profet ne Gct mz nibrde. Yiz 400 otx, profet Malakai pipx-kzle kx Elaeja nayzlu-kaip x mzli kc na-ayzlu-ngrbz Yawe da mz leplz kc ate. [Malakai 4:5-6] Jiszs rpile kx Jon Kxawrkxtr atutrpele natq lc, murde alele nzwzngr kcpwz tqale Elaeja. [Matiu 11:14; Malakai 4:5]

19.1.7 **Melkesidek**—(Melchizedek)

Be ngr Melkesidek yclzm mz Nou 14:18. Melkesidek mncpe kai x Gct sc tqpi-atebzle drtqde lc tqngi 'Yawe' mz Mosis. Drtwr ngr Melkesidek nzyapwx-dalitipx mz Hibru 5:6-11 x 7:1-28. Mc kz natq kxnxtopwzng elr. Nide king ngr taon kxetu Salem, (kc nangi Jerusalem kalr). Mz natq lr Hibru, 'salem' drtwr ngrde 'nrwx,' x mz nzmu-krde lcde, nide kxetu r nrwx. Drtqde 'Melkesidek' drtwr ngrde nide 'King ngr nztubqngr' x ni-kzde kzdq pris ne Gct. Kxnxmcpx apule Melkesidek murde ni-kzde pris x king. Profet kcng pnz nzrpilr kx sa nangini Kxnxmcpx Kxetu r Nrwx [Asaea 9:6] x king kc tqaclvele leplz mz nqmq kxtubq. [Asaea 32:1; Jeremaea 23:5-6. Mc kz Nzaelwapxngr 15:3]

19.1.8 **kxnxryrlqng drtwr**—(judges)

Mosis mailzpxmle lr Israel mrkc Ijipt krlzbzle nrlar nrlc kc tqesalz-ngrbz Gct nakabzle badr. Zbz Josua mailzleng mz nzaovxio-krdr x nztwzlr drtc' lc. Buk ngr 'Kxnxryrlqng Drtwr' ycmnetr-ngrde mzli lc trgalr king ngrdr. A' Yawe nide king rdr. Mzli lcde, nzmu lr Israel trnzalelru da kx pibz Yawe na-alelr, ayrplapx-zvzleng mz nzrlr-krbzle mz enqmi rdrng nzaovxio-krdr nidr. Zbz mzli kc lr Israel drtwrdr tqyzluperde, Gct mcpxle kzdq doa mrkc Israel mz nzngini-krde kxryrlq drtwr, mz nzokatr-krde nzaovxio-krdr enqmi rdrng. Doa lcng nzpnu-esz'-nrade-tq (13) mz buk lc nidr seleng: Otniel [Kxnxryrlqng Drtwr 3:5-11], Ehud [3:12-30], Samga [3:31], Debora x Barak [4:1-5:31], Gidion [6:11-8:35], Abimelek kc tqngi kxryrlq drtwr kx vz-rbr [9:1-57], Tola [10:1-2], Jaer [10:3-5], Jefta [11:1-12:7], Ibsan [12:8-10], Elon [12:11-12], Abdon [12:13-

15], x Samson [13:1–16:31]. Mc kz Nzalvztrngr Kxmyapxbz mz Samwel kc tqngi kxryrlq drtwr kx rmnr-ngrbz.

19.2 **Lr Jiu kxnzrmailzng mz mzli nyz Jisz**—(Jewish leaders at the time of Jesus)

19.2.1 **Kansrl kx aclvele nqmq kr lr Jiu**—(Sanhedrin, Council of the Jews)

Kansrl kc tzrpibz ‘Sanhedrin’ mz natq lr Inglis, ngi dzbe lr Jiu kxnzrmailzng mz mzli nyz Jisz. Kandre ngr Israel yclzbz mz zmatq ngr king kxetu kc Rom. Pcntizs Paelzt nide gavzna kc tqaclovele Provins ngr Rom kc Judiz, mrkc tqycngr Jerusalem. Provins ngr Rom kc Gzlili, mrkc tqyc-ngrng mztea Naszret x Kzpznizm, aclve Herot Antipas. A' Herot apupwzle kzdq gavzna ngr Rom mz nzmnclz-krbzle mz king kxetu kc Rom. Kansrl ngrdr lr Jiu lc aclvele lr Jiu mz kxmu navz-nqblqlr Lou sc Mosis. X leplz kcng trnzvz-nqblqlru lou lcng nzkotqng mz Kansrl lc. Kxzprtrng mz Kansrl lc nide Nardr Pris, pris kxzmyapxbzng, kzdung kxszalvztrng mz Loukxtr, kzdung Farzsi x kzdung kz lr Jiu kxzmyapxbzng. Gzpmn ngr Rom rlr-ngrbzle mz Kansrl kc nzryrlq-krdr drtwr mz Lou sc Mosis, x nzbatr-krbzlr mz leplz nxzpe-krdr faen, x nzrpi-krdr kx leplz navipla, x nzadwatrngr leplz mz presin. A' trnzrncung zmatq mz nzayrplaxngr leplz mz nzbngr, murde Lou ngr Rom rpile kx gzpmn ngr Rom txpwz kx rngisc zmatq lc. Mzli kc ncblo ngr Kansrl tzyrlwr-lxblr-ngrdr mz nzrpi-krdr kx Jisz vz-rbr, trnzvz-nqblqlru Lou sc Mosis, murde rpwa'-ngrde da lcng tq: 1) nzyrlwrpx-lxblrngr mz nrlckxbq [Matiu 26:57–27:1], 2) nzyrlwr-lxblrngr mz zbrq kxtr [Luk 22:7 rpile nzyrlwrpx-lxblrnxng mz zbrq ngr Nzamyangr], x 3) nzayrplaxngr doa mz zbrq kcpwz tkot-ngrde. Pulis ngr Mangr-nzangiongr nzmnclzbzng mz zmatq ngrdr x nzrlolvzng leplz x nzayrplaxlrng mz nzvz-nqblq-krde natq Kansrl lcde.

19.2.2 **Nardr Pris x Kaefzs**—(High Priest and Caiaphas)

Gct kqlele ncblo mz nqvi lr Livae mz nzwzngr mz Mangr-nzangiongr. A' lr Livae kcng tzvzpxmqng mz nqvi lr Eron, tznginidr txpwz pris. Eron nide Nardr Pris ayrnrngr. X Nardr Pris esz'txupwz mz mzli kxesz'. Mzli kx nzryrlqngr kzdq ncblo nzngini-krde Nardr Pris, nzwzngr lc vz-krlzbzle nzbnz-krde. Nide lr Jiu kxrmailz kx myatxlz-zlwzbz. X nikzde kc tqaclovele Kansrl ngrdr. Nide txpwz pris kc tzrlr-ngrbz nzprtr-krde Mrkc Tqtr-esz'ngr mz Mangr-nzangiongr. X vztr-ngrde mrlcde zbrq esz'txu mz yiz kxesz', mz Zbrq ngr Nzrkatxngr Alwx. King ngr Israel dekc tqrmcpwpwz Nardr Pris kzble mou mzli kx bzngr krkc kai. Nzmu nanginide king kx brngz, mcpwz-kzle ncblo kx brngz mz nzngini-krde Nardr Pris. A' nzmu nanginide kxdrka'ngr, da kc tqwai king Herot, mcpwz ncblo kx xpele nide mz trau kx kqlu mz nzrtwz-krde nzwzngr lc.

Mzli kc Jisz tqngini-ngrde doa ncblo, Anas sc tqngi Nardr Pris. A' mz yiz kc 15 AD gzpmn ngr Roman sc tqrtulrtr-ngrbzle mz Anas nzaprpwz-lzbq-krde. X nzmcpx-alzulr kzdode Kaefzs mz nztekqtr-krde nide. Mz nzmu-krde lcde, mz mzli kcng tqalvztrngr Jisz x tztqlvztr-ngrde mz kros, Kaefzs nide nardr Pris. A' Lou sc Mosis rpile kx Anas nzmu nanginide Nardr Pris nakrlzbzle nzbnz-krde. X mz drtwr lr Jiu kxszkqlung, Anas sc tqngibe Nardr Pris x Kaefzs mnclzbz mz zmatq ngrde.

Nzryrngrkxtr rpile kx Jisz nide Nardr Pris ngrgu kzble abzo mz nzylulupe-krde Heven. X nzlu-krde sa navz alo. [Hibru 7:11–10:22]

19.2.3 **kxszetu rdr pris**—(chief priests)

Mz pris ngrdr lr Jiu, kzdung nidr nzrmailzng, x krlcng nzrpibz pris kxnzetung kcng. X nzmncng amrlx ngrdr Jerusalem x nzaclveng Mangr-nzangiongr.

19.2.4 **pris kcng nzvzpxmqng mz nqvi lr Livae**—(Levitical Priests)

Mc ‘nqvi lr Livae’ x ‘nqvi lr Eron’ mz Nzalvztrngr Kxmyapxbz kc tqngi ‘Livae.’ [nabz 23]

19.2.5 **dzbe Sadiusi**—(Sadducees)

Sadiusi kcng tzmnncng mz mzli nyz Jiszs ngi dzbe lr Jiu kx drtwrdr esz'ti mz kzdung da. Ncblo kx nzprtrpqng mz dzbede lc nzayrputrpzng Farzsi, murde nzrlxngiti-krdr blepx-ngrbz badr. Nzaolvz-txpwzlr buk sc Mosis kcng nzlvqn tqngi Nzryrngrkxtr x nzpxtxpx-ngrdr buk kcng kz mz Nzryrngrkxtr Kc Kai. Sadiusi lcng trnzlxitlru da lcde seleng: nzlungr mz nibr nzbzngr, nzmncr enjrl x drka', kx Gct batrpzle da nzprt-zkrdr mz nrlc, kx Gct ayrplapxle leplz kxdrka'-ngrng x kabzle da kxmrlz mz leplz kxnmrlzng. X trnzlxitlru kx Gct sa na-atwzlr-ngrmle Kxnmcpk.

Pris kxnxkqlung x Nardr Pris, x kzdung leplz kxnrngiscng nzprtrng mz Dzbe Sadiusi. X kxmule-esz' nzkqlu-krdr pipz, krlbzle trtqki li o tq, a' nzrngiscng zmatq kx xpl. Pris kang kqlu nzmnlzbzng mz zmatq ngrdr murde Sadiusi kxnxkqlung nzprtr-kzng mz Kansrl ngrdr. Sadiusi lcng nznginidr kzte gzpmancr ngr Rom, x trsuti drtwrdr nzalengr da kx na-atrkatile drtwr gzpmancr kc Rom. Nzpxtxpx-ngrdr ncblo kznike nanginide Kxnmcpk, murde ma tqbatrpzle nzkapx-ngrbz zmatq ngrdr. Dzbede lc esakitx mzli kc lr Rom tzodati-ngrdr Jerusalem x Mangr-nzangiongr mz yiz 70 AD.

19.2.6 **Irtzlvzng**—(elders)

Lrtzlvz ngrdr lr Jiu nidr kxnzetung kx nzmyapxbzng. Kzdung nidr nzalvztrng mz Lou sc Mosis, x kzdung nzrmailzng mz mangr-nzkrka'ngr nydrng. Kzdung kz nidr ncblo kcng mz drtwr leplz nzngini-krdr kxnzetung. Nzokatrng mz nzrmailzng leplz x nzryrlqng drtwr mz nzvz-nqblq-krdr Lou sc Mosis. Nzrtxlzlbzlr nqmq kxkqlu kx nzrtulrtr-ngrbzlr mz lr Jiu nzvz-nqblq-krdr. A' nqmq lcng trnzycpxpqung mz Lou sc Mosis. Nzarsakrlrmilr nqmq krdr Lou sc Gct x nqmq lcdeng arblxbzle nzlukr lr Jiu. Mz nzmu-krde lcde, Jiszs pxtxpx-ngrde nzvz-nqblq-krdeleng. X lrtzlvz kxnxkqlung nztrka badr nide.

19.2.7 **kxnxalvztrng mz Lou sc Mosis**—(Teachers of the Law of Moses)

Leplz kxnxkqlung mz mzli nyz Jiszs trnzkrlzlu nzrlwxngr x nzryrngr. A' kxnxalvztrng mz Lou sc Mosis nznginidr ncblo kx nzkrlzlr nzrlwxngr x nzryrngr. Nzskul-ngrdr Lou sc Mosis x nqmq kcng tzrtxlzlx-mopwz lrtzlvz ngrdrng, x nzalvztrpzlr mz leplz. Nzryrong kzdung buk ngr Nzryrngrkxtr murde nangi kzdu kzble moung. Kxnxalvztrng mz Lou sc Mosis kxnxkqlung nzprtrng mz dzbe Farzsi, a' kzdung nzprtrng mz dzbe Sadiusi.

19.2.8 **dzbe Farzsi**—(Pharisees)

Dzbe Farzsi ngi dzbede kx etutxpxebz mz lr Jiu. X nzprtrng elr ncblo kx siu-esz'mz (6000). Tzsiklu-zvz-ngrdr Nzryrngrkxtr x nzmnc-krdr tubq zlwz. Nzycmnetr-ngrdr Nzryrngrkxtr x nzotablrr-zvz-ngrdr. Kzdung Farzsi nzprtr-kzng mz Kansrl ngrdr lr Jiu. Nzlxngitlru nzlungr kxboi, nzmncr enjrl x drka', nzbatr-krbz Gct da kc tqprtzbz mz nrlc, nzayrplapxkr Gct kxdrka'-ngrng, x nzatwzlr-krmle Kxnmcpk kalm. Nzamrlue leplz nidr murde drtwrdr pqtr zlwz mz nzvz-nqblqng Lou sc Mosis. X nzryrlqbzng nqmq kx kqlu murde ncblo kx vz-nqblq-zvzle

nqmq krdrng, rblx nzxpqbrrlr-krde Loukxtr. A' rblxtx nzrvz-nqblqng
nqmq lcng amrlx.

Mz drtwr dzbe Farzsi lcng nztubq-krdr myaszpxle leplz kxkqlu, x
nzobqszolr krkcng trnznginidru Farzsi. Nzaxtxbzlr dakxnxng nzwrde
li mz wiki kxesz', kxmule-esz' Loukxtr trpileu kx nzmu na-alelr da lc.
Mz drtwrdr, leplz natubq-txpwzng mz nike nzalelr mz nzvz-nqblq-krdr
nqmq kcng tzyrlq Farzsi lcng x Lou sc Gct. Nzrpilr kx nike pnz drtwr
leplz trngiu da kx myapxbz, a' ngi txpwz nike nzalelr. Mz nzmu-krde
lc, Farzsi kxnzkqlung nztaong mz alwx ngr nzglpx-lzbqngr, x trnzmrzlzti-
kzlsru kztedrng x tryc-ngru mz drtwrdr nidr. Rpi-ngrbz Jiszs kx nidr
blzpokiang, murde mz nzaotikr drtwrdrle kxnztubqtrpzng mz nzobqkr
Gct, a' mz nabzdr trnzmrzlzti-zpwxlru nide.

Aposol Pol prtr-kaipz mz dzbe Farzsi.

19.3 king kcng mz Nzryrngrkxtr— (*kings in the Holywritings*)

Mz nztekqtr-krgr 'king', nzrpi leplz kx natq lc nzkxmupwzlr esz'
badr 'bcnyr.' A' drtwr lc vz-rbr. Murde bcnyr nide ncblo kx rngisc,
a' king amrlx trnzrungiscung. X bcnyr nide ncblo kxbrngz, a' king
amrlx trnzmrzlzung. X bcnyr acuve-zpwxle leplz nedeng, a' kzdung king
trnzaclve-zpwxlru leplz nedrung. Leplz nzmnclzbzng mz zmatq ngr king
rdr. Mzbq ka king angidr kx nzmcncng mz nrlc nzpipzng. Murde nzmu
nangi king mrkc Inglzn, king lc tr-rngiscu zmatq angidr mz nzkapx-krde
natq kx navz-nqblq leplz. A' mz Nzryrngrkxtr, king rngisc zvz zmatq, x
leplz namnclzbzng bade x navz-nqblqlr natqde. Doa kx xpqbrlr-ngrde
king rde, x pxtpx-ngrde nzrvz-nqblqng natqde, x pivxitile nide, nzmu
nakrlzti king le, sc tqrpipele kx doa la nabz.

Mz Nzryrngrkxtr, 'king' drtwr ngrde ncblo kxmule lc. 1) Mailzle ami
nede mz vea. 2) Mz mzli r nrwx, yrlqbzle kzdung lou x ni-kzde majestret
kc tqrpile kx doa vz-rbr o trtingr. 3) Rngisc zmatq ngr nzrpipxngr kx leplz
nabz. 4) Rngisc zmatq ngr nzrpi-ngrbz mz leplz kx naxpeng takes. 5)
Rngisc zmatq ngr nzrpi-ngrbz mz leplz kx nawztrpzlr bade. 6) X mzli kc
nabz-ngrde, mrlxde kxetu nide kc natekqtrle nide mz nzngini-krde king.
Murde nzngini-krde king trvzpxpqu mz nzvotqkr leplz kcng tzmnclzbzng
bade. A' nznginikr ncblo king vzpxm mz trtede kc tqngi pnz king, o
mz nznibq-krde kzdq kz king mz vea x nztwz-krde zmatq ngrde, o mz
nzmcpxkr king kxetu nide mz nzngini-krde king kxtopwz kx namnclzbz
bade, o mz nzmcpxkr Gct nide mz nzpi-krbzlele mz profet nede.

Mz nztekqtrngr Nzryrngrkxtr mz Inglis nzrpibz kzdung king mz drtq
kx blepx-lxblrung. Murde king kxetu kc Rom nzrpibz Siss x king ngr Ijpt
nzrpibz Fero. King kc etu tqacivele kandre kxnzkqlung nzrpibz Empzrz.
X king kx mnclzbz mz king kxetu nzrpibz 'tetrak.' A' mz nzrtekqtrngr
natq lcng rpi-zvzku 'king' mz Natqgu. Mrlx king nzrpibz prins (prince)
mz natq lr Inglis. X mz Inglis nzrpi-kzpz kx Setzn nide 'prins ngr nrlc
ka.' A' mz Natqgu rpiku 'kxetu r nrlc ka.' A' trnzpipwzu 'king' o 'mrlx
king' murde sc tqmnclzbepz mz zmatq ngr Gct.

Jiszs nide king x rngisc zmatq amrlx myaszlxle da amrlx x leplz amrlx.
Mzli ka, da lc tropxpwu mz leplz kxnzkqlung. A' mzli kc nayzlu-ngrmlle
mz nzngini-krde king, leplz amrlx sa namnclzbzng mz zmatq ngrde x
narngisc zmatq amrlx. Mzli ka tryzluka-ngrmlle, krkcng tzpxpx-ngrdr
nide sa navzng mz Hxl. Murde krkcng tzmrzltilr nide x nzabrtzlvzlr
nzmnclz-ngrbz bade nidr txpwz kx nzmc-zpx-krdr badr.

19.3.1 king kcng drtqdr 'Herot'— (*kings named Herod*)

Ncblo nzpxwng lang nzblepx-lxblrng nzrpibz 'Herot' mz Nzryrngrkxtr Kc Ate. Herot ngi drtq ngr neidu. Herot kc kai tzpi mz Nzryrngrkxtr nzrpibz '**Herot Kc Tqmyalz.**' [Matiu dckrlzde 2; Luk 1:5] Nide dalr Kandre kc Idumea kc tzrpibz 'Edom' mz Nzryrngrkxtr Kc Kai. Kandre lc yckile mz ulu (south) ngr Prla Kxtrlu-ngru Da. Lr Edom lcng nzvzpxmqng mz neidu lr Isc, mzle Jekop. X mz yiz 130 BC, nztekqtrlr drtwrdr murde nangini-kzdr lr Jiu x sc tzvz-nqblqpeLR Lou sc Mosis. A' lr Jiu mrkc Israel trabru drtwrdr nidr x nzkqle-ngrbzlr 'ncte ngr Jiu.' Kandre kc Israel mnclzbz mz king kxetu kc Rom, a' mcpxle kzdung kz ncblo mz nzaclve-krdr provins nyzdr gzpman ngr Rom. Ncblo kxnxmulr lcng nzrpibzng 'gavzna.' King kxetu Agzstzs mcpxle Herot Kc Tqmyalz mz nzaclve-krde Judiz provins. X rlr-ngrbzle mz Herot nzrpi-krde kx nide 'king,' a' mnclzbz mz zmatq ngr king kxetu lc.

Herot Kc Tqmyalz wz-ngrde mzteadau, lrpalvc x ma nyz king kxkqlu x wz-mou-ngrde Mangr-nzangiongr Yawe kc Jerusalem. A' nide ncblo kxdrka'ngr x atrkatile leplz kxnzkqlung. Herot lc Tqmyalz tqngi king mzli kc Jiszs mzte tzmc-ngrde. X pibzle mz ncblo ngr vea nedeng kx nanibqlr itoto ncblo amrlx mrkc Betleem kx yiz ngrde li o kxyclbz. Murde xlrle kx kzdq kz king ngr Israel mzte nzmc elr. Herot lc nibqle kzdung kz leplz kcng trabru drtwrde, kxmule-esz' olvz rdeng, mzledeng, x kzdq doa ncblo nede.

Mzli kc Herot kc Tqmyalz tqbzpe-ngrde, drtc' kc tqaclvele nzakipxbz mz mrlxdeng kcng nzpxwng. Mzli lc Taebirizs nide king kc etu mrkc Rom x ptxpx-ngrde nzryrlq-krde king kzble. Mz nzmu-krde lcde, mrlxng Herot trnztwzlu drtq 'king.' Mc kz Nzalvztrngr Kxmyapxbz mz 'king.' Mrlxdeng lcng nzpxwng nidr seleng: 1) Filip kc ayrnrngr [Matiu 14: 3], 2) Herot Antipas, 3) Akelezs, [Matiu 2:22] x 4) Filip krali [Luk 3:1]. Filip kc kai, Filip krali, x Akelezs nzrtwz-kzng drtq 'Herot,' a' trnzyrou da lc mz Nzryrngrkxtr Kc Ate.

Herot Antipas nide 'Herot' kc tzpi zvz mz Nzryrngrkxtr Kc Ate. Aclvele Gzlili provins mz yiz kcng nzpnu-pwx (40) mzli kc tqalvztrngr Jiszs. KrIc tqtwz-ngrde Herodizs mz nzapusr-krdele olvz rde krali, kxmule-esz' Herodizs yrlzti kai mzlede Filip. Zngyangr Jon Kxawrkxtr mz nzpi-krbzle bade kx ngi alwx, dekc tzlakipxngr narde. X Herot lc veatibzle mz Jiszs natq kqlu. [Luk 23:6-12] Mc kz Matiu 14:1-10, Mark 6:14-27, 8:15, Luk 3:1, 19:20, 9:7-9, 13:31, 23:6-15, x Aposol 4:27.

Herot Agripz kc kai ngi mrlx Aristobulus kc tqngi mrlx Herot kc Tqmyalz. Aristobulus ngi kz mzle Herot Antipas, (lxedr ble-lxblr a' trtedr esz'). Herot Agripz lc tqngi 'Herot' kc tzpi mz Aposol dckrlzde 12. Aclvele provins kcng Judiz, Szmariz, Gzlili, Perea, Itiria x Trakonaetis x Abilin mz yiz 41-44 AD. King kc etu Rom rlr-ngrbzle bade nzrkqle-ngrbz kzdq king. Blrkqde ngi lr Jiu. Dekc tzmnc-zpxwng badr lr Jiu kxnxrmailzng. Opxm kx nzwxng badr kxnxrmailz lcng mz nzatrkatingr kxnxlxngitilr Jiszs. Murde dekc aposol Jemes (mzle Jon) tznibq-ngrde x adwatrle Pita mz presin.

Herot Agripz krali ngi mrlx Herot Agripz kc kai. X tqngi kz Agripz lc tzpi mz Aposol 25:13, 26:1-7, x 19-32. Kxmule-esz' trnzpipwzu 'Herot' mz Nzryrngrkxtr mz Inglis, a' drtq lc nzyrlqtrpz mz nrtekqtrngr mz Natqgu, murde krIc drtqde atwrnr. Mzli lcde, King kc etu Rom, drtqde Klaodizs. X yrlqtxlpwzle Herot Agripz krali lc mz nzaclve-krde provins esz', mz da lcng tq tqyclbz mz trtede. Twz-ngrde inwede Bernis mz nzapusr-krdele olvz rde. Mcle Pol mzli kc tqutr-ngrbzle mz Agripz nidr mz gavzna

Festzs mz nzyapwxti-krbzle Jiszs badr. [Aposol 26] Agripz krali lc tqngi king mzli kc lr Rom tzodati-ngrdr Jerusalem x Mangr-nzangiongr Yawe mz yiz 70 AD. Tqabzle nzlc-amnq-krde lr Jiu kx bzkq nzxpqbrr-ngrdr gzpman ngr Rom. A' trnzlxngiti-pwzlu natqde. Zbz sc tqprkitrpele mz nrlarde nyz ami ngr Rom mz nzota-krdr badr lr Jiu.

19.4 pulis ngr Mangr-nzangiongr Yawe—(*Temple guards*)

Mz nabz lr Livae kcng tzwzng mz Mangr-nzangiongr, kzdq kcng dzbe ncblo sa tzmncng mz nzaclive-krdrle nzrpibz ‘pulis ngr Mangr-nzangiongr.’ Nzkrlzlr nzrlolvzngr leplz kx trnzvz-nqblqlru Lou sc Mosis o kx nzatrkatilr Mangr-nzangiongr. Mzli kx Kansrl ngrdr lr Jiu pipxle kx kzdq ncblo na-ayrplapx mz nzrviplangr, dzbe lc sc tzviplahr. Ncblo kc tqmailzle nidr nzrpibz ‘Kxetu r Pulis ngr Mangr-nzangiongr.’ X zmatq ngr Nardr Pris txpwz kc tqmyaszpxle zmatq ngrde mz kxnzetu r lr Jiu amrlx.

20 kxnrmailzng lr Rom—(*Roman leaders*)

20.1 gzpman ngr Rom nzaclive-krde nrlc—(*Roman empire*)

20.2 king kxetu kc Rom—(*emperor, Caesar*)

20.3 gavzna—(*governor, procurator*)

20.4 kamadz ngr ami—(*commander, tribune*)

20.5 kxetu r dzbe ncblo ngr vea kx trtqki-esz' (100)—(*centurion*)

20.6 kxnzatakting takes—(*tax collectors*)

20.7 doa kx rlr-ngrbz gzpman ngr Rom nzprtr-krde mz dzbede kxmyapxbz—(*Roman citizen*)

20.1 gzpman ngr Rom nzaclive-krde nrlc—(*Roman empire*)

Mzli kc nzycmnetrngr ‘lr Rom’ mz Nzryrngrkxtr, drtwr ngrde tq. Kzdung mzli drtwr ngrde leplz ngr mzteadau Rom. X kzdung mzli drtwr ngrde leplz kcng tzngineng Rom. A' mzli kang kqlu drtwr ngrde gzpman kc tqbatrzle kandre amrlx nzmnclz-krbzlr badr. Murde mz mzli nyz Jiszs, leplz kcng tzmncng Israel x Iurop trnzkrlztilru nrlc atwrnrngr. A' nzkrlz-txpwzlr kandre kcng tqyc-ngalelr Prla Meditrenia (Iurop, nort Afrika x mrkcng tzyc-ngale-ngrdr Israel). Rom ngi mzteadau ngr Itali, kxmule-esz' Itali nzngini-krde kandre o provins. X mzli lcde, nzyrlqlr drtq lc tqngi, ‘Rom,’ mz nzycmnetr-krdr mrkcng amrlx tzaclvelrng.

X mzli lcde, ami ngr Rom tzaovxio-ngrdr kandre lang amrlx tzycngale-ngrdr Prla kc Meditrenia. X mrlcng amrlx tzaclveng nzrpi-lxblrbz ‘Empaea ngr Rom’ [Roman Empire]. Ami kcng Rom nzwz-ngrdr lrpzki kxmngi mrkcng amrlx, murde navz-aning mrkcng kqluti. Nzatzligr-ngrdr ncblo ngr vea nedrng mrlcng kqluti mz nzaclive-krdr kandre kc-kzng x mz nzngini-kzdr pulis ngr gzpman ngr Rom. Nzaesaki-anilr leplz kcng tzxpqbrr-ngrdr lou scdr lr Rom x krkcng tzotangr. Mz nzaclive-xplrkdr lc, mrkcng kqlu nzycng mz nrwrx, x nrlc yc angidr kz mz nzvzneng.

Mzli kc lr Roman kcng trnzaclveka-ngrdr nrlc, kzdq kxetu r ami rdr lr Grik, drtdde Aleksada kc tqmyalz, aovxiole kandre kang kqlu x yrlqle kzdq nzaclivengr kxetu (‘empaea’) mrkc tqaclvele. Nzaclive-krde nrlc mzli trboi-pnzu, a' atalvzpxle natq lr Grik mz nrlc tulvzo. Mzli lcde, natq lr Grik apule Pijin mz trmctu kcng Solomon, murde leplz amrlx nzalvztr-ngrdr mz nzycmne-krdr. X natq lr Grik apu-kzle Inglis murde ngi natq kc tzamrlue leplz amrlx. Zbz mzli kc lr Rom tzaclve-ngrdr nrlc, nzycmne-zvzng mz natq lr Grik, murde leplz amrlx nzxlrlr natq lc.

Opxm kx Gct oliqtile nrlarnrlc lc mz nzvz-krm Jiszs, murde da lcng tq. 1) Leplz amrlx nzycmnen mgz natq kxesz', kc tqngi natq lr Grik. 2) Lrpzki nyz lr Rom nzrlr-ngrbzlr mz leplz nzvzne-ani-krdr. 3) X mzli lcde nrlc

yc angidr mz nzvznengr. Mz nzmu-krde lcde, Nrpakxmrlz kx Jiszs vzm mz nzarlapx-krde nigu, krlzle nzvz-ani-krde mrkcng amrlx tzaclveng lr Rom.

20.2 king kxetu kc Rom—(emperor)

Lr Rom lcng nzkqle-ngrbzlr king kxetu rdr ‘Sisz,’ [Caesar], kx drtwr ngrde ‘king.’ Mz Inglis, king kxetu kx aclvele kzdq ‘empaea’ (empire) ngr kandre kxkqlu nzrpibz ‘empqrz’ (emperor). Lr Rom kcng nznginyzdr kzdq Palament (Parliament), nzrpibz ‘senet’ (senate). Mzli kc lr Rom trnzacloveka-ngrdr nrlc, senet kc tqngibe gzpman ngrdr x trpnzngr king rdr. A' mz nibrde, zmatq ngr kzdq kxetu r ami rdr etunepx, murde aovxirole kandre kqlutx x sc tqyrlqtr-lzbqpe mz nzngini-krde king. Drtqde Julizs Sisz. Abzo mzli lcde, Rom tqnginide kzdq ‘empaea.’ Senet kc tqprtr mz gzpman, a' zmatq ngrdr topwzbz.

Lr Rom nzangiolr gct kqlu. Gct ngrdr nzapulr leplz kcng tzrngiscng zmatq kx xplr. Nzlxngiti-kzlr kx king kxetu ngr Rom ngini-kzde gct mz nibr nzbz-krde, x nzrtulrtr-ngrbzlr mz leplz kcng amrlx tzaclveng nzangio-kz-krdr nide. A' lr Jiu nzrsaprlr-zvzng x nzota-zvzng badr ncblo ngr vea ngr Rom krlzbzle king kxetu mrkc Rom nzrlr-krbzle badr nzangio-krdr Gct rdr kc esz'txu. A' mzli kc kxtrngiulrJiu nzlxngitilr Kraes, nzpxtxpx-kz-ngrdr nzangio-krdr gct rdr lr Rom lcng tqkqlu. Mz nzmu-krde lc, mz drtwr lr Rom kxnzrlxngiting nidr leplz kxdrka'-ngrng murde trnzlxngitilru gct lcng. X mz nzpxtxpx-kz-krdr nzangio-krdr king kxetu, nzapulr enqmi rdeng. Dela gzpman ngr Rom sc tqatrkti-ngrde Kristin x tqnibqti-ngrde nidr. Kzdung king kxetu lcng tzdrka'tx-zlwzng x drtwrdr nzlukurnrngr. Mz nzrngisc-krdr kc zmatq kxetu, nzkrlzlr nzrka-ngrbz natq mz ncblo ngr vea nedrng nzrnibqng leplz kcng tzngyati drtwrdr nidr. Kzdq king kxetu drtqde Niro, aclvele nrlc mzli kc Pol tzolvz-ngrde x nzatwzlrngr Rom mz nzkotq-krde. Niro angcle nctq taon kxetu kc Rom, x abetitrle kxnzlxngitilr Kraes nzangc-krdrle.

Mzli lcde, Kristin nzatrkating mz kzdung yiz, x mz kzdung kz yiz nzrlr-ngrbz badr nzangio-krdr Kraes. Mz mzli r nzatrkatingr lcng trpnzngr kxnzmnc-mrbrng kx nzrpilr kx nidr kxnzrlxngiting. X nqmq krdr kxnzrlxngiting tubq mz nzvz-nqblq-krdr nqmq kr Jiszs. Zbz nzkqlu-krdr x nzaprcti-krdr etunepx. X mz yiz 311 AD, king kc etu Rom yrlqbzle lou mz nzrlrpx-krbzle mz kxnzrlxngiting nzangio-krdr Kraes mrkcng amrlx. X mz yiz 312 AD, king kc etu Kanstxntin Ixngiti-kzle Kraes, x yrlqbzle lou kx leplz amrlx kcng tqaclveleng natekqtrlr drtwrdr x nalxngiti-kzlr Kraes. Da lc trokatrleu lrmakxtr, murde leplz amrlx nzrpilr kx nzrlxngiting, kxmule-esz' kxnzkqlung nzmnc-mrbrbeng. X abzo mzli lcde, nqmq kr kxnzmnc-mrbrng x nzaokr drtwrdr, sc tzaprctipeleleng lrmakxtr, da kc tqwaile mrkang kqluti mzli ka. Murde mrkcng amrlx tzatrkatingr lrmakxtr, nztu-amqnging mz nzrlxngiti-krdr x trpnzngr kxnzmnc-mrbrng kx nzmnc-kapqng mz mzlirdr. A' mzli kx tr-rblx-ngrpwzleu mz kxnzrlxngiting, tr-rblx-kzpwzu nzrlr-ngrbzlr mz nqmq krdr kxnzmnc-mrbrng kx nzmnc-ngale-ngrdr nidr nzaprcti-krdr nidr.

20.3 gavzna—(governor; procurator)

Gzpman ngr Rom nzakiting mrkcng tzaclveng mz kzdung provins. King kc etu mrkc Rom, sc tqmcpxleng ncblo kcng tzaclvelr provins lcng, x nzkqle-ngrbzng gavzna, da kc tqwaibz Pcntzs Paelzt mz nzaclve-krde Provins kc Judiz. A' kzdung ncblo kcng tzmcpxng mz nzaclve-krdr, nidr king kcng tzaovxiopeng lr Rom. Kzdung mzli king kc etu Rom rlr-ngrbzle badr nzkqle-ngrbz ‘king,’ mz nzmnclz-krbzlr bade. A' kzdung mzli king

Nzalvztr-ngrng kamadz ngr ami654Nzalvztr-ngrng doa kx rlr-ngrbz gzpman ngr Rom nzprtr-karde mz dzbede kxmyapxbz

kc etu pxtpx-ngrde leplz kc-kzng nzkqle-ngrbz nidr 'king,' x nzkqle-alzu-ngrbzng 'tetrak,' drtwr ngrde 'king kxtopwz kx mnclzbz mz zmatq ngr king kc etu.' Herot Antipas nide 'tetrak.' A' mz nrtekqtrngr mz Natqgu rpiku 'king,' murde leplz trnzkrzlru drtq lc tqngi 'tetrak.'

Lr Rom kxnzaclveng amrlx nzrningeng ncblo ngr vea kxkqlu kx nzmnclzbzng mz zmatq ngrdr. Kxnzaclveng lcng nzapu-kzlr majzstret. Nidr tpxpz kx nzrngiscng zmatq ngr nzrpingr kx ncblo narnibqng. Gzpman ngr Rom tr-rlr-ngrpwzleu zmatq lc mz kandre kcng tqaovxioleng.

Lr Jiu kcng tzmnncng mz provins ngr Rom kcng Judiz x Gzlili nzngyati drtwrdr gzpman ngr Rom, murde nzaovxiolr nidr x nzangiolar gct kzbleng kxkqlu, a' trnzamrluelru Gct angidr kc esz'txu. Dekc kzdung lr Jiu nzotang badr lr Rom. A' ncblo ngr vea nedrng trtakitrdeu nzaovxiokrdr lr Rom, x gavzna kcng Judiz x Gzlili sc tztqlvztrlr ncblo kxmule lc mz kros. X nzngyatikr drtwr lr Jiu nidr etunepx zvz.

20.4 **kamadz ngr ami**— (*commander, tribune*)

Kzdq ncblo kxetu mz ami rdr lr Rom nzkqle-ngrbz 'kamadz ngr ami.' Trmyaszlzleu jenzrol, a' ngi ncblo kc tqacivele mrkc tzmnncngr ncblo ngr vea kxznkqlung.

20.5 **kxetu r dzbe ncblo ngr vea kx trtqki-esz' (100)**— (*centurion*)

Kzdq kz kxetu mz ami rdr lr Rom nzkqle-ngrbz 'senturizn,' drtwr ngrde 'kxetu r dzbe ncblo ngr vea kx trtqki-esz' (100)'. Nzmnclz-kzpzung bade kzdung kz kxnzetung r dzbe ncblo ngr vea kx nzpnu (10). A' krlcng trnzymetr-ngru mz Nzryrngrkxtrng.

20.6 **kxnzatakqting takes**— (*tax collectors*)

Gzpman ngr Rom suti drtwrde trau mz nxpke-krde ncblo ngr vea nedeng x mz nzrzwz-krde lrpzki x dalr lue nzylre-krmle mz lue kxvo nayrletr mz taon kxnzetung. Mz nzmu-krde lc, gzpman ngr Rom nzylqbzlr ncblo kcng tzatakqting takes. Mrkcng Provins kcng Judiz x Gzlili, nzamnclr kzdung lr Jiu mz nzatakqti-krdr takes elr. A' mzli kang kqlu nznginidr ncblo kx nzangqngung. Leplz nzmwxltilr nidr murde nzmu napxtpx-ngrdr nzxpe-krdr takes, kxnzatakqting takes lcng nzrngiscng zmatq ngr nzpi-ngrbz da lc mz lr Rom kcng nalolvzlr nidr. Mzli kang kqlu kxnzatakqting takes lcng tzbatr-ngrbzlr mz leplz naxpengr trau kxkqlu, murde gzpman ngr Rom rlr-ngrbzle badr nzatakqti-krdr takes kxyctrpz mz nxpke-lzbq-krdr. Lr Jiu kc-kzng nzngyati drtwrdr kztedrng kcng tzatakqting takes, murde nzwztrpzng mz lr Rom kcng tzaovxiopelr nidr, x nzangqngutitrlr lr mrnyzdrng.

Mz nzmu-krde lcde, lr Jiu kc-kzng nzpxtpx-ngrdr nidr, myapxbz dzbede Farzsi kcng tzobqszo-ngrdr nidr. Lr Jiu kc-kzng trnzokatrlru nidr mz nzyzlu-krmlr mz nqmq kxtubq. Mz nibrde tr-rblxpwzu badr kxnzatakqting takes nzlxngiti-krdr Jisz, murde trpxtpx-ngrdeu nidr. A' mz nzvz-nqblq-krdr nide nqmq krdr natekqtrlr x bzkq nzangqngutitrpeng leplz. A' sc tzrlrbe-ngrbz nzwz-krdr mz nzatakqti-krdr takes. Matiu, kc tzrpi-kzpzung Livae, [Matiu 9:9] x Sakizs [Luk 19:1-8] nidr kxnzatakqting takes kcng tzekqtrlr nqmq krdr mz nzvz-nqblq-krdr Jisz.

20.7 **doa kx rlr-ngrbz gzpman ngr Rom nzprtr-karde mz dzbede kxmyapxbz**— (*Roman citizen*)

Natq Inglis 'sitiszn' (citizen) drtwr ngrde doa kx rlr-ngrbz gzpman ngr Rom nzprtr-karde mz dzbede kxmyapxbz. Kandre kang kqlu nzryrlqng lou mz nzacive-angidr-krdr doa nedrng. Mz mzli r Nzryrngrkxtr Kc Ate, kzdq lou scdr lr Rom rpile kx doa kxprtr mz dzbede lc tqmyapxbz navzmi kai mz kot, zbz navibrtng x nzadwatrngr mz presin kc ate.

Mzli kc tqkotqpengr Pol, a' traolvzleu drtwr kc tqyrlq majstret kc, krlzle nzrlxtngr nzatzlerngr nide mz taon kc etu Rom, murde king kc etu nakapxle drtwr kc navz-nqblqlr. Pol vz-nqblqle lou lc mz nibr nzmcpx-krmle mz presin yiz tq. Mzli lcde, kzdung leplz mztr nzmcng mz nzptrr-krdr mz dzbede lc, da kc tqwai Pol. [Aposol 22:27] A' kzdu-kzng leplz nzayrbzkq-ngrdr trau kxetu mz nzrlr-ngrbz badr nzptrr-krdr mz dzbede lc, da kc tqwai kamadz mz Aposol 22:28. Gzpman ngr Rom tr-rlr-ngrpzwleu mz lr Jiu kxnzkqlung nzptrr-krdr mz dzbede lc, x lr Jiu nzpxtxpx-kz-ngrdr nzptrr-krdr elr. Mc kz Aposol 16:37-39.

21 kzdung nzycmne-ebzpxngr mz Nzryrngrkxtr—(symbolism in the Bible)

- 21.1 **mepyr**—(blood)
- 21.2 **sip x nei sip**—(sheep and lamb)
- 21.3 **nc fiki**—(fig tree)
- 21.4 **nrlanc ngr grep**—(vineyard)
- 21.5 **lue**—(water)
- 21.6 **yisti**—(yeast)
- 21.7 **bret**—(bread)
- 21.8 **zyzlr x nzlo**—(light and darkness)
- 21.9 **nrlar kxrte**—(right side)
- 21.10 **lr nrle**—(the world)
- 21.11 **nqmq ngr nzvz-nqblqbe-krgu lrpzki kc pnz tqikztiku mz nzale-zvz-krgu alwx**—(flesh)
- 21.12 **toki r vea x dalr vea**—(sword, armor)
- 21.13 **gol**—(gold)
- 21.14 **nzvongr mz nzesangr**—(running the race)
- 21.1 **mepyr**—(blood)

Nzryrngrkxtr alvztr-ngrde kx nzlukr doa x animol yctr mz mepyr ngrdr. [Livae 17:10-14; Lou Kcpwz 12:22-24] X nzayrplaxngr mz alwx ngi nzbngr. Mz Nzryrngrkxtr Kc Kai, mzli kx animol nznibq-ngrde mz nzngini-krde blz mz nznibq-ngrde alwx, pris iklrole mepyr ngrdrng mz olta, mz nzaelwa-krde kx animol lc tekqtrle doa mz nzbnz-krde. [Livae 1:4-5, 10-11; 4:3-8, 13-18; 5:1-9; 7:1-2] Kzdung mzli mepyr nziklrobz mz leplz mz nzatrngr nidr mz nzobqkr Gct. [Nzrlaszngr 24:8; 29:19-21; Livae 8:22-30; 14:6-7, 14, 25]. X mepyr lc ngi nzycmne-ebzpxngr mz nzbnzkr animol, murde alwx ngr doa naipqpx. Nakrlzq kx mepyr trokatrleu leplz nzmu animol lc trnabzleu. Mepyr trpnzngr scde zmatq, a' tu-ngrde nzbnzkr animol. Mz Nzryrngrkxtr Kc Kai ngalrdeng kcng tzycmnetr-ngrdr 'mepyr' nzngini-krde nzbnzng nidr seleng: Lou Kcpwz 19:4-6 x Esikel 3:18, 33:4-6.

Gct tr-rlr-ngrpzwleu mz leplz nedeng nzrmnq-krdr mepyr murde nzlukr animol yctr mz mepyr ngrde. [Nou 9:4; Livae 3:17; 7:26-27; 1 Samwel 14:32-34] Mz drtwrdr mepyr ngr animol ngi nabzde. Dekc tr-rlr-ngrpzwleu nidr nzngq-krdr animol kx nznibq x nzasumi mepyr ngrde kcng tqycpxbep badr. X mou Gct yrlqbzle mepyr mz nznibq-krdr alwx. Mz nzmu-krde lc, mepyr tr, x trtakitrdeu nzngini-krde dakxnnzng. (Mz nqmq lcpwz, mz nztrkr makxtr, trtakitrdeu leplz nzmwipx-krmlr elr mz nzapu-krde ma bzq nyzdr.) Dekc lr Jiu nzavzti-zvzlr nzrnibqngr animol nedr mz nzlaki-krbzlr drtwr animol lcng x nzrlr-ngrbzlr mepyr ngrde amrlx nzylerek-krde x sc tzasu ate. Mz drtwr lr Jiu nzrmnqng mepyr ngi da kxtrka zlwz. Dekc mzli kc tqrpinger Jiszs nangqku nrkrdrtqde x namnqku mepyr ngrde, [Jon 6:53-56] lr Jiu nzxngitrlr nzycmne-krde lc. Mc kz Aposol 15:20.

Nzryrngrkxtr Kc Ate ycmnetr-ngrde ‘mepyr’ ngr Kraes nzarlapx-krde nigu, o nzwztipx-krde alwx ngrgung, o nzrngisc-krde zmatq. Krlc nzycmne-ebzpxngr. Mepyr tu-ngrde nzbzkr Kraes nigu, murde ma tqbzku. Ycmnetr-ngrgu mepyr ngrde nzrngisc-krde zmatq. A' trngiu mepyr esz'-krde kx rngisc zmatq, a' ngi nzlukr Kxnmcpkx kx rngisc zmatq. Murde mzli kc rlrpx-ngrde nzlu-krde mz nzbz-krde nigu, tekqtrle nigu mz nzbzngr lc. X ycmnetr-ngrgu mepyr ngrde, a' drtwr ngrde nzbz-krde. Bzkq rpiq kx mepyr rngisc zmatq ngr dabo mz nide esz'-krde. Murde mepyr ngr nrkrdrtrq Kraes kx yrleo mzli kc tqkrka'-ngrde mz nrlanc Getsemzni, x mzli kc tztabrti-ngrde, x sc tztqlvztr ate mz kros, trpnzng r zmatq ngrdr murde trbzka.

Mz Nzryrngrkxtr Kc Ate ngalrdeng kcng tzycmnetr-ngrdr mepyr nzngini-krde nzbzngr nidr seleng: [Matiu 27:24-25; Luk 11:50-51; Aposol 5:27-28; 20:25-28; 1 Korint 18:6; Rom 3:25; 5:9; Efisz 1:7; 2:13; Kolosia 1:19-20; Hibrus 9:11-14, 16-22; 10:19-22, 29; 12:23-24; 13:11-12, 20; 1 Pita 1:1-2, 18-19; Nzaelwapxngr 1:5; 5:9; 6:9-10; 7:14; 12:11; 17:6; 18:24; 19:1-2] Mz Natqgu kzdung mzli rpikr ‘mepyr’ x kzdu-kzng mzli ‘nzbzngr.’ Mz Aposol 20:26 x 1 Korint 18:6; mepyr ngr leplz drtwr ngrde nzbz-krdr mz nzbzngr krali mzli kc Gct na-ayzlu-ngrbzle da mz leplz kxdrka'-ngrng. Nzbzngr krali ngi nzbz-alongr mz Hxl.

21.2 sip x nei sip—(sheep and lamb)

Sip ngi animol kx myapxbz mz lr Israel x mz nibrde mz neidu lrdr, lr Jiu. Nzngqlr sip, x nzkalz-kzpplr mz Gct mz nzngini-krdr blz. Nzwz-ngrdr lrpz mz nrpnri sip kx apqbzle nrkrdrtrqdr mzli kx bao-zlwzng nrlc. Sip kxkqlu nrpnrdprki, a' kzdung nzbotapz'ng.

Nei sip nzrlr-ngrbzng mz Gct mz nzngini-krdr blz. Blz lcng ngi animol kx myapx-esz'ngr, kx trpnzng r kx botapz', trsqkiu, tryc-ngru zyagox, trtxpnzng r da kx vz-rbrtrpz badr. Mz Nzamyangr kc kai lr Israel nzrkabzng mz Gct blz kx ngi nei sip. X mepyr ngrde arlapxle nidr mzli kc enjrl ngr nzbzngr tqlvco-ngrmlle İjipt. [Nzrlaszng 12:21-23] Nzamyangr kc kai tqngi rkx ngr Jiszsz nzngini-krde blz kx na-arlaxle leplz neng Gct murde ma tzbz-alongr mz Hxl. Mz nzmu-krde lcde, nzrpibz kx Jiszsz nide ‘Nei sip ne Gct’ x ‘Nei sip kx ngi blz kc tznibq mz nzarlapx-krde nigu mz zbz ngr Nzamyangr.’ [Jon 1:29, 36; 1 Korint 5:7; 1 Pita 1:19; Nzaelwapxngr 5:6, 8, 12, 13; 6:1-7, 16; 7:9-10, 14, 17; 12:11; 13:8; 14:1, 4, 10; 15:3; 17:14; 19:7, 9; 21:9, 14, 22-23; 22:1, 3]

Sip x nei sip rblxbz badr nzatrkti-krdr leplz. Murde trpnzng nqngidr kxmalc x trpnzng drkrvi rdr. Sip nidr animol kx nzavzo-lzbqng x nzvz-nrwx-ngrng. X mzli kc kxaclve sip tqpaki-ngrbzle nrpnrd o nibqle mz nzrngqng, sip kc tqtu-lrpi x trkya'-pnzu x trbzleu nzdwangr. Jiszsz apule sip mz nzavzo-lzbq-krde x nzvz-nrwx-krde. Murde rka-lzbqng mz nzngini-krde blz. A' trbzleu nzdwangr mz nzrtqlvztrngr nide mz kros, murde nakatxpxle blz ngrgung.

Mz Nzryrngrkxtr, leplz neng Gct nzkqle-kz-ngrbz sip nedeng murde apu-kzku sip mz nqmq lcde seng: 1) Rblxm bagu nzokatr-lzbq-krgu. A' mnc-xgle-zvzku Gct nzokatr-krde nigu x nzrka-krmle nagu dakxnxng, da kc tzwai sip nzmnc-xgle-krdr kxaclvele nidr nzmailz-krbzle nidr mz dakxnxng nadrung x lue pqdrung murde ma tzbzng. [Sam 23:1-3] 2) Sip nidr animol kx nzngqngung x nzmrbrne-anipwzng. Nzkrzlr nzoprtanengr mz nidr esz'-krdr x nzmrbrng x nztaong mz gq x rblx nzdwalz-krmr. Kxaclve sip navz mz nzrtangrti-krde sip kc murde na-arlaxle. Leplz amrlx nzmnc-rlrubzng mz Gct mzli kc trnzlxngitikalr

Jiszs, mz nzngini-krdr kxnxmrbrng. Murde trnzkrpzpelru kxmu nzrmctingr Gct x lrpzki mrnyzdr Heven. [Asaea 52:6] Mz nzmu-krde lcde, Gct atwzlr-ngrmle Jiszs mz nzrtangrti-krde x nzarlapx-krde leplz, murde navzmile nidr mrnyzdr Heven. Dekc Jiszs nide Kxaclve-angidrlle sip x nigu kxnxrlxngiting apuku sip nedeng. [Jon 10:11-18]

21.3 nc fiki— (fig tree)

Fiki nidr nra nc fiki. Nide kzdq dakxnxng kx mrlz-zlwzbz mz leplz ngr nrlarnrlc kc tqycngr Israel. Nrade mqbzq vz-krlzbzle mzli kx plcpz-ngrde. Mz nzmu-krde lc, rblx nzrmcngr kx nc fiki nrade nzyc-krbzle o trpnzng, a' ngi txpwz mz nzesotr-zpwx-krbzme bade x sc tqmc-ateq. Mrkc Israel nzdokr nra fiki ngi rkx ngr nzmn-c-zpwxnegr. [Lou Kcpwz 8:8; 1 King 4:25; 2 King 18:31-32; Sam 105:33; Asaea 36:16-17; Jeremaea 5:17; Hosia 2:12; 9:10; Joel 1:12; 2:22; Emos 4:9; Maekz 4:4; Habakuk 3:17; Hagai 2:19; Sekaraea 3:10] A' nra fiki kx trnadoleu ngi rkx kx Gct drtwrde tresapxu. Kzdung mzli mz Nzryrngrkxtr, nc fiki ngi kzdq nzycmne-ebzpxngr kx drtwr ngrde doa lr Israel. [Matiu 21:18-22; Mak 11:12-14, 20-23; Luk 13:6-9]

21.4 nrlanc ngr grep— (vineyard)

Grep nidr kzdq nra nounc kxtopwz kx lue lrngr, x etu kxpiptbz mz mabol kxtopwz. Nzryblaomqng mz nqvi, a' nqvi lrde trkrlzobzleu drtc'. Nqvi lr grep nzboilz-krde krlzmle lomr nelz. Zbz nrlardeng nzpetrung mz kzdq nqvi kxboi trbxoleu drtc'. Ncblo kx rpe grep nalvaki-zvzle nrlardeng x napetr-zvzleng mz nqvi lc. Lue lr grep nzrwzngr waen. Namrlzu r grep kqlu. Kzdung mqbzq, kzdung pc, kzdung prpol, kzdung blu. Kzdung mzli grep nztwztrp mz kandre nygu x nzamwa Honiara. Grep nzdong mz nablr ngrdr x nzdoomqng mz nqvi lrdr. Kzdung grep nzaglr mz nepi x sc tqrpnakipe. Mz Inglis nrlanc ngr grep nzkqlebz 'vinyzd' (vineyard) x grep kxnxaglqngr nzkqlebz 'sultana' o 'raisin.'

Mz Nzryrngrkxtr, nrlanc ngr grep ycmne-ebzpx-ngrde leplz ngr Israel. X leplz kxnxwzng mz nrlanc ngr grep drtwr ngrdr kxnxrmailzng ngr Israel. [Asaea 3:14; 5:1-7; 27:2-6; Jeremaea 12:10-13; Matiu 23:33-46; Mak 12:1-12; Luk 13:6-8; 20:9-19]

21.5 lue— (water)

Lue x lue kxyrle nidr rkx ngr Mqngrkxtr x zmatq ngrde. Dekc tzwrkxtrngr leplz mz lue. [Asaea 12:3; 35:6-7; 41:17-18; 44:3; 55:1; Jeremaea 2:13; 17:13; Esikel 36:25-27; Sekaraea 14:8; Matiu 3:11; Mak 1:8; Luk 3:16; Jon 3:5; 4:10-11; 7:37-39; 1 Pita 3:20-21; Nzaelwapxngr 7:17; 22:17]

21.6 yisti— (yeast)

Yisti nzrpi-kzpz 'draebam.' Mz Nzryrngrkxtr, yisti ngi rkx ngr da kx rlpxp x aetunepxle da. Kzdung mzli nzetunepxkr da lc mrlz. [Matiu 13:33; Luk 13:20] X kzdung mzli nzetunepxkr da lc trmrlzu. [Matiu 16:6, 11-12; Mak 8:15; Luk 12:1; 1 Korint 5:6-8; Galesia 5:9] Mz Nzmulvzngr Bret kx Trpnzng Yisti Ngrde lr Jiu nzkatpxl yisti amrlx mz ma nydzr mz nzngini-krde rkx ngr alwx, x sc tqakaputr-atelr Nzamyangr mz nzngq-krdr bret kx trpnzng yisti ngrde.

21.7 bret— (bread)

Bret ngi dakxnxng nadr lr Jiu, kx nzngq-zvzlr mzli kang kqlu. Mz nzmu-krde lc ngi rkx ngr dakxnxng amrlx. Mz natqdr, 'nzrlopxingr bret' drtwr ngrde nzmungr. Nzmungr bret x dakxnxng, alule leplz. X ngi kz rkx ngr nzlungr. Jiszs rpile kx nide 'dakxnxng kc tqvzom Heven' x 'dakxnxng ngr nzlungr.' [Jon 6:32, 35, 41, 48, 51, 58] Krla drtwr ngrde kx

nzrngqngr nide kabzle mz leplz nzlungr kxboi Heven. Nzrngqngr nide drtwr ngrde nzrlxngitingr nide. Mz Nzmungrkxtr, rpiku kx bret ngi ncvr Jiszs, mz nzbz-karde nigu mz kros, murde naluku.

21.8 **zyzlr x nzlo**—(light and darkness)

Mz Nzryrngrkxtr zyzlr x nzlo ngi rkh ngr da kxmrlz x da kxtrka. Mz Nzryrngr Kc Kai, zyzlr ngr Gct drtwr ngrde nzpxwng: 1) Zyzlr ngi rkh ngr zmatq ngr Gct kx mcku mz zyzlr ngrde. [Sam 18:12] 2) Mz nzkakrbz Gct zyzlr ngrde mz leplz, drtwr ngrde nzrkatx-karde alwx, zyagox, x da kxtrka amrlx murde namnc-zpxwng. [Sam 18:28] 3) Drtwr kz ngrde nzrkrlngr x nzrmcngr da kx ngi da angidr. [Sam 19:7-11; 119:130] 4) X mou, kzdung mzli zyzlr drtwr ngrde nzmailzkr Gct leplz x nzalvztr-karde nidr. [Sam 43:3]

Mz Nzryrngrkxtr Kc Ate, zyzlr drtwr ngrde nzpxw-kzng: 1) zluli r Gct, 2) zmrlz ngrde, 3) nzrkrlngr da kx ngi da angidr, myapxbz kxnamu leplz nzrlapx-krdr, x 4) nzmailzkr Gct leplz. [Matiu 4:16; 5:14-16; 6:22; Luk 2:32; 8:16; 11:33-36; 16:8; Jon 1:4-9; 3:19-21; 5:35; 8:12; 9:5; 11:10; 12:35-36, 46; Aposol 13:47; 26:18, 23; Rom 2:19; 13:12; 2 Korint 4:4-6; 6:14; 11:14; Efisz 5:8-14; Kolosia 1:12; 1 Tesalonika 5:5; 2 Timoti 1:10; Hibru 10:32; 1 Pita 2:9; 2 Pita 1:19; 1 Jon 1:5-7; 2:8-10; Nzaelwapxngr 21:23-24; 22:5]

Nzlo drtwr ngrde nzlvqn: 1) da kxtrka, 2) alwx, 3) nzmnc-mrbrngr, 4) nzmncbz-ngrbz mz zmatq ngr Setzn, 5) nzmncngr Hxl. [Matiu 4:16; 6:23; 8:12; 22:13; 25:29; Luk 1:79; 11:34; 22:53; Jon 1:5; 3:19; 8:12; 12:35, 46; Aposol 26:18; Rom 13:12; 1 Korint 4:5; 2 Korint 4:6; 6:14; Efisz 5:8, 11; Kolosia 1:13; 1 Tesalonika 5:4-5; 1 Pita 2:9; 2 Pita 2:17; 1 Jon 1:5-6; 2:8-11; Jud 6, 13] Mz nzrtekqtrngr ‘nzlo’ mz Natqgu, rpi-zvzku ‘da kx akamrbrngrde da mz nabz leplz.’

21.9 **nrlar kxrtc**—(right side)

Nzryrngrkxtr ycmnetr-ngrde mq Gct kxrtc. Mq kxrtc ngi mq kxmyapxbz. [Nou 48:12-20] Mq Gct kxrtc tu-ngrde zmatq ngrde murde malele toki r vea scde mz mqde kxrtc. [Nzrlaszngr 15:6, 12; Job 40:14; Sam 17:7; 18:35; 20:6; 21:8; 44:3; 45:4; 48:10; 60:5; 63:8; 74:11; 78:54; 80:15; 89:13, 25, 42; 98:1; 108:6; 118:15-16; 138:7; 139:10; Asaea 41:10; 48:13; 62:8; Nzyrningr 2:3-4; Habakuk 2:16; Nzaelwapxngr 1:12, 17, 19; 2:1; 5:7]

‘Nrlar king kxrtc’ ngi me matq-esz’ngr mrkc tqwxbuo-ngrm ncblo kxmyapxbz kx mnclbz mz king. X drtwr ngrde kz kx king la abrtzlvzle kxnzwxbubzng mz nrlarde kxrtc. [1 King 2:19; Sam 16:11; 45:9; 80:17; 110:1; Matiu 22:44; 26:64; Mak 12:36; 14:62; 16:19; Luk 20:41; 22:69; Aposol 2:33-34; 5:31; 7:55-56; Rom 8:34; Galesia 2:9; Efisz 1:20; Kolosia 3:1; Hibru 1:3, 13; 8:1; 10:12; 12:2; 1 Pita 3:22; Nzaelwapxngr 5:1] A’ leplz kcng tzmnncng mz nrlar king kxmc, trabrtzlvzleu nidr. [Matiu 25:33; 41]

Doa kx tu mz nrlarm kxrtc, na-aclvele nim, murde da kxtrka ma tzprtzbzng bam. [Sam 16:8; 73:23; 109:31; 110:5; 121:5; Asaea 41:13; 45:1; 63:12; Aposol 2:25]

21.10 **lr nrlc**—(the world)

Mz Nzryrngrkxtr Kc Ate ‘leplz ngr nrlc ka,’ o ‘lr nrlc,’ o ‘nrlc’ drtwr ngrde ‘leplz kxnleng alwx,’ o nqmq nr drtwr leplz kcng trnzrlxngitiung, o nzmncbz-ngrbz mz zmatq ngr alwx x Setzn. Mz nzryr-krng Jon, drtwr ngrde kxmule lc. [Matiu 5:14; 18:7; 26:13; Mak 14:9; Jon 1:9-10; 1:29; 3:16-19; 4:42; 6:33, 51; 7:7; 8:12; 9:5, 10, 36; 11:27; 12:46-47; 13:1; 14:17, 19, 22, 27, 31; 15:18-19; 16:8, 20-21, 28, 33; 17:6, 9, 11, 13-18, 21-25; 18:20, 37; Aposol 17:31; Rom 3:6; 1 Korint 1:20-21, 27; 2:12; 6:2; 7:31; 11:32; 2

Nzalvztr-ngrng nqmq ngr nzvz-nqblqbe-krgu lrpzki kc pnz tqikztiku mz nzale-zvz-krgu alwx659Nzalvztr-ngrng gol

Korint 1:12; 5:19; 10:3-4; 11:18; Galesia 4:3; 6:14; Efiszs 2:12; 1 Timoti 1:15; 6:7; Hibru 10:5; 11:7, 38; James 1:27; 2:5; 4:4; 1 Pita 1:1; 2:11; 2 Pita 1:4; 2:20; 1 Jon 2:15-17; 3:1, 13; 4:4-5, 9, 14; 5:4-5; Nzaelwapxngr 11:15]

21.11 **nqmq ngr nzvz-nqblqbe-krgu lrpzki kc pnz tqikztiku mz nzale-zvz-krgu alwx—(flesh)**

Mz kzdung ngalrdeng kxnxzzipzng mz Nzryrngrkxtr Kc Ate mz Inglis, natq lc tqngi 'the flesh' trngiu drtwr ngrde nrkrdrdtq. A' drtwr ngrde 'nqmq ngr nzvz-nqblqbe-krgu lrpzki kc pnz tqikztiku mz nzale-zvz-krgu alwx.' [Rom 7:5; 8:3-13; 13:14; 2 Korint 10:2-4; Galesia 5:16-24; 6:8; Efiszs 2:3; 2 Pita 2:10; 1 Jon 2:16] Mzli kc tr-rlapxka-ngrgu, mqnggru, nabzgu x drtwrgu nztrkang x nepunr drtwrgu nztrka-kzng. A' mz nibr nzrlapx-krgu, rngiscpegu mqngr kxmrna kxlqngi x tr, kx suti drtwrde nzvz-nqblq-krde natq Gct. Kxmule-esz' nabzgu x drtwrgu nzalqngipe x trpe-kzng x suti drtwrgu nzvz-nqblq-krgu Gct, a' mzli lcpwz sutibe drtwrgu da kxtrka, kc tqmailzbepzle nigu mz lrpzki kc mzli kc tqikztinngru mz nzale-zvz-krgu alwx. Murde nrkrdrdqgu x nargu tr-rblxpwzu badr nzaoti-ani-mou-krdr alwx kcng ena tqaleti-zvzkung. A' mzli kc nrkrdrdqgu nabz-ngrde x navdz-ngrgu Heven, da kcng amrlx tqvectitrle nigu mz alwx sa nayrkpxbzng. Mz nzvz-nqblqbe-krgu nqmq lcng mzli kc kxmule-esz' rlapxpeku, mz Nzryrngrkxtr nzpibzlr, 'nqmq ngr nzvz-nqblqbe-krgu lrpzki kc pnz tqikztiku mz nzale-zvz-krgu alwx.'

21.12 **toki r vea x dalr vea—(sword, armor)**

Mz Nzryrngrkxtr, kzdung mzli dalr vea nzycmne-ebzpx-ngrdr nzota-krgu badr Setzn x drka' nedeng, x kzdu-kzng mzli drtwr ngrde nzaclvekr Gct nigu. Mz Sam, Devet rpi-zvzle kx, 'Gct, nim lrpalvc nyznge,' x 'Nim temz ngr lomrnge.' [Sam 3:3; 5:12; 7:10; 18:2, 30, 35; 28:7; 33:20; 59:11; 84:9, 11; 91:4; 115:9-11; 119:114; 144:2; 149:6; Asaea 59:127; Luk 11:22; Rom 13:12; Efiszs 6:10-17; 1 Tesalonika 5:8; Nzaelwapxngr 1:16; 2:16; 6:4; 19:15]

Mz nzota-krgu badr Setzn x drka' nedeng nakrlzku da lcde seng: 1) Nakrlzku Nzryrngrkxtr, murde nzkrlz-krgu da kx ngi da angidr na-amqngile nzrlxngiti-krgu. 2) Na-abrtrpzku drtwrgu mz nztubqkr Nzryrngrkxtr x nzesalzkr Gct, kxmule-esz' nike xngibzku. 3) Mzli kx drka' yrlqtr-ngrbzle nzpokiagr mz drtwrgu, krlzku nzrpipxngr da angidr kcng tqyccpxm mz Nzryrngrkxtr kx aelwapx-ngrde nzpokiagr lang, da kc tqwai Jiszs mzli kc tq tamitingr Setzn le. [Matiu 14:1-11; Luk 4:1-13] Nzrkrlzngr x nzrlxngitingr Nzryrngrkxtr ngi da kc tqaclvele nigu mz nzayotikr Setzn nigu, mzli kx tqabz-ngrde nzatrkti-krde nzrlxngitir-krbzku mz Gct. Mzli kx trka-ngrbagu nigu esz'-krgu, nakrlzku kx Gct mrlztile nigu x atubqtipte x atrpele nigu. Nzrkrlz-krgu da lcng narlapxpele nigu mz nzyrpz'kr drtwrgu.

21.13 **gol—(gold)**

Gol ngi kzdq mrlzu r rplz kx trau rde kqlutpxbz mz nrlc ka. Trau rde kqlu murde rblk nzrmctxnegr, mrlzvxi x trpnzu mepyr ngrde. Gol kx nzrmcngr mz drtc' trngiu gol kxlqngipx. A' na-ayrleningr mz nyr nzwnde kqlu mz nzrkatpxngr zblk ngrde. Mzli lcde, da kcng trnznginidru gol nzlvabetineobzng mz wq gol x nzkrlz nzrkatpxngr. X gol kc tqycope mzli kc tqylqngipe-ngrde, trau rde myaszpxle mzli kc kai. Gol ycmne-ebzpx-ngrde da kx trkrlzleu nzyrkpxngr, apule nzrlxngiti-krgu. Nzprtr-krgu mz nzkxpungr x mzli kx rblk alqngipxle x axplrl nzrlxngiti-krgu, da kc tqwai nyr alqngipxle gol mz nzayrleningr. [1 Pita 1:7; Nzaelwapxngr 3:18; 4:4; 21:18, 21; Sam 19:10]

21.14 **nzvongr mz nzesangr**—(*running the race*)

Mzli kqlu aposol Pol ycmne-ebzpx-ngrde nzvongr mz nzesangr nzapukrde nzrvz-nqblqngr Gct x nqmq krdeng. Mz ‘nzayrkrpxngr nzesangr’ drtwr ngrde nzvz-zvzkr nzrvz-nqblqngr nqmq kr Gct krlzbzle mzli kx nabzngr. X da kxmrlz kx twzku mz nzayrkrpx-krgu nzesangr lc ngi nzlungr kxboi. [Aposol 20:24; 1 Korint 9:24-27; Galesia 2:2; 5:7; Filipae 2:16; 2 Timoti 4:7; Hibru 12:1-3; Sam 102:23]

22 **lepz**—(*leprosy*)

Lepz ngi kzdq zyagox ngr be nrkrdrtq. Mz Inglis zyagox lc tqngi drtqde ‘leprosy,’ ncblx kx ycne bade nzrpi-alzubz ‘lepz.’ Drtq zyagox lc mz medikol nzrpibz ‘Nzyagoxkr Hanson.’ Mzli ka zyagox kc tzrpibz lepz blepxbz mz lepz kc tqyc mz Nzryrngrkxtr. Lepz mz Nzryrngrkxtr drtwr ngrde zyagox ngr be drtq kx blepx-lxblrng, vzmi lepz kc tqrpi-ngrbzku ‘lepz’ mzli ka. Zyagox lcng nzkrlzlr nzprc-ngrbz mz leplz kzbleng. Mz Lou sc Mosis, rpile kx doa kx ycngr lepz x zyagox ngr be drtq trtakitrpleu nide nzprtrnegr mz nzangiongr x trtakitrpleu nzmncr-lxblr-krdr badr kx nrkrdrtqdr mrlz.

Lou ngr zyagox lcng yclzm mz Livae dckrlzde 13-14 x Nzkqlu-krdr 5:1-4 x 12:10-15. Mz drtwr lr Israel, zyagox lcng tqngi nzayrplapxngr kc tqvzom mz Gct. [2 King 5:27; 15:5; 2 Be Ngrdr 26:20-21] Doa kx ycngr zyagox lcng, lrpz scde na-abxplibz, mz nzaelwaxp-krde kx drtwrde vz. Mzli kx nzvzne-ngrdr mz mzli r leplz kxnzkqlung, nzmu nakabominedr kx ‘Nigr kxzngangr! Nigr kxzngangr!’ murde leplz bzkq nzvz-esoaepztrpzng badr. Trnzrlr-ngrpwzu nzycmne-krdr badr doa. Trpnzng kx naesotrpz o nabxtrpzle nrkrdrtqdr.

Doa kc tqmrlzlp-mople la mz nzyagoxngr lc, navzbz mz pris, kx napwxlitibzle nrkrdrtqde mz nzkrlz-angidr-krdele kx mrlzpe. Zbz doa lc sc tqrka-atebz blz mz Gct, x pris kc sc tqipixpebzle kx nrkrdrtq ncblx mrlzpe x takitrpede nzmnc-krdr badr leplz kxnzmrlzng.

23 **Livae**—(*Levi*)

23.1 **mrlx Israel**—(*son of Israel*)

23.2 **nqvi lr Livae**—(*Levites*)

23.3 **nqvi lr Eron**—(*line of Aaron*)

23.4 **Matiu Livae**—(*Matthew Levi*)

23.1 **mrlx Israel**—(*son of Israel*)

Livae ngi kzdq mrlx Jekop (Israel) kcng nzpnu-esz'-nrade li (12), x mrlx Lea. [Nou 29:31-35; 35:22-26] Mc kz nzycmnetrngr Israel. [nabz 10]

23.2 **nqvi lr Livae**—(*Levites*)

Leplz kcng tzvzpxmqng mz Livae nznginipedr nqvi lr Livae, mz nabz nqvi lr Israel [Nzrlaszngr 1:1-7; Nzkqlu-krdr 1:47-54; 3:14-39] Lr Livae nzkalbzng mz nzvztr-krbzlr mz Gct mz Tentkxtr, x trpnzng nyzdr drtc'. Gct rlr-ngrbzle badr nznginyz-krdr taon kxetu mz drtc' ngr kzdu-kzng nqvi lr Israel. [Josua 13:14; 14:3-4; 21:1-42] X rpile kx nqvi lr Israel lc-kzng nakabzlr nqvi lr Livae kranzpu ngr da kx nzpetilr amrlx x animol kxmrna amrlx, murde nzvztrpzng mz Gct x trpnzng nyzdr drtc'.

23.3 **nqvi lr Eron**—(*line of Aaron*)

Eron mnccpxm mz nqvi lr Livae, x ni-kzde mzle Mosis [Nzrlaszngr 4:14] Eron ngi kxokatr ne Mosis kxmyapxbz. X Gct mcpixe nide mz nzngini-krde Nardr Pris ayrrnrngr. Mz nibrde pris amrlx ngr Israel nzvzpxmqng mz nqvi lr Eron, (kc tqvzpxm mz nqvi lr Livae). [Nzrlaszngr 28-30] Mz Livae dckrlzde 21; nzryrlqng lou kx navz-nqblq pris lcng. Lr Livae nztwzlr kranzpu ngr da mz nqvi lr Israel amrlx, x nzka-mopwzlr

kranzpu ngr da lcng mz nqvi lr Eron, mz nzngini-krdr pris. [Nzkqlu-krdr 18:20-28]

23.4 Matiu Livae— (*Matthew Levi*)

Mz Nzryrngrkxtr Kc Ate, kzdq ncblo kc tqvz-nqblqle Jiszs ngi Livae, mrlx Alfizs. Kzdq kz drtqde Matiu. Nide ncblo kxatakqti takes x nide Matiu kcpwz tqryr buk lcde 'Nrpakxmrlz Kx Yr Matiu.'

24 Irmakxtr kxnzrmailzng— (*church leaders*)

24.1 **kxnzwztr-zvz-ngrbz mz Kraes x Irmakxtr**— (*church offices*)

24.2 **aposol**— (*apostles*)

24.3 **profet**— (*prophets*)

24.4 **kxnzrlexng Nrpakxmrlz**— (*evangelists*)

24.5 **kxnzacvlelr dzbe Irmakxtr**— (*overseers, pastors, bishops, priests, presbyters, elders*)

24.6 **kxnzalvztr-ngrdr mz Natq Gct**— (*teachers of God's word*)

24.7 **kxnzaclveng dalr makxtr**— (*deacons*)

24.8 **kxnzlxngiting amrlx nzngini-krdr pris**— (*priesthood of believers*)

24.1 **kxnzwztr-zvz-ngrbz mz Kraes x Irmakxtr**— (*church offices*)

Mz Efisz 4:10-11 ycmnetrngr Pol nzwnzng nzlqn kcng tqkabz Gct mz leplz mz nzmailz-krdr x nzokatr-krdr Irmakxtr. Nzwnzng lcng nzlvqnq nidr seleng: 1) aposol, 2) profet, 3) nzrlexngr Nrpakxmrlz, 4) nzacvlenr dzbe Irmakxtr, x 5) nzalvztrngr Natq Gct. X Aposol 6:3-5 x 1 Timoti 3:8-13 nzycmnetr-kz-ngrdr nzwnzng kraesz'mz mz nzaclvengr dalr makxtr.

24.2 **aposol**— (*apostles*)

Mz Nzryrngrkxtr Kc Ate 'aposol' drtwr ngrde tq. Murde mz natq lr Griki, drtwr ngrde menrpa kc tqatwzlrngr kxetu rde mz nzrpipxngr nrpa. Sc tqvzpx mz zmatq ngr kxetu rde x mnclzbz mz zmatq ngrde. A' mz Nrpakxmrlz kc tqyr Luk, 'aposol' drtwr ngrde 'ncblo kcng nzpnu-esz'-nrade-li tqmcpx Jiszs'. [Luk 6:13; 24:48] Zbz mz buk kcng Aposol x kzdung letz, 'aposol' drtwr ngrde aposol kcng nzpnu-esz'-nrade-esz' nidr badr Pol x leplz kc-kzng tzmcrl Jiszs mz nibr nztulz-mou-krmle mz nzbzng, tqatwzlr-ngrde mz nzlepx-krdr Nrpakxmrlz. [Aposol 14; Rom 16:7; 1 Korint 15:7]

Ncblo kcng nzpnu-esz'-nrade-li (12) tqmcpx kai Jiszs nzprtrng mz nzwnzng kc tqmyapxbz tzrpibz 'Aposol.' Aposol kc-kaing nidr seleng: Saemon Pita (nzsri-kzpz Sifzs), Adru mzle Pita, Jemes (mrlx Sebedi), Jon (mzle Jemes kx topwzbz), Filip, Batolomiu (mrlx Tolmai, kx mwz nzrpip-kzpz Natzniel), Matiu (nzsri-kzpz Livae mrlx Alfizs), Tomas, Jemes (mrlx Alfizs), Saemon (kc tqoprtr ena mz dzbede kc tzrpilr namaszrltxpx-ngrdr gzpman ngr Rom mz nzmnc-krdr Israel), Judzs (mrlx Jemes, kc tzrpip-kzpz Tadizs), x Judzs Iskariot kc tqamwabzle Jiszs mz enqmi rdeng. [Matiu 10:1-4; Mak 3:13-19; Luk 6:14- 16] Dzbede lc nzrpibz 'krkcng nzpnu-esz'-nrade-li', kxmule-esz' Judzs Iskariot nibq-lzbq x ncblo nzpnu-esz'-nrade-esz' (11) kcng tzmcpxwzng. Mz Aposol 1:21-26 nzmcpxlr Mateas mz nztekqtr-krde Judzs. Rpi Pita kx ncblo kc natekqtrle Judzs nangi doa kx prtr-zvzbz badr mzli kc tzvz-nqblq-ngrdr Jiszs, abzo mzli kc tqawrkxtrngr Jon le, krlzbzle nzvzdz-krde Heven. [Aposol 1:21-22] Zbz mz nibrde Jiszs sc tqaelwapx-lzbq-ngrbz mz Sol dalr taon Taszs, x kqle-kzle nide mz nzngini-krde aposol. [Aposol 9:1-16] Mz nibrde drtqde sc tzrpip-kzpz Pol. Jiszs esz'-krde sc tqkqle-txpwzle aposol lcng.

Nzryrngrkxtr tripleu bagu da kxkqlu mz kxmu nzlu-krdr aposol mz nibr nzvzdzkr Jiszs Heven. Krlzku da kx kqlupxbz mz Pol x Pita mz

'Da Kcng Tzaleting Aposol.' Rngine-kzgu kzdung be ngr kzdung aposol kx tryclzpqu mz Nzryrngrkxtr. X mz nzmu-krde lcde, trkrlzkuu kx ngi da zpxw o trtingr. Leplz nzkqlung nzrpilr kx nznibqng amrlx ngrdr murde nzryapwxpx-krdr Nrpakxmrlz, a' ngi txpwz Jon kc tqbz mzli kc tqlrtzlvpe-ngrde.

Pita- Kzdung nzryapwx-ngrng nzrpilr kx Pita nztqlvztr mz kros mrkc Rom. X nzadongr nide, narde nzapwxo x nanycede nzapwxlz wq murde mz drtwrde trtakitrdeu nzbz-krde nzbzkr Jiszs.

Adru - Nzryapwxtrngr mz Adru blepx-lxblrng x trkrlzkuung nike da angidrng. Kzdung nzrpilr kx ryapwxpx mz kandre kc Sitiz. Kzdu-kzng nzrpilr kx ryapwxpx mz provins kc Akaia, x kzdu-kz-moung nzrpilr ryapwxpx mrkc Esia x Tres. Kzdung nzrpilr kx abzole makxtr kc Konstantinopol mrkc Trki. Kzdq kz be rpile kx sc tqvzpe Patae taon mz Provins kc Akaia x gavzna mrlcde rpibzle bade nzptr-krbzle mz nzangiongr gct rdr lr Rom. Pxtxpx-ngrde, x sc tzviplapelr, x sc tzadoopemlr mz kros mz nzpetr-krbzlr mz nqvi, murde na-aboipxbzlr nzbz-krde. A' trnztqlvztrlru mz nilz. Nzrpilr kx dotile mrkc zbq li, sc tqglqlzle Gct, x tqryapwxpxbz Nrpakxmrlz mz leplz kcng tzaokztilr nide. Nzrpilr kx kros kc tqbzo-ngrmle apule letz 'X', x mzli ka kros kxmule lc nzrpibz 'Kros Ngr Adru Kxtr.'

Jemes, mrlx Sebedi - Krlzku mz Nzryrngrkxtr kx Jemes, mzle Jon nibq King Herot Agripz kc kai. [Aposol 12:1-2]

Jon - Krlzku mz Nzryrngrkxtr kx Jon lc tqngi mzle Jemes, mnc krlzbzle nzngini-krde lrtzlvz. Mz nzryr-ngrng kx trycpxpqung mz Nzryrngrkxtr krlzku kx Jon mnc krlzbzle yiz kc 100 AD.

Filip x Batolomiu - Be kx nzycmnetr-ngrdr Filip x Batolomiu nzrpilr da nzling o nztqng kx drtwrdr tr-esz'tiung, x rblk nzrkrlzngr be kxtubq x be kxvz-rbr.

Matiu - Be kx nzycmnetr-ngrdr Matiu nzrpilr kx ryapwxpx Nrpakxmrlz mrkc Judiz twztilele yiz nzpnu-esz'-nrade-li (12) o mwz krlzbzle yiz nzpnu-esz'-nrade-nzlvqn (15). Zbz vz ryapwxpx kz Nrpakxmrlz mz kandre kzbleng.

Tomas - Tomas drtwr ngrde 'kxlipxm,' a' trnzkrlzu neke nzlipxmqng ncdr. Kzdq be kx ycmnetr-ngrde Tomas rpile kx ryapwxpx Nrpakxmrlz mrkc Partia o Prsiz x nzyrtzmq mz taon kc Edesz. X kzdung kz be nzrpilr kx Tomas vz-krlzbzle Indiz x nznibq mz spiz.

Jemes, mrlx Alfisz - Mwx nzrpibz 'Jemes kc tqtopwzbz' murde topwzlbz mz Jemes kc tqngi mrlx Sebedi. Kzdung leplz nzrpilr kx lxede yrlztibz Kleofzs kc tqngi mzle Josip, ncblo ngr Mxri kc tqngi lxe Jiszs. Nzmu nangi da zpxw le, Jemes ngi kave kr Jiszs, apule mzlede, mz ile lxede. Trpnzngr be kx yapwxile nike alele o kxmu nzbz-krde.

Saemon kc tqprtr ena mz dzbede kc tzrpilr namaszltxpx-ngrdr gpzman ngr Rom mz nzmnc-krdr Israel - Trpnzngr be ngrde.

Judzs, mrlx Jemes - Trpnzngr be kx ycmnetr-ngrde nide.

Judzs Iskariot - Krlzku mz Nzryrngrkxtr kx Judzs Iskariot ado-lzbq.

Pol - Kzdung be nzrpilr kx Pol vz mz nzryapwxpxngr Nrpakxmrlz Spen x sc tqyzlu-atem Rom. Pol rpile kx suti drtwrde nzalengr dalc, Rom 15:23-28. A' leplz amrlx drtwrdr esz'ti kx nznibq mrkc Rom.

24.3 profet—(prophets)

Mz nzrkrlzngr dalr profet kcng mz Nzryrngrkxtr Kc Kai, mc Mosis x Elaeja mz nibr 'kxnzrmailzng r lr Jiu'. Profet lcng nzplzpxbzlr mz lr

Israel nrpa kc tqkabz Gct badr. Nzycmnetr-ngrdr Profet kc Tqmyalzesz'ngr tqapule Mosis kc navzm. X Jiszs Kxnzmcpx sc tqatutrepele natq lc. Mz Nzryrngrkxtr Kc Ate nzycmnetr-ngrdr profet kxnxmulr lcng, nidr badr lrmakxtr kcng tzrtwzlr nzwzkr profet mz dzbe lrmakxtr x doa kcng tzrngiscng zmatq ngr nzrplzpxngr nrpa kc tqkabz Gct. Nzryrngrkxtr Kc Kai rpi-kzle kx nzu mu kzdg natq profet kx tratutr-ngrdeu, takitrde nznribqng nide, murde pokia mz nznripi-krde kx natqde kabz Yawe. [Lou Kcpwz 18:20-22]

Mz Efiszs 4:11 mcku nzwzkr profet mz nzokatrngr lrmakxtr. Pol rpile kx Gct mcpixe leplz kx nzrplzpx-zpxng nrpa ngrde mz nzprtr-krdr mz nzwzkr 'profet.' Nzvz-kzpzung mz nibr aposol mz zmatq ngr nzaclvengr, murde aposol kx myatxlz-zlwzbz. Mz 1 Korint 14:29, Pol rpile kx kzteng profet x kzteng leplz kc-kzng tzrplzpxng nrpa kx kabz Gct naobqtrpzng mz nrpa lcng mz nzrmcngr kx nztubqng amrlx ngrdr o mwx kzdzung natqdrng vz-rbr, murde drtwr ngrdr trnzrsakrlr-ngru mz Nzryrngrkxtr. Mc kz 'nzrplzpxngr nrpa kx kabz Gct' mz Nzalvztr-ngrng Kxmyapxbzng.

24.4 **kxnxrlepxng Nrpakxmrlz**—(evangelists)

Mz Efiszs 4:11 Pol pi-kzle kx Gct mcpixe kzdzung leplz mz nznrlepxng Nrpakxmrlz. Kxnxrlepxng Nrpakxmrlz lcng nzalvztrng x nzryapwx-pxbzng nrpa mz leplz kx trnzlxngitikalr Jiszs. Mz Aposol 8:4-13, 26-40, x 21:8 rlwxku nzwzkr Filip mz nznrlepx-krde Nrpakxmrlz, kx ni-kzde kzdg ncblo kcng nzmcpx-kaing mz nzaclve-krde dalr makxtr. [Aposol 6:5-6.] Timoti rlepx kz Nrpakxmrlz. [2 Timoti 4:5] Kxnxrlxngiting amrlx nzkqleng mz nzpi-krbzlr mz kztedrng Nrpakxmrlz x da kcng tqmrlz tqalebz Jiszs mz nzmnc-krdrng. A' kzdzung leplz nzmcpxng mz nzwzkr nznrlepx-zvz-krdr Nrpakxmrlz. Aposol kc-kaing ngini-kzdr kxnxrlepxng Nrpakxmrlz, a' leplz kxnxrlepxng Nrpakxmrlz amrlx trnzngini-kzdr aposol.

24.5 **kxnxacvlelr dzbe lrmakxtr**—(overseers, pastors, bishops, priests, presbyters, elders)

Pol ycmnetr-ngrde doa kzniye takitrde nzngini-krde kxacvlele dzbe lrmakxtr mz 1 Timoti 3:1-7 x Taetus 1:5-11. Mz nzrtekqtrngr 'kxnxacvlelr dzbe lrmakxtr' drtq kx nzyrtiolar nidr seleng: kxaclve, pasto, bisop, presbitz, x lrtzlvz. A' mz Nzryrngrkxtr Kc Ate nzalelr nzwzng kcpwz. Mrka mz trmctu nyzgu, nzkqle-ngrbzng nidr pris, x mama, x pasto. A' mz natq pris lc, kxmule-esz' nztwzlr drtq kcpwz, a' pris mz makxtr nyz Kraes mzli ka nzwz-krdr blepx lxblr mz pris rdr lr Jiu mz Nzryrngrkxtr. Da lc akqlutibzle drtwr kzdzung leplz. Mz Nzryrngrkxtr Kc Ate, kzdg aposol o mrlx kx nzwz-zvzng badr kzdg aposol, da kc tzwai Timoti x Taetus, dela namcpx-zvzle leplz kxna-aclvele kzdg dzbe lrmakxtr. [Taetus 1:5] Kzdung mzli ncblo kx li o tq nzaclve-lxblrlr dzbe lrmakxtr kxesz'. Ncblo lcng nzwz-krdr nzaclvengr x nzalvztrngr dzbe lrmakxtr nedr murde nzrlxngiti-krdr naxplr vzz x na-ale-kzlr nzwzkr Gct. X takitr-kzde lrmakxtr nzxpe-krdr krkcng tzaclvelr nidr. [Luk 10:7; 1 Timoti 5:17-18] Nzwzkr Bisop kc tqycbz mz COM mzli ka, trycu mz yiz kcng trtqki li mz nibr nzrmcngr mz Jiszs. A' nzwzng lc nzyrlqbz mz nibr nzbzpekr aposol kc-kaing amrlx, mz mzli yiz 100-200 AD.

Nzryrngrkxtr alvztr-ngrde kx lrmakxtr navz-nqblqlr natq kxnxacvlelr nidr [Hibru 13:17], x bzkq nzalzqzbzng mz da kx nzycmne-atrkat-ngrde nidr. A' leplz nali o natq namc-kailr nzvz-rbrkr kxacvlele nidr, x lrmakxtr sc tzaolvz-atelr nzvz-rbr-krde lc. Murde ma Setzn tqatrkatile nidr badr leplz kcng tzaclvelr mz nzatrkat-rbr-krde kxnxrmailz lcdeng. Trngiu da

kx rblx-zlwz nzrpngr kzdung da mz nzymne-atrkatingr kxrmailz. A' nzmu kx tqmc-zpxw kzdq doa kx dalc ngi da angidr x mc-kzle esz'-krde nzvz-rbrkr kxrmailz lc, nzmu doa lc vz-rbr nzrlene-krde natq kxtrka. [1 Timoti 5:19]

24.6 **kxnxalvztr-ngrdr mz Natq Gct**— (*teachers of God's word*)

Mz Efisz 4:11 Pol ycmnetr-ngrde Gct nzmcpx-krde leplz kx nzalvztr-zpxw-ngrdr mz Natqde, murde naokatrlr lrmakxtr. Mz Nzryrngrkxtr Kc Ate, leplz nzkqlung nzvzneng mz nrlc mz nzalvztr-krdr kxnxrlxngiting mz natq Gct x Nrpakxmrlz, da kc tzwai Banabas x Timoti x Taetus. A' kzdu-kzng kxnxalvztrng mz natq Gct nzmcneng mz kzdq dzbe lrmakxtr. Kzdung nidr nzngini-kzdr kxnxacvelr dzbe lrmakxtr x kzdung trtingr. Kxnxalvztrng mz Natq Gct nzblepxbzng mz kxnxrlxngiting Nrpakxmrlz murde nzalvztr krkcng tzrlxngiting.

24.7 **kxnxacvleng dalr makxtr**— (*deacons*)

Aposol 6:1-6 ycmnetr-ngrde ncblu kcng nzrlimzng tzmcpx-kaing mz nzacve-krdr dalr makxtr. Nzuz-krdr lc tqngi nzaki-ngrbz dakxnzng mz nra-nzlu ngr leplz. Mz makxtr nyzgu mzli ka, krkcng tzrpibz srs kipz, srs kcmiti, x kxacvlele trau nzalelr nzuzngr kcpwz tzale kxnxacvleng dalr makxtr kcng pnz. Pol pibzle mz Timoti leplz kx nztakitrdr nzacve-krdr dalr makxtr mz 1 Timoti 3:8-13. X mz Rom 16:1, Pol ycmnetr-kz-ngrde kzdq olvz, drtqde Fibi, kc tqtwzle nzuzngr lc. Delc nzuzngr lc nzrlr-kz-ngrbz mz olvz.

Mz nzrtekqtrngr 'kxnxacvleng dalr makxtr,' drtqdr kx nzpibz x nzyro 'dikon' mz natq lr Grik. A' dikon lc, blepxbz mz dikon ngr COM. Murde krlc mz Nzryrngrkxtr nzuz-krde nzacve-krde dalr makxtr, a' dikon ngr COM nzprtr-kzng mz kxnxacvelr dzbe lrmakxtr. Mc kz natq kxtopwz mz 1 Timoti 3:8-13.

24.8 **kxnxrlxngiting amrlx nzngini-krdr pris**— (*priesthood of believers*)

1 Pita 2:5, 9 alvztr-ngrde nigu kx kxnxrlxngiting amrlx nznginidr pris. A' drtwr lc blepxbz mz nzuzkr pris o pasto mz nzacve-krdr kzdq dzbe lrmakxtr. Murde mz nzngini-krgu pris nzuz-krgu nide sele. Okatrku nzrvzmi-krm leplz mz Gct. Blz kcng tqtwzmgur trngiu dalr nzrkapxng alwx, a' ka-alzupwzku nzlu-krgu mz nzuztr-krbzku bade, x kalzbzku bade nzrglqlzng. X krka'-nrgu leplz. Pita rpi-kzle kx nigu pris kxnxtrng x king. Mc kz 2 Timoti 2:12 x Nzaelwapxngr 20:6 kc tzrpilr kx sa na-apuku king badr Kxnxmcpx.

25 **lralvc**— (*fortress*)

Lralvc ngi kzdq nrlc kxnmqngi kx nzmcnkapqng leplz mz mzli r nzvo-krmqng enqmi rdrng. Mz Nzryrngrkxtr lralvc lc ngi ma kxetu x drkq ngrde nzuzngr mz rplz, murde trpnzng milogo x tri kx natakitrde nzdwatr-krdr elr mz nznibq-krde leplz. Mz kzdung Sam, Devet rpile kx Gct nide lralvc nyzde. Nzymne-ebzpxngr lc drtwr ngrde kx mnc zpxw murde abrtrpzle drtwrde mz Gct mz nzacve-krde nide, murde ma enqmi rdeng tzatrkatilr nide.

Mz nqmq krgu, lralvc ngi kzdq nrlc kx nzuzngr peto mzli kc, mrkc leplz narlape-ngrdr mz nzrtqkr tri sc enqmi ngrdrng. Kzdq lralvc lcng tqblzlo-ngrng sa tqyctibe peto.

26 **mana**— (*manna*)

Mana ngi dakxnzng kc tqkabz Gct mz lr Israel mz zmatq ngrde mz yiz kcng nzpnu-pwx (40) tzmcn-ngrdr lzke. Nzycmetr-krpwzle mz natq lr Hibru kc tqvzpx-ngrmle, mana drtwr ngrde 'da kx memulengr lc' o 'da

kxnzrkangr' [Nzrlaszngr 16:15-35; Nzqqlu-krdr 11:7-9; Lou Kcpwz 8:3, 16; Josua 5:12; Sam 78:24-25] Mz nourla kang kqlu, yctxpwpwz Sabat, mana adcpx-lzbq mz drtc' x lr Israel nzatamuti-lxblrng. Mana lc tqngi da kxtopwzne, kx aolzbq x prki. Nilwzde apule wefz kx ycni hane. Lr Israel nzoliqtilr dakxnxng lc mz nzbi-krdrle o mz nzasu-krdrle mz lue kxpq, o mz nzyrlx-krdrle, x sc tzngqpelr. Mana kcng tzyrlqtilr krlzbzle zbq kzble, sc tqtrkape-ngrde nzveakr be leng. A' mz zbq kranzlvqn nzatamuti-krdr mana nakqlu murde natakitrde zbq kxli mz nzngq-krdrle, krlc zbq kranzlvqn x Satqde kc tqngi Sabat nyzdr. Murde mz Sabat trpnz-moungr mana kx yrbqne mz drtc'.

Mz Nzryrngrkxtr Kc Ate, kzdung mzli lr Jiu nzycmnetr-ngrdr mana kx nzngqdr melrmdrng nznginikr 'bret kx vzom Heven.' [Jon 6:31-35, 48-51] Ycmnetr-kzngr Jiszs 'Mana kc tqyc-kapq'. [Nzaelwapxng 2:17]

27 **mrlzu r leplz**—(*kinds of people*)

27.1 **kxnzrlxngiting**—(*believers*)

27.1.1 **kxnztrng**—(*saints*)

27.1.2 **leplz neng Jiszs**—(*disciples*)

27.1.2.1 ncblu neng Jiszs kcng 12—(*the 12 disciples*)

27.1.3 **kxnzvz-nqblqlr Jiszs**—(*followers*)

27.1.4 **nrkrdrtrq Kraes, nrkrdrtrq Kxnmcpk**—(*body of Christ*)

27.1.5 **lrmakxtr**—(*church people*)

27.1.6 **olvz r Kraes, olvi kxmnc-kamelr kc nayrlztile, olvz krnalz**

Nei Sip—(*bride of Christ*)

27.2 **kxtrnzrlxngitiung**—(*unbelievers*)

27.2.1 **kxnzmnc-mrbrng**—(*pagans*)

27.3 **lr Szmariz**—(*Samaritans*)

27.4 **kxtrngiulrJiu**—(*Gentiles*)

27.5 **kxnzrtekqtrng trau**—(*money changers*)

27.1 **kxnzrlxngiting**—(*believers*)

Doa kx nzlxngitilr kx Jiszs nide mrlx Gct x nzabtrpzlr drtwrdr bade mz nzipq-krbzle alwx ngrdrng x mz nzvzmi-krde nidr Heven, nidr kcng tzrlxngiting. Nzsuti kz drtwrdr nzalengr da kx pibz Gct nzale-krdrle, a' trnzsuti drtwrdr nzalengr alwx. Kzdung lang leplz nzrpilr kx nzrlxngiting, a' nqmq krdr aelwapx-ngrde kx trnzngini-zpwxlru kxnzrlxngiting. Mz Nzryrngrkxtrng, kxnzrlxngiting nzkqlebzlr badr drtq kqlu kxbletipx. Nzqlebzng kxnztrng, leplz neng Jiszs, leplz neng Gct, kxnzvz-nqblqlr Jiszs, nrkrdrtrq Kraes, lrmakxtr, x olvz r Kraes. Drtq lcng kqlu pi-txpwzle doa kcpwzng.

27.1.1 **kxnztrng**—(*saints*)

Mz Nzryrngrkxtr Kc Ate, kxnzrlxngiting nzkqle-zvzbzng kxnztrng. Trngiu drtwr ngrde kx nidr leplz kx nzmrztxpxbzng mz kzdung kz leplz. Murde kxnzrlxngiting amrlx nidr kxnztrng mz nzobqkr Gct. Natq lc 'kxnztrng,' drtwr ngrde leplz kcng tqmcpx Gct x akipxbzle nidr mz kxtrnzrlxngitiung, murde nanginidr leplz nedeng kx bletpxbxzng, kcng tzwtrpzng bade. Kxmule-esz' mz nzobqkr leplz, kzdung leplz nzmr-lzpxbzng mz kzdu-kzng, a' kxnzrlxngiting amrlx nztwzpelr nztubqkr Jiszs mz nzobqkr Gct. X mz nzmu-krdr lcde, nzrsakrlr-ngrng mz nzobqkr Gct.

Vz-rbrku mz nzrpi-krgu kx leplz kxnztrng drtwr ngrde leplz kcng nzrlxngiti-krdr xplrx, x kx nzmyaszpxlr leplz neng Gct kc-kzng. Murde drtwr lc tzyrlqbzlr mz nzvz-nqblq-krdr drtwr leplz trngiu drtwr ngrde mz Nzryrngrkxtr.

Mz Inglis ngalrdeng kcng tzycmnetr-ngrdr kxnxtrng nidr seleng: [Matiu 27:52; Aposol 9:13, 32, 41; 26:10; Rom 1:7; 8:27; 12:13; 15:25-26, 31; 16:2, 15; 1 Korint 1:2; 6:1-2; 14:33; 16:1, 15; 2 Korint 1:1; 8:4; 9:1, 12; 13:13; Efisz 1:1, 15, 18; 2:19; 3:8, 18; 4:12; 5:3; 6:18; Filipae 1:1; 4:22; Kolosia 1:2, 4, 12, 26; 1 Tesalonika 3:13; 2 Tesalonika 1:10; 1 Timoti 5:10; Filimon 5, 7; Hibru 6:10; 13:24; Jud 3; Nzaelwapxngr 5:8; 8:3-4; 11:18; 13:7, 10; 14:12; 16:6; 17:6; 18:20, 24; 19:8; 20:9]

Mz Natqgu ngalrdeng kcng tzycmnetr-ngrdr kxnxtrng nidr seleng: [Matiu 6:16; Rom 15:31; 1 Korint 6:11; Efisz 1:4, 15; Filipae 1:1; 4:21; Kolosia 1:22; 3:12; Taetus 2:3; 1 Pita 3:5; Jud 3; Nzaelwapxngr 18:24; 19:08; 22:11; 22:21]

27.1.2 **leplz neng Jiszs**— (*disciples*)

Kxnxrlxngiting nzkqle-zvzbzng leplz neng Jiszs. Mz Natqgu, ‘leplz neng Jiszs’ tekqtrle natq lr Ingilis lc tqngi ‘disciple.’

27.1.2.1 **ncblo neng Jiszs kcng nzpnu-esz'-nrade-li**— (*the 12 disciples*)

Kzdung mzli Nzryrngrkxtr ycmnetr-kz-ngrde aposol kcng nzpnu-esz'-nrade-li (12), mz nzpi-krdrle ‘ncblo neng Jiszs.’ Mz Natqgu natq lcng drtwr ngrde ncblo nzpnu-esz'-nrade-li kcng tzmc-aepztrpzng mz Jiszs, a’ trngiu leplz amrlx nedeng.

27.1.3 **kxnrvz-nqblqlr Jiszs**— (*followers*)

Leplz kcng tzvz-nqblqlr Jiszs drtwr ngrde li. Murde kzdung mzli nzpingr leplz neng Jiszs, a’ kzdung mzli drtwr ngrde leplz kcng tzvz-nqblqlr Jiszs mrkang kqlu tqvzkile, a’ trnznginidru kxnxrlxngiting angidr. Kzdung mzli rblkx nzrkrlngr kx Nzryrngrkxtr ycmnetr-ngrde kxnxrlxngiting, o kxnrvz-nqblqng kcng trnzrlxngitiung, o drtwr lcng li.

27.1.4 **nrkrdrdq Kraes, nrkrdrdq Kxnmcp**x— (*body of Christ*)

Kxnxrlxngiting amrlx mrkc Heven badr krkng mz nrlc ka, nzkqlebzng nrkrdrdq Kraes. [1 Korint 6:15; 12:12, 18, 19, 24, 26, 27; 15:16; Efisz 3:6; 4:12, 16; Kolosia 1:18, 22] Mqngurgung nzaxvctr-lxblrng murde nzaxvctrpzku mz Mqngrkxtr kc tzaxvctr-kzpz mz Jiszs. Nzngini-krgu nrkrdrdq Kraes lc trapuleu nrkrdrdq lcng mz nrlc ka, a’ ngi mz nrlarde nyz mqng.

27.1.5 **Irmakxtr**— (*church people*)

Mz Nzryrngrkxtr mz Inglis, natq lc ‘church’ trngiu drtwr ngrde makxtr, a’ drtwr ngrde leplz neng Kraes. Kzdung mzli drtwr ngrde leplz neng Kraes amrlx kx nzyrlwr-lxblrng me esz’ mz nzangio-krdr nide. X kzdung mzli drtwr ngrde leplz neng Kraes amrlx mrkc Heven x mz nrlc ka. Trngiu drtwr ngrde leplz kx nzvzmqng mz makxtr, a’ trnzrlxngitiangidrung.

Mz Natqgu, nzycmnetr-ngrdr ‘irmakxtr’ myaslzle nzwrde trtqki-li (200). Kzdung ngalrde lcng nidr seleng: [Matiu 16:18; 18:17; Aposol 5:11; 8:1-3; 9:31; 11:22, 26; 12:1, 5; 13:1; 14:23; 15:2, 22; 18:22; 20:17, 28; Rom 16:1, 3-4, 23; 1 Korint 1:2; 4:17; 5:13; 6:4; 10:32; 11:18, 22; 12:28; 14:2, 4-5, 12, 19, 23, 35; 15:9; 16:19; 2 Korint 1:1, 13; Efisz 1:22; 3:10, 21; 5:23-32; Filipae 3:6; 4:15; Kolosia 1:18, 24-25; 4:15-16; 1 Tesalonika 1:1; 2 Tesalonika 1:1; 1 Timoti 3:5, 7, 15; 5:16; Filimon 2; Hibru 12:23; Jemes 5:14; 3 Jon 6, 9-10; Nzaelwapxngr 2:1, 8, 12, 18; 3:1, 7, 14]

27.1.6 **olvz r Kraes, olvi kxmnc-kamelr kc nayrlztile, Olvz Krnalz Nei Sip**— (*bride of Christ*)

Kzdung mzli kxnxrlxngiting amrlx Heven x mz nrlc ka nzkqlebz ‘olvz r Kraes,’ o ‘olvi kxmnc-kamelr kc nayrlztile,’ o ‘olvi kx nayrlzti Kraes kalr,’

o ‘Olvz Krnalz Nei Sip’. [Matiu 11:11; Luk 7:28; Jon 3:29; Efisz 5:27; Nzaelwapxngr 19:7; 21:9; 22:17]

27.2 **kxtrnzrlxngitiung**—(unbelievers)

Kxtrnzrlxngitiung trnzlxlxngitilru Jisszs nzngini-karde Mr lx Gct, x trnz-abrtrpwzlsru drt wrdr bade mz nzarlapx-karde nidr. Rblx nzhpi-angidrngr nekeng kxtrnzrlxngiting. Murde leplz kxkqlu nzvzng mz makxtr, a' trnzvz-nqblqlru nqmq kr Gct. Op xm kx trnznginidru kxtrnzrlxngiting.

27.2.1 **kxnzmnc-mrbrng**—(pagans)

Kxtrnzrlxngitiung leplz kxtrnzrlxngitiung. Mz Natqgu, rpi kx leplz kxtrnzrlxngitiung nzapulr lr Kwaio. A' mz Nzryrngrkxtr, kxtrnzrlxngitiung. Mz nzmu-karde lcde, leplz amrlx mrkc Santz Krus kcng trnzlxlxngitilru Jisszs, ni-kzdr leplz kxtrnzrlxngitiung. X mz nzkrka'-krgu kxtrnzrlxngitiung, krka'-kz-ngrgu kzdung lr mrnyzgu, murde kxtrnzrlxngitiung amrlx nzmnc-mrbrng.

27.3 **Ir Szmariz**—(Samaritans)

Leplz kx nzvzpxmqng mz Provins kc Szmariz mz mzli nyz Jisszs trnzngini-angidru lr Jiu. Murde kxmule-esz' melrmqdr nznginidru lr Jiu, a' nzylztilr kxtrngiulrJiu x trnzvz-nqblqlru nqmq kr lr Jiu. Nzlxngiti-txpzlr buk kcng nzlvqn tqyr Mosis nznginingr natq Gct. Nzpxtxpx-ngrdr buk kc-kzng mz Nzryrngrkxtr Kc Kai. Nzangiong x nzrkabzng blz mz newz Gerasim, a' trngiulrJiu mz Mangr-nzangiong Yawe Jerusalem. Mz nzmu-karde lc, lr Jiu nzpxtxpx-ngrdr lr Szmariz, nzngyati drt wrdr nidr, x nzobqszolr nidr. X Ir Szmariz nzngyati kz drt wrdr lr Jiu. Provins kc Szmariz yc mz mzli Provins kcng Gzlili x Judiz. X kzdung mzli lr Jiu nzkawilr Szmariz. A' mzli kang kqlu nzvz-ngle-ngrdr, kxmule-esz' nzvzne-krdr naboitpxbz, murde nzngangr-ngrdr lr Szmariz.

27.4 **kxtrngiulrJiu**—(Gentiles)

Leplz kxtrngiulrJiu amrlx nzkqlebz ‘Gentiles’ mz Inglis. Lr Jiu trnzkxu drt qdr kandre kznike, o nqvi kx vzpx-ngrm doa, nzmu kx nidr leplz kxtrngiulrJiu. Mz drt wrdr lr Jiu, kxtrngiulrJiu amrlx nidr leplz kxtrnzrlxngitiung kx nzangiolr gct kzbleng. Mz nzmu-karde lc nqmq krdr trka. Mz drt wrdr lr Jiu txpxwz kx ngi leplz angidr neng Gct.

Mz drt wrdr kxtrngiulrJiu, lr Jiu nidr leplz kxtrnzrlxngitiung x nzbletx-pxbzng. Nzmnccpxbeka-zvzng mz kxtrngiulrJiu. Trnzangiolru gct kxkqlu, a' nzangiolr Gct esz'txu pwz kx trpnzngr doa kx rkrlz kxmule. Mz nzmu-karde lc, kxtrngiulrJiu nzpnzkr drt wrdr le kx lr Jiu nidr leplz kxdrka'-ngrng, murde trnzangiolru gct kxtrnzrlxngitiung da kc tzwai leplz kcng tzmrzlzng. Nqmq krdr lr Jiu nzbletx-pxbzng x nzotablr-zvzng x nzotang nzmu doa nzatrkatibzlr nqmq krdrng. Mz nzmu-karde lc, kxtrngiulrJiu nzobqszolr lr Jiu x nzatrkatibzlr nidr.

27.5 **kxnzrtekqtrng trau**—(money changers)

Jiu nzkqlung nzmnctrpqng mrkzbleng. Nzvzki-zvzlr Jerusalem mz nzrka-krdr blz x nxzpe-krdr takes ngr Mangr-nzangiong. A' mzli kx nzvz-ngrmlr Jerusalem, trau scdr ngi krscdr kzbleng yctitrngr mqngr nar king kc etu x kzdu-kzng da kxtrka mz nzobqkr lr Jiu. Mz nxzpe-krdr takes ngr Mangr-nzangiong, lr Jiu lcng nzsuti drt wrdr trau scdr lr Jiu kx takitrde nzrkatrngr Mangr-nzangiong. Murde trau scdr lr mrkzbleng trtakitrdeu. Ncblo kcng tzrtekqtrng trau nzwxbuong yz mz Mangr-nzangiong mz nzale-krdr nzwzngr lc. Mz mzli lc, trpnzngr trau kx ngi pepz, a' trau amrlx ngi srlrni kx apule aian.

Nzwrde li kx Jisszs maszlrpx-ngrde kxtrnzrlxngitiung trau mz Mangr-nzangiong. [Nzwrde kc ayrnrngr mz Jon 2:13-16; x nzwrde krali

kc mz Matiu 21:12-13 x Mak 11:15-17.] Makoa nyzdr kxtrngiulrJiu yc mz nabz Mangr-nzangiongr Yawe. X Gct suti drtwrde kx leplz kcng trngiulrJiu nakrka'bzng bade elr. A' krkng tzrtekqtrng srlrni x kxnzamwang animol kxnangi blz nzapusr-ngrdr makoa lc mz nzngini-krde me nzamwangr da, x rblxbz mz kxtrngiulrJiu nzkrka'-krdr elr. Mz nzmu-krde lcde, Jiszs alzngubzle tebol nyzdr x rlxtxbzleng trau scdr. X maszlrpx-ngrde ncblo lcng. Mz Matiu 21:13, Jiszs rpile kx ncblo lcng tzangqnguti-ngrdr leplz.

28 nqmq kr lr Israel x lr Jiu—(customs of the Israelites and Jews)

28.1 **nqmq kcng tzyrong mz Lou sc Mosis—(customs written in the Law of Moses)**

28.1.1 **nzrpakrngr—(circumcision)**

28.1.2 **da kx batrpzle mz doa trnztakitr-krdeu nzprtrngr mz nzangiongr mz nzvz-nqblq-krde Lou sc Mosis—(ceremonially clean and unclean)**

28.1.3 **animol kx trnangqu—(Unclean food)**

28.1.4 **nzprtr-moungr mz nzangiongr mz nibr nzrmikangr doa—(purification from childbirth)**

28.1.5 **kxnamu nzalengr blz—(sacrificial system)**

28.1.6 **nctq nqvi kxmrbc kcng tzdotitrng mz lrpz, nctqdeng nzyalqtipx—(tassels)**

28.1.7 **bokis kxtopwz ngr rtrllrmz x mq, tqyctrngr Nzryrngrkxtr—(phylacteries)**

28.1.8 **kx-xpepx kxnginide x mzle ncblo nzyrlzti-krde olvz r mzlede kx bzszle nidr—(kinsman-redeemer & Levirite marriage)**

28.1.9 **yiz kx ngi Sabat x Yiz ngr Nzabrtzngr—(sabbath years and the Year of Jubilee)**

28.1.10 **nzrpivxitingr Gct—(blasphemy)**

28.1.11 **nzrvaebqngr mz rplz—(death by stoning)**

28.2 **kzdu-kzng nqmq kr lr Jiu—(other Jewish customs)**

28.2.1 **dakxnxng nadr—(food the Jews ate)**

28.2.2 **nzaelung mz tolo—(anointing with oil)**

28.2.3 **nzyrlqo-ngrbz mq mz kzdq doa—(laying on of hands)**

28.2.4 **trnzrlr-ngrpwu mz olvz kxnzbzsng nzmnginyz-krdr drtc'—(widows can't own land)**

28.2.5 **nqmq ngr nzryrtzmqngr namz—(burial customs)**

28.2.6 **drtq Gct x nzrlxtingr mz drtq Jiszs—(name of God and asking in Jesus' name)**

28.2.7 **Seol, Hedis, Paradaes, Heven, Hxl—(Sheol, Hades, Paradise, Heaven, Hell)**

28.2.8 **nzrwztingr mq—(washing of hands)**

28.2.9 **trnzpipx-ngru "Gct" o drtq Gct—(avoiding saying "God" or God's name)**

28.2.10 **nzrpesalingr lrpz—(tearing clothing)**

28.1 **nqmq kcng tzyrong mz Lou sc Mosis—(customs written in the Law of Moses)**

28.1.1 **nzrpakrngr—(circumcision)**

Gct yrlqbzle nzrpakrngr mz Nzesz'tikr Drtwrdr mz Ebraam. Rpibzle bade kx nrkrdrtqde x nrkrdrtq ncblo amrlx mz ma nyzde x nrkrdrtq kxnzawz nedeng kx ncblo ngr napakrng. Nzrpakrngr ngi kzdq rkx kx kzdq ncblo nepe Gct. [Nou 17:1-14] Zbz mz nibrde, mzli kc Gct tqka-ngrbzle Lou mz Mosis, pile kx ncblo x doa ncblo amrlx kx nzmnlzbzng

Nzalvztr-ngrng da kx batrpzle mz doa trnztakitr-krdeu nzprtrngr mz nzangiongr mz nzvz-nqblq-krde Lou sc Mosis669Nzalvztr-ngrng kx

mz Lou scde napakrng. [Livae 12:1-3] Nzrpakrngr trbatrpzleu mz ncblo nznginekr Gct le, a' ngi txpwz rkx mz nrkrdrq ncblo.

Nzryrngrkxtr ycmnetr-kz-ngrde nzrpakrngr nabz leplz. Drtwr ngrde Mqngrkxtr batrpzle mz nabz leplz nqrtekqtrngr murde nanginidr doa angidr neng Gct. Nzrpakrngr angidr mzli ka ngi da kx trnzmcu mz nabz leplz. Mz nzmu-krde lcde, trpengr rkx lc mz nrkrdrq ncblo kxnzrlxngiting mzli ka. [Lou Kcpwz 10:16; 30:6; Jeremaea 4:4; 9:25-26; Rom 2:28-29; 4:11; 1 Korint 7:18-19; Galesia 5:6; 6:15; Kolosia 2:11; 3:11] Mc kz nzycmnetrngr Ebraam x nzesz'tikr drtwr Gct badr mz nzrpakrngr.

28.1.2 **da kx batrpzle mz doa trnztakitr-krdeu nzprtrngr mz nzangiongr mz nzvz-nqblq-krde Lou sc Mosis**—(ceremonially clean and unclean)

Mz Nzryrngrkxtr Kc Kai, Gct suti drtwrde nzalvztr-krde leplz nedeng kx nide Gct kxtr, x rblxbz mz kxnzaleng alwx nzesotr-krbzlr bade. Mz nzmu-krde lcde, mz Loukxtr kc tqkabzle mz Mosis, rmctiku da kqlu kx batrpzle mz leplz trnztakitr-krdru nzprtrngr mz nzangio-krdr nide. Nzbxtr-krdr nrkrdrq kxbz, kxsqki r nrkrdrqdr kx yrlebz, x ncblo nzmwimi-krde olvz rde, da lcng nzbatrpzlr mz leplz trnztakitr-krdru nzangiongr Yawe mz nzvz-nqblq-krde Lou sc Mosis. Mz Inglis nqrtekqtrngr da lc nzrpibz ‘unclean,’ a’ trnginiu dalr nzlqngikr nrkrdrq. Loukxtr yrlq-kzle nqmq kqlu kx navz-nqblq doa murde natakitrde nzprtr-moungr mz nzangiongr. Mz kzdung da, doa na-aenzlile nzkrlz-zpwxbzle me esaki ngr zbg la x sc tqtakitr-atede nzprtr-krde mz nzangiongr. A’ mz nzbxtr-krde nrkrdrq kxbz, trtakitr-ngrdeu nide mzbq rlimz, x doa la na-alele nzrwztingr kxtr mzli kc tqyrkrpx-ngrbz zbg lcng, murde naprtr mou mz nzangiongr. [Livae 5:2-3; 7:19-21; 10:10; 11:29-47; dckrlzdeng 12-15; 17:15; Nzkqlu-krdr 5:1-3; 19:14-22; Lou Kcpwz 23:19-11]

28.1.3 **animol kx trnangqu**—(Unclean food)

Lou sc Mosis pi-kzle kx kzdung namrlzu r animol takitrde nzmungr x kzdu-kzng rpwa'-ngrbz Gct mz leplz nedeng nzngq-krdrreng. [Livae 7:19-27; dckrlzde 11; 20:25-27; Lou Kcpwz 14:1-21] A’ mzli ka Jiszs rpile sa tqmrlz nzngqkr doa nedeng namrlzu r dakxanzng kcng tzrpwa'ngr mzli kc. [Mak 7:19] Gct pi-kzpzbz da lc mz Pita mz nzobq-rmwible-krde. [Aposol 10:9-15]

28.1.4 **nzprtr-moungr mz nzangiongr mz nibr nzrmikangr doa**—(purification from childbirth)

Mzli kx kzdu-kzng nra nbr, [Sam 40:6] 2) nzrkabzngr dalr wit, bali, o kzdu-kzng nra nbr, [Sam 40:6] 3) blz kx nabatrpzle leplz nzmnclz-lxblr-krdr mz nrwrx, 4) blz ngr nzalqngingr x nzatrngr da, 5) blz ngr nzayzlu-ngrbz nzvz-rbr-krgu. Nzkqlu-krdr 15:1-12 x Sam 54:6 nzycmnetr-kz-ngrdr 6) blz kx nzka-nrbalgng. Mz nzka-krbzlr blz lc, nzka-zvz-kzpz waen kc tzpulio-ngrdr mz drtc'. X mz buk ngr Sam nzycmnetr-kz-ngrdr 7) blz ngr nzawingr mz nzrka-ngrbz waen. [Sam 116:13, 17]

Alwx amrlx naxpe mz nzbzng. Mz nzmnclz-ngrbz mz Lou sc Mosis, Gct rlr-ngrbzle leplz nznibq-krdr kzdq animol nzngini-krde blz mz

Nzalvztr-ngrng nctq nqvi kx mrbc kcng tzdotitrng mz lrpz, nctqdeng nzyalqtipx670Nzalvztr-ngrng kx-xpepx kxnginide x mzle ncblo nzy

nzxpepx-krde alwxngrdrng. Namrlzu r blz kqluti kx nzale mz namrlzu r alwxng. Zbz nzwrdexkesz' mz yiz kxesz' Nardr Pris kapxbzle blz murde lr Israel amrlx naipqng mz alwxngrdrng kx trnzkrlzlr kx nzalelr. Gct pibzle mz leplz nedeng nzkapx-krdr blz lcng murde nakrlz-ngrdr kx ptxpx-ngrde alwx x alwx amrlx na-ayrplapxng mz nzbzngr.

Blz lcng naokatr-kzlr nidr nzkrlzng Nike mrlxde, Jiszs, bz-ngrde mz nztwz-krde nzayrplapxng kx takitrde alwxngrdu. Nzbzkr Jiszs xpe-ngrde alwx amrlx. Murde mz nzkapx-krdr animol kx ngi blz trxpextx-ngrdeleu nidr, a' Gct yrlqtxpxle alwx mz nzxpe-alzu-krbz nzbzkr Jiszs kalr. [Rom 3:25-26] X mz nzbzkr Jiszs, trtakirpedeu nzkangr animol kx ngi blz. X mou, nzrlrtx-ngrpwz nzka-ngrbzlr blz mz Mangr-nzangiongkc Jerusalem kx nzodatingr mz 70 AD.

Mc kz Nzalvztr-ngrng Kxmyapxbz mz 'mepyr' x mz 'sip x nei sip,' vzmi Nzryrngrkxtr lcde seng: [Nzrlaszngr 20:24-26; 29:38-42; Liva dckrlzdeng 3-7; 14:1-32; dckrlzde 16; Hibru dckrlzde 9-12]

28.1.6 **nctq nqvi kx mrbc kcng tzdotitrng mz lrpz, nctqdeng nzyalqtipx—(tassels)**

Lou sc Mosis rpile kx lr Israel na-adotrlr nctq nqvi mz nctq lrpz kcng pwx mz lrpz scdrng. Nqvi lcng nzapulr mrkc tqyalqtipx mz nqvi nrkalodr mama ngr COM, a' topwzbz. [Nzkqlu-krdr 15:38-40; Lou Kcpwz 22:12; Matiu 23:5] Nqvi lcng kala ngrdr naprki x kzdq nablu. Mzli kx kzdq lr Jiu mc-ngrde nqvi lcng, na-adcpwpwzle natq Gct kx navz-nqblqle. Nqvi lcng aopx-kzpze mz leplz kx doa lc tqrxpxingr nide kzdq lr Jiu.

28.1.7 **bokis kxtopwz ngr rtrlrmz x mq, tqycctrngr Nzryrngrkxtr—(phylactaries)**

Lr Israel nzpetr-zvzlr bokis kxtopwz mz rtrlrmztr o mqdr kx yclz-ngrm pepz yctingr ngalr Nzryrngrkxtr elr. Bokis lcng nzrpibzng 'filxktari' x nzpxi-ngrdr murde na-adcpwpwzlr natq Gct kx navz-nqblqlr. Nqmq krdr lr Israel lc vzpxm mz natq Gct kc tqkabzle mz leplz nedeng mz Nzrlaszngr 13:9, 16, x Lou Kcpwz 6:8 x 11:18. Jiszs ycmnetr-kz-ngrde bokis lcng mz Matiu 23:5 mrkc tqycctrngr Farzsi nzaetunepx-krdr bokis scdr murde leplz na-amrluelr nidr mz nzsri-krdr kx nidr ncblo kxztrng. Mzli ka kzdung ncblo lr Jiu nzpetr-ngrdr bokis lcng mzli kx nzsri-krdr.

28.1.8 **kx-xpepx kxnginide x mzle ncblo nzyrlzti-krde olvz r mzlede kx bzszle nidr—(kinsman-redeemer & Levirite marriage)**

Mz Lou sc Mosis kzdq kc lou nzsri-krde olvz r mzlede kx bzszle nidr. Mz Inglis nzsri-krde 'Levirite' (Levirite) murde natq lc 'levir' drtwr ngrde mzle ncblo mz natq Hibru. Mz nzpnzkr drtwr lr Israel nzyrkrtxtrkr nqvi lr kzdq ncblo ngi da kxtrka. Mzli lc, nzrlr-ngrbz mz kzdq ncblo nzyrlzti-krde olvz kx myaszlze kx esz'. Mz nzmku-krde lcde, nzmku kzdq ncblo nayrlzle x sc tqbzpe, trtxpzngr nede doa, e lou lc rpile kx mzle ncblo lc krlzle nzyrlzti-mou-krde olvz kc tzbzsz. Zbz mz nzobqkr leplz, doa ncblo ayrrnrngr kx nanginedr sa nanginepe ncblo kc tqbzpe. X doa ncblo lc na-aprcbz bade drtc' nyx ncblo kc tqbzpe, x nqvi lrde sc tqvz zvz. Ncblo kx nayrlztile olvz r mzlede nanginide kxnginide kx esotrpz mz ncblo kc tqbz. Nzmu rblxbz bade nzyrlzti-krde olvz lc, kzdq kz kxnginidr nayrlztile nide mz nzxpe-krde drtc' nyx ncblo lc tqbz murde na-aprcbzle mz mrlxde kc x nqvi lr ncblo lc ma tqmztr.

Nzyrlzng kxmule lc nzvz-nqblq lr Israel mz nqmq krdr kc pnz, x Lou sc Mosis sc tzka-ate. Mc Nou 38:8-26 x Lou Kcpwz 25:5-128. Be ngr Rut tuo mz nqmq lc. Ncblo kc tqyrlztile olvz mzlede kc tqbzpe nzsri-krde 'kx

xpepx kxnginide.' Mc 'Natq ngr nzaplxtqngr mz buk ngr Rut,' mz nzkrpz-mou-krm kzdung da mz kx-xpepx kxnginide. X mc kz Matiu 22:23-28, Mak 12:15-23 x Luk 20:28-33.

28.1.9 **yiz kx ngi Sabat x Yiz ngr Nzabrtzngr** — (*sabbath years and the year of Jubilee*)

Mz nzvz-nqblq-krdz zbz qkrarlimz mz wiki kxesz' nzngini-krdz Sabat, Lou sc Mosis yrlq-kzle yiz krarlimz ngr yiz rlimz mz nzngini-krdz yiz kx ngi Sabat. Mz yiz krarlimz lc, lr Israel trpnzngr nzyaboti-krdz drtc' x nzpe-krdz da mz lc nyzdr, murde drtc' nyzdr nayctxng mz yiz lcde. Mz yiz kraesz'mz lr Israel nzyrlq-bekalr dakxznzng murde narnginang mz yiz krarlimz x krartqmz. Kxmule-esz' kzdung dakxznzng nalvcputing mz yiz lc kx trnzpetiung, a' dakxznzng lc nayc-angidrung murde nangina kx trpnzngr scdr da x animol kzpetong. [Nzrlaszngr 23:10-11; Livae 25:1-7; 18:22] Kzdq kz da, mzli kc mz yiz kx ngi Sabat, kaon amrlx nzayrkpxbz, [Lou Kcpwz 15:1-11; 31:10-13; Nemaea 10:31] x lr Israel kxnzawz-nrbalqng nzarlapxng. [Nzrlaszngr 21:2-10; Lou Kcpwz 15:12-18; Jeremaea 34:14-20]

Kzdung nzrkrzng kx suti drtwr Gct natwzlr mz yiz kx ngi Sabat nidr seleng. 1) Drtc' amrlx nyz Gct, trnginyzu leplz. 2) Drtc' lc nakalzbz mz Gct x natr, da kc tzwai-zvzbzlr mz leplz. 3) Drtwr ngr nzlukr leplz trngiu nzwzngr mzli kang kqlu, a' nzrbilvz-kzngr da kxmrlzting kx kabz Gct. 4) Kxmule-esz' trnzpeung da, a' Gct nakabzlr da badr nzmu navz-nqblqlr natqdeng kcng tqyrlqbzle mz Nzesz'tikr Drtwrdr Badr.

A' lr Israel trnzvz-nqblqlru natq Gct mz yiz kraesz'mz nzngini-krdz yiz kx ngi Sabat. Murde 2 Be Ngrdr 36:2 rpile kx yiz kcng nzpnu-rlimz (70) kx nzmnncng Bxbilon mz nzngini-krdz kxnzawz-nrbalqng nztekqtr-ngrdr yiz kx ngi Sabat kcng amrlx trnzvz-nqblqlru. Zbz mz nibr nzyzlu-mou-krdz Israel, nzvz-nqblq-zvzlr lou lc.

Zbz mz yiz kranzpu-nzlvqn (50) amrlx, nzyrlqlr yiz kxmyapxbz nzrpibz, 'Yiz ngr Nzabrtzngr.' Yiz lc kaputrp mz nibr yiz kx ngi Sabat kraesz'mz. Drtwr ngrde yiz esz'mz nzwrdes esz'mz mz nzkrpz-krbzle yiz kcng nzpnu-pwx-nrade-rpwxmlz (49), x Yiz ngr Nzabrtzngr kc ate. Natq lc mz Inglis nzrpibz, 'Yiz ngr Jubili' (year of Jubilee). X Jubili drtwr ngrde 'nzrvxutrngr trpu mz nzabrtzngr.' Mz Yiz ngr Nzabrtzngr lc, drtc' kcng amrlx lr Israel tzxpebzlr mz kzdung kz lr Israel mz yiz kcng nzpnu-pwx-nrade-rpwxmlz (49) tqvztxpeng, nzayzlti-mopwzng kxnzrningyng angidr. Murde Gct trsutiu drtwrde doa kxipz nzrningyng krdz drtc' kxkqlu x leplz kx rblxbz badr da trtxpnzngr nyzdr drtc'. [Livae 25:8-34; 27:14-25; Asaea 5:5] Mz Esikel 46:17 yiz lc nzrpi-kzpz 'yiz ngr nzarlapxng leplz,' murde kxnzawz-nrbalqng amrlx nzarlapxng mz Yiz ngr Nzabrtzngr. [Livae 25:39-55] Yiz ngr Nzabrtzngr lc ngi kz yiz kx ngi Sabat, x drtc' trnzyabotiung x trnzpetiung.

28.1.10 **nzrpivxitingr Gct**— (*blasphemy*)

Lou sc Mosis rpwa'-ngrbzle mz lr Israel nzrpivxitingr Gct x kxnzrmailz rdrng. [Nzrlaszngr 22:28] Doa kx xpqbrlr-ngrde lou lc nanibq mz nzvaebq-krdz nide mz rplz. [Livae 24:10-23; Nzkqlu-krdz 15:30-31]

28.1.11 **nzrvaebqngr mz rplz**— (*death by stoning*)

Mz nzvz-nqblq-krdz Lou sc Mosis, lr Israel x lr Jiu nznibqlr kx nzaleng da kxtrka mz nzvaebqti-krdz nidr mz rplz. Da kxtrka kx takitrde nznibqng leplz kx nzyrtiong mz Livae 20:27 nidr seleng: nzrlr-ngrbz doa kxnztopwzng kx ngi blz mz gct kzbleng, nzycmnebzng mz drka' o kxaycmne drka', nzrpilzng trte o lxe, nzrmwimengr doa kx

trngiu kernalzde, ncblo nzrmwimi-krde ncblo, olvz nzrmwimi-krde olvz, nzyrlztikr ncblo kzdq olvz ncdr lxede, x nzrmwimigr kzdq animol.

Nzrlaszngr 21:28-32 ycmnetr-ngrde nzvaebqngr kzu kxncblongr kc tqnibqtile leplz.

Livae 24:10-23 ycmnetr-ngrde nzvaebqngr ncblo kx pivxitile Gct.

Nzkqlu-krdr 15:30-36 ycmnetr-kz-ngrde nzvaebqngr doa mz nzrpivxit-ingr Yawe x mz nwzwngr mz Sabat.

Lou Kcpwz 13:6-11 ycmnetr-kz-ngrde nzvaebqngr doa kx tamitile kztede mz nzangiongr gct kc-kzng.

X Lou Kcpwz 21:18-21 ycmnetr-kz-ngrde nzvaebqngr ncblo o obla kx rnzlvzole natq trtede x lxede.

Mz Jon 8:59 x 10:31-33 leplz nzrpilr navaebqlr Jiszs. Mz Aposol 7:57-60 Stivin nzvaebq.

Mz Aposol 14:19 Pol nzvaebr, a' trbz-pnzu. Mc kz Josua 7:24-26 x 1 King 21:8-16.

28.2 **kzdu-kzng nqmq kr lr Jiu**—(other Jewish customs)

28.2.1 **dakxnzng nadr**—(food the Jews ate)

Lr Jiu nzmu-zvzlr bret kx nwzwngr mz nra wit o bali. Wit ngi nabr kx lvcpu apule raes. Wit nzpeti mz Novembz o Diseba x nzkq mz Eprol, Mei o Jun. Rtqdeng ngi dakxnzng nzbzlu x sc tzngqpe, x nztamyrting mz nzrwzng flawa kx nangi bret. Flawa kc tqxpeti mz sto mrka mz Solomon nwzpx-ngrm mz rtq wit.

Bali ngi kzdq kz nabr kx lvcpu apule raes. Bali nzpeti mz Oktobz x Novembz mz nibr ‘tewa kc tqvztx-kaip.’ (Mc kalendz scdr lr Jiu ycmnetr-ngrde ‘tewa kc tqvztx-kaip.’) Nzrkqngr bali abzo mz Eprol x nzrkqngr wit kc ate. Rtqde ngi dakxnzng x nztamyrting mz nzrwzng flawa kx nangi bret. Bret kx nwzwngr mz bali kc tqmenepi nzngqdr kx trnzrungiscung. [Jon 1:9] Rtq bali nzapu-kz-ngrdr animol nedrng, kx apule hcsi x dcngki. Nra wit x bali lcng nzyc-angidrng mz topla x botol kx nwzwngr mz drtc' bla tqtakitr yiz kxkqlu x tr-trka-pnzung murde mrkc tzmnc-ngrdr mingr x tewa trdc-zvzu elr.

Nzmu-kzng dalr nrlanc kx nzapulr bin, kukaba, onyon, salot, lentil, galik, olivi, fiki, det, apol, x pcnzgrxnzt. Nzmu-kzng dakxnzng kx nwzwngr mz nei pq gout. Mz kzdung mzli kx myapxbzng nzmu-kzng ncvr animol kxzapulr nc, sip, gout, kzu, diz x kzdung utc. X nzrmnq-zvzng waen kx ycmi lue mzli kx nzmu-ngrdr ncvr. A' lr Jiu trpnzngr nzmu-krdr poi murde nzrpwa'ngr. X trpnzngr nyzdr raes o dakxnzng lcng tqvztipxm mz dzbrde nzapulr lxrq, nesrkr, nya, x kumara. Trpnzngr nyzdr bznyapq, brpi o nzlu.

28.2.2 **nzaelung mz tolo**—(anointing with oil)

Kzdung mzli nzpuliobz tolo mz doa mz nzaelwapx-krde kx Gct mcpixe nide mz nzngini-krde profet, o pris, o king. Tolo lc ngi kzdq rkx ngr Mqngrkxtr x zmatq ngrde. X tolo ngi kz rkx ngr nzatrngr da. [Nou 28:18; 35:14; Nzrlaszngr 29:7, 21; 30:22-33; Livae 8:10-12; 14:15-18, 23-29; 21:10; 1 Samwel 10:1; 16:13; 2 King 9:1-3, 6; Sam 35:7; 133:2; Asaea 61:3; Hibru 1:8] Nzryrkr Jemes rpimle bagu nzrkitr-ngrbz tolo mz leplz kxnyagoxng, nangi rkx ngr Mqngrkxtr x zmatq ngrdr mz nzamrlz-krde kxnyagoxng. [Mak 6:12; Jemes 5:14]

28.2.3 **nzyrlqo-ngrbz mq mz kzdq doa**—(laying on of hands)

Mz Nzryrngrkxtr, nzyrlqo-ngrbz mq mz doa nwz-wz-krde kqlu. Nzalelr mz nzamrlz-krdr leplz. [Nou 27:22-29; Matiu 19:14-15; Mak 10:16]

Nzalvztr-ngrng trnzrlr-ngrpwu mz olvz kxnzbzsng nznrginyl-krdr drtc' 673Nzalvztr-ngrng drtq Gct x nzrlxtingr mz drtq Jisz

Kzdung mzli kxrmailz krlzle nzamrlz-krde dzbe leplz nedeng mz nzglalz-krbzle mqde badr; apule nzamrlz-krde nidr rpnapxm mz mqde vzbz badr. [Livae 9:22; 1 King 8:54-55; Luk 24:50-51]

Nzyrlqo-kz-ngrbz mq mz nzaprcngr alwx ngr leplz mz kzdq animol. [Nzrlaszngr 29:10-21; Livae 4:15-20; 8:14-21; 16:20-22; Nzkqlu-krdr 8:12; 2 Be Ngrdr 29:23-24] Nzale kz mz nzaprcngr nzrpilzng o nzayrplaxngr. [Livae 24:13]

Nzyrlqo-kz-ngrbz mq mz nzryrlqngr kzdq doa mz nwztr-ngrbz mz Gct. Mz COM aleku mz nzolvzonr nar doa. [Nzkqlu-krdr 8:10; 27:22-23; Lou Kcpwz 34:9; Aposol 6:6; 13:1-3; 1 Timoti 4:14; 5:22]

Nzyrlqo-kz-ngrbz mq mz doa kxnzyagoxng mz nzkrka'-ngrbzlr mz Gct nzamrlz-krde nidr. [Mak 6:5; Luk 4:40; 22:51; Aposol 28:8; Jemes 5:14]

X nzyrlqo-kz-ngrbz mq mz doa mz nzaprcbz bade Mqngrkxtr, x zmatq ngr nwzngkxtr kx vzpxm mz Mqngrkxtr. Kzdung mzli nzrpibz zmatq lc mz nzalengr nwzkr Gct 'Nzawrkxtrkr Mqngrkxtr.' [Aposol 8:17-19; 19:6; 2 Timoti 1:6]

Nwzngkxtr lcng amrlx mz nzyrlqo-ngrbz mq mz leplz ngi da kx takitrde nzalvztr-ngrbz mz kxnzrlxngiti-ateng. [Hibru 6:1-2]

28.2.4 **trnzrlr-ngrpwu mz olvz kxnzbzsng nznrginyl-krdr drtc'**— (widows can't own land)

Mzlr lr Israel x Jiu, trpnzngkxtr olvz nzmu rgninyl drtc'. X nzmu kzdq olvz nayrlzle x ncblu ngrde kc tqbzpe x trpnzngkxtr nede doa kxtopwzng, olvz lc nzmu sc tqnipede nra-nzlu x trpnzngkxtr kx na-aclvele nide. Nzamwale drtc' nyz ncblu ngrde (nzmu kxtrnzpnatipwzleu bade) a' rblx nzacuve-krdele. [Rut 4:3, 5]

28.2.5 **nqmq ngr nzryrtzmqng namz**—(burial customs)

Mz nzvz-nqblq-krde nqmq kr lr Jiu, mzli kx bzngr leplz, namz la nznu mz lrpz, sc tzyrlqtrpe mz ngrtqbr, yz mz nibrdr ngr mztea, mz nabz nabznepi kx 24 mz nibr nzbngr.

Mz mzli nyg Jisz, lr Jiu trnzrkqtilru gq mz drtc' mz nzryrtzmq-krdr kxbz. Nzmclr butqbr o nzlzlzr butqbr mz rplz mz nrlar newz. Mz nabzde nzkrlzlr nzalengr me mnzpz' mrkc nayrbq-ngrm namz kc. Nzbxtilr namz kc mz lrpz vzmi spaes x bqrlr nouc x tolo kx mnrti rpnaki kqlu murde namz kc bzkq brtu. Zbz sc tzakqlvztrpelr mrkc tzdwakirpz mz butqbr kc mz rplz kxwzpx, murde trpnzngkxtr animol kx nadwatr elr x mnrti navztxpxpu elr. Kzdung doa kxnzbzpeng mz nabz ma nydzr nzkrlz-kzlr nzryrtzmq-krdrle mz butqbr kxes'. [Matiu 27:59-60; Mak 15:46; Luk 23:53; Jon 11:44; 19:38-42; 20:3-8; Aposol 5:6; 10]

28.2.6 **drtq Gct x nzrlxtingr mz drtq Jisz**—(name of God and asking in Jesus' name)

Mzli kx rpingr Nzryrngrkxtr kx 'drtq' Gct o 'drtq' Jisz, trngiu drtwr ngrde kx ngi txpwz drtq la esz'-krde. 'Drtq' lc tu-ngrde nqmq kr doa lc x zmatq ngrde, nzmrlz-krde x doa lcpe mz nide esz'-krde. [Kxnzryrlqng Drtwr 13:18; 1 King 5:3-5; 2 King 21:4, 7]

Mzli kx krka'-ngrgu 'Mz drtq Jisz,' krlc drtwr ngrde kx rlxtibzku mz zmatq ngrde, nzmrlz-krde x nzvz-nqblq-krde me pnz drtwrde. Nzmu narlxzme nzokatrngr mz kzdq kxetu, a' trnginideu kxnginim o kzdq kztem, mwx sc tqrpibzle, 'Trtingr.' A' nzmu kx tqnginim kzte mrlxde angidr, x pibz mrlxde, 'Vz xlrbz mz trtenge. X pibz bade kx pibo bam nzrlx-krbzme,' zbz mzli kx rlx-ngrbzme mz trte, rlxbzme 'mz drtq mrlxde kc ma.' Apule kx mrlxde esz'-krde kc tqrlx, x rpibz Trte kx 'eu' murde ngi da kx suti drtwr mrlxde. Mz nzmu-krde lcde, mzli kx rlxtibzku da mz Gct

Trte mz drtq Jiszs, Trte kc xlrmle nigu apu-txpwzle Jiszs esz'-krde kc tqrlx. X rpimle kx 'eu' nzmu kx tqngi me pnz drtwrde. Nzmu kx tqrlxtiku da kx trngiu me pnz drtwr Gct, tr-rlxtipwzkuu 'mz drtq Jiszs.' Yctxtrpwz mz nzmu da kx tqrlxtiq yctr me pnz drtwrde. Nzmu kx tqrlxtibzme da kx krlzq kxtrka o trngiu me pnz drtwr Jiszs, x sc tqpibzme, 'rlxtibo mz drtq Jiszs,' e nim kc tqpokiatxpeq, murde krlzq kx trngiu me pnz drtwr Jiszs. Mzli kx rlxtx-angidr-ngrgu 'mz drtq Jiszs,' trte xlrle Jiszs nzrpi-krde kx drtwrde esz'ti mz nike tqrlxbzku. [Mark 16:17; John 14:13-14; 15:16; 16:23-26]

28.2.7 **Seol, Hedis, Paradaes, Heven, Hxl**— (*Sheol, Hades, Paradise, Heaven, Hell*)

Drtq nrlc nyzdr kxnzbzng yc-ngrde nrlc kqlu mz Nzryrngrkxtr. Mz Nzryrngrkxtr Kc Kai, nrlc nyzdr kxnzbzpeng nzkqlebz 'Seol' mz natq lr Israel. Mz Nzryrngrkxtr Kc Ate nrlc lc tzkqle-ngrbz 'Hedis' mz natq lr Grik. A' Hedis lc nzlvalio nrlc li, kzdq drtqde 'Paradaes' kx nzvzkilr leplz neng Gct, [Luk 23:43; 2 Korint 12:4; Nzaelwapxngr 2:7] x kzdq kz drtqde Hedis kx nzvzkilr leplz kxnztrkang. Jiszs pile kzdq be ngr Hedis x Paradaes mz Luk 16:19-31. A' mz be lc kqlebzle Paradaes 'nrlar Ebraam.' Mz kqlu mz nzrtekqtrngr mz Inglis x mz Natqgu pile kx ncblo kc tqrngisc vz mz Hxl, a' mz Grik rpile vz mrkc Hedis. Hxl mz natq ngr Inglis ngi 'Gehena' mz Grik.

Kxnzalvztrng mz Nzryrngrkxtr drtwrdr tresz'tiu. Kzdung nzpnzkr drtwrdrle Heven x Paradaes kxmulr esz' x Hedis nidr ncdr Hxl kxmulr esz'. Kzdung nzpnzkr drtwrdrle mzli kc Jiszs trbzka-ngrde, doa nzvzng mz Paradaes o Hedis mzli kc tzbz-ngrdr, x mz nibr Jiszs nzbz-krde, kx Paradaes sc tqaxvctrpebz mz Heven x Hedis sc tqaxvctrpebz mz Hxl. X kzdu-kzng nzpnzkr drtwrdrle kzdq Paradaes sc tqyc mz Seol, mrkc tzvzkilr kxnzbzng, x kx kzdq 'Paradaes nyg Gct' sc tqyc mz Heven.

Doa amrlx nzaolvzlr kx mzli kc leplz neng Gct tzbz-ngrdr, nzvzng mz kzdq me kxmrlz, mwx kzdq Paradaes kx yc-ble-bekangr mz Heven, o mwx Heven nide esz'-krde, x kx mz nibr Jiszs nzyzlu-krmle sc tzmnctr-lxblr-zvzpeng badr Gct Heven. Krkcng tzdrka'-ngrng nzvzng mz kzdq nrlc kxtrka mrkc tzayrplapxngr nidr, mwx kzdq Hedis kx yc-ble-bekangr mz Hxl, o mwx Hxl esz'-krde, x mz nibr Jiszs nzyzlu-krmle sc tzmnctr-zvzpeng amrlx ngrdr Hxl.

Mz nzrtekqtrngr Hedis mz Natqgu rpiku kx 'Me Mncngr Gct.'

28.2.8 **nzrwztingr mq**— (*washing of hands*)

Kzdq lou mz Lou sc Mosis ycmnetr-ngrde nzrwztingr kxtr kx batrpzle leplz x da nzlqngi-krdr x nztr-krdr mz nzobqkr Gct, a' mz mzli nyg Jiszs, lrtzlvzng ngr lr Jiu nzyrlqtr-mopwzlr kcng lou ngr nzrwzting kxtr. Mz kzdq lou lcng doa nawztile mqdeng mz nzrwztingr kxtr x sc tzmu-ateng. Krkc blepx mz nzrwztingr nrkrdrtq mz nzrkapxngr zblkqi. Ayrnrngr wztiq mz nzrkapx-krm zblkqi, zbz sc tqalepeq nzrwztingr kc tqtr. Lou lc trkapwzu Gct, a' Farzsi nzalvztr-ngrdr kx ngi da kx myapxbz nzrvz-nqblqng lou lc, da kc tqwai nzrvz-nqblqng Lou kc tqka Gct. Jiszs trsutiu drtwrde leplz nzpi-krdr kx lou kc tqyrlq leplz rsakrlrmile lou kc tqyrlq Gct. Mz nzmu-krde lc trvz-nqblqleu lou ngr nzrwztingr mq kxtr lc x leplz kc tqmu ate. [Matiu 15:1-20; Mak 7:1-23; Luk 11:37] X Farzsi lcng nzpxtxpx-ngrdr Jiszs murde nzobqszo-krde lou lc tzalelr x trvz-nqblqleu nidr.

28.2.9 **trnzpipx-ngru "Gct" o drtq Gct**— (*avoiding saying "God" or God's name*)

Mzli nyz Jiszs, lr Jiu trnzpipxlsru drtq Gct, kc tqngi 'Yawe.' Mzli kc nzrlwx-ngrdr natq lc mz Nzryrngrkxtr, mztr namcpwzlr drtq 'Yawe' a' nzpilr 'adonai,' drtwr ngrde 'kxetu.' Trnzpipx-kzlsru natq lc 'Gct,' a' nzpi-alzulr 'Heven.' Nzalelr da lc murde nzrpilr na-amrluelr Gct x trnzsutiu drtwrdr nzpingr drtqde mz kzdq nqmq kxtrka. Nzkqle-kzpplr 'Krkc Tqmyalz' o 'Krkc Tqmyalz-esz'ngr,' 'Krkc Tqrnir' mzli kc nzpi-ngrdr Gct. Mzli ka lr Jiu nzpilr 'Ha Shem' mz nzpi-alzu-krdr drtq Gct. 'Ha Shem' drtwr ngrde 'drtq kc' mz Hibr.

28.2.10 **nzrpesalingr lrpz**— (*tearing clothing*)

Ngi nqmq krdr lr Israel x lr Jiu kx mzli kx drtwrdr vzttx-ngrde o drtwrdr ngyatx-ngrde, nzaelwapx-ngrdr da lc mz nzrpesali-krdr lrpzdr. [Nou 37:34; 44:13; Nzkqlu-krdr 14:6; Josua 7:6; Kxnzryrlqng drtwr 11:35; 2 Samwel 1:11; 3:31; 13:31; 1 King 21:27; 2 King 2:12; 5:7; 6:30; 11:14; 19:1; 21:11; 2 Be Ngrdr 23:13; 34:19, 27 Estz 4:1; Esra 9:3; Job 1:20; 2:12; Asaea 37:1; Matiu 26:65; Mak 14:53; Aposol 14:14] A' nzrpwa'ngr mz Lou Nardr Pris nzrpesali-krde lrpz scdeng. [Livae 10:6; 21:10]

29 **nrpr ngr leplz**— (*generation*)

Nrpr ngr leplz o nrpr ngr ncblo drtwr ngrde tq kx blepx-lxblrngr. 1) Leplz amrlx kx nzung mz kzdq mzli. 2) Leplz kx yiz ngrdr kxmu-txpzwle esz'. Trtemung x lxemung x mzledrng x inwedrng nidr nrpr kxesz'. Mzlemqng x inwemqng x kave krmung nidr kzdq kz nrpr. Doa nemqng x doa ne mzlemung x inwemung nidr kzdq kz mou nrpr. 3) Mz Nzryrngrkxtr, nrpr kxesz' ngi yiz nzpnu-pwx (40). Mz nzmu-krde lcde, nrpr kx nzpnu-esz' krlzbzle yiz trtqki-pwx (400).

30 **nzamrlzngr leplz**— (*blessing people*)

Kzdq doa, mz nzamrlz-krde leplz, drtwr ngrde kx pibzle natqdeng kx suti drtwrde da kxmrlz nzkaputr-krbzle badr. Nzamrlzngr lc ngi kzdq nzkrka'ngr, murde da kxmrlz rblx nzngida-krde, a' ngi txpwz mz nzbatr-krbz Gct nzngida-krde. Kzdung leplz nzlxitilr kx doa kx tqamrlzle leplz kcng tzmncbzng bade, zmatq ngr nzamrlzngr lc myaszlzle nzamrlzngr kx kabz kzdq doa kx tracvelru nidr. Mz nzmu-krde lcde, mrlz pasto x mama ngrgung nzamrlz-krdr leplz nedrung. X mrlz kz trte x lxe doa nzamrlz-krdr doa kxnztopwz nedrung. Nzmu nzamrlz-krm kzdq doa vz-nqblqle me pnz drtwr Gct, Gct sa na-angida-kzple bam. Kxnzrlxngiting nzrngidrlvz-ngrbz badr nzamrlz-krdr leplz x bzkq nzrpilzng. [Luk 6:27-28; Rom 12:14]. Krkcng tzrpilzng leplz neng Gct, sa na-atwemzng Gct. [Nou 27:29; Nzkqlu-krdr 24:9] Nzrpilz-krm kzdq doa drtwr ngrde kx tripqwq nide. Jiszs rpile kx nzmu trnaipqwq leplz, Gct trpnz-kzngr nzipq-krde nim. [Matiu 6:14-15] X nzmu alwx ngrm trnaipqleu, sa navzq mz Hxl. Murde leplz kcng tzrpilzng, nzapulr kxszmnc-mrbrng mz nzobqkr Gct.

Gct, mz nzamrlz-krde leplz, alebzle da kxmrlz badr x kabzle da kxmrlzting. Da kxmrlzting kcng tqesalz-ngrbz Gct mz leplz nedeng mz Nzesz'tikr Drtwr Gct Badr Leplz Kc Kai, nzyrtio mz Lou Kcpwz 28:1-13. Nzamrlz-krde leplz okatr-zvzle nidr, murde rngisc zmatq ngr nzangidatingr da. A' kzdung mzli rblxbz mz doa nzmc-krde nzrmrlzngr kx vzpxm mz nzamrlzkr Gct nide. Murde mz drtwr Gct myapxbz kx nike bade na-amrlz-zvzle nide karl, a' trngiu mzli kxmrbcnepwz. A' mz drtwrgu, suti drtwrgu da kxmrlz mzli ka, a' ptxpx-ngrgu nzaenzli-krgu da kxmrlzting lcng. Nzamrlz-krde nim nzmu vztr-kzpzb mzli kx rblxng da, kc tqbatrzle nzesotr-krbzme mz Gct. Krlc okatrle nim, kxmule-esz' mzli kx xngi-ngrbzlele kx trmrlz-ngrdeu.

Mz Inglis Nzryrngrkxtr rpile kx leplz nzamrlzlr Gct. A' drtwr ngrde kx nzglqpxlr nide o nzawibzng bade. Mz nrtekqtrngr mz Natqgu ngi 'nzrglqpxngr' x 'nzawingr' a' trngiu 'nzamrlzngr,' murde trpnzngr scgu zmatq mz nzokatrngr Gct.

31 nzesz'tikr drtwr—(covenants)

31.1 **nzesz'tikr drtwr leplz badr kztedrng**—(covenants between people)

31.2 **Nzesz'tikr Drtwr Kc Kai**—(old covenant)

31.3 **Nzesz'tikr Drtwr Kc Ate**—(new covenant)

31.4 **nzesz'tikr drtwr kxnzyrlzng**—(covenant of marriage)

31.1 **nzesz'tikr drtwr leplz badr kztedrng**—(covenants between people and their companions)

Mz Nzryrngrkxtr, nzesz'tikr drtwr ngi kzdq nzesalzng kx xplr-esz'ngr mz mzli leplz kxli, o mz mzli doa lr ma kxli. Nzesz'tikr drtwr kxmul lc rblx nrtekqtrngr. Leplz kxnzling o lr ma kxnzling kx nzprtrng mz nzesz'tikr drtwrdr nzaolvz-lxblrng mz nzesalzng kx naokatr-etrngr mz da amrlx. Nzmu kzdq enqmi nzayotibzle kzdq doa mz nzesz'tikr drtwr lc, e doa kx nzryrlqng badr nzesz'tikr drtwr sc tzokatrpelr nidr. Leplz kcng nzling tzprtrng mz nzesz'tikr drtwr nzesalz-etrng. X nzrpilzng kx naztitrle doa kx esz' mz nidr kx triangidaleu natqde kc tqpile mz nzesz'tikr drtwr lc.

31.2 **Nzesz'tikr Drtwr Kc Kai**—(old covenant)

Mz Nzryrngrkxtr, Gct prtr mz Nzesz'tikr Drtwr badr Ebraam mz nzesalz-krbzle bade nzrngine-krde neidung kx kqlung [Nou dckrlzde 15] x mz nzryrlq-krdr nzrpakrngr [Nou 17:1-14]. X mz nibrde prtr mou mz Nzesz'tikr Drtwr badr Mosis x leplz nedeng, lr Israel. Mzli kc Mosis tqmailzpx-ngrmle lr Israel Ijipt, nzvzng mz Newz Saenae, mrkc tqkabz Gct natq kcng nzpnu-esz' x Lou kxtr, nzrpibz 'Lou sc Mosis.' Mzli lcde, prtr kz mz Nzesz'tikr Drtwrdr badr, x esalz-ngrbzle kx na-aclveleng, na-amrlzleng, naokatrleng, na-amnc-zpwxleng, x na-alu-zpwxbzle dakxanzng kx nzpetilr x animol nedrng. [Lou Kcpwz 28:1-14] X lr Israel nzesalz-ngrdr nzvz-nqblq-krdr Lou sc Gct amrlx. Gct esalz-kzngrde kx nzmu trnavz-nqblqlru Lou scdeng amrlx, ztrkangr nzrpilzng sc tqkaputrepele nidr. [Lou Kcpwz 28:15-68] Mz Nzryrngrkxtr Kc Ate, Nzesz'tikr Drtwr Gct badr lr Israel mz mzli nyz Mosis nzrpibz 'Nzesz'tikr Drtwr kc kai' o 'Lou sc Mosis.' Gct prtr kz mz Nzesz'tikr Drtwr badr Devet. [2 Samwel 7:11-16; Sam 89:1-38]

31.3 **Nzesz'tikr Drtwr Kc Ate**—(new covenant)

Mz Nzryrngrkxtr Kc Kai Gct batrpzle profet nedeng nzycmnetr-krdr kzdq 'Nzesz'tikr Drtwr Kc Ate' kx sa naprtr-kzpz mz leplz nedeng. X krkc tqate blepxbz mz krkc kai mz Lou sc Mosis x myaszlz-kzle. [Jeremaea 31:31-34; Hibru dckrlzdeng 7-8] Buk ngr Hibru aopx-kzle kx Nzesz'tikr Drtwr Kc Kai yrkrpxpe x nztekqtrpengr Nzesz'tikr Drtwr Kc Ate. Gct yrlq-pnkle drtwr kx naprtrbz mz Nzesz'tikr Drtwr Kc Ate badr leplz nedeng, a' na-aenzlile nakrlzbzle nzvz-krm Kxnmcp, Jisz Kraes. X mzli kc Jisz tqvz-ngrmle, kzdung lr Jiu nzlxngitilr kx nide Kxnmcp ne Gct x nzprtrng mz Nzesz'tikr Drtwr lc Tqate. A' lr Jiu kxnzkqlung trnzlxngitilru kx nide Kxnmcp ne Gct, a' sc tqabrbz drtwrdr Nzesz'tikr Drtwr Kc Kai. A' rblxbz badr nzrvz-nqblqng Lou kcng amrlx mz Nzesz'tikr Drtwr Kc Kai. X Gct rpile kx nzmu leplz rblx nzmnnc-nrwrx-krdr badr x rblx kz nzrlapx-krdr, a' ngi txpwz mz nzprtr-krdr mz Nzesz'tikr Drtwr lc Tqate mz nzlxngiti-krdr Jisz. Mzli ka, kzdung lr Jiu sa tzlxngitipelr Jisz Kxnmcp x sa tzprtrpeng mz Nzesz'tikr Drtwr Kc Ate. Nzryrngrkxtr

rpile kx lr Jiu kxnyzqglung sa nalxngitilr kx Jiszs nide Kxnxmcpkx kalr, x ycpe pipz nzyzlu-mou-krmle.

31.4 nzesz'tikr drtwr kxnyzrylzung—(*covenant of marriage*)

Mz Malakai 2:14-16 rpi Gct kx leplz kcng tzyrlzng nzprtrng mz nzesz'tikr drtwrdr. X trkabade nzaxtx-lzbqngr, murde ngi da kxdrka'ngr nzxpqbrlngr nzesz'tikr drtwr.

32 nzmnc-zpwxngr—(*peace*)

Mz mzli nyx Jiszs leplz nzrpilr 'Namnc-zpwxq,' mz nzrpi-krdr kx 'nim la' o 'nim lape.' Krk c kzdq nzkrka'ngr kx mrbcne kx drtwr ngrde kx, 'Krk-a'-ngrne kx Gct na-amnc-zpwxle nim.' Nzryrngrkxtr mz Inglis nzrytwpwzlr 'nrwx'. A' drtwr ngrde 'namnc-zpwxq,' a' trngi-txpwzu 'nrwx.' Mc Mak 5:35, 9:50, Luk 24:36, Jon 14:27, 20:19, 21, 26, x Aposol 16:36. A' mz Luk 14:23 x Aposol 24:2, 'nrwx' drtwr ngrde 'trpnzngr nzotangr.'

33 nzrsakrlrngr—(*equality*)

'Nzrsakrlrngr' drtwr ngrde kx da li kxmu txpwzle esz'. Kzdq trmyaszpxleu kzdq kz. Mz Tqtrbz, Gct Trte nzrsakrlrngr mz MrIxde. X Mqngrkxtr nzrsakrlrngr mz MrIx Gct. Nidr rtqlrdr nzrsakrlr-ngrng mz zmatq xzluli rdr. A' nzblepxbzng mz nzwz-krdr.

Mz nzobqkr Gct, leplz nedeng nzrsakrlr-ngrng amrlx ngrdr. Nzrsakrlrngrng mz nzmrllz-krdr x nztubq-krdr, murde nztubqkr Jiszs nzngisc-krdr. Nzrsakrlr-ngrng mz nzmrllzi-krde nidr. Nzmyapx-krdr rsakrlrngrbz bade. Nzrngiscng nzyzlu-alongr kcpwz. Nzblepxng mz da kxmrlz kx natwzlr Heven, murde da lcng navz-nqblqlr nike nzalelr mz nrlc ka.

34 nzrlwxngr yiz mz AD x BC—(*dating AD and BC*)

34.1 x Jiszs kc mzte tzmc ate—BC

34.2 mz nibr nzrmcngr mz Jiszs—(AD)

Mc # 39; murde aelwapx-ngrde yiz lcng tqkaputr-ngrbzng kzdung da kxmyapxbz mz Nzryrngrkxtr x mz yiz kcng 2000 tqyrbqtxpxpeng, mz nibr nzvzdzkr Jiszs Heven.

34.1 x Jiszs kc mzte tzmc ate—BC

Letz kcng tqngi BC vzm mz Natq lr Inglis 'Before Christ,' drtwr ngrde yiz kcng amrlx tqykrpxpeng x Kraes kc mzte tzmc ate. Mz nzmu-krde lc, yiz kc tqngi 1000 BC, drtwr ngrde yiz kcng 1000 tqykrpxpeng, x Kraes kc mzte tzmc ate. Trpnzngr yiz siro (0). 1 BC ycbz x yiz kx yc-mop ngi 1 AD.

34.2 mz nibr nzrmcngr mz Jiszs—(AD)

Letz kcng tqngi AD vzm mz Natq lr Rom drtqde 'Latin'. Mz natqdr, 'Anno Domini' drtwr ngrde 'mz yiz ngr Lod rgu.' Mz nzmu-krde lc, 2000 AD drtwr ngrde yiz 2000 mz nibr Lod rgu, Kraes mzte nzrmcngr. A' trngi mz nibr nzbz-krde.

35 nzvzdzkr Jiszs Heven—(*ascension of Jesus to Heaven*)

Jiszs sc tqmnc mz nrlc zbz kcng nzpnu-pwx mz nibr nztulz-mou-krmle mz nzbzng. Zbz sc tqvzpe mz Newz ngr Nc Olivi badr ncblo nedeng. X mzli kc tzaukz-ngrdrng, batrpz Gct nzvzdz-krde Heven, mrkc tqwxbuo-ngrml me matq-esz'ngr mz nrlar Gct kxrtc. [Mak 16:19; Luk 24:50; Aposol 1:9]. Nzycmnetr-ngrdr nzvzdz-krde Heven mz Sam 68:18 x mz Efiszs 4:8-10. X nzycmnetr-ngrdr nzwxbuo-krmle mz nrlar Gct kxrtc mz Sam 110:1 x Hibru 1:13. X Jiszs esz'-krde ycmnetr-kz-ngrde nzyzlu-mou-krde Heven mz Jon 6:62 x 20:17.

Mz nzavzdzkr Gct Trte nide Heven x nzatulz-mou-krde nide aelwapx-ngrde kx Jiszs vz-nqblqle me pnz drtwrde. X mz nzvzdzkr Jiszs Heven, Gct ayzlu-mopwzle bade zmatq x nzamrluengr x zluli kcpwz tqrngiscde

mzli kc, x sc tqvz-atem mz nrlc ka. Nzalvztrngr lc myapx murde axvctr-lzbqbzku mz Jiszs x mncku badr Heven x wxbuku badr mz nrlar Trte kxrtc. Mc Efiszs 2:6, Matiu 28:18, Aposol 7:55-56, Filipae 2:9-10, Kolosia 3:1-4, 1 Timoti 3:16, Hibru 12:2, 1 Pita 3:22, x Nzaelwapxngr 1:9-18 nzycmnetr-kz-ngrdr nzvdzdz-krde Heven. Kxmule-esz' Jiszs mnc Heven mz nrkrdrdtqde, a' sa tqmnc-zvz-kzp bagu mz Mqngkrkxtr. [Matiu 28:20]

36 **takes**—(taxes)

Takes ngi trau kx nzxpebz leplz mz gzpman. Leplz amrlx mrkang kqlu mz nrlc tulvzo nzxpebzng takes mz gzpman o king. Trau lc avz gzpman mz nzxpengr pulis x ncblo ngr vea mz nzaclve-krdr leplz nedeng. X krlzle nzrwzngr lrpzki x me vzkim lue x kzdu-kzng da kxnzmull lcng mz nzokatr-krdr leplz nedrng.

Mz mzli nyz Jiszs, gzpman ngr Rom aclvele lr Jiu kcng tzmncbzng mz king kxetu kc Rom, badr gavzna ngrdrng x ncblo ngr vea nedrng. Nzmcpxlr kcng ncblo mz nzatakti-krdr takes. Yiz kang kqlu olvz kxesz' abzo mz kx yiz ngrde nzpnu-esz'-nrade-tq (13) krlzbzle kx yiz ngrde nzpnu-esz'mz-nrade-nzlvqn (65), x ncblo kxesz' abzo mz kx yiz ngrde nzpnu-esz'-nrade-pwx (14) krlzbzle kx yiz ngrde nzpnu-esz'mz-nrade-nzlvqn (65) naxpeng takes. X ncblo kxnzrtwztrpqng kzdung da mz kandre kzbleng naxpe-kzng takes mz da lcdeng. Jiszs x Pol nzrpilr kx leplz naxpetrpzng takes mz gzpman. [Matiu 22:15-21; Mak 12:13-17; Luk 20:20-25; Rom 13:5-7]

Lr Jiu naxpe-kzlr takes mz yiz kang kqlu mz Mangr-nzangiongr Yawe, murde kxnzetung naxpelr leplz mz nzalqngingr x mz nzrwz-moungr Mangr-nzangiongr lc. [Matiu 17:24-27] Mnztr mz srlrni sc lr Rom mqngr nar king kxetu kc Rom. A' Lou sc Mosis tr-rlrpx-ngrdeu lr Jiu nzxpe-krdr dalr Mangr-nzangiongr mz trau kxmule lc. Mz nzmu-krde lc, lr Jiu trnaxpelru takes ngr Mangr-nzangiongr mz trau scdr lr Rom, x nzrningineng kxnzrtekqtrng trau scdr lr Rom mz trau scdr lr Jiu.

Mc kz nzycmnetrngr kxnzatakqting takes (27.6) x kxnzrtekqtrng trau (27.5).

37 **zmatq**—(authority and power)

Mz Natqgu kzdq natq 'zmatq' drtwr ngrde li mz natq lr Inglis. Natq kx ngi 'power' drtwr ngrde kx ncblo rngisc nzrkrlzngr x nxzplrngr mz nzalengr da. Mz natq lc, Gct rngisc zmatq ngr nzamrlz-krde leplz kxnzyagoxng, murde krlzle nzale-krdele x nxzplrngr takitrde nzale-krdele. A' natq kx ngi 'authority' drtwr ngrde kx kzdung doa nzmnclbzng mz zmatq ngr kzdq kz ncblo. Mz natq lc, drka' nzmnclbzng mz zmatq ngr leplz kcng tzlxngitilr Jiszs, murde mnclbzku mz Jiszs. Trpnzng scgu nzrkrlzngr mz nzrtulrtr-krbzku mz drka'ng nzvz-nqblk-krdr natq kx kapxbzku, murde nxzplrngr trtakitrdeu nidr. A' nxzplrngr x nzrkrlzngr yctrpz mz Gct. Jiszs aprcmle bagu zmatq ngr nzamrlz-krgr leplz kxnzyagoxng, mz nzmnclz-krbzku bade. [Matiu 10:1] Nzrkrlz-krgr x nxzplrngr trtakitrdeu nzale-krgrule, a' Gct aprcmle bagu zmatq ngr nzale-krgrule mz nzvz-nqblk-krde me pnz drtwrde.

Kzdung mzli ncblo kcng tzrngiscng nxzplrngr nzrtulrtr-ngrbzng mz leplz nzvz-nqblk-krdr me pnz drtwrdr, kxmule-esz' leplz lcng trnzm-nclzpwzung mz zmatq ngrdr mz nzobqkr gzpman, x nxzpqbrrl ngrdr lou ngr gzpman mz nzrtulrtr-krdr leplz lcng. Mz natq lr Inglis, nzrpilr kx ncblo lcng nzrningicdr nxzplrngr kc tqngi 'power', a' trtakitrdeu nzale-krdrle murde trpnzng scdr zmatq kc tqngi 'authority' kx aprcbz kxnzetung badr. Nzaprcbz mz pulis zmatq ngr nzrlolvz-krdr leplz. X

Nzalvztr-ngrng zmatq ngr nzwzngr kx bletipx-lxblrng kcng tzvzpxmqng mz Mqngrkxtr679Nzalvztr-ngrng Mqngrkxtr kabzle zmatq ngr

rngisc-kzng nzrkrlngr x nxzplrngr mz nzale-krdrle murde nzrngiscng pu. A' pulis kxes' trpnzngr scde nxzplrngr kx takitrde nzaesakingr ncblo kxnzkqlung kxtrkang kxnzrngisc-kzng pu, kxmule-esz' nzaprcbzlr bade zmatq ngr nzrlolvzng ncblo.

Mz Nzryrnrkxtr scgu, nike drtwr angidr ngr 'zmatq', aelwpx-ngrde mz natq x ngalrdeng kcng tzyc-aepztrpzng.

38 zmatq ngr nzwzngr kx bletipx-lxblrng kcng tzvzpxmqng mz Mqngrkxtr—(Spiritual Gifts)

38.1 Mqngrkxtr kabzle zmatq ngr nzwzngr kx bletipx-lxblrng mz nzokatrngr Irmakxtr—(the Holy Spirit gives Spiritual Gifts to help the church)

38.2 **nzrpipxngr nrpa ngr nzyrplapxngr**—(word of wisdom)

38.3 **nzrpipxngr nrpa ngr nzrkrlngr**—(word of knowledge)

38.4 **nzrplzpxngr nrpa kx kabz Gct**—(prophecy)

38.5 **nzrmcngr namrlzu r kxnzmncng mzlilxlr kc tqwz**—(discernment of spirits)

38.6 **nzycmne-ngrbz mz Gct mz natq lr kzble**—(speaking in other languages)

38.7 **nzrpipxngr drtwr ngr natq lr mrkzble lcng**—(interpretation)

38.8 **nzalvztrngr natq Gct**—(teaching)

38.9 **nzrmailzngr Irmakxtr**—(leading)

38.10 **nzrmcngr lrpzki kx nao-zli kzdq dzbe Irmakxtr**—(administration)

38.11 **nzrlxngitingr kx xplr-esz'ngr**—(faith)

38.12 **nzamrlzngr kxnzyagoxng**—(healing)

38.13 **nzalengr da kxmatq**—(miracles)

38.14 **nzokatr-zlwzngr Irmakxtr**—(helps)

38.15 **nzwztr-ngrbz mz Irmakxtr**—(serving)

38.16 **nzapqtr-ngrbz drtwr Irmakxtr**—(encouragement)

38.17 **nzrka-nrbalq-ngrbz da mz Irmakxtr kcng trnzrngiscung**—(giving)

38.18 **nzaelwapx-ngrbz nzryckr drtwr mz Irmakxtr**—(mercy)

38.19 **nzadwatr-zvzngr Irmakxtr x lr mrkzbleng mz ma nyzm**—(hospitality)

38.1 Mqngrkxtr kabzle zmatq ngr nzwzngr kx bletipx-lxblrng mz nzokatrngr Irmakxtr—(the Holy Spirit gives Spiritual Gifts to help the church)

Mqngrkxtr kabzle zmatq ngr nzwzngr kx bletipx-lxblrng mz leplz neng Gct. Aposol Pol rpile kx suti drtwrde nzalvztr-krde mz zmatq kcng tzvzpxmqng mz Mqngrkxtr, murde nzao-krdr drtwr leplz nedeng naopx. [1 Korint 12:1] X krlc kz drtwr ngr Nzalvztrngr Kxmyapxbz lc. Murde kxmule-esz' kzdung mzli kxnzrlxngiting nzaki-lzbqng mz zmatq lcng tqkabz Mqngrkxtr mz kxnzrlxngiting, a' Jiszs suti drtwrde leplz nedeng amrlx nzmnctr-lxblr-zpwx-krdr. [Jon 17:20-21] X na-acvetio-lzbqgu murde ma tqycmne-atrkatiku Mqngrkxtr. [Mak 3:29-30] Kabz Mqngrkxtr zmatq esz'pwz mz kxrlxngiti kxes'. Pnz drtwrde esz'-krde doa kx narkane bade. [1 Korint 12:11] A' aposol Pol rpimle bagu kx mrlz nzsuti-zlwzkr drtwrgu zmatq kxnzmyapxbzng mz nzokatr-krgru Irmakxtr. [1 Korint 12:31] Krlc drtwr ngrde kx krlzku nzrlxtingr Mqngrkxtr nzka-krmle zmatq kx trtwzkaku, x mwz sa nakamle. Rpi-kzle kx nigu Irmakxtr apuku nrkrdrtq, mz nzngini-krgru nrlar nrkrdrtq Jiszs

Kxnzmcpx. X nawztr-lxblrku mz nzwzngr lcng tzblepx-lxblrng murde na-atutr-ngrgu nzwzkr Gct mz nrlc ka.

Zmatq ngr nzwzngr kxtr lcng yclz-ngrmle buk pwx: [Rom 12:3-8; 1 Korint 12:27-30; Efisz 4:11-16; 1 Pita 4:9-11] Mzli kc tqyrlqtr-lxblr-ngrgu ngalrde lcng, krlzbzle zmatq ngr nzwzngr nzpnu-esz'-nrade-rtqmz (18). Kzdung kxnzetung mz Nzryrngrkxtr nzaki-ngrbz zmatq lcng nzpnu-esz'-nrade-rtqmz mz zmatq ngr nzycmnepxngr rpwxmz x zmatq ngr nzwztr-ngrbz mz lrmakxtr rpwxmz. [1 Pita 4:11]

Zmatq ngr nzycmnepxngr nidr seleng:
nzrpipxngr nrpa ngr nzyrplapxngr,
nzrpipxngr nrpa ngr nzkrlzngr,
nzrplzpxngr nrpa kx kabz Gct,
nzrglxngr namrlzu r kxnzmncng mzlilxlr kc tqwz,
nzycmne-ngrbz mz Gct mz natq lr mrkzbeng,
nzrpipxngr drtwr ngr natq lr mrkzbble lcng,
nzalvztrnegr natq Gct,
nzmailz-zpwxngr leplz, x
nzrmcngr lrpzki kx nao-zli lrmakxtr.

Zmatq ngr nzwztr-ngrbz mz lrmakxtr nidr seleng:
nzrlxngitingr kx xplr-esz'ngr,
nzamrlzngr nrkrdrtrq kxnzyagoxng,
nzalengr da kxmatq,
nzokatr-zlwzngr leplz,
nzwztr-ngrbz mz leplz,
nzapqtr-ngrbz drtwr leplz,
nzrka-nrbalq-ngrbz da mz leplz,
nzrycngr drtwr leplz, x
nzadwatr-zvznggr lrmakxtr mz ma nyzde.

Mz nzawz-krgu zmatq lcng, nadcpx mz drtwrgu 'Nzycmne-ebzpxngr Kxnzawz Kcng Tq' mz Matiu 25:14-30. Natq lc alvztr-ngrde nigu kx Gct suti drtwrde nzawz-krgu zmatq kcng tqkamle bagu. Murde zmatq lcng naetunepx-zvzng mz nzokatr-krgu kztegung. Nzmu trna-awzwq zmatq scmqng, sa napipzne, apune-kzpwzle sate ngr mq. Murde nzmu na-awzqleeng, sa naxplrlng. A' nzmu kx tqama-zvzq, sa nayangrngang. Mzli kc ayrrnrngr tqtwz-ngrn zmatq ngr nzwzngr lc ngi da kx topwzbe o pobe. Murde nzmu kx tqrngiscm zmatq ngr nzamrlzngr kxnzyagoxng, mz nzabzokr nzawz-krm zmatq lc, doa trnakqluang kx namrlzng mzli kx krka'-ngrn nidr. A' zmatq lcng nzapulr rtq da kx nzlvcpong. Mzli la tqkrka'-zvz-ngrn leplz, zmatq ngr nzwztr-krbzme mz Gct sa naetunepx x nzkqlukr doa kx namrlz-moung sa naetunepx kz.

Mz 1 Tesalonika 5:19, Aposol Pol pile kx, "Bzkq abaoamu nzwzkr Mqngrkxtr." X mz Efisz 4:30 rpi-kzle kx, "Bzkq avzbzmu drtwr Mqngrkxtr." Drtwr ngrde kx nalalztqamu mz nate mz nabzmu x bzkq rpwa'-ngrbzmu mz leplz nzawz-krdr zmatq kx kabzle badr. Mz 1 Tesalonika 5:20 pi mou Pol kx, "Bzkq apusr-ngrnamu natq kx aelwapx-ngrbz Mqngrkxtr mz leplz brmrda." Murde Mqngrkxtr kamle bagu zmatq lcng mz nzokatr-krgu kztegung kxnzrlxngiting. X suti drtwrde kx leplz neng Gct namnctr-lxblr-zpwx-krdr x nzrlxngiti-krdr naetu. Doa kc tqrpwa'-ngrbz zmatq kcng tqkabz Mqngrkxtr vz-rbr. [1 Korint 14:29]

38.2 nzrpipxngr nrpa ngr nzyrplapxngr—(word of wisdom)

Mzli kc kxnzrmailz ngrdr mz makxtr mrkc Jerusalem tzrmcti-lzbq-ngrdr mz Aposol 15:1-29, nzpilr mz ngalrde 15:28, 'Drtwrgr esz'ti mz

Nzalvztr-ngrng nzrpipxngr nrpa ngr nzrkrlzngr 681 Nzalvztr-ngrng nzycmne-ngrbz mz Gct mz natq lr kzbleng

Mqngrkxtr kx bzkq kabzkr bamu lou scgr kxkqlu, nigr lr Jiu, murde ma tqmrlepubz bamu.' Opym kx kzdung leplz lcng nzrngiscng zmatq ngr nzrpipxngr nrpa ngr nzyrplapxngr mz nzyrlq-krdr drtwr lc. Mz zmatq ngr nzrpipxngr nrpa ngr nzyrplapxngr, mrlx kx rngisc zmatq lc krlzle nzokatr-krde kztedeng mz nzpipx-krbzle badr kzdung natq mz nzvz-nqblq-krde me pnz drtwr Gct. [1 Korint 12:8] A' zvz na-abzpx-kailr nrpa lc kx vz-zpwxm mz Mqngrkxtr o trtingr. Murde kzdung mzli vz-rbrku mz nxzlr-krgu natq Mqngrkxtr. Nrpa amrlx kcng tzvzpxmqng mz Mqngrkxtr drtwrdr esz'ti mz Nzryrngrkxtr.

38.3 nzrpipxngr nrpa ngr nzrkrlzngr—(word of knowledge)

Mz zmatq ngr nzrpipxngr nrpa ngr nzrkrlzngr lc, Mqngrkxtr pibzle mz doa da kx trkrlz-pnzleu murde naokatrle o atubqtile kztedeng mz nzrkrlzngr lc. Kzdung mzli mrlx lc pipxle ngalr Nzryrngrkxtr. Na-abzpx-kaiku nrpa lcng, da kc tqwaiku mz nrpa ngr nzyrplapxngr. Pita rngiscde zmatq lc mzli kc tqkrlzle kx Ananaeas x Safira nzpokiabzng mz Mqngrkxtr. [Aposol 5:1-11]

38.4 nzrplzpxngr nrpa kx kabz Gct—(prophecy)

Nzalvztrngr mz zmatq ngr nzrplzpxngr nrpa kx kabz Gct yclzm mz ngalrde lcde seleng: [Aposol 2:16-18; Rom 12:6; 1 Korint 11:4-5; 12:10; 28-29; 13:2; 8-9; 14:1-6, 22-25, 29-32, 39; Efiszs 4:11; 1 Tesalonika 5:19; 1 Pita 4:10] Pol nzpnzkr drtwrdele zmatq ngr nzrplzpxngr nrpa kx kabz Gct ngi zmatq kx myatpxbz mz zmatq amrlx kcng tqkabz Mqngrkxtr mz kxzrlxngiting. [1 Korint 14:1; 39] Nzrplzpxngr nrpa kx kabz Gct drtwr ngrde nzpitpx-pnz-krbzle nrpa lc mz kxzrlxngiting, murde na-axplre nzrlxngiti-krdr, apqtrle x amqtr-kzpze drtwrdr. [1 Korint 14:3] Nzryrngrkxtr ycmnetr-ngrde nzrplzpxngr kxmule lc mz ngalrde lcde seleng: [Aposol 11:27-28; 13:1; 15:32; 19:6; 21:9-11; Efiszs 3:5; 1 Timoti 1:18; 4:14] Kzdung leplz kcng tzrngiscng zmatq lc, nzkrlzlr nzplzpx-ngr-mopwz da kx nakaputrp kalr murde pi-pnz-kaipz Gct. [Aposol 11:28; 21:11]

A' mz Nzryrngrkxtr, opx angidr kx kzdu-kzng la profet kxzrlxngiting x kxzrlxngiting. [Matiu 7:15; 24:11, 24; Mak 13:22; Aposol 13:6; 2 Pita 2:1; 1 Jon 4:1; Nzaelwapxngr 16:13; 19:20] Nidr enqmi ngr Gct. X kzdung mzli nzrpipxng da angidr murde napokiasi-ngrdr leplz kalr. Krlzq nzrglxngr kx ngi da angidr o trtingr mz nqmq ngr nzycmnetr-ngrdr Jisz x Nzryrngrkxtr. Nzmu kzdq doa pi-zvzle da kx tresz'tiu mz Nzryrngrkxtr, nide profet kxpokia mz nzrplzpx-krdeng.

38.5 nzrmcngr namrlzu r kxzrlxncng mzlilxlr kc tqwz—(discernment of spirits)

Mz zmatq lc, doa krlzle nzrglxngr nzmu Gct kc tqwz o drka'. [1 Korint 12:10] X krlz-kzle kx nrpa kc tqplzpx ncblo vzpxm mz Gct o mz drka'. X krlz-kzle nzmu kzdq rkx kxmatq vzpxm mz Gct o mz drka'. Jisz rongisc zmatq lc mz Matiu 16:23; murde krlzle kx natq Pita trvzpxpuu mz nide esz'-krde, a' vzpxm mz Setzn mz nzvz-nqblq-krde nqmq nr nrlc. Rpibzle bade kx, "Esopx Pita! Bzkq apume bange Setzn, mz nzrpwa'-krme bange nzvz-nqblq-krne me pnz drtwr Gct. Murde nzrkrlz-krm vz-nqblqle drtwr leplz."

38.6 nzycmne-ngrbz mz Gct mz natq lr kzbleng—(speaking in other languages)

Zmatq ngr nzycmne-ngrbz mz Gct mz natq lr mrkzbleng drtwr ngrde natq lr mrkzbleng mz nrlc ka x natq kz kx trpnzng kx rkrlz, a' ngi txpwz Gct x krkc tqrngisc zmatq ngr nzpipxngr drtwr ngr natq lr

mrkzbleng. Mz 1 Korint 13:1 ycmnetr-ngrde leplz nzycmne-krdr mz natq enjrl. Pol pimle bagu kx, 'Bzkq nzrpwa'ngr zmatq lc!' [1 Korint 14:39] X Nzryrngrkxtr alvztr-ngrde kxnamu nzawz-krgule mz ngalrde seleng: [Aposol 2:4-6; 1 Korint 12:10, 30; 14:2, 6-19, 27-28]

38.7 nzpipxngr drtwr ngr natq lr mrkzbleng lcng—(interpretation)

Pol ycmnetr-ngrde zmatq ngr nzpipxngr drtwr ngr natq lr mrkzbleng mz 1 Korint 12:10, 30, 14:5, 13, 26-28. Mzli kx kzdq doa ycmne-ngrde mz natq lr mrkzbleng mz nzyrlwr-lxblkr lrmakxtr, doa kc tqrngisc zmatq lc napipxle drtwr ngr natq doa kc kai mzli kc Mqngrkxtr aelwapx-ngrbzle bade drtwr ngr natq kztede, murde leplz amrlx nakrlzlr nike tqpile.

38.8 nzalvztrngr natq Gct—(teaching)

Leplz kcng tzrngiscdr zmatq lc nzkrlzlr nzalvztr-zpxwx-krdr leplz kc-kzng, kxmule-esz' leplz nzkqlung o nzpipzng mz Sade Siklu o mz nzyrlwr-lxblrngr doa kx li o tq mz nzrlwxngr x nzskul-krdr mz Nzryrngrkxtr. Kxnzrngiscde zmatq lc, mrlz nzalvztr-krde kxrlxngiti-ate murde nakrlz-zpxwxle nzalvztrngr amrlx mz nzlxngitingr Jiszs. Mc kz 'nzalvztrngr mz Natq Gct' mz nibr 'lrmakxtr kxnzrmailzng' mz Nzalvztr-ngrng Kxmyapxbz.

38.9 nzrmailzng rlmakxtr—(leading)

Mrlz kxnzrmailzng amrlx nzrningisc-krdr zmatq ngr nzrmailzng rlmakxtr, kxmule-esz' nzmailzlr lrmakxtr amrlx o leplz kxnzpipzng. [Rom 12:8] Leplz kx nzsuti drtwrdr nzrmailz-krdr leplz neng Gct nadctipx mz drtwrdr nike tzpi-ngrdr Jiszs, Pol, x Pita mz leplz kcng tztakitrdr nzrmailz-krdr lrmakxtr. [Matiu 20:25-28; Mak 10:42-45; Luk 22:25-27; 2 Korint 1:24; 1 Timoti 3:2-7; 4:11-16; 5:1-2; 2 Timoti 2:14-16, 22-26; 4:2; Taetus 1:6-9; 2:1-15; 3:9; 1 Pita 5:1-3]

38.10 nzrmcngr lrpzki kx nao-zli kzdq dzbe lrmakxtr—(administration)

Zmatq lc mz 1 Korint 12:28 drtwr ngrde nzrmcngr lrpzki kx nao-zli kzdq dzbe lrmakxtr, x nzrpipx-ngrbz mz kxnzrmailzng murde naokatrle nidr mz nike pnz drtwrdr.

38.11 nzrlxngitingr kx xplr-esz'ngr—(faith)

Kxnzrlxngiting amrlx nzabrrpzlr drtwrdr mz Gct. A' krkcng tqycneba zmatq lc, nzxplrx-zlwzkr nzrlxngiti-krdr nzmyaszpxlr kztedrng. [1 Korint 12:9; 13:2] Jiszs rpibzle mz kzdzung leplz kcng tqamrlzpebzleeng mz zyagox kx nzrlxngiti-krdr amrlzle nidr. [Matiu 9:22, 29; 15:28; Mak 5:34; 10:52; Luk 8:48; 18:42; Aposol 14:9; Jemes 5:15] X mou, mz Matiu 17:20-21 Jiszs pi-kzle kx nzrlxngitingr kxtopwz krlzle nzalengr da kxpliz, a' nzrlxngitingr kx xplr krlzle nzalengr da amrlx. Mz nzmu-krde lcde, zmatq ngr nzrlxngitingr kx xplr-esz'ngr krlzle nzokatrngr doa nzale-krde da kxmatq, nzyatr-krbzlr mz da kx rblxngr x nzapqtr-krbzle drtwr kztedeng mz nzaetunepx-krde nzrlxngiti-krdr.

38.12 nzamrlzngr kxnzyagoxng—(healing)

Jiszs rngisc zmatq ngr nzamrlzngr kxnzyagoxng. X zmatq ngrde etu-esz'ngr murde kxnzyagoxng kxnzqqlung nzmrlztx-pnzng mzli lcpwz. A' trngiu amrlx ngrdr. [Mak 8:22-25] Jiszs rngisc zmatq ngr Mqngrkxtr atwrnrngr [Jon 3:34]. Mz Mak 6:5-6 amrlznepwz Jiszs kxnzyagoxng kxnzpipzng. X opx angidr kx kzdzung mzli rblxbz bade nzale-krde da kxnzqkctipxng x nzamrlz-krde kxnzyagoxng murde leplz trnzlxngitilru nide. Mz Jon 5:2-8, Jiszs tramrlzleu krkcng amrlx tzyagoxng mrkc, a' amrlz-txpwzle ncblo esz' mz nzvz-nqqlq-krde da kx pibz Trtede. Mz Aposol 19:11 x 28:8-9, mcku kx Pol rngisc zmatq ngr nzamrlzngr

kxnzyagoxng, a' tryatr-zvzpwzu nzamrlz-ningr kxnzyagoxng. [Filipae 2:25-27; 2 Timoti 4:20]

Mz nzmu-krde lcde, leplz kx ycneba zmatq ngr namrlzngr kxnzyagoxng trnzkrzlru nzamrlz-zvzngr. X kxmule-esz' rblxbz badr nzamrlz-krdr doa amrlx, a' leplz kxkqlu nzmrlz-moung. Kzdung mzli doa trmrlztx-pnzu mzli lapwz, a' mrlz mz kzdung zbq. Mz Mak 8:22-25 mcku nzwrede esz'txu kx Jiszs tramrlzleu doa mzli kcpwz tqkrka'-ngrbzlele. X nakrlz-kzku kx nzamrlzng amrlx trnzangidaung mzli la txpnz o mzli kc ayrrnrngr tqkrka'-ngrn. A' nalxngiti-zvzku kx Jiszs sa na-atutr-ngrde natqde mz Jon 14:12 kc tqpile kx, "Da angidrtx lc napibo bamu. Doa kx lxngitile ninge sa na-ale-kzle rkx lcng tqalexng. X sa na-ale-kzle du rkx kx namyapxbzng, murde sa na-atwzlr-ngrm Mqngrkxtr bamu mz nzyzlu-krmc Trtene."

38.13 **nzalengr da kxmatq**—(miracles)

Rpi Pol kx Mqngrkxtr kabzle zmatq lc mz leplz. [1 Korint 12:10, 28-29] Doa kx tqrngisc zmatq ngr nzalengr da kxmatq trkrlzleu nzalengr da lc mz nzvz-nqblq-krde me pnz drtwre, murde Mqngrkxtr pibzle bade da kx na-ale. Mzli kang kqlu, da kxmatqng nzkaputrpzng mzli kx Nrpakxmrlz nzyapwxtipx-ngrbzle mz krkcng trnzrlxngitiung. [Mak 16:17-18] Murde Gct alele da kxmatq mz nzaelwapx-krbzle mz leplz kx nide Gct angidr x Nrpakxmrlz ngi da angidr kx takitrde nzlxngiti-krdrle. Ngalrde lcdeng seleng nzycmnetr-kz-ngrdr nzkrka'-ngrbzku mz Gct nzale-krde da kxmatq, Matiu 7:7-11, 21-23, Mak 11:24, Filipae 1:15-18, x Jemes 4:2 3.

Jiszs x aposol nedeng nzaleting da kxmatq kxkqlu. [Aposol 2:43; 5:12] Pol x Banabas nzaleti-kzlr da kxmatq. [dalr Pol mz Aposol 11:1-12; 19:11; Rom 15:18-19; x 2 Korint 12:12 – x dalr Banabas mz Aposol 14:3 vzmi 13:50; x 15:12]. X kzdung kx trnznginidru aposol nzaleti-kzlr da kxmatq, drtqdr seleng: Filip (kzble kx trngiu aposol) [Aposol 8:5-13], Stivin [Aposol 6:8], x kxnzrlxngiting kcng Galesia Provins [Galesia 3:5]. Kzdung mrlzu r nzamrlzng kxnzyagoxng nzsri-kzpzung da kxmatq. [Aposol 3:6-8; 4:16, 22] A' kzdung da kxmatq nzvzpxmqng mz zmatq ngr Setzn. [Matiu 24:24; Mak 13:22-23; 2 Tesalonika 2:8-10; Nzaelwapxngr 13:13-14; 16:13-14; 19:20] Krkcng tzaleng da kxmatq mz zmatq ngr Mqngrkxtr sa naglqlz-kzlr Jiszs x nzavzo-lzbqng.

38.14 **nzokatr-zlwzngr lrmakxtr**—(helping)

Mcku zmatq lc mz 1 Korint 12:28. Leplz kxnzrnciscng zmatq lc nzavzo-lzbqng mz nzokatr-zvz-krdr leplz kx nzmnc-krdr rblx. Trnznginidru kxnzetung mz nzobqkr leplz, a' zmatq lc rlr-ngrbzle badr nzokatr-krdr leplz x kabzle badr nabztq kxetu mz nzokatrngr nidr, x nzabrtzngr kxetu mz nzokatr-krdr nidr, murde nzkabzlr zmrlz ngr Gct badr krkcng tzokatrlr.

38.15 **nzwztr-ngrbz mz lrmakxtr**—(serving)

Mcku zmatq lc mz Rom 12:7, Efiszs 4:12 x 1 Pita 4:11. Zmatq lc blepxbz mz nzokatrngr murde okatrku leplz kx nzmnc-krdr rblx o kx suti drtwrdr da, a' wztrpzku mz lrmakxtr amrlx mz nzale-krgu da kx na-amrlzle nidr amrlx ngrdr. Leplz kcng tzrmailzng mz nzngrngr nabz kxtrng nzwztrpzng mz lrmakxtr amrlx, a' trngiu dalr nzokatrngr leplz kx nzmnc-krdr rblx.

38.16 **nzapqtr-ngrbz drtwr lrmakxtr**—(encouraging people)

Mcku zmatq lc tqmyapxbz mz Rom 12:8. Leplz kxnzrnciscng zmatq lc, nzmrlz-angidrng mz nzapqtrngr drtwr kztedrng x nzaxglrngr nidr. Mrlz

Nzalvztr-ngrng nzrka-nrbalq-ngrbz da mz lrmakxtr kcng trnzrngiscung684Nzalvztr-ngrng nzadwatr-zvzngr lrmakxtr x lr mrkzbeng mz

nzmu lrmakxtr kxnzkqlung nzrngisc-krdr zmatq lc. Gct rkam bagu natq nzapqtr-krgu drtwr kztegung. [2 Korint 1:3-7]

38.17 **nzrka-nrbalq-ngrbz da mz lrmakxtr kcng trnzrngiscung—(giving)**

Gct pibzle mz doa nedeng amrlx nzrka-krdr dakxnnzng, lrpz, x trau mz krkcng trnzrngiscung. A' leplz kx nzrngiscng zmatq lc nzabrtz-zvz-ngrdr nzrka-nrbalq-krbzlr dztudrng mz kztedrng. [Rom 12:8] X mz zmatq lc, Mqngrkxtr kabzle badr nzyrplapxngr murde nakrlzlr kxnamu nzrkarbzng r dztudrng. X amrlz kz Gct nidr murde nzrngisc-krdr da natakitrde nzrka-nrbalq-zvz-krdr da. [2 Korint 8:1-15; 9:6-12]

38.18 **nzaelwapx-ngrbz nzryckr drtwr mz lrmakxtr—(mercy)**

Zmatq lc nzyro mz Rom 12:8. Krkcng tzrngiscng zmatq lc nzkrlzlr nxnngi-ngrbz nzetqkr drtq kztedrng x nzaelwapx-ngrdr nzryckr drtwr Gct mz leplz, kxmule-esz' nzetqkr drtqdr vzpxm mz nzale-krdr da kx vz-rbr o trtingr.

38.19 **nzadwatr-zvzngr lrmakxtr x lr mrkzbeng mz ma nyzm—(hospitality)**

Zmatq lc nzyro mz 1 Pita 4:9. Doa kc tqngiscde zmatq lc, sutitx zlwz drtwrde nzamnctx-zpwx-krde lrmakxtr x lr mrkzbeng mz nzadwatr-zvz-krde nidr mz ma nyzde.

39 Nzyokaetipxngr Yiz Kcng Tzkaputrpqng Kzdung Da

Mz nzyokaetipxngr yiz kcng tzkaputrpzng kzdung da, rblx nzpi-angidrung x kxnetzung drtwrdr tresz'tiu. Maki kxmule lc drtwr ngrde kx yiz lcng trkrlz-zpwxkku. A' krlzku kzdung yiz abzo mz da kcng tzkaputrpqng mz buk kcng Nou x Nzrlaszngr. Kzdung da tzkaputrpqng Mz nibr Nzrwzng Nrlc (MNN). X kzdu-kzng da tzkaputrpqng x Nubla Nzetu Kc Ate (NKA) o Mz nibr Nubla Kxetu (MNK). Nzryrong yiz nzling mzli kx lr Jiu nzrlaszlr Ijipt, murde tropx-angidru yiz kzniqe tubq. Abzo mz mzli nyd King Sol, nzvz-rbrkr yiz lcng trmyaszpxleu yiz kcng nzpnu-esz' o nzpnu-li. X abzo mz lr Israel nzngini-krdr kxnzawz-nrbalqng Asiria, nzvz-rbrkr yiz lcng trmyaszpxleu yiz kx li o tq. Trkrlz-angidrkku mzli kx nzmcngr mz Jisz, murde nzvz-rbrng mzli kc tzwnzng kalendz scgu. A' opxm kx mzte nzmc mz yiz 7 BC, murde krlzku kx King Herot kc Tqmyalz bz mz yiz 4 BC, zbz Josip, Mxri x Jisz sc tzrlaszlr Ijipt mz nzyzlu-krdr Israel. Trkrlz-angidrkzku yiz kc tqbz-ngrm Jisz, a' mwz nangi mzli yiz 27-33 AD. Mz pepz lc, vz-nqblqku kxnzrkrlzng kcng tzpipxlr tqbzpe mz yiz 30 AD.

-	MNN	Mz Nibr Nzrwzng Nrlc	-
-	NKA	X Nubla Kxetu kc Ate	-
-	MNK	Mz nibr Nubla Kxetu	-
-	BC	X Jisz kc mzte tzmc ate	-
-	AD	Mz nibr nzrcngr mz Jisz	-
-	YNJ	Yiz nyd Ir Jiu (mz nzvz-nqblq-krde kalendz ngr temz scdr)	-

Nzalvztr-ngrng nzadwatr-zvzngr lrmakxtr x lr mrkzbleng mz ma nyzm685Nzalvztr-ngrng nzadwatr-zvzngr lrmakxtr x lr mrkzbleng mz

MNN	NKA	BC	YNJ	Da kx kaputrp	Natq Gct
0	1657	4000		Nzrwzngr nrlc	Nou 1:1-31
239	1418	3761	1	*	
931	726	3075	687	Adam bzpe mzli kc yiz ngrde 930.	Nou 5:5
1057	600	2950	812	Noa mzte nzmc.	Nou 5:282-29
1559	98	2447	1315	Sem mzte nzmc.	Nou 5:32
1657	0	2349	1413	Nrlc boope.	Nou 6:1-8:22

MNN	MNK	BC	YNJ	Da kx kaputrp
1950	293	2056	1706	Ebraam mzte nzmc.
2007	350	2000	1762	Noa bz. Yiz ngrde 950.
2049	392	1957	1805	Nzesz'tikr drtwr Gct badr Ebraam mz nzrpakrngr Nzodakr
2050	393	1956	1806	Aesak mzte nzmc.
2110	453	1896	1866	Jekop (Israel) mzte nzmc.
2125	468	1881	1881	Ebraam bz. Yiz ngrde 175.
2159	502	1847	1915	Sem bz. Yiz ngrde 600.
2201	544	1805	1957	Josip mzte nzmc.
2230	573	1776	1986	Aesak bz. Yiz ngrde 180.
2231	574	1775	1987	Josip wzlzbz mz King kc Ijipt mz nzaclvengr dztudeng.
2240	583	1766	1996	Jekop x Irmanyzde amrlx nzvzng Ijipt.
2257	600	1749	2013	Jekop (Israel) bz. Yiz ngrde 147.
2311	654	1695	2067	Josip bz. Yiz ngrde 110.
2590	933	1416	2346	Mosis mzte nzmc.
2670	1013	1336	2426	Lr Jiu Nzrlaszlr Ijipt - Mz nzvz-nqblqngr Nou x Nzrlaszngr

BC	YNJ	Da kx kaputrp
1446	2326	Lr Jiu Nzrlaszlr Ijipt - Nzrlwx-teblqngr abzo mzli nyz Solomon
1400	2362	Nztwzkr Josua Kenzn, mz vea, x nzabzokr mzli nyz kxnzryrlqng d
1060	2702	Samuel - Kxrjzs kc tqrmnr-ngrbz.
1040	2722	Nzaelungr nar Sol tolo mz nzngini-krde King ayrnrngr Israel
1000	2762	Devet ngnide king
960	2802	Solomon ngi King
920	2842	Drtc' Ivali Israel x Judz
723	3039	Lr Asiria nzaovxiolr Ir Israel mz nzngini-krdr kxnzawz-nrbalqng
586	3176	Lr Bxbilon nzaovxiolr Ir Judz mz nzodati-krdr Mangr-nzangiongr
536	3226	Nzabzokr nzrwzti-moungr Mangr-nzangiongr Yawe
520	3242	Nzrwztingr Mangr-nzangiongr Yawe sc tqvzpe
516	3246	Mangr-nzangiongr Yawe krali yrkrpx
480	3282	Estz nzmcpx mz nzngini-krde kwin ngr Prsiz
458	3304	Esra yzlu Judz
444	3318	Nemaea yzlu Judz
333	3429	Aleksada kc tqmyalz (Grik) aovxiole Palestaen (prtr kz Judz)
300-200	3462-3562	Nzryrngrkxtr mz Hibru nzrtekqtrngr mz natq lr Griek (Septuajin)
63	3699	Rome aovxiole Palestaen
37	3725	Herot kc tqmyalz nzmcpx mz nzngini-krde king (wzlzbz mz Rom)
8	3754	Nzrpipx-ngrbz mz Mxri kxmnckamelr
7	3755	Nzrmcngr mz Jon Kxawrkxtr x Nzrmcngr mz Jiszs
6	3756	Nzrprmitrngr Jiszs Mangr-nzangiongr Yawe / Josip, Mxri, x Jiszs S
4	3758	Nzbzkr Herot kc tqmyalz

Nzalvztr-ngrng nzadwatr-zvzngr lrmakxtr x lr mrkzbeng mz ma nyzm686Nzalvztr-ngrng nzadwatr-zvzngr lrmakxtr x lr mrkzbeng mz

AD	YNJ	Da kx kaputrp
6	3767	Mxri, Josip x Jiszs nzvzng Jerusalem mz nzmulvzlr Nzamyangr
27	3788	Jiszs abzole nzwz-krde
30	3791	Nzbzkr Kraes, Nztulz-krm Kraes mz nzbzngr, Nzvdzkr Kraes Heven, x Nzvztr-ngrng
33	3794	Nznibqngr Stivin x Pol sc tqlxngitile Jiszs
40	3801	Pita wztrpz mz kxtrngiu lr Jiu (Konilijs)
44	3805	Nzrnibqngr Jemes (mzle Jon)
46	3807	Pol abzole nzvzpx-krde ayrnrngr mz nzryapwxpx-krde Nrpakxmrlz
50	3811	Pol abzole nzvzpx-krde krali mz nzryapwxpx-krde Nrpakxmrlz
53	3814	Pol abzole nzvzpx-krde kratq mz nzryapwxpx-krde Nrpakxmrlz
57	3818	Pol nzlolvz Jerusalem
59	3820	Pol nzatwzlrngr Rom
64	3825	King Kxetu Niro angcle Rom x tetitrle kxnzlxngitilr Kraes
70	3831	Ami ngr Rom odatile Jerusalem x Mangr-nzangiongr Yawe
95	3856	Jon nzatwzlrngr mz trmctu Patmos mz nzayrplapxngr nide

AD	YNJ	Da kx kaputrp
100	3861	Aposol Jon bz
311	4072	Nzabzokr nzrlr-ngrbz mz kxnzrlxngiting nzangio-nrbalq-krdr Jiszs
312	4073	King Kxetu Kanstxntin sc tqlxngitile Jiszs
325	4086	Kansrl mrkc Mztea Naesiz – nzabzokr nzalvztrngr mz Tqtrbz
327	4088	Drtwr kxnzetung esz'ti mz buk kcng naprtrng mz Nzryrngrkxtr Kc Ate
380	4141	King Kxetu Flevizs Teodosizs rtulrtrbzle mz leplz amrlx nzngini-krdr Krist
387	4148	Agostin Kxtr sc tqlxngitile Jiszs. Mz nibrde sc tzmcpx mz nzngini-krde Bis
398	4159	Jon Krisostom Kxtr nginide Bisop mrkc taon kxetu Konstantinopol
400	4161	Jerom tekqtrle Nzryrngrkxtr mz Latin, natq lr Rom. Buk lc nzrpibz, "Vulga
1000	4761	-
1054	4815	Makxtr Kc etu nzakipx-lzbqng. Zbz Makxtr ngr me prkilzm nepi sc tqyc Kc
1209	4970	Fransis Kxtr sc tqabzole dzbe ncblo kx nzwztrpzng mz Kraes kcng tzvz-nq
1384	5145	Jon Wiklif nzatrkti murde tekqtrle Nzryrngrkxtr mz Inglis.
1454	5215	Nzrwzngr masin mz nzryrngr letz kcng kqlu mz pepz mz nzwrdes sz'. X
1517	5278	Maten Lutz mrkc Jemeni sc tqbatrpzle mz kzdung leplz nzyrlqpx-lzbq-krb
1534	5295	King Hedri Krartqmz kapx-lzbq mz Makxtr kc Rom x atulzle Makxtr ngr
1549	5310	Asbisop Kranmr sc tqytle Buk ngr Nzkrka'ngr (Book of Common Prayer, A
1611	5372	King Jemes sc tqbatrpzle nzrtektrnegr Nzryrngrkxtr mz Inglis, KJV (King J
1727	5488	Makxtr ngr Moravia mrkc Iurop sc tqatwzlrpxng kxnzrlexng Nrpakxmrlz
1735	5496	Lr Merika kxnzkqlung nzxngitilr Jiszs mz da kc tzrpibz, "Nzdwalz-ngrm k
1906	5667	Nzabzokr nqmq ngr nzangiongr kc tzrpibz "Pentikostol"
1948	5709	Kandre kc Israel nzyrlq-moung mz nrlc.
1960	5721	Nzabzokr nqmq ngr nzangiongr kc tzrpibz "karismatik"
2000	5761	-
2008	5769	Buk ngr Rut, Buk ngr Sam, x Nzryrngrkxtr Kc Ate Nztektrng mz Natqgu

40 Yiz kx nzyrtting buk kcng tzprtrng mz Nzryrngrkxtr Kc Ate

Nzalvztr-ngrng nzadwatr-zvzngr lrmakxtr x lr mrkzbleng mz ma nyzm687Nzalvztr-ngrng nzadwatr-zvzngr lrmakxtr x lr mrkzbleng mz

-	Matiu	45-68 AD	-	1 Timoti	62-63 AD	-
-	Mak	50-70 AD	-	2 Timoti	65-67 AD	-
-	Luk	59-63 AD	-	Taetus	63-65 AD	-
-	Jon	50-70 (85-90) AD	-	Filimon	60-62 AD	-
-	Aposol	62 AD	-	Hibru	68-69 AD	-
-	Rom	57-58 AD	-	Jemes	46-49 AD	-
-	1 Korint	54-55 AD	-	1 Pita	62-64 AD	-
-	2 Korint	55-56 AD	-	2 Pita	65-67 AD	-
-	Galesia	48-58 AD	-	1 Jon	90-95 AD	-
-	Efiszs	60-62 AD	-	2 Jon	90-91 AD	-
-	Filipae	60-62 AD	-	3 Jon	90-91 AD	-
-	Kolosia	60-62 AD	-	Jud	65-80 AD	-
-	1 Tesalonika	50-51 AD	-	Nzaelwapxngr	90-97 AD	-
-	2 Tesalonika	51 AD	-	-	-	-

41 *Buk ngr Nzryrngrkxtr abzo mz krkc tzyrti-kaing*

-	Matiu	45-68 AD	-	Filimon	60-62 AD	-
-	Jemes	46-49 AD	-	Aposol	62 AD	-
-	Galesia	48-58 AD	-	1 Timoti	62-63 AD	-
-	Mak	50-70 AD	-	Taetus	63-65 AD	-
-	Jon	50-70 (85-90) AD	-	1 Pita	62-64 AD	-
-	1 Tesalonika	50-51 AD	-	2 Pita	65-67 AD	-
-	2 Tesalonika	51 AD	-	2 Timoti	65-67 AD	-
-	1 Korint	56 AD	-	Jud	65-80 AD	-
-	2 Korint	56 AD	-	Hibru	68-69 AD	-
-	Rom	57-58 AD	-	1 Jon	85-95 AD	-
-	Luk	59-63 AD	-	2 Jon	90 AD	-
-	Efiszs	60-62 AD	-	3 Jon	90 AD	-
-	Filipae	60-62 AD	-	Nzaelwapxngr	90-97 AD	-
-	Kolosia	60-62 AD	-	-	-	-

42 *Kxmu zbz nyz lr Jiu*

Kzdq zbz nyz lr Jiu nzaking mz ncte kcng rtqmz.

-	Mz nrlckxbq:	-	-
-	Nzobqngr kc kai	-	nztaokr nepi krlzbzle nabz-nepi kc rpwxmz mz nrlckxbq
-	Nzobqngr krali	-	nabz-nepi kc rpwxmz krlzbzle aurnrlc
-	Nzobqngr kratq	-	aurnrlc krlzbzle nabz-nepi kc tq mz nourla
-	Nzobqngr krapwx	-	nabz-nepi kc tq krlzbzle nepi kxprtz
-	Mz nrlckxngrlx:	-	-
-	Nabz-nepi kc kai	-	nzprtz-krm nepi krlzbzle nabz-nepi kc rpwxmz mz nourla
-	Nabz-nepi kratq	-	nabz-nepi kc rpwxmz mz nourla krlzbzle bea
-	Nabz-nepi kraesz'mz	-	bea krlzbzle nabz-nepi kratq milzpq
-	Nabz-nepi krarpwmxmz	-	nabz-nepi kratq milzpq krlzbzle nepi kxtao

Nzalvztr-ngrng nzadwatr-zvzngr lrmakxtr x lr mrkzbleng mz ma nyzm688Nzalvztr-ngrng nzadwatr-zvzngr lrmakxtr x lr mrkzbleng mz

Zbq nyzdr yzutr x yrkrpx mz nztaokr nepi, mzli kx wx-nzlotrngr nrlc x
rblx nzrmcngr kala ngr kzdq da.

Sabat ayzutr mz nztaokr nepi mz Zbqkranzlvqn x vz-krlzbzle nztaokr nepi
mz Satde.

Nrlckxbq vz-kaip x nrlckxngrlx kc ate. Mz nzmu-krde lc Satde nyz lr Jiu
abzo mz nrlckxbq ngr Zbqkranzlvqn nyzgu.

Mz nzmu-krde lcde “nabz-nepi kratq” mz Nzryrngrkxtr Kc Ate ycmnetr-
ngrde kzdq mzli abzo mz nabznepi kc rpwxmz mz nourla krlzbzle
bea.

43 Nzboikr Kzdung Nrlc Mz Nzryrngrkxtr

Nzboikr	Nabx	Santa Krus X Trmctu Ngrng Solomon
1 mita	1/2	-
66 mita	36	
100 mita	54.7	@nzboikr sokz fil
1 kilomita	-	Nzboikr ezfil nyzgu, x Uta → Lwepe, x Mrnzu → Yc
2 kilomita	-	Uta → Nep, x Uta → ezfil, x Vxngz → Lata
3 kilomita	-	Bznwz → Palr, x Uta → Balo, x Uta → Lwc梓
8 kilomita	-	Uta → Mzkyo mz nanyc, x Vxngz → Nycli, Uta → Dxi mz bot
11 kilomita	-	Luesalo → Lwc梓 mz nanyc, x Palr → Noole, x Lwc梓 → Mztu m
300 kilomita	-	Honiara → Kia, Isabel, x Kirakira → Visale, Guadalcanal
900 kilomita	-	Santa Krus → Ghater, Isabel, x Star Harbor, Makira → Shortlan
2400 kilomita	-	Tiokpia → Port Moresby, PNG, x Santa Krus → Samoa, x Santa K